

Ref.

BX

890

.58

1856

t.24



Digitized by the Internet Archive
in 2011 with funding from
Boston Library Consortium Member Libraries

<http://www.archive.org/details/rpfranciscisuare24suar>

R. P. FRANCISCI

S U A R E Z

E SOCIETATE JESU

OPERA OMNIA.

XXIV.

TOMUS VIGESIMUS QUARTUS COMPLECTENS

DEFENSIONEM FIDEI CATHOLICE ET APOSTOLICÆ ADVERSUS ANGLICANÆ SECTÆ ERRORES,
CUM RESPONSIONE AD APOLOGIAM PRO JURAMENTO FIDELITATIS,
ET PRÆFATIONEM MONITORIAM SERENISSIMI JACOBI MAGNÆ BRITANNIÆ REGIS,

CUM INDICIBUS NECESSARIIS.

83
84

CAEN.—IMPRIMERIE E. POISSON.

R. P. FRANCISCI

S U A R E Z

E SOCIETATE JESU

OPERA OMNIA



EDITIO NOVA, A CAROLO BERTON,

CATHEDRALIS ECCLESIE AMBIANENSIS VICARIO,

INNUMERIS VETERUM EDITIONUM MENDIS EXPURGATA, ADNOTATIONIBUSQUE
IN ULTIMUM TOMUM RELEGATIS ILLUSTRATA,

REVERENDISSIMO LL. DOMINO SERGENT, EPISCOPO CORISOPITENSI, DICATA

TOMUS VIGESIMUS QUARTUS.



PARISIIS

APUD LUDOVICUM VIVÈS, BIBLIOPOLAM EDITOREM,

Via vulgo dicta Delambre, 5.

MDCCCLIX.

57205

SERENISSIMIS

REGIBUS AC PRINCIPIBUS

ROMANÆ ET CATHOLICÆ ECCLESIAE FILIIS AC DEFENSORIBUS

FRANCISCUS SOARIUS

E SOCIETATE JESU, TEMPORARIAM ET ÆTERNAM FELICITATEM.

Nuper edito libro, Serenissimus JACOBUS, magnæ Britanniæ rex, ad religionis suæ communionem quasi amico classico catholicos reges ac principes evocavit. Ut quos ad defensionem Romanæ Ecclesiæ, quam sanguine suo acquisivit Rex Regum, et Dominus Dominantium Christus, suprema armavit potestate, hos ad illius offensionem communicato consilio incitaret. Irrito tamen conatu Serenissimus rex stylum exercuit. Nec enim portæ inferi adversus eam prævalebunt, aut quos in Romana petra fundatos lapis angularis Christus firmissimo veræ pietatis vinculo innectit, frigida Aquilonis procella dimovere poterit. Utinam majorum suorum invictissimorum regum vestigia secutus vobiscum potius ad Catholicæ Ecclesiæ majestatem exornandam conspiraret; ut quibus potestate et imperio par est, veræ pietatis studio inferior non esset; et inter illos reges numerari potius vellet, quos illius nutritios divina constituit auctoritas, quam inter illos, quos adversus Dominum et adversus Christum ejus impietatis furor inflammavit.

Cum ergo dum librum edidit suæ indicem religionis, nec regali, qua fulget, maiestate, nec armorum strepitu, ac potentia (cui sacerdos Christi et religiosus homo obsistere nequit), sed solius humani ingenii et styli acumine Catholicæ Ecclesiæ bellum inferat; proprium mei munera et instituti existimavi in aciem prodire, non ut tanti regis nōmini et splendori officiam, quod nec possum, nec cupio; sed ut nebulae, a foetidis Novatorum lacunis exhalatae, quibus catholicam obscurare nititur veritatem, veræ sapientiæ radiis dissolutæ, in aerem et fumos evanescant; quod ut persicerem, eam a Deo patre lumen obnixe precatus sum lucem, eam sinceræ veritatis cognitionem, quam a Christo Domino per Apostolos traditam, et Sanctorum Patrum vigiliis expositam consecrari ille debet, qui rectam vivendi credendique viam tenere cupit. Aspiret inceptis illud numen, in cuius manu sunt corda Regum. Vosque, catholici orbis reges ac principes, qui Serenissimum Jacobum, quales vos estis, tales germano affectu exoptatis, qualecumque opus hoc nostrum in vestrum recipite patrocinium vestra auctoritate defendendum; vestrum enim illud, scitumque est: *Nosstra facimus, quibus nostram impertimur auctoritatem;* vestrum igitur opus sit, ut regia vestri patrocinii auctoritate defensum ac ornatum fulgore, et securum in publicum prodeat, et illustre orbi appareat, et regiis oculis indignum non existimetur. Neque enim aliter, nisi vestro sub nomine, libro serenissimi regis noster hic, quo Dei causam tuemur, opponi potest. Hæc enim una me impulit cogitatio, ut vobis laborem hunc nostrum officiosa animi submissione dicarem, qui majorum vestrorum imperii,

et pietatis hæredes, Catholicæ Ecclesiæ tutelam religiose suscepistis, constanterque curatis. Aliis pro antidoto inservire potest noster hic labor; vobis antidoto (quæ est summa Dei pietas) opus non est contra Novatorum furorem, quorum venena ab stygiiis hausta rivulis vobis nocere non possunt, qui veræ et catholicæ fidei unitate Christo Domino, ejusque in terris Vicario Romano, ac Summo Pontifici, ceu capiti suo pulcherrima corporis membra, subditi, et innexi in virtute Dei custodimini. In quo dum suprema vestra potestas stabilitur, ad majorem imperii gloriam increscat, et ad æternam proficiat felicitatem.

Conimbricæ, decimo tertio die junii anni 1613.



CENSURA

ILLUSTRISSIMI D.^{ED.}

ALFONSI A CASTELLO BRACON

EPISCOPI CONIMBRICENSIS, COMITIS ARGANILENSIS, DOMINI GOJÆ, ETC., A CONSILIO
CATHOLICÆ MAJESTATIS.



Ex commissione Illustrissimi Episcopi D. PETRI de Castilho, Lusitanie Proregis, et supremi in rebus fidei Inquisitoris, accuratissime legi et censorio evoluto studio Defensionem Fidei Catholicæ aduersus Anglicanæ Sectæ errores, cum responsione ad Apologiam et Epistolam ad principes christianos, Serenissimi JACOBI, Angliae regis, ab insigni Doctore FRANCISCO SOARIO, e Societate JESU, in lucem editam. In qua non solum sacræ paginæ auctoritati omnia religiose consonant, Apostolicis traditionibus pie correspondent, OEcumenicis Conciliis, Summorum Pontificum decretis erudite consentiunt, verum tanti auctoris latissime eluct sapientia, e Sanctorum Patrum fontibus plus quam humano studio hausta. Quorum integra fide testimonia ita crebro et apposite inducit, ut illius ore locutos ad defensionem hanc roborandam conspirasse omnes affirmare audeam, magna propterea Catholicæ Ecclesiæ utilitate, magno christianæ doctrinæ emolumento in lucem proditaram, cuius lectione multa a Patribus præclare dicta, quæ dudum legeram, in memoriam revocavi; multa etiam magna cum voluptate denuo didici. Utinamque obtusa perfidiae tenebris hæreticorum acies tantum jubar perferre posset. Facile enim instabilem suarum opinionum vanitatem irriderent, quarum fundamenta hujus operis lectione omnino eversa clarissime cernerent. Quod si Episcopo, qui in theologica adolevit schola, et inter Sanctorum Patrum libros consenuit, Serenissimi Angliae regis majestatem alloqui præsentem liceret, quod olim augustissima et sanctissima Maria, ejus mater, voce et sanguine testata est, verissime prædicarem: Ireneo, Dionysio, Augustino, Hieronymo, et reliquis Catholicæ Ecclesiæ doctoribus, quorum judicium in hoc libro expressum offerimus, vitæ sanctitatem nemo ignorat, potius credendum esse, quam Luthero, et Calvinio, quorum scelera, etiam illorum discipuli, si legant, non possunt non erubescere et damnare; quorum inscitiam inconstans sibique adversa doctrina, et a vera religione aliena satis demonstrat. D. FRANCISCO SOARIO, humanarum rerum religioso contemptori, et unius pietatis ac religionis fortissimo defensori, quem ego propter eximiam sapientiam tot monumentis approbatam communem hujus ætatis magistrum, et Augustinum alterum existimo, potius cedendum admonerem, quam Angliae novatoribus, qui ne errasse fateantur, obstinata inconstantia erroribus adhærent, et cupiditatum suarum abducti illecebri circa fidem naufragaverunt, ut Paulus ait. Illud tamen prædico, illud moneo, quod olim Augustinus in simili causa. Non vincant Patres Catholicæ Ecclesiæ Doctores, nec Lutherus, nec Calvinus, impii veræ fidei desertores. Non vincat SOARIUS, Patrum religiosus discipulus, nec Novatores, Lutheri et Calvini infelices umbræ, sed una vincat veritas, sincera hujus libri commen-tatione illustrata. Quem ego typis, et omnium oculis, ad communem Ecclesiæ Catholicæ utilitatem, ita dignum censeo, ut etiam ætati nostræ de tanto magistro, Societati JESU de tali alumno merito gratuler.

Conimbricæ, 12 junii an 1613.

Episcopus Conimbricensis.

CENSURA

ILLUSTRISSIMI D. D.

FERDINANDI MARTINEZ MASCAREGNII

EPISCOPI ALGARBIENSIS, A CONSILIIS CATHOLICÆ MAJESTATIS.



Non tantum litteris, quas hac de re ad me misit Illustrissimus D. Petrus de Castilho, Episcopus, et generalis in tota Lusitania Inquisitor, sed ipsa delectatione trahente P. FRANCISCI SOARII, celeberrimi Doctoris, a me perfecta est accurate, et censorio ungue examinata Defensio, qua Fidem Catholicam mira dexteritate propugnat, oppugnante Anglicanæ sectæ errores; ac Serenissimi JACOBI, regis Angliæ, ad Apologiam quamdam epistolamque respondet. Qua in Defensione nihil plane offendi, quod Fidem Orthodoxam offendat; quæ vero defendant, inveni multa. Hoc enim opus mihi videtur velut alter fatalis clypeus, quem dux Hebraeorum ex imperio Dei quondam contra urbem Hai feliciter elevavit. Ita namque fiet, ut hac Defensione, per manus tanti ducis ex Societate JESU quasi Josue clypeo in altum sublata, armatæ errorum copiæ, quas non regis animus suopte ingenio ad pietatem pronus (utpote a sanctissima matre ac martyre olim educatus), sed quas furia Novatorum nuper in Anglia ad principes christianos classicum canens compulerat, penitus deleantur. Imo vero ipse Serenissimus Angliæ rex (qua pollet ingenii acie, atque exaggerati animi celsitudine), omnia, quæ in hac Defensione continentur, suis rationum ponderibus expendens, et ad judicii trutinam libans, prospectaque imprimis illa animi submissione ac modestia, quam semper (ut par est) adhibet doctissimus Pater SOARIUS, cum Regia Majestate disputans, spes est fore ut, adspirante numinis aura, ad saniora Matris Ecclesiæ consilia animum vere regium appellat; imitatus nempe Clodoveum, illum primum Francorum Regem Christianissimum, qui, proxime moriturus, ipsum Romanum Pontificem, quod sciret unicum esse totius Ecclesiæ visible caput, corona regia redimivit: quo facto oppignoravit regnum Gallorum in Ecclesiæ Romanæ præsidium, pariterque et obsequium. Corona enim illa ad S. Petri Confessionem regnum nominata fuit. Quo pietatis exemplo, stabili fundamento, nempe in petra ac Petri successore regnum suum egregie firmavit Clodoveus; cuius rex Angliæ si imitetur factum, imitabitur exitus felicissimos. Sed ad libri censuram redeo.

Cum magna Reipublicæ Christianæ utilitate quasi ex feraci fœcundoque solo complura edidit religiosissimus juxta ac gravissimus auctor sui ingenii monumenta, quæ orbis suspicit, miratur, amat. Sed in hac defensione vere palmaria eluent verba electa, grandes sententiæ, rationum momenta plena energiæ ac vigoris. Liber itaque totus, nervus, sanguis, spiritus est. Concurrit in eo cum eruditione, judicium admirabile; cum diligentia, facilitas in scribendo; cum doctrinæ copia, rerum ordo. Opponit memoria studium indefessum; Scholasticæ Theologiæ, juris utriusque peritiam; genuinæ juxta antiquos Patres sacrae Scripturæ explicationi, libera, et subrancida ministrorum interpretamenta; sublimiori denique de Deo scientiæ, distinctam temporum seriem, illiusque regni multiplicem chronologiam notitiam. Quæ libri censura in paugeyricam molem exurget, nisi obstaret satis nota gravissimi Patris modestia, quæ solet elegia putare jacula, encomia vulnera, hostes credere laudatores. Est igitur quod gratulemusr Societati JESU, quasi optimæ parenti, quod, licet ex illius sanctissimo instituto tanquam ex equo Trojano plures jam religione, litteris ac morum probitate principes viri prodierint, unum tamen

habet hac tempestate eminentissimum Doctorem Patrem SOARIUM, qui ad subitos errorum tumultus sedandos a prælio ad prælium tanquam bellator egregius accurrat alacriter ultra sortem viresque senectæ. Quare censeo præsens opus, a me recognitum et probatum, dignissimum esse quod publicam lucem aspiciat, densissimis eorum tenebris lucem ipsum allaturum.

Farone, die 6 mensis decembris, anno Domini 1612.

D. FERDINANDUS MARTINEZ MASCAREGNIUS,
Episcopus Algarbiensis.



CENSURA

ILLUSTRISSIMI D. D.

MARTINI ALPHONSI A MELLO

EPISCOPI LAMEGENSIS A CONSILIIS CATHOLICÆ MAJESTATI.



Perlegi ex commissione Illustrissimi Domini Inquisitoris generalis Defensionem Fidei Catholice, adversus Anglicane sectæ errores, cum responsione ad Apologiam pro iuramento fidelitatis et Epistolam ad principes christianos, Serenissimi JACOBI, Angliæ regis, opus editum a Sapientissimo Doctore FRANCISCO SOARIO, in Comimbricensi Academia Primario Theologiæ professore. Ardentि fidei zelo auctor clarissimus, et Theologus eminentissimus, valens sapientiæ viribus, pro Ecclesia Dei in Anglia laborante distinxit calatum contra sœvientes in illo regno hæresum pestes. Dimicat contra hæreticorum errores ex Scripturis divinis explicatis, et intellectis in genuino sensu auctoris sacri instituto et textui congruente. Affert ad confirmandas fidei veritates sacrorum generalium Conciliorum, et Summorum Pontificum sanctiones, quarum infallibili auctorati non obsequentes semper habiti sunt a Christi fidelibus Ecclesiæ perduelles. Utitur aptissimis, et ad rem maxime facientibus, ac selectissimis testimoniosis Sanctissimorum Patrum, quorum pietatem et sapientiam semper Ecclesia Dei suspexit et venerata est. Firmissimarum rationum momentis ita cuncta examinat, ut nihil in silentio relinquit indiscutsum, sed perarduas et difficiles quæstiones dilucide pertractat, et omnibus undequaque orientibus difficultatibus occurrit, ut veritas innotescat. Firmis et inconcussis argumentis potestatem Summi Pontificis supernaturalem tuctur, et ostendit per summam injustitiam regem in erroribus versantem spiritualem potestatem sibi arrogare, et per manifestam hæresim ab hæreticis Anglicane Sectæ illi attribui. Acute et sapienter detegit errores contra fidem delitescentes in juramento, quod rex Angliæ a subditis exigit; infidelitatem adversus Christum ejusque Ecclesiam, injustitiam erga subditos eo juramento contineri demonstrat, ita ut in juramento præstanto cogantur subditi simul fidem catholicam abnegare. Agit hac in re acriter, sed vere et modeste. Opus sane doctissimum, singulari pietate et eruditione plenum, et quod nec ab eo, qui dicendi stylo valeret, posset paribus laudibus et encomiis exornari. Auctoritatibus, et vi rationum ita sunt Anglicane Sectæ errores convicti, ut nullum sit adversariis effugium, nullus respondendi locus, nisi forte responsio dicatur inanum verborum contentio, et convictorum jactatio, apud dementes et furentes homines consueta. Faxit Deus ut, inspecta hac efficacissima et sapientissima defensione fidei (qua ab initio nascensis Ecclesie, ab Apostolis edocte, sancita miraculis, et suffulta martyriis, eadem in Catholica et Romana Ecclesia perseverat), Serenissimus JACOBUS, Angliæ rex, veritati Catholice sibi sufficientissime propositæ attendens, ut dignum est regio ingenio, ipse et subditi Protestantes ad Ecclesiam Catholicam Christi sponsam aggredentur. Ego opus hoc Sapientissimi Doctoris FRANCISCI SOARII dignissimum judico, ut typis mandetur, et in lucem eat, ad fidei nostræ victoriam de hæresibus insignem, et ad totius orbis christiani publicam et communem utilitatem.

Datum Lameci, vigesimo quarto die novembris, 1612.

MARTINUS, Episcopus Lamecensis.

INDEX

LIBRORUM ET CAPITUM

HUJUS OPERIS.

LIBER PRIMUS

QUANTUM ANGLICANA SECTA A FIDE CATHOLICA DISSIDEAT.

CAP. I. De fidei catholicæ progressu, et statu Angli- canæ gentis a prima ejus conversione usque ad præ- sentia tempora.	5	CAP. XIV. Ex ratione catholici nominis, discursus ca- pitulis præcedentibus confirmatur.	69
CAP. II. Sectam Anglicanam a fide vera discessisse.	6	CAP. XV. Catholicam dici Ecclesiam, quia per totum orbem diffusa est ostenditur, et hæreticis occurritur.	73
CAP. III. Ecclesiam Christi non posse veram fidem amittere ostenditur, et ratio facta roboretur.	13	CAP. XVI. Quomodo verum sit Ecclesiam Catholicam per totum orbem diffusam.	78
CAP. IV. Non posse Catholicam Ecclesiam etiam per ignorantiam in rebus fidei errare.	17	CAP. XVII. In Anglicano schismate fidem apostolicam non esse.	85
CAP. V. Romanam Ecclesiam eamdem fidei stabilitatem habere quam Catholicæ, ostenditur, et adver- sariorum evasioni occurritur.	20	CAP. XVIII. Objectioni contra doctrinam superioris ca- pitulis occurritur.	90
CAP. VI. Stabilitas fidei et Ecclesiæ Romanae, tradicio- ne ostenditur.	25	CAP. XIX. Sectam Anglicanam nullius antiqui Marty- ris sanguine decoratam, sed potius damnatam esse ostenditur.	94
CAP. VII. Excluditur tertia evasio hæreticorum, quam per distinctionem Ecclesiæ visibilis et invisibilis configunt.	31	CAP. XX. Veros nostrorum temporum Martyres non Anglicanam sectam, sed Romanam fidem illustras- se.	99
CAP. VIII. Occurritur adversariorum objectionibus, et quo sensu Ecclesia visibilis sit, exponitur.	37	CAP. XXI. Anglicanam sectam vel propter solam schis- matis turpitudinem detestabilem esse.	102
CAP. IX. Regem Angliæ, cum nec Scripturam integrum, nec verbum Dei non scriptum admittat, fidei vere christianæ defensorem non esse ostenditur.	43	CAP. XXII. Anglicanum schisma in manifestam hære- sim et apostaticam doctrinam transiisse.	106
CAP. X. Ex fundamento et ratione credendi regis An- gliæ, ipsum non esse fidei vere christianæ defenso- rem ostenditur.	50	CAP. XXIII. Anglicanum schisma pertinaciter sectan- tes, neque ab hæresi, neque ab hæreticorum nota excusari posse.	111
CAP. XI. Vera fidei christianæ fundamentum non esse in privato spiritu ponendum.	53	CAP. XXIV. Rationes, quibus rex hæretici maculam su- gere studet, refelluntur.	116
CAP. XII. Ex nomine (Catholicæ) Anglicanam Sectam fidem catholicam non esse ostenditur.	61	CAP. XXV. Immerito Anglicanam sectam, fidem suam et Ecclesiæ auctoritatem ad quingentesimum Christi annum laniare.	120
CAP. XIII. Objectionibus contra doctrinam superioris cap. occurritur.	68	Summa et conclusio totius libri, cum apostrophe ad Angliæ regem.	124

LIBER SECUNDUS

DE PECULIARIBUS ERRORIBUS IN MATERIA FIDEI CATHOLICÆ, QUOS REX ANGLIÆ PROFITETUR.

CAP. I. <i>De præsentia corporis et sanguinis Christi in sacrosancto Eucharistiae sacramento.</i>	126	<i>gis Præfatione notantur.</i>	156
CAP. II. <i>Substantiam panis et vini sub speciebus consecratis non remanere.</i>	433	CAP. IX. <i>De Sanctorum invocatione.</i>	159
CAP. III. <i>De Transsubstantiationis veritate.</i>	435	CAP. X. <i>De Sanctarum reliquiarum custodia et veneratione.</i>	168
CAP. IV. <i>Eucharistiam latrice adoratione convenienter adorari, et in hunc finem elevari et circumgredi.</i>	436	CAP. XI. <i>De vera imaginum Sanctorum veneratione, seu adoratione.</i>	173
CAP. V. <i>De laicorum sub una tantum specie communione.</i>	439	CAP. XII. <i>Objectionibus Regis contra imaginum veneracionem satisfit.</i>	180
CAP. VI. <i>De missis privatis.</i>	447	CAP. XIII. <i>De imaginibus Dei, ut Deus est.</i>	184
CAP. VII. <i>De erroribus qui circa cultum et invocationem Beatæ Virginis in regis Præfatione notantur.</i>	450	CAP. XIV. <i>De Crucis Christi adoratione.</i>	186
CAP. VIII. <i>De iis quæ circa cultum Sanctorum in re-</i>		CAP. XV. <i>De errore circa Purgatorium.</i>	188
		CAP. XVI. <i>De erroribus circa Ecclesiæ ritus et benedictiones.</i>	196
		<i>Summa et totius libri conclusio, cum apostrophe ad Anglie regem.</i>	199

LIBER TERTIUS

DE SUMMI PONTIFICIS SUPRA TEMPORALES REGES EXCELLENTIA, ET POTESTATE.

CAP. I. <i>Utrum principatus politicus legitimus et a Deo sit.</i>	203	<i>ex divina Scriptura credendum esse ostenditur.</i>	271
CAP. II. <i>Utrum principatus politicus immediate a Deo sit, seu ex divina institutione.</i>	206	CAP. XIV. <i>Romanum Pontificem successorem esse Petri testimoniorum Sanctorum Patrum ostenditur.</i>	275
CAP. III. <i>Fundamentis et objectionibus regis Angliae contra doctrinam superioris capituli satisfit.</i>	212	CAP. XV. <i>Pontificem Romanum in dignitate, et potestate, ac primatu Ecclesiæ, successorem esse Petri, eorumdem Pontificum auctoritate comprobatur.</i>	277
CAP. IV. <i>Utrum inter Christianos sit legitima potestas civilis, cui Christiani parere teneantur.</i>	217	CAP. XVI. <i>Occurrunt Protestantibus argumentum ex Pontificum traditione sumptum eludentibus, et auctoritate Conciliorum confirmatur.</i>	283
CAP. V. <i>Utrum reges Christiani in civilibus seu temporalibus supremam potestatem habeant, et quo jure.</i>	224	CAP. XVII. <i>Eadem traditio Patrum auctoritate confirmatur.</i>	287
CAP. VI. <i>Utrum sit in Ecclesia Christi spiritualis potestas jurisdictionis externæ, et quasi politica a temporali distincta.</i>	231	CAP. XVIII. <i>Duabus objectionibus, contra primatum Pontificis ex Scriptura et Conciliis desumptis, satisfit.</i>	292
CAP. VII. <i>Potestatem regendi Ecclesiam in rebus spiritualibus seu ecclesiasticis rebus, in temporalibus rebus seu Principibus non existere, auctoritate probatur.</i>	238	CAP. XIX. <i>Explicantur quædam loca Gregorii, quæ rex objicit, et veri tituli Romani Episcopi defenduntur.</i>	296
CAP. VIII. <i>Eadem veritas rationibus confirmatur.</i>	243	CAP. XX. <i>Aliis objectionibus ex factis imperatorum et conjecturis desumptis satisfit.</i>	298
CAP. IX. <i>Solvuntur aliquæ objectiones contra veritatem in superioribus capitibus probatam.</i>	248	CAP. XXI. <i>Utrum personæ principum seu regum temporalium spirituali potestati Summi Pontificis subjectæ sint.</i>	302
CAP. X. <i>Utrum Christus Dominus supremam Ecclesiæ spirituali potestatem Petro contulerit.</i>	253	CAP. XXII. <i>Reges christianos non solum quoad personas, sed etiam quoad regiam potestatem, id est, non solum ut homines, sed etiam ut reges christianos potestati Pontificis subjici.</i>	308
CAP. XI. <i>Objectionibus contra doctrinam superioris capitulis satisfit.</i>	261	CAP. XXIII. <i>Pontificem Summum potestate coerciva in reges uti posse usque ad depositionem a regno, si causa subsistat.</i>	314
CAP. XII. <i>An primatus Petri perpetuo et per successionem in Ecclesia perseveret.</i>	268		
CAP. XIII. <i>Romanum Episcopum verum Petri successorem esse, et in eo Petri potestatem perseverare,</i>			

INDEX LIBRORUM ET CAPITUM.

XIII

CAP. XXIV. Objectionibus contra doctrinam superiorum capitum ex Scriptura petitis occurritur.	322	CAP. XXVIII. Patrum testimonii, quae rex objicit, satiſfit.	340
CAP. XXV. Alteri objectioni ex factis regum, que in veteri Testamento narrantur, sumptae satisſit.	328	CAP. XXIX. Objectionibus ex rei novitate, et factis imperatorum regumque desumptis satisſit.	343
CAP. XXVI. Argumento sumpto ex comparatione regis et Pontificis satisſit.	333	CAP. XXX. Objectionibus ex nonnullis rationibus desumptis satisſit.	347
CAP. XXVII. Aliis objectionibus ex Conciliis sumptis satisſit.	337	Summa praecedentis libri cum apostrophe ad regem Angliae.	350



LIBER QUARTUS

DE IMMUNITATE ECCLESIASTICA, SEU EXEMPTIONE CLERICORUM A JURIDITIONE TEMPORALIUM PRINCIPUM.

CAP. I. Quid nominibus ecclesiasticae immunitatis, libertatis ac exemptionis significetur.	354	suam suorumque bonorum exemptionem ab oneribus, et potestate saeculari.	438
CAP. II. Utrum clerici in spiritualibus et ecclesiasticis causis a potestate principum saecularium jure divino exempti sint.	359	CAP. XVIII. An exemptio a tributis saecularibus conveniat Ecclesiae eorumque bonis, quatenus Christi patrimonium sunt.	442
CAP. III. Utrum personae ecclesiasticae a jurisdictione principum, etiam in rebus et causis temporalibus, eximi potuerint, et exemptae sint.	362	CAP. XIX. An exemptio a tributis saecularibus conveniat Ecclesia et rebus sacris, ob earum specialem sanctitatem seu consecrationem.	444
CAP. IV. Utrum Summus Pontifex omni jure divino et humano ab omni jurisdictione saecularium principum exemptus sit.	370	CAP. XX. Utrum quelibet bona, cum ecclesiastica fiant, eo ipso sint ab omni tributo et onere civili illic inhærente exempta.	447
CAP. V. Expenditur locus Matthei: Da eis pro me et te, pro Summi Pontificis exemptione.	373	CAP. XXI. Aliisque objectionibus occurritur, et quam sit antiqua haec bonorum ecclesiasticorum exemptio obiter explicatur.	456
CAP. VI. Objectionibus contra resolutionem superiorum capitum satisſit.	378	CAP. XXII. Qualis sit exemptio ecclesiastica quoad personalia onera clericorum.	461
CAP. VII. Sextae objectioni satisſit, et tractatur quæstio, an Papa possit se humano iudicio submittere.	383	CAP. XXIII. Utrum redditus ecclesiastici clericorum a tributis exempti sunt.	466
CAP. VIII. Utrum clerici omnes sub Pontifice existentes a jurisdictione temporalium principum jure divino exempti sint; et tractantur duæ contrariae opiniones.	387	CAP. XXIV. Utrum patrimonialia et in universum bona temporalia clericorum sub communibus legibus saecularium tributorum comprehendantur.	469
CAP. IX. Privilegium fori clericorum jure divino et humano esse fundatum, et quomodo id intelligendum sit.	393	CAP. XXV. An clerici teneantur ad onera realia solvenda, quæ rebus immobilibus adhaerent.	472
CAP. X. Quomodo singulis clericorum vel personarum ecclesiasticarum ordinibus exemptio ecclesiastica jure divino conueniat.	401	CAP. XXVI. An clerici ad communes civium expensas contribuere teneantur.	474
CAP. XI. Utrum, secluso jure divino immediato, potuisse exemptio clericorum per jus canonicum sine admīniculo juris civilis introduci.	406	CAP. XXVII. Utrum omnes clerici, tam in sacris quam in minoribus constituti, et in statu clericali perseverantes, integre gaudeant ecclesiastica libertate.	480
CAP. XII. Utrum privilegium fori clericorum etiam jure civili fundatum sit.	412	CAP. XXVIII. An clerici conjugati privilegio ecclesiasticae exemptionis gaudeant.	487
CAP. XIII. Difficultati, quæ ex praecedenti capite oriuntur, occurritur, et quomodo Ecclesia diversis temporibus privilegio fori usa fuerit, explicatur.	415	CAP. XXIX. Utrum aliae personæ ecclesiasticae ordinem nullum habentes exemptione fori integre gaudeant.	490
CAP. XIV. Qualis sit clericorum exemptio in causis criminalibus.	421	CAP. XXX. An privilegium immunitatis clericorum ab aliquo homine revocari possit.	494
CAP. XV. Qualis sit exemptio clericorum in causis criminalibus.	427	CAP. XXXI. Utrum privilegium clericorum possit per renuntiationem amitti vel diminui.	501
CAP. XVI. An privilegium fori exemptionem a legibus civilibus includat, et qualis illa sit.	432	CAP. XXXII. Utrum privilegium clericorum consuetudine amitti vel minui possit.	505
CAP. XVII. Quale sit Ecclesiarum privilegium quoad		CAP. XXXIII. Quibus modis possit immunitas ecclesiastica violari.	511

CAP. XXXIV. Quibus modis actiones contra libertatem ecclesiasticam excusari soleant, et quid de illis	judicandum sit. Superioris libri summa.	515 529
---	--	------------

LIBER QUINTUS

DE ANTICHRISTO, GUJUS NOMEN, ET PERSONAM PER CALUMNIAM ET INJURIAM, FALSO PROTESTANTES
PONTIFICI ATTRIBUUNT.

CAP. I. De Antichristi nomine, ejusque varia significacione.	Antichristum mittendi sunt, ostenditur.	589
CAP. II. Utrum Antichristus proprius dictus sit homo aliquis singularis, vel sedes aliqua seu imperium.	CAP. XIII. Joannem per duos testes, Enoch, et Eliam intellexisse, conjectura, et Patrum auctoritate ostenditur.	532 594
CAP. III. Duabus Protestantium objectionibus ex Daniele et Paulo sumptis contra doctrinam superioris capitulis satisfit.	CAP. XIV. Utrum ex aliis Scripturæ locis ostendi possit, Eliam, et Enoch futuros esse secundi Christi adventus præcursorum, et testes contra Antichristum.	535 598
CAP. IV. Alteri objectioni ex capite 17 Apocalypsis sumptis contra eamdem resolutionem capitulis secundi satisfit.	CAP. XV. Antichristi sedem et loco, et gradu longissime a Pontificis sede distare.	541 605
CAP. V. De tempore persecutionis et morte Antichristi.	CAP. XVI. Ubi futura sit Antichristi sedes.	546 610
CAP. VI. Primæ objectioni regis Angliae contra doctrinam superioris capitulis satisfit.	CAP. XVII. Ex descriptione personæ Antichristi, quam Paulus tradit 2 ad Thess. 2, illum Pontificis adversarium maximum, potius quam Papam esse futurum, evidenter ostenditur.	552 614
CAP. VII. Alteri objectioni regis Angliae ex capite 18 Apocalypsis desumptis satisfit.	CAP. XVIII. Quæ ex visionibus cap. 6 et 9 Apocalypsis rex inducit, refelluntur.	553 620
CAP. VIII. Tertiæ objectioni regis Angliae ex variis novi Testamenti verbis desumptis satisfit.	CAP. XIX. Idem ex cap. 13 ostenditur, et omnia, quæ rex ex illo decerpit, refelluntur.	561 628
CAP. IX. Alteri difficultati occurrendo, tempus regni Antichristi et initium ejus amplius declaratur.	CAP. XX. Quæ circa 14, 15 et 16 caput Apocalypsis rex notat, discutiuntur.	572 638
CAP. X. Aliis duobus argumentis satisfit, et obiter nonnullæ Catholicorum opiniones de tempore Antichristi refelluntur.	CAP. XXI. Ex visione capituli 17 et sequentibus Apocalypsis novum de Antichristo errorem confutari potius quam confirmari.	577 640
CAP. XI. Antichristi tempore duos veros homines ad testimonium contra illum ferendum mittendos esse, ex capite 11 Apocalypsis contra duas falsas Protestantium expositiones ostenditur.	CAP. XXII. Ex descriptione Antichristi a Daniele Prophetæ tradita, fabula de Antichristianismo Romano evidenter refellitur.	583 648
CAP. XII. Eliam et Enoch esse testes illos, qui contra	Eorum, quæ in hoc libro tractantur summa, cum apostrophe ad regem Anglie.	658

LIBER SEXTUS

DE JURAMENTO FIDELITATIS REGIS ANGLIE.

CAP. I. Quis sit præsentis controversiae scopus et causa status, et que ratio disputandi in ea servanda sit.	randum offerri.	670
CAP. II. Utrum in prima parte formulæ juramenti, aliquid præter obedientiam civilem et contra ecclesiasticam jurandum proponatur.	CAP. IV. Utrum in tertia parte juramenti aliquid ultra civilem obedientiam contra doctrinam catholicam continetur.	664 675
CAP. III. In secunda juramenti parte aliquid etiam ultra civilem obedientiam, et contra ecclesiasticam ju-	CAP. V. De ultima parte juramenti, et erroribus in ea contentis.	667 683
	CAP. VI. Rationes, quibus juramentum defenditur, expenduntur.	685

CAP. VII. Summum Pontificem non solum potuisse, sed etiam debuisse Catholicos Anglos a professione dicti juramenti sua monitione avertere.	694	CAP. X. An vexatio, quam in Anglia Catholici patiuntur, sit vera religionis christianæ persecutio.	714
CAP. VIII. Possintne Angli, hoc juramentum admittentes, aliqua ratione aut modo a culpa excusari.	698	CAP. XI. An qui propter Romanam religionem et obedientiam in Anglia morte multati sunt, inter veros Martyres sint annumerandi.	722
CAP. IX. Liceatne Catholicis Anglis templa hæreticorum adire, et cum eis in ritibus communicare sine intentione cultus vel cooperationis cum illis, solum propter temporales pœnas vitandas.	702	CAP. XII. Ad ea quæ contra secundum Breve Pontificium, et contra Cardinalis Bellarmini Epistolam rex objicit, responsio.	730
		<i>Operis conclusio, et ad regem Angliae peroratio.</i>	733



DEFENSIO

FIDEI CATHOLICÆ

ADVERSUS ANGLICANÆ SECTÆ ERRORES,

CUM RESPONSIONE AD APOLOGIAM PRO JURAMENTO FIDELITATIS, ET EPISTOLAM AD PRINCIPES
CHRISTIANOS SERENISSIMI JACOBI ANGLIÆ REGIS.

PROOEMIUM.

1. Mens auctoris.— Mallem quidem¹, ut in causa non dissimili Ambrosius praefatus est, exhortandi ad fidem subire officium, quam de fide disceptandi suscipere onus. Sed quoniam vel ipsum naturæ jus petit, omnesque leges, tam divinæ quam humane postulant, filium, parentem; sacerdotem, Ecclesiam; theologum, religionem; religiosum, sacra; ac denique membrum quantumvis vile, suum caput, quoad possit, a quacumque injuria propugnare; ideo novum hoc scribendi genus non detrectare compulsum sum. Jacobus enim, serenissimus magnæ Britanniae Rex, in *Apologia sua*, et *Præfatione monitoria ad omnes christiani orbis principes*, his omnibus rim inferre conatur, dum sectæ sue, catholicæ ac primitivæ fidei nomen, nostræ vero religioni defectoris dedecus imponit; siveque fidei catholicæ defensoris nomen arrogat, Pontifici autem, omnium fidelium Pastori summo, et sub Christo capiti supremo, tyrannidis, et antichristianæ apostasie notam inurit; aliaque quam plurima nostræ fidei mysteria, et sacramenta insectantur; suaque impugnatione piorum corda commovit. Meque post alios doctissimos viros, licet eruditio-

ne ac eloquentia valde imparem, ad hoc opus aggrediendum induxit, et in palæstram mihi insolitam descendere coegit. Neque me regiæ dignitatis majestas terruit, sed potius ab eadem impugnata veritas vehementius excitavit, ne forte tanti nominis splendor infirmiorum oculos perturbaret. Maxime, quia regium in

hac causa deposuisse videtur splendorem, dum, doctorem potius quam regem agens, usurpatam sibi supremam in ecclesiasticis rebus auctoritatem defendere nititur. In Ambrosio me legisse meminit²: Neque imperiale esse, libertatem dicendi denegare, neque sacerdotale, quod sentiat non dieere. Nihil in regibus tam amabile esse, quam libertatem etiam in iis diligere, qui obsequio ipsis subditi sunt; nihil etiam in sacerdote tam periculosum apud Deum, tam turpe apud homines, quam, quod sentiat, non libere pronunciare. Siquidem scriptum est: Loquabar de testimoniis tuis in conspectu regum, et non confundebar³. His ergo divinis et sacris verbis permotus, licet proprio ingenio diffisus, causæ tamen confisus, et veritate nixus, libere pro illa loqui non pertimesco³. Ea tamen proferre tantummodo conabor, quæ excelsum regis animum offendere non possint, nisi lux ipsa veritatem ostendens oculos male affectos offendat. Decreri enim veritatem catholicam dilucidare ac tueri, non cum regia majestate decertare, sed illi potius, quod opto, in vera et catholica ostendenda fide, inservire.

2. Asserta Serenissimi Jacobi colliguntur.— Divino igitur aspirante favore, veritatem fidei a Christo Domino edoctam, ab Apostolis traditam, et a Sanctis Patribus integre illibateque conservatam, circa aliquot præcipua a Serenis-

¹ Ambr., lib. 2, ep. 17 ad Theodos.

² Psal. 418.

³ Ambr., lib. 2 de Virgin., in princ.

¹ Ambros., in *Præfat. ad lib. 1 de Fide.*

simo Jacobo tacta, ostendendam aggrediar. Quo vero apertior dicendis sternatur via, cunctaque facilius percipiantur, regis imprimis scopum ac propositum, deinde vero respondendi ordinem a nobis serrandum ob oculos proponam. Attente enim ac sedulo regium opus considerans, facile perpendi illuc præcipue collimare auctorem, ut fidelitatis juramentum, quod sibi a subditis suis exhiberi norissime instituit, totis conatibus tueatur. Et ideo tam Pontificia rescripta, quam Illustrissimi Cardinalis Bellarminilitteras ad Archipresbyterum impugnare conatus est. Postea vero responso de his rebus accepto, laccessitus rex, præfationem ad omnes christiani orbis principes sue Apologię adjunxit, in qua contra Pontificem Summum tanquam contra communem hostem, et juris ac potestatis regie usurpatorem, illos nititur irritare, et ad generalem ab Ecclesia Romana defctionem commovere: tum spe majoris libertatis et potestatis excellentioris illos alliciendo, tum etiam timorem incutiendo, ne dum nimia (ut ait) et indulgenti lenitate Pontificiam dignitatem in immensum crescere sinunt, regius splendor vel penitus deleatur, vel saltem plus aquo obnubiletur. Et ne bellum hoc in Christi Vicarium morere existimetur, eo progressus est, ut Pontificem, non Christi defensorem, sed ipsum esse Antichristum persuadere moliatur. Ac denique ne veri Ecclesiæ filii, insignem admirati nocitatem, eam detestentur, semetipsum ipsius catholicæ fidei defensorem nominat ac profitetur, ut hac ratione, secta, quam defendit, non hæresis, sed sola cum Romano Ponifice discordia esse videatur. Addit denique fidei suæ explicata confessionem, qua persuadere nititur, primitivæ et antique fidei inhærere, solumque (ut loquitur) novos ac nuperos fidei articulos ab Ecclesia Romana inventos abnegare.

3. Quo ordine sint impugnanda.—Ut igitur debito doctrinæ ordine procedamus, qui tum claritati, tum etiam utilitatì quam in hoc opere intendimus. inserviat, illud in sex libros distinguemus, qui prædictis punctis, mutato tantum ordine, respondebunt. In primis enim ostendam schisma illud, quod vel ipse rex suo in libello nou insciatur, nullatenus ab hæresi et infidelitate fidei vere catholicæ prorsus opposita, excusari posse; ac subinde usurpatum a Serenissimo rege defensoris catholicæ fidei titulum, non solum esse sine fundamento assumptum, verum etiam esse rei, quam profiteretur, plane contrarium. A quo titulo initium dicendi sumimus, nou tantum quia fronti regii

operis præfixus, statim in admirationem rapit, sed etiam quia nobis ansam exhibitus est aliqua stabiliendi principia, ex quibus Anglicanam sectam veræ Christi fidei fundamenta non habere facile concludi possit, et in hoc primum librum insumemus. In secundo vero, omnes articulos Romanæ fidei, quos Rex oppugnat, antiquos et catholicos esse, oppositosque sine aperla hæresi defendi non posse probabimus. Tertius deinde subsequetur liber, qui Summi Pontificis jus atque primatum pro nostris rivibus tueatur. Non quod omnia, quæ de illius excellenti dignitate ac potestate dici poterant, persequenda censeam (sic enim in immensum cresceret opus), sed solum ut ostendam Romanum Pontificem temporalium regum potestatem non usurpasse, sed supremi tantum sacerdotis dignitatem, a qua (ut inquit Hieronymus,) Ecclesiæ salus pendet, vindicasse, suumque jus, contra quod portæ inferi nec prævaluerunt, neque unquam prævalebunt, conservasse. Et quoniam siuepius rex in illa Præfatione de clericorum exemptione a temporali potestate, et jurisdictione laicorum, maxime conqueritur, et tertiam subditorum partem (ut ait) temporalibus regibus ademptam esse deplorat, ideo quartum addemus librum, in quo jus immunitatis personarum ecclesiasticarum demonstremus. In quinto deinde libro, non solum conjecturas omnes, quæ de Antichristo afferruntur, esse levissimas, verum etiam Antichristum Sedis Apostolicæ destructionem maxime moliturum, evincere conabimur. Sicque illis potius nomen illud convenire, qui ita sedulo Antichristi præripiunt officium. Nam, ut dixit Hieronymus ad Damasum, epist. 5: Quicunque tecum non colligit, spargit, hoc est, qui Christi non est, Antichristi est; et ut ait Bernardus, epist. 124 ad Hildebertum, Turonens. Episcopum, loquens de Innocentio Papa: Qui Dei sunt, libenter junguntur ei; qui autem ex adverso stat, aut Antichristi est, aut Antichristus. In sexto denique libro circa fidelitatis juramentum, breviter ostendemus quid in rege exigente sit injustitia et injuria in Apostolicam Sedem, quidque in illis subditis illud præstantibus, perjurii, vel infidelitatis involvat, diligentius explicabimus.

4. Methodus servanda.—Denique in procedendi et disputandi modo, stylum et scholasticam methodum tanquam mihi familiarem, et ipsa consuetudine quasi factam connaturalem, non omissam, etiamsi hominibus a nobis in fide dis-

¹ Hieronymus contra Luciferan.

sentientibus minus grata esse soleat; fortasse quia ad veritatem e tenebris eruendam aptissima est, et ad impugnandos errores efficacissima. Et idcirco quamvis testimonis divinarum Scripturarum, Conciliorum et Patrum nobis præcipue sit utendum, nihilominus rationum pondera expendemus, et quantum in nobis fuerit, earum vim et efficaciam urgebimus, easque non solum ex prædictis fidei fundamentis,

sed etiam ex ipso naturæ lumine, prout occasio postulaverit, colligemus; non quod illis sacro-sanctæ nostræ religionis mysteria, quibus defendantur, indigeant, sed quod ostendere non obscure possint, quam longe ab omni prudentia et a ratione ipsa discedant, qui ab Ecclesia Catholica Romana in rebus ad salutem pertinentibus dissentire, seque ab illa segregare non verentur.

INDEX CAPITUM LIBRI PRIMI

QUANTUM ANGLICANA SECTA A FIDE CATHOLICA DISSIDEAT.



CAP. I. *De fidei catholicæ progressu, et statu Anglicanæ gentis a prima ejus conversione usque ad præsentia tempora.*

CAP. II. *Sectam Anglicanam a fide vera discessisse.*

CAP. III. *Ecclesiam Christi non posse veram fidem amittere ostenditur, et ratio facta roboratur.*

CAP. IV. *Non posse Catholicam Ecclesiam etiam per ignorantiam in rebus fidei errare.*

CAP. V. *Romanam Ecclesiam eamdem fidei stabilitatem habere quam Catholicæ, ostenditur, et adversariorum evasioni occurritur.*

CAP. VI. *Stabilitas fidei et Ecclesiæ Romanæ traditione ostenditur.*

CAP. VII. *Excluditur tertia evasio hæreticorum, quam per distinctionem Ecclesiæ visibilis et invisibilis confingunt.*

CAP. VIII. *Occurritur adversariorum objectionibus, et quo sensu Ecclesia visibilis sit, exponitur.*

CAP. IX. *Regem Angliæ, cum nec Scripturam integrum, nec verbum Dei non scriptum admittat, fidei vere christianæ defensorem non esse ostendit.*

CAP. X. *Ex fundamento et ratione credendi regis Angliæ, ipsum non esse fidei vere christianæ defensorem ostendit.*

CAP. XI. *Veræ fidei christianæ fundatum non esse in privato spiritu ponendum.*

CAP. XII. *Ex nomine (Catholicæ) Anglicanam sectam fidem catholicam non esse ostendit.*

CAP. XIII. *Objectionibus contra doctrinam superioris capituli occurritur.*

CAP. XIV. *Ex ratione catholici nominis, discursus capituli præcedentis confirmatur.*

CAP. XV. *Catholicam dici Ecclesiam, quia per totum orbem diffusa est ostenditur, et hæreticis occurritur.*

CAP. XVI. *Quomodo verum sit Ecclesiam Catholicam per totum orbem diffusam.*

CAP. XVII. *In Anglicano schismate fidem apostolicam non esse.*

CAP. XVIII. *Objectioni contra doctrinam superioris capit is occurritur.*

CAP. XIX. *Sectam Anglicanam nullius antiqui Martyris sanguine decoratam, sed potius damnatam esse ostenditur.*

CAP. XX. *Veros nostrorum temporum Martyres non Anglicanam sectam, sed Romanam fidem illustrasse.*

CAP. XXI. *Anglicanam sectam vel propter solam schismatis turpitudinem detestabilem esse.*

CAP. XXII. *Anglicanum schisma in*

manifestam hæresim et apostaticam doctrinam transiisse.

CAP. XXIII. *Anglicanum schisma pertinaciter sectantes, neque ab hæresi, neque ab hæreticorum nota excusari posse.*

CAP. XXIV. *Rationes, quibus rex hæretici maculam fugere studet, refelluntur.*

CAP. XXV. *Immerito Anglicanam sectam, fidem suam et Ecclesiæ auctoritatem ad quingentesimum Christi annum limitare.*

Summa et conclusio totius libri, cum apostrophe ad Angliæ regem.

LIBER PRIMUS

QUANTUM ANGLICANA SECTA

A DOCTRINA CATHOLICA DISSIDEAT.



Scopus auctoris. — Duo modi ostendendi errorem sectæ Anglicanæ proponuntur. — Proposui demonstrare titulum defensoris fidei catholiceæ, quem Serenissimus Jacobus sibi arrogat, ejusdem factis esse contrarium. Hoc enim necessarium duxi, tum propter Catholicos homines, qui sub illius ditione commorantur, ne fortasse illo specioso titulo decipi contingat; tum propter reliquos, qui ejusdem cum illo sunt opinionis, ut illius, in qua manifeste versantur, hæresis moneantur, et, si fieri potest, convinceantur. Hie enim est hujus nostri laboris scopus, quem si, Deo juvante, consequi potuerimus, profecto titulum illuminatum esse, et sine re, caputque et protectorem hujus schismatis, Catholiceæ fidei adversarium esse, non defensorem, evidens fiet. Duobus autem modis errorem illius sectæ demonstrare possumus: prius generalim ostendendo, in illa veræ fidei fundamentum, et certam ac infallibilem credendi regulam non esse; monstrando deinde singulos ejus errores, quos, rex ipse proficitur, clarissimis argumentis, et certissimis testimoniis confutando. In hoc ergo libro priorem inchoamus viam, in qua non possumus aptius initium sumere, quam statim ante Anglorum oculos proponendo felicem statum veræ ac catholice fidei, quo ante exortum schisma fruebantur. Et idecirco operæ pretium duxi, in primo hujus libri capite de progressu regni Angliæ in christiana religione ab eo tempore, in quo illius lumen accepit, usque ad præsentem diem pauca præmittere.

Nam sicut in moralibus rebus, facti (ut juri perit loquuntur) cognitio, ad ferendum de jure judicium, imprimis solet esse necessaria, ita in præsenti causa antiquioris fidei cogniti-

tionem, tum ad intelligendam erroris causam et originem, tum etiam ad illius repugnatiā et oppositionem cum fide catholica perspiciendam, necessariam esse judicamus. Si quidem, Cypriano teste, ep. 74, apud religiosas et simplices mentes haec est compendiosa ratio errorem deponendi, inveniendique, et erudiendi veritatem: *Nam si ad divinæ traditionis caput et originem revertamur, cessat error humanus, et sacramentorum celestium ratione perspecta, quidquid sub caligine ac nube tenebrarum obscurum latebat, in lucem veritatis aperitur. Si canalis aquam dicens, qui copiose prius et largiter profluebat, subito deficiat, nonne ad fontem pergitur, ut illic defectionum ratio noscatur, utrum ne, arescentibus venis, in capite unda siccaverit, an vero integra inde et plena procurrens in medio itinere destiterit?* Quod Cypriani consilium maxime collaudans August., lib. 5 de Bapt., c. 26, concludit, *optimum esse, et sine dubitatione faciendum.* Tantorum ergo Patrum vestigiis insistentes, rem aggrediamur.

CAPUT I.

DE FIDEI CATHOLICÆ PROGRESSU, ET STATU ANGLICANÆ GENTIS A PRIMA EJUS CONVERSIONE USQUE AD PRESENTIA TEMPORA.

1. *Fides Catholica cœpit in Anglia ab ortu Evangelii.*—Gildas ille, cognomento sapiens, de excidio Britanniæ (quem Polydorus Virgilius, Beda, et alii sequuntur), Britanniam jam inde ab initio orti Evangelii Christianam recepisse religionem testatur; quam rem Polidorus, lib. 2 Historiæ Anglicanæ, sic accidisse describit¹: *Cum Joseph ille, qui teste Mattheo Evangelista, ab Arimathia civitate oriundus, Christi corpus sepeliverat, sive casu, sive consilio, ita volente Deo, cum non parvo comitatu in Britanniam venit; ubi tam ipse, quam ejus socii, cum de Evangelio prædicarent, atque dogma Christi seduio dicerent, multi per hæc ad veram pietatem traducti, salutiferaque fruge baptizati sunt.*

2. *Aucta est tempore Eleutherii Papæ.*—Eamdem postea insulam confirmavit, vel iterum prius ad fidem reduxit Eleutherius, Ponti-

fx Romanus a Petro duodecimus, teste Beda, lib. 1, c. 4: *Misit ad eum Lucius, Britannorum rex, Epistolam, obsecrans ut per ejus mandatum Christianus efficeretur, et mox pia postulationis consecutus est effectum; susceptamque fidem usque in tempora Diocletiani principis inviolatam, integrumque serrabant.* Nam deinde (teste Gilda, et ex eo Polidoro supra) ob immanitatem persecutionis, religio ita refrixerat, ut sit pene extincta.

3. *Gregorii tempore iterum restituta.*—Tandem vero (divina afflante gratia) anno Christi Domini 590, Mauritii imperatoris anno 41, Gregorius Papa primus, missis in Britanniam Augustino et Mellito, Rege Cantii Ethelberto eorum predicatione converso, et salutari baptismatis fonte abluto, eamdem idolis servientem insulam restituit Christo. Cujus ultimæ a Romana Sede provenientis conversiois causam, modum, ordinem, et progressum fusius prosequuntur ipsemet Gregor., lib. 5, epist. 10, 58 et 59, et lib. 7, epist. 442, indict. 2; Beda supra, cap. 23; Joan. Diac., in Vita Gregorii, lib. 2, c. 34; Baron., anno Christi 596, n. 9, 10, 11, 12, 13 et 14, et alii, quamvis nonnulla sit in annis computandis discordia, quæ ad præsens institutum nihil refert.

4. *Usque ad Henrici tempora duravit.*—A prædicto vero tempore usque ad annum Domini 1534, et decimum quintum fere annum Henrici regis, ejus nominis VIII, per annos circiter mille, prout ex Anglorum liquet annualibus, non alia viguit apud illos reigio, præter illam, quam in hodiernum usque diem communiter vocitant *Antiquam, Catholican* inquam *Romanam.* Adde, quod et ipsemet Henricus VIII, in hoc usque tempus adeo Sedi Apostolicæ fuit devotus, ut in ejus, fideique Romanæ defensionem, justum adversus Lutherum tunc in Petri sedem debacchiantem composuerit librum, quem Leoni X, Christi tunc in terris Vicario (ut habetur in ipsa ejusdem Pontificis ad euindem etiam regem Henricum constitutione 45), examinandum, et auctoritate apostolica approbandum misit. Ubi dum septem asserit Sacraamenta, art. 2, sic Romanæ Sedis propugnare conatur auctoritatem: *Negare Lutherus non potest, quin omnis Ecclesia fidelium sacrosanctam Sedem Romanam velut matrem, primatemque recognoscat ac veneretur, quæcumque saltem neque locorum distantia, neque periculis interiacentibus prohibetur accessu: quanquam si vera dicant, qui ex India quoque xeniunt huc, Indi*

¹ Cardin. Baron., anno 35, num. 5, ex Manuscriptis historiæ Anglicanæ quæ in Vaticano habetur.

² Baron., anno Christi 183, ex lib. de Roman. Martyrolog. et aliis.

etiam ipsi, tot terrarum, tot marium, tot solitudinum plagis disjuncti, Romano tamen se Pontifici submittunt. Ergo si tantam, ac tam late fusam potestatem, neque Dei jussu Pontifex, neque hominum voluntate consecutus est, sed sua sibi vi vendicavit, dicat, velim, Lutherus, quando in tantæ ditionis erupit possessionem; non potest obscurum esse initium tam immensæ potentiae, præsertim si intra hominem memoriam nata sit.

5. Henrici VIII lapsus. — Hæc scripsit rex ille, quo tempore fuit Romanæ Ecclesiæ ad dietissimus. Postea vero, nimio Annæ Bolenæ flagrans amore, a Sede Apostolica facultate, quam sæpius petierat, non obtenta, et legitima sua uxore Catherine Catholicorum Hispaniæ regum filia repudiata, prædictam Annam, omni reclamante jure, duxit uxorem. Qui, ut impunius (ut sibi videbatur) faceret, seipsum Ecclesiæ Anglicanæ caput constitutens, et ab omnibus haberí dicique decernens, vero Christi in terris Vicario denegavit auctoritatem. Hæc basis, hoc fundamentum, et origo novi nati in Anglia Evangelii. Neque ipsi diffiterentur aut erubescunt Protestantes, ut vulgatum est in illius temporis historiis¹.

6. Sub Eduardo Zuingliana secta introducitur. — Post ejusmodi vero illius Ecclesiæ caput ex turpissimis principiis obortum, anno Dominicæ incarnationis 1546, aliud non minus firmum, et regimini ecclesiastico aptum (puer nempe novem annorum, Eduard. VI) utrumque moderaturum corpus, spirituale et temporale, ipse licet alterius indigens regimine, successit. Quem etsi pater in fide catholica (uno dempto primatus Ecclesiæ titulo) educari jussérat, hoc tamen spreto Henrici regis mandato, Zuinglianam Heurico omnium maxime exosam amplexatus est sectam, Pontificiamque exercuit auctoritatem, eo quod (ut in illius rescripto quodam legitur) *omnis juris dicendi auctoritas, atque etiam jurisdictio omnimoda, tam illa, qua ecclesiastica dicitur, quam secularis, a regia potestate velut a supremo capite manat.* Cum plurimæ igitur innovationes per totum fere septennium fierent, Regius tandem juvenis pridie nonas Julii, ætatis sue anno 16, regni vero 7, e vivis excessit, eoque extincto, et ipsa itidem Zuingliana secta in Anglia pene extincta est.

¹ Surius, in Historia nostri temporis. Cochleus in Historia Lutheri. Mauritius Canueus in historia de Martyrio Carthusianorum.

7. Sub Maria fides restituitur. — Subsecutum est etenim felicissimum illud regnum Mariæ, lectissimæ pariter ac religiosissimæ in omnibus feminæ, quæ post obtentam cœlesti auxilio inexpectatam ab inimicis victoriam, sua sola pietate et religione mota, primatus titulum a patre et fratre usurpatum respuit, et e stylo regio delevit, pristinamque quam semper professa fuerat, catholicam religionem, divina mirifice cooperante potentia, Pontificis interposita auctoritate, per omne suum regnum restituit. Sed ob patris vel subditorum peccata, hoc tanto Romanæ fidei publicæ professionis bono, præclarissimæ reginæ morte, post quinquennium et quatuor menses, privata est Anglia.

8. Elisabetha Calvinianam sectam in regnum invexit. — Marie in regno successit Elisabetha, tertia Henrici soboles, non vero in pietate ac religione. Nam pro catholicæ, Calvinianæ sectæ formam statim in regnum induxit. Et quamvis in primo Parlamento non fore caput Ecclesiæ appellandam visum fuerit, quia Calvinus nomen illud in patre displicuerat, nihilominus supremæ gubernatricis Anglicanæ Ecclesiæ (quod in idem recidit) sibi nomen assumpsit, subditosque ad illud solemni juramento confirmandum compulit, multisque legibus in variis comitiis editis, omnimodam in spiritualibus potestatem regio sceptro annexam esse voluit, decrevit, ac declaravit. Et in hoc statu ac professione religionis, quamdiu Elisabetha vixit, Anglia perseveravit.

9. Status Angliae sub Jacobo. — Illa vero demorta, Serenissimus Jacobus reginæ Scotiæ Mariæ filius, et in regno hæres, sceptrum etiam Anglicani regni consecutus est, neque hoc suo jure contentus, simul cum illo primatum cum supraemæ spirituali potestate in universam Britanniam usurpavit, sectam autem vel Calvinianam, vel parum ab ea diversam profitetur, et a suis subditis totis conatibus recipi et observari studet. Et nihilominus semel ipsum non solum Catholicum, sed eliam fidei vere christianæ, catholicæ, et apostolicæ defensorem et propagatorem profitetur. Quantum vero titulus hic a veritate aberret, quantumque facta verbis contraria sint, vindendum superest.

CAPUT II.

SECTAM ANGLICANAM A FIDE VERA DISCESSISSE.

1. Dilemma efficax proponitur. — Prior pars dilemmatis ostenditur. — Assertionem hanc

evidenti consecutione ex narratione, et rerum mutatione in superiori capite proposita, in hunc modum colligo. Interrogo enim an fides illa, quam per Augustinum, et alios verbi Dei ministros, a Gregorio missos Anglia recepit, et usque ad Henricum VIII retinuit, vera fuerit necne. Nam quidquid horum eligatur, facile, ut existimo, convincemus, eam, quam nunc rex Angliae profitetur, fidem vere Christianam non esse. Argumentum hoc sumere mihi videor ex Augustino, lib. 2 contra ep. Gaudent., c. 7, ubi Donatistas sic urget : *Dic mihi utrum eo tempore Ecclesia, quando secundum vos, omnium criminum reos recipiebat, etc., malorum contagione perierat, an non perierat, etc., et infra : Responde, utrum Ecclesia perierit, an non perierat? Elige quod putaveris : si jam tunc perierat, Donatum quae peperit? Si autem tot in eam sine baptismo (utique secundo) aggregatis perire non potuit, responde, queso, ut ab ea se tanquam malorum communione deritans, pars Donati separaret, quae dementia persuasit?* Simili enim modo interrogamus : vel tempore Gregorii Ecclesia perierat, vel non perierat. Si perierat, Anglicanam Ecclesiam quae genuit? Si non perierat, ut ab ea se Anglia sub Henrico separaret, quae dementia persuasit, aut quo modo potest catholica esse, quae in separatione ab Henrico facta perseverat? Nam imprimis si antiqua illa fides vera fuit, defectio ab illa repugnans est et contraria verae fidei; at vero secta quam nunc Anglia profitetur, nihil aliud est quam defectio, seu rebellio quedam ab illa fide; quomodo ergo potest vera fides dici aut reputari? *Quae enim participatio justitiae cum iniquitate? aut quae societas lucis ad tenebras? quae autem conventio Christi ad Belial? aut quae pars fidei cum infidei?*¹ Fieri enim non potest, ut contraria simul in idem convenient: defectio autem a vera fide contraria est ipsi fidei Christianæ; ergo non potest secta, introducta per defec-tionem a Christiana fide, ejusdem nomen, nedum veritatem usurpare. Etenim divina fides, qualis Christiana est, mutari non potest, neque inconstantiam pati: nam Deus, in cuius veritate nititur, seipsum negare non potest, vel (quod perinde esset) quod semel dixit retractare; ergo secta, quae per defec-tionem a divina et catholica fide introducta est, non potest esse divina fides, sed humana ad-inventio, vanaque opinio.

2. Atque hunc discursum confirmat egregie reprehensio Pauli, quæ non minus in Anglos quam in Galatas convenit : *Miror quod sic tam cito transferimini ab eo qui vos vocavit in gratiam Christi, in aliud Evangelium, quod non est aliud, nisi sunt aliqui, qui vos conturbant, et volunt convertere Evangelium Christi;*¹ id est (exponente Chrysostomo) sunt aliqui, qui mentis vestrae obtutum opinionibus suis turbant, et subvertere volunt Christi Evangelium, quod unicum est, et praeter illud non potest esse aliud. Ergo omnis doctrina, quæ ab illo unico Evangelio deficit, humana opinio est, et secta veritati divinæ contraria. Nomine enim *Evangelii*, ut exposuit August., lib. 3 cont. litter. Petil., c. 6, omnem catholicam doctrinam Paulus comprehendit, de qua subiungit : *Licet nos, aut Angelus de cœlo evangelizet vobis præter id quod evangelizarimus vobis, anathema sit.* Quod iterum statim repetit, ut fidei Catholicae firmitatem et stabilitatem exaggeraret, ait Hieronymus; *quia si fieri posset ut Apostoli et Angeli mutarentur, tamen non esset ab eo, quod semel acceptum fuerat, recedendum; et latissime Lirinens., cap. integro 12, ubi inter alia inquit : Tremenda districtio, propter adserendam primæ fidei tenacitatem, nec sibi, nec ceteris co-apostolis pepercisse. Parum est, etiam si Angelus,* etc. Igitur si prior doctrina Anglis prædicata, et ab eis fideliter recepta, divina fuit, defectio ab illa non potest esse translatio in aliam fidem veram, sed potius est fidei perversio et conturbatio.

3. *Qui negat aliquid fidei totam subvertit.*— Adveritque eleganter Hieronymus (quod maxime pro sequenti doctrina considerandum est) hæc dici a Paulo, de his qui in eundem credebant Deum, et easdem Scripturas habebant, proprio tamen spiritu eas interpretabantur, et ita Evangelium novum introduce-re, seu mutare, antiquare, et in aliud convertere conabantur : *Sed non ralent* (ait Hieronymus) *quia hujusmodi naturæ est, ut non possit aliud esse quam verum est.* Et subiungit : *Omnis, qui Evangelium alio interpretatur spiritu et mente, quam scriptum est, credentes turbat, et convertit Evangelium Christi, ut quod in facie est, post tergum faciat, et ea, que post tergum sunt, vertat in faciem.* Chrysostomus tandem, divino quidem, ut apparet, spiritu motus, quasi præsentem schismatis causam, et Ecclesiæ Anglicanæ statum

¹ 2 Ad Cor. 6.

¹ Ad Galatas 4.

contuitus, advertere nos jubet, dicens : *Audiant quid dicit Paulus, .nimis, illos subvertisse Evangelium, qui paululum quoddam rerum invexerunt. Nam ut ostenderet quod pusillum quoddam perperam admistum, totum corruptit, dixit subverti Evangelium. Nam sicut qui de moneta regia paululum de impressa imagine amputaverit, totam monetam adulterinam reddit; ita quisquis sanctae fidei vel minimam particulam subvertit, in totum corruptitur, ab hoc initio semper ad deteriora procedens. Ubi sunt igitur qui nos ut contentiosos damnant, eo quod cum haereticis habemus dissidium, dictitantque nullum esse disserimen inter nos et illos, sed ex principatus ambitu proficisci discordiam?* Sie igitur Serenissimus Angliae Rex, vel alii, qui ejus schisma et sectam profitentur, fidem catholicam, quæ in regno illo prius vigebat, ne dicant, in parvis, paucis, aut minimis defecisse, aut humanum esse de principatus ambitione dissidium obtendant. Nam quacumque ex causa fidei doctrinæ defuerint, in re quantumvis minima, totam fidem catholicam perturbarunt et amiserunt. Eo vel maxime quod non in paucis nec in minimis rebus, sed in maximis fidei fundamentis, ut mox patefiet, deviarunt. Sit igitur constans et manifestum, si Anglicana fides usque ad defectionem Henrici VIII catholica fuit, sectam, quam ab illo tempore profitetur, fidem veram non esse, sed catholicæ fidei perturbationem aut corruptionem. Atque hæc videntur de priori membro sufficere, nam et res est per se satis clara et evidens, et, quantum ex verbis regis conjicere valeo, tam ipse quam alii Protestantes partem aliam censem esse præhabendam.

4. Altera pars dilemmatis confirmatur. — Stultissimum haeretici dictum. — Hanc igitur egregiam rationem defectioni sue obtendent. Ante regis, nempe Henrici, ejus nominis VIII, tempora, Angliam fidem catholicam amisisse, ac subinde propter mutationem ab Henrico factam, in fide neutiquam aberrasse, sed ad illam potius tunc redisse, Henricique delictum, Anglorum fuisse salutem, quia per illud, vel occasione illius illuminati sunt, et a tenebris in quibus versabantur, crepti. Neque enim defuit quidam ex illorum pseudoprophetis¹, qui in hunc modum exclamaverit : *O reræ, et non sine divino numine conciliatæ nuptiæ, cœlestique partus ac progenies, quibus*

¹ Calvinista quidam, lib. 2 de Henrici Matrimonio, Londini edito anno 1583.

patria a servitute et caligine plus quam Ägyptiaca erpta, atque liberata et ad verum Christi cultum revocata est. Tanta est enim humanæ mentis infirmitas, ut a Deo derelicta, et suis desideriis tradita, tenebras vocet lucem, et lucem tenebras, sibique persuadeat lumen evangelicæ veritatis inter turpissimas voluptates eluxisse, et (quod absurdissimum est) nefandas nuptias peculiari divinæ providentiae attribuat. Hæc enim omnia errata in illis continentur verbis. Et præterea ex eisdem conjectare licet, eo tempore jam fuisse in Anglia apud multos introductam eam de antiqua sua fide existimationem, quod falsa fuerit, et non catholica.

5. Sanderus in Eduardo VI.—Henrici VIII testimonio Angliam ante illum fidem catholicam retinuisse ostenditur. — Verumtamen hic error confutari potest imprimis ejusdem Henrici VIII testimonio, quod apud regem Angliae necesse est ut auctoritatem habeat, si constanter lequi, et primatum, quem usurpat, aliqua defendere auctoritate velit. Ipse enim Henricus jam moribundus Eduardum filium, quem haeredem relinquebat, in fide catholicæ, uno tantum excepto primatus articulo, educari voluit et mandavit. Per fidem autem catholicam sine dubio intellexit fidem illam, quam cum Ecclesia Romana ipse prius cum suo regno professus fuerat : hanc enim semper vocavit catholicam, neque ad fidem aliam possunt illa verba referri. Declaravit ergo ille rex et sua confessione confirmavit, fidem, quam præcedentibus temporibus Anglia profitebatur, catholicam fuisse. Cur ergo rex Angliæ in articulo primatus tam libenter ac pertinaciter suum sequitur prædecessorem, et in reliquis articulis, in quibus Henricus veritatem catholicam confessus est, eumdem abnuit imitari? Quod si fortasse respondeat sectam suam ab aliis educatoribus ab incunabulis accepisse, saltem fateatur necesse est, illam novam ac recentem esse; ex quo facile etiam concluditur, illam non posse esse catholicam, sed potius esse a fide catholicæ defectionem. Verumtamen hunc locum in sequentibus latius prosequemur: nunc satis sit ostendisse, sine fundamento et inconstanter opinatos illos, qui, in articulo primatus Henrico fidem adhibentes, ejus fidei catholicæ confessionem detestati recusat.

6. Altera ejusdem partis probatio. — Sed videamus ulterius, quo sensu Anglicanam fidem ante Henricum VIII non fuisse catholi-

cam, astruant. Duobus enim modis id exco-gitari potest. Unus est, in principio quidem fidem catholicam prædicatam esse in Anglia, et receptam etiam Gregorii tempore, postea vero corruptam et amissam fuisse; alter vero modus erit, si quis sentiat, in ipsamet prædicatione fidei per Augustinum facta, traditam esse Anglis doctrinam fidei jam corruptam, et ab antiqua catholica et Apostolica longe diversam; ostendemus autem utrumque ex his modis esse incredibilem. Et imprimis si prius Anglia tempore Gregorii catholica fuit, qui dixerit postea ante Henricum mutatam fuisse, necesse est ut ostendat quo tempore ea mutatio configerit, sub quo regere, et sub quo Pontifice Romano, vel sub quibus Prælatis Anglicanis; itemque in quibus rebus vel articulis facta fuerit mutatio; nihil autem horum cum aliquo veritatis aut probabilitatis indicio hactenus monstratum est, vel ostendi potest; ergo hoc ipso talis assertio tanquam voluntaria et temeraria, et illi regno injuriosa rejicienda est.

7. Deinde si attente considerentur quæ Beda et aliae historiæ Anglicanæ referunt, nullum schisma, nullave hæresis invenietur, quæ post Gregorium totam illam gentem occupaverit. Imo neque legitur mutatio aliqua, vel varietas in his omnibus, quæ nunc novi de-testantur hæretici. Nam, ut ex dicendis constabit, eadem fuit sacramentorum religio, eademque sacrosanctæ Eucharistiæ fides ac veneratio, idem Sanctorum cultus, ac sacrarum imaginum usus, et, quod caput est, eadem ad Apostolicam sedem obedientia et subjectio: quæ igitur fingi potest defectio a fide catholicæ, quæ per universum illud tempus in Anglia fuerit? Denique cum Anglia ex tunc eamdem fidem, quam Romana Ecclesia, semper professa fuerit (hoc enim nemo negare potest, qui historias ecclesiasticas legerit), non potuit eadem Insula catholicam fidem amittere, quin Romana etiam Ecclesia illam amiserit: nam fuit utriusque eadem fides. Ostendemus autem paulo inferius Romanam Ecclesiam post Gregorium a catholicæ fide non defecisse, imo in universum ab illa deficere non posse; ergo neque in Anglicana Ecclesia mutatio in catholicæ fide eo tempore facta est.

8. *Rex Jacolus videtur sentire fidem per Augustinum in Anglia prædicatam non esse catholicam.*—Superest ergo ut dicant, licet Anglia non mutaverit fidem a tempore Gregorii usque ad Henricum VIII, nihilominus eo tem-

pore non fuisse catholicam, quia fides, per Augustinum et alios ministros Gregorii prædicata, catholica non fuerit. Ex quo fit ut ante Henricum VIII nunquam in Anglia fuerit catholicæ fides, saltem in ea parte Britanniae, quæ usque ad Gregorium Evangelii lucem non recepit. Quod quidem, quantum conjectare possum, non abhorret a Jacobi regis fide, seu opinione, nam ea jicit in *Præfatione principia et fundamenta, quibus hæc sententia valde consentanea esse videatur.* Ibi enim omnem doctrinam fidei, quam Ecclesia Romana post quingentesimum a Christo annum amplexa est, incertam et suspectam se habere sentit, aliisque suadere conatur. Nam in pag. 43: *Quidquid (ait) quadringentis post Christum annis unanimi consensu Patres ad æternam salutem necessarium statuerunt, aut cum his ita esse sentiam, aut modesto saltem silentio obmutescam, reprehendere certe non audeo.* In quibus verbis dum solis Patribus primorum quatuor seculorum aliud auctoritatis defert, totam recentiorem doctrinam suspectam habet, et (quod mirandum est) etiam illis antiquissimis Patribus, unanimi consensu loquentibus, fidem suam non accommodat, sed solum reprehendere non audit; cæteros ergo omnes, qui posterioribus floruerunt sæculis, etiamsi de re ad salutem necessaria, unanimi consensu aliiquid statuant, reprehendere audebit, ne dum de eorum fide dubitare. Deinde pag. 47 subneclit, non quidquid Romana Ecclesia ante quingentesimum Christi annum de fide credendum docuit, pro fide habendum esse. Hinc ergo vehemens oritur conjectura, non difficile admissurum esse Jacobum fidem per Augustinum in Anglia seminatam, non fuisse puram et catholicam, sed aliis nævis, imo rebus quas ipse nuperas ac novitias appellat, fuisse permixtam. Cum enī ipse sentiat, a quingentesimo Christi anno Romanam fidem cœpisse deficere, et falsis dogmatibus permisceri; et Augustini prædicatio in Anglia anno 582 post Christum incepit, teste Beda, lib. 1 suæ Hist., cap. 23, quid mirum est, si concedat, vel respondeat fidem ab Augustino prædicatam, neque puram, neque omnino catholicam fuisse?

9. *Fidem ab Eleutherio prædicatam fuisse veram.*—Quanta vero et quam perniciosa dogmata in hoc modo respondendi seu evadendi contineantur, ex altioribus fidei principiis in sequentibus demonstrare conabimur; nunc vero inchoatum discursum proseguendo, res-

ponsum illud esse ab omni ratione alienum, et receptissimis historiis contrarium, et ipsi met Anglicanæ genti ignominiosum et injuriosum, ac denique contra Gregorium et Augustinum esse imposturam gravissimam, ostendendum est. Prius vero supponamus, fidem prædicatam in altera parte Britanniæ longe ante tempora Gregorii omnino veram, puram et catholicam fuisse, et in ea per plures annos perseverasse. Quod non existimo, vel Regem Angliæ vel aliquem ex suis ministris negaturum esse. Quia de tempore Eleutherii, et usque ad quadringentesimum, vel quingentesimum Christi annum, rex etiam ipse sentit, in Romana Ecclesia veram Christi fidem, puram et illibatam conservatam fuisse. Cum ergo pars illa Britanniæ fidem per Eleutherium acceperit, et in ea semper cum Ecclesia Romana communicaverit, et hæresibus contra illam insurgentibus, præsertim Arianæ et Pelagianæ restiterit, ut idem Beda per plura capita refert, evidentissimum est, fidem Britannicam in ea parte et illo tempore catholicam fuisse. Atque hujus veritatis præter Gildam, Bedam, et alios historiographos, habemus antiquissimos testes, Tertullianum, Eleutherio vicinum, qui lib. contra Judæos, c. 7, inter Ecclesiæ Catholicæ provincias, et regna veram Christi fidem profitentia, ponit, *Britannorum inaccessa Romanis loca, Christo vero subdita*; et Chrysostomum, qui tom. 5 in Demonstratione contra gentiles, quod Christus sit Deus, col. 14, amplitudinem etiam Ecclesiæ Catholicæ describens, ait: *Nam et Britannicae insulae extra hoc mare sitæ, et quæ in ipso Oceano sunt, virtutem verbi senserunt, sunt enim etiam illuc fundatae Ecclesiæ, et erecta altaria*; et t. 3, in sermone de Pentecoste, *Hodie nobis, etc., similiter describens sanctitatem Ecclesiæ Catholicæ, inter alias provincias Britanniam enumerat, dicens: Ante hoc autem quoties in Britannia humanis vescebantur carnis, nunc jejunis afficiunt animam suam.*

40. *Idem de fide ab Augustino prædicta concluditur, primo auctoritate.*—Ex hoc igitur fundamento ita concludo: fides sub Gregorio in Anglia prædictata, nec contraria nec diversa fuit ab illa quæ sub Eleutherio Britannis prædicata est: sicut ergo prior catholica fuit, ita etiam posterior, quia revera in se non fuit prior ant posterior, sed una et eadem, quæ citius vel tardius diversas illius insulae parles occupavit. Cujus rei testis locupletissimus est Beda, dicto lib. I Hist. Angl., e. 22, ubi refe-

rens pravos mores Britannorum fidelium, inter alia sic inquit: *Quin inter alia inenarrabilium scelerum facta, quæ historicus eorum Gildas flebili sermone describit, et hoc addebat, ut nunquam genti Saxonum, sive Anglorum secum Britanniam incolenti verbum fidei prædicandum committerent. Sed non tamen divina pietas plebem suam, quam præscivit, deseruit, quin multo digniores genti memoratae præcones veritatis, per quos crederet, destinavit.* Et statim c. 23 narrare incipit Gregorii providentiam in mittendo Augustino cum sociis ad fidem Anglis prædicandam, et in c. 26, non solum prædicatores illos Apostolicam doctrinam docuisse asserit, sed etiam vitam fuisse imitatos: *Cœperunt (inquit) Apostolicam primitivæ Ecclesiæ vitam imitari, orationibus videlicet assiduis, vigiliis, ac jejuniis serviendo, verbum ritæ, quibus poterant, prædicando, cuncta hujus mundi velut aliena spernendo, etc.* Et infra: *Crediderunt nonnulli, et baptizabantur, mirantes simplicitatem innocentis ritæ, ac dulcedinem doctrinæ eorum cœlestis.* Et infra subiungit, plures quotidie ad audiendum verbum cœpisse confluere, ac relicto gentilitatis ritu, unitati se sanctæ Christi Ecclesiæ credendo, sociare. In confessu itaque debet esse ex hac Bedæ narratione, camdem catholicam fidem fuisse Anglis prædicatam, quæ prius fuerat Britannis tradita, et ita illam insulam in unitate fidei, et inter se, et cum aliis christianis populis unitati Ecclesiæ fuisse conjunctam.

41. *Secundo, ex utriusque comparatione.*—Præterea, ex his quæ de modo religionis christianæ utriusque gentis, loci ac temporis, vel in iisdem historiis referuntur, vel per se manifesta sunt, palam est nullam fuisse inter utramque prædicationem doctrinæ diversitatem. Nam imprimis pro comperto habetur, ea dogmata fidei, quæ Protestantes ipsi, et cum eis rex Angliæ antiqua vocal, quæ tum in tribus symbolis continentur, tum in quatuor primis Conciliis explicata ac definita sunt, integra fide et veritate fuisse per Augustinum et socios Anglis prædictata, eum eodem tempore Gregorius decreverit quatuor prima generalia concilia, sicut quatuor Evangelii libros suscipienda, et in veneratione habenda esse, quibus etiam quintum annumerat, lib. I Epistolarum, epist. 24. Neque ipsimet Anglicani Protestantes, qui de hac fide antiqua gloriabantur, et eam se retinere profitentur (quod quam verum sit, postea videbimus) illam aliunde quam a Gregorio et ab Augusti-

no, ejus ministro, per traditionem et continuam successionem suorum prædecessorum fidelium habuerunt; de his ergo dogmatibus nulla est, quæ ad præsens attinet, controversia.

12. Alia vero, quæ ipsi nunc in Ecclesia Catholica Romana reprehendunt, ut sunt Missæ sacrificium, altaria, Ecclesiæ in honorem Sanctorum ædificatæ, reliquiarum veneratio, Sanctorum invocatio, sanctarum imaginum usus, Ecclesiæ Romanæ obedientia et subjectione, sicut libenter admittimus, fuisse credita et observata in Anglia a temporibus Gregorii, ita ipsi negare non possunt eadem fuisse credita et observata in Britannia a temporibus Eleutherii; ergo vel negent fidem primitus in Anglia prædicatam, fuisse catholicam, vel desinant fidem per Augustinum inductam accusare, vel tanquam minus catholicam repudiare. Probatur æquiparatio proposita, nam imprimis Beda, dicto c. 26, refert fuisse in Anglia ecclesiam in honorem S. Martini antiquitus factam, dum adhuc Romani Britanniam incolerent, nempe ante Augustini prædicationem, et post illam subjungit: *In hac ergo et ipsi primo convenire, psallere, orare, missas facere, prædicare, et baptizare coeperrunt, donec rege ad fidem converso, majorem prædicandi per omnia, et ecclesiæ fabricandi vel restaurandi licentiam acciperent.* Et c. 33, refert, Augustinum Ecclesiam quamdam, ibi opera Romanorum antiquorum fidelium antea factam, dedicasse et consecrassæ, et ejusdem hortatu factam esse ecclesiam Beatorum Apostolorum Petri et Pauli, quam successor ejus Laurentius consecravit.

13. Simili autem modo Gildas antiquam Britanniae fidem, et religionem christianam descripsisse videtur in sua historia, seu opusculo de excidio Britanniae, ubi in col. 4, loquens de tempore post mortem Diocletiani, sic inquit: *Renovant ecclesiæ ad solum usque destructas, basilicas Sanctorum Martyrum fundant, construunt, persiciunt, ac veluti ricticia signa passim propalant, dies festos celebrant, sacra mundo corde oreque conficiunt, omnes exultant filii gremio, ac si matris, Ecclesiæ consorti.* Et inferius col. 8, loquens de tempore cuiusdam persecutionis, inquit: *Ita ut cunctæ coloniae crebris arietibus, omnesque coloni cum Prepositis Ecclesiæ, ac populo, etc., solo sternarentur.* Et infra: *Et sacer altaria cadaverum frusta, crustis purpurei crux tecta velut in quoddam horrendo torculari mista viderentur.* Et paulo inferius iterum

mentionem facit *sacrosancti altaris*, quod vocat *sacrificii cœlestis sedem*. Et inferius deplorat, quod tempore persecutionis non audiabantur Dei laudes, *Canora Christi tyronum voce suaviter modulante, neque ecclesiasticæ melodie*; et paulo inferius, col. 13, mentionem facit nuptiarum, quas *illicitas* vocat, *quia post votum monachi factas*. Ac denique in fine illius libri, in ecclesiastico ordine numerat *Episcopos, sacerdotes, et alios clericos*. Quos quidem in alio opere, de Ecclesiasticorum correctione, graviter reprehendit quoad mores, licet statum maximopere veneretur; et inter reprehensiones adhibet, *raro sacrificantes, ac raro puro corde inter altaria stantes*. Et inferius distinguit varios ecclesiasticos gradus, præsertim episcopatum, et presbyterium, et eos graviter reprehendit, *qui non ab Apostolis, vel ab Apostolorum successoribus habent sacerdotia, sed a tyrannis emunt*. Quibus consentanea sunt verba quæ supra ex Chrysostomo retuli, quibus tradit, suo tempore in Britannia fundatas fuisse ecclesiæ, et erecta altaria. Quæ omnia manifeste ostendunt quam fuerit consona fides et religio illius temporis cum ea, quæ fuit tempore Gregorii, et quam nunc in Ecclesia Romana conspicamus; et e converso quantum ab illa discrepet ea, quæ nunc est in Anglia, non reformata (ut ipsi vocant), sed revera potius deformata religio, quæ cœleste sacrificium non habet, vel per fidem recipit, altaria destruit, sacerdotes detestatur, et templo in honorem Sanctorum dicata non admittit. Igitur nova est hæc et humana inventio; fides autem, tam sub Gregorio quam sub Eleutherio in Anglia prædicta, vera et catholicæ fuit, semperque usque ad prædictum Henrici regis lapsum permansit.

14. *Tertio, ex sanctitate, et miraculis Augustini et sociorum.*—Possumus hoc præterea confirmare ex modo, quo illa fides per Augustinum et socios Angliæ tradita et persuasa est. Nam imprimis vita illorum prædicatorum quantum Apostolicæ similis fuit, tantum a novis sectariis et eorum moribus disceperebat: nam illi religiosam sectabantur vitam, quam isti abominantur; illi Missas et sacrificia celebrabant, isti tanquam diabolicum commentum effugiunt; illi assiduis vigiliis et jejunis serviebant, et cuncta hujus mundi spernebant, ut ait Beda; isti vero voluptatibus corporis dediti, nihil aliud præter humanum honorem querunt. Denique ait Beda: *Illi non dæmoniaca, sed divina virtute prædicti, veniebant,*

crucem pro vexillo ferentes argenteam, et imaginem Domini Salvatoris in tabula depictam, litaniasque canentes, pro sua simul, et eorum propter quos et ad quos venerunt, salute æterna, Domino supplicabant. Atque his armis, divinis potius quam humanis, brevi tempore Regem simul cum regno ad Ecclesiæ unitatem, et Apostolicæ sedis obedientiam reduxerunt.

15. Addit denique Beda id non esse perfectum sine multis miraculis; sic enim ait c. 26: *At ubi rex delectatus vita mundissima sanctorum, et promissis eorum suavissimis, quæ vera esse miraculorum quoque multorum ostensione firmaverunt, credens baptizatus est, etc.* Et cap. 31, refert tot ac tanta signa fuisse per Augustinum facta, *ut Gregorius Pontifex, ne per illorum copiam periculum elationis incurret, missa ad eum peculiari epistola, ipsum hortatus sit.* Quæ est 58, libri 9, indict. 4, ubi inter alia, haec ad nostrum maxime facientia propositum superaddit Gregorius: *Scio quia omnipotens Deus, per dilectionem tuam in gente, quam eligi voluit, magna miracula ostendit, unde eodem dono cœlesti, et timendo gaudeas, et gaudendo pertimescas.* Item lib. 2, c. 2, Beda refert Augustinum in confirmationem tñdei, cæco visum restituisse; et inferius, cap. 7, de Melito, tertio post Augustinum Cantuariensi Archiepiscopo, insigne miraculum furentem restinguendi ignem adjungit; et Polydor., lib. 4 de eodem (quem Miletum vocat) memorat, *cum bene multa edidisset miracula, post quartum annum, quam sedere cœperat, e vita in cœlum migrasse.* Cujus ergo cogitationem subire potest, fidem sanctitate vitæ Apostolicæ comprobatam, et insignibus, nec paucis comprobatam miraculis, tantoque fructu et efficacia verbi prædicatam, catholicam non fuisse? Aut quis cogitare audcat, ne dum dicere, omnes Christianos, religiosos, et Apostolicos viros, et reges etiam qui interdum miraculis claruerunt (ut de Eduardo II refert Polydor., lib. 8, non longe a fine) quis, inquam, credere posset omnes hos catholicæ fide caruisse, ac subinde æternam salutem non fuisse consecutos? Quia sine vera fide nemini patet aditus ad æternam gloriam; vera autem fides non est, quæ catholicæ non est. Aut quis prudenter sectam a Luthero, Calvino, et similibus hominibus inventam, nullis signis ac miraculis confirmatam, nec vitæ probitate co honestatam, antiquæ fidei anteponere, et comparatione illius catholicam vocare præsumat? Videat igitur Jacobus rex,

quam rationem redditurus sit suæ fidei, quando districte examinandum est, an defensor fidei catholicæ, vel potius oppugnator extiterit?

16. *Ultimo, ratione eadem veritas stabilitur.*

— Postremo tandem loco non omittam rationem aliam qua idem confirmem, et fidem per Augustini prædicationem in Anglia introduc tam, veram et catholicam fuisse ostendam. Nam si illa catholicæ non fuit, nulla prefecto fuit eo tempore fides catholicæ in mundo, vel saltem nulla erat tunc fides, de qua certe constare posset, an esset catholicæ, necne. Unde consequenter fit nullam fuisse tunc in orbe doctrinam, quam homines, qui salvari cuperent, tota animi certitudine, ac firma de liberatione, tanquam divinam, et a Christo Domino integre traditam, eligere, amplexari aut retinere possent. Hæc autem omnia tantam sonant impietatem, tantamque absurditatem præ se ferunt, ut si admittantur, alia impugnatione non egeat illa doctrina, ex quæ talia dogmata sequuntur; nam in his errorem, et impietatem suam satis prodit. Super est ergo ut consecutionem probemus, quod non erit difficile consideranti, nullam fuisse tunc in mundo doctrinam fidei, in qua tot testimonia, et signa veritatis, antiquitatis, ac perpetuæ successionis ab Apostolorum prædicatione concurrent, sicut in illa quam Augustinus in Anglia prædicavit. Illa enim non erat alia quam Romana fides, quæ annuntiata est in universo mundo, et in eo recepta, tunc etiam perdurabat; ergo si illa catholicæ non erat, nulla prefecto erat in mundo catholicæ fides. Denique hoc ipsum directe ex ipsiusmet regis confessione comprobatur, quia de sua secta tanquam de fide catholicæ gloriatur. Necesse est enim ut consequenter fateatur, nullam aliam fidem, a sua secta diversam, esse catholicam, quia fides vera et catholicæ non est nisi una, teste Paulo, ad Ephes. 4. Ergo fides, quæ fuit ante Henricum VIII, non potest censeri catholicæ a sectariis, quia eo tempore præsens Angliæ secta non erat in mundo, quæ catholicæ, ac subinde sola, vera et unica ab eis proclamat. Hæc quidem ratio gravissima fundamenta nostræ fidei subinducit; quia vero ab adversariis duobus præcipue modis eluditur, ideo fusius stabilienda, et contra hæreticorum subterfugia munienda est.

CAPUT III.

ECCLESIAM CHRISTI NON POSSE VERAM FIDEM
AMITTERE OSTENDITUR, ET RATIO FACTA ROBO-
RATUR.

1. *Proponitur error hæretorum asserentium fidem in tota Ecclesia defecisse.*—Eo superiori capite discursu rationis deuentum est, ut vel sectam Anglicanam non esse fidem catholicae, sed defectionem ab illa; vel e converso ante exortam sectam istam, catholicam fidem in mundo defecisse necessario concedendum sit; ac proinde cogi Jacobum regem, aut titulum defensoris catholicae fidei deserere, aut affirmare a quingentesimo Christi anno, vel alio simili, usque ad exortum Lutherum, Calvinum, vel quempiam alium ex istis, mundum fide catholica caruisse. Videntes igitur autores novorum dogmatum vim prædicti discursus, veriti non sunt dicere, ante ipsos veram et puram fidem defecisse in universalis Ecclesia Dei, seque fuisse extraordinario modo a Deo missos ad abolitam fidem restituendam. Ita refertur ex Luthero in colloquiis latinis, tom. 2, cap. de Patribus; et Calvinus, lib. 4 Instit., c. 2 et 3; Melanchthon, et Bullinger, et aliis.

2. Et quantum ex libello regis Jacobi colligere possum, non est ipse alienus ab hac sententia, et vel istismet novatoribus, vel alicui illorum, vel certe sibi ipsi tanquam novo Evangelistæ fidem adhibet. Nam in Præfatione, pag. 33, prius quam referat privata quædam facta quorundam prædecessorum suorum, hæc verba premittunt: *Ut omnibus inde constet, etiam illis sæculis, quibus crassior cæciorque veritatis ignoratio orbi incubuit, Angliæ reges saepè pontificium ambitum, gliscerentemque tyrannidem non modo non tulisse, sed et illi fortiter restitisse.* Quæ verba quantum spectant ad quæstionem de primatu, in 3 libro expendentur; nunc solam eam partem considero, in qua, ante suum novum evangelium, orbem in veritatis cognitione cæcum fuisse profitetur. Ex quo principio, paulo inferius, pag. 47, subinfert, Doctores Ecclesiæ Romane (de his enim sine dubio loquitur), *nova disputandi et philosophandi ratione theologiam corrupisse.* In alio vero ejusdem præfationis loco, principes christianos allocutus, subjungit: *Cum Paulo opto, vos omnes fieri tales hac una in re, qualis et ego sum, imprimis ut relitis Scripturas per voluntate, ex*

his credendi normam petere, neque super aliorum incertis opinionibus, sed vestra ipsorum certa scientia fidei fundamenta collocare. In quibus verbis seipsum plane vivam sue fidei regulam constituit; nam licet corpori Scripturæ, ut sic dicam, seu litteræ ejus aliquid tribuat, sensum autem, qui est anima ejus, sibi reservat, et private suæ intelligentiæ, quam certam scientiam appellat. Et ideo dixi, sibi ipsi tanquam novo Evangelistæ fidem adhibere, contempta, et ut falsa repudiata Ecclesiæ Romanæ doctrina.

3. *Prædictus error priscis hæreticis familiaris fuit: Lucifer apud Hieronymum; Donatistæ, teste Augustino.*—Non est profecto novum homines, a catholica fide deficientes, lapsum suum universalis Ecclesiæ accusatione tegere velle aut excusare. D. Hieron., dialogo contra Luciferianos, refert, Luciferum asseruisse, universum mundum esse diaboli, et familiare illi fuisse dicere, *factum de Ecclesia lupanar.* Augustinus etiam, epist. 48, et lib. de Unit. Eccles., c. 12 et 13, et sæpiissime, in Donatistis, hoc reprehendit, generalius in hæreticis, Psalm. 401, concion. 2, dicens: *Sed existunt qui dicant: Jam hoc factum est, respondit ei in omnibus gentibus Ecclesia, credisserunt in eum omnes gentes, sed illa Ecclesia, que fuit omnium gentium, jam non est, periit, hoc dicunt (ait Augustinus) qui in illa non sunt. O impudentem vocem! illa non est, quia tu in illa non es? Vide ne tu ideo non sis; nam illa erit, etsi tu non sis.* Hanc vocem abominabilem et detestabilem, præsumptionis et falsitatis plenam, nulla veritate suffultam, nulla sapientia illuminatam, nullo sale conditam, ranam, temerariam, precipitem, perniciem, prævidit spiritus Dei, et tanquam contra illos, cum annuntiaret unitatem in conveniendo populos in unum, et regna, ut serviant Dominum, etc. Simili modo Tertull., lib. de Præscriptionibus adversus hæreticos, cap. 7, hunc etiam prætextum hæreticorum notat, eumque impugnat, et inter alia sic irridet c. 29: *Quoquo modo sit erratum, tamdiu utique regnavit error, quandiu hæreses non erant. Aliquos Marcionitas, et Valentinianos (addo Lutheranos, vel Calvinistas) liberanda veritas expectabat, interea perperam evangelizabatur, perperam credebatur, tot millia millium perperam tincta, tot opera fidei perperam administrata, tot virtutes, tot chrismata perperam operata, tot sacerdotia, tot ministeria perperam functa, tot denique martyria perperam coronaata?* Nihil profecto ad confundendos novi

Evangelii prædicatores aptius dici poterat; non sufficiet tamen, nisi divino etiam verbo convincantur.

4. *Ex testimoniis sacræ paginæ convincitur fidem in Ecclesia nunquam defuturam.—Supponitur primo Ecclesiam esse unam.* — Ut ergo ex Scriptura sacra, prout ab antiquissimis Patribus intellecta fuit, errorem hunc refutemus, supponimus imprimis sermonem esse de universali Ecclesia Christi, quam ipse peculiari modo, et multo excellentiori quam ante suum adventum Ecclesia fuerat, fundatum se promisit, Matt. 16: *Super hanc petram ædificabo Ecclesiam meam*, et promissionem postea implevit, paulatim eam congregando, et postea illam acquirendo sanguine suo, Actor. 20, ac tandem illam commendando Petro, illis verbis: *Pasce oves meas*, Joan. 21, et præcipiendo Apostolis, ut eam ex omnibus gentibus congregarent, dicens: *Docete omnes gentes, baptizantes eos*, etc., Matth. 8. Hæc autem Ecclesia una tantum est: nam unam tantum promisit Christus, cum dixit, *Ecclesiam meam*, quia, licet oves plures sint, grex tamen unus est, et unum ovile, et unus pastor, utique in cœlis Christus, et in terris Petrus et sedes ejus, cui Christus omnes oves suas commendavit, licet plures habeat coadjutores Episcopos, *quos Spiritus Sanctus posuit ad regendam Ecclesiam*, utique unam. Ideoque hanc unitatem commendat Apostolus, ad Ephes. 4, dicens: *Solliciti servare unitatem spiritus in vinculo pacis, unum corpus, et unus spiritus, sicut vocati estis in una spe vocationis vestræ, unus Dominus, una fides, unum baptismus*. Et inferius ait, omnes Apostolos, Prophetas, Evangelistas, Pastores et Doctores Ecclesiæ datos esse in opus ministerii ad ædificationem corporis Christi. Quod non est aliud, nisi Ecclesia, ut exposuit idem Paulus, in cap. 1 ejusdem Epistolæ, dicens: *Ipsum dedit caput supra omnem Ecclesiam, quæ est corpus ejus*: et ad Coloss. 1: *Et ipse caput corporis Ecclesie*; et infra: *Pro corpore ejus, quod est Ecclesia*; et 4 ad Corinth. 12, elegantissime describit compositionem hujus corporis ex variis membris, et tandem concludit: *Vos estis corpus Christi, et membra de membro*, id est membra invicem connexa et ordinata, sicut in uno corpore unum membrum coaptatur alteri, ut exponunt Latini, vel ut Græci legunt, *membra ex parte*, id est, non estis integrum corpus (loquebatur enim ad particularem Ecclesiam), et ideo non estis omnia

membra, sed ex parte. Unde rectissime August., de Unit. Eccles., c. 2: *Ecclesia una est, quam maiores nostri catholicam nominarunt, ut ex ipso nomine ostenderent, quia per totum est*. Et infra: *Totum quod annuntiatur de Christo, caput et corpus est; caput est ipse unigenitus Jesus Christus, Filius Dei vivi, corpus ejus Ecclesia, de qua dicitur, ut exhiberet sibi gloriosam Ecclesiam*, etc., ad Ephes. 5. Hieronymus etiam contra Luciferianos hanc unitatem Ecclesiæ declarat per unitatem arcæ Noe, quæ fuit typus Ecclesiæ, ut ex 1 Petri sumitur. Neque in hoc puncto, ut existimo, nobis est cum Sectariis controversia, et ideo ad illud supponendum, quantum ad sequentia necessarium est, credimus dicta sufficere; nam exacta hujus unitatis et omnium membrorum Ecclesiæ explicatio, in qua hæretici solent a catholicis dissentire, longiorem postulabat tractatum, sed præsenti instituto necessarins non est.

5. *Unitatem Ecclesiæ perpetuo duraturam esse statuitur.* — Secundo statuo, hanc Ecclesiam in sua unitate perpetuo usque ad diem judicii duraturam esse. Loquimur enim de militante; nam de triumphante nullus remanet ambigendi, aut controvertendi locus. Possetque hæc assertio facile probari de Ecclesia prout fuit a principio mundi usque ad Moysem, et de synagoga, prout fuit a Moyse usque ad Christum; hæc autem intentioni nostræ necessaria non sunt; et ideo illa, sicut et testimonia veteris Testamenti, quæ de duratione synagogæ loquuntur, prætermitto. Loquor ergo de Ecclesia Christi prout in novo Testamento ab ipso esse fundatam declaravi. Et ita ex promissionibus ejusdem Christi in novo Testamento factis hæc proprietas Ecclesiæ probanda relinquitur.

6. *Primum testimonium ex Matth. 16, et expositiones Patrum.* — Tres vero præcipue sunt hujusmodi promissiones. Prima est Matt. 16: *Super hanc Petram ædificabo Ecclesiam meam, et portæ inferi non prævalebunt adversus eam*. Nam in his verbis promisit Christus Ecclesiæ suæ stabilitatem et firmitatem, contra quam nec tyranni, nec hæretici, neque quilibet alii Christi hostes potuerunt prævalere. Illi enim omnes per portas inferni a Patribus intelliguntur. Specialiter vero Hieronymus ibi: *Vitia et peccata, et hæreticorum doctrinas per illas portas intellexit*; idem etiam Isai. 26; et fere idem Ambros., l. de Bono mortis, c. 12: *Donatur (inquit) Petro, ne portæ inferi prævaleant ei, portæ inferi*

istæ sunt terrene et infra: Istæ sunt criminum portæ. Epiphanius vero in Anchorato, quem Euthym. in Matt. sequitur, blasphemias hæreticorum, et illorum persecutions contra Ecclesiam intelligunt. Chrysostomus ad c. 2 Isai., et homil. 4 in c. 6, et homil. de Expulsione sua, et in alia supra citata de festo Pentecostes, et in Demonstratione, quod Christus sit Deus, semper exponit de tyrannis, et imperatoribus infidelibus per potentiam oppugnantibus Ecclesiam. Idem vero Psal. 147, in fine, recte id explicat de tota potentia inferni, et omnibus ministris, quibus ad expugnandam Ecclesiam diabolus utitur. Et sine dubio est verissimus sensus, quia verba sunt absoluta, et quasi per metonymiam sub portis comprehendunt quidquid in inferno continetur. Unde optime Damasc., Orat. de Transfigur. Domini: *Adversus hanc, inquit, inferorum portæ, hæreticorum ora, dæmonum organa impetum quidem facient, sed non prævalebunt.* Et infra: *Nam quod nunquam futurum sit ut evertatur, plane confidimus, cum Christus id affirmaverit.* Et in eamdem sententiam Euseb., lib. 1 de Præparat. Evangel., cap. 3: *Ecclesia (inquit) hoc nomine a Christo donata radices egit, ac usque ad astra Sanctorum orationibus glorificata, luce, ac fulgore orthodoxæ fidei splendet, neque hostilis terga dat, neque ipsis januis mortis cedit, propter pauca verba quæ ille protulit: Super hanc petram adificabo Ecclesiam meam, et portæ inferi non ralebunt adversum eam.* Simili modo Athanasius, in Orat. Unum esse Christum, propositis dictis verbis Christi, ait: *Fidelis sermo, et non vacillans promissio, et Ecclesia invicta res est, etiamsi inferus ipse commoveatur, etsi qui in inferno sunt mundi principes tenebrarum, tumultum faciant.* Denique August., lib. 1 de Symbolo, c. 6, explicans articulum Sanctam Ecclesiam, dicit, Ecclesiam esse templum Dei, de quo ait Apostolus, 4 ad Corint. 3: *Templum Dei sanctum est, quod estis vos; et subjungit: Ipsi est Ecclesia sancta, Ecclesia una, Ecclesia vera, Ecclesia Catholica contra omnes hæreses pugnans. Pugnare potest, expugnari non potest. Hæreses omnes de illa exierunt tanquam sarmenta inutilia de rite præcisa; ipsa autem manet in radice sua, in rite sua, in charitate sua. Portæ inferorum non vincent eam.* Imo addit Hilarius, canon. 16 in Matt., per hæc verba non solum esse promissum Ecclesiæ ut vinci non posset, sed etiam, *ut infernas leges, et tartari portas, et omnia mortis claustra dissolveret, ita ut portæ inferni*

non solum non possint resistere Ecclesiæ ad expugnandam illam, verum etiam nec ad resistendum illi sufficient. Nam ut frequenter iidem Patres animadvertisunt, Ecclesia, per persecutions tyrannorum, personarum numero et merito sanctitatis aucta est, et per contradictionem hæreticorum in scientia crevit, et in veritatem cognitione magis illuminata est.

7. *In sacra pagina præsentia Dei auxilium importat.* — Secunda promissio Christi Domini fuit Matt. 28: *Et ecce ego vobiscum sum omnibus diebus usque ad consummationem sæculi.* Cirea quam recte notavit Hieronymus: *Qui usque ad consummationem mundi sui præsentiam pollicetur, et illos ostendit semper esse victuros, et se nunquam a credentibus recessurum.* Constat igitur promissionem illam non esse factam solis præsentibus Apostolis, vel discipulis, sed templo Ecclesiæ perpetuo mansuro, de quo Paulus dixit: *Quod estis vos.* Unde scite August., lib. 6 Gen. ad litteram, cap. 8: *Omnibus dicebat, quos suos futuros ridebat: Ecce ego vobiscum sum.* Ergo in verbis illis vel supponitur, vel etiam promittitur Ecclesiæ perpetuitas. Nam ut de illa simus securi, præsentiam suam, id est, auxilium et protectionem Christus promittit, ut Hieronym. etiam exposuit, Isai. 41, et Zachar. 2; et Aug., tract. 50 in Joan.: *Secundum majestatem suam (inquit), secundum providentiam, secundum ineffabilem et invisibilem gratiam, impletur quod ab eo dictum est: Ecce ego vobiscum sum usque ad consummationem sæculi.* Et Leo Papa, Epist. 31: *Non deserit Ecclesiam suam divina protectio, dicente Domino: Ecce ego vobiscum sum, etc.; et ep. 92, in principi: Confirmans prædicatores Evangelii et sacramentorum ministros, dicit: Ecce ego vobiscum sum, etc.,* Et eodem modo intellexerunt hunc locum Chrysost., homil. 91 in Matt.; Beda, et alii expositores ibi; et Prosper, lib. 2 de Vocatione gent., cap. 2. Et est consueta locutio in Scripturis, ut per assistantiam Dei protectio, et singulare auxilium significetur; Act. 7: *Erat Deus cum eo, alludens ad illud Sapient. 10: Descenditque cum eo in foream;* et Jerem. 1: *Ne timeas a facie eorum, quia ego tecum sum.*

8. *Discrimen inter adventum Christi et Spiritus Sancti.* — Tertia demum promissio est similis præcedenti: nam, sicut ibi promisit suum peculiarem favorem, etiam secundum humanitatem suam, ita Joan. 14 peculiarem assistantiam Spiritus Sancti, et Patris simul,

ac suam pollicetur, dicens: *Ego rogabo Patrem, et alium Paracletum dabit vobis, ut maneat vobiscum in æternum, spiritum veritatis, in quibus verbis illud inter alia non parum notandum, promissionem non esse factam solis Apostolis. Nam licet intelligi possit, etiam in personis Apostolorum perpetuo mansisse Spiritum Sanctum postquam illum receperis- sent, tamen non hoc tantum ibi Christus pollicetur, sed etiam ita fuisse mittendum Spiritum Sanctum ad consolandos, docendos et protegendos fideles, ut non sit amplius ab Ecclesia recessurus in æternum, id est, quādiu mundus duraverit (hæc est enim in Scriptura usitata illius vocis significatio). Unde facite subinnuit discrimen inter adventum suum, et adventum Spiritus Sancti, quia ille venit ad fundandam Ecclesiam, quam erat sanguine suo acquisitus, post mortem ab ea recessurus; Spiritus autem Sanctus datus est Ecclesiæ, ut semper in illa maneat. Quod videtur notasse Chrysost., hom. 74 in Joan. dicens: *Hoc signat, quod neque post mortem abiit.* Et ita intellexit hanc promissionem Cyryll., lib. 9 in Joan., c. 45, dicens: *Quanvis in celos postquam e mortuis resurrexit, Dominus ascenderit, ut Deo pro nobis, juxta Paulum, appareat, adesse tamen semper per Spiritum suum fidelibus pollicetur.* Et eodem modo Tertullian., in Præscrip., cap. 38.*

9. Imo sic impleri hanc Spiritus Sancti donationem, aperte docet Paulus ad Ephes. 4, ubi prius dicit, Christum ascendentem in altum dedisse dona hominibus, postea vero addit: *Ipse dedit quosdam quidem Apostolos, quosdam autem Prophetas, alios vero Evangelistas, alios autem Pastores et Doctores ad consummationem Sanctorum, in opus ministerii, in ædificationem corporis Christi, donec occurramus omnes in unitatem fidei, et agnitionis Filii Dei, donec occurramus omnes in virum perfectum in mensuram ætatis plenitudinis Christi.* In quo testimonio expendenda sunt accurate illa verba: *Donec occurramus, etc.* Nam in eis aperte docet Paulus, Ecclesiam in Corpus Christi ædificatam, et variis ministeriis, et gratiis Spiritus Sancti gubernatam, usque ad generalem resurrectionem, et consummationem Sanctorum esse permansuram. Propter quæ testimonia in hoc fidei dogmate conveniunt omnes antiqui Patres Ecclesiæ, ut ex allegatis liquet perspicere, quibus et addi possunt Martialis, epist. ad Burdegal., c. 41, et Cyprian., epist. 55, ad Cornel.; Athanas. orat. Quod unus sit Christus: *Ecclesia* (inquit)

invicta res est, etiamsi infernus ipse commovatur; denique August., exponens de Ecclesia verba illa Psalm. 47: *Deus fundavit eam in æternum,* inquit: *Sed forte ista civitas, quæ mundum tenuit, aliquando evertetur; absit; Deus fundavit eam in æternum. Si ergo eam Deus fundavit in æternum, quid times ne cadat firmamentum?*

10. *Proposita veritas concluditur.—Amissa fide Ecclesia desineret.* — Ex quibus ultimis Augustini verbis possumus gradum facere ad concludendam ex dictis fundamentis præcipuam assertionem, et veritatem intentam, nimirum catholicam et universalem Ecclesiam non posse a vera et divina fide deficere, demonstrandam. Nam firmamentum, et veluti forma conjungens membra hujus Ecclesiæ, et inter se, et cum Christo, est fides; si ergo Deus fundavit Ecclesiam in æternum, quis timeat quod fides ejus possit in tota illa deficere? Etenim si tota Ecclesia fidem amitteret, eo ipso desineret esse Ecclesia, et inciperet esse synagoga Satanæ. Sicut gentiles sunt extra Ecclesiam, quia fidem ejus non ceperunt, et hæretici desinunt esse in Ecclesia, eo ipso quod fidem amittunt, et ideo in hoc gentilibus comparantur ab Hieronymo, Dial. contra Luciferian., in principio. Denique veritatem hanc satis confirmant Symbolum Apostolorum et Nicænum, quibus rex Angliæ fidem se adhibere profitetur. Docent enim Ecclesiam credendum esse Unam, Sanctam et Catholicam; non potest autem esse una, sine unitate fidei; neque sancta sine vera et divina fide, sine qua impossibile est placere Deo; neque catholica sine fide universalis, quæ omnia vera dogmata complectatur. Cum ergo Ecclesia non possit desinere esse quādiu mundus duraverit, neque etiam possit existere, quin simul sit fidelis et sancta, fieri etiam non potest ut a vera fide deficiat.

11. *Duplex objectio hæreticorum.—Responsio Augustini.* — Solent autem adversarii contra Catholicæ Ecclesiæ in fide stabilitatem multa objicere, et varios lapsus, seu defectiones Ecclesiæ recensere, tum quia tempore legis veteris tota Ecclesia a fide defecit, quando Synagoga vitulum adoravit, Exod. 33; tum etiam, quod Antichristi invalecente persecuzione funditus evertetur, dicente Paulo, 2 ad Thessalon. 2: *Nisi venerit discessio pri- mum, etc.*; et Christo, Lucas 18: *Cum venerit filius hominis, putasne inveniet fidem super terram?* Ex quibus volunt colligere, potuisse jam deficere, quia iam tempus Antichristi ad-

venit. Quibus cum Augustino unico respondemus verbo: *Credo illa quæ in Scripturis sanctis leguntur, non credo ista quæ ab hæreticis ratiis dicuntur.* Ita enim ille respondit Donatistis (lib. de Unitate Eccl., c. 13) dicentibus, suo tempore orbem terrarum apostasse, et in eis solis veram fidem permansisse, variisque exemplis ex Scriptura detortis utebantur, quibus obviat Augustinus dicens, ea se credere quæ in Scripturis leguntur, non ea quæ hæretici suis contentionibus persuadere conantur, et concludit: *Isti ergo vel imperite, vel fallaciter agentes, colligunt de Scripturis talia, quæ vel in malos bonis usque in finem permixtos, vel de devastatione prioris populi Judæorum dicta reperiuntur, et volunt ea retorquere in Ecclesiam Dei, ut tanquam defecisse, ac periisse de toto orbe videatur.*

12. *Fidem non defecisse in tota Synagoga, et primæ objectioni satisfit.* — Istius modi profecto sunt, quæ in præsentiarum sectarii objiciunt. Nam peccatum illud populi Judaici pertinet ad pravos mores et duritiem illius populi, non ad Ecclesiæ defectionem. Tum quia Synagoga non erat Ecclesia Christi, de qua tractamus; tum etiam quia non erat Ecclesia universalis, quæ tunc erat in mundo; nam in præputio poterant etiam tunc esse aliqui fideles, et justi; tum maxime quia falsum est, omnes de illo populo fidem tunc amisisse. Nam imprimis Moyses et Josue immunes omnino fuerunt ab illa culpa; deinde Aaron licet graviter peccaverit, cooperando populo in peccato idolatriæ, longe tamen verisimilius est in fide non aberrasse. Nunquam enim Moyses de hoc peccato illum reprehendit, sed solum de altero, ut patet ex illis verbis: *Quid tibi fecit hic populus, ut induceres super eum peccatum magnum?* Idemque aperie supponit August., q. 141, in Exod., dicens: *Quod jubet Aaron iniures demi ab auribus uxorum atque filiarum, unde illis faceret Deos, non absurde intelligitur, difficultia præcipere voluisse, ut hoc modo eos ab illa intentione revocaret.* Nam si hoc ita est, palam fit, Aaron non ex infidelitate peccasse, sed quia populo fortiter non restitit, et ex nimio humano timore illi cessit. Denique plures de populo in fide permansisse constat ex illis verbis Moysi: *Si quis est Domini, jungatur mihi;* non est enim Domini, nisi qui in eum credit; hujusmodi autem inventi multi sunt, qui Moyse juncti fuere ad injuriam Dei vindicandam.

13. *Fidem tempore Antichristi permansuram*

in Ecclesia, et secundæ objectioni fit satis. — Si militer commentitium plane est, et erroris plenum, peritum aliquando, vel omnino defecturam esse Ecclesiam tempore Antichristi. Quamvis enim tunc futura sit tribulatio magna, prædicta a Christo, Matt. 24, quæ multos turbabit, et a Christi tide dejicit, quam defectionem Paulus nomine *discessionis* præ-significavit, nihilominus Ecclesia Christi non omnino destruetur, neque omnia ejus membra fidem amissa sunt, ut satis Christus indicat, Matth. 24, dicens: *Nisi breviati fuissent dies illi, non fieret salva omnis caro, sed propter electos breviabuntur dies illi.* Et infra, plenius urgens, superaddit: *Ut in errorem inducantur, si fieri possit, etiam electi.* Semper ergo erunt aliqui electi et fideles, in quibus Ecclesia permaneat; imo eo tempore erunt illustrissimi martyres, et fidei catholicae confessores fortissimi. Quod insuper in fine illius objectionis tangitur, quod jam Antichristus venerit, propter primatum Pontificis ab adversariis est objectum; quam vero falsum sit, imo et ridiculum, in lib. 5 videbimus. Alia denique difficultas, quæ in hac objectione et responsione subest, quò pacto scilicet possit Ecclesia catholica in paucis credentibus perseverare, et quasi in angulo delitescere, in c. 6 declarabitur.

CAPUT IV.

NON POSSE CATHOLICAM ECCLESIAM ETIAM PER IGNORANTIAM IN REBUS FIDEI ERRARE.

1. *Erasio superioris argumenti.* — Discursum superiori capite factum posset imperitus vel hæreticus enervare, dicendo, illo quidem recte probari, Ecclesiam non posse in hæresim incidere, per quam fides amittitur; hoc autem non satis esse, neque obstare quomodo Ecclesia possit in multis erroribus versari, saltem per ignorantiam, quæ a culpa hæresis illam excusat, quia, licet illo modo erret, non desinet esse fidelis et sancta, ac subinde non destrueretur. Quod si hoc concedatur, habebunt hæretici vel schismatici excusationem aliquam dissentendi ab Ecclesia in aliquibus rebus, in quibus ipsam errare contendunt. Nam si id intelligent per solam ignorantiam, et sine hæresi, non videntur tam manifeste loqui contra promissionem Christi. Dux autem hoc posse proponi a Catholico potius quam ab hæretico, quia hæretici non tam moderate agunt cum Ecclesia

Christi, sed illi impudenter tribuunt lapsus et errores Scripturæ contrarios, qui nequeunt ab hæresi excusari, et ideo Ecclesiam veram fidem amisisse, ac subinde contra Christi promissionem e mundo periisse, in suæ hæresis excusationem, eadem impudentia nonnulli obtundunt.

2. Ecclesiam nec per ignorantiam posse errare. — Quamobrem dicendum ulterius est, non solum non posse Ecclesiam incidere in hæresim, verum etiam nec posse errare, sive per ignorantiam, sive quocumque alio modo, in aliquo dogmate in quo tanquam in veritate a Deo revelata, et ab omnibus fidelibus credenda, universa Ecclesia conspirat, docet et proponit. Nam hoc etiam in promissionibus Ecclesiæ factis continetur, et ideo nullus Catholicus potest de hoc vero dogmate dubitare. Quod imprimis declaratur ex verbis Pauli, *I ad Tim. 3: Ut scias quomodo oporteat te in domo Dei conversari, que est Ecclesia Dei vivi, columna, et firmamentum veritatis.* Comparatur enim columnæ, tanquam quæ stabilitate ac firmitate sua sinceram ac puram veram veritatem conservat, fidelesque omnes in veritate contra quoscumque ipsius oppressores obfirmat. Si autem ipsa posset errare, quo, quæso, pacto illa fides credentium et veritas credendorum niteretur? Quod autem hæc sit sententia et sensus Pauli, videtur adeo notum ex verbis, ut nulla fere expositione vel persuasione, sed imperturbati tantum animi lectione indigeat. Unde omnes expositores, tam antiqui quam recentiores, dici Ecclesiam columnam veritatis propter immobilitatem quam in veritate habet, declarant. Firmamentum autem, vel quia habet veritatem firmatam prodigiis et virtutibus, quæ a nullo alio, præterquam ab ipso Deo, fieri possent, ut exposuit Ambrosius; vel quia ab illa firmantur in veritate omnes credentes, ut recte D. Thomas docet, et significavit Chrysostomus dicens: *Columna est orbis Ecclesia, quæ fidem continet, ad prædicationem quippe veritas Ecclesiæ columnæ et firmamentum est.* Et clarius Theodoret.: *Ecclesiam (inquit) appellavit cætum credentium, quos dixit columnam et firmamentum veritatis, quia supra petram fundati stabiles et immobiles permanent, et rebus ipsis prædicant dogmatum veritatem.* Et Hieronymus etiam ibidem addit, *Ecclesiam dici columnam, in qua nunc sola veritas stat firmata, quæ sola sustinet ædificium.* Denique Augustinus, concion. *I in Psalm. 110*, tractans illa verba: *Qui fundasti terram super*

stabilitatem suam, et per terram interpretans Ecclesiam, exponit: *Non inclinabitur in seculum seculi, quia prædestinata est columna, et firmamentum veritatis.* Igitur quia a veritate declinare non potest in his, quæ firmiter et tanquam a Deo revelata credit, ideo columna est et firmamentum.

3. Præterea veritatem hanc confirmat promissio Christi supra tractata: *Ego rogabo Patrem, et alium Paracletum dabit vobis, spiritum veritatis.* Joan. 14. Non enim sine causa ibi peculiariter spiritum veritatis appellavit, sed ut illum distingueret ab spiritu erroris, per hoc satis significans se promittere Paracletum ut Doctorem veritatis, ut ipsem Christus declarasse videtur, Joan. 16, dicens: *Cum autem venerit ille Spiritus veritatis, docebit vos omnem veritatem.* Ostendimus autem in superioribus, promissionem illam Spiritus Sancti factam esse Ecclesiæ, ut maneat cum illa in æternum, sicut Christus ipse dixit; ergo Ecclesia semper habet Spiritum Sanctum tanquam rectorem et doctorem, a quo in veritatis cognitione specialiter regitur et illuminatur; et hinc provenit ut circa veritatem eadem Ecclesia errare non possit; et ideo dixit Cyrillus, lib. 10 in Joan., c. ult.: *Cum prædixerit Paracletum ad eos venturum, spiritum veritatis eum nominavit (ipse autem est veritas), ut intelligerent discipuli, non alienam a se virtutem missurum.* Et infra: *Hic ergo veritatis Spiritus ad omnem veritatem ducet, norit enim exacte veritatem, cuius spiritus est, et eam non ex parte, sed integre rerelexit.* Nam etsi ex parte in hac vita cognoscimus, ut ait Paulus, non manca tamen, sed integra veritas in hac parva cognitione nolis refusit. Quæ ultima verba sunt valde notanda, nam ex eis intelligitur necessitas hujus spiritus veritatis in Ecclesia, ut statim declarabo. Denique ob eamdem causam Tertullian., lib. de Præscriptionibus, c. 28, quasi irridens eos qui universalis Ecclesiæ errorem circa fidem tribuunt, ait: *Illam non respexerit Spiritus Sanctus, ut eam in veritatem deduceret, ad hoc missus a Christo, ad hoc postulatus de Patre, ut esset Doctor veritatis, neglexerit officium Dei villicus, Christi vicarius (id est vicem ejus gerens, et in docendi munere absentiam ejus supplens), sinens ecclesias aliter interim intelligere, aliter credere, quam ipse per Apostolos prædicabat?* quasi dicat hæc esse incredibilia, et a Christi promissione, et ab Spiritu Sancti providentia bonitateque aliena.

4. Ratione eadem veritas confirmatur.—Præ-

cluditur evasio. — Denique præter Christi promissionem et Scripturæ testimonia adeo expressa, possumus hanc veritatem persuadere ratione deducta ex principiis fidei. Quia si universalis Ecclesia posset quocumque modo errare in dogmatibus fidei, in nullo illorum posset esse columna et firmamentum veritatis, imo neque aliquid credere tanquam omnino certum, cui falsum subesse non posset, quia semper posset dubitare, et formidare, an per ignorantiam deciperetur. Respondebit fortasse aliquis, posse Ecclesiam, et debere firmiter credere ea quæ in Scriptura continentur, etiamsi in aliis errare posset. Sed hoc non evaeuat difficultatem. Tum quia de ipsismet Scripturæ libris dubitare posset, an per ignorantiam erret, credendo aliquem librum esse canonicum, qui non est, quia non est major auctoritas Ecclesiae in uno approbando, quam in alio. Tum etiam quia si in aliquo dogmate errare posset, etiam posset errare in intelligentia Scripturarum; ergo semper posset dubitare an verum sensum Spiritus Sancti assequatur, ac subinde nihil posset ex Scripturis certo credere. Tum præterea quia Ecclesia non solum debet esse certa de rebus quæ in Scriptura continentur, sed etiam de aliis dogmatibus non scriptis, ut antiquissimi Patres semper docuerunt, ex quibus paucos statim indicabo; nam hoc tantum obiter in præsenti attingimus. Igitur ut dogmata, quæ universalis Ecclesia credit, certa sint, necessarium est ut in nullo eorum errare possit. Unde recte dixit Nazianz., orat. 37, circa fin. : *Unum uni cohæret, et ex eis quedam rere aurea et salutaris fit catena;* et ideo si vel unum auferatur, aut reddatur incertum, tota catena disrumpetur, et inutilis fiet, sicut etiam dixit Ambrosius ad c. 9 Lutæ, lib. 6, in fine : *Unum horum si retraxeris, retraxisti salutem tuam, nam etiam heretici habere sibi Christum videntur, nemo enim Christi nomen negat, sed negat Christum, qui non omnia, quæ Christi sunt, confletur.* Ita ergo totam fidem Ecclesiae destruit, qui in quocumque dogmate illi errorem imponeat.

5. Responsio hæreticorum. — Rejicitur responsio, et superior conclusio Patrum auctoritate stabilitur. — Fortasse tamen adversarii hæc omnia facile concedent, nec inconveniens reputabunt admittere, posse Ecclesiam errando, et falsa dogmata tanquam veritates fidei tradendo, ad eum statum pervenire, in quo nihil ex fide divina, et omnino certa, sed omnia ex

propria opinione credat. Sed hæc responsio imprimis revolvitur in priorem errorem, quod vera Christi Ecclesia possit perire; nam in eo statu constituta non haberet veram et supernaturalem fidem; ergo non esset vera Ecclesia. Et ita quoad hanc partem hæc responsio sufficienter impugnatur ex dictis cap. præcedente, et fundamento et testimoniis quibus illud confirmatum est. Deinde si universalis Ecclesia ad eum statum pervenire potuisset, in quo nihil ex divina fide, sed tantum ex humana opinione crederet, ubi tunc inveniretur fides in terra? Profecto nullibi, quia si alicubi est vera fides, ab Ecclesia Catholica manavit; ergo si in ipsa Ecclesia illa fides certa et supernaturalis non est, multo minus extra illam esse potest. Quapropter qui sic respondent, et ita de Ecclesia sentiunt, dum illam infidelem faciunt, se ipsos fide carere ostendunt; unde enim illam habebunt, si per Ecclesiam illam non habent, cum Deus jam non per seipsum, sed per Ecclesiam homines doceat, ut aperte sumitur ex Paulo, ad Rom. 10? Tandem qui sic respondent, ideo errant, quia in Ecclesia non distinguunt humanam auctoritatem ab auctoritate Spiritus Sancti, qui eam regit, vel per eam loquitur, quoties dogmata fidei generaliter credit aut docet, juxta promissionem Christi nuper ostensam, et juxta mentem Apostolorum tradentium dogma fidei per illa verba: *Visum est Spiritui Sancto et nobis*, Act. 15.

6. Atque ita senserunt de auctoritate Ecclesiæ antiquissimi Patres. Irenæus, libro 3 Contra Hær., c. 3: *Non oportet, ait, adhuc apud alios quærere veritatem, quam facile est ab Ecclesia sumere, cum Apostoli, quasi in depositorum dires, plenissime in eam contulerint omnia quæ sunt veritatis, ut omnis quicumque relit, sumat ex ea potum ritæ, hæc est enim ritæ introitus, omnes autem reliqui fures sunt et latrones, propter quod oportet devitare quidem illos.* Ambrosius, lib. 3, ep. 25 ad Verselles: *Nemo inquit stat, nisi qui fide stat, nisi qui fixus stat sui cordis sententia. Alii quoque legimus: Tu autem hic sta mecum; ultrumque ad Moysem a Domino dictum est: Ubi tu stas, terra sancta est; et: Hic sta mecum, hoc est, mecum stas, si stes in Ecclesia, ipse enim locus est sanctus, ipsa terra secunda sanctitate, et optima virtutum messibus. Sta ergo in Ecclesia, sta ubi tibi apparui, ibi ego tecum sum. Ubi est Ecclesia, ibi firma statio tuæ mentis est, ibi fundamentum animi tui.* Et idem Ambros., lib. 3 de Fide, c. 7, dicens: *Serve-*

mus præcepta majorum; nec hæreditaria sit gnacula ausi rudi temeritate volemus.

7. Et Augustinus, de Utilit. credendi, c. 8, loquens de homine desiderante, et laborante pro veritate invenienda : *Si vis (inquit) finem hujusmodi laboribus imponere, sequere viam catholicae disciplinæ, quæ ab ipso Christo per Apostolos ad nos usque manavit, et ab hinc ad posteros manatura est.* Arbitrabatur enim Augustinus, nunquam defutaram illam fidem, neque aliter quam per traditionem et successionem in Ecclesia Catholica ad posteros fuisse perventuram. Unde in cap. 17, cum dixisset, magnum esse adjutorium fidei, communis populum consensu creditæ et prædicatae, subjungit : *Hoc factum est divina providentia per Prophetarum vaticinia, per humanitatem, doctrinamque Christi, per Apostolorum itineraria, per martyrum contumelias, cruces, sanguinem, mortes, per Sanctorum prædicabilem vitam, atque in his universis digna rebus tantis atque virtutibus pro temporum opportunitate miracula.* Cum igitur tantum auxilium Dei, tantumque fructum, profectumque rideamus, dubitabimus nos ejus Ecclesiæ condere gremio, cum usque ad confessionem generis humani ab Apostolica Sede per successiones Episcoporum, frustra hæreticis circumlatrantibus, et partim plebis ipsius judicio, partim Conciliorum gravitate, partim etiam auctoritatis obtinuit? Cui nolle primas dare, vel summæ profecto impietatis est, vel præcipitis arrogantiæ. Nam si nulla certa ad sapientiam, salutemque animis via est, nisi cum eos rationi præcolit fides, quid est aliud ingratum esse opi auxilioque divino, quam tanto labore prædictæ auctoritati velle resistere. Hactenus Augustinus, quibus tam luculenter et sapienter discursum factum stabilivit, ut nihil eis addi posse videatur. Et propterea idem Augustinus tantum defert auctoritati Ecclesiæ, ut in lib. contra epistolam Fundamenti, cap. 5, sic affirmare non dubitarit : *Ego Evangelio non crederem, nisi me Ecclesiæ Catholicae moveret auctoritas.*

8. Denique Hieronymus contra Luciferian., circa medium : *Quale est (inquit) ut leges Ecclesiæ ad hæresim transferas?* Et infra : *Si Ecclesiæ per totum orbem diffusam non habet Christus, aut si in Sardinia tantum habet, nimium pauper factus est.* Ac tandem postquam multa de Ecclesia protulerat, sub finem sic subjecit : *Poteram diem istiusmodi eloquii ducere, et omnes propositiones rivulos uno*

Ecclesiæ sole siccare; verum, quia jam multum sermocinati sumus, brevem tibi apertam que animi mei sententiam proferam, in illa esse Ecclesia permanendum, quæ ab Apostolis fundata usque ad diem hunc durat. Multaque similia in antiquis Patribus reperiuntur, quæ brevitati studens missa facio; idque lubentius, quod qui hos Patres non audierit, etiam si plures referantur, non credit, sed vana semper subterfugia excogitabit.

CAPUT V.

ROMANAM ECCLESIAM EAMDEM FIDEI STABILITATEM HABERE OSTENDITUR QUAM CATHOLICA, ET SECTORIORUM EVASIONI OCCURRITUR.

1. *Sectoriorum inter Romanam et Catholica Ecclesiam distinctio.* — Quæ in superiori capite ex divinis Scripturis, ad ostendendam Ecclesiæ Catholice in vera fide conservanda, ac perpetuo retinenda, immobilitatem et singularem Dei protectionem, adducta sunt, adeo sunt clara et aperta, ut neque ipsius Ecclesiæ hostes in universum audeant contra Ecclesiam Catholicam aperto marte pugnare. Distinguunt igitur inter Ecclesiam Catholicam et Romanam, et de Catholica non audent aperte dicere defecisse, aut veram fidem amisisse, quod tamen de Ecclesia Romana audacter affirmare non verentur. Et ita videntur sibi eludere omnia Scripturæ testimonia, et Christi promissiones, quia illæ factæ sunt Ecclesiæ Catholicæ, non Romanae. Et ut alias omittam Protestantes, non videtur ab hac sententia seu distinctione alienus rex Jacobus. Quamvis enim in suo libro eam expresse non proponat, ex dictis tamen ejus non obscure colligitur; prius enim se profitetur fidei catholicæ defensorem, quam fidem dicit esse veteris ac primitivæ Ecclesiæ : in quo indicat Ecclesiam Catholicam et primitivam non periisse, sed durare, nam ubi fides catholica est, non potest etiam non esse Catholica Ecclesia. Postea vero in præfatione, pag. 40, fateri non timuit, se neque esse, neque unquam fuisse in nostra Ecclesia, id est, in Romana; et in pag. 47, plane damnat fidei articulos, quos Romane (inquit) Ecclesia officina excudit, ante quingentesimum Christi annum inauditos; et pag. 48, haec habet verba : *Schismaticum me dicant licet, et a Romana Ecclesia defecisse, certe hæreticus esse nullo modo possum.* Distinguit ergo defectionem a

Romana Ecclesia a defectione a fide catholica, seu ab Ecclesia Catholica, perinde enim est. Pagin. item 54, post hæc et multa similia, subjungit: *Nondum Romæ religionis arcem attigimus, id est, caput Ecclesie, Petriquie primatum, nam qui hunc articulum negat, ex Bellarmini sententia catholicam fidem negat.* His ergo et similibus verbis satis insinuavit rex Jacobus, Romanæ Ecclesiæ fidem, durante et perseverante fide catholica defecisse.

2. Hæc distinctio ab antiquioribus hæreticis fuit inventa.—Neque est novus hic error, nam Wiclephus, in suo a. 37, damnato in Concilio Constant., sess. 8, dixit, Romanam Ecclesiam esse synagogam Satanæ, quod non invenio dictum ab ipso de Ecclesia Catholica, neque fortasse id diceret, ne seipsum, aut in synagoga Satanæ, aut extra Ecclesiam Catholica-
m constitutere videretur, quod quidem periculum omnibus hæreticis commune est. Et antea in eodem errore Pauperes de Lugduno, alias Waldenses, versati sunt, qui neminem in fide Ecclesiæ Romanæ, quæ tempore Sylvestri defecit, salvari posse affirmarunt, ut refert Anton., 4 p. Theolog., tit. 41, cap. 7, § 2; et Æneas Silvius, de Origine Bohemorum, cap. 3. Omnes vero hi vel in privatis opinionibus, et propriis fundantur erroribus, quos cum contrarios esse Romanæ fidei negare non possint, Romanam fidem veram non esse, ac subinde Romanam Ecclesiam a catholica defecisse tandem effutre coguntur.

3. Fundamenta erroris.—Vel certe moti sunt quia nihil excellens et universale de Romana Ecclesia credunt, sed illam tantum considerant ut particularem Ecclesiam, seu diœcensem, ac Episcopum ejus tanquam unum ex cæteris, nullam extra illam diœcesim habentem potestatem. Ex quo principio intulerunt, sicut aliae Ecclesie particulares, et earum pastores, etiam si Primate sint vel Patriarchæ, in rebus fidei labi potuerunt, et re ipsa sæpius defecerunt, ita etiam in Ecclesia Romana accidere potuisse, et revera evenisse. Et ita hi duo errores maxime conjuncti sunt, ut Wiclephus supra illos conjunxit, dicens: *Ecclesia Romana est synagoga Satanæ, nec Papa est immediatus et proximus Vicarius Christi.* Et ob eamdem causam videtur dixisse rex Angliæ, arcem fidei Romanæ esse articulum de primatu Petri, quia nos credimus in illo fundari, eo modo quo Christus promisit fundare suam Ecclesiam supra Petram, et ideo rex ipse, negando primatum,

coactus est fidem Romanam abnegare, ejusque defectionem sibi suisque persuadere.

4. Distinctio Romanæ Ecclesie in universalem et particularem.—Quapropter ut impugnationem hujus erroris ab hoc fundamento inchoemus, in Episcopo Romano duo munera, seu duplex pastoralis cura distinguenda est: una particularis, et propria Diœcesis Romanæ, cuius Pontifex est immediatus Episcopus; alia universalis cura totius Ecclesiæ Christi, cuius est universalis Pastor, et supremus Episcopus omnium particularium Ecclesiarum, licet non sit immediatus singularum Episcoporum. Et quidem de priori potestate et munere nulla est inter nos et Protestantes controversia. Posteriorem autem potestatem universalem, et supremam jurisdictionem etiam universalem in universam Ecclesiam negant adversarii; nos vero nunc illam supponimus, et articulum ejus ad catholicam fidem pertinere constanter asserimus, illius tamen probationem in librum tertium reservamus, ne propositum ordinem pervertere, et rem, de qua nunc tractamus, confundere cogamur. Hæc autem duo munera licet possent, sicut in se sunt distincta, ita etiam in personis se jungi, sicut in aliis episcopatibus separantur, nihilominus ex quo in Petro conjuncta fuerunt, nunquam separata inventa sunt, et ex divina ordinatione fortasse nunquam separabuntur: quod nunc non agimus, quia ad præsens institutum non refert, in libro tamen tertio obiter saltem attingemus. Hactenus ergo Romanus Episcopus idem fuit semper Catholicæ Ecclesiæ Episcopus, ut ab antiquis Patribus saepè nominatur.

5. Ex quo intelligimus, nomine Romanæ Ecclesie duo posse significari. Primo, particularem illam Ecclesiam, quæ intra terminos sue diœcesis concluditur, et suum habet proprium Episcopum tantum particularem, si præcise spectetur, ut immediatam jurisdictionem in illam exercet. Et de Ecclesia Romana sic sumpta non loquimur, quia constat illam non esse Ecclesiam Catholicam, sed membrum ejus. Ideoque de illa sic spectata dicere non possumus habere Christi promissionem nunquam deficiendi a catholica fide, quia nullibi talis promissio invenitur, neque in promissionibus factis universali Ecclesiæ necessario includitur, quia posset universalis Ecclesia permanere in vera fide, cum obedientia et unione ad Summum Pontificem, ut Pontifex et universalis Pastor est, etiam si particularis illa Ecclesia a fide deficeret, et

suum Episcopum a se per violentiam abjiceret, quod dicimus explicandæ rei gratia, quamvis nunquam Deum id esse permissum pie credamus.

6. Alio ergo modo illa Ecclesia, quæ veram Christi fidem retinet, solet dici Ecclesia Romana, quia Episcopo Romano paret, licet non uniatur illi ut privato Episcopo, sed ut universalı Pontifici, et sic etiam dicitur Romana fides, vel Romana religio, quæ a Pontifice Romano, ut Christi Vicario conservata, confirmata, definita, seu approbata est. Atque hoc etiam modo particularis Ecclesia Romana, ut conjuncta suo Episcopo non solum ut particulari Rectori, sed etiam ut universali Doctori totius Ecclesiæ, comparatur Catholicæ in privilegio non errandi nec deficiendi a fide, quamdiu in illa unione cum suo capite permanserit; nam hoc etiam habet quaelibet alia particularis ecclesia sub eadem ratione et unione spectata. Et sequitur ex generali principio, Petrum, videlicet, et Petri fidem esse immobile ecclesiæ fundamentum, in quo quamdiu Ecclesia, licet particularis, fundata fuerit, nunquam a vera fide aberrat. Semper tamen inter universalem Ecclesiam et particulares hoc disserimen considerari potest, quod quaelibet particularis potest ab hac petra disjungi et cadere: universalis autem non potest, quia de sola illa scriptum est: *Portæ in seru non prævalebunt adversus eam.*

7. Sic igitur declarata et intellecta vobis significacione, dicimus fidem Ecclesiæ Romanæ esse catholicam fidem, neque Romanam Ecclesiam ab ea defecisse, nec deficere potuisse, propter Petri cathedralm in ea præsidentem. Assertionem hanc ut certam et necessariam in fide Catholicæ proponimus, et eam ex divina Scriptura in hunc modum colligimus. Fides Petri catholicæ fuit, et deficere non potest; sed fides Ecclesiæ Romanæ est fides Petri; ergo fides Ecclesiæ Romanæ est fides catholicæ, a qua nunquam illa sedes potest deficere. Argumentatio legitima est; singulæ vero propositiones in ea assumptæ per partes probandæ sunt. Prima ergo pars per se nota est, scilicet, fidem Petri fuisse catholicam: nam si intelligatur de persona Petri, neque ab hereticis revocatur in dubium; nam fides Petri est, quæ universo orbi a principio prædicata fuit; et illa maxime est Apostolica et primitiva. Si vero intelligatur etiam de sede Petri, vel ipsi Protestantes confitentur per plures annos durasse eamdem catholicam fidem in eadem sede Petri, testantur-

que sufficienter Hieronymus et Augustinus usque ad sua tempora; ille in Epistola ad Damasum de nomine hypostasis, hic vero in libro contra epistolam Fundamenti, cap. 4, ubi inter quatuor, quæ in gremio Ecclesiæ Catholicæ ipsum justissime tenebant, hoc numerat: *Ab ipsa sede Petri Apostoli, cui pascendas oves suas post resurrectionem suam Dominus commendarit, usque ad presentem episcopatum successio sacerdotum.* Ubi aperte supponit illam fuisse tunc Catholicam Ecclesiam, quæ cum sede Petri erat conjuncta, et oves, quæ Petro fuerant commendatae, continebat; ac subinde fidem catholicam in ea sede usque ad illud tempus permansisse, quod in puncto sequenti pluribus testimoniis et rationibus a fortiori confirmabitur.

8. *Expenditur in nostram rem locus Lucæ 22.*—Superest ergo ut alteram partem in propositione assumptam comprobemus, nimirum, hanc fidem non posse deficere in Petro, non solum quoad personam, sed etiam quoad sedem, et consequenter non tantum pro aliquo definito tempore, sed simpliciter quamdiu Ecclesia Christi duraverit. Probatur autem præcipue ex verbis Christi, Lucæ 22: *Simon, ecce Satan aspettivit vos, ut cibraret sicut triticum, ego autem rogavi pro te, ut non deficiat fides tua, et tu aliquando conversus confirma fratres tuos.* Nam recte dixit Tertullian., lib. de Fuga in persecut., c. 22, rogasse ibi Christum, ne tantum diabolo permetteretur, ut fides Petri periclitaretur. Quam orationem fuisse efficacem, et obtinuisse quod petebat, satis persuadet ipsius Christi excellentia; exauditus enim est pro sua reverentia in his quæ absolute postulabat, ut in praesenti declaravit per illa verba: *Ego rogarvi pro te,* magisque declarat, vel potius supponit imprecationem, et infallibilem effectum in illis ultimis verbis: *Et tu aliquando conversus confirma fratres tuos;* et ideo bene interrogat Leo Papa IX: *Erit quisquam tantæ dementia, qui orationem illius, cuius relle est posse, audeat in aliquo vacuam putare?* Igitur nulla fere in hac parte est controversia aut difficultas. Esse autem potest in alio punto, an, scilicet, illa oratio facta sit tantum pro persona Petri, et ideo cum illo finitus fuerit ejus effectus, vel potius facta sit pro sede Petri in persona ejus, et ideo tamdiu duret, quamdiu sedes durat; probandum ergo nobis relinquitur hoc posteriori modo esse intelligendam.

9. Quod imprimis probamus auctoritate mul-

torum Summorum Pontificum, qui hanc prærogativam suæ dignitatis ac sedis agnoscentes, ex his verbis Christi illam comprobarunt, qui licet in propria causa loqui videantur, nihilominus fide dignissimi sunt, tum quia antiquissimi et quasi per continuam traditionem hoc docuerunt; tum etiam quia multi eorum sunt sancti et martyres, qui veram et catholicam fidem sanguine suo consignarunt; tum denique quia etiam antiquissimi Patres eumdem honorem deferunt Romanæ Sedi, et fidei. Utuntur ergo illo testimonio ad hanc veritatem confirmandam, Lucius Papa, epist. ad Episcopos Galliæ et Hispaniæ, circa finem, ubi ait, suam sedem, normam Apostolicæ fidei, ut ab auctoribus suis Apostolorum Christi Principibus illam percepit, illibatam tenere, secundum Salvatoris nostri divinam pollicitationem. Et refert verba citata. Similia habet Marcus Papa, in ep. ad Athanas., quæ habetur in tom. 4 Ep., p. 1, licet in tomis Concilior. non referatur; et Felix I, ep. 3, ad Benignum; et Agatho Papa, in ep. ad Constantini imperator., quæ in actione 4 sextæ Synodi lecta est, et in act. 8 probata; et Nicolaus I, in ep. ad Michaeliem imperatorem, post medium; et Leo IX, in ep. ad Michaeliem, c. 7; et Innoc. III, in c. Majores, de Baptism.; latius vero quam cæteri hoc declaravit Leo Papa, serm. 2, in Natali Petri et Pauli, c. 3, ubi positis Evangelii verbis, subiungit: *Commune erat omnibus Apostolis periculum de tentatione formidinis, et divinae protectionis auxilio pariter indigebant, quoniam diabolus omnes exagitare, omnes cupiebat elidere, et tamen specialis a Domino Petri cura suscipitur, et pro Petri fide proprio supplicatur, tanquam aliorum status certior sit futurus, si mens Principis victa non fuerit. In Petro ergo omnium fortitudo munitur, et divinae gratiae ita ordinatur auxilium, ut firmitas, que per Christum Petro tribuitur, per Petrum Apostolis conferatur. Nam et post resurrectionem suam Dominus beato Petro Apostolo, post regni claves, ad trinam aeterni amoris professionem, mystica insinuatione ter dixit: Pasce oves meas; quod et nunc procul dubio facit, et mandatum Domini pius pastor exequitur confirmans nos exhortationibus, et pro nobis orare non cessans, ut nulla tentatione superemur. Quæ verba repetit idem Pontifex, in serm. 3 de Assumptione sua, et adjungit: Juste in ducis nostri meritis et dignitate lætamur, gratias agentes sempiterno Regi redemptori nostro, Domino Jesu Christo, qui tantam*

potentiam dedit ei, quem totius Ecclesie principem fecit, ut si quid etiam nostris temporibus recte per nos agitur, illius operibus, illius sit gubernaculis deputandum, cui dictum est: Et tu aliquando conversus confirma fratres tuos.

10. *Confirmatur primo.*— Ex quibus verbis aliquæ colliguntur rationes, quibus hic sensus confirmatur. Una sumitur ex mutatione verborum Christi: nam prius ad omnes Apostolos locutus est, omnes fore tentandos prædicens: postea vero Petro specialiter dicit: *Ego rogavi pro te;* ergo aliquid etiam speciale pro illo impetravit. Personalis autem perseverantia non fuit singularis Petro, nam pro aliis etiam Christus oravit, Joan. 17, dicens: *Pater Sancte, serva eos in nomine tuo, quos dedisti mihi.* Et quamvis eo tempore, quando pro Petro rogavit, nondum illam generalem orationem obtulisset, nihilominus nullus fere peculiaris favor Petri fuisset, nisi aliquod specialius privilegium pro illo postulasset. Christus autem in illo singulari modo vocandi Petrum, ut attenderet, *Simon, Simon* (sic enim habent græca), et orandi pro illo, majorem prærogativam sine dubio significare voluit. Imo si attente res consideretur, in utroque loco pro Petro et omnibus Apostolis, et universa Ecclesia præsente et futura, Christus Dominus oravit, diverso tamen modo: nam apud Joannem prius expresse oravit pro omnibus Apostolis, ex quibus Petrus unus, et præcipuus erat, et in illis virtute Ecclesia continebatur, propter quam præcipue illa oratio fiebat, quam paulo inferius consummavit Christus dicens: *Non pro eis rogo tantum, sed et pro eis qui credituri sunt per verbum eorum in me, ut omnes unum sint, utique unitate fidei, et catholicæ Ecclesiæ.* Apud Lucam vero Christus directe et expresse oravit tantum pro Petro, indirecte vero, et consecutione quadam oravit etiam pro aliis Apostolis, ut in subiunctis verbis denotavit: *Et tu aliquando conversus confirma fratres tuos. Ut firmitas, que per Christum Petro tribuitur, per Petrum Apostolis conferatur,* quemadmodum ex Leone paulo superius retulimus. Atque inde ad totam Ecclesiam oratio illa extenditur, quæ sub nomine fratrum etiam comprehenditur, ut ibi Theoph. indicavit, dicens: *Planus intellectus est, quia te habeo ut Principem discipulorum, postquam, negato me, severis, et ad penitentiam veneris, confirma cæteros. Hoc enim te decet, qui post me Ecclesiæ petra es, et fundamentum.* Unde Agatho Papa supra: *Dominus fidem Petri non defec-*

turam promisit, et confirmare eum fratres suos admonuit, quod Apostolicos Pontifices meæ exiguitatis prædecessores confidenter fecisse semper, cunctis est agnatum. Et Leo IX, supra, eundem sensum indicans, dixit : *A sede Principis Apostolorum, a Romana videlicet Ecclesia, tam per eundem Petrum, quam per suos successores reprobata, convicta, et expugnata sunt omnium hæreticorum commenta, et fratrum corda in fide Petri, quæ hactenus non defecit. neque unquam deficiet, sunt confirmata.*

41. Confirmatur secundo.—Unde ex his ultimis verbis aperitur magis sensus prioris promissionis, et alia optima ratio prædictæ interpretationis redditur. Ita enim hic jubetur Petrus confirmare fratres suos, sicut Joan. 21 jussus est pascere oves Christi ; iidem enim sunt, qui hic vocantur fratres, et ibi oves ; sed ibi vocantur oves propter mansuetudinem et obedientiam subditorum, hic vero vocantur fratres, ut ostendatur Ecclesiastici pastoris officium non esse dominari, sed confirmare imbecilliores tanquam fratres, *forma factus gregis ex animo*, ut dixit idem Petrus, epist. 1, c. 5. Sicut ergo dictum est : *Pasce oves meas*, non Simoni pro illa tantum persona, sed Petro pro munere quod illi conferebatur, ut in successoribus duraret, ita cum illi dicitur : *Confirma fratres tuos*, præindicatur præcipua quædam pars illius muneris, quæ est confirmare, et quasi sustentare fratres et Ecclesiam in vera fide ; nam licet hoc principaliter fiat virtute divina, tamen hæc utitur homine ut instrumento, ut homines modo hominibus accommodato gubernet. Et quamvis alii Pastores et Doctores Ecclesiæ, docendo et prædicando, ad hoc cooperentur, nihilominus id præstare ex legitima et ordinaria potestate, et certa auctoritate, discernendo falsa a veris, hæreses damnando, et catholicam doctrinam definiendo, illius est proprium, cui dictum est : *Confirma fratres tuos*. Unde sicut hoc munus ad veræ fidei conservationem necessarium est in Ecclesia, ita verba illa dicta sunt Petro ratione pastoralis muneris perpetuo in Ecclesiam diminaturi, in illaque semper duraturi ; ergo etiam prior missio, *ut non deficiat fides tua*, facta est non tantum personæ, sed etiam muneris et sedi Petri. Ideo enim pro illo specialiter Christus oravit, illique privilegium illud impetravit, quia munus confirmandi fratres illud auxilium ex parte Dei postulabat ; ergo sicut munus futurum erat perpetuum in sede Petri, ita etiam privilegium. Et hoc totum si-

gnificavit Leo I, in illis verbis : *Pro fide Petri proprie supplicatur, tanquam aliorum status certior sit futurus, si mens principis victa non fuerit* ; et in aliis quæ supra retulimus. Et apertius Theoph., postquam dixit : *Quia te habeo ut Principem discipulorum, confirmare ceteros*, adjungit : *Intellexerit autem quis, non solum de Apostolis dictum, quod confirmati fuerint a Petro, sed de omnibus, qui usque ad consummationem seculi futuri sunt fideles.* Quod licet ab ipso videatur postea exponi ratione exempli, quod in persona Petri suum delictum flentis præcessit, et in memoriis hominum perpetuo manet, Christus tamen non de exemplo locutus est, sed de confirmatione per verbum fidei, et ideo per sedem Petri id perpetuo fieri melius intelligimus.

42. Atque ita etiam potest hæc veritas, et illius promissionis interpretatio ex collatione hujus loci cum aliis, in quibus primatus Petri fundatur, amplius stabiliri. Quod etiam significavit Leo I in citatis verbis, conforens hæc verba : *Confirma fratres tuos*, cum illis : *Pasce oves meas*, quam comparationem jam declaravimus. Unde quamvis hæc promissio tam clara non esset, ex solo munere pascendi oves Christi in doctrina fidei, sufficienter colligeremus esse necessarium hoc privilegium in sede Petri. Quia si in illa sede posset fides vacillare, in tota Ecclesia Christi periclitari posset ; tum quia Ecclesia tenetur parere Petro, et successoribus ejus ex cathedra docentibus, ut ex allegatis verbis Christi colligitur, quia primus et maxime necessarius pastus fidelium est vera fidei doctrina ; tum etiam quia alias nulla esset in Ecclesia certa ratio veram a falsa doctrina discernendi, et ita non possent fideles firmari, nedum in catholicæ fide inconcusse confirmari. Quam rationem amplius in sequentibus urgebimus. Et simili modo hanc veritatem confirmat illa missio Christi : *Super hanc petram ædificabo Ecclesiam meam*, illam enim petram esse Petrum, et successores ejus, infra ostendemus. Dicitur autem petra propter firmitatem ad sustentandum ædificium, et ideo sicut Ecclesiæ ædificium perpetuum futurum erat, ita etiam petra, ut ad sustinendum illud ædificium apta esset. Quare sicut Ecclesia perpetua esse non potest, nisi ejus fides deficere non possit, ita nec petra illa esset, nec firmitatem haberet ad sustentandum illud ædificium, si posset in fide deficere. Et ideo recte dixit Origen., tract. 1, Matt. : *Neque adversus petram, super quam Christus ædificat Ec-*

clesiam, neque adversus ipsam Ecclesiam portæ inferi prævalebunt. Et Cyrill., in Thesauro (ut in catena D. Thom., Mat. 16, allegatur), dixit : Secundum hanc Domini promissionem Ecclesia Apostolica Petri (id est Romana) ab omni seductione hæreticaque circumventione manet immaculata, super omnes prepositos, et Episcopos, et super omnes Primates Ecclesiarum et populorum, in suis Pontificibus in fide plenissima, et auctoritate Petri. Et cum aliæ Ecclesie quorundam errore sint verecundatæ, stabilita inquassibiliter ipsa sola regnat, etc. Quæ verba licet in Thesauro Cyrilli nunc non inveniantur, ex D. Thomæ auctoritate magnam fidem habent.

CAPUT VI.

STABILITAS FIDEI ET ECCLESIAE ROMANÆ TRADITIONE OSTENDITUR.

1. Expenduntur testimonia antiquorum Patrum asserentium fidem Romanæ Ecclesiae et Catholicæ coincidere. — Primum testimonium. — Ex dictis in superiori capite, probatum relinquitur fidem Ecclesiae Romanæ esse fidem Petri, ac subinde esse fidem catholicam, a qua sedes illa deficere nequit. Possumus autem ipso rerum eventu, et Patrum traditione, eamdem veritatem et promissionem confirmare. Nam si Apostolica Sedes in hoc speciale privilegium non haberet, aliquando in fide defecisset, etiam ex cathedra docens, vel hæresim aliquam approbasset, sicut in aliis ecclesiis etiam ab Apostolis inchoatis accidisse videmus; nam hæc est humana fragilitas et conditio, ut in tanta varietate et multitudine personarum facile contingat error, nisi Spiritus Sanctus assistat. Hoc autem in Romana Ecclesia nunquam accidisse, præter allegatos Pontifices, testatur Eusebius Papa, ep. 3 ad Episcopos Tusciae et Campaniae, dicens : *Prima salus est, rectæ fidei regulas custodire, et a constitutis Patrum nullatenus deviare. Nec potest Jesu Christi Domini nostri prætermitti sententia, dicentis : Tu es Petrus, et super hanc petram ædificabo Ecclesiam meam. Et hec, quæ dicta sunt, rerum probantur effectibus, quia in Sede Apostolica extra maculam semper est catholica serrata religio.* Et Gelasius Papa, in epist. ad Anastasium August. : *Hoc est (inquit) quod Sedes Apostolica magnopere caret, ut quia mundo radix est Apostoli gloria confessio, nulla rima pravitatis, nulla prorsus contagio macu-*

letur. Nam si (quod Deus avertat, quod fieri non posse confidimus) tale aliquid proveniret, unde cuiquam resistere auderemus errori, vel unde correctionem errantibus posceremus ?

2. Secundum, Augustini et Hieronymi. — Neque soli Romani Pontifices, sed etiam alii Patres, tam Latini quam Græci, de Romana Ecclesia, seu cathedra Petri ita senserunt. Re-tuli jam Augustinum contra Epistolam Fundamenti, c. 4, ubi dum pro signo Catholicæ Ecclesiae ponit successionem Pontificum Romanorum, satis clare demonstrat, Catholicam Ecclesiam a Pontifice Romano non disjungi, ac subinde fidem Romanam et Catholicam eamdem esse. Unde idem Augustinus, lib. 2 de Grat. Christi et peccato originali, c. 8, de Pelagio ait : *Romanam Ecclesiam fallere minime valuit, recoluit enim beatissimus Papa Zozimus, quid imitandus prædecessor ejus de ipsis senserit gestis. Attendit etiam, quid de illo sentiret prædicanda in Domino Romanorum fides, quorum adversus ejus errorem pro veritate catholica studia consonantia concorditer flagrare cernebat.* Et lib. 2 contra duas Epist. Pelagianor., c. 4 : *Cum litteris (inquit) venerabilis Innocentii catholicæ fidei clareret antiquitas, profecto Ecclesiae Romanæ prævaricator esset, qui ab illa sententia deviaret.* Ubi (sicut alias sæpe) fidem Sedis Romanæ tanquam Catholicam recipit ac veneratur. Secundo, Hieronym., epist. 57 ad Damasum : *Quoniam retuso, etc., illa habet verba : Cathedrae Petri communione consocior, super illam petram ædificatam Ecclesiam scio, qui cumque extra hanc domum agnum comederit, profanus est, etc.* Ubi aperte eamdem censem esse Catholicam Ecclesiam, quam Romanam. Ex quo etiam in lib. 4 Apologiae contra Ruffinum, col. 3, sic colligit : *Fidem suam quam vocat? eamne qua Romana pollet Ecclesia? an illam que in Origenis voluminibus continetur? Si Romanam respondet, ergo Catholici sumus;* ubi etiam diserte docet, eamdem esse fidem Catholicam et Romanam. Illam autem etiam esse immaculatam, in libro 3 ejusdem Apologiae, parum ante medium, testatur ita : *Scito Romanam Sedem Apostolica voce laudatam istiusmodi præstigias non recipere, etiamsi Angelus aliter annuntiet, quam semel prædicatum est;* et in Proœmio libri 2 ad Galat., fidem, et religionem Romanorum laudat, concluditque : *Non quod aliam habeant Romani fidem, nisi hanc quam omnes Christi Ecclesiaz, sed quod in eis devotio major sit,* etc.

3. Tertium testimonium, Ambrosii.—Tertius testis sit B. Ambrosius, qui in libro de obitu Satyri fratris, versus finem, prudentiam et cautionem sui fratris referens, inquit: *Advocavit ad se Episcopum, neque ullam veram putarit, nisi vera fidei gratiam, percunctatusque ex eo est, utrumnam cum Episcopis catholicis, hoc est, cum Romana Ecclesia conveniret.* In quibus etiam verbis unionem cum Ecclesia Romana et cum Catholica eamdem esse, ac individuam sentit. Unde lib. 1, ep. 4, ad imperatores sic scribit: *Totius orbis Romani caput, Romanam Ecclesiam, atque illam sacro-sanctam Apostolorum fidem, ne turbari sine-ret, observeanda foret clementia vestra, inde enim in omnes venerandæ communionis jura dimanant.* Et in epist. 7 ejusdem libri, ad Syricium Papam: *Credatur (inquit) Symbolo Apostolorum, quod Ecclesia Romana intemeratum semper custodit, et servat; et serm. 2 de Sanctis, qui est de Cathedra Petri, et serm. 11, qui est secundus de Petro et Paulo, egregie ad rem nostram declarat, quomodo Ecclesia in Petro fundata sit, et inde habeat perpetuam fidei firmitatem.*

4. Quartum, Cypriani.—Quartus sit Cyprianus, qui eodem itidem modo Ecclesiam Romanam veneratus est; præsertim vero epist. 55 ad Cornelium, col. 12, de quibusdam hæreticis ait: *Navigare audent, et ad Petri cathedram, atque ad ecclesiam principalem, unde unitas sacerdotalis exorta est, nec cogitare eos esse Romanos, quorum fides, Apostolo prædicante, laudata est, ad quos perfidia habere non possit accessum.* Unde idem Cyprian., epist. 52, in princip.: *Scriptisti (inquit) ut exemplum earumdem litterarum ad Cornelium, collegam nostrum, transmitterem, ut deposita omni sollicitudine, jam sciret te secum, hoc est cum Ecclesia Catholica, communicare.* Ubi aperte sentit, idem esse communicare Ecclesiæ Romanae et Catholice. Et epist. 76 ad Magnum: *Ecclesia (inquit) una est, quæ una et intus et foris esse non potest.* Unde infert: *Si apud Novatianum est, apud Cornelium non fuit; si vero apud Cornelium fuit, qui Fabiano legitima ordinatione successit, Novatianus in Ecclesia non est.* Ubi etiam Catholicam Ecclesiam unam cum Romana esse supponit. Idem in epist. 40, circa med.: *Una Ecclesia, et cathedra una super Petrum Domini roce fundata.* Et infra: *Quisquis alibi collegerit, spargit.* Idem fere repetit lib. de Unit. Eccl., non longe a princip., et inter multa alia dicit: *Quia cathedram Petri, super quam fundata est*

Ecclesia, deserit, in Ecclesia se esse confidit?

5. Quintum, Irenæi.—Quintus est Irenæus, libro tertio *Contra hæreses*, capite tertio: *Quoniam (inquit) longum est omnium Ecclesiarum numerare successiones, maximæ, et antiquissimæ, et omnibus cognitæ, a gloriostissimis duobus Apostolis Petro et Paulo Romæ fundatæ et constitutæ Ecclesie, eam, quam habet ab Apostolis traditionem, et annuntiatam hominibus fidem, per successiones Episcoporum pervenientem usque ad nos, indicantes, coufundimus omnes eos, qui quoquo modo, vel per sui placentiam malam, vel vanam gloriam, vel per cæcitatem, et malam sententiam, præter quam oportet, colligunt.* Ad hanc enim Ecclesiam propter potentiores principitatatem, necesse est omnem convenire Ecclesiam, hoc est, eos, qui sunt undique fideles, in qua semper ab his, qui sunt undique, conservata est ea, quæ est ab Apostolis traditio.

6. Sextum testimonium, Athanasii et Episcoporum Ægypti.—Sexto, addere possumus Athanasium, et Episcopos Ægypti, in epist. ad Marcum Papam, in qua petunt exemplaria Concilii Nicæni, ubi inter alia dicunt: *Optamus ut a vestra sanctæ sedis Ecclesie auctoritate, quæ est mater et caput omnium Ecclesiarum, ea ad correctionem et recreationem fidelium orthodoxorum percipere per præsentes legatos mereamur, quatenus vestra fulti auctoritate, vestrisque precibus roborati, illæsi a memoratis æmulis sanctæ Dei Ecclesiæ et nostris evadere, nobisque commissos eruere valeamus.* In quibus verbis manifeste supponit, sanam et integrum fidem in Romano Pontifice tunc fuisse, et præterea in illo esse auctoritatem ad corrigendum hæreticos, et fideles in vera fide confirmandos.

7. Septimum testimonium, Episcoporum provinciae Tarragonensis.—Septimo, adducere licet possumus testimonium Episcoporum provinciae Tarragonensis, in epist. 2 ad Hilarium Papam, ubi prium recognoscunt privilegium Ecclesiæ Romanae de primatu Vicarii Christi; deinde subjungunt: *Proinde nos Deum in vobis primitus adorantes, cui sine querela servitis, ad fidem recurrimus Apostolico ore laudatam, inde responsa querentes, unde nihil errore, nihil præsumptione, sed pontificali totum deliberatione præcipitur.* Et his annumerari potest Ruffinus, in Exposito Symboli, in principio, dicens: *In diversis Ecclesiis aliqua in his verbis iuveniuntur adjecta, in Ecclesia tamen urbis Romæ hoc non deprehenditur factum, quod ego propterea esse*

arbitror, quod neque hæresis ulla illuc sumpsit exordium, et mos ibi servatur antiquus. Verba etiam supra ex Cyrillo citata veritatem hanc satis confirmant, quæ præter D. Thomam, refert etiam Gennadius, Archiepiscopus Constantinopolitanus, in Defensione Concilii Florentini, c. 5, sect. 12, paulo tamen aliter, videlicet : *Oportet nos tanquam membra caput sequi, id est, Romanum Pontificem, et Apostolicam Sedem, a qua debemus petere, quid credere et sentire debeamus, ac tenere, quia ipsius tantum est confutare, redarguere, confirmare, ordinare, solvere, et ligare.* Denique allegari solet Theodoretus, in epist. ad Renat., presbyterum Rom., dicens : *Tenet sancta ista sedes gubernacula regendarum cuncti orbis Ecclesiarum, cum propter alia, tum quia semper hæretici factoris expers permanxit.* Quia vero hanc epistolam videre non potui, addo, sententiam illam esse valde consentaneam iis, quæ tradit idem Theodoret., in epist. ad Leonem Papam, quæ in secundo tomo Conciliorum habetur, ubi Ecclesiam Romanam maximis laudibus extollit, præcipue autem ait : *Eam insigniter exornat fides, et fide dignus testis divinus Apostolus, qui clamat : Fides vestra annuntiatur in universo mundo.* Et de ipsa Sede Romana dicit : *Vobis per omnia primos esse conrenit, vestra enim Sedes omnium est maxima, et præclarissima, et quæ præest orbi terrarum.* Et infra : *Habet autem communium quoque Patrum, et veritatis Doctorum, Petri et Pauli sepulchra, quæ fidelium animas illuminant.* Et infra : *Illorum autem Deus nunc quoque illorum sedem claram, insigneque reddidit, cum vestram sanctitatem in ea collocaverit, quæ radios fidei orthodoxæ emittit.*

8. *Erasic.*—*Responsio.*—Dicet fortasse aliquis, hæc dicta esse a Patribus, non propter singulare aliquod privilegium Episcopi Romani in fide illibata conservanda, sed solum propter insignem pietatem, et sinceram Romani populi fidem, quæ in initio Ecclesie maxime viguit. Hoc enim solum significavit Paulus in verbis illis ad Rom. 1 : *Gratias ago Deo meo per Jesum Christum pro omnibus vobis, quia fides vestra annuntiatur in universo mundo.* Sicut etiam 1 Thessal. 1, laudat Thessalicensem fidem, dicens : *Excipientes verbum in tribulatione multa cum gaudio Spiritus Sancti, ita ut facti sitis forma omnibus credentibus,* etc. Respondetur non esse dubium quin' Apostolus in dictis verbis Romani populi fidem commendet, et nonnulla

verba Sanctorum Patrum eamdem laudem commemorent; nihilominus tamen frequenter Ecclesiam Romanam laudent, quia fidem semel susceptam integrum et immaculatam semper custodivit, ut ex allegatis verbis satis constat.

9. *Instantia.*—*Confutatur.*—At enim instabunt adversarii, hæc dicta fuisse ab his Patribus de Ecclesia Romana ante sexcentesimum Christi annum, quo tempore ipsi etiam fatentur veram ac puram fidem catholicam in Romana Ecclesia ac Sede perdurasse; quod tamen non obstat quominus postea paulatim ac sensim ceciderit, et puritatem fidei amiserit, ut ipsi confingunt. Sed hoc imprimis non enervat dictorum antiquorum Patrum testimonia, quia illi non solum factum narrant, sed etiam jus (ut ita dicam) seu fundamentum illius facti perpetuum esse ostendunt, et ita non solum docent fidem Romanam fuisse suo tempore catholicam, sed etiam hoc habere ex proprio privilegio, et prærogativa, quæ perpetuo in illa sede duratura est. Hoc patet imprimis ex illis, qui hoc fundant in promissione Christi : *Ut non deficiat fides tua, ut jam satis explicatum est.* Deinde eadem est ratio de illis, qui hoc colligunt, *quia super hanc petram ædificata est Ecclesia,* ut dixit Hieronymus. Item ex eo quod pro signo certo Ecclesiæ Catholicæ ponunt unionem cum Ecclesia Romana, ut ex Hieronymo et Ambrosio constat, et maxime ex Augustino. Quando enim inter signa Catholicæ Ecclesiæ ponit successionem Episcoporum Romanorum, duo sine dubio potissimum significat. Unum est, seriem ac successionem illius episcopatus inter tot persecutions, et sine humana potentia, et cum eadem excellentia dignitatis et protestatis, non esse præcipue ex humana providentia, sed ex divina, et ex illa Christi promissione : *Portæ inferi non prævalebunt adversus eam,* quæ seipsum durat, ut idem Augustinus, in Psal., contra partem Donati, aperte declaravit, dicens : *Dolor est cum vos videmus præcisos ita jacere. Numerate Sacerdotes, vel ab ipsa Petri sede, et in ordine illo Patrum quis cui successit, videte. Ipsa est petra, quam non vincunt superbæ inferorum portæ.* Alterum est, Ecclesiam Catholicam infallibiliter esse conjunctam cum sede Petri, ac subinde eamdem esse utriusque fidem; nam si hoc non supponatur, signum illud fere nullius esset momenti. Colligitur tandem hanc fuisse mentem dictorum Patrum, quia hoc privilegium attribuunt Apostolicæ Sedi, ut

necessarium ad munus illi commissum exequendum, scilicet, ad confirmandum subditos in vera fide, et ad auctores hæresum et falsæ doctrinæ ab Ecclesia segregandum, omniaque putrescentia membra jam emortua resecandum. Quam rationem multi ex allegatis Pontificibus indicant.

10. Quod si Protestantes Angli, præter hæc antiqua, noviora testimonia requirunt, audiunt imprimis suum gravissimum historicum Bedam, lib. 3 Histor. Anglican., cap. 25, in fine, seu apud illum, sapientem quemdam presbyterum nomine Wilfridum, qui, allegatis decretis Romanæ Ecclesiæ ad quamdam de Paschate controversiam definiendam, ita concludit : *Si audita decreta Sedis Apostolicae, imo universalis Ecclesiæ, et hec litteris sacris confirmata, sequi contemnitis, absque ulla dubietate peccatis. Et si enim Patres tui sancti fuerunt, numquid universali, quæ per orbem est, Christi Ecclesiæ, horum est paucitas una de angulo extremæ insulæ præferenda?* His addo testimonia Gregorii, qui usque ad sexcentesimum quartum Christi annum seddit, et de integritate fidei Sedis suæ testatur, lib. 3 Epistolar., indictio. 12, ep. 32, et saepè alibi. Et ideo ep. 41 ad Bonifac. sic inquit : *Hortor vos, ut dum vitæ spatium superest, ab ejusdem beati Petri Ecclesia, cui claves cœlestis regni commissæ sunt, et ligandi ac solvendi potestas attributa, vestra anima non inveniatur divisa, ne si hic beneficium ejus despicitur, illic vita aditum claudat.* Et lib. 4, indict. 13, c. 77, ep. 32, contra Joannem, Episcopum Constantinopolitanum, qui nomen universalis Episcopi usurpare ausus fuerat, invehitur imprimis verbis et promissionibus Christi : *Cunctis enim, ait, Evangelium scientibus, liquet, quod voce Dominica sancto, et omnium Apostolorum Principi Petro Apostolo, totius Ecclesie cura commissa est; ipsi quippe dicitur: Pasce oves meas; ipsi dicitur: Ego rogavi pro te, ut non deficiat fides tua, et tu aliquando conversus confirma fratres tuos; ipsi dicitur: Tu es Petrus, et super hanc petram ædificabo Ecclesiam meam.* Ex quibus colligere intendit, solum Episcopum Romanum revera esse universalem, licet propter modestiam non soleat ita vocari. Deinde vero audit, Constantinopolitanum Episcopum non posse esse universalem, cum in ea Ecclesia multi Patriarchæ hæresum auctores fuerint, quod absit ab universali Episcopo (ut significat), *quia unversa Ecclesia a statu suo corruit, quando is, qui appellatur universalis, ca-*

dit. In quo plane sentit, ad firmatatem Ecclesiæ pertinere, ut suprema et universalis sedes in fide immutabilis sit. Quod aperte confirmat lib. 6, indict. 5, c. 291, alias ep. 37, dicens : *Quis nesciat sanctam Ecclesiam in Apostolorum Principis soliditate firmatam, quia firmitatem mentis traxit in nomine, ut Petrus a petra vocaretur, cui veritatis voce dicitur: Tibi dabo claves, etc., et cui rursus dicitur: Confirmata fratres tuos.* His adjungi potest sententia Leonis IX, in epist. 1, cap. 7, dicentis : *A Sede Principis Apostolorum, Romana videlicet Ecclesia, tam per eundem Petrum, quam per successores suos reprobata, convicta, atque expugnata sunt omnium hæreticorum commenta, et fratrum corda in fide Petri, que hactenus non defecit, neque unquam deficiet, sunt confirmata.* Quæ scripsit hic Pontifex post annum millesimum quinquagesimum, et ea fundat in promissione Christi quoad futurum tempus, quoad præteritum vero etiam in evidenter facti, quod universo orbi notum esse supponebat.

11. Præterea ad eamdem veritatem confirmandam afferre possumus Isidor., in epist. ult. ad Eugenium, Episcopum Toletanum, ubi prius de Petro ait : *Praeminet cæteris, et ab ipso Dei et Virginis Filio honorem Pontificatus in Christi Ecclesia primus suscepit;* idque confirmat testimonii Matt. 16, et Joan. 21, et deinde subjungit : *Cujus dignitas potestatis etsi ad omnes Catholicorum Episcopos est transfusa, specialius tamen Romano Antistiti singulari quodam privilegio, velut capiti cæteris membris celsiori, permanet in æternum: qui igitur debitam ei non exhibet reverenter obedientiam, a capite sejunctus, Acephalorum schismati se reddit obnoxium, quod sicut illud S. Athanasii, de fide S. Trinitatis, sancta Ecclesia approbat et custodit, quasi sit fidei catholicæ articulus, quod nisi quisque fideliter firmiterque crediderit, salvis esse non poterit.* In quibus verbis, licet non expresse asserat Ecclesiam Romanam non posse deficere a fide, supponit tamen usque ad sua tempora non defecisse, et idem semper esse futurum satis significat, cum dicit privilegium illius permansurum in æternum. Idem tradit Bernardus, qui Ep. 109 ad Innocen., contra novam hæresim insurgentem ejus implorat auctoritatem dicens : *Oportet ad vestrum reserri apostolatum pericula quæque, et scandala emergentia in regno Dei, ea præsertim, quæ de fide contingunt. Dignum namque arbitror, ibi potissimum resarciri damna fidei, ubi non*

*possit fides sentire defectum. Hæc quippe hujus prærogativa sedis. Cui enim alteri aliquando dictum est : Ego pro te rogavi, Petre, ut non deficiat fides tua? Ergo quod sequitur a Petri successore exigitur: Et tu aliquando confirma fratres tuos. In quibus verbis satis comprobatur omnia quæ dicta sunt, et promissionum Christi veram intelligentiam. Unde lib. 2 de Considerat., ad Eugenium, c. 8, Pontificem Romanum dicit esse *Principem Episcoporum, et potestate Petrum, et non modo ovium, sed et pastorum omnium pastorem*, et alia multa, quibus eamdem veritatem stabilivit. Et in sermone de Privilegiis S. Joannis Baptistæ, Ecclesiam Romanam dicit esse omnium Ecclesiarum matrem et magistrum, cui dictum est : *Et pro te rogavi, ut non deficiat fides tua.* Denique B. Anselmus, Cantuariensis Archiepiscopus, librum de Incarnat. ad Urbanum Pontificem dedicans, illum vocat universæ Ecclesiae in terra peregrinantis Summum Pontificem, et subiungit in c. 1 : *Quoniam divina Prævidentia vestram elegit Sanctitatem, cui vitam et fidem christianam custodiendam, et Ecclesiam regendam committeret, ad nullum alium rectius refertur, si quid contra fidem catholicam oritur in Ecclesia, ut ejus auctoritate corrigatur, et alia, quæ prosequitur, quibus quid de Ecclesia Romana sentiret, satis declaravit. His addi possunt duo testimonia, quæ ab hominibus Græcis data sunt. Unum est Theodori Studiæ, in Ep. 1 ad Naueratum, quæ est 6 lib. 2, ubi de hæreticis sic ait : Testor nunc coram Deo, et hominibus, se ipsos arulserunt a corpore Christi, et supremo verticali throno, in quo Christus fidei claves posuit, adversus quem non prævaluerunt unquam, nec prævalebunt usque ad consummationem portæ inferi, ora, scilicet, hæreticorum, sicut pollicitus est qui non mentitur. Et in alio opere, de Cultu imaginum, cuius fragmentum refertur in lib. 3 Bibliothecæ sanctæ, de Romanis loquens, ait : *Tanta est eorum fides, ut et illic infracta videatur esse petra fidei, nimirum, juxta verbum Domini fundata.* Quæ testimonia refert et extollit Gennadius Scholarius, c. 5 Defensionis Concilii Florentini, sect. 12, ubi ipse ait, sect. 17 : *Si illa divina sedes non recte sentit, mentitur Christus, cum dicit : Cælum et terra transibunt, verba autem mea non transibunt; bis enim Ecclesiae pollicitus est se cum ea fore, et portas inferi non prævalituras adversus eam.* Ubi alia etiam ex Patribus tertiaræ et quartæ Synodi adducit. Et alia innumera**

ex catholicis Theologis recenseri possent; sed quia prolixum esset, et non videtur necessarium, id omittimus.

12. Fortasse tamen Protestantes, qui testimonia antiquorum Patrum pro suis vel nostris temporibus non recipiunt, etiam recentiorum testimonia rejicient, quia (ut ipsi fingunt) post defectionem Ecclesiæ Romanæ scripserunt. Sed qui in tantam incidunt audaciam et temeritatem, satis convincuntur, solo proprio judicio et arbitrio duci in interitum, et contra omnem humanam prudentiam loqui, cum et omnem humanam fidem, et ipsius fidei divinæ credibilitatem despiciant et euercent. Nobis ergo satis est ostendisse secundum Scripturas sacras, prout a Sanetis Patribus intellectæ sunt, et secundum eorumdem Patrum traditionem, Romanam Ecclesiam, ratione Sedis Apostolicæ, et Cathedrae fidei, non esse aliam a Catholicæ, nec magis defecisse a fide, aut posse deficere, quam Ecclesiam Catholicam. Addimus præterea, si his omnibus non obstantibus, contendunt adversarii Romanam Ecclesiam defecisse, oportere ut designent tempus et annum in quo illa defectio inceperit, et sub quo Pontifice, et in qua materia vel articulo contigerit error; nam si nihil horum ostendere queant, ut re vera non possunt, profecto omni fide indigni sunt. Et quidem de singulis temporibus, seculis, et annis, ac Pontificibus summa diligentia id ostensum est a Cardinali Baronio, in suis Annal.; ideoque in initio anni 700 prudentissime sic alloquitur ad lectorem : *Attende animo, et lustra memoria, si quid inveneris in Ecclesia Catholicæ diminutum eorum, quæ in reliquis omnibus superioribus videris seculis. Et infra : Res ipsa id testatur, facta clamant, et mira consensione scripta Sanctorum omnium prædicant, a regia nunquam deflexisse sanctam Dei catholicam Ecclesiam ria, etc.*

13. *Additur auctoritas et conjectura.*—Quod vero spectat ad materiam defectionis, seu ad errores particulares, quos hæretici Romanæ Ecclesiæ tribuunt, postea pauca dicemus, saltem de his, quæ rex Angliæ attigit; nam in hoc brevi opere omnibus ex professo responderem non possumus, et ab aliis catholicis Doctoribus, et a nobis pro captu nostro, in aliis Theologiæ libris, prout occasio tulit, id factum est. Non omittam autem moralem conjecturam addere, quam mihi præbuit Tertullian., lib. de Praescript. adversus hæretic., c. 28, dicens : *Quid verisimile est, ut tot ac*

tantæ Ecclesiæ in unam fidem erraverint? nullus inter multos eventus est unus exitus; variasse debuerat error doctrinæ Ecclesiarum. Ceterum quod apud multos unum invenitur, non est erratum, sed traditum. Audeat ergo dicere aliquis, illos errasse, qui tradiderunt? Est profecto fere evidens conjectura, quam satis evincit tam veterum quam recentium hæreticorum experimentum; statim enim ac ab Ecclesia segregantur, in varias et differentes sectas dividuntur: Ecclesia autem Romana semper unitatem doctrinæ retinuit, consentientibus cum illa aliis Ecclesiis Catholicam fidem profitentibus; ergo evidens indicium est, illam Ecclesiam nunquam a prima et originaria fide descivisse. Et ideo quoties aliqua Ecclesia, vel hominum factio ad aliam fidem declinavit, statim notata est, ut ab Ecclesia tam Catholicæ quam Romana separata: in Ecclesia autem Romana, seu in sede Petri nunquam similis defectio aut separatio ab antiqua fide, vel ab aliis membris Ecclesiæ Catholicæ notata est; ergo adversariorum evasio et impositio frivola est et incredibilis.

14. Objiciunt hæretici aliquos Pontifices in heresim incidisse.—Maxime vero objicere solent hæretici lapsus quosdam et errata aliorum Pontificum Romanorum, vel in personis eorum, vel in doctrina. Et imprimis contendunt aliquos vere hæreticos fuisse, et fidem perdidisse. Unde inferre possunt, verba Christi, *non deficit fides tua*, non in omnibus Romanis Pontificibus vera inveniri ac subinde non fuisse de illis prolatæ, atque adeo neque privilegium aut promissionem nunquam errandi sortitos fuisse. Deinde objiciunt aliquos Pontifices, qui, licet de hæresi non accusentur, falsam doctrinam per humanam ignorantiam Ecclesiæ tradiderunt. His vero objectionibus in particulari et sigillatim propositis, copiose et eruditæ satisfecit Illust. Bellarminus, lib. 4 de Summ. Pontifice, et Card. Osius, contra Brentium, et alii nostri temporis scriptores.

15. Nullus Pontifex, ut caput Ecclesiæ, fidem potest amittere.—*Instantia.*—*Solutio.*— Ideoque breviter circa priorem partem recepta distinctio præ oculis habenda est, de Pontifice, vel credente, ut est privata persona, vel docente, ut Pontifex est. Ad illum enim posteriori modo spectatum, dicimus pertinere Christi promissionem: nam hoc modo est petra, a cuius firmitate pendet in suo genere firmitas Ecclesiæ. Hoc autem modo nullum

vestigium hæresis ostendunt hæretici in tota Summorum Pontificum successione. Considerando autem personam Pontificis priori modo, etiam inter Catholicos controversia est, an Pontifex possit esse hæreticus, et adhuc sub judice lis est, an aliquis non præsumptione tantum, sed vere talis fuerit. Hæc autem quæstio non pertinet ad fidei fundamenta, et ideo illam nunc omittimus. Et gratia vitandi controvèrsiam, facile damus non esse necessarium promissionem Christi ad personam Pontificis, ut est unus ex privatis credentibus, extendere. Quod si quis instet, eadem ratione personam Petri ut privatam potuisse a fide deficere, non obstante Christi promissione, respondemus, primo, non esse eamdem rationem de Petro, quia illi immediate facta est promissio, et ideo non tantum facta est muneri, sed etiam personæ, ad alios autem solum per successionem descendit, et ideo solum eis ut successoribus Petri communicatur. Deinde addimus, Petrum non solum hanc habuisse promissionem, sed etiam alias communes Apostolis, ratione quarum omnes haberunt personalem (ut ita dicam) confirmationem, tam in gratia, quam in fide et doctrina.

16. Nullus etiam in rebus pertinentibus ad universalem Ecclesiam potest errare.—Ad alteram vero partem, de erroribus qui Pontificibus tribuuntur, breviter dicimus, aliud esse loqui de decretis Pontificum, quatenus per ea aliquid definiunt vel approbant tanquam credendum vel observandum ab universa Ecclesia; aliud de privatis sententiis, opinionibus, aut rationibus Pontificum. In præsenti enim de prioribus decretis tractamus, et in eis nullum falsum dogma invenitur, quod per modum definitionis ab eis traditum sit, et Ecclesia ad credendum propositum, ut facile intelligat quicumque legerit ea, quæ auctores allegati, et Cajetanus, lib. 6 de Locis, cap. 4 et 8, latius prosequuntur. In privatis autem sententiis, vel opinionibus, vel etiam in rationibus quibus interdum utuntur, sicut non oportet esse fidei certitudinem, ita neque infallibilem veritatem, quia neque hoc est necessarium ad firmitatem vel puritatem fidei universalis Ecclesiæ, neque etiam est eorumdem Pontificum menti et intentioni consentaneum. Nam, eo ipso quod sub opinione vel humana existimatione loquuntur, profitentur se per humanam rationem et sapientiam loqui, non per infallibilem assistentiam Spiritus Sancti. Si quis tamen prudenti et pio ani-

mo consideret etiam illa, quæ hoc posteriori modo a Pontificibus traduntur, forte nihil inveniet, quod non sit sapienter traditum, et satis probabili fundamento stabilitum.

CAPUT VII.

EXCLUDITUR TERTIA EVASIO HÆRETICORUM, QUAM
PER DISTINCTIONEM ECCLESÆ VISIBILIS ET IN-
VISIBILIS CONFIGUNT.

1. Proponitur tertia evasio hæreticorum de Ecclesia invisibili. — In libro serenissimi Angliæ regis nihil de hac evasione, vel de invisibili Ecclesia expresse dictum invenimus; omittere tamen non potuimus, quin illi occurreremus, tum ut plerisque hujus sæculi hæreticis respondeamus; omnibus enim satisfacere, et veritatem persuadere cupimus; tum etiam ut discursum a nobis inchoatum plenius perficiamus, et omnia vana subterfugia præcludantur. Multi ergo ex hæreticis, quamvis propter aperta testimonia Scripturarum negare non audeant, Ecclesiam Christi seu Catholicam perpetuo durare, et in fide vera permanere, ut aliquo modo vim rationis, et lucem veritatis effugiant, duplum Ecclesiam distinguunt, unam veram et solidam, alteram tantum apparentem; et priorem dicunt esse invisibilem oculis corporis, posteriorem autem visibilem esse. Qua supposita distinctione, respondent Ecclesiam invisibilem, esse veram Christi Ecclesiam et Catholicam, cui promissum est ut nunquam deficiat, nec portæ inferi contra eam prævalent. Alteram vero Ecclesiam apparentem et visibilem, licet in hac externa specie perseveret, dicunt in veritate fidei, ac subinde in subsistentia veræ Ecclesiae posse deficere, et jam defecisse in Ecclesia Romana, cujus formam et speciem ita depingunt ipsi.

2. Primum fundamentum erroris prædicti. — Fundamentum autem hujus sententiae, quatenus supponit Ecclesiam veram esse invisibilem (hic enim tantum est scopus præsentis disputationis), est, formam constituentem veram Ecclesiam esse in se invisibilem, et per nullum signum visibile ita manifestari, ut in eo possit videri. Ergo talis forma simpliciter est invisibilis. Quidquid enim visibile est, vel in se videri potest, vel saltem in alio tanquam in signo. Si ergo forma constituens Ecclesiam neutro horum modorum videri potest, profecto omnino invisibilis est. Ergo et vera Ecclesia, ut talis est, invisibilis est, quia,

licet personæ, ex quibus constituitur, videantur quasi materialiter quoad corpora, vel actiones humanas externas, quatenus tamen constituentes Ecclesiam videri non possunt. Sicut si anima hominis, quæ in se est invisibilis, per opera externa videri non posset, profecto homo invisibilis esset; et si corpus humanum nullum exercebat motum vitæ, qui sentiri possit, profecto ut vivens esset invisibile, etiamsi corpus ipsum materialiter videretur.

3. Superest vero probandum, formam Ecclesiæ esse invisibilem utroque modo supra positum. Et imprimis in omni sententia, etiam nostra, videtur necessario dicendum, illam formam esse in se invisibilem, sive sit prædestination (ut quidam hæretici dixerunt), quæ satis invisibilis est, sive (ut dixerunt alii) sit charitas, sive sit fides, ut Catholicæ etiam docent, quia non solum charitas, sed etiam fides est spiritualis forma quoad ipsam internam qualitatem, et ita est in se invisibilis. Quod si etiam adjungatur sacramentum fidei, quod est baptismus, etiam hoc non est visibile, ut sacramentum est, quia non videtur intentio necessaria ut sit sacramentum, et consequenter non videtur spiritualis character, qui necessarius etiam est juxta Catholicorum sententiam, ut membrum Ecclesiæ constituat. Quod item hæc forma Ecclesiæ in signis, seu per signa visibilia videri non possit, probatur, quia nulla sunt externa signa charitatis, vel fidei, quæ non possint ficte fieri sine vera interna fide, sive sint opera externa divini cultus, sive obedientia ad Prælatos Ecclesiæ, sive actus regiminis ex parte ipsorum Prælatorum, sive sint opera confessionis, et professionis fidei, denique vel ipsa etiam opera miraculorum; nam hæc etiam adulterari possunt, et ita exterius fingi, ut non sint necessaria signa vera fidei; ergo nullum visibile superest, quo vera forma Ecclesiæ visibilis sit. Sola autem externa signa aut opera non sufficiunt ad veram Ecclesiam constituendam; nam sicut particularis persona, si interius non credit, licet exterius se fingat fidelem, verum Ecclesiæ membrum non est, præsertim si characterem baptismi non habeat, ita quælibet congregatio, vel hominum multitudo, etiamsi per opera externa religionis et fidei congregetur, si internam fidem non haberet, vera Ecclesia non esset; ergo cum hæc fides semper sit invisibilis, tam per se quam per aliud, etiam Ecclesia vera invisibilis est. Quod fundamentum maxi-

me habet locum in sententia Protestantium, qui uniuscujusque fidem resolvunt in privatum spiritum, vel propriam revelationem unicuique factam, nam ille privatus spiritus sine dubio invisibilis est.

4. Atque hic discursus videtur potissime attingere et punctum controversiae, et hæreticorum motivum. Alia vero, quæ afferri ab ipsis solent contra externum cultum, ut probent in Ecclesia tantum esse debere spiritualem, ac subinde invisibilem, neque ab omnibus hæreticis hujus temporis acceptantur, sed in hac re divisi sunt, nec ad præsentem causam quicquam referunt. Quia licet lex gratiæ principaliter sit in spiritu, non excludit opera quæ ab interna charitate procedant; et similiter licet adoratio Ecclesiæ sit in spiritu et veritate, non excludit cultum externum ab interiori procedentem, ut in propriis locis de lege gratiæ, de religione, de sacramentis et sacrificio ostensum est. Alia etiam, quæ adjungi hic solent de Ecclesia interdum propter vim persecutionis ita latente, ut videri non possit, non pertinent ad hunc locum, sed ad alium infra tractandum de Ecclesiæ universalitate. Præter dictum autem fundatum addunt nonnulla testimonia, quibus respondere necesse est. Primo enim ex Scriptura objiciunt illud Lucæ 17 : *Regnum Dei non venit cum observatione, neque dicent : Ecce hic, aut : Ecce illuc; ecce enim Regnum Dei intra vos est*, nam per regnum Dei ibi Ecclesia intelligitur, quæ alibi dicitur *Domus spiritualis*, 1 Petri 2, et *Civitas Dei viventis*, ad Hebr. 12, ubi distingui videtur in hac proprietate Ecclesia Christi a visibili synagoga. Secundo, afferunt verba Symboli : *Credo unam Sanctam Ecclesiam*, nam si esset visibilis, non crederetur; si ergo fide credenda est Ecclesia, videri non potest. Addunt denique locum Augustini, 20 de Civit., c. 8, ubi Ecclesiam dividit in prædestinatam et non prædestinatam.

5. Nihilominus dicendum est, veram Ecclesiam, quam Christus super petram fundavit, et cui promisit portas inferi non prævalituras adversus illam, visibilem esse, et consequenter futilem esse adversiorum evasionem; quia si hæc Ecclesia visibilis est, et deficere non potest a vera fide, et ipsi ab ea defecerunt, ut est per se evidens, et ipsi non negant, manifestum est non veram fidem, sed hæresim habere. Propositum autem fundatum, quod fidei dogma esse credimus, prius simpliciter prohandum est ex Scriptura et

Patribus. Deinde res ipsa (id est, in quo consistat hæc visibilitas Ecclesiæ) ita explicanda est, ut, ablata verborum ambiguitate et tergiversatione, ex fidei principiis possit ratione convinci.

6. *Ecclesia visibilis ex Scriptura.* — *Primo ex Isaiæ, c. 2.* — *Duplex expositio.* — Primo ergo Ecclesiam esse visibilem probatur ex illo Isaiæ 2 : *Erit in novissimis diebus præparatus mons domus Domini in vertice montium, et elerabitur super colles, et fluent ad eum omnes gentes, et ibunt populi multi, et dicent : Venite, ascendamus ad montem Domini, et ad domum Dei Jacob.* Quo in loco multi ex Patribus per montem Domini Christum intelligunt, qui Danielis 2 dicuntur, *Lapis excisus sine manibus, qui crevit in montem magnum*, ut patet ex Augustino, tract. 1, in 1 epist. Joan., et Orat. contra Judæos, c. 7 et 8; et ex D. Hieronymo, Isai. 2, Micheæ 4, et Daniel. 2; et Tertulliano, lib. contra Judæos, cap. 3. Alii vero per montem Ecclesiam intelligere videntur, ut August., lib. 4 contr. Crescon., c. 58; et Chrysostom., Isai. 2; et Cyril., lib. 1 in Isai., cap. 2. Verumtamen in re non dissentunt: nam de Christo et de Ecclesia tanquam de corpore et capite ibi sermo est, et juxta regulam Augustini, quod de corpore dicuntur, de capite etiam intelligi potest, et e converso. Unde in alio loco Daniel. 2, de lapide abscisso, qui factus est mons magnus, dicitur : *Et implevit universam terram*, scilicet Christus per Ecclesiam suam. Cum autem in loco Isaiæ, mons et domus Domini distincte ponantur, recte per montem, Christum, et per domum, Ecclesiam intelligimus. Unde futurus dicitur *præparatus mons domus Domini*, id est, Ecclesiæ, cum suo capite Christo. Prædictur ergo ibi, sicut Christus visibilis venit in mundum, et per suam prædicationem, signa et miracula omnibus notus et illustris factus est, ita Ecclesiam Christi futuram fuisse visibilem, et ita notam in mundo, ut ab omnibus cognosci posset. Quod satis declarant sequentia verba, quæ sunt gentium omnium dicentium : *Venite, ascendamus ad montem Domini, et ad domum Dei Jacob.* Non enim invitantur homines ut veniant, nisi ad domum, quæ nota et visibilis eis esse potest.

7. Atque ita copiosius quam cæteri explicavit Chrysostomus, dicens : *Res hæc dilucida adeo est, ut nulla deinceps egeat per sermonem interpretatione, ipsa rerum nativa indoles ad eum modum vocem edit, tula quavis clarius*

resonantem, exhibens omnibus spectandum decus, ac splendorem Ecclesie, non enim iste sol tanto nitore splendescit, non item lux ex ipso emicans illustre adeo jubar effundit, ut res gestæ ab Ecclesia. Etenim domus Dei super montes altissimos collocata est. Et infra : Ecclesiæ potestas ipsos pertingit cælos, et tanquam domus supra verticem montium posita omnibus se exhibit conspicuam, usque adeo ipsa multo etiam amplius omnibus inclaruit. Simumilem protulit sententiam Augustinus, lib. 3 contra epist. Parmeniani, ubi dicit, justos esse, per unirersam ciritatem, quæ abscondi non potest (inquit), quia supra montem constituta est. Montem illum dico Danielis, in quo lapis ille præcisis sine manib[us] crevit, et implevit universam terram : et d. tract. 1, in 1 epist. Joan., circa finem : Nonne (inquit) lapis iste, qui præcisis est a monte sine manib[us], Christus est de regno Iudaorum sine opere maritali? et post pauca : Numquid digo ostendimus istum montem? Et infra : Numquid sic ostendimus Ecclesiam fratris mei? Nonne aperta est? Nonne manifesta? Et paucis interjectis : Et cum eis dicitur, utique hæreticis : Ascendite, Non est mons, dicunt, et facilius illuc faciem impingunt, quam illic habitaculum querunt. Et inferius proposito loco Isaiae, interrogat : Quid tam manifestum, quam mons? Et statim objicit : Sed sunt et montes ignoti, ut Olympus, etc. Respondet : In partibus sunt isti montes, ille autem mons non sic, quia implevit universam terram, quis errat in hoc monte? Et infra de hæreticis ait : Montem non vident, nolo mireris, quia in tenebris ambulant, et oculos non habent, quia tenebræ excæcaverunt eos.

8. Secundo ex Mat. — Et in eodem sensu interpretantur multi Patres verba Christi, Matth. 5: Vos estis lux mundi, non potest civitas abscondi supra montem posita. Hanc enim civitatem esse Ecclesiam docuit Augustinus, dicto tractat. primo, dicens : Ecce civitas, de qua dictum est : Hæc est civitas supra montem posita. Idem, d. libro tertio contra Parmen., cap. 5, et lib. 2 contra litteras Petiliani, cap. 32, post illud Psalm. 18 : In omnem terram exivit sonus eorum. Infra : Hinc fit, ut Ecclesia vera neminem lateat, unde est illud quod Evangelista dicit : Non potest civitas abscondi supra montem constituta¹, id est in eodem Psalmo connectitur : In sole posuit tabernaculum suum, quod ipsem super

eumdem Psalmum exposuit, id est, in manfestatione, Ecclesiam suam, non quæ lateat. Et infra : Quid tu, hæretice, fugis in tenebras? Et multa similia habet libro de Unitat. Ecclesiæ, et lib. 13 contra Faustum, c. 13, ubi pro signo certo Ecclesiæ Christi ponit, quod omnibus eminet, et appetet, quia est sedes gloriae ejus, Jereim. 17, et templum Dei sanctum, 1 ad Corinth. 3; et postea subjungit locum Matthæi. Idem lib. 6, cap. 17, et lib. 2 contra Cresconium Grammaticum, cap. 36, ubi habet verba notanda : Extat Ecclesia cuncta clara, atque conspicua, quippe civitas, que abscondi non potest supra montem constituta, per quam dominatur Christus a mari usque ad mare, et a flum[us] re usque ad terminos orbis terræ.

9. Eodem modo exposuit illum locum Hieronymus, lib. 6, in c. 30 Jeremiæ, ubi etiam verba illa Jeremiæ ad Ecclesiam accommodat : ædificabitur civitas in excelso suo, et templum juxta ordinem suum fundabitur. Plenius (inquit Hieronymus) atque perfectius in Domino Salvatore atque Apostolis hoc compleatum est, quando ædificata est civitas in excelso suo, de qua scriptum est : Non potest civitas abscondi, que in monte sita est, et templum juxta ordinem suum, cæreniciasque fundatum, ut quidquid in priori populo siebat carnaliter completeretur. Et Amos 1, verba illa : Dominus de Sion rugiet, de specula Ecclesiæ exponit, quia super montem sita (inquit Matth. 5) latere non potest, de qua cum Dominus dederit per vetus et novum instrumentum, et per Doctores ecclesiasticos vocem suam, et quasi clara buccina insonuerit, tunc doctrina hæreticorum, et circumcisionis siccabitur, etc.; et elegantissime Chrysostomus, homil. 10 in Matth., in Imperfecto, interrogans : Quæ est hæc civitas? et respondens : Ecclesia est Sanctorum, de qua dicit Propheta. Gloriosa dicta sunt de te, civitas Dei¹; cives autem ejus sunt omnes fideles, de quibus dicit Apostolus : Vos estis cives Sanctorum, et domestici Dei², etc. Et infra : Hæc ergo civitas posita est super montem, id est, Christum, etc. Et deinde connectens alia verba : Nec qui accendunt lucernam, etc., inquit : Per alteram comparationem vult ostendere, quare Sanctos suos ipse Christus manifestat, et non vult esse absconditos. Et infra interrogat : Quod est candelabrum? Et respondet : Ecclesia, quæ

¹ Psalm. 86.

² Ephes. 2.

bajulat verbum vitæ. Et adducit illud Pauli ad Philippens. 2 : *Inter quos lucetis sicut lumenaria in mundo, verbum vitæ continentis.* Deinde in eamdem sententiam recte ibi dixit Rupertus¹ : *Quam magna, quam ampla cirtas.* Et infra : *Non potest abscondi, non patitur ordo, vel ratio judicii, seu consilii divini, ut abscondatur, et incognita sit, quæ ad hoc adficata est, et ad hoc mille clypei pendent ex ea omnis armatura fortium, ut omnes, qui inter adversarios periclitantur, qui inter Juðeos, paganos atque hæreticos pro fide agonizantur, recurrere sciant ad civitatem hanc, et in ea communiri, etc.*

10. *Prima proprietas ex Matt. 16.—Secunda proprietas ex Actor. 20.* — Unde possumus tertio ratione sumpta ex proprietatibus, quas Scriptura et Patres Ecclesiæ tribuunt, eamdem veritatem comprobare. Prima conditio Ecclesiæ Christi est, quod super Petrum est fundata, Matth. 16, a quo fundamento dimoveri non potest, ut supra ostensum est, et latius libro tertio dicturi sumus; hoc autem fundamentum visibile est, nam ad gubernandos homines est positum; ergo et Ecclesiam ipsam visibilem esse oportet. Et ideo unum ex potissimis signis ad cognoscendam veram Ecclesiam est successio Episcoporum in pontificatu Petri, ut supra ex Augustino notavimus, et ex Irenæo, lib. 3, cap. 4; et idem sumitur ex Cypriano, epist. 76 ad Magnum. Si autem Ecclesia vera esset invisibilis, non indigeret capite visibili, neque in eo posset fundari. Secunda proprietas huic affinis est, quod Christus talem condidit Ecclesiam, ut per homines regi posset, juxta illud Actorum 20 : *Attendite vobis, et universo gregi, in quo vos Spiritus Sanctus posuit Episcopos regere Ecclesiam Dei, quam acquisivit sanguine suo.* Ubi sine dubio est sermo de vera Ecclesia a Christo fundata, illam enim solam suosanguine acquisivit, illique de convenienti regimine providit, quod hominibus et Episcopis commisit; ergo necesse est talem Ecclesiam esse visibilem, quam ejus rectores intueri et cognoscere possint.

11. Tertia conditio est, Ecclesiam posse videre sensibiles actiones, et audire humanam vocem, juxta verbum Christi, Matth. 18 : *Dic Ecclesiæ;* quomodo enim aliquis loquetur Ecclesiæ, quam videre non potest, aut quomodo Ecclesia audiet verbum hominis, si ipsa

visibilis non est? Et ideo etiam ait Paulus, 1 ad Cor. 10 : *Sinc offensione estote Judæis, et gentibus, et Ecclesiæ Dei;* possumus ergo videre Ecclesiam, et cavere ne illam offendamus, juxta illud Pauli, 1 ad Timot. 3 : *Ut scias quomodo oporteat te in domo Dei conversari, quæ est Ecclesia Dei viri;* quomodo enim poterat Timotheus hoc scire, si veram Ecclesiam nesciret? Et infinitæ sunt locutiones similes, quæ supponunt certam, ac definitam scientiam Ecclesiæ visibilis, ut est illud 1 ad Cor. 15 : *Persecutus sum Ecclesiam Dei;* et illud Actor. 5 : *Factus est timor magnus in universa Ecclesia.* Et similia videri possunt c. 8, 9, 11, et fere per totum illum librum; et interdum est sermo de tota Ecclesia, interdum de parte ejus, seu particulari Ecclesia visibili: verumtamen eadem est ratio partium, et totius; nam si partes visibles sunt, multo magis totum corpus, ex eis constans, erit visibile.

12. *Responsio pro sententia hæreticorum, et refellitur.* — Fortasse tamen hæretici, his testimoniis convicti, confitebuntur Ecclesiam primitivam, quæ fuit tempore Apostolorum, vel paulo post illud, fuisse visibilem, postea vero discursu temporum illam visibilem Ecclesiam defecisse, et invisibilem factam esse. Ex qua response re liberter priorem partem accipimus. Et ex illa imprimis contra hæreticos convincimus, veram Ecclesiam posse esse visibilem, quandoquidem aliquando talis fuit. Ex quo etiam obiter ostenditur, rationes hæreticorum ad probandum Ecclesiam esse invisibilem, futiles esse; nam si quid valerent, repugnantiam aliquam ostenderent in Ecclesiæ visibilitate, cum tamen factum ipsum probet nullam esse. Deinde, sicut nos ex Scripturis ostendimus Ecclesiam in sua origine, ut sic dicam, fuisse visibilem, ita oportet ut ipsi ex Scripturis ostendant dari Ecclesiam invisibilem, vel in eis prædictum esse, aliquando talem futuram fuisse Ecclesiam. Simili arguento urget Donatistas Augustinus, lib. de Unit. Eccles., c. 47, dicens: *Legant nobis hoc de Scripturis sanctis, et credimus; hoc, inquam, nobis ex canone dirinorum librorum legant, tot civitates, quæ usque ad hodiernum diem baptismum, per Apostolos sibi consignatum, tenuerunt, periisse a fide.* Quod argumentum prosequitur c. 48, supponens in principio, Ecclesiam in Scripturis sanctis manifeste cognosci, et postea cap. 49 iterum instat: *Omissis ergo morarum tendiculis, ostendat Ecclesiam vel in sola Africa perditis tot*

¹ Lib. 4 de Gloriæ et honore Filii hominis, in Matth.

gentibus retinendam, vel ex Africa in omnibus gentibus reparandam atque adimplendam, et sic ostendat, ut non dicat: Verum est, quia hoc ego dico, etc. Late enim enumerat omnia quæ hæretici configere solent, et adjungit: *Remoreantur ista vel figmenta mendacium hominum, vel portenta fallacium spirituum, et postea concludit: Sed utrum ipsi Ecclesiam teneant, non nisi divinarum Scripturarum canonicas libris ostendant.* Hoc proinde argumentum eo fortius est contra hæreticos hujus temporis, quo ipsi prædicanter, nihil esse credendum, nisi quod in Scripturis legitur. Cum igitur ex Scripturis habeamus Ecclesiam visibilem, et mutatio ejus in invisibilem non legatur, neque vestigium ejus in Scriptura inveniri possit, profecto neque consequenter, neque cum fundamento loquuntur Protestantes.

43. *Visibilitas Ecclesiae perpetuo duratura.* — Ulterius vero ex eisdem Scripturis et Patribus probamus, falsam esse posteriorem partem illius responsionis; nam locutiones Scripturæ, quæ convincunt Ecclesiam fuisse visibilem tempore Apostolorum, idem probant de vera et apostolica Ecclesia quocumque tempore. Primo, quia promissio non deficiendi facta est Ecclesiae visibili, prout illam Christus super petram fundavit, ut patet ex illis verbis: *Super hanc petram edificabo Ecclesiam meam, et portæ inferi non prævalebunt adversus eam:* nam particula eam, eamdem visibilem Ecclesiam refert. Item ex Paulo, 1 ad Tim. 3, ubi cum dixisset: *Ut scias quomodo oporteat te in domo Dei conversari, quæ est Ecclesia Dei vivi,* subjungit, *quæ est columna et firmamentum veritatis;* ostendimus autem priora verba intelligi de Ecclesia visibili, in qua quis conversatur; sed particula *quæ* eamdem Ecclesiam refert; ergo illa eadem visibilis Ecclesia est columnæ, et firmamentum veritatis, ac subinde perpetua, quia, ut supra ostendi, hæc proprietas nunquam potest a vera Ecclesia separari. Adde nec posse illi convenire, si invisibilis aliquando fiat; est enim columnæ et firmamentum veritatis, semper et sine defectu veritatem docendo, et errores corrigendo; hoc autem cum auctoritate et efficacia facere non posset, si esset invisibilis; semper enim dubitari posset an sit vera Ecclesia quæ loquitur. Deinde multæ ex adductis locutionibus Scripturæ pro quocumque tempore prolatæ sunt; ergo de omni tempore probant veram Ecclesiam esse visibilem. Assumptum patet, nam Christus,

quando monuit: *Dic Ecclesiae, si autem Ecclesiam non audierit, sit tibi sicut ethnicus, et publicanus,* non homines tantum qui se audiabant, nec solam Ecclesiam primitivam, sed totam Ecclesiam suam, ut perpetuo duratram, instruebat; ergo supponebat Ecclesiam suam semper futuram esse visibilem, quæ audiri et audire possit. Et idem argumentum sumi potest ex verbis Pauli proxime citatis; nam consilium illud convenienti modo conversandi in Ecclesia, seu operandi sine offensione ejus, ad omnia tempora extenditur, et omni tempore servandum est: ergo semper Ecclesia talis est, ut videri possit.

14. *Confirmatur primo ex manere docendi.* — Præterea est alia insignis proprietas veræ Ecclesiae, quæ hanc visibilitatem perpetuo requirit, nimirum, quod extra illam non potest salus conservari aut inveniri, ut est certa veritas fidei, quam tradunt Cyprian., epist. 74, ubi habet illam sententiam: *Non potest quis habere Deum Patrem, qui non habet Ecclesiam matrem;* quam repetit lib. de Unit. Eccles., non longe a princ., ubi inter alia Ecclesiam comparat arcae Noe, dicens: *Si potuit eradere quisquam qui extra arcum Noe fuit, et qui extra Ecclesiam foris fuerit, eradet.* Et loquitur aperte de Ecclesia fundata in cathedra Petri. Eamdemque doctrinam tradit multis aliis in locis. Item Augustinus, in lib. de Unitat. Ecclesiae, c. 2 et 19, idem docet, et confirmat, quia *ad salutem, ac vitam æternam nemo pervenit, nisi qui habet caput Christum: habere autem caput Christum nemo poterit, nisi qui in ejus corpore fuerit, quod est Ecclesia.* Quamobrem ex hac proprietate recte colligitur, Ecclesiam veram omni tempore debere esse visibilem, quia omni tempore est corpus Christi, cui uniri debent omnes, qui per Christum salutem consequi voluerint; et est civitas refugii, ad quam recurrere oportet, qui ab hostibus se tueri et defendi desideraverint. Esset autem contra rectum ordinem, ut jam ex Ruperto retulimus, Ecclesiam, ad huic finem institutam, in occulto et in tenebris collocare; ergo cum ad eumdem finem perpetuo conservetur, perpetuo etiam debet esse conspiciua, clara et visibilis. Et ideo apposite admodum dicit Irenæus, lib. 1 contra Hæreses, c. 2: *Hunc fidem Ecclesia in universum mundum disseminata diligenter custodit, quasi unam domum inhabitaus, et similiter credit iis, quasi unam animam habens, et unum cor, et consonanter prædicat, docet, et tradit, quasi unum possidens os.* Et infra subjungit: *Sicut*

sol, creatura Dei, in universo mundo unus et idem est, sic et lumen prædicatio veritatis ubique lucet, et illuminat omnes, qui volunt ad cognitionem veritatis venire. Quam comparationem imitatus etiam est Cyprian., lib. de Unit. Eccles., dicens: *Ecclesia una est, quæ in multititudinem latius incremento secunditatis extenditur; quomodo solis multi radii, sed lumen unum, direlle radium solis a corpore, divisionem lucis unitas non capit.* Quem locum citat August., lib. 1 contra Crescon., c. 36, dicens: *Hanc (scilicet Ecclesiæ civitatem) B. Cyprianus ita commendat, ut eam dicat Domini luce perfusam, radios suos per orbem terrarum porrigit, etc.* Et sic etiam Origen., tractat. 3 in Matth.: *Ecclesia plena est fulgore ab Oriente, usque ad Occidentem, et plena est lumine vero, quæ est columna et firmamentum veritatis.* Et significant Augustinus et alii, qui, ut supra vidimus, ad illam accommodant illud Psalm.: *In sole posuit tabernaculum suum, et illud Jeremiæ: Ipsa est sedes gloriae, que exaltata est, et omnibus appareat.* Et propterea etiam ab aliis Patribus comparatur candelabro continent lucernam, *ut luccat* (ait Chrysostomus), id est, *appareat, et illuminet, qui sunt vel in domo Ecclesiæ, vel in domo omnium mundorum.* Denique propter hanc causam dixit idem Chrysostomus, hom. 4, in cap. 6 Isai., *facilius esse solem extingui, quam Ecclesiam obscurari.*

15. *Confirmatur secundo ex visibili successione Pontificum.* — Alio item modo refutare possumus prædictam evasionem hæreticorum, et veritatem catholicam confirmare, sumpto eodem principio ab adversariis ccesso, quod Ecclesia Christi in sua origine visibilis et notissima fuit, ut ex Scriptura sati probatum est, et præsertim verba Christi, Actaque Apostolorum ostendunt. Nam hæc Ecclesia ita propagata et conservata est, sicut fuit fundata; ergo sicut in principio visibilis fuit, ita perpetuo conservatur. Et minor quidem propositio quoad propagationem ex eisdem Actibus constat. Prius enim in Jerusalem radices agens, postea per Iudeam aucta, deinde ad Samariam extensa, ac tandem per omnes gentes et universum orbem propagata, in omnibus semper locis visibilis fuit. Et ita particulares Ecclesiæ, tanquam nota et manifestæ, tam in dicta sacra historia, quam in epistolis apostolicis, et in lib. Apocalypsis, proponuntur et nominantur. Quod vero spectat ad conservationem seu durationem, constat etiam sensibili, ut ita di-

cam, modo, Ecclesiam perseverasse per continuam visibilemque successionem Pontificum, Episcoporum, Doctorum et aliorum fidelium, et Ecclesiæ membrorum: et inde etiam colligi potest, eodem modo esse perseveraturam quamdiu mundus duraverit, quia eadem est cujuscumque temporis ratio.

16. In quo discursu solum superest probandum, durationem Ecclesiæ semper fuisse in statu visibili ratione successionis: id autem probari potest imprimis ex doctrina Patrum; Tertullianus enim, de Præscript., cap. 20, sic describit continuatam durationem Ecclesiæ: *Apostoli primo per Iudeam contestata fide in Jesum Christum et Ecclesiæ institutis, dehinc in orbem profecti, eamdem doctrinam ejusdem fidei apud nationes prædicarunt, et Ecclesiæ condiderunt, a quibus traducem fidei, et semina doctrinæ aliae Ecclesiæ mutuantæ sunt, et quotidie mutuantur, ut Ecclesiæ fiant, ac per hoc, et ipsæ Apostolicæ deputantur, ut soboles Apostolicarum Ecclesiarum, omne genus ad originem suam censeatur necesse est.* Et ita concludit ex omnibus Ecclesiis coalescere unam. Quod verum est de Ecclesia, non solum prout est simul in aliquo tempore, sed etiam, ut successive permanet per communicationem, et unionem præsentis cum præterita, et legitimam successionem, quam magis explicat cap. 32, dicens, Ecclesiæ, quæ se profitentur Apostolicas, oportere ut ostendant ordinem Episcoporum suorum, deducendo illum usque ad Apostolos.

17. *Ecclesia semper ratione successionis visibilis perseverat.* — Eamdem doctrinam late tradit Cyprian., libr. de Unitat. Ecclesiæ, et epist. 76, ubi inter alia ait: *Nec Episcopus computari potest, qui, evangelica et apostolica traditione contempta, nemini succedens, a se ipso ortus est;* et ita ut Ecclesiæ notam ponit Pontificum successionem. Et epist. 69 dicit, *Episcopum esse in Ecclesia, et Ecclesiam in Episcopo, et si quis cum Episcopo non sit, in Ecclesia non esse, et frustra sibi blandiri eos, qui pacem cum sacerdotibus non habentes, obrepunt, et latenter apud quosdam communicare se credunt, quando Ecclesia, quæ Catholica una est, scissa non sit, neque divisa, sed sit utique connexa, et coherentium sibi invicem sacerdotum glutino copulata.* Eodem modo hanc Ecclesiæ continuam unitatem declarat Irenæ., lib. 3 Contra hæres., cap. 2 et 3; et Augustinus idem sentit contra Epistolam Fundamenti, et aliis locis citatis; et Vincen- tius Lyrinensis, et reliqui supra allegati.

Quorum communis sensus est, Ecclesiam perseverasse per continuam successionem in eodem hierarchico ordine, in quo condita fuit, ac subinde in eodem statu visibili, in quo nota et manifesta sit; quoniam alias non posset de continua successione et traditione constare.

18. *Confirmatur ultimo ex Paul., ad Ephes.*

4.—Potestque merito hic discursus fundari in Paulo, ad Ephes. 4, dicente: *Et ipse dedit quosdam quidem Apostolos, quosdam Prophetas, alios Evangelistas, alios autem Pastores et Doctores, ad consummationem Sanctorum in opus ministerii, in edificationem corporis Christi, donec occurramus omnes in unitatem fidei et agnitionis Filii Dei, in virum perfectum in mensuram ætatis plenitudinis Christi.* Nam ex his verbis constat hanc Ecclesiam, quæ per modum unius corporis ex variis membris coalescit, et per mutuam operam, et influxum eorum inter se conservatur (ut idem Apostolus, 1 ad Corinth. 12, docuit), eamdem formam habituram, *donec occurramus omnes in virum perfectum;* ac subinde Doctores et Pastores per continuam successionem in ea duraturos, et sensibili modo recturos, et docturos illam; quod intelligi nullo modo potest, nisi vera Ecclesia semper visibilis, et humano modo (ut ita explicem) tractabilis perseveret; non enim potest caput esse visibile, et corpus invisibile, ut recte dixit Augustinus, ep. 48, ad Vincent., circa medium.

CAPUT VIII.

OCCURRITUR ADVERSARIORUM OBJECTIONIBUS, ET QUO SENSU ECCLESIA VISIBILIS SIT EXPOSITUR.

1. *Ultima pro hereticorum sententia erasio, Ecclesiam esse credibilem intellectui, non tamen notam sensui.* — His ergo modis satis, ut arbitror, demonstratum est ex principiis fidei et testimoniis Sacrae Scripturae, veram Christi Ecclesiam debere esse cognoscibilem, seu notam. Dicere tamen posset aliquis, inde non satis concludi esse visibilem, seu sensibus externis patentem, sed ad summum esse credibilem, ut in Symbolo credenda proponitur. Atque ita esse notam intellectui, non sensui. Unde possent heretici eludere omnia quæ adduximus, dicendo suam Ecclesiam, quam invisibilem vocant, habentibus veram fidem satis esse notam. Et præcipue Protestantes Anglicani (apud quos dicitur durare quædam

forma hierarchiæ ecclesiasticæ, et episcopatus umbra et ministerii) dicere possunt, in se perseverare Ecclesiam in ea forma externa et sensibili, quam habuit temporibus Apostolorum, et nihilominus non posse sensu discerni illam esse veram Ecclesiam, magis quam Romanam, neque e contrario, ideoque appellare illam invisibilem, non tamen ignotam, quia per fidem suam satis illam cognitam habent.

2. *Vera Ecclesia quomodo fide credenda.* —

Hæc est ultima objectio, et evasio quam ex parte hæreticorum cogitare potui, et non censui omittendam, quia per illius solutionem tolletur omnis Protestantium tergiversatio, et efficacia testimoniorum et rationum, quæ adduximus, magis intelligetur, et reliquæ etiam objectiones in principio positæ facilius expedientur. Ut ergo rem aggrediamur, accipimus primo id quod in hac objectione concedi videtur, Ecclesiam veram esse notam seu cognoscibilem saltem per fidem, ut omnia, quæ haetenus adduximus, testantur satis. Et in hoc puncto addimus duo. Unum est, hoc intelligendum esse, non de Ecclesia confuse concepta, seu in universali abstrahendo aliae vel illa congregazione hominum existentium in mundo, quæ possit illud nomen sibi attribuere, sed intelligendum esse de Ecclesia definite, et in particulari sumpta, ut est in talium hominum fidem Christi profitentium congregatione. Aliud est, hanc Ecclesiam in particulari esse credendam, non quacumque fide probabili aut humana, sed fide divina certissima et infallibili.

3. *Probatur quoad primam partem.* —

Utrumque horum potest probari ex Symbolo Apostolorum, in quo profitemur nos credere Sanctam Ecclesiam Catholicam. Nam hoc intelligendum est de certa et singulari Ecclesia. Cum enim vera Ecclesia Catholicæ tantum sit una, individua, et particularis, illa loeutio, quæ indefinita videtur, æquivalet singulari. Sicut qui dicit se videre solem, statim intelligitur loqui de illo sole singulari, qui solus in mundo est. Atque ita exponit Augustinus, de Fide et Symbolo, cap. 10, et Ruffinus, in expositione Symboli, et omnes. Nam ex vi illius fidei tenemur credere illam esse veram Ecclesiam, in qua sumus, et cuius fidem profitemur, et consequenter tenemur credere, conventicula hæreticorum non esse veram Ecclesiam, sed Synagogam Satanæ, Apocalyp. secundo, vel, ut Ruffinus ait, Ecclesiam malignantium; ergo ut per illam

fidem possimus discernere veram Ecclesiam a falsa, necesse est ut sit de tali congregatio[n]e in particulare. Denique ex ratione supra facta de necessitate hujus cognitionis, evidenter sequitur hanc fidem esse debere de tali Ecclesia individua, quia nobis necessarium est vel Ecclesiam querere, in qua justificari possimus, vel cui credamus, vel in qua vera sacramenta cum fructu recipere, et usque ad finem perseverare, ac denique salvare valeamus. Nemo autem potest querere Ecclesiam in communi, seu in abstracto conceptam, quia haec non est inquisitio speculativa, sed practica, necessaria ad operationes praecipuas hujus vitae; talis autem inquisitio, vel conjunctio, circa particularem Ecclesiam necessario versari debet, quia actiones, ut dixit Philosophus, circa singularia versantur; ergo singularem etiam et individuam Ecclesiam, Sanctam, et Apostolicam cognoscere possumus et debemus.

4. Confirmatur secunda pars. — Et hinc facile probatur alterum, quod proposuimus, scilicet, debere nos credere hanc Ecclesiam non tantum fide, et opinione humana, sed maxime fide divina et christiana. Primo, quia quidquid in Symbolo continetur, tenemur haec fide certa et divina credere; sed unum ex credendis in Symbolo propositis est haec Ecclesia particularis et individua, ut declaravi; ergo est credenda fide infusa, et omnino certa. Secundo, hoc maxime confirmat Augustinus, epist. 28, dicens hanc fidem in ipsa Scriptura fundari, non minus quam fidem hominis Iesu Christi: *Quomodo enim (inquit) confidimus accepisse nos ex divinis litteris, Christum manifestum, et non Ecclesiam manifestam?* Unde saepe ibi Donatistis objicit: *Incerti estis ubi sit Ecclesia*, et ad hoc maxime tanquam ad magnum absurdum eos deducere conatur. *Nos autem (concludit, colum. 13) ideo certi sumus, neminem se a communione omnium gentium juste separare potuisse, quia non quisque nostrum in justitia sua, sed in Scripturis divinis querit Ecclesiam, et ut promissa est reddi conspicit.*

5. Tertio, idem convincitur ex necessitate cognitionis verae Ecclesiæ supra declarata; nam fides veræ Ecclesiæ est in suo ordine, et secundum Deum, fundamentum reliquorum quæ creduntur, et omnium actionum necessiarum ad salutem, cum ab ea accipiamus Scripturam Sacram, juxta pervulgatam Augustini sententiam: *Evangelio non credorem, nisi me auctoritas Ecclesiae commo-*

reret, contra epist. Fundamenti, c. 5. Ab eadem accipimus verum sensum Scripturarum, ut capite sequenti attingemus; accipimus symbola, sacramenta, præcepta, consilia, et omnia quæ ad salutem pertinent; ergo si fides de ipsa Ecclesia esset tantum humana opinio, reliqua omnia tantum opinione tenerentur; periret ergo divina fides. Et e converso nulla esset hæreticorum congregatio, quæ non erederetur Sancta et Catholica sufficienti fide, quia unusquisque hæreticus credit suam Ecclesiam esse Sanctam et Apostolicam; credit autem fide humana, quæ falsa esse potest; at in hoc differt a Catholicis; ergo fides, quam Catholicus concipit de vera Ecclesia, longe altior est, ac subinde prorsus infallibilis et divina.

6. Ecclesia quomodo visibilis sensibus. — Atque ex his colligere et addere possumus tertio, quod maxime nostræ intentioni deseruit, nimirum, in quo vero sensu haec Ecclesia dicatur visibilis. Duplici enim ratione reputatur ejusmodi. Primo, quia illa Ecclesia, quam fide credimus esse veram, objectum quoddam est, quod visu videri, et auribus audiri, et manibus quodammodo contrectari potest. Hoc enim satis esse solet, ut objectum aliquod creditum sensibile dicatur, etiamsi de illo credamus aliquod mysterium invisibile: sic sacramenta sensibilia vocantur, quamvis formalis ratio sacramenti aut veritas non sentiantur. Imo etiam Christus Dominus objectum visibile erat, cum in terris ambulabat, et tamen fide divina credebarat a multis tanquam verus Messias, qui recte dicere poterant se videre Messiam, quem sperabant, et quem praesentem credebant, juxta illud Matth. 13: *Multi reges desideraverunt videre, quæ vos videtis*, etc. Et post resurrectionem suam dixit idem Christus Dominus Thomæ: *Quia vidisti me, Thoma, credidisti*. Quod declarans Gregor. dixit: *Unum vidit, et aliud credidit*; tamen de illo quem vidit, credidit quod non vidit, et ita fides illa habebat objectum sensibile. Ita ergo dicere possumus de Ecclesia, nam de illa, quam in his personis et locis videmus, credimus esse Sanctam et Apostolicam, quod oculis corporis non videmus.

7. Responsio hereticorum. — Obviabunt tandem Protestantes, hoc modo etiam suam Ecclesiam esse sibi visibilem, quia suam congregationem, quam vident, credunt esse veram Ecclesiam. Respondemus imprimis, in hoc nullam nobis esse cum illis contentio-

nem, quia nos nihil moramur, an eorum congregatio visibilis sit, necone : sed ab eis inventum est vocabulum invisibilis Ecclesiae. Semper tamen intercedit haec differentia, quod illi congregationem, quam vident, falso credunt esse veram Ecclesiam; nos autem catholicam, seu Romanam Ecclesiam, quam etiam videmus, certa et infallibili fide creditimus esse veram Ecclesiam. Deinde est alia differentia : nam adversarii vitare non possunt, quin dicant congregationem suam, seu opinionis suae cœtum, aliquando vel non fuisse, vel invisiblem fuisse, nimirum, antequam illi essent, quia tunc a nullis videbatur vel agnoscebatur tanquam objectum, de quo crederent esse veram Christi Ecclesiam. Imo propter illud tempus, in quo ipsi non erant, cogitarunt modum illum dicendi de invisible Ecclesia, ut possent aliquo modo dicere, nunquam defuisse in mundo veram Ecclesiam, licet per plures annos, ut, verbi gratia, a Gregorio Papa usque ad Lutherum, vel Wiclephum, ant alium similem, invisibilis fuerit. Quod etiam pro cerebro solum suo, et sine fundamento astruerunt; nam si omnino ignota et invisibilis erat toto illo tempore vera Ecclesia, unde ostendere possunt alicubi fuisse, vel quis eis revelavit? Nam si id solum colligant ex promissionibus et prædictionibus de perpetuitate Ecclesiae, fateantur necesse est semper durasse visibilem, id est, in particulari cognitam et notam, quia talis prædicta fuit, et promissa, ut ostensum est, et quia semper fuit ita credita ab orbe christiano, sicut Symbolum apostolicum et Nicænum semper in mundo durarunt, ex quo condita sunt, semperque fuerunt in vera Ecclesia credita.

8. *Ecclesiam visibilem sensui in signis esse ostenditur.* — Altera ratio, ob quam merito potest Ecclesia vera dici visibilis, non solum quoad materialem congregationem hominum, sed etiam quoad internam formam et rationem Ecclesiae, quamvis non in se, sed in alio, ut loqui solent Scholastici, est, quia signa et effectus visibles, seu sensibles, quibus conspicitur, sortita est. Sicut anima equi vel etiam hominis potest dici visibilis, aliter vero quam corpus : nam corpus videtur in se, anima vero non in se, sed in suis actibus, seu operationibus. Unde corpus dici potest visible animali modo, id est, mere sensitivo ; anima vero rationali modo, id est, adminiculo rationis, adjungendo discursum sensui. Sicut Paulus, ad Roman. 1, dixit, *invisibilita*

Dei a creatura mundi per ea, quæ facta sunt, intellecta conspici. Vel sicut Christus Dominus, interrogatus a Joanne per discipulos : *Tu es qui venturus es, an alium expectamus?* ipse respondit : *Renunciate Joanni quæ audistis et vidistis. Cœci vident, claudi ambulant,* etc., Matth. 11, ac si diceret : In signis quæ ego facio, videre potestis me esse Messiam; quia illa exhibeo, quæ in Prophetis erant prædicta, Isai. 35 et 6. Et hac ratione idem Dominus dixit, Joan. 15 : *Si opera non fecissem in eis, quæ nemo aliud fecit, peccatum non habent,* quia nimirum per ipsa propalabatur, ut ei fidem adhibere obligarentur.

9. *Signa Catholice Ecclesiae.* — Ita ergo dicimus Ecclesiam esse visibilem, quia talia semper exhibuit signa, et quasi radios visibles suæ veritatis, ut in eis, vel per ea videri possit ac debeat. Quod imprimis summo ex omnibus testimoniis Sanctorum Patrum, quibus supra probavi Ecclesiae visibilitatem; omnes enim illam explicant per effectus ejus visibles, quibus orbi propalam evasit. Et specialiter ex verbis Augustini proxime citatis : *Unusquisque nostrum in Scripturis divinis querit Ecclesiam, et ut promissa est, reddi conspicit.* Promissa enim est Ecclesia habens tales proprietates et signa, in quibus impletis conspici possit. Declaratur hoc ex verbis Christi, Marci ult.: *Funtes in mundum universum, prædicante Evangelium,* ac si diceret : Plantate Ecclesiam, seminando Evangelii verbum, et baptizando; nam ex baptizatis creditibus congreganda est. Et statim subjugnit : *Signa autem eos, qui crediderint, hæc sequentur;* et ponit quinque sensibilia signa quasi certa suæ Ecclesiae indicia, quæ postea in Actibus leguntur impleta : non enim illa data sunt ad cognoscendam singulorum creditum fidem, sed ad cognoscendam congregationem fidelium vere creditum in Christum, quæ est vera Ecclesia.

10. Atque hoc modo per hæc signa ad litteram intellecta, et per alia sanctitatis opera, quæ per illa significabantur (ut Gregorius, homil. 29 in Evangel., et Bernard., serm. 1 de Ascensione, voluerunt), facta est Ecclesia visibilis statim a suo initio, et poscea eodem modo, ut supra ostendimus, perseveravit. Non per durationem, et quasi continuationem omnium illorum signorum, sed per continuam successionem, quæ suo etiam modo visibilis est, et hominibus evidens, et hoc modo in illis signis videtur Ecclesia, quæ nunc est, quia eadem est cum illa quæ tunc fuit, quæ

unitas ex ipsa successione satis cognoscitur. Unde (ut apposite satis Augustinus, libr. de Utilit. credend., c. 26) : *Facta sunt illa opportunitissima, ut his multitudine credentium congregata, atque propagata, in ipsis mores utilis converteretur auctoritas.* Accedit, quod ea signa, licet non sint tam frequentia, ne assiduitate rilescant, ut eodem loco superaddidit idem Augustinus, *vel ne animus semper visibilia quereret, ut idem quoque, lib. 1 de Vera relig., c. 25, ait, nihilominus non omnino cessarunt in vera Christi Ecclesia, sed temporibus opportunis fiunt juxta divinae providentiae dispositionem, ut Augustinus etiam notavit supra. et lib. 21 de Civit., cap. 8.*

11. *Alia signa a Patribus tradita. — Antiquitas Ecclesiae. — Firmitas.* — Accedit denique præter illa signa quasi transitoria, quæ in initio nascentis Ecclesiae magis necessaria fuere, dari alia, quæ permanentia et quasi intrinseca dici possunt, quia in ipsa Ecclesia ita requiruntur, ut semper cum illa durent. Quæ a Catholicis dicuntur notaæ veræ Ecclesiae, quas multi ex illis latissime tradiderunt; nos vero nunc illam provinciam non assumimus; nam præsenti instituto sufficiunt nonnulla signa, quæ attigimus. Unum, et maxime commendatum a Patribus, est antiquitas, quam nomine successionis et originis declaravimus, et in c. 8 de hoc eodem signo redibit sermo. Aliud signum est, quod maneat Ecclesia fundata in eadem petra, in qua Christus illam fundavit, et quod ea immobilis et fidelis perseveret; et de hac sufficiunt dicta in c. 3 et 4, et quæ in lib. 3 addemus. Aliud signum, quod, lib. de Unitat. Eccles., et in multis aliis, valde commendat Augustinus, contra Donatistas, est localis amplitudo, vel (ut ita dicam) ubiquitas Ecclesiae Catholicæ per totum orbem diffusæ, sicut promissa est, et de hac addemus aliqua in cap. 10. Hæc ergo omnia signa visibilia sunt, et per ea fit visibilis Ecclesia, non animali modo, sed rationali, et fidei, quia, supposita promissione et prædictione talium signorum de vera Christi Ecclesia, videndo illa signa in aliqua congregatione, videtur vera Ecclesia saltem sub generali ratione credibilis, juxta modum loquendi D. Thomæ 2. 2, quæst. 1, art. 4, ad 2 et 3, et art. 5, ad 1, id est, per talia signa videt quilibet prudens, de tali congregatione esse credendum, esse veram Ecclesiam, et non de alia.

12. *Hæc signa nulli hæreticorum conventiculo quadrant.* — Atque in hunc modum expli-

cata Ecclesiæ visibilitate, nullo modo dicere potest aliquis novorum dogmatum sectator, vel Anglicanæ sectæ defensor, congregacionem suam esse Ecclesiam visibilem, et veram; idemque de quocumque hæreticorum conventiculo statuendum sentio. Probatur, quia nulla signa exhibent, vel notas habent, quibus Ecclesiæ Christi veritas ita ibi apparat, ut secundum prudentem rationem, credibile sit illam esse veram Ecclesiam, quam Christus instituit, et perpetuo duraturam esse promisit. Non enim habet illa congregatio sub tali secta antiquitatem, ut ex facto supra relato constat. Neque habet originem condignam Ecclesiæ Christi; ut enim in simili, mutatis nominibus, dixit Tertullian., de Praescript., c. 30 : *Ubi tunc Lutherus, ubi tunc Calvinus, nam constat illos neque adeo olim suisse, et in catholicam primo doctrinam credidisse apud Ecclesiam Romanensem, donec sub pontificatu Leonis X, propter ambitionem et inquietam animorum affectionem venena doctrinarum suarum disseminarunt.* De qua re plura inferius, c. 12, dicemus. Deinde non habet ille cœtus fundamentum petræ, in qua Christus suam Ecclesiam fundavit, et in qua permansuram esse promisit, ut ostensum est, sed potius directe profitetur defectionem ab illo fundamento, imo vehementi odio illud insectatur. Ad hæc, amplitudinem non habet, sed in quodam terræ angulo latet, et neque totum illud occupat, neque ibi consensionem doctrinæ habet, sed infinitam propemodum varietatem et divisionem. Ut omittam, nulla habere signa supernaturalis virtutis, nec divini luminis, aut veræ sanctitatis, cum Catholicæ Ecclesiae antiqua lumina, sanctos, inquam, Patres et Doctores tam facile deserat, et quasi contemnat, et eximiæ sanctitatis ac perfectionis viam petulanter irrideat. Quis ergo prudens, his omnibus attente consideratis, cogitare possit, nedum firmiter credere, ibi esse veram Christi Ecclesiam.

13. *Prima hæreticorum evasio. — Consultatur.* — Dicent fortasse aliqui ex hæreticis, se habere signa sufficientia veræ Ecclesiae, quia habent veras Scripturas, ac legitimum earum sensum, et Christi sacramenta, ac vitam bonam et honestam, conformemque Christi præceptis. Sed hæc partim communia sunt, et hæreticis omnibus, et veræ Ecclesiae Christi, ut habere Scripturam, et aliqua Christi sacramenta, et aliquam speciem virtutis aut religionis, saltem apparentis, et ideo ex his solis non potest visibilis fieri vera Ecclesia in sensu

prædicto. Quædam vero sunt falsa, ut nos credimus, et in se sunt obscura, quæ potius credi debent quam videri, et ideo inepte afferuntur ut signa visibilis Ecclesiæ. Tale est quod dicitur de vero sensu Scripturæ: sæpe enim latens est, et potius per veram Ecclesiæ definitiæ debet. Et simile est quod dicitur de numero, veritate, ac legitimo usu sacramentorum. Quod autem spectat ad sanctitatem vitæ, licet in singulis personis occulta, vel incerta sit, nihilominus in professione, et statu perfectionis ejus nihil habet Anglicana secta, quod illam commendet, neque in quo possit cum sanctitate Ecclesiæ Catholicæ comparari. Quapropter rectius adversarii in hoc sensu dicent, suam Ecclesiam esse invisibilem; oportet tamen, ut consequenter fateantur non esse veram: nam vera Ecclesia Christi visibilis est, non solum quia ubi, et in quibus personis visibilibus sit, definite cognoscitur, sed etiam quia sensibus se exhibet, ut evidenter credibilem tamquam veram Christi Ecclesiam, ut declaratum satis et probatum est.

14. Secunda evasio. — Responsio. — Scio non defuturos qui dicant, quamvis in sua secta desint illa omnia signa visibilis, seu evidenter credibilis Ecclesiæ, ipsos tamen certos interius reddi ex peculiari spiritu, seu revelatione Dei, apud se esse veram Ecclesiam. Sed hæc evasio ridenda est potius, quam impugnanda; nam, ut recte dixit Augustinus, lib. de Unit. Eccl., c. 2: *Cum inter nos et hæreticos quæstio est ubi sit Ecclesia, quid facturi sumus? in verbis nostris eam quæsitiuri, an in verbis Christi? Puto quod in verbis Christi, qui veritas est, et optime novit corpus suum.* Quod late prosequitur, excludens non solum privatum spiritum, sed etiam interpretationem Scripturæ secundum sensum hæreticorum. Unde hæc evasio de privato spiritu communis est ad omnia et singula falsa dogmata illius sectæ, et ideo quoad hanc partem in capite sequenti disputationem hanc plenius absolvemus.

15. Solvuntur argumenta. — Nunc solum superest ut rationi dubitandi, et objectionibus in principio positis satisfaciamus, quod quidem ex jam dictis facillimo fiet negotio. Præcipuum siquidem, eni maxime adversarii nituntur, fundamentum solum probat, interiorum formam Ecclesiæ, quæ est vera fides cum charactere baptismali, non esse in se visibilem, seu sensibilem. Non tamen probat non esse visibile corpus humanum et mysti-

cum, de quo certo constet tales formam illi inesse. Item non probat formam illam non esse visibilem in alio, seu in signis quibus sufficienter manifestatur. Quia, licet per hæc signa non ostendatur sufficienter fides vel sanctitas in singulis membris Ecclesiæ, propter fictionem quæ in unaquaque determinata persona esse potest, nihilominus sufficienter ostendunt, in hoc corpore esse veram Christi fidem, et veram sanctitatem, quia vera Christi Ecclesia sine his esse non potest. Dico autem sufficienter ostendere, non quia illa dona evidenter manifestent, nam supernaturalia sunt et occulta, et per fidem creduntur, sed quia saltem faciunt rem evidenter credibilem, in quo sensu diximus, Ecclesiam veram, quoad hanc partem esse in notis suis et signis visibilem.

16. Explicatio ex Patribus. — Ad testimonium Lucæ 17, respondetur illud sæpe solle objici a Patribus in hac materia contra hæreticos asserentes, Ecclesiam esse latenter, aut occultam. Sic Augustinus, lib. 43 contra Faust., c. 13, exponens similem locum Matth. 24, inquit: *Dominus prævidens ait: Non potest civitas abscondi supra montem posita, etc., ut non audiantur illi, qui ad religionem scissuras traducunt, dicentes: Ecce hic est Christus, ecce illic, etc.* Et infra: *Nec illi audiantur, qui sub nomine quasi secretæ et apocryphæ veritatis, et hominum paucitatis, dicunt: Ecce in cubiculis, ecce in deserto.* Et lib. 1 Quæstionum Evangelicar., q. 38, per fulgur, quod exit ab Oriente, et pervenit usque ad Occidentem, intelligit Ecclesiam, quæ velociter totum occupavit orbem; subnectitque: *Constituta ergo auctoritate Ecclesiæ per orbem terrarum clara, atque manifesta, consequenter discipulos admonet, atque omnes fideles, et qui in eum credere voluerunt, ne schismaticis atque hæreticis credant. Unumquodque enim schisma, et unaquæque hæresis, aut locum suum habet in orbe terrarum, partem aliquam tenens, aut obscuris atque occultis conventiculis curiositatem hominum decipit.* Et in hoc sensu explicat totum Christi sermonem, et ideo ait, præmonuisse: *Nolite credere dicentibus: Ecce hic, vel illic est Christus.* Et idem sensit Origen., tract. 30 in Matth., dicens: *Non eum ostendunt in Ecclesia, quæ plena est fulgore, quæ plena est lumine vero.* Eamdemque sententiam insinuavit Hieronymus, Matth. 24, ad illa verba: *Si ergo dixerim vobis, etc., dicens: Aut in hæreticorum penetralibus, qui Dei pollicentur arcana, nolite*

credere. Estque hæc sententia verissima, et virtute contenta in verbis Christi, quamvis non sit ibi præcipue intenta.

17. Explicatio auctoris. — In loco ergo Lucae duæ partes, seu duæ sententiæ Christi distinguendæ sunt. Prior, quæ in objectione refertur, in qua Christus loquitur de regno Dei, ubi regnum Dei sine dubio non significat Ecclesiam, sed ipsum Christum, vel adventum ejus. Interrogaverunt enim Pharisei Christum : *Quando venit regnum Dei?* id est, veniet. Quia non interrogabant de Ecclesia, sed de regno quod per Messiam obtenturos sperabant, et illud vocabant regnum Dei, non quia aliquid cœleste vel spirituale de illo cogitarent, sed quia ex speciali dono Dei per virtutem et potentiam Messiae illud sperabant, vel quia Christum ipsum audierant sæpe loquentem de regno Dei, ipsi vero de regno Messiae nihil nisi temporale, et exterioris potentia, et majestatis cogitabant. Et ideo respondit eis Christus : *Non venit regnum Dei cum observatione, nec dicent : Ecce hic, aut ecce illuc.* Ubi non loquitur de hæreticis, sed excludit expectationem Messiae per modum adventus regis temporalis, qui expectari solet cum certa temporis observatione, et cum aliis præviis signis, ex quibus conjectari solet ubi sit, aut quando perventurus sit. Et ut omnino tolleret falsam cogitationem de futuro adventu regni Dei, quasi nondum venisset, addit Christus : *Ecce enim regnum Dei intra vos est,* quia Messiam, quem sperabant, jam inter illos versatum habebant, sine illo licet apparatu regio quem cogitabant. Probabile etiam est interrogasse Judæos de regno Dei, quod Christus prædicabat, quamvis non intelligerent, quale esset; Christum autem respondisse, illud regnum, prout in hac vita obtineri potest, esse spirituale, et ideo non esse quod speretur pro certo tempore aut loco, quia et intra hominem est, et in potestate uniuscujusque est illud intra se habere, si velit per fidem et dilectionem Christum recipere.

18. Altera pars sententiæ Christi adeo est distincta a prima, ut aliqui censeant non fuisse continenter nec eodem tempore dictas, et saltem est certum ex Evangelio, in priori locutum esse Christum ad Phariseos, respondendo illis; in posteriori autem locutum esse ad discipulos, et in eis ad omnes fideles, præveniendo illos, et dicens : *Venient dies, etc., et dicent robis : Ecce hic, et ecce illuc.* Et hæc pars sine dubio pertinet ad secundum

adventum Christi, et continet prædictionem multorum, qui pseudochristi fingendi sunt, et præsertim Antichristi: contra quorum persecutions, et deceptions præmonens fideles Christus præmunit, ne indicantibus, et dicentibus : *Ecce hic, vel illuc est Christus,* præberent fidem. Et ita ex illo loco nihil colligitur, quod ad præsentem causam faciat: nam hæc posterior pars potius accommodatur optime contra hæreticos, ut jam superius annotavi. Prior vero intellecta de primo adventu Christi, constat nihil pertinere ad quæstionem de Ecclesia. Imo etiam per illa verba non excluditur, quin primus adventus Christi fuerit sensibilis et visibilis, ita ut in aliquo loco certo quæri posset, et signari, sicut Magi quærebant, *ubi Christus nasceretur*, et recte illis responsum est : *in Bethleem Iudeæ.* Utique per signum prophetiæ, nam talia signa data a Prophetis recte observabantur ad expectandum et cognoscendum Messiam, imo per talia signa ipse interdum se manifestabat. Igitur in illis verbis cogitationem humanam excludit, ne putaretur quærendus aut expectandus per signa, et observations humanas, et cum apparatu regis temporalis, etc. Quod si de spirituali regno animæ illa responsio Christi intelligatur, clarum est illud esse spirituale et internum, et hac ratione non esse visibile, et non esse alligatum certo loco et tempori, prout tale regnum in singulis personis inventur. Et hoc modo etiam tota Ecclesia potest dici regnum Dei, et civitas Dei viventis, et domus spiritualis, et per se invisibilis, quantum ad sanctitatem, et spiritualia dona, et nihilominus esse visibilis quoad personas in quibus existit, non vero per rationes humanas, neque hic aut illuc, sed per certa indicia a Christo et Prophetis data, et in quocumque loco et tempore, quia et perpetua et universalis est, ut Augustinus observavit.

19. Ad verba Symboli, jam satis declaratum est quomodo Ecclesia sancta et Apostolica videri possit et credi; videtur enim quoad personas ex quibus constat; creditur autem quoad veram fidem, sanctitatem, et alia divina dona, per quæ Christo conjungitur tanquam corpus mysticum ejus. Item videtur per signa visibilia; creditur autem ut in se per spiritualem et invisibilem formam constituitur. Denique videtur in ratione credibilis; creditur autem in ratione veri et supernaturalis objecti. Ad locum Augustini respondeo, Augustinum nunquam distinxisse Ecclesiam prædestinatorum et reproborum tanquam

duas Ecclesias, imo nec tanquam duas partes ejusdem Ecclesiæ. Solum enim in principio illius cap. 8, lib. 20 de Civit., loquens de Antichristo ait : *Nunquam ab illo Ecclesia seducetur prædestinata, et electa ante mundi constitutionem*; ubi non distinguit Ecclesiam, sed a potiori parte illam denominat, sicut in cap. 9 dieit, interdum a parte denominari totum. Ostendebat enim Augustinus, in dicto cap. 4, non esse ab Antichristo seducendam Ecclesiam, utique totam, nec quoad præcipuam ejus partem, et ideo voeavit illam prædestinatam, non quia sit aliqua Ecclesia invisibilis ex solis prædestinatis constans, sed ut significaret, quoad præcipuam partem ejus, quæ in electis et prædestinatis existit, decipi non posse, sicut significatum est in verbis Christi : *Ita ut in errorem inducantur, si fieri potest, etiam electi.*

CAPUT IX.

REGEM ANGLIÆ, CUM NEC SCRIPTURAM INTEGRAM,
NEG VERBUM DEI NON SCRIPTUM ADMITTAT,
FIDEI VERE CHRISTIANÆ DEFENSOREM NON ESSE
OSTENDITUR.

1. Hactenus generatim demonstratum est, in Anglieana secta veram fidem non esse, quia per defectionem a vera fide introducta est. Et haec occasione digressi sumus, ostendendo, fidem, a qua antea defecit (quæ non fuit alia ab Ecclesiæ Catholice, Romanæ, ac visibilis fide), veram semper fuisse, semperque indubitanter futuram esse, ut inde certissime constet, in Anglicano schismate veram fidem esse non posse. Et quamvis hinc vel eaeentibus inclareat, regem Angliæ, qui se caput et protectorem illius schismatis profitetur, defensorem veræ fidei non esse, quia vero ipse tribus præclaris titulis ornat et extollit fidem quam defendit, cum se appellat defensorem *fidei vere Christianæ, Catholice et Apostolice*, ideo operæ pretium duxi, sigillatim per has tres prærogativas fidei discurrere, et ex singulis earum rationibus ostendere, non posse ejusmodi titulum illi, qui Anglicanum schisma defendit, convenire.

2. *Fides cum materiam, tum actum credendi significat.* — Rem igitur a fide vere Christiana aggrediens, animadverto duobus modis denominari posse fidem vere Christianam, scilicet, ex materia credita, et ex ratione credendi. Nam et ipsum nomen fidei interdum

res creditas, seu doctrinam ipsam fidei significat, sicut Athanasius in Symbolo dixit : *Hæc est fides Catholica, quam nisi quisque fideliter firmiterque crediderit, salvus esse non poterit.* Interdum vero actum, seu virtutem credendi designat, ut est apud Paulum, ad Hebr. 11 : *Est autem fides substantia rerum sperandarum, argumentum non apparentium.* Priori sane modo fides vere christiana, quæ vere fuerit a Christo vel Apostolis nomine ejus tradita, appellabitur. Posteriori autem modo assensus ejusdem doctrinæ, non humana opinione vel ratione conceptus, sed prorsus divina, tanta-que certitudine et firmitate, ut nullum formidini aut dubitationi relinquat locum, vera fides nuncupabitur, juxta illud Pauli, 2 ad Tim. 1 : *Scio cui credidi, et certus sum, quia potens est depositum meum servare.* Quæ verba licet fiduciam seu spem certam indicent, illa tamen in certitudine fidei fundatur, et de illa ad litteram loquitur Apostolus, cum dicit se esse certum de omnipotentia Dei, hoc enim non est objectum fiduciæ, sed assensionis. Evidenter vero sunt verba ad Galat. 1 : *Licet nos, aut Angelus de cœlo, etc.* Unde etiam est illud Athanasii in Symbolo : *Quam nisi quisque fideliter firmiterque crediderit, salvus esse non poterit.* Et illud Basilii, hom. de Vera ac pia fide : *Est fides eorum, quæ dicta sunt, assentiens approbatio sine ulla hesitacione, cum summa animi persuasione de eorum veritate, quæ Dei munere sunt prædicata.* Et illud Bernardi, epist. 190 : *Nonne si fluctuat fides, inanis est spes nostra? stulti ergo martyres nostri sustinentes tam acerba propter incertam, nec indubitantes sub dubio remuneratio-nis præmio durum per exitum diuturnum inire exilium, sed absit, ut pulemus in fide vel spe nostra aliquid dubia uestimatione pendulum,* etc.

3. *Rex Angliæ non recipit integrum fidem christianam.* — De fide igitur pro materia, seu doctrina fidei sumpta, contendit rex Angliæ, se fidem vere christianam retinere, quia Scripturam, Ecclesiæ Symbola, et quatuor prima Concilia generalia amplectitur, eisque fidem habet. Verumtamen licet hæc cuilibet homini vere Christiano necessaria sint, non tamen sufficiunt ad integrum christianam fidem; oportet enim hæc credere, et alia non omittere : nam qui in uno offendit, factus est omnium reus. In duabus autem maxime offendit Angliæ rex, primum, quia multa catholica dogmata nimis aeriter insecatatur, et, ut ex ipsis præfatione liquet, errores

fidei christianæ contrarios profitetur. Quia vero ad hoc demonstrandum necessarium foret singulos errores in medium afferre, eorumque falsitatem ostendere, ideo, ne a proposita controversia digrediamur, in sequentem librum id differimus, ubi, quod nunc supponimus, sectam Anglicanam quoad dogmata non posse diei fidem vere christianam, ostendemus. Quia licet in multis cum illa conveniat, quæ ab illa sumpsit, tamen et in eorumdem dogmatum intelligentia, et in aliorum confessione dissentit plurimum; fides autem vere christiana non dicitur, nisi quæ a doctrina verae Ecclesiae, quæ eadem est cum Christi doctrina, nec in re quantumvis minima discrepat.

4. Fundamentum fidei regis Angliae. — Omissa itaque tantisper fidei materia, de modo et fundamento credendi, quatenus ad fidem vere christianam necessarium est, in præsentि sumus acturi. Jacobus enim rex, in sua Præfatione ad principes christianos, circa finem, ita loquitur: *Cum Paulo opto, vos omnes fieri tales, hac una in re, qualis et ego sum: impensis, ut velitis Scripturas per voluntate, ex iis credendi normam petere, neque super aliorum incertis opinionibus, sed rectra ipsorum certa scientia fidei fundamenta collocare.* Quibus in verbis suæ fidei fundamentum rex declarat, illudque in solis Scripturis certa quadam scientia propria intellectis constituit. Ex illis ergo duo nos præcipue fundamenta sumemus, ad ostendendum fidem ejus non esse vere christianam, ac proinde non habere unde possit de titulo fidei defensoris gloriari. Primum argumentum nostrum desumetur ex defectu integratatis fidei: nam fides, quæ integra non est, vera esse non potest; in illis autem verbis ostendit rex se non habere integrum fidem; et hoc argumentum in hoc capite urgebimus. Aliud vero fundamentum accipimus ab illa scientia peculiari, in qua scientia fidei suæ jecit fundamenta; ejusmodi siquidem fides nec divina, nec certa, nec catholica esse potest, ut capite sequenti prosequemur.

5. Quod ergo ad primum attinet, quamvis rex in prædictis verbis non addat particulam excludentem alia fundamenta fidei, attente tamen considerato toto discursu, et variis ejus verbis in dicta Præfatione, hanc fuisse regis mentem, plane colligimus. Nam impensis paulo ante illa verba, p. 456, in principio, traditiones irridet, dicens: *Non inanibus fluxisque et pravis hominum traditionibus attendentes.* Nam, licet de humanis traditioni-

bus loqui videatur, sentit tamen omnem traditionem non scriptam esse humanam, inanem, fluxam, aut pravam; tum quia nunquam mentionem facit traditionis divinæ non scriptæ; tum etiam quia paulo antea indicat verbum Dei non nisi in Scriptura inveniri. Precatur enim, *ut Deus nolis mentem injiciat cogitandi, quid ad Evangelii plantationem, et propagationem, ex conscientia secundum dirini verbi præscriptum præstare teneamur, nostri illius veri, ac unici pastoris imperio, ac voci, quam in Scripturis audimus, obtemperantes.* Ubi expendenda est illa particula, *quam in Scripturis audimus;* posita enim est ad significandum, non teneri nos obtemperare voci Dei in Scriptura non contentæ. Et quod de *unico pastore* loquitur, licet possit habere verum sensum, vereor tamen esse positum ad excludendam vocem cuiuscumque alterius pastoris, etiam si ab illo Principe pastorum super gregem suum sit constitutus. Et in hoc sensu superiorius, pag. 47, *Romanæ Ecclesie officinam* irridet, et pag. 57, *per negat terrestrem esse aliquem Ecclesie Monarcham, qui infallibilitate spiritus nunquam in suis sententiis errare possit.* Quod repetit pag. 61 et 62, et ita, præter Scripturam, omnem aliam regulam, et fidei fundamentum evertit.

6. Et quamvis p. 42, 43 et 44, videatur cum Scripturis conjungere tria Symbola, et quatuor prima Concilia generalia, et unanimem consensum Patrum, qui primis quadragesitis annis post Christum floruerint, nunquam tamen (quod notandum est) dicit se credere, aut fidem adhibere nisi Scripturis. De Symbolis enim ait, *se in illa juraturum;* et de Conciliis, *ea venerari ac recipere tanquam catholica et orthodoxa, vel eis adhaerere,* ut ait p. 62. Significat ergo in his non nisi tanquam in fundamentis fidei, sed illa recipere, quia sentit et judicat, vel non continere errorem, vel nihil docuisse ad fidem pertinens, quod in Scriptura non sit. His ergo adhaeret, judicando potius (ut sic dicam) Concilia et Symbola, sua certa scientia, quam de Scripturis habet, quam illis utendo, ut regula et norma sui judicii. Quod magis declarat circa unanimem sensum Patrum; dicit enim interdum, *cum illis sentire, aut si non ita sentiat, obmutescere, quia reprehendere non audet;* judicio ergo suo subjicit unanimem consensum antiquorum Patrum, etiam in his, *que tanquam necessaria ad salutem statuunt,* ita enim expresse loquitur. Solam ergo Scripturam ponit tanquam proximam regulam fidei, eam-

que non integrum, nec quoad omnes ejus partes, prout illam Ecclesia Romana, et Catholica amplexatur; sed a canone excludit libros, quos vocat secundæ lectionis, ac ordinis; illos enim omnes inter apocryphos ponit, quos Bellarminus¹ (quem allegat) in secundum ordinem reponendos existimavit.

7. Libros sacros tam primi quam secundi ordinis esse canonicos. — *Sola Scriptura non est integrum et proximum fidei fundamentum.* — *Verbum Dei non scriptum eadem fide quam scriptum recipiendum.* — Hoc igitur fundamentum fidei sic acceptum et intellectum neque sufficiens, neque firmum esse potest. Quæ ut ostendam, statuo id in quo inter nos convenit, libros Scripturæ, qui primi ordinis appellantur, et canonicos esse, et quidquid in eis est, verum Dci verbum esse, ac proinde ex se, id est, si debito modo credantur, esse firmissimum fidei fundamentum. Nos autem addimus imprimis non tantum hos libros, sed etiam qui secundi ordinis vocantur, qui ab Ecclesia jam sunt approbati, et in canone recepti, esse fidei fundamentum, et ex hac parte illud fundamentum, prout a rege accipitur, multiln esse, et insufficiens. Ad hoc autem probandum sufficit nunc nobis auctoritas Concilii Tridentini, quæ est infallibilis auctoritas Ecclesiæ Catholice, ut cap. 3 et 4 ostensum est, et in puncto sequenti hoc etiam confirmabimus. Addimus deinde, solam Scripturam, prout includit etiam omnes hos libros, non esse integrum christiana fidei fundamen-tum proximum, et (ut sic dicam) formale et expressum. Nam, licet in quodam sensu quidquid fides christiana credit, dici possit in Scriptura fundatum, vel proxime, quia in ea formaliter continetur, vel remote, quia in Scriptura approbatur auctoritas, in qua veritates aliquæ fundantur, sive illa sit traditio, sive Ecclesia, juxta modum loquendi Augustini, lib. 4 contra Crescon., cap. 32 et 33, et aliorum Patrum, quos in fine hujus capituli insinuabimus, nihilominus secundum veram et catholicam fidem, negari non potest quin præter Scripturam detur in Ecclesia Christi verbum Dei non scriptum in libris canoniciis, quod eadem fide, qua verbum scriptum, suscipiendum sit. Quæ assertio si ex instituto tractanda esset, prolixam peteret de divinis et humanis traditionibus disputationem, sed quia illa non spectat ad præsens institutum, sed solum obiter illam attingimus, ad rem

quam intendimus enucleandam, ideo breviter auctoritate et ratione per transennam tantummodo eam confirmabimus.

8. Probatur ergo primo, quia ipsam Scripturam hoc diserte statuit; in ipsa enim præcipimus tenere verbum Dei non tantum scriptum, sed etiam solo sermone, seu voce traditum, quod vocamus traditionem divinam non scriptam. Quapropter graviter quidem hallucinantur, qui damnant, vel contemnunt, vel incertam esse putant omnem traditionem, tanquam humanam. Quamvis enim omnis traditio per homines custodiatur, et a prioribus ad posteriores temporum vicissitudine perveniat, nihilominus verbum ipsum, quod a principio prædicatum est, scriptum quamvis non fuerit, in Ecclesia per traditionem conservatum, potest esse divinum, seu divinam confinens institutionem. Assumptum probatur ex illo 2 ad Thessaloni. 2: *Fratres, state, et tenete traditiones, quas didicistis, si-re per sermonem, sive per Epistolam nostram;* in quibus verbis duo maxime sunt animad-vertenda, quæ Theophylact. breviter et docte tetigit, dicens: *Vel hinc etiam perspicuum est, quod pleraque etiam sine scriptis per ser-monem, id est, viva voce tradiderunt, non so-lum per epistolam.* Ecce primum; aliud est: *Si similiter autem et haec et illa, fide digna sunt. Itaque et Ecclesiae traditionem fide dignam existimemus. Traditio est. Noli amplius quæ-rere.* Quæ sumpsit ex Chrysostomo, orat. 4 in eamdem epistolam. Et idem fere habet Theodoret., ibidem, et reliqui expositores, imo pene omnes catholici scriptores hoc potissimo testimonio utuntur ad probandas ex Scriptura sacra non scriptas traditiones. Præ-ter hoc vero sunt alia Scripturæ testimonia, in quibus ab Apostolis tradita credere et tenere præcipimus, ut 2 ad Thess. 3: *Denun-ciamus vobis, fratres, in nomine Domini nostri Jesu Christi, ut subtrahatis vos ab omni fratre ambulante inordinate, et non secundum traditionem, quam acceperunt a nobis.* Et 1 ad Cor. 11: *Ego enim accepi a Domino, quod et tradidi vobis, utique verbo, nondum enim de illo mysterio scripserat, et in fine concludit: Cætera autem, cum revero, disponam.* Et in principio: *Laudo, inquit, vos, fratres, quod per omnia mei memores estis, et sicut tradidi vobis, præcepta mea tenetis.*

9. *Ratione, confirmantur traditiones.* — Ex quibus, et similibus locis, quæ brevitatis causa omitto, possumus hanc elicere ratio-nem, quia verbum Dei idem est, et ejusdem

¹ Bellarm., lib. 4 de Verbo Dei, c. 4.

auctoritatis, sive scriptum sit, sive tantum ore traditum; ergo eadem fide est suscipiendum, si in Christi Ecclesia retentum et conservatum sit. Antecedens non solum certum, sed etiam per se evidens est; nam materiale signum (ut sic dicam) non auget vel minuit veritatem loquentis. Et ideo aequaliter dixit Paulus: *Sive per sermonem, sive per epistolam.* Imo (quod est attente considerandum) Christus non præcepit Apostolis, ut scriberent, sed ut prædicarent Evangelium omni creaturæ, Marci ult., et subdit: *Qui crediderit, et baptizatus fuerit, salvus erit; qui vero non crediderit, condemnabitur;* ergo verbum tantum prædicatum, et non scriptum, est vere verbum Dei. Unde Paulus, 1 ad Thess. 2: *Cum accepissetis a nolis verbum auditus Dei, suscepistis illud, non ut verbum hominum, sed ut est vere verbum Dei.* Constat autem, *verbum auditus*, proprie et in rigore esse verbum vocis, licet scriptum non sit. Hoc ergo verbum in principio evangelizatum est, et signis ac miraculis confirmatum, juxta illud, quod eodem loco subjungit Marcus: *Illi autem profecti prædicaverunt ubique, Domino cooperante, et sermonem confirmante sequentiibus signis.* Quin potius ab hoc verbo sermonis verbum scriptum maxima ex parte derivatum est, ut Lucas in principio sui Evangelii testatur, dicens: *Quoniam quidem multi conati sunt ordinare narrationem, quæ in nobis completæ sunt rerum, sicut tradiderunt nobis, qui a principio ipsi riderunt, et ministri sunt salutis, visum est et mihi,* etc. Est ergo certissimum, verbum non scriptum esse æque divinum, ac subinde æque infallibile ac scriptum, et eadem fide suscipiendum.

10. *Evasio hereticorum refutatur.* — Respondebunt fortasse hœc quidem habere locum, si constaret aliquod verbum Dei non scriptum permansisse in Ecclesia, nunc autem nullum esse, quod scriptum non sit. Nam verbum sermonis, quod in principio evangelicæ prædicationis ad fidem audientium sufficiebat, ut pro futuris fidelibus conservaretur, divina sic disponente providentia, scriptum est, nihilque necessarium ad salutem, vel plenam fidem relictum est non scriptum; et ideo nunc sola Scriptura est regula fidei. Ut autem hæc responsio alicujus momenti sit, oportet ut hæretici nobis probent id, quod ultimo loco ponunt, minimū, nullum Dei verbum prædicatum relictum esse non scriptum. Imo, ut consequenter loquantur, necesse est ut ex Scripturis id probent,

quia ipsi dieunt nihil esse credendum, nisi quod in Scripturis continetur. Et profecto si ad credendum Scriptura necessaria esset, maxime petenda esset ad hunc articulum, a quo magna ex parte pendet integritas et soliditas fidei, et propter quem tanta confidencia rejiciuntur omnia, quæ Ecclesia Catholica credit non scripta. At certe adversarii, non dicam ex Scripturis, verum neque ex aliqua historia, aut testimonio fide digno id probare possunt. Nos autem contrarium colligimus ex Scripturis; nam Joannes, in fine sui Evangelii, dicit: *Sunt autem et alia multa, quæ fecit Jesus, quæ si scribantur per singula, nec ipsum arbitror mundum capere posse eos, qui scribendi sunt, libros.* Et Paulus, 1 ad Corinth. 11, dicit: *Cætera autem, cum venero, disponam, quæ tamen scripta non leguntur.* Et Actor. 20, Paulus allegat dictum Christi: *Oportet (inquiens) meminisse verbi Domini Jesu, quoniam ipse dixit: Beatus est magis dare, quam accipere,* quod alibi scriptum non legebatur. Et ita potuerunt etiam multa alia omitti. Unde antiquissimi Patres¹, præter dogmata scripta agnoscunt etiam non scripta. Nam, ut omittam Dionysium, Origenem, Tertullianum, et Clementem, locupletissimus testis est Irenæus, lib. 2 contra Hæreses, cap. 2 et 3; et Basilius, lib. de Spiritu Sancto, cap. 27, et lib. contra Eunomium; Epiphanius, hæresi 61, circa finem; Hieronymus, lib. contra Luciferian.; Augustinus, Epist. 1, 8 et 11 ad Januar., et 86 ad Casulanum; et Cyprian, in lib. de Cardinalibus Christi Operib., cap. de Ablutione pedum, vel illius operis auctor.

11. Ulterius vero urgere possunt adversarii dicentes, licet verbum Dei non scriptum secundum se spectatum potentissimum sit ad fidem, quia tamen transitorium est, et sua natura labile fluxumque habetur, solum enim in memoria hominum, quæ facile labitur, conservari potest, ideo nisi scribatur, non posse integrum et purum conservari, et ex hac parte non posse ad fidem fundandam sufficere. Hæc autem responsio et Ecclesiae auctoritatem labefactat, dum supponit illam non habere Spiritus Sancti assistentiam ad verbum Dei non scriptum in sua puritate conservandum, et consequenter etiam verbo scripto di-

¹ Dionys., de Ecclesiis. Hierarc., c. 1. — Orig., in prine. Periarchon, et tract. 29 in Matth. — Tertull., in libr. Praescrip., et libr. de Cōrona milit. — Clemens, in Epistolis.

vinam aufert auctoritatem, et omnia ad humanas revocat conjecturas. Et ut utrumque commonstrem, liceat mihi a rege Angliæ interrogare, an credat hos libros, quos ut canonicos recipit, canonicos esse, verumque et purum Dei verbum continere, idque divina fide et infallibili, vel solum humana, propter circumlatam ubique famam et communem hominum opinionem. Si hoc posterius dicat, totam fidem suam ponit in auctoritate humana, cui sine dubio posset subesse falsum, nisi divina simul intercedat; nam fieri non potest ut majori fide credat ea, quæ in his libris scripta sunt, quam credat, hos libros esse canonicos, id est, esse verbum Dei, cum ipsummet verbum Dei sit ratio credendi cætera. Si autem certa et indubitata fide divina credit, in his libris esse purum verbum Dei, seu hos libros esse canonicos, interrogamus ulterius cur hoc credat; nam hoc non potest credere, quia scriptum sit in ipsis, tum quia vix unquam in illis hoc invenietur omnino dilucide expressum; tum etiam quia, licet inveniretur, de hoc ipso verbo interrogamus, cur credatur esse divinum, seu Deo dirigente et inspirante scriptum. Ergo necesse est ut fateatur, regulam, et fundamentum credendi saltem hanc particularem veritatem, scilicet, hos libros esse Scripturam divinam, non esse ipsammet Scripturam, ac subinde esse verbum Dei non scriptum in canonicis libris, quod nunc traditionem appellamus.

42. Ex dictis ipsiusmet regis eadem veritas stabilitur. — Imo ex verbis ejusdem regis in Praefatione, si constanter loqui placuerit, ad hoc concedendum compelletur. Nam p. 44 prius dicit, Scripturis se habere illam fidem, quæ a christiano homine debetur, et statim subjungit: *Ipsa etiam apocrypha eo loco habeo, quem illis antiquitas tribuit.* Ex quibus verbis colligo, traditionem ex sententia regis potuisse dare illis libris eam auctoritatem, quam ejus opinione sunt sortitæ; quid enim est antiquitas, nisi traditio quædam? ergo ratione consimili negare non potest alios libros, quos censet majorem auctoritatem habere, ab antiquitate etiam illam obtinere, quæ fortasse in illis major seu constantior traditio fuit. Verumtamen si hac sola conjectura ducitur ad recipiendum in canone hos libros potius quam illos, non habet satis firmum et inconcussum suæ fidei, quam ita tuetur, fundamentum. Primo, quia etiamsi recepta et indubitata hominum fama vel existimatione,

liber aliquis certi auctoris habeatur, semperque ante hominum memoriam sine controversia ita reputatus sit, nihilominus tota hæc auctoritas non excedit fidem humanam, potestque in rigore illi falsum subesse; ergo idem erit in canonicis libris, nisi aliunde eorum antiquitas majorem recipiat certitudinem.

43. Secundo, quia quamvis perspicuum foret, libros illos fuisse conscriptos Spiritu Sancto dictante, non potest sola antiquitas infallibiliter ostendere illos esse puros, sicut a Spiritu Sancto sunt prolati, et non esse decursu temporum corruptos, vel casu, negligenter, aut imperitia, vel malitia hostium fidei, præsertim Judæorum aut hæreticorum temeratos. Tertio, quia ex variis translationibus eorumdem librorum eadem ambiguitas oriri potest, quæ per solam antiquitatem, et conjecturas ejus non posset cum certitudine et infallibilitate auferri, ut experientia ipsa satis ostendit; tanta est enim in lectionibus et versionibus varietas, et in quibusdam etiam minutioribus partibus controversia, an fuerint in originali Scriptura, necone, ut ex sola antiquitatis fide vix possit perpendi, quid omnino verisimilius sit, nedum quid certum prorsus et indubitatum.

44. Auctoritas, cui Spiritus Sanctus specialiter assistat, est in Ecclesia necessaria. — Ex hoc ergo discursu concludimus, necessariam esse in Ecclesia certam aliquam auctoritatem, cui specialiter Spiritus Sanctus assistat, ut possit infallibiliter discernere libros canonicos a non canonicis, et hanc nos dicimus esse in Ecclesia Catholica, quæ licet ad hoc discernendum necessario uti debeat regula traditionis, ut discursus prior sufficienter probat, tamen quia ipsamet traditio potest esse ambigua, et quia proxime et immediate per manus hominum ad nos descendit, ideo necessarium est ut idem Spiritus Sanctus assistat Ecclesiæ, tum ad custodiendum fideliter Scripturarum depositum sibi commissum, tum etiam ad approbandam cum eadem certitudine eam traditionem, quæ sufficit ad conciliandam quibusdam libris certam fidem, et discernendum illam ab alia minus constante, et minus certa. Aut igitur rex Angliæ admittit hunc infallibilem spiritum in aliquo homine, vel hominum congregatione, vel negat omnino hujusmodi potestatem. Si hoc posterius eligat, omnia reducit ad uniuscujusque privatum judicium; et fidei firmitatem et Ecclesiæ violat unitatem, sicut in ultimœ hujus

capitis punto ostendam. Si autem priorem partem eligat, profecto nisi Scripturæ ipsi, et omni prudenti ratione contradicere velit, non nisi Ecclesiæ Catholiceæ, vel ejus capiti, hanc Spiritus Sancti assistantiam concedere potest, tum quia illi tantum promissa est, ut capite tertio et quarto ostendimus; tum etiam quia haec assistentia non debet esse per spiritum privatum, sed publicum, et ad communem utilitatem datum, ut paulo post impensius enucleaturi sumus.

15. *Æquali certitudine observat Ecclesia verbum Dei non scriptum ac scriptum.* — Ecclesiæ igitur commissa est Scripturarum custodia, et illi divinitus datum est, ut fideliter, pure ac sincere illas conservet, verasque a falsis, certas ab incertis, et integras a mutiatis discernat; et ideo Augustinus, in lib. contra Epistolam Fundamenti, cap. 5, pronunciare non veretur: *Evangelio non crederem, nisi me Catholice Ecclesia commoveret auctoritas.* Ex quo principio ulterius concludimus quod fuerat propositum, nimis, non minori auctoritate et fidelitate posse Ecclesiam Dei conservare verbum Dei non scriptum, quam ipsas Scripturas. Tum quia promissio illi facta non est limitata ad verbum Scripturæ, sed simpliciter est enunciatum Ecclesiam esse columnam, et firmamentum veritatis, et Christus simpliciter promisit Spiritum Sanctum, qui doceat nos omnem veritatem, utique necessariam, vel convenientem Ecclesiæ. Tum etiam quia conjectura illa de verbo transitorio et permanenti, est parvi momenti, posita Spiritus Sancti assistantia et virtute. Imo differentia est fere nulla, quia, licet verbum non scriptum, semel aut iterum prolatum, transitorium sit, tamen ut saepius repetitum facile conservatur, et ita contingit in corpore Ecclesiæ per frequentem confessionem, ac celebrationem mysteriorum fidei. Unde dici potest, non solum memoria retineri, sed etiam verbis et factis, seu signis externis fidelium saepe repetitis conservari; quin etiam, licet hoc verbum non sit scriptum in libris canoniciis, semper vel in decretis Pontificum et Conciliorum, vel in Patrum monumentis, manet exaratum. Aliunde vero in conservando verbo scripto in sua puritate non fuisset minor difficultas et contingentia, si sola industria et diligentia humana id agendum esset, quia, ut diximus, facile possunt scripta corrumpi vel mutilari, vel nimium mutari propter varias linguarum translationes, aut exemplarium transcriptiones. Igitur in utro-

que verbo necessaria est et sufficiens Spiritus Sancti assistantia, ideoque non minus efficax est ad confirmandam fidem verbum Dei non scriptum, quam scriptum, si utrumque per Ecclesiam sufficienter proponatur.

16. *Auctoritate Patrum traditiones firman- tur.* — Atque hujus veritatis gravissimi testes sunt. Imprimis Irenæus, lib. 3 contra Hæres., c. 4, sic concludit, ex his quæ de traditionibus dixerat: *Non oportet adhuc apud alios querere veritatem, quam facile est ab Ecclesia sumere, cum Apostoli, quasi in depositorum di- vites, plenissime in eam contulerint omnia, quæ sunt veritatis, ut omnis quicumque velit, su- mat ex ea potum ritus. Hac est enim ritus in- troitus, omnes autem reliqui fures sunt et la- trones.* Declaransque amplius sufficientiam verbi non scripti, in hunc modum interrogat: *Quid autem si nec Apostoli quidem Scripturas reliquissent nobis, nonne oportebat ordinem se- qui traditionis, quam tradiderunt iis quibus committebant Ecclesias?* Et in exemplum adducit multas gentium nationes, quæ fidem Christi suscepserunt, priusquam scriberetur, et per plures annos sola traditione eam reti- nuerunt, prius quam Scripturas reciperent.

17. Huic accedat Augustinus, qui in dict. c. 5 contra Epistolam Fundamenti, post verba citata, statim prudentissime interrogat: *Qui- bus ergo obtemperavi dicentibus: Credite Evan- gelio; cur eis non obtemperem dicentibus mihi: Noli credere Manichæo?* quod nos mutato no- mine dicere possumus: *Noli credere Luthe- ro, aut Calvinum.* Et deinde prosequitur: *Elige quid velis; si dixeris: Crede catholicis, ipsi me monent ut nullam fidem accommodem vo- bis. Quapropter non possum illis credens, nisi tibi non credere. Si dixeris: Noli Catholicis credere, non recte facies me cogere ad Mani- chæi fidem, quia ipsi Evangelio, Catholicis prædicantibus, credidi.* Quo argumento sec- tarios omnes, et eorum sectatores convincit Augustinus, ut vel Evangelio credere non debeant, utique quod Evangelium sit, vel reli- quia, quæ Ecclesia Catholica docet, credere debeant, quia negare non possunt quin Evan- gelium ab Ecclesia habeant, et sine ulla ra- tione illi præbeant auctoritatem in susci- piendo Evangelio, non vero in aliis quæ do- cet. Unde subjungit idem Augustinus: *Si dixeris: Recte credidisti laudantibus Evangelium, sed non recte illis credidisti vituperantibus Ma- nichæum (vel, quod perinde est, Calvinum), usque adeo me stultum putas ut, nulla redditia ratione, quod vis credam, quod non vis non cre-*

dam? quod postea late et eleganter prosequitur. Et similem discursum habet lib. de Util. cred., cap. 14.

18. Est etiam insignis locus apud eumdem Augustin., lib. 4 contra Cresconium, cap. 32 et 33, ubi et sua auctoritate, et manifesto exemplo eamdem confirmat veritatem. Agit enim ibi de non rebaptizandis rite ab haereticis baptizatis, docetque esse dogma fidei, ut revera est, et prius dicit: *Sequimur sane nos in hac re etiam canonicarum auctoritatem certissimam Scripturarum.* Et postea subjungit: *Quamvis hujus rei certe de Scripturis canoniciis non proferatur exemplum, earumdem tamen Scripturarum, etiam in hac re, a nobis tenetur veritas, cum hoc facimus, quod jam universa placuit Ecclesiae, quam ipsarum Scripturarum commendat auctoritas, ut quoniam sancta Scriptura fallere non potest, quisquis falli metuit hujus obscuritate questionis, eamdem Ecclesiam de illa consulat, quam sine ulla ambiguitate sacra Scriptura demonstrat.* In quibus verbis imprimis confirmat Augustinus quod supra dixi, non omnem veritatem de fide credendam, proxime et (ut sic dicam) formaliter in Scriptura contineri, quoniam remote quaelibet veritas possit in Scriptura fundari, quatenus ipsa Scriptura auctoritatem traditionis et Ecclesiae commendat. Deinde testatur hic Augustinus, Ecclesiam esse judicem controversiarum quae circa res fidei moventur, posseque sua auctoritate confirmare, et certam reddere traditionem, de qua prius fuerat dubitatum. Unde obiter colligo quam inconstanter faciant, qui aliquos libros ut canonicos recipiunt, et alios aequi ab Ecclesia probatos a canone rejiciunt, quia olim de illis dubitatum fuit. Unde etiam rex Angliae, qui in sua prefatione ita loquitur, vel in eadem est inconstantia, vel certe convincitur se non aliqua certa et indubitate regula, sed sola humana conjectura duci ad hos libros admittendos, et illos rejiciendos a canone, et consequenter de neutris eorum, nec de contentis in illis habere certam fidem et vere christianam, sed tantum humanam conjecturam et opinionem.

19. *Exemplis tandem veritas confirmatur.* — Denique ex dictis verbis Augustini habemus veritatem positam optimo exemplo confirmatam. Nam semel rite baptizatum iterum baptizandum non esse, licet prior baptismus ab haeretico datus fuerit, veritas est de fide christiana tenenda, quamvis in Scriptura sacra expressa non sit. Simile exemplum addu-

cere possumus, quod (ut existimo) nec Protestantes Anglicani recusant: nimur, infantes quoad valorem recte et convenienter baptizari, quod cum non inveniatur in libris canoniciis scriptum, ex traditione per Ecclesiam approbata receptum est, ut sentit August., ep. 28, et l. 4 de Baptis., c. 24, et l. 10 Gen. ad lit., c. 23, et lib. 3 de Peccat. mer., a c. 6; cum Cypr., ep. 59; et Orig., hom. 8 in Levit., et hom. 14 in Lucam. Est et aliud exemplum de perpetua virginitate Deiparæ, quod licet multi ex novis haereticis, seu Protestantibus, fortasse non admittant, rex tamen respire non videtur, eum illam in p. 45 Praefationis, B. Virginem appellet. Et quicquid alii senserint, nobis satis est dogma illud unanimi consensu a Patribus esse traditum: *Quos, ut alibi dixit Augustinus, oportet ut populi christiani vestris prophanis noritatis anteporant, eisque potius elegant adhaerere, quam vobis.* Nam, ut inferius addit¹, *quod incenerunt in Ecclesia, tenuerunt; quod didicerunt, docuerunt; quod a Patribus acceperunt, hoc filiis tradiderunt.* Quo nihil aptius dici potuit, vel ad commendandam auctoritatem traditionum ex origine, vel ad declarandum quomodo communis Patrum consensus cum traditione conjunctus sit. Videri etiam potest idem August., lib. 4 contra Julian., c. 2; Hieronym., ep. 50 ad Pammach. pro lib. contra Jovinian., et in lib. contra Helvidi. Atque haec videntur de hoc punto satis esse, ut liqueat Scripturam, licet in suo ordine sit magnum fidei fundamentum, non tamen esse per se sufficientem quoad nos, sine adminiculo traditionis et Ecclesiae, quod magis ex sequenti capite fiet manifestum.

20. *Explicantur aliqui Patres qui videntur parum traditionibus favere.* — Contra hanc veritatem, ex Scripturis vel ratione nihil invenio cui respondere necessarium sit. Ex Patribus autem aliqua notare et exponere oportet; Basilius enim, homil. de Vera ac pia Fide, signum superbiæ certissimum esse dicit, *eorum, quæ scripta sunt, aliquid rejicere, aut eorum, quæ non scripta, introducere.* Sed vel loquitur de additione in ipsa Scriptura, aliquid apocryphum illi addendo; nam inferius ait prohibuisse Apostolum, *ne quid eorum, quæ in dirinis litteris habentur, dematur, aut, quod absit! addatur;* vel intelligit de introductione privata, et facta sine auctoritate in ipsa Scriptura probata. Nam alias constat ipsum

¹ August., 2 contra Julian., c. 4 et 10.

Basilium maxime commendare traditionem non scriptam, lib. 2 de Spiritu Sancto, cap. 27 et 28. Et in eundem sensum referri debet quod ait in Morali, reg. 26 : *Quidquid dicimus vel facimus, testimonio Scripturæ confirmari debere*, utique proxime, vel remote, ut ipse diserte declaravit, in Regul. 1, ex brevioribus.

21. Sic etiam intelligendus est Augustinus, 1. 3 contra Petili., c. 6, cum exponens illud Pauli : *Si Angelus de celo, etc.*, addit, *præterquam quod in Scripturis legalibus et Evangelicis accepistis*, utique proxime, vel remote; nam ipse alibi exposuit, quod est contra Ecclesiam, esse contra Scripturam. Sic etiam dicit, lib. 2 de Peccator. merit., c. ult., in re obseura nihil esse aerdendum, non adjuvantibus certis clarisque Scripturæ documentis. Quidquid enim Ecclesia docet, adjuvatur certis Scripturæ documentis. Præterquam quod Augustinus tractat de rebus obscurissimis non definiendis humana præsumptione; quæ autem traditione approbata recipiuntur, nec obscurissima dici possunt, nec humana præsumptione introduci.

22. Allegari præterea solet Hieron., Matt. 23, quia de quadam opinione dicit : *Quia de Scripturis non habet auctoritatem, eadem facilitate contemnitur, qua probatur*. Sed ibi loquitur de quadam historia, scilicet, de occasione Zacharie, Patris Joannis Baptista, inter templum et altare, quæ ad traditionem, vel Ecclesiæ definitionem non pertinebat. Solent etiam allegare hæretici Hieronymum, Aggæi 1 dicentem : *Sermo Dei percutit, quæ sine auctoritate et testimonio Scripturarum dicuntur*. Sed Hieronymus, circa id : *Et vocari sicutatem, etc.*, contra hæreticos agit, qui absque auctoritate Scripturarum : *Quædam (ait) quasi traditione apostolica sponte reperiunt atque configunt*; ubi potius facite admittit cum Scriptura traditionem apostolicam, reprehendit autem eos, qui sponte et sine fundamento illam configunt.

CAPUT X.

EX FUNDAMENTO ET RATIONE CREDENDI REGIS ANGLÆ, IPSUM NON ESSE FIDEI VERE CHRISTIANÆ DEFENSOREM, OSTENDITUR.

1. *Rex Angliae jicit fundamentum credendi propriam scientiam.* 2 ad Tim. 1 et 2, et indicat Tertull., de Prescrip., et Nazian., orat. 22, et optime Vincent. Lyrin., c. 27 et sequen-

tibus. — In hoc capite tractanda est alia pars fundamenti fidei regis Angliæ, qui dum optat alios Principes Christianos esse qualis ipse est, collocantes, scilicet, fundamentum fidei in certa scientia, quam ipsi ex Scripturis accipient, pervolutando illas, certum esse ostendit, a se partam scientiam Scripturæ, pro fidei suæ fundamento jecisse. Ex hoc ergo fundamento, et ratione credendi Scripturis, colligo, eum fidem vere christianam non tenere, nedum defendere. Et imprimis occurrit statim admonitio Pauli ad Timotheum : *O Timothee, depositum custodi* (utique fidei et doctrinæ, ut ipsemet Apostolus, in 2 ad Timoth. epist., declaravit), *devitans profunas vocum noritates, et oppositiones falsi nominis scientiæ, quam quidam profitentes, circa fidem exciderunt*. Nam ex prædictis verbis regis collatis cum verbis Pauli, statim apparet hoc regi accidisse, quod Paulus prædixit, nimirum per *falsi nominis scientiam*, quam profitetur, a vera fide aberrare. Nam, ut ibi recte Chrysostomus, *quando aliquid propriis cogitationibus gignitur* (præsertim in divinis mysteriis, et rebus ad fidem spectantibus), *scientia non est*; merito ergo vocatur *falsi nominis scientia*, et omnium errorum occasio, propter magnam, quam denotare solet, præsumptionem. Et ideo de istis certam scientiam promittentibus dixit Augustinus, eadem Apostoli verba in tract. 97 in Joan., circa finem, expendens : *Nihil sic amant isti, quam scientiam promittere, et fidem rerum vararum, quas credere parvuli præcipiuntur, velut imperitiam deridere*. Proinde (in eodem tractatu, circa principium, præmisit prudentissime) *cavete, maxime qui parvuli estis, et adhuc alimentis lacteis indigetis, ne hominibus deceptis ac deceptoribus aurem curiosam prebeatis ad incognita scienda, cum mentes invalidas habeatis ad vera et falsa dijudicanda*. Et infra, vanitatem eorum, qui, cum sint ignari veritatis, promittunt scientiam veritatis, comparat mulieri stultæ et clamosæ, et nihil omnino scienti, de qua dixit Salomon, Proverb. 9 : *Sedit in foribus domus suæ super sellam in excelso urbis loco, ut vocaret transeuntes, qui est parvulus declinet ad me, etc., eamdemque comparationem late prosequitur*.

2. *Temeritas est hanc intelligentiam sibi arrogare*. — Præterea interrogare libet, quid per certam scientiam rex intelligat. Non est enim verisimile ut de illa certa scientia more philosophorum loquatur, ut significat claram

et evidentem rerum cognitionem, cum per se omnibus pateat, ex lectione Scripturarum, non comparari evidentem cognitionem rerum, seu mysteriorum quæ in eadem Scriptura referuntur, ideoque eadem met Scriptura fidem exigit suæ veritatis, non visionem. Imo ipsam docet fidem esse de his quæ non apparent, ad Hebr. 11, et ideo Petrus, 2 canonica, c. 4, dixit : *Habemus firmorem propheticum sermonem, cui bene facitis attendentes tanquam lucernæ lucenti in caliginoso loco, donec dies illucescat, et Lucifer oriatur in cordibus vestris.* Non potest ergo promitti nec postulari propria, id est, evidens scientia, quæ sit fidei fundamentum. Neque etiam per certam scientiam intelligere rex potuit ipsammet fidem, quæ et certa est, et, quatenus est excellens quædam cognitio, solet interdum nomine scientiæ (generali quædam ratione accepto) appellari, ut 2 Cor. 5 : *Scimus quoniam si terrestris domus, etc.;* non potuit (inquam) rex in hoc sensu loqui : nam super hac certa scientiæ dicit esse fidei fundamentum collocandum; aliud ergo est fides, aliud certa scientia, in qua fundatur. Per certam ergo scientiam certum et indubitatum Scripturæ sensum intelligere videtur. Duo enim accurate distinxit Augustinus, lib. 12 Confess., c. 23, dicens : *Duo video dissensionum genera oboriri posse, cum aliquid a nuntiis veracibus per signa enuntiatur, unum de veritate rerum, alterum de ipsis, qui annuntiat, voluntate;* et c. 24, ponit exemplum in verbis Moysi : *In principio creavit Deus cælum, et terram,* dicens se fidenter dicere, Deum in verbo suo creasse visibilia et invisibilia, non tamen ita fidenter dicere, hoc intendisse Moysem per verba illa. Rex autem Angliæ e contrario significat se certa scientia consecutum esse, quid Moyses vel alias scriptor canonicus scribere voluerit, et in hac scientia fundare certam fidem rerum, quæ in tali scriptura continentur. Et quod mirabilius est, ad hunc modum fidei omnes christianos principes invitat, eisque facile similem scientiam promittit, si divinas litteras evolant.

3. Audiat vero Augustinum in dicto lib. 12, c. 25, dicentem ad Deum : *Plue mihi mitigationes in cor, ut patienter tales feram, qui non mihi hoc dicunt, quia divini sunt, et in corde famuli tui (id est Moysi) viderunt, quod dicunt, sed quia superbi sunt, nec noverunt Moysi sententiam, sed amant suam, non quia vera est, sed quia sua est.* Et infra : *Ista te-*

meritas non scientia, sed audacia est, nec vi-sus, sed typus eam peperit. Et Vincent. Liri-nensis, c. 14, postquam multis verbis depin-xerat haereticos dicentes : *Nobis actoribus, nobis principibus, nobis expositoribus, dannate quæ tenebatis, relinquite antiquam fidem, etc.,* subjugxit : *Horreo dicere, sunt enim tam su-perba, ut ne refelli quidem sine piaculo posse videantur.* Sufficit ergo nobis verba Pauli ad-versus hanc scientiam objicere, dicentis ad Roman. 12 : *Non plus sapere quam oportet sa-pere, sed sapere ad sobrietatem, et unicuique sicut Deus divisit mensuram fidei:* quem lo-cum tractans Ireneus, lib. 5 Contra haeres., cap. 20, legit : *Sed sapere ad prudentiam, cen-setque ibi contineri admonitionem et cau-tionem ab haereticis, de quibus ait : Qui con-fidentur semetipsos halere agnitionem boni et mali, et super Deum, qui fecit eos, jaculantur sensus snos impios. Supra igitur sentiunt, quam est mensura sensationis.* Sapere igitur ad prudentiam, dicit esse ab his cavere : *Ne manducantes (inquit) illorum agnitionem eam, q'æ plus quam oportet sapit, projiciamur de paradiſo ritæ,* per quem Ecclesiam intelligit, de qua prius dixerat : *Configere oportet ad Ecclesiam, et ejus sinu educari, et Domini Scripturis enutriri, plantatus est enim Eccle-siæ paradisus in hoc mundo; ab omni ergo li-gno paradisi escas manducabilitis, ait Spiritus Dei, id est, ab omni divina Scriptura mandu-cate, super elato autem sensu ne manducare-ritis, neque tetigeritis unirersam haereticam dis-sensionem.* Quis autem elatiorem habet sensum eo, qui præsumit se certa scientia sensum Scripturæ Sacræ, eam tantum pervo-lutando, acquisivisse ?

4. *Sacra pagina non potest absque Doctore germane exponi.* -- Interrogo enim ulterius a rege, quo Doctore, quo duce, hanc certam scientiam Scripturæ consecutus sit, et aliis comparandam offerat. Respondebit, ut opinor, quod alias apud Augustinum¹ : *Cum le-gerem, per me ipse cognori;* hoc enim signifi-cat, cum ait : *Neque super aliorum incertis opinionibus, sed vestra ipsorum certa scientia fidei fundamenta collocare.* Sed quid Augusti-nus? prosequitur et dicit : *Itane est? nulla im-bitus poetica disciplina Terentium Maurum sine magistro attingere non auderes, etc.* Tum in eos libros, qui quoquo modo se habeant, sancti tamen, divinarumque rerum pleni, prope totius generis humani confessione diffamantur,

¹ De Utilit. credendi, cap. 17.

sine duce irruis, et de his sine præceptore audes ferre sententiam. Est igitur hæc præsumptio a Sanctorum Patrum spiritu aliena, et teste Augustino, in eodem libro, cap. 17, matrem habet superbiam. Verba ejus sunt: *Si unaquaque disciplina, quanquam rilis et facilis, ut percipi possit, Doctorem aut magistrum requirit, quid temerariae superbiæ plenius, quam divinorum sacramentorum libros, et ab interpretibus suis nolle cognoscere, et incognitos velle damnare?* Deinde est contra ordinariam Spiritus Sancti providentiam. Ad quid enim Pastores et Doctores Spiritus Sanctus Ecclesiæ providit, si Scripturarum sensus non a Doctoribus, sed proprio ingenio, et industria comparandus est? Aut quomodo illa, quam Paulus requirit, prudentia aut modestia, potest unusquisque fidelium non solum seipsum in intelligentia Scripturæ Doctoribus Ecclesiæ præferre, verum etiam solum suum sensum certam scientiam existimare, et quidquid ab eo diversum est, tanquam incertam hominum opinionem relinquere?

5. Longe quidem aliter de se sentiebat Augustinus, qui, lib. 3 Confession., c. 5, sic inquit: *Institui animum intendere in Scripturas Sanclas, ut viderem quales essent; et ecce video rem non compertam superbis, neque nudatam pueris, sed incessu humilem, successu excelsam, et relatam mysteriis: et non eram ego talis, ut intrare in eam possem, aut inclinare cervicem ad ejus ingressus.* Unde D. Basilios, in Regulis brevioribus, in 235, interrogat: *Numquid oporteat multa ex Scripturis ediscere?* et in summa respondet, Episcopos, Pastores, vel Doctores Ecclesiæ id maxime curare debere, de cæteris vero ait: *Unusquisque memor verborum Apostoli: Non plus sapere quam oportet sapere, sed sapere ad sobrietatem, unicuique sicut Deus dicit mensuram, quæ officii sui sunt, studiose discat et perseguatur, neque curiose ulterius quidquam inquirat.* Atque in eundem modum exponit dicta verba Ambrosius, et inter alia ait: *Neque enim si quis bona vita est, ex eo sibi etiam doctrinæ prudentiam debet defensere.* Et quidem quando omnis auctoritas decesset, ratio ipsa naturalis et experientia docet, vanum esse omnibus fidelibus, etiam illitteratis et ineruditis, et negotiis secularibus implicatis, per solam simplicem, licet frequentem, lectionem Scripturarum certam illarum scientiam promittere.

6. Rectius quidem Hieronymus, epist. 103 ad Paulin., Scripturam dicit esse librum si-

gnatum sigillis septem, quem etiam litterati aperire non possunt, nisi ille reseraverit, qui habet clavem David. Ideoque multum laudat modestiam Eunuchi, Philippo interroganti: *Putasne intelligis quæ legis?* respondentis: *Quomodo possum, nisi aliquis ostenderit mihi.* Et statim magna humilitate de se ipso dicit: *Ego nec sanctior sum hoc Eunicho, nec studiosior.* Et infra ita concludit: *Hæc a me breviter perstricta sunt, ut intelligeres, te in Scripturis Sanctis, sine prævio et monstrante semitam, non posse ingredi.* Et postea valde conqueritur, quod in omni arte, etiam utilissima, nemo sine Doctore potest esse quod cupit: *Sola (inquit) Scripturarum ars est, quam sibi omnes passim vindicant, hanc garrula anus, hanc delirus senex, hanc sophista verbosus, hanc universi præsumunt, lacerant, docent, antequam discant.* Quibus verbis hujus temporis sectarios depingere videtur; sed in eis illud magis portentosum, magisque periculosum est, quod a singulis fidelibus illam certam scientiam pro suæ fidei fundamento exigunt. Nam hinc necessario fit, ut quibusdam sit impossibilis fides, qui non solum certam illam scientiam assequi nou valent, verum etiam nec probabilis intelligentiae Scripturarum sunt capaces; aliis vero qui majoris acuminis sunt, occasio datur et se præcipitandi, et alios perturbandi. Et ideo sapientissime monet Augustinus, de Utilit. credendi, cap. 10, necessarium esse ut fides scientiam antecedat. Ita ut, *etiam ii, qui valent volare, ne cui sit periculoso invitamentum, paulisper cogantur incedere, qua etiam ceteris tutum est.* Hæc est providentia veræ religionis, hoc jussum divinitus, hoc habetis majoribus traditum, hoc ad nos usque servatum; hoc perturbare velle, atque pervertere, nihil est aliud quam ad veram religionem sacrilegam viam querere. Quod qui faciunt, nec, si eis concedatur quod volunt, possunt quo intendunt pervenire: *cujusmodi enim libet exce-
dant ingenio, nisi Deus adsit, humili repunt.*

7. *Dilemma efficax contra certam scientiam a rege præsumptam.* — *Quam periculoso sit fidei fundamentum in privato spiritu collocare.* — Tandem ut ad privatum spiritum, quem rex indicat, faciamus gradum, de hac eadem scientia, quæ certa dicitur, inquirō qualis sit ejus certitudo, id est, an sit humana, solaque vi et acumine ingenii ex lectione Scripturæ et significatione verborum ejus comparata; vel sit divina ab Spiritu Sancto data per speciale gratiam et donationem. Quidquid ho-

rum dicatur, certitudini et unitati fidei repugnat, et gravissima habet incommoda; ergo non potest talis scientia certa esse fidei vere christianæ fundamentum. Prior pars facile ostendi potest. Primo, quia si scientia illa solum habet certitudinem ex humano discursu et conjectura, et illa est fundamentum fidei, non potest fides certior esse, cum non possit ædificium firmius esse, quam fundamentum. Deinde jam non Scriptura Sacra, sed sensus humanus erit fidei fundamentum; nam, ut recte præmonuit Hieronymus, in cap. 1 epist. ad Galat. : *Non est putandum in verbis Scripturarum esse Evangelium, sed in sensu; non in superficie, sed in medulla; non in sermonum soliis, sed in radice rationis.* Unde subinfert: *Tunc Scriptura utilis est audiētibus, cum absque Christo non dicitur, absque Patre non profertur, et sine Spiritu non eam insinuat ille qui prædicat, alioqui et diabolus, qui loquitur de Scripturis, et omnes hereses secundum Ezechiem¹ inde sibi consuunt cervicalia, quæ ponant sub cubito universæ aetatis.* Et tandem concludit: *Grande periculum est in Ecclesia loqui, ne forte interpretatione perversa ex evangelio Christi fiat Evangelium hominis, vel, quod pejus est, diaboli.* Multo ergo majus periculum est, si unusquisque credentium fundamentum suae fidei in sua privata interpretatione, in suoque humano sensu ponat, sic enim non solum Evangelium Dei fiet hominis, sed etiam tot erunt Evangelia, Scripturæ totidem, quot sunt capita hominum. Quod ita eleganter explicuit idem Hieronymus contra Luciferianos, in fine Dialogi, dicens: *Nec sibi blandiantur, si de Scripturarum capitulis ridentur sibi affirmare quod dicunt, cum et diabolus aliqua de Scripturis sit locutus, et Scripturæ non in legendo consistant, sed in intelligendo, alioqui, si litteram sequimur, possumus et nos quoque novum nobis dogma componere, ut asseramus in Ecclesia non recipiendos, qui calceati sunt, vel duas tunicas habent.*

8. Denique res ipsa per se spectata etiam impossibilis appareat; qui enim fieri potest ut per solum discursum, et conjecturam humana, quispiam Scripturam legendō, sensum a Spiritu Sancto intentum certissime assequatur? Nam hæc certitudo, cum non proveniat ex fide divina, ut in hoc membro supponitur, oportet ut in aliqua evidentiā fundetur; alioqui non erit certitudo secundum rationem,

sed ex sola pertinacia, voluntatisque pervicacia. In tali autem materia evidētia esse non potest; tum quia mens et intentio Spiritus Sancti occultissima est, et potest esse multiplex; tum etiam quia in ipsorum verborum significatione potest esse ambiguitas; tum denique propter innumerā alias difficultates, quæ in divinæ Scripturæ interpretatione occurrunt. Illa ergo certa scientia hoc modo explicata non est nisi voluntaria quædam pertinacia pro arbitratu effecta, qua unusquisque vult esse certum, quod sibi magis placet, ut acute discurrit et convincit Augustinus, lib. 1 contra Faust., cap. 2, ubi loquitur de hæreticis, qui pro suo arbitrio partem aliquam Scripturæ, quæ pro illis est, admittunt, et aliam, quæ contra illos est, eo ipso respūnt, et canonicam esse negant, et ita se ipsos faciunt regulam veritatis. Eodem autem modo applicari potest ad judicium de vero Scripturæ sensu, in quo, ut cum Hieronymo dixi, vera Scriptura consistit.

9. Superest ut alteram propositi dilemmatis partem discutiāmus. Illam enim maxime videntur sectarii intendere, cum dicunt iudicium de vero sensu Scripturæ non esse ab Ecclesia sumendum, sed ex proprio uniuscujusque spiritu, non humano, sed divino movente unumquemque, ut certe et infallibiliter sensum a Spiritu Sancto intentum attingat, et hunc spiritum, quem privatum vocant, volunt esse regulam fidei. Sed hic etiam error in hoc sensu intellectus non solum divinæ Scripturæ et Patribus, sed etiam rectæ rationi evidenter contrarius est, quod in sequenti capite ex professo ostendendum est.

CAPUT XI.

VERÆ FIDEI CHRISTIANÆ FUNDAMENTUM NON ESSE IN PRIVATO SPIRITU PONENDUM.

1. *In controversiis fidei regulam Ecclesiæ tenendam esse, ex Scriptura comprobatur.* — Veritas hæc auctoritate simul et ratione facile demonstrari potest. Primo enim Divina Scriptura duo ubique monet. Unum est, ut in controversiis fidei regulam Ecclesiæ consulamus; alterum, ut privatum spiritum timeamus, præcipue si a communi regula discordaverit. Primum patet, etiam in veteri Testamento, Deuter. 47: *Si quid ambiguum et difficile occurrerit, ascendas ad locum, etc.* Et de sacerdote dicitur, Malach. 2: *Labia sacerdotis custodiunt scientiam, et legem Dei requiri-*

¹ Ezech. 43.

res de ore ejus. Et Christus Dominus dixit, Matth. 23 : *Super Cathedram Moysi sederunt scribere et Pharisei, omnia quaecumque dixerint vobis facite, quod sine dubio multo magis pro sua Ecclesia dixit, et pro Cathedra, quam in sua Ecclesia erecturus erat, juxta superius dicta, cap. 4.* Et ita videmus esse ab Apostolis observatum, Act. 15, ubi quæstionem ortam de legalibus, non privato, sed communi spiritu definiendam crediderunt, dicentes : *Visum est Spiritui Sancto, et nobis.* Sic etiam Paulus, quamvis non dubitaret se habere infallibilem Spiritus Sancti directionem, nihilominus ascendit Hierosolymam, ut eum aliis Apostolis, præsertim cum Petro, Evangelium suum communicaret : *Ne forte (inquit ipse) in vanum currerem, aut cucurrissem, id est, ut toti Ecclesiæ per universalem regulam doctrina ejus probaretur, ut ibidem Hieronymus notavit, et ep. 87, quæ est etiam 11 inter Epistolas Augustini ; et Tertull., lib. 4 contra Marcionem, cap. 2.*

2. *In rebus fidei privatum spiritum caverendum esse, Scriptura ostenditur. — Refert Petrus Soto contra Brentium. — Germana interpretatione. — Secundum etiam constat ex verbis Joan., 1 canonica, c. 4 : Nolite omni spiritui credere, sed probate spiritus si ex Deo sint.* Quo testimonio abutuntur hæretici ad probandum, unumquemque Christianum esse debere judicem doctrinæ et Scripturæ. Quod est sufficiens exemplum ad demonstrandum, quantum sit periculi et erroris in hoc privato spiritu, et in usurpando proprio judicio de certo sensu Scripturarum, cum tam facile sit pravo spiritu eadem verba contra intentionem Spiritus Sancti interpretari, ut in hoc loco dilucidatur. Nam Joannes Apostolus in illis verbis monet fideles, ut non facile credant privatis monitionibus, impulsibus, seu cogitationibus sine magna probatione et discretione. Hæc autem probatio non debet esse per eundem spiritum privatum, nam idem esset in tali probatione periculum; debet ergo esse per aliam notiorem et certiore reglam. Et omisso spiritu practice movente ad opus (propter quem maxime datur discretio spirituum, de qua loquitur Paulus, 1 ad Cor. 12), loquendoque de probatione spiritus in materia doctrinæ, sola illa quæ fit per regulam Ecclesiæ, qualis est ejusdem Ecclesiæ definitio, sufficiens est. Ideoque quando sensus privatus Scripturæ est contra doctrinam ab Ecclesia definitam, certum est non esse a bono spiritu, sed a malo : quando vero

non fuerit contra doctrinam Ecclesiæ, donec ab illa probetur, non erit exploratum qualis sit, sed ex aliis conjecturis, et præsertim ex majori vel minori consonantia ad doctrinam Ecclesiæ probandus est. Et ita intellexerunt hunc locum sancti Patres, dicentes, præmunire nos his verbis Joannem contra omnes privatos hæreticorum spiritus, et doctrinas Ecclesiæ contrarias, ut late prosequitur Augustinus, id colligens ex verbis sequentibus Joannis, in serm. 30 et 31, de Verb. Apost. ; idem suadet Anacletus Papa, ep. 1, ubi cum his verbis conjungit alia ejusdem ep., cap. 2 : *Vos quod audistis ab initio in vobis permaneat ; et infra : Et sicut docuit vos (utique per Apostolos, et Ecclesiam Catholicam), manete in eo.* Idem tradit optime Athanasius, Orat. contra Arianos, circa princip., ubi tractans hunc locum, inter alia dicit, quod *Dæmon omnium hæresum parens nomen Salvatoris profitetur, Scripturarumque dictionibus amicitur, et verba quidem profert, veram tamen inde sententiam susfurratur, ac deinde intellectu, quem ipse confinxit, dolis inumbrato, erroneorum homicida efficitur.*

3. Hinc etiam Paulus, 2 ad Thessalon. 2 : *Rogamus (inquit) etc., ut non cito moreamini a vestro sensu, neque terreamini, neque per spiritum, neque per sermonem, etc.* Ubi contra duos deceptores prævenit, spiritum scilicet et sermonem falsorum prophetarum, de quibus, 2 ad Corinth. 11, dicit : *Pseudoapostoli sunt operarii subdoli transfigurantes se in Apostolos Christi, et non mirum, ipse enim Satanus transfigurat se in Angelum lucis ; non est ergo magnum, si ministri ejus transfigurentur velut ministri justitiae.* Unde omnia, quæ in Scripturis afferuntur de cavendis falsis prophetis, ut Ezech. 3, et Deuter. 13, 2 Petri 2, etc., de hoc privato spiritu prolata esse, non immerito existimari possunt. Nam idem esse solet, qui in falsis prophetis loquitur, quando contra doctrinam prius revelatam docent aut prophetant, quos per hanc regulam ejicendos esse in loco Deuteronomii 13 traditur. Denique idem intendit Paulus, ad Galat. 1, cum dicit : *Si Angelus de cœlo evangelizet vobis, praterquam quod evangelizarimus vobis, anathema sit,* per quam exaggerationem voluit significare Paulus, spiritum privatum, sive nova docentem, sive Scripturam exponentem contra catholicam doctrinam prius in Ecclesia receptam, non posse esse spiritum cœlestem, sed vel humanum, vel diabolicum, vel

mundanum, juxta distinctionem Bernardi, sermone de Sex vel septem spiritibus, quem locum Patres etiam ita intellexerunt, ut supra cap. 2 retuli.

4. Privatum spiritum non esse regulam fidei, ex Patribus ostenditur. — Non potest ergo privatus spiritus esse regula fidei catholicæ, sed potius per hanc regulam ipse discernendus est. Ut passim docent Patres, præsertim August., de Unit. Eccles., c. 11 et 19, et optime in Proœmio de Doctr. Christ., ubi expectare hunc spiritum, dicit esse *tentare Deum*, et cavendas esse tales cogitationes, *ut superbissimas et periculosissimas*. Idem Vincent. Lyriken., cap. 14, late. Denique hoc ipsum est, quod innuit Hieronym., ep. 152 ad Minerium et Alexandrum, circa finem his verbis, quæ Salvatoris esse dicit: *Estote probati numularii, ut si quis numerus adulter est, et figuram Cœsaris non habet, nec signatus moneta publica, reprobetur; qui autem Christi faciem præfert lumine, in cordis nostri marsupium recondatur.* Sola autem Ecclesia Catholica claro lumine cernitur, ut supra ostendi, et ipsa sola publicum habet sigillum ad consignandam veram Scripturam, et verum sensum ejus. Eamdemque sententiam imitatus est Damascenus, lib. 4 de Fide, cap. 18, ubi post sacrae Scripturae commendationem subjungit: *Illud nobis curæ sit, ut probi numularii simus, verum, nimirum, ac purum aurum aggerentes, adulterinum autem reprehéantes.* Ex his igitur satis constat, quam sit hic privatus Spiritus, prout a sectariis extollitur, a Sanctorum Patrum spiritu et sensu alienus, et ex his demum, quæ in sequentibus rationibus afferemus, idem quoque evidentius evadet.

5. Ratione stabilitur eadem veritas. — Ratio ergo prima contra prædictum errorem ex proxime dictis sumi potest. Nam fides vere christiana communis est et publica; ergo fundamentum ejus etiam esse debet publicum et commune. Antecedens per se notum est, quia fides catholica omnibus credenda proponitur, et unitas, et concordia in hac fide omnibus præcipitur; est ergo res communis et publica. Unde recte Augustinus, lib. 41 Confession., c. 25: *Veritas tua* (dicit ad Deum) *nec mea est, nec illius, aut illius, sed omnium nostrum, quos ad ejus communionem publice vocas, terribiliter admonens nos, ut non limus eam habere privatam, ne privemur ea; nam quisquis id, quod tu omnibus fruendum proponis, sibi proprie vendicat, et suum rult*

*esse, quod omnium est, a communi propellitur ad sua, hoc est, a veritate ad mendacium. Qui enim loquitur mendacium de suo loquitur*¹. Unde facile probatur prima consequentia: tum quia (ut more philosophorum loquamur) mensura et mensuratum debent esse homogenea: fundamentum autem fidei est regula et mensura fidei, neque ipsum potest esse adæquatum, et commensuratum fidei, si, cum ipsa sit publica et communis, ipsum particulare sit et privatum; tum etiam quia non est consentaneum divinæ providentiae dirigere et gubernare homines per spiritum privatum, ad eligendam fidem, quæ debet esse communis.

6. Secunda ratio. — Assistentiam infallibilem Spiritus Sancti non esse singulis fidelibus promissam. — Quod magis secunda ratione explicatur, quia ut hoc fidei fundamentum firmum sit et infallibile, necessaria est Spiritus Sancti assistentia, seu specialis directio, vel illuminatio in dijudicando vero sensu Scripturæ; hæc autem assistentia non est promissa singulis fidelibus Scripturam voluntibus, et privatum de illius sensu judicantibus, sed est promissa Ecclesiæ, vel Pastoribus ejus, præsertim in iis quæ ad fidem necessaria sunt; ergo non privatum judicium, sed publicum Ecclesiæ debet esse fundamentum fidei. Major satis ex dictis est probata, quia, sublata Spiritus Sancti assistentia, relinquitur spiritus pure humanus, qui frequenter fallitur, ideoque certæ fidei fundamentum esse non potest. Et præterea probatur verbis Petri, dicta Ep. 2, c. 4, ubi cum dixisset: *Habemus firmorem propheticum sermonem, cui bene facitis attendentes*, etc., subjungit: *Hoc primum intelligentes, quod omnis prophétia Scripturæ propria interpretatione non fit*, id est, proprio ingenio, quod maxime habet verum de interpretatione certa, quæ non possit a vero sensu Spiritus Sancti discrepare; cuius veritatis rationem subjungit Petrus dicens: *Non enim voluntate humana allata est aliquando prophétia, sed Spiritu Sancto inspirati locuti sunt Sancti Dei homines.* Quasi diceret, eodem spiritu interpretandam esse Scripturam, quo facta est: *Solus autem spiritus scrutatur omnia, etiam profunda Dei; sicut enim, quæ sunt hominis, nemo novit, nisi spiritus hominis, ita quæ Dei sunt, nemo cognovit, nisi spiritus Dei*, 1 ad Cor. 2. Minor autem propositio quoad posteriorem partem

¹ Joan. 8.

de assistentia Spiritus Sancti promissa Ecclesiæ, et capiti ejus, probata est a nobis in c. 3 et 4, quia in promissione fidei perpetuae et indeficientis in Ecclesia, hæc promissio continetur Præterquam quod Christus etiam promisit et assistentiam suam, et Spiritum Sanctum, qui diceret Ecclesiam omnem veritatem, utique necessariam, vel quovis tempore opportunam, ad quam maxime spectat vera et certa intelligentia Scripturarum in rebus necessariis. Alteram vero partem, in qua abnuimus hanc promissionem factam esse singulis fidelibus, imprimis probamus, aliquem Scripturæ locum petentes, in quo facta sit, quem merito possumus petere ab his, qui negant aliquid esse credendum quod scriptum non sit; nullum autem vel apparentem locum afferre possunt. Nam, licet 1 Joan. 2, dicatur: *Uncio docebit vos de omnibus*; et Joan. 6: *Est scriptum in Prophetis: Et erunt omnes docibiles Dei*, hæc et similia intelligunt secundum modum et ordinem congruentem divinæ providentiæ, et in Scripturis saeculis significatum. Docet enim Paulus, 1 ad Cor. 12, et ad Roman. 12, et ad Ephes. 4, varia esse dona Spiritus Sancti in Ecclesia, inter quæ ponuntur donum prophetiæ, interpretatio sermonum, discretio spirituum, et additur, non omnibus convenire actus et ministeria horum donorum, quia *omnia membra corporis non eundem actum habent*. Nam *sicut totum corpus oculus, ubi auditus*¹? Et similiiter dicere possumus: Si omnes scientes, ubi discipuli? Ad quid Doctores?

7. *Vide Aug. in Proœm. de Doctr. Christi.* — *Quomodo Spiritus Sanctus omnes doceat.* — Docet ergo Spiritus Sanctus omnes ordinato modo, communem videlicet plebem per Doctores, ipsos autem Doctores per Concilia, et maxime per Vicarium Christi. Et in hoc etiam ordo, et modus servatur. Nam Spiritus Sanctus omnibus aliquo modo immediate præbet auxilium ad supernaturem doctrinam recipiendam, vel tradendam, juxta uniuscujusque munus, seu necessitatem. Et ita omnes fideles juvat, et illuminat interius ad credendum ea, quæ per suos prædicatores docet; nam *fides ex auditu*, ut Paulus ait, quia Deus communi lege non docet homines, nisi per homines. Ideo enim interrogat ibi Paulus: *Quomodo credent sine prædicante?* tamen quia neque qui plantat, est aliquid, neque qui rigat, sed qui incrementum dat, Deus, ideo

semper est necessaria interior gratia Spiritus Sancti ad fidem concipiendam, et hoc modo omnes sunt docibiles Dei, ut Augustinus, tum ibi, tum passim contra Pelagianos exposuit. Pastores vero et Doctores Ecclesiæ, per specialiora auxilia et dona docentur a Spiritu Sancto, quantum ad commune bonum Ecclesiæ expedit: et ideo, ut plurimum id non facit per expressas revelationes, neque per judicium infallibile, sed quatenus oportet, et quantum cujusque status et munia postulaverint. Pontifex autem Maximus et Concilia legitima, quando definiunt, docent per singularem assistentiam, ita ut errare non possint, ne omnem Ecclesiam in errorem inducant.

8. *Spiritus Sanctus interdum aliquibus ex privilegio specialiter assistit.* — Neque negamus, interdum Spiritum Sanctum privatim docere aliquos de mysteriis fidei, vel de vero sensu Scripturæ, tali modo, ut eos reddit certos de veritate doctrinæ, vel de sensu revealato. Tamen hæc est specialis gratia, quæ non potest omnibus fidelibus generatim attribui; et ideo Paulus, superius allatus, dixit de his donis: *Spiritus dividit singulis, prout vult*; et Petrus, 1 ep., cap. 4: *Unusquisque prout accipit gratiam, illam administrantes.* Et præterea talis privata doctrina seu revelatio prius accurate probanda est, juxta illud 2 ad Thessalon. 4: *Omnia probate; quod bonum est, teneite.* At prima ac præcipua probatio est, ut non sit contra antiquam et receptam Ecclesiæ doctrinam, quia Deus non potest esse sibi contrarius. Et deinde ut sit consentanea bonis moribus, et quæ tantum Doctorem deceat. Ac denique si talis privata revelatio per aliqua certa signa Ecclesia non proponatur sufficienter, esse poterit utilis recipienti, non tamen valere poterit ad fidem certam apud alios fideles faciendam, ut Innoc. III sapienter docuit. Quia alias sæpiissime fideles manifesto periculo erroris exponerentur. Cum ergo haeretici nec ex Scripturis nobis ostendant illam privatam scientiam sibi, ut fungunt, certam ex infallibili assistentia Spiritus Sancti, neque etiam signis aut virtutibus illam ostendant, cur illis credendum est, præsertim cum ea, quæ per tales scientiam opinantur, ipsi Spiritui Sancto per Ecclesiam loquenti contraria sint? Et mirabile profecto est, ut velint nobis privatum spiritum infallibilem venditare, et persuadere, sine ullo indicio vel testimonio Spiritus Sancti, cum ipsi in publico Ecclesiæ judicio de doctrina fidei certam Spi-

¹ 1 Cor. 2.

ritus Sancti assistantiam manifeste promissam audeant pernegrare.

9. *Tertia ratio.* — Tertia ratio addi potest, quia non est minus necessaria ac sufficiens infallibilis assistantia Spiritus Sancti ad judicandum de veritate ipsius Scripturæ, id est, qui libri ejus sint canonici, discernendo illos a non canonicis, quam ad judicium certum feren-dum de vero sensu Scripturæ, ut supra visum est. Sed Spiritus Sancti assistantia ad prius judicium de legitimis libris non datur singulis fidelibus: nec existimo fuisse hactenus hæreticum hominem adeo superbum, ut sibi arrogaverit spiritum privatum discernendi canonicos libros a non canonicis; neque tam stolidum, vel temerarium, ut dixerit, hoc judicium esse committendum, vel permittendum singulis credentibus, pro uniuscujusque arbitrio, seu somniato spiritu. Illa ergo assistantia quoad hoc judicium ad Ecclesiam, vel cum, qui Christi vices gerit in terris, referenda est. Ergo idem dicendum est de spiritu attingendi infallibiliter verum Scripturae sensum; nam est eadem ratio, eademque necessitas. Atque hanc rationem attigit Augustinus, lib. contra Epist. Fundamenti, cap. 5, et de Utilit. creden., c. 14, cuius sententias jam in superioribus retuli, et in summa continent, *Cui obtemperamus, et credimus dicenti hunc librum esse Evangelium, eidem esse credendum dicenti, hunc esse sensum Evangelii;* quia utrumque non fit certum, nisi per eundem spiritum, quia (ut saepè ex Hieronymo dixi) Evangelium magis in sensu consistit, quam in membranis. Unde valde diminuta fuisset providentia Dei circa Ecclesiam suam, si dedisset illi spiritum, quo de sacris libris certificaret, et non de illorum sensu, cum ad certitudinem fidei parum prosint libri sacri, nisi de sensu etiam illorum similis certitudo habeatur. Merito ergo dixit Irenæus, lib. 4 contra Hæres., c. 23: *Ubi charismata Domini posita sunt, ibi discere oportet veritatem, apud quos est ea, quæ ab Apostolis Ecclesiarum successio, et id, quod est sanum, et irreprobatum conversatio, et inadulteratum, et incorruptibile sermonis constat. Hi enim et fidem nostram custodiunt, et Scripturas sine periculo nobis exponunt.*

10. *Quarta ratio.* — Privatus spiritus est radix hæresum.—Atque ex his sumitur quarta ratio, moralis quidem, sed efficacissima, et a Patribus multum commendata. Nam hic spiritus privatus non solum esse non potest fidei fundamentum, verum potius radix est hære-

sum, et magna schismatum occasio. Nam, ut dixi, hic privatus spiritus aliis non probatur, nec sufficienter ostenditur aut proponitur; ergo haec scientia privata in unoquoque non est utilis ad fidem in aliis generandam; ergo ex vi talis scientiae non possunt fideles convenire in una fide; ergo datur occasio hominibus, ut unusquisque pro fide vendat sua somnia, et phantasias, et hinc oriuntur hæreses et schismata. Attigit rationem hanc sapienter Tertull., lib. de Præscript. her., c. 15 et sequent., ubi docet, non esse cum hæreticis disputandum de Scripturis; et rationem subiungit, c. 17, quia: *Ista hæresis, ait, non recipit quasdam Scripturas; et si quas recipit, adjectionibus et detractionibus ad dispositionem instituti sui intervertit; et si recipit, non recipit integras; et si aliquatenus integras recipit, nihilominus diversas expositiones commentata, convertit, id est, pervertit; et ideo addit: Tantum veritati obstrepit adulter sensus, quantum et corruptor stylus. Varie præsumptiones necessario nolunt cognoscere ea per quæ revincuntur; his nituntur, quæ ex falso composuerunt, et quæ de ambiguitate cœperunt.* Unde addit, c. 19, priusquam veniatur ad certamen Scripturarum, stabiliendum esse cujus sint Scripturæ, a quo, et per quos, et quando, et quibus sit tradita disciplina, qua sunt Christiani; ubi enim apparuerit esse veritatem fidei, et disciplinæ christianæ, illuc erit veritas Scripturarum, expositionum, et omnium traditionum christianarum.

11. In eodem sensu dixit idem Tertull., lib. de Resurr. carnis: *Hæreses esse non possent, si non etiam Scripturæ male intelligi possent.* Et in idem reddit, quod dixit Augustinus in Joann.: *Non sunt natæ hæreses, nisi dum Scripturæ bonæ intelliguntur non bene, et, quod in eis non bene intelligitur, ctiam temere et audacter asseritur, utique tanquam certum et infallibile, et sibi specialiter a Spiritu Sancto dictatum.* Et ideo subdit inferius: *Etiam a me, charissimi, longe sit vana præsumptio, si volo sanus in domo Dei conversari, quæ est Ecclesia Dei vivi, columna, et firmamentum veritatis, ubi tacite hanc regulam præfert omni privato spiritui.* Ita etiam dixit Cypr., ep. 55: *Non aliunde hæreses obortae sunt, aut nata sunt schismata, quam inde, quod Sacerdoti Dei non obtemperatur, nec unus in Ecclesia ad tempus sacerdos, et ad tempus iudex vice Christi cogitatur, quod repetit Epist. 96, et lib. de Unitat. Eccles., et saepè alias.* Omnes autem hæretici, qui privatum

spiritum fingunt, id faciunt, ut judicium Ecclesiæ refugiant, et unusquisque se ipsum suæ fidei regulam faciat, ut indicavit Augustinus, lib. 31 contra Faust., c. 2.

12. *Quinta ratio.*— Præterea hinc sumitur quinta et valde urgens ratio, quia alias nullus potest esse terminus controversiarum in quæstionibus, quæ circa fidem oriuntur; nam unusquisque hæreticorum affirmat se esse illuminatum a Deo, et alios esse delusos; ergo nisi aliquis sit judex, et supra omne privatum judicium, qui a Deo auctoritatem habeat discernendi infallibiliter falsum a vero, impossibile est lites fidei componere, aut unam fidem infallibilem in Ecclesia conservare. Probatur hoc, quia si credendum est privato spiritui, cum per diversos hæreticos contraria pronuntiet, non potest esse uterque verax, quia alter illorum falsum dicit. Et non est major ratio credendi in uno esse spiritum Dei, quam in alio, quia neuter eorum exhibit certum aliquod signum sui divini spiritus; et conjecturæ humanæ, quamvis interdum diversæ esse possint, ad fidem certam non sufficiunt. Fluctuat ergo fides, et plane scinditur, si privatus uniuscujusque spiritus pro fidei fundamento constituatur. Et ideo merito Clemens I, *Eistol.* 5, acriter invehitur in eos, qui controversias fidei proprio judicio definire volunt.

13. Recte etiam Hieronymus, contra Luciferianos: *Si non sit in Ecclesia una eminens potestas, tot futura sunt schismata, quot sacerdotes;* et Augustinus, lib. 22 contra Faust., c. 38, ad hæreticos loquens, ait: *Videtis id ros agere, ut e medio tollatur dirina auctoritas, ut suus unicuique animus auctor sit, quid in unaquaque reprobet aut improbet.* Et lib. 11, c. 1, fere similem discursum late prosequitur circa particularem controversiam, an hic liber vel pars ejus canonica sit, necne. Nam si unus dicat esse, aliis non esse, neutri propter suum solum testimonium est credendum. Et licet alter conetur plures testes vel conjecturas pro se afferre, ait Augustinus: *Et si hoc facere conaberis, nihil valebis,* adjungitque: *Et vide in hac re quid Ecclesiæ Catholicæ raleat auctoritas,* etc. Perinde autem est de vero sensu Scripturæ, quod de veritate Scripturæ controvertere, quia, ut sæpe dixi ex Hieronymo, Scriptura in sensu consistit, magis quam in litteris. Imo eadem ratio in quacumque alia controversia fidei, quæ in illa particulari, militat. Et ideo generaliter dixit idem Augustinus, lib. 7 de Baptismo, cap. 35: *No-*

bis tutum est non progredi aliqua temeritate sententiæ, quæ nullo in catholico regionali Concilio capta, nullo plenario Concilio terminata sunt. Et concludit, securum esse, quidquid est universalis Ecclesiæ consensione roboratum. Et e contrario, in epist. 18, dicit: *Disputare contra id quod universa Ecclesia sentit, insolentissimæ superbiae est.* Ac denique, lib. 4 de Trinit., c. 6, eleganter satis: *Contra rationem nemo sobrius, contra Scripturam nemo Christianus, contra Ecclesiam nemo pacificus senserit.*

14. *Sexta ratio.*— Tandem his affinis est sexta ratio: nam si privatus spiritus esset regula propriæ fidei, nulla esset hæresis, nullusve hæreticus, vel saltem nullus posset ut hæreticus ab hominibus judicari aut damnari, vel ad aliquam communem fidem tenendam cogi, quæ omnia valde sunt absurdâ, et contraria non solum Scripturæ, et Patribus ac rationi, sed etiam dictis et factis ipsiusmet regis Angliæ; ergo. Sequela probatur: nam hæreticus non est, nisi qui discrepat a regula fidei; at si privatus spiritus est regula fidei, nullus est, dicens se credere Christo, et Evangelio, ac Scripturæ, qui discrepet a regula fidei, quia nullus est qui discrepet a suo judicio, et suo privato spiritu, ut per se manifestum est. Et hinc etiam aperte sequitur, nullam esse propriam hæresim, quia nulla est regula ipsius doctrinæ secundum se spectatæ, sed in unoquoque homine habet suam regulam, et non potest cum certitudine constare, quis privatus spiritus vera regula sit; ergo nulla doctrina secundum se sumpta potest hæretica judicari saltem ab hominibus. Unde a fortiori sequitur, nullum hominem posse ut hæreticum damnari, quia et nullus discedit a regula quam sequi tenetur, ut ostensum est, et de nullius doctrina constare potest esse hæreticam, ut etiam est probatum. Ac tandem a fortiori infertur, neminem cogi posse ad aliam fidem, præter eam quam legendo Scripturas, per suam certam scientiam, sumpque privatum spiritum consequi dixerit. Probatur illatio, quia si illud est fidei fundamentum, nemo cogi potest ut ab illo dimoveatur; ergo neque ut aliam fidem sequatur.

15. Fortasse non deerunt hæretici qui hæc omnia facile concedant. Nam, ut fertur, jam aliqui dixerunt unumquemque salvari posse per illam fidem, quam sibi interius, aut vere Spiritus Sanctus dictat, aut ipse certo quodam modo existimat, id sibi a Spiritu Sancto dictari. Ex quo principio, et illa quæ diximus,

et alia non minus absurdia inferuntur, ut, sine vera fide posse aliquem salvari contra aper-tas Scripturas. Illatio est manifesta, quia ille instinctus, qui putatur esse a Spiritu Sancto, et non est, inducit ad errorem; ergo non est vera fides; ergo si illa existimatio sufficit ad salutem, error etiam sufficit, et vera fides non est necessaria. Unde ulterius sequitur, extra Ecclesiam esse salutem, quod etiam est contra Scripturam, et contra omnes Patres, ut supra dixi, et videri potest Cypr., lib. de Unit. Eccles.; et Augustin., in simili libro, fere per totum, et de Fide et Symb., lib. 3, c. 41, et lib. 4, c. 40: et Fulgent., de Fide ad Petrum, c. 37 et 39; et Pacian., ep. 2 ad Sempron. Sequela patet, quia ubi vera fides non est, nec vera Ecclesia esse potest, sicut (teste Paulo) nec Ecclesia potest subsistere sine unitate fidei; ergo si quis posset salvari sine vera fide, posset etiam extra Ecclesiam habere salutem. Denique qui sic sentiunt, non solum contra Scripturam et Patres, sed etiam contra omnem rectam rationem loquuntur; nam et ab omnibus credentibus auferunt certitudinem fidei, et omnibus schismaticis et hæreticis liberam licentiam tribuunt, et latissimam viam omnibus dissensionibus sternunt, quæ sunt contra rectum ordinem sapientissimæ providentiae Dei. Non enim præcepisset unitatem, consensionem et securitatem in certitudine suæ fidei; reliquisset vero Ecclesiam sine via aut modo conservandi hanc fidem certam, et ejus unitatem.

16. Non potest ergo negari quin illa, quæ in hac sexta ratione intulimus, absurdissima sint, quale est, vel nullam esse hæresim, vel nullum hæreticum esse damnablem: utrumque enim repugnat Paulo; nam ad Galatas 5, inter opera carnis numerat dissensiones et sectas, per quas Patres maxime hæreses intelligunt. Et ad Titum 3: *Hæreticum hominem post unam et secundam correptionem devita, sciens quia subversus est, qui ejusmodi est, et delinquit, cum sit proprio judicio condemnatus.* Unde constat, proprium spiritum non solum non excusare ab hæresi, sed potius esse propriam radicem ejus; quid enim est proprius spiritus, aut illa certa scientia uniusejusque, nisi proprium judicium? Unde recte Tertullian., lib. de Præscriptionib. hæret., c. 6: *Ideo (inquit) sibi, dixit Paulus, damnatum hæreticum, quia et in quo damnatur sibi eligit. Nobis vero nihil ex nostro arbitrio inducere licet, sed nec eligere quod aliquis de arbitrio suo induixerit. Apostolos Domini habemus auc-*

tores, qui nec ipsi quidquam ex suo arbitrio, quod inducerent, elegerunt, sed acceptam a Christo doctrinam fideliter nationibus adsignaverunt. Itaque etiamsi Angelus de cœlis aliter evangelizaret, anathema diceretur a nobis. Et in cap. 7, addit, doctrinas hoc proprio judicio inductas, esse doctrinas hominum et dæmoniorum prurientibus auribus natas de ingenio sapientiae sæculi. Et eodem modo August., epist. 85, alias 222, et lib. 2 de Nuptiis, c. 31, et alii Patres communiter, dicunt omnes hæreses, vel inde nasci, vel in eo fundari, quod earum auctores, vel ex proprio affectu Scripturas detorquent ad suos sensus, vel ex proprio judicio, et superbia in illis expoundis errant; ergo spiritus privatus non potest excludere hæresim; imo quatenus est proprius, est ad illam aptissimus, quia hæresis propria electione et judicio inducitur. Et consequenter neque est aptus ad fundandam fidem, maxime quia, cum sit spiritus elationis, nullum habet indicium Spiritus Sancti, qui super humiles requiescit.

17. *Rex Anglie, dum predictum astruit fideli fundamentum, secum pugnat.* — Regis ad seclarios de unitate fidei exhortatio repugnantiam involvit. — Denique ipsum etiam regem Angliæ, dum tale ponit fundamentum fidei, quæ damnationi hæresis et hæreticorum repugnet, secum pugnare constat. Tum quia ipse, in Praefat., p. 43, damnat omnes hæreticos, quos antiqui Patres damnarunt; et ideo ibidem maxime contendit se ab hæreticorum numero eximere, et ab hac nota purgare. Et pag. 55, fatetur se in Puritanorum anarchia expugnanda laborasse, et (ut publica est fama) subditos suos ad Calvinianum variis modis compellit. Hæc igitur cum illius fundamento de certa scientia, proprio judicio et spiritu comparata, plane repugnant. Nam si ipse censem hoc esse fidei suæ firmum fundamentum, et omnes principes christianos exhortatur ut similes sibi sint, cur non eamdem fidei libertatem suis subditis concedit? Numquid in hoc melioris conditionis est rex temporalis, quam subditi? Oportet sane ut Spiritus Sancti assistentiam infallibilem, quam Summo Pontifici negat, sibi adesse vel promissam esse ostendat. Vel si in hoc non habet majus quam cæteri privilegium, quo jure potest alios cogere ad suam fidem sectandam, vel alios magis judicare hæreticos, quam se ipsum, cum nullum majus indicium Spiritus Sancti ipse ostendat, quam alii? Unde obiter etiam adverto, incassum laborare eumdem

regem, cum in sua Præfatione, pag. 157, sectarios omnes, seu Protestantes exhortatur, ut inter se veræ fidei unitatem conservent, et communionem spiritus in vinculo pacis retineant. Nam fundamento fidei, quod sibi et omnibus proponit, talis unitas et concordia plane repugnat, ut ostensum est, et ipsa rerum experientia satis declaravit. Unde optime Tertullianus, de Præscrip., c. 42: *Mentior, si non etiam a regulis suis variant inter se, dum unusquisque proinde suo arbitrio modulatur quæ accipit, quemadmodum de suo arbitrio ea composuit ille, qui tradidit; agnoscit naturam suam, et originis suæ morem profectus rei. Idem licuit Valentianis, quod Valentino, idem Marcionistis quod Marcioni, de arbitrio suo fidem innovare. Denique penitus inspectæ hæreses omnes in multis cum auctoribus suis dissentientes deprehenduntur. Plerique nec ecclesias habent, sine matre, sine sede, orba fidei; extorres quasi sibi, late vagantur.*

18. *Objectiones oppositæ sententiae.*—Superest testimonii quibusdam satisfacere, quæ ad errorem suum de oppugnato fidei fundamento retorquent Protestantes: ex quibus quædam, quæ videntur esse præcipua, in superioribus obiter expeditivimus. Addunt vero alia, in quibus præcipimus Scripturas scrutari, Joan. 5, sicut faciebant Thessalonenses, Actor. 17. Adduntque Scripturas, præsertim in rebus fidei et morum ad salutem necessariis, claras esse, et ab omnibus intelligi posse, ut sumitur ex Augustino, lib. 2 de Doctrina Christ., c. 9, dicente: *In his, quæ aperte in Scriptura posita sunt, inculcari illa omnia, quæ continent fidem moresque vivendi. Idem sensit Chrysost., hom. 3 in 2 ad Thessalon., circa finem, dicens: Omnia sunt dilucida et recta, quæ sunt in dixinis Scripturis, manifesta sunt quæcumque sunt necessaria. Et similia habet Hom. 13 in c. 2 ad Cor., in fine, et homil. 33 in Acta, versus finem, et Hom. 3 de Lazaro et divite. Indicat etiam Ambros., Psal. 118, Octonario 14, circa illa verba: Lucerna pedibus meis verbum tuum. Hinc ergo concludunt, cum Scriptura clara sit, non esse necessariam aliam regulam, sed solum ut ipsa attente legatur et intelligatur. Præsertim, quia facienti quod in se est, et potenti, dabitur intelligentia et sapientia, Jacobi primo; et qui voluerit voluntatem Dei facere, cognoscat doctrinam Christi, ut ipse promittit, Joan. 7. Denique addunt, quod Christus de se dixit, Joan. 5: *Ego ab homine testimonium non accipio, etc.**

19. Verumtamen hæc inania prorsus et utilia sunt, quia si circumstantiae singulorum locorum attendantur, in occasionibus longe diversis, et alia mente ac intentione dicta sunt. Primum enim, quis abnuit scrutandas et evolvendas esse Scripturas? vel ubi majori cum diligentia et fructu fit, quam in Ecclesia Catholica et Romana? Hoc ergo studium necessarium est; modus autem, et delectus, ac prudentia postulatur. Deinde nemo etiam refugit posse Ecclesiæ Doctores et Sapientes aliquid, de propria industria et ingenio, ad Scripturarum intelligentiam investigandam excogitare, easque per humanam sapientiam interpretari. Hoc enim fecerunt Patres omnes, non ex speciali privilegio, sed ex ordinaria lege maxime consentanea ipsismet Scripturis, et naturali hominis conditioni, et ita hoc etiam nunc Doctores catholici observant.

20. *Duplex Scripturæ interpretatio: alia authenticæ, alia doctrinalis.*—Oportet autem duplarem Scripturæ interpretationem distinguere: unam vocare possumus authenticam, alteram communem, seu privatam. Quam distinctionem videntur adversarii dissimulare aut ignorare, cum tamen similis frequentissima sit inter jurisperitos in suarum legum interpretatione. Nam quædam est authenticæ, id est, habens vim legis, de qua ipsamet iura dicunt, ejus esse interpretari legem, cuius est condere; alia est doctrinalis tantum, quæ licet illam auctoritatem non habeat, tamen ad humanum regimen suam habet utilitatem. Ad hunc ergo modum necessaria est aliqua interpretatio authenticæ Scripturæ Saceræ: et non minus in iis, quæ ad fidem et mores pertinent, quam in aliis, imo eo magis quo in illis certus et indubitatus sensus magis necessarius est. Nec refert quod illa soleant esse clariora, quia semper possunt habere ambiguities, ex varietate significationum aut sensuum, et præcipue quia omnia solent pervertere hæretici, teste Augustino, lib. 2 de Nuptiis, c. 31, ubi sic ait: *Non est mirum, si Pelagiani dicta nostra in sensu quos volunt, detorquere conantur, quando et de Scripturis sanctis, non ubi aliquid obscure dictum est, sed ubi clara et aperta sunt testimonia, id facere consuerunt, more quidem hæreticorum etiam cæterorum. Ob has ergo causas necessaria est authenticæ interpretatio. Præter hanc vero necessaria etiam est doctrinalis ad Ecclesiæ ædificationem et utilitatem, et ad resistendum hæreticis, quia omnis Scriptura di-*

vinitus inspirata utilis est ad docendum, ad arguendum, ad corripiendum, ad erudiendum in justitia, ut perfectus sit homo Dei, ad omne bonum institutus, ut dicit Paulus, 2 ad Tim. 3.

21. Interpretatio authentica non potest ab spirito privato prodire. — Prior ergo interpretatio non potest fieri privato spirito, et de hac procedunt omnia quæ diximus; nam hæc est quæ ad fidei fundamentum pertinet, et ideo solum ab illo fieri potest, cui clavem scientiæ specialiter Christus promisit, et tunc non ab homine, sed a Deo per hominem testimonium accipitur. Ipse enim Christus et assistentiam suam, et Spiritus Sancti magistrorum Ecclesiæ suæ promisit. Posterior autem Scripturæ interpretatio, cum per se non habeat infallibilem auctoritatem, humana esse potest, et privata auctoritate fieri, dummodo non temere et ad libitum fiat, sed ita ut neque alii Scripturæ locis, neque Ecclesiæ definitionibus, neque cōmuni sensui Patrum repugnet. Neque tamen hujusmodi etiam interpretatio omnibus permittenda est, sed Doctoribus Ecclesiæ ad hoc munus vocatis; aliis vero, quamvis lectio Scripturæ interdum possit esse⁹³ utilis, pro legentis capacitate, non tamen ad eam interpretandam, sed ad illam simpliciter intelligendam, prout communiter in Ecclesia exponitur. Neque etiam legenda est ad fidem examinandam propria scientia, sed potius ex fide legenda est ad alias utilitates et fructus ex illa hauriendos, et in hoc sensu loquuntur Patres in locis allegatis, et videri etiam potest Basilius, in serm. de Vera et pia fide, et in Regulis brevioribus, interrogat. 93, ubi optime, quamvis breviter, hoc docuit.

CAPUT XII.

EX NOMINE (CATHOLICA) ANGLICANAM SECTAM FIDEM CATHOLICAM NON ESSE OSTENDITUR.

1. Quoniam hæc appellatio *catholica* semper distinxit, et Ecclesiam Christi a synagogis Satanæ, et veram fidem ab haeresi, ut sufficienter probant symbola fidei, et perpetua Patrum traditio (ex quibus nonnullos retulimus, et plures in hoc capite referemus) ideo rex Anglie notam haeretici vitare cupiens, ut in sua Præfatione ostendit, titulum defensoris catholicæ fidei assumit, quo catholicam fidem credere et tenere profitetur. Cum autem compertum sit, ipsum esse defensorem ac pro-

pugnatorem particularis sectæ Anglicanæ, si ostenderimus, illam non esse catholicam fidem, convincemus etiam illum non esse defensorem catholicæ fidei, et tunc fore talem quando, pie ac sincere cognita veritate, ad Ecclesiæ Romanæ gremium (quod faxit Deus) et obedientiam redierit. Quamvis autem ex hactenus dictis satis inclarerit sectam illam, quæ firmum fidei fundamentum non obtinet, nequaquam posse veram Ecclesiam esse, aut catholicam fidem profiteri, nihilominus ut evidentius id constet, operæ pretium visum est, per antiquissimam traditionem Ecclesiæ ex ipsa appellatione *catholicæ fidei* aperte deductam, idem ostendere. In hoc autem attributo duo spectari possunt, scilicet, et nomen ipsum, seu cognominatio ab illo sumpta, et res seu proprietas significata per nomen, ex quibus diversa argumenta solent Patres sumere ad veram fidem vel Ecclesiam cognoscendam, et ideo prius de nomine, postea de ratione nominis dicemus.

2. Nomen Catholicæ, fidei et Ecclesiæ adaptatur. — Supponimus autem imprimis hoc nomen *catholicæ*, tam Ecclesiæ quam fidei attribui solere; nam in Symbolis Apostolico et Nicæno confitemur unam Ecclesiam Catholicam, et in Symbolo Athanasii, de collectione ipsa articulorum fidei dicitur: *Hæc est fides catholica, quam nisi quisquis fideliter firmiterque credidirit, salvis esse non poterit.* Cui autem illarum, scilicet, Ecclesiæ an fidei, prius fuerit hoc nomen impositum, incompertum mili fateor; potuit enim Ecclesia vocari Catholicæ, quia fidem catholicam profitetur, et e contrario fides potest dici catholicæ, quia ab Ecclesia Catholicæ refinetur et traditur, vel certe utrique per se spectatae potuit hoc nomen attribui, quia ratio ejus, seu omnis proprietas, quæ per illud indicatur, tam in vera Ecclesia quam in vera fide per se invenitur, ut in sequenti capite declarabimus. Unum autem certum est, scilicet, illa duo ita esse conjuncta, ut separari nequeant, quia nec fides catholicæ esse potest extra veram Ecclesiam, nec Catholicæ Ecclesia sine vera fide, nam ubi Ecclesia Catholicæ fuerit, erit etiam catholicæ fides, et e contrario, et ideo semper de illis indifferenter loquemur.

3. Catholicæ nomen Anglia affectat. — Secundo statuendum est, hoc nomen antiquissimum esse, quamvis non defuerint haeretici etiam antiqui, qui contra illud obmurmurare ausi fuerint, ut de Symproniano Novaliano

refert Pacianus, contra Parmen., epist. 1 et 2. Et fortasse non desint aliqui ex hujus tempestatis novatoribus, qui illud respuant, eo quod in libris canoniciis non inveniatur scriptum. Verumtameu quantum ex verbis regis Angliæ conjicio, Anglicana secta illud non detrectat, imo tanquam nomen vera fidei, religionis, et Ecclesiæ, catholicismi nomen affectat, sibique cupit attribuere, ut in ipso titulo defensoris catholicæ fidei rex ipse sat s ostendit. Præterquam quod hæc vox in allegatis Symbolis approbata invenitur, ita ut sub illa denominatione jubeamur, unam Ecclesiam et fidem Catholicam recognoscere ac confiteri; ergo rex Angliæ, qui dicta symbola admittere profitetur, negare non potest nomen illud, vel rem per illud significatam. Denique ipsa veneranda antiquitas, et Patrum omnium ætatum consensio, ostendit nomen hoc non sine divino numine in Ecclesia introductum esse: *Certe* (inquit Pacianus, dicta Epist. 1), *non est ab homine mutuatum, quod per secula tanta non cecidit, catholicum istud nec Marcionem, nec Apellem, nec Montanum, nec hæreticos sonat auctores. Multa nos Spiritus Sanctus edocuit, quem Paracletum Apostolis, et magistrum Deus misit e calis. Multa ratio, sicut dicit Paulus, et honestas, et (ut ait) ipsa natura. Quid? parva nobis de apostolicis viris, parva de primis sacerdotibus currit auctoritas?* Et infra: *Age, si illi usurpando nomini huic auctores idonei non fuerint, nos idonei erimus negando? et nostram potius auctoritatem Patres sequentur, et emendanda Sanctorum cedet antiquitas, et jam putrescentia vitiis tempora canos Apostolicae antiquitatis eradet?* Quæ gravissimus hic Pater ante mille et trecentos annos scripsit, tunc testatus fuisse antiquissimum hoc nomen, et merito; nam ex Symbolo Apostolorum constat ab ipsis fuisse approbatum; in eo enim profitemur *Sanctam et Catholicam Ecclesiam;* quæ verba non sunt minus antiqua in illo Symbolo quam cætera, et ita leguntur et explicantur ab omnibus antiquis, Cyrillo, Ruffino, et Augustino. Ergo ab Apostolorum tempore cum ipso symbolo nomen etiam Catholicæ semper Ecclesia conservavit. Unde etiam Pacianus illud nomen admiratur: *Quia tanto tempore non ceciderat?* Ergo multo majori admiratione dignum est, quod usque ad nostra tempora conservatum fuerit, et eidem Ecclesiæ ac fidei attributum. Igitur evidenter nunc ostenditur, nomen hoc neque datum, neque conservatum esse sine speciali Dei providentia,

semperque vere indicasse et indicare id quod significat, et propter quod impositum est.

4. *Hoc nomen inditum est Ecclesiæ ut ab hæreticis conventiculis discriminaretur.*—Tertio igitur supponendum est, hoc nomen attributum esse Ecclesiæ, et fidei Christi, ad distinguendam illam ab hæreticorum doctrinis et conventiculis. Testis est idem Pacianus, in eadem Epist. 1, sic dicens: *Cum post Apostolos hæreses extitissent, diversisque nominibus columbam Dei, atque reginam lacerare per partes et scindere niterentur, nonne cognomen suum plebs apostolica postulabat, quo incorrupti populi distingueret unitatem, ne intemperatam Dei Virginem error aliquorum per membra laceraret, nonne appellatione propria decuit caput principale signari?* Quam necessitatem adhibito exemplo declarat, dicens: *Si forte ingressus populosam urbem Marcionitas, Novatianos, et cæteros ejusmodi comperissent, qui se Christianos vocarent, quo cognomine congregationem meæ plebis agnoscerem, nisi Catholicæ diceretur?* Unde postea concludit: *Christianus mihi nomen est, Catholicus vero cognomen: illud me nuncupat, istud ostendit; hoc probor, inde significor.* Eamdem causam et necessitatem hujus nominis statuit, et pro more, acute satis explicavit Augustinus, lib. contra Epist. Fundamenti, c. 4, ubi inter vincula quæ ipsum in Ecclesia tenuerunt, enumerat: *Ipsum Catholicæ nomen, quod non sine causa inter tam multas hæreses sic ista Ecclesia sola obtinuit, ut cum omnes hæretici, Catholicæ dici velint, querenti tamen peregrino alicui, ubi ad Catholicam conveniatur, nullus hæreticorum, vel basilicam suam, vel domum audeat ostendere.* Idem docuit lib. de Vera relig., c. 7, cuius verba postea referam.

5. Eamdem rationem hujus vocis nobis tradidit Cyrillus Hierosolymit., Cateches. 18. Nam quia nomen Ecclesiæ absolute dictum, et antiquam Synagogam, et quilibet congregationem, et malignantium etiam, id est, hærelicorum Ecclesiam significare potest: *Propterea (inquit) nunc confirmans fides tradidit, ut dicas: Et in unam Sanctam Catholicam Ecclesiam, ut illorum quidem feda conventicula fugias, perseveres autem in Catholicæ Ecclesia, in qua renatus es.* Ubi confirmantem fidem appellat Symbolum, quod exponit. Et statim monet non esse querendum ubi sit Ecclesia, sed ubi sit Catholicæ Ecclesia: *Hoc enim (ait) proprium nomen est Sanctæ hujus, et matris omnium nostrum, quæ est sponsa*

Domini nostri Jesu Christi unigeniti filii Dei. Eamdemque rationem subinnuit Hilarius, canon. 10 in Matth.; nam explicando verba illa Christi : *In quacumque civitatem intraveritis, interrogate quis in ea dignus sit, et ibi manete*, etc., per dignam domum, Ecclesiam interpretatur, quæ *Catholica*, inquit, *dicitur*. Quia multi Judæorum erant futuri, qui licet Christo crederent, tamen in legis operibus morarentur; alii, qui per simulationem ex lege ad Evangelium transirent: multi vero, qui in hæresim traducerentur, et penes se esse veritatem catholicam mentirentur: *Ideo* (inquit) *admonuit dignum, cum quo habitandum sit, esse querendum, id est, Ecclesia, quæ Catholica dicetur, caute, et diligenter utendum*. Atque hinc usus etiam Ecclesiæ, et omnium Patrum obtinuit, ut veri fideles ab hæreticis per hoc Catholicorum nomen distinguantur, ut passim in Patribus legimus, et usu comprobatum videmus, et experti sumus non solum inter Catholicos, sed etiam inter ipsos hæreticos, ut ex dicendis amplius inclarescet.

6. *Colligitur esse reram Ecclesiam, quæ vere hoc nomen meretur.* — Quarto, ex his inferimus, et tanquam certum statuimus, illam esse veram Ecclesiam, et in ea esse veram et catholicam fidem, quæ jure ac merito, id est, secundum primævam hujus nominis impositionem, catholicæ nominatur. Hoc manifeste sequitur ex dictis, quia ostensum est hoc nomen ab Apostolis impositum fuisse ad denotandam illam Christi Ecclesiam, quæ per eos fundata fuerat; ergo in fide pro explorato habetur, illo nomine tunc significatam fuisse veram Ecclesiam, ac subinde Ecclesiam per Apostolos fundatam habuisse eas proprietates, quæ in vera Ecclesia requiruntur, et illo nomine indicantur, ut ex infra profertur clarius elucescat. Constat enim Apostolos veram Ecclesiam et proprietates ejus non ignorasse, et habuisse auctoritatem imponendi illi nomen, veritati et usui ejus accommodatum. Et hinc ulterius fit, illam Ecclesiam ab Apostolis conditam, quatenus per veram successionem semper duravit (ut supra vidimus), semper etiam meruisse nomen catholicæ, neque illud unquam amisisse. Probatur primo, quia semper est una et eadem, non similitudine tantummodo speciei, sed etiam identitate (ut cum philosophis loquar) numerica morali, propter continuam successionem legitimam; ergo veritas et proprietas significata per illud nomen semper

illi convenit; ergo et nomen ipsum. Secundo, quia semper hæc Ecclesia professa est fidem illius symboli, in quo ipsa catholicæ nominatur, cum tamen in sua fide errare non possit, ut supra jam satis liquido manet commons-tratum. Tertio, quia non amisit illud nomen per demutationem rei, id est, quia amiserit proprietatem significatam per illam vocem; nam si illam amisisset, non esset eadem Ecclesia, ut supponitur; nec etiam amisit illud per ablationem seu mutationem solius nominis, quia Ecclesia ipsa se illo nomine non privavit, aut nominis significationem mutavit, ut ex usu et ex fide Symboli satis constat. Neque extra illam est in terra potestas, quæ potuerit eam tali nomine privare, neque jure, quia non habet superiorem; neque facto, quia neque in hoc portæ inferi contra eam prævalere potuerunt, ut latius infra comprobabimus.

7. Unde tandem concluditur illam Ecclesiam, cui jure ac merito nomen hoc tribuitur, esse veram Christi Ecclesiam, et fidem catholicam in se conservare, et consequenter nullam congregationem, etiam sub Christi nomine et confessione coactam, quæ a priori Ecclesia divisa et segregata sit, ullo modo posse hoc nomen sibi merito vendicare. Utrique pars nota est ex dictis. Prior quidem, quia talis Ecclesia est eadem numero cum illa, quæ a principio et semper illud nomen habuit; posterior vero, contraria ratione, quia Ecclesia vera est tantum una, et hoc nomen uni tantum et veræ Ecclesiæ contributum est. Omnis ergo Ecclesia, quæ non est illa una et vera Ecclesia, vel pars ejus, Catholicæ dici non potest. Idem confirmatur clare ex causa impositionis talis nominiis. Inventum est enim ad discernendum perpetuo veram Ecclesiam a falsis, et ideo non est positum tanquam nomen commune, sed tanquam proprium et singulare, ad significandum hoc individuum corpus mysticum tales sortitum proprietates; ergo hoc ubicumque et quandocumque fuerit, recte illo nomine appellabitur, secus vero est de quocumque alio factio corpore ab hoc diviso.

8. *Quid sit Ecclesiam Catholicismi nomen mereri.* — Unde etiam obiter constat, quid sit mereri tale nomen, et quasi jure suo illud sibi vendicare, innotescit; nihil enim aliud est quam habere veram et indubitatam successionem ab illa Ecclesia primitiva, cui primo hoc nomen exhibitum est; nam cum per illam successionem omnia bona et jura, ut sic

dicam) antiqua Ecclesiæ vendicentur, itidem cum illis etiam proprium nomen comitari necessarium ducitur. Potestque exemplo rerum humanarum declarari, ita enim nomen uniuscujusque familiæ, quo ejus nobilitas et antiquitas indicatur, non aliter ex vi primæ impositionis ad aliquem transit, nisi ex vi originis et successionis; et tunc ostenditur quis merito et quasi jure suo nomen illud vendicare, quando directam et legitimam successionem a tali radice demonstrat. Ita ergo de Ecclesia quoad appellationem catholicam, multoque altiori modo et majori certitudine existimandum est. Excellentiori quidem modo, quia successio Ecclesiæ licet sit per multiplicacionem diversarum personarum naturalium (ut sic dicam), nihilominus est per conservacionem ejusdem numero corporis mystici, cuius omnes personæ, sibi invicem succedentes, sunt membra. Et inde etiam sequitur major certitudo, quia illud nomen non est per se primo impositum singulis membris, aut personis, sed toti corpori, quod cum sit semper idem, tenacius et firmius nomen suæ dignitatis retinet, perpetuoque conservat. Maxime tandem sumitur hæc certitudo ex continua professione fidei, qua ipsamet Ecclesia semper confitetur se esse catholicam. Nam cum huic fidei falsum subesse non possit, certissimum omnino fit, veram Christi Ecclesiam jure sibi hoc nomen vendicare, quod nullus vel hæreticus, si Symbolis Apostolico et Niceno fidem præbeat, negare potest, saltem generatim de vera Ecclesia Christi, prout hactenus locuti sumus.

9. *Infertur nomen Catholicæ, Ecclesiæ Romanæ deberi.* — Quinto denique addimus, Ecclesiam, quæ nunc Pontifici Ronano obtemperat (quam, ut distincte loquamur, nunc Romanam appellabimus), jure ac merito catholicæ nomen sibi vendicare, eademque ratione fidem ejus catholicam esse censandam et appellandam. Hæc assertio sequitur evidenter ex proxime dictis, iis adjunctis quea in c. 4 tractata sunt. Ibi vero advertimus, nomen Ecclesiæ Romanæ interdum accipi pro universalis Ecclesia, quæ Pontifici Romano tanquam universalis Christi Vicario obedit; interdum autem pro particulari diœcesi, quæ eidem Pontifici etiam ut particulari et proximo Episcopo subest. In præsenti quidem priori modo loquimur de Ecclesia Romana, quia nomen catholicæ, Ecclesiæ universalis primario est impositum. Quanquam etiam particulares Ecclesiæ soleant catholicæ voca-

ri, ut constat ex modo loquendi Augustini, Paciani, et Cyrilli supra, et ex communi usu, sicut et quilibet fidelis vocatur Catholicus, vel a professione fidei catholicæ, vel quia est pars Catholicæ Ecclesiæ; ergo multo magis quælibet ecclesia particularis, utramque rationem habens, poterit Catholicæ vocari, et sic etiam particularis Ecclesia Romana maxime catholicæ est, quod a fortiori constabit, si de universali illud comprobetur. (Vide Walden., lib. 2 Doctrinal. fide, c. 25.)

10. *Probatur assertio primo.* — Primo ergo probari potest assertio, eodem modo quo antiqui Patres supra allegati probabant Ecclesiam, quæ suo tempore erat, esse Catholicam, quia erat illa quam Apostoli fundaverant, cuique hoc nomen imposuerant; et ex eisdem et aliis constat, loqui etiam de illa Ecclesia, quam nunc Romanam vocamus, quia loquebantur de Ecclesia unita Pontifici Romano tanquam capiti, et Christi Vicario, ut patet ex Augustino, qui hac ratione successionem Pontificum Romanorum simul cum nomine Catholicæ in signis verae Ecclesiæ conjungit; et ex Cyrillo, qui ait, *Sanctam Ecclesiam Christianam esse, de qua Salvator dixit Petro : Tu es Petrus, et super hanc petram ædificabo Ecclesiam meam, et portæ inferi non prævalebunt adversus eam.* Pacianus demum, licet non ita dilucide hoc declaret, auctoritate tamen Cypriani utitur ad suam sententiam de Ecclesia Catholicæ stabilendam; Cyprianus autem ipse sane, epist. 75 ad Cornelium, Ecclesiam Romanam vocat Ecclesiæ Catholicæ radicem et matricem; uterque ergo intellexit per Catholicam Ecclesiam, illam quæ sub Romano Pontifice militat, pluraque alia ex eodem Cypriano, Irenæo, Hieronymo, et Ambrosio supra, c. 3 et 4, retulimus, et alia legi possunt in Augst., epist. 165, et passim in libris contra Donatistas; et Optat., lib. 2 contra Parmenianum, ubi ex unione cum cathedra Petri monstrari dicit, aliquam Ecclesiam esse Catholicam. Denique Tertull., in Præscriptionib., c. 30, *catholicam doctrinam esse dicit in Ecclesia Romanensi,* quod perinde est ac si diceret, illam esse Catholicam. Ostensum autem a nobis in superioribus est, Ecclesiam Romanam eamdem esse nunc, quæ prisca temporibus fuit; ergo ad illam solam jure pertinet Catholicæ nomen.

11. *Secundo probatur eadem assertio.* — Et præterea nunc etiam locum habet probatio, quam iidem Patres ex totius orbis consen-

sione desumere solent. Nam, sicut tempore, verbi gratia, Augustini, ita etiam nunc, et omnibus interpositis annis, omnes homines, tam fideles quam infideles, utentes voce *Ecclesiae Catholicæ*, et simpliciter loquentes, et sine speciali affectione vel malitia, per illam vocem intelligunt et significant illam Ecclesiam, quæ cum Pontifice Romano communicat; ergo signum est illam solam esse, cui ex proprio jure hoc nomen debetur. Ita argumentatur Augustinus, lib. de Vera relig., c. 7, dicens: *Tenenda est nobis Christiana religio, et ejus Ecclesiae communicatio, quæ Catholica est, et Catholica nominatur, non solum a suis, verum etiam ab omnibus inimicis. Vellint enim, nolintve ipsi quoque hæretici, et schismatum alumni, quando non cum suis, sed cum extraneis loquuntur, Catholicam nihil aliud quam Catholicam vocant. Non enim possunt intelligi, nisi eam hoc nomine discernant, quo ab universo orbe nuncupatur.* Idemque probat quod Cyrilus ait, ubi est diversitas sectarum cum vera Ecclesia in eodem loco mistarum, ne quis decipiatur inquirendo, oportere ut interroget, non pro Ecclesia tantum, sed pro Catholicæ; nam illo nomine omnes intelligunt illam quæ antiquam fidem retinet. At hoc eodem modo durare usque ad præsentia tempora, evidenti experimento constat, ut superius annotavi; ubique enim qui se professorem Romanæ fidei ostendere vult, Catholicum se nominat, et ita etiam ipsi hæretici, quando sincere et communi modo loquuntur, eosdem fideles gloriose Catholicorum titulo designare et insignire solent; ergo

12. Tandem ex verbis Jacobi regis assertio propositu confirmatur. — Atque hoc nobis regia auctoritate confirmavit rex Angliae; nam in sua *Apologia*, quasi consuetudine ductus, et contradictionem in dictis suis non adverens, illos, quos acerrime prosecutus et impugnat, Catholicos sæpe sæpius appellat, cum eos defendere teneretur, si vero et non ficto titulo se defensorem catholicæ fidei appellaret. Occurreritque ex eodem titulo argumentum aliud (quod ad hominem vocant), quo idem rex convinci potest, Ecclesiam Romanam ab ipso ut Catholicam admittendam esse; nam ipse quasi jure hæreditario gaudere vult titulo defensoris fidei catholicæ, qui a Leone X, Pontifice maximo, Henrico VIII, prædecessori suo, concessus est; ergo tacite admittit et approbat et concessionem, et titulum, in eo sensu, in quo a Pontifice datus

est; ergo, velit, nolit, confitetur Romanam Ecclesiam, ejusque fidem, tempore Leonis X, et quando Henricus VIII contra Lutherum libro scripto de Sacramentis illam defendit, vero ac legitimo jure Catholicam dictam esse, et præter illam nullam aliam potuisse Catholicam jure nominari, nisi quatenus cum illa conjuncta esset, quia Catholicæ Ecclesia integra (ut sic dicam) non potest esse, nisi una. At vero non desiit esse Catholicæ Ecclesia Romana eo, quod rex Henricus ab illa se separaverit, sed potius ipse desiit esse Catholicus; hæretici enim vel schismatici ab Ecclesia exeuntes, se ipsos dividunt ac demutant, in Ecclesia autem nullam aliam mutationem faciunt, præter quamdam diminutionem seu membra divisionem; ergo semper hæc Ecclesia jure nomen Catholicæ retinet; nulla enim in fide mutatio in illa facta est; imo nec fieri posse, supra ostensum est.

13. Concluditur non posse sectæ Anglicanæ adaptari. — *Prima ratio.* — Sexto et ultimo, ex his omnibus concludo, quod propositum est, nempe, Anglicanam sectam seu congregationem, aut qualemcumque ecclesiam, quæ sectam illam profitetur, Catholicam jure non posse nuncupari, ac proinde neque esse. Probatur primo, quia hoc nomen non debetur neque potest jure tribui, nisi uni Ecclesia, et quæ vera Christi Ecclesia sit, ita enim in Symbolo confitetur omnes veram et sanctam Ecclesiam unam et Catholicam esse; sed ostensum est Ecclesiam Romanam esse Catholicam: ergo Anglicana Catholicæ non est. Probatur consequentia, quia Ecclesia Anglicana neque est Romana, neque illi est unita, sed ab illa omnino divisa, tum in fide et dogmatibus, tum etiam in obedientia, et vinculo charitatis.

14. Secundo idem facile ostendi potest ex defectu successionis et originis ab illa Ecclesia primitiva, quæ primum Catholicæ dicta est. Hanc enim successionem nunc non habet Ecclesia Anglicana; ergo neque nomen Catholicæ jure (ut aiunt) hæreditario potuit adipisci. Consequentia est evidens ex dictis. Antecedens autem late probatum est in toto discursu cap. 1 et 2, et iterum necessario occurret in capite sequenti, et breviter declaratur. Quia secta Anglicana, quoad quod id quod illi maxime proprium est, et quasi differentia distinguens illam non solum ab Ecclesia Catholicæ, sed etiam ab omni ecclesia malignantium, videlicet, quoad recognitio nem temporalis regis in ratione supremi ca-

pitis in ecclesiasticis et spiritualibus, incepit ab Henrico VIII, ante septuaginta et quatuor vel quinque annos, et nulla illius mentio prius facta est in mundo; neque illud genus reipublicæ aut capitis spiritualis originem dicit ab Ecclesia primitiva, quia nullum in Scriptura vel in prædicatione Apostolorum fundamentum habet, ut libro tertio late ostendemus; ergo quoad hanc partem caret dicta successione. Quoad alteram vero, quæ in ea spectari potest de aliis dogmatibus, in quibus ab Ecclesia Romana dissidet, initium habuit a Calvino, et ex parte etiam a Lutherio, qui profecto in doctrina successionem ex Apostolis, seu Catholica Ecclesia non habent; nam si ex illa essent, permansissent in illa; at ex illa exierunt, quia novos errores doctrinæ apostolicae contrarios excogitarunt, ut ab aliis catholicis auctoribus sæpius est probatum, et est luce meridiana clarius; ergo etiam quoad hanc partem Anglicana secta caret successione. Quod etiam in lib. 2, ex pendendo confessionem fidei regis Angliae, fiet evidenter; ergo nullum verum vel apparentem titulum habet illa secta, quo possit catholica nuncupari.

15. *Tertia ratio: secta, quæ proprium nomen a magistro suo sortitur, Catholica non est.* — Tertio, uti possumus argumento seu signo quo utuntur antiquissimi Patres ad cognoscendum congregationem vel sectam non Catholicam, et illam a Catholica distinguendam. Quotiescumque enim secta aliqua proprium nomen habet a magistro, vel præceptore talis doctrinæ, et sectatores ejus ab eodem præceptore nomen accipiunt, signum est nec doctrinam, nec personas, nec earum congregationem esse Catholicam. Quod signum explicat late Athanasius, Orat. 2 contra Arianos, circa princ., dicens: *Numquam populus christianus ab Episcopis suis, sed a Domino, in quem creditum fuit, nomen accepit, nec ab Apostolis, neque a præceptoribus, ministrisque*

Evangelii, etc.; illi vero, qui aliunde originem fidei suæ deducunt, merito auctorum suorum cognomenta præ se ferunt. Et deinde id ostendit, discurrendo per omnes hæreticos usque ad Arianos, dicens: *Beato Alexandro Arium ejiciente, ii, qui Alejandro adhæserunt, remanserunt Christiani; qui una cum Ario recesserunt, nomen Salvatoris nostri Alejandro cum suis relinquentes, Ariani deinceps appellati sunt.* Additque deinceps, etiam post mortem Arii idem servatum esse, et inter alia ait: *Omnes, qui ejusdem cum Ario sententiae*

fuerunt, ex eo notas suas insigniaque habentes, Ariani nuncupantur, quod revera eximium et magnum argumentum est. Nam qui ex gentibus ad Ecclesiam veniunt, non catechizantium, seu fidei rudimenta tradentium nomina, sed Salvatoris in se transferunt, et pro gentilibus Christiani incipiunt appellari. Qui vero, et ex eodem genere ad istos abeunt, aut ab Ecclesia ad heresim transitum faciunt, nomen Christi derelinquunt, et Arianorum vocabulo induuntur, quasi qui non amplius fidem Christi retineant, sed Arianæ insanæ gregales habentur. Quod late prosequitur, inde concludens, tales sic nominatos non solum de numero Ecclesiae Catholicæ non esse, verum etiam nec Christianos, quia fidem apostolicam jam deseruerunt.

46. Deinde Chrysostomus, hom. 33 in Acta, circa finem, ubi proponit quæstionem, si gentilis volens fieri Christianus, inter eos, qui hoc nomen profitentur, divisiones in dogmatibus inveniat, et ideo dubitet quam partem eligat; et inter alia documenta, quæ ponit ad dignoscendam veram Catholicam fidem, seu Ecclesiam, unum est: *Illi, id est, hæretici, habent quosdam, a quibus appellantur, prout enim hæresiarchæ nomen, ita et secta vocatur, nobis autem nullus vir nomen dedit, sed fides ipsa;* per hoc ultimum verbum significans, a fide Catholicæ vocatos esse fideles Catholicos, et etiam Ecclesiam ipsam Catholicam. Et eamdem sic concludit: *Numquid scindimur ab Ecclesia, num hæresiarchas habemus, num ab hominibus cognomen habemus, numquid nobis dux quidam est sicut illi Marcion, illi Manichæus, huic Arius; quod si nos agnominationem cuiusdam sortimur, sed non ut ab hæresum principibus, sed, ut ab his, qui presunt nobis, et gubernant Ecclesiam. Non habemus Doctores super terram, absit; unum habemus in cœlis. Et illi, inquit, eadem prætexerunt. Sed assistit nomen accusans illos, etc.*

47. Idem signum tradidit Lactant., lib. 4 de Vera sap., cap. ult., ubi ait, multos excidisse a doctrina Dei, credendo falsis prophetis, et veram traditionem relinquendo, subiungitque: *Sed illi demoniacis fraudibus irretiti, quas prospicere et carere debuerant, divinum nomen et cultum per imprudentiam perdidierunt; cum enim Marcionite, Ariani (adde Lutherani, Calvinistæ), seu quilibet alii nominantur, Christiani esse desierunt, qui Christi nomine amiso, humana et externa vocabula induerunt: sola igitur Catholicæ Ecclesia est,*

quæ verum cultum retinet, hic est fons veritatis, etc. Huic quoque doctrinæ consentit D. Hieronymus, dialogo contra luciferianos, cap. 9, alias col. ultim., ubi hanc tradit regulam : *Sicubi advertis eos, qui dicuntur Christi, non a Domino Jesu Christo, sed a quodam alio nuncupari, utpote Marcionitas, Valentinianos, etc., scito non esse Ecclesiam Christi, sed Antichristi synagogam : ex hoc enim ipso quod postea instituti sunt, eos se esse indicant, quos futuros Apostolus prænunciavit.* Sic etiam Optatus, lib. 3 contra Parmenian., col. 4, hoc argumento maxime exprobrat Donato, dicens : *Cum ante ipsius superbiam omnes, qui in Christo crediderant, Christiani vocarentur, ausus est populum cum Deo dividere, ut qui illum secuti sunt, jam non Christiani vocarentur, sed Donatistæ.* Quod late prosequitur. Denique idem sumitur ex Augustino, dicto libro contra Epistolam Fundamenti, cap. 4, et lib. contra Serm. Arianorum, cap. 36, ubi inquit : *Ita se habet catholicæ veritatis antiquitas, ut ei omnes hæretici diversa nomina imponant, cum ipsi sua singula, sicut ab omnibus appellantur, obtineant.*

18. *Cur unaquæque hæresis ab inventore suo nominetur.* — Causa vero et ratio hujus signi quasi ex natura rei reddi potest, quia omnis hæresis aliquam novitatem contra antiquam fidem comminiscitur; novis autem rebus existentibus necessaria sunt nova nomina, quibus significantur, et ab aliis discernantur. Hac ergo ratione, sicut philosophorum scholæ ab inventoribus, seu primis præceptoribus nomen acceperunt, ita etiam sectæ hæreticorum a suis etiam magistris, quibus discriminentur receperunt nomina. Atque ita Irenæ., lib. 1, cap. 20, in fine, de sectatoribus Simonis dixit : *Habent quoque et vocabulum, seu nomen a principe impiissimæ sententiaz Simone, dicti Simoniani ; et Justinus Martyr, in dial. cum Tryphone, p. 26, generaliter de hæreticis dixit : Ex novis prodeunt, a virorum appellatione, ex quibus unaquæque disciplina et sententia originem habuit.* Et infra : *Ac eorum quidem nonnulli Marciani vocantur, alii Valentiniani, alii alio nomine a sententiae disciplinæque principe unusquisque nominatur, quemadmodum etiam unusquisque eorum, qui sibi philosophandum censem, a parente disciplinæ nomen philosophiæ, cui studet, sibi imponendum censem.* Ita ergo in hæreticis observatum est tanquam moraliter necessarium, et ex rei natura consequens. At vero Catholica Ecclesia antiquitatem semper obser-

vat, nullamque novitatem priori fidei contrariam admittit, ideoque novo nomine non indiget, sed antiquum semper retinet, sicut et religionem a Christo primitus institutam.

19. *Non tantum antiqui hæretici, sed etiam novi a suis hæresiarchis cognominantur.* — Hoc autem ipsum, quod antiqui Patres de hæreticis antiquis docuerunt, in novis etiam observatum esse cernimus : nam insurgente Lutherò, Sectatores ejus ab ipso Lutherani vocati sunt, a Calvinò Calvinistæ, a Zwinglio Zwingiani, et sic de aliis, ut ex communi more loquendi totius orbis christiani, et omnium scriptorum hujus temporis palam evadit. Imo de sectariis Lutheri constat, se ipsos vocasse Lutheranos in confessione Augusta, non longe a principio¹. Cum ergo secta Anglicana in re non alia sit quam Calviniana, non minus idem nomen participat, et eo indicio ostenditur qualis sit, utique non Catholica, sed potius a Catholica deficiens. Quod si fortasse non ita a plerisque vocitetur, quia suum primarium fundamentum Calvinus non probavit, vocari profecto posset Henriciana, quia cum rex Henricus fuerit primus auctor illius erroris, non minus possent sectatores ejus ab eo nomen accipere, quam alii hæretici a suis ducibus reportarunt. Fortasse tamen hoc non est usu receptum, vel quia Henricus, licet illud dogma invexerit, in reliquis voluit catholicam religionem in suo regno servari, ut supra notavimus; vel certe, quia non sua tantum auctoritate, sed celebri actu parlamenti sui institutum est, ut rex in supremum caput suæ ecclesiæ susciperetur². Hoc vero non obstat quin hinc etiam illa secta specialiter Anglicana nuncupetur, quia speciali arbitrio illius regni seu parlamenti definitus est, non solum ille articulus, sed etiam modus religionis ex variis novis erroribus mistus, in illo regno observandus; ergo utecumque res se habeat, semper illa secta novo nomine indiguit, ut cognosci et discerni possit, illudque a suo proximo inventore, vel institutore participat; ergo in illa etiam locum habet dictum indicium, et consequenter ex testimonio omnium Patrum, qui signum illud dederunt, Catholica non est.

¹ Refert Stapleton., l. 4, controv. 4.

² Mauritius Canneus, supra, c. 9.

CAPUT XIII.

OBJECTIONIBUS CONTRA DOCTRINAM SUPERIORIS
CAPITIS OCCURRITUR.

1. Prima objectio. — *Catholici vocabantur Homousiani, et nunc Papistæ, etc.* — **Secunda objectio.** — Contra discursum superiori capite factum duo possunt Protestantes objicere. Unum est, etiam Catholicæ solere appellari novis nominibus, quando controversiæ de doctrina oriuntur, et ita vel nullum esse indicium, vel ex illo etiam inferendum esse, fideles non esse Catholicos. Assumptum patet, quia tempore Arii, dissentientes ab illo et defensores Concilii Nicæni Homousiani vocati sunt. Imo eo tempore fideles, Romani vocabantur, ut sumitur ex Victore Uticensi, lib. 1 de Persecut. Vandalica, circa finem, ubi refert, cum Theodoricus Armogastem fidellem capite truncari jussisset, Jocundum presbyterum consuluisse illi, ut potius diversis afflictionibus interficeret: *Nam si gladio permereris* (inquit), *incipient Romani martyrem prædicare*. Quam vocem exponens Gregor. Turonensis, libro 4 de Gloria Martyrum, cap. 25, dicit: *Romanos enim vocant homines nostræ religionis*. Deinde etiam nunc quos nos vocamus Catholicos, rex in sua Præfatione Pontificios vocat, vulgusque Papistas appellat, et similiter quam nos vocamus Ecclesiam Catholicam, rex appellat Romanam religionem. Altera objectio est, quia sicut nos Catholicorum nomen nobis vendicamus, ita etiam hæretici contendunt suam religionem esse catholicam, et consequenter etiam se ipsos Catholicos appellant. Quod si nobis non nocent alia nomina ab aliis imposita, ita etiam ipsi dicent, ex aliis nominibus ipsis impositis nullam præsumptionem falsæ sectæ contra illos sumi, sed potius per illa indicari reformatam religionem, ut rex etiam loquitur, vel purum, et verum Evangelium, ut Puritani, et Evangelici contendunt.

2. Solutio ad primam. — Ad priorem partem imprimis generatim dico cum Augustino, lib. contra Serm. Arianor., c. 36, ita sese habere catholicæ veritatis antiquitatem, ut *ei omnes hæretici diversa nomina imponant, cum ipsi sua singula, sicut ab omnibus appellantur, obtineant*. Quibus verbis differentiationem indicat, quod quoties talia nomina imponuntur Catholicis, a solis hæreticis impo-
nuntur, et ab aliis non recipiuntur, quia ne-

cessaria non sunt respectu aliorum, sed ipsi hæretici illa inveniunt, vel in injuriam et infamiam Catholicorum, vel ut se ipsos Catholicos venditent. E contrario vero peculiaria nomina sectarum hæreticarum, quasi ex natura rei, ut dixi, cum ipsis nascentur, et ita statim veniunt in usum omnium, etiam ipso-rummet sectariorum, qui eisdem nominibus se ipsis appellant. Atque ita Augustinus, in dicto c. 36, contra sermonem Arianorum, de nomine Homousianorum dicit: *Ariani et Eunomiani, non alii hæretici, nos vocant Homousianos, quia contra eorum errorem, Graeco vocabulo homousion, defendimus Patrem, et Filium, et Spiritum Sanctum*. Nunquam ergo illud fuit Catholicorum nomen, sed inventum fuit ab hæreticis, et non ab omnibus, sed ab illis, quibus nomen homousion erat infestum, quia per illud eorum error detegebatur, et tergiversationes evitabantur. Idemque in hæreticis hujus temporis observari potest; nam quia Christi Vicarium, quem nos Papam, et Summum Pontificem, et Episcopum Romanum appellamus, odio prosequuntur, ideo ad ignominiam eorum, qui illi sedi obediunt, et ad conflandam eidem sedi invidiam, Catholicos vocant Papistas, Pontificios, et Romanistas. Sicut autem Arianî non potuerunt nomen a se inventum introducere in Ecclesiæ, sed illi tantum eo abusi sunt, ita etiam hæc nomina ab hæreticis inventa inter eos tantum circumferuntur, Catholici autem neque eis utuntur, neque de illis solliciti sunt, quia nihil sibi nocere possunt.

3. Nomina, quæ hæretici Catholicis imponunt, doctrinæ novitatem non indicant. — In quo est etiam valde notandum, talia esse hæc nomina, quæ hæretici catholicis imponunt, ut etiam illa divisionem non indicent ab Ecclesia Catholicæ, neque in doctrina novitatem aut singularitatem. Quod etiam de nomine Homousianorum indieavit Augustinus supra, dicens, ipso illo nomine significatos esse ab hæreticis defensores veræ Trinitatis, quia non possent esse verus Pater et Filius, nisi essent ejusdem naturæ. Unde recte concludit: *Ecce qui nos quasi macula novi nominis vocant Homousianos, nec se ipsos, cum ista sentiunt, intuentur insanos*. Atque hoc ipsum contingit novis hæreticis; cum enim nos Papistas vel Pontificios vocant, non aliquid novum nobis tribuunt, sed quod omni tempore Catholicis omnibus commune fuit, et ita ve-
lint, nolint, eisdem nominibus nos Catholicos vocant. Nam et Romanorum, et Romanista-

rum nomina paulo antea ostendimus, jam olim Catholicos significasse. Sicut etiam supra ex Hieronymo, Ambrosio, et aliis ostendimus olim Catholicam Ecclesiam Romanam fuisse vocatam, seu pro eadem reputatam. Quod ergo fides nostra, religio Romana a rege Angliae vocetur, sine offensione audiri posset, si recta mente diceretur, quia religio Romana neque nova est, neque privata, sed eadem est quae Catholica, et utrumque nomen est antiquitatis, non novitatis. Et ita etiam accipi potest quod Chrysostomus, dicta homil. 33 in Acta, pronunciat, *non esse inconveniens, interdum fideles nomen accipere ab his, qui præsunt, et gubernant Ecclesiam*, utique quando per talia nomina non significatur aliud, quam debitus ordo, et institutio antiqua ecclesiastice hierarchiae et monachiae. Secus vero videmus accidere in propriis haereticorum nominibus; omnia enim denotant vel novam doctrinæ inventionem, maxime ea quae a nominibus haeresiarcharum sumuntur, vel divisionem et separationem, ut in generali nomen sectariorum, vel in particulari nomen sectæ anglicanæ, vel aliud simile.

4. *Solutio ad secundam.*— Ad secundam objectionis partem, respondeo non esse novum, ut haeretici penes se esse veritatem catholicam mentiantur; de Arianis enim id jam olim Hilarius, dicto canon. 10 in Matt., animadvertisit, et Augustinus, 15 contra Faust., c. 3, dixit: *Mirabilis est impudentia, cum Manicheorum sacrilega et immunda societas etiam castam sponsam Christi se jactare non dubitat; in quo adversus Ecclesiae veræ Catholicæ casta membra quid proficit?* etc. Et inferius: *Noli (dicit ad Ecclesiam) decipi nomine veritatis, hanc solam tu hales et in lacte tuo, et in pane tuo; in hac autem (id est, Manicheorum congregatione) tantum nomen ejus est (id est, usurpatum nomen veritatis) ipsa non est.* Et de Donatistis idem saepe refert Augustinus, et specialiter Optatus, lib. 1 contra Parmenian., circa finem. Non est ergo mirum, quod hodie etiam Protestantes catholicum nomen usurpent, ne suam doctrinam haereticam esse statim fateri videantur, sicut etiam Satan transfigurat se in Angelum lucis, ut latere possit, et decipere. Tanta vero est vis veritatis, ut etiam ipsi haeretici non nisi timide et cum rubore Catholicorum nomen ausi fuerint sibi arrogare, ut lib. 2 de Schismate Anglicano, in Eduardo VI, Sandrus notavit. Unde fit ut, licet aliqui se ipsos

ita compellent, ab aliis et ab universo orbe non sic nominantur, nec per illud nomen cognoscantur. Quod longe aliter in veris Catholicis observatur; non enim Catholicorum nomen sibi ipsi assumunt, sed ab ipsa fide antiqua, quam profitentur, quasi haereditario jure illud recipiunt, et ita illo nomine ubique appellantur, et per illud ab omnibus cognoscuntur, cuius religionis sint, scilicet, Romanae et Apostolicæ, atque ab ipsis etiam haereticis, cum sine fuso, ingenuo, et commun modo loquuntur, ita appellantur. Quod ergo interdum iidem haeretici aliquo peculiari modo illo nomine abutuntur, nihil obstat quominus illud attributum, absolute et secundum se spectatum, signum certum sit veræ et orthodoxæ fidei.

CAPUT XIV.

EX RATIONE CATHOLICI NOMINIS DISCURSUS CAPITIS PRÆCEDENTIS CONFIRMATUR.

1. *Catholica ex græco idem est ac universalis.*— Duo in hoc catholicò cognomine præcedenti capite distinximus, scilicet, denominationem, seu designationem ab ipso vocabulo sumptam, et rationem nominis, seu proprietatem per illud significatum; cum ergo priorem appellationem ostenderimus, veram fidem et Ecclesiam indicare, id nunc evidentius fiet rationem vocis explicando. Ostendemus ergo proprietates per hanc vocem significatas in schismate Anglicano non reperriri, et ideo catholicam fidem aut Ecclesiam in ejusmodi schismate esse non posse. Ad hoc autem probandum, supponimus vocem *Catholica*, juxta etymologiam ex græco sumptam, idem significare quod universalis, seu communis, ut Patres omnes statim citandi in hac materia supponunt, et est adeo vulgare et receptum, ut in hoc nulla possit esse controversia. Tota ergo constitui potest in explicando, quae universalitas in Ecclesia vel fide ex vi illius nominis requiratur. Potest enim in fide (de illa enim præcipue nunc agimus, quamvis idem fere sit de Ecclesia, propter similitudinem rationis, et propter connexionem, ut supra dixi), potest, inquam, in fide catholicæ multiplex universalitas considerari. Et quamvis, ut in hac ipsa materia advertit Aug., Ep. 48, col. 10, non sit de nomine contendendum, nihilominus dubitari non potest quin illa fides, quæ universalis fuerit secundum omnem rationem consentaneam Scri-

pturis et Patribus, sit proprie et maxime catholica.

2. Fides dicitur primo universalis ratione materiæ. — Primo ergo dici potest fides universalis ex parte materiæ, quia nimur omnium dogmata ad veram Dei fidem pertinentia sine diminutione seu partitione complectitur. Quam etymologiam indicasse videntur Donatistæ, qui, ut Augustinus supra refert, nolent Catholice nomen *ex totius orbis communione interpretari, sed ex observatione præceptorum divinorum, atque sacramentorum omnium.* Quorum sententiam licet quoad priorem partem negativam reprehendat Augustinus, ut paulo post videbimus, de altera derivatione vocis solum dicit, *si forte hinc sit appellata catholica, quod totum teraciter teneat, cuius veritatis nonnullæ particulae etiam in diversis inveniuntur hæresibus, nihil impedire, imo etiam in favorem Ecclesiæ Catholicæ redundare, quia illa sola est quæ integrum veritatem retinet, et omnia divina sacramenta a Christo instituta conservat, et juxta illius spiritum docet ac credit.* Dici etiam potest observare omnia divina mandata, tum in ordine ad fidem, quia inter dogmata fidei etiam illa numerantur, quæ per fidem revelantur; tum etiam in ordine ad obedientiam, charitatem, quia cum vera Ecclesia, sancta dicatur et eredatur in Symbolo Apostolorum, et sine observatione mandatorum non sit vera sanctitas, non potest Catholicæ Ecclesia esse sine omnium mandatorum observatione. Vera enim sanctitas sine charitate esse non potest, 1 ad Cor. 13, ad Galat. 5, et ad Rom. 5, et charitas secum affert observationem mandatorum omnium, Joann. 14 et 15. Igitur sicut sanctitas, ita etiam præceptorum universalis observatio necessaria est ipso corpori Ecclesiæ Catholicæ; licet in singulis personis ejus, ut catholici dicantur et vere sint, non sit necessaria hæc mandatorum omnium observatio, quatenus ad voluntatem spectat; quia sine illa possunt integrum fidem, etiam de ipsis præceptis retinere, quod alibi ostendendum est: nam ad præsens negotium parum conferre videtur.

3. Si ergo ab hac proprietate velimus fidem nominare catholicam, profecto manifestum est, in Anglicana secta fidem catholicam non reperiri, quia non habet integrum veritatem. Hoc vero postea lib. 2 ostendendum est, demonstrando et designando errores in quibus versatur, eosque, quantum hujus operis brevitas permiserit, redarguendo. Nunc

vero generaliter id probare possumus ex discurso in principio hujus libri facto, quia illa secta incepit per defectionem a vera fide; ergo licet aliquam partem doctrinæ fidei admittat, non tamen integrum et inviolatum illum retinet; ergo fides ejus, id est, materia fidei (hanc enim nunc fidem appellamus) non est universalis, ac subinde nec catholicæ, juxta etymologiam dictam. Denique fides Romana etiam in hoc sensu catholicæ est, ut satis probatum relinquitur ex dictis in cap. 4 et 5, in quibus ostendimus non posse Sedem Romanam a vera fide deficere. Sed Anglicana secta in multis rebus ad fidem pertinentibus, et præcipue in puncto de Primatu (quod ad fidem spectare infra lib. 3 ostendam), discordat ab Ecclesia Romana; ergo quoad materiæ universalitatem non est catholicæ.

4. Secundo, dicitur universalis, ex universalis seu communis regula credendi. — Secundo requiritur in vera fide universalitas, seu communitas ex parte rationis credendi, et ex parte regulæ, per quam certo discernatur a falsa; unde etiam ex hoc capite potuit Christiana fides vocari catholicæ. Quanquam enim Patres expresse hanc etymologiam illius vocis non attingant, nihilominus non est improbanda, quia non est contraria aliis proprietibus, vel universalitatibus ab eis in illa voce consideratis, imo in eis virtute continetur, neque enim potest esse fides universalis quoad materiam, personas, loca et tempora, nisi etiam rationem et regulam credendi universalem et communem, seu publicam sortiatur. Unde quidquid sit de etymologia vocis, de re ipsa dubitari non potest quin fides christiana postulet imprimis talem rationem credendi, quæ universalis sit, et eadem in tota materia, quæ credenda proponitur. Quæ ratio, ut Theologi aiunt, est ipsa divina veritas, seu (quod perinde est) verbum Dei, quo ipse præbet testimonium veritatis, juxta illud Pauli, 1 ad Thessal. 2: *Gratias agimus Deo, quia cum accepissetis a nobis verbum auditum Dei, accepistis illud, non ut verbum hominum, sed sicut est vere verbum Dei;* et illud 1 Joan. 5: *Si testimonium hominum accipimus, testimonium Dei majus est.* Hoc ergo testimonium idem esse debet in omnibus credendis, et ideo ratio universalis dicitur respectu christianæ fidei, alias non esset in omnibus æque certa, imo nec certa fides in re qualibet esse poterit, si ab illa universalis ratione in aliqua discrepet. Regula etiam aliqua necessaria est, quæ nobis res credendas

tanquam a Deo revelatas infallibiliter proponat, quam debere esse publicam et generalem, in cap. 6 ostensum est, quia non potest esse fides uniformis, ut sic dicam, seu eadem in omnibus fidelibus, nisi omnes in eadem communis regula credendi conveniant; ergo ut fides possit esse catholica, necesse est ut sit universalis, etiam in regula et ratione credendi.

5. Secta Anglicana caret universalis credendi regula ad reram fidem maxime necessaria. — Constare autem facile potest ex dictis, in secta Anglicana hanc proprietatem fidei non reperiri; ergo etiam ex hoc capite non potest illa secta fides catholica reputari. Assumptum patet primo, quia illa secta veritates aliquas a Deo revelatas admittit et suo modo credit, alias vero negat, ut infra ex ipsa regis confessione ostendemus. Nam licet ipse non concedat, illa, quae negat, esse a Deo revelata, tamen eo ipso ostendit non divinum testimonium, sed suum arbitrium et conjecturam habere pro ultima, et primaria ratione credendi; nam si divino testimonio in credendo vere niteretur, aequaliter crederet omnia quae eodem divino testimonio confirmata sunt. Hic autem defectus in ratione credendi provenit ex defectu regulæ universalis, quae cum certitudine et infallibilitate proponat quid sit vel non sit a Deo revelatum. Nam in illa secta nulla est hujusmodi regula universalis et publica, sed unusquisque sibi est regula, ut supra vidimus; ergo talis fides non potest esse catholica, seu (ut rem clarius explicem) talis modus credendi non potest esse catholicus, id est, aptus ad catholicam fidem. Imo, quod sic credentes in aliqua materia fidei plures convenient, non provenit ex ratione, aut regula credendi, sed vel ex aliqua humana consuetudine, vel ex timore humano, vel alia simili ratione. Unde etiam fit ut, ad conveniendum aliquo modo in ea secta, necessarium sit majorem partem hominum adhærentium illi relinquere regulam credendi propriam illius sectæ, quae est proprium uniuscujusque judicium, prout sibi certum videtur, et sequi aliorum judicium, sive regis, sive parlamenti, sive ministrorum. Quomodo enim aliter vulgus credere posset? ergo talis fides ex vi regulæ et rationis credendi non solum catholica non est, verum etiam neque ullo modo universalis, id est, una communis multis, et ut fiat aliquo modo communis, fit alia fides pure humana, id est, in privato iudicio alicujus hominis, vel par-

ticularis communis humanæ fundata; ergo vel hac ratione longissime distat a fidei catholice proprietate.

6. Tertio fides universalis est quoad gradus personarum. Ad Ephes. 4, et 1 ad Cor. 12. — Tertio dici potest fides, seu Ecclesia Catholica, quia universalis est quoad omnes gradus et ordines personarum, quod his verbis nos docuit Cyrill. Hierosoly., catechesi 18: *Ecclesia antea sterilis erat, nunc autem multorum est liberorum parens. Illa enim priore extincta, in hac altera Ecclesia Catholica, ut Paulus dicit, Deus posuit quidem primum Apostolos, deinde Prophetas, tertio Doctores, postea Virtutes, tum gratias curationum, opitulationes, gubernationes, et omne genus totius virtutis, sapientiam dico et intellectum, temperantiam et humanitatem, et in persecutionibus patientiam irreprehensibilem, quæ per arma justitiae prospera et adversa, per gloriam et ignominiam, primum quidem in persecutionibus et tribulationibus, Martyres, et Sanctos diversis coronis patientiæ, et multum florentibus coronavit, quibus ipsa Ecclesia ornata est, nunc vero temporibus pacis, gratia Christi, debitum habet honorem a regibus et illustribus, et omni genere hominum.* In quibus verbis variis modos indicat, propter quos dici potest Ecclesia, Catholica, quia omnia genera et gradus personarum complectitur. Unus et notior ac facilior est, quia omnibus hominibus cuiuscumque nationis, provinciæ, linguae, qualitatis, vel conditionis utilis est, imo et ad salutem necessaria, et ideo omnes ad se vocati sive Judæos, sive gentiles, etc., juxta illud Pauli ad Colossem. 3: *Ubi non est gentilis et Judæus, circumcisio et præputium, Barbarus et Scylha, serrus et liber, sed omnia, et in omnibus, Christus.* Significavit etiam hunc modum Augustinus in illa verba Psalm. 65: *Jubilate Deo omnis terra, dicens: Non ergo sola Judæa. Videte, fratres, quomodo commendetur universitas Ecclesiæ toto orbe diffusa, et non solum dolete Judæos, qui hanc gratiam gentibus invidebant, sed plus hereticos plangite; si enim dolendi sunt, qui collecti non sunt, quanto amplius qui collecti divisi sunt?* Verumtamen hoc modo explicata haec universalitas (ut ex his verbis Augustini liquet) parum differt ab universalitate loci, et statim cum illa magis explanabitur.

7. Ecclesia universalis est quoad gradus et munera. — Alter modus indicatus a Cyrillo est, quia Ecclesia Catholica debet constare ex omnibus membris et gradibus, gratiis, et donis,

quibus illam depingit Apostolus Paulus. Unde Augustinus ait, lib. 1 de Doctrin. Christian., cap. 16: *Catholica Ecclesia corpus Christi, sicut Apostolica doctrina commendat, quæ etiam conjux ejus dicitur. Corpus ergo suum multis membris diversa officia gerentibus, nodo unitatis, et charitatis, tanquam sanitatis adstringit.* Cum igitur Ecclesia sit Christi sponsa, quam ipse sibi exhibuit gloriosam, non habentem maculam aut rugam, aut aliquid hujusmodi, sed ut sit sancta et immaculata, id est, omni genere virtutum et gratiarum abundans, ad ejus pulchritudinem pertinet, ut sit integra et constans ex omni varietate membrorum, et omnibus gratiis, ministeriis, operationibus et virtutibus, quibus eam Christus constare voluit. De quibus sic scribit Optatus, lib. 2 contra Parmenian., non longe a principio: *Certa membra sua habet Ecclesia, Episcopos, presbyteros, diaconos, ministros, et turbam fidelium.* De horum autem membrorum varietate, et de muneribus singulorum, et quomodo sint semper necessaria Ecclesiæ, non est hic dicendi locus, postulat enim integrum opus de Ecclesiastica hierarchia. Satis ergo nobis sit, in corpore mystico Christi, ex sententia Pauli, requiri dictam membrorum varietatem, quæ usque ad consummationem Sanctorum in eo est, duratura. Ac proinde juxta sententiam Cyrilli, recte potuisse Ecclesiæ ab hac membrorum universitate, et varietate donorum, catholican appellari. Et (ut jam dixi) quidquid de impositione nominis sit, de re ipsa negari non potest quin hæc integritas et varietas ad splendorem et majestatem Ecclesiæ Catholicae spectet, et ad ejus conservationem et perfectionem non solum utilis, sed etiam necessaria sit, ideoque non posse Catholicam Ecclesiam reputari, quæ hac excellentia et integritate fuerit destituta.

8. Prædictas Ecclesiæ conditiones Anglicana sectæ deficere ostenditur. — Non est autem difficile ostendere, hanc perfectionem Ecclesiæ in schismate Anglicano non inveniri. Primo quidem, et præcipue, quia non habet Pastorem et Episcopum cui adhæreat, quod secundum Christi institutionem maxime ad veritatem Ecclesiæ necessarium est, ut ex Matth. 16, et Joann. 21, non obscure colligitur. Ideoque Cyprian., epist. 69, sic Ecclesiæ definit: *Ecclesia est plebs sacerdoti adunata, et pastori suo grex adhærens.* At Anglicana congregatio non sacerdoti, sed regi adunatur; nec pastori suo adhæret, non est enim pastor gregis Christi, nisi quem ipse

constituerit, non constituit autem regem, sed Petrum et successores ejus: *Unde (addit Cyprianus) scire debes, Episcopum in Ecclesia esse, et Ecclesiam in Episcopo, et si quis cum Episcopo non sit, in Ecclesia non esse, et frustra blandiri eos, qui partem cum sacerdotibus Dei non habentes, obrepunt, et latenter apud quosdam communicare se credunt, quando Ecclesia, quæ catholica una est, scissa non sit, neque divisa, sed sit utique connexa, et cohærentium sibi invicem sacerdotum glutino copulata.* Quibus verbis omnia conventicula haereticorum graphice depingit, et præcipue Anglicanum, quod (præsertim universe sumpturn) in Episcopo non est, nec Episcopus in ipso, nec sacerdotes habet, quorum glutino copuletur, nisi forte dicant, ministros esse sacerdotes, aut regem esse Episcopum, quod satis esset ridiculum. Neque ab ipsis dicitur, quia sacerdotes in Ecclesia esse non credunt, sicut et sacrificium esse negant, neque etiam de illis ministris vere cogitari potest, cum legitime ordinati non sint.

9. Occurrunt evasioni. — Quod si fortasse ministri contendant Angliam non carere suis Episcopis, quibus singulæ plebes adhærent, respondemus imprimis cum eodem Cypriano, epist. 76, illos non esse veros Episcopos, sed nomine tantum. Quia *Episcopus computari non potest, qui evangelica et apostolica traditione contempta, nemini succedens, a scipso ortus est;* neque etiam qui secundum legitimum Ecclesiæ ritum ordinatus non est. Deinde respondeo, Cyprianum non solum de singulis particularibus Ecclesiis, sed etiam de universalis Ecclesia Catholica esse locutum; docet enim ita esse unam, ut uni etiam communis Episcopo debeat esse conjuncta; sic enim ep. 76 dixit, Ecclesiam esse unam, *que apud Cornelium fuit, qui Fabiano legitima ordinatione successit.* Et ep. 55, ad eundem Cornelium: *Non aliunde (ait) haereses obortæ sunt, aut nata schismata, quam inde, quod sacerdoti Dei non obtemperatur, nec unus in Ecclesia ad tempus sacerdos, et ad tempus judex vice Christi cogitatur, cui si secundum magisteria divina obtemperaret fraternalis universa, nemo adversum sacerdotum collegium quidquam moveret.* Ubi aperte loquitur de uno Episcopo supremo, et illum quasi per antonomasiam vocat sacerdotem Dei, et judicem vice Christi, et sacerdotem unum, cui tota fraternalitas obedit. Et in lib. de Unit. Eccles., idem late docet, et in suis epistolis ita unitatem Ecclesiæ Catholicae saepè sapius exponit. Homi-

num ergo congregatio. quæ non uni Episcopo, sed uni regi temporali adhaeret, neque veros Episcopos habet, nec veros sacerdotes, nullam Catholicæ Ecclesiae speciem, nedium veritatem, præ se fert.

10. *Non ecclesiasticam, sed politicam hierarchiam Anglia retinet.* — Neque Jacobo regi quidquam confert, quod sæpe in sua Præfatione repetit, se hierarchiam ecclesiasticam ubique in suo regno restituisse, et contra Puritanos defendisse; non enim veram ecclesiasticam hierarchiam, quam Christus instituit, sed humanam, et politicam, quam ipse, apparenti quadam conjectura ductus, imitari voluit, retinuit, ac defendit. Hoc enim est, quod ingenue ipse fatetur pag. 54, dicens: *Et quo studio in Episcoporum et ecclesiastica hierarchia (politicu duntaxat ordinis causa) defensionem semper incubui, eodem in confusam illam anarchiam, et parilitatem Puritanorum inrectus sum.* Et iterum pag. 56 repetit, se aliquod discrimen inter Episcopos et Patriarcharum institutionem admittere; addit tamen, *ordinis et discriminis causa*; et paulo post, pag. 55, tertio idem inculcat, addendo: *Sic enim intelligi volo.* Longe ergo diversa est illa hierarchiæ umbra a veritate a Christo instituta, et a Patribus tradita.

11. Christus enim non posuit in Ecclesia Episcopos solum propter politicum ordinem, sed *ut regerent Ecclesiam suam, quam acquisivit sanguine suo,* Actor. 20, et ut curam illius gererent, non tantum externam et politicam, sed maxime spiritualem, et salutem animarum procurantem, juxta illud Hebr. 13: *Obedite præpositis vestris, et subjacete illis, ipsi enim perrigilant, quasi rationem pro animalibus vestris reddituri.* Propter quod Cyprianus, epist. 55, potestatem Episcoporum ad Ecclesiam gubernandam, *sublimem et divinam* vocat. Et merito quidem, quia et a Christo Deo et homine data est, et cum admirabili potestate remittendi et retinendi peccata, et solvendi ac ligandi in terra quæ in cœlis rata habentur. Non est enim Ecclesia Christi corpus mere politicum, sed mysticum, et quodammodo divinum, et ideo non solum propter politicum ordinem, sed propter spiritualem finem hierarchiam requirit, *ad consummationem Sanctorum, in opus ministerii in ædificationem corporis Christi*, ut Paulus dixit. Et ideo diversitas horum membrorum et graduum non in externis dotibus, aut temporalibus bonis consistit, sed in diversis donationibus, *secundum gratias, quæ datae sunt nobis dif-*

rentes, ut prosequitur Paulus, ad Rom. 2, et 1 ad Cor. 12. Quibus donis et gratiis abundavit semper Ecclesia Catholica, et usque ad hodiernum diem eamdem excellentiam, et donorum in Ecclesia Romana varietatem conspicamus. Quam vero ab hac perfectione et splendore gratiæ absint Protestantium conventicula, deplorandum potius est quam describendum, et toti terrarum orbi notius, quam ut nostra probatione indigeat, præsertim quia ex ipsam regis confessione sufficiens hujus rei probatio sumitur. Nam ex his, quæ in Præfatione ejus notavimus, duo colliguntur. Unum est, in iis quæ ad fidem spectant, solum privatum spiritum esse regulam. Unde fit consequens, cum interior conscientia ex fide pendeat, nullam aliam regulam, tam pro doctrina quam pro conscientia, esse in Ecclesia necessariam praeter uniuscujusque privatum spiritum. Aliud est, ministrorum differentiam, si qua est in ecclesia quam ipse molitur, solum ad externam politiam et ordinem constitutam esse; ad quem finem prudentiam quamdam humanam sufficere nemo est qui ambigat; ergo omnis ratio diversorum donorum et gratiarum divini spiritus ibi cessat. Neque id mirum, cum fides etiam, quæ est omnium gratiarum fundamentum, ibi deficiat, quod necesse est evenire iis, *qui Dei traditione contempta, alienas doctrinas appetunt, et magisteria humanae institutionis inducunt,* ut alias testatum reliquit Cyprianus. (Lib. de Unitat. Eccl.)

CAPUT XV.

CATHOLICAM DICI ECCLESIAM QUA PER TOTUM ORBEM DIFFUSA EST OSTENDITUR, ET HÆRETICIS OCCURRITUR.

1. Præcipua magisque recepta vocis *catholicæ* etymologia est, quæ ab universitate locorum sumitur, qua frequenter Patres contra hæreticos utuntur, præsertim Augustinus, multis in locis contra Donatistas disputans, et ex professo toto lib. de Unit. Ecclesiæ. Ubi per totam fere Scripturam discurrevit, veram Christi Ecclesiam esse illam, quæ est per totum mundum diffusa, evincens; indeque dictam esse catholicam supponens; et lib. 2 contra Epistol. Gaudentii, cap. 2, quoniam ille ausus fuerat affirmare, et testimonio Cypriani confirmare¹, partem Donati esse Ecclesiam

¹ Cyprian. de Unit. Eccles.

Catholicam, contra illum inquit : *Attende, quam Ecclesiam dixerit ille catholicam. Ecclesia, inquit, Domini luce perfusa per totum orbem radios suos porrigit, ramos suos in universam terram copia ubertatis extendit. Unum tamen caput est, et origo una, et una mater, secunditatis successibus copiosa. Quid igitur, et vos ipsos fallitis, et alios fallere mendaciis impudentibus vultis? si hujus martyris testimonio vestra est ecclesia catholicica, ostendite, illam per orbem totum radios suos porrigeret, ostendite, illam per universam terram ramos suos copia ubertatis extendere: hinc enim, et greco vocabulo catholicum nominatur. Idem late prosequitur ep. 48 et 170, et lib 2 contra Litteras Petiliani.*

2. Eamdem etymologiam tradit Optatus Milevitanus, lib. 1 contra Parmen., ubi in fine refert, duos esse Episcopos ad Africam missos, ut apud Carthaginem pronuntiarent, ubi esset Catholicæ : *Et novissima (inquit) sententia eorum Episcoporum Eunomii et Olympii talis legitur, ut dicerent illam esse Catholicam, quæ esset in toto orbe terrarum diffusa, et sententiam decem et norem Episcoporum jam dudum datam, dissolvi non posse; et lib. 2, in princip., contra Donatistas arguens, ait : Ubi ergo erit proprietas catholicæ nominis, quod sit rationabilis, et ubique diffusa? De hac etiam veritate est integrum caput tertium apud Vicentium Lyrinensem : In ipsa Catholicæ Ecclesia magnopere curandum est, ut ita teneamus, quod ab omnibus creditum est, hoc est enim vere proprieque catholicum (quod ipsa vis nominis ratioque declarat, que omnia vere universaliter comprehendit), sed hoc ita demum fit, si sequamur universitatem, antiquitatem, consensionem. Ex quibus, antiquitas pertinet ad temporis perpetuitatem, de qua in capite sequenti dicturi sumus; consensio vero pertinere potest ad alias rationes et etymologias ex Augustino et Cyrillo depromptas, quanquam hæc duo, prout a Lyrinensi declarantur, ad antiquitatem et consensionem traditionum ab ipso referri videantur. Universitas ergo est, quæ ad præsens spectat, quam ipse sic exponit : Sequemur autem universitatem hoc modo, si hanc unam fidem veram esse fateamur, quam tota per orbem terrarum constitetur Ecclesia. Denique Cyrus Hierosolymit., eamdem enucleans vocem, dicta catechesi 48, ita concludit : *Regum quidem potestas certis locis et gentibus terminos habet, Ecclesia autem Catholicæ per universum orbem infinita est potentia. Et eleganter Felix Papa I,**

epist. 1, in principio, Ecclesiam quatuor mundi constructam esse lateribus adstruxit.

3. Atque hoc modo loquuntur reliqui antiqui Patres de Ecclesiæ Catholicæ amplitudine, quamvis vocem *catholicæ* non semper explicent, ut Hieron., Isai. 54, circa illud : *Semen tuum gentes hereditabunt, ait illud esse semen, quod Christus exit seminare, Matth. 3 : Quod semen etiam civitates desertas faciet inhabitare, ut Ecclesiæ gentium in toto orbe consurgant.* Et infra : *Hoc de Ecclesiæ magnitudine, quæ pro uno Judææ loco, et ipso angustissimo, in toto orbe terrarum suos terminos dilatabunt.* Idem, c. 60 : *Miratur (inquit) Ecclesia de circumcisio[n]is primum populo congregata volare ad se gentium turbam toto orbe terrarum.* Et Psalm. 66, in principio, dicit columbam (de qua Canticor. 6) esse Ecclesiam in toto mundo diffusam. Idem Matth. 26, circa illa verba : *P[re]dicabitur Evangelium hoc in toto mundo.* Similiter Ambros., Psal. 39, tractans verba illa : *Annuntiari justitiam tuam in Ecclesia magna : Quid est (inquit) quod addidit, magna, nisi quia fuit ante non magna? Quæ est magna nisi de totius terrarum orbis partibus congregata, quando ab Oriente, Occidente, Septentrione et Meridie populi gentium sunt vocati.* Et ibidem de eadem Ecclesia intelligit illud Psalm. 34 : *Confitebor tibi in Ecclesia magna, in populo gravi laudabo te ; et adjungit : Ibi ergo Ecclesia magna ubi populus gravis, hoc est, non inquietus et mobilis, qui sedit manducare et bibere, et surrexit ludere. Gravis populus est, qui fidem Deo suo servat, et qui non aliqua levitate mutetur, neque nutet et fluctuet ; ibique fusa alias Ecclesiæ proprietates prosequitur.* Eodem modo exponit eamdem Ecclesiam magnam Chrysost., dicto Psal. 39 : *Beatus (inquit) David pollicetur se magnæ Ecclesiæ universo orbe terrarum a divina gratia collectæ Dei justitiam p[re]dicaturum, et prophetæ veritatem, et maxime expetendam salutem, et immensam misericordiam.* Atque in Psalm. 106, per illa verba : *Dicant qui redempti sunt a Domino, dicit gentilium vocationem declarari, qui ex omni terrarum plaga per Salvatorem colliguntur, et e diaboli fauibus ad sanctam ipsius Ecclesiam rapiuntur.* Et ita etiam exponit illud, quod in eodem Psalmo sequitur : *Et de regionibus congregavit eos, a solis ortu et occasu, ab aquilone et mari, et ait : Hoc in Iudeis quidem ad hunc modum factum non accepimus (etenim toto orbe fusi versantur), at vero ipse gentilem ecclesiam in omnibus*

orbis partibus, tam orientalibus quam occiduis, tam australibus quam septentrionalibus vocavit, et congregavit. Atque hujusmodi concilia in omnibus terræ, et maris partibus cernere licet.

4. Denique Tertullianus, lib. contra Juðeos, cap. 7, adducens prophetias et promissiones de regno Christi, et specialiter illam Isaiae 36 : *Hæc dicit Dominus Christo meo Cyro, cuius apprehendi dexteram*, addit : *Quod ipsum adimpleum videmus. Cui enim dexteram tenet Pater Deus, nisi Christo Filio suo, quem exaudierunt omnes gentes, id est, cui crediderunt omnes gentes? cuius et Prædicatores Apostoli in Psalmis David ostenduntur: In universam (inguit) terram exitit sonus eorum, et usque ad terminos terræ verba eorum; in quem enim alium universæ gentes crediderunt, nisi in Christum, qui jam venit? Cui enim et aliae gentes crediderunt, Parthi, Medi, etc.; et prosequitur numerando innumeratas Ecclesiæ provincias, in quibus Christus regnat, demumque subnectit: Quis enim omnibus regnare potuisset, nisi Christus Dei Filius, qui omnibus in æternum gentibus regnaturus nuntiabatur? Et postea recensens quamplurima mundi regna, quorum singula in aliqua orbis parte intra certos fines semper fuere contenta, denique concludit: Christi autem regnum et nomen ubique porrigitur, ubique creditur, ab omnibus gentibus super enumeratis colitur, etc. Ubi, licet Tertullianus sub nomine Ecclesiæ Catholicæ non loquatur, non tamen ignorabat illam esse regnum Christi; quod ergo de regno Christi dicit, de Ecclesia Catholicæ intelligit. Et ita interpretantur Patres, præsertim Augustinus, omnes similes prophetias de Christi regno, vel hæreditate, ut est illa Psalm. 2 : *Postula a me, et dabo tibi gentes hæreditatem tuam, et possessionem tuam, terminos terræ, et similes.**

5. *Anglicanam sectam veram non habere fidem concluditur.* — Constat igitur ex Scripturis sanctis, ita ab antiquis Patribus intellectis, proprietatem Ecclesiæ Christi esse, ut per universum orbem sit diffusa, et ex eorumdem Patrum confessione patet, hanc ejus proprietatem nomine *catholicæ* significatam esse. Ex quo principio recte concluditur, sectam illam, quæ non solum intra terminos unius regni continetur, et per totum orbem non diffunditur, verum etiam Ecclesiam per totum orbem diffusam damnat, et ab ea separatur, catholicam esse non posse. At secta Anglicana terminos Britanniarum (quæ, ut dixit Tertullianus supra, *intra Oceani ambi-*

tum conclusæ sunt) nòn egreditur, et Ecclesiam Romanam, a qua se ipsam segregavit, damnat, ut ex facto in superioribus narrato omnibus notum est; ergo nec potest esse Ecclesia Catholicæ, nec fidem catholicam retinere. Quo argumento Patres semper hæreticos impugnarunt, et Africani Episcopi, præcipue Augustinus, Donatistas exagitarunt et superarunt; non est autem minus efficax contra omnes Protestantes, cum causa sit si millima, et supra ostensem sit Ecclesiam Romanam et Catholicam eamdem nunc esse, quæ prædictorum Patrum tempore floruerit.

6. *Erasio.* — *Resellitur. — Amplitudo loci per se non constituit Ecclesiam Catholicam.* — Huic autem rationi videtur tacite voluisse occurrere Jacobus rex, cum in fine suæ Præfationis, pag. 456, dixit : *Nos Dei beneficio, nec numero, nec dignitate ita sumus contemnendi, quin bono vicinis nostris exemplo præire possimus; quandoquidem christiani orbis, omniumque in eo ordinum inde a regibus, liberisque principibus usque ad infimæ conditionis homines pars prope media in nostram religionem jam consensit.* Verumtamen quanquam hoc, prout a rege asseritur, verum esset, non satis esset ut talis secta in tota illa multitudine hominum existens, catholicæ dici posset, cum tota illa multitudo a vera et catholicæ Ecclesia defecisset, ut paulo post adhibitis exemplis explicabo. Ratio autem est, quia licet amplitudo et multitudo populorum sit quædam ex Ecclesiæ Catholicæ proprietatibus, non tamen sufficit ad catholicam constitutandam; nullus enim ex Patribus hoc dixit, et quidam ex illis aperte senserunt, catholicam non ex sola universitate locorum constitui, sed ex aliis etiam proprietatibus, quas cum illa conjungunt. Nam Vincentius Liricensis catholicum esse dixit, *si sequatur universitatem, antiquitatem, consensionem.* Optatus pronunciavit, proprietatem nominis catholicæ esse, quod sit *rationabilis et ubique diffusa*. Cyprianus, cui consensit Augustinus, præter multitudinem requirit, *unum caput, et unam originem, et unam matrem divino lumine perfusam*, cuius luminis radii per totum orhem extendantur; Cyrillus item multa alia sub nomine catholicæ comprehendit, ut vidi mus. Addo Bedam, in cap. 6 Cantic., dicentem, Catholicam vocari Ecclesiam, *quia per omnes mundi partes, in una pace, in uno Domini timore ædificatur.*

7. *Responsio regis alio modo rejicitur.* — Nunc vero aliud responsum regi damus, quo-

niam aliud est convenire in religione , aliud convenire in communi ratione schismatis , et discessionis ab Ecclesia Catholica , ut per se notum est ; nam ab una via plures deflectunt , qui secundum quamdam rationem , mente potius conceptam , quam in re subsistentem , in deflexu , seu in aberrando a via conveniunt , non tamen in una via , neque in uno termino , ad quem tendant , consentiunt . Ita ergo oportet in præsenti distinguere . Et fortasse verum est (quod non affirmo) , consideratis sectis omnibus schismaticorum et hæreticorum , qui ab Ecclesia Romana defecerunt , et nunc sunt per totum orbem , tam ad Orientem quam ad Occidentem dispersæ , ex illis omnibus confici multitudinem , quæ sit pars prope media totius christiani orbis . Illa vero multitudo nec unum corpus politicum est , ut per se constat , nec mysticum aut ecclesiasticum , quia neque in eadem fide , neque in uno ecclesiastico regimine , neque in eadem regula credendi conveniunt ; ergo nec tota illa multitudo populorum aut sectarum potest dici Ecclesia Catholica , cum una Ecclesia non sit , neque aliqua secta particularis illarum dici potest catholica , cum nec pars sit alicujus Ecclesiae Catholicae , neque per se sola ad constituendam Ecclesiam Catholicam sufficiat , ut principalis ratio facta probat .

8. Oportet ergo ut rex loquatur de consensione in unam religionem , id est , in unam viam salutis , et in unam fidem ; in hoc autem sensu , non solum non credimus sectam Anglicanam occupasse dimidiam partem orbis christiani , verum etiam nec fortasse tertiam partem regni Britannici . Priorem partem ex ejusdem regis verbis probabimus . Loquens enim ad principes et populos schismaticos , haec interset verba : *Quanquam inter vos nec dum bene de apicibus nescio quibus converterit* . Sentit ergo nondum illos in doctrina convenisse , et ideo paulo post eos ad unitatem et concordiam exhortatur . Et quamvis illam obvelans discordiam , in quibusdam *apicibus* esse dicat , vel in rebus *adiaphoros* , ut paulo post , et saepè alias loquitur , re tamen vera dissensio est in rebus gravissimis , et ad substantiam fidei , salutemque fidelium maxime spectantibus , ut in sacramentorum doctrina , et præsertim veritate et reali præsentia Christi Domini in sacrosancta Eucharistia , et in modo justificationis hominis per fidem , in necessitate operum , et obedientia mandatorum , et aliis multis , quæ postea sua unaquaque trutina sunt libranda ; in quibus

nec Calvinistæ cum Lutheranis , nec cum istis Zwingiani , et alii similes conveniunt .

9. Accedit , obedientiam Ecclesiæ præstans addeo esse ad salutem necessariam , ut Christus dixerit : *Qui Ecclesiam non audierit , sit tibi tanquam ethnicus et publicanus* ; et nihilominus isti sectarii , in explicando Ecclesiæ regimine , a quo hæc obedientia pendet , non minus inter se quam a nobis dissident ; non est ergo dissensio in rebus adiaphoros , sed in maxime necessariis ; neque in apicibus tantum , qui in subtilibus punctis , speculationi præcipue deservientibus , a jure consultis constitui solent , sed in rebus quæ præmanibus habentur , et ad recte vivendum necessariæ sunt , versatur . Et quod ad præsentem causam maxime attinet , etiam in articulo de regio primatu tanta est dissensio , ut sola Anglicana secta illum approbare et tueri videatur . Ex quo capite solo et per se spectato , sufficiens ratio sumitur , ut Anglicana congregatio non possit Catholica Ecclesia existimari . Quia opinio illa de primatu limitat et coaretat sectam illam ad terminos illius regni temporalis , et quantum inde est , in tot partes Ecclesiam Christi dividit , quot sunt in mundo temporalia regna ; nec veram unitatem unius ovilis , quam Christus in Ecclesia sua esse voluit , illi relinquit , sed ad sunnum quamdam concordiam vel similitudinem , ut sic dicam , quam rex Jacobus exoptat . Verum neque illam (ut supra dixi) unquam obtinere poterit , quia cum omnes in proprio judicio sequendo convenient , necesse est ut in opinandi et gubernandi ratione dissideant .

10. Atque hinc facile rationem alterius partis reddimus , in qua conjectamus , Anglicanam sectam , neque tertiam partem Britanniae insulæ occupasse . Nam ut omittam in omnibus partibus illius insulæ plurimos esse fideles , qui fidem suo judicio non subjiciunt , sed intellectum suum captivant in obsequium Christi , et ab Ecclesia Romana animo saltem et mente separati non sunt ; etiam inter eos , qui ab illa defecerunt , in religione et fide non est consensio . Nam , ut ipsem rex in Præfatione supponit , multi sunt in sua ditione Puritani , quos ipse persecutur , et ita ad minimum totum regnum in tres partes divisum est , nimirum , in Catholicos , Puritanos , et Calvinistas non puros ; et si fame fides adhibenda est , multi etiam inter ipsos sunt Lutherani , alii Zwingiani , vel aliarum sectarum . Imo etiam inter ipsos Calvinistas mistos non cre-

ditur esse consensio in fide, quidquid sit de externa specie religionis. Ergo loquendo in sensu, qui ad præsentem causam faciat, nullo modo subsistere potest quod rex ait, fere diuidiam orbis christiani partem in suam consensisse religionem.

11. Quapropter, Lutherus, Calvinus, et alii hæresiarchæ hujus temporis, libere, ne dicam impudenter, respondent, sæpe id, quod bonum est, paucioribus approbari, ideoque non esse notam veræ Ecclesiae aut fidei, quod sit in multitudine gentium, et consensione populorum approbata; sic enim fertur scriptissime Lutherum¹, diabolum juxta Dei Ecclesiam sacellum longe majus et amplius condidisse, et Calvinus sic excusabat paucitatem suæ congregationis, quia vix unquam ita bene se habuerunt res humanæ, ut pluribus placerent meliora. Et similia habent Magdeburgenses, centuria 1. Verumtamen (quod in omnibus controversiis hujus temporis maxime considerandum est) isti novi hæretici, in omnibus suis dictis et responsis, antiquos hæreticos imitantur, quod est magnum sui erroris signum, unde non aliter illis obvianendum existimo, quam verbis Patrum, qui antiquos hæreticos confutarunt. Augustinus, libro de Unit. Eccles., c. 2, sic habet: *Internos et hæreticos quæstio est, ubi sit Ecclesia; quid ergo facturi sumus? In verbis nostris eam quæsaturi, an in verbis capituli sui Domini nostri Jesu Christi? Puto, quod in illius verbis eam querere debemus, qui veritas est, et optime novit corpus suum;* et cap. 3: *Non audiamus: Hæc dico, hæc dicis: sed audiamus: Hæc dicit Dominus; sunt certe libri dominici, ibi queramus Ecclesiam, ibi discutiamus causam nostram.* Quasi dicat, in divina Scriptura Christi Ecclesiam per totum orbem diffusam prædicari, et ideo blasphemias hæreticorum contemendas esse, qui dæmonis Ecclesiam illam audent appellare. Et c. 9, refert Donatistas convictos, dixisse Ecclesiam Christi in principio in toto orbe fuisse, postea vero periisse, propter liberas et pravas hominum voluntates. Quibus Augustinus respondet: *Quasi vero nescierit spiritus Dei futuras hominum voluntates, quis hoc insanissimus dixerit? cur ergo non hoc potius prænunciavit futurum, quod de voluntatibus hominum sciebat futurum, etc.* Et cap. 13, sic scribit: *Inquiunt: Ista credimus, et completa esse confi-*

temur; sed postea orbis terrarum apostatavit, et sola remansit Donati communio (vel, mutato nomine, Anglicana vel Calviniana secta). Hoc nobis legant (ait Augustinus), et nihil resistimus. Si autem non ea de Scripturis sanctis legunt, sed suis contentionibus persuadere conantur, credo illa quæ in Scripturis leguntur; non credo ista quæ ab hæreticis vanis dicuntur. Et c. 15, similibus verbis refellit hæreticorum calliditatem, volentium convertere verba Dei a veritate, in qua ipsa sunt, ad perversitatem, in qua ipsi sunt. Et deinde respondet ad quasdam scripturas, quas hæretici ad sua conventicula accommodabant. Ac tandem, c. 19, concludit: *Omissis ergo illis morarum tendiculis, ostendat Ecclesiam, vel in sola Africa, perditis tot gentibus, retinendam, vel ex Africa in omnibus gentibus reparandam, atque adimplendam, et sic ostendat, ut non dicat: Verum est, quia hoc ego dico, vel quia hoc dixit ille collega meus, vel illi,* etc.

12. Idem ergo nos Luthero respondemus, cum dicit, in suis sectariis esse Ecclesiam, ut nobis illam ostendat; nam illi non creditur, neque ullo modo credibile est, Deum ædificasse Ecclesiam contra Ecclesiam a se conditam, et cui perpetuam protectionem promisit, præsertim cum nullum indicium divini spiritus, sed humanæ ambitionis, et libertatis in auctore illius synagogæ apparuerit. A Calvino etiam probationem eorum, quæ vane dicit, postulamus, et præterea addimus satis superbiam suam ostendere, cum judicium suum multitudini et auctoritati tot Patrum, antiquitate, sapientia et sanctitate illustrium, temere audet præferre. Unde tandem dicimus, licet comparatione vulgi interdum meliora a paucioribus approbentur, nihilominus ea, quæ a pluribus sapientibus ut meliora probantur, ab omni viro prudente talia esse censenda, et contraria reprobanda. Quod longe certius est, quando talis approbatio non humana tantum, sed divina stabilitur auctoritate. Hoc autem modo approbata est in Scriptura sancta, et a sanctis Patribus Ecclesia Catholica per totum orbem diffusa, a qua longissime distant hæreticorum conventicula, ideoque nec catholica esse nec nominari possunt.

¹ Lib. de Notis Eccles., in Præfatione Institution.

CAPUT XVI.

QUOMODO VERUM SIT ECCLESIAM CATHOLICAM ESSE
PER TOTUM ORBEM DIFFUSAM.

1. Ratio dubitandi. — Ut vel ipsis etiam Catholicis satisfaciamus, non est omittenda hic alia objectio, quam attigit Augustinus, epist. 48, quia orbis christianus catholicus, seu Romanus, modica pars est totius mundi; quomodo ergo potest haec Ecclesia ex eo catholicā nominari, quod mundum occupet universum? Assumptum facillime demonstrari potest: nam paulo superius concedendum duximus, multitudinem schismaticorum et hæreticorum fere dimidiam partem christiani orbis occupare; ultra hos vero sunt in mundo Mahometani, qui soli fortasse tot plagas mundi possident, quot illi qui sub nomine Christi fidem profitentur, sive falsam, sive veram. Deinde Gentiles etiam et idololatræ multis et magnas mundi provincias occupant; Judæi etiam per innumeræ alias mundi partes vagantur; ergo dubitari non potest, quin respectu totius mundi valde limitata et restricta sit Ecclesiæ Christi amplitudo; ergo non potest titulo universitatis catholicæ nominari.

2. Confirmatio. — Et augetur difficultas, quia non est contra Ecclesiæ veritatem, ut persecutionibus aut schismatibus ita opprimatur, ut aliquando in minori parte confitentium Christum vera fides perseveret. Accommodatum exemplum est de tempore, in quo per Arianam hæresim ita afflita fuit, ut vere universum orbem christianum occupaverit Arianismus, fere pro illa tempestate obronto Christianismo, ut constat ex Hilario, libro cont. Auxent., et Hieron., libro contra Luciferian., ubi col. 13: *Tunc Usiae nomen abolidum est, tunc Nicenæ fidei damnatio conclamata est. Ingemuit totus orbis, et Arianum se esse miratus est.* Unde Gregorius Nazianz., Orat. 23, ad Arianos, qui de multitudine gloriantur, sic inquit: *Ubi tandem sunt, qui paupertatem nobis exprobrant, opesque suas insolenter jactant, qui Ecclesiam multitudine definiunt, ac parvum gregem aspernantur?* In quibus verbis, et concedere videtur, eo tempore fuisse parvum numerum fidelium præ multitudine hæreticorum convenientium etiam in eodem errore, et consequenter videatur negare multitudinem pertinere ad notas Ecclesiæ, ut ibi etiam notat Billi. Imo videtur

alludere ad verba Christi, Lucæ 12: *Nolite timere, pusillus gressus, et ex illis verbis colligere, ad veram Ecclesiam parvum gregem sufficere, quod hæretici hujus temporis libenter recipiunt, ut de paucitate glorientur, addentes illud Matth. 7: Intrate per angustam portam; et infra: Quam angusta porta et arcta via est, quæ dicit ad vitam, et pauci sunt, qui inveniunt eam.*

3. Ad rationem dubitandi respondetur. — Ad priorem partem responderi potest primo, nomen catholicæ non esse impositum Ecclesiæ ad distinguendam illam a gentilismo, paganismō, vel judaismo, nam sub nomine Christianorum, seu ecclesiæ christiane ab his omnibus satis distinguebatur. Sed impositum esse illi hoc nomen, ut ab hæreticorum sectis discerneretur. Nam licet hæretici, quoad veritatem fidei Christiani non sint, tamen quia non omnino Christum negant, sed eum suo modo colunt et confitentur, idecirco peculiarem modum infidelitatis sub nomine christiano habent, et ideo (ut ex Patribus notavimus) additum est fidei vere christiane cognomen catholicæ, quo a sectis hæreticorum distinguueretur. Atque hinc fit, ut ex vi talis nominis et rationis ejus non sit necessarium, ut amplitudo Ecclesiæ omnium infidelium multitudinem superet; sed satis est ut suo modo sit dispersa per universum orbem, et quod in hoc excedat quamecumque hæreticorum sectam.

4. Duobus modis potest Ecclesia esse per totum orbem diffusa. — Deinde ad hoc magis explicandum advertimus, duobus modis intelligi posse, Ecclesiam Christi debere esse per totum orbem diffusam, scilicet, vel jure et institutione ac potestate, vel facto, et actuali (ut ita loquar) possessione. Priori modo manifestum est, Ecclesiam Christi, ex quo instituta fuit, catholicam et universalem fuisse: tum quia pro toto mundo instituta est, et non sicut synagoga pro quadam natione; tum etiam quia ex tunc accepit jus prædicandi fidem Christi per universum mundum, juxta illud: *Prædictate Evangelium omni creaturæ,* Marci ultim.; et illud: *Eritis mihi testes in Jerusalem, et in omni Judæa, et Samaria, et usque ad ultimum terræ.* Tum denique quia habet potestatem in terris ad gubernandum universum orbem in iis, quæ ad salutem animæ spectant, vel ad illam referuntur, juxta illud: *Qui Ecclesiam non audierit, sit tibi tanquam ethnicus,* etc., Matth. 48, et illud: *Pasce oves meas,* Joan. 21. Hæc ergo univer-

sitas Ecclesiæ, quam juris seu sufficientiæ vocare possumus, sufficere poterat ut vere Catholica diceretur. Imo Augustinus, lib. 2 contra Petil., c. 38, cum objecisset Petilianus : *Si vos tenere Catholicam dicitis, catholicum illud est, quod Græce dicitur unicum, sive totum, ecce in toto non estis, qui in partem cessistis,* respondet Augustinus, *catholicum,* idem significare quod, *secundum totum,* unde *Catholica nomen accepit, dicente ipso Domino: Eritis mihi testes, etc.*; et concludit : *Ecce unde Catholica vocatur.* Quare videtur Ecclesia accepisse hoc nomen ab Apostolis, priusquam fides esset cum effectu per totum mundum disseminata ; prius enim Apostoli Symbolum condiderant, quam per diversas mundi partes distribuerentur.

5. *Ecclesia dicitur universalis universalitate juris et facti.* — Nihilominus non solum propter jus, sed etiam propter factum et possessionem (ut sic dicam) Ecclesia illud nomen accepit. Sciebant enim Apostoli promissionem Christi esse infallibilem, et non multo post fuisse impletandam, et ideo ita de illa statuerunt, ac si jam actu mundum occupasset, quia, in moralibus, quod parum distat, nihil distare videtur, et maxime apud illos, qui per fidem rem futuram tanquam jam factam aestimabant. Post illorum vero prædicationem amplitudo Catholicæ Ecclesiæ in re ipsa esse cœpit, ita ut veluti oculis cerni posset. Unde Augustinus, loco proxime citato ; post illa verba : *Ecce unde Catholica vocatur,* subjunxit : *Sed clausis oculis offenditis in montem, qui ex parte lapide secundum prophetiam Danielis crevit, et implevit universam terram.* Sentit itaque Augustinus, sentiuntque alii Patres supra allegati, prophetias de Ecclesia Christi futura per universum orbem diffusa, promissionesque de fundanda et stabienda eadem Ecclesia a Christo factas, impletas jamdudum fuisse. Quo autem tempore incepit, et qua certitudine id constare possit, non est facile explicare.

6. Igitur ulterius animadvertisendum est, hanc diffusionem Ecclesiæ Catholicæ per universum orbem, quoad majus vel minus augmentum varios posse sortiri status amplitudinis Ecclesiæ, nec esse certum apud Sanctos Patres, et Scripturæ expositores, an prophætia et promissiones de hac Ecclesiæ universalitate omni ex parte sint jam impletæ, vel aliquid supersit impletum, quod usque ad mundi finem vel prope illum relinquatur consummandum. Nam quod Christus Dominus

dixit, Matth. 24 : *Prædicabitur hoc Evangelium regni in universo orbe in testimonium omnibus gentibus, et tunc veniet consummatio,* Hieronymus et Beda intelligent de mundi consummatione, et significant illam prædictionem nondum fuisse impletam. Imo indicat Hieronymus complementum illius futurum esse signum judicij appropinquantis, ac proinde adeo cumulatam Ecclesiæ extensionem, usque ad finem mundi, vel tempus illi propinquum non esse adimplendam.

7. *Amplitudo Ecclesiz per orbem varias potest habere vicissitudines.* — In quam sententiam inclinat etiam Augustinus, lib. de Unit. Eccl., c. 47, ubi tractans eadem Christi verba, dicit : *Ipsa fides omnium gentium nondum impleta est.* Et infra, accommodans parabolam seminantis bonum semen in agro suo, Matth. 13, subnectit, *hunc agrum esse mundum in quo verbum Dei fructificat et crescit,* ut dicitur ad Colos. 1, *usque ad messem, id est, usque ad finem mundi.* Idem vero Augustinus, epistol. 78 ad Hesichium, interpretatur superiora verba Christi negative tantum, scilicet : *Tunc veniet consummatio, id est, antequam prædicetur Evangelium in toto mundo non veniet.* Quanto autem tempore post consummatam Evangelii prædicationem per totum orbem, *incertum (inquit) est.* Unde etiam est incertum quo tempore integre sit implenda illa promissio de diffusione Evangelii et fidei seu Ecclesiæ per totum mundum. Pro certo vero habuit ibidem Augustinus suo tempore nondum fuisse impletam illam præmissionem, dicens : *Si ergo susciperent hunc laborem servi Dei, ut peragrato orbe terrarum, quantum possent colligerent, quod remaneret gentium, ubi nondum est Evangelium prædicatum, hinc advertere utcumque possemus, quantum hoc tempus longe sit a fine seculi; quod etiam latius confirmat epist. 80, circa finem, quia suo tempore innumerabiles gentes (ut ait) erant, quibus nondum prædicatum fuerat Evangelium.*

8. *Promissiones de prædicatione Evangelii per orbem, adhuc non sunt integre consummatæ.* — Quod argumentum etiam convincit, usque adhuc non esse completas integre illas promissiones, quia nostra ætate novus mundus (ut aiunt) et vastissimæ provinciæ, quibus Evangelium non erat prædicatum, inventæ sunt, pro quibus ad fidem convertendis videmus a servis Dei loca inaccessibilia peragrari, et ecclesias denuo in eis fundari. Hinc ergo recte concluditur, Ecclesiam Ca-

tholicam non ideo dici per totum orbem diffusam, quia in toto universo et omnibus provinciis ejus illa diffusio Ecclesiæ jam facta sit. Imo addit Augustinus, dicta epist. 80, licet in omnibus gentibus, ubi nondum est Ecclesia, oporteat ut aliquando sit, non tamen oportere ut omnes, qui ibi fuerint, credant, quia omnes gentes promissæ sunt, non omnes homines omnium gentium, non enim omnium est fidēs. Ex his ergo omnibus valde incertum relinquitur, quando incœperit Ecclesia habere in re, et non tantum in spe, illam universalitatem, quam nomen Catholicæ denotat. Item, incertum est quanta Ecclesiæ amplitudo et multiplicatio ecclesiarum per varias orbis provincias fuérit ad eundem effectum necessaria. Denique multo magis incertum est quam numerosam hominum multitudinem eadem proprietas requirat, ut in re ipsa existat.

9. *Universalitatem ad catholicismum sufficientem jamdudum Ecclesia adepta est.* — Nihilominus certum esse debet ex communis sensu omnium Patrum, ita intelligentium Scripturas, Ecclesiam Catholicam consecutam esse non solum nostris temporibus, sed etiam multis retro seculis statum (ut sic dicam) universalitatis sufficientis, ut dicatur per totum orbem diffusa. Nam prædictionem Prophetarum, et promissiones Christi, Paulus jam suo tempore dixit de Apostolorum prædicatione : *In omnem terram exivit sonus eorum, et in fines orbis terræ verba eorum.* Quod licet Augustinus interpretetur, esse prophetiam de futuro prolatam per verbum præteriti propter certitudinem, nihilominus Hieronymus intelligit jam tunc fuisse aliquo modo impletam, et est consenteum contextui Pauli in eodem loco, et aliis; nam ad Colos. 4, de Evangelio dicit : *Perrenit ad vos, sicut et in universo mundo est, et fructificat, et crescit sicut in vobis.* Deinde certum est ita crevisse Ecclesiam usque ad tempora Augustini, et aliorum Patrum, ut simpliciter dici posset per totum orbem diffusa, sicut ipsi loquuntur; ergo saltem eo tempore jam dictum statum habebat, ut ipsi prædicant. At illum etiam retinuit, vel potius in eo erexit usque ad Gregorium, ut ex supra dictis et ex epistolis ejusdem Gregorii ad Episcopos Orientis, et variarum provinciarum Occidentis colligitur. Ab illo autem tempore usque ad nostram ætatem eundem statum non amisit, sed potius per plures et novas provincias auctum esse conspicimus, li-

cet in quibusdam aliis diminuta fuerit; ergo simpliciter verum et certum est, Ecclesiam Catholicam esse per totum orbem diffusam. Et quamvis non possimus cum certitudine designare tempus in quo cœpit habere consummatum hunc statum universalitatis, non refert, satis est enim ut certo constet a principio in hunc finem fuisse institutam, et intra aliquot annos statum illum sufficienter obtinuisse, prout secundum ordinem providentiae divinæ expediebat.

10. Et eadem ratione licet non possint certo designari termini hujus amplitudinis, nihilominus dicere possumus, post sufficientem Evangelii prædicationem, necessarium fuisse Catholicam Ecclesiam habere in mundo splendorem quemdam universalem, quo posset ejus dignitas et majestas cognosci, et ab haereticorum turbis discriminari. Hoc enim imprimis pertinuit ad excellentiam regni Christi, quod non solum in cœlo, sed etiam in terra promissum est, quamvis in terra ipsum non esset futurum terrenum, seu temporale, sed cœleste, seu spirituale. Deinde quia Ecclesia est a Christo instituta propter salutem hominum, ut per eam multo universalius et abundantius, quam antea, omnibus, tam Judæis quam Gentibus, communicearetur, et ideo oportuit ut statim cresceret, ita ut intra breve tempus in predicto statu constitueretur, in quo, quantum est de se, omnibus mundi regionibus, vel saltem eorum majori et principaliori parti prodesse posset. Ad hunc autem finem necessarium fuit ut statim, seu quam primum morali modo posset, toti mundo innotesceret. Nam si cut Augustinus, ep. 48, col. 40, id urget : *Quomodo confidimus ex dirinis litteris, accepisse nos Christum manifestum, si non inde accepimus et Ecclesiam manifestam?* ita et nos asserimus non potuisse Christum in mundo regnare, nisi fides creditum per totum mundum esset diffusa.

11. *Incœpisse Ecclesiam habere prædictam universalitatem a tempore Constantini, probabile est.* — Dici autem cum magna probabilitate potest, cœpisse Ecclesiam habere hunc statum saltem a tempore Constantini imperatoris, in quo, concessa Ecclesiæ publica pace, templa etiam et ecclesiæ publice aedificari cœperunt, et Apostolica Sedes condignum honorem et splendorem habere incœpit, et generalia Concilia congregari potuerunt, et in reliquis omnibus, quæ ad majestatem Ecclesiæ Christi spectant, cœpit Ecclesia ab

universo orbe, qui tunc agnoscebatur, publice cognosci ut unum corpus mysticum, et una spiritualis respublica, ad universam curam et salutem animarum instituta. Atque hanc nostram conjecturam videtur insinuasse Augustinus, concione secunda in Psalm. 103, ubi exponens verba illa : *Super montes stabunt aquæ*, de diluvio persecutionum nascentis Ecclesiae illa interpretatur, dicens : *Fuit enim tempus aliquando, quo terram Dei, Ecclesiam Dei, cooperuerunt aquæ persequentium, et ita cooperuerunt, ut non apparerent, neque ipsi magni, qui sunt montes. Quando enim ubique fugiebant, quomodo non minus apperebant?* Et infra : *Cooperuerunt eos aquæ, et super illos stabant, et dicebant : Preme, preme, et prævalebant super Martyres, et fugiebant ubique Christiani, et fuga quadam occultabantur Apostoli.* Postea vero interrogat : *Sed quandiu?* Respondet : *Audi quod sequitur : Ab increpatione tua fugient, et hoc factum est, fratres; ab increpatione Dei fugerunt aquæ, hoc est, a pressura montium recesserunt. Jam montes ipsi extant Petrus et Paulus. Quomodo eminent? qui ante a persecutoribus premebantur, nunc ab imperatoribus venerantur. Fugerunt enim aquæ ab increpatione Dei, quia cor regum in manu Dei deflexit quo voluit, jussit per eos pacem dari Christianis, emicuit et eminuit auctoritas Apostolica. Numquid quando supra erant aquæ montium, defeceraut magnitudo? Sed tamen ut omnes riderent eminentiam montium, per quos montes salus esset generi humano (quia leravi oculos meos in montes, unde veniet auxilium mihi), ab increpatione Dei fugerunt aquæ, a voce tonitrui tui formidabunt, jam quis non terreatur a voce Dei? per Apostolos, per Scripturas, per nubes ejus, conquivet mare, formidaverunt aquæ, nudati sunt montes, jussit imperator. Sed quid jussisset, nisi Deus tonuisset? Quia voluit Deus, illi jusserrunt, et factum est. Hæc elegantissime et sapienter Augustinus, quibus satis manifeste declarat, quo tempore cœperit Ecclesia Catholica habere statum suo nomini consentaneum. Et obiter advertendum est, non tribuere hunc statum Ecclesiae, imperatori tanquam auctori ejus, sed tanquam removenti impedimenta, et pacem tribuenti; imo nec numerare imperatorem inter montes Ecclesiae, sed Apostolos, utique in suis successoribus, et specialiter dicit : *Exstant Petrus et Paulus*, per quos sine dubio Sedem Apostolicam intelligit, et ad eamdem pertinet illa interrogatio : *Quomodo eminent?**

quia in illa Sede fundata est Ecclesia, quæ tunc cœpit statum, ut dixit, suo nomini consentaneum habere.

12. *Ad catholicismum Ecclesiar, non est opus ut cæteras sectas universalitate excedat.*—Atque hinc salisfactum est priori parti objectionis; concedimus enim non pertinere ad universitatem Ecclesiae per nomen Catholicæ explicatam, ut in ea sit major hominum multitudo quam in falsis sectis; nam hoc nullibi ei promissum est, et pendet ex altissimo Dei consilio in sua prædestinatione. Et quantum ex Scripturis colligere possumus, divino consilio potius permisum est, plures esse in mundo malos quam bonos, infideles quam fideles, imo fortasse etiam intra ipsam Ecclesiam plures peccatores quam justos. Unde Augustinus, dicta ep. 48, col. 13 et 14, in simili difficultate : *Ecclesia (inquit) est de cuius paucitate dicitur : Arcta est via quæ ducit ad vitam, et pauci sunt qui ambulant in ea; et rursus ipsa est de cuius multitudine dicitur : Sic erit semen tuum sicut stellæ cœli; iidem quippe fideles Sancti et boni, et in comparatione plurimorum malorum pauci sunt, et perse ipsi multi sunt, qui ab Oriente et Occidente veniunt, etc.* Et infra : *Itaque et totus mundus in maligno positus est propter zizania, quæ sunt per totum mundum, et Christus propitiator est peccatorum nostrorum, et totius mundi, propter triticum, quod est per totum mundum.* Et infra id declarat per comparationem areæ in qua frumenta pauca sunt comparatione palcarum, tamen multa sunt per se ipsa, et congreganda a quatuor ventis, a summis cœlorum usque ad terminos eorum, etc. Idem tradit lib. 13, contra Faust., c. 16, et optime lib. 20, cujus hæc sunt ultima verba : *Agnoscenda est paucitas illa, quam Dominus præcipue commendat in ingenti atque innumerabili multitudine orbe diffusa; quæ paucitas tanquam granorum in comparatione multitudinis palcarum paucitas dicitur, per se autem ipsam tantam massam frumenti facit, ut omnes probos et reprobos restros, quos pariter veritas reprobat, incomparabili multitudine superet.* Comparat enim Ecclesiam ad unam particularem sectam hæreticorum, et dicit non solum Ecclesiam esse ampliorem, sed etiam solos Ecclesiae justos incomparabiliter superare omnes hæreticos talis sectæ, quod mihi verisimillimum est, simili comparatione facta ad quamecumque hære im, quamvis ad præsentem causam non sit necessarium.

13. Itaque non refert, pauciores esse in Ec-

clesia fideles, quam sint infideles in omnibus sectis Gentilium, Paganorum, Judæorum et hæreticorum, quia de hac comparatione nihil est revelatum vel promissum, neque ad universitatem Ecclesiæ Catholicæ pertinet, ut in numero, vel personarum, vel populorum, provinciarum, aut regnum infideles excebat, sed solum ut sit in se amplissima, et per totum orbem diffusa. Unde Augustinus, contra Petilian., qui paucitatem Donatistarum ad Ecclesiam Catholicam sufficere volebat, respondet, lib. 2 contra illum, cap. 45 : *Tinuisti comparatam multititudini restræ multitudinem orbis terrarum, et ad paucitatis laudem per angustam viam gradientis te conferre coluisti. Utinam non ad ejus laudem, sed ad ipsam viam te contulisses, profecto conspiceres eamdem paucitatem esse in Ecclesia omnium gentium, sed paucos dici justos comparatione multorum iniquorum, sicut in comparatione paleæ possunt pauca grana dici uberrime segetes, quæ tamen per se ipsa in massam redacta implent horreum.* Et simili fere modo, in ep. 48, colum. 9, ad Vincentium dicentem, comparatione totius mundi modicam esse partem Christianorum, respondet : *Non vis attendere, aut te nosse dissimulas, in quam multas jam barbaras nationes tam parvo tempore venerit Evangelium, etc.*

14. *Satisfit ultime objectionis parti.* — Ex dictis etiam facile est respondere ad alteram partem objectionis factæ; jam enim cum Augustino declaratum est, quæ paucitas commendetur in grege Christi. Quanquam aliis etiam titulis et rationibus grex Christi potuerit dici pusillus comparatione infidelium, vel si dicatur de prædestinatis comparatione reprobatorum, scilicet, vel ob *humilitatis devotionem*, ut dixit Beda, lib. 4, in Lucam, c. 54, vel propter abjectionem conditionis discipulorum, qui tunc Christum audiebant, quia erant pauperes et infimæ conditionis, vel quia ob voluntariam paupertatem, vel gloriae mundi abnegationem servi Christi in mundo tanquam viles reputantur. Constat etiam augustam et arctam viam non repugnare cum Ecclesiæ amplitudine, quia Christus illam arctam viam toti mundo proposuit, et ita ejus Ecclesia, quamvis sit per totum orbem diffusa, per illam augustam portam intrare contendit; et licet pauci sint qui conantur intrare comparatione infidelium, tamen simpliciter sunt multi, ex diversis provinciis totius orbis vocati, et similiter, quamvis pauciores sint qui intrant quam qui conantur intrare, ta-

men etiam illi priores sunt satis multi, et ex toto orbe vocati. Et præterea non ex illis solis constat Ecclesia Christi, in qua non solum prædestinati sunt, sed etiam reprobi, nec tantum boni, sed etiam mali.

15. *Ecclesia Catholica in medio etiam persecutionum suum splendorem retinuit.* — Denique etiam constat ex dictis non esse inconveniens quod Ecclesia Catholica, propter insurgentes haereses et alias persecutions, multum interdum deprimatur, vel etiam minuatur. Quia non solum hoc non repugnat prædictionibus vel promissionibus factis Ecclesiæ Christi, verum potius illud ipsum saepius a Christo prædictum est, pertinetque ad arctam viam quæ dicit ad vitam. Unde Beda, exponens illud Marci 6 : *Erat navis in medio mari, etc., ait per illam navem labores Sanctæ Ecclesiæ designari, quia nonnunquam Ecclesia tantis gentilium pressuris non solum afflita, sed sedata est, ut, si fieri posset, Redemptor ipsius ad tempus eam deseruisse videatur.* Addendum vero est, ex quo Ecclesia Catholica per universum mundum diffusa esse cœpit, nunquam propter persecutions, vel haereses insurgentes ita splendorem suum et quasi possessionem amisisse, ut desierit esse sufficienter per totum orbem terrarum illustris et diffusa. Hoc significavit Augustinus, dicta ep. 48, col. 12, dicens : *Ipsa est que aliquando obscuratur, et tanquam obnubilatur multitudine scandalorum, quando peccatores intendunt arcum, ut sagittent in obscura luna rectos corde, sed etiam tunc in suis firmissimis eminet.* Possetque hoc facile ostendi ex promissionibus Christi, et ex perpetua traditione, et successione Ecclesiæ Catholicæ ac Romanæ, nisi, in c. 5, de visibili Ecclesia id satis esset demonstratum.

16. Atque ex hoc fundamento respondet Augustinus ad exemplum adductum de tempore Arianæ hæresis, dicens : *Tale tunc erat tempus, de quo scripsit Hilarius, etc.* Et infra : *Quanquam et illi qui tunc firmissimi fuerunt, et verba hæreticorum insidiosa intelligere potuerunt, pauci quidem in comparatione cæterorum, sed tamen etiam ipsi quidam profide fortiter exulabant, quidam toto orbe latitabant.* Ac sic Ecclesia, quæ per omnes gentes crescit, instrumentis dominicis conservata est, et usque in finem, donec omnino gentes omnes etiam barbaras teneat, conservabitur. In qui-

bus verbis videtur Augustinus concedere, fuisse illo tempore fideles in minori numero quam essent Ariani hæretici, et nihilominus Ecclesiam fuisse conservatam in sua universitate per totum orbem. Quod ex hypothesi verissimum est, propter omnia superius dicta, et quia etiam tunc Ecclesia Catholica fundata mansit in petra firmissima, et habente potestatem universalem, et Catholicos sibi subjectos per totum orbem dispersos; nam quod illi pauciores interdum sint, nihil refert, præsertim ad breve tempus. Eo vel maxime quod semper illa Ecclesia retinuit auctoritatem Concilii Nicæni, et continuationem cum antiqua Ecclesia, cuius splendorem etiam participabat tanquam eadem cum illa.

17. Atque hæc eadem responsio locum habet in tempore persecutionis Antichristi; imo in eo videtur magis necessaria, quia tota illa occultatio et diminutio Ecclesiæ videtur a Christo Domino prædicta. De tempore autem Arianae hæresis verisimilius existimo nunquam hæreticos, etiam numero, Catholicos superasse. Nam licet in Ariminensi conciliabulo major pars Episcoporum ab Arianis decepta fuerit, et ideo Hieronymus dixerit, in gemiscentem orbem terrarum se Arianum miratum esse, nihilominus ille error non fuit animo hæretico, ut idem Hieronymus et Augustinus significant, et Ambrosius, lib. 3 de Fide, c. ult. Et ideo fere omnes, fraude intellecta, statim veram fidem profiteri clareque docere coeperunt. Deinde licet fortasse in Oriente major esset multitudo hæreticorum, non tamen in Occidente, nec simpliciter in toto orbe. Id enim aperte Basilius testatur, ep. 72, ad Evaisenenses scribebis: *State in fide, ipsum orbem inspicite, et videte quam modica sit ea portio, quæ hoc morbo laborat; reliqua vero Ecclesia, que ab orbis finibus usque ad fines Evangelium recepit, sanam hauc et rectam doctrinam sectetur.* Athanasius etiam in epist. Synodica ad Jovinianum imperatorem, quam refert Theodoret., libr. 4 Histor., c. 3, loquens de fide definita in Concilio Nicæno, inquit: *Huic omnes ubique Ecclesiæ assensæ sunt, ut Hispaniæ, Britanniæ, Galliæ, Italiz, totius, etc.; et post plures alias numeratas subdit: Orientis denique Ecclesiæ, exceptis paucis, qui seclæ fuvent Arianiæ, nam istarum omnium re ipsa explorata cognitam habemus sententiam, litterasque ab illis acceptimus, proque certo scimus, Auguste sanctissime, non tamen præjudicium inde potest orbi terræ fieri universo.* Ac propterea Hilarius

supra beatos et gloriosos vocat Galliæ et Britanniae Episcopos, qui apostolicam fidem perfecte retinerent, et suo exemplo multos orientales Episcopos ad saniorem mentem reducerent. Unde etiam eo tempore veri fideles nomen Catholicorum retinuerunt.

18. Atque ita intelligi potest quod Nazianzenus dicit de hæreticis volentibus catholicam fidem multitudine credentium metiri; fortasse enim in sua civitate vel episcopatu plures erant Ariani quam Catholicæ, et ex illa multitudine clarum est non esse catholicam fidem colligendam, sicut licet fortasse nunc in Anglia plures sint hæretici quam Catholicæ, nullum inde sumetur signum catholicæ fidei. Præsertim quia licet contingeret hæresim multum diffundi, nunquam haberet signum Catholicæ Ecclesiæ ex defectu aliarum conditionum, ut supra dixi, et ibi notat Billius.

19. *Nulla secta potest ita per orbem diffundi, ut verisimiliter catholicæ existimetur.* — *Prima ratio.* — Unde concludo ultimo, nunquam hæresim aliquam ita posse per universum diffundi, vel cum talibus circumstantiis in numero sectatorum ejus augeri, ut inde possit verisimiliter existimari illam esse fidem catholicam, sed potius semper contrarium posse cum sufficienti certitudine constare ex defectu modi universitatis, fidei catholicæ promissæ. Hoc posset sufficienter probari per exempla omnium hæresum quæ hactenus fuerunt; nam quod omnibus hæreticorum sectis in temporibus præteritis accidit, credendum est in cæteris eventurum; nam eadem ratio limitationis (ut sic dicam) seu determinationis ad limitatum locum, aut gentem, vel paucitatem sectariorum in omnibus invenitur. Est autem prima ratio, quia omnis hæresis introducitur per defectionem a catholicæ fide, et consequenter deviat a certa regula credendi, ideoque nunquam potest universaliter persuaderi tanquam vera et indubitate fides. Hoc eleganter indicavit Augustinus, libro de Pastoribus, cap. 8, ubi cum dixisset varias hæreses esse in variis provinciis, quæ se invicem non cognoscunt, Catholicam vero Ecclesiam cum omnibus esse ubique, et omnes nosse, quia in omnes diffusa est, subjungit: *Illa (id est Catholicæ) sic est tanquam ritis crescendo ubique diffusa, illi sunt tanquam sarmenta inutilia agricultæ fulce præcisa merito sterilitatis sue, ut ritus putaretur, non amputaretur. Sarmenta ergo illa, ubi præcisa sunt, ibi remanserunt, ritus*

autem crescens per omnia, sarmenta sua novit, quæ in illa remanserunt, et juxta se, quæ de illa præcisa sunt; inde tamen revocat errantes. Quæ verba sunt valde notanda; nam et differentiam inter catholicam fidem et quamcumque particularem sectam, et rationem propositam, recte declarant. Eamdemque rationem habet fere eisdem verbis Augustinus, lib. 4 contra Crescon., c. 60, ubi refert Cyprianum, lib. de Unit. Eccl., dicentem, Ecclesiam ramos extendere per universum mundum. De hæresibus autem adjungit Cyprianus: *Non nos ab illis, sed illi a nobis recesserunt, et cum hæreses et schismata postmodum nata sint, dum conventicula sibi diversa constituant, veritatis caput atque originem reliquerunt.* Unde merito colligit non posse in nomine Christi congregari, nec cum universa fraternitate convenire.

20. *Secunda ratio.* — Et hinc oritur altera ratio, quam ibidem Cyprianus attingit, dicens: *Hæreses factæ sunt, et fiunt, dum perversa mens non habet pacem, dum perfidia discordans non tenet unitatem.* Nam hinc fit, ut qui concordiam cum Ecclesia deserunt, inter se concordes non sint; quod etiam (ut supra dixi) provenit ex defectu fundamenti, quia cum in credendo non nitantur regula a Deo tradita, sed proprio judicio et opinione, necesse est ut si aliquantulum durent vel multiplicentur, statim in varias seclas descendantur, *quoniam visiones cordis eorum frustrantur eos*, ut idem Cyprianus ibidem dixit, ideoque non perseverant, nec extunduntur cum illa unanimitate, quam fides catholica requirit. Quod declaravit optime Augustinus, lib. de Pastorib., c. 8, ubi accommodat ad hæreticos verba Ezechiel. 24: *Super omnem faciem terræ dispersi sunt greges mei;* et addit: *Non omnes hæretici per totam faciem terra, sed tamen hæretici per totam faciem terra, alii hic, alii ibi, nusquam tamen desunt, ipsi se non neverunt.* Alia secta in Africa, alia hæresis in Oriente, alia in Ægypto, alia in Mesopotamia, verbi gratia. In diversis locis sunt diversi, sed una mater superbia omnes genuit, sicut una mater nostra catholica omnes Christianos fideles, toto orbe diffusos. Non ergo mirum si superbia parit dissensionem, charitas unionem. Unde idem Augustinus, ep. 48, ad hæresim etiam accommodat illud Canticor. 1: *Si ignoras te, egredere, et abi post vestigia gregum, et pasce hædos tuos;* et sic exponit: *Nisi cognoveris temelipsum, exi tu, non ego te ejicio, sed exi, ut*

dicatur de te: Ex nobis exierunt, sed non erant ex nobis, exi tu in vestigiis gregum, non in vestigiis meis, sed in vestigiis gregum, nec unius gregis, sed diversorum gregum et errantium. Et pace hædos tuos, non sicut Petrus, cui dicitur: Pasce oves meas, sed pasce hædos tuos in tabernaculis pastorum, non in tabernaculo pastoris, ubi est unus grex et unus pastor.

21. *Tertia ratio.* — Addere denique possumus tertiam rationem, quia in secta hæreticorum non invenitur spiritus propagationis fidei (ut sic dicam), sine quo fides ipsa catholica nunquam crevisset, nec per totum mundum fuisset diffusa, *quia fides ex auditu, auditus autem per verbum Christi.* Et ideo in Christi Ecclesia, ut Catholicæ esset, necessaria imprimis fuit potestas universalis prædicandi Evangelium per universum orbem, quam Christus illi dedit simul cum præcepto prædicandi fidem suam in toto mundo, Matth. 28, Marc. 16, et Act. 1. Et hoc modo asserit Paulus, ad Galat. 1, sibi fuisse creditum Evangelium præputii, sicut Petro circumcisio; et 2 Corint. 5: *Deus erat in Christo mundum reconcilians sibi, et posuit in nobis verbum reconciliationis.* Pro Christo ergo legatione fungimur tanquam Deo exhortante per nos. Deinde fuit necessarius spiritus propagationis fidei huic potestati conformis, tum ad efficaciam prædicationis, tum ad concipiendum affectum, et sollicitudinem trahendi homines ad Christum, et ideo ipsem Domini Apostolis præcepit ut manerent in civitate, donec induerentur virtute ex alto, Lucæ 24, et Act. 1, quem spiritum maxime ostendit Paulus in suis Epistolis, et varia ejus dona ad hunc finem data Ecclesiæ ad Ephes. 4, et 1 Corinth. 12, describit.

22. *Hæreticos non habere spiritum propagandi fidem.* — Hunc autem spiritum non habere hæreticos ita potest declarari. Quia duo præcipue ad hanc Ecclesiæ propagationem pertinent. Unum est ad Christum convertere ethnicos nullo modo credentes in ipsum; aliud est, eos, qui in professione fidei Christi errant, et a sua Ecclesia exierunt, ad ipsam revocare, et in vera fide illuminare. Neutrum horum munerum uspiam exercuerunt hæretici ulli, nec modo Protestantes Anglicani, quantunquecumque hoc jactent et contendant. Nam quoad primum, nunquam hæretici visi sunt fidem novis gentibus prædicare, aut ethnicos ad fidem convertere. Testis est Tertullianus, lib. 1 de Præscrip., cap. 42, di-

cens : *De verbi administratione quid dicam? cum hoc sit negotium illis, non ethnicos convertendi, sed nostros evertendi.* Et ratio est, quia in illis non est verum Dei verbum, et ideo neque efficaciam verbi habere possunt. Item non ducuntur Spiritu Christi, sed proprio, et ideo *ruinas potius operantur stantium ædificiorum, quam structionem jacentium ruinarum*, ut ibidem Tertullianus dixit. Tandem cum extra Ecclesiam sint, potestatem prædicandi fidem Christi habere non possunt, quia hæc potestas, ut dixi, data est Ecclesiæ in Apostolis, et in successoribus eorum manuit, et ab eis mitti debent veri Evangelii prædicatores, juxta illud : *Quomodo prædicabunt, nisi mittantur?* Roman. 10. Et ita in historiis ecclesiasticis observatum est, Ecclesiam non esse in gentibus diffusam, nisi per prædicatores catholicos ab Apostolis vel a Sede Apostolica missos, quod etiam de ipsis Anglis in superioribus ostensum est.

23. *Sollicitudo reducendi hereticos est Ecclesiæ necessaria.* — *Objectio quædam diluitur.* — Præter hanc vero curam propagandi fidem inter ethnicos, necessaria est in Ecclesia Catholica sollicitudo conservandi illam, et reducendi ad illam omnes, qui Christum non omnino abnegantes ab Ecclesia deviant. Hoc enim maxime ad ejus pastoralem curam, et universalem propagationem necessarium est. Unde Augustinus, dicto c. 8, de Pastorib. : *Catholica (inquit) mater, et ipse pastor in ea ubique querit errantes, confortat infirmos, curat languidos, alligat confractos, alios ab istis (utique ab haereticis) alios ab illis, non se invicem scientibus.* Quomodo autem potest hæc cura in secta hæretica inveniri? Cum enim ipsa per defectionem a vera fide increbuerit, et in illa pedem fixerit, quomodo potest alios errantes ad viam salutis reducere? Dices : sollicita saltem erit, alios credentes in Christum in suam rapere opinionem, et sic poterit utique crescere. Respondeo, etiamsi id continget, Deo id propter peccata hominum permittente, neutiquam inde tamen posse splendori et amplitudini Catholice Ecclesiæ præjudicium afferre, *quia portæ inferi non prævalebunt adversus eam*, ut jam declaravi. Addo, considerata hæresis natura et conditione, id non esse morale, neque ordinarie timeri posse; tum quia cum Deo et veritati repugnet, et negotium sit mere humanum, non potest contra Ecclesiæ lumen adeo perfracte, aut tamdiu prævalere; tum quia, ut dixi, ipsimet hæretici facile inter se

dissentient, et ita vim amittunt eamdem sectam per varias regiones disseminandi; tum quia plerumque non incident in hujusmodi sectam, nisi vel superbiæ, vel ambitionis, aut libertatis spiritu ducti, ideoque de propagatione sue sectæ non amplius, quam huic fini, vel alicui contentioni humanæ deserviat, sunt solliciti.

24. Cujus rei non levem conjecturam faciet lector, si verba illa regis Angliæ in fine suæ Præfationis relegat, ubi generatim ad principes christianos loquens, se ostendit propagationis fidei sollicitum, precaturque, *ut Deus sibi et aliis mentem injiciat serio cogitandi, quid ad Evangelii plantationem et propagationem præstare teneantur.* In quo temporalibus principibus tacite persuadere conatur, ut munus pastorale, solis Apostolis, eorumque successoribus commissum, ut vidimus, sibi arrogent et usurpent; statim vero ostendit quo spiritu feratur dicens : *Deinde ut sceptrorum nostrorum securitati mature prudenterque consulamus, nec Babylonicum monacham latius serpere patiamur.* Et alia, quæ prosequitur et nunc omitto, quia in lib. 3 tractanda sunt. Per ea vero quæ indicavi, satis demonstrat, suum studium solum esse *conjugendi spiritualem libertatem cum temporali, et tempore quietem et securitatem in suo schismate comparare*: hæc enim fere sunt verba ejus. Satis igitur ex omnibus dictis, nihil catholicum, nihilve universale in Anglicana secta deprehendi concluditur.

CAPUT XVII.

IN ANGLICANO SCHISMATE FIDEM APOSTOLICAM NON ESSE.

1. *Ab Apostolis fides dicitur apostolica.* — Exploratum est apud omnes sacræ doctrinæ tractatores, illam esse veram et catholicam fidem, id est, doctrinam fide credendam, quam Apostoli tradiderunt, et ideo apostolica fides vocata est, sicut Ecclesia etiam universalis Apostolica dicitur in Symbolo Nicæno. Ob hanc ergo causam rex Angliæ non solum se fidei catholicæ, sed etiam apostolicæ defensorem esse profitetur, et ex consequenti vult, sectam Anglicanam, quam solam revera tuetur, fidem esse apostolicam. Quamvis autem ex dictis facile intelligi possit sectam, quæ catholicæ non est, apostolicam esse non posse, et quæ nova est et nupera, antiquitatem apostolicæ doctrinæ arrogare sibi non

valere , nihilominus, ut rem apertius et distinctius demonstremus, et omnibus, quæ occurrere possunt, satisfaciamus , operæ pretium visum est, speciatim hoc etiam attributum tituli regii refellere.

2. Quid requiratur, ut aliqua doctrina apostolica dicatur.—Primum autem omnium statuendum est, duo esse necessaria, ut fides seu doctrina apostolica sit: unum est, ut ab Apostolorum prædicatione, et eorum verbis aut scriptis aliquo modo duxerit originem ; aliud est, ut per legitimam traditionem seu successionem ad nos usque pervenerit. Primum indicatum est a Paulo, ad Ephes. 2, dicente : *Jam non estis hospites et advenæ, sed estis cives Sanctorum, et domestici Dei, superædificati supra fundamentum Apostolorum, et Prophetarum;* quod attingens Augustinus, et de his fundamentis intelligens illud Psalm. 86 : *Fundamenta ejus in montibus sanctis,* interrogat : *Quare fundamenta Apostoli, et Prophetæ?* Respondet : *Quia eorum auctoritas portat infirmitatem nostram; nimur, quia et Prophetarum prædictione et Apostolorum prædicatione, proxime in credendo nitimur.* Illud enim Apostoli prædicarunt, quod Prophetæ prædixerunt, et Prophetæ (inquit Ambrosius ad Ephes. 2) *disposuerunt, Apostoli fundamenta jecerunt,* quæ fundamenta non sunt nisi dogmata et doctrina ab eis prædictata. Unde gravissime Irenæus, lib. 3, c. 1, dicit : *Non per alios dispositionem salutis nostræ cognovimus, quam per eos, per quos Evangelium pervenit ad nos, quod quidem tunc prædicaverunt, postea vero per Dei voluntatem in Scripturis nobis tradiderunt, fundamentum et columnam fidei nostre futurum.* Ratio est, quia fides , vel doctrina non denominatur apostolica, nisi quia ab Apostolis tradita est, ad eum modum, quo solet doctrina, vel lex ab auctore denominari; hac tamen observata differentia, quod aliae doctrinæ humanæ solent ab hominibus tanquam a præcipuis auctoribus sua sibi convenientia desumere nomina, fides autem non ita ab Apostolis nomen accepit ; sed sicut lex vetus dicitur Mosayea, a Moyse, non ut auctore, sed ut promulgatore, ita fides christiana dicitur apostolica, ab Apostolis , non auctoribus, sed primis ejus prædictoribus ac promulgatoribus. Et ideo postquam Paulus in citato loco dixit : *Ædificati supra fundamentum Apostolorum et Prophetarum, addidit, ipso summo angulari lapide Christo Jesu, in quo omnis ædificatio constructa crescit in templum sanctum in Domi-*

no. Ipse est enim principale fundamentum, et basis omnium fundamentorum, quæ in eo superædificantur, et in illum aspicere debeamus tanquam *in auctorem fidei, et consummatorem Jesum,* ad Hebr. 12.

3. Alterum, quod proposui de successione legitima , frequentissimum est apud Patres, quos magna ex parte retuli cap. 3 et 6, præsertimque id declarat Irenæus, lib. 3, cap. 3, dicens : *Traditionem Apostolorum in omni ecclesia adest perspicere, qui vera velint audire, et habemus annumerare eos, qui ab Apostolis instituti sunt Episcopi in Ecclesiis, et successores eorum usque ad nos.* Et lib. 4, cap. 43 : *Eis, qui in Ecclesia sunt, presbyteris obaudire oportet, his qui successionem habent ab Apostolis, sicut ostendimus, qui cum episcopatus successione charisma veritatis certum secundum placita Patris acceperunt.* Eamdem conditionem ad discernendam doctrinam apostolicam a peregrina late tradit Tertullianus, lib. de Præscriptionibus hereticorum, ubi inter alia hæc habet, omnes Ecclesias apostolicas exhibere aliquem Apostolum ibi Episcopum constitutum, vel apostolicum virum ibi per aliquem Apostolorum ordinatum, ex cuius successione Apostoli seminis *traduces* habeat. Vocat autem apostolicos viros eos, qui cum ipsismet Apostolis conversati sunt, et doctrinam, ordinationem et potestatem ab eis acceperunt, ut Titum, Polycarpum, Clementem, et similes. Quoniam vero multæ Ecclesiæ post illa antiqua tempora institutæ sunt, de illis subdit : *Tamen in eadem fide conspirantes, non minus apostolicæ deputantur pro consanguinitate doctrinæ.* Conspirant demum in eadem doctrina per legitimam etiam successionem, quia licet tales Ecclesiæ nec per Apostolos, nec per viros apostolicos, id est, immediate ab Apostolis missos seu ordinatos , edocæ fuerint, saltem habuerunt initium per aliquem missum ab alio habente potestatem, ad quem, simul cum illa, doctrina Apostolorum pervenerat, ut Anglicana Ecclesia cœpit per viros missos a Gregorio ; Germana a Bonifacio Episcopo, misso a Gregorio II, et sic de aliis. Nam qui non intrant per hanc portam sine dubio fures sunt, et latrones : *Ad quos (ut eleganter Tertullianus¹) merito dicendum est : Qui estis, quando, et unde venistis, quid in meo agitis non mei (nomine Ecclesiæ loquitur)? mea est possessio, habeo origines firmas ab ipsis auctoribus, quorum*

¹ Sup., c. 37.

fuit res, ego sum haeres Apostolorum, sicut caverunt testamento suo, sicut fidei commiserunt, sicut adjuraverunt, ita teneo.

4. *Optima regula ad fidem cognoscendam.* — Eodem fundamento utuntur alii Patres ad eumdem finem separandi veram doctrinam a falsis erroribus, ut late Vincent. Lirinensis, in suo libro contra profanas hæreticorum novitates, et illo utitur sæpe Optatus, lib. 2 contra Parmenian.; Hieronymus, contra Luciferianos, in fine, ubi illi Ecclesiæ dicit esse adhærendum, quæ ab Apostolis fundata usque ad diem durat; et idem significat epistol. 65 ad Pammachium et Oceanum, ubi vel nostræ tempestatis novatores, sicut et sui sæculi veteratores hac urget interrogatione: *Cur profers in medium, quod Petrus, et Paulus edere noluerunt?* Item Ambros., 1 ad Corinth. 4, in principio, dicit, cognosci de aliquo esse pseudoprophetam, quando aliquid tradit a traditione apostolica discordans. Sic etiam dixit de Ecclesia Augustinus, lib. 1 de Symbolo ad Catechumen., cap. 6: *Omnes hæreses de illa exierunt tanquam sarmenta inutilia de rite precisa, ipsa autem manet in radice sua, in rite sua, id est, in eadem origine quam a principio habuit.* Quomodo autem in illa radice maneat, declarat idem August., 28 contra Faust., cap. 2, dicens: *Ab Apostolicis sedibus usque ad præsentes Episcopos certa successione perducta:* et infra adjicit, illud Evangelium esse credendum, quod a tempore Apostolorum non interrupta serie temporum Ecclesia certa connexionis successione usque ad tempora ista perduxit. Similia habet lib. 1 contra Adversarium legis et Prophetar., cap. 10, et lib. de Utilit. credend., cap. 17. Denique optima est regula tradita ab Origene, in Praefatione ad lib. Periarchon: *Cum multi sint, qui se putant sentire quæ Christi sunt, et nonnulli eorum diversa a prioribus sentiant, servetur ecclesiastica prædicatio per successio- nis ordinem ab Apostolis tradita, et usque ad præsens in Ecclesiis permanens; illa sola credenda est veritas, quæ in nullo ab Ecclesiastica discordat traditione.*

5. Ratione item possumus hoc facile declarare, quia fides apostolica illa tantum est, quæ ab Apostolis prædicata, vel scripta est; nos autem non audivimus Apostolos prædicantes, nec eos scribentes vidimus; ergo non possumus certo cognoscere doctrinam aliquam esse ab Apostolis prædicatam vel scriptam, nisi per manus et ora eorum, qui vel eos audierunt et viderint, vel ab his qui apos-

tolos audierunt, eamdem doctrinam receperunt, per plures, vel pauciores successiones, juxta temporum antiquitatem; ergo, ut certo constet talem doctrinam omnino puram et eamdem durare, necessarium est illam successionem esse continuam, et non interrumptam. Imo, ut supra, c. 6, dicebam, necessaria est singularis Dei protectio, ut in tam longe repetita temporum et generationum successione, integra et illibata et cum summa auctoritate servetur; hæc autem divina protectio promissa non est nisi Ecclesiæ, quæ per legitimam Pontificum et fidelium successionem eadem semper existit; ergo sine hujusmodi serie et successione non potest aliqua fides apostolica existimari.

6. *Colligitur fidem Anglicanam non esse apostolicam, ex defectu prædictarum conditio- num.* — Ex hoc igitur necessario fundamento ita concludimus: illa fides nunc est apostolica censenda, quæ ab Apostolis prædicata per legitimam successionem ad nos usque derivata est; sed Anglicana secta neque est ab Apostolis prædicata, neque ab illorum doctrina aut traditione legitime derivata est; ergo non est apostoliea fides. De priori propositione satis dictum est; superest declaranda et probanda posterior, illam enim forte rex Angliæ negabit. Hac siquidem fortasse causa, in sua Præfat., p. 42, 43 et 44, ut se *Catholico-Christianum* (ut ipse loquitur) ostendat, Scripturas quoad libros primi ordinis, tria fidei Symbola, et prima quatuor Concilia generalia credere, admittere aut venerari profitetur, sentiens fidem apostolicam in iis fontibus sufficienter contineri. Quod autem de se affirmat, de tota Anglicana secta seu congregatione, primatum ipsius regis recognoscente, dictum esse putamus. Sic ergo respondebit ad rationem a nobis factam, doctrinam apostolicam ad se et suos per dictos Scripturæ libros, Symbola, et Concilia sufficienter pervenisse, et nullum esse posse modum certiore aut magis legitimum, apostolicam fidem per hæreditariam quasi successionem suscipiendi, quam per Scripturas, Symbola, et Concilia dicta, omnemque aliam doctrinam, quæ in his non continetur suspectam habere, et tanquam nuperam refutare, vel saltem in canone fidei non recipere.

7. *Quæ Anglicana secta cum Romana Ecclesia habet communia, ad fidem apostolicam pertinent.* — At hæc dimidiata fidei confessio vim rationis factæ non enervat, ut nunc breviter in generali, latius vero lib. 2 in par-

ticulari ostendam Oportet ergo in Anglicana secta, seu (quam nunc eamdem reputamus) in hac regis professione distinguere, quid cum fide catholica et Romana habeat commune, et quid proprium aut diversum Multa enim retinuit Anglia ex iis, quae prius catholice credebat, et haec dicimus habere communia cum fide apostolica; alia vero sunt, in quibus ab Ecclesia Romana defecit, quae illius propria vocamus. Quod ergo ad priora pertinet, concedimus partem illam ad fidem apostolicam pertinere, sed tamen non ab Anglicana congregatione seu credulitate, sed a Romana Ecclesia habere hujus antiquitatis testimonium. Unde etenim habuit Anglia libros illos, qui apud regem pollent auctoritate, nisi a Romana Ecclesia? aut quomodo possent illum gradum auctoritatis obtinere, nisi per legitimam traditionem ad Ecclesiam Catholicae pervenissent, et ab eadem approbati fuissent? Quid de vero et certo sensu talium librorum dicam? Profecto nisi ex eadem origine, traditione, et approbatione constare posset, quae fuerit in talibus scripturis Apostolorum mens et sententia, nunquam posset apostolica fides ex eisdem libris cum certitudine erui, nedum comprobari, quia doctrina non consistit in verbis aut libris, sed in sententia, ut in simili supra ex Hieronymo monstravi. Quod non solum de Scripturæ libris, sed etiam de Symbolis et Conciliis intelligendum est, cum omnium sit eadem ratio, ut per se appareat manifestum.

8. Quapropter licet doctrina talium librorum per se spectata fides catholica sit, vel potius pars ejus, ut jam dicam, nihilominus, ut a sectariis retinetur, vel non est apostolica, vel non potest ut talis certo credi. Primo quidem, quia certi esse non possunt, illos libros Scripturæ, quos admittunt, esse Apostolicos, cum pro suo arbitrio quosdam admittant, alios negent, et quosdam quoad alias partes, et non quoad alias. Hac enim libertate discernendi inter Scripturæ libros, tota eorum doctrina quoad eos incerta et quasi humana redditur, quia sola humana opinione vel fide credi poterit, non divina. Quæ ratio etiam ad Concilia applicari poterit, quia nulla certa auctoritate vel ratione quædam admittunt, alia rejiciunt, eum idem pondus auctoritatis habent, sive in eis gravitas judicantium, sive Sancti Spiritus assistentia spectetur. Et præterea est alia ratio, tam de Symbolis quam de Conciliis: nam doctrina illorum non ideo ab his sectariis admittitur, quia ibi tra-

ditur, aut definitur, sed quia ipsorum judicio in Scriptura continetur, et ita Symbola vel Concilia non sunt apud ipsos fundamentum certitudinis, quod illa doctrina sit apostolica, sed solum ipsorum judicium, ut in 6 et 7 cap. late deduxi. Unde sumitur altera generalis ratio, quia doctrina non in littera, sed in sensu consistit; ergo ut doctrina sit apostolica, necesse est ut non solum libri, sed etiam eorum sensus habeat originem et certam dimensionem ab ipsis Apostolis; sed hanc non habet apud sectarios, quia suo arbitrio, vel, quem fingunt, privato spiritu ducuntur; ergo vel doctrina eorum etiam in re ipsa non est apostolica, quia in sensu Scripturæ errant; vel licet casu contingat in se esse apostolicam, apud ipsos non habet ejusmodi certitudinem, quia eadem mensura illam metiuntur.

9. *Doctrinam Symbolorum, prout eam Rex interpretatur, certitudinem fidei apostolice continere non posse.* — Quamobrem nihil juvat Jacobum regem, pag. 42, dicere, *se tria Symbola in eo sensu interpretari, quem illis esse voluerunt Patres atque Concilia, a quibus sunt condita atque descripta.* Interrogo enim unde noverit voluntatem hanc Patrum vel Conciliorum. Dicit fortasse ex verbis illorum eam nosse. Sed quid si verba, vel ex varia significacione, vel ex hominum interpretatione, varios habeant sensus? Unde discernit voluntatem Patrum et Conciliorum fuisse, hunc sensum esse in illis verbis, et non aliud? Dicit, credo, *sua certa scientia*, se id cognoscere, ac credere. Nam cum id de Scripturis dicat, facilius de Symbolis et Conciliis affirmabit. At illam certam scientiam nullam omnino esse, ex Scripturis, Patribus, ac manifesta ratione, cap. 7, ostendi; ergo non potest rex nobis probare, se interpretari Symbola in sensu quem Patres illis esse voluerunt, sed casu accidet ut interdum ita sit, et saepè non ita crit, ideoque talis doctrina sic credita non potest habere certitudinem apostolicæ doctrinæ.

10. *Exemplis idem convincitur.* — Exemplis hoc amplius convincamus. Unus ex articulis Symboli Apostolici est: *Descendit ad inferos*, quæ verba ab Athanasio non amplius explicantur. Ecclesia vero a Patribus edocta, intelligit illa verba proprie de vero, et reali, ac locali descensu Christi in anima a corpore separata ad loca subterranea inferni. Calvinus autem et alii intelligunt de doloribus inferni, quos fingunt Christum passum esse in horto

et in cruce. Si ergo rex credit illis verbis Symboli in hoc posteriori sensu acceptis (quod de rege præsumimus, cum Calvini secundum profiteatur), ostendat nobis quis ei revelaverit illum sensum intendisse Apostolos, præsertim cum ille sit extra propriam et usitatam verborum significationem, et contra intelligentiam omnium veterum Patrum alio pacto Scripturas interpretantium de hoc eodem articulo, ut alibi est a nobis ostensum; ergo in hoc non retinet apostolicam doctrinam, quantumvis Symbola se recipere jactitet. Idemque argumentum in aliis Symboli articulis fieri potest, ut in illo, in quo confitemur Christum esse natum ex Maria Virgine, vel venturum esse judicare vivos et mortuos ex factis illorum, ut in Symbolo Athanasii confitemur, vel quo unam Ecclesiam Catholicae, sanctorum communionem, remissionem peccatorum profitemur. Nam hæc omnia longe in diverso sensu a Protestantibus intelliguntur, quam ab Apostolis vel Conciliis fuerint tradita, ut facile ostendi posset, si pro hujus operis brevitate licet; ergo frustra rex, qui Protestantes tuetur, dicit se interpretari Symbola in sensu quem auctores voluerunt; nam ostendere non potest istiusmodi ex illis sensum, et ita illa doctrina non potest ostendi apostolica, et consequenter, quoad illum et sequaces, nihil est in Symbolis, quod cum certitudine possit doctrina apostolica reputari.

11. — *Apostolica scripta sine apostolico sensu ad fidem non sufficiunt.* — Concludimus ergo, non satis esse apostolicas voces, seu scripta retinere, nisi *apostolice etiam intelligentur*, ut loquitur Gregorius Nazianz., orat. 52, alias epist. 2 ad Cledonium. Quid autem sit apostolice vel non apostolice intelligi, declarat, dicens: *Quoniam eadem roces, si recte intelligentur, cum pietate conjunctæ sunt, si perperam exponuntur, impietate non carent.* Et prius dixerat usum haereticorum esse *cum communibus sententiis, quas Scriptura exhibet, convinci ac premi se rident, piis quidem dictiones confiteri, et circa mentem dolum struere.* Indicium autem hujusmodi intelligentiae non apostolice, significat esse novitatem, antiquæ Ecclesiæ traditioni contrariam, dicens: *O ingentem absurditatem, absconditam post Christum sapientiam nobis annuntiant, id quod sane lacrymis dignum est.* Nam si triginta dumtaxat abhinc annis fides initium sumpsit, cum quadrigeniti jam fere anni fluixerint, a quo Christus manifestatus est, inane utique tanto tempore fuit *Evangelium, inanis*

etiam fides nostra, frustraque martyres martyria perfuncti sunt, et tales tantique Antistites plebi præfuerunt. Igitur ad apostolicam doctrinam adjungi debet apostolicus sensus; erit autem apostolicus, si ab Apostolis duxerit originem, quam perpetua Ecclesiæ consensio et prædictio manifestat. Cum ergo rex Angliae, licet Symbolum apostolicum et cætera recipiat, apostolicum tamen eorum sensum illibatum non retineat, dici non potest, etiam quoad hanc partem, apostolicam fidem profiteri.

12. Sectam Anglicanam secundum propria dogmata apostolicae fiduci repugnare ostenditur.

— Venio ad alteram prædictæ doctrine partem, Protestantum, omninemque pene hujus tempestatis sectariorum propriam, quam etiam rex Angliae cum suis recipit, et Ecclesiæ Romanæ fidei anteponit. De hac igitur parte duobus modis possumus ostendere, apostolicam non esse. Primo in universali ex principiis hactenus discussis; nam illa omnia, quæ sunt propria illius sectæ, sunt contraria antiquæ fidei universalis Ecclesiæ, quia per defectiōnem ab illa introducta sunt, ut cap. 2 et 3 est ostensum; ergo non possunt esse ex apostolica doctrina, sed ex vana hominum novitate pro cerebro excogitata. Probatur consequentia ex fundamento posito, quod initium doctrinæ apostolicae per certam seriem revocandum est ad tempora Apostolorum et eorum prædicationem; ergo illa dogmata, quæ ante paucos annos incepérunt, et quorum initium cognoscitur fuisse per defectionem ab antiqua fide, non possunt esse doctrina seu fides apostolica. Hoc enim argumento implicite utitur Gregorius Nazianzenus, in loco proxime citato, et eodem utitur Athanasius apud Theodor., lib. 4 Hist., cap. 3, dicens ad Jovianum imperatorem, de fide divinitatis Verbi divini: *Pro certo scias, Auguste, hanc ipsam ab omni sæculorum memoria prædicatam fuisse.* Hac etiam regula usus est Theodosius imperator apud Sozomenum, lib. 7 Histor., cap. 12, ad insurgentes haereticos compescendos, scilicet, examinando doctrinam, per eam, quam sancti viri et Apostoli semper tradiderant, ut quæ cum illa consentiret, ut apostolica recipetur, quæ vero dissentiret, repelleretur; et alii Patres frequenter utuntur eadem antiquitatis regula, et illam maxime commendat Vincentius Lirinensis in suo aereo libro contra profanas vocum novitates.

13. Alter modus ostendendi sectam Anglicanam, quoad ea quæ sunt sibi propria, vel

in quibus Calvinus, Luthero, Zwinglio, aut aliis Protestantibus adhæret, non esse fidem apostolicam, esse potest, descendendo ad singula dogmata, eorumque novitatem et erroris gradum ostendendo. Quia vero nunc non assumimus provinciam disputandi de omnibus dogmatibus, quæ his temporibus ab hæreticis in controversiam vocata sunt, et quia id esset nimis prolixum et operosum, hunc modum probationis in præsenti non prosequemur. Non omittemus autem in sequenti libro, quin singula puncta a Romana fide aliena, quæ rex Jacobus in sua fidei confessione attigit, expendamus, eique summa brevitate pro loci opportunitate respondeamus.

14. Nunc sufficere censemus, gratia exempli, proponere articulum de primatu, qui Anglicanæ sectæ maxime proprius esse videtur. Secta enim Anglicana hunc articulum credendum suis sectatoribus proponit, scilicet, temporalem regem in suo regno esse supremum caput in spiritualibus, cui omnes Episcopi et sacerdotes, vel (ut sectarii loquuntur) ministri obedire tenentur. Quærimus ergo quis Apostolorum hoc docuerit, vel scriptum reliquerit in Ecclesia Christi, vel quomodo possit esse ab Apostolis derivatum dogma, quod ante Henricum VIII in Ecclesia Christi non est auditum. Quod autem hoc ita sit, nunc non aliter probamus, nisi quia nunquam legimus in Evangelio, Ecclesiam commissam regibus, sed Petro, Apostolis et Episcopis, Matth. 16, 18, 28, Joan. 21, Actor. 20; neque in apostolicis epistolis legimus præcipi fidelibus obedire regibus in his quæ pertinent ad salutem animæ, sed præpositis, qui rationem animarum eis commissarum sunt reddituri, ad Hebr. 13; neque in historiis legimus, regem aliquem christianum et catholicum talem potestatem sibi arrogasse, aut in Ecclesia exercuisse. Quæ omnia in libro tertio ex professo tractatur sumus, et ideo ea nunc insinuasse sufficiat, ut inde concludamus, sectam illam, quæ ab hoc dogmate sumpsit initium, et quodammodo in illo fundata est (nam propter illud præcipue a Romana Ecclesia se separavit), apostolicam fidem reputari nequaquam posse.

15. *Responsio regis ex ejus factis impugnatur.*—Fortasse rex dieat illum articulum non computari ab ipso, vel a suis ministris, inter eos qui de fide catholica sint tenendi. Hanc enim correctionem adhibuisse videtur, pag. 62 Praefationis, cum dixit : *Ego vero id ingenue spondeo, quæcies religionis, quam profiteor,*

ullum caput ostendetur non antiquum, catholicum et apostolicum, sed novitum esse, ac recentem (in rebus, scilicet, spectantibus ad fidem) me statim ab eo discessurum. Verumtamen si sub illa limitatione seu correctione suum de primatu articulum comprehendit, et inter res ad fidem spectantes illum non numerat, profecto injustissime cogit subditos suos ad recognoscendum in ipso talem potestatem, seu dignitatem. Quomodo enim juste cogi possunt, si ipsi non tenentur in conscientia talem in temporali principe recognoscere dignitatem? Vel quomodo possunt teneri ad eam recognoscendam, si non tenentur eam credere? Vel quo jure teneri possunt ad illum articulum credendum, si ille non est secundum fidem catholicam credendus? Responderi potest, esse credendum fide, ut sic dicam, politica, seu regia, id est, in regis vel sui consilii auctoritate, præcepto aut testimonio fundata. At hoc absurdissimum est, et ab omni etiam humana ratione alienum, quia dignitas et potestas gubernandi Ecclesiam in spiritualibus, non est res humana ratione inventa, sed a Christo dari debuit, juxta illud Pauli, 2 ad Cor. 10 : *Si amplius aliquid gloriatuſ fuero de potestate noſtra, quam dedit nobis Dominus in ædificationem, et non in destructionem vestram, non erubescam;* et ideo ipsem Christus dixit, Luce 10 : *Qui vos audit, me audit, et qui vos spernit, me spernit;* ergo de dignitate illa et potestate, quod in rege sit, non potest sola naturali ratione constare, neque rex potuit voluntate sua illam usurpare, si sibi data non est; ergo si hoc non est revelatum, ut revera non est, et ideo non tenentur Angli illum articulum de fide credere (ut in dicta responsione supponitur), profecto nulla est humana auctoritas quæ juste possit illos cogere ad id credendum, cum sit de re quæ superat humanam potestatem et cognitionem, quæ per revelationem non habeatur, ut omittam etiam esse contra ea quæ revelata sunt, ut postea ostendam. Ergo si rex velit consentanee loqui ad ea quæ operatur, necesse est ut inter fidei suæ articulos hunc de primatu suo ponat, et ita vel ex illo solo concludimus, suam fidem apostolicam non esse.

CAPUT XVIII.

OBJECTIONI CONTRA DOCTRINAM CAPITIS SUPERIORIS
OCCURRITUR.

1. Objectio hæreticorum. — *Quæ a rege tanquam nova improbentur.* — Contra discursum superioris capititis possunt adversarii nobis objicere, etiam Pontifices Romanos multa nobis de fide credenda proponere, quæ neque ab Apostolis prædicata sunt, neque ita sunt antiqua, ut per continuatam seriem ab Apostolis derivari potuerint; ergo etiam fides Romana non potest esse aut vocari apostolica. Hæc illatio fundamentum habet in his, quæ proxime contra adversarios protulimus. Nam, ut aliqua doctrina sit apostolica, non satis est aliquam ejus partem esse ab Apostolis prædicatam et derivatam, hoc enim habet etiam secta Anglicana, imo et quælibet secta hæretica, quæ semper falsis vera permiscet. Si ergo Ecclesia Romana etiam habet nova veteribus permista, non poterit doctrina ejus simpliciter apostolica censeri. Maxime quoad ea in quibus ab aliis sectis hominum profidentium Christum dissidet, quia in his dogmatibus etiam est nova, sicut sunt aliæ sectæ sub Christi nomine introductæ. Propositio assumpta probari imprimis potest his exemplis, quæ rex in sua Præfatione refert, et *novitia, ac nupera* vocat, ut in Beatae Virginis, et aliorum Sanctorum invocatione, cultuque reliquiarum, et imaginum veneratione et adoratione, et aliis quæ postea percurremus.

2. Catholicæ responsioni riam præcludere conatur rex. — Nec illi satisfacieamus dicendo, non posse hæc nova vocari, cum ante mille et plures annos ab Ecclesia observata ostendantur; nam ipse solum ut sufficienter antiqua recognoscit, quæ tota Catholicæ Ecclesia jam inde ab Apostolorum temporibus sine intermissione multis post seculis constanter docuerit, et crediderit, ut ipse pag. 62 dicit, et testimonio Vincentii Lirinensis confirmat. Et quæ hujusmodi adinvenientur dogmata (ut se apostolicæ doctrinæ sectatorem ostendat), nunquam recusaturum esse confirmat, quamvis hoc etiam non simpliciter, sed cum limitatione velit intelligi de fidei dogmate, *quod ad salutem sit necessarium*. Denique addere possumus exempla quarundam rerum, quas Ecclesia Romana nunc de fide credit, quas in confessu habetur non esse ab Apostolis prædicatas, ut B. Virginem nunquam venia-

liter peccasse, libros Machabæorum esse canonicos, et hujusmodi, quæ brevitatis causa missa facio.

3. Ecclesia Romana nullum dogma Apostolis contrarium recipere potest, Anglicana vero secta multa illis contraria recipit. — Ad hanc objectionem dicimus imprimis, aliud esse credere aliquid repugnans dogmatibus et doctrinis ab Apostolis prædicatis; aliud vero credere aliquid per modum additionis ad doctrinam prædicatam ab Apostolis, quod ab eis expresse declaratum non sit, vel saltem declaratum esse non constet. Primum genus credulitatis aut doctrinæ repugnat cum doctrina apostolica, quia illa immutabilis est omnino, sicut Deus, et verbum ejus immutabile est, ut significavit Paulus, ad Galat. 1, per illam exaggerationem: *Si Angelus de caelo, etc.*; et ideo dixit c. 2: *Si quæ destruxi iterum redifico, prævaricatorem me constituo;* et 2 ad Cor. 1: *Fidelis Deus, quia sermo noster, qui fuit apud vos, non est in illo: Est et non, sed non est.* Ideoque signum evidens doctrinæ non apostolicæ, sed potius apostaticæ est, aliquid vel minimum tradere, dictis vel scriptis Apostolorum contrarium: nam illud sufficit non solum ad ostendendam talis dogmatis falsitatem, sed etiam ut totam fidem talis doctrinæ quoad certitudinem evertat, ut jam explicavi. In doctrina autem Ecclesiæ Romanæ nullum dogma hujusmodi invenitur, aut inveniri potest, juxta Christi promissiones supra tractatas, idque respondendo inferius ad omnia exempla, quæ rex adducit, facile ostendemus. At vero in secta regis Anglie numerantur multa, quæ cum doctrina Apostolorum, etiam ab ipsis scripta, plane repugnant, ut est negare traditiones non scriptas, resistere in dogmatibus universali Ecclesiæ, quæ est columna et firmamentum veritatis. Negare item omnem fidei regulam præter privatum spiritum, vel sic saltem statuere, ut omnia in dubium necessario revoacentur; item prædicare liberum esse et licitum temporali regi non obedire ulli Episcopo vel Pastori Ecclesiæ, etiam Supremo, et alia similia, quæ cum his connexa sunt, ut omittam alia specialiora, quæ ex his generalibus nascentur, ut negare veritatem corporis et sanguinis Domini in Eucharistia, et alia, quæ postea tractabimus.

4. Potest Ecclesia aliqua distincte credenda proponere, quæ antea non ita credebantur. — At sane non repugnat apostolicæ doctrinæ, quod pro temporis discursu aliqua distinctius et

expressius tradantur, quam antea prædicata fuerant; quin potius hoc modo addi possunt aliqua credenda in uno tempore, quæ prius expresse et formaliter (ut sic dicam) prædicata non erant, dummodo antiquioribus non repugnant, et legitima potestate proponantur, id est ab Ecclesia definitur. Hoc probat objectio facta, et consuetudo Ecclesiæ Catholicae, quæ ex necessitate quadam humanæ conditionis orta est, et tam manifestam et cogentem rationem habet, ut non sit verisimile, reliquisse Deum Ecclesiam suam sine hujusmodi potestate, vel sine sufficiente providentia, et auxilio ad utendum illa sine periculo recedendi ab apostolica doctrina. Probatur hoc et declaratur, quia mos Spiritus Sancti semper fuit, non simul Ecclesiam docere de omnibus, quæ ad doctrinam supernaturalem pertinent, sed pro temporum opportunitate, juxta dispositionem suæ occultissimæ providentiæ. Hoc videre licet in temporibus antiquis; nam, ut omittam tempora legis naturæ, in ipsamet synagoga discursu temporis crevit doctrina sacra, prout variis temporibus Deus inittebat Prophetas. Deinde, quia, non obstante Scriptura, poterant aliquando insurgere res dubiae vel ambiguæ, Deus constituerat locum, et tribunal sacerdotale, per quod posset ille populus magis ac magis in rebus divinis illuminari. Præterea etiam in ipsa primitiva Ecclesia, Spiritus Sanctus non simul docuit Apostolos omnia, nam de gentium vocatione postea fuit Petrus instructus, Act. 10, et de cessatione legalium certior redditæ est Ecclesia in Concilio Apostolico, quam antea erat. Sic ergo post Apostolorum tempora potuit Ecclesia in multis illuminari, quæ necessaria esse potuerunt in posteriori tempore, et non prius, vel propter dubia de novo orta, præsertim insurgentibus hæreticis, vel aliis temerariis hominibus, res fidei obscuras prave exponentibus, vel etiam, quia hæc est naturalis hominis conditio ut paulatim in cognitione proficiat, quod etiam Deus in Ecclesia sua observari voluit, juxta illud Proverb. 4: *Justorum semita quasi lux splendens procedit, et crescit usque ad perfectum diem.*

5. Quæ novitas antiquitati fidei repugnet.
— Et ideo Paulus 4 ad Timoth. 6, non simpliciter novitates, sed *profanas vocum novitates* vitandas dixit, quia, ut D. Thomas ibi notat, non omnis novitas reprehendenda est, cum Dominus dixerit: *Mandatum novum do vobis*, Joan. 13; sed profana novitas, id est,

rebus divinis et sacris contraria. Quæ fuit prius sententia Augustini, in tract. 97 in Joan., circa finem, et fere eamdem habet Vincent. Lirinensis, c. 37, dicens: *Quid est profanas? quæ nihil habent sacri, nihil religiosi, ab Ecclesiæ penetralibus, quæ est templum Dei, penitus extraneas. Profanas rocum, inquit, id est, dogmatum, rerum, sententiarum novitates, quæ sunt vetustati, quæ antiquitati contrariae.* Quamobrem quæ non sunt contraria, sed potius deserviunt ad melius intelligenda, quæ antiqua sunt, non possunt dici novitates profanæ; imo nec omnino novitates, quia in antiquioribus continebantur, et virtute, vel, ut aint, implicite credebantur, et ideo quando postea explicatius traduntur, non tam *nova* dicuntur, quam antiqua *nove* proposita. Quod esse utilissimum in Ecclesia, et sæpe necessarium, per se clarum est, et optime docet idem Lirinensis, c. 27; et Chrysost., homil. 71 in Joan., exponens mandatum mutuae dilectionis dici novum propter modum, licet sit antiquum.

6. Primus modus declarandi dogmata fidei.

— Possimusque hoc amplius declarare, distinguendo in materia fidei ea quæ ad solam cognitionem veritatis pertinent, et ea quæ ad mores, et ad observantias vel cærenonias spectant; in utrisque enim fieri potest additione aliqua, vel explicatio, non tamen eodem modo. Nam in his quæ spectant ad cognitionem, contingit dupliciter. Primo, nullam veritatem de novo definiendo, sed veritatem antiquam retinendo, et ubi opus fuerit noviter explicando, sicut in Concilio Nicæno definita est Verbi divinitas, et in Concilio Ephesino substantialis unio duarum naturarum in una Christi persona, et realis præsentia Christi Domini in Eucharistia in Conciliis Lateranensi, Florentino et Tridentino. Et interdum contingit in hujusmodi mysteriorum declarationibus, nova nomina ab Ecclesia excoxitari, quibus et veritas definita magis explicetur, et hæreticorum calumnæ et tergiversationes evitentur et detegantur, et tune talium vocum non est profana novitas, sed prudens ac fidelis necessitas. Ita voeem ἐμούσιον, seu consubstantiale, quam ut novam Ariani reprehendebant, quia eorum errorem detegebat, Patres fidei defensores semper approbarunt, ut patet ex Ambrosio, lib. 1 et 3 de Fide, c. ult.; et Athanasio sæpe in Orationibus contra Arianos; et Augustino, tract. 97 in Joan., dicente: *Patres adversus impietatem Arianorum novum nomen, ἐμούσιον, condide-*

runt, sed non rem noram tali nomine signare-runt, hoc enim vocatur ὁμονοία, quod est : *Ego et Pater unum sumus, unius videlicet ejusdemque substantiae*. Similiter propter Nestorium, qui negabat Virginem esse matrem Dei, concilium Ephesinum eam Θεοτόκον appellandam decrevit, latine *Deiparam*, de qua voce loquens Cyrillus, epistola prima ad Presbyt., etc. : *Admiratus (inquit) sum, an sint, qui dubitent, num Beatissima Virgo Deipara dicatur alicubi, an non dicatur : si namque Deus est Dominus noster Jesus Christus, quomodo Virgo, quae illum peperit, Deipara non est? Hanc nobis fidem divini tradidere discipuli, et licet nullam fecerint dictionis hujus mentionem, ita tamen sentire a Sanctis Patribus edocti sumus.* Et idem est cum proportione de voce *transubstantiationis* ad explicandum sacrosanctæ Eucharistiae mysterium. Idemque est de similibus vocibus, de quibus generaliter dixit Augustinus, dicto tract. 79, *esse aliquas verborum novitates doctrinæ religionis convenientes.*

7. Secundus. — Secundo fieri potest per Ecclesiam nova fidei explicatio, addendo ac definiendo novam propositionem, aut veritatem de fide credendam, quia hoc saepe necessarium est, quando nova controversia vel hæreses oriuntur. Exemplum est in veritate definita in sexta Synodo contra Monothelitas, de duabus Christi naturalibus voluntatibus, quæ sub illis terminis antea non fuerat tanquam de fide tradita. Aliud et clarius est de non rebaptizando rite baptizatos ab hæreticis. Nam haec veritas prius adeo fuit dubia, ut Cyprianus cum multis Episcopis contrarium senserint, et nihilominus postea est in Concilio Carthaginensi et aliis ab Ecclesia definita, quod sine dubio ad certitudinem fidei sufficit, ut recte Augustinus docuit, lib. 1 contra Crescon., c. 32. Quamvis autem hæc nova videantur, nihilominus doctrina est apostolica, quia in illa virtute continetur, et ab ipsis Apostolis non fuit ignorata. Acceperunt enim Spiritus Sancti donum, et omnia ipsis exposuit, ut dixit Epiph., hæres. 66, et latius Tertullianus, in *Præscriptionibus*. Quod tamen intelligendum non est de solo die Pentecostes, nam postea etiam temporibus opportunitate aliquibus rebus potuerunt magis doceri, seu illuminari. Non tamen fieri potuit, vel certe non oportuit, ut totam Theologicam doctrinam, ut sic dicam, quam Apostoli ab Spiritu Sancto didicerunt, eodem modo Ecclesiæ traderent, aut alios docerent, sed quæ

pro eo tempore erat maxime conveniens, et ita necessarium non fuit omnes veritates vel conclusiones ab eis distincte tradi vel declarari. Vel fortasse multa ex his, quæ pertinent ad majorem explicationem, et subtiliorem cognitionem articulorum fidei, verbo docuerunt, quæ postea sunt in dubium revocata, vel propter aliquam hæresim, vel interdum propter ignorantiam, ut in facto Cypriani constat, ex epistola ejus 74, et aliis. Quia ignorantia non obstante, veritas de non iterando baptismate ad apostolicam traditionem pertinet, ut tractans eumdem Cypriani locum, lib. 5 de Baptismo, cap. 26, asseruit Augustinus.

8. In rebus ad mores pertinentibus non solum additio, sed etiam mutatio fieri potest. — At vero in his quæ ad mores, et proxim Ecclesiæ spectant, facilior est non solum additio, sed etiam mutatio. Quia, ut dixit Epiphanius contra Arium, hæres. 75, circa principium : *Non potuerunt Apostoli statim omnia constituere, sed Ecclesia accepit complementum dispensationis, pro locorum et temporum opportunitate; nam singulæ res non ab initio omnia haberunt, sed progressu temporis ea, quæ ad perfectionem requiruntur, parabantur.* Quod late prosequitur. Et ratio clara est, quia ea quæ pertinent ad externos mores, et præsertim quæ ex humana institutione pendunt, de se magis sunt variationi subjecta, et non eadem pro omnibus temporibus congruunt, et ideo non possunt pro omni tempore immutabiliter stabiliri. Neque etiam ab Apostolis potuerunt omnia determinari, quia non habuit eumdem statum Ecclesia eo tempore, quem postea adeptura erat, vel quem nunc obtinuit. Imo etiam suo tempore non omnia simul disposuerunt Apostoli : nam Paulus, 4 ad Cor. 11, commemorat se prius tradidisse Corinthiis usum divini sacramenti, et tamen multa in illo servanda postea ibi docuit, et in fine subiungit : *Cetera autem, cum tenero, disponam;* et cap. 14, ac saepe in aliis epistolis, alia practica documenta paulatim tradidit. Et e converso, Act. 15, aliqua præcepta tradiderunt Apostoli pro illo tempore opportuna, quæ sciebant non esse perpetuo in Ecclesia servanda, ut de abstinentia a suffocato et sanguine.

9. Per additiones ab Ecclesia factas apostolica doctrina non mutatur, sed magis declaratur. — In his autem omnibus additionibus vel mutationibus observandum est, semper doctrinam esse eamdem, et apostolicæ doctrinæ

consentaneam. Nam imprimis nihil in hujusmodi rebus introducitur, quod juri divino positivo aut naturali repugnet, quia universalis Ecclesia non potest in fide aut moribus errare, ut supra est ostensum. Deinde, quidquid in hoc genere fit, derivatur a legitima potestate a Christo data Vicariis suis, et Pastoribus Ecclesiæ ad illam gubernandam, de qua in lib. 3 dicturi sumus. Ideoque licet in his, quæ ad mores, vel cultum externum pertinent, sit interdum varietas, non est novitas reprehensibilis, nec inducit in doctrina fidei mutationem, seu variationem, imo nec additionem alicujus rei, quæ in doctrina evangelica, et apostolica virtute non contineretur. Denique ad totam hanc Ecclesiæ illustrationem recte accommodari potest elegans sententia Vincentii Lirinensis, qui, in c. 28, ita objicit : *Forsitan dicet aliquis : Nullusne ergo in Ecclesia Christi profectus habebitur religionis?* *Habeatur plane, et maximus. Nam quis ille est tam invidus hominibus, tam exosus Deo, qui illud prohibere conetur? Sed ita tamen, ut vere profectus sit ille fidei, non permutatio. Siquidem ad profectum pertinet, ut in semetipsa unaqueque res amplificetur, ad permutationem vero, ut aliquid ex alio in illud transvertatur. Crescat igitur, oportet, et multum, vehementerque proficiat, tam singulorum, quam omnium, tam unius hominis, quam totius Ecclesiæ, et atum ac seculorum gradibus, intelligentia, scientia, sapientia; sed in suo duntaxat genere, in eodem scilicet dogmate, eodem sensu, eademque sententia.*

10. Satisfit exemplis in principio adductis. — Ex his ergo abunde satisfactum est difficultati propositæ; et ad exempla quæ rex objicit, in libr. 2 in particulari respondebimus; nunc in generali, tam ad illa quam ad ea quæ nos addimus, ex dictis facile responderemus, omnia illa habere fundamentum, vel in Scriptura, vel in traditione apostolica, seu aliis principiis fidei. Et quia vel satis declarata non erant, vel temporum decursu obscurata, vel in dubium vocata fuerant, per Ecclesiam declarari ac definiri denuo potuerunt; nam ad hoc habet potestatem et divini Spiritus assistentiam simul cum sua a Christo promissam, et ita semper cum necessitas postulavit, in Ecclesia Christi observatum est. Et ideo non est in his comparanda Ecclesia Catholica cum Synagogis hæreticorum, quorum novitates sunt antiquis dogmatibus contrariae, ideoque profanæ sunt; novæ autem definitiones Ecclesiæ non solum non pu-

gnant cum antiquis, verum potius ex illis derivatae sunt per legitimam potestatem, ideoque vel non sunt profanæ, sed sacræ, si nova dicenda sunt; vel certe non sunt dogmata simpliciter nova, sed antiqua et apostolica, sive ante plures, sive ante pauciores annos declarata seu definita sint. Parumque refert quod rex Angliae certum antiquitatis tempus, certumque modum necessitatis ad credendum, vel non recusandum aliquid, requirat. Nam per hoc convincitur, non confiteri se catholicam fidem, cujus columna et firmamentum est Ecclesia Catholica, neque habere in credendo certam et universalem regulam fidei ab Apostolis traditam, ideoque Apostolicam fidem profiteri aut defendere non posse.

CAPUT XIX.

SECTAM ANGLICANAM NULLIUS ANTIQUI MARTYRIS
SANGUINE DECORATAM, SED POTIUS DAMNATAM
ESSE OSTENDITUR.

1. Verba regis expenduntur. — Addit rex Anglie in suo defensoris fidei titulo duas alias prærogativas, seu laudes illius fidei, vel potius sectæ, quam defendit. Una est, fidem illam esse veteris ac primitivæ Ecclesiæ, de qua nihil amplius dicere necesse est, quia hæc proprietas recte intellecta non est alia ab attributo fidei apostolicæ; quia Ecclesia primitiva non est alia ab Ecclesia vera et Catholica, quæ nunc est; sed est eadem, secundum statum quem in principio plantationis suæ habuit, quod fuit tempus prædicationis Apostolorum, et ideo nihil est aliud, fidem esse Ecclesiæ primitivæ, quam esse illam, quam Apostoli Ecclesiæ tradiderunt. Cum vero in illo titulo huic particulæ additur, *veterisque ac primitivæ Ecclesiæ*, virus erroris sub verbis latere videtur. Indicatur enim fidem veteris ac primitivæ Ecclesiæ in universali et visibili Ecclesia defecisse, et per novatores instauratam esse, et ita innovatam a rege defendi. Quanvis enim verba ipsa manifeste hoc non prodant, ex aliis Protestantium principiis ac doctrinis timere non immerito possumus, ne rex in hoc sensu veteris Ecclesiæ fidei protectorem se proferat. Verumtamen quocumque sensu id fuerit dictum, est satis impugnatum ex dictis. Nam imprimis ostensum est sectam illam in his, quæ habet propria, apostolicam fidem non esse; ergo nec esse potest fides Ecclesiæ primitivæ, cum

illa maxime apostolica fuerit. Deinde, licet in his, quæ cum Romana fide convenit, aliqua ex parte fidem primitivæ Ecclesiæ refineat, in multis tamen a vero sensu primitivæ Ecclesiæ aberrat, et quæ vera retinet, casu potius et humana opinione, quam vero spiritu primitivæ fidei conservat. Ideoque quoad hanc partem illa sufficere censemus, quæ de attributo apostolicæ fidei dicta sunt.

2. *Rex Jacobus asserit fidem Anglicanam martyrum sanguine fuisse decoratam.* — Alteram laudem, ultimamque prærogativam suæ fidei ponit rex Angliæ, plurium *Episcoporum*, fidelique *Martyrum sanguine esse illustrem*, quam possem etiam merito prætermittere, tum quia laus hæc propria est veræ, catholicæ et apostolicæ fidei, ut etiam ipsemet rex in verbis sui tituli sentire videtur; cum ergo demonstratum sit sectam illam neque veram fidem, neque apostolicam, vel catholicam esse, satis etiam probatum relinquitur non esse tali laude dignam. Tum etiam, quia Martyrum testimonium non facit veram fidem, sed potius vera fides facit, verum esse martyrum, quod pro illa suscipitur: nam, ut eleganter Cyprianus, ep. 23, *non Martyres Evangelium faciunt, sed per Evangelium martyres sunt*. Ideoque dicit etiam Augustinus, ser. 44 de Verb. Apost.: *Ideo martyres, quia fidelis*. Igitur sanguis martyrum, licet illustret veram fidem, per se tamen illam non ostendit, sed supponit. Quia vero, ut multi referunt, Protestantes de testimonio Martyrum multum gloriantur, et quia ex ipsismet verbis et confessione regis non leve argumentum sumere possumus ad illam præsumptionem coercendam, erroremque convincendum, ideo de hoc etiam puncto pauca subjugere visum est.

3. *Anglicanam sectam Martyrum sanguine oppugnari, ostenditur.* — Duo autem prius a serenissimo rege interrogare necessarium duco. Unum est, an partem suæ fidei, vel totam, martyrum sanguine illustratam esse intelligat; alterum est, de quibus martyribus loquatur; an de antiquis, qui ante Calvinum, Lutherum, et alios nostrorum temporum hæresiarchas præcesserunt; vel etiam de novis, qui post exortum Anglicanum schisma consumpi sunt. Multum enim refert hec accurate discernere, ut quæ fides, quo sanguine vere et non ficte reddatur illustris, sine ambiguitate intelligatur.

4. Possumus ergo, ut capite superiori tetigi, loqui de fide Angliæ quoad partem fidei

antiquæ quam retinet, et communem habet cum Ecclesia Romana, a qua illam didicit, vel quoad dogmata in quibus per novos sectarios mintatio et defectio facta est. Loquendo ergo de priori parte, seu de antiqua fide, et consequenter etiam de antiquis Martyribus, verissimum est illam fidem sanguine Sanctorum Martyrum factam esse illustrissimam. Hoc vero nihil Anglicanam causam juvat, imo plane condemnat. Quia illi Martyres non Anglicanæ, sed catholicæ et apostolicæ fidei testimonium dederunt, et hoc modo sanguine suo eam illustrarunt. Testes sunt antiquissimi Patres, qui sèpissime asserunt, persecutionibus tyrannorum martyres interficiunt illustriorem factam esse Ecclesiam Christi, et non solum diminutam non fuisse, verum potius mirabiliter auctam, juxta celebrem Leonis Papæ sententiam, serm. 1 in Natali Petri et Pauli: *Non minuitur persecutionibus Ecclesia, sed augetur, et semper dominicus ager seget ditioni vestitur, dum grana, quæ singula cadunt, multiplicata nascuntur.*

5. Neque est dissimilis sententia Augustini, lib. de Catechizandis rudib., cap. 24: *Illaritis, quæ per orbem terrarum, sicut de illa prophetatum, et ab ipso Domino prænuntiatum erat, fructuosos palmites diffundebat, tanto pullulabat amplius, quanto uberiore Martyrum sanguine rigabatur, quibus per omnes terras innumerabiliter pro fidei veritate morientibus, etiam ipsa persequentia regna cesserunt, et ad Christum cognoscendum, atque venerandum, fracta superbie cervice, conversa sunt.* Similia scribit Præfat. ad Psalm. 40, dicens, Judæos occidisse Christum in se, paganos autem voluisse illum occidere in corpore suo, et subiungit: *Occisi sunt Martyres, ad multiplicandam Ecclesiam valuit sanctus sanguis effusus, multiplicati sunt magis magisque Christiani, et non est impletum quod dixerunt inimici: Quomodo morietur, et peribit nomen ejus.* Et eleganter Tertullianus, in Apologetico extremo, ait ad Tyrannos: *Cruciate, tortuete, probatio est enim innocentiae nostra: iniqüitas restra. Plures efficiuntur, quoties metimus a vobis, semen est sanguis Christianorum.* Et plura habet lib. ad Martyres; et Justinus Martyr, contra Triphonem; et Cyprian., epist. 41: *O beatam Ecclesiam nostram, quam sic honor divinæ dignationis illuminat, quam temporibus nostris gloriosus Martyrum sanguis illustrat, erat ante in operibus fratrum candida, nunc facta est in Martyrum cruce purpurea.* Loquuntur autem hi Patres, ut ex eorum

scriptis constat, de Ecclesia universali, vel de Romana, vel si interdum loquuntur de aliqua particulari (ut Cyprianus de Africana), perinde est, quia loquitur de illa ut parte Ecclesiae Catholicæ, et ut conjuncta per eamdem fidem Romanæ sedi, ut ex aliis ejus locis in superioribus allegatis manifestum est. Cum ergo ostensum sit, Ecclesiam Romanam et Catholicam, quæ nunc est, eamdem esse quæ tempore Apostolorum et dictorum Patrum extitit, constat universam gloriam antiquorum Martyrum in hanc universalem Ecclesiam, quæ nunc existit, redundare.

6. Antiqui martyres maxime Romanam extollunt fidem. — *Evasio hereticorum refutatur.* — Et hinc ulterius concluditur, totam fidem hujus Catholicæ Ecclesiae eodem antiquorum Martyrum sanguine confirmatam esse, et illustratam. Probatur, quia fides primitivæ Ecclesiae, et quæ fuit temporibus Cypriani, Augustini, et aliorum Patrum, eadem durat per legitimam successionem in præsenti Ecclesia Catholica, ut etiam est demonstratum; ergo sanguis Martyrum, qui fidei antiquæ Ecclesiae testimonium dedit, idem præbuit præsentis Ecclesiae fidei. Igitur fides Romana est, quæ sanguine dictorum Martyrum facta est illustris. Dicent fortasse hoc esse verum quoad sola illa dogmata fidei, quæ illo tempore in Ecclesia credebantur, non vero quoad alia nova, quæ postea, ut Protestantes calumniantur, in Ecclesia Romana per homines inventa sunt. Sed hoc facillime refutatur, quia fides Ecclesiae una semper est, nec variatur propter accidentale augmentum aut diminutionem, quoad majorem vel minorem rerum declarationem, vel quoad alias circumstantias quæ ex temporis successione pendunt. Quod adeo verum est, ut Augustinus, tract. 45 in Joannem, etiam de fide synagogæ et Ecclesie Christi dixerit: *Tempora mutata sunt, non fides;* quod etiam affirmat 48 de Civit., c. 47, et lib. 19, contra Faust., c. 14, et sumitur ex illo 2 ad Cor. 4: *Habentes eundem spiritum fidei.* Quibus verbis (ut ibi notat Chrysostomus, homil. 9) ostendit Apostolus, *eundem spiritum esse, qui in utroque testamento rim suam exercuerit.* Multa ergo majori ratione cum Ecclesia Christi omni tempore eodem Spiritu Sancto regatur, eamdem semper fidem retinet, etiamsi quoad res aliquas in uno tempore magis quam in alio per eamdem Ecclesiam declarata sit.

7. Martyres pro quoque tempore fidem confirmant. — *Iutelligitur assertio etiam de arti-*

culis recenter declaratis. — Quapropter Martyres, qui uno tempore suo sanguine catholicam fidem illustrarunt, totam fidem, et pro quoque tempore existentem æque confirmarunt, et exornarunt maxime, quia ea, quæ in posteriori tempore declarantur, in antiquioribus virtute continentur, et omnia ita sunt inter se connexa, ut non possit unum illustrari, aut testimonio Martyrum confirmari, quin omnia pariter illustrentur. Sicut et contrario non potest unum negari, quin cætera omnia certitudinem suam amittant, et ideo virtute negentur. Exemplo rem declaro; nam multi Martyres pro confessione Trinitatis mortui sunt in Ecclesia, priusquam per Ecclesiam declaratum ac definitum esset Spiritum Sanctum a Filio procedere, et nihilo minus fides hujus articuli non minus consignata est sanguine illorum Martyrum, quam fides cæterorum articulorum, quos tunc ipsi expresse confitebantur. Qua etiam ratione, qui pro fide moritur, confitendo expresse unum articulum, si illum credit catholica fide, virtute confitetur totam fidem Catholicæ Ecclesiae, eamque suo sanguine consignat. Sic igitur cuiuscumque veri Martyris sanguine, quocumque tempore effuso, tota fides catholicæ, in quocumque statu vel tempore consideretur, illustratur.

8. Martyres occisi sunt pro defensione articulorum, quos Anglia dissitetur. — Accedit quod multi ex antiquis et præcipuis Martyribus eadem dogmata, quæ nunc ab hereticis in Ecclesia Catholica reprehenduntur, diserte tradiderunt, et postea suo sanguine consignarunt. Hoc imprimis conspici potest in Martyre et Pontifice Ignatio, qui in Epistolis suis ecclesiasticam hierarchiam, et subjectionem laicorum Pastoribus Ecclesiae debitam commendat, et Episcopum in suo munere regi comparat. Nam in ep. 10, ad Smyrnæos, Episcopum prefert presbyteris et diaconis, illumque post Deum honorare jubet, ut principem sacerdotum, imaginem Dei referentem propter principatum, et Christi, propter sacerdotium; et similiter honorare præcipit regem, quia in rebus creatis nullus est ei similis, nec Episcopo quidquam majus in Ecclesia. Et ad Antiochenos ait: *Cæsari subjecti estote, in his in quibus nullum animæ periculum est.* Ad Philadelph.: *Una (inquit) Eucharistia utendum, quia una est caro Domini nostri Jesu Christi, et unus illius sanguis, qui pro nobis effusus est, unum altare.* Et ad Romanos: *Volo (inquit) panem cælestem, qui est caro*

*Christi, filii Dei; et in epist. ad Heronem, traditiones Apostolorum servare jubet. Et in speciali Quadragesimam, et Dominicam, etc., Epist. ad Philipp. Et hanc fidem postea glorioso martyrio illustravit. Quis ergo neget sanctum hunc Pontificem et Martyrem testem esse fidei, quam nunc Ecclesia Romana profitetur? cum nec de sanctitate, et doctrina ejus, nec de illius Epistolis dubitari possit, teste Hieronymo, de Scriptoribus Ecclesiasticis; et Eusebio, lib. 3 Histor., cap. 30. Et hoc testimonium suo etiam sanguine confirmavit Polycarpus, qui in epistola sua ad Philipp., prius ad cavendas falsas doctrinas consultit, ut ad illud, quod traditum nobis est a principio, revertamur. Et postea epistolas Ignatii commendat dicens: *Ex omnibus enim vobis magnus erit profectus. Continent enim fidem, patientiam, et omnem aedificationem ad Dominum nostrum pertinentem.* Addere item possumus Irenaeum, gloriosum etiam Episcopum et Martyrem, qui Ecclesiæ Romanæ primatum et traditiones Ecclesiasticas apertissime docet, lib. 3 contra haereses, a principio, per multa capita, et veritatem corporis et sanguinis Domini in Eucharistia, lib. 4, c. 34, in quibus principiis tota fides Romana virtute continetur; hic ergo sanctus Martyr illi etiam testimonium dedit. Eodem modo afferre possumus Justinum, fidem de veritate Eucharistie profitentem, et innumeros Romanos Pontifices, qui primatum suæ Sedis constantissime defenderunt, eademque constantia totam fidem suam sanguine confirmarunt.*

9. *Concluditur contra assertum regis Angliae.*—Ex quibus tandem in hoc puncto concludimus, si rex Angliae admittatur suam fidem commendare ex splendore, et claritate, quam habet vera fides christiana ex sanguine antiquorum martyrum, velit, nolit, convinci, eorumdem Martyrum sanguinem damnare sectam suam quoad illa omnia, in quibus a Romana fide defecit. Probatur illatio: nam probatum est, illo sanguine illustratam esse totam fidem catholicam, quæ hodie in Romana Ecclesia perseverat, non solum quoad ea quæ Protestantes ex illa retinere voluerunt, sed etiam quoad omnia quæ deserenda elegerunt, multa quidem quæ jam tunc explicite in Ecclesia credebantur, alia vero quæ in illis et in infallibili Ecclesiæ auctoritate virtute saltem continebantur. Unde inter hunc regis titulum, ejusque fidei confessionem, repugnantiam considero, quam ipse fortasse non animadvertis; nam in titulo fatetur fidem

apostolicam et primitivam sanguine martyrum illustrem fuisse, postea vero in confessione suæ particularis fidei antiquam evertit, quia multa fidei dogmata non tantum novitia (ut ipse loquitur), sed antiquitate Martyribus æqualia vel priora, negat, novaque inducit, quibus testimonium Martyrum evacuari necesse est. Ita enim antiqui Patres contra suorum temporum novatores insurgebant.

10. *Repugnantia in dictis regis ostenditur.*

— Præsertim Nazianz., ep. 2 ad Cledonium, dicens: *O ingentem absurditatem, absconditam post Christum sapientiam nobis annunciant, id quod sane lacrymis dignum est. Nam si triginta duxerat abhinc annis fides initium sumpsit, cum quadringenti jam fere anni fluixerint a quo Christus manifestatus est: inane utique tanto tempore fuit Evangelium, inanis etiam fides nostra, frustraque Martyres martyrio perfuncti sunt, et tales tantique Antistes plebi præfuerunt, versuumque non autem fidei est gratia.* Similemque sententiam habet Tertullianus, in Præscriptionibus, c. 29, ubi contra eosdem haereticos quas iirridendo infert: *Tamdiu utique regnabit error, quandiu haereses non errant. Aliquos Marcionitas (nos dicamus Calvinistas) liberanda veritas expectabat, interea perperam credebatur.* Et post multa, tot denique martyria perperam corona-ta. Huc etiam spectat sententia Ambrosii, lib. 3 de Fide, cap. 7, ubi loquens de Concilio Nicæno, sic inquit: *Librum sacerdotalem quis nostrum resignare audeat signatum a confessoriis, et multorum jam martyrio consecratum?* Quem qui resignare coacti sunt (utique in Concilio Ariminensi), postea tamen damnata fraude signarunt; qui violare non ausi sunt, Confessores et Martyres extiterunt. Quam gravissimam sententiam ad omnia legitima Concilia, et definitiones fidei ab Ecclesia approbatas merito accommodamus. Cum in eis sit consignatus liber sacerdotalis sub ejusdem Spiritus Sancti regimine conscriptus. Præser-tim vero intentionem nostram confirmat verbum, quod subjungit Ambrosius: *Quomodo fidem eorum possumus denegare, quorum victoriæ prædicamus?*

11. *Evasio.*—Fortasse audebunt adversarii dicere, non errasse antiquos SS. Pontifices et Martyres in confessione Christi aut Trinitatis, aut aliorum mysteriorum, pro quorum de-fensione sanguinem fuderunt: errare tamen potuisse, et errasse in aliis rebus, in quibus suis opinionibus adversantur, neque esse ne-cessarium ut quidquid credebant, suo san-

guine confirmarent, sed illud tantum, pro quo oppetere mortem non dubitarunt. Sic enim Cyprianus Martyr sua morte Catholiconrum fidem illustravit, quamvis per humanam ignorantiam crederet, rebaptizandos esse ab haereticis baptizatos; hanc siquidem sententiam nullatenus suo sanguine confirmavit, nec pro ea defendenda mortuus est.

12. Rejicitur et concluditur praedictos Martyres non errasse in aliquo dogmate fidei. — Hæc tamen evasio impietatem magnam continet et temeritatem. Quia imprimis cogitari non potest Ignatium, Polycarpum, et similes sanctissimos Martyres in dogmatibus fidei errasse per haeresim aut pertinaciam, alioqui veri Martyres non fuissent, quia in haeresi non potest esse verum martyrium, ut statim subinferam: et ita suo sanguine christianam fidem non illustrassent. Hoc autem cogitare impiissimum esset, et perpetuae et universalis Ecclesiæ traditioni contrarium, et prorsus temere contra omnem historiæ fidem, et sine ullo fundamento excogitatum. Deinde nec potest in his Patribus præsumi error in dogmatibus fidei per ignorantiam, nam si culpabilis foret, repugnaret certe eorum sanctitati; si invincibilis, adeo eorum sapientiae et muneri est contraria, ut in suspicionem venire non possit. Tum quia multi eorum ab ipsiis met Apostolis, alii vero ab apostolicis viris, et Apostolorum discipulis doctrinam fidei suscepserunt. Tum etiam quia dogmata, de quibus loquimur, erant valde necessaria ad communem fidem Ecclesiæ, in qua ipsi erant gravissimi Pastores et Doctores, ut de Eucharistia, de traditionibus, de Ecclesia, ejusque potestate spirituali, ac fide infallibili, et similibus. Et ideo hæc docebant, non ut dubia, sed ut certa, neque in angulo, sed in conspectu totius Ecclesiæ, neque cum contradictione, vel aliorum Episcoporum, vel Romanæ Ecclesiæ, sed cum communi omnium consensione; ergo sine ulla dubitatione non ex ignorantia vel opinione, sed ex certa fide illa docebant, proinde in ea ^{de}, pro qua moriebantur, illa omnia comprehen debant.

13. Vendicatur Cyprianus a calumnia. — Quomobrem longe dissimilis est Cypriani causa. Nam, ut omittam, Augustinum interdum insinuare¹, eum ante mortem sententiam retractasse, illa tunc non pertinebat ad dogmata necessaria fidei, neque ab Ecclesia communiter recipiebatur, et Summi Pon-

tifices (quamvis nondum definiendo) illi contradicebant, et ideo neque ipse Cyprianus ita illi adhærebat, ut illam inter dogmata suæ fidei reputaret. Quin potius audeo dicere, contrarium dogma, quod postea definit Ecclesia, Cyprianum virtute semper credidisse. Nam, licet privata et humana opinione tunc ita sentiret, multo firmiss eredebat Ecclesiam non posse errare, et paratus erat ad relinquendam propriam sententiam, si Ecclesia contrarium definiret. Ut ex Augustino sumitur in praedicta epistola de illo dicente: *Unitatem orbis terræ, atque omnium gentium, et diligendo tenuit, et disputando defendit.* Et inferius hoc magis explicans, dicit: *Aut non sensit omnino, quod eum sensisse recitatis, aut hoc postea correxit in regula veritatis, aut hunc quasi nærum sui candidissimi pectoris cooperuit ubere charitatis, dum unitatem Ecclesie toto orbe crescentis et copiosissime defendit, et perseverantissime tenuit vinculum pacis*¹. Quasi diceret, quidquid privata opinione sentiret, semper animo fuisse subiectum regulæ Ecclesiæ; et hoc modo dicimus, ipsum sanguine suo fidem Christianæ Ecclesiæ simpliciter confirmasse.

14. In his ergo, quæ antiquissimi Pontifices et Sancti Doctores tanquam de fide certa Ecclesiæ tradiderunt sine dissensione, imo cum communi Ecclesiæ acceptatione, non potest ignorantia cogitari, alias tota eorum doctrina fluctuaret; et ideo dum pro sua fide sanguinem effuderunt, totum id, quod in hoc genere docuerunt, vel scriptum reliquerunt, eodem sanguine illustrarunt. Et propterea graviter Vincentius Lirinensis², novitates tali antiquitatì contrarias cavendas esse præmonuit: *Nam si recipientur (inquit), necesse est, ut fides beatorum Patrum, aut tota, aut magna ex parte violetur; necesse est ut omnes omnium ætatum fideles, omnes Sancti, omnes Virgines, omnes Sacerdotes, tanta Confessorum millia, tanti Martyrum exercitus, tanta populorum celebritas, et multitudo, totus postremo jam pene terrarum orbis per catholicam fidem Christi capiti incorporatus tanto sæculorum tractu ignorasse, errasse, blasphemasse, nescisse quid crederet, pronuncietur.*

¹ Ex Augustino, libr. 1 de Baptism., c. 18.

² Cap. 33.

CAPUT XX.

VEROS NOSTRORUM TEMPORUM MARTYRES NON ANGLICANAM SECTAM, SED ROMANAM FIDEM ILLUSTRASSE.

1. Sectarii non vere martyres. — Venio ad alteram partem de novis Martyribus, qui post exortum Anglicanum schisma in Ecclesia sunt perpessi, ut si forte rex Angliæ de ipsis lequi velit, catholicam etiam in hac parte sententiam defendamus. Quos enim, quæso, vocat Martyres? an eos qui in sua secta vel pro illa interfecti sunt? an potius eos qui propter fidem Ecclesiæ Romanæ a defensoribus illius sectæ occisi sunt? At de his posterioribus loqui non potest, nam illi non Anglicanam sectam, sed Romanam fidem illi contrariam illustrarunt, quia in detestationem illius sectæ mortui sunt. Imo, licet tantum pro Christo, et pro illis articulis fidei, quos Anglia recipit, a gentilibus, vel paganis interfici sint, eorum gloria in Ecclesiam Catholicam et Romanam, ac fidem ejus in qua moriuntur, redundat, et consequenter omnem hæreticam pravitatem illi contrariam condemnant. Si vero rex loquatur de sectariis propter suam pertinaciam punitis, immrito eos Martyres vocat; nam revera Martyres non sunt, sed malefactores juste castigati. Primo quidem quia, ut recte dixit Cyprianus, lib. de Unit. Eccles., *illa mors non est fidei corona, sed pena perfidie*. Secundo, quia *martyrem non facit pena, sed causa*, ut ex Cypriano refert Greg., lib. 2 Reg., Epist. 36; et tradit August., serm. 50, de Sanctis, qui est sextus de Martyribus, et latius concione 2 in Psalm. 3^t, explicans illa verba: *Ezurge, et intende iudicio meo, Deus meus, et Dominus meus, in causam meam: Non in paenam meam (inquit Augustinus), sed in causam meam, non in id quod tecum habet latro commune, sed in id quod Beati, qui persecutionem patiuntur propter justitiam: haec enim causa discreta est; nam pena similis est bonis et malis. Itaque Martyres non facit pena, sed causa*. Qui ergo propter haeresim et schisma interfici sunt, non sunt Martyres, alias latrones et malefactores omnes martyres vocandi essent, ut Augustinus ibidem late prosequitur, et epist. 50, et lib. 4 de Baptism., cap. 47, et aliis locis, quæ statim insinuabimus; specialiter vero in serm. 2 de Sanct.

Vincent.¹, rationem reddit: *Quia isti dolores tolerant pertinacia, non constantia, ritio, non virtute, præto errore, non recta ratione, diabolico possidente, non perseguente*. Quam etiam rationem optime prosequitur Chrysostomus, Orat. contra Judæos.

2. Ratione declaratur ex parte inferentis mortem. — Possumus præterea ratione morali convincere, mortem hanc pro falso errore susceptam, non esse martyrium, sive consideretur ex parte causæ, sive ex parte inferentium, sive ex parte acceptantium illum in defensionem erroris. Non quidem ex parte causæ, ut dictum est, quia illa mors non est pro Christo: *Sanguis autem effusus is tantum martyrium facit, qui pro Christi nomine funditur*, ut dixit Hieronymus, in epist. ad Philem.; initio. Qui generalius id declarat in cap. 5 ad Galat., ad fin. Neque etiam ex parte punientis, quia qui sic punit pertinacem, non id facit in odium veritatis, sed in defensionem, nec injuste persequendo personam, sed juste vendicando delictum, et pertinaciam in illo.

3. Diluitur objectio. — *Veritas martyrii ex sola morte non dignoscitur.* — Dices hoc esse, quod inter nos et hæreticos controversum est, scilicet, an sectarii, qui pro sua secta moriuntur, pro errore vel pro veritate moriantur. Respondemus hanc controversiam non posse ex sola passione mortis definiri: nam (ut proxime ex Augustino dicebam) multi pro defensione erroris mortui sunt. Et constat, sæpe homines mori pro doctrinis contrariis, quarum alteram falsam esse necesse est, et consequenter unum pro errore, alterum pro veritate pati; ergo ex sola passione discerni non potest veritas ab errore. Unde antiquum est in Ecclesia, hæreticos de suis martyribus gloriari, ut de Montanistis refert Eusebius, lib. 5 Histor., c. 18, et de Donatistis Augustinus, ep. 50 et 68; et Epiph. refert, quosdam hæreticos dictos esse martyrianos, quia de numero suorum martyrum valde gloriantur. Nequé solum hæretici, sed etiam ethnici et philosophi vel pro suis falsis religionibus, vel propter rempublicam, vel aliam causam humanam, et præsertim propter gloriam hominum, mortem pertinacissime tolerarunt²; ergo mors audacter tolerata non discernit causam, sed ex causa dijudicanda est. Et eadem ratione mors per se non est signum

¹ Est 9 inter 17 a Parisiensibus additos.

² Vide Tertull. in Apolog., c. 5.

erroris, aut veritatis. Igitur illa controversia ex aliis principiis dirimenda est. Hoc autem egimus in capitibus præcedentibus; ostendimus enim Anglicanum schisma errare a veritate in his omnibus, in quibus ab antiqua fide catholica et Romana defecit; ergo mors inficta propter talem defectionem, et pertinaciam in illa, non est veritatis persecutio, sed erroris correctio, et justa punitio.

4. *Probatur ex parte acceptantis.* — Præterea si ex parte suspicentium hæc poena consideretur, nunquam potest martyrium reputari. Quia vel isti patientur recognoscentes errorem, et confitendo delictum, et tunc potius præbent testimonium veritati quam errori, non tamen per martyrium, sed per piam justamque confessionem ac pœnitentiam. Vel moriuntur isti negando delictum, et ficte ore confitendo fidem, occultando errorem quem in corde retinent, et sic nec sunt martyres veræ fidei, quam non credunt, nec pro illa moriuntur, neque sunt testes sui erroris, quem ore non confitentur, sed negant. Vel denique moriuntur propter pertinaciam in suo errore, eligentes potius mori quam illum retractare, et talis etiam mors non potest esse martyrium, quia a pia et recta voluntate non procedit, quam verum martyrium requirit. Unde Sancti ac veri Martyres magna ratione ac prudentia mortem pro sua fide subierunt, quia etiam humano ac morali modo certi esse poterant, illam solam fidem esse secundum rectam rationem credibilem; at vero isti sectarii imprudentissime ac omnino temere pro suis privatis sectis ac opinionibus moriuntur. Quæ enim ratio aut prudentia patitur, in rebus gravissimis et ad religionem pertinentibus, propter unius vel alterius hominis, interdum vitiosi et pessimi, persuasione, relinquere antiquam fidem consensu Ecclesiæ per totum orbem diffusæ receptam, et divinis signis ac miraculis roboratam, ac denique Sanctorum, sapientissimorum hominum sanguine illustratam? Profecto moraliter evidens est imprudentissimum esse ac plane temerarium, propter talem causam mortem sponte subire; ac proinde illam non esse animi fortitudinem, nec ex affectu divinae charitatis procedere, quia charitas semper prudenter operatur. Est ergo animi pertinacia, non martyrium, quod, ut recta docet Theologia, actus est studiosus et prudens, a charitate fortitudinem imperante procedens. Legatur in simili causa Optat., lib. 3 contra Parmen., versus fin.

5. *Hæretici, licet pro defendenda aliqua fidei veritate patientur, non sunt vere martyres.* — Ulterius, in hujusmodi hominibus ab Ecclesia Catholica separatis, non solum mortem pro suis erroribus, sed etiam pro aliqua veritate, quam retinent, susceptam, non esse martyrium demonstratur. Est enim notanda doctrina Augustini, lib. de Patientia, c. 26 et 27, ubi tacite distinguit, duobus modis posse schismaticum vel hæreticum pati pro sua fide, scilicet, vel ne abneget errorem, vel ne deserat Christum, seu aliquid aliud quod ex fide catholica retinuit. De priori modo passionis diximus hactenus, quia in illo evidens est, non solum non esse martyrium, verum etiam neque actum ullo modo bonum, sed imprudentissimam temeritatem. De posteriori autem modo dicit quidem idem Augustinus, patientiam illam esse laudabilem, quia minus malum est, non negare Christum, etiamsi in illum non perfecta fide credatur. Imo etiam addit, fortitudinem illam esse donum Dei, quamvis non sit ex illis donis quæ sunt propria filiorum, sed ex his quæ servis communicantur. Hinc ergo dicimus mortem illam non esse martyrium, quia martyrium est donum justorum, et infallibiliter perducit ad gloriam, juxta illud Matth. 10: *Omnis qui confitebitur me coram hominibus, confitebor et ego eum coram Patre meo, qui in cælis est;* mors autem illa non perducit ad gloriam, nam sine fide impossibile est placere Dæo, ad Hebr. 11; et quia qui fide caret, charitatem non habet; de illo autem dixit Paulus, 1 ad Cor. 13: *Si tradidero corpus meum, ita ut ardeam, charitatem autem non habuero, nihil mihi prodest.* Quam rationem attigit Augustinus, lib. 4 de Baptism., c. 7; et Cyprian., lib. de Unit. Eccles., dicens, *maculam hæresis neque sanguine ablui*, et iterum: *Inexplicabilis culpa nec passione purgatur.* Et ep. 73, versus finem: *Hæretico, nec baptisma publicæ confessionis et sanguinis proficere ad salutem potest.* Ad quas sententias Cypriani videtur alludere Chrysostomus, hom. 41 ad Ephes., in parte morali, in princ., dicens: *Dixit autem vir quidam sanctus quiddam, quod magnam præ se fert audaciam, sed tamen est elocutus. Quid hoc est autem?* *Dixit, nec sanguinem quidem martyrii posse delere hoc peccatum,* utique dividendi Ecclesiam per schisma vel hæresim. Addit vero ipse Chrysostomus in confirmationem ejusdem sententiae: *Nam dic mihi, quamnam ob causam es Martyr? An non propter Christi gloriam?* Qui pro

Christo animam prodegisti, quid popularis Ecclesiam, pro qua Christus suam profudit animam?

6. *Prima ratio.* — Item est ratio generalis, quia extra Ecclesiam non est salus, ut in superioribus dictum est, et est axioma commune Sanctorum Patrum; sed martyrium non separatur a salute; ergo extra Ecclesiam non potest esse verum martyrium. Ita fere colligit Fulgentius, de Fide ad Petrum, c. 37, 38 et 39; et August., epist. 204, dicens: *Foris ab Ecclesia constitutus, et separatus a compage unitatis, et rinculo charitatis, aeterno supplicio punireris, etiamsi pro Christi nomine virus incendereris.* Idem optime Pacian., epist. 2 ad Sympronian., ubi passionem Donati pseudomartyris, cum martyrio Cypriani confert, consentanea ad doctrinam ejusdem Cypriani., qui ep. 52, circa medium, loquens de illo, qui ab Ecclesia ad haereticos vel schismaticos transit, inquit: *Et si occisus propter nomen (utique Christi) postmodum fuerit, extra Ecclesiam constitutus, et ab unitate et charitate divisus, coronari morte non poterit*, ubi aperte loquitur de modo passionis, de quo nunc tractamus. Et idem repetit in fine epistolæ, et in 54, ubi recte etiam ait: *Idoneus non potest esse ad martyrium, qui ab Ecclesia non armatur ad prælium; et mens deficit, quam non recepta Eucharistia erigit et accedit.* Et in expositione Orationis Dominiæ aliam rationem indicat, dicens: *Nec sacrificium Deus recipit dissidentis; et affert illud Matth. 5: Vnde prius reconciliari fratri tuo.* Et inferius aliam indicat his verbis: *Non potest esse cum Christo, qui imitator Judæ maluit esse quam Christi.*

7. *Secunda ratio.* — Aliam rationem insinuat Augustin., lib. 1 de Sermone Domini in monte, c. 5. Quia Christus non absolute dixit fore beatos, *qui persecutionem patiuntur*, sed addidit, *propter justitiam*: *Ubi autem (ait Augustinus) sana fides non est, non potest esse justitia, quia justus ex fide vivit.* Quæ ratio in omni haeretico procedit, sive pro errore, sive in errore pro aliqua veritate moriatur. Et potest ita explicari, quia qui in uno pertinaciter errat, licet aliquid credat, non tamen sieut oportet neque christiana fide credit, et ita fides ejus ad justitiam non pertinet; ideoque licet propter veritatem, ut a se creditam, vel potius suo sibi electam judicio patiatur, non propter justitiam persecutionem patitur. Et hoc etiam mihi videtur significasse Augustinus, tract. 6 in Joan., circa finem, ubi intro-

ducit jactantem Donatistam: *Ecce nos multa mala patimur; cui ille: Hæc si pro Christo pateremini, non pro honoribus vestris. Patiuntur molestias, sed pro Donato, non pro Christo. Vide quomodo patiaris, nam si pro Donato pateris, pro superbo pateris.* Quæ verba licet maxime quidem in eum convenient, qui pro suo errore vel magistri sui haeretici patitur, nihilominus vera etiam sunt, quocumque modo haereticus pro sua fide patiatur; quia licet contingat esse verum et alias catholicum dogma pro quo patitur, si tamen haereticus Calvinista sit, non pro Christo, sed pro Calvinio patitur, quia licet Christum credat, non Christo, sed Calvinio credit, vel certe sibi ipsi, si proprio iudicio eligit, quid sibi credendum sit.

8. *Hæreticus etiam pro Christi confessione mortuus, neque martyrium consequitur, neque fidem illustrat.* — Atque hoc etiam ex eodem Augustino desumere mihi videor in serm. 117 de Diversis, ubi proponit dubium, quomodo stet illa sententia: *Omnis homo mendax*, cum certo testimonio Martyrum, qui homines fuerunt: *Martyres enim (inquit) veraces fuerunt, quia pro veritate mortui sunt; ideo enim sunt Martyres, quia pro veritate passi sunt;* ergo si illi veraces fuerunt, non omnis homo mendax. Respondet hominem esse mendacem, cum de suo loquitur; martyres autem non de suo fuisse locutos, sed de Spiritu Dei, et ideo non tam ipsos, quam Spiritum Dei in eis loqui, juxta illud Matt. 10: *Non enim vos estis qui loquimini, sed Spiritus Patris vestri, qui loquitur in vobis;* et inde habere testimonium eorum, ut certum sit. Quibus nos addimus, quoties haereticus loquitur, licet easu contingat verum loqui, semper de suo loqui, quia suo spiritu ducitur, suamque privatam opinionem defendit vel profitetur, ideoque dicimus, testimonium illius natura sua fallax esse, quamvis in uno vel altero dogmate verum esse contingat. Ac proinde licet haereticus pro confessione Christi moriatur, testimonium ejus fidem Christi neque illustrat, neque confirmat; mors igitur propter talem confessionem neque martyrium est, nec martyrii nomen meretur. Quod ergo rex Angliæ dicit, se defendere fidem sanguine martyrum illustrem, si de iis pseudomartyribus, quos protestantes Martyres vocant, intelligatur, subsistere nullo modo poterit, sive ad veram Christi fidem, sive ad Anglicanam sectam referatur.

9. *Multos hujus temporis Catholicos marty-*

rio apostolicam fidem collustrasse ostenditur. — Fuerunt sane nostra ætate multi viri Sancti et Catholici, tum in aliis locis, tum maxime in Anglia, qui pro sua fide constans decertarunt, de quibus verissime dicitur, suo sanguine fidem catholicam et apostolicam illustrasse, quia longe diversa a Protestantibus est eorum conditio, causa, vita, et modus moriendi pro Christo. Sicut enim ab illis in his omnibus longissime distant, ita Martyres antiquos præclarissime imitati sunt, ideoque veri Martyres fuerunt, suoque sanguine fidem Romanam illustrarunt. Nam imprimis cathelicam et apostolicam fidem semper retinuerunt, et intra Christi Ecclesiam, cui in pace et obedientia fuere conjuncti, passi sunt. Deinde pro eadem Ecclesia, ejusque fide et obedientia, atque adeo propter justitiam persecutionem sustinuerunt. Neque aliam ob causam (etiamsi adversarii, ad Martyrum gloriam occultandam, alias temporales et humanas confingant) carceres, tormenta et acerbissimas mortes passi sunt. Cujus rei non leve signum est (quod in simili consideravit Eusebius, lib. 3 Histor., c. 9), quia licet nulla in re alia rempublicam offendissent, imo potius aliquando essent moribus et innocentia vitae præclari, una confessio Romanæ fidei, et obedientia Papæ ita animos persequentium accedit, ut eos asperius quam alios sceleratissimos punirent. Cum tamen (sicut a fide dignis audivimus), si contingat aliquem in ea confessione deficere, et suis judicibus in falsa religione consentire, etiamsi propter alia delicta dignus sit morte, illi facile condonentur ac remittantur.

40. *Ex m-d patiendi catholicorum martyrum comprobatur.* — Denique, quod ad modum patiendi spectat, non possunt nostri Martyres alicujus inconstantiae vel imprudentiae argui, quia non proprio judicio, sed publico totius orbis ducuntur, et antiquam fidem retinent, et veterum Sanctorum ac Martyrum vestigia sequuntur, multique inter eos inventi sunt vita, sanctitate, maturitate judicii, eruditione ac prudentia illustres, paratique ad suæ fidei rationem reddendam; sed, cum in animis obduratis et in catholicam tñdem obfirmatis nihil proficerent, magna alacritate et patientia tormenta et mortem sustinuerunt. Hi ergo Martyres, licet novi, antiquam vere fidem illustrarunt, novam autem Anglicanam sectam potius redarguerunt et confuderunt, ideoque neque propter hos Martyres potuit rex Angliæ in suo titulo illa verba

proponere, cum ipse non antiquam fidem, sed Anglicanam sectam defendat.

CAPUT XXI.

ANGLICANAM SECTAM, VEL PROPTER SOLAM SCHISMATICIS TURPITUDINEM, DETESTABILEM ESSE.

1. *Ab hæresis nota se vindicare studet rex Jacobus.* — Postquam rex Angliæ in suæ Præfationis initio rationem vel occasionem sui operis late proposuit, multis interpositis, quæ ad hunc locum non pertinent, totis viribus se a labe et nota hæresis excusare conatur, vel propter vitandam tanti criminis infamiam, vel ut suum defensoris catholicæ fidei nomen tueatur. Ego vero, ne cum rege contendere, aut ejus personam velle offendere videar, de causa ipsa loquar, eamque generatim tractando, ostendam imprimis initium Anglicanæ defectionis et separationis ab Ecclesia, crimen propriissimi et gravissimi schismatis fuisse. Deinde vero per diuturnitatem et pertinaciam in manifestam hæresim transvisse, monstrabo. Ex quo facile constabit, nullum hominem christianum seu baptizatum, cujuscumque conditionis seu status sit, illi sectæ, ejusque erroribus pertinaciter adhaerentem, posse non solum salutem assequi, verum etiam nec ab hæresis crimine excusari. Et quoniam rex de apostata nomine simul conqueritur, quid in eo puncto quoad apostasiæ nomen et culpam sentiendum sit, in sequentibus etiam dicam.

2. *Anglicanum lapsus gravissimum schisma fuisse, ex etymologia vocis ostenditur.* — Quod ergo ad primum punctum attinet, non magna probatione indiget. Nam qui factum ipsum, et initium Anglicani lapsus, prout cap. 4 a nobis relatum est, consideraverit, et vulgarem doctrinam de culpa schismatis, ejusque discriben ab hæresi a Patribus et Theologis traditum, non ignoraverit, facile intelliget lapsus illum Anglicanum per gravissimum schisma incepisse. Schisma enim, generali significacione juxta vocis etymologiam, dissensionem, ac moralem quamdam divisionem indicat, per antonomasiam autem jam proprie significat divisionem Ecclesiæ Catholicæ per spontanciam separationem ab illa, sub Christiano nomine particularem congregationem, seu conventiculum extra Ecclesiæ unitatem, communionem, et obedientiam congregando. Ita fere schisma definiunt D. Thomas¹ et Theo-

¹ D. Thom. 2. 2, quæst. 39, art. 1.

logi, imo etiam jurisperiti, fuitque sententia antiquorum Patrum, quos statim referam; habetque in Scriptura fundamentum. Nam in illa schisma significare solet divisionem judiciorum, ut Joan. 9, ubi dicentibus quibusdam: *Non est hic homo a Deo*; alii vero: *Quomodo potest homo peccator hæc signa facere?* additur: *Et schisma erat inter eos.* Haec autem judiciorum diversitas solet esse quasi inchoatio schismatis, quod in animorum et concordiae divisione consummatur. Et quando est in materia religionis, tunc maxime schisma vocatur. Sic usurpatur a Paulo 1 ad Cor. 1: *Fidelis (inquit) Deus, per quem vocati estis in societatem filii ejus Iesu Christi Domini nostri.* Et statim quasi exhortans ad servandam unitatem hujus societatis: *Obsecro vos, fratres, per nomen Domini nostri Iesu Christi, ut id ipsum dicatis omnes, et non sint in vobis schismata.* Quod magis de divisione contra unitatem Ecclesiæ declaravit, cap. 12 dicens: *Ut non sit schisma in corpore, sed id ipsum pro invicem sollicita sint membra.* Ubi licet loquatur de naturali corpore hominis, tamen illud adducit ad declarandum quid servandum sit in corpore Ecclesiæ, de quo concludit: *Vos autem estis corpus Christi, et membra de membro.*

3. *Duo genera schismatum traduntur.* — *Schisma et parasyntagoga quid?* — Possunt autem in Ecclesia distingui duo genera schismatum, juxta doctrinam Basilii, ep. 1 ad Amphiloc., can. 2, quam sequitur etiam Theodorus Studites, in epist. 4, ad Naucratium., ubi tria membra distinguunt, hæresim, schisma, et parasyntagogam: *Hæreses (inquit) sunt, quæ omnino abruptæ, et adversus ipsam fidem sunt alienatæ; schismata, dissensiones eorum, qui propter aliquas causas ecclesiasticas, et quæstiones medicabiles inter se dissident. Parasytagogæ sunt congregations quæ a recusantibus parere Presbyteris, vel Episcopis, vel populis insolentibus, sunt.* Omissio autem nunc primo membro, alia duo indicant duo genera dissensionum inter membra Ecclesiæ: unum privatum, alterum magis publicum: prius sistit in privatis contentiobus et inimicitiis; posterius vero usque ad publica conventicula, et quasi ecclesias diversas faciendas procedit. Piores ergo dissensiones vocarunt dicti Patres schismata, posteriores autem parasytagogas. Jam vero piores discordiæ generale nomen dissensionum retinuerunt, et nomen schismatis ad aliud genus divisionis Ecclesiæ per privata

conventicula significanduni usurpatum est, et ita in præsenti sumitur, omissa voce parasytagogæ, quæ jam in usu non est.

4. *Per separationem ab Ecclesia, etiam absque defectione a fide, schisma committitur.* — *Hæresis necessario schisma includit, non vero e converso.* — *Tempora orthodoxorum fidelium nomen catholicum retainent.* — Sic ergo manifestum est schisma committi per separationem ab Ecclesiæ unitate, charitati ejus contraria, etiamsi in dogmatibus dissensio nondum intercedat. Ita dixit Hieronymus in verba illa ad Titum 3: *Hæreticum hominem post unam, et alteram correptionem devita: Inter hæresim, et schisma hoc interesse arbitramur, quod hæresis perversum dogma habet, schisma propter episcopalem dissensionem ab Ecclesia pariter separat, quod quidem in principio aliqua ex parte potest intelligi diversum ab hæresi.* Cur autem dicat, *in principio*, in puncto sequenti declarabo. Dicit autem *aliqua ex parte*, quia hæresis schisma necessario involvit; maxime enim Ecclesiam dividit, quia, disvisa fide, non potest unitas charitatis non scindi, sicut amissa fide, non potest charitas non amitti; at vero e converso schisma potest ab hæresi separari, sicut protest charitas sine fine amitti. Sicut olim Meletius schismaticus fuit, et non hæreticus; nam ut refert Epiphan., secta 68, semper rectæ filei fuit: *Non enim (inquit) immutata est fides ipsius in aliquo tempore a Sancta Catholica Ecclesia.* Quia vero adversus Petrum, Alexandriæ Episcopum, et sibi superiorem, propriam congregationem fecit, et Ecclesiam divisit, schismaticus habitus est. Observarique obiter potest, cum Ecclesias proprias ædificarent Meletiani, et successores Petri antiquas obtinerent, semper antiquas Ecclesias retinuisse nomen Catholicæ Ecclesiæ, alias vero vocatas esse Ecclesias martyrum. Nam novum schisma novo nomine indiguit.

5. *Schisma Donatistarum.* — Simile fuit in principio schisma Donatistarum, propter ordinationem Cæciliani in Carthaginensis Ecclesiæ Episcopum contra Donati voluntatem, ut sumitur ex August., lib. de Hæresib., hæres. 69. Unde idem August., lib. 2 contra Cresconium, c. 7, sic inquit: *Quanvis inter schisma et hæresim magis eam distinctionem approbem, qua dicitur schisma esse recens congregationis ex aliqua diversitate sententiarum dissensio, neque enim schisma fieri potest, nisi diversum aliquid sequantur, qui faciunt; hæresis autem schisma inveteratum;* tamen cum

*me adjuvent definitiones tuæ, schismaticos vos
liventius, quam hæreticos dicerem. Cresco-
nius enim schisma recognoscet, hæresim
vero negabat, quia non erat diversitas, ut il-
le aiebat, in doctrina¹, quod facile Augustini-
nus acceptat, quamvis postea etiam ostendat
schisma illud in hæresim transivisse. Quod
vero ait, schisma non esse sine diversitate
sententiarum, intelligendum generaliter est,
quia dissensio animorum non est sine diver-
sitate opinionum; non autem accipiendum id
est de sententiis diversis in dogmatibus ca-
tholicæ fidei, quod ex aliis locis Augustini
manifestum est. Nam lib. 1 de Fide et Sym-
bolo, c. 10, dicit: *Hæretici et schismatici
congregationes suas ecclesias vocant; sed hæ-
retici de Deo falsa sentiendo, ipsam fidem
violent; schismatici autem discussionibus ini-
quis a fraterna charitate dissiliunt, quam-
vis ea credant quæ credimus.* Et lib. Quæstio-
num Evangelicar., ex Matt., q. 44: *Solet (in-
quit) quæri, schismatici quid ab hereticis dis-
tent, et hoc inveniri, quod schismaticos non fi-
des diversa faciat, sed communionis disrupta
societas.* Idemque late tradit Optat., lib. con-
tra Parmenianum.*

6. *Henricum VIII schismaticum fuisse
concluditur.* — Ex hoc ergo certo principio, et
ex facto supra narrato de Anglicano lapsu,
aperte concluditur Henricum VIII schismati-
cum fuisse. Hæreticum enim ipsum fuisse,
saltem in principio, nobis non constat, quia
non propter mentis deceptionem, sed alia
turpi et erubescenda occasione Pontifici
Summo obedientiam negavit, seque et re-
gnu suum, quantum potuit, ab Ecclesiæ Ro-
manæ unitate separavit. An vero hæreticus
etiam fuerit, infra attingemus, nunc enim ne-
cessarium non est. Nam quidquid in mente
senserit, satis est quod vel propter solam
concupiscentiam practice erraverit, et Eccle-
siam seiderit, ut schismaticus evaserit, imo
auctor gravissimi schismatis, in quod tum
auctoritate et exemplo, tum maxime timore
ac violentia muitos alias ire cogit. Ita ergo
hoc vitium Anglicanam gentem occupare coe-
pit, et ita a parentibus ad filios derivatum est,
ut usque in præsentem diem perseveret.

7. *Ab schismatis labe se liberare minime
studet rex.* — Quamobrem neque ipse rex Ja-
cobus se ab hoc crimen purgare studuit; imo
quasi contempnere, et pro nihilo ducere vide-
tur, dum pag. 58 dicit: *Schismaticum me di-*

*cant licet. et a Romana Ecclesia defecisse,
certe hæreticus esse nullo modo possum. Nos
autem e converso dicimus, licet hæreticum
se esse neget (quod nunc nundum tractamus),
negare non posse se esse schismaticum, cum
et baptizatum esse in suamet præfatione fa-
teatur, et sciens ac videns inchoatum schis-
ma non solum conservet, verum etiam magna
contentione et totis viribus potentiae suæ pro-
pagare studeat. Considerare autem debet, in
oculis Dei non multum distare schisma ab
hæresi; Augustinus enim, lib. 1 de Serm.
Domini in monte, cap. 5, illa duo æquiparat
dicens: *Multi hæretici, nomine christiano ani-
mas decipientes, multa talia patiuntur, sed
ideo excluduntur ab ista mercede, quia non
tantum dictum est: Beati qui persecutionem
patiuntur; sed additum est, propter justitiam.*
*Ubi autem sana fides non est, non potest esse
justitia. Neque schismatici aliquid sibi ex ista
mercede promittant, quia similiter ubi charitas
non est, non potest esse justitia. Dilectio enim
proximi malum non operatur. Quam si habe-
rent, non dilaniarent corpus Christi, quod est
Ecclesia.* Et quod gravius est, in libro de Vera
Religione, cap. 6, non solum hæreticis, sed
etiam paganis et Judæis schismaticos annu-
merat, dicens: *Neque in confusione pagano-
rum, neque in purgamentis hæreticorum, ne-
que in languore schismaticorum, neque in ætate
Judæorum quærenda est religio, sed apud eos
solos, qui Christiani, Catholici seu orthodoxi
nominantur, id est, integritatis amatores, et
recta sectantes.**

8. *Quid Chrysostomus de schismate sentiat.*
— Accedat S. Chrysostomus, qui delictum
schismatis ita exaggerat, ut illud cum peccato
crucifigentium Christum conferat, dicens:
*Nihil Deum aequa irritat, atque divisam esse
Ecclesiam, etiamsi bona fecerimus innumerabili-
lia, non minores quam qui ejus corpus di-
scindunt penas dabimus, qui plenum ecclesias-
ticum conventum discindimus.* Loquitur autem
in priori parte de corpore Christi vero. Unde
subdit: *Nam illud quidem factum est ad lu-
crum orbis terrarum, etsi non eo animo; hoc
autem nullam usquam habet utilitatem, sed ex
eo damni est plurimum.* Et addit verba tam
regi et consiliariis ejus, quam subditis con-
sideranda: *Hæc dicta sunt, non solum ad eos
qui gerunt magistratus, sed etiam ad eos qui
ab illis reguntur.* Et postea significat hoc cri-
men esse hæresi periculosius, fortasse quia
solet esse initium hæresum, et ideo maxime
necessarium est in initio illud cavere, et quasi

¹ Aug., cap. 4.

ad radicem securim ponere. Ait ergo: *Hæc a me dicta sunt de iis, qui se dedunt indiscriminatim iis qui scindunt Ecclesiam, nam si dogmata quidem habent contraria, vel propter hoc ipsum, non conveniebat cum illis miseri; sin autem eadem sentiunt, multo magis. Quare? Quoniam est morbus ambitionis, et amoris imperii, et gerendi magistratus.* Denique Optatus Milevit., lib. 1 cont. Parmenianum, *ingens flagitium*, schisma vocat, et inferius ait: *Schisma summum malum esse, et vos negare minime poteritis.* Et loquitur ad Donatistas, sibi autem etiam esse dictum Anglicani intelligent, cum nec rationem diversam, nec verisimilem excusationem afferre possint.

9. *Schismatici nomen rex Jacobus jure detrectare non potest.* — *Afferuntur Beda et Optatus.* — At enim fortasse rex Jacobus negabit se esse schismaticum, neque enim in verbis suis dicit: *Licet schismaticus sim, sed: Licet dicant me esse schismaticum, idque non simpliciter, sed cum addito quod adjungit, et a Romana Ecclesia defecisse.* Interrogo vero an saltem cum hoc addito vere vel falso dicatur schismaticus ab Ecclesia Romana. Certe affirmare non potest dictum hoc esse falsum, quia ex facto ipso publico et notorio id evidenter probatum est. Quod si rem adeo claram negare non audet, sciat additionem illam non minuere delictum, sed augere, vel (ut ita dicam) in supremo gradu schismatis illud constituere. Nam si verum est quod Hieronymus dixit, schisma constitui per separationem ab Ecclesia propter *Episcopalem dissensionem*, ergo schisma constitutum propter dissensionem a Summo Pontifice, omnium Episcoporum Pastore, merito dicitur non solum simpliciter schisma, sed etiam ex suo genere maximum. Nam, ut recte dixit Beda, homil. de Sanet. Petro et Paulo: *Beatus Petrus, qui Christum vera fide confessus, vero est amore secutus, specialiter claves regni cœlorum, et principatum judicariæ potestatis accepit, ut omnes per orbem credentes intelligant, quia quicumque ab unilate fidei, vel societatis illius quolibet modo semetipsos segregant, tales nec vinculis peccatorum absolvi, nec januam possint regni cœlestis ingredi.* Ubi nomine *Petri* sine ulla dubitatione cathedram ejus intelligit, et *societatem illius*, vel Ecclesiam, vel unionem cum sede Petri vocat; ergo segregari ab hac societate, ad constituendum schisma censem esse sufficiens. Idem si recte expendatur, sensit Optatus Milevit., lib. 1 cont. Parmenian., col. 5, ubi, ut probet Par-

menianum fuisse schismaticum, non Cœciliatum, sic inquit: *Non enim Cœcilianus exivit a Majorino aro tuo, sed Majorinus a Cœcilio, nec Cœcilianus recessit a cathedra Petri, vel Cypriani, sed Majorinus, cuius tu cathedram sedes, quæ ante ipsum Majorinum originem non habebat.* Supponit ergo illum esse schismaticum, qui recedit a *cathedra Petri*; addit autem, *vel Cypriani*, quia interdum potest schisma fieri per separationem a proximo Episcopo, novam cathedram sine origine introducendo. Et addit, quod præsenti instituto maxime servit: *Cum hæc ita gesta esse manifeste constet, et vos hæredes esse traditorum et schismaticorum evidenter appareat.* Sic ergo nos ex facto Anglicano evidenter concludimus, Henricum VIII, qui cathedram Petri deseruit, et novam sine origine erexit, schismaticum fuisse, ejusque hæredes eum imitantes in eodem schismate perseverare.

10. Praeterea in superioribus ostensum est Ecclesiam Romanam et Catholicam eamdem esse, illisque cognominibus tantum diversas proprietates, seu habitudines ejusdem Ecclesiæ significari; dicitur enim Christi Ecclesia Catholica, quatenus universalis est: Romana autem vocatur, quatenus in sede Petri fundata illi semper conjuncta est; ergo idem est etiam schisma ab Ecclesia Catholica et a Romana; ergo si rex negare non potest separationem Angliæ esse schisma ab Ecclesia Romana, vitare non potest quin sit etiam gravissimum schisma ab Ecclesia Catholica. Et sane qui lapsum Henrici, et divisionem ejus ab Ecclesia consideraverit, illumque cum schismate Donati, et aliis antiquis contulerit, omnino eamdem vel majorem rationem schismatis ab Ecclesia Catholica in illo inveniet, neque verisimilem rationem diversitatis poterit cogitare. Nisi fortasse fingendo cum hæreticis, universalem Ecclesiam, quæ olim erat Catholica, tempore Henrici jam fuisse collapsam et extinctam. Sed hoc vanum et voluntarium refugium satis ex Scripturis sanctis, et communi sensu antiquorum Patrum refutatum est supra. Indubitanter ergo sciat rex se esse ab Ecclesia Catholica separatum, cum nullo colore id negare vel occultare possit, vehementerque timeat Augustini sententiam dicentis: *Quisquis ab hac Catholica Ecclesia fuerit separatus, quantumlibet laudabiliter se vivere existimat, hoc solo scelere, quod a Christi unitate disjunctus est, non habebit vitam, sed ira Dei manet super eum,*

CAPUT XXII.

ANGLICANUM SCHISMA IN MANIFESTAM HÆRESIM ET
APOSTATICAM DOCTRINAM TRANSIISSE.

*1. Anglicanam sectam in plures hæreses prorupisse, auctoritate Patrum ostenditur. — Experientia eadem veritas roboratur. — Quoniam rex Angliæ plus uomen hæresis quam schismatis abhorre videtur, ostendendum a nobis ulterius est, eo demum Anglicanum schisma pervenisse, ut non in unam tantum, sed in plures et manifestas hæreses proruperit. Hoc imprimis probamus ex quadam verissima Sanctorum Patrum doctrina, dicentium, schisma diuturnum in hæresim transire. Sic Hieronymus, dicto loco ad Titum 3, dixit, in principio posse intelligi ex parte diversum ab hæresi : *Cæterum (addit) nullum schisma non sibi aliquam confignit hæresim, ut recte ab Ecclesia recessisse videatur.* Et propterea dixit Augustinus, lib. 2 contra Cresconium, c. 7, *hæresim esse schisma inverteratum*, quia solent, ut dixi, hæretici propter aliquam controversiam, vel indignationem, aut cupiditatem non expletam, aut ambitionem non obtentam, ab Ecclesia in principio separari, quoad obedientiam et unionem; postea vero, ut in schismate perseverare possint, ad hæresim transire. Quod exemplis ab antiquitate pœnitentis quasi inductione quadam facile ostendi posset, ut de Novato passim legimus apud Cyprianum et Augustinum, qui ep. 164 ad Emeritum, ad illos ait : *Neque vobis objicimus, nisi schismatis crimen, quod etiam hæresim male perseverando fecistis.* Sic etiam de Meletii secta refert idem Augustinus, lib. de Hæres., ad Arianos tandem transiisse, quamvis in principio tantum schisma fuerit, quod nunc etiam Anglis accidit. In principio enim, cum Henricus neque Lutherum, neque Calvinum secutus fuerit, schismatici, ab ipso facti, post non multum tempus ad Calvinistas transierunt.*

2. Duplex ratio prædicti experimenti assignatur. — Ratio autem hujus experimenti duplex reddi potest. Una, quam tetigit Hieronymus, quia perseverantes in suo schismate, statim (quod naturale est) factum suum et audaciam honestare ac defendere cupiunt; et ideo ad hæresim declinant, qua possint factum illud honestare, vel laudando ut bonum quod pravum est, vel negando esse faciem, quod præceptum est; vel (quod in idem

redit) negando esse præceptum, quod ab Ecclesia Catholica traditum est. In quibus omnibus modis et aliis similibus, hæresis involvitur. Quia licet operari malum, quod lex Christi prohibet, non sit hæresis, sentire tamen cum pertinacia non esse malum, quod fides docet esse prohibitum, hæreticum plane censendum est. Altera ratio est, quia licet schisma in rigore distingui seu præscindi possit ab hæresi, adeo tamen est illi affine et propinquum, ut si perseveret, facile in illud transmutetur. Unde Ambrosius, lib. de Obitu Satyri, narrans Satyrum post naufragium, Ecclesiam quæsiisse, in qua Deo pro liberatione gratias ageret, et advocasse ad se Episcopum, cumque interrogasse, *utrumnam cum Episcopis catholicis, hoc est, cum Romana Ecclesia conueniret*, subjungit inferius, postquam Satyrus intellexit illum Episcopum esse schismaticum, noluisse ibi gratias agere, neque cum illo communicare, quia licet ille Episcopus esset hæres Luciferi schismatici, et non hæretici (ut significat) nihilominus (ait) *non putavit lamen fidem esse in schismate; nam etsi fidem erga Deum tenerent, tamen erga Dei Ecclesiam non tenebant, cuius patiebantur velut quosdam artus et membra lacerari.* Etenim cum propter Ecclesiam Christus passus sit, et Christi corpus Ecclesia sit, non videtur ab his exhiberi Christo fides, a quibus evanescatur Christi passio, corpusque distrahitur. Quod ita interpretor, schismaticum scilicet in principio agere contra fidem quam Ecclesiæ debet, practice, seu opere ipso, vel certe agere contra fidem, id est, fidelitatem et obedientiam, quam debet Ecclesiæ; postea vero, ut in suo schismate perseveret, etiam negare Ecclesiæ illam fidem, quæ consistit in credendo ipsam Ecclesiam esse unicam Christi sponsam, columnam et firmamentum veritatis. Qui transitus facillimus est : nam si Paulus ad Timot. seripsit, repellentes bonam conscientiam, circa fidem naufragavisse, quanto facilius credendum est id accidere in pertinaci schismate contra Christi Ecclesiam. Merito ergo timuit, vel non putavit Satyrus fidem esse in schismate.

3. Schisma charitati per se opponitur, et diuturnitate tenebras menti offundit. — Accedit quod schisma proxime oritur ex aliquo odio proximorum. Nam, licet ex contentione aliqua, vel ambitione, vel inordinata cupiditate, vel invidia, oriri soleat, ut Patres tradunt, et experientia docet, proprie tamen et per se charitati opponitur, quæ Ecclesiæ Christi de-

belur, et ideo odium proximi includit; hoc autem odium, perseverando in schismate, nutritur et augetur, et ita facile inducit in mentis cætitatem atque ad hæresim, juxta mentem Augustini in illud 1 Joan. 2 : *Qui odit fratrem suum, in tenebris ambulat, et nescit quo tendat, quia tenebre obcæcaverunt oculos ejus.* Quæ verba de schismaticis interpretatur Augustinus ibi, tract. 1, dicens illos ita excæari ex odio veræ Ecclesiæ, ut illam non videant, et *facilius illuc faciem impingant, quam illuc habitaculum querant.* Sic etiam dixit Optat., l. 1 contra Parmenia. : *Schisma sparso coagulo pacis dissipatis sensibus generatur labore, nutritur aëmulatione, et litibus roboratur, ut deserta matre catholica, impii filii dum foras exeunt, et se separant a radice matris Ecclesiæ, invidiæ falcibus amputati, errando rebelles abscedunt.* In quibus verbis alia etiam indicatur ratio : nam schismatici cum ab Ecclesia præscindantur, et synagogam extra illam congregent, eo ipso dedignantur Ecclesiam sequi, præsertim quando in schismate obdutati perseverant, et ideo carere incipiunt regula veritatis, ex quo necessitate quadam consequitur, ut in errores et hæreses prolabantur, vel novam inveniendo, vel alieui jam inventæ adhærendo, ut distinctum aliquid ab Ecclesia, a qua recesserunt, habere videantur. Nam si in eadem fide perseverarent, non possent novum aliquid, aut aliud agere, nisi quod jam dudum apud suam didicerunt matrem, ut Optatus supra dixit. Propter quod sæpe Cyprianus inde oriri affirmat *schismata et hæreses, quod sacerdoti Dei non obeditur, neque unus ad tempus iudeæ rice Christi cogitur,* ut ait ep. 55. Et in 69 addit, *congregationem perseverantem in schismate intra breve tempus carere veris Episcopis, et Pastoribus, quia cessat vera origo, successio, et ordinatio.* Unde tandem consequitur ut careat etiam vera doctrina et sanctitate; nam ad illam conservandam in unitate fidei, et vitæ sanctitatem usque ad consummationem electorum, dedit Deus Ecclesiæ suæ Pastores, et Doctores, teste Paulo ad Ephes. 4.

4. *Anglicanum schisma ad hæresim jam perrenisse ex dictis concluditur.— Schismatis defendendi causa, novam sili hæresim Henricus VIII excogitavit.* — Propositæ autem rationes evidenter in Anglicano schismate procedunt. Constat enim illud esse satis diuturnum; nam per septuaginta annos vel amplius duravit, et licet interruptum fuerit per breve reginæ Mariae tempus, statim renovatum est,

posteaque plus quam quinquaginta annis continuis duravit. Deinde cum cœperit per separationem a cathedra Petri, et negando obedientiam Summo Pontifici, licet in principio, facto tantum, ex inordinato affectu luxuriæ tentatum fuerit, postea circa jus ipsum erratum est; et doctrina introducta, qua cœpit in Anglia prædicari, Ecclesiam Christi non habere unum spirituale caput, nec Romanum Pontificem ut tale recognoscendum esse, sed in unoquoque regno, vel republiæ suprema in temporalibus esse proprium caput supremum in spiritualibus, illudque non esse aliud præter regem, vel principem temporalem, aut senatum respective. Quæ tota doctrina hæretica est, et contra Scripturam sacram, et contra perpetuum ejusdem Ecclesiæ sensum, et Patrum traditionem, ut in l. 3 ex professo ostendemus. Ita ergo (quod ad primam rationem attinet) in Henrico VIII ad litteram impletum est, quod Hieronymus dixit; nam *sibi hanc construxit hæresim, ut recte ab Ecclesia recessisse videretur.* Non enim poterat regia majestas, vel potius humana præsumptio ita pertinaciter in gravissimo facinore perseverare, nisi in aliud gravius incidendo, quo prius defenderet, et recte factum esse contenderet. Qui error ita Henrici animo adhæsit, ut non solum in illo mori non dubitaverit, verum etiam novo præcepto de filio in eodem errore educando, in aliis catholica fide retenta, illud confirmaverit. Vel certe si mente non credebat quod sic præcipiebat, in eo maxime ostendit (quod ad alteram rationem spectat) quam ingens odium contra Romanam Ecclesiam conceperat, siquidem contra mentem suam, et cum æterna morte animæ suæ, in eodem schismate mori, et illud per modum dogmatis seu doctrinæ exterius tueri, et in filio, et in regno suo perpetuo stabilire voluerit. Cum ergo Anglia in hoc puncto non solum factum, sed etiam jus usurpare, et doctrinam defendere conetur, vel ex hoc solo manifestum est sectam illam non tantum schismaticam, sed etiam hæreticam esse.

5. Post mortem autem Henrici statim Anglicanum regnum schismaticum Calvinianam sectam, quamvis fortasse non puram, sed mistam ex Lutherana, et aliis, amplexum est, et ita etiam in illo schismate, quod in secunda ratione de diuturno schismate dicebamus, et ex eisdem causis, seu radicibus, et cum eisdem effectibus seu signis hæreticis impletum videmus. Nam imprimis odium in Romanam

sedem mirum in modum in dies auctum est, et ut quotidie magis invalescat, et in animis omnium radicetur, industria dæmonis factum est, ut parentes et magistri ab infantia in puerorum animis talem de Papa conceptum seu apprehensionem imprimant, ut simplices et vulgares homines crudelem tyrannum, horrendum idololatram, ac denique monstrum quoddam, potius quam hominem, auditio Papæ nomine, concipient. Nec mirum est si communis plebs in tanto errore versetur, si quidem rex ipse, in sua Praefatione, pag. 14, affirmare audet, *Pontifices per ambitiosam tyrannidem sibi in temporalium regum jura auctoritatem injuste usurpasse*. Et iterum pag. 22 : *Hanc in reges potestatem a Pontificibus inique usurpatam*. Rursus pag. 24, a Catholicis extrui Pontificis imperium adeo *immane, ac solutum, ut ad libidinem condonare atque adimere regna possit*. Ita enim Cardinali Bellarmino tribuit. Iterum pag. 24 : *Magnus ille pastor, instar orium, ad occisionemducere vos pro libidine sua potest*. Alibi, pag. 27 : *Cum antiquitus Clerici nihil ultra decimas appeterent, iisque contenti viverent, nunc Papa clericorum caput, non nisi tertia civium, et bonorum, ac fundorum parte in omnibus regnis et provinciis accepta, acquiescit*. Ulterius pag. 61, secularem Pontificis in reges dictaturam *principis fidei catholicæ articulis enumerat*. De Cardinali Bellarmino loquitur, et absolutam potestatem dominandi per illam sacerdotalē dictaturam intelligit. Et alibi, pag. 72, in eodem sensu inter multa, quæ refert, vel potius irritet tanquam a Pontificibus usurpata, hoc ponit : *Omni potestate, tam spirituali, quam temporali prædicti*. Et infra, pag. 128 : *Qui pro Deo Papam colunt, eumque sic habent quasi Scripturam loquentem*; postea vero de eisdem Catholicis ait, *tribuere Pontifici supremam in temporalibus potestatem supra reges ac principes, utique in sensu in aliis locis ab ipso declarato*.

6. Refutatur.—Posse Pontificem pro libito regna adimere nullus Catholicus asseruit.—Hi et similes sunt coloris, quibus rex Pontificem Summum, ejusque regimen depingit, in quibus tamen nihil est quod non sit a seductoriis confictum, vel male interpretatum, et incaute, et per veritatis ignorationem a rege creditum et scriptum; ut mirum non sit, rudem plebem his fabulosis exaggerationibus decipi, quandoquidem seductores etiam regem ipsum fallere et decipere potuerunt. Nam imprimis quod Pontifex regum potesta-

tem non usurpet, toti orbi notum est, et ipsi Pontifices in suo jure communi testatum ab ipsis esse voluerunt. Nam de rege Anglorum loquitur Alexander III, cum dicit : *Nos attentes quod ad regem pertinet, non ad Ecclesiam, de talibus possessionibus judicare, ne videamur juri regis Anglorum detrahere, mandamus, quatenus regi judicium possessionis relinquentes*, etc. Et de rege Galliae dixit Innocentius III : *Non putet aliquis, quod jurisdictionem illustris regis Francorum perturbare aut minuere intendamus*. Et alibi, idem Pontifex affirmavit, *regem in temporalibus superiorum non recognoscere*. Constat igitur Pontifices jura regum non usurpare. Unde longe certissimum et notissimum est, neminem catholicorum Doctorum affirmasse, posse Pontificem ad libidinem regna condonare aut pro libidine adimere. Qui enim vel in uno iudicio regiam jurisdictionem perturbare nolunt, quomodo regna ipsa sua libidine perturbabunt? Multo vero intolerabilius est cogitare, nedum scribere, *pro libidine sua posse Pastorem hunc oves occidere, aut similem tyrannidem, per hanc exaggerationem indicatam, exercere*. Quin potius non potestatem modo, verum etiam solum usum illi imponere, gravissima et impiissima detractio est eorum qui, regem decipiendo, ipsum irritare voluerunt. Hoc autem evidentius constabit ex his, quæ de legitima potestate Pontificis in christianos reges l. 3 ostendemus, ubi etiam justum usum illius explicabimus; nam forte sectarii non solum ex malitia, sed etiam ex ignorantia, et defectu Theologicæ doctrinæ ista configunt.

7. Pontificem tertiam partem bonorum ci-vium sibi usurpare contra omne jus factique veritatem configunt hæretici.—Deinde quod de Pontifice asseritur, non acquiescere, nisi accepta *tertia cirium bonorum, et fundorum parte in omnibus regnis et provinciis*, contra omne jus canonicum est, ut in proprio opere de decimis ostendimus; neque minus contrarium est usui, ut in omnibus regnis et provinciis catholicis notissimum est. Quod si fortasse sit sermo de fundis et bonis voluntarie donatis Ecclesiæ, semper in Ecclesia observatum fuit, ut bona hujusmodi jura decimarum non minuerent, nec in eis computarentur, sed cum illis adpios ecclesiasticos usus conservarentur. Praeterquam quod, illis omnibus etiam computatis, sine fundamento asseritur, illam esse tertiam partem bonorum orbis catholici, multoque magis voluntarie

fictum est, ad eam proportionem, seu mensuram exigi, et sine illa quota parte Pontificem non acquiescere.

8. Vendicantur Catholici ab aliquibus regis impositionibus. — Denique quod rex ait, Catholicos Pontificem pro Deo colere, et verba ejus ut scripturam sacram habere, facile intelligitur per exaggerationem dictum, ad eamdem quam diximus de Pontifice existimationem, in hominibus, qui voces distinguere nesciunt, generandam. Qui enim verisimile est credidisse regem, Catholicorum aliquem cultum, soli vero Deo debitum, Pontifici tribuere? Si autem nomine Dei solum significetur is, qui singulari modo aut Deum repräsentat, aut ejus excellentiam participat, juxta Scripturæ phrasim, et Christi explicationem dicentis: *Si illos dixit Deos, ad quos sermo Dei factus est*, quid reprehenduntur Catholici, quod Dei Vicarium debito honore colant ac venerentur? Item non est verisimile in mentem regis venisse, universa verba Pontificis sacram Scripturam a Catholicis reputari, cum ignorare non debeat sacros Theologos, ipsas etiam Conciliorum et Pontificum definitiones sacram Scripturam esse, negare. Quanquam in veritatis certitudine æquiparari tam constanter quam verissime doceant; non de omnibus verbis Pontificis, sed de his quæ, universam Ecclesiam ex cathedra docendo, definit. De quo puncto aliquid in superioribus tactum est, et in l. 3 non nihil addemus. Hæc igitur obiter dicta sint, ut intelligatur quam pertinax odium et inveterata rabies in Romanum Pontificem diuturnitate schismatis Anglicana pectora occupaverit.

9. Plures hæreses post Henricum VIII Angliam occuparunt. — Ex hoc autem odio secta est illa mentis cæcitas, quam Augustinus descripsit, qua fit ut altissimum et lucidissimum Ecclesiæ montem secta Anglicana non videat, sed in illum potius faciem impingat. Unde etiam factum est ut, regula et directio-ne Catholicæ Ecclesiæ Anglia destituta, ad synagogas hæreticorum diverterit. Nec enim novam condere illi fuit necessarium, quia eo tempore hæreses innumerae Septentrionem occupare cœperant, et sicut cancer serpebant, nullamque occasionem eas introducendi fidei hostes omittebant. Atque ita, ut cap. 1 relatum est, post Henrici mortem, contra ejus declaratam voluntatem, Eduardi regis tempore Zwingiana hæresis in regno prævaluit. Postea vero tempore Elisabethæ Calvinismus introductus est, idemque usque in hunc diem,

vel omnino, vel majori ex parte perseverat; nam perfecta stabilitas vel conformitas in hujusmodi sectis durare non potest, ut in superioribus probatum est. Compertum est autem Calvinum magnum hæresiarcham fuisse, ejusque sectam hæresim esse; ergo dubitari non potest, sectam Anglicanam, quæ Calviniana est, sive pura, sive mista ex aliis erroribus, hæresim esse, omnesque, illam pertinaciter sequentes, hæreticos esse. Solum superest ut probemus, Calvinianam sectam hæresim esse: hoc autem duobus modis in sequentibus ostendemus, tum respondendo ad ea quæ in sua præfatione rex Jacobus affert in excusationem sui lapsus in hæresim; tum refellendo ea quæ in accusationem Ecclesiæ Catholicæ objicit; quot enim articulos accusacionis opponit, tot suæ sectæ errores prodit.

10. Ex signis hæresum, quæ a Patribus traduntur, Calvinianam sectam hæresim esse, ostenditur. — *Primum signum.* — *Secundum.* — Prins vero in fine hujus capituli idem ostendere libuit, omnia signa hæresis, quæ a Patribus traduntur, in universa Protestantium secta breviter indicando. Primum signum est origo infecta, vel per superbiam: *Nam una mater superbia omnes hæreses genuit*, ut Augustinus, lib. de Pastoribus, cap. 8, dixit; vel *per invidiam*, quæ (ut scripsit Chrysostomus, hom. 7 in Ep. ad Rom.) *hæreses peperit*; vel *per aviditatem cumulande pecuniae* (ut dixit Basilius, in § c. Isaiæ); vel per alia vitia, quæ Paulus late enumerat, 2 Timot. 3, ibi: *Eruunt homines se ipsos amantes, cupidi, etc., usque ad illud: Homines corrupti mente, et reprobri circa fidem*. Talem fuisse Lutherum, et per ambitionem et invidiam defecisse a fide, notum est, et in historiis illius temporis legi potest; Calvinum autem simili elatione, et morum improbitate excelluisse, testes sunt plures¹, quos Præteolus, l. 3, verb. *Calvinus*, commemorat. Secundum signum est supra tactum, discordiæ et separationis ab obedientia Romanæ Sedis, quod sæpe in suis Epistolis Cyprianus observat, ut paulo antea retuli; et Augustinus, l. 2 contra Petil., c. 51 et 72, Donatistas maxime reprehendit, quod in cathedram Romanam et Apostolicam blasphemarunt, in quo maxime novi sectarii eos imitantur, et excedunt.

11. Tertium signum. — Tertium sit inconstantia et divisio doctrinæ, nihil est enim

¹ Echius, in Actis Lutheri; Surius in Compendio; Sander., de Visib. mon., l. 7.

magis fidei certitudini, et veritati contrarium. De qua re satis in superioribus dictum est. Nunc vero adjungam egregia verba Basilii, in e. 5 Isai., ubi, cum dixisset haereticos videri sibi sapientes, et alios antecellere, sub-jungit : *Eam ob rem referta sunt omnia sententias inter se pugnantibus, et iis qui dogmata tradant, reclamantia suismet auctoribus; quando singuli quique suo dogmati tuendo obstinatus insistunt, et quae diversae partis sunt placita, perrumpunt vi, ut evertant et confutent accrima verborum velitatione.* Et epist. 82, in fine : *Nunquam eisdem verbis contenti stabiles persistunt.* De eadem re late Athanas., Epist. de Decret. contra Arian. haeresim, in principio, et Orat. 1 contra Arian., circa principium, ubi inter alia inquit : *Dum perpetuo scribunt, suamet ipsi immutantes, incertam suam fidem, vel potius certam suam infidelitatem, dementiamque ostendunt.* Quibus consonant verba Hilarii, lib. 3 de Trinit., circa principium : *Haeretici contra Ecclesiam veniunt, sed dum haeretici omnes se invicem vincunt, nihil tamen sibi vincunt.* Similiter et optime auctor Imperf., homil. 20 in Mat.; et Tertull., in Præscript., c. 40. Hanc autem inconstantiam in Luthero, Calvino, et sequacibus maxime inventam esse, notarunt saepè Doctores Catholici, præsertim Cardinalis Bellarm., in suis Controversiis, et late quamplurima congerens Coccoius, l. 8 sui Thesauri, art. 7, 8, 9 et 10; et Salmer., tom. 1, ad epist. Pauli, in Prolegom., disp. 6, refert, Saxonæ ducem dicere solitum esse, se quidem nosse quid præsenti anno sui crederent; quid autem sequenti anno credituri essent, ignorare. Atque hanc mutationem in Protestantibus Angliæ inventam esse, eradicabile est; quia tamen mihi exploratum non est, id non affirmo, nec necessarium est, satis est enim quod adhaereant doctrinæ, quæ cum illa instabilitate incepit, nam in vera fide non est *est et non*, sed est tantum *est*, ut dixit Paulus, 2 Corinth. 1.

12. *Quartum signum.* — Quartum signum, et in Protestantibus fortasse maximum est, jactare verbum Dei, corrumpto et mutilando illud, de quo etiam multa diximus. Singulariter vero haereticorum jactantiam de verbo Dei describit Vincent. Lirin., c. 35 et 37. Elationem vero et deceptionem in illud exponendo, accusant Basilins proxime citatus, et Athanas., orat. 1 et 2 contra Arian., et orat. in id, *Omnia mihi tradita sunt a Patre meo*, circa finem; Nazianz., orat. 51, seu ep.

1 ad Cledoni.; item epist. 46 ad Neetarium. Rursus orat. 36, alias 2, de Filio, et 4 de Theolog., in principio, et deinceps in orat. 37, post medium; et optime orat. 42, indicat modum, quo solent haeretici verbum Dei infideliter vel diminute allegare; dicens : *Tu ea quidem, quæ minuunt atque extenuant, profers; quæ autem effterunt, præteris; atque id quidem expendis, quod passus sit; quod autem sponte, non adjungis.* Plura Aug., lib. 7 Genes. ad Litter., c. 9, et de Unitat. Eccles., c. 12 et 13, et lib. 2 contra litter. Petil., cap. 61; Hilar. optime, lib. 2 de Trinit., in principio.; Hieronym., Isai. 4, et Galat. 1. De mutilatione autem Scripturarum eos irridet saepè Augustinus contra Donatistas, et optime ac generaliter Tertullianus, de Præscript., cap. 17.

13. *Quintum. — Sextum. — Septimum. — Octavum.* — Quintum signum, omnium evidenterissimum, et haeresim apertam involvens, est contemnere Ecclesiam Catholicam, eique errorem tribuere, negando esse Catholicam, sibique hane vocem attribuendo. De quo videri potest Lirin., c. 26; et August., lib. de Unit. Eccles.; multaque sunt in superioribus dicta, et simul est ostensum quam sit hoc proprium Protestantum, et Anglicanæ sectæ. Sextum ad hoc consequens est, Conciliis non acquiescere, ex Athanas., Orat. 1 cont. Arian., parum a principi. Et perinde esse censeo, quædam Concilia sua sponte admittere, alia vero respuere; quia non ipsi aequiescant Conciliis, sed potius inter illa dijudicant, eaque suo arbitrio approbant vel reprobant. Septimum huic affine est, Patrum auctoritatem contemnere, in quo liberrimus fuit Calvinus, qui etiam ausus est Patres Pharisæis comparare, sicut olim fecerunt Donatistæ, apud Augustinum, lib. 2 contra litter. Petil., cap. 61. Octavum signum superioribus consentaneum est, proprio spiritu duci, sive humano, sive satanico angeli tenebrarum transfigurantis se in angelum lucis. Unde apposite Hilarius, lib. 4 de Trinitat., haereticos dicit *esse sibi arbitros religionis, cum religionis opus in solo obedientiae esset officio*, ubi alludere videtur ad illud Pauli : *Captivantes intellectum, etc.* Et lib. 2, in principio, de eisdem ait, *pro voluntatis sue sensu verba Dei interpretari.* Et multa similia habet lib. 3, parum a principio. Et saepè Tertullianus, de Præscriptionibus. Aliaque multa in superioribus adduximus.

14. *Nonum signum. — Decimum. — Unde-*

cimum.—*Duodecimum.*—Nonum signum hæreticæ temeritatis est, fucata eloquentia cum præcipitatione et nimia loquendi libertate. De quo Nazianz., orat. 33, in princip., sic inquit : *Hi vero utinam sicut linguam volubilem habent, atque in nobilioribus ac probatoribus verbis insectandis acrem et vehementem, sic etiam in agendo nonnihil sallem, aut etiam æque, operam collocarent.* *Id quod si facerent, minus utique carillatores essent, nec tam absurdæ atque insolenter in verbis, perinde atque in aleæ ludo versarentur.* De illorum autem in dicendo præcipitatione, legi potest Gregor., lib. 7 in Job, c. 2. Decimum signum potest esse novitas, antiquæ doctrinæ contraria, seu per defectionem ab antiqua fide; de quo supra dictum est, et videri potest Chrysost., hom. 47 in Matt. ; Tertull., de Præscrip., cap. 3, et alii Patres exponentes illud 1 Joan. 2 : *Ex nobis exierunt.* Undecimum sit nominis catholici amissio, et nova ab auctore denominatio, de quo et aliis similibus multa in superioribus. Addam vero hic duodecimum et ultimum, a Tertulliano, in Præscr., c. 41, traditum, conversationis ipsorum hæreticorum, quam ipse ibi late describit, et *futilem ac terrenam esse dicit.* Inter alia vero illa maxime verba notanda sunt : *Ordinationes eorum temerarie, leves, inconstantes; nunc neophytes collocant, nunc sæculo obstrictos, nunc apostatas nostros, ut gloria eos obligent, quia veritate non possunt. Nusquam facilius proficitur, quam in castris rebellium, ubi ipsum esse illic, promereri est. Itaque alius hodie Episcopus, cras alias; hodie diaconus, qui cras lector; hodie presbyter, qui heri laicus; nam et laicos sacerdotalia munera injungunt.* Hæc igitur signa breviter recensui, ut cum Protestantium moribus, et statu rei Anglicanæ conferri possint, nam si id prudenti consideratione fiat, nemo dubitare poterit quin secta illa hæresis aperta sit, ac subinde professores ejus hæretici.

CAPUT XXIII.

ANGLICANUM SCHISMA PERTINACITER SECTANTES,
NEQUE AB HÆRESI, NEQUE AB HÆRETICORUM
NOTA EXCUSARI POSSE.

1. *Rationes, quibus rex ab hæresi's nota se liberare conatur, proponuntur.* — *Prima.*— Adversus ea quæ in superiori capite dicta sunt, procedere possunt rationes, quibus rex in sua Præfatione ab hæresi crimine se pur-

gare contendit, ideoque quanti ponderis illæ sint, diligenter inquirendum est. Et prius quidem in p. 39 et 40, negat, se esse apostamat; deinde contendit neque hæreticum dici posse; verum hæc a nobis melius immutato ordine tractabuntur. Quod ergo hæreticus proprie dici non possit, *etiam ex Catholicon regulis*, pag. 40, probat imprimis his fere verbis : *Cum patrem, paternumque arum idem de fide sentientes habuerim, et in Catholicon regulis propriæ hæreticus dici non possum.* Secundo, ita virtute argumentatur : Licet Catholicorum ritibus ablatus sim, et ab illis in religione dissentiam, hæreticus dici non possum, quia de baptismi substantia nulla est inter nos lis, neque ulla in hoc doctrinæ capite controversia, cum omnes in nomine Patris, et Filii, et Spiritus Sancti baptizemur. Tertio, et potissimum rationem, quam late ipse proponit, ita summatim colligimus. Rex Angliæ Scripturis sanctis eam fidem adhibet, quæ a Christiano homine debetur, et in tria symbola fidei libenter jurat, prima que quatuor Concilia generalia tanquam catholicæ et orthodoxæ veneratur et recipit, et quidquid ad salutem necessarium quadrigentis post Christum annis unanimi consensu Patres statuerunt, reprehendere non audet, sed vel idem sentit, aut obmutescit; ergo non potest jure censeri hæreticus, nisi forte (ait pag. 62) ab his, *qui pro Deo Papam colunt, eumque sic habent ut scripturam loquentem, ut neque hæresim aliter definiant, quam opinionem quamcumque in causis fidei decisioni Papali contrariam.*

2. Hæc sunt quæ ad suam defensionem rex adducit, et licet in ultima ratione totum excusationis suæ pondus constituat, aliasque obiter attingat, nullam tamen prætermittendam duximus, ut et ipsi regi et legentibus omnibus plenius satisfaciamus, nihilque intactum relinquere videamur. Prius vero propter verba regis ultima duo declaranda sunt. Primum, quid sit hæresis, quidve ad illam constituendam sufficiat; secundum, quis sit proprie hæreticus, et quando consensus in aliquem errorem hominem hæreticum constitut. Utramque ex his quæstionibus attingit Augustinus : priorem, in epist. ad Quodvult-Deum, præambula ad libr. de Hæresibus; et posteriorem, in Præfat. ad eundem librum; et utramque definire dicit esse difficile, promittitque in altera illius operis parte inquirere, quomodo sit definiendus hæreticus; il-

lam tamen partem non scripsit, et ita in illo opere utrumque punctum indecisum reliquit. Ex aliis autem ejusdem Doctoris locis, et aliorum Patrum Theologorumque doctrina, quid in hac materia sentiendum sit, et pro certo habendum, explicare necessarium est, ut aliquo firmo fundamento, sine verborum ambiguitate, niti possit disputatio.

3. *Ex variis hæresis acceptionibus duæ præferuntur. — Inter Christianos hæresis in malam partem sumitur.* — Nomen ergo hæresis varias sortitur significationes, etiam in usu theologorum; duæ vero in præsenti maxime distinguendæ sunt, quia ratione illarum varie a Theologis definitur hæresis. Possunt autem explicari per comparationem ad fidem; nam hæresis fidei opponitur, ideoque sicut interdum doctrina, a Deo revelata, fides vocatur, saepius vero assensus, quo talis doctrina creditur, dicitur fides; ita hæresis interdum dicitur de ipsa doctrina hæretica, interdum etiam de assensu voluntarie præstito tali doctrinæ. Illa enim duo sine dubio valde diversa sunt, non minus in doctrina, seu fide falsa, quam in vera, et ex usu vocis satis constat nomen hæresis ad utrumque significandum usurpari. Cum enim Paulus, Act. 24, dixit: *Confiteor autem hoc tibi, quod secundum sectam, quam dicunt hæresim, sic deservio Patri, et Deo meo*, de doctrina evangelica loquebatur. Unde Syriaca versio, pro *secta* habet *doctrinam*, et vox græca significat *secundum viam*, quod proprie dici solet de ratione tota alicuius doctrinæ, quam etiam vox *secta* optime indicat. Noluit autem Paulus doctrinam evangelicam hæresim appellare (ut optime notat Theophyl.), quia non est secundum electionem hominum, a qua nomen hæresis sumpta est, ut advertunt Tertull., de Praescript., c. 6; Hieron., ad Galat. 5, et ad Tit. 3; et Isidor., l. 8 Etymol., c. 3; sed secundum Dei voluntatem et revelationem. Ideoque in lege evangelica, et inter Christianos nomen hæresis in malam partem accipitur, significatque doctrinam, quam aliquis homo sibi eligit, doctrinæ Dei repugnantem. Et indeconsequenter electio talis doctrinæ, per assensum in illam, vocatur hæresis; sunt enim illa duo ita conjuncta, ut facile ab uno ad alterum transitus fiat. Et ita Paulus, ad Galat. 5, hæreses ponit inter vitia carnis, ut vertit et notat Hieronymus, juxta vocem græcam, licet latina Vulgata *sectas* vertat; et ad Tit. 3, ait Paulus, hæreticum proprio iudicio esse damnatum; constat autem hæreticum ob hæ-

resim damnari; indicat ergo Paulus illud proprium iudicium esse hæresim, ubi etiam id sentit Hieronymus, et clarius Tertullianus, dicto c. 6.

4. *Doctrina fidei contraria apte hæretica propositio vocatur, assensus vero talis doctrinæ hæresis. — Propositio hæretica quid.* — Ut ergo distinctius utramque partem definiamus, priorem vocemus propositionem hæreticam, posteriorem autem hæresim; nam verisimile est ecclesiastico usu et more, peccatum illud, quod eligendo falsam doctrinam, ad credendum illi, seu quod spontaneo et libero assensu talis doctrinæ committitur, hæresim esse appellatum, nam hoc vera etymologia vocis magis indicat. Propositio ergo hæretica illa est, quæ recedit a regula veritatis catholicæ, illique opponitur, seu contradicit. Ita docet Augustinus, libro de Vera relig., c. 5 et 6, ubi vocat, *pravam doctrinam, a regula veritatis aversam*; et cap. 7: *Est (inquit) prava opinio, a regula et communione Ecclesiae Catholicæ devians*; et orat. cont. Judæos, paganos et Arianos, c. 20, vocat, *hæreticorum errorem contra veram Ecclesiam Catholicam fidem*. Similiter Tertullian., de Praescript., c. 6, dicit esse *adulterinam doctrinam, quam quis proprio arbitrio et electione inducit, vel ab alio inductam amplectitur*. Cum autem adulterinam vocat, intelligit a Christo vel Ecclesia, sicut cap. 37 dicit, *hereticos non a Christo habere, quod de sua electione sectantur*. Et in eodem sensu ait de hæreticis, cap. 44, *fidem stuprasse adulterio hæretico, Virginem traditam a Christo*. Denique communis est usus illius vocis in dicta significatione, neque in illa est differentia inter nos et Protestantes. Quia vero propositio constituitur seu definitur hæretica per recessum a regula, et quia privative opponitur propositioni seu veritati fidei, ideo ad comprehendendam formalem rationem propositionis hæreticæ, oportet præfigere regulam credendi, et explicare quid necessarium sit, ut aliqua propositio censeatur de fide; nam hoc semel posito, facile constabit assertionem contrariam hæreticam esse.

5. Atque hoc punctum attigit rex in ultimis verbis supra citatis, et irridet Catholicos definientes, hæresim esse *opinionem quamcumque, in causis fidei, decisioni Papali contrariam*. Oportuisset autem, quandoquidem hæc definitio illi displicet, aliam tradere, qua nobis explicaret quid per hæresim intelligat, ut ita se a macula hæresis liberum ostende-

ret. At proculdubio id nullatenus explicare potest, nisi in labyrinthum incidat prorsus inextricabilem, pro regula fidei solam Scripturam, eamque propria et privata scientia certa intellectam, assignans. Quae doctrina, ut supra ostendi, non solum viam latissimam omnibus erroribus sternit, verum etiam, quam pro regula hæresis assignavit Paulus, pro regula fidei catholicae tradit, utique proprium credentis judicium. De hæretico enim ait Paulus, ad Tit. 3: *Subversus est qui ejusmodi est, et delinquit, proprio iudicio condemnatus, quia, in quo damnatur, sibi eligit, ut addidit Tertullianus, unde et hæreticus est nominatus.* Regula ergo hæresis est proprium iudicium, hoc est, communis iudicio Ecclesiæ contrarium. Qui vero in proprium spiritum fidei certitudinem verumque sensum Scripturæ revocant, nihil aliud quam proprium iudicium pro regula fidei constituunt. Quid enim est proprius spiritus, nisi proprium iudicium? Aut quomodo discernitur ille spiritus, ab his qui in illo confidunt, nisi arbitratus suo? Confundunt ergo regulam fidei cum fundamento hæresis, et ideo mirum non est quod hæresim pro fide teneant, et fidem ut hæresim rejiciant. Præterquam quod (ut in superioribus dicebam) nullum jure possunt ut hæreticum damnare, cum nemo proprium iudicium alterius ejusve privatum spiritum in rebus fidei sequi teneatur; nemo ergo erit hæreticus, discordando a regula fidei, quam illi constituunt.

6. *Vera fidei regula statuitur.* — Doctrina ergo solida et catholica, regulam fidei esse dicit Scripturam sacram, non solam, nec privato sensu intellectam, sed cum aliis regulis, quæ in ipsa commendantur, eamque conservant, discernunt et interpretantur, traditione, inquam, et ipsa Ecclesia, quæ est viva regula, per quam Spiritus Sanctus loquitur, eamque regit et facit, ut sit columna et firmamentum veritatis. Et idecirco licet Scriptura et traditio purum ac verbum Dei continent, quod est primaria regula fidei, nihilominus, quia Ecclesia est quæ Scripturas, traditiones, et sensus illarum infallibiliter nobis explicat et proponit, ideo solet a Patribus tanquam sufficiens regula fidei commemorari. Unde Irenæus, lib. 3 contra Hæres., c. 4: *Non oportet apud alios querere veritatem, quam facile est ab Ecclesia sumere;* et c. 11, in fine, præfert spiritum Ecclesiæ omni privato spiritui; et lib. 4, cap. 43 et 45, in sola Ecclesia esse veram traditionem, veram-

que Scripturæ intelligentiam. Cyprianus, ep. 73, ait Ecclesiæ Catholicæ doctrinam firmiter tenendam esse et docendam, et late epist. 76; Augustinus etiam passim utitur hac sola Ecclesiæ regula ad confirmandas veritates fidei, ut ex locis proxime allegatis constat; et ex lib. de Hæresibus, in fine, ubi ait satis esse scire, Ecclesiam contra aliquam doctrinam, ut a fide alienam, sentire, ut a nullo fideli recipiatur. Idem optime, lib. 4 contra Cresconium, c. 32 et 33, et ep. 48, et aliis libris contra Donatistis, item epist. 99, et in ep. 418, cap. 5, *disputare contra doctrinam universalis Ecclesie, insolentissimæ dementiae esse*, dicit. Eamdem pro regula fidei et veræ doctrinæ ponit, lib. de Vera relig., c. 5, 6 et 7, et lib. 4 de Moribus Eccles. cath., c. 30, lib. 3 de Libero arbitr., c. 23, et gravissime lib. de Utilit. credendi, c. 17, ubi de Ecclesia inquit: *Culmen auctoritatis obtinuit, cui nolle primas dare, vel summae profecto impietatis est, vel præcipitis ignorantiae.* Pluraque alia tum ex Sanctis et antiquis Patribus, tum ex Scriptura ipsa in superioribus adduximus.

7. *Propositio, quæ ab Ecclesia tanquam de fide credenda proponitur, est de fide.* — Ex quibus breviter inferimus, illam propositionem esse de fide, quam Ecclesiæ Catholicæ auctoritas nobis tanquam de fide credendam proponit: in hac enim regula continentur omnia, quæ vel in Scriptura sunt, vel in Conciliis approbatis sunt definita. Unde e contrario, propositio hæretica illa est, quæ contraria est Ecclesiæ definitioni, seu alicui propositioni per Ecclesiam definitæ modo explicato. Locuti autem sumus de Ecclesia, ejusque definitionibus, ut a quæstione de potestate Pontificis Romani ad definiendas veritates fidei, quam rex videtur suis verbis involvere voluisse, nunc abstineamus, ne a scopo et intentione nostra divertamur. Etsi enim verissimum sit, definitionem Pontificis ex cathedra loquentis infallibilem veritatem continere, omnesque fideles teneri ad illam firmiter credendam, hoc tamen diversum non est ab eo quod diximus; nam cum Pontifex definit, Ecclesia per caput suum loquitur, neque corpus separatur a capite, nec caput a corpore; quia vero magis limitatum est, nam Ecclesia etiam aliis modis potest veritates fidei proponere, approbante etiam Pontifice, ut per Concilia generalia, et per universalem consensionem Ecclesiæ, ideo ad comprehendendum omnia, et ad vitandas controversias, generalius lo-

cuti sumus. Nam definitiones esse debent, quoad fieri possit, communes, et extra controversiam. Ita ergo pro loci opportunitate satis videtur explicatum, quid sit hæresis quoad materiam, seu quid sit propositio hæretica.

8. Hæresis definitio. — Explicatur definitio. — Ex his autem, quæ de propositione hæretica dicta sunt, facile definiri potest quid hæresis sit, prout opus est seu vitium hominis. Est itaque hæresis deliberatus assensus, seu credulitas alicujus hæreticæ propositionis. Et in idem recidit quod scholastici dicunt, esse falsam opinionem circa ea quæ sunt fidei. Itaque tam doctrina fidei quam illi contraria potest dici materia, circa quam hæresis versatur; diverso tamen modo; doctrina quidem fidei, deficiendo ab illa, seu illam falsam judicando; contraria vero doctrina, eligendo illam ut veram, eique fidem adhibendo. Dicimus autem hæresim esse voluntarium assensum, tum quia hæresis juxta nomen suum, ex electione propria et arbitraria procedit; tum etiam quia hæresis in malam partem accipitur, ita ut non tantum falsum assensum mentis, sed etiam culpam, lapsusque voluntatis invelvat; ideoque (ut mox dicemus) licet quis erret, assentiendo propositioni fidei contrariæ, non incidit in hæresim propriam, id est, assensus ejus non censebitur hæreticus, seu propria hæresis, nisi repugnantiam cum fide catholica cognoscat, et ea non obstante, talem doctrinam ut veram eligat et credit. Et hac ratione dixit Paulus, ad Tit. 3: *Hæreticum hominem post primam et secundam admonitionem devila.* Quamvis enim Paulus non rationem seu substantiam hæresis tradat, sed modum cavendi hæreticos doceat, insinuat nihilominus propriam hæresim non committi, donec aliquis sciat, sufficienterque advertat, qualis sit doctrina quam eligit.

9. Hæc ergo conditio ex parte assentientis necessaria est; ex parte vero materiae generatim dicimus, hæresim esse assensum de re fidei contraria. Quia materia fidei multiplex est: sunt enim in ea dogmata ad Deum unum et trinum, ejusque attributa pertinentia, alia ad Christi humanitatem, ejusque cum Verbo hypostaticam unionem, et in universum ad hominum redemptionem spectantia, et cum his connexa sunt ea, quæ ad Ecclesiæ Catholicæ institutionem et hierarchiam, ejusque sacramenta, mores et cæremoniæ, necnon ad veram remissionem peccatorum, ve-

ramque justitiam, præmiumque et pœnam humanorum operum spectant; dum ergo materiam fidei in hæresis definitione indefinite ponimus, omnia prædicta dogmata complectimur. Vera enim et propria hæresis in quocumque dogmate fidei committitur. Nam si a Deo revelatum sit, eadem fidei certitudine credendum est, in quacumque materia versetur. Unde etiam fit ut ad veram hæresim, quæ totam fidem destruat, voluntarius assensus uni tantum dogmati fidei contrarius in quacumque materia sufficiat. Quia unicum mendacium, etiam in re minima ad fidem pertinente, supremam Dei auctoritatem destrueret, et quælibet assertio falsa, si inter dogmata fidei inveniri posset, reliqua omnia incerta et ambigua redderet. ac proinde quilibet assensus, cuicunque dogmati fidei contrarius, hæresis est, penitus destruens fidem. Unde Paulus scribens ad Galatas, qui circa observationem legalium falsam opinionem, et Evangelio contrariam eligere volebant, licet in aliis mysteriis fidei non errarent: *Evacuati estis (inquit) a Christo, qui in lege justificamini.* Et infra: *Currebatis bene, quis vos impedivit veritati non obedire? persuasio hæc non est ex eo, qui vocat vos, modicum fermentum totam massam corruptum.* Per quæ verba indicat, illum errorem (si in eo pertinaces essent) fuisse sufficientem ad evacuandam et corrumpendam totam illorum fidem. Sic etiam schisma Donatistarum in hæresim transiit, pertinaci animo adhærendo uni vel alteri errori in materia baptismi, vel Ecclesiæ, etiamsi in aliis rebus fidei non errarent, ut ex Cypriano et Augustino sæpe retuli, et in sequenti puncto iterum confirmabo.

10. Propria hæretici definitio traditur. — Comprobatur definitio ex Augustino. — Tandem colligitur ex dictis, quis proprie et in rigore hæreticus dicatur; est enim ille, ex Origin., in id ad Tit. 3: *Hæreticum hominem*, etc., apud Pamphil. in Apolog.: *Qui se Christo credere proficitur, et aliquod dogma in ecclesiastico ordine receptum commutare, vel subvertere conatur.* Sumiturque ex Paulo, dicto loco ad Titum 3, juncta expositione Patrum, et communī consensu Doctorum, et recepto usu illius vocis in Ecclesia. Nomen enim hæretici non omnibus infidelibus tribuitur, sed illis tantum, qui Christum confitentes, ejus fidem ex parte negant, nam cæteri infideles Judæi potius, Pagani, aut Gentiles appellantur. Est ergo hæreticus ille, qui sub nomine christiano (nam Christum se cre-

dere dicit) veritatem fidei Christi corrumpit, aliquid contra illam sentiendo. Oportet autem ut ex propria electione, et cum sufficienti cognitione et judicio hoc faciat, nam si per ignorantiam, vel incogitantiam error contingat, hæreticum non constituit, quia nondum proprio judicio damnatus est, neque propriam hæresim commisit. Et hac ratione Augustinus sæpe distinguit inter hæreticum, et credentem hæreticis. Librum enim de Utilitate credendi sic orditur: *Si mihi, o Honorate, unus atque idem videretur esse hereticus, et credens hereticis homo, tam lingua, quam styllo in hac causa mihi esse conquiescendum arbitrarer. Nunc vero inter haec duo plurimum interest, quandoquidem hereticus est, ut mea fert opinio, qui alicujus temporalis commodi, et maxime gloriae, principatusque sui gratia falsas vel noras opiniones, vel gignit, vel sequitur (utique in materia fidei); ille autem qui hujusmodi hominibus credit, homo est imagine quadam veritatis ac pietatis illusus.* In priori namque membro significare voluit Augustinus, ut homo, errando in fide, constituatur proprie et simpliciter hæreticus, necessarium esse ut propria electione, et videns se ab universalis Ecclesia dissentire, in errorem se præcipitet; et quia hoc moraliter non fit, nisi propter humanum vitium seu motivum, ideo illas particulas posuit Augustinus in definitione hæretici, quæ magis occasionem seu causam voluntarie errandi, quam intrinsecam conditionem hæresis declarant. In altero autem membro docet, errorem ex ignorantia, quod fidei aut Ecclesiæ repugnet, non constituere hominem hæreticum. Quod erit longe certius, si talis ignorantia probabilis (ut aiunt) seu invincibilis sit; si vero sit ex gravi negligentia et nimia facilitate, non excusabit omnino culpam; excusabit nihilominus eum gradum, et magnitudinem culpæ, quæ ad constituendum, seu simpliciter denominandum hæreticum, juxta communem usum sapientium, et totius Ecclesiæ, sufficiat.

41. Eamdemque doctrinam habet idem Augustinus, Epist. 46, in principio, dicens: *Qui sententiam suam, quamvis falsam atque perversam, nulla pertinaci animositate defendant, praesertim quam non audacia presumptionis sue pepererunt, sed a seductis, atque in errorem lapsis parentibus acceperunt, querunt autem cauta sollicitudine veritatem, corrigi parati cum invenerint, nequaquam sunt inter hæreticos deputandi.* E contrario vero, lib. 48 de Civitat., cap. 51, sic inquit: *Qui in Ecclesie-*

sia Christi morbidum aliquid pravumque sapiunt, si correpti, ut sanum rectumque sapiant, resistunt contumaciter, suaque pestifera et mortifera dogmata emendare nolunt, sed defensare persistunt, hæretici sunt, et foras eentes habentur in exercentibus inimicis. Denique lib. 4 de Baptism., c. 16, exhibito exemplo, utrumque membrum declarat, dicens: *Constituamus duos, unumque eorum id sentire de Christo, quod Photinus opinatus est, et in ejus hæresi baptizari extra Ecclesiæ communionem; alium vero hoc idem sentire, sed in Catholica baptizari, existimantem istam esse catholicam fidem. Istum nondum hæreticum dico, nisi manifestata sibi doctrina catholicæ fidei, resistere maluerit, et illud, quod tenebat, eligere; quod antequam fiat, manifestum est illum, qui furis baptizatus est, esse pejorem.* Quæ testimonia ideo refero, quia multa in eis notari possunt, quæ in præsenti causa magnum pondus habent, ut statim etiam indicabo. Est ergo, teste Augustino, necessaria pertinacia in hæresi, ut qui illam elegit, hæreticus habeatur. Et hanc pertinaciam per verbum *eligendi* significavimus cum Hieron., ad Titum, c. 3, et Tertull., dicto cap. 6, de Præscr. hæret., qui propterea, lib. 4 contra Marcion., c. 1, significat illum esse maxime hæreticum, qui a priori fide recedit, et *Deum quem invenerat, extincto lumine fidei suæ, amisit, ut hinc jam destinari possit hæreticus, qui deserto quod prius fuerat, id postea sibi elegerit, quod retro non erat.* In tantum enim hæresis deputabitur, quod postea inducitur, in quantum habebitur, quod retro, et a primordio traditum est.

42. *Unum dogma fidei contrariorum ad hæreticum constituendum sufficere, probatur ex Partibus.* — *Ratione idem probatur.* — Locutus sum autem in descriptione in singulari de dogmate, vel assensu fidei contrario, ut denotarem ad hæreticum constituendum satis esse, quod vel in una re tantum a doctrina Catholicæ Ecclesiæ voluntarie dissentiat. Quod ex dictis de hæresi satis per se clarum est. Idque late tradit Origenes, in dicto loco ad Titum 3, recensendo multa specialia dogmata, quæ ad causam præsentem magna ex parte pertinent, adjiciens, unum illorum sufficere ad constituendum hominem hæreticum. Augustinus etiam in locis allegatis, licet interdum in plurali loquatur de illo qui falsas vel novas opiniones gignit aut sequitur, sæpius in singulari loquitur de illo, qui perversam sententiam vel aliquid morbidum pertinaciter defendit. Unde libro de Hæresibus, in fine,

duas classes hæreticorum his verbis distinguit: *Sunt hæretici, quod satendum est, qui singulis vel non multo amplius dogmatibus oppugnant regulam veritatis, sicut Macedoniani, vel Photiniani, et quicumque alii ita sese habent. Alii autem (ut ita dixerim) fabulones, id est, qui fabulas vanas, easdemque longas, perplexasque contexuerunt, tam multis falsis dogmatibus pleni sunt, ut ipsi quoque illa numerare non possint, aut difficillime possint.* Et profecto Lutherus, Calvinus, et similes in hoc posteriori ordine ponendi sunt; tot enim multiplicarunt errores, et tam confuse, et inconstantiter eos tradiderunt in controversiis de Ecclesia, de fide justificante, de necessitate operum, libertate arbitrii, sacramentis, et similibus, ut vix numerari, vel percipi possint. Henricus item VIII rex Angliæ, si mente crederit, jure potuisse facere quod facto usurpavit, inter hæreticos primi ordinis numerandus erit, cum in uno saltem dogmate contra Catholicam Ecclesiam sentire elegerit. Quod enim unum dogma sufficiat, patet facile ex dictis: hæreticus siquidem ab hæresi denominatur, quia illam amplectitur, vel committit; sed ad hæresim sufficit unum falsum dogma, seu voluntarius assensus illius; ergo etiam sufficit ad hæreticum constitendum. Item unum falsum dogma destruit totam fidem, et voluntarius assensus ejus, etiamsi unus tantum sit, et in una sola materia, totam fidem divinam in tali homine destruit; ergo constituit illum vere hæreticum. Denique constituit infidelem; et non in altera specie, ut constat; ergo constituit hæreticum.

13. Ex his ergo principiis, quæ certissima sunt, et rex Jacobus negare non potest, si sapere velit, ipse de se judicium proferat, an a se ipso damnatus sit, ut more Tertulliani et Cypriani loquar¹. Nos enim summopere cupimus, regem hæreticum non esse, et fugimus nominare, scimus enim Augustinum cum Pelagianis disputantem dixisse²: *Possemus forsitan, si vellemus, eos hæreticos appellare, nec tamen appellamus.* Non tamen propterea omittebat veritatem eis ostendere, et conscientiam illorum convenire, et omnibus convincere, ut corriperentur, et ad meliorem mentem redirent. Optimamque reddit rationem: *Quia in rebus nondum plena Ecclesiæ*

¹ Tert., de Præscript., c. 6; Cypr., ep. 55, in fine.

² August., serm. 44, de Verb. Apost., cap. ult.

auctoritate firmatis ferendus est error, non tam progreedi debet, ut etiam fundamentum ipsum Ecclesiæ quatere moliatur. Non expedit. Adhuc forte non est reprehendenda patientia, sed debemus timere, ne culpetur etiam negligenter. Quandoquidem igitur nos in ea causa cum rege Jacobo contendimus, in qua fundamentum Ecclesiæ quatere molitur, simili etiam affectu, impari quamvis ingenio, vel auctoritate, statum ejus demonstrare studeamus, non ut illum hæreticum vocitemus, sed ut ipse resipiscat, et videat ne sit, quod appellari merito recusat. Nam profecto excusationes ejus nullius momenti vel ipsimet regi perpendenti apparebunt. Nullaque alia (procul dubio) excogitari potest, qua rationes et probationes adductæ eludantur.

CAPUT XXIV.

RATIONES, QUIBUS REX HÆRETICI MACULAM FUGERE STUDET, REFELLUNTUR.

1. In prima igitur ratione sua, duo excusationis capita rex indicat: unum, quod patrem et avum paternum ejusdem sectæ, quam ipse nunc profitetur, habuerit; alterum, quod in Catholica Ecclesia nunquam fuerit. In priori capite omittendum illud censui, quod ad veritatem historiæ pertinet, quia multi vel illud negant, vel in dubium revocant. Nam cum rex neque patrem neque avum cognoverit, quos ante usum rationis animis, et ab hæreticis educatus, et inter eos semper conversatus fuerit, facile potuit hac in re ab eis decipi, ut ipsum in errorem suum facilius inducerent. Verumtamen quidquid avus vel pater ejus de fide senserint, eorum lapsus propriam hæresim non excusabit, si post sufficientem monitionem et instructionem, illam non correxit. Relegat, quæso, sententiam Augustini paulo antea citatam, ex Epist. 162, ubi loquens in specie de illis qui falsam et perversem credunt doctrinam, quam non audacia sua pepererunt, sed a seductis, atque in errorem lapsis parentibus acceperunt, tunc solum eos inter hæreticos non deputat, quando non pertinaci animo talem doctrinam defendunt, sed de veritate solliciti, parati sunt errorem corrigere. E contrario vero in aliis locis sine ulla distinctione, ut hæreticum damnat pertinacem in errore, sive illum per se invenierit, sive a falso doctore, sive a parente didicerit. Quod etiam ratio ipsa manifeste ostendit, nam parentis error, quando jam a

prole discerni potest, ipsius culpam non excusat, quin potius accusat.

2. Regem Jacobum in Catholica Ecclesia aliquando fuisse probatur. — Catechumenus rite ab hæretico baptizatus vere membrum Ecclesiae efficitur. — Quod vero rex addit, nunquam in eadem Ecclesia cum Catholicis fuisse, imprimis ex confessione ejus, addito vero Theologiae principio, negari merito potest. Ipse enim fatetur se fuisse ritu catholico baptizatum, cum adhuc sub cura et potestate serenissimæ reginæ et catholicæ matris existaret; ex his autem principiis manifeste concluditur, ipsum fuisse spiritualiter genitum in Ecclesia Catholica, non in hæreticorum synagoga, quia et baptismus, quo fuit regeneratus, est proprium donum Ecclesiae Catholicae, licet interdum ab hæreticis possideatur et ministretur, ut ait Augustinus, lib. 1 de Baptismo, cap. 10; et serenissima ipsius mater, sub cuius potestate tunc erat rex, unita erat Ecclesiae Catholicae, ut membrum ejus, per fidem quam profitebatur; ergo etiam filius regeneratus est Ecclesiae, tanquam ejusdem membrum. Imo quamvis nullus ex parentibus esset Catholicus, per solum baptismum rite ministratum, et non indigne receptum, factus esset Ecclesiae Catholicae membrum, quia veram justitiam, et fidem Christi per baptismum accepit, simul cum Christi charactere; ergo conjunctus fuit Ecclesiae per sacramentum fidei, et per fidem sacramenti, quod satis omnino est ut fuerit membrum ejus. Sicut etiam catechumenus vere fidelis et catholicus, si propter necessitatem ab hæretico baptizetur cum vera fide, et convenienti dispositione, plene sanctificatur, et unitur Christo ut capiti, et Ecclesiae Catholicae ut corpori ejus, juxta doctrinam Augustini, lib. 1 de Baptismo, c. 2; ergo idem sentiendum est de infante, etiamsi a ministro hæretico, et sub parentibus hæreticis baptizetur. Quia licet ministri vel parentes errent privato errore, nihilominus baptizatur in fide veræ Ecclesiae, et per eamdem fidem, quam in baptismo accepit infusam, membrum ejusdem Ecclesiae efficitur, etiamsi sub potestate alienorum, et hostium Ecclesiae detineatur. Quamdiu ergo rex Angliae baptismalem justitiam et fidem non amisit, in Ecclesia Catholica fuit; nam ab illa fuit regeneratus, juxta doctrinam Augustini, lib. 1 de Baptismo, cap. 10, et ab eadem habuit characterem, et fidem, qua sibi illum conjunxit. Nam in illa ætate, quæ actus fidei capax non est, ad prædictam unionem habi-

tus sufficit, cum etiam ad unionem cum Christo sufficiat; ergo ex illo capite excusari non potest, quominus, amittendo postea fidem per proprium actum hæresis, ab Ecclesia Catholica defecerit.

3. Potest aliquis esse hæreticus, etiamsi in Ecclesia Catholica nunquam extiterit. — Et quamvis hæc verissima sint, addi præterea potest, posse aliquem esse vere et proprie hæreticum, etiamsi nunquam in Ecclesia Catholica fuerit. Nam si quis a principio instrutus fuit ab hæreticis non rite baptizantibus, posteaque in errore semel concepto post sufficientem animadversionem pertinaciter duret, vere fit hæreticus, quia incipit esse infidelis sub nomine Christiano, et tamen ille nunquam fuit in Ecclesia, quia neque verum baptismum, neque veram fidem in habitu vel in actu habuit. Et hoc modo docent interdum Concilia et Patres, ut hæretici non rite baptizati venientes ad Ecclesiam per baptismum recipiantur, ut de Paulianistis statuit Concilium Nicænum, canon. 19. Erant ergo illi hæretici, quamvis antea nunquam in Ecclesia Catholica fuissent. Ratio vero est, quia de ratione hæretici non est ut sit vere baptizatus, sed sufficit quod, cum Christum confiteatur, in ipsius fide pertinaciter contra Catholicam Ecclesiam sentiat. Quin potius licet aliquis non solum vere baptizatus non sit, verum etiam nunquam fuerit Catholicus, potest esse hæreticus, si cognoscendo et confitendo Christum, veram ejus fidem non integre profiteatur. Hoc enim satis est ad infidelitatem hæresis, etiamsi persona sic errans nunquam fidem catholicam prius professa fuerit, et ab illa postea discesserit; nam hoc ad circumstantiam apostasiæ necessarium est, non ad propriam maculam hæresis, quæ sine illa circumstantia inveniri potest juxta doctrinam D. Thomæ 2. 2, q. 11 et 12. Loquimur autem de hæretico quoad culpam, non quoad poenas Ecclesiae, quia ut illas incurrat, characterem baptismi habere oportebit, per se loquendo, ut latius in dicto loco de Infidelitate tractatur. Hoc ergo nunc satis fuerit ad ostendendum, regis excusationem, neque in eo quod assumit, neque in illatione fundatum habere.

4. Refellitur secunda regis ratio. — In secunda etiam excusatione non recte rex colligit, nam licet quispiam rite baptizatus sit, nullumque errorem circa baptismum, nullamve controversiam in ea materia cum Catholicis habeat, nihilominus propter errores

in aliis articulis fidei pertinaciter conceptos, potest esse hæreticus. Alias neque Arius, neque Lutherus, neque alii similes fuissent hæretici; nam fuerunt rite baptizati, et circa baptismum vel ritum ejus controversias non excitaramunt, sed propter alias hæreses hæretici facti sunt. Ad præsentem ergo causam parum refert, quod rex fuerit rite baptizatus, et quod de baptismo controversiam nobiscum non habeat, sed considerandum est, num in aliis rebus fidei a Catholica Ecclesia dissentiat. Nam, ut Augustinus¹ (aliud agens) dixit: *Non sacramenta christiana te faciunt hæreticum, sed prava dissensio.* Alloquiturque Donatistas, de quibus paulo post dicit: *Nobiscum estis in baptismo, in Symbolo, et in cæteris sacramentis Dominicis; in spiritu autem unitatis, et vinculo pacis, in ipsa denique Catholica Ecclesia nobiscum non estis.* Quælibet ergo dissensio ab Ecclesia Catholica in doctrina fidei facit hæreticum eum, qui in Christum credere profitetur, etiamsi nec baptismo caret, nec circa baptismum erret.

5. *Diluitur ultima ratio.* — Superest ultima ratio, in qua rex ea, quæ credit, enumerat, ut inde se Catholicum esse comprobet. Sed profecto non recte colligit, tum quia nec sufficienter credit ea quæ enumerat, neque sufficienter enumerat quæ Catholicus credere deberet. Primum itaque ait, se fidem adhibere Scripturis sanctis; sed quibus? non omnibus quas Catholica Ecclesia approbavit, sed quas ipse sibi elegit credendas; ergo fides, quam Scripturis adhibet, catholica non est; nam catholica fides universalis est, et non aliunde quam ab Ecclesia Catholica, teste Augustino, recepit Scripturas. Deinde quem sensum Scripturæ sanctæ sua fide credit? Quem nempe sua certa scientia invenisse se credit. Non ergo per fidem catholicam Scripturis credit; nam fides catholica proprio judicio, et privato spiritu nequaquam ntititur, sed Ecclesiæ Catholice in exponendis Scripturis regulam tenet. Verum hæc in superioribus late tractata sunt.

6. *Ad veram fidei confessionem non sufficiunt Symbola, absque catholico sensu credita.* — Secundo numerat rex Symbola fidei, in quæ se jurare dicit. Sed de his (ut supra etiam notavi) interrogandus est, an in omnibus illa Symbola recipiat in eo sensu, quo Catholica Ecclesia illa recipit; nam si hoc affirmare non audet (quia revera non ita

est), tenere aut jurare litteram Symboli non satis est, ut se Catholicum ostendat. Sententia est Cypriani, Epist. 76 ad Magnum, ubi cum dixisset, schismaticos, utique hæreticos, gentilibus adæquari, subjungit: *Quod si aliquis illud opponat, ut dicat, eamdem Novatianum legem tenere, quam Catholica Ecclesia teneat, eodem Symbolo quo et nos baptizare, eundem nosse Deum Patrem, eundem Filium, eundem Spiritum Sanctum, ac propter hoc usurpare eum potestatem baptizandi posse, quod videatur in interrogatione baptismi a nobis non discrepare, sciat quisquis hoc opponendum putat, primum non esse unam nobis et schismaticis symboli legem, neque eamdem interrogationem.* Nam cum dicunt: *Credis remissionem peccatorum, et vitam aeternam per sanctam Ecclesiam?* mentiuntur in interrogacione, quando non habeant Ecclesiam, etc. In qua Cypriani sententia solum pondero, ad professionem et veram fidei confessionem, non satis esse recipere verba Symboli, vel in ea jurare, nisi in sensu catholico credantur, neque satis esse (ut etiam subjungit Cyprianus) confiteri Patrem, Filium, et Spiritum Sanctum, etiam in sensu catholico, si alii articuli de remissione peccatorum, et de una sancta et Catholica Ecclesia in perverso retineant sensu, sicut constat intelligi a Protestantibus. Nam ex dictis supra de Ecclesia manifeste liquet, quantum in articulo de Ecclesia omnes illi errent, quod nunc nobis sufficit; nam de aliis articulis non est hic disputandi locus.

7. *Omnia authentica Concilia æquali certitudine recipienda sunt.* — Tertio numerat rex quatuor prima Concilia generalia, eaque dicit se tanquam Catholica et orthodoxa venerari. Ubi etiam statim interrogandum occurrit, cur hæc potius, quam quintum, vel sextum, vel alia authentica usque ad Concilium Tridentinum recipiat. Nam si externam speciem seu solemnitatem (ut ita dicam) spectemus, non minor fuit posterioribus Conciliis generalibus, quam illis quatuor primis, nam eadem auctoritate Pontificia congregata et confirmata fuerunt, et convocatio æque universalis fuit, et concursus vel æque frequens, vel interdum major, vel si aliquando fuit minor, parum refert, idem siquidem contigit in quatuor primis Conciliis, hocque accidentarium prorsus est ad Concilii universalitatem, idemque cum proportione dico de sapientia, aut sanctitate personarum ad Concilia venientium, eaque celebrantium. Si au-

¹ Ep. 48.

tem in Conciliis consideremus internam et primariam virtutem eorum, quæ est assistentia Spiritus Sancti, et hanc credit, et hoc recognoscit rex in quatuor primis Conciliis, et ideo illa veneratur, cur non credit et recognoscit eamdem in posterioribus Conciliis, et pari veneratione ea recipit? Gerte non video quid respondere possit, nisi vel post tempora quatuor primorum Conciliorum Ecclesiam Catholicam jam periisse, et a vera fide defecisse, et ideo Concilia illius, quantumvis generalia, jam non fuisse vera Concilia, sed congregations perfidorum, vel se et suos per privatum spiritum proprium posse discerne-re inter vera et falsa Concilia, et per illum approbare quatuor prima, et non reliqua. Sed de his et similibus responsis, quam vana et voluntaria, quamque per se incredibilia apud quemcumque virum prudentem, quam denique erronea, et non solum Sanctis Patribus, sed etiam Scripturis sanctis contraria sint, satis est a nobis in superioribus demonstratum.

8. *Præcluditur evasio quædam regis.*—For-tasse aliud fuit regis consilium, illa potius ve-nerandi Concilia quam alia, non quia assi-tentiam Spiritus Sancti veris Conciliis credat esse promissam, neque etiam quia crediderit errare non potuisse, sed quia judicat de facto non errasse, sed consentanee ad Scripturas sacras docuisse, quod de aliis Conciliis non judicat. Quod si ita de Conciliis sentit, hoc non est credere Concilio generali tanquam regulæ fidei, sed est proprio judicio approbare Concilium, et reprobare; hoc autem modo recipere Concilia, ad humanam opinio-nem potius quam ad fidem pertinet. Et hinc etiam provenire videtur, ut Protestantes non plenè et integre illa Concilia recipientes ve-nerentur, sed in ea tantum parte doctrinæ, quæ illis non contradicit, non tamen in aliis decretis, præsertim moralibus, neque in modo deducendi veritatem ex traditionibus Ecclæsiæ, et consensu Patrum, neque in recognizione Sedis Apostolicæ Romanæ, cui semper primas deferunt, ut eruditæ notavit in sua Apologia doctissimus Cardinalis Bellarminus, cap. 7, et juxta occurrentes occasiones in sequentibus declarabimus.

9. Quarto denique commemorat rex Pa-trum consensum unanimem, eorum videlicet, qui quadringentis vel quingentis annis post Christum fuerunt. Ubi statim occurrit eadem objectio, quia gratis soloque arbitrio suo dis-cernit inter Patres majoris vel minoris anti-

quitatis, cum multi, tempore inæquales, nec sanctitate, nec sapientia fuerint inferiores; et (quod caput est) in rebus ad fidem et salutem pertinentibus a vestigiis antiquorum non discesserint, ut Gregorius Magnus, Gregorius Turonensis, Isidorus, Joannes Damascenus, venerabilis Beda, Remigius, Petrus Damianus, Anselmus, Bernardus, Thomas, Bonaventura, Laurentius Justinianus, et alii si-miles. Deinde inter illos antiquos Patres merito numerantur Dionysius et Ignatius, quos Protestantes aliqui non solum non admittunt, sed etiam convitiis onerant. Deinde Leoni I et Innocentio I, et aliis Sanctis illorum tem-porum Pontificibus, nihil fere deferunt, so-lum quia Pontifices fuerunt, licet non minori sapientia scripserint. Denique Patres etiam alios, quotiescumque persentiscunt sibi con-trarios, facile rejiciunt, vel negando esse eorum scripta, licet eorum nomine circumfe-rantur, vel ipsis errorem attribuendo. Unde etiam ipse rex in hoc puncto non profitetur se credere omnia, quæ illi Patres unanimi consensu docuerunt, etiam de rebus ad salutem necessariis, sed solum ea non reprehendere, vel ad summum obmutescere, quod parum et diminutum est ad integrum fidei confessionem, quia ex hujusmodi unanimi consensu in tali materia consurgit ecclesiasti-ca traditio, quæ continuata semper in Ecclæsia Catholica sufficit ad regulam fidei, ut supra probatum est.

10. *Ratio regis insufficiens ostenditur.*—Quamobrem licet concederemus regi, verum simpliciter esse, quod in illa ratione profite-tur, de fide quam præbet Symbolis et qua-tuor Conciliis, nihilominus nec recte nec suf-ficienter concluderet ejus ratio; alioqui oportebit ut multos, ab Ecclesia ut hæreticos dam-natos, hæreticos fuisse inficiemur. Helvidius enim, et qui ab Epiphanius¹ Antidicomaria-nitæ appellantur, inter hæreticos numeran-tur ab Augustino², quamvis illi fidem adhi-berent Scripturis, Symbolis, et Conciliis, quia Beatissimam Mariam alios post Christum fi-los ex Joseph habuisse solum contendebant; licet id non sit expresse contra Scripturam, Symbola vel quatuor Concilia, sed contra ecclæsiasticam ab omnibus Catholicis receptam traditionem. Deinde habemus optimum exem-plum in Donatistis, de quibus ait Cyprianus supra, in principio perseverando in eadem

¹ Hæres. 78.

² Hæres. 56 et 84.

fide, et religione, et usu sacramentorum schisma fecisse, Ecclesiam scindendo, et cathedram ac primatum usurpando. Addit vero Augustinus, lib. de Hæresibus, in 69 : *Pertinaci defensione firmata in hæresim schisma verterunt, et ita factos esse hæreticos. Explicans autem quomodo primum facti sint hæretici, addit : Tanquam Ecclesia Christi propter crimina Cœciliani, seu vera, seu, quod magis judicibus apparuit, falsa, de toto orbe terrarum perierit, ubi futura promissa est, atque in Africa in Donati parte remanserit, in aliis terrarum partibus quasi contagione communionis extincta.* In quibus verbis non obscure innuit Augustinus, Donatistas factos esse hæreticos, male sentiendo de Ecclesia, a qua per schisma fuerunt divisi. Et tamen Donatistæ dicebant se credere Scripturis, et Symbolo Apostolorum; reliqua enim symbola, et quatuor Concilia generalia, quando Donatus incepit, nondum facta fuerant; fidem autem postea in illis definitam tenebant (quantum ex Cypriano et Augustino colligimus), et tamen propter solum errorem, quo male de Ecclesia sentire cœperunt, hæretici facti sunt. Si quis autem recte consideret, idem Protestantibus, et præcipue Anglicanæ sectæ accidisse reperiet, quæ per schisma et usurpationem primatus incepit, et postea eo processit, ut propter communicationem cum Pontifice Romano, cui falsa crimina et errores imposuit, universalem Ecclesiam visibilem defecisse pronunciet.

11. Addit præterea de Donatistis Augustinus : *Audent etiam rebaptizare Catholicos, ubi se amplius hæreticos esse firmarunt, cum Ecclesia Catholice universæ placuerit, nec in ipsis hæreticis commune baptisma rescindere.* Dicit autem, per hoc amplius firmatur esse hæreticos, quia novam hæresim addiderunt, qua tamen non obstante, diceret Donatus se admittere Scripturam, et Symbolum, et unicum verum baptisma, quod in sua Ecclesia esse contendebat. Hoc autem totum, si non in eadem baptismi materia, in multis aliis similibus, in opinione Anglicana videre licet. Nam postquam cœpit male de Ecclesia sentire, multa contra universalem ejus sensum ac definitionem recepit et docuit, quibus in hæresi amplius firmata est, ut paulo superiorius locutus est Augustinus. Possumus præterea in exemplum adducere omnes hæreticos, qui privatos et singulares errores habuerunt, et hæretici ab universa Ecclesia reputantur, licet Scripturas, Symbola, et quatuor

Concilia generalia, vel ea, quæ suis temporibus facta fuerant, se credere dicenter, ea omnia male interpretando. Ut colligitur ex his, quæ de variis erroribus, quorum singuli ad constituendum hominem hæreticum sufficiunt, refert Origenes ad Titum 3, apud Pamphilum in Apologia. Item ex his, quæ de Pelagianis, Anabaptistis, Monothelitis, Jovinianistis, et aliis, Augustinus, Epiphanius, et alii referunt, quos esse hæreticos manifestum est; et ipsi Protestantes multos ex his ita vocare non dubitabunt. Ergo illa excusatio non est sufficiens, quando, illa non obstante, multa contra Ecclesiam Catholicam creduntur, sive aliter interpretando Scripturam, aut Symbola, quam ipsa Ecclesia sentiat, sive multa damnando, quæ ejusdem Ecclesiæ auctoritate approbata ac definita sunt. Talem autem esse fidem suam rex Angliæ non solum non negat, verum etiam expresse affirmat, Catholicam Ecclesiam de variis erroribus accusando; quot enim errores illi objicit, tot hæreses in sua secta invenire confitetur, totiesque docet universalem Ecclesiam posse in fide et moribus errare, quod hæreticum est.

CAPUT XXV.

IMMERITO ANGLICANAM SECTAM FIDEM SUAM, ET ECCLESIE AUCTORITATEM AD QUINTAGESIMUM CHRISTI ANNUM LIMITARE.

1. Priusquam in sequenti libro errores Anglicani schismatis sigillatim refellamus, operæ pretium duxi in præsenti capite, quædam regis verba, quibus (ut ita dicam) certos quosdam credulitatis suæ et consensionis cum Ecclesia Romana præscribit terminos, cæterorum utope fundamenta, proponere diligenterque expendere. Verba autem sunt ejusmodi : *Quod si Romanæ Ecclesiæ officina fidei articulos ante quingentesimum Christi annum inauditos, ac invisos recenter excudit, non sum, credo, damnandus pro hæretico, si ad hæc novitia et nupera non accedam.*

2. *Conjecturæ quibus rex ad predictam credendi regulam astruendam adduci potuit.* — Hæc certe verba veluti generalem credendi regulam continent, seu limitationem quædam, mensuram, vel terminum, quem credulitati suæ præscribit rex, videlicet, ut ad articulos, propositiones, que post quingentesimum Christi annum in Ecclesia definitæ sunt, non extendatur; supponere autem vi-

detur, se credere omnia, quæ quinque primis sæculis Ecclesia tanquam de fide necessaria creditit. Quanquam hanc posteriorem partem affirmantem non tam expresse ponit, sicut alteram negantem. Nam, licet paulo inferius videatur illam etiam profiteri, verbis tamen mutatis, magisque confusis et ambiguis, ne fortasse illis possit constringi, ut infra, quamdam responsonem regis urgendo et exigendo, ponderabo. Nunc ergo circa alteram partem, in qua refudit rex credere, si quid est post quingentesimum annum in Ecclesia definitum, rationem hujus regulæ credendi, vel potius non credendi, a serenissimo rege postulare necessarium judico. Neque enim verisimile est ipsum, pro solo suo arbitratu terminum illius temporis sibi statuisse, alioqui tota ejus fides non solum erit humana, sed etiam prudenti ratione carebit, quod quam christianæ fidei repugnet, omnibus perspicuum manet; ad eujus rationem reddendam parati esse debemus juxta monitionem Petri, 1 canonice, c. 3, quam de ratione inducente ad credendum explicuit August., epist. 222. Potuit itaque rex moveri ad sic limitandam fidem suam, vel quia decrevit nihil sibi esse credendum, nisi quod per suam certam scientiam scriptum esse intelligit in illis libris canoniceis, quos ut sacros admittit; vel quia credit Ecclesiam Catholicam gubernatam esse a Spiritu Sancto ad conservandam puram fidem per quingentos annos, et non amplius; vel quia non loquitur de Ecclesia Catholica, sed de Romana, et illam dicit ab illo tempore errasse. Sed haec non sufficiunt ad excusandum errorem illius limitacionis; imo omnia, et singula convineunt, illam, et contra fidem, et contra rationem esse, ut dicta tria membra examinando patebit.

3. *Solvuntur conjecturæ adductæ. — Evansi occurritur.* — Nam prima ratio facile ex superiorius dictis refutatur. Tum quia ostendimus, contra fidem et contra rationem esse admittere quoadam libros approbatos ab Ecclesia, et alios repudiare, cum nullus canonici fidem possit sortiri, nisi per auctoritatem Ecclesiæ, et haec eadem sit in omnibus, ac proinde si in uno inveniatur fallax, incerta in omnibus fiat. Tum quia contra principia fidei, et contra naturalem rationem sit in privatum spiritum fidem reducere, et illam ut certam et omnibus necessariam prædicare. Praeterea occurrit hic peculiaris ratio, quia privatus iste spiritus etiam potest suggerere, aliquid in Scriptura esse credendum,

aliter quam fuerit intellectum in primis quinque sæculis; et e converso potest quispam sensum aliquem Scripturæ approbare, qui post quingentos Christi annos ab aliquo etiam privato spiritu excogitatus fuit, licet fuerit contrarius dogmatibus prioribus quinque sæculis receptis; nulla est enim major ratio de uno tempore, quam de alio, si semel aliquis sibi persuadeat fidem esse dannam huic privato spiritui. Quod si fortasse rex dicat, spiritum sibi dictare, in illis quinque primis sæculis non esse erratum ab Ecclesia in intelligentia Scripturarum, et postea esse erratum, certe ostendere non potest ubi hoc legat, ut per suam certam scientiam intelligat, authentice et canonice esse scriptum, et ita constat sine fundamento etiam ab ipso rege discrimen illud seu limitationem temporum præscribi. Quod si conjecturis tantum humanis rex ducatur, statim ostendemus nullas esse, nulliusque ponderis et momenti, unde immerito illas anteponit certæ et induitatæ fidei.

4. *Secundæ conjecturæ solutio.* — Venio ad secundam rationem, et simili modo inquiro unde constet, Ecclesiam Catholicam per quingentos primos annos gubernatam esse, et in vera ac pura fide a Spiritu Sancto conservatam. Certe non aliunde, quam ex Christi promissionibus, alioqui voluntarie et sine fundamento enunciatur. At Christus Dominus quingentorum annorum spatium, suæ promissioni limitem, ut ex Scripturis liquet, non præfixit. Sine fundamento ergo fidei Christianæ istiusmodi præfigitur terminus. Imo vero contra fidei fundamentum, quia Christi promissiones indefinitæ sunt, et interminatae (ut sic dicam); ergo contra fidem est illis præscribere terminum. Quin potius in eis sæpe addit Dominus de promissione Spiritus, *ut maneat robiscum in æternum*, et de protectione sua, *usque ad consummationem sæculi*; ergo si a quingentesimo Christi anno cessavit Ecclesia protegi a Christo, et a Spiritu Sancto gubernari, pro majori parte temporis fallax et infidelis fuit promissio, et sic sine causa creditur, illis prioribus temporibus fuisse implementa; vel e converso si fides Ecclesiæ Catholicæ ob eam causam creditur pura in illis primis quinque sæculis, credendum eadem fide est, non minus puram durasse per undecim sequentia sæcula.

5. *Erasio regis. — Solutio.* — Dicet fortasse rex, in illis quinque primis sæculis, Ecclesiam conservasse veram fidem, non quia

errare non potuerit, sed quia de facto non erravit, postea vero errasse. At si ita sentit de primitiva et antiqua Ecclesia usque ad quingentesimum annum, profecto non credit fide divina Ecclesiam toto illo tempore non errasse, quia nullibi hoc revelatum est, nec in libris canoniciis scriptum, nisi in quantum in eis inveniuntur dictæ promissiones, et testimonium Pauli vocantis Ecclesiam columnam et firmamentum veritatis, quæ verba, et limitationem temporis non habent, et propter infallibilem assistantiam Spiritus Sancti ad nunquam errandum pronunciata sunt. Si ergo in hoc sensu non accipientur, non habet rex unde per fidem credat, Ecclesiam du-rasse Catholicam in primis illis quinque sæculis, aut non errasse in Concilio Nicæno, vel aliis tribus, nec etiam potest certa fide credere ipsummet Symbolum Concilii Nicæni, vel Constantinopolitanum, saltem quantum ad additiones in eis factas, et maxime quoad articulum de Ecclesia Catholica prout illis temporibus durante. Solis ergo conjecturis humanis, vel historiis, aut proprio arbitrio ducitur rex in credendo in illis sæculis Ecclesiam non errasse; possetque certe non multum dissimilibus, neque inæqualibus credere idem de posterioribus sæculis, nisi a falsis ministris ab incunabulis contrarium errorem imbibisset. Illa ergo limitatio et discretio temporum statim ostendit, talem fidem non posse esse catholicam, neque in divino verbo fundatam.

6. Diluitur tertia conjectura. — Dilemma contra regem. — Tertia vero ratio, seu excusatio (nimirum si rex asserat se non loqui de Ecclesia Catholica, sed de Romana), satis superque in cap. 5 rejecta est, quia nec Romana Ecclesia unquam fuit a Catholicis separata, neque Ecclesia Catholica, semel in Romana fundata, ab illa fuit unquam divisa. Præterea si post quingentesimum Christi annum rex loquatur de Romana Ecclesia, oportet ut etiam pro prioribus quinque sæculis de eadem identidem pronunciet eadem; tum quia solum de Ecclesiæ *Romanæ officina* in tota illa sententia loquitur; tum etiam quia alias incongrua esset, et non satis sibi constans vel firma ejus sententia. Concedat ergo necesse est, in illis quingentis primis annis Ecclesiam Romanam non errasse, neque ex officina ejus falso articulum produisse, nam illos articulos, quos tanquam novitios et nuperos reprehendit, ipsem fatetur in illis quinque primis sæculis fuisse inauditos; fatetur

ergo nihil habere quod pro illis sæculis in Ecclesia Romana reprehendat, ac proinde saltem pro eisdem sæculis non errasse. Hoc autem posito, discursum proxime factum recolentes stabilimus. Aut enim creditur Ecclesia Romana illis quinque primis sæculis non errasse, quia errare non potuit propter Spiritus Sancti assistantiam, vel quia de facto, et quasi casu non erravit. Prius membrum licet verissimum sit, scio esse non a rege admittendum, ne tantam prærogativam et insigne privilegium, vel ad breve tempus, Ecclesiæ Romanæ attribuat, præsertim quia si constanter loqui velit, et pro uno tempore illud recognoscet, pro alio renuere nequaquam potest. Quia si pro quocumque tempore admittatur, fundari debet in promissione Christi; verba autem Christi: *Ego rogabo pro te, etc.*, et illa: *Portæ inferi non prævalebunt adversus eam*, non habent ullam temporis limitationem, sed indefinite prolata omnia futura tempora comprehendunt.

7. Negabit ergo rex, ut credo, habuisse unquam Ecclesiam Romanam hoc privilegium, magisque aliud membrum eligit, scilicet, ipso facto ita evenisse, ut illis quingentis annis Ecclesia Romana non erraverit, licet privilegium non errandi non haberet, ac subinde non certa fide, sed humana conjectura, et libera opinione credit, illis quinque sæculis Ecclesiam Romanam non errasse. Unde ulteriori consequitur, idem de Ecclesia Catholica asserendum esse, quod quam sit absurdum, jam declaratum manet. Consecutio vero patet, quia totis illis quingentis annis id credebat Ecclesia Catholica, quod credebat Ecclesia Romana, et illi articuli prodierunt ex officina Ecclesiæ Catholicae, qui prodierunt ex officina Ecclesiæ Romanæ. Nam ejus Pontifex in Conciliis quatuor generalibus illorum temporum (quæ maxime dici possunt officina Ecclesiæ Catholicae) præfuit et præsedidit, et ab illius confirmatione et approbatione potissimum firmitatem habuerunt, ut ex actis eorumdem Conciliorum manifeste constat, et inferiori commodiori occasione dicetur; ergo non potest esse major certitudo de puritate fidei Ecclesiæ Catholicae pro illo tempore, quam de firmitate fidei Ecclesiæ Romanæ. Unde si hæc ad humanam opinionem revocatur, tota fides illorum nutabit, et auctoritas quatuor primorum Conciliorum mere humana erit, Symbolumque Athanassi nullam præter humanam habiturum est auctoritatem. Quia quam habet maximam, ab Ecclesia

Romana recepit, idemque supra de Symbolo Nicæno, seu Constantinopolitano intulimus. Accedit denique, quod Patres illius temporis non humanæ industriae, sed assistentia divini Spiritus, firmitatem et puritatem fidei Sedis Romanæ, et perpetuam successionem Episcoporum ejus, tanquam divinæ protectionis miraculo, tribuerunt semper, ut ex Cypriano, Augustino, et aliis nuper testati sumus; et maxime constat ex decretis et Epistolis Pontificum ejusdem Sedis, et illorum temporum, de quibus tamen omnibus in discurso supponitur puram conservasse fidem, et inter illos multi fuerunt sanctissimi Martyres, et Apostolis propinquissimi, ut Clemens, Anacletus, et similes. Alii vero fuerunt sapientissimi et sancti Confessores, ut Leo I, Innocentius, et alii.

8. *Concluditur esse contra fidem, Ecclesiae Romanae falsos articulos attribuere.* — *Prima ratio.* — Ex quibus tandem concludimus, contra omnem fidem esse attribuere Ecclesiae Romanae, quod post quingentesimum Christi annum officina fuerit falsorum fidei articulorum. Primo, quia ostensum est puritatem fidei, quam primis quinque saeculis habuit, non humano tantum consilio, sed divino privilegio fuisse conservatam; hoc autem privilegium sublatum non est, vel amissum in quingentesimo Christi anno; tum quia loc nec probatur, nec probari potest, et contra privilegium antiquissimum, Christi ipsius ore exhibitum, non praesumitur, nisi probetur; tum maxime, quia perpetuitas illius privilegii sufficienter ex Scripturis, et ex communi traditione Patrum probatur, ut supra factum est, et in lib. 3 aliiquid fortasse addemus.

9. *Secunda ratio.* — Secundo, quia etiam post prima quinque saecula non potest separari officina Ecclesiae Romanæ ab officina Ecclesiae Catholicæ; sed affirmare ab officina Ecclesiae Catholicæ produisse unquam falsos articulos fidei, est plane haereticum, quia nihil aliud est quam dicere Ecclesiam Christi amisisse fidem catholicam, ac subinde periisse; ergo non minus erratur, de Romana Ecclesia ita sentiendo. Prima propositio uno vel alio exemplo declaratur. Nam quinta vel sexta Synodus generalis non minus fuit officina Ecclesiae Catholicæ, simul et Romanæ, quam tertia, vel quarta; ergo si Ecclesia Romana potuit errare, vel erravit post illos quingentos annos, idem sentiri potest de tota Ecclesia Catholicæ. A qua sententia non longe videtur distare rex Jacobus, nam ob eam causam non

recipit Concilia generalia post quingentesimum Christi annum celebrata. Sed longe alter sensit de quinta Synodo Gregorius, Angliae apostolus, lib. 1 Reg., epist. 24, in fine, ubi cum dixisset suscipere ac venerari quatuor prima Concilia sicut quatuor libros sancti Evangelii, subjungit: *Quintum quoque Concilium pariter veneror.* Et infra de omnibus quinque loquitur, cum dieit: *Cunctas vero, quas præfata veneranda Concilia personas respuunt, respuo; quas venerantur, amplector, quia dum universalis sunt consensu constituta, se et non illa destruit, quisquis præsumit, aut solvere quos religant, aut ligare quos solvunt; quisquis ergo aliud sapit, anathema sit; quisquis vero fidem illarum Synodorum recipit, pax ei sit,* etc. Timeat ergo rex Angliae anathema dictum a sancto Gregorio, et ponderet rationem ejus ibi, *dum universalis sunt consensu constituta:* nam evidenter concludit, contra omnem rationem esse, ubi tam manifesta est eadem causa certæ auctoritatis in Conciliis, illam in quibusdam recognoscere, et non in aliis, propter solam temporis differentiam. Quam rationem egregie expendit Bellarmus, conferendo sextam Synodum cum tertia, dicto cap. 7, quibus nihil addi potest.

10. *Nihil potest a Romana Ecclesia produire, quin simul a Catholica prodeat.* — Atque eodem modo discurri potest per omnia sequentia tempora; semper enim Ecclesia Romana et Catholica fuerunt conjunctæ, vel potius una, et ideo nunquam aliiquid prodidit ab officina Ecclesiae Romanæ, quod ab Ecclesia Catholica non emanaverit. Nemo ergo potest falsitatis labem Ecclesiae Romanæ officinæ tribuere, quin vel eamdem Ecclesiae Catholicæ tribuat, vel tot saeculis in mundo Ecclesiam Catholicam fuisse neget, vel saltem post quingentesimum Christi annum latuisse, factamque esse invisibilem, affirmet, quæ sunt portenta et monstra per se incredibilia, et non solum Scripturis divinis, sed etiam rationi, imo et sensui contraria, ut in superioribus satis discursum est.

11. *Articuli a rege reprehensi veram et catholicam continent doctrinam.* — Quod si quis fortasse comminiscatur, his ad summum probari, ex Conciliis generalibus, ac subinde ex officina Catholicæ Ecclesiae non produisse falsos articulos, tamen aliquos esse per Pontifices Romanos sine dictis Conciliis inventos, de quibus loqui potuit rex Angliae, et ita Romanam Ecclesiam a Catholicæ in sententia sua

separari, advertat, hanc responcionem aliam petere quæstionem, num, scilicet, Papa pos- sit res fidei definire sine Concilio generali, quæ nobis nunc necessaria non est; tum quia rex sine dubio non in hoc sensu loquitur, quia et posteriora Concilia non admittit, et multi ex articulis, quos reprehendit, sunt in Conciliis generalibus approbati, ut videbi- mus; tum etiam quia, licet demus aliquos ex dictis articulis non fuisse in principio per ge- neralia Concilia introductos, nihilominus per universalem Ecclesiæ Catholicæ consensum recepti et approbati sunt, et ita non separan- tur ab universæ Ecclesiæ Catholicæ consensu; tum denique quia discurrendo per singulos articulos, quos rex attigit, aperte ostendemus sine causa reprehendi, quin potius veram fi- dem continere, sive per Concilia generalia, sive auctoritate Summorum Pontificum legiti- time definiti sint. Unde potius poterit e con- trario obiter, et quasi inductione quadam os- tendi, Sedem Romanam, quæ in suis defini- tionibus hactenus non erravit, errare nequa- quam posse, sive cum generali Concilio, sive solo Pontifice ex cathedra loquente, facta sit definitio. De quo puncto aliqua in tertio libro attingemus, quamvis propria illius conside- ratio et disputatio huic loco neque necessa- ria, ut dixi, neque opportuna sit.

42. *Summa et conclusio totius libri cum apostrophe ad Anglia regem.* — Rectam, ple- nam, securamque inveniendæ veræ ac catho- licæ fidei viam, rationemque pro modulo nos- tro ostendere, certisque ac verbo Dei funda- tis signis manifestare conati sumus; et quo- niam neque catholicæ fides extra veram Christi Ecclesiam, neque hæc unica Christi sponsa a sincera fidei veritate aberravit un- quam, aut aberrare potest, ideo cum funda- mento veræ fidei, hanc unicam ejus magis- tram tanquam solem in orbe fulgentem quasi digito demonstravimus, eamque non esse aliam, nisi quæ in sede Petri fundata est, verbo Dei partim scripto, partim non scripto comprobavimus. Unde fuit necessario conse- quens, ut Anglicanæ sectæ errorem, a nota hæresis inexcusabilem esse convinceremus, quod ea libertate, quæ catholicum docet Doc- torem, et ea modestia quæ majestati regiæ debita est, facere non dubitavimus: meino-

res illius Gelasii Pontificis ad Anastasium im- peratorem prudentissimæ sententiae : *Absit, quaso, a Romano (seu Christiano) principe, ut intimatam suis sensibus veritatem arbitre- tur injuriam.*

43. Superest ut rex serenissimus Jacobus (quod humiliter et obnixe postulo), vocem Domini audiens, non obdurescat, sed, omni affectu humano deposito, pro ingenii sui acumine, quo præditus est, maxime perpen- dat nostræ Catholicæ Romanæ Ecclesiæ anti- quitatem, suæ vero, quam amplectitur, sec- tæ videat novitatem; illius firmitatem, hujus instabilitatem; illius Doctores sapientissimos, sanctitate et antiquitate venerandos susci- piat, hujus vero obscuros, novitiosque impos- tores perhorrescat; sic enim, ut cupio, fiet ut illius veritatem, hujus autem fucum luce clarius intueatur, et cum Hilario dicere incipi- at: *Tandem nobis hos impiissimos Doctores atlas nunc hujus sæculi protulit, seros habuit fides, quam tu Deus erudisti, magistros. Inau- ditis ergo omnibus his, in te ita credam, ut exinde tuus semper sim.* Atque ita fiet, rex prudentissime, ut titulum defensoris catholi- cæ fidei, de quo merito gloriaris, merearis, veroque ac justo titulo possideas; non enim benigna Mater Ecclesia hoc tibi nomen invi- det (quod dono Pontificio datum non igno- ras), sed exoptat invictissimum; si autem ad ea, quæ hactenus diximus, animum attendas, intelliges profecto non Romanæ Ecclesiæ re- sistendo, sed ei potius humiliter parendo, il- lum esse consecuturum, Nam si eam impug- gnando persistas, vires alteras necesse est; ut enim Chrysostomus dixit: *Homini si bellum inferas, fortasse vinces, aut forte vinceris; Ecclesiam vincere nulla vis potest, nam cœ- lum et terra transibunt, verba autem Christi non transibunt.* Si vero Ecclesiæ Sanctæ sin- ceram fidem amplecti, ejusque gloriam et puritatem deamare incipias, constanterque retineas, tunc verum defensoris catholi- cæ fidei titulum consequeris æternum. Quod ut fiat, Divinam Majestatem efflagitamus, et apud vestram qualemcumque hunc la- borem nostrum libenter impendimus, et hac spe allecti ad alia, in quibus vestri vobis imposuerunt ministri, ostendenda pro- gredimur.

INDEX CAPITUM LIBRI SECUNDI

DE PECULIARIBUS ERRORIBUS IN MATERIA FIDEI CATHOLICÆ, QUOS REX
ANGLIÆ PROFITETUR.

-
- CAP. I. *De præsentia corporis et sanguinis Christi in sacrosancto Eucharistiæ sacramento.* *ctorum in regis Præfatione notantur.*
- CAP. II. *Substantiam panis et vini sub speciebus consecratis non remanere.* *CAP. IX. De Sanctorum invocatione.*
- CAP. III. *De transsubstantiationis veritate.* *CAP. X. De Sanctarum reliquiarum custodia et veneratione.*
- CAP. IV. *Eucharistiam latræ adoratione convenienter adorari, et in hunc finem elevari et circumgestari.* *CAP. XI. De vera imaginum Sanctorum veneratione, seu adoratione.*
- CAP. V. *De laicorum sub una tantum specie communione.* *CAP. XII. Objectionibus regis contra imaginum venerationem satisfit.*
- CAP. VI. *De missis privatis.* *CAP. XIII. De imaginibus Dei, ut Deus est.*
- CAP. VII. *De erroribus, quæ circa cultum et invocationem Beatae Virginis in Regis Præfatione notantur.* *CAP. XIV. De Crucis Christi adoratione.*
- CAP. VIII. *De iis quæ circa cultum San-*
- ctorum in regis Præfatione notantur.*
- CAP. IX. De Sanctorum invocatione.*
- CAP. X. De Sanctarum reliquiarum custodia et veneratione.*
- CAP. XI. De vera imaginum Sanctorum veneratione, seu adoratione.*
- CAP. XII. Objectionibus regis contra imaginum venerationem satisfit.*
- CAP. XIII. De imaginibus Dei, ut Deus est.*
- CAP. XIV. De Crucis Christi adoratione.*
- CAP. XV. De errore circa Purgatorium.*
- CAP. XVI. De erroribus circa Ecclesiæ ritus et benedictiones.*
- Summa et totius libri conclusio, cum apostrophe ad Angliæ regem.*



LIBER SECUNDUS

DE

PECULIARIBUS ERRORIBUS

IN MATERIA FIDEI CATHOLICÆ, QUOS REX ANGLIÆ PROFITETUR.

Hactenus de veris nostræ fidei fundamen-
tis, quibus sub Deo tota Catholica doctrina
natur, diximus, quibus reliqua superædifica-
ri facillime possunt; Ecclesiam siquidem au-
diens, audit et Deum. Scripturam vero, prout
ab illa traditam et explicatam, spernens, ejus
spernit auctorem; Ecclesia enim columna et
firmamentum veritatis est, *quam ut gravissime*
Paulus Orosius, lib. 7, c. 33, qui impugnat, inimicus est; et qui illi non sociatur,
alienus est. Quia vero serenissimus Angliæ
rex, quæ super fundamentum hoc superædifi-
cata sunt, maxime concutere molitur, ea
nos pro virili et captu nostro defendere et
stabilire conabimur; ideoque non de omni-
bus fidei dogmatibus, sed de illis quæ a pag.
44 Præfationis in confessione sua rex oppu-
gnat, agendum, neque ex illis omnia, sed
quæ præcipua, et quæ ad causam spectare
videbuntur, attingemus; non eo quidem, quo
ipse, ordine, sed doctrinæ, a præcipuisque
ordiemur; reliqua ordine, quem dixi, debito,
prosequemur. Solum ea, quæ ad primatum
monarchiamque Ecclesiasticam, exemptio-
nem clericorum et Antichristum pertinent,
quia proprias et prolixiores disputationes
postulant, in sequentes libros remittemus.

CAPUT I.

DE PRÆSENTIA CORPORIS ET SANGUINIS CHRISTI IN
SACROSANTO EUCHARISTIÆ SACRAMENTO.

1. *Primus error. — Secundus. — Tertius.*
— *Quartus. — Quintus.* — Serenissimus An-
gliæ rex titulum defensoris veræ fidei, quo
gloriari cupit, verum esse, atque in re ipsa
fundamentum habere, ostendere cupiens,
confessionem fidei suæ proposuit, qua evi-

denter convincitur quantum a veritate Catho-
licæ fidei aberret. Nam post illa, quæ de fun-
damentis fidei generaliter dixerat, plures arti-
culos Romanæ fidei sigillatim enumerat,
eosque tanquam nuperos ac novitos, imo et
perniciosos refellit. Et recensitis nonnullis,
ad quos postea revertetur, in hunc modum
subjungit: *In his articulis privatas illas Mis-
sas numero, in quibus sacrificus simul populi
personam, et sacerdotis sustinet. In his quoque
est sacramenti mutilatio, qua laicis partem
illius medium substraxerunt, Transsubstantia-
tio, adorandi causa elevatio, in supplicationi-
bus sacramenti circumgestatio.* In quibus ver-
bis quinque continentur errores, quos alio
ordine recensebo, ut a fundamento ordia-
mum. Primus est, in Eucharistiæ consecratio-
ne non fieri transubstantiationem; secundus,
Eucharistiam non esse adorandam, et ideo
pravam esse consuetudinem elevandi illam
in sacrificio adorationis causa; tertius, usum
in supplicationibus Sacramentum circumges-
tandi potius esse abusum; quartus, consue-
tidinem communicandi laicos in sola specie
panis, ut contra jus divinum reprobandam;
quintus, Missas privatas admittendas non es-
se. Primus autem ex his erroribus duos alios,
vel eorum alterum, in hac materia præci-
puum, et aliorum fundamentum, supponit.
Hic est, Christum Dominum non esse revera
et substantialiter præsentem sub speciebus sa-
cramentalibus Eucharistiæ, ut verisimiliter
credo, hanc esse opinionem regis, qui Calvini
sectam præcipua ex parte profiteri dicitur;
puduisse autem videtur regem infamiae istius,
et ideo errorem jam diu pro haeresi damnatum
disertis verbis confiteri erubuisse. Alter error
in negatione transubstantiationis inclusus
est, manere nempe post consecrationem sub-

stantiam panis et vini; nam si substantia panis et vini ibi maneret, etiamsi Christi Domini caro et sanguis sub eisdem speciebus præsentes fierent, assertio transsubstantiationis falsa procul dubio foret.

2. Prima conclusio. — Ut ergo primum ac præcipuum hujus mysterii fundamentum jaciamus, secundum fidem Catholicam credendum esse, sub speciebus panis et vini legitime consecratis, vere ac realiter corpus et sanguinem Christi Domini contineri, affirmamus. Hæc fides non potest a rege dici novitia vel nupera, neque ex humana, aut sola non scripta traditione venisse; nam in expressis verbis Christi a tribus Evangelistis Matthæo, Marco et Luca, et a Paulo relatis, fundata est, scilicet : *Hoc est corpus meum*, et : *Hic est sanguis meus*, vel, quod perinde est : *Hic est Calix sanguinis mei*, vel *in sanguine meo*. Neque immorari nos oportet in referendis et refutandis tropis, figuris et metaphoris, quibus Protestantes hæc clarissima verba corrumpere conati sunt; tum quia, ut dixi, non assumpsi provinciam has controversias ex professo disceptandi; tum etiam quia, ut recte monuit Tertullianus, de sensu alicujus Scripturæ ex solis verbis, et privato spiritu disputare cum hæreticis, qui neque Ecclesiam, neque Patres reverentur, inutile est. Quanquam ex hoc maxime loco convinci possunt, quam sit vanus privatus spiritus, quo in exponentibus Scripturis ducuntur, ita ut suis opinionibus non contradicant. Nam in his verbis secundum se spectatis nullum est vestigium figuratæ locutionis; nec occasio, in qua Christus illa protulit, ad condendum novum testamentum, metaphoram permittit; non enim solent prudentes in similibus occasionibus, præsertim sine sufficienti explicatione, metaphorice loqui et obscure. Accedit, Christum Dominum potius addidisse verba, quæ ad excludendam metaphoram sufficere valerent; ait enim : *Hoc est corpus meum*, *quod pro vobis tradetur*, et : *Hic est sanguis meus*, *qui pro multis effundetur*. Paulus quoque : *Quicumque manducaverit panem hunc, vel biberit Calicem Domini indigne, reus erit corporis et sanguinis Domini*. Et infra : *Judicium sibi manducat, et bibit, non dijudicans corpus Domini*. Denique concordia et consonantia horum verborum Christi cum promissione ab ipso facta, Joan. 6, et cum prædictionibus, et figuris hujus mysterii, et cum aliis verbis Pauli, 1 ad Cor. 10, eumdem sensum maxime confirmat et illustrat.

3. Assertio ex Patribus antiquis ostenditur.

— Prætermissa vero, ut dixi, disputatione de solis Scripturis, nobis nunc ut regi respondeamus, sufficit, hanc fidem non esse novam, neque sensum prædictum verborum Christi inventum esse post quingentesimum Christi annum, sed ab omnibus Patribus primorum quinque sæculorum, qui prædicta verba Christi attigerunt, vel mysterium explicarunt, esse traditum. Cujus veritatis testes non omnes, qui adduci possent, sed qui sufficient, afferemus, nam qui eos non audierit, neque si mille afferantur, credat. Primus ergo testis sit Hilarius, lib. 8 de Trinit., ubi prius præmittit: *Non est humano aut sæculi sensu in Dei rebus loquendum*, etc. Et postea adductis verbis Christi, Joan. 6, concludit: *De veritate carnis et sanguinis non relictus est ambigendi locus, nunc enim et ipsius Domini professione, et fide nostra, vere caro est, et vere sanguis est, et accepta atque hausta id efficiunt, ut nos in Christo, et Christus in nobis sit. An ne hoc veritas non est? Contingat plane, id rerum non esse iis, qui Christum Jesum, rerum Deum esse negant*. Calvinus ergo, cui hoc verum non est, Christi veritatem, ac subinde divinitatem, non minus impie quam ignoranter negavit.

4. Occurritur hæretorum erasioni.

— *Quid Ambrosius intelligat per figuram corporis.* — Secundus gravissimus, et locupletissimus testis est Ambrosius, lib. quarto de Sacramentis, cap. 4, ubi inter alia: *Panis iste panis est ante verba Sacramentorum; ubi accesserit consecratio, de pane fit caro Christi*. Et deinceps, ut admirationem tollat, et uno verbo ratunculas infidelium ex vana philosophia depromptas dissolvat, subjungit: *Ubi venitur, ut conficiatur venerabile sacramentum, jam non suis sermonibus sacerdos, sed utitur sermonibus Christi; ergo sermo Christi hoc conficit sacramentum. Quis sermo Christi? Nempe is, quo facta sunt omnia*, etc. Et postea in cap. 6 ita explicat verba Christi, et concludit: *Numquid debemus de ejus fide et testificatione dubitare?* Sed non deerit fortasse hæreticus, qui etiam clarissimis verbis Ambrosii vim inferre conetur, quia in principio illius cap. 5 refert, sacerdotem in Missa dicere sequentia verba: *Fac nobis hanc oblationem adscriptam, rationabilem, acceptabilem, quod fit in figuram corporis et sanguinis Domini nostri Jesu Christi*. Nam quia dixit, *in figuram*, protervus cætera omnia in tropum convertet, quamvis illis aperte repugnet. Verus autem et clarus sen-

sus est, per consecrationem vere fieri corpus Christi sub speciebus, per quod etiam fit ut species sint signum corporis et sanguinis, quæ sub se continent, et hoc vocavit Ambrosius, fieri in figuram, id est, in sacramentum corporis et sanguinis ibi latentis, vere tamen ac realiter existentis. Et hoc est obiter notandum ad explicanda, si interdum occurrerint, subobscura verba Patrum, quæ ex aliis eorumdem locis perspicnis, et integrum doctrinam continentibus explicanda sunt, et non e converso propter unum verbum obscurum tota doctrina alibi satis explicata offuscanda. Idemque sensus et tota veritas mysterii ab eodem Ambrosio explicatur in libro de Initiandis, cap. 9. Ecclesia vero Catholica ad vitandam calumniam non utitur in canone Missæ illo modo loquendi, *quod fit in figuram, etc.*; sed dicit, *ut nobis corpus et sanguis fiat dilectissimi Filii tui Domini nostri Iesu Christi.*

5. *Representare idem est quod rem præsentem facere.* — Tertius testis sit Hieronymus, exponens verba Christi, Matt. 26, ubi sic inquit: *Postquam typicum pascha fuerat impletum, et agni carnes cum Apostolis comedederat, assumit panem, qui confortat cor hominis, et ad verum Pascha transgreditur sacramentum, ut quomodo in figurae ejus Melchisedech, summi Dei sacerdos, panem et vinum offerens fecerat, ipse quoque veritatem sui corporis et sanguinis repræsentaret.* Ubi etiam fortasse prodibit haereticus, qui verbum repræsentaret, in aliquam fictionem vel metaphoram interpretetur. Vis vero verbi, et mens Hieronymi perspicua est: idem enim est repræsentare, quod rem præsentem facere, præsertim quæ antea promissa erat, vel futura prædicta, aut desiderata. Quod possumus exponere ex verbis Senecæ, epist. 95, in initio: *Petis a me, ut id, quod in diem suum dixeram debere reperiri, repræsentem et scribam tibi, etc., id est, impleam scribendo, etc.* Sunt etiam satis ad rem accommodata verba Ciceronis, Philip. 5: *Ego corpus libenter obtulerim, si repræsentari morte mea libertas civitati posset, id est, recuperari, seu præsens fieri.* Sic ergo dixit Hieronymus, Christum repræsentando, id est, præsentem faciendo veritatem corporis et sanguinis sui, illamque sic præsentem Patri offerendo, implevisse quod in oblatione panis et vini Melchisedech, et in immolatione agni Paschalis repræfiguratum fuerat. Atque hunc verum sensum explicavit magis idem Hieronymus, ep. 180 ad Hedibiam, quæst. 2, di-

cens: *Nos audiamus panem, quem fregit Dominus, deditque discipulis suis, esse corpus Domini, ipso dicente ad eos: Accipite et comedite, hoc est corpus meum.* Et infra: *Non Moy-ses dedit nobis panem verum, sed Dominus Jesus, ipse conciva et convivium, ipse comedens et qui comeditur; illius bibimus sanguinem, et sine ipso potare non possumus, et quotidie in sacrificiis ejus de genimine ritis veræ rubentia musta calcamus.* Quibus verbis (ait ibi Marianus Victor) *illustrius ac clarius de veritate corporis et sanguinis Christi dici nihil potuit.* Magis autem id confirmat idem Hieronymus, dicens aliis locis sacerdotes sacro ore Christi corpus conficere, epist. 1 ad Heliodorum, epist. 85 ad Evagrium, et fere idem Malachia 1, ad Galat. 5, ibi: *Alioqui sciebam et in Christi sanguinem vinum consecrari.* Et optimè ad Titum 1, circa illa verba: *Sed hospitalem, etc.: Tantum (inquit) interest, inter propositionis panes et corpus Christi, quantum inter umbram et corpora, inter imaginem et veritatem, inter exemplaria futurorum, et ea ipsa, que per exemplaria figurabantur.*

6. *Augustinus a sinistra interpretatione rindicatur.* — Quartus testis sit D. Augustinus, qui innumeris in locis hanc docet veritatem; perspicuus autem, et qui nullam tergiversationem patiatur, mihi esse videtur in concione 1 ad Psal. 33, ubi post latissimum sermonem de sacrificio corporis et sanguinis Domini, *quod fideles norunt, et qui Evangelium legerunt, quodque nunc diffusum est toto orbe terrarum,* dicit, *in illo mutasse Christum vultum suum de humilitate sua, id est, quia verbum, quod est pennis Angelorum, caro factum, panis factus est hominum, quia in corpore et sanguine suo voluit esse salutem nostram;* post hæc (inquam) quæ prosequitur multis verbis explicando veritatem hujus mysterii, tandem ad hoc mysterium accommodat verba 1 Reg. 21, sicut ipse illa legit, *ferebatur in manibus suis,* dicens: *Quis portatur in manibus suis? manibus aliorum potest portari homo, manibus suis nemo portatur; quomodo intelligatur in ipso David secundum litteram, non invenimus, in Christo autem invenimus. Ferebatur enim Christus in manibus suis, quando commendans ipsum corpus suum, ait: Hoc est corpus meum, ferebat enim illud corpus in manibus suis, ipsa est humilitas Domini nostri Jesu Christi, ipsa multum commendatur hominibus.* Ubi maxime ponderandum est, quod ait, in hoc mysterio, et in solo Christo ad litteram impletum esse, se ipsum *sui* manibus

portavisse; cum enim dicit ad litteram, figuram et tropum excludit. Nam suis manibus se in figura vel imagine portare, nullum esset miraculum, nec grande opus, nec proprium Christi; nam David posset in imagine sua se ipsum manibus portare. Neque etiam per tale opus multum commendaretur humilitas Christi; fuit autem maxima, quod Verbum caro factum, panis etiam vitae fieret, ut vere et realiter manducaretur ab hominibus. Et ita recte hunc locum urget Guitmundus, lib. 3 de Sacramento, in princ. Advertere autem oportet Augustinum, in conc. 2 ejusdem Psalmi¹, addidisse particulam, *quodam modo*, dicens: *Acceptit in manus suas, quod non rurunt fileles, et ipse se portabat quodam modo, cum diceret: Hoc est corpus meum.* Quam particulam aliquis fortasse ex umbraticis hominibus malitiose arripiet, ut totam evertat sententiam. Sed vix potest esse tanta cœcitas, ut existimetur Augustinus in tam brevi sermone dixisse contraria, aut addidisse aliquid quo totum mysterium, quoā explicuerat, destruueret. Per illam ergo particulam, *quodam modo* (quæ judicio meo melius disjunctim, et in vi nominis, quam conjunctim, et tanquam adverbium legitur), solum significare voluit Augustinus, Christum non se portasse in manibus corporali modo, id est, visibili, et suis manibus gravitatem corporis sentiendo et sustinendo, sed mystico modo, vero tamen et reali, et ita singulari, ut in sola figura vel imagine servari non possit. Et hoc est valde observandum in doctrina Augustini, quia sæpe conjungit illa duo, scilicet, veritatem corporis cum modo sacramentali et mystico, et ideo non est unum propter alterum excludendum, aut male explicandum.

7. Atque ita est optimum ejusdem Augustini testimonium in tract. de Cataclysmo, ubi primum ait, *sanguinem et aquam, quæ fluxerunt de latere Christi esse matris Ecclesiae gemina sacramenta, quæ exponens subdit: Hic sanguis inebriat mentem, ut amorem oliviscar mundi*, etc. Et clarius infra exponens illud: *Nec relinquatis ex eo quidquam usque mane, inquit: Hoc nunc agitur, comeditur enim Agnus per noctem hujus sæculi, ut cum mane illud venerit, quod vesperum non habebit, non jam offeratur sacrificium imaginis Agni, sed ipsum Agnum, quem quotidie immolamus, comedimus, et cuius sanguinem bibimus, inveniamus illic eum sacerdotem perfectum, quem constat, hic pro nostra salute occisum.* Qui locus potest etiam cavillum pati propter illa

verba, *sacrificium imaginis agni*. Ob quam difficultatem vitandam posset fortasse aliquis verba illa de sacrificio typici Agni paschalis intelligere, nam de nostro sunt expressa sequentia verba, *ipsum Agnum, quem quotidie immolamus, comedimus*. Sed expositio non quadrat contextui. Dixerat enim Augustinus, *hoc nunc agitur, comeditur enim Agnus per noctem hujus sæculi*. Ubi tempus etiam legis gratiae aperte complectitur, nam etiam addit, sæculum hoc durare usque ad mane illud, quod vesperum non habebit, id est, usque ad statum gloriae, ubi inveniemus (ut subjungit) Agnum sacerdotem perfectum, *quem constat, hic pro nostra salute occisum*. Et in illo mane, ait jam non esse offerendum sacrificium *imaginis Agni*, quod utique durante hoc sæculo semper offertur. Ergo etiam sacrificium Eucharistiae vocat sacrificium imaginis Agni. Per hoc autem non excludit veritatem præsentiae Agni, quem quotidie immolari et coaudi affirmat, sed quia haec immolatio non est cruenta, sed mystica, et quia ita est oblation Agni invisibilis sub specie visibili, ut sit etiam commemoratione ejusdem Agni visibiliter immolati, ideo vocat hoc sacrificium mysticum sacrificium imaginis Agni, id est, sacrificium representativum Agni pro nobis occisi, juxta verba ejusdem Agni: *Hæc quotiescumque feceritis, in mei memoriam facietis.*

8. *Per figuratam significationem modum sacramentaliter comedendi Augustinus intelligit.* — *Loca in quibus Augustinus veritatem catholicam simpliciter docet.* — Similique observatione adhibita, est satis apertum ejusdem Augustini testimonium, lib. 2 contra adversarium legis et Prophetarum, c. 9, ubi dicit, *mediatorem Dei et hominum, Christum Jesum, carnem suam nobis manducandam, bibendumque sanguinem dantem, fidi corde atque ore suscipimus, quamvis horribilius videatur, humanam carnem manducare quam perire, et humanum sanguinem potare, quam fundere.* Quæ verba expressissima sunt. Addit vero statim quamdam generalem regulam, qua possunt Calvinistæ abuti, dicens: *In omnibus sanctis Scripturis secundum sanæ fidei regulam figurate dictum vel factum si quid exponitur, de quibuslibet rebus, et verbis, quæ sacris paginis continentur, expositio illa ducatur, non aspernanter, sed sapienter audatur.* Attendant vero et intelligent verba illa, secundum sanæ fidei regulam, quæ est Catholica Ecclesia, unanimis Patrum consensu, et eum aliis Scripturis, et fidei mysteriis con-

cordia, retenta proprietate verborum, ubi si ne inconvenienti fieri possit. Atque ita in prædictis verbis *manducandi corpus, et bibendi sanguinem Domini*, admittit Augustinus figuratam seu mysticam significationem quoad modum manducandi et bibendi, utique sacramentalem, quo tollitur horror, qui in tali manducazione aut potu esse poterat, nam hæc figurata significatio est secundum regulam fidei, et necessaria ad veritatem mysterii. Non tamen admittit Augustinus figuratam locutionem quoad substantiam (ut sic dicam) manducazione Christi, et ideo dixit : *Quem fideli corde atque ore suscipimus*, quia talis figura nec necessaria est, nec secundum regulam fidei, imo illi contraria. Et juxta hanc regulam exponit late Augustinus, tract. 26 et 27 in Joan., verba illa Christi : *Nisi manducareritis carnem Filii hominis, et biberitis ejus sanguinem, non habebitis vitam in robis*. Simul cum illis : *Spiritus est qui vivificat, caro non prodest quicquam ; verba, quæ ego locutus sum vobis, spiritus et vita sunt*. In plerisque vero aliis locis, idem S. Doctor simpliciter affirmit, dedisse nobis Christum corpus suum ad manducandum, et sanguinem ad bibendum, ut Psal. 33, in expositione, sub finem, et conc. 1 in Psalm. 48, circa principium, et enarrat. in Psalm. 65, ante medium, et expositione in Psal. 93, circa princip., et sermon. 2, de Verbis Apostoli, cap. 1, et lib. 50 Homiliarum, in ultima, alias lib. de Utilitat. Pœnitent., cap. 4, et lib. 2 contra Litteras Petiliani, cap. 37, et lib. 1 de Peccatorum meritis, c. 24, ubi ait : *Sine baptismo, et corpore, et sanguine Domini nemini speranda est salus, ac vita eterna*. Et ideo Christianos Carthaginenses solitos fuisse vocare baptismum salutem, et Eucharistiam vitam. Et interdum ad majorem declaracionem addit, bibere nos sanguinem, quo redempti sumus, ut 12 contra Faustum, c. 10, optime dicit : *Habet magnam vocem Christi sanguis in terra, cum eo accepto ab omnibus gentibus respondetur Amen. Hæc est clara vox sanguinis, quam sanguis ipse exprimit ex ore fidelium, eodem sanguine redemptorum*. Denique in lib. 20 contra eundem Faustum, cap. 13 : *Panis (inquit) et calix non quilibet, sed certa consecratione mysticus fit nobis corpus Christi. Proinde quod non ita fit, quamvis sit panis et calix, alimentum est refectionis, non sacramentum religionis, nisi quod benedicimus Domino, et gratias agimus in omni ejus munere*. Et sic etiam lib. 2 de Peccator. meritis,

cap. 26, de pane benedicto, seu cathecumenorum dicit, sanctum esse et sanctioreni, quam sint communes cibi, *quoniam sacramentum est, id est, sacram signum, quamvis (inquit) non sit corpus Christi*, quod nimis corpus longe altiori modo est ipsum Eucharistiæ sacramentum

9. Quintus testis sit Cyprianus, qui in serm. de Cœna Domini fuse ita explicat hoc divinum mysterium, et inter alia dicit : *Inconsumptibilem cibum Magister apponit discipulis*. Et infra : *Immortalitatis alimonia datur a communibus cibis differens*. Et post multa : *Panis iste communis in carnem et sanguinem mutatus procurat vitam, et incrementum corporibus, ideoque ex consueto rerum effectu fidei nostræ adjuta infirmitas sensibili argumento edocta est, visibilibus sacramentis inesse vitæ aeternæ effectum, et non tam corporali quam spirituali transitione Christo nos unire*. Et infra : *Panis iste, quem Dominus discipulis porrigebat, non effigie, sed natura mutatus, omnipotentia Verbi factus est caro*. Quod statim explicat exemplo divinitatis latentis sub humanitate, et optimas rationes tanti mysterii adducit. Et paucis interpositis : *Universa Ecclesia ad has epulas invitatur, æqua omnibus portio datur, integer erogatur, etc*. Per quæ omnia evidenter testatur præsentiam Domini in hoc sacramento. Quod si quis in dubium revocet an opus illud sit Cypriani, respondemus imprimis, ab omnibus fere gravioribus Theologis et peritis auctoribus Cypriano attribui, quia stylus, phrasis et doctrina ipsum satis indicant. Deinde, si fortasse non sit Cypriani, nemo sane ambigere potest quin fuerit alicujus gravissimi Patris ejusdem ætatis. Ac denique quam plurimis indubitatis locis, idem Sanctus, paucioribus licet verbis, eamdem ejusdem Sacramenti fidem ostendit ; ut epist. 11 exponit Eucharistiam, id est, *Sanctum Domini corpus*, et latius epist. 63, dicens : *Christus sacrificium Deo Patri obtulit, et obtulit hoc idem quod Melchisedech obtulerat, id est panem et vinum, suum, scilicet, corpus et sanguinem*, quod per totam fere epistolam prosequitur. Idem epist. 54 et 56, et 76, et lib. de Lapsis, in principio, et alibi saepe.

10. Sextus et gravissimus testis est Leo Papa, in ser. 6, de Jejunio septimi mensis : *Dicente (inquit) Domino : Nisi manducareritis carnem Filii hominis, et biberitis ejus sanguinem, non habebitis vitam in robis, sic sacerdos mensæ communicare debitis, ut nihil pror-*

sus de veritate corporis Christi et sanguinis ambigatis, hoc enim ore sumitur, quod fide creditur, et frustra ab illis Amen respondetur, a quibus contra id, quod accipitur, disputatur. Idem tradit serm. 4 Quadrag., et 7 de Passione. Et ep. 23 ad Clerum et plehem Constantinop., contra haereticos negantes veritatem nostræ carnis in Christo, ait : *In quibus isti ignorantiae tenebris, in quo hactenus desideria torpore jacuere, ut nec auditu disserent, vel lectione cognoscerent, quod in Ecclesia Dei in omnium ore tam consonum est, ut nec ab infantium linguis veritas corporis, et sanguinis Christi inter communis sacramenta fidei taceatur.* Optima est etiam illa sententia Optati, lib. 6 contra Parmen. : *Quid est altare, nisi sedes corporis et sanguinis Christi, et illa : Fregistis calices sanguinis Christi portatores.* Multa etiam legi possunt apud Tertullianum, supra relatis antiquorem, lib. de Resurrect. carnis, c. 8, et lib. de Pudicitia, c. 9, et lib. 3 contra Marcionem, c. 19, et lib. 4, c. 40, ubi Pameli, n. 662, plura alia ejus loca congerit, illique adjungit Lactantium, et utrumque a calumniis haereticorum defendit usque ad n. 668. Sunt etiam gravia et omnino notanda testimonia apud Gaudentium, tract. 2 in Exodus, et apud Paulinum, epist. 3 ad Severum, circa finem, et ep. 4 ad eundem, aliquantulum a medio, qui etiam sunt prioribus æquales. Neque omittendi sunt Gregor., lib. 4 Dialog., c. 58, et lib. 2 in 1 Regum, non longe ab initio; et Beda, lib. de Mysteriis; nam, licet hi Patres post quingentesimum Christi annum fuerint, non docent, nisi quod a prioribus Patribus acceperunt. Quam continuatam traditionem postea ostenderunt Paschasius, lib. de Corpore et sanguine Domini, et qui deinceps contra Berengarium insurrexerunt, præsertim Lanfrancus, Guitmundus, et Algerus, quibus tandem annumerandi etiam sunt Anselmus, libro de Corpore Christi; et Bernard., in epist. 190, in fine; et D. Thomas, Bonavent. et alii. Nam ex illis omnibus eviderter constare potest universalis et perpetuus Catholicae Ecclesiæ sensus, quantum ad scriptores latinos pertinet.

11. *Idem ex Patribus Græcis ostenditur.* — Superest ut ex Patribus Græcis nonnulla delibemus, quorum pauciora verba, ut brevitat consularum, referam, multa enim sunt clarissima, et satis obvia. Præsertim vero taceo antiquiores¹, Dionysium Areopagitam, Ignat-

lium, et Martialem, quia eorum scripta, quanvis satis recepta sint, et ab antiquissimis Patribus allegentur, ab haereticis in dubium revocantur. Primus ergo sit Chrysostomus, Homil. 60 ad Pop., et 45 in Joan., ubi inter alia haec habet selectissima : *Ut non tantum per charitatem hoc fiamus (id est, unum corpus cum Christo), verum et ipsa re in illam misceamur carnem, hoc per escam efficitur, quam largitus est nobis, volens ostendere desiderium quod erga nos habet. Propterea semetipsum nobis immisicut, et corpus suum in nos contemperavit.* Et infra : *Parentes quidem aliis sape filios tradunt alendos, ego autem, inquit, non ita, sed carnibus meis alo, et me ipsum vobis appono.* Et iterum : *Volui frater esse vester, carnem propter vos et sanguinem assumpsi, vobis vicissim ipsam carnem et sanguinem, per quæ cognatus vester factus est, trado.* Quæ quidem sententiae si sigillatim perpendantur sedulo, mirabilis hujus sacramenti institutionis singulas et optimas exhibebunt rationes, quas per effectus hujus sacramenti fuse declarat. Deinde ex virtute constituentis eamdem confirmat veritatem, tum ibi, tum Homil. 83 in Matthæ., dicens : *Non sunt humanæ virtutis opera proposita; qui tunc ipsa fecit in illa Cœna, idem ea nunc quoque facit. Nos ministrorum tenuimus locum; qui vero sanctificat, et immutat, ipse est.* Et infra : *Audiamus, et horreamus; sanctis carnibus suis nos dedit impleri, semetipsum apposuit immolatum.* Multa similia habet Homil. de Prodictione Judæ, in fine, tom. 3, et Homil. ad Neophyt., tom. 5, et Homil. 24 et 27, in 1 ad Corint., et Homil. 3, in cap. 1 ad Ephes., et plura lib. 3 de Sacerdotio, in principio, præsertim ab illis verbis : *O miraculum, o Dei benignitatem, qui cum Patre sursum sedet, in illo ipso temporis articulo omnium manibus pertractatur, ac se ipsum trudit volentibus ipsum excipere, ac complecti, etc.*

12. Secundo est insigne testimonium D. Cyrilli, in ep. 10 ad Nestor. : *Incruentum in Ecclesia perficimus cultum, atque ita ad mysticas accedimus benedictiones, ac sanctificamur, participes facti sanctæ carnis, pretiosissime sanguinis Serratoris nostri omnium Iesu Christi, nec ut communem carnem accipimus, absit, neque tanquam viri sanctificati, et Ver-*

non longe a fine.—Ignatius, ep. 10 ad Smyrnenses, et ep. 14 ad Ephes., et 15 ad Roman. — Martialis, ep. 1, c. 3 et 4.

¹ Dionysius, Ecclesiast. hierar., c. 1, p. 3,

bo conjuncti secundum dignitatis unitatem, aut sicut divinam possidentis habitationem, sed vere vivificatricem, et ipsius Verbi propriam factam. Et ita statim exponit illud Joan. 6 : *Nisi manducaveritis carnem Filii hominis, etc.* Refertur autem hæc epistola in Actis Concilii Ephesini, et in antiquis Conciliis inscribitur epist. Concilii Ephesini ad Nestorium. Et ideo Lanfrancus et Guitmundus hoc testimonium allegant sub auctoritate Concilii Ephesini. In Concilio autem Ephesino, opera Theodori Peltani integre invento, et Latinitate donato, tom. 4, c. 44, refertur eadem epist. sub nomine Cyrilli et Synodi Alexandrinæ, quæ ante Ephesinam præcessisse videtur. Postea vero in eodem Concilio Ephesino, tom. 2, cap. 5, eadem epist. Cyrilli ad Nestorium lecta fuit, et, ut ibi notat Peltanus, quamvis ibi non legantur acclamations Patrum, quæ circa aliam epistolam Cyrilli ad Nestorium, cap. 3, factæ sunt, nihilominus dubitari non potest quin eodem modo fuerit illa epistola a toto Concilio approbata. Unde in Concilio Chalcedonensi sœpe legimus, doctrinam Cyrilli fuisse approbatam in Concilio Ephesino, et in fine totius actionis dicuntur approbatæ duæ epistolæ ejus, et specialiter confirmantur duodecim anathematismi, qui habentur in fine ejusdem epistolæ ad Nestorium. Habet ergo testimonium hoc majorem vim ex auctoritate Concilii Ephesini, quod est unum ex quatuor primis quæ rex admittit.

13. Ulterius vero idem Cyrus, in libro ad Evoxptium, respondendo Theodoreto pro suis anathematismis, in defensione undecimi refert verba Nestorii, nos manducare carnem Christi, quod Cyrus approbat, ad littaram intelligendo Christi verba. Nestorium autem reprehendit, quatenus separabat corpus Christi a divinitate; ipse autem docet, ideo nos accipere carnem vivificatricem, et cibum manentem in vitam aeternam, quia accipimus carnem Verbo Dei unitam. Quod etiam repetit lib. de Fide ad Reginas, sub titulo : *Quod Christus sit vita ex Evangelio Joannis,* et refertur etiam in Concilio Ephesino, tom. 4. Idem late et optime lib. 4 in Joan., cap. 2 : *Dedit (inquit) pro vita omnium corpus suum Dominus, et per illud rursus vitam in nobis immittit, et quomodo? dicam breviter pro viribus meis, nam cum vivificans Dei filius in carne habuatur, ad suum bonum eam, id est, ad vitam reformatum, et totus, ut ita dicam, ineffabili modo unionis conjunctus vivificans efficit, quia natura vivificans est, prople-*

rea participantes haec caro vivificat. Quod per sequentia capita, usque ad 17, late prosequitur. Præcipue vero notandum est decimum tertium, ubi reprehendit haereticos imitantes Capharnaitas hæsitantes : *Quomodo potest hic nobis carnem suam dare ad manducandum?* *Nam de Deo (inquit) magna impietate clamant, nec in mentem venit, nihil esse impossibile apud Deum,* etc. Capite vero 17, describit egregie quomodo Christus in nobis maneat, et nos in ipso, cum illum manducamus, exemplo ceræ liquefactæ, in quam altera infunditur, ut altera cum altera per totum commisceatur; illo enim exemplo nos non sola fide, sed vere, realiter et corporaliter Christum manducare, declarare contendit.

14. Atque hoc ipsum est quod Cyrus Hierosolymitanus, catech. 4 Mystag., verbis Christi propositis subnectit : *Cum Christus ipse sic affirmet, et dicat de pane : Hoc est Corpus meum, quis deinceps audeat dubitare, ac eodem confirmante et dicente : Hic est sanguis meus, quis dubitet, et dicat, non esse illius sanguinem?* Et infra : *Quare omni cum certitudine corpus et sanguinem Christi sumamus, ut ei comparticipes corporis et sanguinis, et Christophori, id est, Christum ferentes, efficiamur, cum ejus corpus et sanguinem in membra nostra receperimus.* Quod late prosequitur. Et catech. 5 : *Gustantes (inquit) non panem, aut vinum ut gustent jubentur, sed quod sub specie est, videlicet, panis et vini, corpus et sanguinem Domini.* Simili modo exposuit verba Christi Epiphanius in Anchoredato : *Et nemo (inquit) non fidem habet sermoni, nam qui non credit ipsum esse verum, sicut dixit, is excidit a gratia et salute.* Denique eamdem veritatem confirmat Athanasius, lib. de Incarn. Christi, in fine, dicens : *In communionem corporis Domini admissi sumus, sicut ipse dixit : Panis, quem ego dabo, caro mea est, pro mundi vita; spiritus enim vivificans est caro Domini, quoniam ex spiritu vivificante concepta est.* Gregorius etiam Nazian., Orat. 4, quæ est prima contra Julianum, et Orat. 42, quæ est secunda in sanctum Pascha, versus finem : *Sine pudore (inquit) ac dulitatem corpus ede, sanguinem bibe, si modo vitae desiderio teneris, etc.*

15. Idem sentit Gregorius Nyssenus, lib. de Vita Moysis, seu de Vita perfecta, circa medium, dum ait : *Celestem cibum nobis esse suscipiendum, quem nulla nobis actio agricultura artibus produxit, sed panis est absque aratione, absque alio humano opere nobis para-*

tus. Is desuper defluens in terris invenitur; panis enim qui de celo descendit, qui verus cibus est, qui enigmatische per manna significatur, non incorporea quedam res est; quo enim pacto res incorporea corpori cibus fieret; res vero, quæ incorporea non est, corpus omnino est. Et infra: *Is igitur mirabilis sine agricultura panis, varietate qualitatis ad suscipientium habitudinem virtutem suam commutat,* etc. Quibus satis indicat, quam alte et excelse de illo cibo senserit. Aliaque plura habet Basilii in Exhortatione ad Baptismum, ubi Eucharistiam vocat *viventem panem*, dicens: *Nec unquam Israel ex spirituali petra bibisset, nisi ex figura baptizatus fuisset, nec tibi aliquis veram potionem, nisi vere baptizato præbebit. Panem Angelorum ille post baptismum accepit, tu autem quomodo viventem comedes panem, nisi sumpto hoc sacramento.* Et in lib. de Baptismo, in tertia ejus parte, in qua ostendit, *eum, qui per baptismum regeneratus est, participatione deinceps divinorum mysteriorum nutritiri debere*, verba Christi, tam promissionis apud Joannem, quam institutionis apud alios Evangelistas, ad litteram et simpliciter intelligit. Et similia habet in Regulis moralib., regul. 21. Justinus etiam Martyr, Apologia 2 pro Christianis, in fine, apertissime hanc veritatem docet, et ex antiquissima traditione et consuetudine Ecclesiae illam confirmat. Denique idem habet Irenæus, libro 4 contra hæreses, cap. 34, cuius aliqua verba statim referam; et lib. 5, cap. 2, eos redarguens, qui veritatem carnis et sanguinis in Christo Domino, ejusque assumpta natura negant, inquit: *Sic autem, secundum hæc, videlicet, nec Dominus sanguine suo redimit nos, neque calix Eucharistiae communicatio sanguinis ejus est, neque panis, quem frangimus, communicatio corporis ejus est.* In quibus verbis maxime consideranda est æquiparatio. Æque enim absurdum, et veræ fidei contrarium existimavit Sanctus hic Martyr, negare, verum corpus et sanguinem Christi nobis in Eucharistia sacramento communicari, ac vero Christi sanguine nos esse redemptos inficiari. Et probationem innuit, quia sicut Apostolus ait nos habere redemptionem per sanguinem ejus, ita Christus eum calicem, suum sanguinem, qui effusus est, et eum panem, qui est a creatura, suum corpus confirmavit. Unde concludit: *Quando ego, et mistus calix, et fractus panis percipit verbum Dei, fit Eucharistia corporis et sanguinis Christi.* His ergo evidenteribus testimoniis sa-

tis liquet, antiquissimam Ecclesiæ fidem, et verborum Christi germanum sensum fuisse, Christum ipsum vere ac realiter in Eucharistia esse præsentem.

CAPUT II.

SUBSTANTIAM PANIS ET VINI SUB SPECIEBUS CONSECRATIS NON REMANERE.

1. Hanc veritatem in primis quinque sacerulis ita creditam fuisse, ostenditur ex Patribus.

— Altera veritas in assertione transsubstantiationis inclusa est, in Eucharistia post consecrationem, substantiam panis et vini non permaneré, quam Ecclesia Romana et Catholica tanquam de fide certam amplectitur, fundata etiam in verbis Christi, et perpetua traditione, ut Concilium Tridentinum nuper declaravit¹, et ante illud plura alia, quæ nunc referre non est necesse, cum a rege non admittantur. Sola igitur testimonia antiquorum Patrum proferemus, quibus constet, hunc sensum verborum Christi, et hanc fidem non esse novam aut nuperam, sed primis quingentis annis in Catholica Ecclesia fuisse creditam, ac proinde ab Apostolis traditam. Omnes itaque Patres, qui docent, per consecrationem panem mutari, converti, aut transire in corpus Christi, aperte itidem panem communem post consecrationem non manere, contendunt. Quia quod in aliud transit seu convertitur, in sua, quam antea habuit, essentia non manet, ut per se notum est, et multi ex eisdem Patribus expressis verbis declararunt. Maxime Justinus, dicta Apologia 2 pro Christianis, ubi loquens de Eucharistia dicit: *Neque enim communem usitatumque panem, usitatamque potionem capimus, sed quemadmodum per Dei verbum homo factus Jesus Christus Sacerdos noster, et carnem, et sanguinem pro salute nostra habuit, sic etiam cibum, qui per preces sermonis, quem ab eo acceptimus, consecratus est, et quo sanguis, carnesque nostræ communione aluntur, Jesu Christi, ejus, qui homo factus est, et carnem et sanguinem esse acceptimus;* statimque verba Christi adducit, et in hoc sensu ab Apostolis esse tradita manifeste testatur.

2. Eodem modo Irenæus, libr. 4, c. 34: *Quemadmodum (inquit) qui est a terra panis percipiens invocationem Dei jam non communis est, sed Eucharistia, ex duabus rebus constans,*

¹ Sess. 3, c. 4, can. 4.

terrena, et cœlesti (id est speciebus panis, et corpore Christi), *sic et corpora nostra percipientia Eucharistiam jam non sunt corruptibiliæ, spem resurrectionis habentia*. In quibus verbis aperte negat, manere communem panem sub speciebus consecratis, sed cœlestem, constantem ex carne Christi, et speciebus panis. Et in eodem sensu dixit Cyrillus Hierosolymitanus, catech. 3 Mystag.: *Panis Eucharistiae post Sancti Spiritus invocationem non amplius panis communis, sed est corpus Christi*. Et in catech. 4: *Aquam* (inquit) *ali quando mutarit in vinum, quod est sanguini propinquum, sola voluntate, et non erit dignus, cui credamus, quod vinum in sanguinem transmutasset? Sicut ergo post transmutationem aquæ in Cana Galilæa factam substantia aquæ non mansit, ita nec substantia vini manet in calice, postquam in sanguinem Christi transmutatur*. Unde infra concludit: *Exultet anima mea in Domino, hoc sciens, et pro certissimo habens, panem hunc, qui videtur a nobis, non esse panem, etiamsi gustus panem esse sentiat, sed esse corpus Christi*. Et eodem fere modo loquuntur Chrysostomus, Gregorius Nyssenus, et Eusebius Emisenus, quos alibi retuli. Suntque etiam optima verba Epiphani, quibus eamdem veritatem insinuat serm. de Laudibus Virginis, ad quam ita loquitur: *Are, Sanctissima Virgo, quæ velut rubus intellectualis absque combustionē divinitatis ignem tenes. Libanus intellectualis, qui ignem et panem ritæ calidum mundo in esum attulit, de quo Salvator mundi Christus ait: Accipite, comedite, hoc est Corpus meum, quod pro vobis frangitur in remissionem peccatorum. Quæ verba ita intelligit, ut panem illum non nisi panem ritæ esse credat, ac profiteatur.*

3. Inter Latinos vero sapientissime hoc explicavit Ambrosius, in lib. 4 de Sacramento, cap. 4, ubi sic scribit: *Tu forte dicis: Meus panis est usitatus; sed panis iste panis est ante verla sacramentorum, ubi accesserit consecratio, de pane sit caro Christi*. Et infra: *Si tantæ ris est in sermone Domini Jesu, ut inciperent esse quæ non erant, quanto magis operatorius est ut quæ crant, in aliud commutentur*. Et infra: *Ergo, tibi ut respondeam, non erat corpus Christi ante consecrationem, sed post consecrationem dico tibi quod jam corpus est Christi; ipse dixit, et factum est; ipse mandavit, et creatum est*. Quod inferius iterum repetit. Et in cap. 5 idem confirmat ex illo principio, *quia potens est sermo Christi, universa convertere*. Et lib. de Initiandis, capit.

9: *Quantis* (inquit) *utimur exemplis, ut probemus non hoc esse quod natura formavit, sed quod benedictio consecravit, majoremque vim esse benedictionis quam naturæ, quia benedictione etiam natura ipsa mutatur*. Et infra: *Quod si tantum valuit humana benedictio, ut naturam converteret, quid dicimus de ipsa consecratione divina, ubi verba ipsa Domini Salvatoris operantur?* quod latius ibidem prosequitur. Hoc etiam significavit Augustinus, lib. 20 contra Faustum, cap. 13, dicens: *Panis et calix non quilibet, sed certa consecratione mysticus fit nobis corpus Christi, non nascitur*. Quod verbum ultimum Algerus, lib. 1 de Sacramentis, cap. 6, ita accurate perpendit: *Cum panis mysticus non nascatur, nec aliqua naturæ terrene origine, vel conditione in hoc divino gratia sacramento creetur, sed ita corpus Christi fiat, ut panis esse designat, quomodo Christus in pane, qui jam non est, impanari dicitur?* Denique Cyprianus, in sermone de Cœna Domini, eodem modo loquitur, dicens: *Immortalitatis alimonia datur, a communibus cibis differens, corporalis substantia retinens speciem, sed virtutis divinae invisibili efficientia probans adesse presentiam*. Et infra: *Panis iste communis, in carnem et sanguinem mutatus, procurat vitam et incrementum corporibus*. Et infra: *Panis iste, quem Dominus discipulis porrigebat, non effigie, sed natura mutatus, omnipotentia Dei factus est caro*. Pluraque similia in sequentibus tradit, quibus eamdem veritatem confirmat.

4. *Erasio hæreticorum rejicitur*. — Et in eundem sensum dixit Tertullianus, libr. 4 contra Marcionem, cap. 40: *Acceptum panem, et distributum discipulis, corpus suum illum fecit, Hoc est Corpus meum, dicendo*. Videtur, inquiet Protestantæ, sententiam destruere, cum addit, *id est, figura corporis mei*. Sed sine dubio non intellexit ea verba in eo sensu quo illa accipiunt adversarii; alioqui et in eodem contextu pugnantia diceret, et sibi ipsi in multis aliis locis esset contrarius. Vel ergo intellexit, non panem jam consecratum, sed panem olim oblatum, vel aliquo modo sanctificatum, fuisse figuram corporis Christi, ut in oblatione Melchisedech, et in panibus propositionis, quia Christus dandus erat nobis in cibum sub specie panis. Propter quod etiam nomine panis corpus appellatum est a Jheremia dicente: *Venite, mittamus lignum in panem ejus, quem locum ibi Tertullianus allegat, et ex illo, et ex aliis verbis idem Tertul-*

lianus ibi, *figuram illam veterem appellat*. Et hunc sensum late ibi confirmat Pamelius, cum Gagnæio, et aliis. Vel certe, si panem consecratum vocavit figuram corporis Christi, per figuram nihil aliud quam sacramentum intellexit; nam, licet corpus Christi vere sit in hostia consecrata, nihilominus simul est signum corporis Christi ibi contenti; et ita explicare voluit Tertullianus, panem consecratum non esse verum, seu materialem panem, quia solum ibi sunt species ejus, contineentes et sic figurantes corpus Christi, quod propterea et panis olim est vocatum, et per panem quondam præfiguratum. Et hunc sensum confirmat cum subdit : *Figura autem non fuisset, nisi veritatis esset corpus*. Item : *Aut si propterea panem corpus sibi finxit, quia corporis carebat veritate, ergo panem debuit tradere pro nobis*. Nam per hæc verba explicat, non ficte, sed vere, Christum fecisse panem corpus suum, non illum tantum ad significandum imponendo, neque sibi per modum corporis uniendo, sed eumdem in verum sui ipsius corpus convertendo. Hæc ergo fuit Tertulliani sententia, quam in libr. de Orat., cap. 6, et lib. 2 ad Uxor., cap. 5, confirmat. Ubi est illud : *Et si sciverit, panem, non illum esse credit, qui dicitur?* Et habet similia lib. de Fudicitia, et lib. de Resurrect. carnis, et aliis similibus. Præter prefatos etiam antiquiores Patres, eamdem veritatem amplexi sunt omnes, qui post quingentesimum Christi annum floruerunt, Damascenus, Theophylactus, Gregorius, Beda, Remigius, Paschiasius, Algerus, Lanfrancus, Anselmus, Bernardus, Bonaventura, et alii, quorum testimonia obvia sunt, et eorum idcirco per transennam solum nomina indico, ut ex perpetuo Patrum consensu in diversis temporibus constet, Ecclesiæ sensum semper eumdem extitisse, nullamque novitatem in hoc mysterio a recentioribus Pontificibus introductam fuisse.

CAPUT III.

DE TRANSSUBSTANTIATIONIS VERITATE.

1. *Transsubstantiationem omnibus sæculis retentam fuisse, ostenditur*. — Ex his demum duobus principiis catholicis et antiquissimis, quod sub speciebus consecratis vere adsit substantia corporis Christi, et absit substantia panis, evidenter sequitur veritas transsubstantiationis, quam immerito rex inter nueras novitates memorat. Cum enim transsub-

stantiationem carpat, interrogo remne ipsam defugiat, vel solam vocem devitet. Si de re agatur, testimonij omnium Patrum quinque primorum sæculorum, transsubstantiationem non esse novam, sed omnibus sæculis traditam evincitur. Nam per transsubstantiationem, Ecclesia nihil aliud intelligit, quam conversionem, seu transitum panis in corpus Christi, aut (quod perinde est) desitionem panis, non simpliciter in nihilum, sed loco illius corpore Christi succedente. Vel e converso transsubstantiationem nihil aliud est quam mirabilis actio, qua corpus Christi sub speciebus panis constituitur, et substantia panis expellitur. At certe allegati Patres antiqui conversionem panis in corpus sub his etiam confitentur verbis, et in eodem sensu nomine transmutationis panis in corpus utuntur saepe, vel panem fieri corpus asserunt, vel tandem distincte negant, post consecrationem manere naturalem panem, et esse mysticum, cœlestem, ac verum Christi corpus contestantur; ergo re ipsa nihil aliud docent, quam transsubstantiationem; res ergo transsubstantiationis nova non est, sed antiquissima et catholica veritas.

2. *Transsubstantiationis nomen et antiquum, et maxima auctoritate introductum est*. — *Concilium Florentinum loco transsubstantiationis ejus definitione usum est*. — Si autem rex in sca voce transsubstantiationis novitatem adinvenerit, immerito proculdubio offenditur, quia licet non sit illius antiquitatis, quam ipse desiderat, ante quadragecentos annos illa usus est Ecclesia, et maxima illius concordia et auctoritate approbata est in Concilio Lateranensi, sub Innocentio III, cui Græci et Latini, Patriarchæ, Archiepiscopi et Episcopi fere quadragecenti octoginta, et complures alii Abbes, et Prælati, et Legati imperatorum, Romanorum, et Orientis, et regnum Hispaniæ, Galliæ, Angliae, et aliorum, cum Summo Pontifice et Cardinalibus, interfuerunt. In ejus autem c. 4 sic dicitur : *Una vero est fidelium universalis Ecclesia, extra quam nullus omnino salvatur. In qua idem ipse sacerdos, et sacrificium Jesus Christus, cuius corpus et sanguis in sacramento altaris sub speciebus panis, et vini veraciter continentur, transsubstantiatis pane in corpus, et vino in sanguinem, potestate divina, ut ad perficiendum mysterium unitatis accipiamus ipsi de suo, quod accepit ipse de nostro*. Neque opinari oportet verbum illud a dicto Concilio fuisse inventum; nam ante illa tempora invenimus usum illo fuisse Gaufre-

dum, Cisterciensem monachum, ep. ad Cardinal. Atanensem, quam refert Baron., ann. 1188, n. 18, ubi etiam indicat fuisse tunc communiter a Theologis usu receptum. Atque idem verbum invenimus in historia quadam authentica, quam idem Baron. refert anno 1192, in fine. Ignoratur ergo initium consuetudinis utendi hoc verbo ad mysterium Eucharistiæ explicandum. Sed tamen ante Concilium Lateranense non erat publica auctoritate confirmatum; ibi vero universa Ecclesia in usu illius vocis *transsubstantiationis* ad explicandum hoc mysterium consensit. Et postea Concilium Florentinum quamvis illa voce non fuerit usum, loco illius, ejus definitionem seu descriptionem apposuit dicens: *Substantia panis in corpus Christi, et substantia rini in sanguinem convertuntur*. Nihil enim aliud Lateranense Concilium transsubstantiationis voce significare voluit, nisi conversionem totius substantiæ in aliam integrum substantiam, hujus siquidem conversionis genus optime illa voce significatur et exprimitur. Nam et præscindit a voce mutationis, quæ in physico rigore solet subjectum postulare; et excludit quemcumque errorem assentem manere sub speciebus panis, vel naturam panis, vel partem ejus ut materiam, aut formam, vel aliquid ejus, ut ipsum esse, vel subsistentiam panis. Ideoque merito Concilium Tridentinum, sess. 13, c. 4, et canon. 2, asseruit conversionem illam totius substantiæ panis in corpus, et totius substantiæ vini in sanguinem Christi, *convenienter, proprie, et aptissime a Sancta Ecclesia Catholica transsubstantiationem esse appellatam*.

3. Denique superiori libro ostensum est, solere Ecclesiam in Conciliis, præsertim oecumenicis, novas adinvenire voces, quibus antiqua mysteria fidei contra insurgentes hæreticos, et novas eorum opiniones, tergiversationes, et calumnias declarat ac defendat; eur ergo non potuerunt Concilium Lateranense et Tridentinum in simili vocis institutione vel approbatione, antiqua Concilia Nicænum I et Ephesinum I imitari? Quid ergo habet rex, quod in transsubstantiationis voce improbet, cum rem negare nequeat, si Catholicus non tantum nomine, sed et revera, quod summopere optamus, esse velit; aut quomodo potest negare transsubstantiationem esse antiquissimam, eo quod sola vox minus antiqua sit, cum in causis non dissimilibus similes antiquorum hæreticorum tergiversationes Athanasius, Cyrillus Alexandrinus, et

alii Patres illis æquales gravissime reprehenderint? Atque hæc de hujus mysterii substantia ac veritate pro hujus loci opportunitate dixisse sufficiat, ut ad alias notatos errores transitum faciamus.

CAPUT IV.

EUCHARISTIAM LATRIÆ ADORATIONE CONVENIENTER ADORARI, ET IN HUNG FINEM ELEVARI ET CIRCUMGESTARI.

1. *Christum Dominum cultu latriæ adorandum esse, ostenditur*.—Non est difficile ex posito principio fidei veritatem hanc evidenter elicere, et alterum Protestantum errorem, quo Sacrosanctæ Eucharistiæ adorationem taxant, vel negant, satis perspicue refellere. Nam Christum Dominum verum Deum hominem, unica et perfecta latriæ adoratione adorandum esse docuit expresse Cyrillus cum Concilio Alexandrino, in ep. ad Nestorium, de Excom., his verbis: *Cum Verbum carni secundum hypostasim unitum esse confitemur, unum adoramus Filium ac Dominum Jesum Christum*. Et in anathematismo 8, damnat hunc modum loquendi, *assumptum hominem una cum Deo Verbo esse adorandum et glorificandum*, et anathema dicit in eum, *qui non magis una adoratione Emmanuel honorat, et una illi glorificationem, sicuti Verbum caro est factum, adaptat*. Quam doctrinam approbat Concilium Ephesinum I, et Concilium Chalcedonense, ut supra retuli, et ab universa Ecclesia recepta est, nec potest illam negare rex Angliæ, qui se quatuor prima Concilia venerari profiletur. Præsertim quia sæpe in Evangelio legimus, hujusmodi adorationem Christo Domino non raro datam, nec ab ipso recusatam, sed approbatam potius, ut patet Joan. 9, in cæco a Christo illuminato, qui jam credens, *procidens adoravit eum*, et cap. 20, in Thoma, dicente: *Dominus meus, et Deus meus*. Et Paulus, ad Philippenses 2, de hac adoratione loquitur, cum dicit: *In nomine Jesu omne genu flectatur*. Et ad Roman. 14, de Christo interpretatur illud Isai. 45: *Mihi flectetur omne genu, et omnis lingua confitebitur Deum*. Est ergo de fide certissimum Christum Dominum in sua specie visibili perfectissimo cultu adorandum esse. Cum igitur ostensum sit eumdem Christum Deum hominem vere et realiter esse in Eucharistia præsentem, nullus revera credens Incarnationis

et Eucharistiæ mysteria, negare potest Eucharistiam esse adorandam.

2. An forte quia Christus ibi modo naturali et visibili non existit, et sub speciebus sacramentalibus latet, ideone tandem non æque adorandus, ac si corporeis oculis objiceretur? At hoc solummodo contingat illis, qui suis tantum sensibus fidem adhibent, qui profecto etiam in specie visibili Christum non adorarent, quia ejusdem divinitatem non viderent. Qui ergo vera fide in sua religione et adoratione ducitur, sicut adorat invisible Verbum cum carne sub qua latet, ita adorat Verbum carnem factum, licet speciebus sacramentalibus sit obvelatum. Unde sicut Christus Dominus Thomæ dixit : *Quia vidisti me, Thoma, credidisti;* nam videndo Christi corpus et ejus vulnera, ipsum Deum credidit, et ut talem adoravit, ita quilibet Catholicus fidem adhibens verbis Christi, et videns species ejusdem verbis consecratas, Deum sub illis per fidem intuetur, et ita sacramentum illud adorat.

3. *Hunc articulum immerito a rege inter nuperos recenseri, ex Patribus ostenditur.* — Quam ob causam haec Eucharistiæ religio et adoratio antiquissima etiam est in Ecclesia, quod nullus, qui antiquos Patres legerit, negare potest, quos breviter commemorabo, ut hac etiam ratione constet, immerito regem Angliae hunc articulum inter novos et nuperos annumerasse. Et in primis Ambr., lib. 3 de Spiritu Sancto, c. 12, prius de Angelis dicit, adorare non solum divinitatem Christi, sed etiam scabellum pedum ejus, quod de mysterio Incarnationis intelligit, et scabellum terram illam, quam Dominus Jesus in carnis assumptione suscepit, interpretatur, et ita exponit verba Psalm. 98 : *Adorate scabellum pedum ejus,* dicens : *Per scabellum terra intelligitur, per terram autem caro Christi, quam hodie quoque in mysteriis adoramus, et quam Apostoli in Domino Jesu, ut supra diximus, adorarunt, neque enim divisus est Christus, sed unus.* Ubi aperte loquitur de perfecta adoratione latræ, et adoracioni Christi in propria specie existentis, hanc ipsiusmet sub speciebus sacramentalibus latitantis æquiparat. Atque eodem modo exponit prædicta verba Psalmi 98 Augustinus ibi, ubi eamdem movet quæstionem, quomodo præcipiamur adorare scabellum pedum Dei, quod terra esse dicitur Matth. 4, et respondet : *Fluctuans converti me ad Christum.* Et infra : *Suscepit enim de terra terram, caro enim de terra est, et de carne Mariæ carnem accepit, et quia in ipsa car-*

ne hic ambularit, et ipsam carnem nobis manducandam ad salutem dedit, nemo autem illam carnem manducat, nisi prius adoraverit, inventum est quemadmodum adoretur tale scabellum pedum Domini, et non solum non peccemus adorando, sed peccemus non adorando. Quod utinam attente legat et consideret rex Angliæ. Simili modo de hoc sacramento intelligit Augustinus, concion. 1 in Psalm. 21, verba illa : *Manducaverunt et adoraverunt omnes pingues terræ,* quod eodem modo exponit epist. 120, cap. 7, et epist. 118, et cap. 3, comparans eum, qui frequenter ad Eucharistiam accedit, cum illo qui propter reverentiam abstinet : *Faciet (inquit) unusquisque quod secundum fidem suam pie credit esse faciendum, neuter enim eorum exhonoret corpus et sanguinem Domini, si saluberrimum sacramentum certatim honorare contendunt.*

4. Præterea Cyrillus Hierosolymitanus, catech. 5 Mystag., in qua fere liturgiæ ritum describit, cum de communione tractat, prius docet, quanta reverentia corpus Domini suscipiendum sit, deinde post communionem corporis Christi, inquit : *Accede et ad calicem sanguinis illius, non extendens manum, sed pronus adorationis in modum, et venerationis.* Plura tradit Chrysost., homil. 24, in 1 ad Cor., præsertim in fine, ubi inquit : *Hoc corpus etiam jaceus in praesepi reveriti sunt Magi, et cum multo metu et tremore adorarunt, imitemur ergo vel barbaros, nos celorum cives.* Et infra : *Tu non in praesepi vides, sed in altari.* Et iterum : *Non solum hoc corpus vides sicut illi, sed nosti ejus virtutem et dispensationem;* inferius adhuc : *Nos ergo ipsos excitemus, et formidemus, et longe majorem, quam illi barbari, ostendamus reverentiam.* Ubi etiam est consideranda equiparatio inter Christi adorationem in propria specie visibili, et in sacramento. Præterea homil. 3 de incomprehensibili Dei natura, circa finem, *Angelos etiam ait genua flectere Domino in hoc sacramento pro hominibus intercedentes, et dicentes : Pro his supplicamus, pro quibus tuum largitus es sanguinem; pro his oramus, pro quibus corpus hoc immolasti.* Addit etiam ibi, solitum fuisse diaconum in Missa tempore consecrationis ducere energumenos, quos agitatos vocat, utique a dœmone, et jubet (inquit) *caput inclinare.* Videri etiam possunt Gregorius Nazianzenus, Orat. 11 de S. Gorgonia; et Origenes, homil. 6 in Josue; et Eusebius Emilianus, homil. 5 Paschali; Theodoret., dialog. 2 et 3; et Joannes Climacus, gradu 23 : *Donum*

(inquit) *cæleste suscipiens adoro*; et Damascenus, lib. 4 de Fide, cap. 13. Neque contra veritatem hanc aliquid rex adducit, nec quid afferri possit, facile conjicere valeo.

5. Eucharistie elevatio maxime laudabilis, et antiqua. — Ex quo fundamento nullo quidem negotio evertitur, quod in hoc puncto de elevatione Eucharistie post consecrationem adorandi causa, adduxit rex. Hoc enim reprehendi non potest, quia malum sit, sicut etiam nec quia novum. Primum patet ex dictis, quia si adorare Eucharistiam ducatur sanctum, illam, ut adoretur, proponere et ostendere populo, non potest esse malum; ergo elevare idem sacramentum propter eumdem finem, non potest esse reprehensibile, sed potius maxime laudabile. Quid enim vel in substantia illius actus, vel in modo, reprehensione dignum excogitari potest? Quod autem mos ille novus non sit, constat ex Dionysio, 3 cap., de Eccl. Hier., p. 3, ubi de sacerdote consecrante ait: *Sicque venerandissima mysteria consummat, et laudata oculis subjicit in signis sancte propositis*; et Basilius, lib. de Spiritu Sancto, cap. 27, hanc ponit inter apostolicas traditiones, quamvis non elevationem, sed ostensionem vocet *divini corporis, et sacri poculi*.

6. Et quanquam res non esset adeo antiqua, nihil obstaret quominus, approbante illam Ecclesia, cum omni fide et reverentia susciperetur. Et ideo merito Concilium Viennense inter alios errores Beguardorum et Beguinarum hunc damnavit, *quod in elevatione corporis Jesu Christi non debent assurgere, neque eidem reverentiam exhibere*. Quod tamen non de omnibus fidelibus, sed de quibusdam valde perfectis asserebant, quia dicebant imperfectionis esse, ab altissima contemplatione ad ministerium Eucharistie descendere, quæ erat ridicula dæmonum elusio. Ideoque etiam est valde laudabilis consuetudo Ecclesiae, quod eo tempore, quo corpus Domini elevatur, pulsetur campanula, qua circumstantes ad Dominum adorandum excitentur. Neque hoc itidem est adeo novum, quin ante quadragesimos annos fuerit a Gregorio IX Pontifice approbatum, teste Nauclero, generat. 42. Et Ivo Carnotensis ante quingentos annos gratias egit reginæ Anglorum pro campanis quas Ecclesiae Carnotensi dono dederat, indicans solitas esse pulsari consecrationis tempore. Hujusmodi ergo mores, cum ad optimum finem ordinentur, et in se nihil indecens aut divino cultui indecorum contineant,

sive parum, sive multum antiquitatis sortiti fuerint, laudabiles omnino sunt habendi.

7. Eucharistie in supplicationibus circumgestationem non vituperandam, sed potius laudandam valde esse ostenditur. — *Ratio sumpta ex fine.* — Atque hinc etiam responsum est ad articulum 3 a rege notatum, videlicet de usu circumgestandi divinum sacramentum in supplicationibus, quem ut superstitionis dammare solent Protestantes, quia novum, humano ingenio inventum, et ad cultum Eucharistie introductum. Quibus breviter respondemus, imprimis confitendo non esse modum nimis antiquum, quanquam neque nimis recentem omnino; cum ante tercentos quinquaginta annos inductus sit anoritate Summorum Pontificum Urbani IV et Clementis V, cum generali Concilio Viennensi, ut habetur in Clement. unic., de Reliquiis et Venerat. Sanctor. Et statim universalis consensu totius Ecclesiae, et mirabili acclamatione et fructu susceptus est, et in dies confirmatus et auctoratus. Quod non sine speciali Spiritus Sancti providentia, ac nutu prorsus divino factum esse, dubitare nemo potest, qui promissionibus Christi fidem dederit, quibus, et se, et Spiritum Sanctum Ecclesiae suæ in perpetuum gubernatorem et protectorem est pollicitus affuturum. Deinde in hoc etiam punto locum habet ratio facta, quia hujusmodi institutio, et Eucharistie solemnis circumgestatio finem habet optimum, et in actione ipsa nulla est superstitionis umbra, sed potius ad propositum sibi finem magna utilitas, et aptitudo maxima. Finis enim illius solemnitatis est tanti beneficii memoria populum christianum ad gratiarum actionem excitare, et ad percipiendum uberioris tanti sacramenti gratiam et fructum commoveré, ut prædicti Pontifices in exordio et discursu illius capituli summa cum pietate declararunt. Actio vero ipsa de se indifferens est, unde facta propter bonum finem, et debita fide ac reverentia, fit honestissima et religiosa, sicut in figura legimus de circumgestatione arcae, Numer. 14, et maxime 2 Regum 6, et 1 Paralip. 15.

8. Refutatur hereticorum evasio. — *Ecclesia potest statuere quidquid ad majorem Dei cultum opportunum fuerit.* — Quid ergo sit quod adversarii in hoc solemnri ritu reprehendant, nescio. Dicent fortasse non potuisse Ecclesiam hujusmodi novum ritum introducere. Sed hoc ab ipsis sine Scriptura, sine ratione, sine ullo prorsus fundamento, imo contra Scripturam et rationem assertum est.

Scriptura enim nunquam hoc prohibuit; imo ubique significat, ea, quæ pertinent ad cultum, cæremonias et ritus hujus sacramenti, Ecclesiae providentia et dispositioni esse commissa, juxta illud 1 ad Cor. 11: *Cætera cum venero, disponam.* Deinde in veteri lege fuit potestas instituendi novum aliquod festum, ut constat 2 Macha. 4, et Esther, et Judith, ult., ac proinde multo magis est hæc potestas in Ecclesia, et ita consuevit a primordiis diæ festos instituere ad Deum in Sanctis suis laudandum; ergo majori ratione potuit pecuniam diem instituere in honorem Sancti Sanctorum, et tanti beneficij commemorationem, ut Clemens V supra in virtute argumentabatur. Denique naturalis ipsa conditio humanae naturæ postulat in his rebus varietatem et mutationem, unde incredibile est reliquisse Christum Ecclesiam suam ex hominibus congregatam sine hujusmodi potestate.

9. *In principio Ecclesiæ potuit hæc circumgestatio non esse utilis.* — In principio igitur nascientis Ecclesiæ potuit hæc celebritas non solum non esse necessaria, verum etiam neque utilis, quia Christiani inter infideles viventes, eisque subditi, non poterant sine periculo, tam publico et solemni ritu sacramentum hoc colere. Postea vero licet fieri potuisse, tamen per multum temporis non est judicata necessaria hujusmodi solemnitas, quia pura, et sincera fide hoc mysterium ab omnibus Christi professoribus tenebatur, et quotidie, vel saltem singulis Dominicis ac festis diebus ejus memoria cum magna devotione ac fructu recolebatur. Postea vero cum errores contra veritatem hujus sacramenti ingruentes multiplicarentur, et charitas etiam ac devotio fidelium remitti videtur, prudentissime quidem ejusmodi instituta est solemnitas, quæ et fidelium animos in fide tanti sacramenti magis confirmaret, et ad gratitudinem dilectionemque excitaret arditiorem. Quapropter merito Concilium Tridentinum anathema dixit illis, qui sacramentum hoc non esse adorandum assererent, festivaque celebratione peculiari venerandum, et in supplicationibus solemniter circumgestandum pernegarent. Nam in his omnibus vel supponitur error veritati præsentiae Christi in hoc sacramento contrarius, vel saltem includuntur alii errores non minus veræ fidei adversantes, ut Ecclesiam universalem posse in moribus errare, vel non posse præcipere, nisi quod in Scriptura præceptum invenitur, vel, quod inde sequitur, omnes cæ-

remonias per Ecclesiam institutas esse superstitiones; et similia, quæ aliis locis satis sunt refutata, et in sequentibus sæpius occurrent obvianda.

CAPUT V.

DE LAICORUM SUB UNA TANTUM SPECIE PANIS COMMUNIONE.

4. *Laicorum sub una specie communionem immerito reprehendit rex.* — *Objectio hæreticorum.* — Cum rex in 4 articulo Ecclesiam Catholicam novitatis insimulat, eo quod laici in specie tantum panis Eucharistiam exhibeat, in eadem salebra hærere videtur; in eo enim nititur, quod Ecclesia in usu vel ritibus sacramenti nihil addere aut minuere possit, vel immutare, quod universe et sine limitatione sumptum, rationi et Scripturæ contrarium esse demonstravimus. Quamvis enim illa, quæ sunt de substantia sacramentorum, et a Christo sunt instituta, mutari per Ecclesiam non valeant, nihilominus ea, quæ ad accidentales ritus, et ad mores utentium pertinent, variationem accipere, et Ecclesiæ auctoritate pro temporum opportunitatibus mutari possunt. At in præsenti articulo solent adversarii urgere dicentes, mutationem hanc contrariam fuisse Christi institutioni et præcepto. Nam Christus omnibus præcepit utriusque speciei perceptionem illis verbis, Joan. 6: *Nisi manducaveritis carnem Filii hominis, et biberitis ejus sanguinem, non habebitis vitam in vobis.* Quæ verba ita fuisse principio Ecclesiæ intellecta, antiquus usus communicandi omnes fideles comprobare videtur. Accedit etiam, quod ipsa mutilatio sacramenti videtur esse contra illius institutionem, ac subinde intrinsece mala, tali institutione supposita.

2. *Solutio.* — *In usu Eucharistiae sub una specie duo consideranda.* — *Sacerdoti sacrificanti communio sub una specie non permititur.* — Sed in his etiam objectionibus non recedunt hæretici a superba præsumptione, qua judicium suum Ecclesiæ Catholicæ auctoritati præferunt, eamque in exponendo vero Scripturæ et Christi sensu, errare posse, imo et errasse dicere audent. Quia igitur ex contrario fundamento in hoc articulo potissimum convincendi sunt, et illud satis est in superioribus confirmatum, ideo in præsenti breviter dictis objectionibus satisfaciemus, si mulque morem Ecclesiæ nec novum esse, nec

a verbis Christi alienum, ostendemus. Duo vero, ut clarius procedamus, in usu Eucharistiae in una tantum specie distinguere oportet. Unum est, an liceat interdum manducare corpus separatum ab usu calicis, vel hoc semper et quasi intrinsece malum sit; aliud est, an liceat privare fideles toto vitæ tempore usu calicis, quia, licet ponamus aliquando posse licite unam speciem sine alia sumi, nihilominus superesse potest quæstio, an liceat nunquam sumere utramque; posset enim esse necessarium, interdum, vel in discursu vitæ utramque sumere, esto unam tantum accipere aliquando liceat. Deinde distinguere oportet inter oblationem Eucharistiae ut sacrificium est, et participationem ejus, ut sacramentum est. Quoties enim hoc sacramentum conficitur, sacrificium Deo offertur, ut Catholica docet Ecclesia (quiequid hæretici sentiant, quod nunc agendum non est), et quia sacrificium hoc incruentum imago est cruenti sacrificii in Cruce oblati, quod Christus Dominus in consecratione utriusque speciei separatim facta representari voluit, ideo nunquam Ecclesia permittit, vel sacramentum hoc in una tantum specie confici, vel a sacerdote sacrificante in una tantum specie consumi. Et ita de mutilatione sacrificii, vel communionis sacerdotalis, seu sacrificialis (ut sic rem declarerem), nulla est quæstio; illam enim fatemur nunquam esse licitam, et probabile est, licet non de fide certum, illam esse jure divino prohibitam, vel fortasse intrinsece malam, supposita institutione. Sed hæc Theologis omittimus; nam solum de laicorum communione, seu participatione sacramenti extra sacrificium nunc tractamus.

3. *Communio in sola specie panis ab initio Ecclesiæ usitata est.* — *Serapio senex in sola specie panis Eucharistiam recepit.* — De usu ergo communicandi ex preconsecratis in sola specie panis, dicimus imprimis, nec per se malum esse, neque unquam fuisse in Ecclesia prohibitum, imo neque esse novum, sed potius ab initio Ecclesiæ fuisse in illa usitatum. Et quoniam ex hoc usu cætera sufficienter probantur, et rex maxime hujusmodi novitatem reprehendit, illum præcipue ostendemus. Primo ex antiquo usu servandi Eucharistiam sub specie panis sola, et ministrandi illam infirmis, et deferendi in domum, vel in itinere, utique ad consumendam illam opportuno vel necessario tempore. Morem autem hunc colligimus imprimis ex his, quæ ex Diognasio Alexandrin. Eusebius narrat, lib. 6

Histor., c. 36, de Serapione sene, qui cum diu communione privatus pœnitentiam egisset, eo quod sacrificium idolis obtulisset, tandem in articulo mortis existens presbyterum ad se vocari jussit; cum vero ille morbo etiam vexatus, ad Serapionem accedere non posset, *exiguam Eucharistiae particulam nuncio dedit, præcipiens ut eam madefactam in os senis infunderet*, quod postquam factum est, senex feliciter e vivis excessit. Ex qua historia perspicuum relinquitur, particulam illam fuisse panis consecrati, et pro tempore necessitatis conservati, et illum sine vino vel sanguine pro integra communione fuisse datum, eamque communionem non sine miraculo, vel singulari Dei gratia fuisse a sancto illo sene expectata, ac proinde Deo fuisse gratam, ut sancta etiam mors senis statim subsecuta comprobavit.

4. *Ambrosius in sola specie panis Eucharistiam suscepit.* — Nec dissimile est quod de Ambrosio animam agente in fine vitæ ejus scribit Paulinus, Honoratum, Vercellensis Ecclesiæ sacerdotem, in lecto suo jacentem ter vocem audivisse, dicentem sibi: *Surge, festina, quia modo est recessurus; qui descendens (ait Paulinus) obtulit Sancto Domini corpus, quod ubi accepit, emisit spiritum, bonum viaticum secum deferens*, ubi de sanguine nulla est mentio. Præterea eumdem Ecclesiæ modum ostendit historia, quam de suo fratre Satyro refert idem Ambrosius, in Orat. funebri de ipso, videlicet e navi secum corpus Domini tulisse, cuius virtute a naufragio liberatus est, ut in superioribus his jam attigimus. Item Gregorius Turonensis, lib. de Sancta Patrum Vita, c. 3, de S. Gallo Episcopo refert, cum revelationem instantis mortis acceptisset, post triduumque migraturum, *convocasse populum, et omnibus, confracto pane, communionem sancta ac pia voluntate partitum fuisse*. Hoc etiam confirmat antiqua consuetudo Eucharistiam servandi pro infirmis, quæ sumitur ex Concilio Turonico II, sub Joanne Papa III, anno 570 celebrato; et Concilio Matisconensi paulo post sub Pelagio IV, can. 6; et ex Beda, lib. 4 Histor. Anglor., c. 24. Non est enim verisimile servatam fuisse unquam Eucharistiam sub specie vini, cum brevi tempore et facile acescat et corrumptatur; servabatur ergo in sola specie panis, ut nunc etiam fit.

5. *Eucharistiam in domum secum deferre, olim fidelibus licebat.* — Alia etiam fuit antiqua consuetudo, qua liberum erat fidelibus

corpus Domini, quod viri in manibus, feminae in linteolis nitidis accipiebant (ex August., serm. 252 de Temp.), vel in Ecclesia consumere, vel secum in domum deferre ad secrete communicandum tempore opportuno, quae communio sine dubio in sola specie panis fiebat. Et ita sumitur ex Tertulliano, lib. 2 ad Uxor., cap. 5, ibi : *Non sciet maritus quid secreto ante omnem cibum gustes; et si sciverit, panem, non illum credit esse, qui dicitur.* Et in eodem sensu possunt intelligi verba ejusdem, libro de Orat., cap. ult. : *Accepto corpore Domini, et reservato, utrumque salvum est, et participatio sacrificii, et executio officii.* Quamvis possint hæc verba optime intelligi de priori reservatione pro infirmis. Dicta etiam consuetudo colligitur ex verbis Cypriani, lib. de Lapsis, non longe a fine, ubi refert de quadam femina, *cum arcam suam, in qua Domini Sanctum fuit, manibus indignis tentasset aperire, igne inde surgente deterritam esse, ne auderet attingere,* quod refert inter Eucharistiæ miracula. Illud ergo Sanctum in privata arca reclusum nihil aliud erat, nisi corpus Domini in propriam demum portatum juxta præfalam consuetudinem, quam etiam commemorat lib. de Lapsis, dicens : *Dimissus, et adhuc gerens secum, ut assolet, Eucharistiam.* Qui mos solum primis quinque annis Christi durasse videtur. Nam in Concilio Cæsaraugustano, anno 518, cap. 3, anathematizatur, qui probatus fuerit, *acceptam Eucharistiæ gratiam non consumpsisse in Ecclesia.*

6. *Hic communicandi modus non est a Christo prohibitus.* — Manifestum ergo est, usum communicandi interdum in sola specie panis, antiquissimum fuisse in Ecclesia; ergo propter novitatem non potest a rege Angliae reprehendi, cum in primis quinque sæculis fuisse probetur. Et eadem ratione reprehendi non potest propter abusum, vel aliquam inordinationem, cum ipsi etiam hæretici fateantur, in illis prioribus sæculis mores Ecclesiæ fuisse puros, et verbo Dei consentaneos. Ratio autem Theologica et Catholica est, quia Christus Dominus nunquam prohibuit unam speciem sine alia sumere, neque ex vi institutionis, et attenta sola rei natura id pravum est. Priorem partem contra adversarios sufficienter probamus, petendo ab eis Scripturæ locum ubi illa prohibitio scripta sit. Nam cum illum ostendere nequeant, satis in eorum principiis convincuntur, nullam esse talam prohibitionem specialiter a Christo la-

tam. Nos autem addimus, etiam ex traditione Ecclesiæ non haberi, sed contrarium potius, ut videbimus. Imo si vera est opinio dicentium, Christum post resurrectionem dedisse panem consecratum duobus discipulis, Luc. 24, inde habemus, exemplo Christi hujusmodi communionem in una specie esse comprobata; et sane Augustinus id plane supponit, lib. 3 de Consensu Evangelistar., c. 25, et serm. 140 de Tempore; et Beda, et Theophylact. ibi.

7. *Christus Dominus sub qualibet specie totum sacramenti effectum communicat.* — Altera vero pars, præterquam quod sufficienter auctoritate Ecclesiæ probatur, ex principiis etiam fidei ostendi potest, quia Christus Dominus, qui est veluti substantia hujus sacramenti, totus est sub singulis speciebus, potensque sub utrisque, vel separatim sumptis, ad vitam dandam recipienti; ergo sumptio solius panis sufficit, et ad recipiendum Christum, et ad recipiendum effectum sacramenti, et ad significationem sacramentalem, quæ in usu Eucharistiæ, quatenus sacramentum est, invenitur. Nam quomodocumque hoc sacramentum sumatur, semper significat perfectum convivium ad refectionem animæ sufficiens propter excellentiam panis cœlestis, sub speciebus terrestribus panis contenti et significati. Sicut etiam hoc sacramentum, ut est Angelorum panis, sufficienter significatus fuit per manna, vel per panes propositionis, sine adjectione potus aut vini, quamvis ubi sub ratione sacrificii oblationis præfiguratum est, utraque species intervenerit, ut in oblatione Melchisedech, quando panem et vinum obtulit.

8. *Nullum datur præceptum communicandi sub utraque specie.* — *Evasio hæreticorum.* — *Rejicitur evasio, et verus sensus præcepti Eucharistiam conficiendi traditur.* — Reliquum est ut de altera parte proposita aliqua cursim saltem subnectamus, de perpetua nimirum parentia, seu separatione fidelium non conservantium ab usu calicis. In qua breviter dicimus, Christum nunquam præcepisse Pastori bus Ecclesiæ, ut aliquando communicent subditos sub utraque specie, nec ipsis fidelibus hujusmodi communionem sub legis vel salutis necessitate constituisse. Priorem partem probamus imprimis, quia tale præceptum non invenitur scriptum, hoc enim pro adversariis sufficit, ut jam dixi. Dicent fortasse præceptum hoc datum esse a Christo Pastori bus Ecclesiæ, dicente Apostolis suis in noc-

te Cœnæ : *Hoc facite in meam commemorationem*, quibus verbis id facere præcepit, quod ipse fecerat; ipse autem *acepit, benedixit, ac distribuit* discubentibus utramque speciem; ergo idem a ministris suis fieri voluit, et præcepit. Sed imprimis cum Protestantes contra universalem Ecclesiæ sensum, nec substantialem ritum hujus sacramenti, nec sacrificii oblationem ex illis verbis probari velint, profecto nulla verisimili ratione possunt præceptum communicandi sub utraque specie inde colligere. Præsertim quia neque præceptum communicandi, quoties sacrificio Missæ assistitur, in verbis illis continetur, ut alibi ostendimus, et ex antiquis Conciliis infra attingemus. Verbis igitur illis non præcepit Christus imitari factum illud quoad omnes circumstantias, quas tune pro temporis et occasionis opportunitate observavit, alias oportet noctu semper, et post cenam, imo et post lotionem pedum communicare. Item esset necessarium de jure divino in azymo conficere, sicut Christus fecit. Item quoties sacramentum conficitur, aliis necessario tribendum esset, eademque ratione semper deberet sacerdos totum panem, quem consecraverat, distribuere; et a solo illo sacerdote, qui sacrum confecit, et finita statim consecratione accipendum esset; ac denique ante calicis consecrationem distribuere necessarium esset; nam ita etiam fecit Christus Dominus; haec autem omnia incredibilia sunt, et contra perpetuam Ecclesiæ consuetudinem. Solus ergo substantialis ritus hujus sacrificii et sacramenti illis verbis præceptus est, ut Concilium Tridentinum docuit, sess. 22, cap. 4; reliqua enim, quæ accidentaria sunt, Ecclesiæ dispositioni Dominus commisit, ut jam dixi, et Augustinus, epist. 418, affirmavit.

9. *Objicitur locus Lucæ 22.* — *Explicatur locus prædictus.* — Non desunt vero ex adversariis, qui præceptum hoc colligant ex aliis verbis Christi Domini apud Lucam, c. 22: *Bibite ex hoc omnes*, quod non solum de his, qui tunc præsentes aderant, sed etiam de omnibus futuris fidelibus intelligi obtendunt; aiuntque, non sine mysterio, et quasi propheticō spiritu additum esse verbum illud in distributione sanguinis, potius quam corporis, ad præcavendum et prohibendum morem futurum in Ecclesia Romana excludendi fideles a participatione calicis. At haec ponderatio frivola est; quamvis enim verba illa futuros homines comprehendere concederemus, de omnibus fidelibus illa intelligere neuti-

quam oporteret, sed ad summum de omnibus sacerdotibus, quia ibi soli Apostoli aderant, qui tunc ordinati sunt sacerdotes, ut satis indicavit Concilium Tridentinum, sess. 22, c. 1, et can. 2, dicens Christum in cœna Apostolorum sacerdotes consecrasse, dicens eis, et, in eis, successoribus eorum: *Hoc facite*, etc., ubi licet exclusivam expresse non ponat, tamen solos Apostolos nominando, illos solos ibi adfuisse satis significavit. Idemque ex Matt. 26, et Joan. 13, et aliis Evangelistis colligitur. Nam solos discipulos nominant, per quos quasi per antonomasiā Apostolos intelligunt, et Matthæus expresse addidit numerum duodecim, et quos in particulari nominant, omnes erant Apostoli. Ac denique communis Ecclesiæ sensus est, Christum non omnium discipulorum, sed duodecim tantum Apostolorum pedes lavisse; illos ergo tantum præsentes in Cœna habuit, illisque solis dixit: *Hoc facite*; illis ergo tantum dixit: *Bibite ex hoc omnes*. Deinde ineptum est, particulam *omnes* ad futuros fideles referre, cum Christus ad solos præsentes, et de solo illo calice, quem illis præbebat, qui non poterat nisi inter præsentes dividi, locutus fuerit. Et ita Marcus exposuit ibi statim esse impletum, quod Christus præceperat, dicens: *Et biberunt ex illo omnes*. Neque in illo verbo vel signo aliquod invenitur mysterium, sed quia Christus panem prius fregerat, et in duodecim particulas divisorat, et unicuique suam porrexerat, non fuit necessarium dicere: *Accipite omnes, et comedite*; quia vero unum calicem præbebat, ut ex eo omnes biberent, ideo verbis suis illud etiam expressit. Quod aliis verbis, et sine illa distributione expressit Lucas dicens: *Accipite, et dividite inter vos*; ubi particula *vos*, præsentes tantum designat, non futuros.

10. *Objicitur locus Joan. 6.* — *Explicatur locus iste.* — Posterior autem pars, de necessitate fidelibus imposita communicandi aliquando sub utraque specie, maxime fundari solet in verbis Christi, Joan. 6: *Nisi manducaveritis carnem Filii hominis, et bibere sanguinem ejus, non habebitis vitam in vobis*. Verumtamen hic locus a Calvinistis urgari non potest, cum ipsi plerumque negent Christum Dominum in toto illo capite Joan. 6 de sacramento Eucharistiæ fuisse locutum. Deinde multi etiam Catholici negarunt verba illa intelligenda esse de sacramentali mandatione corporis et sanguinis Domini, quorum sententiam hactenus Ecclesia non damnavit, nec certum sensum illorum verborum decla-

ravit, sed solum unum falsum, quem nunc hæretici approbant, exclusit. Unde Concilium Tridentinum, sess. 21, cap. 2, dixit: *Ex illo sermone Domini non colligi, communionem sub utraque specie esse a Domino præceptam, ut cumque juxta varias Sanctorum Patrum, et Doctorum interpretationes, intelligatur.* Probabilior autem expositio esse videtur, ibi quidem impositam esse fidelibus communionis Christi in Eucharistia necessitatem, non tamen esse impositam omnibus, et singulis fidelibus utriusque speciei obligationem, sed tantum sumendi carnem et sanguinem Christi, sive uno actu, sive multis sumatur. Quia tota necessitas posita est in unione cum Christo per hujus sacramenti sumptionem, quæ ad salutem et vitam sufficiat; ad vitam autem sufficit totius Christi manducatio, ut ex verbis ejus statim id elicientes confirmabimus. Sicut ad salutem sufficit credere in Christum, et illud est credere carnem et sanguinem ejus, licet hæc non singulis, seu distinctis actibus credantur, ita quia Christus totus sub singulis speciebus continetur, sola eucharistici panis receptio ad salutem sufficit, quia in illa totus Christus accipitur, et (ut sic dicam) sanguis ejus re ipsa babitur, licet non per modum potus accipiatur. Unde fit, ut præceptum illud integre implete, qui corpus Domini accipit; et e contrario sequitur, illum tantum violare præceptum illud, et Christi communionem incurrere, qui a corpore et sanguine Domini abstinet, ut recte exposuit Fulbert. Carnoten., epistol. 1 ad Deodatum, in fine. Et Christi verba egregie hunc sensum recipiunt, ita ut negatio inclusa in particula nisi, cadat in totam sequentem sententiam, et utrumque membrum ejus, et sensus sit, si nec corpus meum manducaveritis, nec sanguinem biberitis, non habebitis vitam in vobis. Et ita legit Athan., lib. de Commun. essentia Patris, etc.: *Qui non comedit carnem meam, nec bibit sanguinem meum, non habebit vitam æternam.* Et eodem modo exponit August., tract. 26 in Joan., cujus verba paulo post referam.

11. *Confirmatur expositio tradita.* — Per illa ergo verba solum voluit Dominus ostendere, quam sit necessarium fidelibus per hoc Sacramentum Christum ipsum intra se sumere. Voluit autem distincte explicare sumptionem corporis et sanguinis, non quia necesse sit distinctis actibus illa sumere, sed vel ut fidem hujus sacramenti distincte proponeret, vel ut passionem suam signifi-

caret, in cuius memoriam celebrandum semper est hoc sacramentum; vel quia futurum erat, ut in Ecclesia sua necessarium esset, carnem et sanguinem suum sub diversis speciebus accipere, quamvis non omnibus, sed his, qui sacrificant, hæc necessitas imponenda esset. Intentionem autem Christi Domini in verbis allegatis esse, quam diximus, ex mente Concilii Tridentini in hunc modum probatur. Nam ipsem Christus Dominus dixit, manducationem panis cœlestis sufficere ad salutem; ergo non constituit ut necessariam sumptionem vini in propria specie, et ut distinctam a sumptione panis. Consequentia evidens est, quia non potest una species esse sufficiens, si duplex est necessaria. Assumptum vero constat ex multis verbis Christi Domini, Joan. 6, scilicet: *Hic est panis de cœlo descendens, ut si quis ex ipso manducaverit, non moriatur.* Et infra: *Si quis manducaverit ex hoc pane, vivet in æternum; et panis, quem ego dabo, caro mea est pro mundi vita.* Et infra, post prædicta verba, quibus necessitatem earnis et sanguinis docuit, addidit: *Qui manducat meam carnem et bibit meum sanguinem, in me manet, et ego in illo.* Ubi particula et, copulative quidem, non tamen conjunctim, sed divisim (ut dialectici loquuntur) sumitur, juxta vocis proprietatem et materiæ exigentiam, et juxta communem etiam Scripturæ usum. Cum enim dicitur Exod. 21, juxta hebraicam lectionem: *Qui percusserit patrem et matrem, morte moriatur,* non est sensus conjunctus, ut qui utrumque simul parentem occiderit, moriatur, sed divisus, ut tam qui occiderit patrem, quam qui occiderit matrem, moriatur. Sic ergo in præsenti sensu dictorum verborum Christi est: *Qui manducat meam carnem, in me manet, et ego in eo; et qui bibit meum sanguinem in me manet, et ego in illo;* ergo sumptio uniuscujusque speciei sufficit ad salutem. Et rationem indicavit Christus in verbis sequentibus: *Qui manducat me, et ipse vivet propter me,* quasi diceret, sive quis manducet carnem, sive bibat sanguinem meum, me totum accipit, et ideo propter me vivet. Unde iterum subjungit: *Qui manducat hunc panem, vivet in æternum.*

12. *Idem ex Patribus confirmatur.* — Præterea Patres antiqui nihil aliud sub illis verbis intellexerunt præceptum esse a Christi, nisi ut Christum sacramentaliter et spiritualiter recipiamus; neque in hoc vim faciunt, quod sub una vel duabus speciebus recipiatur, sed in hoc solum, ut manducando, vel su-

mendo ipsum, illi uniamur. Sic Cyrillus Alexandr., libr. 4 in Joan., cap. 14, rationem illorum verborum his verbis reddit: *Non enim possunt cum sanctificatione beatæ ritæ fidei participes esse, qui per mysticam benedictionem Jesum non suscepserint.* Et infra: *Quia corpus Christi vivificare potest, et solo tactu suo corrupta redintegrare, quomodo non vivemus, qui carnem illam et gustamus, et manducamus? Reformabit enim omnino ad immortalitatem suam participes sui.* Ubi est notanda particula exclusiva in antecedenti posita: nam ex vi illationis etiam in consequenti subintelligitur. Idem etiam Chrysostomus, homil. 46 in Joan., ubi tam illis, quam sequentibus verbis nihil aliud sentit voluisse Christum docere, nisi necessarium esse quod alii putabant impossibile, et persuadere se esse verum cibum, qui salvat animam, *ne obscure locutum in parabolis arbitrarentur, sed scirent omnino necessarium esse ut corpus comedenter.* Et idem fere habet Theophylactus in illum locum.

13. Augustinus præterea, tract. 26 in Joan., prædicta verba Christi: *Nisi manducaveritis, etc.*, exponit per sequentia: *Qui manducat meam carnem et bilit meum sanguinem habet vitam æternam*, dicens: *Hanc ergo non habet, qui istum panem non manducat, neque istum sanguinem bibit.* Et infra, *qui non manducat ejus carnem, nec bibit ejus sanguinem, non habet in se vitam.* Non ergo privatur vita, nisi qui neutram speciem recipit; a contrario vero, et *qui manducat carnem, et qui bibit sanguinem ejus, habet vitam*, ut idem Sanctus subjicit; et tract. 27, generaliter dicit, Christum dedisse corpus suum ad manducandum propter æternam vitam, et *signum (inquit) quia quis manducavit, et bibit, hoc est, si manet, et manetur, si habitat, et inhabitatur.* At vero in eo, qui manducat solum panem, Christus manet, et ipse in Christo, ut ipsem Christus testificatus est; ergo ille sufficienter manducat et bibit, teste Augustino, quia totum Christum recipit, et perfecte reficitur, quod illa verborum distinctio maxime significatum est, ut sumitur ex eodem Augustino, serm. 1 de Verbis Apostoli, et ex Eusebio Emiseno, hom. 3 de Paschate; et Cypriano, in serm. de Cœna Domini, inter alia dicente: *Potus et esus ad eamdem pertinent rationem, quibus sicut corpoream nutritur substantia, et virit, et incolmis persererat, ita vita spiritus hoc proprio alimento nutritur, etc.*

14. *Eundem sensum Ecclesiæ consuetudo comprobat.* — Neque antiqua Ecclesiæ consuetudo ab hoc verborum Christi sensualiæna est, sed illum potius confirmat. Nam licet verum sit, in primitiva Ecclesia usum utriusque speciei frequentem fuisse, et fidelibus communem, nihilominus etiam est certum, alterum usum manducandi in una specie fuisse ab illo tempore inchoatum. Nam quod Lucas refert, Actor. 2, de usu fractionis panis, multi referunt ad communicationem sub una specie. Et quidem ex vi verborum nihil aliud colligi potest. Unde cum certum sit omnes fideles tunc communicasse in fractione panis, non est certum, nec probari potest, omnes communicasse sub specie vini; imo verisimilius est non omnes fuisse ad hoc coactos. Nam (ut reliquos in præsenti subiectam) qui ex Nazaræis ad fidem convertebantur, non prohibebantur tunc servare legalia; ergo non est verisimile fuisse coactos ad sumendum calicem, cum ex peculiari professione sua a vino abstinerent. Idemque cogitari potest de multis abstemiis, qui vel vino usi nunquam fuerant, vel ab illo abhorrebat; quamvis ergo usus calicis tunc etiam fuerit in usu, quod id ex necessitate impuneretur omnibus, sive semper, sive aliquando, nullo sufficienti testimonio, nec satis verisimili conjectura ostendi potest. Quin potius solum usum panis fuisse generalem, et communem omnibus, indicant prædicta verba Lucæ, et confirmingant illa Pauli, 1 ad Cor. 10: *Unus panis, et unum corpus multi sumus omnes, qui de uno pane participamus.*

15. Et similiter antiqui Patres, licet interdum utriusque speciei usus mentionem faciant, sæpius de sola manducatione corporis Christi loquuntur, quod ejus usus generalior esset, et sufficiens existimaretur. Ut patet ex Ignatio, Epist. 13, ad Ephes., ubi prius dicit: *Date operam, ut crebrius congregemini ad Eucharistiam, et gloriam Dei.* Et in fine subiungit: *Obedientes Episcopo et presbytero, mente indivisa frangentes panem unum, quod pharmacum immortalitatis est, mortis antidotum, vitamque in Deo concilians per Jesum Christum, medicamentum purgans vitia, et cuncta pellens mala.* Idem sumitur ex Hieronymo, epist. 50 ad Pammachium, quæ est apologia pro libris contra Jovinianum, versus finem, ibi: *Prolet se unusquisque, et sic ad corpus Christi accedat, non quod dilata communionis unus dies, rursum biduum sanctiorem efficiat Christianum, ut quod hodie non uerui, cras,*

vel perendie merear, sed quod dum doleo, me non communicasse corpori Christi, abstineam me paulisper ab amplexu uxoris, ut amori conjugis amorem Christi præferam. Et lib. 2 contra Jovinianum : *Quasi non et nos Christi corpus æqualiter accipiamus.* Similia legi possunt in dialogo contra Luciferianos. Item apud Augustinum, ep. 180 ad Honorat., ubi ait, diabolum saepe persuasisse, apostatas fieri fideles, *quibus quotidianum ministerium Dominici corporis dedit.* Unde infra his verbis exhortatur Ecclesiae Pastores : *Magis timemamus, ne membra corporis Christi destituta spirituali rictu necentur, quam membra corporis nostri oppressa hostili impetu torqueantur.* Denique idem significavit Tertull., lib. de Orat., cap. ult., dicens : *Quod statio solvenda sit accepto corpore Domini.* Et infra : *Accepto corpore Domini, et reservato.* Quae verba clariora sunt de solo corpore, quia sanguis sub specie vini nunquam potuit comode reservari.

16. *Antiquissima consuetudo communicandi infirmos sub specie panis eundem etiam sensum ostendit.* — Unde maxime confirmatur hæc consuetudo ex communione, quæ semper fuit infirmis tradita per modum viatici. Nam si in aliquo tempore est necessaria Eucharistia de jure divino, maxime in articulo mortis, ut est communis Theologorum sententia, valde consentanea rationi, quia præcepta affirmativa tunc potissimum obligant, quando et maxime urget necessitas, et tempus aptum ad implendum præceptum absolutitur. Sed in illo articulo non consuevit Ecclesia dare utramque speciem, sed solum corpus Domini; ergo signum est semper Ecclesiam sensisse communionem sub una specie ad salutem sufficere. Nam quod illa consuetudo antiquissima fuerit, ex Ambrosio, Gregorio Turonensi, et aliis adductis in præcedenti puncto colligitur, et clarius ex Concilio Nicæno, cap. 12, juncto 14, alias e. 13 et 18, nam in e. 12 et 13 dicitur de iis, qui recedunt ex corpore : *Antiquæ legis regula observabitur etiam nunc, ut ultimo et necessario ritu sue viatico non defraudentur.* In cap. autem 14, prohibetur, *diaconus corpus Domini alias porrigere;* et additur, *quod si non fuerit in præsenti Episcopus vel presbyter, diaconi proferant et edant.* Similiaque sunt verba Gelasii, ep. 9 ad Episcopos Lucaniæ : *Sacri corporis prerogationem, sub conspectu Episcopi, vel presbyteri, jus non habet exercendi; utique diaconus, quibus in locis non*

sine causa de solo corpore Domini fit mentio, quia diaconus, cum non possit consecrare, non potest dare Eucharistiam, nisi ex præconsecratis et reservatis, solum autem reservabatur corpus Christi sub specie panis. Simileque est quod in Concilio Rhemensi¹, c. 2, reprehenduntur presbyteri, *qui laico, aut feminæ sacram corpus Domini tradunt ad deferendum infirmis,* ubi etiam fit mentio solius corporis, quia debebat esse reservatum ex consecratione prius facta, et non nisi corpus reservabatur. Cum ergo præcipue conservatum sit hoc sacramentum propter viaticum infirmorum, judicatum fuit semper sufficiens sub specie panis, ut pro viatico daretur. Ergo etiam judicabatur sufficiens ad implendum divinum præceptum de communione hujus sacramenti.

17. In quo puncto notari potest historia, quam refert Beda, lib. 4 Anglicanæ historiæ, c. 44, de quodam monacho, cui ægrotanti Petrus et Paulus apparuerunt, et mortem instantem revelarunt : *Sed primum (dixerunt) expectare debes donec Missæ celebrentur, ac viatico Dominici corporis ac sanguinis accepto, sic infirmitate simul et morte absolutus, ad aeterna in cœlis gaudia subleveris.* Et tamen inferius subditur de prælato monasterii : *Missas fieri, atque omnes communicare more solito, simulque infirmanti puero de eodem sacrificio dominicæ oblationis particulam deferri mandavit.* Ubi expendo dictionem *particulam,* quæ solum significat parvam aliquam partem panis consecrati. et illam datam esse pro viatico Dominici corporis et sanguinis, quia per illam totum sacrificium participatur, et in illa utrumque continetur. Expendo etiam quod ait, omnes communicasse more solito; refert autem idem Beda, lib. 2 ejusdem historiæ, c. 5, consuetudinem Angliae tunc fuisse, *Eucharistiam populo dare sub specie panis, quem videntes barbari, panem nitidum appellabant,* et a sacerdote petebant, quibus ille respondit : *Si rultis ablui fonte salutari, potestis panis sancti esse participes.*

18. *Ægroto deglutire non valenti, hostia in vinum non consecratum immissa subministranda est.* — Pro eadem etiam consuetudine notari potest decretum Concilii Toletani XI, cap. 44, ubi refertur canon Toletani Concilii I, 14, dicens, *ut si quis acceptam a sacer-*

¹ Ex Concilio Rhemensi refert Gratianus in c. *Pervenit*, de *Consecr.*, dist. 2. Sed vide que ibi notantur.

dote Eucharistiam non sumpserit, velut sacri-legus propellatur, quem canonem explicat posterius Concilium, intelligendum esse, si id voluntate fiat, non vero si ex infirmitatis impedimento id contingat. Nam multi infirmi, ut ibi dicitur, Eucharistiam sibi oblatam rejiciunt, non ex infidelitate, sed quia, *præter Dominici calicis haustum, traditam sibi non possunt Eucharistiam deglutire*. In quibus verbis satis indicat, consuetudinem ordinariam fuisse dandi infirmis Eucharistiam sine hausto calicis, et in eodem sensu intelligere videtur alterum canonem antiquioris Concilii. Aliqui vero inde colligunt, infirmo, qui hostiam deglutire non potuerit, in sola specie vini viaticum tribuendum esse; quod non repugnat quidem juri divino, ibi tamen non dicitur. Magis colligi posset ex Concilio Carthaginensi IV, cap. 76, ubi de infirmo in simili casu dicitur: *Si continuo creditur moriturus, infundatur ori ejus Eucharistia; infusio enim est rei liquidæ. Sed nihilominus id intelligi posset de particula hostiæ, quæ in calice posita intra vinum non consecratum, proprie dici potest infundi ori infirmi. Et attenta præsenti consuetudine Ecclesiæ, potius hoc ultimo modo esset communicandus talis infirmus, quam sub specie vini consecrati, quia et minus habet periculi, et magis est Ecclesiæ consuetudine consentaneum: nam usus calicis extra sacrificium generatim prohibitus est, et nulla est necessitas quæ cogat ad utendum epicheia, cum alter communionis modus sufficiat, qui per se prohibitus non est. Nam licet in Concilio Bracarensi III, c. 1, videatur prohibitus ille communicandi modus, ut intellexisse videtur Glossa, in c. Is qui, 26, q. 6, quia ibi dicitur, non esse dannam *intinctam Eucharistiam populis, nihilominus vel illa prohibitio non extenditur ad easum necessitatibus, vel (quod verius existimo) non est facta in illo sensu, sed adversus quosdam, qui intinctam Eucharistiam populis pro complemento communionis porrigebant.* Nam in vino consecrato immergabant seu humectabant Eucharistiam, et illam dabant pro complemento communionis, quod erat superstitionis, quia satis completa est communionis in sola specie panis ministrata sine ulla tinctione, et quando ambæ species accipiendæ essent, ut potuerunt aliquando accipi, seorsim ministrandæ essent, sicut Christus Dominus illas præbuit.*

19. *Insacrificio vel ex superstitione corpus sine sanguine sumi prohibetur.* — Neque huic

consuetudini obstat, quod aliquando legatur prohibita sumptio corporis sine sumptione sanguinis, ut ex Gelasio Papa refert Gratianus, in c. *Comperimus*, de Consec., d. 2, quod alii tribuunt Leoni; apud neutrum autem inventio in epist. ad Majoricum et Joannem, ex qua citatur. Sed cujuscumque fuerit illa prohibitio, non obstat, vel quia refertur ad sacerdotes sacrificantes, ut ibi Gratianus cum Glossa voluit, et aliqui ex Scholasticis sequuntur, sic enim facta fuerat talis prohibitio in Concilio Toletano XII, c. 5; vel (quod magis est textui et historiæ consentaneum) ibi solum est prohibitum id facere ex superstitione, ut in textu dicitur, ibi, *quoniam nescio qua superstitione docentur obstringi*, existimantes utique non esse licitam vini sumptuinem. Qui videtur fuisse error Manichæorum; nam, ut refert Leo Papa, serm. 4 Quadrag., c. 5, cum sentirent in Christo non fuisse veram carnem, ad tegendam infidelitatem suam, nostris audebant interesse mysteriis: *Ita vero (inquit) in sacramentorum communione se temperant, ut interdum tutius lateant, ore indigno Christi corpus accipiunt, sanguinem autem redemptionis nostræ haurire omnino declinant.* Hoc ergo spiritu et errore non solum prohibitum, sed etiam per se malum et sacrilegum semper fuit, a calice abstinere. Hæc autem eadem fraus et hypocrisis illorum hæreticorum ostendit, communionem corporis sine calice fuisse tunc inter fideles usitatam, et morem illum sanctum et religiosum fuisse existimatam, alioqui non ausi fuissent Manichæi, ad occultandum suum errorem, usum illum, si novus esset, introducere. Unde tunc etiam Pontifex posset præcipere ut corpus non sumeretur sine sanguine, ubi ad vitandum illud scandalum necessarium fuisset; quamvis enim mihi non constet id factum esse, potestas nihilominus non deest. Ex illa tamen colligi non potest, Christum prohibuisse accipere unam speciem sine altera, sed infertur solummodo posse Ecclesiæ præcipere vel prohibere aliiquid, quod Christus non præcepit vel prohibuit, quod verissimum est; et ex eodem principio nos concludimus, potuisse Ecclesiæ, quando temporis occasio et generalis ratio id postulavit, prohibere laicis usum calicis, quamvis Christus illum non prohibuerit, sed absque precepto coucesserit.

20. *Statuta veritas ratione confirmatur.* — Unde posset ultimo haec veritas persuaderi rationibus, quibus ostendi potest imprimis

non fuisse conveniens Christum præcipere, et sub necessitate salutis constituere usum calicis pro omnibus et singulis fidelibus, tum quia totus Christus sub singulis speciebus futurus erat, et omnem necessarium convenientem effectum hujus sacramenti se sumentibus sub qualibet specie tribuere potest; tum etiam quia vix posset id moraliter fieri sine magnis incommodis et periculis contra reverentiam huic sacramento debitam, quæ vel propter multitudinem communicantium, vel propter eorum varietatem, tam in conditionibus et affectibus corporis, quam in animi prudentia et circumspectione, vel denique propter ministrantium incuriam, nullatenus possent juxta humanam conditionem evitari. Deinde contrariis rationibus probari posset, prudentissime fecisse Ecclesiam, introducendo et approbando consuetudinem hanc communicandi laicos sub sola specie panis, quia illis nullum inde provenit spirituale incommodum, quod ad effectum hujus sacramenti pertineat; imo eisdem esse potest modus ille communicandi utilior, tum ad fidem erga hoc sacramentum perfectius exercendam, utique Christum in toto sacramento, eumdemque Dominum totum in singulis sacramenti partibus fidei oculis intuendo; tum etiam ad majorem obsevantiam prioremque ejusdem sacramenti cultum, ut satis explicatum est. In his enim, et aliis rationibus declarandis immorari, non est operæ pretium, quia in commentariis theologicis, ad quos magis quam ad disputationem de fidei fundamentis pertinent, copiose pro viribus nostris id præstitimus.

CAPUT VI.

DE MISSIS PRIVATIS.

1. Missas privatas rex abhorret. — *Missa etiam si secrete fiat, est verum sacrificium et actus de se publicus.* — Venio ad ultimum punctum circa divinum Eucharistie mysterium a rege tactum, de missis privatis, quarum usum inter novitos et nuperos ritus ponit et reprehendit. Notanda vero sunt verba regis dicentis: *In his articulis privatas illas missas numero, in quibus sacrificus simul et populi personam et sacerdotis sustinet.* Nam in illis videtur rex de Missa tanquam de vero sacrificio loqui, alias immerito *sacrifici*, et *sacerdotis* nomina interponeret, ac sacerdotem in Missa pro populo intercedere, et ideo

ab illo distingui debere, supponeret. Propter quod dubito an in illis verbis ex propria sententia loquatur, credens quod de Missæ sacrificio supponit, cum Lutherus, Calvinus et alii Protestantes id negent, an vero solum intendat Catholicos ex propriis principiis redarguere. Nos vero, catholicam doctrinam de veritate ac proprietate hujus sacrificii supponentes, dicimus imprimis Missam, sive publice, sive secrete fiat, semper esse verum sacrificium, ac subinde nunquam esse ita privatam, quin de se actio sit publica; fit enim a sacerdote, ut a ministro publico, auctoritate Christi et nomine Ecclesiae constituto in his quæ sunt ad Deum, ut pro universo christiano populo Deo sacrificium offerat. Et ideo merito dixit Concilium Tridentinum, sess. 22, cap. 6, *Missas, etiam si nullus in eis communicet, vere communes censerit debere, partim quod in eis populus spiritualiter communicet, partim vero quod a publico Ecclesie ministro, non pro se tantum, sed pro omnibus fidelibus, qui ad corpus Christi pertinent, celebrentur.*

2. Missa quoad substantiam semper est actio publica. — Juxta hanc ergo catholicam doctrinam nulla est Missa quæ (ut ita rem explicem) per se et substantialiter sit privata; nam quoad principalem offerentem, qui est Christus, et quoad ministeriale, qui est sacerdos, et quoad rem oblatam, quæ est caro et sanguis Christi, et quoad Deum, cui offeruntur, et quoad Ecclesiam Catholicam, pro qua offertur, communis est; hæc autem sunt quæ ad ejus substantiam maxime pertinent, eique per se convenire dici possunt. Solum ergo possunt aliquæ Missæ dici private, ex conditionibus seu circumstantiis quæ in illius celebratione intervenire possunt. Quoniam autem hæ circumstantiæ multiplices esse possunt, per singulas discurrere oportet, et expendere an in aliquo sensu Protestantium reprehensio vel potius calumnia contra Ecclesiam Catholicam verisimile aliquod fundamentum habere possit.

3. Variis modis potest dici Missa privata. — **Primo, ex defectu concursus populi.** — Et primo quidem dici potest Missa privata, quæ sine populi concursu celebratur. Quem sensum indicat rex, cum affirmat, Missas privatas vocare, *in quibus sacrificus simul, et populi personam et sacerdotis sustinet;* hoc autem si attente consideretur, neque necessarium, neque in rigore verum esse potest, nisi supponatur sacerdotem omnino solum esse, quando sacrificat; nam si ministros,

vel saltem ministrum habeat, ille populi personam sustinebit, et non solus sacerdos. Tales autem Missas privatas, in quibus nullus ministret sacerdoti, Ecclesia non permittit nec permisit unquam; prohibet enim Missam dici a sacerdote sine ministro. Nam in Concilio Moguntino, sub Leone III, c. 43, dicitur nullum presbyterum recte posse solum Missam facere, et ita observat universalis Ecclesiæ consuetudo, et omnes catholici Doctores docent. Hoc autem satis est ut non dicatur solus sacerdos simul populi et sacrifici personam sustinere; nam minister, vel solus, vel simul cum persona sacerdotis, populi personas sustinet. Cum enim Paulus, ad Hebr., cap. 5, dicat Pontificem creatum, quemadmodum pro populo, ita etiam pro semetipso offerre, nullum est inconveniens quod ipsem sacerdos saltem simul cum ministro populi personam sustineat. Quin potius si solam sacrificii generalem rationem spectemus, non colligitur ex vi illius necessitas alicujus ministri, neque alicujus populi adstantis; constat enim Abel, Abraham, et alios Patriarchas in lege naturæ obtulisse interdum sacrificium solos, sine aliis ministris vel assistentibus, quia licet sacerdos esset solus, poterat nomine populi, et pro se, et pro illo toto simul offerre. Unde quod nunc requiratur aliquis sacerdoti ministrans, est ex peculiari institutione, quæ videtur magis esse ecclesiastica quam divina, quia magis postulatur propter accidentales cæremoniæ, quam propter essentiali ritum consecratio-

nis.

4. Missa hoc modo privata omnino irreprehensibilis est. — Hinc ergo fit, nullam dari verisimilem causam ob quam reprehendi possit Missa privata quoad hanc circumstantiam, id est, cui nullus assistit præter unum ministrum, quia in tali modo offerendi nihil committitur, vel contra naturalem legem, vel contra præceptum Christi, vel contra præceptum aut consuetudinem Ecclesiæ. Primum constat ex dictis, et est per se manifestum, quia nec communis ratio sacrificii, nec peculiaris modus, aut dignitas eucharistici sacrificii multorum presentiam requirit; potest enim cum debita reverentia, devotione et integro ritu a sacerdote cum uno tantum ministrante fieri. Præceptum item Christi ostendi non potest, quia neque actio ejus in nocte cœnæ, neque verba, quæ tunc Apostolis dixit, continent tale præceptum, ut ex similitudine rationis colligi potest ex iis quæ

in præcedenti puncto tradidimus. Item ex iis quæ tradunt Cyprianus, epist. 62 ad Cæciliū, versus finem, et Augustinus, epist. 448, cap. 6, dicentes, non præcepisse nobis Christum in confiando hoc mysterio observare omnes circumstantias, quas ipse observavit, sed quæ ad ritum substantiale pertinet. Sie ergo quamvis ipse coram multis celebraverit, non ideo præcepit semper ita fieri. Alias necessarii essent saltem duodecim assistentes, vel etiam non deberent permitti plures, quia Christus non omnes discipulos, sed tantum duodecim Apostolos ad cœnam vocavit; et simili ratione non in conspectu feminarum, sed tantum virorum esset hoc sacrificium offerendum. Denique non potest designari multitudo assistantium, vel numerus eorum jure divino necessarius ad confiendum hoc sacramentum; ergo neque est datum præceptum, ut coram multis absolute fiat, quia non magis uno quam alio modo ostendi potest, vel scriptum, vel traditum.

5. Nullum præceptum ecclesiasticum obligat ad sacrificandum coram multis. — Præcepto autem ecclesiastico videri potest olim fuisse statutum, ne Missæ dicantur, nisi coram testibus saltem duobus, ut habetur in Concilio Nannetensi, c. 30, et alii referunt ex Anacleto, Epist. 1, ubi generaliter de sacerdotibus dicit: *Non soli sacrificent, sed testes secum adhibeant*, postea vero in Episcopis plures requirit. Verumtamen hoc jus, vel nunquam fuit generaliter introductum in Ecclesia per modum rigorosi præcepti, vel certe per consuetudinem abrogatum est, quia in his, quæ accidentaria sunt, potest esse in Ecclesia varietas, ut ratio vel occasio temporum exigit. Et ita multiplicatis sacerdotibus potuit, vel necessarium, vel magis conveniens judicari, ut unus minister sufficeret, ne propter solam assistantium paucitatem aut penuriam divinus cultus minueretur, et Ecclesia ipsique sacerdotes fructibus sacrificiorum privarentur.

6. Secundo, dicitur Missa privata, quia solus sacerdos in ea communicat. — Secundo modo dicitur Missa privata, in qua solus sacerdos sacramentum consumit, et communiceat, et in hoc magnam vim faciunt Protestantes, fingentes esse non solum contra antiquam Ecclesiæ consuetudinem, sed etiam contra jus divinum. Sed ducuntur solo spiritu contradicendi et calumniandi Ecclesiam Romanam, quia sine fundamento fingunt tale

præceptum, ut facile ostendi potest discursu sæpe facto. Nam ex facto aut verbis Christi non colligitur de hac re præceptum divinum, ut testimonia adducta et ratio probant, quia solum Christi factum non inducit præceptum, neque per aliqua Christi verba sufficienter indicatum est. Deinde licet verum sit, in principio Ecclesiæ frequentius observatum fuisse, ut fideles assistentes fractioni panis de illo participarent, tamen quod id factum fuerit ex obligatione præcepti, maxime divini, nullo indicio ostendi potest, verisimiliumque est, ex sola devotione et fervore fidelium, eo tempore id provenisse. Præsertim cum dicat Paulus, 4 ad Cor. 11 : *Probet autem se ipsum homo, et sic de pane illo edat, nam poterant etiam tunc multi adesse sacrificio, qui se probantes, non dispositos ad communicandum invenirent, et ideo semper etiam in Ecclesia fuit facilius Missam audire, quam in illa communicare, quod non ita esset, si quoties Missa auditur, communicare oporteret; quia non eadem probatio conscientiae idemve iustitiae status æque ad utrumque postulatur.* Deinde paulo post Apostolorum ex hac vita discessum designari cœperunt tempora, in quibus solis fideles communicare obligabantur, cum tamen extra illa tempora, et diebus saltem Dominicis Missas audire tenerentur. Merito ergo Concilium Tridentinum damnavit dicentes, illicitas esse Missas in quibus solus sacerdos communicat. De quo punto plura in scholasticis disputationibus disserimus.

7. *Tertio, dicitur Missa privata ex circumstantiis loci et temporis.* — *Prædictæ circumstantiæ non reddit Missam privatam illicitam.* — Tertio, potest Missa dici privata ex aliis circumstantiis, ut ex loco, quia in privata domo dicitur, et non in publico templo, pro toto populo deputato; vel ex tempore, scilicet, quia non fit hora consueta in qua populus solet ad sacrificium convenire, sed quacumque alia sacrificanti opportuna; vel ex modo, quia non fit cum cantu, vel alias similibus solemnitatibus. Et de his omnibus modis certum est, Missam privatam non fieri illicitam, nisi aliquid contra specialem Ecclesiæ prohibitionem, vel contra reverentiam sacramento debitam committatur. Ratio generalis est, quia in his ritibus accidentalibus nihil est jure divino positivo definitum, et ideo quidquid non est per se malum, nec per Ecclesiæ prohibitum, indifferens est. Unde quod ad locum specat, solum est per se necessarium ut locus sit per Ecclesiæ pastores appro-

batus, juxta antiquos canones, a Concilio Tridentino gravissime commendatos et innovatos¹. Dico autem per se, quia semper in Ecclesia usitatum fuit, ut ex prudenti causa vel necessitate, Missæ in privatis locis aut dominibus, pro debito tempore et opportuna occasione oblata, dicantur.

8. *Consuetudo celebrandi in privatis locis, miraculis confirmata.* — Quem morem miraculis etiam confirmatum esse, antiquæ historiæ prodiderunt. Nam Paulinus in vita Ambrosii refert, cum aliquando Romæ adesset, sacrificium in domo cuiusdam matronæ nobilissimæ obtulisse, et paralyticam in lecto jacentem miraculose sanasse. Et Augustinus, lib. 22 de Civit., c. 8, refert, quemdam presbyterum suum sacrificium corporis Christi in quadam privata domo, quæ a dæmonibus vim noctiam patiebatur, obtulisse, et orationibus suis habitatores illius domus ea vexatione dæmonis liberasse. Theodoreetus etiam, in Historia religiosa, c. 20, de se narrat mysticum sacrificium in privata domo cuiusdam viri sancti, Maris vocati, propter ejus consolationem obtulisse. Pius tandem I, Summus Pontifex, in sua epist. 1 ad Justum, Verensem Episcopum, habet: *Euprepia titulum domus suæ pauperibus assignavit, ubi nunc cum pauperibus nostris commorantes Missas agimus.* Quæ quidem Missæ saltem quoad modum videntur fuisse privatæ, quoad locum autem potest esse dubium, quia per titulos significantur domus ad divinum cultum mancipatae, ut notat Baronius, an. 412, num. 4. Quia vero Pius non dicit domum illam jam fuisse cultui divino dicatam, sed ab Euprepia pauperibus assignatam, et in illa adhuc cum pauperibus habitasse, satis verisimile est, illam non fuisse Ecclesiam publicis officiis divinis dicatam, sed fuisse domum habitationi pauperum destinatam, in qua privatin Missæ dicebantur. Et hoc maxime solitum est fieri tempore persecutionis tyrannorum vel hereticorum, ut sumitur ex multis, quæ memorat Victor, lib. 3 de Persecut. Vandalica; et Sozomenus, lib. 7 Historiæ, c. 5; et Augustinus, in Breviculo Collation., c. 17. Item in illo tempore dicebantur Missæ in cryptis. Unde Cornelius Papa, ad Lupicinum Viennensem Episcopum exaggerans vim persecutionis ait: *Neque in cryptis notioribus Missas agere Chri-*

¹ Clemens, Epist. 3; et Felix IV, epist. 1, et multa Concilia quæ citantur dist. 4 de Consecrat.

stianis licet, ubi expendo particulam, notioribus, nam significat in secretioribus privatum et occulte dici potuisse. Dicebantur deinde tunc in carceribus, teste Cypriano, Epist. 5, apud quem notanda est prudens monitio: Ita (inquit) ut presbyteri quoque, qui illuc apud confessores offerunt, singuli cum singulis diaconis per vices alternent; quibus verbis etiam significat, Missas illas fuisse privatas quoad modum, et quoad personarum concursum.

9. *Consuetudo celebrandi Missam quo cum que opportuno tempore exemplis confirmatur.* — Quocirca eisdem exemplis facile probari potest consuetudine receptum fuisse, ut Missæ quo cumque opportuno tempore dicerentur, quia nec necessarium erat, nec moraliter possibile, definitam horam celebrandi in tanta varietate occasionum et locorum observare. Accedit semper fuisse licitum sacerdotibus quotidie celebrare, si vellent, sicut de Andrea Apostolo dixisse legimus: *Ego omnipotenti Deo immolo quotidie, non taurorum carnes, nec hircorum sanguinem, sed immaculatum Agnum in altari.* Hieronymus etiam, epist. 150 ad Hebidiam, q. 2, de se dicit: *Quotidie in sacrificiis ejus de genimine vitis verue rubentia musta calcamus.* Quod de Missis privatis, quæ ab ipso quotidie dicebantur, necessario intelligi debet. Nam de eodem Hieronymo ait Epiphanius, epist. ad Joannem Hierosolymit, quæ est 60 inter Epistolas Hieronymi, ipsum non fuisse solitum publicas Missas celebrare. De Cassio etiam, Narniense Episcopo, refert Gregorius, homil. 37 in Evangel., morem illi fuisse, *quotidianas Deo hostias offerre, ita ut pene nullus dies vitæ ejus abscederet, quo non omnipotenti Deo hostiam placationis immolaret.* Et similia in historiis de vitis et gestis Sanctorum frequenter reperiuntur, ex quibus manifeste colligi potest, eos neque certam diem hebdomadæ, neque publicam ac definitam dici horam ad celebrandum observasse, sed pro sua devotione aut commoditate elegerisse horam intra diei tempus ab Ecclesia permisum. Et inde a fortiori etiam perspicuum manet, Missas privatas quoad intentiōnem offrendi, aut alias circumstantias, codem modo fuisse semper licitas et in usu; tum quia de illis est eadem ratio; tum etiam quia non poterant aliter Missæ tam frequenter celebrari. Atque haec sufficient de hoc puncto, in quo nullam rationem dubitandi, vel difficultatem, quæ ad dogmata fidei pertineat, invenio; alia vero, quæ ad sacrificium Missæ

spectant, a rege non attinguntur, et alibi ex professo a nobis tractata sunt¹.

CAPUT VII.

DE ERRORIBUS QUI CIRCA CULTUM ET INVOCATIONEM BEATÆ VIRGINIS IN REGIS PRÆFATIONE NOTANTUR.

1. Inter alia, quæ in reddenda ratione suæ fidei rex Jacobus scribit in Præfatione sua, nonnulla de B. Virgine confitetur, quæ ex catholica doctrina desumpsit, a qua nihilominus in aliis discrepat, quæ breviter expendere, et non minus certa esse quam priora, ostendere necesse est. Primo ergo dum Mariam sanctissimam B. Virginem appellat, recte de perpetua illius virginitate sentire videtur; non enim potest simpliciter virgo appellari, quæ aliquando virginitatem servavit, si postea illam amisit. Deinde recognoscit illam fuisse veram Dei Matrem, eo quod Salvatori nostro placuerit ex illa humanum sibi corpus assumere, et in Christo non possit a divinitate humana natura separari; quod recte dictum est, utpote a Concilio Ephesino I, cum Leone magno et Cyrillo Alexandrino mutuatum. Præterea dicit, se pie ingenuaque fateri constanterque contendere, illam Virginem supra omnes beatorum hominum ac spirituum ordines ad caelestem gloriam elatum, ejus filio, Deo simul et homine, excepto. In qua confessione veritatem laudo et complector, illius tamen certam fidem postulo, et fundamentum requiro. Si enim rex dicens, pie et ingenue illam veritatem fateri, et pro illa constanter contendere, solum piam quamdam credulitatem, constantemque opinionem illius veritatis se habere significare intendit, confessioni fidei Catholice non satisfacit. Nam traditio antiquissima ab Apostolis orta, et unanimi consensu Patrum ad nos usque derivata, et ab universali Ecclesia sine ulla dissensione aut hæsitatione recepta, certam fidem illius veritatis apud Catholicos facit. Si vero rex serenissimus verbis suis hanc fidem indicare voluit, aliquid esse firma fide credendum, quod in libris canonici expresse non sit scriptum, factetur necesse est. Verumtamen, quia in veritate doctrinæ quoad hanc partem convenimus, et de modo et regula credendi satis in superioribus dictum est, ideo in hac veritate

¹ 3 tomo tertiae partis, disp. 73, et seq.

confirmanda non immoror, et lectorem ad ea, quæ alibi scripsimus, remitto.

2. Denique hanc Beatissimam Virginem se venerari rex profitetur, quod etiam libenter legimus et admittimus. Nec de verbo venerandi vel adorandi quæstionem movemus, licet fortasse rex primum admittere, posterius autem cavere consulto studuerit; nam hoc etianu sine reprehensione fieri posse, si sana mente et legitimo sensu fiat, non dubitamus. Nam Concilium Tridentinum, sess. 25, in Decreto de Invocatione et venerat. Sanctorum, illum loquendi modum observavit, dicens : *Christum adoremus, et Sanctos veneremur.* Epiphanius, contra hæresim 78, cum doceat, Virginem honore et veneratione prosequendam esse, adorandam esse negat, utique adoratione latræ, seu divino cultu, de quo ibi tractabat, et per antonomasiam verbo adorandi simpliciter dicto significari solet.

3. *Quid intersit inter verba honorandi, adorandi et venerandi.* — Itaque majoris claritatis gratia, et ut pure et sincère hujus dogmatis sensum sine ambiguitate verborum explicemus, tria verba notanda sunt, scilicet, honorare, adorare, et venerari, nam duo priora distinxit Augustinus, contra serm. Ariano- rum, c. 23 : *Nam honorat (inquit) omnis qui adorat, non vero adorat omnis qui honorat;* honoramus enim non solum superiores nobis, sed etiam æquales ; imo et inferiores ; quin etiam rex interdum subditum honorat, ut dicitur Esther. 6. Adoratio autem solum exhibetur potentiæ et superiori, in signum dignitatis et excellentiæ. Est ergo honor testimonium virtutis absolute spectatæ, quomodo cumque ad honorantem comparetur. Adoratio vero est etiam virtutis testificatio, cum recognitione tamen superioris dignitatis, excellentiæ; et ideo qui honorat, non statim adorat; e contrario vero qui adorat, necessario etiam honorat. Venerandi autem verbum licet magis ad proprietatem adorandi accedere videatur, quia exhibitionem reverentia et observantia indicat, interdum tamen solet pro verbo honorandi, et in eadem significatione usurpari, ut ex latina proprietate et usu constat. In præsenti ergo cavendum est, ne in hac tantum postrema significatione verbum venerandi usurpemus : parum est enim Virginem honorare, nisi id fiat cum debita mentis submissione, et estimatione excellentiæ virtutis et dignitatis ejus. Honor autem sic exhibitus est proprie venerationis et reverentia, et dici etiam potest quædam adoratio.

4. *Adorationis plures species.* — *Latria.* — *Dulia.* — *Qua adoratione B. Virgo adoranda.* — Nam ipsa etiam adorationis vox generalis est, et varios gradus seu species habet; quædam enim in signum supremæ et increatæ excellentiæ exhibetur, quæ latræ dicitur, et interdum nomine adorationis simpliciter prolato significari solet; alia vero est quæ ob minorē excellentiam indicandam exhibetur, in qua significatione interdum usurpatur in Scriptura verbum adorandi, ut 1 Reg. 24 et 25, et 3 Reg. 4, et alibi sæpe. Atque eodem modo distinguunt Theologi adorationem inferiorem (quam per nominum accommodationem duliam vocant) a supra adoratione latræ, et sub priori membro, cum singulari quadam excellentia et perfectione, observationem Virginis debitam constituunt, et hyperduliam vocant. Quæ verba fortasse regi non placebunt, sed de illis non contendemus, dummodo res non displiceat, et per venerandi verbum non quemcumque honorem, sed illum, qui cum debita aestimatione et animi submissione in signum singularis excellentiæ, et sanctitatis, Virginis exhibetur, significemus. Merito enim dixit Augst., lib. de Genes. ad litter., c. 4 : *Dummodo intelligatur quod intelligendum est, non magnopere curandum quid vocetur.* Nos igitur hac mente confitemur Beatam Virginem esse venerandam, et ab adorandi verbo, ne quempiam in fide infirmum offendat, abstinemus. Nec videtur rex ab hoc sensu alienus : nam statim fatetur, Virginem esse veram Dei Matrem, quam nemo prudens negare potest esse singularem excellentiam, et insuper addit, Virginem in cœlesti gloria supra omnes Beatorum spirituum ordines esse collocatam; ergo necesse est ut cum recognitione ejusdem excellentiæ, et in testimonium ac significationem ejus, honorem illi exhibeat, quando ipsam veneratur.

5. *Quid rex in veneratione B. Virginis debita coarguat, ejusque objectio.* — *Objectio ex verbis Regis collecta.* — *Satisfit objectioni.* — *Verus Nazianzeni sensus traditur.* — His vero non obstantibus, aliquid obmurmurat vel reprehendit rex in cultu et veneratione, quam Catholici Beatae Virginis tribuimus, dicens : *Sed nec ipsam deridiculo ausim habere, nec impias in Deum voces emittere, non illi divæ modo, sed et Deæ nomen tribuens.* Quibus alia adjungit, quæ proprie ad invocationem pertinent, ideoque commodius inferius tractabuntur. Hæc autem reprehensio hanc fere objectionem continere videtur : nam cultus

vel adoratio, non tantum factis, sed etiam verbis divinitatem significantibus exhibetur; ergo cum illa verba divinitatem in Virgine significant, adorationem simpliciter seu latræ continent; ergo non ad honestam, et debitam observantiam, sed ad idololatriæ labem spectant. Hæc vero objectio nec fundamentum habet, neque alicujus momenti est. Nego habere fundamentum, quia nunquam Ecclesia Romana seu Catholica, in laudanda, seu invocanda Beata Virgine, illis vocibus usa est, et ideo immerito illi tribuitur, si quid fortasse hujusmodi in aliquo privato Doctore invenitur. Addo etiam, similes voices rarissime inveniri in Patribus, vel Doctoribus Theologis, qui apud nos sunt alicujus auctoritatis. Solum memini leguisse me nomen *Deæ*, apud Gregorium Nazianzenum, in tragedia de Christo paciente, in fine, ubi sic inquit: *Veneranda o Virgo casta felicissima, quando Beata nunc Beatorum in polo, exuta quidquid fæcis humanae sedes, aternitatis pallio ornata, ut Dea habita senectæ expers.* Ex hujusmodi autem, vel similibus verbis, dico frivolam capi reprehendendi vel objiciendi occasionem, quia tam ex fide et sapientia scribentis, quam ex antecedentibus et sequentibus verbis constat, non esse usurpatam ad significandam veram deitatem per essentiam, sed quamdam excellentem participationem ejus. Unde possemus regi respondere verbis Christi Domini, Joannis decimo: *Si illes dixit Deos, ad quos sermo Dei factus est,* etc. Cum ergo Scriptura justos, principes et judices deos vocet propter quamdam participationem, quid mirum quod Gregorius Nazianzenus ad significandam inter omnes res creatas singularem excellentiam, dignitatem et propinquitatem (ut sic dicam) Virginis ad Deum, Deæ nomen usurpaverit. Eo vel maxime quod non simpliciter asseruit, illam esse deam, sed ut Deam habitam, nam particula *ut*, diminuit, et solum participationem quamdam et imitationem dicit, sicut Christus Dominus, Matth. 5, dixit: *Estote perfecti, sicut et Pater vester perfectus est;* Joan. 16: *Et sint unum sicut et nos unum sumus.* Denique addere possumus Nazianzenum, quasi licentia poetica usum, et necessitate carminis compulsum, vocem illam præter consuetum morem fideliter interposuisse, nullum timens periculum, sicut revera nullum erat, quod legentes posset in aliquem errorem inducere. Et hæc nunc sufficiunt pro iis, quæ de veneratione Virginis rex attingit.

6. *Invocationem B. Virginis redarguit rex Jacob.* — *Prima objectio contra modum invocandi B. Virginem.* — Contra invocationem autem ejusdem Virginis severius rex invehitur, nam et substantiam (ut sic dicam) et modum reprehendit. Negat enim imprimis, orandam esse Virginem a nobis, ejusque dogmatis egregium fundamentum mirabilemque rationem, vel potius conjecturam indicat, dicens: *Ne illud quidem in animum induco, tam otiose in cœlis eam degere, ut absurdis cuiuslibet inepti hominis orationibus pateat, seque ejus rebus, ac negotiis immisceat.* Et infra: *In cœlis, in aeterno Sanctarum animarum receptaculo, in aeterna est felicitate collocata, nunquam a tantis gaudiis ulla terrenarum rerum cura, aut sollicitudine avocanda.* Ex quibus verbis hæc ratio summatim colligi videtur: non potest B. Virgo, nostra curare, vel nostris precibus attendere, nisi a sua felicitate avocetur; at hoc fieri non potest; ergo neque illud a nobis faciendum aut tentandum est. Deinde in modo interpellandi Virginem, tria potissimum taxat. Primo, quia illam oramus, ut non solum precibus, sed etiam imperio cum Filio suo agat, et quod illi imperet ac dominetur. Secundo, quia perridicente eam habemus, dum singimus ipsam in terras ad sacerdotum oscula et complexus descendere. Tertio, quod similiter credimus, propter nos acri ac pertinaci altercatione cum dæmonibus contendere. Alii denique addunt, quod eam omnipotentem facimus, illi tribuendo quod cunctas hæreses sola interemerit in universo mundo, et eam postulando ut beatos nos faciat filium ostendendo, ac denique eam vocando spem nostram, quod est proprium Dei; et mediatrixem seu advocationem, quod est proprium Christi.

7. Verumtamen quod ad priorem partem attinet, Protestantes in ea secuti sunt Constantinus Copronymum¹, de quo Suidas ita memorie prodidit: *Mortalium omnium impurissimus præcipere ausus est, ne quis Marice intercessionem imploraret.* Quem errorem statim universa Ecclesia detestata est, et auctores, qui errorem referunt, satis ostendunt, morem invocandi Virginem antiquissimum in Ecclesia fuisse. Sic enim, ait Theophanes, si quisquam, corruens vel doleus, solitam Christianorum vocem emitteret, dicens: *Dei genitrix, jura,* ut inimicus imperatoris damnabatur.

¹ Vide Baronium, tom. 9, anno Christi 767, n. 27.

tur. Et Theosterictus, ejus temporis scriptor, apud Nicetam sic ait : *Quam Christus sibi in domicilium elegit, gloriosissimam, inquam, suam Matrem, omnibus aliis rebus creatis superiorem, omnium hominum salutem, mundi patrocinium, quæ propter virginitatis suæ præstantiam prope Deum versatur; hujus, inquam, venerandum nomen multis modis ab Ecclesia expellere studuit; ejus vero intercessiones, per quas mundus consistit, illas nec nominare quidem voluit, cum diceret nemini eam posse opitulari.* Contra quem errorem satis nunc erit, morem hunc invocandi Sanctissimam Virginem, ex Sanctis, et antiquioribus Patribus, tanquam testibus apostolicæ traditionis, ostendere.

8. Primus sit Ambrosius, Precat. 2 præparationis ad Missam, ubi cum Deum pro charitate obtinenda precatus esset, subjungit : *Et ut efficax hæc mea sit deprecatione, B. Mariae Virginis suffragia peto, quam tanti meriti esse fecisti, ut prima inter mulieres novum munus offerret, et nulla præter ipsam tam novum acciperet.* Huic adjungo Augustinum, qui in lib. Meditationum, cap. 35, post longam ad Christum Dominum orationem, ita concludit : *Propter bonitatem tuam suscipe preces servi tui, et da mihi effectum petitionis meæ, et desiderii mei, intercedente, et orante, et impetrante gloriosa Virgine genitrice tua Maria, Domina mea, cum omnibus Sanctis tuis. Amen.* Et c. 40 sic orat Virginem : *Sancta et immaculata Virgo Dei genitrix, Maria, et Mater Domini nostri Jesu Christi, intervenire pro me digneris apud illum, cuius meruisti effici templum;* et serm. 18 de Sanctis, insignem habet orationem ad Virginem, ex qua Ecclesia sumpsit illa verba : *Sancta Maria, succurre miseris,* etc. Notatur autem in Antuerpiensi editione sermonem illum ab aliquibus tribui Fulgentio; sed inter opera ejus non invenitur, et ideo merito Theologi Lovanienses non in appendice, sed inter vera Augustini opera illum collocarunt. Ipse autem Fulgentius, in sermone de Laudibus Mariæ ex parte Servatoris : *Venite (inquit) virgines ad Virginem, venite matres ad Matrem;* et post multa similia concludit : *Ideo omnes istos cursus naturæ Virgo Maria in Domino nostro Jesu Christo suscepit, ut omnibus ad se confugientibus feminis subveniret,* etc.

9. His accedat Gregor. Nazianz., qui Orat. 18 de S. Cypriano, refert, B. Justinam a dænone sollicitatam ad Deum configuisse : posteaque adjungit : *Virginemque Mariam supplex*

obsecrans, ut periclitanti virginis suppeditas ferret, jejunii, et chameunia pharmaco sese communit, etc. Et in Tragædia citata, circa finem, hæc addit : *Senectie expers, supremo ex aethere benigna adesto vocibus meis, preces admitte, Virgo, o inclyta hic quando tibi Verbi parenti, sed supra modum tamen, legemque, solus inter omnes contigit honor;* quam precationem piissime et elegantissime usque ad finem prosequitur, eamque his tribus versibus concludit : *Regina, Domina, gene-*is* humani bonum, amica semper esto tu mortalibus, maximaque quo-vis in loco mihi salus.* Eadem fide et pietate Chrysost., in Proœmio ad Psal. 118, station. 3, in fine : *Hæc (inquit), fratres, Patrum monumenta et documenta sunt, ex quibus nos haurientes, cum ea, quam adhiberi par erat, animadversione vobis impertivimus, que nimurum Dei mandata in vobis proficiant, ut iuxta sinceram vestram fidem ac religionem probæ quoque actiones sint.* In quibus confirmabit vos Dominus Deus, dans vobis uberes misericordias, et per intercessiones incontaminatae Dominae nostræ Deiparæ, ac semper Virginis, etc. Omitto Athanasium, Gregorium Nyssenum, et alios, quos de hac re alibi disputans allegavi¹, libetque hic adjungere Basilium, Seleuciæ Archiepiscopum, qui Synodo Constantinop. adfuit, et licet in Chalcedonensi, action. 4, in fine, legatur depositus, non tamen propter fidem, et paulo post restitutus est, ut ex action. 5 colligitur. Ille ergo in orat. 4 de Annuntiatione Deiparæ², intèr multa alia, quæ de laudibus et intercessione Virginis dicit, hac tandem oratione concludit : *O ter Sacro-santa Virgo, aspice nos de cælo oculo propitio, et nunc quidem educ nos hinc cum pace; ad iudicis autem thronum a confusione liberos nos siste, ac stationis tandem ad dexteram participes nos effice,* etc.

10. His addi possunt multa ex Damasceno, orat. 4 de Nativit. Mariæ, ad finem, et orat. 4 de ejusdem Dormitione; et Epiphanio, in sermone de Laudibus Virginis; et Ephrem, de ejusdem Laudibus; Beda, in simili homil. de S. Virginine; Anselmo, lib. de Excellentia B. Virginis, præsertim c. ult.; et Bernardo, in homiliis super *Missus est*, et in sermonibus de Assumptione; Ildephonso, in libr. de Virginitat. Mariæ; Laurentio Justiniano, et aliis quamplurimis Patribus, sive antiquioribus, sive recentioribus. In omnibus enim illis frequenter

¹ 2 tomo tertiae partis, disp. 23.

² Refertur tom. 2 Bibliothecæ.

invenientur devotissimæ orationes ad B. Virginem cum magna reverentia, laudibus, et encomiis de illius excellentia, et exhortationes ad fideles postulandi Virginis intercessionem cum magna fiducia. Et ex illis omnibus evidenter collimus, consuetudinem hanc non novam, sed antiquissimam fuisse, neque etiam fuisse antiquatam vel multatam aliquando, sed conservatam semper in cordibus et ore fidelium. Immerito ergo videtur illam rex ponere inter eas consuetudines, quas nuperas et novitias vocitat.

11. *Responsio ad regis verba.*—*Optime stat visio beata cum cognitione et dilectione creaturarum.*—*B. Virgo potest pro nobis intercedere, quin felicitatem suam deserat.*—Ratio autem, quæ contra illam objicitur, regii sane ingenii videtur indigna, potiusque appareret esse alterius hominis parum in mysteriis fidei et rebus theologicis versati. Nam qui Sanctorum felicitatem contemplari neverunt, non ignorant visionem illam divinitatis, quæ homines et Angelos beatos efficit, eos non impedire quominus, quæ apud nos aguntur, cognoscere et curare possint. Est enim visio illa beata eminens quædam participatio divinæ scientiæ, qua Deus se ipsum comprehendit, et ideo sicut contemplatio, quam Deus de se ipso habet, ipsum non impedit quominus nostra consideret, et omnibus exactissime provideat, ita in suo gradu et proportione contemplatio Beatorum non necessario excludit nostrarum rerum cognitionem; imo potius illam unicuique juxta sua felicitatis gradum et statum confert. Unde etiam fit, ut sine sua felicitatis diminutione aut intercessione possint Beatinos diligere, et secundum charitatem suaे gradum pro nobis intercedere. Sic enim de Sanctis Angelis dixit Christus: *Semper vident faciem Patris, qui in cælis est*, Matth. 10; et nihilominus eos vocal Angelos hominum dicens: *Angeli eorum, utique custodes, juxta illud Psalm. 33: Angelis suis mandavit de te, ut custodian te in omnibus viis tuis.* Si ergo Angeli beati possunt homines custodire, et ex hac terrenarum rerum cura et sollicitudine ab aeternis gaudiis suaे felicitatis non avocantur, quis cogitare potest non posse B. Virginem orationes nostras audire, et pro nobis intercedere, quin a sua felicitate distrahat?

12. Quod si hoc cuiquam difficilius videtur, quia longe feliciorum et gaudiis aeternis magis intentam B. Virginem esse credit, manifeste decipitur; nam eum ipsa felicitate et ejus gaudio erescit etiam et facultas consider-

ranti res humanas simul cum divinis, et affectus charitatis ad illarum curam, pro ratione sui status, et propter majorem Dei gloriam suscipiendam. Unde Christus etiam ipse, licet a principio conceptionis suæ longe felicior fuerit in anima sua, quam nunc sit Beata Virgo, nihilominus summam curam et sollicitudinem nostræ salutis semper habuit, et pro nobis intercessit, et nunc etiam nostras exaudit orationes, nostrique curam habet, neque propterea a tantis gaudiis suæ aeternæ felicitatis avocatur. Certe Beatus Petrus, cum fidelicibus scriberet: *Dabo autem operam, et frequenter habere vos post obitum meum, ut horum memoriam faciatis*¹, non timebat ne post obitum suum a sua felicitate propter nostri recordationem et intercessionem retardaretur; ita enim illum locum intellexit Chrysostom., Orat. in Petrum, quem alii secuti sunt; cur ergo rex cogitat, non posse B. Virginem sine sua felicitatis imminutione nobis optulare?

13. Quod vero ait rex, non posse in annum inducere tam otiose Virginem in cælis degere, ut absurdis cujuslibet inepti hominis orationibus pateat, interrogo quid per absurdas orationes intelligat, quove sensu dicat eis patere Virginem. Absurdæ enim orationes dici possunt, quibus aliquid absurdum vel indecens a Virgine postulatur, et has orationes audit Virgo, sed non exaudit. Neque est alienum a perfectione Virginis, vel eximia ejus felicitate, esse in eo otio, in quo possit has orationes audire; nam Deus ipse in eo est otio, ut hujusmodi etiam orationibus pateat, et eas videat, non ut eas recipiat, sed ut puniat potius. Quia otium illud non est vanum aut vitiosum, sed contemplationis otium, omni quidem labore vacuum, non tamen rerum omnium cognitione et altissima providentia destitutum; illud ergo otium in suo gradu B. Virgo participat. Quod si absurdas orationes rex vocal omnes illas, quæ ab infimis et vilibus hominibus, vel a magnis etiam peccatoribus fiunt, hoc nihil obstat quominus, si fideliter et honeste fiant, aditum patentem ad Virginem inveniant, et ab illa non solum cognoscantur, sed etiam acceptentur, quantum secundum ordinem divinæ providentiæ expedire judieaverit, quod ceteris etiam sanctis commune est, ut capite sequentem dicemus.

14. *Diluitur prima objectio contra modum introendi Virginem.*—*Ecclesia non triuit B.*

¹ 2 Petr. 4.

Virgini imperium in Christum Dominum. — Ad primam vero objectionem contra modum invocandi Virginem, fundatam in verbo *imperandi*, eamdem responcionem damus, quam supra de nomine Deæ exhibuimus. Ecclesia enim non consuevit petere a Virgine, ut imperet filio, nec docere, habere Virginem hanc potestatem, aut illa interdum uti consuevisse. At vero Augustinus, lib. 2 de Symbclo, ad Catechum., cap. 5, significat B. Virginem, quando Christo dixit, Joan. 2 : *Vinum non habent, tentasse, jubere se filio posse tanquam matrem, Christum autem ideo respondisse : Quid mihi et tibi est, mulier? ut distingueret inter Deum et hominem*, et significaret virtutem faciendi miracula esse a divinitate, secundum quam non erat subditus matri. Unde Augustinus tacite reprehendit dicentes, B. Virginem posse petere a filio per imperium. Neque vero putandum est hac mente Virginem in nuptiis ad filium fuisse locutam, sed humiliter rogando, et ex charitate petendo, ut cum Hilario, Ambrosio, Cyrillo, et aliis Patribus alibi tradidimus. Neque etiam est nobis verisimile, hoc fuisse Augustinum de Virgine suspicatum, cum in illius verbis nullum sit talis suspicionis fundamentum aut vestigium. Solum ergo videtur indicare Augustinus, Christum ita respondisse, ut ab omnibus eam suspicionem auferret. Vel certe usus est Augustinus verbo *jubere tanquam domina*, quæ se agnoscebat ancillam. Non ergo poterat ex proprio imperio petere, si se agnoscebat ancillam. Ita ergo Ecclesia nunquam postulat a Virgine ut jubeat vel imperet. Solumque Petrum Damianum, serm. 4 de Nativitate Mariæ, inveni dicentem : *Accedit non solum rogans, sed etiam imperans, domina, non ancilla*; non tamen propterea Ecclesia modum illum loquendi approbat; imo neque illum fidelibus permitteret, si eo communiter uti vellent. Et nihilominus pietas christiana doceat, verba quæ per tropum et exaggerationem dicta sunt, sana mente interpretari. Nam Josue 10, ad vocem Gedeonis : *Sol, ne moriaris, dicitur sol stetisse, obediente Deo voci hominis*; si autem Deus obediuit, homo imperavit. Est autem metaphorica locutio ad exaggerandam efficaciam orationis hominis apud Deum. Ita ergo Petrus Damianus locutus est, exaggerando quanta sit materna fiducia apud filium.

15. *Solvitur secunda objectio.* — Ad secun-

dam objectionem respondemus, fundatam esse in falsa calumnia fortasse conficta ab aliquibus Protestantibus; nam in Catholicon libris non existimo aliquid simile reperi. Quamvis enim sæpe legatur, et pium ac verisimile sit, B. Virginem supplicibus suis, ad spiritualem consolationem interdum apparere et loqui, vel per se, vel per ministerium Angelorum, nunquam tamen legitur aliquid indecorum, vel quod pudicissimum non sit, in hujusmodi apparitionibus contingisse. Aut certe si aliquid hujusmodi lectum alicubi fuerit, quod piam et prudentem interpretationem non recipiat, credendum est aut fuisse opus dæmonis, se in Angelum lucis transfigurantis, aut (quod sæpe contingit) esse malevolorum hominum deceptiones, qui ad eludendam auctoritatem revelationum, et ignominiae vel infamie notam his cœlestibus visitationibus inurendam, similes confingere fabulas non verentur.

16. *Satisfit tertiae objectioni, et quomodo B. Virgo dæmones pulset declaratur.* — Ad tertiam objectionem de fuga dæmonum, respondemus hunc effectum sæpe fieri per orationes Virginis, et ideo a Patribus sæpe illi tribui; nam Cyrus Alexandrinus, homil. 6 contra Nestorium, in Concilio Ephesino dicta, inter alia multa, quæ de Virginis excellentia et efficacia prædicat, inquit : *Salve, per quam cœlum exultat, per quam Angeli et Archangeli lætantur, per quam dæmones fugantur.* Et Laurentius Justinianus, serm. de Annunciat., eam vocat inter alia, *dæmonum fugam*. Et Ecclesia ad Virginem orat : *Maria, mater gratiæ, tu nos ab hoste protege.* Refertque Surius S. Richardum Anglum, Cicestriensem Episcopum, in mortis articulo semper in corde simul et voce illa verba habuisse, suisque capellanis mandasse, ut ad ejus aures illa pronuntiare non cessarent. Denique de fidelibus suis dixit Christus, Marci ultimo : *In nomine meo dæmonia ejiciant.* Quid ergo mirum est, quod Beatissima Christi Mater ad dæmones fugandos sit potens? Quod vero in objectione dicitur de pertinaci et acri altercatione Virginis cum dæmonie, calumniam sapit novatorum, et est modus loquendi ab eis inventus ad fidelium pietatis et devotionis irrisiōnem; nunquam enim a catholicis Doctoribus assertum est, Virginem altercari cum dæmonie, sed vel illi imperare, vel (quod frequentius est) per orationem ad filium, illius fugam impetrare.

17. *Quomodo B. Virgo hæreses interimat.* — Atque hoc etiam modo dicitur Virgo omnes

hæreses vincere, scilicet, per Christum, qui est verum lumen, qui illuminat omnem hominem, qui suo proprio judicio damnari nolit. Et sic etiam multi alii effectus gratiæ tribuuntur Virgini, non quia per se illos efficiat, sed vel quia nobis Christum omnium gratiarum auctorem peperit, vel quia per illum et ab illo eos nobis impetrat. Et sic etiam dicitur Virgo spes nostra, vel quia per illam habuimus Christum, qui est spes nostra, ut exposuit Epiphanius, in sermone de Laudibus Virginis, vel ad explicandam magnam fiduciam, cum qua ad illam recurrimus. Et ad eundem modum facile intelliguntur quamplurimæ aliæ locutiones Sanctorum, in quibus ea, quæ secundum excellentiam sunt Christi propria, per singularem participationem Virginis tribuunt, phrasim et modum loquendi Scripturæ imitando. Qui sensus tam est notus fidelibus, et per se patens, ut nullam patiatur calumniam, nec majori interpretatione aut persuasione indigeat. Quod Canisius et alii catholici scriptores copiose et eruditè responderunt; et nos etiam aliis locis aliquid attigimus. De nomine autem Advocatæ seu Mediatrixis, in cap. 9, de Sanctis, generaliter dicemus¹.

CAPUT VIII.

DE HIS QUÆ CIRCA CULTUM SANCTORUM IN REGIS PRÆFATIONE NOTANTUR.

1. Multa sunt quæ in Præfatione et fidei suæ professione rex objicit contra veram doctrinam, quam Ecclesia Catholica de Sanctis vita functis credit et profitetur, possuntque ad quatuor capita reduci, videlicet ad cultum et invocationem Sanctorum, reliquiarum et imaginum adorationem, quæ breviter prosequemur, quia non plenam disputationem, sed solam sufficientem responsionem dare intendimus, obiter ostendendo non solum non esse nupera, seu nova, quæ in his Ecclesia observat, verum potius a perniciosa novitate temerarioque errore excusari non posse, qui hæc reprehendere ausi sunt.

2. *Sanctos colendos esse, Scriptura et Patres testantur.* — De cultu ergo Sanctorum sic regi placuit in sua statuere præfatione: *Colo equidem illorum memoriam, cuius*

honestandæ ergo nostra publice Ecclesia tot solemnnes dies instituit; quos Scripturæ auctoritate in album Sanctorum relatos legimus. Sed tot nugis, quæ in novitiorum Sanctorum actis, ac legendis perscribuntur, sane credulitatem meam deludi non patior. Ex quibus verbis confessionem regiam ex ea parte recipimus, qua saltem in genere contentit, Sanctos homines cum Christo regnantes esse a nobis colendos, tanquam honore et veneratione dignos. Id enim non solum Scriptura et Sancti Patres, ac Ecclesiæ traditio, sed etiam ratio naturalis docet, ut confirmant verba illa Psal. 138: *Mihi autem nimis honorificati sunt amici tui, Deus, id est, ita sentio, amicos Dei maxime colendos, et honorandos esse, seu, amicos tuos, Deus, valde colo et veneror.* Quo testimonio ad hanc veritatem confirmandam usus est Hieremias Constantinop., in suo ad Protestantes Resp.¹, c. 45, et ita etiam exponit Basilius, cum in Scholio ait: *Præscivisti me, inquit, et cum nondum essem, adduxisti me, et ego vicissim rependo, ut diligentes te honore prosequar.* Ubi valde notandum est quod Basilius indicat, et ex verbis David colligit, ita esse gratum Deo suos amicos honorare, ut tanquam obsequium pro beneficiis ab eo acceptis ex gratitudine illi possit offerri. Nam ut recte Ambrosius, serm. 4, de Sanctis: *Quisquis honorat Martyres, honorat et Christum, et qui spernit Sanctos, spernit et Dominum, cum ipse dicat ad Sanctos suos: Qui vos honorat, me honorat, et qui vos spernit, me spernit.* Sic etiam Hieron., ep. 53 ad Ripari.: *Honoramus servos, ut honor eorum redundet ad Dominum, qui dixit: Qui vos suscipit, me suscipit.* Quod ita etiam exposuit Athanasius, lib. de Virg., circa finem. Alia consulto praetermitto, quia frequentia, et alibi a nobis tractata², et quia, ut dixi, rex Angliae, se etiam Sanctorum memoriam colere profitetur.

3. *Adorandi verbum rex Jacobus detrectat.* — Non omittam autem advertere, hic etiam abstinuisse regem a verbo adorandi, verboque colendi usum esse. Nos vero juxta ea, quæ in præcedenti capite notavimus, vocum quæstiones devitantes, in illis non insistimus, dummodo eorum sensus verus sit et catholicus. Itaque si adorandi verbum per antonomasiam cultum latriæ significet, noverunt Catholicæ omnes, Sanctos in hoc sensu non esse

¹ Canis., l. 5 de B. Virg., c. 10 et seq.; 1 tomo tertiae p., q. 26, art. 1, in com.; et in 2 tom., disp. 23, sect. 2 et 3; et tom. 2 de Relig., tract. 1, lib. 3, c. 9, n. 4, et seq.

² Refert Genebrard.

² Tom. 4 tertiae partis, disp. 52.

adorandos, quo sensu asseruit Hieronymus supra, Sanctos honorari a nobis, non adorari; nam potius eos honorando, Deum adoramus; et lib. 4 contra Vigil., cum dixisset: *Quis Martyrem adoravit?* illud explicando addit: *Quis hominem putavit Deum?* Eodemque modo loquuntur Justinus, Epiphanius, Damascenus, et saepe Augustinus. Et nihilominus, sumpto adorationis verbo in ampliori significacione, non dubitavit idem Augustinus dicere in Psalm. 25, de Sanctis: *Beatissimum Petrum piscatorem modo genibus pro volutis adorat multitudo credentium, per Dominum nostrum Jesum Christum.* E contrario autem sumpto verbo colendi strictiori modo, dixit idem Augustinus, epist. 44 ad Maximum Grammaticum: *Ne te hoc lateat, et in sacra lega convitia imprudentem trahat, scias a Christianis Catholicis nullum coli mortuorum;* id tamen exponens subjungit: *Nihil denique ut numen adorari, quod sit factum et conditum a Deo.* Addendo enim particulam numen, se de cultu et adoratione latræ loqui declaravit.

4. *Civili honore potius quam religioso cultu Sanctos decorare videtur rex Jacobus.* — *Sanctos sacro et religioso cultu veneratur Ecclesia Catholica.* — Præter hanc verbi colendi et adorandi ambiguitatem, aliam præcavere necesse est, quia verba regis lubrica sunt, et Calvinismum etiam in hac parte redolent. Calvinus enim civilem honorem et cultum Sanctis vita functis concessit deferendum; sacram vero et religiosum cultum eis sine idolatria dari posse negavit. Regis autem verba talia sunt, ut de civili cultu intelligi facile possint, nam et solemnies dies, quos Sanctorum memoriam honestandi gratia in sua pseudoecclesia institutos esse dicit, solum ob civilem honorem instituti esse feruntur, sicut etiam in regum et principium sæcularium natalitiis interdum institui solent. Quod si in hoc tantum sensu de cultu Sanctorum rex loquitur, immerito ad solos illos, qui Scripturæ auctoritate in Sanctorum album relati sunt, suas illas solemnitates coarctat; possumus enim cultu civili benefactores defunctos, vel insignes homines colere, etiamsi de illorum felicitate certi non simus, saltem dum non constet illos esse damnatos. Catholica vero Ecclesia non civilem tantum, sed sacrum et religiosum cultum Sanctis tribuendum esse censem, licet non latræ, sed inferioris rationis cultus sit, ad quem significandum nomen duliæ Theologi accommodarunt, sicut in cultu B. Virginis explicui-

mus, est enim in cæteris sanctis in gradu suo similis ratio. Illos enim propter excellentiam quamdam omni civili dignitate superiori veneramur, eosque in felicitatis æternæ celsitudine constitutos, tanquam suo modo nobis superiores, et in illo ordine singulariter excellentes recognoscimus; merito ergo eos sacro et excellentiori cultu, et a civili distinto adorandos esse profitemur.

5. *Consuetudinem sacro cultu Sanctos honrandi antiquissimam esse ex Patribus continetur.* — Hanc vero doctrinam nuperam non esse, sed antiquissimam, testimoniis Sanctorum Patrum evincere facile possumus. Ambrosius enim, in dicto serm. 4 de Sanctis, qui est in festo S. Lucia, de thesauro abscondito in agro, sic concludit: *Igitur, fratres, quotiescumque Martyrum memoriam celebramus, prætermisis omnibus sæculi actibus, sine aliqua dilatione concurrere debemus, reddere illis honorificentiam, qui nobis salutem profusione sui sanguinis pepererunt, qui tam sacrata hostia pro nostra propitiatione Domino sunt oblati.* Honor ergo Sanctorum, teste Ambrosio, non est tantum civilis, ille enim sæculi actibus exhiberi solet; hic autem per actiones religiosas et sacras, consentaneas fidei, et sacræ causæ, propter quam datur, tribuendus est. Unde dixit Damascenus, lib. 4 de Fide, cap. 10: *Quibus rebus Deus colitur, eisdem servit oblectantur, quapropter, psalmis, hymnis et canticis spiritualibus Sanctos colimus.* Est ergo suo modo spiritualis hic cultus, qui actionibus spiritualibus exhibetur; nec propterea est æqualis cum divino, quia semper spiritus, et intentio adorandi est longe diversa. Est autem hic cultus cum divino cultu conjunctissimus, totusque in supremam Dei venerationem redundat, ut Athanasius, Hieronymus et Ambrosius supra, et Basilius, orat. in 40 Martyres, notant. Ideoque consuevit Ecclesia eisdem fere rebus, quibus Deus colit, sanctos honorare, et jejuniis, vigiliis, orationibus, et aliis similibus actionibus, ut sumitur ex Concilio Toletano III, cap. 23; et Hieronymo, contra Vigilantium; et Cypriano, epist. 34 et 37; et Augustino, 2 contra Faustum, cap. 21. Unde recte Eusebius Cæsariensis, lib. 43 de Præparat. Evangelica, cap. 7, sic inquit: *Verae pietatis milites, ut Dei amicos honorantes, ad monumenta quoque illorum accedimus, votaque ipsis facimus tanquam viris sanctis, quorum intercessione ad Deum non parum juvari profitemur.*

6. *Tacita regis objectio.* — Neque contra

hunc modum venerationis et cultus Sanctorum aliquid objicere solent Protestantes, quod alicuius momenti esse videatur, et quaecumque illud sit, alibi responsum est a nobis. In praesenti vero tacite rex objicit, Catholicae Ecclesiam immerito publice venerari aliquos homines vita functos, de quorum æterna felicitate sacrae Scripturæ auctoritate non constat, et ideo ait suam ecclesiam (quam catholicam nominare non audet; imo, velit, nolit, eam a Catholica distinguit) eorum tantum solemnitates servare, qui Scripturæ auctoritate Sancti esse leguntur. Et virtute hoc confirmat, quia alias exponuntur fideles periculo, ut eorum credulitas deludatur, hominem damnatum pro sancto adorando, quod videtur magnum absurdum, prudenti modo operandi contrarium. Ut autem illud periculum suadeat, adjungit, *in Sanctorum actis ac legendis quamplures nugas esse conscriptas.*

7. *Satisfit objectioni regis, et Sanctos omnes ab Ecclesia approbatos colendos esse ostenditur.* — Verumtamen rex semper hæret in errore, nihil posse aut debere credi, nisi quod Scripturæ auctoritate immediate (ut dicam) seu proxime probari potest, quod esse contra eamdem Scripturam, et contra Ecclesiæ auctoritatem in eamdem Scriptura confirmatam, in superioribus abunde satis ostensum est. Et in praesenti sufficienter probari potest exemplo Innocentium ab Herode interfectorum, quos sanctificatos per mortem fuisse, et nunc eum Christo regnare, Scripturæ quidem auctoritate probari non potest; et nihilominus auctoritate Ecclesiæ nixi, sine ullo periculo aut falsitate illos colimus, ut recte tradit Augustinus, lib. 3 de Libero arbit., c. 23, et lib. 2 de Symbolo ad Catech., c. 5, et lib. 3, c. 4, et in Sermonibus de Innocentibus, qui sunt sermones 8 et 9 de Sanctis; et Origenes, homil. 3, in diversos, circa finem, de eisdem loquens, inquit: *Horum memoria semper, ut dignum est, in Ecclesiis celebratur secundum integrum ordinem Sanctorum.* Et infra: *Bene ergo, et secundum voluntatem Dei eorum memoriam Sancti Patres celebrari mandaverunt sempiternam in Ecclesiis, velut pro Domino morientium, vel pro Iudeis et Gentibus credituris, vel etiam pro ipsis parentibus, ut eis intercessio filiorum apud Deum plurimum profueret.* Pluraque videri possunt in Cypriano, serm. de Stella Mag. et Innoc.

8. *Consuetudo celebrandi dies festos Martyrum ab Apostolis originem trahit.* — Præterea constat fuisse a temporibus Apostolorum Ec-

clesiæ consuetudinem, memoriam in sacrificio facere aliquorum Martyrum in particulari, et notare diem martyrii, ut singulis annis illud solemniter celebraretur, ut sumitur ex Cypriano, ep. 34 et 37, et Cyrillo Hierosol., catech. 5 mystagog. ; Eusebio, lib. 4 Histor., c. 14, alias 15, ubi de Martyre Polycarpo peculiararem mentionem facit; et ex Tertulliano, lib. de Corona militis, c. 3, ubi hanc ponit inter traditiones nou scriptas, quæ summam in Ecclesia auctoritatem habent, eamque confirmat Clemens Papa, lib. 8 Constit., c. 39. Non est ergo novum in Ecclesia colere Sanctos aliquos, quamvis eorum sanctitas et felicitas Scripturæ auctoritate probari non possit. Quod egregie confirmant verba Episcoporum Europæ, in ep. ad Leonem, et testificantur orationes, seu conciones, vel homiliæ antiquorum Patrum factæ in honorem et cultum plurium Sanctorum in particulari, in quibus sœpe de honore Sanctis debito egregie loquuntur. Ut sunt apud Gregorium Nazianz., oratio 18 in S. Cyprianum, et Orationes in laudem Basilii, Athanasii; et apud Gregorium Nyssenum, oratio in Theodorum Martyrem, et similes sunt plures apud Ambrosium, Augustinum, Chrysostomum et alios, ut de S. Ignatio, Laurentio, Gervasio et Protasio, Philogono Maxime vero notanda sunt verba Chrysostomi, serm. in Juventinum et Maximum Martyres, tom. 3, quem sic inchoat: *Heri beatus Babylas cum tribus pueris nos hic congregabat, hodie vero pars Sanctorum militum in acie exercitum Christi ostendit, impar eorum est ætas, sed par fides, illi tempore superiores, isti recentiores, et cum tantus thesaurus sit Ecclesiarum novas et veteres habentis margaritas, sed una omnium est gratia.* Et infra: *Quod scientes, non aliter priscos, aliter recentiores colitis sanctos, sed eadem alacritate omnes. Non enim exploratis tempus, sed exquiritis fortitudinem, fidem, zelum ferridum, et eas virtutes, quas præ se ferunt Sancti, ob quorum honorem hodie conuenimus.*

9. Desinat ergo rex despicere Sanctos, quos novitios vocat, quia non antiquitas, sed vera sanctitas et felicitas eos tali cultu et honore dignos efficit. Neque timeat errare aut decipi, colendo ut sanctos, quos universa Ecclesia colit, quæ est columna et firmamentum veritatis; sed potius vereatur censuram ab Augustino datam, quam hoc nostro tempore præ oculis habendam, ae sæpius repetendam censeo. In epistola enim 18, c. 5, in tres ordines mores Ecclesiæ distinguens, in primo

ponit ea, quæ divinæ Scripturæ præscribit auctoritas, de quibus ait, non esse dubitandum quin ita facere debeamus, ut legimus. In tertio ponit ea, quæ per loca et regiones variantur, de quibus ait, in unaquaque provincia servandum esse, quod neque contra fidem, neque contra honestos mores fieri solet. In medio vero ordine ponit ea, quæ toto orbe serrat Ecclesia, de quibus ait, disputare, quin ita faciendum sit, insolentissimæ insanæ est. Non sane alia ratione, nisi quia Catholica et universalis Ecclesia in his, quæ communi consensu approbat et observat, errare non sinitur a Spiritu Sancto, quem illi Christus peculiariter promisit, ut ab eo specialiter regatur. Ergo quando universa Ecclesia Catholica de alicujus Sancti felicitate non dubitat, et in ilius cultu concordat, non licet viro Catholico et prudenti, disputare quin ita faciendum sit. Nam cum veritas et puritas non minus in cultu et recta existimatione Sanctorum, quam in cæteris moralibus rebus necessaria sit, sine ulla dubitatione cum Bernardo dicere potest et debet unusquisque Catholicus: *Ego quod ab Ecclesia accepi, securus et teneo, et trado, quod non scrupulosius fateor admiserim.* Loquitur ad Canonicos Lugdunenses de hac eadem materia colendi Sanctos, de qua trac-tamus.

10. *Qua auctoritate nitatur Ecclesia in collendis Sanctis.* — Quamobrem nihil ad causam refert, quod rex addit de nugis in actis et legendis Sanctorum conscriptis, nam sive illud verum sit, sive per exaggerationem dictum, cultus, quem Ecclesia præbet alicui Sancto in Scriptura non canonizato, non fundatur in quavis humana historia, etiam gravi, nedum suspectæ auctoritatis, sed fundatur vel in antiqua traditione, cum universalis totius Ecclesiæ consensu, vel in authentica Pontificis declaratione, quam canonizationem vocamus, quæ tanto morum et miraculorum examine, et tam gravi inquisitione ac diligentia fit, ut ipsa per se posset morale quamdam certitudinem ac securitatem conferre; adjuncta vero Spiritus Sancti assistentia et gubernatione, quam eredimus esse a Christo promissam, fit certitudo longe major, quæ omne morale periculum, omnemque prudentem dubitationem excludit. Sine hac vero certitudine, nemo cogitur hominem vita funetur colere. Si quis vero sua peculiari opinione aliquem esse sanctum credit, et privatim colat, non statim damnandus est, sed monendum, ut prudenter prius rem examinet, et pos-

tea debitam circumspetionem in modo colendi exhibeat. His enim observatis, non negebunt veris fidelibus nugæ, si quæ forsan essent in Sanctorum actis; quia si eas discernere valeant, non eis adhibebunt fidem; vel si in aliquo forte decipientur, non perniciosus error, sed de rebus indifferentibus esse solet. Imo etiam in his magna cura et diligentia a Pastoribus Ecclesiæ adhibetur, ut Sanctorum historiæ, quam fieri possit, emendatae, et ab erroribus purgatae, per manus fidelium circumferantur. Audivimus autem circumferri in Anglia historias quasdam de gestis Sanctorum, non solum incertæ auctoritatis, sed etiam a fidei hostibus plerumque confictas, quibus deludi nolumus regiam credulitatem. Itaque regem monemus, qui tam religiose non patitur credulitatem suam his rebus deludi, longe majori cura ferre non debere, fidem suam tot Calvinii, Lutheri, et Protestantum, non dicam nugis, sed perniciosissimis erroribus, in his, quæ ad salutem animæ necessaria sunt, corrumpi.

CAPUT IX.

DE SANCTORUM INVOCATIONE.

1. *Quibus conjecturis Sanctorum invocationem Jacobus rex despiciat.* — Quamvis rex hanc Sanctorum invocationem inter novitios et nuperos articulos Ecclesiæ Romanae, ut ipse loquitur, numeret, ideoque illam simpli-citer non approbet neque admittat, non tamen satis explicat in quo gradu, vel ob quam potissimum causam illam rejiciat. Interdum enim solum significat esse superfluam, aliamque viam, Deum per solum Christum invocandi, tutiorem, et ad salutem esse potiorem; interdum vero objiciendo indicat, hanc Sanctorum invocationem superstitionem et prohibitam esse. Tria igitur a nobis breviter ostendenda. Primum, hunc morem non esse novum in Ecclesia Romana, sed antiquissimum, et perpetua traditione constantem in Ecclesia Catholica. Secundum, non esse inordinatum, sed pium et religiosum. Tertium, non esse minus tutum hac Sanctorum uti intercessione, sed tutius et utilius longe quam illa carere. Hæc igitur ostensuri, objectionibusque quas rex subiunxit, sumus satisfacti.

2. *Antiquitas consuetudinis invocandi Sanctos ex Patribus deducitur.* — Antiquitatem ergo hujus consuetudinis orandi Sanctos vita functos, ostendunt imprimis testimonia Pa-

trum, quibus Sanctos esse colendos tradunt; nam simul etiam docent esse a nobis invocandos, et interdum hanc ipsam orationem in partem cultus et honoris Sanctorum ponunt; aliquando vero inter alias causas illius cultus assignant, quod cum Sancti de nostra salute sint solliciti, et pro nobis orent, justum est ut a nobis honorentur, vel e contrario dicunt honorari a nobis, ut suis orationibus nos adjuvent, ut ait Augustinus, 20 contra Faustum, c. 21; et fere idem habet 21 Civit., c. 27, in fine. Unde frequenter supponunt, vel aperte docent Patres, Sanctos in cœlo pro nobis apud Deum intercedere. Quod tradunt generatim, licet quasi aliud agentes, Cornelius Papa, epist. 4 ad omnes fideles; Anacletus, ep. 3; Leo, serm. 2 Apost. Petr. et Paul., et serm. 4 et 4 de Jejunio Pentecost., et serm. 5 de Jejunio septimi mensis; Hilarius, in Psal. 24: *Montes in circuitu ejus*; Ambrosius, ep. 39 ad Horatian., et lib. 10 in Lucae 21, parum a principe, et optime lib. de Viduis, post medium, et lib. 2 de Jacob et vita beat., c. 10; Gaudent., serm. de Petro et Paulo; August., lib. 2 Quæstionum in Exod., q. 108. Idem optime, Psal. 85, in fine: *Dominus Jesus Christus adhuc interpellat pro nobis. Omnes Martyres, qui cum illo sunt, interpellant pro nobis. Non transeunt interpellationes eorum, nisi cum transierit gemilus noster.* Et de S. Cypriano dixit, l. 7 de Bapt., c. 4: *Adjuvet nos orationibus suis.*

3. Sic etiam Hieronymus, contra Vigilantium fusius: *Si Apostoli (inquit) et Martyres adhuc in corpore constituti possunt orare pro ceteris, quando pro se adhuc debent esse solliciti, quanto magis post coronas, et victorias, et triumphos; quod late prosequitur. Unde ep. 25 ad Paulam super obitu Blesillae filiae: Pro te (inquit) Dominum rogat, mihique, ut de ejus mente securus sum, veniam impetrat peccatorum.* In quibus verbis Patrum duo consideranda sunt: unum est, Sanctos non solum in generali, sed etiam in particulari pro nobis nostrisque necessitatibus orare. Aliud est, ex eo quod Sancti pro nobis orent, optime colligi etiam posse a nobis honestissime orari, quia, cum illos oramus, maxime ab illis petimus ut pro nobis intercedant, nam sicut necessitates nostras cognoscunt, ut pro illis orent, ita etiam orationes audiunt, quas Deo repræsentent, et propter illas ad orandum pro nobis inclinentur. Unde idem Hieronymus, in Vita Hilarionis, in calce tolius libri, commemorat devotionem eujusdam S. Constanti-

tiæ, quæ solita erat peragiles in sepulchro Hilarionis noctes ducere, et quasi cum præsente ad adjuvandas orationes suas sermocinari. Cyprianus tandem, lib. de Mortalitate, in fine, de cœlesti patria loquens, dicit: *Magnus illuc nos carorum numerus expectat, parentum, fratrum, filiorum, frequens nos et copiosa turba desiderat, jam de sua immortalitate secura, et adhuc de nostra salute sollicita.* Et in serm. de Stella et Magis, de SS. Innocentibus ait: *A cunabulis in cœlum translati, facti sunt superni capitolii senatores et judices, nonnullis reniam obtinentes immeritis.* Et epist. 57 ad Cornelium scribit: *Si quis hinc nostrum prior divinæ dignationis celeritate præcesserit, perseveret apud Dominum nostra dilectio, pro fratribus et sororibus nostris apud misericordiam Patris non cesset oratio.* In quibus verbis (ut egregie animadvertisit Pamelius) aperte supponit Cyprianus, Sanctos cum Christo regnantes, sicut viventes, quos hic cognoverunt, eadem prosequuntur charitate, ita et pro illis orare. Eamdemque fidem ostendit Cyprianus in libro de Habitu Virginum, cum in ultimis verbis ad illas dicit: *Mementote tunc nostri, cum incipiet in vobis virginitas honoriari.*

4. *Objectioni hæreticorum satisfacit Augustinus, ad Colos. 4.* — Apud D. Augustinum infinita sunt pro hujus veritatis antiquitate testimonia, ex quibus nonnulla annotabo. Unum est in tract. 4 super epist. 1 Joannis, circa illa verba: *Si quis peccaverit, advocatum habemus apud Patrem Iesum Christum, quæ in hac materia solent nobis objicere hæretici, et ipse quoque sibi objicit, dicens: Sed dicit alius: Ergo Sancti non petunt pro nobis; ergo Episcopi, vel præpositi non petunt pro populo; respondet autem: Sed attendite Scripturas, et videte quia et præpositi commendant se populo, nam Apostolus dicit plebi: Orantes simul et pro nobis; orat Apostolus pro plebe, orat plebs pro Apostolo, oramus pro robis, fratres, sed et vos orate pro nobis, invicem pro se omnia membra orent, caput pro omnibus interpellat,* utique excellentiori modo, ut qui solus est propitiatio pro peccatis nostris, et per quem omnes alii orant, sive pro se, sive pro aliis intercedant. Nec refert quod Augustinus ibi de Sanctis hic viventibus loqui videtur, tum quia revera non restringit sermonem, sed de Sanctis absolute loquitur; tum etiam quia ratio, quam insinuat, dum ait: *Membra pro se invicem orent, generalis est, quia non solum viatores inter se, sed etiam cum beatis*

unius sunt mystici corporis Christi membra ; tum denique quia, excipiendo solum Christum tanquam singularem advocatum, generalem regulam de membris constituit, quod possint esse pro suis fratribus intercessores, si alii indigeant. Accedit, quod serm. 44 de Tempore, de Sanctis defunctis aperte loquitur, cum dicit : *Tunc pro nobis absque ulla dubitatione Sancti Martyres intercedunt, quando in nobis aliquid de suis virtutibus recognoscunt.* Et in quodam tractatu de expositione Symboli, qui olim erat sermo 181 de Tempore, et nunc in appendice positus est 59, qui a Lovaniensibus non est visus Augustini, sed sumptus ex Gregorii scriptis, mihi autem phrasim et doctrinam Augustini, magis quam Gregorii redolet, utcumque vero sit, saltem est certum esse magnae auctoritatis, ibi ergo in cap. 43, *Sanctorum communionem*, ita explicat : *Id est, cum illis Sanctis, qui in hac, quam suscepimus, fide defuncti sunt, societate, et spei communio ne teneamur. Si igitur cum Sanctis communio nem in eterna vita habere volumus, de imitatione eorum cogitemus, debent enim in nobis recognoscere aliquid de suis virtutibus, ut pro nobis dignentur Domino supplicare.* In quibus duobus testimoniis supponit Augustinus aliud fundamentum hujus veritatis, nimirum, cognoscere Sanctos post hanc vitam actiones nostras, et juxta exigentiam illarum ad orandum pro nobis moveri, quod maxime per orationes et petitiones illis oblatis fieri potest. Sunt etiam alia loca, in quibus Augustinus non solum docendo, sed etiam orando hujus consuetudinis antiquitatem ostendit ; ut in libro septimo de Baptismo, cap. primo, cum de B. Cypriano dixisset : *Jam corpore, quod corrupitur, non aggravante, animam ipsam perspicere veritatem,* subdit : *Adjuvet nos orationibus suis in istius carnis mortalitate languam in caliginosa nube laborantes, ut donante Domino, quantum possumus, opera ejus imitemur.* Præsertim vero videri apud ipsum possunt c. 24 et 40 Meditationum, ubi ad omnes Sanctos in generali, et ad plures in particulari devotissime orat. Et quamvis in ejus verbis multa notari possint, quibus et ratio et fructus orationum ad Sanctos declaratur, illa tamen ad prolixitatem vitandam missa facio, ut pauca quædam ex Græcis Patribus adjungam.

5. Inter quos Chrysostomus sæpiissime Sanctorum pro nobis orationes commendat, simul requirens cooperationem nostram per illorum imitationem, ut hom. 79 ad Populum,

in fine, et in quodam sermone secundo contra desperationem, et super Psalm. 48, circa illa verba : *Frater non redimet, redimet homo, ubi interrogat : Quid ergo? suntne supervacaneæ Sanctorum preces? Nequaque, sed magnas etiam vires habent, quando tu quoque eis auxilium tuleris.* Quæ verba posset quis restringere ad Sanctos hic viventes, verum et Chrysostomus simpliciter loquitur, et ratio eadem est, ut jam dicam. Eodemque modo loquitur homilia 5 in Matthæ. Præcipue vero notandus est locus in orat. 8 ex decem nuper translatis, circa finem, ubi haec habet verba : *Habemus Dominam nostram S. Mariam, Dei genitricem, sed et Apostolorum precibus opus est. Dicamus et nos Paulo, quemadmodum et prisci illi : Cum in Macedonia pertransieris, nobis auxiliare.* In quibus verbis obiter adverto, sentire Chrysostomum, ita nos posse nunc loqui cum Paulo, sicut cum eodem hic vivente alii loquebantur. Et subjungit : *Rogemus, ut dixi, S. gloriosam Virginem, et Dei genitricem Mariam, rogemus Sanctos, et præclaros Apostolos, rogemus Sanctos Martyres.* Et infra eleganter docet, non esse expectandum necessitatis tempus ad colendos et nobis conciliandos Sanctos, sed honore et imitatione præveniendos esse, quod humanis etiam exemplis aptissime declarat, et concludit : *Simus itaque Martyrum amici, non ob necessitatem, sed dilectionem; ante tempestatem, ut tempestatibus afficti, in tempestate vero, ut serenitatem inveniamus.*

6. Similia multa sumi possunt ex Basilio, hom. 20, quæ est de Sanctis quadraginta Martyribus, ubi inter alia ait : *Paratum est hic Christianis auxilium. Sæpe laborastis, ut unum pro ipsis orantem inveniretis. quadraginta sunt hi, unam orationis emittentes vocem; ubi enim sunt duo vel tres in nomine Domini congregati, ibi est Deus; ubi vero quadraginta fuerint, quis dubitet Deum esse præsentem? Qui aliqua premitur augustia, ad hos confugiat; qui rursus latetur, hos oret, ille ut a malis liberetur, hic ut duret in rebus latet.* Cyrillus etiam Hierosol., Catech. 5 mystag. : *In sacrificio (inquit) incruento mentionem facimus Prophetarum, Apostolorum et Martyrum, ut Deus orationibus illorum et deprecationibus suscipiat preces nostras.* Cyrillus item Alexandrinus, lib. 12 Thesauri, c. 10, exponens illud 4 ad Timoth. 2 : *Unus Deus et unus mediator hominum Jesus Christus,* dicit, Christum esse unicum mediatorem naturaliter et substantialiter, *nam aliter, ait, quomodo unum*

mediatorem Christum Paulus dixisset? multi enim Sanctorum mediationis ministerio usi sunt. Et adducit in exemplum Paulum et Moysem, quorum ministerium fuit alterius rationis, præter orationem; addit vero Jeremiam: *Præcipue (inquit) quando clamabat ad Deum: Recordare, quod steterim in conspectu tuo, ut loquerer pro eis bonum.* Et sic etiam ait alios Apostolos et Prophetas fuisse media-tores. Et quamvis de illis hic viventibus loqui videatur, non tamen solummodo; nam de eodem Jeremia jam defuncto dixit Onias, jam etiam defunctus: *Hic est fratrum amator, et populi Israel; hic est, qui multum orat pro populo, et universa sancta civitate Jeremias, Propheta Dei.* 2 Machab. 45. Et de eodem Onia dicitur, visum esse manus extendentem, et pro populo orantem. Atque ita illo testimonio ad hanc veritatem confirmandam utitur Eusebius, libr. 42 de Præparat. Evang., c. 4.

7. *Ante adventum Domini, Sancti non invocabantur, et cur.* — Sed oportet advertere, licet ante Christi adventum Sancti defuncti orarent pro vivis, non tamen legi viventes homines ad defunctos eo tempore orasse, sed ad Deum, ut *orationem mortuorum audiret*, ut dicitur Baruch, cap. tertio, quia tunc Sancti defuncti non videbant Deum, et ita non poterant cognoscere viventium orationes, nisi fortasse ex speciali privilegio. Nunc autem in statu felicitatis constituti merito orantur, quia ratione sui status omnia, quæ ad ipsos pertinent, cognoscunt. Nam, ut dixit Gregorius, *quid non vident, qui videntem omnia vident?* Unde Apocalypsis cap. 5, viginti quatuor seniores offerebant Deo orationes Sanctorum, quod facere neutiquam possent, nisi illas cognoscerent. Et ideo etiam Angeli Sancti semper potuerunt, non solum orare pro hominibus, sed etiam orari ab hominibus, quia semper viderunt Deum, et ita etiam orationes hominum, quantumvis occultas, semper cognoscere potuerunt, ut sumitur ex Tobiae 42, Danielis 10, Zachariae 4, et Apocalysis 8.

8. Hoc denique confirmant antiqui Patres in concessionibus seu homiliis, vel etiam in historiis de Sanctis; nam sèpissime inter concessionandum, aut scribendum, vel orationes fundunt ad Sanctos, quos laudant, vel populum ad illos orandos exhortantur, vel interdum scribunt, Sanctos ipsos hic degentes suas orationes post suum obitum promisso. Ita videtur ex Sanctis citatis in Ambrosio, preicatione secunda ante Missam; et Chrysos-

tomo, loco citato, cap. præcedenti, de Beatisima Virgine; Basilio, dicta Homilia 20; et Nysseno, Orat. in Theodorum Martyrum; Ephrem, dicta Orat. de Laudibus Virginis; Nazianzeno, Orat. 48 in Cyprian., 20 in Basilium, et idem sentit Orat. 24, loquens de Athanasio. Est etiam optima oratio apud Victorem Uticensem, lib. 3 de Persecutione Vandalie: *Deprecamini, Patriarchæ, orate, Sancti Prophetæ; estote Apostoli suffragatores, præcipue tu Petre beate, tu Sancte Paule, gentium magister, universimque ingemiscite Sancti pro nobis Apostoli. Prostrati rogamus, ut non spernatis restros miseros peccatores.*

9. Eusebius etiam, lib. 6 Hist., cap. 4, alias 5, de virginе Potamiæna ad martyrium eunte refert, quemdam Basilidem, unum ex satellitibus, qui eam humanius tractaverat, bono animo esse, jussisse: *Nam (ait) se simul ac abiret e vita, a Domino suo reniam et gratiam pro eo efflagitaturam;* et l. 8, c. 17, de Theodosia virginе refert, accessisse ad quosdam Sanctos Confessores, qui vincit considerant ante tribunal tyranni, *eos obsecraturam, ut cum essent apud Dominum, illius recordarentur,* et ea occasione martyrium subiisse. Denique Augustinus, l. 22 de Civit., c. 8, de Petronia et Palladia, et aliis narrat, per orationes ad sepulchra martyrum, et per eorum intercessiones salutem miraculose impetrasse. Et similia attingemus in puncto sequenti; et alia multa leguntur apud antiquos Patres, quæ ipsi tanquam vera et sibi nota referunt, et ideo a nullo prudente possunt nugae reputari, sed fide humana dignissima existimari, ex quibus aliqua in sequenti puncto referemus. Accedit, quod caput est, Patres, qui haec referunt, certissime credidisse, illum modum orandi, impetrandi et faciendi miracula, esse honestissimum, et frequenter in Ecclesia Catholica usitatum.

10. Ex his manifestum relinquitur, fidem de intercessionibus Sanctorum, et morem illos invokeandi ad illas petendas, non esse res novas, sed antiquissimas in Ecclesia Catholica, quod primo loco probandum proposuimus. Inde vero sufficienti etiam auctoritate probatum relinquitur, quod secundo loco polliciti sumus, hunc ritum orandi Sanctos nec superstitionem, nec malum esse, sed sanctum, et Deo gratum. Quis enim credit potius Luthero, Calvinio, et similibus Novatoribus Sanctorum orationes improbabibus, et in hac parte antiquos haereticos, Vigilantium, Constantium Copronymum, et alios similes

sectantibus, quam Augustino, Hieronymo, Ambrosio, Basilio, Nazianzeno, Chrysostomo, et aliis similibus Patribus verbo et exemplo suo hanc orationem approbantibus; imo etiam referentibus, Deum magnis miraculis, quæ Christus inter potissima signa suæ Ecclesiæ posuit, illam approbasse et confirmasse? Talis autem est hæc veritas, ut non solum auctoritate credi, sed etiam ratione convinci possit apud eos, qui aliqua fundamenta, seu principia nostræ fidei non inficiantur.

11. *Oratio unius pro alio grata Deo est.* — Uatum enim ex principiis, etiam in ipsa Scriptura contentis, est, sanctum esse et Deo placitum, ut unus pro alio apud Deum intercedat, orando. Paulus enim, 1 ad Timot. 2, obsecrat orationes fieri pro regibus, principibus, etc.; et ad Ephes. 6, præcipit orare pro omnibus Sanctis, id est, fidelibus; et Jacobus, c. 5, dicit: *Orate pro invicem, ut salvemini, multum enim valet deprecatio justi assidua.* Quod confirmat exemplo Eliæ, 3 Regum 17. Idemque exemplo suo nos docuit primitiva Ecclesia, cum ad Deum pro Petro orabat, Actorum 2; imo et Christus Dominus exemplo suo idem ostendit Joan. 7, et Luc. 22 et 23. Hinc ergo manifeste colligimus sanctum esse, et Christo placitum, ut homines, qui cum ipso regnant, pro peregrinantibus hominibus apud ipsum intercedant, quia in utrisque, scilicet, viatoribus et beatis, opus est ejusdem honestatis et religionis respectu Dei, et charitatis respectu eorum pro quibus oratur; neque fingi potest ratio ob quam hæc ratio in homine viente in corpore mortali admittatur, et non in spiritu gloriose Deo magis grato, nam hæc intercessio non est beatorum statui incongrua, sed maxime decens et accommodata. Et ideo Scriptura sacra hanc etiam orationem commendat, tam in Angelis beatis, quam in animabus sanctis vel gloriiosis, vel nondum etiam gloriam assecutis, ut ex libris Machabæorum et Apocalypsis, Tobiæ et Danielis supra probavimus.

12. *Rogare aliquem ut pro se oret, sanctum est.* — Alind principium fidei est, sanctum, et Christo proinde gratum esse, unum hominem ab alio petere, ut pro se oret rem licitam, et cum aliis conditionibus ad honestam orationem requisitis. Hoc certe naturali ratione evidens est, quia qui ab alio petit ut pro se oret, ab illo actum licitum postulat, qui et in gloriam Dei per se cedit, et utrique, scilicet, petenti, et a quo petitur, potest esse utilis; cur ergo illa petitio non erit honestis-

sima? Deinde recte fecit serenissimus Jacobus, monendo fideles ut pro se invicem orarent, et sanctissime præcepit Paulus vigilare in obsecratione pro omnibus Sanctis, ad Ephes. 6, ubi etiam addidit: *Et pro me ut detur mihi sermo, etc., et ad Colossenses, capite quarto: Orationi instate, vigilantes in ea in gratiarum actione, orantes simul et pro nobis, ut Deus aperiat nobis ostium, etc.* Et similia habet 2 ad Thessal. 3; ergo similiter licitum est cuicunque viatori ab alio fideli petere ut pro se oret; non enim magis est nobis hoc prohibitum, quam Paulo, neque nos minus indigere possumus orationibus aliorum, quam Paulus.

13. *A paritate rationis concluditur, licitum esse Sanctos vita functos orare.* — Ex his ergo principiis evidenter colligimus, sanctum, et Deo gratum esse, rogare homines vita functiones, quos Sanctos et jam beatos esse credimus, ut pro nobis orent. Probatur illatio, quia nulla ratio vel occasio malitiæ vel inordinationis in hoc actu cogitari potest, magis quam in ea petitione, quæ fit ab homine nobiscum vivente; nam differentia, quæ ab adversariis cogitari potest, tantum in fidei defectu potest esse fundata. Vel enim credunt homines justos ex hac vita decedentes non videre Deum, nec fieri beatos usque ad mundi finem; at hoc tam contra fidem catholicam est, quam contra id, quod ut plurimum a Protestantibus Anglis est receptum. Vel forte timent ne justi et felices non sint illi, quos oramus, et hæc hæsitatio respectu eorum Sanctorum, quos universa veneratur Ecclesia, etiam est contra fidei integratem, ut ostendimus. Vel denique timent ne homines mortui, etiamsi felices sint, nostras orationes non audiant, et hoc etiam est contra sanam doctrinam satis ab Ecclesia approbatam. Præterquam quod talis suspicio vel metus nullum habet verisimile fundamentum, quia Deo facillimum est hanc cognitionem Sanctis secum regnantiibus præbere, estque valde consenteaneum providentiae ipsius Dei, ut illam præbeat, tum ad explendum justum illorum desiderium; tum quia et corum statui et nostro est maxime consentaneum, ut spirituale aliquam communicationem inter nos habere possimus, cum simus membra ejusdem corporis, cuius caput est Christus, ut sumitur ex Paulo, ad Ephes. 1 et 4.

14. *Invocatio Sanctorum nec mala est, nec prohibita.* — Ex his ergo tandem ita concludimus, crare et invocare Sanctos cum Christo

regnantes, nec ex natura rei malum esse, neque etiam prohibitum, esse subinde omnino bonum et licitum. Consecutio per se evidens est. Major autem, discurrendo per omnes, circumstantias hujus actionis, et per comparationem ejus ad similem petitionem inter viventes, est demonstrata. Minor vero facile etiam ostenditur, quia illa prohibitio non est juris divini positivi, quia in Scriptura non inventur, et traditio Ecclesiæ potius ostendit, jus divinum hunc ritum orandi permettere vel approbare; neque etiam est prohibita per jus ecclesiasticum, ut per se notum est, nam potius contrarius error in multis Conciliis, et novissime in Tridentino, damnatus est. Unde licet Ecclesia non omnibus præcipiat orare Sanctos, præcipit tamen omnes de invocatione Sanctorum recte sentire, et omnibus hujusmodi orationem consultit, et aliquibus ministris suis interdum hanc orationem præcipit, instituendo peculiarem modum et ritum orandi Sanctos in divinis et publicis officiis, quem Sacerdotes et ministri Ecclesiæ observare tenentur. Est ergo ex omni capite sancta et religiosa hujusmodi oratio.

15. Prima regis objectio contra doctrinam traditam. — **Solutio.** — *Christus Dominus tanquam Redemptor, Sancti vero tanquam media-tores ad ipsum invocantur.* — Contra hanc autem catholicam doctrinam objectiones quasdam indicat rex, quæ licet ab ipso cursim et quasi timide proponantur, omittendæ non sunt. Primam sumit ex verbis Christi, Matth. 11 : *Venite ad me omnes, qui laboratis, et onerati estis, et ego reficiam vos.* Ex quibus verbis videtur colligere voluisse, ad solum Christum esse accedendum, ut pro nobis intercedat, vel ut necessitatibus nostris subveniat. Verumtamen sensus verborum Christi est, ipsum esse unicum Redemptorem, qui peccatorum onus, et labores ac poenas ex peccatis contractas possit auferre, eumdemque esse auctorem gratiæ, et legis evangeliæ, qui ab onere legis veteris nos liberavit. Vocat ergo Christus omnes ad se tanquam ad medicum, et auctorem salutis. Et hoc modo vera est exclusiva, ita, scilicet, nos Christum vocare ad se, ut ad nullum alium abire permittat. Per hoc autem non prohibuit nobis invocare Sanctos ut intercessores ad ipsum Christum, seu ad Deum per ipsum, neque ullus Sanctorum Patrum illationem hujusmodi fecit, aut verba illa ad præsentem materiam accommodavit, vel illa aliter intellexit. Ut videri potest in D. Hieronymo ibi; Chrysostomo, hom. 39

in Matthæ.; Augustino, serm. 9 et 10, de Verbis Domini, quos alii expositores Latini et Græci imitantur. Potestque hic locus ex aliis declarari, in quibus venire ad Christum, idem significat quod credere in ipsum. In hoc enim sensu dixit Joann. 6 : *Qui renit ad me, non esuriet, et qui credit in me, non sitiет in æternum.* Et iterum : *Omne quod dat mihi Pater, ad me venit, et eum, qui venit ad me, non ejiciam foras,* id est, in gratiam meam ipsum recipiam, et fructum redemptionis meæ communicabo. Hoc ergo modo jubemur venire ad solum Christum, quia non est aliud nomen datum hominibus, in quo oporteat nos salvos fieri. Hoc autem non obstat quoniam ad Sanctos per orationem accedere possimus, ut ab ipso, et per ipsum auxilium nobis obtineant, ut ad ipsum veniamus, vel si jam venimus, ut ab eo non recedamus. Sic enim, non obstante sufficientia redemptionis Christi, recte petimus a viventibus, ut pro nobis orient.

16. Secunda objectio ex Paulo, ad Colos. 2. — **Solutio.** — Altera objectio est, quia Paulus, ad Colossens. 2, prohibuit humilitatem, et religionem Angelorum, omniemque ejusmodi venerationis cultum in superstitione et humilitate, non ad parcendum corpori, non in honore aliquo ad saturitatem carnis. Ita rex proponit verba Pauli, et non amplius declarat, quomodo ex eis aliquid contra invocationem Sanctorum colligatur, cum famen in eum finem ab ipso referantur; nam alioqui immrito, et extra rem illa ibi proponeret. Pauli tamen intentio longe diversa est, ut ex contextu manifeste constat, omniumque Patrum expositione. Monuerat enim Paulus Colossenses, ut sicut acceperant Jesum Christum Dominum, ita in ipso ambularent, radicati et superædificati in ipso. Unde postea infert : *Nemo ergo judicet ros in cibo,* etc. Quibus verbis eos cavere docet judaicas cærimonias, et observationem legis; deinde vero subdit : *Nemo vos seducat, volens in humilitate, et religione Angelorum,* per quæ verba non prohibet debitam venerationem et invocationem Sanctorum Angelorum, ut novatores sentiunt, hoc enim neque ex verbis Pauli colligi potest, neque ex Patribus aut expositoriis. Unde aliqui illam posteriorem clausulam cum præcedenti conjungunt, et omnia intelligunt de observatione legalium. Communior tamen et magis litteralis expositio est, illa posteriora verba dici a Paulo contra errorem quorundam hæreticorum, qui dixe-

runt Angelos esse hujus mundi factores, et per ipsos accedendum esse ad Deum, et non per Christum. Quam fuisse haeresim Simonis Magi refert Epiphanius, haeres. 21; et illam voluisse damnare Apostolum, docuit ibi Chrysostomus, homilia 7, quem OEcumenius, et Theophylactus sequuntur, qui explicant, illos haereticos per fictam humilitatem dixisse, non oportere per Christum adduci ad Deum, quia hoc majus est quam ut id possimus assequi, sed commodius esse ut per Angelos accedamus, ideoque peculiarem cultum et religionem Angelorum introduxisse, et hanc prohibuisse Paulum, affirmant.

17. Sensus Pauli. — Paulo vero aliter Theodoretus ibi dicit cosdem, qui observantiam legis veteris defendebant, ad Angelos colendos induxisse, dicentes legem fuisse per eos datam, refertque Concilium Laodicenum hac ratione Angelorum cultum prohibuisse. Ita enim videtur legisse canonem 35 illius Concilii, qui juxta versionem antiquam et Gentiani, sic habet: *Non oportet Ecclesiam Dei relinquare, et abire, et Angelos nominare, et congregaciones facere, quæ interdicta noscuntur. Si quis igitur inventus fuerit huic idololatriæ serviens, sit anathema, quia derrelinquit Dominum nostrum Jesum Christum.* Alia vero translatio non legit Angelos, sed angulos, damnatque eos, qui in angulis congregabantur ad idola colenda. Verisimilior autem est illa prior lectio, cum Theodoretus, auctor græcus, et illi tempori vicinus, ita illum canonem referat. Constat autem ibi non fuisse damnatum omnem cultum Angelorum, sed eum, qui ab Ecclesia et a Christo separat, legem, per Angelos datam, legi Christi præferendo, ut Theodoretus vult. Aliter vero Tertullianus, lib. de Præscrip. haeticor., cap. 33, generaliter dicit: *Simonianæ magiæ disciplina Angelis serviens, utique et ipsa inter idololatrias deputabatur.* Unde fit verisimilis conjectura, Paulum per religionem Angelorum intellexisse, omnem superstitionem cultum, qui per magicam artem malis angelis datur. Quæcumque vero fuerit illa, quæ a Paulo vocatur *religio Angelorum*, certum est fuisse superstitionem, et partem idololatriæ, ut exponit Hieronymus, ep. 151 ad Algasiæ, q. 10, qui illa verba exponit de Judæis, qui post Christi mortem et abolitionem legis: *Quascumque offerunt victimas, non Deo offerunt, sed angelis refugis et spiritibus immunis.* Augustinus vero, ep. 59 ad Paulinum, generatim ait, illa verba dicta esse a Paulo,

propter superstitiones gentilium, Angelos (inquit) volens intelligi principatus, quos elementorum mundi hujus præpositos in his observationibus colendos esse arbitrantur; et de illis observationibus ait, per eos fieri, *ut cor hominis velut religione humile reddatur falsa humilitate, quæ magis inflat, ut inferius dicit.* Longissime ergo distat talis superstitione a cultu et invocatione Sanctorum, sive hominum, sive Angelorum.

18. Denique ponderanda sunt verba dicentis: *Nemo vos seducat volens in humilitate, utique ficta, et religione angelorum, utique malorum, quæ non videt, ambulans frustra inflatus sensu carnis suæ, et non tenens caput, ex quo totum corpus per nexus et conjunctiones subministratum, et constructum crescit in augmentum Dei.* Hæc enim verba non possunt in Ecclesiam Catholicam convenire, quatenus Sanctos colit et invocat. Quia neque hoc facit inflata sensu carnis suæ, sed exemplis ac doctrinis Sanctorum Patrum in divina Scriptura fundatis instructa. Neque per illum cultum recedit a capite, quod est Christus, sed ad illum potius refert omnem Sanctorum cultum; per illum enim Sanctos omnes impetrare, et ad illum etiam pro nobis intercedere profitetur. Et ita neque fictam humilitatem, neque falsam religionem introducit, neque impedit corporis Christi augmentum per influxum gratiæ ab ipso manantis, sed potius per hanc conjunctionem et communicationem omnium membrorum hujus corporis, totius corporis unitas et sanctificatio melius perficitur. Quapropter majori quidem ratione possunt talia verba in Protestantes converti, illisque possumus serenissimum regem alloqui: *Nemo vos seducat, etc.* Nam Protestantes revera regem seducunt, *inflati sensu carnis suæ*, quia neque ab Ecclesia, neque a Patribus doceri volunt, *sed dulci nomine scientiæ* (ut Augustinus supra loquitur) regem *seducunt, et avertunt a luce veritatis, quæ est Christus Jesus.* Unde licet ore Christum confiteantur, re ipsa caput non tenent, ex quo totum corpus crescit in Domino, quia non possunt tenere idem caput, qui nolunt esse in ejus corpore, nec possunt in illo crescere per nexus et conjunctiones, qui Sanctorum unionem et communicationem recusant. Denique licet isti aperte non fingant religionem Angelorum, quos colant, fingunt tamen illorum religionem angelorum, a quibus decipiuntur, et per quos alios seducunt. Dicta igitur verba Pauli, si secundum proprium

sensum considerentur, reprehensionem gentilium continent, non Catholicae Ecclesiae. Si vero secundum generalem doctrinam, quam includunt, spectentur, hæreticos omnes, et præcipue Protestantes redarguant et convincent.

19. Tertia objectio.—Tertiam objectionem his verbis indicat rex : *Sed qua fiducia, quore auctore decurratur ad deos penates istos, sive tutelares, quasi aulicos et familiares Dei Optimi Maximi, equidem nescio. Id illis probandum reliquerim, qui nova disputandi ac philosophandi ratione Theologiam corruperunt.* Non quidem immerito prius quam respondeam, possum cum Augustino interrogare, *seriumne aliquid inter nos agitur, an jocari libet?*¹ Credere namque non possum deorum penatum aut tutelarium memoriam regem renovare voluisse, nisi jocari potius quam serio agere maluisset. Quod si res istæ tam leves regi esse videantur, nobis jocari non vacat. Si autem graves existimentur, mirum est quod nomen deorum penatum et tutelarium absurditate vel gentilitate terrere voluerit ignorantibus. Non enim ignorare potest rex a Christianis Catholicis, nullum mortuorum hominum, aut Deum vocari, aut tanquam numen coli, aut invocari : *Nihiloque secius* (ait Theodoreetus²) *urbium custodes, ac locorum praesides venerantur, quorum precibus et interventu apud Deum utentes, per eos demum dirina munera consequuntur.* Et paulo inferius : *Quid ergo adversus nos indignationem concipitis, cum nullum quidem nostrorum hominum referramus in Deos, quanquam debitos honores Martyribus persolvamus, ut Dei testibus servisque amantissimis.*

20. Responsio.—Relicto ergo et contemptu deorum nomine, quod rex dicit se ignorare, qua fiducia ad Sanctorum intercessionem recurramus, mirum profecto non est; nam fides est fiduciæ fundamentum, et ideo ubi vera fides non est, fiducia esse non potest. Nos autem credimus justos vita functos, et cum Christo regnantes, pro hominibus in hac vita peregrinantibus apud Deum intercedere, eorumque orationes Deum propter Christum exaudire, et hac fiducia ad illos accedimus, non dubitantes quin et nostras petitiones audiant, et magna charitate benigne suscipient. Possumusque regem interrogare, an interdum a suis subditis, quos fideles esse

credat, ut pro se Deum precentur, postulet. Nam si hoc contemnit, Paulo contradicit, qui et pro se orari postulabat, et pro regibus orare monebat; si vero id probat et facit, peto qua fiducia id faciat: certe non alia, nisi ea, quæ in aliqua fide fundetur; simili ergo fiducia ad Sanctos vita functos nos accedimus, quia neque minus apud Deum posse, nec minori charitate res nostras curare credimus. Unde cum iterum rex interrogat, quo auctore hoc audemus, fidenter respondemus, imprimis Spiritu Sancto principali auctore nos id facere; ille enim est principalis auctor, qui Ecclesiam Christi docet, eique omnem suggerit veritatem. Deinde id etiam Christo auctore nos facere, tum quia ipse nos Ecclesiam suam audire præcipit; tum etiam quia per suos Apostolos nos docuit pro invicem orare, et per Apostolorum successores, quos ipse dedit Ecclesiæ Pastores et Doctores, Sanctos etiam vita functos invocare docuit, non solum illorum verbo, sed et eorumdem exemplo. His enim modis hactenus ostendi, qua fide Sancti sint invocandi. Neque vereor in eorum numero comprehendi, quos falsa Protestantium calumnia deceptus rex corruptores Theologiæ appellat. Hoc enim non veritatis indicium, sed hæreticorum convicium est, de quo proinde Theologus et Doctor Catholicus gloriatur.

21. De invocatione Sanctorum male sentienti Dei per Christum invocatio nihil prodest.—Superest ut Sanctorum invocationem non solum superstitione carere, sed etiam tutiorem et utiliorem esse ostendamus; hoc enim ultimo loco promisimus, quoniam verba regis hoc a nobis efflagitant; subjungit enim : *Miki satis est, Deum per Jesum Christum prout jubemur invocare, et hanc viam tutiorem, ideoque in rebus ad salutem spectantibus potiorem insistere.* In quo puncto, necessarium est opus a fide, et usum a judicio secernere. Nam licet alicui satis fortasse possit esse ad salutem, Deum per Jesum Christum invocare, etiamsi Sanctos non invocet, non tamen sola per Christum invocatio satis erit ad salutem, si de Sanctorum invocatione male sentiat vel judicet. Quia per hoc judicium pertinax hæreticus constituitur; hæretico autem homini sola invocatio Christi prodesse non potest, quia neque ex vera et catholica fide, neque cum charitate conjuncta esse potest. Deinde quamvis homini, de fide invocationis Sanctorum recte sentienti, usus talis invocationis possit non esse impositus sub præcepti ne-

¹ Ep. 44 ad Maximum.

² Lib. 8 contra Græcos.

cessitate, et ideo illi satis esse possit, Deum per Christum invocare, multis vero, quibus necessitas invocandi Sanctos ex officio, et debito, ac præcepto incumbit, non satis est Deum per Christum invocare, nisi Sanctos invocando, obligationi suæ, ac præcepto sibi imposito satisfaciant. Quia licet Christi redemptio, et interpellatio de se ad nostram salutem sufficiat, nostram tamen cooperacionem, et præceptorum obedientiam requirit, ideoque licet ab aliquo præceptorum contemptore invocetur, ad salutem non sufficit, nec talis invocatio ab ipso Christo, vel a Deo per Christum exauditur.

22. *Invocatio alicujus Sancti potest interdum esse ad salutem necessaria.* — Addimur præterea, licet invocatio alicujus Sancti, absolute et per se spectata, non sit ad salutem necessaria, interdum posse contingere ut ex divina ordinatione, et mirabili providentia necessaria sit. Quod si hoc rex non intelligit aut non credit, legat Augustinum dicentem : *Si Stephanus sic non orasset, Ecclesia Paulum non haberet; sed ideo de terra excitatus est Paulus, quia in terra inclinatus exauditus est Stephanus?*¹ Quamvis ergo Paulo satis esse potuisse ad salutem Deum per Christum invocare, nihilominus (teste Augustino) necessaria illi fuit ad salutem intercessio Stephani; utique quia beneplacitum fuit Deo per tale medium, et non aliter, Paulum ad cognoscendum et invocandum Christum vocare. Ita ergo in aliis hominibus et prædestinatis potest contingere, ut unius salus per alterius Sancti intercessionem præordinata sit, et ut Sanctus non sit pro illo intercessurus, nisi ab eo invocetur. Hoc igitur modo unius hominis pro alio intercessio, et consequenter invocatio potest ex divinæ providentiae ratione esse necessaria, ut cum effectu salutem consequatur ille, qui Sanctum invocat, et pro quo Sanctus intercedit. Quamobrem neque secure neque pie dicitur, satius esse, Deum per solum Christum invocare, quia, licet unum jubeatur, aliud non excluditur, et quia ad invocandum Deum per Christum, sicut oportet, necessarium est divinum auxilium, quod interdum per alicujus Sancti invocationem impetrandum est.

23. *Sanctorum invocatio tutior et utilior.* — Ex quo evidentius concluditur, non solum tutius, sed etiam utilius esse, invocatione Sanctorum interdum uti, quam illam omnino

prætermittere. Est quidem tutius, tum quia qui omnino illam prætermittit, eam despicere vel contemnere videtur, quod perniciosum est, et quamvis forte non contemnat, huic periculo se exponit, quod tutum non est. Tum maxime quia in hac invocatione facta ex recta fide nihil periculi ad salutem esse potest, cum sit pia, et Deo grata; et aliunde, ut dixi, contingere potest ut Deus per tale medium orantem salvare, vel bonum illud, quod optat, tribuere destinaverit; non est ergo satis tutum ab implorando Sanctorum patrocinio abstinere, tantum abest ut tutius sit. Multiplex vero utilitas hujus invocationis in multis Ecclesiæ orationibus satis indicata est. Una est, ut quod nostris meritis non valeamus, *Sanctorum patrocinio assequamur;* alia esse potest, ut multiplicatis intercessoribus Deus largiatur, quod fortasse soli oratori roganti non concederet.

24. *Hæretorum evasio præcluditur.* — At, inquiunt Protestantes, Deus non est sicut homo, ut personas respiciat; Deus enim personarum acceptor non est, et ideo nihil ad impetrandum confert, vel qualitas precantis, vel intercedentium multitudo. Sed hoc tam contra rationem quam contra Scripturam profertur. Aliud est enim accipere personam, aliud veram personæ dignitatem, seu conditionem ad negotium pertinentem expendere. Acceptio enim personæ in communi usu et in allegatis Scripturæ verbis vitium sonat distributionis vel donationis, in qua conditio personæ, quæ ad causam non refert, neque personam tali muneri, vel dono magis aptam, vel dignam reddit, consideratur. At vero in præsenti talis personarum acceptio locum non habet; nam sanctitas personæ orantis vel intercedentis, talis est conditio personæ, quæ ad impetrandum illam reddit dignorem, et consequenter multitudo etiam deprecantium, quatenus in eis, et majora merita, et augmentum aliquod sanctitatis considerantur, efficaciorem apud Deum orationem reddit. Non enim sine causa dixit Jacobus, cap. 5, multum valere depreciationem justi, sed quia, licet oratio peccatoris interdum impetraret, multo facilius justi oratio exauditur. Alioqui si Deus faciem orantis non respicit, et illius conditionem non considerat, cur dixit ad amicos Job : *Ite ad serum meum Job, et servus meus Job urabit pro vobis, faciem ejus suscipiam, ut non vobis imputetur stultitia,* nisi quia propter sanctitatem et patientiam Job, illius potius quam ipsorum

¹ Aug., serm. 1 et 4, de Sanctis.

esset orationem exauditurus? Et e converso, ad exaggerandam iram suam, dixit Dominus per Ezechilem¹: *Terra cum peccaverit, etc.*; *et si fuerint tres viri isti in medio ejus, Noe, Daniel et Job, etc.*, ac si diceret, cum isti me possent maxime placare, eos etiam pro tali populo orantes non exaudiāt; quia non satis est plurium et sanctissimorum virorum intercessio, si is, pro quo orant, non cooperetur, ut notavit Chrysost., hom. 79 ad Pop., ubi nihilominus ostendit, orationē plurium efficaciorem esse, quod etiam late prosequitur orat. 3, de Incompreh. Dei natura.

25. Estque ad hoc propositum valde notanda oratio Gregorii Nysseni ad Theodorum Martyrem, sub finem, ubi cum multa a Martyre postulasset, subjungit: *Quod si majori opus fuerit adocatione ac depreciatione, fratrum quoque tuorum Martyrum coge chorūm, et cum omnibus una deprecare; multorum justorum preces, multititudinum, ac populorum peccata luant, admone Petrum, excita Paulum, Joannem item Theologum, ac discipulum dilectum, ut pro ecclesiis, quas constituerunt, solliciti sint, etc.* Multo ergo magis orationes nostræ cum Sanctorum intercessionibus conjunctæ efficaciores fiunt, ac subinde utiliores. Neque propterea Dei, vel Christi cultus minuitur, sed augetur, quia dum Sanctos invocamus, divinam majestatem magis reveremur, nostramque indignitatem recognoscimus, et per Sanctos Deum magis honorare et glorificare cupimus, eique gratias pro tot beneficiis agimus. Quia, ut recte dixit Ambrosius, serm. 14, de SS. Nazario et Celso: *Immensa ejus pietas multiplex ad bonitatem, et artifex ad salutem proponens arduam virtutum palmarum, raro appetitore pretiosam, in paucorum triumphis, plurimorum commodis prospicit; illorum siquidem merita, nostra vult esse suffragia.* Quod infra exaggerans addit, licet aliquis Sanctus, alicujus loci *peculiaris putetur privilegio sepulchri, omnium tamen esse communione suffragi; non clauditur enim locus, quod diffunditur meritis. Invocasti ubique Martyrem, ubique te exaudiet ille, qui honoratur in Martyre.* Merito ergo Catholica Ecclesia Sanctorum invocationem tanquam magis piam, et Deo gratiorem, sibique tutiorem, et utiliorem elegit, semperque retinuit.

¹ Ezech. 14.

CAPUT X.

DE SANCTARUM RELIQUIARUM CUSTODIA ET VENERATIONE.

1. *Quem cultum Sanctorum reliquiis tribuat rex Jacobus.*—Duo in hoc punto potissimum carpit rex, adorationem, videlicet, reliquiarum, et usum asservandi particulas a corporibus Sanctorum separatas, ut a christiano populo videri vel tangi possint. Prius vero, ut vulnus suum occultet, et ne cum Juliano Apostata, et Constantino Copronymo, et aliis hæreticis reliquias Sanctorum detestantibus sentire videatur, quædam verba præmittit, quibus se Sanctorum reliquias honore prosequi ostendit, dicens: *Quod ad reliquias Sanctorum si quas ejusmodi haberem, quas constaret Sanctorum corporum partes esse, eas ego honorificis tumulis solemniter inferrem.* Hic zelum regis laudo; quod autem secundum fidem non sit, doleo. In eo enim quod Sanctorum reliquias honore aliquo dignas esse censem, recte judicat; insinuat vero non religioso cultu, sed solo civili honore Sanctorum reliquias tumulandas esse; quod si ita sentit, non recte, neque secundum fidem catholicam sentit. Ipsum vero in hoc sensu fuisse locutum, verba, quæ paulo post subjungit, satis declarant, in quibus, *reliquiarum adorationem pro intolerabili idololatria habere se dicit, et abominari.*

2. *Sanctorum reliquias latrīa a Catholicis adorari falso machinantur Protestantes.*—In his autem verbis imprimis adverto, cum superius tractando de cultu B. Virginis et Sanctorum, non verbo *adorandi*, sed *venerandi*, vel *colendi*, usus fuerit, hic mutata locutione, *adorationem reliquiarum abominari*. Interrogo igitur quo sensu quæve significatione nomen adorationis accipiat; nam si perfectam illam, et absolutam ac summam latrīam, quæ soli Deo debetur, per nomen *adorationis* intelligit, merito quidem abominaretur eos, qui Martyrum ossa, aut corpora, vera latrīa soli Deo debita adorarent; at immerito tales adorandi modum Ecclesiæ tribueret. Quod profecto facere convincetur, cum eam, quam abominatur, reliquiarum adorationem, inter Romanæ Ecclesiæ articulos numerare intendit.

3. *Hæreticorum calumnia ex Patribus resellitur.*—Sciat ergo calumniam hanc nec novam esse, nec alia responsione quam data ab

antiquis Patribus indigere. Augustinus enim Maximo, philosopho gentili, qui ep. 43 ita ad Augustinum scriperat, ut ignoranter hanc idololatriæ notam inurere Christianis videtur, in ep. 44, sub finem, ita respondet: *Ad summam tamen, ne te hoc lateat, et in sacrilega convitia imprudentem trahat, scias, a Christianis Catholicis, quorum in vestro oppido etiam Ecclesia constituta est, nullum coli mortuorum, nihil denique ut numen adorari quod sit factum et conditum a Deo, sed unum ipsum Deum, qui fecit et condidit omnia.* Hieronymus vero contra Vigilantium, qui eamdem calumniam impudentius Ecclesiæ imponebat, sic loquitur in ep. 53: *Os fetidum rursum aperire et putorem spurcissimum contra Sanctorum Martyrum proferre reliquias, et nos qui eas suscipimus, appellare cinerarios et idololatras, qui mortuorum hominum ossa veneremur.* Et infra: *Nos autem non dico Martyrum reliquias, sed ne solem quidem, aut lunam, non Angelos, non Archangelos, non Cherubim, non Seraphim, et omne nomen quod nominatur, et in praesenti saeculo et in futuro, colimus et adoramus, ne serviamus creaturæ potius quam creatori, qui est benedictus in saecula. Honoramus autem reliquias Martyrum, ut eum, cuius sunt Martyres, adoremus.* In quibus verbis adverto consulto usum fuisse Hieronymum verbis venerandi et honorandi, ut calumniam hæretici evitaret, et adorandi verbum Deo reservaret. Idemque observat in alio libro contra Vigilantium, ubi reliquias, ossa veneranda, appellat, quam venerationem negabat Vigilantiū, propter illam Ecclesiæ imponens idololatriæ maculam, contra quem Hieronymus: *Quis unquam, o insanum caput, aliquando Martyres adoravit? Quis hominem putavit Deum?* Ex quibus etiam verbis, et ex supra dictis concluditur evidens ratio. Nam si Martyres ipsos, seu eorum beatos spiritus, fideles illo modo non adorant, ut supra declaratum est, multo minus eorum reliquias et corpora mortua sic adorabunt. Quæ ratio in reliquiis ad Christum Dominum pertinentibus non ita procedit, quia Christo specialis debetur adoratio; quomodo autem ejus reliquiae venerandæ sint, infra dicemus.

4. *Eodem cultu Sanctos et eorum reliquias venerantur Catholicī.* — Quod si rex non adeo stricte nomen adorationis intellexit, cur venerationis nomine ad vitandam verbi invidiam et amphibologiam usus non est? Vel (quod ad rem proprius accedit) quid est quod in adoratione reliquiarum abominatur, cum ip-

semet reliquias Sanctorum aliquo honore dignas esse fateatur? Certe non video quid ei displicere possit, nisi quod reliquias, tanquam res sacras, actibus etiam sacris et religiosis veneramur. Sed in hoc etiam puncto (si ita sentit) toti antiquitati catholicae contradicit, et ab antiquis damnatis hæreticis, Eunomio, Vigilantio et similibus non dissentit. Quod variis modis potest breviter ostendi. Primo, quia Patres ideo docent reliquias esse venerandas, quia earum honor, illorum Sanctorum, quorum sunt reliquiae, est veneratio, et inde eisdem signis, actionibus ac rebus, Santos, et eorum reliquias colendas esse demonstrant. Quia ita est cultus reliquiarum cum honore Sanctorum conjunctus, ut unus non possit ab alio omnino separari, quia utriusque ratio eadem est, nimirum excellentia sanctitatis, quæ proprie, et ut aiunt, formaliter in animo existit, et in corpus et alias reliquias per quamdam participationem et habitudinem redundat. Quam veram et catholicam doctrinam his verbis eloquentissime declaravit Ambrosius, dicto serm. 44, in fine, simul fundamentum adversariorum propoenens et evertens: *Quod si dicas mihi: Quid honoras in carne jam resoluta, atque consumpta, de qua nulla jam Deo cura est? Et ubi est illud, charissimi, quod ipsa veritas loquitur per Prophetam? Pretiosa, inquit, in conspectu Domini mors Sanctorum ejus.* Et iterum: *Mihi autem valde honorificandi sunt amici tui, Deus. Honorare debemus servos Dei, quanto magis amicos Dei. De quibus alio loco dicitur: Dominus, inquit, custodit omnia ossa eorum, et unum ex his non conteretur. Honoro ergo in carne Martyris exceptas pro Christi nomine cicatrices, honoro viventis memoriam perennitate virtutis, honoro per confessionem Domini sacras cineres, honoro in cineribus semina æternitatis, honoro corpus, quod mihi Dominum meum ostendit diligere, quod me propter Dominum mortem docuit non timere. Cur autem non honorent corpus illud fideles, quod reverentur et Daemones? Quod et afflixerunt in suppicio, sed glorificant in sepulchro. Honoro itaque corpus, quod Christus honorarit in gladio, quod cum Christo regnabit in Calo.*

5. *Altiori cultu quam civili Sanctorum reliquias afficiendas esse.* — Ex ratione igitur honorandi has reliquias, quæ longe altior est omni humana justitia vel dignitate politica, recte colligimus, honorem etiam esse altiorrem, atque ita sacrum esse, et per res sacras exhibere deberi. Sieque idem Ambrosius, ep.

58, ad Fideles per omnem Italiam, etc., refert, sibi revelatum esse, ut in nomine Sanctorum Gervasii et Protasii Ecclesiam ædificaret, in qua eorum corpora collocaret, quod sine dubio ad sacrum honorem pertinet. Et in fine epistolæ ponit hæc verba relata ex libello cum reliquiis invento : *Ego servus Christi Philippus abstuli cum filio meo furlim nocte sancta corpora, et in domo mea, Deo solo teste, in ista arca saxea sepelivi, credens, me orationibus eorum consequi misericordiam Domini nostri Jesu Christi.* Honorabat ergo illos altiori mente et fide, quam soleant mortuorum corpora solo civili honore tractari; mens autem et affectio est, quæ qualitatem cultus constituit et distinguit. Et eodem modo idem Ambrosius, ep. 53, in fine, ad eosdem Italiæ populos de inventione reliquiarum Sanctorum Vitalis et Agricolæ, ita concludit : *Hæc vobis pauca et compendiario, dilectissimi fratres, de corporum Sanctorum Martyrum inventione significare curavimus, ut ipsorum memoriam in ecclesiis facere valeatis.*

6. Similique modo, et ob eamdem rationem, de hoc cultu reliquiarum sentit Eusebius, lib. 13 de Præparat. Evang., cap. 7, circa principium, dicens : *Hæc nos quotidie factitamus, qui reræ pietatis milites, ut Dei amicos honorantes, ad monumenta quoque illorum accedimus, votaque ipsis facimus tanquam viris Sanctis, quorum intercessione ad Drum non parum juvari profitemur.* Quomodo tandem Sanctis vota fieri possint et debeant, alibi¹ a nobis explicatum est; certum est autem cultum sacrum continere, proprieque Deo fieri in honorem Sanctorum cum Christo regnantium. Addit vero Eusebius, specialiter solere fieri circa monumenta Sanctorum, ut idem cultus in honorem etiam reliquiarum aliquo modo redundet. Et multa similia habet Theodoretus, lib. 8 ad Græcos, et apnd Gregorium Turonensem, lib. 2 de Historia Francor., c. 37, et colligitur etiam ex his, quæ refert Augustinus, lib. 20 contra Faust., cap. 3. De hoc denique sacro honore loquuntur Patres, quoties de honore reliquiarum loquuntur, ut videri potest apud Hieronymum, ep. 7 ad Lætam, in princip. : *Inundans, inquit, populus ante delubra semiruta currit ad Martyrum tumulos; si non extorqueat fidem prudentia, extorqueat saltem verecundia;* et epist. 7 ad Eustochium : *Martyrum, inquit, ubique sepulchra veneramur, et sanctam furil-*

lam oculis apponentes, si liceat, etiam ore contingimus. Similia in vita Hilarionis, et in epitaphio Paulæ, et alibi saepe. Et Augustinus, lib. de Cura pro mortuis agenda, cap. 17 et 18; Basilius, homil. in Quadraginta Martyres; Gregorius Nazianzenus, orat. 48 in Cyprianum; et optime Chrysostomus, homil. 66 ad Populum, ubi inter alia hæc notatu dignissima : *Etiam ipse, qui purpuram induitus est, accedit illa complexurus sepulchra, et fastu deposito stat Sanctis supplicaturus;* et homil. in Psalm. 145 : *Contemplare (inquit) civitates, etc.*

.*Reliquiarum venerationem Deo gratam esse.*— Denique quod in hoc genere cultus nihil contra Dei religionem fiat, imo Deo gratissimus sit, ratione fit perspicuum, et miraculis frequenter Deus ipse contestatus est. Ratio ex dictis clara est, quia ossa mortuorum Sanctorum non coluntur divino honore; ergo ex hac parte in hoc cultu non fit contra religionem Deo debitam. Deinde non coluntur ex falsa existimatione, ac superstitione, ac si illa perciperent honorem ipsis exhibitum, vel inse haberent excellentiam, propter quam exhibetur; nam hac mente illis præbere etiam civilem honorem, absonum plane esset et stultum. Coluntur ergo ea fide qua credimus illa esse organa et vasa, quibus ad bona opera Sanctus usus est Spiritus, ut argute admodum scripsit Augustinus, lib. 1 de Civit., c. 43. Et quia totum illud redundat in honorem sanctorum animarum, quas etiam credimus non ignorare, et gratum habere obsequium, quod ipsis in corporibus suis a fidelibus fit; ergo nullus recta ratione utens potest hunc cultum accusare, vel levissimæ inordinationis, etiam contra duliam, nedum contra latram.

8. *Eadem veritas miraculis confirmatur.*— Testimonium denique Dei per miracula multiplex a Sanctis Patribus antiquis refertur, et præcipue videndus est Ambrosius, dictis epist. 53 et 54 ad Marcellinam sororem, ubi inter alia dicit : *Dum transferimus Sanctorum corpora, cæcus sanatus est, etc.* Quod miraculum cum aliis contra hæreticorum calumnias constantissime defendit, serm. 5 de eisdem Sanctis Gervasio et Protasio, qui omnino videndus est. Eademque miracula (ut in duorum tantæ auctoritatis et ocularium testium ore irrefragabile sit hoc verbum) recognoscit Augustinus, lib. 9 Confession., cap. 7, et dicto etiam cap. 17, de Cura pro mortuis agenda, et lib. 22 de Civit., cap. 8, ubi alia multa de reli-

¹ Tom. 2 de Relig., tract. 3, lib. 1, c. 46.

quiis S. Stephani, et aliorum Sanctorum refert. Et ideo epist. 103, commendans Episcopo Tinciano Gallam et Simpliciolam, inquit: *Portant reliquias beatissimi et glorioissimi Martyris Stephani, quas non ignorat Sanctitas Vestra, sicut et nos fecimus, quam convenienter honorare debeatis.* Plura etiam alia refert Theoderetus, dicto lib. 8 ad Graecos.

9. *Sanctorum reliquiis daemones fugantur.* — Confirmant præterea Patres frequenter veritatem hanc exemplo Elisei, cuius ossa mortuum excitarunt, ut videre licet in Clemente, lib. 6 Const., c. ult.; Chrysost., Orat. in laudem Ignatii Mart., et singulariter in Cyrillo Hierosol., Cateches. 48. Nam id factum esse dicit, *ut non solum animæ Sanctorum honorentur, sed credatur quod etiam corporibus mortuorum inest virtus seu potentia, propter tot annorum inhabitationem animarum justarum in illis, quorum ministerio usæ sunt.* Denique ad hoc testimonium spectat efficacia reliquiarum Martyrum contra daemones, tum ad expellendos illos, tum ad coercendos, ne in idolis responsa darent. In quo genere pulchra est historia de reliquiis S. Babilæ Martyris, quas impius Julianus ex quodam sepulchro transferri jussit, quia impedimento erant Apollini, ne in quodam vicino loco gentilibus responsa daret; fidelium autem Ecclesia magna fide et alacritate concurrit ad transferrendam arcam Martyris, quam deferebant psallentes summis clamoribus, cum exultatione dicentes: *Confundantur omnes qui adorant sculptilia, et qui confidunt in simulacris suis;* ita refertur in Vita Athanasii ex Sozomeno, lib. 5 Historiæ, c. 18 et 19; idem referrunt aliæ ecclesiastice historiæ, Ruffini, lib. 2, cap. 35; Theodoreti, lib. 3, cap. 9; Socratis, lib. 3, cap. 16. Tantum ergo abest ut reliquiarum veneratio idolatria sit, ut potius ad illam confundendam argumentum sit efficacissimum.

10. *Particulas reliquiarum publice ostendere, antiquum, et sanctum esse.* — Quia vero rex Angliae peculiariter offenditur ac perturbatur consuetudine separandi particulas reliquiarum, seu corporum sanctorum, et illas publice ostendendi seu proponendi, idcirco necessarium est antiquitatem etiam et pietatem hujus consuetudinis specialiter demonstrare. Tam est enim antiqua hæc religio erga Martyres, ut de illis sic scribat Theodoretus, dicto lib. 8: *Animæ quidem triumphatorum Martyrum in cœlesti nunc patria vitam agunt, angelorum choros intersitæ, eorum vero cor-*

pore non singula quidem singulis monumentis conduntur, sed civitates, oppida, paganique conventus hac inter se sortito partiti sunt, laborantibusque animis, ac agrotis corporibus salutares eos confiteri non cessant. Eudemque morem, ejusque rationem brevi, sed gravi et egregia sententia, ut solet, explicavit Ambrosius, dicto serm. 4 de SS. Nazario et Celso, ubi prius dixerat: *Exultant felices singularem urbium populi, si unius saltem Martyris reliquiis muniantur. Ecce nos populos Martyrum possidemus.* Deinde vero ita subjungit: *Beatum itaque Nazarium Martyrem Christi Sancta Mediolanensis Ecclesia, licet totum corpore secum retineat, et mundo tamen totum in benedictione transmisit.* Et addit rationem, quam nunc expendimus: *Hæc est enim Sanctorum Martyrum gloria, quorum etsi per universum mundum seminetur in cineribus portio, manet tamen integra in virtutibus plenitudo.* Quasi dicat, magna prudentia et pietate communicari fidelibus per partes reliquias Martyrum, quoniam et tota ratio venerationis in singulis contemplari potest, ut integre in eis Sancti colantur, et tota etiam virtus obtinenda Deo beneficia et miracula per talia instrumenta et Sanctorum intercessiones in singulis invenitur.

11. Sic etiam dixit Basilius, dicta hom. 20 de Sanctis quadraginta Martyribus: *Hi sunt, qui nostram obtinentes regionem quasi quedam turres contra adversariorum incursum refugium exhibent, nec uno in loco sese clauerunt, sed in multis locis hospitio recepti, multorum patrias ornaverunt, nec tamen separati, sed inter se commisti, si in singulos ipsos divisoris proprium numerum non excedunt.* Et infra: *Nam hi quadraginta sunt unum, et omnes apud singulos.* Sic item Gregorius Nazianz., oratione 3, quæ est prima contra Julianum, § Non victimas, inter alias Martyrum laudes adjungit: *Quorum vel sola corpora idem possunt, quod animæ Sanctæ, sive tangantur, sive honorentur, quorum vel solæ sanguinis guttæ, atque exigua passionis signa idem possunt, quod corpora.* Et in carmine iambico 48, ita scribit: *Venerationi tanquam magnæ est veritas, exiguis etiam pulvis, ut vel ossium particula veterum quæpiam, aut paulum comæ, vestisse, sparsi aut sanguinis quedam notæ, cultum parem habeant, atque corpus integrum.* Unde similiter, orat. 18 in Cyprianum, inter narranda ejus miracula dicit, *vel cineres Cypriani miracula fecisse.*

12. Gregorius vero Nyssen., orat. in S.

Theodorum Martyrem, cum majori exag-
eratione dicit, quod *pulverem, quo conditorium,*
ubi Martyris corpus quiescit, obsitum est, au-
ferre permittat, pro munere pulvis accipitur,
ac tanquam res magni pretii condenda terra
colligitur. Nam ipsas attingere reliquias, si
quando contingat, ut id facere liceat, quam id
sit multum desiderandum et optandum, ac
summarum precum donum, sciunt experti, et
eius desiderii compotes facti. Ex verbis autem
quæ subjungit, discere possumus causam ob
quam ex reliquiis Martyrum partes aliquæ
separatæ serventur, ut interdum possint po-
pulo ostendi, ut fide ac pietate illas aspiciant,
et, si opus fuerit ad spiritualem fructum,
complectantur. Nam ut idem Sanctus subjun-
*git : *Qui eas intuentur, quasi corpus per se*
**rivens et florens amplectuntur; oculis, ori, au-*
**ribus, omnibus sensuum instrumentis adhiben-*
**tes; deinde officii et affectionis lacrymas*
**Martyri, quasi integer esset, et appareret, su-*
**perfundentes, ut pro ipsis precator intercedat,*
supplices preces offerunt.******

13. Hoc denique recte confirmat, et anti-
quum morem apertissime ostendit Hierony-
mus contra Vigilantium, non longe a prin-
cipio, ubi verba ejus refert dicentis : *Quid ne-*
cesse est te adorare illud, nescio quid, quod in
modico rasculo transferendo colis, quid pulve-
rem linteamine circumdatum adorando oscula-
*ris. Contra quem postquam Hieronymus de-
claravit illam non esse adorationem latræ,
seu divinam, subjungit : Et audes dicere, il-
lud nescio quid, quod in modico rasculo trans-
ferendo colis? Quid est illud nescio quid? Scire
desidero, expone manifestius, ut tota libertate
blasphemæ. Pulvisculum, inquit, in modico
rasculo pretioso velamine circumbatum. Dolet,
Martyrum reliquias pretioso operiri velamine,
etc., et infra : Ergo sacrilegi sumus, quando
Apostolorum basilicas iugredimur? Omnes
Episcopi non solum sacrilegi, sed et fatui judi-
candi, qui rem vilissimam et cineres dissolutos
in serico et vase aureo portaterunt. Non potuit
profecto clarioribus verbis usum præsentis
Ecclesiæ testimonio et exemplo omnium
Episcoporum sui temporis approbare. Videat
rex Angliæ ntrum audeat illos, ut sacrilegos
et fatuos damnare, quod Hieronymus tan-
quam absurdissimum et prorsus incredibile
reliquit.*

14. Unde etiam facile ostenditur quam sit
frivola et indigna collatio, quam rex quasi ir-
ridens proponit inter hunc modum venerandi
reliquias, et supplicium quo solent puniri

malefactores, capita eorum, aut alias cadave-
rum partes in publicis et excelsis locis ad
perpetuam infamiam, et poenam post mortem
duraturam, suspendendo. Nullus enim reli-
quias Martyrum ad infamiam in publico col-
locat, nisi qui fideles persecundo, martyres
facit, et postea gloriam martyri per similem
infamiam et poenam obscurare conatur. Qua-
propter non immerito possumus, Hierony-
mum imitando, exclamare : *Nos ne sumus,*
*qui Sanctos honoramus, an ille qui honoranti-*b*us illos viris habitaculum, mortuis sepul-
chrum, negat, qui fratrum (utique fidelium)
exilia postulat? Et paulo inferius : *Quis ossa*
*Sanctorum et innoxios cineres hucusque verbe-
rari ab imbris sinit?* Profecto, ut dixi, non
nisi ille, qui fideles persecundo, Martyres
facit. Ecclesia autem Catholica non ad infa-
miæ imaginem, ut rex ludificatur, sed ad ma-
jorem honorem, et ad ostensionem amoris, et
ad fidem ac devotionem excitandam, reliquias
Sanctorum illo singulari modo conservat,
suisque fidelibus videndas et tangendas pro-
ponit. Imo insuper addo, hanc ipsam consue-
tudinem ostendere, longe altiori modo Eccle-
siam de sanctis reliquiis sentire, quam vul-
garium hominum mortua corpora soleant re-
putari. Qnod mihi Gregorius Nyssenus, in
dicta Orat. de S. Theodoro, his verbis expli-
cavit. Postquam enim dixit, *corpus S. Theodo-*r*ri veluti rem charam magnique estimatam,
atque reconditam, in tempus regenerationis
servari, multis singularibus et eximiis rebus
præditum, propter quas ad alia corpora, que
communi et vulgari morte dissoluta sunt, ne
comparandum quidem est, idque in simili ma-
teria naturæ, subjungit : *Nam ceteræ quidem*
reliquæ abominabiles plerisque sunt, ac nemo
*lubenter sepulchrum præterit, aut si ex inopi-*nato* apertum offendit, etc., prætercurrit. At*
si venerit in aliquem locum similem huic, ubi
hodie noster conventus habetur, ubi memoria
justi, sanctæque reliquæ sunt, primum quidem
*earum rerum, quas videt, magnificantia oblec-*t*tatur.* Et infra : *Cupit deinceps ipsi conditorio*
*appropinquare, sanctificationem, ac benedictio-*nem, contrectationem ejus esse credens.* Consul-
lens ergo Ecclesia huic pietati fidelium, illis
interdum publice particulas reliquiarum vi-
dendas, et tangendas proponit, idque in ma-
jorem Sanctorum gloriam cedere, quidquid
adversarii calumnientur, prudenter existi-
mat.***

15. Nec omittam in hoc punto addere,
multas esse reliquias Sanctorum, quæ partes

corporum non sunt; et ideo cum eis sepeliri non debent, sed cum debito honore servari, quarum rex nullam mentionem fecisse videatur, quia illam suam imaginum infamiam ad illas non poterat accommodare. Hujusmodi sunt vestes Sanctorum, quæ manibus contactæ ægritudines interdum repellunt, ut de vestibus Sanctorum Gervasii et Protasii affirmat Ambrosius, Epist. 54, et de sudariis SS. Vitalis et Agricolæ idem dicit, ep. 55, ubi etiam clavos et cruces Martyrum inter has ponit reliquias. Multi etiam ex allegatis Patribus mentionem faciunt vestium Sanctorum, easque aliis reliquiis æquiparant, et in eodem habent honore, ut ex Nazianz. et Augustino maxime intelligi potest. Unde Cyril. Hieros., Cateches. 48 : *Etiam sudaria ei semicinctia extra corpus existentia, dicit, contacta ab ægrotis, illos ab infirmitate liberabant.* Ratio autem moralis sumi potest ex Augustino, lib. 1 de Civit., c. 43 : *Quia paterna vestis et annulus, ac si quid hujusmodi, tanto charius est posteris, quanto erga parentes major affectus.* Sic ergo vestium Sanctorum affectus et reverentia, erga ipsos Sanctos amorem et venerationem ostendit. Unde in vita Antonii legitur, cum Antonius in morte sic præcepisset : *Melotem, et pallium tritum, cui superjaceo, Athanasio Episcopo date, quod mihi novum ipse detulerat,* idem Athanasius vitam scribens sic subjungit : *Legatarius autem Antonii benedicti, qui tritum pallium cum melote imperio ejus meruerat accipere, Antonium in Antonii muniberibus amplectitur, et tanquam magna hæreditate datus, luetanter vestimentum recordatur, imaginem sanctitatis.*

16. *Reliquiae, licet Sanctorum partes non sint, eamdem venerationem sibi vendicant.* — Et in hoc ordine reliquiarum ponendæ sunt res aliæ, quibus Sancti in hac vita familiariter usi fuerunt, ut sunt libri, et res similes, nam omnium est eadem ratio. Atque ita cathedra S. Jacobi Apostoli, et primi Hierosolymorum Episcopi, usque ad tempus suum fuisse ab illius successoribus cum magna æstimatione servatam, refert Eusebius, lib. 7 Histor., c. 14, in fine, et subdit : *Unde declarat perspicue, quemadmodum veteres Patres ad nostram usque ætatem sanctis viris ob eorum veram erga Deum pietatem, debitam venerationem et tribuerint, et adhuc tribuere non cessent.* Quam traditionem conservans Sancta et Catholica Romaina Ecclesia, Petri et Pauli non solum corporum reliquias, sed etiam Petri cathedram et catenas usque ad hodiernam diem

religiose conservat, easque in propriis festivitatibus christiano populo videndas, tangendas et venerandas proponit.

CAPUT XI.

DE VERA IMAGINUM SANCTARUM VENERATIONE SEU ADORATIONE.

1. *Iconomachorum hæresis quam Anglia exercitat.* — Contra imagines sacras vehementius invehiatur rex Angliae, earumque venerationem, sicut et reliquiarum, *intolerabilem idolatriam* appellat; non vult tamen iconomachus haberi; semper enim nomen et notam hæreticorum fugit, quorum doctrinam sequi non dedignatur. Probat autem se non esse iconomachum, *quia non arguo (inquit) si quis aut fingere statuas, aut imagines pingere, sive ad publicum splendorem, sive ad privatorum hominum domesticos usus volet.* At hoc non satis est ut iconomachus non sit, nisi etiam fateatur sacras imagines venerandas esse, et non solum ad externum splendorem, et domesticos usus, sed maxime ad usus sacros, ad Dei Sanctorumque honorem, et bonum animæ, retinendas esse confiteatur. Prima enim ac præcipua hæresis iconomachorum fuit, imagines Christi et Sanctorum venerandas non esse, ejusque auctor fuit Xenias Persa, qui cum esset servus, et nondum baptizatus, Episcopus a Petro Gnapheo factus est, ut refert Nicephor., lib. 16 Hist., c. 28, et subjungit : *Primus (O audacem animum, et os impudens) vocem illam evomuit, Christi, et eorum qui illi placuerunt, imagines venerandas non esse.* Et ex Theodoro lectore, antiquiore scriptore, eadem historia eademque origo illius hæresis habetur per Anastasium in septima Synodo, action. 1. Et in eodem sensu eamdem hæresim postea secuti sunt Leo Isauricus, Copronymus Constantinus, et alii posteriores.

2. Denique in eodem sensu damnata fuit illa hæresis ab Ecclesia. Nam si satis esset ad fidei integratatem, confiteri, imagines esse aptas ad splendorem humanum, et domesticos privatosque usus, vix credo, inventus esset homo rationis compos, qui omnem imaginum usum, etiam humanum, damnasset, ac si ars pingendi intrinsece mala esset, vel specialiter Christianis prohibita. Vel certe si Manichæi, vel alii antiquiores hæretici illum errorem docuerunt, ut multi volunt, ad dam-

nandum talem errorem, satis fuisset Ecclesiæ definire, non omnem usum imaginum malum esse, seu civilem ac privatum usum earum permitti. Quia vero per hoc non sufficienter condemnabatur error Iconomachorum; ideo contra illos definitum est, venerandas esse sacras imagines, et publicum, ac sacrum, seu Ecclesiasticum illarum usum retinendum. Si ergo Rex Angliæ hoc neget, Manichæus quidem poterit non esse, Iconomachum autem se esse negare non potest.

3. Præterea præcipius error Iconomachorum fuit, idolatriæ accusare, et damnare Ecclesiam, eo quod Christi et Sanctorum imagines coleret seu veneraretur, unde ipsas imagines idola vocabant, et hac ratione eas e templis auferebant, et omnibus ignominiis afficiebant, et in ignem tandem conjiciebant. Que omnia constant ex antiquis historiis, et ex septima Synodo, Action. 1 et sequentibus latissime, quæ in summam redegit Photius in epistol. de septem Synodis, quæ in tertio tomo Conciliorum ante eamdem Synodus præmittitur. Rex autem Angliæ expresse dicit, se pro intolerabili idolatria habere et abominari adorationem imaginum, intelligens si ne dubio adorationem, quam Ecclesia Romana imaginibus dare consuevit; et paulo inferius conatur probare, imaginem esse idolum; et ad utrumque suadendum, Scripturæ testimoniis utitur, quæ Iconomachi etiam contra ecclesiasticam traditionem allegabant, ut ex dicta Synodo, action. 3 et 7, habetur; ergo negare non potest rex, quin sententiam in Inocomachis damnatam ipse defendat; quid ergo illi deest, ut Iconomachus sit? An forte quod imagines non confringat, ignominiis afficiat aut comburat? profecto licet hoc ita esset, eum ab hæresi Iconomachorum non excusaret, cum hæresis in animo et pertinaci sententia sit, etiamsi in illos exteriore effetus non prodeat.

4. Verumtamen de Protestantibus notum est, in violandis imaginibus non fuisse antiquis Iconomachis impares, ut ipsi etiam Angli satis experti sunt, et recentiores ipsorum historiæ copiose testantur¹; ergo rex, qui eidem Protestantium sectæ adhæret, et regiam illi exhibet auctoritatem, easdem imaginum contumelias approbat, et earum auctor censeri debet. Contra hanc hæresim nunc novam disputationem instituere supervacaneum du-

co, cum hæresis nova non sit, et eisdem temporibus, quibus olim exorta est, plenissima eruditione et summa auctoritate sit in septima Synodo generali damnata. Damasco-nus etiam libros pro imaginibus scripsit, qui ad impugnandam illam hæresim sufficiunt. Praeterquam quod nostris temporibus multi viri catholici de hoc arguento copiosissime et efficacissime disputarunt. Nihilominus tamen prætermittere non possumus, quin singula regis verba expendamus, ut objectionibus, quas indicat, satisfaciamus, inde namque veritas catholica confirmabitur.

5. *Fideles nunquam imagines orant.—Orare coram imagine et illi supplicare multum inter se dissident.*—Primo ergo Ecclesiam no-vitatis accusat per hæc verba, *quod illas* (id est, imagines) *adorare, quod illis supplicari, quod aliquam sanctitatis opinionem affungi illis oporteat, id quidem antiquis inauditum.* In quibus verbis oportet, vel falsa a veris discernere, vel obscura et ambigua declarare, ne vana sit contentio, et ubi non est, error cogitetur vel fingatur. Et imprimis verbis illis, *Quod illis supplicari*, significatur esse in Ecclesia, vel ab illa approbari consuetudinem orandi imagines, vel illis supplicandi; hoc autem non ita est, in nullo enim decreto ecclasiastico, vel gravi scriptore catholico ille modus loquendi invenietur. Imo Concilium Tridentinum, sess. 25, Decreto de Vener. imaginum, expresse dicit, *habendas et retinendas esse imagines, eisque debitum honorem et venerationem impertiendam, non quod credatur, vel quod ab eis sit aliquid petendum, vel quod fiducia in imaginibus sit figenda.* Notum est autem omnes Catholicos hujus sacri Concilii doctrinam indubitanter amplecti; ergo falso attribuitur Catholicis, quod imagines ipsas orent, et ab ipsis petant. Erravit autem fortasse qui hoc dixit, quia idem esse credidit, orare coram imagine, et illi supplicare, cum tamen longe diversa sint. Nam fidelis, qui orat coram imagine Virginis, verbi gratia, mentem habet in Virgine fixam, et illam pre-catur, et non imaginem, licet illam oculis corporis conspiciat. Non enim ignorat solum illum esse orandum, qui possit preces audire et facere, vel intercedere prout rogatur; orat tamen nihilominus coram imagine, ut ad majorem devotionem et attentionem illius con-spectu moveatur. Supplicaret autem imagini, qui ab illa peteret tanquam ab auditum et mentem habente, quod non solum Catholicæ instructi in fide, verum etiam nec rustici ho-

¹ Sanderus, lib. 1 et 2 de Schismate Angliano.

mines cogitare possunt, et ideo licet coram imaginibus oremus, non tamen imagines ipsas. Coram illis autem orare antiquissimum in Ecclesia fuit, ut intelligi potest ex liturgia Chrysostomi, et aliis, atque etiam ex historiis quas infra adducimus.

6. *In imaginibus nullam sanctitatem intrinsecam agnoscerunt Catholicci.*—Deinde in verbis illis, *Quod aliquam sanctitatis opinionem affungi illis oporteat*, non solum antiquis, ut ibi dicitur, sed etiam praesentibus omnibus fidelibus, ac vere Catholicis inauditum quidpiam a Protestantibus, regi in hac re sicut in aliis perniciose imponentibus, falso tribuitur, nisi fortasse in verbo sanctitatis aliqua vel ignorantia, vel deceptio lateat. Nam imprimis idem Concilium Tridentinum, citato loco pariter dixit: *Non quod credatur, aliqua inesse in iis dirinitas vel virtus propter quam sint colendae*. Ubi excludendo ab imaginibus divinitatem, principaliter excludit veram sanctitatem per essentiam: dum vero ait non habere aliquam divinitatem, significat, neque veram aliquam participationem divinae excellentiae, et sanctitatis eis inesse. Hocque magis declarat, dum subjungit, non esse in eis virtutem aliquam, nam perinde fuit ac si dicebat, non esse in eis veram sanctitatem etiam creatam. Ergo illa opinio sanctitatis affectae imaginibus commentum est Protestantium, qui Regi imposuerunt, nam a Catholicorum sensu aliena est, cum sit in orthodoxo Concilio damnata.

7. Dixi autem, *nisi in verbo sanctitatis aliquid lateat*. Nam, juxta doctrinam Augustini, lib. 2 de Peccatorum merit. et remission., cap. 26, *non unius modi est sanctificatio*, et sic etiam *multi modi sunt sanctitatis*, ut idem Augustinus dixit, serm. 14, de Verbis Apostoli, c. 9. Nam etiam communes cibos per verbum Dei et orationem sanctificari dixit Apostolus, 1 ad Timoth. 4, et de pane benedicto, qui olim catechumenis dabatur, dicit idem Augustinus, sanctum esse, et sanctiorum quam sint communes cibi, etiam privatim benedicti; et panes propositionis in lege veteri dicebantur sancti, et arca federis sancta censebatur, juxta illud Psalm. 98: *Adorate scabellum pedum ejus, quoniam sanctum est*, quod ad litteram recte de arca intelligitur, quæ scabellum pedum Domini dicitur, 1 Paralip. 28. Et Arca testamenti vocata est arca sanctificationis, Psal. 131. Et dies festivi dicuntur *sancti et venerabiles*, Exodi 12; et vestes sacerdotales dicuntur *sanctæ*, Exodi

28. Denique templum ipsum, et maxime saerarior pars ejus, et sacra vasa, et alia cultui divino dicata, sancta dicebantur. In his ergo omnibus aliqua sanctitas cogitanda est, quia nihil nominatur sanctum, nisi ab aliqua sanctitate. Non est autem illa sanctitas vera, seu formalis, et intrinseca (ut aiunt), sed habitudo quedam ad veram aliquam sanctitatem, ut Theologi latius declarant.

8. *Imagines dicuntur sanctæ ab extrinseco.*—Cum ergo dicitur oportere aliquam sanctitatis opinionem de imaginibus concipere, si non de vera sanctitate, quæ propria est intellectualium rerum, sed de analogia, et quasi metaphorica sanctitate, per habitudinem, seu denominationem (ut aiunt) extrinsecam intelligatur, id non solum sine rubore aut metu tanquam verum admittimus, sed etiam a Patribus traditam, et ratione naturali evidens esse, suppositis maxime fidei principiis ostendemus. Nam sacrae imagines, eo ipso quod ad representandas personas vere sanctas, formatæ, et ad honorem aliquem eisdem sanctis exhibendum, et ad decentem et religiosum ornatum templorum, et ad spiritualem profectum animarum institutæ ac deputatae sunt, inter res sacras merito censeri debent. Unde sicut loca, vasa, et vestimenta sacra, et alia proxima divini cultus instrumenta sanctitatem quandam extrinsecam, ut dixi, participare censentur, et ita passim in Exodo et Levitico, et aliis locis Scripturæ sanctæ vocantur, ita etiam imagines Sanctorum his rebus sacris in hoc genere sanctitatis æquiperantur. Quod sæpe tradit Concilium Nicænum II, et specialiter in act. 2, Adrianus Papa, in epist. ad Imperatores: *Non est dubitandum (inquit) omnia, quæ in Ecclesiis Dei ad laudem et decorum domus illius constituantur, sancta et colenda esse*. Atque id ex similitudine rationis facile intelligi potest, et ex Sanctorum testimoniis, quæ statim referemus, magis constabit¹. Declarari denique potest humana et morali ratione, ac exemplo imaginis regiae, quo in hac materia sæpe utuntur Sancti; nam imago regis non est quidem rex, neque in se veram regis excellentiam habet; tamen quia regem representat, et quasi vicem ejus sustinet, tanquam quid regale aestimatur, et ideo peculiarem quandam reverentiam sibi conciliat; ergo altiori modo et ratione imagines Sanctorum,

¹ Methodius, Orat. 2, de Resurrect.; Basilus, lib. de Spiritu Sancto, cap. 18.

quatenus ipsos repræsentant, umbram quamdam sanctitatis participant, ratione cuius sanctæ et sacræ per quamdam analogiam nominantur. In his ergo duobus punctis nihil amplius immorari existimo necessarium.

9. *Latriæ cultum imaginibus exhibere prohibitum est.* — Venio ad verbum *adorandi*, quod ad substantiam causæ, ut sic dicam, spectat. In quo iterum adverto, mutasse regem verbum *venerandi*, quo in principio confessionis suæ uti cœperat, in verbum *adorandi*, ut exagge-ret vel magis apparentem reddat reprehensionis causam. Nos autem, ad verbi invidiam et amphibologiam tollendam, sicut in reliquiis fecimus, ita etiam hic interrogamus quid per verbum *adorandi* significare voluerit. Nam si illo utitur, ut antonomastice significat supremum et absolutum latriæ cultum soli Deo debitum, fatemur quidem ingenuo inauditum esse antiquis, oportere imagines adorari. Imo nos addimus, non solum esse inauditum, sed etiam særissime negatum, non solum ab antiquis, sed etiam ab illis Patribus, quos rex ipse recentiores appellat, etiamsi ante mille annos præcesserint. Gregorius enim, lib. 7, in dict. 2, ep. 53, ad Se-cundinum, qui ab illo imagines petierat, ejus laudans desiderium, ait : *Scio quod imaginem Salvatoris nostri non ideo petis, ut quasi Deum colas, sed ut ob recordationem Filii Dei, in ejus amore recalescas, et nos quidem non quasi ante divinitatem, ante illum proster-nimur, sed illum adoramus per imaginem, aut natum, aut passum, sed in throno sedentem recordamur.* Et infra, ep. 109 ad Serenum, et latius lib. 9, ep. 9, ad eumdem, illum reprehendit eo quod imagines confregerit; zelum autem laudat, quoniam putaverat non esse adorandas, utique tanquam deos, seu tanquam idola, in quo aliqui errabant; ait autem Gregorius illos fuisse docendos et instruendos, ob privatum autem errorem non fuisse imagines confringendas.

10. Et in hoc sensu sæpe utuntur verbo *adorandi* antiqui Patres, ut supra annotavi, et in eodem dicitur in septima Synodo, act. 7, in definitione fidei, *secundum nostram fidem non exhiberi imaginibus veram latriam.* Et inferius Tharasius, in epist. ad Constanti-num et Irenem, licet utatur verbo *adorandi*, statim explicat, non intelligere de divina adoratione, et ideo ostendit verbum *adorandi*, juxta græcam proprietatem, minores etiam adorationes comprehendere. Et in eodem Concilio, action. 3, Constantinus, Constantiæ

Episcopus, qui Iconomachus fuerat, abjurando hæresim, ita loquitur : *Complector vene-randas imagines, adorationem autem, quæ fit secundum latriam, hoc est Dei culturam, tan-tummodo Trinitati conservo;* et Adrianus Pa-pa, in Epist. ad Constanti-num et Irenem, et in altera Epistola ad Tharasium, accurate distinguit modum venerandi imagines, et interdum verbum *adorandi*, singulariter Deo tribuit, comparatione utique imaginum, quas dicit esse honorandas, licet interdum etiam dicat esse adorandas. Denique Concilium etiam Tridentinum, citato loco, imaginibus dixit, *debitum honorem, et venerationem impertendam; per illas vero (ait) Christum adoramus, et Sanctos veneramur.* Sumpto igitur adorandi verbo in hac restricta significatione, immerito rex Ecclesiæ Catholicæ attribuit, quod imagines adoret, vel adorandas esse doceat. Incredibile autem videtur, regem Angliæ tanta ignorantia rerum Romanarum laborare, ut sibi persuaserit, Romanam Ec-clesiam hoc modo adorare imagines, aut Concilia, et Patres, qui pro imaginum veneratione pugnarunt, in hoc sensu fuisse locutos. Neque magis credibile est, per calumniam voluisse regem hoc crimen Catholicis imponere. Est ergo verisimilius, credere regem, quam-cumque venerationem imaginum, præsertim sub specie sanctitatis et religionis, esse prava-m, et inseparabilem ab idolatria, et ideo verbum adorandi in latiori significatione usurpassee.

11. *Imaginem adoratio ab Apostolis inchva-ta.* — Si ergo rex verbum adorandi in gene-rali significatione, et de quacumque sacra veneratione intellexit, profecto non minus mirabile est quomodo ausus fuerit dicere, inauditum esse antiquis imagines adorari, seu adorandas esse, cum oppositum tam sit vulgare et evidens, ut vix possit ignorari. Nam imprimis in prædicta septima Synodo, et a Damasceno, in libris de Imaginibus, et ab Adriano I, Pontifice, lib. de Imaginibus contra libros Pseudocarol., et Jona Aurelianensi, et ab aliis recentioribus, tam multa ex antiquis Patribus ad hujus fidei et consuetudinis antiquitatem ostendendam allata sunt, ut nullus, qui ea legerit, dubitare possit hanc esse traditionem a temporibus Apostolorum inchoatam, et per continuam seriem ac suc-cessionem perpetuam in Ecclesia retentam. Primo enim ipsummet Christum imaginem sui non manu factam ad Abagarum misisse in Edessam, antiquæ historiæ ecclesiasticæ

referunt : Evagrius, lib. 4 Hist., c. 26; Nicephorus, lib. 2, cap. 7; et Damasc., lib. 4 de Fide, c. 17; et recipitur in dicto Concilio Nicæno II, act. 5; et defenditur ab Adriano Papa, epist. 3, ad Carolum Magnum, cap. 18, qui etiam affirmat Stephanum Papam, prædecessorem suum, illam historiam approbasse.

12. Deinde in eodem Concilio Nicæno II, act. 1, Gregorius quidam, Episcopus Pessinensis, refert canonem Apostolicum de imaginibus in templis collocandis, editum in Concilio Antiocheno, tempore Apostolorum coacto, cuius meminit Innocentius I, ep. 18 ad Alexandr., illiusque canones, ex inventis a Pamphilo in Bibliotheca Origenis, refert Turrianus, lib. 1 contra Magdeburgenses, c. 25, ubi hunc canonem de imaginibus plenius refert, quam in septima Synodo referatur, et sic habet : *Ne decipiantur salvati (id est fideles) ob idola, sed pingant ex opposito dirinam humanamque manu factam, impermixtam effigiem Dei veri, ac Salvatoris nostri Jesu Christi, ipsiusque servorum, contra idola et Judæos, neque errant in idolis, neque similes fiant Judæis.* Ubi obiter notari potest, tantum abesse ut imagines sint idola, ut potius ad confutationem idolorum introductae sint, et veluti ad medium inter judaismum et gentilismum tenendum, ut infra explicabo. Nota item est historia de antiquissima imagine Salvatoris, Cæsareae collocata, a femina quam Dominus a profluvio sanguine liberavit, Matth. 9, quam refert Eusebius, lib. 7 Histor., cap. 14, qui addit non esse mirum, hoc effecisse feminam illam, in recognitionem accepti beneficii, cum et nos (ait) Petri et Pauli Apostolorum, et Christi etiam ipsius imagines in picturis colorum varietate expressas conservatasque aspexerimus. Eamdem historiam de statua Christo erecta a prædicta muliere in memoriam beneficij refert Nicephorus, lib. 10, cap. 3, et addit a Juliano Apostata fuisse ablatam, et contumeliose confractam, Christianos vero, sicut potuerunt, illam in Ecclesiam transtulisse, et cultu convenienti prosecutos esse.

13. Constantimum præterea, cum ecclesiæ ædificare coepit, eas simul variis imaginibus et status argenteis Apostolorum et aliorum Sanctorum ornasse, memoriae proditum est a Damaso Pontific., in Sylvestro, et a Paulino, epist. 12, et aliis. Ad hæc Augustinus, 22, contra Faust., c. 73, commemorat, imaginem Abrahæ sacrificantis filium multis locis fuisse depictam, et lib. 1 de Consensu Evan-

gelistar., idem affirmat de imaginibus Christi et Apostolorum Petri et Pauli. Ambrosius etiam, epist. 57, cum Gervasio et Protasio apparuisse sibi personam gravem, *quæ similis (inquit) erat Beato Paulo, cuius me vultum pictura docuerat*, id est, imago Pauli, quam familiarem habuisse videtur. Quod etiam de B. Chrysostomo refert Damascenus, orat. 1 de Imaginibus, dicens : *Habebat autem effigiem Apostoli Pauli in imagine, in loco, ubi propter corporis imbecillitatem quiescebat.* Gregorius etiam Nyssenus, oration. in Theodororum Martyrem, refert, certamina Sanctorum Martyrum, et eorum Præsidis Christi, tanquam in libro quodam potuisse in ecclesiis legi, coloribus artificiosis depicta. Et Sanctus Basilius, Homil. de Sancto Barlaam, quæ est 18, postquam lingua sua Martyris fortitudinem depinxit, sic concludit : *Exurgite nunc, o præclari athleticorum gestorum pictores. Mutilam ducis imaginem vestro illustre artificio, et obscurius a me depictum coronatum athletam vestrae industriae coloribus conspicuum reddite. Abibo certaminum ac victoriarum Martyris a robis posita imagine rictus, gaudebo tali hodie per vestram dexteritatem victoria superatus.* Et infra : *Pingatur in tabula una, et certaminum agonotheta Christus, cui sit gloria in saeculorum sæcula.*

14. Legi etiam potest Nazianzenus, orat. 23, circa principium, ubi commemorat Angelos, cum corporea forma, vestitu candido, solitos fuisse depingi, *ad significandum (inquit) naturalem ipsorum puritatem.* Et idem usus imaginum colligitur ex eodem, epist. 49 ad Olympium, et infinita alia ex Patribus et historiis afferre possemus. Quod si fortasse Protestantes prædictas historias ut incertas rejecerint, nihilominus scripta Patrum et testimonia, quæ usum imaginum supponunt et probant, negare non possunt. Deinde licet in una vel alia historia possit esse aliquis error, seu defectus veritatis, tamen ubi tot concurrunt exempla, multis et gravissimis testibus confirmata, valde temerarium esset omnia falsitatis arguere, propter solam pertinaciam propriæ opinionis, sine alia probatione. Denique licet Protestantes hæc non admittant, saltem sine ullo fundamento astruent, cultum imaginum fuisse ab antiquis inauditum.

15. *Erasio refellitur.* — Dicent fortasse, prædictis historiis et testimoniis probari quidem usum imaginum, non autem cultum vel adorationem, de qua rex præfatis in locis lo-

quitur. Advertant autem, obsecro, non quemcumque usum politicum et privatum, sed ecclesiasticum et sacrum, ex dicta traditione demonstrari, et cum eo conjunctam esse venerationem imaginum, quæ sæpe in eisdem locis expresse ostenditur. Quod quidem Patres septimæ Synodi diligentissime expendebunt, et ideo, postquam in act. 7, exhibendam esse imaginibus salutationem et honorarium adorationem definissent, protinus addiderunt : *Sic enim Sanctorum nostrorum Patrum optima disciplina, et Ecclesiae Catholicæ habet traditio; et in fine exclamavit sancta Synodus : Omnes sic credimus, hæc est fides Apostolorum, hæc est fides Patrum. Nos antiquæ Ecclesiae legislationi insistimus, nos decreta Patrum custodimus.*

16. *Finis imaginum. — Oratio nullo modo tendit in imaginem, adoratio vero proxime versari circa illam potest.* — Potest autem hæc veritas ita declarari, nam imagines quidem non sunt per se ac principaliter factæ, ut adorentur, sed potius ut per eas colantur et honorentur personæ quas repræsentant, simulque ut ad sacrum templorum cultum, et ad spiritualem utilitatem fidelium inserviant. Hinc autem necessitate quadam etiam naturali rationi conformi, ortum est, ut ipsæ etiam imagines venerandæ sint, et debito honore tractandæ. Quod fieri potest duplice modo et ratione. Primo, quia in eis et per ipsas adorantur prototypa, ad quæ intentio adorantis præcipue fertur, ut Concilia Nicænum et Tridentinum declararunt. Unde fit, ut qui sic adorat Christum, verbi gratia, in imagine, id faciat simul venerando imaginem, circa illam signum venerandiæ exercendo, ut osculando, salutando, etc. In quo est notandum discrimen inter orationem, et adorationem : nam oratio sive mente, sive voce fiat coram imagine, nullo modo ad imaginem pertinet, neque illam (ut ita rem explicem) contingit, quia ad intelligentem solum potest immediate referri; adoratio vero, quæ per actionem corporis exhibetur, licet dirigatur ad personam, proxime exerceri potest circa rem distinctam a persona, quatenus illi conjuncta est, vel re ipsa, ut est vestis, vel thronus in quo rex sedet, vel habitudine, ut est imago, reliquiæ, et similia. Et ideo quando per hæc quasi instrumenta adorantur personæ, necesse est ut etiam ista instrumenta seu imagines aliquo modo coadorentur.

17. *Solæ intellectuales creaturæ propter se coluntur.* — Alio modo possunt et debent ima-

gines cum veneratione tractari, quoties actiones aliqua circa illas exercetur, etiamsi tunc propria et formalis adoratio personæ non fiat, sed solum spectetur imago ut res quædam sacra, quæ cum debita veneratione tractanda est, sicut ad alias res sacras *reverenter accedimus*, ut septima Synodus in sua definitione dixit. Et sic etiam dixit Gregor., libr. 7, indict. 2, epistol. 5 : *Sublata, cum ea, qua debitum est, veneratione, imagine Genitricis Dei, et Crucis.* Et nihilominus hæc etiam reverentia respectiva est respectu imaginis, quia tota exhibetur propter rem repræsentatam. Atque ita fit ut tota hæc veneratione imaginum sit diminuta, et secundum quid, respectu venerationis prototyporum. Et consequenter efficitur ut veneratione imaginum quorumcumque Sanctorum Angelorum, et hominum, infra Christum Dominum, non solum deficiat a vera latraria, sed etiam a propria dulia simpli-citer dicta, quæ est absoluta veneratione propter propriam excellentiam. Unde veneratione etiam quæ exhibetur imagini Christi, licet cum ipsius Dei adoratione sit conjuncta, non tamen est absoluta latraria, prout circa imaginem versatur, sed respectiva, et secundum quid, quia tota tendit ad Deum, et in ejus excellentia fundatur. Et hac ratione interdum dicunt Patres, solas intelligentes personas esse venerandas vel adorandas, utique absolute, et propter se; aliquando vero asserunt etiam res inanimes posse adorari, cultu scilicet respectivo, et propter aliud, ut videre licet in dicta epistola Adriani ad Constantimum et Irenem, et sæpe in aliis locis ejusdem Concilii. Et sic etiam dixit Augustinus, lib. 3 de Trinit., cap. 10, *signa mirabilia operum Dei, præsertim divina virtute facta, et permanentia, et stuporem habere tanquam mira, et honorem tanquam religiosa; quæ vero ab omnibus sunt, honorem habere posse tanquam religiosa, licet stuporem non efficiant.*

18. *Venerationem imaginum esse æque antiquam atque earum usum, concluditur.* — Sic ergo intellecta hac imaginum veneratione, recta ratione concluditur, tam esse antiquam in Ecclesia, quam est antiquus sacer imaginum usus, ut recte dixit Nicephor. Constantinopolitanus, in dialogo orthodoxo de imaginibus, apud Turrianum supra, ubi inter alia inquit : *Cum querit hæreticus ubi scriptum sit de adoranda Christi imagine, respondendum est ibi scriptum esse ubi scriptum est, adorandum esse Christum, quia imago unum est cum prototypo, non natura, sed habitudi-*

*ne, et ideo communionem etiam habet, et nominis, et honoris, modo utique prædicto. Quam doctrinam, Athanasii auctoritate et aliorum Patrum confirmat. Potest præterea idem colligi ex ipso antiquo usu sacrarum imaginum; nam in templis et altaribus collocatae semper fuerunt, ut ex testimoniis citatis constat, et epis. 3 Adriani Papæ ad Carolum Magnum; hoc autem pertinet ad religiosum cultum, et venerationem; præsertim, quia etiam in sacris calicibus ponebantur, ut constat ex Tertulliano, in lib. de Pudicitia, cap. 7 et 10. Item in sacris litanis, et processionibus consuetum fuit, imagines crucis et Sanctorum deferri; et Beda, lib. 4 Historiæ Anglorum, cap. 25, refert, Augustinum, et socios ad prædieandum Evangelium, ingressos fuisse, *crucem pro rexillo ferentes argenteam, et imaginem Domini Salvatoris in tabula depictam.* Idem etiam ostendit usus accendendi lumina coram imaginibus, ut ex Fortunato, lib. 4 de Vita Sancti Martini, in fine, colligitur¹.*

19. *Sacrarum imaginum veneratio ex miraculis comprobatur.*—Accedit sæpe probasse Deum hanc venerationem imaginum, miraculis, seu signis mirabilibus, quale fuit in illa Christi imagine Cæsareæ collocata per modum statuæ, quod ad ejus pedem quædam herba exorta, cum fimbriam ejus crescendo attingeret, vires ad pellendum morbos accipiebat, ut historici, et Patres supra allegati referunt, et Gregorius Turonensis, lib. 1 de Gloria Martyrum, cap. 21, et similia divina beneficia facta per imaginem Christi ad Abagarum missam referunt historiæ supra citatæ. Huc etiam spectat, quod sæpe sola unctione olei lampadum ardentium coram imaginibus, infirmi sanati sunt, ut constat ex Fortunato supra, et aliis. Item satis admiratione dignum est, quod Damascenus, lib. 3 de Imaginibus, circa finem, refert de Theophilo Alexandrino, qui, propter inimicitias quas cum Chrysostomo in vita gesserat, mori non est permisus, *donec allata fuit imago Chrysostomi, quam ille cum adorasset, spiritum emisit.*

20. *Imagines contumelia afficere gravissimum sacrilegium.*—Præterea imaginum sacrarum injuriæ vel contumeliæ semper sunt reputata gravissima sacrilegia contra Sanctorum et rerum sacrarum debitum cultum; ergo signum manifestum a contrarij est, cul-

tum eis debitum semper fuisse sacrum existimat. Consecutio profecto evidens est. Assumptum vero colligimus imprimis ex verbis Simeonis Stylitæ, in epist. ad Imperatorem Justinum, relata in dicta septima Synodo, act. 4: *Omnem (inquit) blasphemiam excedit improbum hoc factum, quod in Deum Verbum pro nobis incarnatum, ejusque gloriosam Matrem, et venerandam, sanctamque Crucem designarunt. Nam cum videamus pias leges vestras, eos, qui imaginem aut statuam imperatoris ignominia afficiunt, extremo et justo mortis supplicio plectere, qua tandem pena puniendi sunt, qui in imaginem Domini nostri, ejusdem Matrem nefando facinore grassati sunt?* Ubi clare sentit, excedere hoc delictum injuriam civilem, etiam in personam imperatoris redundantem. Unde interdum acerbitas hujus criminis cœlesti signo monstrata est, quale fuit copia sanguinis, quæ ex imagine Crucifixi a Judæo telo confixa manavit, ut refert Sigebertus, in Chronic., anno 560; et Gregorius Turonensis, lib. 1 de Gloria Martyrum, cap. 22. Et quoddam simile ex Athanasio refertur in septima Syncedo, actione 4.

21. Denique iidem Patres, eisdem locis loquentes de imaginibus, eas sæpe sacras, sanctas et venerabiles vocant, et interdum verbo adorandi, interdum autem verbo venerandi aut salutandi eas utuntur, ut patet ex proxime allegatis, et ex Anastasio Sinaita, in Orat. de Sacra sinaxi, dicente, *non esse satis ingredi in ecclesiam, ac divinas imaginum Sanctorum formas, pretiosasque ac venerabiles cruces venerari, nisi etiam peccatorum sordes confessione et lacrymis abluantur.* Quam orationem in latinum conversam, Pontifici Gregorio XIII Achilles Statius Lusitanus obtulit, ut refert Baronius, anno Christi 599, num. 9 et 10. Qui etiam, anno 656, ex actis et vita Sancti Maximi, refert pulchram historiam et colloquium inter Maximum, et quosdam legatos imperatoris ad eum missos, quod his verbis concluditur: *Postea surrexerunt omnes cum laetitia lacrymis, et humili reverentia inclinarunt sibi invicem, et oratio facta est. Et unusquisque eorum sancta Evangelia, et pretiosam crucem, et imaginem Dei, et Salvatoris nostri Jesu Christi, et Genitricis eius Dominæ nostræ Deiparae salutarunt.* Quæ fere verba commemorat Euthymius, Sardensis Episcopus, in dicta Synodo, act. 4. Et in eis etiam expendi potest juramentum, quod actio sacra et religiosa est, super Evangelia, et imagines,

¹ Notavit Baronius, anno Christi 402, n. 53.

tanquam super res sacras, et religiosa veneratio dignas factum esse.

22. Ratio naturalis imaginum venerationem commendat. — Est ergo ex traditione Patrum manifestum, antiquam Ecclesiam cum usu imaginum earum sacram venerationem semper observasse. Et profecto ratio naturalis idem demonstrat, quia talis est honor, qualis est excellentia in qua fundatur; ratio autem venerandi imagines Christi vel Sanctorum est eadem excellentia, vel sanctitas prototyporum; ergo earum veneration ad eundem ordinem seu ad eamdem virtutem spectat, ad quam honor talium personarum pertinet, quia ad eas omnino refertur. Sicut honor imaginis regiae, regius quodammodo est, et illius injuria ad crimen læsæ majestatis pertinere censetur, quo exemplo et argumento, ut dixi, Patres et Concilia utuntur.

CAPUT XII.

OBJECTIONIBUS REGIS CONTRA IMAGINUM VENERATIONEM SATISFIT.

1. At rex Jacobus mirari non desinit, *quod hominum ingenium, que Satanae fraus, hoc tam audax commentum Ecclesiæ Christianæ obtrudere attenterat*¹. Vehementerque ambigit, pag. 59, *an in ultimo judicio excusationes istius modi, ex illis argutiarum ineptiis petitæ, Christo idolatriam exprobant, probandæ sint.* Hæc fere sunt verba regis, quibus prudenter, et pro causæ dignitate, obviare mihi difficultius est, quam fortissimis et clarissimis rationibus aut testimoniis respondere. Nam si leviter id egero, timeo ne fidei Catholicæ causam, remissius quam par sit, agere videar; si vero tantæ verborum acerbitatæ eadem loquendi libertate me opponam, vereor ne inde rex alicujus offenditio occasionem sumat; ideoque satius duco, hujusmodi verba, quæ rationem ad causam pertinentem non continent, præterire, et objectionibus quas rex innuit, satisfacere. Prius tamen serenissimum regem monere non omittam, ut consideret quam sit securius Catholicæ Ecclesiæ, Conciliis, ac Patribus antiquis simpliciter credere, quam de eorum sententia et auctoritate proprio arbitrio judicium ferre. Quamobrem iterum atque iterum humiliter obseero, ut consilium, quod alii præbet, sibi accipiat, medi-

teturque attentissime, quam rationem, vel (ut ipse loquitur) defensionem aut excusationem in ultimo judicio Christus Servator noster accepturus est, an illius qui in Deo, Sanctis, et eorum imaginibus colendis, vestigia Patrum sequitur, eorumque doctrinis operations suas accommodat; an vero illius qui novos doctores antiquis præfert, et proprio judicio traditiones Patrum damnare non ve-
retur.

2. Objectio prima. — Secunda. — Tertia. — At inquit rex obediendum esse Deo potius quam hominibus; Deus autem in Scripturis omnem imaginum adorationem, omnisque rei a Deo conditæ similitudinem coli vetat. Deinde omnis imago est idolum; idulum enim non est nihil, *non enim nihil fuit, cui Deus cultum deferri interdixit*; ergo omnis imago Dei, aut cujuscumque rei creatæ est idolum; ergo omnis adoratio imaginis est adoratio idoli, ac subinde idolatria. Tandem neque serpens æneus, neque corpus Moysis nihil erant; ille tamen contritus est, et hoc absconditum.

3. Primæ objectioni satisfit. — Imaginum veneratione nullo præcepto divino positivo prohibetur. — Respondetur, fieri non posse ut quod Ecclesiæ Catholicæ definitio ac traditio approbat seu præcipit, divino præcepto contrarium sit, cum Ecclesia ab Spiritu Sancto regatur, et Spiritus Sanctus non possit sibi ipsi contraire. Negamus ergo imaginum usum et venerationem esse contrariam divino præcepto. Nam vel illud præceptum ex novo Testamento allegatur, aut ex veteri; in novo ostendit non potest, nisi fortasse existimetur inclusum in prohibitione idolatriæ, quod frivolum et vanum esse statim ostendimus. Si autem ex veteri Testamento allegetur, interrogabo rursus, utrum alferatur tanquam positivum illius legis mandatum, vel tanquam naturale. In priori enim sensu, nolumus examinare an in lege veteri fuerit tale præceptum positivum, necne, quia hoc ad dogmata fidei non pertinet. Nam illo dato, inde inferre, venerationem imaginum, quam Ecclesia approbat, esse contra divinum præceptum, iudaicum continet errorem; quia si tale præceptum positivum fuit, cærimoniale fuit; aut ergo creditur nunc obligare, et hic est iudaicus error; nam secundum fidem cærimonialia mortua sunt, imo et mortifera; vel creditur esse abrogatum, et sic non potest ratione illius veneratio imaginum reputari contraria divino præcepto, quia præceptum abrogatum jam non est præceptum, neque opus, illi con-

¹ In Praefat., pag. 49.

trarium, voluntati legislatoris repugnare dici potest.

4. *Nullum datur præceptum naturale imaginum venerationem prohibens.* — *Ex locis Exodi 20, et Deut. 5, nihil concludi ostenditur.* — Si vero præceptum illud reputetur naturale et morale, negamus inveniri tale præceptum in Testamento veteri. Maxime enim sumi potest ex verbis Exodi 20, et Deuter. 5: *Non facies tibi sculptile, neque similitudinem omnem, quæ est in cœlo desuper, et in terra deorsum, neque eorum qui sunt in aquis sub terra.* In his autem verbis, vel non omnes rerum imagines, sed solum ordinatæ ad indebitum cultum (ut multi probabiliter credunt, etiam ex antiquis Patribus) prohibebantur; et sic quidem præceptum erat naturale; negamus tamen sub illo comprehendi Sanctorum imagines; ille enim non ad indebitum, sed ad honestissimum cultum, institutæ sunt, ut ostendimus. Vel illo præcepto omnes imagines simpliciter et absolute, et propter quemcumque usum institutæ (ut alii volunt) prohibitæ sunt, et sic præceptum non fuit naturale, et ita nihil ex illo inferri potest ad presentis temporis obligationem, ut jam declaratum est. Et Protestantes, qui illud in hoc sensu allegant, et nihilominus esse præceptum morale affirmant, probare id certe non possunt ex Scriptura; nam in illa hoc non dicitur; apud illos autem nulla alia probatio firma est, nec nos illam admittere tenemur. Verumtamen etiam non est sufficiens conjectura, quod verba illa in promulgatione Decalogi inserantur: nam ibi etiam multis verbis proponitur præceptum tertium de observatione sabbati, quod nihilominus quoad tales temporis determinationem non morale fuit, sed ceremoniale. Deinde nullus est Sanctorum Patrum, qui illa verba, in dicto absoluto sensu intellecta, dixerit continere præceptum morale naturale, et non potius positivum illi tempori accommodatum. Denique nulla verisimili ratione ostendi potest, illam prohibitio nem esse ex intrinseco dictamine legis naturalis.

5. Et certe ipse etiam rex hoc idem concedere cogitur; ait enim aliquem usum imaginum non esse prohibitum nunc, et consequenter nec naturali jure, idemque necessario fatetur de imaginum effectione; cum tamen verbum absolutum Dei fuerit: *Non facies tibi sculptile;* ergo vel per illa verba non fuit tantum prohibitum illud, quod erat per se malum, et ita continebant præceptum positivum

quod cessavit; vel, si dicatur per illa non esse prohibitum absolute facere imagines, sed facere ad venerationem, pari ratione restringi verba debebunt ad venerationem indebitam, seu superstitionis. Non enim omnis veneratio imaginum de se mala est, aut honori divino contraria, ut in superioribus ostensum est, et in sequenti puncto amplius declarabitur. Et ideo qui verba illa intelligunt de absoluta prohibitione imaginum, consequenter dicunt effectiōnem, et usum imaginum et statuarum ita fuisse prohibitam, ut illas per se depingere, aut fabricare non licet; hoc autem manifestum est, non esse juris naturalis, quamvis potuerit esse positivi, quod modo non curamus, quia nihil ad præsentem causam refert.

6. *Satisfit secundæ objectioni.* — *Discrimen inter idolum et imaginem.* — *Veneratio imaginum ab idolatria longissime distat.* — In altera parte confundit rex idolum cum imagine, et in hoc fundat objectionem, quæ proinde parvi est momenti: nam sacrae imagines Christi et Sanctorum, idola non sunt, et oppositum in septima Synodo, act. 7, damnatum est. Quamvis enim simulacra gentium, quæ idola erant, revera imagines fuerint, non propterea quælibet imago idolum est, sed illa tantum *quæ est Dei falsi simulacrum*, ut dixit Augustinus, lib. Quæst. in librum Judic. 441. Et idem fere sensit Tertullianus, lib. de Idolatria, c. 4, dicens, *idola esse imagines earum rerum, quas colit humanus error*, quantum hæc verba generaliora sunt, et comprehendunt omnem imaginem inventam vel propositam, ad colendum id quod non est cultu, aut veneratione dignum. Est ergo differentia inter idolum et imaginem, quod idolum est falsa imago, id est, rei quæ non est, vel quæ non est adoratione digna, ut communiter Patres de idolis scribentes interpretantur; imago autem dicitur, etiamsi veram representationem habeat. Restrinxendo autem generali rationem imaginis ad sacras et ecclesiasticas imagines, de ratione illius est, ut sit de re vera et vere sancta, ac proinde vere digna adoratione. Et sic dixit Adrianus Papa, in epist. ad Constantimum et Irenem, in septima Synodo, Act. 2, *imagines tantum ob recordationem Sanctorum pingi, venerari et coli, quos clare constat servos esse Dei, et pro nobis apud Deitatem obsecrari et intercedere.* Unde etiam constat quantum distet veneratione imaginum sacrarum ab idolatria; nam omnis cultus idolatriæ vel sistit in idolo tanquam in vero

Deo, vel per simulacrum tendit ad colendum pro Deo, eum qui non est, vel ad colendum ut numen, impium aliquem, seu dæmonem; veneratio autem imaginum tendit, vel proxime in honorem Dei, vel saltem alicujus personæ vere sanctæ, qui tandem in Dei etiam honorem redundat.

7. Qua ratione idolum dicatur nihil. — Neque contra hoc obstat, sive idolum dicatur esse aliquid, ut rex contendit, sive esse nihil, ut ipse Catholicis objicit. Nemo enim unquam negavit idola gentium quoad ipsa corpora simulacula esse res alias etiam materiales, et sensibus patentes, quod commune etiam est imaginibus sacris; in hoc ergo sensu idolum aliquid est. Et nihilominus propter falsam representationem dici potest nihil (sicut vocatur a Paulo, 1 ad Corint. 8 et 10) quia res, quam repræsentat, vel nulla vera res est, vel nullam veram excellentiam habet, ob quam sit colenda, ut Origenes, Homil. 8 in Exodum, et aliqui interpres Pauli illud ejus verbum intellexerunt. Quamvis etiam possit idolum diei nihil, quia nullius est virtutis aut potentiae, ut ibi interpretatur Chrysost., homil. 20, quem Theophylact. et alii sequuntur. Et sic etiam asseruit Augustinus, 20 contra Faustum, c. 5, ea, quæ colunt gentes, aliquid esse, quia sunt idola, in quibus dæmonia adorantur, vel aliquæ partes mundi, quæ sunt vera corpora, non tamen colenda, sed ad salvatorem (ait) nihil sunt. Sicut alias etiam dixit idem Augustinus peccatum nihil esse, non quia actus peccati nihil sit, sed quia malitia ejus, qua in ratione peccati constituitur, non est aliquid, sed privatio boni. Et simili modo Hieronym., in Osea 7, in fine, dicit, *hæreticos impiissimas hæreses extruentes converti in nihilum*, juxta translationem Septuaginta, ibidem, *non quo desierint esse, sed quo comparatione Dei omnes, qui contra Dominum sapiunt, non esse dicuntur: nam si Deus est veritas, quidquid contrarium veritati est, mendacium est, et nihil nominatur*. Et ita etiam intelligit ibidem illud Esth. 14: *Ne tradas sceptrum tuum iis, qui non sunt. Haud dubium (ait) quin idola significet; nimis, quia falsa sunt, et mendacium, ut tale est, nihil est*. Est ergo idolum res aliqua, ut imago et materia quedam est, et est nihil, quatenus nihil est quod repræsentat, sive sit omnino nihil, seu nulla vera res, sive sit nihil quatenus aliquid divinum aut sanctum repræsentatur, quod vere sanctum non est. Et hinc habet idolatria quod mala sit, et quod idolatria

sit, et ideo multum ab illa differt saecularum imaginum veneratio.

8. Adoratio alicujus creaturæ est Scripturæ consentanea. — Verum hujusmodi responsiones a rege despiciuntur tanquam sophistica et arguta effugia; nam *Scriptura* (inquit) *omnis rei a Deo conditæ similitudinem colit*. Sed nihil nos movent verba regis, tum quia distinctiones illæ non sunt a nobis inventæ, sed a Patribus; tum etiam quia sunt rationi naturali valde consentaneæ. Ad Scripturam vero imprimis respondemus, juxta Patrum et Ecclesiæ traditionem, rectamque rationem esse intelligendam. Deinde negamus Scripturam prohibere omnis similitudinis rei conditæ venerationem; nullibi enim potest hoc præceptum ostendi, nisi forte in prohibitione faciendi sculptile, omnemque similitudinem, intelligatur inclusa. Et tunc ad responsionem datam revolvimur. Nam vel fuit positiva, et nunc non obligat, vel si naturalem et moralem obligationem continet, intelligitur de effectione idolorum, seu (quod perinde est) de effectione imaginum, quæ tanquam dii vel tanquam deorum simulacula colantur. Estque hoc ipsi Scripturæ consenteum, quæ aliquam creaturæ adorationem permittit, vel interdum jubet. Quod argumentum auctoritate Hieronymi confirmat Adrianus Papa, in dicta epist. ad Constantin., afferentis in exemplum, *duo Cherubim aurea, et crustas (inquit) illas, quas fabricavit Moses*. Dicitque Deum concessisse Iudeis hæc adorare. Quamvis enim hoc expresse in Scriptura non legatur, tamen id videtur collegisse ex eo, quod erant imagines sacræ, vel certe quia erant veluti partes propitiatorii, quod etiam veneratione dignum erat; et ita in epist. 17, inter Epistolas Hieronymi, quæ est Pauli et Eustochii ad Marcellam, et stylus docet a Hieronymo esse conscriptam, sic dicitur: *Venerabantur quondam Iudei Sancta Sanctorum, quia ibi erant cherubim et propitiatorium, et arca testamenti, manna, virga Aaron, et altare aureum*; et additur: *Nonne tibi venerabilius videtur sepulchrum Domini?* quæ posteriora verba declarant priora etiam intelligi de veneratione sacra. De qua clarius dicitur Psalm. 98: *Adorate scabellum pedum ejus, quoniam sanctum est, ubi (ut supra dixi) per scabellum pedum Domini, area testamenti intelligitur, et ex ratione adorandi, quæ proponitur, constat sermonem esse de sacra veneratione. Et hanc fuisse Dei voluntatem, patet ex modo quo volebat arcum illam re-*

verenter tractari, Deuteron. 17, et Josue 3, et 1 Reg. 6. Et ratio sanctitatis, in eisdem verbis data, ostendit res etiam alias dicatas divino cultui, quæ sanctæ in Scriptura vocantur, fuisse simili veneratione tractandas, ut aperte sentit Damascenus, lib. 4 de Fide, c. 17. Non ergo omnis veneratio rei creatæ erat in Scriptura prohibita, sed illa tantum quæ ad cultum veri Dei referri non poterat.

9. *Occurritur objectioni tertiae.* — Denique ad exempla illa, quæ rex adducit de serpente æneo et de corpore Moysi, respondemus, ex rebus partim incertis, partim ad causam non pertinentibus sumpta esse. Nam, licet verum sit, regem Ezechiam confregisse serpentem æneum, quia filii Israel adolebant ei incensum, ut habetur 4 Regum 18, non est tamen certum fuisse prohibitum in illa lege quocumque modo adorare illum serpentem. Imo multi putant licuisse, et in principio id factum fuisse debito modo, utique venerando in illo, et per illum, Deum auctorēm tanti beneficii. Quod potuisse recte fieri testatur D. Augustinus, libr. 3 de Trinitate, cap. 10, et non constat specialiter fuisse a Deo prohibitum : *Postea vero, ait Augustinus, lib. 10 de Civitat., cap. 8, cum populus errans, serpentem propter facti memoriam reservatum, tanquam idolum colere cœpisset, Ezechias rex religiosa potestate Deo servieis cum magna pietatis laude contrixit.* Sic autem facto illo explicato, nihil ad causam de imaginibus Ecclesiæ pertinet, quia imagines non adorantur a fidelibus ut idola, neque hujus mali periculum morale imminet. Et quando aliquis error aliquid contingeret, non fractione imaginum, sed doctrina et luce Evangelii depellendus esset error, et pius imaginum usus conservandus, ut dixit Gregorius, in dicta ep. 9 libri 9. Alli vero existimant, nunquam Judæos veneratos esse serpentem illum, imo id fuisse prohibitum in lege veteri, non naturali præcepto, sed positivo, nec speciali lege, sed illa generali qua probabiliter credunt, tunc fuisse prohibitam omnium imaginum venerationem, populum autem cœpisse agere contra illud præceptum, et ideo Ezechiam ad occasionem tollendam serpentem confregisse. Qua etiam admissa sententia, nihil habet commune illud exemplum cum causa imaginum, tum quia præceptum illud, si fuit, in lege gratiæ cessavit; tum etiam quia occasio errandi, quæ tempore legis erat, ex propensione ad idololatriam, partim ex gentilium consuetudine et exemplo, partim ex ignorantia et in-

firmitate fidei profecta, tempore legis gratiæ non invenitur, ut recte notavit Damascenus, dicto libr. 4, cap. 17, et latius orat. 1 de imaginibus.

10. *Satisfit secundo exemplo.* — In alio vero exemplo, de corpore Moysi, solum ex Scriptura habemus mortuum fuisse jussu Dei, et ab eodem sepultum, ejusque sepulchrum occultum fuisse hominibus, Deuteron. ult. Quam vero ob causam Deus voluerit occultare corpus Moysi, Scriptura non declarat; Protestantes vero existimare videntur causam fuisse, ne Judæi occasionem sumerent committendi idololatriam, corpus Moysi vel ejus sepulchrum venerando. Et in hoc videatur fundari regis argumentum, ut saltem propter tollendam occasionem imagines etiam tollendæ sint. Cui imprimis respondere possumus, negando illationem et similitudinem, quia jam ostensum est non esse in hac imperfectione Ecclesiam Synagogæ aequiparandam. Alias etiam sepulchra Apostolorum et Martyrum deberent esse fidelibus ignota; imo reliquiæ Sanctorum omnium comburendæ essent, ne fideles ad idololatriam per occasionem inducerent, quod non solum impium, sed etiam ridiculum est.

11. Deinde responderi potest argumentum illud non in Scriptura, sed magis in propria conjectura esse fundatum, et ideo parvi momenti esse. Nam est quidem illa ratio probabilis, ut illam expendit Abulensis, ad illam accommodans altercationem inter Archangelum et diabolum super Moysi corpore, cuius meminit Judas Apostolus, in sua canonica. Et eamdem rationem insinuat Chrysostomus, Hom. 5 in Matth., quamvis non dicat occultasse Deum sepulchrum Moysi propter illam causam, sed ait, *non introduxisse Moysem populum in terram promissionis, ne Judæi illi prorsus tribuerent omnia beneficia, quæ per illum a Deo receperant;* et adjungit: *Ut igitur omnis hujusmodi amputaretur occasio, ipsum quoque est occultum ejus sepulchrum.* Eamdemque rationem indicavit Augustinus, vel auctor operis de Mirabilibus Sacrae Scripturæ, libr. 4, capite ultimo. Sed nihilominus non est ratio necessaria. Nam idem auctor de Mirabilibus Sacrae Scripturæ addit aliam, videlicet, *ut illam faciem, quæ consortio sermonis Domini rutilaverat, mortis mœrore repressam, nullus videret.* Dici etiam potest id factum esse quasi ad complementum et aggerationem poenæ injunctæ Moysi, propter culpam diffidentiæ circa fluxum aquæ de pe-

tra; illa enim de causa terra promissionis privatus est, Numer. 20, ut recte ponderat Chrysostomus, lib. 4 de Sacerdotio, prope initium; et Augustinus, in lib. 50 Homiliarum, hom. 27, et Enarrat. in Psal. 98, versus finem. Videtur autem voluisse Deus, ad majorem populi terrorem, ut nec vivus, nec mortuus illam terram ingredetur, ideoque occultavit sepulchrum ejus, ne Judæi ossa illius secum deferrent, sicut ossa Jacob et Josephi transtulerunt. Præterea dici potest occultasse Deum corpus Moysi, ut in majori admiratione et interna reverentia haberetur. Hoc enim insinuavit Hieronymus, Amos cap. 9, dicens: *Ascendit Dominus cum Moyse, cuius sepulturæ locus, quia in cælum ascenderat, in terra non potuit inveniri.* Denique dici potest, et fortasse securius, hoc esse unum ex his quæ secundum consilium voluntatis suæ operatur Deus, quorum causas invenire non possumus, et querere supervacaneum est, id quod insinuavit Chrysostomus, orat. 20 ad Hebr., dicens, *quædam antiquorum Patrum ossa translata esse in terram promissam, Moysis autem ossa sita fuisse in terra aliena, et non solum illius, sed etiam Aaronis, Jeremie et Danielis.* Et similiter, ait, *quorum-dam Apostolorum, ut Petri et Pauli, etc., sepulchra novimus, aliorum autem nescimus, cujus rei rationem querere superfluum esset.* Illa ergo conjectura in tam gravi causa supervacanea etiam est.

CAPUT XIII.

DE IMAGINIBUS DEI UT DEUS EST.

1. *Objectio regis contra imaginis Dei adorationem.* — *Imago Dei duplex.* — Præter objectiones generales de veneratione imaginum, duas alias in particulari proponit rex: unam, contra imaginem Dei, utique ut Deus est; aliam contra crucis Christi adorationem; de hac posteriori dicemus capite sequenti, hic prior expendenda est, in qua dicit: *Non solum est prohibitum (scilicet in veteri Testamento) adorare imaginem Dei, sed etiam effingere, additaque ratio, Deum sub nullius unquam aspectum cecidisse.* Verumtamen in hoc puncto vulgaris distinctio imaginum Dei permittenda est: una est propria, ut si quis velit per depictam formam ad vivum exprimere propriam Dei formam, seu naturam, quæ dici potest formalis imago; alia vero est metaphorica imago, in qua per aliquam figu-

ram corpoream repræsententur aliquo modo et per analogiam proprietates rei superioris, sicut per figuram juvenis, pennis et induimentum album habentis, repræsentantur Angeli.

2. *Propria et formalis Dei imago describi nequit.* — Quod ergo spectat ad primum genus imaginum, de fide certum est non esse licitum, *imo esse stultissimum conari talem imaginem Dei depingere.* Quia cum Deus corpore careat, impossibile est per imaginem corpoream, sive sculptam, sive depictam, ad vivum Deum repræsentare. Et hoc est quod dicitur Isaiae 40: *Cui similem fecistis Deum, aut quam imaginem ponetis ei?* et cap. 46: *Cui assimilastis me, et adæquastis, et comparastis me, et fecistis similem?* Quæ verba, si attente considerentur, non tam continent prohibitionis formam, quam declarant esse per se malum et impossibile, talem Dei similitudinem aut imaginem formare. Et ideo non solum in veteri Testamento, sed etiam in novo, eodem fere modo idem prohibitum est, dicente Paulo, Actor. 17: *Non debemus aestimare auro et argento, aut lapide, sculpture artis, et cogitationis hominis Divinum esse simile.* De hoc ergo genere imaginis Dei nulla est controversia, nam in hoc sensu et Patres communiter, quos referre non est necesse, et septima Synodus, Act. 3 et 5, et Scholastici omnes has imagines Dei omnino improbandas, tanquam verae Dei existimationi contrarias, constantissime docent.

3. *Descriptionem metaphoræ imaginis Dei, neque malam neque prohibitam esse.* — De altero vero genere imaginum Dei nihil hactenus est certa fide stabilitum, et consulto Concilium Tridentinum de imaginibus Christi, Deiparæ, et Sanctorum agens, nihil de imaginibus Dei dixit; et Concilium Nicænum II, reprobando priores imagines Dei, de posterioribus tacuit, et ita inter catholicos Doctores variæ sunt in hoc puncto opiniones. Cum ergo hic solum de dogmatibus fidei agamus, possemus hanc regis objectionem omittere, ut in hac parte in suo sensu abundet. Quia vero docere intendit talium imaginum usum esse impium, et contra divinum præceptum, et nos credimus, longe probabilius esse neque malum, neque prohibitum, *imo honestum esse et magis pium*, si prudenter fiat, magisque consentaneum Ecclesiæ usui, ideo utrumque breviter probandum est. Primum ergo ostendimus fere discursu supra facto, quia depingere talem imaginem Dei non est

prohibitum in novo Testamento de speciali præcepto positivo, quia de imagine Dei solum inveniuntur in novo Testamento citata verba Pauli, quæ aperite tantum jus naturale declarant.

4. Exponuntur loca Scripturae de imaginibus Dei loquentia. — Si autem dicatur contineri hanc prohibitionem in veteri Testamento, de illa iterum interrogamus qualis fuerit illa prohibitio; res enim dubia est, tam quod ad sensum, quam quoad genus præcepti. Unde si prohibitio dicatur esse moralis, et ex lege naturali, intelligenda erit de imagine propria, et non de metaphorica, quia nulla est verisimilis ratio quæ ostendat esse per se et intrinsece malum, Deum metaphorice deppingere, ut statim dicam. Et quidem in locis Isaiae citatis, in quibus jus ipsum naturale explicatur, de propriis imaginibus Dei sermo est; nam, ut notat Hieronymus in c. 40, irridet Isaias stultitiam gentium, qui putabant idola sua esse Deos, vel. propriam Dei formam repræsentare. Unde ad illa verba: *Cui similem fecistis Deum, aut quam imaginem ponetis ei?* addit Hieronymus, *qui spiritus est, et in omnibus est*, etc. In cap. autem 46, reprehenduntur Judæi gentium stultitiam in hoc imitantes. De hac item forma possunt convenienter intelligi verba Moysis, Deuter. 4: *Locutusque est Dominus ad vos de medio ignis, vocem verborum ejus audistis, et formam penitus non vidistis.* Quamvis etiam sensus esse possit, nullam omnino formam vel quasi personam sensibilem vidiisse, sed tantum vocem loquentis audivisse; nam hoc magis indicant alia verba, quæ Moyses infra repetit: *Non vidistis aliquam similitudinem in die, qua locutus est nobis Dominus in Oreb de medio ignis, ne forte decepti faciatis robis cunctam similitudinem.* Et ita est probabile fuisse ibi, et Exodi 20, prohibitum fingere quamcumque imaginem Dei, sub quovis prætextu, quia rudis ille populus facile existimaret illam esse propriam formam Dei, vel ipsas statuas ut deos adoraret. Tale autem præceptum sic intellectum positivum fuit ac cærimoniale, conveniensque illi populo propter imperfectionem suam; et ideo nunc jam cessavit, et mutato etiam rerum statu non fuit necessarium, quia illa occasio seu periculum sublatum est, ut supra dixi. Cujus etiam rei sufficiens signum est, quia in Christi Ecclesia permittitur usus talium imaginum Dei, non solum nunc, sed ante mille trecentos annos, ut intelligi potest ex variis carminibus quæ

de his imaginibus habet Paulinus, Epist. 12. At Ecclesia non permisisset illas tot sœculis, si divino jure prohibitæ fuissent.

5. Instantia regis. — Encodatio. — Sed instat rex, non solum propter periculum adorationis, sed etiam propter indecentiam et inutilitatem, prohibitum esse tales imagines effingere. Nam, *cum Deus (inquit) ad virum exprimi non possit, supervacaneus est labor, conatusque inanis, id falsa adumbratione corrumpere, quod imitari non possis; quod nemo, non dico princeps, sed vix quisquam homo plebeius in sua effigie ferre sustineat.* At rationes istæ in Scriptura non leguntur, sed a Protestantibus excogitate sunt. Et in priore earum quidpiam falsum supponitur, et sanctæ Scripturæ contrarium, ne dicam injuriosum. Nam si omnes metaphoricæ imagines, quæ ad vivum non possunt imitari prototypa, falsa adumbratione illa corrumpere dicenda sunt, *omnes etiam parabolæ ac figuræ significandarum quarumcumque rerum, quæ non ad proprietatem accipiendas sunt, sed in eis aliud ex alio est intelligendum, dicentur esse mendacia,* ut in simili dixit Augustinus, lib. contra Mendacium, c. 10. Sic ergo, quando descendit Spiritus Sanctus in specie columbæ, vel quando sub specie linguarum tanquam ignis missus est, falsa adumbratione forma ejus corrupta est. Idemque erit dicendum de imagine Christi sub specie agni, cum tamen illius imaginis usus antiquissimus in Ecclesia sit. Item imago Angeli sub specie juvenis, etc., esset formæ angelicæ corruptio, quod non solum est contra septimam Synodum, sed etiam contra Scripturam, quatenus in illa legimus imagines Cherubim, Exod. 25, 3 Reg. 6. Imo etiam est contra omnem rectam rationem, quia nos non capimus res incorporeas, nisi instar corporearum, ut recte declarant Dionysius, c. 2 et ult. de Cœlesti Hierarch., et Tertullian., in Apolog., cap. 29. Denique omnes sensibiles apparitiones Dei aut Angelorum in Scripturis essent formarum illorum falsæ corruptiones. Quia ergo in metaphorica repræsentatione non est falsitas, ideo metaphoricæ imagines Dei falsitatis argui non possunt. Neque etiam potest inanis aut supervacaneus reputari usus earum, cum deservire possint ad manudendum quasi intellectum hominis, ut invisibilia instar visibilium cognoscat, et ad memoriam mysteriorum, quæ Deus sub forma visibil operatus est.

6. Unde facile etiam patet responsio ad

aliam conjecturam, quod nullus princeps, imo nec privatus homo talem deformationem suæ formæ permitteret; nam eodem modo Deum, qui sæpe sub forma visibili apparuit, arguerent, quia nullus homo ita se ipsum deformaret. Imo etiam reprehenderent Scripturam, quia sæpe loquitur de Deo tanquam de homine, tribuens illi dolorem, pœnitentiam, corporis membra, et similia; nam est eadem ratio de verbis scriptis quæ de imaginibus; quia (ut recte dixit Gregorius) illud est imperitis imago, quod doctioribus scriptura. Est ergo debilis illa conjectura, tum quia in illis imaginibus nulla est turpis deformatio, sed metaphorica significatio; tum etiam quia non fit sine gravi causa et necessitate, orta partim ex divina excellentia, quæ non potest aliter repræsentari, partim ex indigentia hominis, qui non potest spiritualia prout in se sunt concipere, cum tamen per sensus debeat excitari ad eorum cognitionem vel recordationem. Ideoque non est simile neque magni momenti argumentum ab hominibus sumptum, quia homo sensibilem formam habet propriei imaginis capacem, et nihilominus non dignatur homo, etiam princeps aut imperator, excellentiam suam aut fortitudinem, per metaphoricam imaginem aquilæ aut leonis, aut aliam similem repræsentari.

CAPUT XIV.

DE CRUCIS CHRISTI ADORATIONE.

4. Ultimo invehitur rex contra crucis Christi venerationem. Sed ne diutius forsan quam necessarium aut par sit, in hac materia immorer, hoc punctum breviter expediam, tum quia eadem fore est ratio de cruce quæ de aliis reliquiis vel imaginibus, tum etiam quia rex nihil in hoc objicit, nisi argutias quasdam quas olim Claudius Taurinensis et Wiclephus objecerant, et a Catholicis inanes reputatae sunt. De cruce igitur triplex est consideratio, ut alibi dixi¹, scilicet, de signo ejus circa propriam personam digito vel manu espresso, vel de imagine crucis facta ex permanenti materia, vel de ipsam cruce in qua Christus passus est, vel integra, vel de particulis ejus. De prima consideratione nihil rex attigit, et de illa dixi loco citato, sect. 3. Se-

cundam etiam considerationem rex omisit, quia eadem ratio est de imagine crucis quæ de reliquiis.

2. *Dilemma regis adorationem crucis Christi oppugnantis.* — Contra crucem vero tertio modo spectatam quod veneranda non sit, hac brevi ratione multis verbis conatur efficere. Nam si veneranda esset, maxime ratione contactus; hanc enim rationem præcipue solent scholastici assignare. *An igitur ratione omnis contactus, vel alicujus?* Primum dici non potest, tum quia licet mulier, quæ erat in fluxu sanguinis, tangendo fimbriam vestimenti Christi senserit virtutem ejus, non ideo eam senserunt omnes qui Christum premebant, Lnc. 8; tum etiam quia alias labia Judæ osculo Christum tradentis, et manus militum cædentiū et crucifigentium Christum, et terra Chanaam, quotidianis Christi vestigiis tacta, essent a nobis adoranda, quod impium et profanum est dicere. Si autem non omnis contactus, sed aliquis singularis ad hoc genus adorationis sufficit, oportet ostendere quis ille sit, et ubi Christus singularem hanc benedictionem in lignum illud effuderit, vel privilegium concesserit. Augetque objectionem his modis. Prima, quia Christus mulieri sibi dicente: *Beatus venter qui te portavit*, respondit: *Quinimo beati qui audiunt verbum Dei*. Secundo, quia, licet Christus dedisset suæ cruci virtutem faciendi miracula, non ideo esset adoranda, nam umbra Petri faciebat miracula, quæ non idcirco poterat adorari. Tertio, quia Prophetæ maledicunt cultoribus imaginum, quæ oculos habent, et non vident, et aures quæ non audiunt; ergo hæc acerbius dicerent in eos, qui partem ligni, neque ad aurium vel oculorum similitudinem formatam venerantur.

3. *Nullam vim patrandi miracula ex contactu corporis Christi in cruce fuisse derivatam.* — Videtur rex in sua objectione supponere vel existimare, nos fingere aut cogitare, crucem Christi et singulas partes ejus ex contactu corporis Christi vim aliquam, seu virtutem faciendi miracula, aut extraordinaria beneficia conferendi eliciuisse, aut Christum ipsum, speciali concessione et voluntate, illi contactui vim similem vel dignitatem contulisse. Hoe autem a sensu Ecclesiæ Catholicæ alienum est. Nam imprimis, licet verissimum sit, et historiis ac testimoniis Patrum satis comprobatum, Christum per crucem suam multa edidisse miracula quæ nunc referre non est necesse, nihilominus nullus as-

¹ 1 tomo tertiae partis, disp. 56.

seruit vel cogitavit¹, Christum virtutem aliquam miraculorum effectricem cruci suæ indidisse, aut certa lege et promissione statuisse, ad præsentiam vel tactum illius, signa facere, nam hoc nullo fundamento affirmari potest, neque ad illius crucis venerationem ducitur necessarium. Neque etiam fingere oportet Christum, speciali voluntate et quasi positiva institutione, dedisse illi cruci peculiarem dignitatem ob quam honoretur; nam hoc etiam figmentum non modo fundari non potest, verum nec satis intelligi, et ad veritatem, et rem de qua tractamus, supervacuum est et impertinens.

4. *Catholica de Christi crucis adoratione doctrina explicatur.*—Doctrina ergo Ecclesie et Theologorum catholicorum est, sicut reliquiae Sanctorum sunt venerabiles, non ex virtute vel institutione superaddita, sed quia, supposita vera sanctitate animarum, seu personarum cum quibus peculiarem habuerunt conjunctionem vel relationem sufficientem ut aliquid illarum esse censeantur, ex natura rei sequitur, ut propter excellentiam talis animæ vel personæ in veneratione habeantur, ita etiam majori ratione erux Christi et quæcumque illius pars, tanquam pretiosæ Salvatoris reliquiae a veris et piis Christianis habentur. Quia sustinendo Christum ipsum, instrumentum fuit nostræ redemptionis, ipsi Christo peculiari modo conjunctum, et ab illo sanctificatum. Ut significarunt Petrus, 1 ep., c. 2, et Paulus, ad Colos. 4 et 2, qui etiam ad Hebr. 9 indicat, fuisse quasi altare in quo Christus se pro nobis obtulit. Ac proinde ob ejusdem Christi amorem et reverentiam venerabilis est. Atque ita rationem venerandi Christi crucem explicuit Damasc., lib. 4, c. 12, dicens: *Hoc ingentis pretii lignum, ac reverandum, in quo Christus seipsum sacrifici causa pro nobis obtulit, ut ex sancti corporis et sanguinis contactu sanctificatum, optimo jure adorari solet.* Et infra: *Nam si eorum, quorum amore flagramus, et dominus nobis chara est, et lectus, et vestis, quanto magis ea quæ Dei ac Salvatoris sunt, per quæ nobis salus parta est.*

5. Et hanc fuisse mentem antiquæ Ecclesiæ, satis colligitur ex canon. 73, sextæ Synodo attributo, et ex septima Synodo, et ex

¹ Vide Paulinum, ep. 41, ad Severum; Evag., lib. 4 Hist., c. 25; Ruffinum, l. 10 Hist., c. 3; Theodoreum, lib. 1, cap. 18; Severum Sulpicium, lib. 2 Sacrae Hist.

Hieronymo, ep. 17; Ambrosio, Orat. de Obitu Theodosii; Chrysostomo, Homil. Quod Christus sit Deus, ubi ait, *totum orbem contendere aliquid ex illo ligno habere. Et qui habent* (ait), *viri et mulieres, illud auro includunt, ut cervicibus suis aptent, et inde valde sunt honestati, et magnifici, et muniti, et protecti.* Et Gregorius Nyssenus, Orat. de Sancto Baptismate, non longe ab initio: *Lignum crucis* (ait) *omnibus hominibus salutare est.* Per quod verbum indicat beneficia, quæ Deus solet per hujusmodi crucis reliquias conferre, cum vera fide et pia veneratione illa potentibus. Quamvis enim sola miracula sufficientem rationem adorandi non continerent, ostendunt tamen placitam esse Deo hujusmodi venerationem, ac subinde crucem ipsam veneratione dignam esse. Adduntque dicti Patres, præsertim Damascenus, idem esse de aliis Christi reliquis, ut sunt clavi, lancea, præsepe, induimenta, et vivificum sepulchrum. Adducitque Damascen. illud Psalm. 131: *Adorabimus in loco ubi steterunt pedes ejus.* Idemque confirmat illud Isai. 41: *Erit sepulchrum ejus gloriosum, quod de Christi sepulchro ab omnibus intelligitur, et merito, quia relativum ejus refert radicem Jesse, quam esse Christum expponit Paulus, ad Romanos 15.* Dicitur autem illud sepulchrum gloriosum futurum, non solum eo tempore quo Christi corpus in illo jacuit, sed etiam perpetuo ratione illius. Et ita Hieronymus, ep. 17, dicit, *ibi esse predictum, locum sepulturæ Domini esse ab omnibus honorandum.* Hæc ergo veritas ex principiis fidei et ex Scriptura colligitur, et rationi naturali est consentanea, et nullum ostendi potest præceptum quo talis veneratione crucis prohibeat. Quid ergo est quod Protestantes in tam pio religionis opere calumnientur?

6. *Occurritur dilemmati regis.*—Ad objectionem autem regis, et interrogationem in ea factam, respondit venerabilis quidam Anglus¹, non omnem contactum corporis Christi fuisse sufficientem rationem hujus venerationis, *sed tactum innoxium*, et ita vitabat absurdum illicitum ex osculo Judæ. Addunt vero alii ad majorem explicationem, si præcise spectaretur ratio contactus, non deesse in illo sufficientem causam adorationis respectivæ, propter Christi excellentiam; impietatem autem personæ, illam impedire, ne adoratio in hominem impium refundatur. Et simili modo, ubi fuerit indecentia vel occasio scandali, vi-

¹ Waldensis, tom. 3, c. 18.

tanda erit adoratio, non obstante contactu, quod ad exemplum de asina in qua Christus sedet, accommodandum est. De terra vero illius regionis, quam Christus suis pedibus tegit, si constaret nunc permanere quoad illas partes quas Christus tegit. in eadem esset habenda veneratione. Nam et Augustinus, 22 de Civit. c. 8, testatur suo tempore *miracula facta esse per terram sanctam de Hierosolymis allatam*, et a fidelibus fuisse in reverentia et honore habitam. Hoc vero tempore verisimile est terram illam adeo esse mutatam, ut ratio illa contactus cessaverit. Et nihilominus si aliquis viva fide et recordatione Christi, et vestigiorum ejus, illam veneretur, pie faciet, et nulla erit reprehensione dignus, quia tota illa actio ad Christum refertur, et relatio illa (ut sic dicam) sufficiens fundamentum habuit in actionibus et gressibus Christi.

7. Unde ad dilemma Regis respondemus, contactum per se sufficere ad hanc venerationem respectivam, nisi aliquid aliud secundum prudens judicium impedit. Et ideo non oportet ostendere ubi Christus hanc prærogativam suæ cruci contulerit, quia suis operibus id satis ostendit recta fide et ratione utentibus; neque hoc est privilegium crucis, sed est communis proprietas omnium reliquiarum Christi. Unde exemplum ibi adductum de muliere tangente, et turbis prementibus Christum, prædictis recte perpensis, nequaquam urget, quia hæc venerationis ratio, quæ ex contactu sumitur, non est aliquod opus miraculosum, quale fuit illius mulieris sanitas, quam Christus contulit soli indigenti, et ex fide petenti, sicut voluit, et altissimo sue voluntatis consilio disposita.

8. *Responsio ad primam confirmationem.*—*Ad secundam.*—*Ad tertiam.*—Ex aliis confirmationibus, prior nihil ad causam facit, quia Christus respondens : *Quinimo beati qui audiunt verbum Dei*, docuit quidem beatorem fuisse Beatissimam Virginem credendo, et diligendo Christum, quam illum corporaliter concipiendo, non tamen negavit quin fuerit magna dignitas Virginis, Christum in ventre suo portare, neque negavit mulierem illam vere et fideliter dixisse : *Beatus venter qui te portavit*, quamvis neque omnem, neque præcipuam rationem illius beatificationis explicaverit, ut eleganter attigit Beda, lib. 4 in Lucam, cap. 49. Alia vero de umbra Petri facile expeditur negando exempli similitudinem, tum quia umbra nihil est, tum etiam quia (ut dixi) ratio hujus adorationis non est

virtus aliqua faciendi miracula. Denique veneratores crucis longe sunt a maledictionibus Prophetarum contra adorantes idola, quia non respiciunt ad formam vel figuram ligni, sicut idololatræ, sed ad Christum, quem in ligno, et propter quem lignum adorant.

CAPUT XV.

DE ERRORE CIRCA PURGATORIUM.

1. *Jacobus rex purgatorium irridet.*—*Pri-
mum fundamentum.*—*Secundum.*—Inter alia dogmata catholice fidei, in quibus rex ab Ecclesia Romana se dissentire fatetur, articulum de purgatorio ponit, pag. 52 Præfat.; tam leviter tamen illum attingit, ut ludere potius quam fidei causam agere videatur. Nam, licet irrideat et contemnat purgatorii articulum (quod ipse commentum vocat), nihil tamen solidum ad illum impugnandum adducit; imo, licet illum non credat, non tamen absolute negat esse purgatorium; sed *si forte sit*, dicit, *nobis esse ignotum, satisque nobis esse credere eas animarum sedes, quas nobis Deus in Scriptura revelavit, caelos, scilicet, et inferos, neque ulterius de dirinæ providentiae arcanis scrutandum esse.* Quocirca fundamentum præcipuum regis est, quia purgatorii assertio ex Scriptura ostendi non potest: *Sane (inquit) Bellarminus nullum ei ex Scriptura fundamentum astruere potuit.* Unde infert: *Satis certe nobis fuerit, eas animarum sedes cognoscere, quas Deus suo verbo nobis voluit esse revelatas.* Præter hoc vero fundamentum, tacite, et quasi aliud agens, inserit aliud quasi latenter, dicens de Christo : *Ipse est vera expiatio, verumque purgatorium nostrorum peccatorum, quasi subinferens :* Ergo aliud purgatorium necessarium non est. In his autem verbis radix non solum hujus erroris, sed etiam plurium aliorum, a quibus iste pendet, delitescit, et ideo ab illo incipiendum est, et totum uleus breviter aperiendum, ut integra errorum connexio defegatur, ut vel inde rex intelligat, non recte de rebus ad salutem necessariis judicare, cum hæc *indigna existimet, in quibus tempus, et opera impendatur.*

2. *Error Protestantum circa redemptions Christi, et justificationem impii.*—Protestantes igitur ita de Christi redemptione, et impii justificatione, seu remissione peccatorum plerunque saltem censem, ut totam nostram justitiam in remissione peccatorum ponant,

Remissionem autem hanc solum in hoc docent consistere, quod peccata nobis a Deo propter Christum non imputentur, non in hoc quod vel non sint, vel non fiant. Addunt deinde tunc non imputari, quando aliquis firma fide credit, sibi non imputari peccata propter Christum, sive quæ prius fecit, sive quæ in præsenti cum tali fide et apprehensione actu committit; nam Christus hoc nobis promeruit, pro peccatis nostris sufficienter satisfaciendo. Atque ad hoc suadendum, verba Pauli et cæteras Scripturas depravant ad suam ipsorum perditionem, ut Petrus præmonuit¹.

3. Ex his autem principiis inferunt, quoties quis habet eam fidem, quæ sufficit ut peccatum non imputetur, prorsus non imputari, omnemque illius pœnam remitti. Nam vel peccator firma fide credit justitiam Christi satis esse, ut sibi peccatum omnino et integre tollatur, et ad nullam pœnam imputetur, si ita credit; vel aliter de justitia Christi et non imputatione peccati per fidem cogitat: si hoc posteriori modo in fide illa speciali claudicet, vere non credit, ideoque neque integre, neque ex parte peccatum ei remittetur, seu non imputabitur; sin vero plenam fidem non imputationis concipiatur, ad nullam omnino pœnam reputabitur peccatum; atque ita remissio pœnæ, ad quam posset peccatum mortale imputari, semper aut integra est, aut nulla.

4. Denique ex eisdem principiis inferunt in homine justo nullum esse veniale peccatum, sed aut mortale esse, quod justitiam auferat, aut nullum esse; nam si justus quodlibet opus, quantumvis leve, faciat, credens sibi imputari ad aliquam culpam, eo ipso infidelis est et graviter peccat, et Christo gravem injuriam infert, de illius meritis et satisfactione diffidens; si vero hæc faciat, firmiter credens ad nullam vel minimam pœnam imputari, nec leve peccatum committit (utique quod imputatur), nam per Christum purgatur præveniente (ut ita dicam) purgatione, seu non imputatione. Atque in hoc sensu videtur rex vocasse Christum nostrum purgatorium. Cessat igitur, si hæc vera sunt, omnis purgatoriæ necessitas, quia in homine justo nihil remittendum relinquitur, et ita si in eo statu moriatur, non indiget purgatione; si vero sine justitia moriatur, peribit in æternum.

5. Hæc sunt monstra et portenta ab haereticis inventa, ut purgatorium de medio tolle-

re possint, ut vel hinc videat rex, an assertio purgatoriæ parvi sit momenti, cum ad illam evertendam necessarium sit potissima fidei fundamenta convellere; imo, etiam opus sit contra divinam justitiam et ordinatam providentiam, addo etiam contra naturalem rationem, comminisci plurima. Fides ergo catholica principiis ac fundamentis omnino contrariis subsistit, quæ breviter et per transennam tantum indicabo, ut ad scopum intentum perveniam; nam si ex professo singula probanda et disputanda forent, justum atque integrum opus necessarium fuisset. Primum ergo fidei fundamentum est, licet Christus ex se sufficienter et copiose omnes homines redemerit, et pro omnibus satisfecerit, nihilominus cum effectu nou omnes salvare, ut ipsem docet, Matth. 25, et est in nostra fide per se notum, idque rex Angliæ in citato loco supponit, dum confitetur duo esse domicilia, cœlum ac infernum, humano generi in æternum constituta. Ex quo fundamento aperte aliud sequitur, videlicet, non obstante Christi redemptione, necessarium hominibus esse ad salutem consequendam, ut aliquid agant, vel in eis fiat quo meritum et satisfactio Christi illis applicetur. Probatur, quia existente infinito merito et satisfactione Christi, volentis omnes salvare, ut Paulus dicit, ac subinde pro omnium salute se offerentis, nihilominus quidam salvantur, alii vero perpetuis destinantur ignibus; ergo hæc differentia non aliunde provenire potest, nisi quia præter actiones et passiones, quas Christus ipse exhibuit, necessarium sit aliquid fieri ex parte nostra, quo infinita Christi redemptio nobis applicetur. Atque hoc etiam satis agnoscit Jacobus rex, cuin istum articulum concludit, dicens: *Id agamus, ut alterum consequamur, alterum defugiamus.*

6. *Meritorum Christi ad homines applicationem non fieri per non imputationem peccatorum.* — Discriben ergo inter Protestantes et Catholicos incipit ab hac necessaria applicatione meritorum Christi, per quam, nimirum, actionem, cognitionem aut affectum fiat. Sit ergo secundum fideli fundamentum, hanc applicationem non fieri per illam fidem specialem, quam Protestantes fingunt de propria justitia, aut non imputatione peccatorum, neque per illam peccata præterita remitti, neque præsentia non imputari, neque justitiam veram, quam propter Christum accipimus, in illa non imputatione consistere. Quæ omnia contra regem et Protestantes in eorum

¹ 2 Pet. 2.

principiis sufficienter probantur, quia in Scriptura sacra nullibi invenimus impositam hominibus necessitatem credendi, sibi non imputari peccata eo ipso quod talis non imputatio credatur; alioquin locum prodant, ubi vel illa credulitas præcepta sit, vel ejus objectum, seu illa non imputatio revelata. Nos enim audimus Paulum dicentem : *Sine fide impossibile est placere Deo*, et rationem subiectem, *credere enim oportet accedentem ad Deum, quia est, et inquirentibus se remunerator sit*. Hæc ergo fides dogmatum est necessaria ad salutem, non de propria justitia, quæ nullibi exigitur. Christus etiam Dominus, Marci ultim., dixit : *Prædictate Evangelium omni creaturæ; qui crediderit et baptizatus fuerit, salvus erit; qui vero non crediderit, condemnabitur*. Et Matthæi ultimo addit : *Dolentes eos servare omnia quæcumque mandari vobis*. Fides ergo Evangelii seu dogmatum, et baptismus cum obedientia mandatorum, sunt media seu actiones a Christo prescriptæ ad participandam redemptionem ejus; de fide autem speciali, aut non imputationis peccatorum, nec Verbum ipse locutus est, nec per Apostolos aut Ecclesiam suam id nobis tradidit.

7. Adde, per se incredibile esse peccata, licet re ipsa committantur transgrediendo etiam divinam et naturalem legem, eo ipso a Deo remitti, vel tanquam nihilum reputari, quod is, qui illa committit, ita credit, et illa fiducia delinquit. Quid enim hoc est, nisi dare hominibus liberam licentiam peccandi? Profecto nihil cogitari potest justitiae Dei, et sapientissimæ providentiae magis contrarium. Neque minus repugnat redemptioni Christi; sic enim non venisset ad dissolvenda, sed potius ad fovenda et multiplicanda opera diaboli. Dicit autem Joannes, 1 ep., c. 3 : *Scitis quia ille apparuit, ut peccata tolleret*. Et infra : *In hoc apparuit Filius Dei, ut dissolvat opera diaboli*; et Petrus, 1 ep., c. 2 : *Christus passus est pro nobis, vobis relinquens exemplum, ut sequamini vestigia ejus, qui peccatum non fecit, etc.*; et Paulus, ad Gal. 5 : *Vos in libertatem vocati estis, tantum ne libertatem in occasionem detis carnis, sed per charitatem spiritus servite invicem*. Non ergo applicatur homini Christi meritum per illam commentitiam fidem specialem, sed per *siquidem, quæ per charitatem operatur*. Et ex hac fide spem justitiae concipi mus, intercedente pœnitentia præcedentium peccatorum, cum observantia mandatorum, sine qua non potest subsistere vera justitia.

Non enim qui se justum reputat, sed, *qui facit justitiam, justus est*, ut loco supra allegato idem Joannes ait. Et sic etiam cætera omnia quæ dixi, frequentissima sunt in Scripturis, et in propriis locis ex professo tractata sunt.

8. Tertio, docet catholica fides, et sequitur ex dictis, fructum meritorum et satisfactiōnum Christi non semper æqualiter omnibus credentibus et justis applicari; ac subinde, non quoties peccata mortalia remittuntur quoad culpam, ita remitti quoad poenam, ut ad nullam omnino etiam temporalem amplius imputentur. Utrumque docuit Concilium Tridentinum : primum, sess. 6, c. 7 et 10, et canone 14. Quod etiam sumitur ex Paulo, 1 ad Cor. 15, dicente : *Stella enim a stella differt in claritate, sic et resurrectio mortuorum*. Et ex verbis Christi, Joan. 14 : *In domo Patris mansiones multæ sunt*. Quæ sunt variae, et inæquales sedes beatorum, ut omnes Patres exponunt, et singulariter Augustinus, tract. 67 in Joan., dicens : *Multæ mansiones diversas meritorum in una vita æterna significant dignitates*. Sicut ergo in patria sunt inæquales coronæ, ita in vita est inæqualitas in gratia et justitia, et consequenter etiam in participatione meritorum Christi. Omnis enim interna justitia, ejusque operatio per gratiam Christi confertur, atque ita fructus est et participatio meritorum ejus; est ergo in hac participatione inæqualitas.

9. Secundum autem docuit idem Concilium Tridentinum, eadem sess. 6, c. 14, et canon. 30, et sess. 14, sequiturque manifeste ex priori; nam qua ratione meritum Christi non semper æqualiter applicatur quoad perfectiōnem justitiae, eadem, satisfactio Christi non semper in nobis habet æqualem effectum quoad remissionem poenæ temporalis. Ratio vero est, quia remissio poenæ fit interveniente dispositione aliqua, vel satisfactione ex parte hominis; hæc autem dispositio, vel operatio potest esse major et minor; ergo et poenæ remissio. Peccata ergo mortalia post baptismum commissa (nam de baptimate alia est specialis ratio), quamvis per pœnitentiam remittantur propter Christum, non semper quoad poenam temporalem omnino remittuntur, sed juxta modum pœnitentiae et dispositionis. Et ideo orabat David, Psal. 50 : *Amplius lava me ab iniuitate mea*; et ob eamdem causam omnes Scripturæ pœnitentiam de peccatis, etiam remisis, et eleemosynas, aliaque bona opera, ad eorum plenam remissionem obti-

nendam, consulunt¹. Eademque est communis doctrina Sanctorum, ut videre licet in Augustino, lib. de Vera et falsa pœnitent., c. 45; Chrysostomo, homiliis de Pœnit., præsertim in 5. Et optime Ambrosius, lib. 7 in Lucam, ad finem c. 42, dicente : *Sicut qui pecuniam solvunt, debitum reddunt, nec prius evacuatuer fœnoris nomen, quousque totius sortis ad minimum usque, quo cumque solutionis genere, qualitas universa solvatur, sic compensatione charitatis, actuumque reliquorum, vel satisfactione quacumque peccati pœna dissolvitur.* Et infra : *Aut pretio charitatis redimitur injuria, aut injuriæ aestimatione pœna relaxatur.* Et infra : *Uniuscujusque peccatum supra scriptæ genere conditionis eluitur, cum tandem exercetur noxius pœnis, ut commissi supplicia erroris expendat.* Qui ergo non plene satisfecit, licet justus sit, alicuius pœnæ debitor est.

10. *Aliqua peccata hominibus etiam justis insunt, quæ gratiam non tollunt.* — His accedit aliud fidei fundamentum, nimirum, esse in hominibus, etiam justis, quedam peccata quæ gratiam non tollunt, nec hominem Deo inimicum, aut reum aeternæ pœnæ constituant, et ideo venialia vocantur. Ita docuit Concilium Tridentinum, dicta sess. 6, c. 45, et nunc sufficienter probatur ex illo Proverbiorum 21 : *Septies in die cadit justus, et resurgit; impii autem corruunt in malum.* Illi enim casus justorum aliqua peccata sunt, non famen talia quæ justitiam auferant, alias etiam justus corrueret in malum, quoties sic peccaret. Unde recte Augustinus, serm. 41 de Sanctis, hæc vocat *minuta peccata, a quibus in hac vita Sancti non sunt immunes, quæ animam non occidunt, licet deforment;* et ep. 103, in fine, illa vocat *peccata levia justorum, quæ ordinariis remediis tolluntur.* Et propter eadem asserit, lib. 2 de Peccator. merit., c. 7, protulisse Joannem : *Si dixerimus quia peccatum non habemus, ipsi nos seducimus,* etc., 1 Joan. 4. Item ad eadem peccata pertinet illud Jacobi 3 : *In multis offendimus omnes, ut ibidem notat Beda, et Augustinus, in Enchirid., c. 78, ubi multa exempla talium peccatorum ponit, et plura lib. de Natura et Grat., cap. 36 et 38.*

11. Ratio etiam naturalis hoc suadet, quia prudens ac perfecta amicitia non dissolvitur propter levem aliquam negligentiam vel offensionem; ergo incredibile est amicitiam cum

Deo propter quemlibet defectum levem amitti, aut quodlibet peccatum levissimum reddere hominem divino odio, et aeterna pœna dignum. Quamvis autem hæc peccata tam acerbam pœnam non mereantur, nihilominus, eo ipso quod peccata sunt, aliqua certa pœna digna sunt, ut recte notavit Augustinus, lib. Octoginta trium quæstion., q. 26, quia unicuique culpæ, secundum debitum justitiae ordinem, et juxta qualitatem ejus, aliquis modus pœnæ respondet; Deus autem justissimus est, et ideo hæc etiam peccata, quæ legi suæ aliquo modo derogant, impunita non sinit, juxta illud Matth. 5 : *Amen dico tibi, non exies inde, donec reddas novissimum quadrantem,* ubi Hieronymus : *Hoc est quod dicit, non egredieris de carcere, donec etiam minima peccata persolvas.* Et eodem fere modo exposuit Ambrosius, lib. 7 in Luc., ad finem cap. 42. Denique, ut Augustinus dixit, dicto serm. 41, quamvis hæc peccata *animam non occidant, ita eam deformem faciunt, ut eam ad amplexus Sponsi cœlestis, aut vix, aut cum grandi confusione venire permittant.* Quod de hujus vitæ statu et de contemplatione Dei et dilectione, quæ in hac vita haberi potest, intelligendum puto; nam si de amplexu patriæ et visionis beatæ intelligatur, non vix, sed omnino haberi non poterit talis amplexus Sponsi, nisi prius deformitas talium peccatorum auferatur. Quia, ut dicitur Apocalyps. 2, *non intrabit in illam civitatem aliquid coquinatum,* et in illo statu maxime complebitur quod Paulus dixit ad Ephes. 5 : *Christus dilexit Ecclesiam, et se ipsum tradidit pro ea.* Et infra : *Ut exhiberet ipse sibi gloriosam Ecclesiam, non habentem maculam neque rugam.*

12. Amicitiam cum Deo non dirimi propter quodcumque peccatum. — Ex his igitur principiis plane concluditur purgatoriæ necessitas, in hunc modum. Homines justi, dum in hac vita vivunt, habent simul cum justitia vel reatum aliquem pœnæ temporalis debitæ propter peccata remissa, vel propter venialia postea commissa; contigit autem sæpe justos mori in hujusmodi statu, quia vel post multa et gravia peccata, seram, ac levem, et remissam penitentiam agunt, vel quia, licet multo tempore ante mortem in gratia vivant, frequenter venialiter peccant, et in adhibendis remediis, et satisfactionis operibus exercendis negligentes sunt; ergo necessarium est ut post mortem sit purgatoriæ tempus, et locus in quo ab his maculis mundari, et delitas pœnas solvere, atque ita paradisum ingredi

¹ Matt., 3 et 4; Eccl., 5; Ezech., 23, cum similibus.

valeant; quandoquidem secundum fidem nullus ad beatitudinem admittitur sine integra remissione culparum et pœnarum, ut ostensum est. Quæ ratio ad hoc dogma fidei confirmandum sufficeret, etiamsi ex Scriptura expressius probari non posset, quia principia hujus discursus in Scriptura ipsa fundata sunt, et aliqua ex parte, quantum ex facto pendent, sunt etiam experientia notissima, et illatio est etiam necessaria, ac evidenter nota. Hæc autem sufficiunt, tum ad reddendam assertionem omnino certam, tum etiam ut ab Ecclesia definiri potuerit, et fidelibus proponi, ut eam de fide credere teneantur, ut in superioribus ostensum est. Ecclesiam autem ita veritatem hanc definitisse, ex Conciliis Florentino et Tridentino constat. Et quamvis tam expressa definitio facta non fuisset, universalis consensus cum antiquissima Ecclesiæ Catholice traditione ad fidem faciendam sufficeret.

13. Articulum de purgatorio antiquissimum esse ex Patribus ostenditur.—Unde ulterius infero, immerito Jacobum regem hunc articulm de Purgatorio, inter eos, quos nuperos et novitios vocat, recensere, cum neque Augustinus, nec Hieronymus, nec alii Patres illis æquales, qui certe nuperi non sunt, veritatem tot fidei fundamentis subnixam ignorare potuerint. Quod etiam eorum verbis ostendere non est difficile; Augustinus enim, in Psalm. 37, in princ., de Purgatorio exponit verba illa: *Domine ne in furore tuo (vel ut ipse legit) in indignatione tua arguas me, neque in ira tua emedes me;* sic enim legit, et dicit, *hanc emendationem in ira, per quam emendati salvabuntur, futuram esse post mortem, sic tamen quasi per ignem.* Unde sic exponit: *In hac vita purges me, et talem me redas, cui jam emendatorio igne non opus sit.* Præterea, lib. Octoginta trium Quæstionum, q. 26, loquens de venialibus peccatis, dicit eis deberi certam pœnam et in hoc sæculo, et in futuro, ubi vel particulam et pro disjunctione posuit, vel sub conditione intellexit deberi illam pœnam in futuro sæculo, si in præsenti non luatur. Clarius vero dicto serm. 41 de Sanctis, de eisdem peccatis agens dixit: *Quidquid de istis peccatis a nobis redemptum non fuerit, illo igne purgandum est, de quo dixit Apostolus, quia in igne revelabitur, et si cuius opus arserit, detrimentum patietur; aut enim dum in hoc mundo vivimus, ipsi nos per pœnitentiam fatigamus, aut certe, volente aut permittente Deo, multis tribulationibus pro is-*

tis peccatis affligimur, et si Deo gratias agimus, liberamur. Et infra: *Ita peccata ipsa in hoc sæculo purgantur, ut in futuro ille ignis purgatorius, aut non inveniat, aut certe parum inveniat, quod exurat.* Si autem nec in tribulatione Deo gratias agimus, nec bonis operibus peccata redimimus, ipsi tamdiu in illo purgatorio igne moras habebimus, quamdiu supra dicta peccata minuta, tanquam ligna, sœnum, stipula, consumantur.

14. Post diem judicii non remanebit purgatorii locus.—Item in libro de Oeto quæstionibus ad Dulcitium, licet in q. 1 solum dicat, *salvari aliquos sic tamen quasi per ignem, et non esse incredibile ita contingere aliquibus post hanc vitam, utrum vero ita sit, queri posse,* tamen in questione 2 repetit quæ dixerat l. de Cura pro mortuis agenda, c. 4, quod allegat, et definite et tanquam certum docet suffragia vivorum prodesse aliquibus ex mortuis, qui nec tam mali fuerunt, ut illis prodesse non possint, ut sunt damnati, nec tam boni ut illis non indigeant, sed medii ejudsam status, quos ipse vocat, *non valde malos, quia licet bona pereuntia dilexerint, non tamen sunt tales, quales illi de quibus dictum est, quod regnum Dei non possidebunt, sed justi aliqua indigentes purgatione.* Idemque docet in Enchirid., c. 68, cum 96, ubi ait: *Negandum non est defunctorum animas pietate suorum viventium relevari.* Ideoque Monica, gloria Augustini mater, catholica fide bene instructa, dum animam ageret, nihil a filio et sociis ejus postulavit, nisi ut ad Domini altare memoriam ejus haberent, ut ipse refert lib. 9 Confession., c. 41; et in 3, insignem illam fidem et pietatem commendat, et pro matris anima orat, aliasque ut orent interpellat. Præterea, lib. 21 de Civit., cap. 46, ubi de infantibus morientibus eum solo baptismo, ait ita esse ad beatitudinem dispositos, ut non solum pœnis non præparentur æternis, *sed ne ulla guidem post mortem purgatoria tormenta patientur.* In quibus verbis aperte supponit, esse post hanc vitam purgatorias pœnas, de quibus infra dieit: *Purgatorias autem pœnas nullas futuras quis opinetur, nisi ante illud ultimum tremendumque judicium?* utique universale. Nam post illud non erit necessarius purgatorii locus, quia ante illud integræ peccatorum purgatio in omnibus justis fiet, et ideo in illo judicio tantum in duo loca, perpetuo duratura, omnes judicandi dividuntur. Et ita intelligenda est Scriptura, quoties de illis duobus terminis ultimis loquitur. Videri

etiam potest apud eumdem Augustinum (si ejus est opus), lib. 4 Hypognost., c. 5 et 6.

15. Denique in libro Quinquaginta homiliar., homil. 16, circa finem, hanc veritatem idem Augustinus plenissime docet, cuius aliqua verba referam, quia et omnia fundamenta supra posita confirmant, et vehementer pungunt adversarios: *Qui temporalibus pœnis digna gesserunt, de quibus Apostolus dicit: Si cuius opus arserit, detrimentum patietur, ipse autem salvis erit, sic tamen quasi per ignem, per fluvium igneum (de quo propheticus sermo commemorat), et rada ferventibus globis horrenda transibunt. Quanta fuerit peccati materia, tanta et pertransundi mora; quantum exegerit culpa, tantum sibi ex homine vindicabit quedam flammæ rationabilis disciplina.* Et infra: *Ilic sermones otiosi et cogitationes iniquæ vel sordidæ, illic multitudo levium peccatorum, quæ puritatem nobilis naturæ infecerant, exundabunt; illic stagnum, vel plumbum diversorum subrepentium delictorum, quæ divinam imaginem obscuraverant, consumentur, quæ omnia hic ab anima separari per eleemosynas et lacrymas compendiosa transactione potuissent.* Et ut rex intelligat quomodo Christus sit purgatorium nostrum, concludit: *Ecce sic exigere habet ab homine rationem, qui se ipsum pro homine dedit, et confixus clavis legi mortis se junxit,* et in hoc catholico sensu dixit idem Augustinus, 10 de Civit., cap. 24, *Dominum Jesum Christum esse principium, cuius incarnatione purgamur, eum quippe (id est dæmonem) in sua carne contempsit, quam propter sacrificium nostræ purgationis assumpsit.* Et infra: *Hunc ille platonicus non cognovit esse principium, nam agnosceret purgatorium.* Nihil aliud ergo est in Christo esse purgatorium, quam esse redemptorem, per quem possunt homines in hac vita perfectissime mundari, si velint se disponere, alioqui si in hac vita id assecuti non fuerint, in futura, si justi sint, per condignas penas secundum rigorem iustitiae purgabuntur, nisi aliqua ex parte propter suffragia viventium sublevenatur.

16. Præterea D. Hieronymus diserte affirmat, dari post hanc vitam aliquam pœnam ignis temporalem, in c. ult. Isaiæ, fere in ultimis, docetque aliorum Christianorum opera esse per ignem probanda et purganda, ita ut purgatio temporalis sit et finiatur. Et in lib. contra Jovinianum, eodem modo exponit locum Pauli 1 ad Corinth. 5, et concludit: *Si is cuius opus arsit et periit, et damnum susti-*

nuit laboris sui, perdet quidem laboris præmium, sed ipse servabitur, non tamen sine probatione ignis, ergo is, cuius manserit quod superadificavit, sine ignis probatione salvabitur, et inter salvationem, et salvationem erit utique diversitas aliqua. Quæ verba notanda sunt, nam discursum supra factum confirmant, licet ordine commutato. Hieronymus enim ex diverso modo consequendi salutem, per ignem purgatorium, vel sine illo, colligit quasi a posteriori diversitatem meritorum et praemiorum; nos vero e contrario ex diversitate operum, vel malorum, vel bonorum disponentium ad justitiam, necessitatem purgatorii deduximus. Et in c. 4 Ezechiel., idem Hieron. ita concludit: *Ex quo ostenditur, post pœnas, atque supplicia, et purgationem peccatorum, futuram misericordiam duntaxat in his qui Deum meruerint videre regnante.*

17. Eamdem veritatem docuit Ambrosius in c. 4 Apoc., circa illa verba: *Sine macula enim sunt, dicens: Animæ Sanctorum sine macula sunt, quia si quas sordes ex mundana habitatione contraxerunt, aut per pœnitentiam et lachrymas, charitatisque opera, aut per flagella, aut certe post mortem igne purgatorio deleta sunt.* Et similia habet in c. 20, in illa verba: *Hæc est resurrectio prima.* Scio in dubium revocari, an illud opus sit Ambrosii, nemo autem dubitat quin sit alicujus Patris, et satis antiqui. Verumtamen precatio secunda, præparans ad Missam, extra dubium Ambrosii est, et tamen in illa sic orat Christum: *Recordare quia advocatus meus es ipse, qui judicas. Quod si etiam in illo adhuc sæculo aliquid in me vindicandum reservas, peto ne me potestati dæmonum tradas, dum scelus meum purgatoria pœna detergis.*

18. His accedat S. Cyprianus, qui epistola quinquagesima secunda ad Antonianum, dicit: *Aliud est ad veniam stare, aliud ad gloriam pervenire, aliud missum in carcerem non exire inde, donec solvas novissimum quadrantem, aliud statim fidei ac virtutis accipere mercedem, aliud pro peccatis longo cruciatum dolore emundari, et purgari diu igne, aliud peccata omnia passione purgasse.* Idem sumitur ex Tertulliano, lib. de Anima, c. 35, et c. 58, in fine, ubi ita exponit dictum locum Matth. 5, dicens: *Carcerem illum inferos intelligimus, et novissimum quadrantem, modicum quoque delictum mora resurrectionis illic luendum interpretamur.* Quam fere expositionem habet etiam Athanasius, in lib. Variarum Scriptur. quæstion., q. 62. Et plura alia ex Patribus

Græcis pro hac veritate congerit Gennadius Scholarius, Patriarcha Constantin., in defensione Concilii Florent., c. 3. Suntque preci-pua tam in Græcis quam in Latinis illa, in quibus asserunt sacrificia, orationes, et eleemosynas, et alia bona opera viventium, ju-vare defunctos ad aliquam remissionem poenarum, si in eo statu recesserunt, in quo il-lius auxilii sint capaces. Quæ loca Sanctorum contestantium hanc antiquissimam tradicio-nem tam sunt frequentia, ut supervacaneum videatur illa referre, præsertim cum articulus ille propriam disputationem requirat. Qui au-tem illum tradunt, necesse est ut crediderint aliquas fidelium animas ita post mortem pu-niri, ut possint ab illis poenis liberari, et hoc est quod purgatorium vocamus. De illo autem dogmate videri possunt specialiter Augusti-nus, dicto libro de Cura pro mortuis agenda; et Cyrillus Hierosol., Catech. 5 Mystag.; et Cyprianus, epist. 66 ad Clerum, etc.; et Am-brosius, orat. de Obitu Theodosii, et orat. 2 de Obitu fratris sui Satyri; Damasc., orat. de Def. fidei.

19. Ex quibus intelligere præterea licet, sine causa regem Angliæ astruere voluisse, non potuisse Bellarminum purgatorium ex Scripturis probare; nam, sicut Sancti Patres non sine Scripturis illud astruxerunt, licet si-mul ex traditione Apostolica illud docerent, ita etiam Illustrissimus Bellarminus sapienter et eruditæ veritatem hanc ex Scripturis com-probavit, illas intelligendo, prout Sancti Pa-tres interpretati sunt. Quod si hoc regi non satisfacit, quia sua certa scientia aliter illas intelligit, jam responsum est, scientiam illam, quæ a sensu Patrum et Catholicæ Ecclesiæ discrepat, non esse veram scientiam, neque ex spiritu Dei esse, eo vel maxime quod (ut sæpe dixi et cum Paulino in eadem fere causa dicit Augustinus, libr. de Cura pro mort. agend., c. 1), licet Scriptura deasset, Eccle-siæ auctoritas sufficeret. Nam certe eum Seri-ptura docet Ecclesiam esse columnam et fir-mamentum veritatis, et traditiones apostoli-cas credendas esse, virtute continet purgato-rii assertionem, quam et Ecclesia et traditio docent. Deinde addimus veritatem hanc con-tineri satis in illis Scripturæ locis, in quibus dicitur Deus retribuere unicuique secundum opera sua, juxta illud 2 ad Corinth. 5: *Omnes nos manifestari oportet ante tribunal Christi, ut referat unusquisque propria corporis, prout gessit, sive bonum, sive malum.* Hinc enim ha-bemus, nullum malum impunitum a Deo re-

linqui, ideoque, si in hac vita non puniatur, vel pro illo satisfiat, in futura vindicandum esse poena condigna, et culpæ commensurata, ac subinde poena temporali, si persona alio-qui justa, et grata Deo sit.

20. Denique dicimus, etiam proxime et im-mediate probari sufficienter veritatem hanc in novo Testamento, ex loco saepè citato 1 Cor. 3: *Uniuscujusque opus quale sit, ignis probabit.* Et infra: *Si cuius opus arserit, de-trimentum patietur; ipse autem salvus erit, sic tamen quasi per ignem.* Quamvis enim non negemus verba illa aliter interdum ab ali-quiibus Patribus exponi (quorum interpreta-tiones nunc expendere non vacat), nihilominus hæc rejici nullo modo potest, quia et est valde conformis textui et sensui Ecclesiæ, et a multis Patribus approbatur, ut ab Augusti-no, Hieronymo, quos jam retulimus, et Am-brosio, in Paulum, ubi multi alii eam probant; et Origene, copiose hom. 6 in Exod., et opti-me Paulin., in ep. 9 ad Severum, ubi purga-torium vocat *ignem sapientem*, et in carmine continente paraphrasim Psalm. 1, ubi, *ignem arbitrum*, illud appellat. Et ita etiam expo-suit Gregor., in cap. 3 Reg., circa finem, et in lib. 4 Dialog., c. 39; et Cæsar. Arelaten., homil. 8, in eumdem locum. Locus etiam Matth. 5: *Ne in carcerem mittaris, amen dico tibi, non exies inde, donec reddas norissimum quadrantem*, si recta ratione pensetur, non parum juvat, maxime cum ita etiam intelli-gatur a Patribus allegatis, Tertulliano, Cy-priano, Ambrosio, et Hieron., ut recentio-res omittam. Denique hoc etiam insinuari vel supponi a Christo in verbis Matth. 42: *Non remittetur ei neque in hoc saeculo neque in fu-turo*, Patres intellexerunt, ut Augustinus, 21 de Civitat., c. 13, quem imitati sunt Gregorius, dicto c. 39; Beda, in eum locum; ac Bernard. Et si attente consideretur prudens loquendi modus, nemo de re aliqua pro duobus tem-poribus ita loquitur, nisi in utroque tempore vel statu res fieri soleat.

21. Ex veteri etiam Testamento aliqua testimonia in superioribus tacta sunt. Quale est illud Psal. 37: *Domine, ne in furore tuo arguas me, neque in ira tua corripias me.* Juxta interpretationem Augustini supra relata-m, quam etiam tradit Gregorius, Psal. 1 Poenitentiaæ. Maxime vero illa convincunt testimonia, in quibus, operibus viventium posse juvari mortuos, vel asseritur vel sup-ponitur. Inter illa vero notius et clarius est, quod lib. 2 Machab., c. 42, habetur: *Sancta*

et salubris cogitatio est pro defunctis exorare, ut a peccatis solvantur. Quod defugere non potest rex, nisi negando librum esse canonicum. At hoc miserrimum refugium est, et de illo nunc disputare esset in longum, vel potius in infinitum ire. Sufficiunt ergo quæ de regula discernendi libros canonicos a non canonicis in superiori libro diximus, et quod Patres communiter illo libro ut canonico utantur; et quod specialiter August., dicto libro de Cura pro mortuis agenda, c. 1, inde veritatem hanc confirmet. Cum ergo veritas hæc de purgatoriis poenitentiis tanto pondere auctoritatis et rationis firmata sit, videat rex, quo spiritu ductus illam vocare audeat *commentum indignum, in quo opera impendatur.* Neque putet Catholicis esse contentionem cum haereticis, vel de statu loci purgatoriis, vel an unus aut multiplex sit, nec de modo aut qualitate poenarum ejus; nam, licet hæc a Theologis sobrie et prudenter disputentur (sicut inquireti etiam posse dixit interdum Augustinus, in superioribus allegatus), si vero regi harum rerum meditatio non placet, cum illo de his non contendimus, dummodo temporales post mortem poenas pro aliquibus justis imperfectis destinatas esse, non neget.

22. De his vero quæ purgatorium consequi subjungit rex, et frivola appellat, cum ab ipso non impugnentur, nunc multa dicere non est necesse. Quia vero in margine libri hæc frivola esse dicuntur, *indulgentia, jubilæa, et satisfactiones pro defunctis,* dicam breviter, non nisi a Protestantibus, levibus profecto et impudentissimis hominibus, qui Regem in infancia perverterunt, hæc potuisse frivola reputari. Aut enim frivola dicuntur, quia veritatis fundamentum non habent, vel quia licet vera sint, parvi sunt, aut nullius momenti. Hoc posterius nullius hominis mentem, si recta ratione non careat, subire potest. Quis enim parvi momenti reputet a debito gravissimæ poenæ liberari; aut quis contemnendum putet, aut charitatis opus esse neget, orationibus ad Deum fusis et propriis afflictionibus et eleemosynis proximum a gravissima poena liberare; aut quis non magni aestimet potestatem pene divinam, Christi et Sanctorum satisfactiones ad compensandas purgatoriis poenas, efficaciter applicari? Profecto hæc et similia, non ideo quia parvi momenti sunt, sed quia incredibilia infidelibus videntur, a Protestantibus frivola reputantur. Putant ergo non habere veritatis fundamentum. At si verum est quod rex dicit,

hæc consequi assertionem purgatoriis, cum ostensum sit purgatorium maximæ et infallibili auctoritati nixum esse, profecto non possunt cætera, quæ illud assertum consequuntur, non esse magno pondere auctoritatis fundata; ergo hac etiam ratione non frivola, sed veritatis catholicæ dogmata certissima dici possunt.

23. *Indulgentiae propter Christi merita a Deo Ecclesiæ largiuntur.* — Si autem illi Pseudotheologi, qui in hoc regi imposuerunt, in sacra doctrina versati essent, suffragia et indulgentias ad purgatorium consequi non assererent; non enim in illo fundantur, neque cum illo necessariam habent connexionem. Nam posset Deus, si justitiæ rigore uti voluisset, purgatoriis poenas ab hominibus defunctis, et illarum reis, sine ulla remissione vel compensatione exigere. At indulgentiae et satisfactiones nihil aliud sunt quam poenarum purgatoriis remissiones quædam et compensationes, quas Deus propter infinitam bonitatem suam, et propter eximia Christi merita Ecclesiæ suæ concessit, ut et poenæ illæ mitiores per Christum fierent, et ut inter Christi membra major et excellentior esset charitatis mutuae communicatio. Quocirca, licet purgatoriis, satisfactiones pro defunctis, et indulgentiae unam habeant communem matrem, videlicet, debitum temporalis poenæ, quod in aliquibus justis interdum post hanc vitam manet, et ideo possit aliquo modo unum ex alio colligi, nihilominus, proprie loquendo, unum in alio non fundatur, sed unumquodque per se gravissimum habet veritatis fundamentum. Nam purgatoriis poena fundatur in ordine divinæ justitiæ per regulas fidei nobis sufficienter manifestato, ratione valde consentaneo, ut ostensum est.

24. At vero suffragia seu satisfactiones fundantur in *communione Sanctorum*, quam in Symbolo profitemur. Nam communionem illam non solum inter mortales hic viventes, sed etiam cum justis jam defunctis juxta uniuscujusque statum intercedere, Ecclesiæ auctoritate traditum est, et in Scriptura sacra sufficiens fundamentum habet. Quod in superioribus capitibus de communione inter nos, et Sanctos cum Christo regnantes, ostensum est, quatenus et illos intercessionibus suis nos adjuvare, nosque ab illis eas postulare, atque ipsos venerari, laudare, et Deo pro ipsorum gloria gratias agere posse et debere, ostendimus. Communio vero nostra cum justis defunctis nondum beatis, sed in

carcere , pro aliquibus debitissis, detentis, perpetua etiam Ecclesiæ in traditione et in Scriptura sacra fundata est, ut ex dictis in hoc capite intelligi potest. Oratio enim , eleemosyna , sacrificium, et similia opera Deo pro defunctis oblata, ut a peccatis solvantur, ad hanc communicationem pertinent ; docent autem Scriptura et Ecclesiæ consuetudo optimum esse orare et operari pro defunctis. Unde recte colligit Augustinus allegatus, sufficienti auctoritate convinci, hoc non fieri sine fructu : non est ergo frivola satisfactio pro defunctis , sed sufficientissime fundata. Accedit, genus hoc communicationis charitati etiam et rationi esse valde consentaneum et benignæ providentiæ divinæ valde dignum ; non ergo pro Catholico reputari potest, qui hanc tam catholicam ab universali Ecclesia receptam veritatem reputaverit frivolam.

25. Indulgentiarum vero concessio (ad quam etiam jubilæa pertinent) duo habet solidissima fundamenta. Unum est , infinitus thesaurus meriti et satisfactionis Christi Domini, et Sanctorum, quem thesaurum , saltem quantum ad Christi divitias eorumque sufficientiam, non existimo a Protestantibus negari, idque nunc nobis satis est, quia satisfactiones Sanctorum non ut necessariae , sed ex abundantia adjunguntur , quod amplius explicare et probare præsentis loci non est. Alterum fundamentum est suprema potestas ligandi et solvendi, quam Christus suo Vicario concessit, quæ in Evangelio satis fundata est, ut libro sequenti ostendemus. Quod autem illa potestas ad hanc dispensationem et indulgentiarum concessionem extendatur, ecclesiastica traditio et antiquissimus ejusdem potestatis usus, communis consensu Ecclesiæ probatus, satis ostendit, ut latius in disputationibus theologieis tractavimus, in quarto tomo tertiae partis , disput. 48, et seq.

CAPUT XVI.

DE ERRORIBUS CIRCA ECCLESIAE RITUS ET BENEDICTIONES.

1. Inter alia exempla quæ rex ponit pro articulis quos novitos et nuperos vocat, haec verba adjungit, p. 48 Praefationis, in princ.: *Baptizatio campanarum, et mille præterea nugæ;* quæ vero sint istæ nugæ , nec ipse declarat, nec in margine exponit. Unde videatur sub illis verbis omnes similes benedictiones comprehendere ; nam Protestantes

æque solent de his omnibus nugari¹. Quanquam de hac, quam vocat baptismationem campanarum, magna exaggeratione Magdeburgenses dixerint, horrendum esse eiorem, magnumque sacrilegium contra Christi institutionem. Et ideo ad hujus libri complementum, operæ pretium visum est, pauca de his ritibus dicere, ad propriam objectionem, ex particulari exemplo sumptam, respondendo, et illius occasione aliquid de toto genere talium benedictionum attingendo.

2. Duo ergo in hujusmodi signis, quæ campanæ nuncupantur, spectari possunt, videlicet, usus talis instrumenti ad alias actiones publicas convenienter exercendas, et ritus ab Ecclesia institutus ad benedicendas campanas, et de utroque sigillatim dicendum est. Principio igitur certum est, antiquam Ecclesiæ consuetudinem fuisse, ut Missæ et alia divina officia in sacris locis ac templis fierent, ut certis horis vel diebus christianus populus ad illa conveniret. Unde necessarium etiam fuit esse in ecclesiis signum aliquod, quo dato populus ad ecclesiam accederet. Ad hoc ergo munus institutæ sunt campanæ, quæ propterea solent interdum nomine signorum absolute significari, ut in c. Solent, de Consecrat., d. 4, et in c. 1 et 2, de Offic. custodis. Considerata igitur bac propria et quasi litterali institutionis ratione campanarum usus , nemo prudens dubitare potest quin fuerit et utilissimus, et convenientissimus, quia signum aliquod publicum moraliter necessarium erat. Unde etiam in veteri Testamento dixit Deus Moysi, Nnm. 11^o: *Fac tibi duas tubas argenteas ductiles, quibus convocare possis multitudinem, quando movenda sunt castra,* etc. Et ex Levitic. 23 colligitur, in festivitatibus solitum fuisse populum tubis clangentibus convocari, seu admoneri. Idem indicant verba illa Joelis 2 : *Canite tuba in Sion.* Necessitas ergo alicuius signi, etiam in Ecclesia Christi , moralis erat. Determinatio autem ad sonitum campanæ ex humano arbitrio pendebat; et ideo recte et legitime potuit ab Ecclesia fieri, sicut facta est, et in re per se indifferentie sufficiebat Ecclesiæ consuetudo, ut nemo prudens ac moderatus in illa offenderetur. Præsertim cum instrumentum illud ad prædictum finem sit aptissimum, tum quia facile et sine magna industria pulsari potest, tum etiam quia ejus so-

¹ Refert Bellarm., lib. 4 de Pontif. 12 , cent. 10, c. 6.

nus late diffunditur, tum denique quia est magis durabile, et quasi perpetuum.

3. *Campanarum usus ante mille annos introductus.* — Accedit, hunc campanarum usum non esse novum in Ecclesia. Quamvis enim, ut eruditio auctores testificantur, certo non constet quo tempore incepissent, non est tamen dubium quin ante mille annos usus illarum jam fuerit in Latina Ecclesia communis. Nam anno 615 vixit S. Lupus, episcopus Senonensis, in cuius Actis referunt, tempore eiusdem obsidionis Senonensis civitatis, *S. Episcopum ad Protomartyris Stephani ædem se contulisse, et ad convocandum populum signum tetigisse*, ut est apud Surium, tom. 5, die 1 septembbris. Ubi etiam refert mirabilia Dei opera circa signum illud seu campanam demonstrata. Item anno 665 obiit S. Eligius, Episcopus Noviomensis, in cuius vita, lib. 2, c. 21, refertur, cum prohibuisset Presbyterum in ecclesia sacra facere, et Presbyter, prohibitione contempta, campanam pulsare tentaret ad populum convocandum, ipsam sonum non reddidisse, donec, Presbytero pœnitentiam agente, Sanctus Episcopus prohibitionem sustulit¹. Refert Surius, tom. 6. Præterea Beda, lib. 4 Histor. Anglicanæ, cap. 23, mentionem facit campanæ, ad eujus sonum ad orationes excitari et convocari solebant quædam religiosæ, quando aliqua earum de sæculo migrabat. Aliqui autem conjectant, tempore Anastasii, Persæ Martyris, nondum fuisse introductum campanarum usum, quia in septima Synodo, Act. 4, ex miraculis ejus refertur, in quædam solemní supplicatione convocatos fuisse fideles, non ad signum campanæ, sed per ligna sacra pulsata. Sed hoc et non multum obstat, quia Sanctus ille, 27 anno post sexcentesimum passus est, et præterea verba illa de Ecclesia Græca dicta sunt, in qua signa illa lignæ usque ad annum Domini 865 durrasse creduntur. Nam in illo anno ferunt, Venetiarum ducem misisse campanas ad Michaelim imperatorem, et tunc earum usum apud Græcos incepisse, relictis lignis signis, ut notat Baronius eodem anno, in fine². Quamvis alibi dicat, illa lignæ signa non fuisse in usu communi ad convocandum aliquis ecclesiæ populum, sed tantum inter religiosos, ad convocandos monasterii monachos.

4. Quidquid vero in hoc acciderit, certum est semper fuisse existimata necessaria aliqua hujusmodi signa, quæ (quod prætereundum non est) sacra etiam dicebantur; et inter ea campanarum usum tanquam utiliorem et durabiliorum prævaluuisse. Recte autem advertit Walfridus Strabo, lib. de Rebus eccles., c. 5, hæc signa publica non potuisse com mode in Ecclesia primitiva in usu haberi; quia divina officia, propter multitudinem gentilium, et præsertim propter vim persecutionum, non poterant esse tam publica, nam potius ut secrete fierent, curabatur. Et ideo aliis modis invitabantur fideles, ut prænunciando in uno conventu alium proxime futurum, vel scriptis tabulis eum prodendo, ut ait Strabo, loco citato, vel privatis singulos percursores, vel diaconum monendo, ut ex epistolis Ignatii 11 et 13 Baronius conjectat¹. Post datam vero pacem Ecclesiæ, ejusque amplitudinem, necessarius fuit signorum publicorum usus, et ita verisimile est, paulo post Constantini tempora campanarum ritum fuisse introductum, qui postea perpetua traditione probatus est. De qua videri possunt quæ refert Coccius, in Thesaur., tom. 2, lib. 3, art. 6.

5. *In campanarum benedictione nihil reprehendi posse ostenditur.* — Cum ergo constet nihil esse in simplici campanarum usu quod hæretici carpere possint, videamus quid in earum benedictione, et (ut sic dicam) symbolico usu reprehendant. Aut enim in universum omnem sacrarum rerum benedictionem et cæremonialem consecrationem ab Ecclesia institutam ut superstitionem detestantur, vel peculiare aliquid in campanarum benedictione reprehensione dignum inventiunt; utrumque autem unico Augustini verbo refutare possemus, dicentis: *Si quid per totum orbem servat Ecclesia, quin ita faciendum sit, disputare, insolentissimæ insaniae est*²; et quod alibi ait, *non esse credendum, inaniter fieri, ubi universæ Ecclesiæ claret auctoritas*. Ulterius vero illud prius generale membrum non solum traditioni, sed etiam Scripturæ et rationi repugnat. At enim Paulus, creaturam omnem verbo Dei et oratione sanctificari, 1 Timoth. 4. Unde legimus Christum, ad multiplicandos panes, benedictione usum esse, in cœlum aspicioendo, Matth. 14. Additque Marcus, c. 6, etiam pisces benedixisse;

¹ Die 1 decembbris.

² 1 tom., an. 58.

¹ Tom. 4, an. 58, n. 102.

² Ep. 138, c. 5.

et Lucæ 24, benedixit panem, per cuius fractionem voluit a discipulis cognosci. Quid ergo est cur Ecclesia non possit vel res aliquas sanctificare benedicendo illas, vel in hoc Christum imitari? aut ubi hoc Christus prohibuit? vel quæ moralis seu naturalis ratio cogitari potest, cui hoc repugnet? Ecclesia enim in hujusmodi benedictionibus potissime utitur signo crucis et oratione: ex quibus oratio a Christo Domino maxime commendata est; signum vero crucis magnam sanctificandi vim ab ipsis morte accepit; quamdam enim virtualem invocationem, et propter Christi mortem depreciationm continet; ergo utroque titulo benedictiones Ecclesiæ religiosæ sunt, et Deo gratæ.

6. Atque hoc etiam confirmant antiquæ benedictiones aquæ lustralis, panis, olei, cerei paschalis, et aliæ similes, de quibus non est hic dicendi locus. Certum autem est non esse novas, sed in primitiva Ecclesia usitatas, ut facile posset ex Patribus ostendi, sed id tanquam ab hoc loco alienum omitto, et locum hunc præclaro testimonio Gregorii Nazianzeni concludo. Nam oratione prima contra Julianum¹, hujusmodi ritus et sanctiones Ecclesiæ (ita enim illas appellat) sic laudat, ut dicat, *aptissimæ illi congruere, talesque esse, ut nullus eorum, qui vestigiis nostris insistere cupiunt, amulari possit, quandoquidem non magis humanis ingeniis atque inventionibus, quam vi divina temporisque firmitate vigorem adeptæ sunt.* Addereque possumus, hunc ritum campanarum etiam miraculis fuisse interdum a Deo confirmatum, ut videri potest in Sigeberto, in Chron. anno 1081; et in Baronio, t. 8, anno 615, n. 14; et in Durando, lib. 1 de Ritibus eccl., c. 22.

7. Si vero peculiarem ritum benedicendi campanas spectemus, nihil habet præter orationes quasdam, quibus peculiaria Dei beneficia per campanæ sonum pro fidelibus postulantur, in quibus nihil est quod valde pium et religiosum non sit. Prius enim præmissis quibusdam Psalmis, et communi ritu benedicendi aquam, hæc oratio interponitur: *Assistat super eam virtus Spiritus Sancti, ut cum hoc rasculum ad invitandos ecclesiæ filios præparatum, in ea fuerit tinnitus, ubicumque postmodum sonuerit ejus tinnitus, procul recedat virtus insidiantium,* etc. Et postea petitur ut in Christianis, audientibus tale signum, crescat devotionis augmentum, et in

ecclesia digne orent, et Deum laudent; et haec petitiones in aliis orationibus iterantur, et specialiter, *ut quicumque ad sonitum ejus converint, ab omnibus inimici temptationibus liberentur in corpore, et a pravis cogitationibus mundentur in mente, semperque fidei catholicae documenta sectentur, atque tuæ consolacionis gratiam recipere mereantur, Salvator mundi,* etc. Quæ omnes petitiones piissimæ sunt, et magnam fidem ostendunt. Et ex eis licet colligere, licet prima ratio seu occasio inveniendi hæc signa, fuerit moralis necessitas convocandi christianum populum, postea vero Ecclesiam fidi cogitatione et sapienti institutione illa ordinasse ad spirituales effectus, et assumpsisse illa (ut sic dicam) tanquam instrumenta, per quæ fidelium fidem excitaret, qua interveniente, ejusmodi beneficia per Christum a Deo impetrarent. Quocirca, licet ipsa signorum instrumenta propter corporalem (ut ita loquar) effectum fiant, scilicet, propter fidelium convocationem, benedicuntur autem propter spirituales effectus arcendi dæmones, et omnia incommoda, tam spiritualia quam corporalia, quæ per eorum insidias nobis proveniunt, et excitandi fideles ad fidei et devotionis auge mentum.

8. Sed urgent Protestantes hoc esse genus quoddam superstitionis, quia vanum est sine præcepto aut auctoritate divina spirituale fructum intendere per materialem sonum campanarum, ex vi solius humanæ benedictionis. Respondemus autem facile, præceptum divinum non esse necessarium, nam satis est actum de se malum non esse, neque a Deo specialiter prohibitum. Deinde dicimus auctoritatem Dei non deesse, saltem in radice et origine, quia ipse dedit auctoritatem Pastori bus Ecclesiæ ad regendam Ecclesiam, et disponenda ea quæ ad accidentarios ritus Ecclesiæ pertinent. Et in iis quæ pro universali Ecclesia approbati sunt, non deest etiam auctoritas Spiritus Sancti Ecclesiam docentis ac gubernantis. Denique fiducia, quæ similes benedictiones fiunt, est fundata in fide Christi et promissionum ejus, et ita longe ab omni superstitione. Quia ille spiritualis effectus non expectatur nisi a Deo per orationes Ecclesiæ, quæ in illa benedictione funduntur; et licet quoad nos transire videantur, et in re benedicta virtutem non relinquant, semper manent in divina cognitione. Ideoque licet non semper infallibiliter obtineant effectus postulatos, saepè nihilominus impetrant,

¹ Versus finem, § Neque enim, n. 96.

quando aliæ opportunæ conditiones concurrunt, quia generaliter hoc promissum est justæ orationi, qualis maxime censenda est illa, quæ nomine totius Ecclesiæ funditur.

9. *Objectio hæreticorum dissolvitur.* — Instabunt vero adversarii, quia in hac benedictione interveniunt non solum depreciationes, sed etiam actiones quædam quæ nullum possunt habere effectum, et ideo vanæ ac superstitiones evidenter. Et præcipue calumniantur Protestantes lotionem campanarum; undique enim intus et extra cum aqua benedicta lavari jubentur. Et ideo fortasse rex non sub nomine benedictionis, sed nomine baptizationis hunc ritum appellat; vel forte quia Calvinus omnis usus aquæ benedictæ profanatio quædam baptismi visus est. Sed hoc vanum omnino est, cum in tali usu, nec intentio nec forma baptismi intercedat. De nomine autem curandum non est, tum quia Ecclesia neque in ritu benedicendi campanas, neque in aliquo decreto, verbo baptizandi, sed verbo benedicendi campanas usa est. Tum quia nihil habet reprehensione dignum, et non est novum, sed satis antiquum, ut ex his, quæ Durand. refert, lib. 5 de Ritib., c. 22, n. 6, intelligi potest.

10. *Instantia.* — Rejecta ergo voce, de hujusmodi actionibus fatemur, non fieri propter aliquem effectum quem proprie efficere aut impetrare possint, et nihilominus negamus vane aut superstitiose fieri, quia propter aliquam convenientem significationem fiunt, ad memoriam vel affectum fidelium excitandum. Quæ ratio valde consentanea est humanæ conditioni; et ideo Deus ipse tam in sacramentis antiquis quam in novis illam observavit, quem suo modo, et pro suo captu in instituendis suis rebus et cæremoniis Ecclesia imitatur. Et ita per illam lotionem campanæ significatur imprimis quædam illius dedicatio ad usum sacrum, et ab aliis signis profanis separatio. Item significatur quanta puritate et decentia interna et externa, quantaque fidei integritate accedere ad ecclesiam debeant illi, qui ad sonitum talium signorum ad ecclesiam convocantur. Circa hujus autem ritus antiquitatem non immoror; nam, licet quidam Joanni XIII Pontifici illum tribuant, alii vero antiquiorem esse existiment, res tamen incerta est, parumque refert ad doctrinæ veritatem. Nam in his rebus quæ ex institutione humana pendent, et mutatio et novitas esse potest, ut supra dixi. Non enim omnis novitas, sed profana, detestanda est; potest autem

aliqua esse pia, et prudenter ac legitima potestate inducta; talis autem est usus et ritus de quo tractamus, et ideo quocunque tempore incepit, irreprehensibilis est.

SUMMA ET CONCLUSIO TOTIUS LIBRI, CUM APOSTROPHÆ AD ANGLIÆ REGEM.

11. De nostræ fidei mysteriis quæ rex Jacobus in sua Praefatione attigit, ea strictim tractavimus, quæ homini ad prudenter credendum parato sufficere, non credituro autem nimis multa videri possunt¹. Quamvis enim divina hæc et sacrosancta mysteria, ea præser-tim quæ ad divinam Eucharistiam, ac B. Virginis aliorumque Sanctorum cultum invocatio-nemque pertinent, adeo fines humanae ratio-nis et naturæ terminos excedant, ut ad eorum intelligentiam nihil, quod ab homine dicatur, satis valeat existimari, ad puram nihilominus et sinceram fidem adversus scripta regis Angliæ persuadendam, nostræ fidei antiquita-tem, et in ea SS. Patrum consensionem os-tendere satis superque esse judicavimus. Ideoque et id solum demonstrare promisimus, et promissum, qua potuimus diligentia, cer-titudine, et claritate, implevimus.

12. Superest, serenissime rex, ut sicut nos, quod promisimus, summa fidelitate exhibui-mus, ita etiam a te, quod et ipse promisisti, qua debemus humilitate exigamus. Hæc enim tua sunt verba in Praefatione ad christianos principes: *Ego vero id ingenue spondeo, quoties religionis illius quam profiteor, ullum caput ostendatur non antiquum, Catholicum et Apostolicum, sed novitum esse (in rebus scilicet spectantibus ad fidem), me statim ab eo discessurum.* Et inferius: *Sic (inquit) hunc locum concludam: me nunquam ullum fidei dogma, quod quidem ad salutem est necessarium, amplecti recusaturum, quod tota Catholica Ecclesia jam inde ab Apostolorum temporibus sine intermissione, multis post sæculis constanter docuerit et crediderit.* Cum igitur non unum tantum, sed plura fidei gravissima dogmata, nimirum, de veritate corporis et sanguinis Domini in Eucharistia, de ejusdemque cultu, debito usu, sacraque oblatione, de Sanctorum cum Christo regnantium, et præcipue SS. Virginis invocatione, de fidelium animarum, purgatione indigentium, pœnis atque suffra-giis, aliaque similia quæ Romana Ecclesia

¹ Vide Bernard., ser. 67 in Cantic.

LIB. II. CONTRA NONNULLOS ANGLICANÆ SECTÆ ERRORES.

docet ac credit, antiquissima in Ecclesia Catholica fuisse, manifeste ostenderimus, cumque regem Angliae illa negare, et contraria ut vera et catholica profiteri, manifestum sit, negare profecto non potest conditionem ab ipso postulatam, a nobis, et ante nos ab aliis Catholicis, esse impletam, ac subinde ipsum sua sponsione teneri, cuius proinde exhibitionem multis titulis postulamus.

13. Primum, quod promissio sit regia, quam decet esse constantissimam. Deinde quod, supposito rerum Anglicanarum statu, fuerit prudentiae ac religioni valde consentanea. Ad hæc, rex serenissime, quia nisi veritati manifestatæ acquiescas, summum tibi periculum salutis immineat; nam ignorasse veritatem, humanum, sed nolle agnoscere declaratam, vel oppugnare agnitam, periculosissimum est, cum ex lance fidei libretur æternitas. Demum, quod nulla honesta ratione, nullove prætextu, verborum tuorum vincula subterfugere valeas. An clariorem lucem majusve testimonium requiris? audi Chrysostomum dicentem: *Sicut semper discere, signum est nunquam posse proficere, sic testimonium semper quererere, signum est nunquam*

reelle credere. An de tuis viribus et potestate contra fidei hostes diffidis? at si voluntatis promptitudo non desit, non est cur impotentiā verearis; nam quod prudentia persuadet, quodque fides docet ac religio jubet, idem nullo profecto negotio exequi potest regia potentia; præsertim quia si animus tibi non defuerit, Deus certe non deerit, cuius donum est ipsa fides fideique defensio. An scandalum perversorum hominum times? Audi Augustinum: *Si de veritate scandalum sumitur, utilius nasci scandalum permittitur, quam veritas relinquatur.* Cæci ergo sunt, et duces cæcorum, contemne illos; tui sunt, absconde eos; facile fiet, quod pro Deo, et re tua et sua fit. Vel tandem humanum aliquid patferis, et ne, si Romano subjiciaris Pontifici, aliquid auctoritati tuæ derogetur, times? Securus esto, non tua quærerit Romanus Pontifex, sed te; nam fidei obediencia regnum non minuit, sed temporale potius auget, et pandit æternum, cuius claves Romano Pontifici commissæ sunt, et ideo de tua est salute sollicitus. Quod ut persuasum tibi habeas, quod tuum quodque ipsius sit jus et potestas, sequens liber ostendet.

FINIS LIBRI SECUNDI.

INDEX CAPITUM LIBRI TERTII

DE SUMMI PONTIFICIS SUPRA TEMPORALES REGES EXCELLENTIA
ET POTESTATE.

-
- CAP. I. *Utrum principatus politicus legitimus et a Deo sit.*
- CAP. II. *Utrum principatus politicus immediate a Deo sit, seu ex divina institutione.*
- CAP. III. *Fundamentis et objectionibus regis Angliæ contra doctrinam superioris capitii satisfit.*
- CAP. IV. *Utrum inter Christianos sit legitima potestas civilis, cui Christiani parere teneantur.*
- CAP. V. *Utrum reges christiani in civilibus seu temporalibus supremam potestatem habeant, et quo jure.*
- CAP. VI. *Utrum sit in Ecclesia Christi spiritualis potestas jurisdictionis externæ et quasi politicæ a temporali distincta.*
- CAP. VII. *Potestatem regendi Ecclesiam in rebus spiritualibus, seu ecclesiasticis rebus, in temporalibus regibus seu principibus non existere, auctoritate probatur.*
- CAP. VIII. *Eadem veritas rationibus confirmatur.*
- CAP. IX. *Solvuntur aliquæ objectiones contra veritatem in superioribus capitibus probatam.*
- CAP. X. *Utrum Christus Dominus supremam Ecclesiæ spiritualem potestatem Petro contulerit.*
- CAP. XI. *Objectionibus contra doctrinam superioris capitii satisfit.*
- CAP. XII. *Au primatus Petri perpetuo et per successionem in Ecclesia perseveret.*
- CAP. XIII. *Romanum Episcopum verum Petri successorem esse, et in eo Petri potestatem perseverare, ex divina Scriptura credendum esse ostenditur.*
- CAP. XIV. *Romanum Pontificem successorem esse Petri testimoniis Sanctorum Patrum ostenditur.*
- CAP. XV. *Pontificem Romanum in dignitate, et potestate, ac primatu Ecclesiæ, successorem esse Petri, eorumdem Pontificum auctoritate comprobatur.*
- CAP. XVI. *Occurritur Protestantibus, argumentum ex Pontificum traditione sumptum eludentibus, et auctoritate Conciliorum confirmatur.*
- CAP. XVII. *Eadem traditio Patrum auctoritate confirmatur.*
- CAP. XVIII. *Duabus objectionibus contra primatum Pontificis ex Scriptura et Conciliis desumptis satisfit.*
- CAP. XIX. *Explicantur quædam loca Gregorii, quæ rex objicit, et veri tituli Romani Episcopi defenduntur.*
- CAP. XX. *Aliis objectionibus ex factis*

- imperatorum et conjecturis desumptis satisfit.*
- CAP. XXI.** *Utrum personæ principum seu regum temporalium spirituali potestati Summi Pontificis subjectæ sint.*
- CAP. XXII.** *Reges christianos non solum quoad personas, sed etiam quoad regiam potestatem, id est, non solum ut homines, sed etiam ut reges christianos potestati Pontificis subjici.*
- CAP. XXIII.** *Pontificem Summum potestate coerciva in reges uti posse usque ad depositionem a regno, si causa subsistat.*
- CAP. XXIV.** *Objectionibus contra doctrinam superiorum capitum ex Scriptura petitis occurritur.*
- CAP. XXV.** *Alteri objectioni ex factis regum, quæ in veteri Testamento narrantur, sumptæ satisfit.*
- CAP. XXVI.** *Argumento sumpto ex comparatione regis et Pontificis satisfit.*
- CAP. XXVII.** *Aliis objectionibus ex Conciliis sumptis satisfit.*
- CAP. XXVIII.** *Patrum testimoniis, quæ rex objicit, satisfit.*
- CAP. XXIX.** *Objectionibus ex rei novitate, et factis imperatorum regumque desumptis satisfit.*
- CAP. XXX.** *Objectionibus ex nonnullis rationibus desumptis satisfit.*
- Summa præcedentis libri cum apostrophe ad regem Angliæ.*

LIBER TERTIUS

DE SUMMI PONTIFICIS

SUPRA TEMPORALES REGES EXCELLENTIA ET POTESTATE.

Hactenus ostensum est in quas haereses gravesque errores, contempto catholicæ fidei fundamento, Anglia tandem inciderit. Superest ut de totius lapsus origine, id est, de negata Pontifici Summo debita obediencia, et usurpato a temporali rege falso nomine supremi capitulis in spiritualibus sui regni, disseramus. Hoc enim fuit totius schismatis initium, et de schismate ad haeresim perventum est, ut supra vidimus. Non est autem necesse iterum miseram et turpem causam commemorare, quæ tantæ mutationi et horrendo schismati occasionem præbuit; nam historiae veritas satis perspicue in principio primi libri describitur; argumentum vero evidens, quod

inde sumitur, mutationem illam anglicanam non a Deo vero, sed a principe tenebrarum ortam esse, satis etiam in eodem libro inculcatum manet, ideoque his, quæ ad præteritum factum spectant, omissis, de jure regis et Pontificis, in hoc libro tractandum superest. Et quamvis de absoluta temporali regis potestate nulla lis aut controversia mota sit, sed solum de illius ad Romanum Pontificem subordinatione, dependentia, ac debita obediencia, nihilominus ut exactius res tota intelligatur, et regi Angliae plenius satisfaciamus (qui in Praefatione sua conqueritur, Pontificem tantam in reges potestatem inique usurpasse, ut se posse contendat *pro libito*

regna mutare, dare et auferre), ideo prius quid de regum temporalium munere et jurisdictione fides doceat, postea vero de Romani Summique Pontificis primatu, et potestate quam, pro ratione sui muneris, in quosvis temporales principes exercere valeat, disseremus. Observato autem, pro uniuscujusque loci opportunitate, ordine doctrinæ, simul errores varios ad hoc punctum pertinentes, quos sparsim rex in Præfatione et in Apologia profert, animadvertemus et refutabimus, objectionibusque quas indicat satisfaciemus; ad alia vero multa, quæ in hoc punto diei possent, non digrediemur.

CAPUT I.

UTRUM PRINCIPATUS POLITICUS LEGITIMUS ET A DEO SIT.

1. Error aliquorum Judeorum nullum principatum humanum agnoscentium.—Potest hoc loco referri antiquus error quorundam Judæorum, qui dicebant solum Deum esse tanquam principem et dominum recognoscendum, illi enim videntur omnem principatum humanum, ac subinde regnum etiam politicum tanquam humanæ libertati contrarium respuisse. Ita refert Josephus, libro 48 de Antiquit., cap. 1, ubi auctorem hujus erroris vocat Judam Gaulanitam, fortasse enim ex origine hoc cognomen habebat; nam c. 2, vocat Judam Galilæum, forte ex patria; lib. autem 2 de Bello Judaic., cap. 2, vocat Simonem Galilæum; tamen in Actibus Apostolorum, c. 5, illius videtur fieri mentio sub nomine Judæ Galilæi, de quo dicitur : *In diebus professionis avertit populum post se, et ipse periiit, et omnes quotquot consenserunt ei dispersi sunt.* Cujus seditionis meminit etiam Joseph., loco citato, et lib. 7 de Bello Jud., cap. 29 et 31, et aliqui existimant hos esse Galilæos, quorum sanguinem Pilatus miscuit cum sacrificiis eorum, ut refert Lucas, c. 13, et exponit ibi OEcumenius, et Anastasius Nicænus, q. 67, in Scripturam. Et quoniam Christus Dominus Galilæus erat, et ex Galilæa discipulos congregaverat, ideo fortasse Judæi calumniam illi hujus erroris moliebantur, quando illum interrogaverunt : *Licetne censem dare Cæsari, an non?* ut sensit Augustinus enarrans verba illa Psalmi 418 : *Principes persecuti sunt me gratis,* et Hieronymus, ad Titum 3, in princ.

2. Non constat autem mihi an Judas ille Galilæus de universis hominibus, an de solis Judæis sententiam suam protulerit; potuit enim specialiter de Judæis sentire non potuisse ab imperatoribus ethnicis in subjectiōnem redigi, vel ad solvenda tributa cogi, neque debere illos ut dominos recognoscere, quia populus ille sub peculiari Dei regimine susceptus erat. Et ideo fortasse postea etiam Apostoli et Christiani, in principio, de hoc errore suspecti fuerunt gentibus, ut ex Justino, Apolog. 2, et Clement. Alexandri., lib. 4 Stromat., accipi potest, et latius c. 3 dicam. Quod si Judas ille absolute de omnibus hominibus et principibus humanis loetus est, fundari forte potuit in naturali hominis dignitate. Nam homo factus ad imaginem Dei, sui juris, solique Deo subditus creatus est, et ideo non videtur posse juste in alicujus hominis servitatem vel subjectionem redigi; ergo non potest unus homo juste compelli, ut alium tanquam principem et dominum temporalem recognoseat; ac subinde principatus politicus, qui hunc dominatum usurpat, nec legitimus, nec a Deo est.

3. Prima assertio : principatus politicus debito modo introductus justus est.—Nihilominus veritas catholica est, politicum principatum, debito modo introductum, justum et legitimum esse. Dico, *debito modo introductum*, ut excludam potestatem per tyrannidem usurpatam, quia de illa constat esse violentiam iniquam, non veram et justam potestatem, cum justo titulo dominii careat; quis autem hic titulus justus sit, capite sequenti attingam. Sic ergo explicata, dicta resolutio habetur expresse in sacra Scriptura, Proverb. 29 : *Rex justus erigit terram;* et iterum : *Rex qui iudicat in veritate pauperes, thronus ejus in aeternum firmabitur;* Sapient. 6 : *Rex sapiens stabilimentum populi est.* In his enim locis et similibus, aperte supponitur temporales reges esse veros ac legitimos principes seu dominos. Et ideo Petrus, 1 canon., cap. 2, præcipit : *Subjecti estote omni humanæ creaturæ propter Deum, sive regi tanquam præcellentí,* etc. Et infra : *Regem honorificate,* et Paulus ad Roman. 13 : *Omnis anima potestatibus sublimioribus subdita sit.* Et infra : *Non solum propter iram, sed etiam propter conscientiam;* non tenetur autem aliquis propter conscientiam obedire, nisi legitimam potestatem ad præcipiendum habenti. Præterea ex Patribus docuerunt veritatem hanc Clemens, libro quarto Constit., cap. 12, dicens : *Estote sub-*

jecti omni regi et potestati, in iis quæ Deo placent, tanquam ministris Dei, et impiorum iudicibus. Et ulterius : *Exhibete eis omnem metum debitum, omne vectigal, omne tributum,* etc. Et concludit : *Hæc enim est Dei lex.* Idem habet lib. 7, c. 17, et Basilius, in Moralibus, regul. 79, ubi etiam adducit illud ad Titum 3 : *Admone illos, principatibus et potestatibus subditos esse;* Hieronymus, epist. 4, post medium, ubi exemplis etiam ex brutis animalibus sumptis id confirmat, dicens : *Etiam multa animalia et ferarum greges ductores sequuntur suos. In apibus principes sunt, grues unum sequuntur ordine litterato, imperator unus, iudex unus provinciae,* etc. Et sumpsisse videtur ex Cypriano, libr. de Idolorum vanitate.

4. *Ratione probatur assertio.*—Atque ex his testimoniosis colligi imprimis potest ratio hujus veritatis, quæ ex necessitate hujus principatus et potestatis ejus, et consequenter ex fine illius, qui est conservatio humanae ac civilis reipublicæ, sumitur. Homo enim natura sua propensus est ad civilem societatem, eaque ad convenientem hujus vitæ conservationem maxime indiget, ut recte Aristoteles docuit, 1 Politicorum, cap. 1 et 2; quod etiam a Deo esse sic ordinatum ad conciliandum inter homines concordiam et charitatem, longo discurso expendit Chrysostomus, homil. 34, in 1 ad Corinth. Non potest autem communitas hominum sine justitia et pace conservari; neque justitia et pax sine gubernatore, qui potestatem præcipendi et coercendi habeat, servari possunt; ergo in humana civitate necessarius est princeps politicus, qui illam in officio contineat. Propter quod dicitur Proverb. 11 : *Ubi non est gubernator, populus corruet,* et Ecclesiast. 10 additur : *Væ tibi terra, cuius rex puer est,* quia non satis est habere principem, nisi sit etiam aptus ad gubernandum. Et ideo in penam comminatur Deus Isaiæ 3 : *Dabo pueros principes eorum, et effeminati dominabuntur eis.* Cum ergo humana natura non possit esse destituta mediis ad suam conservationem necessariis, dubitari non potest quin ex natura rei, et attento jure et justitia naturali, possit esse princeps politicus in civili societate, habens in eam legitimam et sufficientem potestatem. De quo discursu videri potest Augustin., lib. Propos. in epistol. ad Roman., prop. 72, quem imitatur Anselm., Roman. 43, et ibidem Primas, et Laur. Justin., de Triumphali Christi agon., cap. 12.

5. *Ad principatum politicum unum caput mysticum sufficit.*—Potestque idem declarari naturali exemplo corporis humani, quod sine capite conservari non posset. Est enim humana respublica ad modum unius corporis, quod sine variis ministris, et ordinibus personarum, quæ sint instar plurium membrorum, subsistere non potest. Unde multo minus conservari poterit sine gubernatore et principe, ad quem totius corporis commune bonum procurare pertineat. Idem explicari potest exemplis ab arte (ut ita dicam) desumptis, ut est de navi, quam necessesse est perire si gubernator desit. Item de exercitu, si desit dux, et similibus. Atque huc etiam tendunt exempla ex aliis animantibus, e Cypriano et Hieronymo desumpta, quibus (quod notandum est) non solum intendunt concludere, necessarium esse principem in respublica, sed etiam unum tantum esse debere : *Nunquam enim regni societas* (dixit Cyprianus) *aut cum fide caput, aut sine cruro desit.* Loquuntur autem de supremo principatu, nam sub illo esse possunt plures gubernatores in diversis provinciæ partibus; necesse est autem ut omnes uni subordinentur, in quo sit suprema potestas. Nam si plures essent, nec inter se nec alteri subordinati, fieri nullo modo posset ut unitas, seu concordia et obedientia cum justitia et pace conservarentur, ut per se satis notum est. Intelligendum vero etiam hoc est de uno principe, non quoad personam propriam, sed quoad potestatem, et consequenter quoad personam aut veram, aut mysticam, seu politicam; nam ad regimen et conservationem civilis societatis humanae non est absolute necessarius unus monarca (sunt enim alii modi regiminum sufficientes, licet fortasse non ita perfecti, ut infra attingemus), et ideo cum de uno principatu politico loquimur, unum tribunal, seu potestatem unam intelligimus, sive illa in una naturali persona, sive in uno consilio, seu congregatione plurium tanquam in una persona ficta, ut in uno capite existat.

6. *Secunda assertio : potestas politici principis a Deo dimanat.*—Præter rationem sumptam ex fine et ex necessitate hujus potestatis, justitiam ejus ex illius origine ostendere necesse est. Propter quod addimus, principem politicum potestatem suam a Deo ipso recipere. Quod etiam, absolute loquendo, de fide est; nam expresse Paulus pro ratione obedientiae debitæ tali principi, adjunxit : *Non est enim potestas nisi a Deo; quæ autem*

sunt a Deo, ordinata sunt¹. Et infra : *Dei enim minister est*; et Proverbiorum 8, dicit divina sapientia : *Per me Reges regnant*; et Sapient. 6 : *Audite, Reges, etc., quoniam data est a Domino potestas vobis, et virtus ab Altissimo*. Et ita 3 Reg. 10, de rege Salomone dicitur : *Sit Dominus Deus tuus benedictus, cui complacuisti, et posuit te super thronum Israel*; et Daniel, cap. 2, ad Nabuchodonosor dixit : *Deus cœli regnum, et fortitudinem, et imperium dedit tibi*. Et idem sumitur ex Jeremiahia 27. Eadem est communis doctrina Patrum exponentium prædicta loca Pauli, præsertim Chrysostom., hom. 23; et Origen., lib. 9 in epistol. ad Roman., et OEcumen., ibidem, qui ait : *Quia æqualitas in omnibus seditiosa res erat, ideo Deus potestatem adiunxit*. Homilia in Psal. 148, circa verba illa, *Reges terræ, omnes populi, principes, et omnes judices terræ, inter alia dicit, fuisse opus Dei providentiae in eos qui magistratus gerunt, et in eos qui illis parent, universum divisisse*. Nazianzen., orat. 47, et Epiphanius contra Archontic., et hæres. 40, ubi inter alia de potestate principis ait : *Non aliunde est, sed ex Deo*; et Isidorus Pelusiota, lib. 2, ep. 206, imperium a Deo formatum atque institutum dicit; et Theophilus Antiochen., lib. 1 ad Autolyc. : *Deum (inquit), non Cœsarem adorabo, sciens Cœsarem ab ipso esse ordinatum*; et infra dixit, regem, sive Cœsarem esse honorandum, et pro illo ad Deum esse orandum : *Nam regnum (ait) seu imperium, rerumque administratio ipsi a Deo commissa seu demandata est*. Idem late docet Irenæus, lib. 5 contra Hæres., cap. 24, ubi loca Scripturæ, præsertim Pauli, in hunc sensum exponit, et alias interpretationes refellit, et optime Tertullianus, libro ad Scapulam, cap. 2 : *Christianus nullius est hostis, nedum imperatoris, quem sciens a Deo suo constitui, necesse est ut et ipsum diligat, et revereatur, et honoret, et salvum esse velit*. Denique Augustinus, libr. 5 de Civitat., cap. 21 : *Non tribuamus (inquit) dandi regni et imperii potestatem, nisi Deo vero*, etc. Idemque confirmant Patres in priori assertione allegati, et alii, quos in sequenti capite referam.

7. *Ratio assertionis.* — Ratio hujus assertione multum pendet ex modo quo credendum est, Deum dare hujusmodi principatum, seu potestatem, quod sequenti capite tractandum est. Et ideo nunc breviter probatur,

primo, quia omnia quæ sunt de jure naturæ, sunt a Deo ut auctore naturæ; sed principatus politicus est de jure naturæ; ergo est a Deo ut auctore naturæ. Et ita hæc assertio fundatur in præcedente; nam cum hic principatus justus et legitimus sit, non potest non esse consentaneus juri naturali; et cum sit necessarius ad conservationem humanæ societatis, quam ipsa humana natura appetit, etiam hoc titulo est ex jure naturali talem potestatem exigente; igitur sicut Deus, qui est auctor naturæ, est etiam auctor juris naturalis, ita etiam est auctor hujus primatus et potestatis. Nam, ut Philosophus dixit, qui dat formam, dat ea quæ consequuntur ad ipsam. Deinde potest eadem illatio fieri hoc modo, quia omne bonum dimanat a Deo ut a principali auctore, juxta illud Jacobi 4 : *Omne datum optimum, et omne donum perfectum desursum est*; sed principatus politicus est bonus et honestus, ut ostensum est; ergo est a Deo. Denique hac ratione terreni reges ministri Dei vocantur in Scriptura, ut vidi mus; ergo eorum potestas ministerialis est respectu Dei; ergo ipse est principalis auctor hujus regiminis. Declaratur autem maxime ex potestate quam princeps politicus habet ad vindictam de malis sumendam, etiam illos vita privando, si oportuerit; nam hoc sine divino nutu fieri non potuisset, cum solus Deus sit dominus vitæ hominis, et hoc significavit Paulus dicens : *Non sine causa gladium portat, Dei enim minister est, viadex in iram, ei qui malum agit*. Unde etiam est illud Augustini, lib. de Natura boni, contra Manichæos : *Etiam nocentium potestas non est nisi a Deo*, et citat illud : *Per me reges regnant*, et similia.

8. *Diluitur fundamentum erroris in principio positi.* — Atque hinc facile patet responsio ad fundamentum contrarii erroris intellecti in posteriori sensu supra declarato, in quo est propositæ veritati catholicæ contrarius. Quamvis enim homo liber creatus sit, non tamen sine capacitate et aptitudine, ut justa causa et rationi consentanea possit alteri homini subjici; imo subjectio aliqua est homini naturalis, vel supposito naturali modo generationis, ut est subjectio filii ad patrem, vel supposito aliquo pacto, ut est subjectio uxoris ad virum. Sic ergo, supposita societate civili, subjectio singularum personarum ad publicam potestatem seu principatum politicum, naturalis est, tanquam consentanea rectæ rationi naturali, et ad con-

¹ Rom. 13.

venientem humanæ naturæ conservationem necessaria. Et ideo neque conditioni hominis hæc subjectio repugnat, neque etiam in aliquam Dei injuriam redundat, quia, licet princeps politicus in gradu suo sit rex, legislator et dominus, longe tamen diverso et inferiori modo quam Deus. Nam de homine solum per participationem quamdam tanquam de ministro Dei hæc dicuntur; soli autem Deo per essentiam et principaliter conveniunt. Quod si error ille in priori sensu intelligitur, non opponitur assertioni catholicæ a nobis propositæ, quia licet Judaicus populus ex peculiari Dei privilegio esset exemptus, ne jure principibus ethnicis subjici posset, nihilominus in ipsa Judæorum republica legitimus principatus politicus inveniri potuit, sicut revera suis temporibus fuit, et similiter in aliis regnis et provinciis gentium esset idem principatus, et in unoquoque principe supremo esset similis potestas in populos sibi subjectos. Verumtamen etiam in illo sensu non habuit sententia illa fundamentum solidum; non vacat autem nunc illud expendere, neque etiam examinare an Judæi jure et legitimate, vel per injuriam et tyrannidem fuerint Romanis subjecti, et ad solvendum imperatori tributum coacti, nam hujusmodi quæstiones nihil ad præsens institutum referunt.

CAPUT II.

UTRUM PRINCIPATUS POLITICUS IMMEDIATE A DEO SIT, SEU EX DIVINA INSTITUTIONE.

1. Principatum politicum immediate a Deo esse opinatur Jacobus Rex. — Quæstio tractata in præcedenti capite, propter hanc, quam nunc propono, declarata est; in illa enim nulla est nobis contentio cum rege Angliæ; sed necessario præmittenda fuit, ut hæc possit intelligi. In qua rex serenissimus non solum novo et singulari modo opinatur, sed etiam acriter invehitur in Cardinalem Bellarminum¹, eo quod asseruerit, *non regibus auctoritatem a Deo immediate, perinde ac Pontificibus esse concessam*. Asserit ergo ipse, regem non a populo, sed immediate a Deo suam potestatem habere, suam vero sententiam quibusdam argumentis et exemplis suadere conatur, quorum efficaciam in sequenti capite expendemus.

¹ In prefatione, pag. 140.

2. Quæ requirantur ut aliqua potestas immediate a Deo concedatur. — Sed quanquam controversia hæc ad fidei dogmata directe non pertineat (nihil enim ex divina Scriptura aut Patrum traditione in illa definitum ostendi potest), nihilominus diligenter tractanda et explicanda est. Tum quia potest esse occasio errandi in aliis dogmatibus. Tum etiam quia prædicta regis sententia, prout ab ipso asseritur et intenditur, nova et singularis est, et ad exaggerandam temporalem potestatem et spirituale extenuandam videtur inventa. Tum denique quia sententiam Illustrissimi Bellarmini antiquam, receptam, veram ac necessariam esse censemus. Quod ut ostendamus, declarare prius oportet, quid sit potestam aliquam esse immediate a Deo, seu (quod perinde est) Deum esse immediatam causam et auctorem alicujus potestatis. Imprimis enim requiritur ut Deus sit causa proxima, sua voluntate conferens talem potestatem. Non enim satis est ut Deus, tanquam prima causa et universalis, potestatem tribuat; nam licet illo etiam modo possit Deus aliquo modo dici immediate efficere, vel donare quidquid ab ipso tanquam a prima causa pendet, sive ratione proximæ virtutis, sive ut immediatum suppositum, ut philosophi distinguunt, nihilominus hic modus immediate effectionis in præsenti non satis est. Quia nulla est potestas quæ hoc modo non sit a Deo, ut a prima causa, ac proinde immediate in illo genere; atque ita potestas etiam data immediate ab hominibus, a rege vel Pontifice, datur etiam a Deo, ut prima causa immediate influente in illi effectum, et in actu voluntatis creatæ, per quam proxime donatur. At vero talis potestas non dicitur simpliciter esse immediate a Deo, sed solum secundum quid; nam proxime ab homine datur, et ab illo pendet. Tunc ergo dicitur potestas absolute data immediate a Deo, quando solus Deus per voluntatem suam est causa proxima, et per se donans talem potestatem, et hoc modo in præsenti loquimur, alioqui frivola et inutilis esset disputatio.

3. Imo ulterius duos modos distingue oportet, quibus Deus potest et solet immediata, id est, sola sua potentia et voluntate aliquam potestatem conferre. Unus modus est dando potestatem, ut ex natura rei necessario connexam cum aliqua natura rei, quam Deus ipse condit, quod in physicis facultatibus facile potest considerari; nam Deus

creando animam dat illi immediate intellectum et voluntatem, quia licet hujusmodi potentiae ex anima ipsa naturaliter fluant, tamen quia solus Deus animam immediate creat, dicitur etiam immediate conferre potentias quae illam consequuntur. Idem ergo est, servata proportione, in morali potestate, nam potestas patris in filium moralis est, et a Deo ipso ut auctore naturae immediate confertur, non ut peculiare donum a natura omnino distinctum, sed ut necessario consequens illam, supposito generationis fundamento; sicut e contrario subjectio filii ad patrem naturalis est, et a Deo immediate, non ex peculiari institutione addita naturae, sed ut necessario consequens ad talem naturam rationalem sic productam. Alio modo datur a Deo immediate potestas per se (ut ita dicam) et peculiari donatione, non ut necessario connexa cum alicujus rei creatione, sed ut voluntarie a Deo superaddita alicui naturae vel persone. Cujusmodi possumus exempla quasi physica et moralia adhibere; nam potestas proxima faciendi miracula quasi physica est, et tamen Deus illam immediate confert cui vult, non ex aliquo debito, sed ex consilio voluntatis suae. Potestas quoque jurisdictionis, Petro, verbi gratia, data, moralis fuit, et tamen Deus illam immediate, direete, ac per se contulit. Ratio autem distinctionis non est alia, nisi quia potestates ipsae possunt esse diversarum rationum vel ordinum, et Deus potens est ad operandum, et connaturali, et praeter, vel supernaturali modo.

4. Quamobrem cum rex adstruat, Deum immediate dare regibus principatum et potestatem temporalem, videndum est an illa assertio aliquo ex praedictis modis vera esse possit. Prius vero declarandum est subjectum, cui dicitur Deus immediate dare hanc potestatem, et ad quod vel quale regimen illam dare censeatur. Nam haec potestas considerari potest, vel prout est, seu esse potest, in toto corpore politico communitatis, seu civitatis humanae, vel prout in his aut illis membris ejusdem communitatis existit, vel existere potest. Item considerari potest eadem potestas vel praeceps et abstracte, vel ad certam speciem politicæ gubernationis determinata. Nam (ut est moralis doctrina philosophis communis) triplex potest esse regimen reipublicæ humanæ, monarchicum unius principis supremi, qui sit una singularis persona; aristocraticum, unius supremi consilii

seu tribunalis ex pluribus optimatibus coacti; et democraticum, per totius populi suffragia, qui tres modi simplices sunt; ex illis autem possunt alii componi, qui vel duos illorum, vel etiam omnes participant, quae gubernationes mistæ solent appellari. Potest igitur principatus politicus, vel per se et praeceps considerari, ut potestas quædam suprema regendi civiliter rempublicam, abstrahendo ab hoc vel illo modo regiminis, tam simplici quam mixto, vel prout determinatus ad aliquam regiminis speciem ex his quas numeravimus. Quibus sic propositis, et distinctis, sine ulla prorsus ambiguitate, evidentique ratione statui potest quomodo principatus politicus sit immediate a Deo, et nihilominus regibus et senatibus supremis non a Deo immediate, sed ab hominibus commendatus sit.

5. *Suprema potestas civilis soli communis perfectæ immediate a Deo confertur. — Probatur prior assertionis pars primo.* — Primo enim suprema potestas civilis, per se spectata, immediate quidem data est a Deo hominibus in civitatem seu perfectam communitatem politicam congregatis, non quidem ex peculiari et quasi positiva institutione, vel donatione omnino distincta a productione talis naturae, sed per naturalem consecutionem ex vi primæ creationis ejus, ideoque ex vi talis donationis non est haec potestas in una persona, neque in peculiari congregatione multarum, sed in toto perfecto populo seu corpore communitatis. Haec resolutio quoad omnes partes communis est, non solum Theologorum, sed etiam jurisprudentiarum, quos statim referam. Nunc ratione ostendo singulas partes. Primam quidem et secundam, quia haec potestas politica naturalis est; quia nulla etiam interveniente supernaturali revelatione aut fide, ex dictamine rationis naturalis agnosceretur haec potestas in humana republica, ut illius conservationi et æquitati omnino necessaria; signum igitur est, esse in tali communitate ut proprietatem consequentem naturam, seu creationem, et naturalem ipsius institutionem. Nam si praeter hanc esset necessaria specialis Dei donatio, et concessio non connexa cum natura, non posset sola naturali ratione de illa constare, sed opus esset ut per revelationem hominibus manifestaretur, ut de illa certi esse possent, quod tamen falsum est, ut ex dictis constat.

6. *Probatur secundo.* — Quod autem saltem

hoc modo necessario dicendum sit, hanc potestatem esse immediate a Deo, facile ex eisdem principiis concluditur, quia quæ consequuntur naturam, immediate dantur a proprio et immediato auctore ejusdem naturæ, ut declaravi; sed hæc potestas est proprietas quædam consequens humanam naturam, ut in unum politicum corpus congregatam, ut etiam ostensum est; ergo datur immediate a Deo, ut est auctor et provisor talis naturæ. Deinde probari hoc potest, quia hæc potestas est a Deo, ut capite præcedenti probatum est, et respectu talis communitatis non intercedit medium (ut sic dicam) inter Deum et ipsam, per quod tribuatur. Nam, eo ipso quod homines in corpus unius civitatis vel reipublicæ congregantur, sine interventu aliquujus creatæ voluntatis resultat in illa communitate talis potestas, cum tanta necessitate, ut non possit per voluntatem humanam impediri; signum proinde est esse immediate a Deo, interveniente solum illa naturali resultantia, seu consecutione ex natura, et dictamine rationis naturalis, ostendentis, potius quam ejusmodi potestatem exhibentis. Neque immediatam emanationem hujus potestatis a Deo, hoc modo declaratam, negavit unquam Cardinalis Bellarminus, sed illam potius supposuit, quia non inter populum et Deum medium posuit, sed inter regem et Deum voluit populum esse medium, per quod rex talem accipit potestatem, quod longe diversum est, ut jam declarabitur.

7. *Altera pars assertionis ostenditur.* — Atque hinc evidens etiam est (quod in ultima parte assertionis dicebamus) potestatem hanc præcise spectatam, ut est ab auctore naturæ quasi per naturalem consecutionem, non esse in una persona, neque in aliqua peculiari communitate, sive optimatum, sive quorumcumque ex populo, quia ex natura rei solum est hæc potestas in communitate, quatenus ad illius conservationem necessaria est, et quatenus per dictamen rationis naturalis ostendi potest; sed ratio naturalis solum ostendit esse necessariam in tota communitate, et non in una persona, vel senatu; ergo prout est immediate a Deo, solum intelligitur esse in tota communitate, non in aliqua parte ejus. Quod intelligo de parte communitatis non solum individue seu materialiter (ut sic dicam) designata, sed etiam formaliter, seu indeterminate aut vase concepta, id est, non est immediate in una certa persona, verbi gratia, Adamo, Jacobo, vel Philipo, neque etiam

ex natura rei postulat esse in una singulari persona, et idem est cum proportione de senatu, sive spectetur materialiter, ut constans ex talibus personis, sive formaliter, ut est congregatio ex tali, vel tanto personarum numero. Et ratio est manifesta, quia ex vi rationis naturalis nulla potest excogitari ratio cur hæc potestas determinetur ad unam personam, vel ad certum numerum personarum infra totam communitatem, magis quam ad alium; ergo ex vi naturalis concessionis solum est immediate in communitate. Declarat denique, quia ex vi solius rationis naturalis non determinatur principatus politicus ad monarchiam, vel aristocratiæ simplicem vel mistam, quia nulla est ratio quæ definitum modum regiminis necessarium esse convincat. Quod usus ipse confirmat: nam propterea diversæ provinciæ vel nationes diversos etiam gubernationis modos elegerunt, et nulla illarum contra rationem naturalem aut contra immediatam Dei institutionem operatur. Quare signum est potestatem politicam non esse a Deo immediate donatam uni personæ, principi, regi, aut imperatori, alioqui illa esset monarchia immediate a Deo constituta; vel uni, vel alicui particulari senatu, aut particulari congregationi paucorum principum, alioqui illa esset aristocracia a Deo immediate instituta; idemque argumentum de quacumque mixta gubernatione fieri poterit.

8. *Objectio.* — *Solutio.* — Dices: si hæc ratio efficax esset, etiam probaret Deum non dedisse immediate toti communitati hanc politicam potestatem, quia alias democratis esset immediate ex divina institutione, sicut de monarchia et aristocratiæ nos inferebamus. At hoc non minus est falsum et absurdum in democratis, quam in aliis speciebus regiminum, tum quia sicut ratio naturalis non determinat ut necessariam Monarchiam vel aristocratiæ, ita nec democratiæ; imo multo minus istam, quia omnium imperfectissima est, ut Aristoteles testatur, et est per se evidens. Tum etiam quia si illa institutio esset divina, non posset per homines immutari. Respondetur negando primam illationem, nam potius ex eo quod hæc potestas non est data a Deo instituente monarchiam vel aristocratiæ, necessario concluditur datam fuisse toti communitati, quia non relinquitur aliud subjectum humanum, ut sic dicam, cui dari potuerit. Ad alteram vero illationem, scilicet, hinc sequi democratiam esse

ex divina institutione, respondemus, si hoc intelligatur de institutione positiva, negandam esse consecutionem; si vero intelligatur de institutione quasi naturali, sine ullo inconvenienti admissi posse et debere. Est enim valde notanda differentia inter has species politicæ gubernationis, nam monarchia et aristocratia introduci non potuerunt sine positiva institutione divina vel humana, quia sola naturalis ratio nuda sumpta non determinat aliquam ex dictis speciebus ut necessariam, sicut dixi; unde cum in humana natura, per se spectata absque fide seu revelatione divina, non habeat locum positiva institutio, de illis speciebus necessario concluditur, non esse immediate a Deo. At vero democratia esse posset absque institutione positiva, ex sola naturali institutione, seu dimanatione, cum sola negatione novæ, seu positive institutionis, quia ipsa ratio naturalis dictat, potestatem politicanam supremam naturaliter sequi ex humana communitate perfecta, et ex vi ejusdem rationis ad totam communitatem pertinere, nisi per novam institutionem in alium transferatur, quia ex vi rationis neque alia determinatio locum habet, neque immutabilior postulatur.

9. *Quomodo democratia dicatur esse de jure naturæ.*—Quocirca potestas hæc, prout a Deo immediate datur communitati, juxta modum loquendi juris peritorum, dici potest de jure naturali negative, non positive, vel potius de jure naturali concedente, non simpliciter præcipiente. Quia nimurum jus naturale dat quidem per se et immediate hanc potestatem communitati, non tamen absolute præcipit ut in illa semper maneat, neque ut per illam talis potestas immediate exerceatur, sed solum quamdiu eadem communitas aliud non decreverit, vel etiam ab aliquo potestatem habente mutatio legitime facta non fuerit. Exemplum est de libertate hominis, quæ servituti opponitur, est enim de jure naturali, quia ex vi solius naturalis juris homo nascitur liber, nec potest sine legitimo aliquo titulo in servitutem redigi; jus autem naturæ non præcipit omnem hominem semper manere liberum, seu (quod perinde est) non simpliciter prohibet hominem in servitutem redigi, sed solum ut id non fiat vel sine libero illius consensu, vel sine justo titulo et potestate. Sic ergo perfecta communitas civilis jure naturæ libera est, et nulli homini extra se subjicitur, tota vero ipsa habet in se potestatem, quæ si non mutaretur, democratica esset, et nihilominus,

vel ipsa volente, vel ab alio habente potestatem et titulum justum, potest tali potestate privari, et in aliquam personam vel senatum transferri.

10. *Nullus principatus politicus est immediate a Deo.*—Ex quibus tandem concluditur nullum regem vel monarcham habere vel habuisse (secundum ordinariam legem) immediate a Deo, vel ex divina institutione, politicum principatum, sed mediante humana voluntate et institutione. Hoc est *egregium Theologie axioma*, non per irrationem, ut rex protulit, sed vere, quia recte intellectum verissimum est, et ad intelligendos fines et limites civilis potestatis maxime necessarium. Non est autem novum, aut a Cardinali Bellarmino inventum, ut prædictus rex illi attribuere videtur; nam multo antea illud docuit Cardinalis Cajetanus, in *Apologia*, seu tract. 2 de *Auctoritat. Papæ*, p. 2, c. 10; et *Castr.*, lib. 1 de *Leg. pœnal.*, c. 1; et *Dried.*, lib. 1 de *Libertat. Christ.*, c. 19; et *Victor.*, in *Relect. de Potestat. civil.*, n. 8 et sequent.; et sumitur ex eodem, in *relect. 2, de Potestat. Eccles.*, concl. 3, et ad 1; *Soto*, lib. 4 de *Justit.*, q. 2, art. 1, in *discursu conclusionis 1*, et latius quæst. 4, art. 1; quos secutus est *Ludovic. Molina*, *tractat. 2 de Justit.*, disp. 21. Et insinuat *D. Thom.*, l. 2, q. 90, art. 3. et quæst. 97, art. 3, et *clarius 2. 2*, quæst. 40, art. 10. Nec solum a *Theologis*, sed etiam a *jurisperitis* doctrina hæc tradita est communiter, in lib. 3, ff. de *Constitut. Princip.* et in l. 2, ff. de *Origin. juris*; et ex *Modernis*, a *Navarro*, in cap. *Novit.* de *Judiciis*, notab. 3, præsertim num. 41, et 85, et 94, et num. 112 et sequentibus, usque ad 121, et num. 147; *Covarruv.*, in *Practicis quæstionibus*, c. 1, num. 6, qui alias etiam referunt.

11. *Ex Patribus confirmatur assertio.*—Præterea sumi potest hæc veritas ex *Sanctis Patribus*, primo, quia sæpe asserunt hominem a Deo fuisse creatum ingenuum et liberum, solumque accepisse a Deo immediate potestatem dominandi brutis animalibus et inferioribus rebus; dominium autem hominum in homines per humanam voluntatem, propter peccatum aut adversitatem aliquam, fuisse introductum. Quod tradidit Ambrosius, ad *Coloss.* 3, in fine; et latius August., 19 de *Civit.*, c. 45, et lib. *Quæstion. in Genes.*, q. 153; et Gregorius, lib. 21 *Moral.*, cap. 10, alias 11, et in *Pastorali*, p. 2, c. 6. Quod enim illi de libertate uniuscujusque hominis, et servitute illi opposita dicunt, eadem ratione

in persona mista seu facta unius communittatis seu civitatis humanæ verum habet. Nam prout a Deo immediate regitur jure naturæ, libera est et sui juris, quæ libertas non excludit, sed includit potius potestatem regendi se ipsam, et imperandi membris suis, excludit autem subjectionem ad alium hominem, quantum est ex vi solius naturalis juris, quia nulli hominum dedit Deus immediate talem potestatem, donec per institutionem vel electionem humanam in aliquem transferatur. Deinde hoc egregie confirmat sententia Augustini, lib. 3 Confess., c. 8, dicentis : *Generale pactum est societatis humanæ obedire regibus suis.* Nam per hæc verba significat, regium principatum, et obedientiam illidebitam, fundamentum habere in pacto societatis humanæ, ac subinde non esse ex immediata institutione Dei, nam humanum pactum humana contrahitur voluntate.

12. Et fortasse hoc pactum nomine *legis regiae* significatur in l. 4, ff. de Constitut. Princip., ubi Ulpianus ait, ideo principis placitum legis habere vigorem, *quia lege regia, que de imperio ejus lata est, populus ei et in eum omne suum imperium et potestatem transstulerit.* Quæ verba probavit et transcripsit Justinianus imperator in § *Sed et quod principi*, Institut. de Jure natur. genti. et civili : illa enim lex non dicitur regia, quia ab aliquo rege lata sit, sed quia de imperio regis lata est, ut in eadem l. 4 dicitur, ubi etiam significatur constitutam esse a populo creantem et instituente regis dignitatem, transferendo in illum suam potestatem, ut ibi etiam Glossæ et Doctores exponunt. Non potuit autem illa lex ferri per modum solius præcepti, cum per illum populus se abdicaverit a suprema juris dicendi potestate ; ergo intelligi debet constituta per modum pacti, quo populus in principem transtulit potestatem sub onere et obligatione gerendi curam reipublicæ, et justitiam administrandi, et princeps tam potestatem quam conditionem acceptavit ; ex quo pacto firma et stabilis permansit lex regia, seu de regali potestate ; non ergo immediate a Deo, sed a populo reges hanc habent potestatem. Unde etiam dicitur in l. 2, § *Noesisime*, ff. de Orig. juris, *quia senatus non omnes provincias probe regere poterat, constituto principe, datum esse ei jus, ut quod constituisset, ratum esset.*

13. *Ratione probatur conclusio.* — Ratio autem assertionis ex dictis facile colligitur ; nam illa potestas dicitur esse in aliquo inmediate

a Deo, quæ vel per solam Dei voluntatem, vel ex vi solius rationis naturalis, aut alicujus divinae institutionis ad illum pervenit ; sed potestas, de qua tractamus, nullo ex his modis data est regibus a Deo, loquendo secundum ordinariam legem, quia nec per speciale voluntatem Dei immediate data est (talis enim voluntas Dei nec revelata, nec nota facta est hominibus) ; neque etiam solum jus naturale per se dictat, hanc potestatem debere esse in regibus, ut ostensum est ; institutio denique seu determinatio aut translatio hujus potestatis ad reges non a Deo immediate facta est, ut ex usu ipso constat. Item quia alias talis institutio immutabilis esset, et omnis mutatio in ea facta per homines fuisset iniqua ; imo omnes civitates, regna, vel res publicæ deberent eamdem institutionem servare, quia non est major ratio de una quam de alia, neque una magis accepit ex divina revelatione talem institutionem, quam alia. Est ergo hæc humana institutio, quia per homines immediate facta ; ergo per homines immediate datur potestas regibus, quorum dignitas per illam institutionem creata est. Mediata autem dicitur Deus dare hanc potestatem regibus, tum quia immediate dedit illum populo, qui in regem illum transtulit ; tum quia Deus huic etiam translationi, proxime a populo factæ, consentit et cooperatur, tanquam prima et universalis causa ; tum denique quia illam approbat, et servari vult. Sicut etiam lex humana immediate quidem obligat ex voluntate principis humani ferentis illum, mediate vero etiam obligat ex vi voluntatis Dei volentis, ut legitimis principibus obediatur, juxta illud Petri : *Subjecti estote, etc., quia sic est voluntas Dei.*

14. *Eadem conclusio exemplis ostenditur.* — Cap. Quo jure, dist. 4. — Potest denique hoc exemplo dominii humani circa res inferiores declarari. Simpliciter enim loquendo, omnes res, qnarum homines habent dominium, ipsis a Deo donatae sunt, non tamen eodem modo. Nam immediate non dedit Deus (ordinarie loquor) alieui homini proprium et peculiare dominium alicujus rei, sed immediate omnia fecit communia ; privata autem dominia partim jure gentium, partim jure civili introducta sunt ; et nihilominus illa etiam privata dominia sunt mediate a Deo, tum quia ducunt originem ex prima donatione Dei ; tum etiam quia per suam generalem providentiam ad illa concurrit ; tum denique quia illa servari vult, postquam sunt constituta. Sieque dixi

Augustin., tract. 6 in Joan. in fine: *Unde quisque possidet quod possidet? nonne jure humano? nam jure divino Domini est terra, et plenitudo ejus; jure tamen humano dicit: Hæc villa mea est, hæc domus mea, hic servus meus est.* Et infra concludit: *Ipsa jura humana per imperatores et reges sæculi Deus distribuit generi humano.* Ita ergo, proportione servata, Deus est qui distribuit regna et principatus politicos, sed per homines, seu consensus populorum, vel aliam similem institutionem humanam.

15. Objectio. — Dicet vero fortasse aliquis, hoc discursu solum probari, potestatem regis non dari a Deo alicui personæ sine interventu voluntatis vel actionis humanæ, id tamen non satis esse ut non detur immediate a Deo, nam etiam dignitas Apostolica data est Matthiæ mediante actione aliorum Apostolorum, et nihilominus data illi est immediate a Deo; et similiter Summus Pontifex a Cardinalibus eligitur, et tamen immediate a Deo accipit potestatem. Et similiter qui succedit in majoratu per generationem, a proximo parente jus illud tandem consequitur, et nihilominus immediate censemur habere illa bona a primo institutore majoratus, quia ex vi solius voluntatis ejus, etiamsi proximus parens maxime nolit, majoratum consequitur. Sic ergo, licet temporales reges per successionem dignitatem regiam obtineant, a Deo immediate illam recipiunt ex vi primæ institutionis.

16. Duobus modis potest intercedere voluntas hominis in collatione potestatis a Deo manantis. — **Primus modus.** — Verumtamen haec objectio non enervat, sed confirmat potius discursum factum, tum quia exempla non sunt similia; tum etiam quia non asservimus, quamcumque interpositam hominis voluntatem vel actionem sufficere, ut potestatis donatio a Deo immediate non sit, sed solum id fuit dictum de peculiari mutatione et translatione facta per novam institutionem humanam. Duobus itaque modis potest actio aut voluntas humana intervenire in collatione potestatis a Deo ipso ducentis originem: primo, solum designando vel constituendo personam quæ sucedat in dignitate a Deo instituta, eodem prorsus modo quo instituta est, et sine auctoritate, vel potestate illam mutandi, augendi, vel minuendi. Atque hic modus quoad pontificiam dignitatem servatus est in lege veteri secundum successionem carnalem; in lege autem nova fit per legitimam electionem, qua persona designatur. De hoc ergo modo

successionis verum est, nihil obstare quomodo potestas a Deo immediate conferatur, et hoc tantum probant exempla adducta. Et ratio est, quia semper confortur potestas ex vi primæ institutionis, et solius voluntatis Dei, cuius signum est, quia integre et immutabiliter, prout instituta est, confortur, et quia successio etiam in eadem potestate ab eadem institutione originem habet; ideo enim in lege veteri per generationem carnalem in pontificatu succedebatur, quia ita a Deo ipso institutum erat; nunc autem designationis personæ alio magisque spirituali modo fit, quia ecclesiastica traditio docet ita esse a Christo institutum, qui modum electionis seu designationis personæ vicario suo definiendum comisit.

17. Secundus modus. — Alio ergo modo potest fieri collatio potestatis ab homine per novam donationem vel institutionem ultra designationem personæ, et tunc etiamsi talis potestas fundamentum habeat in aliqua priori donatione divina alteri facta, nihilominus collatio illa, quæ postea fit, simpliciter est de jure humano, et non divino, et immediate ab homine, non a Deo. Exemplum est in servitute, nam si aliquis homo se vendat in servum alteri, servitus illa simpliciter est de jure humano, et potestas, quam dominus in servum accipit, ab ipso servo immediate data est per potestatem et libertatem naturalem, quam ipse immediate habuit ab auctore naturæ. Ita ergo est in praesenti de subjectione totius communis humanæ ad unum principem, nam immediate procedit a voluntate communis, et ideo immediate est ab homine, et de jure humano, licet originem trahat a potestate naturali, quam eadem communis supra se ipsam a suo auctore accepit. Et ratio clara est, quia in his, et similibus casibus, nec sufficit designationis personæ, neque est separabilis a donatione vel contractu, aut quasi contractu humano, ut habeat effectum conferendi potestatem, quia sola naturalis ratio non inducit translationem potestatis ab uno homine in alium per solam designationem personæ, sine consensu et efficacia voluntatis ejus a quo potestas transferenda seu conferenda est. Unde intelligi non potest collatio potestatis, quæ a Deo immediate fiat, media generatione, electione, aut simili designatione humana, nisi ubi successio est ex divina institutione positiva; potestas autem regia non ex divina institutione positiva, sed solum ex ratione naturali dicit originem,

media libera voluntate humana; et ideo necessario est ab homine immediate conferente, et non tantum personam designante.

18. Et hinc etiam oritur (quod est clarum indicium hujus veritatis) ut haec regia potestas non sit aequalis in omnibus regibus, neque cum eisdem proprietatibus durationis, perpetuitatis aut successionis, et similibus. In quibusdam enim potestas est simpliciter monarchiae, in aliis vero cum mistione aristocratie, seu cum dependentia ab aliquo senatu, etiam quoad suffragia decisiva, et interdum tantum in certis casibus, interdum in omnibus gravioribus; vel aliquando in multis, aliquando in paucioribus. Item quibusdam regibus data est potestas non solum personae, sed etiam ejus generationi (ut sic dicam), id est ut possint ad filios vel nepotes dignitatem transferre; aliis vero interdum datur pro persona, et sine carnali successione, ut, uno rege mortuo, alter eligatur, sicut modo in regno Poloniae, et in ipso imperio Romano fit; imo etiam posset rex ad certum tempus eligi, si ita fuisset alicubi in principio introductum, quia ex natura rei non repugnat. Ergo signum manifestum est, hanc esse immediatam institutionem humanam, et ideo recipere posse totam illam varietatem, quae rationi non repugnet, et sub humano arbitrio cadere possit.

19. Atque hinc tandem fit, ut haec regia potestas seu dominatio variis modis obtineri possit, quos hic etiam adnotare oportet, ut plenius resolutio tradita intelligatur. Primus enim modus conferendi uni principi hanc potestatem in primæva institutione, est per voluntarium populi consensum. Hic autem consensus variis modis intelligi potest: unus est, ut paulatim et quasi successive detur, prout successive populus augetur. Ut, verbi gratia, in familia Adæ vel Abrahæ, aut alia simili in principio, obediebat Adamo tanquam parenti, seu patrifamilias, et postea, crescente populo, potuit subjectio illa continuari, et consensus extendi ad obediendum illi, etiam ut regi, quando communitas illa cœpit esse perfecta; et fortasse multa regna (et in particulari primum regnum Romanæ civitatis) ita incepérunt. Et in hoc modo (si quis recte consideret) regia potestas et communitas perfecta simul incipere possunt. Alius vero modus esse potest, quando communitas jam perfecta voluntarie regem eligit, in quem suam transfert potestatem, qui est modus per se maxime conveniens, et rationi

consentaneus. Postquam vero haec translatio semel facta est firma et perpetua, tunc non est ulterius necessaria nova electio vel novus populi consensus; sufficit enim ille qui in primordio regni datus est, ut ex vi illius eadem regia dignitas et potestas per successionem transferatur. Et hoc modo in regnis successivis reges etiam dici possunt habere potestatem immediate a populo, non per novum consensum, sed ex vi antiqui; a parentibus enim habent filii eadem regna in virtute primæ institutionis, magis quam parentum voluntate; nam, etiamsi pater nolit, primogenitus succedit in regno, et ideo pater solum se habet quasi applicans, seu constituens personam, in quam eadem potestas ex vi ejusdem primi contractus transferatur.

20. Præter hunc autem voluntarium modum solent interdum provinciae seu populi liberi involuntarie subjici regibus per bellum; hoc autem contingit et juste et injuste fieri. Quando ergo bellum justum habuit titulum, tunc revera privatur populus potestate quam habebat, et princeps, qui contra illum prævaluuit, verum jus et dominium talis regni acquisivit, quia, supposita justitia belli, illa est justa poena. Sicut capti in justo bello privantur libertate a natura concessa, et efficiuntur vere servi in poenam justam. Et ideo supra dixi, potestatem regiam fundari in contractu, vel quasi contractu; nam justa punitio delicti vicem contractus habet quoad effectum transferendi dominia et potestates, ideoque aequaliter servandus est. Sæpius vero contingit occupari aliquod regnum per bellum injustum, quo fere modo clariora orbis imperia amplificata fuere, et tunc quidem in principio non acquiritur regnum, nec vera potestas, cum titulus justitiae desit, successu vero temporis contingit ut populus libere consentiat, vel a successoribus regnum bona fide præscribatur, et tunc cessabit tyrannis, et incipiet verum dominium et regia potestas. Atque ita semper potestas haec aliquo humano titulo, seu per voluntatem humanam immediate obtinetur.

CAPUT III.

FUNDAMENTIS ET OBJECTIONIBUS REGIS ANGLIÆ CONTRA DOCTRINAM SUPERIORIS CAPITIS SATISFIT.

1. *Primum regis fundamentum ab inconvenienti desumptum.*—Duo videntur esse præ-

cipua fundamenta regis Jacobi , ut existimet reges non a populis, sed immediate a Deo suam habere potestatem. Primum proponit, redargendo Bellarminum, et quædam incommoda inferendo. Primum incommodum est, quia contraria sententia est *seditionum fundamentum, factiosis ac rebellibus avidissime arripiendum*. Quia si princeps a populo suam potestatem haberet, *posset populus in principem insurgere, seque in libertatem vendicare, quandcumque ipsi rideretur, nimirum fretus eodem jure et potestate quam in regem transtulit*. *Præsertim cum Bellarminus dicat populum nunquam ita suam potestatem in regem transferre, quin illam sibi in habitu retineat, ut in certis casibus etiam actu recipere possit*. Atque eodem modo inferre posset rex, integrum esse subditis potestatem principis restringere, et leges ejus abrogare, et alia similia facere, quæ superioris sunt potestatis. Nam si rex a populo habet potestatem, ab illo semper pendet; ergo potestas populi superior est; ergo potest omnia, quæ intulimus, efficere. Illa autem sunt absurdâ, nam seditionibus occasionem præbent, et principum potestatem enervant, ut severitatem, ut integratatem justitiae servare non valeant.

2. Respondemus, nullum ex his incommodis sequi ex resolutione sententiave proposita. Nam imprimis negamus, ex ea occasionem rebellionum aut seditionum contra legitimos principes populo dari. Nam postquam populus suam potestatem in regem transtulit, non potest juste, eadem potestate fretus, suo arbitrio, seu quoties voluerit, se in libertatem vendicare. Nam si potestatem suam regi concessit, quam ille acceptavit, eo ipso rex dominium acquisivit; ergo quamvis rex habuerit a populo illud dominium per donationem vel contractum, non ideo licebit populo dominium illud regis auferre, nec libertatem suam iterum usurpare. Sicut particularis persona, quæ sue libertati renunciat, et se in servum vendidit aut donavit, non potest postea suo arbitrio se a servitute eximere. Idem ergo est de persona ficta seu communitate , postquam se alicui principi plene subjicit. Item postquam populus suam potestatem regi contulit, jam se illa privavit; ergo non potest illa fretus juste in regem insurgere, quia nitetur potestate quam non habet, et ita non erit usus justus, sed usurpatio potestatis.

3. A redargutione regis Illustrissimus Bellarminus vindicatur. — Quando possit popu-

lus in regem insurgere, seque ab ejus potestate eximere. — Quod vero Bellarminus ex Navarro dixit, populum nunquam ita suam potestatem in principem transferre, quin eam in habitu retineat, ut ea in certis casibus uti possit, neque contrarium est, neque fundatum populis præbet ad se pro libito in libertatem vendicandum. Quia Bellarminus non simpliciter dixit, retinere populum potestatem in habitu, *ad quoscumque actus pro libito, et quoties velit exercendos*, sed cum magna limitatione , et circumspectione dixit, *in certis casibus*, etc. Qui casus intelligendi sunt, vel juxta conditiones prioris contractus, vel juxta exigentiam naturalis justitiae, nam pacta et conventa justa servanda sunt. Et ideo si populus transtulit potestatem in regem, reservando eam sibi pro aliquibus gravioribus causis aut negotiis, in eis licite poterit illa uti, et jus suum conservare. Oportebit autem ut de tali jure, vel antiquis et certis instrumentis, vel immemorabili consuetudine sufficienter constet. Et eadem ratione, si rex justam suam potestatem in tyrannidem verteret, illa in manifestam civitatis perniciem abutendo, posset populus naturali potestate ad se defendendum uti, hac enim nunquam se privavit. Extra hos vero, et similes easus, nunquam licet populo a legitimo rege sua potestate fretus deficere , et ita cessat omnis seditionis fundamentum aut occasio.

4. *Potestatem semel in regem translatam populus restringere nequit, neque ejus justas leges abrogare.* — Atque eadem ratione non licet populo semel subjecto potestatem regis magis restringere , quam in prima translatione seu conventione restricta fuit, quia id non permittit lex illa justitiae , quæ docet legitima pacta servanda esse, et donationem absolutam semel valide factam revocari non posse, neque in totum , neque ex parte , et maxime quando onerosa fuit. Imo nec leges principis justas potest populus sua potestate nixus abrogare, sed solum tacito, vel expresso ejusdem principis consensu fretus, ut D. Thomas supra docuit, et nos alibi latius diximus¹. Unde non est simpliciter verum , regem pendere in sua potestate a populo , etiamsi ab ipso eam acceperit, quia poterit pendere in fieri, ut aiunt, et postea non pendere in conservari, si plene et absolute illam accepit. Quocirea, postquam rex legitimate

¹ Lib. 7 de Legib.

constitutus est, supremam habet potestatem in his omnibus, ad quæ illam accepit, etiamsi a populo illam habuerit, quia lex justitiae hoc exigit, ut declaravimus.

5. *Secundum fundamentum regis.* — *Solutio.* — Secundo loco inducit rex exempla Saulis et David, qui non a populo, ut Bellarminus contendit, sed a Deo immediate principatum acceperunt. Quod specialiter de Saul le confirmat, quia per sortes nutu divino electus est, quod dicit esse signum certum potestatis immediate a Deo acceptæ. Quod et suadet exemplo electionis Matthiæ, de quo inde scimus apostolicam dignitatem immediate a Deo accepisse, quia per sortes ad illam electus est, *Auctor. 4.* Respondemus, circa exempla Saulis et David, in utramque partem disputari posse, an illi duo reges a Deo, vel a populo immediate acceperint potestatem; neutrum enim aperte ex Scriptura sacra colligitur. Nam, licet ex eadem Scriptura certo constet, utriusque personam divino nutu, voluntate ac revelatione fuisse in regem designatam, non tamen inde sequitur Deum etiam immediate illis potestatem dedisse; haec enim duo diversa sunt, et ex uno non recte aliud colligitur. Nam, sicut Deus interdum concedit hominibus facultatem designandi personam cui daturus est ipse immediate potestatem, ita e converso Deus potuit sibi reservare potestatem designandi personam, cui populus daret immediate potestatem.

6. Atque ita in facto illorum regum contingisse satis verisimiliter conjectat Cardinalis Bellarminus, ex verbis Deuter. 17: *Cum ingressus fueris terram, quam Dominus Deus tuus dabit tibi, et possederis eam, habitaveris que in il'a, et dixeris: Constituam super me Regem, sicut habent omnes per circuitum nationes, eum constitues, quem Dominus Deus tuus elegerit de numero fratrum tuorum; non poteris alterius gentis hominem regem facere, qui non sit frater tuus.* In quibus verbis duo tanquam distincta ponuntur, scilicet eligere eum qui futurus est rex, et constituere eum regem; et illud prius reservat sibi Deus, secundum autem populo concedit seu relinquit, ut patet ex illis verbis: *Eum constitues, quem Dominus Deus tunc elegerit;* et ex cap. 28, ibi: *Ducet te Dominus, et regem tuum, quem constitueris super te, in gentem quam ignoras,* etc. Constituere autem regem, non significat tantum petere regem, sicut postea ille populus petiit, *1 Reg. 8;* sed significat

facere regem. Tum quia ita exponitur in dicto c. 17 Deuter., ibi: *Non poteris alterius gentis hominem regem facere;* tum etiam quia ibidem præcipitur populus constituere regem eum, quem Deus elegisset; petitio autem regis non poterat esse particularis personæ electæ a Deo, nam præcessit talem electionem; ergo illa regis constitutio non erat nisi creatio regis, et immediata collatio regiae dignitatis ac potestatis; ergo electio personæ, quam Deus sibi reservavit, nihil aliud erat nisi personæ designatio. Supponitur ergo in illo loco, populum ex natura rei habere potestatem constituendi sibi regem; non enim eam ibi peculiariter illi populo Deus concessit, sed supposuit tanquam communem aliis gentibus, et illum ea uti permisit, vel aliquando usurum prædictum, sicut impletum est, *1 Reg. 8,* et sequentibus. Et quamvis potestas etiam designandi personam naturaliter cuiilibet populo conveniat, nihilominus in peculiarem favorem illius populi, ut aptior persona semper designaretur, potestatem eligendi personam sibi Deus reservavit.

7. *Saulem potestatem suam a populo accepisse probabilius.* — Ex illo ergo loco optima conjectura fit, ita observatum esse in creatione primi regis illius populi, qui fuit Saul, quod etiam ex historia electionis ejus colligi potest. Nam *1 Reg. 10,* postquam sors cecidit super Saul, dixit Samuel ad populum: *Certe videtis quem elegit Dominus,* quasi petens et expectans populi consensum, et tunc clamavit populus dicens: *Vivat rex.* Postea vero rege jam constituto, suhjungitur, scripsisse Samuelem legem regni, etc. Neque refert quod prius, in eodem capite, ante sortes missas dicitur Samuelem unxit Saul: *Ecce unxit te Dominus super hereditatem suam in principem,* quia (ut Bellarminus ait, et est probabile) non fuit illa collatio potestatis, aut regni traditio, sed certa promissio et prædictio more propheticō futuri effectus, et veluti præparatio quædam animi Saulis ad futuram dignitatem. Quin potius, quia post Dei electionem et populi acclamationem, adhuc multi repugnabant, additur in cap. 11, Samuelem convocasse iterum populum in Galgala ad innovandum regnum, et subditur: *Perrexit omnis populus in Galgala, et fecerunt ibi regem Saul coram Domino.* Quibus verbis non significatur nova regni electio, sed fuit confirmatio prioris, ut firmior apud populum maneret, et ut omnium subditorum animi magis acquiescerent, omnisque divisio

et dissensio tolleretur, ut recte dixit Abulensis ibi, quæst. 12 et 13; et confirmat Josephus, lib. 6 Antiquit., cap. 6, et addit, ibi spectante tota multitudine, iterum Samuelem unxisse Saulem sacro oleo, quod tamen Scriptura non refert; inde vero intelligi potest, unctionem similem non semper fuisse cum regni traditione simul conjunctam, sed potuisse etiam esse signum jam factæ, vel futuræ.

8. Unde eodem lib. 4 Reg., cap. 16, simili modo secrete fuit unctus David a Samuele cum promissione regni, quod postea per multos annos pacifice possedit Saul; quod est apertum signum, per illam unctionem non fuisse Davidem factum regem, sed in successorem regni designatum. Et ideo postea, lib. 2, cap. 2, iterum unctus est a tribu Juda, ut *regnaret super domum Juda*; et ibi etiam refertur dixisse David: *Licet mortuus sit dominus vester Saul, tamen me unxit dominus Juda in regem sibi*, significans promissionem Dei per populi consensum fuisse completam. Ideoque super alias tribus regnare non cœpit, donec (ut refertur cap. 5) *venerunt seniores Israel ad David in Hebron, et percussit cum eis rex David fædus in Hebron coram Domino, unixeruntque David in regem super Israel*.

9. *Matthias apostolatum suum immediate a Deo accepit.* — Est ergo probabilis hæc sententia, contra quam parum valet argumentum regis de sortibus, nam electio per sortes, speciali Dei providentia directas, per se solum probat, designationem personæ a Deo ipso fuisse immediate factam. Neque inde fit Matthiam per sortem electum non recepisse immediate a Deo apostolicam dignitatem et potestatem. Quia, licet ex solo modo electionis per sortes id sufficienter non colligatur, ex qualitate et excellentia talis dignitatis et potestatis id colligitur. Erat enim dignitas apostolica supernaturalis, et immediate a Christo instituta, et ideo solus ipse poterat illam immediate donare. Unde quamvis Apostoli sine sortibus solum Matthiam elegissent (quod facere potuissent, si illum digniorem esse certo cognovissent, ut frequentius Patres insinuant), nihilominus ab ipso Christo immediate accepisset dignitatem et potestatem; ergo non ex sortibus, sed ex qualitate potestatis colligendum est, an immediate a Deo conferatur.

10. *Exemplis a rege adductis, principatum politicum immediate a Deo non esse convinci-*

tur. — Juxta hanc ergo expositionem, illis locis et exemplis potius confirmatur communis sententia tradita. Quia vero expositi illa de fide non est, neque omnino necessaria, concedamus regi ut probabile, Saulem et David regnum et potestatem immediate a Deo accepisse; facile enim poterit quisque, si velit, Scripturæ verba ad hunc sensum accommodare. Et de David id aperte affirmat Soto, lib. 4 de Just., et q. 2, art. 4; et de utroque Navarr., dict. c. *Nozit*, notabil. 3, n. 33 et 147; et idem sentit Abulens. supra. Nihilominus hoc non solum non obstat resolutioni positæ, sed potius inde non minus efficaciter confirmari potest. Primo, quia exempla specialia parum valent ad inferendam universalem regulam, imo solent esse exceptiones a regula, et ideo ex illis sumi solet argumentum, quod juristæ vocant ab speciali, ad inferendam regulam in contrarium. Deinde quia in eisdem locis supponitur manifeste, esse in populo libero potestatem constituendi sibi regem, imo et eligendi et designandi personam, cui jus regni tribuat, quod probant aperte testimonia Scripturæ quæ supra ponderavi. Et ideo Deus peculiariter sibi reservavit electionem personæ, in regem illius populi constituendæ, quia, seclusa Dei revelatione et præcepto, totum hoc erat in arbitrio populi constitutum. Igitur neque inde inferri potest generalis regula pro omnibus regnis, videlicet, quod ad Deum pertinuerit, immediate designare aut eligere personam in throno regni constitutam, sive in initio talis regni, sive in ejus progressu (alias ostendat rex Angliæ quando Deus peculiari revelatione, aut singulari signo elegerit vel ipsum, vel aliquem ex progenitoribus suis in Britanniæ regem); neque etiam potest inde inferri, Deum ordinarie dare aut dedisse principatum regibus temporalibus, etiamsi fortasse in initio Israclitici regni, propter specialem quam assumpserat illius eum, semel atque iterum id fecerit. Quod tandem colligi etiam potest ex alia prohibitione facta illi populo, dicto c. 17 Deuter.: *Non poteris alterius gentis hominem regem facere*; illa enim prohibitio absque dubio non fuit naturalis, sed positiva. Constat enim, alias gentes et nationes potuisse creare sibi reges ex quacumque provincia vel natione, et in ipsis etiam imperatoribus Romanis ita observatum esse sine ulla injustitia, vel violatione juris naturalis; fuit ergo illa prohibitio positiva et specialis; ergo supposuit potestatem

in illo populo creandi sibi regem ex qua-cumque gente , nisi divinitus prohiberetur, et consequenter ante illam prohibitionem in populo Israel, in aliis vero populis, quos illa prohibitio non pertinebat, semper hanc libe-ram potestatem fuisse, et per illam reges in-cepisse, concluditur.

11. *Tertia objectio.* — Tertio, possumus in regis favorem ejusque sententiæ confirmationem urgere loca Scripturæ et Sanctorum, quibus supra probavimus reges esse minis-tros Dei, et ab ipso habere potestatem; nam in illis locis soli Deo tribuitur hujus potestatis donatio ; ergo intelligenda sunt de Deo imme-diate donante, quia hæc est purior et simpli-cior interpretatio ; nam quidquid illi additur, præter Scripturam dicitur. Item minister ali-cujus, ordinario et meliori modo immediate solet ab eo constitui, cuius est minister. De-nique hac ratione nos dicimus, Pontificem habere potestatem suam immediate a Deo, quia Christus ipse illam contulit, et ex vi il-lius primæ donationis ad alios transfertur, licet per ministerium seu electionem homi-num transferatur; ergo eadem ratione potes-tas regia erit immediate a Deo.

12. *Solutio.* — Ad hæc vero imprimis res-pondemus , ipsam regiam potestatem esse imme-diate a Deo auctore naturæ, ut diximus. Quia vero non est per specialem revelatio-nem seu donationem, sed per quamdam na-turalem consecutionem, quam ratio naturalis ostendit, ideo imme-diate solum datur a Deo illi subjecto, in quo ex vi solius rationis na-turalis invenitur; hoc autem subjectum est populus ipse, et non aliqua persona ejus, ut declaravi. Quia vero hanc eamdem potesta-tum populus in regem transfert, ideo potes-tas regia dicitur esse data a Deo; et præ-te-re quia ipsam regis electio non fit sine di-vina cooperatione, nec sine peculiari provi-dentia ejus. Quod egregie declaravit Chrysostomus, homil. 23 in Epist. ad Rom., ubi trac-tans verba illa : *Non est potestas, nisi a Deo,* sic inquit : *Quid dicas ? omnis ergo princeps a Deo constitutus est ? Istud (inquit) non dico. Nec enim de quovis principe mihi sermo nunc est, sed de ipsa re, id est de ipsa potestate.* Unde subjungit : *Quod enim principatus sint, quodque hi quidem imperant, illi vero subjecti sunt, quodque non simpliciter ac temere cuncta feruntur, divinæ sapientiae opus esse dico. Pro-pterea non dicit : Non enim princeps est, nisi a Deo, sed de re ipsa disserit, dicens : Non enim potestas est, nisi a Deo.* Ubi Theophy-

lact. idem docet. Neque vero necessarium est ut hæc omnia ita distincte in Scriptura expli-centur. Nam constat varios effectus eisdem fere verbis Deo in Scriptura attribui, et ex materia subiecta secundum rectam rationem colligendum esse modum, quo a Deo esse di-cantur. Nam etiam dicitur sœpe Deus dare regna, propter specialem permissionem, licet per injuriam et seditionem usurpentur, ut rex ipse Angliæ de Jeroboam sentire videtur, et in aliis multo est certius, ut notavit Augu-stinus, lib. 5 de Civit., cap. 21 ; et Origen., Homil. 4 in libr. Judicium. Ut autem reges dicantur ministri Dei, satis est quod ab illo habeant potestatem, licet mediante populo, quia ille est modus maxime connaturalis et optimus, qui intra latitudinem naturalis ratio-nis cogitari potest.

13. Ad comparationem autem, seu æqui-parationem quæ in hoc fit inter Pontificem et reges, respondeo esse rationem longe dissi-milem. Nam imprimis Pontificia monarchia in universam Ecclesiam ab ipso Deo imme-diate est instituta et præcepta, ita ut mutari non possit. Modus autem regiminis tempora-lis non est a Deo definitus nec præceptus, sed hominum dispositioni hoc relictum est. Deinde spiritualis potestas nunquam fuit in communitate totius Ecclesiæ, quia Christus non contulit eam corpori Ecclesiæ, sed capiti, seu Vicario suo, ideoque non potest Ecclesia in electione Pontificis concurrere tanquam dans potestatem, sed tanquam personam de-signans. Potestas autem civilis ex natura rei est in ipsa communitate, et per illam in hunc vel illum principem translata est, voluntate ipsius communitatis, eam (ut ita dicam) tan-quam rem suam alteri donantis. Unde etiam fit, ut spiritualis jurisdictio suprema Pontifi-cis ita sit jure divino collata, ut limitari non possit, nec minui, nec augeri, etiam per uni-versalem Ecclesiæ consensum, imo nec per ipsiusmet Pontificis voluntatem. Quamdiu enim dignitatem retinet, non potest illam in se minuere vel mutare. Potestas autem regia, vel cuiusvis supremi tribunalis temporalis, potuit a principio major vel minor constitui, et successu temporum poterit mutari aut minui, prout ad bonum commune expediens fuerit, per eum qui ad hoc habuerit potes-tatem.

CAPUT IV.

UTRUM INTER CHRISTIANOS SIT LEGITIMA POTESTAS CIVILIS, QUI CHRISTIANI PARERE TENEANTUR.

1. Quamvis in quæstione hac non sit nobis cum adversariis controversia, quia vero multi ex illis (ut audio, et ut rex Angliæ in sua Præfatione sœpe inculcat), Romanum Pontificem ejus doctrinæ insimulant, quæ jura et dominia principibus debita evertat, quid de hac re vel fides catholica statuat, vel sanior Doctorum sententia tueatur, explicandum existimavi, ut hoc etiam modo ad præcipuam controversiam de summi Pontificis primatu clarior et aptior sternatur via. Duobus ergo modis existimatum est et affirmatum, christianos reges non habere supremam potestatem civilem ad leges ferendas, punienda delicta, et jus politicum dicendum. Unus eorum fuit, qui dixerunt in Ecclesia Christi non posse esse talē potestatem, neque usum ejus legitimum, quia Christiani nulli temporali dominio possunt esse subditi. Alius est eorum qui, licet fateantur esse in Ecclesia temporalement potestatem, negant tamen esse supremam in regibus temporalibus, sed in solo Pontifice, a quo regum potestas per concessionem vel tolerantiam derivatur. De hoc secundo puncto in capite sequenti dicemus; quia vero supponit primum, illud hic breviter expediemus, quia etiam novi sectarii in illo non recte sentiunt.

2. *Antiquorum hæreticorum error.* — *Pri-*
mum prædicti erroris fundamentum. — Multi ergo ex antiquis hæreticis, veluti sequentes aut imitantes Galilæorum errorem in cap. 1 relatum, dixerunt Christianos non esse subjectos principibus temporalibus, praesertim ethnicis. Quod aliqui solum de perfectis Christianis, et maxime spiritualibus dixerunt, ut Beguardi; alii de omnibus justis, alii de omnibus Christianis, quos errores hic latius recensere superfluum duco. Hinc effutierunt Anabaptistæ, et alii similes, principatum politicum non esse Christianis licitum, praesertim in Christianos. Horum autem errorum diversa cogitari possunt fundamenta. Primum et peculiare respectu principum ethnicorum est, quia indignum et periculosum est, infidelem dominare fidelibus; ideo enim Paulus monet, 2 ad Cor. 6: *Nolite jugum ducere cum infidelibus.* Et rationem variis modis explicat,

dicens: *Quæ enim participatio justitiae cum iniquitate, aut quæ societas luci ad tenebras, quæ autem conventio Christi ad Belial, aut quæ pars fidi cum infideli, qui autem consensus templo Dei cum idolis?* Cum ergo primatus politicus a Deo sit, non debet intelligi concessus contra ordinem debitum, et cum periculo fidei, nam quæ a Deo sunt, ordinatissima sunt; ergo, eo ipso quod aliquis in Christo baptizatur, et fidem ejus recipit, fit immunis ab ethnicorum principum subjectione. Et confirmari hoc potest ex verbis illis Matth., c. 17, ubi cum Christus Petrum interrogasset: *Reges terræ a quibus accipiunt tributum vel censem? a filiis suis, an ab alienis?* et Petrus respondisset: *Ab alienis,* conclusit Dominus: *Ergo liberi sunt filii;* utique a tributis, et consequenter etiam a potestate, nam hæc duo correlativa sunt. Nomine autem filiorum, Christus omnes fratres suos, ac subinde omnes fideles comprehendit, *quia omnes sunt filii regni illius, sub quo sunt omnia regna terrena,* ut dixit Divus Augustinus, lib. 1 Evangelicarum Quæstionum, quæst. 23. Vel alio titulo illi eamdem libertatem participant, quia omnes sunt speciali et excellenti modo de familia Christi, qui est filius naturalis; cum autem filius liber esse dicitur, cum illo comprehenditur ejus familia, ut dixit Lyran. in eum locum, quem alii imitantur, et sensit Hieronymus dicens: *Ille pro nobis et crucem sustinuit, et tributa reddidit; nos pro illius honore tributa non reddimus, et quasi filii regis a vectigalibus immunes sumus.* Quæ verba non possunt restringi, ut quidam volunt, ad solos sacerdotes vel clericos; æque enim illa duo conjunxit, *pro nobis et crucem sustinuit, et tributa reddidit.* Subiit autem crucem pro omnibus simpliciter, tam laicis quam clericis; ergo pro omnibus solvit tributa; ergo omnes a tributis solvendis temporalibus regibus liberavit; ergo et ab illorum dominatu et jurisdictione illos exemit, quia una libertas aliam comitatur.

3. *Secundum fundamentum.* — Secundum et generalius fundamentum hujus erroris est, quia Christiani liberi sunt etiam a potestate christianorum principum, quia hoc postulat christiana libertas, quam in hoc sensu intelligunt, et maxime exaggerant Lutherus et alii hujus temporis sectarii, ad hunc sensum detorquentes varias Scripturas, quibus abunde satisfecimus lib. 4 de Legib., c. 18 et 19, et lib. 3, cap. 31; et ideo illas nunc omittimus. Ex hoc autem principio, seu libertate chris-

tiana, sic intellecta, recte infertur, in principibus etiam christianis non esse potestatem civilem aut politicam in homines fideles, quia si isti non tenentur parere, illi non habent jus præcipiendi, quia hæc duo correlativa sunt, et uno ablato, alterum auferri necesse est. Unde inducunt etiam testimonia novi Testamenti, in quibus Christianis, et dominari et subjici dicunt esse prohibitum. Nam de dominatu dicitur Luc. 22: *Reges gentium dominantur eorum*, etc., *vos autem non sic*; vel, ut Matthæus ait, c. 20: *Non ita erit inter vos*, ubi D. Chrysostomus, hom. 56, dixit Christum voluisse discriminem hoc inter gentiles et Christianos consistere. De subjectione autem ait Paulus, 1 ad Cor., cap. 7: *Nolite fieri servi hominum*, et indicat rationem, præmittens: *Pretio empti estis*, quasi dicat, indignum esse redemptos a Christo terrenis subjici potestatibus.

4. Rejicitur prædicta heresis ex Scripturis et Patribus. — Hæc vero sententia tota sine dubio hæretica est. Nam imprimis Apostoli docuerunt fideles jam ad Christum conversos, ut regibus et potestatibus obedirent, non tantum propter vitandam poenam, nec quia tunc resistere non poterant, nec solum propter scandalum vitandum, sed etiam propter conscientiam, et quia ministri Dei sunt, ut ex Petro et Paulo in cap. 1 probavimus. Loquebantur autem hi Apostoli eo tempore, quo imperatores et reges, ac præfecti eorum, seu potestates, infideles erant et idololatræ; ergo ex eorum doctrina habemus, Christianos esse subjectos principibus, etiam ethnicis, et consequenter veros reges infideles potestatem habere in Christianos in suis terris degentes. Deinde ita intellexerunt illa loca, et docuerunt antiquissimi Patres, ut D. Chrysostomus, Ambrosius, Origenes, Epiphanius, et alii in cap. 1 allegati, et expresse Justinus, Apologia 2 ad Antoninum Pium imperatorem ethnicum, aliquantulum a principio, ubi ex professo Christianos ab hac calunnia liberat, dicens: *Tributa vero et census iis, qui a vobis constituti sunt, ubique imprimis conamur pendere, quemadmodum ab eo instituti sumus*; et affert verba Christi, Matthæi 22: *Reddite ergo que sunt Cæsaris Cæsari, et que sunt Dei Deo*; et concludit: *Hinc Deum solum adoramus, vos autem in aliis rebus lati servimus, regesque vos et principes hominum esse profitemur, rogamusque ut vos cum regali potestate sanam bonamque mentem habere inveniamini*. In quibus verbis nomine omnium Christianorum

profitetur, esse infideles veros reges et principes Christianorum, ut homines sunt, et posse in eos habere potestatem, etiam si sanam mentem non habeant. Idem sensit Ignatius, Epist. 10 ad Smyrnens.; et Optatus, lib. 3 contra Parmenian., ubi expresse dicit, *etiam si talis esset imperator, qui gentiliter vivet*. Possumus denique ad hoc afferre verba Ambrosii, libr. 4 in Luc., capite 5, in fine, ubi expendens verba Christi, Matth. 47, dicit: *Magnum quidem est et spiritale documentum, quo christiani viri sublimioribus potestatibus docentur debere esse subjecti, ne quis constitutionem regis terreni putet esse solvendam*; ubi etiam alludit ad verba Pauli, ad Rom. 31. Unde manifeste loquitur de legitimo rege, etiamsi Christianus non sit, nam ita locutus est Paulus; et Christus de Cæsare, imperatore ethnico, loquebatur, et in eodem sensu loquuntur alii Patres quos statim referemus.

5. Ratione ex D. Thoma sumpta eadem heresis rejicitur. — Rationem vero hujus veritatis attigit D. Thomas 2. 2, quæst. 10, art. 10, quia, *dominium (inquit) vel prælatio introducta sunt ex jure humano, distinctio autem fidelium et infidelium est ex jure divino: jus autem divinum, quod est ex gratia, non tollit jus humanum, quod est ex naturali ratione*; et ideo distinctio fidelium et infidelium secundum se considerata non tollit dominium et prælationem infidelium supra fideles. Quæ ratio est optima, et potest in hunc modum explicari: nam quando subditi alicujus regis gentilis convertuntur ad fidem, non eximuntur ipso facto, aut ex vi juris divini, a jurisdictione temporali sui legitimis principis, quia non possunt auctoritate propria privare alterum dominio et jure suo; neque etiam eis datum est ut id faciant auctoritate Dei, quia hoc neque illis est revelatum, nec ratio naturalis id dictat, imo contrarium docet Scriptura, et recta etiam ratio. Tum quia, non interveniente concessione divina, illud esset, per se loquendo, contra justitiam; tum etiam quia cederet in scandalum infidelium, et quamdam ignominiam christianæ religionis, cuius propagatio maxime posset illo modo impediri. Confirmatur et explicatur exemplo de matrimonio inter infideles, quia non dissolvitur ipso facto per conversionem, verbi gratia, uxoris ad fidem, sed adhuc manet uxor subdita viro infideli, quia retinet potestatem in ipsam, teste D. Paulo, 1 ad Corinth. 7, ut late explicat D. Augustinus, lib.

1 de Adulterin. conjugiis, in cap. 18. Ratio autem est, quam D. Thomas tetigit, quia matrimonium inter infideles consistit jure naturæ, professio autem fidei per se non mutat jus naturæ, vel humanum contractum in illo fundatum. Quam rationem indicavit etiam Innocentius, in cap. *Gaudemus*, de Divortiis. Ergo eadem ratione non amittitur legitima potestas civilis propter conversionem subditorum ad fidem.

6. *Vis rationis D. Thomæ declaratur.* — *Regem infidelem sibi de novo voluntarie creare fidelibus non licet.* — Est autem valde notandum circa doctrinam D. Thomæ in citato loco, rationem factam solum procedere, quando dominium et potestas principis ethni ci præexistit ante fidem subditorum, in quo etiam casu videntur maxime procedere testimonia Petri, Pauli, et traditio Patrum. Unde addit Divus Thomas, si sermo sit de instituenda vel tribuenda de novo potestate infidelibus supra fideles, hoc nullo modo esse permittendum: *Cederet enim (inquit) hoc in scandalum, et fidei periculum, nam subditi, nisi sint magnæ virtutis, facile sequuntur imperium principis et religionem: Et similiter (ait) infideles contemnent fidem, si fidelium defectus cognoscant.* Hæc vero doctrina intelligenda est, quando nova subjectio fidelium ad principem infidelem ex fidelium consensu et voluntate pendet; in eo enim casu procedunt efficaciter rationes Divi Thomæ, et testimonium Pauli, quod inducit 1 ad Corinth. 6: *Audet aliquis vestrum habens negotium adversus alterum judicari apud iniquos* (id est infideles, ait Divus Thomas), *et non apud Sanctos* (id est fideles), ut paulo inferius ipsem et Apostolus declarat, dicens: *Frater cum fratre judicio contendit, et hoc apud infideles.* Si enim ad privata etiam judicia inter fideles non sunt infideles voluntarie in judices eligendi, multo certe minus potest aliqua christiana plebs infidelem principem sibi præficere, et ideo, ut D. Thomas ait, nullo modo id permittit Ecclesia.

7. *Rex gentilis justo bello civitatem christianam occupans, verum etiam dominium in illum consequitur.* — *Quando subjectio ad principem vergit in detrimentum fidei, possunt fideles se ab ea eximere.* — At vero si contingeret plebem fidelem involuntarie subjici denuo principi infideli justo titulo, tunc procederet etiam assertio posita, et ratio facta. Ut, verbi gratia, si rex gentilis justo bello civitatem christianam occuparet, tunc verum dominium

acquireret, nam hoc etiam est de jure gentium a naturali derivatum, quod fides non tollit. Nec Ecclesia, per se loquendo, hoc impedit, quando princeps infidelis ethnicus est, et ipsi Ecclesiæ non subditus, prout modo loquimur. Idemque esset, si contingere regem infidem, legitimo jure successionis, christianum populum principi christiano antea subjectum obtinere, quia tunc etiam fides subditorum non impedit acquisitionem dominii, nec pendet ex illius populi voluntate, sed necessario venit ex aliqua priori et justa institutione. Hæc autem intelligenda per se sunt, id est, præcavendo scandala, et pericula fidelium, quæ sequi etiam possunt ex subjectione fidelium ad antiquos principes infideles, ideoque in utroque casu si talia incommoda probabiliiter timerentur, et vitari non possent nisi vel non ferendo, vel non acceptando talem principem, fieri posset et deberet, quia jus et potestas ad id faciendum Ecclesiæ non deest. Atque hac ratione generaliter dixit D. Thomas, citato loco, posse Ecclesiam de jure instituere, ut infideles priventur dominio et prælatione super fideles, qui transferuntur in filios Dei, quamvis propter vitandum scandalum Ecclesia non utatur hac potestate circa principes infideles, alias sibi non subditos.

8. Unde ulterius considerandum est, aliquos infideles esse subditos Ecclesiæ temporaliter tantum, ut sunt Judæi habitantes in terris principibus christianis subjectis, et de illis infidelibus non agimus, quia non sunt supremi principes, de quibus maxime nunc loquimur. Tamen de illis certum est posse Ecclesiam, vel christianos principes illos ita gubernare in temporalibus, et maxime in his quæ spectant ad libertatem et securitatem fidelium, prout ad bonum fidei expedire judicaverint, quod alterius considerationis est. Alii vero sunt infideles subditi Ecclesiæ spiritualiter, etiamsi alias sint supremi principes temporales, quales sunt hæretici baptizati, qui nomine Christiani sunt, re tamen vera sunt infideles, quia vera fide carent, subditi vero Ecclesiæ sunt ratione baptismi characteris. Et de his vera est dicta resolutio, non solum propter vitandum periculum fidelium, sed etiam propter directam potestatem quam habet Ecclesia ad puniendos hæreticos, etiamsi reges sint, ut infra videbimus. Alii vero sunt infideles nullo modo subditi Ecclesiæ, neque temporaliter, neque spiritualiter, neque jure, neque facto. Et in his solum procedit illa doctrina D. Thomæ de potestate indi-

recta, per quam potest Ecclesia suos fideles subditos a moralibus periculis, et occasionibus amittendi fidem, liberare ac defendere. Nam per se non habet Ecclesia jurisdictionem in hos reges infideles, juxta illud Pauli, 2 ad Cor. 5 : *De his qui foris sunt, nihil ad nos*; et ideo sicut non potest illos ad fidem cogere, ita nec propter infidelitatis crimen eos punire; quapropter, neque hoc titulo potest illos privare dominio et jurisdictione quam super Christianos habuerint. Solum ergo id potest facere Ecclesia propter spiritualem gubernationem, et necessariam providentiam circa suos subditos fideles. Quod autem hoc titulo possit, verissimum censeo, quia qui dat gubernandi potestatem, consequenter tribuit quidquid ad illius convenientem usum necessarium est, ut in sequentibus latius ostendendum est.

9. *Quando possit dissoluvi matrimonium inter infideles propter alterius conversionem ad fidem.*—Potestque in praesenti optimum argumentum sumi ex doctrina recepta et approbata ab Ecclesia, et sumpta ex Paulo, 1 ad Cor. 7, dicente, conjugem prius infidelem, ad fidem conversum, si alter neque converti ad fidem velit, neque cohabitare sine injuria creatoris, posse dimittere illum, et matrimonium dissolvere; ergo eadem vel majori ratione data est potestas Ecclesiae ad liberandum fideles a jugo infidelium quorumcumque, quando ex tali subjectione fides periclitatur; hic enim aequa urget ratio Pauli dicentis : *Non enim servituti subjectus est frater vel soror in hujusmodi.* Quin potius notari potest in hoc discrimen, nam, quia vinculum matrimonii indissoluble est natura sua, et inter duas tantum determinatas personas consistit, ut illo titulo dissoluvi possit, necesse est ut in particiari de periculo conjugis fidelis constet; at potestas regia in multitudinem hominum cadit, et de se non est adeo immutabilis, ideoque satis est generale et commune periculum, in quo fideles principibus infidelibus subditi moraliter loquendo versantur, ut Ecclesia possit omnes a tali subjectione liberare, etiam si de singulorum periculo in particiari non constet, quia leges morales, quae in universaliter feruntur, considerant ea quae ut plurimum eveniunt, etiam si in particiari cessare contingat. Nihilominus tamen raro Ecclesia utitur hac potestate, et licite id facit, etiam si fideles suos in aliquo periculo relinquat, quia vel non habet vires cum effectu et fructu potestatem suam exequendi, vel quia majora

scandala probabiliter timet. Et nihilominus tunc singuli fideles subditi licite poterunt vel fugere, vel alio medio uti ad evadendum periculum, si de illo moraliter constet, tum quia magis tenentur consulere animæ suæ quam juri alterius, tum etiam quia tunc a tali principe injuriam et violentiam patiuntur, et ideo parere non tenentur.

10. *Conclusio : inter Christianos esse veros reges ac principes de fide certum est.*—Ex quibus ulterius certissimum ac de fide est, in Ecclesia Christi esse Christianos principes ac reges veram potestatem politicam seu civilem habentes in subditos suos, etiam Christianos et fideles. Haec assertio non est sub his terminis, *fidelium et Christianorum principum*, in toto novo Testamento expressa, fortasse quia quo tempore scriptum est, nondum erant temporales reges ad fidem conversi, et ita non occurrit occasio de illis loquendi. Adducta tamen testimonia sufficienter illam probant, tum ex similitudine, vel certe ex majori ratione; tum etiam quia verba Aposolorum valde indefinita et universalia sunt. Ait enim Petrus : *Subjecti estote omni humanae creaturae propter Deum, sive regi quasi præcellentibus.* Et infra : *Regem honorificate.* Et deinde præcipit servis, subditos esse dominis, *non tantum bonis, sed etiam discolis*; ergo idem a fortiori intelligit de omnibus fidelibus subditis principibus, sive bonis, sive malis; non possunt autem dici boni principes, nisi sint fideles. Denique admonitus Pauli, ad Titum 3 : *Admone illos principibus et potestatibus subditos esse*, quam latius tradit ad Roman. 13, non fuit ab eo data pro solo illo tempore primitiva Ecclesia, sed ut perpetuo in ea duraret; ergo nunc etiam habet locum respectu principum Christianorum. Potestque idem confirmari testimonii veteris Testamenti, quibus constat principes fideles habuisse politicum regimen subditorum fidelium, quorum imperio isti obedire tenebantur, ut de Moyse, Iose, et aliis iudicibus usque ad Samuelem, et postea de Saule, Davide, et successoribus eorum colligitur, ex Deuteronom. 1 et 17, et ex libris Iudicum et Regum, et 2 Paralipomen. 19, ubi etiam fit mentio inferiorum iudicium et magistratum; ergo multo magis illa subordinatio et subjectio servanda est in lege gratiae, quia non spectat ad cæremonialia legis veteris, et in generali loquendo, non pertinet ad propria judicialia illius legis, sed ad legem moralē juris naturalis, vel immediate, vel mediante aliquo iure humano, quæ

jura in lege gratiæ durant, et perfectius obligant.

11. *Evasio.*—*Rejicitur evasio.*—Dicet vero fortasse aliquis, hoc fundamentum recte concludere ex hypothesi, quod in Ecclesia Christi sint veri reges et principes temporales verum dominium et jurisdictionem in Christianos habentes; nam hoc posito, lex naturalis justitiae et obedientiae evidenter obligant subditos ad parendum. Adversarii autem, qui contrarium errorem defendunt, hoc principium negant, dicentes repugnare institutioni Christi, et libertati christianæ, seu perfectioni legis gratiæ. Contra hoc vero probari potest illa suppositio ex perpetua Ecclesiæ traditione, ab eo tempore quo imperatores et reges ad Christum converti et baptizari cœperunt; semper enim pro veris regibus et principibus habiti sunt, non minus, imo perfectius et excellentius quam antea essent. Hoc constat ex Historiis Ecclesiasticis Eusebii, et aliorum, præsertim de Constantino; Theodosio, et similibus. Item hoc sæpe profitentur Concilia generalia, ut patet ex Nicæno I, cui Constantinus adfuit, et aliis. Praeterea Summi Pontifices scribentes ad reges et principes christianos, illos ut veros principes et dominos temporales recognoscunt, ut patet ex multis Epistolis D. Leonis et D. Gregorii, et ex aliis, quos capite sequenti referemus. Nunc solum notamus verba Symmachi Papæ, Apolog. ad Anastasium imperatorem : *Nos* (inquit) *potestates humanas suo loco suscipimus, donec contra Deum suas erigunt voluntates.* Concilium etiam Toletanum XII, c. 4, sub excommunicatione declaravit, Eringium esse verum regem Hispaniæ; et Concilium Meldense, capit. 15 et 16, anathema fert in eos, qui regiæ potestati contradicere præsumpserint, et loquitur de regibus christianis, et de illis ait, habere potestatem a Deo, juxta sententiam Apostoli, quam proinde etiam de regibus christianis intelligit.

12. Atque eodem modo intellexerunt apostolica testimonia Chrysostomus, Ambrosius, et alii Patres, et optime D. Augustinus, libr. Quarundam propositionum in Epist. ad Romanos, prop. 72, circa illa verba : *Omnis anima potestatibus sublimioribus subdita sit : Rectissime* (inquit) *admonet ne quis, ex eo quod a Domino in libertatem vocatus est factus Christianus, extollatur in superbiam, et non arbitretur in hujus vita itinere servandum esse ordinem suum, ut potestatibus sublimioribus, quibus pro tempore rerum temporalium gubern-*

natio tradita est, existimet non se esse subdendum. Et infra : *Si quis ergo putat, quoniam Christianus est, non sibi esse rectigal reddendum, aut tributum, aut non esse exhibendum honorem debitum eis, qui hæc curant potestatisbus, in magno errore versatur.* Ubi loquitur Augustinus de suo tempore, quando in Ecclesia jam erant principes christiani, et ita verba Pauli accommodat ad omnes principes pro tempore regnantes. Et verba illa Augustini mutuatus est Anselm. in Paul., et brevins Primasius. Idemque Augustinus, lib. 3 contra Crescon., cap. 51, declarat quam necessarium sit regis officium etiam inter christianos, et quanto melius et salubrius per bonos, id est, pios et fideles reges, quam per malos et infideles exerceatur.

13. Praeterea hoc confirming honorifici tituli, quibus antiqui Patres ad fideles principes scribunt, ut Cyrillus Alexandrinus, in libro de Recta fide, ad Theodosium, ubi prius Christianissimum Regem illum appellat, et postea ad eumdem ait : *Vos estis summarum dignitatum fontes, et supra omnem eminentiam, humanæque felicitatis principium ac origo.* Et infra : *Tam piæ et præclaræ vestri imperii summum præsidium est Dominus noster Jesus Christus ; nam per illum reges regnant,* etc. Et infra se ostensurum promittit, *quod gloriosa in Deum pietas regiis honoribus immobile sit fundamentum.* Similia videri possunt in Ambrosio, in Epist. ad Gratianum Augustum, quam ad libros de fide præmittit, ubi etiam illum vocat, *Christianissimum Principem, et Principum Christianissimum.* Item in ejusdem concessionibus in obitu Theodosii et in obitu Valentiniani, et in variis Epistolis ad sui temporis imperatores christianos. Idemque agnovit Gregorius Nazianzenus, Orat. 17, cujus verba optima inferius commodiori loco referam.

14. Addo præterea antiquius testimonium Martialis, Episcopi Lemovicensis, qui prope tempora Apostolorum vixit, et in Epist. 2 ad Tolosanos, cap. 8, refert convertisse ad fidem principem quemdam Galliæ, quem regem appellat, ejusque fidem valde commendat, et addit : *Cui obedire debetis in omnibus, quia princeps vobis a Deo est constitutus,* etc. Notari etiam potest locus Tertulliani, libr. de Idolatria, c. 45, ubi prius ait, reddenda esse Cæsari quæ sunt Cæsaris, et quæ sunt Dei Deo, sicut Christus docuit. Unde postea subinfert : *Igitur, quæ attinet ad honores regum et imperatorum, satis præscriptum habemus,*

in omni obsequio esse nos oportere secundum Apostoli præceptum, subditos magistratibus et principibus, et potestatis. Sed intra limites disciplinae quoadusque ab idolatria separamur. Ubi licet loquatur de tempore imperatorum gentilium, tamen generaliter doctrinam intelligit. Unde c. 17 addit, Christianos eo tempore potuisse ab imperatoribus dignitatem et administrationem potestatis civilis accipere, dummodo sine ulla idolatriæ labe illam exercearent. Unde tandem recte scripsit Prosper, in lib. Epigrammaton, cap. 34 :

Redendum est quidquid mundi bene postulat ordo,
Propositumque piæ non violat fidei,
Mitibus et Sanctis nulla est spernenda potestas,
Æquum servire est regibus et dominis,
Ut Christi famulis ad verum prosit honorem,
Dilexisse bonos et tolerasse malos.

15. *Ratione probatur assertio.* — Ratione facile etiam persuaderi potest hæc veritas, quia christiana fides aut baptismus non facit aliquem incapacem regiæ dignitatis, vel principatus, aut potestatis politicæ; ergo si quis ante fidem illam habebat, non amittet illam propter baptismum aut fidem, si ad illam convertatur; vel si jam christianus per legitimam electionem, vel alio justo titulo ad illam assumatur, vere illam acquirit, verusque rex, princeps aut magistratus constitutus; ergo subditi etiam fideles et Christiani illi parere tenentur. Illationes quidem per se et ex dictis evidentes sunt. Antecedens autem probatur, quia vel illa incapacitas esset ex peculiari Christi institutione, vel ex natura rei, seu naturali aliqua repugnantia; nullum enim aliud fundamentum cogitari potest; utrumque autem illorum omnino falsum est et irrationabile.

16. *Tacite evasioni occurritur.* — De primo patet, tum quia nullibi legimus Christum prohibuisse fidelibus regium principatum, ut facile infra ostendetur, fundamentis contrariae sententiæ satisfaciendo. Tum etiam quia potius de Christo et de tempore gratiæ prædictum erat, reges terræ fuisse in Christum credituros, ipsumque adoraturos, Psal. 71 : *Reges Tharsis et insulae munera offerent, reges Arabum et Saba dona adducent, et adorabunt eum omnes reges terræ*, etc. Unde Psal. 2 prius dicitur adstisset reges terræ adversus Christum, et postea subditur : *Et nunc reges intellige, eridimini qui judicatis terram, servite Domino in timore*, etc. Et Isaiae 49 : *Erunt reges nutritiū tui, rultu in terram demisso ad-*

orabunt te, et scies quia ego Dominus, super quo non confundentur qui expectant eum. Et cap. 60 : *Ambulabunt gentes in lumine tuo, et reges in splendore ortus tui*, etc. Neque dici aut cogitari potest, reges venientes ad Christi fidem eo ipso amittere regna, et reges esse desinere, quia, ut Ecclesia canit, *non eripit mortalia, qui regna dat cœlestia*. Neque alia fuisse suavis vel conveniens providentia, nam si reges ad Christum conversi statim ab ipso privarentur regnis juste possessis, pauci profecto essent ita regnorum contemptores, qui Christiani fieri vellent. Non est ergo credibile Christum, qui omnium ordinum homines ad se vocat, et sapienter ac suaviter media ad illorum conversionem apta dispositus, tam magnum impedimentum conversioni principum temporalium posuisse, talemve institutionem in Ecclesia sua reliquisse.

17. Maxime quia neque ad Ecclesiæ splendorem, neque ad bonum temporale regimen, neque ad spiritualem perfectionem talis institutio pertinebat. Primum patet, quia multo magis illustrat Christi fidem et Ecclesiam, quod imperatores, reges ac principes terræ Christo ejusque Vicario subjiciantur, et hoc sine dubio est quod in supra positis promissionibus commendatur. Secundum etiam patet : nam ratio supra facta de necessitate politici principatus ad conservationem societatis humanæ non minus habet locum in Ecclesia Christi quam extra illam, quia etiam Christiani indigent communitate politica, in qua pax et justitia serventur, et ad hoc etiam Christiani indigent directione et coactione civili, ut per se notum est; ergo cum Christus nec suam Ecclesiam in temporalibus male gubernari voluerit, neque etiam miraculose illam regere decreverit, non debuit quasi connaturale regimen ab ipsa tollere, et consequenter nec principatum politicum auferre. Tertia denique pars probatur, quia principatus politicus non est contra essentialē Ecclesiæ perfectionem, quæ in vera et viva fide per charitatem operante consistit. Cum enim ille principatus sit justitiae c' rationi naturali consentaneus, non potest esse charitati contrarius. Neque etiam est contra perfectionem consiliorum, nam ad hanc non spectat ut carrentia temporalis dominii aut jurisdictionis sub necessitate constitutur, sed solam sub consilio liberæ voluntati relinquatur, juxta illud : *Si vis perfectus esse*, etc. Atque ita perfectio evangelica, et efficacia gratiæ Christi in hoc potius ostenditur, quod multi im-

peratores et principes voluntarie imperia et regna abdicarunt.

18. *In quo consistat libertas christiana.* — Ex quibus satis probatum manet alterum membrum, nimirum, Christianos non esse incapaces principatus politici ex natura rei, vel ex aliqua naturali repugnantia. Tum quia potius ostensum est ex natura rei esse hoc regimen necessarium Christianis, quibus multo etiam melius est per principes christianos gubernari, quam per non christianos, ut obiter etiam ostensum est, satisque est per se notum; ergo potius ex natura rei necessarium fuit, christianos esse capaces regnorum et magistratuum temporalium. Tum etiam quia si esset aliqua repugnantia, vel esset cum libertate christiana, vel cum fide. At libertas christiana non consistit in exemptione a justis legibus humanis, neque in immunitate a justa coactione, aut vindicta peccatorum, quando contra pacem et justitiam committantur; sed consistit in exemptione, vel a lege Moysi, vel a timore servili, seu (quod perinde est) consistit in libera servitute ex amore et charitate, cui humanum regimen non repugnat, sed potius illam juvat, si adsit; si vero desit, illius defectum per coactionem supplet. Fidei etiam nihil repugnat praedicta potestas vel subjectio illi respondens, quia utraque est conformis rationi naturali, quae non est fidei adversa. Quod certe satis confirmat Paulus in epist. ad Philemonem, in qua manifeste supponit, propter fidem, quam Philemon habebat, et Onesimus servus ejus suscep- perat, nec illi fuisse ablatum jus dominii, nec huic servitutem esse ademptam; ergo a fortiori idem dicendum est de jurisdictione politica, et illi corespondente subjectione.

19. *Solvuntur fundamenta primi erroris.* — Ad primum ergo fundamentum contrarii erroris respondemus, verba illa Pauli: *Nolite jugum ducere cum infidelibus*, ad litteram intelligi de infidelibus, ut infideles sunt, id est, nolite cum infidelibus in propriis eorum operibus, quae ut infideles operantur, communicare. Et hunc sensum probant omnes rationes Pauli. Ex hac autem sententia solum concluditur, fideles non debere obedire principibus infidelibus, si aliquid contra fidem aut contra veram religionem praecipiant. Atque in hunc modum intellexerunt ibi locum illum Ambrosius, Theodoretus, et D. Thomas, et Augustinus, lib. contra Donatistas post collationem, c. 6 et 21. Hieronymus autem, lib. 1 contra Jovinian., et ep. 11 ad Ageruchiam, per ju-

gum intelligit matrimonium, sentiens ibi prohiberi feminæ christianæ cum gentili contrahere. Sed sine dubio Apostolus ibi non loquitur specialiter de vinculo matrimonii, quia neque de illo mentio ibi fit, neque in toto illo contextu occurrit occasio de illo specialiter tractandi. Probabile sane est quod Chrysostomus ibi ait, homil. 6, admonere Paulum fideles generatim, ut nimiam consuetudinem et familiaritatem cum infidelibus evitent, utique propter periculum, ne in fide aut moribus ab eis corrumpantur. In quo sensu non tradidit Paulus ibi novum præceptum positivum, sed explicat naturale, quo unusquisque tenetur vitare periculum, ne in illo perreat. Atque hoc modo etiam respublica christiana tenetur vitare principem infidelem, et non acceptare illum, si ex ipsius consensu pendeat; vel etiam repellere, si ex illius imperio morale periculum eversionis timeatur, quod tamen non privata, sed publica auctoritate facere debet, quando alioqui princeps jus ad regnum legitimum habet. Atque ita servatur debitus ordo, et vitatur periculum.

20. *Exponitur locus Matt. 47.* — Ad locum Matt. 47, quoniam tractando de immunitate ecclesiastica latius expendendus est, nunc breviter dico, nomine filiorum non comprehendi ibi omnes fideles, neque etiam omnes justos, quia Christus ad litteram loquitur de filiis naturalibus, ut ex contextu, et ex omnium expositione constat. Ad Augustinum vero respondet D. Thomas, 2. 2, q. 104, art. 6, ad primum, locutum esse in sensu spirituali, et ita filios regni liberos esse a servitute peccati, et a tributo quod ratione illius pendere debebant. Quod non placet Cajetano ibi, et ideo exponit, sub filiis regni, sub quo subsunt regna terrena, intellexisse Augustinum non omnes justos, sed eos qui præsunt quasi filii, ut sunt Episcopi, et alii ecclesiastici. Verumtamen etiam isti filii naturales non sunt, et ideo sub nomine et ratione filiorum (si modo verborum proprietati stet) non comprehenduntur. Et ideo Jansenius putat, Augustinum esse locutum de solo Christo, etiam si in plurali de filiis loquatur, quia Christus Dominus generatim de filiis naturalibus loquebatur. Neque etiam comprehenduntur sub illa libertate omnes Christiani propter alium titulum, quod sint de Christi familia, ut satis explicuit Paulus, ad Roman. 13, quia illa conjunctio cum Christo in eadem familia, id est, Ecclesia, et valde ampla

et generalis est, et alterius ordinis, scilicet, spiritualis, quæ non tollit corporalem servitatem, seu subjectionem, et consequenter nec tollit ordinem justitiae qui ex illa nascitur. An vero ratione illius tituli immunitas illa ad omnes ecclesiasticas personas extendatur ex vi verborum Christi, postea videbimus, et verba Hieronymi, quæ hoc attingere videntur, exponemus.

21. *Solvitur secundum fundamentum.* — Ad aliud fundamentum jam responsum est, veram christianam libertatem non excludere honestam subjectionem ad legitimos principes temporales, non solum christianos, sed etiam infideles, ut ex doctrina Apostolorum satis declaratum est, et latius in dicto lib. de Legibus. Ad verba demum Christi Domini respondemus, Christum non intendisse per illa tollere justum principatum inter Christianos, sed solum eos docere, ne gentilium principum ambitionem et tyrannidem imitentur. Et ideo non simpliciter de regibus, sed cum determinatione dixit : *Reges gentium dominantur eorum*, ubi etiam verbum *dominandi* indicat nimium affectum, et ambitionis gubernandi modum, sicut Petrus, 1 can., c. 5, dixit : *Non dominantes in clero.* Atque ita exposuit Chrysost., Homil. 56 in Matth., et in alia brevi narratione in Matth. cap. 20. Et ex occasione, in qua Dominus, ad reprimendam discipulorum ambitionem, et de primatu contentionem locutus est, et ex verbis quæ subjunxit : *Vos autem non sic, sed qui major est in vobis, fiat sicut minor*, manifestissime constat, Christum non exclusisse ordinem, et gradus majoris et minoris, sed affectum discipulorum moderari voluisse.

22. Ad Paulum autem respondetur, cum ait : *Nolite fieri servi hominum*, non loqui de civili subjectione, imo nec de servitute pœnali, seu rigorosa; neutra enim repugnat vel derogat pretio redemptionis Christi, nam ibidem paulo antea dixerat : *Servus vocatus es? non sit tibi cura.* Imo addit posse servitutem præferri libertati, utique propter humilitatem, ut cum Ambrosio et Gregorio D. Thomas exponit. Igitur, cum ait : *Nolite fieri servi hominum*, intelligit de servitute, qua homo Christo præfertur, serviendo homini in iis quæ Dei servituti opponuntur. Et quia hoc contrarium esset effectui redemptionis Christi, idcirco optimam rationem Paulus præmisit dicens : *Precio empti estis.* Hoc ergo modo servire hominibus alienum esse debet a redemptis a Christo; subjici autem legitimis

principibus, in iis quæ Deo non repugnant, non est indignum, sed potius debitum, juxta ejusdem Redemptoris verba : *Reddite quæ sunt Cæsaris Cæsari, et quæ sunt Dei Deo.*

CAPUT V.

UTRUM REGES CHRISTIANI IN CIVILIBUS SEU TEMPORALIBUS SUPREMAM POTESTATEM HABEANT, ET QUO JURE?

1. Potestas aliqua tunc suprema dicitur, quando superiorem non cognoscit; nam vox illa *suprema*, negationem superioris denotat, cui alter, qui supremam potestatem habere dicitur, obedire teneatur. Intelligitur autem de superiori in terris, seu humano; nam cum Deo nulla fit comparatio; quis enim humanus princeps, nisi atheus vel amens sit, divinæ se subtrahere potestati vel conari præsumat? Excluditur ergo per negationem illam subjectio ad superiori hominem mortalem. Potest autem illa negatio variis modis sumi, et ideo ut quæstionis titulus intelligatur, et ab aliis quæstionibus, quæ hic esse possunt, discernatur, modum ac sensum illius negationis declarare necesse est. Primo enim negare potest simpliciter omnem subjectionem ad superiori hominem, tam in spirituali materia quam in civili. Secundo, potest negare subjectionem in eadem materia temporali ac civili. Et quamvis in priori quæstione maxima sit dissensio inter nos et regem Angliae, ipse enim nemini in terris subesse vult, etiam in spiritualibus, quod nos contra fidem et obedientiam christianam esse credimus, nihilominus quæstionem illam nunc non tractamus, quia nondum de spirituali potestate diximus, sine cuius cognitione illius resolutio intelligi nullo modo potest; ideoque in ultimam hujus libri partem illam remittimus, et in præsenti illam potestatem temporalem supremam vocamus, quæ in eodem ordine seu materia alteri subjecta nou sit.

2. *Subjectio duplex, directa, et indirecta; utraque quid.* — Deinde solet in præsenti distinguiri duplex subjectio, directa, scilicet, et indirecta. Directa vocatur, quæ est intra finem et terminos ejusdem potestatis; indirecta, quæ solum nascitur ex directione ad finem altiorum, et ad superiorum ac excellentiorem potestatem pertinentem. Propria enim potestas civilis de se solum directe ordinatur ad convenientem statum, et tempo-

ralem felicitatem humanæ reipublicæ pro tempore vitæ præsentis, et ideo etiam potestas ipsa temporalis appellatur. Quamobrem tunc civilis potestas dicitur in suo ordine suprema, quando in eodem, et respectu sui finis ad illam fit ultima resolutio in sua sphæra, seu in tota communitate, quæ illi subest; ita ut a tali principe supremo omnes inferiores magistratus, qui in tali communitate, vel in parte ejus potestatem habent, pendeant, ipse vero princeps summus nulli superiori in ordine ad eumdem finem civilis gubernationis subordinetur. Quia vero felicitas temporalis et civilis ad spiritualem et æternam referenda est, ideo fieri potest ut materia ipsa potestatis civilis aliter dirigenda et gubernanda sit, in ordine ad spirituale bonum, quam sola civilis ratio postulare videatur. Et tunc, quamvis temporalis princeps ejusque potestas in suis actibus directe non pendeat ab alia potestate ejusdem ordinis, et quæ eumdem finem tautum respiciat, nihilominus fieri potest ut necesse sit ipsum dirigi, adjuvari, vel corrigi in sua materia, superiori potestate gubernante homines in ordine ad excellentiorem finem et æternum, et tunc illa dependentia vocatur indirecta, quia illa superior potestas, circa temporalia non per se, aut propter se, sed quasi indirecte, et propter aliud interdum versatur.

3. *Sensus quæstionis aperitur.* — Hinc fit ut negatio illa subjectionis in temporalibus, quam prærogativa supremæ potestatis temporalis includere creditur, in duos præterea sensus subdistinguenda sit. Potest enim negare vel omnem subjectionem, tam directam quam indirectam, vel tantum directam, et ita duplex alia suboritur quæstio. Prior est, an potestas regis christiani sit priori modo suprema, id est, nec directe, nec indirecte recognoscens superiorum in materia civili et temporali; altera est, an posteriori saltem modo sit suprema, id est directum superiorum in temporalibus non recognoscens. Inter quas quæstiones tanta est diversitas, ut prior ad dogmata fidei pertineat, et in illa fere punctum totius controversiae inter nos et regem Angliæ versetur; posterior autem neque ad materiam fidei pertineat, nec in ea sit inter nos dissensio. Nihilominus tamen præsens quæstio non in priori sensu, neque de indirecta subjectione, vel potius exemptione accipienda est; quia (si attente consideretur) ad quæstionem de spirituali potestate pertinet, quia indirecta illa subiectio solum ad

spiritualem potestatem esse potest, vel (quod perinde est) si qua potestas excogitari potest, cui temporalis suprema indirecte subjiciatur, sola spiritualis esse potest, nt de ipsa disputando videbimus, ideoque in illum etiam locum hanc quæstionem rejicitur. Titulus ergo præsentis quæstionis solum de suprema potestate, quæ in eodem ordine superiore directe non recognoscet, intelligendus est. Nam licet, ut dixi, in hoc puncto non sit nobis cum rege contentio, quia tamen sæpe ipse de Catholicis conqueritur, quod christianorum principum jurisdictionem, et obedientiam eis debitam abnegemus, ideo quæstionem illam non esse hoc loco prætermittendam censui, ut regiam potestatem christianorum principum in his omnibus, quæ juri naturali consentanea sunt, sartam tectam juxta catholicam doctrinam servari, ex illius resolutione manifestum fiat.

4. *Prima sententia negans.* — Fuit itaque quorumdam Catholicorum, præsertim juris peritorum sententia, in Ecclesia Christi non solum spirituale regimen, sed etiam temporale, esse monarchicum, ac proinde in universa Ecclesia Catholica unum tantum esse supremum principem temporalem, habentem per se et directe supremam potestatem civilem in universam Ecclesiam, eumque esse Summum Pontificem ex Christi institutione. Unde consequenter collegere, nullam rem publicam, nullumve regem aut imperatorem habere supremam potestatem in temporalibus, quia non possunt esse duo suprema capita in eodem ordine: igitur si Pontifex habet supremam potestatem temporalem directe ac per se, necesse est ut in reliquis omnibus principib[us] temporalibus non sit suprema potestas, quia nullus erit qui superiorum in temporalibus non recognoscet. Imo aliqui etiam addunt, omnia jura regnorum et dominia Petro collata esse tanquam Christi Vicario, et ita Romanum Pontificem in illo jure succedere, ideoque supremam potestatem civilem in habitu (ut ipsi loquuntur) solum esse in Pontifice, quamvis per alios reges ex tacita vel expressa concessione illam administret. Ita loquuntur præcipui ex antiquis juris Ponti. cii interpretibus, Glossa, Innocentius, Hostiensis, Joan. Andreas, Paganitanus, Felinus, et Decius, in c. *Novit*, de *Judicis*, et in c. *Causam quæ*, 2, et in c. *Per venerabilem*, Qui fil. sint legit., et in c. *Solitæ*, de Major. et obed., et in cap. *Quod super his*, de *Voto*, et alii in cap. *Quoniam*,

d. 10, et in c. *Cum ad rerum*, 96 d.; et, ex interpretibus juris Cæsarei, Barthol., Oldrad., Paulus de Castro, et alii, quos Navarr. et Covarr. infra citandi referunt. Quibus accessit D. Anton., 3 p., tit. 22, c. 5, § 13 et 17; Alvarus Pelagius, et August. de Ancona, cum multis aliis a prædictis relati.

5. *Primum fundamentum.* — Fundantur primo in multis decretis Summorum Pontificum, qui hoc affirmare videntur, quæ infra referemus, cum eorum mentem explicabimus. Secundo, in usu, et variis effectibus ostendentibus hanc potestatem. Hujusmodi sunt transferre imperium a Græcis ad Germanos, et instituere modum eligendi imperatorem, et confirmare illum, et interdum etiam deponere, qui omnes sunt actus superioris potestatis temporalis. Si autem imperator non est supremus, multo minus alii reges. Unde interdum etiam reges fuerunt a Pontificibus depositi. Tertio, ut Scripturas etiam ad hoc probandum inducant, supponunt Christum habuisse directam potestatem non solum spiritualem, sed etiam temporalem. Tum quia ipse dixit: *Data est mihi omnis potestas in cœlo et in terra;* tum etiam quia erat filius Dei naturalis. Unde inferunt, ultramque potestatem Vicario suo æqualiter commisisse, tum quia ipse nihil distinxit, sed absolute dixit Petro: *Pasce oves meas,* sub quo verbo *pascendi*, non minus comprehenditur civile regimen quam spirituale; nam de David dicitur, 2 Reg. 5: *Tibi dixit Dominus: Tu pasces populum meum Israel.* Tum etiam quia ad bonum Ecclesiæ regimen, ejusque unitatem et pacem ita expediebat. Unde additur quarto naturalis ratio, quia in uno corpore tantum esse debet unum supremum caput, a quo omnes actiones vitae, sive corpori, sive spiritui servientes, tanquam a primario fonte procedant; sed Ecclesia est unum corpus mysticum, ut jam supra declaratum est; ergo postulat unum supremum gubernatorem in utroque ordine; imo ultramque potestatem in una persona; quia si in personis diversis sint, infinitæ dissensiones et lites orientur, quæ vix possunt humana diligentia et ratione componi, ut experientia ipsa ostendit.

6. *Vera sententia statuitur.* — Nihilominus dicendum est, reges christianos habere potestatem civilem in suo ordine supremam, nullumque alium recognoscere directe superiorum intra eundem temporalem seu civilem ordinem, a quo in actibus sue potestatis

per se pendeant. Unde fit non dari in Ecclesia unum supremum principem temporalem totius Ecclesiae, seu omnium regnorum ejus, sed tot esse quot sunt regna seu res publicæ supremæ. Hæc est magis recepta et probata sententia inter Catholicos, quos statim referemus. Probatio autem prioris partis ex posteriori pendet: nam si non est unum caput temporale, consequens nec essario est ut sint multi reges supremi, ut a nobis propositum est; nunc enim non intendimus in particulari expendere an hic vel ille rex supremus sit, nec principes ipsos temporales inter se conferre, id enim a præsenti instituto satis esset alienum.

7. *Imperator non habet supremam potestatem temporalem in universam Ecclesiam.* — Et ob eamdem causam non tractamus nunc quæstionem illam, an imperator sit superior jurisdictione in omnibus Christianorum provinciis et regnis, et consequenter sit supremus monarca in universa Ecclesia. Quia, licet ad posteriorem partem assertionis posset pertinere, tamen nihil fere pertinet ad dogmata fidei explicanda, ideoque breviter supponimus, imperatorem non habere hoc dominium aut supremam jurisdictionem temporalem in universam Ecclesiam (quidquid Bartholus et nonnulli alii jurisprudenti censemant), quia vel nunquam illam habuit, vel, licet habuisset, majori ex parte illam amisit. Quod autem nunquam illam habuerit, probabilissimum est, quia neque supernaturali aut extraordinario modo a Christo Domino vel Romano Pontifice illam habuit, ut ex dicens a fortiori constabit, neque etiam aliquo humano jure illam acquisivit, quia nunquam vel per electionem, vel per justum bellum, unus imperator totum orbem vel totam Ecclesiam sibi subjecit. Ut enim demus antiquos imperatores christianos fuisse legitimos principes totius ditionis suæ, non tamen inde fit fuisse etiam supremos principes omnium Christianorum, quia extra illorum territorium multi populi potuerunt esse Christiani. Nam (ut reete dixit Prosper, lib. 2 de Vocat. gent., c. 6), *gratia christiana non contenta est eosdem limites habere quos Roma, multosque populos sceptro crucis subdividit, quos armis suis ipsa non domuit.* Unde et est illud quod Leo Papa, in serm. 1 Apostolorum, de Roma dixit: *Ut latius præsideres religione divina, quam dominatione terrena.* Accedit, illud ipsum Romanum imperium in orientale et occidentale fuisse divisum, et deinde occi-

dentale imperium (quod solum in Christianis permansit, orientali a paganis occupato), licet quoad dignitatem in una persona duret, quo ad jurisdictionem in multis principes et reges divisum esse. Ex quibus licet aliqui sint imperatori subjecti, plures censentur legitime exempti, jure præscriptionis, accedente simul populorum consensu, vel titulo justi belli. Ac proinde præter imperatorem plures esse reges temporales ab illius jurisdictione omnino liberos, ut sunt rex Hispaniaæ, Galliæ et Angliæ, nunc supponimus.

8. Solum ergo superest probanda assertio de Summo Pontifice, nam si ille non habet proprium dominium jurisdictionis temporalis supremæ in universa regna Ecclesiæ, nullus alius fingi potest qui talem primatum habeat, ac subinde plures erunt reges temporales supremi. Quod ergo Pontifex talem jurisdictionem temporalem in universa Ecclesia non habeat, tenuerunt ex Theologis, præcipue Major, Cajetan., Victor., Soto, et Bellarminus¹, qui plures alias refert. Et ex jurisperitis, Covarru., in Regul. *Peccatum*, 2 p., § 9, n. 7; Navarr., in c. *Novit*, notab. 3, latissime, et plures alias referendo, n. 41; et Petrus Bertrand., tract. de Orig. jurisdiction., q. 3. Et (quod caput est) ipsimet Pontifices Summi multis in locis hanc veritatem simpli-citer recognoscunt.

9. *Auctoritate Summorum Pontificum probatur assertio.* — Unde illorum iuribus imprimis probanda est assertio. Nicolaus enim Papa ad Albinum Archiep. ita scribit: *Sancta Dei Ecclesia gladium non habet, nisi spiritualem*; nomine autem *gladii* significari solet in jure canonico potestas temporalis; ergo maxime id debet intelligi, et de directa potestate, et de jurisdictione quam S. Ecclesia per se, et, ut sic dicam, ex intrinseca sua ratione habet. Nam in proprio territorio alio titulo comparato habere potest Ecclesia, seu ecclesiasticus Prælatus, gladium temporalem, sicut Romanus Pontifex in sua peculiari ditione illum habet. Præterea idem Nicolaus, in epist. ad Michaelem imperatorem sic ait: *Nec imperator jura pontificatus arripuit, nec Pontifex nomen imperatorium usurparit, quoniam Christus sic actibus propriis, et dignitatibus dis-*

tinctis officia potestatis utrinque discrevit, etc. Idem nobis tradidit Gelasius Papa, cum epist. 10 ad Anastasium imperatorem scribit, *duo esse, quibus principaliter mundus regitur, auctoritas sacra Pontificum, et regalis potestas*; et Gregor. Papa I, lib. 2, indict. 11, ep. 61, alias c. 100, ad Mauritium imperatorem ait: *Ad hoc potestas super omnes homines minorum meorum pietati data est, ut terrestre regnum cœlesti regno famuletur*: et Joannes Papa I, in epist. ad Justinianum imperatorem, quæ habetur in lib. *Inter cleros*, C. de Sacra Trinit., ejus supremum principatum et regiam potestatem recognoscit.

10. Præterea Innocentius III, in c. *Novit*, de Judiciis, aperte sentit regem Francorum supremam habere jurisdictionem temporalis, quam Papa perturbare aut minnere nolit; et ideo infra dicit: *Non enim intendimus judicare de feudo, cuius ad ipsum spectat iudicium*; aperte significans ad se non pertinere, utique directe, ut recte Glos. et Innocentius adnotarunt. Quod amplius declarat, dum ad-dit: *Nisi forte juri communi per speciale priuilegium, vel consuetudinem sit derogatum*. Nam per hanc exceptionem declarat, per jus divinum non esse juri regio derogatum. Idem præterea Innocentius, in c. *Per venerabilem*, Qui fil. sint leg., de rege Francorum expresse dicit, superiorem in temporalibus non recongnoscere. Et de Apostolica Sede dicit, *in patrimonio B. Petri libere* (id est directe et absolute) posse disponere, *in quo et Summi Pontificis auctoritatem exercet, et summi principis* (utique temporalis) *exequitur potestatem*, plane sentiens in aliis regnis non ita libere posse circa temporalia disponere. Idem in c. *Solitæ*, de Major. et obed., imperatorem fatetur *in temporalibus præcellere in ditione sua*; et de regali potestate dicit, *in carnalibus præesse*, et in c. *Causam*, 2, Qui fil. sint legitimi, Alexander III expresse dicit, ad regem, non ad Ecclesiam pertinere de temporalibus possessionibus judicare, et loquitur in particullari de rege Angliæ. Satis ergo constat ipsosmet Romanos Pontifices nunquam sibi hujusmodi potestatem arrogasse, quod amplius ex sequenti discursu constabit.

11. *Eadem conclusio rationibus probatur.* — Secundo, principaliter veritas hæc demonstratur, quia nullus potest justus titulus assignari, quod directum dominium jurisdictionis temporalis in omnia Ecclesiæ regna Summo Pontifici conveniat; ergo illam non habet, neque enim sine justo titulo obtineri potest. As-

¹ Major, in 4, d. 24, q. 3; Cajet., tom. 1 Opusc., tract. 2, c. 3, et 2. 2, q. 43, art. 8; Victor., in suis Relectionib.; Soto, lib. 4 de Just., c. 2; Bellar., lib. 5 de Sum. Pontif., c. 4 et sequentibus.

sumptum probatur, quia vel ille titulus esset juris divini positivi, vel juris humani; manifestum est enim, ex supra dictis, non posse esse immediate ex jure naturali. Nam probatum est, ex immediato naturali jure solum communitatem humanam perfectam, et politice in corpus unius reipublicæ congregatam, habere supremam jurisdictionem temporalem in se ipsam. At congregatio Ecclesiæ licet sit unum corpus spirituale seu mysticum Christi, et in hoc genere habeat fidei, baptismatis et capitilis unitatem, non tamen est unita in ratione unius politicæ congregationis, sed in se continet varia regna et respuplicas, quæ in politico genere nullam inter se habent unitalem; ergo ex vi juris naturalis non est in tota communitate Ecclesiæ immediate una suprema jurisdictionis temporalis et universalis super totam Ecclesiam, sed tot sunt jurisdictiones temporales supremæ, quot sunt politicæ communitates, quæ non sunt membra unius regni, seu reipublicæ civilis.

12. *Suprema potestas civilis non competit Summo Pontifici jure humano.*—Et hinc non minori evidentiâ concluditur, talem potestatem non esse in aliquo ecclesiastico principe aliquo titulo humano, quo mediante potestas illa naturalis in ipsum translata fuerit. Quia hic titulus vel est electio et consensus populi, et hic in præsenti locum non habet, ut per se manifestum est; nunquam enim omnes populi Christiani propria voluntate et consensu uni homini tanquam supremo principi temporali se submiserunt. Vel est titulus justi belli, et de hoc etiam clarum est non habere locum in aliquo ecclesiastico principe. Vel est titulus legitimæ successionis, et hic etiam esse non potest, præcise sistendo in jure humano, quia supponit legitimum titulum et dominium in prædecessore, et ita ascendendo, necessario sistendum est in aliquo, qui alio priori titulo humano tale dominium sine successione obtinuerit, qui non potest esse, nisi vel consensionis populorum, vel belli, quod aut a principio fuerit justum, aut per tacitum consensum subditorum per legitimum tempus justum fuerit factum; nihil autem istorum habet locum in aliquo Pontifice, cuiuscunq[ue] temporis vel superioris saeculi cogitur. Vel denique hic titulus est alicujus donationis ab homine factæ, et de hoc fere eadem est ratio quæ de titulo successionis. Quia nemo potest donare nisi quod habet; nullus autem princeps etiam temporalis habet unquam supremam jurisdictionem

temporalem directam in omnes provincias, et regna christiana, ut supra tetigi; ergo nullus est, qui Ecclesiæ, vel Pontifici talem donationem facere potuerit.

13. Quæ omnia recte confirmant illa jura canonica, quæ tradunt Pontificem Romanum legitimum jus, et temporale dominium habere Romani regni, seu patrimonii (quod vocant) S. Petri, per donationem a Constantino imperatore factam, ut patet ex c. *Constantinus*, 1 et 2, 96 dist., et ex c. *Fundamenta*, de *Elect.*, in 6, et c. *Futurum*, 12, q. 1. Nam hinc aperte colligitur, titulo donationis solum habere directe temporalem jurisdictionem in regnum et civitates, quæ sunt de patrimonio Petri, sub quo patrimonio comprehendimus omnem ditionem temporalem, quam nunc possidet Romanus Pontifex, sive totius patrimonii donatio facta fuerit a Constantino, sive ab illo fuerit inchoata, et ab aliis regibus et principibus aucta.

14. *Idem probatur de jure divino.*—Superest dicendum de titulo juris divini positivi, qui solum potuit incipere per Christi Domini donationem, et perseverare per legitimam successionem; a Christo autem Domino nulla talis donatio facta est, et consequenter nulla potest esse in tali jurisdictione temporali legitima successio; ergo neque hoc titulo convenit Pontifici hujusmodi jurisdictioni. Quod autem Christus illam jurisdictionem non dererit Ecclesiæ, probatur imprimis, quia si dedisset alicui, maxime Petro, ut nunc suppono, ex his quæ inferius de primatu Romani Pontificis diceenda sunt. Petro autem non donasse satis colligitur ex Matth. 16, ubi ante illa verba: *Quodcumque ligaveris, et quodcumque solveris*, præmittit Christus promissionem: *Tibi dabo claves regni cœlorum*; non ergo promisit Christus Petro claves regni terreni, ac proinde non promisit temporale dominium, vel jurisdictionem temporalem directam, sed spirituale potestatem. Quocirca, quod statim Christus addit: *Quodcumque ligaveris, vel quodcumque solveris*, secundum potestatem, quam nomine clavum promiserat, sine dubio intelligendum est. Et similiter verbum, *Pasce oves meas*, secundum eamdem potestatem intelligendum est, nam ibi promissionem prius factam Christus adimplevit. In nullo autem alio loco indicavit Christus se dare temporale dominium aut regnum proprium directum Petro, vel Ecclesiæ suæ, neque etiam ecclesiastica traditio hoc ostendit, sed potius oppositum, ut visum est; ergo nulla

supernaturali via nobis constare potest de tali jurisdictione temporali et directa Pontificis; ergo non potest cum fundamento illi attribui, cum non nisi supernaturaliter possit illam habere.

15. Deinde est optima conjectura, quia ipse Christus sibi in humanitate sua non assumpsit regnum terrenum, seu temporale, cum dominio et jurisdictione temporali directa, qualis est in imperatore, vel aliis principibus humanis; ergo neque illam tribuit Vicario suo in terris. Antecedens supponimus, ex his quae in 1 tomo tertiae partis¹ de regno Christi diximus, et nunc breviter ostenditur ex his quae Scriptura dicit de paupertate Christi Domini, ut est illud 2 ad Cor. 8: *Scientis gratiam Domini nostri Jesu Christi, qui propter nos egenus factus est, cum esset dives, ut illius inopia vos divites essetis.* Unde Joannes II, in Extravagant. *Cum inter nonnullos, de Verbor. signifi., docens habuisse Christum, non obstante paupertate, quarumdam paucarum et usualium rerum dominium, manifeste supponit non accepisse regnorum dominium, vel aliarum rerum quarum proprietas homines divites constituit.* Et hoc significavit ipse Dominus, cum Matth. 8, et Lue. 9, dixit: *Filius hominis non habet ubi caput reclinet.* Et de temporali jurisdictione idem significavit Lue. 12, ubi euidam petenti: *Dic fratri meo ut tecum dividat hereditatem, respondit: Homo, quis me constituit judicem aut divisorem super eos?* quasi diceret non assumpsisse illud judicium, nee ad temporalem jurisdictionem exerceendam in mundum venisse, ut recte Ambros., Theophylact. et Euthym. adnotarunt.

16. Et hoc etiam confirmavit idemmet Dominus, Joan. 18, dicens: *Regnum meum non est de hoc mundo, id est, non est temporale et terrenum, quale est regnum Cæsaris, ut ibi exponunt Cyrillus, lib. 42 in Joan., cap. 10, et sequentibus; et Chrysostomus, hom. 82 in Joan., et optime Augustinus, tract. 115, dicens: Audite omnia regna terrena, non impedio dominationem restraint in hoc mundo, regnum meum non est de hoc mundo.* Unde omnes Patres docent assumpsisse Christum regnum spirituale, quod veram paupertatem non excludit. Ideoque Zachar. 9 prædictitur venturus Salvator, qui esset rex et pauper, quod in Christo impletum esse declaravit Matth., cap. 21, et Joannes, c. 12; et in Psal. 2,

de Christo dicitur: *Ego autem constitutus sum rex ab eo super Sion montem Sanctum ejus, et statim additur, prædicans præceptum ejus, ad significandum regnum illud esse spirituale, non terrenum.* Unde Augustinus supra, montem illum, super quem Christus est rex constitutus, non esse de hoc mundo dixit, *quia credentes in Christum, qui sunt regnum ejus, non sunt de hoc mundo;* Hilarius autem dixit non esse Jerusalem terrestrem, sed cœlestem. Et hoc etiam modo prædictum est ab Angelo de Christo: *Dabit illi Dominus sedem David patris ejus, et statim subjungit: Et regnabit in domo Jacob in æternum, et regni ejus non erit finis,* quia non temporale, sed spirituale futurum erat, ut adnotarunt Epiphan., hæres. 29, et Hieronymus, Jeremiæ 22 et Zachar. 6. Ratio vero est, quia temporale regnum non fuit Christo necessarium ad honorem vel majestatem suam, et ad exemplum ac redemptionem nostram fuit magis expediens ut illud non assumeret.

17. *Objectio.* — *Solutio.* — Atque hinc facile probatur prior illatio, quia Christus non contulit Vicario suo potestatem quam non ipse assumpsit. Dices, quamvis Christus non habuerit temporale regnum eaducum et imperfectum, habuisse tamen etiam in humanitate sua propter gratiam unionis dominium quoddam excellentius, per quod poterat sua voluntate uti quibuscumque rebus vel regnis temporalibus, et consequenter per illud etiam potuisse dare Vicario suo temporalia regna, et directam jurisdictionem temporalem. Respondemus, non negari quin id facere potuerit, siue etiam potuit sibi assumere, sed colligimus non dedisse, cum illud non assumperit, quia non reliquit in terris, nisi Vicarium illius regni quod ipse de facto assumpsit, quod regnum spirituale est, ut ostendimus, et perfecte quidem consummatur in gloria, in hoc vero mundo inchoatur in Ecclesia militante. Item quia Christus habuit perfectam spiritualem potestatem sine jurisdictione temporali directa; ergo etiam potuit communicare Vicario suo perfectam, seu sufficientem jurisdictionem spiritualem, sine altera directe temporali. Ac denique quia sicut fuit expediens Christum ipsum non assumere temporalem jurisdictionem, ita etiam conveniens fuit ut Vicario suo illam non communicaret, ne aut reges terræ perturbaret, aut spiritualia sæcularibus miscere videretur.

18. Unde possumus ultimo ratione argumentari, quia dominium temporale cum ju-

¹ Dispat. 48, sect. 2.

risdictione directa et civili in universam Ecclesiam non erat necessarium ad spirituale regimen Ecclesiæ, ut per se manifestum est, neque etiam ad eumdem finem erat utile, imo potius magno impedimento esse potuisset; ergo non est verisimile a Christo fuisse datum. Minor probatur primo, quia tempore regnum est longe diversum ab spirituali, et implicat homines negotiis sacerdotalibus, quæ maxime avertunt ab spiritualibus, propter quod dixit Paulus, 2 ad Timoth. 2: *Nemo militans Deo implicat se negotiis sacerdotalibus*; ergo incredibile est Christum Dominum conjunxisse has duas supremas et universales potestates in uno supremo Pontifice Ecclesiæ, cum moraliter impossibile sit, unum hominem sufficere utrique ponderi universalis gubernationis.

19. Objectio. — **Prima responsio.** — Diccs: hac ratione probaretur, Summum Pontificem vel alios Episcopos non posse nec debere esse simul temporales principes. Respondeatur imprimis verum esse, Christum Dominum id non instituisse neque præcepisse, neque aliqui ex suis ministris seu pastoribus temporalium principatum dedit. Et hoc probat discursus factus, et confirmant quæ de Christi Domini regno diximus, quia ille nec totius orbis, nec aliquius partis ejus principatum temporale aut sacerdotiale judicium sumpsit, unde nulli etiam Episcopo, vel Vicario suo illud communicavit; quod ergo ipse de se dixit: *Quis me constituit judicem inter vos*, in unumquemque Episcopum convenit. Quod etiam aliis testimoniis et longo discursu ostendit Bernar., lib. 4 de Considerat., ad Eugenium, c. 6, et lib. 2, cap. 6. Addo nihilominus non prohibuisse Christum, ne Pontifex aut Episcopus possit esse simul temporalis dominus, quia nec talis prohibitio ostendi potest, ut supra tactum est, et ex dicendis magis constabit; neque etiam sequitur ex ratione proposita, quia non est per se malum, eumdem esse ecclesiasticum pastorem et principem temporalem. Quin potius, licet temporalis cura nimis ampla et universalis non recte conveniat cum spirituali sollicitudine, nihilominus principatus aliquis temporalis moderatus potest non solum esse licitus, sed etiam expediens ad Ecclesiæ splendorem et auctoritatem conservandam, et ad necessarios sumptus, et alios similes honestos fines, ut recte dicitur in cap. *Fundamenta*, de Elect., in 6. Et ideo Christus Dominus hoc non prohibuit, sed humanæ dispositioni, recta ratione regu-

latæ, et pro temporum opportunitate, id reliquit.

20. Secunda solutio. — *Rejicitur responsio.*

— Aliter vero responderi posset rationi factæ, illa solum probari exercitum utriusque jurisdictionis universalis non debuisse simul eidem personæ committi, nihilominus tamen in habitu potuisse utramque jurisdictionem dari Pontifici, datamque esse ea lege et conditio, ut spiritualem per se, temporalem vero per alios ordinarie exerceret. Sed hoc etiam facile impugnatur, non solum quia etiam illa jurisdictione in habitu nullo titulo aut probabili modo ostenditur, ut probatum est, sed etiam quia vel est imperlinens, vel odiosa valde. Aut enim qui illam habet, nunquam per se ipsum uti illa debet, et sic erit otiosa et inutilis, quia nunquam poterit quis illa uti per alios, nisi prius per se illa utatur, saltem illam delegando, vel ordinariam committendo. Si vero ad hunc usum data dicatur, interrogo ulterius an Pontifex, verbi gratia, committendo hanc jurisdictionem, illam omnino a se abdicet, et omnem illius curam prorsus relinquit, an vero ita illam committat, ut semper maneat temporaliter superior, et cum potestate revocandi commissionem, vel saltem limitandi eam, vel etiam sub arbitratu corrigendi aut emendandi acta per illam. Si priori modo haec jurisdictione in habitu cogitetur, est sine fructu, et otiosa. Quid enim refert quod Pontifex habeat hanc potestatem in habitu, si necessario debuit illam dare aliis, per quos exerceatur, et postquam dedit, jam non potest actum superioris exercere in illo ordine? Imo potius sequitur jam nunc illam non habere, et solum fingitur aliquando habuisse, ut emanatio hujus potestatis ad principes sacerdotales Pontifici attribuatur, quod invidiae satis plenum dueitur, odiosumque nimis, et alias est etiam sine fructu et fundamento.

21. Si vero posteriori modo cogitetur haec potestas ita in habitu, ut possit exire in actum, quando libuerit, vel quando oportuerit, sic augetur odium et invidia, quia jam principes temporales non erunt supremi reges, falsumque erit Sedulii carmen ab Ecclesia receptum, et celebratum satis: *Non eripit mortalia, Qui regna dat cœlestia*; poteritque Pontifex pro libito suo regna temporalia auferre vel mutare, et judicia temporalium rerum, dispensationes, et similia, sibi etiam ad libitum vindicare, saltem valide, nam licet fortasse non bene faceret propter perturba-

tionem ordinis, factum nihilominus teneret, quia esset ex supra dictione, a qua inferior pendet. Hoc autem non solum odiosum est, et regum animos perturbare potest non sine causa; verum etiam est per se incredibile, quia est contra universalem pacem Ecclesiæ, et contra universalem ac perpetuum usum ejus. Unde etiam jurisperiti, qui dicunt Summum Pontificem habere supremam jurisdictionem temporalem, id non admittunt. Imo in multis actibus jurisdictionis temporalis absolute negant posse Pontificem extra dictio nem suam temporalem illos usurpare, etiam valide, ut communiter tradunt Doctores, in c. *Per venerabilem*, Qui filii sint legitimi. Ac denique si hoc modo haberet Pontifex jurisdictionem temporalem totius Ecclesiæ, non minus oporteret ipsum esse sollicitum de bono temporali regimine omnium regnorum Ecclesiæ, quam de regimine spirituali omnium episcopatum; nam est eadem ratio et obligatio, servata proportione; et ita procedit ratio facta, quod illa duplex sollicitudo universalis humanas vires et capacitationem moraliter excedat, sitque contra omnem rationem et usum.

22. Solvuntur fundamenta contrariæ sententiæ.—Ex fundamentis contrariæ sententiæ, primum et secundum procedunt tantum de potestate indirecta. Et profecto multi ex auctoribus pro illa sententia relatis, de eadem tantum superiori potestate loquuntur, ut in fine hujus libri declarabimus. Tertium autem fundamentum procedit ex falso principio, quia Christus Dominus dominia temporalia non assumpsit, ut dictum est. Simili modo deficit quartum fundamentum, quia Ecclesia non est una res publica temporalis, sicut est spiritualis, et ideo non indiget una temporali potestate directe suprema, sed una spirituali, que ad temporalia extendatur, ut infra etiam videbimus.

CAPUT VI.

UTRUM SIT IN ECCLESIA CHRISTI SPIRITALIS POTESTAS JURISDICTIONIS EXTERNAE ET QUASI POLITICÆ A TEMPORALI DISTINCTA?

1. Potestas ecclesiastica alia ordinis, alia jurisdictionis.—Diximus hactenus de potestate temporali, ut constet nullum principem christianum jure posse Catholicam Ecclesiam vel doctrinam arguere, quod debitam potestatem illi pro libito eripiat: nunc dicendum

est de spirituali potestate, ut etiam ostendamus quid reges schismatici in hoc genere indebit usurpent, et in quibus ecclesiastice potestati contra divinum jus obedire et subjici recusent. Quia vero potestas ecclesiastica multiplex est, ideo in titulo restringimus quæstionem ad potestatem jurisdictionis spiritualis et externæ. Duplex enim distingui solet potestas ecclesiastica, scilicet, ordinis et jurisdictionis: ad hæc enim duo membra, alia, quæ ad numerari solent, reducuntur, ut recte Navarrus adnotavit. De potestate ergo ordinis hic non tractamus, non enim pertinet ad præsentem controversiam, quia illa non est potestas superioris in subditos, sed est facultas quædam moralis ad cultum Dei religiosum ordinata, vel per oblationem sacrificii, vel per administrationem aut dispensationem sacramentorum, quæ ad sanctificationem fidelium sunt instituta, vel denique per quæcumque alias cæremonias quæ, ad ornatum sacrificii aut sacramentorum, convenienter et ordinate fieri debent. Unde etiam Protestantes non omnino videntur hanc potestatem negare, quamvis ita illam interpretentur, ut nomine potius quam re illam confiteantur. Sed hoc in tractatu de Sacramentis examinandum est.

2. Jurisdictio item ecclesiastica duplex.—*Sensus questionis.*—Potestas item jurisdictionis subdistinguitur in jurisdictionem interni fori pœnitentiæ, et externi fori ecclesiastici. Prior proxime constituit sacerdotes, superiores et judices in quodam divino et secreto foro, quod in sacramento pœnitentiæ exercetur. Et quamvis de hæc etiam sit magna contentio hæreticorum hujus temporis contra Ecclesiam Catholicam, illam nunc prætermittimus, quia neque rex Jacobus illam attigit, neque ad exteriorem politiam, etiam ecclesiasticam, spectat. His ergo potestatibus omissis, sermo est de potestate jurisdictionis externæ datæ ad gubernandam Ecclesiam, quatenus est quædam spiritualis res publica, et corpus Christi mysticum, quam spirituale vocamus, ut a temporali eam distinguamus. Unde juxta intentionem nostram idem est querere an hæc jurisdictione sit, et an sit a temporali distincta.

3. Marsilius hæresis, et fundamentum schismatis Anglicani.—In hac ergo quæstione fuit hæresis Marsilius Paduani, qui fere ante quingentos annos inter alias hæreses dixit, Christianum nullam jurisdictionem Ecclesiæ suæ, aut Episcopis, vel Romano Pontifici dedisse, vel

in laicos, vel in clericos, vel ad præcipiendum seu obligandum, vel ad cogendum seu puniendum; sed solum dedisse sacerdotibus potestatem ministrandi sacramenta, et prædicandi verbum Dei, et in reliquis omnibus, dispositioni et jurisdictioni temporalium principum eos subjectos reliquissce. Ita errorem hunc referunt plures auctores, sed distinctius quam cæteri, Albertus Pighius, lib. 5 de Eccles. Hierarch. Et in hoc errore videtur fuisse fundatus Henricus VIII, rex Angliæ, ad schisma contra Ecclesiam Romanam excitandum. Ut enim Pontifici obedientiam negaret, consequenter etiam negavit se habere in terris superiorem tam in spiritualibus quam in temporalibus, et consequenter asseruit in suo regno se habere totam potestatem supremam, quæ in Ecclesia respective esse potest. Idemque de quocumque rege temporali christiano censuisse videtur, quia non potuit majorem rationem aut titulum talis potestatis in se, quam in aliis supremis regibus invenire; idque diserte ac frequenter vel affirmat, vel supponit rex Jacobus in sua ad chrisianos principes Praefatione.

4. Ex quo manifeste convincuntur, non agnoscere in Ecclesia aliam potestatem jurisdictionis, praeter eam quæ est in regibus temporalibus, vel quæ ab illa manat, quia nullum alium titulum ad illam usurpandam prætendere possunt. Unde, sicut supra diximus, regiam potestatem a populo ad reges manasse, ita referunt Anglicanæ historiæ, regem Henricum ex consensu regni in Parlamento hanc sibi arrogasse potestatem, idemque in simili conventu fuisse in Eduardo, proximo successore, declaratum, posteaque in Elizabetha innovatum. Ergo signum est non aliter de hac potestate quam de politica sentire. Idemque satis ostendit Jacobus rex, cum jure hæreditario et titulo carnalis successionis illam habere profiteatur. Neque ab hoc errore alienus fuit Calvinus aut Lutherus, nam, licet Calvinus primatum Henrici non approbaverit, nihilominus, ex alio principio, hujusmodi spiritualem potestatem negare cogit. Ille enim cum Luthero et aliis, omnes Christianos parcs in sacerdotio faciunt, et distinctionem cleri a populo laico e medio tollunt, atque ita nullam potestatem specialem ponunt in Ecclesia ad gubernandam illam, præter cam quæ est in magistratu politico, vel quæ in aliqua communitate ad servandum rectum ordinem ex natura rei existit.

5. *Fundamenta dictæ hæresis.* — Funda-

menta hujus erroris diversa sunt. Nam isti, quos ultimo loco retuli, fundari potuerunt, quia crediderunt in Ecclesia nullum esse verum ac proprium sacrificium, et consequenter nec verum ac proprium sacerdotium, sed tantum spirituale ac metaphoricum, quod omnibus Christianis commune est, de quibus dicitur 1 Petr. 2 : *Et ipsi tanquam lapides rivi superaedificamini, domus spiritualis, sacerdotium sanctum offerre spirituales hostias acceptabiles Deo per Jesum Christum.* Et infra : *Vos autem genus electum, regale sacerdotium.* Marsilius autem, licet sacerdotium non negaverit, et clerum seu presbyteros a populo distinxerit, negavit tamen in clero hierarchicum ordinem, dixitque omnes presbyteros esse æquales Episcopis, et Episcopos Papæ; unde intulit non habere inter se, vel respectu populi, subjectionem aut prælationem, sed omnes dixit esse subjectos politico magistrati. Afferebatque illud Lucæ 22 : *Reges gentium dominantur eorum, vos autem non sic, quibus verbis arbitratus est, prohibitum esse clericis omnem dominatum seu jurisdictionem.* Inducebatque alia testimonia Scripturæ, quæ a sacerdibus curis clericos abstrahunt, ut est illud : *Nemo militans Deo, implicat se negotiis sacerdibus,* 2 ad Timoth. 2; et illud : *Sæcularia judicia si habueritis, contemptibiles qui sunt in Ecclesia, illos constituite ad iudicandum,* 1 ad Corinth. 6. De regibus autem Angliæ non mihi constat, quo alio fundamento nitantur, nisi quia, detorquendo Scripturas ad alios sensus, negant in eis esse fundatam spiritualem potestatem, et exaggerant quod Scripturæ præcipiunt omnibus Christianis, principibus et magistratibus temporalibus subesse. Unde in hoc æquiperant Ecclesiam Christi synagogæ, aut reipublicæ fideli quæ in lege naturæ esse poterat, in quibus putant non fuisse aliam potestatem gubernativam, præter eam, quæ vel regibus data est in lege veteri, vel in alio statu ex natura rei esse poterat in tali communitate ordinata per fidem ad veri Dei cultum et religionem, et a populo in principes, vel (quod perinde est) ex consensu populi in primogenitos transferebatur, tanquam una et eadem potestas connaturalis.

6. *Prima assertio de fide.* — *Probatur ex Scriptura.* — Nihilominus veritas catholica est, dari in Ecclesia spiritualem potestatem veræ et propriæ jurisdictionis, per quam possit christianus populus in ordine ad salutem animæ convenienter gubernari. Hæc assertio

de fide certa est, ut communis consensu Catholicorum docent, et probatur primo apertissimis Scripturæ testimoniis. Præcipua sunt illa duo : *Quodcumque ligaveris, etc.*, Matth. 16; et : *Pasce oves meas*, Matth. 21, quæ inferius ex professo tractanda sunt. Simile etiam est illud Matth. 18 : *Si Ecclesiæ non audierit, sit tibi tanquam ethnicus et publicanus*; et adjungit : *Amen dico vobis, quemcumque alligaveritis super terram, erunt ligata et in cœlo; et quemcumque solveritis super terram, erunt et soluta in cœlo*; ligare enim et solvere manifeste sunt actus jurisdictionis, et ibi non est tantum sermo de jurisdictione in foro interno, seu secreto poenitentiae, ut per se constat, nec de jurisdictione temporali. Nam excommunicationis, de qua ibi sermo est, censura est ecclesiastica, quam etiam ipse rex Jacobus interdum spirituale appellat in præfatione. Sunt etiam expressa verba Pauli, 2 Corint. 13 : *Id eo hæc absens scribo, ut non præsens durius agam secundum potestatem, quam Dominus dedit mihi in ædificationem, non in destructionem*. Potestas autem spiritualis erat, nam temporalis vel regia in Paulo non erat. Item ad eamdem potestatem pertinet quod idem Apostolus ait, Actor. 20 : *Attendite vobis et universo gregi, in quo vos Spiritus Sanctus posuit Episcopos regere Ecclesiam Dei, quam acquisivit sanguine suo*; ubi aperte dicit, Episcopis datam esse a Deo potestatem regendi Ecclesiam ; regimen autem et gubernatio idem sunt. Unde, nisi magna vis fiat verbis, de potestate jurisdictionis Apostolus loquitur ; ut autem significet illud regimen esse spirituale, addit de Ecclesia : *Quam acquisivit sanguine suo, non enim acquisivit Christus suo sanguine temporale regnum, sed spirituale*.

7. Unde optima ratione simul cum Scripturæ testimoniis potest hæc veritas confirmari. Habemus enim ex Scripturis, Christo Deo homini promissum esse a Patre regnum æternum, juxta illud Psal. 131 : *De fructu ventris tui ponam super sedem tuam*; et Isai. 9 : *Super solium David, et super regnum ejus sedebit*. Et addit Angelus, Lucæ 1 : *Dabit illi Dominus sedem David Patris ejus, regnabit in domo Jacob in æternum, et regni ejus non erit finis*. Hoc autem Christi regnum non in cœlo tantum, sed in terra etiam tradendum seu inchoandum promissum est, ut patet ex Daniel. 7 : *Aspiciebam in visione noctis, et ecce cum nubibus cœli quasi Filius hominis veniebat*. Et infra : *Et dedit ei potestatem, et honorem, et regnum, et omnes populi, tribus, et lin-*

guæ ipsi servient, potestas ejus potestas aternæ, quæ non auferetur, et regnum ejus, quod non corrumpetur; illum autem Filium hominis esse Christum, qui in Evangelio sæpe Filius hominis appellatur, omnes intelligunt, illiusque regnum post alia imperia fuisse in terra inchoandum, et perpetuo esse duraturum, tum illo loco, tum etiam Daniel. 4, aperente prædictur, et concordat illud Ezechiel. 37 : *Faciam eos in gentem unam in terra in montibus Israel, et Rex summus erit Dominus imperans, et non erunt ultra due gentes*. Quæ verba de Christo et ejus Ecclesia evidenter intelliguntur, ut ex toto contextu usque ad finem capitilis constat. Hoc autem regnum Christi corporale seu temporale non est, sed spirituale et æternum, ut cap. 4 diximus, et colligitur ex verbis ejusdem Ezechielis : *Salvos eos faciam de universis sedibus, in quibus peccaverunt, etc.*; et ex Jerem. 43 : *Ecce dies veniunt, dicit Dominus, et suscitabo David gerumen justum, et regnabit rex, et sapiens erit, et faciet judicium et justitiam in terra, in diebus illis salvabitur Juda, et Israel habitabit confidenter, et hoc est nomen quod vocabunt eum, Dominus justus noster*. Et hoc ipsum confirmingant alia testimonia ex Scriptura et Patribus, dicto cap. 4 adducta.

8. Ex quo ulterius concludimus, hoc regnum Christi non esse nisi Ecclesiam ejus, in qua ipse spiritualiter regnat, ut dixit Gregorius, lib. 1, in 1 Reg., in ultimis verbis. Et Augustinus, tractat. 118 in Joan. : *Quod est regnum ejus, nisi credentes in eum? Quibus dicit: De mundo non estis*. Et infra : *Unde non ait: Regnum meum non est in hoc mundo, sed, Non est de hoc mundo; nec dicit: Non est hic, sed, Non est hinc. Hic est enim usque ad finem saeculi*. Ergo sicut regnum spirituale est, ita per spirituale potestatem regi debet. Hoc autem regnum perpetuum est non solum in cœlo, sed etiam in terra, quamdiu mundus durabit, ut ex Augustino retuli, et in libro etiam primo, tractando de Ecclesia ostendi; ergo etiam potestas spiritualis ad regendum illud ita est a Christo huic Ecclesiæ concessa, ut in ea perpetuo duret, quia non potest regnum sine potestate gubernatrice illi proportionata conservari. Unde recte dixit Epiphan., hær. 29 : *Thronus David, et regia sedes, est Sacerdotium in S. Ecclesia, quam dignitatem regiam, simulque pontificiam simul conjunctim largitus est Dominus S. Ecclesiæ suæ, translatu in ipsam throno David non deficiente in æternum*. Et infra : *A domo carnali Juda et*

Israel regia dignitas translata est, firmiter autem sedet thronus in S. Dei Ecclesia in aeternum.

9. Evasio regis Angliae, ejusque rationes.—
Prima.—**Secunda.**—Ad hanc autem rationem tacite respondet rex Jacobus in Præfatione, pagin. 5, 7, his verbis : *Nec si regna terrestria a monarchis terrestribus regi debent, ideo Ecclesiam sequitur a terrestri quoque monarca debere gubernari.* Cur autem non sequatur, duas rationes indicat. Prior est, *quia neque unus est aliquis totius orbis regnorumque omnium moderator ac monarcha*; altera est, *quia Christus Ecclesiæ suæ monarcha est, Christique vices explet, quem venturum promiserat, Spiritus Sanctus*; et hic illud adjungit : *Reges gentium dominantur eorum, vos autem non sic.* Sed in his verbis attingit rex aliam quæstionem de monarchia infra tractandam, quæ diversa est a præsenti. Nunc enim solum tractamus de spirituali potestate suprema, ad regendum regnum Christi, quod est Ecclesia, necessaria, et hanc dicimus esse debere in ipsa Ecclesia, prout in terris versatur, sive sit in una persona, sive in multis, seu in congregacione ex illis composita, quod postea videbimus. Verba autem regis eo tendunt, ut nulla sit necessaria in hoc regno Christi potestas, quæ vices Christi gerat, ut maxime patet ex posteriori ratione, quam de munere Spiritus Sancti affert, ideoque hic prætermitti non potuerunt.

10. Rejicitur evasio regis.—Circa primam ergo æquiparationem spiritualis regni Ecclesiæ cum regno terreno dicimus, si cum proportione fiat comparatio, non minus esse necessarium in Ecclesia supremum aliquem gubernatorem terrestrem, id est, visibilem hominem et mortalem, quam sit in regno terrestri. Quia Ecclesia Christi universa non minus est una, seu regnum unum in suo ordine, quam sit regnum quodlibet temporale in suo. Et licet Ecclesia quoad finem et præcipua media spirituale regnum sit, nihilominus, quoad personas ex quibus constat, etiam est terrestris, et actiones, in quibus regi, vel dirigi et corrigi debet, terrestres etiam sunt, id est, externæ et sensibiles, et illis mediantibus servanda est pax, unitas, religio, et cætera omnia quæ ad convenientem hujus corporis gubernationem sunt necessaria; ergo non minus est in hoc regno necessaria potestas suprema, quæ humano et sensibili modo membra ejus et actiones eorum in ordine ad æternam salutem dirigat et gubernet. Et ideo

recte Bonifacius II, ep. 1, et Gregorius, libro quarto epist., c. 96, alias epist. 52, ind. 3, de eadem Ecclesia loquentes dixerunt : *Ad hoc divinæ dispensationis provisio gradus diversos et ordines constituit esse distinctos, ut una concordia fieret ex diversitate connexio, et recte officiorum gereretur administratio singulorum.* Neque enim universitas poterat alia ratione subsistere, nisi hujusmodi magnus eam differentiaz ordo servaret. Quia vero in hac graduum diversitate et ordine in infinitum procedi non potest, nec in eis esse divisio, ideo necesse est in aliquo supremo capite uniri seu terminari. Unde subiungit Gregorius : *Tunc unumquodque salubriter impletur officium, cum fuerit unus, ad quem possit recurri, præpositus.* Quod profecto sicut in unaquaque congregacione spirituali seu ecclesiastica, et in unoquoque episcopatu, vel particulari Ecclesia seu provincia verum est, ita in universalis Ecclesia multo majori ratione est necessarium. Et ideo dixit Anastasius Papa, in Apolog. adversus Anastasium imperatorem : *Si omnis potestas a Deo est, magis ergo quæ rebus est præstituta divinis, quam nos nunc spirituale potestatem vocamus.* Optima ergo est illatio quam rex improbat : si terrenum regnum a terrestri monarcha regi debet, etiam Ecclesia suum monarcham, seu supremum gubernatorem in terris habere, necessarium fuit.

11. Satisfit primæ probationi regis.—Prior autem regis ratio non solum hoc non expugnat, sed potius comprobatur, si alia diversitas inter Ecclesiam et totum orbem quoad regna terrena consideretur. Nam in universo orbe terrarum non est una tantum res publica, vel unum temporale regnum, sed varia et plura, quæ inter se non componunt unum politicum corpus, et ideo neque unus monarcha, neque (generalius loquendo) una præfectura, vel unum supremum tribunal politicum et humanum pro toto universo esse oportuit. Imo neque moraliter vel humano modo potuit. At vero Ecclesia Christi est unum corpus mysticum perfectum, et unum (ut sic dicam) simplex regnum per universum orbem diffusum, ut in libro primo, tractando de Ecclesia Catholica, dictum est. Et ideo una suprema potestas, quæ toti illi præsit, necessaria est. Quocirca si supponamus Ecclesiæ regimen esse monarchicum, ut infra ostendetur, comparatio ejus cum temporali regno non est cum universo orbe facienda, sed cum singulis orbis regnis, ita ut sicut

unumquodque regnum temporale ab uno monarca terreno regitur, terreno, inquam, quoad personam, quoad potestatem, quoad materiam et proximum finem, ita totum Ecclesiae regnum ab uno regatur monarca, terreno quidem quoad personam, cœlesti vero quoad potestatem, materiam, et proximum ac principalem finem. Hac enim ratione Christi Ecclesia militans, licet terrenum regnum dici possit, propterea quod ex mortaliis hominibus in terra degentibus constat, nihilominus in Scriptura sæpe regnum cœlorum appellatur, et Christus de illa dixit : *Regnum meum non est hinc.* Ubi Augustinus notat, non dixisse : *Non est hic*, quia revera in hoc mundo est, sed *non est hinc*, quia licet sit in mundo, non est de mundo, sed de cœlo venit, ideoque tale regnum gubernatore indiget, terrestri simul et cœlesti.

12. Dissolvitur secunda regis ratio. — Ad alteram rationem, concedimus quidem Christum Dominum esse principem Ecclesiae suæ monarcham. Ideoque quamdiu in terris deguit, et cum Apostolis suis conversatus est, illam per se ipsum tanquam supremus illius rex et Pontifex gubernavit, Apostolos elegit, sacerdotes et Episcopos consecravit, et ad prædicandum misit, eisque discipulos adjunxit, et pro illius temporis et status Ecclesiae opportunitate cætera necessaria providit. Quia vero nunc est absens ab Ecclesia militante quoad visibilem præsentiam, ideo non potest sicut antea, per se ac proxime, pastoris munus Ecclesiae præstare, et idecirco ad compensandam visibilera præsentiam suam Vicarium seu Præfectum providit, cui Ecclesiae suæ regimen commisit. Quod quidem non negat rex Angliæ, sed (quod mirabile est) ait hunc Vicarium esse Spiritum Sanctum, quia ad dirigendos et docendos Apostolos non Petrum, ait, sed Spiritum Sanctum relictum Christus pollicitus est. Sed hoc, vel non proprie, vel non vere, neque ad rem et causam, de qua tractamus, dictum est. Scio quidem Tertullianum aliquando vocasse Spiritum Sanctum Christi Vicarium, libro de Præscription. hæreticor., c. 13 et 28, impropria tamen et metaphorica locutione, solum quia Christus dixit Joan. 14 : *Alium Paracletum dabit vobis, ut maneat vobiscum in æternum, spiritum veritatis.* Et infra : *Hæc locutus sum vobis, apud vos manens. Paracletus autem Spiritus Sanctus, quem mittet Pater in nomine meo, ille vos docebit omnia, et suggeret vobis omnia quæcumque dixerit vobis.* Per quæ

verba promittit Christus Spiritum Sanctum, qui internam virtutem, illustrationem et suggestionem per gratiam suam fidelibus conferat.

13. Spiritus Sanctus non potest propriè dici vicarius Christi. — Hæc autem operatio non potest Spiritui Sancto attribui tanquam vicario alterius, si proprietas verbi servetur. Quia vicarius proprie est alterius principalis auctoris minister, qui vices ejus gerit, et ejus potestate sibi commissa utitur; at vero Spiritus interius docet et inspirat tanquam principalis et proxima causa gratiae, et internæ virtutis, quomodo Paulus dixit : *Neque qui plantat est aliquid, neque qui rigat, sed qui incrementum dat, Deus.* Non potest ergo in proprietate sermonis Spiritus Sanctus dici vicarius Christi. Lato autem et improposito modo Tertullianus ita locutus est, quia Spiritus Sanctus missus fuit, ut loco Christi Apostolos consolaretur, et doceret vel explicaret multa, quæ pro temporis brevitate et opportunitate Christus ipse vel tradere non potuerat, vel non oportuerat. Unde dixit : *Ego rogado Patrem, et alium Paracletum dabit vobis*, ac si diceret, In me habebatis consolatorem, quamvis autem discedam, eo non carebitis, nam Pater alium dabit vobis, qui loco mei vos consoletur. Et in eodem sensu (ut Euthymius significat) dixit, de Spiritu Sancto : *Quem mittet Pater in nomine meo*, id est, ut ea perficiat quæ ego incepi, suggerendo et declarando vobis quæ docui, et addendo, quæ non potestis portare modo, et testimonium de me perhibendo. Hac ergo ratione dici aliquo modo potest Spiritus Sanctus vices Christi gessisse seu explexisse, non per vicariam aut ministerialem virtutem, quod inferioris esset, sed ut principalis causa perficiens quod Christus absolvere in brevi tempore vitæ suæ non potuit. Unde hoc modo quicumque alteri in officio succedit, vel perficit quod alter inchoavit, et perficere non potuit, dici potest vices ejus supplere, etiamsi vicarius ejus proprie non sit, nec per potestatem inferiorem et participatam, et ab altero dependentem operetur.

14. Quod si hoc tantum modo rex Angliæ intellexit, Spiritum Sanctum vices Christi explexisse, immerito sentit illam Spiritus Sancti operationem sufficere ad externum et hominibus accommodatum Ecclesiae regimen, quia illa virtus et operatio Spiritus Sancti invisibilis est, et mere spiritualis ac interna; homines autem indigent etiam externo et visu-

bili rectore. Deinde, si ille invisibilis influxus Spiritus Sancti sufficiens esset pro Ecclesia visibili, non tantum Spiritus Sanctus, sed etiam Christus ipse absens, et nunc nobis invisibilis, dici posset sui ipsius praesentis seu visibilis Vicarius, quia de se etiam promisit : *Ecce ego vobiscum sum omnibus diebus usque ad consummationem saeculi*, utique invisibili protectione et auxilio, ut in superioribus explicavi. Præterea si Christus, quia est principalis monarcha Ecclesiæ, illi non contulit rectorem visibilem, qui loco ipsius eam gubernaret, cur rex Angliæ, in sua Præfatione¹, se et alios reges vicarios Dei appellat? nam (juxta suam opinionem, qua se credit esse caput Ecclesiæ in regno suo, etiam in spiritualibus) necesse est ut, cum se appellat vicarium Dei, intelligat, non solum quoad regnum temporale, sed etiam quoad ecclesiam Britannicam; ergo repugnat sibi ipsi, cum dicit Christum non reliquisse vicarium sui, præter Spiritum Sanctum.

15. *Veram spiritualem jurisdictionem Christus Dominus Petro contulit.* — Denique falsum est Christum non promisisse Petrum, qui alios dirigeret aut doceret; non enim solum promisit, sed etiam dedit, nam promittendo ei claves, et clavem regiminis, et clavem scientiæ promisit. Item quando illi dixit : *Rogavi pro te, ut non deficiat fides tua*, statim addidit : *Et tu aliquando conversus confirma fratres tuos*. Ac denique cum illi dixit : *Pasce oves meas*, et doctrinam, et regimen seu directionem manifeste comprehendit, ut infra videbimus. Et ultra hæc in multis aliis locis significavit Christus futuram esse in Ecclesia præfecturam spiritualem, et aliquem, vel aliquos ministros suos, qui tanquam proprii et visibiles vicarii vicem ejus gerant. Ita intelligunt Patres illud Lucæ 10 : *Qui vos audit me audit, et qui vos spernit me spernit*. Ambrosius ibidem, et Hilarius, Can. 27 in Matth. Idem colligit Chrysostomus, lib. 2 de Sacerdot., ex Lucæ 12. Nam cum Christus sub parabola patris familias, qui vult magna vigilantia et sollicitudine a suis subditis expectari et obediri, declarasset quomodo sit Domino serviendum, Petrus eum interrogavit : *Domine, ad nos dicis hanc parabolam, an ad omnes?* Respondit autem Christus : *Quis putas est fidelis dispensator et prudens?* significans, Apostolos specialiter vocatos fuisse ut essent tanquam præcipui servi, quibus alio-

rum cura demandanda erat; et præcipue Petrum, qui super totam familiam Christi erat constituendus, non solum ad communem vigilantiam, sed etiam ad specialem fidelitatem et prudentiam obligari. Quam curam et obligationem commemorabat Petrus, cum dicebat : *Pascite, qui in vobis est, gregem Dei, providentes non coacte, sed spontanee, secundum Deum.* Et consonant verba Pauli, 1 Cor. 4 : *Sic nos existimet homo ut ministros Christi, et dispensatores mysteriorum Dei; hic jam queritur inter dispensatores, ut fidelis quis inventiatur, etc.; et c. 3 dixerat : Quid igitur est Apollo, quid vero Paulus? ministri ejus cui credidistis*, id est, Vicarii ejus, et loco illius Ecclesiam regentes; et ad Rom. 13, temporalem principem, vel judicem, Dei ministrum appellavit.

16. Nam quod illud ministerium apostolicum fuerit, etiam cum potestate et jurisdictione ad ferendum judicium, satis declarat idem Paulus, in fine dict. c. 4, dicens : *Quid rultis? in virga veniam ad vos?* et cap. 5 : *Ego quidem absens corpore, praesens autem spiritu jam judicavi, ut praesens, eum, qui sic operatus est, in nomine Domini nostri Iesu Christi, etc., tradere hujusmodi Satane in interitum carnis, ut spiritus ejus salve fiat,* etc. Et 2 ad Cor. 13 : *Si venero iterum, non parcam*, etc. Et expresse ad Hebr. 13 : *Obedite præpositis vestris, et subiacete illis, ipsi enim perrigilant*, etc. Et 1 ad Timoth. 5 : *Qui bene præsunt presbyteri duplice honore digni habeantur.* Et ad Titum 1 : *Oportet Episcopum sine crimine esse sicut Dei dispensatorem*, etc. Et c. 2. *Hæc loquere, et exhortare, et argue cum omni imperio.* Denique huc spectant loca Pauli, in quibus describit unitatem corporis Ecclesiæ, et varia membra ejus, ut ad Roman. 12, ubi inter alia ait : *Qui præest in sollicitudine*, et 2 ad Cor. 12, et ad Ephes. 4, ubi ponit, *Apostolos, Prophetas, Evangelistas, Pastores et Doctores in opus ministerii, in ædificationem corporis Christi.* Quem modum gubernationis dicit esse duraturum, usque ad consummationem Sanctorum, id est, usque ad mundi finem, ut in superioribus explicatum est.

17. *Distinctio inter spiritualem et temporalem potestatem.* — Atque ex his constat manifeste, banc potestatem spiritualem esse omnino distinctam a temporali. Primo quidem et principaliter in fine; nam temporalis potestas ordinatur ad servandam reipublicæ pacem, et moralem honestatem, juxta illud

¹ Pag. 134.

Pauli, 1 ad Timoth. 2 : *Ut quietam et tranquillam vitam agamus in omni pietate et castitate.* Potestas autem ecclesiastica ad aeternam salutem consequendam ordinatur, juxta illud Pauli ad Ephes. 4 : *Ad consummationem Sanctorum, etc.; et illud ad Hebreos 43 : Obedite praepositis vestris, ipsi enim pervigilant, tanquam rationem pro animabus vestris reddituri.* Alia differentia est in origine, quia potestas temporalis trahit originem a Deo auctore naturae media ratione naturali, et ita per se spectata est de jure naturali; prout vero est in rege vel senatu, est de jure humano; potestas autem ecclesiastica est de jure divino positivo, et speciali promissione et concessione Christi : *Tibi dabo claves, Pasce oves meas, Sicut misit me Pater, et ego mittio vos.* Sicut enim finis, ad quem ordinatur haec potestas, et actus ac media quae illi subsunt, sunt supra naturam et vires humanae, ita et potestatem ipsam habere originem supra jus naturae vel humanum necesse est. Et ideo tandem haec potestates differunt tanquam materialis et spiritualis, naturalis et supernaturalis, terrestris et coelestis. Atque ita explicant distinctionem hanc Gelasius Papa, de Vinculo anathematis, et Nicolaus I, in epistol. ad Michaelem Imper., circa finem, dicens : *Mediator Dei et hominum homo Christus Jesus, sic actibus propriis et dignitatibus distinctis officia potestatis utriusque discrevit, propria volens medicinali humilitate sursum efferrī, non humana superbia rursus in inferno demergi, ut christiani imperatores pro aeterna vita Pontificibus indigerent, et Pontifices pro cursu temporalium tantummodo rerum imperialibus legibus uterentur, quatenus spiritualis actio carnalibus distaret in cursibus.* Easdem differentias attingit Gregorius VII, l. 4 Epistol., ep. 2 ad Herimanum, easque ex Anastasio Papa, in ep. ad Anastasiū imperatorem, et Gregorio in Pastorali, confirmat. Idem docet Symmachus, in Apologia contra eudem Anastasiū imperatorem dicens : *Conseruamus honorem imperatoris cum honore Pontificis, inter quos tantum distat, quantum ille humanarum rerum curam gerit, iste divinarum.* Et infra : *Tu humana administras, ille tibi divina dispensat.* Idem Symmachus, in Synodo Romana, et refertur late in cap. *Bene quidem, 96 dist.*, et plura alia in duobus capitibus sequentibus referuntur.

18. Solvuntur fundamenta errorum in principio capituli relatorum. — Neque huic doctri-

næ catholice obstant fundamenta aliorum errorum, quæ in aliis hæresibus fundantur, quas non possumus hoc loco ex professo refutare. In fundamento ergo primi erroris hæreticum est dicere, non esse in Ecclesia Christi verum et visibile sacrificium, aut verum et proprium sacerdotium. Et similiter hæreticum est dicere, omnes fideles esse in sacerdotio æquales, quæ omnia alibi sunt a nobis disputata et probata. Marsilius etiam Paduanus in fide errat, dum supponit omnes clericos, seu sacerdotes et Episcopos, jure divino esse æquales. Nam quoad potestatem ordinis ex institutione Christi Episcopus excedit presbyterum, et presbyter diaconum, etc., ut in tractatu de Sacramento Ordinis late ostenditur. In potestate autem jurisdictionis est de Apostolis certissima differentia, quæ ex adductis testimoniis facile colligi potest, et quoad Petrum, et successores ejus, late in sequentibus ostendetur. Præterea quod ait, Christum prohibuisse Pontificibus temporaliter regnare, imprimis omnino falsum est et erroneum, ut cap. 8 ostendemus. Deinde ad id, quod nunc agimus, nihil refert, quia etiam si illud admitteretur, solum inde posset inferri Episcopos, aut Pontifices, per potestatem quam habent, ut tales sunt, non temporaliter regnare, sed spiritualiter, quod nos omnino contendimus, cum dicimus potestatem illorum non temporalem esse, sed spiritualē.

19. Et hoc ad summum probat testimonium illud : *Reges gentium dominantur eorum, vos autem non sic* (quod etiam rex Anglie non omisit), nam etiam in illo sensu non prohibet Christus Apostolis regnare, sed sic regnare sieut reges gentium, id est, temporaliter; necesse est autem ut spiritualiter regnent saltem illi, qui supremam in illo ordine potestatem habent. Nisi velimus dicere, etiam Summum Pontificem non tam proprie regnare spiritualiter quam vice regnare, quia non tanquam supremus rex, sed tanquam Vicarius summi Regis Ecclesiae præest. Veritas autem est non prohibuisse Dominum regnare, sed gubernare dominando personis, per elationem se illis præferendo, aut inhumaniter subditos tractando, ut dixit Gregorius, in Pastoral., 2 p., cap. 6, qui verba Christi exponit per illa Ecclesiast. 32 : *Ducem te constituerunt, alias, rectorem te posuerunt, noli extolli, esto in illis quasi unus ex ipsis;* et per illa 1 Petr. 5 : *Non dominantes in cleris, sed forma facti gregis ex animo;*

et per illa Pauli, 2 ad Cor. 4 : *Non quia dominemur fidei vestrae, sed adjutores sumus gaudiis vestri*. Et similia habet Gregorius, 36 Moral., cap. 19, alias 22, et lib. 1 Registri; et Bernard., lib. 2 de Consider., in principio. Et ita per haec etiam responsum est ad fundamenta quae in hoc puncto attingit rex Angliæ; ad alia vero quae objicit contra primatum Pontificis, et contra verum sensum Scripturarum, quibus ille probatur, in sequentibus dicendum est.

CAPUT VII.

POTESTATEM REGENDI ECCLESIAM IN SPIRITALIBUS. SEU ECCLESIASTICIS REBUS, IN TEMPORALIBUS REGIBUS SEU PRINCIPIBUS NON EXISTERE, AUCTORITATE PROBATARU.

1. *Quomodo sese habeant potestas spiritualis et temporalis, in ordine ad subjectum.—Error Anglicanae sectæ circa subjectum spiritualis potestatis.*—Præter differentias inter potestatem spiritualem et temporalem in præcedenti capite traditas, intercedit alia, quam, quia origo est, et præcipuum Anglicani schismatis fundamentum, in hoc caput examinandam reservavimus, quanquam ex principiis positis in præcedenti capite manifeste concludatur. Consistit autem hoc discrimen in hoc, quod potentia temporalis et spiritualis per se non respiciunt easdem personas, quibus convenire debeant, sed potius sunt subjecto separabiles, quod plane supponit distinctionem inter illas, et eam indicat. Duobus autem modis extreme contrariis circa discrimen hoc errari potest. Primo, asserendo potestates has non solum esse distinctas, sed etiam esse adeo repugnantes, ut in eadem persona conjungi, divino juri contrarium sit. Et ita videtur errasse Marsilius de Padua, quanquam ille vel spiritualem potestatem cum temporali confundat, vel non in quocumque subjecto, sed solum in sacerdotibus negat posse simul convenire. Verumtamen hic error hoc sensu intellectus fundamentum non habet, et in capite sequenti breviter impugnabitur, quoniam ad præsens institutum parum refert. Alius ergo modus errandi est proprius Anglicanae sectæ, enjus principium et fundamentum est, potestatem spiritualem non separari a temporali, sed regio sceptro esse annexam. Ita voluit Henricus VIII, quem successores ejus Eduardus et Elizabetha secuti sunt, ut late refert Sander., in tribus primis libris de

schismate Anglicano, ubi etiam varias leges ad hujus potestatis amplificationem in illo regno a dictis principibus latas describit.

2. Denique in hoc errore persistit rex Jacobus, ut ex factis ejus satis constat, et in Praefatione sua saepe profitetur, præsentim pag. 5 Praefationis, dicens : *Nam neque me Pontifice ulla ex parte inferiorem esse credam*. Et in eodem sensu dicit pag. 2, de temporalibus regibus, *quos Deus in altissimo dignitatis gradu, quasi suos vicarios et legatos ad exercenda judicia in suo solio collocavit*. Et iterum ad reges, pag. 10 : *Quos Deus præcipuos sibi in terris vicarios in administratione justitiae esse jussit*. Et in eodem sensu dicit pag. 14, controversiam, quam cum suis subditis catholicis habet, non aliunde esse motam, *quam ab ambitiosa Pontificum tyrannide, quam illi contra auctoritatem Scripturarum, contra Conciliorum antiquorumque Patrum mentem, sibi in temporalia regum jura injuste usurparunt*. Tandemque ibidem concludit, in hac regum auctoritate asserenda (utique in hoc sensu) totam suam apologiam impendisse. Hujus autem erroris fundamentum solum videtur esse, quia non agnoscit distinctionem inter potestatem spiritualem et temporalem, et quia negat primatum Petri et successorum ejus, de quibus in sequentibus capitibus dicemus.

3. *Prima conclusio: regibus temporalibus, ut tales sunt, nulla spiritualis potestas competit.*—Veritas ergo catholica est, reges temporales, ut tales sunt, seu ratione suæ jurisdictionis supremæ in principatu politico, nullam habere in Ecclesia spiritualem potestatem. Haec assertio probari potest auctoritate Scripturæ duobus modis. Primo, quia in Testamento novo haec potestas promissa et data est a Christo illis personis, qui reges temporales non erant. Secundo, quia non invenitur data regibus temporalibus, et ex utroque capite, tam sigillatim quam simul sumpto, recte concluditur non esse in regibus temporalibus, quia non potest esse nisi in illis quibus a Christo data est, et eorum legitimis successoribus. Prior pars sufficienter probatur testimoniis adductis capite præcedenti, quibus constat Christum singulariter promisisse et dedisse hanc potestatem Petro. Deinde aliunde etiam monstratur, dedisse illam omnibus Apostolis, Joan. 20, quibus, et successoribus eorum sub nomine Ecclesiæ eam promiserat, Matth. 18. Alia etiam testimonia ostendunt, Paulum saepe esse usum hac potestate, cam-

que in Episcopis et Ecclesiæ præpositis inveniri, et ab eisdem exerceri; nullus autem istorum rex erat, aut jurisdictionem temporalem administrabat. Unde etiam sumitur efficacissimum argumentum: nam, priusquam in Ecclesia essent reges temporales, erant in Ecclesia pastores cum vera jurisdictione spirituali ad-regendam Ecclesiam, ut ex usu ejusdem potestatis, et ex allegatis testimoniis manifeste colligitur; ergo potestas hæc de se non pendet ex regia potestate, neque cum illa ex vi illius conjuncta est; tunc enim reges temporales illam non habebant, neque ab eis illam receperant, qui legitime illa utebantur.

4. Et hinc etiam aperte probatur ex Scripturis (quod etiam capite superiori attigimus), hanc potestatem alterius esse originis, quam temporalem; nam temporalis potestas, prout invenitur in rege, vel alia simili persona, vel proxime, vel per successionem, aut alium humanum titulum, provenit a multitudine populi, qui suam auctoritatem principi contulit; hæc autem potestas illam originem non habuit; nam in primitiva Ecclesia Apostoli illam habuerunt, non a populo christiano, sed ab ipso Christo; et aliis Episcopis illam communicarunt auctoritate sua, et independenter a populo, ut patet ex illo Pauli, ad Titum 1: *Hujus rei gratia reliqui te Cretæ, ut ea quæ desunt corrigas, et constitutas per civitates presbyteros, sicut et ego disposui tibi.* Et 1 ad Tim. 4: *Noli negligere gratiam, que in te est, quæ data est tibi.* Et c. 5, ostendit fuisse cum jurisdictione episcopali, dicens: *Adversus presbyterum accusationem noli recipere, nisi sub duabus aut tribus testibus,* etc. Cum ergo ex præcedentibus capitibus constet, totam potestatem regiam a populo proxime manasse, consequens profecto est ut ex vi regiæ potestatis nulla sit in rege spiritualis jurisdictione vel potestas.

5. Tandem altera probatio ab auctoritate, quam vocant negativa, Scripturæ, in praesenti effleax est ex eodem principio et fundamento. Nam, ut recte dixit D. Thomas¹, *in his, quæ sunt supra naturam, soli auctoritati creditur, et, quæ ex sola Dei voluntate proveniunt supra omne debitum creature, nobis innotescere non possunt, nisi quatenus divinitus revelata sunt;* sed spiritualis potestas Ecclesiæ denuo est superans naturam, et ex divina voluntate et institutione pendet, tam ut sit, quam ut in tali

persona, vel per talem modum aut successionem sit. Nulla est autem divina revelatio vel auctoritas quæ ostendat, Christum potestatem hanc regibus temporalibus dedisse; ergo, ut D. Thomas supra dicit, *ubi auctoritas deficit, sequi debemus naturæ conditionem.* Quæ quidem conditio naturæ in praesenti est, ut temporalis rex solum eam potestatem habeat, quam homines naturali ratione ducti illi conferre potuerunt, ac subinde nudam ac præcisam habeat temporalem potestatem. Quod autem divina auctoritas majori potestati regum testimonium non præbeat, manifestum est. Nam imprimis extra Scripturam adversarii non admittunt verbum Dei, et quamvis admitterent, nulla est sacra seu apostolica traditio, quæ talem potestatem in regibus indicet, sed contrarium potius, ut ex discursu hujus capitii et totius libri præsentis constabit. De Scriptura vero sufficienter id probamus postulando testimonium, ubi Christus hanc potestatem regibus contulerit, quod sine dubio ostendi non poterit, neque in veteri, neque in novo Testamento. Nam testimonia, quæ afferri solent, in quibus regibus obedire præcipimur, frivola sunt, cum nihil de nova potestate a Christo regibus concessa contineat, sed illius tantum obligationis naturalis nos moneant, qua regibus, in his quæ ad eorum jurisdictionem pertinent, præcipientibus obedire tenemur, ut latius inferius respondendo ad objectiones declarabimus. Hic vero ponderari potest, P:ulum, ubicumque ecclesiasticam hierarchiam describit, ejusque fundamenta, structuram, ministeria et gubernationes distinguit, numerare quidem Apostolos, Prophetas, Pastores et Doctores, regum autem et imperatorum nullam facere mentinem, non quia illi non essent in Ecclesia futuri, sed quia, quod ad ordinem hierarchicum Ecclesiæ spectat, illi proprium gradum non constituunt, sed cum laico populo computantur, nec inter eos, qui ad ædificandum in rebus spiritualibus Christi corpus usque ad consummationem Sanctorum positi sunt, sed inter eos, qui ædificandi sunt et consummandi, tantum recensentur. Denique expendi potest, quod Christus Dominus, interrogatus alicet censem dare Cæsari, accurate respondit: *Reddite quæ sunt Cæsar's Cæsari, et quæ sunt Dei Deo,* indicans profecto, Cæsari, id est, imperatori vel regi solum illud esse reddendum, quod ex vi cæsareae seu regiæ potestatis debetur. Christus ergo, ut graviter Salmeron notavit, *sicut potestatem regiam non*

¹ 4 p., q. 101, art. 1.

abstulit, ita neque illam auxit, neque pecuniale jus pascendi oves suas ei commisit. Addit etiam Chrysost., homil. 71 in Matth. : *Cum audiſ reddenda esse Cæſari quæ ſua ſunt, illa ſolum dici non dubita, quæ pietati ac religioni nihil officiunt. Nam quod fidei ac virtuti ob- est, non Cæſaris, ſed diaboli tributum ac re- tigal est.* Clarius Ambrosius, in epift. 14, alias 33 ad Marcellinam ſororem : *Allegatur (ait) imperatori licere omnia, ipſius eſſe universa. Respondeo : Noli te gravare, imperator, ut put- tes, te in ea, quæ divina ſunt, imperiale ali- quod jus habere, noli te extollere, ſed ſi viſ di- vinitus imperare, esto Deo ſubditus ; ſcriptum eſt : Quæ Dei Deo, quæ Cæſaris Cæſari. Ad imperatorem palatia pertainent, ad ſacerdotem ecclesie ; publicorum tibi mænium juſ commiſſum eſt, non ſacrorum.*

6. *Ex Summis Pontificibus probatur aſſer- tio.*—Tertio probanda eſt aſſertio Pontificum et juris canonici testimoniiſ, quæ, licet in propria cauſa dari videantur, maximam etiam in illa auctoritatē habent, tum propter clavem ſcientiæ, quam habent ad docendam Eccleſiam, ut in lib. 4 monſtravimus, tum etiam, quia certam et immutatam Eccleſiæ traditio- nem ostendunt. Non enim ſoli moderni, ſed etiam antiquissimi Pontifices, Sancti, et Ma- rytyres, huic veritati testimonium præbuerunt. Primoque posſemus afferre omnia, quæ de primatu Romanæ Eccleſiæ ſcripſerunt, ſed hæc poſtea commemoranda ſunt, et ideo nunc tantum ea afferemus, in quibus utramque potestatem inter ſe confeſſunt, vel in qui- bus obedientiam etiam ab imperatoribus et regibus exigunt, quod, ſi in principiibus tem- poraliibus eſſet ſuprema spiritualis potestas, facere non poſſent. Hujusmodi eſt illud Anas- tasii II, Pontificis, ad Anastasium imperato- rem : *Illud vero pecularius pro amore imperii- vestri, et beatitudine, quæ conſequi poterit re- gnum, pro Apostolico offiſio prædicamus, ut ſicut decet, et Spiritus Sanctus dictat, moniſti noſtriſ obedientia præbeatur.* Et infra : *Hac me ſuggerentem frequentius non ſpernat pietas tua, ante oculos tuos habens Domini in Evangelio verba : Qui vos audit, me audit, et qui vos ſpernit, me ſpernit ; qui autem me ſpernit, ſpernit eum qui me misit.* Et Gelasius Papa, in epift. 10 ad eumdem Anastasium, camdem potestatem ſibi, et non imperatori convenire conſtantim docet, ubi inter alia habet illa verba : *Duo ſunt, imperator Auguſte, quibus p̄ principaliter mundus hic regitur, auctoritas ſacra Pontificum, et regal's potestas,* etc. Et

Symmachus Papa, ad eumdem imperatorem : *Si Christianus princeps eſt, qualicumque Prae- ſulis Apostolici debes vocem patienter audire.* Et infra : *Conferamus honorem imperatoris cum honore Pontificis, etc.* Et infra : *Si omnis po- testas a Deo eſt, magis ergo quæ rebus eſt preſtituta diuinis ; defer Deo in nobis, et nos deferemus Deo in te.* Ubi aperte negat potesta- tem spiritualem eſſe in imperatore, ſed in Pontifice, et poſtea ſubdit : *Omnes catholici principes, ſive cum imperii gubernacula ſus- ceperunt, ſive cum Apostolica Sedi novos agno- verunt Praesules institutos, ad eam protinus ſua ſcripta miserunt, ut ſe docerent ejus eſſe conſortes.* Quod ſcripſit Symmachus, ante mille centum annos, et uſque ad noſtra tem- pora ſervatum videmus.

7. Præterea hoc confirmat definitio ejusdem Symmachi Papæ in Concilio Romano III, *non licere laicis, quamvis religiosis, vel poten- tibus in quacumque civitate, quolibet modo ali- quid decernere de ecclesiasticis facultatibus, quarum ſolis ſacerdotibus diſponendi indi- cuſſe a Deo cura commiſſa docetur.* Quæ ratio et definitio in quacumque cauſa ecclesiastica locum habet. Multa etiam ad hanc veritatem confirmandam congerit Gratian., 96 dist. Et præſertim eam late confirmant Nicolaus Papa in Epiftola ad Michaelēm imperatorem, ubi inter alia multa inquit : *Cum ad verum ventum eſt (id eſt, ad evangeliacum veritatem), neque imperator jura pontificatus arripiuit, nec Pon- tifex nomen imperatorium usurparit, quoniam idem mediator Dei et hominum homo Christus Jesus, ſic actibus propriis et dignitatibus dis- tinctis officia potestatis utriusque diſcrevit, ut et Christiani imperatores, pro æterna vita Pontificibus indigerent, et Pontifices, pro curſu temporalium tantummodo rerum imperialibus legibus uterentur.* Idem tradit late Grego- riū VII, in epiftola ad Herimanum, Meten- ſem Epifcopū, lib. 4, epiftol. 2, et in alia ad eumdem, lib. 8, epift. 21, ubi dictis et fac- tis aliorum Pontificum et imperatorum, camdem veritatem confirmat. Item Innocen- tiū III, cap. *Solitæ*, imperatorem ait in tem- poraliibus, Pontificem autem in spiritualibus antecellere. Et Bonifacius VIII, in Extravag. unīc., de Majorit. et obed., dicit, in Eccleſia eſſe gladium spiritualem manu ſacerdotis exercendum, et gladium temporalem manu laicorum pro Eccleſia, et ad nutum et patien- tiā ſacerdotis, exequendum. Quod tacite confirmat Clemens V, in Extravag. Meruit, de Privilegi., licet declarat, per Extravagantem

Bonifacii, regnem, aut regum Galliae non magis esse subjectum Apostolice Sedi, quam antea esset. Denique hoc confirmat, quod Gratian., dist. 63, cap. 1, refert ex Adriano Papa : *Ut laici principes vel potentes non intersint ecclesiasticis electionibus, quia in ecclesiasticis nullam habent potestatem.* Habeturque in Concilio Constantinop. IV, alias Synodo VIII, c. 22, ubi etiam c. 12, non solum negatur principibus temporalibus potestas creandi Episcopos; sed etiam deponendus dicitur, qui per eorum tyranidem fuerit intrusus. Item in septima Synodo, c. 3, irrita dicitur electio Episcopi a principe temporali facta; refertur a Graffiano supra dicta dist. 63, cap. *Omnis.* Sic etiam dixit Innocentius III, in cap. *Ecclesiae*, de Constitut. : *Laicus super ecclesiis, et personis ecclesiasticis nulla est attributa facultas, quos obsequendi manet necessitas, non auctoritas imperandi.* Et similia habet in c. *Tua*, 1, de Decimis. Quae sumpta sunt ex Concilio 4, sub Symmach. 3. Multaque alia jura canonica possent afferri, in quibus exemptio causarum ecclesiasticarum a potestate laicorum prescribitur; in illis enim supponitur, non esse in magistratibus temporalibus spiritualem potestatem, sed illa omnia in librum de immunitate ecclesiastica reservamus.

8. His testimoniorum adjungi possunt aliorum Patrum sententiae, qui licet Summi Pontifices non fuerint, Episcopi tamen, Archiepiscopi, et Patriarchae, aut sancti Ecclesiae doctores, et in prioribus Ecclesiae saeculis fuerunt. Inter quos egregie Chrysostomus, homil. 4 et 5 de Verbis Isai., inter alia multa dixit : *Quanquam admirandas videtur thronus regius, tamen rerum terrenarum administrationem sortitus est, nec praeter potestatem hanc praeterea quidquam habet auctoritatis.* Et homil. 88 in Matth., ad Diaconum dicit : *Majorem illo (id est, saeculari principe) potestatem habes, utique in ecclesiastica administratione.* Idem plura in lib. 3 de Sacerdotio. Et Cyrillus Hierosolym.: *Nonne (inquit) habet Ecclesia ritulum et leonem simul pascentes, sicut ad hodiernum usque diem cernimus mundanos principes regi et instrui ab ecclesiasticis.* Ubi alludit ad locum Isai. 73 : *Lupus et agnus pascentur simul; leo et bos comedent paleas;* et sub verbo *pascendi* duo illa includit, *regi et instrui.* Cyryllus etiam Alexandrinus, in epist. 31 ad Joann. et Synodus Antiochenam, et refertur in Synodo Ephesina, tom. 5, cap. 9, in fine, ubi admonet Episcopos, ut audiant eos, qui

alios de haeresi accusare volunt, ne apud extera tribunalia tumultuantur, et subdit : *Est autem multo melius ac justius, ut ecclesiasticae questiones in Ecclesiis agitantur ac formentur, et non apud alios externos, quibus sane hujusmodi causarum tractatio prorsus non convenit.*

9. Celebris etiam est sententia Nazianzeni, orat. 47 ad cives gravi timore percuslos, ubi postquam ad subditos concionem habuerat, subiungit : *Quid autem vos, principes et praefecti? ad vos enim nostra se convertit oratio.* Et infra : *An me libere loquentem a quo animo feretis? Nam vos quoque lex Christi imperio meo ac throno subjicit, imperium enim nos quoque gerimus, addo etiam praestantius ac perfectius, nisi vero aequum est spiritum carnis fasces submittere, et caelestia terrenis cedere.* In quibus verbis illa praecipue pondero, *lex Christi subjicit.* Ex quibus constat, juxta sententiam Nazianzeni, institutionem hanc, et potestatum distinctionem divinam esse, et ex lege Christi. Multaque similia ex eodem sumi possunt Orat. 1, quae est apologia pro absentia sua, et ex Orat. 27, circa finem. Optime etiam Damascenus, Orat. 1 de Imaginibus, circa finem : *Neque enim, ait, piorum est regum ecclesiastica statuta conrellere.* Et infra : *His de rebus statuere atque discernere non ad reges pertinet, etc.* Et Orat. 2, parum a principio : *Regum (inquit) partes non sunt, ut Ecclesiae leges prescrivant, quod confirmat testimonii Pauli, 2 ad Cor. 12, et ad Hebr. 43, supra tractatis.* Et apud Theodoretum, libr. 4 Histor., cap. 16, est egregia sententia Eulogii Presbyteri, qui cum a praefecto imperatoris Valentis haeretici moneretur : *Communica cum imperatore,* ait Theodoretus : *Dissimulanter, sed valde facete, respondit: Numquid cum imperio est etiam sacerdotii dignitatem consecutus?* Cumque Praefectus, ironia cognita, in iram provocaretur, ipse iterum respondit, se habere pastorem cuius nutum sequeretur. Simile factum narrat Suidas, verbo, *Leontius, Tripolis Lydia Episcopus.* Cum enim Constantius in conventu Episcoporum presideret, et multa prescriberet, aliis annuentibus, ipse tacebat, cumque ab imperatore interrogaretur cur taceret, respondit : *Miror qui fiat, ut aliis curandis destinatus, alia tractes, qui cum rei militari et rei publicae præsis, episcopis ea prescribas, quæ ad solos pertinent Episcopos.*

10. Ambrosius praeterea in epist. superius allegata ad sororem Marcellinam, 14, alias

33, expresse negat, imperatorem in ea, quæ divina sunt, imperiale aliquod jus habere. Idemque late et constantissime docet in Orat. seu conc. 4 contra Auxentium, ubi inter alia inquit: *Scitis et vos ipsi, quod imperatoribus soleam deferre, non cedere, suppliciis me libenter offerre, non metuere quæ parantur.* Et infra: *Respondi ego quod sacerdotis est, quod imperatoris est faciat imperator.* Et infra de Arianis, qui ab imperatore petebant ecclesiastiam, inquit: *Videte quanto pejores Ariani sunt, quam Judæi: illi quererebant, utrum solvendum putaret Cæsari jus tributi, isti imperatori volunt dari jus Ecclesiæ.* Et infra: *Imperator bonus intra Ecclesiam, non supra Ecclesiam est; bonus enim imperator querit auxilium Ecclesiæ, non refutat.* Hæc ut humiliter dicimus, ita constanter exponimus. In Actis etiam Concilii Aquiliensis, cum Palladius hæreticus damnationem Episcoporum fugiens ad præsentes laicos provocaret, sic respondit Ambros.: *Sacerdotes laicos judicare debent, non laici de sacerdotibus.* Et infra: *Et si in multis impietatibus apprehensus sit, erubescimus tamen, ut videatur, qui sacerdotium sibi rendicat, a laicis esse damnatus.* Ac per hoc quoniam et in hoc ipso damnandus est, qui laicorum expectat sententiam, cum magis de laicis sacerdotes debeant judicare, eum pronuncio sacerdotio indignum.

41. Confirmat optime veritatem hanc Athanasius referens prius, et commendans verba Hosii ad Constantium, in epist. ad solitariam vitam agentes: *Desine, quæso, et memineris te mortalem esse, reformida diem judicii, servate in illam diem purum, ne te misceas ecclesiasticis, neque nobis in hoc genere precipere, sed potius ea a nobis disce.* Tibi Deus imperium commisit, nobis quæ sunt Ecclesiæ concredidit; et quemadmodum qui tuum imperium malignis oculis carpit, contradicit ordinationi divinæ, ita et tu cave, ne que sunt Ecclesiæ ad te trahens, magno criminis obnoxius sis. Date (scriptum est) quæ sunt Cæsaris Cæsari, et quæ sunt Dei Deo. Neque igitur fas est nobis in terris imperium tenere, neque tu Thymiamatum, et sacerdorum potestatem habes imperator. Et inferius sic ex propria sententia scribit Athanasius: *Si istud est judicium Episcoporum, quid commune cum eo habet imperator? sin contra ista minis Cæsaris conflantur, quid opus est hominibus titulo Episcopis? quando a condito ævo auditum est? quando judicium Ecclesiæ auctoritatem suam ab imperatore accepit?* Vocat autem titulo Epis-

copos, quos Constantius sua auctoritate creaverat, qui titulo tenus, ut infra dicit, erant Episcopi, non veritate, quod mirum in modum in Episcopos Anglicanos convenit. Denique Augustinus, in epist. 48 et 162, Donatistas reprehendit, quod in causa ecclesiastica ab Episcoporum iudicio ad Constantium imperatorem appellare ausi fuerint: *Neque auras est (inquit) christianus imperator sic eorum tumultuosas et fallaces querelas suscipere, ut de iudicio Episcoporum, qui Romæ sederant, ipse judicaret.* Et infra: *Qua in re illos quemadmodum detestetur adestis.* Et quoniam Constantinus, tandem hæreticorum importunitate vixus, sententiam dixit, eum tacite excusat Augustinus, dicens: *Eis ipse cessit, ut de illa causa post Episcopos judicaret, a Sanctis Antistitibus postea veniam petiturus, dum tamen illi, quod ultius dicerent, non haberent.* Et consonat quod eadem de causa refert Optatus Milevitanus, lib. 4 contra Parmen., circa finem: *Donatus (inquit) appellandum esse ab Episcopis credidit, ad quam appellationem in Constantinum imperator sic respondit: O rabida furoris audacia, sicut in causis gentilium fieri solet, appellationem interposuerunt.*

42. *Ex imperatoribus eadem veritas stabilitur.* — His addere possumus ipsorummet imperatorum confessiones seu testimonia. Justinianus enim imperator, in Authent. Quomodo oporteat Episcopos, etc., in principio, sic ait: *Maxima quidem in omnibus sunt dona Dei a superna collata clementia, sacerdotium, et imperium: illud quidem divinis ministrans, hoc autem humanis praesidens, aut diligentiam exhibens, ex uno eodemque principio utraque procedentia, humanam exornant vitam.* Intellexit ergo Justinianus imperator, non habere imperatorem spiritualem potestatem circa res divinas. Ideisque sensisse Constantimum Magnum, qui judicium inter Episcopos in Nicæno Concilio recusavit, agnoscens, et ad se non pertinere, dicens: *Deus vos constituit sacerdotes, et nobis a Deo dati estis judices, et conveniens non est ut homo judicet Deos; sed ille solum, de quo scriptum est: Deus stetit in synagoga Deorum, in medio autem Deos iudicat,* refert Ruffin., lib. 1 Histor. additæ ad Euseb., c. 2. Et Adrian. Papa, in epist. ad Michaelim imperatorem, ubi etiam refert Theodosium, in epist. ad Synodum Ephesinam scribentem: *Illicitum est, cum, qui non sit ex ordine sanctissimorum Episcoporum, Ecclesiasticis immisceri tractatibus.* Refert

etiam Sozomenus, lib. 6 Histor., c. 7, cum Episcopi quidam legatum ad Valentimianum imperatorem mitterent, potestatem petentes ad conveniendum in Concilio pro rebus fidei, ipsum respondisse, *sibi, qui unus e laicorum numero erat, non licere se ejusmodi rebus interponere*; quod etiam refert Nicephor., lib. 11, c. 40. Atque de eodem Valentiniano refert Sozomenus, lib. 6 Histor., c. 21, *pie admodum in Deum affectum fuisse adeo, ut neque sacerdotius quidquam imperare, neque novare aliquid in institutis Ecclesiae, quod sibi deterritus videretur, ut melius, omnino aggrederetur, nam quamvis esset optimus sane imperator, et ad res agendas valde accommodatus, tamen hæc suum judicium longe superare existimavit*. Et i Hist. tripartita, lib. 7, c. 8, de eodem Valentiniano refertur, cum Mediolani mortuo Auxentio hæretico, ordinari cuperet Episcopum Catholicum, ad Episcopos dixit : *Nostis aperite, eruditi quippe dirinis eloquiis, qualem oporteat esse Pontificem*. Et infra : *Talem itaque in Pontificali constituite sede, cui et nos, qui gubernamus imperium, sincere nostra capita submittamus, et ejus monita, dum tanquam homines deliquerimus, necessario velut curantis medicamenta suscipiamus*. Cumque Episcopi peterent ut ipse decerneret tanquam pius et sapiens, respondit ille : *Super nos est talis electio*. Extat præterea inter epistolas Innocentii I, quadam Honorii Augusti ad Arcadium, in qua scribens in causa Chrysostomi, ait : *Cum, si quid de causa religionis inter Antistites ageretur, episcopale oportuerit esse judicium; ad illos enim divinarum rerum interpretatio, ad nos religionis spectat obsequium*. Et infra : *Rebus denique ipsis docetur, quid de his senserit divina majestas, etc.* Denique inter Acta octavæ Synodi generalis refertur a Surio oratio Basilii imperatoris, in qua pie admodum et fideliter ad laicos loquitur : *De vobis quid amplius dicam, non habeo, quam quod nullo modo robis licet de ecclesiasticis causis sermonem habere. Hæc enim investigare et querere, Patriarcharum, Pontificum et sacerdotum est, qui regiminis officium sortiti sunt, qui sanctificandi, ligandi atque solvendi potestatem habent, qui ecclesiasticas et cœlestes adepti sunt claves, non nostrum, qui pasci debemus, etc.; quæ late, et sapienter ac pie prosequitur*.

CAPUT VIII.

EADEM VERITAS RATIONIBUS CONFIRMATUR.

1. *Prima ratio.* — Cum catholica veritas sufficienter auctoritate fundata sit, ratione ex eisdem principiis facile potest demonstrari. Quia potestas regendi in nullo homine inventari potest sine justo titulo, ex quo principio supra probavimus, in Pontifice non esse directam temporalem potestatem supremam; ex eodem ergo plane convincitur, in temporali rege non esse potestatem ad spirituale regimen. Unde qui primum libenter audiunt, necesse est ut secundum admittant, nisi ve- lint ad libitum voluntatis suæ sine ratione loqui. Quia multo minus invenitur justus titulus spiritualis potestatis in temporali principe, quam temporalis potestatis in spirituali pastore. Assumptum autem principium probatur breviter, quia vel titulus ille esset juris naturalis, vel positivi divini, vel humani; hæc autem omnia facile ex dictis excluduntur. Nam de jure naturali esse non potest, tum quia potestas ipsa naturalis non est, ut jam est probatum; tum etiam quia nulla potestas dominandi vel regendi alios est in particulari persona immediate ex jure naturali, sed in communitate; hæc autem potestas spiritualis non est in communitate humana tanquam ab illa naturaliter fluens, neque, prout est in particulari persona, proxime fundari potest in voluntate ejusdem communitatis, tanquam conferentis seu transferentis in aliud talem potestatem, quia est longe altioris ordinis; ergo non potest esse in rege de jure naturali. Et eadem ratione convincitur non esse ex jure humano, quod in solo naturali fundetur, vel ab illo ducat originem, quale est jus gentium vel civile, quia si jus ipsum naturale non attingit talem potestatem, multo minus alia inferiora jura, quæ in illo fundantur.

2. De jure autem divino res est manifesta ex dictis, quia tale jus auctoritate divina probandum est : nulla est autem auctoritas, non solum divina, verum nec probabilis humana, quæ tale jus regibus datum esse ostendat. Imo, licet interdum possit ratione suaderi aliquid esse de jure divino, oportet ut ex principiis revelatis sufficienter colligatur, vel saltem ut, supposita institutione Ecclesiæ, magis consentaneum divinæ providentiæ ostendatur. Nihil autem horum in præsenti intervenit, quia nullum est revelatum principium,

ex quo talis potestas spiritualis in regibus verisimiliter comprobetur; quin potius omnia principia revelata illi dogmati repugnant, ut ostensum est. Ac denique omnis ratio convenientis providentiae, et ecclesiasticæ disciplinae ostendit, non debuisse cœlestem hanc potestatem temporalibus regibus committi, tum quia temporalibus euris, et negotiis sacerularibus sunt implicatissimi; tum etiam quia litteris Sacris et divinæ scientiæ vacare non possunt, quæ tamen doctrina maxime necessaria est in ecclesiasticis Pastoribus. Propter quod Paulus dicebat Timotheo : *Attende tibi et doctrinæ.* Ubi etiam indicat aliam rationem, quia cum hæc potestas ad spiritualem finem et salutem animarum conferatur, requirit in eo, cui confertur, statum vitæ spiritualis et perfectæ, ut possit non minus verbo et exemplo, quam potestate, subditis prodesse. Reges autem temporales, moraliter loquendo, et ex vi status, hoc vitæ genus non habent vel profitentur, et ideo ad hoc munus apti non erant. Denique ob hanc causam in Ecclesia Christi cum regno non est per se conjunctum sacerdotium; non enim assumpti sunt reges, ut pro hominibus constituantur in iis, quæ sunt ad Deum; ergo eadem ratione neque regimini spirituali apti erant. Atque hinc consequenter excluditur omnis titulus fundatus in jure canonico, tum quia jus canonicum a jure positivo divino derivatur; tum etiam quia rationes factæ non minus in illo procedunt; tum denique quia ostensum est, jus canonicum tali regum presumptioni omnino repugnare. Atque hic discursus evidenter fiet ex capite sequenti, in quo quam sint levia, quæ rex sui juris adducit fundamenta, ostendemus.

3. Secunda ratio.—Erasio Protestantium.
— *Rerum.* — Aliam rationem in hunc modum formare possumus, quia si potestas spiritualis esset in temporalibus regibus, tot essent in Ecclesia supremi principes spirituales, quot sunt supremi principes temporales, quod et absurdum est, et principiis fidei multum repugnat. Consequentio manifesta est. Primo, quia si potestas regendi Ecclesiam in spiritualibus intrinsece conjuncta est cum potestate regia, ergo non reducitur in superiorius principium infra Deum, neque ab alia mortali potestate pendet. Secundo, quia non est major ratio, cur unus rex alteri in spiritualibus subdatur, quam e contrario. Sed forte Protestantes Anglicani, non solum hoc concedunt, verum etiam præcipue intendunt. Neque existimat esse illum inconveniens, quia

non admittunt plura capita in spiritualibus totius Ecclesie universalis, sed plurium particularium Ecclesiarum, quæ sunt in diversis regnis tanquam partes Ecclesie universalis, atque ita similiter habere poterunt plura capita partialia. Quam vero hoc sit absurdum, et monstruosum in Ecclesia Christi militante in hoc mundo, facile intelliget, qui ex Scripturis consideraverit, Ecclesiam Christi esse unum corpus mysticum perfectissime institutum. Nam tale corpus requirit unam supremam potestatem, quæ supra omnia membra ejus efficaciam habeat, sive illa potestas sit in una persona vera, sive in una congregacione (quod postea videbimus), quia sine tali potestate non potest esse debita unio et conformitas inter membra talis corporis.

4. Alia erasio præcluditur, et Ecclesie supremum caput debere esse unum ostenditur. — Dicent fortasse satis esse, quod omnes Ecclesiae particulares in uno capite Christo uniantur. Sed contra hoc est, quia Ecclesia militans, ut est in hoc mundo, est unum spirituale regnum, et corpus mysticum perfecte unum in suo genere; ergo requirit etiam in hoc mundo unum supremum tribunal, sub quo gubernetur, alias non potest dici habere unitatem, prout in hoc mundo versatur. Quod declaratur a simili, nam plura regna, quæ sub diversis regibus aut imperatoribus militant, non sunt unum regnum vel imperium, quia non habent unum supremum regimen in terris, quamvis omnia uniantur in uno rege Deo, qui est supremus Rex etiam temporalis omnium regum. Unde ex illa sententia sequitur aperte, plures Ecclesias, quæ sunt in mundo, non magis constituere universalem Ecclesiam, quæ sit proprie una, quam plura temporalia regna sint una res publica temporalis, vel unum imperium aut regnum. Et declaratur amplius alio exemplo accommодato: nam si in diversis provinciis versentur duo exercitus regis Hispaniae, sub duobus duabus supremis, et inter se nullo modo subordinatis, non possunt dici esse unus exercitus, etiamsi in eodem rege remote uniantur, et ab eo alterius rationis influxum recipient. Ita ergo dicendum esset de diversis regnis quatenus sunt Ecclesiæ distinctæ, si sub supremis capitibus ecclesiasticis militarent.

5. Objectio. — Accedit tandem quod unitas Ecclesiae sine unitate fidei et sacramentorum conservari non potest; hæc autem unitas fidei in diversis regnis et provinciis conservari non posset sine magno miraculo, si partes

Ecclesiæ et capita earum in terris essent inter se omnino divisa, et sine subordinatione ad aliquam supremam potestatem, cui omnes in terris obedire teneantur. Nam hoc satis ostendit experientia, hinc enim orta sunt omnia schismata, et Ecclesiarum divisiones. Et ratio est clara, quia si duo reges temporales sunt supremi in spiritualibus, et unus eligat in suo regno talem modum religionis, et alius alium, unus unam fidem suo iudicio ex Scriptura sumat, alius contrariam, quomodo poterunt ad unitatem reduci? Atque hinc tandem concluditur, moraliter fieri non posse ut duas Ecclesiæ supremæ, id est, non recognoscentes in spiritualibus superiorem in terris, sint unitæ etiam in Christo, quia non uniuntur Christo nisi per veram fidem, ac subinde per unam et eamdem fidem, quia vera fides non est, nisi una; sed tales Ecclesiæ non possent in una fide conservari, ut ostensum est; ergo neque unionem in Christo retinere possent.

6. *Solutio.*—*Instantia.*—Dices, discursum hunc eodem modo procedere de Episcopis, vel Apostolis, etiamsi in eis dicatur esse suprema potestas spiritualis. Respondeo, verum esse, etiam illos reducendos esse ad unum supremum caput, ut possit Ecclesiæ unitas conservari. Quod autem et quale sit hoc caput, infra videbimus; nam ex vi prædicti discursus solum sequitur debere esse unum, sive illud sit unus Episcopus, sive una Episcoporum congregatio. Instabis, similiter ab Anglicanis dici posse, quod licet rex temporalis sit etiam in suo regno supremus in spiritualibus, comparatione facta ad quamcumque aliam singularem personam, nihilominus possit ex omnibus regibus christianis Concilium seu conventus congregari, in quo sit spiritualis potestas superior singulis regibus, cuius auctoritate possit unitas Ecclesiæ conservari. A qua responsione non videtur alienus rex Angliae: nam et auctoritatem legitimi Concilii recognoscere videtur, quandoquidem primis quatuor Conciliis fidem adhibet, et quod jam in usu non sint conqueritur, regibusque potestatem illa congregandi, et non Pontifici convenire contendit.

7. *Responsio.*—Verumtamen evasio hæc non solum rem non expedit, sed potius magis involvit. Nam-imprimis si ante illius Concilii vel conventus convocationem nullus rex habet superiorem in spiritualibus, quis habebit potestatem illud congregandi? nam si aliqui repugnant, nemo illos cogere poterit. Quod si etiam Episcopi convocandi sint, nullus rex

poterit Episcopos sibi non subditos ad convenientem compellere, vel authentice vocare; erit ergo res moraliter impossibilis, et ab auctore Ecclesiæ insufficienter provisa. Sicut in rebus politicis, si ad disponendum ea, quæ ad bonum regimen totius universi sunt necessaria, oporteret reges omnes et principes supremos in temporalibus ad comitia convenire, profecto impossibilis esset talis convocatione, et ab omni prudente providentia aliena. Deinde quis futurus esset præsidens in tali conventu; nullus enim alteri cedere volet, cum sit æque supremus, et præsertim si agendum esset de rebus fidei, nam si in illis inter se dissentirent, unusquisque potius suo spiritui quam aliorum opinionibus credendum putaret. Præsertim si vera esset regis Angliæ regula, qua propriam uniuscujusque scientiam pro fundamento suæ fidei omnibus regibus proponit.

8. *Præterquam quod, admisso illo monstrioso conventu vel Concilio, si illud esset supra singulos reges, jam nullus temporalis rex esset supremus in spiritualibus, prout rex Angliæ pertinaciter contendit.* Et ideo existimo mentem illius non esse admittere potestatem alicujus Concilii tanquam superiorem, sed solum deservire ad quamdam prudentem consultationem, et magis publicam rerum examinationem. Ideo enim de ipsis Conciliis constanter non loquitur, sed quæ vult, approbat, et quæ non placent, rejicit, judicem se illorum constituens. Imo, in quodam loco Praefationis suo arbitrio discernit inter convocabandos ad Concilium generale, si nunc congregandum esset.

9. *Erasio quædam refellitur.*—Tandem, si reges supremi in temporalibus habent etiam in suis regnis spiritualem potestatem supremam respectu aliorum regum, nullum relinquitur fundamentum ad asserendum, congregationem talium regum habere in Ecclesia potestatem supra totam ipsam, et supra omnes principes ejus. Quia ex sola rei natura hoc non sequitur, neque affirmari potest. Sicut in temporalibus, licet congregatio regum fieret, non haberet supremam jurisdictionem supra singulos illorum, nisi sponte unusquisque renunciaret juri suo, mutando prius regimen, et ex pluribus monarchiis unam aristocratiæ constituendo, quod voluntarium esset, et cogitatione potius confictum, quam in re subsistens. Idem ergo crit in potestate spirituali, si ex natura rei esset cum temporali conjuncta. Quod si quis fingat, Christum

ex peculiari institutione voluisse singulos reges esse in spiritualibus subjectos ipsorum congregationi, oportet ut vestigium aliquod hujus institutionis ostendat. Eo vel maxime quod omnia, quæ contra potestatem singulorum regnum diximus, æque contra quamcumque multitudinem seu congregationem illorum procedunt. Est ergo commentitia et plane monstrosa hæc spiritualis potestas suprema temporalium principum, quomodo cumque fingatur aut cogitur.

10. *Tertia ratio.*—Tertiam denique rationem ab incommodis confidere possumus; nam imprimis ex tali positione sequitur, posse reges christianos, si velint, per se ipsos omnes actiones proprias sacerdotum et Episcoporum exercere, quales sunt offerre Deo sacrificium, vel (si hoc non admittunt) ministrare sacramenta, ligare per excommunications et censuras, et absolvere ab eis aut a peccatis, et alia, quæ ad publicum Dei cultum pertinent. Hæc autem inaudita sunt in Ecclesia Christi; imo etiam in Judæorum synagoga dictum est regi: *Non est officii tui, Ozia, ut adoleas incensum Domino*¹, et quia non cessavit, percussus est lepra. Quod non minus habere locum in rege christiano, recte docuit Chrysostomus, hom. 5, de Verbis Isai. Et præterea si rex temporalis, eo ipso quod est rex, potest has actiones per se ipsum legitime administrare, licebit etiam mulieri easdem per se exercere, nam est capax regiæ potestatis, et cum illa, juxta Protestantium opinionem, eamdem supremam potestatem spiritualem habet. At Paulus² mulieres in ecclesia nec loqui permittit, nedum actiones sacras exercere, sed jubet tacere et subditas esse.

11. *Responsio hereticorum.*—Possunt vero adversarii, distinguendo inter actiones quæ potestatem ordinis requirunt, vel solam jurisdictionem, respondere, posse regem omnem actum jurisdictionis ecclesiasticæ per se exercere, et ad hoc habere supremam potestatem, idque satis esse ut primatum in spiritualibus habeat, etiamsi actiones alias, quæ potestatem ordinis requirunt, per se non valeat exercere. Sed hoc imprimis alienum est ab institutione Christi; nam ipse per illos voluit Ecclesiam regi, quos principales ministros verbi Dei et sacramentorum esse voluit, nimurum per Episcopos, in quibus potestas ordinis per excellentiam existit. Deinde satis

absurdum est, ut supremus Ecclesiæ gubernator non possit exercere præcipuos actus, tam ad divinum cultum, quam ad sanctificationem fidelium ordinatos. In republica enim civili nihil efficere possunt inferiores magistratus in ordine ad finem suæ potestatis, quod non possit rex aut imperator altiori potestate in ordine ad eumdem finem præstare; ergo multo magis in christiana republica, cum potestas ecclesiastica sive ordinis, sive jurisdictionis ad spiritualem finem, et sanctificationem animarum referatur, ita debuerunt illæ duæ potestates inter se ordinari et institui, ut in supremo principe Ecclesiæ cum omni perfectione et excellentia coniungerentur, ideoque nihil per inferiores fieri, quod non possit a superiori vel supremo perfici, quantum est ex vi potestatis.

12. *Ex principiis Protestantium peculiarter refellitur prædicta responsio.*—Possumus etiam Protestantes ex ipsorum principiis convincere. Nam apud illos potestas ordinis nihil est, nisi deputatio ministrorum a rege vel magistratu temporali facta. Nam si fortasse in Anglia (ut ferunt) aliae cærimoniae in constituendis ministris adhibentur, non reputantur necessariæ, nec a Christo institutæ, sed propter quemdam ornatum exteriorem humano arbitrio excogitatae aut servatæ. Ergo sine illis posset rex ministros ad easdem actiones instituere; ergo multo magis posset per se ipsum omnes illas actiones exercere. Idemque regina Elisabetha ex vi ejusdem dignitatis potuisset, eademque ratione feminas posset in ministros Ecclesiæ suæ constituere. Quis enim eredat feminam posse esse caput Ecclesiæ, et non ministrum? Absit autem ab Ecclesia Christi tam absurdæ gubernatio et hierarchia.

13. *Ab incommodis eadem responsio impugnatur.*—*Primo.*—Quin potius si supremam spiritualis jurisdictionis temporalem consequitur, et potestatem ordinis nullo modo postulat, profecto etiam in rege eterno esse poterit supra omnem Ecclesiam ditionis suæ, quia tam perfectam potestatem jurisdictionis habet sicut rex christianus, et ex Scriptura non magis probari potest, ad usum talis jurisdictionis esse necessarium baptismum, quam episcopatum, seu clericalem ordinem. Et declaratur hoc amplius: nam in Ecclesia Romana, Constantinus, verbi gratia, priusquam ad fidem converteretur, habebat supremam potestatem temporalem; vel ergo jam etiam habebat spiritualem, et sic admittitur incon-

¹ 2 Paral. 26.

² 1 ad Cor. 14.

veniens illatum, quo nihil potest esse absurdius; vel si Constantinus illam non habebat, profecto apud Sylvestrum erat; ergo etiam post baptizatum Constantimum eamdem potestatem Sylvester retinuit, non Constantinus. Quis enim illam transmutationem, seu translationem potestatis a Sylvestro in Constantimum effecerit? aut quo verbo Dei factum est, ut Constantinus per solum baptismum ex ove factus sit Pastor, et ex spirituali filio in supremum parentem et gubernatorem transierit? Sunt profecto haec incredibilia et absurdia. Quod si Constantinus baptizatus solam potestatem temporalem retinuit, eamdem profecto solam ad posteros transmisit, eademque in alios reges vel principes, qui nunc extant, divisa est. Vel si qui sunt alii reges postea facti Christiani, inde non trahentes originem, eadem ratio ad illos cum proportione applicari potest. Et simili modo, si post baptismum Constantini Sylvester in suo pontificatu cum eadem spirituali potestate perseveravit, eadem ad successores usque ad hodiernum diem pervenit. Idemque est cum proportione de Anglia, et de quocumque christiano regno.

44. *Secundo.* — Aliud etiam absurdum inferre possumus. Nam si cum potestate suprema temporali conjuncta est similis potestas spiritualis, cur non similiter in quolibet inferiori magistratu vel principe temporali, etiam si superiorem recognoscatur, non est conjuncta utraque potestas cum debita proportione et subordinatione ad superiorem? Est enim eadem ratio, neque ex vi juris naturalis discrimen constitui potest. Et Scriptura non magis dat spiritualem potestatem supremis principibus quam inferioribus. Ubi autem Scriptura de obedientia principibus temporalibus debita loquitur, generaliter tam de regibus, quam de aliis magistratibus loquitur. Sic enim illud Pauli intelligitur: *Omnis anima potestatibus sublimioribus subdita sit*¹; ut magis Petrus exposuit, dicens: *Sive regi quasi praecellent, sive duceb[us] tanquam ab eo missis*². Si autem hoc absurdum concedatur, totam hierarchiam ecclesiasticam quoad regimen externae gubernationis everti necesse est. Nam ubi rex temporaliter creditur supremus gubernator in spiritualibus, eo ipso Summus Pontifex inde excluditur; ergo si praefectus regius unius civitatis ibi etiam habet spiritua-

lem praefecturam, excludendus consequenter erit Episcopus ab spirituali regimine, quia non possunt esse duo capita ejusdem ordinis; sed a fortiori excludentur omnes alii praefecti, seu ecclesiastici gubernatores, et ita, velut, nolit rex Angliae, in Puritanorum anarchiam, quod attinet ad regimen ecclesiasticum, incidemus.

15. *Evasio.* — *Rejicitur.* — Responderi potest non esse eamdem rationem de supremo rege et inferioribus magistratibus, quia rex per se, et quasi ex necessitate habet utramque potestatem conjunctam; inferiores vero a rege habent suam potestatem, et ideo potest rex sua voluntate illas potestates dividere, et temporalem communicare praefecto civili, spiritualem autem Episcopo. Sed imprimitis hoc totum non transcendit voluntatem et institutionem humanam, quam rex suo etiam arbitrio poterit mutare, sicut illam constituit; ergo potest totam hierarchiam ecclesiasticam evertere quoad Ecclesiæ regimen. Deinde rex in sua opinione non consequenter loquitur, si hoc concedat; jam enim admittit potestates spiritualem et temporalem esse distinctas, et subjecto separabiles, vel etiam separatas in inferioribus magistratibus; cur ergo non separabuntur in utriusque ordinis capite, aut quo titulo ostendere potest, se utramque potestatem habere?

16. *Prædicta evasio ipsi Jacobo regi repugnat.* — Alia etiam ratione non potest hoc constare cum dictis regis; nam ipse reprehendit Bellarminum, eo quod negaverit, Episcopos immediate a Deo suam potestatem accepisse; sentit ergo ipse Episcopos immediate a Deo jurisdictionem suam habere¹. Quomodo ergo potest nunc dicere, se illis dare jurisdictionem, et in voluntate sua esse positum, illam non ipsis, sed suis magistratibus temporalibus conferre, nisi forte se ipsum faciat jure etiam divino superiorem. Deinde rex Angliae, in eodem loco, faletur se a Puritanis dissentire circa jurisdictionem Episcoporum; Puritani autem affirmant jurisdictionem ecclesiasticam conferri a magistratu temporali; ergo, si rex dicit se conferre jurisdictionem Episcopis, non differt a Puritanis in puncto jurisdictionis episcopalnis, quidquid de differentia in ordinis dignitate sentiat. Ut ergo gubernatio Ecclesiæ per Episcopos, et non per temporales magistratus, firma et stabilis sit, hanc institutionem esse di-

¹ Ad Rom. 13.

² 1 Petr. 2.

¹ In Præfat., p. 54. Lib. 4 de Pontif., c. 25.

vinam, et jurisdictionem etiam Episcoporum a Christo descendere oportet, sive mediante Papa, ut Bellarminus probabilius sentit, sive immediate, ut alii etiam Catholici probabiliter volunt. Ad praesentem enim causam non refert; nam quomodocumque sit a Christo per positivam institutionem, non potest esse a temporali rege, neque ab illo per se dependere, et consequenter non potest regia potestas esse directe ac per se supra episcopalem, ac subinde neque suprema in latitudine ecclesiasticae jurisdictionis. Quam repugnantiam in dictis et opinionibus suis, ductus fortasse spiritu contradicendi Bellarmino, rex non consideravit, cum tamen satis clara sit, ut in sequenti capite iterum declarabimus.

CAPUT IX.

SOLVUNTUR ALIQUÆ OBJECTIONES CONTRA VERITATEM IN SUPERIORIBUS CAPITIBUS PROBATAM.

1. Multa sunt quibus rex Angliæ suadere conatur, justo titulo spiritualem potestatem, et supremi capitum seu gubernatoris spirituallis nomen in regno suo sibi arrogare; et omnia, quæ adducit, objectiones sunt contra veritatem a nobis probatam, quas, licet difficiles non sint, prætermittere non possumus, ut omnibus satisfaciamus. Quia vero plures illarum ex factis regum vel imperatorum sumuntur, et ad præsens punctum non pertinent, ut clarius singulæ suis locis propositæ percipientur, oportet hic tres quæstiones distinguere. Una est, quam nunc tractamus, an spirituallis potestas sit in principe necessario conjuncta cum potestate temporali. Altera est, supponendo has potestates esse in diversis personis, an sit una altera superior, et quæ illa sit; de quo puncto a capite vigesimo primo dicturi sumus. Tertia est generalis quæstio de exemptione clericorum a potestate temporali, etiam in causis civilibus, criminalibus, et tributis, quæ sine dulio est longe diversa ab aliis duabus, et ex aliis principiis in libro sequenti tractanda. Igitur si quæ sunt exempla aut facta catholicorum principum, quæ contra jurisdictionem ecclesiasticam objici aliquo modo possint, ad quæstionem tertiam de immunitate clericorum maxime pertinent, ut ibi videbimus, et pauca etiam circa secundam quæstionem attingemus. In præsenti vero puncto vix, credo, inventetur ante Henricum VIII exemplum principis vel solo nomine christiani, licet hære-

tici, qui ex vi propriæ et innatae potestatis, actum jurisdictionis spiritualis usurpare, nemus supremam jurisdictionem et primatum spiritualis potestatis sibi arrogare tentaverit. Et ideo, his exemplis omissis, breviter alias titulos expendemus, quibus rex jus suum firmare, aut apparenter defendere tentat.

2. *Prima objectio.* — Primus est, quia jure naturæ hæc duæ potestates conjunctæ sunt, regia et sacerdotalis; ergo hoc jus naturæ manet integrum in lege gratiæ, quia gratia non destruit naturam, neque lex Christi data est ad tollendam legem naturæ, sed perficiendam. Assumptum probatur, quia ante legem Christi et Moysi, jus tantum naturale observatum est; nam ideo tempus illud naturalis legis vocatur. In illo autem tempore iidem erant reges et sacerdotes, ut constat de Melchisedech, Abraham, Isaac, Jacob, et generaliter ex recepta regula, quod eo tempore primogeniti et regni hæredes, erant simul sacerdotes, ut sumitur ex Hieronymo, epist. 126 ad Evagr.; et Ruperto, lib. 5 in Genes., c. 42. Unde Paulus, ad Hebr. 12, Esau profanum vocat, eo quod primogenitura vendiderit, quæ sacra erat ratione sacerdotii.

3. Hunc titulum non invenio a rege expresse propositum; propter complementum autem doctrinæ, et quia rex, allegando in favorem suum quædam testimonia novi Testamenti, illum supponere videtur, omnendum non duxi, quamvis revera frivola sit. Nam imprimis, admissa illa antiqua consuetudine, quæ non solum inter fideles, sed etiam inter Gentiles viguisse videtur, negamus illam esse de jure naturali, id est, lege naturali præceptam, licet, mediante ratione et voluntate humana, a generalibus principiis juris naturalis originem duxerit. Quia licet sacrificium sit aliquo modo de jure naturali, et consequenter etiam sacerdotium, quod autem tali modo sit institutum, et his vel illis personis attributum, non est jure naturæ præscriptum, sed jure aliquo positivo definiri necesse est. Et hoc modo ante legem Moysi, vel jure gentium, vel moribus populorum introductum est, ut dignitas sacerdotalis præcipua cum regali esset conjuncta. Qui mos sicut in lege veteri mutatus fuit, etiam in lege nova mutari potuit. Imo ita factum esse, et ad perfectionem legis gratiæ hoc pertinere, docuit Nicolaus Papa, ad Nicolaum imperatorem, dicens: *Fuerunt hæc ante adventum Christi, ut quidam typice reges simul*

et sacerdotes existerent, quod sanctum Melchisedech fuisse, sacra prodit historia, etc. Et infra : Sed cum ad verum rentum est, eumdem regem atque Pontificem ultra nec imperator, nec Pontifex usurparit.

4. In lege naturæ nulla fuit potestas supernaturalis ordinis. — In lege naturæ nulla jurisdictio spiritualis extitit. — Deinde si sermo sit de sacerdotio quoad potestatem ordinis, manifesta est differentia, nam in lege naturæ non erat propria et supernaturalis potestas ordinis, sed erat solum ministerium sacrificandi, et intercedendi pro populo, ad quod poterat aliquis sua sponte, vel per consensum populi deputari, quia Deus eo tempore nihil in particulari de sacerdotio vel sacrificio præscriperat; et sic Anacletus Papa, epist. 2, negat Melchisedech, vel Abraham, vel alios illius temporis viros, sacrificium obtulisse sacerdotali auctoritate, utique a Deo peculiariter instituta. In lege autem veteri sicut determinavit Deus sacrificia, ita et sacerdotium seu pontificatum, absque inter ventu populi, vel consensu ejus. Quod etiam altiori et excellentiori modo in nova lege Christus instituit. Si autem sit sermo de sacerdotio quoad potestatem jurisdictionis, supponit imprimis illa objectio vel falsum, vel valde incertum, nimirum, sacerdotem, vel Pontificem in lege naturæ habuisse jurisdictionem spiritualem, quod vel falsum, vel incertum est. Quia talis potestas neque a Deo specialiter data est in illo statu, ut per se notum est, nec ex jure naturali potest hominibus convenire, quia potestas gubernativa humana non transcendent ordinem humanum, et principaliter instituitur ad ordinandum homines ad invicem, ita ut, licet curam etiam habere possit divini cultus, semper in modo ac determinatione illius respiciat commune bonum reipublicæ humanæ, ut in simili dixit D. Thomas 1. 2, quæst. 99, art. 3. Quapropter non recte fit comparatio inter legem naturæ et gratiæ, quia in lege naturæ omnis potestas gubernativa sub temporali sufficienter comprehendebatur, nam illa eadem posset disponere de iis quæ pertinent ad cultum Dei, prout expediret communi bono humanæ reipublicæ; secus vero est in lege gratiæ, quæ est lex diuina, quæ principaliter ordinat homines ad Deum, et bonum ipsius reipublicæ refert ad amicitiam hominum cum Deo. Ideoque sacerdotalis potestas in hac lege spiritualis est, et altioris ordinis, et non potest esse ab ipsis hominibus, vel eorum commu-

nitate, sed ab ipsomet Christo manare debuit, sicut de facto manavit, ut supra ostendit.

5. Objectio. — Solutio. — Dices, illud esse verum de hominibus tantum ut homines sunt consideratis; sic enim manifestum est, in eis esse non posse nisi potestatem naturalem; secus vero esse de hominibus christianis ut Christiani sunt, et ut componunt civitatem, non tantum politicam, sed etiam christianam. Nam sicut talis communitas fundatur in fide, et religione supernaturali, ita ex ea habet potestatem altioris ordinis con naturalem ipsi gratiæ ad disponendum ea, quæ spectant ad divinum cultum, consentanea ad veram fidem, et amicitiam Dei; ergo talis censenda nunc est potestas ecclesiastica, et consequenter potuit a tota communitate regi suo temporali conferri. Respondeo, antecedens potuisse habere locum, si Christus Dominus Ecclesiam suam et regimen ejus non instituisset peculiari modo, et longe excellentiori quam ex sola rei natura possit esse in communitate hominum, etiam ut Christiani sunt. Nunc autem Christus sua peculiari institutione prævenit (ut sic dicam) et sublimavit spirituale regimen Ecclesiæ. Primum, instituendo illam per modum unius corporis mystici per totum orbem diffusi, in quo unitas fidei et concordia in substantiali ritu religionis, ad Dei cultum et sanctificationem hominum ordinato, conservari posset; hoc autem sine supra spirituali potestate fieri non posset, ut supra ostendi. Universalis autem potestas supra universum mundum non potuit ab ipsis hominibus ubique etiam dispersis procedere; debuit ergo esse a Christo. Item instituit Christus quamdam Ecclesiam, quæ in fide esset columnna veritatis, et in moribus semper esset sancta, ideoque talem ei dedit potestatem spiritualem, ut per illam ad utrumque finem recte et sine defectu substantiali posset dirigi; talis ergo potestas necessario esse debet plus quam humana. De nique ex sola rei natura, etiam si homines Ecclesiæ spectentur ut Christiani sunt, non esset necessarium regi per Episcopos, vel alios similes pastores, quibus specialis cura animarum incumbat; nunc autem Ecclesia necessario regi debet per Episcopos et sacerdotes, quorum institutio et distinctio ex divino jure sine dubitatione descendit; ergo potestas gubernativa Ecclesiæ Christi in spiritualibus non est a populo christiano, etiam fide illuminato, sed est ab ipso Christo, vel

immediate, vel per participationem ab illo, cui Christus ipse immediate illam communicavit.

6. Secunda objectio.—Secunda objectio sumitur ex aliquibus locis veteris Testamenti, in quibus significatur, Pontifices legis veteris fuisse inferiores et subjectos regibus. Sed hanc objectionem nunc omitto, quia quod ad præsentem locum spectat, manifestum est ex veteri Testamento, pontificiam dignitatem et potestatem regiam in diversis fuisse personis, quod nunc tantum tractamus. De comparatione autem harum potestatum infra dicendum est, et ibi melius videbimus an sit necessarium eamdem habitudinem, seu relationem inferioris et superioris habere, seu habuisse in utraque lege, veteri scilicet, et nova.

7. Tertia objectio ex novo Testamento petita.—Est ergo tertia objectio sumpta ex testimoniis novi Testamenti, in quibus præcipitur Christianis omnibus, regibus temporalibus obedire, ut sunt in superioribus allegata, et a rege accumulata in Apol., pag. 129, scilicet, Roman. 13, 1 Petri 2, ubi etiam adjungit illud 1 ad Tim. 2, ubi Paulus præcipit orari pro omnibus, sed præcipue pro regibus, et omnibus qui in sublimitate sunt; et illud Matth. 22: *Reddite quæ sunt Cæsaris Cæsari*, etc.; et illud Joan. 18: *Regnum meum non est de hoc mundo*; et illud Luc. 12: *Quis me constituit judicem inter vos?* et illud Luc. 22: *Reges gentium dominantur eorum*, etc.

8. Solutio ad prima duo testimonia.—Sed nullum ex his testimoniis ad causam facit, et nonnulla illorum contra regis intentionem probare possunt. Nam imprimis in nullo illorum est sermo in particulari de spirituali potestate, neque in eis insinuat fuisse regibus temporalibus concessam, aut quod illis in materia talis potestatis præcipientibus obediendum sit. Cum ergo Paulus inquit: *Omnis anima potestatis sublimioribus subdita sit*, generalim loquitur de omnibus superioribus, ut ex tenore verborum constat. Unde recte intelligi possunt cum partitione accommoda, scilicet, unicuique in eo, in quo superior est, obediendum esse ab iis qui ei sunt subjecti. Nam ita etiam inferior dicit: *Reddite omnibus debita, cui tributum tribulum, cui honorem, honorem*, etc. Est ergo generalis distributio singulis accommodanda juxta mensuram potestatis; quæ autem hæc sit in singulis potestatis, ibi non explicatur. Demus autem ibi loqui Paulum in particulari de potestate temporali, de qua paulo post dicit: *Non sine*

causa gladium portat. Quid aliud ex illo loco sic intellecto colligi potest, nisi obediendum esse principibus temporalibus in his quæ justæ et recte præcipiunt? quis autem hoc negat? aut quomodo inde colligi potest etiam in spiritualibus et ecclesiasticis esse illis parentum? Certe Paulus non tantum de principiis christianis, sed etiam eo maxime tempore de regibus ethniciis loquebatur, quibus tanquam dominis temporalibus Christiani etiam obedire tenebantur, nec propterea prudens aliquis dicet, fuisse tune illos capita Ecclesiarum in regnis suis. Omnia ergo, quæ ibi Paulus, et Petrus in sua epistola, dicunt, ad eundem sensum referuntur; nam vel intelliguntur respective, ut unicuique reddatur jus suum, vel obedientia debita, juxta gradum potestatis suæ, vel, si definite de dominis temporalibus intelligentur, etiam sunt in eorum foro et materia intelligenda, prout ratio ipsa justitiae postulat; ibi enim Apostoli non condunt novum jus, sed jus ipsum naturale observari præcipiunt. Simili enim modo servi monent subditos esse dominis, et mulieres subditas esse viris, etc.

9. Ex tertio testimonio 1 ad Tim. 2, nihil contra statutam veritatem colligi.—Ad tertium autem testimonium fatemur, Paulum obsecrare, fieri orationes pro omnibus hominibus, et deinde in speciali addere, *pro regibus et omnibus qui in sublimitate sunt, ut quietam et tranquillam vitam agamus*. Quid vero hoc pertinet ad primatum spiritualem regis temporalis? Numquid quia reges in primo loco posuit, ideo dixit illos esse capita Ecclesiarum in spiritualibus? Vana profecto est collectio, et longe aliam rationem reddit Chrysostomus ibi, Homil. 6, videlicet, *ideo addidisse pro regibus, quia neque tunc reges Deum colebant, et multis postea temporibus in infidelitate, quam per seriem successionis acceperant, persisterunt*. Et infra: *Quoniam vero consequens esse cernebat, ut Christiani ad ista torpescerent, neque hujusmodi admitterent monita, siquidem pro gentili, et sacramentorum tempore preces oporteret offerre, vide, quid secutus adjunxit, ut ex consideratione lucri admonitionem facilius libentiusque reciperent: Ut quietam (inquit) et tranquillam vitam agamus*. Ergo ex mente Chrysostomi non ideo designavit reges, quia ipsi sint spiritualia capita Ecclesiarum (quod maxime tunc esse non poterant, cum essent gentiles), sed potius ne propter hanc causam fideles putarent non esse pro eis publice orandum. Neque Paulus dixit, *præcipue*

pro regibus, illam enim particulam *præcipue*, rex de suo addidit, sed simpliciter locutus est, ac si diceret, etiam reges ethnicios sub *omnibus* comprehendendi; nam licet essent gentiles, orandum pro eis erat, ut ad fidem converterentur. Et hoc magis significavit Paulus, in ratione quam subjunxit: *Hoc enim bonum est, et acceptum coram Salvatore nostro Deo, qui omnes homines vult salvos fieri, et ad agnitionem veritatis venire.* Ac denique quamvis Paulus addidisset particulam *præcipue*, nihil referret, nam quia conversioregum et difficilior erat, et ad commune bonum Ecclesiæ magis est necessaria, ideo etiam potuit specialiter ac *præcipue* commendari.

10. *Testimonium Matt. 22 oppositum concludit.* — *Testimonia etiam Joan. 18, Luc. 12 et 22, doctrinam traditam confirmare ostenditur.* — De verbis autem Christi, *Reddite quæ sunt Cæsarum Cæsari*, jam supra, ex mente Chrysostomi, Ambrosii et Athanasii, ostensum est potius probare contrarium, scilicet, *Cæsari*, id est, regi temporali, *reddenda esse que sunt Cæsaris*, id est, temporalis potestatis, quæ præcisa responsio vim habet exclusivæ, ut significavit Theophyl. dicens: *Jesus autem, per hoc quod figuratum erat numisma imagine Cæsaris, persuadet illis deberi Cæsari, quæ ejus sunt, hoc est, quæ habent ejus imaginem, nam in corporalibus et externis obediendum est regi; in internis autem, et spiritualibus, Deo, utique vel immediate præcipienti, vel per pastores suos, juxta verbum Pauli: Obedite præpositis vestris, et subiacete eis*, ad Hebr. 13. De aliis etiam Christi verbis: *Regnum meum non est de hoc mundo*, dicimus etiam probare contrarium, quod ex dictis non difficile colligitur. Tria enim ex doctrina Augustini et aliorum Patrum ex illis verbis adnotavimus, scilicet, Christum habere regnum, etiam in hoc mundo, licet non de hoc mundo; unde merito colligimus, reges hujus mundi, ex eo quod tales sint, non habere potestatem in regno Christi, quatenus altioris originis est; et pari consecutione, inferimus hoc regnum Christi non carere suis gubernatoribus, qui, licet non sint reges hujus mundi, id est temporales, sunt spirituales pastores et regale sacerdotium. Eademque ratio est de aliis verbis Christi: *Quis me constituit judicem et divisorem inter vos?* probant enim temporales causas per se non pertinere ad Christi regnum, seu Vicarium ejus, unde potius a contrario, seu a commutata proportione inferendum erat, causas spirituales ad temporalem

regem non pertinere. Denique idem dicimus de ultimis verbis: *Reges gentium dominantur eorum.* Nam Christus non addidit: Vos autem non gubernetis, vel, Non præcipiatis aut corrigitis subditos, sed potius supponit illos futuros fuisse rectores seu pastores, et ideo dixit: *Vos autem non sic*, quasi præsupponendo regimen, et distinguendo illud a regno temporali, et modum diversum in illo postulando, quem pluribus verbis declaravit Petrus, priori epist., c. 5, ut in superioribus adnotatum est.

11. *Quarta objectio.* — Quarta objectio sumi potest ex nomine vicarii Dei, quem rex Angliae cuivis regi temporali attribuit. Et ne videatur novus loquendi modus, ante Jacobum illo usus est Eduardus rex Angliae, ut ex suis legibus, c. 19, relatum invenio, qui tam in numero Sanctorum ponitur. Possimusque idem confirmare auctoritate Augustini, lib. Quæstionum veteris et novi Testamenti, p. 2, q. 91, ubi de rege dicit: *Adoratur in terris quasi vicarius Dei.* Eleutherius etiam, in quadam epistola ad Lucium, Britanniae regem, sic scripsisse fertur: *Suscepistis nuper miseratione divina in regno Britanicae legem et fidem Christi, habetis vos in regno vestro utramque paginam, ex illis Dei gratia per consilium regni vestri sumite legem, vos enim in regno vestro vicarius Dei estis.* Ergo praeter hunc vicarium non est alius necessarius, qui immediate sub Deo sit, ac subinde in rege est tota potestas vicaria divinæ potestatis, sive illa spiritualis sit, sive temporalis. Augerisque possumus hanc objectionem ex Isidoro, lib. 3 Sentent., seu de Summo bono, cap. 49, dicente: *Dedit Deus principibus præsulatum pro regimine populorum.* Præsulatus autem nomen est spiritualis potestatis; nam præsul non dicitur, nisi qui spiritualibus præest.

12. *Solutio ad quartam.* — *Augustinus immrito pro contrario errore citatur.* — *Supra dictam epistolam falso Eleutherio tribui.* — Respondeo breviter, consecutionem esse nullius momenti, quidquid de modo loquendi in antecedente sumpto sentiatur, de quo non est contendendum, quamvis ea, quæ pro illo allegantur, apocrypha sint. Nam, liber ille Quæstionum novi et veteris Testamenti, judicio omnium doctiorum, non est Augustini, quia nec stylus est, nec doctrina in multis locis est Augustiniana. Quanquam illa sententia bene explicata vera sit, regem, nimirum, adorari, id est coli et venerari propter dignitatem, in

qua Deum quodammodo repræsentat, cuius vicem gerit. Epistola etiam illa, quæ ex Eleutherio citatur, commentitia est, quia neque inter epistolas pontificias, neque in tomis Conciliorum, neque apud catholicos auctores mentio illius invenitur, sed ab aliquo hæretico conficta est, ut notavit Sander., lib. 5 de Clave David, cap. 6. Et illamet verba, quæ ex illa referuntur, id satis ostendunt; est enim phrasis propria Novatorum, et a Pontificibus Romanis prorsus aliena.

43. Ad verba Isidori respondetur. — Non negamus autem posse regem in bono et sano sensu vicarium Dei appellari; nam Paulus, ad Rom. 13, reges vocat ministros Dei, quod perinde fere est. Unde Ambrosius ibi ait, principem *vicem Dei agere*, et ideo subjectiōnem esse illi servandam. Idem autem est vicem agere, quod vicarium esse. Hinc autem non recte infertur, reges esse vicarios Dei in spiritualibus; nam Deus primarius rex est tam in regno temporali quam in spirituali Ecclesiæ, et in utroque suos vicarios posuit, in temporali reges, in spirituali Episcopos, et præsertim Sunimum Pontificem. Unde ex eo quod rex in uno regno vicarius sit, male infertur esse in utroque. Nam etiam reges gentiles, de quibus etiam Paulus loquebatur, sunt ministri Dei, ac subinde vicarii, non tamen in spiritualibus, sed in temporalibus tantum. Idem ergo dicendum est de regibus christianis, quamvis illi possint etiam dici peculiari titulo vicarii Dei, ad defendendam Ecclesiam, et protegendum Prælatos, ut possint in pace et cum fructu spiritualia ministrare. Et in hoc sensu S. Eduardus locutus est. Isidorus autem lato quadam modo præsulatum vocavit præfecturam, seu quamecumque regendi potestatem, sicut etiam c. 49 antecedente, sub titulo de *Prælatis* ponit reges, et quacumque seculi potestates, non solum fideles, sed etiam infideles. Unde clarum est non loqui de Prælatis in eo rigore, quo jam eomuni usu vox illa pro ecclesiastico antistite sumitur, sed prout generaliter a verbo *præfero* derivatur, et quemcumque superiorē, vel primarium gubernatorem significare potest.

44. Quinta objectio ex Patribus. — Quinto, objici possunt nonnulla Patrum testimonia, qui regi vel imperatori primatum tribuere solent. Sed ex his quedam pertinent ad comparationem utriusque jurisdictionis, quæ infra, ut dixi, tractabuntur. Alia vero sunt hujus loci propria, quia in eis videntur proprios

actus spiritualis potestatis regibus tribuere. Tales enim actus sunt, veritatem docere, errores depellere, et similes; et tamen Epiphanius, haeres. 40, dicit, reges datos esse ut omnia ex Deo bene disponantur et administrentur, et ad bonam (inquit) ordinationem terræ, ubi cædes, et pugnæ, ignorantiaeque, ac doctrinæ bonæ, etc., significans hæc omnia cadere sub regis curam. Et sie etiam Aleuinus, in Præfat. ad lib. de Trinit., ad Carolum diecit, sapientiam illi datam esse, *ut regat et doceat pia sollicitudine subjectos*. Et infra, ad illum pertinere ait, *justa decernere, rata præcipere, sancta admonere, ut quisque letus cum perpetuae salutis præcepto domum redeat*. Et infra subdit: *Principem populi christiani cuncta scire, et prædicare quæ Deo placent, necesse esse, notissimum est. Neque enim quemquam magis decet, vel meliora nosse, vel plura, quam imperatorem, cujus doctrina omnibus prodesse debet subjectis*, etc. Quin potius Concilium Arelatense, sub eodem Carolo M., capite ultimo, post decreta omnia subjungit: *Hæc domino imperatori præsentanda decrevimus, poscentes ejus clementiam, ut si quid hic minus est, ejus prudentia suppleatur; si quid secus quam se ratio habet, ejus judicio emendetur; si quid rationabiliter taxatum est, ejus adjutorio, divina opitulante clementia, perficiatur*. Addi etiam hic possent objectiones ex actibus congregandi generalia Concilia, vel præsidendi in illis, item creandi, vel deponendi Pontifices; hi enim actus et similes proprii sunt ecclesiastice jurisdictionis; et tamen illos saepius exercuisse imperatores, rex Angliæ in sua Præfat. contendit.

45. Solutio. — *Verus sensus Patrum appetitur.* — Ad priorem partem respondeo, Patres nunquam tribuere regibus proprios actus jurisdictionis spiritualis, sed interdum per modum exhortationis, vel laudis, aut honoris, illos excitare ad exercendos actus aliquos, qui sine juridictione exerceri possunt, vel ad procurandum ut alii in Ecclesia cum fructu fiant per Pastores, a quibus legitime exerceri possunt. Unus ex illis actibus esse potest, curare ut ignorantia ab Ecclesia tollatur, et ut bona et sana doctrina conservetur et augeatur, de quo loquitur Epiphanius. Habetque locum etiam in politica republica intra limites suos, ut per se notum est, et sic pertinet ad regem ex vi propriæ potestatis. Respectu vero Ecclesiæ, et quoad doctrinam fidei, pertinere potest ad regem, non quidem prædicando publice per se ipsum, neque dando auctoritatem

prædicandi, sed præbendo auxilium catholicis Prælatis et prædicatoribus, et sacrarum litterarum studia fundando, suaque potestate seminatores malæ doctrinæ coercendo. Et hunc sensum declararunt Patres Concilii Turonensis, sub Carolo M., in principio: postquam enim commendarunt pietatem et sapientiam imperatoris, subjungunt: *His igitur intentus, piros ac religiosos Dei sacerdotes Ecclesiae gubernacula in regno sibi divina largitate collato tenentes saluberrimis exhortationibus admonuit, ut operam darent, et actibus eminerent, quibus et se bene operando, et sibi commissos verbis et exemplis instruendo regerent.* Et idem supra indicat Alcuinus dicens: *Multa est omnibus fidelibus in vestra pietate gloriandi facultas, dum clementiae vestrae sollicitudo sacerdotalem, ut decet, habet in prædicatione verbi Dei vigorem.*

16. Germana Concilii Arelatensis expositio. — Reliqua vero, quæ retulimus, laudis sunt et honoris verba, nam etiam imperator christianus esse potest doctus, et bene instructus in doctrina sacra, et privatim juxta occurrentes occasiones potest veritatem docere. Simili etiam modo verba Patrum Concilii Arelatensis eo tendunt, ut protectionem et adjutorium ad executionem suorum decretorum ab imperatore petant, ut ex ultima clausula verborum constat; reliqua autem sunt verba modestiae et urbanitatis, ex quibus nullum judicium vel subjectionis in spiritualibus ex parte Concilii, vel spiritualis potestatis in imperatore, sumi potest. Ad aliam etiam partem objectionis, uno verbo dicimus, illos actus proprie non esse imperatoriæ potestatis; posse tamen, vel aliquando potuisse aliquam co-operationem, seu præparatoriam dispositionem, aut conditionem, quæ spiritualem potestatem non requirit, in eis exercere, ut in sequentibus latius declarabimus.

CAPUT X.

UTRUM CHRISTUS DOMINUS SUPREMAM ECCLESIAE SPIRITUALEM POTESTATEM PETRO CONTULERIT?

1. Priusquam spiritualem potestatem cum temporali conferamus, ex qua præsens controversia maxime pendet, inquirere oportet an hæc potestas sit in Pontifice Romano, cum quo lis et contentio tota regis Angliæ versatur. Quia vero Romanus Pontifex non potest habere hanc potestatem, nisi per legitimam successionem, et successio ab origine et ins-

titutione pendet, quæ a solo Christo fieri potuit, ideo de hac institutione prius videndum est. In quo puncto duæ quæstiones distingui possent, una abstracta (ut sic dicam) seu generalis, an Christus in sua universalis Ecclesia monarchicum regimen in aliqua persona, quæ vices ejus gereret, reliquerit. Altera quæstio est contracta, seu particularis, an tali persona, scilicet, Petro, Christus vices suas et potestatem supra omnes fideles commiserit; simul tamen illas tractabimus, quia quod ad fidem et auctoritatem attinet, non possumus melius ostendere institutionem, quam ex singulari Christi facto, et rationem illius ex generali causa institutionis postea investigabimus.

2. Neque oportet in recensendis erroribus, qui in hac materia fuerunt, et nunc a Lutheranis et Calvinistis, cæterisque Protestantibus pertinaciter defenduntur, immorari, quia et notissimi sunt, et nunc solum de Anglicana secta tractamus, cuius caput, et defensor, ejusdem Angliæ rex sæpe in sua Præfatione contendit, Christum non dedisse Petro majorem quam cæteris Apostolis potestatem, et p. 22 et 24, et præsertim 58, in alios sensus verba Scripturæ detorquere conatur. Sed illius fundamenta postea expendemus; nunc prius catholica veritas stabienda est. Et quoniā quamplurimi Catholici et eruditissimi viri in hac veritate confirmanda diligentissime laborarunt, operæ pretium non erit omnia, quæ illi dixerunt, transcribere, et in hunc locum congerere, sed panca quædam, quæ iudicio nostro selectiora et efficaciora videbuntur, ex illis mutuabimur, et qua poterimus brevitate et perspicuitate proponemus.

3. Conclusio de fide. — *Probatur conclusio ex promissione Christi.* — Dicimus ergo Christum Dominum, instituendo Ecclesiam suam militantem, priusquam quoad visibilem præsentiam corporalem eam relinquaret, illam Petro tanquam vicario suo, ac supremo pastori commendasse, ac subinde supremam spiritualem potestatem ad gubernandam illam ei contulisse. Conclusio est certa de fide, quam præcipue probabimus gemino illo testimonio, quo non solus Bellarminus, quem in hoc rex Angliæ reprehendere ausus est, sed omnes Pontifices et Patres eamdem veritatem confirmarunt. Primum est illud Matthæi. 16, ubi Christo quærenti: *Quem dicunt homines esse filium hominis?* cum Petrus respondisset: *Tu es Christus filius Dei vivi,* Christus dixit illi: *Beatus es Simon Bar Jo-*

na, quia caro et sanguis non revelavit tibi, sed Pater meus, qui in cælis est; et ego dico tibi quia tu es Petrus, et super hanc petram ædificabo Ecclesiam meam, et portæ inferi non prævalebunt adversus eam, et tibi dabo claves regni cælorum, et quodcumque ligaveris super terram, erit ligatum et in cælis; et quodcumque solveris super terram, erit solutum et in cælis. Hæc fuit Christi promissio, qui fallere non potest in promissis, et ideo dubitari non potest quin postea impleverit quod tunc promisit. Videamus autem cui promiserit et quid promiserit; nam si hæc duo plene et fideliter intelligentur, hoc solum testimonium ad assertionem confirmandam sufficit.

4. *Prædicta promissio Petro in propria persona facta est.*—Primo ergo evidens est ex tenore verborum, promissionem esse factam Petro in sua propria persona; tot enim circumstantiis designata est, ut de hoc dubitari non possit. Primo enim Evangelista retulit Simonem Petrum confessionem divinitatis Christi fecisse. Neque existimo vacare mysterio, quod Evangelista utrumque nomen conjunxit *Simon Petrus*. Nam prius Petrus vocabatur Simon, ut constat Joan. 1. Unde quia hoc erat quasi proprium et primavum nomen Petri, in negotio tam gravi omitti non debuit; nomen autem Petri a Christo fuit illi impositum Joan. 1, et hic adjunctum est, tum propter tollendam omnem ambiguitatem, quia aliis etiam Apostolus Simon vocabatur, tum propter mysterium quod statim Christus declaravit. Deinde addit Evangelista, Christum ad eundem esse locutum. Et ut hoc magis esset testatum, Christus iterum eodem nomine illum appellat, dicens: *Beatus es Simon*, et quia nomen Petri ad mysterium explicandum reservabat, ne nomen Simonis videretur ambiguum, addidit aliam circumstantiam propriam illius personæ, dicens: *Bar Jona*, id est filius Jonæ, seu Joannis, sicut idem dixerat Joan. 1: *Tu es Simon filius Jona*. Nominavit autem Christus Simonem in dicto loco, simul laudando illum, ut inde etiam intelligi posset qualis esset promissio, et cui fieret; erat enim remunerativa, et illi facienda erat, qui laudem in confessione meruerat. Sicut Hilarius ibi, canon. 26, dixit: *Et dignum plane confessio Petri præmium consecuta est, quia Dei filium in homine vidisset*; et Hieronymus ibid.: *Testimonio de se Apostoli reddit rictem; Petrus dixerat: Tu es Christus filius Dei ricti; mercedem recepit vera confessio: Beatus es Simon*

Bar Jona. Volens ergo Christus non sola laude, sed etiam mirabili promissione Petrum remunerare, subjungit: *Et ego dico tibi*, ubi recte Hieronymus: *Quia tu mihi dixisti: Tu es Christus, etc., et ego dico tibi, non sermone casso, et nullum habente opus, sed dico tibi, quia meum dixisse, fecisse est.* Illa ergo particula *tibi*, eamdem personam Simonis designat; ad illam ergo verba Christi diriguntur; illi ergo fit promissio. Maxim., Homil. 4, in Natali Petri et Pauli, et Prosp., lib. 2 de Vocat. gent., c. 28.

5. In verbis autem Christi considero, quædam esse tantum affirmativa per modum indicativi: *Tu es Petrus*, alia prædictionem et promissionem continentia, scilicet: *Super hanc petram ædificabo Ecclesiam meam, et tibi dabo*, etc. Prima ergo affirmatio eo etiam tendere potuit, ut magis exprimeretur persona, de qua futura erat prædictio, et cui fiebat promissio. Commemorare ergo voluit Christus hunc Simonem esse illum, cui multo antea dixerat: *Tu es Simon filius Jona, tu vocaberis Cephas*, quod interpretatur Petrus. Simulque (ut existimo) indicare voluit Christus, quam ob causam nomen Petri Simoni imposuerit, nimirum, propter firmissimam et immobilem fidem quam recepturus erat, cuius primam et insignem confessionem tunc effecit, et ideo audire meruit: *Tu es Petrus*. Unde recte Ambrosius, serm. 6 de Variis actionibus: *Cum vocaretur (inquit) Simon, per hanc devotionem vocatus est Petrus*. Imo addit, quia Christus est petra, cum fideli *Simone nomen suum communicasse*. Quod etiam attigit Chrysostomus, Hom. 10 in Marcum. Optime vero Cyrus, lib. 2 in Joan., c. 12, adnotat, prævidisse Christum futuram Petri fidem, et ideo illi dixisse: *Vocaberis Cephas, id est, Petrus, vocabulo ipso commode significans, quod in eo tanquam petra, lapideque firmissimo suam esset ædificaturus Ecclesiam*. Denique addit Chrysostomus, Hom. in Psalm. 50, in prima ejus parte, paulo post principium, *propterea Petrum a Christo appellatum, quia saxe fide præditus erat*. Ubi etiam bis illum appellat *basim fidei*; et Hom. 3, de Paenit.: *Cum Petrum dico, Petram nomino indebilem, crepidinem immobilem, etc., significans Christum vocasse Simonem Petrum propter immobilitatem, non quam in se, aut ex se haberet, sed quam in fide accepturus erat, et ideo alibi, fidei petram firmam et solidam, illum appellat*. Quae omnia eleganter complexus est Leo Papa, sermone de

Transfigur., c. 1, dicens de Petro : *Tantumque in hac fidei sublimitate complacuit, ut beatitudinis felicitate donatus, sacram inviolabilis petræ acciperet firmitatem, super quam fundata Ecclesia portis inferi et mortis legibus prævaleret.*

6. Unde ulterius clare intelligitur quid designaverit Christus, cum dixit : *Et super hanc petram ædificabo Ecclesiam meam.* Nam sine dubio eumdem Petrum designavit, ut frequentius antiqui et gravissimi Patres intellexerunt, et ex contextu aperte constat. Ideo enim Christus prius illi dixit : *Tu es Petrus,* ut ad eumdem statim diceret, super ipsum se ædificaturum Ecclesiam, et ad hoc munus illum per suam gratiam petram effecisse. Deinde ostensum est illa verba, cum sequentibus, continere promissionem remunerativam; ergo eidem fit qui propter bonam confessionem beatificatus est, et nomen Petri meruit; ergo idem per vocem, *hanc petram,* designatur. Quod fiet evidenter si consideretur, Christum non esse usum voce *Petri*, vel *petræ*, tanquam diversi generis. Unde si Christi verba hoc modo Evangelista retulisset : *Tu es petra, super hanc petram ædificabo Ecclesiam meam,* nemo dubitaret quin illæ particulæ, *Tu et hanc,* eamdem petram, atque adeo eamdem personam designarent; at Christus ita locutus est, et Matthæus etiam hebraice vel syriace ita scripsit, nam in illis linguis vox feminina et masculina Petri aut Petræ non distinguuntur, et ita utroque loco habet *petra* syriaca versio; græcus autem et latinus interpres personæ Petri, quia vir erat, masculinum nomen accommodarunt, fundamentum autem ædificii feminino nomine petram appellaron, quia in his linguis ita solet cum proprietate vocari.

7. Præterea per illud signum *hoc* vel *hanc*, designari solet res singularis præsens; ibi autem non erat alia res nomine petræ significata, et cui jam nomen petræ tanquam proprium, et sine metaphora, esset impositum, nisi persona Petri; ergo illum sine dubio designavit Christus, dicens : *Super hanc petram.* Nam, ut omnis occasio errandi, imo et dubitandi tolleretur, præmisit : *Tu es Petrus,* quasi præ oculis ponens eum, quem designare volebat. Præterea, cum Christus proxime subjunxit : *Et tibi dabo claves regni cœlorum,* quis dubitet, per pronomen *tibi*, Petrum designasse, et ad illum esse locutum, cum ad illum a principio sermonem suum direxerit, et eodem tenore semper cum eodem fuerit

locutus? ergo etiam cum dixit : *Et super hanc petram,* de eadem persona locutus est. Denique quia non est credibile, in tam claro et continuo contextu Christum nunc ad Petrum loqui, deinde rem aliam per pronomen *hanc*, designare, et statim ad Petrum redire. Sic enim incerta et ambigua esset tota sententia et promissio, et supervacanea fuisset diligentia tot modis et circumstantiis determinandi personam, cui promissio fiebat.

8. *Eadem veritas ex Summis Pontificibus confirmatur.* — Atque ita intellexerunt hunc locum quoad hanc partem de persona, cui fit promissio, imprimis omnes Pontifices Romani, qui hoc punctum attigerunt, præsertim Clemens, ep. 4 ad Jacobum, et Anacleetus, ep. 2 et 3; Leo supra, et ser. 2 et 3, in die Assumptionis suæ, et epist. 89, cujus alia verba in sequentibus referemus; et multa ex Gregorio adduximus, libro primo, cap. 6, et plura congerit Gratianus in suo decreto, dist. 12, 21 et 22, et in sequentibus plura referemus, in quibus Pontifices suum primatum non in humano, sed in divino jure fundant, ob successionem Petri, ad quem Dominus promittendo in hoc testimonio locutus est.

9. *Idem ex Patribus ostenditur.* — Et eodem modo hæc verba intellexerunt alii Sancti Episcopi, et antiquissimi Doctores Ecclesiæ: Cyprianus, epist. 55 ad Cornelium, dieens, in Petro fundatam esse Ecclesiam; et eodem modo loquitur epist. 69, 71 et 73, et aliis locis, quæ supra lib. 1, cap. 5 et 6, adnotavimus. Item Hilarius, canon. 16 in Matth., ubi post verba supra citata : *Dignum plane confessio Petri præmium consecuta est, subjungit: O in nuncupatione novi nominis felix Ecclesiæ fundamentum,* etc. Idem habet libr. 6 de Trinit., et Psalm. 131; Ambros., lib. 4 de Fide, cap. 3 : *Habes (inquit) in Evangelio quod Petrus dixit: Rogavi pro te, ut non deficiat fides tua; eidem autem supra dicenti: Tu es Christus filius Dei vivi, respondit: Tu es Petrus, et super hanc petram,* etc., et subjungit verba valde notanda : *Ergo cui propria auctoritate regnum dabat, hujus fidem firmare non poterat? quem cum petram dicit, firmamentum Ecclesiæ indicavit.* Idem optime Psal. 40, circa finem : *Ipse (inquit) est Petrus, cui dixit: Tu es Petrus, et super hanc petram,* etc.; et addit : *Ubi Petrus, ibi Ecclesia.* Idem late sermone 9 supra citato, et serm. in Cathedram S. Petri, et sermone 41 de Sanctis. Late etiam Augustinus, sermone 29 de Sanctis, qui est quintus S. Petri et Pauli : *Solus*

inter Apostolos meruit audire : Tu es Petrus, et super hanc petram ædificabo Ecclesiam meam. Dignus certe qui ædificandis in domo Dei populis lapis esset ad fundamentum, columna ad sustentaculum, clavis ad regnum; et multa similia habet in serm. 16, qui est de Cathedra Petri, et ser. 49 de Verb. Dom., c. 3; et lib. 2 de Baptism., c. 1, referens hæc verba Cypriani : Petrus, quem primum Dominus elegit, et super quem ædificavit Ecclesiam suam, adjungit : Ecce ubi commemorat Cyprianus, quod etiam nos in Scripturis sanctis didicimus, Apostolum Petrum, in quo primatus Apostolorum tam excellenti gratia præeminet, a posteriori Apostolo Paulo esse correctum, etc.

10. Optime etiam Pacianus, epist. 3 ad Sympronianum, circa medium : *Ipsò (inquit) referente Mattheo ad Petrum locutus est Dominus, ad unum ideo, ut unitatem fundaret ex uno; et statim refert verba : Super hanc Petram ædificabo Ecclesiam meam. Supra etiam retuli Cyrilum Alexandrinum, et Chrysostomum, quibus addi potest Cyrillus Hierosolymitanus, catech. 18, dicens : Ordinavit Salvator nostram sanctam Ecclesiam Christianam, de qua dixit Petro : Tu es Petrus, et super hanc petram ædificabo Ecclesiam meam. Et Nazianz., orat. 26 : Vide (inquit) quemadmodum ex Christi discipulis, magnis utique omnibus et excelsis, atque electione dignis, hic petra vocetur, atque Ecclesiæ fundamenta in fidem suam accipiatur. Item Basilius, in c. 2 Isai., cum dixisset Ecclesiam fuisse aedificatam in Prophetis et Apostolis, subdit : *Quorum unus erat Petrus, super quam petram pollicitus fuerat suam se adficiaturum Ecclesiam;* et lib. 2 contra Eunomium, circa principium, de Petro ait : *Qui quoniam fide præstabat, Ecclesiæ commissam sibi ædificationem suscepit;* et Hom. 29, quæ est de Poenitentia : *Petrus tertio abnegavit, et collocatus est in fundamento. Et infra : Petrus dixerat jam antea, et beatus pronuntiatus fuerat; dixerat : Tu es filius Dei excelsi, et vicissim audierat se esse petram, ita laudatus a Domino; licet enim petra esset, non tamen petra erat ut Christus; ut Petrus petra erat. Nam Christus vere est immobilis petra, Petrus vero propter petram. Axiomata namque sua Jesus largitur aliis; largitur autem ea non evacuatus, sed nihilominus habens. Lux est. Vos estis lux mundi, inquit; sacerdos est, et facil sacerdotes. Oris est, et dicit : Ecce ego mittos vos si ut oves in medio luporum. Petra est, et petram facit. Quia**

sua sunt, largitur servis suis. Similiter Epiph., in Anchorato, non longe a principio, de Petro loquens sub nomine principis Apostolorum, subjungit : Ipse autem Dominus constituit eum primum Apostolorum, petram firmam, super quam Ecclesia Dei ædificata est, etc.

11. His Patribus accedunt alii exponentes Matthæum, Theophylact. et Euthymius, sequentes Chrysostomum, sed præcipue Hieronymus, dicens : *Simoni, qui credebat in petram Christum, Petri largitum est nomen, ac secundum metaphoram petræ recte dicitur ei : Ædificabo Ecclesiam meam super te. Non potuit sane litteralis sensus verius aut clarius explicari. Unde aliis locis saepè dicit, Ecclesiam Christi super Petrum fuisse fundatam, dialog. 1 contra Pelagian., aliquantulum a princ., et ep. 54 et 57; et lib. 1 contra Jovinian., prius Petrum petram Christi appellat, postea vero tacitæ occurrens objectioni, et rationem declarans, inquit : Super Petrum fundatur Ecclesia, licet id ipsum in alio loco super omnes Apostolos fiat, et cuncti claves cælorum accipiunt, et ex aequo super eos Ecclesiæ fortitudo solidetur; tamen propterea inter duodecim unus eligitur, ut capite constituto, schismatis tollatur occasio. Ubi est attente considerandum, inter Apostolos et æqualitatem quamdam et caput nihilominus constituere. Æqualitas enim est in apostolatu, in certitudine doctrinæ, super quam fortitudo Ecclesiæ solidatur, et in universali clavium potestate; caput autem unum, quod propter tollenda schismata positum est, auctoritatem et jurisdictionem Petri in alios etiam Apostolos indicat, et perpetuitatem potestatis, sine qua concordia, schismatibus contraria, perpetua in Ecclesia esse non posset.*

12. Similemque sententiam habet Leo Papa, ep. 89, c. 1, dicens : *Hujus muneric sacramentum ita Dominus ad omnium Apostolorum officium pertinere voluit, ut in Beatissimo Petro, Apostolorum omnium summo, principaliter collocaret, ut ab ipso quasi quodam capite dona sua velut in corpus omne diffunderet, ut exsortem se mysterii intelligeret esse divini, qui ausus fuisset a Petri soliditate recedere. Hunc enim, in consortio individue unitatis assumptum, id quod ipse erat, voluit nominari, dicendo : Tu es Petrus, et super hanc petram ædificabo Ecclesiam meam, ut aeterni templi ædificatio, mirabili munere gratiae Dei, in Petri soliditate consistaret. Denique apud alios Patres frequens est, ut Petrum hac ratione vocent Ecclesiæ Catholicae fundamen-*

tum, petram Ecclesiæ, Pontificem Ecclesiæ primum, ut videri potest in Isidoro, lib. 2 de Offic. eccles., c. 5, et lib. de Vit. et mor. Sanctor., c. 69, et aliis locis, quæ lib. 1, c. 6, indicavimus. Et Petr. Chrysolog., sermone 107; Laurent. Justinian., lib. de Obed., c. 42; Tertull. sæpe, antequam in hæresim incidisset, eisdem modis de Petro locutus est, ut in lib. de Præscrip., c. 22, et lib. de Monogamia, c. 8. A qua sententia etiam factus hæreticus non discessit, quamvis illam aliquo modo corruperit, lib. de Pudicitia, c. 25, ut c. 17 commodius animadvertemus.

13. *Petrus, Mat. 16, in Ecclesiæ fundatum designatus fuit.* — *Probatur ex Patribus.* — Nemo igitur dubitare potest quin Petro facta sit illa promissio; superest jam explicandum quid illi promiserit. Duplex enim in verbis videtur esse promissio: una de fundamento Ecclesiæ, alia de potestate ligandi et solvendi: existimo tamen esse eamdem, prius per metaphoram, et postea per verba magis propria explicatam. Cum ergo Christus dixit fundaturum Ecclesiam super Petrum, promisit Petro, effecturum ipsum Ecclesiæ fundamentum adeo firmum et immobile, ut et totam Ecclesiæ molem sustinere posset, et cum tanta firmitate, ut cadere nunquam aut ruere posset. Hinc Ambrosius, in dicto lib. 4 de Fide, c. 3, dicens in verbis supra allegatis, *cui propria auctoritate regnum dabat*, significat Christum ibi promisisse Petro regnum Ecclesiæ; et quia hoc regnum et fide constituitur, et perpetuum esse debet, ideo addit Ambrosius, potuisse etiam Christum firmare fidem Petri, et illum firmamentum Ecclesiæ constituere, indicans hoc totum in illis verbis fuisse Petro promissum. Quod etiam declaravit serm. 2, ex variis, qui est de Cathedra Petri, dicens, Petro esse promissum, *ut tanquam saxum immobile totius orbis christiani compaginem molemque continueat*. Et similia fere habet Augustinus, dicto serm. 16 de Sanctis. Hieronymus vero, dicto lib. 4 contra Jovinianum, sentit ibi esse promissum Petro, futurum fuisse caput Apostolorum; Cyprianus autem cum Augustino, dicto lib. 2 de Baptism., c. 4, primatum Ecclesiæ sentiunt ibi esse Petro promissum. Chrysostomus etiam, Homil. 55 in Matthæ., dicit promissum esse Petro, fore Ecclesiæ Pastorem. Hæcque omnia in idem recidunt.

14. *Probatur ratione.* — Ratio denique metaphoræ est, quia singularis aliqua dependentia Ecclesiæ a Petro per illam metapho-

ram significata est, quæ non potest in alio consistere, nisi quia danda erat Petro singularis potestas ad instruendam et regendam Ecclesiam in fide et moribus, a qua tam ædificationem conservatio Ecclesiæ perpetuo penderet. Ut si navis dicatur fundata in aliqua persona, statim per metaphoram intelligitur pendere ab illa tanquam a gubernatore et nauclero, et sic etiam regnum dicitur in rege fundari, et e converso rex dicitur fundatum regni. Quocirca licet metaphora fundamenti vel petræ alios etiam possit habere usus et significationes, tamen accommodata ad hunc locum et has circumstantias, nulla præter hanc potest esse accommodata, et ideo Patres et Ecclesia ita illam intellexerunt.

15. *Christus per claves supremam spiritualem potestatem Petro contulit.* — Ut vero rem apertius explicaret Christus, addidit aliam metaphoram, et explicationem ejus, dicens: *Tibi dabo claves regni cœlorum*; solet enim nomine clavis potestas regia seu regendi significari, ut patet Isai. 22: *Dabo clavem domus David super humerum ejus*, id est, principatum, vel potestatem, de qua paulo antea dixerat: *Potestatem tuam dabo in manu ejus*. Christus ergo promittens claves regni cœlorum Petro, nihil aliud promisit, quam potestatem regendi Ecclesiam, quæ in terra est regnum spirituale tendens ad regnum cœlorum consequendum, et ideo per potestatem quamdam cœlestem gubernanda est. Quam potestatem per verba satis propria statim explicavit Christus, dicens: *Et quocumque ligaveris super terram, etc.*; his enim verbis expresse promisit Petro singularem potestatem ligandi atque solvendi, quæ potestas non est alia, nisi potestas leges ferendi, quæ homines ligent, seu obligent, vel etiam puniendi, aut censuras ferendi, aut similia onera imponendi, vel auferendi, ut patet, tum ex communi usu talium verborum, tum ex similibus verbis Matth. 18: *Quæcumque ligaveritis, etc.*, et ex aliis Joan. 20: *Quorum remiseritis peccata, etc.* Ergo claves illæ non aliud per metaphoram significant, nisi potestatem spiritualem ad regendam Christi Ecclesiam in ordine ad regnum cœlorum consequendum. Ex hoc ergo loco manifeste probatur primatus Petri, quamvis hæretici variis objectionibus et evasionibus illum obscurare nitantur, quibus in sequenti capite respondebimus, ne veritatis positæ confirmationem intermittamus.

16. *Confirmatur eadem assertio ex Joan. 21.* — *Rejicitur quædam hæreticorum expositio.* — Omnia igitur, quæ de prædicta Christi præmissione diximus, ex aliis Christi verbis, Joan. 21, maxime confirmantur, et ex utroque loco simul sumpto, et inter se collato evidentissima fit veritatis testificatio. Nam quod Christus promiserat, ad Patrem ascensurus, implevit, dicens Petro semel et iterum: *Pasce agnos meos*; et tertio: *Pasce oves meas*, per quæ verba curam et gubernationem totius Ecclesiæ illi commisit, et Vicarium suum illum constituit, et tunc plane claves regni cœlorum et potestatem ligandi atque solvendi, proprio et peculiari modo illi tribuit, sicut super humeros ejus tanquam super firmum fundamentum et saxum immobile Ecclesiæ ædificium imposuit. Quæ omnia facile persuaderi possunt, si totum Christi factum ejusque verba pura intentione et mente considerentur. Prius enim quam Christus Petrum Pontificem Summum crearet, ter illum interrogavit: *Simon Joannis, diligis me plus his?* et *Diligis me?* seu *amas me?* per quod imprimis significare voluit aliquid magnum et excellens, et sibi maxime charum voluisse Petro commendare, suam nimirum Ecclesiæ, quam ipse maxime diligebat, pro qua seipsum tradidit, et Patrem ac matrem reliquit, ut ostendit Paulus ad Ephes. 5. Deinde manifestato amore Petri erga ipsum, dixit illi Christus: *Pasce oves meas.* Per quæ verba contendunt hæretici nullam potestatem esse datam Petro, sed solum præceptum prædicandi verbum Dei, quod est animarum cibus. Sed est vana et ridicula expositio, nam de missione ad prædicandum jam Christus dixerat, Joan. 20: *Sicut misit me Pater, et ego misso vos;* et dicturus erat postea in discessu suo: *Euntes docete omnes gentes;* quid ergo necesse erat pro solo munere prædicationis tam singulariter cum Petro agere, tantumque pondus verborum et interrogationum præmittere?

17. *Quid verbo pascendi in Scriptura significetur.* — Deinde, verbum *pascendi*, eo modo quo ibi a Christo usurpalum est, non solum significat actum (ut sic dicam) ministrandi cibos, sed etiam munus et sollicitudinem procurandi omnia, quæ et ad nutriendas oves, et ad illas regendas, tuandas, et in vita conservandas pertinent. Denique omnia, quæ sunt pastoralis muneris, comprehendit. Perinde enim fuit Petro dicere: *Pasce*, ac dice: *Pastorem mearum ovium te relinquo.*

Bonus autem pastor, ut ipsem Christus dixit, Joan. 10, *intrat per ostium, et proprias oves vocat nominatum, et educit eas, et ante eas vadit, et eum oves sequuntur, quia sciunt rocem ejus.* Et infra: *Bonus pastor animam suam dat pro ovibus suis*, et ut ibidem significat, non se gerit sicut mercenarius, qui cum non sit pastor, videt lupum venientem, et dimittit oves, et fugit; ergo ex Christi sententia, ad munus pastoris intrantis per ostium, id est, per ipsummet Christum, ut ipse explicavit, seu (quod idem est) ab ipso super gregem suum constituti, pertinent non solum cibum ministrare, sed etiam custodiare, et regere, et omnia alia quæ pastoralis cura requirit; non ergo solam verbi prædicationem, sed totam hanc curam gregis sui Christus Petro commendavit. Et sine dubio hæc est maxime usitata significatio illius verbi in ea metaphora usurpati, non solum in communis loquendi modo, sed etiam in Scriptura sacra, ut patet ex illo 1 Petr. 5: *Pascite, qui in vobis est, gregem Dei, providentes non coacte, sed spontane, secundum Deum, ubi pascere sine dubio non significat tantum prædicare, nam per solam concessionem non solet fieri coactio; sed significat regimen seu gubernationem, quæ interdum nimis violenta esse solet, et ideo subjungit: Non dominantes in cleris.* Similiter, verbum *providentes*, manifeste ostendit, Petrum esse locutum de providentia et sollicitudine pastoris in regendis et custodiendis ovibus, et non de sola verbi prædicatione. Sic etiam 2 Reg. 5: *Tu pasce populum meum Israel, in cuius explicationem additur: Tu eris dux super Israel;* et c. 7: *Numquid loquens locutus sum ad unam de tribubus Israel, cui præcepi ut pasceret populum meum Israel,* quod statim declaratur per illa verba: *Ego tuli te de pascuis sequentem greges, ut esses dux super populum Israel.* Et de Christo dicitur Isai. 40: *Sicut pastor gregem suum pascet;* et infinita similia sunt in Prophetis; ergo hoc ipsum significavit Christus Petro, cum illi oves suas pascendas commisit.

18. *Potestas Petri ad totam Ecclesiam extenditur.* — Ac denique cum oves indefinite posuit, omnes absque dubio sine disserimine comprehendit, quia in similibus locutionibus indefinitus sermo æquivalet universalis, et quia nulla est major ratio, de his quam de illis ovibus talia verba interpretandi. Imo, quia ibi nominatim distincti sunt agni et oves, Euthymius existimat significatum esse, non so-

lum imperfectos, sed etiam perfectos Petri curae fuisse subjectos. Bernardus autem, lib. 2 de Considerat. ad Eugenium, exponit, non solum communem plebem, sed etiam prælatos et Episcopos usque ad ipsos etiam Apostolos, Petro commendatos et subjectos fuisse. Unde sic ait c. 8: *Non modo ovium, sed et Pastorum tu unus omnium Pastor. Unde id probem, quæris. Ex verbo Domini. Cui enim, non dico Episcoporum, sed etiam Apostolorum sic absolute et indiscrete totæ commissæ sunt oves? Si me amas, Petre, pasce oves meas. Quas? illius, vel illius populos civitatis, aut regionis, aut certi regni? Oves meas, inquit. Cui non planum, non designasse aliquas, sed adsignasse omnes? Nihil excipitur, ubi distinguitur nihil. Et forte praesentes cæteri condiscipuli erant, cum committens unum, unitatem omnibus commendaret, in uno grege et uno pastore, secundum illud: Una est columba mea, formosa mea, perfecta nra. Ubi unitas, ibi perfectio.* Quibus verbis egregie Bernardus prædictum sensum confirmavit et locupletavit.

19. *Tradita expositio verborum Christi ex Patribus confirmatur.* — Neque nova est aut recens hæc interpretatio, eodem enim modo veteres Patres dicta Christi verba intellexerunt. Nam Leo Papa, sermone 3 Assumptionis suæ, in eamdem sententiam dixit: *De toto mundo unum Petrus eligitur, qui et universarum gentium vocationi, et omnibus Apostolis cunctisque Ecclesiæ Patribus præponatur, quamvis in populo Dei, multi Sacerdotes sint, multique pastores, omnes tamen proprie regat Petrus, quos principaliter regit et Christus; Chrysostomus, homil. 87 in Joann.: Quid tandem, ait, aliis omissis, de his duntaxat Petrum affatur? os erat Apostolorum et princeps, et vertex ipsius cœlus, propterea et Paulus eum præter alios visurus ascendit, simul ut ei ostenderet jam sibi fiduciam habendam; tanquam enim negationis oblitisceretur, fratrum curam ei committit. Et infra: Ter autem interrogat, et sœpe idem præcipit, ut demonstret quanti ovium suarum curam faciat, et quod hoc maximum sit amoris argumentum. Cyrilus item, lib. 11, Joan. c. 64: In singulis, inquit, confessionibus, variatis parumper verbis, audievit, rationalium ovium curam sibi esse habendum. Et similiter Augustinus, tract. 123: Nec aliud toties audit a Petro, quam se diligere; nec aliud toties commendat Petro, quam suas oves pasci. Quid autem sit pascere oves Christi, paucis verbis in fine ejusdem tractatus declarat,*

dicens, *debere eos usque ad sanguinem pro veritate certare, quibus oves ipsas pascendas regendasque committit.* Et sermon. 62 de Verb. Domini, explicans eadem verba: *Pasce oves meas: Pertinet (inquit) ad nos cura, ad vos obediencia; ad nos vigilancia pastoralis, ad vos humilitas gregis, etc., ubi verbo pascendi, verbum obediendi opponit. Intellexit ergo pastoralem curam non consistere tantum in docendo, sed etiam in regendo et præcipiendo, et hanc esse commissam Petro super totam Ecclesiam. Sicut etiam dicit sermone 49 de Verb. Domini: *Dicit Dominus Petro, in quo uno format Ecclesiam: Petre, amas me? Respondet: Amo. Pasce omnes meas.**

20. Et item Ambrosius, sermone 48 de Tempore, in feriam 3 hebdomadæ sanctæ, eumdem locum tractans, ait: *Qui ante lachrymas prævaricator extitit, post lachrymas pastor assumptus est, et alios regendos accepit, qui prius seipsum non rexit.* Et in dict. sermone primo de Sanctis, seu de cathedra Petri: *Tanquam bonus Pastor (inquit) tuendum gregem accepit, ut qui sibi infirmus fuerat, fieret omnibus firmamentum.* Ubi ad utrumque testimonium alludit, et alterum cum altero conjungit. Et ad Galat. 1, declarat, per verbum *pascendi*, delegatam esse Petro curam Ecclesiarum, dicens de Paulo: *Dignum fuit, ut cuperet ridere Petrum, qui primus erat inter Apostolos, cui delegaverat Salvator curam Ecclesiarum.* Deinde lib. 10 in Lucam, c. 24, in fine: *Dominus (inquit) non dubitabat, qui interrogabat non ut disceret, sed ut doceret, quem elevandus in cœlum amoris sui nobis relut ricarium relinquebat, sic enim habet: Simon Joannis, diligis me? Utique tu scis, Domine, quia amo te. Dicit ei Jesus: Pasce agnos meos.* Et infra: *Jam non agnos ut primo, nec oviculas ut secundo, sed oves pascere jubetur perfectiores, ut perfectior gubernaret.* Et lib. 5 de Fide, in Procœmio, late eumdem locum in eodem sensu explicat, dicens, Petrum esse servum illum prudentem et fidelem, quem constituit Dominus super familiam suam. Idem fere habet lib. de Dignitate Sacerdotali, c. 2. Utrumque vero testimonium optime connectit Cyprian., lib. de Unit. eccles., circa principium, dicens: *Loquitur Dominus ad Petrum: Ego dico tibi quia tu es Petrus, et super hanc petram ædificabo Ecclesiam meam, etc. Et iterum eidem post resurrectionem suam dicit: Pasce oves meas. Super illum unum ædificat Ecclesiam suam, et illi pascendas mandat oves suas, et quamvis Apostolis omnibus post*

resurrectionem suam parem potestatem tribuat, et dicat: *Sicut misit me Pater, etc., et: Quorum remiseritis peccata, etc.; tamen ut unitatem manifestaret, unam cathedram constituit, et unitatis ejusdem originem ab uno incipientem sua auctoritate disposuit.* Et infra: *Priuatus Petro datur, ut una Christi Ecclesia et cathedra una monstretur.* Et infra: *Qui cathedral Petri, super quam fundata est Ecclesia, deserit, in Ecclesia se esse confidit?*

21. *Ex epithetis Petri eadem veritas ostenditur.* — Denique veritatem hanc confirmant varia epitheta, quae solent Patres Petro tribuere ad illud munus explicandum, et potestatem quam a Christo in dictis locis recepit. Sie enim vocatur *Caput Apostolorum* a Hieronymo, libro primo contra Jovinian., et Optat., libro secundo et septimo Cont. Parmeni.; Cyril. Alex., lib. 42 in Joan., c. 64, caput et principem, et lib. 13 Thesaur., c. 2, apicem Apostolorum vocat. Dicitur etiam constitutus *Pastor pastorum*, ab Eusebio Emisseno, in sermone de S. Joanne Evangelista, et rationem reddit, quia *regit subditos et Prelatos. Omnium igitur pastor est, quia præter agnos et oves in Ecclesia nihil est.* Unde Isidorus, de Vita et morte Sanctor., c. 69, Petrum vocat Pastorem humani gregis. Item Origenes, lib. 3, in c. 6 ad Roman., circa finem, ait: *Petro cum summa rerum de pascendis oibus tradetur, et super ipsum velut super terram fundaretur Ecclesia, nullius confessio virtutis alterius ab eo, nisi charitas exigitur.* Vocatur item Petrus Christi Vicarius in Concilio Nicæno, c. 39, de quo canone plura dicemus inferius. Et Anselm., Matt. 16, illum vocat principalem Vicarium, quia etiam alii Episcopi omnes, qui potestatem ligandi et solvendi accipiunt, sunt modo suo Vicarii Christi, Petrus autem est principalis. Quem ob eamdem rationem ibi vocat principem Apostolorum, quod est frequens in aliis Patribus. Et sic etiam frequenter dicunt accepisse primatum Ecclesiæ, ut est apud Ambros., 2 ad Cor. 12, et ad Galat. 2; et optime Beda ex dictis verbis: *Pasce oves meas*, in Homil. de Vigilia Apostolor. Petri et Pauli. Idemque voluit Chrysostomus, Hom. 80 ad populum, dicens, *ei per totum terrarum orbum Ecclesiæ præsidentiam traditam esse, seu orbis terrarum curam esse demandatam*, ut ait hom. 87 in Joan.; vel *totius Ecclesiæ gubernacula suscepisse*, ut ait Damascenus, orat. de Transfigurat., ubi ad Petrum ita de Ecclesia loquitur: *Hunc Christus suo ipse crux compara-*

vit, tibi autem ut fidissimo famulo in fidem tradidit. Et infra: *Qui te cœlestis regni claviculairum instituit.* Et infra, dicit voluisse Christum Petrum adesse suæ transfigurationi, ut *Antistitem qui totius Ecclesiæ gubernacula suscepisset.* Unde tandem dixit Ephrem, sermone de Transfiguratione, sicut unus Moyses Hebræorum princeps fuit, ita Petrum Ecclesiæ Christianorum fuisse principem constitutum. Et plura videri possunt in Gregorio, Hom. 21 in Evangel., et lib. 3 Epistolar., ep. 3, alias cap. 67, et lib. 1, ep. 24.

22. *Ratio institutionis primatus Petri.* — Tandem si velimus aliquam rationem hujus divini consilii reddere, oportet institutionem regiminis ab electione personæ separare. Electionis enim nullam possumus propriam reddere causam præter divinum beneplacitum. Nam, licet Deus ea fide et charitate Petrum disposuerit, quæ ad tale ministerium suscipiendum dignum illum redderet, ut ex verbis Matthæi et Joannis supra tractatis manifestum est, nihilominus fides Petri non fuit prima ratio electionis ejus, sed voluntas Dei, nam quia illum elegerat, ideo illum ita vocavit, ut cooperando vocationi Vicarius Christi fieri posset dignissime. Institutionis autem primatus propria ratio fuit, quam Cyprianus, Leo Papa, et alii Patres tetigerunt, unitas Ecclesiæ et optimum regimen ejus, quia si in Ecclesia non fuisset unum caput, ad quod diversa Ecclesiæ membra recurrerent, facile per diversa schismata rumperetur, ut etiam Anselmus supra recte dixit.

23. *Regimen ecclesiasticum, monarchicum esse debet.* — Ut autem optimum esset regimen, oportuit caput hoc unum esse monarcham, nam monarchia forma regiminis est omnium optima, ut ex Patribus, Theologis, philosophis et historiis eruditæ ostendit Cardinalis Bellarminus, lib. 4 de Roman. Pontif., c. 2 et sequentibus. Quod si in aliis communitatibus aut regnis humanis hoc verum est, multo certe magis in regimine totius Ecclesiæ fuit necessarium, quia cum res publica ecclesiastica sit amplissima, et pro universo mundo sit instituta, non posset convenienter per unam potestatem supremam gubernari, nisi talis potestas in uno homine resideret. Nam si esset in congregazione multorum, non esset in mundo talis potestas apta ad regendum, nisi quando tales personæ in unum Concilium essent congregatae. Quomodo ergo posset difficultatibus occurrentibus subveniri, quando talis congregatio deesset, vel a quo posset

cum efficacia cogi, si nullum esset in Ecclesia caput, ad quod hujusmodi generalis providentia, et cura Ecclesiae perpetuo pertineret? Profecto haec ratio convincit primatum Petri fuisse moraliter necessarium, eademque convincit, fuisse illum principatum non pro sola persona Petri, sed perpetuum, ut convincunt etiam illa verba: *Et portæ inferi non prævalebunt adversus eam*, sicut in libro primo late probatum est, et sequentibus amplius confirmabitur.

CAPUT XI.

OBJECTIONIBUS CONTRA SUPERIORIS CAPITIS DOCTRINAM SATISFIT.

1. Petri primatum nemo noritatis arguere potest. — *Petrum non posse dici principem Apostolorum nisi ratione supremæ potestatis.* — Contra primatum Petri intellectum in sensu a nobis superiori capite declarato, nonnulla in transcurso, et quasi obiter attingit rex Jacobus, quibus satisfacere necesse est. Dicit enim ille, in pag. 60 sue Praefationis, *verum quidem esse Petrum, et ætatis, et temporis, quo a Christo vocatus est, ratione, unum ex primariis Apostolis fuisse, principem ordine illorum duodecim, quos primos Christus elegit, et de tribus illis unum, quos ordinis servandi gratia cæteris præposuit.* Et p. 59, doctrinam, quam Catholicam esse ostendimus, *nuperam*, et *noritiam* vocare veritus non est. Quod apud me argumentum efficax est, Protestantes, vel Santos Patres non legisse, vel regem suum turpiter decepisse. Nam ex dictis, luce clarius constat, doctrinam traditam de primatu Petri cum ipsa Ecclesia ortam esse, et in verbis Christi, eo modo intellectis, quo ab antiquissimis Patribus exposita sunt, esse fundatam; nullus ergo, qui non ex industria fallere et falli velit (quod de Serenissimo rege credendum non est), doctrinam hanc nuperam aut novitiam vocare potest. Locutus est ergo ex deceptione et veritatis ignoratione, non tamen probabili, vel quæ illum a gravi lapsu et culpa excuset, cum possit facile ignorantiam et errorem depellere, si velit. Præterquam quod si Petrum fatetur esse principem duodecim Apostolorum, quid, quæso, est quod addit: *Principem ordine, aut ordinis servandi gratia?* aut quis est iste ordo, vel in qua excellentia aut dignitate personæ fundatus est? Omnis enim ordo, ut juste ac prudenter inter alias personas constituantur, fundamentum aliquod ex-

cellentiæ, seu excessus, aut inæqualitatis in eis requirit, quod constituendo ordini proportionatum et accommodatum sit.

2. Si ergo Petrus nullam dignitatem vel potestatem habet majorem, quam cæteri Apostoli, nec jurisdictionem in illos, secundum quem ordinem princeps illorum appellatur? Nam excessus ætatis vel antiquitas vocationis apud Deum parvi momenti sunt, apud quem sicut non est personarum acceptio, ita neque est ætatum differentia; imo in conspectu illius sæpe sunt novissimi primi, et primi novissimi. Præsertim, quia non constat Petrum fuisse seniorem cæteris Apostolis, aut ante omnes vocatum, cum saltem Andreas illum præcesserit, ut de vocatione sumitur ex Joannis 1, et de ætate probabile censem Epiphan., hæres. 51. Neque etiam fundari potest ille ordo in gradibus sanctitatis, nam hoc judicium Deo reservatum est, neque hactenus est nobis revelatum, quis Apostolorum in vera sanctitate apud Deum cæteris major fuerit. Neque item satis est quod Christus familiarius cum illo egisset, et in nonnullis actibus, quibusdam aliis eum præ tulisse videatur; nam hac ratione etiam Joannes dici poterit princeps ordine; imo et Jacobus, nam fuit unus ex illis tribus, quos in aliquibus negotiis Christus peculiares socios habere voluit. Præsertim quia sola illa peculiaris favoris aut amoris Christi ostensio non erat sufficiens fundamentum alicuius ordinis inter Apostolos permanens post Christi discessum. Accedit quod rex semper loquitur de ordine politico in hierarchia ecclesiastica, ad quam præteritus ille favor, seu benevolentia parum referebat, neque prudens aliquis Paulum reputabat ordine minorem, quia ex illis tribus non erat, vel quia Christo in mortali corpore viventi familiariter non adhæsit.

3. Denique eo modo quo Petrus inter Apostolos princeps censemur, non ab hominibus, sed a Christo, ac proinde jure divino illum principatum habuit; ergo si fuit princeps ordine, necesse est talem ordinem ab ipso Christo creatum et institutum esse. At non legimus Christum in Ecclesia sua instituisse dignitates alias, quæ, propter solum ordinem politicum, specialem honorem, aut sedes primas in sedendo aut loquendo sibi vendicent. sed legimus tantum, 1 ad Cor. 12, Christum posuisse in Ecclesia primum Apostolos, secundo Prophetas, tertio Doctores, alios Pastores et Doctores, ac denique alias gratias vel ministeria distribuisse; in his autem omnibus

non potest dici Petrus princeps inter Apostolos ratione ordinis. Ut ergo quod verum est asseramus, cogitatio talis ordinis politici in Ecclesia Christi, ut ab ipso institutæ, nupera est et novitia, nam ordo ille inter Petrum et alios Apostolos in superiori potestate ad regendum et gubernandum tam illos, quam universam Ecclesiam in perpetuum fundatus est. Et hoc docuit nos Christus, et legimus in antiquis Patribus; reliquæ vero adinventiones et novitates humanæ sunt.

4. Objectio regis contra probationem primatus Petri ex Scripturis.—Sed imprimis inventitur Rex contra duplicem illam probationem primatus Petri ex locis illis : *Tu es Petrus, etc., et Pasce oves meas.* Et prius quidem quasi Bellarminum irridens, pag. 22 ait : *Nec posterius disputationis meæ caput aliis machinis adoritur, quam illis Christi verbis : Pasce oves meas, et : Tibi dabo claves regni cœlorum.* Postea vero, pag. 24, sic (ait) novum, et egregium, scilicet, sensum his Christi verbis affinxit : *Pasce, etc., quasi hoc significant, tolle, proscribe, abdica christianos principes atque reges. His quoque quodcumque solveris, etc.* Ac denique pag. 128, eo progreditur, ut *invercundam ac impudentem vim* appellat, *illam, quam sensui illorum duorum locorum Cardinalis attulit, ut ex eis supremam in temporalibus Pontificis potestatem supra reges ac principes astrueret.* In his autem verbis nulla ratio nullumve testimonium objicitur, sed solum concivia et Protestantium calumnia, quibus rex fidem adhibet, proferuntur, ideoque possumus facile illa præterire; ne autem aliquem, ob rerum confusionem et veritatis ignorationem, moveant, falsa a veris discernere, et rem totam explicare necessarium est.

5. Solutio. — *Ex Scriptura immediate solum primatum Petri in spiritualibus probant Catholicæ.* — Bellarminus ergo, et nos omnes qui in hac causa unum sumus, ex illis locis non probamus proxime et immediate primatum Petri in civilibus seu temporalibus, sed in ecclesiasticis, seu spiritualibus; an vero hæc potestas spiritualis ad temporalia extenderatur, alia quæstio est tractanda et decidenda, et auctoritate ecclesiastice traditionis, et rationis, ex priori fundamento supremæ spiritualis potestatis, prædictis testimoniis comprobato. At rex ita refert Bellarmini probationem, ac si testimoniis illis, Pontificem absolutum temporealem dominum regnorum omnium esse, et suo arbitrio posse illa dare vel auferre, probare voluerit, quod a vera il-

lius mente longissime distat. Unde in sua response modeste prudenterque interrogat : *Ubi, quæso, expositionem illam tam incivilem et invercundam in libello meo vidisti?* Non igitur ipse affinxit sensum illum Christi verbis, qui nunquam in libris ejus extat, sed qui te decepit (o rex), eum sensum sine ulla specie verisimilitudinis affinxit. Igitur sensus quem Bellarminus illi testimoniis affinxit, idem est cum illo, quo primatum Petri in spiritualibus probavimus, qui vere quidem egregius est, et non novus, sed communi Patrum antiquorum consensu probatus.

6. Quando possit Pontifex principibus temporalibus regna adimere. — Ex hoc vero sensu, per illationem et necessariam consecutionem recte potuit Bellarminus eisdem testimoniis convincere Petri abdicandorum regum potestatem, non quidem omnium arbitratu suo, ita ut ad libidinem condonare et adimere regna possit, ut rex pag. 23 loquitur, sed haereticorum et incorrigibilium, vel ad illorum dignum supplicium, vel ad suarum ovium necessariam defensionem, ac proinde non ex dominio absoluto, vel directa (ut vocant) potestate, sed ex indirecta. Non dicat ergo rex Angliæ, verba, *Pasce oves meas*, ita a nobis exponi ac significant, *tolle, proscribe, abdica christianos principes*, hoc enim nullus Catholicus dixit. Si autem, quod verum est, sincere testatum cupid, dicimus, inter alia multa, quæ in illis verbis, et potestate per ea data continentur, etiam illud esse, *tolle, proscribe, abdica haereticos reges*, qui emendari nolunt, et subditis suis, in rebus ad fidem catholicam pertinentibus, perniciosi sunt. Hic autem sensus nullam vim verbis Christi afferit, sed necessaria consecutione ex eis elicetur; nec est novus, sed perpetua Ecclesiæ traditione comprobatus, neque ex illo directa potestas Petri in temporalibus, sed tantum indirecta colligitur, quam a supra spirituali potestate separari non posse ostendemus.

7. Secunda objectio. — Pergit autem rex obiciendo contra expositionem illorum locorum, quatenus ad probandam singularem Petri spiritualem potestatem afferuntur. Et primo argumentari videtur ab auctoritate Doctorum etiam catholicorum, qui variis modis loca illa sunt interpretati, unde Bellarminus allocutus, pag. 58 ait : *Sed neque est inscius quam rationem veteres afferant, cur Sancto Petro potissimum oves pascere Christus mandaverit.* Deinde ipse approbare videtur expositionem dicentium, utrumque, scilicet : *Tibi*

dabo claves, et : *Pasce oves*, Petro quidem dictum esse, sed ad omnes pertinuisse Apostolos, quorum ipse personas sustinebat. Quod inde confirmat, quia alibi potestas clavum in plurali numero concessa est, Matth. 18 : *Quaecumque alligaveritis super terram, erunt ligata et in cælo; et quaecumque solveritis super terram, erunt soluta et in cælo*. Ex quibus verbis colligere vult, clavum potestatem non minus cæteris Apostolis, quam Petro fuisse collatam, ac proinde non habuisse primatum. Imo multi sunt ex Protestantibus, qui non solis Apostolis, sed toti Ecclesiæ potestatem clavum collatam esse velint, quia in dicto loco Matthæ. 18, Christus dixerat : *Dic Ecclesie, si autem Ecclesiam non audierit, sit tibi tanquam ethnicus et publicanus*; et statim quasi rationem reddens subjungit : *Quaecumque alligaveritis super terram, erunt ligata et in cælo*; signum ergo est locutum fuisse Christum ad Apostolos vel discipulos, prout Ecclesiam repræsentabant, vel virtute continebant.

8. Responsio. — *Verba Joan. 21, Pasce, etc., ad solum Petrum dicta sunt.* — Sed quia hæc objectio utrumque testimonium involvit, et non est in utroque eadem omnino ratio, sigillatim de illis dicere necesse est. Et imprimis de verbis, *pasce oves meas*, non invenio apud veteres Patres dissentientes sententias aut expositiones, neque circa personam, cui singulariter dictum est *Pasce*, neque circa significationem verbi *pascendi*, neque circa personas nomine ovium et agnorum comprehensas. Quamvis enim in exponendis his duabus vocibus ultimis sit aliqua varietas, an illæ due voces *agni et oves*, easdem vel diversas personas significant, re tamen vera nulla discrepantia est, quæ ad præsentem causam referat. Omnes enim Catholici convenienter totum Christi gregem cunctasque oves fuisse Petro commissas, sive sub singulis vocibus agnorum et ovium, sive sub utraque simul propter diversas proprietates omnes significatæ fuerint. Et hinc necessario sequitur, verba illa ad solum Petrum pertinuisse, eique, non ut gerenti aliorum personam, sed propriissime et speciatim propter singulare munus ipsi commissum, dicta fuisse. Quod ex communī consensu Patrum in præcedenti capite satis probatum est, et ex contextu ipso satis probari potest. Tum quia Christus interrogando Petrum : *Diligis me plus his?* satis distinxit illum a cæteris, ut tantum cum propria ejus persona, non ut repræsentante cæ-

teros, sed ut ab illis distincta, negotium transigeret. Tum etiam quia sub nomine ovium alios Apostolos comprehendit, ut supra probatum est; ergo verbum *pasce*, necessario dictum fuit Petro ut soli, seu ut pastori sub aliqua ratione unice constituto: quia non poterant singuli Apostolorum simul esse pastores eorumdem universorum, neque ipsorum aliquis factus est pastor Petri, sicut Petrus cæterorum omnium est pastor constitutus.

9. Neque aliquis veterum Patrum, ut dixi, aliter quoad hanc partem verba illa intellexit. Quamvis enim nonnulli Patres dicant, quod tunc Christus Petro dixit, cæteris etiam Episcopis et Pastoribus Ecclesiæ dictum esse, intelligunt dictum esse in Petro tanquam in exemplari, et convenire aliis secundum convenientem proportionem. Nam, licet solus Petrus sit universalis pastor Ecclesiæ constitutus, non excluduntur particulares pastores, quorum singulis non omnes, sed quædam ex ovibus committantur, juxta illud 1 Petri 5 : *Pascite, qui in vobis est gregem Dei, ubi particula, qui in vobis est, particularem gregem determinat*; et Act. 20 : *Attendite vobis, et universo gregi, in quo posuit vos Spiritus Sanctus regere Ecclesiam Dei*. Sieut ergo alii pastores ad partem sollicitudinis cum Petro assumuntur, ita intelligere debent sibi esse dictum : *Amas me? pasce oves meas*. Non quia quando Christus similia fere verba protulit, ad omnes particulares pastores formaliter loqueretur, vel ad Petrum in persona omnium, sed quia virtus et ratio verborum Christi in omnibus pastoribus cum proportione locum habent. Non enim possunt esse recte dispositi ad pascendum gregem Christi, nisi ipsum ament Christum. Et hoc sensu dixit Augustinus, libro de Agone Christiano : *Cum Petro dicitur, ad omnes dicitur: Amas me? pasce oves meas*.

10. *Prima expositio verborum Matth. 16,* Et super hanc petram, etc. — *Secunda expositio.* — *Etiam auctores prædictarum expositorum Petrum fundamentum Ecclesiæ constituunt.* — *Fundamentum Ecclesiæ quomodo in Petrum, et fidem quadret.* — Venio ad alium locum Matth. 16, in quo nonnulla major est expositorum varietas, præsertim quoad illa verba : *Et super hanc petram;* nam interdum Patres exponunt illam particulam *hanc*, designare fidem Christi Dei et hominis, super quam dicunt fundatam esse Ecclesiam, ut indicat Chrysostomus ibi, hom. 55, et Hilarius,

Frequenterque alii dicere solent, fidem esse fundamentum Ecclesiæ. Alii vero exponunt Christum dicendo, *super hanc petram*, se ipsum designasse, quia, ut dicitur 1 ad Cor. 3, *fundamentum aliud nemo potest ponere præter illud, quod positum est, quod est Christus Jesus*, de quo c. 10 dicitur: *Petra autem erat Christus*. Quam expositionem habet Augustinus, tract. 27 et 124 in Joan., et serm. de Verbis Domini. Verumtamen nullus ex his Patribus, qui aliter hunc locum exposuit, negavit Petrum esse peculiari modo petram, et fundamentum Ecclesiæ, ut supra de Hilario et Chrysostomo ostensum est; et idem est de Ambrosio, et aliis, qui solent pro expositione priori allegari. Nam eisdem locis utrumque dicunt, scilicet, et Petrum, et fidem Christi, seu confessionem ejus, esse fundamentum Ecclesiæ. Utrumque enim sub diversis rationibus verum est, quia Petrus tanquam Christi Vicarius, locum ipsius absentis tenens, Ecclesiæ fundamentum est, camque suo modo post Christum sustinet. Fides autem dicitur fundamentum, tanquam ratio fundandi (ut sic dicam), nam propter fidem singularem Petrus factus est Ecclesiæ fundamentum, et per fidem constitutus est firma petra ad Ecclesiam fundandam accommodata. In hoc ergo sensu dicti Patres locuti sunt, et Chrysostomus, hom. 2 in Psal. 50, recte dixit: *Ob robur confessionis vocatus est Petrus, dicente Domino: Tu es Petrus, et super hanc petram*, etc. Quod si non de fide Petri in specie, sed de fide in genere sermo sit, illa etiam dicitur fundamentum Ecclesiæ, quia est prima ratio, et quasi forma, Ecclesiæ membra constituens, et uniens. Et hoc modo solent interdum illa verba per accommodationem, et in sensu mystico ad totam Ecclesiam et singulos fideles applicari, ut fecit Origenes, tract. 4 in Matth. Qui tamen non negat, in proprio et litterali sensu solum Petrum ibi esse a Christo nomine *petræ* significatum, et in fundamentum Ecclesiæ promissum, ut ex eodem constat, homilia quinta in Exod.

11. *Expenditur.* — Altera vero sententia Augustini, quod petra sit Christus, quoad doctrinam per se spectatam verissima est, quoad sensum autem verborum Christi difficile accommodari potest. Nihil enim verius dici potest, quam Christum esse lapidem angularem, et petram in qua principaliter Ecclesia fundata est, imo solum Christum per se et virtute sua Ecclesiæ fundamentum esse.

Quod vero in dicto loco Matthæi de se fuerit Christus locutus, aut dicendo: *Super hanc petram*, se ipsum signaverit, revera non potest litterali ac proprio verborum sensui accommodari, ut ex dictis in superiori capite manifestum est. Unde vel expositio Augustini non ut litteralis, sed ut mystica ab ipso est tradita; vel ad præcedentem expositionem reduceenda est. De Christo enim loquitur, ut est objectum fidei, quam confessus est Petrus, et ita eo modo dicitur, per *hanc petram*, Christus indicari, quo fides, utique ut ratio propter quam Petrus factus est Ecclesiæ fundamentum. Sic autem loqui Augustinum de Christo ex ejus verbis sumi potest. Nam lib. 1 Retract., c. 21, sic ait: *Postea sic exposui quod a Domino dictum est: Tu es Petrus, et super hanc petram*, etc., *ut super hunc intelligeretur, quem confessus est Petrus dicens: Tu es Christus*, etc. Adde, Augustinum propone re sensum illum non ut certum, sed ut probabilem, et ad illum motum fuisse ex diversitate vocabuli Petri et *petræ*, quæ in re nulla fuit, ut jam dixi. Denique Augustinus alium sensum non excludit, multoque minus de veritate ipsius sententiae dubitat, quod Petrus etiam fuerit petra, in qua fundata sit Ecclesia; id enim saepè docet in locis capite superiori allegatis; in dictoque c. 21, lib. 1 Retract., ait, sensum illum ore multorum cantari in versibus B. Ambrosii: *Hoc ipsa petra Ecclesiæ canente culpam diluit*.

12. *Potestas ligandi et solvendi perpetua et independens extitit in Petro, in aliis vero dependenter ab illo.* — Denique quod rex objicit de verbis: *Quæcumque ligaveris*, quod alibi in plurali dictum sit: *Quæcumque ligaveritis*, difficultatem non habet, nam certum est et Petrum et Apostolos potestatem ligandi et solvendi receperisse; verumtamen ipsa verborum differentia ostendit, aliter Petro, aliter omnibus Apostolis potestatem illam fuisse promissam. Nam Petro promissa est ut ordinaria et universalis, ac perpetuo in Ecclesia permansura, aliis vero Apostolis data erat, vel solum quasi delegata pro corum personis; vel si consideretur ut in Episcopis eorum successoribus permansura erat, data est dependenter a Petro et per Petrum, ut Leo Papa, Anselmus, et alii Patres supra allegati adnotarunt. Et ex circumstantiis utriusque loci id manifeste colligitur, ut ex dictis in superiori capite satis constat. Sicut Joan. 20, generaliter Petro et aliis dixerat Christus: *Sicut misit me Pater, et ego mitto vos*; et nihilominus

cap. 21 specialiter dicit Petro : *Pasce oves meas*, utique tanquam supremus Pastor, omnibus, etiam ipsis Apostolis superior.

13. *Exponuntur quædam loca Augustini.* — Neque contra veritatem hanc obstant nonnulla testimonia Augustini, quæ hic objici solent, quia dicit Petrum, quando claves accepit, Ecclesiam significasse; intelligit enim significasse Ecclesiam, quia ut Ecclesiæ princeps potestatem clavium accepit, non pro sua persona tantum, sed ut in Christi Ecclesia, et in successoribus, et aliis Pontificibus et Episcopis, adjutoribus suis, perpetuo durarent. Et ita dixit tract. 50 in Joan.: *Si hoc Petro tantum* (id est, pro sua tantum persona) *dictum est, non facit hoc Ecclesia*, quia nimis cum Petro potestas extincta fuisset. Unde quia nunc Ecclesia etiam ligat et solvit, infert: ergo *Petrus, quando claves accepit, utique Ecclesiam sanctam significavit*. Quæ illatio nulla fuisset, si intellexisset, Petrum repræsentasse Ecclesiam tanquam vices ejus gerentem, quia id neque necessario sequitur, neque verum est. Cum neque Ecclesia hanc repræsentationem seu delegationem Petro commiserit, nec Christus sua potestate illam fecerit, cum verbis suis illam non significaverit. Ergo intellexit Augustinus, Petrum Ecclesiam tunc repræsentasse ratione sui primatus et sedis; sic enim quod datur capiti propter corpus, censetur dari Ecclesiæ in suo capite, sicut quod datur regi ad regendum, regno dari existimatur. Et sic dixit idem Augustinus tract. 424 in Joan., Petrum propter primatum suum personam Ecclesiæ gessisse. Quod apertissime explicat dicens: *Ecclesia, quæ fundatur in Christo, clares regni cœlorum accipit in Petro.*

14. *Expositio erborum Augustini ex Christi verbis comprobatur.* — Denique hic etiam fuit modus loquendi Christi, Matth. 18: *Dic Ecclesiæ*, id est, Ecclesiæ pastoribus, ut omnes exponunt, et res ipsa clamat; non enim potest peccatum fratris toti cœtui Ecclesiæ denunciari, sed Pastores nomine Ecclesiæ significantur, quia Ecclesia est in Episcopo tanquam in capite. Simili ergo modo dicitur Petrus in dictis locis Ecclesiam repræsentasse. Et ita etiam solutum relinquitur, quod ex eodem loco Matthæi objiciebatur, quia quod subjunxit Christus, *Si Ecclesiam non audierit, sit tibi tanquam ethnicus et publicanus*, simili modo pastores Ecclesiæ intellexit; eisdem ergo, seu ratione illorum dixit: *Quæcumque alligaveritis, ibique in plurali lo-*

cutus est, quia peccata non erant denuncianda soli supremo Pastori, sed etiam cœteris, ideoque, ut diximus, sine præjudicio singularis potestatis Petri illud dictum est: Nam si quid cum eo commune cœteris voluit esse principibus, nunquam nisi per Petrum dedit, quod aliis non negavit, ut egregie Leo Papa, serm. 3 Assump. suea.

15. *Instantia in Præfat., p. 58. — Refellitur.* — At vero contra responsonem hanc urget rex ulterius in hæc verba: *Quod ni esset* (id est, si non Apostoli omnes, vel Petrus, nomine omnium, æque a Christo claves accepisset), *qui potuit, queso, Paulus Corinthonum Ecclesiæ auctor esse incertum illum excommunicandi, cum spiritu suo?* Dicendum sane fuerat cum spiritu Petri. Qui potuerunt omnes Apostoli censuris suis in nomine Christi uti, nec ullibi ejus Vicarii meminisse? Verumtamen hæc conjectura parvi momenti est. Nam imprimis licet Petro claves singulariter datæ sint, nihilominus etiam Paulo et aliis Apostolis immediate Christus contulit ligandi et solvendi potestatem, et ideo recte potuerunt censuras ferre in nomine et virtute Christi, cuius erant proximi ministri, nulla Petri facta mentione. Deinde etiam si a Petro immediate potestatem accepissent (sicut nunc Episcopi accipiunt, juxta probabiliorem sententiam), non oporteret in ferenda excommunicationis sententia, Vicarii Christi meminisse, sicut neque nunc Episcopi catholici, licet Episcopum Romanum ut Christi Vicarium recognoscant, cum excommunicationis sententiam ferunt, non dicunt in nomine vel virtute Papæ, sed vel simpliciter utuntur sua ordinaria potestate, vel dicere etiam possunt in virtute Christi, vel per potestatem sibi a Christo concessam. Et ratio est, quia licet Petrus sit universalis Pastor Ecclesiæ, non est tamen principalis auctor et dominus, sed illius Vicarius. Unde etiam ipse Petrus, ferendo censuram, dicere poterat in nomine Domini nostri Iesu Christi, id est, vice et auctoritate ejus. Idem ergo facere possunt inferiores Prælati, quia, licet mediante Petro tanquam dispensatore, principaliter a Christo habent auctoritatem, et in virtute illius operantur. Sicut prorex alij cœtus regni vel provinciæ saepè auctoritatem a rege accipit constituendi per civitates gubernatores et magistratus, et nihilominus illi omnes in publicis sententiis, et præsertim

quando gladio utuntur, se auctoritate regia, non proregis, id facere profitentur.

16. *Prælatus inferior potest in censura sua addere, se id facere potestate a Pontifice accepta, addere vero in virtute Papæ non ita congruit.* — Nec tamen nego posse ministrum vel legatum Pontificis excommunicando dicere, se id facere potestate a Pontifice accepta. Nam verum dicent, et sine injuria Christi; quia per illa verba non attribuitur effectus Pontifici ut principali cause simpli-citer, sed tantum in genere ministri, seu Vicarii communicantis jurisdictionem suam. Quod secus fortasse esset, si diceretur in nomine aut virtute Petri, aut Papæ, quia hæc verba videntur significare auctoritatem principalis domini, ut sensit D. Thomas, 4 ad Corinth. 5. Et ideo talis modus loquendi non est in usu. Alio vero, scilicet, auctoritate mihi a Papa concessa, vel alio simili, uti solent interdum ecclesiastici judices, præsertim delegati. Dico tamen etiam illum modum loquendi non esse necessarium neque usitatum ab ordinariis Pastoribus, ut sunt Episcopi, qui post acceptam potestatem ad modum causæ proximæ suo jure utuntur. In Apostolis vero, ut dixi, intercessit major ratio, quia non a Petro, sed immediate a Christo habuerunt auctoritatem. Unde constat merito dixisse Paulum, *et spiritu meo*, nec debuisse, imo nec potuisse dicere, *et spiritu Petri*, tum prepter rationem datam, quia Paulus non habebat potestatem a Petro, quia erat Apostolus non ab hominibus, neque per homines, sed per Jesum Christum, ut ipse dicit ad Galat. 1; tum etiam quia ibi particula illa, *et spiritu meo*, non significat virtutem seu potestatem operandi, sed conditionem necessariam ad judicandum, nimurum, notitiā sufficiētē causæ, ut patet ex illis verbis : *Absens corpore, præsens autem spiritu, jam judicavi ut præsens eum, qui sic operatus est*; nam in eodem sensu subjungit, *congregatis robis, et meo spiritu*, id est, mea notitia, et spirituali præsentia. Hæc autem conditio non poterat attribui Petro, imo neque proprio Christo, quia est propria et personalis conditio requisita ex parte ministri, præter quam requiritur auctoritas principalis domini, ideoque Paulus addidit, *cum virtute Domini nostri Jesu Christi*.

17. *Ultima objectio ex varijs indiciis.* — *Primum indicium in Praesatione*, pag. 59. — *Secundum indicium.* — *Tertium.* — *Quartum.* — Tandem objicit rex indicia quædam di-

recte contra Petri primatum. Unum est, *quia in omnibus Apostolorum congressibus Petrum, ut e multis unum, legimus inter illos con-sesse*, ut in Concilio, cuius fit mentio Actor. 45. Ubi etiam ad nuncios mittendos, solum dicitur : *Visum est Apostolis, et presbyteris, totique Ecclesie mittere electos viros. Sed merum* (ait rex) *de Ecclesie capite silentium. Sic in eorum litteris, Apostolorum, seniorum et fratrum fit mentio, de Petro nec verbum.* Alterum indicium est, quia Paulus, 4 ad Cor. 1, aequre reprehendit dicentes : *Ego sum Cephae*, ac dicentes : *Ego sum Pauli*, ego autem *Apollo*; cum tamen si Cephas esset caput Ecclesie, damnandi potius essent, qui ab eo non stabant, tanquam a fide catholica receden-tes, et soli Petri sectatores habendi essent fideles. Tertium indicium est, quia Paulus, ad Galat. 2, cum Petro tam parum comiter egit, ut illi nou se æquaret modo, sed etiam anteferret. Quartum indicium, licet per irri-sionem positum, addit, quia Paulus, ad Galat. 1, dicens se profectum Hierosolymam, *ut Petrum viseret, et certis de rebus cum eo ageret*, non addit, *eo quoque se ad sacra pe-dum oscula esse profectum*.

18. *Petrus in omnibus congressibus, tanquam caput, primum locum obtinuit.* — Hæc vero et similia digna non sunt, quæ contra totius Ecclesie auctoritatem, et verba Christi satis expressa proponantur, illis tamen satis-faciendum est, ne aliquid omisso videamur. Ad primum imprimis dicimus falsum esse quod sumitur, nam Actor. 1 refertur quidam Apostolorum congressus, et tamen non solum Petrus tanquam caput primo loco ponitur, sed etiam ipse, tanquam caput, totum coetum allocutus est, et de creando duodeci-mo Apostolo loco Judæ decrevit, quod alii secuti sunt. Ubi recte Chrysostomus, Homil. 3, inquit : *Quam est servidus, quam agnoscit cred' tum a Christo gregem, quam in hoc choro princeps est*; ergo, teste Chrysostomo, quem alii sequuntur, in illo conventu Petrus ut su-perior cæteris, et universalem curam gerens, proponitur. Quod etiam notavit Leo Papa IX, ep. ad Michaelem, e. 16, dicens, ibi Petrum auctoritate suam usum fuisse. Unde non sine causa fere semper nbi numerantur Apostoli, primo loco ponitur Petrus tanquam dux et princeps cæterorum, quod non casu, neque ob aliam excellentiam aut prærogativam factum esse, eruditè Bellarminus ostendit, lib. 1 de Sunno Pontif., e. 48. Quocirca etiam in Hierosolymitano Concilio primus est qui lo-

quitur, et magna auctoritate suam sententiam profert, quod etiam ad primatum, et (ut sic dicam) ad præsidentiam ejus in Concilio pertinuisse, multi adnotarunt. Unde necessarium non fuit, postea in decernenda legatorum missione, vel in forma decreti specialem mentionem Petri facere, tum quia Petri et sententiæ ejus jam facta sufficienter fuerat; tum etiam quia non specialiter nomine Petri, sed nomine totius Concilii epistola et definitio scribebatur. Addi etiam potest, in auctoritate et spiritu non errandi in fide habuisse tunc Apostolos quamdam æqualitatem, et ideo quoad hoc omnes in primo ordine positos fuisse.

19. Ad secundum. — Ad secundum indicium respondemus, nihil ad præsentem causam pertinere; nam, ut notat Chrysostomus, Orat. 3 in 1 ad Corinth., inter Corinthios *non erant schismata, eo quod in fide dissiderent, sed ex eo quod humana contentione divisa esset sententia.* Quod satis explicuit idem Paulus, tum blande et leniter eos obsecrando, *ut sint perfecti in eodem sensu, et in eadem sententia;* tum explicando quales essent contentiones, quia de privatis magistris aut baptizatoribus gloriabantur, et ab eis nominabantur, dicentes: *Ego sum Pauli, ego Apollo, ego Cephe.* Posuit autem Paulus suum, et Petri, et Apollinis nomen, non quia revera sub his nominibus divisiones et contentiones fierent, sed illa ponendo loco illorum, qui erant capita factionum, vel ne illos nominando magis exacerbaret, vel ut rem magis exaggeraret, nam si sub nominibus Principum Apostolorum non licebat contentiones et divisiones facere, multo minus aliorum nominibus. Cum ergo contentiones solum essent, quod unusquisque de proprio magistro seu ministro gloriabatur, ac si melius ab eo esset baptizatus aut instructus, non oportebat vel damnare eos, qui a Cepha non nominabantur, vel eos laudare, qui de illius baptismō gloriabantur, sed illos tantum commendare, qui dicebant: *Ego sum Christi.* Quia neque illi, qui dicebant: *Ego sum Pauli, vel Apollo, a Petro visibili capite in fide dissidebant, sed solum in speciali affectu, vel estimatione baptismi, aut magistri sui;* nec qui Cephæ se esse dicent, in hoc essent tolerandi, quia, licet Petrus esset visibile caput, non tamen ut princeps supremus, sed ut Vicarius principis, qui est solus Christus, a quo solo nominandi sunt Christiani. Nec per privatos affectus etiam circa Petrum et Paulum

dividendum est Christus, seu Christianorum nomen, quia nec baptismus est melior, eo quod a meliori ministro detur, neque similes contentiones in Ecclesia movendæ sunt.

20. Ad tertium. — De tertio indicio, sumpto ex facto Pauli resistentis Petro, dici possent multa, nisi nuper in libro nono de Legibus a nobis dicta fuissent, ideoque breviter dico, etiam antiquos hæreticos inde sumpsisse argumentum contra dignitatem, vel potius contra doctrinam Petri. Quibus uno verbo respondet Tertullianus, libro de Præscrip. hæret., dicens: *Cæterum si reprehensus est Petrus, conversationis fuit vitium, non prædicationis.* Falsum ergo est Paulum aut parum comiter egisse cum Petro, aut illum sibi æquasse, nedum antetulisse. Quid enim? si rex Angliæ minus considerate, et cum scandalo suorum subditorum aliquid ageret, et aliquis familiaris vel consiliarius suus eum moneret id non recte fieri, vel esse injustum, aut aliis esse offendiculo, ideo se regi anteferret, aut illum ut regem non recognoscere? Minime vero, alioqui nunquam licebit subdito fraterne corripere Prælatum suum, aut illi cum debita reverentia resistere, ut scandalum publicum tollatur, quod diei non potest. Igitur ex illo facto Pauli, colligi non potest se anteposuisse Petro in potestate vel prælatione; nam, licet esset inferior, poterat illo charitatis officio uti. Et ita intellexit locum illum Augustinus, ep. 19, et D. Thomas, 2. 2, q. 33, art. 4, ad 2.

21. Ad quartum. — Ad quartum, de profectione Pauli ad videndum Petrum, Galat. 1, certe Hieronymus ibi dicere non dubitavit, ascendisse *studio honoris priori Apostolo deferendi;* et Ambrosius: *Dignum fuit ut ruperet videre Petrum, qui primus erat inter Apostolos, cui delegaverat Salvator curam Ecclesiarum.* Et alii etiam Patres ita sæpe loquuntur. Et quamvis fateamur, ex solo illo facto Pauli non colligi necessario prælationem Petri, tamen suppositis aliis testimoniis dignitatem Petri commendantibus, magnum indicium inde sumitur, Paulum recognovisse Petrum ut caput suum et universalem Ecclesiæ pastorem, ideoque quamprimum commode potuit, ascendisse Hierosolymam invisere illum, et debito proseQUI honore. Nec dubitandum est quin Paulus pro humilitate sua pedes Petri osculari cuperet; verumtamen nec id modestia et submissio Petri permisisset, nec denique necesse fuit Paulum eo loco referre modum honoris ac reverentiæ,

quam Petro exhibuit. De consuetudine autem venerandi Pontificem per pedum oscula, cui tacite rex Angliæ hic detrahere voluit, non est hic dicendi locus; legat cui placuerit Josephum Stephanum, opusc. de Adorat. pedum, in tom. 13 Tractatum.

CAPUT XII.

AN PRIMATUS PETRI PERPETUO ET PER SUCCE-
SOREM IN ECCLESIA PERSEVERET.

1. *Hæreticorum error.* — Non desunt ex hujus temporis hæreticis, qui non solum absolute negent Petrum, vel Pontificem Romanum esse totius Ecclesiæ pastorem, Christive Vicarium, sed etiam ex hypothesi, licet Petrus illam prærogativam habuisse, cum illo extinctam fuisse dicant, ut hoc modo facilius in Pontifice Romano perseverare abnegent. Ut ergo errorem hunc funditus evertamus, et per eosdem gradus ad veritatem intentam perveniamus, prius ostendemus hoc capite, Petrum non extraordinario jure, seu singulare, vel (ut sic dicam) vitali privilegio, sed jure ordinario, et ratione Ecclesiæ perpetuo duraturæ, Vicarium Christi creatum fuisse, postea vero ad Romanum Pontificem in sequenti capite gradum faciemus.

2. *Conclusio de fide.* — *Primatus Petri cum ejus vita non fuit extinctus.* — *Probatur Matt. 16.* — Principio igitur statuimus, primatum Petri non illi soli pro sua persona fuisse collatum, sed, ut perpetuo in Ecclesia duraret, in eo fuisse institutum. Hoc facile probari potest ex dictis in duobus capitibus præcedentibus. Nam hac ratione, postquam Christus dixit Petro: *Tu es Petrus et super hanc petram ædificabo Ecclesiam meam*, statim adjungit: *Et portæ inferi non prævalebunt adversus eam*, promittens perpetuam Ecclesiæ durationem in Petro fundatam, tanquam in petra firmissima, et perpetuo duratura, ut supra, lib. 4, late comprobatum est, et confirmatum ex alia Christi promissione: *Ego rogari pro te, Petre, ut non deficiat fides tua.* Et hac etiam ratione dixit Augustinus, ut præcedenti capite explicuimus, Petrum repreäsentasse Ecclesiam, quando illi claves datae sunt, quia non pro illius tantum persona, sed pro illius sede, ut perpetuo cum Ecclesia duraret, eamque regeret, suoque modo sustentaret, illi datae sunt. Unde sicut ex illis verbis: *Tu es Petrus*, etc., intulit Ambrosius, Psal. 40, ita nos inferre possumus:

Ubi Ecclesia, ibi Petrus, et quamdiu durat Ecclesia, tamdiu durat Petrus, quod etiam significavit idem Ambrosius, subjungens: *Ubi Ecclesia, ibi nulla mors, sed vita æterna;* et ideo addidit: *Et portæ inferi non prævalebunt ei.* Recte quidem dixit: *Ubi Ecclesia, ibi nulla mors*, quia, licet singuli in Ecclesia moriantur, Ecclesia non moritur; et licet Petrus defecerit, sedes Petri non deficit.

3. Alia præterea verba Christi, *Pasce oves meas*¹, si ejus intentio et institutionis ratio prudenter considerentur, non minus efficaciter dictam veritatem confirmant. Nam imprimitus ratio ex Patribus supra addueta, quod Christus indefinite Petro commendans oves suas, universas oves illius curæ commisso intelligitur, æque in totius temporis ac in cunctis locis ovibus procedit, quia sicut futuræ erant oves Christi in diversis locis, ita in diversis temporibus, et in quolibet tempore oves indigebant supremo aliquo Pastore, sicut et in omni loco. Denique cum Christus dixit: *Pasce oves meas*, certum est non fuisse locutum de solis ovibus, quæ jam tunc erant in ovile suum congregatae, paucæ namque illæ erant, Christus autem futuræ Ecclesiæ suæ ex omnibus gentibus congregandæ providebat. Igitur non tantum præsentes, sed etiam futuras oves suas Petro commendavit, cumque limitationem temporum non adhibuerit, omnium temporum oves Petro commisit, sicut de loco diximus, vel de numero dici potest. Dicit aliquis, recte hinc probari, commendatas fuisse Petro oves etiam futuras, dum ipse viveret, non vero postea futuras. Quomodo enim futuras post se oves pascere posset? Respondetur illud esse incredibile, quia alias non satis Christus ovibus suis providisset, cum tamen non minorem curam gereret ovium post mortem Petri futurarum, quam ipso vivente. Unde recte Chrysostomus, hom. 55 in Matt.: *Aperte (inquit) hic prædictit magnam eorum, qui credituri, et erant, et sunt, multititudinem fore, et sublimiora sapere ipsum facit, et Ecclesiæ Pastorem constituit*, utique futuræ, ex omnibus qui erant et sunt credituri. Neque est difficile ad explicandum quomodo Petrus post mortem suam potuerit pascere oves Christi in hoc mundo relictas. Tum quia hinc intelligimus Christum non tantum Petro in persona sua, sed Sedi Petri, seu Petro ut continentis in se tanquam in semine et fun-

¹ Joan. 21.

damento omnes successores suos, oves suas commendasse. Tum etiam quia propter hanc causam ad pastorale munus Petri pertinuit providere modum quo sibi succederetur, ut oves Christi sine Petro Pastore non relinquerentur, etiamsi persona Petri deficeret, et ita usque hodie Petrus pascit oves Christi per successores suos.

4. Atque hoc confirmant optime verba Christi, Joan. 10 : *Alias oves habeo, quæ non sunt ex hoc ovili, et illas oportet me adducere, et fiet unus ovile et unus Pastor.* Nam ex illis colligimus, in Ecclesia Christi tam esse futurum semper unum Pastorem sicut unum ovile, ac subinde Pastorem illum a Christo datum et institutum, duraturum esse donec totum ovile Christi congregetur. Significavit etiam Christus in illis verbis, Pastorem unum in Ecclesia sua necessarium esse propter ovilis unitatem; hæc autem unitas ovilis omni tempore servanda erat, quia in omni tempore una est Ecclesia; ergo et unus Pastor a Christo constitutus pro omni tempore datus est, non in eadem persona, sed in eodem throno, sicut Ecclesia una est, non in eisdem personis, sed in ejusdem populi successione. Unde Augustinus, lib. de Pastorib., c. 13 : *Hic invenio (inquit) omnes pastores bonos in uno pastore. Non enim rere boni pastores desunt, sed in uno sunt. Multi sunt qui divisi sunt. Hic unus prædicatur, quia unitas commendatur. Neque enim vere modo ideo tacentur pastores, quia non invenit Dominus cui commendet oves suas; tunc autem ideo commendavit, quia Petrum invenit. Imo vero in ipso Petro unitatem commendavit. Multi erant Apostoli, et uni dicitur: Pasce oves meas.*

5. *Erasio.* — *Rejicitur.* — Sed dicent forte adversarii, illum unum Pastorem esse Christum, nam statim Augustinus addit : *Omnes boni pastores in uno sunt, unum sunt, illi passunt, Christus pascit.* Respondetur, Christum quidem esse principalem pastorem, in quo omnes alii pastores simul etiam cum Petro nituntur, et uniuntur, nihilominus tamen etiam in terris necessarium esse unum Pastorem Christi Vicarium, in quo inferiores pastores proxime uniantur et nitantur. Quia sicut Ecclesia militans visibilis est, ita Deus in ea posuit visibles pastores et Doctores, cum quibus plebs uniri debet, et ut ipsi pastores inter se uniantur, necessarius etiam est unus pastor visibilis, qui locum Christi absentis teneat. Unde Augustinus supra subjungit : *Nam et ipsum Petrum, cui commendavit oves suas,*

quasi alter alteri unum secum facere volebat, ut sic ei oves commendaret, ut esset ille caput, ille figuram corporis portaret, id est Ecclesia, et tanquam sponsus et sponsa essent duo in carne una. Et serm. 24 de Sanctis, cap. 2, in eodem sensu dixit : *In uno Petro figurabatur unitas omnium pastorum.*

6. Multo vero clarius et copiosus Cyprianus, libro de Unit. Eccles., circa principium : *Ut unitatem (inquit) manifestaret, unam cathedram constituit, et unitatis ejusdem originem ab uno incipientem sua auctoritate dispositu.* Ubi manifeste institutionem et dispositionem unius cathedræ, ad unitatem Ecclesiæ conservandam institutæ, distinguit ab ipsomet Christo instituente. Et similiter præter Christum designat unum alium pastorem, in quo illa cathedra et institutio incepit, ut ab illo originem duceret, non ut cum illo finiretur. Unde subjungit : *Exordium ab unitate proficiscitur. Primatus Petro datur, ut una Christi Ecclesia, et cathedra una monstretur,* sentiens tantum durare cathedram illam, quantum Ecclesia durat. Et hoc ipsum multis aliis locis significavit idem Cyprianus, præsertim epist. 40 : *Deus unus est, et Christus unus, et una Ecclesia, et cathedra una super Petrum Domini voce fundata.* Et epistol. 55, ubi habet illam celebrem sententiam, *inde oriri hereses, et schismata, quod sacerdoti Dei non obtemperatur, neque unus in Ecclesia ad tempus sacerdos, et ad tempus iudex vice Christi cogitalur.* Et similia fere habet epistol. 69 ad Florentinum, et epistol. 73 ad Juvianum : *Petro (inquit) primum Dominus, super quem ædificavit Ecclesiam, et unde unitatis originem instituit et ostendit, potestatem istam dedit, ut illud solveretur in cælis, quod ipse solvisset in terris.* Quem locum recognoscens Augustinus, lib. 3 de Baptismo, cap. 17, dicit : *Quia in typo unitatis Petro Dominus dedit potestatem, manifestum est quod illa unitas etiam una columba perfecta sit dicta.* Ex ratione ergo illius institutionis, manifestum est non fuisse solum speciale favorem, vel gratiam personæ Petri factam, sed dispositionem regiminis perpetuo in Ecclesia duraturi.

7. *Ratione probatur assertio.* — Unde etiam sumitur ratio moralis, in optima Ecclesiæ gubernatione fundata. Est enim Christus Dominus supremus rex, quem dedit Deus caput supra omnem Ecclesiam, ut ad Ephes. 1 dicitur, id est, supra triumphantem et militarem, quæ una est, et unum corpus Christi,

quasi ex illis duabus partibus constitutum, ut ibidem, et ad Colossem. 1, dicitur. Sunt ergo illae duæ Ecclesiæ quasi duo regna parcialia unius integri regni Christi, ideoque ad ipsum tanquam ad proprium regem pertinet utriusque regni gubernatio. Fieri non poterat sine ingenti et extraordinario miraculo, ut simul esset Christus visibiliter præsens in utraque hujus regni parte, et alioqui coelestis locus post resurrectionem ratione status illi debitus erat, et ad fidem credentium non expediebat ut inter eos Christus visibiliter permaneret, sicut ipse dixit : *Expedit vobis ut ego vadam*; ideoque coeleste regnum per se ipsum nunc immediate regit. Ergo cum non possit eodem visibili modo partem hanc militantem sui regni gubernare, ad illius sapientiam pertinuit modum regiminis hominibus accommodatum in eo providere. Ergo sicut regnum hoc duraturum est quamdiu mundus duraverit, ita modus regiminis ejus non potest esse alius, nisi quem Christus instituit, et e converso institutio regiminis ejus ita facta est, ut non minus quam regnum ipsum sit duratura, alioqui imperfecta fuisset et insufficiens. Fuit autem illa institutio monarchiae in Petro, ut vidimus; ergo non tantum pro Petro, sed etiam pro successoribus ejus facta est. Quod his fere verbis declaravit Cyprianus, epist. 27: *Dominus noster Ecclesiæ suæ rationem disponens in Evangelio loquitur, et dicit Petro: Ego dico tibi, quia tu es Petrus, et super istam petram aedificabo Ecclesiam meam.* Et infra : *Inde per temporum et successionum rives Episcoporum ordinatio et Ecclesiæ ratio decurrat, ut Ecclesia super Episcopos constituantur, et omnis actus Ecclesiæ per eosdem præpositos gubernetur.* Ubi non solum Pontificatus Romani, sed etiam omnium aliorum Episcoporum successionem ab illa primaria, et quasi radicali institutione derivari significat, quod libro etiam de Unit. Eccles. latius prosequitur.

8. Denique non solum Petro, sed etiam successoribus ejus datam esse potestatem et pastoralem curam, et ita primatum ejus esse perpetuum, aperte declarat Leo Papa, in serm. 2 de Assumpt. sua, dicens : *Et si multis pastoriibus curam suarum ovium delegavit, ipse tamen dilecti gregis custodiam non reliquit. De cuius principali aeternoque præsidio etiam apostolicae opis munimen accepimus, quod utique ab opere suo non vacat, et firmitas fundamenti, cui totius Ecclesiæ superstruitur altitudo, nulla incumbentis sibi templi mole las-*

sescit. Soliditas enim illius fidei, quæ in Apostolorum principe est laudata, perpetua est, et sicut permanet quod in Christo Petrus cre-didit, ita permanet quod in Petro Christus in-stituit. Et infra : *Manet ergo dispositio veritatis, et cætera, quæ prosequitur.* Et simili modo Chrysostomus, lib. 2 de Sacerdot., ubi tractans locum Joan. 21, inter alia inquit : *Quanam de causa Christus sanguinem effudit suum? certe ut pecudes eas acquireret, quarum curam tum Petro, tum Petri successoribus com-mittebat.* Et adjungit : *Jure igitur ac merito sic loquebatur Christus: Quisnam fidelis ser-vus et prudens, quem constituit dominus super familiam suam?* Et infra dicit aperte, succe-sores Petri ea nunc agere, quæ cum Petrus ageret, inquit, illum Christus auctoritate pre-ditum esse voluit, ac reliquos item Apostolos longe præcellere. Similiter D. Augustinus, libro de Utilit. credendi, c. 16, per successiones Episcoporum ab apostolica sede hanc perpe-tuitatem declarat; et lib. 11 contra Faustum, c. 2 : *Vides in hac re, quid Ecclesiæ Catho-licæ valeat auctoritas, quæ ab ipsis fundatis-simis sedibus Apostolorum usque ad hodier-num diem succendentium sibimet Episcoporum serie, et tot consensione firmatur.* Et eodem modo hanc veritatem declarant Optatus, Pa-cianus, et alii, quos in sequenti capite com-modius referemus.

9. *Objectio. — Diluitur objectio, et retor-quendo.* — Sed objicere possunt hæretici, quia alii Apostoli pro suis tantum personis legatio-nem seu dignitatem apostolicam acceperunt; ideoque post mortem non habuerunt in illa dignitate successores: ergo nec Petrus in suo apostolatu successorem habuit, quia licet in-ter Apostolos fuerit primus, et inter eos prin-cipatum aliquem vel potestatem acceperit, propter servandum ordinem et concordiam, nihilominus nulla major ratio successionis in eo quam in aliis reperitur. Respondetur, con-trarium posse eodem argumento probari, nam in Apostolis duo considerari possunt a Christo Domino illis collata, scilicet, potestas ordinis, et dignitas apostolica. Prior nihil aliud in eis fuit praeter ordinationem, seu consecra-tionem episcopalem, que ad fundamenta Ec-clesiæ pertinet, et ideo cum illis extincta non est, sed in illa habent Episcopos successores, ut sentit Cyprianus, lib. de Unit. Ecclesiæ, et aliis epistolis citatis; Augustinus, enarrat. in Psalm. 44, et Hieronymus, epist. 83 ad Eva-grium. Et ideo de haec potestate intelligen-dum est, quod ibidem ait, omnes Episcopos

esse æquales. Posterior vero, id est, apostolica dignitas, multa includebat privilegia, nimirum, potestatem immediate a Christo delegatam ad prædicandum per universum orbem cum auctoritate et speciali potestate ab ipso Christo concessa, juxta illud: *Sicut misit me Pater, et ego mitto vos.* Item multas gratias, et prærogativas tali muneri accommodatas, ut fuerunt abundantia spiritus cum confirmatione in gratia, et in fide, cum quadam scientiae plenitudine, ita ut in rebus fidei nec falli, nec fallere possent, vel docendo, vel scribendo; itemque ut præter donum linguarum, quod ad docendum habebant, haberent etiam directionem spiritus ad canonice scribendum. In hac ergo dignitate, verum est Apostolos non habuisse successores; erat enim extraordinaria, et solum pro initio disseminandi Evangelium et plantandi Ecclesiam requisita, non vero ad ordinarium regimen ejus necessaria.

10. Romani Episcopi in primatu, non in omnibus privilegiis Petro succedunt. — Unde etiam in hac parte, quoad multas ex dictis prærogativis Petro non succeditur. Præter hæc autem duo, aliquid singulare tributum est Petro, nimirum, jus supremi Pastoris et Vicarii Christi in ejus Ecclesia, simpliciter et absolute pro quocumque loco et tempore spectata. Et in hoc non est comparandus Petrus cum cæteris Apostolis, alias nihil singulare accepisset, et ideo quoad hanc partem illatio est nullius momenti, et potius (ut dixi) oppositum inferre licet ex singulari concessione, et ex ratione muneric. Potest autem in cæteris Apostolis peculiari modo auctoritas episcopalnis quoad jurisdictionem considerari, quatenus ordinarium regimen et sedem alicujus Ecclesiæ receperunt, sicut Jacobus, frater Domini, Hierosolymis constitutus est Episcopus, quod tameu de aliis non est certum, quamvis eadem ratione fieri potuerit. Quoad hanc ergo episcopalem auctoritatem, quia ordinaria est in Ecclesia, etiam succeditur Apostolis, sicut Jacobo Simeon successit. Et ita quoad hoc potest aliqualiter admitti comparatio, longe tamen diversa ratione, tum quia hæc ordinaria dignitas episcopalnis non est data alicui Apostolo extra Petrum, jure divino, sed mediante Petro, ut de Jacobo refert Eusebius, lib. 2 Histor., cap. 4; et de Joanne, Ephesi commorante, verisimile fit ex Irenæo, lib. 3, c. 3, in fine, ut omittam, quæ de Andrea, Barnaba, et aliis, historiæ referunt. Ubi ergo Apostoli ut proprii

Episcopi particulares Ecclesias regebant, jurisdictione illa certis limitibus continebatur, et intra illos tantum eis succedebatur; Petri autem jurisdictione, quam a Christo immediate recepit, fuit universalis pro tota Ecclesia; et ita fuit etiam illi proprium, in hac dignitate successorem habere. (Vide Baron. tomo primo Annal., anno 44, numero 29 et seq.; et anno 51, numero 54.)

CAPUT XIII.

ROMANUM EPISCOPUM VERUM PETRI SUCCESSOREM ESSE, ET IN EO PETRI POTESTATEM PERSEVERARE, EX DIVINA SCRIPTURA CREDENDUM ESSE, OSTENDITUR.

1. Prima assertio. — Supponimus id, quod satis in superioribus probatum est, semper in Ecclesia requiri aliquem Petri in ejus universalis regimine successorem: nunc vero addimus, illum in unoquoque tempore unum tantum supremum episcopum, unamque personam esse posse. Quia ostensum est ecclesiasticam rem publicam, ejusque spirituale regimen ita semper conservari debere, sicut a Christo est institutum; est autem monarchicum ex institutione Christi, ergo ita debet per successionem conservari; ergo unus tantum simul, seu quovis tempore potest esse Petri successor, licet per successionem in diversis temporibus multiplicari necessarium sit. Declaratur amplius, quia si plures Episcopi simul Petro succederent, tribus modis id posset intelligi.

2. Prima ratio conclusionis. — Primo, ut unusquisque eorum succederet tantum in parte pastoralis muneric, quasi primatum inter se dividendo, ita ut totus quidem esset in omnibus simul, non tamen in singulis; neque in omnibus collective, sed divisus in singulis per partes. Et hunc modum asseruisse referuntur aliqui ex Protestantibus, allegantes illud Cypriani, de Unit. Eccles.: *Episcopatus unus est, cuius a singulis in solidum pars netur.* Verumtamen hoc nihil aliud est, quam veram successionem in primatu Petri negare; nam eo ipso quod primatus eo modo dividetur inter multos, nullus eorum esset universalis pastor Ecclesiæ, sed tantum ejus partis, quæ illi contingeret; ergo nullus eorum esset verus, et (ut sic dicam) adæquatus successor Petri; nullus enim esset supremus simpliciter, quem cæteri recognoscerent, quod habuit Petrus. Et consequenter nullus

esset Petra fundamentalis Ecclesiæ, et ad nullum eorum pertinerent verba Christi, *Pasce oves meas*, quatenus per illa omnes oves uni pastori commendatae sunt. Denique in nullo eorum unitas Ecclesiæ servaretur, sed potius in illis multis Ecclesia scinderetur, sicut Occidens et Oriens in diversa imperia divisa fuerunt, quod quantum repugnet unitati Ecclesiæ supra ostensem est. Nec sensus verborum Cypriani est ille, quem Protestantes fingunt, cum idemmet Cyprianus, tum in eodem libro, tum aliis locis jam sœpe allegatis, unam cathedram maxime commendet, et unum Episcopum Ecclesiæ Catholicae, sine quo ejus unitas subsistere non potest. Sensus ergo est, episcopatum totius Ecclesiæ unum esse; sub illo tamen particulares esse Episcopos, qui in partem sollicitudinis vocantur, non ut supremi pastores in suis diœcesisibus, sed sub uno, qui supremus est. Quem sensum satis declaravit Cyprianus, subjungens: *Ecclesia quoque una est, quæ in multitudinem latius incremento fœcunditatis extenditur*. Et post varia exempla sumpta ex multis radiis, ramis, vel fluminibus, qui unitatem habent in origine, de unitate Ecclesiæ ita concludit: *Unum tamen caput est, et origo una, et una mater fœcunditatis successibus copiosa*, quam matrem alibi in particulari designat, ut mox videbimus.

3. *Secunda ratio.* — Secundo modo cogitari potest successio plurium simul in primatu Petri, non divisim, sed collective, et per modum unius tribunalis, seu congregationis. Et hunc modum excogitare potuerunt qui, non obstante primatu Petri, dixerunt generale Concilium esse supra Papam. Quanquam illi fortasse dicere cogerentur, etiam tempore Petri, Apostolorum vel Episcoporum Concilium fuisse supra Petrum, quia eadem est servanda proportio, neque est major ratio de uno tempore quam de alio, imo nec potest aliter doctrina subsistere, ut statim ostendam. Ita vero sentire de Petro et de ejus primatu non solum fundatum non est in Evangelio, verum etiam verbis Christi repugnat, ut constat ex his omnibus, quæ de primatu Petri diximus. Nam Christus Petro commendavit simpliciter oves suas, sive sigillatim singulas, sive simul totum carum gregem, et supra illum Petro tribuit potestatem, et ideo totius corporis Ecclesiæ fundamentum illum constituit. Ipsi autem ovibus, sive divisim, sive simul toti gregi, non solum potestas supra Petrum data non est, verum etiam neque ulla

omnino potestas legitur immediate a Christo collata. Sed de hoc alias, nunc enim satis a nobis probatum est, Petro simpliciter datam esse potestatem supra totam Ecclesiam, non pro ejus persona tantum, sed ut ei succederetur. Hoc ergo supposito, dicimus, successorem in ea potestate, quam Petrus habuit, unam tantum personam esse posse, et non plurium congregationem, alias mutata fuisse Christi institutio ex monarchica in aristocraticam, quod esse non potest sine ejusdem Christi auctoritate, quæ revelata non est, neque per Scripturam, neque per traditionem. Et deinde illa non esset successio, sed esset nova creatio, seu alterius regiminis institutio, cuius originem ostendere oporteret; nam Petri primatus ex vi primæ institutionis per solam successionem perseverat, ut ostensem est. Denique abstrahendo a quæstione de comparatione Papæ et Concilii, certum est, Petrum habuisse primatum in tota Ecclesia, quamdiu actu non erat congregatum Concilium, cuius congregatio ex voluntate Petri pendebat, cum solus ipse in tota Ecclesia esset superior; ergo successor etiam Petri in hac eadem potestate debet esse una persona, unum episcopatum gerens, quidquid inde circa illius cum Concilio comparationem subsequatur, quod præsenti instituto nihil refert.

4. *Tertio probatur conclusio.* — Tertio tandem modo cogitari potest, habere Petrum simul et pro eodem tempore plures successores, divisim et in solidum habentes integrum primatum, et universalem curam pastoralem. Et hic modus a nullo ctiam haeretico assertus aut excogitatus est. Nam imprimis repugnantiam involvit, quia si plures essent primi, nullus eorum esset positive primus, id est, superior omnibus, sed ad summum negative, id est, non habens alium supra se; utrumque autem repugnat. Quia ex priori membro sequitur nullum eorum successisse Petro in primatu, quia Petrus positive fuit omnibus superior, et simpliciter fuit pastor omnium ovium Christi extra ipsum, quod nullus illorum haberet. Ex altero vero membro, et unitas Ecclesiæ destruitur, et corpus monstruosum fingitur, ut potè habens simul duo capita æqualia, quæ nec pacem nec concordiam inter se habere potuissent. Et ideo ipsa etiam natura universa hanc potentatum multitudinem abhorret, ut dixit etiam philosophus, in fine Metaphysicæ; et melius Cyprianus, de Idolor. vanit.; et Athanasius, contra Idola.

Unde ipsa etiam bruta animalia ducem unum sequi solent, ut late Hieronymus, epist. 4. Denique si alii Apostoli non habuerunt cum Petro similem aequalitatem, qui fingi potest aliquem postea fuisse Episcopum, successori Petri in jurisdictione aequalem? aut quæ fingi potest institutio vel necessitas plurium simul in unius potestatis adæquate et in solidum successionem? Est ergo certum Petri successorem unam tantum personam, seu unum Episcopum esse posse. Quo semel legitime creato, ut recte dixit Cyprianus, epist. 52: *Quisquis jam Episcopus fieri voluerit, foras fiat necesse est, negue habet ecclesiasticam ordinationem, qui Ecclesie non tenet unitatem. Quisquis ille fuerit, multum de se licet jactans, et sibi plurimum vindicans, profanus est, alienus est, foris est. Et cum post primum secundus esse non possit, quisquis post unum, qui solus esse debeat, factus est, non jam secundus ille, sed nullus est.* Sit igitur constans in una sede episcopal, seu in una Episcoporum serie, successionem hanc constituendam esse.

5. *Secunda assertio de fide.* — Hinc ergo concludimus solum Romanum Episcopum esse verum successorem Petri, et potestatem Petro datum ad oves Christi pascendas, in illo perseverare. Hæc assertio certa et catholica fide tenenda est, nam, licet expresse et in propriis terminis in sacra Scriptura non legatur, in principiis in illa revelatis virtute continetur, quod per Ecclesiam sufficienter declaratum est; imo, quadam rerum evidencia, et experimento constat. Declaratur imprimis, nam ex Scriptura habemus, Petro datum esse primatum Ecclesiae ut perpetuo in illa duraturum, ut satis probatum est. Hæc autem duratio, cum non esset futura in una et eadem persona, necessario futura erat per plurimum personarum in eadem dignitate successionem, et hoc etiam sufficienter in Scriptura continetur, non per additionem aliquam, sed per legitimam ejusdem Scripturæ interpretationem. In qua autem sede vel episcopatu relicta fuerit hæc successio, et personarum series in hac dignitate succendentium, Scriptura non retulit, quia historia canonica novi Testamenti usque ad mortem Petri non pervenit. Ideoque ut Ecclesiae certo constet in tali sede impletam esse, et hactenus impleri institutionem a Christo factam, et in Scriptura revelatam, satis est ut applicatio (ut sic dicam) illius institutionis et dignitatis ad talem episcopatum per evidentem traditionem, et continuum ac notissimum usum

eidem Ecclesiae sufficientissime proponatur.

6. *Vicarium Christi visibilem et in determinata sede esse debere.* — Nam sicut in primo libro ex ratione, institutione et fine Ecclesiae Christi, necessarium esse ostendimus, illam in individuo et in particulari esse visibilem, ita ex institutione et fine munera Vicarii Christi, necessarium est illum esse visibilem Ecclesiae in particulari ac determinata sede et successione. Quid enim prodesset Ecclesiae confuse credere, esse in terris aliquem Episcopum, seu episcopatum cum potestate et munere vicarii Christi, si in particulari non agnosceret, ac certo crederet quisnam talis episcopatus esset? Aut quomodo possent oves suum pastorem sequi, vel ad illum recurrere, vel vocem ejus audire et recognoscere, nisi in particulari talem Episcopum in tali sede vel episcopatu sedere crederent? Sicut ergo Ecclesia visibilis non tantum fide humana, sed etiam divina creditur esse Ecclesia, quia sensibilia signa, per quæ videtur, non sunt ratio credendi, sed proponunt, ut eviderent credibile, illam esse veram Ecclesiam, quam Deus semper in mundo esse futuram revelavit, ita non solum fide humana, sed etiam divina credendum est, Romanum Pontificem esse caput visibile hujus Ecclesiae vice Christi, quia signa illa, quibus hoc caput ostendimus, faciunt credibile evidenter, illum esse quem Christus ex vi suæ institutionis Vicarium suum constituit. Hoc ergo modo dicimus, assertionem positam esse de fide, et in Scriptura, Ecclesiae traditione adjuneta, sufficienter contineri.

7. *Probatur conclusio.* — Superest ut signa et testimonia hujus evidenter credibilitatis afferamus. Primumque et quasi fundamentale sit, D. Petrum in episcopatu Romano ultimo tempore vite suæ sedisse, ibique mortuum fuisse; nam hinc fit consequens ut successores ejus in eadem sede permanserint. Ut antecedens melius intelligatur, tria tempora seu status in Petro post Christi ascensionem distinguere possumus. In primo, praesedit universalis Ecclesiae Christi sine determinatione ad propriam et specialem curam alicujus particularis episcopatus, nimirum per quinque vel sex annos priusquam Antiochiae sedem figeret, ut ex Eusebio in Chronico, et ex aliis antiquis historiis constat. In secundo, sedit Petrus Antiochiae ab ultimo Tiberii anno per septem annos; quibus finitis secundo, vel, ut alii volunt, tertio Claudi anno, et 44 vel 45 adventus Christi, Eccle-

siam Romanam fundavit, ac sedem suam in eam transtulit, ibique usque ad mortem sedit, quam in eadem urbe Roma per martyrium passus est.

8. *Solum in Romana Sede potuisse Petrum habere primatus successorem.* — Hinc ergo fit, successionem in cathedra Petri non potuisse in Hierosolymitana vel Antiochena Ecclesia contingere. Quia in priori nunquam sedit, sed in ea Jacobum primum omnium sedere fecit, cui Simeon successit, ut diximus, et est in historiis notum. In posteriori autem non permanxit, sed ad tempus tamen in ea sedit, et consequenter adhuc vivens, ibi successorem habuit, quem ipse sua auctoritate constituit, vel Evodium, vel Ignatium, de quo videri potest Turrianus, in Constitutiones Clementis, lib. 7, c. 46; et Baronius, in Martyrolog., die 4 februarii. Successit autem Evodius Petro in particulari episcopatu Antiocheno, non vero in primatu seu episcopatu universali. Nam Antiochenam sedem, non a Christo immediate, sed divino jure, sed arbitrio suo, et humano jure Petrus sibi assumpserat, et ideo facile potuit illam relinquere, et alteri tradere. Pontificiam autem dignitatem immediate a Christo et divino jure habuit, ideoque quamdiu vixit, illam non reliquit, neque, ut existim⁹, relinquere potuit, quia ex immediata electione, et collatione ac praecepto ipsiusmet Christii Ecclesiam universalem habuit sibi commendatam. Relinquitur ergo, ut in Romana sede Petrus habuerit sui pontificatus successorem, tum quia in nulla alia potest esse vestigium, vel ratio hujus successoris, etiamsi sit Alexandrina, quia nunquam Petrus in ea sedit; vel Constantinopolitana, quæ vivente Petro fundata non fuit; tum etiam quia Petrus in morte habere debuit successorem; ergo in episcopatu, in quo mortuus est, scilicet, Romano, illum habuit.

9. *Resellitur evasio quorundam haereticorum.* — Non defuerunt nihilominus haeretici, qui ut vim hujus argumenti fugerent, Petrum Romæ sedisse, aut in ea mortuum esse, negaverint. Sed supervacaneum duco, contra eos disputationem longiorem texere, tum quia neque rex Angliæ hoc insinuat, neque, ut opinor, Protestantes Anglicani in hac sententia permanent, licet fortasse aliquando illam tentaverint; tum etiam quia evasio illa nullum habet veritatis vestigium, neque probationem cui respondere necesse sit. Aliunde vero Petrum Romæ fuisse, ipsiusmet verba indicant epist. 4, c. 5: *Salutat vos Eccle-*

sia, quæ est in Babylone collecta; ibi enim nomine Babylonis Romanam significari, omnes catholici interpretes et Doctores interpretati sunt, quos moderni ibi congerunt, et ideo eos referre non est necesse; nam inferius etiam tractando de Antichristo aliquid de hoc puncto attingemus. Ac denique in eadem Roma Petrum usque ad mortem pontificatum gessisse, et ibi mortuum esse, omnes Patres antiqui, tam Græci quam Latini, communī consensu trādiderunt, quos late refert Sander., lib. 6 de Visibili monarchia, cap. 10; et Bellarmin., lib. 2 de Romano Pontifice, a principio, per plura capita. Nunc sufficit nobis auctoritas Hieronymi, lib. de Scriptoribus ecclesiast., et ad Galat. 2; et Eusebii, in Chronico, cujus fere verba Hieronymus mutuatus est; et cum eis ali⁹ tam latini quam græci historici consentiunt; præter testimonia ipsorummet Pontificum successorum Petri, quæ statim referemus.

10. Addunt denique nonnulli Catholici¹, licet haereticis daremus Petrum non fuisse Romæ, nihilominus potuisse Pontificem Romanum esse successorem Petri; nam potuit Petrus alibi existens aut sedens, vel Romæ, vel alibi successorem sibi deligere. Quod quidem vere dictum est, et ex abundantia, ad confusionem haereticorum, procedit tamen solum de possibili, seu de potestate. Ut autem de facto constet, multum refert quod Petrus Episcopus Romanus fuerit usque ad mortem. Nam si Petrus alibi sedem habuisset usque ad mortem, ut Romanus Episcopus in pontificia sede illi succederet, oporteret illam institutionem ostendere ex peculiari Petri ordinatione, quæ revera non existit, quia non alibi, sed in Romana sede et urbe mortuus est. Quo posito, non fuit necessaria nova institutio aut voluntas Petri, nam ex natura rei, supposita priori institutione divina, qui in Romana sede Petro successit, primatum etiam ejus consecutus est, et ita per successionem ad reliquos Romanos Pontifices derivatus est.

11. *Alia evasio haereticorum.* — Aliter vero fugere possunt adversarii, etiamsi, vel inviti, fateri cogantur Petrum fuisse Episcopum Romanum usque ad mortem, videlicet, inde solum sequi, successorem Petri fuisse Episcopum Romanum, non tamen recte inde collegi, eumdem successorem fuisse etiam totius Ecclesiæ Catholicae Episcopum et pas-

¹ Sander., lib. 3 de Clave David., c. 6.

tem. Quia hæc duæ dignitates seu episcopatus distincti sunt et separabiles : nam potest esse Pontifex Ecclesiæ universalis, licet non sit Episcopus alienus dioecesis particularis, sicut in Petro in initio sui pontificatus vidimus. Potest præterea universalis illa dignitas prius conjungi cum particulari episcopatu, et postea ab illo separari, sicut factum vidimus in sede Antiochiae, ubi Petrus habuit successorem in Antiocheno episcopatu, qui non successit in papatu; ergo potuit idem contingere in morte Petri, et Romano episcopatu; quia in ipso etiam Petro conjunctio talis episcopatus cum primatu non erat de jure divino, sed humano, utique ex voluntate

Petri, et ita posuit facile per mortem cessare. Imo, eo ipso quod successor Petri a Romana tantum, et non ab universalis Ecclesia electus est, videtur consequens, ut in particulari episcopatu, non in universalis, successerit.

42. Refellitur erasio. — Successor Petri in Romano episcopatu, in primatu etiam necessario successit. — Respondemus, non minus certum esse, primum successorem Petri, et consequenter reliquos, in episcopatu Ecclesiæ Catholicae, quam in episcopatu Romanae Ecclesiæ successisse. Hoc probamus, quia una tantum persona semper Petro successit, ut ex historiis constat, et ex Patribus, quos capite sequenti referemus; ergo vel illa persona simul cum episcopatu Romano primatum Ecclesiæ habuit, quod intendimus, vel priuatus sine successione relictus est, et perit; hoc autem posterius est impossibile, quia est contra jus divinum, et contra promissionem Christi; ergo prius est omnino certum. Quocirca ex quo Petrus sedem suam Romæ collocavit, et pontificalem dignitatem illi episcopatu conjunxit (sive illa conjunctio fuerit ex divina institutione, per speciale præceptum ac revelationem, ut aliqui volunt, sive fuerit ex humana voluntate Petri, licet divinitus inspirata), eo ipso quod a Petro vivente mutata non est, rata mansit, ideoque qui Petro in episcopatu suffectus est, illi in utraque dignitate necessario successit. Et quidquid sit de illa quæstione, quæ a Theologis disputatur, an possit Summus Pontifex separare primatum a Romana sede, et illum, vel in alio episcopatu collocare, vel ab omni particulari episcopatu separatum relinquere, certum esse existimo, dum aliquis Summus Pontifex id non fecerit, non posse universam Ecclesiam, vacante papatu, id efficere, quia

non potest inferior potestas mutare quod per superiorem constitutum est, et quia sicut Petrus soli datus est primatus, pro ipso et successoribus ejus, ita ad solum illum, seu ad Summum Pontificem spectat determinare sedem pontificalem, et modum electionis et successionis ejus præscribere. Sic ergo cum Petrus suam sedem Romæ collocaverit, et in illam totum suum primatum et potestatem contulerit, illamque institutionem vivens non mutaverit, non potuit postea Ecclesia accepit alia per mortem Petri illam institutionem mutare, ideoque successor Petri in episcopatu Romano ex necessitate simul in primatu successit.

43. Neque obstat quod illius successoris electio a clero Romano, et non ab universa Ecclesia facta fuerit, nam (ut dixi) determinare modum successionis, non ad corpus Ecclesiæ, sed ad ipsum Petrum pertinebat, ideoque sicut voluit Petrus pontificatum in sede Romana stabiliter collocare, ita etiam statuit electionem successoris a clero Romano fieri. Vel certe Petrus ipse Clementem sibi successorum designavit, ut auctor est ipse Clemens, epist. I ad Jacobum, fratrem Domini, et lib. 7 Constitut., c. 45, licet (ut probabilior sententia fert) ipse Lino et Cleto prius cesserit, et postea illis successerit. Atque ita omnes illi in pontificatu, simul cum episcopatu Romano successerunt, eodemque modo successio ad omnes sequentes Episcopos Romanos derivata est.

CAPUT XIV.

ROMANUM PONTIFICEM SUCCESSOREM ESSE PETRI, TESTIMONIIS SANCTORUM PATRUM OSTENDITUR.

4. Cum ad confirmando omnia fidei dogmata, magnam vim habeat ecclesiastica traditio, maximam profecto in praesenti articulo habere debet, quia veluti in quodam facto et rerum concursu, continuaque successione consistit. Ideoque necessarium duximus, omni testimoniorum genere veritatem hanc confirmare. Et primo utenur testimoniorum antiquorum Patrum, qui non solum affirmant Episcopos Romanos Petro in pontificatu successisse, sed etiam inter præcipua fundamenta et signa veræ et Catholicae Ecclesiæ hanc enumerant successionem, ut in libro primo saepè insinuatum est, et nunc breviter recensebimus. Primo enim Irenæus, lib. 3, c. 3, sic inquit: *Quoniam valde longum est omnium*

Ecclesiarum enumerare successiones, maximæ, et antiquissimæ, et omnibus cognitæ, a gloriostissimis Apostolis Petro et Paulo Romæ fundatæ et constitutæ Ecclesiæ indicantes, etc. Et infra : *Fundantes igitur et instruentes Beati Apostoli Ecclesiam, Lino episcopatum administrandæ Ecclesiæ tradiderunt.* Et postea enumerat successores usque ad Eleuterium. Et in illis verbis adverto simpliciter dicere : *Episcopatum administrandæ Ecclesiæ tradidérunt, et sine restrictione ad Romanam Ecclesiam, quia non poterat una ab altera separari, et ideo de Romana Ecclesia præmisit : Ad hanc Ecclesiam propter potentiorum principalitatem, necesse est omnem convenire Ecclesiam, hoc est, eos qui sunt undique fideles, in qua semper ab his, qui sunt undique, conservata est ea quæ est ab Apostolis traditio.*

2. Secundo, Augustinus contra epist. Fundamenti, cap. 4, inter certa indicia Catholicæ Ecclesiæ hoc ponit : *Ab ipsa Sede Petri Apostoli, cui pascendas oves suas post resurrectionem Dominus commendavit, usque ad præsentem episcopatum successio sacerdotum.* Et in Psal. contra partem Donati : *Numerate sacerdotes vel ab ipsa Petri Sede. Et in ordine illo Patrum, quis cui successit videte. Ilsa est petra, quam non vincunt superbae inferorum portæ; ubi clarissime ostendit, successionem esse in ipsa pontificali dignitate, quæ per Petram significatur. Et ita lib. 2 contra Litter. Petilian., c. 51, eamdem dicit esse cathedram Ecclesiæ Romanæ, et cathedram in qua tunc Anastasius sedebat. Ac denique, ep. 165, successionem omnium Pontificum a Petro usque ad Anastasium enumerat. Simili modo Optatus, lib. 2 contra Parmenian. : *Videndum est (ait) qui, et ubi prior cathedra sederit.* Et infra : *Negare non potes scire te, in urbe Roma Petro primo cathedram episcopalem esse collatam, in qua sederit omnium Apostolorum caput Petrus, in qua una cathedra unitas ab omnibus servaretur.* Ubi clare loquitur de cathedra episcopali supra totam Ecclesiam. Unde addit inferius : *Ergo cathedra unita, quæ est prima de dotibus (scilicet Ecclesiæ Catholicæ), sedit prior Petrus, cui successit Linus, etc., usque ad Siricum.**

3. Eamdem successionem accurate refert Epiphanius, hæres. 27, circa finem, et post illum subjungit : *Et ne quis miretur, quod singula ita exakte recenseamus, per hæc enim semper claritas ostenditur; sentiens, ad claritatem veræ et Catholicæ doctrinæ, necessa-*

riam esse hujusmodi successionem, ejusque notitiam, quia, ut de Petro ipse dixit in Ancorato, circa principium : *Hæc est petra firma, super quam Ecclesia ædificata est, et portæ inferorum, quæ sunt hæreses et hæresiarachæ, non valebunt adversus illam. Suxta enim omnem modum in ipso firmata est fides, qui accepit claves cælorum, et solvit in terra, et ligat in cælo.* Quam petram et potestatem usque ad sua tempora per successionem deducit, ut ostendat in ea esse firmatam fidem, contra quam hæreses non prævalent. Eamdem Pontificum seriem descripsit versibus Tertullianus, libro 5, contra Marcionem, cap. ultim., ubi loquens de Apostolorum discipulis, qui *successere per orbem, subjungit :*

Ex quibus electum magnum, plebique probatum, Hac cathedra, Petrus qua sederat ipse, locatum. Maxima Roma Linum primum considerare jussit, etc.

quæ prosequitur usque ad Thelesph., de cuius tempore dicit :

Constabat pietate vigens Ecclesia Romæ, Composita a Petro cuius successor et ipse. Namqæ loco nono cathedram suscepit Higinus.

Et postea Pium et Anicetum recenset. Et lib. de Præscript., c. 30, mentionem facit Eleuterii, qui post Anicetum, imo, et post Soternum sedit. Sic enim ait : *Constat catholicam primo doctrinam credidisse apud Ecclesiam Romanensem, donec (supple, relegatus est Marcion) sub episcopatu Eleuterii Benedicti; et cap. 36 : Habes Romam, unde nobis quoque auctoritas præsto est. Stat felix Ecclesia, cui totam doctrinam Apostoli cum sanguine suo profuderunt, ubi per totam doctrinam intelligo etiam firmitatem et doctrinæ incorruptionem.*

4. Denique D. etiam Hieronymus breviter successionem hanc declarat lib. de Scriptor. Eccles., in Clemente. Et sëpe Cyprianus, agens de electione et ordinatione Cornelii, præsertim epistol. 43 ad Cornelium, ubi prius Ecclesiam Romanam vocat, *Ecclesiæ Catholicæ radicem et matricem.* Postea vero dicit : *Nunc episcopatus tui et veritas pariter et dignitas apertissima luce, et manifestissima, et firmissima comprobatione fundata est.* Ut te (sicut prius dixerat) universi collegæ nostri, et communicationem tuam, id est, Catholicæ Ecclesiæ unitatem, pariter ac charitatem probarent firmiter ac tenerent, ubi clare docet Episcopum Romanum rite electum ita esse Petri successorem, ut in illo universalis fundetur

et uniatur Ecclesia, sicut in Petro fundata et unita fuit. Unde loquens de eodem Cornelio, epist. 52 ad Antonianum : *Factus est* (inquit) *Cornelius Episcopus, cum nemo ante se factus esset, cum Fabiani locus, id est, cum locus Petri, et gradus cathedralis vacaret.* Atque hi quidem Patres de ipsa successione Pontificum in sede et dignitate Petri expressius loquuntur; sunt vero alii plurimi, qui dignitatem ipsam in episcopo Romano recognoscunt et exaggerant, quos infra capite decimo septimo referemus.

CAPUT XV.

PONTIFICEM ROMANUM IN DIGNITATE ET POTESTATE, AC PRIMATU ECCLESÆ SUCCESSOREM ESSE PETRI, EORUMDEM PONTIFICUM AUCTORITATE COMPROBATUS.

1. Quamvis hoc probationis genus Protestantes parum moveat, ut infra dicam, nihilominus illud omittendum non censui, tum quia revera est gravissimum, et pro Catholicis utilissimum, multaque argumentorum genera in se complectitur; tum etiam quia rex Jacobus, in sua Præfatione, pag. 60, cum dixisset Petrum esse primum vel principem Apostolorum ætate, vocatione, vel ad summum ordine, non potestate, subjungit : *Nec aliquid sibi amplius trecentis post Christum annis Romanæ sedis Episcopus arrogavit.* Ut igitur testimonium hoc per errorem et deceptionem a rege datum esse convineam, non solum per trecentos, sed etiam per sexcentos, vel plures Christi annos discurram, et evidenter ostendam Romanos Pontifices a principio nascentis Ecclesiæ, primatum Ecclesiæ non tantum quoad ordinem politicum, sed multo magis quoad superioris auctoritatem et potestatem, et Petro, et sibi arrogasse.

2. Ut autem verborum et testimoniorum vis percipiatur, oportet advertere varios esse modos, quibus Pontifices suam dignitatem astruunt. Unus est expresse in Petro declarando excelleniam potestatis, seque appellando successores Petri, et verba de Petro dicta sibi applicando. Alius est, eos dignitatis titulos assumendo, qui non nisi ratione talis primatus eis convenire possunt. Alius est, sibi attribuendo vel reservando actus supremæ jurisdictionis et spiritualis potestatis supra totam Ecclesiam. Cum enim existimari non possit, injuste jurisdictionem usurpare voluisse, supponunt in illa sede successionem in

hac suprema dignitate conservari. Ultimus denique est, ex professo pro hac veritate pugnando, et contra errores illi repugnantes disputando. Ex quibus loquendi et probandi modis, et ex variis actibus supremæ potestatis, quos Romani Pontifices semper exercuerunt, varia genera argumentorum ad confirmandam veritatem sumi possunt. Ut tamen perpetua Ecclesiæ traditio evidentius pateat, commodius visum est, servato temporum ordine, quid singuli Pontifices in omnibus sæculis de suo primatu docuerint proponere.

3. Primo ergo Anacletus Papa, epist. 1, Apostolicam Sedem esse dicit, super quam Christus fundavit Ecclesiam, et ideo majores causas ad ipsam pertinere; epist. 2 : *Ecclesiæ* (inquit) *gubernacula tenemus*; et epist. 3, ex professo hanc veritatem confirmat et declarat, dicens, Romanam et Apostolicam Ecclesiam ab ipso Salvatore primatum obtinuisse, et eminentiam potestatis super universas Ecclesias. Secundo, Evaristus, epist. 1, *Romanum Episcopum caput vocat, ad quod in dubiis recurrendum est.* Alexander I, epist. 1, vocat *apicem et caput.* Tertio, Sixtus I, Epist. 1, *omnium ecclesiarum caput.* Quarto, Anicetus, epistola unica, *ad se pertinere*, ait, *terminare omnia Episcoporum iudicia.* Quinto, idem habet Eleutherius in sua epistola, c. 2. Sexto, Victor, epist. 1 ad Theophilum, dicens, *contrarium agere, nihil aliud esse, quam Apostolorum successorumque ipsorum terminos transgredi, ac decreta violare.*

4. Zephirinus, epist. 1, ex loco Matth. 16, ubi caput totius Ecclesiæ vocat Romanam Ecclesiam, et ad eam cæteras Apostolica auctoritate instruere, pertinere dicit, et in fine : *Memor enim sum, me sub illius nomine Ecclesiæ præsidere, cuius a Domino Jesu Christo est glorificata confessio, et cuius fides omnes semper destruit errores.* Octavo, idem supponit Anterus ad Episcopos per Bæticam et Tolitanam provinciam constitutos, respondens ad eorum consultationem de mutatione Episcoporum, et prius per occasionem dixit, *Petrum, quem sanctum magistrum nostrum, et principem Apostolorum vocat, de Antiochia utilitatis causa translatum esse Romam.* Idemque fieri posse declarat in aliis episcopatibus apostolica auctoritate; subjungit : *Hæc ut petistis, licet vobis incognita non sunt, tenenda mandamus.* Et in fine : *State itaque, fratres, et tenete traditiones Apostolorum et Apostolicæ Sedis.* Nono, Fabianus, in epist. 1, pontificiam auctoritatem statim ostendit, tum in ti-

tulo ad omnes *communis* *ministros* *ubique Catholicae Ecclesiae*; tum in exordio: *Divinis praeceptis, et Apostolicis monemur institutis, ut pro cunctarum Ecclesiarum statu, imp'ro vig'lemus affectu. Unde consequens est debere vos scire, quae apud Romanam in sacro aguntur ritu Ecclesiae, ut ejus sequentes exempla, ejus veri filii inveniamini, quae restra est mater vocata.* Ubi certe supponit appellationem hanc jam tunc finisse ubique pervulgatam et receptam. Idemque eodem modo colligitur ex epist. 3, quae ad omnes Orientis Episcopos, et ex epist. 3 ad Hilarium, ubi de se dicit, *ob hoc divina gratia fuisse ad fastigium sacerdotale proiectum, et in quadam sacerdotum Dei specula constitutum ad prohibendum illicita, et docendum sequenda.* Et deinde servandum ordinem ecclesiasticis judiciis præserbit, *salva* (inquit) *in omnibus apostolica auctoritate, utique Romanæ Ecclesiae.*

5. Decimo, Cornelius, epist. ad Cyprianum, quae est 46 inter epistolas Cypriani, refert quosdam, per ignorantiam deceptos, schisma contra ipsum fecisse, postea vero, veritate agnita, resipuisse per verba sequentia, quae illorum propria esse affirmat: *Nos Cornelium Episcopum Sanctissimæ Catholicae Ecclesie electum a Deo omnipotente, et Christo Domino nostro, scimus.* Et infra: *Mens nostra semper in Catholica Ecclesia fuit, neque enim ignoramus unum Deum esse, unum Christum esse Dominum, quem confessi sumus, unum Spiritum Sanctum, unum Episcopum in Catholica Ecclesia esse debere.* Quam confessionem ita ipse approbat, ut dicat: *Ista corum professione non moveremur?* Et infra: *Has litteras existimo, te debere ad ceteras Ecclesias mittere.* Undecimo, Lucius, in epistola ad Occidentales, sic incipit: *Litteras dilectionis vestræ, quas ad Beati Petri Apostoli sedem pro vestri causa negotiis misistis, libenter suscepimus.* Et postea tanquam universalis Pastor respondet, et multa disponit. Duodecimo, Sixtus II, in epistol. 4, prius dicit, *se illius nomine Ecclesie prasidere, cuius a Christo est laudata confessio, et cuius fides nullum unquam failit, sed omnes hereses destruit.* Postea vero subdit, licitum esse Episcopis ad Sedem Apostolicam appellare, *cujus dispositioni omnes majores ecclesiasticas causas, et Episcoporum judicia, antiqua Apostolorum, eorumque successorum, atque canonum auctoritas reservarit, quoniam cnpantur Episcopi, qui aliter erga fratres egerint, quam ejusdem Sedis Papæ fieri placuerit.*

6. Decimo tertio, similia habet Dionysius, Epist. 2 ad Severum Episcopum: *Ab initio (ait) tantam accepimus a B. Petro, Apostolorum principe, fiduciam, ut habeamus auctoritatem, auxiliante Domino, universali Ecclesia subvenire.* Et postea parochiarum divisionem fieri præcipit, et normam ab ipso datam omnibus fieri notam, *ut non specialis fiat (ait), sed generalis hæc præceptio.* Decimo quarto, Felix, epist. 1, *majores causas totius Ecclesiae sibi reservatas esse confirmat.* Decimo quinto, Marcellus, epist. 1 ad Episcopos Antiochenæ provinciae, sic incipit: *Sollicitudinem omnium Ecclesiarum juxta Apostolum circumferentes, etc.* Quæ late prosequitur, omnia supra dicta confirmingo, et addit, *nullam Synodus legitime fieri posse sine Romanæ Sedis auctoritate.* Atque hæc ad regis asseverationem confutandam sufficere possent; nam Marcellus usque ad annum Christi 310 supervixit; ad majorem autem veritatis evidentiam saltem per alia tria subsequentia sæcula discurrendum est.

7. Decimo sexto, Eusebius Epistolam tertiam sic incipit: *Benedictus Dominus Deus noster, qui per misericordiam suam Romanam Ecclesiam Beati Petri Apostoli sacerdotio ducavit, nobisque viam monstrandam circa nos (propter universalem curam, quae nobis est propter privilegium ejusdem Ecclesie) è invicem charitatis indulxit, etc.* Decimo septimo, Melchiades, in epist. ad Episcopos Hispaniæ, dicens, ad se pertinere de Episcopis judicare, subdit: *Hos enim Dominus suo iudicio reservarit, hocque privilegium Beato clavigero Petro sua rice solummodo commisit. Quod ejus justè prærogativum succrescit sedi, futuris hereditandum atque tenendum temporibus, quoniam et inter Apostolos fuit quædam discretio potestatis, etc.* Decimo octavo, ex Sylvestro afferre possumus canонem ultimum Romanæ Synodi sub illo constitutæ, qui sic habet: *Nemo judicabit primam sedem, quoniam omnes sedes a prima sede justitiam desiderant temperari.* Neque ab Augusto, neque ab omni clero, neque a regibus, neque a populo iudex judicabitur. Et subscriperunt ducenti octoginta quatuor Episcopi cum aliquibus presbyteris et diaconis, et ipse etiam Constantinus Augustus. Decimo nono, Marcus, in epistola ad Athanasium, et Episcopos Ægypti: *Hæc (inquit) est sancta et Apostolica mater omnium Ecclesiarum, Christi Ecclesia;* quam etiam esse dicit immaculatam in fide, quia promissio facta Petro in Romanis Pontificibus impletur. Vigesimo, Julius I, epistola

ad Orientales, Romanam Sedem primam vocat, et ad illam pertinere dicit iura convocandi Synodos, judicandi Episcopos, et majores causas ad se reservandi, *quia omnibus prælata est non solum canonum, et Sanctorum Patrum decretis, sed Domini Salvatoris nostri roce*. Quod etiam repetit in rescripto contra Orientales pro Athanasio.

8. Vigesimo primo, Liberius, in rescripto ad Athanasium, in principio, auctoritatem dicit se in Petro super universam Ecclesiam accepisse. Vigesimo secundo, Felix II, in rescripto ad Athanasium et Ægyptios, de Romana Sede intelligit Christi verba, Matth. 16. Vigesimo tertio, Damasus, in epistola ad Episcopos Africæ, prius dicit: *Nos qui supra dominum Domini, hoc est, universalem Ecclesiam Catholicam Episcopale suscepimus ministerium; deinde subjungit: Scitis firmamentum a Deo fixum, et immobile, atque titulum lucidissimum suorum sacerdotum, id est, omnium Episcoporum, Apostolicam sedem esse constitutam, et verticem Ecclesiarum.* Et subjungit statim verba Christi. Et inter epistolæ hujus Pontificis extat quædam ad ipsum, Aurelii, Carthaginensis Episcopi, postulantis ab ipso statuta et decreta in Romana Sede a fine Petri usque ad ipsum Damasum, *juxta Apostolicæ* (inquit) *Sedis auctoritatem.* Quæ mittens Damasus ait, epist. 5: *Ea te custodirz optamus, et aliis prædicanda ac publicanda mandamus, ut ab omnibus inviolate debita veneratione custodiantur*, etc. Vigesimo quarto, Siricius, epist. 1 ad Himerium, Tarraconensem Episcopum: *Portamus* (inquit), *onera omnium; imo hæc portat in nobis Beatus Apostolus Petrus.* Et epistola tertia ad universos orthodoxos: *Nobis loqui necessitas imperarit, cui omnium Ecclesiarum cura est.* Vigesimo quinto, Anastasius cunctis Germanicis et Burgundiaæ regionis Episcopis sic scribit: *Exigit dilectio vestra, ex auctoritate Sedis Apostolicæ vestris respondere consultis.* Et postea sub hac verborum forma respondet: *Apostolica auctoritate mandamus.*

9. Vigesimo sexto, Innocentius I variis loquendi modis, et in multis epistolis hanc veritatem docet, et universalem potestatem, quam in Evangelio fundat, præcipiendo et decernendo exercet, quæ omnia hic referre prolixum esset. Et ideo satis erit loca designare, scilicet, ep. 1 ad Victricium, 2 ad Exuperium, 3 ad Innocentium, et fere per omnes subsequentes; specialiter vero notanda est epistola decima septima ad Arcadium Impe-

ratorem, in qua his verbis illum excommunicat: *Ego minimus et peccator, cui thronus magni Apostoli Petri creditus est, segrego et rejicio te et illam a perceptione immaculatum mysteriorum Christi Dei nostri*, etc., quæ ibi prosequitur, potestate ligandi et solvendi utendo in omnes Episcopos et Patriarchas. Notanda est etiam epistola vigesima septima ad Episcopos Macedoniae; nam cum Innocentius ab eis epistolam accepisset: *In eis, ait, multa posita esse perridi, quæ stuporem mentibus nostris inducerent.* Et infra illa explicans, dicit: *Quæ cum sæpius repeli fecissem, adverti, Sedi Apostolicæ (ad quam relatio quasi ad caput Ecclesiarum missa currerbat) fieri injuriam, cuius adhuc in ambiguum sententia duceretur.* In epist. etiam 29, ad Decentium, late idem ostendit. Et optime in epist. 31 et 32 ad Concilia Carthaginense et Milevitani.

10. Vigesimo septimo, Zosimus epist. 1 ad Hesich. Episcopum: *Miramur, ait, ad dilectionem tuam statuta Apostolicæ Sedis non fuisse perlata.* Et infra: *Si quid auctoritati tuae aestimas defuisse, supplemus.* Et infra: *Sciet quisquis hoc, postposita Patrum et Apostolicæ sedis auctoritate, neglexerit, a nobis districtius vindicandum.* Vigesimo octavo, Bonifacius I, epist. 2 ad Episcopos Galliae, de judiciis Episcoporum in gravibus causis ita concludit: *Nostra necesse est auctoritate firmetur;* et epist. 3 ad Hilarium Episcopum ita scribit: *Metropolitanæ jure munitus, et præceptionibus nostris fretus accede,* etc. Vigesimo nono, Cœlestinus I, epist. 1 ad Episcopos provinciarum Viennensis et Narbonensis: *In specula* (inquit) *a Deo constituti.* Et infra: *Circa longinqua spiritualis cura non deficit, sed se per omnia, qua nomen Dei prædicatur, extendit.* Et in Epist. 4 ad Ecclesiam Constantinopolitanam, de Athanasio loquens, inquit: *In hac sede quietem communionis invenit, a qua semper Catholicis subvenitur.* Et epist. 5 ad Nestor., curam fidei et omnium Ecclesiæ ad se dicit pertinere; idemque ex cæteris ejus epistolis aperte colligitur.

11. Trigesimo, ex Leone Papa multa in superioribus adducta sunt, nam in omnibus ferre epistolis se ostendit universæ Ecclesiæ pastorem, ut epist. 4, in initio, verbis etiam expressit, dicens: *Divinis præceptis et apostolicis monitis incitamur, ut pro omnium Ecclesiarum statu impigro vigilemus affectu.* Notanda etiam est epist. 47 ad Synodum Chalcedonensem, in qua, cum dixisset voluntatem

imperatoris fuisse ut congregaretur Concilium, addit, *Beatissimi Petri Apostoli jure atque honore servato*; et infra dicit per suos vicarios se in universalis Synodo præsidere. Et epist. 53, in qua reprehendit Anatolium, Patriarcham Constantinopolitanum, eo quod Alexandrinæ et Antiochenæ Ecclesiæ præferri voluisset, quod in duabus sequentibus epistolis repetit; et in posteriori, quæ est ad Pulcheriam Augustam, sic inquit: *Consensiones Episcoporum, sanctorum canonum in Nicena Synodo conditorum regulis repugnantes, unita nobiscum restrae fidei pietate in irritum mittimus, et per auctoritatem B. Petri Apostoli generali prorsus definitione cassamus*. Optima est etiam epist. 84 ad Anastasium, Thessalonicensem Episcopum, cui, ut ipse dicit, vices suas delegaverat, *ut curam (ait) quam universis Ecclesiis principaliter ex divina institutione debemus, imitator nostræ mansuetudinis effectus adjutares*; et in epist. 89 ad Episcopos Viennensis provinciæ ex professo declarat divinam institutionem de ecclesiastica monarchia in Petro, et ejus successoribus Romanis Episcopis. Quam inter alia probat ex consuetudine consulendi eamdem Sedem, appellandi ad illam, et quod ab illa fuerint retractata, vel confirmata judicia, quam dignitatem *divinitus datam, se tueri dicit, non sua querens, sed quæ sunt Christi*. Idem optime tractat in sermonibus de Assumptione sua, præsertim in terlio.

12. Trigesimo primo, idem profitetur Hilarius Papa, epist. 3 ad Ascanium Episcopum, et in principio Concilii Romani sub ipso congregati. Trigesimo secundo, idem supponit Simplicius, epistol. 4 ad Zenonem, Hispalensem Episcopum, cui Apostolicæ Sedis vices committit; et in epist. 3 ad Zenonem imperatorem quem filium vocat, et ad fidem tuendam excitat, dicens inferius: *Perstat enim in successoribus suis (id est Leonis Papæ) hæc et eadem Apostolicæ norma doctrinæ, cui Dominus totius curam orilis injunxit*, etc. Et in epist. 4 ad Acacium, habet illa verba notanda: *Quia sanctæ memoriae prædecessorum nostrorum ex tanta doctrina, contra quam nefas est disputare, quisquis recte sapere videtur, noris assertionibus non indiget edoceri*. Et epist. 9 ad Zenonem Augustum: *Ecclesiarum (inquit) omnium curam sustinens*, etc. Quod etiam ostendit in epistola decima tertia ad eundem, ubi etiam in quodam canone Concilii Nicaei dispensat.

13. Trigesimo tertio, magnus præterea hu-

jus dignitatis defensor fuit Gelasius 1, epist. 2 ad Episcopos Dardaniæ, et 6 ad Episcopos Lucaniæ, cap. 41 et 27, et maxime in epistola 10 ad Anastasium imperatorem, ubi veritatem hanc late confirmat, et quantum Pontifex imperatorem, quem filium vocat, antecellat, declarat. Et in epist. 11 ad Dardanos, testatur Apostolicam Sedem omnes Synodos confirmare, et nullum Episcopum posse judicium ejus subterfugere, etc. Multaque similia habet in commonitorio ad Faustum, et in tomo de Vinculo anathematis, et maxime in decreto de Apocryphis scripturis, in principio. Trigesimo quarto, Anastasius in epistola ad Anastasium Augustum, illum monet ut suis mandatis obediat, quia sedes Petri ex ordinatione divina in universalis Ecclesia tenet principatum. Trigesimo quinto, idem latius ostendit Symmachus, in Apologet. contra eundem Anastasium Augustum, ex quo multa in superioribus desumpsimus. Trigesimo sexto, Hormisda, Epist. 1 ad Anastasium Augustum, jam aliquo modo correctum, eum laudat, dicens: *De orthodoxa concordia cogitatis, Ecclesia, in B. Apostoli Petri reverentia, divina specialiter præcepta servantes*. Et infra: *Directis ad nos sacris affatibus, commemorationem Sancti Concilii facere pietas vestra dignata est. De qua re tunc plenissimum poterimus præbere responsum, dum causam congregacionis nos volueritis evidenter agnoscere*. In quibus verbis satis ostendit decretum Concilii congregandi ad se, et causa cognita pertinere, de qua re plures epistolæ inter eosdem Pontificein et imperatorem videri possunt. Et similia habet idem Pontifex in epist. 22 ad Justinum imperatorem, cum multis sequentibus.

14. Trigesimo septimo, Bonifacius II, in epist. ad Eulalium, Alexandrinum Episcopum, in principio, eamdem dignitatem et fiduciam in potestate Petri ostendit. Trigesimo octavo, idem optime Joannes II, epist. 2 ad Justinianum imperatorem. Trigesimo nono, Vigilius Papa, epist. 4, cap. 7, sic ait: *Nulli vel tenuiter sententi, vel pleniter sapienti, dubium est quod Romana Ecclesia forma et fundamentum sit Ecclesiarum*, etc. Idem sumitur ex epistola ejusdem 2 ad Justinianum Augustum, quem filium appellat. Idem ex epist. 4 ad Aurelianum Episcopum, et in fragmento Theodori, Episcopi Cæsareæ, et aliorum, et ex epistola 7 ad universum populum Dei. Quadragesimo, Pelagius I, in epist. 4 ad Vigilium, in fine, post confutationem cuiusdam erroris,

addit: *Det operam tua dilectio, ut omnibus Ecclesiæ filiis innotescat, etc.; et subjungit rationem: Memor enim sum, me sub illius nomine Ecclesiæ præsidere, cuius Dominus Iesu Christo est glorificata confessio, et cuius fides omnes hæreses destruit.* Epistola etiam 3 optima est, et valde notanda pro his quæ in sequentibus dicemus; et epistola 5, in dubitationibus circa universales Synodos, ad sedem Apostolicam esse recurrentum. Quadragesimo primo, Joannes III, in epistola ad Episcopos Germaniæ et Galliæ dicit, eos suis litteris Apostolicis admonere, antecessorum vestigia sequendo, et iterum versus finem: *Monente (inquit) Dominicæ vocis imperio, quo Beatissimus Apostolus Petrus trina repetitione mysticæ sanctionis imbuitur, ut Christi oves, qui Christum amat, diligenter et cum magna cura pascat, quoniam ipsius Sanctæ Sedis, cui per abundantiam divinæ gratiæ præsumus, ipsius amore cohortamur, etc.* Quadragesimo secundo, Pelagius II, epist. 2 contra Joannem, Constantinopolitanum Episcopum, qui primatum ambiebat, inquit: *Rejecta penitus audacia, quæ contra Apostolicam Sedem, et contra ipsam Domini Salvatoris vocem sumpta est, disputandi contra Domini præcepta, vana errantium corda conquiescant, et caetera, quæ late prosequitur, docens, Romanam Sedem, instituente Domino, caput esse omnium Ecclesiarum, ad ipsamque pertinere Concilia congregare, nec posse legitima esse, quæ illius auctoritate non fulciantur.*

15. Quadragesimo tertio, Magnus tandem Gregorius, qui usque ad sexcentesimum decimum annum Domini Ecclesiæ præsedidit, eamdem Pontificiam auctoritatem actibus exercuit, et verbis confirmavit, ut ex epistolis ejus constat, ex quibus aliqua breviter perstringemus. Nam, generatim loquendo, in omnibus fere illis curam universalis pastoris egregie demonstrat, et præsertim notanda est epistola vigesima quarta, libro 1, quæ est ad omnes orbis Patriarchas, in qua onus sibi impositum exaggerat, et quinque generalia Concilia veneratur, et quasi denuo confirmat; et epist. 71: *Quanto Apostolicæ Sedi (ait) ab Ecclesiis cæteris reverentia exhibetur, tanto eam in earum decet esse tuitione sollicitum;* et lib. 1, indict. 11, epist. 7, cap. 46, potestatem supra omnes Episcopos, et ad omnes causas arduas terminandas profitetur et exerceat. Postea vero libro 3, epistol. 32, alias indict. 13, cap. 76, graviter reprehendit elationem Joannis Constantinop., et minatur coer-

cionem, nisi resipiscat, et per occasionem dicit: *Cunctis Evangelium scientibus liquet, quod voce Dominica totius Ecclesiæ cura et principatus committitur.* Quæ etiam repetit libro 7, epistola 69, ubi etiam dicit, sine Apostolice Sedis consensu et auctoritate nullum Concilium vires habere. Et in eodem libro, epist. 64, agens de eodem Episcopo Constantinopolitano, ait: *In quodam crimine Bysantius primas fuerat accusatus, et piissimus imperator eum juxta statuta canonica per nos voluit judicari.* Et infra de eodem primate ait, *quod se dicit sedi Apostolicæ subjici; si qua culpa in Episcopis invenitur, nescio quis ei Episcopus subjectus non sit.* Et l. 6, indict. 15, cap. 201, ad Eulogium, Alexandrinum Episcopum, refert illius Patriarchæ epistolam, in qua recognoscit cathedram Petri in Sede Romana, et adjungit: *Quis est qui nesciat Sanctam Ecclesiam in Apostolorum principiis soliditate firmatam?* etc. Libro 4, epist. 51, alias cap. 95, pallium mittit cuidam Episcopo. Idem, epist. 54; et saepè Episcopos confirmat, et interdum deponit vel excommunicat. Et lib. 7, epist. 125: *Quæ semel inquit) Apostolicæ Sedis auctoritate sancta sunt, nihil egent firmitatis,* etc.; et innumera similia in illis epistolis invenientur.

16. Præcipue vero notandus est insignis locus ejusdem Pontificis super quintum Psalmum Pœnitentiæ, circa illa verba: *Qui laudabant me, adversus me jurabant.* Ibi enim quasi describens hujus temporis schismata, inquit: *Erroris vesania nostris maxime temporibus malitia sua virus exercuit. Et totius Ecclesiæ pacem schismatica infestatione turbarit. Concitavit enim adversus Ecclesiam Dei non solum innumerabilem populi multitudinem, verum etiam regiam, si fas est dicere, potestatem. Nulla enim ratio sinit ut inter reges habeatur, qui destruit potius quam regat imperium, et quotcumque habere potest perversitatis suæ socios, eos a consortio Christi efficit alienos. Qui turpissimi lucri cupiditate illectus sponsam Christi efficit captivam, cupid abducere, et passionis Dominicæ sacramentum ausu temerario contendit evanescere. Ecclesiam quippe, quam sui sanguinis pretio redemptam Salvator noster voluit esse liberam, hanc iste potestatis regiæ jura transcendens, facere conatur ancillam. Quanto melius foret sibi dominam suam esse agnoscere, eique religiosorum principum exemplo devotionis obsequium exhibere, nec contra Deum fastum extendere dominacionis, a quo suæ dominium accepit potesta-*

tis. *Ipse enim est, qui ait: Per me reges regnant. Sed immensa cœcatus cupiditatis caligine, et divino, ut patet, ingratus beneficio, et contra Deum fastuosus, terminos, quos posuerunt patres nostri, contempto divino timore, transgreditur, et contra catholicam veritatem sue furore tyrannidis effertur. In tantum autem suæ temeritatem extendit resania, ut caput omnium Ecclesiarum Romanam Ecclesiam sibi vendicet, et in domina gentium terrenæ jus potestatis usurpet.* Quod omniño ille fieri prohibuit, qui hanc Beato Petro Apostolo specialiter commisit, dicens: *Tibi dabo Ecclesiam meam. Obstruatur ergo os loquentium iniqua, et omnis haereticorum acies obmutescat; quia nullas vires habet mendacium, quod ipsius voce veritatis incenit delectum.*

17. *Posteriores etiam Pontifices æque constanter suum primatum tutati sunt.* — Sicut his sex primis sæculis Romani Pontifices primatus sui testimonium et manifestissima signa dederunt, ita prorsus in omnibus posterioribus sæculis ipsorum successores constans docuerunt, et pro hac veritate ad unitatem fidei et Ecclesiæ conservandam necessaria maxime propugnarunt. Non existimo autem opportunum singulorum sententias sìgillatim prosequi, tum quia Protestantes de his maxime posterioribus Pontificibus hoc non negant; tum etiam quia omnia jura et decreta canonica, quæ in Decreto et Decretalibus continentur, plena sunt hujusmodi testimoniis. Quædam vero insigniora loca, quæ præsenti controversiæ magis videntur accommodata, designanda breviter censui. Videndæ ergo sunt epistolæ Honorii I ad Eduinum, regem Anglorum, et Honoriū Episcopum, nam ex illis constat, tum regem, tum Episcopos Angliæ, ab Apostolica sede spiritualia jura impetrasse vel accepisse. Nam ibi Pontifex ad regis petitionem duo pallia mittit duobus Metropolitanis, et utrique, ut auctoritate Papæ successorem in morte possit sibi subrogare, concedit. Videri etiam potest epistola Leonis II ad Episcopos Hispaniae de recipienda sexta Synodo; cuius fit mentio in Concilio Toletan. 14, eamque integrum refert ex vetusto et authentico codice Garcias Loaisa in sua collectione Conciliorum Hispaniæ. In illa ergo Leo Romanam Ecclesiam, et Apostolicam sedem, Sanctam Ecclesiam omnium matrem appellat, et de se ait: *Nos licet imparés vice tamen Apostolorum Principis fungimur.* Et similiter Benedictus II in ep. ad idem Concilium in eodem loco relata: *Beati (inquit)*

Petri Apostolorum Principis licet imparés pro commisso, divina ope, ministerio locum implemus. Est etiam consulenda ep. Agathonis ad Constantimum imperatorem, quæ habetur in sexta Synodo, act. 4, ubi loca Evangelii supra tractata ad Romanam Ecclesiam pertinere ostendit, et in hoc maxime insistit, quod in fide nunquam erravit, nec errare potest.

18. Est etiam valde notanda epistola Adriani I ad imperatores Constantimum et Irenem, quæ habetur in Septima Synodo. Nam in priori parte ejus, imperatorem exhortatur *ad permanendum in fide Petri et Ecclesiæ Romanæ, et ad honorandam Sanctissimam Romanam Ecclesiam, Principem Apostolorum, sicut a superioribus piis imperatoribus factum est, qui ex toto corde Vicarium ejus dilexerunt.* In altera vero parte, quæ a Graecis omissa est, tamen in Vaticana Bibliotheca servatur, et ab Anastasio addita est, de hac sede dicit: *In toto orbe terrarum primatu fungens, caput omnium Ecclesiarum constituta est, etc., reprehenditque Patriarcham Constantinopolit., quod auderet universalis Episcopi nomen assumere, cum neque in secundo ordine sine auctoritate Pontificis Romani unquam potuerit nomen habere.* Et addit notanda verba: *Quod si super prælatam sibi Sanctam Romanam Ecclesiam, quæ est caput omnium Ecclesiarum, describatur, tanquam Sanctarum Synodorum rebellem, atque haereticum se manifestare certum est.* Quia si universalis est, etiam nostræ Sedis primatum habere dignoscitur, quod ridiculum omnibus fidelibus christianis appareat, quia in toto orbe terrarum a Redemptore mundi B. Petro Apostolo principatus ac potestas data est, et per eundem Apostolum Ecclesia Romana usque hactenus tenet principatum, potestatem et auctoritatem.

19. Praeterea Nicolaus I, in suis epistolis, saepè hanc veritatem profitetur, præsertim ad Photium, et in septima responsione ejus, copiose vero et efficaciter in epistola 8, ad Michaelem imperatorem, quæ est prima ad ipsum, et in altera ad eundem idem confirmat, et in 10, ad Episcopos Constantinopolitanæ sedi subjectos, et in 18, 20 et 30, et fere in reliquis. Multa etiam similia habentur in epistolis Joannis VIII, quæ licet in tomis Conciliorum non habeantur, in 3 tomo epistolarum Pontificalium novissime editæ sunt; specialiter vero in epistola 73 ad Lambertum Comitem, notari possunt illa verba: *Sedem Apostolicam, quam Deus omnipotens supra petram sui nominis fundare dignatus est, non solum reges et*

principes terræ, verum etiam imperatores Augusti, et totius orbis domini suis apicibus, ut pote caput omnium Ecclesiarum Dei honoraverunt, dignisque præconiis ejus Pontifices, Vicarios scilicet B. Petri, Apostolorum principis, laudaverunt, votisque supplicibus deprecari studuerunt, et usque in finem sæculi, Petri manente nomine ac memoria, supplicare non desinenter. Idem epistola 84 ad Ludovicum regem, Caroli imperatoris filium, quem vice patris suum a secretis consiliarium constituit.

20. Deinde Leo IX, in Apologia contra Michaelem et Leonem, c. 9, inter haereses Orientalium Episcoporum ponit præsumptionem assumendi nomen universalis Episcopi, quod ait Romano Episcopo oblatum esse a Synodo Chalcedonensi, et licet post Christum illi maxime convenire possit, propter modestiam et humilitatem illud non acceptasse; et c. 10 decernit, de Apostolica Sede neminem mortalium posse facere judicium: *Beatissimo (inquit) et Apostolico Pontifice Sylvestro dirinitus decernente, spiritualique ejus filio Constantino, religiosissimo Augusto, universa Nicæna Synodo approbante ac subscribente, etc.* Videri etiam potest ejus epist. ad Petrum Episcopum Antiochenum, et epistola ad Constantimum Monomachum imperatorem. Gregorius item VII, in suis epistolârum libris multa habet in hujus veritatis confirmationem; specialiter autem videri possunt in lib. 1, epist. 63 ad Regem Aragoniæ, et 64 ad Alphonsum et Sancium, reges Hispaniæ, ubi fidelitatem eorum ad Apostolicam Sedem laudat, et concordiam cum illa commendat; et lib. 3, epist. 40 ad Henricum regem, ubi in ipsa salutatione ait: *Henrico regi salutem, et Apostolicam benedictionem, si tamen Apostolice Sedi, sicut christianum regem decet, obedierit, etc.* Et deinceps tota epistola est in confirmationem Români primatus; et postea excommunicat Sigefredum, Moguntinum Archiepiscopum, et alios, propter schisma ab Ecclesia Romana. Et tandem ipsum etiam regem excommunicat, et omnes Christianos a vinculo juramenti, quod illi fecerunt, vel facient, absolvit, et ut nullus ei serviat, interdicit. Libro autem 4, epist. 42 ad Episcopos et principes regni Theutonicorum, refert qualiter idem rex, humiliatus ad poenitentiam, *absolutionis veniam impetraverit*, recepto ab eo securitatis jureamento. Et in eodem libro, epist. ult. ad regem et principes Hispaniæ, eamdem curam universalis profitetur, ut latius ibi videri potest. Innocentius etiam III egregie de primatu Ec-

clesiae Romanæ scripsit in sermone 2 de Consecr. Pontificis; et in variis epistolis decretalibus, tam libro primo quam secundo, saepè idem repetit. Ac denique fere in omnibus Bullis, Constitutionibus, et Extravagantibus, eamdem supremam potestatem moderni Pontifices exercuerunt semper, et exerceant. Est ergo evidens in hoc punto perpetua eorumdem Pontificum traditio, et consensio.

CAPUT XVI.

OCCURRITUR PROTESTANTIBUS, ARGUMENTUM EX PONTIFICUM TRADITIONE SUMPTUM ELUDENTIBUS, ET AUCTORITATE CONCILIORUM CONFIRMATUR.

1. *Primus evadendi modus.* — Altero vero e duobus modis solent adversarii Ecclesiæ Romanæ allatis testimoniis Pontificum respondere. Prior est, non constare prædictas epistolas decretales esse legitimas; imo multa in eis reprehendunt, propter quæ earum auctoritatem contemnunt. Verumtamen hæc responsio non solum apud Catholicos, sed etiam apud quoscumque eruditos et prudentes viros tanquam frivola et incredibilis rejicienda est, ut late ostendit noster Franciscus Turrianus, in libris in defensionem illarum epistolarum editis, in quibus omnibus calumniis Magdeburgensem respondet. Nos autem breviter dicimus, imprimis tantam esse epistolarum antiquitatem, ut timeri non possit ad confutandos novos errores fuisse conflictas. Præterea de Leonis I epistolis nullus hactenus dubitavit, et tamen ipse, in epist. 2, c. 5, *custodire mandat omnia decretalia constituta, tam beatæ recordationis Innocentii, quam omnium prædecessorum suorum.* Et clarius Gelasius Papa, qui ante mille centum annos fuit, in decreto de Libris authenticis, quod Gratianus etiam refert, dist. 15, cap. 3, sic inquit: *Decretales epistolæ, quas beatissimi Papæ diversis temporibus ab urbe Roma pro diversorum Patrum consultatione dederunt, venerabiliter suscipienda sunt.* Idemque post trecentos et quinquaginta fere annos confirmavit Nicolaus I, in epist. 42 ad Episcopos Galliæ, cuius magnam partem Gratianus inse-
ruit Decreto, distinct. 19, cap. 4. D. Item Hieronymus, epist. 44 ad Geruch., testatur, aliquando juvisse Damasum, Orientis atque Occidentis consultationibus respondentem. Non potest ergo dubitari fuisse consuetudinem Pontificum Romanorum per has epistolas Ecclesiam gubernandi; ergo neque verisimile

est omnes periisse, neque alias esse, nisi quæ in Ecclesia Romana receptæ et servatæ sunt.

2. Ad hæc multæ ex his epistolis insertæ sunt et connexæ cum epistolis aliorum Patrum, quæ in dubium revocari non possunt sine magna impudentia et temeritate. Ut patet ex epistolis Cornelii cum epistolis Cypriani; Innocentii, cum scriptis Chrysostomi et Augustini. Item ex epistola Marci Pontificis cum epistola Athanasi ad eumdem; itemque ex epistola Liberii. Item ex multis aliis inter epistolas Hieronymi et Augustini. Item ex epistola Theodorei ad Leonem cum responso ejus. Quædam etiam sunt inter alia opera eorumdem Pontificum recepta, ut inter opera Gregorii, Leonis, etc. Neque est major ratio de illis, quam de cæteris operibus dubitandi. Multæ item a gravissimis historiographis referuntur, ut capite sequenti probabo. Extant præterea antiquissima exemplaria plurium epistolarum in Vaticana Bibliotheca, ex quibus summa fide et diligentia novissime editæ sunt et correctæ. Denique, quanquam de una vel altera epistola, vel parte ejus posset aliqua ratio dubitationis vel suspicionis oriri, nihilominus quod attinet ad præsentem causam, tantam habemus impositam nubem testium (ut verbis Pauli utar), tantamque concordiam sententiarum et actionum supremæ jurisdictionis, ut nullus, nisi nimis pertinax et impudens, dubitare possit quin hic fuerit omnium Romanorum Pontificum sensus et consensus, universa item Ecclesia cum eis conspirante et consentiente.

3. *Confutatur alia evasio.* — Tunc vero occurrit altera responsio dicentium, in hoc negotio non esse Pontificum testimonium audiendum, quia nemo in propria causa est legitimus testis. Verumtamen hæc etiam responsio a viro catholico audiri non potest. Primo, quia revera Pontifices Romani in hoc negotio non tam sunt testes in propria causa, quam in causa Christi et universalis totius Ecclesiæ. Dicinde, quia non tam sunt testes quam judices in similibus causis, nam ad eos spectat dogmata fidei declarare, et Ecclesiæ proponere, ut in superioribus visum est; hic autem articulus ad dogmata fidei pertinet, ut iidem Pontifices eadem certitudine decernunt, et ex divina Scriptura in superioribus probatum est. Unde sive judices, sive testes dicantur, non proprio, sed divino spiritu duci, veritatem docuisse credendi sunt. Praeterea, etiam si eorum testimonium ut humanum conside-

retur, maximæ auctoritatis est, et rem facit evidenter credibilem; nam credibile non est in hoc puncto per ignorantiam errasse, quia aliqui eorum fuerunt sapientissimi, nonnulli vero Apostolorum discipuli fuerunt, et cum eis familiariter conversati sunt, præsertim Clemens et Anacletus, quos fuisse Petri diaconos Ignatius testatur, in Epist. 5 ad Trallianos, per illos autem cum Lino, Cleto, et similibus hæc traditio ad successores pervenit. Fuerunt etiam illi viri sanctissimi, ut propterea credi non possit ex ambitione et arrogantia potestatem sibi non datam usurpare voluisse. Multi etiam ex illis fidem suam suo sanguine consignarunt. Cum ergo hunc articulum inter dogmata fidei docerent, non solum verbo, sed etiam vita et morte sua illum confirmatum reliquerunt. Denique cum rex Angliæ profiteatur, se non audere antiquis Patribus primorum sæculorum resistere, si constanter loqui velit, necesse est ut in tantorum Patrum conspectu taceat, eisque contradicere non audeat. Ut autem illum amplius urgeamus, addeamus quatuor Concilia generalia, quæ ipse veneratur, mire cum dictis Pontificibus consentientia.

4. *Traditio Pontificum ex quatuor Conciliis generalibus roboratur.* — Concilium itaque Nicænum 1, lib. 3, in canonibus sumptis ex Julio Papa I, epist. 2, in canon. 1, sic dicitur: *Non debent præter sententiam Romani Pontificis Concilia celebrari.* Et canon. 2: *Episcopi in gravioribus causis libere Apostolicam appellant Sedem, atque ad eam quasi ad matrem confugiant, etc.* Et canon. 3: *Dum iterato iudicat Apostolica Sedis Pontifex causam Episcopi, nullus aliis in ejus loco ordinetur;* et redditur ratio, *quia inconsulto Romano Pontifice, non est permisum tales causas omnino definire,* cum Petro dictum sit a Domino: *Quodcumque ligaveris, etc.* Et in canonibus 80 ex Græco et Arabico translatis, in can. 39, sic dicitur: *Ita præest Patriarcha iis omnibus, qui sub potestate ejus sunt, sicut ille, qui tenet sedem Romæ, caput est, et princeps omnium Patriarcharum, quandoquidem ipse est primus, sicut Petrus, cui data est potestas in omnes principes Christianos, et omnes populos eorum, ut qui sit Vicarius Christi Domini nostri super cunctos populos, et universam Ecclesiam Christianam, et quicumque contradixerit, a Synodo excommunicatur.* De quo canone videnda sunt, quæ in tom. 1 Conciliorum notantur. Et illi concordat Concilium Sardicense, in can. 4 et 7, quæ sunt de cau-

sis Episcoporum a Pontifice Romano terminandis.

5. Deinde in Concilio Constantinopolitano I, can. 3, alias 5, dicitur : *Constantinopolitanus Episcopus habeat honoris primatum post Romanum Episcopum.* In quo canone unum supponitur, et aliud statuitur. Supponitur quidem, Summum Pontificem habere primatum in Ecclesia, et hoc est quod nunc ad nos spectat; nam generale Concilium id supponit, quod pro certo et indubitate habuit. Neque fingere potest rex Angliae Concilium loqui de primatu solum ratione politici ordinis, quoad aliquem externum splendorem, vel honorem; nam loquitur de primatu eo modo quo ab ipsis Romanis Pontificibus gerebatur, jurisdictione nimirum et potestate; et canon. 2, proxime præcedente, constat Concilium loqui de primatu in regimine et gubernatione Ecclesiæ. Altera vero pars illius canonis multis temporibus recepta non est, ut constat ex Leone Papa, epist. 53, alias 51, ad Anatolium, cap. 2, et ex duabus sequentibus ad Marcianum et Pulcheriam Augustos. Et ex Gregorio, lib. 6 Epistolarum, epist. 31 et 37; et ex Nicolao I, et Leone IX, locis supra citatis. Sed hoc etiam primatum Ecclesiæ Romanæ commendat; ideo enim statutum illud, neque tunc, neque post multa tempora vim habuit, quia Romana Ecclesia illud non probavit; quando vero illa consensit, habere cœpit effectum, ut constat ex Innocentio III, cum Concilio Lateranensi, cap. *Antiqua*, de Privilegiis.

6. Præterea Concilium Ephesinum I, in epist. ad Cœlestinum Papam, quæ habetur tomo quarto illius Synodi, c. 47, illum tanquam supremum Pastorem et fidei judicem alloquitur in hunc modum : *Sanctitatis Tuæ circa pietatem, zelum, ejusdemque circa fidei sinceritatem, curam nostri omnium Servatori apprime gratam et placitam cum omni admiratione complectimur : est enim vobis tam eximiis in more positum, ut in omnibus celebres sitis, studiaque vestra solida Ecclesiarum firamenta constituatis.* Ubi certe non tantum de persona Cœlestini, sed de more ipsius sedis loquitur, unde subjungit : *Quia vero necessitas exigebat ut omnia, quæ in hac sacra Synodo acciderunt, Sanctitati Tuæ declarentur, non potuimus hisce nostris litteris ad Tuam Sanctitatem non perscribere, etc.* In quibus verbis etiam ostendunt dependentiam a Pontifice Romano. Unde tomo secundo ejusdem Concilii, c. 45, cum totum Conci-

lium, auditis Cœlestini litteris in absentia legatorum ejus, acclamasset, et illius instructionem secutum fuisset, cumque legati postea advenissent, et quod factum fuerat intellexissent, Philippus unus ex illis dixit : *Gratias agimus sanctæ venerandeque huic Synodo, quod litteris Cœlestini Sanctissimi Beatisimique Papæ robis recitatis, sancta Ecclesie membra sanctis vestris vocibus, piisque præconiis, sancto vestro capiti vos exhibueritis ; non enim ignara est vestra beatitudine totius fidei, cæterorumque omnium Apostolorum caput Beatum Apostolum Petrum extitisse.* Quod iterum latius repetit idem Philippus, dicens nulli esse dubium, Petrum fuisse Christi Vicarium ab ipso constitutum, necnon per successores suos huc usque semper vivere, ejusque successorem et Vicarium sanctum esse Romanum Pontificem. Quos sermones sacra Synodus detestata non est, sed potius consensit legatis apostolicis, et magna conformitate eidem fidei cum illis subscriptis. Et cap. 17, in epist. Synodi ad Imperatores, inter alia referunt, Cœlestinum litteras misisse ad Cyrilum, ut suas in hac parte vices subiens, Romæ definita perficeret, et postea misisse Philippum presbyterum, qui *Sanctissimi Cœlestini* (inquit) personam hic sustinet. Multaque alia similia evidenter signa primatus pontificii in illo Concilio leguntur.

7. Neque pauciora reperimus in Concilio Chalcedonensi, in quo fuerunt etiam legati Leonis Papæ, loco illius Concilio præsidentes, ex quibus Paschasius, Act. 1, in principio, sic locutus est : *Beatissimi atque Apostolici viri Papæ urbis Romæ, quæ est caput omnium Ecclesiarum, præcepta habemus præmanibus, quibus præcipere dignatus est ejus apostolatus, ut Dioscorus Alexandrinorum Archiepiscopus non sedeat in Concilio, sed audiendum intromittatur ; et totum Concilium Leoni tanquam capitii obedivit.* Et in Act. 2, lectis Leonis epistolis, omnes Concilii Patres dixerunt : *Ita credimus ; Petrus per Leonem ita locutus est.* Et in Act. 3, Leo sæpe vocatur universalis Patriarcha, et universalis Archiepiscopus; et circa medium, Julianus Episcopus dixit ad legatos Papæ : *Nunc Vestra Sanctitas Primatum tenet sanctissimi Leonis.* Et infra : *Petimus Vestram Sanctitatem, qui habetis locum Sanctissimi Papæ Leonis, contra eum (id est, contra Dioscorum) proferre sententiam, etc., quæ omnia partim nomine totius Concilii fiebant, partim illis consentiebat.* Præter haec refert

Surius, in fine actionis 45 ejusdem Concilii, sequentes sententias : *Veneramur, secundum Scripturas et canōnum definitionem, sanctissimum antique Romæ Episcopum primum esse, et maximum omnium Episcoporum.* Item alia : *Si quis Episcopus predicatur infamis, liberam habeat sententiam appellandi ad Beatisimum Episcopum Antiquæ Romæ, quia Petrum habemus petram refugii, et ipsi soli libera potestate loco Dei sit jus discernendi Episcopi criminati infamiam secundum claves a Domino sibi datas.* Item : *Alia omnia ab eo definita teneantur tanquam a Vicario Apostoli throni.* Hæ vero sententiae non inveniuntur nunc in Concilio Chalcedon., sed eas allegat Surius ex D. Thoma, in Opusculo contra errores Græcorum, apud quem invenio 2 et 3, in c. 32, § Ostenditur etiam quod Petrus ; primam autem ibi non invenio, sed in § Ostenditur etiam quod Prædictus, sic inquit : *Legitur in Chalcedonensi Concilio, quod tota Synodus clamarit Leonī Papæ : Sanctissimus Apostolicus et universalis Patriarcha per multos annos virat.*

8. Præter hæc vero sunt expressa testimonia ejusdem Concilii, act. 46, in epist. ad Leonem, in qua referuntur gesta in Concilio, ubi prius ex illo Matth. 16 : *Ubi sunt duo aut tres congregati in nomine meo, ibi sum in medio eorum, inferunt, quantam circa sacerdotes peculiaritatem potuit demonstrare, qui et patriæ, et la'ori, sue confessionis notitiam prætulerunt, quibus tu quidem sicut membris caput præeras in iis qui tuum tenelant ordinem.* Et infra, Eutychetis scelera referens, ait : *Et eos quidem, qui ea, quæ pastoris sunt, sapiunt, abscidit; eos vero qui lupi demonstrati sunt, super oves imposuit, et post hæc omnia insuper et contra ipsum, cui vineae custodia a Salvatore commissa est, extendit insaniam, id est, contra tuam quoque Apostolicam Sanctitatem.* Et excommunicationem meditatus est contra te, qui corpus Ecclesiae unire festinas. Et inferius petunt confirmationem decretorum ab ipsis, et specialiter circa præminentiam Patriarchæ Constantinopolitani. Et quamvis hoc Pontifex non probaverit, ut supra diximus, tamen in ipsa petitione confitetur Synodus primatum Pontificis, et ita exponunt decretum secundæ Synodi supra relatum : *Quæ præcepit (aiunt), post restraintem sanctissimam et Apostolicam sedem honorem habere Constantinopolitanam, quæ est secunda ordinata, confidentes quia lucente apud vos apostolico radio, usque ad Constantinopolitanam Ecclesiam*

consuete gubernando, illum spargentes, hunc sapienter expanditis, etc.

9. *Ex aliis synodis eadem traditio confirmatur.* — Eodem modo confirmari potest eadem traditio, ex multis quæ habentur in quinta Synodo generali, Constantinopolitana II, a Vigilio Papa confirmata. Item ex sexta Synodo, act. 47 et 48, et ex septima Synodo sub Adriano Papa coacta, quæ sub ejus obedientia, et juxta ejus instructionem in omnibus processit, ut ex act. 7, in fine, colligitur. In octava etiam Synodo extat canon. 21, in quo primatus tribuitur Ecclesiæ Romanæ, quam vocat sedem Petri, principis Apostolorum. Et ut alia omittam, quæ, si legitima fuerunt, sub obedientia Romanæ Sedis semper processerunt, specialiter hanc veritatem docuit Concilium Lateranense, sub Innocentio III, c. 5 et 6; et expressius eam definit Concilium Florentinum in litteris unionis, Græcis eum Latinis consentientibus his verbis : *Definimus sanctam apostolicam Sedem, et Romanum Pontificem in universum orbem obtinere primatum, et ipsum Pontificem Romanum successorem esse Beati Petri, principis Apostolorum, et verum Christi Vicarium, totiusque Ecclesie caput, et omnium Christianorum Patrem ac Doctorem existere, et ipsi in Beato Petro, pascendi, regendi, et gubernandi universalem Ecclesiam a Domino Jesu Christo plenam potestatem datam esse, etc.* Denique Concilium Tridentinum a principio, et in toto suo progressu Pontificis auctoritatem recognoscit, ejusque confirmationem in fine postulat, et specialiter session. 6, cap. 4, de Reformatione, eum vocat Dei in terris Vicarium, habentem supremam sedis auctoritatem.

10. Ex Conciliis etiam provincialibus possent multa congeri, quæ brevitatis causa prætermittimus; videri tamen possunt Concilium Romanum sub Sylvestro, et Romanum III et IV sub Symmacho, et Concilium IV Aurelianense, c. 4; et Concilium Carthaginense, et Milevitanum, in epist. ad Innocentium Papam, quæ sunt 90 et 92 inter epistolulas Augustini, in quibus auctoritas Ecclesiae Romanæ ad plenam hæresis damnationem postulatur. Quod etiam confirmant alii Episcopi cum eodem Augustino, in ep. 93, ad eundem Innocentium, quarum facit etiam mentionem idem Augustinus, in epist. 106, dicens : *Ex duobus Conciliis Carthaginensi et Milevitano, relationes ad Apostolorum sedem missæ sunt; scripsimus etiam ad beatæ memorie Papam Innocentium præter*

Conciliorum relationes epistolas familiares, etc. Ad omnia nobilis ille rescripts eodem modo, quo fas erat. atque oportebat Apostolicæ sedis Antistitem. Et concordat cum illis Concilium Africanum sub Bonifacio, cap. 35.

41. Præter hæc vero animadverti potest Concilium Turonicum II, in cuius c. 21 habentur illa notanda verba : *Quis sacerdotum contra decreta, quæ a Sede Apostolica processerunt, agere præsumat.* Et fere similia habet Concilium Bracharense I, c. 18, ubi omnes Episcopi dixerunt, conveniens esse ut omnia inter ipsos concordi celebrarentur officio, et adjungunt, *præcipue cum et de certis quibusdam causis instructionem apud nos Sedis Apostolicae habeamus, quæ ad interrogationes suas quondam tenerandæ memoriae Prosuturi prudenti ab ipsa Beatissimi Petri accepit cathedra.* Et addidit Lucretius, Bracharenensis Episcopus : *Recte Paternitas Vestra auctoritatem Sedis Apostolice recordata est, etc.* Et statim 22 et 23 statuunt, ut in ordine Missæ et baptismi prædictam instructionem Romanæ Sedis sequantur. Unde Concilium Toletanum I, in assertione fidei, in ultimo anathematismo dicit : *Si quis in salutaris baptismo contra sedem Sancti Petri aliquid faciat, anathema sit.* Maxime vero nostrum propositum confirmingant verba Concilii Toletani III, satis antiqui, can. 1 : *Permaneant in suo rigore Conciliorum omnium constituta, simul et synodicae Sanctorum Præsulum Romanorum epistolæ.* His enim verbis satis constat, quanta fuerit eo tempore auctoritas non solum Ecclesiæ Romanæ, sed etiam epistolarum decretalium ejus, de quibus simile decretum habetur in Concilio Toletano XIV, capite undecimo.

CAPUT XVII.

EADEM TRADITIO PATRUM AUCTORITATE CONFIRMATUR.

4. Quamvis ad confirmandam fidem de Romani Pontificis primatu satis superque sit auctoritas Pontificum et Conciliorum, nihilominus non est omittenda auctoritas Sanctorum Patrum, ex quibus nonnullos supra adduximus, qui successioni Pontificis Romani in cathedra Petri expressum testimonium præbuerunt; nunc vero alii inducendi sunt, qui de excellentia ipsius cathedræ ejusque dignitate testificantur, quibus et concordia traditionis evidenter constabit, et eorum auctoritate fortasse rex Angliæ, qui aliquid

Patribus deferre videtur, magis movebitur. Est autem præ oculis habendum eosdem argumentandi modos ex Doctoribus posse desumi, quos in Pontificibus adnotavimus, nemirum ex verbis et titulis, quibus Romanos Pontifices honorant, ex actibus supremæ jurisdictionis spiritualis, quos illis tribuunt, et ex illustrioribus sententiis, quibus eorum primum profitentur. Prius ergo a Græcis, qui in præsenti causa minus suspecti judicari possunt, incipiemus.

2. Primo ergo Ignatius, in ep. 15 ad Romanos, Romanam Ecclesiam honorificentissime salutat, et de illa dicit : *Quæ præsidet in loco Romanæ regionis.* Polycarpus item cum *Romam venit, ad Anicetum Ecclesiam in urbe regentem,* ut eum de Paschæ quæstionne consulere (teste Hieronymo, de Scriptoribus ecclesiasticis, in Polycarpo; et Irenæo, lib. 3, c. 3), satis recognovisse videtur Pontificem Romanum ut Pastorem et fidei magistrum. Clarius vero et uberior Irenæus, lib. 3, c. 3, Romanam Ecclesiam maximam et antiquissimam vocat, et ab Apostolis Petro et Paulo fundatam esse dicit. Et subjungit : *Ad hanc Ecclesiam propter potentiores principaliatatem, necesse est omnem conuenire Ecclesiam, hoc est eos, qui sunt undique fideles,* etc.

3. Deinde D. Athanasius, in epist. ad Marcum, Romanorum Episcopum, sic eum salutat : *Domino Sancto, et Apostolici culminis venerando Marco Sanctæ Romanæ et Apostolicae Sedis, atque universalis Ecclesiæ patri, Athanasius, et universi Ægyptiorum Episcopi, salutem.* Et infra petitionem subjungens, ait : *Optamus ut a restra Sanctitate, sedis Ecclesiæ auctoritate, que est mater omnium Ecclesiarum,* etc. Et infra : *Vestri sumus, robisque obedientes cum omnibus nobis commissis, et sumus, et esse semper volumus.* Et in epist. ad Felicem II, quæ inter acta ejusdem Felicis in tom. 4 Conciliorum habetur, ipse cum aliis Episcopis Ægypti auxilium Sedis Apostolice implorat his verbis : *Vestro Sancto suggestimus apostolatui, ut nostri more solito sollicitudinem gerere dignemini.* Et infra : *Quia semper antecessores nostri et nos a restra Apostolica S. Sede auxilium hausimus, et nostri vos curam gerere agnоримus, præfatam apostolicam et summam expetimus juxta canonum decreta Sedem, ut inde auxilium capiamus, unde prædecessores nostri ordinationes et dogmata, atque sublerationes ceperunt.* Ad eam quoque quasi ad matrem recurrimus. Et infra : *Quod nequaquam robis inconsultis agere præsumimus*

(scilicet, de fide definire), *canonibus jubentibus, absque Romano nos de majoribus causis nihil debere decernere Pontifice*. Et infra : *Ob id vos, prædecessoresque vestros, Apostolicos, ridelicet, Præsules in summitatis arce constituit, omniumque Ecclesiarum curam eis habere præcepit*. Et infra : *Cui omne Episcoporum judicium est commissum*. Et infra, de hoc primatu exponit locum Matt. 16, et auctoritate Concilii Nicæn. omnia confirmat. Huic concordat Basilius, epist. 52, quæ est ad eumdem Athanas., dicens : *Visum est mihi consentaneum, ut scribatur Episcopo Romæ, ut quæ hic geruntur, consideret, etc.*

4. Gregorius etiam Nazianzenus, orat. 23, in laudem Heronis, commemorat Petrum Alexandrinum, Athanasii successorem, a sede sua pulsum a Lucio Ariano, ad Romanum Pontificem confugisse : *Ac per tacitam (inquit) accusationem omnibus lachrymas morit, ut calamitatis magnitudinem in oculis, et aspectu desigerent, et auxilium nanciseretur, quemadmodum et nactum esse scimus*. In quibus verbis Nazianzenus, simul cum Petro Alexandrino, Pontificis auctoritatem ad iudicandas etiam Orientis causas recognoscit. Quod etiam ex eodem Nazianzeno colligitur, orat. 52, quæ est secunda ad Cledonium, ubi commemorat Vitalium, Apollinaris sectatorem, quemdam fidei libellum fraudulenter edidisse, hæresim occulte profitendo; Damnum autem, fraude cognita, eum ab Ecclesiæ cœtu abdicasse; denique libellum cum anathematismo delevisse. Eodem modo Pontificiam potestatem testatus est Chrysostomus, in epistolis ad Innocentium I, petens ab illo auxilium contra eos qui injuste illum deposuerant, tum declarando depositionem fuisse irritam, tum puniendo malefactores, pro quibus tamen pie intercedit ut, si resipiscant, non excommunicentur, in hoc ipso potestatem Pontificis recognoscens.

5. Simili modo Cyrilus, in epistola ad Cœlestinum¹ in causa Nestorii, rem totam ad ipsum sicut ad caput retulit, et subjungit : *At quamvis res ita habeat, non prius tamen illius communionem deserere ausi sumus, quam hæc ipsa pietati tuæ indicaremus*, etc.; cui Cœlestinus respondit² : *Nostræ sedis auctoritate ascita, nostraque vice et loco cum po-*

testate usus, ejusmodi non absque exquisita sedulitate sententiam execqueris, nempe ut nisi decem dierum intervallo, ab hujus nostræ numerationis die numerandorum, nefariam doctrinam suam conceptis verbis anathematizet. Et infra : *Illico Sanctitas Tua illi Ecclesia prospiciat, is vero modis omnibus se a nostro corpore segregatum esse intelligat*. Cui epistolæ Cyrilus obedivit, ut constat ex ejus epistola ad Nestorium¹, quæ est de excommunicatione, dicens : *Quod nisi juxta tempus in litteris Cœlestini, sacratissimi Reverendissimique Romanorum Episcopi, expressum præstiteris, certo scias nullam tibi deinceps cum Episcopis et sacerdotibus Dei consuetudinem, nullum sermonem, nullum denique inter eos iocum futurum esse*. Et similia habet in sequenti epistola ad clerum populumque Constantinopolitanum. Refert præterea D. Thomas, opusc. 1, contra errores Græcorum, c. 32, § *Habetur*, eumdem Cyrillum in libro Thesaurorum dicentem : *Sicut Christus accepit a Patre plenissimam potestatem, sic et Petro, et ejus successoribus plenissime commisit*. Item, *nulli alii quam Petro, quod suum est plenum, sed ipsi soli dedit*. Ubi particula soli non excludit successores, sed alios Apostolos; nam paulo post dicit dedisse Petro potestatem et Ecclesiæ. Et inferius ait D. Thomas : *Ostenditur etiam quod subesse Romano Pontifici sit de necessitate salutis; dicit enim Cyrus in libro Thesaurorum : Itaque, fratres, si Christum imitamur, ut ipsius oves vocem ejus audiamus, manentes in Ecclesia Petri*, etc. Nec dubitandum est de his testimoniis, etiamsi nunc in Thesauro non inveniantur, tum propter D. Thomæ auctoritatem; tum etiam quia plures libros Thesauri periisse scimus.

6. *Ex consuetudine graviores causas ad Pontificem deferendi, idem primatus colligitur*.

— Denique ex ecclesiasticis historiis a Græcis etiam conscriptis constat, antiquissimam Ecclesiæ praxim fuisse, ut in causis gravioribus ex tota Ecclesia etiam Orientali ad cathedram Petri fieret recursus, ad petendam vel fidei declarationem, vel alicujus hæresis damnationem, vel Synodi congregationem aut confirmationem, vel ad petendum iudicium per modum appellationis, aut justæ defensionis, ex quibus manifeste constat potestatem supremam Romani Episcopi omnibus Græcis a principio Ecclesiæ agnitam et credi-

¹ Quæ est 18 inter epist. Cyrilli, et habetur in Concilio Ephesino, tom. 1, c. 29.

² Ep. 12, inter epist. Cyrilli et dicto tom. 1, c. 16.

¹ Epist. 10, et dict. tom. 1, c. 14.

tam fuisse. Hujus autem praxis, præter testimonia adducta, optimum argumentum sumitur ex historia Eusebii, lib. 7, c. 24, ubi de Paulo Samosateno ait : *Ubi simul cum orthodoxa fide episcopatum amisisset, et ex Episcopi domo ejus Ecclesie propria exire nollet, imperator Aurelianus de ea re rogatus sententiam, sanctissime quid esset agendum decrevit. Praecepit enim ut domus Ecclesiae illis tribueretur, quibus Christiani Italæ et urbis Romæ Episcopi per litteras tribuendam prescriberent.* Tanta enim erat fama publica primatus Romani inter Christianos Graecos, ut etiam gentiles non lateret, et ideo imperator, licet infidelis, eam sententiam protulit, sanctissime, ut ait Eusebius approbans sententiam illam, et consequenter etiam primatum, quia fidei conformis fuit, licet ab infideli lata fuisse.

7. Eadem traditio sumitur ex Theodoreto, lib. 2 Hist., c. 22, ubi de Conciliabulo Ariminiensi ait : *Præjudicium habere non debet, praesertim cum formula illa composita sit, neque Episcopo Romano, cuius sententia præceteris omnibus expectanda erat, consentiente, etc.*; et lib. 5, c. 10, refert, Damasum, post exortam sectam Apollinaris, illum et discipulum ejus Timotheum abdicasse, et per litteras Orientalibus significasse, quas ibi refert, earumque initium est : *Quod restra charitas debitam Sedi Apostolicæ reverentiam tribuit, filii honoratissimi, vobis quoque ipsis maximo sane honori est. Nam, licet in sancta Ecclesia, in qua S. Apostolus sedens nos docuit, quo pacto illius gubernacula, que suscepimus, tractanda sint, nobis prime partes deferuntur, tamen confitemur nos illo dignitatis gradu longe inferiores esse.* Et infra significat idem Pontifex, Orientales Catholicos ad ipsum recurrisse, dicens : *Quid est cur abdicacionem Timothei a me rursus requiratis, qui etiam hic judicio Sedis Apostolicæ, Petro quoque Episcopo Alexandrino praesente, abdicatus est una cum magistro Apolinario. Qibus omnibus Theodoretus assentitur. Imo ipse etiam cum aliquando in fidei suspicionem venisset, ad Leonem Papam per epistolam confugit, dicens : Ad Apostolicam vestram sedem currimus, ut Ecclesiarum ulceribus medicinam a vobis accipiamus; vobis enim per omnia primos esse convenit. Multis enim, quibus superiores estis, ornatur vestra sedes. Alias enim urbes ornat vel magnitudo, vel pulchritudo, etc. Vestrae autem redundantem bonorum copiam dedit is, qui est omnium largitor, ea est enim*

omnium maxima, et præclarissima, et quæ præest orbi terrarum; et cætera, quæ late prosequitur.

8. Huic denique traditioni adstipulatur Socrates, lib. 2 Histor., cap. 5, ubi Concilium Antiochenum illegitimum fuisse significat, quia Julii Pontificis Romani auctoritatem non habuit : *Cum canon (ait) ecclesiasticus jubeat non oportere absque sententia Episcopi Romani decreta Ecclesiae sancire.* Et c. 11, referens Athanasium, et plures alios Orientales Episcopos ab Ecclesiis suis electos, Romam pervenisse, ut Julium Episcopum Romanum de suo statu certiore facerent, inquit : *Quoniam Ecclesia Romana privilegium præter cæteras obtinebat; et lib. 4, c. 3, similia referens de Petro Alexandrino, de illo adjungit : Cum litteris Damasi, Episcopi Romani, reversus esset, populus illis confusus expellit Lucium, Petrum autem in locum illius introducit.* Et Sôzomenus, libro tertio Histor., capite octavo, referens fugam Athanasii et aliorum ad Julium Romanum Episcopum, addit : *Quorum criminationes cum Episcopus Romanus intellexisset, in communionem recepit. Et cum propter sedis dignitatem cura omnium ad ipsum spectaret, singulis suas Ecclesiæ restituit, scripsitque ad Episcopos Orientis, eosque incusavit, etc. Deditque mandatum, ut quidam illorum omnium nomine ad diem constitutum accederent.* Et c. 9, alias litteras ejusdem Julii refert, in quibus præter alia illud continebatur, legem esse ad sacerdotii dignitatem spectantem, quæ pronunciat acta illa irrita esse, quæ præter sententiam Episcopi Romani constituantur. Additque (quod notandum est) cum suis litteris apud rebelles Orientis Episcopos nihil proficeret, a Constante imperatore quasi a sæculari brachio adjutorium postulasse, atque ita tandem Orientales Episcopos Romam venire coegisse; et lib. 6, c. 22, orta controversia de Spiritus Sancti dignitate, inquit : *Episcopus Romanus de ea certior factus, scripsit ad Episcopos Orientis litteras, ut una cum Episcopis et sacerdotibus Occidentis Trinitatem consubstantialem esse, et gloria aequalem crederent. Quo facto singuli rebus ab Ecclesia Romana semel judicatis acqueverunt, sicque illa controversia finem habere visa est.* Et hæc de Patribus Graecis sufficiunt.

9. *Patres Latini in eamdem veritatem conspirantes.* — Ex Latinis multa in superioribus capitibus et in primo libro adducta sunt, quæ hic non sunt repetenda, sed breviter in-

sinuanda, et aliqua ex parte locupletanda. Primo ergo Tertullianus, lib. de Præscript., c. 36 : *Habes Romam, unde (inquit) auctoritas præsto est.* Et lib. de Pudicit., c. 4, Episcopum Romanum vocat *Pontificem maximum, et Episcopum Episcoporum*, ubi Pamelius plura ejusdem auctoris loca designat, quæ omitto, quia hic auctor cum ab Ecclesia Romana defecerit, non recte de primatu illius sensit, quamvis non omnino illum ignoraverit. Magnus igitur et fidelis hujus veritatis assertor fuit Cyprianus, qui in suis epistolis saepissime ad unitatem Ecclesiæ requirit unum supremum caput, illudque esse dicit in Ecclesia Romana, ut videri potest epist. 40, 43, 52 et 55, et 76, cujus verba saepe retulimus. Item Ambrosius, Orat. de Satyro fratre, et 1 ad Timot. 3, et lib. 1 Epist., in 7, ad Sacerdicium Papam, cum aliis Episcopis sic inquit : *Recognovimus litteras Sanctitatis Tuæ boni Pastoris excubias, qui fideliter commissam tibi januam serves, et pia sollicitudine Christi orile custodias, dignus quem oves Domini audiunt et sequantur.* Et epist. 4 ad imperatores Gratianum, etc., agens de vitandis Arianis : *Quomodo (inquit) fieri potest ut eum, quem societati eorum insertum vidimus, non etiam assertorem perfidiae judicemus? Quid etiam si defuissest? tamen totius orbis Romani caput Romanam Ecclesiam, atque illam sacrosanctam Apostolorum fidem ne turbari sineret, obsecranda foret clementia vestra; inde enim in omnes venerandæ communionis jura diminant, etc.* Et ep. 9 ad Theophylact. Alexandrinum : *Referendum arbitramur ad sanctum fratrem nostrum Romanæ sacerdotem Ecclesiæ, quoniam prasumimus ea te judicaturum, que etiam illi displicere nequeant.* Et infra : *Ut nos quoque accepta vestrorum serie statutorum, cum il gestum esse cognoverimus, quod Ecclesia Romana haud dubie comprobarerit, lati fructum hujus examinis adipiscamur.* Quibus verbis ad Orientalem Episcopum scriptis, de consuetudine Romani Episcopi gubernandi etiam Orientales satis testatur Ambrosius.

10. Ejusdem usus et potestatis testis est Hieronymus, epist. 41, ad Ageruchiam, dicens (ut supra retuli) se aliquando juvisse Damasum in respondendo ad Orientis et Occidentis synodales constitutiones. Et epist. 16 ad Principiam, referens quod supra tactum est de Athanasio et Petro Alexandrino, qui persecutionem Arianae haereseos declinantes, quasi ad tutissimum communionis sue portum Romam conseruant. In epist. etiam 8 ad De-

metriadem, circa finem, Sedem Romanam *Cathedram Apostolicam* vocat, idem de primatu ejus sentiens quod de primatu Petri, de quo ejus sententiam supra retulimus. Idem copiosius in epist. 57 ad Damasum, cuius verba jam in superioribus adducta sunt, ubi etiam docet, habere illam Sedem privilegium Petri non errandi in fide. Quod etiam sentit Apolog. 2, seu lib. 3 Apolog. contra Ruffinum, ubi habet illa verba : *Attamen scito Romanam fidem Apostolica voce laudatam hujusmodi præstigias non recipere etiam si Angelus aliter annunciet, quam semel prædicatum est.* Et infra : *Et tamen miror quomodo probarerit Italia quod Roma contempsit, Episcopi suscepserint quod Sedes Apostolica condemnavit, tacite negans id fieri potuisse, aut se illud credere.*

11. Ex Augustino etiam recurrente ad Romanum Pontificem tanquam ad Christi Vicarium, multa supra diximus ex epist. 90, 92 et 95 ejusdem Augustini. Quibus concordat idem Augustinus, lib. 2 Retract., cap. 50, dicens, *Pelagianam haeresim ab Episcopis Ecclesiæ Romanæ, Innocentio et Zosimo, cooperantibus Conciliorum Africanorum litteris, damnatam esse.* Et in epist. 157, in principio, se subditum Romani Pontificis aperte profitetur, dum ait : *Me apud Cæsaream præsente venerunt, quo nos injuncta nobis a venerabilis Papa Zosimo, Apostolice Sedis Episcopo, ecclesiastica necessitus traxerat.* Et infra, relatis verbis ejusdem Zosimi, ad probandam necessitatem baptismi in remissionem peccatorum, subjugit : *In his verbis Apostolice Sedis tam antiqua atque fundata, certa et clara est catholica fides, ut de illa nefas sit dubitare Christiano.* Et epist. 102, de Romana Ecclesia inquit : *In qua semper Apostolice cathedrali viguit principatus; et ibi etiam refert, in causa Donalistarum judicium Apostolice Sedis expectatum fuisse.* Idemque repetit lib. 4 contra epist. Parmen., c. 5, et epist. 16, ubi ait, ad cognoscendam Ecclesiam Catholicam, maxime spectandam esse successionem in sede Petri, sentiens illam esse petram super quam fundata est Ecclesia. Quod expressius declaravit in Psalmo contra partem Donati, tom. 7, dicens : *Numerate sacerdotes, vel ab ipsa Petri sede; ipsa est Petra, quam non vincunt superba inferorum porte.*

12. Praeterea ex eodem fundamento dicit libro 4 contra Julianum, c. 4 : *Puto tibi eam partem orbis sufficere debere, in qua primum Apostolorum suorum voluit Dominus glorio-*

sissimo martyrio coronari. Cui Ecclesiae præsidentem Beatum Innocentium si audire voluisses, jam tunc periculosam juventutem tuam pelagianis laqueis exuisses. Quid enim potuit vir ille sanctus Africanus respondere Conciliis, nisi quod antiquitus Apostolica Sedes et Romana cum ceteris tenet perseveranter Ecclesia. Qui locus est valde notandus : nam in eo plane docet Augustinus, definitionem Pontificis facere certam fidem, etiam sine generali Concilio. Unde in libro 2 de Peccato origin., c. 7, etiam de Cœlestio, Pelagii socio, refert, non fuisse ausum beati Papæ Innocentii litteris obsistere, imo se omnia, quæ Sedes illa damnaret, damnaturum esse promisso. Denique libro 1 ad Bonifacium, in principio, inter alia dicit : *Non deditur nisi qui non alta sapi, quamvis altius præsidens, esse amicus humilium, et amorem rependere impensum.* Et infra : *Cum communis sit omnibus nobis, qui fungimur episcopatus officio, quamvis ipse in eo præemiæas celsiore fastigio speculæ pastoralis, facio quod possum pro mei particula muneris, etc.*

13. Concordat cum Augustino Prosper contra Collatorem, cap. 10, ubi definitiones Innocentii et Zosimi contra Pelagium infallibilis reputans, tanquam absurdum infert contra Collatorem : *Secundum tuam censuram erravit Papa Innocentius, Petri sede dignissimus.* Et infra : *Erravit sacrosancta Beati Petri Sedes, quæ ad universum orbem Papæ Zosimi ore loquitur.* Et cap. 41, iterum inquit : *Beatae memoriae Innocentius nefandi erroris capita apostolico mucrone percussit.* Et infra : *Africanorum Conciliorum decretis beatæ recordationis Papa Zosimus sententia sua reburudnexit, et ad impiorum detrunctionem gladio Petri dexteræ omnium armavit Antistitum.* Ubi addit etiam Bonifacium, de quo ait : *Contra inimicos gratiæ Dei non solum apostolicis, sed etiam regiis utebatur edictis.* Et de Cœlestino adjungit : *Prædecessorum suorum statuta et decreta synodalia inviolabiliter servanda censebat.* Et de eodem subdit : *Nec segniore cura ab hoc eodem morbo Britannias liberavit, etc.* Et infra dicit, eadem cura Scotiam fecisse Christianam. Et in libro de Ingratis, cap. 2, sic ait :

Sedes Roma Petri, quæ pastoralis honoris,
Facta caput mundi, quicquid non possidet armis,
Religione tenet.

Et similiter^m libro de Vocat. gentium¹, imi-

tatus Leonem, ait : *Roma per Apostolici sacerdotii principatum amplior facta est arce religionis, quam solio potestatis.* Quomodo etiam dixit Fulgentius, lib. de Incarnat. et Gratia, cap. 11, *Romanam Ecclesiam Petri et Pauli cerbis, tanquam splendentibus radiis illustratam, eorumque decoratam corporibus, mundi cacumen esse.* Ex Optato etiam Milevitanus, contra Parmenian. multa relata sunt ; specialiter vero libro secundo : *Negare (inquit) non potes scire te in urbe Romana Petro primo episcopalem cathedralm esse collatam, in qua sedetur omnium Apostolorum caput Petrus, in qua una cathedrala unitas ab omnibus servatur, ut jam schismaticus et peccator esset, qui contra singularem cathedralam alteram collocaret.*

14. Similiter Isidorus, in epistola ad Eugenium, Toletanum Episcopum, cum potestatem Petro datam modo a nobis supra tradito explicasset, subjungit : *Cujus dignitas potestatis, etsi ad omnes Ecclesiarum Episcopos est transfusa, specialius tamen Romano Antistiti, singulari quodam privilegio, velut capiti, ceteris membris celsior permanet in æternum.* Et in Praefatione ad canonum collectionem, quæ habetur primo tomo Conciliorum, ait, cum Conciliis collegisse decreta et epistolas synodicas Pontificum, *quia in eis pro culmine Sedis Apostolice non impar Conciliorum extat auctoritas.* Et in fine : *Synodorum (inquit) congregandarum auctoritas Apostolice Sedi privata commissa est potestate, nec ullam Synodus ratum esse legimus, quæ ejus auctoritate non fuerit congregata vel fulta : hæc canonica testatur auctoritas, hæc historia ecclesiastica roboret, hæc Sancti Patres confirmant.* Hoc etiam confirmat Beda, in Homil. D. Benedicti Angli, tom. 7, de quo ait : *Ad Beatorum Apostolorum limina peregrinaturus advolavit, ut quia ruditus adhuc in gente Anglorum fides, et Ecclesiarum institutio florebat, ibi potius perfectam vivendi formam sumeret, ubi per summos Christi Apostolos totius Ecclesiae caput eminet eximium.* Et lib. 2 Histor. Anglor., cap. 4, de Gregorio ait : *Cum prius in toto orbe gereret pontificatum, et conversis jamdudum ad fidem veritatis esset Prælatus Ecclesiis, nostram gentem eatenus idolis mancipatam Christi fecit Ecclesiam, etc.* Et lib. 3, cap. 25, refert regem Angliæ, et alios illo jam tempore credidisse, claves Petro datas in Ecclesia Romana permanere. Et in lib. 4, c. 1, et saepè in illa historia, ostendit quanta fuerit semper Romani Pontificis circa An-

¹ Cap. 16, alia 56.

glos providentia, et eorumdem ad eumdem Pontificem obedientia.

16. Denique onines etiam posteriores Patres eamdem veritatem constantissime docuerunt, ex quibus duos tantum numerabimus, Anselmum et Bernardum, qui gravissime de pontificia dignitate locuti sunt. Anselmus enim, libro de Incarnatione Verbi, sic incipit: *Domino, et Patri universæ Ecclesie in terra peregrinantibus, Summo Pontifici Urbano, Frater Anselmus.* Et infra: *Quoniam divina proridentia Vestram elegit Sanctitatem, cui ritam et fidem christianam custodiendam, et Ecclesiam suam regendam committeret, ad nullum alium rectius refertur, si quid contra catholicam fidem oritur in Ecclesia, ut ejus auctoritate corrigatur, nec ulli alii tutius, si quid contra errorem respondetur, ostenditur, ut ejus prudentia examinetur.* Et in Praefatione ad epistolam ad Romanos, dicit illam epistolam primo loco poni, quamvis prima omnium scripta non fuerit, quia et in illo tempore Roma caput totius orbis extitit, et usque hodie Romana Ecclesia omnium Ecclesiatarum obtinet principatum.

17. D. autem Bernardus multo copiosius hoc ipsum docet, epist. 125 ad Gaufridum, ubi inter alia dicit: *Alemaniae, Franciae, Anglie, Scotiae, Hispaniarum et Hierosolymorum reges cum universo clero et populis servant et adhaerent domino Innocentio, tanquam filii Patri, tanquam capiti membra, solliciti servare unitatem spiritus in vinculo pacis.* Item epist. 141, fere de eodem argumento ad Mediolanenses; et epist. 183 ad Conradum, regem Romanorum: *Legi (inquit): Omnis anima potestatis sublimioribus subdita sit. Quam sententiam cupio vos, et omnimodis moneo custodire in exhibenda reverentia summae et Apostolicæ Sedi, et Beati Petri Vicario, sicut ipsam robis vultis ab universo servari imperio.* Et de sublimitate illius Sedis egregie loquitur epist. 137 ad Eugenium, et latius lib. 3 de Considerat., ad eundem, cap. 8, ex quo plura verba in superioribus relata sunt, et ideo illa prætermittimus. Addi etiam lie possent temporalium regum et imperatorum testimonia et exempla, sed ex illis aliqua in superioribus tacta sunt, et pluria in sequentibus afferemus, spiritualem potestatem temporali comparando. Nunc sufficiente notanda verba Constantini imperatoris, in cap. *In memoriam*, dist. 19, ubi sic inquit: *Honoremus Sanitatem Romanam et Apostolicam Sedem, ut quæ nobis sacerdotalis mater est dignitatis,*

esse beatæ ecclesiastice magistra rationis. Quare servanda est cum mansuetudine humilitas, ut licet vix ferendum ab illa sancta Sede imponatur jugum, tamen feramus, et pia devozione toleremus. Præter auctoritatem autem non est hic specialis ratio postulanda. Sufficiunt enim adductæ de perfecto regime Ecclesiæ, et de necessitate unius capitii in uno corpore ad unitatem ejus et fidei conservandam. Nam quod hoc caput in tali Sede sit constitutum, licet plures habeat morales congruentias, quæ et a Patribus insinuantur, et facile cogitari possunt, propria ratio est voluntas Christi et Petri, quæ ex adductis testimoniis nobis satis innotuit.

CAPUT XVIII.

DUABUS OLOCATIONIBUS CONTRA PRIMATUM PONTIFICIS, EX SCRIPTURA ET CONCILIIS DESUMPTIS, SATISFIT.

1. Contra Pontificis Romani dignitatem et primatum multa sparsim in suo libello objicit rex Angliæ, præter ea quæ contra primatum Petri supra retulimus, ex quibus multa comparationem inter Pontificem et reges temporales attingunt, quæ melius post dictam comparationem factam in sequentibus examinabimus, ubi etiam de potestate Pontificis supra reges in temporalibus dicendum est. Nunc solum his, quæ contra supremam spiritualem Pontificis potestatem absolute objici videntur, respondebimus. Hæc autem, tam in Praefatione quam in Apologia regis, ad tria capita reduci videntur, his exceptis, quæ ex factis regum vel imperatorum desumuntur, de quibus, ut dixi, postea videbimus.

2. *Prima objectio. — Confirmatio.* — Primum caput est, quia hoc dogma nullum vel debile fundamentum habet in verbo Dei, ut dicit in Apolog., pag. 48, et in Praefatione, pag. 22, 28, 60, et aliis quamplurimis locis. Possumusque in hujus objectionis confirmationem ponderare, quod Paulus, ad Ephes. 4, ministeria Ecclesiastica et ordinem Ecclesiæ describens, nullam de Vicario Christi mentionem facit, cum tamen ille aptissimus locus videretur ad illum proponendum, si ad hierarchiam Ecclesiæ pertineret. Unde valde miratur rex, dicta pag. 60, et ignorare se dicit, *quibus artibus Pontifices Romani facti sint Vicarii Christi, imo vero Dii in terra, triplici corona insigniti, cœli nimirum, terræ-*

que ac inferorum reges, totius orbis judices, et ipsi a nemine judicandi, fidei capita, et cætera, quæ prosecutur concludens: Quibus, inquam, artibus ad tantum fastigium ascenderint, eisdem nescio.

3. Solutio. — Verumtamen vel hoc ipso intelligere rex posset, si sapere vellet, hoc non esse humana arte factum, sed in virtute illius verbi: *Super hanc petram aedificabo Ecclesiam meam, et portæ inferi non prævalebunt adversus eam, ut sancte et catholice antiqui Patres intellexerunt.* Qua enim arte Sylvester Papa Constantinus imperatorem ita sibi subjecit, ut Christi Vicarium, et Petri successorem, et majori honore se ipso dignum confiteri non erubuerit, eadem reliqui Sancti Pontifices eamdem dignitatem et potestatem conservarunt, et contra portas inferi defenderunt. Artes etenim illæ non fuerunt aliæ præter verbum Dei, magna virtute spiritus libere prædicatum, et interdum divinis virtutibus et illustrationibus pro temporum, juxta divinæ providentiae dispositionem, opportunitate confirmatum. Errat ergo rex, et verbo Dei contradicit, dum ait, primatum Papæ debile in verbo Dei habere fundamentum. Nam et in verbo Dei scripto Petri primatus perpetuus, et per successionem semper duraturus sufficienter continetur, et per verbum ejusdem Christi non scriptum, sensus verbi scripti cum certitudine traditus est. Et præterea successionem illam Petri in Romana Sede permansisse, evidenter est declaratum. Nec possunt rex vel doctores ejus Protestantes vim hujus verbi effugere, nisi et negando veritatem verbi non scripti, et verbum scriptum sua certa scientia, et privato spiritu interpretando. Utrumque autem esse a catholica veritate alienum, imo hæresum omnium et schismatum fundamentum, in primo libro satis demonstratum est.

4. Diluitur confirmatio. — Ad confirmationem a nobis additam ex loco Ephes. 4, respondere possumus ex doctrina Augustini, libro de Fide et operib., c. 9, ubi, tractans locum Actor. 8, de eunuco, quem baptizavit Philippus, licet nihil plus dixerit quam: *Credo filium Dei esse Iesum Christum*, unde aliqui argumentabantur non esse necessarium aliquid aliud docere catechumenos, ut baptizentur, ipse vero respondet: *Scriptura tacuit atque intelligenda admisit cætera, quæ cum illo spadone baptizando Philippus egit.* Sic ergo nos dicimus, licet Paulus tacuerit illo loco de uno Christi Vicario, totius Ecclesiæ

pastore, illud intelligendum reliquise in cæteris, quæ describit.

5. Instantia. — *Ex Scriptura primatus Pontificis, non regum colligitur.* — Potest autem hæc responsio in nos retorqueri: superius enim hoc loco usi sumus ad probandum reges non habere in Ecclesia spiritualem potestatem, quia Paulus nullam, vel in loco, vel in aliis similibus illorum mentionem fecit; quæ illatio eodem prorsus modo eludi potest. Respondeo ex verbis ejusdem Augustini loco citato: *Atque in eo quod ait (scilicet Lucas: Baptizavit eum Philippus, intelligi voluit impleta omnia, quæ licet taceantur in Scripturis, gratia brevitatis, tamen serie traditionis scimus implenda; pari modo etiam in eo quod scriptum est, evangelizasse Philippum spadoni Dominum, nullo modo dubitandum est, et illa in catechismo dicta esse, quæ ad ritum moresque pertinent ejus, qui credit in Dominum Iesum Christum.* Ita ergo in praesenti dicimus, Paulum sub illa descriptione Ecclesiæ comprehendisse omnia, quæ vel ex traditione, vel ex aliis Scripturæ locis, ad Ecclesiæ ordinem et hierarchiam pertinere perspicuum est. Est autem satis nobis traditum, et in Scriptura, et extra illam, Ecclesiam visibilem esse unum ovile sub uno pastore visibili, vicem Christi gerente; hunc ergo pastorem sub generali nomine pastorum Paulus explicuit, quia non assumpsit ibi provinciam in particuliari explicandi gradus omnes, et ministeria ecclesiastici ordinis. Cujus etiam argumentum est, quia tractans idem argumentum, 1 Corinth. 42, omisit Evangelistas, quos sub Prophetis comprehendit, et ibi ponit virtutes, et alia, quæ in loco ad Ephes. omisit; et in neutro loco ponit presbyteros et diaconos, quamvis ad ecclesiasticam hierarchiam pertinere, ex aliis Scripturæ locis manifestum sit. At vero de regibus nulla Scriptura vel traditio docet, in ecclesiastica hierarchia habere peculiarem locum, aut munus ecclesiastici regiminis aut ministerii, ideoque dum illis locis præcipuis tacentur, prorsus excluduntur; præsertim quia nec sub specifica, nec sub generali verborum forma comprehensi sunt.

6. Secunda objectio. — *Confirmatio.* — Secundam objectionem paucis his verbis indicat rex in Præfat., pag. 60: *Ita interim generalibus Conciliis suberant (utique Romani Episcopi), ut et nuper Constantiense Concilium, tribus Pontificibus abdicatis, quartum inaugureretur.* Quæ objectio confirmari potest, quia

in aliis casibus deponuntur Pontifices, vel aliter judicantur ab Ecclesia, mediantibus Conciliis. Ita enim fieri posse, dictum Concilium Constantiense definivit, et Basiliense confirmavit, et utrumque id exequi tentavit. Et olim Marcellinus Papa depositus fuit a Conclilio Sinuesso; et in casu haeresis deponi posse traditur in cap. *Si Papa*, distinct. 40, et communiter ab omnibus Catholicis receptum est.

7. Respondeo imprimis, objectionem hanc ad quæstionem potius de comparatione Papæ et Concilii generalis, quam ad quæstionem de primatu Pontificis pertinere. Patres enim, qui Conciliis Constantiensi et Basiliensi interfuerunt, et Gersonius, aliqui Doctores, qui generale Concilium supra Pontificem esse opinati sunt, nihilominus certa fide credebant Episcopum Romanum esse supremum et universalem Ecclesiae pastorem, supra omnes Episcopos et Patriarchas, habentem in illos spiritualem jurisdictionem, et in omnes fidèles cuiuscumque conditionis existant, etiam reges vel imperatores sint, et contra hoc obiectio facta non procedit, ut per se constat, idque instituto nostro sufficiebat, quidquid de altera quæstione comparata sentiatur. Quia tamen omnino verum esse credimus, in Conclilio generali nullam esse jurisdictionem immediate a Christo collatam, ideoque dum legitimus et indubitatus Pontifex vivit, ab illo pendere Concilii generalis jurisdictionem, ac proinde illi subesse (quod alibi tractandum est), ideo breviter dictis objectionibus satisfaciendum est.

8. *Solutio objectionis.* — Ad objectionem ergo principalem respondemus, tempore Concilii Constantiensis tres fuisse in Ecclesia prætentos Pontifices, Gregorius XII, Benedictus XIII, et Joan. XXIII, nominatos. Cum autem certum sit, et supra probatum, non posse simul esse in Ecclesia plures veros Pontifices, fit consequens ut non omnes illi fuerint Pontifices. Unde etiam fieri potuit ut nullus eorum esset certus Pontifex, atque adeo nec Pontifex, quia nondum erat aliquis eorum sufficienti consensu Ecclesiae receptus, nec credebatur legitime electus. In tali autem casu jus habet Concilium generale, quamvis acephalum, ad inquirendum de vero et legitimo Pontifice, et, si nullum ex prætensoribus legitimum ac certum Pontificem esse invenerit, omnes deponere, vel potius nullum eorum verum Pontificem esse declarare, ac subinde de vero Pontifice Ecclesia providere.

Et hoc ad summum fecit Constantiense Concilium, deponendo dictos tres Pontifices, et Martinum V eligendo. Ex hoc autem facto nihil contra Pontificis dignitatem aut potestatem colligi potest, quia cum Pontifices dubii non sint veri Pontifices, potestas Concilii supra illos nihil derogat veris Pontificibus, nam electo postea vero Pontifice per tale Concilium, in illo erit plena pontificia potestas, ipso Concilio superior, quia non ab illo habet potestatem, sed a Christo. Quia vero dicere quis potest Joannem XXIII fuisse Pontificem satis certum, quidquid de hoc sit, addere possumus ipsum tandem voluntarie renunciasse papatui, ut ex historiis constat, et similiter cessit Gregorius XII. Benedictus autem XIII, alias Petrus de Luna, licet nunquam cedere voluerit, mortuus tamen est paulo post Martini electionem, et Clemens quidam, qui in locum ejus fuerat suffectus, paulo post renuntiavit, et Martinus V tanquam unicus et verus Pontifex ab universa Ecclesia cognitus et receptus est.

9. *Refellitur instantia quædam.* — Quod si quis instet, Basiliense Concilium subsequens depositionis sententiam contra Eugenium IV, unicum et indubitatum Pontificem tulisse, et Amadeum, Felicem appellatum, loco illius creavisse, respondetur in hoc errasse Concilium illud, quod mirandum non est, quia jam tunc non legitime, nec sub obedientia Apostolicæ Sedis procedebat. Unde etiam erravit in approbanda assertione, quod Concilium generale sit supra Papam, in Conclilio Constantiensi traditam. Unde consequenter existimavit, Concilium, semel legitime congregatum, sine suo consensu non posse dissolvi a Pontifice; imo posse ipsum Pontificem ad assistendum Concilio cogere. Quod tamen fundamentum omnino falsum est, et in eo Constantiense Concilium errare potuit, quia nec a vero ac certo Pontifice convocatum fuerat, nec illius præsentiam per se vel legatos habebat. Unde solum ad tollendum schisma legitime coactum fuerat, non ad dogmata fidei definienda. Excessit ergo terminos potestatis suæ, et ideo errare potuit, et consequenter etiam in hoc erravit Basiliense illud sequens, quia, ut dixi, jam tunc non legitime procedebat. Atque ita prædicta assertio postea a Pontificibus et Conclilio Lateranensi sub Leone X reprobata est. Et Eugenius IV, tam assertiōnem quam sententiam Basiliensis Concilii pro nihilo habuit, ut in eodem Concilio refertur, sess. 38, et cum Eugenio sensit

universa Ecclesia, quæ, non obstante illa sententia, tam Eugenium, quam successorem ejus Nicolaum V, pro veris Pontificibus habuit, Antipapa Felice repudiato, qui postea Nicolao cessit, et ita semper Pontificia dignitas integra mansit.

10. *Responsio ad confirmationem.* — Antiquum vero exemplum de Marcellini depositione a rege non objicitur, qui acta illius Concilii non admittit, et contradictionis arguit¹, quia in eis sœpe dicitur, *Pontificem a nemine judicari*, et nihilominus Marcellinus inde judicatus exivit; nam sententia anathematis in eum lata est, cui omnes Episcopi subscripti-
runt, neque enim poterat Marcellinus seipsum excommunicare. Neque desunt etiam ex scriptoribus catholicis, qui de illa historia Marcellini dubitent, ut videre licet in Baronio, tom. 2, ann. 302, numero 95 et seq., et ann. 303, n. 89 et sequentibus. Verumtamen ipsomet admonet, non oportere antiquam historiam communiter in Ecclesia receptam in dubium revocare. Præsertim cum Nicolaus Papa, in epist. ad Michaelem imperatorem, illam ut veram referat, et illa utatur ad Apostolice Sedis auctoritatem confirmandam.

11. *Ex dicto etiam Concilio Sinuesso primatus Pontificis confirmatur.* — *Marcellinus non fuit a Concilio depositus.* — Est igitur advertendum, peccatum Marcellini, cujusdam infidelitatis fuisse, et ideo ad Concilium pertinuisse de illo inquirere, tum propter publicum scandalum in materia fidei, tum propter Ecclesiæ securitatem. Quia tamen culpa solum fuerat contra confessionem fidei, et non hæresis, ideo Episcopi congregati sœpe dixerunt: *Tu te ore judica, nam prima Sedes a nemine judicatur.* Ex quibus verbis auctoritas supra-
rema Pontificis confirmatur. Ipse autem Marcellinus videtur in se ipsum sententiam protulisse, dicens: *Peccari coram robis, et non possum in ordine esse sacerdotum.* Per quæ verba visum est aliquibus renunciasse pontificatu, eamque renunciationem Episcopos acceptasse, et propterea de illis dici: *Subscripti-
serunt in ejus damnationem, et damnaverunt eum*, non vi jurisdictionis quam in ipsum, dum fuit Pontifex, haberent, sed voluntarie consentiendo illi, et renuntiationem acceptando. Atque ita nemo eum, dum esset Pontifex, judicavit, sed ut statim subjungitur, *ore suo damnatus est.* Postquam autem desit esse Pontifex, potuit etiam a Concilio censu-

ris ligari, ut per se constat. Vel fortasse patutui non cessit, ut est probabilius, quia hoc ibi expresse non dicitur, nec verba citata renunciationem præ se ferunt, sed pœnitentiam, nec Damasus, nec Platina, vel Romanum Breviarium id referunt, sed potius fuisse Pontificem, etiam eo tempore quo martyrium passus est, significant, et clare testatur Baronius, anno Christi 304. Hoc autem supposito, dicendum consequenter est, ipsum non fuisse proprie in ecclesiastico foro damnatum, seu punitus, vel censura ligatum, sed voluntarie ad aliorum exemplum, et in sui peccati vindictam se ipsum separasse, et ab officio quasi suspendisse, seu abstinuisse. Quod judicium Concilium illud probavit, et quasi declaratoriam sententiam criminis tulit, ipsomet Marcellino annuente. et in hoc sensu dicitur, Concilium illud damnasse Marcellinum. Et ita nulla est in dictis illius Concilii contradictio.

12. *Occurritur exemplo de Papa hæretico.* — *Papa hæreticus a Deo ipso deponitur, non ab hominibus.* — *Ante depositionem Pontificis sententia criminis declaratoria premiti debet.* — Ad ultimam partem illius objectionis de Papa hæretico respondemus imprimis, non esse certum an Papa, etiam ut persona privata, possit in hæresim pertinaciter labi. Unde si vera est sententia, quæ negat Papam esse posse hæreticum, cessat objectio. Quia vero contrarium videntur cancries et Concilia supponere, ut patet ex cap. *Si Papa*, dist. 40, et ex Concilio Romano, sub Adriano, et ex octava Synodo, admissio illo casu, concedendum est Papam tunc posse judicari, et dignitate privari. Quomodo autem id fiat sine præjudicio dignitatis, varie a Doctoribus explicatur; non est autem in præsenti necessarium singulas sententias referre et examinare. Dico ergo breviter Papam hæreticum non ab hominibus, sed ab ipso Deo deponi, quamvis non sine ministerio Ecclesiæ, seu Concilii fermentis in ipsum sententiam declaratoriam criminis. Sicut enim Papa ab hominibus eligitur, et nihilominus non ab hominibus, sed ab ipso Christo immediate dignitatem recipit, ita etiam licet per sententiam hominum declaratur hæreticus, nihilominus non jure humano, sed divino statim manet dignitate privatus. An vero ad talem privationem seu depositionem necessaria sit talis sententia, vel ipsummet peccatum hæresis sufficiat, saltem externum, et facto ipso notorium, a Doctoribus controvertitur. Mihi autem rationi et recto regimini magis consentaneum videtur, neces-

¹ In *Apolog.*, p. 105.

sariam esse sententiam criminis declaratoriam, datam a Concilio auctoritatem habente, ut omnia ordinate fiant, et schismatum pericula tollantur.

CAPUT XIX.

EXPLICANTUR QUÆDAM LOCA GREGORII QUÆ REX OBJICIT, ET VERI TITULI ROMANI EPISCOPI DEFENDUNTUR.

1. *Recensentur testimonia Gregorii.* — Tertia objectio principalis sumitur ex Gregorio in variis epistolis, in quibus reprehendit Joannem Constantinopolitanum, eo quod universalem Episcopum seu Patriarcham se ipsum appellaret et nominari vellet, et ad illum magis confundendum, adjungit : *Nullus unquam prædecessorum meorum hoc tam profano vocabulo uti consensit*, lib. 4, indict. 3, cap. 80, alias epist. 39 ad Anastasium Antiochenum, ubi etiam ait : *Sicut enim veneranda mihi Vestra Sanctitas novit, per sanctam Chalcedonensem Synodum Pontifici Sedi Apostolicæ, cui Deo disponente deservio, hoc universitatis nomen oblatum est, sed nullus*, etc. Et similia habet, epist. 32 ad Mauricium, 33 et 34 ad Constantiam, et 38 ad eumdem Joannem, et 36 ad Ananium, et lib. 7, epist. 69 ad Eusebium Thessalonicensem. Et addit lib. 6, epist. 30 ad Mauricium, alias c. 194 : *Ego fidenter dico, quia quisquis se universalem sacerdotem vocat, vel vocari desiderat, in elatione sua Antichristum precurrit, quia superbiendo se cæteris præponit.* Aliam etiam rationem reddit Gregorius, quia si unus Patriarcha universalis dicitur : *Patriarcharum nomen cæteris derogatur.* Et ideo, ait, *nullus Romanorum Pontificum hoc singularitatis vocabulum assumpsit, nec uti consensit, ne dum privatum aliquid daretur uni, honore debito sacerdotes privarentur universi.* Quæ ratio æque in Summo Pontifice procedit. Unde idem Gregorius, lib. 7, indict. 1, epist. 30 ad Eulogium Alexandrinum, qui ad ipsum scribens, eum universalem Papam vocaverat, ait : *Quod peto dulcissima mihi Sanctitas vestra ultra non faciat, quia vobis subtrahitur. quod alteri plus quam ratio exigit, præbetur.* Et infra : *Si enim universalem me Papam Vestra Sanctitas dicit, negat se hoc esse quod me fateatur universum.* Ubi significat repugnare unum esse universalem Episcopum, et alios esse veros Episcopos. Et hanc sententiam tradidit ante Gregorium Pelagius II, contra eumdem

Joannem, in epist. 1 ad illegitimum Concilium Constantinopolitanum. Et ante hos Pontifices legitur in Concilio Carthaginensi III, cap. 26, et in Concilio Africano tempore Bonifacii, canon, qui sic habet : *Prima sedis Episcopus non appelletur Princeps sacerdotum, vel summus sacerdos, aut aliquid hujusmodi, sed tantum primæ sedis Episcopus.*

2. Hoc argumentum valde urget rex Angliæ in Apologia, pag. 106 et 107, et ex allegatis testimoniiis Gregorii multa ex his, quæ pro primatu Romani Pontificis adduximus, vel certe omnia enervari putat Maximeque redarguit Bellarminum, eo quod in favorem primatus Romani Pontificis alio testimonio Gregorii usus fuerit, in quo Apostolicam Sedem, *caput fidei* vocat, lib. 11, ep. 42. *Nam qui nomen (inquit) universalis Episcopi reputabat, hic caput fidei sese vocari aequo animo latatus erat?* Et ideo ipse exponit de capite, seu gubernatore in genere, sive ille sit Papa, sive rex intra dictiones et fines suos. Et quia videbat expositionem hanc esse violentam, ut revera est, veniam petit, ut si illa rejiciatur, dicere possit, *Gregorium, vel minus caute locutum esse, vel per excessum.* Cum eadem tamen regis venia, ipse simul utrumque committit, quia sine ulla ratione vel fundamento, non solum verbis Gregorii, sed omnium etiam antiquorum Patrum liberam illam censuram adhibet. Imo addere possumus, etiam in verba Christi redundare ; non est enim minus esse fundamentum Ecclesiæ, quam esse caput fidei; Christus autem de Petro, id est de Petri sede, ut supra probavi, dixit esse fundamentum Ecclesiæ; excessit ergo, vel incaute locutus est Christus, si excessit vel incaute locutus est Gregorius, Apostolicam Sedem caput fidei appellando.

3. Non enim de sua persona tantum, sed de sede sua loquebatur Gregorius. Sic enim ait : *Illud autem admonemus, ut Apostolicæ Sedis reverentia nullius præsumptione turbetur ; tunc enim status membrorum integer manet, si caput fidei nulla pulsetur injuria, et canonum manut incolmis atque intemerata semper auctoritas.* Ex hæ verborum serie constat, eamdem Apostolicam sedem, cui reverentiam exhiberi monnerat, postea vocare *caput fidei*, quod a membris nulla est pulsandum injuria, ut corum status integre perseveret. Quod ego maxime de fidei statu intelligo, quia qui contra reverentiam Apostolicæ Sedi debitam omnia perturbant, in vera et integra fide perseverare non possunt. Et ideo fortas-

se modum loquendi mutavit, et quam prius vocaverat *Apostolicam Sedem*, postea vocat *caput fidei*, ut indicaret magnum periculum imminere, contemnendo obedientiam et reverentiam debitam Apostolicæ Sedi, nam facile transit usque ad periculum amittendi fidem. Et confirmatur, quia non excessit certe neque incaute locutus est Christus, cum dixit Petro : *Et tu aliquando conversus confirma fratres tuos*; hoc autem munus cum illo privilegio : *Ego rogari pro te, Petre, ut non deficiat fides tua*, non tantum personæ, sed etiam sedi Petri collatum est, ut libro 4 ostendimus; ergo nullus est excessus, neque incauta locutio, si Pontifex, qui tanquam viva regula fidei ad confirmandos fratres positus est, caput fidei appelletur. Unde Patres Concilii Chalcedonensis, in Epistola ad Leonem Papam, *firmitatem fidei* illum appellant, dicentes : *Firmitas tua filii, quod decet, adimpleat*.

4. Eo vel maxime quod recte potest intelligi, vocari caput fidei, quia est caput omnium fidelium, posito abstracto pro concreto, ad denotandum non esse veram fidem, nisi in membris hujus capitatis, vel fidem ipsam esse, quæ membra cum capite conjungit. Unde fit, ut tam caput, quam membra, fidei appellantur, quia per fidem in unum corpus coalescunt, quod est Ecclesia. Atque ita nihil aliud est esse caput fidei, quam esse caput Ecclesiæ, in quo capite in suo genere fides Ecclesiæ nititur. Quapropter ridiculum est verba illa ad reges temporales accommodare, aut tantum de gubernatore politico, et solum ordinis externi causa leges ferente, caput illud interpretari, cum Gregorius aperte loquatur de capite totius Ecclesiæ, et in spiritualibus; nam propter hanc etiam causam caput fidei vocat. Et quamvis verum sit, in principio epistolæ Gregorium tractasse de concedendo Panormitanó Episcopo usu pallii, qui usus ad quamdam ecclesiasticam cæremoniā pertinet, inde sumpta occasione illum postea monet, ut disciplinam ecclesiasticam circa reverentiam Apostolicæ Sedis, et circa incolument et intemeratam canonum auctoritatem, et morum integratatem observet et observari faciat, quæ omnia ad ecclesiasticum et spirituale regimen pertinent; igitur de capite hujus regiminis loquebatur Gregorius, cum Se-de Apostolicam caput fidei appellavit.

5. *Legitima testimoniorum Gregorii explicatio traditur, et argumentum regis in eum retorquetur.* — Retorquendo ergo regis argumentum, ex hoc loco legitimus aliorum sen-

sus erui facile potest. Nam si Gregorius sedem suam caput fidei vocavit, quia firmitas fidei, et cura ac sollicitudo conservandi ac propagandi illam, et consequenter etiam honestos mores, qui ex illa pendent, illi sedi commissa est, quando nomen universalis Episcopi recusavit, non supremam pastoralem curam suæ sedis negare, sed verbi invidiam, et elationis vel ambitionis speciem cavere voluit. Neque solum ex citato loco, sed ex aliis etiam innumeris, imo ex eisdem, ubi de nomine universalis tractat, manifeste colligitur, Gregorium in se, et in sede sua curam supremi et universalis Pastoris agnovisse. Nam in eadem epist. 32 ad Mauricium, dixit : *Cunctis Evangelium scientibus liquet, quod roe Dominica sancto et omnium Apostolorum Petro Principi Apostolo lotius Ecclesiae cura commissa est.* Et infra : *Cura ei totius Ecclesiae, et principatus committitur, tamen universalis Apostolus non vocatur.* Ecce ubi et principatum agnoscit, et nomen abnuit. Et in epist. 36 et 38, simul nomen illud contemnit, et universalis potestate utilit, dissolvendo et reprobando illegitimum Concilium sine auctoritate suæ sedis congregatum, et comminando censuras Joanni, nisi resipisceret. Imo, in lib. 7, epist. 64, eudem Joannem propter idem nomen reprehendit, licet ipse non negaret se Apostolicæ sedi subjici, ut idem Gregorius refert, qui etiam addit, se nescire Episcopum, qui eidem sedi subjectus non sit; ergo recusando vocabulum universalis, non intendit suæ sedi universalem jurisdictionem negare. Unde etiam epist. 69, tractaturus eamdem causam, sic incipit : *Suscepti regiminis cura constringimur officii nostri sollicitudinem vigilanter extenderre*, etc. Et infra, eamdem curam ostendit, dicens, *acta in Concilio sine Sedis Apostolicæ auctoritate, atque consensu nullas vires habere*; et in fine profert generalem censuram contra violantes sua præcepta, ut omittam alia loca supra citata, in quibus Gregorius primatum Romanæ Ecclesiæ et commendat, et exercet.

6. *Nominis universalis Episcopi duplex acceptio.* — *Nomen universalis Episcopi, si alias particulares Episcopos non excludit, Pontifici congruit.* — Cur ergo Gregorius nomen universalis Episcopi tanquam profanum vetuit et repudiavit? Respondet cum Cardinali Bellarmino, lib. 2 de Clericis, cap. ult., in fine, duobus modis posse nomen universalis Episcopi usurpari. Primo, ad significandum unum Episcopum, qui sit proprius et proximus pastor totius Ecclesiae universalis, et omnium

Ecclesiarum ac diœcesum particularium, eo utique modo quo, verbi gratia, Conimbricensis est unicus Episcopus totius diœcesis suæ, in qua potest habere vicarium unum, vel plures, non tamen alium Episcopum. Hoc igitur modo fingere universalem Episcopum totius Ecclesiæ, contra jus divinum est, et ideo vox illa universalis Episcopi, in hac significatione usurpata, profana est et sacrilega. Alio modo potest dici universalis Episcopus, qui per modum causæ universalis jurisdictionem habet in totam Ecclesiam, non excludit autem particulares Episcopos, qui et veri Episcopi sint, et quasi causæ proximæ habentes ordinariam jurisdictionem sub Pontifice Summo. Et in hac significatione sumpta vox illa in se quidem non est profana, quia rem veram, et maxime sacram, et Ecclesiæ necessariam significat, tamen ut usurpata a Patriarcha Constantinopolitana profana erat, et plena superbie et præsumptionis, quia per eam sibi tribuebat quod non habebat. Et ob contrariam rationem, attributa in eo sensu Pontifici Romano non est profana, sed veritatem significat, et ideo in Concilio Chalcedonensi Leoni Papæ attributa est, ut Gregorius Papa in dictis epistolis sæpe testatur. Et in eodem sensu æquivalentia nomina a Conciliis et Patribus Episcopo Romano sunt attributa, ut esse *caput universalis Ecclesiæ*, in Concilio Chalcedonensi, act. 16; *habere curam universalis Ecclesiæ*, Leo, epist. 82; Euseb., epist. 3; Dionys., epist. 2; *Rectorem domus Dei*, Ambros., 1 ad Timoth. 3; denique *Episcopum universalis Ecclesiæ*, ut sæpe vocatur in epistolis Pontificiis supra allegatis, et in Concilio Chalcedonensi, act. 3, et in multis aliis epistolis Episcoporum vel principum scribentium ad Pontifices Romanos, quæ in Actis Conciliorum, et inter epistolas Pontificias referuntur, et specialiter videri possunt quæ in Concilio Chalcedonensi, act. 3, leguntur.

7. *Cur Gregorius nomen universalis Episcopi devitarit.* — Nihilominus tamen Gregorius nomen universalis Episcopi repudiavit, tum propter humilitatis excessum; nam in hoc melius dicere potuisset rex Angliæ excessisse Gregorium, non per ambitionem, sed propter humilitatis exemplum; tum etiam ut efficacius superbiam Constantinopolitani Episcopi cohiberet; tum denique quia propter vocis ambiguitatem posset alios Episcopos offendere, et hac ratione sæpius utitur Gregorius, et quia hoc periculum in usu aliarum vocum non invenitur, ideo alias detestatus non est.

Et per hæc etiam responsum est ad Pelagium Papam, nam eadem ratione, qua Gregorius, motus est, ut ex verbis epistolæ primæ est manifestum, et simul in eadem epistola Romanum Episcopum vocat caput omnium Ecclesiarum.

8. De nomine autem Summi Pontificis nunquam dubitatum est, ut testatur Justinianus imperator, in Authentico de Ecclesia Romana, collat. 1, dicens: *Ut legum originem anterior Roma sortita est, ita et summi pontificatus apicem apud eam esse, nemo est qui dubitet*; imo Concilium Chalcedonense Leoni, in epistola ad eum, dicit: *Summitas tua*, etc.; et Gregorius, lib. 1 Dialog., c. 4, referens historiam de Equitio, ait: *Equitius cœpit immensas gratias omnipotenti Deo agere, asserens quod se per Summum Pontificem visitasset*, cum nuncius a Pontifice missus ei dixisset, *quia pater ejus apostolicus Pontifex eum videre vellet*. Hieronymus vero, in Praefatione ad Evangelia, Damasum vocat *summum sacerdotem*, quod perinde est. Canon ergo ille Concilii Carthaginensis et Africani non intelligitur de Romano Pontifice, sed de Primate Africano, ut recte Glossa exposuit in cap. 3, distinct. 99. Neque enim provincialia seu nationalia Concilia, quomodo Papa vocandus eset, statuere poterant; imo fortasse, ne Papæ fieret injuria, primatem suum Summum Pontificem appellari Patres illorum Conciliorum vetuerunt.

CAPUT XX.

ALIIS OBJECTIONIBUS EX FACTIS IMPERATORUM, ET CONJECTURIS DESUMPTIS RESPONDETUR.

1. *Quarta regis objectio, et hujus capititis prima.* — Quarta objectio insinuat a rege in Praefatione, pagin. 60, Phocæ memoriam faciente, affirmanteque usque ad Phocæ tempora Pontifices Romanos imperatoribus paruisse. Unde indicat, quod alii Protestantes asserere solent, Phocam statuisse ut Romanus Episcopus primatum inter alios obtineret. Quibus aliqui ex historicis favere videntur, nam Beda, de Temporib., in Phoca, sic inquit: *Hic, rogante Papa Bonifacio, statuit sedem Romane et Apostolice Ecclesiae caput esse omnium Ecclesiarum, quia Ecclesia Constantinopolitana primam se omnium scribebat*. Et eodem fere modo id narrant Paulus diaconus, in lib. 4 de Gestis Longobardorum, c. 41; et Anastasius Bibliothecarius, in sua historia; et

Antonius Sabellicus, *Æneade* 8, lib. 6; et Pomponius Lætus, in compendio Historiarum Romanarum, in Phoca, et plures alii eodem modo historiam referunt. Et propter illa sola verba persuadere volunt Protestantes, eo anno (qui fuit sexcentesimus septimus, ut Genibrardus cum aliis, vel sexcentesimus sextus, ut vult Baronius) incœpisse Romanum Pontificem habere primatum in universam Ecclesiam, præsertim in Orientalem. Quanquam neque in hoc sibi constent, nam Magdeburgenses, centur. 6, dixerunt Romanum Pontificem a Justino imperatore, anno 520 factum esse Patriarcham, nisi forte isti locuti sint de patriarchatu occidentali, illi vero de primatu, qui ad Orientalem etiam Ecclesiam extenderetur.

2. Alii dixerunt Romanam Ecclesiam a Constantino IV habuisse primatum, quia Platina, in Benedicto II, dicit, *Constantinum, Benedicti sanctitate permotum, ad illum sanctionem misisse, ut ille, quem clerus, populus, exercitusque Romanus Pontificem delegisset, euīdem statim verum Christi Vicarium esse, omnes crederent, nulla rel Constantinopolitani principis, vel exarchi Italiæ expectata auctoritate, ut ante fieri consueverat.* Alii in Constantinium I hanc Romani Episcopi referunt dignitatem, quia in edicto Constantini, in capit. penult., d. 96, sic dicitur: *Constantinus imperator, quarta die sui baptismi, privilegium Romanæ Ecclesiae Pontifici contulit, ut in toto orbe Romano sacerdotes ita hunc caput habeant, sicut judices regem.* Et postea ponuntur late verba privilegii, quæ etiam referuntur in 1 tom. Concil., et approbantur a Gelasio, cum Concilio 70 Episcoporum. Et eisdem fere verbis utitur Leo IX contra Michael., c. 10. Atque hinc alii dixerunt a Concilio Nicæno datum esse privilegium Ecclesiae Romanæ; nam Leo IX supra dicit Pontificem a nemine judicari posse, *Beatissimo et Apostolico Pontifice Sylvestro decernente, et Constantino Augusto spirituali ejus filio, cum universa Synodo Nicæna approbante.* Similesque locutiones inventiuntur in Concilio IV sub Symmacho, et in aliis supra allegatis. Alii denique ad tempora quidem Apostolorum hanc referunt institutionem, dicunt tamen apostolicam esse, non divinam, quia interdum dicunt antiqui Pontifices Petrum, volentibus aliis Apostolis, in principein eorum constitutum fuisse. De quibus et aliis erroribus videri possunt Turrecrem., lib. 2 de Eccl., c. 39 et seq.; et Bellar., lib. 2 de Pontif., c. 17.

3. *Primum Pontificis ab imperatoribus esse non potuisse convincitur.* — Verumtamen hæc omnia neque fundamentum habent, neque verisimilitudinem ullam, quia primatus Ecclesiæ Romanæ antiquior est omnibus imperatoribus christianis, ut ex traditione antiquissima supra demonstratum est. Præterquam quod etiam probavimus temporales reges nullam habere spiritualem potestatem vel jurisdictionem, qua de rebus ecclesiasticis possint disponere. Primatus autem ecclesiasticus spiritualis et supernaturalis est, ut probavimus; quomodo ergo poterant imperatores illum instituere, aut conferre? Denique probavimus dignitatem hanc esse ex Christi institutione, et ex vi illius durare per continuam successionem, semperque ex eodem divino jure transire ad Romanum Pontificem, supposita determinatione ad tales sedem a Petro facta; ergo vanum est querere institutionem hujus dignitatis ab imperatoribus. Quin potius neque a Conciliis vel Patribus, neque ab Apostolis, sed ab ipso Domino initium habuit, ut Anacletus et alii Pontifices supra relativi testantur, et ex Evangelio ita a Patribus intellecto probavimus. Unde ubicumque scriptum inveniatur ab aliquo ex Patribus, vel scriptoribus catholicis, Romanam Sedem ab aliquo Concilio, vel a Patribus habere Primum, sensus est, habuisse non tanquam ab instituente vel donante, sed ut a declarante, vel defendente seu conservante tales dignitatibus; sic enim Concilium Nicænum declaravit Romanum Episcopum habere primatum in omnes, et addit *semper etiam habuisse.* Optime vero Nicolaus I, in epist. ad Michaelem imperatorem, dixit: *Privilegia huic sanctæ Ecclesiae a Christo sunt donata, a Synodis non donata, sed celebrata et honorata.* Sic dixit Justinianus imperator in Authentic de Ecclesiast. tit., cap. 1: *Sancimus secundum definitionem Synodorum, sanctissimum senioris Romæ Papam primum esse omnium sacerdotum.*

4. *Ad Phocam.* — *Objectioni occurritur.* — *Phocas solum Pontificis primatum tutatus est.* — Quod ergo rex Angliæ dixit, ante Phocam Romanos Pontifices paruisse imperatoribus, ad sequentia capita spectat, ubi de comparatione utriusque potestatis agemus, et id falsum esse ostendemus. Quod vero insinuat, et clarius contendunt alii Protestantes, Phocam aliquid potestatis vel jurisdictionis Romano Pontifici contulisse, falsum est, et aut ex ignorantia, aut (quod verisimilius est) ex malevo-

lentia Protestantium introductum. Est enim ex dictis in præcedenti punto recolendum, inter Gregorium et Joannem Constantinopolitanum fuisse contentionem de vocabulo *universalis*, quæ non tam fuit de re, seu de potestate ipsa (nam Joannes ipse, ut vidimus, subditum se esse Gregorio fatebatur), quam de titulo, qui propter aliorum offensionem, superbiam et pérículum transeundi in schisma, Romanis Episcopis maxime displicuit. Cum ergo Pelagius et Gregorius, neque suis monitis, neque interventu imperatorum, Joannem Constantinopolitanum ad suam sententiam, et saniorem mentem trahere potuisserunt, et Cyriacus, Joannis successor, in eadem dementia perseveraret, Bonifacius III, qui post Sabinianum unius tantum anni Pontificem Gregorio successit, apud Phocam obtinuit, ut Cyriacum compelleret illum titulum non usurpare, declarando soli Ecclesiæ Romanæ posse competere, ut recte Platina, in Bonifacio III; Blondus, lib. 9, Decad. 1; Genebrar., in Chronico ann. 607; et Baronius, in Annalib. ann. 606, declararunt. Estque per se evidens, quia multo ante Phocam in Concilis Nicæno et aliis declaratus fuerat Sedis Apostolicæ primatus, et specialiter in Concilio Chalcedonensi proclamatus fuerat Romanus Pontifex universalis Episcopus, quamvis Pontificum modestia ac moderatio nomen illud acceptare noluerit. Advertit etiam Baronius Cyriacum non negasse subjectionem et obedientiam Romano Pontifici, quia statim post electionem suam responsales suos simul cum Epistola synodali ad Gregorium Papam misit, ut ex eodem Gregorio habetur, lib. 6, epist. 31. Ex quo etiam constat, Gregorium nunquam fuisse conquestum de usurpata jurisdictione, sed de ambitioso titulo, aliis Episcopis, et maxime Sedi Romanæ injurioso. Igitur Phocas auctoritate sua Romanam Sedem defendit, et superbiam Cyriaci compressit, nihil vero novum Bonifacio contulit.

5. *Ad Justinum.* — *Ad Constantinum noviorem.* — De Justino autem nullam invenio historiam, quæ in auctoritate sit, referentem, Justinum seniorem aliquid potestatis Romano Episcopo contulisse, non solum in illo anno quingentesimo vigesimo, verum etiam nec in toto tempore imperii sui. Nam licet cum magna fide et reverentia ad Hormisdam Papam sœpe scripserit, et ad Ecclesiam Romanam munera miserit, nunquam tamen specialia privilegia illi sedi contulit; unde igitur errorem illum, vel suspicionem ejus, hæretici su-

mere potuerunt? Præsertim quia ex actis in Concilio Chalcedonensi et multis aliis supra adductis, evidenter ostensum est primatum Ecclesiæ Romanæ ante Justinum in universo orbe fuisse notissimum. Atque eodem modo facile confutatur, quod de Constantino IV dicebatur, nam hic plus quam ducentis annis post Justinum imperavit; sed primatus Ecclesiæ Romanæ antiquior fuit Justino, et ideo ab illo esse non potuit; ergo multo minus a Constantino noviore oriri potuit. Neque verba Platina hoc indicant, sed solum imperatorem Constantinum cessisse consuetudini, qua solebat consensus imperatoris vel hexarchi ad consummatam Pontificis creationem expectari; de potestate autem summi Pontificis nihil Constantinus locutus est, imo ex verbis ejus aperte colligitur, ipsum sensisse Pontificem rite electum statim esse Vicarium Christi.

6. *Ad Constantinum Magnum.* — Eadem responsio locum habet in Constantino Magno, nam ante illius conversionem Pontifex Romanus ecclesiasticam jurisdictionem in universa Ecclesia exercebat non solum in Occidente, sed etiam in Oriente, ut satis in superioribus ostensum est. Nihil ergo ad hanc potestatem pertinens Constantinus Ecclesiæ Romanæ contulit, sed quod invenit, id probavit et credidit; imo etiam sua obedientia et subjectione recognovit, et in reverentiam et honorem tantæ dignitatis temporalia etiam bona Ecclesiæ Romanæ concessit, ut majorem honorem et splendorem illi conciliaret. Quod ex verbis ejusdem edicti constare potest. Nam in principio confitetur, Deum per Apostolos Petrum et Paulum mirabilia erga se operatum esse, *interveniente (ait) Patre nostro Sylvestro, et universali Papa.* Et infra sic inquit: *Quantam potestatem idem Salvator noster suo Apostolo B. Petro contulit in cœlo ac terra, lucidissime nobis idem venerabilis Pater edixit.* Et infra subjungit: *Judicavimus ut, sicut in terris S. Petrus Vicarius filii Dei videtur esse constitutus, etiam et Pontifices, qui successores sunt ipsius principis Apostolorum, principatus potestatem, amplius quam terrena imperialis amplitudo habere videtur, obtineant.* Interponit autem hæc verba, *concessam a nobis, et a nostro imperio,* quod intelligendum est de concessione per consensum et recognitionem, non per propriam donationem, ne verba hæc repugnant præcedentibus, in quibus Petrum fuisse Christi Vicarium et Romanum Pontificem esse successorem ejus, confessus est, et

ideo ejus principatum præfert imperiali; non poterat autem imperator dare potestatem imperiali majorem. Vel etiam intelligitur concessisse sedi Petri splendorem et principatum temporalem in spiritualis honorem, ut ita in majori esset honore, quam ipsum imperium. Quod significant verba sequentia, in quibus valde notandum est, appellare imperium *terrenam potentiam, et terrenum thronum, pontificatum vero sacrosanctum, et sedem sacra-tissimam B. Petri*, etc.

7. Ad Concilium Nicænum. — Ad ultimam partem de Concilio Nicæno et aliis, patet etiam responsio ex dictis, et ex verbis Leonis IX, ibidem citatis; prius enim dicit, Pontificem a nemine judicari, *Sancto Sylvestro divinitus decernente*, hoc est, non a se statuente, sed jus divinum declarante; hoc enim verba in rigore indicant, et materia postulat; non enim poterat ipse auctoritate sua se ipsum eximere; declaravit ergo se divinitus exemptum. Et addit Leo, *Constantino Augusto, et Nicæna Synodo approbante et sub-scribente*, utique definiendo, declarando et promulgando tale esse divinum privilegium Apostolicæ Sedis. Et nihilominus addit Leo, Constantiū contulisse hoc privilegium, quod necessario intelligendum est juxta superius dicta, contulisse, scilicet, approbando, et ut observaretur statuendo. Et sic etiam dixit Joannes II, in epistola ad Justinianum imperatorem: *Romanæ Sedis reverentiam conservatis, et ei cuncta subjicitis, et ad ejus deducitis unitatem, ad cuius auctorem, hoc est, Apostolorum primum, Domino loquente, præceptum est: Pasce oves meas, quam esse omnium vere Ecclesiarum caput, et Patrum regulæ, et principum statuta declarant, et pietatis restræ reverendissimi testantur affectus.* Quibus verbis complectitur, quid Christus, quidve Patres et principes huic dignitati contulerint, nam a Christo est institutio et collatio potestatis cum præcepto pascendi, a Patribus vero est declaratio ac definitio, imperatoribus vero proprie competit recognitio et defensio. Denique idem cum proportione dicendum est de Apostolis respectu Petri; non enim alii Apostoli contulerunt Petro potestatem, ut ex Evangelio constat, sed datam a Christo libentissime acceptarunt.

8. Alia objectio ex conjecturis. — Præter has objectiones, solent a Protestantibus aliæ fieri ex rationibus seu conjecturis petitæ, ut quod unus homo non possit Ecclesiam per universum orbem diffusam commode guber-

nare. Unde ad hoc persuadendum solent exaggerare, vel etiam fingere defectus, aut vitia quæ in aliquibus Pontificibus notata sunt, et Rex Angliæ non prætermittit insimulare quædam, quæ in electionibus Pontificum committi affirmat. Denique alii addunt vulgarem, et in multis rebus communem eorum objectionem, quia fit magna injuria Christo, si præter ipsum aliud constituatur totius Ecclesiæ caput.

9. Solutio. — *Plures ex Pontificibus regi-mi totius Ecclesiæ perfectissime satisfec-runt.* — Sed hæc parvi momenti sunt, nam si hoc Ecclesiæ regimen mere humanum esset, et solis humanis viribus, prudentiave morali, aut solo naturali arbitrio peragendum esset, non immerito unius hominis capacitatem excedere judicaretur; quin potius fatemur neque ordinaria gralia auxilia ad id sufficere, nisi Deus longe majora et specialia offerret. Cum autem Christus Dominus et singularem providentiæ suæ præsentiam, et Spiritus Sancti assistantiam suo Vicario promiserit, et pro illius fide peculiariter rogaverit, quamvis humanæ fragilitati difficile sit onus spiritualiter gubernandi totum universum, non est tamen impossibile, nec ita moraliter difficile, quin plures Pontifices, et majori ex parte, egregie illud sustinuerint, et perfecte ac sancte impleverint. Eo vel maxime quod, licet unus sit supremus Pontifex, non tamen solus ubique et immediate gubernat, sed alios etiam Episcopos et Pastores in partem sollicitudinis ex divina institutione vocat, eisque, quantum expedit, partem sue jurisdictionis communicat, sibique majora et graviora, omnemque recursum ad conservandam unitatem et concordiam necessarium reservat. Atque hoc modo unius regimen non solum fit possibile, sed etiam ad unitatem Ecclesiæ conservandam fuit necessarium, ut ostendimus; imo etiam esset suo modo facile, nisi per errores et schismata perturbaretur.

10. Criminaciones hæreticorum refelluntur. — Ad ea vero de quibus personas Pontificum eorum hostes criminantur, dicere imprimis possumus cum Augustino, epist. 165: *In il-lum ordinem Episcoporum, qui ducitur ab ipso Petro usque ad Anastasium* (nos dicamus usque ad Paulum V), *qui nunc eamdem cahe-dram sedet, etiamsi quisquam traditor per illa tempora subrepsisset, nihil præjudicaret Eccle-siae, neque innocentibus christianis, quibus Do-minus prævidens de præpositis malis ait: Quæ dicunt facite, que autem faciunt facere nolite,*

dicunt enim et non faciunt, ut certa sit spes fidelibus, quæ non in homine, sed in Domino collocatur. Deinde addere possumus quod idem Augustinus Donatistis respondit, lib. de Unico baptismo, contra Petilian., c. 46: *Quid opus est ut Episcoporum Romanæ Ecclesiæ, quos incredibilibus calumniis insectatus est, objecta ab eo crimina diluamus? Nam, licet de criminalibus arguantur, numquid etiam convincuntur, aut convicti aliqua instrumentorum firmitate monstrantur?* et cætera, quæ eleganter prosequitur. Non negamus tamen aliqua peccata et scandala de aliquibus Pontificibus in historiis referri, sed hi et pauci sunt comparatione multitudinis tot illustrum et Sanctorum Pontificum, et mirum esse non debet quod in tanta multitudine pauci mali inventi sint, cum inter duodecim Apostolorum unus traditor fuerit. Unde sicut iste apostolicam dignitatem non faedavit, ita neque ullus Pontifex pravus Apostolicam Sedem maculavit, quia nullus in eis fuit hæreticus, saltem qui hæresim publice docuerit, et vita mala sanctitatem sedis non diminuit. Et quod de personis Pontificum dicimus, de eorumdem electione dictum intelligatur. Nam quod rex Angliæ obmurmurat, nostra ætate accidisse ignoramus, et licet fortasse interdum commissum sit, in merito notatur ac reprehenditur, ac si frequens vel perpetuum esset, ideoque merito Bellarminus respondit: *Solemne est adversariis, id, in quo unus aliquando peccavit, ad omnes transferre.* Ac denique licet in tali electione homines ut homines interdum delinquent, non inde necessario fit, ut electio non sit ab Spiritu Sancto, qui novit malis bene uti, etiam ad dignam personam eligendam; et licet interdum propter sua occulta judicia, permittat ut in electione personæ erretur, nihilominus propter Ecclesiæ bonum et firmam instituticnem Spiritus Sanctus assistit, ut rite electo, quicumque ille sit, suam conferat potestatem, et ita percata hominum non obstant quominus uno vel alio modo electio ab Spiritu Sancto sit.

44. *Pontificis primatus non injuriam Christi, sed ejus singularem erga Ecclesiam providentiam præ se fert.* — Denique ad ultimam partem negamus, in injuriam cedere Christi, quod unum habeat in terris Vicarium, qui suo modo caput visibile militantis et visibilis Ecclesiæ sit, quia hoc est caput ministeriale; ipse autem Christus solus semper est caput principale. Sicut etiam supra de petra dicebamus, vel sicut Christus etiam in Scriptura dicitur, *Pastor animarum nostra-*

rum, 1 Petr. 2, quod non obstat quominus aliis hominibus dicatur: Posuit vos Spiritus Sanctus Episcopos regere Ecclesiam Dei, Act. 20. Nam, licet Christus sit Princeps Pastorum, supremus et principalis, ut dicitur 1 Petr. 5, nihilominus alii etiam sunt pastores tanquam ministri illius principis; imo isti etiam interdum principes appellantur, juxta illud: *Constitutes eos principes super omnem terram;* omnes tamen sunt sub illo supremo principe. Ita ergo Papa et est Pastor, et Episcopus, et Princeps Pastorum et Episcoporum, utique mortaliū, seu ministerialiū, sub immortali et absoluto principe. Atque eodem modo est ministeriale et mortale caput sub principali et immortali. Et ideo hoc non solum non derogat dignitati Christi, sed etiam charitatem et potentiam ejus, et singularem erga Ecclesiam suam providentiam commendat.

CAPUT XXI.

UTRUM PERSONÆ PRINCIPUM SEU REGUM TEMPORALIUM SPIRITALI POTESTATI SUMMI PONTIFICIS SUBJECTÆ SINT.

1. *Potestas spiritualis et temporalis duplexer inter se conferuntur.* — Quamvis in praesenti præcipue agendum sit de subordinatione, seu comparatione spiritualis et temporalis potestatis, nam ad illarum perfectam cognitionem hoc præcipue declarandum superest, nihilominus ab ipsis personis, in quibus tales potestates insunt, initium sumimus, quia fundamentum prædictæ subordinationis inde maxime pendet. Quod ut declarem, adverto, prædictas potestates, spiritualem et temporalem, posse comparari vel in nobilitate et excellencia, vel in subordinatione et subjectione unius ad alteram; haec enim duo adeo diversa sunt, ut possint separari, ad eum modum quo in physicis facultatibus potest una esse excellentior alia (ut visus auditu), etiamsi una alteri in actione sua non subjiciatur vel subordinetur. Nunc ergo non comparamus has potestates in absoluta perfectione et excellencia; nam explicando distinctionem spiritualis potestatis a temporali, satis ostendimus illam esse excellentiorem ista, quod etiam ex professo docui in opere de legibus, et supposita distinctione utriusque potestatis, vix potest habere dubitationem. Quia spiritualis potestas est altior quædam participatio divine potestatis, perfectiores effectus, altiorem finem, nobiliorem originem, et quoddam esse divi-

noris atque excellentioris ordinis habens, ut variis etiam loquendi modis Patres ostendunt, quos in citatis locis adnotavi.

2. Variæ quæstiones quæ ex unius potestatis ad aliam subordinatione oriuntur. — Comparamus ergo has potestates in subordinatione ac dependentia unius ab alia, quæ vel inter ipsas potestates formaliter (ut sic dicam) cogitari potest, vel solum inter personas in quibus tales potestates existunt. Inquiri enim potest an una ex his potestatibus possit alteram ad suos actus applicare, vel ab eis cohibere; vel an persona habens unam potestatem subjiciatur habenti aliam quoad actus ad illam pertinentes, in quo etiam quæri potest an hæc subjectio reciproca, vel tantum ex altera parte sit. Quæ omnia, ut punctum difficultatis attingamus, de illis personis tractanda proponimus, in quibus hæc potestates in supremo excellentiæ gradu inveniuntur, ut sunt imperator et Pontifex Summus. Tres igitur resultant quæstiones. Prima est, an Summus Pontifex personas regum et principum temporalium habeat sibi spiritualiter subjectas. Secunda, an Pontifex habeat sibi subjectam non solum personam regis, sed etiam ejus potestatem temporalem, quantumvis supremam, ita ut possit illius actus præcipiendo dirigere, exigere, supplere vel impedire. Tertia his consequens est, an Pontifex, ratione suæ spiritualis potestatis, possit christianos principes non solum dirigere præcipiendo, sed etiam cogere puniendo, etiam usque ad regni privationem, si opus fuerit, quod est fere punctum et cardo totius controversiæ, et ideo accuratius tractandum est. Possuntque tres similes quæstiones e converso moveri, scilicet, an rex vel imperator personas Papæ vel aliorum Episcoporum habeat sibi in temporalibus et civilibus subjectas. Item, an rex sua temporali potestate possit spirituali dominari, in ordine ad suam gubernationem illum excitando aut cohibendo. Tertio, an possit rex præcipere Pontifici cum potestate coerciva, etiam usque ad depositionem. Ex his autem tribus posterioribus questionibus prima ad disputationem de exemptione clericorum a potestate civili pertinet, cui totum librum sequentem dicamus, et ideo ibi copiose tractabitur; hic vero solum de persona Pontificis aliquid attingemus, quantum ad solvendas aliquas objectiones fuerit necessarium. Secunda vero quæstio, supposita resolutione priorum quæstionum, nullam habet difficultatem, et ideo cum illis per quamdam

consecutionem expedietur. Tertia vero quæstio annexa est præcedentibus, et quatenus spectare potest ad Pontificem ut Pontifex est, in sequentibus etiam obiter expedietur; quatenus vero de Pontifice ut est homo vel civis, in sequenti libro simul cum prima resolvetur.

3. Error Protestantum circa regum ad Pontifices subjectionem. — In hoc ergo capite prima quæstio proposita tractanda est, in qua, sententia Protestantum est, regem temporalem, et in universum principem in temporalibus supremum nulli homini in spiritualibus esse subjectum, ac subinde nec potestatem regis a potestate alicujus hominis pendere. Qui error a Marsilio Paduano originem duxit, et illi maxime adhæsit Henricus VIII, rex Angliæ, quem nunc serenissimus Jacobus imitatur, ut non solum ejus facta, sed etiam verba, quæ in variis locis suæ Præfationis posuit, ostendunt. Nam in hoc sensu, pagin. 2, de temporalibus regibus ait: *Quos Deus in altissimo dignitatis gradu quasi suos vicarios et legatos ad exercenda judicia in suo solo collocarit.* Et clarius in pagin. 5: *Nam neque me Pontifice ulla ex parte inferiorem esse credam.* Et iterum ad reges, pagin. 10: *Quos Deus præcipios in terris vicarios in administratione justitiae esse jussit.* Et in eodem sensu dicit, pagin. 14, controversiam, quam cum suis subditis catholicis habet, non aliunde esse motam, *quam ab ambitiosa Pontificum tyrannide, quam illi contra auctoritatem Scripturarum, contra Conciliorum antiquorumque Patrum mentem, sibi in temporalia regum jura injuste usurparunt.* Tandemque ibidem concludit, in hac regum auctoritate asserenda (utique in hoc sensu) totam suam Apologiam impendisse. In quibus locis, licet interdum de subjectione in temporalibus loquatur, intelligit tamen de subjectione, tam directa quam indirecta; ut enim utramque a regibus excludat, spiritualem etiam negat, ideoque potestatem etiam spiritualem sibi arrogat, et in hoc fundamento tota ejus machina nititur.

4. Fundamentum prædicti erroris. — Cum hæc scriberem, liber Illustrissimi Cardinalis Bellarmini ad manus meas pervenit, in quo Guillermo Barclaio, qui Pontificis potestatem in rebus temporalibus novo quodam modo negavit, respondet. Profitebatur enim ille habere Pontificem supremam potestatem in spiritualibus, etiam supra reges et imperatores, et nihilominus negavit subordinationem

potestatis temporalis ad spiritualem, et consequenter etiam negavit, posse Pontificem in temporalibus rebus, ad jus vel dominium regis pertinentibus, mutationem aliquam facere, vel in illis aliquid disponere. Et quamquam in praedicto libro multa ejus fundamenta referantur, nullum tamen grave vel ab auctoritate, vel ab urgente ratione petitum invenio, et qualiacumque illa sint, illis tam plene et erudite Cardinalis satisfacit, ut nihil addere necesse sit. Summa itaque omnium est, quia reges christiani habent supremam potestatem in temporalibus; repugnat autem esse supremam, et esse alteri subjectam, sive directe, sive indirecte. Ad utrumque autem persuadendum ex Scripturis colligit vulgaria testimonia, quibus obedientia ad temporales principes commendatur, et adjungit potestatem Pontificis quoad temporalia nullum in Scriptura habere fundatum, neque in usu vel traditione Ecclesiae. Multa etiam accumulat, in quibus quaestione hanc de potestate spirituali Pontificis cum quaestione de exemptione clericorum confundit, cum tamen, ut saepe dixi, distinctae sint, et ex principiis longe diversis definendae; ideoque omnia, quae ad exemptionem perlinuerit, in sequentem librum remittimus; aliis vero in capite sequenti satisfaciemus.

5. *Assertio de fide.* — *Reges temporales in spiritualibus subjiciuntur Pontifici.* — Principio ergo contra regem Angliae id statuimus, quod Barclaius admittit, Pontificem Romanum esse spiritualem Patrem et Pastorem summum regum et principum temporalium, quantumeunque in suo ordine supremi sint; ac proinde in his, quae ad animam et spirituale regimen spectant, reges esse Pontifici Romano subjectos. Hæc assertio directe respondet primæ quaestioni propositæ, estque de fide catholica tenenda. Et nova probatio non indiget; sequitur enim evidenter ex principiis capitibus præcedentibus traditis. Ostendimus enim Papam esse pastorem omnium ovium Christi; at reges christiani inter oves Christi computantur, alioqui extra ovile et extra Ecclesiam Catholicam erunt; ergo etiam illorum pastor est Papa; ergo e converso ipsi spirituali Pontificis potestati subjacent: nam hæc duo correlativa et inseparabilia sunt. Quapropter Scripturæ, Pontificum, Conciliorum et Patrum testimonia, quae probant Pontificem Sumnum succedere Petro in universalis potestate regendi Ecclesiam, probant etiam reges subdi eidem potestati Pon-

tificis, saltem in spiritualibus: nam potestas data in totum ovile, seu corpus, ad singulas oves seu partes extenditur. Et qua ratione illa potestas cæteros baptizatos ejuscumque inferioris conditionis sub se complectitur, eadem reges etiam et imperatores comprehendit, quia nullo jure exempti sunt, et regia dignitas cum christiana subjectione non repugnat, alias etiam cum Christiana fide et professione pugnaret, cum ipsa Christi fides obedientiam hanc a suis cultoribus requirat.

6. *Probatur conclusio, primo, ex Concilio Nicæno et Patribus.* — His generalibus rationibus et testimoniis addi possunt specialia verba, imprimis Concilii Nicæni, canon. 39, inter octoginta ex Arabico translata, ubi de Pontifice Romano dicit: *Ipse est primus sicut Petrus, cui data est potestas in omnes principes christianos, et omnes populos eorum, ut qui sit Vicarius Domini nostri Jesu Christi super cunctos populos, et universam Ecclesiam Christianam.* Unde Symmachus Papa, Apolog. ad Anastasium imperatorem, sic ad eum loquitur: *Tu si christianus princeps es, qualiscumque Præsulis Apostolici debes vocem patienter audire.* Et Anastasius Papa II, in epist. 4 ad Anastasium imperatorem, obedientiam in his quæ illum monebat, ab ipso requirit. Et Gelasius ad eumdem: *Licet præsideas humano generi dignitate rerum terrenarum, tamen Præsulibus divinarum devotus colla submittis.* Et infra: *Subdi te debere cognosce religionis ordine, etc.* Ex testimoniis etiam supra allatis, quibus primatum Romanæ Sedis ostendimus, multa expresse declarant, inter oves Petro commissas, etiam reges et imperatorem numerari. Præsertim Nazianzenus, in Oratione ad Populum timor. percul.: *Suscipe (ait) vocem liberiorem, scito te esse ovem gregis mei.* Et Chrysostomus, Homil. 83: *Si is, qui diadematè coronatur, indigne adeat, cohibe; majorem illo potestatem habes.* Et Ambrosius, lib. de Dignitat. Sacerdot., cap. 2, ait, *regum colla submitti pedibus Sacerdos-*

7. Ex factis imperatorum probatur secundo assertio. — Multum denique veritas hæc ex factis, exemplis ac testimoniis christianorum imperatorum ac regum manifestatur; nam imprimis de Philippo primo imperatore christiano memoriae proditum est, obdivisse Fabiano Papæ, præcipienti ut ad communionem non prius accederet, quanu inter publicos penitentes sedens peccata defleret, ut Eusebius

refert, libro sexto Histor., capite vigesimo quinto, alias vigesimo septimo; et Nicéphor., lib. 5, c. 25. De Constantino etiam nota est historia, quod in Concilio se ab Episcopis judicandum esse dixerit, non de illis iudicaturum, apud Ruffin., lib. 4, c. 2. Satis etiam pie Justinus imperator, in l. 4, c. de Summ. Trinit. et fide Cathol. : *Nos (inquit) reddentes honorem Apostolicæ Sedi, et Vestrae Sanctitati, quod semper nobis in voto fuit, et ut decet Patrem, honorantes Vestram Sanctitatem, omnia, quæ ad Ecclesiarum statum pertinent, festinacimus ad notitiam deferre Vestrae Sanctitatis, quoniam nobis semper fuit magnum studium unitatem vestræ Apostolicæ Sedis, et status Sanctorum Ecclesiarum custodire.* Et alia, quæ prosequitur, quibus satis se ostendit spiritualiter Apostolicæ Sedi subjectum, ut recte intellexit, et laudavit Joannes Pontifex, in rescripto quod in eadem lege referatur, § *Inter claras*, ubi inter alia dicit : *Romanæ Sedis reverentiam conservatis, et ei cuncta subjicitis, et ad ejus deducitis unitatem, et cætera quæ supra retulimus.*

8. Sunt etiam valde notanda verba Caroli Magni imperatoris : *In memoria B. Petri honoremus S. Romanam, et Apostolicam sedem, ut quæ nobis sacerdotalis mater est dignitatis, esse debeat magistra ecclesiastica rationis, quare servandi est cum mansuetudine humilitas, ut licet rix ferendum ab illa sancta sede imponatur jugum, tamen seramus, et pia devotione toleremus.* Quæ verba ex capitulis Caroli refert Gratian., in c. 3, dist. 49; et Nauclerus, volum. 2, generat. 28, dicit esse unum ex viginti tribus legum capitulis, quæ Carolus ad suos subditos misit. Et receptum est a Patribus in Concilio Triburiensi, canon. 30. Unde etiam dixit Symmachus Papa, in sexta Synodo Romana : *Non licet imperatori vel cuiquam pietatem custodienti, quidquam, quod apostolicis regulis obriet, agere.* Et refert Gratianus, in c. 2, dist. 10, ubi similia verba ex Calixto, Marcellino et Adriano Papa referuntur. Imo idem Adrianus Papa, in ultimo suorum capitulorum : *Generali (ait) decreto constituimus, ut execrandum anathema sit, et veluti prævaricator catholicæ fidei semper apud Deum reus existat, quicumque regum vel potentum deinceps Romanorum Pontificum decretorum censuram in quocumque crediderit vel permiserit violandam, ut est apud Gratianum, in c. Generali, 25, q. 1.*

9. Possunt præterea his adjungi plura signa reverentiæ, et obedientiæ sedi Apostoli-

cæ data ab imperatoribus et regibus, in omnibus locis ac temporibus. Nam in primis fere omnes vocant *spiritualem Patrem*, et addunt, *Beatissimum, Sanctissimum*, aut aliiquid æquivalens, ut videre licet in multis epistolis diversorum imperatorum ad Leonem Papam, Hormisdam, Anastasiū, et alios, specialiterque notari possunt verba Ladislai regis Ungariæ, in oratione ad Nicolaum V, ubi vocat, *Pontificem maximum, unicum Christianorum Principem, et Regum Regem, ac in terris Deum*, ut extat apud Coelum, lib. 11 Historiae Husitarum. Deinde confitentur sœpe, et recognoscunt cathedralm Petri in Pontifice Romano, ejusque universalem jurisdictionem in totam Ecclesiam, ut constat ex Constantino, et aliis supra allegatis, et ex Valentiniano, Epist. ad Theodos., in Act. 4, Concilii Chalcedonensis, et in alia ejusdem ad Leonem, ubi eum ait, *habere principatum sacerdotii, fidei præsidentem, et ipso auctore congregandum esse Concilium*, et ex aliis quæ ibi videri possunt. Item ex Justiniano, in Legibus et Authenticis in superioribus citatis, et ex litteris ad Bonifacium II, quæ inter gesta Bonifacii, tom. 2 Conciliorum, referuntur, ubi prius de Apostolica Sede intelligit illud : *Tu es Petrus, et super hanc petram ædificabo Ecclesiam meam ; et subjungit : Hæc, quæ dicta sunt, rerum probantur effectibus, quia in Sede Apostolica extra maculam semper est catholica servata religio.* Et infra : *Anathematizamus omnes, qui contra S. Romanam et Apostolicam Ecclesiam superbiendo suas erigunt cervices, sequentes in omnibus Apostolicam Sedem et prædicantes ejus omnia constituta.*

10. Et Federicus I, in Epistola ad Emanuellem, Græcum imperatorem, prius dicit, Romanam Ecclesiam omnium Ecclesiarum unicam matrem, Dominam, et magistrum a Deo esse ordinatam. Unde infert : *Summo Pontifici, quem nomine tenus sanctum appellas, debitam obedientiam exhibeas et honorem.* Fertur etiam epistola Leonis, Armenorum Regis, ad Innocent. III, *quem Dominum et in Christo Patrem et universalem Papam appellat, et Pastorem, quem Deus Ecclesie suæ præesse voluit.* Et subjungit : *Vestri luminis gratia informati, omne regnum nobis a Deo commissum, et omnes Armenos ad unitatem S. Romanæ Ecclesiae dicina inspirante clementia revocare cupimus et optamus.* Similia scripsit Michael Palæologus ad Gregorium X, sub annum 1274. Et plura Andronicus, imperator

Græcus, in epistola quæ extat in Bibliotheca Palatina, ubi Romanam Ecclesiam dicit habere supremum absolutumque principatum super universam catholicam Ecclesiam ab ipso Domino traditum, etc.

11. *Nangius, de Gestis sancti Ludovici, et apud Surium.* — Præterea Carolus rex Franciæ in epistola ad Adrianum II, sic scribit: *Sanctissimo Patri Adriano summo, et universali Pontifici, Carolus, Dei gratia rex, et spiritualis filius vester*, etc. Et Hugo, rex Franciæ, ad Joannem Papam XV, inter alia dicit: *Hoc ex integro affectu dicimus, ut intelligatis et cognoscatis nos et nostros restra nolle declinare judicia.* Et Ludovicus, etiam rex Galliæ, epistola ad Pium II, prius his verbis illum salutat: *Beatissimo Patri nostro Pio Pape II, obedientiam filiale*, et deinde subjugit: *Te Vicarium Dei virentis ea veneratione prosequimur, ut sacra tua monita, præsertim in ecclesiasticis rebus, velut rocem Pastoris audire, illisque parere prompta mente velimus, te Dominici gregis Pastorem profitemur et scimus, teque jubentem sequimur*, etc. Ita S. Ludovicus, Rex Franciæ, inter documenta ad Philippum filium ante mortem scripta, inquit: *Sis devotus, et obediens matri Romanae Ecclesiae, ejusque Pontifici, tanquam spirituali patri, te morigerum præbeas.* Præterea Sigismundus, Rex Poloniæ, in epistola ad Concilium Lateranense, sub Leone X, quæ habetur in ejus act. 7, obedientiam præstat Summo Pontifici, et addit: *Juxta consuetudinem majorum meorum.*

12. Et in eodem Concilio, sess. 2, in principio, habetur mandatum regis catholici Ferdinandi, in quo inter alia multa illustrissima suæ fidei testimonia hoc ponit: *Proitemur nos filium sanctæ Romanae Ecclesiae, matris nostræ, deditissimum, proque ejus honore atque statu animam ponere paratissimum.* Et intra subdit, se mittere legatum, ut intersit Concilio, *ibique* (ait) *obedientiam debitam præfato beatissimo Domino nostro Pape, toutes, quolies opportunum fuerit, præstandam*, etc. Et similia fere verba ex Carolo V habentur in edicto Wormacieensi. Neque plura testimonia Hispaniarum regum referre necesse est, quia res est notissima, et quia rex Alphonsus, in suis Legibus, parte prima, tit. 5, l. 2, 3, 4 et 5, ex professo non solum profitetur, sed etiam eruditæ Pontificiam dignitatem et potestatem declarat, dicens, ratione illius esse speciali modo, *Vicarium Christi, et successorem Petri*, ac præterea

per antonomasiam *apostolicum* appellari, et nominari etiam *Papam*, quia *Pater Patrum, et caput Episcoporum, et aliorum Prelatorum.* Et præterea (inquit) *omnes Christiani totius orbis, quando ad ipsum accedunt, pedem ejus osculantur.* Addit deinde, in fine legis 4, *cum, qui negaret Pontificem habere hanc potestatem, vel esse caput Ecclesie, non solum excommunicatum esse, sed etiam hereticum.* Et in l. 5, generaliter et sine exceptione dicit, omnes Christianos teneri ad obediendum Pontifici in spiritualibus, etc.

13. *Plures reges Angliae assertionem positam amplexati fuere.* — Venio ad reges Angliae, qui a principio suæ vocationis ad fidem, usque ad Henricum VIII, Romanum Pontificem tanquam supremum Ecclesie pastorem recognoverunt. Primus enim Britannæ rex, Lucius, statim ac fidem suscepit, ad Eleutherium misit Epistolam, *obsecrans* (ait Beda) *ut per eum mandatum Christianus efficeretur, et mox effectum prie postulationis consecutus est.* Quo facto et exemplo ostendit aperte, recognovisse Pontificem ut Pastorem suum; quomodo enim sacramentum tam necessarium, ab aliis quam a Pastore suo postulasset? Item professus est illum habere claves totius Ecclesie, et ad illum principaliiter pertinere per januam baptismi reges et principes intra Ecclesiam recipere. Alioqui cur non potius ab aliquo Episcopo Britannico (si fortasse aliquis tunc ibi erat ex prædicatione et ordinatione Josephi succedens), vel saltem ab aliquo vicino Episcopo baptismum postulasset? Nam, ut ex Irenæo, lib. 1, c. 8, sunimus, jam eo tempore in Germania, Gallia et Hispania, quæ sunt provinciæ, Britannæ insulæ, quam Roina viciniores, erant fundatæ ecclesiæ et Episcopi creati; cur ergo ad nullum illorum nuncios misit, sed ad Romanum solum? Non certe alia ratione, nisi quia illum tantum universalem jurisdictionem, et superiorem potestatem in Ecclesiam habere credidit. Supra etiam retulimus ex Beda¹, regem Osuvi, cum audisset Petro principaliiter esse datas claves regni Cœlorum, et illius successorem Romanum Pontificem esse crederet, dixisse: *Ego vobis dico, quia hic est ostiarius ille, cui ego contradicere nolo, sed in quantum novi et raleo, hujus cupio in omnibus obedire statutis.* Hæc dicente rege (ait Beda) *fuerunt assidentes, et ad ea, quæ meliora cognoverant, sese transserre festinabant.*

¹ Beda, lib. 3, cap. 25.

Multaque alia de recursu regum Angliæ ad Apostolicam Sedem in rebus et negotiis ecclesiasticis Beda refert.

14. Item Joannes Papa X, Eduardum regem tanquam ovem suam admonuit, ut refert Polydorus, lib. 6. Estque optima epistola regis Eduardi ad Nicolaum II, quam sic inscribit: *Summo universalis Ecclesiae Patri Nicolao, Eduardus, gratia Dei Anglorum rex, debitam subjectionem et obedientiam*¹. Et postea, in epistola confitetur et postulat, ut quod prædecessor Papæ ipsi injunxerat sub nomine obedientiæ et pœnitentiæ pro quodam voto, ratum habeat, et ut quædam privilegia confirmet, et postea dicit, se augere et confirmare donationes et consuetudines pecuniarum, quæ habet S. Petrus in Anglia, easque mittere collectas cum regalibus donis, etc. Similes fere inveniuntur epistolæ alterius Eduardi, regis Angliæ, ad Bonifacium VIII, et alterius ad Clementem VI. Et sunt etiam optima verba regis Richardi II ad Clementem III²: *Justiorum exitum facta principum sortiuntur, cum a Sede Apostolica rcbur et favorem accipiunt, et sanctæ Romanae Ecclesie colloquio diriguntur. Propterea dignum duximus ad notitiam Beatitudinis Vestræ transmittere, quæ inter nos et dominum Tancredum, illustrem Sicilie regem publico nuper et necessario sunt celebrata contractu. Et infra: Sanctitatem Vestræ et Sanctam Romanam Ecclesiam obnoxie rogamus, ut sancta Sedes Apostolica fidussionem pro nobis suscipiat, et ut confidenter id faciat, testimonio presentium litterarum vobis liberam concedimus potestatem, nos et heredes nostros, et terram nostram districtius coercere, si contra prefatam pacem venerimus, etc.*

15. Præterea Kenulphus, rex Merciorum in Anglia, epistolam scripsit ad Joannem III, Pontificem, in qua prius gratias Deo agit, quia cum gloriissimum gregis sui Pastorem Adrianum perpetuo remunerandum super aethera duxisset, suis tamen oribus pia erexit prudenter eum, id est, Leonem, qui scit ovile dominicum ad caulas superioris ritæ agitare. Et infra: *Quapropter opportunum arbitror tuis sanctis jussionibus aurem obedientiæ nostræ humiliiter inclinari*³. Et postea, humiliter benedictione postulata, subjungit: *Hanc benedictionem omnes, qui ante me fuerunt Merciorum reges, meruerunt ab antecessoribus suis*.

adipisci, hanc ipse humilis peto, et a robis, o Sanctissime, impetrare cupio, quatenus impensis adoptionis sorte me tibi filium suscias, sicut te mihi patris persona deligo, et tot s' o'led entia riribus semper amplector. Refert etiam Petrus Blesensis epistolam quamdam reginæ Angliæ, quæ apud ipsum est 144, in qua contra tyrannidem ejusdam principis christiani auxilium Coelestini Papæ implorat: Quem constituit, inquiens, Deus super gentes, et regna in omni plenitudine potestatis. Et infra: Nec ista dissimulare potestis sine criminis et infamie nota, cum sitis ricarius crucifixi, successor Petri, Deus etiam Pharaonis. Et cum postea tyrrannum claves ludibrio habere retulisset, concludit: Elsi restram non vultis injuriam prosegui, robis tamen Petri opprobrium, et injuriam Christi dissimulare non licet.

16. *Ex Anglorum factis eadem regum subjectione stabilitur.*—Potest præterea hoc loco in signum hujus spiritualis subjectionis regum Angliæ adduci consuetudo illa, ejus supra Eduardus meminit, solvendi tributum Romanæ Ecclesie in D. Petri reverentiam, quæ consuetudo ab Ina rege initium sumpsit, teste Polydoro, lib. 4, et a successoribus conservata et aucta est, ut in lib. 5 et aliis locis prosequitur. Posteaque lege lata a Guillermo, Conquæstore Angliæ, confirmata est, et inter ejus leges dicitur esse decima, et de denario Petri inscribitur. Atque ita usque ad tempora Henrici VIII tributum illud Romanæ Ecclesie persolutum est. Unde optime colligit Sander., d. I. 5, c. 6, verisimile non esse, reges Angliæ, qui in honorem Sancti Petri regnum suum vectigale Romanæ Sedi fecerunt, spirituale ejusdem regni gubernationem eidem Sedi negasse. Potestque indicium hoc locupletari ex his, quæ Azor congerit in 2 p. suarum Instit., lib. 4, c. 35.

17. *Alia eorumdem gesta præsens institutum confirmantia inducuntur.*—Tandem confirmari hoc potest ex antiquo usu et praxi antiquorum catholicorum regum Angliæ, qui semper a Pontificibus postulaverunt, tum dispensationes in votis, aut ecclesiasticis legibus, tum Episcoporum confirmationes, tum etiam pallium Archiepiscopis dari solitum, et saepe ipsos Archiepiscopos pro suscipiendo pallio Romanam interdum mittebant, aliquando vero reges a Pontificibus, ut daretur absentibus, postulabant. Interdum etiam Episcopi et reges, in controversiis quas inter se habebant, ad Pontificem appellabant, de quibus et mul-

¹ Baron., anno 1060, n. 9.

² Baron., anno 1190.

³ Baron., anno 169.

tis similibus, videri possunt Neubrigensis, lib. 1 Rerum Anglicarum; et Malmesburiensis, lib. 1 de Gestis Pontificum, et lib. 1 Histor. Novel. Et Petrus Blesensis, epistol. 136, cum aliis multis; et Matthæus Parisius, in Historia regum Angliæ; Baronius, anno 1100 et 1117, et 1174, et quoties de regibus Angliæ historia occurrit. Aliqua etiam in summam redegit Sanderus, in Clavi David, lib. 5, cap. 6. Quæ his repetere non est necesse, cum ipse etiam Henricus VIII, rex Angliæ (ut supra notavimus), priusquam in schisma incideret, magnum pro Sede Romana ejusque auctoritate testimonium scriptum reliquerit in assertione Sacramentorum contra Lutherum, artic. 2, ubi inter alia dicit: *Non tam injurius ero Pontifici, ut anxie et sollicite de ejus jure disceptem, quasi res haberetur pro dubia.* Ideoque dispensationem a Papa postulavit, quia eo tempore se spirituali potestati Pontificis subjectum agnoscebat, secundum fidem, et traditionem quam non solum a prædecessoribus suis, sed ab universo orbe christiano accepit; cui etiam traditioni in suo libro testimonium perhibuit.

18. *Ratione etiam efficaci eadem regum subjectio demonstratur.*—Denique veritas hæc ex quodam principio in cap. 6 hujs libri demonstrato manifeste sequitur; probavimus enim temporalem regem ex vi suæ regiæ dignitatis nullam habere potestatem vel jurisdictionem spiritualem. Quod principium non minus verum in regibus Anglicanis est quam in aliis, ut per se notum est, nam propterea rex Jacobus contrarium persuadere ntititur omnibus regibus, quia videt causam et rationem esse communem. Ex hoc ergo principio ita concludimus: temporales reges non habent in Ecclesia spiritualem potestatem; ergo necesse est ut in spiritualibus subsint ecclesiastice potestati. Probatur consequentia, quia in Ecclesia non sunt nisi oves et pastores, seu ovile et pastor; sed qui non habet spiritualem potestatem, non est pastor; ergo oportet ut sit ovis, alioqui in ovili non erit, neque Ecclesiæ membrum. Et quidem contra omnem rationem et rectum ordinem esset, quod in Ecclesia sint aliqui, qui nec regere spiritualiter possint, nec regi, alioqui neque Papa esset Christi Vicarius integræ et perfecte, neque res ordinate fierent, nec Ecclesia posset in unitate et pace conservari, nec denique omnibus fidelibus sufficienter esset ad salutem proximorum.

19. Unde hæc ratio non solum probat tem-

poralem regem esse subditum Pontifici in spiritualibus, sed etiam jure ordinario unumquemque regem esse subjectum sno Episcopo, nisi a Pontifice eximatur, et sub protectione seu jurisdictione sua immediate recipiatur. Quod rex Angliæ male fert, et in Bellarmino reprehendit, est tamen manifestum, si debitus ordo hierarchiæ ecclesiastice consideretur. Nam reges inter oves nullam jurisdictionem spiritualem habentes computantur; ergo ex vi sui status, et attento solo jure naturali vel divino, non habent majorem exemptionem a jurisdictione Episcoporum, quam cæteri laici in eadem diœcesi commorantes. Et hoc probat exemplum Ambrosii, et similia, et quod dixit Chrysostomus, *majorem illo potestatem habes*⁴, et nonnulla alia, quæ supra retulimus. Clarius vero id traditur a Clemente III, in cap. *Omnes Principes*, de Majorit. et obedientia, ubi id notat Glossa, Panormitanus et alii Doctores, et in cap. *Solitæ*, eodem titul. Ab hoc autem ordinario jure solent eximi reges per privilegia Pontificum, ab ipsius autem Pontificis obedientia eximi nullo modo possunt, et ideo illi præcipue spiritualiter subjecti dicuntur.

CAPUT XXII.

REGES CHRISTIANOS NON SOLUM QUOD PERSONAS,
SED ETIAM QUOD REGIAM POTESTATEM, ID EST,
NON SOLUM UT HOMINES, SED ETIAM UT REGES
CHRISTIANOS, POTESTATI PONTIFICIS SUBJICI.

1. *Prima conclusio.*—Assertioni in præcedenti capite probatae altera subjicienda est, quæ ex præcedenti sequitur, et secundæ quæstioni in principio præcedentis capitulis propositæ respondet, nimirum, Pontificem Summum, ex vi suæ potestatis seu jurisdictionis spirituali, esse superiorem regibus et principibns temporalibus, ut eos in usu potestatis temporalis dirigat in ordine ad spirituali finem, ratione cuius potest talem usum præcipere vel prohibere, exigere aut impedire, quantum ad spirituale bonum Ecclesiæ fuerit conveniens. Per potestatem enim directivam non intelligimus solam potestatem consulendi, monendi aut rogandi, hæc enim non sunt propria superioris potestatis, sed intelligimus propriam vim obligandi, et cum moralí efficacia movendi, quam aliqui solent coactivam appellare, sed hæc vox magis ad

⁴ Theod., lib. 5 Hist., c. 17.

pœnas pertinet, de quibus in capite sequenti dicturi sumus; hic autem de jurisdictione ad obligandum in conscientia loquimur.

2. Assertio est communis Catholicorum. — Assertio ergo sic explicata communi consensu Catholicorum recepta est, quos ex parte in cap. 4 hujus libri allegavi. Nam illi auctores, qui absolute docent Papam habere supremam potestatem, etiam temporalem, in universo orbe, hoc præcipue intendunt, et fortasse vel omnes, vel plures illorum in hanc tantum sensu locuti sunt. Nam, licet interdum indistincte, et sine sufficienti declaracione, vel etiam improprie loquantur (quia potestas Papæ temporalis non est, sed spiritualis, quæ temporalia sub se continet, et circa illa indirecte, id est, propter spiritualia versatur), nihilominus saepe hunc sensum declarant, et distinctionem vel expresse vel virtute attin-gunt. Affirmant enim aliqua posse indirecte Pontificem, et directe negant. Ut judicare de feudo, sicut dixit Glossa in c. *Norit*, de Judiciis, verb. *Judicare*, ubi Innocentius eam sequitur, et Panorm., num. 17 et sequentibus; imo si attente legatur a num. 11, non aliter intellexit habere Pontificem supremam potestatem temporalem. Similiter dixit Glossa, in regula *Possessor*, 2, de Regulis jur., in 6, Papam indirecte posse revocare legem civilem intuitu vitandi peccatum; non tamen directe et per se, id est, cessante ratione pertinente ad salutem animæ, ubi licet non utatur formaliter his terminis, directe vel indirecte, in re tamen et per descriptionem eundem sensum declarat.

3. Simile exemplum est in Glossa, cap. *Per venerabilem*, Qui filii sint legitim., verb. *Habebat potestatem*, estque de legitimatione ad temporalia, quam Pontifex directe dare non potest, licet possit indirecte. De quo exemplo videri possunt Covar., in 4 Decretal., 2 p., c. 8, § 8, numer. 13 et sequentibus; et Molin., lib. 3 de Primogen., cap. 2, num. 10 et sequentibus, et plures alii, quos allegant. Reliqui vero Doctores, præsertim Theologi, d. cap. 4 allegati, negantes habere Pontificem absolutum dominium regnorum omnium, seu directam potestatem temporalem supra omnes reges, unanimi consensu docent veritatem hanc de potestate Pontificis directiva regum et principum, et jurisdictionis ac regiminis eorum. Qui plures alios Doctores pro hac veritate referunt, et multo plures Bellarminus, in principio responsionis ad Barclajum, ex quibus in sequenti assertione aliquos notabimus.

4. Probatur primo conclusio. — Primum ac præcipuum fundamentum ex illis Scripturis sumimus, in quibus Pontifici universalis animalium cura commissa est. Nam ad gerendam hanc curam plena et perfecta potestas data est Petro, et consequenter etiam ejus successoribus, Romanis Episcopis, quia qui succedit in munere, succedit etiam in potestate; ergo talis potestas data est ad omnia quæ ad hoc regimen necessaria sunt; ergo in illa potestate spirituali includitur vis directiva cuiuscumque potestatis temporalis in regibus vel supremis principibus existentis. Assumptum manifestum est, tum ex verbis Domini: *Quodcumque ligaveris*, et: *Quodcumque solveris*; et: *Pasce oves meas*; tum quia ad sapientem Christi Domini providentiam hoc pertinebat. Unde facile etiam prima consequentia ostenditur, quia non solum Christus verus Deus, cuius opera perfecta sunt, sed etiam quilibet prudens gubernator, qui vices suas alicui committit, vel suam potestatem delegat, consequenter dat potestatem ad omnia quæ ad finem vel effectum talis commissionis seu delegationis necessaria sunt, ut prudens ratio naturalis, et jura tam civilia quam canonica disponunt, l. 2, ff. de Jurisdict. omnium Judic.: *Cui jurisdictio data est, ea quoque concessa esse videntur, sine quibus jurisdictio explicari non poterit*. Et cap. *Præterea*, de Offic. deleg.: *Ex eo quod causa alicui committitur, super omnibus, que ad causam ipsam spectare noscuntur, plenariam recepit potestatem*.

5. Pontifici vim directivam regum inesse, ex parte ipsorum regum ostenditur. — Superest ut subsumptam illationem probemus, nimirum, in hac spirituali potestate indirecta vim directivam temporalium includi. Hoc enim est quod maxime adversarii negant, expressumque a nobis Scripturæ testimonium postulant, quo talis inclusio doceatur. Nos vero facile respondemus, non in omnibus esse necessarium expressum Scripturæ testimonium, satisque esse si ex scriptis clara et necessaria ratione, vel Patrum traditione et interpretatione colligatur. Dicimus ergo hoc contineri in Scriptura tanquam particulare in universali, vel tanquam unum ex necessariis mediis in fine, seu in potestate dirigendi ad finem talis potestatis spiritualis. Potest autem hoc dupliciter explicari, scilicet, vel ex parte ipsius principis temporalis vel ex parte subditorum ejus. Nam, ut dixi, reges temporales spiritualiter subditi sunt Petro et successoribus ejus; at vero potestas spiritualis data

Petro universalis est ad omnes actus subditorum dirigendos, quibus vita æterna perdi vel comparari potest, ut probat indefinitum verbum *Pasce*, et universalis potestas ligandi et solvendi; unus autem ex his actibus in christiano principe est debitus usus potestatis gubernative, nam si illa non juste utatur, condemnabitur; ergo ad pastorem spiritualem talis principis pertinet facultas dirigendi illum in usu sue temporalis potestatis, si alii cubi a recta ratione, aut a fide, justitia vel charitate deviet. Sic ergo potestas illa ad temporalia indirecte extenditur, nam usus ipse temporalis potestatis, quatenus animæ obesse vel prodesse potest, sub spiritualibus tanquam particulare sub universalis continetur, et tanquam medium necessarium sub fine, ad quem potestas spiritualis ordinatur. Et hanc rationem insinuavit optime Gelasius Papa ad Anastasium imperatorem, ubi distinguit duas potestates, spiritualem et temporalem, et addit¹: *In quibus tanto gravius pondus est sacerdotum, quanto etiam pro ipsis regibus hominum in dirino sunt reddituri examinæ rationem.* Quapropter verba illa Pauli: *Obedite præpositis vestris, et subjacete eis,* ad Hebr. 13, non minus reges comprehendunt quam cæteros, quia et universalia sunt, et ratio a Paulo sub juncta: *Ipsi enim pervigilant, quasi rationem pro animabus vestris reddituri, in regibus etiam procedit, ut ex Gelasio dixi; merito ergo dicere possumus in verbis illis potestatem hanc præpositorum Ecclesiae contineri.*

6. *Dilemmate effaci idem evincitur.* — Alio etiam modo et non minus efficaci hæc inclusio ostenditur ex parte subditorum regis temporalis christiani, quia si ipse iniqua præcipiat, vel, plus quam expedit, permittat subditis illicitos usus temporalium actionum, vel honorum, in magnum spirituale detrimentum subditorum cedet; sed Pontifex tenetur habere curam spiritualem totius populi christiani subditi temporalibus regibus; ergo in hoc munere includitur potestas avertendi a christiano populo omnia spiritualia incommoda, quæ ex abusu potestatis temporalis in illum possunt redundare; ergo hoc etiam titulo necesse est ut potestas spiritualis principis ad temporalia indirecte extendatur, dirigendo ubi oportuerit potestatem temporalem, ut ita temporalia disponat, quod spiritualibus non noceant. Et hæc etiam ratio insinuatur a Ge-

lasio supra, si ut alia lectio habet, legatur, *quanto pro ipsi regiminibus hominum redditu-ri sunt rationem.* Et utrumque etiam significat Nicolaus Papa, ad Michaelem, dicens, *christianos imperatores pro æterna vita Pon-tificibus indigere.*

7. Declaraturque amplius hæc ratio, nam utraque potestas temporalis et spiritualis, prout in Ecclesia existunt, ita conferri et posideri debuerunt, ut communis bono, et saluti christiani populi proficiant; ergo necessarium est ut hæc potestates aliquem ordinem inter se observent, alias non posset pax et unitas in Ecclesia servari, nam sœpe temporalia commoda repugnant spiritualibus, et ideo vel erit bellum justum inter utramque potestatem, vel necesse est, alteram alteri cedere, ut omnia recte ordinentur. Ergo vel potestas spiritualis erit sub temporali, vel e contrario. Primum nec dici nec cogitari potest secundum rectam rationem, quia temporalia omnia ordinari debent ad spiritualem finem; ergo dicendum e contrario est, potestatem temporalem subjectam esse spirituali, ut a suo fine non deflectat. Nam ita subordinantur potestates sicut et fines. Ideoque merito dixit D. Thomas, 2. 2, q. 40, art. 2, ad 3, bella subordinari potestati Papæ; quia potentia, virtus, vel ars respiciens superiorum finem, habet sibi subjectas facultates inferiores in ordine ad eundem finem. Et q. 60, art. 6, ad 3, sic agit: *Potestas temporalis subditur spirituali, sicut corpus animæ; et ideo non est usurpatum iudicium, si spiritualis Prelatus se intromittat de temporalibus.* Et in 2, dist. 44, in expositione textus, ad 4, ait, *secularem potestatem esse sub spirituali in his que ad salutem animæ pertinent, et ideo in iisdem magis esse obediendum spirituali potestati quam temporali, licet in his, que ad bonum civile pertinent, magis sit obediendum potestati seculari.* In quibus verbis etiam superiorum distinctionem plane indicat. Addit vero limitationem dicens: *Nisi forte potestati spirituali etiam secularis potestas conjugatur, sicut in Papa, qui utriusque potestatis apicem tenet.* Quod intelligi posset, unius directe, et alterius indirecte, juxta superiora verba. Quia vero hæc posteriora verba exceptionem continent a prioribus, videtur in eis potius loqui de utraque potestate directa, et consequenter loqui de Pontifice, ut simul est Pontifex, et rex temporalis. Denique habere apicem utriusque potestatis, quia in utroque ordine habet potestatem supremam, licet non æque univer-

¹ Cap. *Duo sunt*, 96 d.

salem. Ut etiam dixit Innocentius III, in dicto cap. *Per venerabilem*.

8. Atque ad hunc modum intelligenda sunt alia, quae de hac potestate idem D. Thomas tradit, lib. 1 de Regimine Prince., c. 14, et lib. 3, c. 10, 11, 12 et 13, si tamen ejus est opus. Quibus locis, variis exemplis et similitudinibus ad hanc veritatem declarandam utitur, multisque historiis et gestis Summorum Pontificum eamdem confirmat. Idem optime et satis copiose Alexand. Alens., 2 p., q. 118, memb. 3, art. 1, et 3 p., q. 40, membr. 5, quæst. penult., et 1 p., q. 10, memb. 5, post art. 2, in tract. de Officio Missæ, p. 2, art. 2; Hugo de S. Victor., lib. 2 de Sacram., p. 2, c. 4; Turrecrem., in Sum. de Eccles., lib. 2, c. 113; Waldens., tom. 1, in Doct. fid. antiqu., lib. 2, c. 76; Cajetanus, in Apolog. pro Roman. Pontif., c. 13; Henric., Qnodlib. 6, quæst. 23, ubi ait, *sacerdot in apostolicum se habere ad reges, sicut architectedum civilem ad alios artifices in civitate*. Bellarminus, de Sum. Pontif., l. 5, c. 6, 7 et 8; Albert. Pigh., lib. 5 de Eccles. hierarc., c. 14 et 15; Sander., de Visib. eccles. monarch., præsertim c. 4; Victor., Duplici Relect. de Potest. eccles., et altera de Potest. civili, et in Relect. de Indis, p. 1, n. 29; Dried., de Libert. Christ., lib. 2, c. 2; Soto, in 4, d. 23, q. 2, art. 5, et lib. 4 de Just., q. 5, art. 4; Navarr., in c. *Norit*, de Judic., notab. 3, num. 19 et sequentibus; Almain., de Potestat. ecclesi., cap. 8; Molin., referens plures, 1 tomo de Justit., disput. 29, et consentiunt jurisperiti, quos infra referemus.

9. *Eadem regum a Pontifice dependentia exemplis declaratur.* — Declaratur præterea hæc dependentia et subordinatio optimis exemplis. Primum est de dominic et servo; nam dominus habet peculiarem potestatem in servum, quam sine dubio non habet Papa in servum alienum, unde recte dicitur non habere directam potestatem dominativam in illum, et nihilominus certum est, quemcumque dominum temporalem subesse potestati Pontificis, quod debitum usum sui dominii, ita ut non sit contrarius spirituali saluti, vel domini, vel servi, et in hoc sensu recte dicitur Pontifex habere superiorem potestatem indirectam in servum alienum. Et simili modo patria potestas directe convenit proprio parenti et non spirituali pastori, et nihilominus illa potestas, quamvis a natura data, subest spirituali potestati, ut ab ea regatur et dirigatur, et ita potest dici spiritualis potestas

indirecte extendi ad filiorum Christianorum gubernationem. Pari ergo ratione potestas temporalis regis per spiritualem potestatem Pontificis gubernanda et dirigenda est. Possuntque exempla ad principem ipsum temporalem accommodari, ut ex eis a fortiori argumentum desumatur. Nam rex non habet quidem formalem, ut ita dicam, seu directam potestatem patriam in filium alicujus vassalli sui, nec proprium dominium servi alicujus subditi sui, et nihilominus habet eminentem seu indirectam potestatem ad dirigendum vassallum suum in usu patriæ potestatis, quam habet in filium, et in usu dominii quod habet in servum; ergo multo magis Vicarius Christi habet similem potestatem in reges christianos in ordine ad spirituale bonum totius populi christiani.

10. Explicatur præterea hæc potestas ex usu ejus; multiplex enim esse potest, ad duos tamen præcipue revocatur, qui juxta duas temporalis principis potestates distingui possunt. Est enim in principe potestas jurisdictionis, quæ proprie dicitur civilis et moralis, de qua præcipue tractamus. Ut autem hæc timeri possit et conservari, conjunctam habere debet aliam potestatem, non juris, sed facti, ut sic dicam, quæ physica est et executiva, seu militaris potest appellari. Juxta has ergo duas potestates temporalis principis distinguimus duos modos hujus spiritualis regiminis, seu directionis. Primus pertinet ad actus jurisdictionis civilis; talis est emendatio, seu correctio legum civilium, quando bonis moribus consentaneæ non sunt. Potest enim tunc Pontifex illas emendare, vel contrarias ferendo, vel præcipiendo principibus sæcularibus, ut eas revocent aut corrigant. Quæ est doctrina communis Theologorum, cum D. Thoma 1. 2, q. 96, art. 5. Eamdemque tradunt copiosus jurisperiti, Barthol., in l. *Privilegia*, C. de Sacros. Eccles., q. ult.; Alex., in l. *Captatorias*, C. de Testam. milit.; Anton. et Imola, in c. *At si clerici*, de Judiciis; Joan. Andr., Cald. et Abb., in c. 1 de Novi oper. nunciat.; Felin., in c. *Ecclesia*, de Constit., n. 41; Covarr.; in Epito., 4 Decret., 2 p., c. 8, § 9, n. 6 et sequentibus; Anton. Gomez, in l. 9 et 10 Tauri, n. 37 et 38; Fortun. Garci., in tractat. de ult. fin. utriusque jur., n. 51, qui alios referunt. Et hic usus frequentissimus est in jure canonico, et communi sensu et more Ecclesiæ approbatus, ideoque non licet catholico viro de potestate Pontificia dubitare.

11. Materia legis civilis et canonice. — Est autem advertendum, materiam proximam legis civilis interdum esse per se ac directe omnino distinctam a canonica, ut quando est pure temporalis, et nullo modo sacra, nec ad finem spiritualem de se ordinata, ut est, verbi gratia, definire pretium mercium, ordinem judiciorum civilium disponere, etc. : aliquando vero communicare aliquo modo cum materia legis canonice ratione rei subtractæ utriusque legi, ut leges circa matrimonia, circa funera, circa legata pia, et similes¹. Quando ergo leges civiles sunt hujus posterioris generis, non solum indirecte, sed etiam directe per potestatem spiritualem emendari, et irritari possunt, quia materia illa, vel est directe spiritualis, vel est misti fori, et ideo spiritualis potestas directe circa illam versatur, ideoque omnes leges civiles, quæ in talibus materiais versantur, si contrariae sint juri canonico, per illud corriguntur, quia ab excellenti potestate superantur. Et hoc modo leges civiles, circa matrimonia disponentes, per leges canonicas auferuntur, si illis repugnant, et illæ solæ valorem habent, quæ leges canonicas juvent, modo ab eis permisso. Ut verbi gratia, leges civiles permittebant matrimonia inter consanguineos in secundo gradu, quibus prævalent canonice illa irritantes.

12. Ad hunc etiam ordinem pertinent canonice leges disponentes circa juramenta promissoria, ut omnino serventur, non obstante lege civili, et præcipientes judicibus laicis ut eas servari faciant². Item hue etiam spectant canones statuentes contra civiles leges, ut legata pia valeant cum duobus tantum testibus. Nam piæ causæ directe sub potestatem spiritualem cadunt. Leges item civiles, quæ in multis casibus secundas nuptias prohibent et puniunt, per canones derogantur, ut constat ex titulo de secundis nuptiis, et sic de aliis. At vero quando materia legum civilium est pure temporalis, tunc solum indirecte corriguntur per Pontifices, quando vel peccatis favent, vel illis occasionem præbent. Ut sunt leges concedentes præscriptionem cum mala fide, quæ per canones sublatæ sunt, ut

constat¹. Idemque est de legibus permittentibus usuras, concubinatus, etc. Vel etiam quando sunt minus consentaneæ æquitati naturali, ut sunt leges negantes alimenta filiis spuriis, quæ per canones temperantur. Atque eadem servata proportione, si lex aliqua civilis ad spirituale bonum regni judicaretur conveniens, et reges in ea ferenda negligentes essent, posset Pontifex auctoritate sua illam ferre, ut fecit Pius V, dando formam constituendi census, quæ materia satis temporalis est; forma autem visa conveniens ad pericula usurarum vitanda, et ita intervenit eadem ratio indirectæ potestatis.

13. Leges civiles de rebus ecclesiasticis disponentes ipso jure irritæ sunt. — Quibus addi potest alius modus irritationis legum civilium ex vi ecclesiasticae potestatis, nimirum, quando disponunt in materia pure canonica, ut sunt illæ, quæ de clericis vel rebus ecclesiasticis in particulari feruntur, et aliae similes, quæ libertati ecclesiastice derogant. Hæ tamen leges ipso jure naturæ irritæ sunt, et per canones potius irritæ declarantur, quam fiant, quia in aliena materia, et extra sphæram jurisdictionis temporalis versantur; possunt tamen diei virtute spiritualis potestatis irritari, quasi in radice, quando materia illa per spiritualem potestatem canonica effecta est, et pro ecclesiastico foro reservata. Hoc enim etiam potest virtute jurisdictionis spiritualis fieri, quando materia illa divinum cultum vel religionem concernit, ut in materia de Legibus latius dictum est. Extantque de hujusmodi legibus obvia exempla in jure canonico, sub titulis de Immunitate Ecclesiarum, et sub titulo de Constitut., et plura ex illis adducit Gloss., in Extravagant., *Quia in futurum*, Joannis XXII, verb. *Torneamenta*. Extra jus vero commune optimum sumitur ex epistola Ludovici, Gallie regis, ad Pium II, in qua inter alia sic inquit: *Sicut mandasti, præmatricam sanctionem Sedi infensam, a regno nostro, nostroque Viennensi delphinatu, et omni ditione nostra per præsentes pellimus, dejicimus, stirpitusque abrogamus.*

14. Quando possit Pontifex judiciis sæcularibus se intromittere. — Et quod de legibus dictum est, de judiciis ac sententiis potest cum proportione intelligi, nam directe non

¹ Cap. *Cum contingat*, de Jurejur. ; Cap. *Licet*, de Jur. jur., in 6, ubi Glossa, verb. *Excomm.* ; L. *Celebran.*, C. *de Nuptiis* ; C. *Non debet*, de Consang. et affinit.

² Tridentinum, sess. 24; Cap. *Relatum*, de Test.

¹ Cap. ult., de Præscript. ; C. *Possessor*, de Reg. jur., in 6; Authent. Ex complexu, C. de Incertis nupt. ; Cap. *Cum haberet*, de Eo qui in matrim.

potest Papa sacerdotalia iurisdictio usurpare; in casu vero ad spirituale bonum necessario, potest vel iniquam sententiam irritare, vel causam aliquam temporalem ad se avocare. Præsertim quando inter eos litis versatur, qui superiorem in temporalibus non recognoscunt, et ad commune bonum Ecclesiae conveniens judicatur. Sieque dicit Innocentius III, in c. *Per venerabilem*, Qui fil. sint legit., super patrimonium Petri plenam se exercere potestatem: *In aliis autem regionibus*, ait, *certis causis inspectis temporalem jurisdictionem casualiter exercemus*. Et fere idem in sententia dixit Bernardus, lib. 4 de Consider., nam in c. 6, dicit temporalia iurisdictio ad Pontifices non pertinere, addit vero in c. 7: *Sed aliud est incidenter excurrere in ista, causa quidem urgente, aliud vero incumbere istis tanquam magnis*. Ratio est, quia ad munus Pontificis spectat impedire publica peccata, eorumque occasiones morales, præsertim quæ cum vi aliqua vel auctoritate inferuntur, auferre; ergo si leges civiles vel iurisdictio sacerdotalia fovent peccata, aut illorum occasionem præbent, possunt per Pontificem vel irrita declarari, vel etiam irritari, ut recte dixit Victor., Relect. 4, de Potestat. eccles., q. 3, § *Utrum potestas spiritualis sit supra*, etc., n. 43. Simili etiam modo ad Pontificem spectat promovere fidem, religionem et pietatem, et ideo in earum favorem potest aliquid statuere et præcipere, ut servetur, non obstante quamcumque lege civili.

45. Alter usus spiritualis potestatis esse potest in dirigenda temporali, quatenus potestatem et vires exequendi, seu ministrandi habet¹. Potesque hic usus esse duplex, unus est cohibendo abusum illius potestatis, alter movendo ad necessarium usum, et, si opus fuerit in auxilium fidei vel defensionem Christianæ religionis, illum imperando. Ad utrumque igitur residet in Pontifice potestas. Et de priori quidem res est per se evidens, quia, ut dixit Innocentius III, in cap. *Norit*, de Judiciis, cohibere peccata proprium est spiritualis potestatis, et maxime ad id tenetur, quando sunt publice nociva, et contra commune bonum; sed talis est abusus ille potestatis regiae ad nocendum, et injustum bellum inferendum; ergo sine dubio in hoc subditur rex Pontifici, qui sic ei possit talem potestatis suæ usum prohibere.

46. *Ad defensionem fidei reges a Pontifice*

¹ Vide Sander., lib. 2 de Visib. mon., c. 4.

compelli possunt.— Quod autem etiam posteriori modo possit Pontifex regibus imperare, probatur, quia principes christiani vel ex officio suo, vel ex iustitia quadam legali, qua membrum reipublicæ illi subvenire obligatur, vel ex charitate christiana Ecclesiam defendere, eique auxilium conferre tenentur. Ergo, necessitate vel causa exigente, potest Pontifex, ut spiritualis Pastor, tam universalis Ecclesiae, quam ipsorum principum, eos movere ad usum potestatis sua, eos excitando, et obligando per imperium. Assumptum ex terminis videtur notum, quia omnes Christiani sunt membra unius corporis Ecclesiæ; membra autem, ut ait Paulus, 1 ad Cor. 12, pro invicem, et maxime pro bono totius corporis sollicita esse debent, unumquodque juxta suam potestatem et dignitatem; ergo quando principis potentia necessaria est, hæc sollicitudo et cura ei maxime incumbit. Unde Leo Papa, ep. 75 ad Leonem Augustum: *Debes* (inquit) *incunctanter advertere regiam potestatem tibi non solum ad mundi regimen, sed maxime ad Ecclesiæ præsidium esse collatam*. Et Gregorius, lib. 2, indict. 11, epist. 61, seu cap. 100: *Ad hoc potestas pietati imperatorum data est, ut qui bona appetunt, adjurentur, et terrestre regnum cœlesti regno famuletur*. Et optime Augustinus, epist. 50, tractans illud Psal. 2: *Et nunc reges intelligite, eruditini, qui judicatis terram, servite Domino in timore: Aliter (inquit) servit, quia homo est, aliter, quia etiam rex est. Quia homo est, ei servit, vivendo fideliter; quia rex est, servit, leges justa præcipientes, et contraria prohibentes convenienti vigore sanciendo*. Unde Concilium Parisiense, sub Ludovico et Lothario, libro secundo, c. 2: *Rex (inquit) primo defensor esse debet Ecclesiæ, servorum Dei*, etc. Ideoque iidem Ludovicus et Lotharius imperatores ad Eugenium Papam scripserunt: *Vera-citer nos debitores cognoscimus, ut his, quibus regimem Ecclesiarum, et ovium dominicarum cura commissa est, in omnibus causis ad divi-num cultum pertinentibus, open et auxilium pro qualitate virium nostrarum, et intellectus nostri capacitate feramus*. Et catholicus imperator Carolus V, in edicto Wormaciensi: *Ad honorem, dixit, Dei omnipotentis, Romanique Pontificis, et S. Sed's Apostolicae debitam reverentiam, pro imperialis dignitatis officio debito, necnon zelo et studio, quo nostrorum majorum more et ingenita etiam nobis vi ad defensionem catholicæ fidei, sanctaque Romanæ et universalis Ecclesiæ honorem, tutelam et*

protectionem, omnes nostras vires, et facultates, imperium, regna, dominium, vitam denique et animam ipsam exponere sumus parati.

17. Ex his autem illatio superius facta facile monstratur. Nam si rex aut princeps in hoc auxilio Ecclesiæ præstando sit negligens, sine dubio potest Pontifex illum excitare, et præcipiendo movere. Primum ex illo principio supra probato, quia Papa non solum est pastor regis ut hominis, sed etiam ut regis, quia in utroque munere se recte gerere debet, ut salvari possit, et Deo placere; ergo potest Pontifex curare, et illi præcipere ut regis obligationem in hac parte adimpleat. Deinde quamvis non ita urgeret Ecclesiæ necessitas, ut ex lege ipsa charitatis quasi naturalis oriretur obligatio, sufficiente causa interveniente, posset Pontifex illam imponere, quia præceptum esset justum; nam in ordine ad spiritualem finem esset rationi consentaneum, ac subinde esset legitima potestate impositum. Quia cum Pontifex sit caput, et superior in spiritualibus, potestatem habet imponendi ea præcepta, quæ in ordine ad spiritualem finem, et bonum Ecclesiæ, justa et prudentia sunt.

18. Atque hac ratione dixit Bonifacius Papa, in Extrav. *Unam Sanctam*, de Major. et obed., tacite approbans sententiam Bernardi, l. 4 de Consider., c. 3, in sede Petri non solum esse spiritualem gladium, sed etiam temporalem: *Sed is quidem pro Ecclesia, ille vero ab Ecclesia exercendus, ille sacerdotis, is manu regum et militum, sed ad nutum, et patientiam sacerdotis, quia oportet gladium esse sub gladio.* Quod late probat ostendendo debitam Ecclesiæ institutionem hunc ordinem postulare, et concludit: *Romano Pontifici omnem humanam creaturam subesse definimus, et pronunciamus omnino esse de necessitate salutis.* Atque eodem modo Nicolaus Papa II, de Romana Ecclesia loquens, inquit: *Eam solus ille fundavit, qui beato aeterna vita Clavigero, terreni simul et caelestis imperii jura commisit, utique caeleste, per se exercendo, terrenum vero, ipsius potentia utendo, illam per imperium, si opus fuerit, efficaciter excitando.* Et hoc modo idem Pontifex, in epistola ad Episcopos Galliæ, illis eorumque defensoribus mandat, *ut spirituali simul et temporali gladio malignos quosdam usque ad recuperationem bonorum Ecclesiæ insequantur.* Quod cum partitione accommoda accipendum est, nam Episcopi spirituali gladio, defensores autem, id est, Patroni, vel principes gladio

materiali Ecclesiam defendere præcipiuntur.

19. Multa similia sumi possunt ex Decreto, dist. '96, c. *Si Imperator*, ubi Joannes Papa ait, *ex Dei ordinatione omnes sæculi potestates Ecclesiæ debere esse subjectas*; et Gelas., cap. *Duo sunt*, ad imperatorem Anastasium scribens: *Nosti (ait inter alia) ex illorum te pendere judicio, non illos ad tuam redigi voluntatem*, etc. Idem, in c. *Quamvis*, dist. 22; Innocentius I, in c. *Quoties*, 24, q. 4. Similia habentur ex Gregorio VII, in c. *Quis dubitet*, et ex Innocentio III, in c. *Solitæ*, de Majorit. et obed., ubi potestatem Pontificiam ita ad imperiale comparari ait, sicut animam ad corpus, vel sicut solem ad lunam. Idem in c. *Per venerabilem*, Qui fil. sint legitimi, in hoc sensu dixit: *Certis causis inspectis, temporalem jurisdictionem in aliis etiam regionibus casualiter exercemus*; id est, non directe sicut in proprio patrimonio Ecclesiæ, sed indirecte, quando ratio spiritualis finis id postulat. Quod confirmat ex Deuteron. 7: *Si quid difficile et ambiguum, etc.*, et ex 1 Cor. 6: *Nescitis quoniam Angelos judicabimus, quanto magis sæcularia.* Sic denique accipendum est quod Bernard. supra, et epist. 256 ad Eugenium, dixit: *Exercendus nunc est uterque gladius; per quem autem, nisi per vos? Petri uterque est, alter suo nutu, alter sua manu, quoties necesse est, evaginandus.* Expendenda est enim illa particula, *suo nutu*; est enim de voluntate justa, et prudenti intelligenda, ut per alteram particulam, *Quoties necesse*, satis declaratur. Supponit autem hæc voluntas potestatem, quæ eminenti quadam ratione materialis gladius appellatur, quatenus per illam efficaciter moveri potest. Est ergo in Pontifice quoad hanc etiam partem potestas directiva in principes temporales. Atque ita satis declarata et probata est assertio posita, quæ in capite sequenti amplius confirmabitur.

CAPUT XXIII.

PONTIFICEM SUMMUM POTESTATE COERCIVA IN REGES UTI POSSE, USQUE AD DEPOSITIONEM ETIAM A REGNO, SI CAUSA SUBSISTAT.

1. *Scopus controversiae cum rege Anglie.* — Hic est, ut dixi, cardo et præcipuus scopus præsentis controversiæ. Nam rex quidem Jacobus, qui Pontificis jurisdictionem in universam Ecclesiam, et præcipue in reges abnegat, de directiva potestate parum sollicitus est. At vero potestatem coactivam Pontificis

anxie timet, eam præcipue quæ usque ad regni expoliationem protendatur, quia persistendo in errore suo non credit se esse in suo sceptro securum, si a subditis suis talis potestas in Pontifice esse credatur. Ut ergo libere possit in sua cæcitate persistere, Ecclesiæ Christi vult omni remedio contra hæreticos Principes privare. Quod ante illum etiam Marsilius Patavinus, et alii Ecclesiæ hostes commenti sunt. Contrarium autem docent omnes Catholici Doctores, quos supra commemoravi, et latius Bellarminus, in novo opusculo allegato eos allegat, estque non minus certum, quam cætera, quæ dicta sunt. Imo, si ea ponderentur attente, et dictum refutare errorem, et veritatem catholicam, usu, auctoritate et ratione comprobata defendere, difficile non erit.

2. *In Summo Pontifice est vere potestas iniquos reges coercendi.* — Primum enim in Pontifice esse potestatem ad coercendos temporales principes iniquos et incorrigibiles, et præsertim schismaticos, et pertinaces hæreticos, evidenter ex dictis sequitur. Quia vis directiva sine coactiva inefficax est, teste Philosopho, lib. 10 Ethic., cap. ult.; ergo si Pontifex habet potestatem directivam in principes temporales, etiam habet coactivam, si justæ directioni per legem vel præceptum obedire noluerint. Probatur consequentia, nam quæ a Deo sunt, ordinata sunt, et optimæ instituta; ergo si Pontifici dedit potestatem directivam, dedit coactivam, quoniam institutio aliter facta esset imperfecta et inefficax. Unde contraria ratione docent Theologi non habere Ecclesiæ potestatem actus mere internos præcipiendi, quia de illis judicium ferre non potest, et consequenter neque pro illis poenam imponere, quod ad vim coactivam pertinet, ut auctor est D. Thomas, 1. 2, q. 91, art. 4, et 100, art. 9. Ergo e converso, cum Pontifex possit imperando efficaciter dirigere potestatem temporalem in actibus suis, potest etiam cogere et punire principes sibi non obtemperantes, in iis quæ juste præcipit.

3. *Ex Scripturis idem suadetur.* — Atque hæc ratio sine dubio erat sufficiens; quia vero adversarii Scripturas exigunt, ex illis etiam possumus veritatem hanc non obscure confirmare. Paulus enim, 2 Corinth. 10, prius sic inquit: *Arma militiae nostræ non carnalia sunt, sed potentia Deo ad destructionem munitionum.* Et infra subjungit: *In promptu habentes ulcisci omnem inobedientiam.* Et infra:

Nam et si amplius aliquid gloriatus fuero de potestate nostra, quam dedit nobis Dominus in ædificationem, et non in destructionem vestram, non erubescam. In his autem verbis aperte docet Apostolus habuisse a Deo potestatem vindicandi et puniendi omnem inobedientiam quorumcumque fidelium, quantum ad Ecclesiæ ædificationem et bonum oportuerit; potestas autem ulciscendi seu puniendi coactiva est, ut per se constat. Unde Chrysostomus ibi, homilia 22, sic inquit: *Ad hoc potentiam accepimus, ut ædificemus. Quod si quis obluctetur et dimicet, atque ita affectus sit, ut nulla ratione sanari possit, tum demum altera quoque facultate utamus, eum diruientes, ac prosternentes.* Theophylac. etiam ita exponit: *In promptu habemus pœnam et ultionem.* Et infra: *Præcipue quidem ad ædificationem accepi* (utique potestatem); *sin quisquam fuerit incurabilis, demolitione utemur.* Et infra: *Si voluero (inquit) gloriari, quod Deus aliquid amplius mihi dederit, ut potestatem habeam beneficiandi imprimis, et quando cogor, etiam puniendi, non erubescam, hoc est, non monstrabor arrogans aut mendax.* Atque eodem modo ad litteram exponunt Theodoreetus et alii Græci; et ex Latinis, Anselmus et Cajetanus ibi, et Augustinus, epistola quinquagesima, dum hoc testimonio utitur ad probandum, posse Ecclesiam hæreticos pœnis ad resipiscendum cogere.

4. *Per virgam in Scriptura potestas coactiva significatur.* — Eamdemque vindicandi potestatem nomine virgæ significavit Paulus, 1 ad Cor. 4, cum dixit: *Vultis in virga veniam ad vos*, juxta Scripturæ phrasim: *Reges eos in virga ferrea*, Psal. 2, et locis similibus; et Psal. 22: *Virga tua et laculus tuus ipsa me consolata sunt*, ut exponit Hieronymus, Zachariae 1. Idemque sentit de prædictis verbis Pauli, ad Galat. 6. Clarius ita exposuit Augustinus, lib. 3 contra Epist. Parmen., cap. 1, dicens: *Jam hic appareat eum loqui de vindicta, ad cuius significationem virgam nominavit.* Et Ambrosius, epist. 18 ad Marcell. sororem: *Quem virga sacramentis abdicavit cælestibus, eumdem mansuetudo restituit.* Et lib. 1 de Poenit., c. 12: *Quid esset in virga renire, docet invectio fornicationis, accusatio incesti, reprehensio tumoris, postremo condemnatio rei.* Idem in sententia habent Gregorius, lib. 1, ep. 4; et Tertullianus, lib. de Pudicit., c. 14, ut expositores in eumdem locum prætermittant.

5. *Exploduntur evasionses adversariorum.*

— Nec video quid ad hæc loca responderi possit, nisi fortasse, vel Paulum loqui ad communem plebem Ecclesiæ sibi subjectam, non de regibus, qui superiores sunt; vel loqui de potestate specialiter concessa, ex qua non licet ad ordinarium Ecclesiæ regimen argumentari. Sed utrumque futile est. Cur enim sermo Pauli reges christianos, et inobedientes, et pertinaces non comprehendit? Num ne quia tunc nulli erant in Ecclesia temporales reges? At fortasse tunc etiam non erant in Ecclesia Angli; ergo etiam illos omnes non comprehendet? Vel forte quia reges sunt in potentia et dignitate temporali altiores? at hoc non obstat quominus jugo Christi et ecclesiasticae potestati subditi sint, ut ostendimus; ergo si illa potestas coerciva est malorum Christianorum, teste Paulo, est etiam punitiva regum Christianorum; vel si rex Angliæ exemptum se esse gloriatur, aut se non Christianum fateatur, aut privilegium divinum ostendat, et exemptionem verbo Dei factam, alioqui a causa jure cadit, licet facto resiliat. Quamvis autem potestas illa Pauli, quantum spectat ad personam, et apostolicam dignitatem ejus, cum illo fuerit extincta, non sequitur in Ecclesia non perpetuo manere, quia illa eadem potestas perfectius fuit in Petro ordinario jure, et ut ei succederetur, quia ad munus pascendi et conveniens Ecclesiæ regimen necessaria erat, ut in superioribus ostensum est.

6. *Potestas ligandi potestatem coerciram includit.* — Et confirmatur tandem ex potestate ligandi et solvendi singulariter data Petro, nam potestas ligandi etiam potestatem coercendi et puniendi includit. Et si adversarii hoc negaverint, oportet ut exceptionem ostendant, nam Christus universim locutus est, dicens: *Quicumque ligareris.* Accedit quod ipsem Christus ita potestatem illam interpretatus est Matth. 48. Nam cum dixisset: *Si Ecclesiam non audierit, sit tibi tanquam ethnicus et publicanus,* subiungit: *Quicumque alligaveritis super terram, erunt ligata et in cæl.s.* Quasi diceret, Si Ecclesiæ liganti non obedierit, sit tibi tanquam ethnicus, quia non deerit in Ecclesia potestas ad ligandum ita efficax, ut quod ipsa ligaverit, in cœlo etiam ligatum judicetur. Et ita licet Calvinus et sequaces locum hunc, sicut cætera, depravent, ex illo semper Ecclesia intellexit, esse in pastoribus suis potestatem coercendi, saltem per excommunicationis censuram, quæ est spiritualis pœna. Quod

tempore Apostolorum esse in Ecclesia usitatum, Paulus satis ostendit, 4 ad Cor. 5, et ita esse perpetua traditione servatum, omnia jura, omnia Concilia, omnia decreta Pontificum, omnia Sanctorum Patrum scripta, denique omnes historiæ testantur, ut ea in medium adducere supervacaneum sit. Maxime vero contra hæreticos esse necessarium hujusmodi coercionem, satis ostendit Paulus, ad Tit. 3, dicens: *Hæreticum hominem post primam et secundam correctionem derita;* et illud 1 Joan. 2: *Nec Are ei dixeritis.*

7. Solum id, quod ad causam maxime refert, non prætermittam, nimirum, hac censura saepe usos esse Pontifices contra imperatores et reges, compertissimum esse. Innocentius enim I excommunicavit Arcadium et Eudoxiam ob crima contra Sanctum Chrysostomum commissa, ut patet ex ultima epistolarum ejus, et ex Nicephor., lib. 13, c. 34; idemque retulit Gregorius VII, lib. 8 Registr., c. 21; Gregorius II, synodico anathemate obstrinxit Leonem imperatorem cum sectatoribus ejus in eversione imaginum, ut ex Zonara et aliis refert Baron., anno 726, n. 24. Idemque postea Gregorius III confirmavit, ut Platina refert. Idem Gregorius VII, Henricum IV imperatorem, saepius admonitus, excommunicavit in Romana Synodo, ut habetur in lib. 3 Epistolarum ejus, Epistola 5 et 10. Illamque sententiam a successoribus Pontificibus et a Conciliis confirmatam eruditæ defendit Cardinalis Bellarminus, contra Barclium, c. 9. Idemque Gregorius VII, in alio Romano Concilio, imperatores, reges, et alios temporales principes usurpantes investituras episcopatum vel aliarum dignitatum ecclesiasticarum, vineculo excommunicationis ipso facto astrinxit, ut habetur lib. 7 Epistolarum, post epist. 14; idemque Poloniam propter gravissimum regis delictum in Sancti Stanislai occisione commissum interdixit, ut est apud Baronium, Anno 1079, n. 40. Præterea Alexander III Fridericum I imperatorem excommunicavit, ut refert Platina in Alexandro III, ubi etiam multa alia commemorat, quæ hanc supremam potestatem in Pontifice ostendunt. Postea Innocentius III Othonem V imperatorem anathemate notarit, ut ait Platina, in Vita ejus. Gregorius IX Fridericum II excommunicavit, ut habetur ex c. *Ad Apostolicæ*, de Sent. et re jud., in 6. Joannes denique XXII Ludovicum, Bavaram, intrusum imperatorem, excommunicavit, ut late refert Albert. Pighius, lib. de

Visib. Monar., c. 14. Præterea potestatem hanc in Ecclesia suppónit Concilium Lateranense sub Innocentio III, e. 3, cum jubet ut, si necesse fuerit, per censuram ecclesiasticam compellantur sacerdotes, quibuscumque fungantur officiis, ut pro defensione fidei publicæ juramentum præsent, etc. Quæ forma ferendi censuras, quæ reges et imperatores comprehendant, frequentissima est, et non est noviter usurpata, sed antiqua satis, cum in privilegio quodam concessso, a Gregorio I, monasterio Sancti Medardi inveniatur, ut post illius epistolas habetur. Eumque Gregorii locum refert alter Gregorius VII, idemque argumentum ex illo sumit lib. 8 Reg., ep. 21, ad Herimetensem.

8. Basilius etiam imperator eamdem in Pontifice potestatem supra imperatores in octava Synodo, act. 6, confessus est dicens : *Nicolaus Papu, cum S. Romanorum Ecclesia, anathema pronunciarit contra resistentes hujusmodi decreto, atque sententiae. Hoc autem nos olim scientes, et parentes judicium anathematis promulgari, obsecundare Synodico judicio Romanæ Ecclesie necessarium duximus.* Eamdem recognovit Philippus I, rex Galliæ, qui excommunicatus ab Urbano II, et postea a Paschali, resipuit, et Romam pro solutione misit, ut videri potest in Baronio, anno 1100 et 1101. Et eamdem agnovit Ludovicus, rex Galliæ, cum ad Alexandrum III seripsit, enixe postulans ut contra regem Angliæ pro morte S. Thomæ Cantuariensis potestate sua uteretur. Et Henricus ipse, rex Angliæ, resistere non est ausus, et pœnitentiam a Pontifice impositam humiliiter suscepit, ut Platina refert. Simile exemplum refert Petrus Blesens., epist. 145, de Eleonora, Angliæ regina, quæ in defensionem suam, et filii sui injuste a rege Galliæ in carcere detenti, auxilium Summi Pontificis et usum spiritualis gladii contra regem postulavit. Denique eamdem potestatem in Pontifice agnoscet rex Angliæ, qui regem Galliæ ad Innocentium III detulit, ut eum coriperet, et si ipsum audire nollet, excommunicaret, ut ex cap. *Novit*, de Judiciis, colligimus, ubi Pontifex habet illa verba : *Non intendimus judicare de feudo.* Et infra : *Sed decernere de peccato, cuius ad nos pertinet sine dubitatione tensura, quam in quemlibet exercere possumus et debemus.* Unde de eodem Innocentio III refert Matt. Paris., anno 1204, Joannem, Angliæ regem, excommunicasse, et regnum ipsum interdixisse.

9. Quapropter ipse etiam Marsil. Paduanus, ut referunt¹, non est ausus negare, posse Pontificem coercere principes et reges, præsertim hæreticos, per censuras ecclesiasticas excommunicationis, vel etiam interdicti, sed negavit posse ulterius contra illos procedere. Et rex Jacobus, in defensione sui juramenti fidelitatis, non tam acriter videtur resistere potestati excommunicandi, quam temporaliter puniendi, ideoque hoc maxime titulo illud juramentum defendit, quod per illud non cogat subditos abjurare potestatem Papæ ad excommunicandum regem, sed solum ad privandum illum regio dominio ac potestate. Existimat enim, ut in Praefatione, pag. 42, dicit, *Abdicandorum regum jus nullo legitimo titulo Pontifici quæsitus esse.* Et hanc, quam vocat, *injustam Paparum usurpationem, et violentiam sacerularem, excommunicationis, quæ spiritualis censura est, longe, lateque excedere.* Ex quibus verbis satis constat, non ita spirituali censuram, sicut temporalem coercionem aversari.

10. *Posse Pontificem temporales reges penitus etiam temporalibus punire, ostenditur.* — Superest ergo ut contra ipsum, et contra Marsilium, et alios ulterius procedamus, eamdemque Pontificis potestatem, ad coercendos reges temporalibus pœnis ac regnorum privationibus, quando necessitas postulat, extendi posse, ostendamus. Quod eodem fere discursu ex eisdem Scripturæ locis sufficienter fieri potest. Nam Christus Dominus dedit Petro et successoribus potestatem corrigendi omnes Christianos, etiam reges, et consequenter, si inobedientes atque incorrigibiles sint, eos coercendi ac puniendi; sed hanc potestatem non limitavit ad censuras ecclesiasticas; ergo nec potest a nobis, vel ab aliquo Ecclesiæ principe limitari, sed ad ipsummet Romanum Pontificem pertinet decernere, et determinare pœnam convenientem juxta occasionem, vel necessitatem occurrentem. Priorem propositionem satis jam probavimus; posteriorem autem ex verbis Christi sæpe ad ductis, et recte perpensis, ostendere possumus. Nam verbum Christi : *Pasce oves meas*, indefinitum est; unde quatenus in verbo passendi includitur etiam potestas coercendi, quæ in omni pastore necessaria est, talis potestas non definitur ad censuras, sed relinquitur determinanda ad modum pœnae seu coercionis per prudentiam, et justitiae æquitatem.

¹ Azor, 2 p. Inst., lib. 4, c. 19.

tatem. Nam quilibet pastor habet potestatem ad coercendas oves, non secundum determinatum modum, sed prout fuerit convenienter et expediens ovibus.

11. Deinde hoc etiam colligimus ex aliis Christi verbis : *Quodcumque ligaveris*, nam illa etiam generalia, et indifferentia sunt. Quod si quis dixerit Matth. 18 fuisse declarata et determinata ad ligamen censuræ, respondemus, declaratum ibi esse, in illa generali potestate ligandi, includi excommunicationis vinculum, non tamen ad illam solam pœnam imponendam potestatem illam limitari. Tum quia nulla talis limitatio ex illo contextu colligitur ; tum etiam quia, licet ibi solius excommunicationis facta sit mentio, nihilominus aliae censuræ sub illam potestatem cadunt, ut interdictum, suspensio, et aliæ item ecclesiastice pœnæ. Imo etiam vinculum præcepti et legis sub illa potestate incidunt; et ex vi talium verborum potestas illa, ut directiva est, non determinatur ad hunc modum directionis per personale præceptum, vel per stabilem legem hoc vel illo modo obligantem, sed omnem convenientem directionem indefinite complectitur. Idem ergo est de coactione. Et ita ex illo loco colligit hanc potestatem Innocentius IV, cum Concilio Lugdunensi, in cap. *Ad Apostolicæ*, de Sent. et re jud., in 6.

12. *Ex facto Sancti Petri idem colligitur.* — Præterea potestatem hanc adumbratam esse in facto Petri, ad cuius increpationem Ananias ejusque uxor mortui sunt, indicat Beda, lib. 3 in Luc., c. 4, dicens, verbis Apostoli Ananiam, et uxorem ejus cecidisse, quia expediebat in novo etiam Testamento fieri interdum, licet rarius, tales vindictas ad aliorum correctionem. Et in lib. 3 de Mirabilib. Sacre Script., c. ult., dicitur nomine Augustini, id factum esse, *ut Apostolica auctoritas quanta esset ostenderetur, et quam magnum fuisse peccatum, et ut ceteri illo exemplo castigarentur.* Clarius Gregorius, lib. 4, ep. 24, tractans de munere pastoris, et de benignitate et severitate, ac zelo justitiae quem requirit, Petrum in exemplum adducit, dicens : *Hinc est namque quod Petrus, auctore Deo, S. Ecclesiæ principatum tenens, a bene agente Cornelio inmoderatus se venerari recusavit, et cum Anania et Saphiræ culpam reperit, mox quanta potentia super ceteros excrevisset, ostendit. Verbo namque eorum vitam perculit, quam spiritu scrutante reprehendit, et summum se in Ecclesia contra pecc-*

cata recolxit. Itaque licet factum illud extraordinarium fuerit, et speciali Spiritus Sancti instinctu ac virtute factum, nihilominus, ut infra ait Gregorius : *Zelus ultiōnis vim appetuit potestatis.*

13. Et eamdem ostendit Paulus, 1 ad Corint. 5, quando fornicarium illum non solum excommunicavit, sed etiam *tradidit Satanæ in interitum carnis*, *ut spiritus salvus sit in die Domini*; quod enim ait : *In interitum carnis*, clare indicat, præter spiritualem censuram, etiam per corporalem vexationem fuisse punitur, et ad pœnitentiam agendam coactum, ut spiritus ejus salvus fieret. Sicque exponit locum illum Chrysostomus ibi, Orat. 15, dicens, ita fuisse illum traditum daemoni ad interitum carnis, sicut Job, licet non pro eadem causa, ut *eum flagellet*, ait, *malo ulcere, aut morbo alio*; Theophyl. : *Ut morbo eum maceret, et tahescere faciat.* Anselmus etiam licet aliam expositionem adjungat, in hac magis persistit. Nam in fine c. 24, explicans actus *virgæ*, id est, apostolicæ potestatis ad coerendum, ait : *Alios excommunicando, alios dure increpando, alios corporaliter (ut decet patrem) flagellando.* Et postea, c. 5, interitum carnis significare dicit, *validam corporis afflictionem per diabolum factam.* Refertque habuisse Apostolum potestatem, *ut si quem excommunicasset, statim ille corriperetur a diabolo, et rexaretur, quamdiu et quantum Apostolus rellet.* Qui modus vexationis singularem virtutem quasi executivam, vel daemoni imperativam requirebat, quæ communiter aliis non datur; sed nihilominus supponit jurisdictionem ad cogendum non sola excommunicatione, sed etiam modis aliis. Eamdemque expositionem significat Pacian., in Parænesi de Pœnit., dum ex illo loco coligit, necessariam esse interdum corporis pœnam et afflictionem ; et similiter Ambros., lib. 4 de Pœnit., c. 12, quatenus cum afflictionibus Job illum interitum carnis comparat, sicut fecit Chrysostomus. Igitur juxta hanc Patrum expositionem, ex illo loco habemus, ecclesiasticam correctionem et vindictam non in sola spirituali censura sistere, sed etiam interdum in corporis afflictione, ac proinde pastores Ecclesiæ temporali punitione in ordine ad spirituale bonum uti posse.

14. *Usus Pontificum eamdem veritatem confirmat.* — Secundo, possumus veritatem hanc auctoritate et praxi Ecclesiæ ostenderé. Nani ex his Pontificibus, quos imperatores et re-

ges excommunicasse diximus, Gregorius II Romanum cum tota Italia a Leonis imperio recedere fecit, ut ex Theophane refert Baron., anno 730, n. 3 et 4¹. Idemque tribuit Gregorio III Sigebertus, in Chronic. ann. 731, dicens : *Leonem imperatorem erroris redarguit, et populum Romanum, et rectigalia Hesperiæ ab eo avertit.* Gregorius autem VII Henricum IV et imperio et regno privavit, ut constat ex sententia supra citata, cuius hæc sunt verba : *Beate Petre Apostolorum Princeps, inclina, quæso, aures tuas nobis.* Et infra : *Hac itaque fiducia fretus pro Ecclesiæ honore et defensione ex parte omnipotentis Dei Patris, et Filii, et Spiritus Sancti per tuam potestatem, et auctoritatem, Henrico regi, filio Henrici imperatoris, qui contra tuam Ecclesiæ inaudita superbìa insurrexit, totius regni Teutonicorum et Italiæ gubernacula contradico, et omnes Christianos a vinculo juramenti, quod sibi fecere vel facient, absolvō, et ut nullus ei sicut regi serviat, interdico.* Similiter Innocentius III Othonem, quem excommunicavit, *imperii titulis privatit*, ut ait Platina. Item Innocentius IV in Concilio Lugdunensi, Fridericum II imperatorem, a Gregorio IX jam excommunicatum, imperio privavit, non solum subditos a juramento fidelitatis absolvens, sed etiam *auctoritate apostolica firmiter inhibendo, ne quisquam de cætro sibi tanquam imperatori vel regi pareat, et intendat.* Et excommunicationis censura ipso facto ligando eos, qui deinceps illi tanquam imperatori, vel regi consilium vel auxilium præstiterint, seu favorem. Tandem Clemens VI Ludovicum Bavaram, qui inique imperium occupaverat, jam a prædecessoribus suis excommunicatum, imperio dejicit, aliumque legitimū imperatorem, nimurum, Carolum IV, eligit fecit.

45. Præter hæc autem, que ad imperium spectant, in regno Galliæ, Zacharias Papa, in simili casu, titulum regni a Childerico rege in Pipinum transtulit, ut est apud Gregorium VII, l. 8 Registri, ep. 21, c. Alius, 14, q. 9; Baron., ann. 751, in prin., et ann. 841, n. 3. Ubi etiam refert mutationem factam in regno Galliæ tempore Lotharii imperatoris, et Ludovici ac Caroli fratrum, qui auctoritate freti Episcoporum, regnum inter se diviserunt, et Lotharium ob scelera sua illo privarunt. Bonifacius etiam VIII Philippum Pul-

chrum, Galliæ regem, regno privatum declaravit, et illa occasione Extravagant. *Unam Sanctam, de Majorit. et obedient., edidit;* et refert Aemilius, in vita ejusdem Philippi; Gregorius item VII, quando Poloniam propter Stanislai interfectionem interdixit, regem Bonislaum regno privavit, teste Cromero, l. 4 Rerum Poloniæ. Insigne vero exemplum in ipsam Anglia habemus in Joanne rege, quem, cum ingentia crimina contra religionem, sacerdotes, et alios innocentes committeret, et ab Innocentio III saepius admonitus, ut inobediens ac pertinax resipere nollet, sed potius quotidie deterior fieret, idem Innocentius post magnam cum Patribus consultationem (ut Polydorus ait) regia dignitate abdicavit, populosque illi subjectos jurejurando absolvit, et christianos principes de ea re certiores factos, ut Joannem tanquam Ecclesiæ hostem persequerentur, admonuit. Qua sententia deterritus Joannes, et imminentis periculi timore percussus, tandem juravit se Pontificis arbitrio staturum, et diadema capiti ademptum Pandulpho, Pontificis legato, tradidit, nunquam id ipse aut hæredes accepturi, nisi a Pontifice Romano. Hæc Polydorus, libro decimo quinto.

46. At vero hæc omnia et similia non temere, nec in angulo, sed aliqua ex illis in Conciliis frequentissimis, et aliquando in generali, ut in Lugdunensi, acta sunt, et in conspectu totius orbis christiani, a quo approbata et executioni mandata fuerunt; ergo incredibile est fuisse actus usurpatus, et non veræ potestatis. Accedit, Concilium Lateranense sub Innocentio III, cap. 3, eamdem potestatem supponere, dicens : *Si dominus temporalis monitus ab Ecclesia terram suam purgare neglexerit ab heretica fæditate, per metropolitanum excommunicetur. Et si satisfacere neglexerit intra annum, significetur hoc Summo Pontifici, ut ex tunc ipse rasallos ab ejus fidelitate denunciet absolutos, et terram exponat Catholicis occupandam, etc.* Ex quibus omnibus tale concluditur argumentum. Universalis Ecclesia errare non potest in his que ad fidem et mores pertinent; sed universalis Ecclesia consensit in hujusmodi factis, et illa probavit tanquam consentanea divino et naturali juri, et similiter approbat leges canonicas imponentes hujusmodi pœnas principibus temporalibus propter gravissima scelera et contumaciam in illis, maximeque in hæresi; ergo tam est certum posse Pontificem coercere vel punire principes

¹ Vide Sigon., lib. 3, de Regn. Italiæ, an. 726.

temporales his pœnarum generibus, quam est certum non posse Ecclesiam in fide et moribus errare.

47. *Ratione id convincitur.* — Tertio, declaratur ratione hæc veritas, nam duplii titulo erat necessaria hæc potestas in supremo capite et pastore Ecclesiæ, scilicet, et propter ipsos imperatores seu reges, ac quosvis temporales principes, et propter populos illis subjectos. Priori titulo necessaria est hæc potestas, ut possit Pontifex vel rebellum principem corrigere et emendare, vel etiam digne punire; utrumque enim ad Pastorem pertinet; saepè autem contingit ut solæ censuræ ad illos effectus non sufficiant, ut diuturna experientia satis ostendit; ergo necessario dicendum est Christum Vicario suo hanc potestatem contulisse, cum non minus illum constituerit pastorem christianorum principum, quam cæteræ christianæ plebis. Quocirca, quod ad priorem titulum attinet, quando vel solum, vel principaliter agitur de emendatione principis, qui peccavit, solent maxime Pontifices censura uti, quia illa est propria medicinalis pœna, de qua locutus est Christus, Matth. 18. Quod si contingat principem per censuram corrigi et emendari, non solet Ecclesia ad rigorosam vindictam per graves et publicas pœnas contra eos procedere; potest tamen et solet pœnas aliquas injungere, tum ad resarcienda damna, si quæ forte ab eis illata fuerunt; tum etiam ut tam Deo, quam universæ Ecclesiæ aliquam satisfactionem tribuant. Nam resarcire damna, et illatas injurias recompensare, non tam est pœna, quam restitutio quædam, et debiti solutio, quamvis coactio ad illam faciendam potestatem superiorem requirat. Præter hanc vero recompensationem ex justitia commutativa debitam, ratio communis boni et iustitiae legalis postulat, ut aliqua pœna in vindictam delicti ad Ecclesiæ satisfactionem, et aliorum exemplum et timorem adhibeatur. Quando vero, non obstante censura, rex contumax est, et incorrigibilis in delicto, tunc graviores pœnæ adhiberi debent, et hujusmodi sunt fere omnes casus supra enumerati, ut notavit D. Thomas, tertio libro de Regimine Princip., cap. 40.

48. *Confirmatio.* — Et confirmari potest hæc pars, quia circa alios fideles seu Christianos baptizatos habet Ecclesia potestatem, non solum ad coercendum illos per censuras ad emendationem delicti, sed etiam ad vindicanda delicta commissa per alias pœnas

temporales vel corporales, secundum modum accommodatum ecclesiastico judici et pastori; ergo eamdem potestatem habent legitiimi Ecclesiæ Praelati, et maxime Summus Pontifex, in principes temporales, etiam supremos. Assumptum ex perpetuo usu Ecclesiæ manifestum est: solent enim canones imponere pecuniarias pœnas, interdum usque ad bonorum confiscationem. Interdum etiam imponunt pœnas corporales citra vitæ aut membrorum periculum, ut est flagellationis pœna, interdum etiam usque ad damnationem ad triremes, et quando necessaria est pœna sanguinis, licet ecclesiastici judices illam ferre non soleant propter status decentiam, possunt reum committere judici sæculari, ei præcipiendo ut secundum legum æquitatem illum puniat. Quæ omnia maxime possunt in crimen hæresis considerari. Hæretici enim non solum ab Ecclesia excommunicantur, et aliis spiritualibus afficiuntur pœnis, sed etiam bonis omnibus temporalibus privantur, non solum per leges imperatorum, sed etiam virtute canonum. Ac denique si vel contumax fuerit, vel relapsus, per leges imperatorum capite punitur, per canones autem sæcularis judicis arbitrio relinquitur, recepturus pro qualitate facinoris ultionem, juxta cap. *Ad abolendam*, de Hæret., cum similibus.

49. *Potestas temporalibus pœnis puniendi est Ecclesiæ necessaria.* — *Tacita evasio præcluditur.* — Has autem pœnas esse justissimas, Ecclesiæ usus satis convincit, et defendit optime Augustinus, ep. 48 et 50, et lib. 3 contra ep. Parmen., c. 4. Esse autem necessariam in Ecclesia Christi, ut ab illo est instituta, hanc potestatem, ratio convincit, quia si Ecclesiæ subditi non possent per hujusmodi pœnas coerceri, facile spirituales contemnerent, et plurimum sibi ac aliis nocerent. Nam ut dicitur Prov. 29: *Puer, qui relinquitur voluntati sue, confundit matrem suam.* Unde non esset res christiana convenienter instituta, nec illi esset sufficienter provisum, si non haberet potestatem cogendi rebelles, qui censuris obtemperare nollent. Nec satisfaciет, qui dixerit, satis esse quod in Christianis principibus temporalibus sit hæc potestas, tum quia etiam ipsi principes possunt delinquere, et correctione indigere, ut jam dicam. Tum etiam quia vindicta malefactorum per se solum pertinet ad civiles magistratus, quatenus politico fini, et paci reipublicæ et iustitiae humanæ contraria sunt;

coercere autem illa, ut sunt religioni et saluti animae contraria, per se spectat ad spiritualem potestatem, et ideo ad illam maxime pertinere debuit facultas utendi temporalibus poenis ad talem correctionem, vel per sese illas inferendo, vel temporalis brachii ministerio utendo, ut omnia decenter, ordinate et efficaciter fiant.

20. *Non magis eximuntur reges a praedicta potestate coerciva Pontificis, quam ceteri.* — Superest ut priorem illationem probemus, nimirum, si in ceteros fideles inferioris ordinis potestatem istam habet Ecclesia, etiam in supremos temporales principes, in Petro maxime, et successoribus ejus, eam accepisse. Probatur ergo consecutio ex principio supra posito, quod hi principes tam sunt oves Petri, quam reliqui omnes, neque temporalis dignitas vel potentia eos reddit immunes, seu a tali potestate vel pena exemptos, quia neque ex Christi verbis, neque ex alio principio vel ratione colligi potest talis libertas, seu potius peccandi licentia. Quin potius multo magis necessaria est in Ecclesia potestas haec ad coercendos hujusmodi principes, quam eorum subditos. Primo quidem quia ipsi liberiores sunt, et ita facilius labuntur, et semel lapsi difficilius corriguntur. Deinde quia principum peccata, praesertim contraria fidei et religioni, perniciosiora sunt, facile enim subditos ad sui imitationem pertrahunt, vel exemplo, vel beneficiis, ac promissionibus, vel etiam minis ac terroribus. Propter quod merito dixit Sapiens, Ecclesiastici cap. 10: *Rex insipiens perdet populum suum. Nam qualis est rector civitatis, tales et habitantes in ea.* Quod etiam ducti ratione et experientia philosophi docuerunt, ut Cicero ex Platone, lib. 1 Epist. Unde idem Cicero, lib. 3 de Legibus, recte etiam dixit: *Vitiosi principes non solum vitia concepiunt ipsi, sed etiam ea infundunt in civitatem.* Denique quia principes gravius quam ceteri delinguunt, et ideo etiam per pastores suos gravius puniri debent, ut de ipsismet pastoribus dixit Gregorius, in Pastor., p. 3, cap. 5, et refertur a Nicolao Papa contra Lotharium, regem Galliae, in ep. ad eumdem, et refertur in c. *Præcipue*, 41, q. 3.

21. Atque hinc tandem facile ostendi potest aliis titulus hujus potestatis in reges, nimirum, propter defensionem subditorum, nam ad pastorem non solum spectat oves errantes corrigere, vel ad ovile revocare, sed etiam lupos arcere, et ab hostibus defendere,

ne extra ovile trahantur et pereant: sed ini quis rex, praesertim schismaticus et haereticus, subditos constituit in magno periculo perditionis, ut ex proxime dictis notum factum est, et ideo Claudianus dixit:

Regis ad exemplum totus componitur orbis,
Mobile mutatur semper cum principe vulgus.

Ergo ad Pontificis munus spectat, subditos haeretici vel perversi principis defendere, et ab illo evidenti periculo liberare; ergo Christus, qui bene et optime omnia fecit et instituit, hanc potestatem Petro contulit, eamque sub verbo *Pasce*, et sub potestate ligandi et solvendi comprehendit. Ergo per illam potest et talem principem dominio suo privare et arcere, ne noceat subditis, et hos a jamento fidelitatis solvere, vel solutos declarare, quia illa conditio in tali juramento semper intelligitur inclusa.

22. *Etiamsi Pontifex regem ethnicum punire nequeat, potest fideles subditos ab ejus dominio liberare.* — Qui titulus D. Thomæ, et probatis Theologis, tam gravis et efficax visus est, ut per se solus sufficiat ad privandum regem infidelem dominio et potestate supra fideles, etiam si prior ratio vindictæ et justæ punitionis cesseret. Nam juxta Pauli doctrinam, *de his qui foris sunt Ecclesia non judicat.* Unde colligunt iidem Theologi, non posse Pontificem punire regem ethnicum non baptizatum propter infidelitatem, vel alia peccata. Et nihilominus si habeat subditos fideles, potest eos a subjectione illius eripere, propter morale et evidens eversionis periculum, ut docet D. Thom. 2. 2, q. 10, art. 10, et colligitur ex Paulo, 1 ad Cor. 6; reprehendit enim fideles, quod apud infideles judices litigarent, supponitque posse Ecclesiam creare judices, qui inter fideles etiam in temporalibus judicent, ne ad infideles ire cogantur, et ad suadendum ait: *Nescitis quia et Angelos judicabimus? quanto magis secularia?* Quæ verba allegat Gregorius, lib. 7, ep. 21, et ex illis infert: *Cui ergo aperiendi, claudendi que cœli data est potestas, de terra judicare non licet? Absit.* Hinc etiam conjux fidelis separari potest a conjugi infideli, si cum illo non possit sine injuria Creatoris habitare, juxta doctrinam Pauli, 1 ad Corint. 7. Et ex eadem radice filii baptizati a patrum infidelium potestate et consortio liberantur, ne illorum iterum involvantur erroribus, ut dicitur in Concilio Toletano IV, c. 59. Ergo simili vel majori ratione privatur rex christianus, seu

subditus Ecclesiæ ratione baptismi, potestate et dominio in vassallos suos; ergo titulus est per se sufficiens, ut possit Pontifex in hos principes animadvertere, eosquæ regnis jure privare, et ad hoc uti gladio aliorum principum, ut ita gladius sit sub gladio, ut ad propugnandam et defendendam Ecclesiam mutuo juventur.

23. Possem hoc loco alios titulos explicare, confirmare ac defendere, quibus potest Romanus Pontifex circa temporalia justis ex causis disponere, ut fecit in translatione imperii, et in instituendo modo electionis imperatoris, et in ejus administratione, cum vacat, et in aliis etiam casibus in temporalibus causis jus dicendo; verumtamen nec hujusmodi operis brevitas hæc omnia prosequi permittit, nec intentioni nostræ ac instituto necessaria sunt, et ideo ad alios auctores, qui hæc eruditissime disputatione, lectorem remitto.

CAPUT XXIV.

OBJECTIONIBUS CONTRA DOCTRINAM SUPERIORUM CAPITUM EX SCRIPTURA PETITIS OCCURRITUR.

4. Ut catholica doctrina, quam tribus præcedentibus capitibus ostendimus, magis confirmetur, necessarium duximus, in fine hujus libri, nonnullis objectionibus, quibus potestas Pontificis in temporales principes impugnari ab adversariis solet, satisfacere. Et quoniam copiose hoc præstat Cardinalis Bellarminus in ultimo opere contra Barelaium, ideo illas tantum objectiones proponam, quæ vel a rege Angliæ insinuantur, vel nonnullam difficultatem habent, vel quarum resolutio utilitatem aliquam ad majorem veritatis manifestationem afferre possit. Advero autem (quod in superioribus etiam monui) sœpe in his objectionibus confundi causam de primatu et potestate Pontificis in laicos, cum causa de exemptione clericorum a jurisdictione et potestate laicorum, quæ controversiæ sicut diversæ sunt, ita a nobis (sicut ab aliis catholice auctoribus) disputatione separantur, et ideo omnia, quæ ad exemptionem pertinent in sequentem librum reservamus, et ibi objectionibus peculiariter ad rem illam pertinentibus satisfaciemus. Quia vero exemptione personæ ipsiusmet Pontificis Summi cum ejus dignitate divino et naturali jure conjuncta est, omnisque subjectio ad imperatores, vel alios reges, illius dignitatem obscurare et

minuere videri potest, ideo prætermittere aliqua non possumus ex his, quæ contra Pontificis immunitatem summamque ab omni humano judicio exemptionem objici solent. Et quamvis superior potestas Pontificis in reges et principes, tam in spiritualibus quam in temporalibus, distinctis assertionibus quasi per partes seu gradus a nobis declarata fuerit, quia tamen rex indistincte contra primatum loquitur, idcirco eodem fere modo objections ejus proponemus; respondendo autem quid per unamquamque directe oppugnetur, distincte declarabimus, atque ita singula, quæ a nobis dicta sunt, clarius et facilius defendemus.

2. *Prima objectio.* — Prima ergo objectio ex Scriptura sumitur, duasque habet partes: unam scholastico more vocare possimus positivam, alteram negativam. Priorem indicat rex in Præfatione, pag. 44, dum in generali ait, auctoritatem et potestatem, quam Pontifices sibi in temporalia regum jura usurparunt, nihil aliud esse quam ambitiosam tyrannidem contra auctoritatem Scripturarum; et de eadem dicit, pag. 22, potestatem a Pontificibus inique usurpatam cum Scripturis pugnare. Quæ autem sint hæ Scripturæ in illis locis non declarat, sed ad Apologiam remittit, quam totam in auctoritate regum asserenda impendisse dicit. In Apologia vero solum invenio, in pag. 25 et 129, quædam Scripturæ testimonia, in quibus obedientia ad sacerdtales principes, etiam propter conscientiam, commendatur, Romanorum 13, cum aliis, quæ ex novo Testamento in principio hujus libri satis a nobis tractata sunt. Quibus ibi adjungit multa ex veteri Testamento, quæ duplicitis ordinis esse adverto. Quædam enim sunt, in quibus obedientia principum etiam iniquorum et infidelium vel permittitur, vel laudatur aut præcipitur, vel alio simili modo stabilitur, ut est illud Josue 1: *Quemadmodum Moysi obedivimus in omnibus, ita et tibi obediemus;* et illud Jerem. 17: *Submittite corda vestra subter jugum regis Babylonis, eique et populo ejus servite, ut viratis.* Item illud adjungit, quod, Exodi 3, filii Israel veniam abeundi a Pharaone supplicarunt, et quod 1 Esdra 4, similem veniam a Cyro, rege Persarum, impetrarunt. Et in hoc ordine annumerari debent alia testimonia Scripturæ, quæ postea ipse congerit, in quibus variis honoris titulis regis dignitas in veteri Testamento declaratur, nam reges vocantur *sibli Altissimi, dir, uncti Domini, in Dei solio se-*

dentes, famuli Dei, angeli Dei, facti juxta cor Dei, lumina Israelis, nutricia Ecclesiae. In alio ordine ponit facta quædam regum Israel, de quibus capite sequenti dicemus.

3. *Ad testimonia novi Testamenti responsio.*

— Verumtamen prædicta testimonia neque ad præsentem causam aliquid conferunt, neque in se spectata difficultatem habent vel controversiam, præter unum quod peculiaris eujusdam quæstionis occasionem præbet; illa vero quæstio ejusmodi est, ut tradita veritas ab illius resolutione non pendeat, quod per singula discurrendo, breviter declaro. Nam imprimis loca novi Testamenti probant quidem esse in regibus veram jurisdictionem civilem a Deo ipso originem trahentem, ideoque regem convenienti modo honorandum esse, illique esse obediendum, non solum ob timorem pœnæ, sed etiam propter conscientiam, quæ omnia secundum fidei doctrinam vera esse in principio hujus libri docuimus. Inde vero nulla verisimilitudine inferri potest, reges nullum habere superiorem, a quo in spiritualibus, et consequenter etiam in temporalibus in ordine ad spiritualia, regantur, et ideo dixi, testimonia illa nihil ad præsentem causam pertinere. Quin potius neque satis ex illis locis convincitur, regum temporalium potestatem ita esse in suo ordine supremam, ut in temporalibus direcete superiorem non recognoscatur; hoc enim, ut dixi, in rigore ad fidem non spectat, quamvis longe verissimum sit, et Scripturæ sacrae magis consentaneum, sicut etiam disputando ostendimus.

4. *Ad testimonia veteris Testamenti.* — Neque priora testimonia veteris Testamenti aliquid amplius probant, nam ex eis solum habemus, obediendum esse regi vel principi, aut gubernatori communis, utique in foro suo validum præceptum ferenti. Hoc enim, et nihil aliud obtulerunt Josue filii Israel, cum dixerunt: *Sicut obedivimus in cunctis Moysi, ita obediemus et tibi, tantum sit Dominus Deus tuus tecum, sicut fuit cum Moyse.* Verba autem Jeremiæ, si intelligantur de absoluta Dei voluntate, qua decrevit dare filios Israel sub verum dominium et potestatem regis Babyloniæ, ad summum probant obediendum esse temporalibus regibus, sicut de aliis testimoniis dictum est. Si vero solum intelligantur de voluntate permissiva, qua Deus decreverat permittere in pœnam peccatorum populi iudaici, ut rex ille potentia sua, et facto, potius quam jure, illum populum sibi subjugaret, sic verba illa ad rem nihil faciunt, quia

non de vero rege, sed de tyranno in loco illo sermo est, cui monentur Israelitæ subjecere colla, non tam propter conscientiam, quam propter majora mala vitanda, ut subjuncta verba indicant: *Servite ei et populo ejus, et vivetis, quare moriemini tu et populus tuus gladio, et peste, et fame?* etc. Et juvat etiam, quod verba illa dicta sunt a Propheta priusquam populus in servitutem Nabuchodonosor redactus esset, et ita potius inducebat eos ad non resistendum dominationi et potentiae ejus, et consequenter ad serviendum saltem facto, quamvis jure non tenerentur. Eademque ratio est de aliis locis, sive Pharao et Cyrus fuerint veri reges populi Judæorum, sive non, vel (quod perinde est) sive populus Israel jure teneretur veniam illam petere ad discedendum, sive tantum de facto propter potentiam illorum principum ausi non fuerint, sine illorum venia et voluntate discedere.

5. *Prærogativæ a rege Jacobo adductæ expenduntur — Nomen filiorum Dei non omnibus regibus convenit.* — Multo vero minus urgent testimonia illa, in quibus varii tituli venerationis et honoris regibus tribuuntur, tum quia quidam illorum communes sunt aliis, qui non sunt reges, quidam vero non omnibus regibus convenient, sed fuerunt prærogativæ aliquarum personarum. Quod patet breviter discurrendo per singula. Nam imprimis titulum *Filiæ Dei*, regi temporali tribui, solum colligit rex Angliæ ex illis verbis, quæ de Salomone dixit Deus, 2 Regum 7: *Ego ero illi in Patrem, et ipse erit mihi in filium.* Hæc autem verba, ut ibi dicta sunt, profecto non sunt omnibus regibus communia, sed peculiarem promissionem Salomoni factam continent, ut patet, tum ex præcedentibus verbis: *Ipse ædificabit domum nomini meo, et stabiliam thronum regni ejus usque in sempiternum;* tum ex verbis subjunctis: *Qui si inique aliquid gesserit, arguam eum in virga virorum, et in plagiis filiorum hominum, misericordiam autem meam non auferam ab eo, sicut abstuli a Saul, quem amovi a facie mea,* etc. Ex quibus verbis aperte constat, verba illa: *Ego ero illi in Patrem, etc.,* in Saulem non convenire, quamvis ille fuerit temporalis rex electus a Deo immediate, ac sine successione, auctore Deo, rex creatus; non est ergo excellentia illa communis omnibus regibus, sed singularis favor promissus Salomoni.

6. Imo sunt qui putent, verba illa neque

ipsi Salomoni in proprietate convenire, nec de illo ad litteram dicta esse, sed de solo Christo per Salomonem significato, quia de Christo illa Paulus allegat ad Hæbr. primo, et quia in solo Christo impletum est quod statim Deus promisit: *Et fidelis erit domus tua, et regnum tuum usque in æternum ante faciem tuam, et thronus erit firmus tuus jugiter.* Sed licet verum sit verba illa singulare quodam modo in Christum convenire, et de illo dicta esse, vel in historico, vel saltem in mystico sensu, nihilominus negare non possumus de Salomone ad litteram esse dicta; id enim ex illo contextu, et ex 3 Regum 1, et 1 Paralipom. 22 et 28, aperte colligitur. Dicta autem de illo sunt non propter solam regis temporalis dignitatem vel potestatam, alias de omnibus regibus dicta fuissent, et Sauli convenienter, quod falsum esse ostensum est, sed vel propter singulararem providentiam, regimen ac protectionem, sub qua Deus Salomonem assumere statuerat, vel quia nunquam illum privare regno decreverat, etiam si peccaret, sed ut filium castigare, ut suis verbis Deus ipse satis declaravit. Vel certe quia sanctum et justum illum facere decreverat, et nomen filiorum Dei, justorum potius quam regum, proprium est. Nam reges si impii sint, filii Dei non sunt. Ideoque si verba illa de filiatione Dei adoptiva intelligentur, conditionem habent adjunctam, *Si perseveraverit facere præcepta mea, et judicia,* ut expresse additur 1 Paralip. 28, et infra refertur dixisse David Salomoni: *Si quæsieris eum, invenies; si autem dereliqueris eum, projiciet te in æternum.* Hoc autem modo cuique justo vere dicitur nomine Dei: *Ego ero illi in patrem, et ipse erit mihi in filium.* Quæ igitur prærogativa temporalium regum ex illis verbis colligitur?

7. Alter titulus regum, quem rex magni facit, est, quia interdum *dii* vocantur, et allegat Psalm. 81: *Ego dixi: Dii estis.* Sed unde ostendit rex verba ista de regibus temporalibus singulariter dicta esse? certe ostendere id non potest, cum falsum sit. Nam Christus, Joan. 10, aliter illa verba exposuit, cum dixit: *Si illos dixit deos, ad quos sermo Dei factus est.* Nam sermo Dei non est factus ad solos reges, sed magis ad Prophetas, vel etiam ad omnes fideles, et maxime ad justos. Unde Augustinus ibi, tractat. 48, de omnibus hominibus, qui per sermonem Dei, filii Dei per participationem fiunt, Christi expositionem intelligit, et præsertim de fidelibus Ju-

daeis, qui tunc in Deum credebant. Præterea initium ipsius Psalmi, scilicet, *Deus stetit in synagoga deorum, etc.,* vix potest ad reges accommodari, ad fideles autem et Prophetas optime, vel etiam ad sacerdotes; maxime vero ad judices, eorumque congregationem, nam subditur: *In medio autem deos dijudicat, usquequo judicatis iniquitatem?* ut Euthymius et alii notant. Sicut etiam Exod. 22, judices dii appellantur, ibi: *Applicabitur ad deos,* id est, ad judices, et infra: *Dii non detrahes,* quanquam hoc de sacerdotibus intelligit Chrysostomus, Psal. 173, in princ., dicens solere Scripturam sacerdotem vocare angelum et deum. Itemque de sacerdotibus et de judicibus multi intelligunt verba Psal. 49: *Deus deorum Dominus locutus est,* et illa Psal. 46: *Dii fortes terre vehementer elevati sunt.* Quæ verba possunt quidem reges comprehendere, non tamen solos, sed quoslibet magnates, vel potentes terræ, qui dii dicuntur, non quia sint, sed quia ita dominari volunt, ac si essent dii, vel (si in bonam partem accipienda sit appellatio) quia potestatem et prælationem Dei speciali modo participant. Quo quidem modo multo magis sacerdotes quam reges dii per participationem appellari possunt.

8. *Frequentius sacerdotes quam reges Uncti vocantur in Scriptura.* — Tertia nota regum est, quia *uncti* appellantur, 1 Reg. 24. At hæc appellatio multo frequentius sacerdotibus tribuitur, quia per unctionem consecrabantur, ut est notum Exod. 29, Levit., c. 4 et 8. Unde cum Psalm. 104 dicitur: *Nolite tangere christos meos,* non solum reges, sed etiam sacerdotes comprehenduntur. Et ideo fortasse (quod notandum est) 2 Machabæor. 1, utrumque conjungitur, cum de Aristobulo dicitur, *qui est de genere christorum sacerdotum,* vel ad distinctionem christorum regum, vel ad distinctionem eorum sacerdotum, qui christi non erant, ut inter gentiles, vel in lege naturæ existebant. Denique unctio externa nullam de se confert potestatem, nec aliam indicat dignitatem, nisi illam, ad quam significantiam imponitur; si ergo rex loquitur de christo vel uncto hac externa unctione, unde probat nobis, unctionem regum significasse potestatem eorum supra Pontificem, vel in iæ ecclesiasticas, et non potius per unctionem Pontificis ipsius primatum et excellentiæ supra reges significari? nulla profectio ratio reddi potest. Veritas autem est, ex vi solius unctionis neutrum significari, aut posse

probari, sed ex aliis principiis colligendum esse. Quod si non de sola exteriori unctione, sed de invisibili, et interiori sit sermo, cum illa fiat per internam Spiritus Sancti gratiam, sic non soli reges, sed omnes justi, et aliquo modo omnes fideles Uncti possunt appellari, et de illis etiam intelligi possunt citata verba: *Nolite tangere christos meos.* Neque etiam omnes reges hoc modo christi dici possunt, et clarum est Davidem, in loco allegato cum de Saule loqueretur, non in hoc sensu christum illum appellasse.

9. *Hæc laus specialiter regibus Israel attributa est.* — Quarta prærogativa est, *in solo Dei sedere*, ex 2 Paralip. 9, ibi: *Sit tibi Dominus Deus tuus benedictus, qui voluit te ordinare super thronum suum.* Sed imprimis in verbis illis *thronus Dei*, nihil aliud significat, nisi regimen populi Israel, seu regni sedem in illo populo. Nam sicut populus ille singulariter dictus Dei, quia illum singulariter elegit ac sanctificavit; et peculiarem illius curam suscepit, juxta illud Exodi 19: *Eritis mihi in peculium de cunctis populis, et regnum sacerdotale, et gens sancta*, ita regnum ejus dicitur thronus Dei, et frequentius appellatur thronus David, et thronus Israel, 3 Reg. 1 et 2, ac sæpe alibi. Unde sicut dixit Deus Samueli, 1 Reg. 8: *Non te abjecerunt, sed me, ne regnum super eos, ita thronus illius regni dici etiam potuit thronus Dei, quia reges illius regni, et a Deo facti sunt, et quodammodo in regimen ac curam illius regni pro Deo substituti sunt.* Illa ergo laus sic intellecta non communis omnibus regibus, sed propria regum Israel, neque in illis aliam excellentiam vel potestatem, sed solam civilem, illi peculiari populo, speciali modo ac electione, a Deo datam, significat. Deinde licet omnes reges dici possint sedere in solo Dei, quia ministri Dei sunt, et ab eo potestatem habent, quid inde habetur, nisi potestas regum temporalis, et ad summum in suo ordine suprema? Nam in hac significatione non unus tantum datur Dei thronus, sed multiplex, quia ut Nazianzenus dixit, *etiam Episcopus thronum suum habet, in quo positus est regere Ecclesiam Dei*, Act. 20. Datur ergo thronus temporalis, et thronus spiritualis, et thronus potest esse sub throno, vel in eodem ordine, ut Episcopus est sub Pontifice, et rex interdum suo modo sub imperatore; vel in diverso, et sic thronus temporalis est sub spirituali, quia licet uterque sit Dei, seu a Deo, tamen *quæ a Deo sunt, ordinata sunt.*

10. *Excellentius multo sacerdotes vocantur Dei ministri, quam reges.* — Quinta excellētia regum ponitur, quod sunt servi Dei, et ita appellantur, 2 Paral. 6. At hæc duobus modis potest regibus attribui. Primo eo ipso quod reges sunt, quia sunt ministri Dei, cui præcipue in munere suo serviant, vel servire debent; et hoc quidem modo prærogativa illa regibus omnibus convenit; multo vero magis, et nobiliore modo sacerdotibus et Pontificibus, quia in rebus majoris momenti et excellentioris ordinis Deo ministrant, et ab ipso immediatus in eo munere constituti sunt, et ideo Paulus sic inchoat epistolam ad Romanos: *Paulus, servus Jesu Christi*, et epistolam ad Philippenses: *Paulus et Timotheus, servi Jesu Christi*; et ad Titum: *Paulus, servus Dei, Apostolus autem Jesu Christi*; et eodem modo loquuntur Petrus, et Jacobus, et Judas in principio suarum Epistolarum, et Joannes, Apocalyps. 1; Act. vero 4 ac 17, prædicatores Evangelii servi Dei appellantur; imo etiam vocantur *dispensatores mysteriorum Dei*, 4 ad Corinth. 4, imo et adjutores et ministri, 1 ad Cor. 3. Alio vero modo servi Dei appellatio dicitur ratione obedientiæ ad Deum, et observantiæ præceptorum ejus, juxta illud ad Roman. 6: *Nunc autem liberati a peccato, servi autem facti Deo.* In quo sensu absque dubio Salomon patrem suum vocavit servum Dei in dicto loco Paralipomenon, et sic neque omnes reges sunt servi Dei, sed tantum pii, Deoque obsequentes, neque soli reges, sed omnes liberati a peccato, sunt servi Dei, ut ex dictis verbis Pauli, et ex frequentissimo usu Scripturæ manifestum est. Igitur hæc appellatio nullam peculiarem excellentiam in regibus denotat.

11. *David non angelus vocatus, sed in aliqua proprietate ei æquiparatus fuit.* — Sexto ponderat rex nomen angeli interdum regibus tribui, solumque adducit locum 2 Reg. 14, ubi mulier quædam dixit ad David: *Tu domine, mi rex sapiens es, sicut habet sapientiam Angelus Dei*, quæ superius etiam dixerat: *Sicut Angelus Dei, sic est dominus meus rex, ut nec benedictione, nec maledictione moreatur.* Possumusque similem locum addere ex 1 Reg. 29, ubi Achis dixit ad David: *Scio, quia bonus es in oculis meis, sicut Angelus Dei.* Verumtamen hæc non omnibus regibus, sed uni tantum David, et non propter dignitatem regiam, quam in posteriori loco allegato nondum consecutus fuerat, sed propter peculiares rationes in ipso inventas illi dicta fuerunt;

videlicet, propter sapientiam, lenitatem animi, et morum probitatem; persona ergo illius regis, non ipsa regia potestas inde commendatur. Accedit, in illis locis non appellari David angelum, sed in aliqua proprietate Angelo comparari, quod longe diversum est, ut per se constat.

12. Reges nullibi angeli appellantur, sacerdotes vero n. a xime. — Neque illa comparatio secundum aequalitatem, sed secundum quamdam imitationem seu proportionem etiam analogam accipienda est. Sic enim particula *sicut*, frequenter in Scriptura accipitur, ut Joan. 47: *Uuum sint, sicut et nos unum sumus*; et Matth. 5: *Estate perfecti sicut et Pater vester perfectus est.* Estque simillimus locus Act. 6, ubi de Stephano dicitur: *Viderunt faciem ejus tanquam faciem Angeli.* Per quae verba neque Stephanus angelus appellatur, neque aliqua potestatis excellentia indiscatur, sed sola mirabilis pulchritudo aut fulgor, seu luminis splendor, qui tunc in facie ejus apparuit. Est enim illa phrasis hebraica, qua excellentia alicujus virtutis vel pulchritudinis ad instar angelicæ exaggeratur, ut est vulgare. Sic ergo in dicto loco mulier illa voluit laudare sapientiam David, non illum angelum vocare. Unde si vere et in rigore loquamur, nullus est in Scriptura locus, in quo nomen Angeli, vel omnibus regibus, vel aliqui temporali regi tribuatur, cum tamen de sacerdote scriptum sit Malach. 2: *Labia sacerdotis custodiunt scientiam, et legem requirunt ex ore ejus, quia angelus Domini exercituum est*, ubi Cyrillus Alexandr.: *Quia voluntatem Dei perspicue nunciat, et legem sermonis hortatricem habet;* et Hieronymus: *Sacerdos Dei angelus dicitur, quia Dei et hominum sequester est, ejusque ad populum nunciat voluntatem.* Ergo ex angeli appellatione multo magis sacerdotalis dignitas, quam regia commendatur. Nam, licet sacerdos per metaphoram, seu analogiam angelus dicatur, fundatur tamen proportio in ipso munere, seu dignitate sacerdotali, non aliqua proprietate in alicujus sacerdotis persona inventa, sicut de persona regis David explicatum est.

13. Idem paralogismus committitur, cum ex eo, quod de David dixit Samuel: Quiescet sibi Dominus virum juxta cor suum, 1 Reg. 13, infertur, reges vocari factos juxta cor Dei, quæ aperta est fallacia, tum quia ibi non dicitur David factus juxta cor Dei, quando factus est rex, sed dicitur inventus vir secundum cor Dei, et ideo assumptum esse a Deo, ut

esset dux populi; ergo non potestas regia fecit illum secundum cor Dei, sed gratia, quam Deus illi prius contulit, ut jam factum secundum cor suum, regem etiam faceret. Igitur non recte inde infertur aliqua excellentia potestatis regiae, sed solum ostenditur æquitas electionis Dei, et singularis electio gratiae circa personam David. Unde non minorem dignitatem et potestatem regiam Sauli contulit Deus, cum tamen illum non invenerit secundum cor suum. Nam Deus, dicens: *Inveni David filium Jesse virum secundum cor meum*, subdit, *quia faciet omnes voluntates meas*, ut dicitur Act., c. 13.

14. Erasio quædam impugnat. — Quod si quis dicat, regem propter similitudinem et participationem potestatis dici factum secundum cor Dei, et ita convenire omnibus regibus, respondemus imprimis hunc non esse sensum illius loci, ut probatum est; imo neque inveniri locum in Scriptura, in quo id fundari possit. Deinde addimus, licet id gratis concedatur, nihil amplius inde probari, quam regem participare peculiari quodam modo potestatem Dei, aut regiam institutionem esse placitam Deo, et ab ejus providentia originem ducere. Sed hoc quid attinet ad comparationem cum dignitate sacerdotali, vel pontificia potestate, cum haec multo magis sit secundum cor Dei, quia et illi placet magis, et altiori modo ab ipso dicit originem? Imo si de Israelitico populo loquamur, speciali ratione pontificia dignitas, magis quam regia dignitas fuit secundum cor Dei; nam priorem ex solo suo beneplacito et sapientia Deus invenit et instituit; posteriorem autem quasi coactus ad populi petitionem concessit, ut ex 1 Reg. 8 sumitur. Multoque majori ratione in christiano populo pontificatus dici potest secundum cor Dei, quia et est divinior, et altioris ordinis, et a Deo etiam ex majori providentia et benevolentia Ecclesiæ sue concessus.

15. Ex eo quod reges lucernæ appellantur, nulla spiritualis potestas eis tribuitur. — Neque est multum dissimile argumentum, quod ex octavo titulo regis sumitur, sumpto ex 2 Reg. 21, ubi David appellatus est a suis subditis *lucerna Israel*. Nam etiam verba illa (ut ibi sensit Abulensis) intelligi possunt specialiter dicta de persona David, in quem totius populi oculi tanquam in lucernam intenti erant, propter singularem virtutem et fortitudinem ejus, et ideo valde timebant ne extingueretur, id est, interficeretur, quia per

illum magna Dei beneficia sperabant. Sed demus, propter eminentiam dignitatis regiae lucernam appellari, et sub eadem metaphora nomen illud regibus omnibus convenire, quid inde contra pontificiam eminentiam colligi potest? cum Christus Apostolis, et consequenter etiam successoribus suis dixerit: *Vos estis lux mundi*, quod multo majus est quam esse lucernam, ac subinde in metaphora persistendo majorem dignitatem indicat.

16. Ultimum titulum sumit rex ex Isaiæ c. 49, ubi de Ecclesia ex gentibus congreganda prædixit: *Erunt reges nutritii tui, et reginæ nutritrices tuæ*, taciteque interpretatur, reges vocari nutritios propter eminentiam potestatis, quam in Ecclesia Christi et in ecclesiasticis rebus habituri erant. Sed imprimis Hieronymus ibi de Apostolis et apostolicis viris locum exponit, sensus autem videtur mysticus. Fatemur ergo, ad litteram esse ibi sermonem de regibus gentium ad fidem Christi convertendis, negamus tamen ibi extolliri eorum potestatem, sed futuram pietatem. Qualis fuit in Constantino, Carolo Magno, et fuit etiam et nunc est in nostris catholicis regibus, qui totis suis viribus in adjuvandis fidelibus, et in vera Christi Ecclesia tuenda et propaganda, incumbunt. Et hoc significavit Augustinus, de Unit. Eccles., cap. 7, cum dixit, ab Esaia prædictum esse, reges terræ, qui prius persequerantur Ecclesiam, postea ejus adjutores futuros fuisse. Addit præterea Cyrillus Alexandrin., lib. 4 in Isaiam, et optime, prophetiam illam esse impletam, quia *licet videre propter dominorum pietatem, honore affectos, et omni misericordia dignatos eos, qui in Christum crediderunt, adeo ut nihil aliud quam eorum alumni esse videantur*. Accedit quod ipsum metaphoricum nomen nutritii nihil aliud significat, aut indicat, quam curam nutriendi et promovendi prolem, juxta illud Pauli 1 ad Thessalon. 2: *Facti sumus parvuli in medio restrum, tanquam si nutrix foreat filios suos*.

17. *Reges sunt Ecclesiae nutritii in temporalibus, Pontifex vero in spiritualibus.*—Unde non solum reges, sed etiam Apostoli et Pontifices dici possunt Ecclesiae nutritii, prout Hieronymus voluit, et Paulus indicavit, sed longe diverso modo; nam reges per se (ut ita dicam) sunt nutritii in temporalibus, Apostoli vero in spiritualibus, juxta illud Pauli, 1 ad Corinth. 3: *Tanquam parvulis in Christo lac vobis potum dedi*. Et ita Pontifices per se nutriunt Ecclesiam, ut Ecclesia est; reges vero, ut civilis, seu politica congregatio est. Quia

vero id quod spirituale est, supponit id quod est animale, ideo per bonum civile regimen, et per temporalia beneficia Ecclesia multum in spiritualibus adjuta est, ideoque boni ac pii reges Ecclesiae nutritii appellati sunt. Illud enim nomen magis est benignitatis et condescensionis, quam potentiae et majestatis. Sub qua metaphora Deo etiam tribuitur Oseeæ 2, et aliis locis. Et hunc esse sensum verborum Isaiæ declarant verba sequentia, ubi eisdem regibus statim subjungitur: *Vultu in terram demisso adorabunt te*, id est, Ecclesiam, seu Christum in ea, ut Patres exponunt. Nam quia Christus est caput Ecclesiae, ait Hieronymus, recte Christus adoratur in corpore, et præsertim in Vicario suo. Reete ergo intelligimus, prophetiam illam ad litteram impletam esse in imperatoribus et regibus osculantibus pedes Pontificis, vultu in terram demisso, quod multi præsentes et coram fecerunt, alii per epistolas paratum animum ostendebant, et specialiter rex Angliæ Eduardus, in epist. ad Clementem VI. Cui consonat aliud ejusdem Prophetæ vaticinium: *Venient ad te curvi filii eorum, qui humiliarerunt te, et adorabunt vestigia pedum tuorum*.

18. *Prærogativas a rege inductas nihil contra supremam Pontificis potestatem conducere concluditur.*—*Solutio.*—Constat igitur manifeste, ex hujusmodi notis regiae dignitatis nihil aliud colligi, quam regibus deberi honorem et obedientiam intra suam ditionem, et in materia illi subjecta, quod nullus est qui neget, non vero licet inde inferre aliquid quod pontificiæ dignitatis deroget. Nam omnes illi tituli sacerdoti, et præsertim Summo Pontifici excellentiori modo convenienti, ut obiter declaratum est. Et præterea sacerdotes et Apostoli dicuntur Ecclesiae fundamenta, sal terræ, lux mundi, ministri Christi, dispensatores mysteriorum Dei, adjutores Dei, parentes, seu genitores filiorum Dei, ad Galat. 4, et 1 ad Cor. 4, mediatores inter Deum et homines, legati Christi et Dei, 2 ad Cor. 5, et ad Ephes. 6, clavigeri regni cœlestis, ac proinde thronum regalem habentes, non terrenum, sed cœlestem, ut dixit Chrysostomus, homil. 5 de Verb. Isaiæ. Denique a Christo et Apostolis pastores nominantur, utique rationalium ovium, id est, duces et rectores gregis Christi, ut dixit Ambrosius, lib. 2 in Lucam, et lib. 1 de Dignit. Sacerd., c. 2. Potuissetque rex Angliæ nomenclaturam hanc etiam regi tribuere, quia Davidi dictum est: *Tu pasces populum meum Israel*, 2 Reg. 5, et

inde posset contra nos apparentius argumentum sumere, quia nos ex verbo pascendi, Petri potestatem colligimus. Sed ad hoc etiam facile respondemus, verbum pascendi, cum metaphoricum sit, diversa posse significare, et juxta subjectam materiam, et alia Scripturæ loca, et Patrum interpretationem intelligendum esse. His autem modis manifestum est, dictum de David solum significasse gubernationem civilem et temporalem, ut ibidem, et c. 7, statim explicatur, cum dicitur, *ut sit dux super populum meum Israel*, etc. Dictum autem de Petro significat altiorem et spiritualem gubernationem per potestatem ligandi atque solvendi, et claves regni cœlorum, quibus necesse est temporales reges subjici, si cœleste regnum consequi velint.

CAPUT XXV.

ALTERI OBJECTIONI, EX FACTIS REGUM QUAE IN VETERI TESTAMENTO NARRANTUR SUMPTÆ, SATISFIT.

1. Pro fundamento hujus objectionis conatur rex ex Scriptura ostendere, reges in Iudeorum populo *cuncta moderatos esse*, quæ ad ecclesiasticum regimen quoquo modo pertinent. Quia cum credendum non sit, eos jurisdictionem a Deo non datam usurpasse (cum reges etiam justi et sancti actiones illas exercuerint), recte infertur, potestate regia omnia fecisse. Unde ulterius etiam efficitur, idem posse nunc reges in Ecclesia Christi, tum quia neque illi antiqui reges aliam potestatem habebant, praeter regiam; neque nunc minor est regum potestas, quam tunc fuerit.

2. *Objiciuntur variae actiones regum.* — *Responsio ad singulas.* — *Jure naturali tenentur reges idola auferre.* — Ut ergo fundamentum illud suadeat, inducit imprimis locum 2 Paralip. 14, ubi tria de rege Josaphat referuntur. Primum, *abstulisse lucos de terra Iuda, egressu n esse ad populum suum, et revocasse ad Dominum Deum patrum suorum.* Item, in Jerusalem constituisse levitas, et sacerdotes, et principes familiarum ex Israel, *ut judicium et causam Domini judicarent habitatoribus ejus.* Ex his autem nihil colligi potest, nam lucos auferre, seu idola, quod et alii reges Israel fecerunt, Asa, 3 Reg. 15, et Ezechias, 4 Regum 18, hoc (inquam) etiam ad reges temporales ex officio pertinet. Nam colere idola est contra rationem naturalem, et contra commune bonum humanæ civitatis, seu rei-

publicæ. Unde etiam seclusa fide reges gentium ad hoc ipsum tenerentur, si naturali lumine rationis convenienter uti vellent, majorique ratione ad hoc tenentur reges fideles, sive in lege veteri, sive nunc in lege gratiæ. Illa ergo actio non est propria spiritualis seu ecclesiasticæ potestatis, sed communis utriusque, seu utriusque fori, ut aiunt, quia ad finem utriusque potestatis conductit. Maxime vero quoad executionem ejus solet esse necessaria potentia regum, ut erat revera in populo Israelitico propter duritiam ejus, et ideo maxime laudantur reges qui idola destruxerunt; qui vero illa induxerunt, vel in eis evertendis fuerunt negligentes, maxime reprehenduntur et notantur. Ex illa ergo actione nihil colligitur, ut magis statim in alia simili declarabitur.

3. Et ad hoc genus actionis spectat, quod multi ex regibus populi Judaici reprehenduntur, eo quod excelsa non abstulerint. Sive enim illa *excelsa* fuerint aliqua idola in excelsis montibus vel collibus ad cultum posita, sive fuerint quælibet altaria in variis montibus aut locis, extra templum seu locum tabernaculi ad immolandum etiam vero Deo erecta, fere semper illa vox in Scriptura in malam partem accipitur, et significat locum, in quo indebitè et superstitione sacrificabatur. Quia vel idolo immolabatur, vel si vero Deo, non secundum voluntatem ejus, id est, non in loco ab eo deputato, id est in templo jam aedificato, vel antea in loco tabernaculi. De quo videri potest Abulensis, 3 Reg. 3, q. 3. Illo igitur modo quo possunt et debent reges idola evertere, tenebantur etiam reges Israel *excelsa* auferre, non tanquam Pontifices, sed tanquam executores, et adjutores Pontificum. Et ideo in illis contraria negligientia specialiter reprehenditur, quia potestate sua efficacius valebant illa destruere, quam Pontifices doctrinis vel præceptis suis, et præterea quia de regibus ibi præcipue historia texebatur.

4. *Josaphat per sacerdotes populum ad Deum adduxit.* — Idem fere in secunda actione considerari potest. Cum enim ibi dicitur, *Josaphat rursum egressum esse ad populum suum, et revocasse illum ad Deum*, non per se ipsum, sed per nuncios, vel ministros aliquos id fecisse intelligendum est, ut communiter ibi interpres notant. Nam illa particula *rursum*, jam prius iterum egressum fuisse indicat; non legitur autem aliis egressus Josaphat ad populum suum, praeter id quod legitur 2 Pa-

ralip. 7, scilicet, *tertio anno regni sui misisse de principibus suis, ut docerent in civitatibus Iuda, et cum eis Levitas et sacerdotes*; hoc ergo ipsum dicitur in cap. 49 iterum fecisse, scilicet, misisse qui circumirent cunctas civitates ad docendum et erudiendum populum in lege Domini. Hæc autem actio, licet per se et ex officio pertineat ad Pontifices et sacerdotes, suo tamen modo etiam regum est suum providentiae modum circa illam exhibere. Sic enim etiam nunc reges catholici dicuntur mittere prædicatores ad gentes sibi subditas, quia ad voluntatem, seu petitionem eorum, et sub eorumdem protectione atque ipsorum expensis mittuntur. Ita ergo Josaphat ex providentia regis fidelis, ac zelum Dei habentis, potuit per prædicatores et Doctores egredi ad erudiendum populum, servato tamen ordine et modo, secundum ritum illius temporis necessario. Et ideo dicitur misisse sacerdotes et Levitas, ad quos illud munus per se pertinebat.

5. Cur Josaphat principes cum sacerdotibus miserit.—Quod autem etiam miserit quosdam de principibus suis, non obstat, etiamsi fateamur illos principes non fuisse de tribu Levi, sed mere laicos, cum a Levitis distinguantur; hoc, inquam, non obstat, tum quia vel illi laici mitti potuerunt, non ad docendum, sed ut Levitas et sacerdotes tuerentur, et rebelles ac idololatras, qui tunc erant, in officio continerent, et, si opus esset, etiam ad audiendum verbum Dei cogerent. Vel certe licet illi etiam docerent, nullum est inconveniens, quia licet ad laicos non pertineret, vel dubia legis resolvere, aut doctrinam fidei definire (hoc enim sacerdotibus commissum erat, Deuter. 17), nihilominus poterant esse docti, et eruditæ in lege ac fide, ut alios instruere et exhortari possent, hoc enim neque ex natura rei malum est, nec invenitur in lege veteri prohibitum, maxime cum id facherent ex consensu sacerdotum. Sicut Actor. 43, cum Paulus et Barnabas ingressi essent quamdam synagogam, principes synagogæ miserunt ad eos dicentes, *Viri fratres, si quis est in vobis sermo exhortationis ad plebem, dicite*, cum tamen Paulus de tribu Levi non esset, et ideo a Judæis tanquam mere laicus reputaretur¹. Simileque exemplum de Christo habemus Luc. 4. Sic igitur actio illa Josaphat recte intellecta non pertinuit ad propriam ecclesiasticam gubernationem, sed ad regiam protec-

tionem, et fidei defensionem ac propagacionem, quod munus jura etiam canonica christianis regibus commendant.

6. Tertia actio fuit constituere judices. Et ibi etiam Levitæ, sacerdotes et principes numerantur. Ubi etiam duo similia explicanda sunt, scilicet, quomodo ad regem pertinuerit Levitas et sacerdotes in eo munere constituere, et quomodo cum eis laicos principes miscuerit. Utrumque autem facile intelligetur, si alia verba, quæ inferius adduntur, considerentur, scilicet: *Amasias autem sacerdos et Pontifex vester in his quæ ad Deum pertinent, præsidebit; porro Zabadias, filius Ismael, qui est dux in domo Iuda, super ea opera erit, quæ ad regis officium pertinent.* Ubi aperte distinguuntur officium regis et officium Pontificis, et hic præsidere dicitur in his, quæ ad Deum spectant, rex autem vel vicarius ejus in his quæ ad homines. Ita ergo cum dicuntur constituti sacerdotes, Levitæ et Principes ad judicium faciendum, duplex sub illa voce comprehenditur judicium, ut recte Cajetanus ibi notavit, scilicet, sæculare, et quasi ecclesiasticum, seu ad res sacras pertinens. Et ita facile expeditur posterior interrogatio; non oportet enim judicia, vel personas miscere, sed cum partitione accommoda eos intelligere, nam principibus sæcularibus sæculare judicium committi debuit, Levitis autem ecclesiasticum. Et ita plane oportet intelligi, cum alteri judicio præses deberet Pontifex, alteri vero gubernator regius, quando et quomodo oporteret.

7. Josaphat solum designarit sacerdotes potestatem judicandi a Deo habentes.—Atque eadem fere ratione, quamvis rex dicatur constituisse utrosque judices, non oportet eodem modo de omnibus intelligi, nam judices laicos constituit per se et virtute sua, eligendo illos, et dando illis potestatem; Levitas autem et sacerdotes non ita, sed solum applicando et designando illos ad tale munus, nam potestatem illud exercendi ex institutione divina habebant, vel per Pontificem Summum. Quod declaratur ex aliis verbis: *Amasias sacerdos, et Pontifex vester, præsidebit in his quæ sunt ad Deum, Zabadias in aliis*; quæ licet videantur eodem modo dicta, nihilominus respectu Pontificis non efficiebant, ut sic dicam, seu conferebant potestatem, sed declarabant quid jure suo ad Pontificem pertinaret, ut patet ex Deuter. 17. Respectu vero civilis præsidis, a rege manabat potestas, quia pro rege specialiter constituebatur. Ita ergo licet uno ver-

¹ Videndus Joan. Lorinus, ibi.

bo dicatur constituisse hos et illos judices, nihilominus cum distributione accommodata, et legi ac debito ordini consentanea, de singulis intelligendum est. Principes ergo per se et vi sua judices fecit, Levitas vero solum ad modum causae per accidens, quasi applicando seu nominando personas, non tamen sine consensu Pontificis eos creando. Atque ita hæc actio fere ejusdem rationis est cum præcedenti, et non pertinet ad propriam jurisdictionem ecclesiastici regiminis, sed solum ad sollicitudinem quamdam, piumque fidelis regis zelum, ut in aliis explicatum est.

8. *Quarta actio a rege Jacobo inducta solvitur.* — Deinde addit rex aliam actionem, quam possumus quarto loco numerare, scilicet, *corruptelas purgare, et abusus tollere.* Ad hanc vero probandam solum adducit locum 2 Reg., vel, ut ipse allegat, 2 Samuel 5, n. 6, ubi nulla fit mentio de corruptelis purgandis, aut abusibus tollendis; sed solum refertur, cum David iisset in Jerusalem ad Iebusæum, ut civitatem expugnaret, dictum esse illi ab habitatoribus civitatis: *Non ingredieris huc, nisi abstuleris cæcos, et claudos dicentes: Non ingredietur David huc.* Hæc autem verba non possunt applicari ullo modo ad reformationem morum, vel ablationem abusuum, quia nec de hac re ibi agebatur, neque cogitari potest Iebusæos hoc voluisse consulere Davidi sub illa quasi metaphorica locutione. Unde licet illa verba sint obscura, et ideo ab interpretibus varie exponantur (ut in Glossa, Theodoreto, Abulensi, Carthusiano, Cajetano, et aliis ibi videre licet), nihilominus omnes convenient, illis verbis solum fuisse propositum Davidi, ut medium necessarium ad civitatem capiendam, tollere cæcos et claudos. Sive per has voces significantur aliqui inimici David ex Iebusæis, qui insurrexerunt dicentes: *Non ingredietur David huc, et cæci appellantur propter errorem mentis, et claudi, quia non recte cum David ambulabant.* Sive revera fuerint corporaliter claudi et cæci positi supra muros civitatis ad defendendam illam, in Indibrium et irrisiōnem David (ut videtur probabilius, et magis consentaneum textui secundum Vulgatam editionem); in neutro vero sensu quicquam ad præsentem causam refert, quia de purgandis corruptelis nihil ibi agitur. Nam licet statim subjungatur, proposuisse David præmium pro auferentibus cæcos et claudos, odientes animam David, et inde ortum esse proverbium, *Cæcus et claudus non intrabunt*

in templum, non potest inde verisimiliter inferri, Davidem, auferendo cæcos et claudos, voluisse significare, ad se pertinere abusus tollere, et corruptelas purgare; quæ est enim hæc consecutio, connexio, vel conjectura? profecto esse non potest nisi mera divinatio.

9. *Alia adjungitur actio a rege Jacobo.* — Ad hanc vero actionem pertinet etiam alia, quam infra rex ponit, dicens de regibus, *reformationes publicas instituere, convocatis eo fine et congregatis promiscue sacerdotibus, et laicis;* nam ad reformationem publicam maxime spectat, abusus tollere et corruptelas purgare. Ad probandas autem illas reformationes, solum adducit locum jam tractatum 2 Paralip. 17, unde solum habetur, Josaphat ordinasse seu procurasse quamdam reformationem, mittendo principes, sacerdotes et Levitas, qui, docendo et instruendo populos in lege Domini, illos reformarent. Cur autem laici cum Levitis missi fuerint, jam declaratum est, neque ibi legitur alia congregatio ex laicis et Levitis promiscue facta. Sicut ergo diximus missionem illam non fuisse actum jurisdictionis, ita de hac reformatione dicendum est.

10. *Suo modo regibus competit abusus tollere.* — Quapropter (quidquid sit de probationibus) facile concedimus pertinere ad reges intra ordinem suum, et modo sibi accommodato abusus tollere, et corruptelas sui regni purgare. Nam imprimis si corruptelæ et vitia sint contra naturalem justitiam, vel civiles leges justas, vel contra pacem reipublicæ, ad regem directe perinet, subditos suos a talibus vitiis repurgare. Si vero vitia sint in materia religionis, vel fidei, postquam per eamdem fidem vel per Pontifices (ad quos voluntatem Dei explicare pertinet) illos esse abusus et corruptelas constiterit, etiam ad regem pertinet hujusmodi abusus tollere, vel poenis et coercitione in sibi subditos utendo, vel etiam sollicite procurando, ut ecclesiastici pastores simul in hoc suam operam adhibeant, vel denique forti brachio suo occasiones pravarum consuetudinum tollendo, sicut paulo superius de idolorum destructione dicebamus. Nam illa profecto erat in illo populo præcipua pars reformationis morum, et purgationis corruptelarum. Quamvis ergo expresse in veteri Testamento diceretur reges abstulisse abusus, et corruptelas purgassem, modo prædicto, et sine ulla usurpatione primatus ecclesiastici intelligi posset et deberet.

Sicut etiam nunc Catholici et pii reges abusus et corruptelas suarum ditionum auferunt. Imo et inferiores principes in suis territoriis, et privatus paterfamilias in domo sua, potest pro modo suo, et juxta capacitatem suam corruptelas a domo sua expellere, et omnem, vel politicam, vel oeconomicam providentiam adhibere, quae ab ipso circa suos subditos exerceri valet, et ad illum finem potest deseruire.

41. Atque ad hoc caput spectat exemplum aliud, quod idem rex adducit ex 4 Reg. 18, de serpente æneo ab Ezechia confracto. Illud enim ad similem reformationem et abusuum ablationem pertinet. Nam (ut lib. 2, c. 12, dixi) licet ille serpens Dei jussu fabricatus fuerit, et bonam habuerit significationem, propter quam bonum etiam usum in principio habuit, nihilominus postea coepit esse Hebraëis in occasionem scandali et ruinæ propter illius populi ignorantiam, mentisque cæcitatem, ac duritiam cordis ex prava consuetudine generatam. Ideoque recte potuit rex, serpentem confringendo, illam occasionem ruinæ populo tollere. Quamvis enim ex Dei præcepto factus esset, non propterea jusserat Deus illum conservari, sed ad memoriam divini beneficii, prudenti et pio arbitrio præcedentium principum illius populi servabatur; postquam vero coepit irreligiose coli et adorari, confrangi debuit, juxta legem præcipientem : *Confringite statuas, lucosque succidite.* Et quia hæc lex non solum ad sacerdotes, sed etiam ad reges loquebatur, ideo potuit Josaphat, non jurisdictionem sacerdotalem exercendo, sed legem implendo, serpentem frangere.

42. *David non tetigit arcam Dei.* — Quinto loco ponimus actiones alias recensitas a rege, quæ multo minus quam præcedentes ad causam conducunt : talis quidem est, *arcam Dei ad constitutum locum perducere*, 1 Paralip. 13. Nam David, de quo ibi est sermo, non portabat arcam, nec contingebat illam; primum enim solis Levitis, secundum autem solis sacerdotibus licebat, Numer. 4, 2 Reg. 6; non autem Davidi, licet esset rex. Et ideo tantum honoris divini causa arcam comitabatur, quod non solum regi, sed cuiilibet de populo licebat, ut paulo inferius ibidem dicitur : *David, et omnis domus Israel ducebant arcam*, etc. Et simile habetur 3 Reg. 8. Sed aditum, *regem David arcæ præsaltasse.* Sed quid tum? eratne illa actio propria sacerdotum aut regum? profecto magis propria

videri poterat hominum inferioris conditionis. Unde paulo inferius in eodem loco, despectus et reprehensus fuit David a Michol, non quia actionem magnæ dignitatis exercuisset, sed quia *tanquam unus de scurris factus esset*; ipse vero ex magna devotione et gratitudine erga Deum, respondit : *Ludam, et vilior stam plus quam factus sum, et ero humiliis in oculis meis.* Non ergo censuit David illam actionem fuisse dignitatis sacerdotalis, nedum pontificie, vel supra illam, sed fuisse magnæ humilitatis, et reverentiæ erga Deum, et ad hoc indicandum expressit Scriptura personam David; addidit vero, 2 Reg. 6 : *David et omnis Israel ludabant coram Domino.*

43. *Facta Salomonis a rege objecta 1 Paral. 28, 2 Paral. 1.* — *Hæc facta nullam spiritualem potestatem præ se ferunt.* — Ejusdem ordinis sunt facta quædam Salomonis, ex quibus etiam regium argumentum sumptum est, scilicet, *templum ædificare, ædificatum dedicare, et sua præsentia consecratum honestare.* At hæc omnia hodie etiam nunc reges faciunt; imo etiam alii inferiores, pii et potentes viri, et non propterea opus ecclesiasticae potestatis, nedum primatus, exercere censentur. Nam ædificare templum de se tantum est actus religionis, qui præter piam voluntatem solum requirit ex parte ædificantis facultatem ad necessarios sumptus, ex parte vero Dei necessaria est acceptatio per se, vel per vicarios suos. Tunc autem Deus speciali revelatione satis voluntatem suam ostenderat, ideoque ex parte Salomonis tantum regia potestas et magnificentia cum pia et fideli voluntate desiderari poterat; ergo nihil aliud ex illo facto recte colligitur.

44. *Dedicatio templi quomodo potuerit a Salomone fieri.* — Dedicare vero templum, duo potest significare. Unum est, propria aliqua actione religiosa consecrare illud; aliud est, propria voluntate exterius manifestata illud Deo offerre et donare. Priori modo, dedicare templo pertinet ad sacerdotes vel Pontifices. In illius autem templi dedicatione hæc actio non videtur alia fuisse, nisi vel ex parte hominum sacrificiorum oblationes, quæ ad solos sacerdotes pertinebant, ut jam explicabo; vel ex parte Dei præsentia illa, seu descensus sub specie nebulæ, quæ templum replevit, ad significandum Deo placuisse dedicationem illam, et ideo, ut dicitur 3 Reg. 8, *impletisse gloriam Domini, Domum Domini*, quæ actio non fuit hominis, sed divinæ dignationis, cui rex Salomon testimonium de-

dit, dicens : *Dominus dixit ut habitaret in nebula.* In hoc ergo sensu non potest dici rex Salomon dedicasse templum, neque id de Salomone legitur, nec rex Angliæ illi hoc traxit, cum solum dicat, sua præsentia opus consecrationis honestasse. Posteriori autem modo recte dicitur Salomon dedicasse templum. Sed inde nullum sumitur argumentum; nam quilibet potest rem vel domum suam ad divinum cultum offerre. Sicut Exod. 35 dicitur : *Omnes viri et mulieres mente devota obtulerunt donaria, ut fierent opera, que jussserat Dominus per manum Moysi.* Et statim subditur : *Cuncti filii Israel voluntaria Domino dedicaverunt.* Sic ergo in dicto loco, 3 Reg. 8, dicitur : *Dedicarerunt templum Domini rex et filii Israel.* Denique quod additur, regem sua præsentia opus consecrationis honestasse, clarum est toti populo fuisse commune, et ita nihil ad rem facere.

15. Ad discernendum vero modum præsentia, discernendæ sunt actiones, quæ in illa dedicatione peractæ sunt : prima fuit, inferre arcam, tabernaculum, et vasa sanctuarii in templum, et de hac dicitur : *Ferebant ea sacerdotes, et Levite;* et additur : *Rex autem Salomon, et omnis multitudo, quæ cum illo convenerat, gradiebatur ante arcam,* ubi rex cum populo conjungitur, et a sacerdotali ordine distinguitur. Altera actio fuit sacrificiorum oblatio, et hæc fiebat sine dubio a sacerdotibus tanquam a propriis ministris; traxi autem videtur tam regi, quam populo, cum de eis dicitur : *Et immolabant et oves, et boves absque aestimatione et numero;* intelliguntur autem immolasse per sacerdotes, ut est frequens in Scriptura, et in communione etiam usu loquendi. Et sic etiam dicitur ibi : *Mactavit Salomon hostias pacificas;* et iterum : *Sanctificavit rex medium atrii, quod erat ante dominum Domini, fecit quippe ibi holocaustum et sacrificium.* Utique per sacerdotes, in quo nulla potestas supra illos ostenditur, sed potius inferior status et conditio. Unde etiam nunc reges, sicut et cæteri laici, solum per sacerdotem offerunt. Tertia fuit actio orandi, et hæc etiam communis est toti populo. Alia denique fuit, rationem reddere populo de templi ædificatione et dedicatione, quam quidem Salomon cum auctoritate regia, et tanquam singularis (ut ita dicam) illius templi patronus exercevit, nihil tamen pontificium usurpavit, neque Pontifice se superiorem ostendit. Igitur totum illud factum nihil omnino ad causam de potestate eccl-

sistica, et regia, aut earum comparatione, pertinet.

16. *Alia duo ejusdem ordinis facta.* — *Hoc factum ad causam nihil refert.* — Denique ad probandam eamdem regis potestatem duo alia facta ejusdem fere ordinis afferuntur, quæ non majorem vim habent, quam præcedentia. Unum est, quod *librum legis e tenebris erutum populo recitare fecerunt*, ex 4 Reg. 22. Verumtamen eo loco refertur quidem Elciā Pontificem ad Saphan scribam dixisse : *Librum legis reperi in domo Domini,* et additur, dedisse illum Saphan, qui et legit illum, et postea regi dixit, Eleciā sibi librum dedisse, quem etiam legit Saphan coram rege. Quod autem Rex fecerit librum illum populo recitari, in eo capite non dicitur, sed solum, regem lectione libri valde commotum, misisse sacerdotes qui super ea re Deum consulerent. In cap. autem 23 additur, sacerdotes renunciassæ regi quidpiam, quod prophetissa quædam dixerat, et subjungitur : *Qui misit, et congregati sunt ad eum omnes senes Juda, et Jerusalem. Ascenditque rex templum Domini, et omnes viri Juda, universique, qui habitabant in Jerusalem, cum eo, sacerdotes et Prophetæ, et omnis populis a parvo usque ad magnum : legitque cunctis audientibus omnia verba libri fixeris;* ubi Abu-lensis exponit, *legit*, id est, fecit legere, putat enim Saphan scribam legisse librum, quod non est alienum ab usu illius locutionis, ut ex alia simili capituli 12 recte ipse probat. Nihilominus tamen, ex 2 Paralip. 34, magis colligitur, ipsum regem per se legisse librum, nam ibi expresse dicitur : *Quibus audiuntibus, in domo Domini legit rex omnia verba voluminis.* In hac vero historia quid, quæso, est, quod in rege pontificiam potestatem vel primatum ostendat? An congregare populum, aut legere librum? neutrum sane. Nam congregare populum non est de se spiritualis seu ecclæsistica actio, sed indifferens, quæ auctoritate regia propter varios fines fieri poterat. Ut autem tunc fieret propter spiritualem finem, non provenit ex potestate spirituali regis, sed ex sancto zelo, et intentione illius. Rex enim fidelis, divina gratia, et fide adjutus, potestate sua regia et civili in spirituale bonum sui populi sæpe uti potest, quia licet proxime in materia civili vel indifferenti operetur, potest ad dictum finem illam referre. Legere autem librum, magis fuit opus dignationis, humilitatis ac devotionis, quam potestatis. Et quamvis ipse

non legisset, sed recitari fecisset, nullam maiorem auctoritatem ostenderet, quia perinde est, per se fecisse, vel per Saphan scribam, et ministerum suum, et quia, licet liber esset sacer, actio legendi illum sacerdotibus et laicis communis est.

17. Aliud factum est, quod illi reges *fœdus inter Deum et populum aliquando redintegrarunt*. Citaturque in margine Apologæ regis locus Nehem., seu 2 Esdræ 9, in fine. In illo tamen loco non dicitur, regem redintegrasse fœdus inter Deum et populum, nec dici poterat, quia eo tempore jam non erant reges in Israel. Cum ergo in principio illius capititis dictum fuisset : *Concenerunt filii Israel in jejunio et in saccis; et infra additum esset: Surrexerunt autem super gradum Levitarum Josue, et quidam alii, et dixerunt: Surgite, benedicite Domino, etc.*, in fine capititis concluditur : *Nos ipsi percutimus fœdus, et scribimus, et signant principes nostri, Levitæ nostri, et sacerdotes nostri*. Ex quo contextu plane constat, totum populum, vel sua sponte, vel Levitarum verbis excitatum fœdus redintegrasse, et ideo principes nomine totius populi cum Levitis et sacerdotibus fœdus consignarunt. Quod si quis fortasse ponderet, *principes* (quos laicos fuisse verisimile est) primo loco poni, advertat, etiam Levitas sacerdotibus anteponi, et inde conjectet, posteriorem locum in illo ordine digniorem videri, ut saepe contingit. Allegatur etiam in eadem margine secundus Regum (nobis quartus), cap. 8, num. 4, sed in toto illo capite nihil invenio. Negare autem non possumus in c. 23, supra tractato, post lectionem libri fœderis addi, *Sicutque rex super gradum, et fœdus percussit coram Domino*. Et paulo post additur : *Acquieritque populus pacto*. Sed in hoc etiam facto nihil aliud, nisi pieetas et sanctus zelus principis reluet. Nam illa redintegratio, seu percussio fœderis nihil aliud erat, nisi renovatio quædam fidelitatis ad Deum, seu quasi nova promissio obedientiae ad legem ejus; hanc autem quilibet homo, vel quilibet populus vel sua sponte, vel alterius exemplo aut verbo provocatus facere potest. Ita ergo illam fecit prædictus rex, et in illa facienda alios anteivit, ut suo exemplo et verbo alios provocaret. Unde recte Cajetanus ibi notat : *Vide quanti boni causa bonus sit Princeps*.

18. Ex his ergo omnibus exemplis et testimoniorum, nulla spiritualis jurisdictio, vel specialis potestas, in his quæ ad Deum pertinent,

in regibus tempore legis veteris fuisse ostenditur. Optime vero ostenditur, bonum ac fidem regem defensorem esse debere divinæ fidei, ac veræ religionis, et diligenter curatrum ut omnes errores, et superstitiones contra veram, et ab Ecclesia approbatam doctrinam, vel ingressum non habeant, vel ubi inventi fuerint, expellantur. Hanc ergo fidelitatem ad Deum prædicti reges boni ostenderunt, et in lege nova Constantinus, Carolus Magnus, et Quintus, et alii reges catholici summa pietate observarunt, quamvis se non Ecclesiæ Parentes, aut Prælatos, vel Prælatis superiores, sed filios, subditos et protectores agnoscerent.

CAPUT XXVI.

ARGUMENTO SUMPTO EX COMPARATIONE REGIS ET PONTIFICIS SATISFIT.

1. *Objectio regis ex facto Salomonis.* — Post reliqua facta regum Israel, inducit rex Angliae factum Salomonis, qui *Abiathar Sacerdotem exauthorarit, ut non esset Sacerdos Domini*, ut ipse refert, indeque colligit, regem fuisse Pontifice superiorem, ut inde concludat, idem in Christi Ecclesia servandum esse. Fundaturque hoc argumentum in loco 3 Reg. 2, ubi Salomon quasi in exilium ire jussit Abiathar Pontificem, dicens : *Vade in Anathoth agrum tuum; equidem vir mortis es, sed hodie te non interficiam, quia portasti arcum Domini*, etc. Et infra concluditur : *Ejecit ergo Salomon Abiathar, ut non esset Sacerdos Domini*. De hoc autem facto nunquam in Scriptura reprehenditur Salomon; imo c. 3 additur : *Dilexit autem Salomon Dominum, ambulans in præceptis David Patris sui, excepto quod in excelsis immolabat*. Quæ exceptio qualiscumque illa sit (quod nunc non refert), ostendit, Salomonem usque ad illud tempus servasse alia præcepta, et consequenter in facto illo non peccasse. Imo aliqui in eodem facto clementiam Salomonis commendant, quia cum Abiathar esset dignus poena mortis, propter sacerdotis munus, quod exercuerat, et quia laborum patris sui particeps fuerat, vitam ei condonavit, et in mitiorem exilii et depositionis poenam commutavit. Ut autem illa eadem poena juste illata fuerit, necessarium est ut Salomon jurisdictionem, et superiorem potestatem in Pontificem habuerit; ergo rex tunc erat Pontifice superior. Quod hoc arguento inter alia ducti fatentur

ibi Abulensis, quæst. 28 et 31; et fuit sententia D. Bonaventuræ, in tractatu de Ecclesiast. Hierarch., part. 2, § 1, in fine, et in 4, distinct. 24, in expositione litteræ, quam etiam tradidit Divus Thomas, si ejus est opusculum 20, lib. 1 de Regim. principum, c. 14, in fine, quem multi etiam alii graves auctores secuti sunt. Ex hoc ergo facto infert rex Angliae, etiam in lege nova regem esse Pontifice superiorem, ac subinde habere primatum in regno suo.

2. *Factum Salomonis nullam in eo potestatem spiritualem indicat.* — Hæc vero objectio fundatur in re valde dubia, scilicet, an in lege veteri Pontifex esset exemptus a jurisdictione regis quoad delicta et judicium seu pœnam illorum, quam hic disputare nolumus, quia non putamus veritatem fidei, quam docuimus, ex quæstione illa inter Catholicos controversa pendere. Præsertim quia, ut sæpe dixi, quæstio de exemptione clericorum a jurisdictione laicorum in temporalibus, diversa omnino est a quæstione de primatu et de potestate in spiritualibus. Ex illo autem facto ad summum colligi potest, Pontificem in lege veteri non fuisse exemptum a jurisdictione regia, quoad tribunalia sacerdotia, sive civilia, sive criminalia. Inde vero inferre non licet, regem Salomonem habuisse jurisdictionem aliquam in spiritualibus, seu pertinentibus ad Deum, quia causa illa temporalis fuit. Nam crimen, quod Abiathar commisso supponitur, fuit læsæ majestatis, propter conspirationem cum Adonia contra Salomonem. Pœna item exilii temporalis erat. Depositio autem a pontificali munere vel consecuta est ex priori pœna exilii, vel solum fuit separatio quædam ab usu illius muneris, quod facilius tunc fieri potuit, quia duo tunc eo munere fungebantur, scilicet Sadoc et Abiathar, et ita potuit ex justa causa removeri Abiathar, ut solus Sadoc Pontificatum gereret. Et fortasse sicut sacrificia illius temporis carnaalia erant, et cæremonie illæ vocantur a Paulo, *justificationes culturæ, et sanctum sacerdotale*, ad Hebr. 9, ita pontificatus ille non erat adeo spiritualis, quin posset quis propter gravissimum crimen læse majestatis illo privari ab eadem læsa majestate, si jurisdictione illi non deerat. Etenim si poterat illum vita privare, ut verba illa indicant: *Equidem vir mortis es, etc.*, quid mirum quod posset illum pontificatu privare?

3. *Etiam in veteri Testamento Pontifex rege superior extitit.* — Oziæ rex punitus fuit

quia sacerdotum munus subire tentarit. — Adodo vero ulterius, etiam hoc concessò seu permisso, non sequi pontificatum eo tempore non fuisse, et dignitate et potestate, simpliciter superiorem regi. Probatur, quia imprimis illa munera erant omnino distincta, et impermista per se, seu directe. Nam de rege supponimus habuisse supremam potestatem in temporalibus, quod verum simpliciter est de potestate directa, sive extenderetur ad sacerdotes et Pontificem, sive non, a qua nunc quæstione abstrahimus, ut dixi. Deinde Pontifici commissa erat potestas, et administratio spiritualium, seu in his, quæ ad Deum, et ad fidei doctrinam, et legis declarationem pertinebant, ut constat ex Deuter. 17: *Si difficile et ambiguum, etc., usque ad illud: Qui autem superbierit nolens obedire sacerdotis imperio, qui eo tempore ministrat Domino Deo tuo, ex decreto judicis morietur homo ille*, etc. Et ideo 2 Paralip. 19, præsidere dicitur in his quæ sunt ad Deum. In his ergo non poterat rex se intromittere, ut satis probatur ex facto Oziæ regis, qui cum ministerium sacerdotis exercere tentasset, adulendo incensum super altare thymiamalis, et sacerdotibus resistentibus comminaretur, percussus est lepra usque ad diem mortis suæ, ut refertur 2 Paral. 26. Quod factum late expendens Chrysostomus, Homil. 4 de Verbis Isaiæ, etc., sic ad regem affatur: *Mane intra terminos tuos; alii sunt termini regis, alii termini sacerdotii.*

4. Quod autem inter illas duas dignitates major simpliciter fuerit pontificia, expressis verbis subjungit idem Chrysostomus, dicens: *Hoc regnum, utique sacerdotale, illo majus est*, id est temporali. *Neque enim (ait) ex his, quæ ridentur hic, declaratur rex, neque e gemmis illi affixis, neque ex auro, quo amictus est, debet aestimari rex. Ille quidem ea, quæ sunt in terris, sortitus erat administranda, ceterum sacerdotii jus e supernis descendit.* Quod postea late prosequitur. Et quamvis sepe et in multis de sacerdotio novæ legis loquatur, tamen de veteri etiam loquitur, unde inferius ait: *Major hic principatus, propterea rex caput submittit sacerdotis manui, et ubique in veteri Scriptura sacerdotes inungebant reges.* Unde item Chrysostomus, in Psal. 113, exponeus illa verba: *Domus Israel speravit in Domino; adjutor eorum, et protector eorum est; domus Aaron speravit in Domino, adjutor eorum et protector eorum est, excellentiam sacerdotii inde colligit, dicens: Dividit orationem in Israelem, et genus sacerdotale, quia*

non est conferendus privatus cum sacerdote, sed hic eum longe superat. Itaque majoris honoris causa putat, sacerdotale genus divisum esse a reliquo populo filiorum Israel, sub quibus reges etiam comprehendendi manifestum est. Eamdemque excellentiam multi colligunt ex eo quod, Levit. 4, nobilior victima pro Pontifice quam pro rege offerri præcipitur; illud enim fuisse indicium excellentioris dignitatis, notavit Philo, lib. de Victimis, et sequuntur ibi Theodore., Procopius, et alii. Et ex 19 Exodi, n. 27 et 35, solent alia indicia hujus excellentiae desumi.

5. *Ratione dicta Pontificis præminentia ostenditur.* — Ratio vero majoris dignitatis sumi potest ex materia utriusque muneris: nam pontificatus, etiam legalis, proxime ordinabatur ad Deum, et non attingebat homines, nisi per ordinem ad Deum; regnum vero e contrario totum versatur circa homines, et quantum est ex se, seu ex vi. sui objecti, non attingit Deum, nisi quantum ad hominum et reipublicæ bonum expedit. Unde materia pontificatus altioris ordinis, et aliquo modo spiritualis, etiam tunc erat. Ac denique sicut virtus religionis altior est quam justitiæ, ita pontificatus, ad quem munera religionis spectant, dignior est regno, cuius est tractare justitiam. Hæc enim ratio etiam in lege veteri locum habebat. Atque eadem fere proportione ostendi potest excessus non tantum in dignitate, sed etiam in potentia. Nam quod Pontifex tunc etiam haberet suam potestatem, non solum ad ministrandum, sed etiam ad præcipiendum, et judicium in controversiis de lege vel doctrina ferendum, negari non potest, ex locis citatis Deut. 17, et 2 Paralip. 19. Quod vero ejus potestas in suo ordine supra prema fuerit, probant illa verba Deuter. 17: *Qui superbierit, nolens obedire sacerdotis imperio*, etc. Et ex eisdem colligi potest, etiam regem comprehendere; nam universalia sunt; ergo etiam rex erat subjectus huic potestati Pontificis, tenebaturque stare definitionibus ac decretis ipsius, ejusque præceptis in sua materia obedire; ergo ex hac parte erat Pontifex rege superior. Quod si fortasse Pontifex quoad temporalia vel civilia crimina subjeciebatur regi, et ideo diversis respectibus et fundamentis mutuam relationem inferioris et superioris inter se habebant, nihilominus propter excessum in materia et fine, potestas Pontificis major et superior simpliciter appellari potest.

6. *Ex facto Salomonis etiam civilis potestas*

eius supra Pontificem non satis colligitur. — Addo præterea ex facto illo Salomonis (quod ad præsens spectat) non satis colligi, habuisse regem jurisdictionem supra Pontificem in causa temporali seu criminali (quidquid sit, an possit aliunde probari). Probatur primo quia multi censem Salomonem non ut regem, sed ut Prophetam, deposuisse Abiathar, ut Theodoreus ibi, q. 9, et Procop. ibidem, et plures ex modernis. Et fundantur in subjectis verbis: *Ejecit ergo Salomon Abiathar, ut non esset sacerdos Domini, ut impleretur sermo Domini, quem locutus est super domum Heli in Silo.* Erat enim Abiathar ex semine Heli, cui per Samuelem prædicterat Deus, 1 Reg 2, fore aliquando, ut pontificatus familiæ suæ auferretur, propter peccata filiorum ejus, quæ fortasse fuerunt in Abiathar completa. Salomon autem spiritu prophetico id intelligens, et divino instinctu permotus, executioni mandavit, quod Deus fuerat comminatus. Quod si hoc ita est, nihil ex illo loco colligi potest de potestate seu jurisdictione ordinaria regum supra Pontifices, quia illa fuit extraordinaria. Atque hæc responsio facile sustineri potest, probari autem difficile; quia verba illa, *ut impleretur*, etc., frequenter dicuntur, etiamsi comminationes Dei per malos ministros, et mortes aut violentias injustas impleantur. Quia per illa verba non redditur ratio quæ movet hominem ad operandum, sed quæ Deum movit ad permitendum, seu tantum significant consecutionem unius ex alio, non causam. Sicut de militibus crucifigentibus Christum dicitur, divisisse vestimenta, *Ut impleretur*, etc., Matth. 27. Nihilominus tamen illa responsio probabilis est, quam auctoritate Innocentii III, in libro sequenti, confirmabimus, et eam defendit Cardinal. Bellarminus, tum ex aliis Scripturæ locis, tum ex ponderatione verbi hebraici, in c. 45, contra Barclai.

7. Alii vero non dubitant dicere Salomonem in eo facto injuste egisse, usurpando potestatem quam non habebat. Ego vero id affirmare non audeo, propter verba Scripturæ, quæ ex c. 3 allegavi, et quia apud antiquos Patres, et expositores non invenio factum illud inter peccata Salomonis numeratum, eive in culpam tributum. Quocirca si nec jurisdictionem, nec peculiarem instinctum, aut revelationem habuit, potius excusarem illum, dicens, relegasse vel separasse Abiathar, qui contra ipsum conspiraverat, non puniendo delictum, sed quasi defensioni suæ, et con-

servationi pacis et regni consulendo. Nam si Abiathar contra ipsum conspiraverat, et Adoniæ amicitia conjunctus erat, timere non immerito poterat Salomon, ne post Adoniæ mortem Abiathar in pontificatus ministerio, et Hierosolymis manens, aliquid in suam perniciem moliretur. Tales ergo circumstantiae tunc occurrere potuerunt, ut posset rex prudenter et sine peccato illo modo cogere Pontificem, etiam si jurisdictionem in illum non haberet.

8. *Argumentum, ex veteri pontificatu ad novum d'sumptum, nullum est in praesenti causa.* — Addo vero ultimo, etiam si daremus (quod nunc non concedimus) Pontificem in lege veteri non fuisse exemptum a potestate coercitiva regis, nullum inde argumentum sumi ad tempus legis gratiæ. Nam potestas regum in lege gratiæ in se non est major quam fuerit in lege veteri; in utraque enim est mere civilis, et naturalis ordinis ac originis, quamvis in lege veteri fuerit specialiori modo a Deo collata. Dignitas autem et potestas pontificia est longe major, et altioris ordinis, ut ex hac tenus dictis satis constat, et in tractatu de Legibus dictum est. Ideoque nullum argumentum fieri potest a Pontifice veteri ad Christi Vicarium, in his, quæ ad subjectionem et imperfectionem pertinent. Nam Mosaico Pontifici non sunt datae claves regni cœlorum, neque illa potestas ligandi et solvendi, cuius actio in terris rata habetur in cœlis, quæ Summo Pontifici Vicario Christi datae sunt cum supra Ecclesiæ gubernatione longe majori, quam haberet vetus Pontifex ad regendam synagogam, cui nullibi dictum est: *Pasce oves meas*, sicut dictum est Petro. Ergo multo magis pugnat cum pontificatu legis novæ subjectio ad temporalem principem, quam in lege veteri repugnaret, ac proinde ex factis legis veteris nullum argumentum ad legem novam sumi potest. Præterquam quod pontificatus illius legis ad cæremonialia ejus pertinebat, quæ jam omnino cessarunt, et nova institutio facta est, secundum quam suprema potestas et exemptione Vicario Christi data est.

9. *Instantia hæreticorum.* — *Responsio.* — Sed urgent adversarii, postulantes a nobis ut hanc institutionem ex Scriptura ostendamus, utunturque altero modo contra nos argumentandi ex Scripturis, quod supra negativum vocavimus, nimirum, quod nullibi in novo Testamento scriptum inveniatur, Pontificem Romanum habere primatum seu poten-

statem in reges, præsertim quæ ad temporalia aliquo modo extendatur. Si autem quæ hactenus diximus expendantur, non solum facile huic argumento respondemus, sed etiam plane evidenter in regem Angliæ illud retorquemus. Primum enim, quod attinet ad potestatem et primatum in reges, jam constat ex superioris dictis, ubi declaravimus quomodo hæc potestas ex Scriptura et verbis Christi colligatur, neque esse necessarium ut ipsa etiam collectio in Scriptura sit expressa, sed satis superque esse, ut traditione et definitione Ecclesiæ declarata ac firmata sit. Quod vero ad exemptionem pertinet, præterquam quod ex ipsa superiori potestate manifeste colligitur, ex verbis etiam Christi, et simili Ecclesiæ traditione in libro sequenti probabitur.

10. *Argumentum adversariorum in ipsis retorquetur.* — Ad argumentum ergo negativum, negamus potestatem Pontificis Romani in reges ex Scriptura non probari. Retorquemus autem argumentum hoc modo: primatus regis Angliæ non probatur ex Scriptura, et, secundum fidem ejus, nihil est credendum quod in Scriptura non continetur; ergo secum repugnat, illum asserendo, et subditos ad illum credendum cogendo. Major probatur, quia ex veteri Testamento non ostenditur, tum quia omnia testimonia, quæ afferruntur, id non probant etiam de statu legis veteris, ut vidimus; et licet probarent de illo tempore, nihil pro statu legis novæ efficerent, ut etiam ostensum est. Neque etiam ex novo Testamento probari potest; nam omnia testimonia, quæ rex adducit, nullius momenti sunt, ut ostendimus. Unde Sacellanus ejus (ut relatum invenio) ingenue fassus est, fundamentum illius primatus in solo veteri Testamento queri oportere, et nullum illius in novo vestigium aut exemplum inveniri. Idemque argumentum fieri potest contra exemptionem regis Angliæ a jurisdictione coactiva Pontificis, nam illius fundamentum, si quod esse posset, esset certe in veteri Testamento quærendum; in novo autem nullum habet, sed pugnat potius cum generalibus verbis Christi: *Quodcumque ligaveris, et, Pasce oves meas.*

CAPUT XXVII.

ALIIS OBJECTIONIBUS EX CONCILIIS SUMPTIS
SATISFIT.

1. Prima objectio. — Addit præterea rex Angliæ in sua Praefatione, pag. 22, *prædicatam in reges potestatem, a Pontificibus usurpatam, cum Conciliis et Patribus pugnare;* dictique, in sua Apologia id demonstrasse. In ipsa vero Apologia, pag. 29, imprimis inducit Concilium Arelatense, tempore Caroli Magni congregatum, quod in fine capitulo rum ita concludit: *Hæc igitur sub brevitate, quæ emendatione digna perspeximus, quam brerissime adnotarimus, et D. imperatori præsentanda decretinus, poscenes ejus clementiam, ut si quid hic minus est, ejus proridentia supplicatur; si quid secus quam se ratio habet, ejus iudicio emendetur; si quid rationabiliter taxatum est, ejus adjutorio dicina opitulante clementia perficiatur.* Ex quibus verbis colligere vult rex Angliæ, Patres illius Concilii recognosse imperatorem ut judicem, et superiorem suum, et suorum decretorum.

2. Solutio. — Nihil tamen minus ipsi senserunt, aut imperatorem sentire existimarunt. Nam in prologo ejusdem Concilii sic de imperatore loquuntur: *Ecclesiæ Dei statum vigili instantia roborare disponit.* Et infra: *Omnibus Dei sacerdotibus obsecrans et obtestans, ut Ecclesias, quas regendas suscepérunt, pia prædicatione instruant,* etc. Et in fine prædictorum verborum, non postulant sua decreta ab imperatore confirmari, sed ejus adjutorio perfici, id est, executione mandari. Regimen vero ecclesiæ non imperatori, sed sibi creditum esse cognoscunt: duo vero imperatoris officia in hujusmodi rebus indicant, scilicet, exhortari et adjuvare pastores Ecclesiæ in suo regimine, quæ, ut saepe diximus, ad jurisdictionem non pertinent, sed ad pietatem, et humanam potentiam, seu auctoritatem. Est præterea in verbis illis advertendum, in eis non esse sermonem de rebus fidei, sed de decretis pertinentibus ad moralem usum, ut patet ex verbis illis, *quæ emendatione digna perspeximus, quam brevissime notarimus.* Quia ergo in illis multa decreta erant, quæ laicos simul cum clericis contingebant, ut patet ex cap. 4, 5, 12, 13, 15, 22 et 23, ideo prudenter fecerunt illa imperatori præsentando, ut ejus auctoritate adjuti, ea possent facilius executioni mandare. Cætera autem verba urbanita-

tis, modestiae et humilitatis sunt, ut ex usu similius verborum constat, ideoque vanum est ex illis propriam subjectionem vel jurisdictionem colligere.

3. Secunda objectio ex quibusdam provincialibus Conciliis. — *Dicitur.* — Secundo ob jicit rex, sex Concilia generalia, quæ ait, *sese penitus Carolo Magno tradidisse.* Nominat autem Concilium Francofordiense, Arelatense, Turonense, Cabilonense, Moguntinum, ac Rhemense. Sed imprimis non video cur hæc generalia Concilia voet, cum fere omnia provincialia sint, et ad summum quædam sint nationalia; deinde nihil in dictis Conciliis reperio, propter quod dicantur, *se penitus Carolo tradidisse.* Et imprimis Concilium Francofordiense sine dubio generale non fuit, nam, ut ex titulo Epist. ejusdem Concilii ad præsules Hispaniæ constat, solum Episcopi Germaniæ, Galliæ et Aquitaniæ in eo intefuerunt, et de legatis Apostolicis ejusve confirmatione nulla fit mentio. De Carolo autem Magno in titulo libelli sacrosyllabi solum dicitur, Concilium fuisse habitum sub præsentia Clementissimi Principis Caroli. Ubi Carolus non ut auctor, sed ut exhortator et defensor, neque ut pars Concilii, sed ut honorificus testis ponitur. Et quamvis in principio libri sacrosyllabi Carolus necessitatem extirpandi quemdam errorem Concilio proponat, postea vero solum Concilium est, quod veritatem docet in discursu illius libri, cuius auctor dicitur fuisse Paulinus, qui in fine libri sic ait: *Nos autem Domini, et charissimi fratres, sequentes præcedentium Patrum sanam fideli doctrinam, respuentes per omnia deliramenta nugacium hominum, corde credamus ad justitiam, et ore confiteamur ad salutem,* etc. Postea vero solum orat pro Carolo Magno, *ut Deus eum protegat et defendat,* etc., eumque postea precatur, ut contra visibiles hostes pro Christi amore dimicet. Neque ibi aliud verbum invenio, quo illud Concilium *se penitus Carolo tradiderit.* Satiusque fecisset rex Angliæ, si in actis illius Concilii considerasset, eumdem Carolum, in epistol. ad Eli pandum, et alios Hispanos sacerdotes, non Patrem, aut primatum Ecclesiæ, sed filium et defensorem S. Dei Ecclesiæ seipsum appellare. Item potuisset advertere, Patres illius Concilii, cum in fine dicti libri sententiam protulissent, statim addidisse, *reservato per omnia juris privilegio Summi Pontificis Domini et Patris nostri Adriani, primæ sedis Papæ.* Item notare posset, quod inferius

aiunt, et *B. Petri*, primi *Pastoris Ecclesiæ*. Ac denique notari potest, solam Synodum Episcoporum scripsisse doctrinam fidei ad Elipandum et alios; postea vero scripsisse Carolum, tanquam protectorem, et defensorem Synodi.

4. *Ad Concilium Turonense*. — *Ad Concilium Cabilonense*. — De Concilio Arelatensi jam diximus. In Turonensi autem nihil aliud invenitur, nisi quod in ejus præfatione illum laudant, et saluberrimis ejus exhortationibus illuc convenisse fatentur; in fine autem his verbis concludunt: *Hæc nos in conventu nostro ita ventilavimus, sed quomodo deinceps p'issimo Principi nostro de his agendum placebit, nos fideles famuli libenti animo ad nutum et voluntatem ejus parati sumus*. Quid enim aliud religiosi et prudentes, ac modesti Episcopi dicturi erant ad pium imperatorem, qui sancto zelo ea tantum, quæ ad bonum Ecclesiæ pertinebant, procurabat, non tanquam Ecclesiæ gubernator, sed tanquam filius et defensor? In Concilio autem Cabilonensi, in principio, habentur similia verba supra tractatis ex Concilio Arelatensi, et ideo idem repetere necesse non est. Nam in illo Concilio solum agitur de moribus, et inter illius decreta etiam inveniuntur aliqua laicis communia, ut c. 18 et 21, et maxime 43. Ubi eam ob causam in adhibendo remedio quibusdam publicis et communibus vitiis, sententia imperatoris expectanda dicitur. Neque aliud verbum in illo Concilio invenio, quo se penitus imperatori tradiderit. Sed in c. 66 tantum decretum est, ut ab omnibus inde sinenter oretur pro rege, quod longe diversum est. Imo ibi additur dixisse Concilium, Scripturarum monita et canonum instituta diligentí indagatione inquirenda, et simili observatione perficienda esse, in quo non imperatoria, sed ecclesiastica auctoritas post Scripturas commendatur. Quin potius illi subjectioni Concilii ad imperatorem, quam exaggerat rex Angliæ, repugnat cap. 28 et 37 ejusdem Concilii. Nam in priori dicitur, de gradibus propinquitatum, matrimonia utique prohibentium, vel irritantium, canones ecclesiasticos consulendos esse, non regem. Posteriori vero dicitur, Conciliorum canones a sacerdotibus legendos esse et intelligendos, quia per eos vivere debent et docere.

5. *Ad Moguntinum Concilium*. — Idem fere judicium est de Concilio Moguntino, nam licet in Praefatione Concilii Patres eodem honore tractent imperatorem, et omnia ad il-

lum referant, sicut præcedentia, nihilominus satis ibidem distinguunt potestates, et laicis controversias mundanarum legum, *vulgique justicias* (ut aiunt) committunt, et unicuique personæ et statui proprium honorem impendunt: *Secundum dictum (inquiunt) B. Petri, primi Pastoris Ecclesiæ*¹. Unde inferius subdunt: *Insuper etiam congruum nobis esse videbatur, ut sacerdotes et Ecclesiæ Dei jure legitimo et inconcluso honorarentur: de quibus Dominus ait: Qui vos audit, me audit, et qui vos recipit, me recipit. Qui autem me recipit, recipit eum qui me misit*². Et *Apostolus ad Hebreos: Obedite, inquit, præpositis vestris, et subjecete eis. Ipsi enim perrigilant, quasi rationem reddituri pro animabus vestris*³. Inferius vero, in c. 6, cum de filiis exhiberetis a parentibus quædam disponerent, quoniam civilem materiam attingere videbantur, addunt: *Quantum ad nos, vel ad nostram pertinet potestatem, et ad imperatorem aiunt: Quod si forte extra officium nostrum aliquibi inventum fuerit admonere Vestram Clementiam audeamus, ut emendentur. Ubi aperte sua potestate in causis spiritualibus et piis disponunt, ubi autem sæculare auxilium necessarium est, illud ab imperatore postulant. Sicque in c. 7, in causis pauperum aiunt: Hoc omnino emendetur per iussionem vestram. Et in c. 8, optime de utraque potestate loquuntur.*

6. *Ad Concilium Rhemens*. — Denique in Concilio Rhemensi fit quidem in principio honorifica mentio imperatoris, nihil autem ei tribuitur, quod jurisdictionem aliquam in Concilio ei concedere videatur. Imo cum in principio dicatur (quod in superioribus etiam quatuor Conciliis dictum erat), *conventum illum a Domino Carolo piissimo Cæsare, more priscorum imperatorum fuisse congregatum*, quasi in declarationem illius moris additur, *ordinante Ulfario, ejusdem Sanctæ Sedis Archiepiscopo*. Quod paulo post in Conciliis etiam generalibus explicabimus. Nam hæc quinque, de quibus diximus, provincialia tanquam sine dubio fuerunt, et ideo convocatione propria, et cum potestate jurisdictionis ad Archiepiscopum pertinebat, tribuitur autem imperatori tanquam petenti, et per temporalia subsidia cooperanti.

7. Tertio, objicit rex quatuor prima gene-

¹ ¹ Petri 2.

² Luc. 40.

³ Hebr. 13.

ralia Concilia : *Imo, et alia (inquit) quatuor sic vulgo appellata, imperatoris prudentiae ac pietati sese in omnibus subjecisse. Adeo ut Ephesinum illud quater satis distincte inculcat, se accitos coisse imperatoris oraculo, nutu, sanctione et mandato.* Inducit præterea verba ejusdem Concilii in epistola ad Augustos, ubi Patres dicunt, *universos se supplices ad pietatis ejus dominationem confugere, ut quæ contra Nestorium et illi consentientes gesta sunt, robur suum haberent.*

8. *Solutio.* — Verumtamen in quatuor primis Conciliis dissimulat rex ea omnia, in quibus Episcopi Romani primatus et potestas supra imperatores et supra Concilia generalia ostenditur, et unum tantum vel aliud verbum arripit, quo imperatoria dignitas in suo gradu commendatur, et facilem habet ex aliis locis intelligentiam. Et quoniam de Concilio Nicæno nihil in particulari rex adducit, et multa a nobis in superioribus allegata sunt, nihil hic addere necesse est, præsertim cum sit notum, quantum Constantinus imperator in illo Concilio Episcopis et eorum potestati detulerit.

9. Ex Concilio etiam Constantinopolitano I, nihil rex notat, cum tamen ignorare non debat quid Patres illius Concilii ad Damasum Papam scripserint, nimirum : *Mandato litterarum superiore anno a Vesta Reverentia post Concilium Aquileiense ad sanctissimum imperatorem Theodosium missarum, ad iter duntaxat Constantinopolim usque faciendum nos præparavimus, atque de hoc uno Concilio celebrando consensum Episcoporum una nolis cum attulimus*¹. Ecce quomodo imperatores ad cogenda Concilia concurrunt, scilicet, vel impetrando et postulando a Pontifice convectionis mandatum, vel illo obtento illius executionem procurando, vel in virtute illius jubendo.

10. Ex Concilio etiam Ephesino posset rex Theodosii et Valentiniani imperatorum verba, quæ in epistola ad Concilium posuerunt, notare. Cum enim Candidianum comitem ad Concilium mitterent, ut esset quasi Concilii protector, et pacis conservator, subjungunt : *Sed ea lege et conditione, ut, cum quæstionibus et controversiis, quæ circa fidei dogmata incident, nihil quidquam commune habeat; nefas enim, qui sanctissimorum Episcoporum catalogo adscriptus non est, illum Ecclesiæ negotiis et consultationibus sese immiscere.*

Habetur hæc epistola in tomo primo illius Concilii, cap. 32. Et in cap. 29 habetur epistola Cyrilli ad Cœlestinum Papam, in qua petit ut sententiam suam in causa fidei, quæ tunc contra Nestorium tractabatur, Macedonia et totius Orientis Episcopis perspicue per litteras exponat. Et ex tomo secundo, præsertim a c. 13, constat nihil in illa Synodo sine Pontificis auctoritate actum esse. Præterea in actis præambulis ad Concilium Chalcedonense habetur epistola Valentini et Marciani Augustorum ad Leonem Papam, ad quem ita loquuntur : *Tuam Sanctitatem principatum in episcopatu dicinæ fidei possidentem sacræ litteris in principio justum credimus alloquendam, invitantes atque rogantes, ut pro firmitate et statu nostri imperii æternam divinitatem Tua Sanctitas deprecetur, et ut tale propositum atque desiderium habeamus, quatenus omni impio errore sublato per celebrandam Synodum, te auctore, maxima pax circa omnes Episcopos fidei catholicae fiat.* In quibus verbis maxime expendo illam particulam, *te auctore;* nam ex illa cum præcedentibus optime explicatur, quid imperator, quidve Pontifex in congregando Concilio conferat, scilicet imperator intercessionem, Pontifex auctoritatem. Eademque verba sufficiunt ad explicanda verba Concilii Ephesini, de convocatione illius per imperatorem. Quæ vero Patres ejusdem Concilii post illius definitionem ad Theodosium scripserunt¹, supplicantes ut in illo gesta, ac definita suum robur obtineant, eundem supra explicatum sensum habent, scilicet, petiisse Patres illos, ut auctoritate sua fidem protegerent, ac defenderent. Unde inferius², in alia epistola ad Augustos, eos exhortantur ut vestigia majorum snorum imitentur, ut *quenadmodum (inquit) singuli eorum Sanctorum Patrum Synodis imperii sui tempore celebratis paruerunt, Patrumque sanctiones legibus suis munierunt, et quam illis deferrent obseruantiam, decretis suis ostenderunt, ita et vos, etc.* Ubi clare imperatoris esse docent parere, et obseruantiam exhibere decretis Synodorum generalium, deinde vero suis legibus ea munire, et executionem procurare. De quo puncto legi etiam potest Synodus tertia Romana sub Symmacho, ubi non solum Patres, sed etiam Theodosius rex Pontifici tribuunt

¹ Habentur tom. 4 ejusdem Concilii, c. 14.

² Cap. 16.

potestatem cogendi Concilia, licet ad petitio-
nem imperatorum aut regum illa frequenter
utatur.

CAPUT XXVIII.

PATRUM TESTIMONII, QUÆ REX OBJICIT, SATISFIT.

1. Primum Augustini testimonium. — *Hoc testimonium nihil favet regi.* — Ulterius objicit rex quasdam Patrum sententias¹. Prima est Augustini, Psal. 124, ubi ait, Julianum, tametsi iniquum, infidelem et idololatram, nihilominus fuisse verum dominum temporalem, illique fuisse a Christianis obediendum. At quis hoc negat? superius enim ex professo a nobis probatum est, infideles etiam esse posse veros reges et dominos, eisque in rebus justis et licitis parendum esse. Quod etiam verum esse dicimus de rege haeretico et schismatiko, quamdui per Ecclesiam non deponitur, seu regno privatur. Atque ita locutus est Augustinus. Quod si rex dicit non posse deponi, oportet ut aliunde id probet, nam Augustinus certe id non dicit, et in aliis locis generaliter docet justum esse, haereticos per cruciatus et poenas ad fidem compelli. Quod si rex argumentum inde sumat, quod apostata ille impiissimus per Ecclesiam depositus non est, respondemus argumentum nullius esse momenti; non enim ideo id facere omisit Ecclesia, quia jure non posset, sed quia otiosum fuissest id tentare quod exequi tunc non poterat.

2. Secundum testimonium ex Tertulliano. — *Hoc testimonium tantum supremam regum in temporalibus potestatem commendat.* — Secundum testimolium est Tertulliani, lib. ad Scapulam, c. 2: *Christianus nullius est hostis, nedum imperatoris, quem sciens a Deo suo constitui, necesse est ut et ipsum diligat, et reveretur, et honoret, et salvum velit, cum toto Romano imperio quoisque saeculum stabit, tamdiu enim stabit.* *Colimus ergo et imperatorem sic, quomodo et nobis licet, et ipsi expedit, ut hominem a Deo secundum, et quidquid est a Deo consecutum, et solo Deo minorem.* *Hoc et ipse volet.* Sic enim unius major est, dum solo vero Deo minor est. Hoc vero testimonio et alio Tertulliani nos etiam supra usi sumus, ut potestatem supremam regum temporalium probaremus, nihilque aliud ex verbis illis cum fundamento colligi potest. Nam

quod imperatorem vocat *hominem a Deo secundum*, ideo dictum est, quia in ordine temporalis regiminis imperator vel rex supremus immediate sub Deo est, et nullum alium in eo ordine superiore recognoscit. Atque in eodem sensu accipiendum est, quod illum vocat *solo Deo minorem*, utique in suo imperio, obedientia, ac regimine pure civili ac temporali. Nam alioqui manifestum est posse unum regem vel imperatorem temporalem esse majorem alio in potestate et ditione, etiam si unus alteri non subjiciatur. Majorisque ratione Pontifex major est imperatore, quia non solum dignitate et ditione excedit, sed etiam illi superior est in alio excellenter ordine, et in ordine ad altiorem finem. Sicque locum habet limitatio, quam in eisdem verbis Tertullianus adhibet: *Colimus imperatorem sic quomodo et nobis licet, et illi expedit*, utique in his quæ potestati illius subjacent, et Deo ejusque fidei non repugnant. Nam cum in his excedit et delinquit imperator, jam non legitima potestate utitur, et si Christianus sit, ut talis superiore habet, a quo corrigitur.

3. Tertio ex Justino. — Neque plus probant verba, quæ tertio loco ex Justino addueit, Apolog. 1 pro Christianis, quæ nos etiam supra tractavimus, et nihil probant, nisi imperatorem et regem, quamdui rex est, esse verum dominum, cui obediendum est in his quæ illi subjacent. Nemo autem dubitat posse regem, vel regno renunciare, vel illud amittere, et tunc etiam dominium ejus ac potestatem, et consequenter etiam obligationem illi obediendi cessare.

4. Quarto ex Ambrosio. — Quarto adducit verba Ambrosii, Oratione contr. Auxent., de Basilic. non tradend., in initio: *Dolere potero, potero flere, potero gemere, adversus arma, milites; Gothos, quoque lachrymæ mee arma sunt. Talia munimenta sunt sacerdotis.* *Aliter neque debo, nec possum resistere.* Quibus verbis videtur velle concludere rex Angliae, Pontifices non posse iniquis schismaticorum regum conatibus potestate resistere, sed solo verbo, exhortatione ac precatione. Longe vero diversa erat mens Ambrosii, quam satis ostendit, quando Theodosio non sola preece, sed imperio, et spirituali potestate restitit. Sententia igitur Ambrosii fuit, non esse sacerdotis officium arma sensibilia, et materialia contra imperatorem tyrannum aut rebellem sumere, et militum castris illi resistere. Et nihilominus non negat habere Ecclesiam

¹ In Apolog., p. 26.

potestatem qua illi resistat, sed quia hæc sæpe contra incorrigibiles et contemptores efficax non est, ideo ait ultimum refugium sacerdotis in lachrymis et precibus ad Deum positum esse. Potuisset autem rex Angliæ attentius expendere verba, quæ in fine orationis posuit Ambrosius : *Quid honorificentius quam ut imperator filius Ecclesiarum esse dicatur? Quod cum dicitur, sine peccato dicitur, cum gratia dicitur. Imperator enim bonus intra Ecclesiam, non supra Ecclesiam est. Ergo sicut filius corrigi poterit a patre, et ut inferior a superiori, quia si superior non est, profecto inferiorem esse necesse est; nam duo capita æqualia sine schismate esse non possunt. Estque similis locus, eodemque modo explicandus, apud Chrysostomum, Homil. 4 de Verb. Isai. : Nam sacerdotis tantum est arguere, liberamque præstare admonitionem, non morere arma, non clypeos usurpare, non vibrare lanceam, nec arcum tendere, nec jacula mittere, sed tantum arguere, ac liberam præstare admonitionem.* Sub verbo enim arguendi, intelligendum est comprehendi quicquid ad correctionem ecclesiasticam perfinet, et tunc etiam locum habet quod idem Chrysostomus premittит : *Ubi sacerdos contemptus est, dignitasque sacerdotii conculcata, neque quicquam præterea potuit sacerdos* (dicit Deo) : *Ego quod erat mei officii præstiti, nihil amplius possum, succurre sacerdotio, quod conculcatur*, etc. Agit autem de Azaria, qui quantum potuit restitit Oziæ, et cum porprosione de Pontifice novæ legis intelligendum est.

5. *Quinto ex Optato.* — *Verus ejus sensus.* — Quinto loco adducit verba Optati, lib. 3 contr. Parmen. : *Super imperatorem non est, nisi solus Deus, qui fecit imperatorem.* Sed hæc verba eodem modo quo similia Tertulliani exponenda sunt, scilicet, imperatorem esse in suo ordine sub Deo supremum, quod non excludit subordinationem ad spiritualem potestatem, quam ut Christianus habet. Et hanc fuisse intentionem Optati ex aliis locis ejus in superioribus allegatis, et ex occasione quam tunc habuit imperatoriam dignitatem tuendi, satis manifestum est. Agebant enim ibi contra Donatum, qui imperatorum leges despiciebat, dicens : *Quid est imperatori cum Ecclesia, quæ, ut ait, contra præcepta Apostoli Pauli meditabatur. De quibus præceptis inferius ait servanda esse, etiam si imperator gentiliter riveret.* Quod ergo, ait, solum Deum esse majorem imperatorem, etiam de imperatore gentili intelligit, de quo cogi-

tare non potuit, habere in Ecclesia primatum, vel spiritualem potestatem; loquitur ergo de imperatore solum quoad temporalem potestatem.

6. *Sextum testimonium ex Gregorio.* — Sexto, majorem vim facit in verbis Gregor., lib. 2, ep. 61, indict. 2, alias c. 100, quæ est ad Mauricium imperatorem, super legem quam tulerat, ut milites in monasterio non suscipierentur, quæ erat injusta, et contra supernaturalem finem, et nihilominus non est a sus revocare illam per eam indirectam potestatem, quam nos illi tribuimus; non ergo illam in se agnoscebat. Unde postquam Gregorius, verbis submissionis et humilitatis, imperatorem allocutus fuerat, eum *dominum suum, seque famulum pietatis sue appellans*, deinceps iniquitatem legis ostendens, inter alia sic inquit : *Ego rero hec dominis meis loquens, quid sum, nisi pulris et cinis? sed tamen quia contra Dominum Deum hanc intendere constitutionem sentio, dominis tacere non possum.* Et nihilominus in fine epistolæ ita concludit : *Ego quidem jussioni subjectus eamdem legem per direras terrarum partes transmitti feci, et quia lex ipsa omnipotenti Deo minime concordet, ecce per suggesti mis meæ paginam serenissimis dominis nunciavi. Utrobique ergo quæ debui exclexi, qui et imperatori obedientiam præbui, et pro Deo, quod sensi, minime tacui.*

7. Respondemus, satis in superioribus ostensum esse, quid D. Gregorius de imperatorum potestate in Ecclesia senserit, cum in Psal. 5 Pœnit., alias 101, circa versum illum : *Tota die reprobarabant mihi inimici mei, contra eumdem Mauricium imperatorem scriptum reliquerit : In tantum suæ temeritatem exten dit resaniae, ut caput Ecclesiarum Romanam Ecclesiam sibi rendicet, et in domina gentium terrenæ jus potestatis usurpet.* Et infra, in alium versum : *Initio tu, Domine, terram fundasti, eumdem Mauricium inter Ecclesiæ persecutores annumerat, dicens : Quid Nero, quid Diocletianus, quid denique iste, qui hoc tempore Ecclesiam persequitur?* Ex hoc ergo loco, alterius intelligentiam recte colligunt Cardinales Baronius et Bellarminus¹. Cum enim ille imperator, licet catholicus, et alias Ecclesiæ benefactor, sua potestate abutetur, prudenter egit Gregorius ad eum sub-

¹ Responsio Baron., ann. 593, n. 14 et sequentibus. — Bellarm., in Respons. ad regem Angliæ.

misso scribendo, et blande illum exhortando et instruendo, ut facilius illum ad legis emanationem vel revocationem induceret. Igitur non idcirco statim potestate sua usus non est, quia illam non haberet, sed quia non speravit tunc fructum, si rigore uteretur. Et ideo in principio ejusdem epistolæ, ad hoc insinuandum, et ad intendam sui muneric dignitatem, ait : *Ego autem indignus pietatis Vestrae famulus, in hac suggestione, neque ut Episcopus, neque ut serrus jure reipublicæ, sed jure privatō loquor.* Et nihilominus providentiam erga Ecclesiam eo tempore necessariam non omisit, nam legem illam, quam in fine illius epistolæ ad varias mundi partes transmitti fecisse dicit, non sine debita correctio-ne, et moderatione transmisit, ut constat ex ejusdem epistola ad Episcopos diversarum regionum, quæ habetur lib. 7, indict. 4, ep. 11. Ubi postquam dixit : *Legem quam imperator dedit, etc., vestre studi firmati transmittere, etc.,* subdit : *Hoc maxime exhortans, etc., ut nisi eorum vita fuerit subtiliter inquisita, suscipiendo non sint; post sufficientem autem probationem et examinationem, ait suscipiendo esse.* In quo manifeste usus est auctoritate quam habebat supra leges civiles, in ordine ad bonum animæ et spiritualem finem moderando legem.

8. *Alia Patrum testimonia imperatoriam dignitatem commendantia, eorumque explicatio.* — Ultimo, possumus addere nonnullas alias Patrum locutiones, quæ nimium potestati, seu dignitati civili favere videntur. Ignatius, epistola ad Smyrnenses : *Honorare oportet et regem, neque enim rege quisquam præstantior, aut quisquam similis ei in rebus omnibus creat's.* Intelligitur autem de præstantia et similitudine in potestate, utique in suo ordine, ut diximus. Unde ibidem de Episcopo etiam ait, esse honorandum, *ut principem sacerdotum, imaginem Dei ferentem, et Christi.* Et infra : *Nec Episcopo, qui Deo consecratus est pro totius mundi salute, quicquam majus est in Ecclesia.* Quod etiam respective et cum proportione intelligendum est. Cyrilus etiam Alexandrinus, lib. de Recta in Deum fide, ad Theodosium, in principio, sic ait : *A Deo, cuius est summa celsitudo, roris clarissimi reges humanæ claritudinis fastigium incomparabilibus excellentiis pra omnibus aliis exurgens, et exaltatum, eximiaque ac honesta sors sunt data.* *Vos enim estis summarum dignitatum fontes, et supra omnem eminentiam, humanæque felicitatis principium ac origo.* Et

Vestræ quidem majestatis clementissimis nutibus, quidquid regni solis substratum est, ut ritam legitimam, et admirabilem agat, gubernatur; at qui jugum non ferunt, facile a vestro robore victi cadunt.

9. *In predictis aliam dignitatem regia præstantiorem insinuavit Cyrus.* — Hæc autem verba superius dictam intelligentiam facile recipiunt, et tanta moderatione ac prudenter scripta sunt, ut non solum verum sensum statim per se prodant, sed etiam esse aliam potestatem excellentiorem, et plus quam humanam satis indicent. Ideo enim dixit Cyrus, datum esse regibus humanæ cel-situdinis fastigium, quia sacerdotale et Pontificale plus est, quam humanum. Unde cum postea dixit, imperatorem esse summarum dignitatum fontem, et supra omnem eminentiam, statim addidit, *humanæ felicitatis principium et origo.* Nam illa omnia de dignitatibus terrenis ac temporalibus, quæ ad humanam, id est, naturalem seu civilem felicitatem ordinantur, intelligenda sunt. Quod magis declarant illa verba : *Quidquid regni solis substratum est, ut ritam legitimam et admirabilem agat, vestris nutibus gubernatur.* Sciebat enim Cyrus, esse multa quæ regni solis non substernuntur, quæ tunc clarius explicare non erat necesse; quia non doctrinam ecclesiasticam tradere tunc instituerat, sed tantum imperatorem ad veram de Christo fidem audiendam benevolum reddere.

10. Ultimo, possunt notari verba Symmachii Papæ, in Apologet. adversus Anastasium imperatorem, ubi comparans Pontificem cum imperatore in honore eis debito, ait : *Ut non dicam superior, certe æqualis honor est.* Verumtamen ex antecedentibus constat sensus et modestia Pontificis. Dixerat enim : *Conferamus honorem imperatoris cum honore Pontificis, inter quos tantum distat, quantum ille rerum humanarum curam gerit, iste divinarum.* Ex quo principio potuisset quidem expresse concludere, majorem honorem Pontifici esse debitum, propter modestiam vero noluit. Vocavit autem honorem aequalem, non simpliciter, sed secundum proportionem, quatenus uterque eorum in suo ordine supremus est. Postea vero in discursu Apologiae diserte affirmat, et probat habere se auctoritatem superiorem, ad cogendum imperatorem, si hæreticus sit, aut cum hæreticis ab Ecclesia damnatis communicet.

CAPUT XXIX.

OBJECTIONIBUS EX REI NOVITATE, ET FACTIS IMPERATORUM REGUMQUE DESUMPTIS SATISFIT.

1. Primum Pontificis novitatis arguit rex.—Conqueritur ulterius rex Angliæ, quod potestas hæc in christianos principes per ambitionem et abusum sit usurpata, ut in Praefatione ait, pag. 22. Ut autem hoc persuadeat, etiam usum ejus novum esse contendit. Sic enim in Praefatione, pag. 24, dicit, *norum esse et absurdum sénsum illorum verborum Christi : Pasce oves meas, et Quodcumque ligaveris*, ex quo genus illud potestatis colligitur. Et pag. 60, cum dixisset Petrum fuisse illorum Apostolorum, quos Christus elegit, principem, tantum ordine quodam, subiungit: *Nec aliquid sibi amplius trecentis post Christum annis Romanæ Sedis Episcopus arrogavit.* Deinde, ut hanc novitatem suadeat, illidem in generali dicit Romanos Episcopos usque ad Phocæ tempora imperatoribus subiectos fuisse. Sed hoc quam sit a veritate alienum, satis in superioribus ostensum est. Antea verc, pag. 28 et seq., aliqua imperatorum et regum facta recensuerat, quæ ad prædictam novitatem usurpatæ jurisdictionis, et antiquam subjectionem Romanorum Pontificum ostendendam induci possunt, de quibus propterea hic nobis dicendum est.

2. Quam sit antiquus Pontificis primatus.—Prius vero ad generalem de novitate querelam refutandam sufficere quidem possent ea, quæ ad probandam hanc potestatem ex antiquo usu et traditione adduximus. Breviter tamen addimus, si sermo sit de ipsa potestate, tam antiquam esse, quam est antiqua monarchia ecclesiastica institutio, quæ ab ipso met Christo verbis satis expressis facta est. Nam hunc esse legitimum sensum illorum verborum, eumque non novum, sed antiquissimum, imo et perpetuum in Catholica Ecclesia fuisse, satis demonstratum est. In illa vero institutione ac potestate includi jus hoc ad cogendos christianos principes hæreticos, schismaticos, vel Ecclesiae inobedientes, perniciosos et incorrigibiles, evidenter rationibus ac testimoniis ostensum est. Quibus cum rex Angliæ nihil habeat quod respondeat, fingit Catholicos asserere, *posse Pontificem ad libidinem regna tollere, et condonare*, ut ait in Praefatione, pag. 23, imo etiam *pro libidine posse illos ad occisionem ducere*, ut pag. 24

adjungit. Ubi etiam addit, verba illa Christi : *Pasce oves meas*, ita a nobis exponi, *tanquam hoc significarent : Tolle, proscribe, abdica christianos principes atque reges.*

3. Sed (ut iterum jam in superioribus dixi) hæ sunt evasions frivola, vanaque portenta a Protestantibus inventa, ut et regi imponeant, et odium in Catholicos et in veritatem ipsam excitarent. Numquid enim, quia rex Angliæ potestatem habet ad coercendos subditos suos justis pœnis, quando deliquerint contra suas leges, ideo dicendus est ad libidinem suam posse occidere subditos, eosve bonis suis privare? Certe neque subditi sui hoc audire vellent, neque ipse tantam tyrannidem sibi attribui permetteret. Cur ergo in Christi Vicario fingit quod de se puderet audire? Vera ergo novitas in hac tyrannica potestate fingenda a Protestantibus reperta est; antiquitas autem legitimæ potestatis Pontificiæ ad justam principum coactionem, etiam usque ad privationem regnum, si causa sit digna, et ipsi rebelles sint, evidenter a catholice Doctoribus, suppositis Christi verbis, ostensa est; nec de ipsa potestate aliud dicendum superest.

4. Imperator Philippus I catholicus extitit, in eumque Pontifex sua potestate usus est.—Si vero sit sermo de usu, distinguere possumus usum directivæ potestatis et coactivæ, et de utroque facile confitemur non fuisse in Ecclesia erga christianos imperatores aut reges, trecentis post Christum annis, non quia esse non posset, sed quia non erat materia ejus; nulli enim fuerunt illis temporibus christiani principes aut imperatores. Quid ergo mirum si Pontifices, præceptis suis ac legibus, illos gubernare non possent, nec sua potestate cogere, cum Paulus dixerit: *De his qui foris sunt, nihil ad nos?* Solum ergo tune poterant illis fidem prædicare, quamdiu vero illam voluntarie non suscipiebant, et per baptismum non profitebantur, efficacius dirigi aut regi non poterant. Ab hoc autem tempore, breve illud excipio, in quo Philippus imperator christianus fuit, nam in illum Fabianus Pontifex sua potestate, quantum occasio justa tulit, usus est, ut supra ex Eusebio retulimus. Ut hoc exemplo appareat non esse solidam, neque simpliciter veram, illam regis absolutam locutionem, *Negre amplius trecentis post Christum annis Pontifices Romani sibi arrogarunt, quandoquidem, quantum illius temporis occasio tulit*, Fabianus ea legitime usus est. Accedit quod illo etiam tempore Ecclesia usa

est sua potestate spirituali in materia etiam temporali, prout ad suum bonum expediebat, nulla habita ratione civilium legum, sed illas corrigendo aut limitando propter spiritualem finem. Exemplum optimum est in lege facta a quodam Concilio Africano¹, ut Cyrillus refert, ep. 66, ne clericus possit in testamento in tutorem nominari, cum leges civiles neminem a tutela eximi posse disponant, ff. de *Exens. tutor.*, per plures leges.

5. Præterea post illa tempora semper Pontifices usi sunt hac potestate in christianos principes, prius quidem monitis et præceptis eos dirigendo, et ubi oportuit, eorum leges emendando, ut de Gregorio capite præcedenti vidimus, et de aliis supra retulimus: postea vero etiam cogendo, quantum necessitas postulabat et ratio temporum permittebat. Usus enim hujus potestatis coercivæ non est per se necessarius, sed cogente necessitate. Atque utinam necessitas istius usus nunquam fuisset, id est, nunquam fuissent quæ ad illum exercendum obligarent. Quamdiu ergo talia crimina in principibus christianis inventa non sunt, sine præjudicio potestatis potuit talis usus in Ecclesia non esse. E contrario vero, non fuit necesse ut statim ac imperatores christiani apostatae, vel Ecclesiæ rebelles esse cœperunt, tota sua potestate Ecclesia seu Pontifices in eos usi fuerint; quia ex tali uso non fructum, sed majus Ecclesiæ nocumentum timere potuerunt. Unde Augustinus, respondens simili argumento Donati, epist. 204 ad eumdem, ait: *Repetis sicut audio, quod in Evangelio scriptum est, recessisse a Domino septuaginta discipulos, et arbitrio suæ male atque impie dissencionis fuisse permisso, ceterisque duodecim, qui remanserant, fuisse responsum: Numquid et vos rultis ire? Et non attendis, quia tunc primum Ecclesia novello germine pullulabat, nondumque in ea fuerat completa illa prophetia: Et adorabunt eum omnes Reges terra, omnes gentes servient illi. Quod utique quanto magis impletur, tanto majore utitur Ecclesia potestate, ut non solum invitet, sed etiam cogat ad bonum.* Idem ergo in illis primis temporibus, Juliani, verbi gratia, vel aliorum accidit, qui per potentiam et tyrannidem more gentilium Ecclesiam persecabantur. Et nihilominus non desuit circa eadem tempora usus hujus potestatis, quando cum fructu adliberi potuit, ut ex censura Ambrosii in Theodosium, et Innocentii in Ar-

cadium aperte ostenditur, et ita etiam postea successu temporum juxta occurrentes occasiones usus hujus potestatis adhibitus est, ut vidimus.

6. *Argumentum regis, ex imperatoris suffragio in Pontifice eligendo desumptum.* — Sed occurrit rex Angliae ex contrariis factis ostendens contrarium jus imperatoriæ potestatis in Pontifices, nam *imperatoris* (inquit) *assensus longo annorum decursu eligendis Pontificibus intervenit*, etc. Quæ late prosequitur, ex quibus argumentum excellentioris potestatis imperatoriæ desumere conatur. Quia vero de electione Pontificum in propria materia de Pontifice tractatur latius, nunc breviter fatemur servatum esse aliquo tempore, ut electio Pontificis per consensum imperatoris confirmaretur, ut ex Platina in Firmiano Papa, et ex aliis historiis constat, et aperte ex Gregorio, lib. 7, indict. 1, epist. 1, in fine, ubi voluntate imperatoris se factum esse Pontificem illis verbis affirmit: *Ecce serenissimus dominus imperator fieri simiam leonem jussit. Et quidem prævisione illius vocari leo potest, fieri autem leo non potest. Unde necesse est ut omnes culpas ac negligentias meas non mihi, sed suæ pietati deputet, qui virtutis mysterium in firmo commisit.* Addimus vero deinde multis temporibus factos esse Pontifices sine consensu imperatorum aut regum, nimurum, et ante conversionem imperatorum ad christianam fidem, per trecentos et plures annos, et post conversionem Constantini, per alios ducentos annos usque ad Justinianum Augustum, a cuius tempore imperatores jus illud usurpare cœperunt, ut vulgare est in historiis. Unde colligimus non recepisse imperatores hanc potestatem divino jure, quia alias nunquam sine illorum suffragio Pontificis electio valide fieri potuisset. Neque etiam habuisse illam ex vi imperii, tum quia alias a principio illam sibi arrogassent; tum præcipue quia imperium terrenum est et humandum, Pontificis autem dignitas suo modo divina et coelestis est.

7. *Quo jure imperatores in Pontificum electione suffragium aliquando tulerunt.* — Exercuerunt ergo illam potestatem vel usurpatam, vel ab ipsis Pontificibus concessam. Et quidem priori modo illam per vim ac potentiam a Justiniano usque ad Constantimum IV exercuerunt. Atque hanc vim ac tyrannidem deploravil Gregorius in Psal. 5 Pœnit. supra allegatum, et notavit Baron., ann. 590, n. 5, ubi etiam commemorat imperatorum violen-

¹ Cap. *Displacet*, § *Repetis*, 23, q. 4.

tiam, avaritiam et simoniam in extorquenda pro sua confirmatione pecunia, quæ consuetudo usque ad Agathonem Papam duravit, ut sumitur ex c. *Agatho*, d. 36. Quapropter vana est, quam rex sumit ex hac consuetudine, argumentatio, quia ex summa vi et injuria nullum jus colligi potest. Posteriori autem modo dicunt aliqui, usos esse hac potestate Carolum Magnum et Othonem imperatores, virtute privilegiorum quæ Adrianus I et Leo VIII illis concesserunt, prout Grafianus refert in c. *Hadrianus*, 2, et c. *In synodo*, d. c. 63. Verumtamen capita illa Gratiani ex falsis historiis desumpta esse, et privilegia illa ab schismaticis fuisse conficta, late ostendit Cardinalis Bellarminus, in sua responsione ad regem, et latius Cardinalis Baron., ann. 774, a n. 10, et ann. 964, a n. 22, ubi inter alias rationes inde argumentum sumit, quod nulla historia narrat, Carolum vel successores ejus tali privilegio usos fuisse. Et ita omnino evertitur regium argumentum.

8. *Privilegium ab uno concessum ab alio æquali revocari potest.* — Et quamvis hanc Cardinalium sententiam omnino veram esse existimem, ne tamen quis putet solutionem argumenti pendere ex reprobatione historiae, quam nunc examinare non vacat, addendum censuimus (quod etiam Bellarminus non omisit), etiam si vera esset historia, et verum privilegium, satisque de legitimo illius usu constaret, nihil inde inferri contra eminentiam Pontificiæ potestatis; imo in hoc extolli, quod tanta est, ut electio etiam successorum Pontificum ex illius institutione et determinatione pendeat, valueritque partem aliquam, vel electionis vel confirmationis futuri Pontificis imperatoribus ex privilegio communicare. Quod licet aliquis Pontifex concessisset, aliquis etiam successor ejus revocare potuisse. Nam semper summus Pontifex manet imperatore superior, et privilegium, a superiori liberaliter concessum, ab eodem vel æquali successore revocari potest, præsertim si tale privilegium parum sit universalis Ecclesiæ utile, quale illud sine dubio, vel potius perniciosum fuisset. Quod autem imperator, non obstante tali privilegio, semper maneat Pontifice inferior, manifestum est, quia per tale privilegium nulla jurisdictione spiritualis imperatori data esset. Nam jus nominandi, eligendi, vel confirmandi non est jurisdictione, sed auctoritas quædam, quæ (qualiscumque illa sit) versatur circa personam eligendam in Pontificem, non tamen circa Pontificem

jam electum, supra quem neque ipsemet Pontifex potest jurisdictionem aliquam vel potestatem concedere aut delegare. Neque etiam propter tale privilegium imperator a jurisdictione Pontificis exemptus fuit, quia etiam repugnat Pontificem simile privilegium concedere in diminutionem dignitatis et curæ sibi a Christo demandatae. Neque ad effectum talis privilegii est talis exemptione necessaria, nam antequam Pontifex eligatur, non habet locum exemptione; postquam vero electus est, etiam qui illum elegerunt, illi subjiciuntur, ut in Cardinalibus et in aliis electoribus patet. Cursu vero et mutatione temporum privilegium illud sublatum est, meliorque electionis forma instituta, de qua alibi, Deo dante, dicetur.

9. *Alia objectio regis, ex actis imperatorum in Pontifices desumpta.* — *Otho Joannem Pontificem non depositum.* — Pergit rex, objicitque secundo, *passim occurrere imperatorum exempla, qui Romanis Pontificibus suam potestatem abrogarunt.* Adhibetque exempla in Othonem imperatore, qui Joannem XII, Pontificem; et in Henrico III, imperatore, qui Benedictum IX, Gregorium VI, et Sylvestrem III deposuerunt. Sed imprimis licet hæc vera essent, nihil contra veritatem efficarent. Quia ex factis, quæ justa et licita non probantur, nullum ostenditur jus. Deinde dicimus partim vera non esse, partim non fideliter narrari. Nam Otho non depositum Joannem. Aut enim potestate temporali, et hac non potuit legitimate in Pontificem uti, non solum quia ex vi pontificatus erat exemptus, ut libro sequenti ostendam, sed etiam quia jam tunc Pontifex erat rex et supremus in temporalibus, sicut nunc est; vel id fecisset Otho spirituali potestate, et hoc etiam dici non potest, quia nec illam habebat, ut ostendimus, nec legimus illam usurpasse, aut eo errore laborasse Othonem, ut se caput Ecclesiæ faceret. Imo, tam de illo quam de aliis imperatoribus catholicis legimus, nunquam brachio aut virtute sua, sed alicujus Synodi, quam congregari procurabant, auctoritate, de Pontificum causis vel abdicatione tractasse.

10. *Ex allegatis Pontificibus non omnes legitimi extiterunt.* — Unde Platina, in Vita Joannis XII, licet prius dicat Othonem, persuadente cleto, Leonem VIII loco Joannis, qui aufugerat, creasse, nihilominus statim id declarat, dicens, cum Romani instant apud imperatorem, ut alium Pontificem, abrogato Joanne, crearet, respondisse, electionem

ad populum et clerum pertinere, et ita clericum elegisse Leonem, Othonem vero illum suscepisse. Imo etiam indicat Joannem non fuisse depositum propter solos mores, sed quia, *Alberici patris potentia pontificatum occupaverat*; nam in his verbis indicare videtur, non fuisse recte electum, sed per vim et potentiam intrusum. Et hoc sensit Onufrius in Additionibus ad Platinam, dum sentit Leonem VIII fuisse rite electum vivente Joanne. Sed quia fortasse verius est, nec Joannem fuisse rite depositum, nec Leonem valide electum, addendum est Othonem excessisse zelo non secundum scientiam, Synodumque fuisse privatam et illegitimam, potuisseque errare, existimando posse deponi Pontificem propter crimina extra hæresim; vel fortasse magis propter violentiam imperatoris, et humanum timorem id fecit, quam quia sentiret legitimate fieri potuisse. Vide Baronium, ann. 964, n. 45. Quod vero ad alios tres Pontifices spectat, imprimis falsum est, omnes fuisse veros Pontifices, nam de Sylvestro certum est fuisse intrusum et schismaticum. De aliis vero nonnulla etiam dubitatio est, licet probabilius credatur legitimos Pontifices fuisse. Deinde Sylvester non ab Henrico, sed a Benedicto IX, legitimo Papa, ejectus fuit. Ipse item postea non ab Henrico rejectus, sed sua sponte (vel persuasione cuiusdam sancti Abbatis, ut aliqui referunt, vel ut liberius viveret), pecunia accepta, papatu renunciavit. Atque hoc tandem modo Gregorius VI introductus est; quem solum Henricus postea deponendum curavit, in quo potuit idem error qui in Joanne XII contingere, quamvis illum etiam voluntarie cessisse multi tradant. Vide Baronium, anno 1044.

11. Tertia objectio, ex factis regum. — Responso. — Tertio rex post imperatores ad reges transitum facit, et prius generatim dicit, non minori constantia reges hoc in se jus Pontificis temporale aspernatos fuisse; deinde facta quedam aliquorum regum Gallie et Angliae refert, ex quibus concludere vult, nullum jus in reges ex divina institutione habere, nec præscriptione illud assequi potuisse, cum per similia facta satis fuerit interrupta. Sed non censui necessarium in examinanda veritate historiarum circa facta hujusmodi immorari, quia, licet omnia, ut referuntur, admittantur, nihil ad concludendum, quod intenditur, conducunt. Primo ex illa generali ratione, quod facta regum temporalium parum valent ad ostendendum divinum jus, tum

quia illud per se cognoscere vel docere non illorum munus est, sed Praelatorum Ecclesiæ, et præcipue summorum Pontificum; tum etiam quia nimirum sœpe potentia sua freti, et vel ambitione dominationis, vel turpissimi lucri cupiditate illecti, potestatis regiæ jura transcendunt. Secundo, et specialius, quia omnia verba et facta, quæ referuntur, ad alias causas seu materias pertinent, ex illisque non solum inferri non potest, Romanum Pontificem non habere supremam potestatem in spiritualibus, quæ ad directionem et correctionem regum, etiam in materia temporali, se extendat, verum etiam nec colligi potest, reges illos ita sensisse. Quod brevi discursu, per singula quæ afferuntur discurrendo, demonstro.

12. Primum enim afferit inepta quædam verba Philippi Pulchri, Francorum regis, quæ in epistola quadam ad Bonifacium VIII, aliquo animi furore aut impetu iracundiae ductus, scripsit, ex quibus argumentum sumere contra rationem est. Sed, omissa contumelia, quid tandem rex ille affirmavit? *Scias, nos in temporalibus alicui non subesse.* At quid tandem hinc sequitur? aut quis hoc inficiatur? Certe qui definite dixit, se in temporalibus alicui non subesse; tacite confessus est in spiritualibus subesse, cui autem magis quam Pontifici? Quod si ei in spiritualibus subesse fassus est, negare profecto non potuit, si temporalibus contra spiritualia rex abutatur, ratione spiritualium posse etiam in temporalibus vexari et corripi.

13. S. Ludovicus, rex. — Deinde allegat sanctum Ludovicum, qui *publica sanctione exactiones omnes curiæ Papalis intra regnum suum prohibuit*. Quam ex Arrestis allegat. Cum illorum tamen copiam non habeamus, non possumus certum illius sensum explicare, nihil enim credimus a tanto ac tali rege sanctum, quod justum ac religiosum non fuerit. In tomo autem 6 Bibliothecæ Sanctorum, in fine, quamdam Pragmaticam sanctionem ejusdem regis typis mandatam invenimus, in qua in favorem ecclesiasticae jurisdictionis, et liberae provisionis beneficiorum, et cum observantia sanctorum canonum, multa legimus scripta; de exactionibus autem curiae Romanae penitus nihil. Alii vero prohibitionem illam non absolute, sed cum limitatione referunt, videlicet, *exactiones, et onera gravissima, etc., colligi nullatenus volumus, nisi proportionabili, pia et urgentissima ineritibili necessitate.* Itaque si quid sanctus rex sancivit,

non fuit spiritu elationis, aut exemptionis ab obedientia Papæ, sed quatenus existimavit justæ sui regni conservationi esse necessarium, et ad suam jurisdictionem temporalem pertinere. Adeo enim fuit ab usurpatione spiritualis potestatis alienus, ut cum ejus legatus ultro Ecclesiarum cathedralium a Papa impetrasset *Bullam prorisionum, rex in ignem illam projecerit, dicens: Gratias non agimus tibi de his, que in periculum animarum nostrarum impetrasti, videlicet, ut ecclesiis provideramus.* Et illa uti noluit. Ita refert Rebuff., in Concordat., in Procœmi., § Quædam nobis, verb. *Optamus.*

14. *Ludovicus XI.* — Denique rex Angliæ late commemorat factum Ludovici XI, regis Galliæ, qui Pio II, Pontifici, petenti revocari quandam pragmaticam sanctionem non acquievit. Sec hoc etiam nihil ad causam facit, nam tota illa controversia fuit sine schismate, semper enim rex ille obedientis Papæ fuit, ut ex litteris ejus ad Pium II supra ostensum est. Nec video cur rex Jacobus potius Pii II Ludovicique XI, quam sequentium Pontificum et regum usque ad Leonem X, mentionem fecerit, cuius tempore lis illa finita est, et pragmatica abrogata in Concilio Lateranensi, sub eodem Leone X, sess. 41, ubi tota illa historia late refertur; et ex illa constat Pontifices nunquam absoluta potestate fuisse in illo negotio usos, sed suaviter processisse, ut, servata concordia, cum fidei unitate tandem res periceretur.

15. *Error Gersonis de Concilii in Pontificem potestate.* — Deinceps vero post magnam et prolixam exaggerationem, quam rex non probat, ad quæstionem longe distinctam divertit, librumque Gersonis commemorat, in quo graviter quidem lapsus fuit, tribuendo Concilio generali potestatem coactivam in Pontificem, etiam usque ad depositionem propter alia crimina præter hæresim, nullo tamen modo regibus tribuit spiritualem potestatem, nec a subjectione et potestate coerciva Pontificum illos eximit. Nec in dubium revocavit ecclesiasticam monarchiam, quam a Christo esse institutam, et auferri, aut in aliud regimen transferri non posse, in eodem loco confirmat; supervacaneum ergo est, his verborum exaggerationibus et digressionibus veritatem obscurare.

16. Tandem rex Jacobus sex enumerat reges Angliæ, qui vel Episcoporum investituram sibi arrogarunt, vel ecclesiasticarum personarum libertatem violarunt, vel Pontifici obe-

dire noluerunt. Verumtamen hæc facta turpia sunt, et occultanda potius quam in medium producenda, et parum ad rem faciunt. Nam investituræ Episcoporum aliquando fuerunt concessæ vel permittæ regibus; unde Richardus, vel alias similis rex Angliæ, non juri divino innixus, sed fortasse consuetudini vel alicui prætenso privilegio, illam potestatem retinere aut exercere audebat. Et licet inobediens esset ac pertinax, Pontificum prohibitionibus, utique Gregorii VII ac successorum, resistendo, non tamen sibi primatum Ecclesiæ arrogabat, neque absolute obedientiam Pontifici negabat, sed in particulari facto, vel practice tantum errabat, vel colore aliquo jus suum defendere fingebat. Tandem vero resipuit, et *investituras Deo et sancto Petro remisit*, ut ait Guilielmus Malmesburiensis, lib. 5 Histor.

17. Similiter negare non possumus aliquos reges Angliæ pertinaces nimium in usurpanda jurisdictione in personas ecclesiasticas fuisse. Sed ex abusu et tyrannide male colligitur legitima potestas; et præterea error ille seu peccatum ad aliam controversiam pertinet, ut sæpe dixi. Unde iidem ipsi reges primatum Pontificis recognoverunt, ejusque potestatem coactivam timuerunt, ut supra de Henrico II visum est, qui adeo libertatis ecclesiasticæ violator fuit, ut neci S. Thomæ Cantuar. occasionem dederit, et nihilominus Pontifici cervicem submisit, et publicam pœnitentiam egit. Similiter Eduardus, tam I quam II et III, licet in factis illis errarent, a Pontificis obedientia non recedebant, ut ex illorum epistolis supra vidimus, ubi etiam similes litteras Richardi II recensuimus. Quapropter frivolum est quod in hoc puncio rex Jacobus respondet: *Satis est injustam meorum jurium usucaptionem, quotiescumque licuit, fuisse interruptam.* Potestas enim Pontificis non humano jure præscripta, sed divino concessa est, ideoque nulla hominum tergiversatio, nulla inobedientia, nullave multorum annorum consuetudo illam mutare potest vel minuere.

CAPUT XXX.

OBJECTIONIBUS EX NONNULLIS RATIONIBUS DESUMPTIS SATISFIT.

1. *Prima objectio. — Instantia.* — Quamvis in libro regis Angliæ nullam novam rationem inveniam, qua errorem suum et omni-

modam exemptionem a potestate Papæ, præsertim in temporalibus, suadere nitatur, nihilominus ad hujus libri complementum non nullas, quæ communiter circumferuntur, vel potiores judicantur, breviter proponere et expedire necessarium visum est. Prima igitur esse solet (et videtur etiam esse regis fundamentum), quia rex est supremus in temporalibus, ut ex Scripturis sumitur, et supra etiam ratione probatum est; ergo non potest esse simul in temporalibus subjectus. Probatur consequentia, quia qui est subjectus in aliqua materia, habet superiorum in illa; repugnat autem esse supremum, et habere superiorum. Dices id esse verum de subjectione et prælatione ejusdem generis, id est, ut utraque sit directa vel indirecta; quod autem idem sit supremus respectu potestatis directæ superioris, quia illam supra se non habet, et nihilominus sit indirecte subjectus alicui, non repugnat. Sed contra, quia, ut juristæ dicunt, quod directe fieri prohibitum est, nequit per aliam viam fieri, etiam indirecte, quia alias enervaretur et inutilis fieret prohibitio; ergo simili modo in præsenti. Quomodo cum enim rex dicatur alteri subjectus (etiam indirecte) in temporalibus, ejus excellentia in illo ordine tollitur.

2. Solutio. — Sed nihilominus responsio est optima, et replica est nullius momenti, quia nullum est jus absolute prohibens subjectionem regis supremi in temporalibus, respectu superioris altioris ordinis, et ipsa temporalia excedentis. Quia vel hoc jus est naturale, et hoc non, quia hæc subjectio indirecta est superioris ordinis, et a jure divino positivo manat; vel est jus humanum, et hoc non potest esse juri divino contrarium, nec contra illud prævalere. Quocirca jus naturale in hac parte, sicut est fons et origo principatus civilis, et supremæ potestatis ejus, ita etiam dici potest directe tollere seu prohibere subjectiōnem ad similem potestatem ejusdem ordinis; respectu vero subjectionis indirectæ ad potestatem alterius ordinis, et spirituale, quasi negative se habet; quia principem civilen in temporalibus supremum nemini quidem subiectum in eisdem temporalibus, etiam indirecte, non tamen repugnat quominus per jus superioris ordinis subjiciatur. Accedit, quod hæc subjectio indirecta in temporalibus intrinsece conjuncta est: eum subjectione in spiritualibus, præsertim respectu potestatis spiritualis supremæ in suo ordine, et ideo nihil repugnat, etiam juxta principia juris humani, re-

gem, directe supremum in temporalibus, fieri indirecte subditum in eisdem, quatenus hæc subjectio intrinsece conjuncta est cum spirituali; sic enim jura ipsa dicunt, id quod est directe prohibitum, posse alia via fieri, quando hoc necessario sequitur ex alio, quod eodem vel altiori jure concessum est. Neque propterea tollitur excellentia supremæ potestatis temporalis, vel supervacanea, aut nullius momenti redditur, tum quia semper retinet negationem directi superioris in eodem ordine, negatio autem indirecti superioris de illius ratione non est; tum etiam quia ille modus negationis, seu supremæ potestatis sufficit ad omnes morales effectus, qui ad rectam gubernationem politicam necessarii sunt et sufficienti.

3. Secunda objectio. — Contra hoc vero obiecti potest secunda ratio, quia rex infidelis non baptizatus est ita supremus in temporalibus, ut in eis nullum recognoscatur superiorum, neque directe, neque indirecte; ergo etiam christiani principes sunt eodem modo supremi; ergo nulli subsunt in temporalibus etiam indirecte, ac subinde neque Pontifici. Probatur consequentia, tum quia non sunt pejoris conditionis fideles principes, quam infideles; tum etiam quia per baptismum non privantur aliis bonis temporalibus; ergo neque regnis, neque suis temporalibus prærogativis, juxta illud: *Non eripit mortalia, qui regna dat cœlestia.* Tum denique quia alias hoc esset magnum impedimentum conversiois infidelium regum ad fidem et baptismum, si per illum sua libertate suprema, sive directe, sive indirecte privarentur. Atque ita omnia argumenta, quibus hoc supra de subjectione directa in temporalibus probavimus, de indirecta etiam urgere videntur.

4. Solutio. — *Discrimen inter reges baptizatos et non baptizatos.* — Respondemus, æquiperationem hanc inter fideles et infideles reges non esse cum omni æqualitate admittendam, quia rex non baptizatus non est subjectus directe spirituali potestati Ecclesiæ, et ideo mirum non est quod potestas ejus temporalis non subordinetur spirituali jurisdictioni, neque ab illa pendeat etiam indirecte, quoad vim directivam aut coactivam. Rex autem baptizatus est directe subditus spirituali potestati, ut vidimus, et ideo consequenter etiam potestas ejus temporalis subordinata manet spirituali potestati, saltem indirecte, in ordine ad illius finem. Quocirca potestas temporalis in utroque rege eadem quidem

est, vel æqualis, neque in rege Christiano proprie et intrinsece minuitur (ut sic dieam), sed solum ratione subjecti novam incipit habere regulam, vel proximam, et internam, quæ est fides, et prudentia infusa, vel externam, quæ est spiritualis pastor, et lex seu potestas ejus, quatenus ad spiritualem finem ordinatur.

5. Et ita cessant aliæ objectiones, quæ solum probant non fieri diminutionem intrinsecam in illa potestate ratione fidei, non tamen probant non addi prædictam subordinationem, hæc enim intrinsece sequitur ex fide. Et non est imperfectio, sed potius excellentia illius potestatis, ideoque non addit gravamen vel impedimentum conversioni regum ultra difficultatem intrinsecam, quam ipsa fides, et obedientia ecclesiastica secum afferunt. Hoc autem qualemque gravamen intrinsece continetur in professione fidei Christianæ¹, in qua includitur tacitum pacatum, et promissio obedientiae ad pastores Ecclesiæ, et ad perendum omnia propter Christum, si opus fuerit, juxta illud : *Qui renuit ad me, et non odit patrem, matrem, etc., adhuc autem et animam suam, non potest meus esse discipulus*, Luc. 14. Et consequenter etiam sequitur obligatio ad perseverandum in fide, et ad defendendum illam pro ratione sui status, ac denique inde etiam oritur, ut quilibet Christianus sit subjectus correctioni ac dignæ poenæ, si contra hujusmodi obligationem deliquerit. Hæc ergo obligatio et professio communis est christianis principibus, et ideo eidem potestati debita proportione subjiciuntur.

6. Addo vero ultimo, etiam reges ethnicios, juxta sui status capacitatem, spirituali potestati ecclesiastice esse subordinatos, et e converso potestatem Ecclesiæ indirecte saltem posse superioris actum in illos exercere. Nam si habeant subditos Christianos, potest ab eorum dominatu eos liberare, vel quando eos conantur a fide averttere, ut limitat Durandus, in 2, distinet. 44, q. 3, vel simpliciter et absolute, ratione periculi, ut vult D. Thomas 2. 2, q. 10, art. 10. Quod est probabilius, quia in rebus ad bonos mores pertinentibus, cavendum est morale periculum, priusquam expectetur eventus, et ideo potestas extenditur etiam ad vitandum periculum, quamvis in usu ejus prudenter caveatur scan-

dalum, ut supra diximus. Si vero reges ethni ci nulos habent subditos Christianos, ordinarie non habet Ecclesia potestatem super illos, etiam ratione subditorum, nisi in casu quo Evangelii prædicationem impediunt, vel subditos cogerent ne illam reciperent. Unde fieri videtur, potestatem formaliter (ut sic dicam) esse eamdem, seu sub eodem titulo et respectu, licet usus illius circa diversas personas, juxta varias conditiones et status illarum, rarer aut frequentior, et major aut minor esse possit. Nonnulla vero intercedit differentia. Quia potestas Pontificis in principes Christianos est propria jurisdictione, quæ licet spiritualis sit, indirecte ad temporalia extenditur. At vero circa principes ethnici nou est per modum jurisdictionis in ipsos principes, sed in eorum subditos Christianos, propter quos tuendos potest infideles arcere, vel in officio continere, et ideo quidquid circa illos operatur, est per modum defensionis fidelium, non per modum vindictæ, aut punitionis infidelium. Denique addere possumus, sicut potestas regia, ex conjunctione ad fidem, aliquam recipit subjectionem, ita etiam majorem quamdam amplitudinem et excellentiam participare, et ita illud qualemque onus hoc beneficio compensari. Nam rex Christianus ductus regulis fidei multa potest præcipere, dirigendo illa ad fidei defensionem, vel religionis Christianæ honorem, vel aliud supernaturale commodum, quæ ductus pura ratione naturali præcipere non posset; et similiter multa punit delicta, quæ ex vi solius rationis naturalis non puniret, ut verbi gratia, haeresim, vel aliud simile.

7. Ultima objectio ex triplici medio conflata.

— *Primum.* — *Secundum.* — *Tertium.* — Ultimo adduntur rationes quædam minoris momenti. Una est : Pontifex satis magnam sollicitudinem habet in spirituali cura; ergo non debet temporalibus immisceri, nam, si omnibus, qui Deo militant, hoc prohibuit Paulus, multo magis hoc videtur supremo pastori prohibitum, qui et aliorum exemplar esse debet, et majoribus curis spiritualibus distinetur. Altera ratio est. Quia in Pontifice, per se loquendo, et ex vi pontificatus non inventur formaliter (ut sic dicam) regia dignitas; ergo nec potest regia potestas illi esse subordinata. Probatur consequentia, quia non potest una potestas alteri subordinari et subjici, nisi eadem potestas, quæ est in subordinato, inveniatur in eo cui subordinari

¹ Vide Bellarminum contra Barclaium, cap. 3, n. 3.

dicitur. Alia ratio est, quia non potest Papa dispensare in jure naturali, nec divinam institutionem mutare; ergo nec potest aut naturalem obligationem obediendi regi, a subditis, seu vasallis, aut a rege potestatem, quam Deus ipse contulit, auferre.

8. *Solutio.* — *Ad primum.* — Hæc vero facile expediuntur. Ad primum enim respondemus, illud ad summum procedere de administratione directa rerum temporalium, non vero de indirecta. Tum quia prior est distineta et separabilis ab spirituali potestate, posterior vero non est distineta, sed per se et intrinsece pertinens ad potestatem spiritualem, ideoque non potest illam impedire, eum potius sit usus et exercitium ejus. Tum etiam quia administratio directa temporalium per se et ex instituto eirea illa versatur, et ideo necesse est ut præcipua intentione, ac subinde vel fere semper, vel majori ex parte circa illa oceupetur; at vero administratio indirecta raro et per occasionem tantum (ut supra ex Bernardo attigimus) occurrit. Ideoque nec dici potest sæcularis cura, nec spiritualem impedire. Addo denique, quamvis Pontifex ex vi pontificatus non habeat directum regiam temporale, non fuisse contra munus ejus, aut contra consilium Pauli, ut aliunde acceptum utrumque simul conjunctum habeat, quia ad commune bonum Ecclesiæ, et ad meliorem usum ipsiusmet spiritualis potestatis, fuit ita conveniens. De quo puncto alibi latius diximus¹, et videri potest Gennadius, in expositione pro Concilio Florentino, cap. 5, sect. 3 et 4.

9. *Ad secundum.* — Ad secundum respondetur negando consequentiam, nam propositio illa, quæ in probatione ejus assumitur, simplieiter loquendo, falsa invenitur, tam in potentissimis physicis quam in artibus, et consequenter etiam in moralibus. Nam voluntas subjacet intellectui, et ab illo pendet, etiam si formalis potestas voluntatis in intellectu non inveniatur. Item ars frænæfactiva subordinatur equestri, quamvis hæc illam formaliter non includat, et patria potestas subordinatur regiae, quamvis in rege formaliter non sit patria potestas circa filios suorum subditorum. Sic ergo potestas regia subordinatur Pontificali, etiamsi Pontifex temporalis imperator formaliter non sit. Et ratio est, quia hæc subordinatio fundatur in potestate altioris ordinis, quasi eminenter alteram conti-

nente. Item quia oritur ex subordinatione inter fines utriusque potestatis, quæ sufficit ut potestas, quæ ordinatur ad finem inferiorem, subjiciatur potestati respicienti altiore finem. Illa ergo propositio, quod habens aliquam potestatem non subordinatur alteri, nisi habenti eamdem, seu similem potestatem, ad summum est vera in potestatibus ejusdem ordinis, quarum una est participatio alterius, ut est potestas delegata et ordinaria, seu potestas Vicarii et Prælati. Non habet autem locum illa propositio, quando subordinatio fundatur in eminentia superioris potestatis et finis ejus, ut declaratum est.

10. *Ad tertium.* — Ad tertium respondeamus, licet Papa non possit dispensare in jure naturali, posse nihilominus mutare materiam ejus, qua mutatione facta ipsum naturale jus cessat, et ita in praesenti potest de subdito facere non subditum; subjectione autem ablata, cessat ratio et obligatio naturalis obediendi. Subjecio autem ipsa, sicut et potestas regia, non est immediate de jure naturali, sed de jure humano, ut supra ostensum est, et ideo ex justa causa per superiorem Pontificis potestatem auferri potest. Eo vel maxime quod aliqua bona a natura immediate collata, ut libertas et vita, possunt interdum per superiores potestates humanas juste auferri, ut ipso usu licto et honesto satis constat, quia Deus ipse, qui illa dona constituit, dedit etiam hominibus publicam potestatem ad auferenda illa ex justa causa. Sic ergo subordinatio regum temporalium ad spiritualem potestatem ab ipso Deo est, qui talis potestatem contulit, ideoque non est contra jus naturæ, sed supra illud, et servata proportione illi maxime consentanea existit.

SUMMA PRÆCEDENTIS LIBRI CUM APOSTROPHE AD REGEM ANGLIÆ.

11. Cum summi legislatoris, a quo omnis potestas in cœlo et in terra derivatur, inviolabili lege sanctum sit, reddenda esse Cæsari quæ Cæsaris sunt, et quæ sunt Dei Deo, hanc regulam ita in hujus libri doctrina servare studuimus, ut nemo, si recte oculis aspiciat, unicuique datum a nobis esse, quod suum est, dubitare possit. Ostendimus enim duplē illam, qua mundus hic regitur, potestatem, temporalē et spiritualem, regiam et Pontificiam, a Deo datam esse, et utramque in suo ordine supremam esse

¹ Lib. 4 de Leg.

comprobavimus. Ita vero illas inter se dif-
ferre monstravimus, ut regia humanarum ac
temporalium rerum curam tantummodo ger-
rat; Pontificia vero rerum temporalium fines
transcendens, et spiritualis vitæ finem ultimi-
mum intuens, divinis ac æternis rebus ordi-
nandis incumbat. Unde tandem conclusimus,
tantum inter se potestates has distare, quan-
tum a corpore anima, a temporalibus æter-
na, a corporalibus spiritualia, et a terrenis
cœlestia dissident. Ac proinde sicut æquum
est, corpus animæ subjici, et ad sempiterna
temporalia referri eisque subordinari, ita ne-
cessarium esse ut in Christi Ecclesia, in qua
omnia recto et optimo ordine constituta esse
debent, regia potestas Pontificiaæ subjecta sit,
ut ab ea in æternam beatitudinem dirigatur,
et, sicubi ab eos fine de flexerit, emendetur ac
corrigatur.

12. Hac itaque justa et æquissima distri-
butione servata, Pontifici dedimus quæ sua
sunt, quæque illi Princeps pastorum et totius
gregis dux contulit; et tibi, quæ tua sunt,
rex serenissime, non negavimus. Superest
igitur, ut eidem Christi regulæ ac legi te sub-
jectum esse consideres, ne plus quam oportet,
de tua potestate præsumendo, terminos
tibi præscriptos transcendas, et quæ divinæ
sunt potestatis usurpes. Seito te ovem gregis
Christi esse, non pastorem; noli ergo pas-
tores pascere ac regere, aut fines a supremo
Pastore præscriptos transilire. Audi Nazianzenum¹, alicubi imperium suum terreno im-
perio præferentem, et inter oves suas impe-
ratores et reges annumerantem. Ad quas
oves alibi hunc in modum loquitur : *Oves, pas-
tores ne pascite, nec supra fines vestros
assurgite, satis enim vobis est, si recte pasca-
mini. Judices ne judicate, nec legislatoribus
leges præscribite. Non est enim dissensionis et
confusionis Deus, sed pacis et ordinis. Ne quis
igitur caput sit, qui vix, aut manus, aut pes,*

*aut vilius quoddam aliud corporis membrum
est; verum quo vocatus est, in eo gradu quis-
que maneat, etiam si alioqui præstantiori di-
gnus sit, plus utique laudis habiturus ex eo,
quod præsenti gradu acquiescit, quam si eum
querat, quem non accepit. Ne quis, cum sine
periculo alium sequi liceat, pruire cum peri-
culo expetat; nec obedientiæ lux, quæ tam
terrena, quam cœlestia tuetur, atque conservat,
infringatur.*

13. Quid, quæso, rex humanissime, a tuis
subditis tam anxie postulas, et summo jure
exigis, sicut obedientiam principi debitam?
Illam Pauli sententiam in tuo libro frequen-
ter inculcans : *Omnis anima potestatibus sub-
limioribus subdita sit*; imple igitur naturale-
lem illam legem a Christo propositam et com-
mendatam : *Quæcumque vultis ut faciant vo-
bis homines, et vos facite illis*. Et quam obe-
dientiam a subditis requiris, eam fideliter
præsta illi prudenti ac fideli dispensatori,
quem Christus super omnia bona sua consti-
tuit, tibique ita præposuit, ut rationem pro
anima tua redditurus sit. Quod enim Paulus
fideles omnes monuit, et præcepit : *Obedite
præpositis vestris, et subjecete eis, ipsi enim
pervigilant tanquam rationem pro animabus
vestris reddituri*, non minus ad regem, si
christianus sit, quam ad cæteros fideles per-
tinet. Quod si fortasse, rex serenissime, ver-
bis meis non dignaris attendere, audi, quæ-
so, Bernardum, ad Conradum regem scri-
bentem, et pro me loquentem : *Regis dedecus
regnive diminutionem nunquam volui, violen-
tos odit anima mea. Legi quippe: Omnis ani-
ma potestatibus sublimioribus subdita sit; et:
Qui potestati resistit, Dei ordinationi resistit.
Quam tamen sententiam cupio vos, et omnimo-
dis moneo custodire in exhibenda reverentia
summæ et Apostolicæ Sedi, et B. Petri succe-
sori, sicut ipsam vobis vultis ab universo ves-
tro servari imperio. Et adjungit, quæ non
minus libenter usurpo, sequentia verba: Sunt
quæ non putari scribenda, præsens ea fortassis
opportunius intimarem.*

¹ Orat. 47 ad cives gravi timore percul-
sos.

INDEX CAPITUM LIBRI QUARTI

DE IMMUNITATE ECCLESIASTICA, SEU EXEMPTIONE CLERICORUM A JURISDICTIONE TEMPORALIUM PRINCIPUM.

-
- CAP. I. *Quid nominibus ecclesiasticæ immunitatis, libertatis ac exemptionis significetur.*
- CAP. II. *Utrum clerici in spiritualibus et ecclesiasticis causis a potestate principum secularium jure divino exempti sint.*
- CAP. III. *Utrum personæ ecclesiasticæ a jurisdictione principum, etiam in rebus et causis temporalibus, eximi potuerint, et exemptæ sint.*
- CAP. IV. *Utrum Summus Pontifex omni jure divino et humano ab omni jurisdictione sacerdotalium principum exemptus sit.*
- CAP. V. *Expenditur locus Matthei : Dais pro me et te, pro Summi Pontificis exemptione.*
- CAP. VI. *Objectionibus contra resolutionem superiorum capitum satisfit.*
- CAP. VII. *Sextæ objectioni satisfit, et tractatur quæstio, an Papa possit se humano judicio submittere.*
- CAP. VIII. *Utrum clerici omnes sub Pontifice existentes a jurisdictione temporalium principum jure divino exempti sint; et tractantur duæ contrarie opiniones.*
- CAP. IX. *Privilegium fori clericorum jure divino et humano esse fundatum, et quomodo id intelligendum sit.*
- CAP. X. *Quomodo singulis clericorum vel personarum ecclesiasticarum ordinibus exemptione ecclesiastica jure divino conveniat.*
- CAP. XI. *Utrum, secluso jure divino immediato, potuissest exemptione clericorum per jus canonicum sine administriculo juris civilis introduci.*
- CAP. XII. *Utrum privilegium fori clericorum etiam jure civili fundatum sit.*
- CAP. XIII. *Difficultati, quæ ex praecedenti capite oritur, occurritur, et quomodo Ecclesia diversis temporibus privilegio fori usa fuerit, explicatur.*
- CAP. XIV. *Qualis sit clericorum exemptione in causis civilibus.*
- CAP. XV. *Qualis sit exemptione clericorum in causis criminalibus.*
- CAP. XVI. *An privilegium fori exemptionem a legibus civilibus includat, et qualis illa sit.*
- CAP. XVII. *Quale sit Ecclesiarum privilegium quoad suam suorumque bonorum exemptionem ab oneribus, et potestate seculari.*
- CAP. XVIII. *An exemptione a tributis sacerdotalibus conveniat Ecclesiis earumque bonis, quatenus Christi patrimonium sunt.*

- CAP. XIX. *An exemptio a tributis sæcularibus conveniat Ecclesiæ et rebus sacris, ob earum specialem sanctitatem seu consecrationem.*
- CAP. XX. *Utrum quælibet bona, cum ecclesiastica fiunt, eo ipso sint ab omni tributo et onere civili illis inhaerente exempta.*
- CAP. XXI. *Aliquibus objectionibus occurritur, et quam sit antiqua hæc bonorum ecclesiasticorum exemptio obiter explicatur.*
- CAP. XXII. *Qualis sit exemptio ecclesiastica quoad personalia onera clericorum.*
- CAP. XXIII. *Utrum redditus ecclesiastici clericorum a tributis exempti sint.*
- CAP. XXIV. *Utrum patrimonialia et in universum bona temporalia clericorum sub communibus legibus sæcularium tributorum comprehendantur.*
- CAP. XXV. *An clerici teneantur ad onera realia solvenda, quæ rebus immobilibus adhærent.*
- CAP. XXVI. *An clerici ad communes ci-vium expensas contribuere teneantur.*
- CAP. XXVII. *Utrum omnes clerici, tam in sacris quam in minoribus constituti, et in statu clericali perseverantes, integre gaudeant ecclesiastica libertate.*
- CAP. XXVIII. *An clerici conjugati privilegio ecclesiastice exemptionis gaudeant.*
- CAP. XXIX. *Utrum aliæ personæ ecclesiastice, ordinem nullum habentes, exemptione fori integre gaudeant.*
- CAP. XXX. *An privilegium immunitatis clericorum ab aliquo homine revocari possit.*
- CAP. XXXI. *Utrum privilegium clericorum possit per renunciationem amitti vel diminui.*
- CAP. XXXII. *Utrum privilegium clericorum consuetudine amitti vel minui possit.*
- CAP. XXXIII. *Quibus modis possit immunitas ecclesiastica violari.*
- CAP. XXXIV. *Quibus modis actiones contra libertatem ecclesiasticam excusari soleant, et quid de illis judicandum sit.*
Superioris libri summa.



LIBER QUARTUS

DE IMMUNITATE ECCLESIASTICA

SEU EXEMPTIONE CLERICORUM A JURISDICTIONE TEMPORALIUM PRINCIPUM.

Dogmatis de immunitate ecclesiastica , seu de exemptione clericorum a temporalium principium jurisdictione , veritatem sœpe in superioribus supposuimus, eamque in præsenti libro expendere , confirmare ac defendere , tum in principio hujus operis , tum in cap. 9 superioris libri promisimus, quoniam ad hujus operis complementum , plenamque ad querelas et objectiones regis Angliæ responsionem , necessarium esse judicamus. Rex etenim in fine Apologiae pro jureamento fidelitatis, et in Præfatione ¹ ad principes christianos, dogma istud ex libris Bellarmini *mira**bundus*** (ut ipse ait) referens, non solum audaciam et temeritatem in Cardinali, sed etiam in dogmate ipso novitatem affingere et reprehendre ausus est. Et inde maxime catholicos reges contra Pontificem excitare ac provocare nislitur, quod *eorum præcipue intersit, ne quid prærogativis legalibus detrahatur*. Unde ad illos sic loquitur : *Quod si potentissimus quisque restrum alte, serioque recogitet, pene tertiam populi solique vestri partem Ecclesiæ esse dicatam, nonne, quæso, illius iacturæ sensus animos vestros percutiet, quæ tantum hominum fundorumque vestro juri sultrahat, ut ubique Pontifici coloniæ, provinciæque constituantur?* ² et alia prosequitur, quæ infra referemus ; nam objectiones, quasdam continent, quibus in discurso hujus libri satisfaciendum est. Prius ergo catholicum dogma de vera libertate seu immunitate ecclesiastica, et clericorum exemptione juxta vera Theologie ac juris canonici principia explanare, et divinis testimoniis ac rationibus pro nostra tenuitate stabili-

lire curabimus. Deinde vero non solum regias objectiones, sed etiam quæ occurrerint graviores, in medium afferemus, eisque ita, ut spero, satisfaciemus, ut locum in hoc dogmate habere constet, quod alias Chrysostomus dixit : *Nihil veritate clarius, nihil simplicius, nisi maligni esse velimus* ¹.

CAPUT I.

QUID NOMINIBUS ECCLESIASTICÆ IMMUNITATIS,
LIBERTATIS AC EXEMPTIONIS SIGNIFICETUR?

1. *Methodus in hoc libro servanda.* — Quoniam hujus libri materia non solum fidei sed etiam morum doctrinam complectitur, ita a nobis tradenda est, ut et contra Ecclesiæ Catholicæ adversarios veritatem fidei ostendamus, et pro morali usu ac praxi Catholicis inservire possimus. Ac propterea non solum sacræ paginæ testimonia , sed etiam leges, tum canonicas, tum civiles, diligenter considerabimus et expendemus, ab his enim maxime doctrina præsertim moralis pendet. Ideoque imprimis voces , quibus jura de hac materia loquentia uti solent, explicandæ sunt, ut ita res ipsa et jura melius intelligi valeant. Sunt autem potissimum hæc voces tres illæ, quas in titulo proposuimus, quas breviter in hoc capite declarabimus.

2. *Immunitatis descriptio.* — Prima vox est *immunitas*, quæ generatim sumpta describi potest, ut sit, *privilegium quo res aliqua, vel persona, a communi aliqua obligatione seu onere eximitur*. Quam descriptionem sumo ex 1. *Munus*, 18, ff. de Verbor. significat., ubi *munus* inter alia onus significare dicitur, de

¹ In præfatione, pag. 25.

² Ib., pag. 27.

¹ Homil. 15 in Joan.

quo subjungit Paulus J. C. : *Cum remittitur, vacationem militiae, munerisque præstat, inde immunitatem appellari.* Ubi *militiae* nomen exempli causa positum videtur, quatenus onerosum munus est; immunitas autem generatim esse dicitur vacuitas muneris pro onere sumptui, quæ per quamdam remissionem seu concessionem datur; hæc igitur carentia seu ablatio oneris ad Ecclesiam applicata dicitur immunitas ecclesiastica. Quid autem per hanc particulam ultimam denotatur, ex dicendis constabit. Potest autem in hac immunitate considerari, vel actus remittendi, seu jus speciale, quo aliquis eximitur a communi onere, vel effectus illius juris, qui est carentia seu vacatio talis oneris et obligationis. Et utrumque potest nomine immunitatis significari, ut sumi potest ex titulo de Immunitate nemini conced., C. libro decimo. Immunitatem ergo, ut significat jus vacandi a muneribus, dicimus esse privilegium excusans ab onere communi. Utimur autem nomine privilegii lato modo, ut comprehendere potest jus aliquod naturale vel divinum, aliqui specialiter conveniens comparatione aliorum, ut in sequentibus magis declarabimus. Immunitas autem sumpta pro ipso effectu privilegii dici potest vacuitas seu excusatio a munere, utique legitima et aliquo jure fundata. Et fortasse hoc modo distingui possunt duo tituli juris civilis, ff. de Vacat. et excusat. munerum, et de Jure immunitatis. Sed de hoc alias. In praesenti ergo utroque modo sumi potest immunitas, quæ ecclesiastica appellatur, quatenus res vel personas ecclesiasticas ab oneribus, aliis rebus vel personas communibus, eximit, et in talium rerum vel personarum decentiam ac reverentiam concessa est.

3. Immunitas triplex, locorum, personarum et bonorum. — *Immunitas locorum in quo consistat.* — Hæc autem immunitas ex parte subjectorum, seu rerum quibus concessa est et quasi adhæret, duplex vel triplex distingui solet. Una est immunitas locorum, seu templorum, aut ecclesiarum; alia est immunitas personarum, seu clericorum; tertia est immunitas bonorum, quæ ad duas priores revocari potest, quia bona aut sunt Ecclesiarum, aut clericorum, et ratione illorum ab oneribus seu tributis eximuntur. Prima loco rnm sacrorum immunitas in duobus consistit: primo, in vacatione ab actionibus profanis talium locorum sanctitati repugnantibus, aut ea pollutibus. Secundo, in hoc quod sunt

loca refugii, securitatis ac custodiæ, tam reorum ad ea confugientium, quam bonorum quæ in eis reponuntur. Ita sumitur ex titulis de Immunit. Ecclesiarum, et ex 17, q. 4, fere per totam, et notavit specialiter Glos., in c. *Cum devotissimam*, 12, q. 2, verb. *Pro violata immunitate.* De hac vero immunitatis specie dictum late a nobis est in tom. 1 de Religione, lib. 3 toto, nihilque hoc loco addendum occurrit, maxime cum ad praesentem causam nihil pertineat. Aliæ vero duæ immunitates personarum et bonorum præsentis considerationis maxime sunt, et utramque attingit rex Angliæ, cum ingentem personarum et fundorum partem regio juri subtrahi conqueritur, et ideo de utraque dicemus.

4. Quid libertas ecclesiastica sit. — *Prima opinio.* — Atque ex hujus vocis declaratione, facile intelligitur quid libertas ecclesiastica sit; aliqui enim existimant has voces esse synonymas, alii differentiam aliquam inter eas constituant. Ut videre licet in Cajetano, in Sum., verb. *Immunitas*, ubi licet prius illas voces confundat, in fine tamen in ordine ad intelligentiam canonum, illas ita distinguit, ut nomine libertatis ecclesiastice solam immunitatem personarum in se et in bonis suis, nomine autem ecclesiastice immunitatis locorum tantum exemptionem significari velit, ideoque violantem templi immunitatem non censem agere contra libertatem ecclesiasticam, nec censuras contra violantes ecclesiasticam libertatem latas incurrire. Et ad id confirmandum expendit Cajetanus verba Benedicti XII in Extravag. 4, de Privileg., ubi referens casus reservatos, distincte numerat *Ecclesiarum immunitatis et ecclesiastice libertatis violatores*; ergo sentit verbis illis diversa privilegia Ecclesie significari.

5. Secunda opinio. — Nihilominus voces illas idem significare docuit Covar., d. c. 20, lib. 2 Variar., in princ., et secutus est Tusclus, ver. *Ecclesiæ immunitas*, concl. 8, n. 9. Potestque suaderi ex descriptione immunitatis, quia immunitas non est nisi carentia quædam subjectionis et oneris, quæ carentia nomine etiam libertatis significatur, sicut etiam libertas significare solet carentiam servitutis seu necessitatis; ergo, addita eadem determinatione ecclesiastice libertatis, sicut et immunitatis, idem utraque voce significabitur. Unde ponderat Covar., in dicta Extravag. 4, non addi eamdem determinationem, sed variari, cum dicitur, *Ecclesiarum immunitatis, et ecclesiastice libertatis*, nam

voces, *ecclesiarum et ecclesiasticæ*, non idem significant, quia nomine *ecclesiarum* ibi significantur tempa juxta vulgarem usum, et ita per illam vocem compositam solum ibi significatur immunitas sacrorum locorum; cum vero dicitur *ecclesiastica libertas*, nomen *ecclesiastica sumptum* est generaliter ab Ecclesia, maxime ratione ecclesiastici status; et ideo ibi proprie significat exemptionem ecclesiasticarum personarum, tam in se quam in bonis suis. At hæc libertas etiam vocatur in jure immunitas ecclesiastica, in cap. *Adversus*, de Immunitate ecclesiarum, juncto cap. *Non minus*, eodem. Ergo, stante eadem determinatione ecclesiastice libertatis et immunitatis, idem utraque voce significatur. Unde in communi usu Doctorum voces illæ tanquam synonymæ usurpantur, ut videre licet in Joan. Lup., tractat. de Libertat. Ecclesiast., a principio, per totum, et præsertim 1 p., q. 3, et 2 p., q. 11; Rebuff., tract. de Immunit.; et Hieronym. Alban. in tract. alio de Immunit. et reliquis, in Rubricis de Immun.

6. *Præfertur secunda sententia.*—Quocirca hæc posterior sententia in rigore vera est, recteque probatur attento usu et verborum proprietate. Nec Cajetanus simpliciter contradicit, fatetur enim voces illas sæpe confundi; addit vero, in usu canonum censuram ferentium contra violantes ecclesiasticam immunitatem, vel contra ecclesiasticam libertatem, illam differentiam servari, quod priora tantum puniunt inferentes injuriam locis sacris, posteriora vero eos qui agunt contra immunitatem personarum. Quæ etiam differentia non satis firma est, nam prior pars ad summum habet locum, quando in canone est sermo de immunitate ecclesiarum, nam tunc ordinarie nomine ecclesiarum significantur tempa, ut dixi, et ex illo addito determinatur canon ad loca sacra. At si canon disponat contra violantes immunitatem ecclesiasticam, plane omnia comprehendit, nisi ex actione quam puniit, vel ex aliis circumstantiis, constet de immunitate locorum vel personarum specialiter loqui; et ita vox de se indifferens est, et omnia comprehendit, nisi aliquide determinetur. Idemque est si canon loquatur de immunitate *Ecclesiae* in singulari, tum quia vox *Ecclesiae* de se solum generaliter determinat immunitatem Ecclesiae concessam, sive in locis, sive in personis; tum etiam quia præcipue significare solet congregationem fidelium, nisi aliquide determinetur, vel ex contextu constet sermonem esse de materiali templo.

7. *Differentia inter canones delicta contra immunitatem vel libertatem Ecclesiae punientes.*—Alia vero differentia excogitari potest inter canones punientes eos, qui contra immunitatem Ecclesiae aliquid faciunt, vel contra libertatem. Duobus enim modis potest immunitas violari. Primo, solo facto, sine usurpatione juris; secundo, sub prætextu juris alicuius seu legitimæ potestatis. Prior modo agit contra immunitatem, qui ecclesiam incendit, infringit, spoliat, bona ecclesiae surripit; posteriori modo agit contra immunitatem judex qui reum ab ecclesia extrahit. Unde posterior hic modus non solet committi, nisi a gerente publicam potestatem, vel sub aliquo ejus colore seu prætextu; prior vero a quocumque, privata potestate, per violentiam potest committi; utroque autem istorum modorum fit contra immunitatem, proprie vero contra libertatem ecclesiasticam tantum posteriori modo committi videtur. Sic enim qui violentias manus in clericum injicit, contra immunitatem Ecclesiae agit, non tamen videtur agere contra libertatem ecclesiasticam; e contrario vero judex sacerdotalis, judicium in clericum usurpans, violator est ecclesiastice libertatis proprie (ut ita dicam) et specifice, licet ibi etiam generatim includatur immunitatis violatio, quia non potest jus immunitatis violari sine actione immunitati contraria.

8. *Quando contra immunitatem, et quando contra libertatem Ecclesiae fiat.*—Simili modo, qui privata auctoritate per solam vim et injuriam aliquam personam ab ecclesia extrahit, contra immunitatem tantum Ecclesiae agit; qui autem id facit titulo publicæ potestatis et jurisdictionis, vel qui statuit ut ecclesiæ non habeant privilegium securitatis et asyli delinquentium confugientium ad ipsas, etiam libertatem ecclesiasticam violat, quia non solum usum, sed etiam ius immunitatis Ecclesiae eripere conatur. Et hoc modo videntur optime intelligi verba Benedicti XII supra citata. Et ratio reddi potest, quia minus requiritur ad agendum contra immunitatem, quam contra libertatem Ecclesiae, ac subinde latius patet agere contra immunitatem, quam contra libertatem; omnis enim qui libertatem infringit, immunitati etiam derogat, non vero e converso, nam qui negat facto tantum obedientiam Ecclesiae, ad summum erit schismaticus. Et haec etiam ratione dixit Cardinalis Zabar., in Repetit., c. *Perpendimus*, de Sentent. excomm., n. 2, opposit. 7, odiosius esse clericum judicari a laico, quam ab alio ut

privato percuti, nimirum, quia illud prius est contra libertatem ecclesiasticam, hoc vero posterius tantum videtur contra immunitatem. Habetque hoc fundamentum in cap. *Si vero*, de Sentent. excomm., ubi percussio clerici facta a ministro potestatis, non ut ministro, sed ut privata persona, et sine usurpatione jurisdictionis, non censetur semper inducere censuram reservatam Pontifici; percussio autem facta ab officiali potestatis, utique ut ministro ejus, semper declaratur reservata, cuius ratio non videtur esse alia, nisi quia haec posterior est gravior, et odiosior actio, utpote contraria libertati Ecclesiae, et non tantum immunitati, sicut prior. Denique differentia hæc etiam videtur proprietati verborum consentanea, nam ille proprie agit contra libertatem alicujus, qui vult illum in servitatem redigere, et onus servitutis illi imponere; qui vero facto tantum injuriam alteri facit, eumque tñquam servum percutit, non proprie agit contra libertatem ejus.

9. Verumtamen in hoc punto negare quidem non possumus, illos duos modos violandi ecclesiasticam immunitatem esse distinctos; et ex suo genere gravius multo esse delictum, quando non solum facto, sed etiam prætenso jure immunitas rumpitur, sicut longe gravius est jus decimarum Ecclesiae negare, quam decimas non solvere. Nihilominus tamen hoc non obstat quominus utroque modo violetur libertas ecclesiastica, sicut immunitas, quia (ut ostendi) immunitas et libertas ecclesiastica, eodem modo determinata, in re idem sunt. Et quamvis verum etiam sit potuisse facile nomen violationis libertatis ecclesiastice quasi per antonomasiæ applicari ad significandum modum violationis, qui non solum violentia, sed etiam præsumpto et usurpato jure nititur; eo quod libertatis nomine magis jus ipsum significari videatur, et quia frequenter videntur jura hanc violationem immunitatis, contra libertatem ecclesiasticam vocare, ut in dicto c. *Non minus*, et in multis censuris Bullæ Cœnæ videre licet; nihilominus affirmare non possumus differentiam illam esse in jure constantem, nec tanquam regulam constituere, quod censura lata contra violantes libertatem ecclesiasticam non comprehendat omnes violatores immunitatis, nisi ex verbis vel materia legis limitatio talis colligatur. Quia illa regula vel differentia nullo jure satis fundata est, nec est in usu Doctorum, ut constat ex his quæ congerit Joan. Lup., tract. de Libert. ecclesiastic., p. 4,

quæst. 10, et aliis quæ enumerat Guilielmus Luveranus, in tract. de Arbore jurisdict., in illius declarat., n. 45; et ex Rebuff., in Concord., tit. de Firma et irrevoc. concord. stabili, § penult., verb. *Quero quæ sunt statuta.*

10. *Quid exemptio ecclesiastica significet.*— Atque ex his tandem explicata relinquitur tercia vox, *exemptionis ecclesiasticæ*, nam in re idem significat quod immunitas vel libertas, et ita communiter solet una vox per aliam explicari seu describi. Videtur tamen nomen exemptionis esse magis facti quam juris, ac proinde magis significare effectum privilegii, quam privilegium ipsum immunitatis. Unde potest non immerito queri, an omnis exemptione, privilegio concessa templis, rebus aut personis ecclesiasticis, censeatur ad immunitatem vel libertatem ecclesiasticam pertinere, ita ut qui omnem hujusmodi exemptionem violaverit, censeatur contra immunitatem vel libertatem ecclesiasticam agere, et censuras contra ejusdem libertatis usurpatores latas incurrere. Duplex enim potest esse tale privilegium: unum generale, concessum ecclesiis omnibus, ut ecclesiæ sunt, vel personis ecclesiasticis, qua tales sunt; et de ejusmodi privilegio certum est, ad immunitatem ecclesiasticam pertinere, in hoc enim consentiunt omnes, et patet ex dicendis. Alia vero potest esse exemptio ex privilegio particulari dato tali ecclesiæ, vel dignitati, aut personæ ecclesiastice, ex peculiari illius consideratione.

11. *An privilegium alicui specialiter concessum ad immunitatem Ecclesie pertineat.*— *Prima sententia Rebuffi.*— *Fundamentum.*— Et de hac exemptione est dubium an pertineat ad immunitatem ecclesiasticam, ita ut violatio illius sit ecclesiastice immunitatis violatio. Affirmat enim aperte Rebuffus, in Concord., loco proxime citato, referens plures; sequitur Card. Tuschus, verb. *Libertas Ecclesiastica*, concl. 341, num. 17 et sequentibus, ubi alios allegat. Et idem videtur sentire Rochus Curt., tract. de Consuet., sect. 5, circa secundam partem Glossæ, num. 21, et Joan. Lup., dicto tractat. de Libert. ecclesiast., p. 4, q. 10, casu 12 et 10. Moveri potuerunt hi Doctores, vel quia immunitas ecclesiastica comprehendit omnia privilegia ecclesiis vel ecclesiasticis personis concessa, vel quia ad agendum contra libertatem ecclesiasticam, satis est agere contra libertatem unius ecclesiæ. Nam statuta privata unius reipublicæ contra Ecclesiam, tantum ecclesiastis illius territorii lædunt, et nihilominus

sunt contra ecclesiasticam libertatem, quia in una ecclesia offenduntur omnes, sicut in percussione unius clerici totus clerus offenditur, et timidior fit.

12. Nihilominus dicendum est, secundum juris usum et ecclesiasticum morem, solam illam exemptionem ad ecclesiasticam immunitatem vel libertatem pertinere, quae manat ex generali privilegio dato Ecclesiae, vel in honorem et reverentiam templorum, vel ob decentiam et dignitatem ecclesiastici status, seu clericalis ordinis. Hæc est communis sententia juris peritorum, in c. *Noverit*, de Sent. excomm.; et in Authent. *Cassa*, c. de Sacro-sanct. eccles., ut testantur Panormitanus, in dicto c. *Noverit*, num. 2, et lib. 1 Consil., in 83, num. 1; et Decius, in dict. Authent. *Cassa*, num. 18; Jul. Clar., l. 5, § ultim., q. 77, num. 28; Sylv., verb. *Excommunicatio*, 9, Excom. 10; et Lapus, allegat. 3; et alios retuli et securus sum, tom. 5 de Censur., disp. 21, sect. 2, num. 89 et 90, ubi hoc latius explicui. Et idem sensit Cajetanus, in Summa, verb. *Immunitas*; dicit enim, quoad poenas juris, sub immunitate non venire, nisi exemptiones, quae ex generali privilegio Ecclesiae competunt, quoad culpam vero ejusdem rationis esse posse violationem exemptionis speciali privilegio alicui ecclesiæ datae, cum violatione immunitatis communiter Ecclesiae concessæ, licet prior culpa non ita puniatur in jure, sicut posterior. Unde sentit, et bene, exemptionem alicujus ecclesiæ ex speciali privilegio in re ipsa vere esse quamdam immunitatem et libertatem ecclesiasticam. Quia est liberatio ab onere, quam vox immunitatis generatiū significat; est autem concessa rei sacrae, qua talis est, ac subinde religiosa, et suo modo sacra merito dici potest; ergo violatio ejus est irreligiosa, sacrilega, et consequenter ejusdem specie cum violatione similis immunitatis concessæ Ecclesiae per generale privilegium. Et nihilominus jura non puniunt has violationes specialium privilegiorum, neque de illis tractant, quando libertatem et immunitatem ecclesiasticam tueruntur, sed de his quae generaliter ad Ecclesiam et ecclesiasticum statum spectant. Et ideo diximus, in usu juris, sub immunitate ecclesiastica solas exemptiones ex privilegiis universalibus comprehendendi.

13. Unde fit ut determinatio illa immunitatis, cum ecclesiastica dicitur, habitudinem dicat ad Ecclesiam secundum communem rationem suam. Non quia debet privilegium

esse concessum Ecclesiae universalis in omnibus membris suis, hoc enim necessarium non est, ut constat, sed ut respiciat totam Ecclesiam pro illis membris vel locis quae talis immunitatis sunt capaces. Unde etiam recte adnotavit Cajetanus, ad violationem hujus immunitatis, non esse necessarium ut in tota Ecclesia, vel in omnibus personis aut locis quibus convenit, violetur, sed satis esse quod violetur in uno seu in quolibet, cui ex vi generalis privilegii competit. Et hoc solum probat fundamentum contrariae sententie, et aliqui ex prioribus auctoribus nihil aliud intendunt, præsertim Rochus Curti., qui alios refert. Et est manifestum ex juribus quæ ipse allegat, c. 2, de Reb. Eccles. non alienand., et c. 2, de Foro compet., ubi etiam ratio redditur, quia injuria facta uni personæ contra generale privilegium communitatis, et propter communitatem concessum, in totam communitatem redundat, et ideo est propria violatio immunitatis, quam jura puniunt. Unde etiam obiter intelligitur, licet contingere possit, violationem specialis privilegii et propriæ immunitatis ecclesiastice quoad speciem culpæ esse ejusdem rationis, nihilominus ex genere, seu modo suo, violationem immunitatis hoc habere peculiare, quod est veluti communis injuria, ut in communitatem speciali titulo redundans; ita ergo immunitas proprie dicit exemptionem aliquam Ecclesiae communem.

14. *De qua immunitate in hoc opere agitur.*
— Ex quibus tandem concluditur de hac sola propria immunitate seu libertate ecclesiastica in præsenti tractari, et quia jam locorum immunitatem exclusimus, solum de immunitate personarum, vel in se, vel in rebus esse sermonem. Addendum vero est, personis ecclesiasticis duplum immunitatem seu duplex generale privilegium esse concessum: unum appellatur privilegium canonis, aliud fori. Prius est privilegium (ut ita dicam) securitatis et indemnitatis personarum ecclesiasticarum, cui per canонem *Si quis suadente*, 17, q. 4, cautum est, singularem censuram ferendo contra percussores clericorum. Et de hac immunitate nulla est nobis controversia cum rege Angliae, et alioqui materia illius canonis alibi est a nobis tractata, et ideo de illa exemptione seu immunitate non erit in præsenti sermo. Privilegium autem fori dicitur illud, quo clericis exemptio a jurisdictione laica concessa est, cui consequenter annexa est exemptione a tributis, et in his controversia versatur.

CAPUT II.

UTRUM CLERICI IN SPIRITALIBUS ET ECCLESIASTICIS CAUSIS A POTESTATE PRINCIPUM SÆCULARIUM JURE DIVINO EXEMPTI SINT.

1. Aliorum hereticorum error. — *Fundamentum.* — *Confirmatio.* — Punctum hoc in principiis superiori libro positum virtute definitum est; illud autem hic præmittimus, tum quia rex Angliæ clericorum in omnibus rebus et causis sibi fore subjectum in suo regno contendit, idemque respective de cæteris regibus et regnis, cum Marsilio Patavino, et aliis similibus, affirmat; tum etiam quia, hoc errore rejecto, majori claritate et certitudine constabit, in quo propria immunitas et exemptio clericorum posita sit. Fundamentum ergo prædicti erroris est, quia vel nulla est in Ecclesia Christi spiritualis potestas, sed sola civilis seu temporalis, qua omnia, tam sacerdotalia quam ecclesiastica, gubernanda sunt, et omnes leges ferendæ, et judicia terminanda, in quacumque materia versentur. Quia omnia, tam ecclesiastica quam civilia, comprehenduntur sub politico ordine ac regimine, neque aliter cadunt sub potestatem humana; totus autem politicus ordo sub regiam potestatem cadit. Vel certe, si illius erroris sectatores aliquam spiritualem potestatem agnoscent, illam volunt esse in regibus in supremo gradu, ex eodem fere fundamento, quod totus ordo hierarchicus Ecclesiae est tantum politicus, id est, propter externam politiam ecclesiasticam, quæ unum corpus facit cum civili, et ideo necesse est totam eidem regi supremo subjici. Unde ad hoc confirmandum expendunt, Paulum omnia, quæ ad humanum regimen spectant, regi supposuisse sine ulla exceptione, dicens: *Qui potestati resistit, Dei ordinationi resistit*¹. Ex quibus verbis quidam intulit, principes sacerdotales habere auctoritatem ferendi leges in omni materia, et obligantes omnes personas, juxta illud: *Per me reges regnant, et legum conditores justa decernunt*². Confirmatur hoc, quia Theodosius imperator, in suo Codice, et postea Justinianus, in suo, multas leges de spiritualibus rebus condiderunt, ut de Sacrosanctis ecclesiis, de Episcopis et clericis, etc. Et plures similes habet Alfonsus, Hispaniæ rex,

in suis legibus Partitar., part. 1; ergo *qui illic resistit* (teste Paulo), *Dei ordinationi resistit*.

2. Conclusio de fide. — Veritas nihilominus catholica est, clericos in spiritualibus seu ecclesiasticis causis omnino esse immunes a jurisdictione temporalium principum: ita docent omnes catholici scriptores in locis infra allegandis, convenienterque omnes, immunitatem clericorum quoad hanc partem esse de jure divino; quod æque certum ac de fide esse censeo, quia eisdem principiis et fundamentis nititur. Hæc autem principia tria sunt præcipua, quæ in superiori libro probata sunt. Unum est, esse in Ecclesia potestatem gubernativam spiritualem, a civili distinctam, et superioris ordinis, datam ipsi Ecclesiae ex singulari Christi institutione et donatione ultra omne jus naturæ. Quod principium in cap. 6 præcedentis libri probatum est. Aliud principium est, hanc potestatem spiritualem non esse in regibus vel principiis temporalibus, sed in pastoribus Ecclesiae a Christo dati, et præsertim in Summo Pontifice, qui est Romanus Episcopus, et hoc principium probatum est in eodem libro, a cap. 10. Tertium principium est, hanc spiritualem potestatem non esse subordinatam potestati regum, sed potius habere illam sibi subjectam, quod in eo libro, a cap. 20, fuse probatum ac defensum est.

3. Probatur assertio ratione. — Ex his ergo principiis sic concluditur. Causæ spirituales per spiritualem potestatem stabiliendæ ac definiendæ sunt; sed hæc potestas spiritualis neque est in regibus, neque subordinatur potestati eorum; ergo tales causæ spirituales sunt extra forum et potestatem sacerdotalium principum, tam directe, quam indirecte; ergo personæ ecclesiasticae quoad has causas ex vi divini juris extra jurisdictionem principum constituti sunt, ac subinde eodem divino jure tali exemptione seu immunitate gaudent. Major est per se evidens, supposito primo principio, quia si potestas jurisdictionis spiritualis et temporalis distinguntur, necesse est ut circa distinctas materias versentur, et unaquæque materiam sibi proportionatam vendicet, et intra illam contineatur; ergo spiritualis materia quoad omnem dispositionem et regimen ad potestatem spiritualem pertinet; et e converso, spiritualis potestas in materia spirituali tanquam in propria sphera operatur, eamque pro adæquato et proprio objecto habet. Minor autem in secundo et tertio prin-

¹ Rom. 13.

² Prov. 8.

cipio probata est. Prima vero illatio evidenter ex præmissis infertur, quia nulla potestas operatur directe nisi in sua materia, neque extenditur indirecte, nisi ad materiam potestatis sibi subordinate; neutrum autem habet potestas civilis respectu materiæ spiritualis, ut ostensum est; ergo spiritualis materia omnino est extra jurisdictionem temporalium principum. Et inde tandem evidenter concluditur altera illatio, quia imprimis clerici, ut clerici sunt, ad spiritualem materiam pertinent, ratione ordinis, qui spiritualis est, et ex Christi institutione. Deinde personæ sortiuntur forum pro ratione materiarum seu causarum, quia jurisdictionis actus proxime versatur circa aliquam materiam, quam præcipit, vel discutit personæ subjectæ; et ideo si materia est extra jurisdictionem alicujus, etiam personæ, ad quas pertinet talis materia sub ratione tali, erunt ab eadem jurisdictione immunes.

4. *Ex Scripturis ostenditur conclusio.* — Hac ergo manifesta probatione supposita, ex principiis fidei jam probatis, non aliter ostenditur hæc veritas ex Scriptura, quam ex illis locis, in quibus Ecclesiæ regimen pastoribus Ecclesiæ a Christo commissum esse ostenditur: *Pasce oves meas*, etc. *Quodcunque ligaveris*, etc. *Qui vos audit, me audit*, etc. Item ex illis, quibus ex institutione Christi ostenditur esse in Ecclesia potestatem judiciarium, et ecclesiasticum tribunal, juxta illud: *Quid rultis? in virga reniam ad vos?*¹ etc. Et illud: *Ego quidem absens corpore, præsens autem spiritu jam judicari ut præsens, eum qui sic operatus est*, etc. Et infra: *Nam et si amplius gloriatus fuero de potestate nostra*, etc. Item illud: *Obedite præpositis vestris*, etc. Et quod ad hanc potestatem pertineat clericorum regimen, satis declaratur ex verbis Pauli ad Timotheum: *Adversus presbyterum accusationem noli recipere, nisi sub duobus, aut tribus testibus*². Inde enim satis constat, causas clericorum, saltem ut clerici sunt, ad Praelatos Ecclesiæ pertinere, et ad solos illos. Nam licet exclusiva ibi expresse non addatur, satis ex eo colligitur quod illa potestas superioris ordinis est, et aliis data non est, nisi Ecclesiæ Pastoribus, nec inferiori potestati subordinata est, ut dixi.

5. *Confirmatur ex Summis Pontificibus.* — Atque hoc modo veritate in hanc ex Christi et

Apostolorum doctrina sumpserunt sacri Pontifices et Concilia. Huc enim spectant verba illa Joan. Papæ: *Si imperator Catholicus est, filius est, non præsul Ecclesie.* Et infra: *Ut Dei beneficiis non ingratus contra dispositionem cœlestis ordinis nihil usurpet, ad sacerdotes enim voluit Deus, quæ Ecclesiæ disponenda sunt, pertinere, non autem ad sæculi potestates*, etc. In quibus verbis aperte declarat, hanc institutionem esse de jure divino, et illud verbum *discuti*, ponderandum est, nam ex illo constat, causas clericorum ad forum ecclesiasticum tantum pertinere ex divino jure. Quod saltem de causis ecclesiasticis, et de clericis, ut clerici sunt, necessario intelligendum est. Eamdem doctrinam comprobant et confirmant Gelasius, Nicolaus I, et Symmachus Pontifices, in variis decretis synodibus, in eadem dist. 69 allegati. Et Felix Papa, atque iterum Nicolaus, in cap. *Certum est*, et cap. *Imperium*, et cap. *Quoniam*, distinct. 10; et Innoc. III, in cap. *Ecclesia*, de Constit., et in cap. *Solitudo*, de Majorit. et obediens., et in cap. *Novit*, de Judiciis, ibique cap. 2, idem habetur ex Concilio Rhemensi sub Eugenio, et ex Honorio Papa, in cap. 2 de Jurament. calum.

6. Scio quidem regem Angliae cum suis Protestantibus tantorum Pontificum auctoritatem contemnere, eosque tanquam judices in causa propria recusare. Verumtamen jam dixi in præcedenti libro, istorum vel ignorantiam, vel pertinaciam, Pontificum auctoritatem, quæ in Christi verbis ac promissionibus fundata est, non posse minuere. Eo vel maxime quod non soli Romani Pontifices, sed alii etiam antiquissimi Patres in eamdem veritatem conspirant, ut ex Ambrosio, Gregorio Nazianzeno, et aliis multis, in superiori libro, cap. 9, et sequenti, late monstratum est, et ideo eorum sententias iterum referre supervacaneum judico. Quod si de his omnibus dicitur esse Episcopos aut sacerdotes, et in propria causa loqui, certe Ecclesia nunquam habuit alias Pastores aut Doctores a quibus doceretur, et per quos divinas et Apostolicas traditiones acciperet, et in fidei puritate et sana Scripturarum intelligentia conservaretur, ad consummationem Sanctorum in opus ministerii, in ædificationem corporis Christi, donec occurramus omnes in unitatem fidei, et agnitionis filii Dei in virum perfectum, in mensuram ætatis plenitudinis Christi, ut dixit Paulus, ad Ephes. 4. Impium ergo est cogitare, eos in hac causa Ecclesiæ imposuisse,

¹ 1 Cor. 4.

² 1 Timoth. 2.

aut humano affectu fuisse locutos, sed Ecclesiæ causam, quæ a sua separari non poterat, defendisse, non potestatem novam sibi arrogando, sed quam a Christo per Apostolos et eorum successores acceperunt, conservando, et posteris ad Ecclesiæ utilitatem deferendo.

7. Sic ergo confirmata catholica assertione, tam infallibili auctoritate quam firma ratione, et ex eadem probatione intelligi potest primo, hanc immunitatem seu exemptionem clericorum non esse per modum ablationis, seu diminutionis jurisdictionis, quæ prius esset in principibus, sed per modum negationis, quia nunquam talem jurisdictionem habuerunt, neque unde illam habeant, ostendere poterunt. Quia (ut sœpe dixi) Christus Dominus condendo novam spiritualem rempublicam, nullam principibus temporalibus dedit potestatem (ubi enim, aut quando illam contulit?) sed eam dedit Ecclesiæ pastoribus, ideoque temporales reges nullam potestatem habent in ecclesiasticas personas et earum causas, prout tales sunt, neque hujusmodi personæ quoad tales causas regibus subjiciuntur, et hoc modo dicuntur exempti, non quia illorum jurisdictioni subtracti sint, sed quia ipsi reges potestatem in ipsis nunquam acceperunt. Quod declaratur optime ex tempore primitive Ecclesiæ, in quo principes temporales infideles erant; nemo enim dicet eos habuisse tunc potestatem ad judicandas ecclesiasticas causas clericorum, et nihilominus tunc Ecclesia non carebat perfecta potestate ad se gubernandum, et ad judicium ferrendum in hujusmodi causis, et de hujusmodi personis, quæ ad principes sœculares nullo modo pertinebant. At sœculares principes propter conversionem ad fidem non acquisierunt jurisdictionem aliquam novam in Ecclesiam (quis enim eis illam contulisset?); ergo neque nunc illam habent. Recte igitur dicuntur clerici in his exempti, non per propriam subtractionem, et quasi ex privilegio novo, sed quia ipsi principes ex se carent tali potestate in clericos quoad hujusmodi causas.

8. *Omnes etiam spirituales cause a sœculari potestate eximuntur.* — Secundo colligo ex dictis, licet hæc exempio præcipue elucet in clericis, quia et personæ sacræ sunt, ac divino cultui specialiter dicatae, ideoque et canonice legibus principaliter gubernantur, et consequenter causæ ecclesiasticæ in eis maxime et quasi in proprio subjecto locum habent, nihilominus etiam in aliis fidelibus,

quatenus spirituales causæ ad eos etiam pertinere possunt, eamdem exemptionem observari, quia non tantum ex proprio statu personæ ecclesiasticæ, sed ex generali ratione talium causarum nascitur, ut declaratum est. Vocantur autem spirituales causæ omnes illæ, quæ ad fidem, sacramenta, sacrificium, et in universum ad divinum cultum, et ad salutem animæ, ejusque a peccatis curationem ac remedium pertinent, ut in lib. 4 de Legib., qui est de legibus canonice, latius diximus; et tractant Doctores in dicto cap. *Ecclesia*, de Constit.; et varia exempla videri possunt in Tuscho, verb. *Libertas ecclesiastica*, cap. 4; et nonnulla de hoc puncto addemus infra, cap. 15 et 16.

9. *Solutio ad fundamentum contrarii erroris.* — Ultimo, ex dictis patet responsio ad fundamentum contrarii erroris. Principia enim in quibus fundatur, hæretica sunt, satisque in superioribus impugnata. Verba autem Pauli: *Qui potestati resistit, Dei ordinationi resistit*; et verba Sapientiæ: *Per me reges regnant*, ineptissime inducuntur. Nam Paulus loquitur de potestate in suo foro, et intra limites suos præcipiente. Cum enim dixit: *Omnis anima potestatibus sublimioribus subdita sit*, non intellexit omnem hominem debere esse subjectum cuicumque regi, sed suo; nec enim Hispanus tenetur regi Galliæ parere aut subesse; unusquisque ergo suo regi subesse præcipitur; ita ergo etiam dicitur Dei ordinationi resistere, qui potestati se superiori, et ordinate seu in materia sibi subjecta præcipienti resistit. Neque Paulus dixit regi obediendum esse in omni materia, sed simpliciter locutus est, sicut alibi etiam dixit: *Obedite præpositis vestris*. Ideoque necessarium non fuit addere limitationem vel exceptionem, quia in ipsa obedientiae ratione intrinsece includitur respectus ad superiorem, ut superior est et legitime præcipit. Et in alio loco, sicut dixit Sapiens, reges per sapientiam regnare, ita statim addidit, *et legum conditores justa decernere*.

10. *Ad confirmationem.* — Ad confirmationem de legibus Justiniani in materia canonica, dixi in allegato lib. 4, de Legib. c. 41, illas non esse veras leges, sed per modum instructionis, non per modum juris haberi posse, ideoque in his, in quibus canonibus contradicunt, nullius esse utilitatis, etiam declaratur in l. *Privilegia*, et *Authent. Cassa*, C. de *Sacrosanct. eccl.* Et specialiter de causis ecclesiasticis id declaravit idem Justinian.,

Novel. 38, quæ habetur collat. 6, tit. 11, Ut Clerici apud proprios Episcop., etc.

11. Objectio. — **Solutio.** — Una vero superest objectio contra illam partem, in qua dictum est, immunitatem hanc esse de jure divino, nam inde fieret esset immutabilem, et non posse per Pontificem minui aut dispensari, quod falsum est. Nam ex consensu Doctorum, potest Pontifex causas ecclesiasticas et spiritualem jurisdictionem laicis committere; poterit ergo clericos in eisdem etiam causis regibus subjicere. Respondeo, hanc exemptionem (ut dixi) esse de jure divino negative, quatenus jus divinum non dedit regibus spiritualem potestatem in clericos, vel ecclesias, aut ecclesiasticas causas. Unde quoad hoc est prorsus immutabilis divina institutio, fieri enim non potest ut rex ex via regiae potestatis jus dicere possit clero in hujusmodi causis. Neque hoc potest per ullam dispensationem honestari, quia repugnantiam contra rationem naturalem involvit. Unde etiam est jure divino prohibitum, ne quis per solam jurisdictionem regiam sine altiori jurisdictione tale judicium usurpet; in hoc ergo dispensatio aut limitatio non cadit.

12. Non est autem sic eodem divino jure prohibitum, ne spiritualis jurisdictione laicis committatur; et ideo licet canones hoc prohibeant, et regulariter non fiat etiam per usitatem dispensationem, nihilominus de absoluta potestate Pontificis fieri non repugnat, ut cum communis sententia in libris de Censuris et Legibus diximus, et tradunt Panorm., Felin. et alii expositores communiter, in cap. *Ecclesia Sanctæ Mariæ*, de Constitutionib. Existimo autem hoc esse intelligendum de jurisdictione delegata, vel in aliquo particuliari casu, nam ordinarium regimen Ecclesiæ non existimo posse regibus aut laicis committi, quia jure divino statutum est, ut per Episcopos gubernetur, ut Aectorum 2 constat. Et cibamdem rationem, existimo fieri non posse ut clerici in propriis, et ecclesiasticis rebus et causis, sæcularibus principibus ordinario jure subjiciantur, etiam per concessiōnem Pontificis; nam hoc modo multum everteretur ordinarium Ecclesiæ regimen a Christo institutum, et non potest habere justam et rationabilem causam, ob quam valide fieri posse videatur.

CAPUT III.

UTRUM PERSONÆ ECCLESIASTICÆ A JURISDICTIONE PRINCIPUM, ETIAM IN REBUS ET CAUSIS TEMPORALIBUS, EXIMI POTUERINT, ET EXEMPTÆ SINT?

1. In hoc puncto est præcipua controversia cum his schismaticis, qui, licet primatum Romani Pontificis non negent quoad spiritualem potestatem, nihilominus primatum in temporalibus, tam civilibus quam criminalibus, etiam respectu clericorum regibus temporalibus attribuunt, et ideo illud prius generaliter proponimus inquirendum, an sit talis exemptio, ut postea originem, proprietates et effectus ejus speciatim declaremus. In quæstione autem proposita duo insinuantur: unum est de potestate, id est, an potuerint clerici eximi a jurisdictione regum in rebus temporalibus; aliud est, an de facto exempti sint. Hæretici enim sectatores Marsilii Paduani, et Illiricus, aliquique novorum schismatum inventores, constanter negant factam esse in Ecclesia eam clericorum exemptionem, quam principes temporales supremi observare tenentur. Ut autem hujus assertionis fundamentum aliquod inveniant, negant consequenter potuisse fieri in Ecclesia talem exemptionem sine gravi lapsu et errore contra jus divinum et naturale. Quam rationem astruendi hunc errorem habuisse videntur quidam Paulus Servita, et alii occulti scriptores contra libertatem ecclesiasticam, qui ante paucos annos libellos quosdam contra sedem Apostolicam sparserunt occasione Venetæ dissensionis omnibus notæ, eisque annumerandus videtur Barclaius, cui novissime Illustrissimus Bellarminus respondit; atque hos etiam rex Angliae laudat et imitatur.

2. Ad illud autem suum fundamentum persuadendum, solum utuntur illis testimoniis Scripturæ, in quibus reges dicuntur ministri Dei, et eorum potestas a Deo esse dicitur, et ideo eorum obedientia præcipitur, tanquam jure naturæ necessaria, *propter conscientiam*, ad Rom. 13, Proverb. 8, cum similibus. Ex quibus hoc etiam principium tanquam certum statnunt, reges a Deo immediate habere potestatem et curam impositam gubernandi omnes homines ditionis suæ. Ex quo tandem inferunt, exemptionem clericorum uniuscujusque regni a suo rege esse esse repugnantem legi divinæ ac naturali, ac propterea esse impossibilem. Hæc autem ultima illatio in hunc modum potest a nobis deduci,

ut umbram aliquam rationis habere videatur; nam hæc exemptione vel potuit fieri a Deo ipso, vel ab aliquo homine; neutrum dici potest; ergo simpliciter introduci non potuit. Minor quoad priorem partem de Deo probatur, tum quia Deus non est sibi contrarius; si ergo ipse præcepit regibus ut haberent curam omnium hominum, qui sub imperio suo nascuntur et degunt, et his omnibus præcepit ut suis regibus obedirent, fieri non potest ut regibus potestatem in clericos subditos ademerit, vel (quod perinde est) ut clericos a principum potestate exemerit. Tum etiam quia hæc exemptione est contraria juri naturali, Deus autem vel omnino non potest dispensare in jure naturali, vel certe ordinaria potestate id non facit, maxime in lege gratiæ, et dispensatione adeo universalis.

3. Altera pars de homine probatur imprimis ratione universalis, quia multo minus potest homo quam Deus naturale jus everttere. Deinde utor alio dilemmate, quia si quis hominum talem exemptionem facere potuisset, aut esset Papa, aut imperator, seu rex aut princeps quilibet supremus in suo territorio: nam si hi nou possunt, multo certe minus inferiores poterunt. Quod autem Papa non potuerit hanc exemptionem clericis concedere, probatur, quia non potest reges potestate sua privare, neque *regalibus prærogativis detrahere*, ut inquit rex Angliæ. Nam eadem est ratio totius et partis; si ergo Papa non potest regem aliquem christianum tota sua jurisdictione privare, ergo neque aliqua illius parte, præsertim adeo magna et notabili, qualis esset *tertia hominum et fundorum pars*, ut idem rex conqueritur. Et confirmatur, quia non potest Papa exemptionem hanc concedere clericis respectu principis ethnici et non baptizati, si clerici sint illius subditi, ut, verbi gratia, nunc est in Japoniæ vel China; ergo neque respectu christianorum principum id facere potest. Probatur consequentia, quia reges christiani non sunt minus supremi in temporalibus quam reges ethnici, et quamvis demus christianos principes esse subditos spiritualiter Summo Pontifici (quod rex Angliæ et Protestantes non admittunt), hoc nihil conferit, ut eos possit sua temporali jurisdictione privare; in hoc ergo æquiparantur principibus ethnici, et nullo modo Ecclesiæ subditis. Dicit fortasse aliquis, hoc ad summum probare, non potuisse Pontifices hoc facere invitis regibus christianis, ex consensu autem illorum potuisse. Sed hoc imprimis

non sufficit ad repugnandum adversariis, nam inde schismatici inferent, exemptionem clericorum non esse per se firmam, sed pendere semper ex consensu principum, ac proinde pro eorumdem arbitrio revocari posse. Deinde rex Angliæ dieet se esse supremum in temporalibus, et nunquam consensisse, sed restitisse, non solum se, sed etiam antecessores suos. Denique etiam videndum superest an ipsimet reges consentire potuerint, nam perinde est consentire ac facere; probabimus autem reges non potuisse hanc exemptionem concedere; ergo neque ex illorum consensu potuerunt Pontifices illam introducere.

4. Quod igitur rex temporalis non possit privilegiorum talis exemptionis clericis sui regni concedere, ut illos faciat sibi non subditos, probatur imprimis principio a jurisperitis recepto, quod principes non possunt privilegium concedere, quod directe sit contra regiam dignitatem, quia non possunt illam minuere aliquid ei detrahendo, quia neque in eorum utilitatem principaliter creata est, neque illius absolutum dominium acceperunt, sed ut eam pro suis successoribus integrum conservarent. Nam ob hanc etiam causam non potest Summus Pontifex suam dignitatem minuere, nec privilegium concedere, quo dignitati suæ aliquid detrahatur. Unde intulit Navar., in c. *Norit*, de Judiciis, corollar. 69, n. 166, nullum regem posse regno vel regnocolis suis privilegium concedere, ut neque sibi, nec magistratibus suis parere teneantur. Quod et confirmat, tum quia tale privilegium esset contra legem naturæ, dictantem principibus et superioribus obediendum esse; tum etiam quia res publica ipsa, si in se retineret potestatem supremam a Deo sibi datam, non posset membrum aliquod reipublicæ a lege sibi obediendi eximere, quia non posset se abdicare illa naturali potestate, quam a natura accepit in cives suos, manente eadem relatione et unione civium cum civitate, seu membrorum cum corpore; ergo neque nunc rex potest id facere, cum potestas ejus eadem sit, quæ in republica præcessit, et in eum translata fuit.

5. *Confirmatio.* — Possumus denique nos hoc confirmare exemplo adducto de Summo Pontifice, qui non potest aliquem hominem baptizatum a sua jurisdictione ita eximere, ut sibi parere non teneatur; nam idem dicendum videtur in rege temporali, quia ita comparatur ad regnum suum et personas ejus in regimine temporali, sicut Papa ad

Ecclesiam in spirituali. Ratio autem utriusque communis est, quia Deus tam regi quam Pontifici commisit curam subditorum, ac praecepit ut eis jus dicerent, et in officio contineant, iniquos puniendo, et bonos defendendo; ergo non potest rex personas sibi a Deo commissas eximere, et liberas relinquere, quia hoc esset contra divinam institutionem, et contra sui muneric naturalem obligationem. Et hoc est quod rex Angliae et alii contendunt, quando dicunt hanc exemptionem esse contra jus naturale. Tandem confirmatur haec pars simul cum præcedenti, quia talis exemptione non esset in ædificationem, sed in detrimentum Ecclesiæ; ergo neque a rege, neque a Pontifice introduci potuit. Quam rationem intendisse videtur rex Angliae, cum principes monet ut recogitent, *quantum spinarum et tribulorum (inquit) in mediis vestris ditionibus relinquitur, cum asseratur tam potens hominum factio sub imperiis vestris nasci, educari, opimisque prædiis frui posse, que a vestra potestate immunis sit, nec ullo jure vestris legibus judiciisque subjecta.* Sequi autem hoc incommunum ostendere conatur Paulus ille Veneratus, quia cum Prælati ecclesiastici non possint in subditos gladio materiali uti, eos poena mortis mulctando, inde fit ut vitia et peccata in Ecclesia augeantur. Unde concludit, hanc libertatem, quam ecclesiastici prætendent, nihil aliud esse quam peccandi libertatem.

6. Vera et catholica sententia. — *Probatur primum.* — Nihilominus vera et catholica sententia est, clericos juste potuisse a jurisdictione temporalium principum eximi. Hæc assertio, quatenus auctoritate Ecclesiæ fundanda est, pendet ex facto, de quo nondum dictum est, et ideo prius ostendemus veritatem ipsam de possibili, postea ex facto certitudinem ejus probabimus. Dicimus ergo exemptionem hanc juste fieri potuisse tribus modis in argumentando tactis, videlicet, a Deo, et a Pontifice, et ab imperatore seu regibus. Et quidem prima pars adeo est evidens, ut a nemine possit sine magna cæcitate et impietate negari; nam Deus est absolutus dominus vite et mortis, ac libertatis humanae; ergo, justissime sua potestate et jure utendo, potest quemlibet hominem alterius servum vel dominum efficere, et subditum vel superiorem, et similiter potest quemcumque hominem proprio dominio aut potestate privare, et prout libuerit alteri eam donare. Et ideo dixit Daniel, cap. 2: *Sit nomen Domini benedictum a seculo, et usque in seculum, quia sapientia*

et fortitudo ejus sunt, et ipse mutat tempora et aetates, transfert regna, et constituit. Ergo eadem facilitate potuit transferre clericos sub potestatem Pontificis, auferendo regibus potestatem quam in illas personas habere poterant, et illam Pontifici conferendo.

7. Solvitur ratio contra dictum concessionis modum. — Neque ratio quæ in contrarium fiebat, ullius est momenti, quia per hujusmodi exemptionem, mutationem, seu translationem, nullam mutationem in ipso Deo fieri necesse est; manens enim ipse immutatus, mutat imperia et humanarum rerum status, et ita in ipsa Ecclesia pro diversis temporibus distinctos esse voluit gubernationis modos juxta consilium voluntatis suæ, sine ulla ejusdem voluntatis mutatione aut contrarietate. Nam, licet Deus alicui regnum vel aliam potestatem tribuat, non cogitur perpetuo illam conservare, sed juxta suæ providentiae rationem potest illam auferre, et alteri donare, non quia priorem voluntatem retractet, sed quia a principio sub ea lege et conditione, ac dependentia a sua voluntate omnia disposuit. Nec denique in hoc negotio intervenit aliqua dispensatio in jure naturali, sed solum quædam mutatio in materia ejus, quæ non solum a Deo, sed etiam per hominem fieri potest, ut alibi a me latius dictum est, et statim etiam attingam.

8. Per clericorum exemptionem reges prævantur jurisdictione in ipsos. — Unde duo hic breviter distinguenda sunt, quæ adversarii confundunt, ut tenebris rem involvant, cum tamen res sit clarissima, et cuilibet mediocreiter docto manifesta. Aliud est enim eximere aliquem ab obedientia alicujus, auferendo ab alio jurisdictionem, seu omne jus superioris circa tales personam, etiamsi circa alias potestatem retineat. Alind vero est, conservando in principe vel Prælati eamdem jurisdictionem in tales personam, idemque jus præcipendi, nihilominus auferre a subdito obligationem parendi. Exemptio igitur explicata in hoc posteriori sensu (quem theologico more compositum appellare possumus) verissime dicitur esse contra jus naturale quoad hoc indispensabile, quia involvit apertam repugnantiam et contradictionem, etiam in ipsa divina voluntate. Nam inde fieret Deum simili velle, ut superior possit vere præcipere, ac proinde subditum efficaciter obligare, et ut nihilominus possit subditus licite non obediere, et consequenter ut simul sit subditus et non subditus; itemque ut sit bellum justum

ex utraque parte, non in ignorantia, sed in re ipsa fundatum, quæ est intolerabilis et incredibilis perplexitas. Quis autem unquam exemptionem clericorum ita intellexit? nullus profecto qui sanæ mentis sit. Alter igitur modus exemptionis non solum possibilis, sed etiam facillimus, imo et quotidianus est in his potestatibus quæ ab hominibus dantur, et ab eisdem auferri aut limitari possunt. Sie enim eximit rex aliquem nobilem a jurisdictione inferioris magistratus, et Pontifex eximit religiosum a jurisdictione Episcopi. Ita ergo eximere potuit Deus clericos a jurisdictione regum sine ulla dispensatione in lege naturali, quia nulla est lex naturalis, quæ præcipiat ut reges in clericos vel omnes incolas suorum regnorum jurisdictionem habeant; sed potius cum reges sint Dei ministri, et ab ipso habeant potestatem in quoslibet subditos, ipsa ratio naturalis dictat posse Deum potestatem illam minuere, et ab illa quos libuerit ex subditis eximere.

9. *Probatur secundum.* — Altera pars erat, non esse impossibile neque contra rationem naturalem, hanc exemptionem a Summo Pontifice efficaciter fieri, ita ut justa sit et valida, ideoque sæculares principes eam admittere et servare teneantur. Quæ pars propriam disputationem postulat, quam cap. 11 trademus, ubi auctoritate et ratione illam direete ostendemus; nunc ergo solum declaranda est, ut constet nullam habere repugnantiam. Duobus ergo modis intelligi potest, Pontificem hanc libertatem clericis conferre, primo, potestate humana seu mere naturali; secundo, potestate aliquo modo divina, id est, supernaturali et divinitus data. Priori modo fatemur Pontificem non potuisse hanc exemptionem introducere, hoc enim saltem probat ratio facta, quod non possit Pontifex jure humano, vel potestate naturali seu acquisita, regum potestatem auferre seu minuere, cum illi sint supremi in suo ordine, et secundum naturalem potestatem ei non subjiciantur.

10. *Objectio.* — *Responsio.* — Dicit forte aliquis titulum præscriptionis humanum esse a naturalem, potuisse autem Pontificem usum præscribere hoc jus contra temporales principes, eximendi clericos ab eorum potestate. Respondeatur hunc titulum non habere locum in præsenti materia, neque in illo fundari Pontifices, ut interdum rex Angliae existimasse videtur, et in suis verbis indicat. Ratio vero reddi potest, vel generalis, quia illa, quæ sunt de intrinseca ratione supremæ potestatis,

non possunt contra supremum principem præscribi, ut est communis sententia juristarum, cum Bartholo, in l. *In omnibus*, ff. de Diversis et temporalibus præscriptionibus; et Panormitan., in cap. *Cum nobis*, de Præscript., et aliis quos refert Covar., in Practicis, cap. 4, et in Regula *Possessor*, p. 2, § 2, n. 8. Vel potest esse ratio peculiaris et propria, quia exemptio clericorum, seclusa concessione seu voluntate ipsorum sæcularium principium, non posset sola humana ratione aut titulo juste inchoari, seu bona fide, et ideo necesse est ut potestas non procedat ab usu, sed potius e contrario usus legitimus supponat potestatem, et ab illa inchoetur.

11. *Pontifex per suam indirectam in reges potestatem potest clericos eximere.* — Oportet ergo ut hæc potestas sit supernaturalis, et a Christo specialiter indita; hoc autem modo, evidens est non repugnare quod Christus dederit Vicario suo hanc potestatem per quamdam participationem ejus dominii et potentiae, quæ in ipso est per essentiam vel excellentiam. Quid est enim cur hoc fieri non potuerit? aut quæ deformitas aut malitia contra rationem naturalem in hoc excogitari potest? Concessa enim Pontifici tali potestate, per illam constituitur superior regibus tanquam minister Dei superioris ordinis, et ideo exemptio facta per hujusmodi potestatem erit quidem supra merum jus naturæ, non tamen contra illud. Neque in hoc video esse posse quæstionem, sed solum in hoc, an Christus de facto hanc potestatem Pontifici dederit, quam quæstionem in citato loco tractabimus, et ibi ex professo respondebimus objectionibus circa hoc punctum supra propositis, nam eo præcipue tendunt, ut ostendant de facto non esse datam Fontifici hanc potestatem. Nunc ergo breviter dicimus, argumenta illa solum probare, Pontificem non posse hanc exemptionem conferre clericis per directam potestatem quam in temporalibus habeat supra reges terræ, non tamen probare hoc exceedere potestatem spiritualem ejus, quatenus per eam est superior regibus temporalibus, saltem indirecte, et in ordine ad spiritualia, quæ potestas etiam supra reges ethnicos in multis casibus locum habet, ut superiori libro ostensum est. Quomodo vero hæc potestas indirecta ad effectum exemptionis sufficiat, in dicto loco videbimus.

12. *Probatur tertium.* — Tertia pars supra posita fuit de regibus temporalibus, de quibus dicimus potuisse licite juri suo renunciare, et

quamvis nulla superiori virtute aut potestate cogerentur, potuisse abdicare se jurisdictione temporali, quam habebant in clericos, eamque in Pontificem Romanum vel alios ecclesiasticos Praelatos transferre. Hanc partem tanquam certam supponunt multa jura civilia et canonica, et communiter eorum interpres, ac Doctores Theologi, ut in sequentibus capitulis late referemus. Ratio autem aperla est, quia rex supremus est verus dominus, et habet liberam potestatem utendi sua jurisdictione quocumque modo, neque intrinsece malo, neque sibi prohibito; sed actus eximendi clericos a jurisdictione laica est actus dominii, et ejusdem jurisdictionis voluntariae, qui nec fuit regibus prohibitus, nec est intrinsece malus; ergo potuit valide et licite fieri a quocumque rege supremo. Consequentia optima est et legitima. Majorem etiam non negabit rex Angliae, est enim regibus favorabilis, et quidem merito, nam est res clara et evidens ex dictis supra de regia potestate. Quamvis enim rex non sit ita factus reipublice dominus, ut possit ad libitum sua potestate uti, et omnia in utilitatem suam convertere, nihilominus verus est dominus, quatenus verum et proprium jus habet praeципiendi, judicandi, gubernandi, et disponendi circa res sui regni in communem utilitatem, et ita juristae hoc vocant dominium jurisdictionis, quod in supremo principe habet per se et in genere suo independentiam ab omni alio superiore infra Deum, et ideo habet amplissimam et liberam facultatem ad omnem usum non prohibitum, seu reclae rationi non repugnantem.

43. Exemptio est actus voluntariae jurisdictionis. — Superest ergo ut talem esse probemus concessionem exemptionis, de qua tractamus. Illa enim quidam usus est supremae jurisdictionis, nam (ut dixi) exemptio privilegium quoddam est, concessio autem privilegii actus est jurisdictionis voluntariae, ut in lib. 8 de Legib. late tractavimus. Recte ergo dictum est, exemptionem hanc esse usum voluntariae jurisdictionis, quam oportet esse supremam in suo ordine, ut possit etiam a se ipse supremus princeps privilegium eximerre. Alia etiam ratione dici potest hic actus usus jurisdictionis, quia est quedam jurisdictionis donatio; nemo enim dare potest jurisdictionem, nisi qui illam habet. Est autem peculiare in hoc modo concedendi jurisdictionem, qui per hanc exemptionem fit, ut princeps, qui illam alteri concedit, se ipsum illa

privet, quia etiam a sua potestate subditum eximit; quod non invenitur in aliis modis delegandi vel committendi jurisdictionem, nec in exemptione ab inferiori magistratu, quam princeps concedit. Unde si illa exemptione consideretur ut est jurisdictionis collatio, actus jurisdictionis recte appellatur; si vero ut abdicatio proprii juris spectetur, magis videtur esse actus dominii et liberalitatis; sub utraque autem ratione optime cadit in supremum gubernatorem et dominum. Quod ergo hic usus jurisdictionis suae non sit prohibitus supremo principi lege positiva, manifestum est, quia non habet superiorum a quo lex illa ferri potuerit. Supponimus enim illam legem non esse positivam divinam, nullibi enim lata est, aut ostendi potest; deinde etiam non esse canonicam, tanquam per se notum sumimus. Et ideo de solo directe superiore loquimur, cum negamus regem habere superiorem, a quo lex illa ferri potuerit, quia debet esse lex humana et civilis, quae a solo principe directe superiore in temporalibus fieri poterat. Neque fingi potest lata ab ipsomet rege, quia non potest supremus princeps se per se primo sua lege obligare, sed ad summum per quamdam consecutionem, quando lex communiatim imposita similem obligandi rationem habet in principe; haec autem lex, si daretur, non communiat, sed soli principi imponeretur, ideoque non potest ab eodemmet principe ferri. Nec denique fingi potest quod sit lex a republica lata; nam postquam respublica potestatem suam in regem transtulit, illo est inferior, ut illum non possit positivis legibus obligare.

44. Exemptio clericorum nec justitiae, nec rationi naturali repugnat. — Solum ostendendum superest, illum usum non esse per se et intrinsece malum, seu, quod perinde est, privilegium illud non esse contra justitiam vel naturalem rationem. Quod quidem per se evidens videtur, quia est in favorem fidei et religionis, et nulli nocet nec prajudicat, nisi ipsimet principi concedenti privilegium, quod voluntarie facere potest et pie, si propter dictum finem et sine aliquo no-cumento id faciat. Declaratur praeterea in hunc modum, quia vel usus ille est per se malus, quia est contra pactum cum republica initum, eum primum in regem transtulit potestatem suam; vel quia est contra naturalem legem justitiae, qua rex tenetur habere curam suorum subditorum, seu incolarum omnium regni sui, juxta exigentiam sui mu-

neris, quod a republica accepit; utrumque autem sine fundamento excogitur, facillimeque excludi potest; nulla est ergo vera ratio intrinsecæ malitiæ in tali privilegio.

45. Prior pars minoris probatur, quia gratis fingitur tale pactum inter rempublicam et regem, nimirum, quod respublica suam potestatem sub ea conditione seu limitatione in regem transtulerit, ut non posset tale privilegium exemptionis aliquibus civibus concedere. Unde enim probari potest talis conditio, aut quod illius signum ostendi potest? Præterea ipsamet respublica non habebat potestatem suam ita limitatam, quia non ex aliquo pacto simili, sed a Deo ipso illam recepit quasi congenitam cum natura, et sub ea tantum conditione, ut illa juste et secundum rectam rationem uteretur; ergo eodem modo illam in regem transtulit, et quidquid aliud fingitur, voluntarium et impertinens est. Præsertim quia si humana respublica consideretur in statu legis naturæ, in quo se ipsam regere posset per rationem rectam, vel naturalem tantum, vel fide illustratam, potuisset et temporales reges sibi, et sacerdotes ad Dei cultum peculiariter dicatos instituere, sacerdotesque a regum potestate eximere, et sub aliquo gubernatore in suo ordine supremo eos constituere; in hoc enim genere institutionis nulla est repugnantia vel deformitas; ergo etiam rex, quamvis simpliciter totam potestatem a respublica receperit, posset postea simile privilegium sacerdotibus concedere; ergo supervacaneum est fingere pactum illud, et conditionem seu limitationem sibi a respublica impositam, cum ad convenientem reipublicæ gubernationem necessaria non sit. Quin potius talis conditio, si extendatur ut locum habeat etiam respectu sacerdotum, seu Pontificum supernaturali modo a Christo institutorum, sic neque venire poterat in mentem humanæ reipublicæ secundum se spectatæ, et contra rationem et publicam honestatem esset, et ideo nullius momenti vel valoris foret. Igitur ex hoc capite non est ligata potestas regum, quominus recte et valide privilegium hoc clericis dare potuerint, etiam si aliunde illud non haberent.

46. *Ita aliquem eximere, ut nulli subjiciatur, intrinsece malum est.* — Atque inde tandem facile probatur alterum membrum, nimirum privilegium hoc non esse contra naturalem legem justitiae, qua rex tenetur curam omnium civium habere, ut convenienter gubernentur. Nam rex, concedendo hoc pri-

vilegium, non omittit hanc curam, sed altiori et convenientiori modo illi providet. Unde duobus modis cogitari potest, regem, aliquem sibi subditum a sua jurisdictione eximere. Primo, abdicando a se omnem potestatem et jurisdictionem circa illum, et nulli alteri illum subjiciendo, sed omnino vagum, ut sic dicam, et absque lege et gubernatore illum relinquendo. Et hunc modum privilegi fatemur esse inordinatissimum, et intrinsece malum, quia est bonis moribus contrarium, et ex se communitati reipublicæ valde perniciosum. Non est autem hujusmodi clericorum exemptio, ut nunc supponimus. Alio modo potest rex eximere subditum a sua jurisdictione, potestatem in eum alteri tribuendo vel relinquendo; et hic modus malus non est, sed potest habere convenientem rationem, quia per se non repugnat bonis moribus subditorum, quia non relinquuntur sine sufficienti gubernatore, et aliunde potest esse magis decens, magisque ad commune bonum convenientis, propter peculiarem statum aliorum civium. Talis autem est exemptio clericorum, ut infra probabimus; ergo illam concedere, non fuit contra bonum usum regiae jurisdictionis et potestatis, ac proinde nec rationi naturali repugnat tale privilegium, nec excedit supremi principis potestatem.

47. *Solvuntur argumenta contra hunc exemptionis modum.* — Neque etiam contra hoc obstant argumenta, quæ supra tertio loco proposita sunt. Quod enim in primo dicitur, non posse principem suam jurisdictionem seu potestatem minuere, eam alteri communicando, non est in universum verum, quando talis divisio vel communicatio jurisdictionis ad bonum reipublicæ conveniens judicatur, quia potestas illa de se mutabilis est, et ad commune bonum reipublicæ ordinatur, et ideo nulli juri repugnat, quod in illa fiat hujusmodi mutatio. Præsertim quia per tale privilegium non privatur respublica tali jurisdictione in se, et in omnibus suis membris, sed ab uno in alium transfertur, quod multis de causis fieri potest, ut constat. Neque in hoc est æquiparatio cum jurisdictione Summi Pontificis admittenda, quia dignitas Pontificia altiore habet institutionem, ratione cuius immutabilis est, ut in superioribus dixi, et ideo fieri non potest ut baptizatus aliquis ab ea eximatur, cum jure divino illi subjectus sit, quod secus in potestate regia, quæ simpliciter et proxime est ex institutione humana. Quod autem Navarrus et aliqui juristæ

dicunt, non posse regem, aliquem a sua obedientia eximere, intelligendum est de exemptione mere privativa, id est, quæ subditum sine lege, et gubernatore relinquat, non vero de exemptione transferente jurisdictionem in alium, ut declaratum est. Et hoc ipsum confirmat exemplum de ipsamet republika, quod Navarrus adduxit, ut etiam ex dictis constat.

18. *Ad confirmationem.—Ecclesiasticus iudex potest pœnam mortis imponere.* — Ad ultimam confirmationem respondeo, impiam et blasphemam esse vocem illam novi Pauli Veneti, libertatem ecclesiasticam clericorum nihil aliud esse, quam libertatem seu licentiam peccandi; nam libertas, quam Pontifices docuerunt et sacri canones defendunt, et pro qua multi Sancti Pontifices usque ad sanguinem decertarunt, et imperatores et catholici reges pie ac fideliter cum universa Ecclesia receperunt et laudarunt, non est licentia libere aut impune peccandi, sed est veneratio quædam ecclesiastici ordinis, et conveniens jurisdictionum distributio, ut omnia in Ecclesia ordinate ac decenter fiant. Neque argumentum Pauli est alicujus momenti. Primo, quia iudex ecclesiasticus vel Pontifex potest pœnam corporalem etiam mortis imponere, licet ob decentiam et lenitatem per se ipsum id non faciat, ut significavit Innocentius, in c. 1 Majorit. et obedi., et ibidem Baldus; et notat Bernardus Diaz, in Practic. criminis., c. 61; et Covarr., lib. 2 Variar., cap. 20, num. 10, ubi ad hoc expendit cap. 1 de Homicid., in 6, ubi Pontifex imponit pœnam diffidationis propter homicidium per assassinos perpetratum, quæ diffidatio pœnam mortis virtute includit, ut ibi declarat. Unde quod iudex ecclesiasticus per se ipsum non utatur gladio, nec per se proferat sententiam sanguinis, non est quia non possit, saltem Pontifex, vel qui ab eo singularem potestatem receiverit, sed quia non decet. Nihilominus tamen quando gravitas delicti postulat, ecclesiastici iudex reum clericum brachio sæculari tradit, ut per eum juxta rigorem legum puniatur; ergo ex hac parte non datur clericis impunitas in similibus delictis perpetratis. Deinde extra casum pœnæ mortis possunt clerci (ut notat Panormit., in c. *Cum non ab homine*, de Jodie., n. 26) ab Ecclesia gravissimis pœnis affici; damnantur enim interdum ad perpetuum carcerem, et adeo arctum, ut mors potius diurna censeri possit quam vita, ut sumitur ex c. *Nostimus*, § 1, de Verbor. signifi-

Deinde etiam est satis gravis pœna diuturnum et onerosum exilium, damnatio ad trimes, fustigatio gravis, et aliae similes.

19. *Ac denique quamvis fortasse ex majori benignitate et lenitate ecclesiastici judicij nonnulli pravi homines sumant occasionem peccandi, non ideo damnabile est privilegium exemptionis ecclesiastice, quia illud per accidens est, et contra intentionem Ecclesiæ, et multo majora et necessaria commoda ex illo sequuntur, ut infra ostendemus, nullumque bonum est quo pravi homines non interdum male utantur, neque propterea damnandum est. Sicut in ipso sæculari judicio inter laicos sit aliqua discretio, nam qui nobiles sunt, a gravioribus tormentis et infamibus pœnis per privilegium nobilitatis eximuntur, quo multi illorum ad licentiam peccandi abutuntur, et ob eam causam privilegium ipsum non reprobat, sed qui male illo utuntur digni censentur illo privari; cur ergo non idem cum proportione dicetur de libertate ecclesiastica, cum clericalis ordo ex genere suo in altiori gradu dignitatis et nobilitatis constitutus sit?*

20. *Ultima assertio.—Exemptio clericorum antiqua et sancta.—Probatur.* — Ultimo ergo concludimus, exemptionem clericorum non solum potuisse juste concedi, sed etiam de facto esse sancte concessam, et in Ecclesia esse antiquissimam. Quam assertionem non solum veram et piam, sed etiam catholicam esse credimus, ita ut absque errore in fide negari non possit. Quia vero in discursu hujus libri late tractanda et confirmanda est, eam nunc breviter sic probamus. Nam imprimis hanc exemptionem servandam esse in Ecclesia docuerunt et præcepérunt Pontifices et Concilia, fere ab initio Ecclesiæ usque ad præsentem diem, ut constat ex Alexandro I, epist. ad omnes Orthodoxos, qui sedit ann. 109, testaturque, a temporibus Apostolorum id observatum fuisse, quod postea etiam præcepit Caius Papa, epist. ad Felicem Episcopum, ann. 283; et Marcelliuus, epist. 2 ad Universos Episcopos Orientis, ann. 496; Sylvester Papa, in quodam Concilio Romano, quod sub illo primum ordine ponitur, canon. 4, ann. 314; Gelas., apud Gratianum, in c. *Christianis*, et c. *Sylvester*, 11, q. 1; et Bonifacius V, in epist. ad Episcopos Galliæ, ut refert Gratianus supra, in c. *Nullus*, 3, nam in originali non invenitur, et magis videtur caput illud desumptum ex Authentica *Nullus*, c. de Episcopis et Clericis. Idem tradit Gre-

gorius, quem Gratianus ibidem refert, ex lib. 9 Epist., indict. 4, ep. 32, ad Romanum defensorem Siciliæ, et idem habet in epist. 74 ad Bouifacium defensorem Corsicæ, ubi sic ait¹: *Pervenit ad nos, quod quidam clericorum, te illic posito, a laicis teneantur. Quod si ita est, tuæ hoc culpæ noveris reputari, quia hoc fieri, si homo essem, non debuit. Et ideo de cætero sollicitudinem te habere necesse est, ut hoc fieri non permittas, sed si quis contra aliquem clericum causam habuerit, Episcopum ipsius adeat*, etc. Omitto posteriores Pontifices, quia de illis res est manifesta, et appetit ex usu quotannis promulgandi Bullam cœnæ Domini.

21. Addo duos antiquiores et gravissimos testes, quos Gratianus prætermisit: unus est Leo I, in epist. 96, ad Episcopos et presbyteros Thraciæ, cujus sunt verba notanda: *Tanta saculi potestates circa sacerdotalem ordinem reverentia prævalere, etiam hi, quos sub imperiali nomine terris divina potentia præesse præcepit, ut jus distinguendorum negotiorum Episcopis sanctis, juxta divalia constituta, permiserint. Quod cum et juris antiqui formulæ, et illibatis frequentius sit legibus confirmatum, præsenti tamen tempore a plerisque invenimus fuisse calcatum. Nam prætermisso sacerdotali judicio, passim ad examen sæculare transiere. Quocirca nobis visum est, ut hanc et sacræ legis, et nostri ordinis contumeliam, et ad præsens ulcisceretur plena districtio, et observandam formulam constitueret in futurum*, etc. Alter est Telesphorus, Papa nonus a Petro, qui in sua epistola ad omnes fidèles sic inquit: *Discreta esse debet vita clericorum a laicorum conversatione, et sicut laici et sæculares homines nolunt eos recipere in accusationibus et infamationibus suis, ita nec clerici debent eos recipere in impulsationibus suis*. Ostendens per haec verba, quanta jam tunc fuerit distinctio inter utrumque forum.

22. Multa præterea sacra Concilia generalia et provincialia, antiqua et recentiora, clericos non a laicis, sed ab Episcopis vel a Conciliis provincialibus judicandos esse tradiderunt, ut constat ex Concilio Chalcedonensi, act. 15, c. 9, et ex Carthaginensi III antea coacto, ann. 397, c. 9, ubi inter alia dicitur, male de Ecclesia sentire clericum, qui de iudicio sæculari petit auxilium. Et in c. 38, petitur facultas ab eodem Concilio ad implo-

randum brachium sæculare contra quemdam incorrigibilem Episcopum, et respondet Aurelius, consentientibus aliis, hoc non esse contra formam disciplinæ, quando clericus admonitus contumax fuerit, et contempserit. Et in Concilio Toletano III, c. 13, puniuntur clerici deserentes judicia ecclesiastica, et ad sæcularia euntes. Idemque habetur in Concilio Agathensi, tempore Symmachii, c. 8 et 32; Aurelian. III, c. 31; Milevit., c. 10; Matiscon. I, c. 8 et 32; et latius Matiscon. II, c. 9 et 10, ubi notanda sunt illa verba: *Reverendissimi canones atque sacratissimæ leges de episcopali audientia in ipso pene christianitatis principio sententiam protulerunt; tamen quia, eadem postposita, humana in sacerdotes Dei grassatur temeritas, etc. Quæ verba sunt valde notanda, tum pro exemptionis antiquitate, tum quia in eis insinuatur, illam magis esse per canones et leges declaratam atque defensam, quam institutam; hoc enim ille modus loquendi indicat, pro episcopali audientia protulisse sententiam*.

23. Idem refertur ex Concilio Parisiensi, in c. 2 de Foro compet.; et ex Concilio Lateran., sub Alexandro III, in c. *Si clericus*, eodem tit., in quo multa sunt decreta de distinctione utriusque fori, et plura in c. *Qualicher et quando*, et c. *Clerici*, et c. *Cum non ab homine*, de Judiciis. Deinde in Concilio Coloniensi I, p. 9, c. 20, dicitur, *hanc immunitatem esse antiquissimam*; et in Concilio Lateran., sub Leone X, sess. 9, in Bulla reformationis, innovantur omnes sanctiones Apostolicæ in favorem libertatis ecclesiasticæ: *Cum a jure (inquit), tam divino quam humano laicis potestas nulla in ecclesiasticas personas attributa sit*. Ac denique Concilium Tridentinum, sess. 25, c. 20, de Reform., sic inquit: *Decernit et præcipit S. Synodus, sacros canones et Concilia generalia omnia, necnon alias sanctiones ecclesiasticas in favorem ecclesiasticarum personarum, ac libertatis ecclesiasticæ, et contra ejus violatores editas, quæ omnia præsenti etiam decreto innorat, exacte ab omnibus observari debere*. Atque his canonis decretis concordant jura civilia, quæ postea referemus.

24. *De facto fuisse clericis exemptionem concessam concluditur*. — Ex his ergo testimoniis evidenter concluditur, datum esse in Ecclesia Christi clericis privilegium exemptionis a potestate sæculari. Nam impossibile est tot Pontifices sanatos et sapientes, quorum multi etiam Martyres fuerunt, et tot Concilia

¹ Cap. Pervenit, 11, q. 1.

Ecclesiam in hoc decepisse. Unde etiam est incredibile, clericos contra imperatores et reges privilegium hoc per tyrannidem vel injuriam usurpasse. Imo de fide certum esse debet, institutionem et observationem hujus privilegii honestam et sanctam fuisse, et esse. Quod in hunc modum ex principiis fidei, et citatis testimoniis colligitur. Quia de fide est, Ecclesiam non posse errare in præceptis morum, quæ universaliter auctoritate Pontificum aut Conciliorum generalium observari præcipiantur; sed in Ecclesia per multas leges canonicas et universales approbatur hoc privilegium exemptionis clericorum, et observari præcipitur, et novissime innovantur et confirmantur a Concilio Tridentino, loco citato; ergo de fide certum est, tam hoc Concilium quam superiora decreta in hoc puncto non errasse; ergo eodem modo est de fide certum, et privilegium hoc justum ac validum esse, et convenienter institutum. Quibus autem rationibus concessum sit, in sequentibus videbimus, investigando quo jure fuerit introductum. Nam ex dictis in hoc capite, constat tribus modis dari potuisse, scilicet, divino, canonico et civili, et ideo a quo illorum emanaverit inquirendum superest.

CAPUT IV.

UTRUM SUMMUS PONTIFEX OMNI JURE DIVINO ET HUMANO AB OMNI JURISDICTIONE SÆCULARIUM PRINCIPUM EXEMPTUS SIT.

1. *Sensus questionis.* — Quamvis privilegium exemptionis commune sit Summo Pontifici cum reliquis clericis, cum ipse non solum clericus sit, sed etiam clericorum et totius Ecclesiae princeps et caput, tamen, quia in illo propter singularem eminentiam notior est talis privilegii origo, et quia illius cognitio parare potest viam ad investigandam originem immunitatis aliorum ecclesiasticorum, ideo prius de Papa in particulari sermonem instituimus. De quo etiam haeretici non negant, nunc de facto exemptum esse ab omni sæculari potestate, quia ipse cum Pontificatu conjunctum habet temporale regnum, in quo superiorum non recognoscit; quia vero regnum istud non a Deo immediate, sed hominum devotione, vel alio simili humano titulo consecutus est, ideo talis exemptione non est per se conjuncta cum Pontificia dignitate, nec ex divino jure, sed ex humano dicit originem, vel certe, supposito tali statu tempo-

ralis principis, ex natura rei sequitur, sicut in aliis regibus, qui exempti sunt ex vi sui status, quia non habent superiorem. Unde ad respondendum quaestioni propositæ, præscindenda est regia dignitas a persona Pontificis, et solum ut Pontifex considerandus est, sicut fuerunt Petrus et successores ejus ante Constantinum.

2. *Error Protestantum. — Opinio Palatii minime permittenda.* — Sic ergo tam Protestantes quam rex Angliae negabunt plane, habere Pontificem Romanum hanc exemptionem. Vel quia non plus esse credunt quam privatum quemdam Episcopum, vel ad summum Patriarcham; de omnibus autem Episcopis et Archiepiscopis censent esse subditos suis regibus in temporalibus. Vel certe quia Pontifex neque jure divino exemptus est, ut patet in Petro, et cæteris Apostolis, quibus nunquam Christus tale privilegium concessit; neque jure canonico, quia non potest Pontifex hoc privilegium sola sua auctoritate sumere; jus autem canonicum Pontificia auctoritate præcipue nititur. In jure autem civili nihil singulare legitur de Pontifice Romano, magis quam de cæteris. Unde etiam inter Catholicos Palatius, in 4, dist. 23, asserere ausus est, Papam non esse exemptum a potestate civili jure divino, vel canonico, sed jure tantum civili, seu ex privilegio imperatorum. Nam idem sentit de aliis ecclesiasticis, et nihil singulare Pontifici quoad hoc privilegium attribuit. Verumtamen hæc sententia quatenus totum hoc privilegium revocat in solam donationem imperatorum, etiam de aliis clericis Summo Pontifice inferioribus perniciose est, et minime probanda, ut infra ostendam; de Summo autem Pontifice omnino reprobanda, et minime toleranda est.

3. *Prima conclusio.* — Dicendum ergo est, Summum Pontificem ex divino jure habere exemptionem et immunitatem ab omni iudicio ac jurisdictione sæculari, etiam imperatorum et regum. Hanc assertionem tenent imprimis omnes catholici Doctores, qui generaliter affirmant, exemptionem hanc in toto ecclesiastico statu esse de jure divino, quos cap. 8 referemus. Præter eos vero, qui de inferioribus vel id negant, vel dubii, sunt de Summo Pontifice propter ejus singularem dignitatem id ingenue fatetur Soto, lib. 5 de Justit., q. 4, art. 1; idem sentit Bannes 2, 2, q. 67, art. 1, dub. 3; et sumitur ex Cajetano, eodem loco, et tom. I Opuscular., tract. 1, de Potest. Papæ et Concilii, c. 27, ad 2; expres-

sius id notant et probant Turrecre., lib. 2 Summ., c. 93; et Bellarm., libr. 2 de Sum. Pontif., c. 26; sequitur Molina, 1 tom. de Justit., disp. 31; Valentia, 3 p., disp. 5, q. 11, punct. 1; Henricus, lib. 7 de Indulgent., c. 24; et Driedo, lib. 1 de Libert. Christian., c. 9, circa medium, et c. 15, circa finem.

4. *Probatur assertio, primo ex jure canonico.*—Probarique generatim potest hæc assertio ex jure canonico, quatenus in eo simpliciter asseritur, Papam non habere superiorem in terris, a quo possit judicari aut cogi. Ita tradit Concilium Romanum, sub Sylvestro, cap. 20: *Nemo (inquit) judicabit primam sedem, quoniam omnes sedes a prima sede justitiam desiderant temperari.* Et ne quis existimet Concilium illud loqui de solo judicio, seu potestate spirituali, subditur statim: *Neque ab Augusto, neque ab omni clero, neque a regibus, neque a populo iudex judicabitur.* Quæ fere verba ex Innocentio Papâ refert Gratianus, 9, q. 3, c. *Nemo judicabit primam sedem*, etc. Atque eadem verba ex Sylvestro refert Nicolaus Papa, in epist. 1, alias 8, ad Michaelem imperatorem, § *Consonat autem*; et in § sequenti refert similia verba Concilii congregati in casu Marcellini, scilicet: *Prima sedes non judicabitur a quoquam*, quam sententiam variis testimoniis et argumentis confirmat. Ac tandem ipse concludit: *Satis evidenter ostenditur, a sæculari potestate, nec ligari prorsus, nec solvi posse Pontificem.* Unde, cum tempore Leonis III seditio contra ipsum Romæ mota esset, et Carolus Magnus ad illam sedandam Romam venisset, et in Basilica S. Petri, adstante populo et clero Episcoporum omnium, qui eo ex tota Italia et Francia convenierant, sententias et vota de vita et moribus Pontificis rogaret, ab omnibus una voce responsum est, *Sedem Apostolicam, omnium Ecclesiarum caput, a nemine (laico præsertim) judicari debere;* Carolus autem auditio tam gravi responso, questionem omisit. Ita refert Platina in Vita Leonis, et habetur etiam in tom. 3 Concilior. Et eamdem sententiam late comprobat Ennodius diaconus, in libro pro defensione Symmachii, qui recipitur et probatur in quinta Synodo Romana sub eodem Symmacho. Eamdemque refert, ex dictis Bonifacii Martyris, Gratianus, in cap. *Si Papa*, dist. 40, et sumpsit ex Cardinali Deusdedict, in historia de Rebus ecclesiastic., lib. 1, cap. 231, prout late refertur in decreto Gregoriano, sub dictum cap. *Si Papa*. Denique in Synodo octava generali, Constantinopolitana

IV, can. 21, egregie locupletatur illa sententia, quia non solum de Papa, sed etiam de aliis Patriarchis dicitur: *Neminiem prorsus mundi potentiam eos posse inhonorare, aut a proprio throno movere;* et additur, *præcipue quidem sanctissimum Papam senioris Romæ.* Et infra: *Sed nec alium quemquam conscriptiones contra Sanctissimum Papam senioris Romæ, ac verba complicare, vel componere licet, sub occasione quasi diffamatorum quorumdam criminum.* Et infra ait etiam Synodus generalem non posse sententiam dicere contra summos senioris Romæ Pontifices.

5. Ex hoc ergo tam antiquo et constanti dogmate colligimus, privilegium hoc Summi Pontificis non humanum esse, sed divinum, quia neque ipse sibi arrogare illud facto auderet, nisi jure potuisset; non enim tanta facilitate et consensione ab Ecclesia et principibus christianis, sine ulla vi vel coactione (quam profeeto neque ipsi Pontifices efficere poterant) admissum fuisset; neque etiam Pontifex id petere jure potuisset, nisi ad hoc potestatem et auctoritatem haberet, quam ratione suæ dignitatis a Christo recepit. Quod si ab ipso Christo auctoritatem habet declinandi omnem jurisdictionem humanam, profecto jure divino ab illa exemptus est. Neque credibile est hoc jus ab imperatoribus accepisse; tum quia ante imperatores christianos dogma illud in Ecclesia cognitum est, ut de tempore Marcellini diximus; tum etiam quia imperator non poterat hoc privilegium concedere pro omnibus regibus et populis non sibi subjectis, cum tamen in dicta Synodo Romana, generaliter et respectu omnium illa sententia proferatur. Tum denique quia Concilia et Pontifices non fundant dogma illud in aliquo beneficio imperatoris, sed in eminentia dignitatis Romanæ Sedis. Et ideo consentaneum privilegium esse perpetuum, ac omnino firmum et immutabile, quod non posset habere, si ab imperatore originem habuisset. In quo etiam considero, nec imperatorem ipsum vel regem esse ita exceptum in terris ab omni jurisdictione temporali, ut in nullo easu possit ab hominibus, vel a tota communitate judicari et cogi, quia, ut dictum est lib. 3, potestas ejusdemque monarchæ temporalis manat a republica cum aliqua limitatione et conditione inclusa; exceptio autem Pontificis multo major et altior est: ergo non potest in concessione imperatorum vel regum fundari; datum ergo fuit tale privilegium a Deo ipso. Unde Ennodius supra: *Aliorum (in-*

quit) *hominum causas Deus voluit homines terminare, sed sedis istius Præsulis suo sine questione reservavit arbitrio*¹.

6. *Quando dicatur aliquid esse de jure divino naturali vel positivo. — Exemptio Summi Pontificis est de jure naturali et positivo divino.* — Ut autem ratione aliqua distinctius declaremus, ubi aut quando Christus privilegium hoc immediate Pontifici contulerit, distinguere oportet duos modos, quibus intelligi potest hoc privilegium esse divinum, scilicet, vel naturali jure, vel positivo. Intelligendum autem est in præsenti materia jus naturale, non respectu naturæ humanæ in sua pura conditione spectatae, nam hoc modo per se notum est exemptionem hanc non esse de jure naturali; sed naturale in præsenti dicitur, quod est connatuale alieui gratiæ, vel supernaturali dignitati homini collatæ, id est, quod, posita tali dignitate, secundum rectam rationem ex illa necessario sequitur. Ex jure autem positivo divino dicetur esse tale privilegium, si per se ac directe, seu propria et peculiari voluntate a Christo Domino Vicario suo collatum esse constiterit. Dicimus ergo utrumque modum verum esse, quod sigillatim ostendendum est.

7. *Probatur assertio quoad primam partem in c. Patet, 9, q. 3.* — Et imprimis hanc exemptionem esse de jure divino naturali, his verbis significavit Nicolaus Papa, in epist. citata: *Patet proposito, Sedis Apostolicæ, cuius auctoritate major non est, judicium a nemine fore retractandum, neque cuiquam de ejus licere judicare judicio.* Et infra: *Nemo unquam Apostolico culmini manus obrias audacter intulit, nemo in hoc rebellis extitit, nisi qui de se voluit judicari.* Ac si diceret, Pontifieem, ex vi Apostolici cuiuminis et auctoritatis, qua major non est, exemptum esse ab humano iudicio. Et Ennodius, in loco proxime citato, hanc exemptionem fundat in verbis Christi: *Tu es Petrus*, et: *Quodcumque solveris*, etc. Ac si diceret, ibi Christum dedisse Petro hanc exemptionem, ubi illum Vicarium suum et supremum Ecclesiæ pastorem creavit, etiam si nihil aliud expressisset, quia, nimurum, ex natura rei privilegium hoc talem dignitatem comitatur, et ideo est de jure divino naturali tali dignitati, licet simpliciter et in se sit de jure divino supernaturali, quod in radice (ut sic dicam) positivum etiam dici potest. Ratio autem hujus consecutionis, seu naturalis ju-

ris esse debet, quia per illam dignitatem factus est Petrus supra omnes, non solum in spiritualibus, sed etiam in temporalibus, ut supra visum est; ergo eo ipso exemptus est ab omnium potestate, et subjectione.

8. *Difficultas circa propositam probationem.*

— Non est autem haec illatio tam evidens, quin aliquam patiatur difficultatem. Quia Pontifex ex vi suæ dignitatis non est superior omnibus in temporalibus directe, imo ex vi juris divini nullam jurisdictionem directe temporalem habet, sed tantum spiritualem, quæ indirecta tantum extenditur ad temporalia; ergo non repugnat esse subjectum directe temporali jurisdictioni, et habere indirectionem potestatem supra temporalem regem; ergo e converso exemptio illa in temporalibus non sequitur intrinsecæ ex illa spirituali dignitate. Hæc posterior consequentia est evidens, et antecedens in superiori libro probatum est. Prima vero consequentia ostenditur, quia illa duo, subjectio et prælatio, sunt diversarum rationum, et ideo non opponuntur, nec repugnat simul eidem personæ convenire. Et declaratur, quia non secundum eamdem rationem, nec respectu ejusdem, et secundum idem referuntur: nam licet Pontifex ut Pontifex sit superior in suo ordine, ut homo potest esse subjectus in inferiori ordine. Item quia solum potest Papa uti indirectione sua potestate in temporalibus, quando rex, verbi gratia, sua abutitur potestate in ordine ad spiritualem finem; ergo hoc non obstat quominus possit esse subjectus imperatori juste in ipsum animadvertenti per suam directam potestatem. Denique aliis exemplis constat non pugnare, eum, qui uno titulo superior est altero, sub alio esse illi subditum, ut si quis habeat filium regem, naturali titulo patris illo est superior, et nihilominus erit illi ut regi subjectus.

9. *Resolutio prædictæ difficultatis.* — Nihilominus connexio talis privilegii cum tali dignitate multum est rationi consentanea, variisque modis ostendi potest. Primo, quia sicut in naturalibus dans formam dat consequentia ad formam, ita in moralibus dans jurisdictionem censetur dare omnia necessaria ad illius debitum usum et administrationem. Sed in præsenti materia, ut possit Pontifex suam supremam potestatem et jurisdictionem indirectionem in temporalibus supra omnes principes temporales exercere, necesse est (moraliter loquendo) ut nulli eorum sit directe subjectus in temporalibus causis, ad

¹ Cap. *Aliorum*, 9, q. 3.

personam ipsius Pontificis quocumque titulo aut modo pertinentibus; ergo talis exemptione data est Pontifici ex vi suæ dignitatis. Nam, cum Deus omnia sapientissime et suavissime disponat, non est verisimile dedisse dignitatem et potestatem sine exemptione necessaria vel conveniente ad debitum usum talis potestatis. Quod autem talis dignitas talem exemptionem postulet, ostendi potest, tum quia minime decebat, ut supremum Ecclesiæ caput, cui omnes reges terræ subjici debent, ab eisdem judicari possit, cogi et puniri; tum quia perpetuum fuisse divisionum ac schismatum seminarium; tum etiam quia non possent Pontifices debita libertate et auctoritate sua jurisdictione et potestate uti in reges et principes terre, si alia via illis essent subjecti, et ab eis possent in vincula conjici et puniri.

10. Secundo, magis declaratur, quia Pontifex ex vi suæ dignitatis et potestatis supremæ potest disponere de omnibus juribus temporalibus, atque etiam de ipsa suprema sæculari potestate, prout necessarium fuerit ad rerum spiritualium convenientem gubernationem, ut supra ostensum est; ergo idem Pontifex ex vi ejusdem spiritualis jurisdictionis habet auctoritatem præcipiendi cuicunque regi, ne in personam suam audeat manum extendere, aut potestatem suam exercere, potestque irritare et pro nihilo ducere quidquid sæcularis potestas in contrarium attentaverit, quia sine dubio hoc maxime pertinet ad spirituale bonum Ecclesiæ, et ad reverentiam debitam Christo, et personæ gerenti vices ejus in terris; ergo plane repugnat Pontificem esse subjectum quoad vim coactivam regi temporali, quia vis coactiva requirit talem potestatem in alium, ut ab illo, superiori potestate, impediri aut ligari non possit. Confirmatur, quia hac ratione in sequentibus ostendemus, posse Pontificem eximere alios clericos a jurisdictione sæculari, non expectato principum temporalium consensu; ergo multo magis potuit eximere seipsum; hoc autem perinde est ac esse exemptum ex vi dignitatis et potestatis acceptæ; nam qui in sua voluntate et facultate habet non subdi alterius coactioni, profecto ab illa est immunitus et exemptus.

11. Tertio explicatur, quia impossibile est magistratum temporale habere vim coactivam in regem se directe superiorem, a quo in suæ potestatis usu pendet; ergo non minus repugnat Pontificem esse subjectum illo modo

potestati temporali. Antecedens receptissimum est apud juristas supra citatos, et sumitur ex cap. *Cum inferior*, de Majorit. et obed., ubi dicitur inferiorem non posse ligare superiorem. Estque aperta ratio, quia repugnat eumdem respectu alterius esse simul inferiorem et superiorem ex fundamento ejusdem jurisdictionis involuntariae et coactivae. Ratio autem hujus est, quia coactio non potest fieri per virtutem propriam ejus qui cogitur, et consequenter nec per inferiorem potestatem, quæ pendet a superiori potestate, existente in eo qui cogendus est. Consequentia vero probatur, quia, licet potestas Pontificis non sit directe temporalis, nec ejusdem ordinis cum potestate regum, nihilominus eminenter continet illam, et omnem efficacitatem ejus circa materiam etiam temporalem, habentem sufficientem habitudinem ad spiritualem, qualem esse ostendimus judicium de persona ipsa Papæ; ergo æque repugnat Pontificem subjici tribunali principis temporalis, quem ita habet sibi subditum et subjectum. Eodem ergo divino jure, quo temporales principes ita subjiciuntur Papæ, eodem, inquam, ipse Pontifex ab illorum jurisdictione exemptus est. Superest probanda altera pars de jure divino positivo, quam in sequenti capite prosequemur.

CAPUT V.

EXPENDITUR LOCUS MATTHÆI, *Dà eis pro me et te, PRO SUMMI PONTIFICIS EXEMPTIONE.*

1. *Quo sensu exemptione Pontificis sit ex jure divino positivo.*—*Illatio querdam hereticorum rejicitur.*—Jus divinum positivum hic appellamus privilegium a Christo concessum peculiari et directa voluntate. Quod ita declaro, ne videatur haec pars præcedenti contraria, nam, in rigore loquendo, jus positivum dicitur quod naturale non est, sed per liberam Dei voluntatem additum, et ita videtur repugnare hoc privilegium esse simul ex utroque jure divino, naturali et positivo. Ideo ergo dicimus, jus positivum hic latius sumi pro quocumque jure fundato in expressa et directa Christi voluntate, etiamsi fundari etiam possit in alia remota, medio discursu seu ratione naturali. Unde etiam dici potest hoc jus positivum declarans potius privilegium, quod jam erat connaturale ratione prioris dignitatis, quam illud denuo concedens. Sic ergo declarata voce, probatur assertio proposita

ex verbis Christi, Matth. 17, ubi cum exactores tributi, quod eo tempore Judæi Augusto viritim solvebant, Petrum interrogassent : *Magister rester non solvit d'rachma?* et ipse affirmando respondisset, postea Christus ut Petrum, et in eo Ecclesiam suam instrueret, eum interrogat : *Reges terræ a quibus accipiunt tributum vel censum? a filiis suis, an ab alienis?* Petrus autem respondit, *ab alienis*, unde intulit Christus : *Ergo liberi sunt filii. Ut autem non scandalizemus eos, rade ad mare, etc.; et invenies staterem; illum sumens, da eis pro me et te.* Ex quo facto non solum non coiliqunt hæretici immunitatem Petri a solutione tributorum, sed potius inferunt, Christum etiam fuisse debitorem tributi, quandoquidem jussit illud pro se solvere. Sed errant manifeste, tum quia Christus argumento suo colligere voluit, se esse immunem a solutione tributi, quia filius regis terreni immunis est a tributis; tum etiam quia postea expresse dicit : *Ut non scandalizemus eos, quasi diceret, Quamvis non simus debitores tributi, ut isti non offendantur, solve pro me et pro te.* Ut ibi Hieronymus, Chrysostomus et omnes intelligent; et Augustinus, serm. 6 de Verb. Apost., c. 7, de Christo ait : *Non debebat, et persolvebat;* et Ambrosius, in Annotationibus in Exod., cap. 31 : *Non debebat (ait) filius Dei, non debebat Petrus, sed ne scandalizentur, ait, etc.*

2. Dubium primum, de quibus filiis fuerit locutus Christus Dominus. — *Prima ratio dubitandi.* — Prius vero quam ex hac Christi sententia hoc sedis Apostolicae privilegium colligamus, inquirendum est de quibus filiis Christus fuerit locutus, et quæ sit vis argumentationis, et consecutio verborum ejus. Aut enim locutus est de solis filiis propriis et naturalibus, vel latius etiam de adoptivis et impropriis; hoc posterius dici non potest, alias omnes justi essent exempti a tributis principum, quia omnes sunt filii adoptivi, et quia de æterna justitia singulorum hominum constare non potest, omnes Christiani erunt exempti, quia omnes sunt in statu filiorum, vel quantum est ex vi professionis snae illum habere possunt, et per fidem et baptismum jam inchoatum habent, propter quod solent in Scriptura, præsertim a Paulo, omnes fideles sancti vocari. Imo etiam omnes homines possent eamdem exemptionem a subjectione aliorum hominum prætendere, quia omnes sunt filii Dei per creationem, hic enim titulus satis est ut omnes possint Deum tanquam Patrem invocare.

3. Secunda ratio dubitandi. — Si autem Christus Dominus de solis filiis naturalibus est locutus, duo insurgunt dubia : unum est, quomodo recte inferat Christus se esse liberum, quia ipse non erat filius naturalis Augusti Cæsaris, ut hoc titulo esset immunis a tributo quod Cæsari pendebatur. Nam filius naturalis unius regis non est exceptus a solvendo tributo cuiuscumque regi, sed tantum patri suo; nam si filius unius regis extra distinctionem paternam in alienis provinciis versetur, fieri poterit vectigalis alterius regis. Quod, servata proportione, optime accommodatur Christo, qui licet ut Deus sit filius naturalis regis, et ideo, ut sic, liber sit a tributo respectu Patris, et a fortiori respectu omnium humanorum regum, quia omnes sunt sub distinctione paterna, et consequenter ipsi etiam ei subsunt, nihilominus ut homo non est filius naturalis Dei cum illa proprietate, sed est filius per gratiam; ergo cum de se tanquam homine loqueretur, non potuit ex titulo filiationis recte inferre se esse liberum, et solum propter vitandum scandalum tributum solvere. Sicut etiam licet Christus, ut Deus, sit rex et dominus omnium hominum, nihilominus multi putant, ut hominem non fuisse regem, neque habuisse dominium regnorum temporalium; ergo eadem ratione nihil obstatabat filiatio naturalis quominus ut homo esset tributi debitor. Altera dubitatio, et major est, quia videtur Christus in hac exemptione secum Petrum conjungere, et ex via ejusdem principii, quod liberi sunt filii, aequo immunem illum facere, quandoquidem proxime intulit, *ut non scandalizemus eos, solve pro me et pro te;* perinde enim fuit ac si dicearet, Ambo liberi sumus, expedit autem eos non scandalizare, et ideo pro utroque solve. Haec autem illatio in Petro nullum habebat fundamentum, quia nullo modo erat filius naturalis.

4. Resolutio primi dubii. — Ad primam interrogationem Augustinus, lib. 4 Quæst. Evangelicarum, q. 13, indicat Christum, cum intulit : *Ergo liberi sunt filii, locutum esse de filiis non tantum naturalibus, sed etiam adoptivis, seu per gratiam, sic enim ait: Quod dixit: Ergo liberi sunt filii, in omni regno intelligendum est, liberos esse regni filios, id est, non esse vectigales; multo magis liberi esse debent in qualibet regno terreno filii regni illius, sub quo sunt omnia regna.* Non sunt autem in regno terreno filii supremi regis, id est, Dei, nisi per gratiam; extendit ergo Au-

gustinus illationem Christi etiam ad filios per gratiam. Nihilominus dicendum sine dubio est, Christum locutum esse de filiis propriis et naturalibus, nam hoc plane convincunt rationes prius factæ. Et præterea quia Christus non interrogavit Petrum, nisi de illis filiis de quibus ipse poterat verba simpliciter dicta intelligere ; Petrus autem sine dubio non intellexit interrogationem, nisi de filiis naturalibus, quia de filiis per gratiam vel tunc intelligere non valebat, vel saltem ex illo simplici et communis sermone in illam cogitationem tunc ascendere non poterat. Sicut quando respondit, *ab alienis*, nihil de injustis aut peccatoribus cogitavit, sed tantum de extraneis, qui filii naturales non sunt.

5. Unde Chrysostomus ibi, hom. 59, ex illis verbis probat, Christum esse naturalem filium Dei, dicens : *Perpendis quomodo distinxit filios a non filiis; si enim filius non esset, h̄c profecto regum exemplo usus non fuisset. Sed filius quisquam (inquires) est, non autem prius. Non ergo filius, quod si non filius, nec proprius, nec omnino ejus, sed alienus. Ita exemplum nullas rires habebit. Non enim de filiis simpliciter, sed de propriis et regum haeredibus disputat. Atque ita distinguendo alienos opposuit, quo vocabulo eos appellavit, qui ab ipsis regibus nati non sunt, suos vero ex se genuerunt.* Et hoc ipsum indicavit Hilarius, canon. 47 in Matth. dicens : *Numquid ambiguum est, filios regum tributis obnoxios non esse, et quibus regni veritas est, liberos esse a servitute?* nam per regni veritatem, veram et naturalem regiam originem indicavit. Et infra, utens fere argumento Chrysostomi, ait : *Ut ostenderet legi se non esse subjectum, et ut in se paternæ dignitatis gloriam contaretur, terreni regni posuit exemplum, censu aut tributis filios regum non teneri.* Argumentum ergo Christi a naturalibus filiis sumptum est. Augustinus autem vel in sensu mystico ad filios Dei per gratiam, et ad immunitatem eorum a servitute peccati et tributo dæmoni solvendo inde digressus est, ut de Origene notavit D. Thomas, in eundem Matthæi locum. Vel certe Augustinus etiam de filiis naturalibus locutus est; nam, licet filius Dei naturalis unicus tantum sit, potuit in plurali loqui, ut formam verborum Christi observaret, nam perinde esset, etiam si tales filii Dei plures essent, ut notarunt Jansenius, in c. 69 Concordiæ, et Salmeron, tom. 6 de Mirac. Christi, tract. 37.

6. *Ad secundam rationem dubitandi.* — Ad

priorem vero dubitationem secundo loco propositam respondent omnes Patres allegati, et cæteri expositores, argumentum Christi esse a fortiori desumptum a filiis naturalibus regum temporalium ad filium naturalem regis illius, sub quo sunt omnia regna terrena, ut supra dixit Augustinus. Unde ad objectiōnem in contrarium factam respondemus, verum quidem esse filium regis terreni solum in paterno regno esse immunem a tributo, non vero respectu alterius regis, si aliqua ratione ei subjiciatur, vel in ejus ditione verisetur. Imo etiam in regno paterno non est filius exemptus a jurisdictione patris, sed ex voluntate ejus exemptus est ab omnibus ministris ejus, et ab exactione tributorum, omnique alia jurisdictione, quæ per ministros patris exercetur. Negamus autem consecutionem vel similitudinem rationis ad Christum filium Regis cœlestis. Nam unusquisque rex terrenus limitatus est, et non habet sibi subjectos alios reges supremos. Deus autem est rex omnium regum, et ideo filius naturalis ejus etiam est supra omnes illos, ac subinde liber et immunis ab omni tributo, et ab eorum jurisdictione exemptus, cum illi non sint nisi quidam ministri supremi regis patris sui.

7. *Christus Dominus, etiam ut homo, est naturalis Dei filius.* — Ad replicam autem, quia hoc procedit de Christo ut Deus est, et non ut homo, respondemus negando assumptum, nam Christus etiam ut homo est filius Dei naturalis propter gratiam unionis, per quam ipsa naturalis filatio substantialiter est humanitati conjuncta, et consequenter etiam gratia creata facta est illi homini connaturalis. Eademque ratione inde etiam habuit Christus, ut tanquam homo non solum liber esset ab omni terreni regis potestate et tributo, verum etiam ut esset per quamdam singularem excellentiam rex regum, et Dominus dominantium, sicut de illo dicitur Apocalyp.

17. Proprietatem enim et dominium hujus regni, quod nunc habet in cœlis, semper in terris habuit ratione unionis, quamvis usum illius in vita mortali non acceperit, quomodo intelligendi sunt, qui negant Christum ut hominem fuisse regem, vel fortasse loquuntur de proprio regno temporali et caduco, quod verum est, Christum non accepisse, nec jure hæreditario habuisse. Habuit vero supra omnia regna terrena regnum et dominium altioris rationis, et potestatem excellentiæ, et ideo etiam habuit innatam libertatem ab omni tri-

buto mortali regi vel imperatori debito, quam immunitatem habet ratione filiationis naturalis, et ideo optime de se, etiam ut homine, argumentatus est.

8. *Ad tertiam dubitationem. — Prima sententia. — Rejicitur prædicta sententia.* — Major difficultas est in altera dubitatione, quæ postulat cur Christus Petrum in hac libertate secum conjunxerit, et quasi aequaliter fecerit, dicens illi : *Ut non scandalizemus eos, solve pro me et te.* Aliqui negant id colligi ex prædictis verbis, vel aliquod in illis verbis latere mysterium. Sed Christum in plurali dixisse Petro, *ne scandalizemus eos*, non quia Petrus solum ratione scandali vitandi teneretur solvere tributum, sed vel quia de propria persona potuit facile ita loqui, plurali pro singulari utendo, vel quia scandalum Christi in Petrum et alios Apostolos redundaret. Atque ita postea Christum jussisse Petro solvere tributum, etiam pro se, ex statere invento in ore piscis, quia cum Petrus esset debitor tributi, voluit Christus simul illi subvenire, et fortasse illi soli, quia Apostoli tunc non aderant. Quam sententiam libenter hæretici arripiunt. Mihi tamen verisimilis non est. Nam imprimis dum aiunt hi exposidores, tunc temporis alios Apostolos ibi non adfuisse, nullo fundamento loquuntur, sed divinant. Deinde ipse modus, quo exactores tributi Petrum in plurali interrogarunt : *Magister vester non solvit didrachma?* satis indicat, non tantum Petrum, sed etiam alios Apostolos tunc adfuisse cum Christo, unde communiter Patres id supponunt, ut statim referam.

9. *Petrum in aliqua dignitate temporali sibi prælatum existimabant Apostoli.* — Addo ulterius, verisimile non esse Christum in eo facto nullum intendisse mysterium, aut peculiarem affectum erga Petrum non ostendisse. Quia cum Christus ibi docuerit se esse filium Dei naturalem, et ideo non esse obnoxium solutioni tributi, sed tantum propter vitandum scandalum præcepisse ut solvereatur, et in hac prærogativa et modo solvendi tributum Petrum sibi specialiter conjunxerit, sine dubio significare voluit se communicaturum Petro quamdam participationem sui privilegii, ratione cuius, etiam ipse non esset debitor tributi, nisi propter scandalum vitandum. Et addit Chrysostomus ibi, Christum conjunxisse secum Petrum in solutione tributi, in retributionem fidei, per quam ad rem ita natura incredibilem illico paruit; illamque retributionem vocat honoris excellentiam,

quam Christus Petro ostendit, dicens : *Da eis pro me et te.* Unde etiam alii Apostoli intellexerunt, Christum in eo facto Petrum ipsis prætulisse. Hinc enim orta est occasio interrogandi Christum : *Quis putas, major est in regno cælorum, ut statim in initio cap. 18 Matthæus refert, et exponit ibi Hieronymus dicens : Post inventum staterem, post tributa reddita, quid sibi vult. Apostolorum repentina interrogatio? et respondet : Quia riderant pro Petro et Domino idem tributum redditum, ex æqualitate pretii arbitrati sunt, Petrum omnibus Apostolis esse prælatum, qui in redditione tributi Domino fuerat comparatus.* In quo, si recte illud comprehendissent, non decipiebantur, sed errabant, putantes illam excellentiam vel dignitatem futuram fuisse in aliquo regno temporali more humano, et ex invidia interrogabant. Et propterea Hieronymus addit : *Videns Jesus cogitationes eorum, et causas erroris intelligens, vult desiderium glorie humilitatis contentione sanare, dicens : Amen dico vobis, nisi conversi fueritis, et efficiamini sicut parruli, non intrabitis in regnum cælorum.*

10. Eamdemque doctrinam habet Chrysostomus, homil. 59 in Matthæum, dicens, aliiquid humanum passos fuisse discipulos in illa interrogatione, et ad illud significandum, addidisse Evangelium illam particulam : *In illa hora, quando scilicet cæteris omnibus Petrum prætelit.* Et infra dicit, ex multis causis fuisse inflammatos discipulos, et numerat singularem promissionem : *Tibi dabo clares, et : Beatus es Simon Bar Jona*, et his adjungit præsentia verba : *Da pro me et te*, sentiens singularem excellentiam et prærogativam per illa significasse. Idem tradit Origenes, tract. 5 in Joan., expendens eodem modo verbum illud : *In illa hora, et dicens : Ego arbitror, quoniam maximum hunc existimantes honorem in Petrum a Christo collatum, quasi per hoc indicasset, Petrum cæteris discipulis meliorem, cupiebant, quod suspicabantur, caute cognoscere*, etc. Idemque habetur nomine Augustini in libro Quæstionum novi et veteris Testamenti, q. 75, ubi ait, præcepisse Christum singulariter solvere pro Petro, quia constituerat illum facere caput aliorum Apostolorum, et pastorem gregis sui, et comparat illa verba cum illis : *Ego rogabo pro te.* Quod etiam notavit Lyran., Matth. 17 et 18, et fore alii Doctores catholici fatentur, ibi esse significantiam specialem prærogativam Petri, quamvis in illa explicanda non omnes convenient.

11. Aliorum opinio. — *Privilegium Petri ad successores transit.* — Aliqui ergo existimant Christum ostendisse ibi peculiarem amorem et curam Petri, non vero exemptionem. Sed hoc parvi momenti est in re adeo mirabili, tanta diligentia ab Evangelista observata, et a Patribus exaggerata. Alii, agnoscentes aliquod altius mysterium, ad mysticos sensus divertunt, nt videtur esse Augustinus, sermon. 6 de Verbis Apostoli, dicens, *Petrum Ecclesiam repræsentasse, pro qua Christus indebitam mortem solvit, ut eam a debito mortis liberaret*, quod Anselmus et D. Thomas sequuntur. Ita vero est hoc accipiendum, ut litteralis sensus non omittatur. Negari ergo non potest quin Christus specialiter jussicerit, solvi tributum pro persona Petri, sicut et pro se, hoc enim in proprietate significant verba illa : *Da eis pro me et te*, et ita notant Patres nuper allegati , æquiparando hæc verba cum illis : *Tibi dabo claves*, et : *Ego rogabo pro te*; nam in omnibus illis pronomen illud designat individuam personam Petri. Significavit ergo Christus in illis verbis Petrum futurum esse exemptum a solutione tributi, sicut ipse erat. Atque ita credimus ex hoc loco, ut minimum colligi, Christum concessisse Petro privilegium hoc exemptionis , quia futurus erat princeps Ecclesiae, Christique Vicarius. Unde consequenter fit, hoc privilegium non fuisse personale in Petro, sed reale ratione dignitatis, atque ad successores transire ex vi divini juris, et peculiaris institutionis seu voluntatis Christi. Quam sententiam satis significant Hieronymus, Chrysostomus, Theophylact., Eutym., et alii, quatenus dicunt, illam prærogativam fuisse concessam Petro , quia erat caput Apostolorum , et quatenus æquiparant hunc locum cum aliis, in quibus Christus, loquens ad Petrum , cum illo et successoribus ejus loquitur.

12. In dictis verbis Christi potestatem alios a tributis eximendi demonstrat. — Ad difficultatem autem propositam, quomodo Christus extendat illationem ad Petrum , qui non erat filius Dei naturalis , respondent multi, tacite supposuisse Christum aliud principium, scilicet, sub filiis regum comprehendi domesticos et familiares eorum, nam etiam hi solent esse a tributis exempti, ratione filiorum quibus adhærent. Sed de hac ratione dicemus inferiorius; nam si vera est, non solum ad Pontificem, sed etiam ad alios extenditur privilegium illud, ut divinum est. Dico ergo significasse Christum, non solum se esse immunem

a solutione tributi, sed etiam potuisse illud privilegium communicare Petro tanquam sibi conjunctissimo, et valde simili in potestate quam illi concessurus erat supra totam Ecclesiam, et supra omnes reges terræ. Quocirca quando Christus, post factam illationem : *Ergo liberi sunt filii*, adjunxit : *Ut autem non scandalizemus eos, da pro me, et te*, non oportet ut hec posteriora verba intelligentur adjuncta ex vi prioris illationis, sed per modum novae declarationis et extensionis ex speciali Christi voluntate. Vel certe dici potest, quia argumentum Christi fuerat a minori ad maius, ut supra declaravi, ideo Christum non fuisse contentum inferendo, se esse immunem a tributis, sed etiam Petrum secum conjunxisse, ut ostenderet se, utpote filium Dei naturalem, longe altiori modo esse immunem quam sint filii regum terræ, quia non solum est immunis ab illis, sed etiam est superior omnibus illis, et potuit Petro suam potestatem seu participationem ejus ita communicare, ut ejusdem etiam exemptionis illum faceret participem.

13. Objectio. — Responsio. — *Ex immunitate a tributis recte colligitur immunitas a sæculari potestate.* — Sed instabit tandem aliquis : nam licet concedamus ex hoc loco colligi exemptionem a tributis, non sequitur colligi etiam exemptionem ab omni subjectione et potestate coerciva principum. Nam filius regis terreni licet sit liber a tributo patri solvendo, non est liber a potestate directiva patris, quia tenetur ejus leges servare; nec a potestate coerciva , nam potest rex filium suum punire secundum justitiæ æquitatem. Respondeo, concedendo illationem non esse formalem (ut aiunt), quia non tenet in omni materia, ut argumentum factum probat. Nihilominus tamen in præsenti materia, et ratione illius, recte colligimus unam exemptionem ex alia. Nam imprimis in ipso Christo sicut ex filiatione naturali infertur immunitas a tributo, ita infertur immunitas ob omni subjectione, et jurisdictione principum temporalium, quia filatio, quæ est ratio unius exemptionis, necessario etiam est ratio alterius, quia est ratio dominationis et excellentiæ supra omnes reges. Simili ergo modo, seu accommodata proportione, intelligimus hoc privilegium esse communicatum Petro, ideoque ex immunitate a tributis colligimus exemptionem ab omni subjectione, et jurisdictione temporali, quia ratione dignitatis et potestatis supra ipsos reges communicata est,

CAPUT VI.

OBJECTIONIBUS CONTRA RESOLUTIONEM SUPERIORUM CAPITUM SATISFIT.

1. Prima objectio. — *Solutio.* — Quoniam Summi Pontificis exemptione cum ejus dignitate et potestate supra reges temporales conjuncta est, ideo eadem fere objectiones contra exemptionem hanc, quae contra potestatem opponuntur; et quia fere omnes in superiori libro tractavimus, ideo illas breviter attingendo, unam vel alteram addemus, quae hujus loci visae sunt magis propriae. Prima objectio sumitur ex lege veteri, in qua Summus Pontifex a jurisdictione regis exemptus non erat; imo ab eo puniri poterat, ut factum Salomonis ostendit, 3 Reg. 2, ubi Salomon exauthoravit Abiathar propter crimen læsæ majestatis, illum auctoritate regia puniendo. Huic vero objectioni supra respondimus, assumptum non satis probari ex illo facto, tum quia fortasse Salomon id fecit non ut rex, sed ut propheta; tum etiam quia unum factum non ostendit jus, cum a regibus multa per violentiam fiant. Unde cum ex aliis locis Scripturæ non probetur subjectio Pontificis ad regem in lege veteri, relinquitur vel falsum esse illud antecedens, vel saltem incertum. Deinde adjunximus, quidquid fuerit in veteri lege, nullum inde sumi posse argumentum ad Pontificatum legis gratiæ, qui longe altioris est ordinis. Nunc ergo solum addendum occurrit, objectionem similem factam esse ante quadragesimos annos ab imperatore Constantinop., in epist. ad Innocentium III, ex qua sumptum est caput *Solitæ*, de Major. et obed., qui non de Salomone, sed de Davide argumentabatur, *quia David rex Abiathar Pontifici præeminebat*¹. Cui Pontifex eisdem modis respondet, dicens: *David quamvis regni diademu obtineret, non tam ex dignitate regia, quam auctoritate prophetica imperabat. Verum quidquid horum fuerit in veteri Testamento, nunc aliud est in novo, ex quo Christus factus est sacerdos secundum ordinem Melchisedech.* Et concludit: *Circa illum præcipue, qui successor est Petri, et Vicarius Iesu Christi.*

2. Secunda objectio. — Secundo objici potest, quia ea, quae sunt jure divino a Christo

¹ Vide Turrecrematam, lib. 2 Summæ Ecclesiast., c. 96, ad 4.

constituta, statim a principio Ecclesiæ habuerunt effectum; sed Pontifex Romanus non solum a principio Ecclesiæ, verum etiam toto tempore quo imperatores Romani fuerunt ethnici, non fuerunt ab eorum jurisdictione exempti; ergo non habuerunt a Christo hujusmodi exemptionem. Minor propositio probatur ex Paulo, ad Rom. decimo tertio, dicente: *Omnis anima potestatibus sublimioribus subdita sit.* In quo loco præcipue loquitur Paulus de politico principatu, et de obedientia regibus debita, ut ibi notant expositores, et Augustinus, epist. 54 ad Macedonium, et Basilius, in Constitut. monasticis, c. 23. Et ipse Paulus inferius aperte ostendit, cum dicit: *Non sine causa gladium portat;* et cum ait: *Ideo enim et tribula præstatis.* Itaque ut iidem Patres advertunt, illud specialiter monuit contra nonnullos, qui eo tempore prædicare cœperant, Christianos non teneri ad parendum principibus temporalibus; ipse autem contrarium de omnibus Christianis docet, et ut nullum excipi declarat, inquit: *Omnis anima, etc., ut ibi expedit Chrysostomus, Hom. 23, dicens: Osten-dens quod ista imperentur omnibus, et sacer-dotibus, et monachis, et non tantum sæculari-bus, id statim in ipso exordio declarat, cum dicit: Omnis anima potestatibus sublimioribus subdita sit, etiam si Apostolus sis, si Eran-gelista, si Propheta, sive quisquis tandem fueris, neque enim pietatem subvertit ista sub-jectio.* Et eodem modo loquuntur ibi Theodo-retus, Theophylactus, et OEcumen. Juxta Apostoli ergo sententiam sic expositam, etiam Petrus erat tunc subditus potestatibus sublimioribus. Cum enim Chrysostomus dixisset, etiam Apostolos fuisse subditos, et senten-tiam auxerit, dicens: *Sive quisquis tandem fueris, profecto etiam Petrum comprehende-re visus est.* Multo ergo majori ratione Pon-tifices successores Petri fuerunt subditi imperatoribus, saltem quamdui isti christiani non fuerunt. Et ratione potest hoc confirmari, quia princeps ethnicus non est subditus Pontifici; ergo potest esse illi superior; ergo de facto erat superior, quia habebat potesta-tem universalem in omnes, et non habebat subjectionem ratione cujus privaretur potes-tate in Petrum vel successores ejus.

3. Responsio. — Respondet concedendo privilegium hoc, quatenus a Christo Domino concessum est Petro et successoribus ejus, habuisse suum proximum effectum, statim ac Christus Petro contulit Pontificiam digni-

tatem, quia illud privilegium, vel cum ipsa dignitate intrinsece conjunctum est, et quasi ab illa manat, vel per speciale Christi voluntatem datum est, quae voluntas efficax fuit, neque impediri potuit per ullam temporalem potestatem. Et non minus comprehen-dit exemptionem a subjectione respectu infidelium principum quam fidelium, tum quia Christus, Matt. 17, absolute locutus est, et occasio sermonis ejus sumpta fuit ex tributo quod imperatori ethnico solvebatur; tum etiam quia non est major ratio de principe fidi, quam de infidei. Imo si Pontifex, verbi gratia, Sylvester fuisse subditus Constantino ante conversionem ejus, etiam post conversionem maneret subditus, quia, ut supra dixi, nullus rex infidelis ipso facto amittit jurisdictionem aliquam propter conversionem ad fidem. Denique quando Concilia et Patres docent, Pontificem non habere superiorem in terris, omnem excludunt, sive fidelis, sive infidelis sit.

4. Pontifices Summi semper fuerunt exempti. — Dico ergo, et Petrum, et ejus successores, toto tempore gentilium imperatorum fuisse exemptos ab eorum jurisdictione quoad privilegium, licet usum privilegii pro eo tempore habere non potuerint, quod nihil repugnat juri divino. Sicut etiam eo tempore habuerunt dignitatem et potestatem supra omnes imperatores a Christo datam, non expectato temporalium principum consensu, usum autem et exercitium illius potestatis circa eosdem principes non statim habuerunt Petrus aut successores, quia juxta ejusdem Christi ordinationem ex voluntaria fidei receptione pendebat. Eadem ergo ratio est de praedicto privilegio accessorio dignitati, nam illud contulit solus Christus sine dependentia a consensu principum, seu aliorum hominum, usus autem partim ex voluntate, partim ex potentia et factis hominum pendebat.

5. Ad verba Pauli. — Nec verba D. Pauli, quantumvis generalia videantur, excludunt privilegium speciale a Christo concessum, nam regula juris est, generale jus per speciale limitari, etiam si speciale antiquius sit, quae regula hic satis accommodari potest. Præsertim quia D. Paulus ibi solum explicat jus antiquum et naturale, docetque observandum esse a Christianis, ac proinde tradit (ut Theophylact. ibi ait) Evangelium non docere defectionem aut inobedientiam erga magistratus, sed moderationem et obedientiam. Hoc autem jus naturale non violatur,

sed materia ejus ex parte mutatur per privilegium exemptionis a Christo concessum, quod ibi Paulus non exclusit, neque illius mentionem fecit, quia necessarium non erat. Quanquam si attente verba Papli considerentur, ex forma illorum intelligi potest, Vicarium Christi sub eis non comprehendendi, dicit enim: *Omnis anima potestatibus sublimioribus subdita sit*, quae verba sunt respectiva, et comprehendunt tam privatos homines respectu eorum qui proxime præsunt, quam magistratus inferiorum ordinum respectu sublimiorum potestatum. At vero comparatione Vicarii Christi nulla est in terris sublimior potestas, et ideo in eo non habet locum sententia Pauli.

6. Ad Chrysostomum. — Ad Chrysostomum vero, quod attinet ad præsentem quæstiōnem, similiter respondemus generatim fuisse locutum, neque ibi exclusisse speciale privilegium Petri, neque tractasse quæstiōnem, an Vicarius Christi habeat in terris potestatem sublimiorem, cui ex vi naturalis et divini juris parere teneatur. Quod vero spectat ad alia specialia exempla, quae inducit de Apostolis, sacerdotibus et monachis, infra ex professo tractandum est, an illorum exceptio sit de jure divino vel humano. Nunc solum dicimus, quidquid sit de aliis etiam Apostolis, de Petro ut Christi Vicario esse speciale rationem; tum propter speciale dignitatem, tum propter verba Christi illum singulariter eximentis a debito solvendi tributum. Quapropter jus hoc exemptionis æquale fuit in Pontificibus respectu ethnicorum principum, et Christianorum, quia privilegium, ut dixi, non fuit pendens ex fide subditorum, licet usus sine illa esse non potuerit.

7. Ad rationem in eadem objectione factam. — Neque obstat ratio in contrarium facta, quia licet princeps infidelis pro illo statu non sit directe subditus Petro, nihilominus ex divino jure tenetur illi subdi, suscipiendo fidem, et baptismum, per quem unusquisque fit de grege Christi, et consequenter subditus Petro. Et præterea etiam ante baptismum est hujusmodi princeps indirecte subditus Petro, qui jus habet cogendi infideles principes, ne Evangelii prædicationem in suis terris impediunt, neve subditos suos ad fidem negandam, vel non suscipiendam cogant, aut alio modo religioni christiana infesti sint. Hac ergo ratione Pontifices simpliciter facti fuerunt a Christo immunes a potestate principum temporalium, sive fidelium, sive infide-

lium, nam infidelitas non facit eos melioris conditionis, neque eorum auget jurisdictionem; quoad usum vero non potuerunt Pontifices temporibus infidelium principum iudicia illorum declinare, sicut etiam non poterant se vel dignitatem suam ab omni injuria vindicare, quod mirum esse non debet, cum etiam sub fidelibus principibus interdum similia passi sint, id permittente Deo, vel ad eorum probationem, vel ad majorem fidei confirmationem.

8. Tertia objectio ex factis imperatorum. — *Responsio.* — *Cur suffragium eligendi Pontificem imperatori jurisdictionem aliquam in ipsum non impertiat.* — Ex quo facile etiam solvitur tertia objectio, quæ et a rege Angliæ, et ab aliis schismaticis et schismatum fautoribus sæpius inculcatur, sumiturque ex factis quorundam imperatorum, qui superiorem potestatem in Summos Pontifices sæpius exercuerunt, vel illos eligendo, seu in sede collocando et confirmando, vel eos puniendo et exauthorando. Ad quod præcipue inducunt factum Othonis I (quem imperatorem piissimum fuisse dicunt), qui Joannem XII, alias XIII, propter pravos mores a sede depositit. De hoc tamen argumento dixi multa in superiori libro, cap. ult., ad quem locum lectorem remittimus; hic enim solum illud commemoravimus, ne objectionem in hoc punto frequentem intactam relinqueremus. Addere vero possumus, priorem objectionis partem ad præsentem causam nullo modo pertinere. Quid enim? si daremus imperatores aut reges posse esse Pontificum electores, numquid propterea esse possent eorum legislatores aut judices, aut propter aliquam in eos jurisdictionem superiores? Profecto Cardinales sunt electores Pontificum, et nihilominus, postquam Pontificem elegerunt, nullam in illum habent potestatem vel jurisdictionem; imo potius illi sunt omnino subjecti. Ratio vero est, quia dum suffragia ferunt, aliquem sibi æqualem nominant vel eligunt, ille autem, qui rite electus est, a Christo ipso statim investitur, et sit superior suis electoribus, quibus antea erat æqualis. vel fortasse inferior. Accedit, quod ipsi electores a Sede Apostolica habent eligendi potestatem tanquam a superiore et Christi Vicario, ad quem spectat modum eligendi sibi successorem prescribere. Idem ergo cum proportione dicendum est de imperatore, etiamsi vel ad eligendum Pontificem, vel ad confirmandam suo consensu electionem ejus fuerit admis-

sus, quia non propterea factus est superior Pontifice, sed manat semper inferior Pontifice jam instituto, sicut etiam erat subditus illi, a quo talem prærogativam accepit.

9. Depositio Pontificis per civilem potestatem fieri nequit. — De altera vero objectio- nis parte, in citato loco ostendi historias, in quibus factum illud et alia similia referun- tur, et incertas esse ac varias, seu inter se dissentientes, et non satis fideliter referri. Nam ex eis non solum colligi non potest imperatorem jure deposuisse aliquem Pontificem, verum etiam neque facto id tentasse ex vi propriæ jurisdictionis, judicii ac senten- tiae, sed aut apertam vim aut tyrannidem, per quam aliqui principes christiani manus violentas in Pontificem injecerunt, vel ad sum- mum industria et auctoritate sua procurando, ut congregaretur aliqua Synodus, quæ senten- tiam depositionis in Pontificem ferat, quid- quid sit de potestate talis Synodi, et an ex errore vel malitia processerit; nam ita acci- disse in facto Joannis XII citato loco ostendimus. Et sane cum poena depositionis cano- nica sit, in illa peculiarem deformitatem et repugnantiam habet, quod per potestatem sæcularem possit imponi. Neque in eum er- rorem incidere potest, nisi qui de Pontificia dignitate nihil supernaturale vel spirituale, sed tantum politicum seu civile cogitaverit. Et ideo si quis imperator vere fidelis teme- rario ausu et indiscreto zelo de Pontifice di- judicando tractavit, non per se, ut dixi, sed per congregationem aliquam, quæ speciem saltem potestatis spiritualis habere videtur, deponendum curavit. Quia vero illa de- positio summa est in eo genere spiritualis poenæ, et jus divinum attingit, a quo per se et immediate est Pontificia dignitas, ideo ex parte Pontificis maximam causam requirit, qualis est sola hæresis, quæ fundamentum talis dignitatis quodam modo tollit; ex parte vero Ecclesiæ requirit sententiam, non cuiuscumque Synodi, sed legitimæ et universalis, et nihilominus ex parte Dei necesse est ut ipsem talem dignitatem auferat, quam ipse per se contulit.

10. Quarta objectio, ex Matt. 18.—Solutio. — *Replica.* — Quartam objectionem sumunt hæretici ex verbis Christi, Matth. 18: *Si pec- caverit in te frater tuus, corripe cum, etc.*; ac tandem *dic Ecclesiar, et si Ecclesiam non audierit, sit tibi tanquam ethnicus et publicanus.* Hanc enim Christi sententiam et legem non minus erga Pontificem, quam erga alios

fideles procedere censem, quia etiam Papa est homo, et potest coram aliis et cum eorum scandalo et injuria delinquere; ergo potest et debet corripi, vel secreto, vel coram testibus; et si emendari noluerit, poterit Ecclesiæ denunciari; quam si non audierit, poterit per eam excommunicari, ut ab aliis tanquam ethnicus et publicanus habeatur; ergo subest Pontifex potestati coercivæ Ecclesiæ. Dices, hinc ad summum sequi, Pontificem non esse omnino exemptum a potestate spirituali, non vero non esse exemptum a potestate sacerdotali. Sed contra, nam ex primo potest inferri secundum, saltem quantum est ex vi juris divini, quia si Papa non est divino jure exemptus a foro ecclesiastico, non habet illam supremam dignitatem, in qua præcipue fundabamus jus divinum de exemptione illius a sacerdotali potestate. Item, quia si Pontifex potest per Ecclesiam excommunicari, eadem ratione poterit gravius puniri pro qualitate delicti; ergo poterit etiam degradari et brachio sacerdotali remitti; ergo non est omnino exemptus jure divino a jurisdictione sacerdotali, alias non posset per Ecclesiam iterum sacerdotali potestati subjici.

41. Solutio. — *Ecclesia nullam habet vim coercivam in Pontificem.* — Respondeo imprimitis haec posteriora argumenta efficacia non esse, tum quia, licet fingeretur Pontificem esse subjectum alicui tribunali ecclesiastico, verbi gratia, Concilio generali, nihilominus posset esse jure divino exemptus a sacerdotalibus, vel ex speciali privilegio Christi, vel quia semper manet super omnes principes sacerdotiales, etiam si per impossibile in ordine spiritualium potestatum Concilio subisset. Tum etiam quia eadem argumenta fieri possunt de Episcopis et inferioribus clericis, de quibus postea dicemus. Deinde addo, etiam si argumenta illa admittantur, potius ostendere incommoda et absurdâ, quæ ex priori antecedente sequuntur, quam illud confirmant. Negamus ergo posse Ecclesiam vim coercivam in Pontificem exercere, sive per censuram, sive quocumque alio modo, nisi prius a Pontificatu cadat, vel per voluntariam renunciationem ab Ecclesia acceptatam, vel per culpam heresis ab Ecclesia judice declaratam. Quia quamdiu persona illa verus Papa existit, jurisdictionem habet supra totam Ecclesiam, etiam simul sumptam, ideoque necessario est jure divino exemptus spiritualiter, id est, non subditus sublimiori potestati spirituali extra Christum, quia nulla talis in

mondo invenitur, ut in superiori libro satis tractatum est.

12. Quomodo fraterna correctio erga Pontificem exerceri valeat. — Unde ad objectionem respondeo, correctionem fraternalm habere posse locum erga Summum Pontificem, quantum est charitatis officium, et intra illud sistitur, hoc enim modo potest interdum major a minori, et Prælatus a subdito admoneri, sicut Paulus cum Petro se gessit, ut explicuerunt Augustinus, epist. 19 ad Hieronymum, et Gregorius, homil. 18 in Ezechiel. Cessat autem correctionis progressus, quando ad viam coactionis fit transitus. Itaque cum reverentia ccripi vel admoneri potest Pontifex, prius solus, si crimen sit secretum, deinde coram aliquibus, si res et necessitas postulet. Quod vero ulterius sequitur, *Dic Ecclesie*, in eo locum non habet, quia ibi nomine Ecclesie, non corpus Ecclesie, sed Prælati ejus intelliguntur; nec enim potest peccator toti corpori Ecclesie denunciari, sed pastori. Unde necesse est ut respective, seu cum proportione accommoda intelligatur, ita ut unusquisque peccator suo pastori ac prælato denunciari debeat, nam extraneus non potest efficaciter corripere aut cogere sibi non subditum. Quia ergo Pontifex superiorum Prælatum non habet, in eo locum non habet illa denunciatio, sed potius quia ipse est supremus Pastor totius Ecclesie, satis Ecclesie dicitur peccatum ejus, cum ipsi dicitur. Posset autem respectu Pontificis non male intelligi nomine *Ecclesie*, confessor ejus, qui eum monere, et suo modo corripere, et peculiariter obligare in foro suo potest. Quod autem sequitur: *Si Ecclesiam non audierit, sit tibi tanquam ethnicus et publicanus*, proprie non potest in Pontifice locum habere, quia excommunicari non potest, cum non habeat vim coercivam superiorum. Neque hoc est inconveniens, quia præceptum illud affirmativum est, et circa unumquemque obligat juxta capacitatem ejus.

13. Objectio. — Contra hoc vero insurgit statim quinta objectio, nam sequitur Christianum non satis providisse Ecclesie suæ, nec convenienter illius regimen instituisse. Nam ut nos dicimus, dedit uni homini supremam in sua Ecclesia potestatem, eumque constituit, *Super gentes, et regna, ut exellat, et destruat, et disperdat, et dissipet, et ædificet, et plantet*¹. Potest autem talis esse Papa, ut

¹ Jerem. 4.

potestate sua in destructionem utatur, nam libertati sua relinquitur, et peccator esse potest; ergo si in Ecclesia non est potestas ad coercendum illum, imperfecte instituta est, insufficienterque est illi provisum. Quale enim est corpus, quod membrum putridum non possit per violentiam aliquam purgare, vel, si hoc non sufficiat, abscindere ne totum corpus corruptat? Ergo cum Ecclesia sit unum corpus mysticum, et Papa sit unum membrum ejus, quod eo plus potest illi nocere, quo potentius et principalius est, necessarium est ad hujus Ecclesiae conservacionem, ut in ea sit aliqua potestas, quae jure et facto valeat iniquo Pontifici resistere, et illum cogere, vel abscindere, etiam si necesse sit; haec autem potestas non est alia, nisi potestas regia, vel imperatoria; ergo.

14. *Solutio.* — *Nulla potitur Ecclesia potestate coercire in Pontificem.* — *Objectio in regem Anglie retorquetur.* — Respondeo, hoc etiam argumento usos esse qui existimarent, Concilium generale esse supra Pontificem, posseque illum deponere, non tantum in causa haeresis, sed etiam propter alia crimina Ecclesiae valde nociva. Et quidem, si argumentum tantam efficaciam haberet, ut propter illud esset in Ecclesia admittenda aliqua potestas coercire Pontificum abutentium potestate sua in Ecclesiae perniciem, potius ponenda esset illa potestas spiritualis quam temporalis, et in generali Concilio potius quam in aliqua particulari persona. Et ita non procederet objectio; negatur enim ultima propositio assumpta, nimirum potestatem hujusmodi solum regiam vel imperatoriam esse posse. Vera nihilominus responsio est, non esse in Ecclesia talem potestatem supra Pontificem, neque spiritualem, neque temporalem, ut satis in superioribus probatum est. Objectio autem facta retorqueri potest contra regem Angliae multo majori ratione, nam ipse vult ita esse caput in imperio suo, ut neque in spiritualibus, neque in temporalibus superiore habeat, idemque de quolibet supremo rege affirmare cogitur, ne tantam dignitatem pro sola sua libidine usurpare videatur. Nonne est ergo multo majus incommode, ut in Ecclesia Christi, quae unum corpus esse debet, sint multa capita ita suprema, ut quodlibet illorum suos subditos dijudicet, et ipsum a nemine judicetur, quam quod sit unum tantum hoc habens singulare privilegium sub Spiritu Sancti directione specialiter constitutum?

15. Dico ergo potius in hoc ostendi singulariem Christi providentiam in suam Ecclesiam. Nam regna terrena sunt inter se divisa, et non subordinata, quia in temporalibus et civilibus non habent unitatem, et ideo sicut sunt multa corpora, ita non est inconveniens quod habeant multa capita suprema, et licet in unoquoque regno possint sequi incommoda, ex eo quod rex supremus a nemine judicari in temporalibus, vel puniri possit, illa incommoda vel tolerantur propter majora commoda (quod in humana providentia saepe fieri necessarium est, et ad rectitudinem prudentiae pertinet), vel unaquamque respublica habet suas leges et modos justos, quibus his incommodis occurrat. At vero respectu Ecclesiae Christi non erat conveniens, ut intra illam essent plura capita simpliciter suprema, neque plures reges ita supremi in temporalibus, ut nulli superiori capiti subordinarentur, saltem in ordine ad spiritualem finem, ideoque optima institutio postulabat unum supremum caput. Et ad maiorem unitatem, et facilius ac suavius regimen, oportuit illud esse unicam personam, et ad tollenda schismata fuit etiam conveniens, ut sub nulla ratione suis subditis subjeceretur. Ex quo tandem necessarium fuit, ut unum illud caput a solo Deo puniri vel deponi per coactionem, et potestatem superiorem possit.

16. Quod si hinc contingat sequi aliquos defectus vel incommoda, mirum non est, quia, quanquam haec sit divina institutio, versatur circa homines, et per ipsos exercetur, et ideo necessario aliquid de providentia humana participat, quae non semper omnia incommoda evitat, sed pauciora eligit. Unde illa imperfectio non potest attribui Christo, sed homini, nam Christus, quantum in se est, sufficientia media providit ad haec incommoda vitanda. Et majora quidem, quaeque fidem vel sanctitatem Ecclesiae maculare possent, omnino praevenit et abstulit, dando Vicario suo certam et infallibilem directionem in definiendis rebus ad fidem vel mores Ecclesiae pertinentibus. Item quia haeresis serpit ut cancer, et tollit Ecclesiae fundamentum, etiam ius statuit, virtute cuius a dignitate eaderet Papa, si esset haeticus, dando etiam Ecclesiae facultatem ut de tali criminis cognosceret, et sententiam declarantem illud, et divinam depositionem inde subsecutam, proferre possit. At vero in reliquis, quae ad mores pertinent, non perfinebat ad suavem et

sapientem providentiam Christi, aut Pontifices omnes libertate morali privare, aut eos in gratia confirmare, et ideo in eis etiam peccata permisit. Noluit tamen ut per homines coerceri aut puniri possent, ne debitus ordo providentiae et regiminis inverteretur, et majora mala ac perturbationes sequerentur.

17. Varii modi protectionis Pontificum a Christo provisi¹. — Et nihilominus varia remedia providit, quibus hoc malum vel impidiretur, vel ei, quoad fieri posset, subveniretur. Primum ac præcipuum est internum auxilium Spiritus Sancti, quod longe majus et specialius Pontifici paratum esse credimus, simul cum angelica custodia singulari et excellentiori. Secundum est oratio tum universalis Ecclesiæ, tum singulorum fidelium, quæ pro ipso capite semper esse debet major et frequentior, et tunc oportet esse ferventior, quando contigerit caput languere. Tertium et optimum medium est secreta admonitio, vel, si peccata scandalosa fuerint, etiam publica, servata debita reverentia et humilitate, et si necessitas id postulet, interdum fieri potest hæc admonitio per reges et principes temporales, quorum auctoritas apud Pontificem multum valere potest et debet, si prædictam modestiam, et animi submissiōnem conjunctam habet.

18. Pontifici bellum injustum inferenti resisti potest. — Quartum remedium, non quidem iniquum, sed magis humanum et periculose, ideoque non sine extrema necessitate adhibendum, est justa defensio; nam si Pontifex manifestam violentiam et injustam vim inferat, ei resisti potest per modum defensionis, intra terminos inculpatae tutelæ; quia vim vi repellere naturale remedium est, et nemini denegatur, et non requirit potestam superiorem, vel jurisdictionem in eo qui se defendit, sed solum jus et vires ad se tuendum. Nam si in alterum malum inferat, non illum punit, sed illo medio proprium malum juste evitat. Quocirca si Pontifex corporalem vim inferat per aggressionem, vel injustum bellum, ei poterit per similem actionem resisti ad defensionem, non ad offendionem. Si autem violentia esset spiritualis, præcipiendo iniqua, vel sacra profanando aut destruendo, ei proportionato modo resisti poterit, procurando ne talia executioni mandentur. Hæc

tamen rara sunt, et ut hæc licentia sumatur, esse debent evidentissima. Denique (quod valde notandum est) hoc modo per mille et sexcentos annos Ecclesia gubernata est, recognoscendo in Pontifice hanc potestatem, et exemptionem, et hunc honorem, et reverentiam illi deferendo, et tolerando iniquos, qui comparatione Sanctorum et bonorum pauci fuerunt, neque in hac tolerantia tot incommoda passa est Ecclesia, quot in temporibus schismatum, et rebellionum potestatum temporalium adversus Pontifices, sustinuit; ergo gratis et sine fundamento fingunt hæretici imperfectionem vel defectum in hac institutione, quam potius Deo dignam esse, ipsa experientia, præter alia quæ adduximus, ostendit.

CAPUT VII.

SEXTÆ OBJECTIONI SATISFIT, ET TRACTATUR QUÆSTIO AN PAPA POSSIT SE HUMANO JUDICIO SUBMITTERE.

1. Sexta objectio. — Ultima superest objectio, quia Pontifex Romanus saltem voluntate propria potest renunciare huic privilegio, non tantum renunciando papatu (quod clarum est), sed etiam dignitate retenta; ergo signum est non esse hanc exemptionem de jure divino, neque ex natura rei esse necessario cum dignitate conjunctam, nam si talis esset, nec immutari nec separari posset per humanam voluntatem. Antecedens probatur ex usu, nam id fecit Leo IV, judicio Michaelis imperatoris et legatorum ejus se subjiciendo, ut refertur in c. *Nos si incomptenter*, 2, q. 7; et Symmachus regis temporalis judicio se submisit, ut sumitur ex Concilio tertio Romano, sub eodem; et Gregorius Papa, in c. *Si quis*, 42, 2, q. 7, sic ait, referente Gratiano: *Si quis super his nos arguere voluerit, et extra auctoritatem nos facere contendenter, veniat ad Sedem Apostolicam*, etc., ut ibi ante confessionem S. Petri tecum juste deceretur, quatenus inibi unus ex nobis sententiam accipiat suam; ubi se committit alterius judicio. Et Sextus III, in c. *Mandasti*, 2, q. 5, dicit, cum injuste criminaretur, coram Valentiano Augusto et Synodo se purgasse, et addit: *Sed non aliis, qui noluerint, aut sponte hoc non elegent, faciendo formam, exemplumque dans.* Idemque refertur de Leone III, in c. *Auditum*, eadem causa et quæst. De Marcellino etiam constat, se cuiusdam Synodi

¹ Vide Cajetanum in Opusc. de Potest. Papæ, c. 27.

judicio submisso¹. Denique in sacramento confessionis Pontifex se submittit jurisdictioni privati confessoris; cur ergo non poterit se etiam submittere in causa civili, vel temporali? Aliqui etiam inducunt Christi exemplum, qui se potestati Pilati supposuit, dando illi veram potestatem supra se, ut ostendunt ejus verba, apud Joan., cap. 19: *Non haberes potestatem in me ullam, nisi tibi datum esset desuper*. Quo exemplo utitur D. Thomas 2. 2, q. 67, art. 1, ad 2, ut probet posse superiorem subjici judicio inferioris, ubi etiam simpliciter ait, Leonem Papam subjecisse se judicio imperatoris.

2. Prima conclusio: *Pontifex jurisdictioni temporali se subjicere nequit.* — **Probatur.** — **Solutio ad sextam objectionem.** — *Pontifex exemptioni suae renunciare non potest.* — Hoc punctum late tractatur a Theologis, in 4, d. 18 et 19, scilicet, D. Thoma, Paludan., Bonavent., Richardo, Alberto, et aliis; et a Cajetano, dicta q. 67, art. 1; et a Canonistis, in cap. *Ecclesia S. Marie*, de Constit., ubi late Panorm., n. 7; et Felin., 2; et Baldus, in 1. *Est receptum*, G. de Jurisdict. omni. jud. Brevis tamen, quod ad rem praesentem spectat, dicendum imprimis est, Papam non posse ita se subjicere imperatori, ut illius temporali, seu civili jurisdictioni subjectus vere maneat, et ab illo cogi vel obligari possit ratione talis jurisdictionis. In hoc convenientia auctores allegati, et probatur, quia imperator non habet jurisdictionem civilem supra Pontificem, illam enim ei abstulit Christus, eximendo Pontificem. Nec etiam Pontifex potest illam ei tribuere, quia ut Pontifex est (ita enim nunc de illo loquimur) non habet temporalem jurisdictionem directam etiam supra alios, neminem supra se ipsum; ergo nec potest illam dare imperatori supra se, quia in hoc genere non dat quod non habet; ergo non potest se submittere jurisdictioni sacerdotalis imperatoris. Probatur consequentia, quia non posset se submittere, nisi dando illi talem jurisdictionem; quia ipse jam illam non habet; ergo licet Pontifex velit judicari ab ipso, si non det illi jurisdictionem, non submittetur jurisdictioni illius, neque imperator poterit Pontificem judicare tanquam habens jurisdictionem in ipsum. Loquor autem de jurisdictione temporali, quia sola subjectio respectu tem-

poralis jurisdictionis, est contraria exemptioni, de qua nunc tractamus. Potestque hoc confirmari ex alio principio, quod nemo potest renunciare privilegio in favorem communis et dignitatis concessio; talis autem est exemptione Papae; non enim intuitu personae, sed in honorem ipsius Christi data est; de quo argumento plura inferius. Et hoc etiam probat objectio facta, quae per hoc solvit; negamus enim posse Pontificem renunciare suae exemptioni, se alteri, praesertim laico, subjiciendo; quia tali jurisdictioni non potest Pontifex subjici, ut dixi, quia non potest illam dare non habenti. Nec potest facere ut jurisdictione temporalium regum, supra quam Christus Vicarium suum constituit, supra illum extendatur. Ita ergo sufficienter objectioni satisfit.

3. Secunda conclusio: *Pontifex non potest spirituali potestati quoad vim coerciram se submittere.* — **Probatur assertio.** — Quia vero, quae in illa adducuntur, probant posse Pontificem aliquo modo voluntarie se submittere alterius judicio, declarare oportet quomodo id intelligendum sit. Dico ergo ulterius non posse Pontificem se submittere in foro exteriori jurisdictioni ecclesiasticae, seu spirituali, alteri commissae, quoad vim coactivam ejus, sive directe in causis spiritualibus, sive indirecte in temporalibus, tam omnibus quam singularis, vel una, aut altera causa. Ita sentiunt plures ex auctoribus citatis, et optime Bellarminus, lib. 2 de Conciliis, c. 18; et Turrecrem., lib. 2 Sum., c. 104 et 105; et idem sensit Cajetan., tract. 2 de Potest. Papae. Et probatur aperte, quia nulla jurisdictione ecclesiastica esse potest in aliquo extra Pontificem, quae non pendeat et manet ab ipso Pontifice; ergo nunquam potest Pontifex illi subdi quoad vim coactivam. Antecedens supponimus, nam, licet non sit certum omnem jurisdictionem episcopalem manare a Pontifice, est tamen probabilius. Et praeterea certum est omnem hujusmodi jurisdictionem pendere a Pontifice, posseque ab illo et ampliari et restringi quoad causas, personas, et loca; quod nobis nunc satis est. Imo, licet fingeremus datam esse alicui jure divino aliquam jurisdictionem ecclesiasticam independentem a Pontifice, id est, quae ab illo tolli aut limitari non posset, nihilominus illa non posset sufficere ad judicandum Pontificem, quia, ut supponimus, ipse jure divino exemptus est ab omni humano superiore; illa ergo jurisdictione licet esse jure divino data, non esset supra

¹ Vide quae de hoc facto Leonis III citatur in decreto Gregoriano, et Paulum Aemilium, lib. 3, de Gestis Francor.

Pontificem, neque supra totam Ecclesiam, quia hæc soli Petro commissa est, sed ad summum esset in hoc vel in illo episcopatu, et in aliquo inferiori gradu. Igitur cogitari non potest, Pontificem judicari ab aliquo per potestatem spiritualem, nisi per potestatem manantem ab ipso.

4. Pontifex non habet potestatem coactiram sui ipsius. — Hinc ergo evidenter concluditur hanc jurisdictionem non posse esse propriam et coactivam. Probatur primo, quia Pontifex non accepit talem potestatem supra se ipsum; nemo enim habet vim coactivam in se, quia licet se punire possit, volens id facit, et sic non cogitur; ergo nec potest alteri talem potestatem communicare. Secundo, quia Pontificis causæ divino judicio sunt reservatae, ut dicunt Canones, qui maxime loquuntur in ordine ad forum externum et coactivum; ergo non potest Pontifex illas causas alteri committere, quantum ad idem genus judicij coactivi, quia non potest inferior dare jurisdictionem in casibus seu causis reservatis superiori. Tertio, quia non potest Papa ita committere aliquam causam inferiori, quin ipse maneat semper superior in illa causa, et consequenter possit vel revocare jurisdictionem, si velit, vel de sententia ab inferiori data disjudicare, quia hoc totum intrinsecum est dignitati Pontificie, ideoque ita inest Pontifici ex vi juris divini, ut nunquam possit illud a se abdicare, nisi toti pontificatus renuncianto. Ergo, licet fingatur Pontifex committere alteri jurisdictionem in se ipsum, illa non potest esse vere coactiva, quia tam in duratione quam in executione pendet a voluntate Pontificis; quod autem ita voluntarium est, non potest esse coactum. Quæ ratio æque procedit in omnibus et in singulis causis; nam in nulla potest Pontifex a se abdicare supremam jurisdictionem, quam habet.

5. In casu hæresis depositio Pontificis fil a solo Deo. — Confirmatur hoc, quia Pontifex in nullo casu, etiam si alieni se subdere velit, potest per censuram compelli, ut est communis consensus Theologorum, in 4, dist. 18 et 19, et in tractatu de Censuris latius diximus. Ratio autem non est alia, nisi quia semper manet superior illo, cui jurisdictionem committit, et ideo nec contumax esse potest respectu hominis, neque ligari censura, aut alia violenta poena affici aut deponi. Nam, licet in casu hæresis possit deponi, tunc revera non deponitur ab homine, sed ab ipso Deo, præmissa legitimi Concilii declaratione, ut dixi,

et ita ibi non intercedit voluntaria subjectio, neque etiam involuntaria coactio personæ Pontificis, quamdiu Pontifex est, sed solum cognitio et examinatio causæ, quam ipse in eo casu juste impedire non potest, quia est concessa a Deo tanquam justa et necessaria defensio.

6. Ultima conclusio: Pontifex solum tanquam arbitro potest alteri se subdere. — Concludo igitur ultimo, quod attinet ad externum judicium humanum, solum posse Pontificem se submittere judicio alterius tanquam arbitri, non tanquam proprio judici jurisdictione utenti in ipsam personam Pontificis. Ita explicavit suam sententiam D. Thomas, in dicta solutione ad 2, et sequuntur alii allegati. Et sequitur a sufficienti partium enumeratione, nam Pontifex potest se aliquo modo submittere judicio aliorum, etiam in causis personalibus, de quibus præcipue tractamus, ut probant ea quæ in objectione adduximus; sed non potest subjici propriæ jurisdictioni alicuius, ut ostendimus; ergo saltem potest se submittere judicio alterius ut arbitri, quia non est alijs modus subjectionis voluntariæ. Dico autem *voluntarie*, quia, licet per vim et tyrannidem, aut usurpatam jurisdictionem possit Pontifex ab aliquo judicari, et ipse Pontifex possit etiam id permittere, vel etiam eligere ad vitandum majus malum, ut fortasse fecit Paulus, quando appellavit Cæsarem, nihilominus illa submissio simpliciter est involuntaria, et judicium de se violentum est et iniquum; in subjectione autem voluntaria, de qua tractamus, judicium de se fieri potest sine vi, vel injuria aliqua. Ratio autem est jam tacta, quia tunc non fertur sententia iuridica in jurisdictione seu superioritate fundata, sed fertur sententia arbitraria fundata in facto, seu conventione aliqua. Et ita in illo actu non se gerit Pontifex ut Pontifex, committendo jurisdictionem suam, sed ut homo, qui voluntarie vult facere, quod quilibet privatus posset præstare.

7. Objectio. — Solutio. — Dices, postquam Pontifex se subjecit alicuius judicio, tenetur in conscientia, et interdum ex justitia, parere sententiae latæ, si justa sit; ergo procedit ex potestate superiori, et ex vi coactiva, quia omnis necessitas quædam coactio est. Ad hoc Cajetanus, loco citato, concedit ibi intercedere aliquam potestatem superiorem, saltem secundum quid, et eodem modo dicit servari ibi vim coactivam, ac denique indicat illam sententiam ferri in virtute jurisdictionis a

Pontifice commissæ. Sed hoc ultimum, ut dixi, admittendum non est; in reliquis vero potest esse aequivocatio in verbis, quæ cavenda est. Et ideo respondeo breviter, in sententia arbitraria non requiri potestatem superioris, sed purum judicium arbitri; nec esse necessariam vim coactivam, et ideo dixit D. Thomas ibidem, solere in arbitriis adhiberi pœnam, quia in judice non est coactio. Quod adeo verum est, ut neque ad ipsam pœnam possit cogere. Unde quamvis Papa, cum se submittit alicujus judicio, possit promittere sub aliqua pœna stare sententiæ, non poterit ad illam pœnam cogi, licet in conscientia possit interdum ad illam obligari.

8. Ad argumentum ergo nego consequentiam, quia necessitas obligationis in conscientia non oritur ex vi coactiva, sed ex directiva, quæ potest admitti in tali sententia. Adverto tamen hoc esse intelligendum de virtute ostensiva potius quam effectiva, quia talis sententia respectu Pontificis non habet vim præcepti, quod possit Pontificem in conscientia obligare, quam vocamus vim directivam effective, sed habet vim puræ sententiæ declarativæ ostendentis debitum justitiæ, quod ex injuria, vel pacto, vel alio simili titulo potest cadere in Pontificem ex vi legis naturalis, et ita est res perspicua. Ei ob eamdem causam non existimo necessariam distinctionem Cajetani, dicentis Papem posse se subjecere judicio aliorum in quibusdam causis, et non aliis; verias enim et facilius dicitur, in omnibus se posse submittere quoad vim directivam modo explicato, in nullis autem quoad coacti-
vam.

9. *Pontifex non potest ad pœnam ab arbitro impositam cogi.* — Ad objectionem ergo principalem respondetur, in prædicto modo subjectionis voluntariae nullam intervenire renunciationem privilegii exemptionis, ut constat. Ad primum autem exemplum Leonis IV, respondetur non excessisse prædictum modum arbitrariæ sententiæ, ut ex textu et ex historiis constat. Idem dieendum est de Symmacho, in quo tamen facto est considerandum, cum Theodoricus abuti vellet modestia Pontificis, et per modum superioris judicare, clamasse Concilium, Pontificem a nemine judicari posse, utique illo modo, ipse etiam consentiente. Sic etiam in alio Concilio de Marcellino conclamatum fuerat. Et similiter alia facta Sixti et Leonis III clariora sunt, quia in eis Pontifices non se submiserunt aliorum judicio, sed solum ad tollendum fortasse scan-

dum, se voluntarie purgare voluerunt, utique, vel publico juramento, vel aliis probatio-
nibus et rationibus innocentiam suam ostendendo.

10. *Solutio objectionis in principio positæ.*

— Verba autem Gregorii, quæ a Gratiano, in dicto capite *Si quis*, referuntur, suntque Gregorii IV, in Epist. unic. ad Episcopos Eu-
ropæ, quæ in fine secundi tomii Epistolarum Decretalium refertur, nihil ad præsentem causam faciunt; proprius tamen illorum sensus satis intelligi non potest, nisi et finis epis-
tolæ et præcedentia verba considerentur. Scripsit enim Pontifex illam epistolam in de-
fensionem Aldrici Episcopi, qui accusatus forte ab aliquibus, ad Sedem Apostolicam configuerat, ejusque auxilium imploraverat. Et hac occasione decernit ibi Pontifex, Apostolice Sedis privilegium esse, ut omnibus li-
ceat ad illam appellare, et ut *nihil prius de eo,*
qui ad sinum sanctæ Romanæ confugit Ecclesię, ejusque implorat auxilium, decernatur,
quam ab ejusdem Ecclesiae fuerit præceptum auctoritate. Postquam autem hæc verissima principia graviter fundavit, subjungit: *Super quibus si quis nos arguere voluerit, aut extra auctoritatem nos facere contendit, veniat ad Sedem Apostolicam,* et cætera quæ supra re-
tulimus. Unde constat, ipsum non tractare de aliqua propria causa, vel judicio personæ suæ, sed de dogmatibus fidei, et de auctoritate Sedis Apostolice, ad cuius judicium, non ad aliad humanum provocat, ut patet, cum dicit: *Veniat etd Sedem Apostolicam, quo omnia ecclesiastica negotia, de quibus quæstio habetur, confluere jussa sunt.* Ad demonstran-
dam autem confidentiam de virtute doctrinæ addidit idem Pontifex: *Ut ibi ante confessionem S. Petri mecum juste decertet,* utique non in forensi judicio, sed in veritate inquirenda, neque testibus factum aliquod comprobantibus, sed Pontificium, Conciliorum, et consuetudinis auctoritate. Et concludit, *quatenus in illo unus ex nobis sententiam suscipiat suam,* id est, ut ille vineat, qui suam sententiam melius probaverit. Non tamen dubitans, sed, ut dixi, certus de sua veritate ita loquitur¹.

11. *Cur Pontifex judicio confessoris et non alterius se subdat.* — *Pontificem suo confessori jurisdictionem tribuere probabilius.* — Ad exemplum de foro confessoris, respondemus esse in multis dissimilem rationem. Primo,

¹ Ita legit Gratianus, at in originali Roma-
no habetur *mihi;* sed prius videtur melius.

quia Pontifex non est ullo jure exemptus a judicio sacramentalis confessionis, cum sit homo et peccator, et obligetur eodem præcepto pœnitentiae vel confessionis. Secundo, quia illud judicium est altius et divinus quo cumque judicio externo, unde in illo principalis judex est solus Deus, et confessor solum est instrumentum Dei, ejusque vicem immediate gerit. Tertio, dicunt aliqui confessorem in illo foro habere jurisdictionem immediate a Deo, Pontificem auiem solum applicare materiam, seu eligere confessorem, quod est probabile, præcipue in illo casu speciali. Mihi autem probabilius est, Papam dare jurisdictionem confessori supra se ipsum ut peccatorum, sed in hoc esse illam jurisdictionem dissimilem, quod non est omnino coactiva, sed medicinalis, cuius signum est, quia confessor non potest pœnitentem omnino cogere ad pœnam satisfactoriam, sed oportet ab illo voluntarie acceptari. Item est alia dissimilitudo, quia jurisdictione illius fori, licet, quatenus immediate datur ab homine, ab illo pendeat in conservari, quia ab eodem revocari potest, nihilominus in se est altior et divinior, quia etiam de occultissimis, et quæ in corde latebant, judicat, et de omnibus ultimam sententiam profert, a qua neque ad Pontificem, neque ad ullum hominem appellari potest.

12. Utrum Christus Dominus Pilato se subjecerit.—Ad exemplum de Christo Domino, aliqui existimant Christum vere se subjecisse jurisdictioni Pilati, dando illi veram potestatem supra se ipsum, ut hominem, in quam sententiam inclinat Toletus, Joan. 19, annotat. 4; et refert Irenæum, lib. 4, cap. 34. Sed adverto aliud esse loqui de potestate Pilati absolute, aliud de potestate respectu Christi, qui etiam respectus potesi esse aut juris aut facti. Potestas ergo ipsa, qua de facto Pilatus utebatur in Christum, a Deo erat, et sic non permissive tantum, sed etiam positive intelligi potest, quod Christus dixit: *Non haberes in me potestatem ullam, nisi tibi datum esset desuper*, ut ibi sentit Augustinus, tract. 116, et Bernard., ep. 42. At vero potestas illa ut relata ad Christum non fuit data in illum tanquam in subditum, quia illa jurisdictione per se et in se spectata in illum tanquam in subditum non cadebat, ut probant sufficienter verba Christi, Matth. 17, et quæ circa illa capite præcedenti tractavimus. Solum ergo per violentiam Judæorum, et per ignorantiam Pilati, factum est ut illa potestas exerceretur circa Christum, et quoad hoc permissive tantum

intelligitur, potestatem illam esse a Deo, ut recte ibi docent Chrysostomus, Hom. 83; et Cyrillus, lib. 12, c. 22; et certe non aliud docuit Irenæus. Quocirca subjectio illa Christi Domini ex parte sua tantum fuit tolerantiae et permissionis, et non alicujus concessionis potestatis, vel jurisdictionis, nec renunciations alicujus privilegii, et ideo exemplum nihil proposito deseruit.

CAPUT VIII.

UTRUM CLERICI OMNES SUB PONTIFICE EXISTENTES A JURISDICTIONE TEMPORALIUM PRINCIPUM JURE DIVINO EXEMPTI SINT, ET TRACTANTUR DUE CONTRARIE OPINIONES.

1. Prima sententia negans.—In hoc puncto duæ sunt opiniones contrariae, et valde communes, quas in hoc capite cum suis fundamentis breviter referam; in sequenti vero meum qualemcumque judicium interponam. Prima itaque sententia absolute negat hanc immunitatem esse de jure divino. Quam tenent multi Doctores, ex quibus quidam affirmanter esse de jure humano, et tacite indicant exclusivam. Alii, vel in genere, vel in specie, declarant, non esse de jure naturali. Sic refertur pro hac sententia D. Thomas, ad Romanos 13, lect. 1, ubi ait Sacerdotes esse immunes a tributis solvendis, concessione principum consentanea æquitati naturali; eadem autem vel major ratio est de exemptione a foro, seu jurisdictione principum, ut supra tactum est, et in sequentibus dicetur. Henricus etiam, Quodlib. 9, quæst. 13, dicit immunitatem clericorum esse ex statutis Papæ et imperatorum, ubi licet non ponat expresse negativam partem, scilicet, non esse de jure divino, satis eam significat, dum originem hujus immunitatis humanis tribuit statutis. Expressius tenet Almain., in 4, dist. 25, q. 1, ubi refert Ochamum, et communem sententiam Parisiensium.

2. Laius hoc tenent moderni Theologi, Medin, C. de Restit., q. 45, ubi præcipue agit de tributorum exemptione, sed ad omnia extendit sermonem. Idem tenet Victor., in Relect. 1, de Potestate eccles., q. 6, concl. 2; Sot., in 4, dist. 23, q. 2, art. 2; Ledesm., 2 part. quarti, quæst. 20, artic. 4, versic. *Hesabit*, concl. 2 et 3; Palatius, in 4, dist. 25, disput. 3, circa finem; Salon. 2. 2, quæst. 67, art. 4, controvers. 1, c. 4; et Bannez, ibid., dub. 2; Albertus Pighius, lib. 5 Eccle-

siasticæ Hierarch., c. 7, ubi hac ratione constituit differentiam inter principes ethnici et fideles, quod clerici fuerunt sub jurisdictione sacerdotalium principum, quamdiu ethnici fuerunt, vel nunc etiam sunt in regnis ubi reges sunt gentiles, principibus autem christianis non subjiciuntur. Ratio autem differentiae est, quia principes ethnici nec cesserunt juri suo, nec legibus ecclesiasticis subduntur, sicut christiani principes. Quæ doctrina aperite supponit, exemptionem hanc tantum esse de jure humano; et sequitur Jansenius, c. 69 Concordiæ; indicat Maldonat., Matth. 17, exponendo Hieronymum; expressius Salmeron, tom. 6, in Evangel., tract. 37, versus finem. Et eamdem opinionem tenet Molina, 1 de Just., disp. 31; Henr. lib. 7 de Indulg., c. 24. Ex Canonistis idem sentit Innocentius, c. 2, de Majorit. et obed. Licet enim sub distinctione loquatur, tamen banc partem posteriori loco ponit, et in eam magis inclinat. Eamdem tenet Covarr., in lib. Practic. Quæstionum, cap. 31, ubi alios refert.

3. *Primum fundamentum.*—Fundamentum hujus sententiae duobus modis explicari potest, negative, scilicet, et positive. Negativum argumentum est, quia nec auctoritate, nec ratione satis probatur hoc divinum jus. Estque hoc argumentum negativum efficax, supposito antecedenti, quia non sunt præcepta juris divini admittenda sine testimonio satis certo, aut ratione cogente. Quod autem hoc non constet, declaratur, quia vel illud jus est positivum, et hoc nullo testimonio sufficienter probatur; vel est naturale, et hoc oportet ut ratione convincatur, quam invenire facile non est. Prior pars probatur, quia unus tantum locus Evangelii solet ad hoc jus divinum positivum probandum adduci, verba, scilicet, Christi, Matth. 17: *Ergo liberi sunt filii*, quæ non videntur efficacia, quia supra diximus intelligi de filiis naturalibus, et Christum, propter singularem participationem suæ dignitatis, quam Petro tribuebat, ad ipsum illa extendisse. Sed instatur, alia consideratione extendi ad totum clerum, quia est veluti specialis familia Christi, exemptione autem filii naturalis extendi solet ad familiares.

4. At vero hæc verborum Christi inductio non videtur multum urgere, tum quia non est ex natura rei necessarium, ut, exempto naturali filio, eximatur familia, sed hoc pendet ex voluntate patris seu principis, quam voluntatem Christus ibi non ita erga alios declaravit, sicut erga Petrum; imo specialiter de-

signando Petrum, alios excludere seu non comprehendere visus est; tum etiam quia, licet saepius eximatur familia cum patrone, non semper, imo raro æqualiter; quomodo ergo inde concludi potest æqualis exemptione a potestate sacerdotalium principum, omnium clericorum cum Petro, vel etiam Christo? vel, si æqualis non infertur, quanta colligitur? Præsertim quia hic magis urget difficultas quædam supra tacta, quod illo loco tantum est sermo de exemptione a tributis; est autem multo difficilior exemptione a foro, et jurisdictione respectu familiæ, cum neque ipsi metu filiis concedi soleat.

5. Posterior vero pars de jure naturali probatur, quia hoc jus debet esse fundatum in aliqua proprietate supernaturali, quia, ut supra de Pontifice explicui, hoc jus non regulatur mero lumine naturali, sed ut illustrato per fidem, supposita aliqua proprietate vel dignitate supernaturali. In præsenti autem nulla videtur esse proprietas supernaturalis, ad quam talis exemptione necessario consequatur. Probatur, quia si aliqua esset, maxime character clericalis; hoc autem non ita videtur, tum quia servus ordinatus contra voluntatem domini non statim liberatur a servitute ex vi characteris, juxta cap. 2 et penult., de Servis non ordin.; neque omnes habentes characterem hoc gaudent privilegio, sed multi illo privantur, ut infra videbimus. Tum etiam quia per characterem clericalem solum dedicatur homo peculiari modo divino cultui, seu recipit peculiarem potestatem ad ministrandum in illo; non repugnat autem ex natura rei, aliquem esse peculiari modo deputatum divino obsequio, et simul esse subditum temporali principi, in his quæ divino obsequio non repugnant. Tum etiam quia alias daretur ansa dicentibus, Christianos omnes esse exemptos a jurisdictione principum temporali ex vi characteris baptismalis, quia per illum sunt peculiari modo consignati et consecrati cultui divino, multo aliter quam reliqui homines. Tum præterea quia multi sunt clerici non habentes characterem, ut qui tantum sunt tonsurati; et nihilominus, si aliae conditiones necessariae concurran, habent eamdem exemptionem quam alii clerici; ergo si gnuum est non oriri ex illo jure naturali. Idemque argumentum sumitur ex aliis personis ecclesiasticis fruentibus hac exemptione, etiam si nec tonsuram habeant, ut sunt religiosi laici, seu conversi, et religiosæ feminæ, et si qui sunt hujusmodi. Tum deni-

que quia quod est de jure divino isto modo, ita est necessarium, ut contrarium sit intrinsece malum; clericum autem judicari per jurisdictionem laicam non est intrinsecum malum; ergo oppositum, nimurum, quod clericus sit exemptus a tali jurisdictione, non est de jure divino naturali.

6. Secundum fundamentum. — *Prima confirmatio.* — Atque hæc ultima ratio non tantum negative, sed etiam positive (quod secundo loco proposui), videtur hanc sententiam persuadere. Nam quod est contra jus divinum nunquam licet; subjectio autem huic exemptioni contraria sæpe licet; ergo signum est hanc exemptionem non esse de jure divino. Et confirmatur primo, quia clerici non semper fuerunt in Ecclesia exempti a foro judicis sacerdotalis, ut ex Paulo, ad Romanos 13, cum expositione Chrysostomi et aliorum colligitur; ergo non est de jure divino, alioqui simul cum ipsa Ecclesia natum fuisse. Potestque argumentum in hunc modum explicari. Quia longe aliter fuerunt a principio nascentis Ecclesiæ exempti clericci a foro sacerdotali in causis spiritualibus ac in temporalibus. Nam in prioribus nullo modo tenebantur laicis obediare in conscientia, nec poterant ad illorum tribunalia recurrere pro expeditione talium causarum. At in posterioribus tenebantur eis obediare, et poterant ad illos recurrere, quantum erat ex vi jurisdictionis. Ergo signum est distinctionem fori in spiritualibus longe aliter esse de jure divino, quam distinctionem fori in temporalibus. Ergo signum est hoc privilegium quoad temporalia non esse immediate et per se ex divino jure.

7. Secunda confirmatio. — *Erasio quedam refellitur.* — Secundo hoc confirmatur, quia Ecclesia interdum tradit clericum brachio sacerdotale, ut ab eo possit etiam morte puniri, præmissa declaratione per quam privat clericum privilegium fori, et in jure sunt aliqui causas, in quibus privantur clerici tali privilegio; ergo signum est privilegium illud non esse juris divini. Nam quæ sunt jure divino statuta, mutari aut auferri non possunt. Nec satisfaciet qui dixerit tunc non auferri privilegium, nec mutari jus divinum, quia judex sacerdotalis non sua auctoritate, vel ut causa principalis (nt sic dicam), sed ut Ecclesiæ minister, et per ejus potestatem in clericum animadverit. Hoc (inquam) non satisfacit, tum quia jura et Doctores passim dicunt, tunc privari clericum suo privilegio fori, seu (quod idem est) non gaudere immunitate ecclesiastica;

tum etiam quia cum judex utitur gladio materiali ad poenam mortis, certe non imperat per jurisdictionem spiritualem, sed per temporalem, quia spiritualis non extenditur ad hujusmodi poenam, nisi permissive, ut sic dicam. Quapropter non se gerit tunc ut causa per se influens (ut ita rem explicem), sed ut removens prohibens, utique auferendo privilegium, et tollendo pro illo casu praecipuum prohibens laicum judicare clericum; ergo signum est illud non esse juris divini.

8. Tertia confirmatio. — *Erasio.* — *Impugnatur.* — Denique similis confirmatio summa potest ex eo quod, si hæc exemptione esset de jure divino, esset æqualis in omnibus clericis, quia jus divinum naturale nihil inter eos distinguit; non est autem ita, quia imprimis clerici conjugati non ita gaudent hoc privilegio, sicut alii, ut constat ex jure¹. Item clerici minores, licet conjugati non sint, nisi beneficium ecclesiasticum habeant, vel tonsuram, et habitum clericalem deferant, non gaudent privilegio fori. Deinde, licet clericus conveniens non possit coram judge laico, potest tamen reconveniri saltem in causa civili, licet non in criminali, ut ex jure notat Sylvester, verb. *Judex*, n. 4². Item in causa feudi non servatur exemptione, et in nonnullis aliis casibus, et præsertim solet in jure excipi, Nisi consensus Praelati accedit, c. 2, de Judicis; ergo non est uniformitas neque æqualitas in hac exemptione. Quod si quis dicat, attento jure divino solo, uniformem esse exemptionem de omnibus et pro omnibus, varietatem autem illam esse humano jure inductam. contra hoc facit, quia hoc videtur signum sufficiens, ipsam immunitatem absolute non esse de jure divino, alias non posset jure humano ita variari. Sicut nos colligimus jurisdictionem Episcoporum non esse immediate de jure divino, quia per hominem limitari, ampliari et variari potest.

9. Secunda sententia affirmans. — Nihilominus est secunda sententia, quæ simpliciter affirmat exemptionem clericorum esse de jure divino, quæ satis communis est; auctores tamen ejus fere non declarant an de jure divino positivo vel naturali loquantur: plures tamen eorum de jure naturali loqui videntur, quantum ex rationibus et allegationibus eorum colligi potest, quamvis nonnulli aliquid etiam de jure positivo divino attingant. Ita

¹ Cap. unic. *de Cleric. conjug.*, in 6.

² Conc. Trid., sess. 23, c. 6, de Reform.

ergo potest pro hac sententia imprimis allegari Glossa in c. *Si imperator*, verb. *Et d-s-cut*, 69 dist., quæ aperte dicit, constitutiones Ecclesiæ, eximentes clericos a foro sœculari, esse declarationes juris divini, quo talis exemptio illis concessa est ante omnem constitutionem Ecclesiæ. Non tamen declarat illa Glossa quale sit illud jus divinum, nec etiam expresse loquitur de exemptione in causis temporalibus. Possetque intelligi de causis ecclesiasticis, de quibus textus ipse maxime loqui videtur. In eamdem sententiam inclinat Glossa, in c. *Quanquam*, verb. *Divisio*, de Censib., in 6, ubi etiam textus favet. dum ait, *ecclesiæ et sacerdotes non solum humano, sed etiam divino jure a jugo tributorum temporalium esse exemptos*. Quæ duæ Glossæ communiter in illis locis receptæ sunt, ut late cum aliis multis Doctoribus refert Covarruvias supra citatus. Hanc item sententiam non improbat Innocentius, in cap. 2, de Majorit. et obediens. Tenet Rota, in titul. de Consuet., decis. 3 et 10, in antiquis; Abbas, in c. *Ecclesia S. Mariæ*, de Constit., n. 6, ubi Felinus, numero etiam 6, plures alios allegat, et expressius declarat contra rationem naturali-
lem esse, ut clerici judicentur a laicis. Quod latius declarat Rebuff., alias referens in Concordat., titul. ultim. Idemque tenet Navarr., in c. *Norit*, de Judic., notab. 6, num. 30, saltem' quoad exemptionem in criminalibus causis, de quibus idem sentit quod de exemptione in spiritualibus, licet de civilibus aliter sentiat. Ex Theologis tenet Almain., de Po-test. Ecclesiast., c. 8, ubi censuit hanc opinionem probabiliorē, et refert quendam Carlerium, in tract. contra Bohemos, qui illam defendit. Eam etiam tenet Bellarminus, in libro primo de Cleric., cap. 28, proposit. 5, et cap. 29, et latius in disp. speciali, tom. 2, in fine, et tandem in lib. *Recogni*, circa eadem loca, et circa lib. 2 de Pontifi., c. 29. Tenet etiam Julius Clar., referens alios, lib. 5, § fin., q. 36; Bened., collect. 37; et indicat Sylvest., verb. *Immunitas*, 1, quæst. 4; et Angel., codem verb., n. 33.

40. *Fundamenta hujus sententiar ad tria capitula reducuntur.* — Fundamenta hujus sententiae, quædam generalia sunt, et ab utroque jure, divino positivo vel naturali, abstractentia; alia jus naturale attingunt; alia vero positivum. In primo ordine ponimus jura canonica, quæ hoc significant, in quo ordine allegari solent multa jura, quæ supra in c. 2 re-tuli, *sed illa omitto*, quia loquuntur de exem-

patione in causis spiritualibus, et ideo ad exemptionem in temporalibus in rigore extendi non possunt. Afferuntur etiam multa quæ in fine capituli tertii adduxi, quæ similiter prætermitto, quia, licet affirment exemptionem in temporalibus, de origine ejus nihil dicant; quomodo autem induci possint, infra declarabo. Ex antiquis ergo decretis solum invenio cap. *Relatum*, 11, q. 1, quod est Alexandri Papæ, ep 1, quod pro hac parte induci potest, quatenus contra violatores immunitatis personarum ecclesiasticarum ita concludit: *Taliter prævaricantes prævaricati sunt in Deum suum, et non obediunt præceptis ejus.* Secundo, facit textus Concilii Lateranensis, sub Innocent. III, in c. *Nimis*, de Jurejuran., quod sic habet: *Nimis de jure dirino quidem laici usurpare nituntur, cum viros ecclesiasticos nihil temporale obtinentes ab eis præstandum sibi fidelitatis juramenta compellunt.*

11. Tertio, facit c. *Quanquam*, de Censib., in 6, quatenus dicit: *Ecclesiasticæque personæ, ac res ipsarum non solum jure humano, quinimo et divino a sœcularium personarum exactionibus sunt immunes.* Ubi, licet sit sermo de exemptione a tributis, inde sumitur argumentum ad privilegium fori, vel a paritate rationis, vel quia Paulus, ad Rom. 13, dixit: *Non sine causa gladium portat, Dei enim minister est, vindex in iram ei qui male agit.* Et subdit inferius: *Ideo enim et tributa præstatis, ministri enim Dei sunt in hoc ipsum servientes*, significans illa duo esse conjuncta, jus regendi temporaliter, et jus exigendi tributum, et consequenter e converso inferri posse, si jus divinum exemit clericos a tributis, etiam a civili subjectione eos exisse. Quarto, induci possunt c. *Continua*, 11, q. 1, et c. *Futuram*, 12, quæst. 1, quatenus in eis referuntur verba Constantini imperatoris, quæ in Concilio Nicæo Episcopis dixit: *Vos a nemine judicari potestis, sed judicio Dei reserramini*; nam ex vi juris divini locutus videtur, cum eo tempore nondum esset jus humanum in hac parte satis stabilitum.

12. Quinto, ex recentioribus Conciliis generalibus est optimum testimonium Concilii Lateranensis, sub Leone X, in sessione nona, in Bulla reformationis curiae dicentis: *Cum a jure tam divino quam humano potestas nulla in ecclesiasticas personas attributa sit*, etc. Nam si ab aliquo jure laici non habent potestatem in clericos, profecto illam non habent, quia sine justo titulo, et in aliquo jure fundato illam habere non possunt; ergo,

sicut laici, quantum est ex vi juris divini, hac carent potestate, ita clerici ex vi ejusdem juris divini sunt exempti, quia nemo subditus est potestate carenti. Sexto, hoc valde confirmat Concilium Tridentinum, sessione 25, c. 20, de Reformatione, dicens : *Ecclesiæ et personarum ecclesiasticarum immunitatem, Dei ordinatione, et canonicis sanctionibus constitam*. Illud autem dicitur esse de jure divino, quod Dei ordinatione statutum est. Tandem ad idem faciunt verba Concilii Coloniens., 1 part., c. 20, dicentis, hanc immunitatem esse *relustissimam, jure pariter divino ac humano introductam*.

13. *Fundamenta immunitatem juri naturali tribuentia*. — In secundo ordine ponenda sunt ea fundamenta, quæ hoc esse jus divinum naturale suadent. Et quamvis, ut dixi, hoc jus non sit pure naturalis ordinis, sed per connaturalitatem ad sacerdotium supernaturale, nihilominus ab ipsa pura natura magnum indicium, et quasi a fortiori argumentum sumitur. Nam inter infideles, sui qualescumque sacerdotes quasi ductu naturalis luminis ab oneribus laicorum erant exempti; ergo multo magis hæc exemptio erit de jure divino naturali in lege gratiæ. Quo argumento fere utitur Pontifex in c. *Non minus*, de Immunit. ecclesiistarum, adducens exemplum Pharaonis, qui, ut ait, *legis divinae notitiam non habebat, et nihilominus, omnibus aliis servituti subjectis, sacerdotes et possessiones eorum in pristina libertate dimisit, et eis alienoriam de publico administravit*, Genes. 47; et simile est factum Artaxerxis, qui sacerdotes, levitas, et alios ministros domus Dei a vesticibus, tributis et annouis liberis fecit, 1 Esdræ 7. Denique Anacletus Papa, epistola 2, ad hoc inducit illud Zachar. 3: *Qui tangit vos, tangit pupillam oculi mei*. Cui consonat illud Psalm. 104: *Nolite tangere christos mens*, id est sacerdotes. Nam in his verbis declaratur peculiaris reverentia, quæ sacerdotibus debetur ex dictamine juris naturalis, quia sunt peculiariter Deo dicati et conjuncti, juxta illud Numeror. 3: *Eruntque Levitæ mei*; et cap. 18 dicuntur traditi in donum Domino; et ideo, Josue 13, Dominus dicitur possessio Levitice tribus. Sicut ergo naturalis ratio dictat, sacerdotes esse peculiariter venerandos, ita etiam dictat non esse subjiciendos sacerdotibus judicii.

14. *Ratio pro hac parte*. — Hoc autem argumenti genus majorem profecto vim habet in statu clericorum legis gratiæ, quia excel-

lentiori modo sunt Deo consecrati. Unde in hunc modum argumentari possumus. Personæ ecclesiasticae sunt speciali consecratione Deo dicatae, et sacræ effectæ; ergo ex jure naturæ debetur illis peculiaris reverentia ad religionem pertinens; ergo etiam exemptio talium personarum a jugo sacerdotali est quasi connaturalis, seu jure naturæ debita statui talium personarum, præsertim quoad causas criminales et personales earum. Sicut vas aureum et argenteum, quod ex se posset licite communi usui deservire, eo ipso quod consecratum est in calicem, ex natura rei manet liberum, et immune a tali usu; nec potest sine sacrilegio ad illum transferri juxta regulam 51, de Regul. jur., in 6: *Semel Deo dicatum non est ad usus humanos transferendum*, cum similibus. Sic ergo videtur dicendum de persona, quæ Deo consecrata est, respectu subjectionis ad tribunal sacerdotali. Quia non posset usus talis subjectionis non cedere in magnam irreverentiam talium personarum, et totius ecclesiastici status.

15. *Prima confirmatio*. — Confirmant juris tæ rationem hanc, primo, quia sacerdos ex vi sui status est superior laico, distinct. 96, cap. *Duo sunt*; sed ex natura rei inferior debet honorem superiori; ergo et laicus clericus. Contra hunc autem honorem clericis debitum fit, si in judicium sacerdotali vocentur, et ex natura rei id redundat in vilipendium et ignominiam ecclesiasticae dignitatis, et præbet occasionem vulgari populo contempnendi clericorum; ergo ex talium personarum statu ex natura rei sequitur talis exemptio. Quam rationem optime declarant, et confirmant verba Concilii Matisconen., cap. 9, ubi improbans violentias sacerdotalium judicium contra clericos, rationem hanc subdit: *Nefas est enim, ut illius manus Episcopus aut jussione de Ecclesia trahatur, pro quo semper Deum exoriat, et cui, in nomine Domini, ad salvationem corporis, animaque Eucharistiam sepe porrexit*. Ponderandum est enim quod, ad probandum id esse nefas, non positivam legem, sed dignitatem sacerdotalem et rationem in illa fundatam adducit. Secundo confirmatur, quia contra rationem est ut inferior judicet superiorem, c. *Cum inferior*, et cap. *Solitæ*, de Majorit. et obed.; et ideo nulla consuetudine introduci potest, ut inferior acquirat jurisdictionem in superiorem, ut Doctores colligunt ex c. *Inferior*, dist. 21. Est ergo naturali rationi contrarium, ut laicus inferior sacerdotem se superiorem judicet. Quod recte

confirmant verba Gregorii VII, libro 8, epist. 21, quæ retulit Gratian., dist. 96, cap. 9 : *Quis dubitet, Sacerdotes Christi, regum et principum, omniumque fidelium patres, et magistros censeri. Nonne miserabilis insanie esse cognoscitur, si filius patrem, discipulus magistrum sibi conetur subjugare, et iniquis obligationibus illum sue potestati subjecere, a quo credit non solum in terra, sed etiam in celis se ligari posse et solvi?* Denique addunt Felinus et Rebuff., contra rationem esse, ut aliquis feratur ad tribunal suspectum odii et inimicitiarum ; sed laici ordinarie sunt infesti clericis, cap. *Laicos*, 2, q. 7, cap. *Clericos*, de Immunit. Ecclesiae, in 6; ergo.

16. *Fundamenta exemptionem juri divino positivo ascriventia.* — Ultimo loco adducuntur fundamenta, quæ suadeant exemptionem hanc esse de jure divino positivo, quæ tria potissima sunt. Prius sumitur ex verbis Christi jam tractatis, Matth. 17 : *Ergo liberi sunt filii*, ubi sub filiis comprehendi clericos tanquam familiares Christi, indicat Hieronymus ibi, dicens : *Ille pro nobis et crucem sustinuit, et tributa reddidit; nos pro illius amore tributa non reddimus, et quasi filii regis a rectigalibus immunes sumus;* sub illo enim pronomine Nos, se et alios presbyteros seu clericos solos comprehendere videtur, quia non est verisimile loqui de omnibus Christianis. Eademque expositio tribui solet Augustino, libro primo Quæstionum Evangel. , quæstion. 23, quatenus ex dictis verbis infert, *in quolibet regno terreno liberos esse filios summi regis, sub quo sunt omnia regna terra na;* nam per filios summi regis non potuit intelligere omnes justos, et ideo verisimile est intellexisse Episcopos, presbyteros et clericos, eo quod tales præsunt in regno Dei tanquam regis filii, ut exposuit Cajetanus, Matth. 17. Sed hæc re vera non fuit mens illorum Patrum, ut in superioribus dixi, neque habet fundamentum in verbis Christi, et ideo aliter verba illa inducuntur per quamdam extensionem. Nam filii regum ita sunt liberi, ut etiam familiae eorum cum eis eximantur ; clerici autem peculiari modo sunt familiares Dei et Salvatoris, ut dixit Thelesphorus Papa, in ep. ad omnes fideles ; ergo Christus in illis verbis secum illos comprehendit, et sub Petro, quando illi dixit : *Da eis pro me et pro te,* quia Petrus vicem totius ecclesiastici status tunc gerebat, ut indicavit Augustinus, ser. 6, de Verb. Apostoli.

17. *Objectio.—Responsio.*—Dices hanc ex-

tensionem non contineri in verbis Christi, neque præceptum aliquod vel institutionem, quæ juris divini esse possit, ibi traditam esse. Neque etiam exemptionem familie cum filio naturali esse fundatam in aliquo jure naturali, sed in quadam congruentia et usu humano, et ideo non posse inde satis inferri dictam divinam institutionem. Respondent verum esse, Christum non dixisse aperte, familiam esse liberam cum filiis, neque etiam sequi per necessarium et evidenter consecutionem ; propterea enim prædicta sententia quoad hanc partem nec de fide est, nec omnino certa. Nihilominus tamen verisimillimum est extensionem illam esse de mente Christi, tum quia argumentatur a fortiori a filiis naturalibus hominum ad se ipsum, et ideo si in aliis privilegii extenditur ad familiam, excellenter modo extendi debet ad familiam Christi, quia et ejus privilegium ratione tantæ dignitatis majus esse debet, et ejus familia nobilior et excellentior est; tum etiam quia, licet conjunctio familie in exemptione non videtur necessaria in rigore juris seu consecutionis naturalis, est tamen valde consentanea rationi; per se autem credibile est, Christum assumpsisse privilegium exemptionis optimo modo, magisque rationi consentaneo.

18. *Corroboratur hæc pars ex traditione Ecclesiae.* — Accedit altera probatio ex traditione Ecclesiae; quando enim traditio est constans ac perpetua, ostendere solet jus divinum, præsertim quando non appareat ratio illam tribuendi apostolicæ institutioni; talis autem esse videtur traditio hujus exemptionis; est enim adeo antiqua, ut nullum ejus agnoscatur initium; nam pro temporum opportunitate semper observata est, præcipue vero post tempora christianorum imperatorum, ut c. 12 latius videbimus. Sub imperatoribus autem ethnici non potuit quidem executioni mandari respectu magistratum infidelium, qui Ecclesiae non parebant, quod ad factum perlinet ; jus autem Ecclesiae non defuit; cuius signum est, quia semper Prałati ecclesiastici hoc jus immunitatis observari fecerunt, quantum inter ipsos fideles fieri poterat. Et hoc ostendunt antiqui canones, in fine cap. 3 allegati, qui nunquam referunt hanc consuetudinem in aliquam institutionem apostolicam, sed tanquam divinam illam venerantur, et observari student. His ergo modis utraque ex his opinionibus probabiliter fundata videtur.

CAPUT IX.

PRIVILEGIUM FORI CLERICORUM JURE DIVINO ET HUMANO ESSE FUNDATUM, ET QUOMODO ID INTELLEGENDUM SIT.

1. Conclusio. — *Jus humanum duplex.* — Resolutio certa et indubitata in hac materia est, clericos esse exemptos a potestate civili, *jure divino pariter et humano*: nam his fere verbis hoc docent jura canonica supra relata, et sacra Concilia, præsertim Lateranense sub Innocentio III, et aliud sub Leone X, Tridentinum et Coloniense, quæ supra citavi. Unde necesse est ut auctores omnes, pro utraque opinione allegati in capite præcedenti, in hac generali resolutione consentiant. Quam etiam probant utriusque sententiae fundamenta, nam revera probant hoc privilegium esse aliquo modo in utroque jure fundatum. Quomodo autem hoc intelligendum sit, id est, quid in hoc negotio sit singulis juribus tribendum, explicandum pro viribus est, et inde etiam constabit quæ sit diversitas inter prædictas sententias, vel an ad concordiam redigi possint. Quoniam vero jus humanum duplex est, scilicet, civile et canonicum, et de illis in capitibus 11 et 12 ex professo dicendum est, ideo nunc breviter suppono, hanc exemptionem non dependere per se ex jure civili, quia de se illud antecedit, esse tamen ab illo, vel tanquam a continente et approbante, vel tanquam a donante, quantum est ex parte sua, seu, si opus sit, vel tanquam a præcipiente judicibus laicis, ut immunitatem clericorum observent. De jure autem canonico, certum est et satis probatum, præcipere hujus immunitatis observantiam. An vero hoc præcipiat conferendo illam, vel solum declarando quam Deus contulit et observari voluit, pendet ex modo quo talis jurisdictio esse potest a jure divino, et ideo simul explicabitur. An vero solum jus canonicum per se sufficeret ad hoc privilegium conferendum, etiam si nec a Deo ipso datum esset, nec jus civile cooperaretur, sed potius resisteret, in capite undecimo videbimus.

2. Prima positæ assertionis explicatio. — Prima ergo explicatio resolutionis positæ esse potest, ut per jus humanum intelligatur jus civile, per divinum autem, jus canonicum, quod interdum divinum appellatur, quatenus et potestate divina et supernaturaliter collatum est, et quia de rebus divinis et ad bo-

num animæ pertinentibus potissime disponit, et in dictis vel exemplis Scripturæ frequenter fundatur. Et sic exposuit jus divinum in præsenti materia Hostiensis, in c. *Nimis*, de Jurejurand., ita interpretando caput illud, quem secutus est Salmeron, dieto tract. 37, ita exponendo c. *Quanquam*, de Censibus, in 6. Et juxta hanc expositionem omnino rejicitur secunda sententia præcedenti capite tractata; ideo enim per jus divinum allegati auctores in dictis juribus canonicum interpretantur, ut defendant hanc exemptionem nullo modo esse a jure divino proprio, id est, quod a Deo ipso immediate originem trahit.

3. Probatur prædicta expositio. — Ab hac vero sententia recedit Panormit., in d. c. *Nimis*, in fine. Et sane merito. Tum quia valde improprie jus mere canonicum divinum appellatur, raroque aut nunquam usus ille in ipsomet jure canonico invenitur. Tum quod licet in uno vel altero loco posset illa interpretatio permitti, præsertim si aliæ circumstantiæ juvarent, nihilominus quando tot jura et Concilia in jure divino asserendo conveniunt, valde violenta est incredibilis illa interpretatio. Accedit quod Concilium Tridentinum, fortasse ad excludendam illam verbi æquivocationem seu abusionem, expresse distinxit inter jus canonicum et divinum, dicens, personarum ecclesiasticarum immunitatem, *Dei ordinatione*, et *canonicis sanctonibus* esse constitutam. Quid enim sunt *canonicæ sanctiones*, nisi jus canonicum? Illae autem sancções etiam sunt ex ordinatione divina, mediis pastoribus Ecclesiæ; ergo distinguuntur ab illa ordinatione divina, quæ est immediate a Deo; hoc autem est jus divinum proprium; ergo de illo loquitur Concilium, et tacite cætera jura de eodem interpretatur. Concilium etiam Lateranense, sub Leone X, cum ait, nec divino nec humano jure potestatem aliquam esse datam laicos in clericos, necesse est ut de divino jure proprio loquatur, alias non satis probasset laicos non habere hujusmodi potestatem, quia posset quis dicere, habere illam proprio jure naturali et divino, ut hæretici contendunt. Sit ergo certum, assertionem seu resolutionem propositam, intelligendam esse de jure divino proprio seu immediato, et sub humano canonicum præsertim comprehendendi, licet non excludatur civile; quia Concilia hoc aperte asserunt, neque possunt aliter commode explicari, quod satis est ut simpliciter

sit confitendum ita esse, quamvis in declarando modo, quo jus divinum ad conferendum hoc privilegium concurrit, possit salva fide esse inter Catholicos controversia, et va-rietas.

4. Secunda ejusdem assertionis declaratio.

— Secunda ergo declaratio assertionis esse potest, privilegium exemptionis partim esse de jure divino proxime ac proprie, partim esse de jure canonico institutum. Nam jure divino duobus modis existit: primo, quia ab ipso Christo immediate datum est Pontifici; secundo, quia illi data est potestas et præceptum divinum communicandi privilegium illud toti clericali statui. Jure autem canonico quasi completum et executioni mandatum est hoc privilegium, in particulari ac definito modo illud conferendo singulis clericorum ordinibus sub Pontifice Summo contentis, et ita per hoc jus canonicum quasi determinatum et executioni mandatum est generale præceptum divinum eximendi clericos a jurisdictione sacerdotali, quod hæc opinio esse supponit, et per illud maxime a præcedenti differt. Potest autem intelligi tale præceptum esse vel positivi juris divini, vel naturalis. Priori modo, vel intelligitur esse contentum sub illo generali præcepto dato Petro: *Pascere oves meas*, utique singulas, juxta earum statum et conditionem; vel dicitur divinum, quia per imitationem et similitudinem ex testimoniis et exemplis veteris Testamenti sumptum est. Sicut præceptum decimarum dici solet ex jure divino manasse, ut in c. *Tua nobis*, 2, et c. *Decimas*, 1, de Decim.¹. Et ideo sicut decimarum præceptum quoad cottam jure canonico completum est, ita et hoc exemptionis privilegium. Maxime vero censi-seri potest illud præceptum juris divini naturalis, quia, supposita divina institutione clericalis ordinis, ex principiis naturalibus deducitur per illationem vel evidentem, vel ita necessariam moraliter, ut eam ob causam obligetur supremus Ecclesiae Praelatus privilegium illud inferioribus clericis communicare, et sub certa lege et modo illud consti-tuere.

5. Hæc declaratio amplius elucidatur. — Ut autem fundamentum hujus declarationis seu sententiae intelligatur, quatuor assertiones in ea distingui possunt. Prima est, jure canonico præceptum esse ut clerici sint exempti; et hæc pars verissima est, abstrahendo pro-

nunc a modo talis præcepti, et ita assertio in superioribus probata est, et in capite sequenti amplius confirmabitur. Secundo, supponit hæc opinio esse in Ecclesia potestatem ad dandam clericis hanc exemptionem, etiam data hypothesi quod jure divino id factum non esset. Et hoc etiam facile concedi potest, de quo in 11 cap. dicemus. Tertio, affirmat hæc sententia exemptionem hanc esse jure divino præceptam, quod omnino verum esse censemus, non solum de proprio præcepto divino per imitationem, nec per solam moralem deductionem ex principiis divini juris, quæ per humanam constitutionem compleatur, sed per proprium et rigorosum præceptum, vel immediate a Christo Domino latum, vel saltem media ratione naturali. Ratio est, quia sine hac exemptione non potest decentia et dignitas clericalis status cum debita reverentia et honestate conservari; ergo cui Christus illius status curam commisit, illi certe præcepit ut clerum a sacerdotali potestate exemptum haberet, vel conservaret, sive explicite hoc ei præcipiendo, sive implicite, et ex vi muneris, quod illi committebat, ex quo per illationem moraliter evidentem talis obligatio colligitur.

6. Jus divinum singulis clericis præbere immediate exemptionem negat hæc opinio. — *Primum fundamentum.* — Quarto, docet hæc sententia privilegium hoc non esse singulis clericis aut clericorum ordinibus immediate a Deo datum, sed soli Pontifici, ut per ipsum applicetur et distribuatur reliquis. Et in hoc convenit hæc sententia cum prima opinione capite præcedenti relata, et ita eisdem nittitur fundamentis. Præcipue, quia usus ipse videtur hoc declarare, quia hæc exemptione non omnibus personis, neque in omnibus temporibus, neque in omnibus casibus est æqualis, et variari amplius potest; ergo si-gnum est nou fuisse ita distributam immediate jure divino, sed fideli dispensationi Vicarii Christi commissam. Item, quia hoc susfücit ad ea quæ canones de hac exemptione docent, et in summa reducuntur ad verba Concilii Tridentini, dicentis exemptionem hanc *Dei ordinatione, et ecclesiasticis sancti- nibus esse constitutam*. Nam primum propriissime verificatur propter dictam obligationem et præceptum juris divini, secundum autem ratione executionis ecclesiasticae.

7. Secundum fundamentum. — Et declarari potest ex quæstione simili, quæ de jurisdictione Episcoporum tractari solet, an sit im-

¹ Bellar., lib. 2 de Cler., c. 28, 29 et 30.

mediate de jure divino, vel a Pontifice. Et in ea resolutio probabilior esse solet, jus quidem divinum immediate præcipere ut Ecclesia per Episcopos tanquam per ordinarios pastores et principes gubernetur, et quia hoc sine jurisdictione facere non possunt, ideo eodem jure divino præceptum esse, ut eis sufficiens jurisdictione communicetur, et nihilominus in re ipsa et in effectu immediate per Pontificem communicari. Ita ergo de privilegio exemptionis clericis tribuendo affirmat hæc opinio. Est enim similitudo et proportio non parva; nam, sicut exemptio clericorum in genere est de jure divino, ita Episcopale munus est de jure divino; et e converso, sicut jurisdictione Episcoporum non est certa, et determinata jure divino, sed per Pontificem ampliari et restringi potest, ita etiam exemptio non est determinata jure divino pro singulis clericis, causis, locis aut temporibus, sed per Pontifices variari, augeri et minui potest; ergo, sicut jurisdictione Episcoporum, licet ex præcepto divino sit, tamen immediate per Papam confertur, ut ab eodem certum modum et mensuram recipiat, ita privilegium hoc immediate concessioni Pontificum relictum est, ut per eum certum modum ac determinationem acciperet, sine qua non poterat convenienter actu conferri, sub obligatione tamen conferendi illud tanquam fidelis dispensator et prudens.

8. *Tertium fundamentum.* — Et hæc regula generalis est in aliis Ecclesiæ observantiis, quæ in particulari non habent certam determinationem ex divino jure, licet in generali habeant necessitatem ex jure divino positivo, vel naturali; talia enim licet possint dici ex divino jure quoad generalem obligationem, nihilominus quoad institutionem propriam et particularem solent esse immediate ex jure humano. Ita videre licet in censuris, quæ fundamentum habent in illo jure divino: *Si Ecclesiam non audierit, sit tibi tanquam ethnicus et publicanus;* et nihilominus censuræ, prout illis utitur Ecclesia, immediate sunt ab illius institutione. Idem conspici potest in multis ritibus et cæremoniis ecclesiasticis; nam jus divinum generatim præcipit sacramenta, verbi gratia, et sacrificium decenti modo et ornatu fieri; quia tamen ipsum divinum jus immediate hoc non determinat, in effectu talis institutio ecclesiastica est, originem ducens a divino jure, et similia multa exempla afferri possent. Generalis autem ratio est, quia jus divinum immediate non sta-

tuit ea quæ mutationi et variationi obnoxia sunt, et quia propria institutio non fit, nisi in particulari, et cum certo modo ac mensura.

9. *Tertia conclusionis expositio.* — Tertia declaratio propositæ assertionis est, privilegium exemptionis clericorum immediate et cum omni proprietate esse de jure divino, quia ab ipso Christo non solum promissum vel jussum, sed etiam datum, et actu concessum est, et nihilominus esse etiam de jure canonico declarante jus divinum, et privilegium hoc conservante, vel, prout expedit, moderante. Juxta quam declarationem refellitur omnino prior sententia superiori capite tractata, et posterior in sensu maxime proprio et rigoroso stabilitur; et licet pauci ex auctoribus pro illa relatis illam sic declararent, nihilominus multi profecto ita sensisse vindentur, præsertim Carlerius, quem refert et sequitur Almainus. Idemque sensit Rebuff, et alii, qui dicunt clericos jure nunquam fuisse subjectos imperatoribus, etiam ethnicis, a principio Ecclesiæ, quod etiam sentit Turrecrem., lib. 2 Summæ, de Ecclesia, cap. 96, ad 3. Estque hæc opinio et declaratio prædictæ assertionis valde pia, rationique maxime consentanea, ideoque a nobis defendenda et diligenter explicanda est.

10. *Exemptio clericorum Pontifici quoad modum subordinatur.* — Et imprimis licet admittamus hoc privilegium esse a Christo immediate datum clericis, nihilominus non negamus quin subordinatum fuerit Petro, et successoribus ejus quoad modum servandum in usu ejus, tam ex parte personarum quibus applicandum est privilegium, quam ex parte rerum, causarum, vel negotiorum in quibus talis exemptio servari debet. Hoc enim aliqua ex argumentis factis pro priori sententia, et alia, quæ ex usu Ecclesiæ sumi possunt, manifeste convincunt. Videmus enim clericum in causa civili, si actoris personam gerat contra reum laicum, non esse exceptum in tali actione a tribunalii laico, sed teneri ad sequendum forum rei. Cur autem hoc ita est, nisi quia Ecclesia determinavit ut exemptio clericorum intra hos limites contineretur, potuissetque aliter id disponere, si aliter expedire judicasset? Similiter omnes concedunt clericos obligari quoad vim directivam ad servandas quasdam leges, quæ ad communem et convenientem statum civium spectant; quod non aliunde provenit, nisi quia Ecclesia ita expedire judicavit, ut alibi os-

tendi. Igitur istud privilegium exemptionis, quod a jure divino indifferens et quasi generale est, subest quoad determinationem, limitationem, vel ampliationem ecclesiasticæ potestati. Neque vero dici potest hæc omnia solum fieri ab Ecclesia per modum declarationis juris divini vel naturalis, quia sine dubio multa fiunt ex prudenti arbitrio humano, et ideo diversis temporibus mutantur, ut quod clerici conjugati gaudeant hoc privilegio in his rebus, et non in illis, et clerici minores cum his circumstantiis, et non sine illis; et quod in tali crimine clericus tradatur brachio sacerdotali, et non in alio interdum graviori. Fiunt ergo hæc non tantum per potestatem interpretandi, sed etiam constitueri ius novum, et limitandi vel extendi antiquum.

11. Quomodo institutio dirina cum dependentia exemptionis a Pontifice subsistat. — Ut autem explicemus quomodo hæc cohærent, cum Ecclesia non habeat potestatem supra ius divinum, suppono, ex tractatu de Legibus, hoc nomen *ius* interdum significare propriam legem, seu præceptum; aliquando vero, et satis proprie, ac frequenter significare facultatem utendi, vel (ut ita dicam) quasi ius facti, sicut distinguuntur iura servitutis, vel ius in re, et ad rem, et similia. His ergo duobus modis potest etiam in præsenti ius divinum accipi. Nam privilegium ipsum exemptionis, quatenus est libertas quædam a subjectione alterius, est facultas quædam moralis ad non parendum tali potestati, vel libere operandi sine respectu vel impedimento illius; hæc ergo facultas a Deo ipso data dicitur ius divinum, non tanquam præceptum, sed tanquam Dei donum. Sicut libertas a servitute, quæ homini est naturalis, dicitur optime in hoc sensu esse de jure divino naturali. Posito autem tali privilegio, sequitur etiam lex divina, præcipiens ut habenti tale privilegium non fiat vis nec coactio, sed immunitas illi data servetur, et ita intervenit etiam in tali exemptione ius divinum præcipiens, contra quod fit exemptionem clericorum violando.

12. Ex hoc autem duplici jure, illud, quod in facultate generali consistit, et est veluti quoddam donum, quod proprie dicitur privilegium, hoc, inquam, licet divinum sit, id est, a Deo datum, amissibile seu mutabile esse potest ex justis causis; sicut vita ipsa, et corporis membra, et ius libertatis naturalis a Deo donata sunt, et de jure naturæ esse

dicuntur; et nihilominus ex justa causa auferri vel minui possunt per potestatem humanaam, quam intelligimus a Deo esse concessam, quia communi bono reipublicæ humanae ita expediebat. Sic ergo intelligi debet, quamvis privilegium exemptionis a Deo ipso fuerit clericis datum, nihilominus ex justa causa et per legitimam potestatem minui posse vel auferri, quia communi bono Ecclesiae ita erat necessarium. Unde consequenter fit, ut aliud ius divinum præcipiens observantiam talis privilegii, non contineat absolutam prohibitionem, ne tale privilegium minui vel auferri possit, sed ne id fiat sine legitima potestate et justa causa, sicut dicimus de libertate naturali.

13. Exemptio hæc duobus modis potuit a Christo concedi. — Est autem illa potestas solum in Pontifice, quia est potestas spirituialis et supernaturalis, et dispensativa mysteriorum Dei, et potestas ligandi et solvendi, et suprema in suo ordine. Legitima autem causa, generatim loquendo, erit, quoties limitatio aliqua vel privatio hujus exemptionis ad convenientem Ecclesiae ordinem et decentiam, aut bonos mores ecclesiastici status, necessaria vel conveniens judicabitur, quod judicium prudentiae illius, cui claves datae sunt, etiam est commissum. Sic ergo intelligitur facile, non obstante varietate quam in usu legitimo hujus exemptionis videmus, de jure divino esse potuisse, quia per illam varietatem non agitur contra aliquod præceptum divinum, neque in illo dispensatur, sed ipsummet præceptum includit talem limitationem, vel conditionem accommodatam tali privilegio et conditioni ejus, ut explicatum est. Atque hoc modo solvi facile possunt argumenta, quæ prima sententia contra hoc divinum ius directe et positive objiciebat.

14. Hoc autem privilegium sic declaratum duobus modis intelligi potest fuisse a Christo Domino datum statui clericali, scilicet, vel quia tali modo Ecclesiam suam diversosque ordines, et actus illius, et modum gubernationis ejus instituit, ut inde per naturalem ac necessariam consecutionem hoc privilegium sequatur; vel etiam quia peculiari et expressa voluntate hanc exemptionem clericis concesserit. Hic posterior modus satis fit verisimilis ex verbis Christi, Matth. 17, prout illa præcedenti capite pro secunda sententia expendimus, adjuncta etiam ecclesiastica traditione, quæ est optima verborum et legum Christi interpres. Atque hæc pars ex priori

magis confirmabitur : nam ratio , qua ex institutione ipsa Ecclesiæ et status clericalis privilegium hoc deducitur . etiam suadet , Christum , in verbis : *Ergo liberi sunt filii*, totum clericalem statum voluisse comprehendere. Quod ergo priori saltem modo sit hoc privilegium de jure divino naturali, supposita divina institutione ecclesiastici status et totius Ecclesiæ, probatur in hunc modum. Quia clerici, tam quoad corpus quam quoad animam sunt Petro specialiter subjecti jure divino evangelico ; ergo eodem jure sunt a jurisdictione principum sacerularium exempti.

15. *Confirmatur.* — Assumpta propositio declaratur ex doctrina D. Hieronymi, quæ refertur in cap. *Duo sunt*, 11, q. 1, ubi duo distinguit genera Christianorum, unum mancipatum divino officio , et deditum contemplationi et orationi, ut est status clericorum et religiosorum; aliud genus est Christianorum laicorum , qui licet generali ratione divino servilio destinati sint, secundum communem vivendi modum temporalibus rebus principaliter intendunt. Cum ergo Christiani omnes Petro in spiritualibus sint subjecti jure divino, ut libro 3 ostensum est, et illa subjectio dici possit quoad animam, quia tantum est in spiritualibus rebus et ad cultum Dei pertinentibus , de clericis dicimus, fuisse subjectos Petro eodem divino jure, non tantum quoad animam, sed etiam quoad corpora. Quod probatur ex dicta doctrina, quia specialiter sunt dicati et traditi Deo et cultui ejus, non solum quoad animam, sed etiam quoad corpora ; ergo consequenter quoad utrumque sunt etiam Petro subjecti. Probatur consequentia , quia , eo ipso quod clerici sunt dicati Deo secundum corpus et animum, pertinent utroque modo ad jus Dei peculiare; multo majori ratione dicendi sunt traditi in donum Domino, ac proinde majori titulo esse Dei, quam Levitæ, de quibus haec dicta sunt Numer. 3 et 18 ; ergo eo ipso constituti sunt clerici secundum utramque rationem sub propria jurisdictione, Petro, ut Christi Vicario, collata. Nam peculium Christi, et quidquid ad peculiare jus ejus pertinet, Vicario suo tanquam proprio œconomico et dispensatori commisit.

16. Et confirmatur, nam bona ecclesiarum et res sacrae jure divino sunt commissæ Prae-latis ecclesiasticis, et præsertim Petro, quoad curam et dispensationem earum, nimirum, quia pertinent peculiari modo ad dominium Dei et patrimonium Christi ; ergo eadem et

majori ratione tota gubernatio clericorum, tam in his quæ ad corpus et temporalem vitam, quam in his, quæ ad animam spectant, Petro est specialiter per Christum commissa. Antecedens expresse traditur in Synodo Romana IV, sub Symmacho. Dicitur enim non posse laicos, etiam religiosos et potentes, aliquid quomodolibet de ecclesiasticis facultatibus decernere, quarum suis sacerdotibus disponendi indiscesse a Deo cura commissa docetur. Consequentia vero non minus certa videtur, tum quia magis pertinent ad Christum, et res ecclesiasticas, personæ ipsæ , quam ecclesiasticae facultates ; tum etiam quia universa cura divini cultus est sub jurisdictione Petri ex divino jure, quia immediate ordinatur ad spiritualem finem , et hac ratione res omnes, quæ ad cultum Dei dicatae sunt, simpliciter et absolute sunt sub jurisdictione et administratione Ecclesiæ, inter quas res Deo dicatas primum locum tenent personæ clericorum ; ergo simpliciter et absolute, et secundum omnem rationem, jure divino commissæ sunt jurisdictioni et dispositioni Petri.

17. Hoc ergo posito, prima consequentia, nimirum, si commissi snat Petro, consequenter fuisse a jurisdictione principum temporalium exemptos, per sese videtur evidens ex illo evangelico dogmate : *Nemo potest duobus dominis servire; aut enim unum odio habebit, et alterum diliget; aut unum sustinebit, et alterum contemnet*¹. Similis enim impotentia et moralis repugnantia invenitur in hoc, quod clerici secundum idem, id est, secundum corpus, sint subjecti Pontifici et regi, quia possent interdum contraria præcipere, et necessarium esset uni obedire et alterum contemnere. Ut, verbi gratia , posset rex præcipere clericu ut militet, vel aliis actionibus temporalibus occupetur; Pontifex autem illa prohibere poterit, vel alia repugnantia præcipere. Item cum clerici quoad actiones corporis debeant esse divinis ministeriis addicti, et a sacerularibus negotiis abstracti, necesse est ut a Pontifice habeant regulam et modum vivendi et operandi, et utendi etiam temporalibus rebus vel officiis; ergo non possunt esse simul sub jurisdictione principum temporalium, etiam quoad ea quæ ad corpus pertinent. Sicut vasa, Deo sacrata, eo ipso et ex natura rei a profanis usibus exempta sunt ; et contractus matrimonii, in sacramentum

¹ Matth. 6.

consecratus , eo ipso in forum ecclesiasticum transit, et a sacerdotali exemptus est.

18. Clerici tam quoad vim directivam quam coactivam sunt exempti. — Hinc ergo optime infertur, clericos esse exemptos absolute a jurisdictione temporali principum, quia haec jurisdictione praeceps versatur circa subditos ratione corporum, et consequenter circa omnia illa, quae ad convenientem conservacionem vitae corporalis ordinantur, ut in tertio libro late ostensum est; ergo si clerici sunt exempti a jurisdictione principum, etiam secundum corpora, profecto ab eorum jurisdictione temporali exempti sunt. Unde etiam concluditur non solum esse exemptos clericos a potestate principum quicad vim directivam, utique disponendo vel gubernando illos in his, quae ad actiones praesentis vitae spectant, sed etiam quoad vim coactivam; tum quia una subjectio non separatur ab alia, nec potest recte consistere sine alia, et ideo quo ad utramque sunt Pontifici subjecti ex divino jure, et consequenter ab aliis exempti; tum etiam quia non minus necessaria est haec exemptione ad cultum Dei, et convenientem usum rerum cultui divino dicatarum, quam alia. Ideoquo merito dixit Nicolaus Papa, in epist. ad Michaelem imperatorem : *Hi, quibus tantum humanis rebus, et non divinis praeesse permisum est, quomodo de his per quos divina ministrantur, judicare presumant, penitus ignoramus.* Et hoc etiam multum confirmant verba illa Concilii Lateranensis, sub Leone X : *A jure tam divino quam humano, laicis potestas nulla in ecclesiasticas personas attribuita est.* In quibus imprimis adverto de omni potestate esse sermonem, ac proinde non spiritualem tantum, sed temporalem comprehendere; imo hanc posteriorem praeceps, quia de altera nulla erat controversia. Deinde supponit Concilium laicos non posse habere ullam jurisdictionem in ecclesiasticas personas, nisi aliquo jure divino vel humano sit illis concessum. Unde necesse est ut vel supponat jure naturali laicos illam non habere, vel certe ut sub jure divino tam positivum quam naturale includat, alias diminute procederet, et nihil concluderet. Ergo intentio Concilii est, laicos ex vi juris divini non habere talet jurisdictionem in clericos, quia neque jus divinum positivum illam tribuit, ut est per se notum, nec naturale illam permittit, sed clericos eximit a jurisdictione laicorum, eo ipso quod speciali titulo eos Pontifici subjecit. Denique adverto, etiam aliam

partem de jure humano, de canonico maxime intelligi, de quo est illa sententia manifesta. De civili autem nullam rationem videtur Concilium habuisse, quia supponit non esse potestatem in principibus temporalibus ad tale jas validum constituendum, cum ad hoc ipsum jure divino potestatem non habeant.

19. Exemptionem hanc in omni rigore esse de jure divino. — His praeterea addi possunt alia Concilia generalia, et provincialia supra adducta, quae constanter docent esse hanc exemptionem de jure divino; quod potest et debet cum proprietate intelligi juxta materiæ capacitatem. Non dicitur autem proprie de jure divino, quod immediate ab Ecclesia statuitur, etiam si ex pracepto vel potestate jure divino datis originem ducat. Sicut potestas regia non est, nec proprie dici potest esse de jure divino, etiamsi a naturali lege et potestate ducat originem. Et ob eamdem rationem nec cæremoniae ecclesiasticae extra sacramenta dicuntur esse de jure divino, neque etiam jurisdictione Episcoporum, juxta opinionem eorum, qui a Pontifice immediate conferri censem. Cum ergo Concilia de hac exemptione tam constanter et absolute dicant esse de jure divino, profecto cum majori proprietate intelligenda sunt. Et similiter Concilium Tridentinum ait hanc exemptionem esse ex ordinatione divina, rectissime intelligitur juxta communem modum jurium, quod sit ordinata et constituta ab ipso Deo, et declarata ac stabilita per canonicas sanctiones. Accedit quod ipsimet imperatores, non lege quidem humana seu ecclesiastica, sed ratione fide illustrata ducti, exemptionem hanc recognoscere potius quam concedere visi sunt.

20. Sic Carolus Magnus, in suo Capitulari, lib. 6, c. 109, cum ita sanxisset : Clerici non sacerdaribus judicibus, sed Episcopali audiencie reserrentur, rationem declarat dicens : Fas enim non est ut divini munieris ministri temporalium potestatum subdantur arbitrio. Est autem *fas*, teste Isidoro¹, lex divina, quae et ad Deum pertinet, et ex quadam naturali æquitate descendit; tale igitur sensit Carolus esse jus exemptionis clericorum, cui consonat, quod in Concilio Matiscon. 2, c. 9, *ne fas esse* dicitur Episcoporum immunitatem violare, quod in can. 10 ad alios clericos extenditur. Estque attente ponderandum quod in initio illius c. 9 dicitur, *reverendissimos ca-*

¹ Isidor., 5 Etym., c. 2, et c. 4, d. 4.

nones atque sacratissimas leges de *Episcopali* audientia in ipso pene christianitatis principio sententiam protulisse. Loquitur enim Concilium apertissime de audientia quoad temporales et personales causas, ut statim explicat, et non dicit leges humanas illam introduxisse, sed pro illa sententiam dedisse, utique declaratoriam juris quasi connaturalis jurisdictionis Episcopalis et ecclesiasticae exemptionis. Theodosius etiam imperator, ut Ambrosius, epist. 32, alias lib. 2, epist. 13, ad Valentianum, refert, aequo sancivit *in causa fidei*, vel *ecclesiastici* alicujus ordinis eum *judicem esse debere*, qui nec munere *impar sit*, nec *jure dissimilis*: *Hoc est* (ait Ambrosius) *sacerdotes de sacerdotibus*, quasi utrumque ejusdem juris divini sit. Quod etiam sensit Constantinus in facto et verbis saepe repetitis ex Gregorio, lib. 4, epist. 13, ind. 13, alias c. 75; Ruffin., et aliis ecclesiasticis historiis.

21. *Ex sacerdotio legis veteris idem ulterius confirmatur.* — His addi possunt conjecturæ ex jure legis veteris sumptæ. Nam si sacerdotes et Levitæ in illa lege erant a temporali potestate exempti, nemo negabit idem dicendum esse in lege nova ex vi divini juris, saltem naturalis. Tum quia hoc pertinet ad majorem perfectionem sacerdotii legis novæ. Tum etiam quia si talis exemptio in populo Israelitico inventa est, non fuit certe ex lege aliqua humana; nulla enim talis lex vel in Scriptura legitur, vel cum fundamento cogitari potest, præsertim cum hujusmodi leges eo tempore fuerint rarissimæ, quia omnia erant in ipsa Dei lege minutatim præcepta. Colligebatur ergo ex ipso statu sacerdotali, et ex generalibus verbis, quibus Levitica tribus ad illum assumpta est, et donata Deo, et potestati Pontificis omnino subjecta et subordinata; ergo eodem modo colligendum est simile jus divinum in lege nova. Non quia antiquum, prout cærimoniale erat, in lege nova obliget, sed quia illud antiquum jus non in vi cærimonialis, sed in vi moralis ad tale sacerdotium consecutum fuit. Ergo simili modo ex suppositione melioris sacerdotii idem morale jus divinum in lege nova consecutum est. Quod autem illud jus exemptionis fuerit in lege veteri, fit valde verisimile ex modo loquendi Scripturæ, Numer. 3: *Eruntque Levitæ mei*, utique peculiari titulo et donatione. De qua c. 8 dicitur: *Cum Levitæ fuerint coram Domino, ponent filii Israel manus suas super eos; et offeret Aaron debitum munus in conspectu Domini a filiis Israel,*

ut serriant in ministerio ejus. Et infra: *Consecrabis Levitas oblatos Domino, et separabis de medio filiorum Israel, ut sint mei.* Et infra: *Quoniam dono donati sunt mihi a filiis Israel.* Et infra: *Sanctificari eos mihi, tradidique eos dono Aaron, et filiis ejus de medio populi, ut serviant mihi*, etc. Et similia repetuntur cap. 18, et ad Aaron dicitur: *Excubabunt Levitæ ad præcepta tua.*

22. Ex his ergo et similibus modis loquendi satis probabiliter colligitur, ex vi illius separationis ac deputationis Leviticæ tribus ad ministerium templi, fuisse exemptam a jurisdictione civili, quæ ex natura rei erat in communitate illius populi. Primo, quia populus abdicando a se partem illam, et donando illam Deo, aliqua potestate et quasi dominio se privavit, et illam in Deum transstulit; hæc autem esse non poterat, nisi potestas jurisdictionis, quia non erat alia potestas dominativa in communitate illa respectu illius partis, et consequenter Deus acceptando donationem, speciali titulo illud jus sibi reservavit, et Pontifici illius populi commisit. Secundo, quia ex vi illius separationis immunes facti sunt sacerdotes et Levitæ ab oneribus et muneribus mere sacerdotalibus et temporalibus, que vel possent Levitas a ministerio templi distrahere, vel essent incongrua, et indecentia illi statui. Cujus signum est, quod Numer. 1, quando Deus jussit populum numerari, *Levitæ non sunt numerati cum eis*, quia dixit Deus Moysi: *Tribum Levi noli numerare. Quia Levitæ sacri erant* (ait Joseph., lib. 3 Antiq., c. 11), *et immunes a militia.* Et eadem ratione ab aliis sacerdotalibus muneribus et tributis, ut sensit etiam Abulens., q. 25, in c. 1 Numer., dicens tribum Levi, cum esset destinata ad ministerium tabernaculi, non potuisse vacare aliis oneribus et necessitatibus populi. Et propterea Levitæ non acceperunt partem in terra promissa, sed loco illius acceperunt jura Sanctuarii, Numer. 18, Deuter. 18, Josue 13. Hinc adit etiam ibidem Abulens. non fuisse numeratos Levitas cum reliqua multitudine, quia non faciebant cum illis unum populum: *Omnis enim*, ait, *decem tribus erant unus populus; et communicabant cum omnibus, et divisabant sibi totam terram, et vacabant rebus pure sacerdotalibus; Levitæ autem in nullo conveniebant cum populo.* Et hinc etiam tribus Levi quasi separata est ab aliis, et præter illam solent duodecim tribus populi numerari. Sic enim in dict. c. 1 Numer., censentur duodecim tri-

bus, excepta Levi, quia, ut notat Josephus supra, pro Levi inter capita tribuum ponitur Manasses, et pro Joseph ponitur Ephraim, quos Jacob in adoptionem a Josepho imperaverat, Genes. 48.

23. *Cur Scriptura duodecim tantum tribus numeret.* — Estque considerandum, quod licet juxta dictam computationem et adoptionem fuerint tredecim tribus, nunquam in Scriptura nisi duodecim numerantur propter numeri perfectionem Observatum autem est, quoties tribus numerantur in ordine ad spiritualia, numerari Levi, et aut tribus Ephraim et Manasse reduci ad unam Joseph, ut Genes. 46, et Exod. 28, Deuteron. 27; vel excludi aliquam, ut Apoc. 7 omittitur tribus Dan, propter Antichristum. Cum vero recensentur tribus in ordine ad sæcularia vel temporalia excludi Leviticam, et Manasse ac Ephraim in duas distingui, ut Numer. 1, Deuter. 18, etc., quia in ordine ad temporalia erat tribus Levi quasi separata ab aliis. Atque eodem modo quando sub Jeroboam divisæ sunt duodecim tribus, et duæ, scilicet, Juda et Benjamin manserunt sub Roboam, et reliquæ decem ad Jeroboam transierunt, in illis non numeratur Levi, ut ex 2 Reg. 11, et 2 Paral. 11, aperte sumitur, quia nimirum (ut conjectare licet) illa ad temporale regnum non pertinebat. Ex his ergo probabiliter colligitur exemptio sacerdotalis tribus a jurisdictione regum in lege veteri. Et non parum confirmatur ex auctoritate et potestate præcipiendi data Pontifici illius legis, Deuter. 17, de qua in superiori libro dictum est. Multo ergo majori ratione credi debet talis exemptio in lege nova divino jure clericali statui concessa.

24. *Ultima assertionis declaratio secundæ præfertur.* — Tandem, rejectis prima sententia capite præcedenti relata, et prima declaratione assertionis catholicae in hoc capite posita, quæ cum dicta prima opinione coincidit, et conferendo hanc postremam declarationem cum secunda, quod hæc postrema præferenda sit, in hunc modum potest morali ratione declarari. Conveniunt enim duas illæ declarationes seu sententiae, privilegium ecclesiasticae immunitatis esse ex jure divino et humano, cuius ratio reddi potest, quia oportuit tale privilegium esse perpetuum, fixum et immobile, et ideo debuit esse de jure divino, simulque necessarium fuit esse aliqua ex parte mutabile vel variabile, et ideo juri etiam humano aliquo modo subster-

ni debuit. Conjunctio autem utriusque juris circa tale privilegium duplici modo cogitari vel fieri potuit: primo, ut jus divinum tantum remote tale privilegium concedi præcipere, jūs vero humanum illud constitueret hominum arbitrio. Secundo e converso, ut jus divinum illud proxime contulerit, commiserit tamen homini ut illud in particulari moderari et accommodare posset. At vero ex his duobus modis hic posterior convenientior est; ergo credendum est isto modo fuisse a Christo datum Ecclesiæ suæ hoc privilegium.

25. Declaratur minor ex illis duabus proprietatibus, quæ in hoc privilegio considerari possunt, scilicet stabilitas et aliqua varietas; nam prior multo major erit et securior, si hoc privilegium immediate per ipsum jus divinum constitutum sit et concessum. Sic enim per nullam humanam potestate, sive temporalem, sive ecclesiasticam, poterit omnino auferri, quod ad conservationem ecclesiastici status et reverentiam divino cultui debitam necessarium fuit. Item hoc modo nulla usurpatio vel præsumpta humana præscriptio poterit contra hanc immunitatem prævalere, quod ad cohibendam temporalium regum vim et ambitionem etiam convenientissimum ac pene necessarium fuit. Denique hoc modo etiam ipsi Pastores Ecclesiæ cautores erunt in mutationibus faciendis in his privilegiis, majorique titulo poterunt importunis precibus principum sæcularium resistere, ne facultates vel licentias huic privilegio aliquo modo derogantes, absque gravissimis et urgentibus causis illis concedant. Posteriori autem parti in usu hujus privilegii necessariae, nimirum, ut in particularibus casibus, vel personis interdum variari vel mutari possit, sufficientissime provisum fuit, subordinando privilegium potestati Pontificis quoad hanc mutationem ex causa faciendam; ergo hæc fuit convenientissima institutio. Tertia ergo sententia, quæ in hunc modum privilegium hoc declarat, alteri præferenda est.

26. *Diluuntur secundæ declarationis fundamenta.* — Ac propterea non recte æquiparatur hoc privilegium cum aliis observantiis vel cæremoniis ecclesiasticis, quarum institutio in particulari est de jure humano, licet generale præceptum illarum sit de jure divino; est enim in multis dissimilis ratio. Primo, quia illarum institutio per divinum jus fieri non poterat in genere, abstrahendo nimirum a particularibus cæremoniis, quia im-

stitutio est actio seu effectio quædam, quæ non potest circa genus, sed circa particula-
ria versari; præceptum autem optime potuit in generali ferri, committendo arbitrio alterius particularem institutionem seu determina-
tionem. Hanc enim immediate per divinum
jus fieri non expediebat nec oportebat, nisi
quoad ritus substantiales sacramentorum et
divini sacrificii. Exemptio autem optime potuit absolute concedi per jus divinum in generali, seu in universalis, ut ita dicam, quia ibi generalitas non consistit in abstractione a particularibus, sed in comprehensione omniū personarum ecclesiasticarum, et omniū effectuum immunitatis, seu totalis li-
bertatis a temporali jurisdictione, et ita dici-
mus de facto esse institutam jure divino,
dando clericis absolutam exemptionem ab
omni jurisdictione laicorum, quam clerici
haberent, etiamsi Ecclesia nihil in hoc dispo-
suisset. Secundo, quia aliae cæremoniæ vel
ritus Ecclesiæ non sunt tam proxime de dicta-
mine juris naturalis, neque ita immediate
consequuntur ex aliqua priori institutione
divina, sicut hæc exemptio, ut satis declara-
tum est. Tertio, quia alii ritus particulares
non erant ita necessarii ad bonum regimen
Ecclesiæ, et ad splendorem et decentiam re-
ligionis, sicut hoc privilegium. Et eadem ra-
tione non est simile exemplum de jurisdictione
Episcoporum. Quia, quod Episcopi recipi-
ant a Christo immediate jurisdictionem,
nec invenitur scriptum aut satis insinuatum
in Scriptura, nec habet necessariam connec-
tionem cum alia priori Christi institutione,
neque ita necessarium ad bonum Ecclesiæ
regimen, nec conveniens erat, ut omnibus et
singulis tota spiritualis jurisdictione sine ulla
limitatione daretur, et cum varietate et limi-
tatione non poterat immediate a Christo ipso
concedi, et idcirco convenientius fuit ut Vi-
cario suo illam distributionem committeret.
Præterquam quod ad majorem unionem et
subordinationem membrorum cum capite, multo
convenientius erat ut in hoc omnes infe-
riores Episcopi a Vicario Christi penderent.
In exemptione autem longe diversa ratio in
his omnibus invenitur, ut declaratum est.

CAPUT X.

QUOMODO SINGULIS CLERICORUM VEL PERSONARUM
ECCLESIASTICARUM ORDINIBUS EXEMPTIO ECCL-
ESIASTICA JURE DIVINO CONVENIAT.

1. *Varii gradus personarum exemptionem gaudentium.* — Ut veritas in superiori capite confirmata magis elucescat, operæ pretium visum est, in singulis statibus seu ordinibus personarum ecclesiasticarum illam explicare, et in singulis proprias rationes hujus privile-
gii expendere; nam in quibusdam inveniri poterunt majores vel urgentiores quam in aliis, licet in omnibus sufficientes sint. Varii ergo distingui possunt gradus ecclesiastica-
rum personarum sub Petro; nam de Petro et ejus successoribus jam diximus. In primo ac præcipuo gradu fuerunt alii Apostoli a Pe-
tro; in secundo sunt Episcopi, qui Apostolis non ut Apostolis, sed ut Episcopis successerunt. Sub his sunt sacerdotes, ex quibus quidam sunt parochi, et pastores animarum, alii sunt simplices sacerdotes, vel omnino, vel in aliqua dignitate constituti. Sub sacerdotibus sunt inferiores clerici in sacris, et sub his alii in minoribus ordinibus constituti, conjugati vel non conjugati. Ac denique sunt aliae per-
sonæ, quæ, licet ordinem aut tonsuram non habeant, ratione status ecclesiasticæ censem-
tur, et privilegio canonis gaudent. De his igitur omnibus sigillatim dicendum est.

2. *Prima opinio negans.* — *Primum fundamen-
tum.* — Primum dubium est, an Apostoli extra Petrum habuerint hoc privilegium, ita ut jure lieuisset non parere imperatoribus, si facto possent; et e converso magistratus sæculares injuste eos judicarent propter usur-
patam jurisdictionem, nisi forte ignorantia privilegii eos excusaverit. Rex enim Angliæ, in Præfatione, pag. 139, constanter negat hanc Apostolorum exemptionem dicens, *primitivæ Ecclesiæ temporibus nunquam id fuisse in dubium revocatum.* Quam sententiam aliqui etiam Catholici, saniore quidem mente, et non cum tanta exaggeratione defendunt. Quibus favere videntur Chrysostomus, et Theophylact., ad Rom. 13, dicentes etiam Apostolos non eximi ab obedientia et subjec-
tione magistratuum temporalium; et loquun-
tur non solum quoad vim directivam, sed etiam quoad coactivam, prout Apostolus etiam loquebatur. Et inter alics auctores mo-
dernos hoc expressius docuerunt Albertus

Pighi. et Jansenius, in locis jam eitatis. Qui generaliter in hoc fundantur, quod clerici non erant exempti a potestate principum ethnicorum, quando in eorum regnis degabant, quia illi principes non erant sub jurisdictione Ecclesiæ, quæ ratio etiam in Apostolis locum habuit. Verumtamen illa ratio non probat, sed supponit hoc privilegium non fuisse Apostolis a Christo concessum; nam si Christus illud concedere voluit, nihil obstat posset quod infideles principes non essent Petro aut Ecclesiæ directe subjecti, quia ipsi Christo subjecti erant, ideoque potuit ab eorum jurisdictione eximere quos vellet, sicut exemit Petrum.

3. *Secundum fundamentum. — Tertium.* — Si ergo Apostoli hoc privilegium non habuerunt, non est quia principes infideles erant extra jurisdictionem Ecclesiæ, sed quia hoc peudet ex voluntate Christi, et de hac non constat per aliquam revelationem scriptam aut non scriptam; privilegium autem extraordinarium et supernaturale asserendum non est nec credendum sine testimonio voluntatis principis. Secundo, quia tale privilegium fuisse Apostolis inutile, quia nunquam illo erant usuri, neque in effectu habituri erant talem facultatem. Tertio addi solet, quod Paulus, Act. 25, Cæsarem appellavit, tanquam judicem et legitimum superiorem suum in causa criminali de qua tractabatur. Quem locum vehementer urget rex Angliæ, eumque ita intellexit Albertus Pighius, et approbavit aliquando Bellarminus, quos Lorinus secutus est. Et suaderi hoc potest, quia alias non bene fecisset Paulus appellando ad judicem non suum, et tacite renunciando privilegio, cui nullus Praelatus renunciare potest. Denique sumi potest argumentum ex Matth. 17, ubi Christus pro se tantum et Petro tributum solvi jussit, et per hoc alii Apostoli intellexerunt (ut supra ex Patribus retuli) aliquod speciale privilegium Petro fuisse collatum; non est ergo cur dicamus fuisse commune cæteris Apostolis.

4. *Secunda sententia affirmans.* — Contrariam sententiam supponit Turrecremata, loco citato, eamque tandem prætulit Bellarminus, qui hac ratione dicunt, Paulum non jure, sed facto, Cæsarem appellasse, non tanquam ad superiorem suum, nam ab illius jurisdictione exceptus erat, utique jure divino, sed quia alia ratione non poterat inimicorum insidias evitare, neque locus ille in rigore amplius cogit, ut statim dicam. Unde sententia

hæc omnino præferenda est, et præter generalia fundamenta de toto statu clericali, confirmari potest, primo, ex his quæ de Petro diximus; nam, licet Petrus respectu Apostolorum esset illis superior, nihilominus respectu Ecclesiæ, et omnium temporalium, et totius orbis, habebant quamdam cum Petro æqualitatem, nam fuerunt principes constituti super omnem terram, et ab ipso Christo immediate habuerunt jurisdictionem directam vel indirectam super omnes principes terræ; ergo ex vi illius excellentiæ fuerunt exempti a jurisdictione principum sæcularium. Est enim præpostorum et indecorum, superiores principes ab inferioribus judicari, et pastores ovibus subdi. Hinc etiam verba Christi: *Ergo liberi sunt filii*, ad Apostolos extendi possunt majori certe ratione, quam ad quoslibet alios clericos. Tum quia illi magis proprie et stricte fuerunt de familia Christi filii Dei; fuerunt enim magis illi conjuncti, et unum collegium cum illo componebant; et mensa, et si qua habebant temporalia bona, omnibus erant communia. Tum etiam quia singulare modo participarunt excellentiam et potestatem, quam Christus in homines habuit, et ideo etiam in exemptione ab humanis potestatibus illum imitari debuerunt, atque ita sub nomine filiorum veniunt tanquam accessorium sub principale. His ergo modis sat videtur constare de Christi voluntate.

5. *Solvuntur fundamenta contrarie opinionis.* — Neque refert quod Apostoli nunquam erant illa libertate usuri, nam erat quasi connaturalis eorum dignitati, vel certe maxime decens, et ideo non debuerunt illa nobilitate (ut sic dicam) vel ingenuitate privari, etiam si propter hominum ignoracionem vel malitiam permittendi non essent illa gaudere, sicut etiam de ipso Petro dicendum est. Et ita etiam contingere potuit in facto Pauli, in quo non fuisse præsidem legitimum judicem probat novissime et optime Cardinalis Bellarm., in cap. 13 sue Apolog., quia causa Pauli, quæ tunc agebatur, non erat civilis, sed religionis, utique de prædicatione Pauli ad gentes, Act. 22, de Resurrectione mortuorum, cap. 23, et quod esset sectæ Nazaraeorum defensor, cap. 24, ac denique de questionibus sue superstitionis, et de quodam Jesu, ut ipse præses dixit, c. 25. In causa autem religionis non poterat laicus et ethnicus homo esse legitimus judex. Neque propterea male fecit appellando ad judicem laicum et infidelem, quia vitari non poterat si-

mile judicium, in quo jam sub inferiori judece laico etiam, et infideli erat constitutus, et ideo prudenter fecit appellando ad legitimum superiorem ejusdem inferioris judicis et suorum accusatorum, quorum injustam vexationem hoc modo redimebat. Præsertim quia etiam potuit Paulus Cæsarem appellare intentione implorandi ejus auxilium, eo meliori modo quo posset. Sic enim factum illud interpretari videtur Athanasius, Apol. ad Constantium; implorare autem auxilium principis sacerularis contra vim et injuriam illatam ab inferiori judece laico, non est illicitum, neque libertati ecclesiasticae repugnans, imo illi maxime consentaneum, ut ibidem significare voluit Athanasius, et Augustinus, epist. 48, 50 et 204, contra Donatistas docuit. Et hoc significant verba Pauli, Act. 28: *Conctus sum appellare Cæsarem, vi- delicet, ut eum eriperet e manibus Judæorum, a quibus per solum præsidem liberari non posse timebat.*

6. *An Episcopi sint exempti.* — Secundo loco dicendum est de Episcopis, in quibus considerari potest potestas ordinis, in qua Apostolis aequales sunt, et superiores sacerdotibus, unde hoc titulo potest aliqua major ratio hujus privilegii in eis considerari quam in sacerdotibus, major vero sumitur ex in numero pastorali. Nam præter potestatem ordinis considerari potest et debet in Episcopis pastoralis dignitas, et potestas jurisdictionis Episcopalis, ratione cuius sunt spirituales principes Ecclesiae, non quidem universales, sicut Apostoli, sed in suis diœcesibus, propter quod dicuntur esse successores Apostolorum. Hac ergo ratione post Apostolos videtur efficacius probari, habere Episcopos a Christo Domino hoc privilegium fori sacerularis. Nam ad illos possunt cura proportione applicari rationes de Apostolis factæ. Quia illi sunt altiori modo quam cæteri de familia Christi, et cum Pontifice specialiter vocali in partem sollicitudinis, et ideo ab eo fratres vocantur; merito ergo censeri possunt inter filios a Christo comprehensi, cum dixit: *Ergo liberi sunt filii.* Tum etiam quia Episcopi sunt Patres principum sacerularium, et simpli- citer illis superiores, et ideo indignum est, et indecens, ut ab eis judicentur.

7. Unde Anacletus Papa, de Episcopis loquens, in Epist. 2, c. 2, sic ait: *Unde liquet, quod summi sacerdotes, id est, Episcopi a Deo sunt judicandi, non ab humanis, aut præ- vita hominibus lacerandi, sed potius ab omni-*

*bus fidelibus portandi, ipso Domino exemplum dante, quando per se ipsum, et non per alium, vendentes et ementes ejicit de templo*¹, et cætera quæ prosequitur. Et idem optime confirmant verba Gregorii VII, lib. 8, in ep. 21, quæ supra jam retuli: *Quis dubitet sacerdotes Christi, regum, et principum, omniumque fidelium patres et magistros censer? nonne miserabilis insania esse cognoscitur, si filius patrem, discipulus magistrum sibi conetur subjungare, et iniquis obligationibus illum potestati sue subjecere, a quo credit, non solum in terra, sed etiam in celis se posse ligari ac solvi;* ubi constat præcipue de Episcopis loqui, quibus convenient ligandi et solvendi potestas in exteriori foro, seu judicio ecclesiastico.

8. Unde statim idem Pontifex, ex altero Gregorio, lib. 4, epist. 32, c. 75, refert historiam supra tactam de Constantino, qui in Concilio Nicæno, *nullam judicis sententiam super Episcopos dare præsumpsit, sed illos etiam deos vocauit, non suo debere subesse judicio, verum se ab illorum pendere arbitrio judicarit.* Imo addit Melchiades Papa, in cap. *Futuram*, 2, q. 1, dixisse Constantimum, *Episcopos solius Dei judicio reservari.* Unde colligunt adversarii, verba illa Constantini urbanitatis tantum fuisse, quoniam alias Episcopi neque a Papa possent judicari. Sed longe aliter hoc declarat et confirmat Melchiades Papa, in epist. ad Episcopos Hispaniæ, dicens, *episcopos, quos sibi Dominus tanquam oculos elegit, et columnas Ecclesiæ esse voluit, quibus etiam ligandi, et solcendi dedit potestatem, suo judicio servavit, hocque privilegio B. clarigero Petro sui vice solummodo commisit.* In quibus verbis omnes Episcopos in hoc videtur Papæ similes efficere, quod illos Deus judicio suo reservavit. Unde ex hac parte divina ordinatione erunt exempti a judicio mere humano, seu sacerulari. Differunt tamen a Pontifice, quia in terris habent judicem, cui Deus suas vices commisit. Pontifex autem superiorem hominem non habet, a quo judicetur. Quæ omnia etiam de Apostolis a fortiori procedunt, et videntur hanc partem multum persuadere.

9. *De exemptione sacerdotum.* — Tertio dicendum est de sacerdotibus, in quibus non invenitur ratio illa specialis quam in Episcopis consideravimus, quia non habent propriam jurisdictionem ecclesiasticam in foro

¹ Cap. Accusatio, l. c. 2, q. 7.

externo, et ideo non sunt Ecclesiæ principes, nec superiores principibus laicis quoad potestatem imperandi, et judicandi illos in exteriori foro. Sunt tamen illis statu et gradu digniores, et Christi personam in suis ministeriis excellentiori modo repræsentant. Præser-tim in tremendi sacrificii oblatione, et in peccatorum absolutione, ubi Christi personam gerunt. Et ad illa munera ex vi sui ordinis et status deputati sunt, ideoque in verbis : *Ergo liberi sunt filii*, merito censendi sunt sacerdotes comprehensi, quia peculiari titulo et modo sunt de familia Christi, licet non in tam excellenti gradu, sicut Episcopi. Quod vero pertinet ad jus naturale, videtur etiam habere majorem congruentiam in sacerdotibus, quam in inferioribus, ratione characteris sacerdotalis. Primo quidem quatenus dat potestatem in corpus Christi verum, nam per illam maxime participant sacerdotium Christi, et efficiuntur res maxime sacrae, ideoque sunt eo ipso abstractæ a jurisdictione sacerdotali, et spirituali potestati subjectæ. Deinde accedit potestas in corpus Christi mysticum, ratione cuius fiunt spirituales patres laicorum et judices loco Dei in spiritualibus causis, quæ ad Deum maxime spectant, et in foro maxime sacro. Ratione quarum potestatum maxime in sacerdotes legis gratiæ conveniunt tituli regum et deorum, quibus Scriptura solet ornare sacerdotes, ut jura etiam canonica supra citata expendunt, ad considerandum quam sit indecens sacerdotes a laicis judicari. Quæ indecentia ex natura rei inest, et fundatur in excellentia sacerdotalis characteris; ergo valde credibile est ex vi illius esse exemptos.

10. An inferiores clerici jure divino eximantur. — Prima opinio negans. — Atque hinc tandem constat quid dicendum sit de inferioribus clericis. Aliqui enim dixerunt illos non esse exemptos jure divino, etiam si majoribus ordinibus consecrati exemptionem a jure divino habeant, quod sensit Bernard. Diaz de Lugo, in Pract., cap. 65; et Joan. Lupus, tract. de Libert. Christ., p. 2, q. 5. Quod omnino non placet, tum quia quod aliquis ordo peculiari modo major aut sacer reputetur, ex jure positivo pendet, juxta cap. *Miramur*, de Servis non ordinand.; tum etiam quia jura supra allegata generaliter et sine distinctione loquuntur. Tum denique quia non solum clericis in minoribus ordinibus constitutis, sed etiam in universum personis ecclesiasticis, sive recipientibus characterem per aliquem

ordinem, qui sit verum sacramentum, sive per quemcumque alium ritum vel modum ab Ecclesia institutum, possunt cum proportione applicari discursus facti. Nam omnes sub peculiari familia Christi comprehenduntur, et omnes ad ordinem rerum sacrarum et ecclesiasticarum pertinent, et magis aut minus non variant speciem. Sicut bona ecclesiastica quedam sunt magis propria quam alia, et inter res sacras quedam sunt aliis sacraiores, et nihilominus omnes æque sunt Ecclesiæ commissæ, et a sæculari potestate exemptæ ex divino jure. Idem ergo erit in personis.

11. Sententia Navarri præfertur. — Objectio ipsius. — Melius ergo Navarr., in e. *Norit*, de Judiciis, notab. 6, n. 30, respondendo ad sextum argumentum, n. 45, absolute docet, ex vi characteris clericalis sequi ex natura rei exemptionem a jurisdictione laica personæ sic sacratæ, non solum quatenus sacra est, sed etiam quatenus homo est. Objicit tamen sibi, quia sequeretur omnem Christianum ex vi characteris baptismalis eximi a potestate laica, quia per illum characterem est Deo consecratus.

12. Responsio ejusdem. — Quod si responderetur verum esse, Christianum ut charactere insignitum subdi spirituali potestati, et non sæculari, id est, in his quæ ad Christianitym pertinent, ut hominem vero subdi potestati sæculari, replicabitur facile, quia idem dicetur de clero ut affecto charactere clericali. Unde ipse Navarrus laborat in differentia assignanda, rejectisque aliorum sententiis, tandem respondet negando illationem, constituendoque discriminem inter utrumque characterem, *quia baptismalis*, inquit, *non discernit inter Christianos*, sed potius illos congregat in unum corpus, clericalis autem distinguit inter clerum et christianum populum. Quod amplius non declarat, sed potius dicit se omittere quedam quæ in alia editione objeccerat, quia facilem solutionem habebant.

13. Declaratur amplius solutio Navarri. — Confirmatio. — Sed nihilominus videtur res indigere expositione, quia difficultas non videtur soluta. Nam imprimis omnis forma, constituens et uniens aliquo modo omnes similem formam habentes, distinguit illos a reliquis forma illa parentibus, et sic character baptismalis distinguit ab ethniciis, seu infidelibus, Ecclesiæ non subditis, unde solum differt a clericali, quia baptismalis solum distin-

guit ab his qui omnino sunt extra Ecclesiam, clericalis autem distinguit inter fideles. At hoc non videtur sufficere, ut unus efficiat exemptum, et non alias, quia etiam character sacerdotalis distinguit non solum inter fideles, sed etiam inter clericos superioris et inferioris ordinis; ergo licet character sacerdotalis secum afferat exemptionem, non erit idem in inferioribus, vel certe non æqualiter. Simileque argumentum fieri poterit in inferioribus, præsertim distinguendo clericos in sacris a minoribus. Vel certe si character clericalis in primo gradu, vel etiam tonsura, quæ primo facit distinctionem clerici a non clero per specialem quamdam consecrationem, eo ipso afferat exemptionem personæ, etiam character baptismalis, cum faciat primam distinctionem Christiani a non Christiano, consecrando personam baptizatam Christo, afferet secum simile privilegium. Et augetur difficultas, quia saltem afferet character baptismalis exemptionem a potestate principum ethnicorum, quod dici non potest, ut supra visum est. Sequela patet, nam character ordinis, quia distinguit clericum a laico, eximit personam clericu a judicio laici; ergo servando eamdem proportionem, baptismalis character distinguendo Christianum ab ethnico, ab istius jurisdictione eundem eximet. Et confirmatur, quia non minor indecentia nec minus periculum invenitur in hoc, quod fidelis judicetur ab infideli, quam in hoc quod clericus judicetur a laico, et ideo Paulus, 1 ad Cor. 6, reprehendit fideles, qui apud infideles litigabant, et non apud sanctos, id est, fideles, ubi D. Thomas varias rationes indecentiarum et periculi adducit, quæ, servata proportione, ad utramque causam æque possunt applicari, ut legenti et consideranti facile patebit. Unde Alexander Papa, inde e converso sumit argumentum ad exemptionem clericorum persuadendam, cap. *Relatum*, 11, q. 1.

14. *Auctoris responsio.* — His vero non obstantibus, et suppositis quæ de charactere sacerdotali diximus, respondemus idem esse dicendum de omni charactere ordinis. Ad quod asserendum non parum juvat sententia Alexandri I, in canone proxime allegato, cum aliis quæ supra retulimus. Ratio vero est, quia, licet isti characteres differant secundum magis et minus, tamen in hoc conveniunt, quod consecrant personam, dedicando illam divino cultui et alicui ministerio sacro, inchoando ab aliquo inferiori, et de se ordinato

ad supremum, quod est sacerdotale, vel episcopale, et hac ratione talis character statim constituit personam sacram, et eximit a sæcularibus. Et in hoc potest constitui discri-
men inter characterem ordinis et baptismi, nam character baptismi non sacrat personam deputando illam ministerio sacro, sed tantum consignat illam Christo, eamque ad fidem ejus retinendam specialiter obligat, et de se communis est omnibus hominibus, per acci-
densque est quod aliquibus non insit. Ideo-
que per se non distinguit inter fidelem et infidelem, in his quæ ad temporalem vitam et politicum statum spectant, et propterea non ita secum afferat exemptionem a jurisdictione fidelium in eisdem rebus civilibus et huma-
nis, sicut character ordinis eximit clericum a potestate laici, quia dicando personam minis-
terio sacro, per se distinguit utrumque statum clericalem et laicalem, et hoc fortasse est dis-
crimen, quod Navar. indicare voluit, in d.
cap. *Norit.*

15. *Hac exemptione gaudent quæcumque personæ in statu ecclesiastico ab Ecclesia con-
stitutæ.* — Atque hinc tandem videtur idem dicendum de aliis personis, quæ alio quo-
cumque modo ab Ecclesia instituto seu deter-
minato in statu ecclesiastico constituuntur. Quod sensit Navarr. supra, conjungens mona-
chatum cum clericatu; monachatus enim non imprimis characterem, et ex Ecclesiæ institu-
tione vel determinatione existit. Idemque di-
ci potest de prima tonsura, quæ initium est clericatus sine impressione characteris, et si quæ sunt similia. Et confirmari potest ex cap.
Duo sunt, 12, quæst. 1, ubi duo distingun-
tur genera Christianorum, et unum esse dici-
tur, *quod mancipatum divino officio, et dedi-
tum contemplationi et orationi, ab omni stre-
pitu temporalium cessare convenit, ut sunt
clericu, et Deo devoti.* Ex quibus verbis colli-
gere licet, eamdem esse rationem exemptionis in hoc toto genere personarum, quia to-
tum est Deo et divino cultui dicatum, quod est fundamentum exemptionis, licet modus con-
secrationis diversus sit; ergo omnes hæ personæ eodem jure censentur, quantum ad exemptionem.

16. Atque ita ad hoc totum genus personarum applicari poterit jus positivum divinum, quia ex hoc toto personarum genere integra Chris-
ti familia completur, juxta sententiam The-
lesphori Fapæ, in epistola sua, ubi de omni-
bus ecclesiasticis personis sub nomine cleri-
corum loquitur, et familiares Christi appellat.

Potest etiam ad omnes applicari jus divinum naturale, quatenus in generali ratione consecrationis, seu dedicationis ad divinum cultum fundatur, ut dixi. Neque obstat quod modus hujus consecrationis seu dedicationis ad divinum cultum in multis ex his personis sit ex Ecclesiae institutione, quia nihilominus facta tali institutione resultare potest jus naturale. Sicut licet consecratio calicis sit de jure ecclesiastico, exemptio calicis consecrati ab omni usu communii, et non sacro, naturali jure consequitur. Vel, sicut in materia de Simonia diximus, licet consecratio aut benedictio alicuius rei sit de jure ecclesiastico, nihilominus quod vendi non possit, quatenus consecrata, est de jure naturali; ita ergo in praesenti dici potest.

CAPUT XI.

UTRUM SECLUSO JURE DIVINO IMMEDIATO POTUSET EXEMPTIO CLERICORUM PER JUS CANONICUM SINE ADMINICULO JURIS CIVILI INTRODUCI.

1. *Sensus questionis.* — Hæc quæstio simpliciter et absolute proposita necessaria non est, cum ostenderimus præcedenti capite, hoc privilegium a jure divino esse immediate concessum, et supra cap. 3 etiam probatum sit, jure canonico esse stabilitum; nihilominus tamen ex hypothesi tractanda a nobis est proposita quæstio, tun ad materiæ complementum, ne opinionem ullam intactam et indiscessam relinquamus; tun ut ecclesiasticam potestatem tueamur, et nonnullis objectionibus, quæ contra superiorem resolutionem militant, satisfaciamus. Quærimus enim an, remoto jure divino immediate concedente hoc privilegium, potuerit Summus Pontifex suprema sua potestate illud concedere sine consensu sacerdotalium principum, vel tantum, supposita eorum donatione aut consensione, illius observantiam præcipere et tueri valuerit. In quo puncto non solum Marsilius Patavinus, et alii haeretici et schismatici, qui illius doctrinam sequuntur, negant potestatem ecclesiasticam ad hoc sufficere sine sacerdotali consensu; verum etiam aliqui ex Catholicis eis in hac parte consentire videntur. Id enim supponunt, qui dicunt hanc immunitatem esse de jure civili pri-mario, ut sentiunt Medina, C. de Restitut., q. 15, qui ait, hoc privilegium esse ex con-cessione sacerdotali potestatis, significans ali-

ter induci non potuisse. Idemque aperte sentit Palacius, in 4, dist. 25, disput. 3, circa finem, et antea id tradiderat Hostiens., in Summ., lib. 3, tit. de Immunit. eccles., § Sed nec alia, circa finem, dicens: *Non poterat autem imperator cogi ab initio, ut privilegia daret, sed ex quo dedit, auferre non potest;* et, ut Rebuff. et Covarr. allegandi referunt, illam sententiam ex professo docuit Petrus de Ferrara, in sua Practic. in forma libelli, verb. *Plenam.*

2. Fundamentum hujus sententiae esse potuit, quia principes sacerdotales a principio jure naturali, vel saltem gentium, habebant jurisdictionem civilem in personas clericorum, et illa non fuerunt inimmediate privati ab ipso Deo, ut ipsi sentiunt, et nos disputationis gratia permittimus; ergo neque a Pontifice possunt privari, quia, sicut non possunt privari dominiis suis, ita nec parte illorum, qualis est hæc jurisdictione, et quasi dominium super personas clericorum; ergo nec potest concedere Pontifex privilegium exemptionis, quia hoc subsistere non potest, nisi principes jurisdictione priventur. Dices, licet Pontifex directe non possit privare principem sacerdotali dominio suc, indirekte interdum id posse per spiritualem potestatem, et hoc modo posse hoc privilegium concedere. Sed contra, quia hic usus indirectæ potestatis solum habet locum quasi per accidens, vel per modum defensionis subditorum fidelium, quando princeps illis esset perniciosus, et occasio ruinæ, vel per modum punitionis ecclesiasticae, quando princeps criminosus et incorrigibilis fit dignus tali poena, in quibus casibus etiam laicos subditos potest Pontifex eximere a subjectione talium principum; hic autem loquimur per se, et nulla interveniente causa vel culpa ex parte principis. Et hoc argumentum maxime urget in principibus infidelibus, quia non sunt subditi Ecclesiae potestati, nec directe, neque etiam indirecte; extenditur autem ad principes fideles, quia per conversionem ad fidem non sunt facti deterioris conditionis, nec parte aliqua jurisdictionis sunt privati.

3. *Confirmatio.* — Potestque de utrisque hoc confirmari. De fidelibus quidem, quia legimus Episcopos, vel judicium ab imperatoribus postulasse, quamdiu illi juri suo non cesserunt, ut in facto Constantini et Episcoporum Concilii Nicæni saepè commemorato plane ostenditur; vel privilegium hoc ab imperatoribus impetrasse, quando illud habere

desiderarunt, ut colligitur ex Novella 83 : *Ut clericci apud proprios Episcopos, etc., tit. 41, collat. 6, ubi Justinianus ait, se plures leges scripsisse, quibus voluit ecclesiasticos ab Episcopis tantum judicari, et postea subjungit : Petiti sumus a Menna, Deo amabili Archiepiscopo, reverendissimis clericis hoc dare privilegium, etc.* Et in multis aliis legibus, quas capite sequenti referemus, imperatores significant privilegium hoc ab ipsis donari, et a sua voluntate pendere. Imo Concilium Toletanum III, c. 21, privilegium exemptionis pro servis Ecclesiarum, Episcoporum et clericorum, a rege Hispaniae postulavit, ut haberetur in cap. *Ecclesiarum servos*, 12, q. 2.

4. De principibus autem infidelibus fieri potest argumentum, quia antequam convertantur ad fidem, possunt expresse conditionem exigere, et cum eo pacto converti, ut nullus subditorum suorum ab eorum jurisdictione eximatur, sive clericus sit, sive laicus; at si reges Japoniae; Chinæ, aut similes, sub ea conditione baptismum peterent, et aliter illum acceptare nollent, non propterea esset illis denegandus, quia conditio illa neque est intrinsece mala, neque repugnat voluntati credendi omnia necessaria ad salutem et illis obediendi; ergo admittenda vel saltem toleranda esset propter tantum bonum, quale est unius regni integra conversio; semel autem admissa conditio servanda esset, cum non sit injusta; ergo signum est habere temporales principes jus, ut licet ad fidem convertantur, suis subditis, aut parte illorum non priventur, et consequenter licet illam conditionem expresse non ponant, implicite illam includunt vel supponunt, quia nullus censetur juri suo renunciare, nisi satis expresse id declareret.

5. *Secunda et vera sententia.* — Nihilominus vera et certa sententia est, sive hoc privilegium exemptionis immediate sit ab ipso Christo omnibus clericis collatum, sive non sit, potuisse Pontifices illud conferre, ejusque observantiam principibus secularibus praecipere, et ad consentiendum eos cogere. Ita docuit Innocentius, in cap. 2, de Majorit. et obedient. Nam proponens quæstionem, quis exemit clericos, prius dicit, quod *Papa, consentiente imperatore*; postea, *quod exempti sunt a Deo*; et tandem ait, vel dic, *quod Papa, etiam sine consensu imperatoris eos potuit eximere a jurisdictione imperatoris per suas constitutiones, quia cum clerici spirituales res sint, et ex toto corpus suum et animam dede-*

runt in servitum et sortem Christi, per consequens Papæ judicio, et constitutionibus sub sunt. Eadem est communis sententia Canonistarum, in c. *Ecclesia S. Mariæ*, de Constitut., præsertim Panormit., Felin. et Deci., et Rebuff. in Concordat., titul. ult., ubi sententiam Petri de Ferrara falsam et damnatam appellat, et idem tenet Alvarus Pelagius, lib. 1 de Planct. Eccles., cap. 44, in fine referens, et ad litteram sequens sententiam Innocentii. Idem Driedo, lib. 1 de Libertate Christian., c. 9; et Covarr., in lib. Practic. Quæstion., cap. 31, concl. 3 et 4; Soto, 4, d. 25, quæst. 2, art. 2, concl. 6; Molin., tom. 1, tract. 2, de Justit. disput. 31, § *Tertia vero*; Henríg., l. 7 de Indul., c. 24.

6. *Probatur primo.* — *Erasio.* — Probatur primo ex illis decretis, quibus observantia hujus immunitatis sub censuris, ipsis etiam principibus temporalibus praecipitur, ut constat ex c. *Noverit*, et c. *Gravem*, de Sent. excom., et cap. ult., *de Rebus Eccles. non alienand.*, et c. *Quanquam*, de Censib., in 6, et fere toto tit. de Immunit. Ecclesiar., in decreta., et Sexto, et ex Bulla Cœnæ Domini, tot annis a tot Pontificibus repetita; nam in ea per varios articulos, et latis gravissimis censuris etiam contra principes et reges temporales hanc libertatem Ecclesiæ defendunt. Dicere vero posset aliquis, hæc omnia decreta esse noviora, et supponere privilegium exemptionis prius ab imperatoribus collatum, et ita jam supponere consensum temporalis principis, qui semel datus retractari non potest; et ideo facta illa suppositione, locum habere omnia illa præcepta, nihilominus tamen in principio necessarium fuisse consensum principum, et sine illo non potuisse Ecclesiam similia præcepta ferre.

7. *Exploditur dicta erasio.* — Sed hoc profecto incredibile est, tum quia dicti Pontifices non fundantur in illo principio, quod privilegium Ecclesiæ datum ab imperatore ab eo revocari non potest; nam, licet illud verum sit, ut infra videbimus, non est tamen ita certum, sicut est certum illa decreta et censuras obligare omnes principes etiam supremos ad immunitatem ecclesiasticam non violandam. Non ergo nituntur Pontifices in illo principio, sed vel in jure divino, vel in supra potestate, quam a Christo habent ad regendam Ecclesiam, et præsertim res sacras et ecclesiasticas, ut expedire censuerint ad divinum cultum, et ad supernaturalem hominum finem. Unde multi etiam ex antiquioribus Pon-

tificibus clericos a laicis judicari, vel apud illos causam movere, vetuerunt, etiam illis temporibus, quibus imperatores infideles erant, ut patet ex c. *Relatum*, 41, q. 1, et aliis quæ cap. 3 et 4 allegavimus. Præcipue vero veritatem hanc confirmat Concilium Tridentinum, sess. 25, cap. 20, de Reformat., quia, nulla facta juris civilis mentione, dicit, *Ecclesie et ecclesiasticarum personarum immunitatem divina ordinatione et ecclesiasticis sanctionibus esse constitutam.* In quo aperte supponit, immunitatem hanc, non a jure civili, seu a concessionibus principum sæcularium duxisse originem, alias propriam et immediatam hujus immunitatis causam laeuisset, et in rigore, aut falsa, aut nimis diminuta fuisset doctrina. Deinde vero admonet, imperatorem, reges, etc., ut, *quo largius bonis temporalibus, atque in alios potestate sunt ornati, eo sanctius, quæ ecclesiastici juris sunt tanquam Dei præcipua, ejusque patrocinio tecita venerentur, et debitam sacris Summorum Pontificum, et Conciliorum constitutionibus observantium præsent.*

8. *Secundum fundamentum.* — Ratione vero, et Scripturæ auctoritate simul fundata est hæc veritas in potestate data Petro ad gubernandam Ecclesiam, et ad ligandum et solvendum in omnibus, quæ ad bonum religionis christianæ, et conveniens Ecclesiæ regimen necessaria fuerint. Nam hæc exemptio, per se loquendo, et quasi ex natura rei est valde necessaria religioni christianæ, ut res ecclesiasticæ et divinus cultus debita veneratione tractentur; ergo propter hunc finem data est Petro et Pontifici potestas ad solvendum, seu eximendum clericos a potestate civili, et ad ligandum ipsam potestatem civilem, ut personis ecclesiasticis hanc immunitatem custodiat. Consequenter hæc evidens est ex dictis supra de potestate Pontificis circa temporalia in ordine ad spiritualem finem; ibi enim ostensum est hanc potestatem esse divinam et supernaturalem, ac subinde per se sufficien-tem, ut in sua materia efficaciter operari posse, non expectato subditorum consensu, etiam si sint temporales principes, sed illos ad consentiendum obligando, et si necessarium fuerit, cogendo. Antecedens autem satis declaratum et probatum relinquitur ex duobus capitibus præcedentibus. Nam si hæc exemptio est proprie et complete de jure di-vino positivo vel naturali, clarum est posse et debere Pontificem cogere christianos principes ad illud jus observandum. Si vero ad

minimum est hæc immunitas valde propinqua juri naturali, et valde consentanea juri divino, et consensioni omnium gentium, ut omnes Doctores sine dissensione fatentur, profecto negari non potest quin hæc exemptione ex natura rei sit ita necessaria religioni, et cultui divino, ut sine illa convenienter administrari non possit.

9. *Roboratur discursus factus.* — Potestique hoc amplius declarari ratione supra tacta, quam in hoc punto indicavit etiam Innocentius supra, quia res sacræ, ex vi consecrationis, ecclesiastice potestati ita subduntur, ut non solum circa consecrationem ipsam, sed etiam circa materiam et usum convenientem illius jam consecratæ disponat, et prohibeat non solum ea quæ sent intrinsece mala, sed etiam illa quæ frequenter ac moraliter possunt in irreverentiam rerum sacrarum vergere; personæ autem ecclesiasticæ sunt res valde sacræ, et per subjectionem ad sæculari-rem jurisdictionem possunt et a divino cultu valde distrahi, et a sæcularibus hominibus irreverenter tractari et contemni, si eorum crima inter laicos publice ad tribunalia communia deferrentur; ergo talis exemptione per se spectat ad potestatem spiritualem propter spiritualem finem. Denique hac de causa potuit Ecclesia circa matrimonium dis-ponere non solum quatenus sacramentum est, sed etiam quatenus est quidam contrac-tus, quia jam est materia rei sacræ, et sic etiam disponit de bonis ecclesiarum, et de decimis, et de aliis multis, quæ materialiter temporalia sunt; ergo eamdem potestatem habet in hac materia, quæ suo etiam modo sacra est, et ad divinum cultum non minus necessaria.

10. *Quæsitum.* — *Resolutio.* — *An Episcopi in suis diœcesibus clericis hanc exemptionem per se conferre valeant.* — *Ratio dubitandi pro affirmativa parte.* — Sed queret aliquis an solus Pontifex hanc habeat potestatem non solum respectu totius Ecclesiæ, sed etiam respectu singulorum episcopatuum. Nam priori modo clarum est, solum Pontificem habere hanc potestatem universalem pro tota Ecclesia, per quod non excludimus Concilium generale; nam in illo esse debet Pontificia auctoritas, et per illam confirmandum est, ut leges ferre possit universam Ecclesiæ ligantes. Solum ergo quæri potest, si hoc privilegium non esset a Christo vel Pontifice generatim in tota Ecclesia clericis datum, an singuli Episcopi in propriis diœ-

cesibus illud suis clericis dare possent. Ratio autem partem affirmantem suadens esse potest, quia unicuique Episcopo incumbit cura disponendi omnia in sua Ecclesia, quæ ad conveniens illius regimen spectant, et ad hunc finem unusquisque Episcopus potest in sua diœcesi quidquid sibi prohibitum non est, vel per superiorum non est aliter præscriptum; sed hoc non invenitur eis prohibitum; ergo licet exemptio non esset per Pontifices introducta, unusquisque Episcopus in sua diœcesi posset illam tribuere.

41. Ratio pro parte negativa. — Confirmatio. — In contrarium vero est, quia Episcopi in suis diœcesibus non possunt quidquid eis non prohibetur, sed tantum quod eis conceditur, quia non habent jurisdictionem ex jure divino, sed a Pontifice; hoc autem non legitur eis concessum. Deinde majores causæ Pontifici sunt reservatae, ut dicitur in cap. *Majores, de Baptism.* Exemptio autem clericorum, per quam supremi principes temporales sua jurisdictione ex parte privantur, gravissima res est, magna que indiget auctoritate et potestate; ergo vel a Christo facta est, vel ejus Vicario est reservata. Et confirmatur, quia Episcopi non possunt in suis diœcesibus hanc exemptionem augere; ergo nec possent introducere, si non esset. Denique ex hujusmodi exemptione possunt scandala et perturbationes inter principes et Prælatos oriri, nisi magna prudentia et auctoritate fiat; ergo quidquid circa hoc privilegium statui potest, ad solam Pontificis auctoritatem et potestatem pertinere credendum est.

42. Pars negativa præponitur. — Hæc ergo posterior pars verisimilior est, quam etiam praxis Ecclesiæ confirmat. Pontifices enim maximam habuere curam disponendi omnia quæ ad hanc exemptionem pertinent, neque hanc facultatem Episcopis reliquerunt. Estque optima ratio, quia hoc privilegium (ut dicitur in c. *Si diligenti, de Foro compet.*) non in favorem hujus vel illius personæ, neque etiam in favorem hujus vel illius episcopatus, sed simpliciter *in favorem totius collegii ecclesiastici* inductum est; ergo potestas illud conferendi est in solo capite universalis totius collegii, vel principali, quod est Christus, vel in ejus Vicario, qui est Summus Pontifex. Hoc autem intelligendum est de hoc privilegio ut pure canonico, et per solam spiritualem potestatem concessa independenter a consensu vel donatione secularium principum.

13. Episcopi possunt prohibere ne clericis sæcularia judicia adeant. — Duobus autem modis possent Episcopi exemptionem præcipere in suis episcopatibus, etiam si non esset generaliter introducta. Primo, ex parte clericorum tantum, præcipiendo clericis sibi subditis, ut in omnibus causis ab ipsis movendis, seu in quibus ipsis liberum esset judicem eligere, vitarent laicum judicem, et suum Episcopum adirent. Hoc enim præceptum justum esset, et in rigore non derogaret jurisdictioni laicorum; ergo non excederet ordinariam potestatem Episcoporum. Sicut enim Paulus, 4 ad Corinth. 6, reprehendit fideles inter se moventes lites, quia coram infidelibus illas tractabant (et sive id reprehenderit, quia malum, sive quia minus decens et periculosum, non est dubium quin illud prohibere potuerit), ita etiam Episcopi prohibere possent clericis ne, quantum in ipsis est, coram laicis litigarent, etiam si alias exempti non essent, quia, sicut non decet fidelem coram infideli causam agere, ita, servata proportione, indecens et periculosum est clericos a laicis judicari, argumento cap. *Relatum, 11, q. 1.* Alio modo posset quilibet Episcopus in sua diœcesi præcipere obseruantiam alicujus exemptionis, acceptando privilegium aliquod a principe, seu supremo domino terræ concessum, quod est per se manifestum, quia tale privilegium esset Ecclesiæ beneficium, quod laico facere licet, et Episcopo acceptare, quo semel obtento, potestatem habet Episcopus præcipiendo obseruationem ejus, quia tunc jam non privat laicum potestate sua, sed rem ecclesiasticam tuer ac defendit.

14. Ad fundamentum contrarie sententiae. — *Usus indirectus potestatis spiritualis etiam absque sæcularium principum criminibus est necessarius.* — Ad fundamentum contrariae sententiae recte ibi responsum est, ex hypothesi, quod Christus per se ipsum hoc privilegium clericis non contulerit, Pontifices per potestatem spiritualem potuisse illud concedere, et consequenter et quasi indirecte auferre a principibus sæcularibus jurisdictionem quam in personas clericorum habebant, vel habere debuissent, si clerici non essent. Ad replicam autem ibi factam, quod hic indirectus usus potestatis spiritualis solum habet locum per accidens, propter crimina vel tyrannidem principis, negatur assumptum, nam etiam extenditur spiritualis potestas ad temporalia, eliam si nulla interveniat culpa

ex parte principis temporalis, sed causa sufficiens ex parte materiæ, qualis est connexio, vel conjunctio sufficiens rei materialis cum spirituali, vel talis habitudo ad spiritualem finem, ut ratione illius expedit, per spiritualem potestatem dirigi et ordinari. Tunc enim Pontifex circa talia habet cœlestis et terreni imperii jura, ut dixit Nicolaus Pæpa II, in c. 1, dist. 22. Atque in hoc sensu non repugnat usum hujus potestatis spiritualis esse per se, licet sit indirectus; vocatur enim per se, quia non est per modum pœnæ, neque per occasionem alicujus mali casu insurgentis, sed quia, supposita conditione humana, et tali institutione ecclesiastici status, exemptio est moraliter necessaria ad spiritualem finem; et nihilominus ille usus indirectus appellatur, quia non est propter temporalem finem, sed propter spiritualem, ut supra declaratum est.

15. Servus sacris ordinibus initiatuſ a servitute eximitur. — Ratio autem est, quia hæc potestas per se data est ad ordinarium et conveniens regimen ecclesiastice monarchiæ, et ideo per se potest quidquid moraliter expedit ad finem ejus, etiamsi ad eum finem aliquid circa temporalia disponere vel immutare necesse sit. Eo vel maxime quod temporalibus regibus non data est potestas propter ipsorum commodum, sed propter convenientem reipublicæ gubernationem. Ergo si in ipsa republica talis mutatio fiat, ratione cuius ad ejusdem majus bonum expedit personæ aliquas excipere a principum jurisdictione, mirum non est quod Ecclesiæ princeps, qui altiore curam et providentiam habet ejusdem reipublicæ ad altiorem ordinem et statum elevatæ, propter eumdem finem id possit præstare. Maxime cum hæc respublica ecclesiastica, ut per Christum instituta est, supernaturalis sit, et divinum cultum principaliter respiciat, ad quem præcipue hæc immunitas ordinatur. Potestque hoc declarari exemplo. Nam si servus ordinetur in sacris, interdum liberatur a servitute, c. *Per venerabilem*, Qui filii sint legitimi, et c. *Si servus*, 54 dist., c. *Miramur*, de Servis non ordinand. Quod potuit Ecclesia statuere in debitum usum, et decentiam sacramenti ordinis et ministerii, etiam privando dominum potestate quam antea habebat in servum, vel reddito illi pretio, vel etiam non reddito, quando dominus in ordinationem consensit. Ergo mirum nou est quod ratione ordinum possint clerici per ecclesiasticam potestatem

a jurisdictione temporali liberari, nam magis in suo genere est dominium servi, quam solius jurisdictionis, et principes sacerdotes, praesertim fideles, consensum suum, vel expresse, vel tacite præbent tali ordinationi, et Ecclesia habet jus non dandi illis ministros in spiritualibus, nisi veluti sub hoc pacto, et conditione (quæ justissima est), ut immunitate tali statui convenienti gaudeant; ergo merito potest Pontifex sola sua auctoritate hanc immunitatem stabilire, et sacerdotes ad eam observandam obligare.

16. Invitis principibus ethnicis potest Ecclesia clericos ab eorum jurisdictione eximere. — Quia vero in fine illius argumenti dicitur, illud maximam vim habere respectu principum infidelium, addendum est, etiam tempore infidelium principum potuisse Ecclesiæ, et nunc etiam posse in regnis et provinciis principum infidelium, in quibus sunt fundatae Ecclesiæ, posse (inquam) hoc privilegium clericis concedere, invitis principibus. Oportet autem potestatem a facto seu jus ab usu distinguere. Nos enim de jure ac potestate loquimur, et eodem principio et rationibus factis nitimus. Et declaratur, nam supra cum D. Thoma diximus posse Ecclesiæ omnes fideles a potestate infidelium eximere propter periculum; ergo majori ratione poterit sacerdotes et clericos eximere ob reverentiam divini cultus. Pontificis enim potestas in ordine ad suum finem, etiam supra infideles extenditur, et ideo jus habet instituendi quæ ad verum Dei cultum pertinent, et quæ ad illum decent et expedient, etiam invitis principibus infidelibus. Sicut posset præcipere ne in templis secularia judicia fiant, etiam a magistratibus infidelibus, et habet jus illos cogendi ad id observandum, si posset. Quod enim pertinet ad factum sive usum, non ita potest cum fructu et effectu uti Ecclesia hac potestate cum principibus infidelibus, quia ipsi non cognoscunt in Papa potestatem ullo modo superiorem, nec possunt cogi per censuras, seu per gladium spiritualem; uti autem materiali gladio belli difficile est, vel interdum magis noxiun. Et ideo facilius potuit Ecclesia illo tempore dissimulare. Quomodo autem tunc se gesserit aut gerere potuerit, infra inquiremus.

17. Ad confirmationem. — Ad priorem partem confirmationis, quæ erat de usu antiquo Prælatorum Ecclesiæ postulandi ab imperatoribus, vel judicium in causis et controversiis suis, vel privilegium exemptionis pro suo

clero, responderi potest imprimis, illud in principio Ecclesiæ locum fortasse habuisse, quia tunc exemptio clericorum vel non satis erat usu introducta, vel non satis erat nota imperatori recens ad fidem converso, ut erat Constantinus tempore Concilii Nicæni. Et ideo tunc Episcopos judicium ab illo postulasse voluntarie, et non coacte. Vel dici etiam potest Episcopos non accessisse ad Constantinum, tanquam ad judicem in eos jurisdictionem habentem, sed vel tanquam ad defensorem et protectorem, quod est imperatoris munus, vel certe, quod verisimilius appetet, tanquam ad arbitrum quem voluntarie eligeant, quia tunc non erat prohibitum; ipse autem propter Episcoporum reverentiam munus illud acceptare recusavit. Atque eadem ratione potuerunt olim Episcopi hoc privilegium ab imperatoribus postulare, non quia jure ipsis Episcopis non competeteret, sed quia vel facto illis non permittebatur, etiam a fidelibus magistratibus, quibus fortasse tunc jus illud clericorum satis notum non erat; vel certe ex urbanitate, et ut res suavius fieret, consensum principis postularunt. Ac denique aliqui imperatores ita in suis legibus loquuntur, ac si essent hujus privilegii auctores, quia fortasse per ignorantiam ita existimabant, vel ut ostenderent omnino juri suo renunciare, et quantum est ex se ita donare, ac si ab eorum sola voluntate et potestate penderet.

18. Princeps ethnicus sub conditione exemptionem clericorum non observandi ad fidem admitti non debet.— Prima ratio.— In altera parte illius confirmationis, petitur an possit infidelis princeps ad baptismum admitti, nolens in suo regno exemptionem clericorum permittere, imo sub conditione et pacto postulans ne tali jurisdictione privari possit. In quo puncto imprimis dicimus, etiamsi demus Pontificem in tali casu posse id permettere, quia non est intrinsece malum, ac proinde potest talis princeps esse dispositus ad fidem et baptismum, nihilominus inde non sequi hanc immunitatem per se et jure pendere a voluntate principum, sed solum sequi, Pontificem posse aliquando dissimulare, et non uti sua potestate ad concedendum vel excludendum de facto tale privilegium, propter majora mala vitanda. Addo vero præterea, tam iniquam esse illam conditionem, et contrariam juri divino, aut immediate, aut saltem mediate, ut permittenda non sit, neque baptismus sub tali pacto alicui principi con-

cedendus. Primo, quia nunquam potest Papa renunciare potestati quam habet ad concedendum hoc privilegium, vel usum ejus, quoties Ecclesiæ universalis vel particulari expedire judicaverit; per illud autem pactum videtur renunciare huic potestati, alias conditio esset frivola, et nullius effectus; ergo nunquam licet illam admittere. Imo, licet sub ea conditione aliquem principem ad Ecclesiam reciperet, illam postea servare non teneretur, tum quia esset contra bonos mores Ecclesiæ; tum etiam quia per iniquam vim esset extorta, sicut est in mutuo conditio solvendi usuras.

19. Secunda ratio.— Unde oritur altera ratio, cur hoc non licet, scilicet, quia talis princeps est indispositus ad baptismum recipiendum, tum quia graviter peccat vim illam Ecclesiæ inferendo; tum etiam quia videtur suum temporalem statum baptismo anteponere, quandoquidem non vult illum admittere, nisi tali conditione sibi concessa. Tum denique quia ex illa conditione admissa in uno regno posset Ecclesia perturbari in aliis provinciis jam catholicis, et in illa etiam quæ de novo convertitur, nunquam posset immunitas ecclesiastica convenienter introduci, semperque perturbationes et scandala timeri possent. Quamobrem, absolute loquendo, iniqua videtur et nullo modo permittenda hujusmodi conditio, præsertim absolute, et sine temporis determinatione, vel alia honesta limitatione proposita.

20. Quod si hæc vera sunt (ut re vera sunt), ubi Ecclesia non videtur habere jus acquisitum super principem nondum baptizatum, profecto longe fortiori ratione permittenda non est talis resistentia in principe jam fideli seu baptizato, qui subditus est Ecclesiæ, ejusque justis legibus obedire tenetur. Neque verum est illam conditionem esse implicite inclusam in voluntaria susceptione baptismi; cum enim sit iniqua et rejicienda, si forte exprimatur, quomodo potest implicite includi? Conditio ergo quæ implicita cogitari potest, solum est ut temporalis princeps suis juribus non privetur, in his omnibus quæ fidei aut Ecclesiæ obedientiae non repugnant.

CAPUT XII.

UTRUM PRIVILEGIUM FORI CLERICORUM ETIAM JURE
CIVILI FUNDATUM SIT.

1. Sensus quæstionis. — Hujus tituli seu quæstionis sensus ex doctrina capitris superioris accipiendus est; jam enim non quærimus an prima origo, vel principalis aut necessaria causa hujus privilegii sit jus civile, seu voluntas aut donatio principum sacerdotalium; sed an de facto ipsis consentientibus introductum sit, vel certe an sit de jure civili eo modo quo esse potest, vel expedit, quicumque tandem ille modus sit.

2. Prima conclusio. — *Exemptio clericorum etiam est de jure civili.* — Hoc ergo sensu proposito, assertio certa, et communis consensu recepta, est hoc privilegium etiam esse concessum clericis jure civili, seu a principibus temporalibus; quæ intelligitur ab eo tempore quo principes facti sunt Christiani; nam antea, clarum est infideles principes nullum privilegium clericis concessisse; statim vero ac imperatores Christiani esse cœperunt, immunitatem clericis concesserunt. Unde primus omnium creditur hoc privilegium acceptasse Constantinus (nam de Philippo propter temporis brevitatem ratio non habetur). Non nullique dixerunt tempore Julii I, Pontificis, Constantimum huic privilegio annuisse, prout refert Almainus, in 4, d. 25, q. 1, quos ipse etiam sequitur, sed id nec probari potest, nec cum veritate historiarum consistere. Nam Constantinus in initio Pontificatus Julii I mortuus est, unde probabile est auctores illos de Constantio loqui voluisse. Alii vero censent Constantinum in Concilio Nicæno privilegium hoc ecclesiasticum inchoasse, quando Episcopis dixit, a solo Deo fore judicandos, quod significat Paladius, in 4, d. 25, disp. 3. Sed revera ex verbis illis Constantini non colligitur Constantinum novum privilegium dedisse, sed vel Episcoporum dissensiones, illos simul honorando, uno verbo componere ac sopire voluisse, vel certe recognovisse in Episcopis aliquam immunitatem divinitus eorum dignitatim concessam.

3. Constantinus exemptionem clericorum concessit. — Præterea, dubium non est quin Constantinus privilegia immunitatis clericis concesserit, nam l. 1, C. de Episcop. et cleric., clericos et mancipia eorum eximit a novis collationibus, et ne hospites suspicere co-

ganturn, quæ lex habetur etiam in Codice Theodosiano, l. 16, l. 8, sed Constantius triuit, et illi adduntur hæc verba, quæ Justinianus omisit: *Et si qui de vobis alimonia causa negotiationem exercere volunt, immunitate patientur*¹; et in l. 1 de Lustral. collat., in eodem Codice Theodosian., idem Constantius clericos eripit a quodam tributo, quod *lustralis collatio* vocabatur, fortasse quia per lustra exigebatur. Præterea, in l. 1 de Episcop. et cleric., in eodem Theodosiano Codice, idem sancit, *ne clerici contra indulta sibi privilegia nominationibus, seu suspicionibus prægraventur*; loquitur autem de nominationibus ad publica officia sacerdotalia, et a muneribus civilibus, a quibus clericos immunes esse voluit, ut clarius explicat in l. 2 ejusdem tituli, et rationem addit, dicens: *Ne sacrilego labore quorumdam a divinis obsequiis avocentur.* Et simile rescriptum Constantini refert Eusebius, per quod clericos Africanæ provinciæ ab omnibus omnino communibus et civilibus rerum publicarum ministeriis immunes et absolutos vult². Rationem vero addit generalem omnibus clericis, *ut nullo modo per errorem, vel per sacrilegium, ac profanam prolapsionem, que in hujusmodi negotiis accidere solent, a cultu divinae majestati debito abstrahantur.* Idemque privilegium supponit, et quomodo servandum sit declarat idem Constantinus, in l. 6, eodem tit., in Theodosiano Codice.

4. Quia vero in his legibus non fit expressa mentio privilegii fori, licet cum aliis conexum esse videatur, addenda est lex 7, eodem tit. et cod., in qua sic dicit idem Constantinus: Clerici, qui per injuriam hereticorum ad curiam derocati sunt, absolvantur, et de cetero ad similitudinem Orientis ad curias minime advocentur, sed immunitate plenissima patientur. Ubi oportet advertere, licet de hereticis in illo rescripto mentio fiat, quia per occasionem persecutionis Donatistarum datum fuit illud privilegium, nihilominus ipsum privilegium latum fuisse absolute, supponiturque antea fuisse concessum in Oriente, et ad Occidentalem Ecclesiam extenditur³. Imo, quod maxime notandum est, tantum aliquando Constantinus detulit judicio Episcoporum, ut omnibus etiam laicis in causis civilibus ad

¹ Refert Gratianus in c. Generaliter, § Novarum, 16, q. 1.

² Euseb., l. 10 Hist., c. 7; Nicephor., l. 7, c. 42; Sozomen., l. 1, c. 9.

³ Vide Baronium, ann. Christi 330, in fine.

Episcopos provocare concesserit, eorumque sententias magistratum sacerdotalium sententiis prætulerit, ut constat ex l. 4 de Episcopali judicio, in Codice Theodosiano, et ex Sozomeno, lib. 4 Histor., c. 9.

5. Constantius etiam eadem privilegia clericis concessit. — Præterea in eodem codice Theodosiano, tit. de Episcop. et cleric., habentur variae leges Constantii imperatoris, in quibus similia privilegia clericis concedit, nam in l. 9 clericos eximit a curialibus muneribus, et ab omni inquietudine curialium functionum; et in leg. 10, concedit eis immunitatem ab exactionibus munierum sordidorum, et a negotiatorum dispendiis, quæ videtur fuisse exemptione a tributis solvendis, ex iis, quæ sua industria lucrabantur, hoc enim significat in ratione quam subdit, dicens: *Cum certum sit quæstus, quos ex tabernaculis atque ergasteriis colligunt, pauperibus profuturos.* Et additur: *Parangariarum quoque pari modo cesseret exactio;* et infra: *A censibus etiam jubemus perseverare imunes.* Et similiter in l. 11 eximit clericos a munieribus curialibus. Addit vero notandam restrictionem, dicens: *Clerici, qui in totum nihil possident, ac patrimonio inutiles sunt, quia fortasse tunc clerici illum statum profitebantur.*

6. Verumtamen in his non satis explicatur privilegium fori, quamvis interdum per generalia verba insinuari videatur. In lege autem 12 prohibet idem Imperator, *Episcopos in iudiciis publicis accusari, ne libera sit (inquit) ad arguendos eos animis curialibus copia;* et ideo subjungit, *causas Episcoporum ad Episcopos esse deferendas.* Conjectatque Baronius, hoc privilegium concessisse Constantium ad petitionem Hilarii, qui in libro ad eundem, cuius initium est, *Benignifica natura tua, sic inquit: Provideat et discernat Clementia Tua, ne judices posthac præsumant et usurpent, ac putent se causas cognoscere clericorum, etc.;* ubi expendo verba præsumant atque usurpent, quibus non tam novum privilegium quam ne antiquum violaretur, postulare visus est. Atque ita Constantius antiquum potius privilegium confirmavit, quam novum concesserit; eodemque modo in l. 13 ejusdem tituli, simul cum Juliano confirmat privilegia clericis urbis Romæ concessa; et l. 14, itidem confirmat exemptiones clericorum a tributis a Constantino concessas.

7. *Cæteri etiam imperatores eamdem exemptionem confirmarunt.* — Valentinianus exemptione clericos privavit. — Præterea hæc immu-

nitas a posterioribus imperatoribus confirmata est, licet interdum eam restringere vel mutare tentaverint. Valentinianus enim I, ut refert Ambrosius, lib. 2, ep. 43, alias ep. 32, *non solum sermone respondit, verum etiam legibus suis sanxit, in causa fidei vel ecclesiastici aliquujus ordinis, eum judicare debere, qui nec munere impar sit, nec jure dissimilis.* Hæc enim verba rescripti sunt (ait Ambrosius), *hoc est, sacerdotes de sacerdotibus voluit judicare.* Quin etiam si alias quoque argueretur Episcopus, et morum esset examinanda causa, etiam hanc voluit ad episcopale iudicium pertinere. Postea vero quia multi, causa vitandi onera curalia, atque potiendi Ecclesiæ privilegiis, clerici fiebant, idem Valentinianus de Episcopis et clericis statuit, ut non nisi qui decennio in clericatu perseverasset, clericorum immunitatibus potiretur, ut colligitur ex l. 19, de Episcop. et cler., in codice Theodosiano. Postmodum vero Gratian., in l. ult. de Episcopal. judic., statuit, *ne clerici ad iudicia secularia pertrahantur.* Et deinceps Honorius absolute idem privilegium fori clericis restituit, ut constat ex l. 41, de Episc. et cler., in Codice Theodos., dicens de clericorum causis: *Hujusmodi causas dumtaxat Episcopi sub testificatione multorum actis audire debent,* et in l. 29, 30 et 38, confirmat privilegia omnia a suis prædecessoribus clericis concessa, inter quæ sine dubio privilegium fori continetur. Expressiusque colligitur ex l. 45, 46 et 47 ejusdem tituli. Unde idem servatum esse sub Theodosio Juniore colligi potest ex epist. 54 Augustini, cujus verba paulo post referemus. Postea vero Valentinianus III clericos privilegio fori omnino privavit, ut constat ex libro Novellarum ejus, tit. 42.

8. Refert item Baronius, ann. 455, n. 25, Marcianum, Valentiniani successorem, personas ecclesiasticas pristinae restituisse libertati, revocatis legibus contra illam a prædecessoribus promulgatis; solum tamen allegat Novellam ejusdem imperatoris, quæ est ultima in lib. 3 Novell., in Cod. Theodos., et in l. Generali, C. de Sacros. Eccles.; in illa vero solum revocantur leges, quibus prohibebantur clerici ne aliquid ex testamento relicturn a viduis caperent, de privilegio autem fori nihil ibi legitur. In quodam vero scholio ad Novellam Valentiniani notatur, illius revocationem retractasse Majorianum Augustum, quod etiam notat Baron., ann. Christi 452, n. 52, dicens: *Hæc quidem Valentinianus turpiter Romæ promulgat, sed quam inique et*

impie, lata a successore Majoriano his contraria sanctio demonstravit. Non referunt autem hi auctores sanctionem Majoriani, nec inter Novellas ejus, quæ lib. 4 Novellar., post Codicem Theodosianum habentur, continetur. Neque de statu hujus privilegii ab illo tempore usque ad Justinianum aliquid ab imperatoribus clarius statutum, quod certo affirmare valeam, invenio.

9. *Privilegium fori ante Justinianum clericis fuisse concessum.* — Ex dictis autem manifeste falsum esse convincitur, quod quidam schismaticorum fautores hoc tempore dixerunt, distinctionem fori inter ecclesiasticos et laicos ante Justinianum in Ecclesia non fuisse. Nam ex dictis ostenditur, plures imperatores hanc fori distinctionem concessisse seu admisso, ut de Constantino, Honorio, et Valentiniiano I, et aliis, ostendimus. Item multo antiquior Justiniano est gravis illa in Concilio Aquileiensi Ambrosii sententia, *non laicos de sacerdotibus, sed potius sacerdotes de laicis judicare debere*, quam etiam habet in dicta ep. 13 ad Valentinianum Augustum, et in ea distinctionem fori significat. Quam etiam supponit Augustinus, in ep. 53, ad Macedonium proconsulem, et judicem sacerdotalem, qui cum Augustinum interrogasset cur Sacerdotes in sacerdotibus fero pro reis intercederent, ipse Augustinus vicissim respondet: *Scio ego te ipsum cum aliis amicis tuis in Ecclesia Carthaginensi intercessisse pro clero, cui merito succensebat Episcopus, et utique nullum ibi discrimen sanguinis in incruenta disciplina timelatur.* In quibus verbis aperte supponit et declarat fori distinctionem, quæ jam tunc in usu erat. Quin potius Concilium Matisconense II, c. 9, distinctionem hanc *in ipso pene christianitatis principio, non solum canonum, sed etiam legum interventu introductum esse*, asseruit.

10. *In criminalibus clericos a laicis judicari voluit Justinianus.* — *An privilegium fori per Carolum Magnum fuerit restitutum?* — Justinianus ergo non fuit auctor distinctionis fori ecclesiastici a sacerdotiis, nec privilegium fori clericis primus ipse concessit. Quin potius, licet antiqua de hoc foro privilegia concedere aut innovare visus fuerit, ea tamen ad civiles causas limitavit. Nam in criminalibus, quando crima non ecclesiastica, sed communia sunt, ut furtæ, homicidia, etc., voluit clericos a laicis judicari et puniri, ut constat ex Novella 83, alias Authent. *Ut clerici apud proprios Episcopos, etc., et ex Authent.*

Cassa, et Authentica Clericus, C. de Episcop. et cleric. Aliqui vero existimant, privilegium fori iterum fuisse plene restitutum per Carolum Magnum, per quamdam legem qua renovavit aliam Constantini et Theodosii, quam supra retulimus, qua statuebatur ut omnes causæ etiam laicorum possint per Episcoporum sententiam terminari, prout refert Gratian., in c. *Omnes*, 41, q. 4; et latius Baroniūs, tom. 9, ann. 801, circa medium. Sed imprimis lex illa non de criminalibus causis, sed de civilibus loquebatur; valde enim alienum esset ab episcopali munere, in criminalibus causis laicorum sententiam dicere. Deinde per illam legem non concedebatur clericis privilegium fori, sed potius facultas dabatur laicis, ut coram Episcopis possent suas civiles causas tractare ac definire. Denique hoc ipsum privilegium vel receptum non fuit, vel certe non multum duravit, sed usu abrogatum est, ut notant Glossa, Hugo, Turrecremat., et alii Doctores, in dicto c. *Omnes*, et c. *Quicumque*, 41, q. 4, et latius notat Glossa, in c. *Relatum*, eadem causa et quæst. Quocirca, licet ex historiis constet, Carolum Magnum multa beneficia et privilegia clericis et sacerdotibus contulisse, an vero singulare aliquid circa hoc privilegium fori statuerit, scriptum non invenio, neque de aliis imperatoribus, qui post illum usque ad Fridericū II fuerunt.

11. *Privilegium fori in civilibus et criminalibus plenissime statuit Fridericus.* — *Variis etiam legibus civilibus hoc privilegium in Hispania introductum est.* — Hic autem Fridericus sub Honorio III plenissimum privilegium fori, tam in criminalibus quam in civilibus causis, clericis contulit, ut constat ex ejus Constitutione, quæ habetur in volumine post libros feudorum, et ex Authentic. *Statuimus. Cod. de Episcop. et cleric., ex Authent. Cassa, Cod. de Sacrosanct. Eccles.* Quas leges acceptavit Papa in fine dictæ Constitutionis, his verbis: *Nos Honorius Episcopus, servus servorum Dei, has leges a Friderico, Romanorum imperatore, filio nostro charissimo, pro utilitate omnium Christianorum editas laudamus, approbamus, et confirmamus tanquam in aternum validuras.* Atque ita receptum fuit hoc ius in toto orbe christiano, ex quo satis constat privilegium hoc jure communi civili stabilitum esse. Quod etiam imitatæ sunt leges particularium regnorum, præsertim Hispaniæ, tam in antiquioribus legibus, Partita 1, tit. 6, l. 54, et sequentibus, quam in nova Recopi-

latione, lib. 1, tit. 3, a principio, præsertim leg. 11 et 12; et Lusitaniae, l. 2 Ordinationum per varias leges, idemque de legibus aliorum catholicorum regnorum arbitramur.

CAPUT XIII.

DIFFICULTATI QUÆ EX PRÆCEDENTI CAPITE ORITUR OCCURRITUR, ET QUOMODO ECCLESIA DIVERSIS TEMPORIBUS PRIVILEGIO FORI USA FUERIT, EXPLICATUR.

1. Primum dubium circa usum privilegii fori. — *Rationes dubitandi.* — Ex dictis in præcedenti capite circa usum hujus privilegii fori dubium nascitur, nam videtur sequi, aut Ecclesiam non fuisse usam hoc privilegio plene et constanter ante Frederici II tempora, aut multis temporibus, renuentibus imperatoribus, illud observasse; primum autem videtur magnum esse inconveniens, secundum vero difficile creditu est; quid ergo dicendum est de istius usus antiquitate et modo? Nam quod pastores Ecclesiae contra imperatorum voluntatem privilegium hoc non exercuerint, sed dissimulaverint, eorumque voluntati ac potentiae cesserint, colligi potest, tum quia frequenter in suis decretis imperatorum aut regum consensum, seu jurum civilium concordiam allegant; tum etiam quia non legimus censuras fulminasse contra aliquem imperatorem, qui ante Fredericum II privilegium fori, vel omnino, vel ex parte clericis abstulerit, ut de Valentiniano et Justiniano retulimus. Imo ipsimet imperatores, qui maxime videntur clericis in hoc privilegio favisse, interdum in aliquibus causis, etiam ipsismet Episcopis et clericis postulantibus, hanc jurisdictionem assumebant, quibus Pontifices non resistebant, sed potius videndo et tacendo consentire videbantur.

2. Secundum dubium, an clerici ab imperiali potestate fuerint exempti. — *Ratio dubitandi pro negativa parte.* — Atque hinc nascitur alia difficultas, quam Barclaius, c. 35, apud Bellarminum tetigit, quia licet multi imperatores concesserint clericis hanc exemptionem a suis judicibus et magistratibus, non tamen legimus eos a sua propria et imperiali potestate emississe. Nunquam enim id declararunt, quod tamen in tam speciali privilegio necessarium videbatur. Et factis oppositum ostendebant, ut dixi. Ipseque allegat modernum factum Caroli V, qui Hermannum, Archiepiscopum Coloniensem, in jus ad se vo-

cari jussit, ut de criminibus sibi objectis se purgaret. Possetque allegare difficilia verba Justiniani, in Auth. *Nullus Episcopus*, C. de Episc. et cleric., quæ sic habent: *Nullus Episcopus invitatus ad civilem, vel militarem judicem in qualibet causa producatur, vel exhibeat, nisi princeps jubeat.* Ubi constat concedi exemptionem ab inferioribus, non ab ipso principe. Et idem sumi potest ex Auth. *Sed hodie, eodem tit., ibi, Nisi cum ex jussione principis ad alias provincias vocantur.*

3. Ratio pro parte affirmante. — In contrarium vero est, primo, quia hoc repugnat multis Conciliis, asserentibus hanc immunitatem esse antiquissimam, et a principio christianitatis observatam. Quod etiam ratio suadet, quia videtur incredibile, Ecclesiam tanto tempore caruisse usu et observantia immunitatis, ad bonum religionis et decentiam Ecclesiastici status prorsus necessaria. Præsertim cum ex divino jure proprie et immediate sit, vel saltem adeo illi propinqua, ut sine illa non possit conservari. Secundo, quia inde sequeretur etiam nunc non gaudere clericos integra exemptione, quia saltem erunt subjecti jurisdictioni imperatoris, regum, et quorumcumque supremorum principum, quia nec Fredericus II aliter in hanc exemptionem consensit, quam sui prædecessores, sed quod ipsi fecerant, *instauravit, innoravit et servari mandavit*, neque etiam alii imperatores vel reges post Fredericum magis se sua jurisdictione abdicarunt; consequens autem intolerabilis error est, quamvis Barclaius illud insolenter admittat.

4. Ad resolutionem duo tempora distinguuntur. — In hoc puncto breviter duo tempora distinguenda sunt: unum est, a principio Ecclesiæ usque ad Constantinum, quando principes temporales ethnici erant; aliud est a Constantino usque ad Fredericum II; omittimus autem tertium tempus a Frederico usque ad nostra tempora, quia de his quadragesitis annis nullus dubitat, quin Ecclesia Catholica plene ac integre hoc privilegium servaverit, juxta sacrorum canonum dispositionem, sine contradictione alicujus principis christiani, qui hereticus vel schismaticus habitus non fuerit. Præterea circa duo prima tempora præmittenda est alia distinctio supra data, de jure utendi hoc privilegio, et de facto seu de ipso usu cum effectu; saepè enim privilegiatus suo privilegio non utitur, licet jure possit, quia de facto non valet. Hæc autem impotentia facti esse potest, vel in singu-

lis privatis personis ecclesiasticis, si ad sacerdotalia judicia ire cogantur, vel in Summo Pontifice, si cum effectu vel fructu non possit sacerdotali potestati hanc vim inferenti resistere.

5. *Prima conclusio.* — De primo ergo tempore, dicendum est hoc privilegium non potuisse ab Ecclesia plene observari seu vindicari, non ex defectu juris, sed ex defectu potentiae facti, seu executiva (ut sic dicam). Hæc assertio in superioribus insinuata est, et quod ad priorem partem de jure sufficienter probata est, quia hoc privilegium et immediate est jure divino concessum, et licet non esset, data est Ecclesiae potestas et imposita obligatio inducendi illud. Est autem notanda differentia inter hos duos modos, quibus hoc privilegium potuit esse de jure divino, quia juxta illos distingui etiam poterit duplex modus habendi jus circa hoc privilegium. Nam priori modo erit jus illud in re respectu omnium et singulorum clericorum; posteriori autem modo erit tantum jus ad rem. Si enim privilegium priori modo est a Christo concessum, omnes clerici in quocumque tempore fuerunt actu exempti a jurisdictione principum ethniconorum, et hoc vocamus jus in re, et consequenter principes etiam fuerunt privati jurisdictione in clericos, quia hæc duo connexa sunt. Ex quo etiam sequitur potuisse illo tempore clericos in conscientia non parere legibus vel sententiis principum, vel judicium ethniconorum; et si ab eis cogerentur, vim vi repellere, si viribus valerent, quia si infideles jurisdictionem non habebant in ipsis, injuriam ab eis patiebantur clerici, et in conscientia non tenebantur illam sustinere, nisi fortasse propter vitandum scandalum, vel aliam similem extrinsecam rationem.

6. At vero si privilegium tantum posterior modo, id est, per Pontifices, in vi potestatis ac præcepti juris divini, est concessum, sic solum habuerunt clerici in illo primo tempore jus quoddam ad illud privilegium, non tamen jus in illo, quia non fuerunt actu exempti, donec Ecclesia illud instituit et actu concessit. Et consequenter principes infideles eo tempore non fuerunt privati jurisdictione sua, quam habebant in personas clericorum, quia non legimus Ecclesiam eo tempore usum esse potestate, sen' jure quod habebat ad eximendos clericos, sen' privandos principes jurisdictione in ipsis. Unde ulterius fit, obligatos fuisse clericos eo tempore in conscientia parere legibus et sententiis magistratum, etiam

ethniconorum, quia ex vera jurisdictione procedebant. Et eadem ratione tenebantur subesse vi coactivæ illorum, si aliqui juste illa uterentur.

7. *In usu privilegii fori prudenter semper se gessit Ecclesia.* — Inter hos autem duos modos explicandi hoc jus, licet prior sit probabilius, tamen in utroque optime declaratur, morem, quem in usu talis privilegii Ecclesia servavit, semper fuisse rationi ac prudenti gubernationi Ecclesiæ consentaneum. Nam, licet Pontifices eo tempore haberent potestatem et præceptum eximendi clericos omnino a jurisdictione sacerdotalium principum, nihilominus prudenter se gerebant, non utendo illa potestate, quia Ecclesiæ non expediebat, quia sine fructu, et cum scandalo, et impedimento fidei id agere tentarent, ideoque jus divinum non transgrediebantur, quia præceptum illud affirmativum erat, cujus natura est non obligare pro semper, et ita pro illo tempore non obligavit. Et similiter, licet privilegium fori fuerit priori modo immediate a Christo concessum, probabilissime et prudenter explicatur, datum esse cum tali dependentia ab Ecclesiæ pastore et gubernatore, ut sine illius consensu et determinatione non liceat singulis privatis personis illo privilegio suo arbitrio uti. Nam hæc dependentia negari non potest, ut jam dixi, tum quia ipso usu et experientia probatur; tum etiam quia erat valde necessaria ad pacem et bonum Ecclesiæ regimen. Unde fit absolute dicendum esse, non potuisse clericos eo tempore in conscientia resistere jurisdictioni principum sacerdotalium, quia Ecclesia nihil in hoc declaraverat aut statuerat, et aliqui illi principes suo jure bona fide existimato utebantur, licet aliqui infideles essent. Et hic modus explicandi hoc jus est consentaneus Paulo, ad Rom. 13, et sententiis Patrum, præserit Chrysostomi, et Græcorum illum exponentium.

8. *Principes ethnici nunquam habuerunt veram jurisdictionem in clericos.* — Ex quibus colligere licet, an dicendum sit clericos illo tempore fuisse exemptos jure, licet facto non essent, et (quod perinde est) fuisse subjectos jurisdictioni principum facto, non jure, ac subinde usurpato judicio, non vero; vel potius aliquo modo fuerint vere et jure subjecti. Dicendum enim censeo, clericos ex parte sua jure fuisse exemptos, quia jure divino hoc patiebantur privilegio, ut dictum est. Et consequenter sacerdtales principes ethnici non

habuisse jurisdictionem propriam in illos; per ignorantiam vero a formalii tyrannide excusari potuisse. Et nihilominus ad vitanda majora mala, et ne per ignorantiam daretur bellum justum ex utraque parte, pernisiſſe tunc pastores Ecclesiæ, ut ecclesiasticæ personæ regibus, et magistratibus temporalibus parerent; volueruntque illos haberi ut legitimos judices et superiores in rebus temporalibus et honestis; quia minus malum erat illos tolerare, et quasi eis committere vices suas, quam vel statum ecclesiasticum perturbare, vel clericos sine legitimis judicibus in ipso usu relinquere. Hoc ergo modo, non obstante immunitate jure divino concessa clericis, potuerunt illo tempore judicari a laicis, non proprie usurpato judicio, sed vero, si alioqui causa erat temporalis, et legitimate tractabatur.

9. Clerici inter fideles semper privilegio fori gavisi fuerunt. — Addendum vero ulterius est, habuisse clericos illo tempore aliquo modo usum hujus privilegii intra ipsam Ecclesiam respectu aliorum fidelium, ita etiam disponente Ecclesia, quantum status illius temporis permittebat. Probatur et declaratur in hunc modum, quia semper Ecclesia prohibuit fidelibus ne clericos ad laicos judices deferrent, sed ad ecclesiasticum forum. Nam legem invenimus, non solum a multis Conciliis post tempora christianorum principum coactis, et supra, in fine capituli 3, allegatis, sed etiam a nonnullis Pontificibus antiquioribus latam, praesertim ab Alexandro, Caio et Marcellino, in suis epistolis decretalibus, quas in eodem loco citavi. Quamvis enim eo tempore infideles principes suam exercerent jurisdictionem, et ideo eorum magistratus possent esse veri judices in causis clericorum modo declarato, clericusque accusatus vel citatus coram judice laico infideli teneretur comparere ad iussionem talis judicis, nihilominus potuit Ecclesia episcopale forum erigere, in quo causæ clericorum, quantum fieri poterat ex parte Ecclesiæ, tractarentur. Nam ad hoc semper habuit et potestatem a Christo datam, et illam exequendi opportunitatem. Ideoque a tempore Apostolorum usum etiam ejus habuit, ut aperte sumitur ex illo primæ ad Timot. 5: *Adversus presbyterum accusationem non recipias, nisi sub duobus vel tribus testibus;* que verba supponunt jam tunc fuisse episcopale tribunal pro clericorum causis dijudicandis erectum.

10. Sententia Patrum, de senioribus locum

Pauli intelligentium, traditæ resolutioni non adversatur. — Estque attente considerandum, Paulum non loqui de solis causis ecclesiasticis, sed de querelis contra clericos in causis criminalibus; nam in illis fit propria accusatio; et cum Paulus indefinite et simpliciter loquatur, non est restringenda illius sententia ad crimina ecclesiastica; de quocumque ergo criminе poterat et debebat tunc presbyter accusari in tribunali ecclesiastico. Nec refert quod Chrysostomus, Theophylact. et Græci nomen presbyteri, non ad dignitatem sacerdotii, sed ad ætatem senectutis accommodant; non, inquam, hoc obstat, tum quia etiam in illo sensu probatur ex illo loco tribunal ecclesiasticum pro causis fidelium, et majori ratione pro causis clericorum; non enim esse poterant pejoris conditionis, si alii admittabantur, quod nunc non examinamus, quia ad causam præsentem parum refert. Tum etiam quia probabilior est expositio Ambrosii, si ejus sunt commentarii, et Hieronymi, cum eadem correctione; Anselmi, D. Thomæ, et Lafinorum, qui de sacerdotibus locum illum interpretantur. Nam de illis loquebatur Paulus in verbis proxime præcedentibus, dicens: *Qui bene præsunt presbyteri, duplice honore digni sunt, maxime qui laborant in verbo et doctrina,* et statim subjungit: *Adversus presbyterum noli accusationem recipere,* etc. Eratque major ratio ergendi tribunal ecclesiasticum pro clericis, quam pro aliis senioribus laicis fidelibus, quia specialiori ratione sunt clerici sub cura et regimine Prælatorum, quam communis plebs fidelium, eo quod specialius sunt ad ecclesiastica ministeria destinati, ut dictum est. Atque hoc modo fuit ab initio in Ecclesia aliqua distinctio fori ecclesiastici a civili, non solum pro causis ecclesiasticis, sed etiam pro aliis, et pro crimini bus saltem clericorum, ut supra etiam notatum est.

11. Ecclesia semper potuit cogere fideles ad exemptionem clericorum servandam. — Hac ergo distinctione supposita, optime potuit Ecclesia illo tempore prohibere ne clerici accusarentur, vel deferrentur ad tribunalia laicorum per alios clericos, vel fideles. Quamvis enim hoc prohibere non potuerit infidelibus, inter quos fideles tunc vivebant, quia neque erant subditi Ecclesiæ, neque illos cogere valebat, et ita poterant movere litem, vel accusationem contra clericum coram suo judice, quem solum ut legitimum re cognoscabant, nihilominus fidelibus subditis

potuit Ecclesia præcipere, ut si presbyterum accusare vellent, id facerent in tribunali ecclesiastico, quia ita erat valde conveniens ac necessarium ad servandum divinum jus, et ad honorem christianæ religionis, et decentiam ecclesiastici status, quam in omni tempore, quantum illius conditio, et status patiebatur, Ecclesiae Prælati procurare debuerunt.

12. Prohibitio autem illa erat justa illo tempore, quia, licet principes sacerdotes suam exercerent jurisdictionem, fideles eorum subditi non tenebantur aliquo jure ad movendam accusationem vel item coram ipsis, sed poterant quocumque alio honesto modo suas controversias vel lites componere; ergo licite ac prudenter potuit Ecclesia prævenire, ac præcipere fidelibus ut adversus clericum in ecclesiastico judicio agerent, non in sacerdotali, et consequenter potuit etiam graviter punire per ecclesiasticas censuras transgressores bujus præcepti. Eo vel maxime quod, licet per hoc præceptum aliquo modo subtraherentur hujusmodi causæ judicibus laicis, eorumque jurisdictione ex parte impediretur, vel tolleretur, id totum licebat, non solum ex vi divini privilegii, sed etiam quia indirecte saltem cadebat sub potestatem spiritualem Ecclesiae, propter bonum religionis et supernaturalem finem, et usus talis potestatis exerceri tunc potuit sine scandalo infidelium, aut impedimento vel perturbatione fidei. Merito ergo Ecclesia sicut de jure potuit, ita de facto prohibuit, ne clerici ad tribunalia sacerdotalia deferrentur. Quod Alexander Papa confirmat, quia si Paulus Christianorum causas ad ecclesias deferri et ibidem terminari præcepit (1 ad Corint. 6), etiam potuerunt Pontifices præcipere, ut sacerdotes coram solis Episcopis accusarentur, quo argumento usum etiam est Concilium Carthaginense III, c. 9; et de illo videri potest divus Thomas super locum Pauli.

13. Sic igitur cœpit Ecclesia illo tempore, eo modo quo potuit, clericos a sacerdotalium judicio eripere, eodemque modo cœpit eorum immunitatem tueri, non quidem plene, et omni ex parte, quia tunc non erat opportunum, sed, ut dixi, quantum fieri poterat ex parte fidelium. Unde merito potest illa prohibitio quoddam privilegium fori clericorum appellari, sicut prohibitio sub speciali censura, ne quis in clericum violentias manus injicere audeat, est magnum privilegium clericorum, quod canonis appellatur. Sicut enim

haec prohibitio canonis facta est in gratiam status ecclesiastici, ita etiam illa antiqua posita fuit, ut clerici, tanquam res sacræ et religiosæ, judicio etiam quodammodo sacro, quoad fieri posset, reservarentur. Auctumque fuit hoc privilegium illo tempore per aliam ecclesiasticam legem, qua concessum est clericis, ne possent a laicis, sed tantum a clericis accusari; vel e converso prohibitum erat laicis, ne clericos accusare auderent, de qua prohibitione multa decreta refert Gratianus 2, q. 7, ex quibus antiquiora sunt Evaristi, in epist. 2; Fabiani, epist. 1 et 2; Eusebii, epist. 1 et 2; haec tamen prohibitio postea magis declarata vel limitata est, ut in tota illa quæstione videri potest. Et haec de illo primo tempore sufficient.

14. *Secunda conclusio : cum imperatoribus christianis exemptione gaudere clerici cœperunt.* — *Probatur.* — De secundo tempore, dicendum est fere ab initio imperatorum christianorum clericos fuisse exemptos a foro sacerdotali, tum jure proprio, et in re obtento per privilegium actu concessum; tum etiam facto, nisi quando per injuriam, vel tyrannidem impediabantur seu cogebantur. Haec assertio ex dietis in capite præcedenti facile probari potest. Et prima quidem pars nota est, quia hoc privilegium ab ipso Christo immediate collatum est. Imo, quamvis esset necessaria applicatio aliqua per Pontificem, probari posset in hunc modum. Nam Ecclesia, seu Pontifices semper, quantum in ipsis fuit, voluerunt immunitatem hanc clericorum conservare, quia ad hoc ex lege divina tenentur, et quia ad bonum religionis est maxime conveniens; in tempore autem ethnicorum principum propter incapacitatem illorum hoc perficere non tentarunt; ergo, eo ipso quod christiani principes huic immunitati faciles se præbuerunt, Pontifices usum illius introduxerunt, ac perfecte statuerunt. Ostendimus autem Constantinum, factum Christianum, immunitatem hanc vel recognovisse et admississe, vel, si opus erat, donasse; ergo statim etiam Pastores Ecclesie et donationem acceptarunt, et si quid amplius ex parte sua necessarium erat, addiderunt; ergo ex tunc cœperunt clerici habere non solum jus ad immunitatem, sed etiam privilegium ipsum, et usum ejus actu concessum.

15. Unde facile persuadetur secunda pars assertionis, quia ut observantia hujus privilegii non solum jure, sed etiam facto introduceretur, solus consensus et auctoritas

christianorum principum desiderabatur; sed Constantinus, ut diximus, statim præbuit consensum, et ut executioni mandaretur, auctoritate sua statuit; ergo nihil obstare potuit quominus hæc immunitas facto et usu executioni mandaretur. Idemque credendum est de aliis, qui Constantino simul cum imperio in fide et pietate successerunt, paucis exceptis, qui vel per ignorantiam, vel per ambitionem aliquid contra hanc immunitatem attentarunt. Quod satis confirmant cætera, quæ de aliis imperatoribus usque ad Fredericum adduximus. Et in dicto titulo de Episcopis et clericis, inveniuntur multæ leges imperatorum, in quibus reprehenduntur magistratus civiles aliquid agentes contra hanc clericorum immunitatem; et si quæ contrarie consuetudines paulatim erant introductæ, reprobantur ac retractantur; ergo signum est ordinarie et justis judicibus servatam esse exemptionem etiam facto. Unde imperator Fredericus, qui clarius et generalius hoc confirmavit, non quasi rem novam illam decernit, sed ut jam stabilitam *per imperiales et canonicas sanctiones*; ideoque in citata lege statuit, ut nullus præsumat, clericum ad seculare judicium adducere, *contra imperiales* (inquit) *et canonicas sanctiones*; ergo jam ante illud factum erat præsumptuosum et iniquum, ac subinde contrarium erat legitimum, et illo tempore debitum.

16. Et hinc aperte sequitur ultima assertio-
nis pars. Nam quod ad usum attinet, negare
non possumus, in discursu illorum temporum
multa esse facta et tentata contra hanc immu-
nitatem non solum ab inferioribus magistrati-
bus, sed etiam ab ipsis imperatoribus; inde
vero non licet inferre, facta illa aut valida aut
licita fuisse, nam sœculares judices sunt cleri-
cis infesti, ut de laicis dicitur in c. *Laici*, cum
similibus, 2, q. 7, semperque suam jurisdictionem
amplificare student, vel humana ambitione
propria, vel affectu placendi temporalibus
principibus; vel interdum quidem ex zelo
justitiae, non tamen secundum scientiam.
Quidquid ergo eo tempore contra immunitatem
fiebat a quocumque magistratu vel prin-
cipe christiano, non minus erat iniquum et
tyrannicum, quam quod posterioribus tempori-
bus usque ad hodiernum diem factum est,
vel fit. Quia post concessum et firmatum pri-
vilegium exemptionis, quidquid contra illud
fit, est opus usurpatæ jurisdictionis ac potesta-
tis, ac subinde injustum et tyrannicum. Atque
in hoc ordine ponenda est quælibet privilegii

prius concessi retractatio, per sœcularem potes-
tatem etiam imperatoriam facta, quia non po-
test Imperator auferre quod Christus donavit,
sive immediate per se ipsum, sive per Vicar-
ium suum. Neque refert quod privilegium
non fuerit datum sine consensu imperatoris,
quia non fuit ille consensus causa propria et
per se talis privilegii, imo nec conditio ad il-
lins valorem simpliciter necessaria, sed tan-
tum ad usum fuit ex benigna et prudenti Ec-
clesiae providentia expectata, ideoque retrac-
tatio illius consensus postea subsecuta privile-
gium auferre aut immutare non poterat. Imo,
licet hoc privilegium fuisse principaliter ab
imператорibus datum, ab eisdem postea revo-
cari non potuisset, ut infra latius ostendam.

17. Quapropter, non obstante revocatione a
Valentiniano vel quolibet alio facta, locum
semper et veritatem habuit hæc pars assertio-
nis, quod omnia, quæ in illo tempore postea
fiebant, iniqua erant et tyrannica, quia sem-
per subsistebat privilegium, cui erant contra-
ria, et quia, cum ipsa revocatio per tyrannidem
facta esset, quidquid in virtute illius fiebat,
eamdem iniquitatem participabat. Loquor au-
tem semper de ipso opere secundum se spec-
tato, non de personis quæ forte per ignoran-
tiam interdum excusari potuerunt. Nam certe
imperatores illo tempore non videntur pro-
priam originem et excellentiam hujus privile-
gii cognovisse, ideo enim ita de illo loquuntur,
ac si esset proprium ipsorum imperatorum
donum, ab eorum nimirum arbitrio pendens,
atque ita aliqui eorum per ignorantiam huma-
nam, et absque hæresi, cogitare potuerunt se
posse privilegium semel datum auferre. Sed
quidquid de eorum culpa vel excusatione sit,
factum ipsum, in se spectatum, et injustum et
nullius valoris vel efficacitatis fuit. Et ideo
Patres Concilii Andegavensis, qui post revoca-
tionem a Valentiniano III factam in Gallia
congregati fuerunt, nulla ratione legis Valen-
tianæ habita, pro defensione immunitatis sta-
tuerunt ut clericis contra Episcopale judicium
resilire non liceat, neque inconsultis sacerdoti-
bus sœcularium judicia expetere, ut refert
Baron., ann. 453, n. 53; illud enim Concilium
in tomis Conciliorum non habetur. Et Concilium
Chalcedonense, quod proxime post Valen-
tianum III celebratum fuit, c. 9, similiter
distinctionem fori servandam a clericis præcep-
pit. Et licet hæc Concilia solis sacerdotibus, ne
ad judices sœculares accedant, præcipere vide-
antur, tamen Concilium Matisconense I, post
130 annos celebratum, c. 6, etiam judices ab

Ecclesiæ liminibus arcendos disponit, qui clericos judicare præsumpserint. Ex quibus satis intelligitur, revocationem illam nullius valoris, vel momenti ab Ecclesiæ Patribus reputam esse. Quod postea etiam imperatores melius intellexerunt, et ideo ad pristinum statum immunitatem ecclesiasticam restituerunt.

18. Solveuntur rationes dubitandi in primo dubio positæ. — Ad primam ergo difficultatem in principio positam facilis est responsio; dicimus enim semper Ecclesiam usam fuisse ecclesiastico foro pro suis clericis, non tamen semper potuisse æqualiter illos eximere a sæculari, quia tempore infidelium imperatorum, ut dixi, respectu illorum immunitatem non exercuit; quod licet sine incommode fieri non potuerit, patienter sustinendum fuit, quia vel sine majori incommodo vitari non poterat, vel certe quia simpliciter et cum effectu executioni mandari non poterat. Post tempora vero christianorum imperatorum semper Ecclesia retinuit integrum privilegium suum; expectavit autem in principio, ad usum ejus, consensum christiani imperatoris, ut res suavius et efficacius fieret ad imitationem divinæ sapientiæ et prudentiæ. Et ob eamdem causam Pontifices in suis decretis legum civilium consensum allegant. Et ob eamdem rationem, licet alioqui imperatores in illis antiquis temporibus tergiversarentur, et aliquid contra hanc immunitatem agerent, non statim a Pontificibus damnabantur aut puniebantur, quia nondum satis illis erat notum et explicatum jus et fundamentum exemptionis, nec fortasse tunc erant illius capaces, et ideo non poterant sine majori detimento violenter cogi, sed magis opportunum Patres judicarunt interdum aliquid dissimulare, et paulatim veritatem docere, usumque immunitatis introducere. Nunquam vero Episcopi vel Pontifices in causis ecclesiasticis, vel clericorum, judicium sæculare ab imperatoribus postularunt, nisi fortasse hæretici aut schismatici; Catholici autem solum ad judicium legitimum et ecclesiasticum sine impedimento obtineendum auctoritatem principum interponabant. Quod paucis verbis recte explicatur in Concilio Milevitano, cap. 49: *Placuit, ut quicumque ab imperatore cognitionem publicorum judiciorum petierit, honore proprio prioretur. Si autem episcopale judicium ab imperatore postulacerit, nihil ei olsit*¹. Et idem declaratum est in Concilio Carthaginensi III, c. 38, et habetur in cap.

¹ Cap. *Placuit*, 44, q. 1.

Petimus, 44, q. 4, et simile ibidem habetur in capite sequenti, et sumitur ex cap. *Christianis*, 44, q. 4, quod est Gelasii Papæ, scribentis aī quendam comitem, ut quosdam clericos a violentia cuiusdam principis sæcularis tueretur: *Sublimitatis* (inquit) *tuae tuitione vallentur*. De qua re videri etiam potest epist. 68 Augustini.

19. Satisfit rationibus in dubio secundo positis. — Ad alteram difficultatem quam Barclaius movit, respondetur, licet fortasse aliqui imperatores ita per ignorantiam vel errorem hoc privilegium intellexerint, ut per illud a sua suprema potestate clericos non eximi existimaverint, nihilominus ipsos deceptos esse, quia Ecclesia aliter exemptionem hanc introduxit aut declaravit. Nam in d. c. *Placuit* proxime citato, expresse dixit Concilium Milevitano, *etiam ab imperatore non posse peti clericorum judicium*, et in d. c. *Christianis*, Gelasius Papa, contra immunitatem Ecclesiæ esse censem, *per auctoritatem regiam contra clericum procedere*; et Gregorius Papa, lib. 4, ep. 31, alias c. 75, ad Mauritium imperatorem scribit, *ne terrena potestate ita dominetur clericis, ut debitam reverentiam eis non impendat*¹. Ubi taceite eum reprehendit, quoniam tunc tyrannie in sacerdotes imperare studebat, ut ipse Gregorius deplorat, in *Psal. 4 Poenitentiae* (ut supra retulii), moderate autem ad illum loquitur, ne fortasse ad majorem sævitiam provocaretur. Non omisit tamen illi proponere exemplum Constantini, qui Episcopis inter se dissidentibus respondit: *Ite, et inter vos causas discutite, quia dignum non est ut judicemus Deos*². Præterea in multis aliis decretis absolute dicitur, laicos non habere jurisdictionem ullam in clericos, ut expresse dicitur in Concilio Constantiensi, sess. 31; et Concilio Lateranensi, sub Leone X, sess. 9, et aliis quæ supra retulimus; manifestum autem est laicorum nomine etiam imperatores comprehendendi, nam cum non sint clerici, laici profecto sunt.

20. Evasio quædam præcluditur. — Denique ipsi etiam imperatores, licet de se ipsis in speciali non loquantur, saepe tamen loquuntur generaliter, et cum tanta declaratione, ut satis eundem sensum significant. Constantinus enim, in dicta l. 7 Codicis Theodosiani, de Episc. et Cleric., statuit ut clerici, in Occidente sicut in Oriente, immunitate plenissima

¹ Cap. *Sacerdotilus*, 44, q. 1.

² Vide *Rebusfium*, lib. 10 hist., c. 2.

potiantur; et Theodosius, in l. ult. ejusdem tituli confirmans hoc privilegium, dicit causas clericorum reservari *episcopali audientiae*; eximuntur ergo ab omni laicali, etiam imperiali. Neque potest dici hoc solum intelligi in prima instantia, per modum vero appellatio-
nis semper licuisse ad imperatorem provocare; hoc enim et gratis dicitur, et falsum esse probatur. Tum quia ab Episcopis nunquam fuit in Ecclesia appellatum ad imperatorem, sed vel ad Metropolitanos, aut Patriarchas; vel tandem ad Summum Pontificem, ut expresse in Cone. Chalcedonensi, c. 9, traditum est. A Summo autem Pontifice nunquam licuit ad aliud tribunal, sive ecclesiasticum, sive laicum, appellare, ut dixit Gelasius Papa ad Episcopos Dardaniæ, et ad Faustum, et Concilium Sardicense, canon. 4 et 7, et tradunt multa alia decreta Pontificum et Conciliorum, quæ superiori libro ad probandam supremam Pontificis auctoritatem retulimus. Igitur causæ clericorum, eo ipso quod reservatae sunt Episcopis, intra forum ecclesiasticum terminandæ sunt, ac subinde extra totum forum laicum, usque ad ipsum imperatoris tribunal, constitutæ sunt. Et certe ratio, quam illa lex ultima reddit, hoc satis confirmat: *Fas enim (inquit) non est, ut divini muneris ministri temporalium potestatum subdantur arbitrio*; nam profecto potestas imperatoria temporalis etiam est; ergo etiam illa sub indefinita voce, quæ universaliter æquivaleret, comprehenditur. Ac denique eodem modo, indefinita et generali locutione idem privilegium concessit Fredericus II, illudque Honorius III confirmavit.

21. *Ad facta Caroli V.* — Ad facta vero imperatorum, quæ in contrarium allegantur vel allegari possunt, generatim respondemus, fortasse multa illorum non fuisse exercendo actum jurisdictionis, sed intercessionis, vel auxilii, quod solet brachium saeculare ecclesiastico tribuere, ut in superioribus de Constantino et aliis diximus. Vel certe interdum excusari possunt, quia non propria auctoritate, sed potentibus ipsis Prælatis, et quasi arbitrii inter illos judicabant, vel potius dissidia componebant; denique si aliqua ex his vel aliis rationibus excusari non possunt, respondendum est, excessisse jurisdictionem usurpando, ut de Mauritio dixit Gregorius paulo antea citatus, et de Valentianino III jam diximus, et late ostendit Baronius, ann. 452 et 453. Ad novissimum autem exemplum Caroli V, quem scimus fuisse insignem ecclesiastice libertatis

protectorem et observatorem, respondemus, Carolum potuisse ad se vocare Hermannum Archiepiscopum, non ut Archiepiscopum, sed ut principem imperii. Item potuisse vocare non ut judicem, sed ut protectorem cleri, et Academiæ Coloniensis. Nam Surius, qui factum illud refert anno 1545, in Commentario, simul dicit: *Hujus anni mense Junio Cæsar clerum, et Academiam Colonensem in suum patrocinium recepit*. Ut ergo afflictis patrocinaretur, potuit vocare Episcopum, ut veritatem agnosceret, et Ecclesiae noctumenta vitaret, donec Papa causam ad se traheret; quod paulo post fecit, in sequenti mense Julio Hermannum citando, quem postea etiam Pontifex depositus, cooperante Carolo, ut idem auctor, in initio ann. 1547, refert. Denique ad verba Justiniani in illis authenticis nihil invenio a Glossis vel jurisperitis dictum; mihi autem videtur excessisse in his legibus circa res ecclesiasticas condendis, et non satis perspectam habuisse vim et originem ecclesiastice immunitatis, et ideo multa per errorem, et sine legitima potestate circa illam dispunisse, ut jam supra tactum est, et in sequentibus iterum atque iterum occurret.

CAPUT XIV.

QUALIS SIT CLERICORUM EXEMPTIO IN CAUSIS CIVILIBUS.

1. *Causa formalis privilegii fori.—Materia privilegii fori, duplex.*—Hactenus solum ostendimus immunitatem clericorum ipsis convenire, seu privilegium fori illis esse concessum, simulque originem hujus privilegii explicavimus; et rationem ejus reddendo, efficientem et finalem causam ejusdem privilegii declaravimus; consequenter igitur sequitur, ut quid sit hoc privilegium explicemus, quod fieri non potest nisi inquirendo quid per hujusmodi privilegium conferatur; nam tota ratio et essentia ejusdemque privilegii in jure, seu potestate quæ per illud datur, secundum suam generali rationem consistit; speciem autem sumit ex materia in qua vel circa quam versatur. Atque ita etiam fiet, ut quidquid de causa veluti materiali hujus privilegii desiderari potest, simul explicetur. Nam de formali quidem nihil est quod dicamus, quia ipsa libertas seu immunitas est quasi moralis et interna forma, in qua privilegium ipsum consistit; forma autem externa non est nisi confessio ipsa, quæ per verba Scripturæ aut ea-

nonum fit, quæ verba, in his quæ hactenus diximus, et in discursu totius libri, sæpius tractantur et expenduntur. Ex materia igitur, immunitatis illius cognitio maxime pendet; hæc autem materia in duo membra distingui potest: in uno continentur res, actiones, vel passiones, aut munera, aliaque similia, a quibus datur exemptio; sub alio, personæ quibus hæc exemptio datur, comprehenduntur. De his igitur sigillatim dicendum est, atque ita non solum essentiam et causas, sed simul etiam effectus hujus privilegii explicabimus.

2. Prima conclusio: clerici in causis civilibus a judicio sacerulari exempti sunt.—Probatur.—Prima ergo, et (ut sic dicam) antiquissima materia hujus privilegii est forum civile, seu tribunal sacerulare, in quo temporales litigies ad externa bona fortunæ pertinentes tractantur. Certum ergo est, clericos exemptos esse a sacerulari foro in causis civilibus. Probatur primo ex jure canonico, c. 2, de Foro compet., ubi in generali sermo est; sicut etiam 11, q. 1, c. 1 et 3, cum multis aliis, similiter indefinite præcipitur ut clerici ad sacerularia judicia non pertrahantur; et in cap. *Nullus clericus*, additur distributio: *Omne negotium clericorum in Episcopi sui, etc;* et in cap. *Nullus Episcopus*, in specie dicitur: *Negue pro cirili causa;* et in cap. *Placuit*: *Quicumque ab imperatore cognitionem publicorum judiciorum petierit;* et in cap. *Placuit*, 2, ibi: *Vel civilis causa fuerit commota, et similia multa in ea quaestione leguntur.* Et in cap. *Sacerulares*, de Foro competent., in sexto, dicitur, censura ecclesiastica esse compescendos judices sacerulares, qui personas ecclesiasticas ad solvenda debita, audita et judicata causa, compellere præsumunt, quæ causa sine dubio civilis est.

3. Ratione idem suadetur.—Idem præterea certum et constans est in jure civili antiquorum imperatorum, qui de toto foro indefinite loquuntur. Et licet imperator Leo cum sociis, in Leg. *Omnes*, Codice de Episcopis et clericis, in certis casibus, et cum quibusdam conditio-nibus concesserit, ut clerici conveniri possent in foro sacerulari, etiam in civilibus causis, postea hoc revocatum est, tum per Justinianum, qui de causis civilibus absolute locutus est in Auth. *Ut clerici apud proprios Episcopos*, etc., collat. 6, alias novella 83, tum maxime per Fridericum, qui in sua constitutione de utrisque causis, civilibus et criminalibus, in specie locutus est. Et notavit Gloss., in Auth. *Statuimus*, verb. *Vel civili*,

C. de Episc. et Cleric. Et ita hæc pars indubitate est inter catholicos Doctores. Ratio vero seu congruentia est, quia in hac materia eadem vel major necessitas hujus exemptionis est, quæ in quavis alia invenitur, tum quia lites civiles frequentiores esse solent; tum etiam quia majus erat periculum, ne circa hæc temporalia sacerulares judices minus favorabiles clericis essent, vel saltem in exhibenda illic justitia in judicio essent remissi, ut dicitur in c. *Cum sit generale*, de Foro comp.

4. Prædicta exemptione solum quando sunt rei gaudent clerici.—Huic vero regulæ addenda est declaratio, nimirum, clericos esse exemptos in causis civilibus, quando sunt rei, seu ad litem provocati; nam si sint actores, sequi debent forum rei, ut statuit Pelagius Papa relatus in c. *Experientia*, et c. *Si quisquam*, 11, allegans generalem regulam utriusque juris, quod actor sequitur forum rei, cap. *Neminem*, cum multis aliis, 3, q. 6, 1. ult., C. *Ubi in rem actio*, et in l. 2, et in l. 4, de Jurisdict. et ubi quis convenire debeat, in Codice Theodosiano. Unde regula hæc non solum procedit, quando clericus provocat clericum diversi episcopatus, seu distincti fori ecclesiastici, sed etiam quando clericus a laico postulat; tunc enim non potest uti privilegio fori, quia sequi debet forum rei.

5. An Ecclesia potuerit privilegium fori absque limitatione concedere.—*Prima ratio pro negativa parte.*—*Prima confirmatio.*—Ut autem hujus declarationis rationem reddamus, quæri potest an Ecclesia ita limitaverit hoc privilegium, quia non potuerit majus concedere, vel solum quia noluit. Videtur enim illud prius asserendum, nam si Ecclesia potuisse clericos abstrahere a judiciis sacerularibus, etiam quando sunt actores litium civilium, profecto fecisset; nam eadem necessitas tunc intercedit, quia non minora nocimenta possunt clericis provenire ex communicatione cum laicis in sacerularibus judiciis, sive actores, sive rei existant, idemque periculum erit perdendi causas, et infestos habendi judices sacerulares, juxta regulam c. 2, de Imm. eccl., in 6; ergo si Ecclesia id non fecit, ideo est quia non potuit. Et confirmatur, quia Pontifex non potest usurpare jurisdictionem laicorum, juxta c. *Novit*, dc Judic., et alia supra tractata; sed si clericum etiam actorem eximeret a sacerulari judicio, usurparet jurisdictionem laicorum; ergo non potest id facere. Probatur minor, primo, quia judices laici privarentur jurisdictione, quæ ad eos pertinebat. Secundo

et melius, quia reus cogeretur comparere coram non suo judice, nimurum, ecclesiastico, et ita Ecclesia usurparet jurisdictionem in laicu[m].

6. Secunda confirmatio. — **Tertia confirmatio.** — In quo est notanda differentia inter actorem et reum : nam actor non coactus venit ad judicium, sed voluntarie movet illud, et ideo quando agit contra clericum, mirum non est quod ad judicem per se non suum, sed clericis ire compellatur, quia melioris conditionis esse debet is, qui cogitur, quam qui cogit; at vero quando laicus est reus, cogitur comparere, et ideo compelli non potest, nisi coram directo suo judice, alias usurparetur jurisdictione in ipsum; ergo eadem ratione non potuit concedi clero actori privilegium trahendi laicum ad suum forum, seu (quod idem est) extra forum illius. Et confirmatur ex Bart., in dict. l. 3, de Jurisdict. omnium judic., ubi querit, an possit fieri statutum, ut reus sequatur forum actoris, et respondet, pro subditis posse principem hujusmodi facere statuta, non autem posse statuere ut homo non suae jurisdictionis teneatur sequi forum actoris, quia nemo potest statuere de his, quae suae jurisdictionis non sunt. Quæ decisio Bartoli, et ratio ejus, æque videtur in præsenti procedere, quia laicus in temporalibus Ecclesiæ jurisdictionem non subest. Potestque amplius confirmari, nam si fidelis item civilem moveret contra infidelem Ecclesiæ non subditum, non posset Ecclesia cogere reum infidelem ad sequendum forum actoris fidelis; ergo idem erit in præsenti casu.

7. Prima conclusio : Ecclesia potuit clericum etiam actorem eximere. — Nihilominus dicendum est non deesse in Ecclesia potestatem ad eximendum clericum etiam actorem a foro sacerdotali, licet ex suavi providentia et prudenti gubernatione id non fecerit, propter quamdam naturalem æquitatem, cui consentaneum est ut is, qui impetratur, et invitatus trahitur ad judicium, extra forum suum ire non cogatur, ne duplex incommodum sustineat. Nam propter hanc etiam æquitatem, cum sunt partium jura obscura, reo savendum est potius quam actori, ut habet regula 11 juris, in sexto. Prior pars assertionis sumi potest ex Glossa, in c. *Si clericus*, verb. *De consuetudine*, et in capite *Ex transmissa*, in principio, de Foro competent., quatenus dicit non solum posse Papam, sed etiam frequenter concedere rescripta et privilegia clericis, ut in quacumque causa, etiam agendo contra laicum, ad suum

forum illum venire compellant; quam sententiam sequitur ibi Panormitan., et refert Archidiac. et Speculatorem. Hostiensis vero, in Summa, tit. de Foro compet., § *Quibus ex causis*, vers. *Ex præmissis*, dicit, in curia Romana indistincte clericum contra laicum impetrare hujusmodi favorem.

8. Probatur assertio. — Ex hac ergo consuetudine et sententia communis probatur assertio, quia privilegium favorabile, quod Papa potest concedere multis clericis ut singulis, potest etiam omnibus clericis in favorem totius communis et status clericalis concedere, si judicet expedire; sed saepe concedit multis personis ecclesiasticis, ut etiam agendo sint exempti a foro sacerdotali; ergo potuit etiam idem concedere toti statui clericali. Major probatur primo, quia eadem est ratio totius et partis, quod ad potestatem attinet, si causa proportionata subsit. Secundo, quia illa consuetudo sufficienter ostendit, hujusmodi privilegium ex suo genere et forma non esse intrinsece malum, nec contra naturalem iustitiam; ergo nec respectu totius cleri potest talis iniquitas probabili ratione ostendi; ergo non est cur tale privilegium excedat Pontificiam potestatem. Quæ ratio absolute probat assertionem, et ostendit consuetudinem illam concedendi talia privilegia personis aliquibus esse justam, et rationi consentaneam, quod magis respondendo ad argumenta comprobabitur. Accedit, quod cum ostensum sit privilegium hoc exemptionis esse immediate concessum jure divino, difficilius videtur ad explicandum, quonodo potuerit Ecclesia hanc limitationem facere, quam utrum possit illam non facere; quia stando in jure divino, privilegium absolutum omnino est, et sine limitatione concessum; ergo potuisset Ecclesia ita illud exequi, et plenum illius usum conservare. Quia vero, ut diximus saepe, hoc privilegium ita fuit datum a Christo, ut dispositioni Pontificum quoad moderationem, extensionem, vel particularem mutationem commissum sit, ideo potuit Ecclesia praedicto modo illud moderari, et ex parte cedere juri suo, propter congruentes rationes, quæ solvendo argumenta magis explicabuntur, et altera pars assertionis confirmabitur.

9. Solvuntur rationes in contrarium factæ. — Ad primam ergo conjecturam respondemus negando consequentiam; non enim omnia, quæ fieri possunt vel licent, expedient. Unde, licet verum sit non deesse congruentias, ob quas posset Ecclesia hunc favorem concedere

clero, nihilominus voluerunt Pontifices conformari legibus civilibus in hac regula, ut actor sequatur forum rei, ut dicitur in dicto cap. *Si quisquam*, 11, q. 1, tum quia hoc est valde consentaneum aequitati naturali, ut dixi; tum etiam quia hujusmodi actiones et motiones litium pro rebus temporalibus, ordinarie procedunt ex nimio affectu divitiarum, qui personas ecclesiasticas non decet, ideoque, regulariter loquendo, vitare debent clerici hujusmodi actiones, præsertim pro suis secularibus bonis, nisi evidens et gravis ratio cogat. Ne igitur Ecclesia hujusmodi lites fovere videretur, noluit clericos eximere agendo, sed tantum respondendo, quia tunc solum se defendunt, quod et justum et honestum est. Potuit etiam id facere Ecclesia, ne judicia ecclesiastica tot litibus laicorum gravarentur, et ne laicos etiam offenderet, et forensem jurisdictionem nimium affectare videretur. Ideoque quando privatæ exceptions vel favores ab illa regula fiunt per specialia privilegia, non propter solas generales rationes decentiæ aut commodi clericalis status, sed adjunctis aliis specialibus, juxta varias occurrentes circumstantias, conceduntur.

10. *Ad Bartolum.* — Ad secundam confirmationem, et ad Bartoli doctrinam respondeatur, posse in contrarium retorqueri: nam si princeps potest inter subditos statuere, vel privilegium dare, ut reus sequatur forum actoris, etiam Papa poterit idem privilegium dare clericis respectu aliorum fidelium, quia omnes sunt ejus subditi. Neque obstat quod fideles laici non sint directe subditi Papæ in temporalibus; nam satis est quod indirecte subdantur; nam, sicut spiritualis potestas sufficit ad disponendum circa temporalia, quando spiritualis ratio et finis id requirit, quod est indirecte disponere, ita eadem potestas sufficit ad concedendum illud privilegium inter directe subditos in spiritualibus, et indirecte in temporalibus. Quam ob causam, quando Papa concedit hujusmodi specialia privilegia, non usurpat jurisdictionem sæcularis iudicis, sed potestate sua superiori illam alteri committit. Neque etiam reus cogitur comparere coram judge non suo, sed ab uno judge in alium causa transfertur per eum qui legitimam potestatem habet. Quod ergo in particularibus privilegiis dicimus, in generali etiam dicendum esset, si de absoluta potestate Pontificis concederetur. Unde ultimam ampliationem addo, potestatem hanc Pontificiam de se etiam extendi ad concedendum hoc privile-

gium respectu infidelium, si ad bonum fidei, et vitanda moralia pericula necessarium esset, ut in superioribus dictum est; usus tamen hujus potestatis in effectu non ita potest executioni mandari circa infideles, quia non possunt spiritualiter cogi sicut fideles, et ad cogendos illos corporaliter saepe vires non suppetunt.

11. *An predictum privilegium fori exceptiōnem admittat.* — *Prima exceptio ab aliquibus assignata.* — *Rejicitur predicta exceptio.* — Interrogari autem potest, an predicta regula, ejusve declaratio aliquam exceptionem patiatur. Ad quod breviter affirmando respondeamus. Advertendum est autem exceptionem hanc assignari posse, vel ex parte personarum quibus hoc privilegium conceditur, vel ex parte causarum seu materiarum de quibus tractatur. Nunc ergo priorem modum excipiendi omissimus; nam infra agendum est de personis, ibique dicemus quænam simpliciter hoc privilegio gaudeant, quæ vero cum aliqua limitatione. In posteriori ergo genere, prima exceptio ab aliquibus assignatur de causis realibus, id est, fundatis in re mere temporali, non interveniente actione aliqua personali ipsius clerici, in qua lis seu causa fundetur; quia tunc persona non est obligata, nec trahitur ad iudicium, sed res, quæ mere temporalis est. Privilegium autem fori solum eximit personas clericorum, ne conveniri possint civiliter. Hæc autem exceptio vera non est, et multum derogat privilegio clericorum, et ideo communiter rejicitur, ut bene notavit Abbas, in c. *Qualiter*, de *Judic.*, n. 8, et in c. *Ecclesia*, de *Constitut.*, n. 22, et usū ipso satis improbatur. Ratio est, quia generalis regula iurum eximit clericos, ne conveniri possint civiliter in iudicio sæculari; at vero causa realis civilis est, nec potest tractari sine citatione personæ ad quam bona pertinent; ergo, si talis causa pertinet ad iudicem laicum, etiam si dominus bonorum sit clericus, necessarium erit clericum ipsum conveniri civiliter coram judge sæculari; hæc autem est exceptio a regula, quæ nullo iure probatur; ergo admittenda non est. Præser-tim quia est parum consentanea aliis iuribus, ut in *Panor.* supra, *Felin.*, et aliis videri potest.

12. *Secunda exceptio.* — Alia igitur exceptio vera et communis est de feudis, seu bonis feudalibus, nam in causis quæ ad hæc bona pertinent, licet clericus sit rens, et conveniatur a laico, coram domino feudi conveniri de-

bet, etiamsi laicus sit, cuius ratio non est alia, nisi quia in favorem feudorum ita in jure dispositum est, c. *Ex transmissa*, et c. *Verum*, de Foro compet., ubi late expositores. Vel certe ratio etiam reddi potest, quia res, quae in feudum dantur, a principio sub hoc onere vel conditione conferuntur, et ideo servanda est.

43. Tertia exceptio. — Unde alia est generalis exceptio, quae sub his verbis interdum per leges civiles traditur, scilicet, ut clericus convenientius sit in causa civili coram ecclesiastico judice, *nisi bona, super quibus lis movetur, regalia sint*, nam sub hac conditione data censentur. Ideinque est, quoties bona a principio data fuerunt clericis vel Ecclesiæ, sub ea conditione, ut semper sub eodem foro maneant, sub quo tunc existebant. Nam talis conditio non est per se mala, et voluntarie potuit apponi, et ideo servanda est, juxta regulam communiter a jurisperitis receptam, quando aliqua bona dantur Ecclesiæ sub aliqua conditione, onere, aut pacto non illico, servandum esse, quia servare pactum est de jure naturæ, cui jus canonicum non contradicit; imo expresse et in propria specie id confirmat c. *Verum*, de Condit. apppsitis, ubi id notant Panorm. et alii Doctores, Joan. Andr. et Hostiens, in c. *Verum*, de Foro comp.; Felin., in c. *Ecclesia S. Mariæ*, de Constit. ; et Ancharran., cons. 223. Præter has exceptiones solent addi aliae, quas attigit Navarr., in cap. *Norit*, de Judiciis, notabil. 6, ex Stephano Aufrerio, decisi. 126 et 167; et ex Gullielmo Benedicto, in *Repetition.*, c. *Rainutius*, de Testam. ; illas tamen omitto, quia incertæ sunt, et quia materia hæc non tam ad Theologos, quam ad jurisperitos pertinet. Unde alias exceptions late prosequitur Gregor. Lopez, in l. 57, tit. 6, partit. 1.

44. Quarta exceptio. — Circa declarationem autem assertionis notari possunt exceptiones aliae. Una est, si bona, de quibus lis movetur, sint Ecclesiæ vel clericis, nam tunc clericus potest trahere laicum coram ecclesiastico judice. Ita tenet Panorm., in cap. *Ecclesia S. Mariæ*, n. 22, ubi dicit esse casum singularem, in c. *Si clericus laicum*, de Foro compet., ubi idem ipse docet, ita interpretans illum textum. Addit etiam ita servari in curia, ut refert (inquit) et sequitur Collector, in c. *Qualiter*, et in c. *Clerici*, de Judiciis. In contrarium tamen sententiam inclinat Felin., in dicto c. *Si clericus laicum*, n. 4. Fundamentum ejus est, quia hoc non statuitur directe in dict.

c. *Si clericus*, ut constat ex verbis ejus: *Si clericus laicum de rebus suis vel Ecclesiæ impetrerit, et laicus res ipsas, non Ecclesiæ aut clericis, sed suas proprias asseverat, debet de rigore juris ad forensem judicem trahi.* In quibus verbis solum disponitur, quando laicus negat res esse Ecclesiæ vel clericis, non posse trahi ad judicium ecclesiasticum. Hinc autem non potest inferri, quando id non negat, posse trahi, nisi ad summum a contrario sensu. Quod argumentum non est efficax, quando talis sensus est contra alias generales regulas juris, prout est in præsenti, quod reus non est trahendus ad forum actoris, sed ad suum. Et hæc sententia mihi magis placet.

45. Qui bona Ecclesiæ injuste rapit, coram judice ecclesiastico conveniri debet. — *Objectio quædam refellitur.* — Potest autem notari aliqua differentia inter bona Ecclesiæ et bona clericorum. Nam si certo constet bona Ecclesiæ rapta esse, vel injuste ablata, vel retenta, tunc ratione sacrilegii potest conveniri laicus eorum ecclesiastico judice; secus vero erit, si non constet injuste detineri, et laicus contendat aliquo justo titulo se illa possidere. Et hoc tantum probatur in dict. cap., et in cap. *Similiter*, 16, q. 1, sumpto ex Concilio VI Romano sub Symmacho. Bona autem clericorum non sunt ita sacra, sicut res Ecclesiæ, et ideo accipi possunt etiam injuste sine sacrilegio, ideoque licet de illis propter hanc causam lis moveatur, coram laico judice convenientius erit reus laicus, nisi allegetur vis aliqua clero facta, quae sacrilegium involvat, ut sensit Innocent., in capit. *Cum sit*, de Foro compet. Objici autem potest, quia in dicta Synodo sub Symmacho res Episcoporum æquiparantur in hoc bonis Ecclesiæ. Sed consideranda est ratio Pontificis, *quia Episcoporum res non dubitantur esse Ecclesiæ*. Et ita intelligo textum illum secundum consuetudinem illius temporis, in quo dominium bonorum Episcopi apud Ecclesiam esse censebatur; nunc autem satis nota est distinctio dominiorum, et ideo alia est ratio.

46. Quinta exceptio. — Alia exceptio est, quod ex consuetudine interdum actor ecclesiasticus potest reum trahere ad forum suum, et ita fit exceptio in hac materia circa illam regulam, quod actor sequitur forum rei, Nisi ubi aliud sit consuetudine introductum. Hæc exceptio colligi solet ex c. *Si Clericus*, de Foro comp., ubi postquam Alexander III dixit, actorem de iure juris debere sequi forum rei, addit: *Licet in plerisque partibus aliter*

de consuetudine habeatur. Quæ verba duobus modis intelligi possunt: primo, ut prædicta regula et rigor juris servetur, etiam si contraria consuetudo allegetur, quia est contra omnia jura, ut ibi ait Glossa. Secundo, ut regula illa et rigor juris servetur, nisi ubi fuerit illi per consuetudinem derogatum. Et hic posterior est legitimus sensus, ut ibi Hostiensis, Joannes Andreas, Panormitanus et alii expositores agnoscant, et in illo fundant prædictam exceptionem. Quam aperte indicant ipsa verba Pontificis, quæ in ipso Concilio Lateranensi, sub Alexandro III, p. 8, cap. 7, sic leguntur: *Licet in plerisque partibus aliter de consuetudine fiat*, quod factum non reprobatur, sed potius tacite approbat. Et ratio est, quia illa consuetudo non est mala, nec contra jus naturale, ut ex proxime dictis constat; ergo ex hac parte potest derogare juri positivo; aliunde vero est etiam favorabilis religioni, et ideo merito approbanda et servanda est.

17. *Nulla consuetudine potest clericus reus ad sæculare judicium trahi.* — In quo est notanda differentia inter hanc consuetudinem et aliam (si alicubi introduceatur), ut actor laicus ad suum forum trahat clericum provocatum; nam, licet prior valida sit, hæc est invalida, quia prior favet ecclesiastice libertati illamque auget, posterior vero est immunitati contraria, multumque divino juri derogat. Ideoque in jure esse reprobata et iidem interpretes in eodem c. notant, et infra suo loco latius dicemus. Dicit tamen Glossa, in d. cap. *Si clericus*, hanc consuetudinem per occasionem negligentiae judicium sæcularium introductam esse, quia clericis justitiam non exhibebant, argumento c. *Cum sit generale*, et c. *Licet*, et cap. *Ex tenore*, de Foro compet. Verumtamen hoc ad factum pertinet; potest enim illa consuetudo ex pietate laicorum vel ex quadam incogitania introduci. Et quacumque occasione introducatur, exceptio locum habet, quia et textus ille simpliciter loquitur, et ratio eadem procedit. Similisque exceptio esse potest, ut actor sequatur forum rei, nisi alind ei sit speciali privilegio legitime concessum, quæ satis constat ex dictis, nihilque addere oportet, nisi quod tenor privilegii juxta communes privilegiorum regulas observetur.

18. *Sexta exceptio.* — *Declaratur exceptio.* — Hinc vero addi potest alia exceptio, nimirum, ut etiam seclusa consuetudine vel privilegio, si judex laicus negligat justitiam exhibere clericu actori, possit laicus coram ecclesiastico judice conveniri. Ita videtur sentire

Glossa in c. *Cum sit generale*, verbo *Remissi*, et in c. *Licet*, verbo *Vacante*, de Foro comp., quam ibi approbant Doctores, et in illis textibus fundant, quamvis ex eis non satis colligatur, nisi in casibus in illis expressis, videlicet, in quibusdam causis criminalibus, de quibus in capite sequenti dicendum est, vel quando imperium aut magistratus ita vacat, ut clericu judicem sæcularem non inveniant, ad quem recurrant, ut justitiam ipsis exhibeat. Nihilominus tamen ex paritate rationis admittenda est exceptio. Intelligenda tamen videtur hoc modo, ut quando laicus judex est negligens, recurrere possit clericus ad judicem ecclesiasticum, qui potest laicum per censuras compellere, ut suo munere juste utatur, argumento c. *Administratores*, 23, quæst. quinta, quia illa est gravis culpa, et clericis injuriosa, et ideo ad judicem ecclesiasticum pertinet remedium adhibere. Unde si judex laicus contumax fuerit, merito potest judex ecclesiasticus causam ad se advolare, partim in pœnam judicis negligentis et contumacis, partim in clericu defensionem. Et ita etiam facile possunt intelligi aliae exceptiones, quas ponit Glossa, in dicto cap. *Licet*, de quibus ibi etiam expositores videri possunt.

19. *An propter ecclesiastici judicis negligentiam possit clericus reus ad sæculare judicium trahi.* — *Ratio dubitandi.* — Quæri autem potest an hæc exceptio de negligentia judicis laici similiter habeat locum, quando judex ecclesiasticus est negligens respectu actoris laici rem suam a clero postulantis. Videtur enim esse admittenda, quia Justinianus, in Authentica de Sanctissimis Episcopis, collat. 9, alias novell. 123, capit. 21, § *Si quis autem pecunaria, statuit, in easu negligentiae judicis ecclesiastici licitum esse actori laico, coram sæculari judice clericum vocare.* Et in novell. 83, seu Authent. *Ut clericu apud proprios Episcopos, etc.*, hoc ad alios casus extendit. Et refertur in cap. *Si quis cum clero*, 11, quæst. 1. Et favet cap. *Filiis*, 16, quæst. 7, ubi Glossa, verb. *Regis*, idem sentit. Verumtamen in hoc nulla ratio habenda est decisionum Justiniani, qui non potuit exemptionem clericorum limitare, quia materia hæc non juris civilis est, sed canonici, ut infra generalius dicam.

20. *Resolvitur dubium.* — Dicendum ergo est non licere propter negligentiam judicis ecclesiastici clericum conveniri coram sæculari. Ita statuit Innocentius III, in c. *Qualiter et quando*, de Judicis, ubi Prælatis præcepit,

ut laicis, de clericis conquerentibus, plenam faciant justitiam exhibere, ne hac occasione clerici a laicis trahantur ad judicium sacerdotale, quod (inquit) omnino fieri prohibemus. Quae prohibitio ita intelligenda est, ut non solum vetet simpliciter clericos trahi ad sacerdotalia judicia, quod jam antea prohibitum erat; sed etiam prohibeat ut propter illam causam, vel occasionem, aut sub illo colore non fiat. Et ita intellexerunt textum illum Glossa ibi, et optime Panormitan., n. 7, et idem tenet Glossa, in c. *Placuit*, 1, 11, q. 4, verbo *Petierit*; et Archidiacon., in dicto capite *Filiis*. Ratio autem est, quia judex sacerdotalis nullam habet jurisdictionem in clericum reum, nec imperator illam dare potest, aut rex; nec propter negligentiam judicis ecclesiastici ipso facto illum acquirit ex vi juris naturalis, divini, aut canonici; ergo non potest sine jurisdictione talem causam suscipere. Deinde judex laicus est inferior ecclesiastico; inferior autem non potest supplere defectum superioris. Ergo.

21. *Cur negligentia judicis sacerdotalis possit suppleri per ecclesiasticum, non vero e converso.—Exponuntur jura in contrarium adducta.*—Et hinc facile colligitur differentia inter judices sacerdotalem et ecclesiasticum; nam sacerdotalis est inferior, et ideo negligentia ejus potest suppleri per ecclesiasticum, utique in virtute juris canonici, quod est supra civile, et ita statuit per potestatem, quam Pontifex habet ad corrigendos defectus judicium sacerdotale. Judex autem ecclesiasticus est superior, et ideo sacerdotalis non potest per se, et (ut ita dicam) virtute sua ejus defectum supplere; neque etiam virtute juris civilis, quod etiam potestatem in clericum non habet, nec directam, nec indirectam. Neque jus canonicum talem potestatem ei dare voluit, neque id permittere, propter decentiam clericorum et Praelatorum Ecclesiæ. In illo ergo casu remedium postulandum est a superiori Praelato. Quod autem in dicto cap. *Filiis* dicitur, si Praelatus sit negligens, implorari posse regem, vel intelligitur tantum in speciali casu, quando bona Ecclesiæ per clericos dilapidantur, in quo loquitur ille textus; vel intelligitur adiri posse regem non ut judicem, sed ut protectorem et defensorem, ut auctoritate sua moneat Praelatum, et sua potentia res Ecclesiæ interim tueatur ac defendat, donec Summus Pontifex consuli possit. Quomodo intelligenda et concilianda sunt multa jura, quæ a Gratiano referuntur, 11, q. 4, cap. *Si quis clericus*, cap. *Placuit*, cap. *Christianis*, et 23, q. 3, cap. *Ab Impera-*

toribus, et q. 5, cap. *Regum*, et cap. *Administratores*. De quibus infra, capite ultimo, aliquid addemus.

CAPUT XV.

QUALIS SIT EXEMPTIO CLERICORUM IN CAUSIS CRIMINALIBUS.

1. *Prima assertio.—Jura canonica exemptionem a foro sacerdotali absolute concedentia*—Regula generalis est, personas ecclesiasticas gaudere immunitate seu privilegio fori in causis criminalibus, non solum in criminibus ecclesiasticis, sed etiam in civilibus, ut verbis utamur Justiniani ita distinguentis loco statim citando. Assertio haec certissima est, et ab omnibus scriptoribus catholicis recepta; et negari non potest nisi negando aliquod principium fidei. Tam evidenter enim traditur in jure canonico, ut nemo qui magna ignorantia non labore, negare possit assertionem, nisi qui negaverit, esse in Ecclesia potestatem ad hujusmodi exemptionem vel tuendam, vel concedendam; quod repugnat principiis fidei, ut ostendimus. Decreta autem canonica de hac re antiqua habentur 11, quæst. 1. Ex quibus aliqua indefinite prohibent, ne clerici ad judicium sacerdotale deferantur, ut capit. 1, cap. *Placuit*, cum similibus; quæ, ut supra dixi, omnem causam, tam civilem quam criminalem, comprehendunt; alia prohibent laicis accusare, distingere, comprehendere, vel punire clericum, ut c. 2, cap. *Nullus clericus*, c. *Si quis clericos*, cum aliis. Illa autem verba propria sunt criminalium causarum. Alia loquuntur expresse et in specie de criminali causa, c. *Nullus Episcopus*, c. *Clericus nullus*, capit. *Placuit*, 2, ex Concilio Carthag., cap. 9, et c. *Clericum*, 3, ex Concilio Agath., c. 3.

2. *Lectiones diversæ cap. Clericum, 3.—In quo canone advertendum est, aliter legi in ipso Concilio quam a Gratiano citetur. Gratianus enim in casu accusandi ait: Clericum nullus presumat apud sacerdotalem judicem pulsare, etc. in Concilio vero legitur in casu nominandi: Clericus non presumat apud sacerdotalem judicem quemquam pulsare.* Et eodem modo legitur simile decretum, in epist. 2 Marcellini Papæ, unde videtur Concilium illud sumpsisse. Ille autem lectiones sensus multum diversos reddunt, ut constat. Unde verisimile est, vel Gratiani codices fuisse corruptos, vel ipsum Gratianum usum fuisse aliquo Concilio

male conscripto, quia nec præsumi potest, Gratianum ex industria verba Concilii mutasse, neque ita probabile est in epistola Pontificis, et in Concilio mendum accidisse. Sed hoc nihil obstat, tum quia alia decreta sufficient ad confirmandam veritatem; tum etiam quia ibidem adduntur alia verba, quæ eamdem exemptionem significant. Nam Marcellinus, postquam dixit: *Clericus nullum præsumat ad sæculare judicium attrahere*, addit: *Nec laico quemlibet clericum liceat accusare*; quod si absolute ut sonat intelligatur, majus certe privilegium clericorum est; si vero referatur ad judicium sæculare tantum, ut est probabile, juxta verba proxime præcedentia, ibi continetur exemptio clerici in criminali causa a judicio sæculari. Nam ideo accusari non potest, quia judicari non potest. Quod si a laico accusari non debet, multo minus a clero, quod ibi tanquam notum supponitur.

3. Concilium etiam postquam prohibuit clericum ne alium pulsset, addit: *Sed si pulsatus fuerit* (utique clericus, de illo enim sermonem prosequitur), *non respondeat, nec proponat, neque audeat criminale negotium in judicio sæculari præponere*, vel potius proponere, ut legit Gratianus. Juxta quem sensum, utrumque in illo canone continetur, scilicet, ut clericus non accuset laicum coram judice sæculari, præsertim criminaliter, inconsulto suo Episcopo, et ut accusatus seu pulsatus non respondeat. In quo privilegium fori quoad criminalia continetur; ideo enim clericus respondere non debet, quia non in suo foro pulsatur. Et ita quoad sensum in idem redit Gratiani lectio, ordine commutato. Nam priori loco, cum ait: *Clericum, etc., declarat privilegium clerici*; in fine vero cum dicit: *Nec criminale negotium audeat in sæculari judicio proponere*, alteram prohibitionem factam clero accusandi laicum criminaliter sine licentia Episcopi insinuat. Quam prius tradiderat Fabianus Papa, epist. 2, et habetur in e. *Si quis sacerdotes*, 2, q. 7. Et similis canon habetur in Conc. Aurelianensi III, c. 31.

4. Decreta etiam posteriora eamdem immunitatem in criminalibus decernunt, capit. *Clerici*, et cap. *Qualiter et quando*, de Judiciis, et cap. 2, et cap. *Si diligenter*, cum similibus, de Foro competenti. Et in dicto capit. *Clerici*, dicit Alexander III, in hoc jus civile cum canonico concordare, quia leges tradunt generaliter ut de omni crimine clero beat coram ecclesiastico judice conveniri. Quod est verum de moderno jure civili; nam Fridericus,

in sua constitutione, id specialiter expressit, et habet in Authent. *Statuimus*, de Episcop. et Cleric.; et Honorius III illud acceptavit, et per omnia posteriora jura regnorum catholicon confirmatum est.

5. *Quid de criminibus clericorum Gratianus statuerit.* — Jure vero antiquiori civili contrarium statuerat Justinianus, dicta novell. 83, ubi distinguit duplia crimina, quædam ecclesiastica, ut error in fide, sacrilegium, delicta in administratione ordinum aut beneficiorum; et de his concedit ut clericus ad solum ecclesiasticum forum deferatur, quæ non est concessio (quidquid ipse existimasse videatur) sed recognitio et confessio divini juris. Alia vocat delicta civilia, et de his voluit judicium etiam in personis clericorum ad sæculares judices pertinere. Addit vero limitationem his verbis: *Illud palam est, si reum esse putaverit eum, qui convenientur, provinciae præses, et pœna judicaverit dignum, prius hunc spoliari ab Episcopo sacerdotali dignitate, et ita sub legum fieri manu.* Quod videtur intellexisse quantum ad executionem poenæ; nam ad inchoandam, et prosequendam causam, et ad cognitionem illius sumendam, nulla requireretur facultas vel diligentia Episcopi. Et ita sentit Glossa ibi.

6. Addit tamen eadem Glossa, ad sententiam condemnatoriam ferendam, præmittendum fuisse spoliationem illam, seu privationem sacerdotii, quamvis sententiam absolutoriā posset judex sæcularis proferre sine cooperatione Episcopi. Sed non video quomodo possit Episcopus aliquem degradare (hoc enim est spoliare sacerdotio), ante latam sententiam de crimen, et de pœna propter illud inferenda. Unde verba ipsa hoc indicant, ibi: *Si reum esse putaverit, et pœna judicaverit dignum.* Oportebat ergo antecedere hoc judicium, utique forense et authenticum, quod per sententiam condemnatoriam profertur. Cum ergo subjungit, *prius hunc spoliari*, subintelligendum est, prius quam pœna infligatur, non prius quam sententia feratur. Et ita declaratur in Authent. *Clericus*, C. de Episcop. et cler., ibi: *Nec tamen puniatur, etiam si reus fuerit inventus.* Ac præterea non videatur id posse intelli generaliter de omni sententia condemnatoria, nec de omni pœna; sed de pœna sanguinis, vel corporali adeo gravi aut contumeliosa, ut privationem sacerdotii prærequirat; hanc enim non omnis pœna præexigit, ut patet in exilio, perpetuo carcere, pecuniaria, et similibus. Igitur ex vi illius

legis omnino privabantur clerici privilegio fori in criminibus non canonice quoad totum negotium et causam, præterquam in executione quarundam poenarum, quæ postulant degradationem per Episcopum faciendam. Postea vero idem Justinianus, in Authentico de Sanctissimis Episcopis, cap. 21, hoc limitavit, tecisque hæc crimina clericorum misti fori, et quando ad sacerdotiale prius deferuntur, alium ordinem constituit, qui ibi videri potest. Et ante Justinianum prius hoc fuerat statutum a Valente et sociis, in l. 23 de Episcop. et Cleric., in Codice Theodosiano.

7. Prædictæ leges Justiniani nullæ fuerunt. — Verumtamen hæc leges non solum revocatae sunt per constitutionem Friderici (ut notavit Glossa, in dicta Auth. *Statuimus*), sed etiam per jura canonica; imo a principio fuerunt invalidæ, et nullius effectus, quia et erant contra jus divinum, et contra jura canonica, et contra priorum imperatorum concessiones, presertim Constantini, l. 7; C. de Episc. et cleric., quam cum aliis similibus innovarunt Theodosius et Valentinianus, in l. 46 et 47 eiusdem tituli, ubi prius generaliter omnia privilegia a piis imperatoribus antea clericis concessa innovantur; postea vero additur: *Clericos etiam, quos indiscretim ad sacerdotiales judices debere deduci infaustus præsumptor* (utique Julianus Apostata) *edixerat, Episcopali audientiae reservamus. Fas enim non est ut divini munera ministri temporalium potestatum subdantur arbitrio.*

8. Solum unus superest scrupulus in jure canonico ex Concilio Matisconensi I, cap. 7, ubi prius regula generalis his verbis traditur: Nullus clericu: de qualibet causa extra discussionem Episcopi sui a sacerdotiali judice injuriari patiatur, aut custodiae deputetur. Postea vero additur exceptio, in qua est difficultas: *Quod si quicumque judex cujuscumque clericum absque causa criminali, id est, homicidio, furto, aut maleficio, hoc facere fortasse præsumperit, quandiu Episcopo loci illius visum fuerit, ab ecclesiæ liminibus arceatur.* Ubi dicens, *absque causa criminali* videtur exceptionem constituere, regulæ a nobis positæ contraria. Unde videtur illud Concilium, quod paulo post tempora Justiniani celebratum est, jus civile illius temporis fuisse imitatum, vel fortasse in Gallia fuisse tunc illam consuetudinem. Advertito tamen ibi non excipere Concilium omne iudicium criminale, alias esset exceptio regulæ contraria, sed excipere quædam peccata, quæ per antonomasiam crimina vocat, qualia

sunt quæ ibi numerat. Et hoc modo potuit esse exceptio tolerabilis eo tempore, et solum pro illa provincia, in qua forte tunc Episcopi poterant similem facultatem laicis dare, ut infra videbimus. Nunc autem neque Episcopis hoc licet, ut infra etiam ostendam, nec similis exceptio admittenda est, ut mox dicam.

9. An assertio tradita exceptionem patiatur. — **Conclusio.** — Dubitari ergo potest an regula posita aliquam admittat exceptionem. Quæ interrogatio, ut capite præcedenti dixi, intelligi potest, vel ex parte personarum, vel ex parte materiae, seu criminum. De personis dicam infra, nunc autem suppono nullas personas excipi, nisi quæ vel per legem canonicam, vel per justam sententiam ecclesiasticam, vel per Pontificis delegationem judicii laico factam, hoc privilegio privantur. De criminibus autem dico, nullum omnino a prædicta regula excipi ex vi juris communis. Probatur, quia ita est in jure expressum, in c. *Cum non ab homine*, de Judic., ibi: *Sive in furto, sive in homicidio, sive in perjurio, sive in alio crimen*, etc. Et in c. *At si clerici*, eodem tit., prius absolute dicitur, clericos non solum non posse pro crimen a judice sacerdotiali condemnari, verum etiam acta coram tali judice, etiam si in eis clericus convictus sit vel confessus, nihil ei nocere. Et ex illo textu, cum § sequenti constat, tam majora quam minora crimina clericorum ad ecclesiasticum judicem pertinere. Et in c. *Clerici* dicitur, sacros canones imitari leges generaliter statuentes, ut de omni crimen clericus debeat coram ecclesiastico judice conveniri. Denique in communi jure nulla talis exceptio invenitur, neque etiam consuetudine introduci potest, quæ legis vim habeat, ut expresse dicitur in dicto cap. *Clerici*; ergo non potest talis exceptio cum fundamento affirmari.

10. Ratione confirmatur assertio. — Additiam potest ratio satis congrua, quia si exceptio admittenda esset, vel id foret propter gravitatem criminis, vel propter levitatem: hoc posterius nullus dicet, quia leviora peccata facilius possunt per proprium ecclesiasticum judicem cognosci et puniri. Crimina vero graviora clericorum, magis necessarium est non tractari a laicis, imo neque cognosci aut sciri, si fieri posset; et præterea per ecclesiasticum judicem possunt sufficienter vel curari vel vindicari. Quod si ad hoc fuerit necessaria potentia sacerdotalis, non propterea debuit iudicium talium criminum sacerdaribus committi; multo enim convenientius est ut ipsi non se

intromittant donec vocentur, et ut requisiti ab ecclesiastico judice, auxilium suum impendere teneantur, juxta cap. *Ut famæ*, de Sentent. excommunicat. Dixi nihilominus hoc intelligendum esse *de jure communi*, nam ex privilegio solent in aliquibus regnis excipi aliqua crima clericorum, de quibus magistratus civiles cognoscere possunt, ut crimen læsæ majestatis, fabricationis falsæ monetæ, etc.; oportet tamen ut privilegium illud Pontificium sit, quia nullus rex vel princeps sacerularis potest hoc privilegium dare, ut infra dicetur.

11. An regula posita amplietur. — Secundo. quæri potest, an regula hæc aliquam ampliationem admissit. Ad quod breviter respondeo, ex parte materiæ seu criminum non posse ampliari, quia extenditur ad omnia crimina, quibus nullum addi potest. Ex parte vero iudicij seu iudicis, notari potest duplex ampliatio. Una est, ut neque directe neque per modum reconvocationis possit laicus judex de crimeni clerici cognoscere, ut notavit Joannes Lup., tract. de Libert. Eccles., p. 2, q. 1, n. 2, ex cap. *Qualiter et quando*, de Judiciis, in quo expendo particulam illam, *omnino prohibitus*, nam perinde fuit dicere *omnino*, quod quocumque modo. Item ampliatur ab eodem auctore, ut etiam in casu negligentiae iudicis ecclesiastici non possit sacerularis de quocumque crimeni clerici cognoscere, hoc enim a fortiori probant supra dicta in fine capituli præcedentis. Quid vero possit interdum agere sacerularis potestas circa clericum malefactorem per modum defensionis vel auxillii, infra videbimus.

12. Responsio. — *Etiam in criminalibus actor debet sequi forum rei.* — Tertio quæri potest, an in materia criminali locum habeat declaratio de actore et reo, capite præcedenti data in materia civili. Respondeo, sine dubio esse eamdem vel maiorem rationem de criminalibus, quam de causis civilibus¹. Ita docent autores allegati præcedenti capite. Et eisdem iuribus probari potest, nam præter ea quæ generaliter loquuntur, in c. *Si quisquam*, 11, quæst. 1, dicitur canones imitari leges in dicta regula, quod actor sequi debet forum rei; hæc autem regula expresse traditur pro causis criminalibus in l. *In criminali*, Cod. de Juris. omni. judic., in l. ult., Cod. *Ubi in rem actionem*.

¹ Vide Julium Clar., § final., q. 36; et Stephan. Aufrer., in Clementin. *Ut cleric.* de Offic. ordina., limitat. 13.

Rationes etiam supra factæ non minus de criminalibus causis procedunt, quam de civilibus. Imo major quædam ratio in rebus criminalibus intercedit, quia minus decet magisque periculum est, clericum contra laicum actionem criminali intentare, quam civilem, quia in criminali intercedit quædam vindicta et periculum odii, et ita potest facilius scandalum generare. Quod adeo verum est, ut ob hanc causam antiqui canones prohibuerint clericum, inconsulto Episcopo, laicum accusare.

13. Malefactores Ecclesiarum et clericorum percussores in iudicio ecclesiastico conveniri possunt. — Nihilominus tamen in hac materia additur quædam exceptio in'cap. *Cum sit generale*, de Foro compet., his verbis : *In favorem Ecclesie est introductum, ut malefactores suos, qui sacrilegi sunt censendi, venerabilium locorum rectores possint sub quo maluerint iudice convenire*; ubi solum adverto, non excipere omnes malefactores clericorum, alias exceptio destrueret regulam; excipit ergo malefactores Ecclesiarum, quales sunt raptiores, et similes, ut ibi Glossa notat. Verum est tamen etiam percussores clericorum posse ad ecclesiasticum iudicium deferri, non ratione personæ accusantis, si sit clericus, quasi ipsa trahat reum ad suum forum, sed ratione sacrilegii, quod est ecclesiastici vel saltem misti fori. Reliqua de hac declaratione videri possunt in Glossa et Doctoribus ibi. Et quæ de alia moderatione fundata in negligentia iudicis laici supra diximus, hic applicanda sunt, ut constat.

14. An privilegium fori ad crimina ante illud commissa extendatur. — *Ratio dubitandi pro parte negativa.* — Tandem inquiri hic potest, an hoc privilegium seu exceptio extendatur ad præterita, id est, ad crimina ante clericatum commissa, seu eo tempore quo aliquis non gaudebat privilegio fori quacumque ex causa, etiamsi alias clericus esset. Ratio dubitandi est, quia qui deliquit in statu clericali, licet postea relinquat statum clericalem (ut contingere potest in clericis nou ordinatis in sacris, et in religiosis non professis, vel professis, qui per dispensationem statum mutarunt), ille (inquam) semper gaudet privilegio quoad illud delictum durante statu commissum, ut docent Covarr., in Pract., c. 31, numero octavo; Juli. Clar., § final., q. 36, numero undecimo; Barbosa, in l. *Titia*, ff. Solut. matrim., qui alias referunt. Et fundamentum est, quia ad gaudendum privilegio attenditur status temporis, in quo delictum committitur, juxta l. 2, ff. de Pœnis. Item quia

quando commissum est delictum, fuit immune a jurisdictione sacerdotali; ergo etiam si relinquatur status, non subjicitur illi. Quia nullum est jus canonicum quod talem poenam imponat, vel quod declarat amissionem privilegii per dimissionem status retrotrahi ad tempus praeteritum, in quo durabat status, seu ad delictum tunc commissum; non est autem sine jure vel evidenti ratione irritandum privilegium, neque asserendum aliquid, quod poenale est et odiosum. Ergo simili modo qui in statu laici deliquit, et postea accipit ordinem, vel statum ecclesiasticum, non gaudet privilegio pro his delictis quae antea commisit, cum esset in statu laici. Probatur consequentia, tum quia sequitur ex eodem principio, quod ad gaudendum privilegio attenditur tempus delicti; ergo qui non erat clericus, vel, si erat, non vivebat in statu clericali, et tunc commisit delictum, licet postea ordinetur, vel accipiat insignia clericalia, erit subjectus sacerdotali iudicio quoad illud delictum. Tum etiam quia illud delictum a principio pertinuit ad forum sacerdotiale, et nullum est jus quod extrahat illum, vel quod retrotrahat privilegium ad illum effectum; ergo. Et ita videntur sentire Covarr. et Barbosa in locis allegatis.

45. *Ratio pro parte affirmante.* — In contrarium vero facere videtur primo, quia privilegia amplianda sunt, quantum proprietas verborum patitur, maxime in favorem religionis; sed jura concedentia hoc privilegium simpliciter eximunt personas ipsas insignitas chartere, vel dicatas Deo tali modo, et non limitant ad delicta commissa post clericatum vel ante; ergo non est limitandum, sed extendendum privilegium. Secundo, quia etiam si delictum praecesserit, non potest non cedere in ignominiam clericatus, quod ille, qui jam est clericus, puniatur a laico vel judicetur; ergo, cum privilegium magis respiciat decentiam clericatus, quam commodum personae, habere debet locum etiam quoad delictum praecedens. Sicut is, qui antea erat servus, si ordinetur, per jus eximitur a servitute propter honorem clericatus, licet non semper eodem modo, ut ex materia de irregularitate constat. Ergo etiam in praesenti licet quis ratione delicti sit obnoxius foro sacerdotali, per ordinationem liberabitur, saltem a foro, licet non a debito alicujus poenae. Tertio, qui post delictum configuit ad ecclesiam materialem, gaudet immunitate; quid ergo mirum quod illa gaudeat, qui configuit ad spiritualem gradum ecclesiasticum?

46. *Vera resolutio.* — De hoc puncto disputat Panormitanus late, in cap. unic. de Obligatis ad ratiocinia, et plures alii ibi, et in locis quos refert copiose Felin., in cap. ultimo de Constitut., numero decimo quarto, circa finem; et ex modernioribus Avendan., in tractat. de Mandat. Reg. exequend., cap. 22; et Covarr., in Pract., cap. 32, num. 4. Qui varias referunt sententias, et multis distinctiōnibus utuntur, quas hic referre et discutere prolixum esset, et alienum a nostro instituto. Maxime quia non afferunt jura canonica, quae in hoc aliquid clare disponant. Quocirca loquendo in generali, et conjectura utendo, mihi placet sententia dicens, ordinem subsequutum post delictum eximere personam clerici a jurisdictione sacerdotali, etiam pro illo dilicto. Primo, propter rationes factas. Deinde a simili vel a fortiori, ex l. *Hos accusare*, ff. de Accusat., quatenus ait, legatum provinciae accusandum non esse de illo crimen, quod ante legationem commisit. Ergo eadem vel majori ratione clericus, qui in statu laici deliquit, non est de illo crimen in iudicio sacerdotali accusandus.

47. *Quorumdam limitatio rejicitur.* — Solent autem juristae adhibere limitationem: *Nisi mala fide assumpserit clericatum;* per malam autem fidem intelligunt, assumere clericatum ad fugiendum sacerdotiale forum, unde ipsi clero imponunt onus probandi non habuisse malam fidem. Sed certe non videtur pertinere ad dolum vel malam fidem, quod quis ex intentione se eximendi ab illo foro, et custodiendi suam personam, illum statum assumat; sicut non est mala fides configere ad ecclesiam post delictum ad se tuendum; illa enim intentio non est mala, unde si in ceteris bona fides servetur, non videtur obstare. Malam ergo fidem ego intelligerem, si quis ficte vel simulate, et ad tempus assumpsisset illum statum ad evitandum forum. Quapropter quoad hoc censeo aliter esse judicandum, si quis ordinatur in sacris, vel tantum in minoribus. Nam ille prior assumit statum perpetuum et immutabilem, et ideo non potest de illo presumi fictio, nisi evidenter appareat; ideoque censeo illum manere immunem, etiam si constet, occasione delicti et ad mutandum forum id fecisse, quia id nec est malum, nec grave incommodum reipublicae affert.

48. At ille qui tantum minores ordines assumit, potest facile mala fide id facere, id est, non quia velit se vere cultui Dei dicare, sed solum ad tempus, ut facilius liberetur, et

postea mutet statum, et tunc censeo procedere priorem limitationem. Multoque magis in clero jam ordinato in minoribus, qui tempore delicti habitum et tonsuram non gestabat, et postea assumit, et vult gaudere privilegio. Merito enim timeri potest dolose incedere; tunc ergo non gaudebit privilegio, nisi contrarium animum probet, quod difficillimum est. Addunt vero iidem Doctores aliam limitationem, nimirum, posse clericum bona fide ordinatum gaudere privilegio, si causa esset integra; nam si esset jam inchoata coram judge sæculari, alia esset ratio, juxta capit. *Proposuisti*, de Foro comp. Item addunt, in illis casibus, in quibus licet clericus judicatur a sæculari judge de priori criminis, non posse ab illo corporaliter puniri, sed aliis modis. De quibus et aliis punctis similibus ad prædictos auctores lectorem remitto.

CAPUT XVI.

AN PRIVILEGIUM FORI EXEMPTIONEM A LEGIBUS CIVILIBUS INCLUDAT, ET QUALISILLA SIT.

1. *Laici suis legibus nullatenus ecclesiasticas personas ligant.*—Supponimus ecclesiasticam immunitatem includere exemptionem ab obligatione et vinculo civilium legum, quatenus a potestate et jurisdictione humana vim aliquam habent. Hoc certissimum est in jure canonico, licet fortasse in civili expresse et in particulari non inveniatur. Quod nihil obstat, quia jus canonicum sufficit, ut supra dixi. Hoc autem canonicum jus habetur in c. *Ecclesia Sanctæ Mariæ*, de Constitut., et dist. 96, per multa capita, in quibus locis etiam dicitur laicos nullam habere potestatem seu jurisdictionem in ecclesiis, vel ecclesiasticas personas. Quod etiam multa Concilia testantur, ut in superioribus probatum est. Constat autem neminem posse sua lege obligare eum, in quem jurisdictionem non habet; ergo neque legislatores laici possunt suis legibus clericos ligare, quia, ut dictum est, nullam jurisdictionem in eos habent; jurisdiction autem legislativa magna est; cum ergo Concilia nullam dicant, etiam hanc negant. Juvatque Authentic. *Cussa*, Cod. de Episcop. et clericis, ubi cassa et irrita dicuntur esse omnia statuta laicorum ecclesiasticæ libertati contraria; nam, eo ipso quod leges civiles sicut ad ligandos clericos, libertati ecclesiastice repugnant. Hoc igitur in genere certum est; quo-

modo autem sit intelligendum, ampliandum vel limitandum, explicandum superest.

2. *An privilegium fori clericorum exemptionem a legibus civilibus includat.*—Prius autem adverto, aliquos dubitare an, sicut immunitas ecclesiastica, ita etiam privilegium fori clericorum hanc exemptionem a vinculo civilium legum includat. Dico tamen quæstionem hanc esse de solo nomine. Nam si nomen fori stricte sumatur, solum comprehendere videbitur exemptionem a judiciis fori sæcularis, tam in causis civilibus quam criminalibus, quia forum propriè significat locum ubi judicia exercecentur, et consequenter etiam ipsum judicium, vel jurisdictionem, per quam exerceetur. Unde si privilegium fori ita stricte sumatur, non comprehendet totam clericorum libertatem. Nam immunitas seu exemptione clericorum, de qua tractamus, plura comprehendit, ut in principio hujus libri dixi, scilicet immunitatem ab aliquibus oneribus, muneriis, tributis, et legibus sæcularibus, quæ omnia libertas ecclesiastica comprehendit. Potest tamen privilegium fori in tota hac amplitudine accipi. Sic enim duo solent distingui privilegia clericorum, scilicet, canonis et fori, ex quibus prius solum significat specialem immunitatem a violenta manus impositione, et ideo sub privilegio fori, ut adæquata sit numeratio, reliqua libertas tota personarum ecclesiasticarum comprehendenda est. Et ita loquitur expresse Sylvest., verb. *Ecclesia*, 1, quæst. 5, vers. *Primum*. Nec sine fundamento, nam privilegium fori, ut dixi, non solum eximit clericum a jurisdictione temporali inferiorum magistratuum, sed etiam a suprema regum et imperatorum jurisdictione; quia ergo ab illa eadem jurisdictione manant omnes leges civiles, et omnia onera, quæ per hujusmodi leges possunt imponi, ideo privilegium fori extensum est ad exemptionem ab his omnibus significandam. Quapropter, explicata exemptione a judiciis, ut hoc privilegium integre declaremus, superest ut exemptionem a legibus exponamus; nam sub hac omnes aliae immunitates includuntur.

3. *Vis legis civilis duplex: directiva et coactiva, et utraq[ue] quid.*—Ad hoc autem explicandum, oportet supponere, multiplicem esse vim legis humanæ, id est, civilis, de qua specialiter loquimur. Duo tamen sunt præcipua capita, ad quæ alia reduci possunt, scilicet, vis directiva et coactiva. Et ne sit in verbis æquivocatio (ut esse solet), per vim directivam intelligimus potestatem præcipendi sub obligatione non

soliū pœnæ, sed etiam conscientiæ. Vis autem coactiva est vis cogendi per poenam, nam, licet haec coactio ordinarie fiat in executione per homines, scilicet, per judicem et ministros ejus, tamen etiam fit suo modo per legem, idque dupliciter, scilicet, vel imponendo tantum debitum, seu reatum certæ pœnæ transgressoribus legis, vel infligendo etiam ipsam pœnam, quando talis est, ut exēctione hominis non indigeat, sed per legem ipsam fieri possit, si sufficienter in ea exprimatur.

4. Plures alii effectus legum civilium ad prædictam vim directivam et coactivam reducuntur. — Præter hæc duas potestates legis numerari possunt aliæ, ut taxare pretia rerum, quod optime potest ad vim directivam reduci, quia ratio justitiæ obligans in conscientia inde resultat. Item irritare contractus, vel illos cum eo rigore prohibendo, vel instituendo formam sine qua validi non sint, quod aliquibus visum est poenale, et ideo ex virtute coactiva proficiunt. Sed hoc non semper ita est, nam interdum fit propter solam directionem morum, et bonum regimen reipublicæ; et tum magis pertinet ad vim directivam. Item habet lex vim imponendi tributum reale vel personale, et hoc etiam spectat impositio cuiuscumque oneris, vel sacerularis muneris, præsertim sordidi et vilis, seu onerosi, magis quam honoriſci. Et ex hæc parte reputatur hæc virtus legis quasi coactiva, quamvis revera proprie talis non sit, quia per se hæc non imponuntur per modum pœnæ propter culpam, vel legis transgressionem, sed directe et per se, quia in humana republica necessaria sunt. Declarandum est ergo quomodo per privilegium fori clericis ab his omnibus eximantur; in hoc vero capite solum dicemus de legibus ut præcipientibus vel prohibentibus, sive pure, sive adjecta pœna; in capitibus vero sequentibus de aliis legibus, præsertim onerosis, dicemus.

5. Distinctio legum civilium ex parte personarum, et ex parte materiae. — Prius vero iterum distinguendæ sunt leges civiles ex parte personarum et ex parte materiae. Nam communiter hæc leges generaliter feruntur pro omnibus civibus, abstracthendo a laicis et clericis; utrique enim cives sunt, et civitatem componunt. Aliquando vero feruntur pro solis laicis; possent etiam aliquando ferri pro solis clericis, possent (inquam) facto; quid vero de jure dicendum sit, videbimus. Deinde materia legis aliquando esse potest propria clericorum, quæ potius erit ecclesiastica quam civilis; ali-

quando est propria laicorum; sæpius vero est communis utrisque. Item aliquando materia, vel dispositio legis, sive in specie, sive generatim factæ, est onerosa clericis, vel eorum statui minus decens, aliquando vero est favorabilis, interdum vero est indifferens. Quia licet respectu communitatis utilis sit, nihilominus respectu singularium personarum interdum afferit incommodum, licet frequentius omnium comodis prospiciat; juxta hanc ergo legum varietatem, varie etiam de hac exemptione judicandum est.

6. Leges civiles pro solis laicis latæ clericos non obligant. — Nonnulla vero ex dictis colligere possumus, quæ clara et extra controversiam sunt. Primum est, leges civiles, latæ pro solis laicis, clericos non obligare. Hoc enim verum est, non solum ratione exemptionis, sed etiam propter formam talis legis, nulla enim lex obligat, nisi personas ad quas loquitur seu dirigitur. Secundum est, leges etiam civiles, quæ disponunt in materia mere laica et sacerulari, licet cum laicis personis in particuliari non loquantur, sed indefinite ferantur, clericos non obligare, ut leges civiles ordinantes judicia sacerularia non obligant in foro ecclesiastico, et sic de aliis. Ratio est clara, tum propter exemptionem, tum etiam quia materia legis restringit ejus obligationem, ad eas personas quarum propria est talis materia, ut est per se clarum.

7. Leges civiles in materia ecclesiastica statuentes nullæ sunt. — Tertio dicendum est, leges civiles, si in materia ecclesiastica disponant, nullam obligationem inducere, propter exemptionem talis materiae. Hæc assertio constat ex dictis supra, cap. 2, ubi ostendimus, res omnes, et causas ecclesiasticas a jurisdictione laicorum exemptas esse; ergo leges latæ a laicis circa hujusmodi materias sunt ipso jure nullæ ex defectu jurisdictionis. De qua re plene dixi in tomo de Legib., lib. 4, c. 11. Unde quarto addendum est, leges civiles disponentes circa personas clericorum in particuliari, etiam si in materia civili disponere videantur, non obligare clericos, ratione exemptionis illorum. Hæc assertio simul cum præcedenti expresse traditur in cap. *Ecclesia S. Mariæ*, de Constitut., et c. *Quæ in Ecclesiis*, eodem tit., et cap. ult. de Rebus eccles. non alien., et in c. *Bene quidem*, cum multis sequentibus, 96 dist., quibus locis late hanc materiam tractant auctores, præsertim Panormitanus, et Felinus, et Barthol., in leg. *Cunctos populos*, Cod. de Summ. Trinitat. Ratio

autem ibidem redditur, quia super Ecclesiis et ecclesiasticis personis nulla est laicis attributa potestas, *quos obsequendi manet necessitas, non auctoritas imperandi.* Hinc enim fit, ut hujusmodi leges non obligent clericos, non quia sint validae, et ad illos non extendantur; sed potius quia nullae sunt ex defectu jurisdictionis in personas ad quas diriguntur.

8. *Objectio.* — *Confirmatio.* — Dices hoc ad summum procedere, quando tales leges civiles detrimentum, vel onus aliquod afferunt clericis, secus vero esse debere, si sint favorabiles clericis, quia privilegium, quod in favorem datum est, non debet ita extendi, ut privilegiato noceat; sed quod hujusmodi leges sint nullae, etiamsi sint favorabiles clericis, in documentum eorum caderet; ergo non est verisimile, privilegium exemptionis ad hunc effectum extendi. Et confirmatur, nam princeps laicus potest clero privilegium validum conferre, ut sumitur ex cap. *Novit*, de Judicis, et ex multis aliis canonibus et legibus in superioribus allegatis, in quibus imperatores Ecclesiis et Praelatis, vel ministris earum privilegia conferunt; privilegium autem quædam lex favorabilis est, ergo.

9. *Ad confirmationem.* — Nihilominus dicendum est quarto, tales leges, etiamsi favorabiles videantur, non posse obligare; de his enim etiam loquitur dict. c. *Ecclesia S. Mariæ*, ut bene ibi Panormitanus exponit in principio et in fine. Et ratio textus ibi convincit, quia talis lex revera non est lex, etiamsi videatur favorabilis, quia a jurisdictione non procedit; ergo non potest obligare. Item est optima ratio, quia, eo ipso quod lex prohibet vel præcipit clericis in particulari, supponit et exercet potestatem superiorum in illos; ergo supponit potestatem quæ non est, ac proinde nulla est. Imo, eo ipso non potest censeri favorabilis, quia magis nocet usurpando jurisdictionem, quam prospicit aliquid commodi afferendo. Et ita responsum est ad contrariam conjecturam. Ad confirmationem respondeatur, aliud esse de privilegio, nam privilegii concessio non est actus jurisdictionis, sed dici potest actus liberalitatis et dominii illius rei, vel juris quod per privilegium datur, et ideo potest quispiam dare privilegium non subdito, imo et superiori, et sic etiam potest laicus concedere privilegium clero. Nee privilegium habet propriam rationem legis respectu privilegiati, quia per se non imponit illi obligationem, et ita non datur prohibendo vel jubendo privilegiato, sed concedendo; aliis

vero solet præcipere observantiam privilegii, et sic habet privilegium propriam rationem legis, ut in materia de legibus latius declaravi. Atque ita leges civiles concedentes privilegia clericis favent quidem clericis, non tamen ligant; obligant autem laicos, ut clericis talia privilegia observent.

10. *Leges civiles circa Ecclesiarum vel clericorum bona disponentes nullæ sunt.* — *Ratio prioris partis.* — Quinto addere possumus, ampliando superiorem assertionem, leges etiam civiles in particulari disponentes circa bona Ecclesiarum vel clericorum non esse validas, nec posse Ecclesiis aut clericos obligare. Ita docent Glos. et Doctores, præscritim Abbas, in d. c. *Ecclesia*, n. 20 et 21. Et quod attinet ad Ecclesiarum bona, habetur expresse in illo textu, et in d. c. *Bene quidem*, cuius decisionem Innocentius III in priori capite allegat. Nam ibi statutum eujusdam Basillii laici, quia in particulari statuebat circa bona Ecclesiæ, etiam in eorum favorem, irritum censemtur, quia non fuit auctoritate Apostolica confirmatum. Idem sumitur ex cap. *Quæ in Ecclesiarum*, eodem tit., et cap. ultim. de Reb. eccles. non alien., et ex cap. *Decernimus*, de Judic., ubi negotia omnia ecclesiastica exempta dicuntur a sæculari foro. Ratio autem est, quia bona ecclesiastica inter res sacras computantur, et ideo prorsus sunt exempta a jurisdictione laicorum, non solum humano, sed etiam divino jure, juxta ea quæ in decretis traduntur, tota distinct. 96, et quæ supra, capit. 2, tractata sunt.

11. In bonis autem propriis seu patrimonialibus clericorum non militat ratio dicta, quia bona propria clericorum non sunt sacra, sicut bona Ecclesiarum, et ideo necesse non est ut eadem vel tanta exemptione gaudeant, quanta bona ecclesiastica, seu Ecclesiarum. Ratio autem differentiae reddi potest, quia ecclesiastica bona videntur esse sub immediato dominio Dei, et ideo nemo potest circa illa disponere, nisi vel Deus ipse, vel dispensatores suorum mysteriorum et honorum ab ipso constituti. Bona autem clericorum immediate sunt sub dominio talium hominum, quod illis convenit, non ut clericis, sed ut cives vel homines sunt, et ideo circa talia bona videntur possesse disponere leges civiles.

12. *Ratio posterioris partis.* — Sed nihilominus etiam in his bonis clericorum, veram esse censeo sententiam Panormitani, quanquam jura, quæ allegat, non directe hoc disponant, sed per argumentum a simili, vel a

paritate rationis afferantur. Ratio vero illam convincit, quia non potest lex civilis aliquid in particulari disponere circa bona clericorum, nisi obligando clericos ad talis legis observationem, quia bona adhaerent personæ, et lex disponens circa bona nou potest nisi per aliquam personam observari. Sed lex civilis non potest in particulari obligare personas clericorum; ergo nec circa illorum bona in particulari disponere. Item lex non fertur sine jurisdictione; nemo autem habet jurisdictionem seu potestatem juridice disponendi circa bona alicujus, nisi habeat jurisdictionem supra personam. Cum ergo rex temporalis jurisdictionem non habeat circa personam clericorum, neque habere potest circa bona, quæ adhaerent personæ tanquam accessorum principali; ergo lex facta a potestate civili circa bona clericorum in particulari est nulla tanquam sine jurisdictione facta. Ratio autem in contrarium, solum probat non ita certum esse, bona clericorum esse jure divino exempta a potestate civili, sicut est certum de ecclesiasticis bonis, quia non sunt ita immediate et quasi per se exempta. Nam res sacræ et bona Ecclesiæ exempta sunt propter sanctitatem quamdam, quam participant per immediatam habitudinem ad Deum; bona autem clericorum exempta sunt propter habitudinem ad tales personas exemptas; hoc autem non obstat quominus illarum exemptionem participant.

13. Prima opinio. — Sexto addendum est, leges civiles, quæ generaliter loquuntur ad cives, abstrahendo a clericis vel laicis, et disponentes in materia temporali omnibus communis, ad eorumque mutuam societatem et uniformitatem pertinente, obligare clericos quoad vim directivam. In hac assertione conveniunt omnes Catholici, quos in superioribus retuli, et late tractavi in lib. 3 de Legibus, c. 34. Et ratio ex parte causæ finalis est, quia uniformis observantia taliū legum est necessaria ad reipublicæ pacem, et ad servandam inter cives æquitatem; ergo et obligatio directiva debet esse generalis omnibus. Ex parte autem principii efficientis, seu potestatis talis obligationem imponentis, nou omnes eamdem reddunt rationem. Multi enim putant id provenire ex vi potestatis et jurisdictionis principis temporalis: quoad has leges ferendas, dicunt retinuisse jurisdictionem in omnes, etiam clericos, quia ita erat necessarium ad convenientem totius reipublicæ gubernationem, et ideo non oportuit clericos eximi quoad hanc

partem, cum usus talis exemptionis non esset futurus utilis reipublicæ christianæ, ac proinde non esset in illa observandus. Unde, siue supra diximus clericum ut actorem contra laicum esse obnoxium judicio sacerdotali in causa temporali, ac subinde quoad hunc actum non esse exemptum, ita nou est inconveniens clericum, ut civem communicantem cum laicis in hujusmodi actionibus communibus, non esse exemptum a virtute et jurisdictione legis civilis, quoad vim directivam. Atque hunc modum dicendi avide arripiunt haeretici et schismatici, illumque approbant multi catholici Doctores, quos in loco citato retuli, et non est improbabilis, secluso schismaticorum spiritu et errore circa totam exemptionem clericorum.

14. Secunda opinio. — Aliorum tamen sententia est, clericos non obligari ad observandas hujusmodi leges ex vi ipsarum legum, id est, ex vi jurisdictionis quam legislatores civiles habeant in clericos, sed ex vi rationis, id est, quia, posita tali lege justa de re ad omnes pertinente, et quæ a clericis decenter et sine speciali gravamine servari potest, ratio naturalis dictat esse servandam etiam a clericis, vel quia sunt partes talis communitatis, et turpis est pars quæ non concordat toti in his quæ commode potest, vel quia non servabitur æquitas debita inter clericos et laicos, si laici hujusmodi leges servent, et non clerici. Quæ posterior ratio maxime locum habet in legibus definiuntibus medium justitiae, quales sunt illæ, quæ valorem et pretium rerum taxant; de quibus properea nemo dubitat, servandas esse a clericis ex vi justitiae naturalis, sive obligentur vi taliū legum, sive non. Eademque ratio procedit de legibus disponentibus circa quasdam actiones humanas, quasi reciprocas, et quamdam mutuam habitudinem inter ipsos cives includentes, quia tales leges non possunt, vel cum securitate, vel cum æquitate servari a laicis, quin serventur a clericis, ut sunt leges prohibentes talia arma, vel ne tali tempore aut loco ferantur; vel prohibentes ne tales res aut merces extra regnum trahantur, et similes. Prior vero ratio habere poterit locum circa leges disponentes de aliis actionibus civium, in quibus non invenitur hic mutuus respectus æquitatis aut securitatis, conservationis aut rerum abundantiae ad omnes pertinentis; sed solum pertinent ad convenientem vivendi modum uniuscujusque secundum politicum statum, ut sunt, verbi gratia, leges prohibentes ludum alearum,

et similes, quibus regulariter adjungitur ratio scandali, si a clericis non serventur.

15. Atque hanc sententiam, quod leges hujusmodi non obligent clericos ex vi jurisdictionis laicæ, sed ex vi rationis, defendit Bellarminus in suis controversiis, præsertim in ultima editione, et sæpius illam inculcat in his posterioribus opusculis, scilicet, in libro *Recognitionum*, et in libro contra *Barelaium*, et in *Apologiis contra regem Angliæ*. Et ideo rex ipse sæpius circa hunc articulam ipsum mordet, ut in *Præfatione*, pag. 25, et in catalogo mendaciorum sub titulo, *Nova dogmata*, ut in fine *Apologiæ*. Verumtamen neque sententia hæc nova est, nec peculiaris Bellarmini, sed antiqua, et multorum gravium auctorum, ut in citato de *Legibus* ostendi; et ideo immerito rex vel illam novitatis accusat, vel de Bellarmino specialiter conqueritur. Neque etiam rationem aliquam vel testimonium alieujus momenti affert, sed solum Bellarmatum, vel odii, vel affectus in reges temporales minus propensi insimulat, quod valde frivolum est, nisi forte apud illos, qui veritatem suis inordinatis affectibus repugnantem odium reputant.

16. *Auctoris sententia*. — Aliunde vero illa sententia optime fundatur in divino jure concedente simpliciter hoc privilegium. Additis testimoniosis Conciliorum et canonum dicentium, laicis supra clericos nullam esse attributam potestatem vel jurisdictionem, sine qua non possunt directe, et ex vi legis illos obligare. Item haec ratione non possunt reges obligare clericos legibus, illis peculiariter impositis; ergo eadem non possunt eos obligare ex vi sui præcepti per leges communes, quia lex quoad vim suam non transcendit potestatem ferentis illam. Et ita sententia hæc quoad hanc partem negativam probabilior est, et vera; quoad aliam vero partem, explicandi obligationem ex sola vi rationis, est quidem probabilis; tamen, si nude et præcise intelligatur, sæpe inveniatur insufficiens ad gravem obligationem convincendam. Et ideo libenter addere soleo, obligationem illam etiam nisi in virtute canonum disponentium, ut hujusmodi leges a clericis serventur, quos in citato loco retuli cum auctoribus, qui obligationem talium legum hoc modo declarauit, et rationibus quæ hunc modum dicendi confirmant. Quæ non repugnat sententiæ dicenti, has leges obligare ex vi rationis, quia illa non excludit acceptationem canonum, aut virtutem eorum, nec prohibet recursum ad illam,

quando sola vis rationis gravem obligationem in clericis ad hujusmodi leges civiles servandas non ostenderit.

17. *An clerici sint a vi directiva legum ci-vilium exempli*. — Sed quæres, supposita hac sententia, quod clerici non obligentur ad observationem harum legum ex vi illarum, sed aliunde, an clerici simpliciter dicendi sint exempti, vel potius non exempti a vi directiva talium legum. Et ratio dubitandi est, quia si non obligantur in virtute illarum, non potest esse nisi ratione exemptionis a jurisdictione qua feruntur tales leges, ut declaratum est; ergo simpliciter dicendi sunt exempti a talibus legibus. Item qui non tenetur ex obedientia legi parere, profecto exemptus est ab illa; clerici autem, si non obligantur talibus legibus ex vi illarum, non tenentur illas servare ex vi obedientiae auctoribus carum debitæ; ergo sunt exempti a talibus legibus. In contrarium vero est, quia clerici absolute tenentur observare tales leges; ergo absolute non sunt ab illis exempti, quia exemptione absolute dieit libertatem, et earentiam obligationis; quomodo ergo obligatus manens potest dici exemptus?

18. *Variae sententiae*. — *Auctoris judicium*. — Propter quas rationes varie solent loqui auctores. Aliqui enim, licet dicant clericos non obligari his legibus virtute illarum, negant nihilominus esse exemptos ab illis. Alii vero consequenter putant dicendum, illos esse exemptos etiam a vi directiva talium legum, quandoquidem non vi illarum obligantur, sed rationis, vel canonici juris. Mili tamen videatur controversia solum de modo loquendi, existimoque propriæ dici posse, illos non esse exemptos ab observantia talium legum, neque ab obligatione faciendi id, quod per ipsas præcipitur, et vitandi quod prohibetur. Et nihilominus posse etiam dici, esse exemptos a virtute, seu proprio vinculo earumdem legum, nam hæc duo non repugnant, et utrumque probant rationes pro utraque parte factæ. Et ita potest de clericis dici, observare has leges ut liberos a jugo illarum, quia non sunt liberi a jugo rationis naturalis, et juris canonici, quod ad perfectam exemptionem pertinet, et ipsorum statui consentaneum est.

19. *Leges civiles etiam non noxias non obligant clericos quoad vim coactivam*. — Ultimo dicendum est, leges civiles, etiam communes omnibus cibis, et clericis non noxias, neque indecentes, non obligare clericos quoad vim coactivam, ac subinde exemptionem ab hujus-

modi vi talium legum ad plenam ecclesiasticorum libertatem maxime pertinere. Assertio est certa, in qua conveniunt omnes doctores catholici, quos loco supra citato allegavi. Sequiturque manifeste ex praecedenti; nam, si verum est has leges non obligare clericos virtute sua etiam obligatione directiva, multo minus poterunt cogere illos vi coactiva. Declaratur autem simpliciter in hunc modum, quia lex in tantum ligat vi coactiva, in quantum poenam imponit, quod duobus modis potest efficere, scilicet, vel ipso facto inferendo poenam, vel prescribendo per judicem inferendam. Priori modo nou potest lex civilis per se ipsam punire clericum, quia exemptus est in criminalibus a foro saeculari, ut supra probavimus, quod verum est non solum de foro inferioris judicis, sed etiam supremi regis, ut etiam ostendi; ergo lex civilis seu regia non procedit a potestate coactiva clerici; ergo non potest per se ipsam illum punire, quia virtus ejus commensuratur potestati a qua procedit. Et confirmatur, quia non potest princeps temporalis in actuali, seu personali judicio sententiam (quam ab homine vocant) contra clericum proferre; ergo nec potest per legem sententiam latam in clericum dicere, sen sub tali sententia clericum comprehendere, quia extra forum suum jus diceret.

20. Neque etiam leges imponentes poenam posteriori modo possunt exercere vim suam in clericos, quia non exerceant illam, nisi mediante judice; aut ergo judex ille erit laicus, aut clericus. Si sit judex laicus, non solum non potest exequi talem poenam in clericum, verum etiam nec condemnare illum, nec cognoscere de causa, vel de peccato ejus, etiamsi legem civilem fuerit transgressor, quia non est judex competens ejus in aliqua causa, sive civili, sive criminali, ad quam clericus ut reus trahatur, sicut ostensum est; ergo per judicem saecularem non potest lex civilis suam vim coactivam in clericum exercere. Si autem judex sit ecclesiasticus, non tenetur poenam legis civilis clericio imponere; tum quia sepe non erit vel decens, vel accommodata statui clericali; tum maxime quia judex ecclesiasticus non tenetur secundum leges civiles judicare, aut poenas imponere, sed secundum jus canonicum; quod si in illo nulla lex sit designans poenam pro tali delicto inferendam, judex ecclesiasticus arbitrio suo illam imponet. Et poterit quidem, si opportunum, et absque inconvenienti fieri posse judicaverit, leges civiles imitari (nam canones ipsi hoc non

dedigrantur, ut ipsimet dicunt), non tamen tenetur. Nam lex civilis, designando poenam per judicem imponendam, instruit obligando judicem saecularem, non ecclesiasticum, super quem jurisdictionem non habet. Et quamvis lex illa ut imponens poenam in communione loquatur, abstrahendo a judice saeculari vel ecclesiastico, nihilominus sub ea ratione non est ex illis legibus communibus quas clericis observare tenentur. Quia uniformitas in suppliciis, et poenis in omnibus membris reipublicae non pertinet ad bonum regimen ejus, ideoque nec canones illam praeципiunt, nec ratio naturalis illam dictat, sed potius postulat ut pro diversitate statuum diversis modis transgressores puniantur. Definire autem poenas clericis accommodatas pro quocumque delicto, non pertinet ad leges civiles, sed ad ecclesiasticas, et ubi illae defuerint, arbitrio ecclesiastici judicis merito relinquuntur, quia ipse etiam melius judicabit de qualitate poenae clericis imponendae, quam civilis potestas, sive per sententiam, sive per legem loquatur; ergo nullo modo lex civilis sub vi sua coactiva clericum comprehendit.

21. *Objectio.* — Dices: ergo clericus puniri non poterit propter transgressionem legis civilis, vel saltem judex ecclesiasticus non tenetur illum propter tale delictum punire; consequens est valde absurdum, quia inefficax valde esset vis directiva sine ulla coactiva, et delicta publica contra commune bonum manarent impunita. Prior sequela probatur, quia clericus exemptus est a vi coactiva legis civilis; ergo exemptus est non solum a tali specie poenae, sed etiam simpliciter a poena, quia alias lex illa aliquam vim coactivam exercebat in clericum, ligando illum ad poenam, seu debitum poenae inferendo. Et a fortiori non tenetur judex ecclesiasticus tale delictum punire, quia vel reus ex vi talis legis simpliciter non subjicitur poenae, vel certe judex ipse non tenetur secundum talem legem judicare, et ideo sicut non tenetur reum punire tali modo, ita nec simpliciter punire.

22. *Solutio.* — Respondetur negando sequelam quoad utramque partem; nam transgressor talis legis quamvis sit clericus, eo ipso quod transgreditur legem, quam quocumque titulo servare tenetur, fit reus poenae, non ex vi legis civilis, sed ex vi juris naturalis et gentium, quo peccator fit reus poenae, non solum apud Deum, sed etiam apud homines, quando crimen rempublicam offendit. Et ita cessat ratio in contrarium, quia hic reatus

pœnæ non oritur proprie ex vi coactiva legis civilis tanquam ex causa, sed ex lege naturali; lex autem civilis solum fuit quasi remota occasio, quia, non posita illa lege, actio illa non fuisset mala, et consequenter nec pœna digna. Similiter ad alteram partem dico, teneri judicem ecclesiasticum punire simile delictum clerici, si ad judicium suum deferatur, non ex vi legis civilis, ut probat argumentum, sed ex vi legis justitiae, et officii sui, quo teneatur vindicare et emendare delicta subditorum suorum, contra quamecumque legem commissa. Eo vel maxime quod illud crimen magis est contra legem canonicam, vel naturalem, quam contra legem civilem, etiamsi existentiam talis legis prærequirat.

23. *An leges civiles clericorum contractus irritare valeant.* — Quæri tandem hic potest an hæc exemptio clericorum respectu civilium legum extendatur ad vim irritandi aliquos actus, seu contractus humanos, quam hæc leges interdum exercent; quod est quærrere an lex civilis irritans contractus, qui tam a clericis quam a laicis fieri solent, irritet etiam illos factos a clericis, ut, verbi gratia, an testamentum factum a clero sine solemnitate requisita jure civili, sit validum, etc. Respondeo breviter, distinguendum esse de irritatione; quædam enim est pœnalis, ut quæ in pœnam imponitur, vel quæ resultat ex inhabilitate aliqua ipso jure imposta per legem in pœnam alicujus criminis; alia vero est irritatio, quæ per se fit propter bonum commune, etiam si culpa operantis non intercedat. Dico ergo legem civilem irritantem, si proprie pœnalis sit, non comprehendere clericos quoad vim, seu actum irritandi. Probatur, quia lex. civilis non ligat clericum quoad vim coactivam, nec quoad pœnam ipso facto impositam, quecumque illa sit, ut probatum est; sed talis irritatio fit per vim coactivam legis, et per modum cujusdam pœnæ imponitur; ergo non ligat clericum irritando actum ejus; sicut etiam si imponat aliquam inhabilitatem ad similem actum, non inducit illam in clericum, quia omnes rationes factæ de cæteris pœnis, etiam in his procedunt.

24. At vero si lex civilis per se directe irritet actum propter bonum commune, dicendum est comprehendere clericos quoad vim irritandi, quia tunc non pertinet ad vim coactivam, sed ad directivam. Essetque hoc manifestum, si verum esset leges hujusmodi obligare clericos ex vi legis et jurisdictionis, quia tunc nihil est quod eximat clericum a tali ef-

fectu legis, cum ab eadem jurisdictione directiva morum procedat. Verumtamen etiam tenendo has leges solum obligare clericos via rationis, id asseruit Vasquez 4. 2, disp. 167, c. 4, quia talis (inquit) irritatio necessaria est, ut pax et bona reipublicæ gubernatio constet. Quod non caret difficultate, quia irritatio hæc positiva, seu per hominem inducta, non fit sine jurisdictione et potestate supra personam, vel voluntatem, cuius actus irritatur. Et ideo merito addere possumus, leges civiles habere hunc effectum, quia per jus canonicum simpliciter quoad vim directivam acceptantur, atque ita irritatio illa fundatur in jurisdictione potius ecclesiastica, quam civili. Unde etiam prædicta assertio limitanda est, ut non procedat, quando jus canonicum alia via sustinet actum, vel in favorem clerici, vel (ut sic dicam) in favorem ipsius actus; tunc enim prævalet jus canonicum respectu clericorum. Ut, verbi gratia, testamentum clerici valet sine solemnitate civili, quia jus canonicum minori contentum est in favorem ultimæ voluntatis, c. *Cum esses*, de Testament., et idem est in similibus.

CAPUT XVII.

QUALE SIT ECCLESIARUM PRIVILEGIUM QUOD SUAM SUORUMQUE BONORUM EXEMPTIONEM AB ONEIRIBUS, ET A POTESTATE SECULARI.

1. Superest dicendum de alia virtute legis humanæ, quæ est ad imponendum onera vel tributa subditis; et quoniam hæc interdum personis, interdum rebus ipsis solent imponi, ideo de illis sigillatim dicendum est. Quia vero non solum clerici, sed etiam Ecclesiæ ipsæ hac gaudent immunitate, dicemus prius de Ecclesiis ipsis, et ecclesiasticis bonis, postea vero de clericis et eorum bonis. Distinguimus ergo in primis bona ecclesiastica a bonis clericorum; nam priora, ut supra dixi, sunt magis saera et religiosa, quia ad divinum cultum et ad opera pietatis per se ordinantur, bona autem clericorum de se mere temporalia sunt, quamvis personis ecclesiasticis quasi adhaerant, et ideo de his postea dicemus.

2. *Aliquæ Ecclesiæ acceptiones præmittuntur.* — Nunc circa bona ecclesiastica est ultius advertendum, multa sub illis comprehendi posse, inter quæ primum locum tenent ipsæmet Ecclesiæ, a quibus reliqua bona sacra ecclesiastica denominari videntur. Quæri autem potest quid nomine Ecclesiarum, vel Ecclesiæ hic intelligamus. Potest enim intelligi

vel templum ipsum, quod ad usum sacrificii, sacramentorum, et ut in eo fideles ad orandum, et verbum Dei audiendum conveniant, dedicatum et consecratum est; vel potest nomine Ecclesiæ particularis intelligi collegium clericorum, qui unicuique ecclesiæ seu templo ad servitium ejus, et divini cultus et fidelium euram, cæterarumque rerum sacrarum et bonorum custodiam et administrationem deputati sunt. Vel tertio nomine Ecclesiæ particularis intelligi potest tota congregatio fidelium ad eamdem ecclesiam seu templum pertinentium, quatenus in illa recipiunt sacramenta, et illius Pastori, in his quæ ad animam pertinent, proxime subsunt, et secundum eam rationem peculiarem unionem spiritualem habent.

3. *Quæ ex dictis acceptationibus præsenti inserviat instituto declaratur.* — Et quamvis verum sit vocem illam in omnibus his significationibus esse usitatam, præsertim in prima et tertia, nihilominus hæc ultima præsenti instituto non inservit. Quia Ecclesia illo modo sumpta non habet peculiarem exemptionem, seu libertatem ecclesiasticam, præter eam, quæ ad spirituale regimenter spectat, de qua diximus in c. 2. Neque illa congregatio habet alia ecclesiastica bona, præter ea quæ ad clerum vel templum spectant. Ecclesia etiam secundo modo accepta, quæ frequentius dicitur clerus, vel capitulum, si consideretur ut persona quædam ficta, eamdem rationem exemptionis habet quam clericus, et ideo sub illis comprehenditur; si vero spectetur quoad bona ad usum sacrum et templi deputata, ejusque curæ commissa, sic non habet exemptionem aliam, præter illam quam de bonis ecclesiasticis explicaturi sumus. Superest ergo ut de ecclesia loquamur, ut est locus sacer, ad cuius servitium vel ornatum, et ad ministeria sacra quæ in illa fiunt, cæteraque opera pietatis alia bona ecclesiastica ordinantur.

4. *Variae ecclesiistarum immunitates.* — Potest item Ecclesia hoc modo sumpta considerari, vel sub generali ratione rei sacrae, et sic habet exemptiones, seu immunitates cæteris rebus sacris, cum quibus in illa generali ratione convenit, communes, de quibus statim dicemus. Vel etiam considerari potest Ecclesia sub ratione propria loci, seu domus quæ ad custodiendas vel protegendas personas quæ in ea existunt, vel ad eam configiunt, vel ad custodiā rerum quæ in ea collocantur, ordinatur. Et sub hac ratione habent ecclesiæ et loca sacra, quatenus talia sunt, privilegia quædam propria,

et sibi specialiter accommodata. Quæ privilegia in generali sumpta ex ratione naturali resultant, in particulari vero aliqua sunt per leges canonicas determinata vel declarata. Supposita enim institutione et benedictione, vel dedicatione sacra talis loci, ratio ipsa naturalis dicitur, ut ab omni actione indecente, vel quæ sit contra reverentiam tali loco debitam, servetur immunis. Quæ autem actiones cedant in injuriam vel irreverentiam loci sacri, si per legem ecclesiasticam nou definiatur, prudenter arbitrio relinquendum erit.

5. Magna autem ex parte hoc determinavit ecclesiastica lex, privilegia aliquarum immunitatum ecclesiis conferendo. Primo, definiendo per quas actiones ecclesia polluitur juxta ecclesiasticam institutionem, easque vetando. Secundo, prohibendo ne ecclesiæ ut laicæ dominus tractentur, in eis communia suppellectilia sine magna necessitate recipiendo seu admittendo, c. 2 de Custodia Eucharistie. Tertio, præbendo ecclesiis immunitatem, et exemptionem ab actionibus forensibus, quæ ad sæcularia judicia, vel ad tractanda negotia politica aut bellica, vel ad mercaturam pertinent. Quarto, tribuendo ecclesiæ peculiarem vim custodiendi bona in eis deposita, vel quovis modo collocata, ut sine speciali sacrilegio per injuriam inde subtrahi non possint. Denique, ut alia omittam, datum est templis privilegium tuendi reos ad ea confugientes, ita ut a ministris sæcularis justitiae sine injuria et gravi sacrilegio inde non possint per violentiam extrahiri. De quibus immunitatibus dixi late in tract. 2 de Relig., toto lib. 3, et præsertim de hac ultima, a c. 8 usque ad finem, et ideo illam nunc prætermittimus. Solum enim ea tetigimus, ut constet quomodo ecclesia, prout est loens sacer, ab oneribus, seu actionibus, et (ut ita dicam) passionibus profanis, et ab Ecclesia prohibitis exempta sit. De exemptione autem a tributis respectu ecclesiae sic acceptæ nihil dicere necesse est, quia, licet sit res immobilis, non est res (ut ita dicam) fructifera temporalium bonorum, seu fructuum, et ideo non est capax tributi, præterquam quod quatenus ecclesia est res sacra, habet, ut dixi, omnem exemptionem communem aliis bonis et rebus sacris, de quibus jam dicendum est.

6. *Bona ecclesiastica duplia, quædam specialiter consecrata, alia non ita.* — Præter ecclesias ergo cætera ecclesiastica bona in duo membra distingui possunt: quædam sunt, quæ proprie dicuntur res sacrae, quia vel per specialem benedictionem consecratæ sunt, vel

sunt instrumenta divini cultus; aliæ vero sunt quæ generale nomen retinent, et proprie dicuntur bona ecclesiastica, sive mobilia, sive immobilia, quæ, quatenus ad Dei cultum, sustentationem ministrorum, subsidium pauperum, et alias templorum expensas destinata sunt, inter res sacras computantur, teste D. Them. 2. 2, q. 99, art. 4, et q. 183, art. 7. De rebus sacris prioris ordinis, certum est gaudere multis immunitatibus a communibus usibus, vel ministeriis, et ab omni injuria et iniqua alienatione. Nam hoc genus immunitatis ratione naturali fundatum est, quia sancta debent sancte tractari; ea vero, quæ Deo dicata sunt quamdam sanctitatem participant; ergo ipsa ratio dictat non esse ad usus profanos transferenda. Et ita in lege veteri vasa templi in magna erant venerazione, et ideo specialiter conserabantur, ut ait D. Thomas 1. 2, q. 102, art. 4, ad 9, et propterea non poterant ad alios usus profanos, vel communes applicari. Unde, Daniel. 5, Balthasar, rex Babylonie, qui vasa templi in quodam suo convivio profanare ausus est, statim divinam sensit vindictam, ut ibi Hieronymus et Theodor. notant, et Stephanus Papa I, ep. 1, ad Hilar., c. 3, et habetur in e. *Vestimenta*, de Cons., dist. 1. Quin etiam inter gentiles suo modo fuit hoc jus rebus sacris conservatum, ut colligimus ex l. *Inter stipulantem*, § *Sacra*, ff. de Verb. obligat.; nunc autem maxime jure canonico confirmatum est, ut constat ex e. *Ligna*, cum multis sequent., de Cons., dist. 1, et¹ cap. *Quæ semel*, cum sequent., 19, quæst. 3, et ex reg. *Semel*, de Regulis juris, in 6; et novo etiam jure civili declaratum hoc est in l. *Sancimus*, Cod. de Sacro-sanet. Eccles.

7. *Res divino cultui dicatae ab humanis usibus eximuntur.* — Pertinet autem haec immunitas ad quamdam venerationem, seu honorarium cultum hujusmodi rerum sacrarum, et ideo in materia de adoratione explicata est. Et propter eamdem causam non ita convenit hæc immunitas aliis bonis ecclesiasticis secundi ordinis, quia illa nou sunt proxima instrumenta divini cultus. Ideoque priora bona diei solent exempta ab humano commercio et usu; hæc vero posteriora esse possunt in humano commercio, et ad ordinarios usus applicari, dummodo debito modo et cum pietate fiat¹. Ut sumitur ex e. *Sine exceptione*, c. *Aurum*, et cap. *Gloria*, cum aliis multis, 12, quæst. 2.

¹ Vide Sarmient., de Reddit. eccles.

Nam quia hæc etiam posteriora bona aliquo modo sacra sunt, hoc saltem ex vi suæ institutionis requirunt, ut solum in religiosos vel pios usus proxime consumantur, quia ad hunc finem Ecclesiæ data sunt, ut multi canones tradunt in dicta 12, quæst. 2. Quod si bona sint immobilia vel pretiosa, peculiare habent privilegium, ut alienari non possint, nisi modo et ratione jure canonico præscriptis, cap. *Nulli*, cum aliis, de Rebus Ecclesiæ non alienandis.

8. *Omnia ecclesiarum bona gaudent privilegio fori.* — Præterea omnia ista bona ecclesiastica dici possunt gaudere privilegio fori, seu, quod idem est, esse exempta ab omni jurisdictione, seu potestate sacerdotalium principum seu magistratuum. Primo, quoad administrationem, nam per Ecclesiæ ministros custodiri, conservari, transferri, aut permutari, distribui, vel quando oportuerit, alienari debent, non per laicos, quibus nulla super hæc bona est attributa potestas, juxta supra dicta in cap. 2 et 15, et ex dictis ibi constat, immunitatem harum rerum quoad hanc partem ex jure divino descendere, supposita institutione Ecclesiæ, et potestate data Petro et successoribus ejus, ad universas res ecclesiasticas per se, vel per ministros suos, administrandas. Unde in Concilio Lateranensi, sub Leone X, in Bulla de Reformatione curiæ, § *Et cum fructuum*, dicitur prohibitum esse jure divino, ne laici jus administrandi bona ecclesiastica usurpent.

9. *Ratio dictæ exemptionis.* — Ratio vero est, quia hæc bona si considerentur ut sacra, per se ordinantur ad spiritualem et supernaturalem finem, et ideo ex vi juris divini administratio eorum ad spiritualem potestatem pertinet. Si vero considerentur ratione materialiæ, sic, eo ipso quod tradita sunt Ecclesiæ, facta sunt extra dominium et potestatem laicorum, et divino cultui dicata sunt, et sub speciali ratione sub domiuio Dei constituta, ut significavit Concilium Tridentinum, sess. 23, cap. 1, de Refor., prolubens Episcopis, ne res ecclesiasticas, *quæ Dei sunt*, consanguineis donent, qui modus loquendi est frequens in saeculis canonibus, ut videre licet in multis decretis, 12, quæst. 1 et 2, 16, q. 1 et 7, et in cap. *Cum secundum Apostolum*, de Præbend., ubi hæc bona vocantur patrimonium Christi, quod etiam habetur in cap. *Cum ex eo*, de Elect., in 6; et in c. *Tua nobis*, de Præben. decimæ peculiari titulo et modo dicuntur esse bona Dei. Ergo administratio talium honorum

ad eos pertinet, quos Deus dispensatores suorum bonorum constituit; hujusmodi autem dispensatores sunt præcipue Romanus Pontifex, et sub illo Episcopi in suis diecesibus, juxta mensuram potestatis sibi concessæ, ut Pontifices et varia Concilia docuerunt, quæ apud Gratianum videri possunt, dist. 96, præsertim cap. 1 et ultimo, et dicta 12, q. 1 et 2, et 17, q. 1 et 7. Et optime Ambrosius, in cap. *Convenior*, 23, q. 8, ex epist. 33, ad Sororem. Et propterea sacrilegi appellantur, qui per potestates sœculares hujusmodi bona ecclesiastica usurpant, tanquam rerum sacramentorum violatores.

10. Bona ecclesiastica etiam a legibus civilibus sunt exempta. — Secundo dici possunt hæc bona gaudere privilegio fori, quia exempta sunt a legibus civilibus, ita ut nihil circa illa in particulari disponere possint, ut ex dictis in capite præcedenti satis notum est, et sumitur ex cap. *Ecclesia*, et cap. *Quæ in Ecclesiæ*, de Constitut., et cap. ult., de Rebus Ecclesiæ non alienandis. Et traditur apertissime in Concilio Romano, sub Symmacho, quod allegavit Innocentius III, in dicto cap. *Ecclesia*, et refertur in cap. *Bene quidem*, 96 dist., ubi lex quædam super ecclesiastica bona lata a quodam Basilio, homine laico, et urbis Romæ Præfecto, licet esset favorabilis Ecclesiæ, nulla declaratur ex defectu potestatis. Ne in exemplum remaneret præsumendi quibuslibet laicis, quamvis religiosis, vel potentibus, in quacumque civitate quolibet modo aliquid decernere de ecclesiasticis facultatibus, quarum solis sacerdotibus disponendi indiscresse a Deo cura commissa docetur. Ratio ergo est, quia tales leges sunt nullæ, utpote sine jurisdictione factæ; nam sicut civilis magistratus aut princeps non habet potestatem administrandi ecclesiastica bona, ita nec jurisdictionem habet ad ferendas leges, per quas circa eadem bona aliquid disponat. Tum quia eadem ratio versatur, videlicet, quod hæc bona, eo ipso quod speciali titulo facta sunt divina et spiritualia, per specialem habitudinem ad supernaturalem finem, constituta sunt extra objectum et materiam jurisdictionis temporalis. Tum etiam quia dispositiones legum circa aliqua bona continent (ut sic dicam) principalem dispositionem, et administrationem talium honorum quasi eminenter, seu virtute; quia hujusmodi leges sunt regulæ per quas dirigi debet talium honorum administratio; ergo qui talia bona administrare non possunt, multo minus poterunt leges circa illa con-

dere. Quapropter non minus juris divini est hæc exemptione a lege civili, quam ab administratione laicorum. Est tamen variis modis determinata hæc exemptione per ecclesiasticos canones, præscribentes modum circa alienationes, translationes, et alios modos dispensandi, vel administrandi hæc bona, ut videre licet in decretis antiquis allegatis, præsertim 12, q. 1, et toto titulo de Rebus Eccles. non alien., et in cap. *Pastoralis*, de His quæ fiunt a Praelatis sine consensu capituli. Unde per easdem leges canonicas aucta est hæc exemptione per varia privilegia ecclesiis concessa circa bona sua, ut circa alienationes, præscriptiones, et similia, de quibus hic non est dicendi locus, sed vide ri possunt Doctores Canonistæ in cap. *Nulli*, de Rebus Ecclesiæ non alienandis, et Summis tæ, præsertim Sylv., verb. *Alienatio*, et verb. *Ecclesia*, 2 et 3.

11. Bona ecclesiastica exempta sunt a judiciis sœcularibus. — Tertio, eadem ratione gaudent hæc bona exemptione ab onere judicii sœcularis. In quo breviter advertendum est, duobus modis posse hæc bona considerari: primo, præcise quatenus res sacrae sunt, et ut sic manifestum est non posse circa illa versari sœcularia judicia, nam si dubitatio aliqua vel lis circa illa, ut sacra sunt, moveatur, ex ipsa rei natura et divino jure ad ecclesiasticum judicium pertinet, quia est materia sacra et spirituallis; ut si tractetur, an ecclesia sit polluta, necne, vel an calix sit recte consecratus, et similia. Alio modo possunt hæc bona considerari ratione materiæ, secundum quam temporalia bona sunt, et de illarum dominio, vel jure utendi aut fruendi illis litigari potest, et hoc modo etiam constat hæc bona esse exempta a judicio sœculari, ut notant Glossa, Panormit. et Doctores, in cap. *Ecclesia Sanctæ Mariæ*, de Constit., per illum textum, et per cap. *Si clericus*, cum similibus, de Foro comp., et cap. *Decernimus*, de Judiciis, cum aliis quæ cap. 13 adduximus. Hæc enim pars fere coincidit cum his quæ ibi diximus de exemptione clericorum in causis civilibus. Nam si clerici eximuntur quoad propria bona a sœculari judicio, multo magis quoad bona ecclesiastica. Unde hoc intelligendum est cum declaratione ibi addita, nimirum, ut procedat, quando ipsa Ecclesia est rea, seu in judicium vocatur a laico, vel (quod perinde est) quando laicus prætendit talia bona esse sua, vel aliquod in eis jus habere. At vero si e converso Ecclesia, seu Pastor ejus pro hujusmodi bonis, quæ ecclesiastica esse

prætendit, laicum conveniat, tunc non habet locum exemptio a sacerdotali jure, quia reus in foro suo conveniri debet, nisi fortasse sacrilegium intercesserit, ratione ejus potest reus immediate trahi ad judicium ecclesiasticum, ut in prædicto capite satis explicatum est.

CAPUT XVIII.

AN EXEMPTIO A TRIBUTIS SÆCULARIBUS CONVENIAT ECCLESII, EARUMQUE BONIS, QUATENUS CHRISTI PATRIMONIUM SUNT.

1. Bona ecclesiastica quædam mobilia, alia immobilia, utraque quid. — Ecclesiarum nomine, ut præcedenti capite explicavi, ipsa materialia templo vel loca sacra intelligimus; per ecclesiastica autem bona res omnes sacras, et quæ ad usum ecclesiarum, Deo, seu ipsis ecclesiis donatae sunt, et sub administratione ejusdem ecclesiæ, seu ministrorum ejus perseverant. Nam de bonis propriis clericorum postea dicemus. Distingui autem possunt hæc bona in immobilia et mobilia. Sub immobilibus non solum fundos, prædia, domos, et similia corporalia bona, quæ fixam radicem habent, sed etiam jura fructifera, ut census, quibus annui redditus respondent, et servitutes, et similia bona perpetua, quæ incorporalia dicuntur, comprehendimus, juxta juris consuetudinem, in Clementin. *Exiri*, § *Cum annui redditus*, de Verbor. signific., et quæ notantur a Doctoribus, in cap. *Nulli*, de Reb. eccles. non alienand.; et Glos., in cap. 2, de Reb. eccl. non alienand., verb. *Jura*. Sub mobilibus autem cæteras res omnes ecclesiæ usibus deputatas, eujusque estimationis vel valoris sint, complectimur. Nam licet, in ordine ad perpetuam conservationem, prohibendumque alienationem, soleant res pretiosæ ecclesiæ sub immobilibus comprehendendi, quia eodem jure censentur, ut notat Panormitan., in cap. *Tua*, de His quæ fiunt a Prælatis, etc., tamen in ordine ad tributa non habent peculiarem rationem, et ideo inter mobilia censentur sicut revera talia sunt, juxta l. *Lex quæ mancipia*, Cod. de Administrat. tutorum. Ea vero, quæ se moventia vocantur, licet immobilia proprie dici non possint, ut per se constat, quatenus fructifera esse solent, et per quamdam successionem possunt esse perpetua, ad illa nunc revocantur.

2. Sæcularia tributa quæ. — Per tributa vero sæcularia, illa intelligimus quæ a regi-

bus seu temporalibus monarchis, vel aliis magistratibus jure possunt vel solent imponi. Nam de tributis quæ a Summo Pontifice possunt exigi, et ecclesiastica possunt vocari, non est in præsenti consideratio; illa enim non sunt contra exemptionem ecclesiasticam, nam hæc est a potestate civili, non a Pontificia. Imo, quia hæc bona subsunt plene potestati Pontificis, eximuntur a potestate sacerdotali, eoque ista exemptio refertur, ut illa subjectio plene possit impleri; ideoque dubium non est quin ecclesiastica bona possint aliquibus tributis ecclesiasticis subjici, saltem per Summum Pontificem, qui est supremus eorum dispensator. Qualia vero et ob quas causas futura sint, et an ab inferioribus Prælatis introduci possint, non est, ut dixi, præsentis considerationis, sed in materia de prebendis et beneficiis ecclesiasticis tractandum est.

3. Tributa sæcularia duplia. — Deinde tributa sæcularia, quamvis multiplicita sint, ut in lib. 5 de Legib. dixi, in præsenti in duo capita distingui possunt, juxta divisionem positam rerum mobilium et immobilium: quædam ergo tributa de rebus immobilibus posulantur, et solent vocari tributa realia, seu pensiones aut vectigalia, quamvis hæc nomina interdum communiora sint. Alia vero sunt tributa quæ de rebus mobilibus petuntur, ut gabella, quæ etiam vectigal a vectando appellatur. Est enim differentia notanda inter res mobiles et immobiles, quod mobiles, quia non sunt fructiferae, de se non sunt capaces tributorum, nisi quatenus subsunt negotiationi, vel transportationi ab uno loco in alium, et ideo talia tributa inde accipiunt nomina vectigalium, etc. Res autem immobiles, quatenus fructiferæ sunt, per se sunt capaces alieni pensionis, et ideo hæc voce circa illas utemur.

4. Prima conclusio: omnia ecclesiastica bona a tributis sunt exempta. — Dico ergo bona ecclesiastica, tam mobilia quam immobilia, a tributorum solutione esse exempta. Conclusio est certa, et communis Doctorum, locis infra citandis, et sumitur ex c. *Non minus*, et cap. *Adversus*, de Immunit. ecclesiar., et cap. *Quanquam*, de Censib., in 6, et c. 1, de Immunit. ecclesiast., in 6; et Clement. 4, eodem titul., et in Extravag. *Quod olim*, eodem. Item in jure civili confirmata est hæc immunitas, præsertim in constitutione Friderici post libros Feudorum, et habetur etiam in l. 4, § *Item nulla*, c. de Episcop. et Cleric. Deinde optimum argumentum sumitur ex cap.

2 de Censib., quatenus dicit tributum esse signum subjectionis; cum ergo neque ecclesiæ, neque earum bona sint subjecta potestati sæculari, neque etiam tributis sæcularibus subiecti possunt. Quæ ratio generalis est de omnibus ecclesiasticis bonis, et ita etiam loquuntur alia jura.

5. *Ratione probatur conclusio.*—Ut autem fundamentum hujus immunitatis in his bonis specialiter declaremus, advertere oportet duos respectus in eis considerari posse, ut in eis hæc immunitas fundetur: unus est, quod hujusmodi res sunt sub speciali dominio Dei, ut dixi; alijs est, quia tales res sunt specialiter consecratæ aut benedictæ. Prior respectus generalis est omnibus his bonis, quæ ecclesiastica nuncupantur, et ideo de illo in hoc capite dicemus; de altero vero, qui minus universalis est, dicemus capite sequenti. Dico ergo, habitudinem illam ad Deum tanquam ad pecuniarem dominum sufficere ad fundandam dictam exemptionem, non solum in humano, sed etiam in divino et naturali jure. Nam, si dominus honorum non potest esse subjectus tributis, neque etiam ipsa bona possunt tributis onerari, ut infra etiam de clericis dicemus, tum quia bona adhærent personæ, et sequuntur conditionem ejus tanquam accessorium principale; tum etiam quia solutio talis tributi per se non potest ab alio, nisi a domino honorum postulari, et ita necesse est ut in ipsum redundet, et virtute illi tributum imponatur. At vero dominus horum honorum ecclesiasticorum non potest esse subjectus tributis, cum sit ipsemet Christus; ergo neque ipsa ecclesiastica bona. Atque hic optime accommodantur verba Christi: *Ergo liberi sunt filii*, nam filius naturalis regis, sicut in persona sua exemptus est a tributo, ita et in suis propriis bonis; ergo multo magis bona ecclesiastica, quæ propria sunt Christi, et veluti proprium patrimonium ejus, ut Concilia loquuntur, libera sunt a vectigalibus et tributis.

6. *Objectio.* — Dices, proprium et quasi proximum dominium horum honorum revera non esse immediate apud Deum, vel Christum solum, sed apud aliquos homines, vel hominum congregationem habentem jus utendi, et fruendi talibus bonis, et de illis disponendi in omnem usum lege non prohibitum. Ut, verbi gratia, bona alienus monasterii ecclesiastica sunt, et tamen dominium illorum est apud conventum talis monasterii, et bona alienus Ecclesiæ matricis sunt sub dominio totius cleri talis Ecclesiæ, ut est quædam particularis

et spiritualis congregatio ex clericis coalescens. Ergo ille titulus divini dominii non est sufficiens ad fundandam hanc exemptionem a tributis, quia tributum magis consideratur respectu proximi domini, nam ab illo solendum est. Alioqui etiam *Domini est terra, et plenitudo ejus*; omnia enim altius et perfectius sunt sub dominio divino, quam humano; tamen, quia illud dominium divinum non excludit humanum, sub hoc posteriori respectu bona humana capacia sunt tributorum; ergo idem erit cum proportione in bonis ecclesiasticis. Nam, licet peculiari modo dicantur esse Dei, quia ad ejus cultum peculiari modo ordinata sunt, nihilominus quatenus sunt bona temporalia, quibus homines uti debent, non possunt non esse sub aliquo humano domino.

7. *Prima responsio.* — Duobus modis respondemus: primo, negando assumptum; est enim valde probabilis sententia Navarri assertoris bona ecclesiastica proxime et immediate esse sub dominio Dei, et Christi Domini, non per metaphoram, sed per omnimodam proprietatem, ita ut nullus homo vel hominum congregatio habeat proprium dominium, sed tantum dispensationem cum majori vel minori plenitudine potestatis. Quam sententiam dicit Navarrus esse communem consensum omnium catholicorum Doctorum. Et eam late probat decretis Pontificum et Conciliorum, ac rationibus, ut videlicet in *Apologia de Redditibus ecclesiasticis*, q. 1, monito 18 et 24, et in noviori editione tract. de *Redditib.*, q. 1, monit. 16, 21 et 30, et q. 3, monit. 31, n. 7.

8. *Bona ecclesiastica esse immediate sub dominio Dei probatur.* — Estque hæc opinio satis plia et probabilis, quæ ratione præter alias suaderi potest, quia si aliquis homo esset dominus honorum, maxime Summus Pontifex, nam apud illum est suprema potestas dispensandi omnia ecclesiastica bona, ut supra visum est, et passim in canonibus traditnr, dist. 96, 12, q. 2, et in titulis de Reb. Eccles. non alienand., et de Immunit. Ecclesiar. At Pontifex ipse non habet proprium dominium rerum ecclesiasticarum, etiam illarum quæ specialiter sunt Ecclesiæ Romanae, ut sumitur ex Concilio Romano III, sub Symmacho, c. *Non licet*, 12, q. 2. Non enim potest suo arbitrio hæc bona expendere, vel alienare, sed tantum ut fidelis dispensator et prudens; ergo nec tota Ecclesia universalis habet tale dominium in talia bona, quia ipsi videantur in suo capite donata, sicut neque aliqua Ecclesia par-

ticularis habet proprium dominium suorum bonorum ecclesiasticorum, quia quælibet Ecclesia pendet a Pontifice in suorum bonorum administratione, et universalis Ecclesia etiam in hoc est illo inferior; ergo omnes isti sunt tantum dispensatores horum bonorum, et non veri domini. Neque est inconveniens quod aliqua bona humana et temporalia fiant extra dominium mortalium hominum, quia fideles altiori mente quam humana, scilicet, per fidem operando, illa Christo donare potuerunt, et voluerunt, et ipse quamvis per ministros suos illa acceptet, fieri potest, et fit proprius illo- rum dominus.

9. Quia vero non desunt graves auctores qui dominium harum rerum apud homines esse dicunt, saltem apud Ecclesiam, vel universalem, vel particularem respective, juxta intentionem eorum qui talia bona Ecclesiis donarunt, ut videre licet in Turrecr., e. *Videntes*, 12, q. 1, in art. 2, et Cajet. 2. 2, q. 43, art. 8, ideo respondendum est aliter, abstrahendo ab opinionibus, inter quas fortasse, quod ad hoc punctum attinet, magis est quæstio de nomine quam de re. Dico ergo, esto talia bona sint sub aliquo humano dominio, hoc non obstare quominus a tributis exempta esse debeant di- vino jure. Tum quia, non obstante illo domi- nio Ecclesie, negari non potest quin ad jus Christi Domini peculiariter modo pertineant, cum ad ejus cultum et honorem peculiariter donata sint, propter quod patrimonium Christi dicuntur, ut vidimus; et in canon. 39 Apostolor., alias 40, vocantur hæc bona *Dominica*, seu *res Dominicæ*; hoc ergo satis est, ut neque ad alias usus applicari, nec tributaria fieri debeant. Tum etiam quia illamet personæ, vel communitates quibus talium rerum domi- nium attribuitur, non sunt subjectæ sæcula- rium principum jurisdictioni; ergo nec talia bona debent ab eisdem principibus tributis subjici, juxta regulam paulo antea positam. Assumptum declaratur, quia Ecclesia, sub eu- jus dominio dicuntur esse hæc bona, non ha- bet hoc dominium, ut est communitas civilis, sed ut ecclesiastica, et ut est corpus Christi mysticum; sed Ecclesia, ut talis est, non sub- est sæculari principi, sed Pontifici; ergo nec ecclesiastica bona.

CAPUT XIX.

AN EXEMPTIO A TRIBUTIS SÆCULARIBUS CONVE- NIAT ECCLESIE, ET REBUS SACRIS OB EARUM SPECIALEM SANCTITATEM SEU CONSECRATIONEM.

1. Aliud fundamentum hujus exemptionis esse potest peculiaris consecratio, aut benedictio, vel deputatio talium rerum, ut sint quasi proxima instrumenta divini cultus. Quæ ratio non est ita universalis sicut præcedens; in his tamen rebus, in quibus reperitur, suffi- cientem causam huic exemptioni a tributis præbet. Et in primis inter bona immobilia tantum ecclesiæ ipsæ, seu templa, et similia loca divino cultui proxime dicata, hunc peculiarem modum sanctitatis participant. Nam cætera bona immobilia, ut sunt prædia Eccle- siarum, et similia, non habent hujusmodi res- pectum, sed solum illum, ratione cuius remote pertinent ad divinum cultum, quatenus ad substantiationem ministrorum ordinantur. Et ideo D. Thom. 2. 2, q. 99, art. 1, hæc bona col- locat in ultimo gradu tertiae speciei rerum sa- erarum, cum tamen templis et locis sacris se- cundam speciem tribuat.

2. *Prima conclusio: locis sacris etiam ra- tione consecrationis debetur immunitas.* — Inter bona ergo immobilia ecclesiastica, templa, et loca sacra merentur (ut ita dicam) hujusmodi exemptionem a tributis ob peculiariter titulum sanctitatis. Ita sumitur ex e. *Secundum cano- nica*, et e. *Sancitum est*, 23, q. 8, et e. 1, de Censib., in quibus area ecclesiæ seu fundus ubi ædificata est, iino et horti juxta ecclesiam positi, et prædia in dotem ecclesiæ peculiariter colata (quæ solent mansus appellari), a tri- butis eximuntur; ergo multo magis dominus ipsæ, seu fabricæ templorum aut ecclesiarum, eadem gaudent exemptione. Nam reliqua, quæ adjacent ecclesiæ, et sunt quasi partes ejus, eximuntur propter sanctitatem ipsarum eccle- siarum; ergo multo magis ipsæ ecclesiæ, jux- ta dialecticorum regulam: *Propter quod unum- quodque tale*, etc. Quamvis possit etiam alia ratio in ecclesiis considerari, quia non sunt res fructiferæ aliquorum temporalium pro- ventuum, neque habent usum civilem, seu sæcularem pretio aestimabilem, sed tantum usum sacrum, ad quem sanctificatae sunt, vel peculiariter dicatae; et ideo intrinsece sunt incapaces temporalis tributi. Et eadem ratio exemptionis invenitur in area ecclesiæ, et

in atriis, et in aliis partibus, vel locis adjacentibus ecclesiæ, quæ alium fructum non habent præter ejusdem ecclesiæ usum, seu servitium. Dos autem seu manus ecclesiæ licet temporales proventus ferre possit, quia vero omnes illi fructus ad ecclesiæ sustentationem censentur necessarii, ideo cum ipsa ecclesia dos ejus eximitur.

3. *Bona ecclesiastica, ad sustentationem ministrorum ordinata, non eximuntur ratione alicujus consecrationis.* — In aliis autem ecclesiasticis bonis, tam immobilibus quam mobilibus, quæ tantum ad sustentationem ministrorum, vel expensas ecclesiæ ordinantur, ut sunt pecunia, triticum, vinum, et aliæ res usu consumptibiles, non habet locum ratio specialis consecrationis, ut constat, sed solum eximuntur in prædictis juribus, vel ex ratione generali divini dominii, vel quia integre et sine diminutione ad sustentationem ecclesiæ necessariae sunt. Hæc tamen posterior ratio minus universalis videri potest, quia interdum possunt esse abundantiores alicujus ecclesiæ fructus, ita ut sumptus computentur, sicut revera fieri debet, atque ita illa ratio, moraliter loquendo, erit etiam adæquata et universalis. Alia vero sunt mobilia bona ecclesiæ, quæ peculiari et latiori modo res sacre dicuntur, quas D. Thomas supra, in tercia specie et in secundo gradu ejus numerat. In primo enim gradu ponit sacramenta, quæ ad præsens non referunt; in secundo vero ponit vasa consecrata, imagines sacras, et reliquias Sanctorum, sub quibus comprehendit etiam vestimenta sacra; imo et generaliter addit omnia quæ ad ornatum ecclesiæ et ministrorum pertinent; eademque ratio, vel major est de chrismate, et oleo benedicto, quæ ab sacramenta reduci possunt; itemque de Agnus Dei, granis benedictis, et similibus.

4. *An res sacrae si ratione materiae vendantur, tributis subjiciantur.* — De hoc ergo posteriori genere rerum sacrarum dubitari potest, an, secluso respectu ad peculiare dominium Dei, vel Ecclesiæ, ex vi solius consecrationis, seu quasi sanctificationis quam habent, exemptæ sint a tributis, quorum res mobiles sunt capaces, ut gabellarum, si ratione materiae vendantur, aut vectigalium, si ab uno in alium locum transferantur. In quo dubio nihil invenio specialiter dictum ab auctoribus. Solum enim de bonis ecclesiasticis in generali tractant, et de illici, tam mobilibus quam immobilibus, indefinitæ, ac proinde universaliter definiunt a tributis

esse exempta. Sub bonis autem ecclesiasticis omnes res sacras, quas enumeravimus, plane comprehendunt, et consequenter sentiunt omnes illas eadem exemptione gaudere. Potest autem hæc sententia fundari in alio principio, nimirum, quod illi duo respectus supra positi, scilicet, rei existentis sub peculiari domino Dei, et rei specialiter sacratæ et divino cultui proxime dicatae, ita distinguantur, ut prior respectus possit separari a posteriore, tanquam universalior illo; nihilominus posterior nunquam separetur a priori, quia, eo ipso quod res aliqua est aliquo modo sacra, desinit esse sub humano dominio, et ad solum divinum proxime pertinet, et inde consequenter fit ut a tributo humano sit exempta, remote quidem ratione consecrationis, proxime vero ratione personæ Christi, sub cujus dominio existit.

5. *An res sacrae ex vi solius consecrationis ab humano dominio eximantur.* — Illud autem fundamentum, nimirum, rem sacram, eo ipso quod talis est, extra humanum dominium fieri, valle commune est inter jurisperitos; ita enim sentit Glossa de rebus inanimatis, in c. *Frequens*, dist. 54, v. *Reddi*, et in c. *Comperimus*, 14, q. 6, et in c. *Episcopus in Diœcesim*, 7, q. 4, v. *Altaria*, quas Glossas ibi Doctores probant. Verum est illas expresse non dicere, reū inanimem consecratam non posse esse sub humano dominio, sed non posse ad vulgares et communes usus iterum converti, et ideo si res ante consecrationem erat sub alicujus dominio, et invito domino consecrata sit, non esse illi restitnendam. Quod videtur aperte docere Gregorius, in d. capit. *Comperimus*, alias lib. 6, ep. 58, in d. 2. Clarius Navarr., in dicta *Apolog. de Reddit.*, monit. 24, n. 5, universaliter ait, bona sacra nullius puri hominis vel hominum esse, sed Dei tantum, et Domini nostri Jesu Christi. Quod probat ex § *Nullus*, Inst. de Rerum divis., ubi res sacrae nullius esse dicuntur, ubi ratio redditus his verbis: *Quod enim divini juris est, id nullius in bonis est.* Non dicitur autem esse nullius, quia ita careat domino, ut possit fieri primo occupantis; ergo dicitur nullias, quia non est sub dominio alicujus puri hominis, sed sub speciali dominio Dei, ut notavit Glossa, in dicto § *Nullus*, et in l. 2, ff. de Rerum divis., quæ Glossæ ibi communiter approbantur, ut Navarr. refert. Et pro hac sententia allegari possunt jurisperiti dicentes, si quis furetur calicem ex privata domo, non competere actionem furti contra illum domi-

no domus, nisi fortasse nomine Dei, quia res sacra nullius hominis est, sed solius Dei, ut videre licet apud Sylvestr., v. *Sacrilegium*, § 2. Denique confirmari potest hæc sententia, quia laicis non licet vasa aut vestimenta contrectare. c. *In sancta*, et cap. *Vestimenta*, de Consecr., dist. 1, eum similibus; ergo multo minus capaces sunt dominii talium rerum.

6. Res sacræ ex vi solius consecrationis non eximuntur ab humano dominio. — Hoc autem fundamentum ita indistincte sumptum non videtur verum, saltem in eo rigore in quo Navarrus loquitur. Primo, quia nullum est jus ecclesiasticum, quo omnes privatæ personæ, vel communites humanæ incapaces fiant dominii talium rerum, eo ipso quod consecratæ sunt; neque etiam ex natura rei sunt incapaces, nam possunt habere verum titulum dominii circa rem ipsam, seu circa materiam rei consecratæ, nulla enim ratio est cur consecratio sola dominium auferat. Multi enim Theologi dicunt hominem habere dominium, etiam ipsius gratiæ, quæ multo magis supernaturalis est quam vas consecratum. Deinde si persona privata sit ecclesiastica, præsertim sacerdos, non est cur non possit esse proprie dominus calicis, vel aliarum rerum sacris ministeriis deservientium, quia ex parte materiae potest illas suis sumptibus facere, et ex parte consecrationis potest illis libere et suo jure uti legitimo usu, quod satis est ad rationem dominii. Si vero sit laicus, potest etiam habere titulum dominii circa materiam. Et licet post consecrationem non possit per se ipsum licite illis rebus uti, propter incapacitatem personæ, potest tamen illis uti per alios convenientes ministros, et similiter aliis potest facultatem concedere utendi hujusmodi rebus, et ipso invito nemo potest tales res vel usum earum usurpare sine injustitia; ergo signum est privatum hominem, etiam laicum, posse habere talium rerum dominium. Denique usus etiam et experientia hoc personadet, nam multæ privatæ personæ possident tanquam proprias hujusmodi res consecratas, ut vestimenta sacra, et calices, et paramenta altarium, quæ sœpe habent in suis privatis oratoriis, in quibus, vel etiam in propriis cubiculis habent sacras imagines, reliquias Sanctorum, et alias res benedictas, de quibus etiam disponunt tanquam proprii domini, donando, mutando, vel etiam vendendo, quantum ex parte materiae fieri potest, quæ omnia non solum ecclesiasticis, sed etiam laicis licita esse idem usus persuadet, nam ab hominibus piis et prudentibus

fiunt, et a Prælatis sine reprehensione vel contradictione tolerantur.

7. Verum furtum committit, qui rem consecratam alicujus private personæ surripit. — Quapropter non videtur verum esse, quod prædictæ Glossæ absolute dicunt, hujusmodi res semel consecratas non esse laicis reddendas, etiam si ante consecrationem ipsorum essent, et ipsis invitis consecratæ sint. Nam imprimis hoc non dicit Gregorius, in d. c. *Comperimus*, in quo loquebatur de quibusdam synagogis Judæorum, quæ ipsis invitis in ecclesiis fuerant translatæ et consecratæ, de quibus ait Gregorius, licet consecratæ fuissent sine causa, nihilominus non esse reddendas Judæis, sed pretium domorum solvendum; et rationem reddit, *quia quod semel consecratum est, non valet Judæis restituī*. Ubi non loquitur universe de laicis fidelibus, sed de Judeis infidelibus, qui ad usus profanos illas domos convertere volebant, quod post consecrationem non licet. Unde ex illa sententia pro laicis fidelibus ad summum colligere licet, non esse illis res sacras reddendas, imo nec permittendas, ut eis ad profanos seu communes actus utantur; si autem solum ad sacros usus illas possidere et retinere velint, non est cur illis non tradantur, si alioqui jus proprium in hujusmodi res habere supponantur. Atque ob similem rationem non videtur vera alia juristarum assertio, videlicet, non committere verum furtum, qui calicem, verbi gratia, aut aliam rem consecratam a privata persona, quæ eam tanquam propriam possidet, surripit. Nam, licet illi furto addatur circumstantia sacrilegii, non ideo tollitur vera malitia furti, nam est injusta acceptio rei alienæ, invito domino. Neque illa injustitia est contra alium, praeterquam contra illum qui rem illam, licet sacram, tanquam propriam possidet; ergo contra illum furtum committitur, et non est cur actio furti illi denegetur. Non videtur ergo illo modo satis expediri proposita difficultas.

8. Res consecratæ, etiamsi ab humano dominio non eximantur, manent a tributis exemptæ. — **Materia rei semel consecratæ iterum ad profanes usus applicari nequit.** — Nihilominus tamen probabilius mili videtur, hujusmodi res ex vi suæ consecrationis exemptas esse a vectigalibus et similibus tributis, quia jura et doctores indifferenter loquuntur de bonis ecclesiasticis, sub quibus omnes res sacras comprehendunt. Item quia est hoc valde consuetaneum divino et naturali juri, quia his rebus

tanquam sacris debetur honorarius et religiosus cultus, ut in septima Synodo dicitur; ergo contra rationem est, ut per exactionem tributorum profanentur. Præterea, quia licet negare non possimus, hujusmodi res sacras interdum esse sub dominio privatorum fidelium, nihilominus etiam verum est, ad Deum speciali jure et titulo pertinere, quatenus ad illius cultum ita dicatae sunt, ut jam non possint ad profanos usus converti, praesertim quamdiu consecrationem, et formam ad illam necessariam retinent; imo, etiam si illam amittant, materia ipsa propter respectum ad priorem consecrationem a communibus usibus abstractur, juxta cap. *Ligna*, et cap. *Altares*, de Consecr., dist. 1. Ex quo etiam fit ut, licet manere possint sub hominis dominio, nihilominus dominium illud valde restringatur, et coaretur ad solum usum sacrum; ergo merito hujusmodi res exemptæ esse debent a tributo, tum quia videtur peti propter habitudinem, quam habent ad usum sacrum, cum jam non habeant alium moralem usum; tum quia videtur exorbitans et iniquum, temporale tributum exigere a domino talis rei, cum jam illam non ut temporalem, sed ut sacram, et quodammodo spiritualem possideat.

CAPUT XX.

UTRUM QUÆLIBET BONA CUM ECCLESIASTICA FIUNT,
EO IPSO SINT AB OMNI TRIBUTO ET ONERE CI-
VILI ILLIS INHÄRENTE EXEMPTA.

1. Hæc quæstio maxime locum habet in rebus immobilibus, quibus solent imponi onera realia, quæ ipsis moraliter inhärent, et cum illis incedunt, et ratione illarum solvuntur, quatenus fructiferæ sunt, vel usum habent pretio æstimabilem, distinctum a dominio. Rebus autem mobilibus non solent imponi ista onera, seu tributa realia propter contrariam rationem, quod per se fructiferæ non sunt, ideoque solum de illis exiguntur tributa, mediante aliqua actione, qualis est negotiatio, vectio, etc. Non repugnat tamen super rem mobilem imponi onus per modum alienus servitutis, et ideo generalis proponitur quæstio, an quæcumque bona desinant esse euicumque civili aut sacerdotali oneri subjecta, eo ipso quod ecclesiastica sunt.

2. *Prima sententia negans.* — Ratio autem dubitandi est, nam pensio aliqua seu tributum potest super hæc bona imponi, vel postquam facta sunt ecclesiastica bona, vel antequam

Ecclesiæ donata fuerunt. De prioribus tributis certissimum est, bona hæc, postquam ecclesiastica facta sunt, non posse fieri tributaria; quod in universum sine exceptione procedit, ut jura allata probant, et omnes scriptores catholicæ sine dissensione fatentur. De posterioribus autem oneribus est non parva controversia, nam communis sententia tenet, bona ecclesiastica non eximi a tributis realibus quæ ipsis inerant, priusquam ecclesiastica fierent. Ita tenet Barthol., in leg. *De iis*, Cod. de Episc. et Cleric., et in leg. *Placet*, Cod. de Sacros. eccles.; Innocent., in c. *Non minus*, de Immunit. eccl., n. 4; Glossa, in c. *Secundum canonicam*, 23, q. 8, quam ibi sequitur Archidiaconus; item Glossa, in c. *Tributum*, v. *De exterioribus*, et in c. *Sancitum*, v. *Annua*, et in c. *Secundum*, eadem causa et quæst., et in capite primo de Immunitat. ecclesiistarum, in 6, verb. *Bonorum*, ubi idem Joann. Monachus et Joannes Andreas docent; et Panormitan. in dicto capit. 1 de Censib., numero sexto et septimo, et in cap. ultim. de Vita et honestate Clericorum, num. duodecimo. Ubi declarat opinionem hanc esse intelligendam, quando onus est perpetuum et invariabile, quia tunc intelligitur esse annexum possessionibus, non vero alias. Idem habet in cons. 26, volum. 1, et cons. 3 et 6, volum. 2. Et hanc opinionem sequitur Sylvest., verb. *Immunitas*, 1, quæst. 5, versicul. *Tertium*, quamvis fateatur hoc in Italia non servari; et Angelus, eodem verb. *Immunitas*, n. 36, ubi distincte explicat hoc procedere, sive onus impositum fuerit ex dispositione publica, puta principis, sive ex dispositione privata. Et idem cum eadem declaratione latius tradit Gregor. Lopez, partit. 1, titul. 6, l. 51, Gloss. 4, et tit. 45, l. 4, Glos. 4, in fine, ubi etiam leges regni Castellæ in eamdem sententiam allegat.

3. *Primum fundamentum.* — *Secundum.* — *Tertium.* — *Prima confirmatio.* — *Secunda confirmatio.* — Fundatur hæc sententia primo in aliquibus juribus civilibus, præcipue in l. ult., Cod. de Exaction. tributorum, lib. 10, Auth. *Idem prædium*, C. de Sacros. Eccles., quæ refertur etiam a Gratiano, in § *Idem prædium*, 10, q. 2, quatenus ibi supponitur, prædium Ecclesiæ posse habere onus fiscale, id est, tributi solvendi principi, ut notat etiam Glossa ult., in Authent. *Sicut alienatio*, Cod. eodem. Expressius hoc fundatur in leg. *Placet*, Cod. de Sacros. Eccles., et leg. *De iis*, Cod. de Episc. et Cleric., et a simili in l. 1, Cod. de

Indiction., lib. 40, ubi dicitur, similia bona transire ad fiscum cum onere, etiam si fiscus jure civili soleat in privilegiis Ecclesiæ æquiparari. Secundo fundatur in juribus canoniceis, cap. *Convenior*, cum aliis proxime allegatis, ex 23, q. 8, et c. *Si tributum*, et c. *Magnæ*, 11, q. 4. Tertio additur urgens ratio, quia res habens annexum onus transit cum onere suo; ergo si bona antequam essent Ecclesiæ, habebant hoc onus annexum, eum illo transenit ad Ecclesiam, quando illi donantur, vel ab illa emuntur, et consequenter Ecclesia tenebitur ad solvendum onus seu tributum ratione rei acceptæ. Consequentia videtur clara, et antecedens imprimis est vulgare in jure, c. *Ex clericis*, de Pignor., et in c. *Si quis laicus*, 16, q. 4, cum similibus. Et ratione videatur efficaciter probari, quia nemo potest plus juris in alterum transferre, quam ipse habeat; ergo qui non habet dominium rei, nisi cum tali onere, non potest illam, nisi cum eodem onere, in Ecclesiam transferre, quia sicut non erat in potestate sua rem illam habere vel possidere sine tali onere, ita nec potest facere ut ab alio sine onere possideatur. Et confirmatur ac declaratur hæc ratio, quia alias fieret injuria principi, vel alteri habenti jus ad illud onus, quia privaretur jure suo sine suo consensu, quod est contra naturalem justitiam. Et confirmatur secundo, quia alias donationes immobilium bonorum ecclesiis factæ cederent in magnum præjudicium principum temporalium, quia privarentur magna parte suorum proventuum, quibus ad sustentanda onera, et honorem sui munieris, maxime indigent. Quod argumentum sæpius inculeat in suo libello rex Angliae, ut christianos principes contra immunitatem ecclesiasticam moveat.

4. *Secunda sententia affirmans.*—Nihilominus non desunt auctores qui absolute dicant, bona ecclesiastica non solum non posse novis tributis onerari, verum etiam eximi a tributis solvendis, quibus bona onerata erant, priusquam ipsi Ecclesiæ acquirerentur, seu (quod perinde est) bona ipsa liberari a talibus oneribus, eo ipso quod in Ecclesiam transferuntur. Pro hac sententia citat Panormitan. Glossam, in dicta leg. *Placet*, Cod. de Sacros. Eccles., et in diet. leg. *De iis*, Cod. de Episc. et Cleric., quia dicit leges illas revocatas esse per constitutionem Friderie; quod etiam asseruit Cynus, in dict. leg. *Placet*, in fine. Verumtamen hinc non satis colligitur, illas glossas fuisse hujus sententiae, nisi supponatur Fridericum in sua constitutione locutum esse de

oneribus etiam realibus adhærentibus ipsis bonis, priusquam ad Ecclesiam pervenirent, quod tamen dictæ Glossæ non declarant: in hoe autem favent, quod indefinite et sine limitatione loquuntur. Hanc vero sententiam late, et satis diligenter et eruditæ persuadere conatur Cardinalis Albanus, in tract. de Immunit. ecclesiast., cuius sententia valde pia, et ad veritatem accedere mihi videtur. Quia vero nimis indistinetæ et absolute loquitur, et rationes ejus aliquid, ultra id quod verum est, suadere possunt, ideo, distinctione adhibita, videtur resolutio hujus dubii clarius proponenda.

5. *Duo modi imponendi onera rebus immobilibus.*—Duobus itaque modis potest onus reale esse impositum rei immobili. Primo, ex vi proprii dominii circa talem rem, et interveniente aliquo pacto inter eum cui pensione solvenda est, et eum qui est dominus talis rei; vel e converso inter eum qui prius fuit dominus talis rei, et eum in quem illam transtulit cum tali onere, sive in eum transtulerit dominium directum, sive tantum utile. Exemplum prioris membi est, quando quis emit eensem superdomum vel vineam alterius, nam tune res illa manet tali pensione onerata, quam dominus rei censuario seu pensionario solvere tenetur, obligatione reali ex vi talis contractus, nec potest rem illam vendere act alienare sine tali onere. Exempla vero alterius membi sunt, quando dominus dat alteri bona sua in feudum, vel in emphyteusim, vulgo *prazo*, et quantum est ex natura rei potest etiam dari in censum, transferendo totum dominium rei in alium propter solam obligationem solvendi tale onus, vel cum illa conjungendo aliquam partem pretii, prout æqualitas justitiae postulaverit. Alio modo potest onus esse impositum prædio, non ex vi dominii illius, sed ex vi supremæ jurisdictionis regiae super tale præmium, vel in tali territorio; hoc enim modo potest princeps imponere tributa in terris sibi subjectis, sicut in personis, vel in rebus mobilibus. Et de hoc secundo genere realium onerum est propria controversia, quia hæc sunt proprie tributa, et ita illa simpliciter appellabimus; alia vero vel generali nomine *pensiones*, aut *privata onera*, vocabimus.

6. *Bona Ecclesiæ non eximuntur a tributis, vi alicujus pacti antea contractis.*—Dico ergo primo: bona temporalia, quæ antequam fiant Ecclesiæ, habent annexum reale onus privatum, seu pensionem solvendam alteri ex vi dominii et pacti precedentis, etiam si eccl-

siastica fiant, eidem subjacent oneri, quod Ecclesia solvere tenet, nec privilegium exemptionis ipsam a tali onere liberat. In hoc videtur mihi non solum vera, sed etiam certa communis sententia. Neque dissentit Cardinalis Albanus, imo expresse id concedit in quarta ratione pro communi sententia, cum ejus solutione. Et haberri potest hæc assertio, ex cap. *Verum, de Conditionibus apposit.*, ubi dicitur, quando bona dantur Ecclesie interposita conditione, servandam esse, si autem non servetur, non statim posse revocari donationem, nisi forte in ea sit additum, *quod, ea cessante, debeat revocari*; ergo etiam si conditio sit onerosa, servanda est; ergo pari modo si olim fuit imposta, et ipsi rei quasi adhæret, servanda est. Idem aperte colligitur ex cap. *Cum dilecti, de Donat.* Ratione item probatur ex illo principio, quod res transit cum onere suo; item ex illo, quod donatio pia, seu religionis ratio non invertit justitiae ordinem; esset autem contra justitiam, privare alterum, ipso invito, jure quod habet in tali re ad talem pensionem, cum sit verus dominus illius juris, eo modo quo tales res incorporeæ (ut a juristis vocantur) sub dominium cadere possunt.

7. *Ratione suadetur conclusio.*—Ex quibus principiis hæc potest ratio confici, quia quando Ecclesia acquirit hujusmodi bona quocumque modo, sive per legatum, sive per donationem, sive per emptionem, etc., vel liberatur res ab illo onere ex vi voluntatis ejus a quo illam recipit, vel vi alicujus legis positivæ, vel ex natura rei. Nihil horum dici potest; ergo nullo modo liberatur. Supponimus enim non concurrere voluntatem ejus cui pensio debetur; nam si ipse velit remittere, non est quæstio; illud tamen est accidentarium et extrinsecum; hic vero tractamus de hac præcisa ratione, quod bona ecclesiastica fiant. Primum autem membrum antecedentis per se est evidens, quia nullus potest in alium plus juris transferre, quam ipse habeat; tum etiam quia nullus potest disponere de jure alterius ipso invito, cum unusquisque sit rei suæ moderator et arbiter, l. *In re Mandata, C. Mandati.* Secundum patet, quia nulla talis lex positiva ostendi potest, sive divina, sive humana, nam quæ de hac materia loquuntur, de propriis tributis tractant. De illis enim loquebatur Christus, cum interrogavit Petrum: *Reges gentium a quibus accipiunt tributum?* etc. Et de eisdem tantum loquuntur leges et canones, ut statim videbimus. Et moraliter loquendo,

non possunt amplius extendi, quia justitiae repugnarent. Nam etiam humanæ leges non possunt ita absolute privare homines suis rebus et dominiis, nisi ubi evidens necessitas vel magna utilitas boni communis cogeret, quod in præsenti dici non potest, ut per se constat.

8. *Tertium denique membrum de jure naturali, seu ex natura rei, probatur, quia non est contra rationem, vel decentiam religionis, ut Ecclesia sustineat et solvat hujusmodi onera realia.* Solum enim inde sequitur, ut Ecclesia minus ditetur, quod per se non est indecens, neque aliud inconveniens affert, præsertim quando talia bona, vel liberaliter dantur Ecclesiae, vel ipsa justo pretio illa comparat. Nam si pertineant ad ipsum locum sacrum, vel ad dotem ejus, tunc habent speciale rationem, propter quam aliquid est in jure de illis peculiariter statutum, quod servandum est, ut capite sequenti dicemus. Denique servare contractus justos, et solvere debita, quæ ex illis proxime vel remote nascentur, non solum non repugnat Ecclesiæ, sed potius illam maxime decet, quia nemo a contractibus reperitur immunitis, neque ab obligatione quæ ex illis nascitur, cum Deus ipse obligetur ex pacto, ut dixit Bald., in l. 1, ff. de Pactis, magis ut Theologus, quam ut jurispritus, et ideo Magistrum Sententiarum allegat. Unde si attente res consideretur, Ecclesia non solum non est incapax hujus oneris, seu obligationis, quando in bonis præcessit, antequam Ecclesiae fierent, verum etiam illud posset imponere in bonis suis, nisi esset sibi prohibita alienatio ecclesiasticorum bonorum; ideoque habita facultate alienandi, vel in casibus in prohibitione exceptis, etiam potest super bona sua hoc onus impone, ut quotidie fieri videmus; ergo signum est non repugnare hoc ecclesiasticis bonis; ergo ex natura rei non cessat tale onus, quando in bonis ipsis præcessit.

9. *Assertionis ampliatio.*—Ex quibus coligo, assertionem hanc veram esse, ac procedere non solum quando onus a privata persona, sed etiam quando a principe impositum fuit, si ex simili pacto, et peculiari dominio talis rei, et non ex mera potestate jurisdictionis præcessit. Quod ideo adverto, quia fortasse ad intelligendos auctores communis sententiae poterit deservire. Ratio autem clara est, quia sicut persona privata potest habere proprium dominium alicujus prædii, et ex vi ejusdem dominii onus aliquod prædio imponere, ita etiam rex, ut per se manifestum est; hoc autem po-

sito, rationes pro assertione factæ æque procedunt in principe ac in quocumque privato. Unde in his tributis seu pensionibus, quæ in certa mensura, seu invariabili quantitate, de aliquibus prædiis aut agris solvuntur principibus, attente considerandum est an illa prædia olim fuerint sub proprio dominio principis, et illa dederit in feudum vel emphyteusim, vel simpliciter pro tali pensione. Nam si de hoc constare potuerit, profecto in eis procedet sententia communis, ut talia bona licet ecclesiastica fiant, cum onere suo ad Ecclesiam transirent, ut ex dictis satis aperte sequitur. Potest autem de hujusmodi origine constare, vel per scripturas antiquas, vel per constantem traditionem. Et juxta prædictos auctores magnum signum erit, si talis pensio nunquam minuantur vel angeatur, etiam si alia propria tributa regalia multiplicitate varientur, et quod bona illa nunquam fuisse legantur aut credantur extra jus regium, vel sub alterius dominio, sine onere solvendi regi talem pensionem. Quia hoc videtur esse sufficiens indicium illius originis, et quia cum contrarium constare non possit, merito in favorem regis præsumitur.

10. *Objectio.*—Objici vero potest contra assertionem, quod de Josephi legitur, Genes. 47, quod cum totam terram Ægypti Pharaoni tributariam redderet, nihilominus terram sacerdotalem exemerit. Illud enim tributum non ex mera jurisdictione regia, sed ex pacto proficiscebatur. Nam cum Ægyptii triticum a rege vellent emere, et pecuniam non haberent, possessiones loco pretii dabant, quas sub tributario onere solvendi quintam partem frumentum regi, ab eodem, tanquam a proprio illustrum domino, acceperunt; ergo cum terra sacerdotalis ab illo tributo exempta fuerit, satis significatum est bona ecclesiastica libera esse debere, etiam ab his pensionibus quæ ex pacto imponuntur.

11. *Solutio.* — Respondeo imprimis, ibi non esse sermonem de tributo prius imposito, sed de imponendo possessionibus quæ prius liberæ sacerdotibus datae fuerant, sic enim dicitur: *Prater terram sacerdotum, quæ a rege data fuerat eis;* non ergo fuit terra illa exempta a tributo antea imposito, sed ab imponendo. Deinde (quod præcipuum est) terra illa sacerdotum non fuit tunc exempta ab illo tributo ex peculiari privilegio, sed quia non fuit subjecta pacto in quo tributum illud fundatum fuit. Laici enim, quia fame et egestate premebantur, vendebant pro tritico possessiones, et

postea per onus tributarium illas redimebant; de sacerdotibus autem subditur: *Quibus et statuta cibaria ex horreis publicis præbebantur, et ideo non sunt compulsi rendere possessiones suas.* Sic ergo manserunt ab illo tributo liberæ, quia nulla venditio vel redemptio illarum facta est, et ita non fuit in illis necessaria peculiaris exemptio a privilegio, cum pactum, quod erat fundamentum tributi, in eis non intervenerit. Favor ergo sacerdotum tantummodo fuit, quod ex publicis horreis cibaria illis necessaria præbebantur; quod nunc per decimarum solutionem in Ecclesia servatur, quæ possunt integre donari, etiamsi de aliquibus ecclesiasticis bonis pensiones aliquæ ex præcedente pacto solvantur.

12. *Bona Ecclesiarum eximuntur a tributis ex vi regiae potestatis impositis.*— Dico secundo: bona ecclesiastica exempta sunt a propriis tributis, quæ ex vi regiae jurisdictionis imposta sunt, etiamsi talia bona prius quam ad Ecclesiam pervenirent, illi tributo et oneri essent subjecta. Hæc videtur fuisse præcipua intentio Cardinalis Albani, et videtur etiam sumi ex mente Abbatis, in cons. 26, volum. 1, ubi eadem fere distinctione a nobis data utitur. Et fortasse alii auctores non contradicunt, nam Innocentius aperte loquitur, quando Ecclesia ex pacto obligata est, non vero dicit ex sola jurisdictione principis posse obligari.

13. Denique sententiam hanc eodem modo declaratam invenio apud Guttierrez, lib. 1 Practicar. quæst., quæst. 3, n. 15, ubi exponit verba legis cuiusdam Hispaniæ, lib. 1 Novæ Recopilat., tit. 3, l. 14, quæ sic habent: *Los clérigos, que compraren heredades tributarías en que se a el el tributo apropiado a la heredad, paguen el tal tributo,* id est, clerici ementes prædia, quibus tributa imposita sunt, et quasi inhærent, solvant hujusmodi tributa. Ait autem dictus auctor intelligendam esse dictam legem, quando prædia antea erant affecta onere tribulorum expresse et specialiter ex conventione partium, secus vero si tantum sint affecta vel obnoxia tributis ex generali lege; quia si talia bona pervenerint ad clericum, non transirent cum onere. Nec refert quod non de bonis Ecclesiarum, sed clericorum loquatur, a fortiori enim id sequitur, quia, per se loquendo, major et excellentior est exemptio Ecclesiarum. Unde paulo inferiorius generaliter loquitur de bonis Ecclesiæ, seu ecclesiasticis, referens pro hac sententia Alphonsum Guerrero, in Thesauro Christianæ religion., capit. 36; et

Otaloram, Didacum Perez, et Quesada, modernos jurisperitos Hispanos.

14. Quo jure ecclesiastica bona eximantur. — *Prima opinio.* — *Rejicitur dicta opinio.* — Ut autem assertionem probemus, supponimus, quando talia bona traduntur Ecclesiae, non liberari ab his tributis ex efficacia voluntatis privatæ personæ donantis, vel aliter contrahentis cum Ecclesia; nam rationes prioris sententiae, et aliæ factæ in priori assertione, manifeste convincunt nullum privatum dominum aliquorum honorum posse illa eximere a tributis debitis principi, sua auctoritate et voluntate. Necesse est ergo ut hæc exemptio fiat per superiorem aliquam voluntatem, vel aliquo jure declaratam, vel ab ipso principe per expressum ac personalem consensum demonstratam. Unde quia difficile est invenire jus quo talis voluntas ostendatur, dixerunt aliqui, necessarium esse ut quando hujusmodi bona tributis subjecta in Ecclesiam transfreruntur, princeps, ad quem spectant tributa, actu et specialiter consentiat, vel saltem ut donationi seu translationi præbeat assensum, nam tunc virtualiter consentit remissioni, alioqui, aiunt, vel donatio non tenebit, vel bona cum suo onere transibunt. Sed hæc limitatio destruit assertionem, nam illo modo non fiet exemptio illa ex vi privilegii ecclesiistarum, sed per novam principis remissionem, cuius contrarium in assertione intendimus, et in eo sensu disputatur quæstio; nam quod princeps sua voluntate possit remittere tributa, nemo unquam dubitavit. Item ex illa declaratione sequitur, Ecclesiam vel non posse acquirere hujusmodi bona sine consensu principis, vel, si absque ejus consensu illa acquirat, necessario fieri tributariam quoad talia bona; primum autem expresse repugnat juri canonico, in cap. 1 de Immunit. ecclesiar., in 6; secundum vero falsum esse contendimus.

15. Secunda opinio, dictam exemptionem juri divino et canonico tribuens. — *Fundamenta primæ partis.* — Propter hoc ergo Albanus supra conatur ostendere, hæc bona eximi ab hujusmodi tributis ex vi juris divini, canonici et civilis. Ut autem probet esse juris divini, solum inducit locum Genesis paulo antea tractatum¹, et locum Esdræ, lib. 1, cap. 7, ubi Artaxerxes rex sacerdotes et Levitas a tributis exemit. Sed in priori loco, ut dixi, et notwithstanding Abulensis, non concessit rex Pharaon spe-

cialem exemptionem terris sacerdotum, sed quia egestas non compulit sacerdotes ad vendendas terras suas, consequenter factum est ut tributariae non manserint. In altero vero loco non est sermo de tributis realibus adhaerentibus rebus immobilibus, sed de tributis personalibus aut mixtis, quæ ratione bonorum mobilium imponi solent; neque est sermo de antiquis tributis rebus ipsis prius impositis, sed de nova impositione, quæ personis sacris tam in se, quam in bonis suis fieri prohibetur. Verba enim regis hæc fuere: *Vobis quoque notum facimus de universis sacerdotibus, et Levitis, et cantoribus, et janitoribus Nathinuis, et ministris domus Dei hujus, ut rectigal, et tributum, et annonas non habeatis potestatem imponendi super eos.* Nihil ergo inde colligi potest de tributis prius impositis, et quasi adhaerentibus ipsis terris, si personis illis vel templo denuo acquirerentur. Præterquam quod ex illis locis non colligitur jus positivum divinum, ut per se constat, sed ad summum indicatur jus naturale; an vero tale illud sit, ut per se inducat necessitatem talis exemptionis, et illam conferat, vel tantum honestatem, vel ad summum obligationem, ut princeps illam concedat, ex illis locis non satis definiri potest, sed aliis rationibus inquirendum est, ut in superioribus est generaliter disputatum, et in hoc particulari puncto statim attingetur.

16. Unde possit colligi jure divino eximi. — *Objectio.* — *Responsum.* — *Cur tributum exemptioni repugnet, non vero pensio.* — Quocirca solum video posse probabiliter colligi hoc jus divinum ex verbis Christi: *Ergo liberi sunt filii*¹, inducendo illa prout supra insinuavi, quia naturalis filius regis ita est exemptus a tributis, ut bona etiam ejus immunia fiant; ergo hoc jus maxime servandum est Christo et bonis ejus, qualia sunt ecclesiastica bona, ut ostendimus. Filius autem naturalis regis non solum gaudet naturali privilegio, ut super bona jam sua non imponantur nova tributa, sed etiam ut, si de novo acquirat ea bona, quæ apud alios subditos erant tributaria, sub suo dominio fiant libera et ingenua, sicut ipse est; ergo multo magis Christus, et bona ejus ecclesiastica cum hac amplitudine hoc gaudent privilegio. Quod si quis objiciat, locum illum isto modo inductum etiam contra priorem conclusionem probare posse, respondetetur negando assumptum, nam

¹ Gen. 47.

¹ Matth. 47.

etiam filius naturalis regis non liberatur ab omni onere ex pacto antiquiori bonis inhærente, etiam respectu inferiorum, cum nec rex ipse sit liber ab omni obligatione ex pacto. Rationem autem differentiæ bene attigit Panormit., in dicto cons. 26, et ex illo Albanus, circa finem, respondendo ad quartam rationem, quia propria tributa repugnant exemptioni ipsius personæ cuius sunt bona, nam propter illam præstantur, ut significavit Paulus, ad Rom. 13; aliud autem pensionis genitus non est professio, vel indicium subjectiōnis, sed justitiæ, et obligationis ejus ex pacto ortæ, quæ nulli personæ, quantumvis liberæ et excellenti, seu supremæ, repugnat.

17. *Fundamenta secunda partis.* — Secundo, ut prædictus auctor hoc jus esse etiam canonicum ostendat, inducit c. *Sancitum*, 23, q. 8, quod idem est cum cap. 1 de Censib., et dicit esse textum expressum, quia in eo decernitur, tributa, quæ antea exhibebantur de aliquibus bonis, postquam illa facta sunt Ecclesiæ, solvenda non esse. Idemque confirmat ex cap. *Secundum canonicam*, 23, q. 8. Quod si quis respondeat ibi non esse sermonem de universis bonis seu prædiis ecclesiæ, sed de manso, domibus, atriis et hortis juxta ecclesiam positis, contra hoc objicit, alienum esse ab omni ratione et veritate, discrimen inter hæc et alia bona ecclesiæ constituere, tum quia eadem ratio immunitatis, quæ est in horto et manso, vigeret in aliis prædiis quæ Ecclesiæ acquiruntur, scilicet, quia omnia sunt dicata Deo, seu sunt Dei, quæ ratio est fundamentum hujus immunitatis; tum etiam quia una et eadem substantia ecclesiæ non debet diverso jure censeri, cap. *Cognovimus*, cum Glossa, 12, q. 2. Unde concludit, textus illos irrefragabiles esse.

18. *Ex adductis juribus non probatur dicta sententia.* — Sed nihilominus censeo, ex illis non probari assertionem; imo ex ultimis verbis posse sumi objectionem non facilem in contrarium, ut capite sequenti videbimus. Quia mansus et reliqua loca ecclesiæ, quæ ibi specialiter numerantur, non solum eximuntur a propriis tributis regalibus, sed etiam a quacumque pensione et privato onere, etiam præexistente, et in quoemque pacto fundato, eximuntur, ut Glossa ibi, et communiter doctores intelligunt. Et colligitur ex ipsis juribus, quatenus solum ecclesiasticum excipiunt, quæ exceptio firmat regulam in contrarium quoad cætera omnia tributa. Quod adeo verum est, ut neque ipse patronus possit aliquam pensio-

nem de illis bonis sibi reservare, et si antea ipsi rei onus inerat, debeat necessario remitti aut redimi, ut ecclesia in dictis bonis libera maneat. At vero hoc non ita est in cæteris prædiis ecclesiæ, ut expresse notat Panorinit., et alii, cum Glossa, in dicto c. 1 de Censib., et in dicto cap. *Secundum canonicam*, 23, q. 8, et ex ipso cap. *Sancitum*, in fine, aperte colligitur. Ergo necessario est constituenda differentia inter bona ibi specialiter nomina-ta, et alia ecclesiastica bona, cum jus illud speciale non possit ad omnia extendi. Ergo inde non potest sumi argumentum efficax ad id quod intendimus, alias æque probaret de omni genere tributi, vel pensionis temporalis, quod aperte falsum est. Neque est inconveniens ut aliqua pars bonorum ecclesiæ majori gandeat exemptione ex speciali privilegio. Rationem autem privilegii et discriminis inter hæc et alia bona capite sequenti trademus.

19. *Alia jura ex quibus dicta exceptio colligi potest.* — Secundo, colligi potest hoc jus ex aliis decretis, in quibus simpliciter præcipitur, ut bona Ecclesiarum non subjiciantur tributis aut exactionibus temporalibus a quibusvis laicis potestatibus, ut constat ex c. *Non minus*, et c. *Adversus*, de Immun. Eccl., et in c. *Quanquam*, de Censib., in 6. Verumtamen responderi potest, in his juribus solum prohiberi quod Ecclesiis aut ecclesiasticis bonis hæc tributa imponantur, non vero vetari quod tributa antiqua, quæ ipsis bouis inerant, prius quam ecclesiastica fierent, in ipsis permaneant, et ab Ecclesiis solvantur, non quia ipsis imponatur tributum, sed quia cum illo onere bona acceperunt. Unde cum ibidem prohibetur, exactiones tributorum ab Ecclesiis propter talia bona fieri, recte intelligitur de exactionibus, quæ fiunt ob tributa imposta Ecclesiæ super bona jam sua, tum quia exactiones referuntur ad tributa, de quibus ibi erat sermo; tum etiam quia alias non possent omnes exactiones absolute, et sine distinctione prohiberi, cum aliquæ possint fieri ab Ecclesia juste, et sine læsione immunitatis ecclesiastice, ut si petantur, quæ justo titulo debentur, et in iudicio ecclesiastico, si coactio necessaria sit. Sed quamvis hæc interpretatio satis sit consentanea verbis et menti illorum jurium, nihilominus ex identitate rationis credimus inde sumi efficax argumentum, ut decisio illorum jurium etiam ad tributa antiqua, et ad exactiones, quæ propter illa fiunt, extendatur, quod paulo inferius, afferendo rationes asser-

tionis, explicabimus, prius enim alia jura expendere necesse est.

20. Tertio ergo colligi potest hoc canonum jus ex cap. 4, de Immunit. Eccles., in 6, ubi prius querela et abusus sacerdotalium potestatum refertur, *quaæ nituntur et student, ut illis collectas, et talias, et alia hujusmodi Ecclesiæ persolvant, prætextu bonorum quaæ acquisiverunt, vel extra manum suam ponant hujusmodi acquisita.* Et postea talis abusus damnatur, declaraturque non licere quibuscumque jurisdictionem temporalem exercentibus exactiones quascumque Ecclesiis imponere, vel exigere ab eisdem pro domibus, prædiis, vel quibuscumque possessionibus ab eisdem Ecclesiis legitime hactenus acquisitis, vel in posterum acquirendis. In quibus verbis imprimis expendo, non solum reprobari exactiones de bonis quæ jam possidebantur ab ecclesia, quando fuit impositum tributum, sed etiam de bonis quæ postea acquiruntur, etiam si talia bona, cum antea essent sacerdotalia, tributis essent subjecta. Nam quod de hujusmodi bonis sit sermo, manifestum est. Propterea enim laici volebant cogere Ecclesiam, ut vel tributum solveret, vel bona dimitteret, ne ipsi privarentur tributo bonis annexo; ergo de his bonis tributariis loquitur jus illud, et nihilominus statuit ut talia bona, eo ipso quod ad Ecclesiam transeunt, ab exactiobus talium tributorum sint exempta. Unde etiam expendo, ibi distinete et universaliter prohiberi, *quascumque collectas vel exactiones imponere vel exigere,* utique circa ecclesiastica bona; ergo non solum est prohibitum hæc imponere, sed etiam exigere quæ imposta jam erant, prius quam Ecclesia illa bona acquireret. Atque hic textus, adjunctus præcedentibus proxime allegatis, videtur mihi satis probabiliter sententiam hanc ex jure canonico comprobare.

21. *Ex jure civili probatur assertio.—Primo.—Hæc jura non probant sufficienter assertionem.* — Superest dicendum de jure civili, ex quo nonnulla verba Justiniani adduci solent, quibus hæc assertio videtur significari, et imprimis afferuntur illa quæ Gratianus refert in cap. 2, 10, q. 2: *Ea, quæ ad leatissimæ Ecclesiæ jura pertinent, vel posthac forte percererint, tanquam ipsam sacrosanctam et religiosam Ecclesiam intacta conuenit venerabiliter custodiri.* Quæ verba fuerunt imperatoris Leonis, et referuntur a Justiniano, in l. *Jubemus*, C. de Sacros. eccles. In eis autem generaliter dicitur, omnia bona, quæ ad Ecclesiam perveniunt, esse intacta servanda, sicut

ipsam Ecclesiam; ergo jam non licet tributa pro illis exigere, sicut nec pro Ecclesia. Sed ut supra in simili dicebam, si argumentum efficax esset, nimium probaret, videlicet, omnia Ecclesiæ bona debere ita intacta servari, ut nulla pensio vel onus, etiam ex præcedenti pacto proveniens, pro illis exigi possit, quia ipsa ecclesia, seu fundus et area ejus hac immunitate gaudet, quod esse falsum ostendimus. Ergo illa æquiparatio non universaliter, sed juxta materiam subjectam accipienda est. Unde attendendum est, in ea lege specialiter prohiberi alienationes honorum ecclesiasticorum, et in hoc sensu dici debere intacta custodiri, id est, sine diminutione, venditione, aut alia simili mutatione, sicut conservantur Ecclesiæ. Et ita accepit illam decisionem Pontifex, in capit. *Nulli*, de Rebus eccles. non alien., cum ita concludit: *Omnes sacerdotes ab hujusmodi alienatione abstineant, penas timentes, quas Leonina constitutio comminatur.* Ergo vox illa intacta, sine fundamento in textu extenditur ad tributa, et præsertim ad ea quæ inhærent bonis, priusquam ecclesiastica fiant. Nam si Ecclesia recipit bona sub tali onere, licet postea illud solvat, nihil propterea proprium alienat, quia talia bona non fuerunt a principio integre (ut sic dicam) translatæ in Ecclesiam, sed cum diminutione talis oneris, et ideo, illud postea solvendo, non alienat proprium, sed justum debitum solvit.

22. Unde etiam Gratianus non pro exemptione a tributis, sed ab alienationibus verba illius legis adduxit, et ad eumdem finem alia multa ex decretis Pontificum adducit, tum ibi, tum etiam 12, q. 2, in quibus aliqua verba sunt generalia, quæ non recte ab aliquibus ad tributa applicantur. Ut sunt illa Pii, epist. 2: *Ad sedem Apostolicam perlatum est, quod quidam prædia divinis usibus tradita humanis applicant usibus, et Domino Deo, cui tradita sunt, ea subtrahunt, ut suis usibus inseruant; quapropter ab omnibus illius usurpatiōnis contumelia depellenda est, ne prædia usibus secretorum cœlestium dicata, a quibusdam irruentibus vexentur*¹. Quibus verbis aliqui volunt esse prohibita omnia tributa ex ecclesiasticis prædiis, quia solutio tributi humanus quidam usus est; omnis autem applicatio talium bonorum ad humanum usum ibi censetur prohibita. Sed, licet hoc possit per accommodationem quamdam ad propria tributa regia applicari, non tamen in universum ad om-

¹ Cap. *Prædia*, 12, q. 2.

nia temporalia onera, vel pensiones, quas interdum potest Ecclesia, ex prædiis suis, etiam laicis solvere ex justo antecedente titulo juxta priorem assertionem. Ibi ergo tantum est sermo de usu humano injusto, et contra jus Ecclesiæ usurpatō, ut declarant illa verba : *Deo, cui tradita sunt, ea subtrahunt.* At vero solutio pensionis justo titulo debitæ non est injustus usus, nec per illum Deo subtrahitur, quod illi fuerat donatum; nam a principio fuerat donatum cum tali onere; jus ergo ad tale onus non fuerat donatum, et ita non subtrahitur Deo quod traditum illi erat, sed quod in ipsa donatione fuerat reservatum. Ideoque dici etiam potest, illum usum non proprie esse ecclesiasticorum bonorum, ut talia sunt, sed ut aliqua ex parte sacerularibus oneribus subjecta permanserunt. Quapropter, nisi aliunde probetur antiqua tributa non permanere in bonis postquam ecclesiastica fiunt, ex illis verbis et similibus non probatur solutionem talis tributi ad alienationes vel alios usus prohibitos ecclesiasticorum bonorum pertinere.

23. Probatio altera ex civilijure. — Deinde potest confirmari assertio ex l. *Jubemus*, C. de Sacros. eccles., ubi Valentianus et Marianus ecclesiastica privilegia confirmant, et subjungunt : *Quia humanitatis nostræ est, egenis prospicere, ac dare operam, ut pauperibus alimenta non desint, salario etiam, quæ sacrosanctis ecclesiis in diversis speciebus de publico hactenus ministrata sunt, jubemus nunc quoque inconcussa, et a nullo prorsus imminuta præstari, liberalitatique huic promptissimæ perpetuam tribuimus firmitatem.* Ex quibus verbis, et similitudine rationis, non improbabile sumi quidem potest argumentum, formaliter autem seu dispositio non probant intentum, quia lex illa nihil disponit de exemptione a tributis, sed tantum confirmat salario, seu subventiones, seu annuas præstationes, quas imperatores de publicis bonis ecclesiis fieri jussérant. Hinc vero recte colligi potest, non fuisse imperatorum voluntatem, ut ex bonis Ecclesiæ acquisitis imperialia tributa exigerentur, cum potius ipsi imperatores multa ex aliis bonis ad subventionem pauperum Ecclesiis dare præciperen. Unde etiam ratio illa de subventione egenorum non minus suadet, debuisse fructus ecclesiasticorum prædiorum inconcessos et imminutos a publicis tributis servari, quam alia subsidia, quæ ad eundem finem ex publicis bonis Ecclesiis præstabuntur.

24. Fridericus proprie dicta Ecclesiarum bona a tributis exemit. — Bartoli expositio. — Proprie igitur censetur dispositum et latum hoc jus civile a Friderico imperatore in sua constitutione, in qua generaliter statuit, ut nulla communitas, vel persona publica, vel privata, collectas, vel exactiones. etc., Ecclesiis, vel piis locis imponere præsumat. Quæ lex cum indefinite loquatur, omnes exactiones proprium tributorum, quæ collectæ, vel alio simili nomine appellantur, ab Ecclesiis et eorum bonis fieri prohibentur. Obstat tamen expositio Bartoli, in l. *De iis*, C. de Episcop. et Cleric., ubi ait, constitutionem Friderici intelligendam esse solum de tributis personalibus, seu mistis, quæ imponuntur personæ pro rebus, nam haec tantum vocantur proprie collectæ, et ideo non prohibere quin prædia Ecclesiæ sint tributaria, prout in eadem lege *De iis*, et in leg. *Placet*, Cod. de Sacrosanct. eccles., statuit. Ideoque reprehendit Glossas ibi dicentes, illas leges *De iis*, et l. *Placet*, derogatas esse per Authenticam, *Item nulla*, C. de Episcop. et Cleric. Quæ sententia placuit etiam Panormitano in dicto capit. 1 de Censib.

25. Rejicitur expositio. — Eam tamen merito reprobavit Bald., in dicta l. *Placet*, et universaliter sumpta videtur improbabilis. Nam ex illa sequitur, prædia Ecclesiæ, ex vi illius Authenticæ seu constitutionis Friderici, et consequenter ex vi juris civilis, non esse exempta a tributis realibus, etiam de novo impositis, postquam illa prædia ecclesiastica facta sunt, si tributa tanquam ordinaria et perpetuo duratura imponantur; consequens est omnino falsum, et ab omnibus reprobatum, ut in principio hujus capituli ex dictis in præcedenti supposui. Sequela probatur, quia prædicta tributa permittebantur per dictas leges *Placet*, et *De iis*; ergo si non sunt derogate per Fridericium, adhuc in sua vi manent, et consequenter ex vi juris civilis prædia Ecclesiæ erunt tributaria, etiam quoad tributa imposita postquam Ecclesia talia bona acquisierat. Quapropter negari non potest quin Authenticæ *Item nulla*, loquatur etiam de tributis realibus, nam absolute et universaliter prohibet exactiones ulla imponi Ecclesiis; nomine autem exactiorum omnia tributa veniunt, tam ordinaria quam extraordinaria, et tam realia quam personalia, presentim quia in ipso textu expresse distinguuntur *exactiones Ecclesiis*, et *piis locis, vel personis ecclesiasticis imponendæ*, et omnes prohibentur; ergo

etiam Ecclesia et pia loca ab impositione cuiuscumque tributi eximuntur.

26. Expositio Baldi. — *Exploditur expositione.* — Aliter responderi posset, ibi quidem prohiberi Ecclesiis et piis locis exactiones imponi, non tamen illas postulari, quæ antea erant impositæ super bona, quæ cum illo onere ad Ecclesiam transierunt. Et ita limitat illam constitutionem Baldus, cum quodam Jacobo, in dicta Auth. *Item nulla*, n. 4; addit vero imperatorem non permittere, ut prædia Italica sint tributaria; extra Italiæ vero, ubi sunt prædia tributaria, transire ad Ecclesiam cum onere suo. Verumtamen hæc distinctio et limitatio admittenda non est. Primo, quia beneficium principis ample interpretandum est, maxime in causa religiosis, juxta vulgarem legem *Sunt personæ*. ff. de Religiosis et sumptib. funer. Secundo, quia privilegium universale extenditur ad præsentia et futura, juxta cap. *Quia circa*, de Privileg., et notat Barthol., in dicta l. *Placet*, n. 8; ergo ex vi illius constitutionis fuerunt a tributis exempta omnia bona, quæ tunc erant ecclesiastica, quando illud privilegium concessum fuit, etiam si autem essent onerata tributis; ergo multo magis idem servandum est in omnibus bonis postea Ecclesiæ acquisitis. Tertio, quia verbum *Imponere*, in rigore non videtur ibi significare novam tributi impositionem, quia hoc modo solus princeps supremus potest tributum imponere, et tamen ibi prohibitio fit omnibus communitatibus et personis, non solum publicis, sed etiam privatis; ergo necesse est ut verbum *Imponere* ibi significet vel comprehendat actionem, quæ ab omnibus exerceri possit; ergo prohibetur ibi omnis petitio, seu distributio, seu impositio solutionis tributi, quæ ab Ecclesia fiat, sive ex bonis acquisitis, sive ex acquirendis. Atque hoc modo confirmatur etiam satis probabiliter hæc sententia ex jure civili.

27. Tandem ratione conclusio ostenditur. — Ultra hæc vero jura adducit prædictus auctor varias rationes, quibus eamdem assertionem confirmat, quæ in eo videri possunt; solum cavendum est ne aliquæ sint nimium generales, et de omnibus oneribus seu pensionibus, tam publicis quam privatis. Item adverto, plures illarum, si attente considerentur, supponere privilegium exemptionis extendi ad antiqua tributa, potius quam illud probent. Quapropter illæ rationes mihi videntur efficaces, quæ vel ex generali ratione tributi, vel ex æquiparatione inter antiqua et nova tributa

sumuntur. Talis est illa ratio, quod tributa propria jure subjectionis imponuntur, unde eodem jure exiguntur et solvuntur, juxta illud Pauli, ad Rom. 13: *Necessitate subditi state, non solum propter iram, sed etiam propter conscientiam, ideo enim et tributa praestatis*; ergo, cessante subjectione, non potest juste exigi tributum, quia cessante ratione debiti cessat debitum, quando ratio est adæquata, ut est in praesenti. At vero bona quælibet, eo ipso quod ecclesiastica fiunt, desinunt esse subjecta principi laico, quia extra ejus jurisdictionem fiunt; ipsa etiam Ecclesia, ad quam bona pertinent, est extra jurisdictionem ejusdem principis, et multo magis ipse princeps Christus, cujus sunt bona; ergo, eo ipso quod talia bona fiunt ecclesiastica, fiunt exempta ab omnibus tributis, quæ in sola jurisdictione fundantur. Sicut si persona uni regi subjecta a jurisdictione ejusdem regis eximatur, eo ipso a tributis ejus eximitur; imo non solum persona, sed etiam bona ejus ab his tributis eximuntur, quia ratio ne personæ imponuntur; ergo similiter quando bona immobilia in eum statum transferuntur, ut neque ipsa, neque illi, qui habent dominium utile eorum (ut sic dicam), neque proprius ac principalis dominus eorum, sub jurisdictione principis maneant, eo ipso a tributis eximuntur.

28. Confirmatio. — Et confirmatur hæc ratio ex alio principio juris, quod ubi dispositio aliqua ad eum casum venit, a quo incipere non potuisset, prior dispositio cessat, quando nimis eadem ratio militat in continuatione quæ in inceptione. Ita vero est in præsenti; nam impositio vel exactio tributi non potest incipere in ecclesiasticis bonis; ergo nec potest in eisdem bonis, postquam ecclesiastica facta sunt, continuari. Ideoque in talis tributi impositione a principio hæc conditio intelligitur inclusa, ut tamdiu duret, quamdiu res illa non fuerit inhabilis, seu incapax talis tributi; tunc enim sicut inchoari non posset tributum, ita neque conservari, quia eadem est utriusque ratio, ut declaratum est, et magis ex responsione ad fundamenta prioris sententiae constabit.

29. Responsio ad jura civilia in principio adducta. — *Ad rationem quod res transit cum onere suo.* — Ad jura ergo civilia respondetur, leges omnes, quæ permittebant ordinaria tributa ab Ecclesiis exigi, revocatas esse per constitutionem Friderici, unde ad l. 4, de Indictionib., respondetur non oportere, fiscum in om-

nibus Ecclesiæ æquiparari, nam Ecclesiam majoribus privilegiis gaudere æquum est. Authentica vero illa, quæ supponit esse posse in Ecclesiæ bonis onera fiscalia, verum habere poterit in oneribus prioris generis, si fortasse bona, quæ ad Ecclesiam transierunt, prius erant ex contractu vel quasi contractu fisco obligata, et in eo casu locum habere potest decisio illa, quam retulit Gratianus, in c. 2, § *Item prædium*, 40, q. 2. Ad jura canonica respondebimus ex professo duobus capitibus sequentibus. Ad rationem, quod res transit cum onere suo, respondetur, efficaciter probare priorem assertionem, non tamen urgere contra secundam. Ratio autem discriminis est, quia illud axioma proeedit, quando res non transfertur in statum, in quo talis oneris incapax fiat: nam si tanta sit mutatio, consequens necessario est ut res a tali onere eximatur. Sic enim servus, si legitimate ordinetur, ab onere servitutis eximitur, et res consecrata, licet antea esset muneribus sordidis aut profanis subjecta, vi consecrationis ab eis eximitur. In præsenti ergo bona, cum ecclesiastica fiunt, in altiori quadam statu constituuntur, in quo tributorum sunt incapacia, non tamen aliorum realium onerum, quæ ex contractibus privatis nascuntur; et ideo per talem mutationem propria tributa cessant, non vero aliae pensiones, nisi in casibus specialibus in jure expressis. Et tune necesse est ut vel is, qui jus aliquod habebat in talia bona, talem eorum mutationem fieri consentiat, vel ut ei recompensatio fiat, juxta ea quæ capite sequenti dicemus.

30. *Quæsitum.* — *Expeditio.* — Sed interrogabit aliquis cur non idem postuletur respectu principis, quando bona illi tributaria in Ecclesiam transferuntur. Cum enim inde detrimentum et diminutionem in bonis suis patiatur, injuste cum illo fieri videtur, si absque illius consensu vel compensatione talis mutatio fiat. Respondetur neutrum hic esse necessarium. Et ratio diversitatis est, quia princeps antea non habebat proprium dominium, vel jus aliquod particulare dominio aequivalens, ratione cuius ei deberetur tributum, sed solum ratione jurisdictionis illud exigere poterat, quia sub ejus superiori administratione erat res ipsa, vel dominus ejus. Nulla autem ratio justitiae obligat ad conservandam rem illam sub jurisdictione temporalis principis, quia dominus ejus potest de ipsa libere disponere. Maxime vero potest eam Deo dicare seu donare, per quam donationem fiunt talia

bona ecclesiastica; nou est autem necessarius consensus principis ut bona sæcularia ecclesiastica fiant. Quod (ut dixi) et jure canonico caustum est, et jure divino naturali, ratione dicta, satis videtur fundari.

31. Neque refert quod proventus principis inde possint diminui, quia diminutio non fit in propriis bonis, sed in stipendiis communibus, estque per accidens; consequitur enim ex subtractione materiæ, religiose et juste facta, et ob hanc causam non debetur recompensatio. Præsertim quia etiam e contrario contingere potest ut, si bona ecclesiastica vendantur, et sæcularia fiant, tributaria esse incipient, et ita proventus principis augentur. Quæ omnia in privatis oneribus ex peculiari jure seu dominio profectis locum non habent, ut ex dictis satis constat. Accidit quod cessatio tributi in eo casu non fit privata voluntate vel auctoritate donantis; sed fit auctoritate juris, vel divini, vel humani in divino fundati. Et ideo ibi etiam non deest consensus principis ipso jure datus virtute dictæ legis civilis, qui revocari amplius non potuit, postquam Ecclesia beneficium illud et privilegium acceptavit, quanquam etiam sine illo id fieri posset virtute juris divini, vel etiam canonici, sicut supra de hac exemptione ecclesiastica generaliter ostensum est.

32. *Ad ultimam confirmationem.* — Unde ad ultimam confirmationem respondetur, detrimentum illud ordinarie non esse magni momenti, neque illius considerationem haberi, propter rationes factas. Si tamen aliquando contingeret tot bona Ecclesiæ acquiri, ut in grave præjudicium magnamque diminutionem regalium proventuum redundaret, Summus Pontifex consulendus est; nam ad illum spectat in hujusmodi casibus remedium adhibere. Non enim licet christianis principibus ecclesiastica bona invadere, ut in dicta Auth. *Item nulla* expresse dicitur, nec etiam possunt de illis disponere aut statuere, ut in superioribus probatum est.

CAPUT XXI.

ALIQUIBUS OBJECTIONIBUS OCCURRITUR, ET QUAM SIT ANTIQUA HÆC BONORUM ECCLESIASTICORUM EXEMPTIO, OBITER EXPLICATUR.

1. *Prima objectio, ex jure canonico.* — Contra ea quæ in superioribus capitibus definita sunt, aliqua objici possunt, quæ vel falsam esse doctrinam, vel saltem nimis novam sua-

dere possunt. Et primo, ex jure canonico ob-
jicitur cap. *Si tributum*, 11, q. 1, sumptum
ex Ambrosio, orat. seu concion. 1, de Basilicis
non trad., in fine, ubi inquit: *Si tributum
petit imperator, non negamus, agri Ecclesiae
solvunt tributum*. Et similia fere habet in cap.
Conrenior, 23, q. 8, sumpto ex eadem ora-
tione, et epist. 33, ad Sororem, quæ nunc est
13, lib. 2. Secundo objicitur c. *Tributum*, 3,
q. 8, ubi Urbanus Papa sic inquit: *Tributum
in ore pisvis, piscante Petro, inventum est,
quia de exterioribus, quæ palam cunctis appa-
rent, Ecclesia tributum reddit*. Et infra: *De
exterioribus Ecclesiarum, quod constitutum anti-
quitus est, pro pace et quiete, qua nos tueri ac
defensare debent, imperatoribus persolvendum
est*. Tertio objicitur c. *Sancitum est*, 23, q.
8, ubi specialiter dicuntur exempta a tributis
ecclesia cum hortis, atris et domibus ei con-
junctis, et mansis ejus; postea vero additur:
*Et si amplius aliquid habuerint, inde senioribus
suis debitum servitium impendant, per quæ
verba tributum aliquod significatur, ut omnes
intelligunt, et ipsa præ se ferunt. Hæc ergo
est generalis regula, quod bona Ecclesiæ sol-
vunt tributum, illis paucis exceptis quæ in
principio posita fuerant, quæ exceptio regu-
lam in cæteris firmat. Et quamvis caput illud
sit Concilii Wormatiensis provincialis, cap.
50, pro universa Ecclesia receptum est in c. 1,
extra, de Cœsib., per Gregorium IX, qui so-
lum ante quadringentos fere annos præcessit.*

2. *Secunda objectio, ex jure civili*.—Seeun-
do, principaliter ex jure civili objicitur l. *Pla-
cet*, C. de Sacros. eccles., quæ est Honorii et
Theodosii, in l. 40, de Episcop. et Cleric., in
C. Theodosiano, ubi, licet Ecclesiæ eximantur
a muneribus sordidis, et ab extraordinariis
tributis, non tamen ab ordinariis, ut patet ex
illis verbis apud Justinianum: *Nihil præter
canonicam illationem, id est, præter ordinaria-
m, et certa regula statutam impositionem.* Imo etiam posse exigi aliquid, si adventitiæ
necessitatis sarcina repentina poposcerit, quam
legem suo decreto inseruit Gratianus, in c.
Generaliter, § *Placet*, 16, q. 1, significans jus
canonicum legem illam non repudiare. Secun-
do objicitur lex *De iis*, C. de Episcop. et Cle-
ric., ubi prædia clericorum cogenda dicuntur
ad pensitanda fiscalia; sub prædiis autem
clericorum etiam Ecclesiarum intelligi viden-
tur. Tertio objicitur l. ult., C. de Exactor.
tribut., lib. 40, quæ sic habet: *Si dicina do-
mus, aut quæcumque alia cujuscumque digni-
tatis atque fortunæ fundos quolibet titulo posse-*

*derit, et non impositas reipublicæ functiones
agnoverit, quemadmodum prior dominus de-
pendebat, omnibus modis possessiones eorum
publico vindicentur, ubi Glossa per publicas
functiones exponit tributa, et annonas, onera
(inquit) rerum, et ideo cum rebus ipsis ambula-
toria. Sic enim imperatores rescripsérunt, in
rectigalibus ipsa prædia conveniri, l. Impera-
toris, ff. de Publicanis et Vectigalib., ac sub-
inde hujusmodi tributa onera esse realia, et ab
Ecclesiis deberi (juxta illam legem), quacum-
que ratione prædia ad eas devenerint.*

3. *Responsio universalis ad omnes objectiones factas*.—Ad has objectiones possemus uni-
co verbo respondere, illa jura procedere se-
cundum antiquum morem, jam vero revocata
esse, majoraque privilegia esse Ecclesiis con-
cessa. Quæ responsio non gravate acceptari
posset pro legibus civilibus, prout illam tradi-
derunt Glossæ, in dicta l. *Placet*, et in dicta
l. *De iis*. Quod tamen spectat ad jus canoui-
cum, incredibile est, per illud fuisse aliquando
approbata hujusmodi tributa, præsertim post
tempora christianorum imperatorum, et ideo,
prius quam ad singula respondeamus, expli-
care oportet quam sit antiqua, quoad hanc par-
tem tributorum, Ecclesiarum exemptio; nam
de illa fere idem sentiendum censeo, quod de
exemptione ipsa in genere in superioribus
dixi, quia hæc pars quædam est ecclesiasticæ
immunitatis, et non minus necessaria, mi-
nusve rationi consentanea, quam alia. Dis-
tinctio igitur supra tradita hic etiam præmit-
tenda est; nam aliud est loqui de jure, aliud
vero de facto.

4. *Prima conclusio: quam sit antiquum
privilegium non solvendi tributa ex bonis Eccle-
siæ*.—Primo ergo dicimus privilegium, seu
jus non solvendi tributa ex ecclesiasticis bonis,
a principio inditum, et cum ipsa Ecclesia qua-
si concreatum fuisse. Hoc facile patet ex supra
dictis in genere de origine ecclesiasticæ im-
munitatis, et eodem modo declarandum est.
Nam imprimis censeo, hoc jus intrinsecè ori-
re ex ipsa Ecclesiæ institutione, prout a Christo
facta est; nam ex vi talis institutionis Ecclesia
capax est ad acquirendum bona, tam immobi-
lia quam mobilia, quæ ad solum Dei cultum
vel pietatis opera sint destinata. Non enim ha-
bet Ecclesia hanc capacitatem seu potestatem
ab imperatoribus, aut ab hominibus, sed in-
trinsecè, et ex natura rei illam habet, eo ipso
quod est hominum mortalium congregatio ha-
bens speciale unitatem et vinculum ex
Christi institutione. Sive talis capacitas consi-

deretur in Ecclesia, ex eo quod est congregatio hominum utentium libertate, quae est fundamentum dominii externalium rerum; sive consideretur ut est unum corpus, cuius principale caput est Christus, qui multo magis capax est talis dominii. Unde a principio Ecclesiæ cœperunt fideles bona sua ipsi Ecclesiæ tradere, quæ eo ipso fiebant communia ipsius corporis Ecclesiæ, per quam distribuebantur singularis quoad eorum usum, ut ex Actibus Apostolorum manifestum est. Et licet tunc solum haberet Ecclesia bona mobilia, paulo post cœpit immobilia acquirere, non ex privilegio extrinseco, sed ex intrinseca potestate, et prudenti voluntate, ac dispensatione Pastorum Ecclesiæ, ut ex Urbano Papa, in epist. sua, c. 1, intelligimus, et habetur in c. *Videntes*, 12, quæst. 4. Vixit autem Urbanus anno 227, et tamen commemorat jam antea ordinatum esse a summis sacerdotibus, ut prædia, quæ dabantur Ecclesiæ, non venderentur, sed sub potestate ejusdem Ecclesiæ conservarentur, ut ex redditibus eorum melius posset omnibus fidelium necessitatibus subvenire. Qui mos a tempore Constantini multum quidem auctus est, non quia Constantinus ipsi Ecclesiæ potestatem dederit talia bona acquirendi, sed quia sua fide facultatem dedit omnibus donandi Ecclesiæ quæcumque vellent, et suo exemplo illos præavit et excitavit, ut sumitur ex edicto de Primitiva Ecclesia, et munificentia Constantini, quod habetur t. 1 Conc., et in c. *Futuram*, 12, q. 1.

5. Ex quo ulterius colligimus, ab eadem Ecclesiæ institutione, prout a Christo facta est, intrinsece oriri, ut hæc bona, quæ Ecclesiæ traduntur vel acquiruntur, Christo tanquam principali domino acquirantur, quia non acquiruntur Ecclesiæ, nisi ut corpori mystico, cuius principale caput est Christus. Et ideo, licet in Ecclesia sit potestas dispensandi hæc bona, illa tantum est ministerialis a Christo descendens, et in Pastoribus Ecclesiæ præcipue residet, quia illi sunt dispensatores mysteriorum et bonorum Christi in terris. Atque hinc tandem jus exemptionis talium bonorum ab humanis tributis videtur necessario consequens ad talis Ecclesiæ institutionem, quia caput hujus Ecclesiæ, quod est præcipuus dominus talium bonorum, habet connaturalem non tantum exemptionem, sed etiam potestatem, et dominium super omnes reges terræ. Unde non est dubium quin et Christus potuerit immediate et per se ipsum talia bona eximere a tributis,

eo ipso quod sua sunt, et quod hoc sit valde consentaneum divinitati, et excellentiae personæ sue.

6. *Pontifex Summus potuit se solo bona Ecclesiæ a tributis eximere.* — *Probatur primo.* — *Secundo.* — *Tertio.* — Addendum præterea est, etiam si talia bona jure ipso divino non fuissent immediate a tributis exempta, Pontificem sua potestate potuisse illa eximere, sicut supra de personis diximus; est enim fere eadem ratio, servata proportione. Unde sicut Ecclesia semper habuit hanc potestatem, ita semper habuit jus ad gaudendum hac immunitate quoad ecclesiastica bona. Probatur autem primo ex illo principio, quod Christus habet jus; ergo prudentem illius executionem Pastoribus Ecclesiæ, et præsertim Vicario suo commisit, sicut illi etiam præcipue commisit aliorum bonorum suorum dispensationem. Secundo hac ratione habet Vicarius Christi potestatem et obligationem bene administrandi patrimonium Christi; sed unus ex præcipuis actibus hujus administrationis est viudicare illa bona ab oneribus et tributis, quantum pietas et religionis ratio, servata justitia, postulaverit. Sicut ergo a principio, Ecclesiæ administratio et dispensatio talium bonorum in Christi Vicario et Episcopis fuit, ut late probatur in decretis, 96 d., et 12, q. 1, et 2, ita et jus exemptionis talium bonorum perpetuo in Ecclesia fuit. Tertio, eadem est ratio de exemptione a jurisdictione et a tributis; imo hæc posterior sequitur ex priori, ut probatum est; sed Ecclesia ex vi potestatis dispensandi et administrandi talia bona, habuit semper potestatem et jus ad eximendum hæc bona a jurisdictione sacerulari, ut supra probatum est; ergo idem jus habuit semper etiam circa tributa.

7. *Probatur quarto.* — Ultimo declaratur, et optima ratio hujus potestatis redditur, quia potestas ecclesiastica, ut est in capite, et Vicario Christi, est suprema in suo ordine, et quia ille ordo est divinior cæteris, ideo illa etiam est suprema simpliciter respectu omnium potestatum terræ. Illa vero potestas licet spiritualis sit, indiget usu temporalium bonorum ad convenientem gubernationem et executionem sue potestatis; ergo, etiam ut versatur circa bona temporalia sibi commissa, est potestas simpliciter suprema; ergo per se sufficit ad eximendum hæc bona ab impositionibus, quæ per quamcumque aliam terrenam potestatem fieri possent. Unde ipse Pontifex potest talia bona tributis onerare, independen-

ter a consensu alterius, tanquam supremus gubernator, dummodo id faciat tanquam fidelis dispensator et prudens, juxta Clementin.

4. *Ut lite non contestata*, in fine, cum similibus; non posset autem Pontifex habere tam liberam et supremam potestatem, si non posset bona illa a gravaminibus aliorum principum eximere, alioqui saepius talia bona nimium gravarentur, et bellum justum ex utraque parte oriretur, si una potestas alteri non cederet. Quod si altera recognoscenda et preferenda est, illa profecto spiritualis potestas esse debet, ut saepe dictum et probatum est.

8. Secunda conclusio. — *Privilegium exemptionis bonorum Ecclesiae non semper observatum fuit.* — *Probatur conclusio.* — Secundo, dicendum est de facto seu executione hujus exemptionis a tributis realibus, bonis immobilibus impositis, nec semper fuisse in Ecclesia necessariam, nec semper possibilem, nec certo constare quando incœperit; verisimile tamen esse, a principio christianorum imperatorum introductam esse, et quantum per Pastores Ecclesiae fieri potuit, fuisse servatam. Prima pars manifesta est de illo primitivo tempore, in quo Ecclesia haec immobilia bona non habebat, sed agros, et praedia sibi a fidelibus oblata ad sustentanda communia onera vendebat, ut in dicto cap. *Videntes* dicitur. Tunc enim non erat in Ecclesia materia seu fundamentum talium tributorum, et ideo dicimus non fuisse illi necessariam hujusmodi exemptionem. Secunda pars procedit de secundo tempore, ex quo cœpit Ecclesia talia immobilia bona possidere et retinere (juxta idem cap. *Videntes*), usque ad tempora christianorum principum, seu Constantini. Nam eo tempore imperatores et reges, quibus haec tributa solvebantur, non erant Ecclesiae filii ac subditi, neque fide carentes intelligere volebant, quale esset Ecclesiae jus ad liberum usum talium bonorum, ideoque non potuit eo tempore Ecclesia aut efficaciter aut cum fructu, imo neque sine scandalo illo jure uti. Tertia pars, de incertitudine, imprimis sumi potest ex objectionibus factis. Ac deinde, quia non invenimus jura, ex quibus initium hujus executionis, seu observatae exemptionis, clare et cum certitudine colligamus.

9. Dico autem esse incertum hoc initium quoad negationem prioris temporis; nam quoad affirmationem alicujus temporis, in quo stabilita est exemptio semper in posterum duratura, satis certo assignari potest, saltem a

tempore Friderici II et Honorii III, ut ex hac tenus dictis satis constat. Quod vero ante illud tempus saltem jure canonico fuerit stabilitus usus hujus exemptionis, manifestum est ex Concilio Lateranensi, sub Alexandro III, quod fere centum annis præcessit, et ex alio Lateranensi, sub Innocentio III, postea celebrato, c. *Non minus*, et c. *Adversus*, de Immunitate eccles. Atque ex eisdem decretis colligitur, hoc jus non fuisse in illis inchoatum, sed antiquius esse, et in illis Conciliis sub gravioribus censuris et declarationibus fuisse confirmatum. Unde, licet forte non inveniatur antiquius decretum expresse et in specie hanc exemptionem bonorum ecclesiasticorum stabiliens, ex hoc ipso probabiliter conjectamus, non tam jure Pontificio scripto, quam non scripto, traditione, et præceptis Prælatorum fuisse observata in Ecclesia hanc immunitatem, ex quo incepérunt Pontifices expeditam et liberam habere suam potestatem ecclesiastica bona administrandi, id est, postquam impedimentum ethnicorum imperatorum sublatum fuit.

10. Exemptio bonorum Ecclesiae ante Fridericum per leges civiles statuta fuit. — Unde etiam mihi verisimile est, Constantinum statim exemptionem hanc ecclesiasticis bonis coucessisse, vel in eam potius consensisse. Nam omnes historiae¹ tradunt, eum statim omnia bona Ecclesiis restitui præcepisse, et non solum maxima liberalitate Ecclesiis prædia donasse, sed etiam magnis privilegiis illas munivisse. Eumque successores pii et catholici imitati sunt. Imo notat Baronius, an. 387, n. 13, post imperatores gentiles, non nisi apostatas, vel hæreticos imperatores de bonis Ecclesiae tributum exegisse, primumque eorum Julianum Apostamat fuisse. Quamvis ergo in Codice Justiniano vel Theodosiano non inveniatur lex civilis expresse concedens hoc privilegium ante constitutionem Friderici, nihilominus credendum est, longe autem, imo a principio christianorum imperatorum fuisse ab eis concessum, vel admissum². Et, licet interdum fuerit intermissum, patienter ferente Ecclesia, non consentiente, non jure, sed per tyrannidem est factum, tum quia con-

¹ Vide edictum Constantini supra citatum, et Eusebium, l. 10 Histor., c. 5, et in orat. de Laudibus Constantini.

² Vide Codicem Theodosianum, tit. de Episcop. et cleric., in multis legibus, præsertim in ultimis.

tra jus divinum et canonicum; tum etiam quia tale privilegium semel concessum revocari non poterat; ideoque quoties imperatores generaliter renovant privilegia a suis praedecessoribus Ecclesiis concessa, sub illis hoc etiam comprehendi existimandum est.

11. *Prima responsio ad Ambrosium.* — *Secunda.* — Ad Ambrosium ergo in c. *Si tributum*, 41, q. 1, Glossa ibi videtur simpliciter concedere, prædia Ecclesiæ subjecta esse tributis, solumque in hoc gaudere privilegio, quod, licet illud non solvat Ecclesia, non poterunt ejus bona vindicari. Sed hoc si intelligatur de hoc tempore, omnino falsum est; si vero intelligatur de tempore Ambrosii, magis est tolerabile, sed non verum. Alia igitur Glossa, in cap. *Secundum canoniam*, 23, q. 8, textum illum intelligit de oneribus realibus, cum quibus bona ad Ecclesiam transierunt, sentitque ex sententia Ambrosii teneri Ecclesiam ad illa solvenda. Videtur autem intelligere de propriis tributis, nam de his eerte loquitur Ambrosius, ut patet ex illis verbis: *Si tributum petat imperator*, etc. In hoc autem sensu falsa esset sententia, ideoque illam non admittimus.

12. *Tertia et vera responsio.* — Verus ergo intellectus verborum Ambrosii est quem late tradit Cardinalis Albanus, supra, et uno verbo complexus est Cardinalis Baronius supra, dicens, verba illa dicta esse ab Ambrosio, permittendo potius quam probando, et factum asserendo, non jus confitendo. Verisimile enim est illo tempore, quod erat Valentiniani junioris et pueri, Justinam, ejus matrem, et pro illo gubernantem, et Arianam, tributum aliquod ab Ecclesiis exegisse, prudenterque censuisse Ambrosium, non fuisse tunc illi resistendum, vel propter vitanda scandalum, vel quia majora pericula tunc imminebant Ecclesiæ, quibus magis occurtere oportebat, nec poterat simul omnibus resisti. Unde eodem tenore verborum subjungit Ambrosius: *Si agros desiderat imperator, potestatem habet vindicandorum, nemo nostrum intervenit, potest pauperibus collatio populi redundare, non faciant de agris invidiam, tollant eos, si libatum est; explicans autem quo sensu hoc dicat,* subjungit: *Imperatori non dono, sed non nego,* quasi dicat, permitto, non approbo. Multo vero facilius poterat tributum, quam usurpatio prædiorum permitti; nam hæc posterior ita continet injustitiam et sacrilegum, ut excusari per ignorantiam non possit, tributorum autem exactio non ita præ se fert intrinsecam

malitiam, quin ignoratione occultari, vel aliquo apparenti titulo colorari valeat. Et ideo potuit hoc facilius dissimulare Ambrosius, existimans etiam tributum illud tunc non fuisse omnino injustum, nam inferius in eadem oratione subjungit: *Solvimus quæ sunt Cæsaris Cæsari, et quæ sunt Dei Deo; tributum Cæsaris est, non negatur; Ecclesia Dei est, Cæsari utique non debet addici, quia jus Cæsaris esse non potest.* Et ita etiam responsum est ad cap. *Contenior.*

13. *Ad cap. Tributum.* — *Prima responsio.* — *Rejicitur.* — *Alia responsio.* — Ad cap. *Tributum* Albanus supra eamdem accommodat responsum, videlicet, Urbanum de facto fuisse locutum, non de jure, dicens persolvendum esse tributum ab Ecclesia sponte, et ad vitandum scandalum, non ex obligatione aut debito. Et ad hoc suadendum inducit verba illa: *Pro pace et quiete*, etc. Sed violenta videtur interpretatio, nam verba Pontificis sunt: *Quod constitutum antiquitus est, pro pace et quiete, qua nos tueri et defensare debent, imperatoribus persolvendum est.* Quorum verborum sensus non est, solvendum esse tributum gratia scandalum et servandi pacem, sed solvendum esse imperatoribus propter officium, et obligationem quam habent nos tuendi, et in pace conservandi. Unde verba illa magis indicant jus quam factum; nam de facto in principio dixerat: *De exterioribus suis Ecclesia tributum reddit;* postea vero reddit rationem, propter quam persolvendum est. Et ita ibi Turrecrem. et alii textum illum intellexerunt, non solum de facto, sed etiam de debito. Unde aliter respondent, interpretando textum illum de solis bonis quæ ad Ecclesiam cum onere tributi pervenerunt.

14. *Impugnatur.* — *Vera responsio.* — Mihi vero etiam hoc non satisfacit, quia textus indifferenter loquitur de tributo. Gratis enim limitaretur ad tributum impropprium, seu privatum onus in pacto aliquo fundatum; nam potius verba declarant sermonem esse de tributo, quod imperatori solvit ratione publici muneris, quod Ecclesia non debet, sive antiquum, sive novum sit, quia ejusdem sunt rationis, ut dixi. Advero igitur, caput illud referri a Gratiano ex Urbano Papa; non designat autem quis ille Urbanus fuerit; licet autem nulla habeamus decretalium, in tomis Conciliorum aut Epistolarum decretalium, Urbani II vel posteriorum illo nomine nuncupatorum, neque inter acta Urbani I decretum illud in tomo primo Conciliorum reperiatur, conjectamus

nihilominus potius esse Urbani I quam aliorum, quia modus loquendi illius textus magis redolet antiquitatem Urbani I quam noviora tempora aliorum Urbanorum. Hoc ergo dicimus, Urbanum fuisse locutum juxta morem sui temporis, quando imperatores erant ethnici, et Ecclesia nondum sibi libertatem ab iusmodi tributis vindicaverat, jam vero jus illud cessasse.

15. *Ad c. Sancimus.* — *Bona ad mansum Ecclesiæ spectantia ab omni tributo manent exempta.* — Ad cap. *Sancimus*, et cap. 4 de Censibus, Glossæ ibi intelligunt illa ultima verba de antiquioribus oneribus realibus. Quæ responsio pro textu illo mihi placet, dummodo intelligatur de oneribus privatis, de quibus præcedenti capite in conclusione prima locuti sumus. Et ad hunc sensum confirmandum ponderari potest, ibi non fieri mentionem tributi, neque Principis, sed *majoribus*, vel potius, ut habet originale, *senioribus suis* (inquit Concilium) *debitum servitum impendant*. Quæ verba (quidquid Gratianus, in § sequenti, et Glossa ibi dicant) ampliora sunt, nam *debitum servitum*, recte de quocumque onere dicitur; per *seniores* autem intelligunt Glossa, et Joan. Andr., in dict. c. 4 de Censib., antiquos dominos, a quibus res transierunt ad Ecclesiam cum onere suo, et ideo illis persolvendum est ab Ecclesia de eisdem bonis, quando non pertinent ad mansum Ecclesiæ, nec ad alia loca illi conjuncta, de quibus ex speciali illius juris dispositione nihil præter ecclesiasticum solvi permittitur. Quæ exceptio *ecclesiastici* firmat regulam in contrarium respectu aliorum onerum realium, cujuscumque generis sint. Si autem Ecclesia præter hæc bona aliquid amplius habuerit, ut in textu dicitur, obligata erit ad onera realia, quæ ad antiquiores dominos virtute aliquujus pacti pertinuerint. Ratio autem specialis exemptionis priorum bonorum esse potest, quia vel censentur quasi partes accessoriae ipsius Ecclesiæ, quæ totam illam immunitatem meretur, et accessorium sequitur naturam principalis, vel ad Ecclesiæ sustentationem judicantur necessaria, ut ibi notat Abbas, et ideo alia onera in eis non permittuntur. Unde si prius illa habebant, eo ipso quod bona uniuntur Ecclesiæ, cessant onera, ut in præcedenti capite declaratum est.

16. *Ad leges civiles in contrarium inductas.* — Tandem ad leges civiles unico verbo respondetur, cum Glossis supra citatis, derogatas esse illas leges per constitutionem Friderici.

Aut fortasse melius diceretur, leges illas semper fuisse nullas, ut in simili significavit Glossa, in c. *Generaliter*, 16, q. 1, verb. *Collationibus*. Ratio autem est, quia tales leges erant contra privilegia prius Ecclesiis concessa, quæ revocari non poterant, vel certe quia disponebant in materia ecclesiastica, et in Ecclesiæ præjudicium, quod leges civiles facere non possunt, ut saepè dictum est. Quibus addimus, inter ordinationes Lusitanæ, lib. 2, tit. 22, inveniri optimam legem, quæ doctrinam datam confirmat.

CAPUT XXII.

QUALIS SIT EXEMPTIO ECCLESIASTICA QUOD PERSONALIA ONERA CLERICORUM.

1. Non intendimus in hoc capite declarare quæ personæ, vel quomodo hac exemptione gaudeant; hoc enim ad alteram partem materiæ quasi remotam pertinet, de qua in capite vigesimo tertio dicere incipiems; sed generatim supponimus, id quod per se notum in hac materia est, clericos privilegio exemptionis gaudere, et quia in superioribus ostensum est, materiam illius exemptionis esse judicia sacerdotalia, tam criminalia quam civilia, et leges civiles, tam coactivas, seu penales, quam directivas, seu obligationem directe inducentes, ideo dicendum superest an respectu earumdem personarum tributa etiam sint materia hujus exemptionis. Hæc autem tributa quædam imponi solent ipsis personis sine respectu ad bona, quæ dicuntur pure personalia, et appellari solent nomine *census*, ut Matth. 17, juxta multorum expositionem, et in jure, Cod. de Capitatione civium censibus eximenda, lib. 11, ubi idem tributum *census* et *capitatio* appellatur, quia per capita juxta numerum sine respectu ad bona imponebatur. Aliquando vero imponitur tributum ratione bonorum, quod vel reale vel mistum appellatur, ut dicemus capite sequenti, ubi de bonis tractabimus; nunc enim de puris personalibus oneribus agimus.

2. *Clerici a censibus sunt exempti.* — Primo ergo dicendum est, personas ecclesiasticas gaudere personali immunitate quod census, seu capitationis tributum. Hæc assertio certissima est inter Catholicos, nam expresse habetur multis decretis juris canonici supra, ad probandam exemptionem in generali inductis, ut cap. *Aversus*, cap. *Non minus*, de Immunitat. Ecclesiar., et in cap. *Quāquam*, de Censib.,

in 6, et in aliis, in quibus specialis fit mentio personarum. Et ita ibi notant omnes exposatores, idemque docent Theologi, in 2, d. 34. Estque hæc exemptio antiquissima, non solum jure canonico, sed etiam civili, ut colligi potest ex Codice Theodosiano, tit. de Episcop. et Cleric., leg. 8, quam tribuit Constantino Gratianus, in cap. *Generaliter*, 16, q. 1, et his verbis eam refert: *Juxta sanctionem, quem dudum meruisse perhibemini, fundos et mancipia vestra, etc.*; tamen in Codice Theodosiano tribuitur Constantino, et hoc modo legitur: *Vos et mancipia vestra nullus novis collationibus obligabit, sed vacatione gaudebitis.* Et eodem modo legitur in l. 1, Cod. de Episcop. et Clericis, ubi Constantino tribuitur. Idem privilegium confirmavit Gratianus, in l. 26, eodem titulo, ubi habet hæc verba notanda: *Quis eos capite censos patiatur devinctos, quos necessario intelligat supra memorato obsequio (scilicet Ecclesiæ) mancipatos.* Idemque privilegium magis declaratum et confirmatum est a Friderico.

3. *Dicta clericorum a tributis exemptio est de jure divino.* — Probatur primo. — Tacite objectioni occurritur. — Et quidem si aliqua clericorum exemptio est de jure divino naturali, et conformis evangelico, maxime hæc, quæ est a tributis mere personalibus. Probatur, quia personæ non imponitur justa ratione tributum, nisi vel ratione bonorum, vel ratione propriarum actionum, quatenus per eas aliquid lucrari potest, unde tale tributum solvat. At vero quando priori modo tributum imponitur, non est pure personale, sed mistum, et ideo non pertinet ad præsentem quæstionem, sed ad aliam tractandam capite sequenti. Posteriori autem modo non sunt capaces clerici tributi personalis secundum rectam rationem, quia ratione sui status sunt omnino dicati cultui divino, et ex vi talis status actiones suas non ad lucra temporalia, sed ad spiritualia ministeria ordinare debent; ergo ex vi sui status jure naturali exempti sunt a tributis personalibus et temporalibus. Nec refert quod stipendum aliquod temporale propter talia ministeria possunt recipere; nam illud non est per modum temporalis lucri, sed est per modum justæ et congruæ sustentationis, quæ non debet subtrahi vel diminui per impositionem tributi. Eo vel maxime quod illud stipendum est quasi annexum et accessorium ministerio spirituali, et ideo participat ejus naturam et conditionem, ac proinde libertatem, et exemptionem

quam spiritualia ministeria habent ab omni sæculari potestate.

4. Unde etiam est evidens alia ratio, quia nemo potest personale tributum imponere, nisi in personam suæ jurisdictioni subjectam; sed personæ clericorum non sunt subjectæ jurisdictioni sæcularium principum; ergo nec tributis personalibus ab eis possunt onerari. Atque juxta hæc principia colligitur hæc exemptio clericorum ex verbis Christi, Matth. 17: *Ergo liberi sunt filii*; ibi enim de exemptione a tributis, et præsertim personalibus, sermo erat. Nam tributum illud, quod Cæsari solvebatur, et census appellabatur, idem esse videtur quod per capita impositum fuit a Cæsare, quando jussit, *ut describeretur universus orbis*, ut dicitur Luc. 2. Ab hoc autem tributo principaliter liberi sunt filii; consequenter vero liberi etiam esse debent familiares eorum, qui et omnino circa personas et obsequia filiorum occupati sunt, et eorum bonis aluntur. Sie ergo per quamdam consecutionem clerici sub illis verbis continentur. Ad quem sensum trahi recte possunt verba Hieronymi ibi: *Nos pro illius honore tributa non reddimus, et quasi filii regis a rectigalibus immunes sumus.* Oportet autem ut sub illo pronomine, *Nos*, non omnes Christianos, sed ecclesiasticos tantum comprehendenter.

5. *Idem probatur secundo.* — Hincque D. Thomas, in d. 44, q. 2, a. 2, ad 1, tractans eundem locum, ait: *Quod Christus loquitur de se et suis discipulis, qui nec servilis conditionis erant, nec res temporales habebant, quibus suis dominis obligarentur ad tributa solrenda.* Unde ulterius subinfert, ex vi eorumdem Christi verborum eximi omnes, *qui Apostolicam vitam profitentur, nihil in hoc mundo possidentes, et a conditione servili immunes.* Videatur autem conditionem servilem appellare, vel temporalem subjectionem ad jurisdictionem sæcularem, vel curam et sollicitudinem, quæ lucris temporalibus acquirendis incumbit. Et eamdem doctrinam habet Bonavent., art. 3, q. 1, ad 1; et Richard., art. 3, q. 1, ad 1, ex argumentis secundo loco positis; et Thomas de Argentina, ibidem, art. 4, in quadam solutione ad 3. Et eodem modo exposuit Lyra eadem verba Matt. 10; et Glossa ordinaria, usurpans verba Augustini, lib. 1 Quæstion. Evangelicar., quæst. 23, dicit, liberos esse filios regni illius, sub quo sunt omnia regna terrena. Exponunt autem scholastici supra citati per filios regni intelligendos esse, non omnes Christianos, sed eos qui propter Chris-

tum omnia reliquerunt. De quo sensu, quod fuerit intentus ab Augustino, non assero; probable autem censeo, omnes has personas per quamdam consecutionem, saltem quantum ad hæc tributa personalia, sub verbis Christi comprehendi.

6. *Clerici sunt exempti a muneribus sordidis.* — Dico secundo: clerici exempti sunt non solum a tributis pecuniariorum, sed etiam ab omnibus quæ in actione aliqua sordida aut sacerdotali, vel in obligatione subeundi talia munera, consistere possunt. Hæc assertio frequens est in jure civili, præsertim in Codice Theodosiano, in tit. de Episcop. et Clericis, nam in l. 1 præcipit Constantinus, *ne clericorum nominationibus, seu susceptionibus aliquibus, quas publicus mos exposcit, contra indulta sibi privilegia prægraventur.* Et l. 2 dicit, *ab omnibus omnino muneribus excusentur, ne a dirinis obsequiis avocentur.* Et in l. 9 ait Constantius: *Curialibus muneribus, atque omni inquietudine civilium functionium exortes clericos esse oportet;* et in lib. 10: *Repellatur ab his exactio munierum sordidorum.* Idem in l. 11, et l. 14. Idem Valentinianus, in l. 21 et 22, et 24; et Arcadius et Honorius, in l. 36, inquiunt: *Ab his, quos a publici laboris actu, et gradus clericatus, et (quod non minus est) sanctior vita defendit, præcipimus temperari.*

7. Præterea in l. 1, C. de Episcop. et Clericis, notanda sunt illa verba: *Nullus novis collationibus vos obligabit, sed vacatione gaudebitis.* Ubi Glossa addit, *sordidorum munierum.* Item aliud exemplum hujus exemptionis ibi additur, cum dicatur: *Neque hospites suscipietis, quod continet speciale privilegium, ut ibi late Glossa notat, et in l. 2 eadem immunitas generaliter traditur, et distinctius in l. Placet, 17, eodem tit.: Placet ut nihil commune clericorum cum publicis actionibus, vel ad curiam pertinentibus, cuius corpori non sunt annexi, habeant.* Et in l. Generaliter, eodem tit., specialiter eximuntur a tutelis et curis pupillorum, et additur tale beneficium illis fieri, qui non sunt divagantes, neque circa divina ministria desides: *Cum propter hoc (inquit) ipsum beneficium eis indulgeamus, ut, aliis omnibus derelictis, Dei omnipotentis ministeriis inhærent.* Et idem privilegium habetur l. Placet, C. de Sacrosanct. Eccles., et sumitur a simili ex l. *Sancimus*, eodem tit., ubi notanda sunt illa verba: *Cur non facimus discriminem inter res divinas et humanas, et quare non competens prærogativa cœlesti favore conservetur.*

8. *Ex jure canonico confirmatur assertio.*

—In jure autem canonico, non solum is modulus exemptionis approbatur et recipitur, toto tit. de Immunit. eccles., sed etiam observare mandatur in toto tit. *Ne clericorum vel monachorum sacerdotalibus negotiis se immisceant.* Et per locum ab speciali sumi potest ex cap. *Perrenit*, de Immunit. eccl., ubi dicitur in tempore necessitatis nullum clericum esse excusandum a munorum vigiliis, sed ad hoc generaliter posse compelli, ut *cunctis vigilantibus, melius valeat civitatis custodia procurari.* Imo tunc etiam requiritur ut id fiat Episcopo approbante, et ut, si necessaria sit coactio, per eumdem fiat, juxta ea quæ capite sequenti notabimus. Duo ergo sunt in hoc genere exemptionis distinguenda: unum est, ut non possint clericorum cogi aut obligari ad hæc munera subeunda; aliud est, prohibere, et cum necessitate obligare, ne illa exerceant. Primum fieri potest non tantum per leges canonicas, sed etiam per civiles, quia in hoc non exercent jurisdictionem circa clericos, neque utuntur vi coactiva aut directiva propria, sed concedunt privilegium, quod non semper spectat ad jurisdictionem, sed ad liberalitatem, ut supra dixi. Quanquam si res attente consideretur, supposito privilegio fori, prædictæ leges magis loquuntur cum ministris sacerdotalibus, quam cum clericis, magisque declarant quid illi agere teneantur, quam aliquid de novo clericis concedant. Nam cum clericorum a jurisdictione laicorum exempti sint, non possunt leges vel magistratus sacerdotalibus clericos cogere ut hæc onera subeant, vel ut ab his vel illis munieribus abstineant. At vero lex canonica utrumque facere potest, et facit; nam efficaciter eximit clericos a munieribus profanis, vel sacerdotalibus, prohibendo, et cogendo, si opus sit, laicos, ne ad illa subeunda clericos compellant, et ipsos etiam clericos obligando ut ab illis abstineant; utrisque enim præcipere potest in ordine ad spiritualem finem, ut saeppe dictum est.

9. *Ex divino jure assertio ostenditur.* — Ex quibus etiam facile intelligitur, exemptionem clericorum quoad hanc partem seu materiam ex jure divino naturali sequi, in multis quidem necessaria illatione, in aliquibus autem valde propinqua, quæ jure ecclesiastico determinantur. Declaratur breviter, nam clericorum ex vi status destinati sunt divinis obsequiis, quibus duplice titulo repugnare possunt sacerdotalia munera. Primo, quia nemo potest duobus dominis servire, ideoque non possunt clericorum sacerdotalibus negotiis implicari, quin a

divinis obsequiis avocentur. Secundo, quia sancta sancte, et cum honore ac reverentia tractanda sunt; clerici autem per ordinacionem et deputationem ad divinum cultum peculiarem sanctificationem acquirunt, et ideo, ut sancte et honorifice tractentur, necesse est ut ab his saecularibus aut vilioribus muneribus sint exempti. Unde sicut supra de rebus sacris dicebamus, ita de personis sacris nunc dicimus, ex natura rei sequi ut in abstractione a sordidis muneribus singularem praerogativam habeant.

10. Inter haec autem munera quaedam sunt, quae manifeste derogant sanctitati personarum, vel ecclesiastica munera impediunt, et quoad haec necessario sequitur haec exemptio ex vi juris naturalis. Imo saepe non solum se quitur exemptio, sed etiam prohibitio, ut quando munera sunt vel nimis profana, de quibus maxime dicit Paulus, 2 ad Timot. 2: *Nemo militans Deo implicat se negotiis saecularibus.* Alia vero sunt munera, in quibus non statim appetit tanta deformitas, ut est, verbi gratia, tutela vel cura pupillorum, honestam et moderatam vel necessariam artem exercere, et similia. Atque in his determinari potest exemptio per jus canonicum. Quod interdum fit prohibendo talia munera; aliquando vero solum concedendo ne clerici aliqua hujusmodi munera acceptare teneantur. Et hoc posteriorius etiam jure civili fit, sic enim clericus exemptus est a tutela in Auth. *Presbyteros*, sub l. 41, C. de Episc. et Cleric., et nihilominus possunt eam acceptare, si velint, ut ibi notat Glossa, et alia Glossa, in cap. *Irreligioso*, d. 83. Et similiter, licet clerici non cogantur testificari coram judice saeculari, nihilominus in aliquibus causis id facere possunt, et ita de aliis similibus.

11. *Clerici utilitatibus omnibus civibus communibus privari nequeunt.* — Dico tertio, ad hanc libertatem, seu exemptionem clericorum, pertinere, ut juribus, commoditatibus, aut aliis rebus omnibus civibus communibus non preventur. Hanc assertionem sumo ex doctrina Bartholi, in *Authentica Cassa*, C. de Sacrosanct. Eccles., ubi dixit, leges civiles, per quas clerici timidiores fiunt, contra libertatem ecclesiasticam esse, etiam si tales leges cum ipsis clericis non loquantur. Idem tradit in l. 1, § *Quae honorandae*, ff. *Quarum rerum actio non detur*, eamque doctrinam communiter sequuntur Canonistæ, in cap. *Noverit*, de Sentent. excom., præcipue *Pañormit.* et *Felin.*, et in capite ult., de *Immunit.* ecclesiar.,

in 6, ubi specialiter videri potest Ancharranus, et in Repetit. capituli *Constitut.*, et *Cardinalis*, in Repetit. capituli *Perpendimus*, de Sentent. excommunicat, § *Et specialiter quero*. Quid autem sit clericos fieri timidores, non satis perspicue a dictis auctoribus explicatur, cum tamen possit, et nimis ample, et nimis restrictive intelligi.

12. *Clerici non redundunt timidores, quoties ex legibus civilibus aliquod onus in eos resulat.* — Nimis ampla erit explicatio, si quis existimet, quoties laici aliquid faciunt vel statuant, ex quo redundat aliquod onus vel incommoditas clericorum, toties fieri contra exemptionem seu immunitatem eorum, quod interdum insinuant Canonistæ, in cap. *Ecclesia S. Mariae*, de *Constitut.*, et in cap. 1, de *Novi operis nunciat.* Sed illud non est indistincte verum, nam, quando gravamen illud vel præjudicium generale est, et in utramque partem potest evenire, interdum in gravamen, et interdum in commodum, tunc si dispositio generalis est pro civitate, et in re ad commune bonum ejus spectante, non potest diei imponi clericis gravamen contra libertatem eorum, quia nihil tunc fit contra eorum privilegia, neque contra naturalem justitiam. Item quia omnes fere leges humanæ hoc habent, ut, licet communitatii, et regulariter omnibus utiles sint, interdum in alicuius præjudicium vel gravamen redundant, neque propterea censentur injustæ vel nocivæ, tum quia bono communi intendunt, et propter illud juste permittunt privatum incommodum; tum etiam quia, licet in una occasione vel tempore videantur gravamen inferre, in aliis juvant, et afferunt commodum, et ita unum ex alio compensatur.

13. *Leges, in materia communi, et in generali loquentes, immunitati clericorum non derogant.* — Tales ergo leges, si disponant in materia communi omnibus civibus, et in generali loquuntur, non erunt contra clericorum libertatem, nec vere dici possunt eis gravamen imponere, imo ab illis observandæ erunt eo modo quo canones disponunt, quove supra diximus, teneri clericos ad servandas leges civiles justas et politicas suo statui non repugnantes. Atque haec explicatio et sententia communis est expositorum in cap. 1 de *Novi operi nunciat.*, ex quo textu hoc ipsum probatur. Idem habent *Felinus* et alii, in cap. *Ecclesia S. Mariae*, de *Constitut.*, et eamdem doctrinam supponunt plures Doctores, quos refert *Tiraquel.* in legibus connubialibus, *Gloss.*

8, q. 17, n. 169 et sequentibus, et de utroque retractu, p. 4, § 4, Gloss. 23, n. 5. Idem sentiunt Cajetan., verb. *Excommunicatio*, c. 31, et Navarr., in Sum., c. 27, n. 120, quatenus dicunt, legem civilem moderantem funeralis pompam quantum ad honorem humanum, prout esse potest materia talis legis, non esse contra libertatem clericorum, etiam si fortasse aliquod gravamen inde sentiant, quia lucrum eorum aliqua ex parte impeditur, quia hoc est accidentarium, et aliunde potest compensari.

14. *Quando clerici per civiles leges timidiores fiant.* — Nimis vero striete intelligit doctrinam illam, qui existimaverit tantum fieri timidiorem clericum, quando ex facto principis sacerdotalis, vel ex illius lege ac dispositione, laici assumere possunt licentiam nocendi, vel affligendi clericos, quia hoc videntur in proprietate et rigore illa verba significare, *timidiores fieri*. Nam, licet verum sit, hunc modum gravandi clericos esse contra immunitatem eorum, tamen et magna ex parte pertinere potest ad violationem privilegii canonis, potius quam fori, si clerici timidores fiant, ne violente manus suis personis injiciantur, juxta doctrinam Baldi, in Auth. *Cassa*, C. de Sacrosan. Eccles., q. 3, n. 4. Et quatenus spectare hoc potest ad privilegium fori, non adaequat illud, quia multis aliis modis possunt gravari clerici, et timidores fieri, etiam si eis non inferatur metus alicujus documenti, vel laesioris quae sibi a laicis fieri possit, ut statim patebit.

15. Imo neque satis explicatur hic effectus eo modo quo Cajetanus et Navarrus supra illum explicare videntur, dicentes, tunc legem violare immunitatem clericorum, quando aliquo modo gravat illum contra speciale privilegium illi concessum, quia clericus, vel quia persona ecclesiastica est, non vero si gravet illum, quatenus civis vel homo est. Quibus videtur favere Innocentius, in c. *Noverit*, de Sentent. excom., quatenus dicit illa esse proprie contra immunitatem ecclesiasticam, quae sunt contra privilegia Ecclesiae concessa. Quod etiam videntur sentire Baldus, in dicta Auth. *Cassa*, q. 2, n. 3; et Latus, allegat. 92, sub tit. *An constitutio sit contra libertatem Ecclesiae*. Quia, licet verum sit, hoc modo gravari clericum contra suam immunitatem, non est tamen verum, hoc solum significari per illa verba, *timidiores fieri*, quia non tantum gravantur clericorum contra suam immunitatem, quando gravantur contra privilegia quae habent

ut clericorum sunt, sed etiam quando specialiter gravantur ut cives sunt, id est, contra iura quae illis competit quia cives sunt, id est, quae omnibus civibus sunt communia, sive jure gentium, sive civili, seu positivo clericis debeantur, ideoque si in illis graventur solum quia clericorum sunt, contra libertatem ecclesiastice committitur, ut ex sequentibus patet.

16. *Per leges privantes clericos rebus jure naturae vel civili communibus, timidiores ipsi redduntur.* — Dico ergo doctrinam illam Bartoli explicandam esse juxta tertiam assertiōnem propositam. Quotiescumque enim per statutum, seu legem, aut mandatum, aut vim laicorum clericorum privantur illis rebus, quae jure naturali gentium vel civili communia sunt civibus, eo ipso quod sunt membra talis communitatis, gravantur contra ecclesiasticam libertatem, et tunc dicuntur fieri timidores, quia illo modo avertuntur homines a statu clericali, quando vident ita clericos tractari a laicis, eo quod clericorum sint. Vel etiam dici possunt timidores fieri, quia non sinuntur libere uti et frui juribus, seu rebus communibus ceteris civibus, etiamsi statui clericali non repugnant. Et haec sententia sic explicata communis est auctorum, quos pro conclusione allegavi. Idem sentiunt Joann. Andr. et alii in cap. ult., de Immunit. ecclesiar., in 6; et Panormit., in lib. 4, cons. 26, melius in 83. Idem sentit Felin., in cap. *Noverit*, de Sentent. excom., in 6, num. 2. Ubi addit, non aliter sentire Innocentium quam senserit Bartolus, quia ea, quae competit ex jure communi, foitiora sunt quam quae ex privilegio.

17. Addo etiam Innocentium non tantum fuisse locutum de privilegio Papae vel imperatoris, sed etiam Dei; expresse enim numerat ibi multa privilegia a Deo Ecclesiae concessa, et postea concludit, quidquid est contra privilegium, a Deo, Papa, vel imperatore, Ecclesiae datum, esse contra immunitatem. Nomine autem privilegii non intelligitur tantum illud quod est praeter legem universalem tanquam exceptio ab illa, sed etiam omne id quod convenit vel Ecclesiae, vel clericis ex vi juris divini, sive positivi, sive naturalis, supposita tali institutione ecclesiasticae monarchiae et hierarchiae. Multae enim prerogativa Ecclesiae, quas inter haec privilegia numerant Innocentius, Panormitanus et alii, non aliter conveniunt Ecclesiae, quam ex jure divino positivo vel naturali, licet supponant aliquam divinam institutionem. Et in superioribus os-

tensem est, exemptionem ecclesiasticam ex genere suo ad hoc jus divinum pertinere, et multa, quæ sub hac exceptione continentur, esse immediate ab hoc jure, licet aliqua fortasse per Ecclesiam vel imperatores addita vel aucta sint.

18. *Leges, adimentes clericis res aliis civibus communes, libertati ecclesiasticae repugnant.* — *Erasio.* — *Refellitur.* — Ad hunc ergo modum dicimus, ad immunitatem clericorum pertinere, ut per potestatem laicorum non fiant pejoris conditionis, etiam in his commodis temporalibus, quæ communia sunt omnibus civibus. Exemplum optimum est in capite ultimo de Immunitate ecclesie, in sexto, ubi contra ecclesiasticam libertatem committere dicuntur temporales domini, *qui suis subditis, ne personis ecclesiasticis quidquam vendant, aut emant aliquid ab ipsis, neque ipsis bladum molant, coquant panem, aut alia obsequia exhibeant, interdicunt.* Hæc enim omnia non sunt contra specialia privilegia clericorum, vel ut clerici sunt, sed contra communem societatem civilem, et nihilominus contra ecclesiasticam libertatem judicantur, et ut talia prohibentur et puniuntur. Respondet tamen Cajetanus, ibi non dici, interdicta illa, seu statuta esse contra libertatem ecclesiasticam, sed præsumi. Verumtamen de sensu illius verbi, *Præsumantur*, infra, c. 32, dicendum est; nunc breviter dico: qualisunque illa præsumptio cogitetur, ut vera et fundata esse possit, necessarium est ut supponat verum et proprium objectum criminis contra libertatem ecclesiasticam, privare clericum communi jure civilis societatis, etiam si id non fiat exercendo jurisdictionem in clericum, sed per alium quemcumque modum.

19. *Ratio conclusionis.* — *Prima confirmatione.* — Ratio autem est, quia, licet talia jura, communia civibus, non debeantur clericis, quia clerici sunt, debentur tamen ipsis ut civibus, etiam si statum diversum a laicis habeant; imo quia clerici sunt, ideo illis novo et majori titulo debetur, ne his communibus juribus priventur, quia propter statum clericalem non amittunt jura communia civium, et alioqui ratione status majori honore et reverentia digni sunt; ergo ad immunitatem naturali jure debitam clericis, pertinet ut his juribus non priventur. Optimeque juvatur hæc ratio verbis Arcadii, et Honorii imperatoris, in l. 19, Cod. de Episc. et Clericis: *Omnibus, qui Ecclesiis serviunt, tutio defensatur, quia temporibus nostris addi potius re-*

verentiae cupimus, quam ex his, quæ olim præstata sunt, immutari. Et ideo, in l. 31, sacramentum appellant, qui sacerdotibus et ministris Ecclesie aliquid importat injuria, illudque crimen æquiparant cum injuria loco vel cultui sacro facta. Et confirmatur, quia per hujusmodi actiones, vel dispositiones laicorum vilescit multum clericalis status, et irreverenter tractatur, et consequenter clerici timidiores fiunt, et alii ab illo statu suscipiendo avertentur, cum videant ea, quæ jure gentium cæteris civibus communia sunt, ipsis denegari; ergo illa omnia sunt contra ecclesiasticam immunitatem.

20. *Secunda.* — Confirmatur tandem, quia hujusmodi gravamina clericorum ordinarie procedunt ex odio aliquo ipsius status clericalis, non quidem propter ordines, vel ministeria eorum (hæc enim non nisi hæretici vel alii infideles abominantur), sed propter exemptions et libertates quibus in eo statu gaudent, et præsertim quia ab oneribus communibus eximmuntur, quod in aliquod laicorum gravamen solet redundare, et ideo interdum cupiunt a suis communibus commodis clericos exclude-re; ergo, eo ipso læduntur privilegia clericorum, nam et fiunt odiosa, et per quamdam recompensationem fiunt infructuosa, quia occasione illorum clerici æqualibus aut majoribus bonis privantur. Atque ita talia gravamina dici possunt imponi clericis, ut clerici sunt, quia, licet formaliter non consistant in privatione alicujus rei debitæ clerici, ut clericus est, nihilominus fiunt in odium, vel cum injuria, vel contemptu clericatus, quod satiis est ut propriam violationem immunitatis contineant. Et ita fundamento contrariae sententiae sufficienter responsum est.

CAPUT XXIII.

UTRUM REDDITUS ECCLESIASTICI CLERICORUM A TRIBUTIS EXEMPTI SINT.

1. *Bona clericorum duplia.* — Licet de ecclesiasticis bonis multa in superioribus dicta sint, quia tamen certum non est, bona clericorum codem jure censeri quo bona Ecclesiarum, ideo de illis in particulari dicere necessarium est. Duo autem genera talium honorum distinguuntur a D. Thoma, quodlib. 6, art. 12: quædam, quæ clerici lucrantur ex bonis Ecclesie, ut ex decimis, vel prædiis Ecclesiarum, seu ex beneficiis suis, quæ propter officium dantur; alia sunt, quæ vel a parentibus hære-

ditarunt, aut sua industria vel arte comparunt. Priora vocat D. Thomas ecclesiastica, utique lato modo; nos, ad tollendam aequivocationem, clericalia vocabimus; alia vero patrimonialia seu sacerdotalia vocantur. His addit tertium membrum Navar., tract. de Redditib. eccles., q. 1, monito 19, nimis, eorum bonorum, quae per actiones spirituales tanquam stipendia illarum a clericis comparantur, non jure aut titulo alicujus beneficii, sed solo titulo actualis et quasi mercenarii operis, ut sunt stipendia Missarum, et similia. Merito tamen addit idem Navarrus, haec ad patrimonialia reduci, quia et de temporalibus bonis laicorum immediate illa lucrantur, et non ex bonis suorum beneficiorum, et sine ulla conditione tacita vel expressa dominium temporale talium bonorum consequuntur, postquam suum ministerium implent, ac denique quia suo labore, et industria, vel actione, illa comparant, estque valde extrinsecum, et accidentarium ad qualitatem talium bonorum, quod actio illa spiritualis vel omnino materialis sit. Quanquam vero hoc ita sit in ordine ad alias effectus, vel obligationes clericorum, de quibus nunc non tractamus, nihilominus in eridine ad exemptionem a tributis, nounulla major ratio in his ultimis bonis spectari potest, ut videbimus.

2. *Prima conclusio.* — Primo ergo certum est, bona primi generis seu ecclesiastica clericorum exempta esse ab omnibus tributis, sive realibus, sive mistis. Conclusio est certa, et communis omnium Catholicorum; habetur enim expresse in jure canonico, in cap. *Non minus*, ibi: *De bonis Ecclesiarum, et clericorum, et pauperum, Christi usibus deputatis*. Et clarius in cap. *Adversus*, ibi: *Qui Ecclesias et ecclesiasticos viros taliis, seu collectis, etc.*, ubi sermo est de tributis quae imponuntur ratione honorum, et distincte eximuntur non tantum Ecclesiæ, sed etiam ecclesiastice personæ. Et in cap. *Clericis*, de Immunit. ecclesiar., in 6, expresse et late talia tributa prohibentur, et licet cap. illud per Clementinam unic. de Immunit. ecclesiar. revocatum sit quoad poenas, non vero quoad ipsam exemptionem, sed potius confirmatur, et latius in Concilio Lateranense, sub Leone X, sess. 9, in Reformationibus curiæ, § *Et cum a jure, præter alia antiquiora, quae in superioribus allegata sunt, quae omnia renovat Concilium Tridentinum*, sess. 23, c. 20, de Reformat.

3. Deinde in jure civili habetur expresse hoc privilegium in constitut. Friderici impe-

ratoris, l. seu Auth. *Item nulla*, Cod. de Episc. et Cleric., ubi prohibet collectas, vel exactiones imponere Ecclesiis, vel ecclesiasticis personis. Et ex antiquioribus legibus colligi potest hoc privilegium ex l. 10, de Episc. et cler., in C. Theodosiano, ubi Constantius et Constans de clericis dicunt: *Negotiatorum dispendiis minime obligentur*, id est, tributa, quae negotiatoribus imponuntur, solvere non cogantur, et addunt rationem: *Cum certum sit questus, quos ex tabernaculis atque ergasteriis colligunt, pauperibus profuturos*; et in l. 14 dicit Justinianus: *Omnis a clericis indebitæ conventionis injurya, et iniquæ exactionis repellatur improbitas*; in l. 4, de Lustr. collat., eodem Cod., excipiuntur clerici a quodam tributo, quod lustralis collatio dicebatur.

4. *Ratio conclusionis.* — *Confirmatio.* — Ratio autem hujus partis reddi potest, vel generalis ad omnia bona clericorum, et de hac dicemus in capite sequenti, vel specialis, quia haec bona, de quibus tractamus, inter res sacras numerantur a D. Thoma, 2. 2, quæst. 99, art. 3, et ideo vel natura sua exempta sunt a tributis, vel saltem cum ceteris bonis ecclesiasticis intelliguntur exempta. Et confirmatur haec ratio, quia rapere seu furari hujusmodi bona clericorum est sacrilegium, quod non solum de his bonis, sed etiam de quibuscumque aliis nonnulli tradiderunt, ut infra referam; de his autem est multo verisimilius propter dictam rationem, quod haec bona censentur sacra; ergo eadem ratione esse debent a tributis exempta.

5. *Expenditur ratio pro conclusione facta.* — Hæc autem ratio non videtur solida. Nam haec bona considerari possunt, vel priusquam applicentur ipsis clericis, et fiant propria eorum; vel postquam jam ad illorum dominium transierunt. Priori modo recte quidem probat ratio dicta, illa bona esse sacra, et exempta a tributis; non tamen aliquid probat de bonis clericorum, quia illa bona in tali statu spectata non sunt clericorum, sed Ecclesiæ, seu Dei. Alio modo possunt illa bona considerari, quatenus a clericis acquiruntur. Et hæc ipsa consideratio subdividi potest: nam loqui possumus vel de acquisitione ipsa talium bonorum, vel de ipsis bonis jam integre et sine diminutione tributi acquisitis. Et in priori quidem ex his duobus modis, recte etiam probatur non esse talia bona capacia tributorum sacerdotalium, id est, non posse clericis imponi tributum solvendum ex redditibus sui beneficii, seu ex quibuscumque bonis ecclesiasticis.

Tum quia si tale tributum imponatur personæ, est contra exemptionem quam talis persona habet a potestate judicis sacerdotalis. Si vero imponatur rei sive fructibus ejus, sic imponitur bonis ecclesiasticis, quia in positio praecedens priusquam talia bona clericis acquirantur, et tunc adhuc ecclesiastica sunt, et ita fit contra talium bonorum immunitatem.

6. Si vero tale tributum intelligatur imponi super ipsammet actionem lucrandi tales redditus, vel stipendia, etiam est contra immunitatem, quia illa actio spiritualis est, et omnino extra forum potestatis sacerdotalis, et ideo non est capax tributi. Item, quia illud lucrum non est per modum mercaturæ, aut civilis contractus, sed est per modum stipendii annexi ministerio spirituali, et ideo sequitur naturam, et forum sui principalis, solumque ab spirituali potestate minui potest, ideoque jure canonico statutum est ut beneficia sine diminutione conferantur. Quoad hanc ergo partem, et usque ad predictum statutum talium bonorum, recte probatur illa ratione, non posse clericis imponi tributa de talibus bonis. Et hoc modo videtur intelligi statutum Concilii Vormatiensis, quod refertur in cap. *Sanctum*, 23, quæst. 8, et in cap. 4, Extra de Censib., ubi dicitur: *Presbyteri in Ecclesiis constituti, non de decimis, neque de oblationibus fidelium aliquod servitum faciant, præter ecclesiasticum.*

7. *An redditus ecclesiastici in clericos translati tributis subjaceant.* — At vero si talia bona considerentur ut jam sunt facta propria clericorum, non videtur illa ratione probari, esse incapacia tributorum sacerdotalium. Probatur, quia jam illa bona re vera non sunt sacra, neque in ulla specie talium bonorum a D. Thoma numerantur, si attente legatur; nam in ultima specie ponit bona, quæ sunt deputata ad sustentationem ministrorum, sive *mobilia sint, sive immobilia*. Aliud autem est esse deputata, aliud vero esse jam ministrorum facta, nam primum habent, quamdiu sunt communia, et sub potestate Ecclesiae, ac speciali dominio Dei; postquam vero personis clericorum dividuntur et applicantur, statum mutant, et sacra esse desinunt, quia respectum illum peculiarem ad Deum, et annexionem ad spiritualem titulum amittunt. Cujus signum est, quia in quolibet usus converti possunt, et quia possunt donari laicis propria auctoritate privati clericis ejus sunt, et propter causam vel rationem temporalem. Denique quia bona illa in se spectata temporalia

sunt, et dominium, quod clericus de illis acquirit, temporale est; quod autem acquisitio fuerit media actione vel jure spirituali, non refert, quia respectus ille transit, et non manet. Sicut quando ex bonis Ecclesiae datur pauperi eleemosyna, eo ipso quod pauper illa acquirit, incipit pars illa esse mere temporalis; ita ergo esse videtur in his bonis clericorum. Igitur in ordine ad tributa, eadem ratio crit de illis quæ de aliis bonis patrimonialibus clericorum.

8. *Quid dicendum, si clerici non sunt talium reddituum domini.* — Adverto tamen punctum hoc pendere ex alia celebri controversia de redditibus ecclesiasticis, an clericis, postquam illos recipiunt titulo sui beneficii, illorum verum et proprium dominium consequantur, ita ut de illis possint libere disponere, quantum spectat ad obligationem justitiae, vel semper maneant dispensatores eorum bonorum, ut ex illis imprimis congrue aliantur, et deinde cætera in pia opera dispensem. Qui enim hoc posterius censem, ut Navarrus et alii, consequenter dicere possunt et debent, et illa bona semper esse sacra, quia semper manent sub dominio Dei, ac subinde aequiparari ecclesiasticis bonis, quia revera semper manent ecclesiastica. Unde juxta hanc sententiam, per applicationem talium bonorum ad hanc vel illam personam clericis, non mutatur eorum status quoad dominium proprium Dei, nec quoad generalem finem, ad quem bona ecclesiastica sunt destinata, sed solum mutatur facultas proxima dispensandi illa. Nam antequam clericus illa acquirat peculiari titulo, facultas dispensandi illa est in pastoriis Ecclesiae, vel in communitate aut ministris ejus; postquam vero beneficiatus illa acquirit, illi committitur propria facultas ea dispensandi sua auctoritate, semper tamen ut ecclesiastica, et ut fidelis dispensator et prudens. Et consequenter etiam in hac opinione satis probabile est, raptorem talium bonorum etiam de potestate clericis, esse sacrilegum, non ratione personæ a qua furatur, nec ratione loci unde furatur, sed ratione ipsorum bonorum, quia sacra sunt. Ac tandem juxta eamdem sententiam satis consequenter dicitur, talia bona clericorum esse a tributis exempta, non solum ratione personæ, sed ratione sui, quia sacra sunt, et piis usibus semper destinata, et quidquid ex illis per tributum detrahatur, non tam clericis quam piis usibus minueretur. Atque de his maxime clericorum bonis, et eum codem fundamento pro-

cedere potest eorum sententia, qui dicunt, bona clericorum æquiparari bonis ecclesiasticis in omni exemptione, præsertim a tributis, ut videre licet in Glossa 2, in c. *Ecclesia S. Mariæ*, de Constit., et ibi Decius, num. 18, et aliis, quos refert Covar., lib. 4 Variar., c. 4, num. 2 et 3.

9. *Vera resolutio.* — At vero si contrariam sententiam supponamus, nimirum, clericos beneficiatos acquirere proprium dominium illius portionis, seu partis reddituum suorum beneficiorum, quæ illis in stipendium datur, consequenter profecto dicendum est, idem esse judicium de illis bonis quod de aliis patrimonialibus clericorum quoad exemptionem a tributis. Hoc enim sufficienter probant rationes factæ, illo fundamento supposito, quia per illam particularis dominii acquisitionem transferunt bona illa a superiori ordine ad inferiorem, sicut quando dantur laicis ministrantibus Ecclesiæ in stipendium laboris sui, seu ministerii temporalis, vel quando dantur clericis propter actiones communes laicis, ut docendi, canendi, etc. Nam æque mutatur dominium, et consequenter status talium honorum. Quod autem id fiat in stipendium spiritualis vel corporalis actionis, accidentarium est, et non mutat conditionem honorum, quam in inferiori statu consecuta sunt. Hæc autem sententia de dominio clericorum circa hæc bona hodie magis recepta est, et probabilior censetur, et sine dubio fuit opinio divi Thomæ, dicto Quodlib. 6, art. 12, ad 3, et ideo etiam in præsenti supponimus, quoad tributa et exemptiones eamdem esse rationem de his bonis, quæ de patrimonialibus clericorum.

10. *Quid de bonis quasi patrimonialibus clericorum.* — Unde a fortiori constat, idem esse dicendum de bonis quæ Navarrus quasi patrimonialia vocat; illa enim partim conveniunt, partim differunt a præcedentibus. Conveniunt quidem quoad modum acquirendi seu lucrandi illa per actionem, seu ministerium spirituale, et ideo existimo etiam in hoc convenire, quod acquisitio talium honorum est de se a tributis immunis, ideoque etiam illa bona, ut sunt stipendia talium ministeriorum, sunt natura sua a tributis exempta. Militat enim eadem ratio supra facta, nimirum, quod illa actio est spiritualis, et ideo jure divino exempta a jurisdictione civili; ergo etiam stipendum, quod ratione illius datur, et est quasi accessorium illi, debet esse eodem modo exemptum, ut non possit per impositionem sacerdotalis tributi diminui. Item hæc lucra na-

tura sua sunt subjecta potestati spirituali, ad quam pertinet illa taxare, moderari, vel augere; imo et Pontifex posset super illa, si essent copiosa, pro pauperibus vel sumptibus Ecclesiæ aliquod tributum imponere; ergo ratio postulat ut ab impositionibus laicorum sint exempta, quia non debent duplii onere prægravari. Differunt autem hæc bona a propriis ecclesiasticis redditibus, quia non manant ex propriis ecclesiasticis bonis, neque ex titulo spirituali alicujus ecclesiastici beneficii, sed ex quibuscumque bonis temporalibus per modum mercenarii stipendii, interveniente humana conventione, scelusa imperfectione danni unam rem pro alia, sed considerando solum rationem debitæ sustentationis. Ex hac autem differentia, quæ in facto ipso notoria est, sequitur alia, nimirum, de his posterioribus luctris in omni opinione probabili certum esse, clericos acquirere proprium ac temporale dominium talium honorum, posseque de illis prout voluerint, salva justitia, disponere, ut etiam Navarrus, loco supra citato, fatetur. Et ideo etiam quoad tributa est similiter certum, eamdem esse rationem de his bonis jam acquisitis in facto esse, ut sic dicam, quæ de patrimonialibus, de quibus dicendum superstet.

CAPUT XXIV.

UTRUM PATRIMONIALIA, ET IN UNIVERSUM BONA TEMPORALIA CLERICORUM SUB COMMUNIBUS LEGIBUS SÆCULARIUM TRIBUTORUM COMPREHENDANTUR.

1. *Prima ratio dubitandi.* — Ratio dubitandi sumi potest primo ex cap. *Magnum*, 11, q. 4, quod est Ambrosii, lib. 4 in *Luc.*, circa illa verba: *Et sedens docebat de naricula turbas*, ubi attingens locum Matth. 17, ubi Christus soli Petro jussit mittere hamum, et tollere staterem inventum in ore piscis, et solvere tributum, in quo ait Ambrosius significatum esse, *magnum et spirituale documentum, quo christiani viri sublimioribus potestatisibus docentur debere esse subjecti, ne quis constitutionem terreni regis putet esse solvendam.* Et videtur clericos comprehendere, nam subiungit: *Si enim censem Dei Filius solvit, quis tantus es, qui non putas esse solvendum?*

2. *Secunda.* — Secundo faciunt dubium leges civiles, quæ frequenter statuunt hæc tributa solvenda esse a clericis. Quamvis enim aliquæ sint antiquæ leges eximentes clericos

ab aliquibus ex his tributis, ut patet in l. 2, C. de Episc. et Cler., et in aliis, quæ supra ex Codice Theodosiano retulimus, nihilominus illæ sunt quasi peculiares exceptiones, nam generalis regula legum civilium esse videtur, clericos non eximi a solvendis tributis suorum temporalium bonorum, quando generaliter similibus bonis imposita sunt, ut sumitur ex l. *De iis*, C. de Episcop. et Cleric., et ex l. *Ad instructionem*, et l. *Neminem*, Cod. de Sacrosanct. eccles., et ex epist. Valentiniani apud Theodoret., libr. 4 Hist., capit. 7, dicentis: *Episcopi rectigalia, uti leges postulant, pensitare non recusant.*

3. *Tertia.* — Tertio videtur hoc esse rationi consentaneum, quia, licet personæ clericorum sacræ sint, et ideo sint etiam exemptæ, bona tamen eorum temporalia sunt, et mere civilia, et ideo sunt temporalibus principibus subjecta; ergo merito possunt principes ex illis tributa exigere. Neque enim obstat quod illa bona respectum habeant ad personam sacram et exemptam, tanquam ad proprium dominum, quia illud dominium est mere temporale, et ad temporalem finem de se ordinatum. Et ita respectus ille non est ad talem personam ut sacram vel exemptam, sed præcise ut civem. Neque etiam obstat quod princeps non habeat jurisdictionem in personam clerici, qua possit illum ad solvendum tributum cogere, quia satis est quod juste possit illud petere tanquam debitum, ut clerici in conscientia reddere teneantur. Quod si renuant, et necessaria sit coactio, apud suum judicem conveniri poterunt, ut debitum solvant. Quod si hoc non sufficiat, vel commode fieri non possit, poterit princeps, vel minister ejus tributi coactor, rem temporalem, non tam jurisdictionis, quam defensionis titulo, occupare, ne jure suo privetur. Atque hæc omnia ex eo maxime confirmantur, quod in multis regnis ita fieri et consuetudine receptum esse videmus, principibus catholicis, et pastoribus Ecclesiæ scientibus, et tacentibus.

4. *Omnia clericorum bona exemptione gaudent.* — Nihilominus dicendum est, omnia clericorum bona exempta esse ab oneribus tributorum civilium, sive realia, sive mista censeantur, præterquam in casibus a jure canonico exceptis. Ita sentiunt doctores Canonistæ in c. *Ecclesie*, et in c. *Quæ in Ecclesiæ*, de Constit., et in c. *Si clericus*, de Foro comp., quibus locis videri maxime possunt Panorinit., Decius et Felinus, et in c. ult. de Vita et honest. Cleric., et in c. *Adversus*, et c.

Non minus, de Immunit. eccles., et in c. 1 de Immun. eccles., in 6; et Bart., in l. *Placet*, C. de Sacros. eccles., n. 25 et sequent.; et Bald., in l. 2, C. de Episc. et Cleric., et in illis locis alii juris civilis interpres, Paulus de Castro, in l. *Ad instructiones*, C. de Sacrosanct. eccles., et Gregor. Lopez, in l. *Si*, et 54, titulo sexto, parte prima; et Summiſtæ communiter, v. *Immunitas*, et Navarr., in Manual., c. 47, n. 200, et in c. 27, n. 97; et Medin., C. de Restit., q. 15. Probatur autem primo ex jure canonico, nam in omnibus capitibus proxime citatis eximuntur clerici ab hujusmodi tributis. Nam in c. *Non minus*, expresse dicitur: *De bonis Ecclesiarum et clericorum*; in c. attem *Quanquam*, de Censib., in 6, apertius dicitur: *Districtius ne ab Ecclesiis et personis ecclesiasticis talia exigantur*. Et infra: *Ecclesiastice personæ, ac res ipsarum jure divino et humano a sæcularium personarum exactiōibus sunt immunes*. Ubi quædam Glossa marginalis addit ad nomen illud *res*, limitationem *non patrimoniales*, sed corumpit textum; nam ubi lex non distinguit, nec nos distinguere debemus, præsertim sine textu, vel cogente ratione. Igitur indefinita illa locutio æquivalat universalī; idem enim est dicere, res clericorum esse exemptas, ac dicere nulla bona clericorum esse tributis sæcularibus subjecta, præsertim quia negatio inclusa in voce exemptionis cadit supra res exemptas, et ita vocem illam distribuit.

5. Atque hoc magis declaratur in Clement. unic., eodem titulo, quæ præcipit observari, *quidquid contra exigentes ab Ecclesiis et ecclesiasticis personis talias, collectas, aut exactiones quascumque*, a prioribus Pontificibus vel Conciliis statutum est, ubi distributio illa *quascumque* dictam limitationem excludit. Nee refert quod non de rebus, sed de personis loquatur, quia non potest pro re exigi tributum, quin a persona, cuius talis res est, exigatur. Præterea hoc magis declaratur ex Clement. ult., de Censibus, ubi tam a personis ecclesiasticis, quam pro earum rebus propriis tributa extorqueri prohibentur, etc. Ubi et distincte ponuntur res et personæ, et dum additur *pro rebus propriis*, satis significatur sermonem esse de omnibus bonis etiam propriis; talia enim maxime sunt patrimonialia, nam quæ ex suis beneficiis clerici acquirunt, vel non sunt ita propria, vel certe non ita solent in jure canonico vocari. Et præterea additur ibi exceptio, scilicet, ut id intelligatur de rebus, *quas non negotiandi causa deferunt*, aut

deferriri faciunt, vel transmittunt, quæ exceptio firmat regulam in contrarium; nam res, quæ negotiationis causa feruntur, inter patrimonialia bona continentur; ergo si hæc excepituntur a regula, reliqua omnia patrimonialia bona sub illa comprehenduntur. Atque hoc modo idem confirmatur ex cap. ult. de Vita et honestat. clericor., ubi Pontifex a clericis permittit exigi tributa, quæ a mercatoribus solvi solent, quando ipsi clerici eisdem negotiationibus se implicant, de qua exceptione infra dicemus; nunc enim solum ex ea colligimus, extra casum negotiationis, nulla clericorum bona, per se loquendo, esse obnoxia secundum canonicum jus sacerularibus tributis.

6. *Ex jure civili probatur conclusio.* — Præterea huic juri canonico consentit civile in constitutione Friderici supra citata, et habetur in Auth. *Item nulla*, Cod. de Episc. et Cleric., ubi prohibetur ne collectæ vel exactiones ecclesiasticis personis imponantur. Nec refert quod expresse non loquatur de bonis, tum quia (ut dixi) non potest talis exactio ex bonis personarum fieri, quin a personis fiat, quorum sunt bona; et e converso non possunt aliter tributa hujusmodi exigi a personis, nisi de illorum bonis ea postulando, et juxta illorum quantitatem seu proportionem. Non enim de solo censu, seu capitulationis tributo, sed in universum de exactiōibus et vectigalibus, angariis et perangariis ibi sermo est, sub quibus verbis certum est comprehendi etiam illa tributa, quæ personis ratione bonorum imponuntur. Unde per illam constitutionem derogata est lex *De iis*, vel, si quæ forte aliæ libertati clericorum in hac parte derogantes in libris Codicis, vel in authenticis Justiniani reperiuntur. Vel potius renovantur antiquæ leges priorum imperatorum, in quibus hæc exemptio adeo clericis concessa est, ut etiam ex aliqua honesta et moderata negotiatione ad victum comparandum accommodata ab eis illa exigi prohiberent, ut sumitur ex leg. 10, 14 et 36, de Episcop. et Cleric., in Cod. Theodosiano.

7. *Ratione suadetur conclusio.* — *Objectio.* — Ratione probari potest absolute hæc assertio, quia hæc immunitas, etiam quoad bona, est valde consentanea rationi naturali, et dignitati sacerdotali; nam, si viri nobiles solent in humana republica ab hujusmodi tributis eximi, cur non magis eximentur personæ sacrae Deo dicatae? Secundo, potest idem concludi ex alia exemptione clericorum a jurisdictione sacerulari; nam tributa solvuntur

quasi in signum subjectionis, et in stipendum laboris in administranda suprema jurisdictione impensi, ut significavit Paulus, ad Rom. 13; ergo, sicut clerici omnino exempti sunt a jurisdictione sacerulari, ita etiam consequenter ab omnibus tributis solvendis eximuntur. Dices, licet sint exempti a jurisdictione principum, non tamen a commode, et utilitate gubernationis et sollicitudinis eorum; nam eorum providentia in pace conservantur, defenduntur, et saltem secundum communem rationem civium gubernantur. Ac denique simpliciter vasalli sunt, et honorem debitum principi tanquam domino exhibere debent; ergo justum etiam esset ut per aliquam contributio nem ad principis sustentationem juvent.

8. *Responsio.* — Respondeo ex verbis Pauli, 1 ad Cor. 9: *Si nos robis spiritualia seminamus, magnum est, si nos carnalia vestra metamus?* Sic ergo dicimus, sicut clericalis status a regibus in temporalibus juvatur, ita reges a clericis in spiritualibus juvari; nam pro illis et pro tota republica apud Deum intercedunt, et peculiariter pro regibus obsecrant, ut Paulus monet, 1 ad Timoth. 2. Per hæc ergo sufficienter compensant beneficium, quod a regibus accipiunt. Eo vel maxime quod fere nullus labor, vel sumptus principibus sacerularibus accrescit, ex eo quod politicum regimen et regum protectio in eorum commodum redun det. Accedit præterea ratio supra facta, quod Summus Pontifex, cui directe subsunt clerici, potest ab eis exigere tributa, cum rationabilis causa occurrit, et consequenter etiam potest prohibere ne alteri solvant, saltem sine sua facultate, quod etiam (ut infra dicam) moraliter necessarium est ut clerici a laicorum importunitatibus et injuriis immunes conserven tur. Denique propter hanc immunitatem clericorum, etiam quoad bona ipsorum, non desunt regibus et principibus sufficientia stipendia et redditus, quibus onera suorum munerum possint substinere. Quod si interdum indiguerint ecclesiastico subsidio, non sua potestate, sed ejus qui patrimonium Christi dispensat, et ecclesiastici status peculiarem curam gerit, illud postulare debent, ut scandala et excessus evitentur, et omnia ordinate fiant.

9. *Ad Ambrosium prima responsio.* — Ad fundamenta ergo in contrarium facilis est responsio ex dictis. Et imprimis ad Ambrosium aliqui respondent, illum loqui de facto, non de jure; clerici enim (in illo præsertim tempore), quando ab illis exigebatur tributum, pacifice illud solvebant, non ex justitiæ debito, sed ex cha-

ratis affectu, ad vitandum scandalum, et ne propter affectum temporalium bonorum principibus subesse nolle viderentur. Colliguntque hanc mentem Ambrosii ex facto Christi iubantis Petro solvere tributum, quod in exemplum adducit; constat autem ex verbis Christi, ipsum non ex debito, sed ad vitandum scandalum, Petro, ut tributum solveret, præcepisse. Ut ergo exemplum sit accommodatum, necessarium videtur ut sententia Ambrosii in eodem sensu intelligenda sit. Est ergo expositio probabilis, quamvis verba illa Ambrosii: *Christiani viri docentur, potestatibus sublimioribus debere esse subjecti*, et similia, aliquid amplius significare videntur.

40. *Secunda, ad eumdem.* — Aliter ergo responderi potest, Ambrosium non esse locutum de clericis, sed simpliciter dixisse, *Christiani viri*. Quod verbum indicat, magnum illud documentum, quod ibi tradit, præcipue datum esse contra antiquum errorem, asserentem Christianos exemptos esse a tributis principum, eo ipso quod Christiani sunt. Illum enim errorem refellebat Paulus ad Roman. 13, cum protulit sententiam quam Ambrosius allegat: *Omnis anima potestatibus sublimioribus subdita sit*. Cum autem Ambrosius interrogat: *Quis tu tantus es, qui non putas esse solvendum?* non oportet ut clericos comprehendat, nam statim subdit: *Tu, qui sæculi sequeris lucrum, cur sæculi obsequium non recognoscas? Cur te supra sæculum quadam animi arrogantia feras, cum sæculo sis misera cupiditate subjectus?* Loquitur ergo de sæcularibus seu laicis. Denique licet demus, in priori interrogatione clericos comprehendere, sensus nou incongruus esse potest, eos non debere sua auctoritate, et quasi propria præsumptione negare tributum, sed vel juxta concesiones principum, vel juxta suorum Prælatorum decretum.

41. *Ad secundam objectionem ex jure civili.* — *Ad tertiam.* — Ad leges civiles, fatemur alias leges Justiniani non favere huic exemptioni, jam vero responsum est illas esse revocatas, et de legibus antiquiorum imperatorum christianorum verius est plenam immunitatem a tributis clericis concessisse. Quamvis negari non possit, inter ipsos imperatores fuisse varietatem, quam Ecclesia tunc tolerabat, quia ita tunc expediebat, ad quod fortasse etiam allusit Ambrosius, ut supra notavimus. Ad rationem recte ibi responsum est, bona adhærere personæ, ideoque non posse personam esse plene et perfecte exemptam, nisi bona

etiam exempta sint. Et ideo non refert quod bona temporalia sint, neque quod respiciant clericum, non ut clericum, sed ut tempore dominum vel civem, quia ille non tantum est exemptus ut clericus, sed etiam ut civis, et simpliciter ejus persona, et consequenter etiam ea quæ illi quasi accessoria sunt. Ad id vero quod de jurisdictione attingitur, jam ostensum est exemptionem a tributis valde conjunctam, vel consequentem esse cum exemptione a jurisdictione, cum ipsa tributi impositio et exactio actus jurisdictionis sit. Neque potest ullo modo dari laicis licentia occupandi per vim, seu violenter subtrahendi bona clericorum, in quos jurisdictionem nou habent, quia hoc est contra omne jus naturale, solumque in casu extremæ necessitatis permitti posset, ut statim dicam. Denique ad consuetudinem, quæ objicitur, respondemus ad nos nunc non pertinere modum et qualitatem consuetudinis expendere, quæ ad factum pertinet, non ad jus, ideoque solum nunc dicimus, talem consuetudinem ex genere suo iniquam esse, et in jure reprobatam tanquam ecclesiasticae libertati contrariam, nisi vel per Pontificem expresse approbata sit, vel in aliqua exceptione juris sit fundata, juxta ea quæ in sequentibus dicemus.

CAPUT XXV.

AN CLERICI TENEANTUR AD ONERA REALIA SOLVENDA, QUÆ REBUS IMMOBILIBUS ADHÆRENT.

1. Duæ exceptiones a regula in præcedenti capite posita excogitari possunt, quas expendere necesse est. Prima est de tributis realibus, quæ rebus immobilibus inhaerent, priusquam in potestatem clericorum perveniant; nam de posterioribus tributis, quæ superveniunt, postquam talia bona clericorum effecta sunt, certum est sub generali regula comprehendi, quia omnia jura sine distinctione loquuntur, et rationes supra adductæ aequæ de immobilibus et de mobilibus procedunt, quia etiam onera bonorum immobilium redundant in dominum, et tandem ex fructibus solvuntur, quæ mobilia sunt. Deinde quando onera seu tributa in bonis ipsis antecedunt, si sint ex pensionibus procedentibus ex proprio, ac privato dominio ejus, qui primo pensionem imposuit, mediante aliquo pacto, sic certum est rem transire cum suo onere, ac subinde esse a clero solvendum: nam quæ in hac parte diximus de Ecclesiis, in clericis locum habent.

2. An bona Ecclesiarum et clericorum æquali gaudent exemptione. — Opinio negans. — **Fundamentum ejus.** — Dubitatio ergo est de propriis tributis regiis, quæ ex vi solius jurisdictionis imposta fuerunt. Videturque hujus dubii resolutio ex alia dubitatione pendere, nimurum an bona clericorum in hac exemptione bonis ecclesiasticis æquiparentur; nam si non gaudent æquali privilegio, non est cur in hoc speciali casu de tributo reali prius bonis ipsis inhærente fiat æquiparatio, cum sit privilegium valde speciale Ecclesiarum. Quod autem non sit æqualis immunitas bonorum personarum ecclesiasticarum et Ecclesiarum, seu ecclesiasticorum bonorum, sumitur ex Gloss. 2, in Clement. 1, de In integrum restitut.; et ex Glossa, in cap. *Possessiones*, 16, quæst. 4; et ex Abbe, Felin. et aliis, quos refert Covarr., lib. 1 Variar., c. 4, n. 3, ubi ipse concludit, non esse æqualia in exemptione bona patrimonialia clericorum, nisi in casibus in quibus in jure id expressum est. Et videtur hoc rationi consentaneum; quia bona ecclesiastica sunt simpliciter sacra, et tantum ad sacros et pios usus destinata, quod non habent propria clericorum. Cum ergo hic casus, de quo tractamus, non sit in jure expressus, non videtur ad bona clericorum extendendus. Unde in legibus Hispaniæ, lib. 1 Novæ Recopilat., tit. 3, l. 11 et 12, expresse cautum est, ut clerici talia tributa prædiis inhærentia, postquam talia prædia emerint, vel aliter acquisiverint, solvere teneantur. Et ita simpliciter docuit Gregor. Lopez, partit. 1, tit. 6, l. 51, num. 4; et Valasc., de Jure emphyteut., q. 47, n. 10, qui plures referunt; et eos sequitur Molin., tract. 2 de Justit., disp. 456. Verum est eos indistinet in hoc loqui de bonis Ecclesiarum et clericorum, unde omnes auctores, qui ita sentiunt de bonis ecclesiasticis, a fortiori idem dicent de bonis clericorum.

3. Conclusio : bona Ecclesiarum et clericorum in exemptione a regalibus tributis sunt æqualia. — Nihilominus contrariam sententiam veram censeo (loquendo de propriis tributis, ut supra distinximus), quam expresse tenet Cardinalis Albanus, in tractatu supra citato; et Gutierrez, in Practicis Quæstionibus, lib. 1, quæst. 3, a n. 15, ubi tractat legem Recopilationis citatam, eamque juxta distinctionem a nobis superius traditam exponit, dicens, intelligendam esse, quando bona sunt affecta onere tributorum expresse, et ex conventione partium; secus vero esse si tantum

sint affecta tributis ex generali lege, qua prædia privatorum regi pro tributis sunt obligata: *Nam si talia bona* (inquit) *per venerint ad clericum, non transeunt cum onere.* Idque confirmat exemplo alterius legis Hispaniæ, lib. 4 Ordinamenti, l. 12, quæ statuit, cum vir nobilis (hispane, *hijodalgo*) bona emerit ab alio tributis solvendis obnoxia, non transire cum onere. Ita ergo contingit, si clericus similia bona emat, aut hæreditario jure acquirat. Ratio enim omnibus communis est, quia per mutationem personæ mutatur qualitas inhærens rei ratione personæ, argumento l. *Locatio*, § *Fiscus*, ff. de Publican. et vectigal., et l. *Per procuratorem*, 89, ff. de Acquirend. hæredit. Unde ob hanc eamdem rationem, bona ante sacerdotium possessa post sacerdotium gaudent privilegio exemptionis. Et pro hac sententia refert Gutierrez plures modernos, ex quibus videri potest Matienzo, in librum 5 Novæ Recopilat., tit. 10, lib. 11, Gloss. 4; et Alfonsus Guerrero, in Thesauro Christianæ religionis, c. 36, n. 9 et 33.

4. Insinuant autem isti auctores, propria tributa regia, quæ dicuntur realia, et quasi inhærentia rebus immobilibus, non adhædere illis quasi per se, et absolute spectatis, sed ratione personarum sub quarum dominio existunt, ac proinde solum esse quasi pignora, seu hypothecas obligatas virtute leg. 1, C. *In quibus causis hypotheca contrahatur.* Quod est valde probabile. Et inde optime confirmatur (quod supra de Ecclesiis, et nunc de clericis dicimus), talia bona non transire ad ipsos cum tali onere solvendi tributa, utique in futurum. Nam si prior dominus aliquo tempore, quo talia bona possedit, tributa debita non solveret, transirent bona cum illo onere, quia semper habent respectum ad priorem dominum, et ratione illius, et propter subjectionem ejus semper debetur, quæ ratio cessat in tributis solvendis ab eo tempore quo talia bona in personam exemptam fuerunt translata.

5. Confirmatur assertio. — Potest etiam hæc sententia confirmari ex supra dictis in simili dubio de bonis ecclesiasticis; nam, esto in rebus aliis, seu in specialibus prærogativis ac privilegiis hæc bona non sint æqualia, nihilominus in exemptione a tributis merito æquiparantur. Tum quia sicut Ecclesiæ sunt omnino exemptæ a jurisdictione sacerulari, ita et personæ clericorum; tum etiam quia jura, in quibus hæc exemptio a tributis præcipitur, æque de Ecclesiis et ecclesiasticis personis, et de utrarumque bonis loquuntur. Atque ita

æquiparationem hanc comprobat Glossa 2, in cap. *Ecclesiarum S. Mariæ*, de Constit., ubi late Felin., n. 7 et 8; item Gloss. ultim., de Vita et honest. cleric., quæ ad hoc ponderat textum illum. Ubi Panormitan., n. 11, eam limitare videtur, sed revera limitatio non procedit in materia tributorum, sed in aliis privilegiis, quæ non est limitatio ad Glossam, quia non generaliter, sed in tributis tantum loquitur, sicut et textus ille quem inducit. Et idem sentit Glossa penult., in c. *Ex litteris*, de Pignoribus, et optime Glossa 1, in c. *Ecclesiastarum*, 12, quæst. 2, et sumitur etiam ex illo textu, qui est Concilii Toletan. III, c. 21, et ex aliis antiquis, quos eadem Glossa allegat. Et melius id confirmat c. 1 de Immunit. ecclesiast., in 6, quod (ut supra notavi) distinete loquitur de bonis acquisitis et acquirendis, et nunc adverto, etiam loqui expresse de Ecclesiis et ecclesiasticis personis, ac earum bonis. Et eodem modo loquitur Clementina ult. de Censib.

6. *Solutio ad fundamentum contrariae sententiae.* — Qui bona Ecclesiæ surripit sacrilegium committit. — Raptor bonorum clericorum, nisi illi vim inferat, sacrilegium non committit. — Ad leges Hispanæ. — Ex quibus patet responsio ad rationem dubitandi in principio positam; negamus enim privilegium hoc quoad hanc partem esse speciale Ecclesiastarum, aut non esse in jure satis expressum; ex Glossis enim et juribus allegatis contrarium constat. Doctores autem ibi allegati, negantes hanc æquiparationem, intelligendi sunt, ut dixi, quoad alia privilegia, non vero quoad hoc privilegium exemptionis a tributis. Neque in hoc obstat ratio ibi inducta, quod ecclesiastica bona sunt magis sacra quam bona clericorum, nam hoc conduceat quoad alios effectus, ut, verbi gratia, quod major sit culpa distrahere bona ecclesiastica in usus profanos, quam bona propria clericorum, etiam intuitu Ecclesiæ comparata. Item quod major sit culpa furandi bona Ecclesiæ, quam propria clericorum; nam illud est sacrilegium, juxta doctrinam D. Thomæ, quæst. 99, art. 3 et 4, quam omnes sequuntur, et sumitur ex multis decretis, 11, q. 2, et 16, quæst. 1, cap. *In canonibus*; furtum vero a clero factum non est vere sacrilegium, nisi vis personæ inferatur, juxta cap. *Quisquis*, 17, quæst. 4; et notavit Panormit., in cap. *Cæterum*, de Judiciis, n. 17, licet aliud senserit Sylvest., v. *Sacrilegium*. Et sic de aliis privilegiis, quæ pertinent ad majorem tutelam, et religiosum usum

ecclesiasticorum bonorum. In tributis vero facta est æquiparatio in jure, quia non in bonorum ipsorum sanctitate, sed in absoluta exemptione personæ fundatur. Ad legem Hispaniæ jam responsum est, intelligendam esse de specialibus tributis fundatis in conventione partium. Et eodem modo exponendi sunt auctores ibi allegati, vel eorum sententia admittenda non est. Et juxta doctrinam hanc intelligenda videntur quæ in libro 2 Ordin. hujus regni, tit. 33, disponuntur de quodam tributo, quod *jugadas* vocant. Nam illud sine dubio ortum fuit ex dominio directo regum, et conventione cum subditis, quibus illa bona tribuebant, ut ex principio illius tituli constat, et ideo in rigore non continetur in generali privilegio clericorum vel Ecclesiastarum. Nihilominus tamen servanda sunt specialia privilegia, quæ ibidem etiam in hac materia illis conceduntur.

CAPUT XXVI.

AN CLERICI AD COMMUNES CIVIUM EXPENSAS CONTRIBUERE TENEANTUR.

1. *Ratio dubitandi pro parte affirmante.* — *Leges Hispanæ.* — Altera exceptio ad bona mobilia pertinens esse potest de quibusdam tributis, quæ non tanquam stipendia regia imponuntur, sed tanquam sumptus necessarii ad communem utilitatem civium inter ipsos distribuuntur. Hujusmodi sunt tributa quæ imponuntur ad reficiendas vias, pontes, aut fontes, aut muros civitatis, et similia, ad communem usum civium etiam clericorum necessaria. Ratio autem dubitandi esse potest, quia jura civilia non permittunt clericos ab his contributionibus eximi, ut constat ex l. *Ad instructiones*, C. de *Sacrosanct. eccles.*, ubi etiam venerabiles Ecclesiæ et divinæ domus huic tributo solvendo adscribuntur; ibi vero tantum fit mentio *de pontium et itinerum instructione*. In lege autem ult., Cod. Quibus muneribus, etc., lib. 11, additur *muronorum constructio, et frumenti aliarumque specierum comparatio, seu communis provisio*. Unde idem jus in rebus omnibus ejusdem rationis locum habebit. Atque hoc jus commune imitantur leges Hispaniæ, in l. 20, tit. 32, part. 3, et l. 54, tit. 6, p. 1, ac tandem in lib. 1 Novæ Recopilat., tit. 3, l. 11, ubi prius ponitur regula generalis de tributis pro communi bono impositis, et deinde ponuntur exempla

supra dicta , et adduntur alia, idemque cum aliis exemplis statuitur in l. 12.

2. Non videtur autem posse jus canonicum derogare in hac parte juri civili, quia dispositio illa videtur justitiae et æquitati, imo et pietati valde conformis. Nam hujusmodi impositiones revera non sunt tributa quæ indicent subjectionem, vel in propria jurisdictione fundentur, quia non imponuntur, ut regibus, tanquam dominis et principibus, solvantur, sed solum sunt distributiones quæ inter cives fiunt ad proprios usus ipsorum civium. Ratio autem et justitia postulat, ut omnes, qui hujusmodi rebus communibus indigent et utuntur, ad expensas, quæ in illis fiunt, justa distributione concurrant; ergo cum clerici fruantur his communibus commodis, debent etiam participare hujusmodi onus cum cæteris civibus. Nam eadem ratio obligationis et debiti in illis concurrit, et non est contra dignitatem sacerdotalis status, haec tributa solvere, magis quam pretio suo emere res, quibus ad victum et vestitum indigent. Imo, quia priora bona ad commune bonum spectant, ex ea parte est talis contributio pietati consentanea, ideoque in dicta lege *Ad instructiones*, dicitur: *Venerabiles Ecclesias tam laudabili titulo libenter adscribimus, quia non est inter sordida munera numeratum.* Et in dicta l. 11 Novæ Recopilationis Hispaniæ, dicitur: *En estas cosas tales, a fallecimiento de propios de concejo, devan contribuir, y ryudar los dichos clérigos, por quanto es pro comunal de todos y obra de piedad;* ac si diceret: quando ad hujusmodi sumptus bona communia totius populi, seu eorum redditus non sufficiunt, tunc ratio pietatis et communis utilitatis postulat, ut clerici contribuant. Estque illa limitatio valde notanda, nam multum confirmat hujus contributionis æquitatem. Quia ubi communia bona non sufficiunt, necessario debet ex propriis et particularibus bonis singulorum civium suppleri; cur ergo cogentur singuli cives laici ex propriis bonis aliud pro clericis solvere, aut eis de rebus necessariis, licet communibus, propriis sumptibus providere? Quæ ratio videtur ostendere, neque Pontificem, neque ipsum regem posse hanc exemptionem clericis concedere, ipsis communitatibus laicorum invitatis.

3. In contrarium autem videntur jura canonica urgere, præsertim c. *Non minus*, et c. *Adeversus*, de Immunit. eccl. Nam in priori statuitur sub anathemate universaliter, et sine limitatione, ut hæc onera Ecclesiis vel clericis non imponantur: *Nisi Episcopus et cleru-*

tam necessitatem vel utilitatem aspexerint, ut absque ulla exactione ad relevandas communes utilitates, vel necessitates, ubi laicorum non suppetunt facultates, subsidia per Ecclesias existiment conferenda. In altero vero capite *imprimis* significatur, hanc contributionem clericorum, etiam in illo casu non esse ex debito, sed ex gratia; additur enim ibi: *Praedicti laici humiliter et devote recipient cum gratiarum actione.* Et, quod gravius est, adjungitur sequens limitatio: *Propter imprudentiam tamen quorundam Romanus Pontifex prius consulatur, cuius interest communibus utilitatibus providere.* Addi etiam possunt c. *Quanquam*, de Censib., in 6, et c. 1 et 3, de Immunit. eccl., in 6, quatenus in eis generaliter dicitur, Ecclesias et ecclesiasticas personas ab omni exactione sœcularium esse exemptas.

4. *Resolutio affirmans.* — *Fundamentum ejus.* — In hoc puncto Doctores in hoc videntur convenire, ad hujusmodi sumptus communis, quando bona communia civitatum non sufficiunt, ideoque necessarium est ut cives contribuant, clericos etiam debere concurrere, et cum debita proportione ac moderatione contribuere. Hoc enim etiam jure canonico permissum et approbatum est, habetque naturalem æquitatem, ut declaravimus. Difficultas autem est, tum in genere obligationis, tum maxime in modo impositionis et exactionis. Nam de genere obligationis dubitari potest, an clerici solum ex quadam honestate, et quasi ex consilio debeant in hujusmodi casibus contribuere; vel ex necessitate et obligatione conscientiae teneantur. Aliqui enim solum putant teneri priori modo, quod significat Panormitanus, lib. 1, consil. 3, n. 1, circa finem, dicens: *Etiam imminentे communi utilitate clericorum et laicorum, non tenentur clerici aliquid conferre, nisi sponte velint.* Dum enim ait, *sponte*, indicat voluntariam esse contributionem, non necessariam. Et ad hoc inducit verba cap. *Non minus*, quæ statim referemus. Et ratione potest suaderi hæc opinio, quia clerici non obligantur ex vi legum civilium, neque ex vi consignationum, quæ a laicis fiunt sub quocumque tenore præcepti, cum non sint illis subjecti; nec invenitur lex canonica quæ illis talem obligationem imponeat, nec denique lex sola naturalis eos obligat, quia hæc obligatio pendet ex multis circumstantiis, quæ non sunt de jure naturali, sed ex pactis conventionibusque inter ipsos cives resultat.

5. *Secunda opinio. -- Fundamentum hujus.*

— Nihilominus contrarium in hac parte sentit Gregor. Lopez, in l. 54, tit. 6, partit. 1, Gloss. 2, quem sequitur Guttier., in Practic. Quæst., lib. 1, c. 3, n. 8, et idem sentit Guerrero, in Thesauro Christ. relig., cap. 36, n. 32. Fundantur in verbis cap. *Non minus*, ibi: *Nisi Episcopus et clerus tantam necessitatem vel utilitatem aspexerint, etc., ut subsidia per Ecclesiæ existimarent conferenda*; nam ubi res committitur existimationi, non censetur committi liberae voluntati, sed justo judicio et arbitrio, ut declarat Ulpianus, in l. *Fideicomissa*, § *Si fideicommissum*, vers. *Quanquam*, ff. de Legat., 3, ubi ait, per conditionem hanc, *Si existimaveris*, nou committi rem plenæ voluntati, sed prudenti arbitrio, et quasi viro bono; ergo in hoc sensu dixit Pontifex, clericum, *si existimet*, prudenti arbitrio, communem utilitatem vel necessitatem urgere, debere contribuere; ergo, supposita tali existimatione, hoc debitum est moralis necessitatis, et non tantum voluntatis. Et præterea partem hanc videntur efficaciter persuadere rationes in priori parte factæ. Et ad alteram, quam proxime in contrarium fecimus, respondebitur facile, obligationem hanc oriri ex æquitate naturali, cuius materia in hac parte mutata non est per jus positivum, quia jus civile potius illam confirmat, cui jus canonicum in hoc non contradicit, sed judicium practicum, et in particulari talis æquitatis Pastoribus Ecclesiæ committit.

6. *Vera resolutio. — Ubi necessitas occurrit, Episcopus clericorum contributioni consentire tenetur. — Probatur. — Nunquam possunt laici clericos ad contribuendum cogere.* — Quocirca in hoc puncto dicendum est, clericos singulos, seu sigillatim sumptos, non teneri ad hujusmodi contributionem, donec per Episcopum cum clero prudens existimatio facta sit, et decretum, in eo casu intervenire necessitatem, vel utilitatem communem, ad quam clerus contribuere debet. Hoc probat dictum cap. *Non minus*, ubi statuitur, debere præcedere Praelati approbationem, ut paulo inferius magis declarabimus; ergo ante illam non tenentur singuli clerici solvere contributionem; imo neque possunt, ut infra videbimus. Deinde dicendum est, si in re ipsa vera necessitas vel utilitas communis cum debitis circumstantiis intercedat, teneri Episcopum ad contributionem approbandam, et contra rationem et justitiam facturum esse, si contradicat. Et hoc est quod præcipue Gregor. Lopez et alii

intendunt. Et probatur, quia hoc non est ejus liberæ voluntati, sed prudenti arbitrio commissum; ergo ex officio et justitia tenetur tributum admittere, si revera existimet casum necessitatis subsistere, vel si existimare debet, ita ut per ignorantiam invincibilem non excusat. Ulterius vero addendum est, clericos non posse cogi a laicis ad solvendum tributum, etiamsi per Episcopum jam fuerit approbatum, quia nunquam laici habent jurisdictionem ad cogendos clericos. Poterunt ergo petere, rogare et requirere clericos, ut sponte solvant, non tamen vim inferre. Et fortasse in hoc sensu dixit Panormitanus clericos debere sponte solvere. Et ob eamdem causam existimo, addita esse in dict. cap. *Adversus*, verba illa: *Prædicti laici humiliter et devoti recipiant cum gratiarum actione*, etc. Quapropter si clerici in eo casu solvere noluerint, per suum Prælatum cogendi sunt, ut recte dixit Guttier. supra, eum aliis quos allegat. Quod si Episcopus vel clericos in hoc peccantes cogere noluerit, vel ipse injuste agat, nolens contributionem admittere, quando tenetur, ad superiorem Prælatum recurrendum erit, et ita clericorum immunitas servabitur, et sub-sidium communis bono necessarium non deerit.

7. *An, in contributione hac, forma, jure canonico præscripta, sit servanda. — Opinio negans. — Superest tractanda alia pars dubitationis circa modum in hac contributione servandum, videlicet, an in imponenda clericis, vel ab eis exigenda contributione ad hujusmodi communis utilitatis opera, servanda sit forma præscripta in dictis decretis, vel nulla illius ratione habita possint laici principes leges suas executioni mandare. Non enim defuerunt multi jurisperiti qui dixerint, nihil esse in hac parte derogatum juri civili per canonicum, ac subinde ad exigenda a clericis hæc tributa, non esse necessarium recursum ad Summum Pontificem, qui postulatur in dicto cap. *Adversus*, neque approbationem Episcopi aut cleri, prout præscribitur ibidem, et in dicto c. *Non minus*; sed satis esse regis edictum proponentis causam ut communem et necessariam, et contributionem ut moderatam, et justa proportione distributam. Quam sententiam indicant Gloss. et Hostiens., in d. cap. *Non minus*, eamque defendit late Lucas de Penna, in l. *Cum ad felicissimam*, C. *Quibus muneribus*, lib. 10, quem cum aliis multis pro hac sententia refert Guttier., ubi supra, et specialiter illam defendit Rebuff.,*

in Commentar. ad constitut. Galliae, tom. 1, tract. de Sentent. provis., art. 3, gloss. 6, ubi alios refert. Et cum sibi objiciat, imperatorem non potuisse clericos sua lege adstrin gere, respondet : *Verum est, tamen haec opinio de facto servatur in Francia.* In quo sentit, per consuetudinem esse in hae parte juri canonico derogatum. Quod fundamentum falsum omnino esse infra ostendemus.

8. Ut ergo hujus sententiae fundamentum aliquo modo tolerabile sit, in hoc constitui debet, scilicet, jura canonica, præscribentia formam servandam in postulandis hujusmodi tributis a clericis, non extendi ad haec tributa, quando auctoritate regia imponuntur. Hoc autem duobus modis declarari potest. Primo, quia c. *Non minus* solum loquitur de consulibus, et rectoribus civitatum, et aliorum qui similem potestatem habere videntur, et illis prohibet ne clericis tributa imponant, nisi Episcopo approbante, etc. Unde in sequenti capite *Adversus*, quod est Concilii Lateranensis, sub Innocentio III, his verbis refertur decisio prioris Concilii Lateranensis sub Alexander III : *Adversus consules, et rectores civitatum, vel alios*, etc. Ergo ex vi talium verborum non impediuntur reges supremi haec onera clericis imponere. Et hanc sententiam tenet aperte Lucas de Penna, loco citato, et insinuat Hostiensis, in Summa, tit. de Immunitate ecclesiast., § *A quibus*, versicul. *Verum ad extraordinaria*; quamvis enim dicat, legem *Ad instructiones*, et similes, corrigendas vel moderandas esse per jus canonicum, nihilominus addit limitationem : *Nisi princeps præcipiat.* Verum est tamen, in contextu ejus ambiguum esse, an dicere voluerit, illicitas esse has exactiones respectu clericorum tantum, vel simpliciter respectu omnium subditorum esse illicitas, nisi fiant auctoritate principis, et hic posterior videtur magis esse sensus ejus, si totus contextus consideretur.

9. *Rejicitur.* — Cujuscumque tamen sit illa limitatio cap. *Non minus*, et similium, admittenda non est, quia imprimis repugnat Pontificiae declarationi in Bulla Cœnæ Domini, ubi expresse prohibitio extenditur ad quoscumque *cujusvis præminentiae et dignitatis, etiam imperialis et regalis*, et additur : *Innovantes decreta super his per sacros canones tam in novissimo Lateranensi, quam alius Conciliis generalibus edita*, ubi præcipue intelligit cap. *Adversus*, et cap. *Non minus*, exponendo (ut arbitror) potius quam addendo, illorum dispositionem ad omnes principes temporales exten-

di. Deinde in illis decretis licet fortasse propter occasionem facti, quod ibi refertur, nominentur consules et rectores, tamen in fine adduntur generalia verba, quæ omnes potestatem habentes ad imponenda tributa comprehendunt, ut in c. *Non minus* : *Nec non, et alii qui potestatem habere videntur*; et in c. *Adversus*, ibi : *Consules et rectores civitatum, vel alios*. Ubi non dixit alios similes, sed simpliciter alios, plane comprehendens omnes, qui ecclesiasticis viris has exactiones imponere nituntur; et in cap. *Clerici*, § *Nos igitur*, de Immun. eccles., in 6, expresse nominantur *imperatores, reges*, etc. Et in hac parte confirmatur in Clement. unic., eodem tit., quamvis per verba generalia, scilicet, *contra quoscumque laicos*, etc. Et ita etiam interpretatur et confirmat Clement. V decisiones Conciliorum Lateran. sub Alexandro et Innocentio. Denique in c. *Quanquam*, de Censib., expresse dicitur : *Nec collegium, nec universitas, nec aliqua etiam singularis persona, cujuscumque dignitatis existant*, etc. Est ergo certissimum non posse limitari illa decreta ex parte personarum laicarum, quacumque potestate vel dignitate præemineant, ac proinde sententiam illam juristarum in hac declaratione fundatam improbabilem esse.

10. *Secundus dictam opinionem defendendi modus.* — Alio igitur modo posset illa sententia defendi, dicendo, illa jura non loqui de his impositionibus quæ per modum justæ distributionis inter cives fiunt ad res omnibus necessarias, vel valde utiles; sed loqui de propriis tributis, quæ in subsidium principum vel regum imponuntur. Et ratio reddi potest, quia illæ priores exactiones seu contributiones (ut supra dicebam) non sunt propria tributa superiori potestate, et voluntate principis imposita, sed sunt veluti quidam sumptus debiti, quia ex natura rei resultant ex tali opere communitati necessario. Quia nec clerici juste possunt resistere aut contradicere, ne tale opus fiat; neque possunt impedire quin in ipsis sicut in alios cives resultet obligatio naturalis solvendi quotam partem sumptuum, quæ secundum justam proportionem singulos contingit; ideoque talis obligatio non oritur ex jurisdictione sacerulari, neque ex lege civili, sed ex ratione naturali, supposito tali facto justo, et communitati moraliter necessario. Unde fit non repugnare talem contributionem ecclesiastice libertati, ac proinde non esse contra canonica jura, quæ prohibent omnes temporales exactiones a clericis fieri,

quia solum prohibent exactiones contrarias ecclesiastice libertati, qualia sunt quæ in jurisdictione laicorum, et in positiva lege civili fundantur.

11. Refellitur. — Sed quamvis fundamentum hoc speciem quamdam probabilitatis habeat, nihilominus solidum non est, nec decretis consentaneum. Primo, quia (ut notavit Abbas in dicto consilio) dictum cap. *Non minus*, prius dicit : *Sive fossata, sive expeditiones*; et deinde adjungit : *Sive alia quælibet. Fossata enim ad custodiam civitatis fieri solent, et ita pertinent ad utilitates clericis et laicis communes, idemque fere esse solet de expeditionibus; ergo cum additur distributio alia quælibet, omnia similia ad minimum comprehenduntur.* Unde in cap. *Adversus*, distincte explicatur prædicta decisio de exactiōibus, quæ ad relevandas utilitates vel necessitates communes ordinantur. Præterea, in aliis juribus absolute et sine limitatione prohibent exactiones et collectæ, quibus nominibus solent etiam hæ contributiones communes significari, et Clement. unica addit distributionem, *Quascumque exactiones, et praeterea adjungit : Necnon et circa præstandas subventiones laicis a Prælati, vel aliis personis ecclesiasticis;* nomine autem subventionum hujusmodi contributiones maxime significari solent. Et in dicta Auth. *Item nulla, declarantur angariae et parangariae, quæ solent etiam pro communi utilitate exigi; ergo limitatio illa verbis ipsorum iurium repugnat.*

12. Satisfit rationi pro prædicto fundamento adductæ. — Deinde ratio seu conjectura adducta in illo fundamento non est sufficiens ad interpretanda jura contra eorum verba, quia non probat esse necessariam limitationem illam, ut decisio illorum canonum justa et rationabilis sit. Primo quidem quia bona ecclesiastica, quibus clerici aluntur, sunt ad altiores fines deputata, qui in bonum et utilitatem ipsorum laicorum redundant; nam subventio pauperum magna utilitas laicorum est; templa etiam, et omnes sumptus illorum, laicorum usibus inserviunt, et ideo non est a ratione alienum, ut laici ex solis bonis suis temporalibus contribuant ad publica opera civilia, etiam si in communem utilitatem clericorum redundant. Praesertim quia bona sacris usibus deputata non debent ad profanos et communes usus converti, et ideo merito eximuntur ab his etiam temporalibus contributionibus. Quam rationem late prosequitur Panormitanus in dicto consilio.

13. Objectio. — Solutio. — Dices, has rationes ad summum procedere de bonis Ecclesiæ, non vero de bonis clericorum, quia et possunt esse patrimonialia, et quamvis sint ex redditibus Ecclesiæ, postquam sunt facta propria illorum, jam non sunt sacra, sed patrimonialibus comparantur, ut supra dictum est. Respondetur, etiam procedere satis congruerter rationem illam in bonis clericorum, præcipue in his quæ proveniunt ex redditibus ecclesiasticis, quia ex vi suæ exemptionis et dignitatis, postulant ut sine diminutione et sine temporali onere conferantur. Deinde merito extenditur etiam ad bona patrimonialia, tum quia hæc sunt veluti accidentaria et accessoria, expeditque ut participant exemptionem personæ et aliorum bonorum, ne detur occasio laicis illo colore onerandi clericos; tum etiam quia ipsi clerici communi utilitati laicorum inserviunt, et ideo illis quodam modo debitum est, ut gaudere possint utilitatibus temporalibus cæteris civibus communibus, etiam si ad illas temporaliter non concurrant. Hac enim ratione solent eximi milites et magistratus; ergo jure etiam eximuntur sacerdotes, qui non minus ad jus seu commune bonum pertinent, quam civiles magistratus, juxta sententiam Isidori, lib. 5 Etymologiar., cap. 8, cap. *Jus publicum*, distinct. 1, et idem habetur in l. 1, ff. de Instit. et jure. Denique, quamvis demus, in aliquibus casibus justum et rationabile esse, ut clerici ad hæc opera contribuant, inde non sequitur dicta jura canonica de his exactiōibus seu contributionibus non loqui, quia non omnino illas prohibent, sed modum et formam in illis servandam statuunt. Hoc autem maxime consentaneum rationi est, quia ad Prælatos Ecclesiæ spectat, clericorum curam specialem habere, et dijudicare, an talia ouera juste illis imponantur, non tantum generatim, sed etiam in particularibus casibus et eventibus, in quibus solent excessus et violentiae committi. Quam rationem dicta jura attigerunt.

14. Conclusio : in his actionibus servanda est forma jure canonico præscripta. — Dicendum ergo sine ulla dubitatione est, in postulandis a clero hujusmodi contributionibus, a laicis principibus et magistratibus ordinatis, servandum esse modum, et formam in jure canonico præstitutam, præsertim in dictis capitibus *Non minus*, et *Adversus*. Ita docet late Panormit., in dicto cons. 3, et in dicto cap. *Non minus*, n. 48, ubi refert alios antiquos Doctores in hac veritate consentientes, præcipue Glossam, in c. *Generaliter*, verb. *Colla-*

tionibus, quæ ait, legem *Ad instructiones* derogatam, vel certe limitatam esse per jus canonicum. Et idem sensit Hostiens. in Summ., tit. de Immunit., § *A quibus*, circa finem; et communiter Canonistæ super dicta decreta, Paulus Castren., Jason, et alii, in dicta l. *Ad instructiones*, et Gregor. Lopez, dict. tit. 6, partit. 1, l. 51, et melius in 54, n. 1 et 2; et lex illa multum favet. Nam, licet dicat clericos debere has contributiones solvere, tamen simul declarat hoc esse ex consensu Ecclesiæ, dicens: *Tubo por bien la sancta Iglesia*. Et infra adjungit, non posse laicos cogere clericos ad hanc solutionem, sed solum simpliciter ab eis petere, et si dare noluerint, per Episcopos cogendos esse; de Episcopis autem dicit, teneri ad id præcipiendum; quod intelligendum est juxta priorem declarationem, scilicet, juxta probationem Ecclesiæ, et modum ab ea præscriptum. Et plura pro hac sententia, et præsertim quoad Doctorum allegationes videri possunt in Gutierez, in dicta q. 3, l. 1 Practicar.

15. *Quas conditiones requirat forma jure canonico præfinita.* — *Prima conditio.* — Forma autem, seu modus in his tributis servandus, ut a clericis exigi possint, tribus conditionibus consistit, quæ ex dictis capitibus *Non minus*, et *Adversus* sumuntur. Prima ponitur his verbis: *Ubi laicorum non suppetunt facultates*. Circa quæ verba dubitari potest, de quibus facultatibus intelligenda sint, an de solis facultatibus communibus reipublicæ, an etiam de facultatibus singulorum civium. De quo nihil invenio a Glossa vel Doctoribus ibi explicatum, neque in aliis juribus canonici, neque etiam in legibus juris communis civilis; imo lex *Ad instructiones* omnino illam conditionem omisit; solumque in dicta lege Hispaniae Novæ Recopilationis explicatur illa conditio, et ad communia bona limitatur per illa verba: *A fallecimiento de proprios de consejo*. Cui legi stari posse videtur, quamdui ex jure canonico aliud non constiterit, tum quia est satis rationi consentanea, ut ex supra dictis constat; tum etiam quia alia esset nimia restrictio; vix enim potest moralis accidere causus, in quo bona propria omnium et singulorum civium ad hujusmodi opera efficienda non sufficiant, et difficilius erit hoc examinare vel probare. Ut ergo clerici consentire debeat, satis erit ut moraliter constet, communia bona non sufficiere, et singulos cives non posse sine magno gravamine suis solis sumptibus tale opus efficere.

16. *Secunda conditio.* — Altera conditio est, ut contributio non fiat, nisi Episcopus et clerici, re inspecta et considerata, existiment esse conferendam. Ita habetur in cap. *Non minus*, et expressius in cap. *Adversus* dicitur: *Episcopus simul cum clericis*. Unde constat non posse Episcopum solum contributionem approbare vel jubere, etiam juxta dispositionem cap. *Non minus*, quia concursus clericorum simul postulatur. Interrogari autem potest quid nomine cleri vel clericorum intelligatur, nam videtur in rigore significari, necessarium esse dioecesanam synodum; nam hæc videtur intelligi nomine cleri, et quia quod omnes tangit, ab omnibus debet comprobari; ergo oportet ut omnes convenient, saltem per capita, et in synodo. In contrarium autem est, quia hoc non videtur observari in usu, et est moraliter valde difficile, ut in omnibus occasionibus occurrentibus practice servari possit. Quapropter satis probabile est sufficere consensum Episcopi cum capitulo suæ cathedralis Ecclesiæ; nam illud solet in jure intelligi nomine clericorum, juxta cap. 1, cum alisis, de lis quæ fiunt a Prælatis sine consensu capituli. Multum etiam in hoc valere potest consuetudo: nam ubi ex more præscripto Episcopus habuerit proprium consilium suorum officialium, vel clericorum ad hoc munus deputatorum, et cum eis graviora diocesis negotia expedire solet, illud videri potest sufficiens ad conditionem hanc in illis juribus requisitam implendam.

17. *Tertia conditio.* — Tertia conditio, in dicto cap. *Non minus*, est, ut contributio fiat sine ulla exactione. Hæc vero magis pertinet ad modum petendi tributum jam impostum, quam ad modum servandum in imponendo tributo. Intelligitur autem de exactione coactiva, ut jam supra explicatum est, et de illa conditione videri potest Gigas, de Pension., quæst. 90, ubi alios refert. Insinuantur etiam in eodem textu alia conditio, scilicet, ut contributio sit *ad relevandas communes utilitates, vel necessitates*, sed hæc non est nova conditio, sed finis et quasi fundamentum *justitiae* talis impositionis, quod in toto hoc capite principaliter supposuimus. His ergo conditionibus omissis, propriam tertiam conditionem addit Innocentius III, in dict. cap. *Adversus*, his verbis: *Propter imprudentiam tamen quorumdam Romanus Pontifex prius consulatur, cuius interest communibus utilitatibus proridere*. In qua conditione, propter difficultatem ejus, et moram quam necessario

secum affert, fundantur maxime contrariae sententiæ auctores, ut putent non esse exten-dendam ad has exactiones, quæ frequenter necessariæ sunt, et habent quasi innatam naturalem æquitatem et pietatem. Sed nihilominus evidens est, Innocentium III de eisdem exactionibus vel tributis cum Alexandro III esse locutum, ac proinde hanc conditionem ad omnia tributa, in quæ priores conditiones cadunt, extendi. Ideoque, licet difficilis videatur, servandam esse, quia fuit præscripta ab eo, qui potestatem habuit illam imponendi, et potuit esse expediens propter vitanda incommoda, quæ frequenter occurrunt. Existimotamen, si Episcopus et clerici consentiant inconsulto summo Pontifice, licet male faciant, et puniri possint, nihilominus factum tenere, quia ibi non additur verbum irritans consensum eorum, et alioqui habebant jure ordinario potestatem ad illum consensum præstandum.

18. *Erasio.* — *Limitatio admittenda in hac tertia conditione.* — Posset autem aliquis dicere, conditionem hanc esse in præsumptione fundatam, ut indicant illa verba: *Propter imprudentiam quorumdam*, et ideo ubi fuerit evidens justitia et ratio contributionis, et consensus sit debitus secundum prudentiam, non obligare legem illam quoad hanc conditio-nem. Quia præsumptio cedit veritati, et consequenter cessat etiam lex in præsumptione fundata. Respondeo negando assumptum, quia illa lex revera non supponit rem præsumptam in qua fundetur, sed solum morale periculum, et occasionem frequentis mali et nocimenti. Hoc autem satis est ut lex universaliter fera-tur, et obliget etiam in particulari casu, licet in eo negative cesseret finis seu ratio legis. Solum ergo limitari potest illa conditio in casu urgentis necessitatis, quando est periculum in mora, arguento cap. *Pervenit*, de Immunitate ecclesiast., et quia necessitas caret lege. Et hanc limitationem addiderunt Panormitanus et Gregor. Lopez supra, et Sylvester, verb. *Immunitas*, numero 20; Guttier. supra, qui alias refert. Hæc autem necessitas maxime potest contingere in exactione, quæ ad unum actum vel ad breve tempus fit; nam si longiori tempore sit duratura, licet in easu necessitatis possit inchoari inconsulto summo Pontifice, ut longiori tempore protrahatur, consulendus erit, quia potest quoad hanc par-tem lex impleri, necessitate nou obstante, quia hoc modo illi sufficienter subvenitur.

CAPUT XXVII.

UTRUM OMNES CLERICI, TAM IN SACRIS QUAM IN MINORIBUS ORDINIBUS CONSTITUTI, ET IN STATU CLERICALI PERSEVERANTES, INTEGRE GAUDEANT ECCLESIASTICA LIBERTATE?

1. *Explicuimus causas et effectus hujus exemptionis; solum superest ut de personis, seu subjectis quibus hoc privilegium conceditur, disseramus. Et quoniam ex hactenus dictis satis in genere constat, privilegium hoc personis ecclesiasticis concedi, duo sub hac generalitate explicanda supersunt. Unum est, quæ sint istæ personæ ecclesiasticae hoc privilegium participantes. Aliud est, an singuli-lis earum totum hoc privilegium integre et quoad omnes suas materias communicetur. Primum ergo distinguendus est duplex ordo ecclesiasticarum personarum, juxta partitio-nem a Hieronymo traditam, in cap. *Duo sunt*, 12, q. 4. Unus est clericorum, aliis est eorum qui conversi seu Deo devoti ibi appellantur, qui sub nomine *monachorum* significan-tur in cap. *Si quis suadente*, 17, quæst. 4, et jam communiter sub nomine *religiosorum* aut regularium comprehenduntur.*

2. *Differentia inter has ecclesiasticas per-sonas.* — Differunt autem hæc duo genera per-sonarum ecclesiasticarum, quia clericatus proprie sumptus requirit ordinationem aliquam sacramentalem, vel saltem primam dispositio-nem, et quasi inchoationem ejus per primam tonsuram (in hac enim amplitudine nunc sum-mitur juxta cap. *Cum non ab homine*, de Sen-tent. excom., et cap. *Cum non ab homine*, de Judiciis); monachatus vero nullum requirit ordinem, sed solum sacrum aliquem statum, per quem persona Deo specialiter dicetur, et ut talis ab Ecclesia recipiatur. Deinde in clericatu sunt diversi gradus, nam quidam sunt clerici in sacris, ut sunt omnes qui per ordinationem, ratione voti annexi, inhabiles ad matrimonium facti sunt, juxta c. *Miramur*, de Servis non ordin. Alii vero sunt clerici in minoribus, qui votum non emittunt, et ideo subdistinguendi sunt, nam quidam sunt clerici continentis, allii conjugati. Et ita resultant quatuor gradus personarum ecclesiasticarum, de quibus suo ordine dicemus; in hoc vero capite simul tra-ctabimus de omnibus clericis non conjugatis, quia in generali regula convenienti, qua con-stituta, exceptiones vel differentiae quæ inter eos fuerint, facile intelliguntur.

3. *Prima conclusio.* — *Probatur conclusio primo ex jure canonico.* — *Probatur secundo ex jure civili.* — Dicendum ergo est, omnes clericos, tam in sacris quam in minoribus, etiam in prima tonsura constitutos, et in clericali statu perseverantes, plene et integre gaudere privilegio clericali, per se loquendo, id est, nisi propter crimina illo priventur. Haec assertio extra controversiam est inter Catholicos; nam ex jure canonico manifeste probatur. Præsertim cap. 2, de Foro competent., ibi: *Neque presbyterum, neque diaconum, aut clericum ullum, aut minores Ecclesie, per quod ultimum membrum intelligi videntur juvenes, seu juniores (ut habet alia littera) primam tantum tonsuram habentes, quamvis alii magis vocem illam extendant, ut infra videbimus.* Idem probatur in dicto cap. *Cum non ab homine, de Judiciis, ibi: Clericos cujuscumque ordinis.* Et iterum: *Clericus in quocumque ordine constitutus.* Alia vero jura indefinite loquuntur de clericis, sub qua voce omnes comprehenduntur, præsertim in favorabilibus, nisi limitatio addatur, et in hac materia specialiter explicatur in cap. *De persona, 11, quæstion. 4,* ubi multa alia jura eodem modo de clericis loquuntur; tractant vero specialiter de privilegio fori, tam in materia criminale quam in civili. Et cum eadem generalitate loquuntur jura canonica de clericis quoad exemptionem a tributis, ut videri potest in omnibus titulis de Immunitate ecclesiastar. Deinde jus etiam civile eodem modo de exemptione clericorum loquitur, ut patet ex Authent. *Cassa, Cod de Sacros. eccles., et Authent. Item nulla, Cod. de Episc. et Cleric.,* ubi Fridericus de personis ecclesiasticis indefinite loquitur, quod nomen generalius est. In Codice etiam Theodosiano multæ sunt leges saepè jam indicate, in quibus privilegium hoc vel absolute conceditur clericis, vel interdum etiam minoribus in particulari. Unde a fortiori constat convenire majoribus.

4. *Ratione probatur assertio.* — Ratio assertionis non est alia, nisi quæ ex jure sumitur. Nam si hoc privilegium ut est a jure divino spectetur, sic nullam habet limitationem ex parte clericorum, quia omnes sunt speciali titulo de familia Christi, et ad divinum cultum consecrati et deputati; nam, licet inter ipsos clericos sit differentia majoris vel minoris consecrationis, seu magis aut minus sacri ministerii, hoc non satis est ut dicamus, quosdam fuisse magis exemptos ex vi juris divini, quam alios, ut supra cap. 10 declaratum est.

Si autem hoc privilegium spectetur ut per jus ecclesiasticum determinari aut limitari potest quoad personas, sic etiam non inveniatur facta discretio inter clericos in sacris, vel in minoribus, dummodo in statu clericali perseverent, modo inferius explicando. Ratio autem colligi potest ex cap. *Si diligenti, de Foro compet.,* quia hoc privilegium sicut non est personale, id est, intuitu personæ concessum, ita non est datum intuitu hujus vel illius ordinis, sed intuitu status clericalis, et ideo dicitur ibi *toti collegio ecclesiastico indulsum,* ad quod collegium quilibet clerici pertinent, ut ibi dicitur. Nec dubitandum est quin etiam clerici solius primæ tonsuræ sub hac generalitate comprehendantur; et ideo de his solent interdum auctores loqui in particulari, vel ad tollendum omne dubium, vel ut a fortiori intelligentur omnes superiores comprehensi, ut videre licet in Joanne Lupo, tractat. de Libertate ecclesiastie., cap. 2, et Covarr., in Practic., cap. 31, 32 et 33, et est satis expressum in dicto cap. 2, de Foro compet., et clarissimus in Concilio Tridentino, sess. 23, cap. 6, de Reformat.; quod decretum statim exponemus.

5. Quod autem hoc intelligendum sit de plena et integra exemptione, ut in altera parte assertionis dixi, æque certum est, et eodem fere modo est probandum; nam jura canonica et civilia, tam quæ exemptionem fori in criminalibus et civilibus, quam quæ immunitatem a tributis concedunt, de ecclesiasticis personis æqualiter, sive indefinite, sive cum distributione loquuntur. Unde omnia, quæ haec tenus de generalitate exemptionis, tam in criminalibus et civilibus judiciis, quam in legibus etiam civilibus et tributis diximus, ad omnes clericos cujuscumque ordinis in statu clericali perseverantes æqualiter applicanda sunt, quia jura quoad hanc partem nihil inter eos discernunt, unde neque nos discernere debemus, nisi fortasse in aliquo casu particulari in jure expresso, de quo nunc non tractamus.

6. *Limitatur assertio.* — *Ordines sacri per se soli privilegium exemptionis inducunt, minores vero non ita.* — Dixi autem in clericali statu perseverantes. Primo, ad declarandum conclusionem intelligi de clericis non conjugatis, nam illi soli integra exemptione gaudent, ut ex dicendis in capite sequenti constabit. Deinde posita est illa particula ad explicandum decretum Concilii Tridentini supra allegatum, et differentiam quæ inter clericos

majorum vel minorum ordinum in hoc inventur. Supponit autem hæc differentia discri-
men aliud inter status utriusque ordinis cle-
ricorum. Nam, licet omnibus clericis commu-
ne sit, ut characterem indelebilem accipiant
(quod cum proportione, et quadam imitatione
de prima tonsura accipiendum est), nihilomi-
nus quoad perseverantiam in statu et munere
clericali, ordines sacri secum afferunt majo-
rem stabilitatem et obligationem. Nam clerici
in sacris tenentur in statu clericali perseve-
rare, c. *Decernimus*, dist. 28, neque possunt
illum sine apostasia deserere, unde ad habi-
tum et insignia clericalia retinenda cogi pos-
sunt, cap. *Tuae*, de Apostatis, adjuncta Glos-
sa communiter probata. Clerici autem in mi-
noribus, ut eadem Glossa notat, possunt sine
apostasia statum clericalem deponere et laice
vivere, et sæcularibus negotiis implicari, jux-
ta c. *Joannes*, de Clericis conjug., et cap.
unic., eodem titul., in 6. Ex hac ergo dif-
ferentia oritur, ut clerici in sacris absolute, et
sine ulla alia conditione dicantur ex vi suaे
ordinationis gaudere privilegio clericali, quia
talis ordinatio secum trahit perseverantiam in
illo statu, et consequenter etiam trahit privi-
legium clericale, per se loquendo, quam par-
ticulam seu limitationem infra explicabo. In-
feriores autem ordines, quia per se non obli-
gant ad perseverantiam in illo statu, per se
soli non sufficiunt ad gaudendum privilegio
clericali, sed aliquas conditiones requirunt,
quæ indicent talem personam durare in statu,
in quo est divino cultui et ecclesiastico minis-
terio dicata, quæ est potissima ratio ob quam
hoc privilegium conceditur.

7. *In clericis minoribus tres conditiones re-
quiri ad fruendum hoc privilegio.* — Hinc ergo
Tridentina Synodus, sess. 23, cap. 6, de Re-
format., in hunc modum deceperit: *Nullus
prima tonsura initiatus, aut in minoribus or-
dinibus constitutus, ante decimum quartum an-
num beneficium possit obtinere. Is etiam fori
privilegio non gaudeat, nisi beneficium eccl-
esiasticum habeat, aut clericalem habitum et
tonsuram deserens, alicui Ecclesiae ex manda-
to sui Episcopi inserviat, vel in seminario cle-
ricorum, aut in aliqua schola, vel universitate
de licentia Episcopi quasi in via ad maiores
ordines suscipiendos, versetur.* Ex qua decisio-
ne constat, mentem Concilii fuisse ut non gau-
deant privilegio clericali clerici in minoribus
constituti, nisi ecclesiasticis ministeriis actu
dicati sint, quod nos explicuimus per verbum
perseverandi in statu clericali. Voluit autem

Concilium, ut minoribus ordinibus aliquid
aliud adjungeretur, quo ista perseverantia seu
dedicatio ad divinum cultum indicaretur. Duos
autem modos Concilium distinxit. Unus est,
si clericus minor beneficium ecclesiasticum
habeat. Alius est, si tonsuram et habitum cle-
ricalem deferat, et ad serviendum alieni Ec-
clesiae, vel alio modo in via ad ecclesiasticum
obsequium per Episcopum applicatus vel con-
stitutus sit. Qui duo modi singuli per se suf-
ficiunt; nam a Concilio sub disjunctione *aut*,
ponuntur.

8. *Objectio.* — Clericus ergo minor habens
clericale beneficium, eo ipso gaudet privilegio
fori, etiam si conditiones alias in clericis mi-
noribus non beneficiatis requisitas non obser-
vet, quia Concilium in illo membro solum be-
neficium cum ordinibus requirit, quia ex vi
beneficii censetur esse actu dicatus ecclesiasti-
co ministerio, et tenetur habere animum in
clericali statu perseverandi, vel saltem non
habendi contrarium, alias nec beneficium re-
timere, nec illius fructus suos facere potest.
Dices: ergo, licet talis clericus in habitu cle-
ricali non incedat, nec tonsuram deferat, et
in reliquis ut laicus vivat, gaudebit privilegio
clericali, quod videtur absurdum, cum gravi-
ter peccet, et satis videatur clericalem statum
deseruisse. Respondeo concedendo non amitt-
tere privilegium ipso facto, quia nullo jure
privatur, nec Concilium in tali clero aliam
conditionem ut simpliciter necessariam ad
gaudendum privilegio requirit. Poterit tamen
talis clericus moneri, et si incorrigibilis sit,
privilegio privari, juxta cap. *In audientia*, et
cap. *Contingit*, 2, de Sentent. excom. Idem
enim in clericis in sacris contingit, ut infra
dicemus, et notat Glossa in capit. *Tuae*, de
Apostatis; et Innocent., in capit. 1, eodem
tit.

9. *An pensio cum minoribus ordinibus ad
hoc privilegium sufficiat.* — Quæri autem po-
test an sufficiat eum tali ordine habere pen-
sionem. Respondeo, si pensio talis sit, quæ
possit haberi a laico, clarum est non sufficere,
quia talis pensio neque est insigne clericatus,
neque ad statum clericalem vel officium obli-
gat, neque beneficio ecclesiastico ullo modo
equiparatur. Si autem pensio sit clericalis,
videri potest sufficere, propter contrarias ra-
tiones; equiparatur enim ecclesiastico benefi-
cio, et ideo solet sub illa voce comprehendendi,
presertim in favorabilibus. Habemusque ad
manum exemplum in eodem decreto Concilii
Tridentini; nam in principio statuit, ut ante

decimum quartum annum nullus possit beneficium obtainere; ibi autem congregatio Cardinalium censuit, sub beneficio pensionem comprehendendi; ergo eadem vel majori ratione, cum inferius dicitur clericum minorem, si habeat beneficium gaudere privilegio, debet etiam nomen beneficii ad pensionem extendi.

10. Nihilominus invenio responcionem aliam ejusdem congregationis, in qua contrarium declarari videtur his verbis: *Cui reservata fuit pensio, si non incedat in habitu et tonsura, non gaudet privilegio fori.* Et ratio redditur, quia Concilium Tridentinum corrigit jus commune, et tres casus excipit per dictiōnēm *nisi*. Hæc enim decisio non potest subsistere, nisi supponamus ibi, sub nomine *beneficii*, non venire pensionem. Nam, licet verum sit Concilium corrigere jus commune, in eo quod non requirit trinam monitionem, quam postulabant cap. ult. de Vita et honest. cleric., et cap. *Contingit*, de Sent. excommunic., nihilominus in primo membro illorum, quæ excipit, solum beneficium cum aliqua ordinatione requirit; ergo si pensio venit nomine *beneficii*, quando alieui ut clero reservatur, qui illam habuerit, gaudebit privilegio, etiamsi habitum et tonsuram non deferas. Vel e contrario si ille non gaudet privilegio (ut habet responsio Cardinalium), non sufficit sola pensio sine aliis requisitis, ac subinde sub beneficio non comprehenditur.

11. *Quatuordecim annorum ætas ad hanc exemptionem non requiritur.* — Unde tenendo hanc sententiam, responderi poterit, hic restringi nomen beneficii, quia hoc cedit in favorem religionis, ne is, cui pensio tanquam clero reservatur, facile habitum vel tonsuram deserat, si absque illis posset privilegio gaudere. Mihi tamen, ut verum fatear, hoc non satisfacit, ideoque difficilis videtur hæc posterior decisio, nec rationem ejus satis intelligo, ideoque dubito an fideliter sit descripta, ac propterea judicium in hoc puncto aliis remitto. Adverto tandem in hoc priori membro, quod, licet ad beneficium ætatem quatuordecim annorum Concilium requirat, ad gaudeendum privilegio non est necessaria, quia in nullo membro a Concilio postulatur. Solum in hoc primo videtur consequenter exigi ratione beneficii, vel potius supponi. Si tamen per dispensationem contingat, clericum minorem quatuordecim annis habere beneficium, privilegio clericali gaudebit, quia in re habet conditiones a Concilio requisitas, nihilque refert quod eas per jus commune vel per

dispensationem habere potuerit, quia in hoc Concilium nihil distinguit.

12. *Clericus in minoribus ex defectu cuiuscumque ex dictis conditionibus ipso facto privilegium amittit.* — Circa aliud membrum solum oportet notare, in clero minori non habente beneficium, tres conditiones postulare Concilium copulative. Ideoque, quacumque illarum deficiente, ipso facto, et nulla declaratione vel monitione præmissa, non gaudebit talis clericus privilegio, ut congregatio etiam Cardinalium expresse declaravit, citans Innocentium, in cap. 1 de Apostatis; et Geminianum, in cap. *Si iudex*, de Sentent. excom., in 6. Et ratio est, quia illa non est lex pœnalis, sed constitutiva formæ necessariae ad tale privilegium, et ideo, deficiente forma, ipso facto perditur privilegium. Declarat præterea dicta congregatio, habitum debere esse decentem, et usque ad talos. Eademque ratione oportet tonsuram esse secundum communem consuetudinem patriæ. Alia de his duabus conditionibus videri possunt in Covar., in Pract., capit. 31, numer. 7; et Julio Claro. lib. 5, § ult., q. 36, num. 47. Et inter leges Hispaniæ, lex 4, tit. 4, lib. 1 Novæ Recopilat., ubi quædam declaratio Pii IV pro his regnis refertur. Quacumque ergo ex his duabus conditionibus deficiente, juxta consuetum morem amittetur privilegium; ut autem deficere judicentur, non satis est semel aut iterum in eis deficere, sed veluti habitu et permanenter sine illis incedere, ut eadem congregatio sensit, arg. c. *In audience*, de Sent. excom. In casu vero dubio, ecclesiasticus iudex discernit an clericus sufficienter habitum vel tonsuram dimiserit, juxta capit. *Si iudex*, de Sentent. excomm., in 6. Vide Covarr., in Pract., c. 33, in princ.; Jul. Clar., § ult., q. 36, n. 21; Salzed., in Pract., c. 62, n. 44 et 49.

13. Atque hæc due conditiones, habitus et tonsuræ, jure communi videbantur sufficere etiam post trinam monitionem; Concilium vero addit tertiam, nimirum, ut talis clericus ex mandato Episcopi aliqui Ecclesiæ inserviat seu addictus sit, quæ satis per se est perspicua, et sine dubio est necessaria, non tamen absolute, sed nisi per aliam ab eodem Concilio approbatam suppleatur. Ponit enim Concilium sub disjunctione duo membra, scilicet, *Vel in seminario clericorum, aut in aliqua schola, vel universitate de licentia Episcopi versetur*; de quibus dubitari potest, an singula ex illis contineant singulas conditiones per se sufficietes ad hoc privilegium, vel solum

sint quasi partes tertiae conditionis in secundo membro principali positae, et cum illo solo sub disjunctione construendae. Sed sine ulla dubitatione hic posterior est sensus Concilii. Alioqui constituta essent quatuor membra principalia illius decisionis, et clericus in minoribus existens in studio de licentia Episcopi gauderet privilegio, etiam si habitum et tonsuram clericalem non deferret, et beneficio carereret; consequens est contra rationem, et contra consuetudinem, quae est optima legum interpres. Non sunt ergo illa quatuor membra principalia, sed duo; quia vero in secundo membro tres ponuntur conditiones, tertia illarum disjunctive ponitur sub triplici membro minus principali. Itaque in omnibus clericis minorum ordinum imprimis requiritur habitus et tonsura; loco vero tertiae conditionis, de Ecclesiae ministerio, sufficit esse in seminario vel in studio de licentia Episcopi.

14. An clericus minor, si alicui Ecclesiae non inserviat, nec studiis vacet, sit a tributis exemptus. — Aliorum opinio affirmans. —

Secunda et vera opinio. — Ulterius vero potest circa hanc partem interrogari, an clericus minor, habitum et tonsuram deferens, beneficium non habens, neque Ecclesiae deserviens, neque aliter hanc tertiam conditionem observans, sit immunis a tributis, esto non gaudeat privilegio fori. Aliqui enim affirmant, illas conditiones, a Concilio positas, non esse necessarias ad gaudendum immunitate a tributis, quia Concilium solum ad privilegium fori eas requisivit; sunt autem illa duo privilegia diversa, et ideo neque ab uno ad aliud argumentari, neque extensionem facere licet contra privilegium aliud, cum potius favores ampliandi sint. Sed contrariam sententiam ~~concio~~ veram, et imprimis certum est, consuetudine receptum esse, ut isti clerici, qui beneficium non habent, nec Ecclesiae deserviunt, vel habitum aut tonsuram non ferunt, a tributis non excusat, ut testatur Covarr., in Practie., cap. 3¹, in fine, quae consuetudo si esset contra immunitatem ecclesiasticam, non ita prævalere potuisset, ut justa esset exactio, sicut infra dicetur; quod tamen de hac consuetudine dici non potest, nullus enim est qui hanc consuetudinem reprehendat.

15. Deinde in superioribus ostensum est, non posse esse aliquem tributis subditum, nisi sit jurisdictioni et foro subjectus, quia impositio tributi quidam actus jurisdictionis est; er-

go e converso, qui non eximitur a jurisdictione principum, non est cur censeatur ab eorum tributis exemptus, nisi principes ipsum eximere velint; ergo clerici minores, non gaudentes privilegio fori ex defectu dictarum conditionum, consequenter non gaudent immunitate a tributis. Et ideo in superioribus dixi, privilegium fori, ut distinguitur a privilegio canonis, omnem immunitatem etiam a legibus tributorum includere, et sumitur ex cap. *Quanquam*, de Censib., in 6, cum similibus. Concilium ergo, absolute loquens de privilegio fori, in hoc sensu accipendum est. Et confirmatur, nam si isti clerici non gaudent privilegio fori, ergo subduntur legibus civilibus, non solum quoad vim directivam, sed etiam quoad coactivam; ergo etiam subduntur legibus tributorum; nam est eadem ratio. Est etiam magna congruentia, quia si per solam primam tonsuram, verbi gratia, sine ulla alia professione clericatus homines fierent a tributis immunes, multi tonsurarentur, solum ut a tributis eximerentur, absque ulla intentione ecclesiastici status.

16. Expenditur quedam Hispaniae lex. — Major quidem mihi difficultas est, in quadam lege Hispaniae, lib. 4 Novæ Recop., tit. 4, l. 2, quæ declarat, clericos non habentes beneficium ecclesiasticum, licet observent cætera requisita a Concilio ad gaudendum privilegio clericali, solum gaudere illo quoad causas criminales, non vero quoad tributa, contributio-nes, et cætera omnia. Illa enim lex non potuit decretum Concilii limitare; Concilium autem absolute dicit, hos clericos gaudere privilegio fori, quod de se non limitatur ad causas criminales, sed omnia complectitur, quæ supra expliqueimus. Videtur ergo illa lex supponere, hos clericos minores carentes beneficio non gaudere ex vi juris communis exemptione a tributis et causis civilibus. Quod si ita esset, recte diceatur, etiam ex vi Concilii illa non gaudere, quia Concilium Tridentinum non addidit privilegium his clericis ultra jus commune, sed solum non abstulit, quod antea habebant. At vero suppositio illa revera non est in jure fundata, quia nullibi sit talis distinctio; imo dictum cap. *Quanquam*, absolute et generaliter loquitur, et similiter alia jura supra citata, de Judiciis et Foro competenti. Sed fortasse in Hispania hoc jus commune quoad hanc partem derogatum esse supponitur, ut Covar. supra significat. Ut hoc autem admittatur, oportet ut constet, talem consuetudinem et derogationem esse a Pontifice approbatam,

alioqui non censeo posse in conscientia legem illam cum his clericis, qui gaudent juxta Concilium privilegio fori, observari.

17. *An clerici, semel hoc privilegio privati, illo amplius possint gaudere. — Prima sententia.* — Tandem circa hos clericos dubitari potest, an qui semel carent privilegio ex defectu dictarum conditionum, illo gaudere incipiant, quotiescumque formam Concilii servare coeperint; non enim defuerunt qui hoc negaverint, quia privilegium a superiori semel ablatum non recuperatur propria auctoritate, sed oportet ut a superiori iterum concedatur; at vero Concilium aufert privilegium, et non restituit; ergo non recuperatur sola voluntate clerici ad statum clericalem redeuntis. Aliqui vero addiderant, hoc maxime habere locum, quando clericus punitus est a judice, et privatus privilegio, quia sine habitu clericali incedebat, quia tunc proprie videtur habere locum ratio facta. Vel etiam quia tunc maxime videtur quis renunciare privilegio, simulque acceptatur renuntiatio; postquam vero aliquis sic renunciat privilegio, non potest sua voluntate ad illud redire. Et pro hac sententia citatur Innoc., in c. 1 de Apostatis.

18. *Auctoris sententia.* — Nihilominus contrarium censeo certum; quandocumque enim clericus habitum et tonsuram deferre coepit, et Ecclesiae inservire, aliquo ex modis a Concilio praescriptis, incipiet gaudere privilegio, etiam si ob aliquem defectum antea illo non gauderet. Ita docuit Abbas in simili puncto, in cap. *Joannes*, de Clericis conjugat., n. 4. Sequitur Angelus, verb. *Excommunicatio*, 5, num. 23; et in hanc sententiam refert Joannem Monachum, Archidiac. et Joan. de Lignano. Idem Sylvester, Excommunicat. 6, n. 4, et Antonin., 3 part., tit. 24, c. 2; et idem sumitur aperte ex quadam responsione congregationis Cardinalium. Cum enim interrogatum esset an clericus, qui beneficium ecclesiasticum obtinuit, cui, animo uxorem ducendi, una cum clericatu renunciavit, postea vero, mutata voluntate, habitum clericalem assumpsit, et aliud beneficium obtinuit, an recuperet privilegium clericale, respondit congregatio affirmando, quia clericus non potest privilegio renunciare, juxta c. *Si diligenti*, de Foro compet. Et est responsio juri consentanea, ut a simili sumitur ex cap. unic. de Cleric. conjugat., in 6, et ex his que Panormit. et alii notant, in c. *Clericus*, 2, de Vit. et honest. clericor. Hæc autem decisio eamdem

in præsenti rationem habet. Nam Concilium Tridentinum duas conditiones sub disjunctione posuit, ut vidimus; sed in priori, licet clericus dimittens beneficium, etiam animo renunciandi clericatui, desinat gaudere privilegio, si beneficium iterum obtineat, privilegio gaudere incipit; ergo etiam in posteriori casu licet clericus non beneficiatus, si dimittat habitum, pro tune non gaudeat privilegio, postea ad formam clerici a Concilio praescriptam rediens, illo gaudebit. Probatur consequentia ex paritate rationis, et quia ex priori casu ostenditur fundamentum contrariae sententiae nullius esse momenti.

19. Unde argumentor in hunc modum, quia vel talis clericus non recuperaret privilegium, quia fuit omnino et radicitus (ut sic rem explicem) illo privatus; vel quia voluntarie illi renunciavit; neutrum autem est verum, neque probabile. Primum patet, quia nec Concilium nec aliud decretum canonicum tales privationem efficit. Nam Concilium solum dicit: *Is etiam privilegio fori non gaudeat, nisi, etc.* Et sub his verbis ponit utrumque membrum; illa autem verba non continent privationem perpetuam, sed solum conditionem requisitam ad gaudendum privilegio. Hæc autem est vis et natura conditionalis, ut sit ad utrumque parata, si vera sit, nimirum, ut, non posita conditione, non sequatur effectus, et illa posita, sequatur, etiam si antea ob defectum conditionis positus non fuerit; nam hoc nihil refert, quia quod conditio tardius vel citius impletatur, impertinens est. Præsertim quia illa mora per se non est peccaminosa, nec pro tune privatur clericus privilegio in pœnam, sed ex defectu formæ, seu status in quo se gerit ut laicus; et ideo sicut laicus incipit gaudere, si ordinetur, etc., ita et iste clericus, si habitum et alia requisita reasumat.

20. Aliud membrum de renunciatione jam probatum est. Nam regulariter non est necesse ut talis clericus habeat animum renunciandi, sed ad summum non gaudendi pro illo tempore. Et deinde licet velit, non potest renunciare privilegio, nisi renunciando etiam clericatui, seu beneficio, etc. Perseverando autem in debito statu, vel resumendo illum, non potest non gaudere privilegio, etiam si velit, quia non potest renunciare tali privilegio in favorem clericatus inducto. Unde impertinens est quod per sententiam fuerit talis clericus exemptione privatus, tum quia illa sententia non inducit novum effectum, sed declarat effectum ju-

ris; tum etiam quia, licet illam privationem imponeret per modum pœnæ, illa non est absoluta, nec perpetua, sed habet inclusam conditionem seu terminum, scilicet, *donec assumat habitum*, etc., vel *quamdiu non assumpserit*. Unde est quasi suspensio, quæ, sub illis terminis lata, cessat adveniente termino, seu cessante conditione, ut alibi diximus, et ad rem præsentem optime probatur ex Clement. 4, de Vita et honest. Cler., ibi: *Quamdiu præmissis institerint*, ubi id notat Glossa, et aliis juribus confirmat.

21. *Propter crimina posse interdum clericum hoc privilegio privari.*—Atque ex his facile declarari potest, cur in fine conclusionis ad diderimus intelligendam esse per se; quia propter crimina interdum privantur clerici, etiam in sacris, privilegio fori, et ob nullam aliam causam solent illo privari, neque fortasse possunt. Quia vel illud habent a jure divino, vel ab ecclesiastico in divino ita fundato, ut ad illud proxime accedat; ergo, nisi ipsi clerici indigni fiant tali privilegio, non possunt illo privari. Non fiant autem illo indigni, nisi per crimina; ergo non possunt illo privari, nisi in criminum pœnam, quamdiu scilicet statum clericalem retinent. Quod addo propter clericos in minoribus. Nam illi, qui sunt in sacris, ex vi solius characteris censentur esse semper in statu clericali, quamdiu per Ecclesiam non degradantur, quod non fit nisi in pœnam aliquorum criminum. In minoribus autem clericis, non sufficit character sine aliis conditionibus ad illum statum ab Ecclesia requisitus, et ideo ex defectu talium conditionum carent privilegio sine culpa vel poena; illis autem stantibus nunquam illo privantur, nisi in pœnam.

22. Et confirmatur hoc, quia hoc privilegium non est in gratiam personæ, sed totius status clericalis; ergo nullus clericus potest illo privari, nisi fiat illo indignus, quia id redundaret in magnum totius status clericalis incommodum ac detrimentum. Quod autem propter crimina auferatur, redundat in commune bonum totius status, et ideo ita fieri potest, et non aliter. Et ob eamdem causam, ut in superioribus attigi, etiam si hoc privilegium datum esset clericis immediate ab ipso Christo, possent in pœnam illo privari, sicut privantur homines libertate aut vita in pœnam, etiam si dono auctoris naturæ illam habuerint, quia intelligitur data quasi sub hac conditione, seu subordinatione ad commune bonum reipublicæ, et potestatis quæ illius cu-

ram gerit; ita cum proportione de hoc privilegio censendum est, datum nimirum esse cum subordinatione ad potestatem ecclesiasticam, quod multo magis locum habet, si fortasse per illam proxime fuit concessum.

23. *Quibus modis pœna privationis hujus privilegii clericis imponatur.*—Statim vero occurrebat inquirendum, quibus modis fiat hæc privatio privilegii in pœnam. Sed hoc magis pertinet ad tractatum de Censuris ecclesiasticis, ubi id attigimus, disp. 30, sect. 2. Resolutio autem breviter est, regulariter non privari clericum hoc privilegio, nisi per degradationem realem, juxta cap. *Novimus*, de Verbor. significat., et c. 2, de Pœnis, in 6, et docent Canonistæ, in cap. *At si clerici*, § de Adulteriis, de Judiciis, et alii, quos refert et sequitur Covar., in Pract., c. 3; et Joannes Luper, tract. de Libert. ecclesiast., part. 2, c. 5, n. 5. Aliquando vero fieri potest hæc privatio per solam sententiam a judice ecclesiastico latam, etiam si realis degradatio non sit subsecuta, quod tamen nunquam fit, nisi supposita incorrigibilitate in delictis enormibus, et servata forma præscripta in cap. *Cum non ab homine*, de Judiciis, de qua videri possunt ibi Doctores, præsertim Panormit., n. 24; Deceius, n. 28; Felin., n. 9; et Covar. supra, n. 2. Et ratio sufficiens est, quia in pœnis inferendis, sicut potestas a jure data sufficit, ita forma concessionis servanda est; imo et restringenda, quia materia est odiosa. Tertio denique modo potest hæc pœna immediate per ipsam legem canonicam ferri. Ad intelligendum autem quando et quomodo talis pœna per canonem inferatur, imprimis proprietas verborum stricte observanda est, juxta principia generalia de lege pœnali.

24. *Privilegia canonis et fori clericorum in jure distingui.*—Deinde est in hac materia specialiter advertendum, privilegia canonis et fori clericorum in jure canonico esse distincta, ut notavit Panormit., cap. 1 de Apostatis, ideoque attente considerandum esse de quo privilegio lex loquatur, ut ab uno ad aliud non extendatur. Unde, licet in c. *Perpendimus*, cap. *In audiencia*, c. *Ut famæ*, c. *Contingit*, 2, de Sentent. excom., clerici ter admoniti, et nihilominus in quibusdam criminibus obdurati, priventur ipso facto privilegio canonis, nihilominus illa iura non sunt extendenda ad privilegium fori, ut notavi disput. 22, de Censur., sect. 4, tum quia pœnæ sunt restringendæ; tum etiam quia, ut recte dixit Angelus, verb. *Excommunicatio*, 5, n. 23, et Sylvester, *Ex-*

communicatio, 6, n. 4, privilegium fori difficius tollitur quam canonis. Nam privilegium canonis pure humanum est, solum enim consistit in peculiari modo tuendi ac defendendi incolumentem personarum ecclesiasticarum, gravissimam censuram contra earum percussores ferendo, et ideo idem jus canonicum, que illa censura lata est, merito non vult illam habere locum in prædictis casibus, in quibus iudicat clericos ut laicos viventes, et post tot admonitiones pertinaces, tali defensione fieri indignos, licet non statim omni alio majori privilegio, et a jure divino manante, priventur, vel privari mereantur.

25. Unde si quis recte consideret canones qui de hoc privilegio loquuntur, pauci sunt qui poenam hanc ipso facto sine alia sententia judicis ecclesiastici ita imponant, ut eo ipso persona clerici subiecta maneat potestati sacerdotali. Nam quoad clericos in sacris vix reperitur jus certum, præter cap. 1 de Homicid., in 6, de quo supra dicto loco de Censuris dictum est; et videri possunt Sylvest., verbo *Assassini*, quæst. 3 et 4; Juli. Clar., lib. 5, § ult., num. 30, et Covar., lib. 2 Variar., cap. 20, num. 10. Alia vero jura, quæ in certis casibus privant ipso facto clericos hoc privilegio sub quibusdam conditionibus, in cap. *Ex parte*, 3, de Privileg., et c. unic. de Vita et honest. cleric., in 6, et Clement. I, eodem tit., hæc (inquam) jura et similia solent de clericis minoribus exponi. Quod nunc examinare et ex professo tractare nec nostri instituti est, nec vacat, sed videri ibi possunt Glossæ et Doctores, et in c. 1 de Apostatis, et Panormit., in c. *Perpendimus*, de Sent. excom., et Joan. Lupus, in dicto tract. de Libert. Eccles., part. 2, q. 5.

CAPUT XXVIII.

AN CLERICI CONJUGATI PRIVILEGIO ECCLESIASTICÆ EXEMPTIONIS GAUDEANT.

1. *Quatuor conditiones ad exemptionem clericorum conjugatorum requisitæ.*—Hæc quæstio tractari potest, vel de jure antiquo, vel de novo. Prior sensus parum utilis est, et ideo illum prætermittimus. Verisimilius autem est, priusquam Ecclesia hoc discrimen constitueret inter clericos conjugatos et reliquos, privilegium indifferenter clericis concessum ad conjugatos pertinuisse, non minus quam ad reliquos, quia non possumus nos excludere quos lex non excludebat, et quia pri-

vilegium principis ample interpretandum est. Imo in legibus imperatorum nonnullæ habentur, in quibus privilegium hoc saltem ex parte ad uxores et filios clericorum extenditur, ut videre licet in titulo de Episcop. et Cleri., in Cod. Justiniani et Theodosii. Relicto ergo antiquo tempore, quæstio tractatur secundum novum jus capituli unic. de Cleric. conjugat., in 6, quod confirmat et aliquo modo restringit Concilium Tridentinum, sess. 23, cap. 6, de Reformat. Statuit autem Bonifacius, in dicto capite, ut clerici conjugati praeter privilegium canonis solum gaudere possint privilegio fori quoad causas criminales, sive criminaliter, sive civiliter tractentur. Ut autem hac immunitate gaudent, tres requirit conditions. Prima, ut tonsuram deferant; secunda, ut incedant in habitu clericali; tertia, ut cum unicis et virginibus contraxerint. Concilium vero Tridentinum addidit quartam, dicens: *Modo hi clerici alicujus Ecclesie servitio vel ministerio ab Episcopo deputati, eidem Ecclesie serviant et ministrent.*

2. *Clerici conjugati nunquam gaudent integræ clericali privilegio.*—Ex quo jure tres propositiones et quasi generales regulas in hoc puncto colligimus. Prima est: nullus clericus conjugatus gaudet toto privilegio clericali. Probatur, quia etiam si omnes dictas conditions impleant, non sunt exempti a judicio sacerdotali in causis mere civilibus, et consequenter nec ab obligatione legum civilium, saltem quoad vim directivam, neque a tributis, neque ab aliis muneribus vel oneribus publicis, nisi per leges civiles expresse et specialiter eximantur. Probatur, quia in dicto capite, concessa prius exemptione in criminalibus, additur: *In cæteris autem eos gaudere nolumus privilegio clericali*, ubi aperte omnia excludit, et singularis exceptio firmat regulam in contrarium. Et hæc regula communiter recepta est per Joannem Andr., et alios expositores, in dicto cap. unic.; Panormitanum, et alios, in c. *Joannes*, de Clericis conjug., et in c. 2, de Foro compet., et alios, quos referunt et sequuntur Covar., in Pract., c. 31, n. 7; Guttier., de Juram. confirmatorio, p. 1, c. 17, n. 42; Sylvest., v. *Clericus*, 1, quæst. sexta. Non defuerunt autem qui contrarium docuerint, ut dicti auctores referunt; sed non est res disputatione digna, ubi jus est tam clarum et evidens. Neque rationes eorum sunt alienus momenti, ut in dictis auctoribus videri potest. Quocirca juxta hoc de-

cretum optime procederet lex 2, tit. 4, lib. 1 Novae Recopilat., supra tacta, si de his tantum clericis conjugatis loqueretur.

3. Quo privilegio fruatur, qui post sacros ordines uxorem ducit. — Solum circa hoc jus adverto in illo ex intentione Pontificis solum esse sermonem de clericis in minoribus constitutis, nam clerici in sacris uxores ducere non possunt. Duobus autem modis contingere potest, clericum majorum ordinum esse conjugatum. Primo, quia cum antea conjugem haberet, postea modo legitimo ordinatus, et a conjugate separatus est. Et tunc ille non reputatur ab Ecclesia tanquam conjugatus, sed tanquam continens viduus, quia civili quodam modo, et quoad usum et societatem matrimonii uxor illi quasi mortua est, et ideo ille perinde potest gaudere privilegio clericali, ac caeteri clerici in sacris, et forte ob eam causam de hujusmodi clericis nulla specialis mentio vel distinctio in jure fit. Alio modo potest clericus in majori ordine constitutus uxorem ducere per dispensationem Pontificis, et tunc ille omnino abstrahitur, et quasi deponitur a statu clericali, ideoque tanquam laicus reputatur, et gaudere non potest privilegio clericali, nisi fortasse quoad criminale forum, concurrentibus conditionibus in aliis clericis conjugatis requisitis, quia nihil aliud de illo invenimus in jure dispositum, nisi per specialem dispensationem illi concedatur.

4. Qualem habitum deferre debeant hi conjugati ad gaudendum exemptione. — Secunda propositio, seu regula est, clericum conjugatum, observando clericalem statum modo a jure requisito, gaudere saltem exemptione a judicio saeculari in criminalibus causis. Ita statuitur et declaratur in dictis decretis, quae potuisse in hoc ita disponere, satis ex superioribus bus constat. Unde solum supersunt explicandæ conditions ad prædictum statum requisite. Prima erat tonsura, circa quam nihil occurrit addendum, quia eodem modo debet ab his clericis deferri, quo a minoribus non conjugatis. Secunda erat habitus clericalis, circa quam notant Doctores, non oportere in hac conditione observari omnimodam æqualitatem seu æquiparationem inter hos clericos conjugatos cum non conjugatis, quia, licet in utrisque honestior habitus in qualitate, figura, colore et longitudine, quam in laicis postuletur, nihilominus in illisimis circumstantiis, præsertim in figura, longitudine et materia vestium, plus aliquid conjugatis permitte potest quam non conjugatis. Sufficiet ergo ut habitus satis

honestus sit, et secundum communem consuetudinem aptus ad discernendum clericum a laico. Hinc vero intelligi potest, non satis esse hujusmodi clericum deferre habitum clericalem illis horis seu temporibus quibus actu in ecclesia ministrat, sed necessarium esse ut in communi vivendi modo in habitu clericali incedat, quia in hoc æquiparatur clericu non conjugato.

5. An dicti clerici, si cum armis incedant, hoc privilegio fruantur. — Unde etiam infert Julius Clar., dicto § ult., quæst. 36, n. 12, necessarium esse ut hujusmodi clericus arma non portet, quam dicit esse communem opinionem, cum Bertrando, cons. 13, n. 5, quia arma clericis sunt prohibita. Aliquis autem videtur hanc prohibitionem non extendi in clericos conjugatos, quorum statum arma non dedecent. Et ideo Azor, tom. 1, l. 13, cap. ult., quæst. ult., putat non repugnare huic privilegio, arma deferre, si alias clericalis habitus retineatur. Nihilominus tamen securius est non deferre modo præsertim a laicis consueto, ita ut exterius videri possint, quia non bene convenient cum clericali habitu. In his tamen circumstantiis multum valet consuetudo a Prælatis non improbata, ut generaliter notavit Covarr., in Pract., c. 31, n. 7.

6. Bigami clerici non gaudent exemptionis privilegio. — *An contrahens cum virgine a se antea corrupta hac exemptione gaudeat.* — *An qui cum duabus contraxit, et cum altera tantum consummat, exemptione gaudeat.* — Tertia conditio erat, ut cum unica tantum et virgine contraxerint; bigamo enim noluit Ecclesia etiam hanc partem sui privilegii concedere. Sed quid si clericus contrahat cum ea quam ante matrimonium virginem cognoverat et corruperat? tunc enim revera non contrahit cum virgine; ergo nec gaudebit hac exemptione. Sed nihilominus dico gaudere, quia, ut dixi, illud decretum solum intendit excludere bigamos; per illud tamen matrimonium non contrahitur bigamia, ut in materia de Irregularitate dixi, disp. 49, sect. 3. Ratio vero est, quia in favorem matrimonii fictione juris quasi retrotrahitur usus ejus. Unde sicut per matrimonium subsequens proles prius concepta legitima efficitur, ita præcedens usus quasi matrimonialis reputatur, et consequenter matrimonium illud cum virgine contractum esse censetur. Deinde inquire potest quid dicendum sit si clericus cum duabus virginibus contraxit, non tamen cum utraque consummat, quia prius altera illarum vel mor-

tua fuit, vel religionem professa est. Respondeo hoc non obstare quia talis clericus gaudet hac immunitate, quia per illud duplex matrimonium non contrahitur bigamia, ut in citato loco dixi. Unde cum in dicto decreto dicatur : *Clerici, qui cum unicis et virginibus contrixerunt*, intelligendum est de matrimonio perfecte contracto et consummato; nam antea non habet perfectam suam significacionem, et lex illa in hac parte ad actum omnino perfectum restringenda est. Et ita in utroque hoc punto sensit Glossa ibi communius approbata, licet aliqui contradixerint.

7. Per quam bigamiam clericus conjugatus exemptione privetur. — Denique interrogari potest circa hanc conditionem, an per solam bigamiam contractam per duplex matrimonium consummatum, vel per matrimonium cum vidua, fiat clericus incapax hujus privilegii. Et ratio dubitandi est, quia in omni bigamia est eadem ratio, et ideo extendenda videtur lex propter identitatem rationis, quamvis verba non omnino convenient, quia nimur aliter bigamia contracta est, quam verbis illius textus explicetur. Nihilominus censeo standum esse verbis legis, ideoque solum bigamum clericum cum altero ex illis duobus modis esse inhabilem ad hoc privilegium. Et ideo qui contraxit cum unica et virgine, quæ postea adulterium commisit, et nihilominus eam deinde maritus cognovit, licet fiat bigamus quoad alios effectus, et interpretative, nihilominus hoc privilegium non amittit, quia conditionem a jure requisitam servavit; nam cum unica et virgine contraxit, et jus illud nihil amplius quoad hanc conditionem postulat. Neque illa extensio per identitatem rationis admittenda est, tum quia sumus in materia odiosa et stricta, qualis est diminutio vel limitatio immunitatis Ecclesiasticæ; in hujusmodi autem materia raro et vix admittenda est talis extensio, nisi tanta sit vis rationis, ut contrarium injustum vel irrationaliter appareat, quod hic dici non potest. Tum etiam quia neque identitas rationis hic invenitur, multo enim major defectus vel indecentia in bigamia propria, quam in metaphorica invenitur. Tum denique quia Pontifex ipse non loquens generatim de bigamia, sed explicans species et modos ejus, satis indicavit illas tantum species voluisse excludere. Et ita sentit Julius Clar., d. q. 36, n. 9 et 10, referens Aufrerium, dicentem ita sentire communiter omnes, et in facti contingentia ita fuisse decisum.

8. Clericus conjugatus in universitate litteris vacans non manet exemptus. — Quarta conditio, a Concilio addita, supra in minoribus clericis non conjugatis fere declarata est; solum advero duo. Unum est, Concilium hic definite postulare ut talis clericus sit ministerio Ecclesiæ ab Episcopo deputatus, et non addere alia duo membra, quæ in clericis non conjugatis posuit. Et sane merito: nam unum illorum, scilicet, in seminario clericorum educari, non potest moraliter in conjugato clero locum habere, ut per se constat. Aliud vero membrum de studio in aliqua universitate de licentia Episcopi, licet aliquo modo posset a clero conjugato observari, non tamen eo modo quo a Concilio postulatur, addit enim: *Quasi in via ad maiores ordines suscipiendos versetur*, quæ via non potest in clero conjugato considerari, cum per matrimonium ad maiores ordines ineptus factus sit. Igitur præcise ac definite necessarium est Ecclesiæ ministerium. In quo advero secundo, Concilium non tantum dixisse, debere esse deputatum servitio vel ministerio Ecclesiæ, sed addidisse, *ut ei ministret vel inserviat*, quibus verbis plane significare voluit non satis esse quod habeat titulum vel officium, si per alium tantum inserviat, sed necessarium esse ut per se ipsum ministret. De modo autem ministerii nihil in particulari Concilium determinat, et ideo quodlibet sufficiet, sive aliquo modo spirituale sit, ut est ministrare in Missa, vel in choro; sive temporale, ut est, res Ecclesiæ custodire, mundare, et similia, quæ ad officium sacellani aut thesaurarii pertinent.

9. An clericus conjugatus mercaturam exercens hoc privilegio fruatur. — *Resolutio.* — His conditionibus nonnulli quintam addunt, nimur, ut clericus conjugatus negotiationem seu mercaturam non exerceat. Hanc ponit Julius Clar., dict. quæst. 36, n. 12, et refert Alexandrum de Nevo, cons. 60, dicentem ita sentire communiter Doctores, cum Innocentio, in c. ult. de Vit. et honest. cleric., in quo textu potuit hæc opinio fundari; et quia negotiations clericis prohibitæ sunt. Hæc tamen sententia probanda non est. Primo, quia cum in dict. c. unic. veluti constituantur forma servanda, ut aliquis gaudere possit hoc privilegio, nihil ultra illam requiri potest, nisi aliquo alio jure additum sit; unde ante Concilium Tridentinum nihil aliud requirebatur; post illud vero requiritur quarta conditio, quia ab ipso addita est; illa vero quinta conditio nullo jure est adjuncta; ergo necessaria

non est. Et ita tenet expresse Covar., dict. c. 31, n. 8, citans Francum, Alexandr. et Immolam; et idem tenent Summistæ, Sylvest., *Clericus*, 3, quæst. 3; et ibidem Tabien., quæst. 4; Angel., *Clericus*, 9, n. 3; et alii moderni.

10. Neque ex cap. ultim. de Vit. et honest. cleric. aliud colligitur. Nam præterquam quod ibi est sermo de clericis non conjugatis, ut ex toto contextu constat, ibi solum dicitur, clericos negotiationibus vacantes non esse immunes a tributis, quibus negotiantium bona subdita esse solent. Quæ decisio pro clericis conjugatis non erat necessaria, quia, ut jam diximus, nulla immunitate a tributis gaudent. Neque etiam est verum, omnem negotiationem esse prohibitam his clericis conjugatis; nam contrarium supponitur in c. *Joannes*, de Clericis conjugat. Præterquam quod etiam alii clerici, quibus prohibita est negotiatione, licet peccent illam exercendo, et quoad illa bona non gaudeant immunitate a tributis, quoad crimen et quoad reliqua omnia non statim amittunt totum privilegium clericale, donee per judicem ecclesiasticum priventur, si incorrigibiles fiant. Et simili modo crediderim, quod licet clericus conjugatus Ecclesiæ serviens, et insignia clerici portans, possit moderatam et honestam negotiationem ad onera matrimonii sustentanda exercere, gaudendo sua immunitate in criminalibus, nihilominus non posse talem et tantam negotiationem exercere, quæ et clericalem habitum et ministerium non deceat, posseque per Prælatum compelli, ut vel a tali negotiatione abstineat, vel insignia clerici deponat, argumento d. cap. *Joannes*; atque ita fieri ut ille privetur privilegio, vel in poenam ab homine impositam, vel ex defectu aliarum conditionum, non vero quia nova conditio per se necessaria sit.

11. *Qui clerici conjugati omnino exemptione privantur.* — Tertia et ultima regula, quæ ex dictis colligitur, est, multos esse clericos conjugatos, qui privilegio fori omnino non gaudent. Probatnr, quia omnes illi, quibus deest aliqua ex dictis conditionibus, trahi possunt ad iudicia sacerdotalia, etiam in criminalibus, per praedicta jura, et juxta sententiam omnium. Nec requiritur sententia aut declaratio hominis, quia ex defectu conditionis et formæ statim sequitur privatio, ut a fortiori constat ex dictis de clericis non conjugatis. Unde reliqua ibi dicta possunt hie applicari. Solum est advertenda differentia inter conditionem unici matrimonii cum virgine, et alias;

nam si illa semel desit, defectus est perpetuus, et ita reddit personam simpliciter inhabilem ad tale privilegium; in aliis vero potest esse vicissitudo, et ideo licet per defectum earum amittatur privilegium, possunt iterum assumi et redire privilegium, si fundamentum illud unius conjugii cum virgine non desit, quia tunc procedunt dicta de cæteris clericis, ut per se manifestum est.

CAPUT XXIX.

UTRUM ALIAE PERSONÆ ECCLESIASTICÆ ORDINEM
NULLUM HABENTES EXEMPTIONE FORI INTEGRE
GAUDEANT.

1. Ratio dubitandi esse potest, quia jura canonica, quæ de hoc privilegio fori loquuntur, solis clericis illud tribuunt; clerici autem solum dicuntur illi, qui ordinem aliquem, vel saltem primam tonsuram acceperunt. Neque nomine clericorum solent monachi comprehendendi, sed potius condistingui solent, ut sumitur ex Hieronymo, epist. 2 et 3. Et confirmari potest ex cap. *Si quis suadente*, 17, q. 4, ubi privilegium canonis institutum est, et quia Pontifex voluit non solis clericis, sed etiam monachis illud concedere, distinete dixit, *in clericum vel monachum*; ergo a contrario privilegium fori solis clericis ordinatis conceditur, cum de illis tantum canones loquantur. Quod si quis respondeat, inde potius contrarium sumi argumentum, quia principium receptum est, omnes illos gaudere privilegio fori, qui gaudent privilegio canonis, ex communi Doctorum sententia, in c. 2, de For. comp., et ex Sylvest., verb. *Ecclesia*, 1, n. 6, hoc non satisfacit, quia, ut supra diximus, majus est privilegium fori quam canonis; ergo quoad concessionem non valet argumentum a minori ad majus privilegium, sicut etiam supra dicebamus, quoad ablationem non valere argumentum, si aufertur privilegium canonis, auferri etiam privilegium fori.

2. *Assertio: personæ ecclesiasticæ absque ullo ordine gaudent privilegio exemptionis.* — *Probatur assertio, et ratio dubitandi solvitur.* — Nihilominus sine ulla dubitatione dicendum est, personas ecclesiasticas integre gaudere hoc privilegio, etiam si multæ illarum nullum ordinem habeant, ut sunt monachi antequam ordinentur, et sanctimoniales, quæ ordinis sunt incapaces. Assertio est recepta ab omnibus Doctoribus, probaturque primo ex jure canonico, destruendo simul rationem du-

bitandi, quæ ex falso principio procedit. Quamvis enim aliqua jura de hac immunitate sub nomine clericorum loquuntur, ut c. *Non minus*, et c. *Adversus*, de *Immun.* eccles., nihilominus alia loquuntur sub nomine ecclesiasticarum personarum, quod generalius est, et monachos in rigore comprehendit. Ita constat ex c. *Quoniam*, de Censib., in 6, et ex c. *Clericis*, de *Immun.* eccles., in 6, ubi etiam distincte additur, *ecclesiasticis personis regularibus, vel sacerdotalibus*. Et in antiquioribus decretis, in c. *Experientia*, 11, q. 1, declaratur, hoc privilegium fori convenire omni personæ ecclesiastici officii, quæ vox etiam proprie convenit monachis. Denique in c. *De persona*, eadem 11, q. 1, expresse loquitur Gregorius de Episcopis, clericis et monachis, allegando Authent. Justiniani, quam in hoc approbat et recipit. Accedit quod D. Hieronymus, ut citatur in c. *Duo sunt*, 12, q. 1, distinguens duo genera Christianorum, sub primo comprehendit omnes personas divino officio, et contemplationi, et orationi mancipatas, et in eis prius numerat clericos et monachos, quos Deo devotos et conversos appellat, postea vero omnibus tribuit clericorum nomen, quia omnes sorte electi et specialiter vocati sunt. Ita ergo accipiemund est nomen clericorum in hoc privilegio, etiam ubi contigerit per illud tantum nomen explicari.

3. *Ex jure civili probatur secundo assertio.* — Secundo potest assertio etiam ex legibus civilibus probari. Nam imprimis in lege 36 de Episc. et cleric., in Codice Theodos., cum exemplo a tributis clericis tribueretur, additur: *Quos gradus clericatus, et quod non minus est, sanctior vita defendit.* Praeterea Justinianus Imperator, in Authent. de SS. Episcopis, etc., collat. 9, novel. 123, c. 2, *Si quis contra*, 21, concedens privilegium fori, expresse recenset clericos et monachos, et feminas etiam Deo dicatas, ut notavit Gregor., lib. 11, ep. 53. Denique Fridericus, in sua constitutione, simpliciter loquitur de ecclesiasticis personis, ecclesiis, ac locis piis. Unde non est dubium quin præter clericos, monachos etiam comprehendat, ideoque postquam dixerat: *Statuimus ut nullus ecclesiasticam personam in criminali queretione vel civili trahere ad iudicium sacerdotale presumat*, subdit inferius: *Statuimus ut si quis clericis, vel personis ecclesiasticis justitiam denegare presumpserit*, etc. Ubi expendo disjunctionem illam, quia ne forte dicendo tantum, *si quis clericis*, ambiguitas de restrictione verbi oriatur, addi-

dit aliam particulam, *vel ecclesiasticis personis*, declarans subinde, privilegium illud personis ecclesiasticis datum, non solis clericis proprie dictis concedi, sed omnibus divino obsequio specialiter mancipatis, quæ nomine ecclesiasticarum personarum significantur.

4. *Ratione suadetur assertio.* — Et ex eisdem juribus et verbis constat, totum hoc privilegium integre concedi personis ecclesiasticis non ordinatis, æque ac clericis non conjugatis, seu in statu clericali integre permanentibus. Probatur, quia Fridericus sub eodem generali nomine, eodemque tenore verborum hanc exemptionem omnibus concedit. Atque eodem modo illam confirmat et approbat Honorius Papa, in fine ejusdem constitutionis. Decreta etiam antiquiora nullam in hoc distinctionem faciunt inter illa duo genera personarum ecclesiasticarum, de illisque simpliciter asserunt ecclesiastica immunitate gaudere. Denique utrumque est consentaneum rationi, ac subinde juri divino, a quo privilegium hoc emanat. Nam clericis ordinatis ideo hoc privilegium conceditur, quia peculiari modo divinis obsequiis dicati sunt, ideoque ad familiam Christi specialiter pertinent, et a curis ac perturbationibus sacerdotalibus debent esse absfracti; haec autem ratio non minus in monachis et similibus personis militat, etiam si per propriam ordinationem sacrae non sint, quia hic modus peculiari consecrationis non est eur ad privilegium exigatur, quando principalis ratio, et quasi proxima, et fundatum privilegii alia via comparatur. Quod fundamentum, ut dixi, est peculiari dedicatio ad divinum obsequium, ut notavit Innocentius, in c. 2 de Majorit. et obed. Sicut etiam inter ipsos clericos, qui primam tantum tonsuram acceperunt, revera non sunt ordinati sacramentali ordine a Christo instituto, et nihilominus quia per illam cærementiam ab Ecclesia institutam peculiari modo dicantur, et consecrantur divino cultui, ex illa parte id sufficit ad privilegium exemptionis; ergo eadem vel majori ratione, religiosa professio, vel quilibet aliis modis ab Ecclesia probatus, quo persona divino cultui peculiariter consecratur, ad exemptionem sufficit; omnes autem personæ, quæ simpliciter ecclesiasticae vocantur, aliquo simili modo, vel ritu ecclesiastico Deo dicantur et consecrantur; ergo et speciali modo pertinent ad familiam Christi, et ejusdem exemptionis debent esse participes. Et hinc D. Thom., in 2, d. 44, q. 2, art. 2, ad 1, et ibi D. Bonav., Rich., et alii, dicunt, sub illis

Christi verbis : *Ergo liberi sunt filii, non tantum clericos ordinatos, sed etiam omnes, qui Apostolicam vitam sequuntur, omnia propter Christum relinquentes, comprehendi.*

5. *Quæ personæ non ordinatae ecclesiasticæ censeantur.* — *Professio voto simplici emissa sufficit ad gaudendum hoc privilegio.* — *Novitii etiam religionum eadem fruuntur exemptione.* — Jam vero interrogandum occurrit quæ personæ non ordinatae sub hoc genere personarum ecclesiasticarum venire aut comprehendendi censeantur. In quo puncto imprimis certum est, omnes religiosos, et religiosas professas sub hoc membro comprehendendi, sive monachorum, sive regularium, sive religiosorum nomine significantur, et in hoc omnes Doctores convenient, quia est in jure manifestum. Unde recte dixit Panormit., in e. 2 de Fero compet., duo maxime eximere personam a potestate sæculari, ordinationem et professionem. Addendum vero nunc est professionem intelligendam esse, non solum illam quæ fit per vota solemnia, sed etiam illam quæ fit per vota simplicia ab Ecclesia approbata et recepta ad constituendum verum ac proprium religiosum statum ; nam, sicut tales personæ sunt veri religiosi, ita æque primo ac per se gaudent eadem ecclesiastica immunitate. Deinde vero extenditur idem privilegium per quamdam participationem et extensionem ad novitios religionum, quia, sicut in ordine clericorum, prima tonsura initiati, habitum clericalem ferentes, et Ecclesiæ servientes, inter personas Deo dicatas computari incipiunt, ita etiam novitus religionis, quatenus incipit esse in via ad statum religionis, ejusque insignia defert eique inservit, inter religiosas personas quoad gaudendum privilegio computatur.

6. *Alii status ecclesiastici, qui absque voto hanc exemptionem inducunt.* — Ultra hos vero sunt alii status vel modi vivendi ecclesiastici, qui licet per tria vota perfectionis non constuantur, sed per unum aut aliud, vel per aliquem traditionis, oblationis, aut congregacionis modum ab Ecclesia approbatum, sufficere censentur ad gaudendum hoc privilegio, vel ex speciali concessione, vel quia generalis consuetudo ita interpretata est decreta quæ personis ecclesiasticis hoc privilegium concedunt. Et sub hoc membro continentur illi, qui dicuntur *conversi laici* in aliquibus religiobus juxta c. *Non debitum*, de Sent. excom. Item aliqui eremitæ, et alii quos late enumerat Sylvest., verb. *Ecclesia*, 1, q. 5, per to-

tam, et Panormit., in dict. cap. de Foro competit.; et Archid., in c. *Duo sunt*, 12, q. 4.

7. *Gaudentes privilegio canonis, etiam hoc privilegio fruuntur.* — Ut autem generalem regulam constituamus, censeo illam veram, quam in principio argumentando tetigimus, nimirum, omnes personas, quæ gaudent privilegio canonis, gaudere etiam privilegio fori. Quæ regula intelligenda est per se, et ex vi juris communis, nam in poenam poterit quis uno privilegio privari, licet non privatetur alio, et ex jure speciali poterit aliquibus personis unum privilegium sine alio communicari ; per se tamen loquendo, omnes personæ, quæ ad unum privilegium sufficientem ecclesiasticum statum habere censemur, habent etiam ad aliud, quia si persona defenditur ab Ecclesia speciali privilegio canonis, ideo est quia supponitur esse sacra, et sufficienter Deo dicata, ac denique ecclesiastica ; ergo consequenter gaudent communi jure immunitatis quoad forum. Quin potius, licet privilegium fori magis que ex jure divino esse censeatur, nihilominus prius et intimius (ut sic dicam) convenit personis ecclesiasticis, eo ipso quod sacræ, et Deo dicatae sunt, quam privilegium canonis ; nam illud est quasi per se conjunctum cum tali statu, illique valde conveniens ; hoc vero solum quasi per accidens ad coeren- dam hominum audaciam aut malitiam, quia, ut dixi, solum consistit in speciali censura contra percussores clericorum lata. Et ideo etiam antiquius est privilegium fori quam canonis, ac subinde magis necessarium est ut omnes, qui gaudent privilegio canonis, gaudeant etiam privilegio fori, quam e converso. De facto tamen eisdem personis est utrumque privilegium concessum, et ideo, quæ de his personis dixi alibi¹, tractando de privilegio canonis, hic etiam sufficiunt.

8. *Religiosus professus habitum laicum deserens exemptionem retinet.* — *Qui ante professionem religionem deserit, pricilegium amittit.* — Inter has autem personas possumus quodam discriben notare per analogiam et proportionem ad personas clericorum, nam quædam sunt habentes statum ecclesiasticum omnino immutabilem, ut sunt religiosi solemniter profissi ; aliæ vero habent statum aut modum vitæ mutabilem, quia in aliquo casu possunt ad clericorum statum transire. Priores comparamus clericis in sacris, quia absolute, et ex vi professionis semper gaudent hoc pri-

¹ Tom. 5, disp. 22, sect. 1, n. 19 et seq.

vilegio absque alia conditione, vel limitatione, quamdiu illo non privatuntur. Unde, licet religiosus professus habitum deserat, et apostata tanquam laicus incedat, semper gaudet hoc privilegio, quia semper est persona sacra et religiosa, cui simpliciter concessum est. Quod si objicitur c. 1 de Apostatis, respondeamus imprimis ibi non esse sermonem de religiosis, sed de clericis, qui, *relichto clericali habitu, in apostasia tanquam laici conversantur*. Deinde ibi non videntur apostatae simpliciter privilegio privari; nam solum dicitur: *Si in criminibus comprehensi teneantur, per censuram ecclesiasticam non præcipimus liberari*, ubi Glossa advertit, solum juberi ut judices sacerdotes non cogantur per censuras jurisdictionem suam in apostatas non exercere, non tamen dari eis facultatem illam exercendi; haec enim duo diversa sunt, et in materia penali non est ab uno ad aliud facienda extensio. Unde Panormit. ibi, et in c. *Perpendimus*, de Sent. excom., satis probabiliiter dixit, in eo casu non privilegium fori, sed tantum canonis amitti, cui sententiae favent Paulus IV, constit. 29, contra Apostatas; et Pius IV, constit. 8, simili, quae in Bullario Romano videri possunt. Denique, licet ibi esset ipso jure facta privatio illius privilegii, illa esset quedam poena, quae non nisi post sufficientem monitionem et incorrigibilitatem incurretur, ut eadem Glossa notavit. Per se ergo et ex vi juris communis professi semper gaudent hoc privilegio. Aliæ vero personæ ecclesiasticæ infra hunc gradum constitutæ habent statum mutabilem aliquo modo, et ideo licet quamdiu in statu permanent, privilegio fruantur, statim ac statum deserunt, illud amittunt, non in poenam, sed quia fundamentum privilegii jam in eis non invenitur, ideoque hujusmodi personas cum clericis minoribus comparavimus. Sieque novitius statim ac habitum dimittit, privilegio non gaudet; imo et religiosus, qui simplicia tantum vota emiserat, si absolutus a votis dimittatur, privilegium simul amittit. Idemque a fortiori est in omnibus aliis.

9. *Ecclesiis vel clericis serientes an hoc privilegio gaudeant.* — Ultimo vero dubitari hoc loco potest, an sub his personis ecclesiasticis, quae hoc privilegio gaudent, comprehendantur omnes in quocumque munere Ecclesiæ servientes, etiamsi ordinati non sint. Idemque dubitari solet de familiaribus Episcoporum, imo et de iis qui cæteris clericis inserviunt. In quo puncto Glossa, in cap. 2 de

Foro compet., verb. *Minores*, per illud verbum intelligit Ecclesiæ servientes, quos dicit eodem privilegio gaudere. Videturque intellegere etiam si ordinati non sint, tum quia in textu, *minores illi, seu juniores* (ut legitur in c. 2, 11, quæst. 4) distinguuntur ab omnibus clericis, verba enim sunt: *Neque presbyterum, neque diaconum, aut clericum ullum, aut minorem Ecclesiæ*; tum etiam quia Glossa illa citat cap. *Ecclesiarum*, 12, q. 2, in quo sine dubio est sermo de communibus servis, non solum Ecclesiarum, sed etiam Episcoporum, et omnium clericorum.

10. *Resolutio negans.* — *Quid de familiaribus Episcoporum.* — Dicendum nihilominus est, nullos Ecclesiæ ministros, aut servos gaudere privilegio fori, quantum est ex vi juris communis. Ita docent Panormit., Felin. et alii, in dict. cap. 2, de Foro compet.; et Archidiac., in dict. c. *Ecclesiarum*, et in c. *Clericum*, 11, q. 4; et Jul. Clar., dict. § ult., q. 35, n. 18 et 19. Et sufficenter probatur, quia nullo jure cavetur. Item post Concilium Tridentinum, est evidens, quia iri clericis, etiam minoribus, servientibus Ecclesiæ, requirit habitum et tonsuram, ad hoc privilegium; ergo multo minus poterit laicus serviens Ecclesiæ tali privilegio frui, cum neque tonsuram deferre possit. Unde idem est longe certius de servis seu famulis clericorum. De familia autem Episcopi dicunt prædicti auctores, esse consuetudine receptum, ut a judicis sacerdotibus sint exempti, et omnes ad hoc allegant cap. ult. de Offic. Archidiac., quod certe mihi non probatur. Consuetudini ergo standum esse censeo, et ubi de usu contrarium non constiterit, a communi sententia non est recedendum; nam talis consuetudo valde rationabilis est in favorem Episcopalis jurisdictionis et auctoritatis. Et ob eamdem causam eadem consuetudo, et cum majori amplitudine circa familiares Cardinalium servatur, ut ex Julio Claro supra, numero vigesimo septimo, et ex aliis auctoribus, qui de Cardinalibus scripserunt, intelligi potest.

11. *Neque in contrarium obstat dictum c. 2, de Foro compet., in verb. Minores, seu Juniores.* Nam imprimis Hostiensis ibi per miiores intelligit monachos et conversos, quæ expositio non potest accommodari lectioni quæ habet Juniores. Sed quia illa non sine causa permitta est a Gregorio IX, intelligere possumus, vocem *minores*, ab ipso usurpatam esse, non ut significet minores aetate, sed minores gradu. Et ita sub illa voce comprehen-

dentur omnes personæ ecclesiasticæ nullum ordinem habentes, quia in ordine hierarchico sunt in inferiori gradu, juxta cap. *A subdiacono*, 93 dist., cum similibus. Secundo dicere possumus, per minores intelligi scholares (ut ait Glossa, et late exponit Panormitanus), vel juvenes destinati ministerio vel servitio Ecclesiæ, non tamen omniuno laici, sed habentes saltem primam tonsuram. Atque ita nomine clerici in illo textu solum intelligetur ille, qui aliquo vero ordine insignitus est, ut habeat locum illa disjunctio, *aut ullum clericum, aut minorem Ecclesiæ*. Neque hic usus illius vocis est novus, nam olim inter clericos, solum usque ad ostiarios numerabantur, ut patet in capite 1, decima septima dist., et in dict. cap. *A subdiacono*.

12. *Ad c. Ecclesiarum.* — Neque etiam obstat dictum cap. *Ecclesiarum servos*, quia ibi non agitur de quibuscumque famulis conductitiis, aut liberis servientibus, sed de servis perpetuis, ut ibi Glossa et alii exponunt, et Panorm. ac Felin., in dicto c. 2, de Foro compet. Dicuntur autem ibi a Concilio Toletano III, hujusmodi servi esse immunes ab oneribus et officiis, tam publicis quam privatis, laicorum, quia invitis dominis non possunt cogi. Quod quidem, quantum attinet ad privata obsequia laicorum, pertinet ad rationem justitiae; nullus enim privatus juste potest alienum servum ad sibi serviendum compellere. Altera vero pars, de publicis oneribus et officiis, ad exemptionem a tributis reducitur, juxta superius declarata. Nam mancipia Ecclesiarum, imo et clericorum a tributis exempta sunt in l. 1, Cod. de Episcop. et Clericis. Et ratio est, quia servi, seu mancipia inter bona domini computantur, et ideo sicut alia bona clericorum exempta sunt a tributis, vel sicut domus, equi, aut boves clericorum a publicis oneribus exempta sunt, ita etiam servi. Unde hæc exemptio non est per se et directe concessa personis servorum, sed redundat ex privilegio clericis concesso, quia onus impositionum servo redundaret in dominum, et ita esset contra immunitatem ejus.

CAPUT XXX.

AN PRIVILEGIUM IMMUNITATIS CLERICORUM AB ALIUO HOMINE REVOCARI POSSIT?

1. Hactenus explicuimus omnes causas et effectus hujus immunitatis ecclesiastice, de qua tractamus; nunc de proprietatibus ejus

consequenter dicendum videbatur. Si quis tamen diligenter consideret quæ inter explicandas causas et effectus hujus privilegii dicta sunt, fere omnes proprietates, quæ in illo spectari possunt, declaratas inveniet. Nam imprimis ex dictis colligitur, privilegium hoc esse divinum, id est, a Deo ipso concessum, quæ magna dignitas est talis privilegii, a qua consequenter habet ut et immutabile in universalis seu simpliciter sit, et ut etiam ex parte non sine magna et justa causa possit auferri, ut in capit. 28 attigimus, et paulo post amplius declarabimus. Deinde habemus ex dictis, privilegium hoc non esse juris privati, sed publici, non solum quia in publicam utilitatem universalis Ecclesiæ latum est, sed etiam quia utriusque juri canonico et civili insertum est, ideoque eminentiori modo habet prærogativas omnes, quas privilegia in corpore juris inserta habere solent, ut ex generali doctrina de privilegiis suppono. Tertio haberit potest ex dictis, privilegium hoc maxime favorable esse, quia imprimis favet religioni, cuius jus summo favore dignum est, ut sensit etiam jureconsultus, in l. *Sunt personæ*, ff. de Religios. et sumptib. funer. Ac deinde non in favorem unius loci, vel provinciæ, aut gentis, sed ob augmentum et decentiam divini cultus, et honorem totius ecclesiastici status institutum est. Unde etiam fit regulas omnes, quæ de ampliandis favoribus in jure latæ sunt, ad hoc privilegium applicandas esse. Quarto denique concludi potest ex dictis, privilegium hoc non personale tantum esse, sed reale, quia non intuitu alicujus personæ, sed dignitatis Pontificie et totius clericatus concessum est, ut dicitur in c. *Si diligenti*, de Foro competit, et ex dictis de finali causa et ratione hujus privilegii est manifestum. Unde tandem fit hoc privilegium non extingni cum persona, sed de se perpetuum esse, nam hæc proprietas privilegia realia comitari solet.

2. De his ergo proprietatibus, ultima excepta, nihil nobis dicendum superest, sed juxta generalia principia et doctrinas de privilegiis explicandæ et amplificandæ sunt. Solum circa perpetuitatem declarandum superest, quanta illa sit, et an omnem modum amissionis, ablationis, seu desitionis talis privilegii excludat. Perpetuum enim dicitur quod incorruptibile est, vel, si latius loquamur, quod saltem non corruptitur, nec fine in habet. Si ergo hoc privilegium perpetuum est, amitti non poterit, nec auferri. In contrarium vero est, quia multa sunt alia privilegia, quæ dicuntur

perpetua, et desinere possunt. Solet enim privilegium diei perpetuum, quoties vel adhaeret rei de se perpetuae, ut fundo, vel, si adhaeret personae, non cum vita illius extinguitur, sed ei perpetuo succedi potest, et nihilominus talia privilegia tolli vel amitti possunt, per superiorem potestatem, aut efficacem aliquam voluntatem, actionemve contrariam. Videntum itaque superest an major sit hujus privilegii perpetuitas, quod non potest commodius fieri, quam explicando an modus aliquis, quo solent privilegia desinere, in hoc privilegio immunitatis locum habeat.

3. Tres modi privilegium amittendi. — Privilegium hoc immunitatis per lapsum temporis, vel mortem concedentis amitti nequit. — Oportet ergo prae oculis habere modos quibus privilegia destruuntur, quos nunc ad tres reducimus, qui sunt revocatio privilegii, renunciatio ejusdem, usus ei contrarius, et per hos modos breviter discurremus. Nam duo alii modi corruptionis, qui in aliis privilegiis humanis accidere solent, scilicet, vel per lapsum temporis, vel per mortem concedentis, per se notum est in hoc privilegium cadere non posse. Alius vero modus, qui dici solet per abusum, quomodo circa hoc privilegium interdum contingat, in superioribus capitibus explicatum est, declarando quomodo privatio clericalis privilegii interdum sit poena. Et ad hoc etiam reducitur, quod per mutationem clericalis status, interdum etiam amittitur, vel minuitur modis supra declaratis; quamvis ille non tam proprie dicatur abusus, quam mutatio subjecti, per quam interdum solet accidens corrumphi. Et ita posset etiam illa privatio reduci ad cessationem causae intrinsecæ, a qua hoc privilegium pendet, qui est alius modus quo solent privilegia amitti, et illa tantum consideratione potest in hoc privilegio locum habere. His igitur prætermisssis,

4. Prima conclusio. — Dico primo: hoc privilegium ita est perpetuum, ut etiam irrevocabile sit. Assertio est communis et certa, quæ in hunc modum breviter ostenditur, quia privilegium hoc, maxime a Deo, vel a rege temporali, seu imperatore, vel a Pontifice Summo revocari posset; in nullo enim alio talis potestas cum aliquo apparenti fundamento cogitari potest. Probatur ergo assertio de singulis. Et iunprimis de Deo nulla est controversia, nam si velit, potest omnia mutare; si autem velle, repugnet promissione ejus, non volet, neque potest velle in sensu composito, ut aiunt, quia non potest esse infidelis, neque se ipsum ne-

gare. Ita ergo in praesenti privilegium hoc, quatenus ab ipso Deo concessum est, simpliciter irrevocabile ab ipso dici potest. Quia si datum est positivo jure divino legis gratiae, sicut ipsa lex gratiae data est simpliciter, et eum absoluta promissione perpetuitatis, utique quamdiu mundus duraverit, ita etiam hoc jus immunitatis ecclesiasticae ex absoluta voluntate Dei, et sine ulla subintellecta conditione perpetuo stabilitum est, quamdiu sacerdotium novæ legis cum mundo duraverit; ergo eodem modo est hoc privilegium perpetuum et irrevocabile. Nam in fine mundi non revocabitur, sed, cessante illius fundamento ac fine, seu necessitate, consequenter cessabit. Si vero privilegium hoc est a Deo solum ratione juris naturalis, sic magis ab intrinseco irrevocabile est, quamdiu fundamentum et materia illius juris eadem perduraverint, ut per se clarum est, et in libr. 2 de Legibus latius est declaratum.

5. An per reges possit hoc revocari. — Ratio dubitandi. — De secundo puncto, scilicet, de regibus temporalibus, major est difficultas. Primo, quia jus hoc sub ea ratione humanum et civile est, ac subinde mutabile. Secundo, quia unaquæque res per quas causas nascitur, per easdem dissolvitur; ergo quatenus hoc privilegium per voluntatem regis constitutum est, retractari potest, quia voluntas regis terreni mutabilis est. Hæc est enim ratio ob quam cætera privilegia humana revocari possunt. Tertio, quia sepe imperatores talia privilegia revocarunt, ut sumitur ex Gratiano, in c. *Omnis*, § *Hæc si quis*, 11, q. 1, et ex l. *Si quis curialis*, C. de Episc. et Cleri., et ex l. *Neminem*, et ex Authent. *Quas actiones*, C. de Sacros. eccles., et ex l. 19 de Episc. et Cleric., in Codice Theodosiano. Et in legibus particularium regnorum inveniuntur leges similes, quibus exemptio clericorum saltem ex parte revocatur. Quarto, quia reges, qui nunc vivunt, dicere possunt non concessisse tale privilegium, neque suos antecessores ipsorum juri præjudicare potuisse.

6. Probatur conclusio etiam quoad reges. — Nihilominus dicendum est privilegium hoc non posse per voluntatem temporalium principum revocari. Quæ assertio duobus modis potest intelligi. Primo, non posse revocari absolute et simpliciter, etiam quatenus per Dei vel Pontificum voluntatem constitutum est; alio modo intelligi potest, etiam quoad id in quo potuit a principibus temporalibus propria voluntate donari. In priori sensu assertio quoad

Deum per se nota est; quoad Pontifices autem sequitur evidenter ex principiis supra positis, neque alia probatione indiget. Nam Pontifex potest clericos eximere a sacerdotali potestate, etiam temporalibus principibus invitis, ut in superioribus ostensum est; ergo non possunt reges revocare privilegium fori seu exemptionis, ut a Pontificibus concessum, quia sicut tale privilegium non pendet a voluntatibus principum in fieri, ita neque in duratione seu conservatione sua. Et confirmatur, quia non potest inferior mutare jus a superiore statutum, vel auferre jus a superiore concessum; sed Pontifices constituerunt hoc jus immunitatis, quatenus sunt superiores regibus temporalibus, saltem indirecte, per spiritualem potestatem, ut in superioribus declaratum est; ergo non potest per principes temporales mutari. Neque contra hanc partem procedunt rationes dubitandi, neque in illa est controversia inter auctores catholicos, nisi forte apud illos, qui negant posse Pontificem propria potestate et sine consensu principum exemptionem concedere. Sed illa sententia et paucorum est, et certe improbabilis, et quod ad rem maxime spectat, illimet auctores, qui illam defendunt, nihilominus docent exemptionem semel introductam cum consensu regum non posse ab eisdem regibus revocari; in hoc vero loquuntur juxta posteriorem sensum assertionis a nobis propositum.

7. Procedit ergo assertio etiam in secundo sensu supra explicato, qui sensus per hanc conditionalem declaratur, nam licet hoc privilegium haberet suam primam originem a liberali donatione principum, non posset per illos revocari. Vel aliter exponi potest, si Pontifex intelligatur nunc habere triplicem modum jurisdictionis super clericos in criminalibus et civilibus. Unus modus est jurisdictionis temporalis directe date a Deo in tales personas. Alius est jurisdictionis indirectae ex vi potestatis spiritualis, et has sine dubio non habet a regibus, et ita neque auferri per eos possunt. Tertius modus est jurisdictionis directae in tali materia circa tales personas, quam habuerint Pontifices ex donatione imperatorum, quia, ut supra dicebamus, eximendo clericos a sua directa jurisdictione temporali, non reliquerunt eos ex leges, seu absque directo superiore in temporalibus, sed jurisdictionem suam directam in Pontifices transtulerunt. Dicimus ergo, etiam hoc posito, non posse principes amplius auferre jurisdictionem illam a Pontificibus, et sibi ite-

rum eam resumere, praesertim ipsis Pontificibus non consentientibus. Quae sententia sic exposita communis est. Innocentius, in cap. *Norit*, de *Judiciis*, et ibi *Panormit.*, n. 23; Felinus, c. 1 de *Constitution.*, n. 49, vers. *Alius casus*, et in capite primo de *Prob.*, et hi duo plures alios antiquos referunt. Idem Hostiens., in dicto c. *Novit*, n. 2, et in *Sum.*, tit. de *Immun.* ecclesiar., § *Sed nec illa*; et Alvarus Pelagius, lib. 1 de *Planct. eccles.*, c. 44; et Driedo, libro primo de *Libert. Christian.*, cap. 9; Covarruvias, *Pract.*, c. 31; Soto, in 4, d. 25, quæst. 2, art. 2, conclus. 6; Molin., 1 tom. de *Justit.*, disputation. 31. Et idem defendant Medina et Palacius, etiam si alias existimaverint exemptionem hanc non aliter quam ex donatione principum incœpisse.

8. Fundatur autem primo hæc veritas in quodam principio in materia de Privilegiis recepto, quod privilegium vel superiori vel æquali concessum non potest amplius a concedente revocari. Et ratio est, quia tale privilegium transit in pactum, ut juristæ aiunt; pacta autem servanda sunt, etiam cum subditis, nedum cum non subditis, et multo magis cum superioribus. Vel aliter magis rationem explicando, licet in idem redeat, quia talis concessio potius est donatio quædam quam privilegium, ut recte dixit Driedo; est enim, ut paulo antea explicavi, collatio quædam jurisdictionis propriæ, a se illam auferendo, et in alium transferendo; hæc autem quædam donatio est. Item quia inferior non potest dare privilegium superiori, quasi exercendo jurisdictionem in ipsum, cum illam non habeat; ergo solum potest id facere, paciscendo vel donando. Talis autem donatio completa et acceptata non potest a donante revocari, invito donatario, quia post donationem jam non est dominus rei qui eam donavit, sed cui donata est; nemo autem potest auferre rem alterius, invito domino. Et confirmatur ac declaratur, quia si princeps posset talem donationem revocare, aut esset per dominium, seu potestatem dominativam, aut per potestatem jurisdictionis, nullus enim aliis titulus justus cogitari potest. Non per dominium, nam hoc amissum est per donationem seu talis privilegii concessionem; precedens autem dominium, quod jam non est, nullam potestatem seu facultatem moralem relinquit. Supponimus enim privilegium esse simpliciter et absolute concessum absque aliqua conditione, nam si illam includeret, ob

eam non impletam posset interdum prior dominus donationem revocare, quia tunc non omnino priori dominio renunciavit; hic autem non ita est, sed exemptio pure et absolute facta est; ergo propter præcedens dominium revocari non potest. Neque etiam per potestatem jurisdictionis, quia nullam habet unus princeps in suum superiore, cum in æqualem sibi non subditum illam non habeat, ut ex terminis constat; ergo.

9. *Erasio.*— *Resellitur.*— Hoc autem principium, quod sine dubio evidens est, recte in præsenti puncto applicatur, quia hoc privilegium, ut manare intelligitur a principibus sacerdotalibus, datum est non subditis et superiori, nimis, clericis, ecclesiis, Pontifici. Dices, imo datum esse subditis, si supponamus ante concessionem banc clericos fuisse principibus laicis subditos in temporalibus. Respondeo, privilegium hoc partim intelligi concessum omnibus ecclesiasticis inferioribus Pontifice, partim ipsi summo Pontifici; illis, a sua jurisdictione eos eximendo, huius, supremam jurisdictionem temporalem directam circa tales personas in ipsum transferendo. Juxta priorem ergo considerationem, fateor privilegium concessum esse subditis. At per eamdem concessionem facti sunt non subditi, et consequenter privilegium factum est irrevocabile a concedente, quia jam inest non subditis, et ideo nec per potestatem jurisdictionis potest laicus illos accepto beneficio privare, quia nec dominium habet in homines liberos, nec jurisdictionem in non subditos, nec justum titulum illam iterum usurpandi. Juxta posteriorem autem considerationem privilegium hoc datum est non subdito, etiam antecedenter, quia Pontifex jure divino est exemptus, ac proinde non subditus imperatori; imo etiam superiori datum est, quia Pontifex superior est imperatore, etiam in temporalibus, saltem indirecte, et illi ut supremo Pastori data est etiam directa jurisdictione temporalis in clerum, ut commodius et liberius (ut ita dicam) illum in temporalibus regere et judicare possit. Et ita generale illud principium omnibus modis respectu Pontificis locum habet.

10. *Nullum privilegium, Ecclesiæ semel concessum, per sacerdotalem potestatem revocari potest.*— Addo denique non solum in hoc privilegio, sed etiam in omnibus aliis concessis Ecclesiæ non tantum ab imperatoribus vel regibus, sed etiam a quibuscumque principibus vel dominis, habere locum principium illud

sub terminis universalibus propositum, quod nullum privilegium, per quamcumque potestatem temporalem, etiam non supremam, concessum Ecclesiæ, et ab ipsa acceptatum, potest per civilem potestatem, etiam supremam, revocari. Ratio est fundata in alio jure divino, quo omnia bona ecclesiastica a jurisdictione omnique potestate secularium principum exempta sunt, ut supra ostensum est. Ex quo principio ita colligimus: privilegium Ecclesiæ concessum, eo ipso quod incipit esse in possessione et usu Ecclesiæ, inter bona ecclesiastica computatur, ut per se constat; sed princeps secularis, quantumvis supremus, nullam habet potestatem super ecclesiastica bona; ergo nec potest quidquam circa privilegia ecclesiastica disponere; ergo multo minus illa revocare aut auferre poterit.

11. Et declaratur per comparationem ad alia bona magis sensibilia et corporalia; nam si imperator fundum, castrum, aut civitatem Ecclesiæ donavit, non potest amplius illam auferre, sicut non potuit Constantinus donationem Urbis et aliorum bonorum, quam Ecclesiæ Romanae fecit, revocare, aut circa bona illa quidquam disponere, quia jam ecclesiastica facta sunt; ergo similiter non potuit jurisdictionem, quam semel in Ecclesiam transluit, revocare, aut iterum usurpare. Atque hoc exemplo utitur Hostiensis in hac materia, optimeque rem declarat; nam, licet jurisdictione, etiam temporalis, magis incorporeas quam prædium, verbi gratia, nihilominus inter bona humana et temporalia computatur, sicut etiam aliæ actiones vel jura, quæ a jurisperitis bona incorporalia nominantur; ergo postquam hæc transeunt in dominium Ecclesiæ, omnia fiunt ecclesiastica bona, ac proinde eamdem immunitatem jure divino induunt. Unde idem exemplum et argumentum sumi potest ex bonis a quocumque inferiori seu privato domino Ecclesiæ donatis; nam, postquam donatio habuit suum effectum, nec donator, nec rex temporalis potest illa contingere, nisi quantum jura canonica disponunt, vel si quid fuerit in donatione ipsa per aliquod justum pactum exceptum; ergo idem est de quocumque privilegio in temporalibus Ecclesiæ dato a potestate civili, nam cujuscumque gradus vel ordinis sit, revocari non potest per quamcumque potestatem civilem, licet superior, vel etiam suprema sit.

12. *Privilegium immunitatis ne limitari quidem per civilem potestatem posse.* — Am-

pliatur præterea quoad hanc partem regula posita, quia non solum non potest hoc privilegium fori per potestatem civilem integre revocari, verum etiam neque ex parte diminui, vel limitari aut restringi; imo nec restrictive declarari cum legis auctoritate potest virtute solius civilis potestatis. Hoc totum sequitur evidenter ex rationibus et discursibus factis, quia circa bona et jura ecclesiastica nulla est laicis tributa potestas; ergo similiter circa privilegium ecclesiasticum, vel jurisdictionem semel in Ecclesiam translatam nihil potest sæcularis potestas; ergo nec diminuere, nec restringere, nec legem aliquam, quæ in præjudicium illius cedat, ferre potest. Et similiter potest hic illud principium applicari, quod nullus, etiam si sit rex supremus, potest minuere, vel aliquid disponere de privilegiis vel juribus alterius regis, vel cujuscumque personæ non subditæ, a quocumque, vel quocumque justo titulo, illa habuerit ac possideat; ergo majori ratione non possunt principes temporales circa privilegium fori aliquid disponere, quod in illius præjudicium cedat. Talis autem est cujuscumque legis editio, privilegii concessio, jurisdictionis delegatio, seu commissio, aut executionis jussio, quibus ecclesiastica libertas minuatur aut restringatur, et ideo omnes hujusmodi actiones vel dispositiones non solum illicitæ, sed etiam irritæ sunt et inanes, quia sine legitima potestate fiunt. Et ideo ut tales declarantur in Authentica *Cassa*, C. de Sacrosanct. Eccles., et cap. *Noverit*, et c. *Gravem*, de Sentent. excommunicat., et aliis multis, sub titulis de Immunit. Ecclesiar., de Foro comp., et de Judicii.

13. Objectio. — Solutio. — Privilegia, per reges ecclesiasticis personis concessa, ante Prælatorum acceptationem effectum non habent. — Dices: posset rex temporalis in suo regno ecclesiastica libertatem augere, concedendo, verbi gratia, ut clerici non solum ut rei, sed etiam ut actores possint laicos ad tribunal ecclesiasticum vocare; vel etiam concedendo ut temporales causæ inter laicos possint ad tribunal ecclesiasticum deferri, si rei velint, ut Constantiū concessisse legimus in c. *Omnes*, 41, q. 4. Ergo poterit, etiam quando sibi expediens videbitur, immunitatem restringere, ut æquitas servetur. Respondetur primo negando consequentiam, nulla enim æquitas hoc postulat. Tum quia rex temporalis potest privilegium favorable Ecclesiis concedere, non tamē legem condere onerosam aut nocivam Ecclesiis, vel ecclesiasticis personis, quæ illas

obliget; tum etiam quia quilibet potest donationem a se factam augere, non vero minuere, quia prius liberalitatis est, et non tollit jus alterius, sed confert; posterius autem repugnat juri acquisito, et consequenter est contra justitiam. Atque ita in præsenti augere immunitatem ecclesiasticam de se opus est liberalitatis, et non repugnat justitiæ aut religioni, quia non est dispositio de juribus jam ecclesiasticis, sed de jure proprio, ut ecclesiasticum fiat, quod de se potius est opus religionis. At vero immunitatem restringere aut limitare liberalitatis non est, religionique derogat, et injustitiam involvit, quia est falcam mittere in alienam segetem. Deinde circa antecedens advertimus, licet possint principes temporales per nova privilegia clericorum exemptionem, aut jurisdictionem Episcoporum in temporalibus augere, nihilominus hæc privilegia non cogere Ecclesiae Prælatos ut illa observent, sed necessarium esse eorum liberum consensum, ut effectum habeant, quia in tali materia nec vim coactivam nec directivam habere possunt, ut supra est ostensum. Et præterea ut talia privilegia a clericis acceptari valeant, necesse est ut legibus canoniciis non sint contraria, quia contra illas nulla dispositio civilis valida esse potest.

14. Solvuntur rationes dubitandi contra hanc partem propositæ. — Prima. — Secunda. — Neque rationes dubitandi in principio hujus puneti positæ assertioni obstant. Ad primam enim dicimus, licet hoc privilegium, ut ab imperatore manavit, jus civile dici possit, tamen postquam per Ecclesiam est approbatum, esse, ut juristæ loquuntur, canonizatum, id est, jus canonicum effectum, materiamque ejus esse ad altiorem ordinem ecclesiasticarum rerum elevatam, et ideo sine consensu Pontificis revocari non posse. Quod de omni lege civili canonizata docuerunt Glosæ, Innocent., Dominicus, et alii apud Felinum, cap. 1 de Constit., n. 19; et Panormit., in cap. *Norit*, de Judic., n. 27. Ad secundam respondeatur, principium illud, rem, per quas causas nascitur, posse dissolvi, tantum habere locum in his quæ pendent in fieri et conservari a causa; in præsenti autem licet exemptio, prout nunc consideratur, in fieri pendeat a voluntate concedentis, postquam vero data est, jam non pendet, quia, ut dixi, ad altiorem ordinem rerum est evicta. Accedit quod effectus ille per potentiores voluntatem confirmatus est, et ideo per solam sæcularis principis voluntatem retractari non potest. Ideoque non est eadem

ratio de hoc privilegio, et aliis quæ subditis conferuntur.

15. Tertia. — Ad tertium imprimis dicimus, narrari facta, non tamen ostendi jure esse facta. Et ita Felinus, in cap. *Ecclesia*, de Constitut., respondet ad dictam legem, *Si quis curialis*, quod, licet de facto quoddam privilegium revocaverit, jure tamen non potuit. Idemque responderi potest ad alias leges, præsertim antiquas, quia imperatores in principio non satis perspectam habebant vim ecclesiasticae immunitatis. Deinde vero dicitur aliqua forte fuisse privilegia, quæ vel nunquam fuerunt a Pontificibus acceptata, sed ad summum permissa, ut fortasse fuit privilegium datum a Constantino, quod laici possent ad ecclesiasticos judices appellare. Et si quæ talia fuerunt, per contrariam voluntatem vel usum revocari potuerunt, quia nec proprie pertinebant ad immunitatem, neque inter jura seu bona ecclesiastica computabantur, et ita cessant in illis rationes factæ. At vero privilegia, a Pontifice acceptata et probata, sine consensu Pontificis revocari non potuerunt, et ideo leges contrariae vel effectum non habuerunt, vel non nisi Pontifice annuente tacite, vel expresse, illum consequi potuerunt. Quod videtur recognovisse rex Hispaniae Alphonsus, in l. 54, tit. 6, part. 1, dicens, licet clericorum clericatum in multis exempti sint, quædam vero esse in quibus Ecclesiæ placuit, ut non eximantur, hispane : *Tubo por bien la sancta Iglesia*, quasi dicere se non posse exemptionem tollere aut minuere, sed solum declarare quid in eo genere Ecclesia admiserit.

16. Quarta ratio solvitur. — Ad quartam respondetur, reges, qui nunc vivunt, comparari posse vel ad præcedentes quibus hæreditario jure succedunt, vel ad imperatores quorum regna ex parte aliqua occuparunt, et justo titulo cum supra potestate civili possident. De prioribus dico succedere unumquemque in regno, eo modo quo antecessores illud habuerunt; si ergo ab aliquo antecessore privilegium hoc valide concessum est, eo ipso fuit illa jurisdictione ab illo throno regio separata, ideoque successor non potest cum ampliori jurisdictione illud hæreditare, nec separationem prius factam revocare, quia nullam potestatem consequitur respectu non subditorum. Et fere eadem ratio est de regibus supremis, qui nunc sunt in terris, quæ olim erant imperii; nam etiam obtinuerunt illa regna in eo statu, in quo sub imperatore antea erant, et ita non potuerunt juri Ecclesiæ derogare.

17. Evasio. — Dissolvitur. — Quod si quis dicat exemptionem hanc, ut est ab imperatoribus, a temporibus Friderici II incœpisse, quo tempore jam multi erant supremi principes et reges christiani, qui constitutionem Friderici acceptare non tenebantur, respondetur imprimis (quidquid sit de antiquitate juris, et excellentia uniuscujusque regni, quod nunc examinare nobis necessarium non est), Fridericu non dedisse, sed innovasse, et ad pristinum ac debitum statum ecclesiasticam exemptionem reduxisse, prout ab antiquis imperatoribus concessa jam fuerat, ut in superioribus visum est. Deinde negari non potest quin omnia regna Romani orbis legem illam acceptaverint, et usu ac moribus observaverint, imo et in suis regnis propriis legibus confirmaverint, quod satis est ut hoc speciali titulo fuerit Ecclesiæ jus acquisitum. Cujus etiam sufficiens indicium est, quia, ut in aliquibus casibus possint contra exemptionem agere, privilegia ab Apostolica sede obtinuerunt, ut respondendo Barcelao, ejusque argumentum in ipsum retorquendo, Bellarminus notavit, ex Julio Claro, lib. 5, § ult., q. 36, n. 26, in fine; et Aufrerio, in Clementin. *Ut clericorum, de Offic. Judicis ordinarii, limitation.* 13. Et de republica Veneta similia privilegia refert Gigas, in tract. de Crimine læsæ Majestatis, sub Rubrica *Quis de illo cognoscet*, n. 20. Signum ergo est, hoc jus exemptionis in toto orbe Christiano receptum esse, et in eodem orbe esse quasi jus gentium, ideoque temporales reges non posse auctoritate sua illud revocare. De regibus vero supremis, qui fortasse de novo convertuntur ad fidem, jam supra dictum est posse ab Ecclesia cogi ad hanc exemptionem admittendam, et quasi eum illis contrahere, neque aliter illis ministros ecclesiasticos tribuere, nisi eos ab ipsorum temporali jurisdictione exemptos admittant. Quæ conditio, licet non expresse propinatur, in ipsa professione obedientiae ad Pontificem Romanum includitur, ideoque hoc etiam titulo non possunt hujusmodi reges hoc privilegium revocare aut infringere.

18. Etiam per Summum Pontificem non posse hoc privilegium simpliciter revocari. — Tercio dicendum de Summo Pontifice, an possit hoc privilegium revocare, in quo eadem fere rationes dubitandi possent proponi. Illis tamen non obstantibus, breviter dico, etiam Summum Pontificem non posse privilegium hoc simpliciter et absolute revocare. Ita dicunt communiter Canonistæ, in cap. *Ecclesia*,

de Constit., ubi præcipue Panormitan., De cius et Felin., et in cap. 2 de Majorit. et obediens.; Cardinalis, in Repetit., c. *Perpendimus*, de Sentent. excom., opposit. 7; Rebuff., in Concordat., tractat. ultim., ubi alios refert; et Jacobatins, lib. 4 de Concil., art. 6. Probatur autem hæc assertio, discurrendo breviter per tria jura, a quibus hæc exemptio originem ducere potuit. Et imprimis cum dixerimus esse immediate a jure divino naturali vel positivo, clarum est non posse per Pontificem revocari, et in hoc principio dicti auctores fundantur. Quo supposito, evidens est consequio, quia Pontifex non potest divinum jus abrogare; ergo nec potest revocare privilegium jure divino immediate collatum et institutum, quia per hoc jus quoddam divinum abrogaret. Et hac ratione diximus supra, non posse Pontificem se ipsum hoc privilegio privare, quia jure divino est suæ dignitati annexum, neque potest ab illa sine ejusdem dignitatis diminutione divelli; ergo eadem ratione non potest universale privilegium cleri revocare, quatenus a jure divino est.

49. Verumtamen etiam ex hypothesi quod hoc privilegium non esset immediate collatum a Christo cæteris clericis infra Summum Pontificem, vera esset assertio de eodem privilegio, ut est ab hominibus. Et primo de jure civili, quia res est facilior. Non potest enim Pontifex renunciare huic privilegio, eo modo quo ab imperatoribus et regibus conferri potuit, et de facto collatum est, nisi abdicando a Sede sua omnem directam jurisdictionem temporalem ipsi collatam a principibus sæculi, eamque illis renunciando; hoc autem non potest facere Pontifex; ergo vel ex hoc capite non potest Pontifex hoc privilegium revocare. Major satis in superioribus declarata est. Minor probatur, quia Pontifex non est dominus absolutus honorum et jurium suæ Sedis, etiam illorum quæ ab hominibus illi donata sunt, quia principaliter sunt data Christo, ipsi autem tantum ut Vicario ejus, et ideo non personæ, sed Sedi datae sunt; ergo solum est illorum dispensator fidelis et prudens; ergo non potest suo arbitrio illa donare, alienare, vel dissipare. Et ob hanc causam non posset nunc Urbem aut reliquum patrimonium Petri imperatori reddere, aut alteri libere donare. Eadem autem, vel major ratio est de prædicta jurisdictione, postquam semel in potestatem et dominium Ecclesiæ translata est; nam inter temporalia bona est res magna estimationis, et Ecclesiæ magis necessaria ad

ejus decorum et bonum regimen, quam temporale regnum, vel similia bona temporalia; ergo multo minus potest jurisdictionem illam et potestatem relinquere, et sedem suam illa privare.

20. *Ex parte clericorum suadetur assertio.—Evasio quædam rejicitur.*—Deinde ex parte clericorum non minus evidenter hoc ostenditur; nam per hoc privilegium etiam illis est jus acquisitum, per quod speciale libertatem a temporali jugo consecuti sunt, et illius libertatis facti sunt domini; ergo non potest Pontifex pro suo arbitrio eos privare hoc jure acquisito, seu libertate, cuius sunt domini; ergo nec potest revocare privilegium illud, ut ab imperatore datum, quia per talem revocationem dicto jure et libertate clerici privarentur, iterumque potestati sacerdotali subjicerentur. Dices, hoc argumento recte probari, non posse Pontificem sine causa privare clericos illo jure acquisito, ex causa tamen posse. Respondetur, tam necessariam esse exemptionem hanc statui clericali, ut nulla causa justa excogitari possit, propter quam totus ecclesiasticus status juste aut valide possit tanto beneficio privari. Itaque ut aliquis clericus in particulari interdum hac libertate privetur, poterit interdum ex parte illius sufficiens causa intervenire, ut ex supra dictis intelligi potest, quoniam clerici in peñam criminum, vel quia statum clericorum non servant, interdum hoc privilegio, vel omnino, vel ex parte privantur. Respectu vero totius Ecclesiæ et status clericalis, nulla ratio vel causa sufficere potest ad talem mutationem, seu revocationem juste faciendam, et ideo neque valide in tali materia fieri potest.

21. *Non potest Pontifex omnia jura immunitatem concedentia abrogare.*—*Objectio.*—Atque hinc tandem idem facile probatur de eodem privilegio, ut per jus canonicum est stabilitum, quia non posset nunc Pontifex totum jus canonicum concedens vel confirmans hoc privilegium abrogare. Quia non est illi data potestas in destructionem, sed in ædificationem; talis autem abrogatio nullum commodum posset Ecclesiæ afferre, sed potius perturbationem et alia documenta. Quia eo ipso vellet christiani principes potestatem in clericos usurpare. Nam etiam stante jure canonico vix possunt in officio contineri; quid ergo futurum esset si jus canonicum in hac parte abrogaretur? Dices, licet male faciat princeps seu Pontifex abrogando sine causa vel ratione legem a se vel a suis prædecessoribus constitutam, nihilominus si id faciat, factum tenere, quia

valor talis legis ex legislatoris voluntate absolute pendet; ergo similiter in praesenti illa abrogatio vel revocatio valida esset, quamvis injusta.

22. *Solutio.* — Respondeo imprimis talem revocationem non solum fore injustam ex illa generali ratione, quod est contra justitiam legalem, sed etiam alia speciali, scilicet, quia, non obstante dicta suppositione, adhuc esset contra jus divinum, saltem præcipiens ut talis exemptio sit in Ecclesia quoad commode fieri potest, et ex hac parte esset fortasse talis revocatio non solum injusta, sed etiam invalida, quia juri divino contraria. Secundo dicitur, quando lex semel posita contulit jus, et mutationem in ipsis rebus fecit, non posse sine causa boni communis ita abrogari, ut subditi priventur rebus vel juribus jam acquisitis; quia ergo status clericalis perpetuum jus immunitatis per hanc legem canonicae acquisivit, non potest per revocationem, sine causa et temere factam, valide illo jure privari. Denique dico, quidquid sit de hypothetica quæstione, an, si talis revocatio fieret, valida esset, non esse timendum quod talis revocatio aliquando fiat, quia cum non posset fieri sine magno dispendio et perturbatione universalis Ecclesiae, non permittet Spiritus Sanctus, cuius speciali providentia Ecclesia regitur, ut Pontifex in suæ potestatis usu tam graviter erret. Et ita considerando illam potestatem, non nt pure substati voluntati humanæ, sed præcipue ut a Spiritu Sancto regitur, dicimus non posse Pontificem talem revocationem facere, quia esset intolerabilis error moralis contra universale bonum Ecclesiae, ut alibi in præcepto decimarum declaravi¹.

CAPUT XXXI.

UTRUM PRIVILEGIUM CLERICORUM POSSIT PER RE-NUNCIACTIONEM AMITTI VEL DIMINUI?

1. *Per voluntariam renunciationem hoc privilegium amitti non potest.* — *Privilegium fori respectu privilegiatorum inducit præceptum.* — Resolutio est, hanc ecclesiasticam immunitatem, per renunciationem eorum quibus concessa est, propria voluntate et auctoritate factam, amitti non posse, quia a nullo potest valide et efficaciter renunciari. Hæc assertio, quatenus peculiari ratione ad Summum Pon-

tificem pertinere potest, in cap. 7 hujus libri tractata est. Quoad cæteros vero intelligi potest vel de singulis personis, vel de toto clero, seu statu clericali. De singulis ergo personis traditur expresse ab Innocentio III, in c. *Si diligenti*, de Foro compet., redditque rationem his verbis: *Cum non sit beneficium hoc personale, cui renunciari valeat, sed potius toti collegio ecclesiastico publice sit indulatum, cui privatorum pactio derogare non potest.* Unde concludit talem renunciationem etiam juramento firmatam validam non esse, nec tale juramentum obligare, quia est contra bonos mores. Talis enim renunciatio est injusta et sacrilega, quia est injuriosa statui clericali. Atque hoc jus ante Innocentium traditum erat, ut ipse notat, in Concilio Carthaginensi III, c. 9, cap. *Placuit*, 2, 11, q. 4, ubi peculiari poena puniuntur clerici huic privilegio renunciantes, tam in criminali quam in civili causa. Idemque de privilegio canonis statuitur in cap. *Contingit*, 1, de Sentent. excom. Ex quibus juribus colligitur notanda differentia inter hoc privilegium et alia, quæ in favorem privatorum conceduntur; nam hæc, quæ privata jura dicuntur, non habent vim legis et præcepti respectu eorum quibus conceduntur, sed potius sunt quasi permissiones, seu dispensationes, seu favores quibus uti possint, si velint. Hoc vero privilegium, quia continet publicum jus, habet vim præcepti, non solum respectu aliorum, sed etiam respectu privilegiatorum, quia non solum eis tribuit favorem, sed etiam præcipit ut illo utantur, seu prohibet ne illud renuncient; aliis autem jubet ne illud violent, etiam si clerici consentiant.

2. Unde quoad utramque partem, per hoc jus canonicum, non solum revocatum, sed etiam emendatum est jus civile Justiniani, in l. *Si quis in conscribendo*, C. de Episc. et cleric., in qua statuebatur, *si clericus promiserit non uti suo privilegio fori, non posse adversus sua pacta venire*; et in simili l. *Si quis*, Cod. de Pactis, ubi præcipitur judicibus laicis ut eam legem observari faciant. Et ratio in utroque loco redditur, *quia est regula juris antiqui, omnes licentiam habere, his quæ pro se introducta sunt renunciare.* Veruntamen lex illa semper nulla fuit, et in ea condenda graviter excessit imperator (fortasse per ignorantiam), tum quia disposuit in materia non sua, et circa personas sibi non subjectas; tum etiam quia nititur falso fundamento, quia vel non intellexit vim et naturam hujus privilegii, quod non propter privata commoda personalia, sed

¹ Tom. 1 de Relig., tract. 1, l. 1, cap. 14, n. 10.

propter commune bonum religionis principaliiter institutum est; vel si hoc intellexit, male applicavit iuris antiqui generalem regulam, nam illa intelligenda est de iis quae pro privato uniuscunusque commodo introducta sunt, ut recte Pontifex intellexit, ad quem, et non ad imperatorem pertinet, quale sit privilegium clericale, et quomodo a clericis observandum sit, declarare.

3. *An de licentia Episcopi possit quilibet clericus huic privilegio renunciare.* — *Ratio dubitandi.* — Sed quæri non immerito potest an de licentia Episcopi possit quilibet clericus huic privilegio renunciare. Et ratio dubitandi est, quia multa jura antiqua prohibentia ne clerici in judicio sistant sæculari, addunt hanc limitationem, *sine licentia, vel sine permisso Episcopi*, ut patet in epist. 2 Marcellini Papæ, et ex Concilio Agathens., c. 32; Aurel. III, can. 31, et habetur in c. *Clericum*, 1, 2 et 3, 11, quæst. 4; Venetico, sub Leone I, c. 9; Epaunensi, can. 41. Denique idem sumitur ex c. 2 de Foro compet., ubi dicitur: *Nullus judicum, etc., sine permisso Pontificis, clericum per se distingere aut condemnare præsumat;* ergo haec omnia jura significant, de licentia Episcopi posse et clericum renunciare juri suo, et laicum illum judicare.

4. *Vera resolutio.* — *Ratio hujus resolutionis.* — Nihilominus dicendum est, quoad propriam fori renunciationem, non posse Episcopum tallem licentiam concedere. Ita docet Glossa, in c. *Qualiter et quando*, de Judiciis, verb. *Prohibemus*. Item Glossa, in cap. *Significasti*, de Foro compet., verb. *Clerici*, in fine; et colligitur ex illo textu ibi: *Clerici in judicem non suum (nisi forte sit persona ecclesiastica, et Episcopi diæcesani voluntas accedat) consentire non possunt.* Duas ergo conditiones requirit ibi Gregorius IX ad talem consensum, vel renunciationem; ergo si desit prima conditio, et judex sit laicus, non sufficit Episcopi licentia. Et ita etiam sentiunt Panormitan. et alii expositores his locis; Glossa item et Doctores, in cap. 2 de Foro compet. Ratio vero est, primo, quia non solum inferior clericus, sed etiam quilibet particularis Episcopus est privata persona respectu totius ecclesiastici status, et ideo non potest ipsem Episcopus respectu suæ personæ renunciare juri suo, et judicio sæculari se committere; ergo nec potest dare suis clericis licentiam ut id faciant; nam est eadem ratio; per utrumque enim fit contra privilegium in favorem totius status concessum.

5. *Secunda ratio.* — *Tertia.* — Secundo id

amplius declaratur, quia hoc jus, ut dixi, non tantum est privilegium concedens, sed etiam est prohibens seu præcipiens, et est jus superioris generale et gravissimum; ergo non potest inferior, qualis est quilibet privatus Episcopus, in eo dispensare. Tertio, in privilegio canonis non potest Episcopus licentiam concedere clericu ut permittat se ab alio verberari, nec potest facere quin laicus verberans etiam de licentia sua excommunicationem incurrat, ut recte dixit Glossa, in d. c. *Significasti*, et colligitur ex cap. *Universitatis*, de Sent. excom.; ergo nec potest clericu dare licentiam ut renunciet privilegio fori, nec iudicii sæculari permettere ut tali renunciatione utatur. Dixi autem hoc intelligi quoad propriam fori renunciationem, ut adverterem, in tributorum solutione posse admitti aliquem modum exceptionis. Quanquam si attente res consideretur, proprie non est exceptio, tum quia secundum novum jus cap. *Adversus*, de Immunit. eccl., etiam in tributorum solutione non sufficit licentia Episcopi, sed consulendus est Papa; tum etiam quia, licet in casu instantis necessitatis videatur admittenda exceptio per epiikeiam, nihilominus attento modo et ratione contributionis, non est propria exceptio, quia illa contributio non fit nec permittitur tanquam debita in ratione tributi, id est, in signum subjectionis, vel ex vi legis civilis, sed quia ex charitate, vel ex legali justitia, vel alio modo ex vi rationis, ipsimet Prælati Ecclesiae judicant expedire ut a clericis fiat, ut supra declaratum est. Unde non est renuntiatio, sed veluti naturalis juris prudens interpretatio.

6. *Solvuntur jura in contrarium objecta.* — *Glossæ responsio.* — *Alia Glossa.* — *Vera responsio.* — Ad jura vero antiqua in contrarium allegata vario modo respondent Glossæ. Quædam enim, in dicto c. *Significasti*, dicit, in illis textibus supplendam esse particulam *maxime*, ita ut sensus sit, semper esse illicitum clericu renunciare huic privilegio, maxime vero, id est, majori culpa, sine licentia Episcopi, quia peculiarem illi facit injuriam. Sed, ut juristæ aiunt, misera est interpretatio, quæ fit addendo legi verba in illa non contenta. Præsertim quia aliquando illi canones ita loquuntur, ut non nisi violenter, et destruendo sensum particula illa addi posse videatur; ut in Concilio Epaunensi, verba sunt: *Clerici sine ordinatione Episcopi sui adire publicum judicium non præsumant*, etc.; certe ex vi horum verborum, qui ex ordinatione

Episcopi id faceret, legem illam non violaret; et evidentiora sunt verba Concilii Venetici: *Clerici nisi ex permisso Episcopi, etc.*; ibi enim particula *maxime* accommodari non potest. Alia igitur glossa in dicto cap. 2, de Foro compet., respondet uno verbo: *Hic vacat argumentum a contrario sensu*, id est, illi canonones specialiter prohibent ne talis renunciatio fiat sine licentia Episcopi, non tamen propterea concedunt ut cum illa fieri possit; nam hoc est argumentum a contrario sensu, quod argumentum non est efficax, quando aliis juribus repugnat. Estque probabilis responsio, sed dura satis, et quasi violenta, si verba tot canonum simpliciter expendantur. Et similes sunt aliae solutiones, quas multiplicat Panorm., in dicto cap., n. 42. Mihi ergo verior et simplicior videtur responsio Glossae, in d. cap. *Clericus*, 1, dicentis: *Hodie nec cum consensu Episcopi potest, quibus verbis significat, olim secundum jus antiquum id lieuisse, nunc vero non licere. Et idem sensit Glossa, in dicto cap. Qualiter et quando, de Judiciis, dicens hoc non licere, licet jura antiqua contrarium innuere videantur.*

7. *Ad cap. 2 de Foro comp. — Episcopus jurisdictionem in clericum laico nullis ordinibus insignito committere nequit.* — Ad cap. autem 2 de Foro comp., quod magis modernum est, non videtur illa responsio accommodari posse, et ideo considero, canonem illum non loqui ad clericos, prohibendo ut non renuncient foro, sed loqui ad judices saeculares, prohibendo sub censura ipso facto, *ne clericos per se distingere aut condemnare præsumant*. Et respectu illorum recte additur particula, *sine permisso Episcopi*, quia interdum possunt de licentia Episcopi distingere clericos, quia verbum *distingere* in rigore non significat judicare, aut jurisdictionem exercere, sed coactionem aliquam aut poenam exequi, capiendo, incarcerando, et torquendo; haec autem et similia possunt interdum facere judices saeculares jussu Episcopi, juxta cap. *Ut famæ*, de Sentent. excommun., quia, ut ibi dicitur, tunc saecularis judex non sua auctoritate, sed Episcopi illa exequitur, et quia saepe Prelati indigent potentia et auctoritate talium ministrorum. Addi etiam potest alia ratio, quia si Episcopus jurisdictionis actum saeculari judici in clericum committat, videtur ei suam jurisdictionem delegare, et judex saecularis potest præsumere, Episcopum posse talem delegationem facere. Haec vero posterior ratio tolerari

posset, si judex saecularis alias esset clericus, saltem in minoribus, et committeretur illi causa, jure canonico et ecclesiastico more clericis accommodato tractanda; alias non potest habere locum, quia Episcopus non potest jurisdictionem in clericum puro laico committere, neque etiam laicorum more, et per leges civiles clericum judicari permittere, juxta c. 2 de Judiciis. Ideoque solum respectu Summi Pontificis posset hic intellectus illius textus quoad hanc partem habere locum. Neque est contemnenda expositio, quæ textum illum ad Summum Pontificem restringit; non enim dicit sine permisso Episcopi, sed sine permisso Pontificis, quæ vox solet, per antonomasiam, pro Summo Pontifice sumi, præsertim quando per litteram majusculam P scribitur, ut ibi habetur in collect. 4 Antonii August., cap. 3 illius tituli.

8. *De licentia Pontificis potest clericus huic privilegio renunciare.* — Unde manifestum est posse quemlibet clericum de licentia Pontificis Summi huic privilegio renunciare, prout in illo textu tradunt Panormitan. ibi, numer. 42, inducens textum illum in eodem sensu, et Glossam in dicto cap. *Clericum*, 2, quæst. 3, verb. *Sæcularem*. Indeque argumentum sumit, quia Papa potest delegare laico causam spiritualem, juxta cap. *Illud*, 10, quæst. 3, et de purgatione Episcopi in causa criminali idem sumitur ex cap. *Mennam*, 2, quæst. 5. Et ratio est, quia Summus Pontifex habet potestatem dispensandi in quolibet jure canonico etiam præcipiente, et determinare, vel ex parte mutare privilegium jure divino concessum, quod respectu Pontificis non includit præceptum, ut nunquam mutetur. Item quia Pontifex potest suam jurisdictionem committere laico, præsertim in causis temporalibus, etiam si ad personas clericorum pertineant. Hoc tamen rarissime facit Pontifex, quia per se nou decet statum clericalem. Unde etiam constat, necessariam esse causam et satis gravem, ut Papa facultatem hanc recte et legitimate concedat; nam ad omnem dispensationem communis juris, ut licet fiat, necessaria est causa; ergo multo magis in hoc jure, quod gravissimum est, et statum ipsum clericalem universe respicit, et ad jus divinum pertinet, vel illi est conjunctissimum.

9. Advertendum autem est, duabus modis posse facultatem hanc a Pontifice concedi. Primo, per se ac directe ipsi clero intuitu suæ personæ, et in favorem ejus, et tunc datur proprie facultas ad renunciandum privilegio,

ideoque non datur potestas judicii sacerdotali ad cogendum clericum, sed licentia ad judicandum causam ejus, si ipse illi se submittere voluerit. Et hac ex parte minor fit derogatio privilegii, ac subinde minor etiam causa sufficiet ex hoc capite, ut facultas haec licite concedatur; ex alia vero parte difficilius honestari potest, praesertim in causis criminalibus, quia solum potest ad privatum et personale commodum ordinari, et ideo vix potest sufficientem habere causam, ideoque raro, ut opinor, talis facultas conceditur. Alio modo fit haec concessio directe judicii, seu principi sacerdotali, dando illi potestatem et jurisdictionem, ejus intuitu, et in favorem ejus. Et tunc magis quidem derogatur privilegio, quia tunc non solum volentem, sed etiam invitum clericum potest judex sacerdotalis cogere et judicare, ideoque gravior requiritur causa. Ideoque frequentius fit vel in singularibus occasionibus occurrentibus, vel in aliquibus privilegiis circa aliqua graviora crimina, ut lese majestatis, quia tales concessiones ad commune bonum, et pacem reipublicae ordinantur, vel ad defensionem et congruentem favorem aliorum principum, quae quidem cause frequentius occurunt. Hic autem posterior modus concessionis non pertinet ad renunciationem privilegii, cum in illo voluntas privilegiati non concurrat, sed pertinet ad ablationem privilegii in aliquo casu, vel causa, quae, ut superiori capite dixi, fieri potest a Pontifice in poenam vel odium alicujus culpae, et secundum potentiam ordinariam aliter non fit, quia vix potest alia causa necessaria vel sufficiens occurrere.

10. *Ratio dubitandi.* — Tandem queri potest circa hanc assertionem, an communitas aliqua ecclesiastica, vel saltem totus ecclesiasticus status possit huic privilegio renunciare. Et ratio dubitandi esse potest, quia tunc cessat ratio textus in dicto cap. *Si diligenti*, et procedit regula generalis, quod unusquisque potest renunciare juri sibi concessio. Haec enim regula generaliter, et sine limitatione procedit in quacumque persona vera, vel ficta, eui per se primo, et quasi adaequate privilegium concessum est, ut ex materia de legibus suppono. Hoc autem privilegium concessum est statui clericali, ut dicatur in dicto c. *Si diligenti*; ergo totum corpus cleri per modum unius personae poterit huic privilegio renunciare. Haec autem ratio imprimis non procedit de quacumque privata communitate ecclesiastica, sive sit unius Ecclesiae, sive unius dioecesis, sive unius metropolis, sive

unius provinciae aut regni, quia nulla istarum communitatum est subjectum adaequatum (ut sic dicam) istius privilegii, sed ad totum corpus cleri tanquam pars, ac proinde tanquam particularis persona in suo ordine comparatur. De quacumque igitur hujusmodi communitate certum est, non posse huic privilegio renunciare, quia in ea procedit ratio cap. *Si diligenti*, et consequenter etiam decisio.

11. De toto vero corpore status clericalis procedit difficultas posita, quae ad quaestionem hanc reducenda videtur, an Concilium generale possit huic privilegio renunciare, quia non videtur posse morali modo cogitari alia via, qua possit universus Ecclesiae clerus ad consentiendum in hujusmodi renunciatione congregari aut convenire. De Concilio ergo generali dico breviter duo. Unum est, Concilium generale sine Pontifice, id est, sine illius facultate et approbatione non posse privilegio renunciare. Hoc certum est multis de causis. Primo, quia Concilium generale nihil potest facere sine approbatione Pontificis, cuius auctoritate congregari debet et continuari. Quod si contingat, Sede Apostolica vacante, congregari Concilium (quod fieri non debet, nisi quando ratione schismatis non possit electio veri ac certi Pontificis alter fieri), tale Concilium non potest aliquid de statu universalis Ecclesiae immutare, et ideo multo minus posset huic privilegio renunciare, ideoque talis renunciatione non solum a futuro Pontifice facile revocari posset, sed etiam a principio esset invalida tanquam sine potestate facta.

12. Secundo, quia talis renunciatione est contraria juri Pontificis duplice modo. Nam et est contra jus canonicum latum vel approbatum a Pontificibus, cui nullum Concilium sine Papa potest derogare. Et praeterea est contra jurisdictionem Papae; privaretur enim per talam renunciationem illa singulari et supra directa jurisdictione, quam super totum clerorum etiam in causis temporalibus habet. Tertia et optima consideratio, quae rationem dubitandi solvit, est, quia hoc privilegium est concessum statui clericali ab ipso Christo, non absolute ratione talis communitatis, sed quantum est specialis familia Christi filii Dei naturalis, ut supra visum est. Estque omnino verum, sive haec exceptio dicatur esse immediate de jure divino, sive mediante jure canonico; nam utrumque jus, imo etiam jus civile hoc praecepit in toto collegio ecclesiastico consideravit, ut privilegium hoc ei concederet, atque ita magis in Christi Dei honorem, quam

in ipsorum hominum commodum hoc jus introductum est. Propterea enim dixit imperator, in l. *Sancimus*, Cod. de Sacrosanct. Eccles.: *Cur non facimus discrimen inter res divinas et humanas? et quare non competens prærogativa cœlesti favori conservetur?* Et in l. *Generaliter*, Cod. de Episcop. et Cleric.: *Propter hoc eis beneficium indulgemus, ut, omnibus aliis derelictis, Dei omnipotentis ministeriis inhærent.* Quia ergo totum Collegium ecclesiasticum, seu Concilium generale non potest juribus ipsiusmet Christi derogare, neque illa, quæ in Dei cultum et honorem inducta sunt, tollere, ideo non potest huic privilegio renunciare. Sicut etiam inter homines non posset familia principis, Cardinalis aut Episcopi renunciare, sine consensu ejus, privilegio, in peculiarem honorem vel decentiam domini ipsi familiae concessa.

13. *Concilium generale etiam cum Pontifice huic privilegio renunciare minime potest.* — Atque hinc ulterius addimus, etiam Concilium cum Pontifice, id est, cum ejus consensu et approbatione, non posse huic privilegio renunciare. Hoc mihi satis probat ratio proxime facta, quia privilegium familie Christi, qualis est, a nemine potest sine consensu ipsiusmet Christi renunciari. Neque satisfaciet qui dixerit, consentiente Papa, consentire Christum per Vicarium suum, quia non est verisimile potestatem Papæ extendi ad hujusmodi consensum loco Christi præstandum, quia non est data ei potestas in destructionem, sed in ædificationem; talis autem renunciatio prorsus in destructionem esset. Unde confirmatur: nam supra dicebamus non posse Papam revocare hoc privilegium, quia non potest habere justam causam vel rationem, et quia esset contra præceptum divinum, saltem in generali, et ideo semper esset in destructionem; ergo neque cum Concilio potest facere validam talam renunciationem, neque interpretari, Christum in eam consentire; nam eadem est ratio, et quoad effectum eodem revolvitur, et quia consensus ipsius cleri parum in hoc operari potest, cum ad Christi honorem et Dei cultum præcipue intendatur. Ac denique quia quod potest in Ecclesia facere Papa cum Concilio generali, potest etiam facere se solo, quia non est minoris potestatis; ergo si non potest solus e medio tollere hoc privilegium per modum abrogationis, neque etiam cum Concilio potest illud tollere per modum renunciationis. Hoc autem de integra seu totali renunciatione intelligendum est; nam in aliqua particulari

causa vel materia, consentiente Pontifice, fieri posset, quia potest ad hoc interdum sufficiens ratio et causa intervenire. Ideo namque etiam diximus posse hoc privilegium restringi, aut in particulari minui per solius Pontificis potestatem; facilius ergo fieri poterit per modum renunciationis, quando pars ipsa, quæ laedi videtur, juri suo cedit; imo propter hoc verisimile est tunc minorem causam posse sufficere.

CAPUT XXXII.

UTRUM PRIVILEGIUM CLERICORUM CONSUETUDINE AMITTI VEL MINUI POSSIT.

1. *Probatur primo assertio de non usu.* — Respondeo exemptionem clericorum nulla consuetudine amitti vel diminui posse. Ut difficultatem hujus assertionis attingamus, distingnenda est propria consuetudo privilegio contraria, a non usu privilegii; utrumque enim solet sub consuetudine late sumpta comprehendendi. In praesenti autem certum est, hoc privilegium non amitti vel diminui per purum non usum, qui contrarium usum non includat. Probatur, quia privilegium non amittitur per non usum, nisi in vi tacite renunciationis, vel ratione prescriptionis alterius contra privilegatum; sed neuter modus hic habet locum. De priori probatur ex dictis, quia in hoc privilegio non habet locum expressa renunciatio; ergo multo minus tacita; ergo non usus nihil operari potest contra hoc privilegium in vi tacite renunciationis. Altera pars probatur, quia si non usus sit mere negativus, sine aliquo usu contrario juri alterius partis, cui privilegium videtur præjudicium afferre, non potest induci præscriptio, ut in tractatu de Legibus probavi¹ quia est contra rationem, et definitionem præscriptionis; ergo neque hoc modo potest in praesenti sufficere non usus sine contrario usu. Eo vel maxime quod statim generaliter ostendemus, nullam præscriptionem humanam contra hoc privilegium prævalere posse.

2. *Assertio ergo etiam de propria consuetudine huic privilegio contraria intelligenda est.* Et ita est communiter recepta per Canonistas, in cap. *Clerici*, de Judiciis, ubi Abbas, n. 5; Decius, n. 14; Ripa, in c. *Decernimus*, de Judic., n. 15; Probus, in c. 2, de Probat., ubi assertionem ad immemorialem consuetu-

¹ Lib. 8, c. 34.

dinem extendit. Tradit etiam Rota, tit. de Consuet. in Antiquit., decis. 3 et 10, alias 123 et 840. Idem Barth., in l. *De quibus*, ff. de Legibus, n. 5; Rochus Curtius, in c. ult. de Consuet.; et Gregorius Lopez, in l. 2, tit. 2, part. 4, n. 6; Navarr., in c. *Cum contingat*, de Rescip., Remed. 1; et Stephanus Aufreri., in tract. de Potest. civ. supra eccles., reg. 1 et 2. Addit vero ibi plures limitationes seu exceptiones, quas omitto, quia nullam propriam exceptionem censeo esse admittendam, ut ex discurso hujus capituli et ultimi constabit.

3. Probatur secundo de propria consuetudine. — Probatur autem assertio ex dicto cap. *Clerici*, de *Judicis*, ubi dicitur, cum canones generaliter tradant, *ut de omni criminis clericus debeat coram ecclesiastico judice conveniri, non debet in hac parte canonibus ex aliqua consuetudine praejudicium generari*. Ubi, licet videatur sermo esse tantum de privilegio fori in criminalibus, nihilominus ab omnibus de tota immunitate ecclesiastica intelligitur, tum quia ratio textus in quacumque materia hujus exemptionis aequo procedit, ut Panormitanus et Decius notarunt; tum etiam quia alii canones absolute de libertate ecclesiastica loquuntur, ut c. *Cum terra*, de *Elect.*, ubi damnatur quædam consuetudo, *quia in gravamen et perniciem ecclesiasticæ libertatis redundabat*. Idemque sumi potest ex cap. *Ad nostram*, et c. *Cum inter*, de *Consuetud.*; et notat *Glossa ultim.*, in dicto c. *Clerici*. Denique aperte probatur assertio ex *Authent. Cassa*, Cod. de *Sacros. Eccles.*, ubi omnis consuetudo contra libertatem ecclesiasticam cassa et irrita denunciatur, quæ *Authentica sumpta est ex constitutione Friderici, quam tanquam in æternum valitaram Honorius III confirmavit*. Unde idem Honorius, in cap. *Noverit*, de *Sent. excom.*, excommunicat omnes qui consuetudines introductas contra ecclesiasticam libertatem servari fecerint.

4. Prima ratio. — Ratio autem hujus assertionis imprimis reddi potest ex illo fundamento, quod hæc exemptio est de jure divino, contra quod non potest consuetudo humana prævalere. Quia vel illud divinum jus est naturale, et sic consuetudo illi contraria est inqua, utpote rationi contraria, et ideo non potest jus inducere vel auferre, juxta c. ult. de *Consuetud.* Si autem jus illud est divinum positivum, non possunt voluntates humanæ, vel actiones earum, quantocumque tempore vel numero multiplicentur, contra Christi voluntatem prævalere, aut quod ipsa statuit minue-

re. Sed, licet hæc ratio vera sit, non est illi soli insistendum, tum ut ex variis capitibus magis fiat certa et indubitate probatio; tum etiam quia citati canones aliam rationem indicant, quæ in dicto cap. *Ad nostram*, his verbis explicatur: *Attendentes, quod consuetudo, quæ canonicas obviat institutis, nullius debeat esse momenti*, etc. Eademque insinuatur in dicto c. *Clerici*, cum in ejus principio præmittitur, *in canonibus generaliter tradi*, etc.

5. Secunda ratio. — *An consuetudo contra ius canonicum prævalere valeat.* — *Ratio dubii.* — *Confirmatio.* — Est ergo secunda ratio principalis, quia talis consuetudo est juri canonico valde contraria, et ideo non potest contra illud prævalere, quia inferior non potest jus superioris abrogare. Statim vero insurgit difficultas, quia consuetudo potens est ad derogandum juri humano, ut est constans in materia de legibus; sed canones tantum constituent jus humanum; ergo non satis est consuetudinem hanc esse contra canones, ut non possit contra canones prævalere, et jus per illos inductum auferre. Nam si in aliis materiis jure canonico prohibitis id potest facere consuetudo, cur non in ista? Et confirmatur, quia consuetudo sufficit ad obtinendam jurisdictionem, et consequenter etiam ad amittendam vel ad inducendam etiam subjectionem, quia hæc inter se cohaerent; ergo hoc modo poterit etiam in præsenti hæc consuetudo tollere vel minuere exemptionem clericorum.

6. Præmittuntur duo modi quibus potest aliqua lex consuetudine abrogari. — Ad expli-candam ergo vim hujus rationis, oportet ex materia de legibus supponere, duos esse modos, quibus legi humanæ vel privilegio potest per contrariam consuetudinem derogari, scilicet, vel per modum abrogationis, seu retractionis legis, vel per modum præscriptionis contra legem, vel contra jus per illam concessum. Inter quos modos variae constitui solent differentiae; duæ vero sunt quæ præsenti instituto deserviunt. Una est, quod derogatio per modum revocationis legis inchoari potest, et paulatim fieri per actus malos, et mala fide contra legem factos; præscriptio autem requirit bonam fidem, ut est notum, præsertim secundum jus canonicum. Altera differentia est, quod derogatio legis, quando priori modo per consuetudinem fit, innititur voluntati legislatoris, quam, vel tacite, vel expresse consentiendo consuetudini, mutat, et suam legem revocat; quando vero derogatio fit per modum præscriptionis, non fundatur

in peculiari voluntate legislatoris, neque expressa, neque tacita, sed in aliquo alio jure positivo, quo talis præscriptio concessa est, ut late in lib. 7 de Legibus declaratum est.

7. *Dubii enodatio.* — Prius ergo probatur assertio de priori genere derogationis, variis modis. Primo, ex hac secunda differentia, seu conditione requisita, ut consuetudo deroget legi. Nam in praesenti materia necessarius est consensus Pontificis; sed ipsemet Pontifex non potest voluntate sua huic privilegio derogare sine alia causa, ut supra ostensum est; ergo multo minus id poterit facere consuetudo, accipiendo vim et efficaciam a voluntate Pontificis, quia talis voluntas nec præsumi potest, nec si daretur, sufficeret. At haec ratio habet quidem vim quoad abrogationem totius privilegii, etiamsi non fiat pro tota Ecclesia, sed in aliqua provincia aut dioecesi, in qua talis consuetudo cogitetur, quia revera etiam similis abrogatio totius immunitatis in aliquo loco Ecclesiæ esset valde injuriosa toti statui clericali, et scandalosa Ecclesiæ, et non posset esse in ædificationem, sed in destructionem, et ideo verisimillimum est etiam hoc modo non posse a Pontifice fieri, certiusque credimus non permissurum Deum ut id faciat Pontifex.

8. Addimus vero, licet singatur casus in quo, ad vitanda majora mala, hoc possit Pontifex in aliqua provincia permittere, nihilominus nunquam posse per solam consuetudinem id fieri, quia talis consuetudo de se valde irrationalis est, et multum derogans juri divino, et nunquam potest præsumi, tacitam voluntatem Pontificis illi assistere, quia in re tam ardua, et quæ vix, aut ne vix quidem potest honestari, non potest præsumi consensus Pontificis, nisi præcedente causæ cognitione, magna deliberatione, et ideo necessarius semper erit expressus consensus, et tunc ratione illius fiet abrogatio pro tali loco, non ratione consuetudinis. Verumtamen non ita urget haec ratio in derogatione immunitatis partiali, seu in aliqua parte materiæ, ut in aliquo actu jurisdictionis, vel in aliquo tributo, etc., quia haec derogatio fieri potest interdum per Pontificis privilegium, quod est privata lex; quidquid autem fieri potest per legem humanam, introduci consuetudine potest, et ubi voluntas expressa potest esse honesta et efficax, etiam tacita esse poterit.

9. *Etiam quoad partem per consuetudinem hæc immunitas abrogari nequit.* — Nihilominus tamen assertio posita etiam de propria derogatione in particulari materia procedit; nam

in hoc sensu sine dubio loquuntur jura et Doctores, et ideo in hoc aliæ rationes reddendæ sunt. Una est, quia jus canonicum propter rei gravitatem, et majorem immunitatis incolumentem, non solum prohibet quemlibet actum illi contrarium, sed etiam abrogat omnem consuetudinem libertati ecclesiasticae contraria, ut constat ex citatis decretis, et ex multis aliis sub titulis de immunitate Ecclesiarum. Quoties autem lex non solum prohibet actum, sed etiam abrogat consuetudinem, non potest per consuetudinem derogari, quia lex ipsa prævenit (ut sic dicam), et vires abstulit consuetudini ad derogandum se; alias inutilis esset illa clausula, quod dicendum non est, cum sæpiissime addatur in legibus, tam civilibus quam canonicis, non solum de præterita consuetudine, sed etiam de futura. Propter quam rationem videtur esse illud principium communiter receptum in materia de legibus.

10. *Objectio.* — Sed fieri potest communis replica, quia illamet lex abrogans futuram consuetudinem contraria, est humana; ergo potest per posteriorem consuetudinem abrogari, sicut potest per aliam posteriorem legem scriptam tolli; nam voluntas principis mutabilis est, et ideo sicut per expressam, ita et per tacitam posteriorem voluntatem mutari potest. Neque propterea erit illa clausula supervacanea, quia saltem operabitur, ut consuetudo non possit prævalere contra talem legem, sine certa scientia et patientia principis, nihilominus tamen valere poterit illa interveniente, quia illa scientia et patientia principis mutationem voluntatis ejus indicat. Ergo in praesenti etiam materia poterit consuetudo prævalere contra canones, non obstante illa clausula.

11. *Responsio.* — Respondemus imprimis, admissa illa generali doctrina, objectionem tantum procedere de possibili; de facto vero non recte applicari, quia certissimum est nunquam intervenire in hac materia tacitum consensum Apostolicae Sedis, cuius auctoritate talis consuetudo jure communi prohibita est. Assumptum probatur, quia semper Apostolica Sedes per sententias, vel per expressa edicta his consuetudinibus contra libertatem ecclesiasticam resistit, et specialiter in Bulla Cœnæ singulis annis eas revocat, vel potius irritas declarat; ergo nunquam potest præsumi tacitus consensus Pontificis. Nam, licet fortasse interdum non ignoret multa per consuetudinem fieri in aliquibus locis contra libertatem ecclesiasticam, quæ non punit, sed quo-

dammodo tolerat, non ideo est quia consen-tiat, sed quia sine periculo majoris mali non potest efficacius resistere, et ideo non con-sen-tit, sed permittit.

42. Accedit præterea alia ratio, quia jus canonicum non solum prohibet consuetudines contra exemptionem ecclesiasticam, sed etiam reprobatur illas, quod majus est. Nam potest lex prohibere consuetudinem, non quia per se irrationalis sit, sed quia propter alias rationes expedit illam non permettere, et tunc dici potest consuetudo irrationalis quia prohibita, non autem prohibita quia irrationalis; aliquando vero lex prohibet consuetudinem, quia supponit illam esse irrationalis, quod censetur facere, quoties prohibendo consuetudinem, declarat esse irrationalis, addendo, *esse corruptelam*, vel *contra nervum disciplinæ*, aut *esse abusum*, vel quid simile, ut constat ex toto titulo de consuetudine. Hoc ergo posteriori modo prohibet jns canonicum consuetudines contra libertatem ecclesiasticam, ut omnes sumunt ex c. 4 de Consuet., ubi Gregorius ait: *Consuetudines, quæ Ecclesiis gravamen inducere dignoscuntur, nostra nos decet consideratione remittere*, id est, non permittere, seu dissolvere aut irritare, utique tanquam irrationalibus, hoc enim indicat verbum *decet*, quia illas tolerare esset indecens. Et c. *Ad nostram*, eodem tit., dicitur talis consuetudo *minus rationabilis*, et *canonicis obvianis institutis*, et proinde nullam habere firmitatem. Item leges omnes contrarie immunitati ecclesiastice tanquam irrationalibus reprobantur, ut constat ex pluribus decretis de immunitate Ecclesiar.; eadem autem ratio est de consuetudine; nam æquiparatur legi. At vero juxta doctrinam receptam consuetudo reprobata per legem nunquam potest contra legem prævalere¹. Quia ut consuetudo legi de-roget, rationalis esse debet, juxta cap. ult. de Consuet.; omnis autem consuetudo, quam lex præsertim canonica ut irrationalis reprobatur, vere irrationalis habenda est, quia juris declaratio authentica est; ergo.

43. Sed in hac ratione, quæ in hac mate-ria ex præcipuis est, occurrit difficultas, quia, licet respectu consuetudinis totam exemptionem abrogantis efficacissima sit, quia talis consuetudo statim per se fert absurditatem et

¹ Vide Bart., in l. *De qui*, ff. de Leg., n. 4; Antonium, in c. *Cum ex officiis*, de Præscr., n. 3; Rochum, in c. ult., de Consuet., num. 521, qui alios refert.

indecentiam, propter quam diximus, etiam per legem scriptam tales abrogationem fieri non posse, nihilominus non videtur universe procedere de omni consuetudine particulari in una materia vel causa, hæc enim non semper irrationalis est. Quod probatur, quia per legem scriptam sæpe fieri potest juste et prudenter talis derogatio; ergo signum est derogationem ipsam non esse irrationalis; ergo nec consuetudo illam introducens erit irrationalis, quia, ex ipsa materia et singulis actibus, habet consuetudo quod rationalis vel irrationalis sit. Unde tali consuetudini non poterit obesse jus positivum declarans seu reprobans consuetudinem contrariam libertati ecclesiastice ut irrationalis, quia illud jus non facit consuetudinem esse irrationalis, sed supponit tales esse, et ideo illam reprobatur, ut diximus; ergo non cadit nisi in eam consuetudinem, quæ revera omni ratione destituitur. Unde fieri potest ut aliqua consuetudo, quæ in uno tempore irrationalis est, in alio, mutatis rebus, ratione sufficienti honestari possit. Et similiter consuetudo aliqua, quæ respectu Ecclesiæ regulariter irrationalis est, in aliqua provincia potest habere pecuniariam et sufficientem rationem; ergo pro tali tempore vel pro tali loco non censabitur talis consuetudo reprobata per legem, absolute et generatim loquentem; ergo idem contingere potest in hac materia exemptionis. Atque ita sentire videntur multi auctores approbantes et defendantes aliquas consuetudines contrarias immunitati, præsertim Covar., in Practic., quæst. 31; et Julius Clar., lib. 5, § ult., q. 36, n. 3; Joannes Garsia, de Nobilit., gloss. 9, n. 44 et sequentibus, et multi alii, qui in hanc partem potissimum inclinant, ut particulares quasdam consuetudines diversorum regnorum trahantur.

44. *Auctoris sententia*. — Nihilominus dicendum censeo, omnem consuetudinem, sive generalem, sive particularem, contrariam libertati ecclesiastice, esse irrationalis et in iure reprobata, ac subinde non posse privilegio immunitatis aliqua ex parte derogare. Hæc est sententia communiter recepta a Theologis et jurisprudentiis in locis allegatis, et aperte colligitur ex decretis citatis². Non enim loquuntur de consuetudine abrogante totam immunitatem clericorum, vel in tota materia ejus, vel in omnibus criminibus, vel omni-

² Refert late Azor, tom. 1, l. 5, c. 12, q. 12, q. 1, § *Sed dubitari posset*.

bus causis civilibus, vel alia simili magna parte exemptionis, quia nunquam tales consuetudines fnerunt in regnis catholicis a multis annis introductæ, vel etiam intentatæ, neque hoc auctores canonum ignorabant. Loquuntur ergo de particularibus, ut attente legenti tex-tus ipsos constabit. Et specialiter notari potest lectio integra dicti cap. *Clerici*, sic enim habet : *Clerici maxime in criminalibus causis in nullo casu possunt ab aliquo, quam ab ecclesiastico judice condemnari, etiam si consuetudo regia habeat, ut fures a judicibus secularibus judicentur*¹. Ubi constat particularem consuetudinem non potuisse universalis privilegio ex parte derogare ; eadem autem est ratio de aliis similibus, quia etiam in illa particuliari consuetudine posset ratio aliqua honestatis considerari. Et hoc maxime confirmant variae prohibitions, quæ in Bulla Cœnæ quotannis flunt omnium fere actuum, per quos hujusmodi particulares consuetudines introduci possunt, et renovantur jura tales actus et consuetudines reprobantia. Rationem autem hujus veritatis et dictorum jurium , respondendo ad difficultatem positam, reddimus.

15. *Satisfit rationi pro opposita sententia factæ.* — Ad objectionem ergo imprimis responderi posset, juxta aliquorum opinionem, consuetudinem semel per legem reprobata non posse amplius prævalere, aut rationabilem reputari propter quamcumque materiae mutationem vel novam circumstantiam successu temporis, aut in diverso loco exortam. Sententia tamen hæc generatim sumpta rigorosa est, et non necessaria. Nihilominus vero in præsenti materia est valde probabilis, tum quia vix potest mutatio esse tanta, ut sit conveniens Ecclesiæ fieri talem exemptionis diminutionem vel derogationem; tum etiam quia licet fortasse in aliquo loco expediat, non inde statim sequitur ibi esse consuetudinem rationabilem ; nam cum hoc privilegium toti collegio clericorum concessum sit, fieri potest ut illi non expediat, et ut pars secundum rectam rationem propter bonum totius aliquid incommodi sustinere teneatur. Tum præterea quia hæc materia odiosa est laicis, et ideo est morale periculum ne hujusmodi mutationes, vel novæ rationes ad honestandum talem consuetudinem, sine sufficienti causa excogitentur

vel exaggerentur. Imo, ut experientia docet, in omnibus consuetudinibus quas juristæ defendere conantur, revera non inveniuntur novæ rationes, præter eas quæ vel sunt intrinsecæ tali materiæ, vel facile potuerunt a Pontificibus considerari, quibus non obstantibus, propter graviores rationes ad bonum religionis, ad vitanda majora incommoda clericatus, pertinentes, tales consuetudines irrationalib[us] judicorunt ; ergo nunquam potest aliqua talis consuetudo in particulari rationalibilis censeri.

16. Potestque hoc amplius declarari, distinguendo inter derogationem aliquam, seu diminutionem exemptionis, et modum introducendi illam per consuetudinem. Fieri enim potest ut aliqua diminutio exemptionis expedit, et nihilominus modus introducendi illam per solam consuetudinem non expedit, propter moralia pericula quæ modo dicebamus. Sicut interdum expedit, clericos contribuere ad aliquos sumptus communes civium, et nihilominus propter excessus vitandos, statuerunt Pontifices ne ipsis inconsultis id fieret, unde si aliter fiat, non rationabiliter fit, etiam si contributio ipsa rationabilis esse videatur. Sic ergo, licet diminutio exemptionis in aliquo casu vel loco sit rationabilis, consuetudo nihilominus erit irrationalis, quia modus ille introducendi derogationem privilegii est periculis expositus, et (ut ita dicam) temerarius, meritoque ut talis reprobatus. Unde facile solvitur quædam objectio supra facta ex æquiparatione legis seu privilegii et consuetudinis ; fieri enim potest ut superior in aliqua materia possit communi juri per privilegium seu speciale legem derogare, et quod per consuetudinem solam fieri convenienter non possit, quia nimis ut derogatio convenienter fiat, major consideratio et deliberatio necessaria est, quam in sola consuetudine esse soleat. Et propterea in Bulla Cœnæ postulatur in hac materia expressus et specialis consensus Pontificis, quia regulariter datur cum majori causæ cognitione, aut deliberatione, quam tacitus.

17. Ultima ratio pro hac parte addi potest, quia omnis consuetudo, quæ contra immunitatem introduci solet, est consuetudo laicorum, utique principum, vel judicum exercantium actus jurisdictionis in clericos. At consuetudo laicorum, licet possit juri civili derogare, non tamen juri canonico, neque etiam potest clericis aliquod detrimentum inferre ; ergo neque potest huic privilegio derogare. Minor certa est, quia non plus potest consuetudo quam

¹ In Collect. Decretal., l. 2, tit. 1, c. 8; et corporte juris canonici jussu Gregorii XIII edito.

lex, cæteris paribus; sed lex civilis non potest derogare juri canonico, nec potest clericis gravamen imponere, vel præjudicium afferre; ergo nec consuetudo laicorum hæc potest. Probatur consequentia, quia consuetudo laicorum est mere civilis, et in sola auctoritate civili et temporali nititur. Unde est communis doctrina juris peritorum, consuetudinem laicorum non posse clericos obligare, ut videre licet in Innocentio, in Rubric. de Consuetudin., num. 6; et Panormitano, cap. *Quod clericis*, de Foro competent., n. 2; Felin., in cap. *Ecclesia Sanctæ Mariæ*, de Constit., n. 100; Hostiens., in Sum., tit. de Consuetudin., § *Et de virtute*, vers. *Sed pone*, et aliis, quos refert Azor, tom. 1, lib. 5, cap. 18, quest. 12. Qui varia jura allegant, quæ magis loquuntur de lege, vel statuto civili, sed per æquiparationem inducuntur, ut c. 1, distinct. 10, et dictum cap. *Ecclesia*, de Constit.

- 18. Addunt præterea, hoc maxime procedere, quando talis consuetudo laicorum derogat Ecclesiæ libertati. Quod etiam notavit Bartholus, in l. 1, Cod. de Summa Trinit., et l. 2, Cod. de Leg., et l. *De quibus*, ff. de Leg., et per argumentum ab speciali probari potest ex c. ult., de Vita et honest. Cleric., ubi in speciali casu, in quo clerici abutuntur privilegio exemptionis, et negotiationibus sacerdotalibus ad lucrandum implicantur, permittit Pontifex, *ut de suis facultatibus, statutis, et consuetudinibus patriæ subjaceant, cum facto (inquit) privilegium abjiciant clericale*; ergo extra hujusmodi casum non potest consuetudo clericos gravare. Imo adverto, etiam in illo casu, necessariam fuisse Pontificiam declarationem et prohibitionem. Considero etiam, quoad hunc effectum, consuetudinem et legem, sive statutum civile, ibi æquiparari.

19. *Objectio.* — *Prima responsio.* — *Rejicitur.* — Dices, interdum fieri posse ut consuetudo non tantum laicorum sit, sed etiam clericorum, ut si non coacte, sed voluntarie laicorum consuetudinem observent, eorum adeundo iudicia, vel tributa solvendo, vel in aliis similibus cooperando; tunc enim consuetudo erit mixta, seu communis laicis et clericis, quæ etiam in ecclesiasticos vim habet. Ad hoc Covarruv., in d. cap. 31, concedit, in eo casu consuetudinem, quantum est ex hoc capite, posse derogare ecclesiastice libertati, si aliqui rationabilis sit. Sed imprimis existimo, talem consuetudinem vix posse moraliter inviri, quia, licet unus vel alius clericus interdum voluntarie consentiat hujusmodi violen-

tiis laicorum, rarissime contingit, et nunquam dici potest per modum consuetudinis fieri. Addo vero, etiam si talis consuetudo fingatur, sententiam Covarruviae falsam esse in hac parte. Primo, quia consensus clericorum nihil potest ibi operari; nam est quædam privata renunciatio privilegii, quæ, ut diximus, nulla est et nullius efficaciam, ideoque ad introducendam consuetudinem valere non potest, ut recte notavit Felinus supra, cum Paulo de Castro, cons. 59. Secundo, quia tali consensui clericorum nunquam assistit voluntas expressa vel tacita Pontificis, sine qua non potest voluntas clericorum, quantocumque tempore operetur, juri Pontificio derogare; ergo neque illa consuetudo mixta potest habere hunc effectum. Antecedens quoad utramque partem in superioribus declaratum et probatum est. Consequentia vero est evidens, quia id, quod additur ex parte clericorum illi consuetudini mixtae, nullum valorem vel efficaciam eidem addere potest. Quocirca, cum dicuntur consuetudo mixta posse operari in rebus vel personis ecclesiasticis, intelligendum est de consuetudine, quæ non præjudicat sacris canonibus, vel, si præjudicat, in illam Pontifex consentit, saltem tacite; in præsenti autem materia necessarius esset expressus consensus, ut supra dixi. Tum quia ipsi Pontifices ita voluerunt et declararunt; tum etiam quia in hac materia non potest præsumi tacitus consensus, quia et est valde odiosa Pontificibus, et quia vix posset talis consensus tacitus sine majori cognitione causæ prudenter et licite dari; quoties autem consensus non esset prudens et honestus in principe, non præsumitur.

20. *Contra immunitatem consuetudine præscribi non posse ostenditur.* — *Prima ratio.* — *Secunda.* — Quia vero hic consensus necessarius non est in abrogatione legis, quæ fit per modum præscriptionis, ideo probandum superest aliud membrum, quod supra posuimus, nimurum, etiam per viam præscriptionis non posse consuetudinem immunitati ecclesiastice præjudicium afferre. Probatur autem primo, quia nulla consuetudine præscribitur, nisi intercedat bona fides, ut nunc suppono; hic autem non potest bona fides intercedere; ergo neque potest præscribi. Probatur minor, quia talis consuetudo irrationalis est, et jure canonico reprobata, quod adeo notum est, ut non possint principes, vel judices sacerdtales prætextu ignorantie probabilis excusari; ergo semper actus talis consuetudinis sunt illiciti, ac proinde mala fide facti; ergo non pos-

sunt præscriptionem inducere. Secundo, quia non potest exemptio aliqua ex parte diminui, nisi acquiratur judici laico jurisdicitione aliqua in clericum, quam antea non habebat; quia, sicut exemptio est liberatio a jurisdicitione, et consequenter est diminutio jurisdicitionis in alio, ita e converso non potest exemptio diminui ex parte clerici, quin ex parte magistratus sæcularis jurisdicitione augeatur. Sed laici non possunt sola præscriptione jurisdicitionem supra clericos acquirere; ergo nec clerici possunt propter præscriptionem laicorum aliquid de suo privilegio amittere. Minor probatur primo, ex communi sententia juristarum, dicentium laicos non posse præscribere spiritualia, vel quæ spiritualia concernunt, quatenus illis annexa sunt, ut non potest laicus præscribere jus conferendi beneficium, et similia, quæ notant Panormitanus, in cap. *Norit*, de Judiciis, num. 22; et ibi Decius, num. 12; et Joan. Andr., in cap. 2, de Præbend., in 6. Et alii, in cap. 2 de Poenitent. et remiss., in 6. Qui textus solet ad hoc induci, quatenus dicit, facultatem eligendi confessorem non posse præscriptione acquiri; nam videtur esse eadem ratio de cæteris rebus spiritualibus, et in præsenti de jurisdicitione supra clericum, quæ licet in se temporalis videatur, quatenus cadit in clericum, spiritualia concernit.

21. Ratio autem reddi potest, vel eadem quæ tacta est, quia actus præcedentes ad tam præscriptionem nunquam possunt bona fide fieri, vel quia præscriptio requirit personam capacem illius rei, quam debet præscribere, laicus autem non est capax administrationis rerum vel personarum spiritualium, et ideo non potest jus in illas præscriptione acquirere. Quam rationem attingit Panormitanus supra. Intelligi autem debet de capacitate non absolute, sed secundum ordinarium jus; nam laicus non est omnino et absolute incapax alicujus ecclesiastice administrationis vel potestatis in clericum. Jure autem communi, et potestate ordinaria, laicus censetur incapax, quia ex se nullam habet proportionem, et omnia jura illum excludunt, ideoque sola præscriptio non sufficit sine expressa voluntate et concessione Summi Pontificis. Et in his casibus recte dicunt juristæ, multa posse privilegio concedi, quæ consuetudine præscribi non possunt, argumento ap. *Quanto*, de consuetudine.

22. *Tertia ratio.* — Unde etiam potest addi tertia ratio, quia omnis præscriptio requirit juris adminiculum, per quod aliquo

modo princeps concedat, vel dominium rei præscribendæ, vel jurisdictionem, si illa est præscribenda, quia mutatio illa, seu acquisitione quæ fit in præscriptione, non potest fieri sine auctoritate et voluntate alicujus superioris. In præsenti autem nullum est jus quod tali præscriptioni adminiculum prebeat; nam jus civile nihil in hoc potest, jus autem canonicum omnino resistit, et voluntas Pontificis omnibus modis ei opponitur; ergo non habet locum præscriptio in præsenti materia. Ex dictis ergo satis constat, nullam consuetudinem, etiam si immemorialis sit, ullo modo contra immunitatem ecclesiasticam prævalere posse. Ita enim auctores citati conclusionem interpretantur, et rationes et jura adducta in eodem sensu illam confirmant, et difficultates, quæ contra illam occurrere possunt, probando assertionem expeditæ sunt. Solum objici solent quædam peculiares consuetudines aliquorum regnorum, quæ, licet sint contra immunitatem ecclesiasticam, sine scrupulo a magistratibus laicis observantur. Ad illas vero possemus uno verbo respondere, illas consuetudines non ad jus, sed ad facta hominum pertinere, propter quæ veritatem negare non possumus, neque illorum rationem aut excusationem dare tenemur, sed ad illos hoc spectat, qui consuetudines illas observant; fortasse tamen in capite ultimo pauca de illis adjicemus.

CAPUT XXXIII.

QUIBUS MODIS POSSIT IMMUNITAS ECCLESIASTICA VIOLARI.

1. Hactenus illa omnia, quæ ad explicandam et tuendam immunitatem ecclesiasticam, clericorumque exemptionem opportuna visa sunt, pro viribus explicare conati sumus; nunc duo tantum tractanda supersunt. Unum est, quod proposuimus, quibus modis immunitas hæc violari soleat; aliud, quibus modis excusari hoc crimen soleat. Circa primum, supponimus hujusmodi violationem ex se malam, et ex genere grave peccatum esse, quia vel est immediate contra jus divinum, vel saltem contra jus canonicum, sub gravissimis censuris et poenis hanc violationem prohibens. Et illo jure positio, est etiam contra justitiam, quia et est usurpatio jurisdicitionis non habitæ, et est coactio aliqua, vel exactio sub titulo potestatis legitimæ, sine vera jurisdicitione ac potestate facta. Denique includit etiam culpam sacrilegii, quia injuria illa circa

personas vel materiam sacram versatur, et quia prohibitio illa intuitu religionis et divini cultus facta est. De hac ergo culpa quoad speciem et gravitatem ejus nihil superest dicendum; nam, suppositis quae de jure hujus immunitatis hactenus dicta sunt, gravitas et species culpe clara est, si de violatione immunitatis constet. Quia vero haec violatio variis modis fieri potest, et in aliquibus obscura esse potest transgressio, seu violationis ratio, ideo de hac varietate, quae in modis violandi libertatem esse potest, pauca dicemus. Et quia interdum actio, quae contra libertatem ecclesiasticam esse videtur, excusationem aliquam, veram vel praetensam habere solet, ideo de his excusationibus nonnulla in sequenti capite expendemus. Videbatur autem consequens ut pœnas et censuras, quae per hanc transgressionem incurruuntur, explicaremus; quia vero in libro de Censuris sufficienter de illis diximus, ab earum tractatione in præsenti abstinemus.

2. Proponuntur duo modi immunitatem violandi. — Primo ergo possumus duos modos distinguere, quibus immunitas clericorum violari solet, scilicet, vel legibus, vel actionibus: hos enim duos modos multa jura indicant, et penitus diversis puniunt. Prior est, quando principes vel magistratus civiles leges vel statuta condunt contraria ecclesiasticae libertati. Quod duobus etiam modis contingere potest. Primo, quia lex specialiter dirigitur ad personas vel res ecclesiasticas, vel, licet lex generalior sit, ad eas peculiariter extenditur. Talis enim lex eo ipso repugnat libertati ecclesiasticae, etiam si id, quod disponit, non sit contra Ecclesiæ commoda; ino etiam si aliqui esset rationabilis dispositio talis legis, et Ecclesiæ conveniens, si debita potestate lata fuisset. Ita sumitur ex cap. 2, de Judiciis, et cap. *Ecclesia Sanctæ Mariæ*, et c. *Quæ in Ecclesiarum, de Const., et cap. Bene quidem, cum aliis, 96 dist.*, et est communis resolutio, ut supra tactum est, et latius in materia de legibus. Et ratio est, quia princeps laicus ferens talem legem, per ipsam se exhibet superiorum et legislatorem in rebus ecclesiasticis; ergo eo ipso per talem actum contra exemptionem agit. Et quia haec contrarietas non tam in objecto legis quam in ipso actu præcipendi consistit, ideo vocari potest hic modus formaliter contrariis libertati ecclesiasticae. Et ob eamdem causam non habet locum hic modus læsionis, quando laicus privilegium concedit clericis, quia tale privilegium non includit

præceptum respectu privilegiati, neque per se est actus jurisdictionis, ut supra diximus.

3. Aliæ vero sunt leges, quæ dici possunt contrarie libertati ecclesiasticae objective, quia præcipiunt aliquid fieri, quod est contra statum ecclesiasticum, vel ejus exemptionem, sive præceptum dirigatur ad laicos respectu clericorum, ut, verbi gratia, præcipiendo illis ut a clericis exigant tributa, aut quid simile; sive dirigatur ad ipsos clericos, præcipiendo eis ut solvant vectigal, vel coram judice laico compareant, et tunc lex dici potest habere utramque repugnantiam, et formalem, et objectivem. Et hujusmodi leges, quæ objective sunt contra libertatem ecclesiasticam, præcipue in jure prohibentur et puniuntur, præsertim in cap. *Noverit*, de Sentent. excom., et in Authentica *Cassa et irrita*, Cod. de Sacrosanct. Eccles., quamvis illa et similia jura non immerito possint ad omnes leges quomodo cumque contrarias libertati extendi, quia verba eorum generalia sunt.

4. Quando percussio clerici sit contraria privilegio fori. — Cirea aliud vero membrum de violatione immunitatis per facta hominum, solum occurrit adnotandum, sub illo nunc non comprehendi percussionses, seu violentas manus in clericum; nam, licet actiones illæ sint contra immunitatem generatim sumptam, non sunt contra privilegium fori, de quo nunc tractamus, sed contra privilegium canonicis. Quod tamen intelligendum est de illis actionibus, quatenus in sola violentia et privata injuria consistunt; nam si fiant sub titulo jurisdictionis et potestatis publicæ, erunt contra privilegium fori, et habebunt utramque malitiæ; ut si judex sacerularis, aut ministri ejus, per vim clericum detineant, et vinculis, aut careeri tradant. Idemque judicium est (servata proportione) de actionibus contra immunitatem Ecclesiarum, quatenus sunt loca refugii, seu quatenus sunt loca sacra, quæ per injuriam vel indecentes actiones violari non debent; nam si tales actiones fiant, non jurisdictionis titulo, sed per privatam injuriam, seu malitiam, quamvis lato modo sint contra immunitatem, nihilominus sunt sacrilegia alterius rationis, ut in principio hujus materiae diximus. Omnia ergo facta, quibus libertas ecclesiastica proprie læditur, ad duo capita reducuntur, nimirum, ad actiones forenses, et judiciorum, tam civilium quam criminalium, quæ circa clericos tanquam reos exerceuntur, et ad exactiones tributorum, vel coactiones quæ eisdem personis fiunt in ali-

quibus oneribus publicis eis imponendis. Et ita hæc duo genera actionum specialibus pœnæ et censuris prohiberi solent in jure, in titulis de Imm. Eccl., maxime vero in Bulla Cœnæ, claus. 15, 18 et 19.

5. *Modi hoc privilegium violandi tam legibus quam factis hominum communes.*—Secundo distinguendi sunt alii duo modi violandi ecclesiasticam libertatem, qui tam in legibus quam in factis possunt contingere, maxime vero in ferendis legibus civilibus libertati ecclesiastice contrariis observari solent. Prior modus est, quando directe et manifeste aliquid fit vel disponitur contra clericorum exemptionem, et de hoc modo nihil addere oportet, quia et per se facile cognosci potest, et ille maxime in jure reprobatur. Committitur enim quasi per expressam contradictionem, vel contrarietatem ad legem, quæ jubet talem exemptionem servari. Ut si lex civilis directe præcipiat clericis, vel si jubeat eos sub tributis comprehendendi, vel si judex laicus clericum ad comparendum coram se citari jubeat, et sic de cæteris. Alius modus est violationis indirectæ, qui et difficilius cognoscitur, et ejus malitia obscurior est. Habet tamen fundamentum in jure, cap. ultim. de Immunitat. Ecclesiar., in 6, ubi dicitur, excommunicationem incurrere illos sacerdtales magistratus, qui laicis subditis suis præcipiunt ne clericis vendant, aut ab illis emant, vel ne eorum triticum molant, aut aliqua similia obsequia eis exhibeant, et ratio redditur, *quia talia in derogationem ecclesiastice libertatis præsumuntur.* Per quæ verba declaratur, illam esse indirectam violationem libertatis ecclesiastice, quia, licet talia statuta vel præcepta directe non ordinarentur ad clericos quoad verba, quoad intentionem vero et effectum fraudulentem, ut ait ibi Glossa, transitum faciebant de persona ad personam, loquendo cum laico, et gravando clericum. Similis decisio est in cap. *Quanto, de Privileg.*, ubi de quibusdam, qui cum non possent excommunicare monachos, excommunicabant eos qui cum monachis communicarent, dicitur: *Privilegiorum non vim et potestatem, sed verba servantes, monachos quodammodo excommunicant, quando aliis prohibent ne cum ipsis communicent.* Et ita dicuntur ibi similia fieri in fraudem privi egiorum, ubi non tantum est sermo de proprio privilegio immunitatis ecclesiastice, sed latius de quocumque privilegio; a fortiori tamen in præsenti definitio illa locum habet.

6. *Quando libertas ecclesiastica indirecte violetur.*—Hanc ergo fraudulentam et latentem læsionem ecclesiastice libertatis indirectam vocamus, potestque describi, ut sit illa, quæ fit per verba vel actiones, quæ licet versentur directe circa personas laicas, nihilominus ordinantur ad gravandum clericos, vel universalius dici potest indirecte fieri violationem, quando verbis non apparet, tamen re ipsa fit. Sicut dicitur quis violare legem indirecte, qui legis verba complectens, contra legis nititur voluntatem, ut dicitur in regula ultim. de Regulis juris, in 6, et in 1. *Contra legem*, ff. de Legibus, et in 1. *Non dubium*, Cod. de Legibus, quia vis et potestas legis magis in voluntate jubentis, quam in verbis posita est. Hæc autem fraus seu indirectum gravamen multis modis fieri potest, qui non videntur posse sub numero certo comprehendendi, quia per humanam sagacitatem et malitiam possunt facile multiplicari, ideoque prudenti judicio, consideratis circumstantiis, discernendum est an moraliter æquivaleant directis gravaminibus. Et quoad forum conscientiæ pendere hoc multum potest ex intentione operantis, seu præcipientis; nam si id faciat, ut quod sibi est directe prohibitum facere circa personam clerici, per illum circuitum, etiam in vivo clericu, consequatur, magnum signum est indirectæ violationis.

7. *Prima opinio.* — Ut autem violatio hæc indirecta, et malitia ejus magis explicetur, interrogari potest an hæc sit vera et in re ipsa subsistens violationis libertatis ecclesiastice, malitiam ejusdem rationis et speciei participans; an vero sit tantum præsumpta, quia ex circumstantiis externis talis appareat, quamvis si animus vel intentio prava desit, talis in re ipsa non sit. Hanc enim posteriorem partem videtur docere Cajetanus, in Summa, verb. *Excommunicatio*, cap. 31; ait enim, tunc legem civilem esse contra libertatem ecclesiasticam, quando per se et intentione sua contra illam tendit, quia voluntas et intentio distinguunt maleficia, et quæ sunt per accidens, sub artem non cadunt. Ad explicandum autem quando lex civilis talis sit, adjungit id non esse difficile scientibus, *idem esse per se, quod ex propria natura et intentione*, quod exemplis declarat, dicens: *Sicut detracio contra famam, contumelia contra honorem, homicidium contra humanam vitam, ita statuere quod clericis non dentur decimæ aut eleemosynæ, quod non possint judicare in causis ecclesiasticis, quod solvant rectigalia de rebus suis absque*

negotiatione, et similia, est contra libertatem ecclesiasticam. Quæ omnia exempla, si quis ea recte consideret, ad directam oppositionem et violationem ecclesiastice libertatis pertinent, atque ita indicat Cajetanus, solam illam legem esse per se et natura sua contra libertatem ecclesiasticam, quæ directe contra illam disponit. Unde in eodem verbo, cap. 37, ait, actiones prohibitas in dicto cap. ult., de Immun. Ecclesiar., in 6, non esse proprie contra libertatem ecclesiasticam, sed contra humanam societatem; quia vero in odium Ecclesiae fiunt, præsumi contra libertatem ecclesiasticam fieri.

8. Et hanc opinionem sequitur Navar., in Sum., cap. 27, n. 119 et 120. Fundantur primo, quia dictum c. ult. utitur verbo præsumendi, dicens: *Cum talia in derogationem ecclesiastice libertatis præsumantur.* Secundo, quia cum actio ipsa, seu verba legis directe non lèdant libertatem, transgressio et derogatio pendet ex intentione facientis: si enim id faciat animo gravandi clericos, erit violatio libertatis; si autem id faciat propter suum commodum, permittens gravamen aliorum, non erit contra libertatem, quamvis interdum esse possit contra charitatem, vel contra humanam societatem. Cum ergo de intentione non possit constare, neque etiam certo judicari potest, sed ad summum præsumi violatio libertatis ecclesiastice, quatenus talis intentio ex circumstantiis externis præsumi potuerit. Unde juxta hanc sententiam, si contingat veritatem non subesse præsumptioni, in conscientia non erit violatio libertatis.

9. *Contraria sententia eligitur.* — *Probatur primo.* — Nihilominus contrariam sententiam veram censeo, quam aperte tenet Glossa, in illo cap. ult., ibi communiter probata, et in dicto c. *Quanto*, ubi bene Panormitanus. Sumitur etiam ex communi sententia Bartol., in Anthent. *Cassa*, C. de Sacros. Eccles., et aliorum, dicentium omnem legis civilis dispositionem, per quam clerici redduntur timidiores, esse contra libertatem ecclesiasticam, non præsumptive tantum, sed vere et proprie, ut in superioribus explicavimus. Probatur autem primo ex dicto cap. *Quanto*, de Privileg., ubi non dicitur similes sententias aut dispositiones legum præsumi, sed esse in fraudem privilegii, et per illas observari verba, non vim et potestatem privilegii; ergo, si non servatur, violatur vis et potestas privilegii; hæc autem est vera, non præsumpta violatio.

10. *Secundo.* — Unde argumentor secundo,

ex generali principio legis *Non dubium*, in quo Pontifex in illo textu fundatur: *Non dubium est, in legem committere eum, qui verba legis amplexus, contra legem nititur voluntatem*, ubi non dicitur præsumi committere in legem, sed certum esse committere, ut dicitur etiam in ultima regula juris, in 6; at committere in legem, est contra legem peccare aut ageare, ut constat ex proprietate verbi latini, et ex glossis, et communi expositione in citatis juribus, præsertim ex Bart., in dicta l. *Non dubium.* Imo addit Gloss., in e. *Si postquam*, de Elect., in 6, verb. *Mente*, eadem poena puniri, qui in legem committit per fraudem et sub verborum cortice, ac illum qui aperte et directe contra legem agit; ergo eodem modo vere et proprie violat legem, seu privilegium immunitatis, qui indirecte illam violat, quia in fraudem privilegii agit, ut in dict. c. *Quanto* dicitur. Tertio est propria ratio, quia in moribus voluntas indirecta ad directam revocatur, eamdemque speciem malitia participat, ut est primum principium in materia morali; nam voluntarium directum et indirectum ad idem reducuntur, ut non impedire nocumentum, eum possis et debeas, perinde est ac directe nocere, et sic de aliis. Sic ergo in præsenti, parum refert quod violatio sit indirecta, si in re eundem habeat effectum. Et confirmatur, quia alias vel inutile esset privilegium, vel saltem multum minueretur, si per unam viam quasi obliquam (ut sic dicam) liceret; quod directe et simpliciter est per privilegium prohibatum.

11. *Satisfit fundamentis oppositorum sententiae.* — *Primo.* — Ad fundamentum contrarie sententie de verbo, *Præsumantur*, quo utitur dictum cap. ult., responderi potest, primo, interdum vocari præsumptionem illam quæ sub aliqua fraude vel simulatione fit, etiam si vere fiat, et non tantum fieri præsumatur. Secundo vero et inclius dicitur, ibi verbum præsumendi non significare judicium, vel suspicionem quæ de tali facto ex conjecturis ejus desumitur, sed significare modum operandi ex certa scientia et deliberatione, vel quadam animi arrogantia ac temeritate. Nam usus hujus verbi in hac significazione valde communis est in jure canonico, et ita sumitur in illo textu; imo bis in eadem significazione ibi ponitur: primo, in narratione facti, ibi, *aut alia obsequia eximere præsumant*, et iterum in reddenda ratione juris, seu excommunicationis latæ, ibi: *Cum talia in derogationem ecclesiastice libertatis præ-*

sumantur, utique non a jure, sed ab illis qui talia facere vel præcipere præsumunt, sicut prius dictum fuerat. Unde ille textus sic expōsus potius confirmat quod diximus, nam talia puniuntur ut vere et ex præsumptione contra libertatem Ecclesiæ facta. Addi etiam potest quod, licet illa de se non esset vera violatio libertatis ecclesiasticæ, ex vi illius textus prohibentis illam, jam esset vera violatio libertatis. Sed, licet hoc ex hypothesi vere dictum sit, simpliciter non censeo similes actiones esse contra libertatem ecclesiasticam quia ibi prohibentur propter periculum et præsumptionem, sed potius e contrario, ibi prohiberi sub censura speciali, quia revera de se sunt violations libertatis ecclesiasticæ; nam hæc ratio ibi redditur, et supponitur in re substitisse ante illam legem.

42. Secundo. — Ad secundum respondeo, sicut recte Cajetanus, citato loco, de violatione directa dixit, non pendere ex intentione operantis, sed operis, ita eiam dicendum esse de violatione indirecta. Nam si legislator civilis ferat legem quæ re vera sit contra libertatem ecclesiasticam, saltem indirecte, quamvis non intendat clericorum nocumentum, sed suum vel suorum civium commodum, contra libertatem ecclesiasticam peccat, quia, ut dixi, in materia morali eadem est ratio de directo et indirecto. Si autem legislator civilis directe tale gravamen imponeret, contra libertatem ecclesiasticam ageret; ergo idem est, licet indirecte id faciat. Quapropter non potest illa dici tantum permisso, quia magistratus civilis tenetur simpliciter vitare tale gravamen clericorum. Alioqui si in casu dicti cap. ultim., laici illas actiones prohiberent, non intendentis gravamen clericorum, sed suum commodum, non agerent contra libertatem, nec illam censuram incurrerent, quod absurdum est.

43. Ad melius autem intelligendam hanc indirectam violationem immunitatis, oportet advertere non differre a directa in materia; imo necessarium esse ut in eadem materia versetur, utique prohibita per immunitatem, ita ut differentia solum sit in modo, nam in una violatione, actio vel lex recta tendit ad personam clerici; in altera vero, scilicet indirecta, solum per circuitum. Si quis tamen attente consideret, semper illam attingit, saltem in obliquo, ut cum lex prohibet laico ne vendat necessaria clericis, etc. Imo, licet quoad obligationem legis non directe impōnatur clericis, quoad effectum ita in illum

redundat, ut vel talem effectum directe efficiat, si onerosus sit, vel indebitē impedit, si sit favorabilis et debitus. Sicut qui impedit alium ne mecum communicet, me directe privat communicatione illius, vel saltem inique illam impedit; et qui prohibet vel detinet notarium ne adsit testamento clerici, satis directe impedit clericum ne testamentum facere possit; et multa similia in Glossis, et legibus tractatis videri possunt, quæ sub illa generali regula comprehenduntur: *Non resert cum quo lex loquatur, sed in quem intentio legis dirigatur, lex Cum pater, § Donationis, ff. de Legat., 2.*

CAPUT XXXIV.

QUIBUS MODIS ACTIONES CONTRA LIBERTATEM ECCLESIASTICAM EXCUSARI SOLEANT, ET QUID DE ILLIS JUDICANDUM SIT.

1. Sex modi quibus immunitatis violatio excusat. — Cum laici magistratus et judices frequenter ecclesiasticam immunitatem invadere soleant, varias rationes excogitarunt, quibus actiones suas honestare, et a sacrilegii et injustitiæ crimen excusare valeant, quas in fine hujus libri proponere et examinare necessarium duxi. Sex autem hujusmodi excusationes excogitatas invenio, quæ sunt ignorantia, necessitas, consuetudo, pactum seu concordia, privilegium, et justa defensio, de quibus sigillatim dicendum est.

2. Ignorantia. — De prima ignorantiaæ excusatione pauca dicere necessarium est, quia, proprie loquendo, non est ex his quas nunc inquirimus. Duobus enim modis potest cogitari excusatio in hujusmodi actionibus, quæ videntur libertatem ecclesiasticam laderere. Primo, ut talis sit excusatio, quæ reddat actionem in re ipsa licitam et validam, sitque tanquam exceptio quædam a generali privilegio exemptionis; alio modo potest excusatio talis esse, quæ sufficiat excusare personam a culpa, licet actio ipsa per se spectata prava sit, quatenus est privilegio contraria. Hie ergo præser-tim inquirimus prioris generis excusationem, et sic excluditur ignorantia, quia, licet interdum fortasse possit operantem a culpa liberare, nihilominus non dat jurisdictionem, et ita nec reddit actum secundum se, aut licitum, aut validum. Illo autem modo, quo ignorantia potest culpam impedire, excusatio illa generalis est omnibus delictis, et fere nihil speciale de illa in præsenti dicendum relinquitur.

Duplex enim ignorantia hic intervenire potest, una facti, altera juris. Prior duobus modis accidere potest: primo, ex ignoratione personæ circa quam actio versatur, ut si laicus clericum capiat aut judicet, putans esse laicum. Et hoc genus ignorantiae interdum excusare potest a culpa, quia potest esse invincibilis; an vero in particulari talis sit, in foro conscientiae standum erit confessioni partis, seu poenitentis, et ex circumstantiis ab eo propositis ferendum erit judicium, in foro autem externo ex legitimis indiciis et probationibus. In casu autem dubio, an talis persona pro ecclesiastica habenda sit, neque, vel an gaudeat privilegio clericali, ad quem judicem, laicum vel ecclesiasticum, talis causæ cognitio pertineat, tractant jurisperiti, ad quos illa materia pertinet. Vera tamea resolutio est, pertinere ad judicem ecclesiasticum, quia materia illius judicij ecclesiastica est, ut definitur in cap. *Si iudex*, de Sent. excom., in 6, ubi fere omnia, quæ in simili dubitatione fieri debent, statuuntur, et videri possunt quæ late tractat Covar., in lib. Pract. Quæst., cap. 33.

3. Alius modus ignorantiae esse potest circa materiam ipsam, circa quam actio vel judicium versatur, quia non existimatur ecclesiastica, vel spiritualis, vel non creditur ad exemptionem pertinere. Hæc tamen ignorantia interdum nasci potest ex solo defectu cognitionis ipsius materiæ, de qua tractatur, et tunc est propria ignorantia facti, idemque judicium de illa ferendum est, quod de ignorantia personæ; nam est eadem ratio. Aliquando vero illa ignorantia vel dubitatio occurrit ex varietate opinionum circa jus ipsum, quomodo sœpe est inter Doctores controversia, an hæc vel illa actio sit contra libertatem ecclesiasticanam, vel an cognoscere de culpa perjurii commissi a clero, testimonium ferente in judicio sacerulari, sit ejusdem sacerularis fori vel ecclesiastici, et similia, quorum dubitatio ad ignorantiam juris revocatur.

4. *Ignorantia juris unde proreniat.* — Circa ignorantiam ergo juris advertendum est, aliquando oriri tantum ex defectu personæ, ut quando in re ipsa satis constat aliquid contrineri sub jure exemptionis; qui vero in contrarium operatur illud jus nescit, et ideo ignanter exemptionem violat. Aliquando vero ignorantia vel incertitudo oritur ex re ipsa, quia videlicet, jus ipsum occultum est, ita ut etiam apud peritos, et post diligentem inquisitionem jus dubium sit, vel sub opinione constitutum. Quando ergo ignorantia juris est

prioris modi, vix reputari potest invincibilis, saltem in ipsis principibus vel judicibus laicis, tum quia ex vi sui muneric tenetur vel jus scire, vel ab his actionibus abstinere; tum etiam quia suppouitur tale jus esse satis publicum et manifestum, ideoque vix credi potest hujusmodi personas illud invincibiliter ignorare, sed vel ex negligentia valle supina, vel, quod frequentius fortasse contingit, ex affectata nescientia, ut exercere possint jurisdictionem quam valde affectant. Dico autem *vix*, propter conscientiae forum, nam in externo et ecclesiastico foro talis excusatio (ut opinor) nunquam reputabitur sufficiens; tamen in foro conscientiae aliquando poterit, juxta operantis intentionem et occurrentes circumstantias, admitti. Dixi etiam hoc præcipue habere locum in ipsis principibus eorumve consiliaris, et judicibus qui jus scire possunt et debent, quia inferiores ministri facilius possunt per ignorantiam excusari, juxta vulgarem regulam cap. *Qui culpatur*, 23, quæst. 4. At vero quando ignorantia vel dubitatio circa jus provenit ex rei ipsius difficultate, et opinionum varietate, tunc si nihil certum et exploratum possit ex sacris canonibus colligi, servandæ sunt generales regulæ de opinionum delectu, et in hac materia est valde observandum, ut in favorem religionis, et consequenter in favorem exemptionis amplietur potius quam restringatur ecclesiastica immunitas. Et juxta hæc judicandum est de multis singularibus casibus, quos congerit Azor, t. 1, lib. 5, c. 13 et 14.

5. *Necessitas.* — Secunda excusatio *ob necessitatem*, valde ordinaria est in hac materia, fundaturque in illo principio, quod necessitas caret lege. Contingere enim potest ut ad commune bonum reipublicæ necessarium sit, aliquid agere contra immunitatem clericorum; ergo tunc jus immunitatis non obligabit. Et confirmatur, quia hoc jus, saltem ut applicatum et determinatum ad talem materiam vel actionem, non est divinum, sed humanum; sed omne jus humanum, etiam si canonicum sit, potest in particulari casu cessare per episcopiam, propter occurrentem necessitatem, propter quam contingere potest, ut servare jus humanum in tali casu sit contra jus naturale; ergo et in praesenti. Exemplum optimum est in c. *Pervenit*, de Immunit. ecclesiar., ubi dicitur, tempore magnæ necessitatis non excusari clericos a vigiliis in muris civitatis. Et simile est in materia tributorum, quando ad sublevandam communem necessitatem laici

non sufficient, nisi clerici contribuant. In materia etiam fori judicialis solet esse commune exemplum, quando deest judex ecclesiasticus muneri suo, et laici vel clerici magnum detrimentum patiuntur, tunc enim propter necessitatem poterit judex laicus causas expedire, etiam si in eis clerici rei sint, ut multi juris canonici interpres affirmarunt cum Glossa, in cap. *Filiis vel nepotibus*, 16, quæst. 7, ut latius ibi, et in cap. *Qualiter et quando*, de Judiciis, tractari solet. Et maxime urgere potest hæc necessitas, si ecclesiasticus judex omnino non inveniatur legitimus, ut in terris hæreticorum et schismaticorum sæpe potest accidere.

6. Quid de hac excusatione sentiendum sit.
— Nihilominus tamen existimo, non esse hanc excusationem, moraliter loquendo, necessarium, saltem intra catholicam Ecclesiam. Probatur hæc assertio primo, quasi inductione quadam discurrendo per casus insinuatos, ad quæ omnes alii, qui ex cogitari possunt, reducuntur. Aut enim necessitas est in materia tributorum, vel in materia seu causis fori judicarii. In priori materia, supra ostensum est nunquam propter necessitatem posse clericos cogi a laicis ad tributa solvenda. Nam si aliquando tenentur contribuere, vel opus aliquod communis oneris sustinere, non est ex vi legis impouentis tributa, sed ex aliqua obligatione charitatis aut communis justitiae, et juxta canonum dispositionem. Unde in hujusmodi casibus non possunt clerici per judices sæculares ad satisfaciendum huic obligationi compelli, sed per suos Prælatos, et secundum canonicum jus. Quod si ipsi Prælati suo muneri satisfacere nolint, ad Pontificem recurrentur, ut eos compellat. Quod si sit periculum in mora, quia extrema vel gravis necessitas boni communis auxilium clericorum statim requirit, tunc non per modum jurisdictionis, sed per modum defensionis licere poterit, quod recta ratio ad subveniendum communi bono, vel impediendum damnum imminens, necessarium esse dictaverit. Et ita in eo casu excusatio reducitur ad alteram, quæ sub nomine justæ defensionis ponitur, et infra tractabitur, declarabiturque non continere propriam excusationem seu exceptionem a generali privilegio, sed esse aliam speciem actionis ad privilegium non pertinentem.

7. Eadem fere ratio est de casibus in materia judiciali occurrentibus: nam imprimis, in c. 13, ostensum est non posse judicem laicum propter negligentiam judicis ecclesiastici

in causis clericorum se intromittere, quia manifeste repugnat juri canonico. Nec ex illa negligentia sufficiens necessitas insurget, nam si judex ecclesiasticus fuerit negligens, superiore habet, a quo emendari possit et debeat. Quod si proximus superior etiam neglexerit, ad aliquem ejusdem ordinis magis remotum recurrentur erit, et ita usque ad Romanum Pontificem, in quo tanquam in supremo capitale sistendum est; nam si ipse neglexerit, non est per regem cogendus, sed rogandus, vel cum debita submissione monendus, ut in principio libri præcedentis dictum est. Sicut in republica mere temporali ac ethnica, vel nunc in Anglia, si judices regii in una provincia negligentes essent in administranda justitia, non possent magistratus alterius provinciæ ad supplendam horum negligentiam in eorum territoriis iudicia usurpare; multoque minus possent inferiores judices ejusdem provinciæ de superioribus suis ius dicere, aut eorum tribunalia titulo necessitatis usurpare, quia esset summa confusio, et injuriarum occasio. Ergo necessarium tunc est aliquem superiorem magistratum vel senatum adire, vel, si non sufficiat, usque ad regem procedere. Quod si rex ipse negligens sit, profecto nollent Reges ut inferiores sibi subliti iudicia sua emendent aut usurpent. Cur ergo volent ut sæculares judices ecclesiasticas causas sibi arrogent sub prætextu negligentiae ecclesiasticorum iudicium? aut eur potius negligentia vel iniqüitas in ecclesiasticis iudicibus, quam in sæcularibus timetur? Imo vero quia contrarium potius præsumendum est, et quia in christiana et catholica republica Prælati ecclesiastici sunt superiores laicis iudicibus seu magistratibus, ideo juxta canones possunt Prælati supplere negligentiam laicorum, non autem e converso, ut in eodem c. 13 declaratum est.

8. Clericum, si coram aliquo superiore suo conreniri possit, non posse a laico iudicari concluditur. — Atque hinc possumus universaliter colligere, nunquam posse sæcularem judicem usurpare jurisdictionem in clericum prætextu necessitatis, quandiu aliquis Prælaus ecclesiasticus, sive proximus, sive remotus, adiri potuerit. Ratio generalis est, quia sola necessitas non dat jurisdictionem; sine jurisdictione autem non potest usurpari iudicium; ergo nec sub prætextu necessitatis potest aliiquid fieri contra privilegium fori clericorum. Patet consequentia, quia non cessat exemptio in aliquo casu ex parte clerici, nisi

jurisdictio laici in eodem casu augeatur. Antecedens autem quoad posteriorem partem per se notum est ; quoad priorem vero probatur, quia jurisdictio requirit potestatem et voluntatem superiorum, a qua proveniat ; nam, licet unus homo indigeat correptione aut poena, et desit superior qui possit illum coercere, non idcirco potest alius privatus jurisdictionem in illum usurpare, sed ad summum tunc ea licent, quae ad justam et moderatam defensionem fuerint necessaria, alias non posset pax et justitia in humana societate servari. Sola ergo necessitas, ut sic, nunquam dat jurisdictionem, ideoque neque ad excusandam violationem immunitatis sufficit. Quomodo autem ad justam defensionem sufficiat, infra videbimus.

9. Solum superest casus ille ultimo loco propositus, quando clericus versatur inter paganos vel haereticos, ubi nulli sunt Praelati, vel judices veram ecclesiasticam jurisdictionem exercentes. Et tunc imprimis dicendum est, si status ille sit durabilis, et valde generalis in aliqua provincia, consulendum esse Summum Pontificem, si fieri possit, ut remedium adhibeat, quia ipse est supremus judex, et ibi aliis propinquior deest. Si vero aut casus est particularis et extraordinarius, aut non datur locus consulendi Pontificem, aut exequendi mandata ejus, tunc casus reducitur ad terminos juris naturalis, vel gentium, et ideo licet uti remedio quocumque honesto secundum rectam rationem. Vel dici etiam potest, tunc posse conveniri clericum coram judice laico jure defensionis, quia ille tunc est modulus suavior se defendendi, vel jus suum conservandi aut recuperandi, aut etiam communibon consulendi.

10. *Consuetudo.* — Tertia excusatio erat consuetudo, de qua multa in superioribus diximus, quibus non obstantibus, Doctores frequenter hoc solo nomine varias actiones exemptioni repugnantes, quae in variis locis sunt in usu, excusare conantur. Quales sunt punire clericum ob crimen læsa majestatis, de qua consuetudine testatur Julius Clarus, et illam dicit posse excusari per c. *Perpendimus*, de Sentent. excommunicat., supra allegatum. Unde videtur illam consuetudinem ad justam defensionem revocare, quia cum crimen illud mortem principis intentet, jure defensionis videtur princeps posse traditorem per suos ministros vel judices interficere. Alia consuetudo referri solet de clero, qui coram judice seculari testimonium dicens, de perjurio con-

vincitur, ut possit ab eodem judice laico puniri, quando cognitionem de tali crimine ipse prævenit, quam consuetudinem in Gallia servari refert Covarr., in Pract., c. 18, num. 8.

11. Alia dicitur esse in Gallia consuetudo, nimirum, ut clerici in actionibus realibus coram judice sæculari convenientur, quam defendit Joannes Garsia, de Nobilit., gloss. 9, n. 49, cum Fabro, et aliis quos refert. Et similiter est ibi consuetudo, ut de quibusdam delictis gravibus judices laici contra clericos cognoscant. Item ut clerici portantes arma prohibita, vel tempore prohibito, illis per magistratum civilem priventur, consuetudine receptum est, et defenditur, ut videre licet in Covarruvia, dict. lib. Practic., c. 33, circa fin., et lib. 2 Var., cap. ultim., in fin.; Jul. Clar. supra, n. 26; Salced., in Practic., cap. 55. In Hispania etiam solent clerici ministri regis, qui sunt a consiliis ejus, de delictis vel defectibus in suis officiis commissis visitari, inquire ac puniri. Et in multis dubiis et controversiis inter judices ecclesiasticos et laicos, vel in causis in quibus subditi, seu vasalli a Praelatis vel judicibus ecclesiasticis gravari conqueruntur, regia tribunalia judicant. Hæc autem et multa similia, quae auctores referunt, sola consuetudine defenduntur, ut videri licet in Covar. supra, a c. 31, usque ad 35; Navarr., in cap. *Norit*, de Judiciis, notab. 3, num. 31; et Azor, tom. 1, lib. 5, c. 13 et 14.

12. *Consuetudo non excusat actum contra immunitatem factum.* — Nihilominus dicendum est, hanc excusationem consuetudinis nunquam esse posse sufficientem, si actus vere sit contra libertatem ecclesiasticam, et consuetudo per similes actus introducta sit. Hoc evidenter sequitur ex his quæ c. 32 dicta sunt, et ita communiter traditur ab omnibus auctoribus supra allegatis. Nam consuetudo nunquam potest derogare, vel minuere privilegium immunitatis, nec potest dare jurisdictionem laico in clericum; ergo omnis actus jurisdictionis, quem laicus exerceat in clericum solo titulo consuetudinis, est actus sine jurisdictione factus; ergo est violentia contra immunitatem ecclesiasticam; ergo sola consuetudo nunquam sufficit ad culpam, seu libertatis ecclesiasticae violationem excusandam. Quæ ratio, supposito dicto principio, est moralis demonstratio; illud autem principium, ut opinor, satis demonstratum est. Unde omnia jura canonica, quæ consuetudinem illam dicunt esse corruptelam, et tanquam damnablem reprobant, hanc etiam assertionem aperte con-

firmant. Nam corruptela et damnabilis consuetudo non est aliud nisi frequentia peccandi; peccatum autem subsequens non excusatur propter frequentiam praecedentium, sed quodammodo augetur. Quocirca consuetudines quae allegantur, vel aliis titulis a consuetudine distinctis excusandae sunt, vel simpliciter reprobandae, nam propter facta hominum non sunt jura divina vel canonica neganda, vel falsis interpretationibus corrumpenda. Et ita Rota, decision. 804, q. 10, de Consuetud., in antiquis, damnat consuetudinem quamdam, quae etiam ante schisma in Anglia vigebat, scilicet, ut rex vel ejus ministri clericos judicarent in actionibus civilibus, etiam personalibus, et in criminalibus, quando agitur civiliter. Et idem profecto etiam dicendum erit de Gallicana consuetudine, ut clericorum iudicentur a laicis in actionibus realibus, nisi alia via excusetur. Idemque de similibus dicendum est, ut latius prosequitur Azor, loco citato.

13. Duo autem sunt tituli, quibus similes consuetudines excusari solent. Unus est, quia facta seu actiones, quibus introducuntur, et postea defenduntur, non sunt actus contra libertatem ecclesiasticam, quia non sunt actus jurisdictionis laicæ in clericum, sed sunt actus justæ defensionis, vel reipublicæ, vel innocentium, quae defensio non est contralibertatem ecclesiasticam. Juxta quam doctrinam actio revera non excusatur propter consuetudinem, sed potius consuetudo excusatur propter modum et titulum actionis; ipsa vero consuetudo postquam introducta est, et a viris prudentibus ac timoratis servata creditur, ad summum indicat, et est argumentum, actiones illas non fuisse usurpatæ jurisdictionis, ac proinde per modum defensionis fieri consuevit. Atque hoc modo excusatio hæc reducitur ad ultimam infra tractandam, ideoque nunc, illa generali doctrina supposita, solum advertimus necessarium esse ut ad talem materiam, seu actionem, vere et convenienter applicetur, alioquin si materia non sit capax defensionis, quia ibi non fiebat violentia, nec morale periculum ejus, erit ficta excusatio, et de solo titulo, non vera, nec de re; oportet ergo ut et causa et necessitas defensionis supponatur, et ut in ipsa defensione debita moderatio servetur, ut infra explicabitur.

14. *Quomodo excusentur arma prohibita a clericis auferentes.* — Atque hoc titulo potest aliquo modo excusari consuetudo illa auferendi a clericis arma prohibita. Nam certe si id fiat per usum jurisdictionis, vel aliqualis pu-

nitionis, non video quomodo excusari possit, quidquid Covarr. et alii sentiant. Quod ex parte sensit Navarr., consil. 27, alias 44, de Excom., num. 5, quatenus excusat hujusmodi factum, eo quod ordinatur ad impediendum aliquod delictum, additque interdum fieri per modum pacti et conventionis inter clericum et ministros justitiae; solent enim clerici arma offerre, ne ad suos superiores et Praelatos deferantur, vel denuncientur. Quod si ita est, cessat violatio ecclesiastice libertatis, quidquid sit de injustitia vel turpitudine pacti. Quando vero arma tolluntur solum per modum defensionis, ad tollendam occasionem rixæ, vel periculum perturbationis civitatis, tunc non auferuntur in poenam, et ideo non videtur licere ex vi talis facti omnino spoliare clericum armis, privando illum dominio eorum, quia nullus appetet justus titulus quo id fieri possit; ergo tantum debent pro illa occasione auferri, ut postea reddantur, nisi clerici voluntarie consentiant donationi eorum, ut dictum est.

15. *Quo pacto excusetur consuetudo comprehendendi clericos in delicto compertos.* — Sic etiam honestari solet consuetudo, qua solent ministri sacerdotalis justitiae clericos in delicto inventos, vel quos probabiliter presumunt ad delinquendum ineedere, detinere et comprehendere, ut suis Praelatis eos praesentent; nullo enim modo id facere possunt titulo jurisdictionis, ut constat ex c. *Cum non ab homine*, de Judic., et c. *Si vero*, de Sent. excom., et cap. *Si clericus*, de Foro competent., et cap. *Si clericus*, de Sentent. excom., in 6. Unde nulla consuetudine introduci potest, ut eo modo tale factum liceat. Solet autem justificari per modum defensionis, quia expedit valde reipublicæ ut impediatur delicta, et hoc munus videtur maxime commissum ministris justitiae sacerdotalis. Et ita docent Panormitan., in c. *Ut famæ*, de Sentent. excom., n. 6, et in c. *Cum non ab homine*, de Judic., ubi etiam Decius, num. 40; et Felinus ibi, et in c. *Si vero*, de Sent. excom., n. 2; et Navarr., in dicto cons., et in Sum., cap. 27, n. 83; et Julius Clar., dicto § ult., quæst. 28, n. 6. Censetur etiam ibi intervenire tacita voluntas Praelatorum, quam etiam potest interpretari consuetudo, et potest ibi sufficere, quia ibi non intervenit commissio jurisdictionis, sed tantum quidam usus facti, quo Praelatus utitur ministro justitiae ad comprehendendum subditum suum delinquentem, quod optime per sacerdotiale brachium facere potest. Denique ad hunc modum sub hac specie defensionis ex-

cusantur aliæ consuetudines, ut excludendi clericum a curia regis, vel etiam a regno, vel aliæ similes, quas nunc examinare non est nostri instituti, sed videri possunt Doctores allegati, præsertim Azor supra, et Henr. lib. 14 de Irregul., cap. 12, num. 6, littera P et sequentibus.

16. Alius modus dictam consuetudinem defendendi.—Alius modus defendendi hanc consuetudinem est, fundando illam in privilegio Pontificio. Non est enim dubium quin possit Pontifex concedere alicui regi vel regno speciale privilegium derogans aliqua ex parte privilegio exemptionis, de quo infra dicetur. Hoc ergo privilegio supposito, actus, qui ex illo fiunt, honesti sunt, et ita etiam consuetudo illorum est honesta. Tunc autem consuetudo non derogat immunitati, sed derogatam supponit, et ideo non est consuetudo quæ excusat, sed privilegium, de quo statim dicam. Unde non probo quod Navarr., in dicto cons. 27, de Sent. excom., 1, dicit, consuetudinem immemorialem Galliæ, quod iudex sacerdotalis possit punire clericum, habere vim privilegii, citans Aufrerium, in Clement. 1, de Offic. ordinar., regul. 1, fallentia 10. Insinuat enim, talem consuetudinem posse inducere privilegium, quod in hac materia non censeo esse verum, quia si consuetudo sit turpis et reprobata, etiam si immemorialis sit, non potest inducere privilegium, et ideo cum in hac materia consuetudo sit reprobata, ut diximus, etiam si immemorialis sit, non potest vi sua privilegium introducere, ut recte dixit Probus, in c. 2, de Probat., et sentiunt alii auctores supra citati. Ergo oportet quod privilegium præcedat ut consuetudinem honestet.

17. An immemorialis consuetudo sit sufficiens signum privilegii a Pontifice concessi.—Queri autem potest an immemorialis consuetudo sit sufficiens indicium, seu testimonium, quod ex legitimo privilegio inchoata fuerit; videtur enim valde probabile ita esse præsumendum, quia immemorialis consuetudo præsumitur honesta, ut multi jurisperiti tradidierunt, quia cum non possit probari mala, præsumitur bona. Nihilominus censeo, solam et nudam consuetudinem, etiam immemorialem, non sufficere in hac materia ad probandum privilegium. Tum quia illa regula non procedit in consuetudine reprobata per legem, ut Rochus Curtius et alii, tractantes de consuetudine, traliderunt; tum etiam quia valde odiosum est privilegium hoc, et difficile ac-

raro conceditur, et ideo nisi legitime probetur, non præsumitur; solus ergo usus quantumvis antiquus, cum in facto consistat, non probat sufficenter jus seu privilegium. Loquor autem de nuda et pura consuetudine, quia si cum illa conjugatur constans fama, et traditio æque antiqua, seu immemorialis, quod præcesserit privilegium, et talis traditio integre probetur, videtur sufficiens ut talis consuetudo pro privilegio reputetur.

18. Consuetudo in privilegio fundata potest a Pontifice revocari.—In tali vero casu addendum est, non obstante illa traditione et probatione, posse talem consuetudinem per Pontificem revocari. Tum quia illa consuetudo non accipit vires a præscriptione, sed a privilegio; privilegium autem a superiori datum semper potest revocari, præsertim ex justa causa. Tum etiam quia, licet admittetur ibi aliqua præscriptio, non posset obstatre quominus Pontifex posset revocare jurisdictionem receptam per illud privilegium et quasi præscriptam illa consuetudine, quia semper illa jurisdictione est quasi delegata a Pontifice, et consequenter ab ejus voluntate pendens. Item quia contra Papam nemo præscribere potest in his, quæ ad supremam ejus potestatem pertinent. Nam, ut recte dixit Innocentius, in cap. 2 de Postul. Præl., n. 2, *quia Papa circa spiritualem potestatem omnia potest, et plenitudinem potestatis habet, nullus potest querere possessionem quæ ei præjudicet, cum illam habeat a Domino tantum.* Idemque docuit Glossa, in cap. Cum nobis, de Præser., ubi Panormit., n. 1 et 12, eam valde commendat, et in c. Si diligenti, eodem tit., n. 11. Pontifex autem, ex vi potestatis spiritualis, quam a Christo accepit, potest exemptionem clericorum vel conservare, vel redintegrare, si aliqua ex parte fuerit diminuta, et ideo semper potest quamecumque consuetudinem illi contrariam, quomodo cumque introducta sit, revocare, quia illa potestas, quæ a Domino concessa est, per nullam consuetudinem diminui potest, neque ipse Pontifex illam potest a se abdicare.

19. Concordia.—Quarta excusatio erat concordia, seu pactum. Solent enim judices laici nonnullas actiones suas contra immunitatem defendere titulo alieujus antiquæ concordiae inter reges et Prælatos seu clericum transactæ, per quam concessum fuerit sacerdotalibus judicibus, ut in talibus causis vel occasionibus possint circa materiam ecclesiasticam jurisdictionem suam exercere. Atque hunc titulum

video in hoc regno saepius allegari, et in regno Galliae scimus facta esse similia concordata tempore Leonis X et regis Francisci, quæ Rebuffus commentatur; et in regno Hispaniæ et aliis desiderari scimus, propter vitandas perturbationes, quæ inter judices sacerdotes et ecclesiasticos oriri solent.

20. *Concordia inter ecclesiasticos et sacerdotes, absque Pontificis auctoritate facta, immunitati nihil derogat.*—Circa hanc autem excusationem imprimis advertendum est, quotiescumque hujusmodi concordia inter Episcopos, etiam in Concilio provinciali vel nationali congregatos, et reges aut senatus fit, nihil posse contra privilegium immunitatis operari, nisi auctoritate Summi Pontificis facta sit, vel confirmetur. Ita notavit Rebuff., in Concordat., tit. de Approbat. Conventor., verb. *Firmitatem*. Ratio autem est manifesta ex superiori dictis, quia Episcoporum consensus non est sufficiens ad dispensandum, vel privilegium concedendum quo exemptio clericorum minuatur, quia non potest inferior dispensare, nec privilegium concedere in jure superioris, praesertim quando est tam grave, et tam difficile ac raram habet dispensationem, ut de hoc privilegio supra ostendimus; ergo solum potest consensus Prælatorum operari per modum renunciationis, per quam aliqua ex parte cedant juri suo; at vero talis renunciatio propria auctoritate facta non vallet, ut supra etiam est probatum; ergo neque illa concordia potest esse valida sola auctoritate Prælatorum, etiam cum inferiori clero facta.

21. Nec refert quod illa non videatur esse simplex renunciatio, sed quasi commutatio per modum transactionis facta, tum quia per illam transactionem nunquam suppletur in ipsa exemptione diminutio, quæ in aliqua parte materiæ illius fit, neque novum aliquod jus ecclesiastico statui conceditur, sed ordinarie solet ab ecclesiasticis fieri ad fugiendam vexationem, vel majus malum vitandum, ut sacerdotes, illa parte contenti, majorem non usurpent. Quod certe fieri non debet contra commune bonum; si autem fiat, sive cum culpa, ex humano timore, sive sine culpa, ob necessitatem, ad vitandum majus malum, erit potius tolerantia quædam vel permission, quam concordia, etiamsi fortasse hoc nomine appelletur; et ideo non reddit tutos in conscientia judices sacerdotes, donec consensus Pontificis legitime informati accedit. Tum etiam quia, licet fingamus aliquid juris vel commodi tri-

bui clero a principibus secularibus, ut in aliqua parte exemptionis cedant juri suo, etiam hoc modo non potest privatus Prælatus seu particularis cleru in aliquo renunciare exemptioni, quasi alienando partem ejus per modum commutationis, tum quia hoc etiam est contra commune bonum status clericalis, in cuius favorem exemptione est introducta; tum etiam quia illa est quædam alienatio jurisdictionis ecclesiasticae, quæ inter bona ecclesiastica merito computatur, ideoque sub prohibitione alienandi bona ecclesiastica merito comprehenditur.

22. *Concordia per Pontificem confirmata valida est et sufficiens.*—Accidente autem Summi Pontificis consensu, non est dubium quin talis concordia valida sit, et consequenter sufficientem excusationem inducat. Est autem considerandum, hanc Papæ approbationem habere vim cujusdam privilegii, ut in simili notavit Rebuffus, in Concordatis, tit. de Approbatione Conventor., verb. *Privilegiis*, et est per se manifestum, quia etiam si fiat per modum contractus, est peculiaris favor permanens et stabilis, cum aliqua juris communis derogatione. Quocirca excusatio hec ad sequentem de privilegio revocatur, unde sicut ibi dicemus, privilegium revocari posse per Pontificem, ita de qualibet simili concordia ab eodem confirmata dicendum est. Nam, licet, post confirmationem, Prælati non possint a concordia recedere sua auctoritate, saltem invitis principibus secularibus, nihilominus Pontifex semper potest concordiam revocare, quia, ut dixi, confirmatio illa fuit quasi privilegii cujusdam concessio, quod revocari semper posse infra ostendam.

23. *Solutio.* — Contra hoc vero allegari potest Rebuffus, in Concordatis, tit. de Collat., qui in præfatione quæstionem proponit, in §. *Insuper quæro, an altera pars valeat derogare his concordatis.* Et respondet non posse, loquiturque de concordatis inter regem et Papam. Et licet plura argumenta multiplicet, unicum tamen est fundamentum, scilicet, quia concordia illa transit in contractum, contractus autem obligat partes, etiam si supremi Principes sint. Sed imprimis casus, in quo versamur, videtur esse diversus, quia quando concordia fit inter Episcopos vel clerum alicujus regni et Regem, illi tantum sunt partes contrahentes; Pontifex autem, confirmingo pactum, solum se gerit ut supremus dispensator, favorem et gratiam concedens utriusque parti contrahenti tanquam sibi subditæ et inferio-

ri, et ideo illam revocare potest. Quia vero instari potest, quod Papa in illo casu conjungitur clero tanquam caput, ejus consensum consummando, ideoque etiam considerari tanquam partem contrahentem, propterea ultrius addo, resolutionem illam Rebuffi aliqua declaratione vel limitatione indigere. Nam ex parte regis simpliciter verum est, non posse recedere a concordatis cum Papa, tum propter dictam rationem contractus; tum etiam quia si aliquid privilegii vel favoris ex parte regis ibi intercedit, concessum est a subdito suo superiori, et ideo est irrevocabile.

24. At vero ex parte Pontificis distinctione opus est, quia per nullum contractum potest Pontifex a se abdicare supremam potestatem spiritualem, quam habet ad disponendum ea, quae ad convenientem Ecclesiae gubernationem pertinent, et ideo, licet sine causa non possit a concordia recedere, si tamen postea, mutatis rebus, vel melius perspectis, concordiam Ecclesiae nocivam, aut non convenientem esse intellexerit, potest, revocando illam, ab ea recedere, compensando alteri parti damnum, si quod fortasse ratione pacti praecedentis patiatur. Sic enim rex temporalis potest privilegium subdito suo concessum, etiamsi in vim pacti transierit, revocare, dummodo et ad commune bonum regni expiat, et subdito restituat vel recompensem, quod ille in pacto praecedente ex parte sua contulerat, ut in materia de privilegiis latius traditum est. Quae generalis doctrina speciali ratione locum habet in hac materia exemptionis, tum quia, ut dicebam, quidquid in ea remittitur ex parte Ecclesiae, ordinarie liberaliter sine compensatione conceditur; tum maxime quia in hac exemptione magis est attendendum bonum commune status clericalis, quam ulla conventio cum temporali principe facta, quia necesse est ut semper habeat illam conditionem tacite inclusam, Dummodo in praejudicium aut vexationem, vel vilipendium statutus clericalis non cedat, aut aliquando sequatur ex concordia. Intercedente ergo simili causa, poterit revocari; sine illa vero non poterit, saltem licite; si tamen fiat, existimo factum tenere propter supremam spiritualem potestatem Papae, quae in se minui non potest, ut de privilegio statim dicam.

25. *Concordia inferioris Prælati cum laico absque jurisdictionis concessionē facta valida est.* — Oportet autem advertere haec omnia dicta esse, quando per concordiam conceditur laicis jurisdictione aliqua in clericos contra pri-

vilegium clericale; nam si non concedatur jurisdictione, sed tantum executio aliqua, vel ministerium facti, non repugnat fieri per concordiam inter Prælatum et judicem secularrem, ut hic possit tanquam organum et minister Episcopi, actiones aliquas circa clericos exercere, quae ad impedienda peccata, vel perturbationes publicas, convenientes judicentur, et sine indecentia clericalis status fieri possint, ut sunt, eripere arma clericis noctu illa portantibus, vel comprehendere clericum in gravi delicto inventum, et similes. Hoc supponunt omnes auctores supra allegati, approbantes hujusmodi consuetudines, quae maxime ex hoc pacto, saltem implicite, honestantur. Sumitur etiam ex juribus, quae declarant esse in Episcopis potestatem ad utendum hoc modo auxilio brachii sacerdotalis, cap. *Si vero*, de Sentent. excom., cum aliis supra allegatis. Non enim est necesse ut id semper faciant per speciale mandatum. Cur enim non poterunt etiam id efficere per aliquam generalem commissionem, seu concordiam, quatenus necessitas suæ dioecesis juxta suum prudens arbitrium postulaverit? Intelligendum autem est, hujusmodi licentiam seu concordiam, semper esse debere ab arbitrio Prælatorum Ecclesiae dependentem; non enim possunt jus aliquod in hac parte tribuere sacerdotalibus iudicibus, sed tantum illis ut instrumentis uti; instrumentum autem semper pendet a motione principalis agentis. Et ideo semper est integrum Prælati prohibere iudicibus, ne tales actiones exequantur, non obstante quacunque licentia, vel pretensa concordia, etiam consuetudine firmata; ita enim expedit ad bonum regimen status clericalis, et oppositum exemptioni clericorum multum derogaret.

26. Ultimo possunt ad hoc caput reduci nonnulli actus jurisdictionis, quos principes sacerdotes interdum circa ecclesiasticos exercent, non ut ecclesiastici sunt, sed ut sunt feudatarii, vel ministri civiles talium principum. Sic diximus supra causas feudales tractari debere eorum domino feudi, etiam si supra ecclesiastica bona et contra clericos moveantur. Sic etiam Card. Bellarminus, contra Barclaium, cap. 35, defendit factum imperatoris Caroli V, qui Hermannum, Colonensem Episcopum, ad suum tribunal vocavit. Quod factum objiciebat Barelarius; Cardinalis autem respondebat, verum quidem id esse, sed vocasse illum ut principem imperii. Sic etiam solent reges visitare ministros suos et consiliarios, etiam si clerici sint, eosque temporalibus poe-

nis pecuniarii, vel depositione ab officio sacerdotali, et aliis similibus clericis non indecentibus, punire. Quam consuetudinem defendunt Aufrerius, in Clem. *Pastoralis*, de Officio Ordin., reg. 1, fallent. 27 et 28; et Chasse-neus, in Consuetud. Burgundiæ, v. *Justitiae*. Videtur autem in hoc maxime fundari, quod tunc non considerantur, nisi sub respectu mere civili, et maxime quia sub ea conditione et pacto ad ea ministeria et officia regia acceptantur, quod pactum nec contra exemptionem ecclesiasticam, nec contra decentiam ecclesiastici status, aut bonos mores esse videotur, et ita est communis usu receptum et approbatum.

27. *Privilegium*. — Quinta excusatio erat privilegium, de quo in jure, ut sic dicam, nulla est difficultas, in facto autem est maxima. Duo enim, quæ ad jus pertinent, certa sunt: unum est, posse hoc privilegium concedi saltem a Summo Pontifice, quod supra probatum est, et ex usu satis constat. Alterum est, hoc privilegium posse a Pontifice revocari, ac proinde, ut ad legitimam excusationem proposit, non satis esse quod semel concessum seu obtentum sit, sed oportere ut perseveret non revocatum. Atque hoc etiam ex usu Pontificum constat; frequenter enim hujusmodi privilegia revocant per illa verba: *Non obstantibus quibuscumque privilegiis*, ut patet ex cap. *Clericis*, § ult., de Immunitat. eccl., in 6, ubi id notat Glossa; et ex cap. *Quia saepe*, de Election., in 6, cum similibus, et singulis annis fit talis revocatio in Bulla Cœnæ Domini. Ratio vero est, quia privilegium concessum subdito revocari potest ab eodem superiore, vel ejus successore, ut in lib. 8 de Legibus cum communi sententia probatum est. Hoc autem privilegium est hujusmodi, etiam si imperatori aut regibus sit concessum, quia datur a Papa, qui est superior illis, et ideo semper potest illud revocare.

28. In quo est considerandum, quod Papa, quando hoc privilegium concedit imperatori, verbi gratia, non solum remittit aliquid de privilegio quod fortasse ab ipso imperatore acceperat, seu committit illi aliquam partem jurisdictionis temporalis directæ, quam ipse imperator Ecclesiæ prius donaverat, sed etiam ex parte aufert privilegium a Christo ipso concessum, et derogat juri canonico, et in illo dispensat per suam spiritualem potestatem. Quia ergo haec potestas semper in Pontifice manet integra (quia per nullum privilegium potest supremam jurisdictionem a se abdicare,

ut cum Aretino, Baldo, et aliis recte notavit Felinus, in cap. *Norvit*, de Judiciis, num. 8), ideo semper potest Papa privilegium suum revocare, prohibendo sacerdotali principi usum temporalis potestatis circa clericum, seu reducendo jus divinum et canonicum ad suum integrum statum, ablata dispensatione. Imo etiam potest jurisdictionem temporalem directam, quam per suum privilegium principi sacerdotali commiserat, ab illo auferre, et ad se revocare, seu in se solo retinere. Quia verisimilium est, non illam a se abstulisse, sed quasi delegasse, et commisso dependenter semper a voluntate sua, quia non amplius necessarium est ad finem privilegii, nec ex verbis ejus plus colligi potest. Hoc autem privilegium, quod minuit immunitatem, odiosum est, et ideo restiegendum, ut illo modo intelligatur concessum, quo immunitati minus præjudicet, ideoque semper est revocabile, et per potestatem spiritualem, per quam Pontifex potest clericos eximere, et per supremam potestatem civilem, quam Pontifex nunc habet in personas et bona clericorum, quam nunquam a se abdicat, etiam si talia privilegia concedat.

29. *An aliqua privilegia contra immunitatem irrevocata subsistant*. — *Ratio dubitandi*. — Difficultas autem est, an de facto integra sint aliqua hujusmodi privilegia, vel potius omnia, quæcumque fuerunt concessa, nunc sint revocata, ideoque talis excusatio, licet de possibili justa esse possit, de facto locum non habeat. Ratio dubitandi sumitur ex Bulla Cœnæ Domini (in aliis enim antiquis juribus vel Bullis non invenitur generalis revocatio), nam in clausula 19, post prohibitas actiones contra immunitatem, adduntur in Bulla Gregorii XIII haec verba: *Etiam prætextu quorumcumque privilegiorum a Sede Apostolica ex quibusvis causis, ac sub quibuscumque temporibus et formis, in genere, vel in specie concessorum quibuscumque regibus, etc., quæ nolimus illis in aliquo suffragari, illa omnia ex nunc in irritum vocando*. Per quæ verba aperite revocantur privilegia omnia, et tot particulis additis augetur revocatio, ut omnia privilegia, et omnes modos, seu species illorum, omnemque materiam, et omnem formam, et quascumque personas comprehendere videatur. Et quamvis in posterioribus Bullis usque ad novissimam mutata sint illa verba, nihilominus eundem sensum referre videntur, nam post prohibitionem sub censura additur haec sola limitatio: *Sine*

speciali, specifica, et expressa hujus sanctæ Sedis Apostolicae licentia. Quæ exceptio extendit prohibitionem ad omnes alios casus, non obstantibus quibuscumque aliis privilegiis; nam licentia actualis et particularis in easu specifico non est proprie privilegium, sed potius dispensatio quædam, quæ a privilegio differt, ut in libro de Privilegiis dixi. Unde Navarr., in Sum., c. 27, n. 72, verba utriusque Bullæ referens, ingenue fatetur ibi esse revocata omnia privilegia; dubitat autem an possint excipi privilegia remunerativa, vel quæ sunt immemoriali consuetudine firmata; et sequitur Salzedo, in Scholiis ad practicam criminalem Bernardi Diaz, c. 55, § *Apud Gallos.* De qua exceptione statim dieam.

30. *Sententia negans.*— Nihilominus multi auctores, non solum antiqui, sed etiam moderni, utuntur hac excusatione privilegii ad aliquorum regnorum consuetudines defendendas. Ut de Hispania affirmat Bannez 2.2, q. 67, art. 1, dub. 2, concl. 6; et Menochius, de Retinend. possess., remed. 3, n. 334; et de Gallia, Aufrerius, in Clementin 4, de Offic. ordinarii, limitat. 13; et Jul. Clar., lib. 5, § ult., quæst. 6, n. 26; et de republica Veneta, Gigas, in tract. de Crimin. læsæ Majest., quoad illud crimini in particulari. Difficile autem est solidum fundamentum hujus sententiæ afferre, aut probabili modo explicare illa verba revocatoria, ut prædictum effectum in omnibus privilegiis circa talen materiam non consequantur. Fortasse autem illi auctores existimarent talia privilegia esse remuneratoria, vel immemoriali consuetudine firmata, quæ etiam Navarr. exceptit. Sed revera immerito excipiuntur ab iis verbis (præsertim ut habentur in Bulla Gregorii XIII) privilegia, quæ sunt in antiquo usu etiam immemoriali, quia, ut supra dixi, consuetudo in hac materia non addit firmitatem privilegio, cum in vi consuetudinis nullum jus inducat, ideoque immemoriale privilegium nihil speciale et proprium habet, ratione ejus sub generali revocatione et appellatione privilegiorum non comprehendatur. Quod etiam dicitur de privilegio remuneratorio, non satisfacit, tum quia sine probatione dicitur, omnia talia privilegia esse remuneratoria; tum etiam quia illa revocari possunt, ut supra dixi, et videntur satis comprehensa sub illis verbis, *ex quibus causis, ac sub quibuscumque formis ac tenoribus concessorum.*

31. *Sententia auctoris.*— Quapropter mihi valde probabile est, ex vi illorum verbo-

rum esse revocata privilegia quoad causas criminales, nam de illis tantum in illa clausula sermo est, ideoque in aliis materiis pertinentibus ad immunitatem clericorum habere poterit locum excusatio privilegii, ubi de illo satis constiterit. In criminalibus autem causis, et præsertim in capitalibus (ita enim loquitur expresse Gregorius XIII, in Bulla), videntur, ut dixi, privilegia revocata. Quia vero Sixtus V et posteriores Pontifices non ita expresse illam revocationem posuerunt, et verisimile est non sine causa illa verba mutasse, ideo non andeo damnare usum talium privilegiorum, sed hoc Apostolicæ Sedi remitto. Nam etiam Cardinalis Bellarminus, cap. 35 contra Barclainum, cum ille diceret esse in Gallia quædam delicta gravia, quæ privilegia dicuntur, ipse respondet, ideo dici privilegia, quia privilegio Sedis Apostolicae indultum est regibus Francorum, ut ea delicta cognoscere possint. Quibus verbis videtur illam excusationem non improbare, sicut illam non improbant Julius Clarus et Aufrerius, quos allegat.

32. *Defensio justa.*— Sexta et ultima excusatio est justa defensio regni aut innocentum, vel propria, et haec est valde usitata in regiis tribunalibus, quia per se, et generatim spectata, habet magnam quamdam speciem illius naturalis æquitatis, qua *rim vi repellere licet.* Nam defensio ex suo genere omnibus licita est, si necessaria sit, et debito modo fiat; unde etiam contra Papam licitam esse regibus vel Ecclesiæ in tertio libro notatum est cum Cajetan., in Opuse. de Potest. Papæ, c. 27. Idemque in hac materia de exemptione notat Victoria, Relect. 1 de Potest. Ecclesiæ, n. 8, seu proposit. 8; Covarruvias, et multi alii moderni scriptores, Hispani præsertim et Galli, ex quibus videri possunt Didacus Perez, in legem 5, tit. 1, lib. 2 Ordinamenti; et Didacus Castillo, in l. 49 Tauri, n. 3; et Matthæus, de Afflict. in Decisionib. Neapolitan., decis. 2, 24, 85 et 363. Et ex antiquis Decius, in l. Vim, ff. de Justit. et jur., n. 25; et Plattea in l. Prohibitum, C. de Jure fisci, lib. 10. Fundamentum autem est, quia illud principium: *Vim vi repellere licet*, est de primævo jure naturali, teste Isidoro, in quinto libro Etymologiar., c. 4, et refertur in cap. *Jus naturale*, distinct. 1, et confirmat D. Thom. 2. 2, quæst. 96, art. 4. Et ita illo utuntur jura canonica in cap. *Significasti*, 2, de Homicid., cap. *Si rero*, 4, de Sentent. excomm.; ergo etiam licet laicis uti illa defensione contra clericos.

33. In hac autem materia videtur hic usus maxime necessarius, quia nisi hæc defensio interdum adhibeat, sæpius innocentes gravissime opprimentur a suis proximis judicibus, vel Prælatis ecclesiasticis, quia vel omnino non possunt, vel non sine magno dispenso ad superiores Prælatos recurrere, et præsertim ad Romanam curiam longe distantem. Et addit Covarruvias signum hujus necessitatis esse, quod fere omnia catholica regna hac utuntur defensione, quod videant sine illa non posse innocentes suos defendere, cum tamen hoc ad suam conservationem, et consequenter ad officium suum pertineat. Sicut enim unusquisque homo jus habet vim vi repellendi, non solum quando fit toti corpori, sed etiam si cuilibet membro fiat, ita res publica habet potestatem ad propulsandam vim euicunque membro suo factam. Res publica autem transtulit suam potestatem et curam in regem, ideoque defensio hæc regibus specialiter commendata est, teste Hieronymo, Jerem. 22; et Isidoro, lib. 3 Sententiar., c. 53, et habentur in cap. *Regum*, et cap. *Principes*, 23, q. 5; et Augustino, ep. 50, et habetur in cap. *Maximianus*, 23, q. 3. Et idem tradit Concilium Parisiense I, sub Ludovico, p. 2, c. 2 et 3. Rex autem, per sua tribunalia regia et alios ministros, illa potestate utitur. Ergo est justa hæc excusatio, quia et actio fit legitima potestate, et non est contra exemptionem, quia non est actus jurisdictionis, seu superioris, sed defensoris; a defensione autem nullus est exemptus.

34. Quamvis autem hæc defensio habeat, ut dixi, hanc speciem naturalis æquitatis, nihilominus illam applicare ad praxim, et ad excusanda plurima facta judicum sæcularium, difficillimum profecto est. Ut autem punctum difficultatis explicemus, suppono sermonem esse de defensione quæ fit, non titulo, vel potestate jurisdictionis circa aggressorem, sed quæ fit propria auctoritate, viribus, seu potentia, supposito justo titulo dominii, vel administrationis ejus rei, quæ defenditur, ne per violentiam auferatur. Quia cum sæcularis judex non habeat jurisdictionem in clericum, non potest propter defensionem uti jurisdictione in ipsum; ergo solum facto potest adversus clericum se vel alios defendere. In quo potest notari differentia inter Prælatum ecclesiasticum et magistratum civilem; nam si magistratus inferat vim Prælato, potest Prælatus se defendere per potestatem jurisdictionis spiritualis, in qua semper est superior,

præcipiendo, interdicendo, et excommunicando; imo hic modus defensionis est illi magis proprius, quia per se non utitur gladio materiali, quamvis per laicos possit interdum illo juvari, prout necessarium vel opportunum fuerit. At vero judex laicus non potest se defendere a vi per clericum immissa, exercendo jurisdictionem in illum, quia illam non habet; oportet ergo ut sit defensio facti, qualis a privata persona fieri potest, si impetratur, etiam usque ad occisionem aggressoris, si necessaria fuerit.

35. *Duae conditiones ad hanc excusationem omnino requisitæ.* — Deinde ut habeat locum hæc excusatio, necessariæ sunt duæ illæ vulgares conditiones requisitæ ad licitum usum illius principii: *Vim vi repellere licet.* Una est, ut actualis vis ab altera parte inferatur, nam hoc ipsum imprimis supponitur in illis met verbis. Unde in præsentि, oportet ut vis sit clara et manifesta, quia contentio est inter subditum et superiorem, de quo subditus conqueri solet quod sibi vim inferat, et ideo necesse est ut sit clara et manifesta; nam si res sit dubia, semper pro superiori præsumendum est, ideoque tunc nulla potestas laica vim facere potest contra judicem, vel Prælatum ecclesiasticum, ut suum subditum defendat, quia injustam vim inferret Prælato, privando illum jure suo, quod habet in casu dubio. Neque satis erit quod potestas sæcularis probabili judicio aut suspicione ducatur, nisi certo sciat nullam esse opinionem contrariam probabilem, juxta quam possit ecclesiasticus Prælatus practice juste præcipere, vel coactionem aliquam subdito inferre, quia si ita procedat revera, practice nullam vim facit; nam speculative tantum res est dubia. Altera conditio est, ut defensio sit moderata tutelæ, ut jura et omnes Doctores declarant, ut alibi latius declaravi¹. Ad hanc ergo conditionem spectat, ut defensio per potestatem laicam necessaria sit; nam si is, qui conqueritur de suo Prælato vel de alia persona ecclesiastica coram potestate laica, possit sine gravi incommodo vel periculo æqualis vel majoris documenti, a superiori Prælato ecclesiastico defensionem postulare, profecto non inculpate se defendit a clero per laicum, nec laicus ipse juste se intromittit, neque inculpate utitur potestate sua defensiva, quia sine ratione aut justo titulo jus alterius et munus usurpat. Et ita canones non permittunt postulare auxilium sæ-

¹ Tom. 5, disp. 40. sect. 1.

cularis potestatis contra insolentias clericorum, nisi ubi per superiores Prælatos remedium adhiberi non potest, vel ab eis negligitur. Ut aperte docet Gelasius Papa, in c. *Quo ausu*, et Concilium Antioch., in cap. *Si quis Episcopus*, 23, q. 3, et Concilium Toletan. IX, in cap. *Filiis*, 16, q. 7. Supposita autem necessitate, etiam pertinet ad hanc conditionem, ut actiones ipsæ, quibus fit defensio, non excedant modum debitum, ac prudenti arbitrio moderatum.

36. *Hanc defensionem semper fere per usum jurisdictionis a laicis exerceri.* — *Cuidam evasioni obviatur.* — *Refellitur alia evasio.* — Ex his ergo principiis oritur, ut dicebam, non parva difficultas in applicatione justa istius excusationis ad casus in hac materia ocurrentes. Primo quidem quia hæc potestas, quam usurpat laici in ecclesiasticas personas vel causas, fere semper est per usum jurisdictionis, quia exercendo illius actiones, dicunt eum defendere, qui vim patitur. Nam frequentius fit hæc defensio deferendo causas clericorum vel ecclesiasticas ad tribunalia regia, ut ibi examinetur et judicetur, an judex ecclesiasticus vim inferat, neque. Hoc autem faciunt judices sacerulares causam ad se advocoando, et acta caussæ cum processu in ecclesiastico tribunali formato ad se afferri præcipiendo, et postea causam juridice examinando, ac tandem sententiā de appellatione injuste negata, vel censura male imposta, vel alia vi simili injuste illata, proferendo; hi autem omnes sunt actus jurisdictionis. Respondent anctores, qui hunc morem defendunt, tunc judicem sacerularem non judicialiter sed extrajudicialiter procedere. Sed videntur profecto verbis illudere. Quid enim est judicialiter procedere, nisi, advocata causa, illam publice examinare, et sententiam in illa cum auctoritate ferre? hæc autem facit judex sacerularis in illo articulo, in quo defensionem præbere dicit. Respondent alii non esse inconveniens, quod jurisdictione utatur in solo articulo, quem judicandum assunt, dummodo de principali causa, quæ est fundamentum controversiae, non judicet. Sed hoc etiam nihil ad excusationem confert; satis est enim, quod ille etiam articulus ad materiam ecclesiasticam pertineat, et quod ecclesiastica persona ad judicium sacerulare tanquam rea in eodem articulo deferatur. Ergo in omnibus hujusmodi casibus non servatur prima conditio ad defensionem necessaria.

37. Unde etiam deficit alia, quia non præcedit certa et manifesta violentia. Et inde fit ut

sine sufficienti causa vel occasione sub nomine defensionis usurpentur actiones, quæ revera nou pertinent ad defensionem facti, ut sic dicam, sed ad defensionem juridicam, quam potest præstare judex legitimus sua jurisdictione utendo. Unde ulterius efficitur, ut illa non possit dici defensio moderate tutelæ, neque possit fundari in solo illo principio naturali: *Vim vi repellere licet*, tum quia non fit per actionem licitam, sed per usurpatam jurisdictionem, ut ostensum est; tum etiam quia fit antequam constet certo vim inferri innocentia. Quod ex ipso facto manifestum est, quia ad hoc ipsum suam operam adhibet et se interponit judex sacerularis, ut juridice examinet an fiat vis, nece; ergo non supponit certam et evidentem violentiam; ergo non supponitur talis status causæ, seu injuriæ, in quo possit juste per solam defensionem facti vis vi repelli. Quæ ratio locum habet, quotiescumque juridice cognoscendum est de justitia vel injustitia alicuius facti ecclesiastici iudicis, vel cūjuscumque clerici. Et declaratur a contrario, nam si laicus de suo iudice sacerulari conqueratur, quod illi inferat vim, negando appellationem, vel quid simile, non patienter feret judex sacerularis ut ecclesiasticus se intromittat, et auctoritatem suam interponat, acta cause postulando sub præcepto vel censura, ad examinandum et judicandum an judex sacerularis vim faciat, neque. Neque sacerulares judices illam vocabunt defensionem in iudice ecclesiastico, sed suæ jurisdictionis usurpatiōnem; ergo eodem jure ipsi judices sacerulares respectu ecclesiasticorum censeri debent, vel certe majori. Quia majorem potestatem habet ecclesiasticus judex supra laicum, quam e contrario, ut sæpe dictum est, quia Prælatus ecclesiasticus potest judicare de peccatis omnium suarum ovium, juxta cap. *Novit*, de Judiciis, et cap. *Ex tenore*, de Foro compet., et c. *Si quis de Potentibus*, 24, q. 3. Et similiter munus defendendi innocentes magis incumbit Prælatis ecclesiasticis, quam sacerularibus magistratibus, ut notavit Glossa, in cap. *Regum*, 23, q. 5, et sumi potest ex multis decretis, 87 dist.

38. *Defensionem, spiritualis potestatis usurpationem includenter, admittendam non esse.* — Quapropter difficile videtur hunc modum defensionis admittere aut approbare tanquam justum, ex vi solius legis naturalis, qua vim vi repellere licet, quoties non supponitur evidens et manifesta violentia solo facto impedienda, non iure examinanda aut vindicanda.

Hæc enim duo in hac materia discernenda maxime sunt, ne jurisdictio pro defensione usurpetur. Poteruntque facile illa duo hoc exemplo distingui: nam rex Galliæ si videat manifestam vim et injuriam inferri innocentia subdito alterius regis, verbi gratia, Angliæ, qui ad innocentem subditum suum occidendum aggreditur, potest illi facto resistere, et innocentem defendere, vim vi repellendo. Si tamen vis non sit manifesta et evidens, neque per actionem exterius violentam inferatur, sed in judicio sibi fieri subditus alterius regis conqueratur, opusque sit judicario examine ad cognoscendum de violentia, non poterit prefecto rex Galliæ sub specie defensionis, et ex vi illius principii, *Vim vi repellere licet*, acta causæ postulare, ut de querela cognoscere et judicare valeat, ut est per se manifestum, tum ex usu et communi jure gentium; tum etiam quia si contrarium permitteretur, plurimarum perturbationum et dissensionum seminarium esset. Ergo signum est hanc posteriorem non esse defensionem, nec ex vi naturalis juris ei licere, qui jurisdictionem non habet.

39. *An predicta defensio per jus canonicum liceat.* — *Prima opinio.* — Hinc ergo nonnulli auctores, videntes fortasse illam non esse legitimam excusationem pro omnibus similibus causis vel actionibus, addiderunt excusari judices sæculares similia facientes, quia hoc est illis jure canonico concessum, ideoque non sine debita jurisdictione procedere. Unde in Bulla Coenæ, cum damnantur judices similes actus exercentes, additur: *Nisi in casibus jure concessis.* Ita sentit Covarruvias, in Practic., c. 35, n. 4, § *Cæterum in hac regia*, ubi alios auctores refert. Idem Navarr., in c. *Cum contingat*, de Rescr., remed. 1, § *Secundo infertur*; Rebuff., in comment. ad Constit. Gallie., tom. 3, tit. de Appellationibus tanquam ababus, n. 14; et in Concordat., t. ult. de Protect. concordator.; Azebedo, in lib. 1 Novæ Recopilat. legum Hispaniæ, tit. 6, l. 2. Quod autem jus canonicum hanc potestatem principibus sæcularibus vel eorum magistratis tribuerit, colligunt dicti auctores ex c. *Filiis et nepotibus*, 16, quæst. 7, quia in eo dicitur: *Si Metropolitanus talia gerat, regis hæc auribus intimare non differat.* Et simili modo allegant c. *Principes*, et c. *Regum*, c. *Administratores*, 23, q. 5, et c. *Christianis*, et c. *Petimus*, 11, quæstione prima. Item c. *Quidam Monachi*, et c. *Prolinum*, 16, q. 1, et c. *Non licuit*, dist. 17, et c. *Maximianus*, 23, quæstione tertia, et c. *Boni Principis*, 96 dist.

40. *Predicta sententia in jure canonico fundamentum non habet.* — *Satisfit juribus in oppositum adductis.* — Circa hanc autem sententiam duo mihi dicenda videntur: unum est, sententiam illam nullum in jure canonico habere fundamentum. Nam illa omnia, quæ afferuntur, sunt antiqui juris, et ideo licet aliquid simile in eis esset concessum, per noviora jura Decretalium et Bullarum Pontificum esset revocatum. Sic enim ad cap. *Filiis et nepotibus*, respondet Panormitan., in c. *Qualiter et quando*, de Judicis, ubi etiam Glossa idem sentit; et idem habet Stephanus Aufrelius, in tract. de Potest. sæcular. in ecclesiastic. ; et Azor, tom. 1, lib. 5, cap. 14, q. 2, in fine. Non existimo tamen necessarium ad revocationem antiquorum canonum recurrere, quia in nullo eorum, quæ allegantur, sermo est de potestate jurisdictionis in res vel personas ecclesiasticas, quæ laicis tribuatur. Et præsertim in cap. *Filiis*, solum dicitur, ut patronus Ecclesiæ, si viderit bona Ecclesiæ ab inferioribus clericis defraudari, moneat Episcopum; si ab ipso Episcopo, moneat Metropolitanum; si a Metropolitanu, *regiis auribus intimare non differat*; quod non oportet intelligi, ut rex jurisdictione utatur in Metropolitanum, sed ut auctoritate sua illum moneat, vel, si non satis sit, implorato Pontifice, illius auctoritate illum cohibeat, interim vero facto et potentia impedit, ne Ecclesia in bonis suis injuriam aliquam vel damnum patiat. Qui sensus et est conformis intentioni Concilii Toletani IX, cuius est illud caput, ut indicant illa verba: *Aut commonitionis honesta conventione compescant*, que licet de ipsis patronis dicta sint, nihilominus regi accommodari possunt, quatenus indicant mentem Concilii fuisse, ut unaquæque persona, ibi nominata, juxta modum statui et conditioni suæ accommodatum, remedium adhibeat. Nam si Concilium voluisse novam jurisdictionem regi in Metropolitanum tribuere, profecto clarioribus verbis id facere debuisse. Item alias potuisse tunc rex Metropolitanum in jus vocare, in carcerem mittere, et punire, quod est incredibile. Imo eenseo solius Concilii provincialis auctoritate sine approbatione Pontificis fieri non potuisse. Denique, cum Concilium aliud non declaraverit, secundum regulas juris locutum fuisse intelligendum est; regula autem juris etiam antiquioris illo Concilio est, ut qui judicium ab imperatore petierit, *honore proprio privetur: si autem Episcopale judicium ab imperatore postulaverit, nihil ei obsit*, ex

Concilio Milevitano, cap. 19, c. *Placuit*, 14, quæstione prima. Atque hic etiam sensus non displicuit Panormitano, et insinuatur etiam in marginali nota, quæ in C. Gregoriano habetur, et ex Archidiacono sumpta est.

41. Et juxta hunc sensum facillime et omnino vere intelliguntur reliqua jura allegata; in nullo enim illorum est sermo de jurisdictione, nec de actu qui illam requirat, sed de defensione, tuitione, aut auxilio quod et principes sacerdetales Ecclesiæ debent, et ecclesiastici Praelati ab illis possunt exigere. Sic Isidorus, in dicto cap. *Principes*, dixit, ipsos rationem esse reddituros Deo propter Ecclesiam, quam a Christo *tuendam* suscipiunt. Hieronymus vero, in dict. cap. *Regum*, duo de Regibus dicit, scilicet, officium eorum esse facere judicium et justitiam; et liberare de manu calumniatorum vi oppressos, et miseris, qui facilius opprimuntur a potentibus, præberc auxilium, ubi nihil in speciali dicit de clericis. Unde prior pars in suo foro et respectu subditorum intelligenda est, sub posteriori vero possunt clerici in legitimo sensu comprehendendi. Joannes autem Papa, in dicto cap. *Administratores*, solum monet magistratus sacerdetales, ut Praelatis ecclesiasticis eos monentibus, ut ad Ecclesiarum *tuitionem*, pupillorum ac viduarum *protectionem*, rapacium que refrænationem invigilent, obediant. Gelasius autem Papa, in c. *Christianis*, potius dicit *cœlestem militem*, id est, clericum, *non nisi forum suum debere sectari*, occasione quorundam clericorum, qui per regiam potestatem opprimebantur, ut in servitutem redigentur. Et ideo statim in capite sequenti duabus ecclesiasticis personis causam delegat, commendat tamen cuidam comiti, *ut si ad delegatorum judicium*, eorum adversarii *venire contempserint*, sublimitatis ejus *tuitione valentur*, *ne quid illis aut subrepicio aut inimica legis violentia necessitatis imponat*. Ubi imploratur brachium sacerdotale ad resistendum alteri laico, non ad judicandum clericum.

42. Et hoc ipsum confirmat Concilium Carthaginense III, in d. cap. *Petimus*, et extendit ad petendum auxilium a brachio sacerdotali, ad resistendum Praelato intruso et tyranno, quod his verbis moderatur et declarat: *Servata forma disciplinae non estimabitur appetitus, si a vestra charitate modeste conventus recedere detractaverit, cum fuerit, sua contumacia faciente, etiam auctoritate judicaria*, id est, sacerdotali, *conventus*. Similiter Concilium Chalcedonense, in dicto cap. *Quidam monachi*, di-

cit monachos esse cogendos per brachium sacerdotiale (utique imploratum ab ecclesiastico) ut e curia exeant. Idemque facit Gelasius Papa, in dicto cap. *Probinum*, et in dicto capit. *Non licuit*. Similiterque Augustinus, in dict. cap. *Maximianus*, solum dicit esse laudabile in Episcopo petere ab imperatore auxilium contra hostes Ecclesiæ. Denique Marcellus Papa, in dicto cap. *Boni principis*, quod ad rem pertineat, solum dicit, *boni principis esse, sacerdotes Dei honorare atque tueri*; tueri autem non est judicare, et multo minus est honora-re, quin potius contra honorem sacerdotum est, quod a laicis judicentur. Est ergo evidens in illis iuribus nihil jurisdictionis in ecclesiasticos laicis tribui.

43. *Jus canonicum dictum defensionis modum non approbare*.—Unde ulterius concluso, verisimilem non esse supra dictam excusationem, nimirum, hæc fieri a laicis, licentia seu jurisdictione eis jure communi concessa. Probatur, quia jura antiqua illam non concedunt, ut probavi, nulla enim alia referuntur; jura autem noviora non solum non concedunt, sed omnino prohibent, ut cap. *Qualiter et quando*, de Judiciis, cum similibus; maxime vero hoc convincunt verba Concilii Lateranensis sub Leone X, sess. 9, in reformatione curiae: *Cum a jure, tam divino quam humano, laicis potestas nulla in ecclesiasticas personas attributa sit, innovamus omnès constitutiones*, etc. Unde Concilium Tridentinum, sess. 25, cap. 3, *nefas dicit esse ciuiliter magistratui sacerulari, prohibere ecclesiastico judici ne quem excommunicet, aut mandare ut atam excommunicationem revocet*, etc. Et rationem hanc reddit: *Cum non ad sacerdotes, sed ad ecclesiasticos hæc cognitio pertineat*. Hujusmodi autem sunt omnes actiones, de quibus tractamus, ad quas sacerdetales judices jurisdictionem non habere, Concilium aperte tradit.

44. Denique est manifesta ratio, quia judices sacerdetales etiam in materiis spiritualibus hanc vim (ut ipsi loquuntur) per easdem actiones auferre volunt; in illis autem materiis necessaria est jurisdictione spiritualis, quæ nullo jure divino aut naturali competit laicis, et jure canonico semper a principio fuit denegata laicis talis jurisdictione, ut supra probatum est, et constat ex decretis d. 96. Et quamvis Papa de absoluta potestate eam possit illis delegare, ordinarie id non facit; ergo non est verisimile, jure communi esse datam sacerdotalibus totam jurisdictionem ecclesiasticam, quæ ad honestaudas omnes illas actiones, quas ipsi usur-

pant; necessaria est. Imo inde etiam concluditur, nullam omnino communicari, tum quia eadem est ratio totius et singularum partium; tum etiam quia si quis recte consideret, semper causa, quam isti judices ad se advocant, et de qua volunt cognoscere, ecclesiastica est, nimurum, sententia a judice ecclesiastico lata, vel aliquid simile.

45. Aliorum erasio. — Quapropter ali auctores sentientes cum praecedentibus, necessariam esse jurisdictionem ab ecclesiastico Prælato manantem, ut tales actiones juste fiant, ad privilegium Apostolicum recurrent, affirmantque in regnis catholicis, in quibus haec actiones in praxi tolerantur, esse privilegium a Pontificibus concessum ob causas justas, præsertim ad reprimendos Vicarios Episcoporum ab insolentiis (ut ait Bannez statim citantus), et ut pauperes, et minus potentes, qui saepius hanc vim patiuntur, facilius vel sine magno dispendio remedium aliquod habere possint. Atque ita de regno Galliae testatur Menochius, de Retinend. possess., remed. 3, n. 354, et indicat saepè Rebuff., in locis allegatis; et de Hispania idem affirmat Dominicus Bannez, 2. 2, q. 67, art. 1, dub. 2, concl. 6. Et in hoc regno, scimus fieri multa similia, et prætextu similis privilegii defendi, vel ratione ejusdam concordiae per Pontificem approbatæ vel concessæ, donec per Sedem Apostolicam aliud ordinetur, quod perinde est. Et revera ego etiam aliam viam non invenio, qua possint similes actiones a violatione exemptionis excusari, Quia vero pendet haec excusatio ex facto, id est, an talia privilegia sint revera his regnis vel eorum principibus concessa, et an in sua vi perseverent, fuerintve perpetua, de quibus circumstantiis mihi non constat, ideo neque approbare possum nec reprobare hujusmodi facta, sed illud Apostolicæ Sedi remitto. Solumque assero, ut principes vel magistratus civiles tuta conscientia possint hoc genus jurisdictionis exercere, necessarium esse ut de privilegio, quod est illius fundamentum, sufficientem satisque probabilem notitiam habeant, et quod a Pontificibus revocatum non sit; hac autem notitia supposita, cætera, quæ ad hanc materiam spectant, sufficienter ex principiis positis definiri posse existimo.

SUPERIORIS LIBRI SUMMA.

46. Quamvis in hoc opere, fidei catholicae causam et defensionem, potius quam mores instruendi munus assumpserim, nihilominus

in hoc quarto libro utrumque officium pro vi-ribus explere necessarium duxi. Tum ut labor noster Catholicis, quibus maxime debitores sumus, usui magis esse posset; tum etiam ut non solum hæreticorum errores refellen-do, argumentaque solvendo, sed etiam morum honestatem et aequitatem, quæ in utriusque fori ecclesiastici et civilis distinctione ac separatione cernitur, explicando, plenius regi Angliæ, ejusque Protestantibus, aliisque libertatis ecclesiasticæ inimicis, quantum in nobis est, satisfaceremus. Cum ergo in tractatu de Clericorum exemptione, seu ecclesiastica immunitate, duas controversias esse conspicerem, ad fidem unam, alteram ad mores spectantem, ita utramque pertractare curavi, ut et illius, quæ in nobis est, fidelis doctrinæ rationem redderem, et quomodo in usu et praxi servanda sit, docerem. Quam ob causam prius exemptionem ipsam ex fidei principiis ac fundamentis, hoc est, ex verbo Dei scripto, et non scripto, sed antiqua Patrum et Ecclesiæ traditione firmato, stabilire studui. Deinde immunitatem hanc ecclesiasticam non solum jure Pontificio ac Cæsareo introductam esse, verum etiam ipsi divino juri, tam veteri quam novo, imo etiam naturali valde consentaneam esse demonstravi. Quia revera neque in divino cultu reverentia debita, ac decentia, neque in ecclesiasticis moribus honestas, neque in ecclesiastica hierarchia decor, ordo, et pulchritudo sine hoc immunitatis jure ac privilegio subsistere posset. Quod ut evidentius constaret, rationem et modum quo usu et moribus talis exemptio servanda est, luculentius declaravi.

47. Quæ omnia, si rex Serenissimus Angliæ, attente ac sincere, depositoque nimio dominandi ac imperandi affectu, considerare voluerit, futurum spero, ut non tam gravata ferat, quam in sua Praefatione significat, tantam hominum et fundorum partem regum protestati et jurisdictioni subductam esse; quia neque majestas regia inde obsecuratur, sed illustrior fit, nec minuitur potentia, sed angetur. Nil enim christianum et catholicum regem ita illustrat, clarumque ac celebrem reddit, sicut integra in Deum pietas et religionis cultus; nam, ut optime dixit Cyrillus¹, ad Theodosium scribens: *Gloriosa in Deum pietas regiis honoribus immobile fundamentum est, unde subjungit, principes pietatis cultores sine labore vincere, et adversariis prævalere.* Ideo-

¹ Lib. de Recta fid. ad Theodos.

que (ut Nicephor. refert¹) idem Theodosius nihil aliud filiis, Arcadio et Honorio, moriens mandavit, quam ut veram pietatem integrum servarent, per quam et pacem habituros, et victoriam a Deo consecuturos esse sperabat. Filii autem, parenti fidem et obedientiam exhibentes (eodem Nicephoro teste), *quæcumque decessores eorum pii imperatores pro Ecclesiis statuerant, et ipsi confirmarunt, eaque firmiter servarunt, aliaque insuper Deo grata addiderunt.* Intelligebant quippe religiosi principes, prærogativas et immunitates rebus divinis concessas, non hominibus datas esse, sed Deo, a quo regnorum omnium felicitas et conservatio pendet; ac proinde, *tunc Christi dextera imperium defendi, quando Ecclesie status inconcussus servatur*², ut Leo Papa dixit. Ex quo intulit D. Thomas, lib. 2 de Regim. Princip., sub finem, regem et principem toto conatu et sollicitudine divino cultui teneri in-

cumberet; non solum quia homo, sed etiam quia dominus et rex est, et Dei vices gerit, a quo maxime peudet. Unde subdit inferius, *omnes reges, qui ad divinam reverentiam fuerunt solliciti, feliciter suum cursum consummasse; qui vero e contra, infelicem consecutos exitum fuisse.* Absit igitur a christiano rege ut ecclesiasticam libertatem, propter divinum cultum introductam, et tam divina quam humana lege sancitam, et diuturna Ecclesiae Catholice consuetudine stabilitam, et antiquorum Patrum, posteriorumque fidelium scriptorum auctoritate probatam, paucorum Novantium suasu, vel studio ac desiderio temporalem dominationem amplificandi, evertere moliantur. Id enim non gloriam, sed ignominiam ei afferet, et terrenum regnum non augebit, sed auferet sempiternum. Quod ne Jacobo Regi contingat, toto corde optamus, et obnixe peccatum ab illo, in cuius manu cor regis est, et in saniorem partem illud vertere potest, et veritatis radiis ita illustrare, ut amplius ab ipso non avertatur.

¹ Lib. 13 Histor., cap. 4.

² Epist. 25.

INDEX CAPITUM LIBRI QUINTI

DE ANTICHRISTO, GUJUS NOMEN ET PERSONAM, PER CALUMNIAM, ET INJURIAM,
FALSO PROTESTANTES PONTIFICI ATTRIBUUNT.

CAP. I. *De Antichristi nomine, ejusque varia significatione.*

CAP. II. *Utrum Antichristus proprius dictus sit homo aliquis singularis, vel sedes aliqua seu imperium.*

CAP. III. *Duabus Protestantium objectionibus ex Daniele et Paulo sumptibus contra doctrinam superioris capitum satisfit.*

CAP. IV. *Alteri objectioni ex capite 17 Apocalypsis sumptae contra eamdem resolutionem capitum secundi satisfit.*

CAP. V. *De tempore persecutionis et morte Antichristi.*

CAP. VI. *Prime objectioni regis Angliae contra doctrinam superioris capitum satisfit.*

CAP. VII. *Alteri objectioni regis Angliae ex capite 18 Apocalypsis de sumptae satisfit.*

CAP. VIII. *Tertiæ objectioni regis Angliae ex variis novi Testamenti verbis desumptæ satisfit.*

CAP. IX. *Alteri difficultati occurrendo, tempus regni Antichristi et initium ejus amplius declaratur.*

CAP. X. *Aliis duobus argumentis satisfit, et obiter nonnullæ Catholicorum opiniones de tempore Antichristi refelluntur.*

CAP. XI. *Antichristi tempore duos versos homines ad testimonium contra*

illum ferendum mittendos esse, ex capite Apocalypsis contra duas falsas Protestantium expositiones ostenditur.

CAP. XII. *Eliam et Enoch esse testes illos, qui contra Antichristum mittendi sunt, ostenditur.*

CAP. XIII. *Joannem, per duos testes, Enoch et Eliam intellexisse, conjectura, et Patrum auctoritate ostenditur.*

CAP. XIV. *Utrum ex aliis Scripturæ locis ostendi possit, Eliam et Enoch futuros esse secundi Christi adventus præcursorum et testes contra Antichristum.*

CAP. XV. *Antichristi sedem et loco et gradu longissime a Pontificis sede distare.*

CAP. XVI. *Ubi futura sit Antichristi sedes.*

CAP. XVII. *Ex descriptione personæ Antichristi, quam Paulus tradit 2 ad Thess. 2, illum Pontificis adversarium maximum, potius quam Papam, esse futurum, evidenter ostenditur.*

CAP. XVIII. *Quæ ex visionibus cap. 6 et 9 Apocalypsis rex inducit reselluntur.*

CAP. XIX. *Idem ex cap. 13 ostenditur, et omnia, quæ Rex ex illo decerpit, reselluntur.*

CAP. XX. Quæ circa 14, 15 et 16 cap. *Apocalypsis rex notat, discutuntur.*

CAP. XXI. *Ex visione capitilis 17 et sequentibus Apocalypsis novum de Antichristo errorem confutari potius quam confirmari.*

CAP. XXII. *Ex descriptione Antichristi a Daniele Propheta tradita, fabula de Antichristianismo Romano evidenter refellitur.*

Eorum, quæ in hoc libro tractantur, summa, cum apostrophe ad regem Angliæ.

LIBER QUINTUS

DE ANTICHRISTO

CUJUS NOMEN ET PERSONAM PER CALUMNIAM ET INJURIAM FALSO PROTESTANTES PONTIFICI ATTRIBUUNT.

Quoniam doctissimi nostri temporis catholique scriptores (ut interim antiquiores omittam) totam de Antichristo materiam accurate disputationarunt, eamdemque nos jam alibi pro nostra tenuitate prosecuti sumus, liber hic parum necessarius alicui videri potest, præsertim quia superioribus non ita connectitur, ut propter doctrinæ consecutionem postulari videatur. Verumtamen rex Angliæ, cui initio hujus operis respondere proposuimus, nos vel invitox laborem hunc iterum subire compellit. Ille enim in sua Praefatione post suæ fidei professionem, ad disputationem de Antichristo repente digreditur, et peculiarem eorum, quæ pro sua opinione protulit, responsionem postulat, dicens: *Id mihi maxime in votis est, ut si cui hanc meam de Antichristo conjecturam libebit refellere, singulis disputationis meæ partibus ordine respondeat; ideoque necessarium ducimus, et cum illo digredi, et singulis ejus conjecturis peculiare tribuere responsum.* Neque enim illud prætermittendum censimus, eo quod rex solis conjecturis se niti fateatur; quia in re adeo absurda, et plane incredibili, et Ecclesiæ Catholicæ nimis odiosa et perniciosa, nec conjecturæ permittendæ sunt, sed penitus extirpandæ. Quam ob causam iterum de

Antichristo disputationem texere, imo etiam, si necesse sit, eadem iterum repetere non sum veritus, dummodo, quantum in me est, omnibus, tam sapientibus quam insipientibus, satisfaciā, utrisque enim (teste Apostolo¹) debitores sumus. Ne tamen lectori molesti simus, non omnia quæ de Antichristo tractari solent, sed ea solum quæ causæ, et peculiari responsioni, quam rex postulat, inservire queant, attingemus. Et singula membra, quæ rex distinguit, singulatim etiam expendemus, non tamen eodem ordine, sed ea semper præmittemus, quæ vel evidentiora sunt, et in Scripturis clariora, vel quorum cognitio ad ea, quæ minus nota sunt, vel a prioribus pendent, aliiquid conferre posse censebimus.

CAPUT I.

DE ANTICHRISTI NOMINE, EJUSQUE VARIA SIGNIFICATIONE.

1. *Nominis etymon.* — Prius quam de re ipsa dicamus, visum est de nomine Antichristi pauca præmittere, ut omnes Protestantium technas, vel potius in Christi Vicarium contu-

¹ Rom. 4.

melias detegamus. Nomen igitur *Antichristus* græcum esse, seu a Græcis desumptum, nemo est qui nesciat. Componitur autem ab ἀντὶ et χριστός. In qua compositione certum est, Christi nomen, ut est proprium Jesu Salvatoris nostri, usurpari. Quamvis enim hoc nomen, ut ab unctione derivatum, generalius sit, et quoscumque homines per sacram aliquam unctionem in dignitate assumptos significare soleat, juxta illud : *Nolite tangere Christos meos*, Psal. 104, nihilominus Messiam, seu Christum Dominum, præsertim post ejus adventum, per antonomasiam significat, sicut etiam in lege veteri fnerat præsignificatum, ut Joannes, cap. 4, indicavit : *Scio quia Messias veniet, qui dicitur Christus*; et exposuit August., tractat. 13 et 33 in Joan.; et optime Cyrillus, cateches. 4 mystag.; Euseb., lib. 1 Histor., c. 3, et lib. 4 de Demonstrat., c. 10; et Laetan., lib. 4, c. 7, et alii, quos late retulit in tom. 1 tertiarie partis, disput. 48, seet. 2.

2. Falsa hæretorum de hoc nomine etymologia. — *Antichristus significat Christi adversarium.* — *Probatur ex Scriptura.* — Particulam vero ἀντὶ contendunt hæretici, non oppositionem, sed vicem, seu loco alterius subrogationem, in illa compositione significare, et ita Antichristum eum esse, qui se Christi vicarium appellat. Sed ducuntur profecto spiritu decipiendi simplices, saltem per nominis ineptam accomodationem. Et ideo, omissa quæstione de illa duplii significatione dictoris ἀντὶ, secundum se et generali usu Græcorum spectatæ, a nobis solum consideranda est prout in illius nominis compositionem secundum Scripturæ, Ecclesiæ et Patrum usum assumpta est. Sic ergo certum est, contrarietatem et oppositionem significare, nomenque *Antichristi*, insignem Christi hostem designare. Sumpsit enim Ecclesia vocem hanc ex Scriptura, in qua nullum aliud habet significatum. Nullibi enim reperitur hæc ipsa vox in Scriptura, nisi in epist. 1 et 2 Joannis, ibi autem aperte significat hostem Christi. Nam cum cap. 2 dixisset : *Audistis, quia Antichristus venit*, subdit inferius : *Quis est mendax, nisi is qui negat, quia Jesus est Christus? Hic est Antichristus, qui negat Patrem et Filium.* Ex quibus verbis evidenter constat, Antichristum opponi Christo, negando Jesum esse Christum, illum utique singulariter promissum, ex duplii natura in una persona divina compositum, et ipsamet divinitate et Spiritu Sancto singulariter unicum, ac proinde per antonomasiam Chris-

tum. Unde cap. 4 repetit: *Omnis spiritus, qui servit Jesum, ex Deo non est, et hic est Antichristus.* Solvere autem Jesum, nihil aliud est quam negare, Jésum esse divinitate unicum, per singularem utique unionem humanitatis ad Verbum: et hæc est summa ad Christum oppositio, ut idem Apostolus iterum, epist. 2, explicavit, dicens: *Multi seductores exierunt in mundum, qui non confidentur Jésum Christum venisse in carne, hic est seductor et Antichristus.* In Scriptura ergo non habet nomen istud alium usum. In aliis vero Scripturæ locis, in quibus non nominatur, sed describitur Antichristus, summus adversarius Christi depingitur. Nam Daniel. 9, et Matth. 24, per abominationem desolationis, Antichristum prædicti creditur, et de illo dieitur, sedem et nomen Christi usurpatum, maximamque persecutionem contra Christum in Ecclesia sua esse excitaturum. Et de eodem intelliguntur verba Christi, Joan. 5: *Ego reni in nomine Patris mei, et non accepistis me; si alius venerit nomine suo, illum accipietis.* De eodem etiam loquitur Paulus, 2 ad Thessalon. 2, ubi his nominibus illum onerat: *Homo peccati, filius perditionis, qui adversatur, et extollitur supra omne quod dicitur Deus, aut quod colitur, ita ut in templo sedeat, ostendens se tanquam sit Deus.* Et tandem ut ostendat Paulus summam oppositionem Antichristi eum Christo, adjungit: *Tunc revelabitur ille iniquus, quem Dominus Jesus interficiet spiritu oris sui, et destruet illustratione adventus sui.* Apud Danielem item et in Apocalypsi describitur Antichristus tanquam insignis Christi adversarius, ut infra videbimus.

3. Probatur ex Patribus. — Atque in hunc modum de Antichristo et nomine ejus senserunt SS. Patres, exponentes haec loca: Chrysost., Hom. 4 in Joan.; Cyrill., lib. 3 in Joan., cap. 6; et ibi Theophyl., Euth. et Beda; et late Iren., lib. 5 Contr. hæres., cap. 25; Ambr., in Psal. 43, et lib. 4 de Spiritu Sancto, c. 14; Nazianz., orat. 47, quæ inscribitur *Significatio in Ezech.*, et in Iambico inscripto: *Definitoris minus exactæ*, in fine; Ruffin., in Exposit. Symbol.; Hilar., lib. de Unit. Patris et Filii, satis a principio, si ejus est opus. Melius et certius lib. contr. Auxent., in principio: *Nominis Antichristi proprietas (inquit) est, Christo esse contrarium.* Et Hieronym., ep. 451 ad Algas., q. 41: *Ipse est enim universorum perditio, qui adversatur Christo, et ideo vocatur Antichristus.* Et hac ratione, lib. 2 contr. Jovinian., in princip.: *Quomodo dies et*

*nox misceri non possunt, ita nec justitia et ini-
quitas, peccatum et bona opera, Christus et An-
tichristus.* Augustinus, tract. 3 in ep. 4 Joan.: *Latine, ait, Antichristus contrarius est Christo,* et postea reprehendit eos, qui interpretabantur nomen Antichristi, id est, ante Christum, et inquit: *Non sic dicitur, non sic scribitur, sed
Antichristus, id est, contrarius Christo.* Et optime Damas., lib. 4, c. 27: *Non nobis, sed
Iudeis veniet; non pro Christo, sed adversus
Christum, qua etiam de causa Antichristus di-
citur.* Et in tom. 9 Operum Augustini, auctor tractatus de Antichristo sic inchoat: *De
Antichristo scire volentes, primo notabilis,
quare sic vocatus sit, ideo, scilicet, quia Christo
in omnibus contrarius erit, et Christo contra-
ria faciet.* Et licet ille tractatus non censeatur esse Augustini, auctoritatem habet, et Rabani esse creditur. Et Hugo Eterian., lib. de Regres. animar., cap. 23: *Erit (inquit de
Antichristo) homo, non Angelus, qui adversabi-
tur Christo, et membris ejus; inde Antichristus
appellantus.* Pluresque alios in sequenti capite referemus.

4. Cum ergo hæretici nec etymologiam hanc, nec significationem negare possint, quid eis prodest, mutata vocis etymologia et nova significatione ex proprio cerebro illi attributa, saltem nomine Vicarium Christi Antichristum appellare? Nam si de solo nomine in hoc contendere student, contemnendi sunt, et ad scholas grammaticorum remittendi. Si vero, sub illa specie et umbra vocis, suadere contendunt illum esse verum Antichristum sub hac propria vocis significatione, et tanquam illi adversarius, qui se Vicarium Christi, atque adeo Antichristum in alia ab eis cogitata significatione, appellat, ita ut intelligent, non quemlibet hostem Christi, sed illum qui sub nomine Vicarii ejus illi opponitur, esse Antichristum, respondemus in primis, eum, qui non per rapinam vel usurpationem se Christi Vicarium nominat, sed quia ab ipso Christo constitutus est, non esse Christi hostem, et ex hac parte non posse esse Antichristum. Deinde dicimus, illud signum Antichristi non inveniri in Scripturis, nec in illis, vel a Patribus traditum esse, niimirum, Antichristum esse oppugnaturum Christum sub specie Vicarii ejus, sed aperte usurpando ipsum Christi nomen et dignitatem. Et ideo, hac vana cogitatione et novitate omissa, per signa Antichristi in Scriptura fundata discendum est.

5. *Nominis Antichristi duplex significatio.*

— Non possum autem omittere, quin prius advertam, ex hac nominis hujus etymologia, et ex dictis testimoniis duplcam hujus vocis acceptiōem distinguendam esse. Unam propriam, aliam communem, seu translatam appellare possumus. Nam quia nomen Antichristi hominem Christi contrarium significat, per antonomasiā accipitur ut nomen proprium singularis eiusdem hominis maximi Christi et Ecclesiæ adversarii; generali autem modo, etiam de aliis Christi hostibus dicitur. Hac dupli ejus nominis acceptiōe usus est Joannes, dicta epist. 4, cap. 2, cum dixit: *Audistis quia Antichristus venit, et nunc Antichristi multi facti sunt.* Et rationem hujus posterioris significationis inferius insinuans, dicit: *Qui negat quoniam Jesus est Christus, hic est Antichristus.* Idemque fere repetit cap. 4, et in epist. 2. Et ita ex hoc loco duplcam hanc illius nominis acceptiōem adnotarunt Patres ibi, et Matt. 24, et 2 Thessal. 2, ubi Hieronym., Chrys., OEcumen. et alii. Et optime Cyprian, epist. 76, in principio, dicens, Joannem, universos, qui de Ecclesia exissent, quique contra Ecclesiam facerent, Antichristos appellare. Et infra: *Unde apparent, adversarios Domini Antichristos omnes esse;* et similia fere habet epistola septima. Et August., lib. 2 contra Adversarium legis et Prophetarum, cap. ultimo, de illo ait: *Deus verus est, in cuius templum falsus ille (id est Antichristus) sessurus est, ad quem pertinet etiam iste (ultimo legis adversarius) qui sub nomine Christi, quod est nomen Dei, hoc est, Christianum se videri volens, semper extollitur contra Christum, seque ostendit Antichristum, non unum illum majorem ceteris, sed ex his aliquem, de quibus dicit Joannes Evangelista: Nunc Antichristi multi facti sunt¹.* Eos enim dicebat hæreticos, qui temporibus Apostolorum esse jam cœperant. Iden, lib. 20 de Civitat., cap. 19. Unde etiam Hieronym., Naum 2, tractans illud 1 Petr. 5: *Adversarius vester diabolus tanquam leo, etc., subjungit: Catulus leonis Antichristus, et omnes doctrinæ perverse, etc.* Et infra: *Audistis, inquit Joannes, quia Antichristi multi sunt, tot enim Antichristi sunt, quot dogmata falsa.* Et Matt. 7, in fine, omnes, qui contra Christum sapiunt, Antichristos vocat. Quæ omnia confirmant quod diximus, Antichristum ex summa ad Christum oppositione ita esse appellatum, et inde derivatum esse nomen ad alios insigniores Christi ad-

¹ 1 Joan. 2.

versarios denotandos. Sicut etiam communius, hominem valde crudelem Neronem esse dicimus, et similem tyrannum esse Diocletianum, et magnum philosophum esse Aristotelem, et sic de aliis. De hac ergo translata significatione nulla est dubitatio; de altera vero superest cum hæreticis controversia, quam sequenti capite prosequemur.

CAPUT II.

UTRUM ANTICHRISTUS PROPRIE DICTUS SIT HOMO ALIQUIS SINGULARIS, VEL SEDES ALIQUA SEU IMPERIUM.

1. Opinio hæretorum.—Hæretici contendunt non esse singularem personam, sed seriem, vel genus personarum in aliqua sede vel imperio succendentium; quem errorem ex cogitarunt, ut Papam Antichristum esse suaderent. Hunc errorem insinuarunt Wicleph., art. 30, et Joan. Hus, art. 19, damnati in Concilio Constant., sess. 8 et 15. Clarius Luther., in cap. 49 Genes., ubi hac ratione rejecit communem sententiam asserentem, Antichristum futurum esse de tribu Dan, quam fuisse dicit diaboli inventum. Et quidam Rodolphus Gualter., in Homiliis de Antichristo, irridet eos, qui asserunt Antichristum fore certum singularem hominem. Sic etiam Beza, in 2 Thess. 2, dicit, licet Paulus loquatur de Antichristo ut de quodam homine, sub illo nihilominus intelligere totum corpus ecclesiastice tyrannidis, ita vero ut peculiarem tyrannidem declareret, nimirum Romanam. Unde concludit, manifeste hallucinatos esse, qui cumque Paulum de uno quopiam homine esse locutum intellexerunt, nisi dent quempiam qui a Pauli saeculo ad diem usque judicii superstes maneat. Denique Calvinus etiam in eodem loco, et lib. 4 de Justit., c. 7, idem supponit, cum Papam dicit esse Antichristum. Et haec sententia placuit Jacobo regi, qui solis conjecturis duci fatetur¹; quales autem illæ sint postea videbimus.

2. Veritas Catholica tenet, Antichristum singularem futurum.—*Probatur ex Scriptura.*—Veritas catholica et in fide certa est, Antichristum, proprie seu antonomastice sumptum, futurum esse singularem quemdam hominem insignem, ac peculiarem Christi adversarium. Ita docent sapientes et catholici viri, qui hac ætate contra hæreticos decertant.

runt, et hoc punctum magna diligentia et eruditione tractarunt. Et probatur breviter ex sacra Scriptura et Patribus. Et imprimis expendo locum 2 ad Thessal. 2, ubi, licet Antichristus hoc nomine non exprimatur, de illo nihilominus loqui Paulum, sancti omnes et catholici docent¹, nec hæretici negant; imo eumdem locum in contrarium inducunt, ut postea videbimus. In illo igitur loco instruit Paulus Thessalonicenses, ut non perturben tur cogitantes diem Domini, id est, ultimi iudicii, jam esse propinquum, quia necesse est ut Antichristi adventus et persecutio antecedat. Unde ait: *Neque vos seducat ullo modo, quoniam nisi venerit discessio primum, et revelatus fuerit homo peccati, filius perditionis, qui adversatur, et extollitur supra omnem quod dicitur Deus, aut quod colitur, ita ut in templo Dei sedeat, tanquam sit Deus.* Et infra: *Et tunc revelabitur ille iniquus, quem Dominus Jesus interficiet,* etc.

3. Expenduntur singula D. Pauli verba.—Profecto si verba singula attente ponderentur, non possunt proprie ac sincere intelligi, nisi de singulari ac definita persona. Quis enim thronum aliquem vel sedem regni, *hominem peccati*, aut *filium perditionis*, appellare solet? Similia enim verba non collectionem, vel successionem, sed determinatam personam in rigore significant, neque a sua propria significatione violenter et sine causa extrahenda sunt. Praesertim quia tot circumstantiis, moribus et conditionibus ille homo vestitur, et a Paulo ac prophetis describitur, ut necessario uni tantum personæ convenire debeant. Ut cum Paulus ait: *Cujus est adventus secundum operationem Satanæ in omnib[us] virtute, et signis, et prodigiis mendacibus*², et similia, quia verisimile non est in omnibus successoribus, seu regibus alicujus regni omnes illas proprietates et morum qualitates esse futuras. Accedit, Paulum non absolute *hominem*, sed cum articulo græcc, *illum hominem peccati* dixisse, ut etiam latine Ambrosius legit, et Vatablus vertit; articulus autem græcus vim habet indicandi singularem personam, ut infra ex Patribus ostendam. Imo notatione dignum est, Paulum quater repetere illum articulum, dicens: *Ille*

¹ Bellarmin., lib. 3 de Rom. Pontif.; San der., l. 8 de Visib. Monar.; Tho. Malvend., in opere de Antichr.; Joseph. Acost., in opere de Temporib. noviss.

² 2 Thess. 2.

homo peccati, ille filius perditionis, ille, qui aduersatur, etc. Et infra : *Tunc revelabitur ille iniquus.* Positus ergo est ad designandam singulariem personam, quam etiam demonstrat relativum, *cujus est adcentus, etc.* Et adhuc apertius pronomen *Ille iniquus*, cum subsequenti relativo, *quem Dominus Jesus interficiet, etc.*

4. *Probat ex Patribus.* — *Antichristus dæmon non erit.* — Atque ita hunc locum Patres intellexerunt : D. Chrysostomus, orat. 3 et 4, in illum locum, qui per comparationem ad Christum, personæ Antichristi singularitatem declarat. Nam, sicut Christus prædictus fuerat tanquam singularis homo, et data sunt certa ejus indicia, utique per signa et prodigia quæ erat facturus, ita illi opponitur Antichristus, ejusque adventus tanquam ejusdam particularis hominis prædictus, et per signa et prodigia falsa, quæ operatus est, indicatur. Ergo ita est futurus Antichristus determinata persona, sicut fuit Christus. Sic etiam Theophylact., illa verba exponens, interrogat : *Quis autem ille est? numquid Satanus? nequaquam, sed homo quispiam omnem Satanae operationem recipiens.* Idemque fere habet Theodoreto, qui antithesim inter Christum et Antichristum magis expendit, dicens, dæmonem imitari consilium Dei : *Nam sicut Deus, humana suscepta natura, nostram procuravit salutem, ita ille, cum eliget hominem qui possit omnem ejus suspicere operationem, per eum omnes homines decipere conabitur, se ipsum Christum, et Deum et hominem nominans.* Ubi solum notamus æquiparationem in hoc, quod uterque est certa et particularis persona, nam in modo est diversitas. Non enim sicut Christus est verbum in humanitate assumpta, ita erit Antichristus persona dæmonis in assumpta natura hypostaticæ, sicut quidam falso finixerunt, quos alibi impugnavimus ; solum ergo fit in hoc comparatio, quod sicut Christus fuit individuus homo, ita etiam erit Antichristus. Unde etiam ipse Theodoreto docte mutavit loquendi modum, nam de Christo dixit : *Sicut Deus humana suscepta, etc.; de dæmons autem ait : Ita ille cum eliget hominem, qui possit omnem ejus suspicere operationem;* sentiens futurum non solum specialem naturam, sed etiam particularrem personam inter alias electam a dæmons, tanquam aptam ad omnem suam pravam operationem.

5. *Alia ratio ex Theodoreto.* — Denique in eisdem verbis Theodoreti ratio alia ponderari

potest. Nam præcipua intentio Antichristi maximaque ad Christum oppositio erit, quia persuadere conabitur se esse Christum, et verum Messiam, et ostendere *tanquam sit Deus*, ut ibidem ait Paulus. Hoc autem non potest fingi de throno aliquo, aut sedentium in illo successione. Nam, sicut Christus non est prædictus, nisi ut particularis homo, ita nemo se finget Christum, nisi in sua particuliari persona. Et licet multi se finixerint Christum, nullus autem nisi in sua, et pro sua propria persona, et inter eos qui in signis, prodigiis, mendaciis, ac potentia præcellet, per antonomasiam erit Antichristus. Unde Ambrosius ibidem ait, Antichristum futurum esse *primum et summum pravorum hominum, qui se ut Deos colli voluerunt.* Recte etiam Tertullianus, lib. 5 contr. Marc., c. 16 : *Qui est (ait) homo delicti, filius perditionis, quem reuelari prius oportet ante Domini adventum, etc. Secundum nos quidem Antichristus, ut docent veteres et novæ propheticæ.*

6. *Expenduntur verba D. Joannis.* — Atque hinc Ambrosius, Chrysostomus et alii Patres, cum citatis verbis Pauli conjungunt alia Christi verba, Joan. 3 : *Ego veni in nomine Patris mei, et non accepistis me; si alius reuerit in nomine suo, illum accipietis.* In quibus manifeste constat, Christum loqui de aliqua determinata persona, quam Judæi ut Messiam suscipient. Et ita dicti Patres, et alii præcedenti capite allegati, verba illa Christi de Antichristo interpretantur. Et Augustinus, tract. 29 in Joan., exponens verba illa c. 7 : *Qui a semetipso loquitur, gloriam propriam querit,* dicit, talem futurum esse Antichristum : *Ipsum quippe annuncians Dominus, gloriam suam quæsiturum, non gloriam Patris, ait ad Judeos : Ego veni, etc.;* et Ambrosius, in Psal. 43, ait, significasse Christum illis verbis, *Judeos in Antichristum credituros, qui in ilum credere noluerunt.* Et idem habet lib. 1 de Spiritu Sancto, c. 14. Quamvis enim multi futuri essent pseudochristi, et pseudoprophetæ (ut ipse etiam prædictit, Matth. 24), quos aliqui Judæi pro Messia suscepturi essent (ut ex parte impletum legimus Actor. 5, et postea apud Eusebium, lib. 8 Histor., c. 6), nihilominus neminem Judæi ita pro Messia suscipient, sicut Antichristum, et ideo illum singulariter Christum verbis suis designasse intelligimus. Et sic etiam dixit Cyrilus Hierosolymitanus, cateches. 12 : *Judeorum liberi venientem rejecerunt, male autem venturum expectant; verum Christum negaverunt, falsum*

autem ipsi errantes recipient. Qua de re etiam Salvator vere dixit: Ego veni¹, etc. Quod autem ille falsus Christus futurus sit singularis quidam homo, et Antichristus, declarat late idem Cyrillus, catech. 45.

7. *Alia ejusdem verba ponderantur. — Probatatur idem ex articulo græco. — Praeterea hoc aperte confirmat modus loquendi Joannis, epist. 1: Et sicut audistis, quia Antichristus venit, et nunc Antichristi multi facti sunt. Nam in his verbis distinguit quemdam Antichristum singulariter prædicatum, et prædictum, a multis, per quamdam ejus participationem et translationem sic nominatis. Ergo aperte supponit illum priorem esse particularem personam. Præsertim quia illi multi Antichristi, quos Joannes dicebat jam factos, non erant multa regna aut imperia tyrannica, sed vel multi qui ex Judæis contra Christum jam insurgebant, vel plures hæretici, ut Ebion, Cerinthus, Simon Magus, vel plures etiam imperatores Romani Christianorum persecutores, ut Nero, Domitianus, ut Sancti passim exponunt; ergo etiam ille singularis Antichristus est una certa ac definita persona. Accedit, in dictis verbis, et paulo inferius, et in cap. 4, et epist. 2, ubicumque ponitur in singulari nomen *Antichristus*, poni cum articulo, &c., id est, *ille*, qui articulus vim habet designandi certam personam, et cum quadam singularitate, juxta generalem Patrum regulam, quam tradunt Epiphanius, lib. 1 Contra hæres., secta 9, et lib. 2, hæres. 56; et Chrysost., enarrat. in c. 7 Isai., ponderans non dixisse Prophetam: Ecce virgo concipiet, sed addidisse articulum ad designandam singularem et excellentem virginem; et Cyrillus, lib. 1 Joan., c. 4, circa finem, ponderans, addidisse Joannem articulum; cum dixit: In principio erat Verbum. Et Origenes, tom. 7 in Joan., circa illa verba: Prophetæ es tu?*

8. *Ex Daniele confirmatur. — Ad hanc etiam veritatem confirmandam multa argumenta desumi possunt ex locis Danielis et Apocalypsis, in quibus Antichristum prædici, et Patres docent, et hæretici non negant. Itaque Daniel, c. 7, postquam explicuit quartam bestiam esse regnum quartum, utique Romanorum, postea per decem reges dividendum, subiungit: Et alius consurget post eos, per quem omnes Patres Antichristum intelligunt, ubi Hieronymus testatur, et sequitur August., 20*

de Civit., c. 23; et D. Greg., lib. 32 Moral., c. 42, ubi particula *alius* satis demonstrat singularem personam, cuius actiones statim describit propheta satis consentaneæ ad Paulum. Et certe negari saltem non potest, in throno et imperio illius, qui contra decem reges pugnaturus est, quique tres destruet, et septem alias sibi subjiciet, futurum esse aliquem primum regem, qui contra alias insurget; necessarium ergo est illum esse certam, ac determinatam personam; ille autem erit Antichristus. Tum quia in illum specialiter conveniunt omnia, quæ ibi subjiciuntur: *Sermones contra Excelsum loquetur, Santos Altissimi conteret*, etc. Tum maxime quia tempus regni illius tam erit breve, ut in eo non sit habiturus successorem, sed in illo et cum illo sit thronus ejus extinguedus, ut ex eodem loco Danielis, et ex c. 11 et 12, et ex Apoc., c. 11, et sequentibus, et ex verbis Pauli: *Quem interficiet Dominus Jesus spiritu ori sui¹*, et ex aliis infra ostendemus.

9. *Rex ultimus apud Danielem, non fuit Mahometus aut alius tyrannus. — Hoc argumentum etiam convincit, illum ultimum regem per cornu parvum significatum non fuisse Mahometum (ut aliqui voluerunt), neque alium similem tyrannum. Unde etiam potest haec veritas confirmari ex circumstantiis temporis, loci, originis, bellorum, et aliis similibus, cum quibus describitur Antichristus venturus in allegatis Scripturæ locis, quæ postea tractaturi sumus; non enim potest singularis persona evidentius designari, quam per circumstantias hujusmodi, vel (ut cum dialecticis loquamur) per collectionem proprietatum, quæ non nisi in unum et particulare individuum convenire possint; ita autem Antichristus describitur in Scriptura; negari ergo non potest quin particularis persona futurus sit.*

10. *Iterum veritas auctoritate Patrum robatur. — Denique de Antichristo singulariter prædicto a Daniele, Paulo, et Joanne Evangelista, omnes antiquissimi Patres, qui de illo scripsierunt, ubique supponunt esse futurum singularem hominem, cuius genus, mores et alias proprias circumstantias describunt. Ut constat ex his, quæ tradunt Irenæus, lib. 5 Cont. hæres., cap. 25; Hypolit., orat. de Consummat. mundi; Ephrem, tract. de Antichrist., in tom. 4; Cyrill. Hierosolymitan., cateches. 45; Ambr., lib. 10, in c. 21 Lucæ, ubi tres numerat Antichristos, Diabolum,*

¹ Joan. 5.

¹ 2 Thess. 2.

Arium et omnes haereticos similes, et singularem et famosum Antichristum, qui persecuturus est Ecclesiam in fine mundi. Sic etiam depingit Antichristum Lactantius, lib. 7 Divin. inst., c. 16, 17, 18, et 19, concludit : *Hic est autem qui vocatur Antichristus, sed se ipse Christum mentietur, et contra verum dini- cabit.* Similiaque repetit in Epitom. Institution., cap^o 11, et eodem modo loquitur Hug. Eterian., dict. lib. de Regres. animar., cap. 23; Prosper, in Dimidio tempor., a c. 6 usque ad 16; praesertim vero Hieronym., Daniel. 7, dicens : *Putamus Antichristum unum esse de hominibus, in quo totus Satanus habitaturus sit.* Idem supponit epist. 151 ad Algasi., q. 1, ubi late ita exponit locum Pauli ad Thessalonicenses. Idemque habet Theodoretus, in eisdem locis Danielis et Pauli. Et similiter Chrysostomus, orat. 3 in 2 ad Thessalonicenses, ait, Antichristum non esse futurum ipsum Satanam, sed hominem quemdam suscipientem omnem ejus operationem. Ubi eadem verba habet Theophyl. dicens : *Non erit Satanus, sed homo quispiam.* Cyprianus etiam, lib. 3 ad Quirin., c. 118, de Antichristo exponit illud Isai. 14 : *Hic homo qui concitat terram, supponens profecto futurum particularem hominem.*

11. Augustinus, 20 de Civit., cap. 19 : *Nulli (inquit) dubium est, eum de Antichristo ista dixisse, dieque judicii. Hunc enim appellat diem Domini, et ait non esse venturum, nisi ille prior venerit, quem refugam vocat, utique a Domino Deo.* Quod si de omnibus impiis merito dici potest, quanto magis de isto. Et infra tractans locum Joannis, ait : *Sicut ante finem exierunt multi haeretici de medio Ecclesiae, quos multos dicit Antichristos, ita omnes tunc inde exhibunt, qui non ad Christum, sed ad illum novissimum Antichristum pertinebunt.* Et c. 23, ita etiam exponens Daniele mait, *Antichristi aduersus Ecclesiam futurum særissimum regnum, licet exiguo spatio temporis sustinendum, donec Dei ultimo judicio regnum Sancti accipient sempiternum; qui non dormitans haec legit, dubitare non sinitur.* Præterea idem docet Gregorius, lib. 14 Moral., capit. 11, ubi Antichristum dicit, futurum esse caput omnium iniquorum ; et quæ in c. 9 Job dicuntur, ita intelligi de unoquoque iniquo, ut referri quoque debeant ad ipsum specialiter caput iniquorum. Et lib. 31, c. 12 : *Antiquus hostis, ait, illum perditum hominem ingredietur, qui specialiter Antichristus nuncupatur.* Ac denique Damascenus, lib. 4 de Fide, c. 27 : *Omnis, ait, qui Christum non constitetur, Antichristus est. Cæ-*

terum peculiari ac præcipuo modo Antichristus ille dicitur, qui sub mundi catastrophen venturus est.

CAPUT III.

DUABUS PROTESTANTIBUS OBJECTIONIBUS, EX DA-
NIELLE ET PAULO SUMPTIS, CONTRA DOCTRINAM
SUPERIORIS CAPITIS SATISFIT.

1. *Sinistra Bezae interpretatio in Danielem.* — Quoniam si Antichristus una singularis persona futura est, evanescit haereticorum phantasia, quod in throno Apostolicæ Sedis Antichristus sedeat, conantur veritatem, ex Scripturis demonstratam, eisdem Scripturis impugnare. Et primo objicit Beza locum Dan. 7, ubi per quatuor bestias quatuor regna significata sunt ; singula autem illorum regnum multo tempore durarunt, et plures reges habuerunt, qui per singulas bestias significati fuerunt, et eodem modo dicuntur ibidem decem cornua quartæ bestiæ esse decem reges, quos non oportet esse singulas personas, sed plurium seriem in unius regni sede ; ergo eadem ratione dicendum est de regno Antichristi, quod per cornu parvum significatur, non esse unum tantum hominem, sed unum thronum, in quo multi per successionem sedebunt ; quorum collectio vocatur a Paulo *homo peccati*, quia erit velut unum corpus sibi succendentium tyrannorum.

2. *Responsio ad illam.* — Respondeo imprimis, dissimilem esse rationem de verborum significacione, et de representatione per figuræ vel imagines apparentium rerum, ut bestiarum vel animalium. Nam verba habent propriam significacionem quasi permanentem et communem, a qua extrahenda non sunt, nisi ubi necessitas vel sufficiens auctoritas coegerit, et maxime cavendus est sensus improprius et metaphoricus, quando ex aliis verbis, et circumstantiis in ipso contextu et sermone adjunctis, proprietas sermonis constare potest. At vero res vel imagines apparentes non habent per se stabilem significacionem, sed illam tantum, ad quam tunc, cum apparent, assumuntur seu imponuntur, quæ metaphorica seu quasi analoga est, pendetque ex voluntate seu intentione Dei revealantis, et ideo est obscurissima, et intelligi non potest, nisi ab eodem Propheta per verba declaretur, vel ex aliis Scripturæ locis significatio colligatur, vel certe postea tandem ex

effectu cognoscatur. Paulus ergo non per visiones imaginum, sed per verba locutus est de Antichristo, et talibus verbis eum indicat, ut plane de illo tanquam de una singulari persona loquatur, et mores ejus ac circumstantias ita describit, ut uni tantum, et non omnibus, qui in aliquo throno succedunt, convenire soleant.

3. *Quid Daniel sub bestiarum nomine intellexerit.* — At vero Daniel narrat futura sibi revelata, non verbis, sed sub imaginibus bestiarum. Unde utitur quidem verbis quae immediate significant bestias, et ut indicet non esse veras, sed apparentes, non absolute dicit, Prima erat leæna, sed *quasi leæna*, secunda *similis urso*, tertia *quasi pardus*; ipsæ autem bestiæ id significabant, ad quod repræsentandum per quamdam analogiam fuerant impositæ et osteusæ, et alias significationem impropriam seu translatam non habebant. Ideoque potuerunt facile repræsentare regna, et non certas personas, et e converso, pro arbitrio revelantis. Hinc ergo fit ut per bestias interdum significantur regna, interdum certæ personæ. Nam Daniel. 7, per leænam alas aquilæ habentem significatur regnum Chaldaeorum; per ursum, regnum Persarum, et Medorum; per pardum, regnum Græcorum; et per quartam bestiam, Romanorum regnum. At vero in c. 8, per arietem significatur Darius rex; per hircum, Alexander, ut ipsemet Daniel exposuit. Igitur ex repræsentatione per visionem bestiarum nullum fieri potest argumentum ad significationem verborum, nam illa variatur vel imponitur pro arbitrio revelantis; hæc vero de se fixa est et certa, nisi aliunde constet ad metaphoricum sensum transferri.

4. *Primi reges bestiarum nomine significantur.* — Adde præterea, licet per bestias significantur regna apud Danielem, c. 7, nihilominus per singulas principaliter significari primos uniuscujusque regni conditores et amplificatores, in quibus præcipue inveniuntur proprietates, quæ per tales imagines et visiones repræsentantur. Et sic leæna alata præcipue repræsentabat Nabuchodonosor, regni Chaldaeorum fundatorem, hominem ferocissimum, et libidini deditum, ut notat Hieronymus, qui etiam ait, ursum, Cyrum, majorem imperii Persarum conditorem, ob ejus duritiam et ferocitatem repræsentasse. Pardus vero alatus significabat Alexandrum, imperii Græcorum caput, qui magna fortitudine ac velocitate orbem domuit. Ita ergo per quartam

bestiam significari potuit Julius, vel Augustus Cæsar, licet probabilius videatur non fuisse significatam particularem personam, quia imperium illud in principio non monarchicum, sed aristocraticum fuit.

5. *Cornua decem, totidem reges repræsentant.* — Per decem autem cornua illius bestiæ expresse dicuntur significari decem reges, utique illi qui decem regna, in quæ imperium Romanum divident, debellatur sunt. Ita ergo per cornu parvulum rex quidem novi imperii inchoator repræsentatus est, qui non est alias nisi Antichristus, ut Hieronymus, Theodoreetus, et omnes Patres intellexerunt. Est autem differentia, quia de cæteris imperiis, vel de decem regibus non dicitur quantum throni eorum duraturi fuerint vel sint, et ideo tam ipsi fundatores quam eorum successores poterunt per illasmet imagines bestiarum, aut per decem cornua repræsentari; de imperio autem Antichristi satis significatur, tum ibi, tum aliis locis infra tractandis, brevi tempore esse duraturum, et cum suomet fundatore esse extingendum, et ideo per illud cornu parvulum ita significatur Antichristi imperium, ut etiam una tantum et singularis persona repræsentetur.

6. *Alia Bezae interpretatio in Divum Paulum.* — Secundo objiciunt Protestantes locum Pauli 2 ad Thessal. 2, dicuntque (ut supra ex Beza retuli), nisi unus homo detur, qui a temporibus Pauli usque ad diem judicii superstes maneat, non posse Antichristum esse certum aliquem singularem hominem; nam Paulus, citato loco, cum Thessalonicenses docuisset, *diem Domini* (utique ad iudicandum) nondum instare, quia *nisi venerit recessio primum, et revelatus fuerit homo peccati, non veniet dies illa*, subjungit: *Nunc quid detineat scitis, ut reveletur in suo tempore.* Nam mysterium jam operatur iniquitatis, tantum ut qui tenet nunc teneat, donec e medio fiat, et tunc revelabitur ille iniquus, quem Dominus Jesus interficiet spiritu oris sui. Duo ergo docet Paulus, scilicet Antichristum jam tunc incepisse operari suam iniquitatem, et apostasiam a Christo in fine mundi esse ab Antichristo consummandam, ipsumque esse interficiendum, et tunc diem Domini esse venturum. Hæc autem non possunt de eadem persona intelligi, quia non potest unus et idem homo operari iniquitatem tempore Pauli, et durare perseundo Ecclesiam usque ad finem sæculi, et tunc revelari, et a Christo interfici.

7. *Duplicem notionem nominis Antichristi se nescire, haeretici simulant.* — *Antichristus in typo multiplex est, unicus in persona.* — *Hæresiarchæ Antichristi dicuntur.* — Propter hoc testimonium quidam dixerunt, Neronem fuisse Antichristum, quorum sententiam infra, capit. quadragesimo tertio, tractabimus, quia illi non negabant Antichristum esse particularem personam. Illa ergo opinione omissa, Protestantes vel ignorant, vel ignorare se simulant duplicem significationem nominis Antichristi, secundo capite positam, nam ex illius ignoratione objectio facta procedit. Sieut enim dixit Joannes: *Antichristus venit, et nunc Antichristi multi facti sunt*¹, quia unus est qui singulariter praedictus est, et multi, qui ejus iniquitatem participando, illum quasi pœfigurant, et ideo nomen etiam ejus participant, ita etiam dixit Paulus, Antichristum suo tempore jam inchoasse operari iniquitatem, licet id in fine mundi sit consummandum. Errant ergo haeretici non distinguentes inter Antichristum communiter et proprie dictum, seu (quod idem est) inter Antichristum in typo et in persona. Antichristus enim in typo non est una persona, sed corpus, vel successio plurium tyrannorum nomen Christi consequentium. Proprius autem Antichristus in persona, et qui per autonomiam prophetatus est, unica est et singularis persona. De utroque autem locutus est Paulus in citato loco. Nam cum ait: *Mysterium jam operatur iniquitatis*, loquitur de Antichristo typico, quem tunc fuisse Neronem multi Patres intellexerunt, præsertim Chrysostomus ibi, et Theophyl. Et idem Chrysostomus, serm. de Eleemosyn. et collat., et Homil. de Præmiis Sanctor. ; Ambr. ibi, et Hieronym., epist. 451, ad Algasi., q. 9. Attigit Tertullian., lib. de Resurrect. carn., c. 24; et August., 20 de Civitat., c. 19, ubi incertam quidem dicit esse expositionem propter loci ambiguitatem, non tamen illam reprehendit. Addit vero aliam, quam Theodor. et Sedulius in Paulum sequuntur, scilicet, quemlibet hæresiarcham, et Christi hostem, sub illo, qui *mysterium operatur iniquitatis*², comprehendi. Quod parum ad præsens refert: omnes enim in hoc conveniunt, quod ille, qui tunc operabatur mysterium iniquitatis, non erat Antichristus, sed typus, imago, præcursor, aut insigne membrum Antichristi. Quod

ut significaret Paulus, non dixit simpliciter, Operatur iniquitatem, sed *mysterium operatur iniquitatis*, vel ipsum Neronem vocando mysterium iniquitatis, si nomen *mysterium* sit suppositum illius propositionis, et in casu nominandi positum sit, et vocetur mysterium, quia figura erat Antichristi; vel certe ipsammet persecutionem Neronis vocando mysterium iniquitatis in casu accusandi, quia Nero, persecundo Christianos, operabatur mysterium iniquitatis, id est, tyrannidem, quæ erat imago persecutionis Antichristi futuræ.

8. *Ex iisdem verbis Pauli, Beze interpretatio impugnatur.* — Unde tantum abest ut ex illo loco probetur, Antichristum proprium non esse unam certam personam, ut oppositum potius inde convincatur. Nam Paulus eviderter distinguit mysterium iniquitatis seu illum qui tunc operabatur mysterium iniquitatis ab *illo iniquo quem Dominus Jesus interficeret spiritu oris sui*. Imo inde docet Thessalonicenses, nondum instare diem judicii, quia *nondum revelatus fuerat homo peccati*¹, id est, verus et proprius Antichristus. De quo etiam subjungit: *Quid delineat, scitis, etc.*, nimirum, ne ille Antichristus veniat. Non declarat autem aperte Paulus quidnam esset, quod adventum Antichristi detineret, sed significat Thessalonicenses jam illud scisse, quia cum esset cum illis, eos jam instruxerat (ut statim subjungit) Antichristum non esse venturum, donec Romanum imperium e medio tolleretur, vel ad eum statum pervenerit, in quo per Antichristum posset omnino destrui, ut Patres exponunt. Ergo semper Paulus supponit, proprium Antichristum esse alium distinctum ab eo qui tunc operabatur mysterium iniquitatis, et de illo semper tanquam de singulari homine loquitur, ut capite præcedenti ponderavi.

9. *Regis Angliae sententia.* — Unde etiam rex Angliae, in Præfat., pag. 67, fatetur ex illo loco potius probari, *tempus, quo venturus est Antichristus, et universalis discessio futura est, non nisi longo post tempore, quo Paulus scripsit illam epistolam, futurum fuisse*. Nam hoc ipsum est quod Paulus Thessalonicensibus tradere et persuadere studebat, ex illo principio, quod Antichristus non solum nondum venerat, sed neque tam cito venturus erat, alioqui non recte conclusisset diem Domini nondum instare. Nihilominus tamen idem rex negat Antichristum esse particula-

¹ 1 Joan. 2.

² Thess. 2.

¹ 2 Thess. 2.

rem personam, quamvis non ex illo loco, sed ex alio id suadere nitatur, ut capite sequenti videbimus.

CAPUT IV.

ALTERI OBJECTIONI EX CAP. 17 APOCALYPsis SUMPTÆ CONTRA EAMDEM RESOLUTIONEM CAPITIS SECUNDI SATISFIT.

1. Objectio regis Angliæ ex Apocalypsi. — Tertio objicit rex Angliæ in Præfatione, pag. 98, ubi sic inquit: *Scorto Babylonio, quod bestiæ inequitat, sedem alicujus imperii, et successione continuatam aliquorum hominum seriem illi præsidentem, non unum aliquem designari, perspicuum est, ex forma qua diversis libri locis Antichristus ipse describitur, utique in Apocalypsi, et inducit cap. 17 ejusdem libri, in quo refert Joannes ostensam sibi esse mulierem meretricem sedentem super bestiam coccineam, plenam nominibus blasphemia, habentem capita septem, et cornua decem. De qua muliere concludit in fine capititis: Et mulier, quam vidisti, est civitas magna, quæ habet regnum super reges terræ. Ex quo rex concludit, mulierem illam non posse significare certam unius hominis personam, sed plures homines sibi continenter succedentes, quorum sedes est magna illa civitas.*

2. Responsio. — Respondeo, etiamsi regi demus civitatem illam, per mulierem significatam, esse Romam (ut ipse intendit), et septem reges per septem cornua significatos esse septem formas regiminis illius civitatis, et octavum futurum esse Antichristum, ut idem rex arbitrio suo commentatur; licet (inquam) hæc omnia gratis demus, non video unde inferre possit, cum fundamento in illo textu, Antichristum non esse unam certainam personam. Nam, licet mulier significet civitatem, in qua est aliquod imperium per bestiam repræsentatum, cum successione plurium regum, seu plurium formarum regiminis, nihilominus bestia, quæ etiam significare dicitur Antichristum, unum tyrannum unumque hominem significare poterit. Neque ex textu aliiquid induci potest, quod vel apparenter aliud indicet. Nam si forte fiat argumentum a simili, quia si mulier significat civitatem, et bestia imperium cum successione præsidentium in illa, etiam bestia, ut repræsentat Antichristum, simili modo significabit seriem tyrannorum, etc., profecto consequentia nullius momenti est. Nam hæc imaginariae representationes, seu ænigmata figuræ non sem-

per ostenduntur seu proponuntur ad significandum idem, vel eodem modo, ut per se constat.

3. Meretricis nomine, aut Roma ethnica, aut mundus intelligitur. — Addo, in illa expositione regis, in qua suam objectionem fundat, esse quidem aliqua, in quibus cum non-nullis Catholicis convenit, quæ probabilia sunt, sed incerta, alia vero esse regis propria, quæ vix aut nullo modo possunt subsistere. Nam imprimis licet probabile sit meretricem illam Romanam repræsentasse, ut exponit Hieronymi, epist. 451 ad Algasi., quæst. 11, et Tertullianus, lib. 3 contra Marci, et contra Judæos, qui non intelligunt Romanam christianam, sed ethnicanam, tamen etiam est valde probabile, non repræsentasse civitatem aliquam particularem, sed civitatem diaboli aut mundi, sicut illam Augustinus distinxit a civitate Dei, id est, totum cœtum impiorum. Quomodo etiam dixit Hieronymus, Psalm. 54, duas civitates esse in mundo, Babylonem et Hierusalem: *Per Babyloniam (inquit) intelliguntur mali.* Et hæc solet Scriptura mundum appellare. In illum enim coueniunt omnia quæ de illa muliere dicuntur, nam cum illa fornicati sunt omnes reges terræ, et ab ea inebriantur omnes qui inhabitant terram, utique tanquam terreni, et animales homines. Et cætera simili modo. Hac autem posita mulieris interpretatione, non oportet bestiam, cui insidere visa est, esse Antichristum, sed Satanam, ut multi scriptores docuerunt; diabolus enim quasi sustinet totum impiorum corpus, et ideo illi insidere dicitur; et cætera, quæ ibi dicuntur, facile diabolo accommodantur. Cum ergo diabolus vel Satanus non sit collectio personarum sibi in aliquo imperio succendentium, sed una certa singularis persona, non est necessarium bestiam illam repræsentasse, ut rex vult, continuatam personarum seriem, sed unum principem dæmoniorum, qui ad Christum ejusque Ecclesiam impugnandam satellitibus suis, tam malis angelis quam pravis hominibus, multisque tyrannis per temporum successionem utitur.

4. Bestia, qua meretrix rebebatur, Antichristi figura erat, non Antichristus. — Præterea, licet demus scortum illud Babylonium (ut rex loquitur) esse Romanam, et bestiam, cui insidet, esse Antichristum, non est necesse illum esse solum Antichristum in persona, seu verum et proprium. Sed potius dicendum est illam bestiam prius fuisse Antichristum in figura seu mysterio, tandem vero in proprium

ac verum Antichristum defecturam. Ac proinde licet demus Antichristum per bestiam repræsentatum non unum tantum hominem, sed plurium successionem postulare, nihilominus dicimus illam successionem in imperatoribus, qui malitia sua et tyrannide Antichristum præsignarunt, impleri; cum autem in vero Antichristo successio consummabitur, illum tantum esse futurum unam singularem personam. Quam vero responsio hæc sit consentanea Evangelistæ, facile intelliget, qui attente consideraverit quam apposite imperatores Romani tyrannidem exercentes in Christianos significantur per bestiam coccineam, et plenam nominibus blasphemias, hæc enim epitheta non feminæ, sed bestiæ attribui, et omnes interpres docent, et ex græco textu manifestum est. Dicitur autem coccinea, quia erat circumdata purpura et coccino, ut infra dicitur; per purpuram autem imperium significari solet, quia erat quasi proprium illius dignitatis insigne, et ad id magis explicandum dicitur etiam bestia illa circumdata inantrato auro, et lapide pretioso, et margaritis. Potest etiam dici coccinea propter sanguinem Martyrum, de quo infra dicitur: *Et vidi mulierem ebriam de sanguine Sanctorum, et de sanguine Martyrum.* Quamvis enim bestia sanguinem effunderet, et inde coccinea denominari possit, mulier tamen, id est civitas illum bibebat, eo quod inebriabatur, odio persequens Christianos, et idola colendo, propter quod etiam *mater fornicationum et abominationum terræ* ibidem appellatur.

5. Nero bestia fuit et mysterium iniquitatis in figura.—Quod autem bestia illa non solum Antichristum in persona, sed etiam in figura in sua repræsentatione complectatur, illo verbo *mysterium* a Joanne interposito satis significatum est, et explicatur optime per verba Pauli, 2 Thessalonicens. 2: *Mysterium jam operatur iniquitatis*, utique Nero, qui cœpit in Christianorum persecutione Antichristum adumbrare, ut omnes Patres exponunt. Idemque optime declarant alia verba ibi subjuncta, et sic intellecta: *Bestia, quam vidisti, fuit, et non est, et ascensura est de abyso; fuit utique in mysterio et figura, quia priusquam Joannes*

scriberet, jam Nero mysterium operabatur iniquitatis, quem multi imperatores postea imitati sunt. Non est autem in persona, sed ascendet de abyso et in interitum ibit, ut c. 14 et 13 de Antichristi persona prædictum fuerat. Denique sic etiam intelligi non incongrue possunt alia verba postea subjuncta: Et bes-

tia, quæ erat (utique in figura), et non est, id est, nondum venit, et ipsa octava est, quia est distincta persona a septem imperatoribus, qui tyrannide sua illam insignius repræsentarunt; et ideo de septem est, quia eorum imperium usurpabit, et crudelitatem augebit et consummabit; ipsa tamen in interitum vadit, quia brevi tempore regnabit, et statim condemnabitur. Ex hac ergo interpretatione, quæ valde probabilis est, potius colligitur quod, sicut imperatores septem, qui mysterium iniquitatis Antichristi operati sunt, personæ fuerunt certæ et singulares, ita et proprius Antichristus, qui post illos veniet, erit certa et singularis persona. Imo, licet priora septem capita possint ita intelligi ac exponi, ut in singulis non tantum personæ unicæ, sed aliqua successio personarum intelligatur, nihilominus octava, quæ erat et non est, erit singularis persona unica, quia brevissimo tempore durabit, et statim sine successione in interitum ibit, ut ibidem significatur.

6. *Per septem reges aliqui intelligunt bonorum persecutores in septem ætatis. — In ea opinione diabolus bestia illa est.* — Quapropter ad objectionem dissolvendam, non multum refert exponere qui sint illi septem reges, quos per septem capita bestiæ significari Angelus interpretatus est. Quomodo cumque enim illi reges intelligantur, Antichristus, qui post illos futurus est, persona erit unica et singularis, quod breviter declaro, juxta duas magis receptas expositiones. Una est multorum, qui ad explicandos septem illos reges, distinguunt septem mundi ætates: primam ab Adam usque ad diluvium; secundam, a diluvio ad Abraham; tertiam, ab Abraham usque ad David; quartam, a David usque ad Babyloniam captivitatem, et finem ejus; quintam, a fine, seu exitu populi a captivitate usque ad Christum; sextam, a Christo usque ad Antichristum; et septimam tribuunt temporibus Antichristi. Unde in prioribus sex ætatis per singulos reges intelligi dicunt omnes reges crudeles et tyrannos, qui per singulas ætates Sanctos persecuti sunt. Ex quibus regibus quinque præcesserunt seu cederunt, ut ait Joannes; unus, id est, sextus est; et aliis, id est septimus, nondum venit, utique Antichristus. De quo addit Joannes: *Et cum venerit, oportet illum brevi tempore manere, ut significet, licet priores reges non in una persona, sed in plurimum successione duarerint, quia ætates illæ diurnæ fuerunt, ultimam vero futuram esse brevissimam, et*

ideo regem, in ea regnaturum, unam tantum et singularem futuram esse personam. Juxta hanc tamen expositionem bestia, quæ statim octava esse dicitur, non intelligitur esse Antichristus, sed diabolus, qui dicitur *fuisse*, in prioribus, quia solutus erat, nunc vero in sexta ætate dicitur *non esse*, quia ligatus per Christum est, et postea dicitur *ascensurus de abyso*, quia solvetur tempore Antichristi, et in ipso veniet, et eum ipso regnabit.

7. Alii Antichristum et ejus præcursores intelligunt. — *Septem capita non significare numerum incertum.* — *Ecclesiæ persecutio-* nes, secundum alios plures. — Altera expositio supponit, per bestiam non dæmonem, sed Antichristum intelligi, vel potius imperium Romanum non absolute, et in tota sua amplitudine, sed ut operans mysterium iniquitatis, id est persecutionis Christianorum in præcursoribus Antichristi, usque ad Antichristum verum, qui omnem iniquitatem effundet. Et sic bestia illa in Neronem incepisse optime et consentanea ad Paulum intelligitur. Dicitur autem habere capita septem propter imperatores successores ejus; sub quibus aliqui putant comprehendi omnes, qui in illo imperio persecuti sunt Christianos, sive plures, sive pauciores fuerint, sumpto numero certo pro incerto, seu pro universali. Sed difficile hoc creditu est, cum Joannes distincte numeret quinque qui præcesserunt, et unum, qui est, et aliud, qui futurus est, hæc enim tam distincta computatio non fit in numero incerto. Et ideo alii proprie verba intelligunt de septem tantum imperatoribus, qui post Neronem usque ad Nervam fuerunt. Illo enim tempore Joannes vixit et prophetavit, et ideo tantum mysterium iniquitatis, quod in eo tempore, in quo scribebat, partim præcesserat, partim agebatur, partim duraturum proxime erat, commemoravit, inde vero ad Antichristum transitum fecit. Quod etiam difficile videtur. Cur enim alii ibi nou numerantur, præsertim Trajanus, qui eodem fere tempore, et vivente Joanne, acerbissime Christianos vexavit? Unde addi potest, per septem reges intelligi posse aliquos insigniores Christi persecutores, qui inter ethnicos imperatores Romanos fuerunt, et typi fuerunt Antichristi. Quamvis enim Ecclesiæ persecutio variis modis numerentur, nihilominus sub aliqua non contemnenda consideratione ad eum numerum reduci possunt, qui illi visioni accommodari possit. Severus enim Sulpitius, libr. 2 Sacr.

Hist., novem tantum numerat Ecclesiæ persecutio-nes, illas a Nerone inchoando. Alii vero ab eodem principio numerant decem, teste Augustino, lib. 18 de Civit., c. 51. Unde aliquam ponit Sulpitius, quæ in narratione Augustini omittitur, et e converso; quare facile possemus nos illa ad septem vel octo reduce-re. Augustinus autem non putat esse inchoandum a Nerone, nec sistendum in Diocletiano, ut alii faciunt, et ideo in multo majori numero esse putat, eumque esse incertum, et pro varietate temporum multiplicari.

8. Nero primus Christianorum persecutor. — *Post Neronem alii Ecclesiam persecuti.* — Sed quidquid sit de re ipsa in se, et nude spectata, in ordine ad locum Joannis, quem tractamus, non sine causa dicitur Neronem fuisse primum Christi persecutorem, quia Joannes non de omnibus Christi hostibus, sed de Antichristo et præcursoribus ejus loquitur, et fortasse non absolute et simpliciter de omnibus; sed de his super quos Romanum imperium, vel Romana civitas insidebat. Inter hos autem Nero fuit primus, qui post Christum publico edicto contra Christum bellum movit, propter quod de illo singulariter dixit Paulus: *Mysterium jam operatur iniquitatis*, de quo mysterio etiam Joannes loqui videtur, ut dixi, ideoque merito ille reputatur initium et quasi fundamentum Antichristianismi mystici in Romano imperio. Post illum vero numerat Joannes alios septem, in quibus eos numerare et intelligere probabile est, qui novarum persecutionum Christianorum capita fuerunt. Nam, ut dixit Optat, lib. 3 adversus Parmenian. : *Tunc nova persecutio Christianorum in Romano imperio facta esse censemur, cum publico imperatorum edicto nova aliqua ratione Christiani dixerati sunt*; ideoque non omnes, qui persecutionem ab uno inceptam continuarunt, inter persecutores et Antichristos mysticos distinctorum numerantur, sed illi soli qui vel novis modis et edictis persecutionem innovarunt, vel qui eam, quæ jam cessaverat, redintegrarunt. Sic post Neronem inter persecutores numeratur Domitianus, et post hunc Trajanus, licet inter eos alii intercesserint, et sic possunt alii numerari, ut Marcus Aurelius, Decius, Diocletianus, Julianus Apostata, vel alius similis.

9. Ratio dubitandi in contrarium. — *Responso.* — Obstant vero maxime huic expositioni verba Joannis, ubi de illis septem regibus ait: *Quinque ceciderunt, unus est, et alius*

nondum venit; significat enim Joannes his verbis, quando illa scribebat, quinque ex septem illis præcessisse, et sextum actu imperasse; quod si ita est, non poterunt in illo numero computari imperatores, qui post Joannem fuerunt, ut Decius, Diocletianus et alii. Posset tamen quis dicere Joannem locutum esse propheticō more de re futura, partim ut præterita, vel præsenti, partim ut futura, diversis respectibus in ordine ad imperium Christianum. Ita ut cecidisse dicat Joannes illos quinque præcipios Christi hostes, qui ante christianos imperatores, id est ante Constantinum, Ecclesiam persecuti sunt, quales probabilit̄ existimari possunt primi quinque illi qui proxime post Neronem imperarunt, scilicet Galba, Vespasianus, Titus, Domitianus et Nerva. Prætermis- sis Othonē et Vitellio, quorum propter temporis brevitatē non habetur ratio; et non computato Nerone, quia necesse non est ut in illo numero comprehendatur. Sextus vero, qui additur tanquam præsens, non male intelligi potest Licinius, qui statim in principio imperii christiani tempore Constantini gravissime Christianos persecutus est, teste Eusebio, in Vita Constant., lib. 1, c. 4, et lib. 2, c. 1, et in Histor., lib. 10, c. 9.

10. *Juliani persecutio gravissima.* — Alter vero, qui venturus postea dicitur, non immerito Julianus Apostata intelligi potest, in quem recte convenit illud, quod Joannes subjugit: *Oportet illum breve tempus manere,* et fuit ultimus imperator Romanus, qui Christianum ipsum et Christianum nomen persecutus est. Nam, licet multi alii imperatores hæretici Ecclesiam Catholicam impugnaverint, ut Constans et Valens, Constantinus Copronymus, et similes, illi tamen non contra Christianum apertum bellum moverunt, sed sub nomine christiano veros Christianos insequebantur. Aliorum vero persecutorum Ecclesiae (licet plurimi in variis regnis et sectis fuerint) hic ratio non habetur, quia (ut dixi) solum de Romano imperio Joannes loquebatur. Verumtamen hæc omnia incerta esse fatemur, quia non certa verborum expositione, sed sola conjectura et humana accommodatione nituntur; ea tamen solum proponimus, ut ostendamus, quocumque modo probabili locus ille exponatur, ex illo non colligi, octavum illum regem, per quem Antichristus designatur, esse corpus aliquod tyrannorum, aut seriem regum sibi succendentium, sed futurum esse certum et singularem hominem,

sicut fuit Nero, vel Diocletianus, et alii imperatores ibi designati.

11. *Rex Angliæ per septem capita septem formas regiminis Romæ intelligit.* — At vero rex Angliæ, his expositionibus non contentus, novam invenit, vel a suis Protestantibus didicit, ad hoc solum inventam, ut ad Apostolicam Sedem revelationem illam Joannis accommodent. Ait enim, septem reges non esse personas certas, nec imperatores Romanos, sed varias formas regiminis, quæ in civitate Romana a principio ejus usque ad ejus destructionem erunt, quas dicit esse septem, et illas intelligi per septem capita bestiæ, seu per septem reges, quos per septem capita significari Evangelista declaravit: *Nam Romæ (inquit) reges primo fuerunt, deinde exactis regibus, consules, dictatores, decemviri, tribuni militum. Sexta erat, quo tempore Joannes conscripsit Apocalypsim, Cæsarum Imperatorum; septima, quæ nondum venerat, et exquo tempore erat duratura, Ecclesiastica est Episcoporum, quæ translationem imperii Roma Constantinopolim subsecuta est. Licet illorum regimen (ait) imperatoribus quodammodo fuit subordinatum.* Et infra addit, octavam esse Antichristum, quod multis verbis declarat, dicens, illum esse regimen eorumdem Episcoporum Romanorum, quod post annos 276 in eadem sede subsecutum est, utique a tempore Bonifacii III, ut inferius expresse dicit. Quæ omnia sine ulla probatione, sola dicendi auctoritate producit.

12. *Ostenditur sine fundamento hæc effungi.* — *Livius, decad. 3, libro tertio, circa medium.* — Priusquam de hac interpretatione judicium proferam, Tertulliani animadversionem præmittendam censui, in lib. de Præscript., cap. 47, dicentis: *Tantum veritati obstrebit adulter sensus, quantum et corruptor stylus. Varie præsumptiones necessario nolunt agnoscere ea, per quæ revincuntur, et his nituntur quæ ex falso composuerunt, et quæ de ambiguitate coepерunt.* Hoc igitur in tota hac causa de Antichristo Protestantibus accidisse, vel ex hac ipsa interpretatione, quam tractamus, manifestum est. Nam imprimis in tota illa auctoritatem aliquam fide dignam vel probationem requirimus, nam si hæc omnia tanquam dictata propheticō spiritu vendieantur, oportet ut talis propheticus spiritus aliquo signo, vel modo sufficiente nobis ostendatur; si autem sola humana conjectura, vel potius accommodatione inventa sunt, qua facilitate dicuntur, contemnuntur. Non solum

quia humana conjectura plerumque fallitur, sed etiam quia illa nullum habet in textu fundamentum, neque in verbis. Imo rex illa detorquet ad peregrinam et inusitatam significationem. Qualis est, quod per quinque reges, qui præcesserunt seu cediderunt, intelligentur reges, consules, dictatores, decemviri, et tribuni Romanæ civitatis; et ideo nullus, ante Novatores, illos reges ita intellexit. Deinde immerito illa quinque membra numerantur ut quinque regimina illius civitatis inter se distincta, et sibi succendentia. Nam consules, ex quo incooperunt, semper durarunt, et ordinarium regimen tenuerunt, usque ad imperatores. Nunquam enim ante Julium Cæsarem fuit in illa républica ordinarium regimen per dictatorem, sed solum per occasionem interdum ad breve tempus creabatur. Ideoque consules et dictatores dici non possunt multiplicasse reges, vel ordinaria regimina in illa civitate. Nam consules semper durabant, etiam si, suborta gravi occasione, dictator crearetur, qui post sex menses, vel cessante occasione, cessabat. Unde solum erat quasi extraordinarium subsidium, non regiminis mutatio.

13. *Idem dicendum de decemviris.* — Eademque vel major ratio in decemviris militat, quia decemviri non ad mutantum reipublice regimen, sed tantum legum ferendarum causa creati sunt, et interim potestatem regendi rempublicam acceperunt. Intra triennium autem cessarunt, et partem illius temporis non tam reipublicæ auctoritate quam vi obtinuerunt. Hoc autem non satis est ut illa censeatur peculiaris regni, seu regiminis mutatio, alioqui etiam numeranda esset mutatio regni in interregnum, in quo centum gubernabant, unus tamen cæteris præerat, cuius imperium tantum per quinque durabat dies, et ita vi-cissim inter se per anni circuitum sortiebantur. Nam hæc ratio gubernandi non minus a regno distat, quam decemviratus a consulatu, nec minori tempore interregnum, quam decemviratus duravit. Tandem eadem fere ratio in tribunis militum urget. Quia propter tribunorum militum adjectionem, nihil de regimine vel de consulibus immutatum est, sed illi sunt adjuncti de plebe tribuni militum, solo fere nomine a consulibus distincti. Est ergo illa distinctio et numeratio non solum voluntaria, sed etiam in rigore falsa, et contra veritatem historiæ conficta. Nam omnes historiæ tantum tria tempora Romanæ gubernationis usque ad Constantinum distinguunt,

regum, consulum et imperatorum; nam cæteræ dignitæ tantum fuerunt quasi comitantes tempora consulum, eosque in diversis occasionibus vel ministeriis adjuvantes.

14. *Pontificum regimen non significatur a Joanne per regem qui septimus dicitur.* — *Contrarium repugnat verbis Apocalypsis.* — Præterea incredibile est et intolerabile, quod septimus rex esse dicatur, regimen Sanctorum Pontificum a Sylvestro usque ad Bonifacium III. Eo enim tempore non fuit Roma meretrix fornicaria, per idolorum cultum, nec habebat in manu sua populum plenum abominatione, sed doctrinæ, fidei et sanctitatis. Nam, licet fortasse plures idolorum cultores in ea invenirentur, civitas ipsa in Christum credebat, et verum Deum adorabat, et quatenus talis erat Pontificum humeris insidiebat. Ideoque Pontificum regimen, quod eo tempore fuit, dici non potest esse unum ex illis septem capitibus; præsertim cum Johannes dicat, bestiam illam coccineam plenam esse nominibus blasphemie, cui meretrix magna insidebat. Impium ergo est cogitare, hestiam illam, ut fornicationum fundamentum seu fulcimentum, esse in illo capite repræsentatam aliqua ex parte, seu quoad unum caput fuisse Sanctorum Pontificum regimen, vel (quod perinde est) hoc Pontificium regnum unum ex illis septem capitibus bestiae fuisse. Praeterquam quod immerito diceretur de illo septimo rege, oportere illum brevi tempore manere, si 270 annis duravit, nam, licet comparatione sequentium illud regimen sit minus diuturnum, absolute et in se non potest dici breve. Et præsertim quia comparatione præcedentium fuit diuturnius, quam primorum regum Romanorum, qui septem tantum fuerunt, et juxta receptam sententiam ad summum annis 240 durarunt, et ab initio consulum usque ad initium imperii Augusti solum 478 anni transierunt, juxta communiorum computationem. Unde si ille numerus annorum in tria regna dividatur, ut rex vult, quodlibet eorum longe breviori tempore duravit, quam regnum illud Sanctorum Pontificum, quod rex septimum facit; cur ergo de illo potius quam de omnibus præcedentibus dictum fuisse, oportere illum brevi tempore manere? Neque omittam advertere, falsum omnino esse, quod rex obiter, et quasi aliud agens, interponit, regimen illorum Pontificum imperatoribus fuisse subordinatum, contrarium enim in superioribus ostendit.

15. A tempore Bonifacii nihil ex antiqua fide immutatum. — Denique quod supponit, regimen Pontificium seu Romanorum Episcoporum a tempore Bonifacii III adeo fuisse diversum a regimine superiorum Pontificum, ut ex Christiano factum sit Antichristianum, dogma hæreticum est, et impia Protestantium ac mera impostura, contra omnem historiam; imo contra experientiam usque ad hodiernum diem. Nam eadem fides, quæ in prioribus fuit, in Bonifacio III et successoribus ejus perseveravit, et primatum, quem idem Bonifacius habere voluit, et professus est, non per rapinam usurpavit, sed a suis prædecessoribus (ut sic dicam) hæreditavit; eumdem enim illi exercuerunt et tutati sunt, ut in superioribus demonstratum est, neque in ulla re alia substantiale discrimen regiminiis ecclesiastici ostendi potest. Est ergo vana illa distinctio regiminum in Romana Sede, et consequenter tota expositio regis, totaque calumnia Antichristianismi Romanis Episcopis imposita evanescit. Ac tandem evidenter convincitur, ex dicto loco Iohannis non colligi, Antichristum esse seriem plurium hominum in eodem regno, sed potius contrarium indicari, nimirum, illum futurum esse aliquem singularem hominem, licet ex aliis Scripturæ locis id evidentius comprobetur.

CAPUT V.

DE TEMPORE PERSECUTIONIS ET MORTIS ANTICHRISTI.

1. Per singula procedendum. — Quamvis ex sola proprietate nominis Antichristi, et certitudine ac singularitate personæ ejus, evidensissimum sit, ineptissime ad thronum Romanæ Sedis applicari ea, quæ de Antichristo prædicta sunt, nibilominus, quia rex Angliæ contrarium nititur saltem conjecturis ostendere, discurrendo per tria capita, ad quæ revelationes de Antichristo factas reduceit, scilicet, ad tempus adventus ejus, sedem ejus, et descriptionem personæ ejus, operæ pretium existinamus singula ponderare, et in omnibus ostendere, non solum conjecturam probabilem, ad id quod intenditur, inde non sumi, verum potius oppositum ex singulis convinci. Incipimus autem a temporis circumstantia, quia notior et evidentior est.

2. De Antichristo quatuor predicta: ortus, regnum, persecutio, mors. — De Antichristo autem quatuor nobis prædicta sunt, scilicet,

venturum in hunc mundum, regnaturum in eo, persecutum Ecclesiam, ac tandem interficiendum esse a Christo. Hæc omnia patent: nam de adventu ejus dicitur Daniel. 7: *Ecce aliud cornu parvulum ortum est de medio eorum; de regno subditur: Porro cornua decem ipsius regni, reges decem erunt, et alius consurget post eos, et ipse potentior prioribus, et tres reges humiliabit.* De persecutione vero dicitur ibidem: *Sermones contra Excelsum loquetur, et Sanctos Altissimi conteret.* Denique de illius fine subditur: *Judicium sedebit, ut auferatur potentia, et conteratur, et dispereat usque in finem.* Et clarius Paulus, 2 Thes. 2: *Et tunc revelabitur ille iniquus, quem Dominus Jesus interficiet spiritu oris sui, et illustratione adventus sui.* Juxta hæc igitur quatuor, totidem puncta de tempore adventus inquire possunt: primum, quo tempore orietur in hoc mundo; secundum, quando regnare incipiet, et quanto tempore regnabit, antequam aperto marte contra Ecclesiam pugnare incipiat; tertium, quando incipiet persecutio Christianos, quantumve temporis in hac persecutione durabit; quartum, quando interficietur, id est, quanto tempore ante judicii diem. Et quamvis ordine temporis, ortus et regnum ejus priora futura sint, nobis tamen notiora esse possunt tempora persecutionis et mortis ejus, quia clarius sunt in Scriptura revelata, et ideo de illis prius in capite præsenti dicemus, de aliis vero duobus temporibus in sequentibus.

3. Variæ Protestantum opiniones de tempore adventus Antichristi. — *Rex Angliæ circa annum Christi sexagesimum ponit adventum Antichristi.* — Protestantes ergo varie de persecutione et fine Antichristi loquuntur: nam de initio ejus quidam dicunt ab initio Ecclesiae fuisse, ut duobus capitibus præcedentibus visum est. Alii in quadragesimum Christi annum illud initium referunt; alii in sexentesimum sexagesimum sextum, vel circa; alii circa septingentesimum; alii circa millesimum ducentesimum, ut late tractat Bellarminus, libro 3 de Romano Pontifice, cap. 3. Rex vero Angliæ eam sententiam eligere videtur, quæ initium Antichristi ponit anno circiter sexcentesimo. Dicit enim in Præfatione, pag. 98, incepisse Antichristi regnum ducentis septuaginta sex annis post translationem imperii Roma Constantinopolim per Constantinum factam, quæ, ut probabilius creditur, anno trecentesimo trigesimo Christi facta est, ex quibus, additis ducentis

septuaginta sex, efficiuntur sexcenti sex, quo tempore Bonifacius III sedit, a quo Antichristum incepisse rex affirmat. Neque ipse inter persecutionem et regnum distinguere videtur, quia sub eodem Bonifacio utrumque incepisse autumat. Imo sentit non aliter incepisse regnum Antichristi, quam inchoando persecutionem, nova dogmata cedendo, et ipsius Christi potestatem in terris usurpando. De tempore autem durationis ejusdem persecutionis, sentit non esse definitum, sed esse totum tempus futurum ab ejusdem persecutionis initio usque ad finem mundi, vel prope illum. De tempore namque mortis ipsius Antichristi, seu fine persecutionis et regni ejus, nihil etiam rex definit, sed ignorari ait quanto tempore ante diem judicii sit futurum, ut patebit ex fundamentis ejus, quæ capite sequenti expendemus.

4. Persecutio Antichristi judicii diem non multum precedet. — Probatur ex Matthæo. — *Objectio.* — *Responsio.* — *Antichristus recte dicitur abominationis, et ejus persecutio tribulatio.* — Nos autem imprimis statuimus id, quod fortasse neque rex, neque alii Protestantes negabunt, persecutionem Antichristi prope judicii diem finiendam esse, seu (quod perinde est) judicium non multo post consummatam et finitam Antichristi persecutionem, sed proxime et quasi immediate post illam futurum esse. Ita videtur aperte prædicere Christus Dominus, Matth., cap. 24 : *Statim autem post tribulationem illorum dierum sol obscurabitur, et luna non dabit lumen suum, et stellæ carent de cælo, virtutes cælorum commorabuntur, et tunc parebit signum Filii hominis in cælo, et tunc plangent omnes tribus terræ, et videbunt Filium hominis venientem in nubibus cæli cum virtute multa et maiestate.* Quæ verba evidenter describunt secundum Christi adventum ad judicium, nec de hoc fuit unquam, nec potest esse controversia. At vero tribulatio illorum dierum, de qua in eisdem verbis fit mentio, plane est tribulatio sub Antichristo futura, de qua paulo antea dixerat Dominus : *Erit enim tunc tribulatio magna, qualis non fuit ab initio mundi usque modo, neque fiet.* Dices, multos Patres et exposidores intelligere hæc verba de tribulatione Judæorum in destructione Jerusalem per Titum et Vespasianum. Nam hanc prædixerat Daniel, cap. 9, ubi prædictit futuram abominationem desolationis in templo, cuius Christus in eodem loco meminit, dicens : *Cum ergo riederitis abominationem desolationis, quæ dicta*

est a Daniele Propheta, stantem in loco sancto, qui legit intelligat, tunc qui in Judæa sunt, fugiant ad montes. Respondeo, licet probabile sit, Christum hanc etiam tribulationem voluisse comprehendere, tamen negari non posse quin simul et præcipue loquatur de tribulatione sub Antichristo futura. Tum quia hoc consonat antecedentibus et subsequentibus verbis. Discipuli enim simul de tempore destructionis templi, et consummationis sæculi, et adventus Domini ad judicandum interrogaverunt, quia forte putabant simul esse futura, et ita Christus respondet verbis, quæ ad utramque tribulationem possunt applicari, et postea tandem de judicio aperte sermonem instituit. Tum etiam quia in rigore sola tribulatio Antichristi erit ita magna, ut nulla similis antea fuerit vel futura sit postea. Et ideo de illa maxime locutus est Christus, eademque merito potest *desolatio abominationis*, id est, Antichristi. Nam, ut Irenæus recte exposuit, lib. 5, cap. 23, ipsem Antichristus *abominationis desolationis* merito vocatur. *Abominationis* quidem, quia erit homo summe abominabilis; et cognominatur *desolationis*, quia in Sanctis et Christianis incredibilem desolationem efficiet. Ergo ex verbis Christi satis colligitur, statim post finitam et consummatam tribulationem ab Antichristo Ecclesie Christi faciendam, incepturna esse signa diei judicii, et paulo post, Christum esse ad judicandum venturum. Quod ex sequentibus magis confirmabitur.

5. Tribulatio Antichristi ante ejus mortem non terminabitur. — *In quo consistat illa tribulatio.* — Addimus ergo secundo, tribulationem illam cum morte et per mortem ejusdem Antichristi, et non antea, esse terminandam; nam, licet Christus ibi hoc non expresserit, in aliis Scripturæ locis evidenter declaratur. Paulus enim, 2 ad Thessalon. 2 sic inquit : *Et tunc (id est sublato Romano imperio) revelabitur ille iniucus, quem Dominus Jesus interficiet spiritu oris sui, et destruet illustratione adventus sui, cuius est adventus secundum operationem Satanæ in omni rīlute, et signis, et prodigiis mendacibus, et in omni seductione iniquitatis.* Ex quibus verbis aperte colligitur, non destituturum Antichristum a persecutione sua, donec ab ipsomet Christo, ejusque jussu et imperio interficiatur. Nam tribulatio illa maxime consistet in coactione per tormenta, in inductione per promissiones temporales, et in seductione per portenta et falsa prodigia; ab his autem non desistet il-

le iniquus, donec a Christo interficiatur, et potentia ejus destruatur; ergo, teste Paulo, tribulatio finitur per Antichristi mortem, et non antea. Et hoc idem significavit Daniel, cap. 7, dicens, per tribulationem illam *Sanctos tradendos esse in manu Antichristi usque ad tempus, et tempora, et dimidium temporis.* Et statim subdit: *Et iudicium sedebit, ut auferatur potentia, et conteratur, et dispareat usque in finem.* In quo loco de Antichristo ad litteram loqui manifestum est, et omnes Patres et expositores catholici unanimi consensu docent. Unde idem Daniel, in cap. 8, loquens de Antiocho, dicit: *Contra Principem principum consurget, et sine manu conteretur;* quæ verba dicta etiam esse de Antichristo in persona Antiochi repræsentato, auctor est diuis Gregorius, lib. 30 Morali., cap. 12.

6. *Persecutionem Antichristi ejus morte terminandam.*—Denique Apocalyp. 19, de Antichristo, et quodam pseudopropheta ejus, qui fecit signa coram ipso, quibus seduxit eos qui acceperunt characterem bestiæ, dicitur: *Vivi missi sunt isti duo in stagnum ignis,* additur que de socii eorum: *Et cæteri occisi sunt in gladio sedentis super equum, nimirum, Christi, quem prius se vidisse Joannes narraverat.* Constat igitur finem tribulationis sub Antichristo futuræ, etiam esse futurum finem imperii et vitæ ejus. Nam, licet sit dissensio inter Catholicos, an in hoc mundo interficiendus sit propter Pauli verba, vel vivus in infernum tradendus, ut Joannes significat, vel vivus absorbendus a terra per hiatum ejus, ut intra illam conclusus ibi moriatur et sepeliatur, et anima in infernum descendat, ut ita facilius loca concilientur, hæc quæstio nihil ad rem præsentem refert; quocumque enim modo ille præsentem vitam in hoc mundo inter mortales finiat, salis nobis est non prius amisurum regnum, vel a persecutione cessatrum, quam vivere in hoc mundo desinat.

7. *Persecutio Antichristi tres annos cum semisse durabit.*—Tertio dicendum est, persecutionem illam brevi tempore esse duratram, nimirum, tribus annis cum dimidio, ac subinde totidem annis ante mortem Antichristi esse inchoandam. Ita docent Patres omnes: Irenæus, lib. 5, cap. 30; Hippolyt., de Consummat. mundi; Lactant., lib. 7, cap. 17: *Dabitur (ait) Antichristo desolare orbem terræ mensibus quadraginta et duobus.* Idem Cyrillus, cateches. 14; Chrysostomus, homil. 49 in Matthæum, in Imperfecto; Ephrem, tract. de Antichristo; Hieronym., Danielis 17

et 12, dicens: *Sanctos permittendos esse potestati Antichristi per tres annos et dimidium.* Item Augustinus, 20 de Civitate, cap. 18 et 23, dicens, *Antichristi adversus Ecclesiam savissimum regnum, exiguo spatio duraturum esse, qui vel dormitans hæc legerit, dubitare non posse.* Et statim idem tempus declarat. Idem habet Prosper in Dimidio tempor., cap. 14; et Raban., in tractatu de Antichristo, qui fertur sub nomine Augustini. Et eadem est communis sententia interpretum Daniel. 7 et 12, ubi præsertim Theodoret., et in Apocalypsi octavo et sequentibus; Victori., Primasii, Bedæ, Anselmi, Ruperti, Aret., et recentiorum.

8. *Probatur ex cap. 7 Danielis.*—Fundaturque hæc sententia primo, in verbis Daniel. 7: *Tradentur in manu ejus usque ad tempus, et tempora, et dimidium temporis.* In quibus verbis nomine *temporis* annus significatus est, ut notant ibi Hieronymus, Theodosetus, et omnes; et Augustinus, 20 de Civitate, cap. 23; et patet ex Daniel. 4: *Donec septem tempora mutantur super eum.* Et iterum: *Septem quoque tempora mutabuntur super te.* Idemque inferius repetitur. Est ergo ille usus Scripturæ maxime in illo Propheta, quem Joannes in Apocalypsi imitatus est. Item necesse est ut ibi tempus significet definitam aliquam temporis mensuram, quia alias non posset numerari; non potest autem significare horam, diem, hebdomadam, aut mensem, quia esset nimis parvum tempus; nec significat multitudinem aliquam annorum, quia esset nimia duratio contra alia loca Scripturæ. Denique tempus in motu solis præcipue conspicitur, cuius integra revolutione annum consummat, et ideo merito nomine temporis vel unius temporis significatur; quando enim incipit altera solis conversio, quasi novum tempus inchoatur, in nulla vero multitudine annorum potest tam certa ratio metaphoræ occurrere, ut nomine temporis in singulari significetur. Unde etiam intelligitur, quando dicitur *per tempus*, perinde positum esse ac si diceretur, per unum tempus, maxime cum statim additur, *et tempora.* Hoc autem plurale de duabus intelligendum est, et non de pluribus, tum quia illud sufficit ad vim vocis, cuius amplitudo coaretanda est, ne in immensum crescere et sine termino ampliari possit, quod repugnat intentioni prophetæ, et additioni dimidiis temporis, quæ statim fit, et plane indicat tempus illud stricte sumi; tum etiam quia,

ut Hieronymus et Augustinus supra notant, in hebræo ibi est numerus dualis, qui Latinis non est in usu, et ideo pluralis pro duali positus est. Igitur vox *tempora* ibi duos annos significat; sunt ergo tres anni cum dimidio.

9. *Probatur idem ex c. 12 ejusdem Prophetæ.* — *Probatur etiam ex Apocalypsi.* — Accedit (ut notat Augustinus supra) quod hoc tempus per dierum numerum ab eodem Prophetæ explicatur; sic enim ait cap. 12: *Et a tempore, quo ablatum fuerit iuge sacrificium, et posita fuerit abomination in desolationem, dies mille ducenti nonaginta.* qui efficiunt tres annos cum dimidio, et supersunt duodecim dies, quod non refert, quia non oportet dimidium annum esse præcisum, nam communis sermone dicitur annus dimidius, etiam si aliqui dies ultra sex menses supersint. Præterea Apocalypsis 12 similiter dicitur: *Postquam vidit Draco, quod projectus esset in terram, persecutus est mulierem, quæ peperit masculum, et date sunt mulieri* (id est Ecclesiæ) *alæ duæ aquilæ magna, ut volaret in desertum in locum suum, ubi alitur per tempus, et tempora, et dimidium temporis a facie serpentis.* Qui locus intelligitur ab omnibus de tempore persecutionis Antichristi in eadem illarum vocum significatione. Unde paulo antea in eodem capite per dies idem tempus declaratur, dum dicitur: *Mulier fugit in solitudinem, ubi habet locum paratum a Deo, ut ibi pascant eam diebus mille ducentis sexaginta.* Et similiter cap. 41, per dies et menses idem tempus explicatur, cum dicitur: *Civitatem sanctam calcabunt mensibus quadraginta duobus;* et de prædicatione Eliæ et Enoch subjungitur: *Et dabo duobus testibus meis, et prophetabunt diebus mille ducentis sexaginta amicti saccis.* Qui non conficiunt integros annos tres cum dimidio, desunt enim octodecim dies.

10. *Difficultas.* — *Solutio.* — Unde oritur difficultas, quia supra dictum est, hoc tempus mensium vel annorum non esse præcisum quoad dies, quia nonnullis diebus pluribus abundat; hic autem deficiunt dies; fieri tamen non potest ut in eodem mensium numero sit excessus et defectus dierum. Dicendum vero est hoc ita esse in ordine ad eundem effectum, seu ad eamdem rem quæ narratur, secus vero esse posse in ordine ad res diversas. Quocirca, quoties fit numeratio per dies, numerus dierum sine dubio est præcissus, quia hoc requirit veritas narrationis, licet non oporteat extremos dies esse comple-

tos, sed sit satis esse inchoatos. Similiter etiam narratio per menses requirit præcissum numerum quoad menses; ultimus tamen potest esse non impletus, et ideo in numero dierum non requiritur tanta præcissio. Quod si certo numero mensium addatur dimidium, tunc necesse est reliquos menses esse integros, quia dimidii mensis additio hoc requirit ad numeri mensium veritatem, et nihilominus quoad numerum dierum non requiritur tanta æqualitas; nam dimidium mensis dicitur mensis non completus, sive sit præcise dimidius, sive plures, aut pauciores dies, quam quindecim fuerint.

11. Idem ergo est cum numerantur tot anni, verbi gratia, tres, et additur dimidium, nam priores anni requiruntur integri, in dimidio autem potest esse varietas, quia non semper requiritur aut completus, aut præcissus quoad numerum dierum, et mensium integratatem. In præsenti ergo tempus persecutionis Antichristi sine dubio erit trium annorum cum semisse. Et quia in alia numeratione per dies adduntur aliqui dies ultra præcissum tempus trium annorum cum dimidio, ideo necessario sunt intelligendi illi anni quoad præcissum numerum dierum, etiam si non oporteat, ut dixi, ultimum diem integrum esse. Non est autem necesse prædicationem Eliæ et Enoch durare toto tempore, et omnibus diebus persecutionis Antichristi; poterunt enim mitti aliquot diebus post inchoatam persecutionem, vel, quod verisimilius est, occidi aliquot diebus ante mortem Antichristi, et consequenter ante finitam ejus persecutionem, et ideo licet prædicatur dicantur Elias et Enoch per tres annos, et dimidium, vel per quadraginta et duos menses, nihilominus possunt non esse integri quoad numerum dierum, licet in persecutione non solum integri sint, sed etiam aliquibus diebus abundant. Et simili modo dicitur Ecclesia in persecutione illa in desertum fugere, et ibi manere per idem tempus annorum et mensium, quia Sancti eo tempore fugient in montes, et se abscondent in solitudinem, et ibi manebunt. Fieri tamen potest ut non statim a principio se recipient in solitudinem, sed post aliquot dies ab inchoata persecutione, et ideo quoad numerum dierum illudmet tempus annorum vel mensium minus recenseatur.

12. *Duae sententiae.* — Quarto dicendum est, finem persecutionis Antichristi, et mortem ejus per solos quadraginta quinque dies

antecessuram esse diem judicii, seu diem judicii esse futurum post mensem cum dimidio a morte Antichristi. Contra hanc assertiōnē tres possunt referri sententiāe. Prima est antiqua Chilasticarū, qui dixerunt, post Antichristum debellatum regnaturum Christum cum Sanctis in hoc inferiori mundo, in summa pace et gloria terrena, per mille annos. Hanc vero sententiam omitto, quia jam est ab Ecclesia rejecta tanquam haeresis manifesta, et quia nihil ad praeſentem causam refert, et in aliis locis ex professo tractatur a Theologis, in 4, d. 43, et ab expositoribus Apocal., cap. 20, ubi videri potest Ribera, et Perer., lib. 8 in Daniel., in fine. Hac ergo omissa sententia, altera est, dicentium modram illam esse futuram per tempus septem annorum. Quia Ezechiel, cap. 38 et 39, describens persecutionem Antichristi sub nominibus Gog et Magog (ut est probabilior expositio), dicit, superato Gog, id est, Antichristo, et destructo Magog, id est, ejus exercitu, tantam esse futuram stragem inimicorum¹, tantamque pacem in populo Dei, ut post lustratam et purgatam terram per septem menses, mortuos sepeliendo, habitatores ejus per septem annos non indigeant lignis de saltu ad succendendum ignem, quia spolia ex armis inimicorum ad illum usum sufficient.

13. *Tertia sententia regis Angliae dicentis id certo sciri non posse.* — Tertia vero sententia negat posse certo sciri quanta temporis mora inter Antichristi mortem et diem judicii intercessura sit. Quam tanta exaggeratione tradit rex Angliae in Præfat., pag. 74, ut dicat, *sententiam, quam Pontificii sequuntur, tempus illud trium annorum cum dimidio, et tot dierum, proprie et ad amissim intelligendo, toti novo Testamento repugnare.* Nimurum quia in illo dies judicii ignoratus ab omnibus, et repentinus futurus praedicatur. Et alioqui si quæ sunt hac de re prophetiæ, tam sunt obscuræ propter verborum significationem variam, et sœpius metaphoricam, ut nihil certum ex eis colligi possit. Unde concludit, in loco citato sumi diem pro anno, et numerum definitum pro incerto, seu pro duratione diurna.

14. *Probatur assertio posita auctoritate Patrum.* — Nihilominus assertio posita communis est Patrum. Eam docet Hieronymus, Daniel. 44; Theodoret., orat. 10 in Daniel.;

Beda, Apocal. 8; Anselm., 2 Thessalon 2; et frequentius moderni, Bellarm., lib. 3 de Rom. Pontif., cap. 47; Ribera et Perer. supra. Probatur ex loco citato Daniel. 42, ubi, postquam dictum fuerat persecutionem Antichristi duraturam diebus 1290, statim additur: *Beatus qui expectat, et pervenit usque ad dies mille trecentos triginta quinque.* In quo numero, quadraginta quinque dies adduntur priori numero, quod non alia ratione factum intelligitur, nisi quia tot diebus, et non pluribus, differendum est judicium post finitam persecutionem. Nam quia in illis diebus peccare potest, damnari etiam ille, qui in tentatione Antichristi firmus permanserit, non potest proclamari beatus intra illum dierum numerum; qui autem pervenerit usque ad finem illorum dierum constans in eadem vita fide, pronuntiatur beatus, quia jam erit finita via, post quam peccari non poterit. Atque ita locum illum intellexerunt auctores allegati.

15. *Opinio recentiorum. — Improbatur.* — Quidam vero alii recentiores dicunt, ex illo quidem loco colligi, quadraginta quinque dies futuros ante judicium post necem Antichristi, non tamen statim post illos futurum esse judicium, quia ibi hoc non dicitur¹. Verumtamen si attente ponderetur vis illius beatificationis: *Beatus qui expectat, et pervenit usque ad dies,* ut nos illam expendimus, valde probabiliter utrumque inde colligitur. Quia nisi finitis illis diebus 1335, statim esset futurus finis mundi et judicium, non esset cur absolute beatificarentur perseverantes usque ad illum numerum dierum, quia adhuc in periculis versarentur. Et eadem ratione possent dici beati, qui perseverassent usque ad dies mille ducentos nonaginta, quia jam viceerunt Antichristi tribulationem; et e converso dici possent beatores, qui usque ad dies quatuor mille perseverarent. Non ergo sine mysterio ille præcisis numerus dierum positus est, sed quia in illo finienda sunt bella, et pericula Sanctorum in terris. Habetque hoc argumentum, ut statim dicam, magnam vim, quando tam accurate futurum tempus per dies, et numeros magnos et parvos, perfectos et imperfectos computatur; nam tunc denotatur magna præcisiónis narrationis, et quod in illo puncto mysterium aliquod sit implendum; hic autem nullum aliud cogitari potest, nisi

¹ Vide Massu., lib. 4, c. ult.; Riber., Apoc. 20, n. 13.

quod sit finis mundi futurus, seu (quod idem est) judicii dies.

16. *Opinio aliorum.*—Dicunt aliqui significari potuisse, non omnes Christi hostes et Antichristi ministros cum illo simul esse occidentos, et ideo persecutionem non esse omni ex parte finiendam in termino illorum millium ducentorum nonaginta dierum, sed per alias qua draginta quinque occidentos esse hostes Sanctorum, et ideo ex tunc beatos appellari, quia in majori tranquillitate, extinctis hostibus, Christo servire poterunt, etiam si judicium tam cito futurum non sit. Sed haec est voluntaria conjectura, et non multum probabilis. Tum quia tempus persecutionis satis praeceps numeratur Daniel. 7 et 12. Tum etiam quia non est verisimile, extincto mirabiliter Antichristo, et pseudopropheta ejus, futurum esse timorem hostium in Sanctis Ecclesiæ, aut futurum esse aliquem ministerum Antichristi, qui eos persequi audeat. Tum præterea quia Ezechiel. 39, sub nominibus Gog et Magog, ita describitur Victoria contra Antichristum, omnesque fautores ejus, Gog, Magog, ut simul ipse et omnes ejus ministri sint occidenti; sic enim dicitur: *Super montes Israel cades tu, et omnia agmina tua, et populi tui, qui sunt tecum.* Et infra: *Super faciem agri cades, et immittam ignem in Magog, et in his qui habitant in insulis confidenter.* Hæc ergo narratio illas moras non admittit, neque erunt necessariæ, cum non humano brachio, sed divina virtute et prodigiis occidentus sit, non tantum Antichristus, sed omnis etiam exercitus, omnesque fautores ejus. Ergo ratione victoriae et quietis a persecutione Antichristi, beati dici possent omnes, qui usque ad millesimum ducentesimum nonagesimum diem perseverarunt; ergo alia altiori et veriori ratione dicuntur beati, qui usque ad millesimum trecentesimum trigesimum quintum diem constantes fuerunt, utique quoniam ad finem omnium periculorum pervenerunt, et stabunt in sorte sua in finem dierum, sicut statim ibidem dicitur a Daniele. Hæc ergo expositio simplicior est, et verbis ipsis magis consona.

17. *Non obstat locus Ezechielis.*—Neque obstant verba Ezechiel 39, de septem mensibus pro sepeliendis mortuis, et septem annis pro armis hostium ad ignem consumendis, quia non sunt posita ad prædicendum futurum, sed ad exaggerandam præsentem stragem. Itaque sensus non est assertivus futurarum actionum, sed potentialis, id est, tot erunt cadave-

ra, ut pro sepeliendis illis septem menses sint necessarii, et tot armorum spolia ad foven- dum ignem, ut pro septem annis sufficere possint. Ubi etiam septem anni vel menses non certum, sed indefinitum tempus, id est, longam, et longiore moram significare pos- sunt, ut Bellarminus notavit. Eumdemque sensum videt Ribera, n. 71, et aliis testimoniis illum confirmat; nescio autem cur paulo post illi displicerit.

18. *Et si tempus certum significantur, nihil officiunt veræ sententiae.*—Adverto etiam, in- telligendo locum illum juxta corticem et proprietatem litteræ, ad summum inferri, futurum tempus septem annorum a morte Anti- christi usque ad judicium, ut eodem numero 23 Ribera tradit. Quod quidem intentioni nostræ nihil obstaret, quia satis breve est tempus illud ad concludendum nondum ve- nisse Antichristum. Verumtamen, supposito illo sensu, nullum relinquitur fundamentum illius exclusivæ, nimirum, solum per septem illos annos differendum esse judicium, saltem ex vi illius prophetiae. Quia Ezechiel tantum dicit, ignem per septem annos fovenendum esse ex spoliis armorum, non vero dicit postea non esse futurum mundum hunc inferiorem ad humanum usum ignis et lignorum, sicut est. Neque hoc posterius ex priori colligitur, sed solum post illud septennium, consumptis jam armis, necessarium fore colligere ligna, vel scindere arbores ex saltu; ergo nihil cer- tum inde colligitur, licet brevitas temporis in confuso aliunde habeatur, ut statim dicam.

19. *Dics a morte Antichristi ad judicium multi esse non possunt.*—Unde tandem addo, licet obscuritas prophetiarum, et varietas ex- positionum sufficiat, ut ante Ecclesiæ definitionem non sit certa sententia hæc de quadraginta quinque diebus, nihilominus hoc non obstat, quominus probabilius vel etiam simpliciter vera censenda sit. In quo etiam animadverto, licet non sit certum de fide, tot dies, tantumve temporis præcise sumptum interponendum esse inter finem Antichristi et diem judicii, nihilominus certissimum esse illud tempus esse satis breve, nec posse per plures annos differri. Nam Christus Dominus dixit, Matth. 24: *Statim autem post tribulationem illorum dierum sol obscurabitur;* non potest autem cum pro- prietate dici, statim post tale tempus fieri, quod fit per plures annos post finitum illud tempus; imo valde credibile fit ex his verbis, signa illa, quæ diem judicii præcedent, et

mortem Antichristi sequentur, incepitura esse ante transactos illos quadraginta quinque dies, quia hoc indicat verbum *statim*, a Christo positum; et per se est necessarium ut dies judicii in fine illorum, et post praedicta signa, vel paulo post esse possit.

CAPUT VI.

PRIMÆ OBJECTIONI REGIS ANGLIÆ CONTRA DOCTRINAM SUPERIORIS CAPITIS SATISFIT.

1. Rex Angliæ contendit regnum Antichristi longius duraturum. — Tria potissimum argumenta ex Praefatione regis colligo, quibus probare nititur, Antichristum longiori tempore esse duraturum; ipse autem nihil distinguit inter persecutionem, et regnum Antichristi, quia vel aequalis durationis illa facit, vel saltem utrumque censem longo tempore esse duraturum, et ideo etiam nos in hoc capite de illis tanquam de uno loquemur, nam postea illa accuratius distinguemus.

2. Fundamento caret. — Primum ergo argumentum sumit ex c. 13 Apocalyps., juncto 17. In priori enim ait Joannes, vidisse bestiam ascendentem de mari, habentem capita septem. Et de eadem postea subiungit: *Et vidi unum de capitibus suis quasi occisum in mortem, et plaga mortis ejus curata est.* Scenit ergo rex bestiam illam esse Romam, et vulnus illud lethale, quod accepit, esse vastationem et quasi destructionem ejus a Gotthis et Vandalis factam, et hoc vulnus curabitur, ait, *in capite, sive in rege Antichristo, qui deinde exurget, atque ad diuturnum tempus regno potietur.* Quod non aliter confirmare videtur, nisi ex consonantia alterius capitatis 17. In quo etiam Joannes narrat vidisse bestiam habentem capita septem, quae capita declarat esse reges, quibus postea octavum addit, qui *ex septem etiam est*, et qui *erat, et non est.* Qui (ut rex exponit) est Antichristus, qui regnare incipiet Romæ, postquam per operationem iniquitatis Christiana Roma plane corrupta fuerit et sinceritatem religionis amiserit. Unde quia ipse jam hoc esse completum existimat, et lethale vulnus, Romæ a Gotthis inflatum, jamdudum curatum est, et adhuc idem thronus Romæ durat, infert ipse, Antichristum, et regnum ejus multo longiori tempore quam per triennium cum dimidio esse duraturum.

3. In toto hoc argumentandi modo nullam vim rationis vel auctoritatis invenio, quia pro

libito asseritur, et sine probatione sumitur, quod propriæ opinioni deservit; nihilominus tamen istud proponimus, ne aliquid prætermittere videamur, et ut dum per occasionem hanc visionem Joannis explicnerimus, veritatem catholicam magis confirmemus. De visione igitur capitatis 13 breviter respondemus, probabile valde esse bestiam illam Antichristum repræsentasse. Nam omnia, quæ statim de illa bestia dicuntur, propria sunt Antichristi opera et signa, et quia statim introducitur alia bestia, quæ priorem prædicat, et nomen ejus adumbrat, quod omnes intelligunt de nomine Antichristi. Et ita hunc locum exposuerunt Patres antiqui, Irenæus, lib. 5, c. 28 et 30; Hypolit., orat. de Consummat. mundi, et Method., in simili orat.; Ephrem, tract. de Antichristo; Gregorius, 33 Moralium, cap. 26; Ambrosius, Rupert., Andreas, Aret., Anselmus. et alii Apocalypsim exponentes.

4. Septimæ bestiæ capita septem. — *Reges sunt Antichristi socii.* — De septem autem capitibus ejus licet varia sit expositio, tamen simplicior magisque recepta est, illa septem significare reges, ex illis decem, qui tempore Antichristi erunt, et per decem cornua apud Danielem et Joannem significantur. Nam quia ex illis decem tres interficiunt et destruentur ab Antichristo, alii vero septem illi subjiciuntur et sociabuntur, et cum illo simul regnabunt, fasces illi submittendo, ideo Antichristus dicitur habere capita septem. Unde quod additur, *unum ex his capitibus fuisse quasi occisum in mortem*, non oportet de propria persona Antichristi intelligi, hoc enim ibi non dicitur, sed quod in uno ex capitibus suis graviter vulnerabitur et curabitur. Ergo non bestia, sed unum ex capitibus ejus plagam accipiet, ipsa autem bestia curabit plagam illam, specie quidem externa, mirabili quodam modo, ita ut *admirata fuerit universa terra post bestiam*, etc. Igitur sensus est, unum ex illis septem regibus, qui Antichristo servient, fore lethaliter vulnerandum, fortasse in aliquo bello, vel proprie, et ad litteram in suo corpore vulnus lethale recipiendo, et postea subito esse ab Antichristo dæmonis arte tam mirabili modo sanandum, ut omnes rapiantur in admirationem, et Antichristum adorent. Vel certe intelligitur magis metaphorice de vulnero in statu et regno, quia aliquis ex illis regibus vincetur ab hostibus, ita ut videatur omnino destructus, et suo regno privatus, et subito ab Antichristo sum-

ma potentia curabitur, id est, restituetur in pristinum statum et regnum, hostibus superatis, ita ut omnes dicant : *Quis similis bestiae, et quis poterit pugnare cum ea?* Vel fortasse utrumque simul continget, et significatur.

5. *Aliæ ejusdem loci expositiones.* — *Non bene conjunguntur visiones capitum 17 et 13, Apocalypsis.* — Unde juxta hanc expositionem, cum infra eodem capite Antichristus vocatur *prior bestia cuius curata est plaga mortis*, intelligendum est, non in se, sed in uno ex suis capitibus. Et eodem modo, quod infra dicitur, *quæ habet plagam gladii, et rixit*, intelligendum est habere in uno ex suis sociis, qui erunt quasi membra ejus. Nisi forte ipsemet Antichristus habiturus sit septem regna, et in uno eorum recepturus sit plagam illam, quam subito restauret et curen. Quocumque autem ex his modis intelligatur, inde non colligitur diuturnitas magna in regno Antichristi, tum quia hoc totum poterit uno mense fieri ; tum etiam quia accidere poterit, antequam Antichristi persecutio incipiat, in progressu regni ejus, juxta dicenda capite nono. Et juxta hanc expositionem constat immerito conjungi visionem capitum 17 cum hac capituli 13, tum quia fortasse bestiae in utraque vise diversas res significant, ut ex supra dictis patet ; tum etiam quia, licet eundem Antichristum significant, non tamen eosdem reges, nam in c. 17 significantur septem reges, qui successive erant, ibi enim expresse dicitur quinque praecessisse, et alium esse, aliumque futurum esse. In capite autem 13, significari videntur septem reges, qui simul erunt cum Antichristo, et ita non recte inter se conjunguntur. Tum denique quia, licet ex cap. 17 colligatur diuturnitas necessaria ad illam successionem, non tamen in proprio Antichristo, et regno ejus, sed in successione tyrannorum, qui eum praecedent, eumque adumbrabunt et quasi praecurrent, ut in c. 5 declaravi.

6. *Aliqui Catholici bestiae nomine imperium Romanum intelligunt.* — Addo vero non deesse catholicos scriptores¹, qui in capite 13 bestiam illam interpretantur esse Romanum imperium, et septem illos reges esse fortasse eosdem septem, qui c. 17 per septem etiam capita bestiae repræsentantur. Quæ certe non est improbabilis sententia, cum in dicto c. 17 probabilissimum sit, bestiam illam esse Ro-

manum imperium, ut dixi c. 4, et verisimile sit in utroque loco eamdem bestiam significari; intelligendum autem hoc puto de Romano imperio ethnico et tyrannico, in illis septem capitibus repræsentato. Neque ideo excluditur communis expositio, quod illa bestia sit Antichristus, intelligitur enim non adæquate (ut sic dicam), sed quia erit præcipuum caput illius bestie. Nam Romanum imperium (ejus delecto nomine) occupabit, et prædecessorum suorum tyrannidem augebit et consummabit. Qua expositione posita, caput illud plagam mortis accipiens erit ipsemet Antichristus, qui se ipsum cum omnium admiratione subito curabit, sive plaga illa tantum fuerit verum lethale vulnus, proprie curatum, antequam mors consummaretur; sive plaga illa fuerit ipsam mors, non vera, sed ficta, et curatio fuerit etiam ficta resurrectio, ut ibi volunt Primasi., Beda, Anselmus, et nonnulli alii, et sentit Gregorius, lib. 14, epist. 3, dicens, quod veniens Antichristus mori se et resurgere simulat. Nam hoc etiam verisimile est, ut se Christum fingat, et ab illis verbis non est alienum. Ex quo etiam sensu nihil habet rex Angliæ, quo diuturnam durationem Antichristiani imperii ostendat, quia brevi tempore poterit factum illud contingere, neque in eo capite dicit S. Joannes regnaturam esse bestiam multo tempore postquam a plaga curata fuerit.

7. *Dictis faret ex parte rex Jacobus.* — Ad hanc vero expositionem videtur magna ex parte accedere Jacobus rex, quod attinet ad bestiae significationem. Nam sicut censuit, in c. 17, bestiam esse regimen, seu imperium Romanæ civitatis, ita sentire videtur bestiam capituli 13 idem imperium seu regimen significare. Unde consequenter ait, bestiam, in uno ex suis capitibus vulneratam, esse Romanum, *quæ a Gotthis lethale vulnus accepit, et postea curata est*, et deinceps in ea multo tempore regnat Antichristus. De qua interpretatione seu accommodatione, quatenus bestiam esse Urbem, vel ejus imperium aut regimen exponit, non controvertimus ; quamvis enim minus probabilis sit, non continet errorem contra fidem, et ideo id permittimus. Quod vero deinde addit rex, vulnus illatum bestiae in uno ex capitibus suis esse illud quod a Gotthis et Vandalis Roma accepit, confuse dictum est, nam saepius Roma ab illis hostibus vulnerata est ; et non explicatur quando illud vulnus acceperit, et a quo per Antichristum seu Antichristi tempore sanata fuerit. Quod,

¹ Bellar., lib. 3 de Rom. Pontif.

si per singula breviter discurramus, manifestum fiet, quocumque modo id rex intellexerit, non posse applicari expositionem.

8. *Vulnus illud non potest sumi pro prima Gotthorum obsidione sub Alarico.* — Prima enim Gotthorum Romana obsessio ab Alarico facta est, anno Domini 410, et tunc quidem non negamus, per convenientem metaphoram dici posse, Romanam urbem lethale vulnus accepisse. Nihilominus tamen immerito dicitur Joannem de illo fuisse locutum, quia vulnus illud non fuit illatum bestiae in uno ex capitibus suis, ut ait Joannes, sed in ipso corpore bestiae, utique in ipsa civitate; caput enim quod tunc bestia illa habebat (ut rex ipse vult), Romana Sedes seu Pontifex Romanus erat. At Romana Sedes nihil malum per Alarenum passa est. Nam imprimis Innocentius, qui Romae praesidebat quando Alarius illam pene destruxit, ad pacem inter Alaricum et imperatorem componendam discesserat; et Ravennae substiterat, *Deo ita providente, ne urbis riperet excidium*, ut ait Orosius lib. 7, c. 39; et attigit Sozom., lib. 9, c. 7; et Nicephorus, lib. 13, c. 35, ubi subjungit, Alarenum suis concessisse, ut domos expilarent et opes diriperent, jussisse autem ut uni templo, in quo tumulus Apostoli Petri est, parcerent: *Quæ res (inquit) in causa fuit, ne Roma omnis funditus interiret.* Cum enim propter timorem plurimi confluxissent, ob Apostoli reverentiam servati, urbem denuo aedificiis restaurarunt. Igitur neque Petri sedes, neque persona Pontificis, qui tunc sedebat, vulnus accepit, sed civitas ipsa, quæ propter vitiorum multitudinem, et præsertim propter reliquias idolatriæ cladem illam accepisse creditur, ut iidem auctores et multi alii tradunt. Ergo non recte accommodantur ad illud excidium verba Joannis dicentes: *Vidi unum de capitibus suis quasi occisum in mortem.*

9. *Regis expositio non stat cum aliis verbis ejusdem capituli.* — Unde multo minus potest altera pars illius prophetiae huic interpretationi adaptari; ait enim Joannes, *plagam mortis, quam unum caput bestiae accepérat, curatam esse, et admiratam esse universam terram post bestiam, nimirum post Antichristum,* de quo subditur: *Et adoraverunt draconem, qui dederat potestatem bestiae, et adoraverunt bestiam, dicentes: Quis similis bestiae?* Utique quia modo quadam extraordinario et mirabili plagam mortis curavit, ut omnes expount. A qua interpretatione non discrepat rex cum subdit: *Atque ita illud lethale vul-*

nus, quod a Gotthis et Vandals accepérat, curabitur in illo capite, sive rege Antichristo, qui deinde exurget. Hoc autem subsistere non potest, si ea, quæ historiæ tradunt, cum his quæ rex ipse alibi supponit, conferantur. Nam vulnus Romæ illatum a Gotthis, duce Alarico, statim curatum est, non extraordinario modo, aut virtute daemonis, sed speciali Dei providentia, cooperantibus hominibus communi et ordinario modo. Ait enim Augustinus, in tractatu seu sermone de excidio urbis, Deum speciali providentia noluisse tunc Romam destruere, sed castigare, et ideo multos cives salvos servasse, a quibus postea civitas instauraretur. Quod amplius declaravit Nicephorus, loco et verbis supra citatis, dicens, *cum ad D. Petri templum plurimi confluxissent, ob Apostoli reverentiam servatos, Urbem denuo aedificiis instaurasse.* Quæ instauratio per paucos annos fere ad perfectionem perduci potuit.

10. *Roma Vandalorum obsidione vulnus in capite non accepit.* — Post annos vero quadragesima quinque Genserius, rex Vandalorum, Urbem obsedit, et incendere ac demoliri incepit, et ita Romæ, jam a priori plaga curatae, novam intulit. Illa autem plaga non solum caput Urbis non attigit, verum etiam interventu ejusdem capititis factum est, ut Urbs ipsa a lethali vulnera, non tam curata fuerit, quam divina providentia præservata. Unde Sanctus Leo Papa, in sermone de Octav. Apostol.: *Quis hanc (inquit) urbem reformat saluti? quis a captivitate eruit? quis a cæde defendit?* *Ludus Circensium, an cura Sanctorum? quorum utique precibus divinæ censuræ flexa sententia est, ut qui merebamur iram, serraremur ad veniam?* Et infra: *Liberatem nostram, non sicut opinantur impii, stellarum effectibus, sed ineffabilis omnipotentis Dei misericordie deputantes, qui corda surentium barbarorum mitigare dignatus est.* Hoc autem fecisse Deum intercessione ejusdem Sancti Leonis, refert Paulus diaconus, lib. 15, dicens: *Occursu Leonis Papæ mitigatus est Genserius; ab incendio, cædibus, atque suppliciis urbem immunem servavit.* Addit vero, omnibus opibus ablatis, plures Christianos in Africam adduxisse. Illud autem nec dici potest lethale vulnus, et facile reparari potuit, ut per se notum est.

11. *Odoacer Romam occupavit, non tamen vastavit.* — Ulterius vero post viginti fere annos jam Urbe instaurata, iterum illam obserdit, et occupavit Odoacer, rex Erulorum, an-

no 476, ut Evagr., lib. 2 Histor., cap. 16, et Nicephorus, lib. 16, cap. 11, et Cassiodorus, in Chron., referunt, qui tamen non civitatem incendisse aut destruxisse, sed tantum occupasse dicunt. Imo de illo ait Cassiodorus, *cum extinctis adversariis Italœ libere dominaretur, modeste, ac temperate tanta usum esse felicitate.* Nullum ergo lethale vulnus tunc inflictum est Romanæ civitati, nec proprio imperio, quo tunc regebatur, id est, Pontificio; nam Simplicius, qui tunc præsidebat, nec dignitate, nec civitate sua privatus est, aut inimicatus, sed civitas in eodem statu, in quo antea erat, in Simplicio, et successoribus ejus, Felice III et Gelasio, toto tempore, quo Odoacer vixit, perseveravit.

42. *Totila Romam graviter afflxit, sed non lethali vulnere.* — Denique, anno Domini 547 et 550, Totila, Gotthorum rex, Romam vexavit et occupavit, et ex parte diripuit ac diruit, non tamen lethale vulnus inflxit, et illud qualemcumque fuit, statim reparatum est, seu curatum. Nam in primo ingressu, interventu Pelagii tunc diaconi, et postea Papæ, ejus nominis primi, et Belisarii ducis, tam cum Romanis quam cum ipsa civitate benigne se gessit, et quamvis partem murorum everterit, paulo post per eundem Belisarium instaurati sunt. In secundo vero ingressu, licet Totila in principio Urbem demoliri et destruere tentaverit, tandem vero et habitatores ejus revocavit, et ipsam novis ædificiis munivit et illustravit. Ergo multo minus eo tempore recepit Roma lethalem plagam, aut expectare illam oportuit Antichristum, qui eam a sua plaga curaret.

43. *Argumento ad hominem regis Angliæ assertio refellitur.* — Accedit, post has omnes plagas seu persecutioes, bestiam illam, seu Romanam urbem per 56 annos sanam et integrām in pace sub eodem imperio Pontificio, et in eadem fide perseverasse (etiam ex sententia regis et Protestantium) priusquam incoepit Antichristus, quem ipsi configunt. Rex enim ait, Ecclesiam Romanam cœpisse esse Antichristianam anno 606; ultima vero Romana irruptione anno 550 præcessit, ut dixi; ergo quando venit illud tempus, jam non habebat bestia plagam, quæ sub Antichristo sanaretur. Multoque minus accommodari potest, quod Joannes addit, *admiratam esse universam terram post bestiam,* utique propter curationem vulneris lethalis. Neque etiam ex eo tempore, vel ob illud factum potentia Romanæ civitatis aut Romani Pontificis major

visa est mundo, ut propterea omnes bestiam adorarent, dicentes: *Quis similis bestiae, et quis pugnare poterit cum ea?* Nec denique eo quod excidium Romanum in quacumque ex dictis obsidionibus factum postea instauratum est, nec ex modo quo plaga illa curata est, colligi potest quod Joannes ait, *draconem dedisse potestatem bestiae.* Nemo enim unquam cogitavit, instaurationem illam factam esse virtute dæmonis, sed divina virtute et providentia, quæ voluit populum suum corripere, non perdere, ut recte dixit Augustinus, in dicto tractatu de Excidio urbis, et lib. 4 de Civitat., c. 1; unde nullus, nisi amens vel ethnicus, inde potuit ad draconem adorandum, sed potius ad Deum laudandum et glorificandum, excitari; ergo nihil eorum, quæ Joannes eo loco prædicet, potest secundum illam frustra cogitatam expositionem accommodari.

44. *Male verba quædam Joannis textui adduntur.* — Ex quibus tandem manifestum est, ultima verba, quæ ad suam interpretationem rex adjecit, dicens: *Plaga mortis curabitur in suo capite, sive rege Antichristo, qui deinde exurget, atque ad diuturnum tempus regno potietur, haec (inquam) verba ultima (quæ ad præsentem causam solum pertinebant), sine ullo fundamento in illa visione seu prophetia Joannis, a rege addita esse.* Nam ibi nihil docet Joannes de duratione diuturna regni Antichristi; imo de bestia illa, quæ in uno de suis capitibus vulnus acceperat, et sanata fuerat, dicit: *Et data est ei potestas facere menses quadraginta duos, facere (inquit) ea omnia quæ ibi declarantur, scilicet, loqui blasphemias contra Deum, et contra eos qui in celo habitant, et facere bellum cum Sanctis,* etc., quibus persecutio et impietas Antichristi describitur. Ergo illa diuturna duratio Antichristi non solum sine fundamento in illo textu, sed etiam contra ejus verba excogitata est.

CAPUT VII.

ALTERI OBJECTIONI REGIS ANGLIÆ EX CAP. 18 APOCALYPSIS DESUMPTÆ SATISFIT.

4. *Secunda regis Angliæ ex Apocalysi objectionio.* — Secundo ac præcipue colligit rex Angliæ hanc diutunitatem regni Antichristi ex loco alio Apocalypsis 18, ubi prius describitur ingens casus et interitus civitatis magnæ Babylonie, quam rex Romanam esse suppo-

nit, et deinde prædicitur maximus planctus regum et mercatorum terræ super illam, et timor ex admiratione desolationis ejus. Unde rex Angliæ sic concludit : *Ex illo granissimo planctu, planissime constat regnum Antichristi longius triennio et semestri spatio, aut unius hominis ætate duraturum.* Hoc autem probat, quia *reges qui cum ea fornicati sunt, et in deliciis vixerunt, tempus habuisse diuturnius ad magnam illam necessitudinem contrahendam oportuit.* Mercatores autem terre sic ejus, dum stetit, prolixe copias et felicitatem ostentant, quasi suarum suisset emporium dicitiarum, que tam exiguo tempore non poterant, ac ne uno quidem sæculo coarcervari. Ex his ergo duabus conjecturis concludit rex, esse necessarium ut regnum Antichristi non trium annorum, nec tantum unius hominis vitæ, imo nec unius sæculi, sed plurium futurum sit; quomodo autem ex illis conjecturis hoc sequatur, non declarat, cum tamen inter se nullam connexionem habere videantur, ut a me breviter explicabitur.

2. Babylon alia vera, alia mystica. —

Prius vero necesse est exponere quæ sit illa Babylon, de qua Joannes, tam in hoc cap. 18, quam in præcedentibus loquitur. Duplex enim ab hominibus distinguitur Babylon, una materialis et propria, in Chaldaea sita, quæ initium imperii Chaldaeorum fuit; alia mystica. Et licet Andreas, cap. 53, de utraque censeat posse Joannem intelligi, cæteri tamen omnes pro certo supponunt, non loqui Joannem de propria Babylone, quod et ipse satis indicavit cap. 17, dicens, fuisse in fronte civitatis scriptum : *Mysterium, Babylon magna*, illique multa attribuit, quæ non recte veræ Babyloniae accommodantur. Loquitur ergo Joannes de Babylone mystica; quæ autem illa sit inquiero. In quo solum invenio Aretam, qui c. 53, illam Babylonem, de qua Joannes loquitur c. 16, in fine, Constantinopolim esse interpretatus fuerit, sed sine fundamento in Scriptura vel ratione.

3. Babylon dicitur universus mundus. — Duæ igitur sunt probabiles expositiones : una est, hanc Babylonem esse universum mundum quoad pravorum congregationem, quam Augustinus diaboli civitatem appellavit in libris de Civitate, præsertim in 18, a principio. Unde, Enarrat. 2 in Psal. 26, sic ait : *Est quædam civitas, quæ Babylonie dicitur. Civitas ista societas est omnium impiorum ab Oriente usque ad Occidentem, ipsa habet regnum terrenum*, etc. Et Enarrat. in Psalm. 61:

Omnes (inquit) qui terrena sapiunt, omnes, qui felicitatem terrenam Deo præferunt, omnes qui sua querunt, non quæ Jesu Christi, ad eam civitatem pertinent, quæ dicitur Babylonie mystice, et habet regem diabolum. Idemque repetit Enarrat. in Psal. 28, circa id : *Memor ero Raab et Babylonis scientium me¹*; *Babylon* (ait) *civitas dicitur secundum sæculum, una civitas iniqua Babylon*, omnes iniqui ad *Babylonem pertinent*, etc. De hac ergo Babylone exponunt dictum locum Apocalypsis graves et antiqui expositores, Beda, Victori., Tyconii, homil. 16 in Apocalyps.; Anselmus, Primas, necnon etiam Ambrosius ac Augustinus, in Commentariis quæ sub nomine illorum inter illorum opera feruntur, præter alios modernos expositores in eum locum. Et idem docuit Aretas, suo c. 41, 42, 53 et 55, licet aliis locis aliter interpretari videatur. Nec dissentit Andre., licet ad alias etiam Babylonies verba accommodet. Expressæ et optime Prosper, in Dimidio temporis, capite septimo, ubi ita exponit illud Psal. *Filia Babylonis misera*, etc.

4. Possunt etiam pro hac expositione referri Petrus Damianus, epistola tertia ad Blançam, capite 12, quatenus ait, omnem animam iniquam nomine Babylonis comprehendi. Et de pœnis inferni verba illa exponit : *Quantum glorificavit se, et in deliciis fuit, tantum date illi tormentorum².* Et hoc etiam habet Pacianus, Parænes. de Pœnit., in fine. Et similiter D. Aug., Psal. 149, exponit illa verba capituli 18 Apocal. : *Duplicate duplicita secundum opera ejus, in poculo, quo miscuit, miscete illi duplicita*; intelligitque dicta esse de mundo qui nomine Babylonis significatur, licet prædicta verba non ad litteram referat, sed : *Sic, ait, scriptum est : Reddite illi duplum, ad quod fecit.* Atque ex hismet verbis seu locis fit probabilis hæc expositio. Et præterea ex illis : *Facta est habitatio dæmoniorum, et custodia onnis spiritus immundi³.* Hæc enim propriissime de civitate impiorum dicuntur, et vix in aliquam particularem civitatem convenire possunt. Item illa : *Exi de ea, populus meus, ne particeps sis delictorum ejus⁴*, quæ sic exponit Cyprian., l. de Lapsi. Sicut etiam illa : *Væ, ræ civitas illa magna, in qua divites facti suni omnes.* Item illa : *Quia in veneficiis*

¹ Psal. 86.

² Gagnajus et Melo in Apocal.

³ Apoc. 18.

⁴ Apoc. 18.

tuis erraverunt omnes gentes, et in ea sanguis Prophetarum et Sanctorum inventus est, et omnium qui imperfecti sunt in terra. Hæc enim non videntur posse nisi civitati universum orbem occupanti adaptari; hæc autem est civitatis impiorum; bene ergo illa per Babylonem intelligitur. Idemque confirmat Aretas, suo cap. 41, ex illo adjectivo, quo saepe illa civitas magna vocatur; putat enim non ponи ad distinctionem civitatis parvæ (sic enim parum emphasis haberet, et nihil magnum significaret), sed ad denotandam absolutam magnitudinem, id est, universalitatem illius civitatis; nam omnia loca et omnia tempora occupavit, quod videtur etiam significare Hieronymus, epistola decima septima ad Marcell., non hoc caput, sed decimum tertium Apocalypsis explicando.

5. Neque est difficile ad hanc significacionem Babylonis cætera omnia, quæ in c. 17 de illa dicuntur, accommodare; nam Babylon, in hac significatione sumpta, non est aliud quam mundus in malam partem acceptus, prout est frequens in sacra Scriptura, ut 1 Joan. 5: *Mundus totus in maligno positus est, et hæc est victoria, quæ vincit mundum, fides nostra;* et Christus, Joan. 15: *Si mundus vos odit, scitote quia me priorem vobis odio habuit.* Unde inter tres præcipuos salutis animarum inimicos mundus numeratur; et intellectus creditur a Joanne, 1 can., c. 2, per superbiam ritæ, de qua statim subjungit, *quæ ex mundo est.* Hac ergo ratione recte dicetur de hac Babylone mundi, *sedere super aquas multas, super populos, gentes, et linguas,* ut infra idem Joannes declarat. Vocatur etiam *meretrix magna,* quia revera *de rino fornicationis ejus liberunt omnes gentes,* et reges cum illa fornicati sunt, *et mercatores terræ de virtute deliciarum ejus divites facti sunt*¹, et similia, quibus vanitas et mundi malitia optime describitur. Ac tandem merito de illa dicitur, esse *ebriam de sanguine Sanctorum, et de sanguine Martyrum Jesu,* quia omnes impii Sanctos persecuti sunt, et Martyres in universis mundi provinciis sanguinem suum pro Jesu Christo fuderunt.

6. *Babylon hæc destruetur, cum impii perierint.* — Sicut autem hæc Babylon non est de lapidibus facta, sed ex hominibus pravis coalescit, ut dixit Tycon., dicta hom. 16, ita ejus excidium non consistet in murorum et ædificiorum demolitione aut incendio, sed in ulti-

ma impiorum omnium perditione. Et ita hæc Babylon non per Antichristum, nec ante diem judicii destruetur, sed ipso judicii die, et per Christum, et Angelos, ejus justitiæ ministros. Unde dicitur Apoc. 18: *In uno die venient plague ejus, mors, et luctus, et famæ, et igne comburetur, quia fortis est Deus, qui judicabit illam.*

7. *Objectio. — Solutio.* — Dices: quomodo ergo reges terræ et mercatores flebunt illam, et longe fient propter timorem tormentorum ejus¹, cum ipsi membra sint illius civitatis, et tormenta ejus vitare non possint. Respondeo, imo hac ratione merito ploraturos, *quia plangent se super illam,* ut ibidem dicitur, et quia valde horrebunt illa tormenta, dicuntur *longe stare,* utique non corpore, sed affectu, ita ut quantum in se est fugere cupiant, sed non possint. Denique juxta hanc expositionem verum quidem est quod rex Angliæ asserit, reges et mercatores terræ non nisi diurno tempore amicitiam et negotiationem habuisse cum illa civitate, inde autem non sequitur Antichristum longo tempore regnatum, sed civitatem malorum per multa sæcula durare, priusquam a Deo judicetur et puniatur.

8. *Babylonis nomine etiam Roma significatur. — Id de Roma Ethnica, non religiosa dicendum.* — Secunda exposicio est, ut Babylonis nomine ibi Roma significetur; ita ut ibi prædicetur destructionem, et stupendam Urbis ultionem divinam ante finem mundi futuram esse. Quod enim Babylonis nomine Roma interdum significetur, clare tradit Augustinus, lib. 18 de Civit., c. 2, dicens, *veram Babylonem fuisse primam Romanam, et veram Romanam fuisse secundam Babylonem.* Et Hieronymus, de Script. eccl., in Marco, Petrum ait, cum 1 epist., c. 5, inquit: *Salutat vos Ecclesia, quæ est in Babylone collecta,* figuraliter Romanam significasse², idemque habet Isaiae 47, in princ., ita etiam exponens loca Apocalypsis. Et in epist. 17 ad Marcellam, de Roma exponit locum hunc Apoc. 17 et 18. Idem Isaiae 24, Romanam esse sentit spiritualem Babylonem, de qua Joannes loquitur. Idem habet Orosius, lib. 7 contra Paganos, c. 2. Et Tertullianus, lib. 3 contra Marcionem, c. 13, ubi Pamel. adverlit, hoc intelligendum esse de Roma ethnica seu mundana, non de sancta Ecclesia ibi congregata. Satis enim

¹ Apoc. 18.

² Lorin., 1 Pet. 5, refert quamplures.

aperte illas distinxit Petrus, dicens : *Salutat vos Ecclesia, que est in Babylone collecta.* Deinde quod in hac significacione in Apocalypsi sumatur Babylon, satis communis interpretatio est inter antiquos et modernos Apocalypsim exponentes, tam in hoc capite 18, quam aliis, ut sunt Victorin., Andre., Arethas, Riberus, Viegas; item Bellarminus, lib. 3 de Summo Pontif., cap. 13; Sander., lib. 8 de Visib. monarch., cap. 8, et alii complices. Estque probabilis expositio, quia Joannes, cap. 17 (si proprietas verborum teneatur), de speciali civitate loquitur, et in c. 18 non loquitur tantum de populo, sed etiam de materiali civitate, ut ex domibus et aliis aedificiis constante, et particulari loco terrae sita, quæ ab aliis terræ locis distare vel propinquaque esse potest, ut indicant illa verba : *Longe stantes propter timorem tormentorum ejus, et illa : Omnis, qui in latum navigat, et nautæ, et omnes qui in mari operantur, longe steterunt, et clamaverunt videntes locum incendi ejus.* Si autem illa Babylon est civitas aliqua particularis, non potest certe esse nisi Roma, ut ex dictis satis constat, et ex superioribus capitibus ejusdem Apocalypsis est manifestum.

9. *Romam ante diem judicii delendam probabile est.* — Hac ergo admissa expositione, ex illa ad summum colligitur Romanam civitatem ante finem mundi delendam esse, et prorsus evertendam, etiam quoad materialia aedificia, et igni tradendam. Quod multi Catholicæ non solum sine rubore, sed etiam constanter docent ac defendunt, quos refert, eorumque sententias late describit Thomas Malvenda, lib. 4 de Antichristo, cap. 4 et 5; et quamvis ipse timeat in eorum descendere sententiam, ideoque aliis modis conetur loca Apocalypsis interpretari (quos nunc examinare, probare aut improbare non est necesse), nihilominus negari non potest sententiam illam probabilissimam esse, multumque et locis Apocalypsis et antiquis Patribus consentaneam, praesertim Hieronymo, cuius haec sunt verba, Isai. 24: *Atteretur civitas vanitatis, sive omnis civitas, vel spiritualis Babylon, quæ sedet in septem montibus purpurata, cuius supplicia in Apocalypsi Joannis legimus.* Nec ab ea sententia discrepat libro secundo contra Jovinian., licet indicet prophetiam non esse absolutam, sed couminatoriam, dicens : *Ad te loquor, quæ scriptam in fronte blasphemiam Christi confessione delesti, etc.; maledictionem, quam tibi Salvator in Apocalypsi*

comminatus est, potes effugere per paenitentiam, habens exemplum Ninivitarum. Accedit Lactantius, lib. 7, c. 25, qui testimonio sibyllæ confirmat, casuram et incendendam esse urbem caput orbis. Et tunc (ait) quis dubitet venisse jam finem rebus humanis, orbique terrarum! Et certe, supposita devastatione orbis, praesertim christiani, futura in fine mundi ante judicium, partim per decem reges, qui Antichristum præcedent, partim per ipsum Antichristum, qui majori potentia, et acerbitate ac odio, Christum et ejus Ecclesiam persecuetur, per se probabilissimum est, aliquem vel plures eorum irruturos in Urbem, eamque penitus eversuros, ut Romanum nomen, imo et christianum, si possint, Roma deleta, prorsus extinguant.

10. *Tempus illius eversionis incertissimum est.* — Modus autem, ordo et tempus hujus eversionis, licet futuram esse supponamus, longe incertiora sunt quam ipsa eversio; nam de ipsa eversione habemus fundamentum in Scriptura, juxta probabilem sensum ejus, de cæteris autem circumstantiis fere nihil. Unde modus ille, quo vir eruditus, Thom. Malvenda, ultimum excidium Romanum describit, juxta eorum sententiam, qui de Romana urbe prophetias Apocalypsis intelligunt, neque ab omnibus qui illum sensum approbant, asseritur, nec mihi videtur necessarius, aut cogente fundamento fultus. Ait enim Romam circa finem mundi ad plura et majora scelera et flagitia reddituram, quam prius, cum esset ethnica, commiserit, nam et fidem negabit, et Pontificem a se abjiciet, et ecclesiasticos ordines trucidabit, et ad idolatriam redibit. Nam antiquam temporalem potentiam iterum recuperabit cum majori amplitudine, et imperii majestate, quam antea habuerit, decemque reges potentissimos sibi subjectos habebit, quorum opera Sanctos persecuetur acerbius, et martyriis crudelioribus afficiet, quam sub imperatoribus ethnicis passi fuerint. Postea vero intra breve tempus ait reges illos a Roma defecturos, et adversus illam insurrecturos, ac penitus deleturos, Deo id permittente, in vindictam scelerum ejus, tam præteriorum quam illo tempore presentium. Hoc enim videtur indicasse Joan. Evangelista, cum eodem c. 18 dixit : *Quoniam pervererunt peccata ejus usque ad cælum, et recordatus est Dominus iniquitatum ejus.* Credendum enim est Deum non permissurum tam grave Romæ supplicium, nisi ipsa prius antiquis peccatis nova super-

adderet, et ita iram Dei in se excitaret. Atque ad hunc modum accommodat cætera, quæ in hoc capite et præcedente Joannes prædictit. Ac tandem post destructionem Romæ a decem regibus factam, venturum esse dicit Antichristum, juxta alias prophetias supra tractatas.

11. Impugnatur quoad primam partem.— Hæc vero omnia, licet impossibilia non sint, neque cum aliqua prophetia aut promissione Romæ facta, quam ego sciam, repugnant, non videntur mihi necessaria, nec satis fundata. Nam (supposita expositione Babylonis, quam prosequimur) ex hoc loco Joannis solum habemus esse evertendam, ac penitus destruendam, ita ut *ultra jam non inveniatur*, ut ait Joannes, id est, non amplius instaurabitur, nec habitabitur, ideoque *nec tibia canentium, nec artifex, nec vox molæ, nec lux lucernæ, nec vox sponsi et sponsæ amplius audientur aut invenientur in ea*, ut ibi dicitur. Erit ergo desolatio sempiterna, ideoque certum et exploratum videtur, oraculum illud, de Roma intellectum, in nullo præcedentium excidiorum Romanæ urbis, impletum esse, ut facile conjectabit lector, si attente ea, quæ de illis excidiis in capite præcedente diximus, cum verbis adnotatis præsentis prophetiæ contulerit. Imo inde valde probabile fit, tale excidium Romanum, si futurum est, non nisi prope finem mundi esse futurum, quamvis hoc in dicto c. 19 non asseratur, neque alibi sit prophetatum, et ideo minus certum sit. Inde tamen aliquo modo suadetur, quia verisimile est tam mirabilem Urbis destructionem, et immanem sedis Apostolicæ persecutionem non nisi temporibus Antichristi vel prepe illa esse futuram, quia illa fore videbitur tribulatio maxima Ecclesiæ, et in ea implebitur quod Daniel prædictit, cessaturum juge sacrificium, et similia.

12. Impugnatur quoad secundam partem.— Quod vero ante illam destructionem redditura sit Roma ad pristinam potentiam et temporale imperium, non video unde probari possit, quia non omnia, quæ hoc capite de Roma dicuntur, necesse est in ea inveniri in illo ultimo tempore, in quo destruetur, sed in toto discursu temporis ex quo fuit condita usque ad finem: *Quia (ut ibi dicitur) pervenerunt peccata ejus usque ad cælum, et recordatus est Dominus iniquitatum ejus*, utique omnium quæ in ea quovis tempore facta sunt. Quapropter etiam non video unde satis probetur, reddituram Romam ad idololatriam, vel

ad similia scelera, quæ ex veri Dei ignorantie prodeunt, tum quia ut dicantur peccata pervenire usque ad cælum, satis est quod prioribus flagitiis impiorum semper addantur nova et gravissima peccata Christianorum quibus Deus magis quodammodo ad iram movetur, quam delictis hominum cæterorum ignorantium verum Deum, et fieri poterit ut in illo tempore peccata et flagitia in illa urbe multiplicentur cum majori luxu et corruptione, quam in præteritis christianitatis temporibus; tum etiam quia, licet illud excidium futurum sit in supplicium multitudinis pravæ, credibile est futurum etiam esse in probationem honorum, et in purgationem et meritum prædestinatorum, ut de persecutione Antichristi Christus significat, et Patres ubique docent. Non erit ergo necessarium Romam ad idololatriam redire, ut illius destructionem Deus permittat.

13. Impugnatur quoad tertiam.— Quod denique additur, decem reges prius futuros esse subjectos temporali imperio Urbis, et postea esse contra illam insurrecturos, non video, quo fundamento asseratur. Nam quod hic ait Joannes, *reges terre fornicatos esse cum illa, et plancturos se super illam*¹, ad summum indicat, illos futuros esse Romanæ civitatis amicos, vel forte prius illius scelera imitatos fuisse, postea vero naturali affectu ejus perditionem doluisse. Addo etiam non videri necessarium ut illi reges, qui prius fornicati erunt cum Babylonia, et postea plangent cum illa, sint illimet decem qui proxime antea adventum Antichristi regnabunt, sed alii reges terræ, qui non deerunt extra imperium Romanum, ut in Persia, in Africa, India, et aliis regionibus, qui fortasse usque ad mundi finem permanebunt. Denique non oportet per reges terræ intelligere solos supremos et principales reges terræ, sed etiam magnos principes et quasi regulos, ut sunt nunc multi duces et potentatus Italiae et Germaniae, et similes, qui ultra decem illos famosiores reges esse poterunt tempore destructionis urbis Romæ, et cum illa prius fornicari, non tantum per idololatriam, sed per alia vitia sectando mundi vanitatem, et postea de illius perditione dolere ac plangere.

14. Quocirca ex illo loco, supponendo per Babyloniam Romam intelligi, solum potest certo colligi, Romam tandem aliquando esse omnino et irreparabiliter evertendam, unde

¹ Apoc. 18.

fit verisimilius id futurum esse prope diem judicii, et tempore Antichristi, vel circa. In quo vero statu erit Roma proxime antequam destruatur, tam in temporali imperio quam in spirituali et in fide, non video esse revelatum, nec cum fundamento definiri posse. Nullum vero est inconveniens quod, perseverando in fide, religione, et regimine, tam temporali quam spirituali per Apostolicam Sediem, sicut nunc est, in fine mundi destruatur per aliquem tyrannum infidelem, sive paganus, sive apostatam. Sicut enim hoc magna ex parte contigit in tempore Alarici, ita poterit acerbius et omni ex parte in fine mundi consummari. Neque hoc est contra sanctitatem illius urbis, tum quia, non obstante fide, et praesentia Vicarii Christi, poterunt in illa ita multiplicari peccata, ut, conjuncta praecedentibus, Dei judicium, juxta occulta consilia providentiae ipsius, contra ipsam excitent. Tum etiam quia, licet civitas et capita ejus in fide permaneant, fieri poterit ut multitudo populi et praecipuorum civium, exemplo, et minis vel promissionibus tyrannorum infidelium corrumpatur, et deficiat. Tum denique quia (ut dicebam) illud excidium non erit tantum propter vindictam, sed etiam ad probationem et multorum Martyrum perfectiorem consummationem. Ideoque non est etiam contra promissiones factas Ecclesiae et Sedi Apostolice de perseverantia in fide, et in cathedra Petri, quod Roma illo modo destruatur, quia cathedra nunquam deficiet, nec fides ejus, sive in hoc, sive in illo loco consistat; ubique enim eadem erit, semperque Ecclesia visibilis durabit, etiam si vi persecutionis cogatur ad montes fugere, vel in locis occultis magna ex parte se abscondere.

15. Incertum an ea destructio facienda sit ab Antichristo, vel aliquo ex ejus ministris. — Deinde neque ex illo loco, neque ex alio (quod ego sciam) satis colligi potest, an haec ultima Romae destructio ab ipsomet Antichristo perficienda sit et consummandam, vel ante illum, per aliquem, vel aliquos ex illis decem regibus qui in Romano orbe tunc regnabunt. Nam quod altero ex his modis futurum id sit, posita dicta expositione, fit valde probabile, quia, ut dixi, tam generale excidium urbis capitis mundi, tantaque Ecclesiae calamitas et persecutio non potest a temporibus Antichristi multum distare, et ideo vel ab illo erit, vel ab his qui proxime illum antecedent. Itemque ex alio principio id fit multum credibile, quia vel ante deletum prorsus Roma-

num imperium Antichristus non veniet, vel per illum destructio Romani imperii consummabitur; tunc vero maxime delebitur Romanum imperium, quando Roma prorsus extincta fuerit, et e converso dum illa in suo statu perseveraverit, adhuc reliquiae Romani imperii durabunt. Ergo sicut imperium Romanum, ita et Urbs eodem tempore et sub eisdem tyrannis destruetur. Quod autem alterutro ex dictis modis contingere possit, et neuter illorum vel revelatus sit, vel repugnet revelatis, patet, quia nullibi revelatum est, Romanam urbem esse duraturam usque ad tempora Antichristi inclusive seu intrinsecum, ut sic rem explicem; poterit ergo antea per decem reges destrui. Item non solum probabile est, sed etiam aliqui contendunt esse certum, ante adventum Antichristi imperium Romanum esse omnino per decem reges delendum; ergo probabile est ab eisdem esse Romanam evertendam. Quod in capite etiam 17 Apocalypsis insinuatur.

14. Probabile est Romae vastationem ab Antichristo consummandam. — E contrario vero nullibi etiam est revelatum, Antichristum non esse venitrum, donec Romana urbs sit destruta; ergo si per ipsum destruatur, satis implebitur prophetia hujus capitinis, quod tractamus, de destructione Babylonis. Item supra diximus esse valde probabile, et Patribus consentaneum, Romanum imperium, licet per decem reges, Antichristi proximos praecursores, ita sit dividendum et extenuandum, ut prope deleatur, per ipsum nihilominus Antichristum esse consummandam destructiōnem ejus; ergo per ipsum etiam poterit Roma destrui atque extingui. Cum autem dico, *per ipsum*, non intelligo esse necessarium ut ipse Antichristus praesens sit in tali bello; sat is est enim quod per se, vel duces suos, vel reges sibi subjectos id faciat. Itaque utroque modo potest intelligi quod de muliere fornicularia dicitur Apocalypsis 17, et de decem cornibus bestiae, seu de decem regibus, quod odient forniculariam, et desolatam facient illam, etc., si per forniculariam Romani, per bestiam autem, Antichristum intelligamus, ut est probabile, sed incertum, ut supra dixi, et 2 tom. tertiae partis, disput. 56, seet. 2, ubi nihil aliud de ultimo Romae excidio docui; imo de illo tanquam de re incerta locutus sum. Neque aliter loquitur Bellarminus, qui potius sentit Romanam ab ipso Antichristo esse delendam. Nam lib. 3, c. 43, sic ait: *Antichristus odio habebit Romanam, et cum ea pugnabit, eam-*

que desolabit et incendet. Idemque sentit lib. 4, c. 4, in fine. Eundemque dicendi modum sequitur Bozius, lib. 24, c. 6, et citat Tertullianum, Lactant., Cyrillum, Chrysost., Ambros., Hieronymum et Augustinum.

17. *Concluditur, ex Apocal. 18 non colligi persecutionem Antichristi ultra tres annos cum semisse duraturam.* — Ultimo tandem (ut regi Jacobo respondeamus) dicimus, ex toto hoc cap. 18 Apocalypsis, vel ex destructione Urbis in illo prædicta, vel ex circumstantiis cum quibus describitur, colligi non posse persecutionem Antichristi, longiori tempore quam per triennium et semissem esse duraturam. Nam si decem reges Urbem demolituri sunt, licet bellum illud per plures annos duret, vel post illud Roma per plures annos destruta jaceat, nihilominus Antichristus postea veniens, poterit brevi tempore durare. Si vero ipsem Antichristus Romam debellatus est, poterit id facere, antequam spiritualem (ut ita dicam) persecutionem Ecclesiæ incipiat, dum temporale imperium acquirit, quod pluribus annis durare poterit, prout persecutionem antecedet, ut capite nono dicam. Et tunc poterit persecutio durare tantum brevi tempore dicto, ut per se manifestum est. Vel certe, licet demus, ipsam Urbis destructionem futuram esse partem Antichristianæ persecutionis, adhuc poterit triennio, imo biennio compleri quidquid de illa destructione Joannes præsignificat. Quia non solum intra annum, sed etiam intra menses paucos circumdari poterit et expugnari, et incendio tradi, et alia pati quæ ibi describuntur. Et paulo post sequi poterit gravissimus ille planctus regum et mercatorum, quem Joannes commemorat, nam si planctus ille futurus est in provinciis, et insulis Romæ vicinis, intra paucos dies poterit notitia incendi ad eas pervenire, ad remotiores autem intra plures, vel intra annum, planctus autem ipse breviori tempore poterit consummari.

18. Quod autem rex objicit, quia et reges ad contrahendam necessitudinem magnam cum illa Babylonia, et mercatores ad congreendas divitias, longiori tempore indigebunt, hoc (inquam) probat quidem, et reges et mercatores, et Babyloniam ipsam, longo et diurno tempore esse duratura, priusquam Antichristus veniat, vel Babyloniam destruat, non vero probat destructionem ipsius urbis, vel planctum postea subsecutum futurum esse diurnum. Tum quia hæc diversa sunt; tum etiam quia frequenter illa, quæ multo

tempore durarunt, uno momento extingui solent. Eo vel maxime quod in toto illo capite nullum est verbum de Antichristo; unde licet ea, quæ ibi narrantur, diurnius tempus postularent, facile responderemus illa consummada esse ante ortum Antichristum (ut declaravi posse evenire), ipsum vero Antichristum postea esse venturum, et brevi esse consummandum.

CAPUT VIII.

TERTIÆ OBJECTIONI REGIS ANGLIÆ, EX VARIIS NOVI TESTAMENTI VERBIS DESUMPTÆ, SATISFIT.

1. *Contendit primo rex Angliæ positum tempus certum pro incerto.* — Tertio impugnat rex Angliæ fundamentum quo nitimur ad asserendum, Antichristi persecutionem brevi tempore duraturam. Contra quod duo objicit. Unum est, non esse necessarium Joannis de illo tempore loquentis verba in proprio sensu interpretari, quia inspecto more loquendi Prophetarum, satis commode potest metaphorice intelligi. Duplicum autem in illis verbis ipse meditatus est allegoriam: una est ut numerus certus pro incerto ponatur. Quia certum est Joannem id facere consuevisse, ut c. 7, cum duodecim millia salvandorum ex singulis tribubus numerat; et c. 9, cum ait: *Et numerus equestris exercitus vires millies dena millia*¹, etc.; idemque habet aliis in locis, præsertim c. 14, cum numerat: *Centum quadraginta quatuor mille virgines*², et c. 20, cum saepius dicit, Christum regnatum cum suis Sanctis *mille annis*, et c. 21, cum varios numeros mensurarum describit. Accedit quod Joannes in his numerationibus antiquos Prophetas imitatur, præsertim Danieliem, Ezechielem et Zachariam, apud quos saepè sumitur numerus certus pro incerto, ut Daniel 7: *Decies millies centena millia ministabant ei*, et alibi saepè.

2. *Contendit secundo tempus a Joanne assignatum significare dimidietatem spiritualis hebdomadæ.* — Altera regis allegoria est, ut illa tria tempora et dimidium temporis neque annos neque certum tempus significant, sed dimidiam spiritualem hebdomadam: *Nam qui recordantur* (ait) *Joannem in visionibus morem Prophetarum imitari, admodum verisimile es-*

¹ Apoc. 7 et 9.

² Apoc. 14, et 20, et 21.

se comperiet, in illis tribus diebus et dimidio eum imitari Danielis hebdomadas, hebdomadam unam accipiendo totum illud tempus, quod inter adventum Christi primum et secundum intercesserit, cuius temporis, sive spiritualis hebdomada dimidio triumphantem inducit Antichristum. Potestque interpretatio hæc juvari sententia Lyrani, qui, Daniel. 12, incertum putat esse an dies ibi proprie sumatur pro naturali die, vel metaphorice pro anno, sicut hebdomada apud eundem Damilem sumitur. Idem ergo dici poterit de locis Joannis in Apocalypsi, et ita erit probabilis hæc expositio.

3. Tertio, argumentatur ab incertitudine diei judicii. — Altera objectio principalis est, non posse verba Joannis in sensu proprio intelligi, quia talis sensus aliis Scripturæ locis et cuicunque fidei dogmati repugnat. Argumentatur ergo, quia si Antichristus certo numero diuinum regnaturus est, et post mortem ejus intra quadraginta quinque dies judicium futurum est, statim ac Antichristus regnare, ac persequi Ecclesiam cœperit, certo scient fidèles homines quo die futurum sit judicium. Hoc autem est contra Christi verba multis in locis. Nam imprimis, Matth. 24 dixit: *De die autem illa et hora nemo scit, neque Angeli cælorum, nisi solus Pater.* Deinde similitudine diluvii declarat quam repente venturus sit dies ille, dicens: *Sicut autem in diebus Noe, ita erit adventus Filii hominis. Sicut enim erant in diebus ante diluvium comedentes et bibentes, nubentes et nupti tradentes, usque ad eum diem quo intravit Noe in arcum, et non cognoverunt donec venit diluvium, et tulit omnes, ita erit adventus Filii hominis. Tunc duo erunt in agro, unus assumetur, et unus relinquetur; duas molentes in mola, una assumetur, et una relinquetur.* Vigilate ergo, quia nescitis qua hora Dominus vester venturus sit. Quibus omnibus (ait rex) significatur illorum temporum summa securitas, futuros esse homines variis negotiis et curis humanis implicatos, cum hora novissima eos repente, nec opinatos occupet. Sicut Christus in dicto loco concludit: *Illud autem scitote, quoniam si sciret paternas familias qua hora fur veniret, vigilaret utique, et non sineret persodi domum suam; ita et vos estote parati, quia qua nescitis hora Filius hominis venturus est.*

4. Multa congerit testimonia ex Scriptura.

— Secundo Matth. 23, ad declarandam illius diei incertitudinem, adducit Christus parabolam decem virginum, et concludit: *Vigilate*

itaque, quia nescitis diem neque horam. Tertio, addere possumus verba Christi, Actor. 2: *Non est vestrum nosse tempora, vel momenta quæ Pater posuit in sua potestate.* Quarto, addit rex verba Petri, 1 canonic., c. 5: *Sobrii estote, et vigilate. Petrus (ait) jubet nos vigilare, et sobrios esse, ad excipiendum illum diem semper intentos.* Quinto ait: *Joannes in Apocalypsi bis nos admonet, ut forem nocturnum, sic Christum esse venturum. Veniam (dicit Spiritus Sanctus, Apocal. 3) ad te tanquam fur, et nescies qua hora veniam ad te;* et c. 16: *Ecce venio sicut fur.* Sexto, addere possumus, hoc dixisse Paulum, 1, ad Thessal. 5: *De temporibus autem et momentis, fratres, non indigetis, ut scribamus vobis. Ipsi enim diligenter scitis quia dies Domini sicut fur in nocte ita veniet. Cum enim dixerint pax et securitas, tunc repentinus eis superveniet interitus.* Denique id etiam dixit Petrus, epist. 2, c. 5.

Regis fundamenta evertuntur. — Ad priorem partem respondeo, litteralem exppositiounem verborum Joannis, quam Pontificii, id est, Catholici sequuntur, fundatam esse imprimis in proprietate verborum Scripturæ, quæ præferenda est. Cavendum enim omnino est periculum deserendi verum Spiritus Sancti sensum: *Quem, ut libro de Pudicit., c. 9, Tertullianus dixit, omnino observare debemus, neque ac præceptum; quia non levior est transgressio in interpretatione, quam in conversatione.* Magnum autem est periculum aberrandi a vero sensu, quando proprietas verborum sine auctoritate vel necessitate relinquitur; neutra autem ratio hic invenitur ad proprium verborum sensum relinquendum, ut infra ostendemus. Imo e contrario dictus sensus proprius fundamentum habet in consonantia et concordia diversorum locorum Scripturæ, et in variis modis explicandi eamdem rem per tempora, menses et dies, et in veteri et in novo Testamento, ut credibile non sit, omnia esse per metaphoram et impropriatem dicta. Fundatur præterea in communi consensu Patrum, per quos Deus Ecclesiam verum sensum Scripturarum docet; qui autem Patres ita sentiant, satis constat ex his quos capite sexto attulimus. Denique fundari potest, quia nulla metaphora ibi quadrare potest, neque habet probabile fundamentum, ut facile constabit per ea discurrendo, quæ rex adducit.

6. In Scriptura saepè numerus perfectus pro incerto ponitur. — *Per numerum imperfectum determinata duratio significatur.* — Ad prio-

rem ergo metaphorici sensus partem, in qua dicitur accipi numerum certum pro incerto, et ad indicandum longum aut breve tempus, magnumque aut parvum numerum indefinitum, respondemus, regulam in generali sumptam veram esse, et hoc modo ex testimonio ibi relatis, et aliis multis quæ afferri possunt, recte probari, male tamen ad præsentem expositionem applicari. Nam imprimis, ut doce notavit Bellarminus, lib. 3 de Romanis Pontif., c. 8, tunc in Scriptura numerus definitus pro indefinito tempore sumitur, quando est perfectus, et in aliquo ordine consummatus, ut sunt decem, centum, mille. Quando vero numerus comprehendit non tantum magnum, sed etiam parvum numerum, tunc esse signum propriæ et præcisæ numerationis. Et ratio est in promptu, quia simplex et absoluta expressio unius numeri consummati facile potest esse capax talis metaphoræ, vel propter aliquam numeri perfectionem, vel per aliquod mysterium, ut solet considerari in septenario numero propter mundi creationem, vel in millenario propter ejus perfectionem aptam ad significandam quamdam temporis plenitudinem, ut dixit Augustinus, 20 de Civit., c. 7, ubi etiam ita exponit illud *centuplum*, de quo Dominus loquitur, Matt. 19, ut copiosum præmium significet. Et alia exempla profert in lib. 2 de Doctrin. Christ., c. 16. At vero quando minute et distincte additur numerus minor majori, et dimidius integro, signum est definitæ ac propriae numerationis, quia alias nunquam haberemus certum aliquem in Scriptura numerum. Item quia nec in illa imperfectione numerorum perfectio aliqua vel diuturnitas durationis cogitari potest, nec ratio probabilis reddi, cur talis additio et multiplicatio numerorum fiat. Estque optimum exemplum ad hoc confirmandum, Dan. 8, ubi de Hierosolymitana vastatione per Antiochum facta, dicitur duraturam esse *dies duo millia trecentos*. Quem numerum omnes intelligunt, præcise et cum proprietate esse intelligendum, propter speciale modum quo præscribitur. Et ita D. Hieronymus ibi, ex libris Machab. et Josepho, illum comprobare et declarare studet. Idem tradit Theodoret., orat. 8, et Glossa, Lyran., et accurate Benedict. Pereira.

7. *Locus ille Joannis metaphoricum sensum admittere non potest.* — *Primum regis fundamentum evertitur.* — Quocirca partem hanc ita censeo veram, ut in ea nullam declaracionem aut limitationem credam esse necessa-

riam, tum quia per se fundata est in verissima exponendi Scripturam regula, scilicet, retinendum esse proprium sensum, quando nihil est quod metaphoram indicet, vel ad illam excogitandam cogat; tum etiam quia nulla particularis exceptio illius partis occurrit. Nam si quis objiciat exemplum de centum quadraginta quatuor millibus signatis ad salutem, Apocal. 7, et aliud de centum quadraginta quatuor millibus virginibus stantibus cum Agno, Apoc. 14, respondeat ibi Ribera, per illos numeros ibi definitam ac præcisam multitudinem significari. Sed quia hoc difficile creditu est, respondeo, numerum illum sic multiplicatum, mysterium continere, et ideo pro indefinita multitudine poni; nam duodenarius numerus est numerus universalis, et per se ipsum multiplicatus juxta numerum duodecim tribuum illum numerum efficit, ut Beda, Rupert., et alii interpretati sunt.

8. *Perfectus etiam numerus ponitur pro tempore determinato.* — At vero in alia parte de sensu metaphorico, quia non gratis et ubique confingendus est, necessario addenda est limitatio. Quia sæpissime numerus perfectus significat in Scriptura definitum tempus, certamque durationem, ut quando dicitur creatus mundus sex diebus, vel quando dicitur, Dan. 4: *Septem tempora mutabuntur super te*, ubi, licet in verbo *tempora* sit aliqua metaphora, quam supra explicui, in numero septenario nulla esse intelligitur. Item in prophetia Danielis, de 70 hebdomadibus, Daniel. 9, et sæpe alias. Ideoque illa pars permissive tantum seu potentialiter intelligenda est, id est, posse in illo sensu tales numeros accipi, et metaphoram illam esse usitatam in Scriptura. Nihilominus tamen in usu et applicatione ejus ad hunc vel illum locum, necessarium est circumstantias considerare, ita ut illis quadret metaphora, nulloque modo illis aduersetur. Item etiam observanda sunt communes Ecclesiæ et Patrum interpretationes. Quæ duo (ut dixi) persuadent, etiam in dictis locis Apocalypsis non habere locum metaphoram, quia neque circumstantiis locorum accommodata est, neque Patres ibi illam invenierunt, sed certum ac definitum tempus ibi prædicti intellexerunt.

9. *Secundum regis fundamentum destruitur.* — *Aliter Daniel de hebdomadis, aliter de tribus annis locutus est.* — *Mensium et dierum numeratio hebdomadæ accommodari non potest.* — Altera vero pars metaphoræ, quam exco-

gitavit rex, plane improbabilis est. Primo, quia nec Joannes in Apocalysi, neque Daniel, c. 12, nominarunt hebdomadam, sed tempora, menses et dies, et multo minus locuti sunt de dimidia hebdomada, sed per alios numeros mensium et dierum proprietatem sui sermonis declararunt. Et confirmari hoc potest, quia ubi Daniel voluit tres annos et dimidium per dimidiad hebdomadam significare, id fecit aperte, cap. 9, dicens : *Et in dimidio hebdomadis deficit hostia et sacrificium*, id est transactis tribus annis cum dimidio, hebdomadæ septuagesimæ. Secundo, nunquam per hebdomadam significatur in Scriptura omnino indefinitum tempus, sed quoties vox illa per metaphoram sumitur, saltem servatur proportio ad septenarium numerum, metaphora vero in eo ponitur, quod ad numerum annorum extenditur, ut in dicto loco Danielis, et Genes. 29 : *Imple hebdomadam dierum*, id est, septem annos. At vero in tempore toto quod inter primum et secundum Christi adventum decurrit, nulla ratio septenarii numeri cogitari potest, nec probabilis causa talis metaphoræ afferri, nec auctoritas, nec exemplum; quæ est ergo hæc licentia ad libitum interpretandi vel potius corrumpendi Scripturam? Tertio, licet metaphora dimidiæ hebdomadæ posset accommodari verbis illis : *Per tempora, tempus, et dimidium temporis*, nullo tamen modo potest accommodari numerationi quadraginta duorum mensium, vel mille ducentorum nonaginta dierum; quæ enim ratio, vel proportio, seu analogia ad fingendam talem metaphoram excogitari potest? Quin potius, ut sæpe dixi, ille modus explicandi tempora per menses, et numerum mensium per numerum dierum, excludit omnem hujusmodi metaphoram, et proprium esse sensum ostendit.

40. Quarto, si tres illi anni cum dimidio, qui de adventu et duratione Antichristi prædicti sunt, dimidiad spiritualem hebdomadam illo modo intellectam significant, saltem non excederent dimidium temporis illius, quod inter primum et secundum Christi adventum intercedit; at juxta regis sententiam, Antichristianismus incœpit anno Christi 606, et ita jam duravit mille septem annis, et adhuc durat, et durabit quantum scit Deus; ergo incredibile est totum illud tempus per trium annorum cum dimidio spatium propter allegoriam dimidiæ hebdonadæ significari. Denique juxta hanc interpretationem inutilis est omnis illa numeratio temporum,

dierum et mensium, quæ tam accurate a Joanne fit; quia ex illa nihil certum vel probabile de initio vel duratione temporis Antichristi conjectari potest, sed unusquisque fingere potest quod voluerit initium, et temporis spatium, et asserere illud esse dimidiad spiritualem hebdomadam. At vero Scripturæ verba, licet interdum sint metaphorica, non tamen inutilia, nec frustra prolata; ergo quando metaphora talis est ut pervertat prophetæ usum, intentionem et fructum, abjunctione prorsus est et vitanda.

41. *Lyrani dubitatio rejicitur. — Dies illo loco pro anno sumi non potest.* — Quapropter deponenda est etiam seu rejicienda dubitatio Lyrani, an in illis locis dies metaphorice pro anno sumatur. Et pro certo statuendum est, ibi proprie sumi, et naturalem diem significare. Est autem advertendum, hoc intelligi posse, vel de illis locis in quibus est sermo de mille ducentis nonaginta diebus persecutio Antichristi, vel ubi est sermo de quadraginta quinque diebus post mortem ejus. Lyranus enim non de prioribus, sed de his posterioribus loquitur. De prioribus autem non negat futuros esse naturales dies, quod intentioni nostræ maxime deservit, etc. Ideoque breviter ostenditur esse certum. Nam si dies ibi annum significaret, ergo cum dicitur persecutio Antichristi duratura per mille ducentos nonaginta dies, intelligetur de totidem annis. Quomodo ergo verum erit verbum Christi : *Nisi breviati essent dies illi, non fuissest salva omnis caro, sed propter electos breviabuntur dies illi*¹. Quomodo enim breviabuntur, si tot fere futuri sint quot hactenus tempus legis gratiae duravit? Similique ratione consistere non poterit quod Joannes ait, Apocalyp. 12 : *Væ terra et mari, quia descendit diabolus ad vos, habens iram magnam, sciens quia modicum tempus habet.* Et cap. 20 dicit, Satanam ligatum fore per annos mille, et postea solvendum modico tempore; at vero tempus mille ducentorum ac plurium annorum non potest dici absolute modicum, neque comparate ad tempus quo Satanus est ligatus. Ergo impossibile est ibi accipi diem pro anno, sed pro vero die.

42. Confirmatur primo, quia numerus ille dierum postea per numerum mensium explicatur; quis autem dicat mensem ibi significare triginta annos? Nunquam enim in Scriptura talis metaphora mensium sicut hebdon-

¹ Matt. 24.

madarum invenitur. Confirmatur secundo, quia si detur licentia diem pro anno explicandi, eamdem alius sumet ad intelligendum mille annos, quia scriptum est: *Mille anni ante oculos tuos tanquam dies hesterna, quæ præteriit*¹. Et consequenter sequitur duratum Antichristum plusquam per mille annorum millia, quod ridiculum est. Denique confirmatur ex Justino contra Tryphonem, qui hac ratione irridet ejus interpretationem. Putabat enim ille, per tempus ibi intelligendos esse centum annos: *Quod si ita est, scelestum illum hominem ut minimum tercentum quinquaginta annos regnare oportet.* Quod tanquam absurdum et ridiculum omittit, præterquam quod nulla probabilis ratio vel fundamentum in Scriptura talis significationis aut metaphoræ potest afferri.

13. *Dies in ultima prophetia eodem sensu sumitur.* — Confirmatur ex loco Ezechielis. — Ex quo ulterius eadem certitudine concluditur, etiam in ultimis quadraginta quinque diebus, de naturalibus diebus sermonem esse. Primo quidem, quia fingi non potest, in eadem supputatione, respectu temporis persecutionis Antichristi diem accipi proprie, respectu vero temporis postea futuri, sumi metaphorice pro anno, quia uno et eodem verbo dicitur de utroque tempore, seu de toto illo duraturum esse, *mille trecentis triginta quinque diebus*; ridiculum autem esset dicere, idem nomen, in eadem oratione semel positum, partem temporis significare proprie, et partem metaphorice. Secundo, quia rationes factæ de illis etiam diebus procedunt, et præsertim quia etiam dixit Christus, Matth. 24: *Statim post tribulationem illorum dierum sol obscurabitur;* ergo inter finem Antichristi, et initium signorum judicii non intercedent quadraginta quinque mille anni, imo nec quadraginta quinque, quia quod post quadraginta quinque annos fit, non statim fit. Denique metaphora Lyrani non habet fundamentum in Scriptura, ut ipse putat. Non enim potest ex Scripturis ostendi, diem interdum significare metaphorice annum. Nam in loco quem Lyra adducit, Ezechiel. 4, ubi dicitur: *Diem pro anno dedi tibi,* dies non significat metaphorice annum, sed utraque vox in sua proprietate sumitur, diciturque annus pro die computari, quia quot diebus Ezechiel, vinctus atque constrictus, sub sinistro vel dextro latere dormitus erat, tot

annis Israel et Juda captivi erant futuri. Sic Hieronymus et omnes exponunt. Veluti cum dicitur in Psal. 89: *Mille anni ante oculos tuos tanquam dies,* dies proprie sumitur pro die naturali, comparantur autem mille anni cum naturali die, imo cum momento respectu divinae æternitatis.

14. *Tertium regis fundamentum veram sententiam non impugnat.* — *Non est de fide, statim post quadraginta quinque dies futurum judicium.* — Ad posteriorem partem objectionis, imprimis generatim dico, totam illam objectionem non procedere contra præcipuum dogma quod docemus, nimirum, persecutionem Antichristi brevi tempore esse duraturam, et testimonia Danielis et Joannis, quæ de illo tempore loquuntur, proprie et ad litteram esse intelligenda. Nam ad summum procedit objectio contra illam ultimam partem de quadraginta quinque diebus a morte Antichristi usque ad diem judicii interponendis. Etenim, si dixerimus illos quadraginta quinque dies non esse præcise definitos, ut illis consummatis certo futurus sit judicii dies, omnino cessabit objectio, etiam si cætera de tribus annis cum dimidio, quibus persecutio Antichristi tantum durabit, certissima sint et constanter teneantur. Quia si post mortem Antichristi non est certum, futurum judicium finitis quadraginta quinque diebus, ex morte Antichristi nunquam præscietur quando futura sit dies vel hora judicii; ergo cessat objectio. Pars autem illa de quadraginta quinque diebus, post quos sit futurum judicium, non est dogma fidei, nec de illo pertinaciter contendendum est, et ideo tota objectio non multum ad causam refert. Dummodo non negetur illos etiam quadraginta quinque dies proprie esse intelligendos, tam quoad numerum, quam quoad naturales dies; hoc enim necessario conjunctum est cum alia certa sententia de brevi tempore Antichristi, ut declaratum est. Quia hoc non obstante multi Catholici censem, ex Scriptura quidem colligi, post mortem Antichristi non esse venturum diem judicii intra quadraginta quinque dies, non tamen inde colligi, finitis illis diebus, statim esse futurum, et hoc satis esse ut sit incertus, et consequenter ut cesseret objectio.

15. *Judicii dies conjecturis cognosci potest ex Scriptura sumptis.* — Nos vero addere possumus, verum quidem esse, Scripturam non dicere aperte, immediate post illos quadraginta quinque dies futurum esse judicium,

¹ Psal. 89.

insinuare tamen illud, satisque probabiliter ex illa colligi, ut supra ostendi; hoc autem non satis esse ut certo praesciat dies judicii, sed solum ut conjectari possit cum magna probabilitate, quod nullum est inconveniens, quia non repugnat testimonii adductis, cum in illis de certa præcognitione et præscientia sermo sit. Denique addimus, etiam si conjectura illa de quadraginta quinque diebus incerta sit, nihilominus visa morte Antichristi post sufficientem cognitionem personæ ejus, certum esse posse scientibus Scripturas, prope esse diem judicii, neque longe distare, etiam si dies et hora certo non cognoscatur. Illud autem non solum verbis Christi non repugnat, sed potius in eis continetur, cum ipse dixerit: *Statim autem post tribulationem illorum dierum sol obscurabitur*¹, etc. Illud autem *statim* erit proxime post mortem Antichristi, ut ex Scripturis ostensum est; ergo qui noverint Scripturas, evidenter intelligent propinquissimum esse diem judicii, nam illud *statim* hanc propinquitatem aperte indicat. Unde subjungit idem Dominus: *Ab arbore autem fici discite parabolam: cum jam ramus ejus tener fuerit, et folia nata, scitis quia prope est aestas; ita et vos cum rideritis haec omnia, scitote quia prope est in januis.* Ergo talis præcognitione diei judicii, vel certa quoad propinquitatem ejus, et non quoad definitum diem, vel probabilis et conjecturalis quoad ipsum diem, non repugnat, sed potius est maxime consentanea Scripturis. Neque contra hoc aliquid probant testimonia adducta, ut discurrendo per singula facile constabit.

16. Ad locum Matt. 24 respondeo, priora verba Christi: *De die illa nemo scit*, intelligi de certa et infallibili præscientia, non de probabili conjectura. Dico præterea conjecturam etiam haberi non posse, nisi ex revelatis, quia determinatio illius diei pendet ex Dei voluntate, quæ non potest nisi ex effectibus vel signis revelatis cognosci. Posita autem revelatione signorum præcedentium diem judicii, ex illis conjectari potest tempus illius diei, majori quidem vel minori probabilitate, juxta modum revelationis et signorum. Et his conjecturis sæpe Sancti Patres usi sunt ad judicium aliquod faciendum de appropinquante die judicii; imo ad hunc finem revelata esse a Deo illa signa, ex allegatis verbis Christi aperte colligitur. Ad cætera autem verba, quibus docet Dominus horam novissi-

mam diei judicii repente occupaturam esse homines, respondeo eamdem objectionem fieri posse contra verba Christi: *Scitote quia prope est in januis*¹; nam hæc præcognitione satis esse potest, ut dies judicii non repente præoccupet eos qui verba Christi crediderint, et eventum illorum observaverint, et considerare voluerint.

17. *Paucissimi tunc erunt qui conjecturis illustrentur.* — Dico ergo imprimis hos futuros esse rarissimos, quia pauci erunt qui prædictas prophetias perspectas habeant, easque intelligant ac recogitent. Ideoque licet pauci aliqui intelligentes et in fide sapientes possint ex illa expectatione parati esse ad Domini adventum, hoc non obstat quominus totus fere mundus nihil minus quam de illius fine cogitet, atque ita totum fere orbem repente occupet Christi adventus. Quod recte declaratur exemplo diluvii quo Christus utitur; aliqui enim fuerunt tunc homines quos non repente pluviae præoccuparunt, utique Noe, et familia ejus, et nihilominus absolute ait Christus diluvium venisse, et imparatos homines invenisse, omnesque oppressisse; ita ergo erit in adventu ad judicium. Aliud simile esse potest de tempore primi adventus Christi, nam simpliciter repente venit, respectu orbis, licet pauci sapientes potuerint intelligere jam prope in stasse adventum ejus.

18. *Judicii incertitudo tripliciter considerari potest.* — Deinde advero, illam incertitudinem diei judicii posse considerari, vel respectu nostri, et omnium qui futuri sunt ante revelationum Antichristum, et inchoatam persecutionem ejus; vel respectu eorum qui eo tempore futuri sunt, quo persecutio Antichristi jam grassabitur, nondum vero finem ejus viderunt; vel respectu eorum qui vivent post Antichristi mortem, et antequam inchoentur proxima signa judicii, scilicet, *sol obscurabitur*, et similia; vel respectu eorum qui talia signa jam prospexerint. In primis igitur temporibus dies judicii est omnino incertus, imo vix potest per conjecturam aliquid de illius mora vel propinquitate judicari, ut Augustinus, epist. 80 late ostendit, et experimento satis cognitum est in Patribus, qui ante mille annos diem judicii propinquare existimarent. Neque in hoc est controversia. De secundo tempore dicimus, sapientes quidem, magna fide, intelligentia et attentione tunc res consi-

¹ Matt. 24.

¹ Matt. 24.

derantes, conjectare posse, diem judicii non longe abesse, quia certo credent tribulacionem illam brevem esse futuram, et illa finita, statim incœptura esse signa judicii, utrumque enim Christus prædictit. Unde Gregorius, 34 Moral., c. 10, in fine, alias 45 : *Appropinquante (ait) die judicii, vel præcursoris vocibus, vel quibusdam erumpentibus signis, ipsa eis jam aliquo modo advenientis Domini virtus interlucet.* Erit tamen illa conjectura et confusa respectu definiti temporis, et rara respectu totius mundi, et incerta respectu pluriū, quia cum multæ futuræ sint tribulaciones, et multi pseudochristi, teste ipso Christo, Matth. 24, difficillimum erit intelligere an illa sit ultima et maxima, et an ille sit proprius Antichristus.

19. *Regis objectio. — Responsio.* — Sed ait rex : *At Pontifici dicunt : Mundus non ignorabil, illum esse Antichristum, duorum testium doctrina.* Respondeo duos illos testes prædicatores brevi tempore, et fortasse in paucis orbis locis et provinceis ; et ita non sufficiet ut totus orbis sciat illum esse Antichristum. Imo etiam ubi prædicabunt, multi erunt increduli, sicut fuerunt in diebus Noe, vel sicut fuerunt Judæi, quando Joannes testimonium præbuit Christo ; ideoque licet aliqui credant, et possint eamdem conjecturam appropinquantis judicii facere, nullum est inconveniens, quia cæteri omnes, et mundus, simpliciter loquendo, nihil tale cogitabit. Unde Ambrosius, 4 Thessalon. 5, in princ., de illo tempore intellexisse videtur multa ex dictis testimoniis : *Dies Domini ut surveniet*¹, et : *Vigilate, quia nescitis qua hora Dominus vester venturus sit*². Et illud : *Si quis vobis dixerit : Ecce hic Christus, aut ecce illic, nolite credere*³. *Subito enim (ait) et ex insperato apparabit sicut corruscatio appareat ab Occidente in Orientem, habens secum militiam exercitus Dei Patris ad perditionem Antichristi et satellitum ejus.* Cum enim securi fuerint persidi de regno diaboli, imperfectis Sanctis, id est Enoch et Elia, et lœti de victoria, invicem sibi mitten-tes munera, sicut dixit Apocalypsis, tunc illis subito veniet repentinus interitus. In quibus verbis repentinum Christi adventum dicit inchoari ante mortem Antichristi, et ad illum interficiendum, et tunc maxime futurum repentinum incredulis ; nam pauci credentes

jam poterunt illum expectare ; quamvis illi etiam de die et hora etiam sint incerti futuri.

20. *Antichristi mors nota non erit omnibus hominibus. — Multi eorum qui mortem Antichristi riderint, Scripturas non intelligent.* — At vero in tertio tempore post mortem Antichristi, et ante signa judicii, major quidem esse poterit conjectura judicii appropinquantis, tamen illa etiam in paucis erit. Nam imprimis brevissimum erit tempus illud inter Antichristi mortem et signa judicii, ut sæpe probatum est ex verbis Christi Domini, dicentis : *Statim autem post tribulationem illorum dierum sol obscurabitur*⁴. Deinde in tam brevi tempore mors Antichristi non poterit nota fieri universo mundo, neque magnæ illius parti, quia Christus descendens ad Antichristum interficiendum non revelabitur universo mundo, sed in illo tantum loco apparebit, ubi Antichristus adfuerit, et inde mors ejus divulganda erit per famam vel litteras, per temporis decursum, prout humano modo fieri potest. Ergo interim nihil magis sollicitus erit mundus de die judicii, quam si Antichristus non esset mortuus. Denique apud illos etiam qui neverint Antichristum, et mortem ejus riderint aut crediderint, paucissimi erunt qui legerint et intellexerint prophetias de tempore adventus Christi ad judicandum post occisum Antichristum. Imo illi etiam, qui illas intellexerint, nunquam erunt satis certi de sensu illarum, donec impletas illas videant ; ideoque licet probabiliter credere possint, post tot dies futurum judicium, non tamen certo scient diem illum. Et ita nihil sequitur contra testimonia Scripturæ de incertitudine diei judicii, etiam si in rigore de toto tempore et de omnibus personis intelligentur. Eo vel maxime quod etiam non constat an illi quadraginta quinque dies terminum habituri sint in ipso die judicii, vel in die in quo omnium hominum mors consurnabitur, post quam diem non est revelatum, an statim vel post aliquos dies futura sit resurrectio universalis et judicium. Et ita semper manent incerta dies et hora judicii.

21. *Fidelibus in ultimo tempore judicii nota erit, non infidelibus.* — At vero de ultimo tempore postquam inchoata fuerint signa judicii, de quibus Christus ait : *Statim post tribulationem dierum illorum sol obscurabitur*² ex eodem Evangelio constat, notum esse

¹ 2. Petr. 3.

² Matth. 24.

³ Isai. 3.

¹ Matth. 24.

² Matth. 24.

futurum universis fidelibus, mundi consummationem et judicii diem esse propinquissimas, cum Christus dicat : *Cum videritis haec omnia, scilicet quia prope est in ianuis.* Infideles autem, cum talia signa, et finem seu significationem eorum, vel prorsus ignoraverint, vel non crediderint, terrebuntur quidem, et contremiscerent, nihil vero de futuro eventu intelligent aut cogitabunt. Nihilominus tamen respectu omnium verum semper erit quod Christus proxime subjungit : *De die autem illa et hora nemo scit,* quia infideles penitus illam ignorabunt; fideles autem, etiam sapientes, licet cognoscant esse propinquam, definite tamen nescient tali die et hora esse futuram; quia ignorabunt destinatum diem ad universalem mortem omnium hominum, et alium praesinitum ad resurrectionem, aliumque praordinatum ad judicium; imo etiam ignorabunt an sint futuri distincti dies, et quantum inter se distabunt. Et praeterea nescient quanto tempore duratura sint illa signa antecedentia judicium post mortem Antichristi, quia licet sapientiores fideles conjectare possint non duratura ultra quadragesima quinque dies, nescient nihilominus an totos illos dies occupatura sint neccne; et consequenter nescient quo die conflagrabit mundus, et ita de ceteris, quae usque ad diem judicii sunt futura. Atque ita omnia Christi verba ad litteram, et in omni rigore ac proprietate vera sunt, etiam si verba Joannis in proprio etiam et rigoroso sensu intelligentur, quod in sequentibus testimoniis amplius declarabitur.

22. Explicatur parabola de decem virginibus de judicio particulari. — *Judicij denuntiatio magis repentina erit quam ejus adventus.* — Ad secundum testimonium sumptum ex parabola de virginibus, Matth. 25, responderetur, posse quidem omnia quae in illa dicuntur ad privatum uniuscujusque judicium accommodari, nam ejus etiam dies et hora incerta est hominibus, et in illud judicium optime quadrat totius parabolæ conclusio : *Vigilate itaque, quia nescitis diem neque horam.* Haec autem ignorantia dici et horæ mortis non tollit, quin ante illius eventum et consequenter ante judicii particularis momentum praesentiri possit mors, et judicium illud prope esse conjectari, quamvis de die et hora certa et definita cognitio non comparetur, vel praeconcipiatur. Et ita duo in eadem parabola inopinatae eventura ante hoc judicium distinguere necesse est. Unum est, prius

prænunciari adventum sponsi; aliud est, ipsum sponsum postea venire. Primum in illis verbis continetur : *Media nocte clamor factus est, ecce sponsus venit, exite obriam ei;* aliud ibi subjungitur : *Dum autem irent emere, venit sponsus, et quo paratæ erant, intraverunt cum eo,* etc. Ex quo intelligimus magis repentinam esse denunciationem adventus judicii, quam sit futurus ejus adventus, nam prior dormitantes vel dormientes invenit omnes virgines, id est, nihil de appropinquante judicio cogitantes; adventus autem sponsi prudentes invenit paratas, et accensis lampadibus ipsum expectantes, et ita licet diem et horam utriusque, scilicet, prænunciationis et adventus ignoraverint, non tamen tam inopinatus illis fuit sponsi adventus, sicut illius propria denunciatio. Unde in particulari judicio illa duo ita distingui possunt, ut momentum mortis sit idem quod erit adventus judicii; dispositiones autem præviæ, proximæ ad mortem, prænunciant judicij adventum, ut ægritudines, et alia frequentia pericula mortis. Et ita dixit Gregorius, homil. 43 in Evang. : *Venit Dominus cum adjudicium properat, pulsat vero cum jam per agritudinis molestias mortem vicinam esse designat.* Et hanc interpretationem prosequitur Origenes, homilia 22 in Matth.; et eam censet maxime litteralem D. Thomas ibi, nec displicet Augustino, epist. 80. Unde si illam sequamur, nihil ex illa parabola ad materiam præsentem conducere potest, quia regnum Antichristi non ante privatum judicium, sed ante universale futurum est. Quod si loqui velimus de judicio particulari illorum hominum qui post Antichristi mortem futuri sunt, illi etiam ignorabunt diem et horam suæ mortis, et consequenter etiam sui particularis judicii; præsentire autem poterunt non longe distare, per signa et praeconia appropinquantis finis mundi.

23. Eadem parabola intelligi potest de judicio universalis. — Unde ulterius dicimus, licet hic sensus probabilis sit, non ita esse accipendum, ut negemus posse etiam illam parabolam de universalis judicio intelligi, sine præjudicio eorum quae de tempore Antichristi diximus. Nam duobus modis possunt exponi verba illa : *Media autem nocte clamor factus est*¹. Primo, ut per clamorem illum intelligamus tubam et vocem magnam, qua Angeli clamabunt ad electos congregandos, si-

¹ Matth. 25.

cut Christus dixit, Matth. 24, ut exponunt Hieronymus, Chrysostomus et alii, Matth. 23; et Augustinus, epist. 120, cap. 34. Sed difficilis est expositio et æquiparatio: nam tuba illa et vox Angelorum præcedet judicem jam venientem post universorum hominum mortem, eosque vocabit, ut ad vitam resurgent, et in judicium veniant, juxta illud Pauli, 11 ad Cor. 15: *Canet enim tuba, et mortui resurgent incorrupti.* At vero clamor hic, qui in parabola virginum antecessurus dicitur, fiet ante mortem hominum, quando adhuc possint præparari et disponi ad sponsum recipiendum, sicut prudentes virgines fecerunt; ergo per hunc clamorem non potest vox illa Angelorum significari.

24. Alia expositio.—Respondet autem Augustinus, etiam clamorem illum, de quo in parabola de virginibus est sermo, futurum esse post mortem omnium hominum, quæ per somnum ibi significatur illis verbis: *Dormitaverunt omnes et dormierunt*, et consequenter ait illum clamorem non esse ut homines præparentur ad lumen justitiae recipiendum de novo, sed ut resurgent. Tunc autem virgines prudentes ornare lampades suas, se præparando per recogitationem bonorum operum suorum ad rationem reddendam. Atque juxta expositionem hanc, nihil etiam ex illa parabola ad præsentem controversiam sumi potest; nam post universalem mortem omnium hominum, certum erit diem et horam resurrectionis et adventus judicii prope adesse; semper tamen quæ futura sit ignorabitur, donec audiatur vox tubæ, nisi forte animæ beatæ illam jam in Verbo videant, quod non repugnat verbis Christi, licet sit incertum.

25. Tertia expositio.—Alia vero expositio esse potest, ut clamor ille non sit vox tubæ, sed sit prædicatio Enoch et Eliæ, et aliorum servorum Dei, qui eo tempore vivent, vel etiam sint signa judicii quæ præcedent, ut, *sol obscurabitur*, etc.; illa enim suo modo clambunt diem Domini appropinquare. Et sic etiam in illo adventu duo supra dicta distinguenda erunt: unum est prævia denunciatio adventus judicii, quæ erit non tantum antea ignorata, sed etiam inexpectata et repentina, quia ante illam non præcedet alia publica excitatio seu præmonitio præter generales, quæ jam satis in Scriptura factæ sunt. Aliud est adventus judicis, et hic non erit ita repentinus, quin præparatio et expectatio ad illum præcedere possit; semper tamen dies et hora ejus definite ignorabitur, donec veniat. Et

hoc modo explicavit hanc incertitudinem OEcumenius, 4 Thess. 5, suo c. 6, dicens, signa propinquantis adventus posse certo cognosci, adventum autem ipsum non ita.

26. Explicatur locus ex c. 1 Act.—Ad tertium testimonium ex Actor. 1, respondeo primo per verba illa: *Non est vestrum nosse tempora vel momenta*, ad summum excludi certam præcognitionem definiti diei et horæ secundi adventus Domini, ut notavit Cyprianus, lib. 3 ad Quirin., cap. 89. Deinde dico voluisse Christum reprehendere curiosam investigationem et inutile desiderium sciendi futura, maxime quæ a divina potestate et præfinitione pendent, ut notavit Justinus, quæst. 112 ad Gentes. Augustinus autem, in epist. 78, addit, per illa verba etiam excludi numerum quemlibet annorum, intra quem vel post quem immediate futurus sit secundus Domini adventus, quia hoc etiam proprie significat vox illa *tempora*, et ideo in nullius hominis cognitionem cadere potest post quot annos futurum sit judicium. Quod adeo confirmat, ut dicat, licet ex verbis Christi, Matth. 24, colligatur non esse futurum judicium, nisi prius Evangelium in universo orbe prædictetur, dicente Domino: *Prædicabitur hoc Evangelium regni in universo orbe in testimonium omnibus gentibus*, et tunc veniet consummatio, nihilominus etiam impleto illo signo, nunquam posse cognosci tempora (id est annorum numerum) quæ usque ad judicii diem supersunt. In quo significat duo: unum est, verba Christi: *Non est vestrum nosse*, etc., non solum excludere cognitionem per astra, aut alia humana signa, sed etiam per signa revelata, et per prophetias. Aliud est, non solum dicta esse a Christo pro solis illis discipulis, qui tunc aderant, et ipsum interrogabant, sed etiam pro omnibus hominibus quocumque tempore futuris. Quod laetus tradit epistol. 80.

27. Objectio. — Solutio. — Verba Christi non ad solos Apostolos coarctanda. — Tempus ante Antichristi manifestationem incertum esse contendit Augustinus.—Hinc vero sumi potest objectio contra dicta. Nam hinc fieri videtur, nunquam posse certum esse quot anni residui erunt usque ad judicii diem; hoc autem repugnare videtur his quæ diximus de tribus annis cum dimidio persecutionis Antichristi. Respondeo imprimis, verum quidem esse verba Christi non solum ad Apostolos et discipulos, qui Christum audiebant, sed ad omnes nos etiam pertinere; omnium enim

inordinatum desiderium praesciendi futura, quæ a Dei dispositione pendent, repressit Christus, docuitque non pertinere ad homines ea investigare, nec velle cognoscere, nisi quatenus ea Deus voluerit revelare. Ex quo recte etiam infertur, incerta nobis esse tempora adventus Domini, quia nihil de numero annorum durationis mundi nobis revelatum est. Et hoc est quod præcipue Augustinus in illis locis agit et intendit. Sub adventu autem Domini comprehendit etiam signa proxima adventus ejus, et inter ea ponit interdum Antichristi persecutionem, ut in lib. 18 de Civit., cap. 53, postquam dixit : *Illam sane novissimam persecutionem, quæ ab Antichristo futura est, præsentia sua ipse extinguet Jesus, etc.,* subjungit : *Hic queri solet quando istud erit, importune omnino.* Et statim inducit verba Christi : *Non est vestrum nosse tempora,* etc. Et in dicta epist. 80, dicit Paulum tradidisse nobis, *Antichristum manifestum futurum, et interficiendum ore Domini Jesu Christi.* Sed post quantum temporis (inquit) hoc sit futurum, nec saltem obscure locutus est. Itaque tempora usque ad Antichristum incognita esse contendit Augustinus; post manifestatum autem Antichristum, non negat Augustinus, ab his qui illum cognoverint, et Scripturas intellexerint et consideraverint, posse cognosci quam brevi tempore sit jam tunc mundus duraturus.

28. Unde quod in eadem epist. 80 paulo post subjungit : *Quod autem de signis evangelicis et propheticis, quæ quotidie fieri cernimus, propinquum Domini adventum sperare debeamus, quis negat? Quotidie quippe magis magisque fit proximus. Sed quanto intervallo propinquet, hoc dictum est, non est vestrum scire,* hoc (inquam) de signis remotis secundi Domini adventus intelligendum puto, non de proximis, de quibus inferius ait : *Puto quod non erunt sic, quando erunt quæ in Evangelio prædicta sunt signa in sole, et luna, et stellis, et in terris pressuræ gentium, quæ ipse allegorice de persecutione Ecclesiæ tempore Antichristi interpretatur.* Tunc ergo poterunt sapientes fidelium brevitatem residui temporis usque ad judicium præcognoscere. Neque agent contra verbum Christi : *Non est vestrum nosse tempora,* quia non per humanas conjecturas aut naturalia signa, nec per singularem revelationem aut inordinatam curiositatem illam cognitionem inquirent; sed per revelationem in Scriptura factam videbunt impleri quod prædictum est. Sicut enim

in primo suo adventu quædam signa Deus dedit, quibus a sapientibus cognosci poterat, vel jam factum esse, vel brevi tempore distare, antequam fieret, et post certum annorum numerum, saltem per hebdomadas Danielis, licet semper dies et hora fuerint ignorata, ita cum proportione intelligendum est in secundo.

29. *Explicatur locus ex 1 Petr. 5. — Vigilandum nobis ob dæmonis insidias et mortis incertitudinem.* — Ad quartum, ex verbis Petri : *Sobrii estote, respondeo imprimis, Petrum ibi non agere c'le incertitudine mortis vel judicii, sed de certa et quotidiana dæmonis persecutione, qua homines ad peccatum trahere conatur, circuit, querens quem dero-ret;* hanc enim causam adduxit Petrus, ob quam sobrios nos esse et vigilare monebat. Et ad hoc passim allegantur a Patribus illa verba, et res est adeo perspicua, ut superflua sit probatio. Unde licet alicui esset revelata hora mortis vel judicii, nihilominus necessarium esset illi consilium Petri ; imo, si saperet, quo certius appropinquare diem judicii agnosceret, eo magis vigilaret, et sobrius esset, ne a dæmone vinceretur. Addo vero ulterius, licet illud consilium datum esset a Petro propter incertitudinem mortis vel judicii, nihil nobis obstare, nam Christus Dominus licet aliquando nos moneat *vigilare, ne intremus in temptationem*, Matth. 26, alibi saepè similem vigilantiam admonet propter mortis incertitudinem, ut in parabola de virginibus, et alibi frequenter. Unde sicut diximus circa dictam parabolam, illam incertitudinem non solum a nobis non excludi, verum etiam nec ab hominibus futuris tempore Antchristianæ persecutionis, ita dicendum esset de his verbis Petri, etiam si in illo sensu dicta fuissent, quia semper homines de die suæ mortis et judicii incerti erunt.

30. *Eodem modo alia Scripturæ loca expnnuntur. — Cum mors venit, ut fur tunc etiam judicium venit.* — Ad cætera testimonia, quæ continent sententiam et comparationem illam, quod *dies Domini veniet ut fur*, dico imprimis, illam non solum ad judicium universale, se etiam ad diem mortis et privati uniuscujusque judicii referendam esse, ut sapienter docuit Augustinus, dicta epist. 80. Ubi etiam ita exponit verba Marci 13, ubi post longum sermonem de die universalis judicii, concludit Christus : *Vigilate ergo (nescitis enim quando Dominus domus veniet, sero, an media nocte, aut galli cantu, aut mane), ne cum venerit, repente*

inveniat vos dormientes. Probatque optime, quia verba illa omnibus nobis dicta sunt, si-
cū Christus subjunxit: *Quod autem vobis dico, omnibus dico, vigilate.* Dies autem universalis
judicij non inveniet nos et omnes homines in
hac vita, ut propter illius incertitudinem oport-
eat nos omnes vigilare; ergo unicuique hoc
dicitur propter suum privatum, ne illi ut fur
veniat: *Quod unusquisque* (ait Augustinus)
debet etiam de die hujus ritæ sue novissimo
formidare. Cur autem hoc monuerit Christus,
cum de universali judicio sermonem fecisset,
hac ratione et verbis exposuit Augustinus: *In quo enim quemque invenierit suis novissi-
mus dies, in hoc eum comprehendet mundi no-
vissimus dies, quoniam qualis unusquisque in
hoc die moritur, talis in illo die judicabitur.*
Et infra: *Tunc ergo unicuique veniet dies ille,*
scilicet, universalis judicij, *cum venerit ei*
dies, in quo talis hinc exeat, qualis judicandus
est illo die. Unde recte colligitur, unicuique
in tantum venire diem judicij ut furem, in
quantum dies mortis vénit ut fur; nam ut
etiam ait Augustinus: *Illum imparatum inven-
iet dies ille, quem imparatum inveniet ritæ*
sue ultimus dies. Eodemque modo de privato
judicio explicuit comparationem illam OEcumen., 1 Thess. 5.

31. *Mors ipsa non omnino ut fur venit.* — Non dicitur autem mors venire ut fur, quia omnibus sit repentina; nam, licet dies et hora ejus incerta sint, ordinarie instare præcognoscitur, et præcedunt signa non solum generalia, sed etiam specialia, quæ nos possunt ad vigilandum excitare, ne mors noctu, id est, dormientibus et imparatis nobis tanquam fur veniat; tamen quia etiam ipsa specialia signa mortis repente solent evenire, et tunc vix potest homo se ad mortem præparare, ideo mors, ut præviis suis præcursoribus conjuncta, dicitur venire ut fur. Hinc ergo etiam dies universalis judicij dicitur ventura ut fur, nobis quidem mediante nostro particulari judicio, ut exposuit Augustinus; illis vero, qui in illis ultimis temporibus vivent, quia dies illa cum suis proximis signis repente incipient, ut cum Ambrosio supra dixi. Nihilominus tamen non erit tam repentinus ille dies, quin per signa antecedentia sint homines, qui tunc vixerint, excitandi ut vigilent, et se præparent ne illos imparatos inveniat. Unde Paulus, in eodem loco, 1 Thess. 5, ut ibidem OEcumen. notat, alio exemplo mulieris prægnantis hoc declaravit, dicens: *Tunc repenti-
nus eis superveniet interitus, sicut dolor in*

utero habentis, et non effugient. Partus enim in se spectatus non est omnino repentinus, nam præcedunt dolores, quæ sunt illius appropinquantis signa; tamen dolores ipsi re-
pente veniunt, et ideo antea oportet præparari, alias magnum imminet periculum, et sic partus suis doloribus conjunctus dici potest venire ut fur, quia dies et hora ejus semper sunt incerta, et dolores ejus repente in-
cipiunt; ita ergo de die judicij intelligendum est.

32. *Mors imparatis ut fur venit.* — Addit denique Augustinus, epist. 80, diem Domini *non omnibus, sed imparatis ac dormientibus,* ut furem esse venturum. Quod egregie colligit ex illis Pauli verbis: *Vos autem, fratres, non estis in tenebris, ut vos dies illa tanquam fur comprehendat. Omnes enim vos filii lucis esatis, et filii diei, non sumus filii noctis, neque tenebrarum. Igitur non dormiamus sicut et cæ-
teri, sed vigilemus, et sobrii simus.* Igitur dormientibus, et rebus hujus mundi intemperate utentibus dies ille veniet ut fur; non autem vigilantibus et se præparantibus. Quia, licet ignorant illius judicij tempus, diem et horam, non ignorant tamen proxime instare, vel in se, vel in particulari judicio uniuscujusque, et ideo vigilant ne illos dies illa tanquam fur comprehendat. Unde quod ibidem ait Paulus: *Cum dixerint pax et securitas, tunc repentinus eis superveniet interitus, etiam de illo tem-
pore, in quo Antichristi persecutio grassabitur, et proxima judicii universalis signa vi-
deri incipient, Augustinus intelligit, dicitque illos, qui sanctos tribulabunt, dicturos esse, pax et securitas, eisque tanquam furem ven-
turum repentinum interitum; eos autem, qui persecutionem patientur, id est, filios Ecclesiæ, partim esse timore magno afficiendos juxta illud: Arescentibus hominibus præ ti-
more, et expectatione eorum, quæ supervenient universo orbi, quod maxime contingit fide-
libus peccatoribus, qui minus paratos eo tem-
pore sese invenient; partim esse spe suble-
vandos, juxta illud: Surgite, et levate capita vestra, quoniam appropinquat edemptio vestra,* quod his eveniet, qui sancte vixerint, et so-
brii ac vigilantes inventi fuerint.

33. *Quamvis definitum sit tempus a morte Antichristi, dies judicij recte dicitur ignorari.* — Hæc autem omnia sic intellecta impleri optime possunt, etiam si tempus, quo Anti-
christus persecuturus est Ecclesiam, et quod inter mortem ejus, et adventum Domini intercedet, certum ac definitum, et in Scripturis

revelatum sit. Nam hoc non obstante, homines mali et persecutores Ecclesiæ dicent: Pax et securitas, saltem toto tempore ante mortem Antichristi, quo tempore eis repentinus veniet interitus, et dies Domini, ut fur, et adhuc post diem interfectionis Antichristi, multitudine infidelium in sua ignorantia et incogitantia permanebit, et plures etiam ex credentibus mysterium ignorabunt, et male antea viventes in eadem consuetudine perseverabunt, donec signa judicii incipient, quando vehementer timebunt, et licet diem certum suæ mortis vel judicii venturi non agnoscant, nihilominus vel inviti intelligent diem Domini instare, quando vix poterunt sese ad illum præparare, et ideo illis etiam dies Domini veniet ut fur. Electis autem et justis non ita veniet, quia Christi et Prophetarum verba intelligentes et præ oculis habentes, divinaque gratia excitati et adjuti, spe gaudentes judicem expectabunt.

CAPUT IX.

ALTERI DIFFICULTATI OCCURRENDO, TEMPUS REGNI

ANTICHRISTI ET INITIUM EJUS AMPLIUS DECLARATUR.

1. *Antichristum nondum venisse.* — Ex his quæ præcedentibus capitibus disputavimus, solum concluditur neque præcessisse neque inchoatam esse Antichristi persecutionem; si enim præcessisset, jam mundus iudicatus fuisset; et si esset inchoata, intra breve tempus consummandus esset, quod est incredibile, quia neque aliqua persecutio nunc est acerbior quam præteritis temporibus fuit, nec juge sacrificium publice in Ecclesia celebrari cessavit, et alia signa diem judicii antecessura, quæ prædicta sunt, partim non sunt completa, partim nondum apparere incoepserunt, et longius tempus requirunt, ut compleantur, ut prædicationis Evangelii per totum orbem consummatio, divisio imperii Romani in decem regna, ejusque integra destructio, et aliqua similia, quæ intra quatuor annorum tempus expectari non possunt. Unde omnia bella, hæreses, et alia orbis mala, quæ hactenus patimur, nostrique majores experti sunt, ad illa pertinent, de quibus Christus dixit: *Audituri estis prælia, et opiniones præliorum; multi venient in nomine meo, et multos seducent, multi pseudoprophetæ surgent, scandalizabuntur multi, tradent vos in*

*tribulationem, et occident vos*¹, etc. Et nihilominus adjungit: *Videte ne turbemini, oportet enim hæc fieri, sed nondum statim finis.* Hæc enim omnia videmus et esse nunc, et fuisse olim in Ecclesia, et cum eadem rerum vicissitudine diuturno tempore. Ipse ergo rerum humanarum et Ecclesiæ status cum prophetiis conjunctus evidenter ostendit non esse finem mundi ita propinquum, ut intra tempus præfinitum et abbreviatum illius ultimæ tribulationis consummandus sit; ergo manifestum est tempus persecutionis Antichristi nondum inchoatum esse.

2. *Proponitur difficultas de initio regni Antichristi.* — Superest vero difficultas, quia ex hoc principio non est demonstratum nondum venisse et regnare cœpisse Antichristum, quia regnum ejus diuturnius futurum est, et non constat quantum durabit, nec quanto tempore ante diem judicii incipiet. Eo vel maxime quod non est etiam revelatum, an regnum illud antichristianum unius tantum hominis et regis futurum sit, an plurium in eodem throno sibi succendentium. Nam, licet ostensum sit, proprium Antichristum futurum esse unicum tantum singularem hominem, non tamen inde concluditur necessario futurum esse unicum regem in suo regno seu throno; poterit enim esse unus ex multis in eodem throno sibi succendentibus atque regnantibus, et ab illo denominabitur illud Antichristi regnum, et sic fieri poterit ut thronus Antichristi, seu regnum Antichristi sit inchoatum, et in mundo prævaleat, licet in illo nondum sederit unicus ille et proprius Antichristus. At vero si hoc totum concedatur, enerabitur argumentum contra hæreticos, saltem quoad eam partem, qua contendunt regnum, et thronum Antichristi jam incoepisse.

3. *Prima responsio, regnum Antichristi intra triennium cum semisse terminandum.* — Huic difficultati duobus modus occurri potest: unus est, asserendo non solum persecutionem, sed etiam absolute et simpliciter regnum et imperium Antichristi duraturum esse solum per dictum tempus trium annorum cum dimidio. Fundarique potest responsio, quia plures ex Patribus allegatis ita loqui et sentire videntur. Irenæus et Hypolitus absolute dicunt, regnaturum Antichristum tribus annis cum dimidio. Augustinus etiam ait, Antichristi sævissimum regnum exiguo tempore duratu-

¹ Matth. 24.

rum. Eodemque fere modo Victorinus loquitur, et multi alii præsertim ex modernis, ut Bellarmin., lib. 3 de Rom. Pontifice, cap. 8; et Ribera, in cap. 8 Apocalyps. Potestque ex Scriptura deduci, quia illa indifferenter loquitur de Antichristo, illique solum triennium et menses aliquot ad regnandum tribuit, neque inter ejus regnum et persecutionem distinguit; ergo nec nos distinguere possumus, nec habemus fundamentum quo plus temporis ad regnandum quam ad præliandum contra Christum illi tribuamus. Præsertim quia Scriptura dicit, dæmonem totam suam virtutem et potestatem illi communicaturum; dæmon autem non indiget multis temporum moris ad regna hominum debellanda, si a Deo permittatur; permittetur autem illo tempore ut libere agat, propter quod dicitur *solve modico tempore*, Apoc. 20; et cap. 12 dicitur: *Væ terræ et mari, quia descendit diabolus ad vos habens iram magnam, sciens quia modicum tempus habet.* Ergo non est cur regnum Antichristi, quod veluti regnum diaboli futurum est, diuturnius cogitur.

4. *Responsio illa improbatur.* — Nihilominus responsio hæc non potest satisfacere, nam, ut attigi in 2 tomo tertiae partis, disp. 54, sect. 5, licet de monarchia Antichristi recte declarata vere dici possit, tantum esse duraturam illo tempore quadraginta duorum mensium, utique ab eo tempore quo, extinctis tribus regibus, et superatis aliis septem seu cæteris totius orbis Romani, vel etiam christianis regibus, solus incipiat dominari, nihilominus necessarium est ut tempus vitæ et regni ejus futurum sit diuturnius. Et de tempore quidem vite id est per se manifestum, quia nasceret infans more aliorum hominum, et paulatim crescat, et per multos annos ad ætatem adultam perveniet, antequam regnaturus sit. Maxime quia (ut infra dicam) non habebit regnum hæreditario jure, sed per tyrannidem et fraudem illud usurpabit, quod nisi in adulta ætate facere non poterit.

5. *Tempus regni Antichristi determinate ignotum est.* — *Regni tempus longius erit quam persecutionis.* — De tempore autem regni, expressius quam alii hoc attigit Benedict. Pereira, lib. 15 in Daniel., non longe a medio, § *Cæterum*, etc., et ait, licet de tempore quo est Antichristi persecutio duratura, ex Scriptura constet, nihilominus, *quamdiu* (ait) *simpliciter Antichristus regnaturus sit, a nullo, quod ego sciam, traditur, et nulli opinor mortalium fuisse compertum.* Et statim tacite

explicat Patres proxime allegatos, ut loquuntur de Antichristi duratione, ab eo tempore ex quo *incipiet atrociter et crudeliter insectari sanctos, ipsisque prævalebit.* Et videtur sententia hæc fuisse Lyrani, Daniel. 42, nam circa illa verba: *Et a tempore ex quo ablatum fuerit juge sacrificium, et posita fuerit abominationis in desolationem, etc.*, inquit: *Hic Angelus instruit Danielem de termino a quo sunt computandi tres anni cum dimidio.* Et infra: *Ab illo sunt computandi dies mille ducenti nonaginta.* Unde inferius colligit, *tres annos persecutionis Antichristi non esse computandos ab illo tempore quo se incipiet ostendere, et aliquos ad se attrahere, sed ab illo tempore quo jam erit tantæ potestatis, quod se exhibebit adorandum hominibus, et quo fideles non audebunt publice celebrare sacrificium.* Et certe, si verba aliquorum Patrum attento expendantur, non plus significant. Ait enim Lactantius: *Dabitur ei desolare orbem mensibus quadraginta duobus.* Ephrem vero ait: *Postquam tria tempora cum semi impleta fuerint potestatis et operationis scelesti Antichristi, etc.* Et similiter Hieronymus, Daniel. 7: *Tribus annis et sex mensibus Sancti potestati Antichristi permittendi sunt.* Augustinus item, lib. 2 de Civit., c. 8, solum dixit, *tempus, pro quo solvendus est Satanás, futurum trium annorum cum dimidio,* et cap. 23, non absolute regnum, sed *sævissimum regnum* Antichristi dixit *exiguo tempore* duraturum.

6. *Probatur ex Daniele.* — Denique ex ipsa Scriptura videtur hæc sententia satis probari, primo, quia Daniel, cap. 12, expresse designat initium illius temporis dierum mille ducentorum nonaginta, scilicet, *a tempore in quo ablatum fuerit juge sacrificium, et posita fuerit abominationis in desolationem.* At non est verisimile, illud ipsum futurum esse initium regni et præliorum Antichristi, quia tam magna acerbitas persecutionis, quæ a publico sacrificio Christianos abstinere cogat, et ingens audacia sedendi in templo, tanquam sit Deus, quæ est abominationis desolationis, supponunt magnam potentiam, et regnum satis superbum et amplum; ergo duratio regni Antichristi non potest claudi illa brevi duratione. Consonatque ordo narrationis Joannis, Apocal. 13, ubi prius ait: *Vidi de mari bestiam ascendentem, quam esse Antichristum fere omnes intelligunt, et subjungit: Et dedit illi draco virtutem suam, et potestatem magnam.* Et postea: *Admirata est universa terra post bestiam, utique propter victorias et signa mi-*

randa; quæ omnia persecutionem præcedent. Nam postea subditur: *Et data est ei potestas facere menses quadraginta duos*, etc.

7. *Iterum ex Daniele.*—Denique idem confirmat narratio Danielis, capit. 7, ubi post visionem quartæ bestiæ habentis decem cornua, initium regni Antichristi sic describit: *Ecce cornu aliud parrulum ortum est de medio eorum, et tria de cornibus primis evulsa sunt a facie ejus; et ecce oculi quasi oculi hominis erant in cornu isto, et os loquens ingentia.* Et infra addit: *Et majus erat ceteris.* Et deinde subjungit: *Aspiciebam, et ecce cornu illud faciebat bellum adversus Sanctos*, etc. Ex quo discursu apparet, cornu illud, priusquam contra Sanctos bellum inchoet, habiturum parvum initium, et postea bellaturum tria regna, et subjugaturum alia, et ita esse augendum ut fiat majus aliis; hæc autem non possunt parvo tempore fieri; et tamen post illa sequetur initium persecutionis; ergo necesse est ut initium regni Antichristi per multum tempus antecedat initium persecutionis ejus. Ac proinde fit ut tempus totius regni Antichristi longius sit quam trium annorum cum dimidio; quibus (ut ibidem ait Daniel) *Sancti tradentur in manu ejus*, utique *Antichristi*. Aperte significans, illud breve tempus futurum esse solius persecutionis, tempus autem regnandi majus esse futurum.

8. *Tempus persecutionis certum est, monarchie incertum.*—Quantum autem futurum sit tempus regni simpliciter Antichristi, nullibi revelatum invenimus, et ideo nihil cum certitudine affirmari potest, nisi futurum esse majus quam quadraginta duorum mensium. Neque enim satis erit auxilium dæmonis, ut sine mora temporis et aliquorum annorum tot prælia efficiat, totque regna debellet, quia modo humano hæc facturus est, quanquam credibile sit, per dæmonis auxilium brevius et facilius id esse consecuturum. Unde etiam fit ut regnum Antichristi aliquot annis antecessum sit ejus monarchiam consummatam et perfectam, quia non in momento, sed discursu temporis illam consequetur, ideoque prius erit in fieri quam sit perfecta. Regnum autem incipiet simul ac per tyrannidem directionem aliquam occupaverit, suprenamque vim et jurisdictionem in aliqua provincia obtinere incepit. Et ita probabile est, consummatam monarchiam tantum illo brevi tempore quadraginta duorum mensium esse duraturam, quia simul atque fuerit politus regnis omnibus, persecutionem incipiet. Hoc

autem non est ita certum, quia etiam post monarchiam perfecte obtentam fieri potest, ut non statim persecutionem incipiat, et ideo de sola persecutione certum est duraturam per solos illos menses. De monarchia vero est probabile, sed incertum, de regno vero simpliciter certum est, futurum esse diuturnius.

9. *Tempus regni Antichristi hominis vitam non excedet.*—Ut autem difficultati tactæ in principio occurramus, addendum censemus, licet definire non possimus certam quantitatem durationis illius regni, nihilominus credendum esse, tempus illud non esse diuturnius nec longius futurum, quam esse possit et regulariter soleat esse unius hominis vita, nimirum septuaginta aut octoginta annorum. Et in Antichristo credibile est multo brevius futurum esse tempus durationis ejus, quia non permittetur vivere toto tempore quo naturaliter posset, sed divinitus occidetur, aut vivus in infernum mittetur, fortasse in dimidio dierum suorum, quia *propter electos breviabuntur dies illi*¹. Ergo merito conjectare possumus, initium totius vitæ Antichristi vix antecessum initium persecutionis per quinquaginta annos, et initium regni vix per triginta, et fortasse erit brevius. Nam Alexander Magnus breviori tempore mundum subjugavit, ut ex lib. 1 Machab., c. 1, sumitur; verisimile autem est Antichristum velocius occupaturum omnia propter dæmonis auxilium, et licentiam seu permissionem Dei amplam, ut jam dixi. Quod autem totum tempus durationis Antichristi non sit futurum majus quam possit esse tempus unius vitæ humanæ, ex alio principio, cap. 2 posito, convincitur, nimirum Antichristum futurum esse unum singularem hominem tantum, ut statim amplius explicabimus.

10. *Instantia hereticorum.*—Adhuc enim superest instantia supra facta, scilicet, hoc recte dici et concludi de proprio Antichristo, ut futurus est una singularis persona, et consequenter etiam de regno ejus, ut futuro sub ejus personali imperio, ut sic dicam, non probari tamen sufficienter ex dictis imperium Antichristi ab ipsomet Antichristo esse inchoandum. Cur enim non poterit ab ejus progenitoribus inchoari, et tandem ad illum pervenire? Quod si hoc ita contingere potest, unde constabit nondum venisse, seu inchoatum esse thronum illum et regnum, in quo Anti-

¹ Matt. 24.

christus sessurus est, et inde proditurus ad alia temporalia regna occupanda, ac tandem Ecclesiam Christi persequendam. Fieri ergo potest ut regnum illud jam incœperit, et quod per multa annorum sæcula duraturum sit; quia illius regni non est præfinitum aliquod tempus in Scriptura, nec data sunt signa ad cognoscendum initium ejus, sed tantum finem. Quod si hoc concedatur, consurgit difficultas in principio tacta, quia nihil erit contra hæreticos effectum; illi enim solum contendunt thronum et regnum Antichristi jam venisse, non personam aliquam singularem quæ sit Antichristus.

41. Responsio. — *Scriptura de Antichristo ut uno tantum homine loquitur. — Thronum Antichristi jam inchoatum falso fingunt hæretici.* — Respondeo imprimis, fugam hanc nihil hæreticis hujus temporis prodesse; illi enim contendunt proprium Antichristum jam venisse, et singularem persecutionem sub ipso prædictam jam esse inchoatam, et durasse per multos annos, usque ad mille vel plures, et fortasse per multos adhuc duratram. Hoc autem esse falsum ex allegatis prophetiis aperte convincitur, et aliis circumstantiis planius fiet. Et præterea errant isti hæretici, quia in illo diuturno throno Anti-christiano, quem fingunt, non censem solam aliquam personam in illo sedentem esse proprium Antichristum, sed omnes qui in illo throno sedent, per totum hoc tempus, ex quo Antichristianismus secundum eorum imaginationem cœpit, dicunt esse vere ac proprie Antichristum. Quo posito, explicare non possunt quis illorum sit, qui tribus tantum annis cum dimidio persecutur Ecclesiam, *tribulatione illa magna qualis nunquam fuit*; quisve sit ille quem *Christus occidet spiritu oris sui*; non enim occidet omnes sedentes in illo throno, nec plures, de uno enim tantum id est prædictum; quis denique sit ille cui dæmon, a Deo specialiter solitus et permisus, suam totam virtutem communicabit, et potestatem conferet, ut signa mendacia faciat et prodigia, nam hæc et similia hactenus non fiunt, et de uno tantum homine prædicuntur. Quod si dicant hunc esse futurum illum, qui postremo sederit in tali throno, qui in illo destruendus est, et prorsus extinguendus, certe solum illum vocat Scriptura per antonomasiæ Antichristum, et solum illum nobis tribuit inter signa certa futuri judicii; frustra ergo hæretici plures alios, qui æqualiter hoc nomen mereantur, fingunt, cum in aliis non possint

illam proprietatem Antichristi ostendere. Et præterea voluntarie, et ex sola malitia confingunt dari jam aliquem thronum regium, in quo ultimus rex futurus sit ille propriissimus Antichristus. Quæ enim sunt signa talis throni? aut ubi in Scriptura indicatus est? aut cur non poterit quis voluntarie dicere illum esse thronum regni Angliæ, sicut ipsi malitiose dicunt esse thronum Apostolicæ Sedis, et alius finget esse thronum Turcæ, vel alium similem? Est ergo vana illa cogitatio.

42. Regnum Antichristi brevius vita ejus futurum. — Antichristus regnum fraudz, non hæreditate obtinebit. — Quin potius addo, licet non sit tam evidens ex Scripturis, totum tempus regni et throni, quod possidebit Antichristus, non esse futurum diuturnius, quam fuerit duratio vitæ Antichristi, nihilominus magna probabilitate posse ex Scriptura colligi, minori tempore duraturum regnum, quam personam regis in statu regio. Quod ita declaro, quia imprimis persona Antichristi nec nascetur ex regibus, nec erit legitimus hæres alicujus regni. Utrumqæ colligo ex Daniel. 11, ubi sic dicitur: *Et stabit in loco ejus despectus, et non tribuetur ei honor regius, et reniet clam, et obtinebit regnum in fraudulentia.* Quæ verba non possunt ad aliquam seriem hominum in throno aliquo sibi succedentium accommodari, sed de una aliqua singulari persona prædicuntur, nam in longa successione regum in eodem throno, licet fortasse primus fuerit despectus, et clam introierit per fraudulentiam, non possunt hæc de omnibus successoribus affirmari. Dicuntur ergo illa omnia simul de uno aliquo tyranno fundatore (ut sic dicam) vel inchoatore alicujus regni. Præterea illammet personam futuram esse Antichristum testatur Hieronymus ibi contra Porphyrium, qui de Antiocho locum illum interpretabatur, dicens: *Nostri autem et melius interpretantur, et rectius, quod in fine mundi hæc sit facturus Antichristus, qui consurgere habet de modica gente, id est, de populo Judeorum, et tam humilis erit, atque despectus, ut ei non detur honor regius, et per insidias et fraudulentiam obtineat principatum.* Dum vero ait, *nostri autem*, aperte significat hanc fuisse tunc ecclesiasticorum concordem sententiam, quam etiam sequitur Theodoretus ibi. Confirmarique potest ex Daniel. 7, ubi dicitur: *Et ecce cornu aliud parvulum ortum est de medio eorum, quod de Antichristo omnes scriptores ecclæ-*

siaſtici intellexerunt, ut ibi ait Hieronymus. Dicitur autem parvulum, quia erit abjectus, et infimae originis, ac subinde non haeres regni alicujus, imo nec regiae stirpis; et ideo dicitur, nasci *de medio eorum*, utique regum, non ex illis. Igitur Antichristus non succedet in aliquo regno vel throno, sed erit primus rex in suo throno, quem ipse inchoabit, erget seu usurpabit.

13. Antichristus, ut primus in suo throno, sic erit postremus. — His addo, Antichristum non habiturum in suo regno successorem, quia ipsemet, qui regnum per fraudulentiam obtinebit, illud per diaboli potentiam in immensum augebit, et Santos postea persequetur, ac tandem a Christo occidetur; et regnum ejus deſtruetur; ergo non habebit in regno successorem, et consequenter non plus, imo minus durabit regnum quam rex, quia simul finientur, et tardius incipiet Antichristus regnare quam esse. Quae omnia ex eisdem locis Scripturæ colliguntur. Nam Joannes, dicto cap. 13, sub nomine bestie de uno et eodem homine loquitur, qui consurget de terra, cui diabolus dabit suam virtutem et potestatem, per quam universam terram subjugabit, et postea bellum faciet Sanctis per menses quadraginta duos. Idem sumitur ex Daniel. 7, ubi sub specie cornu parvuli describitur idem Antichristus cum eodem progressu in erectione throni, et augmento temporalis potentiae, et transitu ad persecutionem Sanctorum, et blasphemias contra Deum et Christum, usque ad tempus, et tempora, et diuidium temporis, quo tempore et ipse et regnum ejus deſtruuntur; et consonant huic veritati, saltem in sensu mystico, verba Job. 18: *Non erit semen ejus, neque progenies in populo suo, nec ulla reliqua in regionibus ejus.* Quae verba interpretans Gregorius, l. 14 Moral., c. 41, per illa 2 Thess. 2: *Quem Dominus Jesus interficiet spiritu oris sui, addit: Dum ergo ejus iniqitas cum mundi statu terminatur, progenies ejus in populo suo non relinquetur, etc.* At nulla ejus progenies in mundo remanet, quia districtus iudea iniqitates illius cum isto mundi fine concludet, etc. Quod vero hoc de Antichristo intelligi debeant, demonstratur, cum subditur: *In diebus ejus stupebunt novissimi, et primos invadet horror, etc.* Concludimus ergo durationem regni Antichristi non esse futuram diuturniorem quam vita unius hominis esse possit. Unde fit evidens, Antichristum usque ad nostra tempora non venisse, neque regnum ejus inchoatum

esse, non solum in persona ejus, quod est evidentius, verum neque in aliquo, vel aliquis, quibus ipse legitime succedere possit.

14. Signa adventus Antichristi nondum sunt impleta. — *Tunc Romanum imperium revertendum.* — *Modus eversionis incertus est.* — Atque ad hanc veritatem confirmandam addi possunt duo alia signa temporis adventus Antichristi: unum est prædicatio Evangelii per universum orbem, quæ debet præcedere adventum Antichristi, et nondum est facta; aliud est deſtructio omnimoda Romani imperii, quæ vel præcedere etiam debet Antichristi adventum, vel per ejus potentiam et victorias est consummanda. De his vero signis aliquid in secundo tomo tertiae partis, disp. 34, sect. 2, breviter attigi, et in disp. 56, sect. 1 et 2, eadem late ac diligenter tractavi, ideoque in præsenti nihil de illis addendum existimavi. Solum circa posteriorem, de Romani imperii destructione, adverto, eruditum quemdam virum¹ me reprehendisse, quod ibi dixerim signum hoc de eversione Romani imperii incertum esse, nec satis constanter ex Pauli aliisque Scripturæ vaticiniis colligi posse. Si tamen attente legantur quæ diximus, non signum ipsum in dubium revocavimus, quod certum, et communī Patrum traditione, quæ nobis etiam Apostolica visa est, constare diximus. De modo autem quo exponendum et intelligendum sit, tantam certitudinem esse negavimus, quia neque Patrum traditio et censensio æque in modum ipsum cadit, nec ex prophetiis satis definiri potest. Quod nunc etiam verum esse censemus, et brevem expositionem adjungimus.

15. Variis enim modis intelligi potest, extinguendum esse imperium ante Antichristi adventum, primo, quia dividendum est in decem vel plura regna Romani imperii sub regibus, qui illud inter se divisum occupabunt et retinebunt, donec Antichristus veniat, et illa omnia usurpet. Et hoc, si aliud non addatur, est certissimum, et plane colligitur ex prophetiis, præsertim Danielis, et est concors sententia Patrum, ut ibi diximus. Secundus modus addit præcedenti, futurum esse ante adventum Antichristi, ut per illa decem regna omnino extinguitur nomen et dignitas imperii, aut imperatoris, aut regis Romanorum, et hunc modum diximus non esse certum, neque satis colligi ex prophetiis, neque

¹ Thomas Malven., lib. 2 de Antichristo, c. 3, et l. 4, c. 15.

affirmari ab omnibus Patribus. Quia, licet in aliquo vel pluribus illorum regum, nomen et dignitas Romani regis perseveret, fieri poterit ut per Antichristum ipsum vincantur et spolientur. Et sic totalis destructio Romani imperii non omnino antecedet Antichristum, sed per illum consummabitur.

16. *Confirmatur ex Patribus.* — A qua sententia et explicatione certe non multum distat Hieronymus, Daniel. 7, cum ait : *Dicamus, quod omnes scriptores scholastici trididerunt, in consummatione mundi, quando regnum destruendum est Romanorum, decem futuros reges, qui orbem Romanum inter se dividant, et undecimum surrecturum esse regem parvulum, qui tres reges de decem superaturus sit.* Et infra : *Quibus intersectis, etiam alii septem vitori colla submittent.* Quæ verba ad prædictum sensum trahi possunt, licet in eis non declareret an in illis decem regibus, vel in aliquo illorum nomen Romanum permansurum sit, donec per Antichristum extinguitur. Cyrillus autem, cœches. 15, licet prius dicat : *Veniet Antichristus, cum impleta fuerint tempora imperii Romani,* non explicat an debeant esse impleta, ita ut jam omnino extinctum sit, vel ita ut jam sit impletum tempus in quo sit extingendum. Unde infra subiungit : *Decem simul reges Romanorum excitatibuntur, post quos Antichristus Romanorum potestatem rapiet.* Tertullianus autem in Apolog., cap. 32, *vim maximam orbi imminentem, Romani imperii commeatu dicit retardari.* Ubi scholiastes ait : *Sicut Medorum dominatum Babylonii pessum dedere, Babyloniorum vero Persæ, Persarum rursus Macedones, Macedonum porro Romani, ita Romanorum imperium Antichristus, et Antichristi postremo Dominus noster.* Idemque Tertullianus, lib. ad Scapul., cap. 2, dicit de Romano imperio : *Tamdiu durabit, quamdiu sæculum stabit,* quia usque ad Antichristi persecutionem stabit. Imo And. Cæsar., in Apoc., cap. suo 36, ait Antichristum assumpturum nomen et titulum regis Romanorum, et totum illum principatum in decem regna jam divisum, funditus eversum. Præterea Lactan., lib. 7, c. 15, dicit Romanum imperium esse delendum, non declarat autem an omnino ante Antichristum, vel per illum; cap. autem 23, addit, *quamdiu Roma incolumis fuerit, non futurum iudicium.* Et Chrysostomus, homil. 4, in 2 ad Thessalon., *Romanum imperium ab Antichristo extinguendum esse dicit, et alia multa ex Augustino, Theodoreto et aliis in dicto loco ad-*

duximus, quibus hanc partem probabilem esse ostendimus, neque aliquid denuo allegatum video, quo posterior hic modus improbabilis, prior vero certus omnino esse ostendatur.

17. Quin potius addo verisimile videri saltem temporale regnum Pontificis Romani duraturum esse usque ad Antichristi tempora inclusive, donec per illum destruatur et usurpetur, ut infra videbimus; atque hoc sati judicari posse, ut Romanum imperium non censeatur omnino extingendum ante adventum Antichristi, sed per eum esse tyrrannidem consummandam. Denique ad majorem explicationem distingui possunt duo tempora Antichristi: unum, temporalium præliorum, quibus decem reges vincet et omnia usurpabit, aliud persecutionis Sanctorum, et apostasiæ a Christo. Quod ergo ante hoc posterius tempus Romanum imperium omnino auferendum sit, certum est ex omnibus dictis, et ex aliis quæ dicto loco adduxi, et copiosius dictus auctor prosequitur. De priori autem tempore censeo valde probabile, in illomet tempore, et per Antichristi prælia destructio nem Romanæ imperii consummandam esse, ut suadent cætera quæ insinuavi, et ita optimè intelliguntur verba Pauli, 2 ad Thessal. 2: *Tantum ut qui tenet nunc, teneat, donec de medio fiat, et tunc revelabitur ille iniquus.* Utique extollendo se supra omne quod dicitur Deus, etc. Et facile etiam omnia Patrum dicta conciliantur. In hoc ergo sensu diximus non esse certum, an imperium Romanum omnino sit ante inchoatum regnum et prælia Antichristi, vel per illa, omnino extingendum, quod nunc etiam verum existimamus.

CAPUT X.

ALIIS DUOBUS ARGUMENTIS SATISFIT, ET OBITER NONNULLÆ CATHOLICORUM OPINIONES DE TEMPORE ANTICHRISTI REFELLUNTUR.

1. Præter ea quæ rex Angliæ objicit, duo alia solent ex Scriptura sacra, contra ea, quæ de temporibus Antichristi diximus, a Protestantibus opponi, quibus ad hujus puncti complementum satisfacere necessarium visum est. Primum est, quia licet finis Antichristi in fine mundi futurus sit, non opus est ut ejus initium tanto tempore differatur, et consequenter fieri non potest ut ejus duratio tam brevis sit quantum a nobis est descripta. Ad hoc autem suadendum tria loca inducunt.

Primus est illud Pauli, 2 Thess. 2, supra tractatum: *Mysterium jam operatur iniquitatis*, etc. Secundus est, 1 Joan. 2: *Antichristus venit*, ubi de proprio Antichristo loquitur, ut indicat articulus in græco additus juxta superius dicta, et tamen de præsenti dicit, *renit*. Tertius locus est 1 Joan. 4, ubi eodem modo de Antichristo loquens ait: *De quo audidistis quoniam renit, et nunc jam in mundo est*.

2. *Antichristum jam fuisse tempore Apostolorum, et iterum venturum, aliqui dixerunt.* — Hæc vero ex supra dictis facilem habent solutionem; quia vero non solum hæretici, sed etiam aliqui Catholici nobis in hoc puncto negotium faciunt, illa iterum proponimus, ut opiniones quasdam Catholicorum attingamus, omnibusque satisfaciamus. Igitur propter hæc testimonia, præserlim Pauli, aliqui ex antiquis scriptoribus dixerunt, Antichristi personam tempore Apostolorum venisse, non tamen tunc totam suam iniquitatem exercuisse et consummasse, sed in fine mundi iterum venturum, ut suum cursum compleat, et omnia, quæ de illo scripta sunt, impleantur. Hanc opinionem veterum Scriptorum fuisse, Hieronymus et Augustinus referunt, ille Daniel. 11, hic lib. 20 de Civit., cap. 29, camque secutus est Victor., in suo commentario super Apocalyp., circa medium, ubi expounens decimum tertium caput, sic de Antichristo scribit: *Fuisse autem eum jam in regno Romanorum, et fuisse inter Cæsares, Paulus contestatur, dicens: Qui nunc tenet, teneat, donec de medio fiat.* Unde sentit, eum, qui tunc tenebat imperium, utique Neronem, fuisse Antichristum. Eumdem vero putat esse iniquum illum, qui postea revelandus est. Nec tamen existimavit eum vivere, aut usque ad finem mundi victurum, sed mortuum esse et resurrecturum, *non sua (inquit) virtute, nec Patris* (utique carnalis, seu per humanam generationem), *sed Dei iussu suscitatus ob hominum peccata, ut postea prosequitur.*

3. *Neronem iterum venturum, opinio aliorum fuit.* — Sulpitius etiam Severus, lib. 2 Sacr. Histor., circa medium, refert, suo tempore, *multorum opinione receptum esse, Neronem Antichristum venturum fuisse*, quam ipse ibi nec affirmat, neque negat, sed solum ait: *Dignus extitit, qui persecutionem in Christianos primus inciperet, nescio an et postremus complebit.* Inserius vero ait: *Unde creditur, etiam si se gladio ipse transfixerit, curato rulnere ejus, serratus sub finem saeculi mitendus.* Cui sententiæ adhaerere videtur, et

secundum illam de Nerone intelligit illud Apocalyps. 13, de bestia, quæ plagam mortis accepit, quæ postea curata est. Unde sentit, Neronem nunc non esse mortuum, sed reservatum, ut in fine mundi veniat, mysterium iniquitatis completurus. Idem vero, in Dialog. 2 de Vita S. Martini, in fine, licet affirmet redditum Neronem in fine mundi, et debelaturum decem reges, et iterum imperaturum in Occidente, et acerbam persecutionem in Christianos renovaturum, ut eos ad idola collenda inducat, non tamen dicit illum futurum Antichristum, sed potius eodem tempore excitandum in Oriente Antichristum, qui se Christum venditet, et Christianos a Christo avertere conetur, non tamen ad idola, sed ad se adorandum, Judaismumque servandum trahat, cumque dicit pugnaturum esse contra Neronem, et illum superaturum, ac orbem subjugaturum, donec a Christo occidatur.

4. *Opinio illa in Paulo fundamentum non habet.* — Hæc vero sententia, licet anilem fabulam contineat, non tamen ex hæresi processit, nec illam in rigore continet, neque negat receptam traditionem, propriumve Scripturæ sensum, quo habemus Antichristum esse unam certam personam, et venturum esse in fine mundi, et parvo tempore duraturum. Sed adjungit alia, non quidem Scripturæ contraria, sed male in ea fundata, et per se vana et incredibilia. Paulus enim licet (juxta probabiliorem magisque receptam expositionem) dixerit, Neronem suo tempore operatum esse iniquitatem Antchristianam (ut sic dicam), non tamen eamdem quam postea Antichristus operabitur, sed ad imitationem ejus, vel quasi imaginem ejus. Unde licet dixerit Neronem esse Antchristum, addit, in mysterio, seu esse *mysterium iniquitatis*, id est typum Antchristi, ut supra explicuimus. Sine fundamento ergo fingitur, Neronis personam eamdem futuram esse cum persona Antchristi, vanaque, et praeter divinam consuetudinem, imo et contra bonitatem cogitat, suscitandum esse a Deo Neronem jam mortuum, ut iniquitatem, quam inchoaverat in priori vita, postea consummet. Resurrectionis enim opus, quod proprium Dei est, non fit propter iniquitatem operandam, sed propter altiores et honestiores fines Deo dignos, et sua divinæ sapientia ac providentiae consentaneos. Praeterquam quod Scriptura nunquam significat, Antichristum supernaturali modo esse a Deo procreandum, vel

revocandum in mundum, sed more aliorum hominum generandum.

5. *Fabula est Neronem modo rivere.* — Unde non minus vana fuit cogitatio dicentium, Neronem conservari nunc in vita mortali, donec iterum appareat. Nam hoc etiam sine miraculo fieri non potest; ineptum autem est talia miracula Deo tribuere propter tales fines seu causas. Neque minus frivolum est, locum Apocalypsis de plaga bestiæ curata sic expondere, tum quia longe aliter a Patribus exponitur, ut supra visum est; tum etiam quia ex verbis cap. 13 clare colligitur, tam plagam quam curationem ejus tempore Antichristi esse futuram, quando admirata terra post bestiam, draconem adorabit; tum etiam quia ex historiis constat Neronem se ipsum jugulasse ac vere interfecisse. Ut enim ait Gregorius Turonensis, l. 1 Histor. Francor., c. 23, *excitatam super se seditionem fugere tentans, quarto ab urbe lapide propria se manu interfecit.* Idemque habet Paulus Orosius, lib. 7 Histor., anno ab urbe condita 88, additque in eo omnem Cæsarum familiam consumptam esse. Idemque refert Eusebius in Chron., anno Domini 70; eodemque modo de Neronis morte loquitur Nicephor., lib. 2, c. 27, et libro quarto, cap. primo, et in historiis profanis est res nctissima. Denique si (ut posteriori loco dicebat Sulpitius) Nero non est futurus Antichristus, cur vel quo fundamento fingitur iterum in fine mundi venturus? Hæc ergo licet hæretica non sunt, ut fabulosa sunt contemnenda.

6. *De Antichristo et Nerone ut distinctis loquitur D. Paulus, 2 Thes. 2.* — Locus autem Pauli satis ex dictis declaratus est, quia, ut supra dixi, Neronem, vel totum imperium Romanum ethnicum, Antichristi mysterium seu typum appellavit Paulus, illum autem eviderter a vero Antichristo distinxit, dicens: *Quid detineat scitis, donec e medio fiat, et tunc revelabitur ille iniquus.* Ad priora autem Joannis verba respondemus primo, Augustinum, lib. 20 de Civitat., cap. 29, de futuro allegare verba illa: *De quo audistis quoniam venturus est, sive quia ita legit ex græco, sive quia tacite ita interpretatus est.* Non est enim novum in Scriptura præsens pro futuro accipi, ut Joan. 4 dixit Samaritana: *Scio quia Messias venit, de præsenti loquens, et tamen statim per futurum declarat: Cum ergo venerit ille, nobis annunciat omnia.*

7. *Opinio putantium aliquos hæresiarchas, Antichristum fuisse.* — *De Mahometo idem ali-*

qui affirmant. — Verumtamen hic nobis occurrunt alii Catholici, esto verum sit Antichristum non venisse Apostolorum tempore, non tamen esse expectandum circa finem mundi; nam ille metu loquendi modus propinquitatem majorem indicat; ideoque non esse incredibile Antichristum jam venisse in Lutherio, vel alio hæresiarcha simili. Præcipue vero notari obiter potest opinio Joannis Anni, qui super Apocalypsim, Mahometum esse Antichristum sibi persuasit, quem nonnulli secuti sunt, quos refert et sequitur Feuard. lib. 5 Irenæ., c. 30. Illi vero non verbis Joannis aut Pauli, nec aliquo Scripturæ testimonio, sed solis conjecturis, quibus ea quæ de Antichristo prædicta sunt, Mahometo accommodant, nituntur.

8. *Mahometum non fuisse verum Antichristum ostenditur.* — Non censeo autem necessarium illas vel referre vel refellere, tum quia id diligenter præstitit Benedictus Pereir. in proprio opusculo contra Annium, quod suis disputationibus in Apocalypsim adjunxit. Tum etiam quia, licet unum vel alterum signum Antichristi in Mahometo reperire valeant, id mirum non est, quia nullus est hostis Christi, qui aliquam de proprietatibus Antichristi non participet; ideo enim omnes illi generali quadam appellatione Antichristi vocantur, ut supra vidimus. Necessarium ergo est omnium signorum Antichristi collectionem in aliquo ostendere, ut eum esse proprium ac verum Antichristum concludatur. Hoc autem in Mahometo ostendere impossibile est, nisi negando prædictiones multas de Antichristo, præsertim eas quæ sunt de tempore persecutionis et mortis ejus, in illo sensu proprio, quo a Patribus intellectæ sunt, easque ad sensus metaphoricos, alienos a proprietate verborum, et a multis circumstantiis, quas in ipsis prophetiis ponderavimus, detorquendo; atque etiam illas, quæ sunt de brevi tempore quo est persecutio Antichristi duratura, et de morte illius prodigiosa, per quam persecutio finietur, et paulo post sequetur judicium. Accedunt etiam quæ de imperii Romani defecctione tradunt Patres, ita interpretantes verba Pauli, 2 Thes. 3: *Quid detineat scitis, tantum ut qui tenet teneat, donec e medio fiat, et tunc revelabitur ille iniquus.* Anno enim 630, quando Mahometus apparuit, adhuc vigebat Romanum imperium sub Heraclio, et postea etiam floruit, et usque ad nostra tempora durat, licet semper in diminutionem iverrit.

9. *Nec in throno Mahometi successive est*

Antichristus. — Præterea omnia, quæ in sequentibus de testibus contra Antichristum mittendis, et de sede, et Antichristi erroribus variisque descriptionibus dicemus, opinionem illam aperte confundunt. Ideoque coguntur auctores ejus, quædam ad personam Mahometi referre, alia ad thronum ejus, seu imperium, duraturum usque ad mundi finem, et tunc acerbius in Christianos sævitum, ideoque qui sic opinantur, in multis cum Protestantibus convenient, vel ad metaphoras voluntarias confugiendo, vel etiam non de una et eadem persona, quæ de Antichristo prædicta sunt, interpretando, contra Scripturæ contextum ac certitudinem. Et ideo licet opinio hæc non contineat impietatem Protestantum, cavenda est, ne illis major errandi occasio detur, et ne pravis interpretationibus res per se difficilis et obscura magis involvatur. Unde merito Damascenus, lib. de Hæresibus, in fine, Mahometum typum et præcursorum Antichristi vocat, non ipsum verum Antichristum; idemque de Luthero, et de aliis hæresiarchis, qui hactenus fuerunt, intelligendum est; nam ex eisdem principiis de illis ferendum est judicium, ne circa singulos immorari necesse sit.

10. *Respondetur locis initio adductis.* — Ad objectionem ergo factam circa verba Joannis, nego verbum *venit* de præsenti accipi pro futuro propter propinquitatem effectus, sed sëpe propter certitudinem prophetiae. Quod optimè comprobatur Ezechiel. 3, ubi præsenti additur præteritum, cum dicitur: *Ecce venit et factum est*, et tamen sermo est de die judicii, ut exponit Hieronymus, qui et propter certitudinem prophetiae, et propter exaggerationem, ut semper cogitetur quasi præsens, et jam factum, per verba de præsenti et de præterito significatur. Ita ergolocutus est Joannes. Quod satis declaravit, adjungendo: *Et nunc Antichristi multi facti sunt*¹, perinde enim fuit ac si diceret, licet unus Antichristus singularis, ac cæterorum caput et exemplar certissime veniat, id est, venturus sit, jam vero nunc in præsenti tempore multi Antichristi facti sunt, id est, multi ejus ministri et præcursores, qui sicut facta, ita et nomen ejus participant. Dum ergo Joannes ait hos jam venisse, satis declarat alterum nondum venisse, sed dicit venire, quia certissime veniet, quia dum alii quasi vias ejus præparant, quodammodo jam venire dicitur.

¹ 4 Joan. 2.

11. *Explicatur locus 4 Joannis.* — Et sic facile etiam intelliguntur alia verba capituli quarti. Nam imprimis cum *omnis spiritus, qui solvit Jesum*, dicitur esse *Antichristus*, vel intelligi debet de Antichristo generaliter sumpto, quia multi fuerunt hæretici solventes Jesum, et omnes Judæi solvunt illum, negantque esse verum Messiam et verum Deum; vel intelligendum est esse Antichristum, non persona, sed spiritu, sicut Joannes dicitur esse Elias, Matthæi 12, et Luc. 4. Unde graece legitur: *Et hic est Antichristi*, utique spiritus Antichristi, sicut legit Cyprianus, lib. 2 ad Quirinum, cap. 8; seu: *Est de Antichristi Spiritu*. Et sic recte ponitur ibi Antichristus cum articulo, quia omnes qui solvunt Jesum, imo omnes hæretici habent illius spiritum, licet non sint ipse in persona. Et ita etiam convenienter exponuntur sequentia verba: *De quo audisti quoniam venit*. id est, venturus sit, et jam venire incipiat per suos præcursores, per quos jam in mundo est secundum spiritum suum, et muneric ac nominis participationem, quos propterea præcursores spiritus Antichristi recte vocat Tertullianus, lib. 5 contra Marcion., c. 16.

12. *Objiciunt hæretici facta Antichristi brevi tempore claudi non posse.* — *Quid a Paulo nomine discessionis significetur.* — Altera principalis objectio hæreticorum est, quia ea, quæ facturus est Antichristus, et de illo prædicta sunt, non poterunt brevi tempore a nobis præscripto consummari. Et præcipue exagerant verba illa Pauli: *Nisi venerit discessio primum, et revelatus fuerit homo peccati*, etc. Quæ discessio (ut Calvinus dixit) tam universalem apostasiam totius orbis a Christo significat, ut multorum annorum, imo et multorum tyrannorum, hæreticorum, aut hostium Christi successione opus habeat, quia unius hominis vel vita vel diligentia ad illam consummandam non sufficit. Talem autem futuram esse illam apostasiam, eamque per discessionem a Paulo significari, Pontificiorum omnium sententiam esse rex Angliae in sua Præfatione tanquam rem certam supponit, et quadam notanda ratione suadet, dicens: *Alioqui eorum Ecclesia quotidie esset erroribus obnoxia, quod omnino ipsorum doctrinæ repugnat*¹. Denique initium et auctorem ejusdem apostasiae futurum esse Antichristum, et per eundem esse consummandam, satis indicavit Christus, cum dixit, *tunc futuram esse tribu-*

¹ In Præfat., pag. 64.

*lationem, qualis nunquam fuit, et propter electos esse cito consummandam*¹, utique interfecto ipso Antichristo, ut Paulus declaravit.

13. *Primo significari potest Romani imperii eversio.* — Respondemus imprimis non esse necessarium, in loco Pauli per *discessionem* intelligere universalem apostasiam a fide, sed integrum destructionem Romani imperii, seu divisionem ejus in decem regna, ut interpretatur Tertullianus, lib. de Resur. carnis, cap. 24; et Hieronym. dicta quæst. 11, ad Algas.; Ambros. et Primasi. ibi. Destructionem autem Romani imperii fatemur, non brevi tempore esse peragendam, sed paulatim per plures annos et reges. Prius enim dividetur Romanum imperium in decem, sive plures reges, postea vero veniet Antichristus, qui cum illis per aliquos annos certabit, et eos tandem superabit, ut diximus. Ad totam ergo discessionem seu defectionem Romani imperii non sufficiet unius hominis vita, ad ultimam vero consummationem per Antichristum faciendam unius hominis vita sufficiet, ut sat satis explicatum est.

14. *Secundo, Antichristus ipse discessio vocatur.* — Secundo, dicimus nomine *discessionis* significari ibi ipsum Antichristum; sic enim Augustinus, 20 de Civitat., cap. 19, *refugam legit, et ait: Illum refugam vocat, utique a Domino Deo; quod si de omnibus impiis merito dici potest, multo magis de isto.* Græce vero ibi ponitur nomen *apostasia*, quo nomine ipsum Antichristum significari intellexerunt ibi Græci; indicat Chrysostomus, homil. 3, ut illum intellexit et sequitur Theophylact. Idemque tradunt Theodoret. et OEcumen., et Hugo Eterian., lib. de Recess. animar., cap. 23. Potest autem Antichristus ita vocari, vel ad declarandum futurum esse summum apostatam, sic enim solent abstracta pro concretis poni ad significandam excellentiam, seu excessum in tali proprietate; vel certe per metonymiam nomen effectus auctori seu causæ tribuitur, nam quia Antichristus erit causa maximæ apostasie in Ecclesia futuræ, nomen apostasie illi tribuitur.

15. *Discessio non necessario significat generalem apostasiam.* — *Apostatae Ecclesiam non maculant, quia extra ipsam sunt.* — Ex quibus constat non subsistere, nec verum esse, quod rex Angliæ, pagin. 64 Praefationis, dicit, Pontificios omnes constanter affirmare,

discessionis nomine generalem apostasiam ibi significari. Nam, licet aliqui, in meliori et saniori sensu quam Protestantes, ita vocem illam interpretentur, non tamen omnes constanter hoc affirmant, ut visum est. Nec satis intelligo rationem qua rex suadere conatur, Pontificios omnes necessario debere ita sentire, *quia (inquit) alias eorum Ecclesia esset quotidie erroribus obnoxia.* Nam quæ est hæc illatio? Numquid si per discessionem Romani imperii destructio vel Antichristus ipse significetur, ideo Ecclesia Romana erit quotidie erroribus obnoxia? Nulla profecto est conexio, nulla illationis verisimilitudo. Fortasse autem argumento illo solum probare voluit, apostasiam illam, quam significari vult nomine *discessionis*, generalem esse futuram, et non particularem. Verumtamen neque hoc etiam inde probatur, nec illatio etiam in hoc sensu habet ullam verisimilitudinem. Quia, licet quotidie vel frequenter fiant apostasiæ particulares ab Ecclesia Romana et Catholica, non ideo illa quotidie fit erroribus obnoxia, quia et semper damnat errores eorum qui ab ipsa discedunt, et ipsi apostatae statim extra illam exeunt, et ita ipsa, licet personis interdum minuatur, semper immaculata manet, juxta illud 1 Joan. 2: *Et nunc Antichristi multi facti sunt.* Et infra: *Ex nobis prodierunt, sed non erant ex nobis, si enim essent ex nobis, permansissent utique nobiscum.* Et infra: *Vos unctionem habetis a Spiritu Sancto, et nostis omnia.* Semper ergo Ecclesia retinet Spiritum Sanctum et veritatem (ut addit c. 4), licet quotidie multi ab ea discedant. Unde etiam in ultima apostasia, quæ sub Antichristo futura est, licet sano modo generalis dici possit, semper Ecclesia Catholica et Romana erit ab erroribus immunis, ut statim dicetur.

16. *Tertio, nomine discessionis intelligitur apostasia.* — Tertio ergo addimus et concedimus, *discessionem* ibi significare apostasiam ab Ecclesia Romana et fide Christi futuram in mundo, in fine ejus, retenta nimis voce græca in sua sincera proprietate. Quam expositionem videtur mihi magis indicare Chrysostomus; item Anselmus, licet expositionem de defectione a Romano imperio primo loco ponat, statim addit: *Sive ut multitudo Ecclesiarum discedat a Pontifice Romano, aut multitudo hominum discedat a fide.* D. autem Thomas, intelligens illam discessionem esse futuram defectionem a Romano imperio, addit, intelligendam esse non solum de imperio

¹ Matt. 24.

Romano temporali, sed etiam de spirituali, in quod, teste Leone Papa, temporale commutatum est. Discessionem autem a spirituali imperio Romano dicit esse discessionem a fide catholica Romanæ Ecclesiae. Fuitque hæc antiqua expositio, ut Augustinus supra refert, quam ipse non improbat.

17. *Apostasia illa non erit generalis.* — *Multi tunc fidem sunt receptnri.* — Hæc autem apostasia a fide non erit, sicut hæretici fingunt, ita generalis, ut fides vera a tota Christi Ecclesia peritura sit; hoc enim et fundamentum nullum habet, et repugnat promissione Christi: *Et portæ inferi non prævalebunt adversus eam*, Matth. 16, et aliis verbis ejus, Matt. 24: *Propter electos breviabuntur dies illi*, utique ne illi a charitate excidant, nedum a fide. Et Daniel, c. 12, dicit: *In tempore illo salvabitur omnis qui inventus fuerit in libro ritæ;* et in fine concludit: *Beatus qui expectat, et pervenit usque ad dies mille trecentos triginta quinque;* quod aliis verbis dixit Christus, Matt. 24: *Qui autem perseveraverit usque in finem, hic salvus erit.* Non deerunt ergo qui perseverent. Quin potius tantum abest ut omnes antea credentes tunc sint fidem amissuri, ut multi potius, et maxime ex Judæis, tunc sint convertendi ad fidem, ut testatur ibi Theodoreetus, et Gregorius, homil. 12 in Ezechiel.; et Augustinus, 20 de Civit., cap. 29, ait, *per Eliam Thesbitem ultimo tempore ante judicium, Iudeos in Christum verum, hoc est, in Christum nostrum esse credituros, celeberrimum esse in sermonibus, cordibusque fidelium.*

18. Unde idem Augustinus, eodem libro, c. 8, ait Ecclesiam, a Deo electam et prædestinatam, nunquam esse seducendam, neque etiam in persecutione Antichristi, sed erit (inquit) *hic Ecclesia illo tempore, etiam quo solvendus est diabolus, sicut ex quo hic est instituta, hic fuit, et erit omni tempore.* Et infra dicit tunc esse solvendum Satanam, ut *fidelissima patientia electorum probetur, non ut vincatur, tales enim erunt (inquit) cum quibus ei belligerandum est, ut rinci tanto ejus impetu insidiisque non possint.* Inferius vero in eodem capite, ulterius dubitat an in illo apostasiæ tempore non solum aliqui ex credentibus permansuri sint, sed etiam aliqui, qui in fide non fuerant, ad illam accessuri sint; et respondet imprimis, parvulos multos esse illis tribus annis cum dimidio baptizandos a parentibus fidelibus, et ita illos saltem denuo ad fidem accessuros. Deinde generaliter ait,

neque qui cadant ab Ecclesia, nec qui accedant ad Ecclesiam illo tempore defuturos, quod late confirmat. Dicitur ergo tempus illud discessionis seu apostasiæ, non quia tota Ecclesia et omnes fideles Christum negaturi sint, sed quia magna erit clades, pluresque superabat tentatio, quam victores permanebunt, vel quam unquam in persecutione aliqua victifuerint. Quanta vero futura sit apostatarum multitudo, incertum est; licet enim aliqui dicant duas partes fidelium esse casuras, et tertiam permansuram, nullibi esse revelatum aut satis fundatum invenio.

19. *Apostasia illa brevi tempore consummabitur.* — Non erit igitur hæc apostasia adeo universalis, ut non possit intra illud breve tempus, utique trium annorum cum dimidio fieri, tum quia in illis postremis temporibus, prius etiam quam Antichristus veniat, Ecclesia erit multis persecutionibus et contradictionibus agitata. Nam, ut prædictit Christus, Matth. 24: *Scandalizabuntur multi, et invicem tradent, et odio habebunt invicem, et multi pseudoprophetæ surgent, et seducent multos, et quoniam abundavit iniquitas, refrigescet charitas multorum.* Et ita cum Antichristus venerit, inveniet homines valde dispositos, ut brevi tempore magnam illorum jacturam facere possit. Unde Augustinus, 20 de Civit., c. 19, refert, multos ex antiquis expositoribus intellexisse verba illa Pauli: *Et nunc quid detineat scitis, et mysterium operatur iniquitatis*¹, non de Romano imperio, sed de malis et factis, qui sunt in Ecclesia, donec perveniant ad tantum numerum, qui Antichristo magnum populum faciat, et hoc esse mysterium iniquitatis, quia videtur occultum. Et inferius ait, tunc omnes hos malos vel occultos hæreticos prodituros, et conjungendos Antichristo, ut illi adhæreant, cumque ad cæteros evertendos adjuvent. Accedit, ut infra ex Paulo et Apocalypsi dicit, quod *præsentia ejus futura est secundum operationem Satanæ in omni virtute, et signis ac prodigiis mendacibus, et in omni seductione iniquitatis;* tunc enim solvetur Satanæ, et per illum Antichristus mirabiliter quidem, sed mendaciter operabitur. Hinc ergo facile intelligitur non esse necessariam successionem multorum sæculorum (ut Calvinus dixit) ad illam generalem apostasiam, quæ tempore Antichristi fiet, vel certe si per multa sæcula ad illam generalem discessionem mundus disponetur, illa dispositio non

¹ 2 Thess. 2.

sub Antichristo, nec per Antichristum fiet, sed per plures hæreticos, et præcursores Antichristi. Utrumque enim significavit Christus, Matt. 24; et Joannes, 2 epist., c. 2 et 4; et Paulus, 2 ad. Thessalon. 2.

20. Instantia. — Solutio. — Incertum est an haec apostasia totum orbem occupatura sit. — Quod si quis urgeat hoc reete procedere, si apostasia antichristiana aliquam provinciam tantum vel ad summum unam partem mundi occupatura esset, non fore autem ita, sed mundum occupaturam universum, neque videri posse in tam brevi temporis mora tam late extendi, respondemus imprimis non constare in quot regionibus orbis persecutio Antichristi propria grassabitur, et verisimile esse non ita esse disseminandum errorem Antichristi per totum mundum, sicut Evangelium est ante diem judicii in toto orbe prædicandum, quia illud prius non ita prædictum est in Scriptura, sicut hoc posterius. Neque etiam dicunt vaticinia Antichristum regnatum in toto orbe proprie, et in tota sua universitate sumpto, sed dicunt Antichristum occupaturum orbem Romanum in decem regna prius divisum, et postea bellum contra sanctos esse moturum, unde verisimile fit in eodem orbe Romano futuram esse illam spiritualem stragem, et multorum fidelium apostasiam. Ad illam autem non erit necessaria multorum regum aut temporum successio. Nam unus Antichristus quam plurimos habere poterit suæ iniquitatis ministros, qui simul per varias ejusdem orbis partes errores ejus disseminabunt; simulque (permittente Deo) dæmon totas suas vires exeret, et partim signis et portentis mendacibus, partim præmissionibus temporalibus, partim coactione et exquisitis tormentis brevi efficiet; ut major fidelium pars Christo renunciet, et characterem bestiæ suscipiat. Et ita non solum multorum sæculorum, verum etiam nec vitæ unius hominis tempus ad prædictam apostasiam efficiendam necessarium erit.

21. Dæmon potissimum minister erit hujus apostasiæ. — Addo denique non esse necessarium ut totum orbem Romanum talis persecutio et discessio invadat, quia hoc revelatum non est, sed solum quod futura sit major quam unquam fuerit, quod esse poterit, et intensive (ut sic dicam) ubi fieri contigerit, et extensive respectu aliarum persecutionum, quod habere poterit, etiam si non omnes provincias et loca totius monarchiæ, nedum omnes mundi partes attingat. Præsertim quia sicut Chris-

tus dixit, propter electos breviando esse dies illos, ita propter eumdem finem poterit ut intra certos orbis terminos concludatur, non permittente Deo amplius extendi, propter eumdem finem, aliaque secreta suæ providentiæ consilia. Vel certe si fortasse tribulatio illa quoad loca, seu regiones et provincias orbis generalior futura est, et in omnibus illis magnam illam apostasiam est effectura, etiam ad illum effectum non erit necessaria diuturnior temporis duratio, quia non oportet ut successu temporum in diversis locis fiat; simul enim per varios ministros in diversis locis fieri poterit. Nam solvendus est Satanás, qui ubique habet invisibles ministros paratissimos, et visibles non deerunt Antichristo, ac brevi tempore poterit illos ubiqui transmittere, cum magna vi et potestate humana, dæmonis industria et potestate adjutos, illosque ad summam diligentiam et celeritatem instabit: *Sciens quia modicum tempus habet*¹. Ergo quacumque ratione apostasia illa intra tempus a Deo breviam consummari poterit.

CAPUT XI.

ANTICHRISTI TEMPORE DUOS VEROS HOMINES AD TESTIMONIUM CONTRA ILLUM FERENDUM MITTENDOS ESSE, EX CAP. 11 APOCALYPsis CONTRA DUAS FALSAS PROTESTANTIUM EXPOSITIONES OS-TENDITUR.

1. Quoniam de Antichristi tempore dicere incœpimus, priusquam ad cetera capita a rege proposita transcamus, necessarium est cum illo digredi, et de testibus contra Antichristum mittendis disputare, præsertim quia disputatio hæc cum ea, quam de tempore Antichristi prosecuti sumus, valde conjuncta est. Nam unum ex præcipuis signis, quibus ostendere possumus Antichristum nondum venisse, inde sumitur quod testes contra illum mittendi nondum venerunt. Hoc autem fundamentum de duorum testium missione ex cap. 11 Apocalypsis sumptum est. Ideoque verus illius prophetæ sensus inquirendus et explicandus est. Cum itaque Joannes prædixisset Antichristi persecutionem verbis illis: *Civitatem sanctam conculcabunt mensibus quadraginta duobus, subjungit: Et dabo duobus testibus meis, et prophetabunt diebus mille du-*

¹ Apoc. 12.

centis sexaginta amicti saccis. Qui dies fere totidem menses, utique quadraginta duos, efficiunt.

2. Duos illos testes, duo Testamenta, ait rex Angliae.—Circa hanc igitur prophetiam, primo inquiremus an illi duo testes, quos Deus promittit se daturum tempore persecutionis Antichristi, futuri sint veri homines, vel quid sint. Nam rex Angliae totum hunc locum metaphorice interpretatur, duasque habet expositiones, quas in hoc capite et sequent. expendimus. Juxta priorem expositionem, negat illos duos testes futuros esse homines, sed ait esse duo Testamenta, *vetus et novum*, quæ contra Antichristum, *et monarchiam Babyloniam* (ut ipse loquitur) *constans et manifestum testimonium præbent*, ideoque illa maxime Antichristus odio prosequetur, *nihilque intactum relinquat*, quo illa dedecoret, *corrumpat et supprimat*. Hæc fere rex, qui inventitur hac occasione in Summos Pontifices Romanamque Ecclesiam, fingens ab eis esse contra divinam Scripturam multa dicta et facta, *proriet ignominiae plena*. Qualia sunt (ait) illam nasum cereum, litteram mortuam, et regulam lesbiam appellare, cum illa libros apocryphos miscuisse, eosque illi aequiparare tentasse: imo traditions hominum illi præferre, eademque supprimere sub linguis peregrinis, et ne in vulgari sermone legalur prohibendo, occultare, ac denique illam destruxisse et interfecisse, quando alias translationes latinas præter Vulgatam, Pontificum auctoritate correc-tam et emendatam, iidem Pontifices sub censuris prohibuerunt. Hos autem testes ab Antichristo imperfectos, Deus tandem per regem Angliae ejusque ministros excitavit, seu in pristinam lucem et integratatem reduxit, ut ipse vult. Sicque concludit impletam esse prophetiam illam.

3. Illi expositioni farent aliqui.—Huius interpretationi metaphoricæ quoad eam partem, ut duo illi testes sint duo Testamenta, occasionem aliquam dederunt nonnulli antiqui Scriptores. Nam in libro super Apocalypsim, qui inter opera Augustini sub nomine illius ponitur, in Homilia 8 sic habetur: *Dabo duobus testibus meis, id est, duobus Testamentis*. Illud autem opus sine dubio non est Augustini, meritoque a Lovaniensibus in appendicem rejectum est. Creditur autem esse Ticonii, cuius opus in Apocalypsim idem Augustinus allegat, l. 13 de Trinitate, c. 3, ubi etiam dicit, Ticonium illum haereticum Donatistam suisse. Ideoque non multum curandum est de-

illius interpretatione. Quanquam ille non omnino negat illos testes esse homines; infra enim ait illos esse Ecclesiam, quæ propter duo testamenta binario numero ponitur. Quam expositionem imitatus est Beda, lib. 2 in Apocalyps., cap. 11, ubi per testes etiam intelligit, *Ecclesiam ex duobus populis unitam, et duorum Testamentorum lumine radiatam*. Verumtamen Beda et mystice locutus videtur, et in ea expositione non insistit, nam statim refert aliam de Elia et Enoch, et non rejicit, sed tacite approbat. Et si quis postea scriptor catholicus¹, illam mysticam expositionem vel probare vel insinuare visus est, ab alio litterali sensu recedere non est ausus. Itaque metaphora illa, prout a rege traditur, propria est Protestantum, et a quodam Roberto Abbato Calvinista inventa dicitur, et quatenus elium sensum proprium et litteralem excludit, improbabilis omnino est; quatenus vero contra Ecclesiam Romanam applicatur, erroribus seatet et haeresibus.

4. Duo illi testes, veri homines futuri.—Dico ergo testes illos, de quibus Joannes loquitur, futuros esse veros homines, ad testimonium pro Christo contra Antichristum redendum, specialiter mittendos. Assertionem hanc ita certam esse censeo, ut sine temeritate negari non possit. Probatur primo ex verborum proprietate, quam relinquere sine fundamento, magna temeritas et corruptio Scripturarum est. Hic autem nullum est fundamentum, vel in ipsa Scriptura, ut ex verbis constat, in quibus illa metaphora nullum fundamentum habet, neque in Patribus, quia omnes contradicunt, ut infra videbimus, neque in aliqua ratione, vel conjectura, nullas enim rex adducit, sed solam voluntariam accommodationem, propriis opinionibus et erroribus accommodatam, contumeliisque contra Ecclesiam Catholicam redundantem. Illa ergo non est Scripturæ interpretatio, sed corruptio.

5. Probatur ex verbis sacri textus.—Præterea si paulatim singula expendamus, quam sit inepta accommodatio facile intelligemus. Nam imprimis ex verbis illis colligimus, promisso Deum dare duos testes tempore adventus et persecutionis Antichristi, ut ex contextu Joannis constat; ideo enim conjungit illa duo: *Civitatem Sanctam conculabunt*, etc.; et statim: *Et dabo duobus testibus meis, et propheetabunt*, id est, dabo illis spiritum prophete-

¹ Feuard., l. 5 in Joan., c. 30.

tandi, seu ad prophetandum in tempore illius calamitatis mittam illos. Non possunt ergo duo illi testes promissi ad litteram esse duo Testamenta, nam hæc data sunt Ecclesiæ a principio, neque tempore Antichristi aliquid eis addetur, aut novo modo dabuntur, nisi quatenus mittentur illi prophetæ, qui sacram doctrinam majori spiritu proponant et interpretentur. Quin potius, si juxta regis sententiam, Antichristus venit a 606 Christi anno, ab eodemque (ut Protestantes etiam fingunt) cœperunt Scripturæ per traditionem hominum corrumpi, nullo modo tunc dati sunt duo testes ad prophetandum, sed qui multo jam antea dati erant, tunc interfici seu corrumpi cœperunt.

6. Deinde in eodem loco Apocalypsis dicitur, duos illos testes prophetaturos dies milles ducentos sexaginta, id est, toto fere tempore quo Antichristus civitatem sanctam, id est, Ecclesiam calcabit, quod tempus, juxta expositionem regis comprehendit omnia hæc tempora Romani Pontificatus a sexcentesimo sexto Christi anno, usque ad Lutherum, verbi gratia. Ergo toto hoc tempore utrumque Testamentum in sua virtute et integritate conservatur in Ecclesia, eorumque doctrina Ecclesiæ maxime innotescit, et contra Antichristum pugnat, nec aliquis audet illam corrumpere, quia ibi dicitur de illis testibus pro illo tempore: *Si quis voluerit eis nocere, ignis exiet de ore eorum, et si quis voluerit eos ludere, sic oportet eum occidi.* Et statim illorum magna virtus et potentia describitur, et tandem additur: *Et cum finierint testimonium suum, bestia, quæ ascendit de abyso, faciet contra eos bellum.* Ergo Antichristus non corrumpet Scripturas usque ad finem temporis et persecutionis suæ. At vero juxta sententiam regis, Scripturæ patiuntur bellum a Papa, ex quo cœpit in papatu Antchristianismus, et toto hoc tempore non prophetant Scripturæ in Ecclesia, sed traditiones humanae, quibus Scripturæ obscurantur et corrumptur; quæ est ergo accommodatio talis metaphoræ, aut concordia prophetæ Joannis cum ficta ista interpretatione?

7. *Alia verba Joannis dure et false duobus Testamentis accommodantur.* — Præterea Joannes ait, quod postquam illi duo testes a bestia seu Antichristo occisi fuerint, *corpora eorum jacebunt in plateis civitatis magnæ, ubi Dominus eorum crucifixus est, per tres dies et dimidium, quod rex dictum declarat, quia ad dimidium spiritualis hebdomadæ, quod inter-*

primum et secundum Christi adventum intercedit, Scripturæ tanquam cadavera jacebunt omnium contemptui expositæ, dedecoratae, corruptæ, suppressæ, etc. In quibus verbis duo notanda sunt. Primum est, ut juxta suum metaphoricum sensum hæc duo cadavera Prophetarum ad duo Testamenta accommodet, multa fingere et exaggerare, quæ nec probare potest, neque ullam verisimilitudinem habent, ideoque per errorem a suis Protestantibus accepisse convincitur; ac subinde nihil ad metaphoram explicandam deservire. Ait enim libros Scripturæ multis retro temporibus *ad silentium esse damnatos, quia laicis eorum lectio interdicta est, ita ut pro hæretico combureretur, qui in manus sumere auderet, aut inspicere.* Utrumque autem horum evidenter falsum est, tum quia neque lex, neque exemplum de his ostendi potest; tum etiam quia contrarium manifeste constat ex usu et praxi Ecclesiæ Catholicae.

8. *Lingua latina ignota non est, ut rex finit.* — Addit vero rex Scripturæ libros in ignota lingua absconditos jacuisse. At latina lingua non est ignota in Ecclesia Latina, nisi rudibus et idiotis, quibus utile non est per se ipsos velle Scripturas intelligere aut interpretari, sed magis expedit ut quæ illos scire et intelligere de Scripturis convenit, a suis Pastoriibus et Evangelii prædicatoribus addiscant. Neque aliter Scriptura sacra in Catholica Ecclesia conservata et tractata est. Denique ut interfectionem illam metaphoricam utriusque Testamenti rex configat, dicit depravatam esse Scripturam, cum tamen in sua integritate, tam librorum omnium canoniconrum, quam omnium eorum partium per Ecclesiam sit conservata, et legitima auctoritate proposita. Item ait corruptam esse, quod falsum plane est, quia per Ecclesiam, ubi oportuit, lectio, quæ corrupta erat, emendata est; ubi vero mutatio facta non erat, in sua antiquitate conservata est. Tandem vero dicit fuisse imperfectam anno millesimo quingentesimo sexagesimo secundo, quia præter emendatam editionem vulgatam ab Ecclesia propositam, aliæ ab hæreticis factæ et corruptæ non permittuntur. Quæ omnia et per se frivola sunt, et ad explicandum dictum Scripturæ locum valde aliena.

9. *Non esse duo Testamenta, ex tempore determinato a Joanne convincitur.* — Aliud in dictis verbis regis notandum est, in his suam iterum inculcare expositionem, scilicet, Joannem per hos dies et menses non certum tem-

pus, sed dimidium totius temporis cursum a principio usque ad secundum Christi adventum intellexisse, quam expositionem satis in superioribus refutavimus. Nunc vero interrogo, cum dicit *ad dimidium illius temporis Scripturæ Testamenta tanquam cadavera jactura, contemptui exposita, neglecta pene ab omnibus, nec a pluribus intellecta*; interrogo (inquam) quid intendat, cum ait: *Ad dimidium temporis*; aut enim vult toto dimidio tempore, quod inter primum et secundum Christi adventum intercedit, Scripturarum corpora tanquam cadavera in illo statu jactura; vel solum in dimidio tempore esse interficienda, sine designatione temporis pro quo mortua jacebunt. Hoc posterius repugnat vaticinio Joannis, dicentis: *Corpora eorum jacebunt in plateis civitatis*. Et infra: *Et ridebunt de tribubus et gentibus corpora eorum per tres dies, et dimid'um*. Jacebunt ergo cadavera illa per totam dimidię hebdomadam, quae si spiritualis est, ut vult rex, includit totam dimidię partem temporis recurrentis inter primum et secundum Christi adventum.

10. Si autem hoc concedatur, et priorem sensum suorum verborum rex eligat, nobis, quæso, declareret qui fieri possit ut per illam eamdem spiritualem hebdomadam duo illi testes testimonium suum daturi sint, quomodo prophetabunt diebus mille ducentis sexaginta, prout Joannes ait, per quos dies etiam dimidię spiritualem hebdomadam significari rex docet. Maxime quia Joannes dicit testes illos esse occidendos, postquam finierint suum testimonium dare, quod non potest intelligi de priori dimidia parte illius hebdomadae spiritualis, id est, de sexcentis annis a primo adventu Christi, in quo (ut rex vult) Scriptura vixit, nam Joannes aperite loquitur de eodem tempore in quo Antichristus Ecclesiam persecutetur; ergo in fine illius temporis occidentur testes; quomodo ergo postea per integrum dimidię hebdomadam eadem cadavera in platea jacebunt? Accedit quod, postquam occisi fuerint illi testes, non amplius ferent testimonium contra Antichristum, quia jam finierunt suum testimonium, et quia statim a erexerint, vocabuntur ad cœlum, et quia statim occidetur Antichristus. At vero ex sententia regis duo Testamenta postquam per spiritum Lutheri vel similem revixerunt, adhuc perseverant, testimonium ferendo contra Antichristum, et inter homines versantur, et quem ipse vocat Antichristum, ipse adhuc vivit, et usque ad finem sæculi vivet. Nullo er-

go modo subsistere potest accommodatio illa vel potius fictio.

11. *In hæreticos retorquentur metaphoræ quas configunt.* — *Scriptura ab hæreticis jugulatur.* — Præterea, si vanis hujusmodi interpretationibus aut accommodationibus utiliteret, quid esset facilius quam ostendere, metaphoras illas de duobus Testamentis tanquam duobus testibus ab hostibus Christi interfectis, etc., multo verius accommodari hujus temporis hæreticis, vel ipsimet regi, quam Ecclesiæ Catholicae? Tunc enim homo interficitur, quando spiritu, quo vivit et loquitur, privatur; ergo tunc maxime dici posset Scriptura interfici, quando spiritu illo, quo facta est et interpretari debet, privatur. Scripturæ enim veluti corpus est scripta litera, spiritus autem et vita ejus est illius sensus; tunc ergo vere interficitur, quando proprio uniuscujusque spiritu humano, vel forte diabolico declaratur, et ad testificandum inducitur. Constat autem a rege et Protestantibus non aliter Scripturam tractari et exponi, ut in hac ipsa praesentis loci expositione rex ostendit, et superius in statuenda regula suæ fidei testatus est. Ergo necesse est ut apud hujusmodi homines Scriptura tanquam mortua jaceat, ejusque corpus tanquam cadaver in manibus eorum feratur. Quibus optime etiam illud convenit, quod *inhabitantes terram, gaudent super illos, et jocundantur, quia (ut rex addit) carnales suæ libidines non amplius comprimitur, nec in ordinem rediguntur gladio verbi Dei*, quia apud illos non est *vivum et efficax, sed mortuum, ac sine divino spiritu*. Nam quocumque modo vivant, per solam fidem, quod illis peccata non imputantur, justitiam et gloriam sibi promittunt, et neque mandatorum observationem, neque poenitentiam de peccatis secundum Scripturas necessariam esse, prædicant. Denique dum isti jactitant se solos intelligere novum et vetus Testamentum, certissimum est sine vita et spiritu illa possidere atque adeo tanquam mortua corpora apud eos jacere.

12. Ad hunc denique modum potest illa interpretatione metaphorica ex discursu fere totius dicti c. 41 refutari et confundi. Nam si illi duo testes non sunt veri homines, sed sunt tantum verbum Dei in duobus Testamentis scriptum, vel impossibile est seriem totius capituli tenere et commode interpretari; vel infinitæ metaphoræ voluntarie et sine fundamento fingendæ sunt, quod sinceritati Scripturæ, et convenienti rationi eam expli-

candi repugnat. Nam si illi testes non sunt futuri veri homines et prophetæ, quid est quod de illis dicitur : *Hi habent potestatem claudendi cœlum, ne pluat diebus prophetiæ ipsorum?* Quomodo enim Scriptura hanc habent potestatem toto tempore prophetiæ ipsarum? Quodve est tempus duorum Testamentorum, nisi vel totum tempus quo durat Ecclesia, vel illud certe maxime in quo ipsam Scripturam magis integrum, incorruptam et vivam conservatam esse, Protestantes volunt? Item illud : *Potestatem habent super aquas convertendi eas in sanguinem, et percutere terram omni plaga quotiescumque voluerint,* quo probabili modo potest ad duo Testamenta, vel ad aliquid aliud præter duos homines accommodari? Idemque argumentum de reliqua parte capitii fieri potest, ut jam satis declaratum est; necesse est ergo ut verba illa in sensu proprio de hominibus intelligantur. Quam sententiam, quoad hanc partem, quod illi duo testes futuri sint veri homines, catholicam esse censemus, tum quia in Scriptura est satis expressa, nec potest ad metaphorum sensum nisi cum magna violentia detorqueri; tum etiam quia Patres et expositores communiter ita verba illa intellexerunt, ut in capite sequenti videbimus.

13. Alia Protestantium metaphorica interpretatio. — Jam vero sequitur examinanda alia interpretatio, quam rex frequentius receptam esse dicit, utique inter suos Protestantes. Qui ut prophetiam illam suis novi Evangelii prædicatoribus accommodent, metaphoram in binario illo numero ponunt, quos ait rex duos testes appellari, quia pauci fuerunt; et in ciliciis seu saccis apparuisse, quia pœnitentiam prædicarunt; occisos vero fuisse, quia multi crudeliter interfecti et igne combusti sunt; resurrexisse autem in successoribus suis, quia non defuerunt qui verbi Dei prædicatione illorum virtutem et locum tenerent; miracula vero illorum fuisse, quia brevi tempore virtute spiritus magnas nationes, et multas in veram, scilicet, fidei viam reduxerunt. Haec fere rex ex suo spiritu proprio, nou tamén ex certa scientia, sed (ut ipse ait) ex sua conjectura, quam neque in sanctis Patribus fundare potest, illos enim in Apocalypsis explicatione errasse confitetur, neque in ipsis Scripturæ verbis, cum pro libito ad metaphoras sibi deservientes ea detorqueat, quæ satis quidem ad illam expositionem contemnendam esse possent. Ad majorem tamen erroris ejus ostensionem animadverto, quæ-

dam in accommodatione illa inveniri falsa, alia prave accommodata, et alia omissa, forsan quia nullum locum vel sensum commodum in illa metaphora recipere possunt.

14. Primum enim falsum est, hos pseudo-prophetas tam paucos fuisse, ut duorum nomine merito significari credantur. Nam sectæ hæreticorum hujus temporis tot sunt, ut vix possint numerari; et tot sunt capita quot sententiæ; imo in unaquaque plura capita pluresque magistri inveniuntur. Eo vel maxime quod in illo duorum numero non tantum vult rex primos uniuscujusque hæresis inventores, sed etiam eorum successores, qui usque ad hodiernum diem novam fidem prædicant, comprehendendi; isti autem plures profecto sunt quam ut duorum nomine apte significantur. Deinde evidentius falsum est, hos novos prædicatores prædicando pœnitentiam apparuisse, cum constet unum ex præcipuis falsis articulis eorum esse, pœnitentiam non esse necessariam, sed novam vitam, quam in sola, nova et inaudita fide propriæ justitiæ constituant. Præterquam quod Prophetæ non dicuntur apparere vestiti saccis, quia pœnitentiam prædicant, sed quia vitam asperam et pœnitentem profitentur, seu quia pœnitentiam agunt; isti autem novi Evangelii prædicatores, quam, quæso, vitæ asperitatem profitentur, quamve pœnitentiam egerunt? Certe neque ipse rex id dicere est ausus, ne manifestum mendacium affirmaret. Non sunt ergo isti testes saccis amicti, quos Deus contra Antichristum missurus est.

15. Hæresiarchæ a ficto illo Antichristo non sunt occisi. — *Hæretici magis ex se ipsis surgere quam resurgere dicendi sunt.* — Præterea, si per duos testes omnes isti prædicatores intelliguntur, cum Joannes dicit duos illos fuisse ab Antichristo interfectedos, consequenter intelligendus est affirmare, omnes illos prædicatores ab eadem bestia fuisse interfectedos, nam eodem modo dicit duos fuisse interfectedos, sicut duos prædicasse. At hoc falsum est, pauci enim sunt ex his hæresiarchis qui ab hominibus interfectedi fuerint, vel per Ecclesiam digna mortis pœna puniti, sed plures eorum non sine prodigiis et signis divinæ justitiæ mortui sunt; ergo vel interpretatio illa falsum supponit, vel metaphora non subsistit. Multo vero magis incongruum est, quod in suis successoribus resurrexisse dicantur, haec enim non est resurrectio, sed nova proliis generatio; Joannes autem loquitur de eorumdem, qui ceciderant, excitatione et resur-

rectione. Ait enim : *Et post dies tres et dimidium spiritus vitæ a Deo intravit in eos*, utique in illos eosdem qui imperfecti jacebant, *et stelerunt super pedes suos*. Præterea quod pravi prædicatores imitatores et successores habeant, novum non est. ideoque neque admirationem, neque stuporem efficit; at ex illorum testium occisorum resurrectione, *timor magnus cecidit super eos, qui viderunt eos*. Illa ergo resurrectio non est alterius personæ similis successio, sed ejusdem miraculosa seu prodigiosa excitatio. Denique additur, inimicos illorum prædicatorum vidisse illos ascendentibus in cœlum, ad quod statim post resurrectionem suam vocati fuerant; quando autem in successoribus Lutheri, Calvini, aut Henrici VIII aliquid simile vidit vel audivit Ecclesia ? Est ergo frivola accommodatio.

46. *Falsitas illius metaphoræ ostenditur a tempore.* — Ostenditur etiam a loco. — *Hæreticorum prophetæ regna non convertunt, sed pervertunt.* — Atque hinc denique convincitur esse etiam insufficiens. Nam imprimis explicare non possunt cur isti sui prophetare dicantur mille ducentis sexaginta diebus, cum in Scriptura non soleat tempus tot numeris et partibus definitum pro indefinito ponи, nec ratio talis metaphoræ aut exemplum simile afferri possit. Multoque minus explicare possunt, cur dicatur quod corpora istorum suorum prophetarum jacobunt in plateis civitatis magna, etc., ubi *D̄minus eorum crucifixus est*. Nam cum isti in hac parte fateantur, sermonem esse proprium de vera morte suorum Prophetarum, etiam hæc verba proprie intelligenda erunt de corporibus eorum mortuis; quomodo ergo illa jacobunt in plateis civitatis per tres dies et dimidium, cum fere omnia, quæ pœna mortis interire, statim combusta fuerint. Deinde neque locum accommodare possunt, nam per civitatem magnam, in qua Dominus eorum crucifixus est, Romam intelligunt, ut infra videbimus; at neque Lutherus, neque Calvinus, vel eorum successores Romæ imperfecti sunt. Idemque argumentum procedit, etiam si civitas illa, ut veritas habet, Jerusalem intelligatur; de nullo enim Protestantium legimus ibi esse propter suum novum Evangelium imperfectum. Neque etiam possunt exponere qui sint illi tres dies cum dimidio, nisi recurrendo ad spiritualem hebdomadam, quæ, juxta illorum sensum, plus quam mille annos comprehendere potest. Præterea ubi est inventa in his pseudoprophetis, *potes-tas claudendi cœlum*, ne pluat in diebus pro-

phetiæ ipsorum, aut convertendi aquam in sa-guinem, vel percutiendi terram omni plaga, quotiescumque voluerint, aut faciendi aliqua alia mirabilia opera, quæ per illa verba meta-phorice significata fuerint? Certe nullum miraculosum opus hos falsos prophetas fecisse legimus. Et perversio potius quam conversio provinciarum et regnum, quæ per illorum falsam doctrinam facta est, nullum signum est virtutis verbis, aut spiritus ipsorum, cum homines non ad pœnitentiam et præceptorum observantiam, aut vitæ perfectionem attraxerint, sed licentia vivendi sine ecclesiastica obedientia, imo sine jugo legis divinæ, per solam fidem salutem promittendo, homines ad sensibilia proclives facile decepti.

47. *Veritas catholica stabilitur.* — Vera ergo et catholica sententia est, illos Prophetas, a Joanne prædictos, futuros esse duos tantum homines, mortales, divina virtute ac providentia mittendos in mundum tempore adventus Antichristi, cum gratia et virtute Spiritus Sancti, ad prædicandum verum Christum Dominum nostrum, contra Antichristum, ejusque fidem veris ac novis miraculis confirmandum, per veros ac præcisos mille ducentos sexaginta dies, id est, fere toto tempore persecutionis Antichristi, prout verbis Joannis in proprietate intellectis asseritur, et supra capite 3 explicatum est. Et habet convenientissimam rationem divinæ providentiae, ne in tempore tam acerbæ persecutionis videatur Deus Ecclesiam suam sine externo auxilio sufficiente et proportionato relinquere. Congruum est enim ut Deus hominibus per homines subveniat, quod in omnibus temporibus et occasionibus observatum ab ipso videmus; ergo in illis etiam diebus simile auxilium per illos testes hominibus præstabat.

48. *Civitas illa mundum significat, sed magis proprie ac vere Jerusalem.* — In fine vero illorum dierum occidentur vere et proprie illi duo prophetæ ab Antichristo, utique vel per se, vel per ministros ejus, hoc enim Scriptura non declarat, et utroque modo veritas verborum salvatur. Item post mortem vere jacobunt eorum corpora in plateis civitatis magna per tres dies integros, et partem alterius, per quam civitatem mundum aliqui intelligunt, quatenus pravis hominibus abundat, nam ibi dicuntur civitas illa spiritualiter vocari *Sodoma et Ægyptus*, quibus nominibus solet hic mundus in Scriptura vocari: sed melius intelligitur Jerusalem, nam addi-

tur ibi : *Ubi et Dominus eorum crucifixus est.* De quibus verbis plura inferius dicemus. Illis autem diebus, mali et Antichristi sectatores vere ac proprie gaudebunt de morte illorum Prophetarum, et in eorum ignominiam non sinent eorum cadavera sepeliri. Quod etiam consulto permittet Deus, ut mirabilior sit eorum resurrectio, quæ post tres dies et dimidium vere ac proprie continget, juxta verba illa : *Et post tres dies et dimidium spiritus vitæ intravit in eos*, quæ non possunt intelligi de glorificatione animarum illorum Prophetarum, ut aliqui hæretici finixerunt, tum quia glorificatio animarum illorum Martyrum non differetur per tres dies, neque per momentum; tum quia statim additur : *Et stet runt super pedes suos*, ubi evidenter est sermo de resurrectione corporum. Quæ pro illis duobus Prophetis non reservabitur in tempus generalis resurrectionis, sed statim fiet, videntibus et mirantibus aliis hominibus adhuc in vita mortali viventibus, audientque vocem illam de cœlo illos vocantem : *Ascendite huc*, cui voci ipsi obedient ascendendo in cœlos, mirantibus eorum hostibus. Quorum magna pars statim, terræ motu magno corruepta civitate, oppressa et imperfecta est; alii vero, qui permanerunt, terrore perterriti gloriam Deo dederunt, ut Joannes concludit.

19. *Quamvis illi duo testes non essent Enoch et Elia, adhuc essent veri homines.* — Neque oportet aliter hæc omnia confirmare, quam ipso contextu et verbis Scripturæ, nam in proprietate sua hoc significant, et nulla subest ratio vel necessitas, imo nec commoditas ad metaphoricos sensus illa trahendi, proprio arbitrio, et solo affectu ad proprias opiniones illa accommodandi, ut revera rex Angliæ et alii Protestantes faciunt. Accedit quod omnes Patres, et interpres verba illius prophetie proprie intelligunt; quamvis enim vel in personis illorum testium designandis, vel in aliquibus minutioribus circumstantiis different, ut mox videbimus, in hoc vero dogmate, quod vaticinium illud proprie et ad litteram intelligendum sit, omnes convenient, ut in sequenti capite referemus. Solum hic reffero Lactantium, lib. 7, cap. 17, ubi tacito nomine dicit, Prophetam magnum venturum tempore Antichristi, de quo locum Apocalypsis ad litteram interpretatur. Non video tamen, cur in singulari de Propheta magno loquatur, et non de duobus Prophetis, sicut expresse Joannes loquitur. Ita ergo intelligenda res est. Neque contra hunc proprium sensum

illius contextus aliquid rex affert, præter ea quæ de Enoch et Elia disputat, de quibus capite sequenti videbimus. Nunc enim plane dicimus, licet illi duo testes non essent futuri Enoch et Elias, non inde fieri non esse futuros homines, verosque Prophetas ac prædicatores, proprie interficiendos ab Antichris'ō, et a Christo resuscitandos. Posset enim Deus ex sanctis hominibus tunc viventibus duos ad illud ministerium sua gratia vocare, eisque spiritum prophetiæ et miraculorum imperitri, et in eis possent omnia, quæ ibi prædicuntur, proprie ac verissime impleri. Hic ergo sensus, et veritas in hoc capite demonstrata per se potest subsistere, quidquid in quæstione alia de Enoch et Elia sentiatur.

20. *Locus idem Apocalypsis ostendit Antichristum nondum venisse.* — *Nec duo illi Prophetæ, nec alii eis similes adhuc fuerunt.* — Unde tandem concludo locum hunc, in hac proprietate et generalitate explicatum, sufficere ad demonstrandum, Antichristum nondum venisse, abstracto etiam ab speciali disputatione de Enoch et Elia. Quia non solum est evidens non venisse Eliam et Enoch, verum etiam nec aliquos duos Prophetas, contra aliquem Christi hostem ita prædicantes, ut in eis impleta fuerint omnia quæ ibi Joannes de illis duobus testibus ac Prophetis prædictis, hactenus apparuisse, ut est evidens, considerando cum proprietate et veritate circumstantias omnes quas notavimus. Nulli enim prædicatores hactenus fuerunt, qui per 1260 dies prædicaverint, cum potestate faciendo mirabilia in cœlo, aquis et terra, quique post illos dies fuerint publice imperfecti, eorumque corpora per tres dies cum dimidio jacuerint in plateis alicujus civitatis, et postea publice resurrexerint. Ergo, stante illo proprio et vero sensu, evidens est illos duos testes nondum esse missos, ac proinde neque Antichristum venisse. Multo ergo evidenter est non posse vaticinium hoc ad Papam accommodari.

CAPUT XII.

ELIAM ET ENOCH ESSE TESTES ILLOS QUI CONTRA ANTICHRISTUM MITTENDI SUNT, OSTENDITUR.

4. *Testes illos non futuros Enoch et Eliam contendit rex Jacobus.* — Quanquam, ut dixi, ad ostendendum quod intendimus, necessarium non sit scire aut definire quinam futuri sint illi duo singulares homines, quos Deus

testes ac prædicatores contra Antichristum daturus est; quia, dummodo constet illos futuros esse veros homines, quicumque illi futuri sint, procedit demonstratio, ut ostendi; nihilominus quoniam in hoc puncto vehementer invehuntur Protestantes contra Patres, contra Catholicos, et contra perpetuam Ecclesiæ traditionem, et communem sensum, suoque arbitrio et spiritu Scripturas elidunt, ideo quæstionem hanc prætermittere non potuimus. In qua ea solum addemus, quæ ad respondendum regi, ejusque novam sententiam confutandam necessaria videbuntur, nam cætera, quæ hic dici poterant, alio in loco a nobis tractata sunt. Contendit igitur Jacobus rex, sententiam asserentem, Eliam et Enoch venturos in fine mundi in sua carne mortali ad prædicandum contra Antichristum, falsam esse, eamque consueta Protestantium licentia ac libertate, *futilē et animalē fabulā*, imo *vanitatem fabulæ Judaicæ*, *otiosumque somnium* appellat. Sic enim Protestantes, quod rationibus aut testimonis confirmare non possunt, solent conviciis et exaggerationibus, rudibus et indoctis suadere. Rex igitur nulla testimonia nullasve rationes adducit, quibus suam sententiam persuadeat, sed illa tantum testimonia quæ Bellarminus, ad confirmandum vetus dogma adduxit, efficacia non esse convincere conatur; idque ad suæ sententiæ confirmationem sufficere putavit, quia nostram, humanum captum superare, supponit, ut statim refaram. Nos vero primum omnium errores, in quibus ipse versatur, detegemus et confutabimus; deinde Ecclesiasticam et veram sententiam confirmabimus; postremo vero illius objectionibus vel potius evasionibus satisfaciemus.

2. Enoch et Elias adhuc sunt in vita mortali. — Principio ergo statuimus, Eliam et Enoch usque nunc vivere, non vita cœlesti et gloria, sed mortali, id est, in qua nec Deum facie ad faciem vident, nec immortalitatem, vel claritatem gloriae in corporibus assecuti sunt. Priorē partem, quod Elias et Enoch vivant, ut certam rex admittit; in cæteris vero contrarium dogma supponit, et fundamentum suæ sententiæ ponit, cum dicit: *Qui possit hoc cum Theologia vel ratione consistere, ut hec duo glorificata corpora de paradiſo cælo descendant, prædicent, pugnent contra Antichristum, et interficiantur ab eo?* Hoc autem fundamentum colligere imprimis videtur ex Genes. 5, ubi de Enoch di-

citur: *Ambulavit cum Deo, et non apparuit, quia tulit cum Deus.* Vel ad se (ait) recepit. Et ex 4 Regum 2, ubi Elias dicitur visus in cœlum ferri. Deinde hoe utitur dilemmate: *Nunc oportet illos aut in cœlo esse, aut in paradiſo; si in cœlo (quod haud dubie rerum est), glorificata sint corpora eorum oportet, cum nihil corruptibile eo possit penetrare,* Apoc. 20. *Quod si sunt in terrestri paradiſo, primum scire avemus ubi sit ille paradiſus, etc.* Et infra subjungit, *blasphemum esse credere, ex quo Adam ab illo paradiſo ejectus est, aliquem ex Adami posteris illuc pervenisse.* Posteaque addit, terrestrem illum paradiſum diluvio, si non ante, deletum esse.

3. Probatur ex Scriptura. — *Nemo gloriam assequitur, nisi prius moriatur.* — Verumtamen fundamentum illud non solum novum et inauditum est, sed etiam repugnat universalibus locutionibus Scripturæ, a quibus nihil licet excipere, sine auctoritate, vel ejusdem Scripturæ, vel verbi Dei non scripti, per traditionem Ecclesiæ et Patrum manifestati, quod hic ostendi non potest, sed potius contrarium. Assumptum duobus modis ostenditur. Prior sumitur ex universali regula Scripturarum nullum hominem mortalem transferri ad immortalitatem et beatam vitam, nisi intercedente morte corporali, et consequenter neminem consequi corporis gloriam, nisi media resurrectione, quæ est ad vitam. Utrumque docuit satis aperite Paulus, i Corint. 45, dicens: *Per hominem mors, et per hominem resurrectio mortuorum, et sicut in Adam omnes moriuntur, ita et in Christo omnes vivificabuntur.* Et infra: *In sapientia, tu quod seminas non vivificatur, nisi prius moriatur.* Et infra: *Seminatur in corruptione et resurget in incorruptione; seminatur in ignobilitate, surget in gloria,* etc. Et cætera quibus apertissime docethanc esse generalē regulam, a qua neque Christus excipi voluit, nam ipsum etiam mori oportuit, et ita intrare in gloriam suam, et ideo *prinogenitus mortuorum, et primitia resurgentium* appellatur. Nequo ergo illum ad gloriam comittatur, nisi prius mortem gustaverit. Unde ad Hebreos 9 ait idem Paulus: *Quemadmodum statutum est hominibus semel mori, post hoc autem judicium, sic et Christus semel oblatus est,* etc. Et ad Romanos 5: *Sicut per unum hominem peccatum in hunc mundum intravit, et per peccatum mors, et ita in omnes homines mors pertransiit.*

4. Enoch et Elias gloriam assecuti non sunt. — At vero Elias et Enoch hactenus mor-

tui non sunt, ut de Enoch docet Paulus, ad Hebr. 11, dicens : *Fide Enoch translatus, ne videret mortem*; et de Elia colligitur ex quarto Regum 2, ubi narratur, vivum fuisse *in cælum translatum, cum sermocinaretur cum Eli-seo*. Et ita de utroque id fatetur rex cum tanta exaggeratione, ut dicat, omnes Patres super hoc consentire, *utrumque Enoch, atque Eliam adhuc rivere, quod (ait) nemo Christianus unquam, opinor, negaverit*. Et infra, explicando quomodo vivant, inquit : *Deus enim viventium est, non mortuorum Deus, quanto magis in vivis sunt Enoch et Elias, qui nunquam mortem more aliorum gustaverunt*. Ergo cum nondum gustaverunt mortem, nondum in cœlo domiciliū et perfectam beatitudinem animæ, et corporis possident, juxta prædictam Scripturæ regulam.

5. *Evasio. — Responsio.* — Responderi vero potest nullam esse tam generalem regulam, quæ exceptionem non patiatur, vel privilegium admittat; itaque licet dicta regula generalis sit, ex privilegio potuerunt facile Enoch et Elias excipi. Neque hoc mirum videri debet, cum multorum Patrum sententia fuerit, illos homines, qui prope judicium vivi invenientur, non esse morituros, sed immutandos et rapiendos in gloriosum statum, si justi fuerint; cur ergo non poterunt cum illis excipi Enoch et Elias? Praesertim quia generalis lex est, ut homines præsentem vitæ cursum intra paucos annos absolvant, et certum sit ab hac lege exemptos esse Enoch et Eliam, qui per tot annorum millia mortui non sunt. Verumtamen, licet fateamur non esse tam certum, in hac posteriori regula non esse admittendam exceptionem sicut in priori, nihilominus vera sententia, et a Theologis recepta, et magis a Patribus probata, et Scripturis omnino consentanea est, etiam hanc regulam, nullam admittere exceptionem. Nam omnes omnino homines, etiam illi qui in fine mundi erunt, prius morientur quam Dominus ad judicandum veniat, juxta ordinem a D. Paulo positum in verbis proxime allegatis : *Statutum est hominibus semel mori, post hoc autem judicium¹*. De qua re alibi latius disputavi. Addimus vero, licet illa exceptio de hominibus in fine mundi futuris ab errore vel temeritate excusat, quia ex Scriptura occasio illius sumpta est, et in Patribus habet aliquod fundamentum, nihilominus exceptionem hanc de Elia et Enoch excusari non pos-

se a temeritate ex vi hujus secundæ regulæ, propter novitatem suam, et sine fundamento in Patribus; cum præter citata loca David, Psalm. 88, cum magna ponderatione dicat : *Quis est homo qui non videbit mortem?* Tantum certum supponens, nullum esse de quo id possit affirmari. Cum ergo Enoch et Elias nondum viderint mortem, profecto nondum sunt immortales effecti, juxta hanc Scripturæ regulam.

6. *Evasio. — Responsio.* — Ut autem certius constet sententiam illam non posse sine errore defendi, addamus alteram generalem Scripturæ regulam, videlicet, nullum hominem descendenter ex Adamo fuisse cœlestem gloriam, vel in sola anima, vel, quod gravius est, in corpore et animo, consecutum ante Christi Domini adventum et mortem. Hanc regulam nobis tradidit Paulus, ad Heb. 9, dicens, in secundum Tabernaculum, seu sancta sanctorum solum Pontificem solitum fuisse cum sanguine ingredi, *hoc significante Spiritu Sancto non esse propalatam Sanctorum viam, adhuc priori tabernaculo habente statum*. Quem utique habuit usque ad punctum mortis Christi, quando velum templi scissum est, et janua cœlestis regni fuit aperta. Unde in Hymno *Te Deum laudamus* canit Ecclesia : *Tu deicto mortis aculeo, aperuisti credentibus regna cœlorum*. Et Innocentius III, in cap. *Majores*, de Baptism., dixit, *regnum cœlorum usque ad mortem Christi fuisse omnibus obserratum*.

7. *Evasio. — Responsio.* — *Enoch et Eliam gloria non potiri indicat Paulus.* — Dicitur forte non fuisse quidem eo tempore ita propalatam viam, ut omnibus justis esset pervia, neque ita januam aperlatam, ut omnibus esset obvia; nihilominus uni, vel alteri, cui Deus voluit hoc beneficium conferre, extraordinarie patuisse. Sed contra, nam hæc est exceptio a regula data ab Spiritu Sancto, quam non licet ex proprio cerebro fingere. Deinde contra illam obstant verba Christi, Joannis 3 : *Nemo ascendit in cœlum, nisi qui descendit de cœlo, Filius hominis, qui est in cœlo*. Certe qui dicit *nemo*, omnes præter se excludit, et exceptio illa firmat regulam in contrarium. Item Paulus, ad Hebræos 11, cum inter Patres antiquos Enochum numerasset, subjungit : *Et hi omnes testimonio fidei probati, non acceperunt reprobationem, Deo pro nobis aliquid melius prvidente, ut non sine nobis consummarentur*. Ergo neque Enoch neque Elias repromissio-

¹ Hebr. 9.

nem acceperunt, neque consummati sunt, id est, nondum corporis et animi beatitudinem acceperunt. Nam Enoch in proprio nomine et persona induxerat Paulus, Eliam vero sub Prophetis sine dubio comprehenderat, et illum maxime designat, cum infra ait: *Circuerunt in melotis et in pelibus caprinis*; nam de Elia legimus, quod *incedebat zona pellicea accinctus renibus*, 4 Reg. 1. *Et circumibat*, fugiens persecutionem Jezabelis, *egens, augustiatus, et affictus errans in montibus, et in spelunca latens*, 3 Reg. 19. Ergo sicut Enoch et Elias comprehenduntur sub omnibus qui fuerunt testimonio fidei probati, ita etiam sub his qui non acceperunt repromotionem, nec consummati fuerunt.

8. Præterea idem Paulus sic ait, in cap. 10 ejusdem epistolæ: *Habentes itaque, fratres, fiduciam in introitu Sanctorum in sanguine Christi, quam initiarit nobis viam bonam. Quam initiarit* (inquit), id est, cui ipse initium dedit, seu per quam ipse primus omnium ingressus est, vel, ut Theophylactus ait, *noram viam fecit, per quam primus ivit*. Idem latius Theodoret., et eodem modo intellexerunt Chrysost. et OEcumen. Unde si vel unus homo ante ipsum Christum viam illam perambulavit, et beatitudinis januam ingressus est, non initiauit Christus viam illam bonam. Et similia sunt verba capititis sexti: *Confugimus ad tenendam propositam spem, incidentem usque ad interiora velaminis, ubi præcursor pro nobis intravit Jesus*¹. Certe si prius ingressi sunt Enoch et Elias, illi potius intrarunt præcursores, quam Christus. Unde quia nemo illuc ingredi poterat ante ipsum, sic locutus est Dominus ad Apostolos, Joan. 14: *Vado parare vobis locum, et si abiero, et præparavero vobis locum, iterum veniam, et recipiam eos ad meipsum*. Quæ testimonia alio in loco latius expendi, et Patrum expositionibus confirmavi, et veritatem hanc fuse probavi ac defendi, et ideo nunc a longiori confirmatione abstineo.

9. *Patres camdem sententiam tueruntur.* — *Cardinalem Bellarminum immerito rex accusat.* — His Scripturæ documentis accedunt testimonia Patrum, qui unanimi consensu docent, Enoch et Eliam mortem non gustasse, sed adhuc vivere in corpore et animo; nullus autem eorum dicit eos vivere in corpore immortali et gloriose, et multi vel indicant, vel aperte docent in corporibus mortalibus adhuc

vivere, quamvis divina virtute conserventur, et ab omni alteratione corruptiva usque ad præfinitum tempus præserventur. At inquit rex Angliae Bellarminum, ad suam sententiam confirmandam, quinque Patrum adduxisse testimonia, Irenæum, Tertullianum, Epiphaniūm, Hieronymum, et Augustinum; illos vero solum dicere, Enoch et Eliam vivere, eorum autem corpora esse mortalia non affirmare. Imo addit contrarium tradere Irenæum et Tertullianum. Ille enim dixit, *Enoch et Eliam in Paradiso remansuros usque ad consummationem conspicantes aeternitatem*. Hic autem ait, *Enoch non gustasse mortem, ut aeternitatis candidatum*. Sed oportet diligenter expendere singulorum testimonia.

10. *Divi Irenæi verba expenduntur.* — Irenæus quidem, lib. 5, dicit, *Enoch et Eliam, ibi manere conspicantes incorruptelam*. Sed ubi, quæso, manere dicit? certe, *in paradiso* (ait), *ubi primus est positus homo*, id est, in paradiſo terrestri; at ille non est locus corporum beatorum; ergo contradicit Irenæus regi dicenti, *Enoch per multa retro tempora esse in calo in corpore glorioſo*. Quin potius subdit Irenæus, *ibi*, in eodem, scilicet, paradiſo terrestri, *manere usque ad consummationem*, id est, usque ad finem mundi. Quomodo vero hoc intelligendum sit, ex eodem Irenæo accipimus, lib. 4, cap. 30, ubi de Enoch ait: *Translatus est, et conservatur usque nunc*. Hæc enim verba non significant certe translatum esse ad immortalitatem, sed modo extraordinario a Deo conservari, *usque nunc*, et usque ad finem mundi, quem nomine *consummationis* in alio loco significavit. Unde quod ait: *Conspicantes incorruptelam*, non significat jam induisse immortalitatem seu incorruptionem, sed actualem incorruptionem, quam illi in se experiuntur et vident; idem enim est *conspicantes*, quod *conspicientes*, et intuentes suam incorruptionem. Per quam etiam dici possunt, quasi in signo et participatione quadam conspicari immortalitatem, et spem illius dare, eo quod si Deus homines mortales ita conservat, facile credi potest etiam posse mortuos ad vitam immortalem resuscitare, hoc enim ibi persuadere Irenæus intendebat.

11. *Tertulliani sententia expenditur.* — Præterea Tertullianus, lib. contra Judæ., cap. 2, sic de Enoch scribit: *Enoch justissimum non circumcisum de hoc mundo transtulit, qui nec dum mortem gustavit ut aeternitatis candidatus*, ubi esse candidatum non significat jam

¹ Hebr. 6.

esse in æternitate, sed esse illi propinquum, et ad illam aspirare, tanquam certum signum illius habens, hoc enim vox candidati in proprietate significat. Unde idem Tertullianus, lib. de Anim., c. 50 : *Translatus est* (inquit) *Enoch, et Elias, nec mors eorum reperta est, dilata scilicet. Caeterum morituri reservantur, ut Antichristum sanguine suo extinguant.* Impetrando nimis a Deo suo martyrio, ut Antichristum interficiat spiritu oris sui. Quid est ergo quod rex Angliae dicit, Tertullianum plane negare, Enoch esse moritum, cum tamen expressis verbis hoc loco illud fateatur? Nec Tertullianus sibi est contrarius, quia vocavit Enoch *aeternitatis candidatum*, quia (ut dixi) esse candidatum aeternitatis, non est esse translatum in aeternitatem, sed esse aspirantem ad aeternitatem. Unde frivolum est regis argumentum, cum, inquit, *jam male sibi firmatum habet jus aeternitatis, si iterum moriturus est.* Nam potest habere firmum jus aeternitatis suo tempore obtinendae, licet sit moriturus, sicut habuit Christus dum in vita mortali vixit, et justi in gratia confirmati dici possunt habere firmatum jus aeternitatis, id est, ad aeternitatem, licet prius morituri sint. Sic ergo Enoch habere potest firmatum jus aeternitatis, licet moriturus sit, quia sine dubio in gratia est confirmatus et praordinatus, ut per martyrium transeat ad aeternitatem, ut in hoc posteriori loco Tertullianus dixit. Et ita utrumque conjunxit in libro de Resurrectione carn., cap. 58, ubi de Enoch et Elia dicit : *Nondum resurrectione dispuncti, quia nec morte functi, quia tamen de orbe translati, et hoc ipso jam aeternitatis candidati, ab omni vitio, et ab omni injuria et contumelia, immunitatem carnis ediscunt.* Cujus sententiae clarus sensus est, nondum esse resurrectione dispunctos, quia nondum ad eam perfectionem gloriae corporum pervenerunt, quam post mortem et resurrectionem obtinebunt, sed per translationem aliud genus immunitatis ab effectibus et injuriis mortalitatis consecuti sunt, ratione cuius dicuntur candidati aeternitatis. Unde subjungit : *Cuinam fidei testimonium signant, nisi qua credi oportet haec futurae integratatis documenta?*

12. *D. Hieronymi sententia clarior est.* — Circa Epiphanium non immoror, sed ingenue fateor, ubicumque Enoch aut Eliæ sermonem attigit, solum dicere, eos non esse mortuos, et adhuc vivere, testimonium dantes aeternitati, et corporum perpetuae durationi futuræ; an vero postea venturi sint, vel morituri, non

tractat, neque alterutrum definit, ut videri potest contra haeres. 9, et contra haeres. 64, proxime post fragmentum ex Methodio, et in Anchorato, versus finem. Venio ad Hieronymum, cuius clarior est in hac re sententia, nam epistol. 148 ad Marcellam, tractans locum Pauli, 1 ad Thessal. 4, de his qui rapientur obviam Christo in aera, ait : *Vis nosse utrum sic occurrant in corporibus, ut non ante moriantur, cum et Dominus noster mortuus sit, et Enoch atque Elias secundum Apocalypsim Joannis morituri esse dicantur, ne, scilicet, ullus sit qui non gustaverit mortem.* Et epistol. 61 ad Pammach., contra errores Joan. Hierosol., versus finem, dicit *Eliam et Enoch neandum mortuos, paradisique colonos, habere membra cum quibus rapti sunt, atque translati,* etc. Et licet non declareret quid de illis postea futurum sit, satis indicat non esse translatos ad cœlestem gloriam, sed in paradiſum eidem corporibus et ejusdem qualitatibus divinitus conservari. Quod inferius magis declarat, dicens : *Tanto tempore in eadem permanent aetate, qua rapti sunt, et habent dentes et ventrem, et tamen cibis non indigent.*

13. *D. Augustinus aperte pro nobis stat.* — Denique etiam Augustinus diserte suam in hoc puncto sententiam aperuit, et veram fidei doctrinam tradidit, lib. 4 de Peccat. merit. et remiss., cap. 3, ubi cum dixisset, Adam in paradiſo fuisse mortalem, licet non esset moriturus si non peccasset, adjungit : *Talem puto habitudinem adhuc in corpore animali atque mortali, etiam illis, qui sine morte hinc translati sunt, fuisse concessam. Neque enim Enoch et Elias pertam longam aetatem senectute marcerunt, nec tamen credo eos jam in ilam spiritualem qualitatem corporis commutatos, quæ in resurrectione promittitur, quæ in Domino prima processit.* Latius id tradit idem Augustinus, l. 9 Genes. ad litteram, c. 6, dicens : *Neque arbitrandum est, Eliam vel sic esse jam sicut erunt sancti, quando peracto operis die denarium accepturi sunt, vel sic quemadmodum sunt homines, qui nondum ex hac vita migrarunt, de qua tamen ille non morte, sed translatione migravit.* Et infra dicit idem sentiendum esse de Enoch, et de utroque concludit : *Enoch et Elias in Adam mortui, mortisque propaginem in carne gestantes, quod debitum ut solevant, creduntur etiam reddituri ad hanc vitam, et quod tandem dilatum est, morituri.* Et alia loca infra referemus, quæ profecto si rex vidisset, non asseruisset Hieronymum et Augustinum negasse tantum Enoch

et Eliam esse mortuos, non tamen affirmasse esse morituros, utrumque enim disertissime affirmant, et ex generalibus regulis fidei confirmant.

44. *D. Ambrosius in eadem est sententia.* — His Patribus addi potest Ambrosius, nam lib. de Paradis., c. 3, imprimis dicit Enoch mortem non vidisse, idemque de Elia dicit in lib. 1 de Abel, c. 2. Tamen super 1 ad Corinth., c. 4, exponens verba illa : *Puto, quod Deus nos Apostolos novissimos ostendit*, ait: *Hoc ideo personae sue deputat, quia semper in necessitate fuit, persecutioes et pressuras ultra ceteros passus, sicut passuri sunt Enoch et Elias, qui ultimo tempore futuri sunt Apostoli.* Mitti enim habent ante Christum ad præparandum populum Dei, et muniendas omnes Ecclesias ad resistendum Antichristo, quos persecutionem pati et occidi lectio Apocalypsis testatur. Idemque fere dixerat 1 Thessal. 5. Quod si quis fortasse his testimoniis non acquiescat, quia non est certum, opus esse Ambrosii, imprimis dicimus negari non posse quin sit alicujus gravis et satis antiqui expiatoris. Deinde addimus opus indubitatum Ambrosii, tractat. de Symbol., ubi cap. 23 dicit : *Resurrectionis testes sunt Elias et Enoch, qui per tot annorum curricula, et usque ad secundum Domini adventum Christi in carne perpetuo manebunt.* Ac denique in lib. 4 de Fide, cap. 1, expresse dicit: *Translatus erat Enoch, raptus Elias, sed non est servus supra Dominum, nullus enim ascendit in cælum, nisi qui descendit de cælo.* Nam et Moysem, licet corpus ejus non apparuerit in terris, nusquam tamen in gloria cœlesti legimus, nisi postea quam Dominus resurrectionis suæ pignore vincula solvit inferni, et piorum animas elevavit. *Translatus ergo Enoch, raptus Elias, ambo sumuli, ambo cum corpore, sed non cum resurrectione, non cum manubiosis mortis, etc.*, id est, non cum gloria resurgentium, neque cum dotibus gloriae, que sunt quasi spolia mortis et crucis Christi.

45. Magnus item Gregorius, lib. 9 Moral., c. 3, alias 4, sic de Enoch et Elia loquitur : *Hinc est quod duo illi prædicatores eximii dilata morte subtracti sunt, ut ad prædicationis usum in fine revocentur. Ihi sunt duæ olivæ et duo candelabra, quorum unum in Evangelio per semetipsum Veritas pollicetur, Elias venturus est, et restituet omnia, Matth. 17; et lib. 14, cap. 11, in fine, alias 12, in principio : Illi (ait) qui in prioribus mundi partibus præcesserunt, Enoch et Elias, ad medium revoca-*

buntur, et crudelitatis ejus (id est Antichristi) sævitiam in sua adhuc mortali carne passuri sunt, ubi noto particulam, adhuc mortali carne, quia per illam in ea nunc mortali carne vivere significat; et l. 20, c. 25 : Et si ad cælum raptus est Elias, mortem distulit, non evasit. Et homilia 29 in Evangel., Eliam (ait) raptum esse in cælum aereum, ut in secretam quamdam regionem terræ duceretur, ubi in magna carnis et spiritus quiete viveret, quo usque ad finem mundi redeat, et carnis debitum solvat. Ille enim mortem distulit, non evasit. Denique Cyprianus, lib. de Montibus Sina et Sion contra Judæos, non longe ab initio, dicit Enoch translatum esse vivum in locum ubi Deus scit, et in fine mundi ex eo loco venturum esse ad confundendum Antichristum, unde evidenter supponit non esse in gloria, sed vivere potius in carne mortali.

CAPUT XIII.

JOANNEM, PER DUOS TESTES, ENOCH ET ELIAM INTELLEXISSE, CONJECTURA, ET PATRUM AUCTORITATE OSTENDITUR.

4. *Ex eo quod mortui non sunt, venturos obviam Antichristo significatur.* — Ex impugnatione igitur hujus erroris ratio valde urgens colligitur ad persuadendum, illos duos testes futuros esse Enoch et Eliam, etiamsi ad id confirmandum, nullum aliud nobis suppetret Scripture testimonium. Nam si Elias et Enoch non vivunt in gloria, neque habent immortalia corpora, sed divinitus conservantur, tot annis a morte et a corruptione præservati, cur, queso, tam insigne miraculum et extraordinarium providentiae genus factum est, nisi quia illorum virorum via nondum consummata est, et in hac vita aliquod insigne opus illis agendum superest, propter quod a Deo reservantur, et ut pro ipsius honore aliquid in corporibus mortalibus patiantur? Ergo quando alia testimonia deessent, magnum argumentum hinc sumitur, eos reservari ad resistendum maximo Christi hosti Antichristo, et ad subveniendum Judæis et gentibus in summo periculo, et maximæ necessitatis tempore, et ad sustinendam pro Christo insignem mortem. Ergo quamvis Joannes Evangelista eos non nominet, satis eos indicat, dum dicit : *Dabo duobus testibus meis, supple, spiritum seu virtutem, et prophetabunt.* In quo modo dicendi innuit illos testes non esse denuo creandos, seu produc-

cendos, sed jam existere, et tunc mittendos esse cum spiritu prophetiae, etc. Merito ergo intelligimus illos testes futuros esse Enoch et Eliam.

2. *Probatur hæc conjectura Patrum traditione.* — Cui conjecturæ accedit communis Patrum traditio. Nam Tertullianus, Cyprianus, Ambrosius, Hieronymus, Augustinus, et Gregorius in locis allegatis expresse id tradunt. Itemque Gregorius, Homil. 12 in Ezechiel., et Ambrosius, Apocalypsim exponens; Augustinus, tract. 4 in Joan., specialiter de Elia, et 20 de Civit., cap. 29, de eodem tractans, habet verba notanda, dicens, Eliam venturum ante judicium, et per illum Judæos in verum Christum credituros, celeberrimum esse in cordibus, oribusque fidelium. Idem de Elia tradit Justinus Martyr, Dialogo contra Tryphon., dicens Eliam in persona futurum præcursorum secundi Christi adventus, sicut spiritualis Elias fuit præcursor primi adventus. Item Dorotheus, in Synopsi de Elia, inquit : *Contra Antichristum dux bellii servatur, qui se illi opponet, et seductionem illius, ac superbiam redarguet, qui id a Deo accepit, ut secundi, et illustris Domini adventus præcursor futurus sit.* Idem late de Elia docet Julian. Pomerian., lib. 1 de Judæis, ante medium; et Chrysostomus, Homilia quarta in 2 Thessal. : *Veniet (inquit) Elias fideles confirmans, et alia prosequitur, quæ capite sequenti expendemus.* D. Prosper, in Dimid. temporis, cap. 13, de Enoch et Elia exponit locum Apoc. Optime Damascenus, lib. 4 Fidei, c. 27: *Mittentur (ait) Enoch et Elias Thesbites, et patrum corda in filios, hoc est, synagogam ad Dominum nostrum Jesum Christum, et prædicationem Apostolorum convertent; ab eoque trucidabuntur.* Idem tradit Theodoreus, Daniel. 12, et Malac. 4. Denique idem iradunt communiter expositores Apoc. 11, præsertim Andreas Cæsariensis, suo cap. 30, qui dicit plerosque Doctorum per illos testes Eliam et Enoch accepisse, quos ipse sequitur; et ait esse ex traditione præconum Christi in Ecclesia invariabiliter recepta. Consentunt denique Beda, et Anselmus, et Thomas Anglus, qui nomine D. Thomæ solet circumferri. Pluresque alios Patres capite sequenti addemus.

3. *Regium responsum.* — Ad illos vero omnes unico verbo satis a mente catholica alieno rex Angliæ respondet, dicens : *Quoniam in hunc de Patribus antiquis sermonem incidimus, sinite, quæso, hac occasione obiter vos moneam, mirum non esse si sæpius Patres hic errerent, et*

minus recte multa Apocalypsis mysteria intelligent, propterea quod liber ille eorum temporibus adhuc obsignatus fuit; et licet mysterium iniquitatis jam tunc ageretur, ille tamen homo peccati nondum erat revelatus. In omnibus enim obscuris prophetiis certissima est regula, nunquam eas satis intelligi posse usque dum compleantur¹. Et inferius verba subjungit acerbissima : *Tantum abest ut huic futili et anili fabulæ credam, ut contra, isto tam eruditio sæculo, hoc qui credit (Deum testor) non modo pro magni nominis theologo, sed ne Christiano quidem habeam, quin potius scribis et pharisæis accenseam, qui sic insaniebant, ut quamvis Christus contrarium docuisset, semper tamen venturum esse Eliam somniant. Veteribus autem Theologis, si qui in hac parte erraverint, æquior sum, propter rationem quam supra memoravi.* Hæc sunt verba regis, a quo juste expostulare possumus ut talium verborum pondus, rationem, constantiam et veritatem expendamus.

4. *Regis dicta sigillatim expenduntur.* — Imprimis enim quod tot et tam insignes Patres reprehendere audeat, sponsioni prius ab ipso factæ parum est consentaneum. Deinde quamvis prophetia nondum impleta obscura esse soleat, quoad varias circumstantias, et quoad ea quæ solum per ænigmata et metaphoras prædicuntur, nihilominus in his quæ ad substantiam prophetiæ spectant, et quæ per verba propria revelantur, non solet ita esse obscura, quin saltem toti Ecclesiæ et sapientibus Doctoribus ejus nota sit. Quis enim diceret prophetias de Christo venturo, antequam implerentur, non fuisse a sapientibus populi Dei intellectas, saltem quoad substantiam articuli de Messia venturo, et insigni Propheta futuro? Et quoad alias circumstantias expresse et verbis propriis prædictas, ut quod nasciturus esset in Bethlehem ex Virgine, et similes? Sic ergo in præsentि dicimus, esto liber Apocalypsis sit obsignatus et obscurus quoad multa in eo revelata, dum non implentur, nihilominus aliqua esse satis clare prædicta in propriis verbis, in quibus exponendis communis Patrum consensus non errat. Alia vero licet sint obscura, ex consonantia et collatione cum aliis prophetiis clarioribus illustrantur, et in his etiam exponendis non errant Patres, quando communi consensu eundem sensum, ut certum dogma ecclesiasticum, tradunt. Quando enim prophetia adeo est

¹ Præf., pag. 38.

obscura et unica , ut dici possit consignata , etiam ipsi Patres non tradunt suas expositiones ut certas , sed conjecturis utuntur , et ideo in eis regulariter non concordant. In praesenti autem satis clara est prophetia Apocalypsis de duobus testibus saltem in genere , quod sint futuri homines et Prophetæ , ut capite praecedenti ostensum est ; ex aliis vero Scripturis et omnium concordia concludunt Patres fere unanimi consensu , et magna asseveratione et certitudine , illos testes futuros esse Enoch et Eliam ; ergo sine ingenti audacia (ne quid gravius dicam) dici non potest eos in hac parte errasse .

5. *Impletam esse hanc prophetiam Rex sine fundamento supponit.* — Præterea ratio seu excusatio regis errorem deteriorem supponit ; dicit enim latuisse Patres intelligentiam illius prophetiæ , quia nondum erat impleta ; supponitur autem impleta , quia Papa est Antichristus , et quia vel duo Testamenta ab Ecclesia Romana corrupta , vel quia Lutherus , Calvinus , aut similes Apostatae sunt illi duo testes promissi . Quam suppositionem neque rex probat , nec probare potest , quia neque vestigium , neque umbram veritatis habet , sed Protestantium calumniam et imposturam , ut ex hactenus dictis evidenter constat , et in sequenti magis illustrabitur et confirmabitur .

6. *In præfat., pag. 63 et 129.* — Ad hæc , si regi jam est liber ille reseratus , quomodo in conjecturis semper versatur , dum illum conatur exponere , totamque de Antichristo disputationem ita obscuram et involutam esse tradit ut neminem ad credendum cogat , imo et opinionem suam solum conjecturam appellat ? Profecto postquam de sensu prophetiæ ex eventu , et quia impleta jam est , constat , non est amplius ambiguum vel conjecturale quod per eam fuerat prædictum , nec sola opinione sed certa fide credendum est . Quod si forte dicat se non certa fide credere , prophetiam illam Joannis de Antichristo esse impletam , sed hoc ipsum solum conjectura quadam opinari , ac subinde totam expositionem suam esse tantum conjecturalem , profecto si ita respondeat , convincitur imprimis , immerito affirmare , librum illum his temporibus jam esse reseratum , vel esse revelatum hominem peccati , ac prophetiam de illo ita impletam , ut satis jam intellegi possit . Nam quod humana conjectura affimatur , nec revelatum est , nec satis intellectum . Unde majori certe ratione conjectare , imo et conspicere ac dicere possumus er-

rare regem , dum putat se intelligere hujus libri mysteria , quæ Patres assequi non potuerunt , ut ipse ait .

7. Denique interrogo , cur pro Christiano non habeat , cum qui prædictam de Enoch et Elia sententiam credit . Nam si ipse in tota sua disputatione solis conjecturis ducitur , numquid Christianus non est , qui conjecturis et somniis Protestantium , seducentium regem Angliæ , non credit ? Dicet ideo non esse illum Christianum habendum , quia non credit Christo dicenti Eliam jam venisse , et ideo cum Judæis adhuc sperat venturum ; hoc enim in verbis suis rex significat . At profecto jam Christus suum de Elia testimonium dederat ab initio Ecclesiæ , et nihilominus Patres constanter sententiam illam de Enoch et Elia docuerunt ; ergo si consequenter loquatur , necesse est , ut omnes illos Patres pro Christianis non habeat , quia quamvis (ut vult) Apocalypsim non intelligerent , saltem verbis Christi fidem adhibere debuerunt . Quod si illis licuit sine ammissione Christianitatis , Christi verba , aliter quam rex illa interpretatur , intelligere , cur etiam nobis non licet cum Patribus potius quam cum Rege de sensu verborum Christi sentire , eisque fidem adhibere ? Concludimus ergo , non solum salva Christianitate , verum etiam secundum sanam fidem hominis Christiani , et secundum veram et gravem Theologiam credendum , sperandumque esse , Eliam esse venturum : quod ut planius fiat , verba Christi et prophetarum in capite sequenti diligenter expendumus .

8. *Fundamento regis satisfit.* — Prius vero necesse est regis fundamento satisfacere , quod supponit Enoch et Eliam habere jam glorificata corpora , et ideo ingenue fatetur , *captum suum superare , qui possit cum Theologia vel ratione consistere , ut e cœlo descendant , prædicent et pugnant , contra Antichristum : interficiantur ab eo , postea quam per multa annorum millia exempti fuerunt a maledictione mortis .* Confirmat hoc dilemmate supra facto , quia vel sunt in cœlo , vel in paradiso , et utrumque impugnat . Denique addit , *cum eorum corpora tamdiu fuerunt a peccato libera , non indigere maceratione , ac subinde non esse cur oporteat saccis apparere induita .* Sed imprimis nostra parvum refert , quod sententiam catholicam captum suum superare affirmet , id enim certe non tam ex mysterii altitudine vel rei difficultate , quam vel ex præconcepto errore , vel ex Theologiæ defectu nascitur .

Apprehendit enim corpora Eliæ et Enoch esse jam glorificata, et ideo non capit quod sint iterum ad prædicandum, pugnandum et moriendum ventura. Deponat igitur errorem illum, et facile cætera capiet. Addo vero, etiam glorificata corpora posse Deum ad statum mortalitatis revocare, et omnia prædicta eis agenda vel patienda committere; sicut potuit Paulum usque ad tertium cœlum rapere, vel (ut graves Doctores affirmant) usque ad visionem divinæ essentiæ elevare, et postea ad communem statum viatorum reducere. Verumtamen non est nunc nobis illud miraculum necessarium, quia certum nobis est illa corpora non esse glorificata. Cur enim hoc rex non credit? ex eo forte, *quod per multa annorum millia exempli fuerunt Enoch et Elias a maledictione mortis, cui per naturam omnes subjacent*. Sed hoc nullius momenti est, facile enim est Deo corpus mortale a morte præservare quanto voluerit temporesine dotibus gloriæ, sicut, Adamo non peccante, omnibus in statu innocentiae datum esset. Quibus Augustinus, locis supra citatis, Enoch et Eliam comparat, recte distinguens inter corpus immortale, quod non potest mori, et corpus mortale, quod licet mori possit, per specialem Dei providentiam aut operationem diu non moritur. De Enoch autem et Elia nunquam Scriptura dixit non posse mori, sed hactenus non esse mortuos; cur ergo rex non capit fieri posse et futurum esse, ut aliquando inter homines redeant et moriantur?

9. Curiosum magis est quam utile, scire velle ubi sint Enoch et Elias. — Cum autem interrogat ubinam sint, respondemus primo cum Patribus, quæstionem esse curiosam magis quam necessariam ad cætera fidei vel Theologiae dogmata capienda et defendenda. Ubi enim Deus voluit, illa potuit conservare, et ubicumque sint, inde poterit illa huic inferiori mundo restituere. Sic Augustinus, lib. 2 de Peccat. origin., c. 23, inter quæstiones quæ salva fide tractantur, et in quibus vel conjectura utimur, vel judicium propter ignorationem suspendimus, ponit hanc: *Ubi sint nunc Elias et Enoch, quos tamen (ait) non dubitamus, in quibus nati sunt corporibus vicere*; Chrysostomus etiam, Homil. 21 in Genes., de Enoch ait: *Si quis curiose interroget, et dicat: Quo ipsum transtulit? discat non convenire humanis mentibus, curiosius ea, quæ a Deo fiunt, explorare, etc.* Et similia habet, homilia 22 ad Hebræos, in fine litteræ. Deinde dicimus fortasse translatos esse in aliquem

cœlestem locum, ubi ab elementorum immutationibus et impressionibus immunes sint, etiam si usque ad empyreum cœlum, quod glorificatorum corporum propria sedes censemur, non sint perducti. Verba enim Scripturæ ab hoc dicendi modo non dissonant, neque res ipsa magnam difficultatem vel admirationem habet. Quod enim rex quasi irridendo et tanquam absurdum infert, quod futuri sint, *viridiorum more ultro citroque cœlum inter et terram cursitantes*, frivolum est et risu dignum. Nam si Angeli quotidie ascendunt et descendunt in cœlum propter salutem hominum, si Christus ipse postquam semel ascendit, iterum descensurus est ad iudicandum, et rursus ascensurus ad regnandum, quid mirum quod duo homines, electi a Deo ad extraordinarium opus et ministerium, translati semel fuerint, et iterum revertantur ad suum cursum ac ministerium implendum, ac tandem in cœlum redeant consummati?

10. Probabilis est illos in terrestri paradiiso agere. — Denique probabilis censemus esse in paradiso terrestri, in quo Adam fuit conditus, ut dixit Athanæsius, in epistola pro Synodo Nicæen., circa principium, et de Enoch significatur in libro Sapientiæ, ut in capite sequenti videbimus, ubi hoc etiam magis confirmabimus. Nec repugnat, quod de Elia scriptum est, visum esse in cœlum ferri, nam, ut recte dixit Gregorius, homil. 29 in Evangel., de cœlo aereo, non de æthereo id intelligendum est. Quod autem rex dicit, *blasphemum esse credere, ex quo Adam ab illo paradiiso ejectus est, aliquem ex Adami posteris illuc pervenisse*, si intelligeretur de eo qui dicaret, aliquem propria virtute, industria aut labore posse illuc pertingere aut ingredi, recte dictum esset. Si autem intelligatur de illo qui divinæ virtuti, ac dono, seu dispensationi hoc tribuit, non solum sine fundamento dictum est, verum etiam cum illa censura, non dissimili censura dignum est, quia est contra Sanctorum Patrum sententiam, cui sacra Scriptura multum favet, ut statim dicam. Quod autem ad hoc impugnandum ulterius rex interrogat, ubi sit ille paradisus, ad quæstiones adiaphoras pertinet, ut supra etiam dixit Augustinus, et quidquid in ea sentiatur, parum ad causam præsentem refert.

11. Paradisum terrestrem eversum non fuisse probabilis est. — Denique quod adjungit, *paradisum terrestrem haud dubie deletum esse*, si exaggerationem illam, *haud dubie*, abstulisset, tolerabile esset, quia non desunt gra-

ves autores qui ita sentiunt, et quia non est illa sententia damnabilis, cum non sit aperte contra Scripturas, vel communem traditionem, aut Ecclesie sensum. Quod autem *haud dubie* ita sit, sine fundamento dicitur, quia nullum potest rex ostendere Scripturæ locum, quo dubitationem omnem illius assertionis auferat. Quin potius longe probabilius est paradisum non esse deletum per aquam diluvii, sed usque nunc in sua amoenitate et pulehritudine conservari, ibique Eliam et Enoch in quadam vitæ felicitate vivere, ut eam recte describit Bernardus, serm. 3 et 6 de Ascens. Domini. Et Augustinus, dicto cap. 23 de Peccat. origin., dixit curiose quidem inquiri, *qualis vel ubi sit paradiſus, ubi Deus constituit hominem, quem formavit ex pulvrey, cum tamen esse illum paradiſum, fides Christiana non dubitet.* Ubi non tantum dicit fuisse, sed *esse*. Verumtamen de hac quæſtione alibi pro captu meo disputavi, et ideo illam omitto, et quia præsens controversia ab illa non pendet. Nam, licet paradiſus ille fuisset per diluvium deletus, potuisset Deus vel alibi locum statui illorum duorum prophetarum convenientem præparare, vel illum net locum aut partem ejus ad pristinum statum, vel saltem ad amœnitatem illis hominibus convenientem restituere. Ac denique quamvis ibi nunc illi testes feliciter et sine peccato vivant, venient nihilominus saccis vestiti, non ut pro præteritis peccatis satisfaciant, neque fortasse quia illa maceratione carnis ad alia vitanda indigebunt, sed propter exemplum hominum tunc viventium, ut luctum ēt mœſtitiam (ut Athanasius inquit) ostendant.

CAPUT XIV.

UTRUM EX ALIIS SCRIPTURÆ LOCIS OSTENDI POSSIT
ELIAM ET ENOCH FUTUROS ESSE SECUNDI CHRISTI
ADVENTUS PRÆCURSORES, ET TESTES CONTRA
ANTICHRISTUM.

1. *Multa alia Scripturæ loca significant duos illos testes fore, Enoch et Eliam.* — Rex Jacobus in sua Præfatione¹ fidenter affirmat, *verbum nullum in Scripturis reperiri, quod innuat vel Enochum et Eliam reddituros esse, et cum Antichristo dimicaturos, in eoque confictu occidendos, aut quidquam simile passuros.* Ut autem loc ostendat, discurrit per ea Scripturæ loca, quibus non solum Bellarmi-

nus, quem ipse tantum accusat, sed etiam antiquissimi Patres et Catholicci omnes solent dogma illud confirmare; et omnibus responderem aggreditur, imo et *mala fide agere*, qui dicta loca illo modo interpretantur, conatur evincere. Nos vero, Catholicorum sententiam sequentes, asserimus multa esse in Scriptura testimonia, quibus verum illud dogma ita confirmatur, ut licet per se certam fidem divinam non faciant, nihilominus ita prædictam veritatem comprobant, ut sine formidine prudenter credi possit, præsertim accedente consensu antiquorum Patrum, et omnium fere expositorum interpretatione. Et quoniam de loco Apocalypsis satis jam diximus, nunc per cætera discurremus. Et quia illa, quæ de Elia loquuntur, clariora sunt, prius de Elia, postea de Enocho dicemus.

2. *Id imprimis ostenditur de Elia.* — Dicimus ergo primo Eliam venturum esse, ut sit præcursor secundi Christi adventus, et ut reliquias Israel ad Christum convertat, et ab Antichristo avertat, et sic contra Antichristum pugnet. Hæc assertio imprimis probatur ex verbis Malachiae, cap. 4: *Ecce ego mittam vobis Eliam prophetam, antequam veniat dies Domini magnus et horribilis, et convertet cor patrum ad filios, et cor filiorum ad patres eorum, ne forte veniam, et percutiam terram anathemate.* Quæ verba de vero Elia in persona, et de missione illius ante diem judicii finalis, et prope illum fere communi consensu antiqui Patres intellexerunt, Chrysostomus, Homil. 58 in Matth., et 4 in 2 ad Thessal.; Theodoret., orat. 10 in Dan., in fine, circa cap. 12; Ambros., 1 Corinthior. 4, in id: *Puto enim quod Deus, etc.*; Augustin., 20 de Civitat., c. 29; Gregorius, 9 Moral., c. 4; Prosper, in Dimid. temporis, c. 43; Damascenus, lib. 4 de Fide, c. 28; Isidorus, lib. de Vita et morib. Sanctor., c. 35; et Julian. Pomer., lib. 1 contra Judæos, ante medium. Item expositores in eundem locum, præsertim Cyrillus, Theodoretus; et in loca Matth. 11 et 17, præsertim Hieronymus, Euthymius, Theophylactus, Anselmus, et D. Thomas; et in Apocalyps. 11, præsertim Aretas, dicens: *Et certe quod Elias venturus sit, manifestum est, quoniam Scriptura hoc prædixit, quæ per Malachiam vaticinatur: Ecce ego mittam vobis Eliam.*

3. *Rex Jacobus Malachiam de primo adventu et Joanne Baptista interpretatur.* — His vero non obstantibus, rex Anglæ interpretationem hanc non solum judicat esse falsam, sed

¹ Pag. 77.

etiam judaicam fabulam, ac subinde hæresim, quam qui credit, Christianum esse non putat, quia verbis Christi contradicit. Ait ergo Malachiam non loqui de Elia in persona, sed in spiritu; nec de secundo Christi adventu, sed de primo, cuius diem *magnum et horribilem* vocat propter diem passionis et mortis Domini, ac proinde prophetiam illam in Joanne Baptista fuisse completam. Quod totum probat testimonio Christi, Matth. 11, ubi cum multa de Joanne dixisset, adjungit: *Omnes Prophetæ et lex usque ad Joannem prophetaverunt, et si vultis recipere, ipse est Elias, qui venturus est.* Quid clarius? Et addit c. 17, cum discipuli ipsum interrogassent: *Quid ergo scribæ dicunt, quod Eliam oportet primum venire?* Respondens ait: *Elias quidem venturus est, et restituet omnia: dico autem vobis quia Elias jam venit, et non cognoverunt eum.* Et subdit Evangelista: *Tunc intellexerunt discipuli, quia de Joanne Baptista dixisset eis.* Et similia fere habet Marc., cap. ultim., quæ postea ponderabimus. Et pro hac sua sententia solum quemdam Bibliandrum hæreticum allegat. Posset vero Hieronymum etiam adducere, qui non solum Joannem Baptistam, sed omnem chorum Prophetarum Christo testimonium perhibentium nomine Eliæ ibi significari intelligit, et addit, Christum in Evangelio in Elia Joannem intellexisse; et Rupertus ibi dubius esse videtur de sensu Malachiæ, quamvis simul dicat plures Doctores, *quibus omnes* (ait) *fere consentimus*, credere Eliam ad litteram esse venturum, et omnia restitutum.

4. Malachias in sensu proprio de secundo Christi adventu loquitur. — Sed adverto aliud esse loqui de primario sensu litterali, et maxime proprio Malachiæ, aliud de sensu, vel secundario, vel mystico et spirituali. Dico ergo negari non posse quin Propheta ad litteram, et in sensu maxime proprio, et nomini consentaneo, loquatur de secundo Christi adventu, et de propria persona Eliæ. Probatur primo, quia a principio capitî aperte loquitur Malachias de die judicii, de illa enim ait: *Ecce dies veniet succensa quasi caminus, et erunt omnes superbi, et omnes facientes impunitatem stipulae, et inflammabit eos dies veniens,* etc. Quæ verba manifeste indicant sermonem esse de die iræ, et vindictæ divinæ, ante quam præcedet ignis omnia comburens, quæ propriissime convenient in diem judicii, in diem autem vel tempus primi adventus Christi, nullo modo. Et in toto contextu sequenti

idem sensus comprobatur. Et ita in hoc nec Hebrei, nec catholici expositores vel Patres discordant. Ergo cum postea dicit: *Antequam veniat dies domini magnus et horribilis*, de eodem die iudicij loquitur, qui erit *magnus iustis, et horribilis peccatoribus* (ut ait Hieronymus), nam et contextus et litteræ consecutio hoc postulat, et proprietas verborum id satis indicat, et consonant verba Joel. 2. Nam si-
cū dixit Malachias: *Mittam Eliam antequam veniat dies magnus et horribilis*, ita Joel postquam late depinxisset præcedentia ad diem judicij, dicens: *Ante faciem ejus ignis volans, sol et luna obtenebrati sunt, Dominus dedit vocem suam, et similia*, concludit: *Magnus enim dies Domini, et terribilis valde;* ergo dies illa magna et horribilis in utroque loco est dies judicij. Quam etiam *magnam* appellat Sophon., cap. 1, et horribilitatem ejus egredie describit, dicens: *Vox diei Domini amara, tribulabitur ibi fortis, dies iræ dies illa, dies tribulationis, et angustiæ,* etc. Similiter eumdem diem vocat *magnum et iræ*, Joannes, Apocalyp. 6. Non ergo accommodantur recte verba Malachiae diei passionis Christi, nec invenietur antiquus expositor vel Sanctus, qui ita intellexerit. Et specialiter notavit Chrysostomus, homilia 58 in Matth., ponderans ultima verba Malachiae: *Ne forte veniens percutiam terram anathemate,* quæ non primo adventui Christi, sed secundo recte accommodantur.

5. Malachias litteraliter loquitur de Elia, secundi adventus præcursori. — Secundo hinc fit ibi etiam Malachiam proprie et ad litteram loqui de Elia, et prædicere illum esse futurum secundi adventus Christi præcursem. Quod magis confirmant Septuaginta interpres: *Ecce ego mittam Eliam Thesbitem*, ut habetur in versione Hieronymi, et in Latina nuper correcta, et legunt Cyrill. et Theod. in Michæam, et Tertullianus, lib. de Anima, c. 35; Aug., Euth., Arethas supra; et Chrysost., Homil. 38 et 58 in Matth. Qui notat, additam nomini Eliæ fuisse circumstantiam patriæ, ut tolleretur ambiguitas, et notaretur sermonem esse de propria persona Eliæ.

6. Clarus id insinuat in libro Ecclesiastico. — *Hunc locum Protestantes cum ratione non possint, conciis dissolvunt.* — *De eodem Elia omnia hæc ab Ecclesiastici auctore prædicta sunt.* — Tertio idem comprobatur ex verbis Ecclesiastici, 48, ubi a principio capitî de Elia propheta loquitur Sapiens, ejusque insignem sanctitatem, magna prodigia, et si-

gna mirabilia, singularemque translationem describit et postea subjungit : *Qui scriptus es in iudiciis temporum, lenire iram Domini, conciliare cor patris ad filium, et restituere tribus Jacob.* Ubi, quæso, scriptus est in hunc modum Elias, nisi apud Malachiam? ergo de eodem Elia Malachias loquitur, de quo Sapientis, ac subinde de propria persona Eliæ. Ad quæ verba respondet rex Angliæ, cum constet Ecclesiasticum alludere ad verba Malachiæ, Christum, interpretando Malachiam, etiam Jesum Sirach exposuisse : *Neque dedecori est* (ait) *huic mortali Jesu explicari ab immortali veroque Jesu, licet ad pudorem et confusionem haereseos Jesuitarum.* Similiaque convicia libere proferunt Protestantes, quando nec probabilia nec verisimilia facere possunt, quæ dicunt. Quis enim legens caput illud Ecclesiastici, sibi persuadeat non loqui a principio de vero Elia? Sumpserat enim ille Jesus onus laudandi viros gloriosos parentes suos, ut dixerat c. 44, et incipiens ab Enoch, per Noe, Abraham, Isaac, Jacob, et cæteros Prophetas, pervenit ad Salomonem, in fine cap. 47, et postea incipit in 48 : *Et surrexit Elias Propheta quasi ignis, et verbum ipsius quasi facula ardebat, qui induxit in illos famem,* etc. *Et dejecit de cœlo ignem ter,* et alia, quæ historice aperte refert usque ad illud : *Elias quidem in turbine tectus est, et in Eliseo completus est spiritus ejus.* Et postea de Eliseo sermonem prosequitur. In medio autem illius enarrationis de Elia interponit illa verba, *Qui scriptus es in iudiciis,* etc. Qui ergo verisimile est, relativum *qui*, non referre personam propriam illius Eliæ, de quo in antecedentibus et sequentibus sermo texebatur? aut quis talem interpretationem Christo imponat? Præsertim cum eodem locutionis genere illi dicatur : *Qui sustulisti mortuum ab inferis, Qui dejecisti reges, Qui audis in Sina iudicium, Qui ungis reges, Qui receptus es in turbine ignis,* et statim : *Qui scriptus es.*

7. *Regis expositio confutatur.* — Suspicio sane, sub verbo *explicandi* intellexisse regem verbum *emendandi*, vel *corrigendi*, et ideo dixisse, non fuisse dedecori Jesu mortali *exponi*, id est, *corrigi et emendarī* a Jesu immortali, sentiens Jesum mortalem non recte intellexisse verba Malachiæ, et ideo aliter quam ipse senserit, explicatum esse a Jesu immortali. Cum enim rex sciat, illum librum non esse canonicum, facile in illo admittet aliquid quod emendari potuerit. Sed licet hoc non esset dedecori homini mortali a se loquenti,

fuisset tamen dedecori Spiritui Sancto, qui per illum loquebatur, ut vera fides docet, illum librum ut canonicum nobis proponens. Talis ergo interpretatio regia non potest Jesuitis esse pudori, rex videat an ipsi sit honori. Neque per illam aliqua haeresis confutatur, quæ per Dei gratiam hactenus in Jesuitis cum veritate notari potuerit, sed potius interpretatio illa haeresim involvere convincitur, quia vel male sentit de libro Ecclesiastici, vel certe non interpretationem, sed corruptiōnem verborum ejus Christo attribuit.

8. *De duplice Elia, altero vero, altero mystico, Christus loquitur.* — Quarto, Malachiam de persona Eliæ fuisse locutum, probamus ex ipsis Christi verbis, Matth. 17, ubi interrogantibus discipulis quid esset quod Scribæ dicebant, oportere Eliam venire primum, id est, ante adventum Messiae, respondit Christus dando primum : *Elias quidem venturus est, et restituēt omnia.* Deinde vero addit secundum, scilicet : *Dico autem vobis, quia Elias jam venit, et non cognoverunt eum, sed fecerunt in eum quæcumque voluerunt, sic et Filius hominis passurus est ab eis.* Ex quo contextu imprimis colligo, Christum de duplice Elia esse locutum, nam de uno ait esse venturum, de alio vero dicit jam venisse; de primo item dicit quod restituēt omnia, de altero vero non hoc dicit, sed potius esse male tractatum, et quasi contemptum a Judæis, quia illi non crediderunt, et *fecerunt in eum quæcumque voluerunt.* Denique tacite indicat duplē suum adventum, unum in quo passurus fuit a Judæis, ante quem venit spirituālis Elias, de quo proximo loco sermonem fecerat; aliud, in quo non ad patiendum, sed ad complendum omnia veniet, ante quem venturus est proprius Elias, de quo propterea predixit, quod restituēt omnia. Juxta quem sensum summa seu paraphrasis responsionis Christi est: Verum quidem est Eliam verum et proprium esse venturum, non tamen modo, sed eo tempore quo restituenda sunt et complenda omnia: dico autem vobis esse alium spiritualem Eliam, qui jam venit tanquam præcursor istius mei adventus, in quo veni ad patiendum pro hominibus, a quibus ipse etiam male et infideliter tractatus est.

9. *Vulgarem de Elia venturo opinionem Christus non improbavit.* — Hunc autem esse verum et litteralem sensum verborum Christi, ostendo primo, quia est simplicissimus, et valde consentaneus verborum contextui et proprietati, quæ servanda est, nisi ubi

clara fuerit metaphora, et ita hic sit. Nam in priori sententia, et nomen Eliæ, et futurum verbum *veniet*, proprie intelligitur, idemque de verbo *restituendi omnia*, statim explicabimus. In altera vero parte, nomen Eliæ spiritualiter exponitur, quia Christus ipse tam aperte illud declaravit, ut discipuli sensum intellexerint, alia vero verba omnia in sua proprietate retinentur. Accedit quod in prioribus verbis aperte Christus arinuit sententiae scribarum, quæ in illo populo erat vulgaris et receptissima, et tanquam vera illam approbat, nimirum, Eliam Prophetam esse venturum. Neque unquam significavit deceptos fuisse, qui de vero Prophetæ Elia prophetiam illam intelligebant. Postea vero, quasi addens mysterium novum non destruens prophetiæ litteram et veritatem, sed illam elevans ad spiritualem sensum, addit: *Dico autem vobis, jam venit, et non cognoverunt eum.* Cum ergo hic sit planus sensus, sine causa laborat rex Angliæ, ut illum evertat, dicendo Christum in priori parte usum esse verbo futuro *veniet*, non affirmando, sed referendo quod Prophetæ dixerat, et postea addidisse præteritum *venit*, ut explicaret prophetiam, et doceret, jam esse impletam. Sed profecto magnam vim facit illis verbis: *At ille respondens ait: Elias quidem venturus est, nam haec non sunt verba referentis, sed affirmantis et consentientis.* Nec discipuli dubitabant an Prophetæ id dixisset, sed an futurum esset; ipse autem respondit ita quidem futurum esse, et nihilominus addit, alio spirituali modo Eliam jam venisse. Sicut enim Paulus, 2 ad Thessalon. 2, de Antichristo dixit: *Mysterium jam operatur iniquitatis*, et de eodem subdit: *Et tunc revelabitur*, ita intelligere possumus dixisse Christum, Eliam in mysterio jam venisse, in persona vero adhuc esse venturum. Et hoc magis declaravit Marcus, c. 9, ubi prius refert dixisse Christum: *Elias cum venerit primo, restituet omnia.* Et infra subjungit: *Sed dico vobis, quod et Elias venit,* ubi priora verba clarissime affirmando dicta sunt, et non referendo, et in posterioribus particula et, unius Eliæ ab alio, et duplicitis etiam adventus distinctionem denotat.

10. *Joannes Baptista non restituit omnia, cum paucos converterit.* — *Elias primo adventu paucos, secundo plurimos convertet.* — Secundo confirmatur dicta expositio, quia optime concordat cum aliis Scripturæ locis, in quibus de proprio Elia venturo, et de spirituali Elia, qui jam venit, sermo est. Nam ubi

est sermo de Elia proprio venturo, de illo dicitur, vel quod *convertet homines ad Deum*, vel quod *placabit iram Dei*, et sic etiam illi tribuit Christus quod *restituet omnia*, quo verbo, omnia, quæ aliis verbis Malachias et Ecclesiasticus dixerunt, complexus est. Nec possunt illa verba Joanni Baptistæ recte accommodari, cum sua prædicatione parum Judæis profecerit. Quod enim Calvinistæ respondent, restituisse omnia, quia prædicavit Christum, qui omnia restituit, frivolum et valde extortum est. Tum quia verbum *restituet omnia*, significat efficaciam et effectum prædicationis ipsiusmet Eliæ futurum eodem tempore, et per ipsum, ut aperte constat ex proprietate verborum. Tum etiam quia alias quilibet Christi prædicator dicetur restituere omnia, etiam si prædicatione sua nihil proficiat, quod ridiculum est. Tum denique quia cum Malachias dicit de Elia: *Et convertet corda patrum ad filios*, non potest exponi, id est, prædicabit eum, qui convertet; immo nec recte exponemus dicendo, Ita prædicabit ut ad convertendum sufficiat; sed sensus planus est, Convertet efficaciter, seu ita prædicabit ut convertat; hæc enim est vis verbi, et hoc declarant verba Dei per eundem prophetam sub juncta: *Ne forte veniam et percutiam terram anathemate.* Ita ergo dixit Christus, *restituet omnia*, quia cum Judæi priori Eliæ non crediderint, et a vero Christo discesserint in ejus primo adventu, per alterum Eliam Christo restituentur, juxta illud Isai. 40, et Pauli ad Roman. 9: *Si fuerit numerus Israel tanquam arena maris, reliquæ salvæ fient.* Altera vero pars de spirituali Elia consonat verbis ejusdem Christi, Matth. 11: *Si vultis recipere, ipse est Elias qui venturus est*, id est, Joannes Baptista, et ut intelligeretur loqui de Elia in spirituali sensu, præmisit: *Si vultis recipere, ipse est Elias*, id est, ipse vobiscum exercebit Eliae ministerium, quod erit convertere homines, præser-tim Judæos, ad Christum. Quia vero sine consensu illorum perfici non poterat, ideo dixit, *si vultis*, ut Chrysostom. et Theophylact. notarunt. Et Hieronymus: *Hoc (inquit) quod dictum est: Si vultis recipere, ipse est Elias, mysticum esse et indigere intelligentia sequens sermo Domini demonstrat, dicens: Qui habet aures audiendi audiat*, id est, qui valet intelligere attendat, et altiore sensum verborum percipiat. Nam sicut Angelus de Joanne prædixerat, Lucæ 1, venturum esse *in spiritu et virtute Elie*, ita in præsenti dicitur esse Elias.

41. *Joannes Elias tropice dicitur a veri Eliæ similitudine.* — Tertio ipsa metaphora, qua nomen Eliæ Joanni attributum est, indicat de propria persona illius Prophetæ, cui nomen illud prius impositum est, prædictum fuisse, mittendum fore præcursorum alicujus adventus Christi, et prædicaturum Judæis ut convertantur ad Christum, nam quia in hoc munere Joannes assimilatus est vero Eliæ, ideo ipse Elias nominatus est, tanquam venturus in spiritu et virtute Eliæ. Sicut declaravit idem Lucas, c. 1, addendo: *Ut convertat corda patrum in filios*, alludens ad locum Malachiæ, ut ex verbis ipsis constat, et notavit præter expositores ibi, Augustinus, tract. 4 in Joannem, dicens, Joannem dictum esse in spiritu Eliam, quia hoc fuit in primo adventu, quod Elias erit in secundo. Idem Gregorius, homil. 7 in Evang.; ipsa ergo metaphora Eliæ, Joanni attributa, indicat priorem prophetiam ad litteram esse prædictam de proprio Elia. Quod ita etiam confirmatur, nam cum Angelus ait: *Veniet in spiritu et virtute Eliæ*, aperte distinguit Eliam a Joanne; ergo supponit proprium Eliam *venturum in spiritu et virtute*, *ut convertat corda patrum in filios*, etc., ac subinde supponit de illo Elia, distincto a Joanne, prius fuisse similia verba prædicta. Quocirca licet daremus verba Malachiæ interdum afferri de Joanne Baptista, quasi in eis fuerit prædictus, intelligendum id esset in sensu spirituali, fortasse etiam a Spiritu Sancto intento, non tamen est excludendus proprius litteralis sensus, qui multis aliis modis evidenter comprobatur. Sicut quando Joannes de Christo adducit verba illa: *Os non comminuetis ex eo*, non excluditur proprius litteralis sensus, quo significatur in typo id ad litteram servatum esse, ut observavit Augustinus, tractat. 120 in Joannem, et Chrysost., homil. 84. Ita ergo licet verba Malachiæ Joanni in spirituali sensu accommodentur, ad litteram servanda est proprietas. Nam de Joanne ad litteram prædictum fucrat per eundem Malachiam, cap. 3: *Ecce ego mitto Angelum meum ante faciem tuam, qui præparabit viam tuam ante te*. Quæ verba prius retulit Christus, Matt. 3, tanquam proprie de illo dicta, unde præmittit: *Hic est enim de quo scriptum est*, etc.; postea vero longe aliter inducit locum Malachiæ, vel potius ad illum alludit per attributionem, vel in spirituali sensu ad Joannem verba accommodat.

42. Auctoritate Patrum sententia catholica

constabilitur. — Ultimo auctoritate Patrum hæc expositio verborum Domini comprobatur. Hieronymus enim, Matt. 11, dicit Joannem mystice vocatum esse Eliam propter similitudinem, et addit, quod sicut Elias futurus est præcursor secundi adventus Christi juxta Malachiam, ita Joannes fuit præcursor primi. Quamvis enim ibi solum hanc referat, ut aliorum sententiam, ultimo tamen loco eam ponit, et tacite approbat; Matthæi vero 17, supponit ut veram traditionem Hebræorum de vero Elia venturo præcursori secundi adventus, et postea sic exponit verba Christi: *Ipse, qui venturus est in secundo Salvatoris adventu juxta corporis fidem, nunc per Joannem venit in veritate et spiritu.* Et Augustinus, lib. 83 Quæstion., quæst. 58: *In secundo (ait) adventu in claritate Dominus venturus est, cuius adventus præcursor speratur Elias, sicut primi Joannes fuit, et ideo dicitur a Domino: Elias jam venit, et multa ei homines fecerunt, et si vultis scire, ipse est Joannes Baptista, qui venturus est. Quia in eodem spiritu, et in eadem virtute, et tanquam præcedentis præconis officio, et hic jam venit, et ille venturus est.* Ubi clarissime exponit, Christum locutum esse de duplice Elia, vero et mystico. Et lib. 1 Quæst. Evang., quæst. 21, de vero Elia intelligit illa Domini verba: *Elias quidem venturus est*; et quod additur: *Et restituet omnia*, exponit: *Vel eos, quos Antichristi persecutio conturbaverit; vel ipse restituet moriendo quæ debet.* Idem tract. 4 in Joann., ut supra retuli. Et similiter Ambrosius, lib. 1 in Luc., circa illa verba: *Et prælibit ante illum in spiritu et virtute Eliæ*¹, inter alias rationes et similitudines ponit, *quia hic prioris, ille sequentis Dominici præcursor adventus.* Et lib. 2 de Virginibus, in principio, dicit, *Eliam, qui virgo fuit, ideo raptum esse in cælum, et Dominici, ait, venturus est præcursor adeventus.* Gregor. etiam, lib. 35 Moral., cap. 9, alias 6, de vero Elia intelligit; quomodo autem restituet omnia, declarat, dicens: *Nunc enim amisit Israelitas Ecclesia, quos convertere prædicando non valuit, sed tunc Elias prædicante, dum quotquot invenerit, colligit, velut plenius recipit quod amisit.* Et eodem modo intellexit verba Christi idem Gregor., lib. 20 Moral., c. 25, et hom. 12 in Ezech.

13. *Patrum Græcorum dicta proponuntur.*
— Præterea Origenes, tractat. 3 in Matth.,

¹ Luc. 1.

post interrogationem Apostolorum : *Quid ergo dicunt Scribæ, quod Elias oportet venire pri-
mum?* addit : *Ad hoc respondit Jesus, non re-
probans quidem, quæ a Scribis tradita fuerant
de Elia, sed alium Eliæ adventum ante se de-
notat factum, quem ignoraverant Scribæ.* Et
ita statim exponit sequentia verba Christi de
duplici Elia in persona et in spiritu, quorum
alter venturus est, alter jam venit. Unde op-
time Chrysostomus, homil. 38 in Matt. 11 :
Significavit (inquit) *Christus Joannem, utri-
que enim unam administrationem suscep-
runt, et præcursores ambo constituti sunt. Quapropter
non dixit : Hic est profecto Elias, sed, Si
rultis suspicere, hic est, et cætera quæ ele-
ganter prosequitur, tum ibi, tum latius, et
melius hom.* 58, ubi exponit verba Christi :
*Elias venturus est, de Elia Thesbite, de quo
etiam locutus fuerat Malachias.* Et hom. 4 in
2 ad Thessalon., similiter declarat, Joannem
dictum esse Eliam propter ministerium præ-
cursoris, in quo vero Eliæ similis fuit. Et Theophyl., Matt. 17, exponens verba Christi,
ait : *Dicendo quod Elias quidem veniet, ostendit
quod nondum venit, et in secundo adventu
veniens restituturus sit ad fidem Christi om-
nes Hebreos, quos persuasibiles inveniet,* etc.
Denique Tertull., lib. de Anima, c. 35, eidem
favet expositioni, ut posteriores omittam, Be-
dam, Anselm. et alios, qui verba Christi ita
intelleixerunt.

14. Bellarminus defenditur. — Quid est er-
go quod rex Angliae ait, nihil esse in Scrip-
turis, quod innuat Eliam esse venturum ante
judicium? Numquid verisimile est tot Patres
tanta concordia in assertione hac ex sacra
Scriptura colligenda convenisse, sine magno
et evidenti in eadem Scriptura fundamento?
Quapropter multum excedit, dum prædic-
tam interpretationem verborum Christi in
Bellarmine reprehendens, eam impudentem
vocat, et paraphrasim non ferendam, vel
callide et pessima fide inductam fuisse di-
cit. Aut enim Sanctos Patres non legit, aut
omnes in uno Bellarmine tecte et callide,
et contra id quod alibi profitetur, repre-
hendit; utrumque autem intolerabile est
et rege indignum. Eo vel maxime quod nec
rationem ullam, nec ponderationem verbo-
rum Christi alicujus momenti affert, quo re-
ceptum sensum verborum Christi impugnet:
neque his satisfacit quæ nō ad illum persua-
dendum induximus. Cum ergo et alia testi-
monia Scripturæ aliter recte intelligi non
possint, et verba Christi in optimo et plano

sensu cum illis concordent, et communis Pa-
trum interpretatio consentiat, dubitandum
non est quin Elias futurus sit secundi adven-
tus Christi præcursor, ac subinde unus ex
duobus testibus a Joanne in Apocalypsi præ-
dictis.

15. Regis de Enoch sententia. — De Enoch
vero quasi irridendo sic ait rex : *Sed Eno-
chum oportet in hoc negotio cum Elia conjungi,
nullam aliam ad rem, ni fallor, nisi ad ju-
gum ex altera parte tollendum.* Verumtamen
dicteria hæc, et irrisio verba non Bellar-
minum tantum (ut rex dissimulat), sed Pa-
tres omnes, imo ipsum Joannem Evangelistam
pungunt. Nam si prædicta verba audienda
sunt, non solum adversus Enochum, sed
in universum omnem socium Eliæ in prædi-
catione, et adventu suo irrident, et exclu-
dunt. Ita enim dicere aliquis poterit : *Quid
oportet alium quemcumque Eliæ conjungi,
nisi forte ad jugum ex altera parte tollen-
dum?* Cur ergo Joannes duos testes duosque
Prophetas venturos esse prædixit? Quis novit
sensem Domini, aut quis consiliarius ejus
fuit? Aut quis rationem ab illo exiget, cur
duos testes missurus sit, et non unum tan-
tum, vel non plures? Vel cur in primo suo
adventu unum tantum præcursorum miserit,
in secundo vero duos? Vel cur ad prædicandū
Evangelium miserit duodecim Apostolos, et non plures, neque pauciores, et in fi-
ne mundi contra Antichristum duobus testi-
bus contentus futurus sit? Sunt ergo futilis
hujusmodi objectiuncule; nam Deus *omnia
operatur secundum consilium voluntatis suæ.*

**16. Congruæ aliquot rationes, cur alius
socius sit Eliæ adjungendus.** — Quanquam
recte consideranti statim multæ rationes hu-
jus divinæ providentiae occurrere possunt.
In primo enim adventu unus tantum præ-
cursor missus est, quia solum ad unum Ju-
dæorum populum, et ad unum terre locum
mittebatur, et eo tempore quo adhuc ille
populus in fide perseverabat, et Propheta-
rum doctrinis erat instructus, ideoque unus
testis eximius, qui esset *lucerna ardens et lu-
cens*, visus est sufficiens. Elias autem mitten-
dus est ad Ecclesiam per totum orbem jam
diffusam, et ex gentibus ac Judæis constan-
tem, et eo tempore, quo vix invenient fidem
super terram propter ingentem Antichristi
persecutionem, et ideo socium aliquem habe-
bit, qui eum ad ferendum jugum Evangelii
prædicationis et Christi defensionis juvet,
ut sint duo candelabra in conspectu Domini

stantia; et utrumque populum illuminantia; et duæ olive, ex quibus major abundantia gratiæ in tempore tantæ necessitatis Ecclesiæ communicetur¹. Itaque gravissime rex errat de numero duorum testium dubitando, vel illum tanquam ratione carentem irridendo.

17. Quis Eliæ sit adjungendus, non ita compertum est. — Quis autem futurus sit ille socius, non est tam exploratum et certum, sicut quod alter futurus sit Elias. Unde in eo, quod addit rex, nullum Scripturæ locum de reditu Enoch loqui, minus errat. Nam etiam Aretas, Apocal. 11, suo c. 30, dixit: *Quod Elias venturus sit, manifestum est; de Enoch vero testimonium quidem, quod ad adventum spectet, ex Scriptura non habemus.* Unde factum est ut de hoc socio Eliæ varie senserint doctores catholici. Victorin. enim, Apocalyp. 11, opinatus est Jeremiam cum Elia esse venturum; Hilarius autem, canon. 20 in Matth., reprobata illa sententia, Moysem sociavit Eliæ, cuius sententiam aliqui moderni expositores Matth. 17 secuti sunt. Alii vero hoc munus prophetandi cum Elia tempore Antichristi Joanni Evangelistæ tribuunt, cum Hypolito, lib. de Consum. mundi. Qui tamen non excludit Enoch, sed tertium Joannem adjungit. Hoc vero fundamentum non habet, et ipsi Joanni repugnat, qui duorum tantum testium mentionem facit. Neque absolute credibile est Moysem, Jeremiam, aut Joannem venturum esse cum Elia, quia nullum vestigium vel indicium ejus rei in Scriptura habetur, et longe verius est illos omnes mortuos esse, et cum Christo jam regnare, et ideo verisimile non est illos esse iterum morituros, et de celo ab statu beatifico abstrahendos, ut ad pugnandum cum Antichristo descendant, ut latius alibi tractavi (secundo tomo tertiae partis, disp. 53, sect. 3).

18. Probabilissimum est Eliæ socium Enoch futurum. — Superest ut omniuno asseramus Enoch esse venturum simul cum Elia, ut sit alter testis et prædictor contra Antichristum. In hac enim affirmanda sententia gravissimi Patres, et fere omnes conveniunt. Tertullian., lib. de Anima, c. 50; Augustin., lib. 9 Genes. ad litter., c. 6, et lib. 4 de Mirabilib. Sacræ Script., c. 3; Ambros., 1 Corint. 4; Damascen., lib. 4, c. 27; Beda, Anselm. et D. Thomas, in Apocalyp., ubi etiam Andr. Cæsar. dicit, plerosque Doctorum hanc

sequi sententiam; et Aretas dicit haberi ex traditione præconum Christi. Et argumentum magnum est, quia Enoch mortuus non est, sed translatus, ut Scriptura docet, Genes. 5, unde fit aliquando esse morituru, *quia statutum est hominibus semel mori*¹, a qua regula non potest cum fundamento excipi. Ergo verisimillimum est, ad hunc finem reservari, ut cum Elia veniat, et pro Christo moriatur.

19. Favent maxime verba Ecclesiastici. — *Elias ad Judæos, Enoch ad gentiles convertendos præcipue destinabitur.* — Accedunt verba Ecclesiast. 44: *Enoch placuit Deo, et translatus est in paradisum, ut det gentibus poenitentiam.* Quæ verba de paradiſo terrestri intelliguntur a Patribus, ut supra retuli. Rex autem Angliæ contendit sufficieret sic exponi: Qui positus fuit in exemplum futuris hominibus, quo ad poenitentiam agendum et sectandum Deum incitarentur. Quam expositionem Theodoret., quæst. 45 in Genes., tradidisse videtur. Et posset tolerari, si alia non excluderetur, vel si multæ aliae circumstantiæ, aliiquid amplius in verbis illis significatnm esse, interpretari non cogerent. Nam si solum in exemplum translatus esset, non certe in paradiſum terrestrem, sed in cœlestem transferendus fuisset, nec in mortali corpore in terra servandus, sed gloria et honore statim coronandus. Deinde pauci profecto futuri erant, qui illo exemplo tam distanti tamque abscondito permovendi essent ad poenitentiam; alias ergo modus commovendi homines ad poenitentiam ibi prædicitur. Denique in illa nota causali, *translatus est, ut det gentibus* (seu generationibus, ut habent Græca), satis indicatur, ex speciali providentia reservatum esse ad excitandos homines aliquando ad virtutem et poenitentiam. Unde probabile est non sine mysterio positum esse *gentibus*, quia Elias magis ad Judæorum conversionem, Enoch vero ad revocandos lapsos ex gentibus mittetur. Hoc ergo habet hæc assertio satis probabile in Scriptura fundamentum, quod, Patrum auctoritate et conjectura confirmatum, nisi quis velit voluntarie tergiversari, et plus sapere quam oportet, rem satis credibilem et moraliter certam efficit.

¹ Heb. 44.

CAPUT XV.

ANTICHRISTI SEDEM, ET LOCO ET GRADU LONGISSIMIS
SIME A PONTIFICIS SEDE DISTARE.

1. Romam Antichristi sedem esse rex Jacobus suadere conatur. — De tempore adventus Antichristi, et consequenter de testibus ad prædicandum contra ipsum venturis, satis (ut opinor) disputatum est; sequitur dicendum de Antichristi sede, quod est secundum membrum disputationis regis Angliae, seu alter locus, unde ostendere nititur Antichristum jam in sede ac throno suo sedere. Videturque in hunc modum argumentari. Roma futura est sedes Antichristi; ergo magnum signum est eum, qui nunc Romæ sedet, esse Antichristum. Verumtamen nec rex ita expresse colligit, neque illatio ullius momenti esset. Duobus enim modis potest antecedens illius argumentationis intelligi: uno modo, de sede ipsa Romani Pontificis, quatenus est Pontificius thronus, in quo dicatur sessurus Antichristus; alio modo, solum de loco Romanæ urbis, ita ut in illa collocaturus sit Antichristus thronum et regalem curiam imperii sui. Non potest autem antecedens illud in priori sensu intelligi, quia esset inutilis argumentatio, et petitio principii; nam illa est conclusio quam rex suadere conatur, nimirum Antichristum sessurum esse, imo et jam sedere in Pontificia seu Romana sede; si ergo in illo sensu antecedens illud intelligeretur, pro fundamento, et principio argumentationis, probanda conclusio assumeretur, essetque ridicula argumentatio.

2. De Roma ipsa, non de Pontificio throno loquitur. — Oportet ergo ut rex loquatur de loco ipso Romanæ civitatis, et pro fundamento suæ rationis sumat, Antichristum collocaturum sedem imperii sui in illa civitate, ut inde colligat Romanum Pontificem esse Antichristum, quia in eadem civitate sedem pontificatus sui habet. Et sic collectio quidem per se spectata frivola est, quia in eadem civitate possunt varii principes, imperio, moribus, et titulo, ac modo regnandi valde dissimiles, sedes imperii sui, saltem diversis temporibus, collocare. Neque propterea inde inferri potest unum imperium esse aliud. Alias eodem modo inferri posset, Constantiū fuisse Tuream, quia in eadem civitate Constantinopolitana sui imperii sedem collocavit, in qua postea Turca sedet. Imo et inferri

posset Petrum, et successores ejus, etiam ante Bonifacium, fuisse Antichristum, quia sedem suam in eadem Romana civitate haberunt.

3. Etsi Roma Antichristi sedes esset futura, non inde recte inferebatur in sede Petri sessurum. — Quamvis autem haec conditio habendi sedem imperii in eadem civitate non sit satis ad ostendendum esse eumdem qui sedet, neque habere proprie eamdem sedem, id est, eodem regnandi titulo, eademve potestate ac dominatione, nihilominus est conditio necessaria, et ideo rex cum suis Protestantibus maxime conatur ostendere, conditionem hanc figendi sedem Romæ vero Antichristo convenire, ut ex illa adjunctis aliis inferant, eum, qui nunc sedet in illa civitate, esse Antichristum. Cum autem ex hactenus dictis constet, conditiones alias de tempore Antichristi prædictas, in eum, qui nunc sedet, non convenire, et in sequentibus ostendendum sit alias etiam qualitates et proprietates de persona Antichristi revelatas in Pontifice non reperiri, etiam si daremus Romam futuram esse locum sedis Antichristi, nihil referret ad concludendum Antichristum aut venisse, aut esse Pontificem. Nihilominus tamen, quia etiam illud principium, scilicet, Antichristum Romæ sessurum, falsum est, ut evidentius constet quam sit vana fictio et impostura de Antichristiana sede Romæ collocata vel collocanda, expendum in hoc capite regis probationes, ostendemusque assertionem ejus falsam esse, suisque principiis et expositionibus Apocalypsis repugnantem; postea vero de futura sede Antichristi pauca subjiciemus.

4. Probationes regis proponuntur. — Romanam ergo civitatem futuram esse locum sedis Antichristianæ, probat rex primo¹ ex Paulo, 2 ad Thess. 2, dicente de Antichristo: *Ita ut in templo Dei sedeat, ostendens se tanquam sit Deus, id est (ait rex) in sinu atque adeo in penetralibus Ecclesie.* Et addit: *Jam ubi sit Apostolica illa sedes, cuilibet relinquo divinandum, sed et quis in ea sedens pro Deo sese gerat, peccata condonans, fidei articulos definiens, omnium hominum censor et judeex, ipse a nemine judicandus.* In quibus verbis hoc argumentum virtute continetur: Antichristus se debit in Ecclesia, quæ est templum Dei; ergo sedes ejus erit in sinu et penetralibus Ecclesiæ, id est, in præcipuo, et (ut sic dicam) in intimiori loco ejus; ergo erit Romæ; ergo

¹ Præfat., pag. 64.

Apostolica Sedes, quæ ibi est, est sedes Antichristi. Probat virtute hanc ultimam illationem, quoniam qui *illuc sedet*, ostendit se *tanquam sit Deus*. Hactenus rex.

5. Templi nomine an Ecclesiam Paulus intellexerit. — In hoc ergo argumento impensis non hæremus in antecedente prout a nobis propositum est, et virtute continet expositionem, quod Paulus per templum Dei Ecclesiam intellexerit. Nam hic sensus errorem non continet, sed potius probabilis est: Hieronymus enim, epist. 151 ad Algas., q. 11, sensum illum cæteris præfert, illumque sequitur Hugo Eter., lib. de Regres. anim., c. 23, et OEcumen. ibi ita hunc sensum probat, ut alios excludat, dicens: *Non dicit templum, quod erat Hierosolymis, sed Ecclesiam Dei*. Alii vero Graeci interdum insinuant, Paulum non loqui solum de templo Hierosolymitano, sed etiam de Ecclesiis Christi, indicantes prius non excludere. In quam sententiam citatur Chrysostomus, 2 Thessal. 2, dicens: *Jubebit se in templo Dei collocari, non Hierosolymitano solum, sed etiam in ecclesiis*. Ita enim verit Musculus, in Veneta impressione anni 1549; in novis autem editionibus Parisiensibus anni 1581 et 1588, interprete Germano Herveto, non legitur particula *solum*, nec *ecclesiis*, in plurali, sed in singulare, hoc modo: *Jubebit ipsum pro Deo adorare, et sedebit in templo Dei, non quod est Hierosolymis, sed in templo Ecclesie*. Theophylactus autem aliter videtur legisse vel exposuisse Chrysostomum, dicens: *Non in templo specialiter, quod est Hierosolymis, sed in ecclesiis simpliciter, et omni dirino templo*. Apud Theodoreum etiam non invenio exclusivam secundum versionem ejusdem Germani Herveti, in Coloniensi editione anni 1573, sed verba ejus sunt: *Templum Dei appellavit ecclesias, in quibus primam sedem arripiet*. In quibus verbis potius videtur tacite excludere templum Hierosolymitanum, licet absolute dicendo *ecclesias*, omnes includat, et consequenter etiam illas quæ Hierosolymis fuerint.

6. Per templum congregatio fidelium exponi potest. — Secundo *ecclesie*, excludendo templum Hierosolymitanum. — *Tertio, quilibet locus Dei cultui dicatus.* — Quocirca etiam ecclesiam per templum Dei intelligendo, duæ, vel tres sunt illius vocis expositiones. Una, ut per ecclesiam non materialis locus adorationis Dei, sed formalis (ut ita dicam) Ecclesia, id est ipsa congregatio fidelium intelliga-

tur. Et hanc indicat Hieronymus supra, dicens: *Vel in Ecclesia, ut verius arbitramur, sedebit, ostendens se tanquam ipse sit Christus et Filius Dei*. Et idem significat Matth. 24, exponens illud: *In loco Sancto, id est in Ecclesia*. Et certe verba Chrysostomi, quæ retulit juxta Hervetum, ab hoc sensu aliena non sunt. Et eumdem sensum ut probabilem ponit Andr. in Apocal., c. suo 62. Alia expositio est, ut templum Dei sumatur pro materiali loco sacrificii et adorationis, quod *ecclesiam* vocamus. Et hæc expositio potest subdistingui. Unde secunda expositio erit, ut templum Dei generaliter sumatur pro ecclesiis Christi, et specialiter pro illis solis, ita ut templum Hierosolymitanum excludatur: et hanc posuit expresse OEcumen., et ab illa non discrepat Theodoret., licet exclusivam expresse non posuerit. Tertia erit, per templum Dei intelligi omne divinum templum, sive sit in Ecclesia Christi, sive in Synagoga. Et hanc tradit Theophylactus, et sequitur Cajetanus, dicens, *non determinatum templum, sed quolibet Deo dicatum significari*. Ita ut templum Dei positum sit ad excludendum tantum idolorum templa, ut voluit etiam Augustinus, in lib. 20 de Civit., c. 19.

7. D. Augustinus ipsum Antichristum putat dictum Dei templum. — Addit vero ibi Augustinus quartam expositionem magis metaphoricam. Nam per templum Dei intelligit ipsummet Antichristum, et ponderat, Graeca non habere, *ut sedeat in templo Dei*, sed *in templum Dei*, id est, ut se gerat tanquam Dei templum. Quod potest intelligi vel de ipsa persona Antichristi, et sic intelligendum erit, non illo communi modo quo justi dicuntur templum Dei, sed alio singulari modo quo ipse haberi volet ut verus Deus. Sieut dicitur in Christo habitare plenitudo divinitatis corporaliter; et ita humanitas Christi, seu Christus ut homo, potest dici singulari modo templum Dei. Unde cum Paulus ait: *Ita ut in templo Dei sedeat, ostendens se tanquam sit Deus*¹, juxta hanc expositionem, non ponit illa duo tanquam diversa, sed posterior pars est prioris explicatio; exhibebit enim se Antichristus in templum Dei, se ipsum verum Deum prædicando, et ut sic adorandum ostentans. Vel per Antichristum intelligi potest non sola persona Antichristi, sed simul cum corpore mystico ex pravis hominibus, qui illum sequentur, congregato; et sic dicitur

¹ 2 Thes. 2.

Antichristus sedere in templo Dei, quia suam congregationem ostentabit tanquam veram Dei Ecclesiam, in qua ipse sedebit tanquam Deus. Et hunc posteriorem sensum magis sequitur Augustinus.

8. *Optio datur quamlibet ex dictis expositionibus eligendi.* — Si ergo regi Angliae placet, ut templum Dei in illo loco Pauli Ecclesiam significet, non contendimus, eligat autem ipse ex dictis expositionibus quam magis probet; nunc enim nihil nostra refert inter eas dijudicare, sed ad rem solum spectat breviter ostendere, nullam earum Protestantium assertioni, seu vanæ potius cogitationi posse deservire. Nam si Ecclesia, per templum Dei significata, est fidelium congregatio, licet Antichristus in hac Ecclesia sessurus sit, ostendens se tanquam sit Deus, non sequitur in Romana civitate collocaturum sedem suam. Nam fidelium congregatio est per totum orbem diffusa, et de se abstrahit a materiali loco: unde sedere hoc modo in Ecclesia tanquam Deum, nihil aliud est quam in ipsa Christi Ecclesia, et ab his qui fuerint membra ejus, pro Deo haberí ac reputari. Quod verum esse poterit, sive Romæ, sive Constantinopoli, sive Hierosolymis contingat; imo sive in Europa, sive in Asia eveniat. Oportet autem advertere, congregationem illam, in qua Antichristus adorabitur ut Deus, vocari tempulum vel Ecclesiam Dei, quia, antequam per Antichristum perverteretur, erat tempulum et Ecclesia Dei; ipsum autem pro Deo suscipiendo, quoad eam partem facta erit Synagoga Satanæ, seu Antichristiana. Juxta hunc ergo sensum nihil colligitur de Romana civitate, quod sit futura sedes Antichristi. Imo aliunde evertitur blasphemia dicentium, Pontificem ibi sedentem esse Antichristum; nam (ut ait Hieronymus) *Antichristus sedebit in Ecclesia, ostendens se esse Christum et Filium Dei;* Pontifex autem non ita sedet, sed ut minister Dei, et Christi Vicarius, et servus servorum Dei. Et hæc ratio fere eodem modo de quarta expositione procedit, ut facile considerantipatebit, nam expositi Augustini ad hoc etiam revolvitur, ut per Ecclesiam hominum congregatio, non materialis locus designetur, eademque nomine *templi Dei* significetur.

9. *Ex regis conjecturis non magis sequitur Antichristum in Romano quam in aliis templis sessurum.* — *Instantia.* — *Responsio.* — Si vero placeat per Ecclesiam intelligere solas Christianorum ecclesias, cum Paulus indefinite de templo seu Ecclesia Dei loquatur,

non magis potest inferri sessurum Antichristum in aliquo templo Romano, quam in Constantinopolitano, vel Hierosolymitano, aut alio simili. Nec refert quod rex addit, sessurum Antichristum *in sinu et penetralibus Ecclesiæ*, tum quia haec verba non sunt Pauli, sed ipse illa adjunxit de suo capite, ideoque pari facilitate contemnuntur. Tum etiam quia satis erat Anglia in sinu et penetralibus Ecclesiæ, et tamen Deo permittente facta est sedes Antichristi; et Lutherus, ac Calvinus in medio quidem Ecclesiæ, ac subinde in sinu et penetralibus ejus, virus suum effuderunt, licet Romanum evertere non potuerint. Dicit forte rex, licet tempulum Dei indefinite positum fuerit, per antonomasiam sumptum esse pro Roma, vel Romano templo, tanquam omnium præcipuo. Possetque juvari verbis Theodoreti, 2 Thessalonice, 2, dicentis: *Tempulum Dei appellavit ecclesias, in quibus primam sedem arripiēt;* nos enim dicimus primam sedem esse Romanam; illam ergo arripiēt Antichristus. Sed illud etiam voluntarie dicitur, et sine probatione. Et præterea facile respondebimus sessurum Antichristum non in templo, quod revera præcipuum est, sed quod ipse volet, et prædicabit esse præcipuum; credibilius autem est illud esse futurum in Iudea potius quam in Italia. Nam cum Antichristus se pro vero Christo et Messia venditatus sit, caput Ecclesiæ suæ dicet esse Jerusalem, non Romanum, ut mox videbimus. Theodoreus autem per *primam sedem* revera non intellexit Romanam, neque aliquam ex primariis Ecclesiis, sed in unaquaque Ecclesia vel templo primarium locum, ac sedem soli Deo debitam; vel locutus est de prima sede, non quæ nunc sit, vel suo tempore erat, sed quam ipse Antichristus eriget. Atque hic discursus æque procedit juxta tertiam expositionem, quæ sub nomine templi tam Judaicum tempulum, quam ecclesias Christianorum complectitur; nam sic magis ampla est, et indefinita Paulina propositio, ideoque minus potest ex ea inferri determinatus locus Romanæ civitatis.

10. *Sinus Ecclesiæ amplissimus est, nec solum Romam includit.* — *Pontifex non se Deum venditat, sed Christi Vicarium exhibit.* — Ex quibus etiam concluditur, frustra regem divinandum proponere ubi sit Apostolica Sedes; nam, licet omnibus pateat illam esse Romæ, non sequitur Antichristum ibidem collocatum sedem suam, etiam si sessurus sit in sinu Ecclesiæ. Quia sinus Ecclesiæ amplissimus est,

et boni ac mali in illo existunt, et unus quidem legitime sedet, alias per ambitionem et tyrannidem caput Ecclesiae fingitur. Præterquam quod (ut supra dicere cœperam) licet Antichristus Roma expelleret Pontificem, et suam ipse sedem ibi collocaret, non sederet in eadem sede, neque inde posset concludi, eum, qui nunc legitime sedet, ita sedere, sicut Antichristus sedebit. Nam qui nunc sedet, non se Christum aut Messiam esse prædicat, sicut prædicabit Antichristus. Quapropter vanum est quod rex subjungit, Pontificem pro Deo se gerere, *peccata condonando*, etc. Nam aliud est vicem Dei gerere, et ut ministrum ejus, modoque ab ipso instituto supernaturales effectus operari, et divinam jurisdictionem exercere; aliud vero est, se pro Deo gerere, se ipsum tanquam Deum credendum adorandumque proponere. Illud enim legitime facit Pontifex, hoc autem posterius erit proprium Antichristi, ut Scripturæ docent, et Patres interpretantur, et in capitibus sequentibus fusius declarabimus.

41. *Altera regis probatio ex Apocalypsi.* — Alteram probationem, quod Roma futura sit sedes Antichristi, rex assumit ex Apocalypsi, supponitque ex cap. 13, bestiam, quam Joannes vidi ascendente, habentemque capita septem et cornua decem, esse Antichristum. Deinde vero argumentum sumit ex cap. 17, ubi Joannes narrat se vidisse mulierem metrictem sedentem super eamdem bestiam (ut rex interpretatur), de qua muliere sic Joannes in fine capitinis concludit: *Et mulier, quam vidisti, est civitas magna, quæ habet regnum super reges terræ.* Et de eadem prius dixerat, *ejus nomen esse Babylon magna*, et eodem modo illam appellat c. 18; ergo locus *hic* (ait rex) *perspicue et sine ulla contradictione declarat, Romam esse aut fore sedem Antichristi.* Probat illationem: *Primum, quia nullus jam Papista inficiatur, Babylonis nomine ibi planissime Romanum intelligi.* Deinde hanc mulierem (ait) esse illum Antichristum, liquet ex tempore, quo vim suam et operationem exercet, quod erit quadraginta duorum mensium, prout 13 cap. habetur.

42. *Mulier cum bestia confundi non debet.* — Prius vero quam huic arguento respondeam, in his et aliis regis verbis adverto, illum confundere mulierem cum bestia, et e converso; nam mulierem dicit esse Romanum et Babylonem, eamdemque rursus dicit esse Antichristum, et paulo inferius constare dicit, bestiam septem capitum esse Antichris-

tum. Et tamen pag. 108 dicit bestiam illam esse civitatem regiam. Et similiter pag. 99 mulierem cum bestia confundit, et nunc civitatem, nunc imperium ejus, nunc Antichristum significare dicit. Quæ confusio et communis expositioni repugnat, et intelligentiae lumen obfuscatur, nam si mulier est Babylon et Roma, quomodo est Antichristus? aut quomodo insidet bestiæ quæ dicitur esse Antichristus? Deinde in c. 43 non dicitur potestas data mulieri per menses quadraginta duos, sed bestiæ; ergo inde non probatur mulierem esse Antichristum, sed bestiam. Non debent ergo confundi: aliud enim mulier, aliud bestia repræsentat, neque potest bestia se ipsam portare. Neque vero hoc dicimus ut objectionem vitemus, sed ut verum sensum declareremus, viamque paremus ad cavendas calumnias, quæ in illa confusione et æquivocatione delitescunt, ut infra cap. 20 videbimus. Objectio autem in hunc modum formari potest. Mulier fornicaria, quæ magna Babylonie nuncupatur, est Roma, et illa dicitur insidere bestiæ, id est, Antichristo, tanquam principi et fundamento suo; ergo Roma futura est Antichristi sedes. Probatur consequentia, quia licet potius princeps videatur sedere in civitate, ubi habet solium, quam civitas in ipso, tamen etiam civitas ipsa dicitur sedere super principis humeros, quatenus ejus potentia et virtute regitur et conservatur. Sic ergo Roma visa est sedere super bestiam Antichristum; erit ergo sedes ejus.

43. *Si mulier illa Roma est, ethnica, non Christiana est.* — Bestia, cui inequitat, non significat Antichristum, sed seriem tyrannorum gentilium. — De hac objectione multa dici possent, nisi essent in superioribus dicta. Possemus ergo facile objectionem vitare, dicendo fornicariam illam in cap. 17 Apocalypsis a Joanne visam, non Romanam, sed mundum significare, et bestiam, cui insidere visa est, non Antichristum, sed diabolum esse. Verum tamen ad respondendum regi, necessarium non est probabiles, nedum magis receptas interpretationes negare. Concedimus ergo mulierem illam Romanam significare, non tamen christianam, sed ethnica ut c. 6, declaravi. Cum vero subsumitur, bestiam, cui mulier insidebat, esse Antichristum, respondemus vel negandum id esse, vel certe distinguendum et sano modo intelligendum. Nam illa bestia dicitur habere septem capita, quæ ibi exponuntur esse septem reges, quorum nullus est Antichristus, sed alius, qui octavus

esse dicitur, licet de septem sit, et vocatur specialiter, *bestia quæ erat, et non est*, ut supra tractatum est. Igitur bestia habens septem capita, et cornua decem, non est adæquate (ut sic dicam) Antichristus, sed est successio tyrannorum persequentium Christianos in Romano imperio, post quos ortus est Antichristus tanquam *cornu parvum de medio eorum*, ut dicitur Dan. 7. Hinc ergo non recte infertur, Romam aliquando insidere super illum Antichristum verum, et proprium, sed super imperatores Romanos ethnicos, Ecclesiæ persecutores, et Antichristos typice, et per figuram seu participationem. Horum ergo imperatorum seu Antichristorum fuit quidem Roma sedes, quando tenebat imperium super omnes reges terræ, et erat ebria de sanguine Martyrum, id est, quando erat Roma ethnica, non christiana.

44. *Confirmatur expendendo verba Apocalypsis.* — Unde si attente consideretur c. 17 Apocalypsis, nunquam in illo significatur, mulierem illam fornicariam visam esse sedentem super illam bestiam, quatenus proprium Antichristum, sed solum quatenus tyrannos præcursores ejus, et Romanos imperatores ethnicos repræsentabat. Et ideo fortasse quando Joannes dicit vidisse mulierem sedentem super bestiam, solum addit, *Habentem capita septem et cornua decem*, quia Antichristus nec est unum ex illis septem capitibus, nec de decem cornibus. Nam ipse Joannes postquam dixerat, de septem regibus quinque præcessisse, et unum esse, et alterum nondum venisse, sed fuisse venturum, et brevi tempore duraturum, subjungit: *Et bestia quæ erat, et non est, et ipsa octava est, et de septem est, et in interitum vadit.* Et postea declarat, *decem cornua esse decem reges, qui potestatem accipient post bestiam, cui suam virtutem et potestatem dabunt.* Deinceps vero de his subjungit, quod odient fornicariam, et desolatam facient illam et nudam, et carnes ejus manducabunt, et igne concremabunt, utique in hoc bestiæ servientes, cum qua *habent unum consilium, cuique suam virtutem tradent*, ut prius dixerat.

45. *Ex eo loco colligi non potest Antichristum sedem Romæ fixurum; magis colligitur Romam ab Antichristo evertendam.* — Unde ulterius colligo, tantum abesse ut dicat Joannes, fornicariam sedisse super illam bestiam, quatenus verum et proprium Antichristum adumbrabat, ut potius significet, per ipsum vel per reges ministros ejus esse destruen-

dam. Ergo ex illa visione non solum non liquet, nec colligi potest, Antichristum fixurum sui imperii sedem Romæ, sed potius contrarium non obscure probatur, cum per ipsum Antichristum destruenda sit. Quod in cap. 18 multum confirmatur, maxime contra regem Angliæ, qui verba illius capititis: *Cecidit, cecidit Babylon illa magna*¹, de Romana civitate intelligit, et ita ex illius sententia ibi describitur desolatio et abolitio perpetua Romanæ urbis, unde necessaria fere consecutione infertur, illam Ronæ destructionem per Antichristum et reges illi subjectos faciendam esse. Primo ex verbis antecedentis capititis, quæ proxime retulimus. Secundo ex sequenti c. 19, quia illud excidium Babylonæ, quod c. 18 describitur, non est totius orbis consummatio et combustio, sed cujusdam particularis civitatis, juxta illam interpretationem; erit ergo ante mundi finem. Et tamen ex cap. 19 colligitur, illud Babylonicum excidium prope finem mundi esse futurum, nam statim post illud ostenditur Christus descendens super equum album, et cum gladio ex utraque parte acuto procedente ex ore ejus, cœlestibus exercitibus comitantibus, ad perdendam bestiam cum regibus et exercitibus suis, qui occisi sunt in gladio *sedentis super equum*; ergo illam Babyloniam destructionem per Antichristum et exercitum ejus futuram esse satis consequenter intelligitur. Ergo inde evidenter concluditur non esse futuram Romam sedem Antichristi.

46. *Dilemmate idem probatur. — Alia pars dilemmatis.* — Tertio idem ita concluditur, nam si Roma est illo modo in fine mundi destruenda, vel id fieri per Antichristum, vel per alium; si per Antichristum, certe sedes ejus non erit, quia hæc duo inter se repugnant. Neque fingi potest quod prius in illa fixurus sit sedem, si postea illam sit destructurus, tum quia neque hoc habet fundamentum neque verisimilitudinem; tum quia monarchia Antichristi non tanto tempore durabit, ut ad illam vicissitudinem rerum possit sufficere; tum præterea quia (ut ex c. 17 colligitur) ex odio fornicariæ destruet illam per se, vel per reges amicos suos; ergo a principio gerent hostile bellum contra illam; ergo cogitari non potest quod prius sit Roma futura sedes Antichristi, et postea per illum destruenda. Neque etiam dici potest destruenda per alium, postquam Antichristus in illa sedem suam

¹ Apoc. 18.

fixerit, tum quia repugnat cum verbis citatis ex c. 17, ubi dicitur destruenda per reges amicos bestiae, id est, Antichristi, et executorum consiliorum ejus. Tum etiam quia ex aliis locis Apocalypses, et ex Daniele et Paulo constat, Antichristum a nullo puro homine esse superandum, sed ab ipso Christo esse interficiendum; ergo si Antichristus semel sedem suam Romæ collocaret, non esset Roma ab ullo hoste Antichristi destruenda, neque ab ipso Christo ante generalem mundi conflagrationem, quia Christus, cum venerit ad Antichristum interficiendum, nullam destruet civitatem, neque hoc de illo legitur, sed solum quod Antichristum et pseudoprophetam ejus vivos in infernum mittet, et ceteros illorum socios in gladio suo occidet, Apocalyps. decimo septimo.

17. Conclusio.—Assertio ergo, quod Roma futura sit Antichristi sedes, et a rege non probatur, et dictis ac expositionibus ejus contraria est, et plane falsa. Denique est optima conjectura, quia Antichristus destructurus est Romanum imperium, et magno odio illud prosecuturus, ut etiam ex 17 Apocalypsi colligitur, et ex 2 Thess. 2, et ex omnibus Partibus; ergo non est verisimile, collocaturum esse Romæ sedem suam, quia etiam Romanum nomen cum imperio suo cupiet extingui.

CAPUT XVI.

UBI FUTURA SIT ANTICHRISTI SEDES.

1. Certius est Antichristi sedem non futuram Romæ, quam ubi futura sit. — Longe quidem certius est Röمام non esse futuram sedem Antichristi, quam sit certum quis locus vel civitas futura sit, in qua thronum suum sit collocaturus. Neque id mirum esse debet, quia in omnibus rebus obscuris, quae a cognitione humana longe distant, facilius quid non sit quam quid sit agnoscerit. At nobis etiam non est tam necessarium cognoscere ubi sit Antichristus sessurus, quam scire non esse Romæ imperaturum, quia hoc posterius ad hæreticos confundendos multum conduceit; illud vero prius, licet sit ignotum vel incertum, non multum refert. Nihilominus tamen ut ex hac affirmatione negationem demonstratam in sup. cap., in hoc ampliori auctoritate confirmemus, quid in hoc puncto verisimilius videatur, paucis proponeamus.

2. Regiam Antichristi Jerosolymis futuram communis opinio est. — Catholici ergo Doctores verisimillimum censem Jerusalem futuram esse regalem sedem Antichristi, templumque Hierosolymitanum utcumque per Antichristum instauratum futurum esse quasi fundamentum et caput falsæ religionis, quam Antichristus in mundum inducere conabitur. Quæ opinio sine ulla dubitatione ex antiqua traditione descendit. Nam Irenæus, lib. 5, c. 25, aperte dicit, Antichristum regnaturum in Jerusalem. Lactantius, lib. 7, c. 15 et 17, dicit regnaturum esse in Oriente, in eaque Asiae parte quæ Syria vocatur, id est, in Iudea. Hypol., in orat. de Consum. mundi, dicit Jerosolymis sessurum. Idem Augustinus, vel potius Rabanus, tract. de Antichr.; Gregor. Turon., lib. 1 Histor. Francor., in princip.: *Antichristus (ait) primum circumcisionem inducat, se asserens Christum, deinde in templo Hierosolymitano statuam suam collocabit, etc.* Idem Cyrill., catech. 15; Damasc., lib. 4, c. 27; Sever. Sulpit., dialog. 2, de S. Martin., et omnes exponentes Scripturas statim tractandas. Tantus autem Patrum consensus non potuit certe in sola humana suspicione aut opinione fundari, cum sit de re futura contingente, et ex divina providentia, ac permissione maxime pendente; ergo credendum est manasse ex communi intelligentia Scripturarum; sunt enim in Scriptura multa testimonia, quæ hoc significant; tamen quia prophetica, et obscura sunt, ex traditione aliqua verum illorum sensum Patres collegisse videntur.

3. D. Pauli testimonium maxime faret. — *Probabilius est D. Paulum loqui de templo Hierosolymitano quam de Ecclesia.* — Duo autem videntur esse præcipua testimonia, quibus hæc veritas confirmatur, quæ nunc expendemus, et obiter alia testimonia et rationes, seu congruentias attingemus. Primum testimonium est illud Pauli, quo Rex utebatur: *Ita ut in templo Dei sedeat*¹. Nam Paulum ibi loqui de templo Hierosolymitano longe verisimilius est. Primum enim ita exponunt frequentius antiqui Patres, Irenæus, lib. 5, cap. 25: *Transferet (inquit) regnum suum in Jerusalem, et in templo Dei sedebit, seducens eos qui adorabunt eum, quasi ipse sit Christus.* Et c. 30: *Sedebit (ait) in templo Jerosolymis.* Idem Hypolit., in orat. de Consumm. mundi.; Ephrem, orat. de Antichrist., p. 3: *Honora-*

¹ 2 Thess. 2.

bit (inquit) *Judeos supra modum, et Judeorum populi ipsum maxime honore afficiunt. Unde et ipse tanquam eos honore præferens, designabit ipsis omnibus locum suum ac templum, suamque illud instaurandi providentiam.* Idem Cyriillus Hierosolymitanus, catech. 15; Damasc., l. 4, c. 27, exponens Paulum, ait: *Porro Dei templum non nostrum intelligit, sed Judaicum, non enim nobis, sed Judæis veniet.* Ita etiam interpretantur locum Pauli Sedulius, Haymo, D. Thomas, et alii communiter. Et potest ita suaderi. Nam verisimilius est loqui Paulum de templo materiali, quod est locus adorations et sacrificii, quam de templo metaphorico Ecclesiae, vel animi humani, tum quia illa significatio vocis *templi* est magis propria, magisque usitata, faciliusque poterat a fidelibus intelligi, quos tuuc Paulus instruere volebat; tum etiam quia sine dubio alludit ad verba Christi Matt. 24: *Cum rideritis abominationem stantem in loco sancto.* Ubi non est dubium quin Christus de materiali templo loquatur. Tunc autem quando Paulus scribebat, solum templum Hierosolymitanum *templum Dei* quasi per antonomasiam a fidelibus vocabatur, quia tunc vel nondum incooperant christiana templa, vel non hac voce appellabantur, ut ex antiquis Patribus constat. Neque in alia significatione invenitur in Scriptura, et præsertim in novo Testamento vox illa *templi Dei* in proprietate sua, et prout locum sacrificii significat; ergo verisimilius est in eadem significatione Paulum illa voce usum fuisse.

4. *Præcedens expositio ex Matth. confirmatur.* — Confirmatur hoc testimonium ex alio Matth. 24, ubi Christus ait: *Cum rideritis abominationem desolationis stantem in loco sancto;* ibi enim per locum sanctum templum Hierosolymitanum intellexisse testes sunt omnes, qui de statua seu imagine Cæsaris locum interpretantur, ut Chrys., Hom. 76; Theophyl. ibi. Item Hilar., can. 25 in Matt., dicens: *De Antichristi temporibus hec locutus est.* Et infra: *Atque a Judæis susceptus in loco sanctificationis insistet, ut ubi Sanctorum precibus Deus invocabatur, illic ab infidelibus receptus Dei honore venerabilis sit.* Ambros. etiam, lib. 10 in c. 21 Lucae, de templo interiori Judæorum exponit. Et eundem sensum indicavit ibi Hieronymus, cum dixit verba Christi posse intelligi, aut simpliciter de Antichristo, aut de imagine Cæsaris, quam in templo posuit Pilatus, aut de statua Adriani, quæ in Sancto sanctorum loco posita fuit; intellexit ergo Hieronymus illum locum Sanctum esse tem-

plum et Sancta sanctorum, et tamen ibidem ait, de eodem loco Paulum loqui, 2 Thessal. 2. Utrumque autem optime confirmatur ex loco Daniel. 9: *Et erit in templo abominationis desolationis;* quidquid enim ibi per abominationem desolationis significetur, dubitari non potest quin templum Hierosolymitanum Daniel intellexerit; nullum enim aliud templum Dei veri tunc erat, nec de alio est sermo in Testamento veteri. At Christus Dominus locum Danielis allegat; ergo idem templum per locum sanctum intellexit: Paulus autem ad utrumque alludit; ergo de eodem templo loquitur, de quo Daniel, ut recte notavit Origen., lib. 6 contra Celsum, circa medium.

5. *Aliud testimonium ex Apocalypsi nostram sententiam corroborat.* — *Enoch et Elias Hierosolymis occidendi sunt.* — Secundum principale testimonium est Apocalyp. 11, ubi dicitur, testes, prædicaturos contra Antichristum, interficiendos esse *in civitate magna, ubi Dominus eorum crucifixus est,* id est Jerosolymis; interficiuntur autem ab Antichristo, ut ibidem dicitur, et ibidem Antichristus ipse interficiendus est; ergo longe verisimilius est ibi præcipue regnaturum esse Antichristum. Sic Andr., in illum locum, suo cap. 30: *In hac namque civitate (ait) ad imitationem Davidis regni sedem (ut probabile fit) constituet.* Idem cap. 62, cum majori dubitatione. Clarius Aret., cap. 30: *Corpora (inquit) illorum insepulta projiciet in plateis Jerusalem, in ea enim regnabit tanquam rex Judeorum, quos seducet.* Et eodem modo locum illum de civitate Jerusalem intellexerunt reliqui expositores antiqui et moderni in illum locum, multique alii Patres docuerunt, Eliam et Enoch in Jerusalem esse ab Antichristo occidendos, quod non nisi ex hoc loco sumpserunt. Unde satis probabiliter colligitur, civitatem illam futuram esse regiam Antichristi; ideo enim in illa potius quam in aliis testes Christi constanter prædicabunt, quia caput superstitionis erit, sicut olim Petrus et Paulus in Romana urbe, quæ caput erat ethnici imperii, præcipue docere studuerunt: unde sicut ipsi martyrio ibi coronati sunt, ita etiam Enoch et Elias interficiuntur ab Antichristo in civitate sua regia Jerusalem. Cum enim Judeus futurus sit, et pro Messia a Judæis suscipiens et adorandus, ut paulo post dicemus, per se verisimile est, postquam in Oriente monarchiam usurpaverit, in civitate regia Judæorum, quam ipse instaurabit, solium suum collocaturum. Illa ergo civitas, ab Antichristo

instaurata et aucta, ibi a Joanne *civitas magna* vocatur; vel certe *magna*, quia in ea magna et mirabilia contigerunt; quia vero fide et moribus corruptissima erit illo tempore, ideo *spiritualiter Sodoma et Ægyptus* in eodem loco a Joanne appellatur.

6. *Rex Jacobus ciritatis magnæ nomine Romanam significatam certat. — Prima ejus confirmatio. — Secunda. — Tertia.* — At vero Rex Angliæ, non obstante dictorum verborum evidenter, Romam a Joanne illis verbis significatam esse contendit. Et primo advertit, cum Joannes dixit: *Corpora eorum jacebunt in plateis civitatis magnæ, quæ vocatur spiritualiter Sodoma et Ægyptus*¹, illud verbum *spiritualiter*, tam Jerosolymis quam Sodomæ, et Ægypto tribui, ut credatur non esse sermonem de Jerusalem materiali, sed mystica, per quam Romam intelligit. Deinde expendit, post prædicta verba Joannem non addidisse simpliciter, *ubi Dominus eorum crucifixus est*, sed, interposita particula *et*, *ubi et Dominus eorum*, etc., et ita exponit: *Sedes Antichristi tam plena futura est spiritualibus fornicationibus et idololatriis, atque olim fuerunt Sodoma et Ægyptus, imo persecutione Sanctorum tam cruenta, ut in ea iterum Christus sit crucifigendus in membris suis*, juxta regulam vulgarem, ut quæ in corpore et membris fiunt, capiti tribuantur. Tertio, expositionem hanc confirmat ex verbis Joannis, c. 18, in fine, ubi de mystica Babylone dicit: *Et in ea sanguis Prophetarum et Sanctorum inventus est, et omnium qui imperfecti sunt in terra*². Nam sub illa distributione omnium, Christum etiam comprehendit vult, quia ille imperfectus est in terra. Unde videtur colligere etiam Christum dici Romæ imperfectum.

7. *Contendit etiam dici posse Christum Romæ occisum.* — Tandemque addit posse dici Romæ occisum Christum, quia auctoritate Romani imperii occisus fuit, et tanquam reus in imperatorem Romanum, *ita ut qui illum excusare niteretur, Cæsar's amicus non habere*³. Potestque hæc interpretatio juvari, quia nonnulli Catholici non intelligunt in proprio sensu verba illa. Nam Hieronymus, epist. 7, multis argumentis persuadere conatur, ibi non esse sermonem de civitate propria Jerusalem. Primum, quia in initio ejusdem capituli undecimi vocat Joannes, Jeru-

salem *civitatem sanctam*, dicens: *Et civitatem sanctam conculcabunt mensibus* 42. Deinde quia in Scriptura sacra non civitas specialis, sed mundus solet spiritualiter Sodoma et Ægyptus appellari, et ita concludit civitatem illam esse mundum. Lyranus vero in illum locum per civitatem illam magnam, congregationem infidelium intelligit; ergo si licet a proprio verborum sensu recedere, non erit cur interpretatio regis probabilis non videatur.

8. *Primæ regis probationi occurritur.* — Respondemus imprimis, ea, quæ rex advertit, levia esse, vel ad suam expositionem suadendum, vel ad veritatem evertendam. Nam quod primo notat, adverbium illud *spiritualiter*, non solum Sodomæ et Ægypto, sed etiam Jerosolymis tribui, manifeste falsum est, et contra litteram. Quia imprimis non ponitur ibi nomen Jerusalem, ut spiritualiter accipi notetur, sed per periphrasim describitur, per alia nomina metaphorica, quibus ejus viles et foedæ proprietates notantur, et per mortem Domini, quæ in ea contigit, et ita non apparet quomodo illud adverbium *spiritualiter* ibi potuerit Jerusalem tribui. Deinde id fit manifestius, ordinem verborum notando, que sic habent: *Corpora eorum jacebunt in plateis civitatis magnæ, quæ vocatur spiritualiter Sodoma et Ægyptus, ubi et Dominus eorum crucifixus est.* Ubi clare constat vocem *spiritualiter* non conjungi cum *civitate magna*, nec poni ad indicandum, non proprie, sed metaphorice vocari civitatem, aut magnam, sed conjungi cum verbo *vocatur*, et poni ad explicandum quomodo illa civitas vocetur *Sodoma et Ægyptus*, utique mystice, et non proprie; extrahit ergo a propria significatione voces (ut sic dicam) in prædicato propositio- nis positas, non subjectum ipsum, cui illa metaphorica prædicata tribuuntur. Neque etiam potest conjungi vox illa, *spiritualiter*, cum posterioribus verbis: *Ubi et Dominus eorum crucifixus est*, quia illa jam est quasi nova propositio, indicans illam civitatem magna per aliam conditionem seu proprietatem ejus valde diversam, cui verbum *spiritualiter* ibi non tribuitur, nisi quis velit ad suum arbitrium verba pervertere. Ergo verbum *spiritualiter* nullo modo tribuitur Jerosolymis, quia neque sub hac ipsa voce, neque sub periphrasi seu descriptione de illa dicitur. Atque ita concluditur, ex vi illius contextus, propter vocem illam *spiritualiter*, non posse ibi metaphorice intelligi nisi no-

¹ Apoc. 11.

² Apoc. 18.

³ Joan. 19.

mina Sodomæ et Ægypti, et in hoc conueniunt Hieronymus et Lyran. supra allegati, cum expositoribus omnibus.

9. *Secundæ regis confirmationi satisfit.* — In his autem quæ secundo loco rex notat, particula *Et*, quam rex ponderat, nihil veritati obstat; sensus enim litteralis et clarus est civitatem illam non solum esse spiritualiter Sodomam, et Ægyptum, sed etiam in illa commissum esse illud horrendum facinus occidendi Christum. Unde libenter accipimus quod rex ibi fatetur, sermonem ibi esse de civitate illa, in qua erit sedes regia Antichristi. Item admittimus quod addit, futuram esse plenam tenebris, et fornicationibus, vel spiritualibus, vel carnalibus, ob quas Sodoma et Ægyptus appellatur. Quam vero subjungit interpretationem, ut Christus non in se, sed in suis membris crucifixus ibi dicatur, omnino rejicimus et improbamus. Nam, licet illa regula interpretandi Scripturas de Domino et ejus corpore trita sit, tamen, ut ait Augustinus, 3 de Doctr. Christian., c. 31, illam explicans, *quid corpori, quid capiti conveniat, utique intelligendum est.* Quia, licet regula, in se ac generatim sumpta, vera sit, in mala ejus applicatione, sine delectu et intellectu facta, gravissime errari potest. Quod sine dubio regi non solum in hoc punto, sed etiam in toto hoc discursu de Antichristo, imo etiam in aliis fidei dogmatibus, et in abusu aliarum regulorum interpretandi Scripturas sæpe contingit, ut aliquoties jam in superioribus notavimus. Et in præsenti est manifestum, primo, quia ibi nulla est necessitas talis regulæ, vel metaphoræ, et illa non est applicanda neque affingenda sine fundamento. Secundo, quia verba non juvant, sed potius repugnant; cum enim dicitur, *Dominus eorum*, expresse distinguitur caput a membris, et ab illis membris, qui pro ipso interfici fuerunt. Tertio, quia verba illa, *Ubi et Dominus*, ponuntur ad designandam civitatem magnam, de qua erat sermo, et distinguendam illam a cæteris; si autem sit sermo de capite in membris, inutile est signum, quia nec tantum Jerosolymis, nec tantum Romæ, sed per universum mundum, et fere in omnibus urbibus ejus, Christus est in suis membris crucifixus. Denique nullus expositorum ita locum illum intellexit, neque aliquis ex Patribus.

10. *A tertiæ regis confirmationem respondeatur.* — Confirmatione, quam tertio loco rex addidit ex c. 18 Apocalypsis, maxime moti sunt Beda et alii, qui dixerunt Babylonem in

illo capite non civitatem aliquam specialem, sed universum mundum significare, quam expositionem valde probabilem esse supra ostensum est; illa autem posita, cessat objec-tio. Supponendo autem illam Babylonem esse Romam, argumentum regis parvi momenti est: nam si ex illis verbis, *Sanguis omnium*, etc., colligi putat etiam Christum interfectum esse Romæ, et ideo exponit esse occisum in membris suis, ergo Abel et Machabæi martyres, item Stephanus, Andreas, et omnes Apostoli Romæ interficti sunt, nam illi etiam interficti sunt in terra. At non sunt interficti Romæ in propriis personis, nec in membris suis, quia Abel aut alius similis non fuit caput Martyrum, nec in eis locum habet regula de capite et corpore; quomodo ergo omnes illi Romæ interficti sunt? Quod ergo rex de aliis responderit, nos de Christo respondebimus, multoque facilius et probabilius, quia non est necesse illam distributionem intelligere de omnibus Sanctis a principio mundi interfec-tis, sed de illis qui per tyrannos persequentes Christi Ecclesiam interficti sunt, et ita non est necesse sub illis comprehendere Chris-tum.

11. *Romæ dicitur inveniri sanguis eorum Martyrum, qui ejus auctoritate vel approbatione occisi sunt.* — Dices saltem necessarium videri omnes Martyres novi Testamenti comprehendi. Propter hoc respondent docti expositores moderni, sensum non esse, omnes Sanctos interfictos esse Romæ, sed dici in ea inveniri sanguinem omnium Martyrum, quia Romana potentia et auctoritate interficti sunt, quotquot ubique pro Christo interficti fuerunt, maxime usque ad tempora Joannis. Potestque expositio hæc satis in littera fundari, sic enim habet: *In ea sanguis Prophetarum et Sanctorum inventus est, et omnium, qui interficti sunt in terra.* Ubi pondero particulam illam *in terra*; in hoc enim posteriori loco non dixit *in ea*, id est, in Babylone, sed *in terra*, id est, ubique in mundo; ergo non dicit omnes esse Romæ interfictos, sed omnium ubique interfectorum sanguinem Romæ attribui. Sed instabit aliquis, quia etiam hoc modo non omnes Martyres Romanorum imperatorum aut magistratum ipsorum opera interfici sunt. Nam Stephanus interfectus est a Judæis populari impetu, aut propria auctoritate; multi etiam in Perside, et aliis locis extra Romanum imperium interfici sunt. Respondeatur imprimis hos paucos esse, eorumque non haberri rationem, neque

esse necessarium ut universales sermones Scripturæ sine ulla exceptione semper intelliguntur. Vel dici etiam potest, omnium pro Christo interfectorum sanguinem Romæ inveniri, quia omnium martyria Roma suo exemplo approbavit, et omnibus tyrannis exemplum et animos præbuit ad persequendum Christianos, ac denique quia vel omnium mortibus cooperata est, vel affectu suo consensit, et ita particeps facta est interfectionis omnium.

42. *Etsi Christus Romana auctoritate sit occisus, violenter ex Joannis verbis dicitur Romæ occisus. — Romæ est sanguis martyrum, qui Romæ occisi non sunt.* — Atque hæc omnia optime in Christi mortem convenient, sicque melius accommodantur quæ rex ultimo loco in sua interpretatione dicit, Christum dici interfectum Romæ, quia Romani imperatoris auctoritate interfectus est. Hoc enim violentissime accommodatur ad verba Joannis, cap. 11. Nam ibi non agit de auctoritate, sed de loco, *ubi Dominus eorum crucifixus est*, ut verba ipsa ostendunt, et occasio propter quam adjuncta fuere, utique ad signum exhibendum quo intelligeretur de qua civitate sermo esset, ad quem finem parum deservit, aut auctoritatem, aut potentiam qua Christus occisus est, nosse; potuit enim in toto orbe Romano, et in quacumque ejus civitate interfici, etiam si auctoritate imperatoris necaretur. At vero in cap. 18, omnes interfecti, sub quibus rex vult Christum comprehendi, non dicuntur interfecti Babylone, sed *in terra*; sanguis autem omnium dicitur esse Babylonie, seu Romæ, utique per participationem, auctoritatem, cooperationem seu consensum, ut dictum est. Hoc autem modo etiam sanguis Christi non in membris tantum, sed etiam in sua persona Romæ inventus est, vel propter rationem regis, quia per Romanos milites et magistratum, et quasi in defensionem auctoritatis Cæsaris interfectus est, vel certe quia Romani imperatores, persequendo et occidendo Christianos, maximum in Christum odium profitebantur, et ita interfectionis ejus participes fiebant. Rex ergo sua illa interpretatione solvit quidem propriam objectionem, quam in præcedenti confirmatione posuerat; non vero exponit, sed corrumpt verba cap. 11, quæ tractamus.

43. D. *Hieronymus explicatur.* — *Alibi Hieronymus suam mentem clarius expressit.* — Ad Hieronymum respondens imprimis non favere regi, quia non de Roma, sed de

toto mundo locum interpretatur. Et nihilominus dicimus, etiam illam interpretationem non probari a nobis, quia est a verbis et a mente scribentis aliena, ut explicatum est, censemque viri docti, Hieronymum ibi non tam in propria persona, quam nomine Paulæ et Eustochii loqui, eaque proponere, quæ ad Jerusalem commendandam et ab ignominia vindicandam illæ conferre putabant, non expendendo nec examinando rigorose veritatem eorum, quæ dicebantur. Nec rationes Hieronymi cogunt, tum quia eadem civitas diversis respectibus vel temporibus sancta et iniqua nuncupatur, ut est frequens in Scriptura; tum etiam quia probabile est, *civitatem sanctam*, de qua Joannes loquitur in initio illius capituli, non esse eamdem cum *civitate magna*, de qua in fine loquitur, nam prior est Ecclesia Christi, posterior vero est Jerusalem. Nec est inusitatum in Scriptura Jerusalem comparari Sodomæ, ut ibi late expositi ostendunt, et licet alibi factum non esset, hoc non obstaret quominus Joannes, prævidens futurum Hierosolymitanum statum sub tempore Antichristi, eam comparationem faceret, illaque metaphora uteretur. Nam etiam Roma in antiqua Scriptura non inventur Babylon appellata, et tamen Petrus et Joannes nomen illud per metaphoram impo-suerunt. Denique idem Hieronymus, Daniel. 11, in fine, ex professo docet, Antichristum Jerosolymis collocaturum esse solium regni sui, et ibi in monte Sion esse a Christo interficiendum. Et in hunc sensum exponit late locum Danielis, quem sensum, ut ipse ait, *prolixe prosecutus est, ut ostenderet Porphyrii calumniam, et Scripturae difficultatem, cuius intelligentia absque Dei gratia, et doctrina majorum sibi imperitissimi vel maxime rendi-cant.* Quæ verba ideo refero, ut meam etiam in hoc libro prolixitatem eisdem excusem.

CAPUT XVII.

EX DESCRIPTIONE PERSONÆ ANTICHRISTI, QUAM PAULUS TRADIT, 2 AD THESSAL. 2, ILLUM PONTIFICIS ADVERSARIUM MAXIMUM POTIUS QUAM PAPAM ESSE FUTURUM, EVIDENTER OSTENDITUR.

1. *Summum Pontificem Antichristum esse rex Jacobus colligit.* — Hoc est tertium caput disputationis quam rex de Antichristo proposuit. Qui statim in ejusdem disputationis initio inducit descriptionem personæ Antichristi

traditam a Paulo, 2 ad Thessal. 2 : *Homo peccati, filius perditionis, qui extollitur supra omne quod dicitur Deus.* In qua omissis duabus prioribus particulis, solum tertiam expedit, et illam Pontifici accommodat, ut illum Antichristianismi arguat. Et in hunc fere modum colligit : Papa se extollit supra omne quod dicitur Deus; ergo est Antichristus. Antecedens patet, nam de regibus vel sacerdotibus, vel de utrisque ait Deus : *Ego dixi : Dii estis*, Psal. 82. At Papa se extollit supra omnes reges et Episcopos, nam *super utriusque gladii potestatem se effert*. Ergo extollit se supra omne quod dicitur Deus, ac proinde est Antichristus. Neque in eo loco in verbis Pauli proprietatem aliam, unde Antichristi persona describi seu cognosci possit, considerare voluit, sed post longam digressionem de sede et tempore Antichristi, in p. 402, ad descriptionem personæ illius reverfatur, eamque non ex locis clarioribus Scripturæ, sed ex obscurissimis Apocalypsis visionibus eruire conatur. Sed prius quam ad illa obscuriora, minusque utilia, necessitate coacti cum illo divertamus, circa hunc locum Pauli insistendum est. Quoniam ex eo evidenter constare potest talem describi Antichristi personam, ut non solum a Pontifice Romano distinctus, sed etiam fide et moribus omnino diversus et oppositus, ac denique summus Apostolicæ Sedis hostis et adversarius cogitandus sit.

2. Et imprimis expendo verba priora quæ rex omisit, *Homo peccati, filius perditionis*. Nam per hæc verba describitur ille homo ut iniquissimus, et quod perditissimus sit futurus. Quod paulo post apertius idem Apostolus explicuit, dicens : *Ille iniquus, cuius est adventus secundum operationem Satanæ, et in omni seductione iniquitatis*. Unde Chrysostomus ibi, Homil. 3 : *Vocat eum hominem peccati, quia faciet innumerabilia*. Et Theodor. : *Ipsum (inquit) hominem peccati appellavit, quandoquidem natura homo est, qui omnem operationem diaboli in se suscipit*. *Filius autem perditionis, ut et ipse pereat, et aliis perditionem procuret*. Unde in hoc dicit Christum æmulaturum, ut sicut Christus omnium fuit causa salutis, ita ipse sit auctor perditionis omnium. Theophyl. : *Hominem peccati illum ipsum vocat, ut qui omne peccatorum genus peracturus sit, et alios ad peccatum supplanturus*. Similia habet ibi OEcumenius, eisdemque coloribus Antichristum depingunt Cyrill., catech. 15 : *Judæos (ait) decipiet, eos-*

que omni genere inhumanitatis et malis circumscribet, ita ut omnes, qui ante illum improbi et impii fuerint, excellat malitia. Et S. Ephrem, serm. de Antichristo : *Eromet draco in eum universam suam amaritudinem cum omni sua malitia, propinabitque fraudulenter latens in se lethiferum virus*. Et similia habet Damasc., lib. 4, c. 27, et alii, qui de Antichristo scribunt, vel expresse vel tacite ita verba Pauli interpretando. Verba enim illa Pauli, *Homo peccati, filius perditionis*, per exaggerationem et antonomasiam dicta sunt. Habent namque illa genitiva locum adjectivorum, et absolute posita illam magnam vim habere solent, sicut idem Paul., ad Coloss. 1, Christum vocavit *filium dilectionis suæ*, id est, dilectissimum, in quem Pater omnes thesauros dilectionis suæ effudit, ut sensit Augustinus, 15 de Trinit., c. 19, in fine. Ad hunc ergo modum vocat idem Paulus hoc loco Antichristum hominem peccati, id est, summe malum ac perditissimum, vel, ut Hug. Card. exposuit, *serrum peccati*, vel, ut ait Cajetanus, *homo habens plenitudinem omnium peccatorum*. Et hinc etiam Theologi, cum Gregorio, 15 Moral., c. 28, Antichristum dicunt esse caput malorum omnium sub Satana, quia in illo futura est omnis malitiae plenitudo. Et quia sicut Christus est sanctior omnibus bonis, ita Antichristus futurus est pejor omnibus malis, ut dixit cum gloss. D. Thomas, 2 Thessalon. 2.

3. *Ostenditur Antichristi notas Summis Pontificibus non convenire.* — Quis ergo ita sit audax, et impudens, ut descriptionem hanc Bonifacio III aut Pontificibus, qui post illum fuerunt, attribuere non vereatur? Quid enim mali fecit Bonifacius III, propter quod *homo peccati* et *filius perditionis* vocari meruerit? Nihil profecto tale memorie proditum in historiis legimus. Nam sancte vixit, et sancta decreta edidit, et sancte mortuus est, ut constat ex Platina et aliis. Solumque illud ei objiciunt Protestantes, quod ambitionem Constantino-politani Patriarchæ, primatum Ecclesiæ appetentis, represserit, et Sedem Romanam matrem esse, et caput Ecclesiarum constanter fideliterque defenderit. At hoc summa laude dignum est; non enim fuit ab eo usurpatum aut noviter inventum, sed a Deo concessum, et a Patribus ac prædecessoribus suis acceptum. Id enim omnes superiores Pontifices, usque ad sanctum Gregorium Magnum fecisse, in superioribus ostensem est.

4. *Phocas Romanæ Sedi primatum non detu-*

lit, sed ad summum declaravit. — Sed instant, nomen universalis Episcopi ab imperatore Phoca sibi concessum usurpasse, ut Anastasius refert. Respondemus imprimis, aut eos tractare de nomine universalis Episcopi, aut de re per illud significata, scilicet, primatu Ecclesiae. Primatum quidem Ecclesiae Romanae supra Constantinopolitanam et alias conferre non potuit Phocas, nam ante illum semper in Ecclesia Romana fuit, et ipsi Patriarchae Constantinopolitani longe antea ac semper illum recognoverunt, ut in superioribus ostensum est. Ad summum ergo potuit Phocas Romanae Ecclesiae primatum contra insolentiam Cyriaci moderni Archiepiscopi Constantinopolitani defendere ac declarare. Atque hoc tantum fecisse Anastasius et Paulus Diaconus retulerunt, quorum verba recitat Baron., anno 606, n. 2. Si vero de nomine oecumenici seu universalis Episcopi tractant, et in eo ponunt hoc grande peccatum, imprimis in verbis Anastasi aut Pauli Diaconi hanc vocem non invenio, sed voces primatus, primae sedis et capituli Ecclesiarum, quae antiquissimae sunt. Deinde etiam si verum sit, Joannem Archiepiscopum Constantinopolitanum, nomen universalis Episcopi usurpare voluisse, et Cyriacum eadem ambitione laborasse, et propterea Bonifacium obtinuisse a Phoca, ut illum compesceret, ipsumque Phocam id fecisse, et imperiali edicto declarasse, nomen illud solum Romano Pontifici posse convenire, nihilominus nec Anastasius refert, neque ostendi potest, Bonifacium aut successores ejus titulum illum accepisse, illa voce explicatum, et significatum. Denique concedamus, si placet, Bonifacium illo titulo et nomine usum fuisse, numquid hoc grande peccatum est, ut propterea mereatur Bonifacius hemo peccati appellari? Certe si res ipsa et dignitas vera est, ut revera est, non multum refert hac vel illa voce illam explicare, et fortasse in ea occasione ad reprimendum et confundendum Cyriacum illo nomine uti volentem, videri potuit expediens. Alioqui si Bonifacius titulum illum acceptans peccavit, gravius certe Chalcedonensis Synodus deliquit, quae nomen illud Leonii Magno ejusque successoribus obtulit, teste Gregorio, lib. 7, indict. 1, epist. 30.

5. *Henricus vere debuit homo peccati appellari.* — Quod si Gregorius et praedecessores ejus, ut idem ait, illud acceptare noluerint, vel propter humilitatem, vel quia suis temporibus non judicarunt necessarium, vel quia vocis ambiguitatem timuerunt, existimari pos-

se arbitrantes illo nomine universalis Episcopi omnem alium episcopatum de medio tolli, potuit nihilominus Bonifacius suo tempore, jam satis explicata voce et intentione Cyriaci Constantinopolitanus Episcopi, ad resistendum illi, sine humilitatis præjudicio, ad dignitatem ipsam tuendam nomen acceptare. Admiratione profecto dignum est, quod Henricus, rex Angliae, ad suæ libidinis excusationem nomen capituli Ecclesiae usque ad illa tempora inauditum ausus fuerit usurpare, et a Jacobo rege non homo peccati, sed potius verum Ecclesiae caput, cui ipse succedere, quemque imitari debeat, censeatur; et Bonifacium III, propter acceptum a majoribus nomen, defensamque dignitatem, Antichristum, hoc est, hominem peccati, et filium perditionis appellare ausus sit. Omitto cæteros Pontifices, qui post Bonifacium sederunt, neque illo titulo ordinarie usos esse, neque indignum illud nomen hominis peccati meruisse. Nam, licet non negemus aliquos improbis moribus fuisse, illi tamen pauci fuerunt, et inter eos nullus tam iniquus habitus est, ut homo peccati et filius perditionis per antonomasiam dici meruerit, et e converso multi fuerunt sanctissimi, ex quibus aliqui martyres fuerunt, multi vita et sanctitate illustres, ac reliqui omnes sine ulla improbitate vel scandalo Ecclesiam in fide et justitia conservarunt. Descriptionem ergo Antchristi illis verbis a Paulo insinuatam nemo qui vel judicium rationis habeat, Pontifici Romano accommodabit.

6. *Alia Pauli verba a rege suppressa.* — Venio ad alia verba, quæ rex expendit, licet non integre illa referat, sic enim habent: *Qui adversatur, et extollitur supra omne quod dicitur Deus, aut quod colitur.* Omisit enim rex verbum *adversatur*, quia suæ interpretationi non congruebat; Pontifex enim non adversatur christianis regibus aut Episcopis, quos rex ibi deorum nomine significari vult, sed eorum se spirituale patrem et protectorem, æquissimumque moderatorem esse profitetur. Prætermisit etiam illa posteriora verba, *aut quod colitur*, quia sensum ab illo excoigitatum prorsus evertunt. Sed videamus prius quomodo sancti Patres verba illa intellexerint. Certe illi non reges, judices aut principes mundi, vel Ecclesiae sacerdotes aut Praelatos Paulum intellexisse existimarunt, sed ut sonant verba: *Omne quod dicitur Deus.* Et specialiter solent Patres de idolis et diis gentium id exponere, quia omnes abjecerit Antichristus, et supra omnes elevabitur, id est,

supra omnes qui dei, licet falso, dicuntur. Sic Chrysostomus inquit : *Destruet Deos gentium, jubebitque se pro deo adorari.* Similiter Theodor. : *Se ipsum Christum et verum Deum dicet, et ita contra omne quod dicitur Deus, insurget.* Idem fere Theoph., OEcumen. et Ambros., aliquique expositores. Irenæus vero clarius lib. 3, c. 6, de diis gentium locum Pauli interpretatur, *qui dicuntur dii, sed non sunt*, et supra illos ait extollendum esse Antichristum, *non supra verum Deum.* Quod quomodo intelligendum sit, dubitare quis potest. Nam idem Irenæus, lib. 5, cap. 25, licet eodem modo verba illa exponat, simul de eodem Antichristo dicit : *Existens apostata et latro, quasi deus ruit adorari.* Unde adjungit : *Idola quidem seponens ad suadendum, quod ipse sit Deus, se autem extollens unum idolum.* Itaque Antichristus revera supra verum Deum, et supra falsos seu idola se extollebat. Sentit autem Irenæus Paulum, per illa verba, *supra omne quod dicitur Deus, tantum falsos deos intellexisse, exaltationem vero ejus supra verum Deum in aliis verbis : Ut in templo Dei sedeat, ostendens se tanquam sit Deus, significasse.* Unde c. 28 ait : *In templo Dei sedente, ut sicut Christum adorent illum, qui seducuntur ab illo.*

7. *Tam verum Deum, quam falsum a divo Paulo significari.* — Non est autem alienum ab universalitate dictorum verborum, ut intelligantur tam verum quam falsos deos comprehendere, scilicet, *supra omne quod dicitur Deus*, sive vere, sive false dicatur, et sive religiose, sive superstitione colatur. Et ita Lyr. ibi, et Rab., in tract. de Antichristo, *supra omnes, inquiunt, deos gentium, et non solum supra illos, sed etiam supra omne quod colitur*, id est, supra Sanctam Trinitatem, quæ solum colenda et adoranda est. Idemque clare sentit OEcumen. ibi, dicens : *Adversabitur et extollebit sua superbia, non solum adversus Deum universorum, sed etiam adversus idola.* *Neque enim ad idolatriam ducet homines, sed ut ipsum tanquam Deum adorent; propterea dicitur, quod effteretur super omne quod dicitur Deus, aut Numen.* Et 1 Joan. 4, eadem verba tractans, adjungit : *Per hoc quod addit, et omne numen, etiam Christianismum significat,* in quo nimis est cultus veri Dei. Præterea Chrysostomus ibi, cum Paulus simul dicat : *Adversatur et extollitur, ita exponit : Non enim inducet ad cultum idolorum, sed erit quidam Dei adversarius,* utique veri Dei; ergo etiam supra illum extollebitur, nam faciet se

pro Deo adorari, ut idem Chrysostomus sub jungit, homil. 40 in Joan. 5, exponens verba illa : *Si alias venerit in nomine suo, illum accipietis.* Antichristus (ait) neque se missum a Patre, neque ejus voluntate venire dicet, sed omnem potestatem tyrannice vindicabit, se omnium Deum profitebitur, ut Paulus inquit, *supra omne quod dicitur Deus, aut colitur*¹. Alii vero Patres nunc de idolis et falsis diis, nunc simpliciter de omni cultu Dei loquuntur. Sic enim Tertullianus, lib. de Resurrect. carn., cap. 24 : *Adversatur (ait) et superextollitur supra omne quod dicitur Deus, vel religio, ita ut in templo Dei sedeat, affirmans Deum se.* Idemque habet lib. de Anima, cap. 57, et lib. 5 contra Marcion., cap. 16 : *Supra omne (ait) quod Deus dicitur, et omnem religionem.* Similia videri possunt in Hypolit., Ephrem, et aliis, in tractat. de Antichrist.; Cyrill., cateches. 15; Lactant., lib. 7, c. 17; Hieronymo, dicta q. 11, ad Algas.; et idem sentit Augustinus, tract. 29 in Joan. Parumque refert quod per priora vel posteriora verba Paulus id dixerit, dummodo constet, in integra descriptione Antichristi, quam ibi posuit, non tantum de diis metaphoricis (ut sic dicam) seu per participationem quamdam, ut sunt reges et Prælati, nec tantum de diis gentium falsis, seu idolis, sed etiam de vero Deo locutum fuisse.

8. *Principes etsi aliquando dii dicantur, ea significatio Pauli loco non congruit.* — Valde ergo frigida est et inanis Protestantium expositio, aut potius accommodatio. Primo, quia est contra communem sensum Patrum. Secundo, quia *omne quod dicitur Deus*, plus comprehendit. Vel si verbum illud, *quod dicitur*, habet emphasis illam, *quod dicitur, cum non sit*, ut Irenæus significavit, sic nou ad reges vel Prælatos, sed ad idola pertinet, quia reges et Prælati, eo modo quo dicuntur dii, non falso dicuntur, cum ore ipsius Dei dicantur secundum quamdam analogiam vel participationem. Vel si absolute sumitur, *omne quod dicitur*, sive sit, sive non sit, omnem appellatum Deum includit. Et præterea illud nomen *Deus*, debuit maxime comprehendere id quod frequentius, et ab omnibus, et a toto vulgo dicitur Deus; Episcopi autem aut reges, licet semel aut iterum in Scriptura dii dicantur, vulgo tamen et communiter non ita appellantur; idola autem gentium tunc maxime deorum nomine significabantur, et præter illos Deus verus, præsertim a Chris-

¹ 2 Thess. 2.

tianis, tunc maxime Deus dicebatur; ergo de his potius quam de regibus loquitur Paulus.

9. *Summa Antichristi superbia non erit in eo, quod velit hominibus, sed ipsi Deo præcellere.* — Accedit etiam non contemnenda conjectura, quod Paulus ibi non quacumque animi elationem, sed summe pravam et inordinatam, in illo homine peccati voluit ostendere ac describere, ut verba ipsa, et magis quæ inferius adjungit, præ se ferunt. Ergo non loquitur tantum de exaltatione super alios homines in potestatibus temporalibus vel humanis. Hoc enim modo multi fuerunt superbissimi imperatores, supra omnem humanaam potestatem se extollentes, et ipse rex Anglie in suo regno ita vult extolli, ut solus recognoscatur in temporalibus et spiritualibus, et ita se effert supra utrumque gladium, ut infra Deum nolit recognoscere superiorem, etiam in ordine ad salutem animæ, sed omnium volens esse judex, a nemine putat se posse judicari. Multo ergo majori ratione potest hujusmodi rex Antichristus saltem in imagine seu imitatione appellari. Nam Athanasius, epist. ad Solitar. vit. agent., circa finem, ita de Constantio loquitur: *Gravia sunt ista, et plus quam gravia, tamen istiusmodi quæ congruant in eum qui Antichristi imaginem gerit. Quis enim ridens, cum in decernendo se facere principem Episcoporum, et præsidere judiciis ecclesiasticis, non merito dicat illum eam ipsam abominationem desolationis esse, quæ a Daniele prædicta est.* Hæc de Constantio dixit Athanasius, quia judicia Episcoporum in rebus ecclesiasticis, et præsertim in causa fidei usurpare volebat; quid ergo de sæculari principe, qui spiritualem primatum sibi arrogat, dicturus fuisset?

10. *Antichristus supra Deum se efferet.* — Verumtamen, licet hoc genus superbiæ imaginem Antichristi referat, nondum tamen veritatem; majorem enim voluit Paulus de Antichristo indicare, et ideo non ibi descriptionem conclusit, sed addidit: *Ita ut in templo Dei sedeat, ostendens se tanquam sit Deus.* Quæ verba sine causa rex in illa descriptione omisit, cum illa maxime declarant personam Antichristi, et superbiam ejus, explicantque quomodo intelligendum sit prius verbum: *Extollit se super omne quod dicitur Deus;* non quidem super utriusque gladii potestatem se efferendo, intra ordinem ministrorum Dei, sed supra ipsum Deum se exaltando, et jubendo se in templo adorari ut Deum. Et hoc magis declarant quæ postea

adjungit: *Cujus est adventus secundum operationem Satanae in omni virtute, et signis, et prodigiis mendacibus.* Nam haec omnia eo tendent, ut se Deum faciat in omni seductione iniquitatis.

11. *Argumentum ad hominem.* — Ex quibus etiam constat argumentum regis contra ipsum evidenter retorqueri. Primo ad hominem, quia ipse dicit Romanum Pontificem esse idololatram, adorando Sanctos, numina et deos, ac subinde illis se subjiciendo, et serviendo; at vero Antichristus nulli numini se subjiciet, sed supra omne illud extolleretur, nec idola aut simulacra venerabitur, sed eis adversabitur, ut Patres ex verbis Pauli colligunt; ergo non loquitur consequenter rex, dicens Papam esse Antichristum. Deinde evidentissimum est Papam non se facere Deum, nec jubere se adorari ut Deum, nec esse Dei aut Christi adversarium; nam ejus gloriam verumque cultum tanquam ejus minister procurat; non est igitur Antichristus, neque se extollit sicut Antichristus. Item Antichristus, ut ex Chrysostomo referebam, non se dicet a Patre vel Deo missum, sed in nomine suo veniet, ut Christus etiam significavit, Joan. 5. Pontifex autem non solum a Patre missum, sed etiam a Christo sibi esse potestatem commissam confitetur, et servum ejus, imo et servorum Dei se profitetur; quæ igitur est conventio lucis ad tenebras, Christi ad Belial, Vicarii Christi ad adversarium Christi?

12. *Proprie non se extollit qui jus suum juste tuetur.* — Unde addo, injustissime attribui Pontifici verbum *extollendi se*, eo quod dignitatem suam supra utriusque gladii potestatem tueatur. Nam qui jus suum et a Deo sibi propter bonum Ecclesiæ datum defendit, non se *extollit* (quod verbum excessum et arrogantiam significat, et in hoc sensu sine dubio acceptum est a Paulo), sed divinam institutionem defendit, et universale bonum Ecclesiæ procurat; Pontifex autem revera est a Christo constitutus supra utriusque gladii potestatem, ut in superioribus ostensum est; ergo non se extollit, cum illum gradum honoris sedi suæ vendicat. Et quidem si hoc titulo Antichristi nomen meretur, non a Bonifacio III, sed a principio Ecclesiæ Antichristianismus incœpit; semper enim Pontifices illum excellentiæ gradum in sua sede recognoverunt et defenderunt, ut supra ostendimus. Denique non minus efficax argumentum sumitur ex ultimis verbis, quibus describitur An-

tichristus ut operans signa et prodigia mendacia; nam Romana Sedes non est usa his artibus aut prodigiis ad suam dignitatem tuendam. Imo ipse rex Angliæ dixit se nescire, quibus artibus ad illud fastigium potestatis ascenderit; neque mirum, si illas nesciat, quia nullæ sunt, præter sinceritatem verbi Dei, et efficacitatem promissionis Christi stabilientis Ecclesiam suam supra petram, verisque miraculis illam confirmantis, ut c. 19 attingemus.

13. Mendacibus signis Pontifices Catholicis illudere calumniantur Protestantes. — Sed dicit rex hæc prodigiosa signa et mendacia, esse miracula, quæ Catholici in Ecclesia facta esse et fieri gloriantur, quæ ipse irridet, adhibens etiam exemplum de miraculo circa Eucharistiam facto, quo illius veritatem alibi Bellarminus confirmavit. Quod exemplum tam docte et pie idem Bellarminus defendit in sua respons., c. 9, ut nihil illi addi posse videatur. Solum advertere oportet hæc falsa prodigia interdum tribui Antichristo, ut in hoc loco Pauli, interdum vero prædicti de quodam pseudopropheta ejus, ut Apoc. 13, ver. 12 et 13. Et utrumque locum exponit rex de falsis miraculis Ecclesiæ, confundit tamen Antichristum cum propheta ejus, et Romanum Pontificem cum Ecclesia. Ut autem errorem ejus et Protestantium calumniam detegamus, illa duo loca et puncta distincte tractare necesse est. Hic ergo de miraculis ipsiusmet Antichristi Apostolus loquitur. Ut ergo pontificeatum Romanum in Antichristianismum transisse rex nobis probet, oportet ut demonstret, aliquem Romanum Pontificem, qui præstigiis et prodigiis mendacibus ad Antichristi imperium erigendum usus fuerit. At hoc ostendere non potest; fateatur ergo necesse est, descriptionem Antichristi a Paulo datam Pontifici non convenire.

14. Nullum Pontificem Romanum præstigiis grassatum ostenditur, et imprimis de Bonifacio. — Minorem ex historiis probare possumus, a Bonifacio III incipiendo, et per alias discurrendo, quod esset prolixum; satis ergo sit in summa dicere, Bonifacium nulla signa fecisse, quibus dignitatem aliquam, vel potestatem, aut imperium consecutus sit, ut ex historiis et ex superius dictis satis est evidens. De successoribus autem ejus etiam sanctissimis, pauca vera miracula in ecclesiasticis historiis leguntur, tantum abest ut falsa configantur. Nam Leonem II, qui multis annis post Bonifacium III sedidit, sanctum

virum fuisse, Anastasius, Platina et alii tradunt, et Romana Ecclesia anniversario cultu inter Sanctos eum veneratur. Et tamen nulla de illo miracula vel signa leguntur, quibus vel potentiam aliquam usurpaverit, vel sanctitatis nomen obtinuerit. Martinus autem I, qui post Bonifacium III, ante Leonem II sedidit, non solum signis aut portentis non est usus ad Ecclesiam decipiendam, verum potius sola Pontificia fide, et spirituali potestate, ac animi constantia Constanti Imperatori, et Paulo, Constantinopolitano Episcopo, restituit, dicens, *etiam si totus orbis dogmata peregrina, et a fide aliena complecti velit, se nec minis cujusquam, nec blandimentis, nec morte ipsa a doctrina Apostolica et Evangelica ullo pacto posse avelli*¹. Hac ergo fide, non falsis miraculis Apostolicam sedem commendavit, et ideo eamdem fidem in suis Epistolis maxime laudat. Et ob eamdem fidem Deus vero miraculo illum a manu Spatharii, volentis jussu imperatoris, et exarchi Olympii tentantis illum occidere, liberatus est, eumque postea vivum et mortuum veris miraculis honoravit. Sic etiam Pontifex Deus dedit, Martino antiquior, et junior Bonifacio, in historiis Sanctus prædicatur, et anniversaria traditione collitur, suamque dignitatem sine prodigiis mendacibus conservavit, vera sanctitate vitæ, quam et historiæ referunt, et Ecclesia veneratur, et Deus aliquando simplici et vero miraculo, solo osculo ægrum a lepra mundando, manifestavit. Et similia de Gregor. II, III, ac VII, Agathone, Leone VIII et aliis, in gravibus ac fide dignis historiis referuntur, eisque cum sanctitate vitæ nonnulla miracula sine ulla fictione vel mendacii suspicione tribuuntur.

15. Miracula ergo, quæ a Pontificibus Romanis post Bonifacium interdum facta sunt, longe distant a signis Antichristi; nam hæc erunt in omni seductione iniquitatis², ut Paulus ait, illa vero in fidei defensionem, et Christi honorem semper facta leguntur. Denique Rex ipse alio loco fatetur, se ignorare artes per quas thronus ille Romanæ Sedis ad tam excellentem potestatem evectus est; cur ergo nunc fingit, per falsa signa et portenta mendacia esse comparatum?

16. Refellitur Patrum consensu. — Tandem

¹ Baron., anno 649, n. 4; Baron. supra n. 50, ex Anastas.; Baron., an. 654, num. 3 et 6.

² 2 Thess. 2.

addit Paulus aliud signum, et quasi particula-
lam aliam descriptionis Antichristi, dicens,
quem Dominus Jesus interficiet spiritu oris sui,
et destruet illustratione adventus sui. Quæ ver-
ba Protestantes et rex illos sequens etiam ad
metaphoram traducunt, dicentes, spiritum
oris Christi esse verbum Dei prædicatum per
Lutherum, et ministros ejus, quo Deus Papa-
tum debilitavit, et paulatim destruit. Verum-
tamen neque iste est sensus Pauli, neque
etiam in eo sensu verum est, quod dicitur.
Paulus enim per spiritum oris Christi, ejus
imperium efficax, et per illustrationem ad-
ventus ejus, verum descensum, et gloriosam
apparitionem ad interficiendum Antichristum
intelligit. Hoc enim verba in proprietate si-
gnificant, et non est cur ad metaphoricos
sensus torqueantur. Et ita illa Patres intelle-
xerunt. Chrysostomus ibi, orat. 4 : *Jussu (in-
quit) solo et præsentia, satis est enim eum
adesse, et haec omnia perierunt.* Theodoret. :
*Cum e cælo apparuerit, loquetur tantum, et sce-
lerato isti omnino afferet interitum.* Et adjun-
git locum Isai. 41 : *Spiritu oris sui interficiet impium.* OEcumen. : *Spiritum oris vocat
jussum et præceptum.* Ambros., 4 Thessal. 5 :
*Subito et ex insperato apparebit Christus, si-
cut coruscatio appareat, habens secum militiam
exercitus Dei Patris ad perditionem Antichris-
ti, et satellitum ejus.* Et id confirmat ex Apoc.
11. Hieronymus, dicta quæst. 11, ad Algas.,
exponit : *Spiritu oris sui, id est, divina po-
testate, et sue majestatis imperio, cuius jus-
sisse fecisse est.* Et infra : *Quomodo tenebræ
solis fugantur adventu, sic illustratione ad-
ventus sui eum Dominus destruet, atque de-
lebit.* Et Augustinus, decimo octavo de Ci-
vit., c. 53 : *Illam (inquit) novissimam perse-
cutionem, quæ ab Antichristo futura est, præ-
sentia sua ipse extinguet Jesus, sicut scriptum
est, etc., et inducit verba Pauli.* Juxta hanc
ergo verborum proprietatem, verumque sen-
sum, satis constat descriptionem Antichristi
quoad hanc partem non esse in Romanis Pon-
tificibus impletam.

17. *Protestantes de verbo Dei gloriantur.*—
Sed neque id quod in sua metaphora jaectant
Protestantes, ostendere unquam potuerunt.
Gloriantur enim de verbo Dei, cum tamen
nihil minus credant, aut in veritate habeant.
Retinent enim corpus inanime verbi Dei (ut
supra dicebam), et spiritali proprio illud in-
duunt. Huicque spiritui proprio fidem adhi-
bent, illoque solo bellum contra Dei Eccle-
siam et Romanum Pontificem movent, ut evi-

denter in lib. 4 demonstravimus. Absit ergo
ut tali verbo et spiritu oris sui prævalere pos-
sint contra petram, super quam Deus funda-
vit Ecclesiam, contra quam portæ inferi non
prævalebunt. Neque propterea quod multos
a fide et obedientia Romanæ Ecclesiæ per-
verterunt, ideo per eos impleta est Pauli præ-
dictio ; nulli enim fuerunt hæretici, qui non
multos deciperent, et plures pervertit Arrius
quam Lutherus, et non ideo delere potuit
Christi Vicarium vel Ecclesiam ; est ergo ina-
nis gloriatio illa vanaque præsumptio. Qui
ergo integre consideraverit signa omnia, et
colores quibus Paulus describit venturum
Antichristum, evidenter intelliget non solum
dissimilem Pontifici futurum, sed etiam ex
diametro contra illum pugnaturum; nam cum
sit futurus Christi hostis, non potest non esse
maximus Vicarius Christi adversarius.

CAPUT XVIII.

QUE EX VISIONIBUS CAP. 6 ET 9 APOCALYPsis REX INDUCIT, REFELLUNTUR.

1. *Equi pallidi sessorem Apoc. 6 Antichris-
tum rex interpretatur.* — Pergit rex in sua
Præfatione, pag. 102, et ad suam de Pontifi-
cum Antichristianismo persuadendam conjectu-
ram, quatuor visiones Apocalypsis inducit,
in quibus ait Antichristum depingi. Prima est
in c. 6, ubi Joannes narrat apertiones sex si-
gillorum libri, quem c. 5 clausum viderat, et
post primam visionem equi albi, cui Christus
insidebat, et secundam equi rufi qui persecu-
tionem, quam Christiani vel a tyrannis, vel a
suis cognatis, et amicis passuri erant, et ter-
tiam equi nigri, qui famem et alias plagas,
vel potius hæreticorum tenebras et persecu-
tiones significabat, adjungit quartam visio-
nenem equi pallidi, quæ his verbis describitur :
*Ecce equus pallidus, et qui sedebat super eum,
nomen illi mors, et infernus sequebatur eum, et
data est illi potestas super quatuor partes
terræ (vel, ut rex ex græco legit, super quar-
tam partem terræ), interficere gladio, fame et
morte, et bestiis terræ.* Hunc ergo equum
pallidum vel sessorem ejus vult rex esse Anti-
christum, quod inde confirmat, quod statim
illi connectitur quinti sigilli reseratio, in qua
SS. Martyres clamant, et accelerari judicium
et vindictam exposeunt, quod statim in aper-
tione sexti sigilli concessum est eis. Quid au-
tem tota hæc explicatio ad causam referat,
rex non declarat.

2. Occurritur regis conjecturis. — Breviter ergo respondemus, vel falsum, vel valde incertum esse per illum equum pallidum significari Antichristum. Si enim accurate Apocalypsis expositores percurrentur, tot fere inventantur expositiones, quot capita. Nam quidam applicantes ea sigilla variis imperatoribus Romanis ethniciis, et insignibus Ecclesiæ persecutoribus, equum illum pallidum Domitianum accommodant, ut Petrus Aureol., quem Viegas sequitur. Alii diversorum ordinum persecutiones ibi significari intelligentes, equum pallidum Trajano tribuunt, quia illi facile applicantur insignia pallidi coloris, mortis et inferni : Ecclesiamque persecutus est fere illo tempore quo Joannes, visionem illam videns, a quarto animali mysterium illud didicit, ut Ribera ibi prosequitur. Andreas autem Diocletianum seu Maximianum intelligit, quorum tempore persecutio simul cum peste et fame Ecclesiam vexavit. Quod etiam Arethas refert et sequi videtur. Alii, aliter cætera interpretantes, per equum pallidum Mahometum, ejusque per se et per successores suos Christianorum persecutionem significari existimarent, ut Joachimus et Pannonius. Alii falsos fratres significari dicunt, hypocritas, et pseudoprophetas Ecclesiam persequentes, ut Anselmus, Richardus, Vict., Hugo Car. At vero Victor., per equum rufum, nigrum et pallidum, bella, famem et pestem a Christo in Evangelio prænunciata significari dicit. Idemque placuit Tyconio, hom. 5, qui etiam addit, per equum pallidum homines malos intelligi, qui persecutio excitat non desinunt. Ambrosius item, vel qui ejus nomine fertur, longe aliter et valde mystice locum interpretatur, et in aliis infinita est varietas. Neminem tamen reperio qui de Antichristo sigillum illud quartum specialiter intellexerit; quamvis si generaliter de pseudoprophetis et hypocritis illud intelligamus, recte sequitur Antichristum per antonomasiæ sub illo comprehendi.

3. Idcirco potest Antichristo quoque accommodari. — **Confirmatio.** — Et hoc quidem probabile est, et ad sumnum ad id suadendum valet conjectura illa, quod in quinti sigilli resignatione proponuntur petitiones Sanctorum Martyrum postulantum vindictam et judicium, et statim in sexto fit ad judicium transitus. Quanquam neque illud in rigore suadet. Nam ibidem in apertione quinti sigilli legimus Sanctis esse responsum, *ut expectarent modicum tempus, donec implerentur fra-*

*tres eorum, et conservi illorum, qui interficiendi sunt, sicut et illi*¹. Ex quo responso intelligimus, illas Sanctorum interpellationes proponi ut factas ante finem persecutionum, et maxime ante persecutionem Antichristi, ad quam referri potest illud *modicum tempus*, quod Sancti expectare jubentur. Nihil ergo est quod nos cogat per equum pallidum Antichristum intelligere. Sed id gratis regi concedamus. Quod, quæso, inde argumentum ad suam de Romano Pontifice cogitationem fundandam vel persuadendam sumere potest? Nullum profecto, nam licet ibi describatur Antichristus venturus, nullum illius descriptionis vestigium in Pontifice invenitur. Color enim pallidus (ex omnium sententia) indicat timorem nimium, quem tyranni, et præsertim Antichristus hominibus et fidelibus maxime incutiet; Pontifex autem non ex terroribus, et comminatione mortis homines sibi subjectos habet, sed in virtute spiritus et verbi Dei, amore potius quam timore illos gubernat. Unde quod sequitur, *mors et infernus*, nullo modo in Pontificem convenient; quia non profitetur, se recepisse potestatem *ad interficiendum gladio, fume et bestiis terræ*; hæc enim fecerunt imperatores tyranni, et reges apostatæ et rebelles; sed accepit Pontifex potestatem gladii, quo dissipet errorum tenebras, et disperdat vitia, et virtutem plantet. Igitur illius sigilli reseratio, quocumque modo intelligatur, nihil ad punctum quod tractamus pertinebat.

4. Alio Apocalypsis loco rex rult ostendere Pontificem esse stellam de cælo cadentem. — Secundam visionem affert ex c. 9 Apocalypsis, in quo quintus Angelus tuba cecinit; in capite enim 8 dixerat Joannes, cum Agnus aperuisset sigillum septimum, vidiisse se septem Angelos stantes in conspectu Dei, et datas illis esse septem tubas, et in eo capite quatuor primarum tubarum clangorem descripsérat; in nono vero capite incipit dicens: *Et quintus Angelus tuba cecinit; et vidi stellam de cælo cecidisse in terram, et data est ei claris putei abyssi, et aperuit puteum abyssi, et ascendit fumus putei sicut fumus fornacis magnæ, et obscuratus est sol, et aer de fumo putei. Et de fumo putei ascenderunt locustæ in terram, et data est eis potestas.* In quibus verbis, et in toto sonitu hujus tubæ duo tantum rex expendit. Primum est, *stellam illam, quæ de cælo cecidit, significare aliquem eximiae dignitatis qui de cælo cecidit*, quia cum deberet esse

¹ Apoc. 6.

lux mundi, sicut Christus præcepit, ille contra munus suum deserens, instar Luciferi deficit, regnum sibi erigit. Secundum est, loecustas indicare pestiferum examen subdolorum, et immanis sævitiae animalculorum, quod stellæ illa in mundum emisit. Et ad hunc modum (ait rex) sedes Antichristi cœpta est erigi, sentiens stellam illam esse Antichristum, et illum virum eximiæ dignitatis, qui instar Luciferi defecit, esse Bonifacium III, quem Antichristi initium facit. Quæ autem sint animalcula illa sævissima, non declarat; videtur autem intelligere, vel omnes Pontificios, vel Doctores omnes et pastores, aut forte Jesuitas, qui Pontificis imperium dilatare student.

5. *Multa vitia Pontificibus falso objecta.* — Postea vero rex transitum facit ad clamorem sextæ tubæ, in quo solum considerat quod in fine capit is dicitur: *Et cæteri homines, qui non sunt occisi in his plagiis, neque pœnitentiam egerunt de operibus manuum suarum, ut non adorarent dæmonia, et simulacula aurea, et argentea, et ærea, et lapidea, et lignea, quæ neque videre possunt, neque audire, neque ambulare, et non egerunt pœnitentiam ab homicidiis suis, neque a beneficiis suis, neque a fornicatione, neque furtis suis.* Quæ omnia Protestantium more de Catholicis, vel (ut ipse vult) de Papistis interpretatur. Et primo illis attribuit quod adorent dæmonia, ex Vazquez, l. 3 de Cult. et adorat., disp. 6, cap. 3. Secundo, per simulacula, etc., imagines intelligit, *quia negari non potest quin caput doctrinæ de cultu earum sit Romanensis Ecclesia.* Tertio, per homicidia, exponit cædes et trucidationes, quas Romana Ecclesia efficit, hæreses persequendo. Quarto, beneficia dicit esse *Agnos Dei, benedicta industria, reliquias, orationes, quibus putantur homines a variis periculis præservari.* Quinto, fornicationem dicit, partim spiritualem esse per idolatriam, partim propriam, quia in Ecclesia frequentior est propter cælibatum sacerdotum et clericorum in sacris, propter tot otiosos monachorum et sanctimonialium greges. *Nam otium est magnum libidinis incentivum.* Sexto, furga denique et metaphorice et proprie nobis attribuit, dicens: *Furti autem in eo maxime se alligant, quod Deo surripiunt titulos honorum, et amplitudinem potestatis illi soli debitam, quam in Antichristum caput suum conserunt. Nec minus in accumulandis opibus furti tenentur, Jubilæis, indulgentiis, reliquiis, et id genus aliis, etc.*

6. *Alia loca a rege contra Romanum Pontificem accumulantur.* — Tertio, ut suadeat rex,

in his omnibus describi tempora Antichristi, transit ad cap. 10 Apocalypsis, ubi Joannes videt Angelum stantem super mare et super terram, voce magna clamantem: *Quia tempus non erit amplius, sed in diebus vocis septimi Angeli, cum cœperit tuba canere, consumabitur mysterium Dei, sicut evangelizavit per servos suos Prophetas.* Consequenter vero progreditur ad cap. 11, dicens, ibi describi extitum Antichristi, et ex professo ostendit illum significari per bestiam ascendentem de abysso, illamque bestiam esse eamdem quæ cap. 13 et 17 commemoratur, *quia semper ex abysso ascendere dicitur.* De quo non multum contendimus, ut ex supra dictis constat, et infra iterum dicam. Hic autem hoc ideo rex inculcare videtur, ut suadeat Joannem in c. 9 de Antichristo tractare, post cujus destructiōnem sequetur judicium, et tempora cessabunt.

7. *Protestantium somnia non veritate, sed calumniandi studio nituntur.* — Hæc fere rex: in quibus si attente rem expendamus, ea, quæ pertinent ad interpretationem illam, ut per stellam aut bestiam Antichristum intelligamus, indifferentia sunt, nihilque ad fidei ostensionem vel defensionem spectant; illa vero quæ calumnias, falsa testimonia, et (ut quod revera sunt, dicam) blasphemias contra Romanam Ecclesiam continent, nullam habent probationem, sed solam maledicendi libertatem et Protestantium consuetudinem, a quibus rex misere deceptus, eorum sermones imitatur, et ideo responsionem omittere et omnia contemnere possemus; quia vero sapientibus et insipientibus debitores sumus, dicemus prius de literali expositione cap. 9 Apocalypsis, postea vero vanas regis accommodations, falsasque calumnias refutabimus.

8. *Per stellam e cælo cadentem, Apoc. 9, intelligunt aliqui bonum Angelum.* — Primo ergo stella illa, quam Joannes videt cecidisse de cælo, et datam esse illi clavem abyssi, duas habet apud Catholicos præcipuas expositiones: unam in bonam partem, alteram in malam, stellam illam interpretantes. Primo ergo dicunt aliqui, stellam illam non esse malum Angelum, nec personam aliquam pravam, sed esse aliquem sanetum Angelum a Deo mittendum circa finem mundi, ut aperiat puteum abyssi, permittendo, nimirum, principibus tenebrarum ut inde descendant ad infestandos homines, partim tenebris hæresum et infidelitatum, excæcando mentes eorum,

partim gravissimis malis et persecutionibus justos affligendo. Quæ expositio non potest facile refutari. Nam cum dicitur stella illa cecidisse de cœlo, non significat casum moralis a justitia ad iniquitatem, sicut dicitur cecidisse de cœlo Lucifer, Isai. 14. Sed significat descensum localem velocissimum, et ideo verbo illo declaratur. Et cum postea dicitur *obscurus sol*, etc., non dicitur stellam misisse tenebras, vel mala subsequentia operata fuisse, sed solum aperciisse, id est licentiam dedit, seu impedimenta abstulisse, et tunc secutum esse quod subjungitur: *Et ascendit fumus putei*, et cætera quæ sequuntur. Explicaturque interpretatio hæc ex alia simili Apocalyps., ubi Joannes vidit Angelum descendente de cœlo, habentem clavem abyssi, et catenam magnam in manu sua. Qui apprehendit diabolum et Satanam, et ligavit, et misit eum in abyssum, et clausit, etc. Illum enim Angelum bonum esse dubium non est; quid ergo mirum quod idem Angelus missus etiam fuerit ad solrendum diabolum modico tempore, ut ibidem subjungitur. Est sane sententia hæc valde probabilis.

9. *Alii stellam illam Luciferum esse dicunt.* — Altera vero expositio, quæ in malam partem stellam illam interpretatur, non minus probabilis est, in plures autem dividitur. Antiqui enim expositores stellam illam diabolum esse interpretantur, nempe Luciferum, de quo in persona regis Babylonis dictum creditur, Isai. 14: *Quomodo cecidisti de cœlo, Lucifer, qui mane oriebaris, corruisti in terram*, etc., usque ad illud: *Ad infernum detraheris in profundum laci*. Unde ponderant non dixisse Joannem, Vidi stellam descendere, sed descendisse de cœlo, quia non tunc descendit, sed antequam homines conderentur vel peccarent, descenderat. Vel si fortasse Joannes vidit tunc quasi stellam descendente, significabat Angelum malum, qui jam longe ante descenderat. Haic autem stellæ sic expositæ dicitur data clavis abyssi, quia potestas inferni ei commissa est tanquam regni. Nam locustæ illæ feroce, quas Joannes descripsérat, *habetant super se regem Angelum abyssi*; hic autem Angelus abyssi idem esse videtur qui dicitur stella cadens, cui clavis abyssi data est, quia potestas ei data est in cæteros illius regni incolas. Unde etiam Christus Dominus, Matth. 42, regnum attribuit Satanæ, dicens: *Si Satanas Satanam ejicit, quomodo stabit regnum ejus?* Et ibidem: *Beelzebub dicitur princeps daemoniorum*.

rum. Neque obstabit quod clavis illa ad apertandum deservierit, ut ibidem dicitur; nam potestas regni, civitatis vel domus etiam ad hunc actum extenditur. Et juxta hanc expositionem possunt cætera intelligi; nam fumus fornacis recte intelliguntur esse dæmonis tentationes, et locustæ ministri ejus, sive mali Angeli, sive perditi homines, etc.

10. *Nonnulli malis hominibus stellam carentem accommodant.* — Alii vero per stellam illam non Angelum malum, sed vel genus aliquod malorum hominum, vel aliquem pravum hominem intelligunt. Ambrosius enim ibi: *Per stellam* (inquit) *hæresiarchæ designantur*, quia sicut stellæ in cœlo resurgent, ita etiam ipsi, antequam caderent, doctrina atque sapientia resurgent in Ecclesia. Et sic consequenter iutelligit, locutas esse ministros hæresiarcharum, atque ad hunc modum cætera prosequitur. Anselmus vero, licet per stellam dæmonem intelligat, per locutas hæresiarchas ipsos dæmonis ministros interpretatur, quia sicut locustæ saliunt et non volant, sed statim in terram recidunt, et mordent ac corrodunt, ita hæretici superbia saliunt, sed cum per cognitionem in altum volare non possint, in terram recidunt, et sunt honorum corrosores. Unde consentaneæ ad hanc expositionem possumus recte per stellam illam intelligere insignem hæresiarcham Lutherum, qui cum antea suo modo stella esse videretur, aut esse deberet, occulto Dei judicio permisus est in abyssum errorum cadere, et tenebras effundere, ex quibus ingens locustarum, ministrorum, vel potius etiam hæresiarcharum multitudo pullulavit.

11. *Alii transferunt visionem ad insignem aliquem Ecclesie hostem.* — Alii denique per stellam intelligunt non quemcumque hæresiarcham, sed aliquem insignem, qui non solum tenebras effundendo, sed etiam per tyrannidem et potentiam persecundo, Christianos insectatus fuerit. Et sic Lyranus per stellam illam intelligit Valentem imperatorem, qui, persuasione uxoris suæ, de altitudine fidei catholicæ cecidit in hæresim Ariannam, et misit prædicatores, qui Vandalo et Gothos eadem hæresi inficerent. Quos Vandalo significatos dicit per locutas, qui Italianam et alias provincias catholicas devastarunt. Quam expositionem secuti sunt Petrus Aureol., in eumdem locum, et Antonin., 1 part. Hist., tit. 6, cap. 1, § 2, quoad hanc posteriorem partem; nam per stellam carentem, po-

tius Gensericum, vel alium similem Vandalo-
rum regem, quam Valentem interpretantur.
Quid ergo mirum si quispiam simili allegoria
dicat, Henricum VIII, regem Angliæ, fuisse
stellam illam de cœlo cadeutem, qui non so-
lum de altitudine fidei in turpissimum schis-
ma et hæresim lapsus est, sed etiam ex illus-
tri Romanæ Ecclesiæ, non solum armis, sed
etiam doctrina et scripturis defensore, in
acerrimum hostem commutatus est, unde
statim densissimus fumus pravæ doctrinæ per
totam ditionem ejus sparsus est, et fidei lu-
men ac intelligentiam obtenebravit, indeque
pravi ministri, et acerrimi Catholicorum per-
secutores tanquam locustæ et scorpiones,
brevi tempore multiplicati sunt?

12. Per eam stellam nemo antiquorum Antichristum intellexit.—Hæc quidem et similia
facile a quolibet excogitari possunt. Non tam-
en ideo illa propono, quia omnia interpre-
tationi Scripturæ apta aut probabilia esse ju-
dicem, sed ut intelligat lector, non magis esse
verisimilia quæ regi Angliæ Protestantes per-
suaserunt; nam solum per voluntariam ac-
commodationem, sine fundamento in textu
Joannis, et sine consecutione et observatione
eorum, quæ in illo clangore buccinæ propo-
nuntur, excogitata fuerunt. Unde cum tanta
fuerit varietas inter anticos auctores in ex-
ponenda illa stella, cumque multi eorum di-
cant, ibi præcursores Antichristi calamitates
in Ecclesia futuras prope tempora Antichristi
designari, nullum tamen ante regem Angliæ
et magistros ejus reperio, qui dixerit stellam
illam esse Antichristum, vel locutas esse pro-
prios ministros ejus, sed ad summum præcur-
sores, ut eos vocant Anselmus, et alii ex aue-
toribus allegatis.

13. Antichristus dici non potest stella de cœlo cadens. — Et merito quidem per stellam
cadentem nullus Antichristum intellexit, quia
longe diversa futura sunt Antichristi initia,
ab his quæ per stellam cadentem significan-
tur. Nam in Apocalypsi semper inducitur
Antichristus ut bestia de abyso ascendens,
ut paulo antea rex ipse notavit; stella autem
visa est, ut de cœlo cadens, qui modus orien-
di longe diversus est. Nec refert si quis di-
eat, etiam dæmonem repræsentari per bes-
tiæ ascendentem de abyso, et nihilominus
etiam per stellam cadentem significari posse,
nam dæmon prius fuit stella, et cadendo in
terram, in draconem et bestiam abyssi com-
mutatus est. At vero Antichristus non erit
prius stella, nec erit tanquam Angelus in cœlo,

vel tanquam insignis persona habens in hoc
mundo vel in Ecclesia aliquem excelsum vel
regni vel sacerdotii locum, a quo ceciderit,
sed erit (ut illum depingit Daniel, c. 7, 11)
parvus, et respectus, vilissimus, et indignus
decore regio; talia enim erunt Antichristi exor-
dia, ut supra tactum est, et in sequentibus
iterum dicam. Igitur non quadrat in illum
accommodatio, seu repræsentatio stellæ in ter-
ram cadentis. Ut omittam alia quæ vix pos-
sunt cohærenter ita exponi; nam in omni in-
terpretatione summam habent obscuritatem.

14. Esto Antichristus esset stella cadens, nulli Pontificum id quadraret. — Tandem,
esto stella illa sit Antichristus, et per eam si-
gnificetur aliquis eximia dignitatis vir, pro-
fecto hac permissa interpretatione, ex illa
convinci potest, neque ullum ex Pontificibus,
neque signatim Bonifacium III Antichristum
fuisse. Nullus enim hactenus suam dignita-
tem ita deseruit, ut Sedem Apostolicam sua
majestate et excellentia privaverit, sed omnes
constantissime illam tutati sunt ac defende-
runt. Quod si aliqui per tyrannidem vel vio-
lentam mortem illa privati sunt, ille non est
casus, sed consummatio dignitatis; imo, licet
aliquis per culpas vel hæreses ab illa digni-
tate cecidisset, nullum esset indicium Anti-
christianismi, quia ille fuisset casus personali-
lis, non qui adhæreret sedi, nec in illam,
nec in successores redundaret. Verumtamen
etiam hic casus per Dei gratiam in Pontifice
Romano inventus non est, præsertim ut Pon-
tifex est, et Ecclesiam illuminat; nunquam
enim Pontifices hæreses docuerunt, aut semi-
narunt, ut supra late ostensum est. Maxime
vero de Bonifacio III in nulla historia legitur,
doctrinam pravam in Ecclesiam introduxisse,
aut aliiquid contra illa verba Christi, Matth. 5,
fecisse: *Vos estis lux mundi.* Qua ergo fronte,
qua specie veritatis dicitur fuisse *stella cadens*
de cœlo, quia in eximia dignitate constitutus ad
mundum illuminandum, munus suum deseruit?
Respondet tacite rex deseruisse munus suum,
quia regnum sibi erexit. Sed hoc jam satis
refutatum est. Et iterum hoc modo improba-
tur: nam vel erexit sibi spirituale regnum,
vel temporale. Non primum, quia non usur-
pavit Pontificatum, sed ad illum legitimate
electus est, et in illo constitutus, nihil sibi
spiritualis potestatis arrogavit, quod a præ-
decessoribus suis traditum et observatum non
fuerit, ut sæpe in superioribus dictum et de-
monstratum est, ubi de nomine universalis
Episcopi etiam est sufficenter dictum. Nec

etiam erexit sibi Bonifacius regnum aliquod temporale, quia nullum bellum temporale gessit, nec de tyrannide temporali ab aliquo historiographo accusatus est. Quod est sufficiens argumentum, longissime distare ab Antichristo, qui prius temporale bellum geret, et imperium usurpabit, postea Sanctos persecutur.

15. Fumus ab ore putei ascendens nihil ad Bonifacium. — Atque hinc facile convinci potest, cætera, quæ in illo clangore buccinæ audita sunt, *de fumo ascendentे de ore putei*, etc., non posse ad tempora Bonifacii accommodari, quia per fumum illum densissimum, solem et aerem obscurantem, omnes expositiores haereses intelligunt, pravasque doctrinas; nihil enim magis apposite per illas tenebras et fumum significari potest, cum certum sit illa omnia non proprie, sed metaphorice ibi sumi. Nam licet in visione imaginaria sub specie visibili viderentur, non tamen repræsentabant corporalem fumum aliquando ascessurum ad solem obscurandum, sed aliquam spiritualem tribulationem, in Ecclesia futuram, fidei veritatem et lumen obscurantem. At tempore Bonifacii III nulla talis doctrina ex officina Romana prodiit, nec aliquid circa veritatem fidei innovatum est, nec cum aliquo fundamento aliquid tale designari potest, ut in libro primo et secundo late ostendimus; ergo non cœpit tunc in Romana sede hæc prophetia impleri. Quod argumentum de toto reliquo tempore usque ad nostram ætatem fieri potest; quia nunquam ab illa sede fumus infidelitatis ascendit, ut in eodem loco probatum est.

16. Post Bonifacium, in Ecclesia non locustæ subdolæ, sed multi viri Sanctissimi flouerunt. — Denique quod in hoc puncto rex subjungit de examine locustarum, id est, *immanis sævitiae animalculorum et subdolorum*, quomodo post Bonifacium subsecutum sit, ostendere non potest. Nam post Bonifacium fuerunt in Ecclesia sanctissimi et sapientissimi Pastores et Doctores, quales fuerunt ex Græcis Damascenus, Maximus, Germanus Constantinop., Theophylactus, Photius, Euthymius, et alii. Ex Latinis vero Remigius, Bernardus, D. Thomas, D. Bonaventura, Petrus Damianus, Laurentius Justinianus, Hugo et Richardus de S. Victore, et singulariter ex Anglia Beda, Anselmus, Lanfrancus, et infiniti ali ex omnibus Christiani orbis provinciis, Romanæ sedi adhærentes, ejusque fidem et doctrinam ab antiquis acceptam illustrantes,

et posteris tradentes. Neque etiam in ministris illius Sedis sævitia ulla vel persecutio per vim aut cruciatus scorpiacos in Ecclesia facta est. Ergo locustæ illæ vel sæva animalcula ineptissime accommodantur Doctoribus vel ministris Ecclesiæ Romanæ, cum potius haereticos vel alios Antichristi präcursoribus suis quam longissime distare.

17. Contra Catholicos inepte Protestantes buccinantur. — Exclusa vero verborum accommodatione, quæ per tubam quintam insinuerant, facile refutantur cætera, quæ ex clamore sextæ tubæ per solam calumniam ad detrahendum de Catholicis a Protestantibus arripiuntur. Oportet autem advertere, in illa visione describi ingentem cladem, et interfectionem futuram in mundo in novissimis temporibus, sive sub Antichristo, sive (quod probabilius est, magisque receptum) prope tempora illius, sub illis regibus qui Romanum imperium disperdent, antequam Antichristus veniat. Tria vero in visione illa distinguere necesse est, scilicet, multitudinem ingentem ferocium equorum cum sessoribus suis, multitudinem hominum occidentium, et homines ipsos occisos, qui dicuntur esse *tertia pars hominum*, et alios, qui remanserunt, de quibus in fine dicitur, *non egisse paenitentiam*, etc. Igitur feroce equi sine dubio repræsentant vel haereticos et eorum ministros, ut multi volunt, vel exercitus tyrannorum, ut verisimilius alii opinantur, et ab his occidenda dicitur *tertia pars hominum*, utique eorum *qui signum Dei non habebant*, ut in principio capit is dicitur, et communiter de iniquis et impiis exponitur. Præter hos reliqui fuerunt homines, qui non sunt occisi in his plagiis, de quibus in fine capit is dicitur non egisse *paenitentiam ab operibus manuum suarum*, et hos homines residuos vult rex Angliæ esse discipulos Antichristi; nam doctrinam Antichristi dicit in illis verbis declarari; et postea omnia accommodat doctrinæ Romanæ Ecclesiæ.

18. Discipuli Antichristi, ut vult rex Angliae, idololatræ non erunt. — Sed imprimis repugnat aliis Scripturis, in quibus dicitur Antichristus destructurus idola, Daniel. 11: *Nec quemquam Deorum curabit, quia adversum universa consurget.* Et Paulus, 2 Thes-

sal. 2 : *Extollens se supra omne quod dicitur Deus; et supra late explicuimus, per verba illa : Nec egerunt pœnitentiam ab operibus manuum suarum, ut non adorarent dæmonia, et simulacula aurea, et argentea, et ærea, et lapidea, et lignea, quæ negue videre possunt, neque audire, neque ambulare, non posse significari discipulos Antichristi, nec doctrinam ejus, quia ipse potius docebit non esse adoranda idola, et cultores illorum persecuetur. Atque hinc aliqui colligunt, illas plagas et cædes non esse futuras sub Antichristo, sed illum præcedere, et quia per illas non consumentur omnino idololatæ, per Antichristum esse perimendos. Alii vero censem nihil referre quod illi feroce equi sint exercitus ipsiusmet Antichristi ; nam, licet ille idololatras persecutatur, non poterit omnes qui in mundo sunt occidere. Sicut Mahometus etiam insectatus idololatras, eos tamen abolere non potuit. Poterunt ergo aliqui etiam post persecutionem Antichristi vivere, et de iis qui remanserint post tot hominum cædes, et a suis idololatriis pœnitentiam non egerunt, recte dicitur, cum ipso Antichristo vel cum malis Christianis damnandos esse. Nam simili modo, licet Antichristus Christianos persecutatur, non poterit tamen omnes interficere nec pervertere, et tamen si qui ex illis residuis pravi fuerint, et non egerint pœnitentiam a suis fornicationibus et homicidiis, etc., etiam illi damnabuntur.*

19. *De peccatoribus, non de Antichristi discipulis loquitur D. Joannes.* — Et ita possunt posteriora verba Joannis intelligi : *Et non egerunt pœnitentiam ab homicidiis suis, neque a fornicatione, neque a furtis suis.* Hæc enim vitia non indicant doctrinam Antichristi, sed pravos mores hominum. Quod notavit ibi Richar. Victor., dicens : *Notandum ubi ait : Neque egerunt pœnitentiam de operibus manuum suarum, ibi redarguere eorum infidelitatem.* Ubi vero dicit : *Et non egerunt pœnitentiam ab homicidiis, etc., ibi redarguit eorum pravas actiones.* Hæc autem vitia inveniri quidem solent in multis Catholicis, multo vero magis in hæreticis ; inter quos præsertim exerceri veneficia vulgarissimum est ; homicidia vero eorum et injustissimas cædes, et in antiquis hæreticis Donatistis, Arianis, in historiis, et Sanctis Patribus legimus, et in modernis oculis conspicimus, qui eo ferocitatis pervenerunt, ut se ipsos sæpe occidant, ut hostes simul perimant, illorum ne in manus perveniant. Possunt denique sub illis ver-

bis comprehendendi etiam alii infideles, qui idola non colunt, ut pagani, qui maxime vitiis carnis, per fornicationes significatis, dediti esse solent ; et Judæi, qui usuris, et aliis injustis negotiationibus frequentius involvuntur. Ac denique sub illis quatuor membris omnia genera peccatorum mortalium comprehenduntur, a quibus qui pœnitentiam non egerint, licet aliquam Dei veri cognitionem habent, imo licet veram fidem habeant, damnabuntur. In quo etiam perstringunt hæc verba hæreticos Protestantes, qui sine pœnitentia peccatoribus salutem promittunt.

20. *Respondeatur ad primam ex calumniis Protestantium.* — *Ad secundam, de idololatria.* — *Ad tertiam, de homicidiis.* — Superest ut ad singulas Protestantum calumnias, quas rex imbibit, breviter respondeamus. Et imprimis quoad adorationem dæmonis, notissimum est in Romana Ecclesia non solum reprobari, sed etiam ejus criminis reos gravissime puniri. Neque ullus Doctor catholicus in dubium id revocavit. Gabriel autem Vasquez, vir insignis doctrinæ et pietatis, in hoc a catholicis Doctoribus non dissentit ; sed tractat quæstionem de facto, et non de jure, an qui illuditur a dæmone sibi apparente sub aliqua specie vel figura Christi, et adorationem exhibet signo vel lumini apparenti, possit per ignorationem vel bonam intentionem ab idololatria vel superstitione excusari. Aitque utroque modo excusari posse, quia si ignoratio sit invincibilis, ut esse potest, culpam excusat. Si vero intentio adorantis non feratur in signum apparet, sed solum in Christum repræsentatum, vel in memoriam revocatum, etiam excusatur culpa, quia utroque modo revera non adoratur dæmon, sed Christus. Quæ doctrina evidenter supponit adorationem dæmonis per se esse damnabilem. Ad secundum, concedimus, catholicæ doctrinæ de cultu et adoratione imaginum Ecclesiam Romanam caput esse ; quantum vero dissidium sit inter imagines et idola, quantumque adoratio imaginum ab idololatria distet, satis in lib. 2 tractatum est. Ad tertium, de homicidiis, dicimus illa quidem interdum committi a malis christianis, et propter illa fore damnandos, nisi pœnitentiam agant : pœnas vero, quæ auctoritate publica in Ecclesia Catholica interdum hæreticis infliguntur, non esse homicidia, sed justa supplicia.

21. *Ad quartam, de beneficiis.* — In quarta calumnia duo includuntur errores : unus est, damnare sacramentalia Ecclesiæ tanquam su-

perstитiosa et vенefica , quod evidenter falsum est et blasphemum , cum vенeficia , dæmonis virtute , et sacramentalia Dei auxilio , oratione , et Sanctorum etiam intercessione Ecclesiæque precatione nitantur , ut in libr. 2 tetigimus , et alibi latius tractavimus¹. Alius error est , venerationem reliquiarum tacite negare , et miracula divina , quæ illis medianibus fiunt , damnare , contra Scripturam , Actor. 19 , de sudariis et semicinctiis S. Pauli , et c. 3 de umbra Petri , et 4 Reg. 13 , de reliquiis Elisei , et contra omnem traditionem , et historiam ecclesiasticam adeo constantem , ut vel illam negare , vel illi fidem non adhibere insolentissimum sit . Quod vero ibi additur de orationibus superstitionis , Pontificibus et Pontificiis nihil obest , quia ipsi damnant superstitionem illam , et illis signis vel scriptis aut verbis utentes puniunt , ut tractando de superstitione dixi .

22. Ad quintam , de fornicationibus . — Quinta accusatio antiquas hæreses excitat , damnare enim videtur cælibatum , virginitatem et monachatum , quæ certe hæreses si ad Christianam doctrinam pertinent , Ecclesiæ fides a principio Antichristi fuit , non Christi . Ipse enim Christus virginitatem et paupertatem docuit , Paulusque consuluit , et a principio fuerunt in Ecclesia monachorum greges , et sanctarum virginum monasteria . Sed hæc aliis locis a nobis late tractata sunt² . Nunc lectorum breviter advertimus , ut inter otium vitiosum et sanctum discernat , nam illud libidinis vel majorum vitiorum est incentivum ; hoc vero charitatem nutrit , et ab ea desideratur , dicente Augustino : *Otium sanctum quærit charitas veritatis*³ . Hoc enim otium , licet ab operibus externis sæpe vacet , non tamen a divinis studiis , meditationibus aut orationibus , quarum adjutorio fit , ut libido non dominetur , nec vincat , licet interdum pulset . Et ideo dixit Paulus , 1 Corin. 7 : *Mulier innupta et virgo cogitat quæ Domini sunt , ut sit sancta et corpore et spiritu* . Et subdit inferius : *Porro hoc ad utilitatem vestram dico , non ut laqueum vobis injiciam , sed ad id quod honestum est , et quod facultatem præbeat sine impedimento Dominum obsecrandi* . Status ergo continentium non solum perfectior , sed ad ipsam continentiam servandam utilior est , si homo recte illo utatur ; nec damnandus est propter

particularia personarum vitia , quæ in aliis statibus non desunt , et interdum propter majus commune bonum toleranda , et quantum fieri potest , corrigenda sunt ; quod sancte et prudenter Romana Ecclesia observat .

23. Ad sextam , de furtis . — Quæ vero in sexto membro de furtis dicuntur , falsæ calumniæ Protestantium sunt , neque aliud responsum merentur ; vixque illius sunt capaces , qui odium et indignationem contra indulgentias conceperunt , et illo ita execrati sunt , ut pias et voluntarias eleemosynas a furtis discernere non valeant . Nam in concessione indulgentiarum , nullus est quæstus non solum injustus , verum etiam nec indecens , nec resultans in utilitatem temporalem concedentis indulgentiam , sed est paterna providentia succurrenti communibus necessitatibus quorumdam fidelium per pia opera aliorum , eos inducendo ad opera satisfactoria pro peccatis , inter quæ sunt eleemosynæ , quibus alii indigentes juvari possunt . Sed de hac materia latius a nobis in proprio loco disputatum est .

24. Respondetur ad ea quæ rex ultimo contra Romanum Pontificem accumulat . — Ad ea tandem quæ rex tertio loco inducit ex c. 10 et 11 , ut suadeat in c. 6 sermonem esse de Antichristo , respondetur primo , ex verbis illis capitilis 10 , ubi *Angelus juravit per viventem in secula seculorum , quia tempus non erit amplius* , ad summum probari illas tribulationes et supplicia divina , quæ in c. 9 prædicuntur , pertinere ad ultima tempora mundi ; inde vero non necessario sequitur , inter plagas dicto c. 9 prænunciatas , contineri ultimam Antichristi persecutionem , satis est enim quod post illas proxime immineat . Nam quia homines per priores plagas nec poenitentiam agere , nec emendari voluerunt , tandem permittet Deus ultimam , post quam mundus consumetur . Unde comminatio illa , *quia tempus non erit amplius* , non oportet ut intelligatur implenda statim post præcedentes plagas , sed post ultimam , quæ jam instabit . Quod ex consequentibus verbis potest facile intelligi , additur enim : *Tempus non erit amplius , sed in diebus vocis septimi Angeli , cum cœperit tuba canere , consummabitur mysterium Dei* . At septimus Angelus non statim coepit tuba canere , sed in c. 11 prius præmittitur persecutio Antichristi , et prædicatio testium contra illum , et in fine additur : *Væ secundum abiit , id est , completum est , et ecce vœ tertium veniet cito* . At vœ secundum in-

¹ Tom. 3 , in tertia parte .

² Tom. 5 de Relig.

³ Lib. 49 de Civit. , c. 19 .

choatum fuerat in tuba sexti Angeli, nam primum vœ in quinta tuba fuerat consummatum, ut in c. 9 dictum fuerat. Ergo vœ secundum, quatenus in illo includitur Antichristi persecutio, non fuit completum, nec comprehensum totum in vocibus et prædictionibus sextæ tubæ, sed duraturum est post omnia quæ dicuntur capite 10, et in priori parte capititis 11, usque ad dicta verba : *Vœ secundum abiit, et ecce vœ tertium veniet cito, utique vœ ultimi judicii diei.* Unde statim subjungitur : *Et septimus Angelus tuba cecinit, etc.*

25. Cap. 9 Apocalypsis magis ad impios quam ad Ecclesiæ statum spectat. — Unde si quis verba et contextum Joannis attente consideret, facile intelliget priores plagas c. 9, ad universum mundum, et magis ad impios et infideles et iniquos, quam ad Ecclesiam et Sanctos pertinere, ut indicant verba illa capititis 9 : *Præceptum est illis ne lèderent.* Et infra : *Nisi tantum homines qui non habent signum Dei in frontibus suis; ultimam vero persecutionem Antichristi, quæ c. 11 et sequentibus prænunciatur, futuram esse contra Ecclesiam et contra Sanctos, ut patet ex initio c. 11.* Unde ulterius possumus distinguere duo tempora Antichristi, unum, in quo monarchiam expugnabit, et hoc tempus comprehendendi potest in visionibus capititis 9, nam sine dubio calamitates et plagas orbi inferet per bella, et exercitus suos, quibus totum orbem perturbabit ; et pro eo tempore non ita se ostendet Christo contrarium, sicut post obtentam monarchiam, imo ficte et simulate procedet, ut Sancti etiam antiquissimi docuerint. Aliud vero est tempus persecutionis Ecclesiæ, et de hac sine dubio incipit loqui Joannes in c. 11. Denique licet daremus regi, omnes prædictiones quintæ et sextæ tubæ pertinere ad personam Antichristi, et futuras esse in fine mundi, inde evidentius concluderemus, illas plagas nondum incepisse, neque illum Antichristum apparuisse, aut bella sua excitare coepisse, vel saltem non potuisse incipere ante mille annos, a temporibus Bonifacii III; jam enim mundus finitus fuisset, ut in superioribus demonstratum est.

CAPUT XIX.

IDEM EX CAP. 13 OSTENDITUR, ET OMNIA QUE REX EX ILLO DECEPIT REFELLUNTUR.

1. Periocha capitinis 13 Apocalypsis quoad priorem illius partem. — Tertiam velut descriptionem Antichristi colligit rex ex cap. 13 Apocalypsis, multumque laborat, lateque discurrevit, ut eam Pontifici Romano accommodet; sed revera in vanum laborat, et quo licentius loquitur, et pro suo arbitrio et affectu verba Scripturæ accommodat, eo magis errorem, in quo versatur, ostendit, et nolens impugnat. Prius vero quam illius discursus expendamus, summam illius capititis juxta proprium et litteralem sensum magis receptum ante oculos proponamus. Duas etenim habet partes. In priori, narrat Joannes se vidisse bestiam ascendenter de mari, habentem capita septem, et cornua decem, et super cornua ejus decem diademata, et super capita ejus nomina blasphemiae. De qua bestia dicit esse similem pardo, et habere pedes sicut ursi, et os sicut os leonis. Et draconem dedit illi totam virtutem suam, et unum ex capitibus ejus fuisse abscissum in mortem, et plagam mortis ejus curatam; et admiratam totam terram adorasse bestiam. Et postea describit Joannes potestatem datam huic bestiae ad loquendum magnas blasphemias, et ad persequendum Sanctos mensibus quadraginta duabus. Atque hæc fere sunt quæ in priori visione et parte illius capititis continentur.

2. De hac autem priori bestia quid sit seu repræsentet, et quo sensu accipienda sint quæ de plaga mortis illi data et curata, et de tempore persecutionis ejus dicuntur, in capite 6 diximus; ubi regis metaphoras impugnavimus. Et inde visionem illam ad Pontificem accommodari non posse, imo inde bestiam illam nondum apparuisse, convicimus. Nihilominus tamen necessarium est hoc loco refellere aliqua, quæ contumeliose per solam maladicentiam Pontifici accommodantur, quæque non nisi Protestantes et Scripturam adulterantes in ore regis posuerunt.

3. Quatuor bestiæ illius proprietates Romano Pontifici rex affingit. — Pungens igitur Romanum Pontificem, ait bestiam illam apparuisse pardo similem, *tum proper colorem,* quia respersa erat maculis, *id est, corruptelis contaminata, tum quod adulterinam quamdam imperandi rationem habet, specie spiritualem,*

revera secularem, quia super reges terræ extollitur. Secundo, ait hanc bestiam apparuisse etiam leopardo similem, *qua spuria est bellua, e leone pardoque mista*. Tertio, ait visam esse ursinis pedibus, ad vires ejus significandas, ore autem leonis, ad rapacitatem declarandam, sævamque naturam. Quarto, exponit aperius os suum ad blasphemias in Deum, et bellum Sanctis intulisse, quia *eam (ait) terram universam adorare oportet, quod nunquam vetus illa ethnica Roma a quoquam postulavit, quæ dignata non est, fidere coniuncto reges socios atque amicos comiter appellare*. Probat autem hanc adorationem dari Summo Pontifici ex more inaugurandi Pontificem, testemque ipsum Cardinalem Bellarminum appellat.

4. Respondetur ad primum. — Verumtamen in primo puncto, interpretatio ipsa seu analogia, ad veritatem et ad litteram comparata, apta non est, nec sufficiens, quia Antichristus non erit tantum corruptelis contaminatus, sed erit undique corruptissimus, nec usurpabit temporale regimen sub specie vel umbra spiritualis potestatis, sed primo, ac præcipue temporale imperium occupabit, et violenter usurpabit, et deinceps etiam divinitatem sibi arrogabit, ut parlim ex Daniele et Paulo aperte intelligitur, et in præcedenti capite tacitum est, et in sequenti iterum dicetur. Unde longe aliter Richard. Victor., l. 4 in Apocalyp., c. 4, per bestiam illam intelligens imperium ethnicum gentilium Ecclesiam persequentium, ait, *comparari pardo maculoso propter variam philosophorum assertionem, id est, propter variam superstitionem*. Ambrosius vero ibi *hypocrism Antichristi* in varietate colorum dicit designari: *Nam cum sit futurus homo nequissimus, variis virtutibus se decorabit, ut facilius stultos quosque decipiat*. Beda vero et Primasius, cum Tyconio, homil. 11, in maculis pardi aiunt repræsentari *gentium varietatem Antichristum sequentium*, sive quia erit multitudo collecta ex diversis populis, sive quia diversis hæresibus erit maculata, ut ait D. Anselmus. Unde si maculæ pardi vitia repræsentant, non quoscumque defectus, sed universa vitia in Antichristo futura designant. Accedit quod Antichristus propter velocitatem pardo comparatur, quia brevissimo tempore imperium consequetur, et omnia conculcabit. Sicut Danielis 7 Alexander Magnus, propter hanc causam per pardum repræsentatur, ut D. Hieronymus et alii exponunt. Item propter crudelitatem in humano sanguine effundendo. Nullus autem, nisi impudentissimus

sit, similes proprietates in Romano Pontifice audebit configere. Imo neque rex Angliae, neque tota hæreticorum versutia eas corruptelas, quas in Sede Apostolica effingunt, ostendere potuerunt; nam quæ ad doctrinam pertinent, corruptelæ non sunt, licet ab hominibus, contrariis erroribus et hæresibus corruptis, tales judicentur; quæ vero ad mores spectant, maxima ex parte ab eisdem Ecclesiæ hostibus ultra veritatem effictæ et exaggravatæ sunt; et si aliquæ hujusmodi in Prælatis Ecclesiæ inventæ aliquando sunt, ad personales et humanos defectus pertinent, qui sedem ipsam non maculant.

5. Respondetur ad secundum et tertium. — Unde quæ in secundo et tertio puncto de similitudine leopardi, et de pedibus ursinis dicuntur, non gravate accipimus, apte enim in verum Antichristum convenienti. Ex eisdem autem proprietatibus, earumque significatione convincitur, descriptionem illam non posse Pontifici accommodari. Cur enim Bonifacius III, velalius similis Pontifex ejus successor poterit spurius appellari, cum neque origine talis fuerit, nec electione, sed legitime creatus? Vel quæ rapacitas aut sæva natura in eis inventa est, ut ursinos pedes habere dicantur? Antichristus enim dicitur pedes ursinos habiturus, quia *pedibus suis omnia conculcabit*, ut dicitur Danielis 7. Quod autem quarto loco addit de adoratione Pontificis, ridiculum est; non enim adoratur ut Deus, sed ut supremus Ecclesiæ Prælatus, ac Vicarius Dei. Quid enim est adorationis exhibitio? Ait enim Paulus: *Qui bene præsunt presbyteri, duplice honore digni sunt*, 1 Timoth. 5; quid ergo mirum, quod is, qui toti Ecclesiæ præstet, magna veneratione dignus habeatur, præsertim cum in Christi honorem tota illa veneratio redundet?

6. Romæ ethnicæ et christiane imperia male comparantur. — Immerito autem comparat rex Romam ethnicam cum christiana; tantum enim distat imperium illius ab istius potestate, quantum terrestria a cœlestibus, corporalia ab spiritualibus, et temporalia ab æternis discrepant, ut in tertio libro abunde monstratum est. Romani ergo imperatores tantum temporales domini erant, limitatamque ditionem possidebant, ideoque alienam ditionum reges non ut subditos, sed ut socios comiter tractabant. Romani autem Pontifices spirituales Prælati ac reges sunt, totumque mundum pro territorio, omnesque oves Christi pro grege habent, et ideo reges om-

nes Christianos subditos appellare possunt; et nihilominus eos (nisi hæretici vel schismatici sint) non solum comiter, sed etiam humanissime filios, et interdum etiam dominos appellare non dèdignantur. Imo interdum tanta submissione animi id fecerunt, ut eorum verbis abutantur rex et Protestantes ad eos imperatoribus subjiciendos, sicut de Gregorio Papa in tertio libro notavimus. Atque hæc sunt satis de prima bestia.

7. *Periocha secundie partis c. 13 Apocalyp.* — In secunda parte ejusdem capituli 13, narrat Joannes *vidisse aliam bestiam ascendentem de terra, quæ habet cornua duo similia agni, et loquebatur sicut draco*, de qua multa dicit. Primum, fecisse ut omnes habitantes in terra adorarent bestiam primam. Secundo, datum esse illi ut ficeret *signa magna*, et in particulari ita *ut ignem ficeret de calo descendere in terram in conspectu hominum*. Tertio, per hæc signa *seduxisse habitantes in terra, ut faciant imaginem prioris bestiæ*. Quarto, *datum esse illi, ut daret spiritum imagini bestiæ, et ut loquatur imago bestiæ, et faciat ut quicumque non adoraverint imaginem bestiæ, occidentur*. Quinto, quod *faciet omnes pusillos, et magnos, et divites, et pauperes, et liberos, et servos, habere characterem bestiæ in dextera manu sua aut in frontibus suis, ut nemo possit vendere, neque emere, nisi qui habet characterem aut nomen bestiæ, numerum nominis ejus*. Sexto, additur mysterium numeri nominis ejus his verbis: *Numerus enim hominis est, et numerus ejus sexenti sexaginta sex*. Quæ omnia adeo sunt obscura, ut vix humano ingenio conjectari possint, nedum comprehendendi. Et ut recte annotavit Cardinalis Bellarminus, signum evidens est non esse impleta, quia hodie tam sunt obscura et ænigmatica, sicut quando primum scripta fuerunt; prophetæ autem quæ per ænigmata fiunt, licet antea sint obscuræ, saltem quando implentur, intelliguntur et claræ fiunt, alias inutiles essent; cum ergo hæc perinde obscura sint ac antea erant, signum est non esse impleta. Et nihilominus rex Angliae suo more ita multa accommodat, sicut vel opinioni suæ, vel ad detrahendum Romanæ Sedi putat esse accommodata. Prius vero quam illi respondeamus, proprium et literalem sensum hujus visionis proponemus, ut comparatione illius error fictæ interpretationis evidentius appareat.

8. *Hæc posterior bestia Antichristum ejusque emissarios significat.* — Hæc ergo posterior bestia vel generatim repræsentat Anti-

christi pseudoprophetas et prædicatores, quos ipse ad suam divinitatem suadendam, et Sanctos persecuendos mittet, ut exponunt ibi Primasi., Beda, Anselmus et alii, et sentit Gregorius, 13 Moral., c. 26, alias 36, vel certe significat aliquem ex illis insignem et excellentem magum, et potentem etiam viribus et exercitu, qui per signa seducendo, et per potentiam cogendo, ad Antichristum adorandum homines convertat. Sic Irenæus, lib. 5, cap. 28, postquam priorem hujus capituli visionem retulerat, de haec posteriori subiungit: *Post deinde, et de armigerō ejus quem et pseudoprophetam vocat, loquebatur (inquit) quasi draco, et potestatem primæ bestiæ omnem faciebat ei, in conspectu ejus*. Eamdem sententiam comprobat And. Cæsar., allegans etiam Irenæum, suo c. 37. Aretas vero, suo etiam capit. 37, licet in principio videatur per hanc etiam posteriorem bestiam Antichristum interpretari, postea magis rem declarans, vocat hunc *præcursorē Antichristi*, et illos distinguit, comparans cum Joanne Baptista et Christo. Victorin. etiam in singulari intellegit falsum Prophetam, qui facturus est portenta et signa mendacia ante Antichristum. Et hanc nunc frequentius sequuntur erudit Scriptores, quos refert et sequitur Malvenda, lib. 8 de Antich., c. 19. Ambrosius vero in Apoc. sub disjunctione ait, hanc bestiam esse aut multos prædicatores Antichristi, vel aliquem deteriorem cæteris.

9. *Loquitur etiam Joannes de primario aliquo Antichristi adjutore.* — Sed licet verum sit sub illo propheta falso, per antonomasiā nominato, alios adumbrari, nihilominus negari non potest quin de singulari aliquo homine insigni fauore Antichristi et hominum deceptore Joannes loquatur, tum quia contextus ipse sincere spectatus id satis indicat; tum etiam quia in c. 19 evidenter id ostendit idem Joannes, dicens: *Apprehensa est bestia, et cum ea pseudopropheta, qui fecit signa coram ipso, quibus seduxit eos qui acceperunt characterem bestiæ, et qui adoraverunt imaginem ejus; viri missi sunt hi duo in stagnum ignis ardantis sulphure*. Ubi evidenter describit eumdem pseudoprophetam, quem sub nomine bestiæ de terra ascendere viderat, et de illo ut de singulari homine aequæ ac de Antichristo loquitur, et tanquam duos homines speciali modo damnatos numerat, eosque a cæteris sectatoribus Antichristi distinguit, subiungens: *Et cæteri occisi sunt in gladio sedentis super equum, etc.* Non est ergo du-

bium quin per illam bestiam secundam particularis homo, singularisque Antichristi prædicator significetur, cuius duæ præcipue proprietates per duas bestiæ conditiones designantur. Dicitur enim habere cornua tanquam agni propter hypocrismum; ostendet enim se mansuetum, et erit crudelissimus persecutor, vel ostendet se tanquam verum Christum prædicans, loquetur autem ut draco, quia Antichristum prædicabit, motus et actus a dracone, qui priori *bestie dedit totum virtutem suam et potestatem*. Atque ita duas illas metaphoricas proprietates exposuerunt Irenæus, Andr. Aret., et alii supra allegati; et Ticon., alias August., Homil. 44 in Apoc., licet illas omnibus hæreticis accommodet. Idemque sensit Gregorius loco supra citato, easdem tribuendo quasi per participationem omnibus falsis prædictoribus Antichristi.

10. Pseudopropheta ille curaturus est, ut Antichristus velut Deus adoretur. — Cætera vero quæ de hoc falso propheta Joannes prædicit, licet Patres et expositores Catholici obscura et difficulta intellectu esse fateantur, omnes tamen, qui eorum litteralem sensum investigant, in eis proprietatem verborum, quoad fieri potest, servare student. Itaque, cum dicit facturam esse bestiam illam, ut *omnes habitatores terræ primam adorent*, id de divina adoratione et vera latria intelligunt, hac enim ipse Antichristus cupiet adorari, ut in c. 17 ex Scriptura et Patribus ostensum est. Item cum dicit *facturum signa*, de sensibilibus miraculis fictis et mendacibus prodigiis verba exponunt, juxta verba Christi, Matth. 24: *Surgent pseudochristi et pseudoprophetae, et dabunt signa magna et prodigia.* Nam sicut quoad pseudochristos per antonomasiam implebuntur hæc verba in Antichristo, ita quoad pseudoprophetas in hoc Antichristi præcursori implenda esse Joannes sentit. Christum autem loqui de signis externis apparentibus, et sensus illudentibus, nemo unquam dubitavit. Unde cum ulterius Joannes ait facturam illam secundam bestiam, *ut ignis de cælo descendat*, de vero locali descensu, et de vero igne, vel saltem de corpore sensibili habente speciem tanquam ignis, omnes etiam interpretantur. Quia hoc et est consequens ad priorem interpretationem signorum in generali, et est consentaneum proprietati verborum, et nulla est necessitas alias metaphoras configendi, præsertim cum Joannes dicat descensurum ignem *in conspectu hominum*. Similiter, quod tertio loco addit Joannes de

imagine prioris bestiæ, de propria sensibili imagine vel statua Antichristi intelligitur, quam facient credentes in eum, et in templis et fortasse in Hierosolymitano eam colloca- bunt, ut ipsa adoretur, et Antichristus in ea tanquam verus Deus. Et cum eadem proprie- tate intelligitur, hunc pseudoprophetam da- turum spiritum illi imagini, ut loquatur; nam per pactum cum dæmone hoc facilime fieri potest, sicut in sculptilibus et idolis gentium immundos spiritus loqui solitos fuisse, in historiis notissimum est.

11. Character bestiæ erit signum quo Antichristi fautores palam agnoscentur. — De charactere autem Antichristi, ejusque in manibus vel fronte impressione, omnes etiam in hoc conveniunt, quod sit futurum signum sensibile hominibus, accommodatum ad exter- nam suæ religionis professionem, et for- tas tanquam irsigne quoddam apostasie, vel discessionis a christiana religione, et ad sectæ anticristianæ aggregationem; quamvis in particulari nemo divinare possit qualis character ille futurus sit. Nam illud prius veritas et proprietas verborum Joannis requirit; hoc autem posterius per illa non explicatur, nec in aliis locis Scripturæ revelatum est, nec ra- tione investigari potest. Denique de nomine bestiæ, omnes etiam docent tale futurum esse, ut ex litteris constet, quæ, ad rationem numerorum juxta morem græcæ linguæ redactis, numerum 666 contineant. Quia vero innume- ris modis possunt græcae litteræ ita componi, ut illum numerum reddant, addunt dicti ex- positores, sciri non posse quale futurum sit Antichristi nomen, donec appareat, et tunc ex effectu cognoscatur prophetæ sensus et veritas. Nam, licet nunc contingat nomen ali- cujus constare ex litteris, quæ secundum græ- cum idioma illum numerum reddant, ut de Mahometo vel Luthero aliqui ostendere co- nati sunt, illud non est sufficiens Antichristi signum, si alia desint, quia est valde ambi- guum et æquivocum, et ideo necesse est ut cum aliis conjugatur.

12. Prædicta Patrum consensu firmantur. — *De imagine.* — Hanc autem brevem para- phrasim seu expositionem litteralem verbo- rum Joannis sumo ex auctoribus proxime al- legalis; Irenæus enim, dicto cap. 28, de hoc pseudopropheta dicit, quod faciet signa magica operatione. Et ibidem adjungit cætera verba Joannis, simpliciterque sine alia inter- pretatione illa proprie intelligit. In cap. vero 30 late docet quod de numero nominis dixi-

mus. Victorin. etiam in Apocalyps., circa signum ignis, ait : *Hæc magi per Angelos refugas et hodie faciunt. Et addit : Faciet etiam ut imago aurea Antichristo in templo Jerosolymis ponatur, et intret Angelus refuga, et inde voces et sortes reddat.* Et de nomine et nota characteris eodem modo sentit. Idem fere habet Aret., suo cap. 27, ubi de igne aperte dicit, descensurum, ita ut videatur, *intuentium oculos fascinando*; et de charactere ait, futurum esse *perniciosi nominis insculpturam*, et dannum esse *in signum, quo possint vel non possint homines negotiari*, supponens illud futurum esse sensibile. Et Andr., cap. 27 : *Quidquid (inquit) Pseudochristi præcursor ad hominum deceptionem facturus est, hoc totum per præstigias et incantationes facturus est, ut Antichristus testimonium habeat a viro qui tanta miracula patrariet.* Et infra: *Non est mirum aut novum, si in oculis hominum ignem e cælo descendere faciat impostor.* Et adducit exemplum de igne virtute diaboli incenso, vel superne dilapso ad Jobi armentum subito absumentum¹. Postea vero de imagine propria et loquela ejus alia verba interpretatur, exemplisque similium præstigarum dæmonum confirmat. De charactere item loquitur tanquam de nota sensibili, intelligitque proprie hominibus imprimendum fore, ut signum necessarium ad emendum et vendendum etiam res necessarias, *ut saltem (inquit) ob rerum ad vitam necessiarum penuriam ad violentam mortem adigat*, utique illos qui characterem illum recusaverint.

13. *Ne cruci locus sit, in frontibus characterem Antichristi pseudopropheta ille imprimit.*—Ac tandem cap. 38, quæ de nomine Antichristi diximus, tradit, et auctoritate Hyppoliti confirmat: *Dabit characterem in dextra manu, et in fronte, ne quis dextra sua manu pretiosam illam Crucem pingat in fronte.* Inferius autem sentit characterem illum futurum esse nomen ipsius Antichristi sigillo sensibiliter impressum in fronte vel manu. De illo autem nomine negat sciri posse quale futurum sit. Similiter de charactere Antichristi loquitur Ephrem, tract. de Antichristo, metro seu § 2: *In dexteram manum seu frontem insculpturus est homini characterem hunc suum impium, ne facultas sit homini se signandi signo Christi.* Et in sequenti metro signa et falsa prodigia similiter de externis sensibilibus præstigiis exponit. Ac tandem

in metro ultimo idem repetit de charactere, sentiens futurum esse sensibile signum, *quod Christi adversarii pro cruce Salvatoris assument.* Indistincte autem de his loquitur, prout ab Antichristo, vel ab ejus pseudopropheta facienda sunt, omniaque Antichristo tribuere videtur. Denique Primasius, Beda, Rupert. et alii in Apocalypsim, imo et moderni omnes in his quæ diximus consentiunt, licet in explicando charactere et nomine Antichristi varias et inter se dissentientes sententias tradant, quæ varietas nihil nostræ intentioni obest, ideoque necesse non est illam referre aut expendere, unusque pro omnibus videri potest Malvenda, lib. 8 de Antichristo, c. 18 et 19.

14. *Metaphoricæ regis expositiones litterali convincuntur.*—Superest ut cum hoc simplici Scripturæ sensu mysticas et metaphoricas regis expositiones, seu ad maledicendum accommodationes, conferamus. Ille enim per hanc bestiam secundam, Apostolicam Ecclesiam Pontifici Romano parentem, quam ipse more impiorum Protestantum *Apostaticam* appellat, interpretatur. Et nihilominus de illa subjungit: *Cujus firmior origo est et stabilior, ut quæ visibiliter veræ Ecclesiæ succedat.* In quibus verbis, rei veritate coactus, vel non advertens quid diceret, Romanam Ecclesiam veram et Catholicam esse professus est. Nam illa est vera Ecclesia, quæ veræ Ecclesiæ antiquiori visibiliter succedit, ut in primo libro ostensum est. Unde illa comparatio, qua hæc Ecclesia dicitur *firmior et stabilior*, si ad synagogas Satanæ et congregaciones Protestantium seu Apostatarum fiat, recte et verissime facta est; si vero fiat ad Apostolicam Sedem, non recte fit per excessum, sed per æqualitatem fieri deberet. Nam vera Ecclesia non potest a petra separari, neque e converso, ideoque tam firma et stabilis est Petri successio, quam est certa veræ ac visibilis Ecclesiæ duratio; utraque vero est tam firma, quam est certum verbum Christi: *Portæ inferi non prævalebunt adversus eam*, Matth. 16.

15. *Bestia singularem hominem proprio significat.*—Quod vero ad interpretationem bestiæ spectat, satis a nobis ostensum est, in proprio sensu significare unum quemdam singularem hominem. Concedimus autem mystice posse significare congregationem quamecumque impiorum, hæreticorum et Apostatarum, sequentium et prædieantium Antichristum, sive generaliter et typice dictum, sicut ex Tyconio retulimus, per hanc

¹ Job. 4.

bestiam significari omnes hæreticorum sectas, et ministros, sive singularem et proprium Antichristum prædicantium, ut multi Catholici exposuerunt. Sic ergo verum est bestiam illam esse Apostaticam congregacionem. Hæc autem Apostatica congregatio nunc multiplex est; omnis enim synagoga Satanæ sub nomine Christiano collecta apostatica congregatio est, talisque est omnis Lutherañorum, Calvinistarum, Puritanorum et Protestantium congregatio, similemque esse Anglicanam pseudoecclesiam, in primo libro ex ejus statu et lapsu evidenter ostensum est.

16. *Romana Ecclesia non habet agni cornua, id est, hypocrisim. — Nec ut draco errores docet aut unquam docuit.* — Ut autem Romanam Ecclesiam per illam bestiam repræsentari rex ostendat, dicit imprimis habere *cornua similia agni, quia Christi sponsum refert, et sibi propugnatorem ostendit.* At non per hypocrisim, sed per veram fidem et adoracionem Christi, ejusque imitationem hæc refert, in quo multum ab illa bestia differt. Adjungit: *Revera tamen loquitur sicut draco, quia damnabiles diabolicasque doctrinas docet.* At hoc nunquam ab ipso ostensum est, a nobis autem probatum sufficierent est in libro primo, testimonium hoc non solum falsum, sed etiam hæreticum esse, quia vera et visibilis Ecclesia Christi non potest a fide cadere, cum sit columna et firmamentum veritatis, propter promissionem Christi dicentis: *Ego vobiscum sum usque ad consummationem sæculi;* et: *Portæ inferi non prævalebunt adversus eam.* Et in lib. 2, cap. 3, non solum Ecclesiam hanc ab omnibus erroribus, quos in illa rex fingit, vindicavimus, sed etiam, propter contrarias hæreses, Angliam, quatenus sub rege suo nunc militat, apostaticam et schismaticam esse convicimus.

17. *Retorquentur hæreticorum jacula in ipsis.* — Quocirca, priusquam ad alia progrediār, lectorem admonere libet, ut consideret quanto majori et veriori fundamento, regis illa metaphora in ipsum suumque miserandum regnum possit retorqueri. Cur enim non dicemus bestiam illam priorem esse Henricum VIII, et successores ejus illum imitantes, et super capita sua nomen habentes blasphemiae, utique *capitis Ecclesiæ*, non solum in temporalibus, sed etiam in spiritualibus supremi? Cur item non dicetur Henricus fuisse maculosus, ut pardus, cum fidei professionem et doctrinam, qua pollebat, turpissimis

libidinis, schismatis ac tandem hæresis malulis foedaverit? Quin etiam velocitate et ferocitate pardum imitari visus est: nam brevissimo tempore totum fere regnum apostatare fecit, et egregios viros in fide constantes atrociter necavit. Denique multo verius dicitur rex Angliæ adulterina imperandi ratione sub specie temporalis potestatis spiritualem usurpare, et indebitum cultum adorationemque ambire, dum tanquam suæ Ecclesiæ caput vult recognosci, obediri et honorari. Et ad hunc modum possunt cætera facile accommodari. Similique modo dicemus, alteram bestiam esse Anglicanam Ecclesiam, a vera fide lapsam, regem ut spirituale caput suum venerantem, et infinita verba blasphemiae in veram Dei Ecclesiam Catholicam, Christique Vicarium proferentem; vel certe bestiam illam secundam dicemus esse ministrorum falsorumque prophetarum regi applaudentium gregem, seducentem ibi habitantes, ut priorem bestiam adorent, eam ut caput Ecclesiæ recognoscendo. Hæc ergo et similia et facile cogitari possunt, et majori cum fundamento dici, tum quia vera sunt et notissima in universo orbe; tum quia licet rex Angliæ non sit Antichristus, inter ejus typos et præcursorum juste numerari potest, cum Christum in sua Ecclesia et Vicario suo persequatur, quod cum factis exequi non possit, verbis et probris efficere conatur.

18. *Signa fieri ad firmandam Pontificum auctoritatem rex Jacobus ait.* — Unde ulterius rex progreditur, et quod Joannes dicit de signis et prodigiis ab hac secunda bestia faciendis, ut gentes seducat, et ad priorem adrandam trahat, ad Ecclesiæ Catholicæ miracula accommodat, quæ falsa et portenta mendacia esse, et ad conciliandam Pontifici auctoritatem et potestatem fieri affirmat. Quæcum sine probatione contra omnem divinam et humanam auctoritatem ac fidem dicantur, contemnenda potius quam refellenda videbantur. Breviter tamen interrogare libet an credant, in Ecclesia Christi veras potuisse fieri virtutes, ac vera miracula, post sexcentesimum sextum annum, necne. Si negant fieri potuisse, Christi promissiones elidunt, eisque pro suo arbitrio terminum præfiniunt. Christus enim indefinite dixit, Marc. ult.: *Signa autem eos qui crediderint, hæc sequentur, in nomine meo daemonia ejicient,* etc. Et Matth. 17: *Si habueritis fidem, sicut granum synapis,* etc., nihil impossibile erit vobis. Et Joan. 14: *Qui credit in me, opera, quæ ego*

facio, et ipse faciet, et majora horum faciet.
Hæ ergo promissiones non possunt ad certum tempus limitari, alioqui posset quispiam dicere, solos Apostolos vera miracula facere potuisse, vel quidpiam simile; quod absurdissimum est. Ergo non pro solis prioribus Ecclesiæ seculis, sed pro omni ævo concessit Christus Ecclesiæ suæ, ut temporibus opportunitis talia vera signa in ea fierent.

19. Dicent, promissiones has factas esse fidei, et ideo potestatem illam durasse in Ecclesia, quamdiu in illa duravit vera fides; postquam vero illa corrupta est, cessasse, et falsa miracula incœpisse. Hoc autem est in aliud errorum barathrum incidere; nam si Ecclesia vera fide carere incœpit, periiit Ecclesia, contra verbum Christi: *Portæ inferi non prævalebunt adversus eam*¹. Dicent periisse veram Ecclesiam visibilem; sed jam satis ostensum est Christi veram Ecclesiam visibilem esse, eique Christum perpetuitatem usque ad finem promisisse. Præterquam quod signa et miracula sensibilia esse oportet, atque ideo non nisi ab Ecclesia visibili vera miracula fiunt; illi ergo factæ sunt Christi promissiones, et in ea semper durabit potestas a Christo promissa.

20. *Miracula olim a pluribus Sanctis facta sunt.* — Si ergo potestatem negare non possunt, cur negant esse vera miracula, quæ his temporibus in Ecclesia facta sunt? Non enim pauciora signa veritatis in eis, quam in illis quæ in antiqua Ecclesia fiebant, conspiciuntur. Nam imprimis facta sunt per viros sanctissimos, Benedictum, Bernardum, Franciscum, Antonium, et alios similes. Deinde frequenter facta sunt ad fidem persuadendam et in novis provinciis introducendam, ut de Anglia refert, lib. 9, Gregorius, fere proximus Bonifacii III antecessor; et similia fuisse postea in eadem provincia facta in ejusdem fidei confirmationem, auctor est Beda, lib. 5 Histor. c. 13; et Annales ecclesiastici referunt, cooperatione similium miraculorum in Flandria, Hollandia, aliisque provinciis, post tempora Bonifacii fuisse fidem introductam. Præterea, eadem veritatis indicia in posterioribus miraculis quæ in prioribus reperiuntur, nimirum, in miraculo suscitandi mortuum, evidentia praecedentis cadaveris mortui, et vera vivificatio, temporis duratione, et pluribus actionibus vitæ, et publica conversatione confirmata. Denique non minori fide digna

historia hæc quam illa miracula esse probantur; ergo temere et impie omnia falsa judicantur.

21. *Miracula fiunt ad Christi gloriam vel fidei confirmationem, non ad Pontificis auctoritatem primario.* — Quod autem rex dicit, hæc miracula Ecclesiæ facta esse ad conferendam et extollendam Pontificis potestatem, non ita est: nam ordinarie fiunt vel in veræ fidei confirmationem et propagationem, vel in Christi gloriam et honorem; sæpe etiam sunt effectus veræ et firmæ fidei, cui Christus promisit, Matth. 17: *Si habueritis fidem sicut granum synapis*, etc. Aliquando fiunt ex Dei misericordia, volentis talia beneficia indigenibus et potentibus miraculose concedere; aliquando ad ostensionem sanctitatis alicujus personæ, quam Deus ad aliorum exemplum et consolationem manifestare vult. Dico autem ordinarie hoc ita esse, quia cum articulus de primatu Pontificis ad fidei dogmata pertineat, et ad veræ fidei et Ecclesiæ confirmationem notitia ejus maxime necessaria sit, etiam in illius veritatis confirmationem potuerunt vera miracula fieri, quoties opportuna vel necessaria juxta divinæ providentiae dispositionem fuerint. Ac denique, quamvis vera miracula non semper propter illum finem fiant, nihilo minus quatenus fiunt a ministris Ecclesiæ Pontifici obedientibus, et ejus auctoritate prædicantibus, satis eamdem veritatem de Primatu ejus confirmant. Quis ergo non videat quam sit execranda calumnia, miracula Catholicæ Ecclesiæ cum signis Antichristianæ bestiæ comparare?

22. *Excommunicationes a Pontificibus ex cassas, ignem esse de cælo, rex Jacobus commentatur.* — Quia vero Joannes inter signa illius bestiæ unum peculiare designavit, dicens: *Ut etiam ignem faceret de cælo descendere in terram in conspectu hominum*, egregiam profecto his verbis rex affinxit interpretationem, dicens: *Nempe fulmen excommunicationis, cuius tanta vis est, ut thronis exturbare principes valeat, adeo ut omnes pro hæreticis occidendi sint et exurendi, qui bestie nolunt imaginem adorare, hoc est, summam ejus potestatem nullis limitibus circumscriptam.* In quibus duplex metaphora indicatur, quæ si in allegorico sensu affertur, parvi momenti est ad persuadendum, eadem enim facilitate qua fingitur, contemnitur, quia solum ad maledicendum a Protestantibus excogitata est; si vero sensus ille ut litteralis proponatur, valde ridiculus est, et intentioni Spiritus

¹ Matth. 16.

Sancti, ipsorumque Protestantium dictis repugnans. Utrumque breviter ostendo.

23. Ignis ille apud D. Joannem non significat excommunicationem. — Prima enim metaphora est, quia *descendere ignem de cœlo*, per metaphoram dicitur esse excommunicationem fulminare. At hæc metaphora imprimis nova est, sine fundamento in Scriptura, vel Patribus, aut expositoribus, aut commun modo loquendi. Quis autem credat Joannem usurpasse verba in sola illa metaphorica significatione, quam sibi nuper Protestantes pro sua libidine, et solum ad irridendum confinxerunt? Deinde Joannes illud ponit ut signum novum, singulare, et admiratione dignum; at fulminare excommunicationem non est novum, nec singulare, cum etiam ab ipsis hæreticis fiat, unde nullam habet admiracionem, cum quotidianum sit. Imo, si illud est antichristi signum, profecto ante Bonifacium III cœpit Antichristianismus. Nam prius Innocentius I contra imperatorem excommunicationem fulminavit. Denique bestia illa faciet ignem de cœlo descendere, dæmonis arte et potestate; fulminatio autem excommunicationis fit potestate a Christo concessa, et in virtute verborum ejus: *Si Ecclesiam non audierit*, etc., Matt. 17. Ergo Joannes non de hoc signo loquitur, nec metaphora est verisimilis.

24. Instantia. — Solutio. — Dicit forte rex hæc vera esse de justa et ordinaria excommunicatione, se autem loqui de fulmine illius excommunicationis, *cujus tanta est vis, ut thronis exturbare principes valeat*. Sed contra primo, quia etiam talis excommunicatio potest esse justa et legitima potestate facta, ut supra ostensum est. Quanquam revera improprie dicitur excommunicatio ipsa exturbare a throno; nam, licet illi duo effectus tanquam duæ pœnæ ab eadem potestate procedant, et simul imponantur, distincti sunt. Nunc autem ut regi morem geramus, tanquam de uno loquimur. Itaque illud etiam fulmen vera et cœlesti potestate fit, et non est signum mendax, sed verum, ut probavimus; est ergo repugnans cum metaphora. Secundo, hoc signum, id est, hæc excommunicatio non fulminatur seu exhibetur in Ecclesia a prædicatoribus vel fidelibus obedientibus Pontifici, sed a solo Pontifice, et ita secundum regiam accommodationem non exhibetur a posteriori bestia, sed a priori; at signum illud faciendi descendere ignem de cœlo, non tribuitur a Joanne priori bestiæ,

sed specialiter secundæ; ergo talis interpretatio bestias confundit.

25. Dum Pontifex colitur, imago bestiæ non adoratur. — Altera metaphora regis versatur circa *imaginem bestiæ*, per quam rex summam Papæ potestatem significari vult. Hæc autem metaphora eisdem fere argumentis facile refellitur, tum quia nullum fundamentum auctoritatis, rationis aut probationis habet; tum quia recognoscere ac venerari hanc summam Pontificis potestatem non est novum in Ecclesia Christi, sed ante Bonifacium omnes præcedentes Pontifices eam imaginem induerunt, illaque potestate usi sunt, omnesque vere fideles illi paruerunt, ut in lib. 3 fuse probatum est. Ultra hæc vero, pugnant cum metaphora verba illa Apoc. 13: *Dicens habitantibus in terra, ut faciant imaginem bestiæ*. Quis enim Papistarum (ut isti loquuntur) aut verius Catholicorum docuit unquam fideles, ut facerent vel conferrent potestatem Pontifici, cum potius constanter doceamus solum Christum illam conferre? Non est ergo illa *imago* Pontificia potestas, sed aliquid quod arte et manibus hominum fieri potest. Nec dicere potest rex nihil aliud esse facere imaginem, quam potestatem recognoscere et confiteri, nam expresse Joannes duo distinguit, facere imaginem et adorare illam; at vero respectu potestatis, recognoscere potestatem, est venerari illam; ergo aliud est facere imaginem; unde fere evidens est, in illis verbis, *faciendi imaginem*, nullam esse metaphoram, ut supra dixi. Quod etiam valde persuadent sequentia verba: *Et datum est illi ut daret spiritum imaginis bestiæ, et ut loquatur imago bestiæ*. Hæc enim aperte ostendunt sermonem esse de imagine materiali et sensibili. Quomodo enim fingi potest Ecclesiam dare spiritum potestati Pontificis, ut loqui possit, vel quippiam simile facere?

26. Verba Apocalypsis expenduntur. — Tandem in illis verbis considero duplex signum: unum, faciendi descendere ignem de cœlo, et hoc signum dicitur secunda bestia facere, non per coactionem, sed per seductionem, ut inducat habitantes in terra ad bestiam primam ejusque imaginem adorandam, ut patet ex verbis illis: *Et seduxit habitantes in terra, propter signa quæ data sunt illi facere in conspectu bestiæ*. At vero fulmen excommunicationis non pronunciatur ad inducendos homines per seductionem, sed per vim et coactionem, quæ major fit, si cum excommunicatione deturbatio a regno conjugatur. Ergo non

quadrat metaphora excommunicationis cum tali signo. Aliud denique signum, scilicet, dare spiritum imagini bestiæ, et facere ut loquatur, licet etiam sit ad seducendum, tamen ad coactionem progreditur, additur enim : *Et faciat ut quicumque non adoraverint imaginem bestiæ, occidantur.* Et hic etiam non potest accommodari metaphora ; nam Ecclesia non dat spiritum nec loquela Pontifici, ut potestas ejus ad occidendos rebelles extendetur, sed potius ipse hanc potestatem suis ministris committit; est ergo ille Scripturæ abusus, non interpretatio.

27. *Characterem bestiæ obedientiam Pontifici esse rex configit.* — *Joannes loquitur de signo permanente, non de pura professione.* — Deinde ultra procedit rex ad characterem Antichristi Pontifici accommodandum, dicitque characterem bestiæ esse professionem obedientiæ, quæ Summo Pontifici fit. At Paulus, Hebr. 3, cum monuit fideles : *Obedite prepositis vestris*, non censuit professionem ecclesiasticæ et christianæ obedientiæ esse Antichristi characterem, sed Christi. Veriorique ratione dicere possemus, juramentum fidelitatis, quo rex premit sui regni Catholicos, esse characterem Antichristi, quandoquidem sub specie professionis civilis obedientiæ sibi debitæ, Vicarii Christi obedientiam negare compellit. Præterea, ultra errorem, in quo accommodatio fundatur, repugnat Joannis verbis. Primo, quia vel per obedientiæ professionem intelligitur solum modus ipse vivendi sub obedientia Pontificis, vel intelligitur aliqua specialis formula hanc obedientiam profitandi. Prior sensus non est juxta mentem Joannis, quia expresse loquitur de aliquo signo gestando a sectatoribus Antichristi, quo protestentur sectam et obedientiam ejus, ut supra visum est, et ex litera ipsa evidenter constat. Si autem per professionem intelligatur peculiaris forma promittendi obedientiam Pontifici, non quadrat cum verbis Joannis. Primo, quia Joannes ait, *omnes pusillos et magnos, divites et pauperes, liberos et servos, gestaturos esse characterem bestiæ*; at vero specialis professio obedientiæ ad Pontificem non exigitur ab omnibus fidelibus pusillis et magnis, sed a Pastoribus, vel Doctoribus ecclesiasticis, aliisque in simili gradu constitutis.

28. *Nemo sine illo ad contractus humanos admittetur.* — Secundo, character Antichristi ita esse debet communis et familiaris omnibus, ut sine illo nullus permittatur emere aut

vendere, etiam ad vitam necessaria. Unde notant Patres, in eum finem esse imprimendum, ut vel propter vitæ sustentationem omnes homines illum suscipere cogantur, sicut nunc in Anglia coguntur Catholicæ ecclesiæ hæreticorum adire, vel juramentum fidelitatis profiteri, ne bonis ad vitam necessariis, vel vita ipsa priventur ; at in Romana Ecclesia, professio obedientiæ ad Pontificem non exigitur ut homines possint emere et vendere, nec sub coactione amittendi necessaria ad vitam, sed in specialibus occasionibus, ubi ad securitatem doctrinæ, gradus, vel munera suscipiendo judicatur conveniens, postulatur ; nulla est ergo hujus characteris ad illam professionem comparatio. Tertio, character Antichristi futurum est signum aliquod permanens manibus gestatum, vel fronti impressum, quod videri possit, ut homines ad dictos contractus admittantur ; professio autem obedientiæ est signum (ut ita dicam) transiens, quod in susceptione alicujus muneris semel exhibetur, postea vero nec in manibus, nec in fronte gestatur. Est ergo frivola characteris accommodatio.

29. *Opinio regis Jacobi de numero nominis Antichristi.* — Pervenit tandem ad numerum nominis Antichristi, et duas expositiones adhibet. Una est, ut ille numerus non sit nominis, sed personæ Antichristi, id est, ut necessarium non sit in litteris nominis ejus illum numerum contineri, sed in ipsa persona, quia intra annos illius numeri, scilicet 666, venturus fuit Antichristus. Quam expositionem colligit ex eo, quod idem numerus, qui prius dictus fuerat *nummerus nominis ejus*, postea dicitur *nummerus bestiæ*, ibi : *Qui habet intellectum, computet numerum bestiæ*, et statim additur : *Numerus enim hominis est*, Apoc.

13. Et in his posterioribus verbis videtur rex per hominem, Christum Dominum interpretari ; ait enim juxta hanc expositionem diei numerum hominis, quia est *nummerus annorum Domini*¹. Sic autem ait impletam esse prophetiam in Bonifacio III, qui primus (ait) se nominavit universalem Archiepiscopum, quo titulo *S. Gregorius Antichristum fore cognoscendum prædixerat*. Atque illa quidem expositione nova non est ; nam Joan. Annus et quidam alii illa usi sunt, ut ostenderet Mahometum fuisse Antichristum. Et licet illam regi permitteremus, nihil referret, ut statim dicam.

¹ Lib. 6, ep. c. 30.

30. Negari non potest numerum illum esse nominis Antichristi. — Negari autem non potest Joannem prædixisse numerum illum 666, futurum esse in nomine Antichristi; expresse enim dixit: *Aut numerum nominis ejus, id est contentum in litteris nominis ejus, et ita intellexerunt illa verba omnes interpretes.* Hoc ergo negari non potest, licet non repugnet per illum eumdem numerum nominis mystice indicari aliquam proprietatem ad personam pertinentem. Unde si cum veritate aliarum prophetiarum vel historiæ posset consistere, ut per illum numerum significaretur tempus ortus Antichristi secundum numerum annorum Domini, vel tempus durationis throni ejus, ut alii de Mahometo dixerunt, hoc quidem cum verbis Joannis non repugnaret. Tamen illud non ita esse, in Mahometo reipsa monstratum est, ut ostendit Pereira, disp. 5 de Antichristo. De proprio autem Antichristo, constat ex aliis prophetiis, juxta quas nec tam cito venire potuit, nec thronus ejus tanto tempore durabit, ut supra ostensum est.

31. Numerus ille non est temporis adventus Antichristi. — Juxta Protestantium autem accommodationem, clarum est non posse referri numerum illum ad tempus durationis Antichristi, quia opinione illorum jam duravit plus quam mille annis. Propterea ergo rex studuit numerum accommodare ad tempus ortus ejus. Verumtamen etiam hic sensus nullum fundamentum habet in textu, nam eumdem numerum, quem prius vocavit *numerum nominis bestiæ*, statim, brevitatis causa, vocat *numerum bestiæ*; cum vero subdit, eumdem esse *numerum hominis*, per hominem non intelligit Christum, quis enim hoc unquam cogitavit? aut quo fundamento affirmari potest? Accedit quod neque in illo sensu veritas illi numero respondet, quia Bonifacius III anno 666 non sedit. Respondet primo, numerum illorum non ab anno nativitatis Christi, sed ab eo in quo Pompeius templum diruit, computandum esse. Sed hoc neque ratione subsistit; cur enim ab illo potius quam ab alio quovis tempore computandus est ille numerus? neque constanter est dictum, quia jam ille non erit numerus annorum Domini, sicut paulo antea dixerat. Ac propterea respondet aliter, sexaginta annis post Bonifacium, fuisse confirmatum regnum Antichristi, et ita fuisse numerum illum expletum. Sed hoc non minus frivolum et voluntarium est, quia neque Pontifices illis sexaginta annis post Bonifacium magis usurpa-

runt nomen universalis Episcopi, quam per centum, vel plures sequentes, neque potesta te aut dignitate magis creverunt.

32. Bonifacius nomen jam D. Leoni datum ab usurpante vindicavit. — Præterquam quod etiam falsum est, Bonifacium usurpasse nomen universalis Episcopi, quia solum ab alio usurpante vindicavit, et suæ tantum Sedi posse congruere ostendit, licet non constet illo titulo usum fuisse. Quod si hæc usurpatio appetetur, non ille primo, sed Leo Papa ante plures annos illud nomen usurpasse dicendus erit, quia et Synodus Chalcedonensis titulum illum ei tribuit, ut supra ex Gregorio retuli, et ipse in suis epistolis universalis Ecclesiæ Episcopum se nominat, quod perinde est. Falsum denique est Gregorium dicere, Antichristum titulo universalis Episcopi fore cognoscendum, sed verba Gregorii sunt: *Quisquis se universalem Sacerdotem vocat, vel vocari desiderat, in elatione sua Antichristum præcurrat, quia superbiendo se cæteris præponit.* Quo autem sensu Gregorius nomen illud reprehendit, jam supra declaratum est. Quidquid vero de vocabulo et usu ejus fuerit, ex illo loco Gregorii evidenter colligitur, Bonifacium non esse Antichristum, sed ad summum posse inferri, fuisse elatum, vel imitatione quadam præcurrisse Antichristum, ex quo aperte sequitur non fuisse Antichristum. Melius certe posset considerare rex, Gregorium ibi ponere ut notam Antichristi, quod *se Deum dicet*, et quod *Deus videri velit super omnes homines*. Quod nec Bonifacius neque ullus Pontificum hactenus fecit. Veriusque nos possumus illi objicere sententiam Athanasii, epist. ad Solitari. vit. agent., in superioribus commemoratam, ubi inter imagines Antichristi ponit *sæcularem principem, primatum ecclesiasticum supra Episcopos usurpantem*.

33. Contendit rex nomen Latinus continere numerum Antichristi. — Aliam denique positionem illius numeri nominis Antichristi admittit rex, eamque accommodat Pontifici, quia in hoc nomine *latinus*, græcis terminis scriptus, ille numerus continetur: *Quod recte (ait) cum Romana Ecclesia, cum Romana fide, et cum Latina liturgia congruit.* Sed quam sint hæc omnia violenta et frivola, perspicuum est. Et imprimis bene notavit Bellarminus, λατένως græce non per *ει*, sed per *η* scribi, et hoc modo non reddere numerum illum. Nihilominus tamen Aretas, suo c. 38 in Apoc., inter alia nomina, quæ de Antichristo excogi-

tari possunt, nomen λατεῖνος posuit'; statim vero addidit oportere scribi per diptongum (utique præter morem et proprietatem Scripturæ), ut possit illum numerum reddere. Deinde Joannes de nomine proprio Antichristi locutus est; nullus fuit autem Pontifex qui proprio nomine *latinus* sit appellatus; communi autem nomine etiam rex Angliæ est Latinus, et Lutherus, et Calvinus fuit Latinus; cur ergo magis Pontifex quam quilibet illorum Antichristus censendus est propter nomen Latinum? Hæc igitur omnia, quæ de Antichristo, ejusque Antesignano, in illo cap. 13 dicuntur, sincere intellecta, evidenter ostendunt Antichristum, prout ibi describitur, nondum apparuisse, et toto cœlo a Pontifice Romano distare; extortæ autem et violentæ interpretationes metaphoricæ Protestantium non minori claritate produnt errorem in quo isti homines cæci versantur.

CAPUT XX.

QUÆ CIRCA XIV., XV ET XVI CAPUT APOCALYPSIS
REX NOTAT, DISCUTIUNTUR.

1. Finita tertia visione, priusquam rex ad quartam transeat, ex c. 17 sumendam, quædam ex c. 14, 15 et 16 arripit, quæ licet leviora sint, operæ pretium duximus illa notare, ut nihil quod ad causam pertineat, intacatum relinquamus. In principio igitur cap. 14, prius narrat Joannes peculiarem gloriam sanctorum Virginum sibi manifestatam; deinde narrat visionem Angeli volantis per medium cœlum, et habentis Evangelium æternum, et diem judicii annunciantis. Et in his duobus nihil occurrit annotatione dignum. Tertio, ait Joannes, et alius Angelus secutus est, dicens, Apoc. 14: *Cecidit, cecidit Babylon illa magna, quæ a vino iræ sue potavit omnes gentes*, ubi rex notat, ruinam hanc Babylonis, quam hic Angelus prænunciavit, esse interitum Antichristi. Per Babylonem autem vult intelligi Romam, ut in superioribus sæpius dixerat. Unde significat Antichristum Romæ, et in ejus incendio ac destructione esse intermedium. Verumtamen Antichristum esse intersciendum Romæ, nova fictio est sine fundamento ex cogitata ad suspicionem aliquam pravam de Romana sede generandam, Antiqui enim in Oriente occidendum esse tradiderunt, ut ex Lactant., lib. 7, cap. 17 et sequentibus; et Hypsophil., Irenæo, et aliis antiquis colligitur. Hieronymus autem, Isaiæ

cap. 25, in monte Oliveti dixit esse occidendum. Potestque colligi ex cap. 11 Daniel., in fine, et ex cap. 11 Apocal., ut supra notavi. Et capite 19 dixit Evangelista Joannes, Antichristum vivum esse detrudendum in infernum, utique imperio Christi, ut Paulus, 2 ad Thessal., c. 2, significavit, et Daniel, c. 8, dicens: *Sine manu conteretur*. Si ergo per Babyloniam Romam intelligamus, tantum abest ut Romæ ruina sit interitus Antichristi, ut potius per illum, vel duces aut socios ejus abollenda, et igni tradenda sit, ut ex c. 18 Apocal. colligi potest. Nam, ut supra notavi, si Roma delenda est ante judicij tempus, non erit nisi tempore Antichristi, et ejus conatu, ut, extincto nomine Romano, ipse novam excellentioremque monarchiam erigere videatur. Si vero per Babylonem mundum hunc intelligamus, incendium illud Babylonie supponit jam finitam Antichristi persecutionem, et destructionem ac perditionem ejus; ergo neque isto modo ruina Babylonie erit interitus Antichristi.

2. *In Apocalypsi ut in aliis prophetiis aliquando rerum ordo non servatur.* — Post has vero duorum Angelorum voces et monita, tertius sequitur Angelus, tam supplicia in Antichristi sectatores superventura, quam beatitudinem eorum qui, patienter tribulationem tolerantes, et mandata Dei custodientes, in Domino mortui sunt, denuncians. Et quoniam hæc discretio in judicio facienda est, ideo statim visio et representatio judicii sub jungitur. Hæc vero, ut omnes expositores advertunt, magna ex parte per anticipationem dicta fuere; nam priusquam fiat judicium, praecedent septem plagæ, quæ capite decimo quinto in generali denunciantur, et in capite decimo sexto sigillatim recensentur. Quas nunc explicare nostri munera non est. Quia vero rex sensu earum allegorico ludit, adverto breviter, plagas illas ad litteram et proprie intelligi de tribulationibus et calamitatibus corporalibus et externis, ut fuerunt plagæ Ægypti, quibus illas comparant Irenæus, lib. 4, cap. 50; Andr., cap. 46, in Apocal., ubi singulas ita exponit, quem fere imitatur Are-tas. Et merito, nam omnia, quæ ibi dicuntur, vere ac proprie possunt intelligi, et ideo ita sunt intelligenda. Nihilominus tamen illas plagas more suo rex in maledicta et opprobria sanctæ Ecclesie et Pontificis per suas allegorias convertit; non tamen omnes accommodat, sed quas pervertere et acommodare potuit, semperque eosdem errores supponit,

per bestiam Pontificem interpretando, per pseudoprophetam vero Apostolicam Ecclesiam, et ita tenebras, in quinta phiala super sedem Antichristi effusas, dicit esse tenebras ignorantiae et erroris Ecclesiæ Romanæ. Ita enim solent hæretici ad excusationem sui erroris et pertinaciæ, Ecclesiam ignorantiae et cæcitatris arguere; cum enim ipsi cœci sint, Ecclesiæ lumen videre non possunt, ut Augustinus sæpe contra Donatistas notat.

3. Tenebræ in plaga quintæ phiale sensibiles erunt, non intelligibiles. — Præterquam quod nec metaphora est necessaria, ut dixi, nec potest accommodari; nam illæ plagæ superventuræ sunt super bestiam et regnum ejus, id est, super Antichristum et homines ab eo deceptos, ut ibi dicitur. Unde jam supponent densissimas tenebras spirituales; non est ergo de illis sermo. Sed tenebræ, postea per phialam quintam effundendæ, erunt vere corporales, aut saltem temporales, quia vel super Jerusalem, ubi erit sedes Antichristi, et super totam illam regionem, sensibiles tenebræ et frequentissimæ effundentur; vel splendor humanus, et fama Antichristiani regni obscurabitur magnitudine calamitatum, a quibus non poterit Antichristus suis artibus subditos liberare. Unde fiet ut ingenti dolore omnes affligantur, ita ut *linguas suas præ dolore commanduent, et Deum blasphement præ doloribus et vulneribus suis, et non agant pœnitentiam ex operibus suis.* Quæ verba nunquam potuit nec poterit rex sine rubore ad Ecclesiam accommodare; facile autem intellegi potest, quam meliori analogia magisque in veritate fundata possent ad tenebras, et linguas, et blasphemias, et impenitentiam Protestantium transferri.

4. Phialam in Euphratem effusam miscent imperite Protestantes. — Progreditur rex ad sextum Angelum, qui siccando Euphratem, *præparavit viam regibus ab ortu solis*, quod dicit esse impletum, *cum jam homo peccati cœptus est revelari, sublatis omnibus impedimentis, quæ possunt iter eorum*, id est, Orientalium regum, *ad invadendum illum monarchiam remorari.* Ubi per reges ab ortu solis, se et similes reges rebelles Ecclesiæ Romanæ, eamque persequentes intelligit, ut inferius in quarta visione, pag. 121, clarius exponit. Et his regibus ait, parandam esse viam per effusionem illius sextæ phialæ, ut, sublatis impedimentis, Monarchiam Ecclesiæ (quam ipse Antichristi essé fingit) libere et inopinato invadant. Sicut Cyrus (ait) inopinato transitu

Euphratis Babylonem cepit, et Balthasarem, regem ejus, vasis ad Dei ministerium compatis abutentem, atque ita tanquam in Dei templo sedentem, occidit.

5. Reges de quibus ibi sermo est, non contra, sed pro Antichristo dimicabunt. — In qua tota metaphora, omissa ejus impietate et audacia, summam ignorantiam Protestantum sic exponentium adverto, quia non solum extra literalem sensum suo arbitrio loquuntur, sed etiam contra illum verba accommodant. Nam reges illi, quibus per effusionem sextæ phialæ, et exsiccatione Euphratis via parabitur, non contra Antichristum incessuri prædicuntur, sed potius ad juvandum Antichristum in exterminatione populi Dei, sicut circa Danielis prophetias infra, cap. 22, notabimus, et sumi etiam potest ex verbis quæ Joannes paulo inferius subjungit: *Spiritus daemoniorum procedunt ad reges totius terræ, congregare illos in prælium ad diem magnum omnipotentis Dei.* Et ita locum illum de convocatione omnium regum terræ, et præsertim Orientalium, per Antichristum facienda ad debellandos omnes Christianos, omnes interpretantur. De qua convocatione, et ingenti ad prælium congregatione, sub nominibus *Gog* et *Magog*, mentionem fecit idem Joannes, c. 20, post Ezech., c. 38. Quomodo ergo quadrare potest metaphora, ut per reges ab Oriente venturos intelligentur hæretici contra Papam insurgentes? quid magis frivolum magisque ridiculum diei aut cogitari potuit?

6. Accedit quod illi reges non congregabuntur, quando Antichristus incipiet revelari, sed postquam Antichristus ab universo mundo agnitus, et per suum pseudoprophetam satis publice prædicatus fuerit; imo, postquam jam cœperit per alias tribulationes regnum ejus affligi, ut ex præcedentibus phialis et sequentibus verbis manifestum est; at isti hæretici orti et congregati sunt, antequam Antichristus notus esset, vel revelari inciperet; ipsi enim primi fabulam illam confinxerunt, et thronus, cui ipsi nomen illud imposuerunt, semper fuit notissimus Ecclesiæ, et nihil eorum, quæ per phialas illas prædicuntur, passus est. Denique illorum regum congregatio futura est in *prælium ad diem magnum omnipotentis Dei*, quando nimirum Christus de illis triumphabit, simulque Gog et Magog destruet. At hæresiarchæ isti nec in unum diem congregati sunt, et longe ante tempora diei magni Dei prodierunt. In hoc ergo solum convenienter cum illis regibus, quod revera contra Chris-

tum surrexerunt, et Antichristo viam parant, et contra Christi Vicarium (sub titulo ficti Antichristi) bellum movent.

7. Societatis Jesu alumnos ranunculis comparat rex Jacobus, pro Pontifice coaxantibus.

— Concludit tamen rex hanc suam prolixam allegoriam, inducendo illa verba ejusdem sextæ phialæ a Joanne scripta: *Et vidi de ore draconis, et de ore bestiæ, et de ore pseudoprophetae spiritus tres immundos in modum ranarum.* Per quos intelligit novam sectam exurgentem ad thronum Antichristi, tenebris obscuratum et labantem, illustrandum et fulciendum, quam dicit ternario numero significari, quia tribus magistris diriguntur, *draconis*, id est, Satanæ, *Antichristi*, id est, Pontificis, et *pseudoprophetae*, id est, Ecclesiæ Romanæ. Per quam sectam Societatem Jesu sine dubio intelligit, et Doctores ac prædicatores ejus ranunculis comparat, de quibus hæreticorum more ad libitum detrahit. Pro illis autem respondere nec mihi decens est, nec necessarium. Opera enim illorum de ipsis testimonium perhibent, estque qui videat et judicet. Neque parum habent Societatis alumni et operarii, unde possint gloriari, quandoquidem cum Christi Vicario ejusque Ecclesia digni habiti sunt, pro Christi fide, ejusque Vicarii obedientia ignominiam et contumeliam pati.

8. Non cohæret interpretatio. — Solum quoad verborum Scripturæ abusum et corruptionem adnotabo, præter alios errores de falsa interpretatione bestiæ et pseudoprophetae ejus, et abusum aliorum verborum illius Scripturæ, in ipsam allegoria ad textum applicata, non esse constantiam aut consecutionem. Nam hoc loco dicit, tres spiritus malos mitti ad favendum Antichristo, ejusque thronum sustentandum, unde cum Joannes de illis dicat: *Procedunt ad reges totius terræ, congregare illos in prælium, consequitur aperite, reges, ab his spiritibus congregandos, esse futuros Antichristi amicos et fautores; paulo autem superius dixerat, reges illos, quibus sextus hic Angelus viam parat, esse hostes Antichristi, et illis expediri viam, ut sine impedimento, et per illos tres spiritus congregandi, iidem sunt; quomodo ergo et ad invadendum et ad suslinendum labantem thronum Antichristi vocantur?*

9. Societatis Jesu operarii pacem, non dis-

cordias serunt. — Præterea isti tres spiritus congregatur dicuntur reges in prælium, utique contra visibilem Christi Ecclesiam, quæ tempore Antichristi erit; operarii autem Societatis non congregant reges in prælium aliquod, sed ad pacem et unionem cum Christi Vicario, nec ad debellandam Ecclesiam visibilem, sed ad pacem et unionem cum illa. Item illi reges congregandi sunt specialiter ad prælium unius diei, qui per antonomasiam dicitur *dies magnus omnipotentis Dei*, quia in illo *veniet sicut fur*, ut statim dicitur, utique ad destruendum Antichristum, et omnes reges congregatos cum illo ad prælium, ut c. 20 aperte declaratur sub nominibus Gog et Magog. At hoc non potest ad prædicatores fidei, qui nunc sunt in Ecclesia Catholica, ullo modo accommodari. Ut alia infinita omittam, que evidenter ostendunt, Joannem loqui de corporali seu materiali prælio, designando etiam locum in quo reges congregandi sunt; et declarando aperte ranas illas esse tres spiritus immundos dæmoniorum, facientes signa, quibus reges ad prælium illud congregent. Ergo vana est et impudens allegoria ab otiosis et obduratis Protestantibus adinventa.

CAPUT XXI.

EX VISIONE CAPITIS XVII ET SEQUENTIBUS APOCALYPSIS, NOVUM DE ANTICHRISTO ERROREM CONFUTARI POTIUS QUAM CONFIRMARI.

1. Docet rex Jacobus mulierem fornicariam esse Antichristum, ac proinde Pontificem. — Refert Evangelista Joannes, c. 17 Apocalypsis, se raptum fuisse in desertum, et vidisse mulierem fornicariam sedentem super bestiam coccineam, plenam nominibus blasphemiarum, etc. Ex hac visione, quam rex Angliae quarto loco posuit, colligere nititur, Romanum Pontificem esse Antichristum, colligitque in hunc modum. Mulier illa fornicaria Antichristum repræsentat; et omnes proprietates, quæ illi mulieri in eo capite tribuuntur, Romano Pontifici conveniunt; ergo ipse est Antichristus. Majorem rex non probat, sed tanquam notum fundamentum suea disputationis supponit. Minorem autem late prosequitur, ad libitum multiplicando probra contra Romanam Sedem, sine probatione, aut veritatis fundamento, sed solum quia cum ab infantia sub hæreticorum disciplina falsam illam opinionem ac depravatam fidem

imbiberit, et in ea fuerit consuetudine obfirmatus, nunc et mentis ignoratione et indignatione promotus, audet in cœlum ponere os suum, et sacra profanis commaculare.

2. Mulier illa civitatem significat, non hominem. — Sed imprimis fundamentum, in quo nititur, falsum est, nam mulier illa non repræsentat Antichristum. Quia Joannes ipse dixit, mulierem illam habere scriptum in fronte : *Babylon magna*; nemo autem unquam dixit Babylonem, vel proprie vel figurate significare Antichristum; nam Antichristus homo quidam futurus est, ut supra est demonstratum; Babylon autem semper significat civitatem aliquam, vel hominum congregationem, ut idem Joannes, in fine illius capituli 17, conclusit : *Mulier, quam vidisti, est civitas magna, quæ habet regnum super reges terræ.* Et ita Patres omnes, et illius loci expositores in hoc convenient, quod mulier illa, seu Babylon, magnam aliquam civitatem repræsentet, quia hoc jam non tantum in ænigmate, sed expresse revelatum, et ab eodem Propheta declaratum est. Quæ autem sit illa civitas varie exponitur. Duas tamen esse opiniones probabiles, unam explicantem hunc locum de civitate impiorum, aliam de Romana civitate exponentem, supra, c. 7, retulimus, ubi utramque opinionem declaravimus, et probabilem esse ostendimus, et in utramque convenire omnia pravitatis insignia, quibus Joannes illam onerat, minutatim declaravimus. Advertisimus autem ibi, juxta catholicam et veram declarationem, si Babylon Roma est, intelligendum id esse de Roma non christiana, sed ethnica, ut erat tempore quo Joannes scribebat, et quamdiu in illo statu duravit, et si forte ad illum, vel omnino, vel magna ex parte ante mundi consummationem redditura est (ut multi opinantur), etiam pro illo statu merito eodem nomine significatur; nam Roma Christiana, sub vera fide Christi perseverans, Babylonia dici non potest, cum confessionem falsorum dogmatum, aut plurium sectarum vel deorum non admittat. Ideoque merito Hieronymus, lib. 2 contra Jovinianum, ad finem, ad Romanam dixit : *Scriptam in fronte blasphemiam Christi confessione delesti*, etc. Et hac ratione Petrus accurate distinxit Ecclesiam, quæ erat in Babylone, ab ipsa Babylone, dicens : *Salutat vos Ecclesia, quæ est in Babylone collecta.* Et eodem modo loquitur Hieronymus, epist. 18 ad Marcell., dicens : *Est quidem ibi sancta Ecclesia*, etc.

3. Calumniæ aliae falsæ ostenduntur. — Destructo igitur regis fundamento, ejus argumentum ruit. Quapropter omnes accommodationes, quas sub illo fundamento sumit, calumniæ Protestantium sunt, non Scripturæ interpretationes. Neque rex ipse responsionem hanc effugere potest, cum saepius in sua Praefatione fornicariam illam Romanam esse contendat, et nostrorum confessione id confirmet. Hic vero cavenda est calliditas Protestantium, quam notavit Sander., lib. 8 de Visib. Monarch., et rex in præsenti imitari videtur, nam eamdem mulierem dicit esse Romanam, et esse Antichristum, et bestiam item esse Antichristum, ut supra, c. 15, animadvertis, ut ita confundendo Romanam cum Romane throno et cum Antichristo, postea ad omne regimen illius civitatis, ac tandem ad Romanam Ecclesiam et sedem sermonem transferat, illique omnia, quæ tam de Antichristo, quam de Romana urbe infideli, ejusque imperio ethnico dicuntur, accommodet. Talia itaque sunt omnia, quæ in toto discursu circa illud caput communiscitur. Cum enim Roma dicatur fuisse *mater fornicationis*, quando *omnium gentium idolis et superstitionibus serviebat*, ut Leo Papa inquit, serm. 1 de Nativit., et serm. 1 de SS. Petro et Paulo, ideo crimen illud in Apostolicam Sedem transfert. Et sicut nos propter illam sedem dicimus, Romanam esse matrem et magistrum omnium Ecclesiarum, ita rex matrem omnium spiritualium fornicationum illam appellat. Quæ autem sint illæ spirituales fornicationes, quas Romana Ecclesia vel exercuit vel docuit, nunquam hactenus ostendere potuit, cum ab antiqua et primitiva fide nec minimum discrepaverit, ut lib. 1 et 2 probatum est.

4. Roma Christiana Martyrum sanguine nullo modo ebria. — Et simili modo, cum Roma ethnica dicatur *ebria sanguine Martyrum*, propter imperatorum persecutiones, idem audit Romanæ Ecclesiæ et sedi tribuere; quod profecto non video, qua specie vel umbra veritatis dici potuerit. Quas enim *immanes Christianorum persecutiones* excitavit Ecclesia Romana, aut quando sanguinem martyrum fudit, ut propterea sanguine Martyrum ebria dicatur? Sed fortasse justas quorumdam hæreticorum et apostatarum poenas martyria rex vocat, cum tamen illa supplicia tam rara sint, ut nec propter illa dici potuerit sanguine hæreticorum ebria; nam, ut Patres et expositores notant, per hæc verba innumera Martyrum multitudo denotatur. Denique, ut cæ-

tera omitiam, non majori fundamento hæc, quæ de Roma in Apocalysi dicuntur, tribui possunt Romanæ Sedi a tempore Bonifacii III, quam tempore Sylvestri, verbi gratia, ut sæpe dictum et probatum est; desinat ergo rex tergiversari; et vel Romam ratione illius sedis semper fornicariam fuisse fateatur, vel ethnicae Romæ crimina in Bonifacium aliosve sanctos posteriores Pontifices, eorumque legítimos successores, traducere desistat.

5. Bestiæ ac mulieris notæ male confunduntur. — Deinde quia rex mulierem cum bestia, quæ illam portat, confundit, non solum proprietates mulieris, sed etiam bestiæ insignia de Papa interpretari conatur. Et primo refert interpretationem septem capitum ad septem regimina civitatis, quam supra impugnavimus; deinde mirabilem habet de decem cornibus expositionem, quam in sequenti capite melius tractabimus. Ac tandem ad destructionem Babylonis, in c. 18 prædicatam, explicandam digreditur. Quia vero supra, in c. 7, destructionem Babylonis illo c. 18 descriptam fuse tractavimus, non erit necesse circa omnes allegorias et accommodationes, quas hoc posteriori loco rex commentatur, discurrere, præsertim quia nihil novi continent, sed eadem maledicta et concivia contra Romanam Sedem in eisdem erroribus fundata, et novis exaggerationibus sine ulla probatione amplificata. Illis ergo febre prætermisis, solum quædam puncta, quæ vel umbram aliquam objectionis habent, vel calumniam magis perniciosa et scandalosam continent, prætermittenda non duxi.

6. Romanam Christianam cum regibus fornicatam rex prodit. — *Ex suis verbis convincitur.* — Primo ergo, in pag. 122, ut simul objiciendo mordeat, verba illa capitilis 28 expedit, ubi post descriptam ruinam Romanam dicitur: *Et flerunt, et plangent se super illam reges terræ, qui cum illa fornicati sunt, et in deliciis rixerunt.* Ex quibus concludere intendit, Babylonem illam non esse Romanam ethnicam, sed christianam, quia quod ibi refertur, *cum Roma ethnica a nullis unquam regibus factum est, nec fieri potuit, quos vi et armis subegit.* Ergo illa Babylon et Roma Christiana, et reges, qui ejus interitum deflebant, sunt illi, *quos honorificis (ait) nominibus titulisque ornavit, veniamque eorum libidinibus atque illicitis matrimonii indulxit.* Ad objectionem vero respondemus imprimis, eamdem posse contra regem retorqueri, nam etiam cum Roma Christiana illud factum non

est, neque fieri potuit, quia reges illos, quos ipsa honorificis titulis ornavit, licet non vi et armis, fide tamen et pace christiana subjecit, ut Leo Papa dixit, serm. 4 de Sanctis Petro et Paulo. Deinde dico de utraque Roma, seu de utroque ejusdem Romæ statu impertinentem esse objectionem, quia prophetia illa nondum impleta est; nondum enim Roma fuit penitus extincta. Nam, licet aliquas graves calamitates et clades non modicas sub Gotthis et Vandalis passa sit, per illas tamen non est impleta illa Joannis prophetia in dicto c. 18, quia per illa excidia factum non est, *ut amplius non inveniatur*, ut in dicto c. 7 animadvertis; quanquam de illis etiam excidiis verissime dici possit Romæ ethnicae potius quam christianæ supervenisse. Erat enim tum quasi mista, nam licet in ea esset Apostolica Sedes et christiana religio, tamen adhuc in ea multæ reliquiæ gentilitatis, magna pars civium ethnicorum perdurabat, et ad eam ab illa fæce purgandam Deus illas calamitates permisit, ut docte et erudite Malvenda ostendit, lib. 4 de Antichristo, cap. 6, ideoque licet, capita et diruta Roma, non potuerit non magna incommoda et damna pati Ecclesia fidelis, quæ in ea tunc erat, quia tamen idololatriæ et gentilitatis scelera erant causæ ruinarum, ideo potius in Romam ethnicam quam christianam pervenisse merito dici potest.

7. Si Roma ad mundi finem in priorem statum restituenda est, in eam quadrant verba Apocalypsis. — Unde ulterius addo, quod in dicto cap. 7 ex opinione multorum sapientum retuli, non esse incredibile Romanam, prope Antichristi tempora, vel in illis, a gentibus iterum superandam esse, et ad priorem ethnicum statum revocandam, ejecta inde Ecclesia, vel ita afflita, ut quasi in angulo vel in cavernis terræ delitescat, et tunc impleri optimè poterit prophetia Joannis in Roma ethnica, et poterunt illam deploare reges ethnici et idololatræ, qui participes fuerant fornicationum et deliciarum ejus. Atque ita merito etiam tunc Babylon appellari poterit, sicut antea vocata fuit, etiam si in illa esset Ecclesia, cui Babylonice nomen convenire non potest. Unde sapienter dixit Sander., lib. 8 Monarch., c. 8, Antichristum non Romæ, sed inter reliquias et fragmenta imperii Romani expectandum esse. Præsertim quia, licet forfasse antea rex aliquis infidelis insurgeret, qui Romanam vineceret, ibique suam tyrannidem exerceret, ea res non magis imputanda esset

Sedi Apostolicæ, aut Ecclesiæ Romanæ, quam Neronis aut Diocletiani persecutio eidem Ecclesiæ olim adscribatur.

8. *Tunc jure Babylon dicetur.* — Tandem dico fieri etiam posse, ut Roma illud ultimum et perpetuum excidium patiatur, etiam si nunquam ad ethnicismum redeat, sed sub imperio Pontificis permaneat, et quod id patiatur propter sua scelera, non tantum præterita, sed etiam in illis diebus ultimis futura. Nam (ut supra dicebam), licet illa Ecclesia fidelis perseveret, poterit vel esse nimium depravata moribus, vel poterunt in ea multiplicari sectæ, vel hæreticorum, vel ethnicorum, cum tanta potentia et libertate, ut Pontifices illos reprimere non valeant. Et in tali statu poterit etiam Babylonie vocari propter confusionem, quæ in illo statu non poterit non esse maxima. Et similiter poterunt illum deflere reges, qui erant participes deliciarum ejus, sive illi futuri sint ethnici, sive fideles pravis moribus dediti; sive hæretici foventes sectas et scelera, quæ tunc esse poterunt per universam Italiam vel Europam, et ita prævalere, ut auctoritate et potentia externorum regum Romam etiam invadant.

9. *Ecclesia Romana nunquam esse potest antichristiana.* — Quocumque ergo modo illa prophetia intelligatur, ex ea non solum non potest colligi jam nunc esse Romam Antichristianam, verum etiam neque ulla verisimilitudine inferri potest Ecclesiam, quæ Romæ nunc est, vel jam esse, vel futuram esse aliquando Antichristianam, vel infidelem, quia, licet multi cives et membra ejus a fide deficiant, eo ipso fiunt extra Ecclesiam, quæ semper fidelis perseverat. Multoque minus sequitur, caput veræ Ecclesiæ esse, vel futurum esse unquam Antichristum, quia, licet civitas illa funditus destruatur propter apostasiam, vel propter quamcumque aliam causam, poterit caput et petra Ecclesiæ firma consistere, et alibi residere vel latere. Imo, licet Deus permitteret personam alicujus Pontificis in illis temporibus cadere, et tyrannis cedere, errores profitendo, non ideo Pontifex, ut Pontifex est, caderet, nec Ecclesiam falleret, sed illo deposito posset Ecclesia sibi Pontificem creare. Quod per exaggerationem, et ad rem magis explicandam dictum est; nam credibilius est id non esse permissurum Deum, præsertim in tanta Ecclesiæ tribulatione et oppressione.

10. *Mera calumnia est Pontifices veniam*

dare libidinibus. — Ad calumniam autem quam rex obiter in objectione miscet, dicens, solitos esse Pontifices veniam dare libidinibus regum, aut illicta matrimonia permittere, respondemus falsum esse, et a rege non posse probari, a nobis autem vel ex ipso miserrando lapsu Anglicano evidenter convinci. Nam dare veniam libidinibus duobus modis fieri potest. Primo, dando libidinosis veniam post libidinum pœnitentiam et satisfactiōnem. Et hoc fecerunt sæpiissime Pontifices. Ex quo non Antichristi, sed Vicarii esse intelliguntur Christi, qui claves coeli illis commisit, et Petro interroganti: *Quoties peccabit in me frater meus, et dimittam ei, usque septies?* respondit: *Non dico usque septies, sed usque septuagies septies*¹, utique si Ecclesiam audierit, et pœnitentiam egerit, alioqui potius separandus est, ut ethnicus et publicanus. Alio modo attribui potest Pontificibus, quod libidinibus veniam præbeant, perseverantibus in illis, aut approbantibus similia facta, aut publice et cum scandalo Ecclesiæ ea dissimulando. Et in hoc sensu tale crimen falso Apostolicæ Sedi attribui, testis est ipsa Anglia; non enim aliam ob causam Henricus VIII, et cum illo regnum ejus schisma contra Romanum Episcopum inchoarunt, nisi quia intolerandæ ejus libidini veniam dare noluit². Possentque similia exempla ex historiis Lusitaniæ et ex aliis ad eamdem falsitatem coarguendam peti. Sed in re clara, necessaria non sunt, nec nos decet regum jam oblita et deleta delicta in memoriam revocare.

11. *Invalida matrimonia nunquam approbat Ecclesia.* — In altero autem verbo quod rex adjungit, *illicta matrimonia permittere*, alludere plane videtur ad matrimonium Henrici cum Serenissima Catherina, quod Papa permisit, imo non solum permisit, sed constanter etiam defendit, quia non illicitum, sed verum et sanctum fuerat. Probabit autem rex Angliæ matrimonium Henrici cum Anna Bolena, quod non matrimonium illicitum, sed turpissimum adulterium et incestus execrandum fuit. Igitur permisso illiciti matrimonii variis etiam modis fieri potest. Primo, approbando matrimonia illicite facta, etiam si invalida sint; et hoc falso tribuitur Ecclesiæ Ca-

¹ Matth. 18.

² Vid. Chroni. Duarii Nunez, 1 p., in Vita Sancii II, regis Portug., et in Vita Alfonsi III. Vid. Bosium, t. 1, de signis Eccles., lib. 12, c. 3.

tholicæ, vel Apostolicae Sedi, nec a rege produci potest exemplum, quo id faciat quoquo modo credibile. Imo, licet matrimonium fuerit validum, si fuit illicite factum (quod sæpe contingit), licet Ecclesia probet matrimonium, non probat delictum; imo nec permittit illud, sed vetat, et punit si potest; interdum enim, quia sine majori scandalo punire non potest, dissimulat; hæc autem frequenter esse solet culpa principum potentium, non Apostolicæ Sedis. Alio modo permittitur matrimonium, ut cum dispensatione fiat, quod sine illa factum esset illicitum, et hoc sæpe facit Ecclesia, et justissime facit, quia quando id contingit propter impedimenta jure humano introducta, per potestatem etiam Ecclesiæ auferri possunt, et sæpe expedit propter commune bonum, vel aliam causam justam. Et ita factum est in matrimonio Henrici cum Catherina, ut est res notissima, et a multis doctissimis viris demonstrata. Propter has autem dispensationes, non sine dolo vel captione dicitur *Pontifex permittere matrimonia illicita*; nam hæc verba faciunt sensum compositum, ut sic dicam; significant enim permittere illa permanentia illicita, quod falsum est, sed permittit dispensando ut licite fiant, quæ sine dispensatione esset illicita.

12. *Ornatum B. Virginis ac templorum rex carpit.* — Pergit ulterius rex, et occasione illorum verborum Joannis, in dicto c. 48, vers. 12: *Quoniam merces eorum nemo emet amplius, exaggerat Romanæ civitatis divitias, reprehenditque (ut alia omittam) ornatum templorum, et cultum sanctorum imaginum.* Additque horrendum Protestantium mendacium, quod illi imposuerunt, videlicet, *Beatam Virginem quotidie novitiis et exquisitissimis vestimentorum generibus, quamvis habitum referant meretricium, Romæ indui et exornari.* Verum tamen in hac objectione satis Protestantes ostendunt, se non Romam, quam fingunt novitiam et Antichristianam, sed veterem et Catholicam Ecclesiam Romanam calumniari et odio prosequi. Nam ornatus templorum non est novus in Ecclesia, sed ab eo tempore quo templo publice ædificari cœperunt, ornari etiam sumptuose incooperunt, et maxime Romæ. Cujus rei, præter gravissimas historias Eusebii et posteriorum, testes evidentissimi sunt antiquissima monumenta, et ornamenta templorum ac reliquiarum, quæ hodie Romæ inspiciuntur, et in actis ipsorum Pontificum, Sylvestri, Damasi, et aliorum usque ad Gagorium copiosissime inveniuntur. Et præter

exempla id etiam docuerunt sancti et antiqui Pontifices, Felix IV et Leo I, ut alibi latius tractavi¹. Idem manifestum est de cultu imaginum, de quo satis in 2 libro dictum est.

13. *In Ecclesia decenter imagines amiciuntur.* — Calumnia vero de indecenti vestitu seu cultu imaginis Beatissimæ Virginis sufficienter refellitur decreto OEcumenicæ Synodi Tridentinæ per Romanos Pontifices confirmatae, usque receptæ. Nam, sess. 25, in decreto de Sanctorum et imaginum cultu, postquam Catholicam doctrinam declaravit, de morali in praxi servanda subjungit: *Omnis porro superstitione in Sanctorum invocatione, reliquiarum venerazione, et imaginum sacro usu tollatur, omnis turpis quæstus eliminetur, omnis denique lascivia ritetur, ita ut procaeci venustate imagines non pingantur nec ornentur.* Rursusque commendat Episcopis, curam adhibeant, ut nihil inordinatum, aut præpostere, aut tumultuarie accommodatum, nihil profanum, nihilque in honestum appareat, cum domum Dei deceat sanctitudo. Atque hanc curam et religiosam sollicitudinem in Romanis templis magna diligentia et pietate observari scimus, et per plures annos oculis conspeximus, et in Sanctissimæ Virginis imaginibus majori consideratione animadvertisimus; ideoque fideriter in verbis illis non nisi meram calumniam et hæreticorum impudens mendacium contineri affirmamus.

14. *Catholicorum liberalitas in religiosos conviciis discerpitur.* — Neque dissimile crimen est, quod tertio loco rex Pontificibus objectat occasione illorum verborum Joannis: *Merces auri, etc., et animarum hominum.* Dicit enim: *Omnium autem sumptuosarum mercium, quæ maximi pretii sunt, animæ, scilicet, hominum postremo nominantur;* et statim interponit verba, quibus in religiosos et pios sumptus, quos in cœnobitis religiosorum aedicandis Catholici insumunt, et specialiter in Societatem Jesu invehitur, quam injuriis et contumeliis onerat. Quælibens omitto, tum ne piæ aures legentium hoc opus offendatur; tum quia in hoc opere non pro Societate, sed pro Catholicæ fide, et Apostolicæ Sedis singulari prærogativa respondere decrevi. Et licet in illis verbis aliqui errores contra fidem involvantur, ut contra purgatorium, contra suffragia pro defunctis, et contra statum religiosum, tantum obiter tanguntur, et non possunt

¹ Tom. 3, in tertia parte, disp. 18, sect. 6, in fin.

omnia hoc brevi opere refutari. Ac de prioribus, pro hujus operis opportunitate, satis in secundo libro diximus; de ultimo autem speramus, divina ope, aliquando in lucem proditum opus de statu religioso, germanum socium alterius operis de religionis virtute, in quo errorem illum ex professo confutamus. Post illa ergo verba, quæ omissa facimus, subjungit rex: *Et certe credo, non est minima illa animarum negotiatio, cum homines spe et promissione æternæ salutis fascinantur, ut facile persuadeatur fraterculo, regem suum confodere, etc.; tandem concludit: Atque ita tam animi, quam animæ jacturam facere.*

15. *Concessio facultatis ad reges impune trucidandos falso attribuitur Pontifici.* — In quibus verbis rex significat, vel Romanos Pontifices, indulgentias seu remissiones peccatorum solere promittere hominibus, si reges suos et principes temporales occidunt, vel Catholicos docere, esse pietatis opus, principi et regi hosti fidei et religionis, mortem machinari et inferre, esseque maxime meritorium, et genus quoddam martyrii, mortem pro tali facinore perpetrando subire, atque ita promissione salutis æternæ deceptum fuisse fratrem, qui regem Galliæ interfecit, et alios similes. Et quidem prior sensus videtur fuisse a rege intentus, est enim satis consequens ad ea quæ præcesserunt. Ad illum vero breviter et docte respondet Bellarminus, solere quidem Pontifices indulgentias christianis militibus in bellis justis contra infideles dimicantibus vel decedentibus concedere. Nam Gelasius II, ante quingentos fere annos militibus contra Saracenos Hispaniam occupantibus indulgentiam concessit his verbis: *Si quis vestrum, accepta de peccatis suis pœnitentia, in expeditione hac mortuus fuerit, Nos eum Sanctorum meritis, et totius Ecclesie precibus a suorum vinculis peccatorum absolvimus.* Et postea pro aliis vivis cooperantibus aliam indulgentiam concedit, ut est apud Baron., ann. 1118, num. 18. Aliam concessit Joannes VI, tempore Ludovici III, imperatoris, omnibus decedentibus in bello pro defendenda Ecclesia contra Paganos, ut refert Baron., ann. 878, num. 34, ex epist. 144 ejusdem. Item est celebris indulgentia, quam sumentibus crucem pro expeditione terrae sanctæ concessit Urbanus Papa in Concilio Claramont., ann. 1095, ut ibidem Baron. refert, num. 25 et num. 50. Eamdem confirmavit Eugenius III, anno 1145, ut refert Otho

Frisingen., de Gestis Francorum, lib. 4, cap. 34; et late Baron., eodem anno, num. 30 et sequentibus.

16. *Variae concessiones referuntur ex historia Anglicana.* — Denique similem concessit Gregorius VIII in quadam epistola ad universos Christi fideles, quam refert Rogeri Anglican., in Annal.; et Guillielm. Neubrigen., libro tertio Historiæ Anglicanæ, capite vigesimo. Verba concessionis sunt: *Eis, qui de corde contrito et humiliato spiritu laborem itineris hujus assumpserint, et in pœnitentia peccatorum et fide recta decesserint, plenam suorum criminum indulgentiam, et vitam pollicemur æternam.* Sive autem supervixerint, sive mortui fuerint, de omnibus peccatis suis, de quibus rectam confessionem fecerint, impositæ satisfactionis relaxationem, de omnipotenti Dei misericordia, et de Beatorum Apostolorum Petri et Pauli auctoritate et nostra, se noverint habituros. Eamque indulgentiam confirmavit ejus successor Clemens III, ut Rogerius, et Baron., in Annalib., ann. 1187, referunt. Additque Neubrigen., c. 21, Richardum, comitem Pictaviensem, regis Anglorum filium; primum omnium principum crucem Domini accepisse, et postea regem patrem ejus simul cum rege Galliæ in idem propositum convenisse, et per sua regna proprii litteris indulgentiam a Papa concessam promulgasse, et postea in Concilio Anglicano plurium Episcoporum probatam et receptam esse.

17. *Ex forma concessionum falsitas dictorum contincitur.* — Si ergo nunc rex Jacobus omnes hujusmodi indulgentias reprehendere audet, satis tot Pontificum, Conciliorum, regum, et totius Ecclesiæ consensu, antiquaque traditione confunditur, præter alia quæ de hoc puncto in proprio tractatu a nobis disputata sunt¹. Si autem accusat Pontifices, quod eis, qui privata auctoritate suos reges audent occidere, similes remissiones indulgent, eosve ad similia crimina perpetrandam indulgentiarum promissione excitant, novum crimen hoc est, et in Romana Ecclesia inauditum, sed a Protestantibus ad conciliandam Pontifici invidiā excogitatum. Nam potius in forma concedendi indulgentiam, particulam illam, *vere pœnitentibus et confessis*, Romani Pontifices addere, aut aliam æquivalentem apponere consueverunt, tantum abest ut pro criminibus perpetrandis illam promittant.

¹ Tom. 4, disputat. de Indulg.

18. Quæstio, an cuivis liceat impune tyrannum occidere, non est hujus loci. — In altero vero sensu inculcat rex in illa sua reprehensione quæstionem celebrem, an liceat cuiuscumque privato homini legitimum regem suum tyrannice regnarem, et præsertim religionem et Catholicam fidem pervertentem, interficere. Quam nunc disputare prolixum et a nostro instituto alienum esset. Solum ergo cum eodem Cardinali Bellarmino respondemus imprimis, ex factis quorumdam privatorum, etiam si Catholici fuerint, non recte colligi talia facta per Ecclesiam approbari; nam ex factis, præsertim paucorum, doctrinam colligere, aut ingens caligo ignorantiae est, aut manifesta calumnia; cum Christus ipse etiam de Seribis et Pharisæis dixerit : *Quæcumque dixerint vobis facite, secundum opera vero eorum nolite facere.* Deinde dicimus, non Catholicos, sed hæreticos parentes Lutheranorum et Protestantium docuisse, regem non solum propter hæresim vel tyrannidem, sed etiam propter quodlibet mortale peccatum regnum amittere, posseque a popularibus pro suo arbitrio corripi. Quam doctrinam secutus est Joannes Hus; eam vero Ecclesia Catholica ut hæreticam damnat, ut ex Concilio Constant., sess. 8 et 45, constat, et alibi a nobis ostensum est. Imo in eodem Concilio, sess. 45, refertur assertio quædam ad ipsum delata : *Quilibet tyrannus potest et debet licite et meritorie occidi per quemcumque vassallum suum, vel subditum, etiam per clanculares insidias, non obstante quocumque præstito juramento, neque expectata sententia, vel mandato, etc.* Illa autem assertio hæretica declaratur, eamque pertinaciter defendens, hæreticus a Concilio denunciatur. Immerito ergo rex Jacobus Romanam Ecclesiam, vel ejus Catholicos Doctores criminatur, quod per doctrinam illam fraterculum vel quempiam alium, ad suum occidendum regem spe salutis æternæ fascinaverint aut persuaserint. Et de hoc punto hæc in præsenti sufficiunt, nam in lib. 6 iterum occurret.

19. Superbia Romanæ Ecclesie a rege Jacobo carpitur. — *Sed alia est mens D. Joannis.* — Quarto loco, post alia convicia contra Ecclesiam Catholicam, addit rex Romanam Ecclesiam acerbissime puniendam esse propter superbiam suam, quam superbiam dicit explicari illis verbis : *In corde suo dicit : Sedeo regina, et vidua sum, et luctum non video.* Et postea hanc superbiam rex, pag. 25, exaggravat, dicens : *Nulla enim certior est apud*

illos veræ Ecclesie nota, quam secundæ res et externa prosperitas. Sed imprimis quod spectat ad verba Scripturæ, certum est illâ dicta esse de urbe impiorum, vel Roma ethnica et superba, quæ gloriabatur quod sederet ut regina, id est, quia multis regnis et provinciis imperabat, et vidua non esset, quia imperatori et supremo domino gentium nupta erat; sicut e contrario deplorabat Hierusalem Jeremias, quod sederet quasi vidua domina gentium. Cum vero additur : *Et luctum non video,* indicatur error gentilium, qui putarunt Romam et imperium ejus fore perpetua, teste Hieronymo, dicta quæst. 41, ad Algasi., ubi inter alia ait, nomen blasphemie scriptum in fronte meretricis in Apocalypsi esse *Romæ æternæ.* Et ad hunc fere modum communiter exponitur a Patribus et Doctoribus, ideoque ridicula est et impia Protestantium illusio. Maxime cum in vera Christi Ecclesia non superbia, sed fidelis charitas sit se sponsam Christi profiteri, cum Paulus, ad Ephes. 5, dicat : *Viri, diligite uxores vestras, sicut et Christus dilexit Ecclesiam.* Et postea, explicans similitudinem per verba illa : *Propter hoc relinquet homo patrem et matrem, et adhærebit uxori sue,* subjungit : *Sacramentum hoc magnum est, ego autem dico in Christo et in Ecclesia.* Unde cum Christus sit rex regum, quid mirum est quod sponsa sedeat *regina in vestitu deaurato, circumdata varietate?* Non enim in se, sed in Domino, ratione sponsi, de tanta dignitate gloriatur. Eamdemque ob causam non ex superbia aut vana præsumptione viduitatem seu luctum videre non timet, quia a suo sposo audivit : *Et portæ inferi non prævalebunt adversus eam;* et Matt. 16 : *Ecce ego vobiscum sum usque ad consummationem sæculi,* Matth. 48. Quapropter si verbis Scripturæ per accommodationem utiliceret, multo justius posset Anglia timere comminationem et poenas illas, quia revera dicit : *Sedeo regina,* quia nullum sponsum præter temporalem regem, nec alium superiorem in spiritualibus vel temporalibus recognoscet. *Vidua non sum,* quia supremum caput et Christi Vicarium proprium, et tanquam sponsum habeo; et *luctum non video,* quia spiritus dictat hanc esse veram Christi Ecclesiam perpetuo cum Christo mansuram, et paulatim Romanam Ecclesiam superaturam.

20. Veræ Ecclesie nota proponuntur. — Denique, quod rex de suo adjungit, nullam certiorem notam veræ Ecclesiae apud nos

esse, quam *res secundas et externam prosperitatem*, duo continent falsa. Primum et clarissimum cernitur in illa comparatione, nam omnes Catholici uno consensu tradunt ut principiiores, et certissimas Ecclesiæ notas, esse *unam, Sanctam, Catholicam, et Apostolicam*, cum aliis, quæ in his recte explicatis intime continentur, ut sunt habere legitimam successionem ab Ecclesia primitiva, per certam et indubitatam connexionem cum illa in doctrina, in regimine et pastorali munere, et præsertim in cathedra Petri. Item esse fundatam in illa Petra per unionem perpetuam, et obedientiam cum illa. Aliae vero notæ, quæ ab aliquibus Doctoribus Catholicis multiplicantur, vel ad has reducuntur, vel non sunt tam propriæ et certæ notæ, quam veræ Ecclesiæ verisimillima signa.

21. Prosperitas in utramque partem flexibilis est. — Aliud assertum falsum est, *externam prosperitatem et res secundas absolute, et sine aliqua declaratione vel restrictione inter Ecclesiæ notas numerari*. Non enim ignorantii et sapientes viri, temporalem felicitatem rem indifferentem esse; ideoque prosperous in his rebus successus malis et bonis, fidelibus et infidelibus, hæreticis et Catholicis esse communes. Neque etiam ignorant nihil esse magis proprium Ecclesiæ Christi, aut sæpius ab ipso prænunciatum, quam temporales afflictiones et tribulationes ac persecutions; e contrario vero pacem externam, et temporalium rerum abundantiam copiosius solere malis quam bonis concedi, vel quia si quid boni operantur, illa temporalia bona loco præmii recipiunt; vel quia propter peccata sua merentur ut eis concedantur bona, quibus Deus prævidet pejores in dies esse futuros; vel certe ut boni meliores efficiantur, tum carendo illis bonis temporalibus, quæ solent occasionem ruinæ spiritualis afferre, tum sustinendo impiorum molestias, qui prospexitibus elati ipsos afflidunt.

22. Prospera suæ Ecclesiæ Deus moderate providet, etiam per miracula. — Prosperitas ergo temporalis per se spectata non ponitur a nobis ut nota veræ Ecclesiæ, quia non est nota veræ fidei nec veræ sanctitatis. Quia vero Ecclesia Christi, dum in terris degit, etiam his bonis temporalibus indiget (ut recte dixit D. Augustinus), ideo Christus Dominus sua singulari providentia in horum bonorum largitione, conservatione ac defensione peculiari cura illi providet; sæpeque extraordinario auxilio, ac plane cœlesti in prosperis suc-

cessibus obtinendis, et contrariis vitandis, illi assistit. Atque ita prosperitates temporales hoc modo provenientes Ecclesiæ aut principibus, inter signa veræ fidei, ac subinde Catholicæ Ecclesiæ a Catholicis recensentur. Sieque Card. Bellarminus, lib. 4 de Eccles., cap. ultimo, felicitatem quidem temporalem, loco decimo quinto et postremo, tanquam cæteris inferiorem posuit, non tamen sine prudenti et sufficienti declaratione, addit enim: *Temporalis felicitas divinitus iis collata, qui Ecclesiam defenderunt.* Et talia sunt exempla quæ inducit, et eodem modo loquuntur plures alii auctores quos ipse refert, et copiose Bozius, 2 tom. de Signis eccles., præsertim c. 20 et sequentibus.

23. Pontificem et Turcam rex Jacobus eadem librat statera. — Sed nulla est conventio lucis ad tenebras. — In reliqua parte illius discursus, quam ad cap. 19, 20 et 21, rex adjungit, nihil notatione dignum vel ad causam fidei pertinens invenio, præter illud quod obiter in transcurso dicit, an id, quod de Gog et Magog Apocalyp. 20 dicitur, *de Papa et Turca accipiendum sit, necne, aliis judicium relinquo*, et rationem reddit: *Quia fere eodem tempore ad suam magnitudinem excreverunt.* In quibus verbis, multis modis errat et peccat. Primo, contra pietatem, et humanam etiam urbanitatem, dum Papam inter Christi hostes et Ecclesiæ persecutores numerat, et Turcæ exæquat; in quo non solum ostendit quantum ab omnibus principibus piis et catholicis degeneret, qui summa reverentia et honore Papam prosecuti sunt, ut satis est in superioribus ostensem; verum etiam evidenter se prodit, non rationis pondere, sed tantum affectu et odio verba similia effutire. Nulla est enim conventio vel comparatio Christi Vicarii, fidelium parentis, ac fidei ejus magistri et defensoris, cum infideli tyranno, acerrimo Christianorum persecutore. Sed qui sapientes sunt in oculis suis, et proprio spiritu ducentur, facile dicunt tenebras lumen, et lucem tenebras.

24. Pontificis magnitudo Christi jam tempore adolevit. — *Turcae multo post rerum summam sunt adepti.* — Deinde contra veritatem historiæ errat, dum ait Papam et Turcam eodem tempore ad suam magnitudinem excrevisse. Nam si de magnitudine Papæ quoad spiritualem dignitatem et potestatem loquamur, in ea nunquam crevit; a principio enim integra, et (ut ita dicam) in summo gradu in Petro fuit, eademque sine augmentatione ant-

diminutione est ad successores Petri derivata, ipsam utique potestatem in se spectando; nam usus ejus crescere potuit sicut crevit Ecclesia, et impedimenta ablata fuerunt, et majores etiam occasiones occurserunt. Et in hoc etiam sensu dici potest Papa a temporibus Constantini ad suam magnitudinem pervenisse; tunc enim coepit ejus dignitas universo orbi innotescere, et imperator ipse aliquie temporales principes illi colla subdere incœperunt. Imo etiam quoad temporalem dominationem tunc fere ad suam magnitudinem pervenit. At Turcæ imperium multum post tempus incœpit, nam, licet Turcarum gens, qui olim Gazari dicebantur, antiqua sit, tamen secta et imperium eorum longe recentiora sunt, nam et impius Mahometus post sexcentesimum Christi annum incœpit, et Turcæ non cœperunt orientale imperium Romanorum invadere usque ad Constantini Copronymi et Iconomachi tempora, et usque ad annum millesimum ac fere centesimum illud non obtinuerunt¹. Unde si tunc dicatur Turca ad suam magnitudinem excrevisse, ut revera dicendum est, omnino falsum est Papam, et Turcam ad suam magnitudinem simul pervenisse. Videtur autem rex Jacobus ad initium Mahometis respexisse, quia paulo post Bonifacium III in mundo apparuit; verumtamen sic etiam falsum est, aut eo tempore magnitudinem aliquam Pontificati esse additam, aut Turcarum gentem vel imperium tunc incœpisse. Denique accommodatio illa de Gog et Magog, non solum in Pontifice, quod evidentissimum est, verum etiam neque in Turca, habet ullam verisimilitudinem, ideoque neque in dubium revocari, nec aliorum judicio remitti debuit, ut in superioribus tactum est, et in sequenti capite iterum videbimus.

CAPUT XXII.

EX DESCRIPTIONE ANTICHRISTI A DANIELE PROPHETA TRADITA FABULA DE ANTICHRISTIANISMO ROMANO EVIDENTER REFELLITUR.

1. Danielis Prophetias rex Jacobus in medium non adducit. — Cum attente discursum regis Angliae de Antichristo legisset, et nullam in eo Danielis Prophetæ mentionem fieri vidisem, nisi cursim et obiter asserendo

Joannem in Apocalysi imitari modos loquendi Danielis, Ezechielis et Prophetarum, miratus sum valde, et dubitare coepi an rex crederet, Danielem de Antichristo prophetasse. Auxitque suspicionem, quod in principio suæ disputationis ait, Paulum clarius explicuisse, quod Joannes suis visionibus obscurius tradidit, prætermisso Daniele, quasi nihil ad causam pertineret, vel ac si neque obscure nec clare Antichristum prædixisset. Quod si fortasse ita verum est, et rex non credit Danielem de Antichristo prophetasse, interrogandus est cur id credat de Joanne, et de Daniele negat, quia uterque per ænigmata locutus est, et neuter nomen Antichristi expresse posuit, et visiones Danielis, judicio omnium Patrum et expositorum, minus obscure indicant Antichristum, quam Joannis. Imo Christus Dominus, Matth. 4, satis indicat Danielem de Antichristo fuisse locutum, eademque est perpetua Ecclesiæ traditio. Quod si hoc rex negare non audeat, miramur cur in tam prolixa disputatione, et tam immanni contra Papam accusatione, tanti Prophetæ gravissimum testimonium omiserit. Suspicor ergo Danielem silentio præterisse, quia descriptiones ejus de Antichristo non solum ad errorem suum confirmandum nullo colore detorqueri poterant, sed illum potius redarguunt, et veritatem non obscure ostendunt. Ob hanc ergo causam, licet in superioribus ad ostendendum, Antichristum futurum esse singularem personam, et quanto tempore regnaturus sit, hujus Prophetæ testimoniis usi fuerimus, operæ pretium duximus descriptionem Antichristi ex ipso colligere; copiosius enim quam alii eam tradit, evidentiusque per illam non solum a Papa, sed etiam ab omnibus aliis, qui falso Antichristi putati sunt, discernitur.

2. Per bestias apud Danielem imperia adumbrantur. — Descriptio Antichristi. — Primum igitur in capite septimo ait Daniel se vidisse quatuor bestias, quae quatuor mundi regna significabant, ut ipsemet declarat; illa vero quatuor regna ex communi sententia et expositione Catholicorum fuerunt Chaldaeorum, Persarum, Græcorum et Romanorum imperia, ut supra, c. 3, breviter declaratum est. Tribus autem bestiis seu regnis prioribus, quæ cito transierunt, prætermisis, de quarta dicit inter alia Daniel, quod habebat cornua decem, et subjungit, c. 7: *Considerabam cornua, et ecce cornu aliud parecum ortum est de medio corum, et tria de cornibus primis evulsa*

¹ Vide Baron. an. 763 et 1048.

sunt a facie ejus; et ecce oculi, quasi oculi hominis erant in cornu isto, et os loquens ingenititia. In his ergo, et sequentibus verbis quæ postea addemus, intelligimus Danielem personam Antichristi descripsisse. Quod licet in superioribus obiter et per occasionem sæpius indicatum sit, hic ex professo et integre exponendum est, quoniam si colligantur simul omnes proprietates quas Propheta illi parvulo cornui attribuit, falsitatis evidenter convincitur mendacium et impostura Protestantium de Romano Antichristianismo. Oportet tamen ut supponamus cornu illud parvulum repræsentare Autchristum. Prius autem decem cornua interpretari necesse est; de ipsa vero bestia quarta nihil addere oportet his, quæ Daniel ipse dixit, videlicet, quartam bestiam esse *quartum regnum in terra, quod majus erit omnibus regnis, et devorabit universam terram, et conculcabit, et comminuet eam.* Per quod omnes Catholici imperium Romanum intelligunt, omissis interpretationibus Porphyrii et Hebræorum, de quibus videri possunt D. Hieronymus, et alii expositores: nam in hoc nulla est in præsenti controversia.

3. *Per decem cornua quartæ bestie, totidem reges in imperio Romano repræsentantur.* — De decem item cornibus, Daniel declarat repræsentare decem reges futuros, satisque indicat esse futuros non omnino distinctos ab illo regno maximo per quartam bestiam significato, neque in terris et provinciis extraditionem totam Romani imperii, sed esse futuros decem reges ejusdemmet regni quarti, sic enim ait: *Porro cornua ipsius regni decem reges erunt.* Unde omnes collidunt, ipsummet regnum Romanum, quod prius unum imperium fuit, dividendum esse in decem regna. Quod etiam significatum fuit in c. 2 ejusdem Prophetæ, per decem digitos in quos statua desinebat.

4. *An numerus ille certus sit, an pro incerto positus.* — De hoc autem numero decem cornuum dubitatio est, an, sicut Daniel præcise vidit decem cornua, et non plura neque pauiora, ita per illa significantur decem reges in eodem numero certo ac præciso, an indefinite multitudo regum in quos dividendum fuit Romanum imperium. Quam quæstionem attingit Augustinus, 20 de Civit., cap. 23, et incertum esse putat an denarius ille numerus significet universam multitudinem regum futurorum in Romano imperio, prius quam Antichristus veniat, an vero præcise decem reges demonstret. Prosper etiam, in Dimidio

temporis, capite octavo, licet de numero non moveat quæstionem, dubitat nihilominus an per illos decem reges intelligantur *truculentiores reges, qui fuerunt in religione Christiana.* Aretas etiam, c. 36, in Apocalyp., generatim dicit, decem cornua significare, *consummationem eorum que juvant ad malitiam contingere Antchristianam*, ubi numerum indefinitum indicat, quamvis aliam opinionem referat, dicens: *Sed et de his quidam dixerunt, in decem regna divisum tunc iri mundum.* Et in hanc sententiam videtur inclinasse Pereira, lib. 2 in Daniel., dum per decem digitos statuæ significari ait, *Romanum imperium novissime divisum iri in multa regna, multosque reges, quorum alii potentiores, alii imbecilliores futuri sunt, et ideo dìgiti partim ferrei erant, partim testiles.* Et ibidem ait, per decem cornua in c. 7, significari *multos reges.* Idemque lib. 8, tractans sententiam Augustini, sub disjunctione loquitur, dicens negari non posse quin quo tempore venturus est Antichristus, futuri sint in orbe Romano, *decem reges, vel multi reges.*

5. *Patres numerum illum determinatum sentiunt.* — Patres autem communiter, nullam dubitationem vel quæstionem moventes, simpliciter dicunt illa decem cornua significare decem reges, prout Daniel illos interpretatur, eosque futuros esse in orbe Romano tempore adventus Antichristi. Ita loquitur Irenæus, lib. 5, c. 28, et in c. 26, fusius in eodem sensu exponit decem digitos statuæ, Dan. 2, et decem cornua bestiæ, Apocal. 13 et 17; et licet expresse id non declareret, semper tamen tanquam de certo ac præciso numero loquitur. Hyppollit. etiam, orat. de Consummat. mund., solum dicit cornua decem a Daniele visa, esse decem reges, et eosdem in decem digitis statuæ significari; et eodem modo loquuntur Cyrill. Hierosol., catech. 45; Lact., l. 7, c. 16; Tertull., de Resurrect. carnis, c. 24 et 25; et in eadem opinione sunt Hieronymus et Theodoret., Daniel. 7 et 11, intelligentes, per hæc decem cornua bestiæ, ubicumque in Daniele et Apocalypsi eorum fit mentio, decem regna significari, in quæ erit Romanum imperium divisum. Consentiant etiam Andreas, c. 36 et 53, in Apocal., qui inter alia dicit, *per decem cornua, terreni regni in decem partes sectionem significari.* Quod etiam Aretas c. 54 attingit, referendo tantum aliorum nomine, qui ita inquit, *aiunt.* Et hanc sententiam sequuntur communiter moderni expositores et Doctores, et quidam

satis eruditus¹ tanta exaggeratione illam affirmat, ut dicat, tam manifestum esse illos decem reges, nec plures, nec pauciores esse intelligendos, ut vehementer miretur potuisse de hoc sanctum Augustinum ambigere. Imo ait, *considerato tanto Patrum consensu, minimum perfictæ frontis extiturum, qui contra obniti vel hiscere audeat.*

6. Rex Angliae numerum explicat. — *Denarius et septenarius* sœpe indicant numerum incertum. — At nihilominus rex Anglie, in Prefatione, p. 120, tractans locum Apoc. 17, denarium numerum ait ibi sumi pro numero incerto, utiturque hoc argumento, quod ibi Joannes alludit ad hunc locum Danielis, quasi supponens ut certius, Danielem denarium pro numero incerto sumpsisse. Additque aliud argumentum, quia septem capitum, et decem cornuum draconis seu diaboli numerus non potest aliter intelligi, nisi ut numerum declareret incertum. Ego vero imprimis non censeo controversiam hanc pertinere ad dogmata fidei, sed esse rem in opinione positam. Nam Patres pro secunda sententia allegati non tradunt illam ut certam; imo nec faciunt vim magnam in præciso ac proprio numero denario, sed in divisione imperii in plura regna, et utuntur illo numero, quia Scriptura ita loquitur. Constat autem numerum denariorum esse unum ex his qui in sacra Scriptura pro multitudine magna vel universalis sumuntur. Unde, accidente Augustini auctoritate, et dubitatione aliorum, non videtur posse damnari, aut temerarius vel audax censeri, qui de significatione illius numeri denarii in illo loco dubitaverit. Præsertim quia de septenario numero capitum tam in hoc loco Danielis, quam in Apocal. 13, et multo magis in 17, multi dubitant an significet numerum certum, vel communitatem aliquam, seu collectionem regum impiorum, ut supra vidi mus cap. 4. Unde cum in hoc loco dicit Daniel, tria cornua esse a facie parvi cornu eceilenda, licet præcise intelligatur de tribus regibus, quia numerus ternarius non solet in alia incerta significatione sumi, neque ibi est necessaria, nihilominus per septem alias reges subjiciendos vel confederandos Antichristo, intelligi possent omnes alii qui eo tempore sunt futuri, sive pauciores, sive plures sint, quia septenarius numerus ex mysticis est, qui solent universalitatem significare,

et ibi non sine auctoritate, nec sine aliqua apparenti occasione præsumitur talis significatio, ut facilius prophetia et intelligatur et impleatur.

7. Certius est denarium pro numero certo ponи. — Propter hæc ergo non censeo nimium esse exaggerandam certitudinem posterioris sententiæ, quamvis illam præferendam et simpliciter veram existimem. Primo propter Scripturæ testimonia, quia non uno vel alio loco, sed in multis, tam in Apocalypsi quam in Daniele, ubi sub hac figura illa divisio imperii Romani in plura regna prædictitur, fit sub illo numero denario. Secundo, quia nulla est necessitas metaphoræ, vel impropriatatis vocis, cum nihil obstet quominus illa regna futura sint decem et non plura, eademque facilitate possit multiplicatio in illo numero, quam in quocumque alio contingere. Maxime quia etiam si fortasse plura regna parva, vel principatus minores eo tempore in orbe Romano esse possint, nihilominus omnia poterunt ad decem principalia regna et quasi capita revocari. Ita ergo facile potest ille numerus denarius proprie et præcise accipi, neque oportet ad incertos numeros recurrere. Tertio, propter communiorum Patrum consensum.

8. Fundamenta regis Angliae subvertuntur. — Neque prima conjectura regis Angliae est alicujus momenti, sed in contrarium verti debet, nam quia Joannes ad hunc locum Danielis alludit, et in hoc loco probabilius est denarium proprie sumi, ideo in locis Apocalypsis idem judeandum est. Ad aliud vero argumentum, quod sumitur ex comparatione ad numerum septem capitum et decem cornuum draconis seu dæmoni attributum, dicens non posse aliter quam de certo numero pro incerto intelligi, respondemus negando assumptum. Et quoniam ipse non designat locum de quo loquatur, oportet per tria discurrere, in quibus Joannes illius numeri mentionem facit, utique c. 12, 13 et 17.

9. De septenario numero distinctius agitur. — *Antichristus organum dæmonis.* — Et quidem c. 12 fatemur illum numerum tribui dæmoni: nam aperte dicit Joannes: *Visum est aliud signum in cælo, et ecce draco magnus rufus, habens capita septem, et cornua decem.* Et nihilominus etiam in hoc loco dicimus eadem esse capita et cornua decem que in capite tertio, et quæ sunt apud Danielem c. 7. Nam, licet ibi sit sermo de dæmons, et in aliis locis de Antichristo, utriusque organa, et mem-

¹ Thom. Malvend., l. 4 de Antichrist., c. 15 et 21.

bra, seu instrumenta sunt illa capita et cornua, id est, illi reges decem, quorum tres destruet Antichristus, et septem illi servient, nam dæmon et Antichristus conjunctissimi futuri sunt, non quidem unione hypostatica, ut quidam finixerunt, sed morali influxu et motione. Nam Antichristus dum vixerit, totus a dæmone quodammodo possidebitur, movebitur et gubernabitur, et ita erit membrum ejus præcipuum. et quasi conjunctum organum, quo dæmon cætera ad eumdem finem eosdemque effectus movebit. Et ideo illa decem cornua et septem capita, tam dæmoni quam Antichristo tribuuntur; dæmoni, ut principali agenti in illo ordine, magis vero remoto; Antichristo, ut propinquiori, minus vero principali, si ad dæmonem comparetur. Quamvis respectu aliorum hominum Antichristus etiam dici possit principalis causa; unde a Sanetis et Theologis¹, caput malorum dicitur, omnium quidem, excessu et abundantia malitiæ, eorum vero quos suo tempore subjugabit, quibusque tanquam instrumenis utetur, etiam influxu et motione.

40. Duo Apocalypsis loca de septenario exponuntur. — Alter vero locus est Apocalyp. 13, et ibi non est sermo de dracone, sed de bestia, cui draco dedit virtutem suam, id est, de Antichristo, et ita ibi etiam non oportet explicare numerum certum pro incerto. Tertius locus est Apocalypsis 17, ubi bestia potest quidem dæmonem repræsentare, et tunc idem dicendum est quod de c. 12 diximus. Vel significare potest Romanum imperium, ut supra etiam visum est, et tunc iidem decem reges, in quos desinet Romanum imperium, repræsentantur, ut idem Joannes exposuit, et sic etiam ibi idem numerus definitus est. Et de numero septem capitum, supra, cap. 5, ostendimus non incertum, sed certum numerum significare. Quod etiam rex Angliæ admittit, cum illa septem capita dicat esse septem regimina Romanæ civitatis, et non plura, neque pauciora, ex quo potest argumentum ad hominem retorqueri, idem esse de numero denario dicendum.

41. Decem bestiæ cornua omnes christianos reges a Bonifacio III, Rex Angliæ interpretatur. — Prius vero quam ad undecimum cornu parvulum transeamus, oportet hic breviter expendere novam et mirabilem interpretationem illorum decem regum, quam rex

Angliæ nobis exhibuit. Illos enim reges ait esse omnes reges christianos, qui a tempore declinationis Romani imperii sub obedientia Romani Pontificis militarunt, et de illis exponit illa verba Apocalyp. 17: *Decem cornua, quæ vidisti, decem reges sunt qui regnum nondum acceperunt, sed potestatem tanquam reges una hora accipient, post bestiam, quia illustriora (inquit) orbis Christiani regna, non nisi ruente ethnico imperio Romano, libertatem suam vindicarunt.* Unde infert, eodem tempore incepisse hos reges, quo Antichristus suum regnum auspicatus est, id est, tempore Bonifacii III, ut ipse antea exposuit. Et de his regibus ait perseverasse multo tempore in uno consilio, adorando bestiam, ejusque pedes exosculando, omnem potestatem, auctoritatemque suam ei concedendo, calicem idolatriæ simul cum illa hauriendo, bellum cum agno in persecutione Sanctorum ejus, jubente ea, gerendo, quæ tot nationibus ac populis imperitabat. Quod autem Joannes post illa verba: *Cum agno pugnabunt*, subdit: *Et agnus vincet illos*, exponit, dicens, per nostram conversionem, postquam tandem aliquando, ait, odio meretricem habebimus, hoc est Romam, et desertam relinquemus, ac nudam, etc. Deinde (inquit) rationem subjungit (utique Angelus, seu Joannes) hujus tam subitæ mutationis in nobis, dicens: *Deus enim dedit in corde eorum, ut faciant quod placitum est illi, ut dent regnum suum bestiæ, donec consummentur verba Dei.* Hæc est regis interpretatio de decem regibus in Apocalypsi, cumque ipse dicat Joannem alludere ad Danielis verba, idem de decem cornibus apud Danielem sentire indicat.

42. De parvo cornu rex Jacobus omnino tacet. — *Quid alii de eo senserint.* — Prius vero quam interpretationem hanc rejiciamus, explicare oportet quid per cornu parvum intelligendum sit. De quo affirmare non possum quid rex Angliæ sentiat, quia nullam ejus mentionem in disputatione sua facit, quod, ut in principio capituli dixi, admiratione dignum est, et suspicionem ingerit, non credere cornu illud Antichristum repræsentare. Quod si forte hoc ita est, interrogo quisnam sit; vel cur separatim et singulariter numeretur. Præsertim cum rex dicat, illum numerum denarium non significare numerum certum, sed pro incerto poni, in quo etiam undecimus ille rex per cornu parvum repræsentatus includebatur. Profecto vix occurrit quid rex possit, quod verisimile sit et prudentibus

¹ Gregor., 45 Mor., c. 28; Hier., Abac. 3; D. Thom., 3 p., q. 8, art. 8.

satisfaciat, respondere. Scio equidem Porphyrium dixisse, illud cornu repræsentasse Antiochum, neque defuisse alios, qui vel Mähometum vel Turcam significare senserint. Verumtamen Porphyrium confundit Hieronymus, quia Antiochus præcessit imperium Romanum, et ex Alexandro Magno ac imperio Macedonum illustrem duxit originem, et rex seu princeps natus est; cornu autem illud post imperium Romanum et divisionem ejus futurum esse prædictur, et parvum propter humile principium et ortum dicitur. Aliæ vero opinones facile etiam refutari possunt, quia in illis regnis non inveniuntur proprietates quæ ibi illi cornui tribuuntur, ut supra, cap. 2, tetigi, et facile ex dicendis lector poterit intelligere; in his enim nunc immorari necesse non est.

13. Sit ergo certum et constans, cornu illud parvulum Antichristum repræsentare; consideratis enim aliis locis Scripturæ, et prædictione ipsius Christi de tribulatione magna Ecclesiæ futura proxime ante judicium, in nullo alio inveniri possunt proprietates omnes ibi a Daniele prædictæ, et illi cornui attributæ, nisi in Antichristo. Et ita in hac affirmanda sententia convenient Patres, et expositores, Hieronymus, Augustinus et Gregorius, quos supra, c. 2, retuli; Athanas., epist. ad Solitari. vitam agent., circa finem; Justin., contra Tryphon., parum ab initio; Origen., lib. 6 contra Celsum, circa medium; Cyrill. Hierosol., cateches. 15; Irenæ., lib. 5 Contra hæres., c. 25 et 26; Theodoret., orat. 7 in Daniel.; Prosper, in Dimid. tempor., cap. 8; Ruffin., in Exposit. Symbol., circa articulum de adventu ad judicium, et reliqui exponentes tam Danielem, quam Apocalypsim, et Paulum, 2 ad Thes. 2, ubi Chrysost. optime.

14. *Ex ipsis prophetiae verbis regis Angliae placita evertuntur.* — Hinc ergo imprimis colligimus falsam esse interpretationem de decem cornibus, quam rex tradidit, nimirum, illa esse omnia christiani orbis regna, quæ a tempore Phocæ imperatoris usque ad Lutherum, vel usque ad Henricum VIII, regem Angliae, Romano Pontifici obedientiam dederunt. Nam decem illi reges, quos Daniel commemorat, nunquam dederunt obedientiam Antichristo, seu illi cornui parvulo, sed potius statim ac cornu illud ortum est, tria ex decem cornibus ærula sunt a facie ejus, quia, ut infra dicitur, cornu illud rex erit potentior prioribus, et tres reges humiliabit. Ubi evidenter

loquitur Propheta de potentia temporali, et de usurpatione trium regnum, per bella, vel aliam similem coactionem. Unde addunt omnes Patres et expositores, debellatis illis tribus regibus, reliquos septem manus daturos Antichristo, et illi tanquam inferiores et subditos potius vi et metu, quam sua sponte esse sociandos. At nullus Pontifex, sive Bonifacius III, sive quilibet alias, tres reges bello superavit, neque alii inviti, et bello aut potentia, et victoriis Papæ conterriti, sed fide et divina vocatione adducti, ei se subjicerunt. Ergo quæ de illis decem cornibus, et de undecimo parvo dicuntur, non possunt regibus christianis et Romano Pontifici accommodari. Eo vel maxime, quod tres illi reges, quos cornu parvulum debellaturum est, sunt reges Ægypti, et Lybiæ, seu Africæ, ut est communis traditio Patrum, quos sæpe retuli, sumpta ex Daniel. 41, ut ibi Hieronymi, Theodorei, et alii exponunt. At Summi Pontifices nunquam in Ægypto, vel Æthiopia bella gesserunt, neque regnis illis dominari cuperunt.

15. *Cornu partulum exurget post Romanum imperium divisum.* — Præterea ex visione Danielis constat, ante ortum illud parvum cornu, quartam bestiam, id est, Romanum imperium, in decem regna esse distrahendum, nam expresse dixit Angelus Danieli: *Porro cornua decem ipsius regni decem reges erunt, et alius consurget post eos.* Illi ergo decem reges futuri sunt ejusdem regni Romani; erit ergo inter eos divisum prius quam cornu parvum oriatur. At Romanus Pontificatus, etiam quoad statum quem habuit sub Bonifacio III, incœpit ante tantam declinationem seu divisionem Romani imperii; nam tunc adhuc durabat Romanum imperium sub uno imperatore Phoca, et multo tempore postea duravit, saltem usque ad divisionem imperii in Occidentale et Orientale. Et licet multi essent tunc reges in terris impiorum, nondum imperii jugum omnino abjeccerant, aut supremam potestatem obtinuerant; ergo nec illi fuerunt decem reges, de quibus Joannes loquitur; nee parvum cornu potuit esse Bonifacius III, vel alius similis successor ejus.

16. *Bonifacius III novum regnum non crevit, ut Daniel vaticinatus est.* — Præterquam quod non solum rerum eventus cum verbis et visione prophetiae non consentiunt, verum etiam veritas ipsius rei resistit. Quia Bonifacius nullum regnum crevit, sicut de parvulo

cornu prædictit Daniel, nec novam aliquam potestatem aut jurisdictionem accepit vel usurpavit; imo nec novum nomen aut titulum, ut sæpe dictum est; ergo, licet persona ejus orta vel ad dignitatem electa fuisset post reges, tamen Papa, vel Pontificius thronus, de quo potissime hæretici loquuntur, non potest dici surrexisse post divisionem imperii in decem regna; imo neque post aliquam inclinationem ejus; nam in re ipsa incœpit cum ipso imperio, et externum etiam splendorem et majestatem, imperio adhuc florente sub Constantino, habere cœpit, et in se nullum augmentum postea accepit; in externo autem, seu temporali dominio parum crevit, variasque temporum vicissitudines habuit; ergo de illo nullo modo dici potest venisse post reges decem, vel post omnes reges, in quos Romanum imperium divisum, vel dividendum est. Ac subinde nec decem illi reges esse possunt illi catholici et christianissimi reges, qui hactenus sub obdientia Vicarii Christi militarunt.

17. *Non solum externis regibus, sed Anglianis insignem injuriam irrogat rex Jacobus.* — Cætera vero omnia quæ rex Angliæ, post suam de decem regibus interpretationem, in aliorum verborum Joannis expositionem adjungit, tantam præ se ferunt absurditatem, ut refutatione non indigeant. Imprimis enim non solum cæteris illustribus christianis regnis, eorumque regibus, sed etiam regno suo, suisque progenitoribus magnam irrogat injuriam, dum omnes usque ad Henricum VIII, Christi hostes cum *Agno bellum gerentes*, et *fidei persecutores*, et *Sanctos persequentes*, et *idolorum cultores*, *calicem idolatriæ cum bestiæ haurientes*, appellat. Quod enim bellum tot sancti reges et catholicæ principes contra Christum excitarunt, aut quos Sanctos sunt persecuti, quæve idola adorarunt? Certe si venerari Pontificem Christi Vicarium, fuit Christum persequi, fecit hoc Constantinus, et alii pii et catholicæ imperatores ac reges. Si hæreticorum temeritatem ac pertinaciam reprimere, est Sanctos persequi, fecerunt hoc antiqui Ecclesiæ Pastores, imperatorum christianorum potentia adjuti, a temporibus Augustini aliorumque Sanctorum Patrum. Denique si venerari imagines eisque reverenter uti, cultus idolorum est, fecerunt hoc Christiani omnes ab initio Ecclesiæ. Igitur vel principes omnes catholicos qui post Constantinum in Ecclesia fuerunt, imo et omnes Sanctos Pontifices, Antichristianos faciat, vel pos-

teriores, qui a tempore Bonifacii fuerunt, calumniari desinat.

18. *Falsa interpretatio a rege Apocalypsis verbis adhibetur.* — *Vinci in Joannis loco, non est converti, sed everti.* — Praeterea interpretatio illorum verborum, *Et Agnus vincet illos*, ut vincere sit eos convertere, ut contra Papam et Romanam urbem insurgant, evidenter repugnat proprietati verborum, et contextui Joannis, dicentis de illis decem regibus: *Hi unum consilium habent, et virtutem suam bestiæ tradent*¹. Nam tres illorum victi, ac superati ab Antichristo, non voluntarie, sed necessitate coacti, totam suam potentiam in illum transferent, alii vero timentes potentiam ejus illum juvabunt, ejusque consiliis inseruent. Et ita omnes contra Christum insurgent, sicut subjungit: *Hi cum Agno pugnabunt, et Agnus vincet illos*, non solum decem reges, sed etiam ipsum Antichristum principalem hostem, et ducem pugnæ. Non ergo vincet convertendo, sed præliando et interficiendo, proprie et vere illos vincendo, *quia Dominus dominorum est, et Rex regum*: et hoc magis declarant verba sequentia: *Et qui cum illo sunt vocati, et electi, et fideles, utique qui tunc erunt, vincent etiam illos, seu erunt participes victoriae.* Ergo illi reges, qui vincentur, non erunt vocati, nec electi, nec fideles; ergo *vinci* non est *converti*, sed destrui. Et hoc etiam confirmat idem Joannes, in c. 16, ubi ait, tres spiritus malos *congregaturos reges terræ in prælium ad diem magnum omnipotentis Dei*, id est, in quo Deus ostensurus est potestatem suam contra illos, eos mirabiliter superando et vincendo, ut c. 21 idem Joannes describit. Nam sine dubio hoc prælium diei magni omnipotentis Dei non est nisi prælium Gog et Magog, de quo in dicto c. 21 tractat, ut meliores interpres intellexerunt². Denique ex locis Danielis, paulo post, hunc esse verum sensum illius prophetæ et victoriae per Christum comparandæ, confirmabimus.

19. *Decem reges illi nunquam sunt adversus Antichristum præliaturi.* — Unde etiam constat falsum omnino esse, decem illos reges convertendos a Deo esse contra Antichristum, aut pugnaturos esse cum illo et victuros illum, sedemque illius et civitatem regiam ejus tanto odio esse prosecuturos, ut illam

¹ Apoc. 17.

² Ribera, Viegas, Malvend., lib. 5, c. 16, et lib. 10, c. 9 et seq., qui alias referunt.

igni tradant, prorsusque evertant. Nam hoc repugnat expressis verbis Joannis paulo antea citatis: *Hic unum consilium habent, et virtutem seu potentiam suam bestiae tradent*¹. Nam ex sequentibus etiam verbis, quae exposuimus, colligitur clare, in eo statu esse perseveraturos, donec cum Christo pugnant et ab eo vincantur; nunquam ergo cum Antichristo pugnabunt, neque vincent illum.

20. *Dare in corde, id est, permettere.—Romanum non fore Antichristi sedem, Apoc. 17.*—Imo in illis eisdem verbis quae rex detorquet, hoc evidenter continetur. Ait enim: *Deus enim dedit in corda eorum, utique regum, ut dent suum regnum bestiae*, id est Antichristo, donec consummentur verba Dei, id est, impleantur quae de Babylonica destructione, et de ipsis Antichristi interitu praedicta sunt. Dicitur autem Deus hoc dedisse in corda illorum regum, non inspirando aut sugerendo, sed (juxta morem loquendi Scripturæ) permittendo, et illorum malitia ad executionem providentiae suæ utendo. Hoc ergo modo permittet Deus, reges illos, fortasse prius catholicos, pravos autem et iniquos, Antichristo copulari, eique favorem suum et potentiam impendere, et ita regna sua illi tradere, et forte tributaria efficere, donec consummentur prophetiae de Antichristo. Durabit ergo illa confederatio usque ad finem; nunquam ergo illi reges contra Antichristum vel regiam ejus insurgent. Quocirca, si *Babylon illa, et meretrix, seu civitas magna*, quam isti reges odient, et *desolatam facient, ac nudam*, est Roma, profecto inde potius convincitur Romam nunquam esse futuram regiam sedem Antichristi, et impugnatores Romæ non hostes, sed amicos fore Antichristi. Cum ergo rex Angliae se inter eos reges numerat, dicens: *Meretricem odio habebimus*, se inter socios et fautores Antichristi numerat; videat ergo et consideret quem fructum ex istis suis interpretationibus consequatur.

21. *Antichristi descriptio.*—Sic ergo explosa interpretatione illa decem cornuum, et supposito pro constanti, illa repræsentare decem reges futuros tempore Antichristi, et potentiam suam illi tradituros modo explicato, evidenter etiam est cornu parvum esse Antichristum, ut Ecclesia semper intellexit. Superest ergo ut breviter videamus quomodo cornu illud parvum Propheta describat, cap. 17. Primo enim ponderanda est proprietas indi-

cata in particula *parvulum*; posita enim est ad significandum, Antichristum ex vilissimis principiis et abjectissimis parentibus, infame gente esse oriundum; non enim sine mysterio verbum illud additum est, ut omnes intellexerunt. Et aliis verbis statim subiunctis magis declaratur, cum de eodem cornu parvo dicatur: *Ortum est de medio eorum*; significatur enim ibi, ut in superioribus notavi, illum non esse oriturum ex aliquo illorum regum, sed in terris eorum apparitum.

22. *Regnum non hæreditate, sed calliditate consequetur.*—Unde altera proprietas notari potest, scilicet, non habiturum regnum hæreditario jure, sed ex parvis initiiis, variis artibus, et imposturis, ac dæmonis fallaciis, brevi tempore ita esse augendum viribus, ut *tria cornua evellantur a facie ejus*, id est, ut tres reges brevi tempore humiliet, et *major ac potentior fiat cæteris*, ut ibidem additur; ut recte Theodoretus exposuit, dicens: *Quia nascens cornu vidit, parvum appellari tanquam ex parva natione Judæorum profectum, et interim obscurum regnum obtinens; postquam vero ita evulsit cornua, merito reliquis majus vocat.* Tertiam item proprietatem ex eisdem verbis colligo, nimirum, illum primo ac præcipue futurum esse tyrannum, qui temporale regnum prius industria et pravis artibus inchoet, postea per potentiam et bella illud augeat, tres reges superando, et suis regnis privando, et alios sibi subjiciendo, vel tanquam inferiores ac debiliores sibi conjungendo, ut magis Joannes in Apocalypsi declaravit.

23. *Ingenii acumine ad superbiam, et maledicentiam abutetur.*—Quarta proprietas sumi potest ex illis verbis: *Ecce oculi quasi oculi hominis erant in cornu ipso, et os loquens ingentia.* Ubi per oculos hominis Theodoretus significari intelligit, internam mentem et iudicium, atque Antichristo tribui oculos hominis, quia erit sagacissimus, et prudentia humana gubernabitur. Alii simplicius hoc modo exponunt. Cum habiturus sit faciem hominis, quia verus homo futurus est, loquetur non ut homo, sed ut superbissimus dæmon, quod Joannes alibi dixit: *Loquebatur ut draco.* Dicitur enim loqui *ingentia seu grandia*, tum quia ingenti superbìa se efferet; tum etiam quia blasphemias in Deum proferet, nam, ut statim subjungitur, *sermones contra Excelsum loquetur*; utrumque enim illis verbis proprie significatur, et unum est ad aliud consequens. Incredibili enim arrogantia se Deum procla-

¹ Apoc. 17.

mabit (ut ex Paulo notavimus), et ita Deo excelso adversabitur, et contra eum loquetur.

24. Religionem conculcabit et sacra inverttere conabitur. — *Prope judicium diem, non ante venturus est Antichristus.* — Quinta sumitur ex verbis illis : *Sanctos Altissimi conteret, reputabit quod possit mutare tempora et leges, et tradentur in manu ejus usque ad tempus, et tempora, et dimidium temporis.* Quæ verba sunt de persecutione Antichristi, et de tempore durationis ejus, quæ per occasionem necessariam in superioribus exposita sunt. Nunc solum notanda sunt verba illa : *Putabit quod possit mutare tempora et leges.* Quibus declaratur, persecutionem non tantum esse futuram temporalem et politicam propter dominationem temporalem, sed simul et maxime futuram esse spiritualem, nam conabitur *mutare tempora*, id est (ut ait Hieronymus) cærenicias, festivitates, vel certe totam religionem per multa tempora in orbe fundatam, et in cordibus hominum radicatam, et *leges*, utique tam divinas quam humanas. Nec ipse aliquam ex antiquis religionibus seu legibus profitebitur, sed novam introducet, credens se posse leges et tempora mutare. Et hasmet Antichristi notas colligit Athanasius, dicta epistola ad Solitar. vitam agent., dicens: *Nonne visio Danielis istiusmodi notis Antichristum significat? Nimirum quod bella cum Sanctis gesturus sit, et quod invalescat contra eos, quod malitia superabit omnes, qui ante ipsum fuere, et quod humiliabit tres reges, loqueturque sermones contra Altissimum, et quod meditabitur alienare et legum et temporum articulos.* Sexta proprietas colligi potest ex sequentibus verbis : *Et judicium sedebit, ut auferatur potentia, et conteratur, et dispereat usque in finem, regnum autem, et potentia, et magnitudo regni, quæ est super omne cælum detur populo Sanctorum Altissimi*, etc. Nam in his ponitur ut nota Antichristi, quod prope tempora judicii veniet, et quod regnum ejus non nisi per adventum supremi regis Christi conteretur, et ipse interficietur. Quam proprietatem utpote ad tempora Antichristi pertinentem supra explicuimus, illamque ibi Hieronymus, Theodoreetus et alii interpretes indicant.

25. Eadem Antichristi notæ aliis locis a Daniele inculcantur. — Has autem Antichristi proprietates idem propheta in sequentibus capitulis partim magis confirmat et declarat, partim etiam auget. Nam in cap. 8, postquam

retulit visionem arietis et hirci, et de Dario, rege Persarum, et de Alexandro Magno, rege Græcorum, illam declaravit, tandem in fine quædam profert, quæ, licet ad litteram de Antiocho, qui ex Græcis regibus, qui Alexander successerunt, descendit, et Judæos multum vexavit, intelligentur, in persona ejus de Antichristo dicta fuisse multi Patres intellexerunt, præsertim Irenæus, lib. 5 *Contra hæres.*, c. 25; et Origen., lib. 6 *Contra Celsum*, circa medium; et Gregor., lib. 32 *Moral.*, c. 12, alias 14. Et revera verba Prophetæ tam proprie Antichristo quadrant, et ita consonant his quæ in aliis locis de Antichristo dicuntur, ut propter illum præcipue de illo dicta esse videantur. Nam initium ejus his verbis prædicitur : *De uno ex eis egressum est cornu unum modicum*, et iterum : *Consurget rex impudens facie*, ubi etiam mores ejus notantur. De progressu vero ejus additur : *Factum est grande contra meridiem, et contra Orientem*, etc. De illius statu : *Magnificatum est usque ad fortitudinem cœli*. Astutia vero, et artes per quas ascendet, in illis verbis significantur : *Intelligens propositiones*; item in illis : *Roborabitur fortitudo ejus, sed non in viribus*, suis, utique, sed dæmonis, permittente Deo. De bellis autem et crudelitate ejus dicitur : *Supra quam credi potest, universa vastabit, et prosperabitur, et faciet.* Deinde sic describitur ejus superbìa et pugna contra Deum : *Usque ad principem fortitudinis magnificatum est, et ab eo tulit juge sacrificium, dejecit locum sanctificationis ejus.* Et iterum : *Cor suum magnificabit, et contra Principem principum consurget.* Ac denique de Sanctorum persecutione dicitur : *Dejecit de fortitudine et de stellis, et conculcarit eas.* Et iterum : *Interficiet robustos, et populum Sanctorum secundum voluntatem suam, et dolus in manu ejus dirigitur.* Ac denique de fine ejus dicitur : *Sine manu conteretur, quod satis consonat verbis Pauli, 2 Thess. 2: Quem interficiet Dominus Jesus spiritu oris sui.*

26. Antichristus se in templo velut Deum collocabit. — Quamvis ergo hæc vere et ad litteram in Antiocho suo modo impleta fuerint, tamen per antonomasiam de Antichristo dicta esse creduntur; nam in illo cum majori plenitudine et excessu omnia inveniuntur tanquam in capite ipsius Antiochi, et malorum hominum. Ex his autem omnibus sex proprietates supra notatae præcipue declarantur. Solumque additur altera de modo interfectionis ejus, quæ potest esse septima.

Octava vero sumi potest ex c. 9 ejusdem Prophetæ, in illis verbis fere postremis: *Et erit in templo abominatio desolationis*; nam, licet aliis modis exponatur, tam ibi quam Matth. 24, nihilominus valde probabile est de Antichristo etiam intelligi, ut voluit Irenæus, lib. 5, c. 23, saltem in secundario, vel mystico sensu. Nam ad litteram non erat ibi sermo de Antichristo, sed de destructione Jerusalem facta per Titum, ut constat; tamen verba ipsa multo magis in Antichristum conveniunt, juxta ea quæ exponendo verba Pauli et Apocalypsis late diximus. Est ergo octava proprietas, *quod se faciet Deum, et in templo sedebit, ut adoretur, et suam imaginem collocabit, ut per eam etiam tanquam Deus collatur*, ut in Apocalypsi dicitur. Et hoc magis ex sequenti testimonio confirmabitur.

27. *Quæ de Seleuco, et Epiphane Daniel prædixit, convenient Antichristo.* — Est enim alius locus similis in eodem Prophetæ, c. 11, ab illis verbis: *Et stabit in loco ejus despectus, et non tribuetur ei honor regius, et veniet clam, et obtinebit eum in fraudulentia.* In tota enim superiori parte capitis prophetaverat Daniel de regibus Persarum et Græcorum, et latius de successoribus Alexandri, præsertimque de regibus Syriæ et Ægypti, quos reges Aquilonis et Austri vocat, et pervenit tandem (ut Hieronymus deducit) ad Seleucum Philopatrum, Antiochi Magni filium, quem vocat *vilissimum, et indignum decorum regio*, et de illo subjungit: *Et in paucis diebus contetur.* Et statim adjungit prædicta verba: *Et stabit in loco ejus despectus*, etc. Quæ, juxta litteræ contextum, et prophetiæ seu historiæ consecutionem, sine dubio intelliguntur de Antiocho Epiphane, fratre Seleuci, impíissimo rege, qui Dei populum vehementer exagitavit, ut ex libris Machabæorum constat; et fere omnia sequentia in eo capite de illo ad litteram dicuntur, ut fatentur ibi Hieronymus, Theodoret. et alii, et sumitur ex Chrysostomo, oratione secunda contra Judeos. Nihilominus tamen idem Hieronymus, Theodoretus et alii expositores ibi, et Gregorius, libro trigesimo secundo Moral., capite undecimo; Prosper, in Dimidio temporis, capite nono, multa etiam ex illis verbis de Antichristo dicta esse intelligunt, quia in illum maxime convenient, et quia Antiochus in multis typus fuit Antichristi.

28. *Singula de illis et Antichristo verba expenduntur.* — Per illa ergo verba, quæ retulimus, recte confirmantur et explanan-

tur quæ de initiis Antichristi in aliis locis dicuntur. Dicitur enim *despectus*, sicut dicitur *parrum cornu*, quia vilem et despectam habebit originem, et ideo in principio *non tribuetur ei honor regius*, quia non orietur ex regibus, nec regnum jure hæreditario obtinebit, sed *veniet clam, et obtinebit id in fraudulentia*; quia vafer erit, et *propositiones intelliget*. In sequentibus autem verbis describit quidem Daniel bella et victorias Antiochi, dicens: *Abundantes et uberes urbes ingredietur*, etc. Sub illarum vero figura Antichristi prælia et facinora prædixit, et ideo quædam interdum ita exaggerat, ut in solum Antichristum convenire posse videantur. Quale est illud: *Faciet quæ non fecerunt patres ejus, et patres patrum ejus*; quod Hieronymus notat, ad Antiochum proprie non accommodari, quia in regno et divitiis non omnes antecessores suos excessit. Posita ergo sunt propter Antichristum, qui obtinebit multo ampliorem potentiam et monarchiam, quam ille Antiochus fuerit consecutus. Postea vero describit Prophetæ persecutionem Antiochi contra Judæos, in figura etiam depingens persecutionem Ecclesiæ sub Antichristo, cui maxime illa verba convenient: *Contra firmissimas cogitationes inibit, utique consilia sua, et potentiam armabit contra firmas cogitationes sanctorum fidelium, ut Patres exponunt, unde infra dicitur: Cor ejus adversus testamentum sanctum, et faciet.* Et infra: *Et auferent juge sacrificium, et dabunt abominationem in desolationem.* Quæ omnia fecit suo modo Antiochus, sed sicut omnia in figura contingebant Judæis, ita illa fuerunt umbra respectu veritatis per Antichristum futuræ.

29. *Dei contemptus in Antichristo.* — *Antichristus deos gentium non colet, sed demonem fortasse in occulto adorabit.* — *Malvend.*, lib. 7, c. 12. — Postea vero de superbia et blasphemis Antichristi propriissima sunt illa verba: *Et faciet juxta voluntatem suam rex, et elevabitur, et magnificabitur adversus omnem Deum, et adversus Deum deorum loquetur magnifica*, etc. Et infra: *Deum patrum suorum non reputabit, nec quemquam deorum jurabit, quia adversus universa consurget.* Per quæ verba optime explicantur quæ supra tractavimus, ubi de cornu parvulo dicitur habere os loquens ingentia. Item quod circa verba Pauli diximus, quod ostendet se tanquam sit Deus, Dei veri locum et adorationem usurpans. Unde ex hoc loco colligunt Patres, Antichristum idola gentium demolitum, et deos gen-

tiū non esse adoraturum. Ex quo etiam notat Hieronymus hæc verba ita convenire Antichristo, ut non possint de Antiocho intelligi, qui idololatra fuit, et Hebræos ad deos gentium adorandos compellebat, ut in libris Machabæorum narratur. Hæc ergo esse potest nona proprietas Antichristi, scilicet, nou esse futurum idolorum cultorem, quod saltem in publico, vel de antiquis diis gentium intelligentum est. Nam statim addit Daniel, illum esse adoraturum Deum *Moezin*, de quo quis sit futurus, magna est controversia, varieque expositiones, sed ad præsens non referunt. Et probabilius videtur habitum Autichristum locum aliquem occultum, in quo dæmonem adjutorem suum sub aliqua imagine vel idolo occulte colat, ut tractavi in 2 tomo tertiae partis, disp. 54, art. 4, ubi non dixi, ut quidam mihi imposuit, forsitan illa verba interpretanda esse de solo Antiocho, sed retuli primo loco hanc sententiam, et postea sententiam Hieronymi ac Theodorei, et communem prætuli, et ratione Hieronymi, quam in præsenti etiam tetigi, et validissima est, confirmavi.

30. *Alia Danielis de Antichristo raticinia c. 11 et 12.* — Denique in reliqua parte capituli iterum prædictit Propheta prælia et victorias Antichristi, et specialiter quomodo tres reges Ægypti, Africæ seu Libyæ, et Æthiopiarum vincet, et regna eorum occupabit. Postea vero Hierosolymam, debellaturus eam, cum magna potentia *veniet in multitudine magna, ut conterat et interficiat plurimos, et figet tabernaculum suum Apadno inter maria super montem inclytum et sanctum*, quod de monte Sion vel Oliveti Hieronymus et alii exponunt. At tandem de morte ejus subjungitur: *Veniet usque ad summitatem ejus, et nemo auxiliabitur ei, quia, nimirum, interficiet illum Dominus spiritu oris sui, seu imperio suo, et sine manibus, præcipiet enim aperiri terram ut devoret eum, et vivus in infernum demergatur, ut in Apocalypsi dicitur.* Postmodum vero Daniel, c. 12, declarat quanto tempore duratura sit illa persecutio Antichristi, et quomodo paulo post mortem ejus futurum sit iudicium et universalis resurrectio, ut exposuit Augustinus, 20 de Civit., c. 23, et copiose in superioribus explicatum est. Atque hæc fere sunt notæ et signa quibus nobis Antichristum Daniel descripsit, quæ latius Hieron. et Theodorei. prosequuntur, et ex modernis Pereira, lib. 8 et 14 in Daniel., et Malvenda sparsim in suis eruditis libris de Antichristo.

31. *Ex dictis patet Pontificium Antichri-*

stianismum meram esse imposturam. — Conferant ergo omnes, qui fidem adhibent Scripturis, has proprietates et notas Antichristi, eum his quæ de Romano Pontifice sunt toti orbi manifesta, et luce clarius videre poterunt, quanta fuerit hæreticorum impudentia et horrenda temeritas, vel potius insanias, qui venerandam Apostolicam Sedem tam incredibili infamia dehonestare ausi sunt, et quanta sit illorum cæcitas, qui ipsorum nugis et inanibus cogitationibus se illudi sinunt. Antichristi enim initia abjecta erunt, et obscura, non tantum generis et originis (illud enim non multum curandum esset), sed regni et potestatis. Origo autem Romanæ Sedis quoad dignitatem ipsam altior cogitari non potest; ab ipso enim Christo fundata est, et inde ad singulas personas, etiam Bonifacii et posteriorum, per legitimam successionem manavit. Deinde Antichristi regnum ab ipso per falsas artes et tyrannidem inchoabitur: Pontificis autem regnum præcipuum nullum post Christum habuit initium, sed successionem, non per fraudes vel tyrannidem, sed per legitimam electionem. Ad hæc, Antichristi regnum temporale erit, per fraudes incipiet, et per bella et caedes hostium dilatabitur; primatus autem Pontificis spiritualis est, semperque idem quoad dignitatem in se spectatam, et licet quoad populorum subjectionem creverit, non tamen per corporalia bella, sed per verbum Dei, et fidem credentium. Per quam si cut in uno tempore dilatum est, ita per infidelitatem aliquorum in aliquibus locis fuit imminutum, licet per Dei gratiam alibi semper augeatur. Omitto cætera, quæ ad mores, tempora, sedes et fines pertinent, nam in superioribus satis ea inter se contulimus, et non solum diversa, sed etiam omnino opposita esse ostendimus. Nuncque solum adnotare voluimus et advertere, quanta in his omnibus sit Scripturarum consonantia et concordia, ut inde etiam appareat quam sint violentæ Protestantium accommodaciones ad visiones Apocalypsis, cum non solum sint voluntariæ et sine duce, et præter verborum proprietatem, et contra rerum veritatem, sed etiam sint contra alia clariora Scripturarum loca, per quæ debent obscuriora intelligi juxta prudenter rationem Scripturam interpretandi.

EORUM, QUÆ IN HOC LIBRO TRACTANTUR SUMMA,
CUM APOSTROPHE AD REGEM ANGLIÆ.

32. Quamvis hujus libri materia et argumentum nihil aliud præter calumniam, vel certe potius horrendam blasphemiam continere videatur, ideoque multis prudentibus melius fortasse videri posset hæc omittere, quam cum piarum aurium offensione rem per se incredibilem in quæstionem adducere, nihilominus laborem hunc nostrum neque inanem, neque piis auribus offendiculo futurum esse judicavimus. Cum enim serenissimus Angliæ rex, in suo de Antichristo discursu, ita suis conjecturis confidere videatur, ut eorum responcionem per singula disputationis membra, tanquam rem nobis arduam, vel certe impossibilem, audacter postulet, non solum utile, verum etiam necessarium visum est, tum ad singula respondere, tum etiam ostendere, omnia, quæ objiciuntur, et sine fundamento solido esse cogitata, et neque conjecturæ nomen mereri. Ita ut mirandum profecto sit in re tanti momenti, ut in ea salutis æternæ cardo versetur, tam levibus allusionibus seu allegoriis prudentes viros duci potuisse.

33. *Summa totius libri per singula capita.*
—Hanc igitur ob causam prius de Antichristi persona fundamentum posuimus, illumque futurum esse singularem quemdam hominem, ex Scripturarum verbis, serie ac concordia, necnon ex communi Patrum consensu demonstravimus. Deinde per singulas partes a rege propositas discurrendo, imprimis tempus ejus nondum venisse, persecutionemque illam, qualis ab initio non fuit, ab eo movendam, nondum inchoatam esse, nec testes contra illum mittendos adhuc apparuisse, ex eisdem principiis ostendimus. Postea vero sedem ejus, nec Romæ esse, nec unquam futuram comprobavimus. Ac denique Antichristi personam ex proprietatibus a Prophe-

tis et Apostolis de illo prædictis late consideravimus; et quomodo per incredibilem tyrannidem et fallaces artes, ac signa mendacia et ingentia prælia ab infimis principiis ad orbis monarchiam ascendet, et in tantam denique arrogantiam et superbiam perveniet, ut supra omne, quod dicitur Deus, extollatur, ita illum descriptimus, ut evidentissimum sit nullum mortalem hominem, nedum Romanum Pontificem, tam iniquum et abominabilem hactenus fuisse.

34. *Hæretici typus Antichristi.* — Quod si aliqua illius imago in aliquo terræ loco cogitanda est, non certe in sancta Romana Sede, sed in cathedris Hæresiarcharum, vel in thronis regiis paganorum, aut schismaticorum Romanam Ecclesiam consequentium, cogitandam esse ostendimus. Sicut Hieronymus, Daniel. 11, et epist. ad Algas., q. 44, Antiochum et Neronem; Damascenus, lib. de hæres., Mahometem; Irenæus, Marcionitas et similes hæreticos; Cyprianus, ep. 76 et 79, omnes Christi adversarios Antichristum appellarent. Nemo enim nisi quis ex istis Antichristis et Christi hostibus in Romanum Pontificem tale nomen talemve calumniam traduxit. Neque in ejus cogitationem ascendere poterit, qui antiquam illius sedis originem plane divinam, ejusque felicissimum progressum, et admirandam stabilitatem, cum Augustino, et aliis Patribus attenta mente consideraverit.

35. Reliquum est, rex serenissime, ut, omni animi perturbatione deposita, vim rationum et pondus auctoritatis attenta mente recognites, quantaque absurdâ ex libera Scripturæ commentatione proveniant, mediteris; gravissima D. Hieronymi verba simul considerans, qui cum Porphyrio disputans, Danielis 11, ita concludit: *Hoc ideo prolixius posui, ut Scripturæ sanctæ difficultatem ostendam, cuius intelligentiam absque Dei gratia, et majorum doctrina, non nisi imperitissimi, vel maxime sibi vendicant.*

INDEX CAPITUM LIBRI SEXTI

DE JURAMENTO FIDELITATIS REGIS ANGLIÆ.

CAP. I. *Quis sit præsentis controversie scopus et causæ status, et quæ ratio disputandi in ea servanda sit.*

CAP. II. *Utrum in prima parte formulæ juramenti, aliquid præter obedientiam civilem et contra ecclesiasticam jurandum proponatur.*

CAP. III. *In secunda juramenti parte aliquid etiam ultra civilem obedientiam, et contra ecclesiasticam jurandum offerri.*

CAP. IV. *Utrum in tertia parte juramenti aliquid ultra civilem obedientiam contra doctrinam catholicam contineatur.*

CAP. V. *De ultima parte juramenti, et erroribus in ea contentis.*

CAP. VI. *Rationes, quibus juramentum defenditur, expenduntur.*

CAP. VII. *Summum Pontificem non solum potuisse, sed etiam debuisse Catholicos Anglos a professione dicti juramenti sua monitione averttere.*

CAP. VIII. *Possintne Angli, hoc juramentum admittentes, aliqua ratione aut modo a culpa excusari.*

CAP. IX. *Liceatne Catholicis Anglis templa hæreticorum adire, et cum eis in ritibus communicare sine intentione cultus vel cooperationis cum illis, solum propter temporales poenas vitandas.*

CAP. X. *An vexatio, quam in Anglia Catholici patiuntur, sit vera religionis christianæ persecutio.*

CAP. XI. *An qui propter Romanam religionem et obedientiam in Anglia morte mulctati sunt, inter veros Martyres sint annumerandi.*

CAP. XII. *Ad ea quæ contra secundum Breve Pontificium, et contra Cardinalis Bellarmini Epistolam rex objicit, responsio.*

Operis conclusio, et ad regem Angliæ peroratio.



LIBER SEXTUS

DE JURAMENTO FIDELITATIS REGIS ANGLIÆ.

PROCEMIUM.

IN QUO CONTROVERSLÆ FUNDAMENTUM, ET ORIGO
DECLARATUR.

1. Quamvis liber hic postremum hujus operis locum sortiatur, quoniam et rerum ipsarum connexio, et doctrinæ perspicuitas, et ordo quem in libro suo rex Angliæ tenuit, ita postulabant, nihilominus ejus materia et argumentum, fundamentum et occasionem toti huic controversiæ præbuit, ut in suæ Prefationis initio rex ipse late declarat. Quamobrem ut disputationis scopus præ oculis habeatur, initium originemque hujusmodi juramenti, ejusque usque ad praesentem statum progressum præ oculis ponere necessarium duxi. Imprimis vero suppono id, quod nec Catholici, nec schismatici in dubium revocant, juramentum fidelitatis temporali regi debitum, et convenienti forma præstitum, ex se honestum ac consentaneum rationi esse, ita ut regi licet illud a vasallis exigere, et hi sancte possint, imo et debeant illud præstare, quando convenienti modo et ratione petitur, illudque postea observare ac implere teneantur. Cum enim uniueijusque regis subditi, teste Paulo, ei parere et fidelitatem servare, et in omnibus, quæ ad potestatem regiam spectant, illi obediere teneantur, ut in lib. 3 ostensum est, per se manifestum est, juramentum de hac obedientia et fidelitate servanda (quod juramentum fidelitatis appellamus), per se et ex objecto suo honestum esse; ac subinde et posse a rege ad suam majorem securitatem ac stabilitatem postulari, et tunc a subditis et exhiberi et servari debere. Unde etiam obiter declaratum relinquitur, juramenti hujus formam, ut

honesta sit, talem esse debere, ut potestatis regiæ terminos non excedat, quia nec rex potest juste obedientiæ sibi non debitæ promissionem exigere, neque subditi illam facere aut jurare tenentur. Imo si talis promissio aliorum juribus præjudicet, illam in conscientia facere non possunt, ut in sequentibus latius dicemus.

2. Hoc autem fidelitatis juramentum, licet per se honestum sit, non adeo necessarium reputatum est, ut a singulis vasallis, et omnium ordinum personis in omnibus regnis exigatur. Quin potius, in rebus publicis bene institutis, et quiete ac in pace viventibus, et præsertim in catholicis regnis, consuetudine receptum est ut in publicis comitiis civitatum procuratores, aliquique principes, ut magistratus, totius regni nomine, principi, vel cum primum regni potestatem accipit, vel etiam postea prescriptis temporibus, juxta uniuscujusque regni morem, hoc juramentum obedientiæ ac fidelitatis exhibeant. A singulis autem de plebe postulari non solet, non quia fieri non possit, sed quia ipsis metu principes, in pace et tranquillitate regnantes, et de subditorum fidelitate confisi, id neque necessarium, neque opportunum aut conveniens judicant. In regno autem Angliæ, ex quo tempore schismata et haereses in illo seminari cœperunt, etiam mos exigendi a subditis pecuniare juramentum introduci cœpit. Unde sicut Henricus VIII schismatis auctor fuit, ita ipse primus novam jurandi formam subditis suis proponere incepit, qua non solum civilem obedientiam, sed illam etiam, quæ soli Romano Pontifici debetur, sibi promitti postulavit.

3. *Primum juramentum Anglis indictum.* — Resert enim Sanderus, lib. 1 de Schism. An-

glican., circa medium, regem Henricum fere in schismatis initio ab omnibus sui regni ordinibus in publicis comitiis petiisse, ut ab ecclesiasticis omnibus juramentum exigeretur, quo eamdem ipsi, quam antea Romano Pontifici consueverant, obedientiam promitterent, quod, licet in principio non simpliciter, sed cum quadam limitatione admissum fuerit, ut infra dicam, hac tamen ratione tandem rex obtinuit quod expetebat. Non refert autem Sanderus specialem formam hujus juramenti praestandi ab Henrico editam esse, sed simpli- citer formam usitatam jurandi obedientiam Papæ sibi applicasse, utique eodem verborum tenore promittendam, et juramento confirmandam. Neque etiam refert omnes de populo coactos esse juramentum illud praestare, sed solum ecclesiasticas personas, neque illas omnes, sed quæ in comitiis suffragium habere poterant, quantum ex historia illa colligi potest. Nec etiam invenio tempore Eduardi ali- quod simile juramentum populo vel ecclesiasticis iterum fuisse propositum vel postulatum. Elisabetha vero in initio statim regni sui, seu in primis comitiis, quæ *Parlamentum* vocant, novam jurandi forma tradidit, omnesque, exceptis primatibus laicis, illam solemniiter profiteri jussit; formam autem juramenti sequens est, ut eam refert Sanderus, lib. 3, in initio regni Elisabethæ.

§. FORMA JURAMENTI AB ELISABETHA PRIUS SUBDITIS PROPOSITA, ET POSTEA SUB JACOBO AUCTA.

Ego A. B. prorsus testifor et declaro, in conscientia mea, reginam esse solam supremam gubernatricem, et istius regni Angliae et aliorum omnium sue Majestatis dominiorum et regionum, non minus in omnibus spiritu- libus atque ecclesiasticis rebus, vel causis, quam temporalibus, et quod nemo externus princeps, persona, prælatus, status, vel poten- tatus, aut facto, aut jure, habet aliquam ju- risdictionem, potestatem, superioritatem, præ- eminentiam, vel auctoritatem ecclesiasticam aut spiritualem in hoc regno. Ideoque plane ren- nuncio, et repudio omnes externas jurisdic- tiones, potestates, superioritates atque auctor- itates.

4. Recte autem advertit Sanderus, vel ti- muisse, vel puduisse feminam nomen capitis Ecclesiæ, quod sibi Henricus arrogaverat, usurpare, et ideo illud nomen in supremæ gubernatricis commutasse. In re tamen nullam fuisse differentiam, sed in nomine tantum, nam quod rex metaphorico nomine dixerat,

Elisabetha magis proprio declaravit. Imo postea multi suspiciati fuerunt, plus aliquid reginam per illam juramenti formulam intendisse, nimirum, omnem spiritualem potestatem etiam in administrandis sacramentis, sibi ar- rogare; ipsam vero declarasse, nihil aliud per illa verba sibi attribuere voluisse, quam quod patri et fratri sub nomine capitis Ecclesiæ ab Ordinibus fuerat concessum.

5. Hæc igitur juramenti forma tempore Eli- sabethæ servata est; postea vero Jacobus il- lam auxit, addendo specialem promissionem servandi fidem et obedientiam regi, propter quam potuit jam hoc vocari juramentum fide- litatis, nam antea solum videbatur esse quæ- dam jurata confessio vel professio primatus, quasi cuiusdam articuli Anglicanæ fidei. For- ma igitur prioris juramenti a Jacobo rege præstitti, quam ipse in *Apologia* refert, præter superiorem formulam, sequentem tantum ad- dit promissionem.

Ego A. B. etc., et promitto me deinceps fi- dem et reram obedientiam regiae Majestati, ejusque heredibus, ac legitimis successoribus præstitorum, et pro virili mea adjuturum ac propugnaturum omnes jurisdictiones, pririle- gia, præminentias, et auctoritates regiae Ma- jestati, heredibus suis ac successoribus conces- sas vel debitas, sive Imperiali hujus regni coronaæ unitas et annexas. Ita me Deus adju- vet, etc.

6. Postea vero, ut in *Præfationis* initio, et in principio *Apologiæ*, et sæpe in suo libello rex inculcat, occasione proditionis seu conju- rationis, quæ contra eumdem, sive publicos regni ordines in unum coeuntes per tormen- tarii pulveris impetum destinabatur, novam ipse juramenti formam invenit, quam lege et decreto publico sancivit, ab omnibus suis exi- gendam et præstandam fore, tum ut si qui ad- huic tanti criminis socii ibi restarent, depre- hendi possent, tum ut se et suos a similibus periculis et machinationibus securiores redde- ret. Forma autem juramenti est quæ subse- quitur.

§. TERTIA JURANDI FORMULA, QUÆ A REGE JACOBO FUIT EXCOGITATA ET DEFENSA.

Ego A. B., rere et sincere agnosco, prosteor, testifor, et declaro in conscientia mea, coram Deo et mundo, quod supremus dominus noster rex Jacobus est legitimus et verus rex hujus regni, et omnium aliorum Majestatis sue domi- niorum et terrarum, et quod Papa nec per se ipsum, nec per ullam aliam auctoritatem Ec-

clesiar, vel Sedis Romanæ, vel per ulla media cum quibuscumque aliis, aliquam potestatem nec auctoritatem habeat regem deponendi, vel aliquorum Majestatis sue dominiorum vel regnorum disponendi, vel alicui principi extra-neo ipsum damnificare, aut terras suas invadere, auctoritatem concedendi, vel ullos sub-ditorum suorum ab eorum sue Majestatis obedientia et subjectione exonerandi, aut ullis eorum licentiam dare arma contra ipsum gerendi, tumultus seminandi, aut aliquam violentiam aut damnum Majestatis sue personæ, statui, vel regimini, vel aliquibus suis subditis intra sua dominia afferendi. Item juro ex corde, quod, non obstante aliqua declaratione vel sententia excommunicationis aut deprivationis facta, vel concessa, aut facienda, vel concedenda per Papam, vel successores suos, vel quamcumque auctoritatem derivatam, aut deritari pretensam ab illo, seu a Sede sua contra dictum regem, hæredes suos, vel quamcumque absoluzione dictorum subditorum ab eorum obedientia, fidelitatem tamen et reram obedientiam sue Majestati, hæredibus et successoribus suis præstabo, ipsumque et ipsos totis meis viribus contra omnes conspirationes, et attentata quacumque, quæ contra personam illius, vel illorum, eorumque coronam et dignitatem, ratione vel colore alicujus senten-tiæ, vel declarationis, aut alias facta fuerit, defendam, omnemque operam impennam re-volare, et Majestati sue, hæredibus et successoribus suis, manifestum facere omnes prodilio-nes, et proditorias conspirationes, quæ contra illum, aut aliquos illorum, ad notitiam, vel auditum meum pervenerint.

Præterea juro, quod ex corde abhorres, detestor et abjuro, tanquam impiam et hereti-cam, hanc doctrinam et propositionem, quod principes, per Papam excommunicati vel depri-vati, possint per suos subditos vel alios quo-si-cumque deponi et occidi.

Et ulterius credo, et in conscientia mea re-solver, quod nec Papa, nec aliis quicunque potestatem habet, me ab hoc juramento, aut aliqua ejus parte absolvendi. Quod juramen-tum agnosco recta ac plena auctoritate, esse mihi legitime ministratum, omnibusque indul-gentiis ac dispensationibus in contrarium renuncio. Hacque omnia plane ac sincere agnosco et juro juxta expressa verba per me hic prolata, et juxta planum ac communem sensum et intellectum eorumdem verborum, absque ulla aqvocatione, aut mentali eva-sione, vel secreta reservatione quacumque.

Hacque recognitionem et agnitionem facio cordialiter, voluntarie et vere, in vera fide Christiani viri. Sic me Deus adjuvet.

7. Hujus autem juramenti occasione non solum dubitationes, sed etiam opiniones va-riæ, et dissensiones inter ipsos Catholicos Angliæ ortæ sunt. Plures enim a tali juramen-to præstante abhorrebant, eo quod in illa jurandi formula, etsi non expresse, tecte et implicite obedientia Pontifici debita abnege-tur, regique promittatur, ac subinde articulus de primatu regis ibi virtute contineatur et re-cognoscatur. Alii vero sine scrupulo consci-entiae juramentum illud præstari posse dicebant, dummodo animo et intentione fieret promit-tendi tantum regi civilem obedientiam, nam reliqua, cum in juramento non contineantur, si intentio jurantis recta sit, non possunt ju-ranti attribui; quia, licet alii fortasse aliud suspicentur, illud est solum ex ignorantia, quæ per admonitionem et protestationem prius coram Catholicis factam potest sufficienter au-ferri, et ita omne scandalum evitari. Hoe au-tem e medio sublato, nulla interna malitia in illo juramento eis inesse videbatur. Quoniam vero his coloribus decepti, et fortasse non-nullo humano timore inducti, aliqui etiam ex primoribus Catholicis et ecclesiasticis non so-lum in hanc sententiam descendebant, verum etiam in juramento præstante anteibant, ne-cessarium fuit in re tam gravi, et periculis ex-posita, Summum Pontificem pro sua pastorali cura opportunum remedium adhibere. Quam-obrem Sanctissimus D. N. Paulus V, ad Ca-tholicos Angliæ, quid in re tam ardua sentien-dum et servandum esset, datis ad eos litteris in forma Brevis admonuit, quarum litterarum forma talis est:

§. PRIMUM BREVE PONTIFICIUM.

Dilecti filii, salutem et Apostolicam benedic-tionem. Magno animi mœrore nos semper affe-cerunt tribulationes et calamitates, quas pro re-tinenda catholica fide jugiter sustinuistis. Sed cum intelligamus omnia hoc tempore magis exacerbari, afflictio nostra mirum in modum aucta est. Accepimus namque compelli vos, gra-vissimis panis propositis, templa hereticorum adire, cœtus eorum frequentare, concionibus il-lorum interesse. Profecto credimus procul du-bio eos, qui tanta constantia atrocissimas per-secutiones, infinitas propemodum miserias hac-tenus perpessi sunt, ut immaculate ambularent in lege Domini, nunquam commissuros esse, ut coinquinetur communione descritorum divinæ

legis. Nihilominus zelo pastoralis officii nostri impulsi, et pro paterna sollicitudine, qua de salute animarum vestrarum assidue laboramus, cogimur monere vos, atque obtestari, ut nullo pacto ad haereticorum templa accedatis, aut eorum conciones audiatis, vel cum ipsis in ritibus communicetis, ne Dei iram incurbatis. Non enim licet volis haec facere sine detimento divini cultus ac vestrae salutis. Quemadmodum etiam non potestis absque evidentissima, gravissimaque divini honoris injuria, obligare vos juramento, quod similiter maximo cum cordis nostri dolore audivimus, propositum vobis fuisse præstandum infra scripti tenoris, videlicet: *Ego A. B., vere et sincere, etc.*, ut supra.

Quæ cum ita sint, vobis, ex verbis ipsis perspicuum esse debet, quod hujusmodi juramentum, salva fide catholica, et salute animarum vestrarum, præstari non potest, cum multa contineat, quæ fidei et saluti aperle adversantur. Propterea admonemus vos, ut ab hoc atque similibus juramentis præstandis omnino careatis; quod quidem eo acrius exigimus a vobis, quia experti vestre fidei constantiam, quæ, tanquam aurum in fornace, perpetue tribulationis igne probata est, pro comperto habemus, vos alacri animo subituros esse quæcumque atrociora tormenta, ac mortem denique ipsam constanter oppetituros, potius quam Dei Majestatem illa in re iudicatis. Et fiducia nostra confirmatur ex his, quæ quotidie nobis afferuntur de egregia virtute atque fortitudine, quæ non secus ac in Ecclesiæ primordiis resplendet novissimis hisce temporibus in Martyribus vestris.

State ergo succincti lumbos vestros in veritate, et induiti loricam justitiae, sumentes scutum fidei, confortamini in Domino, et in potentia virtutis ejus, nec quicquam vos detineat. Ipse autem qui coronatus vos, certamina vestra in caelo intuetur, bonum opus, quod in vobis coepit, perficiet. Nostis quia discipulis suis pollicitus est se nunquam relictum esse eos orphanos. Fidelis enim est, qui promisit. Retinet igitur disciplinam ejus, hoc est, radicati et fundati in charitate, quidquid agitis, quidquid conamini, in simplicitate cordis, et unitate spiritus sine murmuratione, aut hæsitatione unanimes facite. Siquidem in hoc cognoscunt omnes, quia discipuli Christi sumus, si dilectionem ad invicem habuerimus. Quæ quidem charitas, cum sit omnibus Christi fidelibus maxime appetenda, vobis certe, dilectissimi filii, prorsus necessaria est. Huc enim vestra charitate diaboli potentia infringitur,

qui nunc aduersus vos tantopere insurgit, cum ipsa contentionibus atque dissidiis nostrorum filiorum præcipue nitatur.

Hortamur itaque vos per viscera Domini Iesu Christi, cuius charitate e fauibus æternæ mortis crepti sumus, ut ante omnia mutuam inter vos charitatem habeatis. Præscripsit sane vobis præcepta maxime utilia, de fraterna charitate vicissim exercenda, felicis recordationis Clemens Papa VIII, suis litteris in forma Breris ad dilectum filium Magistrum Georgium, Archipresbyterum regni Angliæ, datis die quinta mensis Octobris 1603; ea igitur diligenter execuimini, et ne ulla difficultate aut ambiguitate remorenini, præcipimus vobis ut illarum litterarum verba ad amussim servetis, et simpliciter prout sonant et jacent, accipiatis et intelligatis, sublata omni facultate aliter illa interpretandi. Interim nos nunquam cessabimus, Deum, Patrem misericordiarum, precari, ut afflictiones et labores vestros clementer respiciat, ac vos continua protectione custodiat atque defendat, quos Apostolica benedictione nostra clementer imperlimur. Datum Romæ apud Sanct. Marcum, sub annulo piscatoris, decimo Calend. Octobris 1606, Pontificalis nostri anno 2.

8. Quia vero nonnulli eo tempore, fortasse ad Catholicos decipiendos, ne illa occasione juramentum recusarent, rumores in Anglia sparserunt, quibus fidem illarum litterarum suspectam redderent, dicentes, Breve illud non verum, nec a Pontifice scriptum, sed ab aliquo fuisse confictum, ideo Summus Pontifex secundum Breve, quo prioris veritas certior fieret, conscripsit, cujus tenor est qui sequitur.

§. SECUNDUM BREVE.

Dilecti filii, salutem et Apostolicam benedictionem. Renunciatum est nobis reperiri nonnullos apud vos, qui, cum satis declaraverimus per litteras nostras anno superiore, decimo Kalend. Octobr., in forma Brevis datas, vos tutę conscientię præstare non posse juramentum, quod a vobis tunc exigebatur; et præterea stricte præceperimus, ne ulla modo illud præstaretis; nunc dicere audent, hujusmodi litteras de prohibitione juramenti, non ex animi nostri sententia, nostraque propria voluntate scriptas fuisse, sed potius aliorum intuitu atque industria. Eaque de causa idem persuadere nituntur, mandata nostra dictis litteris non esse attendenda. Perturbavit sane nos hic nuntius, eoque magis quia experti obedientiam testram

(filii nostri unice dilecti), qui ut huic Sanctæ Sedi obediretis, opes, facultates, dignitatem, libertatem, vitam denique ipsam pie ac generose nihil fecistis; nunquam suspiciati essemus potuisse vocari apud vos in dubium fidem litterarum nostrarum Apostolicarum, ut hoc prætextu vos ex mandatis nostris eximeretis. Verum agnoscimus versuitem, atque fraudem adversarii humanae salutis, eique potius quam vestre voluntati tribuimus hanc renitentiam. Ea propter iterum ad vos scribere decrevimus, ac denuo vobis significare, litteras nostras Apostolicas anno præterito, decimo Kalend. Octob. datas, de prohibitione juramenti, non solum motu proprio, et ex certa nostra scientia; rerum etiam post longam et gravem deliberationem, de omnibus quæ in illis continentur, adhibitam, suiscriptas, et ob id teneri vos illas omnino observare, omni interpretatione secus suadente rejecta. Hæc autem est mera, pura, integraque voluntas nostra, qui de vestra salute solliciti semper cogitamus ea quæ magis vobis expediunt. Et ut cogitationes et consilia nostra illuminet is, a quo christiano gregi custodiendo nostra fuit præposita humilitas, insinuenter oramus; quem etiam jugiter precamur, ut in vobis, filiis nostris summopere dilectis, fidem, constantiam, mutuamque inter vos charitatem et pacem augeat. Quibus omnibus cum omni charitatis affectu peramanter benedicimus. Datum Romæ apud S. Marcum, sub annulo piscatoris, decimo Kalend. Octob. MDCVII, Pontificatus nostri anno tertio.

9. His Pontificiis litteris, et epistola ab Illustrissimo Cardinali Bellarmino ad Archipresbyterum Angliæ conscriptis, exagitatus rex Angliæ, contra utrumque breve et Epistolam, et in defensionem hujus ultimi juramenti libellum, suo nomine occultato, scripsit aut scribi fecit, in quo præcipue ostendere conatur, per juramentum illud nihil aliud quam civilem obedientiam ac fidelitatem a subditis exigi, et ideo vehementer conqueritur quod subditi sui ab obedientia civili ei præstanta deterreatur. Sic enim ipse rex, in principio Praefationis, pag. 13, affirmat, et in alio loco Apologiae sic inquit: *Ad proximum caput Breris quod attinet, quo Pontificis omnibus interdicit ne ecclesias nostras adeant, neve ritus et cærenomias nostras frequentent, non est mihi jam animus hæc attingere; si quidem id solum negotii nunc incumbit, ut orbi proloquar injurias et injusticias Pontificis interdicentis subditis meis ne obedientiam suam erga me profiteantur.* Et alio in loco, magno

verborum pondere et exaggeratione sic affirmat: *Ego enim, quantum mea mens assequi potest, non calum a terra longius distare credo, quam professio obedientiae civilis erga civilem regem differt ab iis omnibus quæ catholicæ fidei aut primatui Sancti Petri quoquomodo sunt affinia.*

10. Hæc autem, et similia multa quæ in illa Apologia continentur, non sine sufficienti responsione et impugnatione a Cardinali Bellarmino relictæ sunt. Statim enim ac in manus ejus Apologia pervenit, antidotum contra illam, quamvis tecto nomine suo, scripsit; quo illud non fidelitatis sed infidelitatis juramentum esse, nec solius obedientiae civilis ad regem, sed etiam abnegationis Pontificiæ potestatis professionem esse convicit. Qua responsione veluti contempta rex in hac posteriori Apologiae editione nihil illi addendum existimavit. Sed initio fere Praefationis, postquam in auctorem illius responsionis acriter invetus, et de injuriis, convitiis, aliisque in modo scribendi defectibus gravissime conquestus est, tandem concludit, *nunquam eum ad id, in quo causæ cardo vertitur, directe respondisse.* Hac vero occasione iterum ibi declarat, duo tantum esse capita de quibus in Apologia disseruit: *Prius (ait) ut probarem, in fidelitatis sacramento nihil aliud quam obedientiam mere civilem et sæcularem summis principibus a subditis debitam contineri. Alterum, ut ostenderem hanc in reges potestatem, a Pontificibus inique usurpatam, cum Scripturis, Conciliis et Patribus pugnare.* Ex his autem duobus capitibus, hoc posterius in lib. 3 et 4 fuse a nobis tractatum est, ubi satis directe omnibus, quæ in illa parte Apologiae, vel in Praefatione rex inducit, respondimus, ideoque illud amplius non attingemus; alterum vero, quod brevius clariusque judicamus, compendiosius etiam in hoc libro prosequemur. Ne vero nobis etiam objiciat, quod ab scopo aberraverimus, illum paulo fusius et distinctius iterum proponemus.

CAPUT I.

QUIS SIT PRÆSENTIS CONTROVERSIAE SCOPUS ET CAUSÆ STATUS, ET QUÆ RATIO DISPUTANDI IN EA SERVANDA SIT.

1. *Genera juramenti fidelitatis.* — Ut proprium hujus disputationis scopum, statumque controversiæ præ oculis proponamus, varia juramenti genera, quæ a rege temporali

exigi possunt, et ex dictis colliguntur, distinguere oportet. Unum dici potest civile juramentum, quia est solius obedientiæ civilis in rebus mere temporalibus, et ad regis potestatem vere pertinentibus. Aliud est juramentum sacrum, seu ecclesiasticum, scilicet, solius obedientiæ ecclesiastice seu spiritualis, regi temporali exhibendæ, tanquam supremam potestatem ecclesiasticam seu spiritualem habenti. Per quod juramentum consequenter Pontificis potestas, eique debita obedientia abjurantur. Tertium dici potest juramentum mistum clare et aperte, quia per illud expresse fit professio utriusque potestatis in temporali rege, et utraque obedientia illi promittitur, et consequenter utraque etiam Pontifici abjuratur. Quartum dici potest mistum palliatum, quia per illud obedientia civilis expresse juratur, tecte autem et sub verbis minus claris obedientia Pontifici debita negatur, et regi tribuitur.

2. *Licitum esse juramentum circa obedientiam civilem, catholicum dogma.* — De primo genere juramenti (ut dixi) nulla est inter Pontificem et regem Angliæ controversia. Quantumvis enim rex injuriam et injustitiam sibi fieri a Pontifice conqueratur, prohibendo subditis suis ne obedientiam civilem illi promittant et servent, revera non ita est, ut merito notavit Bellarminus in responsione ad Præfationem regiam, c. 2, et in Apologia respondendo ad objecta contra primum Breve Pontificis, § *Pergit deinde auctor*, etc. Quia in neutro Brevi Pontificio reprehensio talis juramenti invenitur, nec aliquem auctorem catholicum allegare potest rex, qui hoc genus juramenti cum catholica fide non consentire judicaverit. Quapropter sine causa laborat rex in sua Apologia, p. 25 et sequentibus, ex Scripturis, Conciliis et Patribus probando, vel deberi regibus in conscientia civilem obedientiam, vel licitum esse juramentum quo illa promittitur, nam hoc non solum verum, sed etiam catholicum dogma esse omnes confitemur. Hoc autem et non aliud probant testimonia a rege allegata, ut in libro 3, ex professo per singula discurrendo, ostendimus. Et sane testimonia Patrum, quæ ipsem adducit, diserte ita loquuntur, nam vel utramque obedientiam distinguunt, vel cum moderatione et limitatione loquuntur. Augustinus enim cum dixisset milites Christianos obdivisse Juliano, licet is apostata et infidelis esset, statim adjungit: *Ubi veniebatur ad*

causam Christi, non agnoscebant, nisi eum qui in cœlo erat. Tertullianus vero dicens: *Colimus imperatorem, statim addit: Sic quomodo et nobis licet, et ipsi expedit.* Et similia sunt alia apud Gratianum, in Decret., 11, q. 1, sub finem.

3. *Idem dogma varia Concilia docuerunt.* — Neque minus supervacanea sunt quæ in Apologia, in initio responsionis ad Epistolam Bellarmini, rex congerit ex Conciliis Toletanis IV, V, VI et X, ut probet juramentum fidelitatis, regi factum, esse ab universis subditis servandum. Tractant enim illa Concilia de puro, licto ac honesto fidelitatis juramento, quod et tunc fiebat in Hispania suis regibus, et nunc etiam fit ac fidelissime servatur. Non enim venit in mentem Patrum illorum Conciliorum, esse posse in Ecclesia catholica aliud juramenti genus, quo principi temporali ecclesiastica obedientia promittatur, aut aliqua spiritualis potestas in eo recognoscatur, vel in Pontifice abjuretur. Unde in Concilio Toletano X, c. 2, expresse dicitur: *Si quis religiosorum, ab Episcopo usque ad extreimi ordinis clericum sive monachum, generalia juramenta in salutem regiam, gentisque aut patriæ data reperiatur violasse voluntate profana, mox dignitate privatus, et loco et honore habeatur exclusus.* Quæ verba satis declarant sermonem esse de generalibus juramentis, quæ in quacumque repubblica humana ad ejus conservationem, et ad civilem obedientiam, et vitæ ac rerum suarum securitatem regi præstandam, fieri soleant. Et similiter alia Concilia de juramento, quod non solum inter fideles, sed etiam inter quoscumque gentiles fieri consuevit, aperte loquuntur. Unde Concilium Toletanum IV, cap. 73, sic inquit: *Sacrilegium quippe est, si violetur a gentibus regum suorum promissa fides, quia non solum in eos fit pacti transgressio, sed et in Deum, in cuius nomine pollicetur ipsa promissio.* Et eodem modo loquuntur cætera. Tractant ergo de communi pacto inter regem et regnum juramento fidelitatis firmato, quod est juramentum pure civile et politicum, de quo non est controversia. Unde illa Concilia magis ad speciem et apparatus, quam ad causæ probationem adducta videntur. Neque plus ad scopum disputationis pertinet canon. 42 Concilii Aquisgran., sub Ludovico et Gregor. IV, in secundo articulo seu membro illius, ubi generatim damnantur, qui contra regem insurgunt, et juramentum fidelitatis illi non ser-

vant. Nam loquitur etiam illud Concilium de puro juramento civili, tum quia nullum aliud erat tunc auditum in Ecclesia regibus fieri; tum etiam quia pro fundamento præmittit Concilium: *Constat quia quicunque potestati a Domino datæ resistit, juxta Apostolicum documentum Dei ordinationi resistit;* potestas autem regis civilis tantum est; de simili ergo juramento loquitur Concilium.

4. *Ex Conc. Aquisgra. probatur diversitas primatus ecclesiastici a laico. — Constantini sententia de jurisdictione Episcoporum.* — Quod si rex Angliæ illi gravissimo Concilio fidem adhibet, ut par est, quæso, primum ab eo jacutum fundamentum attente consideret; statim enim in principio sic Patres loquuntur: *Primo, visum est normam universæ religionis atque ecclesiastice disciplinæ in duabus consistere personis, Pontificali, videlicet, atque imperiali.* Quod fundamentum primum auctoritate Gelasii, præferentis auctoritatem Papæ potestati regum, confirmat; deinde testimonio Fulgentii, dicentis: *Quantum perlinet ad hujus temporis ritam, in Ecclesia nemo Pontifice potior, et in seculo christiano imperatore nemo potior invenitur*¹. Et in parte tertia ejusdem Concilii multa de regali munere, ac potestate traduntur, et in cap. 5 illius partis refertur dictum Constantini ad Episcopos: *Potestatem vobis dedit Deus de nobis quoque judicandi, et ideo nos a vobis recte judicamur, vos autem non potestis ab hominibus judicari*². Quando ergo Concilia juramenta fidelitatis regibus facta servanda esse decernunt, non confundunt civilem obedientiam cum ecclesiastica, sed unicuique quod suum est reddendum statunt, Cæsari quæ Cæsaris sunt, et quæ sunt Dei Deo. Et ita de primo juramento fidelitatis et obedientiæ tantum civilis nulla est controversia.

5. *Principem laicum habere jurisdictionem spiritualem, olim inauditum.* — De secundo autem genere juramenti, quo vasallus fidelis regis christiani illum recognoscit ut supremum caput vel gubernatorem Ecclesiae in ecclesiasticis et spiritualibus rebus, eique obedientiam in eisdem spiritualibus promittit, nulla quidem fuit olim in Catholica Ecclesia controversia, quia nunquam in illa tale juramentum auditum est, quia materia ejus sacrilega et doctrinæ fidei contraria semper judicata

¹ Gelas. ad Anastas. imperat.; Fulgen., lib. de Prædestin. et grat.

² Ruffin., lib. 1, alias 10, cap. 2.

est. A temporibus autem Henrici VIII cœpit in regno Angliæ illud juramentum introduci; et in principio ipsem rex in comitiis regni sui illud proponere non est ausus, quia res nova esset et inaudita, sciretque viris catholicis, et præsertim ecclesiasticis, futuram esse acerbissimam. Ideoque Roffensem, virum magnæ auctoritatis, ut illud proponeret, suaque auctoritate aliis persuaderet, coegit; ille autem licet iniquitatem juramenti non ignoraret, tunc vel timore vel rationibus humanis inductus, regi paruit, juramentumque non simpliciter, sed quadam limitatione addita, cæteris Episcopis proposuit, scilicet quantum eis per Dei verbum permisum esset ac licitum¹. Hujus autem lapsus ex humana fragilitate profecti eum postea gravissime penituit, publiceque contestatus est non debuisse cum exceptione illa juramentum admittere, ac si res esset dubia, sed per verbum Dei veritatem aperire, ne alii in fraudem inducerentur. Itaque ex tunc schismatici et timidi juramentum probare et reddere; Catholicici autem detestari et vitare cœperunt. Idemque dissidium inter Catholicos et haereticos usque nunc durat, et perpetuo perseverabit, quamdiu illi Schismatici in suo errore permanserint, quoniam nobis certum est fidem catholicam tale juramentum damnare.

6. *Non est hic quæstio de secundi juramenti genere, neque de tertio.* — Nihilominus tamen quæstio, quæ nunc versatur, non est de hoc juramento; bene enim novit rex Angliæ Romanam fidem illud juramentum damnare, et a veris ac constantibus catholicis subditis suis non esse præstandum: imo (ut infra videbimus) ob hanc causam dicit, formulam juramenti mutasse, ne subditos suos in eas angustias eum ingenti diserimine induceret. Quamvis enim ipse et alii Anglicani Protestantes privato suo errore opinentur, juramentum illud esse licitum, quia putant permissionem esse de re licita et debita, nihilominus non negant nec negare possunt, si vel ratione naturali uti velint, iniquum esse, tale juramentum contra conscientiam praestare, sive animo non implendi illud, sive credendo talem obedientiam soli Pontifici Summo esse reddendam. Quapropter non manet inter nos in hoc puncto controversia de juramento, sed de materia ejus, quæ coincidit cum controversia de primatu, quæ libro tertio tractata est.

¹ Sander., lib. 1.

7. Quarti juramenti genus.—Atque eadem ratione non est quæstio de tertio juramento, utramque obedientiam civilem et ecclesiasticam aperte comprehendente. Cum enim bonum ex integra causa, et malum ex quo cumque defectu, et una pars materiæ talis juramenti prava sit, manifestum est totum juramentum esse iniquum. Sicut enim propositio copulativa, cuius una pars est falsa, simpliciter falsa est, ita juramentum illud, cum per illud copulative (ut sic dicam) et civilis et ecclesiastica obedientia regi ut supremo capiti promittatur, simpliciter iniquum et detestabile est. Denique qui credit regem temporalem esse supremum in temporalibus et spiritualibus, quamvis in priori parte non erret, sed tautum in posteriori, simpliciter haereticus est, quia una haeresis sufficit ad haereticum constituendum; ergo similiter juramentum illud est professio ejusdem haeresis, ac proinde abominabile. Idemque non minus evidens et certum esse debet de quarta jurandi forma, in qua promissio obedientiæ civilis regi facienda, et abjuratio Pontificia non clare, sed tecte et simulate proponitur, quia in moralibus illa duo æquiparantur, parumque refert ad fidei constantiam, quod aperte vel sub aliquo velamine et simulatione veritas catholica negetur. Unde etiam de hoc punto non est principalis controversia; quia vero ab ignorantibus potest in dubium revocari, inferius opportuno loco dictam veritatem confirmabimus.

8. Controversiæ status ac divisio.—Punctum ergo principale, in quo rex controversiam constituit, non est de jure (ut sic dicam), sed de facto, id est, an in illa ultima forma jurandi a rege Angliæ inventa sola obedientia civilis a subditis exigatur, ecclesiastica vero nullo modo, neque expresse, neque tacite, vel tecte, seu palliate. Et similiter an per illud juramentum abjuretur primatus Papæ, ejusque suprema spiritualis potestas negetur, vel solum fiat professio supremæ potestatis regiæ in suo ordine et gradu, sine professione spiritualis potestatis, quam usurpat. Nam rex Angliæ contendit, in eo juramento solam promissionem obedientiæ pure civilis, et professionem supremæ regiae potestatis temporalis contineri. Sic enim ait in Praefatione, pag. 12: *Tanto studio tantaque sollicitudine cavebam, ne quicquam hoc juramento contineretur, præter fidelitatis illius et temporalis obedientiæ promissionem, quam ipsa natura omnibus sub regno nascentibus prescribit.* Et infra dicit

scripsisse Apologiam, in qua suscepiebat probandum, *nihil in eo juramento contineri, nisi quod ad obedientiam mere civilem ac temporalem spectat, qualis summis principibus a subditis debetur.* Idemque in aliis locis, tam Praefationis quam Apologie, repetit, ex quibus aliqua in præcedenti prefatione retuli. Hoc ergo imprimis est a nobis examinandum. Et primo quidem de re ipsa secundum se spectata disseremus; et per singulas illius formulæ jurandi partes, prout rex postulare videtur, discurrendo, quam sit injustum et fidei contrarium juramentum illud ostendemus. Postea vero ad ea, quæ contra Brevia Pontificia objiciuntur, facile respondebimus.

CAPUT II.

UTRUM IN PRIMA PARTE FORMULÆ JURAMENTI ALIQUID PRÆTER OBEDIENTIAM CIVILEM ET CONTRA ECCLESIASTICAM JURANDUM PROPONATUR?

1. Vide lib. 1 de Juram., c. 13, n. 8, 21 et sequentibus.—In quatuor partes seu paragraphos dicta juramenti formula divisa est: prima est in ejus initio, secunda in paragrapho *Item juro*, tertia in paragrapho *Præterea juro*, quarta in paragrapho *Et ulterius credo*, quæ discutiendæ sunt, et attente considerandum an in omnibus, vel in aliqua earum verum inveniatur illud regis pronunciatum, nihil in illo juramento contineri, nisi quod ad obedientiam mere civilem ac temporalem spectat. Prius autem quam ad singulas partes descendam, præmoneo, ab aliquibus notatum esse, verbum *juro* in prima et ultima clausula non apponi, et ideo in eis non jurari, ac subinde non tantam requiri certitudinem de veritate earum rerum quæ in eis proponuntur, quin sine culpa saltem gravi quis possit illa confiteri, licet ea non credit, sicut in aliis duabus partibus, quæ sub juramento proferuntur, necessaria est. Haec vero consideratio falsa est et perniciosa. Primo enim citra dubium verum est, etiam illa, quæ in prima et ultima parte continentur, sub juramento proferri. Nam in prima dicitur: *In conscientia mea coram Deo*, quæ duæ particulæ, in rigore sumptæ, solent esse formæ jurandi, et licet sigillatim sumptæ interdum sint ambiguæ, tamen simul conjunctæ ad invicem se juvant, et determinant significationem ad indubitatam jurandi formam. Et augetur certitudo ex solemnitate juramenti, et ex materia ejus, et quia statim in secunda clausula dicitur: *Item juro*, et ex aliis quæ jam

dicam. Nam in ultima etiam clausula ponitur particula: *In conscientia mea*, et deinde supponitur simpliciter juramentum hoc, quoad omnes suas partes esse tam validum juramentum, ut a nulla earum possit Pontifex quemquam absolvere. Et quod tollit omne dubium, infra dicitur: *Hæc omnia plane ac sincere agnosco et juro*. Et in fine concluditur: *In vera fide christiani viri, et sic me Deus adjuvet*. Quod ultimum verbum sufficit ad jurandum omnia præmissa, ut in jure etiam canonico habetur, c. *Ego N.*, de Jurejurando. Ultimo vero addo, cum in prima parte dicatur: *Agnosco et profiteor*, et in ultima dicatur: *Credo*, et materia pertineat ad dogmata fidei, etiam si juramentum non interveniret, fore gravissimum peccatum in illa materia aliquid falsum confiteri vel profiteri, quia esset contra fidei confessionem, quæ necessaria est ad salutem, teste Paulo, ad Roman. 10.

2. *In prima juramenti parte virus latere ostenditur*. — Hoc ergo supposito, imprimis in ipso juramenti initio: *Ego A. B., vere et sincere agnosco et profiteor, testificor et declaro in conscientia mea, coram Deo et mundo, quod supremus dominus noster rex Jacobus est legitimus et verus rex*, etc., advero, licet hæc verba sincere proposita et intellecta expresse nihil aliud quam dominii ac regni temporalis professionem continere videantur, nihilominus in verbis illis: *Supremus dominus noster rex, virus lateræ*. Nam juxta intentionem loquentis, ex alia formula jurandi nunquam retractata, et ex publica ejus professione et scriptis satis cognita, et juxta vulgarem et receptum in illo regno sensum, particula *supremus dominus* significat esse supremum simpliciter, tam in spiritualibus quam in temporalibus; supremum (inquam) positive in suo regno, quia est supra omnes, tam laicos quam ecclesiasticos, tam in temporalibus quam in spiritualibus; et negative respectu totius orbis, seu Ecclesiæ, quia nullum in ea recognoscit superiorem. Cum ergo in ipsa forma juramenti cogatur omnis, qui jurat, illo modo recognoscere regem ut supremum dominum, tacite cogitur confiteri primatum ejus supremum in magna Britannia et Hybernia, et exemptionem ejus ab omni superiori potestate, et consequenter tacite abjurare cogitur supremam spiritualem Pontificis potestatem. Sic ergo in illa sola particula, *Supremus dominus noster*, aliquid ultra obedientiam civilem ac temporalem continetur.

3. *Excluditur evasio*. — Diceat aliquis, esto hæc fuerit intentio regis, quam certe negare

non potest, consulto non expressisse illam in ipsa formula, ne Pontificis (ut ipse loquitur) scrupulus conscientiae injiceretur, quem nunc poterunt facile deponere, non jurando juxta intentionem loquentis, sed juxta simplicitatem verborum, sonum, et in sensu accommodato, quem possunt illa verba facere, tantum de supremo dominio in temporalibus ea intelligendo. Verumtamen hæc fuga licet speculative (ut aiunt) et abstracte, ac remoto scandalo, posset sustineri, tamen in usu et praxi in tali loco, et inter tales personas, et cum aliis circumstantiis, ac periculo scandali, quod simul ibi concurrit, vix potest ab illis verbis separari talis significatio, et consequenter illa erit quædam externa confessio et professio potestatis regis absolute supremæ in omni materia, et sine ulla limitatione, præter illam quæ in ipsis verbis additur, de terris ejus deminio subjectis. Quæ limitatio auget cætera verba, ut sine ulla limitatione dicta intelligentur. Multoque magis id declarant verba sequentia, ubi jam non tecte, sed expresse ultra civilem et temporalem obedientiam juramentum extenditur.

4. *Dictis verbis Papæ potestatem abjurari*. — Additur enim: *Et quod Papa nec per se ipsum, nec per ullam aliam auctoritatem Ecclesiae vel Sedis Romanae, nec per ulla media cum quibuscumque aliis aliquam potestatem, nec auctoritatem habeat regem deponendi*. Quis, quæso, dicat, per hæc verba tantum postulari a subditis obedientiam civilem, *qualis summis principibus a subditis debetur?* Certe alii reges Ecclesiæ non minus supremi principes in temporalibus sunt, quam rex Angliæ; et tamen neque ipsi talem obedientiam exigunt, nec sibi a subditis deberi credunt, nec subditi illam recognoscunt; ergo aperte declarat rex Angliæ de se loqui et sentire tanquam de supremo principe, nullum in terris habente superiorem, et hanc professionem per illud juramentum a subditis postulare. Deinde per illa verba non tam juratur obedientia regi, quam abjuratur potestas Papæ; tractare autem de potestate Papæ, et illam jurandam vel abjurandam proponere, non pertinet ad potestatem civilem aut temporalem regis, nec ad obedientiam civilem illi debitam; ergo illa verba evidenter excedunt terminos obedientiae civilis, tum quia verba ipsa aliquid aliud significant præter obedientiam civilem regi debitam, ut ex ipsis manifestum est; tum etiam quia ipsem actus exigendi tale juramentum, et imponendi obligationem profitendi hoc vel illud de potes-

tate Pontificis, est actus jurisdictionis plus quam civilis, imo superioris vel non subditæ potestati Pontificis; quia ad civilem potestatem non pertinet, spirituali potestati, præser-tim supremæ, terminos præscribere. Duobus ergo modis (ut theologicis terminis rem de-clarem) rex in illis verbis postulat obedientiam plus quam civilem: primo, in actu signato, proponendo materiam non civilem; secundo, in actu exercito, utendo potestate plus quam civili, et cogendo subditos ut illi se subdant, et sua professione illam recognoscant.

5. *Principia ratio.* — Accedit quod per illa verba proponitur professio eujusdam erroris contra doctrinam ab universa Ecclesia probatam. Quamvis enim revera materia illa ecclesiastica sit, si doctrina proposita vera esset, utcumque tolerabilis esset jurisdictionis usur-patio; cum tamen ipsa forma juramenti errorem contineat, et ad illum profitendum sub-ditos compellat, non solum exigit aliquid ultra obedientiam civilem, sed etiam cogit ad abne-gandam Pontificiam potestatem, et ad confi-tendum aliquid sanæ doctrinæ contrarium. Assumptum ostenditur, quia ille articulus il-lius juramenti includit hanc propositionem et fidem ejus: *In Pontifice vel in universa Ecclesie non est potestas ad deponendum regem baptizatum in ullo casu, vel propter quamcumque causam vel culpam.* Quamvis enim in ipsa ju-ramenti forma non addantur expresse omnes istæ particulæ, *in ullo casu, vel propter quamcumque causam aut culpam,* in aliis æquiva-lentibus continentur, nimirum, cum dicitur, quod *Papa, nec per se, nec per alios, nec cum quibuscumque aliis aliquam potestatem nec au-toritatem habet regem deponendi.* Si enim nul-lam potestatem habet, ergo nec facultatem puniendi, nec quovis alio titulo potestatem habet effectricem talis effectus seu depositio-nis. Et hoc idem per alias clausulas amplifica-tur, videlicet, quod Papa non habeat potesta-tem disponendi de regnis sub dominio regis constitutis, aut alteri regi concedendi auctoritatem illa invadendi. Nam hæc omnia pen-dent ex illo principio, quod Papa non possit illum cogere per talem poenam depositionis, etiam si hæreticus, vel schismaticus, vel Ca-tholicorum persecutor sit, neque aliquibus me-diis coactionis temporalis seu corporalis uti ad illum puniendum, vel Ecclesiam defendendam, et Catholicos a tanto periculo eruendos. Quam vero falsum sit hoc dogma, quamque alienum a principiis fidei, ab usu Ecclesiæ, et ab omni etiam recta ratione, supposito munere pasto-

rali quod Christus Vicario suo commendavit, satis in libro tertio ostensum est; ideoque in hoc puncto in præsenti non amplius immora-bor.

6. Tandem ejusdem rationis est alia clausula, qua hæc pars hujus juramenti concluditur, in qua rex suos subditos jurare cogit in Pontifice non esse potestatem, *ullos subditorum suorum ab eorum suæ Majestatis obedientia et subjec-tione exonerandi, aut ullis eorum licentiam dare arma contra ipsum gerendi, tumultus semi-nandi, aut aliquam violentiam aut damnum Majestatis suæ personæ, statui, vel regimini, vel aliquibus suis subditis intra sua dominia offerendi.* Quæ clausula ejusdem fere rationis est cum præcedenti, et ex eodem errore pro-cedit, nimirum, quod in Pontifice nulla sit po-testas coerciva regis per corporalem violen-tiam, vel alias temporales poenas; quam doc-trinam erroneam esse in eodem libro tertio ostensum est. Quamobrem etiam in hac clau-sula aliquid ultra obedientiam civilem juran-dum proponitur, et spiritualis potestas usur-patur, eamque in ipso juramento profiteri, et in rege agnoscere subditi coguntur. Ac deni-que etiam potestas Pontificia abjuratur, et er-ror contra fidei doctrinam juratur.

7. *Alii errores in hac clausula contenti.* — Imo hic involvuntur novi errores. Unus est, quod Papa non habeat potestatem relaxandi juramenta, etiam si justa et rationabilis causa intercedat, quod est contra ecclesiasticum mo-rem, Conciliorumque generalium usum et ap-probationem, cap. 2, de Re judic., 6; et contra catholicorum Doctorum consensem, et contra potestatem ligandi et solvendi Petro datam, et ita usu et moribus totius populi christiani declaratam. Et præterea est etiam contra rationem, nam in similibus juramentis semper includitur vel conditio tacita: Si promissio impleri possit sine notabili damno et periculo jurantis, maxime vero quando illud periculum et damnum provenit ex injurya et violentia ejus, cui fit promissio. Vel intelli-gitur reservatum jus superioris, qui, non ob-stante promissione a subdito facta, potest illi prohibere ne illam impleat, seu ne actionem promissam exequatur, si justa et rationabilis causa intercedat, et consequenter potest relaxare juramentum, materiam ejus prohiben-do. Denique hic error supponit priorem: nam si Papa potest deponere regem, consequenter necesse est ut auferre possit vinculum obe-dientiae et juramenti, quia non promittitur obedientia Jacobo ut Jacobus est, sed ut rex;

unde si desinat esse rex, eo ipso non debetur ei obedientia, ac subinde nec juramentum obligat, nam, sublata materia juramenti, consequenter juramenti obligationem auferri necesse est.

8. *Alius error.* — Alius novus error est, quia non solum negatur Pontifici potestas deponendi regem ipsum hæreticum, sed etiam subditos ejus cogendi per hujusmodi penas, ut patet ex illa particula, *vel aliquibus suis subditis*. Est enim, circa sensum illorum verborum, advertendum, neminem esse, qui doceat posse Pontificem suo arbitrio, et absque cogente justitiae ratione, dare alicui principi licentiam, ut contra alium regem vel subditos ejus arma sumat, aut vim aliquam vel nocimentum ei inferat; sicut etiam non potest pro libito dare licentiam subditis excitandi turbas contra regem suum, prout videtur rex Angliae in discursu hujus operis Papæ attribuere, ut in fine libri tertii animadvertisimus ac refutavimus. Quis enim Pontifex hanc sibi unquam potestatem arrogavit? aut quis Catholicus, aut rationis usum habens, hoc unquam docuit aut prædicavit? Non oportet ergo tegere aut palliare verba illa, fingendo sensum eorum esse, Papam non posse illam licentiam dare ad libitum, et sine causa, hoc enim neque rex timet, neque in mentem hominum venit.

9. *Postremum juramentum priora virtute continere.* — Sensus ergo est, non posse Pontificem violentiam aliquam vel damnum inferre, non solum regi, verum etiam nec subditis suis, neque alieni dare licentiam quippiam simile contra subditos regis Angliae faciendi, etiam si illi apostatae sint, et Ecclesiæ Romanae rebelles, ac schismatum et hæresum seminatores vel fautores; hoc ergo modo dicimus, in verbis illis magnum et novum errorem contineri, vel certe eumdem de primatu magis explicatum. Quid enim hoc aliud est, quam profiteri subditos regis Angliae non habere in terris alium superiorem, præter ipsum regem, nec ab alio posse cogi vel puniri propter sua sclera, etiam si aliis Catholicis et Ecclesiæ Christi perniciosa sint? Ergo per omnes has clausulas, vel satis expresse, vel saltem implicite negatur et abjuratur suprema Pontificis potestas, et regi tribuitur. Unde concluditur, et falsum esse, nihil in hoc juramento exigi, præter professionem civilis ac temporalis obedientie, et e contrario verissimum esse, juramentum hoc esse mistum, et virtute continere quidquid in prioribus jurandum offere-

batur. Neque video quid possit his rationibus cum aliqua probabilitatis specie responderi; quandam autem fugam, quam rex insinuat, in sequenti capite attingemus.

CAPUT III.

IN SECUNDA JURAMENTI PARTE ALIQUID ETIAM ULTRA CIVILEM OBEDIENTIAM, ET CONTRA ECCLESIASTICAM JURANDUM OFFERRI.

4. Incipit hæc pars ab illis verbis: *Item juro*, et nihil fere continet diversum a praecedenti, sed in ea magis declarantur omnia, quæ in priori parte contra potestatem Papæ abjurantur, ut nimirum intelligantur non solum de potestate extrajudicaria (ut sic dicam), seu de potentia faciendi per vires humanas, sed etiam procedere de potestate jurisdictionis et judicaria, quæ in hac secunda parte expressius negatur et abjuratur Pontifici sequentibus verbis: *Item juro ex corde, quod, non obstante aliqua declaratione vel sententia excommunicationis, aut deprivationis facta, vel concessa aut facienda, vel concedenda per Papam, vel successores suos, vel per quamcumque auctoritatem derivatam, aut derivari prætensam ab illo seu a sua Sede, contra dictum regem, hæredes aut successores suos, vel quacumque absolutione dictorum subditorum ab eorum obedientia, fidelitatem tamen et veram obedientiam sue Majestati, hæredibus, et successoribus suis præstabo, ipsumque et ipsos totis meis viribus contra omnes conspirationes, et attentata quæcumque, quæ contra personam illius, vel illorum, eorumque coronam et dignitatem, ratione vel colore alicujus sententiae, vel declarationis, aut alias facta fuerit, defendam.*

2. *Duplex sensus secundæ partis juramenti.* — *Prior sensus excluditur, et alienus a mente regis ostenditur.* — Ut ergo nullus detur subterfugiendi locus, interrogo an rex intelligat sententiam Papæ deponentis regem baptizatum, et qui se Christianum esse profitetur, propter crimina, posse esse justam, an vero credat semper esse injustam. Primum, ut credo, non asseret, alias subditos suos ad rem turpissimam jurandam induceret, nimirum ad non parendum sententiae justæ, quæ secum affert justum præceptum. Nam si sententia justa est, etiam erit justum præceptum, quo illa a subditis servari mandatur, cum aliter non possit executioni mandari. Item si sententia depositionis lata a Papa contra regem esse potest justa, etiam erit efficax; habet ergo ef-

fectum pœnæ quam imponit. Unde cum poena imposta per sententiam depositionis a regno, sit ipso facto privare regem dominio et proprietate regni, sententia justa efficaciter privat regno; ergo contra justitiam et obedientiam debitam Papæ est, resistere tali sententiæ, et defendere personam regis contra executionem talis sententiæ; ergo qui primum credit, et nihilominus hoc secundum jurat, rem plane injustam et iniquam jurat. Et aliunde contradictionem involvit, velle servare obedientiam et fidelitatem alicui tanquam vero regi, quem scias per justam declarationem, vel sententiam esse cum effectu a regno depositum. Ut si Papa ipse exigeret a fidelibus juramentum, quod, non obstante quacumque sententia vel declaratione depositionis ejus, etiam propter crimen hæresis, a quocumque generali Concilio facta, eum defendant in sua sede, eique eamdem obedientiam et fidelitatem præstabunt, juramentum esset iniquum, quia esset de re iniqua, et Ecclesiæ ac fidei contraria. Tale ergo est hoc juramentum regis, si dicta sententia justa supponatur. Hoc ergo sine dubio non admittet rex, neque etiam opinor adeo esse snarum rerum iniquum aestimatorum, ut si concedat, sententiam, a Papa latam contra aliquem regem, esse posse justam, nihilominus neget contra se posse eamdem tenere æquitatem. Quam enim majorem immunitatem vel innocentiam in se, quam in aliis regibus, qui Romanæ Ecclesiæ rebelles, aut fidei desertores et impugnatores fuerunt, allegare potest? Aut, licet in se causam depositione dignam non agnoscat, unde scit in successoribus suis esse non posse, cum tamen de omnibus æque juramentum exigat? Non est ergo dubium quin fundamentum hujus juramenti sit, talem sententiam non posse esse justam.

3. *Posterior sensus a rege intentus errorem continere ostenditur.* — Hinc ergo evidenter concludimus postulari a subditis regis Angliæ per illa verba, ut jurent, sententiam depositionis contra regem neque validam neque justam esse posse, nam revera hoc profitentur, cum jurant tali sententiæ non parere, nec illam servare. Unde ulterius concludimus, ab eisdem peti ut jurent non esse in Pontifice potestatem ad talem sententiam ferendam. Probatur, quia non alia ratione credit rex, et a suis subditis vult credi, sententiam illam fore injustam, nisi quia absque protestatione et jurisdictione Papæ supra regem lata sit; hoc enim jugum confringere et a se tol-

lere his omnibus mediis conatur rex, et ideo in suo libro sæpe repetit, se nihil minus esse a Pontifice, et Pontifici nihil negotii esse cum illo, et similia. Nec potest aliam rationem injustitiae in tali sententia rex allegare aut prætendere, quæ perpetua sit, et huic parti juramenti fundamentum dare potuerit. Nam, licet in principio Apologiæ duas alias causas ipse indiceat, videlicet, quod dispar religionis cultus non sit sufficiens causa, ut subdit possint contra regem conjurare, et quod inaudita causa damnatus sit, quas querelas infra tractabo; nihilominus neutra earum est universalis et perpetua (ut de illarum qualitate modo nihil dicam). Et ita non potuit juramenti formam in illis causis fundari, tum quia Pontifex nondum Breve suum scriperat, de quo rex conqueritur; tum etiam quia juramentum loquitur de sententia facta vel facienda contra regem vel successores suos; comprehendit ergo omnem sententiam, sive feratur audita parte, sive non auditæ, sive propter disparem religionem, sive propter quæcumque alia crimina, vel aliam causam. Ergo injustitia, quam in illa sententia rex supponit, et in qua fundavit illam juramenti formulam, non est nisi quia credit, non posse a legitima potestate et jurisdictione manare.

4. *In ea parte juramenti professionem erroris contra fidem includi.* — Quot ibi lateant peccata. — Concludo igitur, in illis verbis hujus juramenti non tantum postulari a subditis civilem obedientiam, sed etiam professionem hujus erroris, quod Papa non habeat potestatem et jurisdictionem ad ferendam contra regem depositionis sententiam quacumque ex causa; ac subinde non esse veram illam regis propositionem, *nihil in eo juramento contineri, nisi quod ad obedientiam mere civilem ac temporalem spectat*. Et inde ulterius infertur, peccare gravissime subditos illud juramentum præstando. Nam profitentur exterius Papam non habere jurisdictionem supra regem, qua possit in eum justam sententiam depositionis dicere, quacumque ex causa et quocumque modo illam ferat, servato ordine quem naturalis justitia postularet, si potestas non deesset. Aut enim qui hoc juramentum exhibet, hoc, quod profitetur, credit, vel non credit; si credit, corde et opere schismaticus est, et in doctrina fidei errat; si vero non credit quod in juramenti forma continetur, et nihilominus jurat, peccat, tum contra fidei confessionem,

tum contra religionem juramenti, sive juret absque intentione implendi quod jurat, sive cum intentione servandi illud, quia priori modo perjurus est, posteriori modo facit juramentum vinculum iniquitatis, et proponit obedire potius hominibus quam Deo, promittendo obedire regi contra justam sententiam et praeceptum Pontificis.

5. *Excluditur evasio.* — Quod si dicat eos, qui simpliciter jurant, non intelligere omnia quae in illo juramento continentur, respondemus excusationem esse frivolum, tum quia non de personarum ignorantia, sed de juramenti qualitate, et justitia vel injustitia tractamus; tum etiam quia ignorantia illa in Catholicis vix potest esse invincibilis, nisi valde rustici et parum instructi in religione sint, quia litterati et periti facile intelligent errores in juramento latentes, et qui minus docti sunt, saltem dubitabunt, et tenentur veritatem indagare, et nullus est tam ignorans, qui possit tuta conscientia temere jurare, non inquirendo prius quale sit juramentum. Quod maxime in Anglia locum habet, quia cum sciant omnes Catholici, etiam rustici, regem et consiliarios suos Pontificem maximo odio prosequi, et fidem Romanam aversari, et in ipsa juramenti forma videant multa contra Pontificem abjurari, necesse est ut dubitent qualis illa abjuratio sit; ergo si temere jurant, non excusantur a gravissimis culpis, quas in juramento subesse declaravimus. Ac denique cum tale juramentum cedat in contemptum Apostolicæ Sedis, et in Religionis Christianæ detrimentum, non potest admitti sine magno scandalo, ideoque Pastores et Doctores Catholicæ illius Ecclesiæ, quae in Anglia est, non debent tacere veritatem, et ignorantiam simplicium permittere, nam in hujusmodi eventu minus malum est afflictionem temporalem tolerare, vel aliquorum inconstantium lapsus permittere, quam veritatem occultare aut dissimulare.

6. *Sequentia juramenti verba errorem continent, similemque præcedenti.* — *Alius error ibi inclusus.* — Atque hic discursus, factus circa iniquam abjurationem justæ sententiae, quæ a Pontifice contra regem ferri potest, applicari etiam potest ad similem abjurationem, quæ de omni absolutione a juramento fidelitatis, quam Papa subditis regis concederit, fit per illa verba: *Vel quacumque absolutione dictorum subditorum.* Nam hæc verba etiam exceedunt obedientiam politicam, quia Papam posse vel non posse absolvere a juramento, non

est materia obedientiæ civilis, sed est materia ecclesiastica, spectans ad interpretationem protestatis ligandi et solvendi, Petro datae a Christo Domino. Et præterea hæc verba sunt connexa cum præcedentibus, et eumdem errorem continent. Quia obligatio obedientiæ in quocumque ordine vel statu tantum durat in subdito, quantum in superiori durat dignitas, seu potestas, et jurisdiction, quia hæc sunt correlativa, et unum ab alio pendet. Unde tam in prælationibus Ecclesiæ quam in magistratibus civilibus, eo ipso quod persona superior a prælatione vel magistratu deponitur, cessat in subditis obligatio obediendi tali personæ, quia jam non sunt illi subditi. Quod etiam in Summo Pontifice locum habet, si pontificatus renunciet, vel propter hæresim deponatur; ita ergo si Pontifex potest regem deponere, potest etiam subditos ab ejus obedientia absolvere; ergo ut minimum est æqualis error in abjuratione omnis absolutionis fidelitatis per Pontificem factæ, ac in abjuratione omnissententiae depositionis. Addo vero novum errorem in hæc posteriori parte involvi, quia etiam sine depositione a regno, potest Pontifex præcipere subditis ut regi pertinaci in aliquo errore, vel publico ac scandaloso crimen, non obedientian, et absolvere illos pro tunc a juramento obedientiæ per modum suspensionis obligationis, potius quam absolutæ privationis, ut infra, tractando de censura excommunicationis, tractabimus.

7. *Licite possunt ac debent subditi proditio nem in principem revelare.* — *Limitatio.* — Supersunt expendenda ultima verba hujus paragraphi, in quibus petitur juramentum specialis promissionis revelandi omnem proditionem, his verbis: *Omnemque operam impendam revelare, et Majestati sue, hæredibus et successoribus suis, manifestum facere omnes prodiciones, et proditorias conspirationes, que contra illum aut aliquos illorum ad notitiam vel auditum meum pervenerint.* Circa hanc ergo promissionem adverto, si verba ejus in simplici ac proprio sensu sumantur, honestam esse, nihilque continere quod vel fidelitatem civilem excedat, vel sanæ doctrinæ repugnet. *Proditio* enim gravissimum crimen contra principem vel rempublicam laesæ majestatis significat, quod vulgari sermone *traycion* vocatur; hujusmodi ergo prodiciones et proditoriae conspirationes, etiam seclusa speciali promissione, tenentur subditi revelare regibus suis legitimis, tum ex lege charitatis, et pietatis ac observantiæ erga illos et rempublici-

cam; tum etiam ex titulo subjectionis et fidelitatis, quam ex ipsa lege naturae ratione illius subjectionis suo principi debent; ideoque hanc obligationem promissione et juramento firmare et augere, honestum et sanctum est. Oportet autem ut verba illa: *Quæ ad notitiam vel auditum meum pervenerint, sano modo intelliganiur de notitia mere humana, et quæ per sacramentalem confessionem comparata non sit; nam confessionis sigillum in nullo casu revelare licet, ut mox dicam. Et quidem si verba hujus promissionis simpliciter (ut dixi) acciperentur, de se illam declarationem et limitationem includunt, quia (inter Christianos, et Catholicos præserfim) illa verba juxta communem eorum sensum, generaliter seu indefinite prolatæ, non alium sensum referunt, nec majorem obligationem inducunt.*

8. Si proditio in sensu improprio sumatur, revelanda non est. — Nec talis revelatio licite promitti juramento potest. — Quamvis autem hoc verum sit, ex vi verborum loquendo, et non consideratis peculiaribus circumstantiis, nihilominus, his omnibus pensatis, duplex fraus vel deceptio in illis verbis cavenda est. Una est, quia nomine *proditionis rex* non intelligit tantum illam quæ vere et in re ipsa proditio est, sed etiam omnem illam quæ suo iudicio, et juxta præcedentium clausularum errores, proditio existinatur. Itaque etiam si rex sit per Pontificem legitime depositus, et subditi sint a vinculo juramenti et obedientiæ regi debitæ per eumdem Pontificem legitime liberati et absoluti, omnem regnivæ reipublicæ, aut subditorum conspirationem ad depellendum regem, seque ab ejus tyrannide (si forte eam exercet) liberandum, vocabit rex proditionem et proditoriam conspirationem, cum tamen revera talis non sit, sed justa defensio, vel justum bellum aut supplicium, ut in capite sequenti ostendam. Intelligendo ergo proditionem in hoc sensu, injusta est talis promissio-nis exactio, et turpe esset ac sacrilegum illam jurare, tum quia illa, ut dixi, non est proditio, nam in eo casu potius est servanda fides reipublicæ, seu communitati subditorum vi oppressorum, quam tyranno qui illos injuste premit, cum vere jam non sit rex; tum etiam quia tunc obligat naturale secretum, sub quo notitia talis conspirationis habetur, quia est de re justa, et necessaria ad commune bonum communitatis, quæ juste se defendit, ideoque promissio illi secreto contraria neque obligat, neque potest esse honesta, ac proinde

neque sancte jurari potest. Quocirca illa verba per se spectata, et solitarie, ut sic dicam, sumpta, possent suspicione carere; nihilominus, ut conjuncta præcedentibus, cavenda sunt, quia hic posterior sensus videtur maxime a rege intentus.

*9. Alia fraus esse potest, quia promissio videtur fieri, etiam si per confessionem sacramentalem comparata sit: hanc enim fuisse mentem regis, et eorum qui formam illam juramenti ediderunt, inde colligi potest, quod apud illos nulla est sacramentalis confessio, et sigillum confessionis pro nihilo ducunt, nullumque discrimen inter illam notitiam et quamecumque aliam constituunt. Neque de hac regis mente multum dubitabit, qui ea, quæ de sigillo confessionis in sua Praefat., pag. 147, scripsit, attente consideraverit. Ibi enim licet fateatur scholasticos Doctores, ex quo in Ecclesia esse cœperunt, omnes asseruisse, quidquid confessario sub confessionis velo retegitur, quantumcumque noxia et periculosa res sit, teneri eum confitentis nomen celare, nihilominus doctrinam ita proponit, ut illam potius irridere videatur. Ait enim, *ex quo isti scholastici Doctores in Ecclesia esse cœperunt, cœpisse etiam antique Theologie fundamenta novis e philosophia petitis labefactari;* significans sententiam illam de sigillo confessionis ad hunc Theologie lapsum seu defectum pertinuisse. Sed non ignorat orbis christianus, hujus temporis novatores Theologiam scholasticam odio habere, vel quia illam ignorant, vel quia eorum errores accuratius detegit et impugnat. Verumtamen fundamenta illius doctrinæ et sententiæ de sigillo confessionis antiquiora esse Doctoribus scholasticis, semperque eadem in Ecclesia fuisse et nunc esse, alibi a nobis ex professo probatum est, neque nunc potest obiter pro dignitate tractari, neque est necessarium, cum rex in citato loco de doctrina illa quoad hanc partem contendere noluerit.*

10. Crimen Garneto impositum. — Addit vero neminem antiquorum scholasticorum inficiari, si quid confessario patet factum fuerit, cuius occultatio magnum nocumentum possit reipublicæ creare, quoties id acciderit, confessarium posse et debere, quamvis hominem celet, rem indicare, ut periculo occurrat. Quam doctrinam tam certam esse opinatur, ut dicat, contrariam, quam Jesuitis tribuit, novum et periculosum dogma continere, ita ut neque rex, neque respublica possit esse secura ubi doctrina illa assertores invenerit. Hanc ve-

ro doctrinam eam ob causam ibi proponit et exaggerat, ut Henrieum Garnetum tanquam concium proditionis non revelatae accuset, illiusque participem, non admissa excusatione secreti confessionis, efficiat. Quamvis hac criminazione non contentus addat postea et ostendere conetur, Garnetum non in confessione, sed extra sacramentum, conspirationis illius notitiam habuisse. Sed quod ad factum Garneti spectat, nihil ex certa scientia dicere possum, quia nec praesens adfui, nec certam illius rei historiam legere potui. Scio tamen Garnetum, quem per annos plures familiariter cognovi, magnis animi dotibus a Deo ornatum fuisse; nam, praeter ingenii præstantiam, et egregiam eruditionem, magnum animi candorem, et morum integritatem, ac probitatem in illo semper observavi, quam usque ad mortem custodisse, certis indiciis ac testimoniosis semper intellexi. Quamobrem, in servando proditionis secreto, sive antequam comprehenderetur, sive in confessione judiciali præstantia, magnam prudentiam, fidelitatem ac veritatem servasse non dubito. Ideoque cum Cardinalis Bellarminus affirmet, testes multos, et unum imprimis gravem, et omni exceptione majorem, sancte affirmasse, in ipso mortis articulo ex ore Garneti audivisse, se illius proditionis concium non fuisse, nisi in confessione sacramentali, utrisque fidem adhibendam censeo, scilicet, et Garneto neganti se aliam notitiam habuisse, et testibus affirmantibus Garnetum id negasse. Neque indigne ferat rex, si fidelium et Catholicorum testimonium, haereticorum, qui ipsi regi imposuerunt, testimonios præferamus.

11. *Res, in confessione auditam, ob rationabilem causam, celata persona, manifestari potest.* — *Prima limitatio hujus doctrinæ.* — Quod vero ad jus pertinet, seu ad doctrinam asserentem, rem in confessione auditam posse ad ingens detrimentum vitandum, non revelata persona, indicari, dicimus illam quidem absolute veram esse, et a Jesuitis nunquam negatam fuisse; nam Bellarminus, in sua Apologia, illam ingenue admittit, c. 13; et ego, in tom. 4, de Poenit., disp. 33, secretum confessionis et præceptum ejus ex professore declarans, in sect. 3, n. 8, exposui, secreteum illud intelligendum esse cum relatione ad personam peccatoris, et ideo propter utilitatem posse confessorem loqui de re ipsa, tacendo personam, quod in sect. 7 iterum confirmavi et declaravi. Neque rex poterit auctorem Societatis ostendere, qui contraria-

doctrinam docuerit. Adhibent tamen declarationes necessarias, ne quis doctrina illa abutatur. Unam in defensionem Garnetti, et regi respondendo, acute sane, ac prudenter adhibuit Bellarminus noster, dicens, licere quidem de proditione in confessione cognita generalibus verbis principem admonere, ut periculum caveat, sed tamen intelligendum id esse de principe imprimis catholico, qui religionem confessionis sacramentalis credit, et in debita reverentia habeat; ac deinde de principe pio ac christiano, de quo præsumi non possit, aliquid ultra fas interrogaturum. Alioqui neque sacerdos tenetur in tanto periculo et discrimine se constituere, nec debet, aut licite potest secretum confessionis illi revelare, quem scit et confessionem pro nihilo habere, et omnibus viribus conaturum de persona proditoris interrogare et inquirere.

12. *Secunda limitatio.* — Atque huc spectat alia declaratio generalis, doctrinam illam intelligendam esse, tunc licere de re ipsa in confessione cognita loqui, quando nec directe neque indirecte revelatur persona. Unde, quia in moralibus periculum eventui aequiparatur (nam *qui amat periculum, peribit in illo*); ideo qui de re ipsa ita loquitur, ut morali periculo exponat personam confitentis, utique occasionem moralem præbendo, seu parando viam ut in notitiam ejus perveniat, contra sigillum agit, nam indirecte saltem revelat personam, et ideo id nulla ratione licet. Neque doctrina hæc sic intellecta est contra regum aut regnorum securitatem. Nam potius hæc tanta illius secreti religio et observantia necessaria est, ut per confessionis viam, et per consilia et monita confessari remedium aliquod hujusmodi proditionibus et iniquitatibus adhiberi posset, quod alias plane cessaret; nam si pœnitentes de incolumitate sua per illud secretum securi non fierent, nullus esset qui similia facta in confessione revelare anderet. Atque ita potius illi, qui vel confessionem irrident, vel ejus secretum labefactant, regum et regnorum securitati parum consulunt.

13. Tandem (ut ad punctum nostrum, a quo digressi sumus, revertamur) cum in formula juramenti rex Angliae promissionem a subditis exigit, revelandi omnes proditiones quæ ad eorum notitiam pervenerint, merito timere possunt, imo et credere Catholicæ, sine ulla distinctione id postulari, sive notitia illa sit per confessionem, et sive revelatione proditionis fiat simul cum revelatione proditoris,

sive cum morali ejus periculo, sive quocumque alio modo. In quo sensu etiam illa forma excedit obedientiam civilem, et aliquid contra Catholicam religiouem involvit. Ideo que etiam ex hac parte juramentum illud est valde suspectum, ac propterea merito possunt Catholicci, et prudentes viri majorem illius declarationem exigere, quamvis propter alias causas simpliciter illud recusare teneantur.

CAPUT IV.

UTRUM IN TERTIA PARTE JURAMENTI ALIQUID ULTRA CIVILEM OBEDIENTIAM ET CONTRA DOCTRINAM CATHOLICAM CONTINEATUR.

1. Duplex tyrannorum genus. — Post præcedentia juramenta additur tertium in hæc verba : *Præterea juro, quod ex corde abhorreo et abjuro tanquam impiam et hæreticam hanc doctrinam et propositionem : Quod principes per Papam excommunicati vel deprirati possint per suos subditos, vel alios quoscumque deponi et occidi.* In his verbis tria expendere necessarium est: primum, doctrinam ipsam; secundum, quo jure hoc juramentum a subditis exigatur; tertium, quantum hæc verba illis repugnant, quibus rex promittit ostendere, nihil in hoc juramento præter obedientiam civilem contineri. Circa primum, quoniam rex, de sua securitate sollicitus, saepe inculcat vulgarem illam quæstionem, an liceat privatæ personæ vel subditis regem tyrannum interficere, et ab illius vera resolutione hujus et aliarum partium intelligentia multum pendet, pauca de illa præmittere necessarium duxi. Duplex ergo a Theologis tyrannus distinguitur: unus est, qui non justo titulo, sed vi et injuste regnum occupavit, qui revera non est rex nec dominus, sed locum illius occupat, et umbram ejus gerit; alter est, qui licet verus dominus sit, et justo titulo regnum possideat, tyrannice regnat quoad usum, et gubernationem, quia, videlicet, aut omnia in proprium commodum, communi contempto, convertit, vel subditos injuste affigit, spoliando, occidendo, pervertendo, vel alia similia publice et frequenter injuste perpetrando. Talis fuit, verbi gratia, Nero, quem inter tyranos, quos Deus interdum dominari permittit, numerat Augustinus, lib. 5 de Civit., c. 19, sic legens illud Proverbiorum 8 : *Per me reges regnant, et tyranni per me tenent terram.* Et inter Christianos maxime est in hoc ordine

numerandus princeps, qui subditos suos in hæresim, vel aliud apostasiæ genus, vel pubicum schisma inducit.

2. Princeps licet tyrannice gubernet non potest licite privata auctoritate interfici. — Quæstio ergo præsens præcipue tractatur de legitimo principe tyrannice gubernante, quia rex Angliae de his principibas loquitur, et quia in hoc ordine legitimorum regum nos illum habemus. Dicimus ergo principem propter tyrannicum regimen, vel propter quævis crimina, non posse ab aliquo privata auctoritate juste interfici. Assertio est communis, et certa. Eam docuit D. Thomas, in lib. 4, c. 6, de Regimin. Princip., ubi optimis moralibus rationibus id confirmat. Idem tradit Cajetan. 2. 2, quæst. 64, art. 3, ubi alii moderni; et Soto, lib. 5 de Justit., q. 1, art. 3; Molin., tom. 4 de Justit., tract. 3, disp. 6; Azor, tom. 4, lib. 8, c. 12, q. 17, et c. 26, q. 7, et tom. 3, lib. 2, c. 2, q. 4, et c. 7, q. 30; Card. Toletus, in Summæ lib. 5, c. 6. Et Summistæ communiter, verb. *Tyrannus.* Consentunt in hac veritate asserenda jurisperiti, Bartol., Alex., Socin., Card. Præposit., et alii, quos refert et sequitur Gigas, tract. de Crim. læsæ Majest., quæstione 65, per totam. Idem tradit Lucas de Penna, in l. 4, G. *Ne armorum usus*, lib. 11, et Conrad. Brun., tract. de Seditiosis, lib. 5, c. 2, n. 9 et 10; et Thomas Actius, opus. de Ludo scaccor., q. 2, num. 50; late et bene, pluresque referens Restaurus Castaldus, tract. de Imperat., q. 82, per totam; et Parisius de Puteo, tract. de Sindicat., § *An liceat occidere regem*, qui hoc intendit, licet confuse loquatur, ut infra dicam. Covarr., in epitom. 4 Decretal., p. 2, c. 3, § 4, num. 6. Estque hæc veritas conformis præceptis Petri, 1 Epist., cap. 2 : *Subditi estote omni creaturæ propter Deum, sive regi, etc.* Et infra : *Servi estote dominis, non tantum bonis, sed etiam dyscolis.*

3. Opposita doctrina ut hæretica damnatur. — *Error Wicleph et Joan. Hus.* — Magis vero in specie definita est, et contraria, ut hæretica, damnata in Concilio Constantiens., sess. 15, ubi (ut lib. 5 retuli) damnatur articulus hic : *Tyrannus potest et debet licite et meritorie occidi per quemcumque vasallum suum et subditum, etiam per clanculares insidias, et subtiles blandicias, vel adulaciones, non obstante quocumque præstito juramento, seu confœderatione facta cum eo, non spectata sententia vel mandato judicis cujuscumque.* Declaratque Concilium esse hæreticos, et ut tales puniendos, qui hunc articulum pertinaciter

defenderint. Hæc enim definitio, ut omnes auctores moderni intelligunt, procedit de tyranno in regimine, non in titulo et usurpatione regni, quod ex verbis ipsis licet colligere. Nam vasallus et subditus proprie dicuntur respectu veri principis et superioris. Item verba illa : *Non obstante quocumque præstito juramento*, includunt etiam juramenta legitime facta veris regibus, nam verba universalia sunt. Unde non est dubium quin auctor illius articuli saltem fuerit universaliter locutus de omni tyranno, sive in titulo, sive in regimine, ut ex ejus verbis et exaggerationibus constat. Item quia ille articulus ex doctrina Wicleph et Joannis Hus ortus est, qui dicebant, dominos temporales per quodlibet peccatum mortale amittere principatum ipso facto, et ideo posse per suos subditos ad suum arbitrium corripi, ut in eodem Concilio, sessione octava, habetur. Concilium autem damnat articulum propter suam universalitatem et præcipitationem, quam statim præ se fert in omnibus particulis et ampliationibus suis, præcipueque damnat illum, quatenus veros reges et principes tyrannice gubernantes comprehendit. Potest autem etiam extendi ad tyrannum propriissimum per injustam regni usurpationem et retentionem, si cum omnibus illis exaggerationibus temere asseratur, scilicet, *non obstante quocumque præstito juramento, vel confederatione facta cum eo*, nam hoc est falsum, et contra rationem naturalem, quæ dictat pacta, præsertim jurata, servanda esse.

4. Fundamentum veræ doctrinæ. — Ratio autem assertionis est, quia rex tyrannice gubernans, vel posset occidi a quolibet subdito privato titulo justæ vindictæ et punitionis, vel titulo justæ defensionis suæ, vel reipublicæ. Primum est omnino falsum et haereticum, quia potestas vindicandi vel puniendo delicta non est in privatis personis, sed in superiori, vel in tota communitate perfecta ; ergo privata persona, occidens principem suum illo titulo, usurpat jurisdictionem et potestatem, quam non habet; ergo peccat contra justitiam. Major de fidej certa est, camque tradit Augustinus, lib. 4 de Civit., c. 17 et 18, dicens: *Non licet alicui privata potestate hominem occidere nocentem, cuius occidendi licentiam lex nulla concedit*; et c. 21 et 26, dicens, *qui alium occidit sine publica potestate ejusve imperio justo, homicidam esse*. Ratio vero est, tum quia vindicta et poena delictorum ordinatur ad commune bonum reipublicæ, et ideo

non est commissa, nisi ei cui publica potestas gubernandi rempublicam commissa est; tum etiam quia punire est actus superioris et jurisdictionis; ergo si a privato fiat, est actus usurpatæ jurisdictionis; tum denique quia alias sequeretur infinita confusio et perturbatio reipublicæ, et daretur occasio seditionibus et homicidiis. Quod si hac ratione homicidium est, propria auctoritate occidere privatum hominem, etiam homicidam, latronem et assassinum, multo majus crimen est manus in principem, licet iniquum et tyrannum, propria auctoritate extenderet. Denique alias nulla posset esse in regibus et principibus securitas, nam facile vasalli conqueruntur quod ab eis inuste tractentur.

5. Liceatne in defensionem propriæ vitæ principem occidere. — Alter vero titulus defensionis, licet fortasse in aliquo casu possit habere locum, non tamen in eo de quo tractamus, scilicet, an possit rex occidi a privato propter solam tyrannicam gubernationem. Itaque distinguere oportet an quis defendat se ipsum, vel rempublicam; item si se ipsum, an defendat vitam, aut membra, seu gravem corporis mutilationem, vel tantum defendat bona externa et fortunæ. Nam propter solam defensionem externorum honorum, non licebit regem invadentem occidere, tum quia præferenda est vita principis his bonis externis, propter dignitatem ejus, et quia Deum singulari quodam modo repræsentat, ejusque locum tenet. Tum etiam quia princeps habet quamdam superiorem administrationem bonorum omnium subditorum, et licet ille fortasse excedat, non proplerea usque ad interfectionem illi resistendum est; satis est enim quod ipse obligatus maneat postea ex justitia ad res ablatas restituendas vel compensandas, et quod subditus possit illas exigere, prout sine violentia potuerit. At vero si defensio sit propriæ vitæ, quam rex violenter auferre aggreditur, tunc quidem ordinarie licebit subdito se ipsum defendere, etiam si inde mors principis sequatur, quia jus tuendæ vitæ est maximum, et tunc princeps non est in necessitate, quæ obliget subditum ad vitam pro illo pendendam, sed ipse voluntarie et inique in illo discrimine se constituit. Dico autem ordinarie, nam si ex morte regis respublica perturbanda esset, aliave magna incommoda contra commune bonum esset passura, tunc charitas patriæ et boni communis obligaret ad non interficiendum regem, etiam cum mortis propriæ discrimine; sed hæc obligatio ad or-

dinem charitatis spectat, de quo nunc non tractamus.

6. Quid in reipublicæ defensionem. — At vero si sermo sit de ipsius reipublicæ defensione, hæc non habet locum, nisi supponatur rex actu aggrediens civitatem ut illam injuste perdat, et cives interficiat, vel quid simile. Et tunc certe licebit principi resistere, etiam occidendo illum, si aliter fieri non possit defensio. Tum quia si pro vita propria hoc licet, multo magis pro communi bono; tum etiam quia civitas ipsa seu respublica tunc habet justum bellum defensivum contra injustum invasorem, etiam si proprius rex sit; ergo quilibet civis, ut membrum reipublicæ, et ab ea vel expresse vel tacite motus, potest rempublicam defendere in eo conflictu, eo modo quo potuerit. At vero in præsenti non tractamus de illo casu, in quo rex actu infert bellum aggressivum ipsi reipublicæ ad destruendam illam, et multitudinem civium occidendum, sed quando in pace reguans aliis modis rempublicam vexat, eisque noxius est, et tunc non habet locum defensio per vim vel insidias contra vitam regis, quia tunc non infertur actaulis vis reipublicæ, quam vi repellere liceat. Unde tunc aggredi principem esset bellum contra illum movere privata auctoritate, quod nullo modo licet, *quia ordo naturalis, mortaliū paci accommodatus, hoc poscit, ut suscipiendi belli auctoritas penes rempublicam seu principem sit*, ut dixit Augustinus, lib. 22 contra Faustum, cap. 74. Item quia, sicut non licet mala commissa ab aliquo per mortem ejus propria auctoritate vindicare, ita nec licet mala futura, quæ ab eodem timentur, per ejusdem interfectionem propria auctoritate impedire. Est enim eadem ratio, et in privatibus malefactoribus est evidens; idem ergo majori ratione in principe locum habet.

7. Tyrannus in titulo licite occiditur. — Ut autem doctrinam hanc amplius illustrare, et ad præpositam jurandi clausulam dicta melius applicare possimus, necessarium prius est de altero membro, id est, de tyranno in ipso titulo, dicere, au præcedens doctrina in illo locum habeat, necne. Communiter enim inter hæc duo genera tyrannorum constituitur discrimen, nam asseritur hunc tyrannum quoad titulum, interfici posse a quacumque privata persona, quæ sit membrum reipublicæ quæ tyrannidem patitur, si aliter non potest rempublicam ab illa tyraunide liberare. Ita sentit D. Thomas, in 2, dist. 44, quæ est secunda, art. 2, in corpore et ad ult., quem fere omnes

Doctores citati secuti sunt, et videri potest Conr. Brun., tract. de Seditios., lib. 6, cap. 3, ubi varia refert exempla; sunt tamen ex iustis et injustis actibus coacervata, et ideo non probant jus, sed usum. Ratio ergo est, quia tunc non occiditur rex aut princeps, sed hostis reipublicæ. Quomodo idem D. Thomas, lib. de Regim. Princip., c. 6, defendit factum Aod, Judic. 5, qui, cum esset privata persona, Eglon, regem Moab, cui serviebat Israel, interfecit, quia non erat verus rex populi Dei, sed hostis et tyrannus. Idemque tradit Abulens. ibi, q. 26, et addit a quolibet Israelita potuisse occidi. Sic etiam Judith Holoferne in iinterfecit, Judith. 13. Estque simile factum Jahel occidentis Sisaram, Judic. 4, quod laudatur c. 5. Sic etiam D. Thomas in priori loco approbat sententiam Ciceronis, laudantis eos qui Cæsarem interfecerunt, qui non justo titulo, sed per vim et tyrannidem imperium usurpabat. Ideo etiam Doctores dicunt, contra hunc tyrannum non committi crimen læsæ majestatis, quia in tali tyranno nulla est vera majestas. Dicunt etiam nomine *principis* non venire hujusmodi tyrannum, et ideo decreta, quæ dicunt, Non licet principem interficere, hunc tyrannum non comprehendere, ut vide ri potest in Gigante, tract. de Crimi. læsæ Majest., q. 65.

8. Quæ requirantur ut tyrannus in titulo, licite a privato occidi possit. — Addit vero supra D. Thomas limitationem, nimirum hoc licere quando nullus recursus est ad superiorem, per quem judicium de invasore fieri possit. Quæ limitatio locum habet maxime quando tyrannis non a supremo principe, sed ab inferiori aliquo exercetur. Non enim soli reges, sed etiam inferiores domini potentes possunt per tyrannidem dominium aliquod, vel jurisdictionem, vel magistratum usurpare. Tunc ergo licet in actu aggressionis possit populus invadenti resistere, tamen postquam jam facto possidet et dominatur, non possunt propria auctoritate illum occidere, nec novum bellum contra eum movere, si possunt ad superiorem recurrere. Quia cum habeant superiorem, non licet eis propria auctoritate gladium sumere, minusque licebit euicunque privatæ personæ, alias omnia perturbarentur, magna confusio in respublica oriretur. Et ob eamdem causam, etiam quando non est superior ad quem recurratur, necessarium est ut tyrannis et injustitia sit publica et manifesta; nam si sit dubia, non licebit per vim depellere eum, qui possidet, cum in dubio me-

ior sit ejus conditio, nisi certum etiam sit possessionem fuisse tyrannicam. Præterea, ut licita sit occisio talis tyranni, oportet, necessaria sit ad libertatem regni obtainendam, nam si alia via minus crudeli possit tyrannus depelli, non licebit statim eum occidere sine majori potestate, et causæ examinatione.

9. Alia limitatio. — *Ultima conditio.* — Præterea intelligenda est communis sententia, nisi inter tyrannum et populum fœdus aliquod, vel tregua, aut pactum juramento firmatum intercesserit, ut notavit Abulens. supra, nam pacta et juramenta etiam cum hostibus servanda sunt, nisi fortasse fuerint eviderter iniqua, et coacte facta. Alia etiam limitatio adhibenda est, nisi eadem vel majora mala reipublicæ timeantur ex imperfectione tyranni, quam sub illo patiatur. Et ita dixit Bart., tract. de Guelfis et Gibellinis, licere in eo easu occidere tyrannum propter commune bonum, non propter privatum. Nam si quis occidat tyrannum ut ipse potiatur imperio per similem tyrannidem, non excusatur a culpa homicidii, præter novam tyrannidem. Item, si credatur filium tyranni, vel alium similem ejus socium, eadem mala illaturum reipublicæ, non licebit, quia sit malum sine spe majoris boni, et quia tunc revera non defenditur respublica, nec liberatur a tyrannide, quo solo titulo illa mors honestatur. Denique oportet ut respublica non contradicat expresse, nam si expresse repugnet, tunc non solum non præbet auctoritatem singulis personis, sed etiam declarat defensionem non esse sibi convenientem, cui in hoc credendum est, et inde consequenter fit ut non sit licitum privatæ personæ defendere tunc rempublicam per mortem tyrauni.

10. Aliorum sententia. — His vero non obstantibus, non desunt auctores quibus hæc distinctio et sententia non placeat, sed distincte dicendum putent non esse licitum private personæ interficere tyrannum, sive in solo regimine, sive etiam in titulo tyrannus sit. Ita sentit Castro, l. 14 adv. hær., verb. *Tyrannus*, quatenus indistincte loquitur, et eodem modo intelligit Concilium Constantiense, et omnes ejus rationes eo tendunt. Expressius id dixit Azor, dictam communem sententiam reprobando, in tom. 2, lib. 11, c. 5, q. 40. Fundatur primo, quia Concilium Lateranense absolute et generaliter de tyranno loquitur. Secundo, quia Augustinus, 4 de Civit., absolute etiam dicit, sine publica administratione non licere aliquem occidere. Tertio, quia D. Tho-

mas non dicit hunc tyrannum laudabiliter occidi a quolibet privato, sed indefinite, laudabiliter occidi. Quarto, quia nullus malefactor jure interfici potest, neque is, qui possidet, facto dejici potest, nisi prius audiatur et judicetur. Nec sufficit evidentia patrati sceleris, nisi sententia præcedat.

11. Ejus reprobatio. — *Respondetur ad Augustinum.* — Sed hæc parum cogunt contra receptam sententiam. Nam Concilium Lateranense, ut dixi, non definit universalem propositionem negativam, Nullus tyrannus occidi potest, sed damnat universalem affirmativam, Omnis tyrannus occidi potest, et non absolute prolatam, sed cum multis ampliationibus, et ideo ejus definitio reducitur ad hanc indefinitam, Non omnis tyrannus occidi potest ante sententiam contra illum prolatam, ex quo nullum argumentum contra communem sententiam sumi potest. Ad Augustinum respondeo, illum privatum hominem, qui hujusmodi tyrannum occidit, non id facere sine publica administratione, quia vel id facit auctoritate reipublicæ tacite consentientis, vel facit auctoritate Dei, qui per naturalem legem dedit unicuique potestatem defendendi se, et rempublicam suam a vi, quam similis tyranus facit. Ad D. Thomam respondemus, satis clare loqui, nam in corpore illius articuli dicit: *Cum facultas adest, potest aliquis tale dominium repellere;* in solutione vero ad 5, per vocem illam *aliquis*, aperte declarat privatam personam, tum ita interpretando verba Ciceronis de intersectoribus Julii Cæsaris; tum quia ita concludit: *Tunc enim qui ad liberationem patris tyrannum occidit, laudatur, et premium accipit.* Ad ultimam rationem diciatur, illam procedere, quando aliquis vel in poenam delicti interficiendus est, vel privandus his bonis quæ possidet quiete, et sine conflictu actuali, formali aut virtuali; in nostro autem easu nou de vindicta, sed de defensione agitur, nec tyranus quiete possidet, sed per vim actualem, quia, licet fortasse respublica non moveat bellum, quia non potest, nihilominus (ut recte Cajetanus notat) semper gerit bellum implicitum, quia renititur quantum potest.

12. Nova difficultas proponitur. — Hinc vero nova difficultas suboritur, quia juxta doctrinam hanc nulla est differentia inter utrumque easum seu tyranum. Quia etiam tyranum quoad titulum non licet occidere auctoritate privata, sed publica; hoc autem modo etiam licet occidere regem tyraunicæ

gubernantem. Unde argumentor ulterius, quia vel tyrannus in titulo interficiendus est ad vindictam sui sceleris, vel titulo defensionis. Priori modo, jam dictum est non posse interfici a qualibet privata persona auctoritate privata, tum quia punire est actus jurisdictionis et superioris, ut supra dixi; tum etiam quia nec ipsa res publica a tali tyranno offensa posset hoc modo illum punire, nisi publico consilio, cognita causa, et sufficenter judicata, et ideo ut privata persona id faciat, non sufficit tacitus vel præsumptus consensus reipublicæ, sed requiritur expressa declaratio per specialem, vel saltem per generalem commissiōnem. Unde etiam hoc titulo non licet extraneæ personæ privatæ, imo nec publicæ non habenti jurisdictionem in talem tyrannum, illum hoc titulo interficere sine expressa commissione reipublicæ offensæ. Si autem hoc tantum licet privatæ personæ titulo defensionis, sic nulla est differentia inter utrumque tyrannum, quia etiam titulo defensionis licet privatæ personæ occidere regem verum tyranne invadentem suum proprium regnum, vel civitatem, ut diximus. Item illo modo non licet talis interfictio ex potestate tamen concessa a res publica membris suis, sed ex auctoritate Dei, qui per legem naturalem unicuique dedit facultatem defendendi se et patriam suam, imo et quemlibet innocentem. Ideoque hoc titulo occidere tyrannum, non solum membris reipublicæ, sed etiam extraneis licet in utroque casu et tyranno; nulla ergo est differentia.

43. *Explicatur difficultas.* — Respondeo imprimis ad ultimam interrogationem, verum esse, tyrannum sine justo titulo regnum occupantem non posse a qualibet privato justo interfici per modum vindictæ seu punitionis, hoc enim convincunt argumenta facta in priori membro dilemmatis. Unde quoad hoc, factio non esse discriminem inter hunc et tyranicum regem, quoad absolutam rationem injustitiæ, licet respectu proprii regis sit longe gravius crimen, et læsa majestatis, quod non est respectu alterius tyranii, sed simplex injustitia, et usurpata jurisdictione. Superest ergo ut tantum jure defensionis licet privatæ personæ hunc tyrannum occidere; in hoc vero est magna differentia inter hunc et regem pravum. Nam rex licet tyranne gubernet, quamdiu non movet actuale bellum injustum contra rem publicam sibi subditam, non infert illi actuale vim, et ideo respectu illius non habet locum defensio, neque ullus subditus po-

test hoc titulo illum aggredi, aut bellum contra ipsum movere. At vero proprius tyrannus quamdiu regnum injuste detinet, et per vim dominatur, semper actu infert vim reipublicæ, et ita ipsa semper gerit cum illo actuale seu virtuale bellum, non vindicativum, ut sic dicam, sed defensivum. Et quamdiu contrarium non declarat, semper censetur velle defendi a qualibet suorum civium, imo etiam a qualibet extraneo; ideoque si aliter defendi non potest, nisi interficiendo tyrannum, cuilibet de populo licet illum interficere. Unde etiam in rigore, verum est id non fieri tunc auctoritate privata, sed publica, vel potius regni voluntatis a qualibet cive tanquam a membro et organo suo defendi, vel Dei auctoris naturæ dantis cuiuscumque homini potestatem defendendi innocentem. Unde etiam in hoc non est discriminus inter utrumque tyrannum; neuter enim potest occidi auctoritate privata, sed necessaria semper est potestas publica. Differentia vero est, quod haec potestas censetur commissa cuiilibet particulari personæ contra proprium tyrannum, non vero contra proprium dominum, propter discriminus declaratum.

44. *Altera difficultas.* — *Qua ratione rex haereticus dominio regni prioretur.* — Hinc vero nascitur nova difficultas præsentis instituto necessaria. Nam ex hac posteriori resolutione de proprio tyranno sequitur, priorem de rege tyranne gubernante solum procedere ante sententiam depositionis contra talem regem latam, non vero post illam, quod male fert rex Angliae, et examinatione dignum est. Nam sequela habet imprimis magnum fundamentum in Concilio Constantiensi; quia illud tantum loquitur de interficiente principem tyrannum privata auctoritate, non exspectata sententia vel mandato judicis cuiuscumque; sic enim Concilium Constantiense contrariam assertiōnem damnavit; ergo si judex legitimus talis regis, quicumque ille sit vel esse possit, contra illum justam sententiam tulit, qua eum ipso facto a regno depositus, jam non procedit Concilii definitio. Deinde cessat etiam ratio facta, et ita non habebit tune locum prima assertio, ut proposita est. Nam tunc jam supponitur exspectata sententia justa et legitima, et sic non procedit aggressor auctoritate privata, sed in virtute sententiae, et consequenter ut instrumentum auctoritatis publicæ. Denique postquam rex legitimate depositus est, jam non est rex neque princeps legitimus, et consequenter non potest in illo subsistere assertio, quæ de legitimo rege loquitur. Imo, si rex talis, post depo-

sitionem legitimam in sua pertinacia perseverans, regnum per vim retineat, incipit esse tyrannus in titulo, quia non est legitimus rex, nec justo titulo regnum possidet. Declaratur hoc amplius in rege hæretico, nam statim per hæresim ipso facto privatur aliquo modo dominio et proprietate sui regni, quia vel confiscatum manet, vel ad legitimum successorem catholicum ipso jure transit, et nihilominus non potest statim regno privari, sed juste illud possidet et administrat, donec per sententiam saltem declaratoriam criminis condemnatur, juxta cap. *Cum secundum leges*, de Hæret., in 6. At vero post sententiam latam omnino privatur regno, ita ut non possit justo titulo illud possidere; ergo ex tunc poterit tanquam omnino tyrannus tractari, et consequenter a quocumque privato poterit interfici.

15. *Difficultatis declaratio.* — *Respublica quando possit regem tyrannice gubernantem regno privare.* — Hæc difficultas supponit, contra regem supremum etiam in temporalibus, posse depositionis poenam, et privationis regni sententiam ferri, quod rex Angliae audire detrectat; est autem verissimum, et ex principiis positis in l. 3 evidenter colligitur, et in sequentibus iterum dicetur. A quo vero possit talis sententia ferri, magna quæstio est; breviter tamen nunc nunc supponimus, potestatem hanc deponendi regem esse posse vel in ipsa republica, vel in Summo Pontifice, diverso tamen modo¹. Nam in republica solum per modum defensionis necessariæ ad conservationem suam, ut supra lib. 3, cap. 3, dixi. Ideoque si rex legitimus tyrannice gubernet, et regno nullum aliud subsit remedium ad se defendendum, nisi regem expellere ac depolare, poterit respublica tota, publico et communi consilio civitatum et procerum, regem deponere, tum ex vi juris naturalis, quo licet vim vi repellere; tum quia semper hic casus, ad propriam reipublicæ conservationem necessarius, intelligitur exceptus in primo illo scđdere, quo respublica potestatem suam in regem transtulit. Et hoc modo accipiendum est quod ait D. Thomas 2. 2, q. 42, art. 2 et 3, non esse seditiosum resistere regi tyrannice gubernanti, utique si legitima potestate ipsius communitatis, et prudenter sine majori populi detimento fiat. Ita etiam exposuit idem D. Thomas, lib. 1 de Regimin. Princip., c. 6; et discipuli ejus, Soto, l. 5 de Just., q. 4, art. 3;

Bannez, 2. 2, q. 64, art. 3, dub. 2; Molin., tom. 4, de Just., tract. 3, disp. 6. Aliqui vero ex jurisperitis allegatis confuse in hoc puncto loquuntur, nam Paris. de Puteo supra, et Antonius Massa, tract. contr. Duel., n. 78 et 79, ita hoc affirmant, ut in singulis etiam civibus illam licentiam concedere videantur; e converso autem Restaur. Castal., dicta quæst. 82, ita repugnat, ut etiam communitati id negare videatur; sed juxta prædicta temperandi sunt.

16. At vero in Summo Pontifice est hæc potestas tanquam in superiori habente jurisdictionem ad corripiendum reges, etiam supremos, tanquam sibi subditos, ut supra ostensum est. Unde si crimina sint in materia spirituali, ut est crimen hæresis, potest directe illa punire in rege, etiam usque ad depositionem a regno, si pertinacia regis et providentia communis boni Ecclesiæ ita postulent. Si vero vitia sint in materia temporali, quatenus peccata sunt, etiam potest illa corrumpere per directam potestatem; quatenus vero fuerint temporaliter nociva reipublicæ Christianæ, indirecte saltem poterit ea punire, quatenus tyrannicum regimen temporalis principis semper etiam est saluti animarum perniciosum.

17. *Regnum christianum in deponendo regem tyranno a Pontifice pendet.* — Imo addendum ulterius, licet respublica seu regnum hominum, ex sola rei natura spectatum, prout fuit inter gentiles, et nunc est inter ethnicos, habeat potestatem, quam diximus, se defendendi a tyranno rege, et illum deponendi in eum finem, si necessarium fuerit, nihilominus regna christiana quoad hoc habere aliquam dependentiam et subordinationem ad Pontificem Summum. Primo, quia potest Pontifex alicui regno præcipere, ut se inconsulto contra regem suum non insurgat, vel illum non deponat, nisi prius causa et ratione ab ipso cognita, propter moralia pericula, et animarum dispendia, quæ in his tumultibus popularibus moraliter interveniunt, et ad vitandas seditiones et injustas rebelliones. Unde in historiis legimus, fere semper regna in hujusmodi casibus Pontifices consuluisse, vel etiam ab eo petivisse, ut regem ineptum vel tyrannum deponeret. Ut de Childerico, rege Galliarum, tempore Zachariæ Papæ, cap. *Alius*, 45, quæst. 6, et de aliis supra, lib. 3, c. 23, relatum est; et de rege Lusitanæ Sancio II, tempore Innocentii IV, referunt late Lusitanæ historiæ, fuisse a Ponti-

¹ Vide Sotum, lib. 5 de Just., q. 4, art. 3; Azor., tom. 2, lib. 24, c. 5, q. 8 et 9.

fice ab administratione regia depositum¹, licet non regno privatum, ut refertur etiam in c. *Grandi*, de Supplend. neglig. Prælatorum, in sexto. Secundo, pendet regnum Christianum a Pontifice in hoc, ut possit Pontifex non solum consulere, aut consentire ut regnum regem sibi perniciosum deponat, sed etiam præcipere et cogere ut id faciat, quando saluti spirituali regni, et præsertim ad vitandas hæreses vel schismata necessarium esse judicaverit. Quia tunc maxime habet locum usus potestatis indirectæ circa temporalia propter spiritualem finem, et quia potest per se immediate regem deponere in tali casu; ergo potest cogere regnum, ut id exequatur, si necessarium sit, alias esset ejus potestas non solum inefficax, sed etiam insufficiens. Denique, quia tale præceptum in illo easu justissimum est.

18. *Post justam sententiam declaratoriam, quo modo rex puniri queat.* — Hoc ergo supposito fundamento, dicendum est in puncto ultimo proposito, post sententiam condemnatoriam regis de regni privatione, latam per legitimam potestatem, vel, quod perinde est, post sententiam declaratoriam criminis habentis talem pœnam ipso jure impositam, posse quidem eum, qui sententiam tulit, vel cui ipse commiserit, regem privare regno, etiam illum interficiendo, si aliter non potuerit, vel si justa sententia ad hanc etiam pœnam extendatur. Non tamen statim posse regem depositum a qualibet privata persona interfici, imo neque per vim repelliri, donec ei præcipiatur, vel generalis hæc commissio in ipsa sententia vel jure declaretur. Prior pars evidenter sequitur ex præcedenti principio; nam qui potest aliquem juste condemnare, potest etiam pœnam exequi per se, vel per auxilia ad id necessaria, alias frustra esset illa potestas dicendi jus sine potestate efficaciter coactiva. Atque hæc ratione, ut ait Augustinus, lib. 1 de Civit., c. 26, recte facit minister regis interficiendo hominem ex præcepto regis, quia tunc magis potestatem regis quam suam exequitur. Ita ergo, quando respublica juste potest regem deponere, recte faciunt ministri ejus regem cogendo, vel interficiendo, si sit necesse, quia jam non potestate privata, sed publica operantur. Sicque recte dixit Soto, lib. 5 de Justit., quæst. 1, art. 3, licet rex, in solo regimine tyrannus, non possit a quo-

libet interfici, *lata vero sententia, quisque (inquit) potest institui executionis minister.* Eodemque modo si Papa regem deponat, ab illis tantum poterit expelli vel interfici, quibus ipse id commiserit. Quod si nulli executionem imperet, pertinebit ad legitimum in regno successorem, vel, si nullus inventus fuerit, ad regnum ipsum spectabit. Et ita tradunt Doctores, servandum esse in crimine hæresis, quando rex hæreticus per publicam sententiam regno privatus declaratur, ut videri potest in Castro, lib. 2 de Just. hæret. punit., cap. 7; Siman., de Cathol. institut., tit. 46, num. 73.

19. *Privatum propria auctoritate non posse morte damnatum occidere.* — Atque ex his facile probatur altera pars, quia, licet aliquis sit ad mortem juste damnatus, non potest quilibet privatus suo nutu illum occidere, nisi præcipiatur ab habente auctoritatem, vel aliter moveatur, quia nemo potest alium occidere, nisi vel superior habens in se talem potestatem, vel minister ejus; non potest autem dici minister, nisi a principali potestate moveatur. Quod si hoc verum est respectu cujuscumque malefactoris, majori profecto ratione respectu principis procedit. Dicit forte aliquis sufficere motionem implicitam seu tacitam reipublicæ, quæ, eo ipso quod regem depositum, vult ab omnibus expelli et cogi, et si resistat, etiam occidi. At hoc falsum est, et contra rationem cogitatum seu fictum; nam judex condemnans privatum hæreticum vel malefactorem, non statim facit omnibus facultatem in illum animadvertendi; ergo nec respublica vel Papa regem hæreticum vel aliter tyrannicum condemnans, omnibus talem licentiam concedit, etiam tacite, vel implicite. Nulla enim justa ratione potest præsumi magis hæc licentia contra principem, quam contra alios; nam semper est necessaria prudentia, et justus modus in ipsa executione, et majus periculum est turbationis et excessus in coactione personæ principis aut regis, quam cæterarum. Unde si Papa aliquem regem per sententiam declarat hæreticum, et a regno depositum, et de executione nihil amplius declarat, noui statim potest quilibet princeps contra illum movere bellum, quia nec est illo superior in temporalibus, ut supponimus, nec ab ipso Papa illum potestatem accipit ex vi solius sententiae. Et ideo (ut dicebam) solus legitimus successor ejus, si Catholicus sit, habet tunc illam facultatem, vel si ipse negligat vel nullus sit, communitas regni in illo jure succedet, dummodo

¹ Duar. Nunes, 1 part. Chronicæ in Sancto II, alias Capello.

sit catholica. Ipsa vero petente auxilium ab aliis principibus, illud præstare poterunt, ut per se constat. Si autem Pontifex (quod sæpius fecisse, exemplis ostensum est in lib. 3) aliis regibus potestatem tribuat invadendi tale regnum, tunc juste fieri potest, quia neque dicitur justa causa, nec potestas.

20. Ex doctrina tradita convincitur error in juramento inclusus. — Ex hac ergo vera et certa doctrina, manifeste convincimus tertiam partem juramenti ex variis capitibus excessum potestatis, injustitiam contra bonos mores, et errorem contra veram et Catholicam doctrinam continere. Primum probo, nam qua auctoritate cogit rex suos subditos ad jurandum, ut hæreticam propositionem, quam Ecclesia Catholicæ haec tenus non damnavit? Si enim rex dicat esse damnatam in Concilio Constantiensi, imprimis non potest constanter hoc dicere, cum auctoritatem Conciliorum, præsertim modernorum, pro nihilo habeat. Deinde ubi legit in Concilio Constantiensi particulam illam: *Principes per Papam excommunicati vel deprivati?* Aut illam: *Per suos subditos, vel alios quoscumque?* Cum ergo hæc particulae additæ illi propositioni reddant illam et sententiam ejus longe diversam, fallaci et illusoria illatione talis propositio Concilio tribuitur. Quod si non Concilii auctoritate, sed sua rex damnat propositionem illam, excedit proculdubio, et abutitur potestate quam non habet. Et præterea mirabile est quod sæpe contemnat Papæ potestatem ad definiendas res fidei, et ipse illam sibi audeat arrogare, nam licet verbis non dicat, facto profitetur. In quo etiam parum sibi constat. Nam alibi gloriatur in eadem Apologia, se non pudore novos fidei articulos more Pontificum. Denique cum ipse nihil putet esse de fide, nisi quod in Scriptura continetur, oportet ut nobis ostendat in Scriptura ubi sit illa propositio ut hæretica damnata, vel contraria divinitus revalata, ut illa pro hæretica habenda sit. Certe licet Paulus dixerit: *Omnis anima potestatibus sublimioribus subdita sit*, nunquam addidit: Etiam potestatibus excommunicatis vel deprivatis a Papa omnes subditi sint; neque unum ex alio colligi potest, cum sint longe diversa, ne dicam veluti opposita, nam rex deprivatus jam non est sublimior potestas. Atque hinc ulterius concluso, professionem illius juramenti quoad hanc partem esse quamdam confessionem regiae auctoritatis et potestatis, tum ad damnandas propositiones ut hæreticas ad libitum suum, tamen ad proponendum fidelibus authentice,

quid credere de fide debeant, vel tanquam hæreticum protestari; quod ex parte regis est excessus, et usurpatio potestatis spiritualis, et ex parte profitentium tale juramentum est quædam virtualis professio falsæ fidei.

21. Hoc ipsum ex verbis juramenti convincitur. — Altera ratio. — Præterea ex ipsis verbis apertissime constat, regem in hoc juramento non solam obedientiam civilem, seu juramentum ejus exigere. Nam sub juramento detestari propositionem aliquam ut hæreticam, plane excedit obedientiam civilem, quæ est longe inferioris ordinis a christiana fide. Maxime quando tale præceptum novum est in Ecclesia, ita ut rex, non solum cogat Christianum subditum ad detestandam propositiouem alias damnatam ab Ecclesia (quod interdum potest facere catholicus rex, modum debitum servando), sed etiam cogat ad detestandam propositionem quam ipse denuo sua auctoritate condemnat, ut nunc rex facit. Unde satis etiam probatum relinquitur, injustum esse hoc juramentum ex parte regis, quia multis modis excedit potestatem suam, et ita est violenta coactio, et alienæ jurisdictionis usurpatio. Ex parte vero fidelium etiam est injustum illud acceptare, vel generali ratione, quia vel jurent rem illicitam, vel mendacium; nam si credant esse hæreticam propositionem illam propter solam regis auctoritatem, vel propter hoc solum damnabile est, multoque magis, quia propositio illa, quæ sic damnatur, verissima est, et ex veris principiis fidei certa, ut in lib. 3 probatum est. Si autem abjurent exteriori talem propositionem, quam mente non credunt esse hæreticam, manifestum perjurium committunt, ut per se notum est. Et ultra hoc continet talis professio specialem et propriam injuriam contra Pontificem, cuius potestatem et obedientiam propter timorem humanum abnegant.

22. Duplex error inclusus in tercia parte juramenti. — Tandem facile intelligitur ex his, partem hanc juramenti doctrinam etiam erroneam involvere. Unus error est, in Pontifice non esse potestatem ad deponendum regem hæreticum vel schismaticum, et regnum suum ad idem schisma vel eamdem hæresim pertrahentem, vel pervertentem. Hujus enim erroris professio præcipue, magisque directe per illa verba fit, quam per alia, ut cuilibet legenti statim patet, et in superioribus multipliciter est probatum. Alter error minus quidem verbis expressus, in ipsa vero sententia latens, et virtute contentus, est, in his quæ ad

fidei doctrinam et detestationem hæresum pertinent, posse tempore regem fidem etiam juratam a suis subditis exigere. Imo etiam in hoc esse præferendam sententiam regis sententiæ Pontificis. Quæ sane virtualis quædam professio est primatus regis temporalis in spiritualibus, seu ecclesiasticis; nihil enim majus est in Petri primatu, nec magis ad conservationem Ecclesiæ, ejusque unionem necessarium, quam in proponendis rebus fidei, et hæresibus damnandis suprema auctoritas, quam in illis verbis sibi rex Angliæ arrogat; ergo professio talis juramenti est manifesta schismatis et erroris professio; tenentur ergo veri Catholici in conscientia illud respuere.

CAPUT V.

DE ULTIMA PARTE JURAMENTI, ET ERRORIBUS IN EA CONTENTIS.

1. In ultima parte juramenti errores supra positi repetuntur et exaggerantur. — In ultima juramenti parte fere iidem errores repetuntur, et ideo vix aliquid addendum circa illam superest; quia vero partim declarantur et exaggerantur magis, partim etiam pravitas juramenti augetur, singula breviter notanda et ita exponenda sunt, ut ab omnibus facile intelligantur. Primo ergo iterum abjuratur Pontificis auctoritas et potestas his verbis: *Et ultreius credo, et in conscientia mea resolvor, quod nec Papa, nec aliis quicunque potestatem habet me ab hoc juramento, aut aliqua ejus parte absolvendi.* In his verbis affirmatur aperte hæc propositio: *Papa non potest subditos regis temporalis a juramento fidelitatis absolvere.* Quia quod de hoc juramento affirmatur, non est propter peculiarem ejus rationem, nec propter dignitatem quæ in rege Anglie major sit quam in aliis temporalibus regibus, ut est per se notum, et rex in sua Præfatione aperte profitetur. Cum autem dicitur: *Papa non potest, etc., intelligitur simpliciter, id est, nullo modo, nulla ex causa, in nullove casu;* hoc enim significant illa verba secundum plenum ac communem sensum et intellectum eorum, quomodo vult ipse rex paulo inferius verba hujus juramenti accipi. Preterquam quod ex fine juramenti, et ex prima ejus parte satis clarum est hanc esse regis mentem.

2. Potest Pontifex subditos hæretici a juramento fidelitatis absolvere. — Sic autem propositio illa hæretica est, quia est contra potes-

tatem ligandi et solvendi datam Petro, prout illam semper intellexit et exercuit Catholica Ecclesia. Sie enim subditi hæretici cujuscumque, eo ipso quod per sententiam legitimam publice denunciatur hæreticus, a juramento fidelitatis absolvuntur ex decreto Gregorii IX, in cap. ult. de Hæreticis, illiusque pœnæ et potestatem et justissimam rationem explicat D. Thom. 2. 2, q. 12, art. 2. Simili modo absolvitur quis a vinculo juramenti fidelitatis præstiti domino, qui publice excommunicatus ac denunciatus est, per Urbanum II, in cap. ult., 15, q. 6; et Gregorium VII, cum Romana Synodo, in cap. *Nos Sanctorum*, ibidem. Ubi non omnino et simpliciter vinculum juramenti tollitur, sed quasi suspenditur pro eo tempore, pro quo excommunicatus in censura contumax perseverat. Quod secus est quando rex vel princeps propter hæresim vel alia crimina deponitur, et privatur regni domino, tunc omnino tollitur et quasi irritatur ejus materia subtracta. Atque hoc modo Innocentius IV, cum Concilio Lugdunensi, absolvit a juramento fidelitatis vasallos omnes imperatoris Friderici, et alia exempla supra posita sunt¹, quibus antiquus et universalis sensus Ecclesiæ ostenditur, qui est optimus Scripturæ interpres. Nam, si de consuetudine humana dicunt omnia jura, esse optimam legum humanarum interpretem, cur legis a Christo latæ, et potestatis ligandi et solvendi, ab eodem, Petro tributæ, non erit optima interpres universalis et antiquissima Ecclesiæ consuetudo et talis potestatis usus? Quam potestatem iidem Pontifices, qui illa usi sunt, summa auctoritate et doctrina defenderunt. Præsertim Gregorius VII, lib. 8 Registri, epist. 22; et Innocentius III, in epist. ad Ducem Caringiae, in cap. *Venerabilem*, de Elect.; et Bonifacius VIII, in Extravag. *Unam Sanc-tam*, de Majorit. et obedientia.

3. Quod si rex, propositionem hanc in Scriptura fundatam, Pontificum et Conciliorum auctoritate declaratam, et communi hactenus consensu receptam non credit, quo jure, quæve auctoritate cogere vult omnes subditos suos ad contrariam falsitatem credendam, et ore affirmandam, et juramento firmandam? aut quomodo possunt ipsi in conscientia resolvi, ut in juramento dicitur, ad id credendum et jurandum, sine alia ratione vel motivo, nisi credant majorem auctoritatem habere solum regem cum suis ministris ad suum errorem con-

¹ Lib. 3, cap. 23.

firmandum, ejusque fidem exigendam, quam habuerit Romana et universalis Ecclesia cum Pontificibus Summis tam constanti traditione et consensu id tradentibus? Quod si hoc rex intendit, et ad hanc fidem suos obligat, fateatur necesse est, in hoc juramento non pro temporali tantum jurisdictione, sed pro primatu spirituali pugnare.

4. Eadem veritas alia ratione confirmatur. — Quod alio etiam modo evidenter declaro. Nam contra rationem naturalem est dicere, non posse quempiam absolvi a promissione juramento confirmata per materiæ mutationem, illam auferendo et quasi irritando. Nam, licet quis juramento promiserit reddere depositum, si alter cedat juri suo, depositarius juramento absolvetur. Unde si talis mutatio per superiorem potestatem fiat, æque tolletur fidelitatis obligatio. Quod etiam Triphon. J. C. agnovit in l. *Bona fide*, ff. *Deposit.*, dicens, si quis accepit depositum sub fide reddendi illud domino, et dominus postea a prætore damnatus sit, ejusque bona fuerint publicata, liberari depositarium a fide reddendi depositum eidem domino, et in publicum illud deferri debere. Quia, ut infra dicit, *ratio justitiae postulat ut fidelitas servanda in contractu non sit spectanda ex solo respectu inter contrahentes, sed etiam respectu aliarum personarum, ad quas id, quod geritur, pertinet.* Quod maxime verum est, ubi auctoritas superioris et publicum bonum intervenit. Neque dubitavit, ut opinor, rex similem potestatem in regno suo exercere, subditum, verbi gratia, in crimen læsæ majestatis inventum, bonis privando, et consequenter actiones omnes, seu promissiones omnes illi factas, vel in se aut fiscum suum transferendo, vel certe omnino eas simpliciter irritando, seu debitорibus condonando, vel remittendo, ex quo necessario sequitur ut, licet essent juramento confirmatae, debitores a juramento absoluti maneant. Ergo negari non potest quin hic modus absolvendi a juramento honestus et validus esse possit, si in absolvente sit potestas, vel de materia juramenti, vel de jure creditoris seu domini aut promissarii disponendi. Ergo vel potestas absolvendi vasallos a juramento facto regi hæretico, vel pernicioso subditis christianis, injustissime et contra omnem rationem negatur Summo Pontifici; vel non ex alio fundamento negatur, nisi quia non creditur habere potestatem ad coercendos et puniendos reges temporales. Et ita hæc pars ad superiores revocatur, et aperte continet professionem erroris contra primatum

Pontificis, et assertionem hæreticam de primatu regis, ejusque absoluta exemptione ab obedientia Pontificis, maxime quoad vim coactivam per temporales penas.

5. Juramentum hoc ex se non obligare. — Denique non omittam advertere (quia rex non generatim de juramento, sed de hoc juramento loquitur), in vero et catholico sensu, menti tamen regis contrario, dici potuisse, neminem posse ab illo juramento jurantem absolvere, quia, videlicet, nemo absolvi potest propriè, qui ligatus non est; illud autem juramentum non ligat jurantem, quia non potest juramentum esse vinculum iniquitatis, quale illud esset, et ideo nemo potest ab illo solvi. Nihilominus tamen potest declarari absolutus, seu non ligatus, quod speciali auctoritate potest facere Pontifex, satisque id fecit, quando declaravit juramentum esse illicitum, et æternæ saluti contrarium. Inde enim non solum sequitur non esse præstandum, sed etiam si factum sit, non esse observandum. Unde fit etiam, ut in alio sensu possit Pontifex ab illo juramento jam facto absolvere, id est, a peccato in talis juramenti exhibitione commisso, dummodo digna illius poenitentia tanquam necessaria dispositio præcedat.

6. Jurandi hæc forma regi supremam potestatem spiritualem tribuit. — Secundo, in eadem parte fit confessio supremæ potestatis regiæ in spiritualibus, ejusque exemptionis a Summo Pontifice, his verbis: *Quod juramentum agnosco recta ac plena auctoritate esse mihi legitime ministratum.* Et postea his verbis juramentum confirmatur: *Hæcque omnia plane et sincere agnosco et juro.* Quod enim illa confessio in verbis illis contineatur, constat primo ex illis particulis, *plena auctoritate*; quamvis enim ex industria vox *suprema* vitata sit, ne forte simpliciores deterreret, nihilominus vox *plena* ex mente regis, satis ex toto discursu intellecta, pro æquipollenti posita est; non enim dicitur esse ex plena auctoritate illud juramentum, nisi quia nulla est inter homines potestas quæ illud impedire, prohibere aut auferre valeat; hæc autem est suprema potestas. Deinde cum juramentum ipsum sit expresse contra Papæ potestatem, cum additur plena potestate legitime ministratum, evidenter significatur, potestatem regiam, juramentum ministrantem, esse vel superiorem potestate Papæ, vel illi æquivalentem. Quod ergo rex in aliis locis expresse profitetur, hic teuste et in ipso usu potestatis usurpate involvit. Unde qui tali juramento consentit, plane jurat,

actum usurpatæ potestatis, esse actum legitimæ potestatis, quod est apertum perjurium, et confessioni catholicæ fidei contrarium. Ac denique ex his etiam verbis convincitur rex, non exigere in hoc juramento solam obedientiam civilem, cum recognitionem et confessionem plenariæ potestatis suæ ad decernendum contra potestatem Papæ expostulet.

7. In ultimis juramenti verbis iteratur professio omnium errorum præcedentium. — Ex alio capite ostenditur ibi perjurium committi. — Tertio, in ultimis verbis novum juramentum additur hujus tenoris: *Hancque recognitionem et agnitionem facio cordialiter, voluntarie et vere, in vera fide Christiani veri, sic me Deus adjuret.* Quæ est nova confirmatio et repetitio omnium præcedentium errorum, et confessionis, non solum externæ, sed etiam internæ eorum, ut jurans vel ab interna infidelitate, vel a perjurio excusari non possit. Et præterea expendo particulam illam voluntarie, quæ apertum mendacium involvit, quod sufficit ut sine perjurio jurari a Catholicis non possit. Nam est evidens, ipsos non voluntarios, sed coactos minis et terroribus juramentum præstare. Quia, ut ipsemet rex paulo antea dixerat eos, *si tali juramento renuntient, in discrimen amissionis ritæ, et fortunarum misere compingi et contrudì*¹, quomodo ergo vere jurare possunt se voluntarie tale juramentum præstare? Illud enim voluntarie ibi non significat quamcumque voluntatem, sed illam, quæ metu gravi et potenti violentia humana coacta non est, quamque jurans haberet, etiam si non cogeretur; sciunt autem Catholicæ se non habere talem voluntatem, et rex ipse hoc non ignorat; ergo ex hoc etiam capite juramentum iniquum est, quod perjurium in hoc involvit et exigit.

CAPUT VI.

RATIONES, QUIBUS JURAMENTUM DEFENDITUR, EXPENDUNTUR.

1. Hactenus partite et minutatim, ut, optare se eisdem verbis rex declaravit, juramentum refutavimus, ejusque deformitates ostendimus; nunc, ne contra inauditam partem, quæ regis etiam est querimonia, sententiam dicere videamus, necessarium duximus, quidquid in defensionem juramenti vel rex indicat, vel nos cogitare potuimus, in examen ad-

ducere, ut inde evidentius constet augeri potius inde juramenti damnationem, quam defendi vel excusari.

2. Regis fundamenta. — Primo ergo objici nobis potest auctoritas regia, quæ verbis expressis, ac sæpius repetitis, nihil aliud quam obedientiam civilem, ejusque professionem a subditis suis per juramentum illud exigere voluisse affirmat. Ita repetit sæpe tam in Apologia quam in Præfatione. Nam in pag. 4 se inquit satis ostendisse, nihil ultra per juramentum desiderasse, quam ut de subditorum fide et constantia securus fieret, *quam propter conscientiam*, ait, *mihi præstare tenebantur*¹. In Præfatione sæpius et apertius non solum id affirmat, sed etiam probat hoc fere modo: Cum Parlamentum inferioris domus clausulam inseruissest juramento, *qua Pontifici excommunicandi mei potestas adimebatur, illam protinus deleri volui*; ergo hinc licet colligere, *quanta sollicitudine carebam, ne quicquam hoc jurejurando contineretur, præter fidelitatis illius, civilisque et temporalis obedientiae professionem, quam ipsa natura omnibus sub regno nascentibus præscribit.* Probatio hujus illationis talis ex eodem loco colligitur, quia, sublata a juramento abjuratione potestatis Pontificis ad regem excommunicandum, nihil in eo relinquebatur præter civilem obedientiam et fidelitatem. Nam si quid argui potest, maxime, *quod abdicandorum regum jus Pontifici denegatur et abjuratur; at hoc justissimum est, nec excedit civilem fidelitatem*; ergo. Probatur minor primo, quia tale jus *nullo legitimo modo Pontifici est acquisitum, sed per Paparum injustam usurpationem et violentiam secularem vendicatum*, quod in Præfatione sæpe repetit, et præsertim pag. 22 ait, probandum in Apologia sumpsisse, illam usurpationem Pontificum cum Scripturis, Conciliis et Patribus repugnare. Secundo, quia talis abdicatio seu depositio regum, *excommunicationis, quæ spiritualis censura est, fines longe lateque excedit*; non potest ergo excommunicationis Pontificis justam ac legitimam causam subditis ministrare, ut quicquam in regem vel ejus imperium moliantur. Hæc fere rex in illo loco.

3. Tria consecaria inde deducta. — Et ex hoc fundamento tacite infert, tum ibi, tum in aliis locis, non posse subditos absolví per Pontificem ab obedientia civili debita regi, quia non potest Pontifex deponere regem a gradu et do-

¹ In Apol., pag. 5.

¹ Pag. 11, 12, 13 et 14.

minio suo ; ergo nec postest facere quin obedientia illi debeatur , quia jure naturali debita est, quod jus Papa tollere non potest. Hoc est enim quod illis verbis rex significare voluit, *quam ipsa natura omnibus sub regno nascentibus præscribit*. Simili modo infert, non posse Pontificem subditos à juramento fidelitatis absolvere, quia materia illius juramenti, quæ est obedientia civilis et promissio ejus, est immutabilis , et semper honesta , cum sit jure naturæ debita ; ergo nulla humana potestate fieri potest, quin juramentum illius semper obliget. Probatur consequentia , quia non potest quis a juramenti obligatione, sub qua aliquid promittit , absolvī , nisi prius promissio ipsa, seu materia ejus remittatur aut irritetur, quia vinculum juramenti per se inviolabile est, et jure maxime divino et naturali obligat ; cum ergo huic juramento materia subtrahi nou possit , profecto nec juramentum ipsum solvi potest. Tertio , hinc etiam colligit , multum differre inter hoc ultimum juramentum , et antiquum primatus juramentum, quia in illo potestas etiam spiritualis abjurabatur, in hoc vero tantum potestas temporalis, quam in reges usurpat. Unde in Præfatione valde reprehendit Bellarminum, quia, ut ait, *evincere nititur, hoc fidelitatis juramentum nihil esse, præter antiquum illud primatus juramentum, nunc recens verbis obscurioribus, et per ambages circumlocutionum formatum*, etc. Hinc denique in principio Apologiae dicitur, *non in alium finem constitutum esse hoc juramentum, quam ut non modo inter fideles subditos, et perfidos proditores, sed etiam inter ipsos Pontificios, qui fidelitatem regi servandam esse crederent, et eos qui, prætextu disparis religionis contra regem conjurare, licitum esse arbitrarentur, discriminem aliquod extaret*. Unde infra concludit, *juramentum hoc eo fine constitutum fuisse, ut instar pignoris et auctoramenti subditorum erga ipsum fidei foret*. Nihil ergo præter civilem obedientiam continet.

4. *Ultimum probationis genus*. — Tandem ad hunc locum spectat aliud probationis genus, quod in Apologia in principio impugnationis epistole Bellarmini rex inducit, ducento ad inconveniens. Quia qui hoc juramentum recusandum esse docet, necesse est ut proditoriis et absurdis positionibus implicet subditos, quos ab hoc juramento arcere contendit. Numeratque quatuordecim propositiones ejusmodi, quarum omnes vel alias ex juramenti reprobatione necessario inferri di-

cit. Quæ autem sint illæ propositiones, infra respondendo ad hanc partem constabit.

5. *Regis fundamento satisfit*. — *Ex titulo juramenti convincitur esse inventum ad discernendos Catholicos a sectariis*. — Hæc sunt quæ ex variis locis et dietis regis in ipsius defensionem colligere potui, quæ licet frivolæ excusationes sint, et in eodem semper cardine revolvantur, omittendas non censui, tum ut omnibus evidenter sit, nihil officii, quod ad difficultatem aut veritatem ostendendam possit conducere, a nobis prætermitti ; tum etiam ut, si fieri potest, rex ipse animadvertis, in re tanti momenti tantique periculi, quam levibus rationibus, maleque fundatis opinionibus se duci sinat. Igitur ad verba regis imprimis dicimus, facta non esse verbis consentanea, magisque factis et rebus ipsis, quam verbis aut promissionibus assentiendum esse. Quid enim interest quod rex affirmet, se nihil aliud quam civilem fidelitatem et obedientiam a subditis suis per illud juramentum exigere voluisse, si ex forma ipsius juramenti et omnibus partibus ejus contrarium evidenter ostenditur ? Deinde verbis regis ejusdem verba opponimus. Nam in edicto regio ¹, ubi hæc jurandi formula continetur, titulus illi superscriptus erat : *Ad detegendos et reprimendos Papistas*, id est, Catholicos, et Papæ obedientes, ejusque primatum recognoscentes ; at vero si juramentum solam fidelitatem civilem, et temporalem obedientiam exigeret, non posset esse signum discernens Papistas a sectariis seu apostatis a Papa ; quia obedientia civilis communis est omnibus, nam illi, qui Papæ obediunt, justam obedientiam civilem suis regibus non negant. Ergo tale juramentum non alia ratione datum dicitur ad detegendos Papistas, nisi quia illud admittentes, eo ipso censentur renunciare Papæ, ejusque potestatem abjurare ; et e contrario qui illud recusant, eo ipso ostendere se fideles et obedientes Papæ ; non ergo datur propter solam civilem obedientiam ; nam (ut ipse etiam rex totis viribus contendit) obedientia civilis non pugnat cum Romana religione, ac subinde neque cum obedientia Papæ, quam profitentur hi quos rex Papistas vocat.

6. *Ex titulo alterius juramenti colligitur velle regem primatum in spiritualibus*. — *Principalis finis hujus juramenti est abnegatio Pon-*

¹ Refert Bellarminus, in Apologia initio, et infra in defensione primi Brevis, etiam in principio.

tificiæ potestatis. — Præterea in eodem edicto regio duo juramenta continebantur¹, suis titulis distincta: unum enim de *Primatu regis in spiritualibus* inscribatur, quale fuit juramentum sub Elisabetha usitatum, et a Rege Jacobo promissione quadam locupletatum, ut supra in *Præfatione* notavimus. Alind vero præscriptum erat, *contra potestatem Pontificis in principes christianos*, quod non est aliud nisi quod nunc rex vocat juramentum fidelitatis; nullum enim aliud in illo edicto ferebatur, neque de alio hactenus mentio facta est; ergo ex ipsa inscriptione constat hoc juramentum continere potius abjurationem potestatis Pontificis in reges, quam fidelitatem subditorum erga regem. Nam illud est et directe intentum, ut inscriptio ostendit, et proxime ac expresse per verba declaratum, saepiusque repetitum; aliud autem indirecte ad summum ac remote, seu per consecutionem quamdam in ipso juramento continetur, licet fortasse ab ipso rege fuerit per se ac principaliter intentum. Unde non immerito notare hic possumus et applicare distinctionem scholasticorum, et moralium philosophorum de intentione operantis et operis, et de intentione finis et electione medii propter finem. Rex enim principaliter intendere potuit per hoc juramentum fidelitatem civilem subditorum, et suarum rerum suaæque personæ securitatem ac indemnitatem; medium autem, quo ad illam obtinendam usus est, fuit abjuratio Pontificiæ potestatis, et ita licet prior finis fuerit fortasse præcipuus in operante, id est, in rege instituente juramentum, nihilominus in ipso juramento proprius scopus, et quasi objectum ejus, est abnegatio Pontificiæ potestatis, et hoc modo dicimus esse principalem finem operis, id est, talis juramenti, quia est intrinseca finis, et proxima ejus materia, ut in singulis ejus partibus declaratum est. Et ita quidquid sit de intentione principali regis, de qua non curamus, neque illum mendacii arguere volumus, dubitari non potest quin juramentum ipsum, quo rex ut medio usus est, excesserit terminos obedientiæ civilis, et ad illam munieram, ultra quam par est, potestatem Pontificiam invaserit, eam abjurando, simul fundamenta fidei evertendo et abnegando.

7. *Confirmatur ex æquivocatione rorborum.* — *Potestas civilis subordinatur spirituali.* — Quod ut amplius declarem, adverto, in hac

voce *obedientiæ fidelitatis civilis*, prout rex Anglie illa utitur, æquivocationem latere, qua possunt facile simplices, et ignorantes decipi. Rex enim talem obedientiam civilem et fidelitatem a suis subditis exigit, quæ nullum in terris recognoscet rege superiore, neque directe, neque indirecte, et quæ in nullo casu, neque propter ullam causam possit per aliquam jurisdictionem in mortali homine existentem impediri aut tolli. Et quia non potest in rege recognosci tam suprema potestas, nisi abnegetur potestas Pontificis, quæ sola poterat esse illa in terris superior, etiam in civilibus, saltem indirecte, idèo ad munieram suam civilem obedientiam in illo gradu et modo quo illam efflagitat, usus est illo medio abjurandi Pontificiam potestatem. Et ideo verbis dicit, se tantum fidelitatem civilem a subditis exigere, re tamen vera abjurationem Catholicæ fidei ab eis extorquet. At vero juxta sanam et veram doctrinam, obedientia civilis generaliter dicitur illa, quæ debetur sublimioribus potestatibus temporalibus et civilibus, unicuique in suo gradu, et in sua materia, et intra mensuram suam, juxta illud Pauli, Rom. 13: *Reddite omnibus debita, cui tributum, tributum; cui rectigal, rectigal; cui timorem, timorem; cui honorem, honorem.* Et illud 1 Petr. 2: *Subjecti estote omni humano creaturæ propter Deum, sive regi tanquam præcellenti, sive ducibus tanquam ab eo missis,* etc. Itaque etiam magistratibus civilibus debetur civilis obedientia, tamen subordinata regibus, qui præcellunt; regibus autem, non recognoscensibus superiore in temporalibus, debetur etiam obedientia civilis maxima in illo ordine; non potest autem illa non esse subordinata spirituali potestati, si christiana obedientia sit. Quia esse debet juxta mensuram fidei, nam secundum illam tenentur omnes Christiani, sive reges sint, sive subditi, *obedire præpositis suis*, ad Hebr. 13, et præcipue Vicario Christi, cui ipse omnes oves suas subjecit, inter quas reges connumerantur. Ideoque si a rege temporali talis obedientia civilis postuletur, quæ Pontificis obedientiam excludat, jam non est mera obedientia civilis, sed transit in spiritualem et ecclesiasticam. Talis autem est obedientia quam rex Angliæ a suis exigit, ideoque in hac formula juramenti quasi oblitus obedientiæ civilis, totus ad Pontificiam potestatem abnegandam et abjurandam incubuit.

8. *Concluditur postulare hoc juramentum plus quam civilem fidelitatem.* — Unde constat

¹ Bellarminus supra, in posteriori loco.

primo, simpliciter falsum esse quod rex Angliae dicit, se tantum postulare per hoc juramentum a subditis fidelitatem illam, quam propter conscientiam illi præstare tenentur. Nam propter conscientiam tenentur subditi, ut Christus dixit, *reddere Casari quæ sunt Cæsariorum, et quæ sunt Dei Deo*, et consequenter etiam Vicario Christi quæ sunt illius; et quia singulari modo et titulo ad Deum pertinent, ideo sub posteriori membro verborum Christi continentur. Quapropter sicut Cæsare contra Deum præcipiente, potius est obediendum Deo quam hominibus, ut dixit Petrus, Actor. 4 et 5, ita, licet Christiani in conscientia teneantur obedire regi tanquam præcellentem in suo ordine, non tenentur tamen neque possunt illi obedire præcipienti abjurationem Pontificiæ potestatis, neque etiam teneantur illi obedire contra debitam Pontifici obedienciam, quæ altioris est ordinis, cui civilis obediencia ita est subordinata, ut in certis casibus vel ex justis causis interdum illi cedere debeat. Ergo falsum est in juramento nihil a subditis regis postulari, nisi quod ipsi in conscientia præstare tenebantur.

9. *Latenti regis objectioni occurritur.* — Quod autem paulo post in sua Præfatione, mutatis nonnihil verbis, repetit, *nihil in hoc juramento contineri præter fidelitatis civilisque obedientiæ professionem, quam natura ipsa omnibus sub regno nascentibus præscribit*, cautæ et attente legendum est. Nam continet objectionem, et latentem errorem. Objectio est supra facta, quia obediencia et fidelitas jure naturali debetur regibus; ergo debetur independenter a Pontifice; unde non magis potest ipse illam mutare quam jus nature, nec magis ab illa solvere quam a naturali jure. Error autem vel deceptio latens est, quia non altiori modo judicandum putat de obedientia civili inter Christianos quam inter ethnicos, nam utriusque debent suis regibus illam obedientiam civilem, quam ipsa natura præscribit, ideoque sentit non aliis terminis, neque aliis regulis definiendam esse obedientiam civilem, a Christianis, suis principibus præbendam, quam ab ethniciis, suis regibus debitam. Atque hanc fuisse regis mentem facile sibi persuadebit, qui alia ejus clariora verba, quæ in Præfatione, pag. 24, contra Bellarminum scripsit, in memoriam reduxerit. Ait enim: *Cum me hæreticis annumeret, et Juliano Apostolæ æquet, extra caulam gregemque Pontificium esse putet, necesse est. Eodem itaque jure ethniciis principibus censendus sum, in quos*

ipse nihil posse Pontificem fatetur. Ex hoc ergo principio, in verbis aliis significare voluit, sicut Papa non potest regem ethnicum deponere, nec ejus subditos ab illius obedientia absolvere, ita neque posse suos subditos a sua obedientia et fidelitate liberare, ideoque nihil in juramento postulare, nisi quod ipsa natura omnibus sub regno nascentibus imposuit.

10. *Qualis sit obedientia civilis subditorum fidelium.* — Veritas autem catholica docet, licet fides et gratia non destruant naturam, perficere tamen illam, et sub altioribus regulis ac legibus illam constituere, et ideo obedientiam civilem inter Christianos, licet ex lege naturæ oriatur, nihilominus definiri et limitari ad obedientiam civilem tali statui consentaneam, et fidei ac religioni non repugnantem, et justis Ecclesiæ legibus ac præceptis subordinatam. Ac propterea obedientiam civilem inter Christianos non esse æquiparandam in omnibus cum obedientia civili inter ethnicos, vel inter homines, qui pura naturali prudentia sine ullo fidei lumine gubernari possent. Quia ethnici vel infideles non baptizati non ita subjiciuntur Pontifici et legibus Ecclesiæ, sicut Christiani, et ideo in multis casibus possunt christiani principes, etiam in temporalibus supremi, prohiberi per Pontificiam legem, ne suis subditis aliquid imperent etiam in materia civili, in quibus principes ethnici cogi non possunt, quia in gremio ovium non sunt, neque unquam introierunt. Rex autem Jacobus (ut in libro primo probavimus), licet a crimine infidelitatis, seu heresis, et apostasie excusari non possit, non ideo in exemptione ab obedientia Pontificis est ethniciis annumerandus, nam ratione baptismi characterem in se delere non potest, ita neque a debito obedientiæ Ecclesiastice eximi potest, etiam si millies jugum confringat, vincula rumpat, et dicat: Non obediam. Poterit enim facto resistere, et non obedire; apud Deum autem semper erit inobedientiæ non tantum suæ, sed etiam suorum reus. Quapropter, cum dicit, *in hoc juramento nihil contineri præter obedientiam et fidelitatem civilem, quam ipsa natura omnibus sub regno nascentibus præscribit*, si id intelligat (ut videtur) de obedientia soluta ab omni regula et directione fidei, qualis etiam inter ethnicos recta ratione utentes esse potest, eo ipso satis confitetur sui juramenti errorem, et perversitatem quam involvit, quia talem obedientiam civilem exigit, quæ ecclesiasticam excludat, et illi præ-

feratur; si vero sano modo velimus interpretari obedientiam civilem, quam omnibus sub regno nascentibus natura præscribit, sic falsum erit nihil aliud in illo juramento contineri, ut patebit respondendo ad objectionem quam ex verbis illis confecimus.

11. Obedientia, regibus debita, est de jure gentium. — Qua ratione de jure naturali dici queat. — Aliquando non obligat. — Respondeamus enim fidelitatem et obedientiam civilem regibus datum, licet fundata sit et radicata in jure naturali, verius et proprius dici esse de jure gentium, quia non est immediate de jure naturali, sed supposita hominum conjunctio ne in uno politico corpore, et communitate perfecta. Vel certe ad summum dici potest esse de jure naturæ, supposito pacto et conventione inter ipsos homines, sicut est de jure naturali obligatio voti ad Deum, vel promissionis ac juramenti inter homines, ut supra in lib. 3, et libro etiam 3 de Legib. late declaravi. Atque hinc fit, obligationem obedientiæ civilis quoad materiam et modum non esse æqualem in omnibus hominibus, qui sub regno nascuntur, sed in unoquoque esse juxta regni primævam institutionem et conditionem pacti et foederis inter regem et populum, quæ vel per scriptas leges, quæ alicubi *fora* vocantur, vel per consuetudinem memoriam hominum excedentem constare solet. Et inde etiam fit ut vineulum talis fidelitatis seu obedientiæ, vel interdum non obliget, vel etiam aliquando rescindi possit, juxta conditiones in primo foedere inter regem et regnum, vel expresse positas, vel ipso jure naturæ exigente intime inclusas. Et sic non obligat illa obedientia ad parendum regi præcipienti illicita, vel saluti animæ contraria. Tantaque potest esse perversitas regis contra commune bonum reipublicæ, vel contra foedera, et conventionem cum regno factam, ut totum regnum communi concilio possit pacta rescindere, et regem deponere, et ita se ab illius obedientia et fidelitate civili liberare, ut supra, c. 5, diximus.

12. Civilis obedientia in subditis christianis a fide divina limitatur. — Ita ergo in bono sensu etiam Christiani, qui sub regno nascuntur, dici possunt habere a natura præscriptam regum suorum fidelitatem, modo tamen communi juri gentium christiani et catholici orbis, vel potius divino juri et fidei accommodato. Hic autem modus est, ut civilis obedientia sit subordinata ecclesiastice, et ab ea dirigatur, quantum ad ea quæ ad salutem animæ spectant, et consequenter ut vinculum illud,

in quo obligatio civilis obedientiæ fundatur, per Pastorem Ecclesiae dissolvi possit, si is, qui potestatem civilem habet, illa in subditorum spiritualem perniciem, vel in suam, cum publico aliorum scandalo et detimento abutatur. In hoc autem sensu falsum est, regem Angliæ solum exigere a suis subditis in hoc juramento illam civilem obedientiam, quam ipsa natura omnibus sub regno christiano nascentibus præscribit, quia in Christianis natura ipsa fide illuminata dictat esse obediendum regibus in civilibus, nisi aliquid contra fidem, vel contra obedientiam ecclesiasticam involvant aut præcipiant, sicut in hoc juramento a rege Angliæ fieri, satis superque ostensum est.

13. Refellitur quadam evasio. — Ad signum autem quo rex conatur contrarium suadere, quia clausulam, in qua potestas ipsum excommunicandi abjurabatur, poni in juramento non permisit, respondeamus, esto hoc ita sit (de quo propter verbum regis de facto testificantis non dubitamus) nihilominus signum esse insufficiens. Primo quia, licet expressa abjuratio potestatis excommunicandi sublata fuerit, implicita et involuta relicta est. Secundo, quia expresse est posita in juramento abjuratio potestatis Pontificis deponendi regem ex quacumque causa, quantumvis justa, et solvendi subditos a quacumque fidelitate vel obedientia regi debita, aut promissa, vel jurata, quæ potestas non minori certitudine Pontifici convenit, quam potestas excommunicandi. Utrumque ex dictis facile declaratur. Quia duobus modis potest rex contumax, seu rebellis contra religionem, per Pontificem privari potestate regni, et subditi ejus a fidelitate absolviti: uno modo quoad usum tantum, et per modum cuiusdam suspensionis; alio modo quoad proprietatem et dominium, et per modum depositionis; et utrumque negat rex Angliæ in hoc juramento, primum quidem in secunda et quarta clausulis juramenti, expressius quam in aliis, aliud vero in toto juramento et omnibus partibus ejus. Doctrina autem catholica utrumque docet.

14. Pontifex per excommunicationem privat regem jurisdictione regni quoad usum. — Nam prior modus deprivationis in ipso vinculo majoris excommunicationis intrinsecus inclusus est, ut docet Gregorius Papa VII, in capit. *Nos sanctorum*, 15, quæst. 6, ubi ait, eos, qui excommunicatis fidelitate, aut sacramento constricti sunt, *Apostolica aucto-*

rilate absolvimus, et ne eis fidelitatem obseruent, omnibus modis prohibemus. Quibus verbis non tam sit nova prohibitio, quam declaratur illa, quæ virtute talis censuræ fit. Nam illa censura privat non tantum sacra, sed etiam civili communicatione in omnibus rebus seu casibus in jure non exceptis; in hoc autem non solum non sit exceptio, sed etiam declaratur prohibitio. Quod autem illa non sit absoluta depositio, sed quasi suspensio, patet ex limitatione ibi adjuncta: *Quousque ipsi ad satisfactionem reniant*; hinc enim constat, illam absolucionem non esse perpetuam, sed durante illo vinculo. Est ergo per modum suspensionis potestatis quoad usum, et non per modum depositionis. Quia vero illa verba ultima dicuntur non inveniri in codice manuscripto in Vaticano invento, similis decisio cum illa expressa declaratione reperitur ex Paschas. II, in cap. *Juratos*, 15. q. 6, *quandiu excommunicatus est*. Et similis limitatio habetur in c. ult. de Pœnis.

15. *Objectionis confutatio.* — Neque contra hoc obstat objectio regis, quia excommunicationis est spiritualis censura, et ideo privatio jurisdictionis, vel temporalis potestatis etiam quoad usum, et per modum suspensionis, ejus fines excedit. Negatur enim consecutio. Nam, licet excommunicationis dicatur censura spiritualis, vel a principali materia et fine illius, vel quia a spirituali potestate procedit, tamen sicut potestas ipsa, licet sit spiritualis, indirecte ad temporalia extenditur, ita etiam censura excommunicationis eodem modo et spiritualis est, et indirecte extenditur ad temporalia; privat enim non solum communicatione sacra, sed etiam civili et humana, ut constat ex institutione et usu Ecclesiæ, perpetua traditione approbato, et in Scriptura fundato. Nam 2 Joan. 1 dicitur: *Neque ave ei dixerilis*; et Paulus, 1 Cor. 5: *Cum ejusmodi nec cibum sumere*. Et rationem ibidem insinuat, cum ait: *Judicavi, etc., tradere hujusmodi hominem Satanae in interitum carnis, ut spiritus salvus fiat in die Domini nostri Jesu Christi*. Ita ergo per excommunicationem vexatur homo etiam in temporalibus et corporalibus, ut vexatio det intellectum, ut a contumacia recedat.

16. *Depositio regis non est proprius excommunicationis effectus.* — *Ex diuturno Ecclesie usu potestas Pontificis ad deponendum reges ostenditur.* — Alter vero modus privationis per modum depositionis a regno, vel ab alia temporali potestate, et consequenter cum

perpetua absolutione subditorum a fidelitate et obedientia civili, non est quidem effectus proprius et intrinsecus excommunicationis majoris, si nihil amplius addatur, ut ex propria materia suppono¹, et ex communi usu Ecclesiæ, et ex allegatis etiam juribus satis colligitur. Nihilominus tamen hæc etiam depositio et absolutio per modum singularis pœnæ adjungitur censuris, quando delicta principum cogunt Pontifices ad illa severitate intendunt, qui usus satis est a nobis in lib. 3 comprobatus. Et inde convincitur potestas, quia tam publicus et constans usus, et tam efficax sine violentia armorum non potuit esse sine fide Ecclesiæ recognoscens in Pontifice legitimam potestatem ad illam pœnam imponendam, inclusam in potestate ligandi et solvendi Petro datam a Christo, et in virga pastorali quam ad regendam Ecclesiam accepit, ut in citato loco satis ostendimus. Et hic etiam habet locum ratio Pauli, quia oportet sæpe hominem peccatorem corporaliter et tempore² aliter gravissime affligere, ut resipiscat. Item est optimaratio, quia subditi sæpe indigent hoc remedio ne subvertantur. Ideo enim de hæretico dixit Paulus: *Post unam et secundam correptionem devita*²; quod multo magis in principe quam in aliis solet esse necessarium.

17. *Satisfit regis fundamento.* — Et ita nihil obstat quod rex ait, hanc pœnam longe latetque fines excommunicationis excedere; esto enim ita sit, depositione sic intellecta, nihilominus non excedit limites Pontificis potestatis, sicut in hoc juramento abjuratur. Cum vero ait hoc jus nullo legitimo titulo esse acquisitum Pontifici, respondemus non esse quidem aliquo humano titulo proprio acquisitum, sed divino jure esse inditum, ut ex Christi verbis in lib. 3 ostensum est. Ubi etiam illa verba regis refutavimus, *per Paparum injustam usurpationem et violentiam sacerdalem*. Est enim facile hæc dicere, præsertim potentiam regi, et affectu supremæ potestatis (ut pace illius dixerim) nimium capto et obsecrato, probare autem impossibile. Et ita rex nullam hujus injustæ usurpationis probationem vel indicium adduxit, nec est verisimile injustam usurpationem contra potentiam imperatorum et regum prævaluisse. Unde verba illa, quæ adjungit rex, de *violentia sacerdiali*, magis sunt per se incredibilia, quia hæc violentia non fit

¹ Vide tomum 5, in 3 part. D. Thomæ, disp. 45.

² Ad Tit. 3.

nisi armis et potentia sacerdotali; hæc autem in Pontificibus non fuit tanta, ut ad illam violentiam imperatoribus et regibus inferendam sufficeret. Et ita nulla talis violentia Pontificum in historiis legitur; gratis ergo et per solam dicendi libertatem asseritur.

48. *Confutatio tertii corollarii quod rex inferebat.* — *Confutatio ultimi corollarii.* — Quocirca, ex corollaris quæ rex iufert, primum et secundum de absolutione subditorum ab obedientia et juramento fidelitatis, satis ex dictis rejecta sunt. Tertium vero de comparatione hujus ultimi juramenti cum priori de primatu, facile etiam refellitur. Merito enim Card. Bellarminus dixit, unum virtute et tecte in alio includi. Quia potestas, per quam Pontifex reges schismaticos, ac gregi Christi perniciosos deponit, non est alia quam ipsa potestas quam a Christo accepit, quæ unica est et indivisibilis (ut ita rem explicem), et ideo non dividitur nec minuitur, nec ex parte abjurari potest, et ex parte retineri. Cum ergo in hoc juramento potestas comprimendi et puniendi reges Pontifici abjuretur, plane tota ejus potestas spiritualis abjuratur, quod in priori juramento expresse fiebat. Sufficiens autem hujus veritatis indicium est, quod rex ipse, ut hanc potestatem se deponendi cum fundamento negare videatur, consequenter negat Christum dedisse Petro, aut per eum Romano Pontifici ad regendam Ecclesiam supremam spiritualem potestatem, sentiens ita esse hæc connexa, ut unum sine alio negari non possit. Ergo dum in hoc juramento unum expresse abjuratur, aliud consequenter et virtute, et cum eodem perjurio negatur. Ultima vero illatio et quasi protestatio regis de fine juramenti nihil ipsum juvat. Esto enim ipse intenderit per illud juramentum discernere et cognoscere proditores, medium autem quo usus est fuit abjuratio Pontificiae potestatis. Unde per illud juramentum non solum distinguit fideles civiliter a proditoribus, sed etiam fideles catholicos ad suam fidem prodendam et abjurandam inducit, ex quo fit, ut multo magis inter credentes et non credentes discernat, aut saltem inter constanter recensantes iniquam abjurationem, vel misere propter vitanda temporalia incommoda illam simulant. Quamobrem tale juramentum potius character Anglicani schismatis, quam pignus vel auctoramentum fidei subditorum jure censendum est.

49. *Ultimæ probationi regis satisfit.* — *Propositiones quas rex infert expenduntur.* — Su-

perest ut ad ultimam regis probationem, sumptam ex quatenordecim propositionibus, quas ex reprobatione juramenti infert, respondeamus. Et imprimis dicimus ex illis evidenter colligi, intentionem juramenti non tam esse de obedientia præstanda regi, quam de potestate Pontifici abneganda, et sibi usurpanda. Nam ex omnibus propositionibus sola una pertinet ad regiam dignitatem tuendam, et illa non sequitur ex juramenti improbatione; aliæ vero fere omnes directe sunt de potestate Pontificis, et in sano sensu verissimæ sunt, ideoque merito reprobatur juramentum, quia contradictiones assertiones continet, ut rex ipse fatetur, dum ait has propositiones per antithesim sequi ex reprobatione juramenti. Ut autem hoc evidentius fiat, singulas propositiones, et quid de illis sentiendum sit, adnotabo. Prima est: *Quod ego Jacobus non similis rex legitimus hujus regni, aliarumque omnium mearum ditionum.* Hæc vero minime sequitur ex detestatione juramenti, nam, licet Jacobus sit verus et legitimus rex, nihilominus pravum est juramentum, quo abjuratur Pontificia potestas ad illum deponendum ex causa legitima: hanc enim potestatem habet Papa supra legitimos ac veros reges et imperatores.

20. II. *Quod Papæ liceat me regno deponere, ex mera sua auctoritate, vel, si non sua, tamen auctoritate Ecclesiæ, Sedisve Romanæ; si non Ecclesiæ auctoritate, vel Romanæ Sedis, tamen aliis mediis, atque aliorum subsidiis ei liceat me regno deponere.* III. *Quod Papæ liceat de regnis, ac ditionibus meis pro arbitrio statuere.* IV. *Quod penes Papam sit extraneo cuiuscumque principi potestatem concedere invadendi ditiones meas.* V. *Quod Papæ liceat absolvere subditos meos a fide atque obedientia mihi debitis.* VI. *Quod penes Papam sit licentiam concedere uni aut pluribus ex subditis meis arma contra me ferendi.* VII. *Quod liceat Papæ veniam dare subditis meis vim personæ meæ, aut dominiis, aut quibusdam e subditis meis afferendi.* VIII. *Quod si Papa sententia lata me excommunicaverit aut deposuerit, non sit liberum subditis persistare in fide atque obedientia mihi debita.* IX. *Quod si Papa me judicialiter excommunicaverit, vel deposuerit, subditis non sit liberum, personam et coronam meam omnibus viribus defendere.* X. *Quod si Papaum sententiam aliquam aut excommunicationis aut depositionis contra me promulgaverit, subditi ex vi ejus sententie nequaquam obligentur retegere omnes conjurations aut prodiciones contra me initas, quas vel audire*

vel nosse ipsis contigerit. XI. Quod non sit hæreticum neque detestabile opinari, principes a Papa excommunicatos impune deponi aut occidi posse a subditis suis, aliisve quibuscumque. XII. Quod Papa habeat potestatem absolvendi subditos meos ab hoc juramento, aut ab ejus aliqua parte.

21. Hæc autem assertiones omnes in unam fere coincidunt, quæ quasi per partes illis duodecim positionibus ad rem exaggerandam declaratur. In quibusdam vero illarum interdum additur aliqua particula, quæ verum sensum destruit et commutat. Quod ergo in secula dicuntur, *Papam mera sua auctoritate posse Jacobum regem deponere*, verissimum et catholicum est, dummodo illa particula *mera* non excludat legitimam causam, sed tantum sufficientiam illius auctoritatis sine alterius adminiculo declarat. Et quia propositio loquitur in particulari de tali persona, in qua legitima causa non deest, ut ex dictis satis constat, et universæ Ecclesiæ manifestum est, ideo propositio sine ulla æquivocatione verum sensum facit, quia legitimam causam non excludit, sed supponit. In tertia vero, quæ fere similis est, particula illa *pro arbitrio* ambiguitatem continet, et calumniæ occasionem præbet. Fræsertim quia in aliis locis solet rex dicere *ad libitum*, vel quid simile. Itaque si intelligatur de arbitrio justo et legitimo, vera est propositio; si autem de mera et absoluta voluntate, solaque libidine intelligatur, sic est impostura, nullaque verisimili consecutione ex reprobatione juramenti inferri potest. Eademque ratio est de cæteris. Omnes enim sunt de eadem supraena potestate Papæ ad coercendos Christianos rebelles, etiam si reges sint, usque ad depositionem eorum, si gravitas causæ et necessitas spiritualis regni id postulet.

22. *Decima propositio repugnantiam involvit, occasionemque præbet calumniæ.*—Solum in decima oportet advertere (quod in superioribus indicatum est) partim repugnantiam involvere, partim calumniandi occasionem præbere. Dico involvere repugnantiam, quia si rex per justam Papæ sententiam ipso facto sit depositus, eo ipso qui antea erant illi subditi, desinunt esse subditi; nam rex ipse jam non esset rex nec superior. Ideoque neque jam possent proprie dici proditiones, si quæ coniurationes contra ipsum fierent. Neque cives tenerentur, saltem titulo fidelitatis aut subjectionis, illas revelare. Addo vero, modum illum loquendi esse posse calumniis expositum, quia

rex criminosus, licet depositus sit, non statim potest a quolibet de populo per coniurationem vel insidias juste occidi, quia nec privatum civem criminatum licet aliis civibus his modis auctoritate sua interficiere, sed solum auctoritate publica, vel potestate ab eo accepta, qui illam dare potest, vel per sententiam, vel per imperium, aut commissionem specialem.

23. Quapropter si post regem depositum, aliqui per privatas insidias, non accepta a legitimo judice potestate, illi mortem machinentur, qui, extra confessionem, illarum esset conscius, obligari posset ex charitate eas detegere, ut malum proximi impediret, concurrentibus circumstantiis quæ ad tales obligations necessariæ esse solent. Quando vero contra personam talis regis juxta tenorem justæ sententiæ procederent, non excedendo limites potestatis a legitimo judice concessæ, tunc cessaret omnis obligatio detegendi secretum, quia jam illæ non essent insidiæ iniquæ, sed esset justum bellum. Quia ergo propositio illa indistincte loquitur, ideo dixi dare posse calumniæ occasionem, ac si diceretur, etiam quando coniurations vel proditiones sunt iniquæ et iniquæ, nunquam teneri cives ullo titulo, etiam charitatis, illas manifestare, quod falsum est, nec ex reprobatione juramenti id sequitur, ut per se notum est.

24. *Undecima propositionis duplex sensus.*—Eademque cautio in undecima propositione adhibenda est; sententia enim illius in summa est, regem excommunicatum impune deponi vel occidi a quibuscumque posse. Quæ ita simpliciter prolatæ falsissima est: nam excommunicatione sola et nuda non dat potestatem occidendi excommunicatum, nec privandi illum dominio rerum suarum, sed sola communicatione, et consequenter potest privari excommunicatus usu alicujus rei propriæ, si absque tali communicatione fieri non possit. Rex ergo excommunicatus, si sententia nihil aliud contineat, non statim potest a subditis vel quibuscumque aliis deponi vel occidi, neque hoc sequitur ex reprobatione juramenti. Si tamen in ea propositione, sub voce *excommunicationis*, comprehendatur etiam depositio, et dissidatio quæ per sententiam canonica interdum fit, sic veritatem continebit; imo etiam intellecta de sola censura excommunicationis in forma communis, si sensus propositionis esset, principem excommunicatum, durante excommunicatione, esse privatum jure præcipiendi subditis ut sibi obedient; quod si eos cogat, posse ipsos resistere, etiam per justum bellum: in hoc

sensu erit verissima propositio, et doctrina contraria hæretica est, contra vim et potestatem clavium Ecclesiæ; per illam tamen propositionem ejusque nuda verba, non satis hæc omnia explicantur, et ideo calumnia cavenda est, et aperte loquendum.

25. Decima tertia propositio vera est, et recte sequitur ex juramenti reprobatione. — Decima tertia propositio est: *Quod juramentum hoc neutiquam administretur subditis meis plena et legitima auctoritate.* Hæc quidem aperte sequitur ex reprobatione juramenti, quia juramentum iniquum a nemine potest legitima auctoritate præstari. Est tamen propositio verissima atque certissima, quod ex prioribus evidenter ostenditur, nam ex tenore illarum constat, omnes illos articulos esse de potestate Pontificis, ac subinde in juramento contineri multos potestati Pontificis contrarios; ergo manifestum est non esse in temporali rege legitimam auctoritatem ad tale juramentum subditis suis administrandum. Et simili claritate sequitur, tale juramentum non de sola civili obedientia, sed de sacra, et Apostolica potestate præstari; imo contra illam postulari.

26. Ultima propositio falsa et perperam illata. — Ultima propositio est: *Quod juramentum hoc suscipiendum sit cum æquivocatione, cum mentali erasure, aut lacita reservatione, et non ex animi sententia, atque ex intimo pectori, in vera fide hominis christiani.* Hæc vero nullam cum reprobatione juramenti connexionem vel consecutionem habet. Quia licet pars etiam illa juramenti reprobetur, non ideo affirmatur suscipiendum esse hoc juramentum cum æquivocatione. Hæc enim contraria sunt affirmantia, et utrumque potest esse falsum, et inter ea est medium, scilicet, neutro modo tale juramentum præstare. Unde tantum abest, ut dicamus vel cogitemus tale juramentum esse suscipiendum cum æquivocatione, ut potius illud etiam reprobemus. Tum quia fieret cum perjurio contra ultimam juramenti partem; tum etiam quia fieret eum scandalum, et cum omissione confessionis fidei tempore debito; imo etiam cum externa fidei negatione, ut sequenti capite magis explicabimus.

27. Horum verborum falsitas ostenditur. — Ultimo, post has propositiones addit rex hæc verba: *Hi sunt articuli ex variis juramenti partibus per antithesim eliciti. Quibus oppositæ theses, neque Pontificis primalum in causis spiritualibus ulla tenus attingunt, neque ullo unquam Concilio generali plene finito conclusum et definitum est, hujusmodi in reges potesta-*

tem ad Pontificis auctoritatem pertinere. Et ipsi denique eorum Doctores scholastici inexplicabili quodam litigio de iis inter se dissident in hunc diem. Jam vero satis a nobis ostensum est, quomodo potestas, quæ his articulis explicatur, ad spiritualem Pontificis dignitatem pertineat, et consequenter quomodo oppositæ theses in juramento inclusæ illi directe repugnant. Quod vero rex subjungit, in nullo Concilio generali plene finito conclusum et definitum esse, hujusmodi in reges potestatem ad Pontificis auctoritatem pertinere, imo de hac ipsa potestate esse dissidium inter scholasticos, aperte falsum quoad utramque partem est, neque potuit a rege affirmari, nisi quia cum per se non possit Concilia vel scholasticos evolvere, a Protestantibus deceptus est. Nam supra, lib. 3, ostensum est, multa Concilia generalia hanc potestatem in Summo Pontifice recognovisse et approbasse; præterquam quod sine Concilii definitione, Pontificum definitiones ad certam illam veritatem faciendam sufficienter. Verumtamen sæpius simul Pontifices cum Conciliis generalibus illa potestate usi sunt, ut Innocentius III in Concilio Lateranense, cap. 3, et Innocentius IV in Concilio Lugdunensi. Unde non est dubium quin ipsa Concilia facta approbando, potestatem in Pontifice recognoverint. Præterquam quod communi Ecclesiæ traditione et consensu hæc veritas fundata est.

28. Omnes Catholici doctores admittunt in Papa jurisdictionem ad regem hæreticum depонendum. — Neque in hoc punto est dissensio inter catholicos Theologos (hos enim, ut opinor, nomine scholasticorum rex intelligit, nam sui Theologi scholasticam Theologiam detestantur). De communi autem consensu Catholicorum in hoc puncto, satis dictum est in libro 3, et latius a Cardinali nostro, libro contra Barclaium, in principio. Et qui dissidere eos dicunt, ostendere debent autores catholicos, qui huic veritati contradicant, quod certe facere non possunt. Nam etiam illi scholastici¹, qui potestatem Pontificis interdum restringere visi sunt, ut Okam, Gerson, Parisius, et similes, hanc potestatem dependi reges haereticos, vel perniciosos saluti subditorum, illi nunquam denegarunt, licet in modo loquendi sit inter eos aliqua diversitas, an Papa possit per se et immediate id facere,

¹ Vide Almainum, tract. de Suprema potestate laic.; Gerson, tractat. de Potestate Eccles., cons. 22.

an solum præcipiendo subditis ut talem regem abjiciant; et in hoc etiam plures ex illis, et qui melius sentiunt, et cæteri omnes utrumque modum censem eadere sub potestate Pontificis. Et revera, per se incredibile est non habere christianum regnum remedium contra hæreticum regem; est enim hoc contra omnem rationem, et contra exactam Dei providentiam, cum rex hæreticus facillime totum regnum inficiat, ut experientia docet. Unde etiam Papa, si hæreticus sit, potest ab Ecclesia deponi; ergo necesse est ut sit potestas in terra, quæ possit regem hæreticum pertinacem et incorrigibilem deponere. Ergo maxime esse debet in Pontifice tanquam in supremo animarum pastore visibili in terris, neque in alio potuit convenientius talis potestas collocari, ut illa privatio, quæ multis difficultatibus et periculis exposita est, majori cum maturitate et justitia fieret, ut explicatum est.

CAPUT VII.

SUMMUM PONTIFICEM NON SOLUM POTUISSE, SED ETIAM DEBUISSER CATHOLICOS ANGLOS A PROFESIONE DICTI JURAMENTI SUA MONITIONE AVERTERE.

1. *Tres objectiones a rege propositæ contra Breve Pontificium.* — Hactenus injustitiam et errores predicti juramenti fidelitatis demonstravimus, vanasque excusationes refellimus; superest ut Brevia Pontificia defendamus, et querelis regis et objectionibus satisfaciamus, quod ex principiis positis et breviter et facile expediri potest. In principio igitur Apologiae audet rex Pontificem reprehendere, quod *Brevi in Britanniam misso, ibique vulgato, Papicolis omnibus interdicterit ne hoc sacramento fidelitatis se adstringi paterentur.* Triaque peccata in ipso potissimum notat, unum contra ipsum regem, aliud contra Catholicos Anglos, tertium in modo ipso refutandi juramentum. De primo sic inquit: *Cum indictum bellum non sit, negari non potest quin fecerit Pontifex contra bonos mores, et consuetudinem principum, maxime christianorum, quod me inauditum condemnari.* Unde postea sic colligit: *Pontifex, si existimat se meum judicem, quod dici solet competentem, cur me indicta causa condemnat? sin aliter se res habet, et si nihil Papæ tecum est negotii (quod est verissimum), quare se immiscer operi non suo, et saltem mitit in messem alienam, in re praesertim cirili, et quæ ad eum nullatenus spectat?*

2. Secundo, probat peccasse contra Catholicos

cos Angliæ, quia eos in miseras angustias conjecit, ut aut cum discrimine ritæ et jactura fortunarum fidelitati erga principem renuncient, aut cum catholicæ fidei detimento animarum salutem, ut obblendit Pontifex, in periculum adducant. Utrumque enim horum periculorum vitaretur, si, ut facere coeperant, bona fide juramentum illud præstare sinerentur. Tertio, probat Pontificem defecisse in modo, quia multam insumit operam, integrum jurisjuriandi formulam ad verbum recensendo, postea vero uno generali verbo totum juramentum proscribit, non indicando quid reprehendat, ut vel emendari vel benigne interpretari ab ipso posset, vel si hoc ipse facere contemneret, aliquam excusationem sui subditi Catholici haberent, si juramentum recusarent.

3. *Fundamenta contrariae doctrinæ.* — *Habebit jus Pontifex examinandi tale juramentum.* — Hæ autem objectiones ex duobus erroneis principiis procedunt. Unum est, Pontificem non habere directam potestatem spiritualem supra regem; aliud est, multo minus habere Pontificem potestatem etiam indirectam supra regem in temporalibus. Contraria vero dogmata in lib. 3 a nobis stabilita sunt et probata, quibus suppositis facile objectiones ounnes refelluntur. Nam imprimis dicimus potuisse Pontificem jure suo formulam juramenti a rege præscriptam examinare, et quatenus eam judicavit aut religione christianæ contrarium, aut contra reverentiam juramenti sacrilegam, eam reprobare ac prohibere. Probatur primo, quia juramentum res valde spiritualis est et sacra; ergo directe cadit sub potestatem spiritualem Pontificis; ergo ad munus Pontificis pertinuit reprobare juramentum de re iniqua, et valde perniciosa fidelibus, quale in illa formula contineri, satis in superioribus ostensum est.

4. Secundo, quando lex civilis vel terminos suos temporales excedit, vel disponit de temporalibus, fovendo peccata, vel illorum occasionem præbendo, Pontifex per potestatem spiritualem, quatenus ad temporalia indirecte extenditur, potest illam reprobare et irritare, vel irritam declarare, ut supra lib. 3, e. 22, late ostensum est; at vero formula illa (ut rex ipse contendit) est quædam regia pragmatica, seu lex civilis, et (ut nos ostendimus) excedit terminos materiae civilis et temporalis, et continet nulla religioni et bonis moribus contraria, ita ut a fidelibus sine dispendio animarum servari non possit; ergo Pontifex illam reprobando legitima clavum potestate usus

est, nimirum, clave scientiae, declarando in justitiam et malitiam illius juramenti, quod est proprium munus pastoris, ad quem spectat pascere Christi gregem, et clave potestatis, prohibendo usum talis juramenti. Unde etiam confirmatur, nam Summus Pontifex jus habet defendendi potestatem quam Christus Sedis suae contulit; sed juramentum illud directe est contrarium Pontificiae potestati; ergo jure potuit illud efficaciter reprobare et prohibere.

5. *Pontificem ad reprobandum tale juramentum obligari.* — Deinde addimus, non solum potuisse, sed etiam ex vi muneris et officii sui debuisse non tacere, nec occultare veritatem, sed subditos suos monere ut a tali juramento abstineant. Probatur primo, quia tenetur publica scandala et occasionem peccandi per doctrinam detegere, quando per fraudem et deceptionem ab hostibus Ecclesiæ fidelibus offeruntur. Et similiter tenetur, quantum in se est, talia pericula per potestatem suam auferre vel impedire, maxime quando aliqua publica auctoritate approbantur et proponuntur. Utrumque enim horum includitur in verbis Christi: *Pasce oves meas*; ibi enim data est potestas, ut supra late declaratum est, et simul cum collatione potestatis continent illa verba præceptum Petro et successoribus ejus impositum, ut constat, tam ex forma verborum quam ex materia, nam, supposito muneris, hoc præceptum connaturale est, propter quod dixit Paulus, Ecclesiæ præpositos rationem esse pro animabus subditorum reddituros. At in hoc juramento illa omnia concurrunt, scilicet, latens occasio erroris et deceptionis, acceptando abjurationem Pontificiae potestatis sub colore juramenti civilis fidelitatis, et consequenter occasio schismatis, hæresis et perjurii; ergo tenebatur Pontifex ex vi muneris veritatem aperire, non obstante quocumque incommodo, quia cum tanto spirituali detrimento non est tacenda veritas, propter incommoda quæ ex hominum malitia formidantur.

6. Item ex alio principio sequitur hæc obligatio, quia tenetur Pontifex ecclesiastica jura tueri ac defendere, tanquam fidelis dispensator et prudens. Quod cum de omnibus bonis ecclesiasticis verum sit, maxime locum habet in Pontificia dignitate et potestate tuenda, quia est fundamentum ecclesiastice unitatis, ut Christus ipse docuit, et ad servandam fidei veritatem maxime necessarium, ut experientia ipsa ostendit, et in lib. 3 probatum est. Hæc autem Pontificia potestas per hoc jura-

mentum labefactatur, in regno quidem Angliæ per potentiam et pravam doctrinam, et inde posset per pravum exemplum in alia redundare; ergo tenebatur Pontifex, non obstante quocumque difficultate vel impedimento, illi juramento sese opponere, illudque detestari.

7. *Etiamsi juramenti controversia foret dubia, a Pontifice dirimenda esset.* — Quin potius ulterius addimus, non solum in re tam clara, quam est illius juramenti perversitas, sed etiam si esset res dubia, ad Pontificem pertinuisse veritatem aperire, ne in re tam gravi et periculosa fideles in tenebris versarentur. Ita generaliter docet Innocentius III, in c. *Per venerabilem*, Qui fil. sint legit., et adducit illud Deuteron. 17: *Si difficile et ambiguum apud te judicium fuerit*, etc., usque ad illud: *Qui superbierit, nolens obedire sacerdotis imperio, qui eo tempore ministrat Domino Deo tuo, et decreto judicis, morietur homo ille*. Quæ lex, quatenus directiva est et moralis, etiam nunc habet locum, non virtute legis veteris, sed virtute fidei Evangelicæ, quia, supposita potestate Summi Sacerdotis legis gratiæ, illa obligatio necessario sequitur ex lege quasi connaturali illi potestati. Unde ratio propria est, quia materia illa spiritualis est, tum quia pertinet ad doctrinam fidei et morum, quam declarare ad Pastores Ecclesiæ pertinet, non ad reges, ut supra ex Scriptura et Patribus satis probatum est; tum etiam quia proxime attingit salutem animæ; tractatur enim an tale juramentum animæ nocteat, necne; ergo ad Pastores animarum, et præsertim ad eorum caput, judicium in tali dubitatione pertinet.

8. Confirmatur ac declaratur, nam orta simili controversia inter regem etiam catholicum et Papam, an aliquod juramentum sit licitum, et fidei consentaneum, non est certe talis controversia bello dirimenda, quia nec bellum est conveniens medium ad veritatem moralem declarandam, neque illic modo convenienter esset Ecclesiæ in spiritualibus provisum, nam inde necessario orientur schismata, et regnum in se divisum non posset subsistere¹. Neque etiam posset talis contro-

¹ Vide Bellarmin., lib. de Sacram. matrim., c. 32; Victor., Relect. 3, de Potest. Pontif., § *Ulrum potestas spiritualis*, etc., n. 4; Ledes, n. 4, p. 2, q. 20, art. 4, dubio principali post conclus. 8; Molin., tom. 4 de Just., disp. 29, circa finem.

versia per arbitros terminari, quia in declaranda morali veritate, tale judicium circa rem dubiam non transcendit humanam opinionem, nec potest ab aliquo arbitro majori potestate ferri, et ideo non sufficit ad securitatem Ecclesiae, nec potest Pontifex tali judicio se submittere; ergo necesse est ut talis controversia per regem vel per Pontificem dirimenda sit. Nemo autem qui Scripturas legit, præferet in eo negotio potestatem regiam Pontificie, cum hæc sit simpliciter superior, spiritualis, ac Vicarii Pastoris, cui Christus oves suas commisit ad eas in fide et moribus dirigendas. Debet ergo rex in simili controversia a Pontifice dirigi et gubernari, et tanquam ovis a pastore duci et pasci.

9. Ex his satis convincitur, regem Angliæ non solum immerito conqueri de Summo Pontifice, quod de sua juramenti formula judicium tulerit, verum etiam gravissime peccare a judicio illius discordando, cum illi tanquam subditus parere teneatur, præsertim in causis spiritualibus, ad quas controversiam de juramento pertinere evidentissimum est. Accedit quod nullam justam excusationem aut defensionem sui juramenti afferre hactenus potuit, ut in priori parte hujus libri ostensum est, et quæ ibi adduximus, nullam inveniri posse convincunt. Neque etiam contra Brevia Pontificia aliquid grave vel alicujus momenti objecit, præsertim quod ad punctum causæ principalis, quæ est de honestate juramenti, pertineat, ut in sequentibus videbimus.

10. *Prima regis objectio in ipsum retorguetur.*— In prima ergo reprehensione, qua Pontificem arguit, quod Pontifex ipsum inauditum condemnaret, cum inter eos bellum indictum nou sit, multipliciter rex ipse arguendo peccat. Primo, quia ratio illa de bello non indicte impertinens est. Nam etiam inter principes temporales, maxime christianos, licet neuter alteri subjectus sit, non licet inauditum condemnare, etiam post bellum indictmentum. Ut enim bellum ipsum juste indicatur ex parte aggreditis, necesse est ut contra inauditam partem non moveatur. Nam, teste Augustino, lib. Quæstionum in Josue, alias lib. 6 Quæst., q. 10: *Justa bella solent definiri, quæ ulciscuntur injurias, si qua gens, vel civitas, quæ bello etenda est, vel vindicare neglexerit quod a suis improbe factum est, vel reddere quod per injurias ablatum est.* Hæc autem constare non possunt parti non auditæ; ergo etiam per bellum justum non potest justa condemnatio fieri contra inauditam partem;

ergo neque etiam post indictum bellum protest unus rex alium æqualem seu supremum per sententiam, vel alio modo inauditum condemnare, prout rex in sua objectione supponere videtur. Deinde quia quamvis inter alios principes æque supremos id utecumque procederet, longe diversa ratio inter ipsum et Pontificem intercedit, ideoque illa etiam comparatione abutitur, cum ipse jure subditus sit Pontifici ratione baptismi, et fidei, quam in illo professus est. Quod si ipse rex veritatem hanc negare, et contrariam profiteri publice non veretur, quomodo conqueri potest quod inauditus condemnetur? Præterea, cum rex ait non esse indictum bellum inter ipsum et Pontificem, si de bello materiali seu corporali intelligat, quid ad causam refert, quæ principaliter et directe (ut sic dicam) spiritualis est? Bellum autem spirituale maxime inter regem Angliæ et Summum Pontificem indictum est, illudque primus indixit publice Henricus, quem Jacobus successor ejus imitatur, et hoc satis est ut, etiam si condemnaretur, conqueri non posset inauditum condemnari.

11. *Pontifex nullam pœnam regi imposuit.*—Denique cur se condemnatum conqueritur? Nam in neutro Brevi Pontificio aliqua ejus condemnatio legitur, nec excommunicatio lata, nec depositio pronunciata, nec aliqua alia pœna inficta, aut dicta sententia. Quod si juramenti reprobationem et prohibitionem, condemnationem suam appellet, immerito dicit se inauditum fuisse condemnatum, quia formula juramenti ubique auditur et legitur, quod satis est ut ipsa damnari possit. Neque oportet amplius audiri personam, cum contra illam nulla sententia declaratoria criminis in editione vel petitione talis juramenti commissi, neque aliqua pœna propter idem crimen in regem lata sit. Sed ait rex, Pontificem ipsum inauditum condemnasse, *partim eum persecutoribus annumerando, partim imperando Anglis catholicis, ut ab hoc juramento abstineant.* Sed neutrum horum ad propriam et juridicam condemnationem pertinet, quæ contra inauditam partem ferri non debet. Nam de opinione privata ex publica fama et effectibus manifesta judicare, et loqui de aliquo tanquam de alicujus criminis auctore, sæpe licet, etiam si ipse prius non audiatur, ut est per se manifestum. Qua vero ratione possit juste rex Angliæ persecutoribus fidelium adnumerari, in decimo capite videbimus. De prohibitione autem juramenti, jam diximus, satis esse auditum regem quoad hanc partem legen-

do ipsam juramenti formulam, quam neque ipse negat, neque dubitari poterat ejus auctoritate factam, et suis subditis esse propositionem.

12. Quocirca si tantum de condemnatione privata (ut sic dicam) loquebatur rex, nihil ad rem confert dilemma quod subjungit, quia ad judicandum de aliquo privatim non oportet esse judicem competentem, id est, jurisdictione utentem, neque etiam est semper necessarium (ut dixi) personam judicandam audire; satis est enim sufficientes causas, rationes et motiva ad ita judicandum habere. Neque etiam alteri membro de prohibitione juramenti recte accommodatur dilemma, quia ad reprobandum falsam doctrinam, non oportet esse judicem competentem auctoris ejus, neque ipsum aliter audiendam, quam per scripta sua. Ad prohibendum autem sub praecepto tale juramentum, necessaria quidem est jurisdictione in eos ad quos fertur praeceptum, quam Angli catholici in Summo Pontifice tanquam in suo pastore recognoscunt. Recte ergo potuit Pontifex Anglis talem prohibitionem imponere, praesertim cum non tam legem novam fecerit, quam divinam et naturalem de evitando illicito juramento, et falsi erroris professione fugienda declararit, et suo praecepto confirmaret. Respectu autem regis, licet verissimum sit Pontificem esse ipsius judicem competentem, ut supra ostendimus¹, nihilominus tamen in hoc actu nullum judicium jurisdictionis in regem exercuit. Nam, licet auctor similis juramenti esset aliquis princeps ethnicus non baptizatus, si juramentum errorem aliquem in fide christiana, vel injuriam nostrae religionis involveret, posset Pontifex illud reprobare, et Catholicis sub quocumque imperatore gentili degentibus prohibere, ut ex hactenus dictis satis manifestum est.

13. *Discrimen inter Breve Pii et Pauli V.* — Quapropter immerito rex, in pagin. 7 Apologiae, confert et æquiparat sententiam a Pio V latam contra Elisabetham, cum hoc Brevi Pontificio Pauli V, dicens: *Num potuit is (id est Pius V) aliquid statuere acerbius aut gravioris, quam in me statuit hic Pontifex?* *Quid enim inter haec duo intersit, subditos a vinculo obedientiae solvere, et præcipere ut arma capessant, quod Pius V fecit, et dicere subditis ne principi juramentum fidelitatis exposcenti obtemperent, quod hodiernus fecit Ponti-*

fex, non facile discerni potest. Sed quamvis utriusque Pontificis factum æquissimum fuerit, tam longe distant, ut facillime illorum disserimen cerni possit. Pius enim V sententiam in personam reginæ protulit, gravissimam poenam indixit, et potestate sua severe, licet juste, in eam usus est. At vero Paulus V nullam in regem Angliæ sententiam tulit in suis Brevibus, neque hactenus aliqua poena illum mulcetavit, aut eam incurrisse auctoritate sua declaravit, sed improbitatem solius juramenti aperuit, et quod necessario consequens erat, regi illud imperanti obtemperare prohibuit; non vetuit autem (ut rex semper causatur) simpliciter et absolute ne subditi suo regi juramentum fidelitatis præbeant, sed ne hoc juramentum, quod fidei et religioni christianæ injuriousum est, præstent. Ideoque valde diversa sunt, prohibere subditis regis hoc juramentum, vel illos a civili obedientia sui regis absolvere; possunt enim, sine coactione ad hoc juramentum, eam civilem obedientiam præstare et jurare, quæ fidei Christianæ puritati non repugnet.

14. *Respondetur ad secundam regis objectionem.* — Ad secundam objectionem de subditorum detrimentis et periculis respondetur, non a Pontifice veritatem docente, et quod per se malum erat prohibente, sed a rege tale juramentum imperante subditos Catholicos in eas angustias redigi. Supposita enim regis via et coactione, non potuit Pontifex veritatem tacere, aut errorem dissimulare, suo muneri, ut par erat, satisfaciendo. Ad tertiam responsum optime est ab aliis, Pontificem ut legislatorem seripsisse, ideo breviter quid cavendum sit intimasse. Addere vero possumus, non oportuisse Pontificem designare, quid in illo juramento reprehenderet, nam a principio ejus usque ad finem nihil fere in eo est quod cavendum non sit et vitandum, quia in singulis ejus partibus, ut ostendimus, vel iidem vel diversi errores inculcantur. Et ita sunt omnes ejus sententiae inter se connexæ, ut vix ulla sit a suspicione erroris libera. Quapropter non solum prudenti, sed etiam necessario consilio, nihil in particulari Pontifex reprehensione dignum designavit, ne cetera taceite approbare videretur.

¹ Lib. 3.

CAPUT VIII.

POSSINTNE ANGLI HOC JURAMENTUM ADMITTENTES,
ALIQUA RATIONE AUT MODO A CULPA EXCUSARI.

1. Aliæ duæ objectiones contra Breve. — Post initium et quasi præfationem suæ Apologiæ, primum Pontificis Breve rex ad verbum recenset, et deinde ad illud impugnandum aggreditur. Possumus autem Breve ipsum in tres partes distinguere: prius enim Pontifex ad fideles in tribulatione sua consolandos, et in moribus instruendos pauca verba præmittit; deinde juramentum reprobat ac prohibet; et tandem ad fortiter pro fide resistendum, et ad charitatis concordiam filios suos exhortatur. Quæ fere omnia eodem ordine rex impugnat, nobis autem commodius visum est prius materiam de juramento absolvere, postea vero cum rege circa alia digredi. Proposita ergo juramenti formula, illud exhibere his verbis Pontifex velat: *Quæcum ita sint, vobis ex verbis ipsis perspicuum esse debet, quod hujusmodi juramentum salva fide catholica et salute animarum restrarum præstari non potest, cum multa contineat quæ fidei et saluti aperie adversantur.* Contra quæ verba nihil novi rex objicit, sed duas impugnationes repetit, quas licet sæpe inculcat, nullam vim præter verborum acrimoniam illis addit. Prima est, quia Pontifex paucissimis verbis juramentum perstringit, et sine ulla probatione juramentum refellit. Unde subiungit rex: *Huic vero vetus dictum quadrat, quod de Philosopho circumfertur, multa dicit, sed pauca probat, imo vero nihil omnino probat.* Altera objectio est, quia professio fidelitatis erga principem non potest religioni et saluti adversari, et de contraria assertione inquit: *Ita excedit mean Theogiam, quantulacumque illa est, ut prorsus novam et exoticam plane assertiōnem esse, non possim non existimare, nec ejus ore proferendam, qui se universalem Episcopum, et omnium Christianarum animarum cœcumenicum pastorem satis insulse rendit.* Et hoc argumentum repetit rex, pag. 30 Apol., et in pag. 31.

2. Satisfit primæ. — In his autem objectiōnibus, ut dixi, si pius et consideratus lector attendat, nullam rationis vim nullamve doctrinæ soliditatem, sed tantum dicendi licentiam inveniet. Ad priorem ergo reprehensionem jam capite præcedenti justas brevitatis causas reddidimus. Ad novam autem redargutionem, *quia Papa dicit, et non probat, recte*

Bellarminus respondet, illa, quæ rex allegat, non hominis fidelis et Christiani esse, sed philosophi pagani, seu infidelis, sive ille fuerit Aristoteles de Moyse loquens, ut rex indicat, sive Averroes de Christo, ut ferunt, sive Galenus, ut apud ipsum reperitur scriptum¹; omnes enim illi non fide, sed proprio judicio et opinione regebantur, quos in hoc hæretici imitantur, et ideo mirum non est si Pontifici objiciant, quod alii Christo vel Moysi opponabant. Pontifex autem cum loqueretur fidelibus, quibus dictum est: *Nisi credideritis, non intelligeritis*, non disputationem texuit, nec prolixam probationem adjunxit, sed simplicis veritatis propositionem sufficere judicavit. Cum enim ad orthodoxos loqueretur, qui de illius auctoritate et potestate non dubitant, et inter eos multi sint rudes et idiotæ, qui rationes et probationes Theologicas assequi non valent, conveniens non erat eos rationibus et probationibus onerare, sed simplicem veritatem docere. Imo etiam pro doctioribus oportebat, non in ambiguitate opinionum et humanarum rationum rem tanti momenti constituere, sed eam Pontificia auctoritate firmare, ac brevi declaratione veritatis rem expedire. Addo vero, etiam in illis verbis certissimam et evidētissimam probationem Pontificem insinuasse dicendo: *Vobis ex verbis ipsis perspicuum esse debet;* non est enim necessaria alia probatio præter verba juramenti, et illa est sufficientissima, ut in sex primis capitibus a nobis demonstratum est, possuntque pro commen-tario quodam horum verborum Pontificis deservire.

3. Confutatur secunda. — Ad alteram objectionem jam sæpe responsum est, non oportere loqui in communi de juramento fidelitatis civilis, sed de hoc juramento, quod potius est abjurationis fidei erga Pontificem, quam fidelitatis ad regem. Juramentum ergo fidelitatis in communi sumptum non repugnat religioni Romanae, nec fidei Christianæ, quæ eadem est, neque etiam saluti fidelium, neque Theologi nomen meretar, qui hoc ignorat. Verumtamen, ut pro veritate libere respondeam, non satis illam ponderavit, qui assertionem illam tribuit Summo Pontifici, cum in neutro ejus Brevis, imo neque in universis decretis Pontificium aliquod ejus vestigium reperiatur. At vero hoc juramentum infidelitatis evidenter pugnat cum religione vera, et contra salutem est animarum, et hoc est quod Pontifex dixit, est-

¹ Vide Galenum, lib. 3 de Different. puls.

que verissimum, et ex verbis juramenti perspicuum, ut in praecedentibus a nobis, et prius a Cardinali Bellarmino responsum et probatum est. Quibus probationibus rex nihil respondit, sed digreditur postea in sua Apologia ad probandam regum auctoritatem et potestatem in temporalibus, ac si aliquis Catholicorum illam negaret. Unde nihil adducit quod ad punctum praesentis controversiae perfineat. Probant enim omnia illa, reges habere supremam potestatem in temporalibus; non tamen probant, non habere illam subordinatam et subjectam spirituali potestati Pontificis, ut in discursu tertii libri latissime ostensum est. Ubi ad omnia, quæ hic rex proponit, responsum est, ideoque de hac objectione nihil amplius nobis dicendum superest. Solum advertere non omittam, immerito regem, in pag. 33, Pontifici attribuere quod, incertis rumoribus ductus, temere hoc Breve expedierit, nam ex ejusdem Pontificis paucissimis verbis evidenter constat, non fama, aut rumoribus, nec aliis extrinsecis testimoniosis, sed perspicuis juramenti verbis motum vel potius coactum fuisse, tale juramentum fidelibus interdicere. Neque dissimilia sunt quæ in subsequentibus usque ad finem hujus partis rex profert, quæ lubens omitto, quia et ad sola facta pertinent, et illis copiose Bellarminus respondet.

4. An suspiciens hoc juramentum a peccato excusari possit.—Excusatio prima.—Dubitare vero quis ulterius potest circa hanc partem Pontificii Brevis, an, eo non obstante, possit aliquo modo excusari a culpa infidelitatis vel sacrilegii, qui juramentum illud exhibere non recusaverit. Et ratio dubitandi imprimis esse potest, quia in illo juramento nullum dogma fidei negari seu abjurari videtur. Ad summum enim in illo negatur Pontifici potestas depnendi regem, nam cætera ex hoc principio pendunt; at vero licet nos credamus esse verum, Pontificem habere hanc potestatem, non tamen videtur pertinere ad dogmata fidei, quia nec in Scriptura invenitur expressum, nec ab Ecclesia tanquam de fide definitum; ergo licet illud negetur exhibendo tale juramentum, non negabitur aliquod dogma fidei. Unde ulterius inferri potest, non teneri aliquem cum magna jactura, et præsertim cum evidenti periculo mortis tale juramentum recusare, quia si non continet fidei abnegationem externam, non est intrinsece malum, neque contra religionem, ac subinde excusari poterit a culpa propter tam gravem causam.

5. Secunda excusatio.—Secundo, potest au-

geri excusatio, quia verba juramenti non sunt tam clara, quin possint in alio sensu concepi et jurari, in quo etiam illa Pontificis potestas ad deponendos reges non abjuretur; ergo hoc modo licitum, seu a culpa excusabile est hoc juramentum. Consequentia probatur, quia, licet afferens juramentum, in pravo sensu et mala intentione illud exigat, jurans non tenetur illius intentioni conformari, sed potest uti amphibologia quam verba patientur, et tunc neque contra veritatem juratur, neque contra religionem, vel fidei confessionem, quia jurans nihil tale jurare intendit. Difficultas itaque videtur esse in antecedente, quod probatur, nam in prima clausula eum juratur rex, *quod sit supremus dominus*, etc., intelligi potest in sano sensu de supremo dominio temporali, et eum subjungitur Papam non posse eum deponere, jurans potest subintelligere, *suo arbitrio et libidine*, ut rex Angliæ loqui solet; possunt ergo ita hæc illius verba sumi, subintellecta illa particula, ac si esset expressa, vel, quod in idem redit, subintelligi potest *sine legitima causa*. Eademque particula mente concepi et repeti potest in cæteris verbis ejusdem clausulæ. Et in clausula secunda, potest specialiter fundari in illis verbis: *Ipsumque et ipsos totis meis viribus contra omnes conspirationes, et attentata quæcumque defendam*. *Conspiraciones* enim et *attentata* in deterriorum partem accipiuntur ad significandas coniurationes et tumultus injuste excitatos. Potest ergo unusquisque in hoc sensu verba illa accipere, et non peccabit in eodem illa jurando; ergo in eodem potest omnia præcedentia concipere et jurare, quia in uno contextu posteriora verba explicant et limitant præcedentia. Et ita consequenter reliquæ clausula similem excusationem admittent, ut consideranti facile patebit.

6. Ita legitur in Breri Pontificio prout a Bellarmino refertur.—Confirmarique solet ab Anglis, ut a fide dignis accepi, hæc amphibologia, quia juramentum in Anglicana lingua editum est, et in originali, pro verbo *interficiendi regem*, est in vulgari lingua verbum *murderari*, quod anglice significat *injuste interficere*, et ita communiter accipitur; ergo et in illo juramento potest licite ita accipi in sensu etiam litterali, ac communi, maxime in casu amissionis vitae aut bonorum omnium. At in illo sensu verum est nunquam esse licitum subditis *murderari* regem, et haereticum esse affirmare, id aliquando licere, sicut haereticum esset dicere, aliquando esse licitum in-

justitiam facere. Ergo alia verba trahi possunt ad eumdem sensum propter connexionem. Vel certe, quia tota propositio, cum copulativa sit, ratione alterius partis est falsa. Nam in tertia clausula copulative proponitur abjuranda propositio, *licere regem deponere et occidere* (utique injuste); ergo tota propositio erit falsa et haeretica ratione unius partis, et ita poterit sine peccato abjurari, quia propositio copulativa, cuius una pars est falsa, simpliciter est falsa; et similiter si una pars sit haeretica, simpliciter haeretica erit.

7. *Excusatio tertia*.—Tertia evasio vulgaris esse solet de excusatione per ignorantiam, quam non solum esse posse, sed de facto fuisse invincibilem apud Anglos, aliqui eorum persuadere conati sunt. Quia opinio asserens licetum esse illud juramentum exhibere, multorum virorum auctoritate, et variis rationibus et expositionibus clausularum facta est probabilis; ergo, licet juramentum in se pravum sit, ut Pontifex declaravit, nihilominus practice non peccabunt illud admittentes, conformando se opinioni probabili in casu tantæ necessitatis extremique periculi. Atque haec sunt excusationes, quas ad permittendum simile juramentum, ab aliquibus inventas esse audio; re tamen vera potius sunt fraudes ad decipiendas animas, quanu legitime defensiones talis promissionis veræ religioni contraria, ut breviter per singulas discurrendo convincemus.

8. *Confutatur prima excusatio*.—Prima ergo excusatio ab haereticis potius quam a fidelibus theologis inveniri potuit; falsum enim est et haereticum quod in principio illius excusationis sumitur. Nam propositio haec: Papa potestatem habet ad deponendos reges haereticos et pertinaces, suove regno in rebus ad salutem animæ pertinentibus perniciosos, inter dogmata fidei tenenda et credenda est. Nam continetur in verbis Christi, Petro singulariter et peculiariter ratione dictis: *Quodcumque ligaveris, et quodcumque solveris*; et: *Pasce oves meas*, prout Catholica Ecclesia, quæ est columna et firmamentum veritatis, illa intcllexit, et apertissime declaravit Bonifacius VIII in Extravag. *Unam Sanctam*, de Majorit. et obediens, concludens esse veritatem hanc de necessitate salutis. Et ita omnes Doctores Catholicæ, tam juristæ quam Theologi, in hoc gradu certitudinis veritatem hanc recipiunt, ut in lib. 3 ex professo est disputatum, et sapientius inculcatum est. Cum ergo in illo juramento abjuretur haec potestas, plane abjuratur Catholica fides. Unde si ex corde fiat, amittitur fides,

et in haeresim inciditur; si vero fiat simulate, multiplex perjurium committitur, et contra fidei confessionem peccatur, ut constat.

9. *Grave peccatum est aljurare Pontificis potestatem vel in uno actu deponendi regem ex iuxta causa*.—Addo vero etiam esse falsissimum, quod in posteriori parte illius excusationis sumitur, quia, licet veritas illa non esset in summo rigore de fide, in primario gradu, ut aiunt, sed certa theologica certitudine, gravissimum peccatum foret talem veritatem et illum actum Pontificiæ potestatis abjurare. Probatur ratione proxime facta, quia vel abjuratio ficta fit, et committuntur multa perjuria, et injuriosa ac perniciosa Pontifici, quod ad minimum est contra reverentiam et obedientiam illi jure debitam, et evidenter includit malitiam schismatis, quod proinde non audet rex de se negare, quamvis malitiam ejus dissimulet, ut in primo libro satis ostendimus. Si autem abjuratio fiat ex corde, gravius et formalius (ut sic dicam) schisma committitur, et juramentum licet non sit contra mentem, hoc ipso fit iniquum, et vinculum iniquitatis. Nam in materia gravissima, et necessaria ad unitatem, et concordiam Ecclesiæ, negare certam veritatem, etiam si non esset per se primo de fide, est gravissimum peccatum contra charitatem Ecclesiæ et contra justitiam, negando Sedi Apostolicæ quod legitimo titulo suum est; ergo jurare talem abnegationem, est sacrilegum et perniciosum juramentum. Non potest ergo ullo modo propter quæcumque temporalia incommoda vitanda admitti.

10. *Ostenditur argumento ad hominem*.—*Fundamentum dictæ Pontificiæ potestatis*.—Declaratur ad hominem: nam certe non est de fide Jacobum esse verum regem Angliæ, nullibi enim revelatum est; imo neque theologie certum est, satis enim erit si quadam fide humana moraliter certa credatur; et tamen non negabit quidem rex, quin jurare Jacobum non esse verum regem Angliæ sit grave peccatum, quia vel est jurare aliquid quod in re falsum est, vel saltem aliquid, quod sine magna temeritate non potest credi, vel affirmari tanquam verum, ideoque facile concedet rex, tale juramentum etiam propter vitandam mortem fieri non posse. At vero quantumcumque rex in sua Praefatione tergiversetur, longe certius est Pontificem habere potestatem in ipsum regem, quam ipsum esse verum regem, plura enim et altiora principia habet illud prius quam hoc posterius. Nam quod Jacobus fuerit verus successor regni, so-

lum in quadam traditione et probatione humana fundari potuit, et non parum ipse formidavit ne in dubium verteretur, cum esset haereticus, et reginæ jam declaratae haereticæ succederet; quem metum publica regni acceptatio, cum patientia et tolerantia Pontificis auferre potuit. Potestas autem Papæ supra regem fundamentum habet in verbo Christi, in Ecclesiæ communi confessione, in Decretis Pontificum et Conciliorum, in doctrinis Patrum et Theologorum optimorum, et catholicon, et prudentium utriusque juris interpretum, et in frequenti et inveterato usu; quomodo ergo potest una certitudo cum alia comparari? Si ergo rex non gravate concedet iniuum esse, se a subditis suis regem abjurari, quomodo disputare audet non esse iniquissimum et perniciosum fidelibus Christianis Pontifici jus suum, potestatem et obedientiam abjurare? quod in illo juramento evidenter fit.

11. *Refellitur secunda excusatio.* — Secunda excusatio ab hominibus timidis, et in fide et charitate parum constantibus inventa videtur; est enim valde frivola, et verbis juramenti multis modis repugnans. Primum enim in fine juramenti additur clausula excludens omnem extraordinarium sensum verborum per subintelleetas particulas, vel quolibet alio modo. Ita enim dicitur: *Haecque omnia plane ac sincere agnosco, et juro juxta expressa verba per me hic proleta, et juxta planum ac communem sensum et intellectum eorumdem verborum, absque ulla equivocatione, vel mentali evasione, vel secreta reservatione quacunque?* Si quis ergo haec verba proferat absque intentione impleudi illa, eo ipso perjurus est; si vero ex corde et animo proferat, non habet locum tota illa secunda excusatio, ut facile consideranti patebit. Nam, licet daremus particulam illam *sine legitima causa vel sua libidine* subintelligi posse in abjuratione potestatis Pontificis per se spectata, et non adjungetis aliis clausulis, non tamen potest talis additionis, seu mentalis, supposita illa ultima clausula, sine perjurio adjungi.

12. Deinde in hoc juramento non solum fit promissio nunquam occidendi regem, nec cooperandi ad conspirationem contra illum, vel similia, quæ ad factum pertinent, et possent intelligi de injustis factis; sed abjuratur ipsa Pontificis potestas cum tot particulis distributivis, ut non habeat locum sensus ille seu limitatio subintellecta. Sic enim dicitur in prima clausula: *Et quod Papa nec per se ipsum, nec per ullam aliam auctoritatem Eccle-*

sia, vel Sedis Romanae, vel per ulla media cum quibuscumque aliis aliquam potestatem, nec auctoritatem habet regem deponendi, etc. Quæ verba nullo modo restringi possunt ad potestatem deponendi injuste, vel sine causa, tum quia omnis potestas illi denegatur, tam in particulari respectu hujus regis, quam in generali respectu omnium successorum, ut in clausula secunda additur, et cum distributionibus, *non obstante aliqua declaratione, vel excommunicatione, vel deprivatione facta, vel facienda.* Tum etiam quia virtute juratur, talem sententiam vel depositionem non posse esse justam, nec efficacem, ex defectu potestatis, etiam si rex qui juramentum exigit, seu de quo in specie juratur, haereticus vel schismaticus sit.

13. Praeterea simili modo, et cum eisdem ampliationibus abjuratur potestas absolvendi subditos a vinculo obedientiæ, et quod, non obstante quacunque absolitione, defendant subditi regem etiam contra Papam, et nulla habita ratione alicuius censure vel excommunicationis. Quod non potest mente restringi ad excommunicationem injustam vel nullam, quia verba sunt adeo universalia, ut illis repugnet talis limitatio, scilicet: *Non obstante aliqua declaratione vel sententia excommunicationis,* a quibus verbis excludi non potest declaratio, quod talis sit haereticus vel schismaticus, quæ sit vera, et a Papa per quamcumque potestatem suam facta, nam verba illa omnia comprehendunt. Denique tota illa professio, confessio et abjuratio est directe contraria Pontificum et Conciliorum definitionibus; ergo est expressa exterior negatio dogmatum fidei, quæ nunquam potest esse licita propter subintelletas interpretationes vel particulas, quia est contra obligationem confitendi fidem, et non negandi illam etiam exterioris. Ut omittam scandalum publicum aliorum fidelium, quod non potest a tali actione separari, neque præbendum est, etiam propter vitandam mortem, ut exemplo Mathatiæ Machabæi docemur.

14. *Resellitur confirmatio Pontificia potestatis.* — *Excluditur evasio.* — Unde ad confirmationem de vulgari verbo Anglicano *murderari*, quod dicitur significare idem quod *injuste occidere*, respondetur, si tantum proponeretur jurandum, haereticum esse dicere, *regem posse a subditis murderari*, tolerabilem futuram fuisse excusationem. At nunc non solum id proponitur, sed etiam esse haereticum dicere, principes per Papam deprivatos aut excommunicatos, posse per subditos de-

poni, quod est contra doctrinam fidei. Nec habet locum evasio, quod tota copulativa ratione unius partis sit falsa, tum quia in forma juramenti prout habetur in libro regio, disjunctive legitur, *deponi aut occidi*; tum etiam quia, licet legatur copulative *deponi et occidi*, sensus idem redit, quia non juratur totum illud conjunctum, seu propositionem hypotheticam esse hæreticam, sed juratur singulas partes esse hæreticas, scilicet posse principem a Papa depositum per subditos deponi, et posse *murderari*, et ita semper damnatur ut hæretica propositio catholica, et secundum fidem certa. Eo vel maxime quod verbum *murderari* ideo positum ibi est, quia supponitur, non obstante sententia Papæ, occasionem regis esse iniquam proditionem ejus, et contra fidelitatem regi debitam, et ita totum hoc ibi juratur. Unde, licet verbum illud per se sumptum illam significationem habeat, tamen in illo juramento per multa alia verba declaratur et extenditur, ita ut non habeat locum limitatio, præsertim respectu totius juramenti, et omnium clausularum ejus. In quibus sœpe fit expressa, et absoluta et universalis abjuratio potestatis Papæ ad puniendo reges, etiam rebelles et pertinaces; et præterea recognoscitur in rege auctoritas et potestas ad exigendum tale juramentum, et misscentur alia, quæ non possunt cum veritate jurari, seu a perjurio per illas verborum æquivalentes vel subintelligentias excusari.

45. *In quo sensu et in quibus personis tertia excusatio locum habeat.* — Circa tertiam excusationem distinguere oportet tempora et personas. Quoad tempora enim possumus loqui de tempore ante declarationem factam a summo Pontifice, vel post illam. In priori tempore potuit fortasse esse aliqua contentio, vel opinionum diversitas inter Catholicos, salva conscientia, de quo statim dicam. Post declarationem autem Pontificis, nullo modo existimari potest probabilis opinio illi decisioni contraria, qui apud illum est potestas declarandi hujusmodi dubia ad bonos mores et fidem pertinentia, cui subditi stare tenentur, alias inutilis esset talis potestas. De quo jam satis in superioribus dictum est. Quoad personas vero distinguere oportet inter eos, qui docti sunt, et per se possunt qualitatem juramenti expendere, et de illo judicium ferre, et alios ignorantes, quos oportet aliorum duci opinione et judicio. De his posterioribus, non est dubium quin potuerint aliqui per ignorantiam excusari, si sacerdotes, qui reputa-

bantur probi et docti, eos docebant juramentum illud potuisse salva conscientia præstari, retenta intentione non jurandi aliquid contra fidem vel contra Papæ potestatem. Hæc autem ignorantia jam non habebit locum etiam in his simplicioribus post Pontificium Breve, quia tenentur illud præferre omnibus suis privatis Doctoribus. Si tamen essent aliqui adeo rudes, qui nihil de Pontificia declaratione audierint vel intellexerint, posset adhuc in eis talis ignorantia durare, quia perinde se habebunt ac si Papa nihil declarasset. Verumtamen res adeo est notoria, et in illis partibus publica, ut vix possit casus moraliter accidere. In aliis vero fidelibus doctis, qui per se possunt juramenti momenta expendere, etiam sublato e medio Brevi Pontificio, nunquam censeo fuisse opinionem probabilem eorum, qui professionem talis juramenti licitam esse docebant, quia verba juramenti semper fuerunt tam perspicua et tam multiplicia, et tot modis conscientiam illaqueantia, et schismatis approbationem et professionem inducentia, ut, licet in una vel alia vocula aut particula, colorata evasio locum habere potuerit, impossibile fuerit modum vere probabilem invenire totum juramentum honestandi seu excusandi, ac pericula ejus evadendi, ut satis probant quæ de singulis ejus verbis hactenus ponderata sunt. Si qui ergo in principio, doctrina et vita commendati, in illam sententiam prolapsi sunt, ducti fortasse timore aut ratione humana, non satis rem considerarunt, quorum ignorantia probabilis fuerit, necne, nunc iudicare non est necesse, oportere autem existimo, maculam timere, eamque tum pœnitentia, tum publica confessione, qua infirmiores animentur et instruantur, ne in fraudem incurvant, compensare; et, si opus sit, proprio sanguine ablueret.

CAPUT IX.

LICEATNE CATHOLICIS ANGLIS TEMPLA HÆRETICORUM ADIRE, ET CUM EIS IN RITIBUS COMMUNICARE SINE INTENTIONE CULTUS VEL COOPERATIONIS CUM ILLIS, SOLUM PROPTER TEMPORALES PŒNAS VITANDAS?

4. Quamvis rex Angliæ, in Apologia sua hanc partem Pontificis Brevis referens, eam attingere noluerit, ad hujus operis complementum, et ad majorem fidelium instructiōnem, majoremque eorum, quæ de juramento diximus, declarationem et confirmationem,

nonnulla de hoc puncto dicere opportunum et necessarium hoc loco existimavi. Occasio autem seu necessitas hujus doctrinæ orta est ex dura vexatione quam Catholici in Anglia patiuntur, dum per leges acerbissimas bonis privantur, aliisque gravibus poenis subjiciuntur, nisi Ecclesias hæreticorum adeant, eorumque concionibus, precationibus aliisve ritibus intersint. A temporibus enim Elisabethæ statim cœperunt Catholici gravissimis poenis cogi ecclesias hæreticorum frequentare, eorumque ritibus et concionibus interesse. Priusque, ut Sand., lib. 3, ann. 1559, refert, in singula capita duodecim assium mulcta est indicta ecclesias sicut prius frequentare recusantibus. Postea vero (ut idem refert ann. 1582) ordinibus convocatis legem promulgant, qua multant utriusque sexus singulos (modo annum decimum sextum ætatis attigerint) qui recusant adire Protestantium preces, conciones, ac ecclesiastas, viginti libris Anglicanis menstruis, id est, aureis fere septuaginta. Additumque est, referente Episcopo Tarazonensi, ut qui aureorum summam non haberent, in carcere detinerentur, donec solverent. Quæ leges et poenæ acerbiores usque ad præsentem diem factæ sunt, ut capite sequenti referemus. Hinc ergo nonnulli, pia Catholicorum miseratione commoti, dubitare cœperunt an possint aliqua ratione a culpa excusari, illas leges servando, ita ut neque sine evidenti obligatione cogantur tot mala sustinere, neque etiam cum conscientiæ periculo, propter humanum timorem, vel temporalium rerum nimium amorem, inquis ac tyrannicis legibus subjiciantur.

2. Explicatur divinum præceptum de fide exterius confitenda. — Ut autem ratio dubitandi veraque illius decisio intelligi ac fundari melius possit, pauca de obligatione et præcepto confitendi fidem, non solum verbis, sed etiam factis præmittere necesse est. Et imprimis tria illa discernenda sunt, quæ communiter in hac materia distinguuntur, scilicet, *confiteri fidem exterius*, utique publice, seu coram aliis, ita ut videntes vel audientes per signa externa, a me exhibita, intelligent me esse Christianum; huic extreme opponitur *negare fidem*; quasi medium autem inter hæc est *occultare fidem*, quod tantum negative opponitur confessioni, non contrarie, sicut negare fidem.

3. Ex his autem tribus certum est primum, scilicet, *confiteri fidem*, cadere sub præceptum divinum. Ita docent omnes catholici Doctores

cum D. Thoma 2. 2, quæst. 3. Estque certum de fide ex illo Pauli, ad Rom. 10 : *Corde creditur ad justitiam, ore autem confessio fit ad salutem.* In hoc enim ultimo verbo, *fit ad salutem*, significat Paulus, confessionem fidei esse necessariam ad salutem; sicut enim dicitur corde credi ad justitiam, quia fides est ad justificationem necessaria, ita fidei confessio dicitur fieri ad salutem, utique æternam, quia ad illam consequendam, et ad gratiam conservandam, est necessaria. Et inde etiam constat loqui Paulum de externa et sensibili confessione fidei, nam interua pertinet ad prius membrum credendi corde; non enim aliter interius confitemur fidem, id est, veritates fidei, nisi illis assensum internum tribuendo, quod est corde credere. Ultra hoc ergo requiritur ad salutem externa confessio. Quam etiam explicuit Paulus, dicens *ore fieri*, non quia solo ore fieri possit aut debeat, nam etiam potest fieri actibus corporeis, et aliis signis externis, quibus christianam religionem profitemur; sed quia verba sunt signa magis expressa, et ad mentem exprimendam principaliiter instituta, ideo specialiter tribuit Paulus ori confessionem fidei.

4. Christus autem, Matth. 10, absolute dixit : *Qui me confessus fuerit coram hominibus, confitebor et ego eum coram Patre meo, qui in cœlis est.* Quæ verba non habent tam expressam formam præcepti, sicut promissoris, sed aliis locis explicuit Christus, confessionem nostram esse nobis necessariam ad obtinendam confessionem suam, ut statim videbimus. Recte autem quadrat Christi promissio cum verbo Pauli *ad salutem*. Distinxit enim Apostolus inter fidem cordis et confessionem oris, et illam dixit necessariam *ad justitiam*, id est, ad remissionem peccatorum, et internam animæ renovationem obtinendam, quia interna fides fundamentum est ipsius justitiae; ad illam autem non est ita necessaria confessio externa fidei, nisi forte in proposito generali implendi omnia præcepta. Alioqui enim justificatur homo per internam fidem cum cordis contritione et dilectione, priusquam in externum actum confessionis fidei prodeat. Unde recte dixit Ambrosius, in Psalm. 38 : *Fides credentium principalis est, confessio executionis.* Et ideo confessio fidei non dicitur esse ad justitiam, sed *ad salutem*; nam post justitiam obtentam adhuc necessaria est fidei confessio ad perseverandum in illa justitia, et consequenter ad salutem consequendam, nam *qui perseveraverit usque in finem, hic salvus erit*,

et illum Christus coram Patre suo confitebitur.

5. Hoc autem præceptum non est tantum positivum divinum, sed est morale præceptum quasi connaturale ipsi fidei, seu homini, supposito statu fidei: ideoque in omni tempore, et in omni statu Ecclesiæ fidei confessio fuit ad salutem necessaria. Rationem autem hujus veritatis attigit Augustinus, lib. de Fid. et symbol., in princip., dicens: *Fides a nobis exigit officium et cordis et linguae; ait enim Apostolus: Corde creditur, etc. Et ideo oportet nos esse justitiae memores et salutis, quandoquidem in sempiterna justitia regnaturi a præsenti sæculo maligno salvi fieri non possumus, nisi et nos ad salutem proximorum nientes, etiam ore profiteamur fidem, quam corde gestamus.* Quibus verbis insinuat, fidei confessionem propter proximum esse necessariam. Idemque declaravit amplius, serm. 181 de Tempor., alias serm. 59, de diversis, his verbis: *Sine fide impossibile est placere Deo, hanc in cordibus nostris agnoscit, qui scrutatur renes et corda. Sed propter conservandam Ecclesiæ unitatem dispensationi hujus temporis cum fide cordis necessaria est oris confessio, quia corde creditur ad justitiam, ore autem confessio fit ad salutem, non tantum prædicatorum, sed etiam eruditorum: non enim aliter frater de fratre sentiret, nec pax Ecclesiæ servaretur, neque alium docere, neque ab alio discere saluti necessaria posset, nisi quod in corde habet, signis vocum tanquam suis vehiculis ad aliorum corda transmitteret. Est ergo fides et corde servanda, et ore promenda. Fides enim omnium bonorum est fundamentum.*

6. Proprium motivum confessionis fidei est ad internam manifestandam. — Itaque sentit Augustinus fidem cordis propter Deum per se primo necessariam esse, confessionem vero fidei propter proximos, seu propter Ecclesiam, nam sicut fides interna est fundamentum unionis animæ cum Deo, ita confessio fidei est fundamentum ecclesiastice unitatis et pacis. Non quod ipsa etiam confessio fidei non sit præcepta propter Dei honorem et cultum, sed quod non ita directe et immediate ad Deum tendat, vel propter ipsum necessaria sit, sicut interna fides. In quo est etiam considerandum, confessionem fidei duobus modis fieri posse, uno modo propter ostendendam exterius fidem internam, quam in corde habemus, ita ut hoc sit præcipuum et quasi unicum proximum motivum talis confessionis; alio modo fit præcipue pro-

pter aliquem cultum externum exercendum, Deoque exhibendum; et hoc modo sacrificium Missæ et usus sacramentorum, et aliæ ceremoniæ, dici possunt pertinere ad confessionem fidei, proprie autem sunt actus religionis, et propter Dei cultum et honorem proxime ac præcipue fuent et præcipiuntur. At vero formalis (ut ita dicam) et propria confessio fidei est, quæ fit ad manifestandam aliis nostram internam fidem, et hæc sine dubio ad homines immediate refertur, nam propter Deum non erat necessaria, ideoque recte fundatur ratio hujus præcepti in necessitate hujus confessionis ad conjunctionem fidelium in unius Ecclesiæ pace et unitate, quam ipsam fides exigit. Et ita etiam exposuit idem Augustinus illud Psalm. 115: *Credidi propter quod locutus sum, quia non perfecte credunt (inquit) qui quod credunt, loqui nolunt.*

7. Atque hinc colligitur etiam, secundum, scilicet, *negare fidem*, esse contra divinum præceptum, seu cadere sub præceptum prohibens, seu negativum. Quod eodem modo est de fide certum, dicente Christo Domino, Matth. 10: *Qui negaverit me coram hominibus, negabo et ego eum coram Patre meo, qui in cælis est.* Nam qui negaverit, audiet: *Nescio vos*, ut ibi dixit Theophil. Unde Paulus, 2 ad Timoth. 2: *Si negaverimus, et ipse negabit nos, ubi Ambrosius, Theodoret. et Primas. id notant. Et Chrysostomus, homil. 35 in Matth., rationem reddit, dicens: Liberam petit confessionem, et ad majorem charitatem nos adducit, et sublimes atque invictos esse desiderat, quapropter omnibus hæc præcipit.* Et eodem modo interpretatur ibi verba illa Christi: *Estote prudentes sicut serpentes*¹, qui corpus exponunt cuiuscumque vulnieri ut caput servent; ita enim fidelis debet potius corpus prodere, quam fidem (quæ caput est et initium bonorum omnium) negare. Quod etiam habent ibi Hieronymus et Hilarius, cap. 10; et Augustinus, lib. 2 de Doctrin. Christian., cap. 16.

8. *In præcepto confitendi fidem includitur negativum.*— Sequiturque hoc præceptum ex priori: nam in omni præcepto affirmativo includitur negativum nihil faciendi contrarium ei quod per affirmativum præceptum est; ut si jubemur amare Deum, ibi virtute prohibemur quidquam agere divino amori contrarium, et sic de aliis, nam unum contrarium destruit aliud, unde si unum præcipitur, contrarium sine dubio prohibetur. Cum ergo præ-

¹ Matth. 10.

cipitur fidei confessio, ibi virtute prohibetur fidei negatio, nam haec confessioni contraria est, ut per se patet. Imo ex præcepto internæ fidei sequitur necessario prohibitio negandi eamdem fidem. Nam qui negat fidem ore, vel eamdem fidem negat corde, et sic infidelis est, et agit non solum contra fidei confessionem, sed etiam contra præceptum fidei; vel negando ore, corde retinet fidem, et sic mentitur mendacio valde pernicioso, et honori Dei contrario, quia negando fidem, Deo tribuit mendacium, dicens falsum esse quod Deus dixit. Christianam etiam religionem gravissime offendit, et Ecclesiam, quantum in se est, dissolvit, ejusque unitatem scindit. Ergo mendacium illud prohibitum est, non tantum generali præcepto non mentiendi, sed etiam speciali præcepto fidei et religionis christianæ, ut recte sentit Augustinus, lib. Contra mendacium, cap. 6. Unde etiam fit ut, sicut mendacium dupliciter profertur, scilicet, vel negando quod verum est, vel affirmando quod est falsum, seu quod est vero contrarium, ita in præsenti haec fidei negatio duobus modis contingere possit, scilicet, vel pure negando esse veram aut esse certam fidei veritatem, vel contrarium errorem profitendo, nam professio falsi necessario est negatio veri, et eamdem vel majorem malitiam involvit.

9. *Præceptum confitendi fidem et non occultandi fidem non obligat pro semper.* — *Duplex fidei occultatio.* — Tertium, quod proposuimus, scilicet, occultare fidem, medium quamdam habet rationem, quia nec semper malum est, nec semper licet, ut omnes etiam Doctores Catholici docent. Ratio est, quia veritatem tacere, aut non proferre, non est illam negare, sed abscondere, ut per se notum est, et ita etiam occultare fidem, non est negare fidem, ideoque ex hac parte non est semper malum. Aliunde vero præceptum confitendi fidem, cum affirmativum sit, licet obligat semper, non tamen pro semper; haec enim est natura præcepti affirmativi, ut nunc supponimus, et propterea non confiteri fidem, quod fit occultando fidem, non est semper malum, quia si exercitium alicujus actus non est per se necessarium, cessatio ab illo actu non potest esse semper mala, ut per se notum est. Tantum ergo erit prava occultatio fidei, si eo tempore occultetur, pro quo præceptum confitendi fidem obligat; sicut tacere propria peccata non semper, sed tunc est malum, quando præceptum illa confitendi in judicio aliquo obligat. Unde duplex fidei occultatio

distingui potest, una per modum puræ negationis, quæ potest licite aut sine peccato esse toto eo tempore, in quo vel pro quo non tenetur homo externam fidei confessionem exhibere. Alia est per modum privationis seu omissionis moralis, quia eo tempore admittitur, quo fidei confessio exhibenda esset, et ita est carentia actionis debitæ, ideoque moralis privatio dicitur. Et haec est peccatum de se grave, quia est contra præceptum confitendi fidem. Nam lex affirmativa, præcipiens actum pro aliquo tempore, consequenter prohibet omissionem ejus pro eodem tempore, ut est per se notum.

10. Et de hac omissione possunt recte intellegi verba Christi, Lucae nono: *Qui me erubuerit, et meos sermones, hunc Filius hominis erubescet, cum venerit in Majestate sua, et Patris, et Sanctorum Angelorum. Erubescere enim minus esse videtur quam negare;* non enim tantum qui negat, sed etiam qui Christum vel fidei ejus veritatem (quod perinde est) omittit confiteri, cum debet, Christum erubescit. Et quamvis Christus verbo *erubescendi* (quod proprio significat, aliquid propter pudorem, vel propter timorem alicujus contemptus vel irrisio[n]is, vitare) ibi usus fuerit, quia vel præsenti materiæ, de qua loquebatur, erat magis accommodatum, vel quia in principio doctrina Evangelii a gentibus et Judæis irridenda erat, et ita multi per pudorem et erubescientiam illam erant despecturi, nihilominus doctrina et communatio generalis est; nam quacumque ratione, sive ex pudore, sive ex timore perdendi vitam, vel alia temporalia bona, quis omiserit fidei confessionem tempore debito, eamdem reprehensionem et comminationem incurret.

11. *Pro quo tempore obliget præceptum confitendi fidem.* — Occurrebat autem statim inquirendum quod sit illud tempus pro quo obligat fidei confessio. Sed hoc ex professo explicare non est temporis præsentis. Satis ergo sit supponere, esse illud in quo ad Dei vel Religionis Christianæ honorem tuendum necessaria est confessio fidei, ut censetur esse, quoties quis a tyranno seu publica potestate de sua fide interrogatur, vel certe quoties tacere et non confiteri esset virtute negare. Hie enim est alijs modus, quo prava fit haec omissione, quia virtualem fidei negationem involvit; quia in moralibus implicitum pro expresso reputatur, quando eundem effectum inducit. Et ita præceptum non negandi fidem, non solum expressam negationem, sed etiam tacitam et virtualem prohibet. Dicetur autem ta-

lis omissio, virtualis negatio fidei, quando ipsamet omissio confessionis communiter accipitur pro signo abnegandi fidem. Sicut in ordinario et communi usu non ferre vestes nec tonsuram clerici seu monachi sine speciali causa aut necessitate, est quædam virtutis negatio talis status, quæ ad apostasiam externam potest interdum sufficere. Ita ergo potest contingere in confessione fidei, si alicubi sit juste institutum aliquod signum ita proprium christianitatis, ut qui illud omiserit, eo ipso se Christianum esse negare videatur, ut magis in sequentibus explicabitur.

12. Ratio dubitandi. — Ex quibus intelligitur propositæ quæstionis difficultatem in hoc sitam esse, ut expendamus an exercere illos actus eundi ad ecclesiæ hæreticorum, eorumque conciones audire, et cum eis preces fundere, vel aliis eorum ritibus interesse, sit veram fidem negare, seu (quod idem est) errorem contrarium profiteri; an vero tantum sit non confiteri veram fidem, et, hoc posito, an sit pura negatio vel omissio moralis peccaminosa. Ratio autem dubitandi sumitur ex differentia inter verba, et actiones seu res alias; nam verba et expressius significant quam res, et non habent alium proprium usum, nam ad hoc sunt per se primo instituta; alienæ autem res, ut vestes, domus, cibi, et similia, vel etiam actus audiendi, videndi, et hujusmodi, non sunt per se instituti ad significandam mentem operantis, sed ad alios naturales vel humanos usus, licet interdum per quamdam consecutionem aliquid significare videantur. Unde fit ut magis obscura et ambigua, seu æquivoca esse soleat rerum, quam vocum significatio. Deinde etiam fit ut facilis etiam habeat locum simulationis, vel potius dissimulatio sine mendacio in usu aliquarum rerum, seu actionum, quam in usu verborum, quæ magis certam et usualiem (ut ita dicam) significationem habent. Denique ex hoc eodem principio est longe alia ratio dubitandi de his actionibus adeundi ecclesiæ, etc., de quibus nunc tractamus, quam de professione juramenti fidelitatis, nam haec fit per verba expressa, et in hunc solum finem explicandi mentem, et talia sunt verba formulæ juramenti, ut expressam abnegationem doctrinæ fidei, et consequenter confessionem contrariae hæresis contineant; et ideo nemo, qui in eadem hæresi non versetur, vel nisi in aliam antiquam incidat, quæ dicebat posse sine peccato negari fidem in tormentis, etiam cum juramento, dubitare potest quin professio illius juramenti non licet.

13. Primum argumentum quo ostendi videtur licitum esse adire hæreticorum ecclesiæ, etc. — At vero de illis actionibus in quæstione propesitis videtur posse dubitari. Primo, quia ex propriis objectis et materiis indifferentes sunt, nam ingredi ecclesiæ vel est de se bonum, vel saltem indifferentes; nec ideo fit intrinsece malum, quia hæretici male illo loco utuntur, nam hoc pertinet ad pravam intentionem eorum, sine qua illuc ingredi indifferentes est; nam etiam ingredi Synagogam Judæorum, vel paganorum templum, non est per se malum. Similiter audire concionem cuiuscumque doctrinæ, etiam pravæ, intrinsece malum non est; potest enim quis illam audire ut eam confutet, vel delectetur eloquentia concionantis, vel ut irrideat. Denique interesse precibus et sacris eorum materialiter sumptum indifferentes est, quia potest quis, dum est ibi, preces Catholicorum, et ritu Catholicæ secrete fundere, vel de vera fide cogitare. Aliunde vero illi actus non habent significationem fidei contrariam, ad quam sint per se impositi, quia non ad significandam fidem specialiter impositi sunt, sed solum ad operandum aliquid, quod per unumquemque illorum proxime fit. Quod si vel ex discursu videntium, vel ex communi usu aliorum, tales actus indicare solent pravam fidem, id est accidentarium, si a Catholicæ non ea intentione fiant; quia ipse non significat falsam fidem, nec decipit alios, sed permittit eos decipi. Ergo qui faciunt tales actus solum ad obediendum regi in materialibus actibus externis, ut evitent temporalia damna, non negant fidem, nec in fidei confessione ex præcepto debita deficiunt, quia tunc nulla est specialis necessitas propter quam obliget pro tunc affirmativum præceptum confidendi fidem; ergo cessat ibi omnis ratio culpæ. Unde Catholicæ Doctores docuerunt non esse per se malum in actionibus sacris cum hæreticis communicare, quamdiu nominatum declarati non sunt.

14. Secundum. — Secundo, si aliqua ibi esset culpa, maxime, quia est professio falsæ religionis, saltem simulata; at haec simulationis non est semper intrinsece mala; ergo maxime erit licita in illo casu propter vitandas mulieras et vexationes gravissimas. Consequens patet, quia si talis simulationis non est intrinsece mala, non erit prohibita quia mala; ergo ad summum erit mala quia prohibita, vel ex accidente propter mala quæ inde sequuntur; at haec rationes cessant in tam urgente necessitate, quia positiva prohibitio non obligat cum

tanto rigore, et incommoda, quæ tunc sequuntur, non sunt intenta, sed permissa, et ideo non imputantur. Major etiam est clara, quia supponimus intentionem operantis non esse profiteri aliquid falsum, sed tantum ibi adesse, et aliquid bonum vel indifferens ibi facere, quidquid alii inde concipient, quæ est dissimulatio vel simulatio materialis. Probatur ergo minor, primo, quia non defuerunt auctores catholici et graves, qui docuerint non esse intrinsece malum, falsam vel superstitionem religionem simulare, seu in exterioribus actibus fingere, faciendo illos materialiter tantum (ut aiunt), id est, sine intentione religionis aut cultus, sed propter aliquam utilitatem humanam. Imo multi tribuunt hanc sententiam Hieronymo, dicenti licuisse Apostolis simulate servare legalia, eo tempore quo jam erant mortifera, serio et ex intentione cultus facta, ut late dixi lib. 9 de Legib., c. 46, ubi plures auctores allegavi, et testimonia Scripturarum, quibus moventur, adduxi. Ratio autem est supra tacta, quia talis simulatio mendacium non est; non enim per illam intenditur significari aliquid falsum, aut contra mentem, sed est tantum eujusdam veritatis, seu fidei occultatio, aut non confessio. At priori ratione habet, ut non sit mala tanquam fidei abnegatio, quia haec non est sine mendacio; posteriori autem ratione non est mala, quia nihil est quod tunc obliget ad se manifestandum, nec ad veritatem confitendum.

15. *Tertium argumentum.* — At respondeiri potest, has rationes recte procedere de malitia per se inventa in illis actibus, nihilominus tamen illos esse malos ratione scandali, quod moraliter ab illis separari non potest, et illud sufficit ut actus semper sit moraliter malus. Sed contra hoc objicitur tertio, quia etiam scandalum non solum separari potest, sed etiam actu separatur ab illis actibus, prout in illo regno a Catholicis fieri posse dicuntur. Nam imprimis omnes sciunt eos, qui Romanam fidem tenent, non facere illos actus sponte aut ex animo, sed solum ad vitandas poenas. Imo etiam sciunt, a rege ipso potius præcipi ob cupiditatem auri et argenti, quam propter Dei cultum aut religionem, et ideo libentius imponere pecuniarias poenas quam corporales; unde consequenter etiam persuasum habent, Catholicos non facere illas actiones causa religionis, vel in contemptum fidei, sed solum propter vitandam bonorum spoliacionem. Ergo non est unde possint scandalum rationabiliter accipere, cum actio per se mala

non sit, et species mali, quam habere videbatur, per illam publicam notitiam tollatur. Accedit quod dicuntur fideles facere prius publicam professionem suæ rectæ intentionis et verae fidei; ergo si quod superest scandalum, non est datum, sed acceptum, quod operanti non imputatur, maxime quando tam gravis causa et necessitas intercedit.

16. Nihilominus absque ulla dubitatione dicendum est, non licere Catholicis Anglis in Ecclesia schismaticorum et hæreticorum ad conciones hæreticas audiendas, et profana sacra peragenda convenire. Ita monet in suo Brevi S. D. N. Paulus V, his verbis: *Profecto credimus, proculdubio eos qui tanta constantia, atque fortitudine acerissimas persecutiones, infinitas propemodum miserias hactenus persessi sunt, ut immaculate ambularent in lege Domini, nunquam commissuros esse ut coinqinentur communione desertorum divinæ legis.* Nihilominus zelo pastoralis officii nostri impulsi, et pro paterna sollicitudine, qua pro salute animarum restrarum assidue laboramus, cogimur monere vos, atque obtestari, ut nullo pacto ad hæreticorum templo accedatis, aut eorum conciones audiatis, vel cum ipsis in ritibus communicetis, ne Dei iram incurratis. Non enim licet vobis haec facere sine detimento divini cultus ac vestra salutis. Ex quibus verbis licet colligere, hanc non esse tantum prohibitionem positivam, seu humanam, ratione cuius illi actus fiant mali quia prohibiti, sed esse legem declarativam malitiæ et turpitudinis existentis in ipsis actibus, ratione cuius prohibentur quia mali. Hoc enim significant illa verba: *Non enim licet vobis haec facere, et ideo non tam utitur Pontifex verbis prohibentibus, quam monentibus et obtestantibus malitiam talis communicationis cum hæreticis.* Deinde colligitur ex illis verbis, hanc culpam esse mortalem, et satis gravem: *Ne Dei iram incurratis; non enim licet vobis haec facere sine detimento divini cultus ac vestra salutis.* Unde licet fortasse antea fuerit inter Catholicos aliqua de hoc punto disceptatio vel judiciorum diversitas, jam omnino cessare debet, quia non licet eis de authentica Pontificis declaratione in re morali, et ad salutem animarum pertinente, dubitare.

17. *Summi Pontificis declarationem esse maxime consentaneam Sacris Scripturis.* — Ostendere autem oportet quam sit haec declaratio principiis fidei et doctrinis Sanctorum Patrum, ac rationi consentanea. Imprimis enim in Scriptura maxime prohibita est com-

municatio cum infidelibus, præsertim in rebus sacris; non est autem dubium quin hæretici sub infidelibus comprehendantur. Imo de his præcipue scribit Paulus, ad Timothi. 2 epistol., cap. 2: *Profana et vaniloquia devita, nullum enim proficiunt ad impietatem, et sermo eorum ut cancer serpit, ex quibus est Hymenæus et Philetus, qui a veritate exciderunt, etc.* Et ideo ad Titum 3, hæreticum hominem pertinacem devitandum esse monet, et 1 Corinthior. 6, et ad Romanos 16, gravissime mouet *declinare ab eis qui dissensiones et offendicula, prater doctrinam (ait) quam didicistis, faciunt. Nam per dulces sermones et benedictiones seducunt corda innocentum.* Joannis item verba in epistol. 2 notanda sunt; cum enim de hæreticis dixisset: *Neque Ave eis dixerit*, subdit rationem: *Qui enim dicit eis Ave, communicat operibus eorum malignis.* Quocirca cum omnis communicatio cum hæreticis prohibita sit ab Apostolis propter periculum, illa tamen maxime et majori rigore, quæ est in operibus malignis, quæ nimurum faciunt quatenus hæretici sunt. Talia autem sunt illa de quibus nunc tractamus, et negari non potest quin Catholici cum illis convenientes in ecclesiis, ad similia conventicula peragenda, cum ipsis in eisdem operibus communincant. Quocirca, licet fortasse non omnis alia communicatio cum personis hæreticorum nondum declaratis excommunicatis sit sub rigoroso præcepto prohibita, hæc peculiaris, quæ est in operibus malignis, et schismaticis (ut sic dicam), semper prohibita est. Dicit enim Paulus, 1 Corinthior. 10: *Nolo vos socios fieri dæmoniorum, non potestis calicem Domini bibere, et calicem dæmoniorum, non potestis mensæ Domini participes esse, et mensæ dæmoniorum.* Et 2 Corinthior. 6: *Nolite jugum ducere cum infidelibus*, id est, ut D. Thomas exponit, *nolite communicare in operibus infidelitatis cum infidelibus.* Nam, ut subjungit Apostolus: *Quæ enim participatio justitiae cum iniuitate? aut quæ societas luci ad tenebras? Quæ autem conventio Christi ad Belial, aut quæ pars fidei cum infideli?*

48. *Esse etiam Sanctis Patribus conformem.*
—*Esse præceptum apostolicum prohibens talam communicationem.*—Hanc Scripturarum legem securi sunt, nobisque tradiderunt Sancti Patres. Irenæus enim, lib. 3, cap. 3, sic ait: *Tantum Apostoli et corum discipuli habuerunt timorem, ut ne verbo tenuis communicarent alieni corum, qui adulteraverunt veritatem;* rescripte Pauli testimonium, et vulgata exem-

pla Joannis Evangelistæ, et Polycarpi, et lib. 1, cap. 13: *Easus flantes (ait) et anathematizantes, oportet alicubi et longe fugere ab eis.* In eamdem sententiam Cyprianus, epistol. 55 ad Cornel., in fine: *Declinet (ait) de cælero fortiter et erit dilectissimi fratres nostri verba, et eloquia eorum, quorum sermo ut cancer serpit, sicut Apostolus dicit.* Et infra: *Simus ab eis tam separati, quam sunt illi de Ecclesia profugi.* Et infra: *Hoc (inquit) Beatus Apostolus non tantum monet, sed etiam jubet, a talibus ut recedatur. Præcipimus (inquit) vobis in nomine Domini Jesu Christi, ut recedatis ab omnibus fratribus ambulantibus inordinate, et non secundum traditionem, quam acceperunt a nobis.* Est ergo hoc præceptum Apostolicum, teste Cypriano, et propriissime convenit in præsentem causam, nam conventus schismaticorum Angliae inordinatissimi sunt, et novæ adinventiones humanæ a traditionibus Apostolorum alienæ; ergo ex Pauli præcepto talibus ritibus et conventiculis vir fidelis communicare non potest. Similia habet libro de Lapsis, in fine. Clarius vero et expressius eumdem statum causæ attingens, epistol. 4 ad Plebem, contra eos qui Ecclesiam contra mores legitimos scindebant, ejusque ritus contemnebant, inquit: *Deus unus est, et Christus unus, et una Ecclesia, et Cathedra una super Petrum Domini voce fundata. Aliud altare constitui, aut sacerdotium novum fieri prater unum sacerdotium, et unum altare non potest.* Et subdit paulo post: *Procul ab hujusmodi hominum contagione discedite, et sermones eorum relut cancer et pestem fugiendo, ritate, præmonente Domino, et dicente: Cæci sunt, et duces cæcorum.* Et infra: *Nemo (ait) filios Ecclesie de Ecclesia tollat, pereant sibi soli, qui perire voluerunt, extra Ecclesiam soli remaneant, qui ab Ecclesia recesserunt.* Et infra: *Vitate lupos, qui oves a pastore secernunt. Quid clarius pro Anglicanis schismaticis diei poterat?*

19. *Doctrina hæc miraculo confirmata fuit.*

—Præterea D. Hilarius, cap. 10, in Matth., mystice interpretans verba illa Christi: *In viam gentium ne abiheritis, etc.*, inquit: *Non quod non etiam ad salutem gentium mitterentur, sed ut opere et vita gentilis ignorantiae abstinerent. Et quod civitates Samaritanorum vetili sunt introire, ut Ecclesias hæreticorum non adeant, admonentur.* Augustinus, lib. Contra mendac., et lib. 2 Retract., cap. 62, ex professo docet non licere haeresim simulare, etiam propter ipsos hæreticos convertendos, sentiturque semper illud esse perniciosum menda-

cium. Et epistol. 162, in principio, docet cavenendum omnino esse a communicatione hæreticorum, præterquam in his quæ ad eorum conversionem ordinantur. Ergo maxime in his quæ ad religionem pertinent. Multaque extant antiquitatis monumenta, quibus constat Santos Patres a ritibus hæreticorum, maxime vero ab omni communicatione cum eis in sacris abhorruisse. Ideo enim prohibitum semper fuit ab eis communionem accipere, ut constat ex Decreto Julii Papæ, in cap. *Is qui acceperit*, 24, quest. 5, cum similibus. Estque notandum exemplum quod refert Gregorius Turon., lib. 1 de Glor. Martyr., cap. 80, sacerdotem, scilicet, catholicum, seu Romanum (ut ipse loquitur), noluisse gustare cibos ab hæretico sacerdote benedictos, etiam si ritum hæreticum in benedictione non exercebat, Deumque id factum miraculo comprobasse. Quanto ergo magis vitanda est in ipsis cæremoniis hæreticis communicatio? Unde etiam legimus, Gregorium, libro primo, epist. 44 ad Leandrum, scripsisse omittendum fuisse aliquo tempore ritum baptizandi trina mersione, quia hæretici ad falsam significationem illo abutebantur.

20. *Refellitur duplex evasio.* — *Prima ratio probans eam communicationem esse illicitam.* — Sed haec doctrina SS. Patrum generalis est, et posset quispiam eam eludere, vel illam non de rigoroso præcepto, sed de monitione ratione periculi interpretando, vel eamdem ad ordinarium et voluntarium usum, non ad coactum sine ingenti periculo inevitabilem limitando. Verumtamen neutra evasio locum habet in verbis Augustini, serm. 6 de Verbis Dom., ubi tractans illud Roman. 13: *Qui resistit potestati, Dei ordinationi resistit*, interrogat: *Sed quid si illud jubeat quod non debas facere?* Et respondet: *Hic sane contemne potestatem, timendo potestatem.* Quod exemplo declarans, infra subdit: *Si imperator jubet: Esto mihi in obsequium, recte; sed non in idolio. In idolio prohibet major potestas. Da veniam, tu carcerem, ille gehennam minatur.* Deinde ex allegatis sententiis Sanctorum utraque evasio, si verba singula ponderentur, et omnia inter se conferantur, facile posset refutari; efficacius autem id fiet, rationes hujus veritatis explicando, et occasione illarum magis testimonia Patrum urgendo et locupletando. Prima ergo ratio sit, quia illa communicatio cum hæreticis, de qua quæstio moveatur, fieri non potest nisi profitendo novam hæreticorum religionem, vel potius superstitionem, aut saltem illam simulando; utrumque

autem est intrinsece malum, et contra præceptum confitendi veram fidem et honorandi Christum, veramque ipsius religionem; ergo propter nullum humanum timorem licita est talis communicatio. Consequentia evidens est ex dictis. Antecedens vero quoad utramque partem sic ostenditur. Nam illi, qui cum hæreticis ad ecclesias conveniunt, duobus modis possunt ibi assistere. Primo, animo colendi Deum illis ritibus et cæremoniis, seu intentione exercendi illos ritus tanquam licitos et religiosos; et hoc est formaliter ac vere, falsam religionem profiteri: sicut qui adorat idolum cum vera intentione cultus, vere idolatriam profitetur, et qui nunc exerceret ritus judaeos intentione cultus, vere esset professor sectæ Judæorum. Unde necesse est ut qui sic profitetur falsam religionem, abneget veram, et consequenter etiam fidem, in qua fundatur. Neque in hoc esse potest dubium, neque Catholici intendunt hoc modo ritibus hæreticorum interesse.

21. Alio ergo modo potest hoc fieri sine intentione cultus vel religionis, sed solum eujudam coactæ obedientiæ politicæ quoad externam corporis præsentiam, cum proposito ibi secrete colendi Deum ritu catholicæ. At in hoc ipso necessario includitur simulata professio schismatis, et communicatio exterior cum hæreticis in suis ritibus, quia juxta communem et receptum usum illius gentis et loci hoc significatur per illas externas actiones, et ad hunc finem fit ille conventus et communis convocatio. Talis autem simulatio semper est mala, ut late probat Augustinus, dicto lib. Contra mendac., et in variis epistolis de Cessione legalium ad Hieron., et cum illo probavi in lib. 9 de Legib., capit. 17. Et breviter ostenditur, primo, ex Paul., 1 ad Cor. 10: *Non potestis calicem Domini bibere, et calicem dæmoniorum*, id est, superstitionis gentilis et idolatriæ, *non potestis mensæ Domini participes esse, et mensæ dæmoniorum*, utique idolothyta manducando, etiam sine intentione cultus et adorationis idoli, ut verba sequentia declarant, quæ paulo post expendemus. Et ita intellexerunt locum illum Patres reprehendentes graviter esum idolothitorum, quando exterius fit per modum actus religiosi, et tanquam usus cibi sacri. Ut videre licet in Cypriano, dicto libro de Lapsis, et in multis epistolis, in quibus omnem externam significacionem communicandi vel consentiendi ritibus infidelium, gravissime condemnat, præsertim epist. 31 et 52, cujus aliqua verba infra refe-

ram. Idem late Tertullianus, lib. de Spectac., cap. 43: *Idololatria (inquit) abstinemus, nec minus templa quam monimenta despicimus, non sacrificamus, nec de sacrificato edimus.* Et infra: *Oculos et aures ab idolothylis abstine- mus;* et lib. de Idolol., capit. 43: *Hoc loco (inquit) retractari oportet de festis diebus (utique infidelium), et aliis extraordinariis solemnitatibus, quas interdum lascivia, interdum timiditate nostra subscribimus, adversus fidei disciplinam communicantes nationibus in idolicis rebus.* Et subjungit quæstionem, *An cum ipsis nationibus communicare in his ser- vus Dei debeat, sive habitu, sive victu, etc., utique quatenus fiunt religionis causa,* et respondeat: *Ad hæc nihil communionis est lumini et tenebris, ritæ et morti.* Quam doctrinam late etiam tradit Origenes, lib. 8 contra Cels., parum a princ. Est etiam de hoc insignis locus Chrysostomi, in Imperfecto, cuius verba statim referam. Ratio autem propria est, quia omnis communicatio in his superstitionis ritibus, etiam si facta intentione fiat, est quædam superstitionis participatio. Unde sicut exterior idololatria, etiam facta animo facta, malitiam idolatriæ participat, ita etiam omnis superstitionis exterior, etiam simulata, malitiam superstitionis induit.

22. *Confirmatio hujus doctrinæ.—Ratio D. Augustini amplius declaratur.* — Confirmatur hæc ratio, quia exterior professio simulata talis schismatis est quædam ejus approbatio, et contestatio, quod sit religiosa et ex vera fide; at hoc intrinsece malum est, etiamsi interior non credatur neque intendatur, quia est exterior confiteri falsam religionem. Neque enim a talibus factis, et in tali materia, scilicet, religionis et cultus, potest separari significatio, quia exteriores actus, yestes, vel aliae cæremoniæ non sumuntur ad cultum, nisi propter aliquam significationem; ergo qui illis exterior utitur per modum religiosi cultus, exterior saltem approbat illum ritum colendi Deum. At hoc intrinsece malum est, nam verbis approbare, vel confiteri talem ritum esse religiosum, malum, et contra fidem ac religionem est; ergo et factis idem probare est æque pravum, quæ est potissima ratio Augustini citatis locis. Quæ inde amplius declaratur, quia hæc simulatio falsæ religionis est quædam negotio exterior fidei; hæc autem semper est mala, ut in principio posuimus; ergo et illa simulatio. Major constat, quia illa simulatio est approbatio religionis superstitionis, et consequenter est confessio falsæ fi-

dei, a qua illa superstitionis procedit; affirmatio autem erroris est negatio veritatis; ergo illa simulatio est negatio Catholicæ fidei, quæ hæresi contraria est. Denique cum religio vera tantum sit una, qui exterius unam approbat, omnem contrariam reprobat; ergo qui approbat exterius ritus hæreticos, eo ipso eodem modo catholicam religionem abnegat, et ita deficit contrarie in confessione fidei. Unde in hac etiam ratione talis simulatio est valde contraria honori Christianæ religionis; nam cedit in contemptum ejus, cum exterius negetur et reprobetur, et contraria in animis inimicorum ejus firmetur, ut paulo postea dicemus. Ex quibus tandem concluditur, nunquam esse licet tam simulationem, etiam propter vitandam mortem, tum quia abnegatio fidei externa et simulata nunquam licet propter vitandum quodlibet malum; tum etiam quia maxime tenetur homo servare præceptum, etiam positivum et humanum, non obstante periculo violentæ mortis, quando ejus transgressio in contemptum religionis exterquetur, ut dixi in 1. 3 de Legib., c. 30.

23. *Altera ratio qua posita doctrina explicatur.* — Alio modo possumus vim hujus obligationis explicare, quia in illo articulo cum coguntur fideles, legibus iniquis, sacris hæreticorum interesse, obligat specialiter præceptum affirmativum confitendi fidem catholicam, resistendo talibus legibus; ac proinde qui exterius dissimulant et obediunt, etiam si id faciant factio animo, in confessione fidei deficiunt, ac subinde inter lapsos in persecuzione fidei computandi sunt. Doctrinam hanc sumo ex Cypriano, in locis allegatis, præser-tim ex epistol. 31, quæ est clericorum Romæ existentium ad ipsum, ubi, cum dixissent non solum defecisse in fide, qui exterius idolis sacrificaverant, vel idolothyla manducaverant, sed etiam qui libellos quosdam submissionis, vel præsentes obtulerant, vel absentes miserant, subdunt verba notanda: *Non est immu-nis a scelere, qui ruit videri propositis adver-sus Evangelium, vel edictis, vel legibus satis-fecisse; nam hoc ipso jam paruit, quod videri paruisse se voluit.* Et infra vehementius Anglos pungit, tam schismaticos, quam in fidei constantia debiles, dicens: *Absit ab Ecclesia Romana rigorem suum tam profusa facilitate dimittere, et nervos severitatis, eversa fidei majestate, dissolvere.* Et consonant verba ejusdem Cypriani, lib. de Lapsis dicentis: *Nec si-bi, quominus agant paenitentiam, blandiantur, qui etsi nefandis sacrificiis manus non conta-*

minarerunt, libellis tamen conscientias polluerunt. Et illa professio denegantis, contestatio est Christiani quod fuerat abnuentis, fecisse se dixit, quidquid alius faciendo commisit. Cumque scriptum sit: Non potestis duobus dominis servire, servivit saeculari domino, obtemperavit ejus edicto, magisque obedivit humano imperio, quam Deo.

24. *Eleazari exemplum.*—Eamdem doctrinam sumo ex Chrysostomo, hom. 25 in Matth., in Imperf., ubi prius ostendit necessitatem confitendi fidem, et inter alia dicit: *Si tibi tantum Deus cor creasset, sufficeret tibi fides cordis; nunc autem os tibi creavit Deus, ut corde credas et ore confitearis.* Et adjungit: *Non tantum ore, sed etiam quinque sensibus carnalibus; si autem vel unus sensus minus fuerit, non est perfecta confessio.* Declarans autem occasionem necessariam talis confessionis, addit verba sequentia, quæ quia veritatem hanc multis modis confirmant, et ad solvenda argumenta lucem afferunt, integre illa referam: *Ergo (inquit) si quis tibi dicat: Non manduces idolothyrum, sed aspice tantum ad idola, quomodo speciosa sunt; si aspexeris provocatus, oculis tuis negasti Christum. Non quia aspicere idola aliquid sit, sed quia invictus aspicias, peccas. Si tamen non aspexeris, oculis tuis confessus es Christum. Ideo scriptum est: Averte oculos meos ne videant vanitatem.*¹ *Si vero dixerit tibi: Nolo ut aspicias idola, sed tantum ausulta, quomodo ille gentilis blasphemat Christum, ut glorificet Deos. Si auscultaveris, auribus tuis Christum negasti. Si dixerit tibi: Nolo ut audias blasphemiam Christi, sed ecce quomodo incensum diis offertur, tantum sta, et accipe odorem incensi illius; si odoratus fueris, odoratu tuo Christum offensus es. Item si dixerit tibi: Non manduca carnem dentibus tuis, tantum finge te de immolato manducare; si simulaveris, sic gustu tuo Christum negasti. Si autem nolueris finge re, Christum confessus es, sicut Eleazarus, in libro Machabæorum, qui carnes verrecinas sub specie porcinae noluit manducare. Si dixerit: Nolo fingas te de immolato manducare, sed tantum tange idolum manu tua, aut tene thuribulum, si tetigeris aut tenueris, tactu tuo Christum negasti. Si autem nolueris, tactu tuo Christum confessus es, sicut scriptum est: Si est iniquitas in manibus meis. Omnia enim membra animæ vel corporis tui non solum tibi ad usum Deus creavit, sed sibi ad gloriam.*

25. *Præceptum confitendi fidem in eo articulo cur obliget.*—Ratione autem ostendi potest dicta propositio assumpta, nimis in eo articulo obligare affirmativum præceptum confessionis fidei, quia tunc maxime seu probante obligat hoc præceptum, quando fidelis a tyranno infideli seu hæretico, vel quocumque publico fidei persecutore de sua fide interrogatur, ut, an Christianus sit, vel an Romano Pontifici obediatur; vel, si interrogetur an secundum vel ritum colendi Deum alienum ab Ecclesia Catholica, seu Romana, licet vel sanctum esse credit; in his enim casibus tenetur fidelis non solum non negare aperte fidem catholicam, aut non confiteri falsam, sed etiam non tergiversari, aut dissimulare, seu tacere, sed aperte fidem et religionem catholicam confiteri; sed in eo casu, in quo per edictum coguntur fideles adire tempora hæreticorum, et eorum ritibus interesse, per potestatem publicam virtute interrogantur an probent illos ritus, necne, vel an catholicam religionem profiteantur; ergo tenentur fideles confiteri veritatem, non parendo talibus edictis, nam illa recusatio est quædam fidei confessio, ad quam obligat tunc præceptum. Major propositio communis est Theologorum, cum D. Thoma 2, 2, quæst. 3, articulo 2, ubi Cajetanus et omnes moderni expositores non solum consentiunt, sed etiam tanquam certum dogma illud tradunt. Nam, licet aliqua controversia sit an quælibet interrogatio sufficiat (quæ ad præsens non refert), tamen cum interrogatio est a publica potestate, nullum est dubium de obligatione confitendi fidem, quia tunc maxime imminet necessitas honorandi Deum et Christianam religionem, et ideo qui tunc tergiversatur, subtrahit Deo debitum honorem, et vere Christum erubescit. De quo ita scribit Cyprianus, in citato libro de Lapis: *Christus in præceptis suis dicit: Qui confusus me fuerit coram hominibus, confundetur eum Filius hominis; et Christianum se putat, qui Christianus esse confunditur, aut reretur? quomodo potest esse cum Christo, qui ad Christum pertinere aut erubescit aut metuit?*

26. *Hoc supponit et docet aperte Navar., cons. 10, de hæret., n. 10. — S. Ermenegildi exemplum.*—Quod autem in casu de quo tractamus, Catholici interrogantur per publicam potestatem, tum de sua religione et fide, tum etiam an probent vel recusent Protestantum superstitionem, ex ipso facto manifestatur. Ideo enim sub gravissimis poenis coguntur eorum ecclesiæ adire, etc., ut ostendant an

¹ Psal. 418.

sint Pontificii, seu Romanæ Religionis, ut ipsimet loquuntur, et an Calvinianam detestentur. Quin potius ita interrogantur, ut non possint non alterutrum exterius ostendere; ergo est illa occasio, in qua maxime obligat præceptum confitendi fidem, saltem recusando talem cum hæreticis communicationem. Quod optime confirmat exemplum sancti Ermenegildi, Hispaniæ principis, qui ne Eucharistiam de manu hæretici acciperet, etiam juhente patre, usque ad mortem recusavit. Quod factum valde commendans Gregorius, lib. 3 Dialog., cap. 45, dicit: *Vir Deo deditus Arriano Episcopo venienti exprobravit, ut debuit, ejusque a se perfidiam dignis increpationibus repulit.* Quibus verbis significat ex debito obligationis id fecisse, ne hæresi ministrantis communicare videretur.

27. *Confirmatur doctrina tradita ex ratione scandali.* — Alia ratio hujus obligationis sumi potest ex scando, quod tam videtur intrinsece annexum his actionibus, ut inseparabile ab eis videatur. Hoc autem satis est ut illa communicatio externa cum schismaticis peccaminosa sit et detestanda, juxta doctrinam Apostoli ad Rom., c. 14, et 1 ad Cor., c. 8, ubi hoc peccatum vocat, *peccatum in Christum*; et c. 10: *Nolite manducare propter illum qui indicavit, et propter conscientiam, conscientiam, dico, non tuam, sed alterius.* Et ex facto Mathatiæ, 2 Machab. 6, et egregiis verbis ejus constat, potius esse mortem tolerandam, quam hoc scandalum fratribus tribuendum. Quod autem in hoc negotio scandalum interveniat, declaratur, primo ex parte ipsorum hæreticorum, nam ex hujusmodi fragilitate Catholicorum in suo errore confirmantur et obdurescunt, atque fidem Romanam contemnunt. Unde Sander., lib. 3 Histor., cum retulisset, tempore reginæ propter acerbissimam legem et coactionem, multos Catholicos, schismaticorum ecclesias, conciones, communionem, ac conventicula, aliquando etiam publice adire non recusasse, subhjungit: *Interim regina et sui ab initio præclare secum agi existimarunt, quod cum tot essent antiquæ fidei in regno cultores, plerosque tamen scirent, ritus a se prescriptus publice, vel amplexari, vel utcumque præsentia sua exterius approbare, licet interiorius aliam fidem, de qua ipsi non adeo curabant, vel ad tempus dissimulandam censebant, colerent. Ac, ne sacerdotes quidem quosdam ab illis administrandis abhorrente, gaudelant non mediocriter.* Ita ergo dissimulatio hæc Catholicorum in augmentum schismatis, et ma-

gnum contemptum Romanæ Religionis cessit, ejusdemque scandali occasio semper durat. Et ita reperitur etiam in tali actione alia malitia, quia redundant in favorem et juvamen hæreticorum quatenus hæretici sunt, id est ut opera sui erroris exerceat; hoc autem intrinsece malum est, ut in simili notavit Navarrus, consilio duodecimo, de Hæreticis, numero sexto, in fine, et sequentibus. Unde maxime etiam invenitur hoc scandalum ex parte Catholicorum, præsertim simpliciorum, nam facile imitantur alios, qui videntur esse sapientiores, et ita hujusmodi consuetudo offendiculum fit infirmis. Si enim quis viderit (ut Paulus ait), eum, qui habet scientiam, in ecclesiis hæreticorum ritibus illorum interesse, conscientia ejus, cum sit infirma, ædificatur ad eum imitandum, et sic perit infirmus in scientia doctoris. Et, quod caput est, inde fit ut, multitudine crescente, jam non simulate, sed ex animo, illo ritu ad Deum collendum utantur, ita ut simplices inter antiquam religionem novamque superstitionem distinguere nesciant. Est ergo evidens nocumentum et scandalum, ratione cuius non tantum est hoc peccatum contra charitatem fraternalm, et divinum honorem, sed etiam contra fidei confessionem, quæ maxime obligat, teste D. Thoma supra, quando ex dissimulatione vel taciturnitate subtrahitur debitus honor Deo, et utilitas proximis impendenda.

28. *Probatur ultimo ex periculo amittendi fidem.* — Ultimo his addere possumus rationem ex morali periculo desumptam, nam si fidelis populus conventicula hæreticorum frequenter, et præsertim si eorum conciones audiatur, in maximo periculo versatur amittendi fidem. Nam, licet unus vel alter possit eos sine periculo audire, imo eos impugnare et confundere, tamen simplex vulgus facile decipitur, et ideo etiam provectiones abstinere tenentur a talibus concionibus, ne suo exemplo alios secum ferant, et ita eorum fides pericitetur. Et ideo monet Chrysostomus, orat. 2 de Provid. et fato, magis esse fugiendum a locis et concionibus quæ pestilentibus opinioribus complementur, quam a locis contagiosis et infectis, quia hæc corporibus nocent, illa vero animas interimunt: *Ne steteris* (inquit), *resili, ne tardareris, vel brevissimam hic metuas moram.* *Hac dicimus, non stabilitatem illarum opinionum vcrili, sed imbecillitatem vestram me tuentes, etc.* Ideoque monet Augustinus, in lib. de Fide et symb., c. 4, *ne fides fraudulentis calliditatibus hæreticorum possit in nobis ali-*

qua ex parte violari, pia cautaque vigilantia providendum esse. Et Gregorius Nazianzenus, orat. 53, quæ est de nova Dominica , graviter reprehendit, qui, ut ipse ait, *ad temporis arbitrium fidem suam accommodant*, nimurum, quando hæretici rerum potiuntur, eorum voluntati in rebus fidei obsequentes, et (ut sub-jungit) *dispensatione in fide utendo*. Quæ potius est simulatio quædam periculosa , et ideo etiam dicit, eos, qui ita ambulant, *in fide claudicare*, quia revera in confessione fidei deficiunt, et in periculo versantur amittendi fidem, et licet fortasse ipsi constantes sint, fratres suos in illo periculo constituant.

29. *Satisfit primæ rationi dubitandi.* — Ad rationes autem dubitandi facile ex dictis respondetur. Ad primam dicitur, actiones illas, abstracte et generatim sumptas, dici posse indifferentes, quatenus intrinsece malæ non sunt, tamen, in particulari sumptæ, ut cum tali modo et cum talibus circumstantiis fiunt, habere intrinsecam malitiam. Nam, sicut ex Chrysostomo referebam, aspicere idola non est intrinsece malum ; aspicere autem propter inductionem vel metum tyranni, est Christum negare : *Non (inquit) quia aspicere illud aliquid sit, sed quia invitatus aspicis, peccas.* Ita ergo ingredi ecclesiam hæreticorum, vel synagogam Judæorum, per se nihil est ; ingredi autem religionis causa , et ad hæreticorum ritus exercendos, ad obsequendum hæretico præcipienti, malum est ; sic etiam, licet audire concionem hæretici per se et intrinsece malum non sit, tamen adire conciones frequenter, et ad jussum inducentium ad hæresim, et cum scando et periculo infirmorum, et interdum proprio, perniciosum est. Multoque clarius superstitiosum est precibus et ritibus hæreticorum interesse, quia vel est quædam iacita approbatio hujusmodi superstitionis, vel miscetur etiam cooperatio. Quæ maxime cernitur in participatione sacramentorum ; et ideo inter omnes ritus, qui a Calvinistis fiunt¹, detestabilior est communicatio cum illis in sacrilega cœna et facta eucharistia quam ministrant, nam qui illam participant, evidenter cooperatorant infideli superstitioni, et pro Christi sacramento id recipiunt, quod nihil est, suoque facto illum morem approbant. Sic denique, licet in necessitate possit Catholicus baptizari ab hæretico, utente vero et substanciali ritu baptismi, si tamen adhibeat hæreticus alios

ritus accidentarios, superstitiosos, et alienos a consuetudine Ecclesiæ Romanæ, non potest illis cooperari, licet possit eos interdum tolerare, si neque scandalum neque religionis contemptus interveniat, et eos vitare non possit.

30. Et ita etiam responsum est ad aliam partem illius rationis. Nam isti actus ex communi impositione et usu sunt actus religionis, et partim ex natura rei, partim ex impositione et usu hominum hanc significationem habent; unde in particulari sumpti in tali occasione, et cum tali inductione, et in consortio et communicatione talium schismaticorum, plane significant illorum religiosum cultum et ritum, et ad hoc sunt a tali rege instituti. Quapropter sicut est intrinsece malum assumere signum falsæ religionis, neque propter illum timorem fieri licite potest, ut est in Theologia constans , ita est per se malum, actus illos tali modo et in tali occasione exercere. Doctrina vero illa, quod, dum hæreticus non est denunciatus, liceat in sacris communicare cum illo, quam tradit Navarrus, ab eodem expresse declaratur, dummodo ipsa sacra ritu catholico fiant, neque ulla sit communicatio ritus, cæmonia aut impietas hæreticæ ; et præterea ut nulla Catholicorum offendio nullumve periculum fidei intercedat, ut expresse declaravit Azor, referens Navar., diet. libro octavo, capite undecimo , quæstione quarta, tom. 1.

31. *Secundæ rationi dubitandi satisfit.* — *Quando maxime obliget præceptum confitendi fidem.* — Ad secundam respondetur, simulationem falsæ religionis esse intrinsece malam, ut in dicto libro 9 de Legibus late ostendi, ex sententia Augustini supra allegati, et plurium Doctorum, quos ibi retuli, et idem sentiunt omnes , qui negant esse aliquando licitum assumere signum falsæ religionis, vel externum actum infidelitatis exercere, etiam si interna fides retineatur. Quia, licet assumens signum non intendat significationem ejus, tamen non potest illam separare, et ideo, velit, nolit, actu ipso significat se esse infidelem, et ita falsam religionem opere ipso confitetur, quod est contra præceptum confessionis fidei. Nam, sicut fides vera obligat ad sui confessionem, ita etiam obligat ad vitandam contrariam infidelitatem, et consequenter etiam ad non exterius confitendam illam. Estque hæc obligatio urgenter, cum instat in contrarium publici tyrauni vexatio, nam tunc maxime obligat præceptum confiteudi fidem veram, et vitandi omnem contrariam simulationem.

¹ Vide Navar., cons. de Const., q. 29; Azor., tom. 1, l. 8, c. 41, q. 9.

Eritque hæc obligatio major, quo majus fuerit scandalum, majusque eversionis fidei et contemptus Romanæ religionis periculum, quæ omnia in præsenti casu maxime concurruunt.

32. *Satisfit tertiae rationi.* — Per quod responsum etiam est ad tertiam rationem, quæ erat de scandalō; dicimus enim imprimis præter scandalum esse alias rationes sufficientes. Deinde dicimus non vitari scandalum propter fugas ibi propositas. Cum enim dicitur notum esse omnibus, a Catholicis non ex corde, sed coacte illa exterius fieri, respondemus et hoc esse incertum (multi enim id poterunt ignorare), et illud sufficere ad gravissimum scandalum, nam illamet fictio est grave peccatum. Præterquam quod non vitantur alia pericula et injuriæ religionis Christianæ. Item, cum dicitur regem non vexare fideles, tam causa religionis, quam cupiditatis pecuniarum, respondeo, etiam hoc dici divinando; sed quidquid sit, parum refert, quia non intentio operantis, sed operis spectanda est; licet enim rex intendat pecuniae lucrum, proxime inducit ad profitendam falsam et superstitionem religionem, cum expressa, vel saltem tacita abnegatione Romanæ religionis; hoc autem est intrinsece malum, et ideo quacumque ratione a rege intendantur, resistendum illi est.

33. *Protestatio publica ad cohonestandam communicationem superstitionis non sufficit.* — Denique etiam protestatio non excusat, tum quia moraliter non potest esse tam publica et notoria, sicut est simulatio ipsa heresis; tum etiam quia protestatio, etiam si esset omnibus Catholicis nota, non tollit quin actio illa sit simulatio et externa professio erroris, et falsæ superstitionis, nec tollit defecatum confessionis fidei, nec contemptum religionis, nec periculum animarum. Inio illa via datur licentia profitendi exterius quamecumque infidelitatem cum protestatione facta apud fideles Catholicos, quod id non fiat animo infidieli, sed affectu humano non perdendi facultates, et alia temporalia bona; hoc autem turpissimum et perniciosissimum est, et contra rationem; nam hæc professio fieta pravæ religionis non solum est mala, quia alii fideles credent ex infidelitate fieri, sed etiam quia hoc significatur quibuscumque videntibus et intelligentibus talia signa. At vero protestatio ad summum a Catholicis illam existimationem tollit, quia protestatio solum coram fidelibus fieri solet, non coram infidelibus. Et præterea, licet coram omnibus fieret, semper actio illa est contra Dei honorem, et in con-

temptum fidei, et cum periculo et scandalo infirmorum. Protestatio ergo malitiam talium actionum non purgat. Atque ita tandem sententiam suam explicuit Azor, in tom. 3, lib. 1, c. 7, post quæst. 2.

CAPUT X.

AN VEXATIO, QUAM IN ANGLIA CATHOLICI PATIUNTUR, SIT VERA RELIGIONIS CHRISTIANÆ PERSECUTIO.

1. Ecclesiam Catholicam persecutur qui in odium Romanæ quamlibet illius partem vexat.

— Haec quæstio non in eo sensu tractanda est, ut iterum ad primam controversiam, ubi sit vera et Catholica religio, an in Anglicana insula, vel in toto orbe, seu, quod idem est, in Ecclesia Romana, redeamus; hoc enim satis in lib. 4 disputatum est, et ex ibi dictis supponimus, veram fidem et Religionem Christianam esse in Ecclesia Romana, ex quo eviderter sequitur, si in Anglia vexantur fideles (qui ab haereticis Papistæ vocantur), quia Ecclesiæ Romanæ uniuntur, ejusque fidem, religionem et obedientiam profitentur, illam esse propriam et omnino veram fidei Catholicæ et Ecclesiæ Christi persecutionem, et qui auctor est illius, esse Christi hostem et Christianorum persecutorem. Neque de hac consecutione seu conditionali propositione dubitare quis potest, posita dicta hypothesi; nam, si Ecclesia Romana est vera Ecclesia Christi, qui Ecclesiam Romanam persecutur propter suam religionem, seu qui ejus religionem oppugnat, Christi Ecclesiam persecutur et oppugnat, et consequenter illa erit persecutio Christi et ejus Ecclesiæ. Quæ tunc maxime ita appellatur, quando non est tantum privata unius vel alterius personæ, sed est etiam publica et generalis totius communitatis. Nam, licet persecutio ejusdem membra, quatenus tale est, seu propter fidem vel justitiam, sit persecutio ejusdem Christi, et ratione generalis causæ seu motivi in totam Ecclesiam redundare videatur, nihilominus per automatismam illa dicitur ecclesiastica persecutio, quæ communitatem Ecclesiæ, ejusque universalem corpus oppugnat. Non est tamen necesse ut talis vexatio, vel in tota Catholica Ecclesia, ut est per totum orbem diffusa, vel in Ecclesia Romana, ut est particularis episcopatus, directe et immediate fiat, ut nomen persecutiois Ecclesiæ mereatur; sed satis est ut in aliquo regno Christiano propter eamdem Ro-

manam et Catholicam fidem grassetur. Ait enim Augustinus, lib. 8 de Civit., e. 52: *Quale est enim non considerare, Ecclesiam per totum mundum fructificantem atque crescentem posse in aliquibus gentibus persecutionem pati a regibus, etiam quando in aliis non patitur?* Et afferat exempla de persecutione facta in Perside a rege, et a Gotthis in sua ditione, et ab Herode Hierosolymis. Talis enim vexatio in uno regno vel parte principali Ecclesiæ non fit sine quadam universalis Ecclesiæ participatione et turbatione; nam tota quadam modo conquassatur. Quia, licet in una provincia persecutio moveatur, totius Ecclesiæ fundamenta convellere nititur.

2. *Status controversiae.*— Hoc ergo pro constanti supposito, sensus præsentis controversiae est, cum de facto constet professores Romanæ religionis ab illius regni principibus post Henricum VIII (Catholica Maria excepta), pluribus modis vexari, magnisque suppliciis affici, an illa vere sit, et appellari debeat Ecclesiæ et Christi persecutio, vel solum aut injustum bellum, vel justa punitio. Et occasionem quæstionis præbuit nobis rex Angliæ, qui de Pontifice valde conqueritur, quod ipsum inter Ecclesiæ persecutores annumerare videatur. Unde contendit poenas illas et afflictiones quæ in Anglia auctoritate regia Papistis (ut ab eis intelligamus) inferuntur, non mereri nomen persecutionis Ecclesiæ, quia non titulo religionis, sed in poenam justam criminum contra regem vel rempublicam commissorum, infliguntur. Unde in principio Apologiæ sie inquit: *Negari non potest quin Pontifex contra bonos mores, et consuetudinem principum, maxime christianorum, peccarit reprehenderet, cum me inauditum condemnaret, quod quidem fecit, me persecutoribus annumerando, ut ex eo quod cohortatur Catholicos suos ad martyrii gloriam aspirare, non obscure innuitur.* Deinde vero in impugnatione primi Brevis Pontificis late circa hoc digreditur, et prius de Elisabetha, pag. 18, affirmat, *Nemini ex Pontificiis religionis causa poenam irrogasse, antequam eorum scelera et flagitia, veluti invicie, supplicia, quæ pertulerunt, extorsissent.* Hoe autem probat hac fere partitione, quia regina neque ante editum Breve contra illam a Pio V, neque post, juste potest persecutionis infamia notari. Priorem partem ostendit, quia illo tempore, antequam Pius V contra reginam sententiam fulminasset, neque graviorem aliquam multam Catholicis impo-
suit, neque severiores leges, neque tunc tempo-

ris ulla capitum poena fuit in Pontificios constituta. Alteram partem ostendit, quoniam ab illo tempore, quo illa fuit in reginam lata sententia, *tot conjurations et machinationes, ac rebelliones publicæ in illo regno ortæ sunt, ut illæ non solum fuerint justæ, sed etiam moderatæ poenæ delinquentum;* ergo propter illas poenas non potest regina persecutionis infamia notari, sed potius magnæ clementiæ nomine commendari.

3. *Rationes quibus se rex excusat.*— Deinde ad se suumque regimen transiit facit, et pag. 23 sic inquit: *Quod me de Catholicorum persecutio calumniantur, nunquam probari potest, quemquam conscientiæ causa et religio- nis ergo, me regnante hactenus, vel morte mulctatum fuisse, vel in mortis periculo modo versari. Nisi forte (addit) hæc misera Catholicis interdictio a Papa facta, quominus de juramento suo mihi promittant, causa sit dehinc, cur multi eorum merito plectantur.* Deinde multis argumentis et indieis ostendere conatur, persecutoris nomen non mereri. Primo generatim per comparationem ad reginam, quia Jacobus rex majori multo mansuetudine et pietate eum Catholicis se gessit, quam regina. Secundo, quia tanta clementia in Catholicos usus est, *ut et ipsi in spem venerint se brevi religionis suæ libertate fruituros,* et alii sectarii familiares regis stuperent, et magnam regni perniciem inde formidarent. Tertio, recenset favores humanos, tempora liaque beneficia in Catholicos collata, ut sunt recusantes aliquos equestri dignitate donare, alios accessu et colloquio suo participes effi- cere, sine ullo religionis diserimine honores et beneficia illis largiri, et similia. Quarto, inter hæc beneficia numerat, quod judices suos monuerit, ne sacerdotes, etiam si essent convicti, suppicio afficerent, et præcipue exaggerat clementissimum edictum, quo permissum est sacerdotibus omnibus non comprehensis, et tum extra custodiam agentibus, intra constitutam diem e regno exceedere. Quod si qui in carcere detinebantur, libere etiam abire permissi sunt, et si qui alii postea fuerunt comprehensi, trans mare allegati sunt, et ibi libertati restituti. Ex quibus concludit, ingratitudinem Pontificis ostendit, qui tam iniqua mensura tot beneficia compensarit.

4. *Christianorum vexatio, quæ sistit in tem- poralibus, non est persecutio Ecclesiæ.*— Quia vero nobis certum et exploratum est, quam nunc in Anglia patitur, et post Henricum sub Elisabetha passa est, unam esse ex gravissimis

persecutionibus, quas Ecclesia Catholica in aliquo regno particulari hactenus sustinuit, ideo ut a suis initis et fundamentis hoc ostendam, adverto, in omni persecutione, ad judicium de illa ferendum, primum omnium spectandum esse scopum et finem, in quem tendit persecutio; deinde media quibus illius finis consecutio intenditur. Ut ergo aliqua Ecclesiæ vexatio sit propria et publica persecutio, necessarium est, et sufficit ex parte finis, ut in destructionem vel mutationem Catholice religionis in tota Ecclesia, vel in aliqua ejus notabili parte faciendam ordinetur. Nam, licet vexatio Christiani populi aut regni ordinetur ad dominium temporale ejus tyrannice occupandum, et hac ratione multa temporalia nocimenta Christianorum per rapinas, homicidia, et alias similes injurias fiant, si haec non tendant in everisionem religionis Christianæ, sed tantum in appetitu temporalis imperii sistant, non erit propria persecutio Ecclesiæ, ut nunc de illa tractamus. Quia per illam non vexantur fideles, quatenus fideles et Christiani sunt, sed quatenus homines vel cives sunt, sicut interdum vexantur gentiles et pagani. Poterit ergo illa dici persecutio corporalis, non spiritualis, humana, non Christiana, nam haec esse debet propter Christum, seu propter fidem ejus, juxta verbum ipsius, Matthæi 5: *Beati estis cum maledixerint vobis homines, etc., propter me.* Et 1 Petri 4: *Nemo restrum patiatur ut homicida, etc. Si autem ut Christianus, non erubescat, sed glorificet Deum in isto nomine.*

5. *Quæ sit Ecclesiæ persecutio.* — At vero e contrario si persecutio tendat in illum finem, et sub eo nomine fiat, quibuscumque mediis intendatur, erit Christiana persecutio. Quia ut in moralibus dicitur, finis est qui dat esse et speciem actioni. Unde sicut qui favet Christianis, quia Christiani sunt, vel propter fidem et amorem Christi in eos qualiacumque beneficia confert, Christum honorat, et ab illo potest præmium expectare, juxta illud Matt. 10: *Quicumque potum dederit uni ex minimis istis, etc., tantum in nomine discipuli, non perdet mercedem suam,* ita etiam e contrario qui directe intendit Catholicam religionem offendere, et eam profitentes ab illa averttere, quibuscumque mediis ad hoc utatur, erit proprie persecutor Christianorum, et consequenter etiam Christi, juxta verbum ejus dicentis ad Paulum: *Quid me persequeris?* Actor. 9. Quoad media vero in eodem loco Matth. 5, varios modos persecundi Christianos idem Dominus insinuat, dicens: *Cum maledixerint vobis ho-*

mines, et persecuti vos fuerint, et dixerint omne malum adversum vos, mentientes propter me. Ubi Augustinus, lib. 1 de Serm. Dom. in monte, accurate illa tria distinguens, ait, *persecutiones proprie fieri per vim vel insidias; maledicere autem esse, aliquem in praesentia ejus inhonorare, et contumeliis afficere; dicere autem malum adversus aliquem, proprie esse de illo absente detrahere, ejusque famam laedere.* Quamvis autem haec recte dicta sint, sumpto stricte verbo persecundi, nihilominus etiam vexatio illa, quæ per contumelias vel infamaciones Christianorum fit, persecutio nomen meretur, sicut de Apostolis dicitur Actor. 5, quod *ibant gaudentes a conspectu concilii, quia digni habiti sunt pro nomine Jesu contumeliam pati.* Et 1 Petr. 3: *Si quid patiamini propter justitiam, beati.* Itaque pro diversitate mediorum aut tribulationum esse quidem poterit major vel minor persecutio; quo cumque tamen modo fiat, si ratione fidei aut religionis Christianæ fit, erit Christiana persecutio. Sieut Augustinus, loco citato, dixit, *tunc aliquem propter Christum pati, quando secundum veram fidem et Catholicam disciplinam Christianus vocatur, et ideo vexatur.*

6. *Persecutio Ecclesiæ propria quæ.* — Deinde ut majorem lucem huic causæ afferamus, tam fines persecutionum Ecclesiæ, quam media quibus fieri solent, distinctius explicare utile censemus. Potest enim persecutio esse vel solum contra bonos mores per violentiam et potentiam humanam aliquem pravum morem in rempublicam introducendo, et eos graviter affligendo qui resistunt, vel pro veritate quovis modo pugnant. Sed talis vexatio, quamdiu intra hos limites continetur, quia in omni regno etiam merc humano et gentili esse potest, ideo non tam ecclesiastica persecutio, quam gubernatio iniqua et tyrannica vocari solet. Ulterius ergo progredi solet vexatio christiani principis ad unitatem Ecclesiæ scindendam, et unius capitatis obedientiam ita contemnendam, ut omnes subditos suos, sibi in eodem schismate non consentientes affligat, et vel hoc solo dignos suppliciis existimet. Et haec jam proprie attingit gradum aliquem ecclesiastice persecutionis. Tandem potest finis et scopus persecutionis esse mutatio fidei, et veræ religionis in ea fundatæ, cum vexatione et afflictione fidelium tali mutationi resistentium. Et haec est ex parte finis consummata Ecclesiæ persecutio, quia fundamentum ejus prorsus evertere nititur.

7. Primum medium quo persecutores uti solent. — Media vero, quibus Ecclesiæ persecutores ad hunc timem uti solent, haec fere sunt. Primum, per vim et potentiam divinum cultum in Ecclesia everttere, templa destruendo, imagines concremando, monasteria et loca sacra in profanos usus convertendo. Sieut de Donatistis refert Optatus, lib. 6, quos verbis Eliae accusat: *Altaria tua confregerunt. Cur vota (inquit) et desideria hominum cum ipsis altaribus evertistis? Cur concidistis precibus viam?* Et Augustinus, lib. 3 contra Crescon., cap. 59, inde convineit Donatistas, persecutionem fecisse Maximianistis, *quia basilicam Maximiani destruxerunt.* Sic etiam Arriani tempa Catholicorum evertebant, ut refert Victor, lib. 1 de Persecut. Vandal. Alii etiam imperatores imagines everterunt et incendebant, ut satis notum est. Aliud medium esse solet, leges et edicta pronunciare fidei contraria, quibus cogantur fideles sub gravissimis penis abjurare fidem, aut aliquid contra fidei regulas profiteri. Quod fecerunt non solum gentiles imperatores, sed etiam qui a Christo defecerunt, Julianus, Valens, et similes. His accedit pœnarum et tormentorum executio. Atque interdum etiam solent violenta media adhiberi, quibus filii Catholicorum a ministris et magistris hæreticis doceantur et instruantur, et e contrario ut a Catholicorum disciplina arceantur, et omnibus modis prohibeantur, sicut a Juliano Apostata factum esse, memoriae proditum est. Denique aliquando tyranni solent blanditiis et favoribus humanis animos credentium tentare, ut in historiis ecclesiasticis vulgatum est.

8. Vexationem fidelium in Anglia persecutionem esse Ecclesiæ, ex fine ostenditur. — Primo ergo probandum est, vexationem fidelium in Anglia ex parte finis persecutionem ecclesiasticam esse. Si enim initium et originem ejus contemplemur, manifestum erit. Nam Henricus VIII, ut sententiam divertii in regno suo adversus reginam Catherinam, contempta Sede Apostolica, proferri faceret, novam Ecclesiæ formam in Anglia induxit, seque ipsum caput illius Ecclesiæ constituit; decretumque statuit, ut in illo regno in nulla rerum Ecclesiæ administratione Pontificis auctoritate opus foret. Et per hanc potestatem sic usurpatam novos religionis ritus, et leges colendi Deum, longe alias quam antea fuissent, in regnum suum inducere decrevit; et in hunc finem multa egit, quæ postea attingemus. Hunc scopum babuit etiam Eduardus, vel potius pro-

tector, et consiliarii ejus, qui ita finem illum auxerunt et amplificarunt, *ut intra breve tempus tremendum sacrificium, divina officia, et sacramenta omnia ritu catholico in Anglia fieri omnino desierint*¹, ut Sander. refert. Imo cum Henrieus, excepto articulo primatus, in aliis ad fidem pertinentibus mutationem fieri vetuerit, statim ab Eduardo Zuingliana hæresis introduci cepta est, ut supra vidimus. Eundem finem instauravit Elisabetha simul atque ad regnum assumpta est, nam et se gubernatricem supremam totius Angliæ, non minus in spiritualibus et ecclesiasticis rebus quam in temporalibus, declaravit, et a suis subditis jurari voluit; neque solum in conservando schismate, sed etiam in introducenda Lutherana hæresi, vel alia parum illi dissimili, ac omnino mutanda religione Catholica, quam soror Maria instaurare cooperat, omnibus modis incubuit; et in ea cura et sollicitudine usque ad finem vitae laboravit.

9. Eamdem autem religionis formam, Catholicæ nimirum repugnantem, Jacobum regem in suo regno conservare ac tueri, omnibusque modis intendere, probare non est, necesse. Satis enim diserte et explicite sæpius in suo libro rex ipse hoc profitetur, ut ex sua fidei professione supra tractata satis manifestum est, et in sequentibus multa ejus verba et loca designabimus, in quibus hunc finem ostendit et declarat. Ex quibus omnibus constat, tres illos pravos fines, quos in persecutione religionis Christianæ supra distinximus, pravos scilicet mores, mutationem religiosi per schisma, et fidei mutationem per hæresim, omnes in hac turbatione Anglicana inventos esse; incepit enim a morum corruptione, et ad schisma processit, et in apertam hæresim consummata est, et ita nunc perseverat. Nam schisma neque ab ipso rege negatur, illud autem jam est in hæresi fundatum, ut lib. 3 ostensum est, et multis aliis hæresibus est cumulatum, ut in lib. 1 et 2 est probatum; schisma autem et hæresis sine magna morum corruptione esse non possunt. Ergo ex parte finis omnia mala ibi concurrunt, quæ in ecclesiastica persecutione inveniri possunt.

10. Idem ex parte mediorum demonstratur.
— *Quam gravis fuerit persecutio sub Henrico.*
— *Quod autem etiam ex parte mediorum fuerit, et ante Elisabetham, et sub illa, et post illam sub Jacobo acerbissima persecutio, probatur discurrendo breviter per capita quæ*

¹ Sander., lib. 2.

attigimus. Primum erat de violenta eversione et usurpatione rerum sacrarum; hæc autem statim cum mutatione religionis sub Henrico cœpit. Nam solus Henricus decem millia monasteriorum ac templorum, a Catholicis per multa sæcula ædificatorum, violenter occupavit, et in profanos usus pervertit, ut refert Boz., tom. I de Signis Eccles., c. 10, cuius tyrannidis seriem ac modum latius describit Sander., lib. I, pag. 154 et sequent., et principio dicit, *præcepisse Henricum, ut omnes omnium ordinum viri ac mulieres pretiosissima quæque Ecclesiarum ornamenta, et reliquias suis questoribus tradarent.* Deinde in publicis comitiis obtinuisse ait, ut minora quæque monasteria, quorum redditus septingentos aureos non excederent, suæ libidini derentur; et ita trecenta septuaginta sex monasteria, et ex eis centum viginti millia aureorum in annos singulos occupasse, et plus quam decem mille utriusque sexus religiosos in sæculum remisisse. Intra triennium vero omnia totius regni monasteria evertisse, eorumque omnia bona fisco per summam violentiam applicasse. Quod quanta vi quamque pravis artibus executioni mandaverit, idem auctor late prosequitur¹. Post hæc vero contra imagines, monumenta et reliquias Sanctorum bellum movit, et celebriora omnia evertit, contumeliis affectit et expilavit. Alias vero ecclesiæ licet non omnino everterit, quidquid tamen in eis erat pretiosum arripuit, easque infinitis aliis modis, sacra omnia indigne tractando, violavit.

11. Quantum sub Eduardo persecutio creverit. — Sub Elisabetha. — Sub rege Jacobo. — Hæc autem omnia sub Eduardo conservata et aucta fuerunt, nam si quæ imagines aut cruces in Anglia remanserant, partim eversæ, partim combustæ sunt, et vasa omnia aurea et argentea, calices ac vestes sacrae ecclesiasticæ, omniaque ecclesiarum bona regi applicata fuerunt². Et officia divina ritu hæretico et vulgari lingua recitari cœperunt, atque ita ablatio divino sacrificio, et altaribus destructis, ecclesiæ Catholicorum templo Dei et Christi esse desierunt, et in synagogas Satanae commutatae sunt. Postea vero Elisabetha templo, monasteria, et sacra omnia, quæ soror ejus in antiquum veræ religionis decorum ex parte reduxerat, iterum e medio abstulit, et majori vi et potentia sacra omnia invasit,

et omnem antiquæ religionis usum auferre totis viribus conata est. Jacobus vero licet fortasse monasteria non invenerit quæ destrueret, aut eorum stabilia bona quæ denuo occuparet, nec templo quæ jam non essent ab hæreticis contaminata, nihilominus eamdem vim rebus sacris inferre censendus est. Primo, quia potentia sua facit ut abominatio illa desolationis conservetur, eademque violentia impedit ne aliquid, quod Catholicam religionem redoleat, in suis regnis instauretur. Et quamvis in Hibernia (ut inde accepimus) ecclesiæ ab hæreticis olim dirutæ, nunc expensis Catholicorum jussu regis reædificantur, id tamen fit ut sacrilegis Calvinistarum ritibus et conventiculis inserviant; quæ duplicita, ut sic dicam, est injuria et persecutio. Deinde si quæ sacra vasa occulte a Catholicis retinentur, et ministri regis illa inveniant, ea rapiunt, et ad suos et profanos usus convertunt. Imo (ut a fide dignis accepimus) hoc colore pretiosa quæque auri et argenti vasa, aut feminarum ornamenta surripiunt, fingentes esse vasa sacra, aut ad reliquiarum vel altarium ornatum conservata.

12. Alterum persecutionis medium. — Quantum sub Elisabetha. — Alius modus persequendi religionem Christianam esse solet per edicta, et leges violentas ac poenales Catholicæ fidei repugnantes; quales innumeræ in Anglia sub prædictis regibus latae esse et quotidie ferri, notissimum est. Nam Henricus, in principio sui lapsus, publico edicto subditos coegit ad juramentum primatus illi præstandum, ut supra visum est; imo tanto odio in Pontificem exarsit, ut lege publica sub poena capitis præceperit, ut omnes Papæ nomen ex omnibus libris suis delerent. Et aliae similes leges sub illo, et sub Eduardo contra religionem Catholicam latæ sunt. Postea vero Elisabetha, statim in principio regni sui, juramentum de primatu suo ecclesiastico suis subditis suscipiendum proposuit. Nam, licet nomine *capitis Ecclesiæ* non uteretur, sed *supremæ gubernatricis*, postea tamen declaratum est eamdem rem utraque voce significatam fuisse. Addebaturque pena privationis bonorum et perpetui careeris prima vice recusantibus, secunda autem vice pena capitis. Præterea prohibitus est usus sacrificii et sacramentorum ritu Romano sub poena 200 aurorum prima vice, 400 secunda, tertia omnium bonorum, et careeris perpetui³. Item sub poena amissionis

¹ Sander., lib. I, pag. 286 et seq.

² Sander., lib. I, p. 174 et 175.

³ Idem ann. 1559.

omnium bonorum et perpetui careeris prohibuit, ne quis in Angliam afferret agnos Dei, cruces, vel quascumque res alias auctoritate Pontificis consecratas, et sub poena capititis, ne Brevia aut Bullas Roma quisquam portaret. Reconciliare aliquem Ecclesiæ Romanæ, crimen læse majestatis esse voluit¹. Qui extra regnum religionis causa navigarent, bonis omnibus privavit. Postea vero legem edidit, qua omnes clerici Pontificia auctoritate ordinati intra certum diem regno exire cogebantur, et a transmarinis nunquam redire sub poena læsæ majestatis. Et similia edicta innumera promulgavit.

13. Sub Jacobo rege quid. — Neque Jacobus rex in oppugnanda fide Catholica legibus suis segnior fuit. Nam, ut late refert Cardinalis Bellarminus, in responsione sua ad Apologiam, an. 1606 edictum a rege prodiit, cuius titulus erat: *Ad detegendos et reprimendos Papistas*. Ex quo titulo manifestum est, causa religionis, et in defectionem a Papa edictum latum esse. Unde in primo ejus articulo confirmatae sunt leges ab Elisabetha latæ, in aliis vero multa sub gravissimis poenis propter eundem finem statuta sunt. Ut, quod Catholici recusantes cœnam hæreticorum sumere, vel templa eorum adire, et sacris interesse, variis poenis pecuniariis mulcentur, eas in singulis vicibus augendo, longe acerbiori modo quam sub Elisabetha fieret. Deinde, licet rex dicat se antiquum juramentum temperasse, non tamen illud abstulit. Scimus enim fide digna relatione, superiori anno decretum esse, ut omnes subditi juramentum præstent. Præterea, recusantes etiam novum juramentum fidelitatis admittere, in carcerem sicariorum conjiciuntur, et si ibi etiam recusent, privantur omnibus bonis, et carceri perpetuo mancipantur. Item ut qui aliquem regis subditum ad obedientiam Ecclesiæ reduxerit, reus majestatis læsa habeatur, ejusque criminis poenam subeat, nisi intra certum tempus crimen confessus, utrumque juramentum primatus, et contra potestatem Papæ suscipiat. Quæ omnia edicta et leges in scopum avertendi homines a Romana religione manifeste ordinantur, et magnam coactionem continent; quandoquidem per comminationem privationis honorum et perpetui careeris homines ab actibus Romanæ fidei ac religioni consentaneis arcentur, vel ad juramenta perfidiæ et sa-

crilegas hæreticorum superstitiones inducuntur.

14. Contentus quatuor Archiepiscoporum Hiberniæ, pro extirpanda Catholica fide. — Accedit (quod antea sub Elisabetha non tam acerbe factum fuerat sicut his posterioribus annis, praesertim ab anno 1565 usque ad præsentem) eadem edicta in Hibernia (ut inde scribitur) esse promulgata per legatos et gubernatores a rege magna cum potestate missos, a quibus ita Catholici vexantur, ut vix vivere permittantur, nisi antiquæ religioni renuntient. Præcipitur enim omnibus sub gravissimis poenis, ut ecclesias Protestantium Dominicis diebus et festis adeant, et impiis eorum ritibus intersint, et Catholici patriam deserere coguntur, nisi Protestantibus conformari velint. Prohibentur præterea Catholici sub poena perpetui careeris, ne intra regnum grammaticam aut aliam scientiam juvenes doceant. Parentes sub poena confiscationis honorum interdicuntur filios extra regnum ad litterarum catholica studia mittere; quod si eos misisse constiterit, in carcere detinentur, donec filii redeant. Item qui sui juris sunt, prohibentur similiter regno exire scientiæ comparandæ causa, sub poena careeris perpetui, si in exitu comprehendantur. Nullus permittitur ad magistratum aliquem eligi, nec ad ejus regimen admitti, nisi prius juramentum de primatu ecclesiastico regis Angliæ exhibeat. Quæ omnia, et alia multa, quæ brevitatis causa omittimus, in eundem finem evellen*di radicitus* Romanam fidem ab illa insula, in qua vigore adhuc videbatur, ordinantur. Unde eum jussu regis quatuor Archiepiscopi, qui soli sunt in illa provincia, ad tractandum de rebus religionis, Dullino convenienter, omnes uno ore jurarunt omnibus modis et viis procurare, ut in suis suorumque suffraganeorum diecesisibus, atque adeo in universa Insula in religionis ritu uniformitas conservetur. *In finem (inquiunt) eradicandi penitus Papisticam religionem, et loco illius veram (scilicet) fidem ac religionem plantandi.*

15. Hæc autem vexatio per edicta et leges non in comminationibus tantum sistit, sed ad executionem magna ex parte progreditur, ut Sander., in lib. 3 suæ Histor., de tempore Elisabethæ late refert. Et de hoc tempore per constantem famam et relationes fide dignissimas nobis constat, maxime vexari Catholicos expilationibus et rapinis, ut ad summam pauperiem redacti, nec vires nec animos ad resistendum habeant. Cujuis rei exempla multa re-

¹ Idem ann. 1571. Late Episc. Tarazon., lib. 4, c. 5.

ferre possemus: unum vero sufficiat, de quodam illustri viro vicecomite Montagu, qui ne juramentum novum susciperet, pro compensatione sex mille libras, hoc est, viginti quatuor mille cruciatos Lusitanos solvit superiori anno 1611. Neque necessarium est, ut de aliis mediis tormentorum, pœnarum ac coactionis, quibus fideles gravissime vexantur, longior rem probatioem adhibeamus, quia et in sequenti capite multa hujus veritatis argumenta et exempla referre oportebit; et nunc etiam ad objectiones, vel potius excusationes regis respondendo, idem evidentius constabit. Nam etiam ipse rex non audet omnino negare afflictiones et pœnas, quas orthodoxi in Anglia passi sunt, et nunc etiam patiuntur, sed alias excusationes prætendit, quas expendere necesse est, ut evidentissime constet tam claram et crudelem esse illam persecutionem, ut nulla tergiversatione celari possit.

16. Excluditur evasio qua rex utitur.—Prius ergo excusat rex prædecessorem suam Elisabetham partitione temporum supra facta. Nam ante sententiam a Pio V latam, fideles gravior non vexavit; post sententiam vero non illos vexavit, sed se defendit, nec fidem persecuta est, sed crimina et conjurations. At prius membrum falso nititur fundamento. Dicit enim rex, ante Pii V excommunicationem non esse in Anglia severiores leges latae contra Catholicos; at illa excommunicatio lata fuit a Pio V anno 1569, et tamen anno 1558 et sequenti latæ fuerunt leges supra relatæ, quæ non solum severiores, sed etiam severissimæ dici possunt et debent. Pœnæ enim privationis bonorum, vel perpetui carceris per se ac sigillatim sumptæ, gravissimæ sunt; quomodo ergo non est judicanda severissima lex, quæ utramque pœnam semel recusanti juramentum primatus, id est, perfidiæ, imponebat? Aliæ item leges pecuniarias pœnas imponentes tam servantibus in sacris Catholicum morem, quam sacrilegum Protestantium vitantibus, cum eos paulatim suis bonis ad vitam necessariis prevent, et in bono perseverantes perpetuo carceri tandem mancipent, non possunt non gravissimæ et severissimæ censeri.

17. Refellitur altera evasio.—Addit præterea rex, nullam pœnam capitum fuisse illo tempore in Pontificios constitutam. At contrarium constat ex dictis legibus, nam secunda vice recusanti juramentum perfidiæ, pœna capitum imponebatur. Eademque mulctabatur qui Bullam quamlibet Pontificiam in Angliam deferret. Et Doctor Catholicæ fidei, si aliquem

ab heresi converteret, reus læsæ majestatis, ac subinde etiam mortis reus habebatur. Neque solum legibus, sed etiam illarum executione, et innumeris aliis modis regina illo jam tempore Catholicos vexabat. Refert enim Sander., lib. 3, ann. 1583, plures Episcopos, qui nec jurare, nec aliis impietatibus consentire voluerunt, de gradibus depositos, et carceribus traditos, et ibi tandem *longo misericarum tandem fuisse extinctos*. Alios item nobiles, aliosque utriusque sexus religiosos, vel similes pertulisse vexationes, vel, ut illas vitarent, patriam deserere, et relictis omnibus exules fieri, coactos esse. Est ergo evidentissimum, prius Elisabetham gravissima persecutione Catholicos vexasse, quam Pius V in ipsam animadverteret. Unde si æquo animo, ut rex postulat, ipse rem totam cum suis circumstantiis aestimare et pensitare voluisse, longe verius dicaret, Pium V nullam reginæ pœnam irrogasse prius quam ejus pertinacia et in Catholicos sævitia Pontifice ad innocentum defensionem compulissent.

18. Altera evasio revertitur.—Videamus deinde quam sit legitima de actis ab Elisabetha in posteriori tempore excusatio: *Elisabetha, inquit, censura et depositione Pii V exacerbata*, in Catholicos ira et indignatione commota est. At quænam hæc excusatio est? Profecto nulla; quin potius inde gravior et detestabilior facta est persecutionis iniquitas. Nam, ut ostensum est, ante Pii V sententiam per plures annos Elisabetha Catholicos vexaverat, ut eos ab obedientia Pontificis averteret, cumque Pius IV legatum ad illam misisset, qui eam admonebat ne regnum suum nobilissimum propter odium Pontificis perderet, et si quid sibi de jure regni timeret, sedis Apostolice benignitate facile transigi posse affirmaret, ipsa nec legatum audire voluit, nec illi in Insulam tractationem permisit, ut lib. 3, au 1566, Sandrus refert. Additque alium nihilominus legatum ab eodem Pontifice in Angliam fuisse missum, qui reginam hortaretur, ut aliquos ex suis Episcopis ad Concilium Tridentinum omni securitate promissa mitteret, ut causa fidei tractaretur, quem etiam superbe rejecit. Item ait, variis litteris imperatoris, regum et aliorum virorum illustrum catholicorum du riorem semper factam. Quid ergo mirum, si Pius V, cum per quatuor fere annos sui Pontificatus patienter etiam aliquam correctionem vel moderationem in moribus reginæ expectasset, et nihil proficeret, severitate tandem in ipsam utendum esse censuerit? Nemo sane,

qui de potestate Papæ non dubitaverit, justam ejus indignationem reprehendere audebit, nec reginæ pertinaciam excusabit.

19. Possumusque ad præsentem causam egregiam Augustini sententiam accommodare, qui in lib. de Unit. Eccles., cap. 20, ita ad Donatistas loquitur : *Si vos contra Christi Ecclesiam altare erexitis, et a Christiana veritate, quæ toto orbe diffunditur, sacrilego schismate separatos esse, et corpori Christi, quod est Ecclesia toto orbe diffusa, et blasphemando, et quantum potestis oppugnando, adversari, Sancta et canonica Scriptura convincit, vos impii atque sacrilegi : illi autem, qui vos pro tanto scelere tam leniter, damnorum admonitionibus, vel locorum, vel honorum, vel pecuniae privatione deterrendos coercendosque decernunt, ut cogitantes quare ista patiamini, sacrilegium vestrum cognitum fugiatis, et ab æterna damnatione liberemini, et rectores diligentissimi et consultores piissimi deputantur. Hanc robis dilectionem debent Pontifices, ut et sacrilegia vestra, et propter Christianam mansuetudinem non pro merito punienda decernant, et propter Christianam sollicitudinem non omnino impunita dimittant. Hoc in eis Deus operatur, cuius misericordiam, etiam in his molestis, de quibus conquerimini, non vultis agnoscere.* Hæc fere Augustinus, quæ licet non de Pontifice co-gente regem schismaticum, sed de imperatore in favorem Ecclesiæ contra subditos rebelles sœiente, loquatur, nihilominus, ut dixi, verba ipsa totaque sententia optime ad præsentem causam cum proportione accommodantur. Neque poterit contradicere, nisi qui potestatem Papæ ad reges schismaticos coercendos negaverit; is autem ad quæstionem de causa religionis controversiam revocabit. Atque ita etiam concluditur, licet Elisabetha, sententia Pontificis provocata, persecutionem auxerit, non ideo scopum et finem persecutionis mutasse; semper enim contra religionem pugnavit, et in eo proposito occasione justæ sententiæ magis confirmata, et crudelior facta est, atque ita persecutio Catholicorum non fuit mutata seu ablata, sed aucta.

20. *Persecutionis progressus sub Jacobo.* — Ad alia, quæ de se suoque regimine rex proponit, breviter respondemus, imprimis ex comparatione quam inter se et Elisabetham facit, ad sumnum ostendere, in principio sui imperii mitius se cum Catholicis gessisse, et persecutionem Elisabethæ aliquo modo temperasse, non vero ab illa cessasse. Nos enim facile ostendere possumus, ipsum etiam Jaco-

bum a principio regni sui religionem catholicam persecutum esse. Primo, quia in primo anno regni sui, primoque Parlamento edicta reginæ non solum confirmavit, sed etiam non parum auxit, ut Bellarminus in sua responsione testatur. Secundo, quia ipsem rex dicit, Catholicos de sua benignitate confisos, in eam spem venisse, ut se brevi religionis suæ libertate fruituros considerent. Ergo fatetur, ipso etiam regnante, semper fuisse Catholicis interdictum, ne suam religionem profiterentur vel observarent; ergo cogebantur illam deserere; quæ autem esse potest evidenter religionis persecutio, quam illius usum per ini- quas leges et per vim interdicere ? Tertio, ipse rex fatetur, summam clementiam suam erga Catholicos eo pervenisse, ut intra diem constitutam regno exceedere permetterentur, vel potius egerentur, nam exilium illud ad vitandas graviores poenas illis concedebatur. Et hoc vocat rex *clementissimum edictum*. Sed audiatur quid de simili concessione tempore Elisabethæ facta scribat Sanderus : *Inierunt his ipsis diebus novum consilium de quibusdam, quos in vinculis habebant, in exilium mittendis, vel quia morte ac mactatione sacerdotum senserunt se nihil profecisse, vel quia judicarunt hoc imprimis facto fucatam clementiam suam, cuius laudem tantopere expetunt, pluribus in locis divulgari posse.* Quid ergo si de simili regis consilio idem judicium quis faciat ? Fortasse non multum a vero aberrabit. Verumtamen demus regem id fecisse animo leniendi vexationem, et minuendi poenas. *Profecto perpetuum exilium, neque magnum est lenitatis argumentum,* ut idem auctor adjungit; imo per se spectatum est gravissima pena, et per illud cogi ad graviores poenas vitandas, magna est calamitas, ac denique ea conditione impostum, ut redire sit capitale, durissimum ac sœvissimum est.

21. *Evasioni occurritur.* — *Non excusatur beneficiis in Catholicos, si ratione politici regiminis collata sunt.* — At inquit rex, se regnante, probari non posse, aliquem religionis causa morte mulctatum fuisse. Sed imprimis hæc nulla gratia est, nisi beneficium reputetur illud latronum, qui gloriari solent vitam se eis dedisse, quibus non ademerint. Deinde pessima est illa collectio : *Non interficiuntur Catholici; ergo neque persecutionem patiuntur;* quasi vero sola occisio et mors sit coactio et gravis pena. Unde Augustinus, de Unitat. Eccles., c. 20 : *Quoties principes per terrores etiam leviorum pænarum, a bona vita et a bonis*

factis minando et saceriendo deterrent, persecutores et oppressores sunt. Denique falsum etiam esse illud, quod asseritur, in capite sequenti ostendemus. Et ex eo quod rex addit, et futurum significat, ut interdictio juramenti occasio sit plures recusantes interficiendi, satis ostendit regis propositum esse persequendi Sanctos usque ad mortem, religionis causa. Nam, ut ostendimus, religio et conscientia fideles obligat hoc juramentum non admittere; ergo qui fideles ob eam causam interficit, eos propter causam religionis usque ad mortem persequitur. *Sanguisque eorum non in Pontificem*, ut rex prophetat, sed in caput persecutoris recidet, nisi corrigatur. Non enim Pontifex causam dedit effundendi talem sanguinem, qui veritatem declarando, juramentum interdixit, sed rex, qui et veritatem oppugnando tale imponit iuramentum, et usque ad mortem persequi statuit illud recusantes, erit vera causa sanguinis tam crudeliter effusi. Præterea favores et beneficia, quae Catholicis se contulisse refert, et parvi momenti sunt ad execusandam persecutionem; non enim religionis causa illis favere, vel potius cum illis dissimilare incepit, sed ob rationes politicas, ut in principio regni sui omnes sibi aliquo modo conciliaret. Et fortasse illis blanditiis et honoribus eorum animos lucrari cupiebat, ut eos postea in rebus etiam religionis facilius voluntati suæ obsequentes inveniret. Quod si ita est, illa non excusatio, sed potius pars et augmentum persecutionis censenda est. Denique quod rex frequenter in suam defensionem allegat, sceleribus coniurationis coactum fuisse in Pontificios severius agere, et non excusat persecutionem quam multo antea inchoaverat, ut ostendimus, et ad execusandam a persecutione vexationem catholicorum inde subsecutam nihil juvat, ut sequenti capite ostendemus.

CAPUT XI.

AN QUI PROPTER ROMANAM RELIGIONEM ET OBEDIENTIAM IN ANGLIA MORTE MULCTATI SUNT, INTER VEROS MARTYRES SINT ANNUMERANDI.

1. Ut persecutoris Ecclesiæ infamiam rex Angliae quoquo modo effugiat, in religiosos et fideles viros pro Christo in eadem insula interfectos illam rejicere conatus est, constanter affirmans, propter scelera et crimen perduelionis vel inobedientiae gravissin transgressione legum civilium, justo suppicio affectos, non vero propter conscientiae aut religionis causam

esse interfectos. Et ideo mentiri affirmat, valde irridet eos qui illos Martyres vocant. Unde in Praefatione sic inquit¹: *Licet sat superque idoneis probationibus Jesuitas perduelionis et coniurationum reos esse patet, ipsique veritatis ricti confessi sint, nihilominus pro Martyribus habendi sunt.* Inferius vero, post longam digressionem contra P. Henricum Garnetum et alios factam, adjungit: *Id constanter assevero, quod et in Apologia mea posui, hic neminem sive meis, sive defunctæ reginæ temporibus, conscientiæ ac religionis causa affectum esse supplicio.* Quod si hoc verum est, necessario concluditur nullum Catholicum, saltem Elisabethæ et Jacobi temporibus, supplicio mortis affectum, verum martyrem fuisse, quia (ut est constans in theologia principium) Martyrem non facit poena, sed causa, ut ex Cypriano, Augustino, et aliis Patribus supra, in c. 22, lib. 1, declaravimus. Quibus autem argumentis vel indiciis rex suadere nitatur, violentas Sanctorum mortes Anglorum fidelium auctoritate regia in Anglia factas, non propter causam religionis, sed propter alia crimina inflicas esse, postea videbimus. Ostendemusque illis gloriam Martyrum non obscurari, sed potius ipsiusmet regis verbis illustrari et convinci; tam potens enim est veritatis lux et splendor, ut nunquam ita possit per calliditatem vel violentiam occultari, quin tandem se prodat et ostendat.

2. *Veritas affirmans ostenditur. — Martyres ex Carthusiana et Franciscana familia. — Illustria Thomæ Mori et Roffensis martyria.* — Dicimus ergo non solum sub Henrico VIII, sed etiam sub Elisabetha et Jacobo, plures in Anglicana persecutione mortem pro Christo suscepisse, qui inter veros Christi Martyres magna gloria et constanti veritate computantur. Ita sentiunt de his sanctis viris omnes catholici scriptores, qui de Anglicanis rebus his temporibus scripserunt. Nam Polydor. Virgin., in fine sua Historiæ, referens lapsum Henrici abnegantis Papæ potestatem, sequitur Anglianæ Ecclesiæ constituentis, subiungit: *Illud autem decretum non ab omnibus probatur. Et imprimis ab Episcopo Roffensi, viro magna doctrina, summa integritate et innocentia; item a Thoma Moro, equite, litteris ac bonis moribus ornatissimo, qui demum ambo maluerunt de vita quam de ea sententia decidere, ut ocyus in cœlo, quemadmodum ipsi sperabant, fruerentur aero; aliquotque alii idem*

¹ Pag. 157 et seq.

sponte fecerunt. Ubi, licet expresso nomine Martyres non vocet, tamen dum de illorum innocentia testatur, et veraum interfectionis eorum causam aperit, et ipsos Martyres esse et pro sola religionis causa imperfectos esse confirmat. Idem de illis, et de aliis sub Elisabetha imperfectis affirmat, et variis exemplis ac rationibus ostendit Sander., in lib. 4 et 3 de Schismate Anglican. Nam in lib. 4, anno 1533 et sequentibus, refert plures religiosos Carthusianæ et Franciscanæ familie illustres fuisse Martyres, et praeclare triumphasse, illustre pro veritate testimonium reddendo, confirmat. Postea Roffensis et Mori insignia martyria describit; et signatim de Moro refert, interrogatum esse *an probaret legem publice latam, in qua omnis potestas Pontifici Romano abrogata, et summa Ecclesiae gubernatio regi concessa esset*, cui interrogationi cum prius ita respondisset, ut neque fidem negare, neque temere mortis periculo sese offerre videretur, tandem instante necessitate ita respondit: *Ego per Dei gratiam semper Catholicus, nec unquam a Pontificis Romani communione discedens, audiveram aliquando Pontificis Romani potestatem, legitimam quidem et laudabilem, sed tamen humani juris, non divinæ præscriptionis fuisse. Itaque cum viderem statum hujus regni eo ferri, ut necessario investigandum esset quæ ex origine Pontificis Romani potestas dimanaret, toto septennio hujus rei diligentissimæ indagationi me dedi, et deprehendi potestatem Romani Pontificis, quam vos temere (ut nihil dicam gravius) abrogastis, non modo legitimam, laudabilem et necessariam, verum etiam divini juris et præscriptionis esse. Hæc mea est sententia, hæc fides, in qua per Dei gratiam moriar. Vix hæc dixerat, cum omnes magna voce clamarunt, proditorem et perduelllem esse Morum.* Et similiter de Roffense ait esse imperfectum, eo quod in articulum de primatu spirituali ab Henrico usurpatum consentire recusaverit. Addit vero utrumque etiam fuisse imperfectum, eo quod legitimas fuisse nuptias Henrici cum Anna Bolena jurare noluerint. Ex quo ansam sumpsit rex Jacobus eorum Martyria illudendi; verumtamen ex hoc etiam capite illustriora fieri, capite sequenti ostendemus. Denique idem auctor in omibus fere sequentibus annis vitae Henrici illustrissima martyria refert; verumtamen quia rex Jacobus de tempore Henrici nihil dicit, hæc nunc sufficient.

3. *Martyrium Thomæ, comitis Northumbrii.*
—In libro autem tertio, multos propter solam

fidei causam extinctos per Elisabetham affirmat, quos et Martyres esse censem. Et primum, ante expeditum Breve Pii V in Elisabetham, refert Thomam, comitem Northumbrium, qui contra haereticos arma sumpserat, in manum Anglorum traditum, et *vita (inquit) si vellet religionis sententiam mutare ollata, claro martyrio fideliter in Domino finivisse.* Interposuit autem hic auctor verba illa, *vita si vellet*, etc., ne forte quis hunc comitem a gloria martyrii excludendum putaret, eo quod propter rebellionem motam imperfectus videretur; non enim ita est, nam illa conditio ei oblata sufficiens fuit, ut propter fidei testimonium potius, quam propter prius factum (qualecumque illud fuisse) mortuus fuerit. Quod pro multis aliis exemplis observandum est. Postea vero, anno 1571, cum multæ leges capite præcedenti notatae, contra Catholicos latæ essent, ait Sanderus: *In quas leges cum multi devoti Catholicæ vel vere offendenter, vel saltem calumnia legum irretiti tenerentur, alii carceribus, alii bonorum proscriptione, alii etiam morte mulctabantur, tam sacerdotes quam utriusque sexus laici omnium ordinum.* Et in sequentibus annis 581 et sequent., Patris Edmundi Campiani, e societate Jesu, et aliorum multorum¹, martyria præclarissima refert, de quibus tandem ait: *Frustra vero in hoc instituto compendio commemoraverim, quibus de criminibus tam crudeliter in innocentes animadversum sit, cum omnibus constet, veram solamque causam fuisse religionis aritæ professionem, et Apostolicæ Sedis ad communionis contra Ecclesiæ rebelles filios defensionem.* Quod postea multis indicis et testimoniis confirmat. Unde quod rex Jacobus ait, Elisabetham a Pio V exagitatam hæc et similia commisisse, nihil impedire potuit quin hæc omnia vera martyria fuerint; quin potius inde magis ostendi potest, omnia illa homicidia in odium Romanæ religionis, et ad confirmandam sectam illi contrariam commissa fuisse, ac subinde nihil ad veram martyri rationem in eis posse desiderari.

4. Atque eodem modo de his martyribus senserunt Genebrard., in Chron., ann. 1534, referens Paulum Jovium, Georgi. Lilium in Chron., et Sleidam, lib. 9. Item Surius, in sua Historia; Bozi., de Signis Eccles., p. 4, lib. 44, c. 4, ubi martyria Carthusianorum sub Henrico late refert, notatque sua sponte illa sustinuisse: *Nam conditio (ait) proponebatur iis,*

¹ Hos late recenset idem auctor, lib. 7, de Visibil. monarchia.

*ut vel discederent a fide, vel ea tormenta subi-
rent.* Deinde vero aliorum tormenta et martyria
sub Elisabetha refert, quae omnia latius pro-
sequitur lib. 12, cap. 22. Post hos Didacus a
Yepes, Episcopus Tarazonen., in Anglicana
historia, veritatem hanc saepe confirmat; ma-
xime vero in lib. 1, cap. 14, haereticorum con-
silium et industriam detegit, causam religio-
nis sub nomine criminis læsæ majestatis invol-
ventium, ut sub illo prætextu ac calunnia Ca-
tholici interficerentur, et Martyrum gloriam
inter Christianos non consequerentur. Et lib. 2,
cap. 5, refert Andre. Filipatrum egregie de
his martyribus, qui ab Elisabetha facti sunt,
scribentem.

5. *Testimonium Card. Baron. de martyribus Angliæ.* — *Martyres a societate Jesu.* — Praeter-
ea illustrissimus Baron., in Martyrol., die 29
Decembris, quo die festum S. Thomæ Cantua-
riensis Ecclesia celebrat, post brevem ejus
Martyrii descriptionem subjungit: *Videre me-
ruit sacerdolum nostrum, ex hac parte felicissi-
mum, quamplurimos Thomas, sanctissimos sa-
cerdotes, aliosque nobilissimos viros Anglican-
os ampliori (liceat dicere) martyrio coronatos,
duuplicisque tituli coronis auctos, cum non so-
lum (ut Thomas) pro Ecclesiae liberitate, sed
pro fide catholica tuenda, restituenda ac con-
servanda, nobilissimo martyrio occubuerint;
ut inter alios, quos nuper S. Societas Jesu re-
lut agnos innoxios in sacris septis, sanctis eru-
ditionibus ad martyrium, acceptissimas Deo
hostias, saginavit; quos Romanum, quos Rhei-
mense sacra collegia, quae dixerim celsas tur-
res a facie Aquilonis, et fortissima propugna-
cula fidei, emiserunt ad triumphos, et prove-
xerunt ad coronas. Macte animo, macte vir-
tute, Anglicanorum nobilissime ac glorioissi-
me cætus, qui tam illustri militiæ nomen de-
disti, ac sacramento sanguinem spopondisti:
cænulor sane vos Dei cæmulatione, cum vos mar-
tyrii candidatos ac nobilissima purpuræ Mar-
tyres designatos aspicio. Compellor et dicere:
Moriar anima mea morte Justorum, et
siant novissima mea horum similia. Quæ ver-
ba dixit vir gravissimus, non solum de his
qui temporibus Elisabethæ, sed etiam de his
qui suo etiam tempore sub Jacobo propter
similem causam passi sunt, quos non paucos
fuisse, multorum fide dignorum relationibus
compertum habemus, licet nondum in histo-
ria aliqua typis mandata, quæ ad manus nos-
tras pervenerit, scriptum sit.*

6. *Grave testimonium pro Henrico Garnetio
Martyre, e Societate Jesu.* — Denique ita de

Anglicanis Martyribus sensit etiam Petrus Opmeerius, in novissimo opere chronographicō, ann. 1535; et Laurenti. Beyerlinck, in tomo 2 ejusdem chronographiæ, ann. 1606, ubi postquam descripsit sulphuream conjurationem contra regem Angliæ, et supplicia conjuratio-
nis auctoribus inficta, de Patre Henrico Garneto grave reddit testimonium, quod hoc loco transcribere, opportunum visum est: *Paulo post renit etiam in suspicionem sulphu-
reæ conjurationis, odio crediderim ejus, cui se adscripterat, Societatis Jesu, Henricus Gar-
netus, omni litterarum genere excullus. Qui tamen artibus illis nunquam se admiscuerat, obtestatus nihil se de iis palam rescivisse. Cata-
tesbiū in arcanis conscientiæ detectisse, quid-
quam in animo sibi esse quod religionem pro-
moveret, ita tamen verborum involucris id im-
plicuisse, ut regiæ necis mentionem nunquam fecerit. Acta judicii, et quæ tam adversus il-
lum quam ad ejus defensionem in medium allata sunt, editis libellis explicata fuerunt. Inter-
rim 28 Martii (alii tertiam Maii dicunt) in-
territus, et exorrecta fronte ad supplicii lo-
cum necemque trahitur, obtestatus se gaudere plurimum quod eam mortem invenisset, quæ sibi ad immortalitatem aditum reseraret. Neque ille solus in ejus facinoris suspicionem ve-
nerat, sed plures insuper, quorum nonnulli qui in Belsio degebant, ea macula aspersi feruntur. Dies quo conjuratio detecta primum fuit, in fastos relata, totique regno celebris ad peren-
nem rei memoriam esse jubetur.*

7. *Excluditur regis evasio.* — Scio ad hæc
omnia responsurum Jacobum regem, non esse
hīs auctoribus fidem adhibendam, tum quod
Pontificii sint, tum quod falsis rumoribus
fuerint decepti. Verumtamen cum omnium
istorum virorum non tantum fides in Deum,
sed etiam doctrina et prudentia nota sit,
et aliqui eorum in vitæ integritate et pu-
ritate fuerint illustres, credendum potius
illis est quam Protestantibus, qui et fidem ne-
garunt, et odio in Pontificem facti sunt infi-
delibus deteriores. Quapropter qui non ex alio-
rum relatione, sed ex certa scientia et expe-
rientialia loquuntur, ut Sanderus, et quos ipse
allegat, testes profecto sunt omni exceptione
majores. Qui vero audita referunt, non leviter
motis esse, verba ipsorum manifeste ostendunt.
Unde potius credendum est, regem in
his, quæ de judiciorum suorum legitimis proba-
tionibus affirmat, ab haereticis et Papæ hos-
tibus deceptum esse, quam tot viros sapientes
vanis rumoribus ductos esse, cum rem non ut

dubiam, sed ut certam affirment, et multi eorum, scriptis et testimoniis fide dignissimis, quæ proferunt, illa se didicisse testentur. Quod sine ullo falsitatis vel redargutionis timore fecit etiam illustrissimus Bellarminus, ut omittam alios Societatis Scriptores, qui testimonium huic veritati dederunt.

8. *Ex verbis regis demonstratur, personas quasdam, ab ipso imperfectas, pro Christo occubuisse.* — Prætermisis autem conjecturis et testibus, ex verbis ipsiusmet regis eamdem veritatem demonstrare possumus. Suppono enim ex dictis supra, lib. 1, § 22, in personis a regibus Angliæ imperfectis, nihil aliud desiderari posse, nisi ut propter Christum, seu, quod idem est, propter justitiam, fidem, aut veram religionem extinti sint, nam omnes aliæ conditiones ad martyrium requisitæ, et omnia indicia veri martyrii in eorum morte inventa sunt. Quia tam in fidei antiquitate, quam in animi constantia et patientia, neenon in verborum gravitate et prudentia antiquos martyres imitati sunt, ut in dicto capite declaravi. Unde neque rex ipse Angliæ, neque Protestantes omnes aliam rationem aut modum obscurandi hæc martyria invenire hactenus potuerunt, nisi negando religionis causa hos Martyres passos esse. Et fortasse ideo hanc excusationem prætendere ausi sunt, quia cum ex facto pendeat, difficilem probationem habere videtur; tam potens autem est veritatis vis, ut etiam suis verbis Jacobus illam negare, imo etiam occultare non potuerit.

9. *Martyres sunt, qui oblatam veniam mortis quam merentur, respuunt, ne Romanam fidem abnegent.* — Nam in præfatione, pag. 153, cum dixisset neminem, suo vel reginæ tempore, religionis causa esse ultimo supplicio affectum, probationem his verbis subjungit: *Nam quantumvis religioni sue deditus sit, quantumvis eam aperte et constanter profiteatur, nullum ei a legibus impendet capitum periculum, nisi comperto contra leges externo aliquo actu delinquisse, aut conjurationem consiliumve rei summæ perniciosum iniisse; exceptis tantummodo sacrificulis, cæterisque Pontificiarum partium, qui transmarinis regionibus sacris ordinibus initiantur, qui tot conjurationibus, tot proditionibus ab ipsis in Anglia, vel conceptis, vel laudatis infames, a nostris finibus sub perduellionis pena arcentur.* In quibus verbis primum notanda est regula generalis, in qua rex ait, eis, qui catholicam fidem aperte, et constanter profitentur, nullum a legibus impendere capitum periculum. Non

enim negat alias graves pœnas et afflictiones eis imminere, neque affirmare potest licere eis per leges, suam fidem profiteri his actibus et modis, quos ipsamet fides præcipit vel docet, ut ex dicendis patebit. Deinde notandæ sunt exceptiones: una est, *de his qui conjurationem inierunt*, de qua nihil dicere necesse est; nam si tali criminis legitime convicti fuerint, juste pro illo puniuntur, neque illa mors ad martyrium pertinet. Solet autem (ut quibusdam exemplis supra ostensum est, et generaliter fama prædicat) illis promitti pœnæ remissio, si Romanam religionem abjuren, et tunc si eum pœnitentia priorum delictorum patiantur, non carebunt gloria martyrii, quia tandem propter fidei constantiam mortem sustinent. Sed de hoc alias. Nune quod ad rem nostram pertinet, est altera exceptio de his, qui *externo aliquo actu contra leges deliquerunt*. Atque in hæc immorandum est, et cum illa, cætera, quæ de religione et exterminatione Catholicorum dicuntur, expendemus.

10. *Qui morte afficiuntur ob non servatam legem iniquam, martyres sunt.* — Ostenditur multos Catholicos qui ob transgressionem legum Jacobi regis occisi sunt, propter Christum passos esse. — Interrogo igitur de quibus legibus rex loquatur, an de pure civilibus, quibus latrones, homicidæ, et alii similes morte mulctantur, vel de legibus quibus Catholicæ, aut falsam sectam profiteri, aut obedientiam et potestatem Pontificis abjurare coguntur, aut actus religionis Catholicæ exercere, vel illam docere prohibentur. Profecto de prioribus legibus solis rex loqui non potest, alioqui facile convincetur falsitatis ejus assertio. Tum ex legibus allegatis capite præcedenti, tum ex factis ipsis universo orbi notis, tum etiam ex verbis regis in Apologia, ubi recusantibus jurementum nuper editum, mortem comminatur, ut capite etiam præcedenti ponderavimus, certaque relatione jam accepimus aliquot ob solam illam recusationem esse in Anglia imperfectos. Necesse est ergo ut de legibus in materia religionis disponentibus contra Romanam religionem loquatur. Hinc autem evidenter sequitur, eos, qui propter solam transgressionem talium legum interficiuntur, propter solam causam religionis et conscientiae interfici, ac subinde veros martyres esse; quia, ut dixi, nihil aliud ad verum martyrium in tali morte desiderari potest.

11. *Ob eamdem causam Martyres nascentis Ecclesiæ occidebantur.* — Probatur autem illatio, primo in legibus præcipientibus actus

veræ religioni contrarios, ut est jurare primatum reginae vel regis, et abjurare potestatem Papæ, vel nomen ejus ex omnibus libris dñlere, ut præcepit Henricus. Quia nemo potest talem legem servare, nisi contra suam conscientiam agendo, vel interius, vel exterius saltem Catholicam religionem negando; ergo idem est propter talium legum transgressionem, quod propter suam conscientiam et religionem immaculatam servandam interfici. Consequentia evidens est, et antecedens constat ex sententia Petri et Apostolorum, Actor. c. 5: *Obedire oportet Deo, magis quam hominibus.* Unde recte dixit Augustinus, epist. 166, *si contingat imperatorem in errore versari, et pro errore suo contra veritatem leges dare, qui non faciunt quod ille jubet, quia Deus prohibet, licet torqueantur, non puniri, sed probari nunc et postea coronari.* Similesque Patrum sententiás congerit Gratianus, 11, q. 3, c. 92 et sequentibus. Et confirmatur, quia non aliter omnes Martyres a principio Ecclesiæ passi sunt. Per edicta enim imperatorum contra fidem vel cultum veri Dei aliquid agere præcipiebantur, sub comminatione mortis, quam sustinere potius quam talibus obedire mandatis eligebant. Eodem autem modo puniuntur in Anglia talium legum transgressores. Atque ratio hæc et assertio locum habet, etiam in illis Angliæ legibus, quæ alias actus sacrilegos, ut participationem Calvinianæ Cœnnæ, et similes communicationes cum haereticis in eorum ritibus et Synagogis præcipiunt. Nam, licet in legibus non imponatur capitalis poena, nihilominus qualiscumque sit poena, illam propter talis legis transgressionem sustinere, est quædam martyrii participatio vel inchoatio, quæ si usque ad mortem sustineatur, poterit martyrium consummari, ut infra dicam.

12. *Martyres sunt qui propter violationem legum prohibentium actus religionis catholicae occiduntur.* — De aliis autem legibus vetantibus actus exteriores bonos, et ex fide et religione catholica profectos, ut sunt sacra facere, seu missas privatas dicere, absolvere poenitentes, Catholicos exhortari, ignorantes, vel haeresi deceptos docere, et schismaticos Ecclesiæ Romanæ reconciliare, et specialiter docere Papam esse caput Ecclesiae ubique existentis, etiam in Anglia, et similia; de his, inquam, legibus facile etiam probari potest, eos, qui ob transgressionem illarum interficiuntur, esse veros Martyres, et propter causam religionis interfici. Sunt enim hæc leges similes illi

præcepto sacerdotum et scribarum dato Apostolis, Actor. 4, quando *rocentes eos denunciabant, ne omnino loquerentur, neque docerent in nomine Jesu.* Quibus Petrus et Joannes responderunt: *Si justum est in conspectu Dei vos potius audire quam Deum, judicale, non enim possumus, quæ vidimus et audivimus non loqui.* Et iterum cap. 5, cum princeps sacerdotum Apostolos reprehenderet, dicens: *Præcipiendo præcepimus vobis ne doceretis in nomine isto,* etc., Apostoli responderunt: *Obedire oportet Deo magis quam hominibus.* Et cum ob eam causam caesi fuissent, ibant gaudentes a conspectu Concilii, quoniam digni habiti sunt pro nomine Jesu contumeliam pati. Ubi expendo, licet sacerdotes propter transgressionem sui præcepti Apostolos cædi fecissent, illos nihilominus existimasse pro nomine Jesu passos fuisse: unde si passio illa usque ad mortem pervenisset, sine dubio fuisse consummatum martyrium. Ex quo loco generatim colligimus, si præceptum vel lex humana prohibeat actus veræ religionis catholicæ, qui ad ejus defensionem, conservationem vel propagacionem ordinantur, et propter ejus transgressionem aliquis a fidei persecutore occidatur, vere interfici propter causam religionis, etiam si tyrannus propter legis suæ transgressionem poenam illam imponi dicat. Est enim omnino eadem ratio. Cum ergo per has leges Angliæ similes actus religionis catholicæ prohibeantur, illæ nihil obstante quominus omnes, qui propter usum talium actionum interficiuntur, propter fidem et religionem moriantur.

13. Ratio autem est, quia leges illæ sunt iniquæ, et nullam obligationem inducere possunt, tum quia sunt civiles, et in materia religionis contra religionem disponunt; tum quia prohibent actus de se licitos et sanctos, in spiritualem perniciem Ecclesiae quæ in illo regno est. Et ideo illas leges non observare nulla est culpa; imo, si fiat prudenti modo et sine temeritate, est insignis actus fortitudinis et religionis, et signum magnæ charitatis; ergo mors illata propter tales actus re vera non est poena transgressionis legis, quia ubi lex nulla est, etiam transgressio est nulla, et consequenter nulla culpa; ergo nec vera poena esse potest. Superest ergo ut sit tantum persecutio religionis, et afflictio seu passio talis personæ, solum quia talem religionem profitetur aut defendit, vel prædicat; hoc autem est pati propter causam religionis, et propter Christum, sicut patiebantur Apostoli. Hæc autem ratio procedit evidentius, quando

actio, ab homine prohibita, a Christo est præcepta; tum quia homo patitur ne hominem Deo præferat, juxta illam Apostolorum sententiam: *Obedire oportet Deo magis quam hominibus*; tum etiam quia in illo articulo obligat Christi præceptum: *Nolite timere eos qui occidunt corpus*, Matt. 10. Nam, ibi ait auctor Imperf., hom. 25: *Non solum ille proditor est veritatis, qui transgrediens veritatem mendacium loquitur, sed etiam ille qui non libere veritatem pronunciat, quam libere pronunciare oportet*. Unde subjungit, non solum sacerdotem, sed etiam laicum esse debitorem profitandæ fidei in tali necessitatibus articulo. Quomodo ergo non erit Martyr, si ob eam causam interficiatur?

14. *Qui interficitur, quod actum religionis catholicae exerceat, martyr existit.* — Addo vero: licet talia opera lege humana prohibita possint aliquando omitti sine transgressione præcepti divini, vel quia sunt tantum de consilio, ut vovere castitatem, vel religionem profiteri, vel quia si cadunt sub affirmativum præceptum Dei vel Ecclesiae, vel illud non obligat pro tali tempore, vel cum tot periculis, et ideo posset optime pro tunc omitti, sine ejusdem transgressione; nihilominus si quis, non obstante iniqua prohibitione, et tyrannica comminatione, propter zelum fidei illos actus exerceat, eo modo quo sibi licent, et jucicat ad Dei gloriam, et utilitatem animarum expedire; si propterea occidatur, erit vere martyr, quia non ut maledicus aut fur, vel inobediens regi, cuius lex est iniqua, sed ut Christianus Catholicus patitur, et propter justitiam interficitur. Non enim solum homo operatur justitiam, quando obedit præcepto, sed etiam quoties operatur propter Christum, et Dei gloriam, licet tunc non obligetur; ergo qui patitur ne hanc justitiam voluntariam, ut sic dicam, id est, non necessariam tunc ex præcepto, Deo autem gratam et proximis utilem, omittat, revera propter justitiam patitur; ergo si interficiatur propter eamdem causam, vere occiditur propter causam religionis, ac subinde est verus martyr.

15. Cum ergo rex fateatur in Anglia interfici Pontificios propter transgressionem talium legum civilium, negare non potest quin propter causam religionis interficiantur, et consequenter neque inficiari potest esse veros martyres. Nam lex injusta et invalida non potest impedire martyrii veritatem, nec veram causam talis mortis immutare, quæ causa revera sola professio talium actionum, quæ ideo

displacet regi suisque consiliariis, quia displacet illis Romana religio, et timent ne per illos actus vel conservetur vel instauretur in illa Insula, et ne contraria secta confundatur. Nec refert, si dixerint prohiberi hos actus, non propter religionem, sed propter civiles rationes, quia tales homines seditiosi sunt, et coniurationem movent, etc. Nam imprimis majori ex parte hæc sunt falsæ calumniae et prætextus ad evertendam religionem catholicam. Dato enim (et non concessso) quod aliqui Catholicci in hoc aliquid peccaverint vel excesserint, non ideo in omnes Catholicos redundare debet infamia, hoc enim contra rationem et justitiam est, ut constat. Maxime vero iniurium est ut ob eam causam ipsa catholicæ religio (ut sic dicam) infametur, et persecutio nem patiatur, usum ejus, et omnia media necessaria vel utilia ad illius conservationem vel propagationem subditis prohibendo. Deinde multa sunt legibus Anglicis sub poena capitis prohibita, et punita, quæ ad evitandum illud periculum, si quod esset, nec necessaria nec utilia sunt. Ut, verbi gratia, prohibere affirmare Papam esse caput Ecclesie, nihil profecto ad illum finem confert. Quin potius illa lex efficit ut fideles Papæ obedientes cogantur sese abscondere, ex qua violentia et similibus solent tales coniurations prodire. Et idem est de prohibitione usus sacrificii, et aliarum rerum sacrarum, ut imaginum, et de administratione sacramentorum ritu catholicō. At vero si subditi libere suam fidem profiteri sine rentur, et essent cogniti qui a Pontifice sunt, occasio coniurationis ac similia pericula essent sublata; ergo hoc colore non possunt tales leges, vel mortes, quæ sub illarum titulo fiunt, a persecutione causa religionis excensari. Ex quo tandem dicimus, si quod est periculum insidiarum et coniurationum, ex pertinacia ipsorum haereticorum nasci. Et ideo si ad vitandum periculum volunt potius religionem catholicam funditus evertere, quam a sua pertinacia desistere, hoc ipso evidenter ostendunt se catholicam religionem persecui, ut suam haeresim retineant, et in illa temporalis statum conservent; ergo quando propter similem causam sacerdotes vel alios fideles occidunt, propter causam religionis illos perimunt, ac subinde tauquam veros martyres, velint, nolint, eos Deo mactant.

16. *Obedientiam Pontificis profiteri, nullum est perduellionis crimen.* — *Idem confirmatur edictio Jacobi regis pro juramento fidelitatis.* — Nec movere debet Catholicos aut dubia-

tem aliquam inferre, quod leges Angliae damnent eos qui talia agunt, tanquam perduelliones, tradidores, aut hostes occultos regis vel Reipublicæ; non enim apud Deum, sed apud depravatum judicium hominum tales censeri possunt. Conditores enim talium legum dignitatem Pontificis contrariam esse censem regiae majestati, et ideo crimen læsæ majestatis appellant, obedientiam Pontificis profiteri, cum tamen negare Pontifici obedientiam crimen sit læsæ majestatis divinæ, quæ vices suas Pontifici in terris commisit, et ideo obedientia, quæ illi tribuitur, Deo tribuitur, et non potest esse contraria fidelitati justæ, et principibus temporalibus debitæ; cum Christus ipse docuerit, non repugnare, quæ sunt Cæsaris dare Cæsari, et quæ sunt Dei Deo. Hoc autem esse præcipuum institutum et artificium talium legum, intelligi facile potest ex his quæ refert Sander., de Tempore Elisabethæ, lib. 3, pag. 469, ubi de SS. Confessoribus ait: *Cum cæteras confictas criminationes in judicio facile depulissent, mox ipsorum secretiores cogitationes, et futura facta, quibusdam captiosis interrogationibus super Bulla declaratoria Pii V fit inquisitio; nimirum, si sententiam illam legitimam fuisse judicent? Si putent in Papa esse potestatem reges exauktorare, ac subditos ab ipsorum obedientia liberos reddere? quid sint facturi ipsi, aut aliis in conscientia præscribent, si bellum a quoquam inferatur propter religionem; ac hujus generis alia; in quibus si quid pro Pontificia potestate, vel prudentissima veterum moderatione dixissent, continuo læsæ majestatis, et non religionis rei decernebantur. Et postea confessione cujusdam Joan. Nicolai, et variis ac illustribus exemplis idem late confirmat, ac tandem ex legibus in quadam regio edicto contentis id comprobat, præcipue usque ad pag. 484. Nos vero id ipsum convincere possumus ex regis Jacobi edicto pro suæ fidelitatis, vel potius abnegationis Pontificieæ potestatis juramento, facto ad proclamacionem, seu ad petitionem Parlamenti, anno 7 regni ejus, cuius tenor, omissa proemio, est: *Per has præsentes stricte præcipimus et mandamus, ut domini, et ceteri nostri secretioris consilii Archiepiscopi, Episcopi, Præsides, et custodes pacis, etc., ad quos spectat hoc negotium, ut administrent huc juramentum omnibus personis, et præcipue his quibus potest et debet administrari, juxta statutum factum in tertio anno nostri regni, et quod in recusantes animadvertant juxta leges nostras respective. Et quamvis poterimus propter amorem erga omnes**

subditos nostros (quibus per providentiam Dei loco patris sumus) optare, ne ullus inveniretur intra terminos nostrorum dominiorum, qui illud recusaverit, nihilominus si quis cor suum ita abalienaverit a serenissimo principe suo, ut illud, vel illius ullam partem externæ potestati subjecerit, in derogationem nostræ coronæ et dignitatis, severitatem et justitiam nostrarum legum, tali debitam declarabimus; sicut e contra favor noster et benevolentia bene meritis subditis debetur.

17. *Nihilominus, quia alienatio hæc a nobis et nostra corona, est præparatio quædam ad ulteriorem et periculosiorem defectionem, et ideo tendit ad crimen læsæ majestatis, resolvimus reservare nobis et nostro usui totum ordinem, potestatem, et dispositionem circa hunc casum, sicut et penas ejusdem. Ex quibus verbis satis constat, has penas revera non infligi, nisi propter confessionem primatus Pontificis, vel propter non abnegatam potestatem ejus, quæ manifeste est causa religionis; ut autem gloria Martyrum obsecratur, tegi causam veram subficto velamine criminis læsæ majestatis, poenarum autem severitatem et injustitiam sub blandis verbis clementiae et paternæ providentiae occultari, in quo rex Angliae antiquos imperatores, qui ab Ecclesia defecerunt, imitatur. Sic enim de Constantio refert Hilarius, libro contra illum, quod Catholicos persecutatur, partim blanditiis, partim terroribus et afflictionibus, sine irridia (inquit) gloriosarum mortium. Unde in hunc modum contra Constantium proclamat: *Contra Deum pugnas, contra Ecclesiam særvis, Santos persequeris, prædicatores Christi odisti, religionem tollis, tyrannus non jam humanorum, sed divinorum. Et infra: Subrepis nomine blandiendi, occidiis specie religionis, impietatem peragis, Christi fidem Christi mendax prædicator extinguis.**

18. Similiter Julianus Apostata, *callide et artificiose* (ut ait Nazianzenus, oratione tercia, alias prima, contra illum) bellum contra Christianos movit, tyrannidi clementiam tanquam hamo escam circumponens, ac vim persuasione verborumque blanditiis illiniret. Et subdit Nazianzenus: *Etenim ut alia, ita cum quoque quo Martyres affici solent, honorem athletis invidebat. Ac proinde id molitur, ut ipse quidem et vim afferat, et interim afferre non videatur. Quod late prosequitur. Et similia repetit orat. 4, quæ est 2 contra eundem. Oratione autem 32, postquam de Juliano sermonem fecit, de Valente subdit: Secundus nihil humanior illo fuit; imo eo*

etiam acerbior, quod Christi nomen ferens, pseudochristus erat, Christianisque probrum ac dedecus, quibus et facere impium, et pati inglorium erat; quod nec injuriam quidem accipere viderentur, nec illustre martyrii nomen cruciatibus accederet, verum hic quoque fucus veritati fieret, ut qui tanquam Christiani patientur, tanquam impii cruciatu afficerentur. Nihil est ergo quod Catholici de istorum Sanctorum martyrio dubitent; nam juxta regulam Augustini¹, cum sint certi, eos in unitate Ecclesiae pro eadem unitate et obedientia mortuos esse, dubitare non possunt quin sint tanquam Martyres coronati, et interfectorum eorum tanquam persecutores martyrum esse judicandos. *Nemo igitur* (ut Cyprianus dixit) *infumet Martyrum dignitatem, nemo eorum glorias destruat et coronas. Manet incorruptæ fideli robur incolume, nec dicere aut facere aliquid contra Christum potest, cuius et spes, et virtus et gloria omnis in Christo est*².

19. Qui varie pro Christi fide rexantur, martyrii gloria non carebunt. — Addere tandem possumus ad fidelium consolationem, Catholicos diu pro fide vexatos, licet non sint violenter pro fide interfecti, si in ea tribulacione constanter usque ad mortem perseverent, sive in montibus et solitudinibus fugiendo errantes, sive in vinculis et carceribus afflicti, sive voluntariis vel coactis exiliis peregrinantes, sive speluncis et cavernis terrae delitescentes, sive aliis modis, et egestate multa incommoda patienter sustinentes, usque ad finem vitae pervenerint, non fore privandos gloria vel mercede Martyrii. Cujus veritatis testis sufficiens mihi est Cyprianus, ep. 5, 6 ad Thibarit., quos ad martyrium exhortans, ait: *Si fugientem in solitudine ac montibus latro oppresserit, sera invaserit, fames, aut sis, aut frigus affixerit, vel per maria praecipi navigatione properantem, tempestas ac procella submerserit, spectat militem suum Christus ubicumque pugnantem, et persecutio- nis causa pro nominis sui honore morienti præmium reddit, quod daturum se in persecutione promisit. Nec minor est martyrii gloria non pullice et inter multos periisse, cum pereundi causa sit, propter Christum perire. Sufficit ad testimonium Martyrii sui testis ille, qui probat Martyres et coronat. Sieque dixit idem Cyprianus, ep. 18 ad Lucium Papam: In confessoribus Christi dilata Martyria non meri-*

tum confessionis minuunt, sed magnalia divinæ protectionis ostendunt.

20. *Duplex modus predictas afflictiones tolerandi.* — Hæc autem tolerantia afflictionum et peccatarum usque ad mortem duobus modis potest accidere: uno modo, cum tanta corporis violentia et invaletudine ex ipsis afflictionibus, vel earum occasione provenientibus, ut magna ex parte inde mors proveniat, aut nimium acceleretur, ut contingit in diuturno carcere, vel in exilio ad loca insalubria, in longa et periculosa navigatione, vel in tanta rerum penuria, ut gravibus et continuis incommoditatibus corpus extenuetur, donec extinguitur. Et in his casibus in omni proprietate et veritate martyrium consummatur, et ita solet Ecclesia eos, qui hoc modo pro Christo moriuntur, ut veros martyres colere, eorumque facta celebrare. Alio vero modo fieri potest ut, licet quis vincula, aut exilia, vel alias similes afflictiones usque ad mortem pro Christo sustineat, nihilominus afflictiones illæ non sint causa mortis, sed suo naturali cursu proveniat; et tunc, licet dubium inter Theologos sit an illud fidei testimonium usque ad talem mortem redditum, ad nomen et specialem martyrii aureolam obtinendam sufficiat, certum nihilominus est, copiosam martyrii gloriam et mercedem illi deesse non posse. Nam qui sic perseveravit, revera implevit conditionem a Christo postulatam: *Qui me confessus fuerit coram hominibus; unde Christum etiam ipsum promissionem suam implere necesse est, Confitebor et ego eum coram Patre meo.*

21. Et in his qui sic patiuntur, maxime locum habet quod Augustinus ait, ser. 46 de Temp.: *Non martyrium sola effusio sanguinis consummat, nec sola dat palmam exustio illa flamarum. Pervenitur non solum occasu, sed etiam contemptu carnis ad coronam.* Et serm. 232 de Temp.: *Quicumque pro veritate testimonium dederit, quidquid pro testimonio veritatis et justitiae pertulerit, totum ei Dominus pro martyrio computabit, utique in ea confessione usque ad mortem perseverando. Et sic etiam in his Confessoribus maxime completur, quod Sancti Patres sæpe dicunt, martyrium non deesse ubi voluntas non deest, sicut dixit Chrysostomus, Psalmo 95: Martyrium non tantum eventu estimatur, sed etiam proposito. Et Cyprianus, epistol. 44: Non contristetur aliquis ex vobis, quasi illis minor, qui ante vos tormenta perpessi, victo et calcato saeculo ad Dominum gloriose iii-*

¹ Augustinus, de Unit. Eccles., l. 29.

² Cyprianus, lib. de Laps.

nere venerunt. Dominus scrutator est renum, et cordis arcana perspicit, et intuetur occulta. Ad coronam Dei promerendam sufficit ipsius solum testimonium, qui judicaturus est.

CAPUT XII.

AD EA, QUÆ CONTRA SECUNDUM BREVE PONTIFICIUM ET CONTRA CARDINALIS BELLARMINI EPISCOPALAM REX OBJICIT, RESPONSIO.

1. Regis in Cardinalis Bellarmini brevitatem redargutio.— Inter alia arrogantiæ signa, quæ rex in Praefatione ex Apologia Bellarmini ejusque response enumerat ac reprehendit, unum est, quam in scribendo brevitatem rex tenuerat, eamdem ipsum Bellarminum in respondendo sequi voluisse, et addit : *Quo compendio in secundo Pontificis Brevi confutando usus eram, eodem in me voluit uti, meoque exemplo sese pene intra unius paginæ angustias coercere.* Ut ergo similem reprehensionem vitarem, omnemque umbram occasionis ejus effugerem, sicut in ceteris hactenus feci, in hoc ultimo puneto copiosam reprehensionem serenissimo regi dare desideravi. Nihil autem vel in ipso Brevi, quod nova defensione vel probatione indigeret, neque in oppugnatione regis, quod peculiare responsum postularet, inveni; ideoque satius duxi in eamdem regis offensionem et reprehensionem incurrire, quam vel jam dicta repetere, vel superfluis verbis et otiosis cartas onerare. Ideoque breviter posterius deeretur Pontificis, ejusque rationem explicabo ; deinde nihil difficile contra illud a rege objici eadem brevitate ostendam ; tandemque simili modo circa epistolæ Bellarmini confutationem discurram.

2. Proponuntur præcipuae decisiones secundi Brevis Pauli V.— Pontifex igitur in hoc posteriori Brevi nullum novum onus vel obligationem Catholicis Anglis imponit, sed prius Breve iterum confirmat, distinctiusque explicat in eo duo facta esse. Unum est, declarare non esse licitum in conscientia hoc juramentum fidelitatis præstare ; aliud est, proprio etiam præcepto illud prohibere, ut omnis occasio tergiversandi vel dubitandi tolleretur. Insuper etiam declarat, prius Breve non solum motu proprio, et ex certa scientia, verum etiam post longam et gravem deliberationem de omnibus, quæ in juramento continentur, adhibitam, fuisse scriptum, ideoque omnino servandum esse, omni interpretatione secus sua-

dente rejecta. Ratio autem vel necessitas hujus novæ declarationis seu confirmationis fuit, quia, ut ipsemet Pontifex refert, nonnulli, vel subditi, vel seductores regis, rumorem in Anglia sparserant, Breve vel fictum esse, vel non legitime, et ex certa scientia, sed per surreptionem aliquam fuisse expeditum, quo prætextu aliqui, illo contempto, juramentum non recusabant. Quam fraudem et renitentiam versutiei adversarii humanæ salutis idem Pontifex benigne ac prudenter tribuit, ut infirmiorum fidelium fragilitatem excuset.

3. Objectiones cum rex non haberet contra secundum Breve, verborum exaggeratione utitur.— Rex autem Angliæ cum nihil haberet quod contra verissimam Pontificis declarationem et necessariam prohibitionem objiceret, sive ab auctoritate, sive a ratione petitum, in verborum exaggerationem prorumpit, verbaque ipsiusmet Pontificis, quæ proxime adduximus, arripit, et in ipsum convertit, dicens, nulla fraude ita potuisse dæmonem Catholicis Angliæ per mille annos nocere, sicut hujus Brevis expeditione Papa illis nocuit. Quia ex illo hoc magnum (scilicet) incommodum sequitur, quia multi etiam sacerdotes, qui juramentum admiserant, illud abjurare cogentur ; atque ita fiet ut duo juramenta fidelitatis suo regi exhibita pejerent. Unum est illud quod omnes, qui sub regno nascentur, facite jurant, aliud hoc quod posterius admiserunt. *Unde sequitur* (inquit) *neminem posse in Anglia Romanam religionem profiteri, nec salutem animæ suæ curare, qui non fidelitatem suam erga principem cognitam et juratam exuerit et ejuraverit.* Nihilque aliud contra hoc posterius Breve objicit.

4. A quo spiritu forma il'a jurandi inventa fuerit. — *Satisfit incommodo a rege illato.*— Non est autem difficile in præsenti puncto probare spiritus, et ostendere an institutio juramenti ejusque exactio potius quam ejusdem reprobatio et prohibitio ex spiritu Satanæ fuerit, nam ex fructibus seu effectibus eorum discerni possunt. Finis enim juramenti est, avertere fideles ab obedientia ecclesiastica sub colore obedientiæ civilis, eos inducendo ad abnegandam Pontificiam potestatem, sub prætextu jurandi regi fidelitatem. Unde fructus talis juramenti, si exhibeat, erunt schismatis professio, confirmatio et augmentum, fidei abnegatio, et illius regni integra in spiritualibus ruina, et animarum perditio. Est ergo perspicuum, juramentum illud ab adversario humanæ salutis excogitatum esse, et in cordi-

bus Protestantium regi consulentium immisum; et ab eodem spiritu omnia verba, et media quibus tale juramentum defenditur, proficiunt. E contrario vero reprobationem et prohibitionem ejusdem juramenti a contrario seu divino spiritu inspiratam esse, tum quia proprium opus spiritus Dei est dissolvere opera diaboli; tum etiam quia qui prohibitionem illam plena fide et constanti obedientia suscepint, et suis conscientiis consulent, et schismati ac infidelitati cum spe magni fructus et mercedis resistant. Qui vero sive ex animi fragilitate, sive per errorem et deceptionem tale juramentum admiserunt (ut rex affirmat), lapsum et errorem suum per clamorem Pastoris agnoscentes, dissolvent colligatione s' impietatis, et iniquum juramentum abjurabunt. Hoc enim non solum inconveniens non est, ut idem rex infert, sed potius est ad salutem necessarium, et inter præcipuos effectus hujus Brevis computari debet.

5. Neque propterea sequitur altera pars quam rex involvit, quod, scilicet, abjuretur juramentum obedientiae et fidelitatis ad regem, cum ipsis subditis congenitum. Sive enim per hoc juramentum intelligat obligationem illam, quæ veluti hereditario jure pervenit ad omnes subditos, et ad eorum filios, ex fidelitate a suis parentibus et majoribus suis principibus jurata, sive etiam loquatur de expresso juramento lictio et honesto a subditis facto de fidelitate politica regi debita, neutro modo sequitur abjurari naturale illud vinculum; seu juramentum obedientiae civilis, ob retractionem juramenti a rege inventi, et ab aliquibus admissi. Quia in eo, ut ostendimus, non promittitur regi civilis obedientia justa et honesta, sed directe abnegatur Pontifici obedientia et potestas, et ideo quando retractatur, abjuratur abnegatio, ut sic dicam, ac proinde recognoscitur Pontificis potestas, et ad ejus obedientiam redditur. Regi autem solum negatur illa obedientia, quæ obedientiae Pontificis ac Dei fuerit contraria, quod contra civilem, naturaliterque debitam non esse, saepissime declaratum et probatum est.

6. *Satisfit ultimæ illationi regis.* — Unde ad ultimam regis illationem jam respondimus. Nam si rex loquatur de obedientia, quam ipse desiderat, quæ nullam supra ipsum vel directe in spiritualibus, vel indirecte in temporalibus recognoscat, optime infert neminem posse in Anglia Catholicam fidem tenere et servare, talem obedientiam regi jurando, vel tale juramentum, si illud aliquando præstitit, non re-

tractando. Neque rex in hoc dubitaret, si, ut tenetur, crederet, extra unam Catholicam et Apostolicam Ecclesiam non posse esse salutem aut fidem; quia ubi non est unio cum capite, ibi est schisma et divisio ac separatio ab Ecclesia, ideoque fieri non potest ut qui juramentum illud admiserit, et in eo perstiterit, in statu salutis existat. At vero si de pura ac legitima obedientia civili rex loqueretur, nullius momenti esset illatio, quia haec obedientia civilis cum Ecclesiastica non pugnat, et in aliis regnis Catholicis servant subditi Romanam religionem, et consulunt saluti suæ, et nihilominus non exiunt nec abjurant fidelitatem regi suo debitam, imo illam ampliori fide, et cum majori regum pace ac securitate observant.

7. *Regis objectiones contra epistolam Bellarmini consultantur.* — *Prima.* — *Secunda.* — Post impugnata Pontifica decreta invehitur rex in epistolam Cardinalis Bellarmini, cui quoad hanc partem respondere non duxi operæ pretium, tum quia Cardinalis doctissimus solita eruditione id egit plenissime; tum etiam quia fere nihil ad causam pertinens attingit, eni in superioribus satisfactum non sit. Quod ut omnibus sit evidens, sigillatim et per partes id brevissime declarabo. Primum enim Bellarmino tribuit, quod juramentum fidelitatis cum juramento primatus confaderit. Sed objectionem hanc Cardinalis ipse satis confutat. Et ideo nos in principio hujus libri utriusque juramenti formulam proposimus, ut nullus tergiversationis aut ambiguitatis locus relinquatur. Deinde, in versic. *Atque ut justitiam*, etc., quatuordecim assertiones proponit, quas omnes, vel saltem alias ex impugnatione juramenti sequi affirmat. Sed de illis c. 6 satis dictum est.

8. *Tertia.* — *Quarta.* — *Quinta.* — *Falso imponuntur regum cades Romanis Pontificibus.* — Tertio, in § *Atque ut clarius*, transitum facit rex ad persuadendam justitiam juramenti fidelitatis Conciliorum auctoritate. Sed, ut notavi c. 2 hujus libri, illa Concilia de juramento longe diverso loquuntur. Unde non immerito possumus nos in regem retorquere errorem, quem ipse in principio hujus impugnationis Bellarmino tribuit, nimirum, quod ad confirmandum juramentum a quæstione prorsus alienum probationes non necessarias congerat, ut dicto loco latius declaravi. Quartto, in § *Nunc vero*, quod pag. 65 habetur, per multas paginas digreditur, verbis injuriosis, seu conviciis et contumeliis Bellarminum

insectando et arguendo ; in omnibus autem illis nihil vel ad causam, aut doctrinam pertinens, vel discussione dignum invenio; qualia cumque tamen illa sint, ab eodem Bellarmino docte refelluntur, quanquam non immerito contemni potuissent. Quinto, pag. 84, § *Nunc autem, unde digressus fuerat* (ut inquit) regreditur, statim vero alio divertitur, ut Bellarmine alterius contradictionis redarguat, quod ut efficiat, probandum assumit Pontifices multos imperatores vexasse, inquietasse, et usque ad interitum persecutos esse. Inducit que varia exempla imperatorum et regum, quos Pontifices deposuerunt. Sed inter ea multa falsa veris permiscet, ut eruditus Bellarminus ostendit. Quocirca quæ vera sunt confirmant veritatem Catholicam, ut illa referendo in lib. 3 diligenter expendimus, singulorum circumstantias ponderando; quæ autem sunt falsa, contempnenda sunt, nam potius arguentem redarguunt. Et ita neutra ostendunt, Pontifices regum cædes per sicarios vel insidias fuisse machinatos, quod Bellarminus negaverat, nam falsa nihil probant, veræ autem historiae solum convincunt, causa legitima interveniente, et justa causa exigente, sæpius Pontifices contra iniquos principes, servato juris ordine, usque ad depositionis sententiam processisse.

9. *Sexta.* — *Quod probatione eget supponitur, non probatur.* — Sexto, in pag. 90, versic. *Nam cum illud constet, etc.*, propinquius rex accedit ad causam de juramenti malitia, vel probitate tractandam, parum tamen in ea insistit, statim enim per similitudines, vel exempla a Bellarmino adducta divagatur, in singulis disparitatem, tanquam nodum in scirpo quærens. Nihil vero in defensionem juramenti, vel ad ostendendam ejus probitatem adducit, præter illud generale principium, quod juramentum fidelitatis civilis regi præstitum sanctum est. Cum autem difficultas versetur in applicatione illius verissimi principii ad hoc juramentum, de quo est controversia, ostendendo illud esse purum juramentum civilis obedientiæ, nihilque religioni catholice contrarium continere, sæpe quidem hoc supponit et repetit, nunquam vero illud probat neque defendit, nisi Pontificis potestatem abnegando. Et ideo in hoc solo puncto insistendum censuimus; reliquæ enim similitudines, vel exempla quæ ad exhortationem magis quam ad probationem feruntur, supponunt doctrinam catholicam, et illa stante, sunt optima, nec a rege refelluntur, nisi negando Catholicis.

cam doctrinam, ut recte notavit idem Bellarminus, omnes epistolæ suæ partes, et exempla ac testimonia defendens et confirmans. Quia vero verba quædam Gregorii et Leonis Pontificum, quæ rex late insectatur, pagin. 106 usque ad 116, ad causam de primatu pertinebant, ea nos in libro 3 late tractavimus. In secundo vero refellimus quæ in pagin. 117, contra communionem sub ultraque specie, et contra Missas privatas repetit.

10. *Septima.* — *In uno loco tacere quod in alio dicitur, non est contradicatio.* — Septimo, a pagin. 117 usque ad 126, iterum in Bellarminum et Sanderum, ac denique in Thomam Morum et Roffensem invehitur, et, licet omnia quæ attingit, ad punctum causæ non pertineant, tamen quia fidei doctrinam aliqua ex parte attingunt, de singulis aliquid breviter dicendum putavi. Primo enim reprehendit non Bellarminum, sed Ecclesiam, quæ in verbis consecrationis Corporis non addit verba illa, *quod pro robis datur*, contra Lucam, inquit, et Paulum. Additque habere se adversarium et hostem Bellarminum, confitentem illa non posse conciliari. At quis unquam dixit esse oppositionem inter aliquos de eadem re loquentes, quorum alter rem integre narrat, alter partem refert sine discrepantia, partem vero tacet. Si hæc contradictio vel oppositio est, infinitæ sunt oppositiones inter Evangelistas, quæ inter se conciliari non poterunt. Imo in hoc codem puncto Matthæus et Marcus opponentur Lucas et Paulo, quia tacuerunt particulam *quod pro robis*, quam Lucas et Paulus posuerunt. Quin etiam erunt Lucas et Paulus quodammodo inter se oppositi, quia non eodem verbo usi sunt, sed alter dixit, *quod pro robis datur*; alter, *quod pro robis tradetur*. Quod adnotare libuit, ut qui hæc legerit, advertat quibus prætextibus Protestantes Catholicam Ecclesiam relinquant, ejusque Apostolicos ritus reprehendere audeant. Constat enim evidenter ibi nullam esse oppositionem, quia neque tacere est contradicere, neque Paulus aut Lucas dixerunt, omnia illa verba esse necessaria ad Eucharistiam conficiendam, neque verisimile est Matthæum et Marcum aliquid substantiale huic sacramento prætermissee; blasphemum autem et hæreticum est cogitare, Petrum mutilatam et insufficientem formam Eucharistiæ Ecclesiæ Romanæ ac Catholicæ tradidisse, de qua re alibi a nobis ex professo disputatum est.

11. *Illustre Thomæ Mori et Roffensis martyrium a calunnia vindicatur.* — De persona

Sanderi dicit rex, *esse male meritum de patria sua*, quod probat ex ejus sententiis, seu assertionibus, octoque recenset, quas hic transcribere non est necesse: nam in libris ejus videri facile possunt¹. Ex illis autem aperte colligitur, non alia ratione dici Sanderum male meritum de patria sua, nisi quia veritatem Catholicam docuit, vel quia regibus schismaticis non adhæsit, neque adulatus est, vel denique quia propter fidei constantiam exul a patria mortuus est. De Thoma Moro et Roffensi, insignibus viris et illustrissimis Martyribus, licet negare non potuerit imperfectos fuisse, quia decreto de primatu regis Angliæ in spiritualibus assentire noluerunt, addit, non ob hanc solam causam, sed etiam fuisse occisos, quia secundas nuptias regis approbare recusarunt. Quod specialiter dicit de Moro, idem tamen de Roffense intelligit, nam de utroque ita historiæ referunt. Subjungit autem rex, *quæ meo judicio valde carnalis causa martyrii fuit*. Ego vero judico, hoc regis judicium satis ostendere quam sit potens error semel imbibitus ad pervertendum prudens judicium, etiam in rebus quæ luce meridiana clariora sunt. Quid enim detestabilius esse potest, quam dicere malum bonum, aut quid gravius quam approbare falsa pro veris, in rebus præcipue morum, et quæ salutem æternam concernunt? Cum ergo secundæ nuptiæ regis Henrici adeo essent detestabiles, ut contra omne jus divinum et humanum fuerint sine valore et effectu contractæ, etiam si nulla alia causa moriendi intercessisset præter recusationem approbationis illarum, illa sine dubio esset ad martyrium sufficiens. Nam, licet adulterium et polygamia, vivente prima et vera conjugi, carnalia sint, illa tamen damnare opus virtutis et valde spirituale est, et propter constantiam in tali opere mortem constanter ferre, egregia est causa martyrii. Sic enim mors Joannis Baptiste, ut sentit Ecclesia, illustre fuit martyrium, quamvis Joannes ex odio concubinae potius quam uxoris, quia regi prædicabat: *Non licet tibi habere eam*, imperfectus sit, quia illa causa, licet ex parte regis et Herodiadis satis carnalis fuerit, nihilominus ex parte Joannis fuit spiritualis, utique testimonium veritatis, propter quod occisus est. Ita ergo contigit Moro et Roffensi, ideoque ex hoc capite non obscuratur, sed illustrius fit martyrium. Reliqua ve-ro, quæ de his sanctis viris rex detrahit, ad ea-

Iumnias hæreticorum pertinent, quibus ipse fidem adhibet, et ideo etiam scriptores et conventicula hæreticorum Angliæ Roffensi opponit contra totius orbis auctoritatem et consensum, quod frivolum est, ut egregie Bellarminus prosequitur.

12. *Octava*.—Octavo, in § *Denique illud*¹, etc., regiam dignitatem, et potestatem ex Scriptura veteris et novi Testamenti persuadere aggreditur, sed frustra laborat, quia dignitatem et potestatem legitimam regis temporalis nemo negat, spirituale autem potestatem regis, aut exemptionem ejus ab obedientia Prælatorum Ecclesiæ, illa testimonia non probant, et aliis certissimis improbantur, ut in lib. 3 ostensum est, ubi de testimoniiis quæ hic rex congerit, copiose diximus. Et inde satis perspicuum est quam sint frivclæ oppositiones, quas rex fingit inter modos loquendi Scripturaræ et Bellarmini de regum temporalium dignitate et potentia, quibus ipse Bellarminus satis respondet. Sicut etiam refellit quæ rex postea subjungit adversus titulos, *Pontifex maximus*, vel *caput fidei*, quibus solet Papa decorari, de quibus et de pluribus aliis nos etiam in lib. 3 diximus. Ideoque (ut dixi) in tota hac parte Apologiæ nihil amplius immorandum censui.

OPERIS CONCLUSIO, ET AD REGEM ANGLIÆ PERORATIO.

13. Qua verborum gravitate et moderatio-ne in controversiis fidei loquendum vel disputandum sit, Gregorius ille, qui per antonomasiam Theologi nomen consecutus est, tum exemplo, tum luculenta et gravissima sententia nos doceuit, dicens²: *Non imperite doce-mus, nec adversarios contumeliis et conviciis incessimus, quemadmodum plerique faciunt non cum sermone, sed cum loquente confligentes, ac rationum et argumentorum infirmitatem male-dictis interdum obtegentes, non aliter ac sepias atramentum ante se vomere aiunt, ut piscatores effugiant, aut conspectum sui eis eripiant. Verum nos pro Christo bellum gerere hoc argumen-to planum facimus, quod secundum Chris-tum, qui mitis ac pacatus est, atque infirmita-tes nostras portavit, dimicamus. Nam nec in veræ doctrinæ detrimentum paci studemus, nonnihil de animorum contentione remittentes, ut facilitatis et mansuetudinis famam colliga-*

¹ Lib. 2 de Visibil. monar., c. 4; et in Clave David., lib. 5, c. 2 et 4, et lib. 6, c. 1.

² Pag. 126, in fin.

² Gregorius Nazianzenus, orat. 32.

mus (non enim quod bonum est male auctorū); et rursum pacem colimus, legitime pugnantes, atque intra limites nostros spiritus que regulam nosmet continentēs. Ac de his quidem ita sentio, cunctisque animarum dispensatōribus, recteque doctrinæ arbitris legem statuo, ut nec per duritiam hominum animos exasperent, nec per summissionem elatos et insolentes efficiant, sed prudenter et consulte in fidei causā se gerant, nec in alterutro horum mediocritatem excedant.

14. Ad hanc scribendi regulam totam hanc disputationem ita conformare optavi, ut si fieri posset, ne minimum quidem ab illa discreparem. Hoc enim et regiae majestati debitum, et officii mei esse, et ad finem, propter quem hunc qualemcumque laborem suscepī, obtinendum, per necessarium esse persuasum semper habui. Non enim propter victoriae laudem, aut ingenii vel doctrinæ ostentationem vincere optavi, sed ut veritas ipsa vincat, et errorum tenebræ depellantur, et ut Christus in omnibus regnet, hoc maxime in votis habui. Quamobrem, Rex serenissime, si quid in responsione et disputatione mea acrius quam soleam, aut liberius quam par sit, dictum esse apparuerit, non in personam quam sustines, sed in doctrinam, tum novam, tum etiam contra Christi Vicarium ignominiosam, dictum esse intelligas, tranquilloque animo consideres difficillimum esse, pravam et perniciosa doctrinam, quam vir Catholicus abhorret, doctor aversatur, religiosus indigne fert, acriter, ut par est, reprehendere, quin aliquid in talis doctrinæ sectatores redundare videatur. Sunt enim haec adeo conjuneta, ut vix possint disputatione vel admonitione separari. Quod in Paulo quondam notavit Chrysostomus, dicens: *Volebat, gravitate et reverentia servata, loqui, et auditorem interdum mordens percellere; at haec ambo non dabantur, sed alterum alteri impedimento erat. Nam si quid reverenter diccas, haud quaquam possis auditorem perstringere; quod si rursus vehementer perstringere volueris, necesse tibi est aperte ac nuda oratione rem designare. At prudentia (inquit) Pauli utrumque exacte præstítit, ipso naturæ nomine et increpationem augens, et hoc tanquam peripetasmate ad enarrationis verecundiam usus* ¹. Hanc certe Pauli prudentiam præ oculis habui, et qua potni diligentia imitari studui, semper de re ipsa, non de persona, quoad

fieri posset, tractando, vel ubi necessitas cohereret, non ad regem, sed ad Protestantes illius deceptores, sermonem dirigendo.

15. Superest ergo, Rex serenissime, ut quipollis animi benignitate, et ingenii magnitudine, de qua semper multum confisus sum, nostrum hoc opus benevole accipere, et pure veritatis amore interdum evolvere non dederis, simulque consideres, ingenui animi maximique judicii esse, falsam opinionem, mendacio detecto, deponere, veritatemque intellectam animo amplecti et verbo profiteri, ac æternitatis impendentia pericula praecavere. Nullum enim in pertinacia deus, summa autem in ingenii docilitate prudentia, atque in pia ad Deum conversione providentia, qua non tibi tantum soli, sed patriæ olim florentissimæ, nunc vero in summo discrimine constitutæ, prout ex officii tui magnitudine debitor es, consules. Quod si vocem Domini te vocantis audieris, eique obediere decreveris, quod ipse vocando inceperit, adjuvando perficiet, nihilque erit quod, divino præsidio fultus, vincere ac superare non valeas. Unde non est eur hostium veritatis, quorum sermo ut cancer serpit, contradictionem timeas, proteget enim te Deus a contradictione linguarum: *Contradicunt linguae multæ, ait Augustinus, diversæ haereses, diversa schismata personant, lingue multæ contradicunt veraci doctrinæ, tu curre ad tabernaculum Dei, Ecclesiam catholicam tene, a regula veritatis noli discedere, et protegeris in tabernaculo a contradictione linguarum* ¹. Henrieus ille, qui primus fidei defensor nominatus est, contra linguas contradicentes egregie prius seripserat; postea desipiens, et sibi et patriæ male consilens, deplorandum tam Angliæ quam orbi universo exemplum reliquit. Cur non et Jacobus, licet prius, a seductoribus deceptus, contra Dei tabernaculum, Ecclesiam nimirum catholicam, scripsit, intellecta postea veritate, ejusdem Ecclesiæ acerrimus propugnator, et Anglicani decoris instaurator existat? Ita enim fiet ut illustrem fidei catholicæ defensoris titulum, quem non sine causa magnificare ostendis, non verbis tantum, sed opere et veritate, immortali cum laude merearis.

16. Quod si fortasse, Rex serenissime, nostris disputationibus, desiderio, et excelsa animo, acrique ingenio vestro nondum satisfecimus, et aliquarum rerum, vel plenior responsio, vel major probatio desideratur, aut vobis,

¹ Chrysostomus, homil. 4 in Epist. ad Rom., c. 4.

¹ Psalm. 30.

vel ministris vestris novæ contra catholicam doctrinam objectiones occurunt, quibus satisfacere necessarium sit, proponantur velim omni sinceritate, et solius veritatis intelligendæ gratia, et quantum in me fuerit, paratum semper invenietis, ad eam, quæ in nobis est, fiduci, sive scripto, sive etiam verbo, si occasio tulerit, rationem reddendam; et ad omnia, quæ proposita fuerint, nou de me, sed de divino auxilio, et veritate confidens, pro virili respondendum. Hoc solum Majestatem vestram omni animi submissione enixe pos-

tulo, ut si adversus ea, quæ in his disputacionibus pertractavi, aliquid rescribere visum fuerit, ab omni vana verborum contentione abstineatur, et digressiones variæ de rebus quæ interdum vel casu excidunt, vel obiter attinguntur, et ad causam fidei nihil referunt, evitentur, et solo amore veritatis res ipsa tractetur, et fidei veritas inquiratur. Si enim hoc a vobis obtinuero, spe alienus publicæ utilitatis erectus, nulli labori parcum, sed libentissime impendam, et superimpendar ipse pro animabus vestris.

FINIS LIBRI SEXTI.

INDEX

QUORUM DAM E PRÆCIPUIS SACRÆ SCRIPTURÆ LOCIS

QUÆ IN HOC OPERE EXPONUNTUR.



EX VETERI TESTAMENTO.

EXODUS.

CAP. XXII. *Applicabitur ad Deos*, hoc est, ad judices, l. 3, c. 24.

JOSUE.

CAP. I. *Quemadmodum Moysi obedivimus; ita tibi obediemus*, utique civili obedientia, l. 3, c. 24.

CAP. X. *Obediente Deo voci hominis*. Exaggeratur efficiacitas piae preceptionis, l. 2, c. 7.

LIBER PRIMUS REGUM.

CAP. X. *Ecce unxit te Dominus super hæreditatem suam in principem*. Ostenditur ea Samuelis unctione promissum, non datum fuisse regnum, l. 3, c. 3.

LIBER SECUNDUS REGUM.

CAP. V. *Tu pasces populum meum Israel*. Gubernabis civiliter, l. 3, c. 5.

CAP. VII. *Ego ero illi in patrem, et ille erit mihi in filium*, l. 3, c. 24.

LIBER QUARTUS REGUM.

CAP. XVIII. *Confregit serpentem æneum*. De veneratione quam Judæi habebant hujus serpentis, l. 2, c. 12.

PSALMI.

Ps. L. *Amplius lava me ab iniquitate mea*. Remisso peccato, cuius egregie Davidem pœnituerat, temporales peccati pœnas adhuc luendas insuper sibi remitti postulat, l. 2, c. 15.

Ps. LXXXI. *Ego dixi: Dii estis*, l. 2, c. 24.

Ps. LXXXVI. *Fundamenta ejus in montibus sanctis*. Apostolos et Prophetas D. Augustinus allegorice interpretatur, quia Prophetarum prædictionibus, per Sanctos Apostolos divulgatis, in christiana fide sustinemur, l. 1, c. 17.

Ps. LCVIII. *Adorate scabellum pedum ejus*. Arcam Testamenti, l. 2, c. 11 et 12.

ECCLESIASTES.

CAP. LXIV. *Enoch translatus est in paradisum*. Ter-

restrem, atque illum ipsum Adami, sicut est verisimile, l. 5, c. 14.

ISAIAS.

CAP. LX. *Quam imaginem ponetis ei?* scilicet, propriam, quæ fieri non potest, l. 2, c. 13.

JEREMIAS.

CAP. XXVII. *Submittite colla vestra subter jugum regis Babylonis*, dupliciter exponitur, l. 3, c. 24.

EZECHIEL.

CAP. XIV. *Et si fuerint tres viri isti in medio ejus, Noe, Daniel et Job*, etc., cum illi vel maxime possent placare precibus divinum numen Judæorum scelere violatum; minime tamen placatum officerent, dum isti adhiberent suam contumaciam. Nullus itaque in gratia nos ponet cum Deo, nisi ipsi contendamus et connitamur, l. 2, c. 9.

DANIEL.

CAP. VII, n. 8. *Et ecce cornu parvulum*, etc. De Antichristo locus hic fuse explicatur, l. 5, c. 22.

— n. 13. *Filius hominis veniebat, et dedit ei potestatem et regnum*, etc. Praedictio hæc litteralis habetur de regno Christi, l. 3, c. 5.

MALACHIAS.

CAP. IV. *Mittam vobis Eliam*, etc. Ipsum verum et proprium Eliam mittam sub tempus judicii extremi, qui dilabantem religionem sustineat magna vivendi atque dicendi severitate, l. 5, c. 14. De Joanne etiam Baptista per intentam quoque allegoriam hic locus exponitur, ib.

LIBER SECUNDUS MACHABÆORUM.

CAP. XII. *Sancta et salubris cogitatio est pro defunctis exorare*, ut a peccatis solvantur, pro purgatoriis dogmate, l. 2, c. 15.

EX NOVO TESTAMENTO.

MATTHÆUS.

CAP. V. *Non exies inde, donec reddas novissimum quadrantem*. Non egredieris de carcere, hoc est, pur-

gatorio, donec etiam minima peccata persolvas, l. 2, c. 15.

CAP. X. *Angeli eorum semper vident faciem Patris*, etc. Hinc appetat beatitudinem Angelorum non interpellari custodia salutis mortalium, l. 2, c. 7.

CAP. XI. *Venite ad me omnes, qui laboratis et oneratis estis, et ego reficiam vos*. Unius Christi est, peccatorum pondera auferre et animadversionem remittere; qui Judaicæ legis onera allevavit, novamente legem tulit plenam omnibus gratiis, l. 2, c. 9.

CAP. XVI, n. 17. *Beatus es Simon Bar-Jona*, etc. Locus hic fuse explicatur pro vera fide Ecclesiæ Catholicæ seu Romanæ, l. 1, c. 3.

Et pro principatu ecclesiastico D. Petri et successorum in pontificatu Romano, l. 3, c. 10.

— n. 18. *Inferi*. Tyranni, peccata, et hæreticorum doctrinæ, l. 1, c. 3.

CAP. XVII, n. 12. *Elias jam venit*. Non improbat vulgaris opinio de reddituro proprio Elia, l. 5, c. 14.

— n. 26. *Ergo liberi sunt filii*. Qui sint isti filii dicitur, l. 4, c. 5.

CAP. XVIII. *Quicumque alligaveritis et solveritis*, etc. Significantur actus jurisdictionis externæ, l. 3, c. 6.

CAP. XXIV, n. 14. *Prædicabitur hoc Evangelium regni in universo orbe, et tunc veniet consummatio*. Hinc intelligitur propagationem Ecclesiæ in omnibus terris, indicium fore divini judicii universalis, l. 1, c. 16.

— n. 22. *Propter electos breviabuntur dies illi*. Occiso Antichristo, l. 5, c. 10.

Ne electi concidunt, non dicam a fidei, quam semper Ecclesia conservabit, sed neque a charitatis constantia, c. 10.

— n. 36. *De die illa et hora nemo scit*. Non negatur probabilis conjectura, l. 5, c. 8.

CAP. XXV. *Ecce sponsus venit*, etc. Hæc parabola late exponitur de judicio extremo, tam universali quam peculiari, l. 5, c. 8.

MARCUS.

CAP. ult. *Prædictate Evangelium omni creaturæ*. In orbe omnium terrarum, l. 1, c. 16.

LUCAS.

CAP. XVII, n. 20, 21. *Quando veniet regnum Dei*. Quando veniet rex Messias. Respondit eis: *Non venit regnum Dei cum observatione, nec dicent: Ecce hic, aut ecce illic*. Ecce enim regnum Dei intra vos est, id est, jam Messias hic vobiscum commoratur; quo adveniente, non is futurus erat hominum motus et concursus, qui fieri solet in regnum adventibus, l. 1, c. 8.

CAP. XXII, n. 32. *Ut non deficiat fides tua*. Tua, id est, ipsius Petri, itemque eorum qui in tua sede legitime confidebunt, l. 1, c. 5.

JOANNES.

CAP. II. *Vinum non habent*. Vox fuit non imperantis, sed maternæ fiduciae, l. 2, c. 7.

CAP. VI. *Qui manducat meam carnem, et bibit meum sanguinem*, etc., Particula et, copulative quidem, sed divisim, non vero conjunctim est accipienda, de more loquendi Sacrae Scripturæ, l. 2, c. 5.

CAP. XIV, n. 2. *In domo Patris mei mansiones multæ sunt*. Varia et inæqualia Beatorum præmia, l. 2, c. 15.

— n. 16. *In æternum*. Quamdiu mundus duraverit, l. 1, c. 3.

— n. 26. *Quem mittet Pater in nomine meo*. Ut perficiat quæ ego incepseram, l. 3, c. 6.

CAP. XVIII. *Regnum meum non est de hoc mundo*. Non est temporale, sed spirituale, l. 3, c. 5.

I AD CORINTHIOS.

CAP. III. *Ignis probabit*. Purgatorium, l. 2, c. 12 et 15.

CAP. V, n. 4. *Congregatis vobis et meo spiriliu*. Mea notitia animique presentia, l. 3, c. 11.

— n. 5. *Tradere hujusmodi in interitum carnis*. Quæ diabolica cruciamenta pertulerint excommunicati a D. Paulo, l. 3, c. 23.

CAP. VI, n. 1. *Judicari apud iniquos*. Infideles, l. 3, c. 4.

AD GALATAS.

CAP. I, n. 6. *In aliud Evangelium*. Interpretatum alio et privato judicio, l. 4, c. 11.

— n. 8. *Angelus de cœlo*. Qui cœlestis appareat, sed esse nequeat, ib.

AD EPHESIOS.

CAP. I. *Quem dedit Deus caput supra omnem Ecclesiam*. Triumphantem, scilicet, et militantem, quæ una est coagmentata, l. 3, c. 12.

AD THESSALONICENSES.

CAP. I. *Nisi venerit discessio primum, et revelatus fuerit homo peccati*, etc. Verus et proprius Antichristus, de quo exquisite locus hic explicatur toto libro 5, multis in locis.

I AD TIMOTHÆUM.

CAP. III. *Ecclesia firmamentum veritatis*. Omnes confirmans in veritate, seu retinens veritatem affirmatam divinis prodigiis, l. 1, c. 4.

AD TITUM.

CAP. III. *Hæreticum hominem devita*, etc., cum sit proprio judicio condemnatus, id est, suo privato spiritu, atque illa certa scientia hæreticorum; unde velut e fonte omnes hæreses fiunt, l. 1, c. 11 et 23.

I PETRI.

CAP. V, n. 2. *Pascite qui in vobis est gregem Dei*. Gubernate, l. 3, c. 10.

— n. 13. *Salut vos Ecclesia, que est in Babylone collecta*, hoc est, Romæ, l. 3, c. 13.

Vide Roma.

I JOANNIS.

CAP. II, n. 18. *Nunc Antichristi multi facti sunt*. Non proprii, quia unus futurus est, sed metaphorici, l. 5, c. 1 et 8.

CAP. IV. *Probate spiritus*, examineate animi motus et agitationes, doctrinam fidei approbantes, non ex privata unitus cuiusque, sed ex publica Ecclesiæ sententia, l. 1, c. 11.

APOCALYPSIS.

CAP. XI, cum aliis. *Duobus testibus meis, Eliæ et Enoch*, l. 5, c. 10, latissime, et in discursu ejusdem libri, multa alia ejusdem Apocalypsis capita expounderunt.

INDEX RERUM

QUÆ IN HOC VOLUMINE CONTINENTUR.

A

- Aaron vitulum an adoraverit, l. 1, c. 3.
Adorationis, honoris et venerationis vocabula quid significant, l. 2, c. 7, 8 et 11.
Adorationis species, latria, dulia, et hyperdulia explicantur, c. 7.
Ætates mundi septem, l. 5, c. 4.
Angli Christi fidem primum acceperunt a Joseph ab Arimathia, l. 1, c. 12.
Deinde ab Eleutherio, Romano Pontifice, ib.
Postremo a Gregorio Magno, c. 2.
Angli fidem puram, et integrum conservarunt usque ad annum post Christum natum 1534, ib.
Anglorum regum veterum pietas atque subjectio erga Romanam Ecclesiam, l. 3, c. 21.
Anglorum schisma, et falsa existimatio de Romano Pontifice, l. 1, c. 22.
Quæ refutatur, ib.
Anglorum prolapsio in hæresim, ib.
Anglorum hæresis quasi differentia essentialis posita est in eo, quod suum regem plusquam regem constituit, delato supremo jure Pontificali, c. 12, 15, et l. 3, c. 6.
Anglorum cætera hæresis fere Calviniana est, l. 1, c. 42.
Anglorum hæresis cur non dicatur Henriciana, cum auctorem Henricum habuerit, ib.
Anglorum hæresis vix tertiam partem Britanniæ occupat, c. 15.
Anglorum hæresis Apostolica fides dici non potest multis de causis, c. 17.
Angli si quid Apostolicum retinent, id ab Ecclesia Romana acceperunt, ib.
Angli cognomen Catholicorum perdidérunt, c. 12.
Anglorum hæresis impugnatur martyrum testimoniis, c. 19 et 20.
Angli veram hierarchiam ecclesiasticam non habent, sed solum politicam gubernationem, c. 14.
Anglorum hæresi convenienti duodecim notæ, qui bus hæretica disciplina internoscitur, c. 22.
Anglicanæ sectæ caput primarium est illud, de adulterino Ecclesiæ capite, ib.
Anglicana secta male coarctat Ecclesiæ auctoritatem ad quinque post Christum sæcula, l. 1, c. 24.
Anglicanam vexationem Catholicorum persecutio nem ecclesiasticam esse monstratur, l. 5, c. 5, et latius, l. 6, c. 10.
Angli pro fide et obedientia Romana morientes sunt veri Martyres, l. 6, c. 14.
Angli Henrici Garneti martyrium, ib.
Angli mortem potius subire, quam juramentum Ja-

- cobæum præstare, vel sacris hæreticorum interesse tenentur, c. 8, 9, 10 et 11.
Vide Juramentum, Martyrium, et Persecutio.
Annae Bolenæ incensis nuptiis Catholice fidei Anglia ruinam edidit, l. 1, c. 4.
Annae Bolenæ nuptias nefarias quidam Calvinianus impudenter decantat, l. 1, c. 2.
Antichristi nominis etymologia, l. 5, c. 1.
Antichristi nomen per antonomasiæ significat unum quendam Christi adversarium capitalissimum, ib.
Antichristi nomen ex Apocalypsi, quod continet numerum, c. 19.
Antichristi cognomina, abominatio, c. 5 et 1. *Discessio*, c. 10. *Homo peccati et filius perditionis*, c. 17. *Capul malorum*, c. 22.
Antichristum hæretici quidam quasi pro Christum seu vice Christum interpretantur, tam ineruditæ quam malitiose, c. 1.
Antichristus describitur a Daniele Propheta octo proprietatibus, c. 22.
Antichristus descriptus a D. Paulo, in secunda Epistola ad Thessalonicenses, c. 2, a n. 3 usque ad 14, qui locus in quinto libro saepius recurrat.
Antichristus proprius homo unicus erit, non vero dæmon, neque una series hominum succendentium in uno munere vel uno solio, c. 2.
Antichristi patria erit Judæa, c. 16.
Antichristus parentibus nascetur infamibus, c. 9, 10 et 22.
Antichristus erit homo vafermissus, c. 22.
Antichristus omni scelere cooperatus erit, c. 17 et 22.
Antichristus in suis vitæ actionibus erit organum dæmonis quasi conjunctum, non hypostaticæ, c. 22.
Antichristum nondum venisse constat ex multis locis Sacrae Scripturæ, c. 9.
Antichristum jam olim venisse, redditum sub tempore mundi extremum, error fuit quorundam, etiam Catholicorum, c. 10.
Antichristus veniet prope tempus judicii extremi, c. 13.
Antichristus callide et violenter auxilio diaboli regna cuneta usurparibit, c. 9 et 18.
Antiehrustus in urbe Hierosolymorum domicilium sui imperii constitut, c. 16 et 22.
Antichristus sedem Ronie non fitget, c. 15.
Antichristus imperium Romanum excindet, c. 9.
Antichristus Romanum omnino evertet, c. 7 et 15.
Antichristus, occupata tyrannide omnium rerum, et terrenarum et spiritualium, inducit novam religionem in orbem terræ, c. 22.
Antichristus ipse clam adorabit diabolum, ib.

- Antichristus sibi per vim extorquebit adorationem laitiae, c. 10 et 22.
- Antichristus mentita prodigia multa dabit, c. 22.
- Antichristum infernae furiae agitabunt in Christianos, quorum tanta erit vexatio, quantam vix capiat mens humana; vires humanæ certe non capient, c. 5 et 10.
- Antichristianæ vexationis coagitor horribilis erit diabolus, c. 10.
- Antichristiana vexatio nunquam intermittet, c. 5.
- Antichristianæ vexationi furenti præcipue resistent Enoch et Elias, mira severitate vitæ ac sanctitatem. Vide Elias.
- Vntichristiana vexatio licet maxima sit, fidem Catholicæ Ecclesiæ non omnino perdet, l. 1, c. 3, et l. 5, c. 10.
- Antichristiana vexatio tres solos et semis annos durabit, l. 5, c. 8.
- Antichristianæ vexationis exitus erit paulo ante diem judicii extremi, c. 5.
- Dies videlicet quinque et quadraginta, ib.
- Sed referuntur contrarii errores, ib.
- Antichristianam vexationem nondum extitisse convincitur, c. 9.
- Antichristi monarchia quantum tempus futura sit, ignoratur, ib.
- Antichristi monarchia non transgredietur spatium vitæ unius hominis, ib.
- Antichristi monarchia ad alium hominem non transmittet, ib.
- Antichristus ad aspectum Christi accendentis prostratus occumbet, sub terramque ad inferos præcepe agetur, c. 5, 18 et 22.
- Antichristi asseclæ una profligabuntur, c. 5.
- Antichristus per translationem dicitur quicumque insectator Christianitat̄ seu Ecclesiæ Romanæ, c. 1.
- Antichristus figuratus Antiochus fuit, c. 22.
- Antichristus figuratus Nero Claudius fuit, e. 8 et 10.
- Antichristus proprius non fuit Mahometus, quam suspicionem quidam habuerunt, nec ullus aliis, c. 2, l. 5, c. 9, et l. 6, c. 12.
- Antichristi solium per allegoriam vel accommodationem ineptissime haeretici Romanæ Sedi attribuunt; aptissime vero vel ipsis haereticis, vel Anglicano throno, postquam a fide defecit, accommodabitur, l. 5, c. 9, 11, 17 et 19.
- Antichristi fabula, quam haeretici in Pontificem transferunt ex Daniele, cuius dicta rex Jacobus silentio præterit, redarguitur, c. 22.
- Apostoli fidem non instituerunt, sed promulgarunt, l. 1, c. 17.
- Apostoli omnes æquales erant in privilegio non erandi in materia fidei, l. 3, c. 13.
- Apostolorum dignitatis privilegia, c. 12.
- Apostolos subjectos fuisse magistratibus ethniciis quidam etiam Catholici assertant, sed plures verius negant, c. 3, et l. 4, c. 10.
- Apostolis ut succedant Episcopi, l. 3, c. 11, 12, et l. 4, c. 10.
- Apostolica fides quæ nominetur. Vide Fides.
- Arbiter iudex damnatum cogere non potest, l. 4, c. 7.
- Ariana haeresis quomodo dicatur orbem fere omnium occupasse terrarum, l. 4, c. 16.
- Auctoris observantia et pia lenitas, et bona voluntas erga regem Jacobum, cuius librum refellit, nitet in toto opere; quedam loca hic notantur, c. 2, 14,
- 21, 22, 23, 24, 25; l. 2, c. 9, 12, 16; l. 3, c. 11; et l. 4, c. 34.
- Auctoris modestia in respondendo probris et maledictis Jacobi regis contra Pontificem Romanum ejusque defensores, præcipue socios Jesuitas, l. 5, c. 13 et 18.
- Auctor adhortatur Jacobum regem ad veram Romanam religionem, l. 1, c. 23.
- Auctor adhortatur Jacobum regem ad standum in fide, quam christianis principibus dedit de mutanda sententia si convinceretur, l. 2, c. 46.
- Auctor adhortatur Jacobum regem ad recognoscendum sanctum principatum Romani Pontificis, l. 3, c. 30.
- Qua de re cupit cum rege clam colloqui, ib.
- Auctor adhortatur Jacobum regem ad deponendum quod habet, odium contra immunitatem ecclesiasticam, l. 4, c. 34.
- Auctor exponit quid in hoc opere curaverit, et deinde quid a rege Jacobo exoptet, l. 6, c. 12.

B

Babylon mystice, l. 5, c. 7.

Vide Roma.

Baptizatus rite ab haeretico infans qualisunque seu catechumenus, membrum veræ Ecclesiæ efficitur, l. 4, c. 24.

Beatus nullus hominum fuit ante Christi adventum, l. 5, c. 12.

Beatum nullum fuisse, nec fore etiam in fine mundi priusquam moriatur, ut probabilius defenditur, ib.

Bellarminus Cardinalis a calumnia liberatur, l. 5, c. 12, 14 et 21.

Bellum justum utrinque esse potest ex ignorantia, l. 4, c. 13.

Bello justo adducitur devictus populus in servitatem, l. 3, c. 2.

Bello non fit via consentanea ad veritatem aperiendam, ib.

Bona ecclesiastica an sint immediate sub Christi dominio, non per metaphoram, sed in sensu proprio, l. 4, c. 18.

Bona ecclesiastica an ex vi solius consecrationis ab humano dominio eximantur, disputatur, c. 19.

Bona Ecclesiastica. Vide Immunitas ecclesiastica.

Bonorum mobilium et immobilium explicatio, c. 18.

Bonifacium III, Romanum Pontificem, penitus odit Jacobus, rex Angliæ, eo quod sustentavit sue sedis primatum. Sed Bonifacium auctor defendit, l. 5, c. 5, 17, 18 et 19.

Breve primum Romani Pontificis Pauli V ad Catholicos Angliae pro repudiando juramento regis Jacobi, et pro animandis Catholicis ad relinquendam communicationem cum haereticis in rebus sacris, l. 6, in proœmio.

Breve secundum ejusdem Pauli V ad eosdem Catholicos, ib.

Brevis secundi mittendi quæ ratio fuerit, ib.

Brevis utriusque epitome, et vendicatio a calunnia, c. 12.

Breve utrumque dissimile est a Brevi Pii V, Romani Pontificis, contra Elisabetham, gravem Ecclesiæ persecutricem, c. 16.

Breve prædictum Pii V severe quidem, sed juste muletabat Elisabetham, ib.

C

- Campanæ prope sunt necessariæ, l. 2, c. 16.
 Campanæ sunt in usu abhinc annis circiter mille et trecentis, nimurum in pacata Ecclesia, ib.
 Campanis benedicendis pie sancteque faciunt Catholicici, ib.
 Catholici ab hæreticis justa discordia dissident, l. 1, c. 2.
 Catholici a solis hæreticis Homosianorum vel Papistarum, vel aliis cognominibus perhibentur, c. 13.
 Que tamen cognomina veram et veterem doctrinam indicant, ib.
 Catholicum cognomentum solius est veræ fidei, et Christianæ Ecclesiæ, c. 12.
 Catholicum cognomentum invidiosum est nonnullis hæreticis, ib.
 Catholicum cognomentum est coætaneum Apostolorum, ib.
 Catholicum cognomentum veram Ecclesiam a falsis distrahit, ib.
 Catholicum cognomentum quadrat in unam Christi Ecclesiam, ib.
 Catholicorum cognomentum debetur soli Romanæ Ecclesiæ, ut reecognoscenti universalem Christi Vicarium, ib.
 Catholicum cognomentum minime convenit Anglorum hæresi, ib.
 Catholicum cognomentum nulla meretur falsa religio, quamvis dilatetur per orbem terræ, c. 16.
 Censura ecclesiastica ferri potest ex parte superioris Prælati, non vero in illius virtute vel Summi Pontificis, l. 3, c. 11.
 Cæremoniæ ecclesiasticae quomodo sint a jure divino, l. 4, c. 9.
 Character ordinis, c. 8.
 Chiliastrarum hæresis, l. 5, c. 5.
 Christiani prima Ecclesiæ falso suspecti fuerunt quibusdam principibus de negatione politici principatus, l. 3, c. 4.
 Christiani subjecti sunt potestati legitimæ magistratum, etiam ethnicorum, c. 4.
 Christiani vetantur creare principem infidelem, ib.
 Christianos non liberat character baptismi a jurisdictione principum secularium, l. 1, c. 8.
 Christianorum libertas quæ sit, c. 7.
 Christiani non interdicuntur lege aliqua, ut habeant politicos principatus, l. 3, c. 5.
 Christiani in sua gubernatione etiam politica multum pendent a Romano Pontifice, l. 6, c. 4.
 Vide Pontifex Romanus.
 Christianorum subjectio civilis dirigenda est a potestate ecclesiastica, l. 6, c. 6.
 Christus ut homo an fuerit rex temporalis, l. 3, c. 5.
 Clericorum majoris et minoris ordinis discrimina, l. 4, c. 27.
 Clericorum et animi et corpora subjecta sunt Romano Pontifici, c. 9.
 Clericorum exemptio. Vide Immunitas personarum ecclesiasticarum.
 Clericorum bona. Vide Immunitas personarum ecclesiasticarum in suis bonis.
 Cognitio humana in rebus obseuris facilius assequitur quid ipsæ non sint, l. 5, c. 16.
 Concilii generalis potestas, l. 3, c. 18.
 Consilia Christi non obligant necessario, c. 4.

Crux ipsa Christi a Catholicis inter venerandas ejusdem reliquias habetur, quia instrumentum fuit peculiare suæ redēptionis, neque vero in cruce cogitant vim aliam, seu beneficium a Christo datum, l. 2, c. 4.

Cyprianus D. nunquam fuit hæreticus, l. 1, c. 20.

D

- Danielem Joannes imitatus est in Apocalypsi, l. 5, c. 3.
 Daniele nullus propheta clarius vaticinatus est de Antichristo, c. 21 et 22.
 Davidi an Deus, an vero populus regnum immediate dederit, l. 3, c. 3.
 David nominatur Angelus Dei in Sacra Scriptura, c. 24.
 David nominatur lucerna Israel in Sacra Scriptura, ib.
 Decretalium Epistolarum auctoritas, c. 16.
 Dii, qui nominentur in Scriptura, c. 9, et l. 5, c. 17.
 Directa subiectio et gubernatio quæ sit, l. 3, c. 5 et 30.
 Dominari non est Prælatorum nec ullius pastoris Ecclesiastici, l. 1, c. 5.
 Dominium humanum quo jure fuerit introductum, l. 3, c. 2.

E

- Ecclesia universalis fidem nunquam desperdidit, l. 1, c. 3.
 Neque desperdet tempore Antichristi, ib., et l. 5, c. 9.
 Ecclesiæ fidem hæretici perditam metuentur, l. 2, c. 2, et l. 1, c. 3.
 Ecclesiæ unitas, l. 1, c. 3.
 Ecclesiæ firmitas, ib.
 Ecclesiæ perpetuitas, ib.
 Ecclesiæ persecutio, hoc est vexationes præcipue, quot fuerint, l. 5, c. 4.
 Ultima et gravissima fuit Juliani Apostatae, ib.
 Ecclesia errare non potest in fidei decretis, l. 1, c. 4.
 Ecclesia est dirimere fidei controversias, c. 11.
 Ecclesia est Scripturam Sacram certo interpretari, ib.
 Ecclesia semper fuit eritque visibilis, tractabilis quidem per suum corpus et membra peculiaria, et aspectabilis per multa signa verasque notas suæ intimæ rationis, c. 7.
 Ecclesiam sic Antichristus percellet, ut ejus aspectum fugitura dicatur, l. 5, c. 6.
 Ecclesia non potest distrahi a vera fide, l. 1, c. 3 et 41.
 Ecclesiæ frequentius adversae res temporales accidunt quam secundæ, l. 5, c. 21.
 Ecclesia illas prosperitates a Deo habuit, quæ opus erant ut conservaretur, ib.
 Ecclesiam in solam quadrat cognomen Catholicæ, l. 1, c. 12.
 Multo exelius quam humana cognomina in suas familias, ib.
 Ecclesiam Spiritus Sanctus nunquam deseret, c. 4, et l. 2, c. 9.
 Ecclesia nullas de novo fidei doctrinas ab aetate Apostolorum, sed veteres multo explicati tradiit, l. 1, c. 19.

- Ecclesia eisdem moribus cum semper regi non potuerit, omnem accessionem et mutationem facit accommodate ad instituta et mores Apostolorum, c. 13, et l. 2, c. 4, 5 et 6.
- Ecclesia est unum corpus mysticum perfectissime institutum, l. 3, c. 8.
- Ecclesiam unam esse oportet, ib.
- Ecclesia debuit gubernari monarchice, c. 10.
- Ecclesia non habet unum supremum principem temporalem, c. 5.
- Ecclesiæ militantis perfectio essentialis consistit in vera et viva fide operante per charitatem, c. 4.
- Ecclesia militans et triumphans duæ sunt quasi partes unius coronæ, sive monarchiæ, c. 14.
- Ecclesiæ Catholicae quæ sint notæ verissimæ, l. 5, c. 22.
- Ecclesiæ Catholicae laudes ex D. Augustino, l. 1, c. 4.
- Ecclesiæ ministerio Deus homines docet, ib., et l. 5, c. 11.
- Ecclesiæ immunitas. Vide Immunitas ecclesiastica.
- Ecclesiæ observatio prudens in usu sue immunitatis, l. 4, c. 13.
- Ecclesiæ singularis triplex consideratio, c. 17.
- Ecclesia Romana una est, et eadem atque Catholica, l. 1, c. 5 et 12.
- Ecclesia Romana, ut universalis, certissimam habet fidei constantiam atque doctrinam, c. 4 et 5.
- Ecclesia Romana, ut universalis, habet sedem Petri Apostoli, pro cuius fide Christus rogavit ne unquam deficiat, c. 5.
- Ecclesia Romana quantumcumque perturbabitur ab Antichristo, non labefactabitur, l. 5, c. 21.
- Ecclesia Romana ex ipso ore adversariorum Catholica cognominatur, c. 13 et 14.
- Ecclesia Romana quatenus est peculiaris quædam Diocesis non ita certam habet firmatatem fidei atque doctrinæ, sed pie creditam, c. 5.
- Ecclesiastica bona. Vide Bona.
- Ecclesiasticae personæ. Vide Immunitas propria personarum ecclesiasticarum.
- Ecclesiastica potestas. Vide Potestas.
- Eduardus VI, rex Angliæ, Zwingianus fuit hæreticus, l. 1, c. 4 et 22.
- Eduardi VI persecutio ecclesiastica, l. 6, c. 10.
- Edmundi Campiani et Societate Jesu Martyrium.
- Elias et Enoch nondum mortui sunt; unamque vivunt vitam mortalem, neque beatam usque ad tempus postremum, l. 5, c. 13.
- Elias et Enoch ubi tam longam ætatem degant, scire velle ad nos non pertinet; sed est verisimilis conjectura vivere in paradiso terrestri, ib.
- Elias et Enoch, Antichristo potiente rerum ac religionum, ad sustentandam Christianitatem afflictam et prope jacentem revenient, c. 11, 12, 13 et 14.
- Elias et Enoch annos circiter tres et dimidium evangelizabunt, Judæis quidem Elias et Enoch aliis gentibus, l. 5, c. 5 et 16.
- Elias et Enoch occidentur jussu Antichristi (Hicoroslymis, ut verisimile est), ubi tres dies et semis in sepulti jacebunt. Deinde resurgent vocati e cœlo, quo statim consoncent, attonitis cunctis et suspicentibus; deinde urbs conquassabitur terræ motu horribili, antichristianosque plurimos opprimet, l. 5, c. 44.
- Elisabetha, Angliæ regina, hæretica fuit Calviniana, l. 1, c. 4 et 22.
- Elisabetha se cognominavit *supremam gubernatrixem in spiritualibus*, non ut pater Henricus, *caput Ecclesiæ*, vel quia feminam id cognominis puduit, vel, quod nonnulli sunt suspiciati, volebat insuper jus usurpare supremum in tradendis sacris, initiisque Christianis, l. 6, proœmium.
- Elisabethicum juramentum fidelitatis. Vide Juramentum.
- Elisabethæ reginæ persecutio ecclesiastica, l. 6, c. 10.
- Elisabetham Pius V juste per litteras multatavit, ib.
- Episcopi ut succedant Apostolis, l. 3, c. 11.
- Episcopi non recipiunt a Christo immediate jurisdictionem, l. 4, c. 9.
- Episcopi jure divino liberi sunt ab omni potestate civili, ib.
- Episcopi qualem immunitatem dare potuissent personis ecclesiasticis sibi subjectis, c. 11.
- Episcopus laico nullius ordinis ecclesiastici dare non potest jurisdictionem supra personam ecclesiasticam, ib.
- Episcopi an dominium habeant episcopalium facultatum, c. 14.
- Evangelii nomen omnem catholicam doctrinam comprehendit, l. 1, c. 1.
- Eucharistia vere ac realiter continet Christi corpus et sanguinem sub panis et vini speciebus, l. 2, c. 1.
- Eucharistiae sub consecratis speciebus panis et vini substantia non remanet, c. 2.
- Eucharistiae sub utravis specie totus est Christus, totumque fructum sacramenti impertitur, c. 5.
- Eucharistiae veritas transubstantiationis confirmatur, c. 3.
- Eucharistiae usus sub utraque specie, quamvis frequens et communis fidelibus fuerit in prima Ecclesia, c. 3.
- Attamen etiam est consuetudo coætanea Ecclesiæ sumendi solam panis speciem, ib.
- Quæ consuetudo est admundum rationalis, ib.
- Eucharistiam sumere sub una tantum specie, probabile est teneri jure divino sacerdotes sacrificantes, ib.
- Eucharistiam veteres Christiani sæpe domum portabant, ib.
- Rem circiter quingentos annos retinuerunt, ib.
- Eucharistia præberi potest ægroto non deglutiendi immersa in aquam, vel vinum minime consecratum, ib.
- Eucharistia adoranda ut Deus, ib.
- Eucharistiam erigendi, ut suspiciatur a multitudine, mos est antiquissimus; ipsam in pompa et publicis supplicationibus circumgestandi non ita pristinus, nec recentissimus. Sed mos uterque est imprimis laudabilis et fructuosus, c. 4.
- Excelsa quæ dicantur in Scriptura, l. 3, c. 25.
- Excommunicationis censura usitata tempore Apostolorum, c. 23.
- Excommunicatos a D. Paulo vexatos simul fuisse a diabolo dicunt aliqui Patres, ib.
- Excommunicationes late a Romano Pontifice adversus reges et imperatores, ib.
- Excommunicati reges non sunt eo ipso regnis privati, l. 6, c. 6.
- Excommunicatis regibus interdicta est regni administratio, ib.

F

Fides modo res creditas, modo credendi virtutem significat, l. 4, c. 9.
 Fides Catholica sive universalis cognominatur primo ab universitate materie, c. 14.
 Deinde ab universali credendi regula, ib.
 Tertio ab integritate sacerorum, tum munerum, tum personarum, ib.
 Ultimo, quia universum mundum complexa sit, ib., et c. 15 et 16.
 Præsertim a tempore Constantini imperatoris, c. 16.
 Fides vera et vera Ecclesia individuae comites, c. 4 et 12.
 Fidei regula sunt divinae litteræ expositæ, traditio-nesque comprobatae a vera Ecclesia, c. 6.
 Fidem Apostoli non considerunt sed promulgarunt, c. 17.
 Fidei dogmata non nova eduntur, sed explicantur, c. 18 et 19.
 Fides Apostolica quæ dicatur, c. 17.
 Fidei documenta rationibus non demonstrantur, l. 6, c. 8.
 Fides subvertit, qui partem ejus evertit, l. 4, c. 23.
 Fides specialis seu fiducia novatorum sit quam vana et haeretica, c. 12.
 Fidei de causis judicare proprium est ecclesiasticæ potestatis, c. 11.
 Fidei christianæ externa confessio jubetur præcepto divino positivo, et moraliter quasi connaturali cum ipsa fide, l. 6, c. 9.
 Fidei confessionis præceptum ubi fundetur, ib.
 Fidei confessionis præceptum involvit alterum negatiuum negandi fidem, ib.
 Fidei quædam occultatio tacita licita est aliquando, ib.
 Fidei occultatio duplex negativa et privativa, quæ de utraque, quid sentiendum, ib.
 Fidei confessio quo tempore obliget, ib.
 Fidei occultatio interdum est quædam virtualis negatio, ib.
 Fidem posse negari in tormentis, fuit quorundam haeresis, ib.

H

Hebraica lingua genitivis nominum substantivorum in exaggerando utitur pro adjectivis, l. 5, c. 17.
 Haeresis et haeretici notio atque distinctio, l. 4, c. 23.
 Haereses singulæ a conditoribus nomen inveniunt, c. 12.
 Haereses oriuntur ab animi perturbationibus, c. 15, 16 et 22.
 Haeretici nomine sunt Christiani, quia sunt baptiza-ti, sed revera sunt infideles, quia non habent fidem divinam, l. 3, c. 4.
 Haereticorum vaniloquentia, l. 5, c. 17.
 Haereticorum privatus spiritus confutatur, l. 4, c. 41.
 Haeretici tractant Scripturam sacram valde indecora, l. 3, c. 21.
 Haeretici Catholicon falsum cognomen si quando assumunt, timide ac prudenter id faciunt, l. 4, c. 14.
 Haeretici novi antiquos exprimunt, c. 15.

Hæretici inter se discordant de rebus gravissimis, ib., et c. 16.
 Hæretici non sunt animati ad fidei propagationem, c. 16.
 Hæretici quantacumque sint multitudine, non coag-mentantur in unum corpus ecclesiasticum, neque politicum, c. 15.
 Hæreticorum omnis generis colluvies fere media pars est mortalium, qui Christum agnoscunt, c. 14 et 16.
 Hæreticus esse potest qui nunquam in Ecclesia fue-rit, c. 9.
 Sed pœnis Ecclesie non erit obnoxius, c. 24.
 Hæreticæ disciplinæ duodecim notæ explicantur, c. 22.
 Hæreticorum, qui non sunt nominatim excommuni-cati, quando sit communicatio licita, l. 6, c. 9.
 Henricus librum contra hæreticos edidit ob defensio-nem fidei Catholice et Romanæ, l. 1, c. 1.
 Henricus Leo X, Romanus Pontifex, cognominavit Catholice fidei defensorem, post librum editum pro fide Romana, c. 12.
 Henricus fidei fuit deserter propter impudicas Annae Bolenae nuptias, c. 1.
 Henricus vere appellari posset homo peccati, l. 6, c. 17.
 Henricus principio fuit schismaticus, l. 4, c. 21 et 1, 3, c. 6.
 Henricus deinde fuit hæreticus, l. 4, c. 22.
 Henricus omnium regum primus affectavit impe-rium spirituale, idque tyrannice usurpavit, l. 3, c. 6 et 9.
 Henricus conferitur cum bestia Apocalypsis 9, ha-bente supra caput nomen blasphemiae, hoc est co-gnomentum capitis Ecclesiae, l. 5, c. 49.
 Henricus moribundus Eduardo filio heredi fidem catholicam commendavit, excepta una obedientia Romano Pontifici, l. 4, c. 1 et 22.
 Henricus VIII persecutor ecclesiastica, l. 6, c. 10.
 Henrici Garneti e Societate Jesu Martyrium, c. 41.
 Hispaniae regum pietas in Ecclesiam, l. 3, c. 6.

I

Idolatriæ definitio, l. 2, c. 12.
 Imago Dei propria et metaphorica, l. 2, c. 12.
 Imago Dei propria fieri non potest, ib.
 Imagines Dei circa metaphoricas nullum est fidei decretum, ib.
 Imaginum Dei usus pius est, ib.
 Imaginum Dei usus licitus est, decorus, et utilis in Christiana Ecclesia, c. 13.
 Imaginum Dei usus prohibitus erat in Synagoga, ut ceremonia damnosa Judeis, ib.
 Imaginum hostes græce Iconomachi a servo persa, Xenaja nomine, originem sue haeresis trahunt, c. 41.
 Imaginum hostium effrænatio, ib.
 Imaginum hostium sophismata redarguantur, c. 12.
 Imagines ipsas non orant Catholicæ, sed excitantur earum præsentia, ut Deum et Sanctos attenitus orient, c. 41.
 Imaginibus nulla vera inest sanctitas, sed transla-titia, et injecta extrinsecus a rebus quas præse-runt, ib.
 Imaginum usum et venerationem, ab Apostolica semper Ecclesia retinuit, c. 9, 10, 11 et 12.

- Imagines fructuosissimæ sunt, c. 11.
 Imagines coluntur bifariam, et honorifice tractari debent, ib.
 Imagines si superstitionis occasio essent insipientibus Catholicis, docendi isti forent illæ non violentæ, c. 7.
 Imagines inter et idola discrimen, c. 12.
 Immunitatis cause omnes breviter perstringuntur, l. 4, c. 14.
 Immunitatis divisio, l. 4, initio.
 Immunitatis descriptio, l. 4, c. 1.
 Immunitas an distinguatur a libertate, ib.
 Immunitatis differentia ab exemptione, ib.
 Immunitatis differentia a privilegio fori, c. 16.
 Immunitatis differentia a privilegio canonis, l. 3, c. 15, et l. 4, c. 2.
 Immunitatis excellentiae multæ, l. 4, c. 30.
 Immunitatis dubia quæcumque ad judicium pertinent ecclesiasticum, c. 34.
 Immunitas amplianda est, non imminuenda, ib.
 Immunitatis proxima causa efficiens Deus est, c. 9.
 Immunitas ut possit esse a jure divino pariter et humano, ib., et c. 13.
 Immunitatem imperatores christiani non constituerunt tantum, sed etiam ductu fidei recognoverunt, c. 9.
 Immunitatem quantum foverint jura civilia Christianorum, c. 12, 13 et 14.
 Immunitas quomodo videri possit data olim fuisse a principibus laicis, c. 11.
 Immunitatem nemo dare potest, ita ut immunem faciat exlegem, c. 3.
 Immunitatis perpetuitas tractatur, c. 30, 31 et 32.
 Immunitati perpetuitatem tribuit jus divinum, c. 10.
 Immunitatis perpetuae sola disparitas, mutatione necessaria, permissa fuit jure humano Summi Pontificis, l. 3, c. 30.
 Immunitas non revocabitur ab ipso Deo, l. 4, c. 10.
 Immunitas revocari non potest a Summo Pontifice, c. 30.
 Immunitas minui non potest ab ulla potestate civili, ib.
 Immunitatem renuntiare non potest ulla communitas, nec omnes simul ecclesiastici, neque Concilium generale completum cum Romano Pontifice approbante, c. 31.
 Immunitatem suam non potest Summus Pontifex renuntiare, aut imperatori, aut ulli quantælibet potestati, c. 7.
 Immunitatem renuntiandi facultas concedi alicui privato quomodo possit a Summo Pontifice, c. 12.
 Immunitas renuntiari non potest permissu episcopi, c. 31.
 Immunitatis renuntiatio firmata etiam jurejurando irrita est, ib.
 Immunitatis partem aliquam renuntiante sripuni, debent, quia vetantur sanctis canonibus; jubentur turpe hoc sui status decorum servare, ib.
 Immunitas nulla consuetudine amitti minuive potest, c. 32.
 Immunitate gaudent res quæ stricte appellantur sacrae, quia sunt instrumenta cultus divini, vel quia sunt prædictæ benedictione peculiari, c. 17.
 Immunitates propriæ Ecclesiarum prout sunt domus destinatæ ad tuendas res et personas ibi existentes breviter attinguntur, ib.
 Immunitas locorum in quo consistat, c. 1.
 Immunitatem habent Ecclesiae, ut de se male me- ritos et maleficios ad judicium trahant ecclesiasticum, c. 34.
 Immunitas causarum spiritualium an sit juris divini, c. 3.
 Immunitate majori praedita sunt bona ecclesiastica, quam bona propria personarum ecclesiasticarum, c. 16, 17, 20, et l. 5, c. 7.
 Immunitatem habent facultates ecclesiastice ex vi sue institutionis, ut in religiosis tantum operibus consummantur, l. 4, c. 1.
 Immunitatem habent res immobiles vel pretiosæ, ne alienentur, nisi modo præscripto a jure canonico, ib.
 Immunitates omnium bonorum Ecclesiae a quacumque jurisdictione civili tanguntur, c. 17.
 Immunitatem a tributis secularibus habent omnia bona ecclesiastica, tam mobilia quam immobilia, c. 18 et 21.
 Immunitatem a tributis habent bona ecclesiastica, quamvis vendantur vel transportentur, c. 19.
 Immunitatem a tributis habent bona ecclesiastica, quæ antequam ab Ecclesia compararentur, subjecta erant tributis ex vi regalis jurisdictionis, ib.
 Immunitate prædicta carent ea bona, quæ antequam fierent ecclesiastica, obnoxia erant privato oneri, vel sæculari tributo ex vi dominii pactive præcedentis, c. 23.
 Immunitatem utrum partcipet privilegium privatum datum peculiariter rei vel personæ ecclesiastice, quæstio est, c. 2.
 Immunitates, personarum ecclesiasticarum a quo jure proveniant c. 8.
 Immunitas hæc haberri potuit a jure divino et canonico, et civili, l. 3, c. 8.
 Immunitas hæc probabilius data fuit a jure divino, l. 4, c. 10.
 Immunitas hæc in rebus causisque temporalibus sancte habetur jam usque a prima Ecclesia, l. 3, c. 3.
 Immunitas hæc dari potuit a Romano Pontifice, l. 4, c. 11.
 Invitis principibus, etiam ethniciis, ib.
 Immunitas hæc per se non pendet a jure civili, c. 9.
 Immunitatis hujus et privilegii nobilium similitudo, l. 3, c. 3.
 Immunitas que dicitur privilegium canonis non explicantur in tomo quinto de Censuris, l. 4, c. 2 et 28.
 Immunitas privilegii canonis est pure humana, c. 28.
 Immunes sunt personæ ecclesiastice ab omni potestate legum civilium, et quomodo, c. 1.
 Immunes item sunt a censu, seu tributo, quod dicitur capitacionis, c. 22.
 Immunes item sunt a subeundis occupationibus, muneribusve, etiam non sordidis, quæ alii cives jubentur a legibus vel magistratibus, c. 20.
 Immunes item sunt, ut ne ullo modo priventur emolumentis, commoditatibus, ullis rebus aut actionibus communibus civium reliquorum, c. 21.
 Immunitas Christi a tributo Cæsaris, quoniam esset filius Dei, c. 5.
 Immunitas Summi Pontificis ex jure divino, tam naturali quam positivo, ostenditur, c. 10 et 27.
 Immunitas Apostolorum disputatur, c. 10.
 Immunitas Episcoporum est de jure divino, c. 10.
 Immunitas perfectæ ac plane communicatur eum personis omnibus ecclesiasticis cuiusque status, et gradus, quæ male de ipso non mercantur, de quibus nominatim disseritur, c. 28.

- Immunitate privantur clerici sacri etiam ordinis propter crimina quae exprimuntur, c. 27.
- Immunitate privantur clerici minoris ordinis, qui clericalem statum amittunt, præterita una qualibet trium conditionum, quas apponit Concilium Tridentinum, et explicantur, ib.
- Immunitate privantur clerici conjuges nisi multis conditionibus satisfaciant, ut quamdam partem immunitatis retineant, in causis videlicet criminalibus, c. 29.
- Immunitas personarum religiosi status absque ordine singulatim tractatur, ib.
- Immunitate an gaudeant laici ministri Ecclesie, vel famuli clericorum, vel Episcoporum familiares, ib.
- Immunitatem retinent hæc bona sub potestate clericie constituta, si ille non fieret eorum dominus, sed dispensator. Si vero persona est vere domina, jam ea bona non plus habent immunitatis, quam cætera vulgariter acquisita, in quibus etiam censentur mercedes acceptæ ob actiones spirituales, c. 23.
- Immunitia sunt cuncta bona etiam vulgaria personarum ecclesiasticarum a civilibus legibus, c. 1.
- Immunitia item sunt a tributis civilibus, sive realibus, sive mistis. Sed excipiuntur ea tributa, que jus canonicum quibusdam de causis solvere jubet, c. 24.
- Excipiuntur etiam bona in quibus prærant tributa imposita ex aliquo pacto privati domini. Minime vero excipiuntur bona onerata tributis regalibus, quæ exigebantur ex vi solius jurisdictionis, c. 23.
- Immunitas a tributo quod lusitane dicitur (fintas), et sepe a singulis exigi solet ad opera vulgo vel necessaria, vel utilissima, quanta sit in personis ecclesiasticis, tractatur, c. 26.
- Immunitas in omnibus causis sancte habetur jam usque a prima Ecclesia, c. 3.
- Immunitas in causis ecclesiasticis probatur, c. 2.
- Immunitas in causis civilibus probatur ex jure canonico, c. 14.
- Immunitas in causis realibus, hoc est fundatis in remere temporali, quin interveniat ipsa persona ecclesiastica defenditur, ib.
- Sed excipiuntur primo causæ feudorum quæ agi debent coram domino feudi, ib.
- Secundo, causæ bonorum regalium, ib.
- Tertio, bona civilia data personis, vel rebus ecclesiasticis, ea conditione ut foro civili semper subiectiantur, ib.
- Aliae remissive, ib.
- Immunitas praedita intelligitur, si personæ ecclesiastice reæ centur, ib.
- Sed ab ista declaratione fieri solent exceptions. Prima, si bona de quibus litigatur, sint Ecclesiæ, ib.
- Secunda refertur, si bona sint ipsius personæ immunitis, sed reprobatur, ib.
- Tertia, quando alicubi sit contraria consuetudo, nimirum ut reus secularis ad judicium veniat ecclesiasticum, ib.
- Quarta, si actor ecclesiasticus habeat legitimum privilegium reuni vocandi ad suum forum, ib.
- Qualia privilegia Summus Pontifex sæpe privatim concedit, ib.
- An vero possit generaliter, disputatio est, ib.
- Probaturque posse. Quinta, si laicus judex in culpa sit, propter quam judex ecclesiasticus possit item ad suum judicium traducere, ib.
- Immunitatem habet persona ecclesiastica, ut trahi non possit ad sæculare judicium, seu rea in illo constitui propter ullam quamvis maximam culpam judicis ecclesiastici, ib.
- Immunitas in causis criminum, tam ecclesiasticorum quam etiam secularium negari non potest, c. 15.
- Immunitas in causis criminum probatur ex jure canonico, et civili, ib.
- Immunitati criminum prædictæ quæ leges repugnare videntur, rejiciuntur vel explicantur, ib.
- Præsertim dictum Concilii Matiseconensis prima specie contrarium, ib.
- Immunitatem hanc habent omnia crima, præter excepta a Summo Pontifice in regnis quibusdam, ib.
- Immunitatem hanc habent omnes personæ ecclesiastice præter exceptas, vel a lege canonica, vel a justa sententia ecclesiastica, vel a delegatione, quam Summus Pontifex fecerit judici laico, ib.
- Vel a defensione legitima, ib.
- Vel a pacto et convento etiam legitimo, ib.
- Immunitas hæc etiam intelligitur, si persona ecclesiastica rea sit actor, nisi ratione sacrilegii, ib.
- Immunitatem hanc participant crima commissa ante ordinem sacrum susceptum, vel eo tempore quo persona ecclesiastica privata erat immunitate, quam postea recuperaverat, ib.
- Immunitas violari solet tum legibus, tum actionibus, ib.
- Immunitatis violatio utraque contingere potest, vel directe, hoc est, palam et aperte; vel indirecte, hoc est per præstigias et quasi ex insidiis, ib.
- Quæ indirecta obscuraque violatio, vera quoque et propria est judicanda, c. 16.
- Immunitatem, quæ leges vel canones videntur corrumpere, rejiciuntur vel explicantur, c. 14, 15, 16, 22 et 23.
- Immunitatem minus retinuisse principes aliquos, quomodo accipendum sit, c. 13.
- Immunitati resistens princeps catechumenus, baptizandus non esset, c. 41.
- Immunitatis violatores quantum scelus suscipiant, c. 33.
- Immunitatis violatores quibus poenit teneantur, remissive, ib.
- Immunitatem non violent tributa a Summo Pontifice imposta rebus ecclesiasticis, c. 18.
- Immunitas non præbet impunitatem personis immunitibus, c. 19.
- Immunitati ecclesiastice infesti sunt majori ex parte magistratus civiles, c. 22.
- Immunitatis sine culpa violandæ sex Catholicorum utuntur quæsis excusationibus minime ferme accipendis, c. 34.
- Immunitatis violandæ excusatio prima est ignorancia. Quæ si sit facti interdum admittitur, juris vero minime, ib.
- Quid vero si res sit dubia, ib.
- Immunitatis violatorum excusatio secunda, necessitas est quam inter Catholicos non posse obvenire ostenditur, ib.
- Immunitatis violatorum excusatio tertia est consuetudo, nullam vero immunitati contrariam, quantumvis longissimi seculorum intervalli prævalere posse ostenditur, ib.
- Sed ponderantur varii usus atque abusus plurium regnorum, ib.

- Immunitatis violatorum excusatio quarta, est concordia, seu pactum, ib.
- Sed oportet ut a Summo Pontifice approbatum legitime sit, et revocari ab eodem potest, quandocumque libuerit, ib.
- Immunitas minui non potest per Episcoporum pacta, nisi Pontifex ea confirmet, c. 11.
- Declarations adhibentur, ib.
- Immunitatis violatorum excusatio quinta est privilegium, quod a Summo Pontifice datum nec revocatur fuisse oportet, c. 34.
- Num vero sint aliqua privilegia, quae non revocentur per bullam Coenæ, quæstio est, ib.
- Immunitatis violatorum excusatio postrema est justa, et legitima sui vel rerum suarum defensio; quæ quidem verum jus germanamque justitiam continet, c. 34.
- Sed homines laici umbra fere et imagine hujus utuntur, ipsam justitiam vix tenent, ib.
- Imperatorum pietas atque subjectio erga Pontificem Romanum, l. 3, c. 21, et l. 5, c. 17.
- Imperator non est supremus totius Ecclesiæ princeps, etiam in temporali jurisdictione, l. 3, c. 5.
- Indirecta subjectio et gubernatio, c. 5, 30, et l. 4, c. 11.
- Indulgenter manant ab infinita copia reposita meritorum Christi, neconon etiam aliqua Sanctorum hominum, quam Christi Vicario dispensare licet, ex sua suprema potestate solvendi, l. 2, c. 15.
- Indulgentiarum et satisfactionum causa efficiens, materia et finis, ib.
- Indulgenter ab hinc annos quingentos solent Pontifices dare militibus ad bellum contra infideles proficiscentibus, l. 5, c. 21.
- Infideles non sunt subjecti Ecclesiæ, l. 3, c. 4.
- Internos actus Ecclesia non potest præcipere, c. 23.
- J**
- Jacobus natus matre catholica baptizatus est in Romana Catholica Ecclesia, l. 1, c. 24.
- Jacobum prava in infantia institutio atque doctrina averterunt a vera religione, ib.
- Jacobus se schismaticum esse non diffitetur, c. 21, et l. 3, c. 2.
- Jacobus haeretici notam fugere cupit, l. 4, c. 23 et 24.
- Jacobus vivam fidei regulam scipsum statuit, c. 3.
- Jacobus in sola quam suo arbitratu eligit Scriptura fundamentum fidei ponit, c. 9.
- Jacobus sibi arrogat certam intelligentiam sacræ Scripturæ, c. 10.
- Jacobus sacram Scripturam misilat, c. 16, et l. 5, c. 19.
- Jacobus Ecclesiæ traditiones abhorret, l. 1, c. 9.
- In quo non sibi constat, ib.
- Jacobus persecutionis ecclesiasticae auctor, l. 5, c. 10.
- Jacobi de Romano Pontifice futilis querimonie, c. 7.
- Jacobi assertio de novitate primatus romani pluribus antiquissimis et oculatis testibus refutatur, l. 3, c. 15.
- Jacobus nolens fabulam de Antichristo impugnat, l. 5, c. 19.
- Jacobus non videns Antichristi fautorem et asseclam, se ipsum constituit, c. 22.
- Jacobus redarguit de asserendo sibi ecclesiastica potestate, quam Petro et successoribus negat, l. 4, c. 6.
- Jacobus principatum Ecclesiæ Petro eripit, ut deinde Romano Pontifici detrahatur, ac tandem vacuum occupet, l. 3, c. 9.
- Jacobus fidei Catholicæ defensor non est, sed oppugnator, l. 1, c. 4 et 9, et fere per totum librum.
- Jacobi libellus multa continent, quæ clare pugnant cum suismet scriptis, ut de privato spiritu, c. 11. De catholicō cognomento, c. 12, et l. 2, c. 8 et 9. De testimonio veterum Martyrum, l. 1, c. 20.
- De sua ipsis Jacobi regis cum Ecclesia Catholicæ communione, c. 24.
- De principatu spirituali regum britannicorum, l. 3, c. 6.
- De veneratione Sanctorum Patrum antiquæ Ecclesiæ, c. 8.
- De auctoritate definiendi nova dogmata fidei, l. 5, c. 14.
- De Apocalypsis libro sibi reserato, ib.
- De Roma et Babylone, c. 15.
- Cum aliis multis fere per totum librum sextum, c. 99.
- Jesuitæ socii odio habentur a rege Jacobo, et aliis haereticis, ut observantes Romani Pontificis, l. 6, c. 11.
- Judæorum regum excellentiæ, l. 3, c. 24.
- Judæi ut gubernari possint a potestate civili christiana, c. 4.
- Judex ecclesiasticus sæcularem longe præcellit, l. 4, c. 14.
- Judicij extremi dies conjectari poterit; plane sciri non poterit, l. 5, c. 8.
- Judicium extremo tam uniuscujusque quam universalis omnium hominum accommodatur Christi parabola de decem virginibus, ib.
- Judicij extremi dies quam erit horribilis et pertinascenda, c. 14.
- Juramentum fidelitatis quid sit, l. 6, in proœmio.
- Juramentum fidelitatis civilis nihil involvere debet ecclesiasticum, ib.
- Juramentum non est necessarium ad obligandos subjectos, ut manifestent præditiones suorum principum, cum naturaliter sint obligati a fidelitate et charitate, c. 3.
- Juramento firmare et ad augere obligationem fidelitatis honestum est, ib.
- Juramentum fidelitatis fieri debet cum legitime postulatur a superiore, c. 1.
- Juramentum fidelitatis comprobatum fuit in multis Conciliis, c. 1.
- Juramentum fidelitatis licitum esse nemo Catholicus inficiatur, ib.
- Juramenti fidelitatis civilis honestas frustra monstratur a rege Jacobo, ib.
- Juramentum fidelitatis, de quo dubitetur an sit legitimum, doceri debet a Romano Pontifice, c. 7.
- Juramentum fidelitatis relaxare potest justa de causa Romanus Pontifex, c. 2.
- Juramentum fidelitatis ex se dissolvitur, cum regno is caret in ejus verba juratum fuerat, ib.
- Juramentum fidelitatis illicitum est, si deroget quicquam de jure alieno, ib.
- Juramentum fidelitatis civilis illicitum est, si contra christianam religionem vel clare aliquid proponat, vel etiam occultissime involvat, ib.
- Juramentum fidelitatis in regnis pacatis peti non solet singulatim ab omnibus, sed solum a primariis, l. 6, proœmium.

Juramentum fidelitatis antiquo in Hispania de more soli quidam optimates præstant, ib.
 Juramentum primarii ecclesiastici in Anglia catholica facere solebant Romano Pontifici, ib.
 Juramentum fidelitatis præstandæ sibi in rebus sacris, nulli regum christiani nominis in mentem venerat, c. 1.
 Juramentum sibi in rebus sacris primus ambire cœpit Henricus VIII, sed ipsum istius petitionis initio puduit, ib.
 Juramentorum quæ post miserandam Angliæ ruinam cœperunt extorqueri, nullum hactenus fuit verum jusjurandum fidelitatis, sed sacramenta quædam perfidiae, seu usurpationis primatus Romani per primatum Britannicum, c. 1.
 Juramentum istud extorquere cœpit Henricus VIII a viris primariis ecclesiasticis, ib.
 Juramentum idem Eduardo VI fieri solitum videtur ex eo quod dicit regina, ib.
 Juramentum jussum ab Elisabetha, ib.
 Juramenti Henriciani et Elisabethici forma aucta est a Jacobo, addito fidelitatis et obedientiæ jure jurando, ut ea specie fidelitatis omnes commoti venena bibant, quæ propinrantur, ib.
 Juramenti Jacobi forma prima et secunda, ib.
 Juramentum suum Jacobus contendit esse mere civile, c. 4.
 Juramentum Jacobi in quatuor partes dividitur, in quibus transilire longissime civiles terminos exquisite auctor demonstrat, c. 2.
 Juramentum Jacobi est expressus character Britanicae hæresis, c. 6.
 A malo spiritu, c. 2.
 Juramenti Jacobei latens venenum, judicio suo Romanus Pontifex docere debuit, l. 6, c. 7.
 Jurisdictio ecclesiastica est excellentior quam secularis, c. 40.
 Jurisdictio nulla est in jure nominandi, eligendi vel confirmandi, l. 3, c. 29.
 Jurisdictione caret privilegii datio, l. 4, c. 16.
 Juris vocabulum bifarium accipitur, c. 9.
 Jus divinum quod sit naturale, quod positivum, c. 5.
 Juris naturalis divisio in negativum et positivum; sive concedens, non vero præcipiens, l. 3, c. 2.
 Jus humanum duplex, civile et canonicum, l. 4, c. 9.
 Jus canonicum an recte divinum dicatur, ib.
 Jus canonicum derivatur a jure divino positivo, l. 3, c. 6.

L

Levitarum excellentia, l. 4, c. 9.
 Legis humanæ obligatio unde proveniat, l. 3, c. 2.
 Legum civilium et Pontificiarum materia, c. 22.
 Leges civiles ejusdem materiae cum Pontificiis directe irritari possunt a potestate ecclesiastica, ib.
 Leges civiles de rebus ecclesiasticis ipso jure sunt irritæ, ib.
 Leges civiles nullam vim habent in materia ecclesiastica, neque in bonis, vel ecclesiasticis, vel personarum ecclesiasticarum, c. 12.
 Leges Justinianæ de materia canonica non sunt verae leges, l. 4, c. 2.
 Leges civiles prospicientes communi secularium, et clericorum societati non obligant clericos, sed ipsi obligantur ex vi rationis et canonici juris, c. 16.
 Legum civilium potestas duplex, directiva et coac-

tiva: a quibus manant omnes effectus legitimi, ib.
 Legis quæ regia vocatur etymologia, l. 3, c. 2.
 Libertas hominis quanta sit, ib.
 Libertas ecclesiastica. Vide Immunitas ecclesiastica.

M

Marcellinus Papa, l. 3, c. 48.
 Mahometus non fuit proprius Antichristus, l. 4, c. 2, l. 5, c. 9 et 22.
 Mahometanum errorem fortasse tot gentes quot Christianam religionem obtinent, l. 1, c. 16.
 Maria Virgo coli debet hyperdulia, l. 2, c. 7.
 Mariae Virginis subsidium invocandum mortalibus, ib.
 Maria Virgo sine sollicitudine aut incommodo semper propitia est hominibus, ac pro eis intercedit, ib.
 Mariæ Virginis imaginum cultus catholicus, et decens præcipue Romæ, l. 5, c. 21.
 Maria, regina Angliæ, fidem catholicam instauravit, l. 1, c. 2.
 Martyrum sanguine facta est Ecclesia fœcundior, c. 19.
 Martyrum sanguine est vera fides illuminata, ib.
 Martyrium quali morte præstetur, c. 20.
 Martyr nullus erravit in ullo fidei decreto, c. 19.
 Martyrii laudem nullus hæreticus habere potest, c. 20.
 Martyr est qui occiditur propter honestum actum religionis, etiam si non esset sub præcepto, l. 6, c. 11.
 Martyr est cui religionis catholicæ causa immatura mors accelerat, l. 6, c. 11.
 Martyrii palmarum magna ex parte consequetur, qui usque ad mortem in tribulationibus et laboribus pro catholicæ fide constanter perseverat, ib.
 Matthias an immediate a Deo habuerit Apostolatum, l. 3, c. 2.
 Matrimonium conjugis infidelis quando possit dissolvi, c. 4.
 Miracula Ecclesiæ Catholicæ defenduntur a calumniis, l. 5, c. 19.
 Missa etiam secreta, sacrificium est publicum, l. 4, c. 6.
 Missa fieri non debet sine ministratore, ib.
 Sed hæc interdictio magis videtur ecclesiastica quam divina, ib.
 Missa privata dicitur tribus modis omnibus licitis, ib.
 Et confirmatis miraculorum atque exemplorum comprobacione, ib.
 Moralibus in rebus implicitum pro expresso habetur, quando idem efficitur, l. 6, c. 9.
 Moysis corpus propter quam rationem Deus occulaverit, l. 2, c. 12.

N

Neromem Antichristum fuisse, iterumque venturum quidam etiam Catholici falso putarunt, l. 5, c. 9.

P

Pœnæ ecclesiasticae, l. 3, c. 24.
 Papa, etc. Vide Pontifex.

- Paradisus terrestris, ut est verisimile, servatur hactenus, nec excindetur nisi cum ipsa hac rerum natura, l. 5, c. 13.
- Peccati culpam cum Deus remittit, poenam committerat non semper totam condonat, l. 2, c. 15.
- Peccata justorum levia seu venialia divinam gratiam non extingunt, ib.
- Pericula cavenda, l. 6, c. 3.
- Persecutio ecclesiastica est ea vexatio totius vel magnae partis Ecclesiae, quam præpotens dominatus molitur, ad evertendam vel minuendam veram religionem, c. 10.
- Persecutio ecclesiastica non dicitur ea tyrannis quæ nihil nocet religioni, ib.
- Persecutionis ecclesiasticae prima machina est labefactatio christiani cultus dirutis templis, imaginibus et sacris locis combustis, vel in profanos usus mutatis, ib.
- Persecutionis ecclesiasticae secunda machina est legum crudelium latio et executio in catholica opera, sive personas, ib.
- Persecutionis ecclesiasticae tertia machina est infidelis, et prava puerorum omnium educatio atque doctrina, ib.
- Persecutionis ecclesiasticae quarta machina sunt insidiosæ blanditiæ, sive favores ad vitæ commoda, ib.
- Persecutio ecclesiastica. Vide Angli Catholici.
- Personæ ecclesiasticae quæ sint, l. 4, c. 27.
Vide Immunitas.
- Petrus habuit a Christo Domino potestatem supremam spiritualem ad gubernandam Ecclesiam militarem, l. 3, c. 10.
- Petrus nominabatur Simon, sed Christus ei cognomen addit, ib.
- Petri excellentiæ, ib.
- Petri varia ex epitheta Sanctis Patribus, ib.
- Petrus ex mera Dei voluntate consecutus est principatum Ecclesiae, c. 11.
- Petro data est jurisdictionis ordinaria, universalis, et derivanda in suos posteros; secus vero aliis Apostolis, ib.
- Petri primatus durabit ad omne tempus Ecclesiae, per totum caput 14.
- Petrum discipuli sibi præpositum cognoscebant, l. 4, c. 5.
- Petro interveniente datum est aliis Apostolis munus Episcopale, l. 3, c. 12.
- Petrus a Christi ascensu sex circiter annos domicilium stabile non habuit, c. 13.
- Petri sedes Antiochena, ib.
- Petrus martyrium obiit Romæ, ubi collocavit suam certam sedem, ac domicilium principatus ecclesiastici, ib.
- Petri immunitas a tributo Cæsaris explicatur, l. 4, c. 5.
- Petri immunitas transmissa ad successores Romanos Pontifices, ib.
- Philippus imperatorum primus Christi fidem acceptit, l. 3, c. 29.
- Pii IV legatio ad Elisabetham bis fuit rejecta, l. 6, c. 10.
- Pilatus quam potestatem in Christum habuerit, l. 4, c. 7.
- Pontificem ut Deus immediate nunc creet atque creavit in lege veteri, l. 3, c. 2 et 3.
- Pontifex unus tantum esse potest, c. 13.
- Pontifices neque maximi neque minores interdicuntur temporali et politico principatu, c. 5.
- Pontifices Judæorum suis etiam regibus antecellebant, c. 26.
- Pontifex Christianus Judæum veterem longissime superat, c. 16, et l. 4, c. 6.
- Pontificem Christi Vicarium visibilem esse oportet, et habere certam sedem atque successionem, l. 3, c. 13.
- Pontifex Romanus Pastor est et universalis Ecclesiæ Catholicæ, et peculiaris Romanæ diocesis, l. 1, c. 3 et 12.
- Pontifex Romanus successor est Divi Petri Apostoli in stabilitate doctrinæ fidei, morumve generalium, c. 3 et 6.
- Pontifex Romanus successor est Petri in suo primatu supra totam Ecclesiam, l. 3, c. 13, usque ad finem libri.
- Pontifex Romanus solus Petri est successor, l. 3, c. 13.
- Pontificis Romani sedes non potest ab Ecclesia mutari aliorum, ib.
- Pontifices Romani suum hunc principatum quibus modis tuentur, c. 14, 17, et l. 5, c. 17.
- Pontificum Romanorum auctoritas quantum valeat in asserendo suo principatu, l. 3, c. 16.
- Pontificum Romanorum potentiae documenta antiquissima, c. 29.
- Pontifex Romanus non est monarcha temporalis totius Ecclesiae, c. 5.
- Pontium Romanorum temporale regnum comparatum fuit jure humano, l. 4, c. 4.
- Pontificum Romanorum majestatem non minuunt excellentiæ regalis dominationis, l. 3, c. 24.
- Neque acta regum Judæorum, c. 25.
- Neque dicta Conciliorum, aut patrum, c. 27.
- Neque acta imperatorum et regum, c. 29.
- Pontifex Romanus etsi non possit dispensare jus naturalre, potest ejusdem materiam mutare, c. 30.
- Pontifex Romanus poterat dare personis ecclesiasticis immunitatem, si non habuissent a jure divino, l. 4, c. 11.
- Pontifex Romanus causas ecclesiasticas subiecere laicis non potest, nisi delegata jurisdictione spirituali, c. 2.
- Pontifex Romanus dispensans humana matrimonii impedimenta non sovet libidines, malasve nuptias, l. 5, c. 21.
- Pontifex Romanus subjectos habet Christianos reges in rebus sacris, l. 3, c. 21.
- Pontificis Romani est universam potentiam regum Christianorum dirigere ad finem spiritualem, c. 22 usque ad finem l. 3.
- Pontifex Romanus justa de causa Christianitatis potest reges punire, regnaque etiam adiunere, l. 3, c. 23, et l. 6, c. 7.
- Pontifices Romani regna ademerunt, l. 3, c. 23, et l. 6, c. 4.
- Pontificis Romani auctoritas supra imperium Romanum, l. 3, c. 24.
- Pontificem Romanum summa pietate atque subjectione prosecuti sunt Catholicæ imperatores, c. 21, l. 5, c. 4 et 17.
- Pontificis Romani potentia in bella, et militiam Christianam, l. 3, c. 21.
- Pontificis Romani potentia in leges, et judicia Christianorum, ib.
- Pontificum Romanorum severitas in coercendis libidinibus regum christianorum, l. 5, c. 21.
- Pontificis Romani pedes osculandi consuetudo, l. 3, c. 14, et l. 5, c. 19.

- Pontifici Romano subjecti sunt infideles principes, l. 4, c. 6.
 Licit minus quam Christiani, l. 6, c. 6.
 Pontifices Romani non utebantur sua potestate aut immunitate sub imperatoribus ethnicis, l. 4, c. 6.
 Pontifex Romanus potest justa de causa Christianos eximere ab obedientia principis ethni, ib.
 Pontificis Romani maxima immunitas ex jure divino, tam naturali quam positivo, profecta monstratur, l. 4, c. 4, 5, 6, 7 et 8.
 Pontifex Romanus suam immunitatem non potest Ecclesiæ renuntiare, c. 7.
 Pontifex Romanus a nemine coerceri legitime potest, c. 6.
 Quamvis ipsi ita lubeat, c. 7.
 Pontifex Romanus an se possit subjicere judicio humano, ib.
 Pontifex Romanus quomodo subjectus sit suo confessori, ib.
 Pontifex Romanus potest statucre arbitrum suarum rerum, ib.
 Itaque aliquando statuerunt Pontifices, ib.
 Pontifex Romanus ut fraterne corrigi possit, c. 6.
 Pontificis Romani electio, l. 3, c. 13, 22, et l. 4, c. 6.
 Pontificum Romanorum licentiam multa reprimunt, c. 6.
 Pontificum Romanorum multi bene functi sunt suo maximo munere, l. 3, c. 20, l. 5, c. 17 et 28.
 Pontificum Romanorum integritas atque innocentia, et miracula edita, l. 5, c. 17 et 19.
 Pontifex Romanus privatum haereticus ut privetur summo Pontificatu, l. 4, c. 6 et 7.
 Pontifex Romanus ut sit verisimile, calamitosissimo Antichristi tempore privatam quoque fidei servabit constantiam, l. 5, c. 21.
 Pontificis Romani depulsio a Summo Pontificatu ut fieri possit, l. 4, c. 6.
 Pontifex Romanus renuntiare potest Ecclesiæ suum Pontificatum, ib.
 Pontificis Romani despectio seminarium est haersum, l. 3, c. 41.
 Pontificis Romani quæ a fidei hostibus fit comparatio impudentissima cum Antichristo, refutatur toto libro quinto, summatisque, l. 5, c. 22.
 Potestas suprema quæ sit, l. 3, c. 5.
 Potestas suprema gubernandæ communitatis ipsimet soli et toti communitatibus a Deo tribuitur immediate, non peculiari dono, sed consequentia naturali, c. 2 et 4.
 Potestatem aliquam quibus modis Deus immediate concedat, c. 2.
 Potestatis civilis auctoritas et honestas, c. 1.
 Potestatis civilis necessitas maxima, ib.
 Potestas civilis suprema dividitur in democraticam, aristocraticam et monarchicam, c. 2.
 Potestatis civilis haec tria genera sepe inter se commisceantur, ib.
 Potestatem civilem negavit quidam Galileus, sectatores habuit sui erroris, c. 4 et 4.
 Potestas legitima magistratum, tam christianorum quam ethnicorum, Christianos, et justos etiam continet, c. 4.
 Potestas mere civilis, vel in uno est hominum, vel in uno concilio sociato ad gubernandam cæteram communitatem, c. 1.
 Potestas civilis a Deo instituta confertur bisarium ab hominibus, c. 4.
 Potestas regalis multis modis dicitur a Deo dari, c. 3.
 Potestas regalis non est immediate a Deo, c. 2.
 Potestas regalis non ex divina institutione positiva, sed solum ex ratione naturali dicit originem: ab hominibus vero libere atque immediate data est, ib.
 Potestas regalis quanta sit, ib.
 Potestas regalis comparatur diversis modis, l. 3, c. 2 et 5.
 Potestatis regalis diversi gradus, c. 2.
 Potestate regali Christiani non prohibentur, c. 4.
 Potestas aristocratica non est immediate a Deo, c. 2.
 Potestas popularis seu democratica naturalior est cæteris, ib.
 Potestas popularis imperfectior est cæteris ad finem politicum, ib.
 Potestas civilis duplex, urbana seu moralis, executiva seu militaris, c. 22.
 Potestatem civilem desperdi quovis peccato mortali: posseque magistratus ita peccantes corripi a quolibet subdito commentum fuit haereticorum, l. 3, c. 5.
 Potestas civilis subjecta est Ecclesiasticae, l. 3, c. 7.
 Potestas Ecclesiastica nulla fuit in lege naturæ, c. 6
 Potestatis Ecclesiasticae differentia a temporali, ib., et c. 30.
 Potestas Ecclesiastica temporalem multis modis excellit, c. 21.
 Potestas Ecclesiastica indirecta vim directivam temporalium rerum includit, c. 22.
 Potestas jurisdictionis interni fori quæ sit, c. 6.
 Potestas ordinis quas vires habeat, ib.
 Potestatis ordinis discrimina, ib.
 Potestas Ordinis apud haereticos Angliæ, confertur a rege vel magistratu, per solam ministri designationem, c. 8.
 Potestas Ecclesiastica jurisdictionis externæ, c. 6.
 Potestatem Ecclesiasticam fori externi negant haeretici, præcipue Angli, ib.
 Potestas Ecclesiastica fori externi probatur, ib.
 Potestas ligandi coercivam includit, c. 23.
 Potestas Ecclesiastica num poenam capitatis possit inferre, l. 4, c. 3.
 Potestas Ecclesiastica data a Summo Pontifice ad se coereendum invalida est, c. 7.
 Praescriptio non potest fieri eorum quæ sunt de ratione intrinseca potestatis supremæ, c. 3.
 Praesentia Dei præsidium significat, l. 4, c. 4.
 Principatus. Vide Potestas.
 Privatus spiritus, quem sibi fere haeretici arrogant, late refellitur, c. 9, 10 et 11.
 Privilégii cuiusque ratio generica, et specifica, l. 4, c. 14.
 Privilégium datum semper justa de causa revocari potest, ib.
 Privilégium fori. Vide Immunitas.
 Prophetæ quantumvis obscuræ, postquam deprehenduntur eventis, manifestæ redduntur, l. 5, c. 19.
 Prophetæ priusquam impleantur, licet quoad circumstantias et ænigmata sint obscuræ, quoad rem proprie prædictam sæpe sunt manifestæ, c. 13.
 Providentiae humanae est connivere in multis in rebus, l. 4, c. 6.
 Purgatorium convincitur ex quibusdam fidei propositionibus, l. 2, c. 5.
 Purgatorium asseritur ab antiquissimis Ecclesiæ Partibus, ib.

Purgatorium demonstratur ex nova et veteri divina Scriptura, ib.
Purgatorium evanescet a die judicii extremi, ib.
Puritanorum Angliae haeresis, l. 3, c. 8.

R

Redemptio Christi abundat et effluit in salvandis hominibus; sed non omnes salvantur, l. 2, c. 5.
Regnum fit e tyrannide cum populo est libitum, vel juste prescribitur a successoribus, c. 2.
Regna orbis clarissima majori ex parte contra fas occupata fuere, ib.
Regna orbis praecipua, quae monarchica dicuntur, figuravit Daniel quatuor bestiis, l. 5, c. 22.
Regum. Vide Potestas civilis.
Reliquiae justam habent venerationem, l. 2, c. 10.
Reliquiarum veneratione est religiosissima, ib.
Reliquiarum veneratione Deo est admodum accepta, ib.
Reliquiarum veneratione comprobatur miraculis, ib.
Reliquiae malos daemones fugant, ib.
Reliquiae de more antiquo et sancto in locis publicis exponuntur, ib.
Reliquias inter censemur multa praeter particulas Sanctorum, ib.
Regum excellentiae, l. 3, c. 24.
Regibus jure gentium obedientia debita est, c. 5.
Regum muneri nulla data est potestas spiritualis, c. 7.
Regum potestas subjecta est spirituali, a capite 22, usque ad finem l. 3.
Reges Christiani potestate civili suprema sunt praediti, l. 3, c. 5.
Regum potestas nihil minuitur ex fidei Catholicae professione, imo amplificatur, c. 30.
Regum vitam tenentur subjecti defendere, conjurations et crimina laesae majestatis, optimo quo possint modo, aperiendo, l. 6, c. 3.
Regem creare infidelem Christianis non licet, l. 3 c. 4.
Rege per sententiam declarato haeretico, liberantur subjecti a sacramento fidelitatis, l. 5, c. 14.
Reges tolli a populo possunt quibus de causis, l. 3, c. 2.
Regis est libertatem dicendi permittere, l. 1, in proœmio.
Rex. Vide Potestas civilis, et Excommunicatio.
Roffensis juramentum et poenitentia, l. 6, c. 4.
Roffensis martyrum, c. 12.
Roma non habuit septem formas regiminis a Jacobo inventas, l. 5, c. 4.
Rome dicitur inveniri sanguis eorum Martyrum, qui usque ad Joannem Evangelistam a magistris Romani imperii occisi sunt, c. 16.
Roma fortasse iterum sub Antichristo vulgo ethnica erit, c. 21.
Romæ expugnatio per Alaricum, Gotthorum regem, c. 6.
Per Gensericum, regem Vandalorum, ib.
Per Odoacrem, regem Erulorum, ib.
Bina per Totilam, Gotthorum regem, ib.
Romæ eversio, atque excidium ultimum ante diem judicii extremi, c. 7.
Roma an sit evertenda penitus ab Antichristo, c. 7, 15 et 20.

Roma ethnica dicitur Babylon in Scriptura, l. 3, c. 13, et l. 5, c. 7.
Romæ superbia, l. 5, c. 21.
Romana Ecclesia. Vide Ecclesia Romana.
Romanus Episcopus. Vide Pontifex Romanus.

S

Sacerdotum dignitas et immunitas, l. 4, c. 10.
Sacerdotum dignitas in lege naturæ, l. 3, c. 9.
Sacerdotum cognomina honorifica, c. 24.
Sacerdotes dicuntur Angeli in S. Scriptura, ib.
Sacerdotis est libere dicere, l. 1, in proœmio.
Sanctorum veneratio debita est, l. 2, c. 8.
Sanctorum veneratio sacra est, imo et conjunctissima cum divina, ib.
Sanctorum canonizatio, hoc est, consecratio et conscriptio in Divorum numero, quantæ auctoritatis sit, ib.
Sancti prospiciunt, et consulunt rebus humanis sine detimento sua beatitudinis, c. 7 et 9.
Sanctos implorandi mos post Christi discessum est vetustissimus, c. 9 et 10.
Sanctos implorandi consuetudo est Deo gratissima, c. 9.
Sanctos implorandi consuetudo necessaria est quodammodo; certe est utilissima, ib.
Sanderi merita de Ecclesia Universalis et Anglicana, l. 6, c. 42.
Sauli an Deus, an vero populus immediate contulerit regiam potestatem, l. 3, c. 3.
Schismatis significatio et genera, l. 1, c. 21.
Schismatis turpitudine, ib.
Schismatis cum haeresi conjunctio, l. 2, c. 4.
Scriptura divina duos patitur sensus simul primarios, unum historicum seu litteralem, alterum vero spiritualem, l. 5, c. 14.
Scriptura divina praesenti verborum modo interdum utitur pro futuro, c. 10.
Scriptura divina propositione interdum utitur universalis pro indefinita, c. 26.
Scripturæ divinae arithmeticæ, seu numerandi ratio, c. 5 et 8.
Scripturam divinam decenter admodum tractant Catholicæ, c. 44.
Haeretici vero quam indecora, ib.
Scripturæ divinae interpretatio est difficillima, l. 1, c. 10.
Scripturæ divinae interpretatio una est privata, altera authentica, c. 11.
Scripturæ divinae certa interpretatio solum est ab Ecclesia Catholica, ib.
Scripturæ divinae interpretatio metaphorica fugienda est, ubi propria potest bene constare, l. 3, c. 30; l. 5, c. 8 et 11.
Secretum confessionis sacramentalis quatenus supremendum sit, l. 6, c. 3.
Serpentem eaneum venerari an aliquando Judæis licuerit, l. 2, c. 12.
Servus initiatus sacris ordinibus, ut liberetur a servitute, l. 4, c. 41.
Spiritus Sanctus non potest dici proprie Christi Vicarius, l. 3, c. 6.
Spiritus Sanctus ut Christi Domini vices gerat, ib.
Spiritus Sancti assistentia non omnibus Catholicis singulatim promissa, l. 1, c. 41.

- Spiritus Sancti assistentia quibusdam Catholicis singulariter data, ib.
- Stylus Catholicorum in Theologia, quam vocant scholasticam, veritatis est optimus indagator, in procœmio.
- Suffragia seu satisfactiones nituntur articulo communionis Sanctorum, l. 2, c. 15.
- Synagoga universa fidem non perdidit Judæis virtutum adorantibus, l. 1, c. 5.

T

- Traditiones divinæ etiam non scriptæ ingrediuntur fidei Catholice fundamentum, l. 1, c. 9.
- Traditionum divina auctoritas probatur ex sacra Scriptura, ib.
- Traditionum auctoritas rationibus et conjecturis asserviatur, ib.
- Traditionum auctoritas confirmatur Patrum auctoritate, ib.
- Traditionum auctoritas exemplis defenditur, ib.
- Tribus Israel ut dicantur duodecim, cum tredecim fuerint, l. 4, c. 9.
- Tributorum genera duo, c. 18.
- Tyrannus duplex unus in titulo, alter in sola administratione, l. 6, c. 4.
- Tyrannum in titulo cuiilibet occidere licet, et quando, ac quomodo, ib.
- Tyrannus in usu est, qui subditos a vera religione discedere compellit, ib.
- Tyrannum vim actu inferentem, quando occidere licet, etiam si sit verus dominus, ib.
- Tyrannus in administratione, statim ac incidit in hæresim, quodammodo suo privatur dominio, quod vel confiscatur, vel transmititur ad successorem Catholicum, sed non ejicitur, nisi lata sententia, ib.
- Tyrannum privare per sententiam potest ipsa Res publica vel Romanus Pontifex, ib.
- Tyrannum in administratione post sententiam in illum legitime datum, qui possit occidere, ib.
- Tyrannus post latam privationem sententiam, vel declaratoriam ejus criminis, quod a jure muletatur privatione, potest ex vi regno a sententiae latore, vel ejus ministro, qui tyrannum interficiat, si opus sit, vel si justa sententia hanc poenam imponeret, ib.
- Tyrannus depositus per sententiam, non potest necari a quolibet homine, imo nec vi expelli, nisi jus, vel sententia det generalem quamdam facultatem. Quod si nulli mandetur executio sententiae, transibit regnum ad successorem, vel ad ipsam rem publicam, l. 6, c. 4.


U

- Uncti in Scriptura qui nominentur, l. 3, c. 24, et l. 5, c. 1.

V

- Vicarius quis dicatur, l. 1, c. 8.
- Vicarius Christi. Vide Pontifex.
- Virgo Deipara. Vide Maria.





EDS/WESTON JESUIT LIBRARY
BX890 .S8 1856 v.24
Suarez, Francisco/R. p. Francisci Suarez



3 0135 00077 0907

V

